

Tĩrtũm kapẽr ã kagà nyw

Apinayé New Testament

This Bible is copyrighted by Wycliffe Bible Translators (Wycliffe.org) and is printed with permission by the Digital Bible Society (dbs.org) for non-commercial use.

This Bible is available for free download in a variety of digital formats at dbs.org/bibles.

Matêwre	4
Makre	62
Rukre	96
Juãw	157
Atre	200
Rõmãn	251
Wam Korĩt	281
Sikũn Korĩt	307
Karatas	324
Epes	335
Piripos	345
Korosẽ	351
Wam Tesarõn	358
Sikũn Tesarõn	364
Wam Ximotre	367
Sikũn Ximotre	375
Xitre	381
Piremõ	385
Eprêw	387
Xiakre	407
Wam Pêtre	414
Sikũn Pêtre	422
Wam Juãw	427
Sikũn Juãw	433
Hapuhã Juãw	434
Jutre	435
Apokarip	438

Matêwre

Matêwre na pre kagàja nhîpêx. Kêp Jejus nhÿ hã hkrajê jahkre xwÿnh na pre. Nê kêp Ijaew. Hixi hõ pê na Rewi. Tã na pre mẽ pamã kagàja nhîpêx nê kamã Jejus kot pika hwÿr wrÿk nê kator nê tanhmã ri amnhÿ nhîpêx to ho pa hã harê nê hã kagà. Nê kêp mẽ panhõ pahihiti mex o mex ã harê nê hã kagà. Æ na pre Matêwre mẽ pamã Jejus jarê nê hã kagà anê.

Apraãw kanrêhã hkra nê htãmnhwÿjê nhÿxi

Rukre 3.23-38

- 1 Amnepêm Jejus Kris kormã pika hwÿr wrÿk kêt ri hkukamã higêtjê nhÿxi na jajaja.
Wÿj ri higêtjê hõ nhÿxi na pre kêp Tawi.
Nê Tawi xwÿj ri higêt nhÿxi pê na pre Apraãw.
- 2 Nê Apraãw kra na pre kêp Ijak.
Nê Ijak kra na pre kêp Jako.
Nê Jako hkra na pre kêp Juta mẽ htõjaja.
- 3 Nê Juta hkra na pre wa kêp Pere nê Jera.
Nê Pere mẽ Jera wa katorxà na pre kêp Tama.
Nê Pere hkra na pre kêp Erõ.
Nê Erõ hkra na pre kêp Ari.
- 4 Nê Ari hkra na pre kêp Amĩnatap.
Nê Amĩnatap kra na pre kêp Nasõ.
Nê Nasõ hkra na pre kêp Samõ.
- 5 Nê Samõ hkra na pre kêp Poas.
Nê Poas katorxà na pre kêp Raap.
Nê Poas kra na pre kêp Opex.
Nê Opex katorxà na pre kêp Rutre.
Nê Opex kra na pre kêp Jese.
- 6 Nê Jese hkra na pre kêp Pahihti Tawija.
Nê Tawi hkra na pre kêp Sarumãw.
Sarumãw katorxàja Uristi hprõ na pre. Tã nhÿm pre Uristi ty nhÿm Tawija hãmri mÿrpê Uristi hprõ ho hprõ nê kamã hkra. Nhÿm wa hkraja kêp Sarumãw.
- 7 Nê Sarumãw kra na pre kêp Ropã.
Nê Ropã hkra na pre kêp Apiasti.
Nê Apiasti kra na pre kêp Asti.
- 8 Nê Asti hkra na pre kêp Josapa.
Nê Josapa hkra na pre kêp Jorã.
Nê Jorã hkra na pre kêp Ojis.
- 9 Nê Ojis kra na pre kêp Jotã.
Nê Jotã hkra na pre kêp Akaj.
Nê Akaj kra na pre kêp Ejekis.
- 10 Nê Ejekis kra na pre kêp Manase.
Nê Manase hkra na pre kêp Amõ.
Nê Amõ hkra na pre kêp Josis.
- 11 Nê Josis kra na pre kêp Jekonÿs mẽ htõjaja.
Kormã mẽ htÿr ri na pre Papirõn nhõ xwÿnhjaja kot mẽ hkurê kaxàr kaxyw mẽ hwÿr hprõt nê mẽ unê.
Ijaew piitã unênh pa nê ma akupÿm mẽ õ pyka hwÿr mẽ ho hapêx nhÿm mẽ hpãnhã Papirõn kamã

pa ho pa. Jakamã nhÿm Josis mẽ hkra Jekonÿs mẽ htõjaja mẽ hipêxà pyrã nê Papirõn kamã pa ho pa. Nê Jekonÿs kra na pre kêp Saraxi.
Nê Saraxi hkra na pre kêp Joropape.
13 Nê Joropape hkra na pre kêp Apiux.
Nê Apiux kra na pre kêp Eriakÿ.
Nê Eriakÿ hkra na pre kêp Ajo.
14 Nê Ajo hkra na pre kêp Satok.
Nê Satok kra na pre kêp Akÿ.
Nê Akÿ hkra na pre kêp Eriux.
15 Nê Eriux kra na pre kêp Eresa.
Nê Eresa hkra na pre kêp Matã.
Nê Matã hkra na pre kêp Jako.
16 Nê Jako hkra na pre kêp Juje.
Nê Juje hprõ na pre kêp Marir.
Nê Marir Kra na pre kêp Jejus.
Mê kot kãm: "Tÿrtÿm kot mẽ pakaxyw ãm xwÿnh" anhÿr xwÿnhnta na pre.
17 Nhÿm Apraãw kanrêhã axte axpên kanrêhã mẽ àptàr nywjaja Tawija wÿr kêp 14. Nê Tawi nhÿrõ pê Papirõn hwÿr mẽ hapêx kêt ri axpên kanrêhã mẽ àptàr nywjaja mããnhên kêp 14. Nê ra Papirõn kamã mẽ pa nhÿrõ pê axpên kanrêhã Jejus pê Tÿrtÿm kot mẽ pakaxyw ãm xwÿnhnta wÿr mããnhên kêp 14. Æ na pre Jejus Kris xwÿj ri higêtjê nhÿxi anê.

Jejus Kris kator

Rukre 1.26-38, 2.1-7

18 Tã ã mẽ hixi jarênh kot anhÿr kanrêhã na pre ã Jejus Kris kator anê. Nhÿm pre kormã Jujeja Marir o hprõ kaxyw. Nom kormã ho hprõ hkêt ri nhÿm htujarõ. Kormã hkukrit tã nhÿm Tÿrtÿm Karõ tanhmã ho nhÿm htujarõ. 19 Hãmri nhÿm Jujeja harênh ma nê tee ri hamaxpêr nê htÿx nhãm mēhõ kot kêp htu hã hkamn-hÿx. Juje kot tãm amnhÿ nhîpêx nê tãm hamaxpêr jakamã tee ri kot ho hprõ hkukamã hamaxpêr. Nê hamaxpêr o:
—Nà pa mãn ixte hturê hã. Nhãm mēhõ ra kot ã hipêx anhÿr kênã. Nà kot paj ho ixprõ hkêt nê. Nom kot paj ixkwÿjê mã ã kot amnhÿ nhîpêx anhÿr o amnhÿrit kêt nê. Kot paj anê nhÿm mẽ kuma nê ho kapêr punuj nhÿm amnhÿ kamã hpijaam tÿx nê. Ja pymaj kot paj ixkatat kôt hkaga kurê kumrêx. Nom ixkwÿjê hkàx ã hkaga. Anê.

²⁰ Nê ã hamaxpêr anhÿrja o ra gôr nê nõ. Nhÿm Tirtÿm kapêr o mē wryk xwÿnhjê hõ hwÿr wry nê hwÿr axàn kuri xa. Hãmri nê kãm:

—Pa Juje? E ot pa awÿr tē. Kwa tee ri Marir o aprõ hkukamã ajamaxpêr punuj kêt nê. Mãmri ho aprõ. Mēhõ kot apê tanhmã ho hkêt. Tirtÿm Karõ na pre ã hipêx anê. Jakamã kwa tee ri ajamaxpêr kêt nê mãmri ho aprõ nê war apa. ²¹ Koja hkrare kato nê myre nê hprêk. Hãmri nê mē kot hkõt amnhÿ xunhwÿr xwÿnhjaja mē kot amnhÿ tomnuj piitã pē mē utâr pa. Jakamã koja kato ka wa hã hixi mē nhÿm kēp Jejus. Anê.

Nhÿm pre ã Tirtÿm kapêr o mē wryk xwÿnhja kãm kapêr anê. Ijaew kapêr kãm Jejus jarēnhja te kēp “Tirtÿm kēp mē papytâr xwÿnh” anhÿr pyrãk. Jakamã nhÿm Tirtÿm kapêr o mē wryk xwÿnhja juje õt kãm ã kãm Marir jarēnh anê. ²² Nom kormã ã kãm kapêr anhÿr xwÿj ri na pre ra Tirtÿm nhÿ hã kapêr xwÿnhjê hõja kukamã tanhmã harēnh to nê hã kagã. Nê hã kagã ho:

E mē inhma nê inhmar tÿx nê ho apa. Koja nhÿrmã pyka já kamã mēhõ kormã hkukrit tã htujarõ. Nê hkra kato nê myre. Nhÿm mē omu nê hã hixi mē nhÿm kēp Emanuew. Anê.

Ijaew kapêr kãm “Emanuew” jarēnhja te kēp “Ota ra Tirtÿm mē pahkõt pa ho pa” anhÿr jarēnhja pyrãk. Jakamã nhÿm pre Tirtÿm nhÿ hã kapêr xwÿnhja Jejus kukamã ã harēnh anê nê hã kagã.

²⁴ Jakamã nhÿm Tirtÿm kapêr o mē wryk xwÿnhja juje mã kapêr par mē nhÿm hkrãkato. Hãmri nê kot kãm ujarēnh xá hkõt Marir o hprõ. ²⁵ Nom kormã tanhmã ho hkêt nê ri o pa rãhã nhÿm hkrareja kato. Hãmri nhÿm wa hã hixi mē nhÿm kēp Jejus nê mãänēn kēp Emanuew.

Kanhêti ho studa xwÿnhjê jarēnh

2 Nhÿm pre Jejus Perēj kamã kato. Pika pē Jutej kamã. Pahi Erox kormã kot Jutej nhõ xwÿnhjê ho amnhÿptâr o pa ri nhÿm õ pika kamã kato. Hãmri nhÿm Tirtÿmja kaxkwa kamã Kra kator jarēnh xã hã kanhêti raxta õ nhõ nhÿm pika hõ kamã kanhêti ho studa xwÿnhjaja omu. Kanhêtiya pumu nê hkÿnh nê axpēn mã:

—Kwa ga mē kanhêti raxti mÿj pumu. Mãn ra Ijaew nhõ pahi nywta kato nhÿm kanhêti mÿj kēp ho amnhÿrit xã hã ajêt. Kwa pu mē ma hapêr o mō nê nhÿri tokyx omu nã.

Anê hãmri nê amnhÿ to pikuprõnh pa nê ma hapêr o pa. Ma myt gjêx xã hwÿr hapêr o pa hã apkati xohtõ nê. Hãmri nê ra Ijaew nhõ pika hwÿr pøj nê krÿ pē Jerujarē hwÿr hapêr o mō. Pahi Erox nhõ krÿja wÿr nhÿm mē hapêr o mō hãmri nê kamã pøj nê mē hkrare nywta ã krÿ nhõ xwÿnhjê kukjêr o mō ² nê mē kãm:

—Pa? Ot pa mē apê Ijaew nhõ pahi nywreta pumunh kaxyw mō. Ham kator xwÿnhja. Mē inhõ pika kamã na pa prem kaxkwa hkrax rÿm kot ho amnhÿrit xã hã kanhêti raxta pumu. Hãmri nê nhÿri pahi nywre pumunh nê kutã mē ixkõn krã ho ixtēm nê ixkrÿ nê kãm mex o mex ã harēnh kaxyw nêtãnh mē inhõ krÿ rÿm hapêr o

mō. Kwa mē inhmã harē. Nhÿri na? Na pa mē inhmã omunh prãm tÿx kumrêx.

Anhÿr o hã mē hkukjêr o mör jakamã nhÿm mē piitã pahi nywja jarēnh ma nê axpēn mã harēnh o hprõt. ³ Nhÿm pahi Eroxja harēnh ma nê tee ri amnhÿ kukamã hamaxpêr. Pahi nyw kot mē ho amnhÿptâr ã hkamnhÿx nhÿm já kēp omnuj tÿx nê. Nhÿm krÿ nhõ xwÿnhjaja ã hamaxpêr anhÿr ã omu nê tee ri amnhÿ kukamã hamaxpêr o ra kãm ma nê. ⁴ Hãmri nhÿm pahi Eroxja amnhÿ wÿr hkwyjê hã karõ. Mē õ patre krãhtÿmjaja nê Tirtÿm kapêr tÿm o mē ahkre ho mē pa xwÿnhjaja nhÿm amnhÿ wÿr mē hã karõ nê Tirtÿm kot nhÿrmã mē hwÿr mēnh mã xwÿnhja ã mē hkukjêr kaxyw. Nê mē kãm:

—E Tirtÿm kot nhÿrmã mē pahwÿr mēnh mã xwÿnhja ã na pa mē akukjêr kaxyw mē ato akuprõ. Kwa mē atõ inhmã harē. Koja nhÿrmã kator kaxyw nê nhÿri koja we kato? Xã jar mē panhõ krÿ kamã nã? Xã nhÿri krÿ hõ kamã? Anê.

⁵ Hãmri nhÿm mē kuma nê kãm:

—Nã mē panhõ pika pē Jutej kamã koja xep kato. Krÿ pē Perēj kamãã. Na pre Tirtÿm nhÿ hã kapêr o mē pa xwÿnhja ra hkukamã mē panhÿgêjtjê mã tanhmã harēnh to nê hã kagã. Nê hã kagã ho:

⁶ Pa Perēj nhõ xwÿnhjaja? E mē anhõ krÿ grire htã kamã koja nhÿrmã mē panhõ Pahi Maatiya kato. Koja mē pahpê Ijaewjê piitã mē pahto amnhÿptâr mex o pa. Jakamã mē anhõ krÿ grire htã koja Ijaew piitã axpēn mã mex ã harēnh o pa.

Ã na pre Tirtÿm kot mē pahwÿr mēnh mã xwÿnhja kukamã mē kãm harē nê hã kagã anê. Anê.

⁷ Hãmri nhÿm pahi Erox tee ri ã harēnh anhÿrja ma hãmri nê amnhÿ wÿr mē kot hã àhkukjêr o mör xwÿnhjê hã karõ. Nom nhÿri Ijaew kãx ã. Hãmri nhÿm mē ma hwÿr mra nê agjê nhÿm mē omu nê pahi nywta ã mē hkukja nê mē kãm:

—E mē aprÿ hã inhmã pahi kator nywta jarē. Tanhmã na pre ra mē ate kanhêti pumunh ã mytwÿr kute? Xã ham na ka prem omu nã amnepê mã? E mē aprÿ hã tanhmã inhmã harēnh to. Anê.

Hãmri nhÿm mē ihõja kãm:

—Nã na ra hã amgrã axkrut kaxyw. Na pa prem omu hãmri nê inhnojarêt nê man ixpa ho ixpa ry rax nê mē awÿr pøj. Anê.

⁸ Nhÿm mē kuma nê mē kãm:

—Tÿ. Nom jar amrakati. Perēj kamã na xep kato. E mē mãmri ma hwÿr mō nê kamã hapêr. Hãmri nê nhÿri omu nê akupÿn ixwÿr mō nê inhmã harē. Pa ijaxwÿja ma hwÿr mō nê omu nê mē apyrã nê kãm mex o mex ã harē. Ijaxwÿja inhmã omunh prãm tÿx kumrêx. Anê.

Nom hêx rom ã ri mē kãm kapêr anê. Kot nhÿri harēnh mar nê hã àmnēnh nhÿm mē kot hpÿr kaxyw nhÿm hêx rom ã kãm omunh prãm tÿx ã amnhÿ jarēnh anê. ⁹ Jakamã nhÿm mē kuma hãmri nê kato nê ma Perēj wÿr mör kurê kumrêx. Hãmri nê kormã mē õ pika kamã mē pa ri kanhêti ho studa xwÿnhja nhÿm mē axte amnhÿ kukamã omu nê hkÿnh nê. Nhÿm ma Perēj

wÿr mē hkukamā mō nhūm mē omunh pê ma hkôt pa rāhā hwÿr pōj. Nhūm kanhētija pahi nywre nhōrkwy mÿri ajēt. ¹¹ Jakamā nhūm mē ma hkôt mra nē ixkreja wÿr pōj nē kapem xa. Hāmri nē mē kām kapēr nē mē hwÿr agjē nē Jejus mē katorxāja wa omu. Hāmri nē Jejus kutā hkōn krā ho hkrī hpa nē kām kapēr nē kām:

—Pa Xugitre. Hēxta waa nē. Nà amex o amex. Kot kaj nhÿrmā axaptār hāmri nē apē mē inhō Pahi Maati. Nà am hāmri na pa mē apumu nē ixkīnh nē. Anē.

Hāmri nē ahpÿnhā kām hkīnh xā gō. Kām ōr kwÿ gō nē kām mēhkuxwa xā hkwy gō nē kām te kot rāmre kuxware pyrāk pê mīraja nhūm mē kām hkwy gō. Mē hkīnh xā hā kàxpore xohtō nhūm prem kām ōr pa.

¹² Hāmri nē ra akupÿm Jerujarē kamā pahi Erox wÿr nojarēt. Nhūm kamāt nhūm mē gōr nē hikwÿ hāmri nē ra amÿti. Nhūm Tirtūm mē hpimtir kām mē kām kapēr nē mē kām:

—Pa? E mē inhma. Kêr ka mē akupÿm pahi Erox wÿr amrar nē kām mē hkrata jarēnh kêt nē. Am kwarī ho kwarī. Nē kêr ka mē pry hō hā mām ma mē anhō pika hwÿr akupÿm apa ho apa.

Anhÿr o mē kām kapēr jakamā nhūm apkati nhūm mē kànhmā hkrī hāmri nē Tirtūm kot mē kām hā karō xā hkôt ma akupÿm mē ō pika hwÿr pa kurē kumrēx nē akupÿm pahi Erox wÿr mrar kêt nē.

Juje mē hprō wa kot Erox pymaj ma Jejus o mōr

Apokarip 12.1-6, 12.13-18

¹³ Tā nhūm kanhēti ho studa xwÿnhjaja ma akupÿm hapēx hāmri nhūm Tirtūm axte Marir mjēn Juje hwÿr kapēr o mē wrÿk xwÿnhjē hō mē. Nhūm kê axte hpimtir kām hwÿr wrÿ nē kām kapēr nē kām:

—Pa Juje. E kwa kànhmā nhÿ. Na ra pahi Eroxa aprō pê hkrata ā amÿnē. Koja tokyx pōristi hkwyjaja mē anhō krī hwÿr pōj nē war apē hpīr kaxyw ri hapēr. Jakamā kwa wa tokyx akato nē ma pika pê Ejit wÿr amōr kurē kumrēx. Nē Ejit kamā apa rāhā pa nhÿrmā akupÿn amnē war amē. E kwa tokyx. Anē.

¹⁴ Hāmri nhūm kuma nē kànhmā nhÿ nē Marir mra nē war amnhī to akuprō nē ra nojarēt. Hāmri nē krīja pê Jejus o kato nē ma o mōr kurē kumrēx. Wa mōr ryy nē hāmri nē Ejit wÿr pōj nē kamā pa ho pa.

¹⁵ Rōm nhūm pahi Erox tee ri amnhī wÿr kanhēti ho studa xwÿnhjē kamā hamak o pa nom nhūm mē akupÿm hwÿr mrar kêt nē. Jakamā nhūm mē kamā gryk nē hamaxpēr o:

—Tk. Kwa nà. Na mē am inhmā hēx nē akupÿn ixwÿr mrar nē nhÿri inhmā pahi nywta jarēnh kêt nē. Nà kwār mē māmri ā inhīpēx anē. Mē kot ixpē ho hpimxure kaxyw ā. Nà kot paj mē kēp kupī nhūm mē rī amnhī pumu. Na xep prem kanhēti kot harēnh xāja pumunh ā ra hā amgrā pyxi nē hkôt mytwrÿ kēp 6. Jakamā mām mē hkrata ra hā amgrā axkrut kaxyw. Nà na pa ra ijamaxpēr. Kot paj Perēj kamā mē hkra myjaja ra mē hā amgrā axkrut xwÿnhjaja nē kormā mē hā amgrā axkrut kêt xwÿnh piitā mē himex pa. Jao ra mē kamā pahi nywta pī. Nà ixte hpīr mā kēnā. Koja hprēk nē ixpānhā Ijaew o amnhīptār kêt nē.

Anhÿr o hamaxpēr hāmri nē amnhī wÿr ō pōristi hkwyjē hā karō nē mē kām mē hkrajē hā amÿnē nē mē kām:

—E kêr ka mē ma Perēj wÿr mra nē kamā mē kēp mē hkra myrejaja ra mē hā amgrā axkrut xwÿnhjē nhīmex pa. Nē kormā mē hā amgrā axkrut kêt xwÿnhjaja māmānēn mē himex par kumrēx. Nē Perēj pu hā ri krī hkryre hkôt māmānēn ri ajapōj nē ā mē himex par anē. Anē.

Hāmri nhūm mē kuma nē ma mē hwÿr mrar kurē kumrēx. Hāmri nē Perēj wÿr pōj nē mē kēp mē hkra myre piitā mē himex pa. Jakamā nhūm mē katorxā nē mē hipēxājaja tee ri mē hkra htyk xwÿnhjē pumu nē hkaprī htyx nē mÿr rūnh nē. Nom na pre Tirtūm nhÿ hā kapēr jarēnh o mē pa xwÿnh finat Jeremīstija ra amnepēm ā mē kot amnhī nhīpēx anhÿrja kukamā mē panhīgētjē mā mē harē nē hā kagā. Na pre mē kām Ijaew kurē xwÿnhjē pynēnh nē ma mē ō pika hwÿr mē ho hapēx par kaxyw. Hāmri nhūm mē panā Rrakewja te ra kot tee ri ja hā mē omunh nē tanhmā amnhī nhīpēx to pyrāk nhūm Jeremīstija tanhmā Ijaewjē jarēnh to nē hā kagā. Nē hā kagā ho:

Amnepēm Perēj kamā na pre mē panā Rrakewja hpijagri ho nōrja ā ra htyk kaxyw nē tee ri hkra kator mā xwÿnhhta kukamā hamaxpēr nē mÿr o nō. Nhūm hkwyjaja tee ri akupÿm tam hamaxpēr kaxyw kām kapēr. Tā jarāhā Rrakew kanrēhā hkra nē htāmnhwÿ nijaja ra urāk nē tee ri mē hkrare ho hamak xāj mÿr o pa. Mē kot mē kēp utār nē mē himex par jakamā nhūm mē tee ri mē ho hamak xāj mÿr o pa. Anē. Nhūm pre finat Jeremīstija mē hkukamā ā mē harē nē mē hā kagā anē. Tā ra jarāhā mēni piitā Rrakew pyrā nē hkrajē o hamak xāj mÿr o pa.

Wa kot akupÿm wa ō pika hwÿr Jejus o mōr

Juāw 7.41-42

Tā nhūm mytwrÿ grēre nē hapēx nhūm pahi Erox ty. Jakamā nhūm kamāt nhūm Jujeja gōr nē nō. Nē kê ōt kām axte amÿti. Nhūm Tirtūm kapēr o mē wrÿk xwÿnhjaja axte hwÿr wrÿ nē kām:

—Pa Juje? E na ra Marir pê hkra pīr mā xwÿnhhta ty. Jakamā kwa wa māmri ma akupÿm mō. Ma akupÿm mē apē Ijaewjē nhō pika hwÿr axāmnhix aprō mē hkrata wa o mō.

Anhÿr o kām kapēr. Na pre ra amnepēm Tirtūm nhÿ hā kapēr o mē pa xwÿnhjē hōja ja kukamā mē panhīgētjē mā ja jarē nē hā kagā. Nē hā kagā kot: “Ixpē Tirtūm kot paj nhÿrmā Ejit rūm ma akupÿm ō pika hwÿr ixkrata wa mē kumē.” Anhÿr o kot hkukamā harēnh nē hā kagā.

²¹ Jakamā nhūm Tirtūm kapēr o mē wrÿk xwÿnhjaja ā Juje mā karō anē hāmri nhūm kuma nē ma akupÿm wa o mō. Ma akupÿm mē ō pika hwÿr wa o mō.

²² Tā ra akupÿm hpōx kaxyw htēp o mō. Hāmri nē pahi Erox kra Akêrawja ra hipēxà mÿr pê kot Jutej kamā mē ho amnhīptār hā harēnh ma. Hāmri nē tee ri mē amnhī kukamā hamaxpēr nē kām mē hwÿr wa o mōr puma nē.

Tã nhũm kamàt nhũm juje ra gõr nê nõ nê kê axte amÿti. Nhũm kê axte Tirtũm kapër o mẽ wrÿk xwÿnhja hwÿr wrÿ nê akupÿm õ pika hkwÿ pè Jutej wÿr mõi nê wa mẽ hkurê nê kãm:

—Pa juje? E kêr ka Jutej wÿr wa mẽ amõi kêt nê. Pãn-hã nhãm mẽ anhõ pika hõ hwÿr mãn mõi nê kamã ri apa.

Anê nhũm kuma nê hpãnã wa mẽ ma mẽ õ pika hkwÿ pè Garirej wÿr wa mẽ juk nê ma mõi. ²³ Nê kamã põi nê krÿ pè Najare hwÿr mõi nê kamã amnhĩm õrkwÿ nhĩpêx nê kamã wa mẽ pa ho pa. Nhũm pre ra amnepem Tirtũm nhÿ hã kapër o mẽ pa xwÿnhjê hõja ra ã mẽ kot amnhĩ nhĩpêx anhÿrja kukamã mẽ panhĩgêtjê mã mẽ harê nê hã kagà. Nê hã kagà kot:

Tirtũm kot mẽ pahwÿr mênh mã xwÿnhhta koja kêp Najare nhõ xwÿnh. Anê.

Juãw Paxis kot Tirtũm kapër jarênh o pa

Makre 1.1-6; Rukre 3.1-14; Juãw 1.19-23

3 Nhũm pre Juãw Paxisja ã amnhĩ nhĩpêx anê. Nê pika pè Jutej kamã mẽ kãm Tirtũm kapër jarênh o pa. No ãm krĩm pa hkêt nê. ãm mẽ hpu hã krÿ pè amÿm ri kapõt ã ri mẽ kãm Tirtũm kapër jarênh o pa. ² Tirtũm nhÿ hã kapër o pa xwÿnh finat Ijais ra kot Juãw kukamã mẽ panhĩgêtjê mã tanhmã harênh to nê hã kagà xá hkõt. Na pre hkukamã hã kagà ho:

Koja nhÿrmã mênhõ mõi põi. Kapõt ã mõi põi nê mẽ kãm tanhmã mẽmoj tã karõ hto ho ri pa. Nê mẽ kãm: “Koja Tirtũm tokyx mẽ pahwÿr mẽ panhõ Pahihtija mẽ nhũm wrÿ nhũm mẽ piitã omu. Jakamã kwa mẽ tokyx kutêp tãm amnhĩ nhĩpêx o ri apa. Te mẽ kot mênhõ kutêp pry ho mexta pyrã nê amnhĩ nhĩ ho tãm amnhĩ nhĩpêx nê tãm ajamaxpër mex o ri apa. Kêr ka mẽ Pahihti kutêp ã amnhĩ nhĩpêx anhÿr o ri apa.” Anhÿr o koja mẽ kãm ujarênh o pa. Anê.

Na pre finat Ijaisja Juãw Paxis kukamã ã mẽ kãm harênh anê nê hã kagà. Tã nhũm hã kagà xàja kõt nhũm Juãw Paxisja mõi põi. Hãmri nê Ijais kot hkukamã harênh xá hkõt kapõt ã ri mẽ kãm ujarênh o pa nhũm mẽ kãm mar prãm xwÿnhjaja ma hwÿr mra. Nhũm mẽ kãm kapër nê mẽ kãm:

—E koja Tirtũm tokyx kot mẽ pakaxyw ãm xwÿnhja o amnhĩrĩt. Jakamã kwa mẽ tokyx kutêp amã amnhĩ tomnuj kaga hprãm xàj tãm amnhĩ nhĩpêx o apa.

Anhÿr o Jejus kutêp mẽ kãm kapër o pa.

⁴ Juãw Paxisja hikãxpore hkêt jakamã na pre ê mex kêt nê pa. ãm mẽmo mry pè kamer kí ho amnhĩm ê nhĩpêx nê hagjê nê hã pa. Nê mẽmo mry hkà ho amnhĩ pre nê ri pa. Nê mẽõ mex kur kêt nê ãm krit ku nê menh õr o ri pa.

⁵ Jakamã nhũm kapõt ã ri mẽ kãm Tirtũm kapër jarênh o pa nhũm mẽ kot mar kaxyw ma hwÿr mra. Pika pè Jutej kamã ri mẽ pa xwÿnhjaja. Nê Jutej kamã krÿ pè Jerujarê nhõ xwÿnhjaja. Nê pyhti pè Jotãw mÿri mẽ pa xwÿnhjaja. Nhũm prem piitã harênh ma nê kot mar kaxyw ma hwÿr mra. ⁶ Hãmri nê kapër ma nê Tirtũm noo mã mẽ kot amnhĩ tomnuj xwÿnh ã kãm amnhĩ jarê. Mẽ kot amnhĩ tomnuj kaga nê tam amnhĩ nhĩpêx

o pa hprãm xàj ã kãm amnhĩ jarênh anê. Nhũm Tirtũm kaxkwa kamã hkrÿ htã mẽ kuma nê amnhĩ katut kõt mẽ kot amnhĩ tomnuj rênh pa nê axte kãm hamaxpër kêt nê. Jakamã nhũm pre Juãw Paxisja Tirtũm mã gõx kãm mẽ hkrã kumrãr pa. Pyhti pè Jotãw kamã mẽ hkrã kumrã.

⁷ Tã nhũm Parijew mẽ Satusew nhõ xwÿnhjaja mããnên mẽ hkõt ma Juãw Paxis wÿr mra. Mẽ urak nê mẽ kêp Ijaew jakamã haxwÿja Juãw Paxis kot mẽ hkrã kumrãr kaxyw ma hwÿr mra. No ãm hkwÿjê hkĩnhã mẽ kot amnhĩ tomnuj kaga hprãm xàj kãm amnhĩ jarênh kêt nê. ãm amnhĩ krã hkõt hkwÿjê hkõt hwÿr mra nê amnhĩ to kuma. Nom nhũm Juãw Paxisja ra hprÿ hã ã mẽ hamaxpër anhÿrja kõt mẽ omunh mex nê. Jakamã mẽ kãm:

—Tk kwa nà. Kormã mẽ ate amnhĩ tomnuj pix o ri apa kênã. Xà kot paj mẽ ate amnhĩ tomnuj o apa rãhã mẽ akrã kumrã nhũm Tirtũm ja hã mẽ apumu nhũm ja kãm mex nê? Nà koja já kãm mex kêt nê. Koja ja mÿrapê nhÿrmã tanhmã mẽ atomnuj tÿx to ka mẽ tee ri umaj apimxur prãm kaprÿ. ⁸ Na htem amnhĩ tomnuj kaga nê tãm amnhĩ nhĩpêx nê tam axpên nhĩpêx. Jakamã e kwa mẽ ã amnhĩ nhĩpêx o apa anê pa rĩ kormã mẽ akrã kumrã. ⁹ Na ka htem atÿx ri ajamaxpër o: “Mẽ ixpê finat Apraãw kanrêhã htãmnhwÿ hkwÿ na pa mẽ. Jakamã koja Tirtũm ja hã mẽ ixpumu hãmri nê mẽ ixte amnhĩ tomnuj o ixpa tã nhũm ja hã tanhmã mẽ ixto hkêt nê. Koja mẽ ixto mex nê.” Anhÿr o atÿx ri amnhĩ kukamã ajamaxpër. Nom ja kot anhÿr kêt. Mẽ apê Apraãw kanrêhã htãmnhwÿ htã mẽ ate urak nê tãm amnhĩ nhĩpêxre hã. Kot kaj mẽ apê htãmnhwÿ htã amnhĩ tomnuj o ri apa hãmri nê Tirtũm noo mã te mẽ apê pikap kênre nhĩkwÿ pix pyrãk. ¹⁰ Na ra Tirtũm mẽ ate amnhĩ tomnuj mÿrapê tanhmã mẽ ato kaxyw. Te ho mẽhõ nhõ mẽmo hpàr õ hkêt nhũm kot tee ri omunh nê krãhyr nê kuwy kamã mênh nê ho kaxàr par pyrãk o koja mẽ anhĩpêx. Jao amnhĩ nê kuwy hwÿr mẽ arê ka mẽ kamã amnhĩ xà htÿx kamã ajamak rãhã ho ri apa. Anê.

Nhũm pre ã Juãw Paxisja Parijew mẽ Satusew nhõ xwÿnhjê mã kapër anê. ¹¹ Hãmri nê hpãnã axte mẽ kot mar kaxyw hwÿr mẽ mrar xwÿnhjê mã kapër nê mẽ kãm:

—E ra mẽ ate amnhĩ tomnuj kaga xwÿnhjaja. Na pa Tirtũm mã mẽ akrã kumrãr kaxyw gõ pix o mẽ akrã kumrã. Nom koja tokyx ixpãnã Tirtũm kot mẽ pakaxyw ãm mã xwÿnhhta tãm mẽ pahwÿr põi. àh-pumunh tÿx o kot ijakrenh par jakamã na pa hte ãm kukwak ri ixpa nê amnhĩ tã hã ixpijaam o ri ixpa. Koja mẽ awÿr Tirtũm Karõ rê nhũm mẽ akarõ mã agjê. Ka mẽ ÿ hã tam amnhĩ nhĩpêx o ri apa. Nom kormã mẽ kot tãm amnhĩ nhĩpêx kêt xwÿnhjaja koja Tirtũm kot mẽ pahwÿr mênh xwÿnhja ja hã mẽ omu nê mẽ hipêx o te kuwy kot mẽmoj to kaxàr par pyrãk o mẽ hipêx.

¹² —Na htem pur kãm harõj nhĩkê nê ho grã nê hpãnã kahtwÿ. Nê kahuk pa hãmri nê hkapĩ nhũm kõi apê nê prÿhkà ho htor pa. Nhũm mẽ hpãnã hy ho pa nê ixkre kamã gõi kãm unhwÿ. Ja pyrã nê koja

tokyx Tirtûmja më piitã më kot tanhmã amnhĩ nhĩpêx to ho pa hã më omunh xà hkôt më ho axkjê. Jakamã më kot tãm amnhĩ nhĩpêx o më pa xwÿnhjaja koja ma amnhĩ wÿr më ho api nhũm më kuri mex rãhã nê pa ho pa. No më kot amnhĩ tomnuj rãhã ho më pa xwÿnhjaja koja jajê hkĩnhã tanhmã më homnuj to. Nhũm më ma kuwy raxja wÿr pa nê kamã amnhĩ xà htÿx kamã hamak rãhã nê pa ho pa.

Anhÿr o më kãm kapêr.

Juãw Paxis kot Jejus krã kumrãr
Makre 1.9-11; Rukre 3.21-22; Juãw 1.32-34

¹³ Tã nhũm Jejus pika pê Garirej rũm kato nê ma Juãw Paxis wÿr mõi. Juãw kot pyhti pê Jotãw kamã hkrã kumrãr kaxyw ma hwÿr mõi. Hãmri nê omu nê kãm:

—Pa. E ot pa awÿr amnhĩ to tẽ. Ate më kuxwar ixkrã kumrãr kaxyw. Anê.

¹⁴ Hãmri nhũm tee ri kuma nê kãm:

—Kwa nã. Aa ate amnhĩ tomnure hã kot pa kêt ri akrã kumrã. Nã ka kot kaj ixkrã kumrã. Anê.

¹⁵ Hãmri nhũm kãm:

—Kwa nã. Mãmri ixkrã kumrã Juãw Paxis. Tirtûm kãm ja prãm kênã kot ka kêt ri axtem nê ixkaga. Kot puj më Tirtûm kãm hprãm xà hkôt tanhmã amnhĩ nhĩpêx to ho ri papa. Anê.

Hãmri nhũm kuma nê kãm:

—Tõe. Nã kot paj akrã kumrã. Anê.

¹⁶ Hãmri nê pyhti hwÿr o wrÿ nê kamã hkrã kumrã. Hãmri nê wa akupÿm api nê gõi mÿ ri ãm rãhã nhũm kaxkwa axkjê. Hãmri nhũm kurũm Tirtûm Karõja Jejus wÿr te tuuti pyrã nê ahpãr mã hwÿr wrÿk o tẽ nê ïkre hã xa. Nhũm Jejus arĩ amnhĩ wÿr wrÿk o htêm kãm omunh o xa. ¹⁷ Hãmri nhũm Tirtûm kaxkwa rũm kãm kapêr nê kãm:

Pa? E apê ixkra mex na ka. ãm hãmri na ka hte ixkanrêhã ã amnhĩ nhĩpêx mex anê. Inhmã ajapê kamã na ka ri apa ho apa. Anê.

Satanasti tee kot amnhĩ tã Jejus kamã hamak
Makre 1.12-13; Rukre 4.1-13; mããnen Eprêw 2.18, 4.15

4 Tã nhũm Jejus Tirtûm Karõ nhÿ hã ma kapôt ã ri pa. Satanasti kot amnhĩ tã kamã hamak kaxyw nhũm ma kapôt ã ri pa. ² Ri pa hã apkati xohtõ nê. Ra hã arĩgro pê 40. Nê kormã apkur kêt jakamã ra kãm prãm tÿx kumrêx nê ri pa. ³ Hãmri nhũm Satanastija nhÿhÿnh hwÿr tẽ nê hêx rom kãm kapêr nê kãm:

—Pa. E kwa mãn ka ra amã prãm tÿx nê nã? Nom xep apê Tirtûm Kra jakamã apê mëmoj hihtÿx kêt. Tirtûm pyrã nê axãhpumunh o axãhpumunh kênã. Jakamã kwa kên nhĩkwÿ mÿj mã anê kê amã pãwti hã amnhĩ jahkre ka aku nê tokyx ho amnhĩ xihtÿx. E kwa tokyx kãm akapêr. Anê.

⁴ Hãmri nhũm kuma nê kãm:

—Tk. Nã kot paj amar xà hkôt ã ri amnhĩ nhĩpêx anhÿr kêt nê. Koja Tirtûm kãm inhmã mëmoj nhõr prãm nê inhmã mëmoj gõi pa rĩ kormã kukrê. Kapêr ã kagã htũm kot ja jarênh kot:

Na htem më apkur xà pix kukwak ri htĩr nê pa hkêt nê. Na htem mããnen Tirtûm kapêr ma nê hkôt amnhĩ nhĩpêx nê htĩr nê pa. Anê.

—ã kapêr ã kagã kamã kot harênh kot anhÿr jakamã kot paj akapêr kôt ri ã amnhĩ nhĩpêx anhÿr kêt nê. ãm kwarĩ ho kwarĩ. Anê.

⁵ Hãmri nhũm Satanastija tee ri kuma hãmri nê hpãnhã ma Jerujarê hwÿr o mõi. Nê Tirtûm mã amnhĩ jarênh xà hã ixkre hprêk nhĩmõk wÿr ho api nê kÿxpê hatur xà hã ãm nhũm xa. Hãmri nê amnhĩ parpê kên rũnh nhĩkwÿ xwÿnhja pumunh o xa nhũm Satanasti kãm:

⁶ —E apê Tirtûm Kra jakamã kwa ja rũm ahpãr mã ajarĩ nê ma tẽ nê pikap tẽm. Koja Anhĩpêxãja apumunh mex nê ka tanhmã amnhĩ to hkêt nê. Kapêr ã kagã htũm kot harênh kot:

Tirtûm koja kapêr o wrÿk xwÿnh kwÿjê mã ajarê ka ajarĩ nê ahpãr mã tẽ nhũm më kÿx pê amÿ nhũm mëmoj akã hyr kêt nê. Anê.

—ã kapêr ã kagã htũm kot ajarênh anhÿr jakamã e tokyx ajarĩ. Anê.

⁷ Hãmri nhũm Jejus kuma nê kãm:

—Tk kot paj ri ate inhmã karõ xaja kôt ã amnhĩ nhĩpêx anhÿr kêt nê. Koja Tirtûm tãm inhmã ijarĩ hã karõ pa rĩ mar xà hkôt ijarĩ. No kot pa ri amar xà hkôt ijarĩ hkêt nê. Tirtûm kapêr ã kagã htũm kot ja jarênh kot:

Kêr ka më amnhĩ krã hkôt amnhĩ tã ixkamã ajamak kaxyw inhÿi jarênh kôt tanhmã amnhĩ nhĩpêx to hkêt nê. Anê.

—ã kot ja nê kapêr kot anhÿr jakamã kwarĩ ho kwarĩ. Kot paj ri amar xà hkôt ijarĩ hkêt kumrêx. Tirtûm tãm kot inhmã ã ixte amnhĩ nhĩpêx anhÿr ã karõre hã. Anê.

⁸ Hãmri nhũm Satanasti tee ri kuma nê hpãnhã ma nhÿri kên prêeti hwÿr o tẽ nê himõk ã axte o xa. Hãmri nê kãm pika piitã ahkre hpa. Nê më hikukrêx piitã nhũm kãm ahkre ho xa. Kãxpore nê mëmoj mex piitã nhũm kãm ahkre nhũm Jejus piitã omunh o xa. ⁹ Hãmri nhũm kê Satanasti axte kãm:

—E mãn ka kam ri mëmoj mex mÿj piitã omunh pa. Piitã inhõ na. Nom kot kaj ixkutã tẽm nê inhmã inhmex o inhmex ã ijarê pa ama nê amã piitã õr pa. Ka kam mëmoj piitã ho anhõ nê ho amnhĩptãr o apa. Jakamã e kwa tokyx. Anê.

¹⁰ Hãmri nhũm kuma nê axte kãm kapêr nê kãm:

—Tk kwa ma nhÿhÿm tẽ Satanasti. Kot paj ri amã amex o amex ã ajarênh kêt kumrêx. Tirtûm kapêr ã kagã htũm kot ja nê kapêr kãm hihtÿx kênã. Kapêr kot: Kêr ka më ixkapêr pix ma nê ixkutã pix mã akõnkrã ho akrĩ nê inhmã inhmex o inhmex ã ijarê. Kêr ka më ã amnhĩ nhĩpêx anhÿr o ri apa.

—Anhÿr o kot hã karõ jakamã kot paj amã amex o amex ã ajarênh kêt kumrêx. Anê.

¹¹ Hãmri nhũm tee ri amnhĩ tã kuma hãmri nê ma tẽ. Tee ri kãm kapêr kaprÿja ã amnhĩ pumu hãmri nê hka-ga nê ma tẽ. Hãmri nhũm Tirtûm kapêr o më wrÿk xwÿnhjaja Jejus wÿr wrÿ nê tanhmã ho mex to nê kãm õ nhũm kukrê nê akupÿm hihtÿx.

Jejus kot Garirej kamã kapër o pa

Makre 1.14-15; Rukre 4.14-15

¹² Tã nhũm Juãw Paxisja mëmoj tã pahi Eroxo mã akir nhũm amnhĩ tã kuma nẽ gryk xàj haxã nhũm hkrĩ ho hkrĩ. Hãmri nhũm Jejusja harẽnh ma nẽ ma akupým Garirej kamã krĩ pẽ Najare hwýr ma akupým tẽ. ¹³ Hãmri nẽ ra pøj nom kamã ri pa hkêt nẽ. Nẽ hpãnhã kurũm kato nẽ ma krĩ pẽ Kapanaũ hwýr tẽ. Gõ rax pẽ Garirej mýri na pre. Pika hkwy pẽ Jepurõ mẽ Natari wa mẽ kamã na pre nhũm Jejus ma hwýr tẽ. Hãmri nẽ kamã pa. ¹⁴ Nhũm ra amnepẽm Tirtũm nhỹ hã kapër jarẽnh o mẽ pa xwýnh finat Ijaisja Jejus kukamã ra mẽ panhĩgõtjẽ mã ã kot amnhĩ nhĩpẽx anhýr ã harẽ nẽ hã kagã. Jejus kot ã mẽ hwýr mör anhýrja kukamã nhũm pre harẽ nẽ hã kagã. ¹⁵ Pika hkwy kamã mẽ pa xwýnhjaja nhũm pre mẽ hkukamã mẽ harẽnh mex nẽ. Nẽ pika pẽ Garirej kamã mẽ pa xwýnhjaja nhũm pre mããnen mẽ hkukamã mẽ harẽ. Nẽ pyhti pẽ Jotãw mẽ gõ xujanãr wa hkaêx kãm pika piitã kamã mẽ pa xwýnhjaja. Nẽ krĩ pẽ Garirej kamã mẽ kęp Ijaew kêt xwýnhjaja nhũm pre mããnen mẽ harẽ. ã na pre finat Ijaisja mẽ hkukamã Tirtũm nhỹ hã mẽ piitã mẽ harẽ nẽ hã kagã anẽ. Jejus kot ma mẽ hwýr mörja kukamã nhũm ra hprĩ hã harẽ nẽ hã kagã. Nẽ hã kagãja o:

¹⁶ E. Kot paj mẽ amã mëmoj mex jarẽ ka mẽ inhma. Mẽ ate Tirtũm pumunh kêt jakamã te mẽ ate kamãt kô kamã ri apa pyrãk. Tã koja Tirtũm mẽ amã amnhĩ to amnhĩrit ka mẽ hpãnhã te mẽ ate hirã kamã ri apa pyrãk o amnhĩ nhĩpẽx nẽ ra hkôt amnhĩ xunhwý. Anhýr o mẽ hkukamã mẽ harẽ nẽ hã kagã. ¹⁷ Tã nhũm ra kot hkukamã mẽ kãm ujarẽnh xã hkôt nhũm Jejusja mẽ hwýr mõ nẽ mẽ kãm Tirtũm kapër jarẽnh o ri mẽ hkôt pa. Nẽ mẽ kãm tanhmã amnhĩ jarẽnh to ho pa. Nom kormã hprĩ hã mẽ kãm amnhĩ jarẽnh kêt nẽ. Te ho nhãm mëhõ jarẽnh pyrãk o mẽ kãm amnhĩ jarẽ nẽ mẽ kãm:

—E na ra Tirtũmja kot mẽ akaxyw ãm xwýnhhta mẽ nhũm mẽ awýr wrý. Jakamã kwa mẽ tokyx tee ri ate amnhĩ tomnuj ã amnhĩ pumu nẽ ã ate amnhĩ nhĩpẽx anhýr kaga nẽ hpãnhã Tirtũm kôt mãn amnhĩ nhĩpẽx o ri apa.

Anhýr o mẽ kãm kapër o pa pẽ mẽ ahkre ho ri mẽ hkôt pa.

Jejus kot amnhĩ wýr tep pynẽnh xwýnhjẽ hwýr

Makre 1.16-20; Rukre 5.1-11

¹⁸ Tã nhũm Jejus ma gõ rax pẽ Garirej mýri pa nẽ gõx kãm ja wa omu. Simãw Pêtre mẽ htõ Andreja nhũm wa gõx kãm kryhti rẽnh o wa xa. Hãmri nhũm Jejus wa hwýr tẽ nẽ wa omu nẽ amnhĩ kôt wa kuwý nẽ wa kãm:

¹⁹ —Pa. E kwa ma ixkôt mãn war apa. Kot paj tanhmã war ajahkre hto ka wa ma mẽ kãm ijarẽnh o ri apa. Mẽ kot war amar nẽ ra ixkôt amnhĩ xunhwýr kaxyw. Anẽ.

²⁰ Hãmri nhũm wa kuma nẽ kryhti re nẽ wa ma hkôt htẽm kurẽ kumrẽx. ²¹ Hãmri nhũm mẽ ma nhãm axte mõ nẽ ra jajẽ hwýr kato. Jepetew mẽ hkra Xiakre mẽ Juãwja nhũm wa mẽ hwýr kato. Nhũm mẽ õ pãr kãm

kryhti ho mex o wa mẽ nhỹ. Hãmri nhũm mẽ hwýr mra nhũm Jejus amnhĩ kôt ja wa kuwý nẽ wa kãm:

—Pa Xiakre mẽ Juãw. E wa ma ixkôt mãn wa apa. Anẽ.

²² Hãmri nhũm wa kuma nẽ hipêexã mã amnhĩ jarẽ nẽ ma hkôt pa ho pa kurẽ kumrẽx.

Jejus kot tanhmã amnhĩ nhĩpẽx to

Rukre 6.17-19

²³ Tã nhũm Jejus Garirej kamã Ijaew mã Tirtũm kapër jarẽnh o pa. Na pre hte Tirtũm kapër o mẽ ahkre xã hã ixkre hwýr agjẽ nẽ kamã mẽ kãm Tirtũm kapër jarẽnh o hkrĩ nẽ mẽ kãm:

—E mẽ tee ri ate amnhĩ tomnuj ã amnhĩ pumu nẽ hpãnhã Tirtũm kôt mãn amnhĩ nhĩpẽx o ri apa. Kot kaj mẽ ã amnhĩ nhĩpẽx anẽ nhũm ja hã mẽ apumu nẽ mẽ ato hkra kurẽ kumrẽx. Anẽ.

Hãmri nẽ akupým mẽ kãm mẽ ã xwýnhjẽ ho mex. Ahpýnhã tanhmã mẽ ã kute xwýnhjaja nhũm akupým mẽ ho mex o pa. ²⁴ Jakamã nhũm mẽ piitã pikaja kamã ri axpẽn mã harẽnh o hprõt. Nẽ pika pẽ Sir kôt mããnen ma ri axpẽn mã harẽnh o hprõt. Nhũm mẽ piitã harẽnh ma nẽ ma hwýr mẽ ã xwýnhjẽ ho mra. Ahpýnhã ri tanhmã mẽ ã kute xwýnhjaja. Mẽ ã htýx xwýnhjaja. Nẽ mẽ ã kamã mẽ htyk xwýnhjaja. Nẽ mẽ hkrã pipãnh xwýnhjaja. Nẽ mẽkarõmnuti kot Satanasti nhỹ hã tanhmã ri mẽ ho xwýnhjaja. Nhũm prem mẽ hamý nẽ ma Jejus wýr mẽ o mra nhũm mẽ omu nẽ akupým mẽ ho mex pa. ²⁵ Jakamã nhũm mẽ ohtõ nẽ ma hkôt pa. Krĩ pẽ Garirej rũm nẽ Tekap rũm nẽ Jerujarẽ rũm nẽ pika pẽ Jutej rũm. Nẽ pyhti pẽ Jotãw nhĩkjẽ rũm mẽ pa xwýnhjaja. Nhũm mẽ ã ohtõ nẽ ma Jejus kôt omunh o pa anẽ.

Jejus kot tanhmã mẽ ahkre hto

Rukre 6.20-23

5 Nhũm Jejus amnhĩ kôt ri mẽ kot omunh o mẽ pa xwýnhjẽ pumu hãmri nẽ mẽ ahkre kaxyw ma tẽ nẽ hixêt ã api nẽ himõk ã nhỹ. Hãmri nhũm mẽ ma hkôt mra nẽ pu hã hkrĩ pa. ² Hãmri nhũm mẽ ahkre nẽ mẽ kãm:

³ E mẽ inhma. Kot kaj mẽ atõ amnhĩ kaxyw tanhmã Tirtũm mẽ wa inhã ajamxpër to nẽ ajamxpër o: “Koja Tirtũm inhĩhkõ hã pa hkêt pa ixtýx ri tanhmã amnhĩ tomnuj to ho ri ixpa rãhã ho ri ixpa.” Anhýr o ajamxpër. Hãmri nhũm Tirtũm ã ajamxpër anhýr ã apumu nhũm ja kãm mex nẽ. Hãmri nhũm apẽ hkra hã ato mex nẽ atãnopxar o akõt pa ho pa ka ajamakêtcati nẽ axãmnhĩx akĩnh nẽ ri apa.

⁴ Nẽ kot ka mẽ atõ tanhmã amnhĩ tomnuj to. Hãmri nẽ tee ri ja hã amnhĩ pumu nẽ apijaãm nẽ akaprĩ nẽ. Nẽ akaprĩ xàj amýr o nhỹ. Amýr rax nẽ. Hãmri nhũm Tirtũm ja hã apumu nhũm ja kãm mex nẽ. Jakamã nhũm anẽ akaprĩ hta nẽ ato mex nẽ ka ajamakêtcati nẽ axãmnhĩx akĩnh nẽ ri apa.

⁵ Nẽ kot ka mẽ atõ agryk tokyx anhýr kêt nẽ. Nẽ kritpẽm amnhĩ tã amã mẽ hkaprĩ ho ri apa. Hãmri nhũm Tirtũm ja hã apumu nhũm ja kãm mex nẽ. Hãmri

nhùm ato mex nê ka ajamakêtkati nê axàmnhîx akînh nê ri apa.

⁶ Nê kot ka mê atô amã Tirtûm kãm hprãm xà hkôt amnhî nhîpêx o ri apa hprãm nê. Nhùm amnhî tã apumu nhùm ja kãm mex nê. Hãmri nhùm ato mex nê tanhmã akrã hto ka hkôt pix mã amnhî nhîpêx o ri apa. Jao ajamakêtkati nê axàmnhîx akînh nê ri apa.

⁷ Nê mê kamã mê axukapří ho ri apa xwýnhjaja na hte Tirtûm ja hã mê apumu nhùm ja kãm mex nê. Jakamã na hte mê hã mê apyrã nê mê akamã ukapří ho pa. Jao mê ato mex nê ka mê ajamakêtkati nê axàmnhîx akînh nê ri apa.

⁸ Nê kot ka mê atô ã ajamaxpêr anê nê ajamaxpêr o: "Nà kot paj ãm Tirtûm kapêr kôt pix mã ri amnhî nhîpêx o ri ixa. ãm ja pix na inhmã hprãm." Anhÿr o ajamaxpêr. Hãmri nhùm Tirtûm amnhî tã mê apumu nê mê ato mex nê. Ka mê ajamakêtkati nê axàmnhîx akînh nê ri apa. Nê nhÿrmã Tirtûm wÿr api nê kuri amex rãhã apa ho apa.

⁹ Nê kot ka mê atô mēhō wa kot axpēn kutã amnhî xãm xwýnhhta axpēn tã wa omu nê wa kot tanhmã axpēn nhîpêx tota nê tanhmã wa kãm akapêr to nê akupÿm tãm wa ãm. Hãmri nhùm Tirtûm ja hã apumu nhùm ja kãm mex nê. Nê apê hkra hã ajarē ka ajamakêtkati nê axàmnhîx akînh nê ri apa.

¹⁰ Nê koja mēhō mê ate Tirtûm kapêr mar xà hkôt amnhî nhîpêx o apa hã mê apumu nê hã tanhmã mê anhîpêx kati hto. Tã nom koja Tirtûm arí mê ato mex nê. Mê apê hkra jakamã mê kot tanhmã mê anhîpêx hto htã ka mê ajamakêtkati nê axàmnhîx akînh nê ri apa.

¹¹ —Kwãr mê mãmri ixtã mê ato kapêr rÿ mê ato hêx rÿ tanhmã ri mê atomnuj to. Kwãr mê mãmri ã mê anhîpêx anê. Nom kêr ka mê arí amnhî kaxyw inhmã ajamaxpêr tÿx rãhã pē ajamakêtkati nê axàmnhîx akînh nê ri apa. Kwãr mê mãmri ixtã ã mê anhîpêx anê nê mê amex kêt ã mê ajarē. Amnepêm na prem ã Tirtûm nhÿ hã kapêr jarēnh xwýnhjê nhîpêx anê. Jakamã koja mê urak nê ã mê anhîpêx anê. Hãmri nhùm Tirtûm ja hã mê apumu nê amnhîm mê amex ã mê ajarē. Hãmri nê nhÿrmã kaxkwa kamã wa inhō krí kamã mê ato mex nê. Jakamã kêr ka mê ã amnhî kukamã ajamaxpêr anhÿr pē mãmri akînh nê ajamakêtkati nê axàmnhîx ri apa. Kwãr mê mãmri ã wa ixtã mê anhîpêx anê. Anê.

Jejus krajaja te kot kaxwa mê kanê hpôk wa urak

Makre 9.49-50; Rukre 13.34-35

¹³ Nhùm Jejus arí mê kãm kapêr nê mê kãm:

—Nê mê ate ixkôt amnhî xunhwÿr xwýnhjaja te mê ate kaxwa pyrãk. Kaxwaja mê apkur xà ho ành mã mex. No koja mēhō tēn kamã pika hkwy mê nê ho ahkã. Hãmri tanhmã kot wem ho nê akupÿm ho mex? Nà koja akupÿm mex kêt nê. ãm mê kot hkapir pix kaxyw koja mex. Ja pyrã nê kot ka mê atô ate inhmã tanhmã amnhî nhîpêx to ho apa hã amnhî jarēnh tã gaa nê rí amã ixkôt amnhî nhîpêx prãm kêt nê. Hãmri nê ra te apê kaxwa mê pika pihkarta pyrãk. Kwa mê ixujarēnh ma nê kãm ajamaxpêr tÿx rãhã ho ri apa.

¹⁴ —Nê te mê ate kanê hpôk pyrãk. Nê te mê ate hixêt prêk nhîmök ã krí xãm pyrãk. Koja kríja hixêt prêeti nhîmök ã xa nhùm mê piitã omu. Nê kanêja. Xà na htem kanê hpôk nê poti ho hpro? Nà na htem hpôk nê kÿx pē mēmoj nhîmök ã unhwÿ nhùm mê piitã mê kãm hirã nhùm mê hirã kamã mēmoj pumunh mex nê. Ja pyrã nê kot kaj mê tãm amnhî nhîpêx o ri apa nhùm mê piitã ja hã mê apumunh kôt ra kaxkwa kamã Tirtûm mex ã harēnh o pa. Anê.

Jejus kot tanhmã Mojes kapêr jarēnh to

Rukre 16.16-17

¹⁷ Nhùm Jejus arí mê kãm kapêr nê mê kãm:

—Nê amnepêm Mojes kot Tirtûm nhÿ hã Ijaewjê mã tanhmã mê kot amnhî nhîpêx to hã mê kãm karōja. Nê amnepêm Tirtûm nhÿ hã kapêr jarēnh o mê pa xwýnhjê kapêrja. Ixte mê kapêr o ijapêx kaxyw na pa pre mê awÿr ixwÿrk kêt nê. Jakamã kwa mê ri ã axpēn mã ijarēnh anhÿr kêt nê. Kêt ixprí hã ixte mê amã mê kapêr jarēnh nhùm mê ate mar mex kaxyw na pa pre kaxkwa rûm mê awÿr wrÿ.

¹⁸ —Tirtûm kapêr ã kagã htûm kot mēmoj jarēnhja. Koja ujarēnh xà hkôt mēmoj tanhmã amnhî to hpar mê nhùm rí kormã kaxkwa mê pika wa hapêx pa nhùm kapêr ã kagãja mãänēn hapêx. Nom nhùm Tirtûm kapêr koja mēmojja pyrã nê aa hapêx kêt nê. Koja rãhã ho rãhã nê aa ihkjê ho tanhmã mēnh to hkêt nê. ãm hãmri na pa ã mê amã harēnh anê.

¹⁹ —Nê kot ka mê atô Tirtûm kapêr o pixire nê hirôp xa. Hãmri nê ra amnhî pyrã nê anhîō mã ja hã amÿnê. Apyrã nê kot hirôp ãm kaxyw ka kãm hã amÿnê. Kot kaj ã amnhî nhîpêx anê hãmri nê apê Tirtûm kra hkêt ã amnhî to amnhîrít. Nom kot ka kêt mê tãm amnhî nhîpêx o ri apa. Nê amnhî pyrã nê tãm mê kot amnhî nhîpêx kaxyw mê kãm akapêr o ri apa hãmri nhùm Tirtûm ja hã apumu nê ato hkra nê ato mex nê.

²⁰ —No Parijew nhō xwýnhjaja nê Tirtûm kapêr tûm o mê ahkre ho mê pa xwýnhjaja. Mê kot Tirtûm kapêr kôt amnhî nhîpêx mex ã amnhî jarēnh tã no ãm hkôt ã amnhî nhîpêx anhÿr kêt nê. Jakamã kot kaj mê hkôt amnhî nhîpêx o ri apa hãmri nê mê urak nê nhÿrmã Tirtûm mê wa inhō krí kamã apa hkêt nê. Anê.

Mê gryk o mê pa xwýnhjê jarēnh

Rukre 12.58-59; mãänēn Rōmãn 12.19; Epes 4.26; Wam Ximotre 2.8; Xiakre 1.19-20

²¹ Nhùm Jejus arí mê kãm kapêr nê mê kãm:

—Nê amnepêm na prem mê panhîgêtjê mã Tirtûm kapêr kwÿ jarēnh o pa nê mê kãm:

Kêr ka mê axpēn par kêt nê. Kot kaj mê mēhōx pî nhùm mê ja mÿrapê atomnuj nê. Nê ma mê anhō pahihti hwÿr ato tē nhùm mÿrapê tanhmã ato rÿ hkôt apí. Anê.

ãm hãmri na prem mê kãm ja jarē. ²² Tã kot paj ixprí hã mê amã tanhmã harēnh to ka mê inhma. Kot kaj mê mēmoj tã anhîō kamã agryk. Hãmri nhùm Tirtûm tee ri ja hã apumu nhùm ja kãm mex kêt nê. Jakamã koja mê anhō pahihti tanhmã ja hã mê ato japêr hã

koja ja mex në. Rÿ kot kaj më tanhmã mëhõ japrÿ hto. Ho hagrõ rÿ ho rop. Mÿrapê kop apu akwÿ kot apynênh në anhõ pahihtu hwÿr ato htêm në ïhkram ajaxar ronhÿx ja inhmã mex në. Rÿ kot kaj më tanhmã anhÿõ mã akapêr punuj to në kãm: "Tk. Ate ho warêhti hã. Te apê hagrõ pyrãk kênã." Anhÿr o kãm akapêr. Tã kop apu Tÿrtÿm ra ã akapêr anhÿrja mÿrapê më kot amnhÿ xà htÿx kamã hamak tÿm xàta wÿr amênh ronhÿx ja inhmã mex në. Ja pumaj kwa kêr ka më ã axpên mã akapêr anhÿr kêt në. Kêt më axpên mã tãm akapêr pix o ri axpên kôt apa.

²³ —Në kêr ka më tanhmã ate anhÿõ nhÿpêx hto kamã Tÿrtÿm mã mex o mex ã harênh kêt në. Kêr ka më kãm amnhÿ jarênh o akrÿ hãmri në ra mëhõ kot mëmoj tã akamã gryk xwÿnh mã ajamaxpêr japêr. ²⁴ Hãmri në akato në ma hwÿr atêm kurê kumrêx në wa tãm axpên mã akapêr në tãm akupÿm axpên xãm. Hãmri në rÿ kormã ma akupÿm tẽ në Tÿrtÿm mã amnhÿ jarênh jatur xãm amê në kãm mex o mex ã harê. Kêr ka më ã amnhÿ nhÿpêx anhÿr o ri apa.

²⁵ —Na htem tanhmã axpên nhÿpêx to hãmri në kot tanhmã war axpên to xwÿnhjê hõja ma õ pahi hwÿr tẽ në kãm tanhmã kot ho xwÿnhhta jarênh kaxyw nojarêt. Hãmri nhÿm ra kamã gryk xwÿnhhta kot pahi mã harênh kaxyw nojarêt ã harênh ma në tee ri amnhÿ kukamã hamaxpêr në ma hwÿr tẽ në wa akupÿm tãm axpên xãm. Na htem ã amnhÿ nhÿpêx anê. Pahi kot wa harênh mar në tanhmã axpên tã wa ho pymaj na htem ã amnhÿ nhÿpêx anê në tokyx tãm akupÿm axpên xunhwÿ. No koja më anhÿr kêt nhÿm pahija wa harênh ma në wa kot tanhmã axpên to xwÿnhhta õ jaxã nhÿm tee ri kãm kator prãm. Hãmri në tanhmã amnhÿ to në ra amnhÿ pãnhã kãm amnhÿrer pa nhÿm pahihtija rÿ kormã pôristi mã anê nhÿm kãm ure nhÿm kato. Ja pyrã në kêr ka më Tÿrtÿm tanhmã kot më anhÿpêx to pymaj tokyx më ate amnhÿ tomnuj kaga në hkôt amnhÿ nhÿpêx rãhã ho ri apa. Anê.

Tanhmã më pahte më pahprõjê nhÿpêx to

Matêwre 19.3-9; Makre 9.43-47, 10.2-9; mãänên Rukre 16.18

²⁷ Nhÿm Jejus arÿ më kãm kapêr në më kãm:

—Në na pre finat Mojesja më panhÿgêjtê mã Tÿrtÿm kapêr tÿm kwÿ jarê në më kãm: "Kêr ka më amnhÿ prõ pix tânopxar o ri apa. No më kuhpa hã nhãm mëhõ ho amnhÿkati ho ri apa hkêt në." Anê. ãm hãmri na pre më kãm ja hã karõ. ²⁸ Tã kot paj ixprÿ hã më amã tanhmã harênh to ka më inhma. Kot kaj më nhãm mëhõ pumu në amã ho amnhÿkati hprãm mã ajamaxpêr. Jao te ra ate ho amnhÿkati pyrãk o amnhÿ nhÿpêx. Kormã ate ho amnhÿkati hkêt tã ra hkukamã ajamaxpêr jakamã te ra ate ho amnhÿkati pyrãk o amnhÿ nhÿpêx. ²⁹ ã më hamaxpêr punuj anhÿr xwÿnhjaja koja më nhÿrmã ma më kot amnhÿ xà htÿx kamã hamak tÿm xàta wÿr ma mra në kamã pa rãhã ho pa. Jakamã kêr ka më nhãm mëhõ pumu në amã hkÿnh japêr hãmri në te ate ano kaxar në mënh në axte ate omunh kêt pyrãk o amnhÿ nhÿpêx. Jao hkax ã rÿt në ma nhÿhÿm atêm kurê kumrêx.

³⁰ —Në kot kaj më anhÿhkra ho tanhmã amnhÿ tomnuj to kaxyw. Hãmri në tee ri ja hã amnhÿ pumu në te ate amnhÿ nhÿhkra krãhÿr në mënh pyrãk o amnhÿ nhÿpêx në tanhmã amnhÿ tomnuj to hkêt në. Më ïhkra ho më kot tanhmã amnhÿ tomnuj to ho më pa xwÿnhjaja koja më nhÿrmã ma më kot amnhÿ xà htÿx kamã hamak tÿm xàta wÿr ma mra në kamã pa rãhã ho pa. Anê.

Më pahte axpên kaga hkêt

³¹ Nhÿm Jejus arÿ më kãm kapêr në më kãm:

—Në na pre finat Mojes më panhÿgêjtê mã Tÿrtÿm kapêr tÿm kwÿ jarê në më kãm: "Kot kaj më atõ aprõ kaga kaxyw hãmri në ate hkaga hã amnhÿ jarênh ã kagã nhÿpêx në kãm agõ në rÿ kormã hkaga." Anê. ãm hãmri na pre ã më kãm Tÿrtÿm kapêr tÿm jarênh anê. ³² Tã kot paj ixprÿ hã më amã tanhmã harênh to ka më inhma. Kêr ka më atÿx ri amã hprãm xà hkôt aprõ kaga hkêt në. Nom koja aprõ akuhpa hã nhãm mëhõ ho amnhÿkati ka harênh ma hãmri në amã ja hã hkaga hprãm në mãmrÿ kam në hkaga. Ja tanhmã kute hkêt. Nom koja ã amnhÿ nhÿpêx anhÿr kêt tã ka amnhÿ krã hkôt hkaga. Hãmri nhÿm mëhõ apãnhã ho hprõ në o pa. Hãmri në ra kot apê aprõ ho amnhÿkati ho pa pyrãk o hipêx. Në nija haxwÿja. Te arÿ kêp aprõ htã akuhpa hã nhãm myja o amnhÿkati o pa pyrãk o amnhÿ nhÿpêx. Anê.

Tãm më pakapêr ã Jejus kot më pamã karõ

Xiakre 5.12

³³ Nhÿm Jejus arÿ më kãm kapêr në më kãm:

—Në na pre finat Mojes më panhÿgêjtê në pahpãmjê mã Tÿrtÿm kapêr tÿm jarênh o: "Kêr ka më Tÿrtÿm mã mëmoj to anhÿr ã amnhÿ jarê hãmri në amnhÿ jarênh xà hkôt kãm tanhmã amnhÿ nhÿpêx to. Nom kêr ka më atÿx ri kãm tanhmã amnhÿ jarênh to ho amnhÿ to axêx kêt në. ãm akatãt kôt më ate amnhÿ jarênh to xà hkôt kãm tanhmã mëmoj to." Anê. ãm hãmri na pre më kãm ja jarê. ³⁴ Tã kot paj ixprÿ hã më amã tanhmã harênh to ka më inhma. Kêr ka mëhõ mã tanhmã amnhÿ jarênh to. Tÿrtÿm mã pix mã amnhÿ jarênh kêt nhãm mëhõ mã mãänên tanhmã amnhÿ jarênh to. Në akatãt kôt kãm amnhÿ jarê. Na ka htem më kot më axêx kêt kôt më apumunh kaxyw mëmoj nhÿxi jarênh kôt amnhÿ jarê. Nom kêr ka më axte ã mëmo nhÿxi hã amnhÿ jarênh anhÿr kêt në. Mëmoj tã amnhÿ jarê në akatãt kôt amnhÿ jarênh kurê kumrêx. No më kot axêx kêt kôt apumunh kaxyw mëmoj nhÿxi hkôt amnhÿ jarênh kêt në. Tanhmãnh kaxkwa nhÿxi jarênh kôt mëmoj tã amnhÿ jarênh kêt në. Kaxkwa kêp Tÿrtÿm krÿ xà maati kênã kot ka kêt më axtem në atÿx ri amnhÿ kaxyw hixi jarê. ³⁵ Rÿ më kot axêx kêt kôt apumunh kaxyw pika nhÿxi jarênh kêt në. Pika kêp Tÿrtÿm par xãm xà kênã kot ka kêt më atÿx ri amnhÿ kaxyw tanhmã hixi jarênh to. Në krÿ pê Jerujarêja mãänên kêr ka më ri amnhÿ kaxyw tanhmã hixi jarênh to hkêt në. Koja nhÿrmã Tÿrtÿm më awÿr Jerujarê hwÿr ixpê pahi maati hã inhme pa kamã më ato amnhÿptar o ixkrÿ.

Jakamã kêr ka mẽ ri atỳx amnhĩ kaxyw tanhmã hixi jarënh to ho ri apa hkêt nê.

³⁶ —Nê kêr ka mẽ kot axêx kêt kôt apumunh kaxyw mẽ ri tanhmã amnhĩ krã hkĩ jarënh to hkêt nê. Kot kaj mẽ anê nê ãm tanhmã hã harënh to kaprỳ. Xà kot kaj mẽ ajamaxpêr pix o tanhmã amnhĩ krã hkĩ hto? Nà kot kaj mẽ ho anhỳr kêt nê. Jakamã mẽ ri atỳx tanhmã harënh to hkêt nê.

Nê mẽ atỳx ri mẽmo nhĩxi jarënh kôt mẽmoj tã amnhĩ jarënh o apa hkêt nê. ³⁷ ãm akatãt kôt tãm amnhĩ jarënh kurê kumrêx. Jao mẽ kãm: “Tỳ. Nà kot paj ho anê.” Anhỳr o mẽmoj tanhmã ho. Rỳ mẽ kãm: “Nà kot paj ho anhỳr kêt nê.” Anhỳr o mẽmoj tanhmã ho hkêt nê. ãm akatãt kôt tanhmã mẽmoj tã amnhĩ jarënh to xà hkôt ho anhỳr kurê kumrêx. Mẽ kot Satanasti hkôt amnhĩ nhĩpêx o mẽ pa xwỳnh pixjaja na htem hêx rom mẽmoj nhĩxi jarënh kôt tanhmã amnhĩ jarënh to ho pa. Anê.

Mẽ pahte tanhmã axpên nhĩpêx to hã Jejus kot mẽ pamã karõ

Rukre 6.27-30, 23.34; mãanên Atre 7.60; Rõmãn 12.14

³⁸ Nhũm Jejusja arĩ mẽ kãm kapêr nê mẽ kãm: —Na prem amnepêm mẽ panhĩgêjtê mã Tĩrtũm kapêr tũm jarënh o: “Koja mẽhõ apê ano katõk nê hka-pa hã koja mẽ anhõ pahija atã mã ho anê nê kêp no kapa. Rỳ koja mẽhõ apê axwa hõ hkwỳr hã koja atã mã ho anê nê atã kêp wa hõ hkwỳr.” Anhỳr o mẽ kãm hã karõ. ãm hãmri na prem ã ja jarënh anê. ³⁹ Tã kot paj ixprĩ hã mẽ amã tanhmã ja jarënh to ka mẽ inhma. Ko-ja mẽhõ tanhmã mẽ anhĩpêx to ka mẽ ãm amnhĩ tã omu nê tanhmã amnhĩ tã ho hkêt nê. Koja anhĩnep akura ka ãm omu nê tanhmã amnhĩ tã ho hkêt nê. Te ate kãm ihkjê hpêr nhũm kot ihkjê kamã hkuranh pyrãk o amnhĩ nhĩpêx nhũm ja amã mex nê. No amnhĩ tã tanhmã ho hkêt nê.

⁴⁰ —Nê koja mẽhõ anhĩnõhkã hã awỳ nhũm mẽ anhõ pahija amã anê ka mãmrĩ kãm agõ nê tanhmã hã kãm nê hkêt nê. Te ate hkôt kry pê kãm anhĩnõhkã hpakã ry jagjênh xwỳnhhta nhõr pyrãk o amnhĩ nhĩpêx. Nom kêr ka mẽ kamã agryk kamã kãm õr kêt nê.

⁴¹ —Nê koja mẽhõ ate kãm jênh tur nê hkôt ho amõr ryy kaxyw amã kapêr ka mãmrĩ kãm ho anê. Nê kot amã nhỹri hã karõ xàja wỳr o pøj nom kamã kãm õr kêt nê. Kãm ho hakrenh ryy nê rĩ kormã akupỳm kãm agõ.

⁴² —Nê koja mẽhõ õ mẽmoj kêt nê awỳr tẽ nê mẽmoj tã awỳ ka mãmrĩ kãm agõ. Rỳ nhũm awỳr tẽ nê apê mẽmoj to ãpresta kaxyw ka mãmrĩ kãm ho ãpresta. Kêr ka mẽ ã axpên nhĩpêx anhỳr o ri apa. Anê.

Mẽ pamã axpên kĩnh ã Jejus kot mẽ pamã karõ

Rukre 6.32-36; mãanên Rõmãn 12.14

⁴³ Nhũm Jejus arĩ mẽ kãm kapêr nê mẽ kãm: —Nê na prem amnhĩ krã hkôt axtem nê tanhmã mẽ panhĩgêjtê mã mẽmoj jarënh to nê mẽ kãm: “Kêr ka mẽ amã mẽ akrãmnhwỳjê pix kĩnh nê tanhmã mẽ ho mex to. No kêt mẽ kot tanhmã mẽ ato xwỳnhjaja kêr

ka mẽ mãmrĩ mẽ kamã axàhkurê ho ri apa.” Anhỳr o mẽ kãm karõ. ⁴⁴ Nom pa kot paj mẽ amã Tĩrtũm kot tanhmã ja hã karõ hto hã harê ka mẽ inhma. Kêr ka mẽ kot tanhmã ri mẽ atomnuj to xwỳnhjaja amnhĩ tã tanhmã mẽ ho hkêt nê. ãm tanhmã mẽ ho mex to pix hkukamã mãn ajamaxpêr. Nê mẽ ho Tĩrtũm wỳr pix kukamã mãn ajamaxpêr. ⁴⁵ Na hte ã kaxkwa kamã Mẽpahpãm Tĩrtũmja amnhĩ nhĩpêx anhỳr o pa. Mẽ kot amnhĩ tomnuj xwỳnhjaja nê mẽ kot amnhĩ to mex xwỳnhjaja nhũm hte mẽ ho hpimràatã mẽ ho mex o axpên pyrãk. Jao hamê wa hwỳr na rê nê hamê wa hwỳr myyti rê nhũm hamê wa kãm hirã ho pa. Jakamã kêr ka mẽ urak nê mẽ piitã tãm mẽ hipêx o axpên pyrãk. Mẽ kot amnhĩ tomnuj xwỳnhjê mẽ mẽ kot amnhĩ to mex xwỳnhjê mẽ ho apimràatã mẽ ho mex o axpên pyrãk.

⁴⁶ —Nê xatã kaj mẽ amã mẽ piitã mẽ ho mex prãm kêt nê ãm mẽ kot mẽ ato mex xwỳnh pixjaja ka mẽ amã mẽ ho mex prãm nhũm Tĩrtũm ja hã mẽ apumu nhũm ja kãm mex nê nà? Nà koja kãm mex kêt nê. Koja mẽhõ ato mex kêt tã kêr ka ãm amnhĩ rom ho mex nê. Nhũm Tĩrtũm ja hã apumu nê amnhĩm amex ã ajarê. Mẽ kot amnhĩ tomnuj xwỳnhjaja na htem ãm mẽ kot mẽ ho mex xwỳnh pixjaja nhũm mẽ amnhĩ xwar mẽ ho mex. No tãm mẽ kot amnhĩ nhĩpêx xwỳnhjaja na htem mẽ piitã mẽ ho mex o axpên pyrãk. Mẽ kot tãm amnhĩ nhĩpêx xwỳnhjaja nê mẽ kot amnhĩ tomnuj xwỳnhjaja nhũm mẽ ho hpimràatã mẽ ho mex o axpên pyrãk.

⁴⁷ —Nê na hte mẽ hkwỳjaja ãm amnhĩ kwỳjê pix mã kapêr mex o pa. Nom mẽ piitã tãm mẽ hipêx kêt nê. Nom kêr ka mẽ ã amnhĩ nhĩpêx anhỳr kêt nê. Kêr ka mẽ kurom mẽ piitã tãm mẽ hipêx o axpên pyrãk. Mẽ akwỳjê mẽ mẽ akwỳ hkêt xwỳnhjaja ka mẽ hipêx o axpên pyrãk. Nê tãm mẽ kãm akapêr o axpên pyrãk. ⁴⁸ Kaxkwa kamã Mẽpahpãm Tĩrtũm pyrã nê mẽ kot amnhĩ tomnuj xwỳnhjê mẽ mẽ kot amnhĩ to mex xwỳnhjaja mẽ ho apimràatã mẽ ho mex o axpên pyrãk. Na hte ã Tĩrtũmja mẽ panhĩpêx anê. Anê.

Mẽ pahte mẽ kêp amrakati xwỳnhjê ho mex rãhã hã mẽ pamã karõ

6 Nhũm Jejus arĩ mẽ kãm kapêr nê mẽ kãm: —Nê na htem mẽ piitã hkwỳjê noo mã tanhmã mẽ kêp amrakati xwỳnhjê ho mex to. Nom kãm mẽ hkaprĩ kamã tanhmã mẽ ho mex to hkêt nê. ãm hkwỳjaja kot ja hã mẽ omunh nê mẽ mex ã mẽ harënh pix kaxyw na htem krĩ hkôt ri mẽ kêp amrakati xwỳnh piitã mẽ ho mex o pa. Nê mẽ pikuprõnh xà hã ixkre kamã kuhê nê tanhmã mẽ ho mex to. Mẽ hkwỳjaja kot ja hã mẽ omunh nê amnhĩm mẽ mex ã mẽ ho jarkrar kaxyw. Jakamã koja nhỹrmã Tĩrtũmja axte ja hã mẽ kãm mẽmoj mex nhõr kêt nê. Ra jar mẽ hkwỳjaja kot ja hã mẽ omunh nê amnhĩm mẽ mex ã mẽ harënh kênã. Jakamã kwa kêr ka mẽ ho mẽ urak kêt nê. Nê tanhmã mẽhõ ho mex to kaxyw nê akwỳjê no kuhpa hã mẽ hkàx ã tanhmã mẽ ho mex to. No kot kaj mẽ noo mã tanhmã mẽ ho mex to. Mẽ kot hã apumunh nê ato

jarkrar kaxyw tanhmã më ho mex to nhũm kaxkwa kamã Mëpahpãmja ja hã apumu në më hã tanhmã ato mex to hkêt në. Koja ãm hã apumu.

³—Ja pymaj kêr ka më më kêp amrakati xwÿnhjê mã mëmoj nhõr kaxyw hãmri në më piitã mã no hkàx ã tanhmã më ho mex to. Hãmri në nhãm ri ja hã më kãm amnhĩ to jarkrar kêt në. Aprõ mã rÿ akrajê mã rÿ akrãmnhwÿ mã hã amnhĩ jarênh kêt në. ⁴Kot kaj më no hkàx ã tanhmã ho mex to no nhũm Tirtũm tapxipix apumunh o nhÿ. Hãmri në ja hã ato mex rax në ka amex në apa. Anë.

Tanhmã më pahte Tirtũm mã amnhĩ jarênh to hã më pamã karõ

Rukre 11.1-13, 18.9-14

⁵Nhũm Jejus arĩ më kãm kapër në më kãm:

—Në mãänën ja. Na htem hakwa pix o amnhĩ mex ã amnhĩ jarênh xwÿnhjaja Tirtũm mã amnhĩ jarênh kaxyw në më kot Tirtũm kapër o më ahkre xà hã ixkre-ja wÿr agjê. Në më piitã mã noo mã kãm tanhmã amnhĩ jarênh to. Rÿ gáp kuhê në më piitã mã noo mã kãm amnhĩ jarê. Tã mëmo kaxyw na htem më noo mã Tirtũm mã amnhĩ jarê? Nã ãm më kot ja hã më omunh në më mex ã më ho jarkrar pix kaxyw. Në më harênh o: “E mũjti pumu. Na hte apkati më ã Tirtũm mã amnhĩ jarênh anë. Kot amnhĩ to mex xwÿnh mãn.” Anhÿr ã harênh kaxyw. Tã ra më piitã më kot ja hã omunh në amnhĩm mex ã ho jarkrar jakamã koja Tirtũm axte ja hã tanhmã ho mex to hkêt në. Ra pika ja kamã më kot më omunh në më mex ã më harênh kênã. ⁶No më kajaja. Kêr ka më uràk në ã amnhĩ nhĩpêx anhÿr kêt në. ãm Tirtũm mã amnhĩ jarênh kaxyw në akwÿjê no hkàx ã hitom wÿr agjê në hitom kãm ahte kãm amnhĩ jarê. Hãmri nhũm Tirtũm tapxipix ja hã më apumu. Më amã amnhĩ to amnhĩrĩt kêt tã më apumu. Hãmri në më ato mex në.

⁷—Në më kêp Tirtũm kra hkêt xwÿnhjaja na htem sãnti mã amnhĩ jarênh kaxyw në xatã kãm amnhĩ jarê. Në xatã kàx pëê kãm amnhĩ jarê. Në hamaxpër o: “Kot paj xatã sãnti mã amnhĩ jarê nhũm inhmar japêr.” Anhÿr o hamaxpër jakamã xatã kãm amnhĩ jarê. No ãm htÿx ã hamaxpër anhÿr kaprÿ. ⁸Jakamã kwa kêr ka më ho më uràk kêt në. Tirtũm ra kot më ate mëmoj tã hwÿr xàta ra ja kukamã kot omunh mex kênã kot ka kêt më xatã hã hwÿr o akuhê.

⁹—Në kêr ka më kãm amnhĩ jarênh kaxyw në amnhĩ krã hkôt tanhmã kãm amnhĩ jarênh to rÿ kãm amnhĩ jarênh o:

Pa Mëinhĩpêxã maati pë kaxkwa kamã ri apa xwÿnh? Amex o amex Tirtũm.

¹⁰Apê më ijamãr mex xwÿnh maati na ka.

Na hte kaxkwa kamã më kot ri amã tanhmã amnhĩ nhĩpêx to ho më pa xwÿnhjaja akôt pix mã amnhĩ nhĩpêx o ri pa. Tã ijaxwÿja inh mã më uràk në akôt pix mã amnhĩ nhĩpêx o ri ixpa hprãm.

¹¹Në kwa jarãhã më inh mã mëmoj gõ pa më akuk-wak ri ho apku.

¹²Na pa hte tõhã amnhĩ tomnuj në Tirtũm. Nom më kot tanhmã ixtomnuj to xwÿnhjaja na pa hte ãm më omu në amnhĩ tã tanhmã më ho hkêt në. Në ja ho ijamakêtkati në axte kãm ijamaxpër kêt në. ã ixte amnhĩ nhĩpêx anhÿr jakamã kwa ja hã ixpumu në ixpyrà në ixte tanhmã amnhĩ tomnuj to hã ixpumu në hã tanhmã ixto hkêt në. ãm ho ajamakêtkati kurê kumrêx në axte kãm ajamaxpër kêt në.

¹³Në kot paj nhÿrmã tanhmã amnhĩ tomnuj to kaxyw ka ja hã ixpumu në ixte ã amnhĩ nhĩpêx anhÿrja në ixto htÿx në pa tanhmã amnhĩ tomnuj to hkêt në. ãm mëmoj punuj pë ixpytãr rãhã ho apa Tirtũm. Tã ãm ja pix na hapêx. Anë.

—E kêr ka më ã Tirtũm mã amnhĩ jarênh anë. Anë.

¹⁴—Në koja mëhõ tanhmã anhĩpêx to htã ka ho ajamakêtkati në axte kãm ajamaxpër pix o ri apa hkêt në. Hã koja kaxkwa kamã Mëpahpãm maati ja hã apumu në apyrã në tanhmã ate amnhĩ tomnuj to ho hamakêtkati në axte kãm hamaxpër kêt në. ¹⁵Nom kot kaj më ã amnhĩ nhĩpêx anhÿr kêt në. Në tanhmã më kot më atota ã anohtÿx rãhã ho apa hãmri nhũm Mëpahpãm maati ja më apyrã në më ate tanhmã amnhĩ tomnuj to ho hamakêtkati hkêt në. ãm hã nohtÿx rãhã ho pa ho pa. Anë.

Tanhmã më pahte Tirtũm mã mex o mex ã harênh to

Rukre 18.11-12

¹⁶Nhũm Jejus arĩ më kãm kapër në më kãm:

—Në më kot amnhĩ to jarkrar xwÿnhjaja na htem Tirtũm mã amnhĩ jarênh kaxyw hãmri në tõhã ho apkur kêt rãhã kãm amnhĩ jarênh jakamã hkuk kaprĩ në hkwÿjê hkôt pa. Tã mo kaxyw na htem ã më noo mã amnhĩ nhĩpêx anë? ãm më apkur kêt rãhã Tirtũm mã amnhĩ jarênh ã më omunh pix kaxyw. Tã ra jar pika ja kamã më kot ja hã më omunh jakamã koja Tirtũm nhÿrmã ja hã tanhmã më ho mex to hkêt në. Jakamã kwa kêr ka më ho më uràk kêt në. ¹⁷Kêr ka më tõhã Tirtũm mã amnhĩ jarênh rÿy kaxyw axàpkur kaga hãmri në amnhĩ krã kahõ në amnhĩ jaxwÿr mux në akuk kÿnh në ri akwÿjê hkôt apa. ¹⁸Hãmri në nhÿri më hkàx ã ahte kãm amnhĩ jarê në kãm mex o mex ã harê. Kot kaj më ã më hkàx ã amnhĩ nhĩpêx anë nhũm më akwÿjaja më axàpkur kaga hã më apumunh kêt në. Nhũm Tirtũm pix ja hã më apumu. Hãmri në nhÿrmã ja hã më ato mex në. Anë.

Kaxkwa kamã mëmoj mex

Rukre 12.33-34; mãänën Sikũn Ximotre 4.8; Wam Pêtre 1.4; Eprêw 10.34

¹⁹Nhũm Jejus arĩ më kãm kapër në më kãm:

—Në mãänën ja. Kêr ka më jar pika ja kamã akukrêx rũnh o apa hkêt në. Kêt jar më hikukrêx koja kritpêmx mex kêt në. Kot kaj më ho akuprõ nhũm amnhõre apê homnu rÿ paratre apê homnu. Në kàx o më akukrêx nhũm haxwÿja apê omnu rÿ nhũm mëhõ apê hkwÿ ho ahkĩ. ²⁰Jakamã kêr ka më akukrêx rũnh o apa hkêt në. Kaxkwa kamã Tirtũm kot më akutêp më akukrêx o pikuprõnhja na kêt mex kumrêx o jar më hikukrêx

jakrenh par. Jakamã kêr ka mê amã nhÿrmã kaxkwa kamã akukrêx mex prãm xaj tãm mê piitã tãm mê hipêx nê mê ho mex o ri apa. Nê mê kamã axukaprÿ nê. Nê Tirtûm kôt ri amnhÿ nhÿpêx mex nê. Hãmri nhÿm ã mê ate amnhÿ nhÿpêx anhÿr ã mê apumu nê mê akutêp mê amã mêmoj mex kwÿ jaxwÿ. Kaxkwa kamã mo amnhôre nê mo paratre? Nê kamã mo mê ahkÿnh xwÿnh? ãm kamã amrakati kumrêx. ²¹ Kot kaj mê jar akukrêx rÿnh hãmri nê ãm tanhmã apê homnu hto pix kukamã ajamaxpêr. Nom kot kaj mê apê Tirtûm kra hã kaxkwa kamã akukrêx mã ajamaxpêr rãhã ho ra akÿnh nê ri apa.

²² —Nê kot kaj mê ixkapêr ma nê ixkôt amnhÿ nhÿpêx hãmri nê tãm amnhÿ nhÿpêx. Nê tãm axpên hipêx. Jao te hirã kamã arÿt mex pyrãk o amnhÿ nhÿpêx. ²³ No koja mêmô ixkapêr ma nê ãm kuma nê ixkwÿm ri amnhÿ nhÿpêx o pa. Hãmri nê te kamãt kô kamã mêmô rÿt mex kêt kot amnhÿ nhÿpêx pyrãk o amnhÿ nhÿpêx. E kêr ka mê ã amnhÿ nhÿpêx anhÿr pymaj ixkapêr ma nê kãm ajamaxpêr tÿx rãhã ho ri apa.

²⁴ —Nê kot kaj apyxi nê anhô patrãw hamêxkrut hãmri nê arÿgro pyxi hã hamê wa kãm axàpênh o amÿkry hkêt nê. Kot kaj anê nê hõ gryk ã ihõ kaga. Ja pyrã nê kot kaj mê jar akàxpore nê akukrêx pix mã ajamaxpêr nê amã hapê ho akwÿjê pê ho anhôxy ho ri apa. Nê gryk ã Tirtûm kãm hprãm xà hkôt tanhmã ho mê ho mex to hkêt nê. Jakamã kwa kêr ka mê Tirtûm pix mã mãn ajamaxpêr rãhã nê. Jao akàxpore nê akukrêx pix kukamã ajamaxpêr o ri apa hkêt nê. Anê.

Mê pahte tee ri amnhÿ kukamã pajamaxpêr kêt ã mê pamã karô

Rukre 12.22-31; mãänên Piripos 4.6; Wam Pêtre 5.7

²⁵ Nhÿm Jejus arÿ mê kãm kapêr nê mê kãm:

—E. Kwa kêr ka mê tee ri mêmoj tã amnhÿ kukamã ajamaxpêr kêt nê. Tanhmãn axàpkur xà rÿ axê ka mê tee ri hkukamã ajamaxpêr kêt nê. Mêmoj piitã hkukamã tee ri ajamaxpêr o ri apa hkêt nê. Tirtûmja àhpumunh tÿx o àhpumunh tÿx xwÿnh na. Na pre àhpumunh tÿx o mê anhÿpêx ka mê kukwak ri atÿr nê apa. Jakamã xà kot mê amã mê anhô ho pa kaxyw àhpumunh kêt? Nà ja kaxyw àhpumunh tÿx kênã. Kêp mê anhÿpêx xwÿnh jakamã mãänên kêp mê amã mê anhô xwÿnh. Nê kêp mê amã mê axê nhõr xwÿnh.

²⁶ —Mãn ka htem kuwênhre pumu. Na hte tee ri amnhÿ xàpkur xà hkukamã hamaxpêr o hkaprÿ nê ri pa hkêt nê. Mê anhÿpêxã maati tãm na hte kãm ô ho pa. Tã kãm mê ajapê htÿx o kot kuwênhre jakrenh jakamã koja urãk nê mê amã mê anhô rãhã ho pa.

²⁷ —Nê xà kot kaj mê kritpêm atÿr prãm xaj ja pix kukamã ajamaxpêr rãhã nê ra ajamaxpêr kôt kritpêm atÿr nê apa? Nà kot kaj mê anhÿr kêt nê.

²⁸ —Mãn ka htem akunÿ kamã pixôrã pumu. Na hte tee ri tanhmã kute hkukamã hamaxpêr o ra hkaprÿ nê harir kêt nê. ²⁹ Tã nom muxre nê harir ka mê omu. Te ho amnepêm pahшти Sarumãw xê mex pyrãk nom mex o hakre. ³⁰ Pixôrãreja koja mêmô arÿgro hã htÿr nê mux nê harir tã mêmô arÿgro hã ra grã pa nê hapêx. Kêp

pixôrã pix nê hapêx tokyx anhÿr tã nhÿm Tirtûm ho mex nê nhÿm mux nê harir. No mê kajaja na hte mê ato mex o pixôrã ho mexta jakre. Jakamã kwa mêmô kaxyw kot ka kêt mê tee ri amnhÿ xê hkukamã ajamaxpêr o ri akaprÿ nê apa? Kot kaj mê ã ajamaxpêr anhÿr jao kormã amnhÿ kaxyw Tirtûm mã ajamaxpêr tÿx kêt nê.

³¹ —Kwa mê tee ri axàpkur xà hkukamã ajamaxpêr o ri akaprÿ hkêt nê. Nê tee ri amnhÿ kukamã tanhmã ajamaxpêr to ho ri akaprÿ hkêt nê. ³² Mê kot Tirtûm kôt amnhÿ xunhwÿr kêt xwÿnhjaja na htem ã ri hamaxpêr anhÿr o pa. Tã nom kêr ka mê ho mê urãk kêt nê. Tirtûm ra kot mê panhõ mêmoj kêt kêt mê pahpumunh mex kênã. ³³ Jakamã kêr ka mê hkôt ri tanhmã amnhÿ nhÿpêx to rãhã ho ri apa. Nê amã ja pix tãnopxar prãm. Hãmri nhÿm Tirtûm amnhÿ tã mê apumu nê apkati mê mê amã mêmoj nhõr o pa.

³⁴ —Jakamã kwa kêr ka mê tee ri amnhÿ kukamã ajamaxpêr o akaprÿ nê apa hkêt nê. Tirtûm kot apkati mê mê pajamãr mex jakamã kêr ka mê jarãhã amnhÿ kukamã apkati mê ajamaxpêr kêt nê. Kê apkati mãn. ãm jarãhã pix mã mãn mê ate tanhmã amnhÿ nhÿpêx tota kukamã ajamaxpêr. Tirtûm kot mê pahpumunh mex o pa rãhã kênã. Anê.

Mê pahte axpên to pakapêr punuj kêt ã kot mê pamã karô

Rukre 6.37-38, 6.41-42; mãänên Römãn 2.1-3; Wam Korÿt 4.5; Xiakre 4.11-12

7 Nhÿm Jejus arÿ mê kãm kapêr nê mê kãm:

—Nê kêr ka mê atÿx ri amnhÿ krã hkôt tanhmã akwÿjê hõ kot amnhÿ tomnuj to hã harênh kêt nê. Kot kaj mê ã harênh anê nhÿm Tirtûm ja hã mê apumu nê mê kajaja ã mê ajarênh anê. ² Na hte tanhmã mê pahte axpên nhÿpêx to hã mê pahpumunh kôt tanhmã mê panhÿpêx to. ³ Jakamã kwa kêr ka mê mêmô kot tanhmã amnhÿ tomnuj to hã omu hãmri nê hã kãm kapêr tokyx anhÿr kêt nê. Akumrêx ate tanhmã amnhÿ tomnuj to hã amnhÿ pumu nê hkaga hãmri nê rÿ kormã ate mêmoj tã omunh xwÿnhhta wÿr tẽ nê hã tanhmã kãm akapêr to. Kêr ka mê ã amnhÿ nhÿpêx anhÿr o ri apa.

—Nê xà koja mê akwÿjê hõ tanhmã amnhÿ tomnuj to grire. Ka ate amnhÿ tomnuj tÿx o hakrenh tã ã kot amnhÿ nhÿpêx anhÿr ã omu nê hã kãm akir nhÿm amã ja mex nê nã? Nà koja amã ja mex kêt nê. Kot ka akumrêx ate tanhmã amnhÿ tomnuj tota kaga hãmri nê rÿ kormã anhÿr tanhmã kot amnhÿ tomnuj to grireta nê kãm akapêr nhÿm ja amã mex nê.

⁶ —Nê xà na htem mê apkur xà mex jamÿ nê rop mã kurê? Nà na htem anhÿr kêt nê. Ja pyrã nê kêr ka mê kot Tirtûm kaga xwÿnhjê mã kapêr jarênh o ri apa hkêt nê. Anê.

Mê pahte mêmoj to presija hã amnhÿ to Tirtûm wÿr

Makre 11.24; Rukre 11.5-13; Juãw 14.13-14; mãänên Wam Tesarôn 5.17; Xiakre 1.5-8, 4.1-3

⁷ Nhÿm Jejus arÿ mê kãm kapêr nê mê kãm:

—Nê xà kot we akraja kãm prãm nê tep ã awÿ ka axtem nê kagã hõ py nê kãm agõ? Rÿ nhũm krãhyre gre hã awÿ ka axtem nê makre hõ py nê kãm agõ? Nà na ka htem ã mē hipêx anhÿr kêt. Na ka htem kot mēmoj tã mē awÿr xà hkôt kãm mēmoj gõ. Mē ate amnhÿ tomnuj tã na ka htem akrajê ho mex o ri apa. Tã kaxk-wa kamã Tirtũmja na hte mē ato mex o mē ate mē akrajê ho mex jakrenh. Kãm mē ajapê htÿx kôt na hte mē amã mēmoj mex nhõr o pa. Jakamã kot ka mē mēmoj tã awÿ nhũm mē ama nê mē ate mēmoj tã hwÿr xàta kôt amã kugõ. Æm xatã mē ate hã axahwÿr o ri apaja nhũm mē amã hprãm xwÿnhhta gõ. Æm mēmoj tã hwÿr rãhã ho ri apa nhũm mē ama nê mē amã mēmoj tanhmã hipêx to. Te ho mēhõ kãm tep xành nê teprên-hxà hpyr nê xatã gõx kãm rênh o ãm pyrà nê xatã mēmoj tã awÿ. Hãmri nhũm mē ama nê mē amã hprãm xwÿnhhta gõ. Te tep kanhêr xwÿnhhta jatã kot tep kanhêr pyràk. Jao mē amã mēmoj prãm xwÿnhhta gõ.

¹² —Nê mē piitã mē kot tãm mē anhÿpêxja na mē amã hprãm. Tã kêr ka mē amnhÿ pyrà nê tãm nê piitã mē hipêx o ri apa. Mē kot tãm mē anhÿpêx kêt tã kêr ka mē axamnhÿx mē kêp anhõxÿ hkêt nê tãm mē hipêx. Kot kaj mē ã axpên nhÿpêx anê nê finat Mojes mē Tirtũm nhÿ hã mē kapêr o mē pa xwÿnhjê xujarênh xà hkôt axpên nhÿpêx mex o ri apa. Anê.

Pry pijakrut jarênh

Rukre 13.24; mãânên Piripos 3.19-21

¹³ Nhũm Jejus arÿ mē kãm kapêr nê mē kãm:

—Tirtũm kapêrja mē kêp hihtÿx jakamã na htem ohtõ nê hkôt amnhÿ xunhwÿr kêt nê. Na htem ãm hpÿnhre nê hkôt amnhÿ xunhwÿ nê hkôt amnhÿ nhÿpêx. Jakamã te Tirtũm nhõ krÿ hwÿr pry grireta ã hpÿnhre nê pa pyràk. No nhũm Satanasti hkôt mē kot amnhÿ xunhwÿr xwÿnhhta na htem Satanasti kôt pix mã tanhmã amnhÿ tomnuj to hprãm. Mē kãm mex jakamã nhũm mē amnhÿ nhÿpêx o te pry krepak rax ã axpên kôt mē ohtõ nê pa pyràk o amnhÿ nhÿpêx. Axtem kuwy hwÿr pry krepakja nõr tã nhũm mē htÿx kuwyja wÿr amnhÿ to pa. Jakamã Tirtũm kapêrja mē apê hihtÿx tã kêr ka mē mãmrÿ hkôt amnhÿ xunhwÿ. Jao Tirtũm nhõ krÿ hwÿr pry grireta ã mãn apa. Anê.

Mê kot amnhÿ to hêx xwÿnhjê jarênh

Rukre 6.43-44; mãânên Xiakre 3.9-12; Wam Juãw 3.10, 4.4-6

¹⁵ Nhũm Jejus arÿ mē kãm kapêr nê mē kãm:

—E kwa mē o kora. Mē akwÿjaja kot kêp Tirtũm nhÿ hã kapêr jarênh xwÿnh ã amnhÿ jarênh tã na htem ja hã amnhÿ to hêx. Nhũm htem kãm mē kapêr mar prãm nê. Te mē kapêr mex pyràk tã no nhũm htem ãm mē kãm amnhÿ to hêx pix o ri mē hkôt pa. Mē kot mar nê axtem nê Tirtũm kapêr kwÿm tanhmã amnhÿ nhÿpêx to kaxyw nhũm htem hêx rom tanhmã mē kãm kapêr to. Jakamã kwa mē o kora. Mē axkãm ajamak rom nê amnhÿ nê mē omunh mex nê. ¹⁶ Kêr ka aprÿ hã mē piitã mē kot tanhmã amnhÿ nhÿpêx to hã mē omu nê rÿ kormã tanhmã mē harênh to. Mē hamaxpêr punuj xwÿnhhta kêp Tirtũm nhÿ hã kapêr jarênh

xwÿnh kêt. No koja mē tãm hamaxpêr nê tãm amnhÿ nhÿpêx ka ja hã mē omu nê mē kêp Tirtũm nhÿ hã kapêr jarênh xwÿnh ã mē omunh kurê kumrêx. Na htem hprÿ hã mē kot tanhmã amnhÿ nhÿpêx to ho pa hã mē omu nê rÿ kormã tanhmã mē harênh to. ¹⁷ Na htem hamaxpêr punuj hãmri nê hkôt tanhmã amnhÿ tomnuj to. Nom koja mēhõ hamaxpêr mex nê hãmri nê hkôt tãm amnhÿ nhÿpêx mex o pa. ¹⁸ Na htem tanhmã hamaxpêr to xà hkôt tanhmã amnhÿ nhÿpêx to ho pa.

¹⁹ —Nê koja mēhõ õ pÿ hpàr õ hkêt japêr nhũm tee ri omu hãmri nê krãhta nê kuwym kumê. Ja pyrà nê koja mēhõ tanhmã amnhÿ tomnuj to ho pa nhũm Tirtũm tee ri ja hã omu hãmri nê ã kot amnhÿ nhÿpêx anhÿr o paja mÿrapê kuwy hwÿr kumê. ²⁰ Jakamã kot kaj mē tanhmã mē kot amnhÿ nhÿpêx to ho pa hã akwÿjê pumu nê ra aprÿ hã tanhmã mē kute hã mē omunh kurê kumrêx. Mē kêp Tirtũm nhÿ hã kapêr xwÿnh ã mē omu rÿ mē kêp hkÿwÿm ri kapêr xwÿnh ã mē omu. Anê.

Mê kot Tirtũm nhõ krÿ hwÿr gjêx mã xwÿnhjê jarênh

Rukre 13.25-27; mãânên Sikũn Korit 13.5; Wam Juãw 2.3-6

²¹ Nhũm Jejus arÿ mē kãm kapêr nê mē kãm:

—Nê Inhÿpêxã Tirtũm mē wa inhõ krÿja wÿr koja mē piitã gjêx kêt nê. Æm mē kot kapêr kôt amnhÿ nhÿpêx o mē pa xwÿnh pixjaja koja mē nhÿrmã ma hwÿr agjê. Na hte mē hkÿwjaja ixto "Pahihti" anhÿr ã ijarênh tã no ãm ixkôt ri amnhÿ nhÿpêx kêt nê. Jakamã koja mē nhÿrmã wa inhõ krÿ hwÿr àpir kêt nê. Kot paj nhÿrmã mē piitã mē htÿr ri tanhmã mē kot amnhÿ nhÿpêx to ho pa hã mē omunh xà hkôt tanhmã mē harênh to. Mē mex ã mē hkÿwjê jarê nê mē kot amnhÿ tomnuj ã mē hkÿwjê jarê. Hãmri nhũm mē hkÿwÿ kot ixkôt amnhÿ nhÿpêx o pa hkêt xwÿnhhta kuwyta wÿr ma pa pymaj tee ri amnhÿ kukamã hamaxpêr hãmri nê tanhmã inhmã amnhÿ jarênh to nê inhmã: "Kwa Jejus. Xà ate ixpumunh kêt? Na pa pre amnepêm ixhtÿr ri pikap ixpare ri anhÿ hã aa mē kot mēmoj pumunh kêt kwÿ ho anhÿr rax nê. Nê ixkwÿjê nê mēkarõmnuti jano nê mē kãm akapêr jarênh o ri ixpa. Kwa xà ate ja hã ixpumunh kêt?" Anhÿr o inhmã amnhÿ jarê.

—Nom mē htÿr ri ã mē kot amnhÿ nhÿpêx anhÿr o pa htã ixkapêr kôt amnhÿ nhÿpêx kêt jakamã kot paj mē kuma nê ãm mē kuma nê amnhÿ nê mē hano nê mē kãm: "Tk kwa mē ma mra. Mē apê ixkwÿ hkêt. Mē ate ixkôt amnhÿ nhÿpêx o apare hã. Æm mē ate amnhÿ tomnuj xwÿnh na ka mē. E mē ma kuwy hwÿr amrar kurê kumrêx." Anhÿr o kot paj amnhÿ nê mē hano. Hãmri nhũm mē kot ixkôt amnhÿ nhÿpêx o mē pa xwÿnh pixjaja ma Tirtũm mē wa inhõ krÿ hwÿr gjêx pa. Anê.

Ixkre pijakrut jarênh

Rukre 6.46-49; mãânên Xiakre 1.22-25; Wam Juãw 2.3-6

²⁴ Nhũm Jejus arÿ mē kãm kapêr nê mē kãm:

—E kot paj mē amã awjarê ka mē ixujarênh ma. Nà mē kot ixkapêr mar nê hkôt amnhÿ nhÿpêx o mē pa xwÿnhhta te mē kot ixujarênh ja pyràk. Mē kot amnhÿ nhÿpêx o te mēhõ kot amnhÿ kukamã hamaxpêr mex

nê aptÿx kãm amnhîm òrkwÿ nhîpêxja pyrâk. ²⁵ Koja mēhō aptÿx kãm amnhîm hipêx nhûm mēmo arîgro hã na wrÿk rax nê gō htãm rax nê hanhi no nhûm arî ãm tÿx nê xa. Tã kot kaj mē ixkôt amnhî nhîpêx o ri apa hã kot kaj mē te ixkre ja pyrâk. Jao amex nê aja-makêtkati nê ri apa. Te ho gō htãm kot ixkre janhir nhûm arî ãm tÿxta pyrâk.

²⁶ —No mē kot ixkapêr mar nê ãm mar xwÿnhjaja. Te mē kot mēhō kot amnhî kukamã hamaxpêr mex kêt nê htÿx mōr nê gō mÿri gyw rerek kãm amnhîm òrkwÿ nhîpêx pyrâk. Koja mēmo arîgro hã òrkwÿ hã kôk xapêr tÿx nê na wrÿk rax nê. Nê gō htãm nê hanhi nê kêp grãnh pa. Jakamã koja mēhō ixkôt amnhî nhîpêx kêt nê te kot ã kot amnhî nhîpêx anhÿr xwÿnhhta pyrâk. Jakamã kwa mē ixkapêr mar tÿx nê hkôt amnhî nhîpêx rãhã ho ri apa. Te mēhō aptÿx kãm òrkwÿ xãm xwÿnhhta pyrâk. Anê.

²⁸ Nhûm pre Jejusja ã mē kãm ujarênh ry anê nhûm mē amnhî jaêr pê kot tanhmã mē ahkre htoja mar o hkrî. ²⁹ Hãmri nê axpên mã harênh o:

—Hêxta waa nê. ãm hãmri na ã mē pamã kapêr anê. àhpumunh tÿx kôt na hte ãm hãmri tanhmã mē pamã ujarênh to. Pêr ãm Tirtûm kapêr tûm o mē ahkre xwÿnhjê kurom àhpumunh tÿx kumrêx. Anê.

Kà nhy hkro xapêr o pa xwÿnh jarênh

Makre 1.40-45; Rukre 5.12-16

8 Tã nhûm Jejus mē kãm kapêr pa hãmri nê hixêt prêeta rûm akupÿn wrÿ nê ma tē nhûm mē ohtō nê ma hkôt mra. ² Hãmri nhûm mēhō my hkà nhy hkro xapêr o pa xwÿnhja omu nê hwÿr tē. Hãmri nê kutã hkônkrã ho tēm nê hipō nê nhÿ nê amnhî to kuwÿ nê kãm:

—Pa Pahihti. E ot pa awÿr amnhî to tē. Akupÿm ate mē ixto mex kaxyw axàhpumunh tÿx jakamã kot ka amã akupÿm ixto mex prãm nê mãmrî ixto mex. Anê.

³ Hãmri nhûm Jejus kuma nê hkà punuti hã ðhkra xi. Amnhî kamã kahak kêt nê hã ðhkra xi nê kãm:

—Nà kot paj ato mex. E akupÿm akà mex. Anê.

Hãmri nhûm hkà akupÿm mex kurê kumrêx. ⁴ Hãmri nhûm Jejus kãm:

—E kêr ka amnhî tã mē kãm tanhmã ijarênh to hkêt rãhã ma patre hwÿr tē kē akupÿm akà mex ã apumu. Hãmri ka hpãnhã amnepêm finat Mojes kot mē ate akupÿm amex ã Tirtûm mã tanhmã amnhî nhîpêx to hã karōta ka kãm ho anê. Kê mē piitã akupÿm akà mex ã apumu. Anê.

Pôristi krãhtûm mã àpênh xwÿnh jarênh

Rukre 7.1-10

⁵ Tã nhûm Jejus ma krî pê Kapanaû hwÿr mō. Hãmri nê hwÿr pōj nhûm Rôm nhō xwÿnh pê pôristi krãhtûmja omu nê hwÿr tē. Kêp Ijaew kêt tã hwÿr tē. Na pre kãm àpênh xwÿnh kêp à htÿx nê nō nhûm omu nê tee ri hkukamã hamaxpêr. Hãmri nê Jejus ra ò krî hwÿr hpôx ã omu nê hwÿr tē nê kãm harê nê kãm:

⁶ —Pa Jejus? E ot pa awÿr tē. Inhmã àpênh xwÿnhja na ixpê à htÿx nê. Ra ð kamã htyk pa nê nō. O mÿj inhōrkwÿ kamã nō. Anê.

⁷ Nhûm Jejus kuma nê kãm:

—Tÿ? Tôe. Nà pa ma akôt tē nê akupÿm amã ho mex. Anê.

⁸ Hãmri nhûm tee ri kuma nê kãm:

—Kwa akînhã ixpê Ijaew kêt jakamã ixte amnhî kuk ã ixpijaam. ãm ja rûm mãn akapêr pix o akupÿm inhmã ho mex nã? Ixpê mē hkrãhtûm na pa hte inhō pôristi mã mēmoj tã karō nhûm mē inhmar xà hkôt inhmã mēmoj tanhmã ho. Na pa hte mē kãm: “E mē ma mra nê ã amnhî nhîpêx anê.” Anê nhûm htem inhma nê ma mrar kurê kumrêx. Rÿ pa mē kãm: “E mē amnê ixwÿr mra nê ã amnhî nhîpêx anê.” Anê nhûm mē inhma nê ixwÿr mra. No kêt ixrom axàhpumunh tÿx kôt na ka hte mē aja mã akapêr nhûm ama nê mē kêp hapôx nê ma mrar kurê kumrêx. Jakamã kwa ãm ja rûm akapêr pix o akupÿm inhmã ho mex nã? Anê.

¹⁰ Hãmri nhûm Jejus amnhî jaêr pê kot kãm ã kapêr anhÿrta ma nê hkînh nê. Hãmri nê hã hkôt ri mē mōr xwÿnhjê mã kãm:

—Kwa xà na ka mēmyja kapêr ma? Mē pahkînh ã kêp Ijaew kêt tã mē arom amnhî kaxyw inhmã hamaxpêr tÿx nê. Aa mē atō uràk nê ã amnhî kaxyw inhmã ajamaxpêr tÿx anhÿr kêt tã nhûm mē arom kãm àpênh xwÿnh kaxyw ã inhmã hamaxpêr tÿx anê. ¹¹ Nà koja nhÿrmã mē hkwyjaja kêp Ijaew kêt tã ohtō nê pika pi-itã kurûm ma Tirtûm mē wa inhō krî hwÿr api nê hwÿr agjê. Nê wa ixkuri wa inhō krî kamã Ijaew pãr krax pê Apraãw nê Ijak nê Jako mē pimràatã pa ho pa. Mē kêp Ijaew kêt tã mē ðhkô hã apkur mex o hkrî nhûm Tirtûm mē ho mex rax o pa. ¹² No pêr mē apê Ijaew kwÿjaja kot kaj mē hkôt hwÿr agjêx kêt nê. Tirtûm kãm hwÿr mē agjêx prãm tã ka mē axtem nê hkaga. Jakamã kot kaj mē ma kamàt kô xihtÿx rax wÿr ajapêx nê mē kêp awry rax nê mē kot amnhî xà htÿx kamã hamak tûm xàta kamã apa ho apa. Hãmri nê tee ri mē ixwÿr agjêx prãm kaprÿ nê akaprî xàj mur nê amnhî kamã agryk tÿx nê. No ãm tee ri amnhî kamã agryk kaprÿ. Mē ate Tirtûm kapêr kaga nê hkôt amnhî xunhwÿr kêt jakamã kot kaj mē nhÿrmã ã amnhî nhîpêx anê. Anê.

¹³ Nhûm pre ã Jejusja mē kãm kapêr anê. Hãmri nê pôristi krãhtûmta mã kãm:

—E mãmrî ma akupÿm tē nê amã àpênh xwÿnhhta pumu. Ra ate kaxyw inhmã ajamaxpêr tÿx jakamã na pa ra akupÿm amã ho mex. E akupÿm tē nê omu.

Anhÿr o kãm kapêr rôm nhûm ra akupÿm kãm mex kurê kumrêx.

Jejus kot ahpÿnhã mē à xwÿnhjê ho mex

Makre 1.29-31; Rukre 4.38-41

¹⁴ Tã nhûm Jejus ma Simãw Pêtre nhōrkwÿ hwÿr tē nê hwÿr axà. Nhûm Simãw Pêtre xupãnhgêx ra à nê hkà kagro htÿx nê nō. ¹⁵ Hãmri nhûm Jejus hwÿr axà nê omu nê ðhkra hã kupy nhûm hkà hakry nê akupÿm hihtÿx kurê kumrêx. Jakamã kãnhmã nhÿ nê mē kãm mēõ hã àpênh o ri mra.

¹⁶ Tã nhũm ra awjakry. Ra kamàtre ho mō nhũm mē piitã Jejus wÿr mē à xwÿnhjê ho mra. Nê mēkarōmnuti kot mē hwÿr gjêx xwÿnhjaja nhũm mē hwÿr mē o mra. Hãmri nhũm mē omu nê akupÿm mē piitã mē ho mex. Mē à xwÿnhjê ho mex nê mē hkwÿjê nê mēkarōmnuti jano. Âm kapêr pix o mē nê mē hano nhũm mē kêp hapôj nê ma hapêx. ¹⁷ Na pre ra Tirtũm nhÿ hã kapêr xwÿnh finat Ijaisja ã amnhĩ nhĩpêx anhÿrja kukamã amnepê mē kãm harênh o:

Tirtũm kot mē pahwÿr mēnh mã xwÿnhja koja nhÿr mã wrÿ nê mē panê mē paxà piitã rênh pa nê akupÿm mē pahto mex pa. Anê.

Na pre ã finat Ijaisja Jejus kukamã harênh anê. Tã nhũm wrÿ nê kot harênh xà hkôt ã amnhĩ nhĩpêx anhÿr o pa.

Wa kãm Jejus kôt amnhĩ xãm prãm xwÿnh wa harênh

Rukre 9.57-62

¹⁸ Tã nhũm Jejus amnhĩ pu hã rít nê tee ri hwÿr mē mrar xwÿnhjê pumu hãmri nê hkôt mē pa ho mē pa xwÿnhjê mã kãm:

—E ma pu mē pàr mã agjê nê ma xarmã mō. Anê.

¹⁹ Hãmri nhũm mē nojarêr rôm nhũm Tirtũm kapêr tũm o mē ahkre xwÿnhjê hō Jejus wÿr tē nê kãm:

—Pa mē ijahkre xwÿnh? E pa ma akôt ri ixpa ho ixpa nà. Anê.

²⁰ Hãmri nhũm kuma nê kãm:

—Ko ka mã. Kam nê rí ma ixkôt ri apa. Nom kêr ka inhmar kumrêx. Xore na hte pika hkre kamã hikwÿ. Nê kuwênhre pĩ nhĩmök ã hikwÿ. No pa ixpê Tirtũm kot mē awÿr inhmēnh xwÿnh tã mry hkĩnhã inhörkwÿ hkêt. Na pa hte amarí nhãm krí hwÿr ixpa nê nhãm hō hwÿr ixpa. Tã xà kot ka ixpyrà nê ã amnhĩ nhĩpêx anhÿr o ri apa nà? Anê.

²¹ Hãmri nhũm pãnhã hōja hwÿr tē. Ra mē kot hkôt amnhĩ xunhwÿr xwÿnhjê hōja hwÿr tē nê kãm:

—Pa Pahihti. E pa amã amnhĩ jarê ka inhma. Kot paj ma akôt ixpa ho ixpa no âm kormã. Koja nhÿrmã inhĩpêêxà tanhmã amnhĩ to nê ty măn. Pa haxà hãmri nê rí kormã ma akôt ixpa ho ixpa. Anê.

²² Hãmri nhũm kuma nê kãm:

—Kwa nà ri ã ajamaxpêr anhÿr kêt nê. Ma ixkôt apa ho apa kurê kumrêx. Kê mēmoj inhnê ano kupy rÿ apê àmnàr kêt nê. Kwär mē htír tũm nê mē pa hkêt mã xwÿnhjaja măn axwakre kamã amã anhĩpêêxà jamär o pa nê haxà. Anê.

Jejus kot kôk o pinhkrênh jarênh

Makre 4.35-41; Rukre 8.22-25

²³ Tã nhũm mē ra xarmã nojarêr nhũm Jejus mē hkôt mē pa ho mē pa xwÿnhjaja pàr wÿr agjê hãmri nê himô raxja ã ma xarmã mō. ²⁴ Hãmri nhũm Jejus ra ôtxwa nê ra gôr nê nō. Puh nhũm naja hkoko ho mō nê kôk xàpêr tÿx kumrêx. Nhũm gô kànhmã harí nê axpên tak tÿx nê. Xatã axpên tak nê pàr kre kamã axkapí nhũm ra àr o mō. Hãmri nhũm mē tee ri omu nê kãm ma htÿx kumrêx. Nê tee ri amnhĩ nhĩpêx. No

nhũm Jejusja htÿx gôr nê nō. ²⁵ Hãmri nhũm mē hwÿr hprôt nê kumra nê kãm:

—Kwa Pahihti. Kot puj mē jarãhã pahtyk pa. Kwa tokyx kànhmã nhÿ nê ri tanhmã amnhĩ nhĩpêx to wehe. Anê.

²⁶ Hãmri nhũm hkrãkato nê kànhmã nhÿ nê kôk mã kapêr nê kãm:

—E kwa hãmri anhĩkrê. Anê.

Puh nhũm hpinhkrênh pa nhũm gôja tãm nör kurê kumrêx. Hãmri nhũm Jejusja hkôt mē pa ho mē pa xwÿnhjê hwÿr apkjê nê mē kãm:

—Hêxta waa nê. Kwa pêr âm kormã te mē ate amnhĩ kaxyw Tirtũm mē wa inhmã ajamaxpêr tÿx kêt pyràk. Hã na ka mē amã ma xàj tee ri amnhĩ kukamã ajamaxpêr. Anê.

²⁷ Hãmri nhũm mē amnhĩ jaêr pê ã kot amnhĩ nhĩpêx anhÿrja ã omu nê tee ri hamaxpêr nê axpên pumunh pê omunh o kuhê. Hãmri nê axpên mã:

—Kokÿÿ. Pêr Jejus kêp mē panhĩō hkêt. Mē pahtō kot pu we te kot amnhĩ nhĩpêx pyrà nê kôk mã pakapêr nhũm hpinhkrênh kurê kumrêx? Nà Jejusja mē pakurom àhpumunh tÿx o àhpumunh tÿx. Anê.

Jejus kot wa nê mēkarōmnuti janor

Makre 5.1-20; Rukre 8.26-39

²⁸ Tã nhũm mē ra himô rax pê Garirejja ã rê nê pika pê Geras wÿr pôj nê kamã mō. Hãmri nhũm ra mēhō myja wa hamêxkrut nê mē kutã tē. Ra mēkarōmnuti kot hamê wa hwÿr gjêx xwÿnhja wa. Mēkarōmnuti xohô kot tanhmã wa ho jakamã nhũm wa oprê htÿx nê hihtÿx rax nê wa pa. Jakamã nhũm mē piitã kãm wa uma nê amnhĩ nê mē htykjê jagjênh xà hã kên kre kaêx kãm wa kumê nhũm wa kamã pa ho pa. Jakamã nhũm wa Jejus kutã tē nê amnhĩ wÿr omu hãmri nê amnhĩ nê tanhmã kãm kapêr to. Nom mēkarōmnuti nhÿ hã àmra kamã kãm kapêr nê kãm:

²⁹ —Pa Tirtũm Kra Jejus? Mo kaxyw na ka mē ixwÿr tē? Kwa tanhmã mē ixto hkêt nê. Ate tanhmã mē ixtomnu hto hã arígrota kormã katoore hã. Anê.

³⁰ Nhũm ra krí nhō xwÿnhjê hkrit hagrô ohtô nê ri mē hpum pa. ³¹ Nhũm mēkarōmnuti mē omu hãmri nê amnhĩ to Jejus wÿr nê kãm:

—Kwa kot ka jahti wa nê mē ijapôx japêr nê mē kot amnhĩ xà htÿx kamã hamak tũm xàta wÿr mē ixrênh kêt nê. Hagrô hkwy mÿj wÿr măn mē ixrê pa mē hpãnhã hwÿr măn hagjê nà? Anê.

³² Hãmri nhũm mē kuma nê mē kãm:

—Tôe mē tãm mē hwÿr măn mra. Anê.

Hãmri nhũm mē kuma nê myta wa kêp hapôj nê hagrô hwÿr mrar kurê kumrêx nê hpãnhã kãm gjêx pa. Hãmri nhũm hagrôta mēkarōmnuti pymaj amÿra nê ma hprôt nê himô hã hixêt prêk ã axpum rôrôk nê gôx kãm mrô nê pikaprär pa. ³³ Hãmri nhũm hagrô jamär o ri mē pa xwÿnhjaja tee ri omu hãmri nê ma akupÿm krím hprôt nê mē kãm awjarê. Nê myta wa akupÿm tãm hkrã hã harênh o hprôt. ³⁴ Hãmri nhũm krí nhō xwÿnhjaja tee ri mē hkrit jarênh ma nê ma piitã Jejus wÿr mra nê hkaxpa. Hãmri nê amnhĩ nê kãm:

—E kwa mẽ ma amrar kurê kumrêx. Anê.
Hămri nhũm mẽ kuma nê awjanã nê ma akupým pan rê.

Í kamã htyk xwýnh jarênh

Makre 2.1-12; Rukre 5.17-26; Juãw 10.37-38

9 Nhũm Jejus mẽ hkôt mẽ pa ho mẽ pa xwýnhjaja awjanã nê ma akupým pàr wýr mra nê gjêx pa nê akupým xarmã rê nê akupým Jejus nhõ krí hwýr mõ.
2 Hămri nê hwýr pøj nhũm krí nhõ xwýnh kwýjaja mẽ omu nê í kamã htyk xwýnhja mý nê Jejus wýr o tẽ. Nõr xà kamã nõr rãhã nhũm mẽ hã hije nê kumý nê hwýr o tẽ. Hămri nhũm amnhí tã mẽ omu. Ra mẽ kot hkràmnhwýta kaxyw kãm hamaxpêr tỳx ã mẽ omu nê í kamã htyk xwýnhhta mã kapêr nê kãm:

—Pa? Kwa tee ri amnhí kukamã ajamxpêr kêt nê. Na pa ra apê tanhmã ate amnhí tomnuj to ho ijpêx pa. Kot paj axte kãm ijamxpêr kêt nê. Anê.

3 Hămri nhũm Tirtũm kapêr tũm o mẽ ahkre xwýnhjaja tee ri ã kot kãm kapêr anhýrja ã kuma nê axpên mã:

—Tk. Kwa mẽhõ myti mýj kêp Tirtũm kêt tã te ri kot amnhí nhípêx pyrãk ã amnhí nhípêx. Tirtũm pix na kot mẽ nê mẽ kot amnhí tomnuj o hapêx xwýnh. Anê.

4 Hămri nhũm Jejus amnhí tã mẽ kuma nê mẽ kãm:

—Kwa mẽ ã ajamxpêr anhýr kêt nê. **5** Ixte mẽ nê mẽ kot amnhí tomnuj o ijpêx par ã amnhí jarênh tã mẽ ate ja kôt ixpumunh kêt jakamã na ka mẽ ja kaxyw ixkôt ajamxpêr kêt nê. Nom kot paj mẽ anoo mã akupým í kamã htyk xwýnhhta o mex ka mẽ apiitã hã ixpumu hămri nê ixkôt ajamxpêr kurê kumrêx. Ixpê Tirtũm kot mẽ awýr inhmênh xwýnhhta na pa. Ixte mẽ anê mẽ ate amnhí tomnuj rênh kaxyw na pre mẽ awýr inhmê pa mẽ awýr wrý. **6** Tã mẽ ate ja hã ixpumunh kaxyw kot paj mẽ anoo mã ja ho mex.

Anhýr o mẽ kãm amnhí jarê hămri nê í kamã htyk xwýnhhta mã kãm:

—E kànhmã xa nê anõr xàta py nê ma akupým anhõrkwý hwýr tẽ. Anê.

7 Puh nhũm kànhmã ãm kurê kumrêx nê nõr xà py nê mẽ noo mã kato nê ma akupým õrkwý hwýr tẽ.

8 Hămri nhũm mẽ piitã no hapôx rũnh nê omunh o kuhê nê kamã no pyma htỳx nê. Nê tee ri omu nê axpên mã:

—Kokýy. Kwa aa mẽ pahte ã mẽhõ kot amnhí nhípêx anhýr ã omunh kêt tã jarãhã ja pumu.

Anhýr o Jejus jarê hămri nê ý hã Tirtũm mã mex o mex ã harê.

Jejus kot amnhí kôt Matêwre hwýr

Makre 2.13-17; Rukre 5.27-32

9 Tã nhũm Jejus mẽ kêp kato nê hkôt mẽ pa xwýnhjê mẽ nhũm mẽ ma mõ. Hămri nê pa ixpê Matêwre ixpumu. Ixte Rõm kãm mẽ ho amnhíptàr xwýnh mã krí nhõ xwýnhjê pê kàxpore hkwy jamýnh xwýnh na pa pre. Nom mẽ kot ho tewên kryre htã ixte amnhím hkwy ho ixàrik prãm xàj na pa pre hte mẽ kãm ho rũnh nê harê. Jakamã nhũm mẽ piitã kãm ixkính kêt nê. Tã

pa pre mẽ kêp kàxpore jamýnh xà hã ixkre kamã mẽ kêp hamýnh o nhý nhũm Jejus mẽ hkwyjaja ijãnh mra nê ixpumu nê amnhí kôt ixwý nê inhmã:

—Pa? E axàpênhta kaga nê hpãnhã amnê mẽ ixkôt mãn tẽ nê ixkôt mãn ri apa ho apa. Anê.

Hămri pa kuma nê ixàpênh kaga nê ma hkôt tẽ. Nê hpãnhã hkôt ixpa ho ixpa.

10 Hămri nê mẽmo arígro hã amnhí nhõrkwý hwýr Jejus nê hkôt mẽ pa ho pa xwýnhjaja mẽ ixkràmnhwý hkwyjê hwý. Nhũm mẽ piitã mra nê inhõrkwý hwýr agjê nê ixkutã apkur o hkrí. Nê ixpyrà nê Rõm nhõ pahi mã mẽ kêp kàxpore hkwy jamýnh xwýnh kwý haxwýja ixwýr mra nê mẽ ixkutã apkur o hkrí. **11** Hămri nhũm Parijew nhõ xwýnhjaja mra nê inhõrkwý kapem mẽ ixàpkur ã mẽ ixpumu. Nê tee ri mẽ ixkaêx ã Jejus pumu hămri nê hkôt mẽ pa ho mẽ pa xwýnhjê hwýr agjê nê mẽ ixtã mẽ kãm akir nê mẽ kãm:

—Kwa mẽ kot jajê kutã apkur kêt tã mẽ akrãhtũmja axtem nê mẽ kutã apkur o nhý. Kwa nã mẽ kot amnhí tomnuj xwýnh kênã. Jejus kot amnhí to mex ronhýx mẽ kutã apkur kêt nê. Anê.

12 Hămri nhũm Jejus amnhí tã ã mẽ kapêr anhýrja ma nê mẽ kãm:

—Tk. Nà ixte tãm mẽ unhwýr kaxyw na pa mẽ kutã ixàpkur o nhý. Xà na hte tõtõja mẽ mex xwýnhjê hwýr mra nê mẽ hkane? Nà ãm mẽ à xwýnhjê pix wýr na hte mra nê tanhmã mẽ hkane hto. Ra mẽ ate ja pumunh mex. Tã ja pyrã nê na pa pre mẽ kot amnhí to mex xwýnhjê hwýr ixwrýk kêt nê. Mẽ kot amnhí tomnuj xwýnhjê pix wýr na pa pre wrý. Ixte tãm mẽ unhwýr kaxyw mẽ hwýr wrý nê ã jajê kutã ixàpkur o inhýr anê.

13 Ga mẽ ma mra nê Tirtũm kapêr ã kagà htũm kot ja jarênhja kamã harê nê ama. Harênh kot:

Na ka htem inhmã tanhmã amnhí jarênh to kaxyw hămri nê inhmã mẽmoj gõ nê tanhmã ixto mex to. Nom kêr ka mẽ ãm ja pix ho anhýr kêt nê. Mẽ mãänên mẽ piitã tanhmã mẽ ho mex to ho ri apa. Anê.

—Á Tirtũm kapêr ã kagà htũm kot ja jarênh kot anhýr. Tã ja pyrã nê na pa pre mẽ kot amnhí tomnuj xwýnhjê hwýr wrý nê mẽ kamã ixukaprí ho ixpa. Mẽ kot amnhí tomnuj kaga nê hpãnhã tãm amnhí nhípêx kaxyw na pa pre ã mẽ hwýr ixwrýk anê. Tã ka mẽ ri atỳx amnhí krã hkôt ã ixto akapêr anê. Anê.

Mẽ kot mẽmoj tã Jejus kukjêr

Makre 2.18-20; Rukre 5.33-35

14 Tã nhũm Juãw Paxis kôt mẽ pa xwýnhjaja Jejus wýr mra nê mẽmoj tã hkukja nê kãm:

—Pa? E ot pa mẽ awýr mra. Kwa mẽ inhmã mẽmoj jarê. Na pa htem tõhã Parijew nhõ xwýnhjê pyrã nê ixàpkur kêt kãm Tirtũm mã amnhí jarê. Tã nom akôt mẽ pa ho mẽ pa xwýnhjaja na htem àmnhix apkur o pa kamã kãm amnhí jarênh o pa. Kwa mo na htem mẽ ixpyrà nê tõhã apkur kêt kamã kãm amnhí jarênh kêt nê? Anê.

15 Hămri nhũm mẽ kuma nê mẽ kãm:

—Nà mo kaxyw kot kêt mẽ apkur kêt rãhã kãm amnhí jarê? Mẽ hkapríre hã. Mẽ kot ixkôt pa ho pa hã amn-

hĩ pumunh jakamã na htem hkĩnh nẽ ixkõt pa. Kormã ixte mẽ kamã ixpa kênã kot kêt mẽ apkur kêt rãhã Tĩrtũm mã tanhmã amnhĩ jarẽnh to. Xa na htem hkrãmnhwỹ hã hkĩnh kaxyw hã akuprõ nẽ hkaprĩ nẽ apkur kêt o kamãt nẽ mỳr o hkrĩ? Nà na htem anhỹr kêt nẽ. Na htem hã akuprõ nẽ hkĩnh nẽ hã apkur rũnh nẽ. Ja pyrã nẽ na hte ixkõt mẽ pa ho mẽ pa xwỹnhjaja ixkõt kormã àmnhĩx hkĩnh nẽ apkati mẽ apkur o pa. Nom koja mẽ kãm ixkurẽ xwỹnhjaja nhỹrmã tanhmã ixto hãmri nhũm mẽ hkaprĩ htỹx nẽ rĩ kormã tũhã apkur kêt rãhã Tĩrtũm mã amnhĩ jarẽ. Anẽ.

Mẽ pahte Jejus kõt amnhĩ nhĩpêx

Makre 2.21-22; Rukre 5.36-39

¹⁶ Nhũm Jejus mẽ piitã mẽ kãm kapẽr nẽ mẽ kãm: —Mẽ kot amnhĩ tomnuj xwỹnhjaja ra mẽ kot amnhĩ nhĩpêx tũm o amnhĩ pyrãk jakamã na htem tanhmã mẽ kot amnhĩ nhĩpêx nyw tota kaga. ¹⁷ Tã ixte amnhĩ nhĩpêx nywja te kot mẽ ate amnhĩ nhĩpêx tũm pyrãk kêt jakamã na ka htem ixkapẽr ma nẽ ãm ama. Kwa mẽ inhma nẽ mẽ ate amnhĩ nhĩpêx tũmja gryk ã ixkaga hkêt nẽ. Anẽ.

Mẽ hkra htyk nẽ mẽhõ ni kamrõ wa harẽnh

Makre 5.21-43; Rukre 8.40-56

¹⁸ Nhũm pre ã Jejus mẽ kãm kapẽr anhỹr o xa. Rõm nhũm mẽõ pahihija tẽ nẽ mar o xa. Hãmri nẽ hamaxpẽr o:

—Kokỹỹ. Jejusja ãm hãmri kệp pahi maati kumrẽx. Hã na ri ã kapẽr mex anẽ. E pa hwỹr tẽ nẽ ixkrare ho kuwỹ. Anẽ.

Hãmri nẽ hwỹr tẽ nẽ kutã hkõnkrã ho nhỹ nẽ kãm:

—Pa akupỹm mẽ ixto mex xwỹnh? E ot pa awỹr tẽ. Kwa ma ixkõt tẽ nẽ inhã ixkra nire pumu nẽ tanhmã inhã ho kê akupỹm inhã htĩr. Na ham ixpê ty pa kaxyw amã ijamaxpẽr nẽ man awỹr tẽ. Anẽ.

¹⁹ Hãmri nhũm kuma nẽ kãm:

—Tõe. Nà kot paj ma akõt tẽ. Anẽ.

Hãmri nẽ ma hkõt tẽ. Mẽ ixpê hkõt ixpa ho ixpa xwỹnhjê mẽ pa mẽ ma hkõt mõ. ²⁰ Nhũm mẽhõ ni kamrõ rãhã ho pa xwỹnhja ma mẽ ixkõt tẽ. Na pre hte hkamrõ hkryre rãhã ho pa hã amgrã pẽ 12 nẽ tee ri kãm amnhĩ mex prãm o pa. Jakamã Jejus jarẽnh ma nẽ amnhĩ kaxyw kãm hamaxpẽr kurẽ kumrẽx nẽ hamaxpẽr o:

—Ma pa kop ma hwỹr tẽ nẽ kệp ê nhĩrẽ pix kupênh tã akupỹm inhmex japêr. Anẽ.

Hãmri nẽ ma mẽ ohtõjê kaex kõt hwỹr tẽ. Nẽ katut kõt tẽ nẽ kệp ê nhĩrẽ kupê. ²² Hãmri nhũm Jejus ho hakẽx nẽ amnhĩ tã omu nẽ kãm:

—Pa? Kwa tee ri amnhĩ kukamã ajamaxpẽr kêt nẽ. Ate amnhĩ kaxyw inhmã ajamaxpẽr tỹx jakamã na ka ra akupỹm amex. E mãmri ajamakêtkati nẽ ri apa. Anẽ.

Hãmri nhũm akupỹm mex nẽ hkĩnh tỹx nẽ ma akupỹm tẽ. ²³ Hãmri pa mẽ ma htyk xwỹnh nhĩpêxã hkõt mra nẽ õrkwỹ hwỹr agjê nẽ mẽ pikuprõnh xwỹnhjê pumu. Nhũm mẽ ra mẽ hã htu rax nẽ. Nẽ omũj ri kaprĩ xaj pifti kakõr o hkrĩ nẽ omũj ri mur. Kax pẽ mur

nẽ amnhĩ tak o hkrĩ. ²⁴ Hãmri nhũm Jejus mẽ hwỹr axã nẽ mẽ omu. Nẽ ra kot my hkrata htyk ã omunh tã kuri mẽ mỳr o mẽ hkrĩ xwỹnhjê mã kapẽr nẽ mẽ kãm ãm õt nẽ nõr ã harẽ nẽ mẽ kãm:

—Pa? Kwa mon ka mẽ ri akaprĩ nẽ amỹr o akrĩ? E mẽ ma mra. Na wa hkrata wa kệp htyk kêt nẽ. Na ãm gõr nẽ nõ. Anẽ.

Hãmri nhũm mẽ kot ra htyk ã omunh mex jakamã kuma nẽ ãm kuma. Nhũm mẽ hkwyja axtem nẽ ri axpẽn mã hã hpẽr o pikẽnh o hkrĩ. ²⁵ Hãmri nhũm kapõt mã mẽ hano nhũm mẽ hapõj nẽ kapõt ã kuhê. Hãmri nhũm Jejusja htyk xwỹnhhta wỹr axã nẽ hpa hã kupy nẽ kãnhmã ãm nhũm akupỹm htĩr nẽ kãnhmã ãm kurẽ kumrẽx. ²⁶ Hãmri nhũm mẽ piitã akupỹm htĩr kãm omu nẽ ma ri krĩ piitã hkõt ri mẽ kãm harẽnh o hprõt.

Wa nohkre xwỹnh wa harẽnh

Matêwre 20.29-34

²⁷ Tã nhũm Jejus kato nẽ ma tẽ. Pa mẽ hkõt ixpa ho ixpa xwỹnhjaja ma hkõt mõ. Hãmri nhũm wa myja wa hamẽxkrut. Hamẽ wa nohkre xwỹnh wa Jejus jarẽnh ma nẽ hã ajêt nẽ hkõt rõrõk o mõ. Nẽ xatã amnhĩ to hwỹr o hkõt rõrõk o mõ nẽ kãm:

—Pa Jejus? E Tĩrtũm kot mẽ ixkaxyw axãm jakamã kwa wa ixpumu nẽ wa ixkamã axukaprĩ kêt wehe. Anẽ.

²⁸ Hãmri nhũm wa kuma nẽ wa hkukamã nhỹri ixkrem axã nhũm wa hkõt axã nẽ xa nhũm wa omu nẽ wa kãm:

—Pa? E xan ka wa ra amnhĩ kaxyw inhmã ajamaxpẽr tỹx nẽ nã? Anẽ.

Hãmri nhũm wa kãm:

—Tỹ. Wa ixte amnhĩ kaxyw amã ijamaxpẽr tỹx kênã. Anẽ.

²⁹ Hãmri nhũm wa kuma nẽ hamẽ wa no hã tĩkra xi nẽ wa kãm:

—Tõe. Nà war ate tanhmã amnhĩ kaxyw inhmã ajamaxpẽr to xã hkõt kot paj war anhĩpêx. Anẽ.

³⁰ Hãmri nhũm wa akupỹm rĩt mex kurẽ kumrẽx.

Hãmri nẽ akupỹm kato nẽ ma htẽm kaxyw nhũm wa kãm:

—E kêr ka wa nhãm mẽ kãm ixte war ato mex ã ijarẽnh kêt nẽ. ãm kwarĩ ho kwarĩ.

³¹ Anhỹr tã no nhũm wa kuma nẽ ãm kuma nẽ wa ma tẽ nẽ krĩ pu hã mẽ piitã mẽ kãm ri war amnhĩ tã harẽnh o mra.

Kapẽr kêt xwỹnh jarẽnh

³² Tã nhũm Jejus ma axte nhỹhỹm mẽ ixto mõ. Hãmri nhũm mẽhõ my mẽkarõmnuti kot hwỹr àr nẽ tanhmã ho nhũm kapẽr kêt nẽ pa xwỹnhja nhũm mẽ Jejus wỹr o tẽ. ³³ Hãmri nhũm omu nẽ nẽ mẽkarõmnuti jano nẽ kãm:

—E kệp akato nẽ ma tẽ. Anẽ.

Hãmri nhũm kuma nẽ kurũm kato nhũm akupỹm kapẽr mex kurẽ kumrẽx. Hãmri nhũm mẽ kot hã omunh xwỹnhjaja tee ri kot mẽkarõmnuti janor ã omu nẽ kamã no puma nẽ. Nẽ axpẽn mã:

—Kokÿÿ. Aa mẽ pahte ã mẽhõ kot anhÿr pumunh kêt kumrêx tã na pu mẽ jarãhã ja pumu. Anẽ.

³⁴ Nom nhũm mẽ hkwy pẽ Parijew nhõ xwÿnhjaja ax-tem nẽ hã mẽ kãm kapẽr o:

—Tk. Kot amnhĩ krã hkõt mẽ hanor kêt kẽnã. Mẽkarõmnuti nhõ pahi nhÿ hã kot mẽ nẽ mẽ hanor kẽnã. Anẽ.

Jejus kęp mẽ pakamã ukapřĩ xwÿnh

Makre 6.34; Rukre 10.2-3; Juãw 4.35

³⁵ Tã nhũm Jejusja krĩ ho ohtõ nẽ hkõt ri mẽ kãm Tĩrtũm kapẽr jarẽnh o pa. Pa mẽ hkõt ixpa. Na pre hte nhÿri krĩ hwÿr pøj nẽ mẽ kot Tĩrtũm kapẽr o mẽ ahkre xà hã ixkre hwÿr mra nẽ hwÿr agjẽ nẽ mẽ pikuprõnh xwÿnhjẽ jahkre. Nẽ mẽ kãm:

—E mẽ inhma. Tĩrtũm kãm mẽ apiitã mẽ ato hkra hprãm. Jakamã kwa mẽ ate amnhĩ tomnuj kaga hprãm xaj hkõt amnhĩ xunhwÿ nẽ kapẽr kõt amnhĩ nhĩpẽx. Jao amnhĩ nhĩpẽx nyw o amnhĩ nhĩpẽx o ri apa.

Anhÿr o mẽ kãm kapẽr. Hãmri nẽ ahpÿnhã ri tanhmã mẽ à kute xwÿnhjẽ ho mex. Nhũm mẽ ohtõ nẽ hkõt mar o pa. ³⁶ Hãmri nhũm mẽ omu nẽ kãm mẽ hkapřĩ nẽ. Na prem tee ri amnhĩ kukamã hamaxpẽr o pa jao ra hkapřĩ nẽ. Nhũm Jejus ja hã mẽ omu nẽ hamaxpẽr o:

—Hẽxta waa nẽ. Na mẽ mex kêt nẽ pa. Te mẽ kęp ôwẽhti jamãr xwÿnh kêt kot amnhĩ nhĩpẽx pyrãk o htÿx ri pa. Mẽhõ koja kãm mẽ hkapřĩ nẽ tanhmã mẽ ho mex to ho pa? Anẽ.

Hãmri nẽ mẽ kamã ukapřĩ nẽ. ³⁷ Hãmri nẽ mẽ hã mẽ ixpẽ hkõt ixpa ho ixpa xwÿnhjẽ mã kapẽr nẽ mẽ inhmã:

—Nà na mẽ kormã ohtõ rax nẽ Tĩrtũm kapẽr mar kêt nẽ. No ãm kormã mẽ ate mẽ kãm kapẽr jarẽnh o apa kaxyw mẽ agrẽre. Te pur rax kãm ra harõj kamrêk par nẽ ãm tã no ãm kaxyw hikẽnh xwÿnhjaja grẽre pyrãk. ³⁸ Jakamã kwa mẽ ho Tĩrtũm wÿ kẽ axte mẽ kaxyw mẽ akwÿjẽ rê kẽ mẽ apyrã nẽ ma mẽ hkõt ri mẽ kãm kapẽr jarẽnh o pa. Anẽ.

Jejus kot mẽ ho 12 nẽ mẽ rênh

Makre 3.13-19; Rukre 6.12-16

10 Tã nhũm Jejusja hkõt mẽ ixpa ho mẽ ixpa xwÿnhjẽ ho 12 nẽ mẽ ixrẽ. Mẽ ixte ma krĩ piitã hwÿr inhmrar nẽ ÿ hã mẽ ahkre nẽ tanhmã mẽ à kute xwÿnhjẽ ho mex o ixpa kaxyw. Nẽ ÿ hã mẽ nẽ mẽkarõmnuti janor o ixpa kaxyw nhũm mẽ ixrẽ. Na pre mẽ ixto 12 nẽ mẽ ixrẽ. Æ mẽ inhixi kot anhÿr.

Pẽtre kumrêx na pre kuta. Hixi hõ pẽ Simãw.

Nẽ hkõt htõ Andreja ta.

Nẽ hkõt Jepetew kra Xiakreja ta.

Nẽ hkõt Xiakre htõ Juãwja ta.

Nẽ hkõt Firiptija ta.

Nẽ hkõt Patoromewja ta.

Nẽ hkõt Tomasja ta.

Nẽ hkõt pa ixpẽ Matêwre nhũm pre mẽ hkõt ixta.

Ixpẽ pahi nhÿ hã kãm mẽ kęp ixujamÿnh xwÿnh tã nhũm pre jajẽ hkõt ixta.

Nẽ ixkõt Apew kra Xiakre hõja ta.

Nẽ hkõt Tatewja ta.

Nẽ hkõt Simãw Jeroxja ta.

Nẽ hkõt Jut Kariotja ta.

Kormã kot mẽ kãm Jejus kurẽ xwÿnhjẽ nhĩhkram õr mã nhũm Jejus kot amnhĩ kukamã omunh mex tã mẽ hkõt amnhĩ kaxyw kuta.

Æ mẽ ixte ÿ hã mẽ ahkre o ixpa kaxyw mẽ ixrênh xwÿnhjẽ nhĩxi kot anhÿr.

Jejus kot mẽ kęp 12jẽ mã mẽ àpênh ã karõ

Makre 6.7-13; Rukre 9.1-6, 10.1-12, 10.14; mããnẽn Atre 13.50-51, 18.6

⁵ Hãmri nhũm Jejus mẽ ixrênh pa nẽ ma mẽ hwÿr mẽ ixrênh kaxyw tanhmã mẽ inhmã kapẽr to nẽ mẽ inhmã:

—E. Kêr ka mẽ ma mẽ piitã mẽ kãm ri ijarẽnh o apa. No ãm kormã mẽ kęp Ijaew kêt xwÿnhjẽ nhõ pika hwÿr apa hkêt nẽ. Rÿ mẽ kęp Samar nhõ krĩ hwÿr ka mẽ apa hkêt nẽ. ⁶ Æ mẽ pahpẽ Ijaew nhõ krĩ kõt pix mã mãn ri apa. Mẽ kot tee ri amnhĩ kukamã hamaxpẽr o pa jakamã te mẽ kęp ôwẽhti pikunor nẽ htÿx ri mex kêt nẽ pa pyrãk. ⁷ Jakamã kêr ka mẽ ma mẽ hwÿr apa nẽ ã mẽ hkõt ri mẽ kãm akapẽr o apa anẽ nẽ mẽ kãm: “E kot kaj mẽ ate amnhĩ tomnuj kaga nẽ Tĩrtũm kõt amnhĩ xunhwÿ hãmri nhũm amnhĩ tã mẽ apumu nẽ mẽ ato hkra. Jakamã e kwa mẽ tokyx hkõt amnhĩ xunhwÿ.” Anẽ. Kêr ka mẽ ã mẽ kãm akapẽr anhÿr o ri mẽ hkõt apa. ⁸ Hãmri nẽ akupÿm mẽ à xwÿnhjẽ ho mex o ri apa. Nẽ mẽ htyk xwÿnhjaja ka mẽ akupÿm mẽ ho htĩr o ri apa. Nẽ mẽ hkànhy rũnh xwÿnhjaja ka mẽ akupÿm mẽ ho mex o ri apa. Nẽ mẽ kamã mẽkarõmnuti xwÿnhjaja ka mẽ nẽ mẽ hano. E kêr ka mẽ ã inhÿ hã mẽ ho mex o ri apa anẽ. Na pa amarĩ tanhmã mẽ ato ka mẽ inhmã amnhĩrer kêt tã ra mẽ ate tanhmã mẽ ho mex to mã tãm. Tã kêr ka mẽ amnhĩ xwar amarĩ ri mẽ ho mex o ri mẽ hkõt apa. No ri mẽ ho mex pãnhã kàxpore hã axàhwÿr kêt nẽ.

⁹ —Nẽ kêr ka mẽ ma mẽ hwÿr apa kaxyw anojarêt hãmri nẽ amnhĩ kõt akukrêx rũnh o apa hkêt nẽ. Æm anhÿ kamã mẽ hwÿr apa. Nẽ akàxpore ho rax nẽ ho apa hkêt nẽ. Rÿ akawà kamã axẽ hkwy rÿ aparkà hõ xàr nẽ ho amõr kêt nẽ. Rÿ kô hõ py nẽ ri ho apa hkêt nẽ. Æm anhõ mrykà pix jamÿ nẽ ma ho apa. Kêr kẽ mẽ ate Tĩrtũm kapẽr o mẽ ahkre nẽ mẽ ho mex xwÿnhjaja mãn amnhĩ pãnhã mẽ amã mẽ axàpkur xà gõ ka mẽ kutã axàpkur o ri mẽ hkõt apa.

¹¹ —Nẽ kêr ka mẽ nhÿri krĩ hwÿr ajapõj nẽ kamã mẽhõ kot amnhĩ to mex xwÿnh japẽr. Nẽ ra omu hãmri nẽ kuri mãn pøj nẽ hkõt apikamẽnh tãmtã kurũm akupÿm ajapõj nẽ ma nhãm krĩ hõ hwÿr mra.

¹² —Nẽ kêr ka mẽ mẽhõ nhõrkwy hwÿr pøj nẽ mẽ kãm: “E ot pa mẽ awÿr mõ. Nà koja Tĩrtũmja mẽ ato mex nẽ.” Anhÿr o mẽ kãm akapẽr. ¹³ Koja mẽ ama nẽ amnhĩ wÿr awÿ ka mẽ amnhĩ tã mẽ omu nẽ mẽ kãm: “E koja Tĩrtũm mẽ ato mex nẽ ka mẽ ajamakêtkati nẽ ri axãmnhix apa.” Anhÿr o mẽ kãm akapẽr. No koja mẽ

amnhî nhõrkwÿ nè mẽ akurê nhũm Tirtũm ja hã mẽ omu nè mẽ ho mex kêt nè.

¹⁴—Nẽ koja nhÿri krĩ hõ kamã mẽ akaga nè akapër mar kêt japër. Ka mẽ tee ri amnhĩ tã mẽ kamã ama hãmri nè tokyx mẽ kurũm ajapõj nè ma akupÿm apa. Nẽ akupÿm anojarêt nè mẽ noo mã akuhê nè amnhĩ par ã awjagrõ kapĩ nè ma apa. Mẽ kot Tirtũm kaga hã amnhĩ pumunh kaxyw ka mẽ ã mẽ noo mã amnhĩ nhĩpêx anẽ. Hãmri nè ma nhÿhÿm hpãnhã apa. ¹⁵ Kojã nhÿrmã Tirtũm mẽ kot amnhĩ tomnuj mÿrapê tanhmã mẽ ho. Na pre ã Sotõ mẽ Komo nhõ xwÿnhjê nhĩpêx anẽ. Na prem amnhĩ tomnuj tÿx nè nhũm Tirtũm tee ri ja hã mẽ omu nè tanhmã hã mẽ homnuj tÿx to. Tã jar mẽ kãm ixkapër mar prãm kêt nè mẽ kot ixkaga xwÿnhjaja koja ja hã mẽ omu nè kot Sotõ mẽ Komo nhõ xwÿnhjê nhĩpêx o mẽ hipêx. No ãm tanhmã mẽ ho htÿx o mẽ hakre. Anẽ.

Nhũm pre Jejus ã mẽ inhmã mẽ ixapênh ã karõ anẽ.

Jejus kot mẽ kêp 12jê hkukamã mẽ harênh

Makre 13.9-13; Rukre 12.11-12, mãänên Rukre 21.12-17; Wam Pêtre 3.13-17, 4.12-19; Rukre 6.40; Juãw 15.20; Rukre 12.2-9

¹⁶ Nhũm Jejus arĩ kot mẽ ixrênh xwÿnhjê mã kapër nè mẽ inhmã:

—E kot paj ma mẽ hwÿr mẽ arẽ. Ma mẽ ate Tirtũm kapër o mẽ ahkre ho ri mẽ hkõt apa kaxyw. Jakamã kot kaj mẽ te ôwêhti kot mry xoprê hwÿr amnhĩ to mrrar nhũm kot hkwy hpar pyrãk o amnhĩ nhĩpêx. Kojã mẽ hkwyjaja mẽ ate mẽ ahkre ma nhũm ja mẽ kêp omnuj nè nhũm mẽ hã tanhmã mẽ anhĩpêx to. Tã nom kêr ka mẽ tee ri amnhĩ kukamã ajamaxpër nè amã mẽ uma hkêt nè.

¹⁷—E kwa mẽ o kora. Kêr ka mẽ ma mẽ hwÿr mra nè amnhĩ nè mẽ htãnopxar o ri apa. Kojã mẽ hkwyjaja mẽ akapër ma mẽ kêp mẽ aprãm nõkati. Nẽ mẽ apynê nè ma mẽ utar xwÿnhjê hwÿr mẽ ato mra nè mẽ kãm tanhmã mẽ ato hêx to. Hãmri nhũm mẽ mar xà hkõt mẽ atak. Tirtũm kapër o mẽ ahkre xà hã ixkre kamã koja mẽ ã mẽ anhĩpêx anẽ.

¹⁸—Nẽ koja mẽ ixtã tanhmã mẽ ato kaxyw mẽ apynê nè ma mẽ õ pahi hwÿr mẽ ato mra nè tanhmã kãm mẽ ato hêx to. Nom kwãr mẽ mamrĩ ã mẽ anhĩpêx anẽ. Kojã mẽ ato anẽ ka mẽ kutã akrĩ nè mẽ kãm Tirtũm kapër jarẽ. Ijaewjê mã nè mẽ kêp Ijaew kêt xwÿnhjê mã.

¹⁹—Nẽ koja mẽ ma mẽ õ pahi hwÿr mẽ ato mra nè ã mẽ anhĩpêx anẽ nom kêr ka mẽ tee ri tanhmã mẽ kãm amnhĩ jarênh to hkukamã ajamaxpër kêt nè. Kojã Tirtũm Karõ tãm tanhmã mẽ akrã hto ka mẽ ô ri mẽ kãm akapër mex nè. ²⁰ Nẽ kot kaj mẽ amnhĩ krã hkõt ri mẽ kãm akapër kêt nè. Tirtũm Karõ nhÿ hã kot kaj mẽ ô ri mẽ kãm tanhmã axujarênh to.

²¹—Nẽ koja mẽ hkwyjaja ixtã mẽ akamã gryk nè. Nẽ mẽ atã àmnênh pix o pa. Nẽ mẽ kot mẽ apar kaxyw mẽ akwyjê hã amÿnê. Kojã mẽ anhĩpêxã hkwyjaja mẽ apê mẽ hkra hã amÿnê. Nhũm mẽ akra hkwyjaja mẽ apê mẽ hipêxã hã amÿnê. Nhũm mẽ atõ hkwyjaja mẽ apê mẽ htõ hã amÿnê. Nhũm mẽ akatorxajaja mẽ atã

amÿnê. Hãmri nhũm mẽ apa. No ãm kwãr mẽ mãmri ã mẽ anhĩpêx anẽ. ã mẽ kot mẽ anhĩpêx anhÿr tã kêr ka mẽ tee ri amnhĩ kukamã ajamaxpër pẽ ixkaga hkêt nè. Mẽ ãm amnhĩ to htÿx rãhã ty. Hãmri nè akaxwÿnhja ma Tirtũm mẽ wa inhõ krĩ hwÿr axapir kurê kumrêx nè wa ixkuri akupÿm amex nè atĩr tũm nè apa ho apa.

²³—Nẽ koja mẽ nhÿri krĩ hkwy kamã ixtã tanhmã mẽ anhĩpêx hto ka mẽ mãmri mẽ kurũm ajapõj nè ma nhÿhÿm krĩ hõ hwÿr apa. Nẽ hpãnhã kamã mẽ kãm ri ijarênh o mẽ hkõt apa. Kot kaj mẽ kormã Ijaewjê nhõ krĩ piitã hwÿr apa hkêt ri pa akupÿn mẽ awÿr wrÿ. Kwa kêr ka mẽ ixkapër mã ajamaxpër tÿx rãhã ri apa.

²⁴—Mẽ ate ixkõt apa ho apa xwÿnh na ka mẽ. No pa na ixpê mẽ ajahkre xwÿnh. Jakamã koja mẽ kot tanhmã inhĩpêx to ho mãänên mẽ anhĩpêx. Kojã mẽ nhÿrmã tanhmã inhĩpêx to nè mã ixkõt mẽ ato anẽ nè. Mẽ pahte amnhĩ nhĩpêxja kot axpên pyrãk. Jakamã koja mẽ ixpê Satanasti hã ijarê nè mãänên tanhmã mẽ ajarênh punuj to ho pa. Mẽ pahte amnhĩ nhĩpêxja kot axpên pyrãk jakamã koja mẽ panhĩpêx o axpên pyrãk.

²⁶—Tã nom kêr ka mẽ tee ri amnhĩ kukamã ajamaxpër pẽ amã mẽ uma ho apa hkêt nè. Na htem piitã axpên pẽ tanhmã hamaxpër punuj to ho hpimxur o pa nom tee ri ho pimxur prãm kaprÿ. Kojã nhÿrmã mẽ hamaxpër piitã amnhĩrit pa. Nẽ mẽmoj piitã ra hpimxur mex tã koja nhÿrmã amnhĩrit par kumrêx.

²⁷—Nẽ koja nhÿrmã mẽ piitã ixte amnhĩ nhĩpêx kõt ixpumu. Na pa ra mẽ hkà ã mẽ amã ixujarênh rax nè. Tã kêr ka mẽ ma mẽ piitã mẽ kãm harênh o ri apa. Nẽ ra ixte mẽ hkà ã ahte ixte mẽ amã mẽmoj jarênhka ka mẽ hpãnhã ma mẽ kãm harênh o ri apa kê mẽ apyrã nè harênh ma.

²⁸—E kêr ka mẽ amã mẽ kot tanhmã mẽ ato mã xwÿnhjê puma ho apa hkêt nè. Mẽ kot mẽ apar mã tã koja mẽ ãm mẽ akrãhkà pix pa nom tanhmã mẽ akaxwÿnh to hkêt nè. Tirtũmja tapxipix na hte mẽ hkrãhkà nè mẽ hkaxwÿnh mẽ ho pimràatã kot amnhĩ xà htÿx kamã hamak tũm xàta wÿr mẽ rênh pumunh. Tã kot hwÿr mẽ arênh pymaj kêr ka mẽ amã kapër kwÿm ri tanhmã amnhĩ nhĩpêx to puma ho ri apa.

²⁹—Nẽ Tirtũm kot mẽ pahto hapêx par pumunh tã mãänên kot mẽ pajamãr mex. Mãn ka htem kuwênhre pumu. Na hte Tirtũm kuwênhre jamãr mex o pa. Mẽ piitã mẽ kot ãm omunh tã nom nhũm Tirtũm mẽ kurom hamãr mex pẽ mẽ htãnopxar rãhã ho pa. Tã kãm mẽ pajapê htÿx o kot kuwênhre jakrenh jakamã kwa mẽ tee ri amnhĩ kukamã ajamaxpër o ri akapri nè apa hkêt nè. Kojã Tirtũm mẽ pahtãnopxar rãhã ho pa. Kot mẽ panhĩ piitã omunh par. Nẽ ahpÿnhã tanhmã mẽ pahkrã hkĩ kute hkõt mẽ pahpumunh par. Tã kot mẽ pahtãnopxar rãhã jakamã mo kaxyw kot kaj kêt mẽ ri amã mẽ uma ho apa? Anẽ.

Mẽ pahte Jejus kõt amnhĩ xunhwÿr rÿ mẽ pahte hkaga jarênh

³² Nhũm Jejus arĩ kot mẽ hwÿr mẽ ixrênh xwÿnhjê mã kapër nè mẽ inhmã:

—E kwa mẽ māmri akwỳjê mã mẽ apê ixkwỳ hã amnhĩ jarēnh o ri apa nê amã mẽ uma xàj tee ri amnhĩ nhĩpêx kêt nê. Kot kaj mẽ kãm ra ate ixkôt amnhĩ xunhwỳr ã amnhĩ jarē. Pa ja hã mẽ apumu hãmri nê mẽ apyrà nê kaxkwa kamã Inhĩpêêxà mã ra ate ixkôt amnhĩ xunhwỳr ã mẽ ajarē. ³³ Nom kot kaj mẽ kot ixtã tanhmã mẽ ato pymaj apê ixkwỳ hã amnhĩ jarēnh kêt nê. Pa ja hã mẽ apumu hãmri nê nhỹrmã amnhĩ xwar Inhĩpêêxà mã mẽ apê ixkwỳ hkêt ã mẽ ajarē. Jakamã kwa mẽ māmri mẽ kãm apê ixkwỳ hã amnhĩ jarēnh o ri mẽ hkôt apa kê mẽ ama nê amnhĩ kaxyw inhmã hamaxpêr japêr. Anê.

Mẽ kãm Jejus ã hkwỳjê kurê xwỳnhjaja

Makre 8.34-35; Rukre 9.24, mãänēn Rukre 12.51-53, 14.26-27; Apokarip 12.11

³⁴ Nhũm Jejus arĩ kot mẽ hwỳr mẽ ixrēnh xwỳnhjê mã kapêr nê mẽ inhmã:

—Ra mẽ awỳr ixwỳr tã koja mẽ piitã ixkukwak ri hamakêtkati nê ãmnhĩx ri pa hkêt nê. Kormã. Koja mẽ akwỳjaja ixkapêr ma nê mẽ apyrà nê amnhĩ kaxyw ixkôt hamaxpêr. Nhũm mẽ akwỳjaja axtem nê kuma nê ãm kuma. Hãmri nê ixtã tanhmã mẽ atomnuy to ho pa ka mẽ amnhĩ xà htỳx kamã ajamak o ri apa.

³⁵ —Koja mẽ akrajaja ixtã mẽ apê mẽ hipêêxà nê mẽ katorxà kutã amnhĩ xunhwỳ. Nhũm mẽ wỳjjaja ixtã mẽ umregêxjê kutã amnhĩ xunhwỳ.

³⁶ —Koja mẽ ã mẽ akwỳjaja ixtã mẽ akutã amnhĩ xunhwỳr anê. Mẽ anhõrkwỳ kamã mẽ akukwak ri pa htã ixtã mẽ akutã amnhĩ xunhwỳ.

³⁷ —Nê mẽ amã mẽ anhĩpêêxà nê mẽ akatorxà japêê. Nê mẽ amã mẽ akrajê japêê. Tã nom kot kaj mẽ gryk ã ixkôt amnhĩ nhĩpêx mex o ri apa hkêt hãmri nê apê ixkwỳ mã tãm kêt. ³⁸ Rỳ nhũm mẽ nhỹrmã ixtã mẽ apar kaxyw ka mẽ tee ri amnhĩ kukamã ajamaxpêr nê mẽ kot mẽ apar pymaj ixkaga hã kot kaj apê ixkwỳ mã tãm kêt nê. ³⁹ Koja mẽ nhỹrmã ixpĩ pa mẽ anê ty. Tã mẽ ate ixkôt amnhĩ nhĩpêx o apa xwỳnhjaja. Koja mẽ ixpyrã nê ixtã mẽ apar mã tã kwa kêr ka mẽ amã atyk pymaj ixkaga hkêt nê. Kwār mẽ māmri tanhmã ixtã mẽ ato. Kot kaj mẽ nhỹrmã Tirtũm mẽ wa ixri axte amnhĩ xà kamã ajamak kêt nê atĩr tũm nê amex rãhã apa ho apa. Nom kot kaj mẽ jar amã amex nê apa hprãm xàj ixkaga hãmri nê nhỹrmã wa ixri atĩr tũm nê apa ho apa hkêt nê. Anê.

Mẽ kot Jejus krajê ho mex xwỳnhjê jarēnh

Matêwre 25.34-40; Makre 9.41; Juãw 13.20

⁴⁰ Nhũm Jejus arĩ kot mẽ hwỳr mẽ ixrēnh xwỳnhjê mã kapêr nê mẽ inhmã:

—E koja mẽhõ nhỹri mẽ apumu nê mẽ apê ixkra hã tanhmã mẽ ato mex to nê te pa kot ixto mex pyrãk. Nê kot kaj mẽ tanhmã pa ixto mex to nê te Tirtũm o mex pyrãk.

⁴¹ —Nê kot ka mẽ nhỹri Tirtũm nhỹ hã mẽ kãm kapêr jarēnh xwỳnhjê hõ tanhmã ho mex to nhũm Tirtũm hã apumu nê nhỹrmã hã ato mex nê. Rỳ ka mẽ mẽhõ kot Tirtũm kôt amnhĩ nhĩpêx xwỳnhjê hõ pumu nê tanhmã

ho mex to. Nhũm Tirtũm hã apumu nê mãänēn hã ato mex nê. Te ate mẽhõ ho mexta pyrã nê mãänēn ato mex nê. ⁴² Nhũm mẽhõ nhỹri mẽ kot ixkôt kormã amnhĩ xãm nyw nê kormã ãhpumunh tohtuj anhỹr xwỳnhjê hõ pumu. Nê kãm kôr ã omu nê hamaxpêr o: “Kwa Jejus kôt ri pa xwỳnh mũj kãm kôr. Kormã kot Jejus kôt amnhĩ xãm tỳx kêt tã kêp hkwỳ. E kot paj kãm gô hk-wỳ kê ho ixkõ.” Anê hãmri nê kãm hk-wỳ nhũm ho ixkõ. Hãmri nhũm Tirtũm hã omu nhũm kot kãm gô pix nhõr nhũm kot ho hkõm tã nhũm ja hã ho mex rax nê. Anê.

Nhũm pre ã Jejus kot mẽ hwỳr mẽ ixrēnh xwỳnhjê mã kapêr ry rax anê. Mẽ ixpê 12jê mã ã kapêr anê.

Juãw Paxis kot Jejus jarēnh mar

Rukre 7.18-23, 7.5, mãänēn Rukre 4.16-21

11 Tã nhũm Jejus ra kot mẽ hwỳr mẽ ixrēnh xwỳnhjê mã kapêr pa hãmri nê kato nê ma krĩ pu hã krĩ hk-wỳjê hkôt ri pa. Nê mẽ kãm Tirtũm kapêr jarēnh o ri mẽ hkôt pa.

² Nhũm Juãw Paxisja arĩ kêp prês nê mẽ hagjēnh xà kamã hkrĩ. Nhũm pre hte hkôt mẽ pa ho mẽ pa xwỳnhjaja hwỳr mra nê kãm Jejus kot tanhmã amnhĩ nhĩpêx to ho pa hã harē. Hãmri nhũm harēnh ma nê tee ri hkukamã hamaxpêr. Hãmri nê hkôt mẽ pa xwỳnh wa ho axkrut nê wa kuta ³ nê hwỳr wa kumê nê wa kãm:

—Kwa wa ma Jejus wỳr tẽ nê hkukja nê kãm: “Xà ka na pre Tirtũm mẽ ixwỳr amê nà? Xà kormã axtem mẽhõ na pa mẽ ri hamãr o ri ixpa?” Anhỹr o hkukja hãmri nê tanhmã kot amnhĩ jarēnh to hã ama nê man akupỹn ixwỳr tẽ nê inhmã harē. Anê.

⁴ Hãmri nhũm wa kuma nê ma hwỳr tẽ. Nhũm Jejus kormã tanhmã mẽ ã kute xwỳnhjê ho mex o xa. Mẽ nohkre xwỳnhjaja nhũm akupỹm mẽ ho mex. Nê mẽkarõmnuti kot mẽ hwỳr gjêx xwỳnhjaja nhũm mẽ nê mẽ hanor o ãm rãhã nhũm Juãw kôt wa pa xwỳnhhta wa hwỳr tẽn pøj. Nê kormã mẽ hã omunh o wa xa. Hãmri nê kãm Juãw Paxis kapêr jarē nhũm wa kuma nê wa kãm:

—Tỳ. Nà ãm hãmri na ja hã ijarē. Ixpê mẽ ate ixkamã ajamak o apa xwỳnhhta na pa. Na ka wa kam ã ixte amnhĩ nhĩpêx anhỹr ã ixpumu. Jakamã wa ma akupỹm tẽ nê aprĩ hã kãm ijarē. ⁵ Na pa hte akupỹm mẽ nohkre xwỳnhjê ho mex. Nê mẽ hkànhy xwỳnhjaja pa akupỹm mẽ hkà ho mex. Nê mẽ hyk o mẽ pa xwỳnhjaja pa akupỹm mẽ hte ho mex. Nê mẽ htyk xwỳnhjaja pa akupỹm mẽ ho mẽ htĩr. Nê mẽ kêp amrakati nê ri mẽ pa xwỳnhjaja pa mẽ kãm mẽmoj mex jarēnh o ri mẽ hkôt ixpa. Á na pa hte mẽ hipêx anhỹr o ri ixpa. Jakamã e wa ma akupỹm Juãw wỳr tẽ nê ã kãm ijarēnh anê. ⁶ Kê ijarēnh ma nê ixkôt hamaxpêr tỳx nê tee ri ixkukamã hamaxpêr kêt nê. Koja ã amnhĩ nhĩpêx anê nê hamakêtkati nê ri pa. E wa tokyx ma akupỹm tẽ nê kãm ã ijarēnh anê. Anê.

Jejus kot tanhmã Juãw Paxis jarênh to

Rukre 7.24-35

⁷ Nhũm pre ã Jejus Juãw Paxis kôt wa pa ho wa pa xwýnhja wa kãm amnhĩ jarênh aně nẽ akupým hwýr wa kumě nhũm wa ma akupým hwýr tẽ. Hãmri nhũm Jejus mẽ kot mar o kuhê xwýnhjê mã tanhmã Juãw Paxisja jarênh to nẽ mẽ kãm:

—Na ka pre htem kapôt ã Juãw Paxis mar kaxyw ma hwýr mra. Nom ê mex ã omunh kaxyw rý hpijaãm kãm tanhmã kapër to hã mar kaxyw na ka prem hwýr amrar kêt nẽ. Tirtúm nhỹ hã kapër o pa jakamã na ka prem ate mar kaxyw ma hwýr mra. Tirtúm nhỹ hã ixkukamã ijarênh o pa xwýnh na. Ixpê Tirtúm kot mẽ akaxyw ixãm xwýnh ã na hte ijarênh o pa. Nẽ hprĩ hã tanhmã mẽ amã ijarênh to. Jakamã kapërja mex o kot wam Tirtúm nhỹ hã kapër jarênh xwýnhjê kapër piitã hakrenh par. ¹⁰ Tirtúm kapër ã kagà htúm kot Juãw kukamã tanhmã harênh to nẽ harênh kot:

Kot paj Ixkra hkukamã ma mẽ hwýr harênh xwýnhja mẽ nhũm ma ri kutêp mẽ kãm harênh o pa. Mẽ kot mar nẽ kutêp tãm amnhĩ nhĩpêx o pa kaxyw.

—Anhýr o Tirtúm Juãw Paxis kukamã harẽ nhũm prem hã kagà. Tã nhũm ixkukamã mẽ awýr kumě.

¹¹ Juãw Paxisja na mex kumrêx. Na pre hprĩ hã ixkukamã tanhmã ijarênh to ho pa. Tã nom ixkôt mẽ pa ho mẽ pa xwýnhjê hkĩnhã na pre ixkôt pa ho pa hkêt nẽ. Jakamã ixkôt mẽ pa ho mẽ pa xwýnhjaja kot ixkôt hprĩ hã ixkapër mar o pa jakamã na mẽ mex o mẽ kot Juãw Paxisja jakrenh. Aně.

¹² —Na pre finat Mojes kumrêx mẽ kãm Tirtúm kapër kwý hã kagà. Tã nhũm hpãnhã Tirtúm nhỹ hã kapër jarênh xwýnhjaja Mojes mýr pẽ hkwy hã kagà. Nhũm prem kamã harẽ nẽ kuma nẽ hkôt amnhĩ nhĩpêx o pa. Hãmri nhũm Juãw Paxisja mẽ mýrpê kato nẽ tãm Tirtúm kapër o mẽ ahkre ho ri pa. Tã pa hpãnhã ho mẽ ajahkre ho ri mẽ akôt ixpa nhũm mẽ ohtô nẽ inhma nẽ ixkôt amnhĩ xunhwý nẽ kãm ixkapër kôt pix mã amnhĩ nhĩpêx o ri pa hprãm nẽ.

¹⁴ —Amnepêm na pre Tirtúm nhỹ hã kapër jarênh xwýnhjaja mēhõja kukamã tanhmã harênh to ho pa. Nẽ mẽ kãm harênh o: “Koja nhýrmã mēhõ te Eris kot amnhĩ nhĩpêx pyrãk o amnhĩ nhĩpêx nẽ mẽ awýr mõ. Nẽ mẽ amã Tirtúm kot mẽ awýr mēnh mã xwýnhja jarênh o pa ka mẽ ama.” Anhýr o mẽ kãm mēhõ jarẽ. Tã kot paj mẽ amã kot hkukamã harênh xwýnhnta nhĩxi jarẽ ka mẽ inhma. Nã Juãw Paxisja kukamã na prem ã harênh anhýr o pa.

¹⁵ —E kot pa mẽ amã mẽ piitã htýx ri tanhmã mẽ hamaxpër to ho mẽ pa hã mẽ amã mẽ harẽ ka mẽ harênh ma. ¹⁶ Te mēhprĩre kot amnhĩ nhĩpêx pyrãk o na htem amnhĩ nhĩpêx. Mēhprĩrejaja na htem mẽ õrk-wý kapem mẽmoj to amnhĩkati nẽ tee ri hkwyjê kot amnhĩ nhĩpêx pumu nẽ mẽ kãm:

¹⁷ Kwa na pa mẽ amã gre htã ka mẽ ixkutã an-hõkrepõx kêt nẽ. Pa mẽ ja hã mẽ apumu nẽ hpãnhã mẽ amã mẽ htyk jarẽ htã ka mẽ akaprĩ nẽ amýr kêt nẽ. Kwa mẽ ri ã amnhĩ nhĩpêx anhýr kêt nẽ. Aně.

—Mēhprĩjaja na htem ã axpën mã kapër aně. Tã te mẽ ate mẽ urãk. Tirtúm kot mẽ awýr ý hã kapër jarênh xwýnhjê rēnh tã ka mẽ te mēhprĩre kot amnhĩ nhĩpêx pyrã nẽ mẽ ama nẽ ãm mẽ ama nẽ mẽ hkôt amnhĩ nhĩpêx kêt nẽ.

¹⁸ —Juãw Paxis na pre mẽ awýr mõ nẽ ixkĩnhã apkur mex o ri pa hkêt nẽ. Nẽ ixkĩnh ã wĩhti ho hkõm kêt nẽ. Ka mẽ ja hã omu nẽ hkaga nẽ atýx ri Satanasti nhỹ hã tanhmã kot amnhĩ nhĩpêx to hã hkamnhĩx. Hãmri nẽ mēhprĩre kot amnhĩ nhĩpêx to hã hkôt amnhĩ nhĩpêx kêt nẽ.

¹⁹ Tã hãmri pa hpãnhã mẽ awýr mõ nẽ Juãw Paxis rom apkati mẽ ixãpkur mex o ri mẽ akôt ixpa. Nẽ kurom mẽ akutã wĩhti hkwy ho ixkõm o ri ixpa. Tã ka mẽ ja hã ixpumu nẽ atýx ri ixãpkur rũnh nẽ ixpipãnh o ri ixpa hã ixkamnhĩx nẽ ã axpën mã ixto akapër aně. Nẽ mẽ kot amnhĩ tomnuj xwýnhjê hkôt ri ixpa xwýnh ã axpën mã ijarẽ. ã na ka htem axpën mã ijarênh aně. Jao te mẽ ate Juãw Paxis nhĩpêx pyrã nẽ ixkaga nẽ ixkôt amnhĩ nhĩpêx kêt nẽ. Na hte ã htýx ri tanhmã mẽ hamaxpër to ho mẽ pa xwýnhjaja amnhĩ nhĩpêx aně. No tãm ri mẽ hamaxpër xwýnhjaja na htem ahpyñhã wa ixte amnhĩ nhĩpêx ã wa ixpumu nẽ axpën mã wa ijarênh o: “Nã ahpyñhã wa kot amnhĩ nhĩpêx tã no ãm hamẽ Tirtúm nhỹ hã kapër mex o pa. E pu mẽ wa urãk nẽ Tirtúm kôt amnhĩ xunhwý.” Anhýr o axpën mã wa ijarẽ. Aně.

Mẽ kot Tirtúm kôt mẽ hamaxpër kêt xwýnhjê jarênh

Rukre 10.13-15

²⁰ Na pre hte Jejus krĩ piitã hkôt pa nẽ krĩ nhõ xwýnhjê mã kapër nẽ mẽ kot amnhĩ tomnuj ã mẽ kãm kapër. Korajĩ mẽ Pese nhõ xwýnhjê kumrêx mã kapër nẽ mẽ kãm:

²¹ —E mẽ inhma. Amnepêm krĩ pẽ Sitõ mẽ Xir wa kamã mẽ pa xwýnhjaja na prem tanhmã amnhĩ tomnuj týx to ho pa nhũm Tirtúm tee ri ja hã mẽ omu nẽ mẽ kot amnhĩ tomnujta ã tanhmã mẽ ho. Tã kwa mẽ o kora Korajĩ mẽ Pesêj nhõ xwýnhjaja. Ra ixte mẽ amã aa mẽ ate mẽmoj pumunh kêt kwý ho anhýr rax tã ka mẽ omu nẽ ãm omu nẽ amnhĩ tomnuj kaga hkêt nẽ. Arĩ tanhmã amnhĩ tomnuj to ho ri apa. Mýrapê kot kaj mẽ amex kêt nẽ. Kop apu Sitõ rý Xir kamã măn ixte mẽ kãm aa mẽ kot mẽmoj pumunh kêt kwý ho anhýr o ri ixpa ronhýx mẽ omu nẽ mẽ arom amnhĩ kaxyw ixkôt hamaxpër týx kurê kumrêx. Nẽ tee ri kot tanhmã kot amnhĩ tomnuj to hã amnhĩ pumu nẽ hkaprĩ nẽ hkaga hpa. No mẽ kajaja na pa hte tee ri mẽ amã aa mẽ ate mẽmoj punuj kêt kwý ho anhýr o ixpa kaprý. Ka mẽ ja hã ixpumu nẽ ãm ixpumu nẽ amnhĩ tomnuj kaga hkêt nẽ. Jakamã koja nhýrmã Tirtúm tanhmã mẽ atomnuj týx to. Nẽ tanhmã Sitõ mẽ Xir wa kamã mẽ pa xwýnhjê jarênh to nhũm mẽ kot amnhĩ tomnuj mýrapê amnhĩ xã htýx kamã hamak rãhã ho pa. No mẽ kajaja mẽ ate amnhĩ tomnuj týx o mẽ hakrenh jakamã koja Tirtúm mẽ hkĩnhã mẽ atomnuj týx kumrêx. Ka mẽ amnhĩ xã htýx kamã ajamak rãhã ho ri apa kãm ga. Aně.

²³ Nhũm pre ã Jejus mẽ kãm kapêr anê. Nê hpãnhã Kapanaũ nhõ xwýnhjê mã kapêr nê mẽ kãm:

—No mẽ apê Kapanaũ nhõ xwýnhjaja. Kot kaj mẽ ajaxwýja mẽ uràk nê amex kêt nê. Ra ixte mẽ amã aa mẽ ate mẽmoj pumunh kêt kwý ho anhýr rax nhũm mẽ ate hã ixpumunh tã amnhĩ tomnuj kaga hkêt tã Tirtũm mẽ wa inhõ krĩ hwýr akrà. No ãm hwýr akrà kaprý. Kot kaj mẽ atõ hwýr axàpir kêt nê. Kop apu Sotõ nhõ xwýnhjaja mãn kot ã ixte amnhĩ nhĩpêx anhýr ã ixpumunh ronhýx mẽ ra kot amnhĩ tomnuj kaga nê ixkõt amnhĩ xunhwýr kurê kumrêx. No mẽ kajaja na ka mẽ ã amnhĩ nhĩpêx anhýr kêt nê. Jakamã kot kaj mẽ nhýrmã ma kuwy maatita wýr ajapêx pa kãm ga. Anê.

Jejus kot õ Papaj mã amnhĩ jarênh

Rukre 10.21-22

²⁵ Tã nhũm Jejus Tirtũm mã amnhĩ jarê nê kãm:

—Pa Papaj? Nà apê mẽ inhõ Pahi Maati na ka. Pikap ri mẽ pa xwýnhjaja nê kaxkwa kamã mẽ pa xwýnhjaja apê mẽ ixpiitã mẽ inhõ Pahi Maati na ka. ãm hãmri na ka hte amnhĩ nhĩpêx mex o ri apa. Na ka hte mẽ àhpumunh týx ã mẽ kot amnhĩ to jarkrar xwýnhjê mã axàhpumunh týx o amnhĩrit kêt nê. ãm mẽ àhpumunh kêt ã mẽ kot amnhĩ jarênh xwýnhjê pix mã na ka hte axàhpumunh týx o amnhĩrit nhũm mẽ tapxipixjaja ja hã apumu. Nà ãm hãmri. ãm hãmri na ka hte amã hprãm xà hkõt ã mẽ piitã mẽ hipêx anhýr o ri apa Papaj. Jakamã mẽ kot amnhĩ to hkryre xwýnh pixjaja na htem hprĩ hã ate amnhĩ nhĩpêx kõt apumunh o pa. Anê.

Nhũm pre ã Jejus Tirtũm mã amnhĩ jarênh anê.

²⁷ Hãmri nê hpãnhã mẽ kot mar o kuhê xwýnhjê mã kapêr nê mẽ kãm:

—Nà na pre ri Inhipeêxàja inhĩkra kamã mẽmoj piitã hagjênh pa. Ixte kãm ho amnhĩptar o ixpa kaxyw. Jakamã tapxipix na kot ixpê Kra hã ixpumunh par. No jar pika ja kamã mẽ pa xwýnhjaja na mẽ kot ja hã ixpumunh kêt. Nê papxipix na ixte Inhipeêxà kot tanhmã amnhĩ nhĩpêx to hã omunh par. Jakamã na pa hte ã amnhĩ nhĩpêx o ri ixpa anê nê inhmã hprãm xà hkõt mẽ hkwýjê mã ho amnhĩrit o ri ixpa. Jakamã nhũm mẽ ixpyrà nê Inhipeêxà kot tanhmã amnhĩ nhĩpêx to ho pa hkõt omu.

²⁸ —Nê tee ri amnhĩ kukamã mẽ ajamaxpêr o ri apa xwýnhjaja te mẽ ate mẽmoj pytĩ rax tur nê ahte ho apa pyræk. Kwa mẽ ixkõt amnhĩ xunhwý nê ixte amnhĩ nhĩpêx ã ixpumu. Ixte mẽ akamã ixukaprí xwýnh na pa. Na pa hte mẽ akutã inhnojarêt rãhã ho ixpa. Jakamã kot kaj mẽ ixkõt amnhĩ xunhwý pa te ixte mẽ anê mẽmoj pytĩ ho ixwryk pyræk o mẽ anhĩpêx nê tãm mẽ axunhwý ka mẽ tãm ajamaxpêr nê tãm amnhĩ nhĩpêx o ri apa. Mo kaxyw koja ixkõt mẽ kot amnhĩ nhĩpêx o pa xwýnhjaja tee ri amnhĩ kukamã hamaxpêr o pa? Nà na htem ixkamnàrom hamakêtkati nê àmnhĩx ri pa ho pa. Anê.

Jejus kêp arĩgromnu hpãm

Makre 2.23-28; Rukre 6.1-5

12 Tã nhũm Ijaew nhõ arĩgromnu pê sapja kato. Hãmri nhũm Jejus mẽ hkõt ri mẽ ixpa ho mẽ ixpa xwýnhjê mẽ pa mẽ ma mẽ hpur kõt ri nhýhým ri ixpa. Hãmri nê ra mẽ inhmã prãm nê mẽmo hy te kot harõj pyræk xwýnhja kwý rê nê kugrà nê ma Jejus kõt hkanhar o mõ. Mẽ ixpê Ijaew na pa htem axpên pur kãm ã amnhĩ nhĩpêx anhýr o ixpa. ² Hãmri nhũm mẽ ixkwý pê Parijew nhõ xwýnhjaja kãm mẽmoj tã Jejus o kapêr prãm jakamã ã mẽ ixte amnhĩ nhĩpêx anhýr ã mẽ ixpumu nê mẽ ixtã Jejus kukjêr kurê kumrêx nê kãm:

—Kwa Tirtũm kapêr tũm kot mẽ panhõ arĩgromnu hã mẽ pahte mẽ hpur kãm mẽmoj nhĩkênh nê mẽ pahkurê htã nhũm ri akõt mẽ pa ho mẽ pa xwýnhjaja axtem nê ã amnhĩ nhĩpêx anhýr o ri akõt pa. Mẽmo hyta rê nê akõt hkanhar o pa. Kwa mẽ kãm anê kê mẽ ã amnhĩ nhĩpêx anhýr kêt nê. Na htem arĩgromnu hã mẽmoj tã àpênh kêt kênã. Anê.

³ Hãmri nhũm mẽ kuma nê hprĩ hã mẽ kãm Tirtũm kapêr jarê nê mẽ kãm:

—Tk. Xàn ka htem Tirtũm kapêr ã kagà htũm kot pahi Tawi kot tanhmã amnhĩ nhĩpêx tota kamã harênh nê mar kêt nê? Na pre hkõt ri mẽ pa xwýnhjê mẽ nhũm mẽ prãm xàj Tirtũm mã amnhĩ jarênh xà hã ixkre hwýr agjê. Hãmri nhũm mẽ õ patre maatija mẽ kãm prãm týx ã mẽ omu nê kãm mẽ hkaprí nê mẽ kãm mẽmoj gõ. Mẽ kot Tirtũm noo mã pãwti jaxwýr xwýnhnta gõ nhũm mẽ kuku. Tirtũm kapêr ã kagà htũm kot ja nê mẽ hkurê htã nhũm mẽ kãm prãm týx ã mẽ omu nê mẽ kamã ukaprí xàj mẽ kãm kugõ. ãm mẽ õ patre pix kot ja hkur kaxyw tã nhũm mẽ kãm kugõ nhũm mẽ kuku. Tã nom nhũm Tirtũm ja hã mẽ omu nhũm ja kêp omnuj kêt nê. Kot mẽ kamã ukaprí nê mẽ kãm õr ã omu nhũm ja kãm mex nê.

⁵ —Mẽ panhõ arĩgromnu htã na hte patrejaja arĩ hã Tirtũm mã amnhĩ jarênh xà hã ixkre kamã àpênh o pa. Tirtũm kapêr ã kagà htũm kõt na htem arĩgromnu htã nhũm mẽ arĩ hã apê nhũm Tirtũm pê jamnuj kêt nê. Kumã mẽ àpênh xwýnh kênã. ⁶ ãm hãmri na pa mẽ amã ja jarê. Tirtũm mã amnhĩ jarênh xà hã ixkreta mex tã nom ixpê Tirtũm Kra jakamã inhmex o ixte ixkreta jakrenh. ⁷ Tirtũm kapêr ã kagà htũm kot ja harênh kot: Kêr ka mẽ inhmã amnhĩ jarênh kaxyw nê ãm inhmã mẽmoj nhõr pix pê inhmã amnhĩ jarênh kêt nê. Mẽ mãñnên mẽ kamã axukaprí o ri apa pê inhmã amnhĩ jarê. Ja na kêt inhmã hprãm.

—Ã harênh kot anhýr. Tã mẽ ate aprĩ hã ja mar ronhýx ka mẽ ixkõt mẽ pa xwýnhjê kot mẽmo hy rênh nê hkanhar o mõr ã mẽ omu nê ri tanhmã mẽ ho akapêr to hkêt nê. ãm mẽ kãm prãm ã mẽ omu nê mẽ kamã axukaprí nê.

⁸ —Kêt pa na pre Tirtũm mẽ akaxyw ixãm nê mẽ awýr inhmê. Jakamã papxipix na pa hte arĩgromnu hã tanhmã mẽ kot amnhĩ nhĩpêx to hã mẽ kãm karõ. Kwa mẽ jajê pumu nê mẽ kamã axukaprí kêt wehe. Kwãr

mê māmri mẽmo hyta rê nê hkanhar o ixkôt mõ. Anê.

Ïhkra grà xwÿnh jarënh

Makre 3.1-6; Rukre 6.6-11

⁹ Nhũm pre ã Jejus Parijew nhõ xwÿnhjê mã kapër anê hãmri nê Tirtũm kapër o mẽ ahkre xà hã ixkre hwÿr tẽ nê axà. ¹⁰ Nhũm Parijew nhõ xwÿnhjaja tanhmã ho kapër to kaxyw htãnopxar o kuhê. Jakamã nhũm ixkre kamã mēhõ my ïhkra grà xwÿnhja mẽ pikuprõnh xwÿnhjê nhĩkhõ hã nhỹ nhũm Parijew nhõ xwÿnhjaja omu nê axpẽn mã:

—Kwa pu mẽ jar pakuhê nê Jejus kot tanhmã amnhĩ nhĩpêx to hã omu. Xà koja arĩgromnu hã mũjti ho mex nà? Koja ho anê nê Tirtũm kapër tũm kuhpa hã amnhĩ nhĩpêx. E pu mẽ kop xa nê hã omu. Anê.

Hãmri nê hã Jejus kukja nê kãm:

—E mẽ inhmã mẽmoj jarê. Xà na htem arĩgromnu hã akupÿm mẽ ho mex nhũm Tirtũm kãm ja mex nê nà? Anê.

¹¹ Hãmri nhũm mẽ hamaxpêr kôt mẽ omunh mex nê mẽ kãm:

—Kwa tanhmã na htem arĩgromnu hã amnhĩ nhĩpêx to ho pa wehe? Xà koja we mẽ akrit õwēhti ahkrehti kamã tēm ka omu nê ãm omu nê arĩgro mex jamãr pẽ ho axàpir kêt nê? Nà kot kaj mẽ tee ri omu nê ho axàpir kurê kumrêx. ¹² Arĩgromnu hã mẽ ho mexja ja mex kẽnã. Tirtũm mã mẽ pahpê panhĩja na mẽ pamex o mẽ hkrit jakrenh jakamã kêt pu mẽ tee arĩgromnu htã pu mẽ hã tanhmã axpẽn to mex to ho papa. Ja na Tirtũm kãm hprãm.

Anhÿr o mẽ kãm kapër. ¹³ Hãmri nê hpãnhã myta mã:

—E anhĩhkra katat. Anê.

Hãmri nhũm ïhkra katat nê mex kurê kumrêx.

¹⁴ Hãmri nhũm Parijew nhõ xwÿnhjaja tee ri ja hã omu nê Jejus kamã gryk nê. Arĩgromnu pẽ sap ã kot ho mex jakamã nhũm mẽ kamã gryk tÿx nê. Hãmri nê ma mra nê hapõj nê hã axpẽn kukjêr o kuhê nê axpẽn mã:

—Kwa ã kot amnhĩ nhĩpêx anhÿrja myrapê tanhmã kot puj wem ho? ã kapër anhÿrja o te mẽ papamjaja mẽ pahte hkĩnhã mẽ kamã paxukapri kêt pyrãk ã mẽ pajarê. Koja mẽ pahkwÿjaja kuma hãmri nê mẽ pahte amnhĩ nhĩpêx kaga nê amnhĩ kaxyw hkôt pix mã hamaxpêr. Kwa tanhmã kot puj wem ja nê ho?

Anhÿr o axpẽn kukjêr o kuhê.

Jejus kêp Tirtũm kot mẽ pahwÿr mēnh xwÿnh ã harēnh

Makre 3.7-12

¹⁵ Hãmri nhũm Jejus amnhĩ tã Parijew nhõ xwÿnhjê jamaxpêr kôt mẽ omu hãmri nê mẽ kêp kato nê hpãnhã ma nhỹhÿm krĩ hõ hwÿr ma tẽ. Nhũm mẽ ohtõ nê omu nê ma hkôt mra nhũm mẽ omu nê akupÿm mẽ kãm mẽ ã xwÿnh piitã ho mex. ¹⁶ Hãmri nê mẽ kãm:

—E na pa akupÿm mẽ ato mex. Nom kêt ka mẽ amnhĩ tã ixto axãmra ho ri apa hkêt nê. Ixpê Tirtũm Kra hã mẽ kãm ijarēnh kêt nê. ãm kwarĩ kumrêx.

Anhÿr o mẽ kãm kapër. ¹⁷ Na pre ra amnepêm Tirtũm nhỹ hã kapër xwÿnh finat Ijaisja Jejus kukamã mẽ kãm

tanhmã harēnh to nê hã kagà. Te Tirtũm tãm kapêr pyrãk o harē nê hã kagà. Nê hã kagà ho:

¹⁸ Ota ixkôt amnhĩ nhĩpêx o pa xwÿnhhta xa. Pa na pa amnhĩ kaxyw ãm. Inhmã hapêê. Na pa hte tanhmã kot amnhĩ nhĩpêx to ho pa hã omu nê ixkĩnh tÿx nê. Kot paj hwÿr amnhĩ karõ mẽ nhũm hwÿr axà nhũm ma ÿ hã pika piitã hkôt mẽ piitã mẽ kãm ijarēnh o ri mẽ hkôt pa. Mẽ kot hprĩ hã ixte tanhmã amnhĩ nhĩpêx to nê tanhmã ijamaxpêr to hã ixpumunh kaxyw.

¹⁹ Nom koja ri amnhĩ to ãmra o pa hkêt nê. Rÿ kãm amnhĩ to rax prãm o mẽ kãm tanhmã amnhĩ nhĩpêx to ho pa hkêt nê.

²⁰ ãm kapêr xukapri pix o koja mẽ hirerek xwÿnhjê mã kapêr o pa. Nê mẽ kot tee ri amnhĩ nhĩpêx ã amnhĩ pumunh xwÿnhjê kamã ukapri o pa. Nê mẽ kot htÿx ri amnhĩ nhĩpêx o mẽ pa xwÿnhjê kutã nojarêt rãhã ho pa jakamã nhũm mẽ hpãnhã tãm amnhĩ nhĩpêx o pa. Koja ã amnhĩ nhĩpêx anhÿr o ri mẽ hkôt pa rãhã ra akupÿm mẽmoj piitã tãm haxwÿr pa.

²¹ ã kot amnhĩ nhĩpêx anhÿr o pa jakamã koja pika piitã hkôt mẽ pa xwÿnh kwÿjaja kukwak ri amnhĩ kaxyw Tirtũm kôt hamaxpêr nê hkôt amnhĩ xunhwÿ. Anê. Na pre ã finat Ijaisja Tirtũm nhỹ hã kormã Jejus wrÿk nê kator kêt ri tanhmã kot amnhĩ nhĩpêx to ho pa hkukamã harēnh nê hã kagà anê. Tã nhũm mẽ hwÿr wrÿ nê ã mẽ hkôt amnhĩ nhĩpêx anhÿr o pa.

Jejus mẽ mẽkarõmnuti wa harēnh

Makre 3.20-30; Rukre 11.14-23, 11.31-32, 12.10

²² Tã nhũm prem Jejus wÿr mēhõ myja o mõ. Mẽkarõmnuti kot hwÿr ãr nê ho nohkre nê ho kapêr kêt xwÿnhhta nhũm mẽ hwÿr o mõ. Hãmri nhũm omu nê nê mẽkarõmnuti jano nê akupÿm ho mex kurê kumrêx nhũm akupÿm rĩt mex nê akupÿm kapêr mex nê. ²³ Hãmri nhũm mẽ amnhĩ jaêr pẽ omu nê kamã no puma nê hã axpẽn kukjêr o:

—Kokÿÿ. Jejus na hte ãm mẽ ho mex o mẽ ho mex o pa. Mãn kêp Tirtũm kot mẽ pahwÿr mēnh mã xwÿnhhta na nà? ã na hte ã amnhĩ nhĩpêx anhÿr o pa. Mãn kêp pahi finat Tawi kanrēhã tãmnhwÿta na nà? Anê.

²⁴ Nom nhũm Parijew nhõ xwÿnhjaja ã Jejus kot amnhĩ nhĩpêx anhÿr ã omu nê kêp mẽkarõmnuti hkwy hã hkamnhĩx. Jakamã mẽ kot hã axpêr kukjêr ã mẽ kuma nê mẽ kãm:

—Tk pẽr hinhu nhĩkõõti nhỹ hã na hte mẽ nê amnhĩ kwÿjê japõx o pa. Anê.

Hinhu nhĩkõõti nhĩxi hõ pẽ Satanasti nhũm prem ã Satanasti nhỹ hã Jejus kot amnhĩ nhĩpêx ã hkamnhĩx anê. ²⁵ Nhũm ra mẽ hamaxpêr kôt mẽ omunh mex jakamã mẽ kãm:

—Kwa mẽ inhma mẽ ate ixpê Satanasti hkwy hã ixkamnhĩx xwÿnhjaja. Koja pika nhõ xwÿnhjaja axpẽn kutã amnhĩ xunhwÿ nê axpu hãmri nê anhrã nê ma ahpÿnhã ri pa. Hãmri nê amnhĩ krã hkôt ri tanhmã amnhĩ nhĩpêx to ho pa. Jakamã nhũm mẽ õ pahija mẽ hamãr kêt nê. Nê koja krĩ nhõ xwÿnhjaja. Rÿ mẽ kot axpẽn to hkwy xwÿnhjaja mẽmoj tã axpẽn kãm gryk nê axpẽn kutã amnhĩ xunhwÿ. Hãmri nê ahpÿnhã awry

hã pa nhũm mẽ õ pahija tee ri kãm mẽ hamãr prãm kaprý. Mo mẽ hkwyjaja kot ri mẽ hamãr o pa? No koja pahija tãm amnhĩ nê amnhĩ kwýjê janor kêt nê. ²⁶ Tã ja pyrã nê ixte Satanasti nhỹ hã tanhmã amnhĩ nhĩpêx to ho ri ixpa ronhỹx pa ri mẽ nê amnhĩ kwýjê janor kêt nê.

²⁷ —No mẽ akwyjaja? Xà Satanasti nhỹ hã na htem mẽ nê mẽkarõmnuti japõx o pa? Kêp apu pa ixte ý hã mẽ nê amnhĩ kwýjê japõx ronhỹx mẽ akwyjaja ixpyrà nê ý hã mẽ nê amnhĩ kwýjê japõx o pa. Nà Tirtũm nhỹ hã mẽ ixte mẽ nê mẽ hapõx o ixpa kênã. Jakamã mẽ ate ã ijarênh anhỹrja mex kêt. ²⁸ Tirtũm Karõ nhỹ hã ixte mẽ nê mẽ hapõx jakamã kwa mẽ ja hã ixpumu nê ixte mẽ ato amnhĩptãr kaxyw Tirtũm kot mẽ awýr inhmênh kõt ixpumu kêt wehe. Pa na ka htem ijamãr o apa.

²⁹ —Satanastija àhpumunh týx jakamã na htem tee ri kêp hkõt mẽ kot amnhĩ xunhwýr xwýnhjê pytãr kaxyw nhũm mẽ nê mẽ omunh mex nê. Tã nom ixàhpumunh týx o ixte Satanasti jakrenh par jakamã na pa hte kêp mẽ utã nhũm mẽ hpãnhã ixkõt ri amnhĩ nhĩpêx.

³⁰ —Ra mẽ amã ixkapêr mar prãm tã nom kormã ixkõt amnhĩ xunhwýr kêt nê. Kwa wem ma amnhĩ to amõr gri nê tokyx ixkõt amnhĩ xunhwýr kêt wehe. Kot kaj mẽ anhỹr kêt hãmri nê mẽ apê ixkutã amnhĩ xunhwýr xwýnh pyrãk o amnhĩ nhĩpêx.

³¹ —Nê koja mẽhõ ixkapêr ma nê kãm ixprãm kêt nhũm Tirtũm ixtã omu nom tokyx tanhmã ixtã ho hkõt nê. Koja kormã amnhĩ tã hamã. Karõ kot axte kãm ijarênh o amnhĩrit nhũm jatã kot mar nê kãm ixprãm nê ixkõt amnhĩ xãm prãm xaj nhũm kormã amnhĩ tã hamã. Nom koja Karõ xatã mẽ kãm tanhmã ixto amnhĩrit to htã nhũm mẽ kuma nê ãm kuma nê te mẽ kêp amnhĩ jamak pro pyrãk. Jao ra Karõ hã hpijaãm kêt o amnhĩ nhĩpêx. Mýrapê koja Tirtũm nhỹrmã amnhĩ xwar te kêp amnhĩ jamak pro pyrãk o mẽ hipêx nhũm mẽ tee kãm amnhĩ kaprĩ kaprý. Hãmri nê amnhĩ xà htýx kamã hamak o pa xata wýr ma pa nê kamã pa rãhã nê pa ho pa. Anê.

Mẽ pajamaxpêr xà hkõt tanhmã ri mẽ pakapêr to

Rukre 6.43-45

³³ Nhũm Jejus arĩ Parijew nhõ xwýnhjê mã kapêr nê mẽ kãm:

—Nê kot kaj mẽ atõ anhõ mẽmo pãr nhũm amã õ mex nê. Ô rax nê. Ka omu nê akĩnh nê amnhĩm mex ã harê. No koja apê õ hkõt ka tee ri omu nê mex kêt ã harê. Na htem ã amnhĩm mẽmo xô hpãr pumunh kõt tanhmã kute hã harênh anê. Ja pyrã nê na htem tanhmã mẽ kot amnhĩ nhĩpêx to hã mẽ omunh kõt tanhmã mẽ harênh to. Mẽ kot amnhĩ tomnuj xwýnh ã mẽ harê rý mẽ kot amnhĩ to mex xwýnh ã mẽ harê.

³⁴ —Nê koja mẽhõ hamaxpêr mex nê hãmri nê kapêr mex o pa. Nom koja hamaxpêr punuj nê kapêr punuj pix o pa. Nê htýx ri tanhmã amnhĩ tomnuj to ho pa. Na htem ahpýnhã amnhĩ jamaxpêr xà hkõt tanhmã kapêr to ho pa. No mẽ kajaja na ka htem kagã xoprê jamaxpêr pyrãk o ajamaxpêr punuj pix o ri apa. Jao akapêr

punuj nê. No tãm ajamaxpêr o tãm akapêr o ri apa hkõt nê. Na htem tanhmã hamaxpêr to xà hkõt tanhmã ri kapêr to ho pa. ³⁶ Koja nhỹrmã Tirtũm mẽ piitã tanhmã mẽ kapêr to hã mẽ mar xà hkõt tanhmã mẽ harênh to. Jakamã mẽ akapêr mex o mẽ apa xwýnhjaja koja mẽ amex ã mẽ ajarê. Nom mẽ atýx ri akapêr punuj o mẽ apa xwýnhjaja koja mẽ amex kêt ã mẽ ajarê. Hãmri nê mẽ akapêr punuj o apaja mýrapê mẽ atomnuj týx nê. Anê.

Jejus kot Jõhti jarênh

Makre 8.11-12; Rukre 11.29-32

³⁸ Hãmri nhũm Tirtũm kapêr tũm o mẽ ahkre xwýnh mẽ Parijew nhõ xwýnh kwýjaja mẽmoj tã Jejus wý nê kãm:

—Kwa Pahiiti. Mẽ inhmã aa mẽ ixte mẽmoj pumunh kêt õ ho anê. Kot paj mẽ omu hãmri nê Tirtũm kot mẽ ixwýr amênh ã apumunh kurê kumrêx. Jakamã e mẽ inhmã mẽmoj to anê nã. Anê.

³⁹ Hãmri nhũm mẽ kuma nê mẽ kãm:

—Tk. Pêr ãm mẽ ajamaxpêr punuj pix o na ka htem apa. Ixpê Tirtũm kot mẽ awýr inhmênh xwýnh tã mẽ ate ja hã ixpumunh kêt. Nê mẽ ate ja hã axpên mã ijarênh kêt tã ixte mẽ amã aa mẽmoj pumunh kêt õ ho anhỹr kaxyw hã ixwý. Nã pa mẽ amã ho anhỹr kêt nê. Kormã. ãm amnepêm Jõhti kot tanhmã amnhĩ nhĩpêx toja pix kot paj mẽ amã harê.

⁴⁰ —Tirtũm nhỹ hã kapêr xwýnh Jõhtija amnepêm na pre tep rax kumrêxja htĩr rãhã kukrê. Nhũm õxãhkre kamã htĩr nê hkrĩ hã apkati axkrunêpxi hãmri nê htĩr rãhã õxãhkre rùm kato. Tã ixpê Tirtũm kot mẽ awýr inhmênh xwýnh kot paj nhỹrmã kên kre kamã ixtyk nê inhnõr ã apkati axkrunêpxi. Jõhti hkĩnhã ixtyk kumrêx nê inhnõr ã apkati axkrunêpxi hãmri nhũm Tirtũm akupým ixto ixtĩr.

⁴¹ —Nê koja nhỹrmã Tirtũm akupým mẽ htyk nê mẽ hikwý xwýnh piitã akupým mẽ ho htĩr hãmri nhũm mẽ piitã Inhĩpêxã mẽ wa ixkutã hkrĩ pa wa tanhmã mẽ harênh to. Tirtũm mẽ wa ixkuri mẽ htĩr tũm nê mẽ pa ho mẽ pa mã xwýnhjê hã mẽ hkwyjê jarê nê wa ixkuri mẽ pa ho mẽ pa hkõt xwýnhjê jarê. Mẽ piitã ã ahpýnhã mẽ harênh anê. Amarĩ mẽ pa xwýnhjaja nê mẽ õ pahijaja. Jakamã nhũm Nĩnĩwe nhõ xwýnhjaja tanhmã wa inhmã mẽ ajarênh to. Jõhti kot mẽ hwýr mõi nê mẽ kãm Tirtũm kapêr jarênh o pa xwýnhjaja nhũm mẽ tanhmã wa inhmã mẽ ajarênh to nê wa inhmã: “Na pre Jõhtija man mẽ inhõ krĩ hwýr mõi nê mẽ inhmã akapêr jarênh o ri mẽ ixkõt pa. Pa prem kuma nê mẽ ixte amnhĩ tomnuj kaga nê akõt amnhĩ xunhwýr kurê kumrêx Tirtũm. No or war akutã mẽ hkrĩ xwýnh kwý ata mẽ na pre Akra Jejus tãm mẽ hwýr mõi nê mẽ kãm kapêr o ri mẽ hkõt pa nhũm prem mar tã mẽ ixkĩnhã mẽ kot amnhĩ tomnuj kaga nê hkõt amnhĩ xunhwýr kêt nê. Mẽ ixkurom mẽ kot Akra mar tã amnhĩ kaxyw kãm hamaxpêr kêt nê.” Anhỹr o koja mẽ wa inhmã mẽ ajarê ka mẽ tee ri mẽ ama nê ra mẽ amã ma nê. Nom ãm mẽ amã ma kaprý.

⁴² —Nê sur kãm mẽ õ pahi nitita koja mẽ hpãnhã tanhmã wa inhmã mẽ ajarênh to nê wa inhmã: “Na pa pre inhmã pahi Sarumãw kot war anhỹ hã àhpumunh tỹx ã harênh ma hãmri nê inhmã mar prãm xaj ma awry hã õ pika hwỹr mõ nê omu nê kapêr ma. Hãmri nê ma akupỹm inhõ pika hwỹr mõ nê ixkwỹjê mã àhpumunh tỹx ã harênh o ri ixpa. Tã Akra Jejus na kot àhpumunh tỹx o pahi Sarumãw jakrenh tã or war akutã mẽ hkrĩ xwỹnh kwỹ ata mẽ. Mẽ kot kapêr mar tã ixkĩnhã hãm mar prãm kêt. Na prem kuma nê ãm kuma.” Anhỹr o koja wa inhmã mẽ ajarê. Hãmri nê ja hã mẽ amã akir ka mẽ tee ri mar o akrĩ nê amnhĩ kamã agryk o akrĩ. Nom ãm amnhĩ kamã agryk kaprỹ. Anê.

Mêkarõmnuti kot tanhmã mēhõ hto hã harênh

Rukre 11.24-26

⁴³ Nhũm Jejus arĩ Parijew nhõ xwỹnhjê mẽ Tĩrtũm kapêr tũm o mẽ ahkre xwỹnhjê mã kapêr nê mẽ kãm: —Te mẽ ate ixte mēhõ nê mêkarõmnuti japõx xwỹnh-ta pyrãk. Nhũm te kêp kator nê ma htēm pyrãk. Nê nhỹri amgrã kamã ri pa pyrãk. Koja ja kêp omnuj nhũm tee ri kamã nhỹri hkõt xà japêr o pa. Nom tee ri hapêr o pa kaprỹ. ⁴⁴ Hãmri nê tanhmã amnhĩ kukamã hamaxpêr to nê hamaxpêr o: “E kot paj ma akupỹm mẽ kot nê ixkator xwỹnh-ta wỹr tẽ nê axã nê kamã mãn ri ixpa.” ⁴⁵ Anhỹr o hamaxpêr hãmri nê ma akupỹm hwỹr tẽ. Nom kormã akupỹm hwỹr àr kêt ri nhũm kamã amrakati nê ri pa. Jakamã nhũm akupỹm hwỹr axã. Nom ahte hwỹr àr kêt nê. Amnhĩ kõt hkwỹjê ho 7 nê hwỹr mẽ ho gjêx pa. Mẽ kêp 7jaja nê wamta mẽ nhũm mẽ piitã hwỹr gjêx pa. No mẽ kêp 7jaja na omnuj tỹx o kot wamta jakrenh jakamã nhũm mẽ kot hwỹr gjêx xwỹnh-ta mẽ ý hã ra amnhĩ tomnuj tỹx nê oprê htỹx o pa. Wam pyxire kot hwỹr àrta nhỹ hã nhũm amnhĩ tomnuj o ri pa nom kawax pẽ oprê. Tã nhũm ra axte hwỹr mẽ ohtõ nê gjêxta nhỹ hã hãmri oprê htỹx kumrêx. Ja pyrã nê kot kaj mẽ tokyx ixkõt amnhĩ xunhwỹr kêt nê hãmri nê amnhĩ tomnuj tỹx pix o ri apa. Anê.

Jejus kot tanhmã hkwỹjê jarênh to hã harênh

⁴⁶ Nhũm Jejus arĩ mẽ ahkre ho nhỹ. Rôm nhũm katorxã nê htõjaja nhỹhỹnh hwỹr mõn pøj. Nom kormã hwỹr gjêx kêt nê. Mẽ kot hã htũ rax jakamã nhũm mẽ tee ri hwỹr gjêx kaxyw kormã kapõt ã hã mẽ omunh o kuhê. ⁴⁷ Hãmri nhũm mēhõja kapõt ã mẽ omu nê Jejus mã mẽ harê nê kãm:

—Kwa Pahihti. Ota akatorxã mẽ atõjaja awỹr mõn pøj nê tee àr kaxyw. O mũj mẽ kapõt ã kuhê. Anê.

⁴⁸ Hãmri nhũm kuma nê kãm:

—Tõe. Nà kot pa ixkato nê mẽ omu. Inhmã mẽ hapêê. Nom kot kaj mẽ atõ Tĩrtũm kapêr ma nê hkõt amnhĩ xãm nê hkõt amnhĩ nhĩpêx. Hã kot kaj te apê ix-tõ rỹ ixkatorxã pyrãk o pu mẽ axpên nhĩpêx o ri papa. Pa inhmã ixkatorxã nê ixtõjê japê pyrã nê mãänên inhmã mẽ ajapê nê. Anê.

Mêmo hy hkre xwỹnh jarênh

Matêwre 13.18-23; Makre 4.1-9; Rukre 8.4-8

13 Hãmri nhũm Jejus mẽ kãm kapêr pa nê ixkre rũm kato nê ma himõ rax wỹr tẽ nê gõ mỹri mẽ kãm ujarênh kaxyw nhỹ. Pa mẽ ixpê hkõt mẽ ixpa ho ixpa xwỹnhjaja ma hkõt mra. ² Hãmri nê gõta wỹr pøj nê mỹri ixkrĩ. Nhũm mẽ Jejus ã htũ rax nê nhũm tee ri mẽ omunh o nhỹ. Hãmri nê hamaxpêr nê kãnhmã xa nê tẽ nê pàr krem axã nê pàr kre kamã mütũm awry rũm mẽ ahkre ho nhỹ nhũm mẽ piitã omunh nê mar mex o hkrĩ. Nhũm mẽ kãm ujarênh o mẽ ahkre ho nhỹ. Nom mẽ kãm tãm ujarênh kêt nê. Mẽ kot Tĩrtũm kapêr mar nê tanhmã hkõt amnhĩ nhĩpêx to ho paja nhũm hã kuxi nê mẽ kãm harênh o nhỹ nhũm mẽ amgrã kamã kỹx pẽ mar o hkrĩ. Nhũm mẽ kãm:

⁴ —E mẽ inhma. Koja mēhõ ma pur mã mõ nê pur kãm mẽmo hy ho ukapêr o ri pa. Nom nhũm hy piitã amex kãm rôrõk kêt nê. Koja hkwỹja ahpỹnhã nhỹri rôrõk. Kwỹ aptỹx kãm rôrõk nhũm kuwênhre omu nê hwỹr mra nê hkrêr pa.

⁵ —Nê koja kên kãm hkwỹ rôrõk nê ra higrõt kutã no-jarêt nê higrõt pa. Nom nhũm kamã aptỹx nê kêp pika hkryre. ⁶ Jakamã nhũm higrõt nhũm hã myt apha nê arĩgro htỹx mẽ nhũm grã pa. Harê hkryre jakamã grã pa.

⁷ —Nê koja mrõnhĩ kamã hkwỹ rôrõk nê higrõt tã no nhũm utĩja kêp amỹtã nhũm õ hkêt nê.

⁸ —No kêt hirã kamã pika mex kãm rôrõk xwỹnhja hirã kamã rôrõk jakamã higrõt mex nê piitã õ rũnh nê. Kamã õ hkwỹ kêp 30 nê kamã hkwỹ kêp 60 nê kamã hkwỹ kêp 100. ã mẽ ujarênh kot anhỹr. ⁹ Kwa kêt ka mẽ ixujarênhja ma nê kãm ajamaxpêr tỹx rãhã ho apa. Anê.

Mêmo kaxyw Jejus kot mẽ ujarênh o mẽ ahkre

Makre 4.10-25; Rukre 8.9-15

¹⁰ Hãmri pa mẽ ixpê Jejus kõt mẽ ixpa ho ixpa xwỹnhjaja Jejus kot mẽ kãm ã ujarênh anhỹrja ã kuma nê tee ri hkukamã ijamaxpêr. Hãmri nê hã hkukja nê kãm:

—Kwa axujarênh-ta na pa mẽ ixprĩ hã hkõt mẽmoj pumunh kêt nê. Mon ka hte ãm mẽ ujarênh pix o mẽ ahkre? Anê.

¹¹ Hãmri nhũm mẽ inhmã:

—Tõe. Nà kot paj mẽ amã harê. Tĩrtũm kãm mẽ ate aprĩ hã mar prãm jakamã kot paj ixprĩ hã mẽ amã harê. Mẽ kot amnhĩ tomnuj kaga nhũm Tĩrtũm kot ja hã mẽ omunh nê mẽ ho hkra. Ja na pa harê. No mũjja-ja mẽ akĩnhã kãm ja mar prãm kêt jakamã na htem ixujarênhja ma nê ãm kuma nê htỹx ri pa.

¹² —No kêt mẽ kajaja na ka mẽ ixkõt na ri apa ho apa. Nê xatã ixkapêr mar o apa jakamã na ka mẽ aprĩ hã ixkapêr ma. Tã mẽ ate ixkõt amnhĩ nhĩpêx o apa jakamã na pa tanhmã mẽ akrã hto ka mẽ aprĩ hã mar mex o mõ. No mẽ kot ixkapêr mar nê ãm mar xwỹnhjaja na mẽ akĩnhã inhmar tỹx kêt nê. Jakamã nhũm Tĩrtũm tanhmã mẽ hkrã hto nhũm mẽ hã no hkêt tokyx anê htỹx ri pa.

¹³ “Ixte më kãm aa më kot mëmoj pumunh kêt kwÿ ho anhÿr rax tâ nhÿm më omu në ãm omu. Në ixte amnhÿ nhÿpêxja nhÿm më kãm hkÿnh kêt në. Në më kot ixkapêr mar tâ ãm inhma në kãm hprÿ hã inhmar prãm kêt në.”

—Jakamã na pa hte ã më kãm mëmoj te ho tãm pyrà në harê no ãm hã haxwÿ në më kãm ixujarênh anê.

¹⁴ —Na pre ra Tÿrtÿm nhÿ hã kapêr o pa xwÿnh Ijaisja amnepêm më hkukamã tanhmã më harênh to në hã kagà. Më kot inhmar në ãm inhmar xwÿnhjê jarê në tanhmã më hkukamã më harênh to në më harênh o:

Koja më ujarênh mex mar pymaj amnhÿ jamak pro në amnhÿ no hpro në hkôt hamaxpêr kêt në. Jakamã koja më kãm më kot amnhÿ nhÿpêx mex prãm kêt në harênhja ma në ãm kuma. Në omu në ãm omu. Më kãm hprãm kêt jakamã koja më ã amnhÿ nhÿpêx anê. ã më kot amnhÿ nhÿpêx anhÿr kêt ronhÿx më ra Tÿrtÿm kapêr ma në hkôt amnhÿ xunhwÿ. Hãmri nhÿm amnhÿ tâ më omu në më në më kot amnhÿ tomnuj rênh pa. Hãmri nhÿm më hkôt amnhÿ nhÿpêx mex në kapêr mar mex o pa. Tã no nhÿm më ã amnhÿ nhÿpêx anhÿr kêt në. Anê.

—ã Ijaisja më hkukamã më harê në më hã kagà anê.

¹⁶ —No kêt më kajaja na ka htem ano ho ixte tanhmã amnhÿ nhÿpêx to ho ixpa hã ixpumunh o ixkôt apa. Në më ajamak o ixkapêr mar o ri ixkôt apa. ¹⁷ Amnepêm më akukamã pahijaja në Tÿrtÿm nhÿ hã më kãm kapêr o ri më pa xwÿnhjaja na prem kãm ixpumunh prãm tÿx o pa. Në më kãm ixkapêr mar prãm tÿx o pa. No ãm më akÿnhã ixpumunh në ixkapêr mar kêt rãhã htyk pa. Kormã ixwrÿk në jar ixkator kêt jakamã na prem arÿ htÿr në pa ri ixpumunh kêt rãhã ra htyk pa. ãm më kapxipixjaja na ka më mÿr pê ixte amnhÿ nhÿpêx ã ixpumunh në ixkapêr mar o ixkôt apa. Tã më kurom më ate ano ho ixpumunh në ajamak o ixkapêr mar o ixkôt apa jakamã kwa më ja hã amnhÿ pumu në tãm amnhÿ nhÿpêx o ri apa pê akÿnh në ri apa. Anê.

Nhÿm pre ã Jejus më ixpê hkôt ixpa ho ixpa xwÿnhjê mã kapêr anê.

Jejus kot hprÿ hã mëmo hy jarênh

Makre 4.13-20; Rukre 8.11-15

¹⁸ Hãmri nhÿm Jejus më ixpê hkôt ixpa ho ixpa xwÿnhjê mã hprÿ hã më ujarênhja jarê në më inhmã:

—E kot paj ixprÿ hã më amã mëmo hy ho ukapêr xwÿnh ã ixujarênhja jarê ka më inhma. Nã mëmo hyta te kêp Tÿrtÿm kapêr pyràk. Në ahpÿnhã mëmo hy rôrôk ã pikata te kêp më apê panhÿ ahpÿnhã më ate Tÿrtÿm kapêr mar në ahpÿnhã hkôt tanhmã amnhÿ nhÿpêx tota pyràk. ¹⁹ Jakamã më kot mar xwÿnh kwÿjaja te më kot aptÿx kãm hy rôrôk nhÿm kuwênh kot hwÿr mrar në hkrêr par xwÿnhja pyràk. Jao Tÿrtÿm kapêr ma no nhÿm Satanasti te kuwênh kot hy krêr parta pyrà në më kot mar në amnhÿ kaxyw hkôt hamaxpêr në hkôt amnhÿ xunhwÿr pymaj hãmri ra tanhmã kapêrja në më hkrã hto. Jakamã nhÿm më kuma nom ho hamakêtkati tokyx anê në axte kãm hamaxpêr kêt në pa.

²⁰ —Në më kot mar xwÿnh kwÿjaja te më kot kênre kamã hy hkwÿ rôrôk në higrôt në grà par tokyx anhÿr xwÿnhja pyràk. Jao Tÿrtÿm kapêr ma në hkÿnh në. Në kãm mar prãm në. ²¹ Tã nhÿm mëhõ Tÿrtÿm në tanhmã më kãm kapêr to nhÿm më kuma në Tÿrtÿm kaga. Te mëmo hy higrôt nom ra grà par tokyx anhÿrta pyràk.

²² —Në më kot mar xwÿnh kwÿjaja te mrônhi kamã hy hkwÿ rôrôk në higrôt nhÿm mrônhi kot kêp ãmnar xwÿnhja pyràk. Jao më kãm Tÿrtÿm kapêr mar prãm tâ mãânên kãm më hikukrêx rÿnh në më hikàxpore rÿnh prãm. Hãmri në ãm ja pix kukamã hamaxpêr o pa. Në ja gryk ã axte Tÿrtÿm kapêr mã hamaxpêr në hkôt amnhÿ nhÿpêx kêt në.

²³ —Në më kot mar xwÿnh kwÿjaja te hirã kamã pika mex kãm hy hkwÿ rôrôk në higrôt në ô rÿnhja pyràk. Jao ixkapêr ma në amnhÿ krã him hagjênh tÿx në. Në ixkôt ri amnhÿ nhÿpêx mex rãhã ho pa. Jakamã te mëmo hy ô rÿnh në ô mex pyràk o amnhÿ nhÿpêx. E ã ixujarênhja kot anhÿr. Anê.

Harôj kaàkre jarênh

Matêwre 13.36-43; Makre 4.26-29

²⁴ Nhÿm Jejus axte më kot mar o hkrÿ xwÿnhjê mã awjarê nom hprÿ hã më kãm ujarênh kêt në. Axte më kãm mëmoj tâ kuxi në awjarê në më kãm:

—Nã nhÿrmã Tÿrtÿm më kot kormã htÿr ri tanhmã amnhÿ nhÿpêx to ho pa hã më omunh xà hkôt ahpÿnhã tanhmã më harênh toja te më ujarênh ja pyràk. Koja mëhõ harôj y mex o ukapêr kaxyw ma hpur mã mõ. Hãmri në hkre hpa në ma akupÿm mõ. ²⁵ Tã nhÿm kamã nhÿm ra gör në nõ. Hãmri nhÿm kãm hkurê xwÿnhja ma kêp ihpur wÿr tẽ në harôj mexta nhÿpy axtem në kêp harôj kaàkre hkre. Harôj kaàkreja te kot harôj mex pyràk nom më kot hkur kêt. Tã nhÿm kêp harôj y mex nhÿpy hkre hpa hãmri në ma akupÿm tẽ.

²⁶ —Tã nhÿm hamê higrôt në anhÿpê ô. ²⁷ Nhÿm kãm më àpênh xwÿnhjaja tee ri harôj mex kaêx ã harôj kaàkreta pumu në hpur nhõ dön wÿr tẽ në kãm harê në kãm: “Kwa ate harôj mex pix kre htã pêr hkaêx ã harôj kaàkre mãânên kato. Kwa tanhmã na pre amnhÿ to në hkaêx ã kato?” Anê. ²⁸ Hãmri nhÿm tee ri më kuma në më kãm: “Nã mëhõ kãm ixkurê xwÿnh na pre ã inhÿpêx anê.” Anê hãmri nhÿm kãm më àpênh xwÿnhja kãm: “Kwa xà kot paj më tokyx ma hwÿr mra në në harênh pa në kurê nã?” Anê. ²⁹ Nhÿm më kãm: “Nã kot kaj më anê në harôj mexta më ho apimràatã ixpê harênh pa. ³⁰ Kwãr mãmrÿ harôj mex më hpimràatã ô hpa mãn. Ka më rÿ ma hwÿr mra në harôj kaàkre kumrêx jarênh pa në axpên tâ harê ho ê në ma o mra në hpók. Hãmri në rÿ kormã hpãnhã harôj mex jakà në ho akuprõ në ô ho mra në ixkre kamã haxwÿ.” Anê. ã më ujarênh kot anhÿr.

Anhÿr o më kãm kapêr.

Jejus te kot mēmo hy hkryre pyrāk ā harēnh

Makre 4.30-32; Rukre 13.18-19

³¹ Hāmri nhūm Jejus arī mē kām amnhī tā kuxi nē ujarēnh o nhỹ. Nē tanhmā mē kām amnhī tā ujarēnh to nē mē kām:

—Nà Tirtūm kot mē awyr ixte mē ato amnhīptār kaxyw inhmēnh ā ijarēnhja. Te ixte mēmo hy pixire nhūm mē kot hkre nhūm higrōt pyrāk. Koja gaa nē hprēk. Hāmri nē hpa anhgrā nhūm kuwēnhre hwyr mra nē hōptī kamā amnhīm haē nhīpēx nē kamā hikwỹ. Tā kot paj nhỹrmā mēmo hy jarēnhhta pyrā nē ixpyxi htā pika piitā hkōt mē ho amnhīptā nē mē omunh mex rāhā ho ixpa. Anē.

Jejus te kot pāwti kaxkrit xā pyrāk ā harēnh

Rukre 13.20-21

³³ Nhūm Jejus arī mē kām amnhī tā kuxi nē ujarēnh o nhỹ nē mē kām:

—E kot pa hpānhā mē amā tanhmā pāwti kaxkrit xā jarēnh to ka mē inhma. Na hte mēnijaja pāwti nhīpēx kaxyw hāmri nē kaxkrit xā hkwy ho grire nē kupy nē trik xōm mē ho ahkà. Hāmri nē ho pāwti nhīpēx. Kaxkrit xāja grire htā pāwti piitā ho kaxkrit mex nē. Tā ja pyrā nē ixpyxi htā koja mē nhỹrmā pika piitā hkōt ixkōt amnhī nhīpēx mex o pa.

Anhỹr o mē kām amnhī jarē.

Jejus kot mē ujarēnh pix kām mē ahkre hā harēnh

Makre 4.33-34

³⁴ Na pre ā Jejusja mē ujarēnh o mē ahkre ho pa anē. Ām mē ujarēnh pix o mē ahkre ho pa. Te tām ujarēnh pyrāk no ām mēmoj tā haxwỹ rỹ amnhī tā haxwỹ nē mē kām tanhmā amnhī jarēnh to. ³⁵ ā kot mē ahkre ho pa anhỹr kukamā na pre ra amnepēm Tirtūm nhỹ hā kapēr o mē pa xwỹnhjē hōja harē nē hā kagà. Te Jejus tām tanhmā amnhī jarēnh to pyrāk o hkukamā harē nē hā kagà nē hā hkagà ho:

Kot paj mē kām ixujarēnh pix kām mē ahkre ho ri ixpa. Mēmoj te ho tām pyrā nē harē nom mēmoj tā haxwỹ nē tanhmā mē kām ixujarēnh to. Nē aa mē kot mēmoj mar kēt xwỹnh kwỹ kot paj mē kām harē kē mē kuma. Anē.

Jejus kot hprī hā harōj kaàkre jarēnh

Matêwre 13.24-30, 13.47-50

³⁶ Tā nhūm Jejus mē kām ujarēnh pa nē mē kure nē ma tēn ixkrem axà. Hāmri pa mē ixpē hkōt ixpa ho ixpa xwỹnhjaja ma hkōt mra nē ixkrem agjē. Hāmri nē harōj kaàkre hā ujarēnhhta ā hkukja nē kām:

—Kwa aprī hā mē inhmā harōj kaàkre jarēnhhta jarē nà. Na pa mē kormā ixprī hā mar mex kēt nē. Anē.

³⁷ Hāmri nhūm mē inhmā:

—Tōe pa ixprī hā mē amā harē. Ām paa. Ixpē Tirtūm kot mē awyr inhmēnh xwỹnh te ixte mēmo hy mex o ukapēr xwỹnhhta pyrāk.

³⁸ Nē purta te kēp pika piitā pyrāk.

Nē harōj mexta te ra mē ate ixkōt amnhī xunhwyr nē ixkōt amnhī nhīpēx o apa xwỹnhjē pyrāk.

Nē harōj kaàkreta te mē kot Satanasti hkōt amnhī nhīpēx o mē pa xwỹnhjē pyrāk.

³⁹ Nē kot harōj kaàkre hkre xwỹnhhta te Satanasti pyrāk.

Nē harōj jakār xā hā arīgrota te Tirtūm kot ahpỹnhā tanhmā mē harēnh to xā hā arīgrota pyrāk.

Nē mē kot harōj jakār xwỹnhjaja te Tirtūm kapēr o wrỹk xwỹnhjē pyrāk.

⁴⁰ Mē ujarēnhja kamā na prem harōj kaàkre kumrēx jarē nē hā hpōk jarē. Ja pyrā nē koja nhỹrmā Tirtūm kot ahpỹnhā tanhmā mē harēnh to xā hā arīgrota ā hāmri ā mē kot amnhī tomnuj o mē pa xwỹnhjē nhīpēx anē.

⁴¹ —Kot paj nhỹrmā kām mē piitā mē ho amnhīptār kaxyw hāmri nē kapēr o mē wrỹk xwỹnhjē mā anē nhūm mē ma mran wrỹ nē mē kot amnhī tomnuj xwỹnhjē pix o akuprō. Nē mē kot nhām mē hkwyjē kot mē urāk nē tanhmā amnhī tomnuj to ho pa kaxyw mē kām anhỹr xwỹnhjaja nhūm mē määnēn mē ho akuprō. ⁴² Hāmri nē mē ho pikuprōnh pa nē te mē kot harōj kaàkreta nhīpēx pyrā nē kuwy kamā mē rēnh pa. Hāmri nhūm mē kamā amnhī xā htỹx kamā hamak rāhā nē pa ho pa. Nē amnhī xā htỹx ā maj tee ri mỳr rāhā ho pa. Nē tee ri amnhī xā hā maj amnhī nham o axpēn kamnhar tỹx kaprỹ.

⁴³ —No ixkōt mē kot amnhī nhīpēx xwỹnhjaja koja mē mē kurom mex kumrēx nē pa. Kot paj mē ho mex rax nē nhūm mē mex rāhā nē pa ho pa. Tirtūm kot kormā pika nyw nhīpēx mā xwỹnhhta kamā nhūm mē mex kumrēx nē pa ho pa. E kēr ka mē ixujarēnhja ma nē kām ajamaxpēr tỹx rāhā ho apa. Anē.

Mē hikukrēx mex o hpimxur jarēnh

Piripos 3.7

⁴⁴ Nhūm Jejus arī mē ixpiitā mē inhmā tanhmā ujarēnh to. Nom hprī hā ujarēnh kēt nē. Kē axte mēmoj tā kuxi nē mē inhmā tanhmā ujarēnh to nē mē inhmā:

—Mē ate ixkōt amnhī xunhwyr xwỹnhjaja te mē apē mē hikukrēx mex ā pika japrōr xwỹnhhta pyrāk. Koja mēhō mē hikukrēx mex jamỹ nē o tē nē nhỹri amnhīm ho amũxu. Kaxyw kakwỹ nē kamā hagjē nē hity hpa nē ma akupỹm tē. Hāmri nhūm jāā nhūm mēhō tēn kām kato. Hā pikata kakwỹ nē kām kato nē omu nē hkīnh nē. Nē hamaxpēr o: “E pa ma tē nē inhōrkwy kamā ixkukrēx piitā ho wēnē hpa nē hpānhā kàxpore jamỹ nē ho amnhīm mē hikukrēx mex ā pika japrō nē amnhīm mēmoj mexta o ixārīk pa.” Anhỹr o hamaxpēr nē akupỹm hity hpa nē ma akupỹm tē. Hāmri nē mēmoj mexta gryk ā ō mēmoj piitā ho wēnē hpa. Hikukrēx nē ōrkwy nhūm piitā ho wēnē hpa. Hāmri nē hpānhā kàxpore jamỹ nē ma o tē nē amnhīm pikata japrō. Hāmri nē ma akupỹm hwyr tē nē kamā mē hikukrēx mexta kwỹnh pa nē ho ō kumrēx.

—Tā te mē ate mēhō kot ā amnhī nhīpēx anhỹr xwỹnhhta pyrāk. Na ka mē urāk nē inhgryk ā amnhī

tomnuj kaga hpa në hpãnhã ixkôt amnhĩ nhĩpêx. Te mēhō kot mēmo mē hikukrêx mex gryk ã hikukrêx tũm piitã kaga hpar në mē hikukrêx mex o hpimxur xà hã pikata japrôr pyrãk. Anē.

Mēhō kot kēn jaxēnh japrôr jarēnh

⁴⁵ Nhũm Jejus arĩ mē inhmã awjarē në mē inhmã:

—Nē ja. Na htem kãm hkĩnh në hamakêtkati në ri hpa hprãm xaj Tĩrtũm kôt amnhĩ xunhwý në hkôt ri amnhĩ nhĩpêx rãhã ho pa. Te mēhō my kãm kēn jaxēnh mex prãm në ma ri hapêr o pa xwýnhhta pyrãk. ⁴⁶ Nē ra nhýri omu në ma tē në prês ã mē hkukja. Nhũm mē kãm hã ho ohtô në harē nhũm ma akupým tē në kãm ho õ hprãm xaj hikukrêx piitã ho wēnê hpa. Hãmri në kãxpore jamý në o tē në amnhĩm ho haprô. Kēn jaxēnh mexta pix gryk ã hikukrêx piitã ho wēnê hpa në hpãnhã ho amnhĩm haprô.

—Tã ja pyrã në na ka htem amex në ajamakêtkati në axãmnhĩx ri apa hprãm xaj ixkôt amnhĩ xunhwý në ixkôt pix mã amnhĩ nhĩpêx o apa. Anē.

Kryhti jarēnh

Matêwre 13.24-30, 13.36-43

⁴⁷ Nhũm Jejus arĩ mē inhmã awjarē në mē inhmã:

—E Tĩrtũm kot nhýrmã tanhmã mē harēnh to xà hã arĩgro kot paj ixprĩ hã tanhmã mē amã harēnh to. Te ho mēmyjaja kot himô kamã kryhti rēnh pyrãk. Koja mē gôx kãm kumē në akupým ho api nhũm kamã tep ohtô në. Nhũm omu në kýx pē amgrã kamã hkapĩ në ahpýnhã ri tanhmã kamã kute kawrà. Nē kamã mex kawrà në kawà kamã kujê në mē kot hkur kêtja nhũm nhãm kurê. ⁴⁹ Ja pyrã në Tĩrtũm kot ahpýnhã ri tanhmã mē kot amnhĩ nhĩpêx to hã mē omunh xà hkôt tanhmã mē hipêx to kaxyw arĩgrota ã ã mē hipêx anē. Koja kapêr o mē wrýk xwýnhjaja mē kot hkôt amnhĩ xunhwýr xwýnhjê nē mē kot amnhĩ tomnuj o mē pa xwýnhjê kawrà hpa. ⁵⁰ Nē te mē kot tep mex nē tep punu kawrà në nhãm rēnhhta pyrãk o mē hipêx në ma kuwy hwýr mē o mra në kamã mē kurê. Nhũm mē tee ri amnhĩ xà htýx ã maj amýra në tee ri amnhĩ nhĩpêx kaprý. Anē.

Nhũm pre ã Jejusja axte mē ixpê hkôt mē ixpa ho mē ixpa xwýnhjê mã ujarēnh anē. ⁵¹ Hãmri në mē inhmã:

—E xàn ka mē atã aprĩ hã ixujarēnhhta ma nà?

Anē pa mē kãm:

—Tý. Nà na pa mē atã ixprĩ hã mar mex nē. Anē.

⁵² Hãmri nhũm mē inhmã:

—Tôe. Nà ãm hãmri. Na ka xep mē ra ixte mē ahkre nywta mar mex nē. Nē mē akwýjaja mããnhēn Tĩrtũm kapêr tũm mar mex nē. Te mē apê mēhō apkur xà rax pyrã në ma ho mē piitã mē hipêx o ri mē hkôt paja pyrãk. Ja pyrã në kêr ka mē ma mē piitã mē hkôt Tĩrtũm mē wa ixkapêr o mē ahkre ho ri mē hkôt apa. Anē.

Najare nhõ xwýnhjaja kot Jejus kaga hã mē harēnh

Makre 6.1-6; Rukre 4.16-30; Juãw 1.11

⁵³ ã Jejus mē inhmã ujarēnh par anē. ⁵⁴ Hãmri në ma akupým Najare hwýr mō në Tĩrtũm kapêr o mē ahkre xà hã ixkre hwýr tē në axà në mē ahkre ho nhý. Nhũm mē amnhĩ jaêr pē tanhmã kot mē ahkre hto hã kuma në tee ri hkukamã hamaxpêr në axpēn mã:

—Tk. Kwa kêp mē panhĩõ htã tanhmã kot we amnhĩ to në ã àhpumunh týx kôt mē pamã kapêr anē në ri mē kãm aa mē kot mēmoj pumunh kêt kwý ho anhýr o pa? ⁵⁵ Na pre mē panoo mã hprêk nhũm mē pahte pahprĩ hã hkwýjê pumunh. Kêp pĩ kuprãr xwýnh Juje mē hprõ Marir wa hkraa. Nē kêp Xiakre në Juje në Simãw në Jut mē htõõ. Nē htõxjaja jar mē pakamã pa nhũm mē pahte mē piitã mē omunh mex kēnã kot kêt we mē kurom ã àhpumunh týx anē. Anē.

⁵⁷ Hãmri në kamã gryk në hkaga. Hãmri nhũm tee ri amnhĩ tã mē omu në mē kãm:

—Nà Tĩrtũm nhý hã kapêr jarēnh o mē pa xwýnhjaja na htem krĩ hkwy kamã kãm mē mar prãm në. Nom õ krĩ kamã mē kot karãre rũm hprêk kãm omunh xwýnhjaja na htem kuma në ãm kuma. Anē.

⁵⁸ Tã mē kot amnhĩ kaxyw hkôt hamaxpêr kêt jakamã nhũm tee ri mē kãm aa mē kot mēmoj pumunh kêt kwý ho anhýr rax prãm. No ãm mē kãm mēmoj to grêre në ho anē.

Mē kot Juãw Paxis pĩr ã mē harēnh

Makre 6.14-29; Rukre 9.7-9

14 Tã nhũm pika pē Garirej kamã mēõ pahihti Erox Jejus jarēnh ma ² në tee ri hkukamã hamaxpêr në hã õ pôristi mã kapêr në mē kãm:

—Kwa pêr Juãw Paxis na nà? Ra ixte hã ixãmnhēnh nhũm mē kot hpĩr tã mãn tanhmã amnhĩ to në akupým htĩr. Nà pêr tãm kēnã. Jakamã na hte aa mē kot mēmoj pumunh kêt kwý ho anhýr o pa. Anē.

³ Na pre ra Erox htõ pē hprõptàn ho hprõ. Tõ arĩ htĩr tã nhũm axtem në kêp utã në ho hprõ. Hãmri nhũm Juãw Paxisja harēnh ma në hã kãm akir në kãm:

—Kwa Eroxis kêp atõ hprõ kēnã na ka kêt axtem në kêp utã në ho aprõ. Kwa ja omnuj týx o omnuj týx. Anē.

Hãmri nhũm amnhĩ tã kuma në kamã gryk në kot hpĩr kaxyw. Tã nom nhũm Ijaew kot axpēn mã kêp Tĩrtũm nhý hã kapêr jarēnh xwýnh ã harēnh jakamã nhũm mē umaj hpĩr kêt nē. ãm ho prês në haxà nhũm hkrĩ ho hkrĩ.

⁶ Tã nhũm jãã nhũm Erox kator ã arĩgro kato nhũm mē hã akuprõ në hã hkĩnh. Hãmri nhũm hprõ nyw kra niti mē hwýr axà në ahte mē hipõk ri mē kãm gre. Mē kot omunh në kamã hkurê kaxyw nhũm mē noo mã hpijaãm kêt nē mē kãm grer o xa. Hãmri nhũm pahi Erox omu nhũm ja kãm mex në nhũm hkĩnh në kamã nopyma nē. ⁷ Hãmri në kãm:

—Nà ãm hãmri na ka ã mē inhmã amnhĩ nhĩpêx anē. Jakamã kwa mãmrĩ mēmoj tã ixwý. Amã mēmoj prãm

xà hkôt hã ixwý kot paj amã kugõ. Æm hãmri na pa amã anê. E mëmoj na amã hprãm? Anê.

⁸ Hãmri nhũm kuma nê kãm:

—Ma Juãw Paxis krã na pa inhmã hprãm. Inhmã hkrã krãhta nê pasiiti kamã axà nê ixwýr o tẽ nê inhmã agõ. Anê.

Ra katorxà kot kaxyw kãm karõ jakamã nhũm ã hã hwýr anê. ⁹ Hãmri nhũm Eroxa tee ri kuma nhũm ja kęp omnuj nê. Nom ra më pikuprõnh rax xwýnhjê nhĩpõk ri më noo mã kot kãm: “E mãmrĩ amã mëmoj prãm xà hkôt hã ixwý pa amã kugõ.” Anhýr jakamã kãm kot kęp nê hprãm kêt nê. Hãmri nê Juãw Paxis wýr õ põristi hkwy rê ¹⁰ nhũm më ma më hagjênh xàta wýr mra nê unê nê mut krãhta. ¹¹ Hãmri nê hkrã mý nê pasiiti kamã kuxà nê ma akupým nita wýr o tẽ nê kãm kugõ nhũm kumý nê ma katorxà hwýr o tẽ nê kãm kugõ.

¹² Hãmri nhũm Juãw Paxis kôt më pa xwýnhjaja tee ri më kot hpir ã harênh ma nê ma hwýr mra nê kumý nê ma o mõn haxà. Hãmri nê ma Jesus wýr mra nê kãm harê.

Jejus kot më ho ohtõ nê më kãm më õ hã harênh

Makre 6.30-44; Rukre 9.10-17; Juãw 6.1-14

¹³ Hãmri nhũm Jesus Juãw Paxis jarênh ma nê hkaprĩ nê. Nê ma himõ nhĩkjê hwýr kapõt ã mõr kaxyw pàr krem axà nê ma mõ. Pa më hkôt ixpa ho ixpa xwýnhjaja ma hkôt mra. Hãmri nhũm krĩ hkwy kamã më pa xwýnhjaja harênh ma nê ohtõ nê ma më inhĩkrep pikap mra. Nê ra amnhĩ to wa nê më inhmõr xàja wýr põj nê më ixkutêp hkrĩ. ¹⁴ Jakamã pa më mõ nê më hwýr põj nê më omu. Hãmri nhũm Jesus më omu nê kãm më hkaprĩ nê më kãm më à xwýnhjê ho mex pa.

¹⁵ Tã nhũm ra myt àr kaxyw pa më hkôt ixpa ho ixpa xwýnhjaja tee ri më omu nê Jesus wýr mra nê kãm:

—Kwa na ra amýkry htýx nê. Amnhĩ nê më hano kê më ma nhýri krĩ hkwy hwýr mra nê tokyx amnhĩm mëmoj japrõ nê kuku. Mo jar më apkur xà hã mëõ? Jar akunĩ pix kênã. Anê.

¹⁶ Hãmri nhũm më inhma nê më inhmã:

—Nà kot paj më hanor kêt nê. Më kajaja kot kaj më kãm õ nhũm më apku. Anê.

¹⁷ No nhũm më ohtõ rax kumrêx. Mëmyjaja kęp 5.000. Nê kaxyw më hprõ nê më hkrajaja. Jakamã nhũm Jesus ã më inhmã kapêr anê pa më tee ri më hkukamã ijamaxpêr nê kãm:

—Kwa nà më panhõja raxti hã. Më panhõ pãwti kęp sĩk pix. Nê kaxyw tep grãja pijakrutre kênã kot kêt më piitã më hipêx. Nà xà kot paj më ma mra nê nhýri më kãm më mëmoj japrõ nhũm më kuku? Anê.

Hãmri nhũm më inhmã:

—Nà pu më kãm mëmoj japrõr kêt nê. Kot puj më kãm më panhõta o anhrã. E më kãm anê kê më ah-pýnhã ri hije nê hkrĩ hpa. Anê.

Hãmri pa më kuma nê më kãm anê nhũm më piitã hkrĩ hpa. Hãmri nhũm Jesus pãwti më tepja jamý nê kaxkwa hwýr rĩt nê ho Tĩrtũm wý nê kãm:

—Pa Papaj? Nà apê më inhmã më inhõ ho apa xwýnh jakamã amex o amex. Anê.

Hãmri nê më kãm ho hkry hpa nê hkôt më ixpa ho më ixpa xwýnhjê mã kugõ pa më õ ri ho më hipêx pa. Nhũm më piitã apkur o hkrĩ. Mëõja grire htã nhũm Jesus tanhmã më kãm ho rax to nhũm më ohtõ rax kumrêx tã piitã kuku nê ho õhy htu hpa nhũm arĩ mëõ jakrêx prã. Hãmri pa më akupým hakrêx o akuprõ nê ho kawà ho 12 nê ho nýt pa.

Jejus kot gõ krãhkà hã ãm nê htẽm ã harênh

Makre 6.45-52; Juãw 6.15-21

²² Tã nhũm Jesus më ixpê hkôt ixpa ho ixpa xwýnhjê mã anê pa më akupým pàr mã agjê nê ma xarmã hkukamã mõ. Hãmri nhũm më kot mar o kuhê xwýnhjê jano nhũm më ma akupým hapêx. Hãmri nhũm Jesus kot Tĩrtũm mã amnhĩ jarênh kaxyw ahte tẽ nê hixêt ã api nê himõk ã kãm amnhĩ jarênh o nhý.

Gaa nhũm ra kamãt nhũm arĩ ahte hixêt nhĩmõk ã nhý.

²⁴ Rõm pa më pàr kãm më inhmõr xwýnhjaja kormã himõ nhĩpõk ri mõ. Pu nhũm kók xapêr týt më ixkaxpa. Nê gõ axpên tak týt nê pa më tee ri rrẽmti ho gõ rênh nhĩpêx nê tee ri axpên pumu.

²⁵ Tã nhũm krãhyre kà nhũm Jesus man më ixkõt gõ krãhkà hã xan tẽ ²⁶ pa më amnhĩ wýr omu. No nhũm kormã hirã mex kêt jakamã pa më ixprĩ hã omunh mex kêt nê. Hãmri nê tee ri omu nê mëkarõ hã hkamnhĩx nê umaj ixãmra rax nê. ²⁷ Hãmri nhũm më inhmã kapêr nê më inhmã:

—Tk. Kwa më amã ma hkêt nê. Pa na pa më akõt tẽ. Anê.

²⁸ Hãmri nhũm Simãw Pêtre kuma nê kãm:

—Kwa xà ka na ka tẽ? Tõe apê më inhõ Pahihtĩ jakamã kwa amnhĩ wýr ixwý pa apyrã nê gõ krãhkà hã xa nê awýr tẽ nà? Anê.

²⁹ Hãmri nhũm kãm:

—Tõe mamrĩ amnê ixwýr tẽ. Anê.

Hãmri nhũm kuma nê pàr rũm kato nê hwýr tẽ. Urak nê gõ krãhkà hã hwýr tẽ. ³⁰ Hãmri nê kormã htẽp o htẽm më kók xapêta kamã ama nê tee ri amnhĩ kukamã hamaxpêr pê ra àr o mõ. Hãmri nê àmra kamã Jesus mã amnhĩ to akir nê kãm:

—Kwa tokyx ixto api Pahihtĩ. Anê.

³¹ Hãmri nhũm hpa hã kupy nê ho àpir kurê kumrêx nê kãm:

—Kwa pêr ãm kormã ate amnhĩ kaxyw inhmã ajamaxpêr týt kêt. Mon ka we ixkamnàr rom mãmrĩ man ixwýr atẽmre hkêt nê? Anê.

³² Hãmri nhũm wa akupým më ixwýr tẽ nê wa axà. Hãmri nhũm kók katat kôt pinhkrênh pa nhũm gõ tãm nõr kurê kumrêx. ³³ Hãmri pa më Jesus kot ã amnhĩ nhĩpêx anhýrja ã omu hãmri nê kãm mex o mex ã harê nê kãm:

—Kwa ãm hãmri na hte amnhĩ pê Tĩrtũm Kra hã amnhĩ jarê. Nà apê Kra kênã. Anê.

Jenějare kamã Jejus kot akupÿm mẽ ho mex ã harënh
Makre 6.53-56

³⁴ Tã pa mẽ ra himô hã rê nẽ Jenějare hwÿr pøj.
³⁵ Hãmri nẽ ma kapê hã ri xpa. Hãmri nhũm pika nhõ
xwÿnh kwÿjaja Jejus pumu nẽ mẽ piitã mẽ kãm harënh
o hprõt nẽ ahpÿnhã hwÿr nhÿhÿnh mẽ à xwÿnhjê hã
karõ. Nhũm mẽ man mẽ ixwÿr mẽ o mra ³⁶ nẽ mẽ ho
Jejus wÿ nẽ kãm:

—Pa? Kwa kê mẽ à xwÿnhjaja akupÿm mex kaxyw
apê axê kupê nà? Anẽ.

Hãmri nhũm mẽ kãm:

—Tõe. Kwãr mẽ mãmri mran hkupê. Anẽ.

Hãmri nhũm mẽ kuma nẽ axpën pãnhã hwÿr mra nẽ
kêp ê pix kupênh tã ra akupÿm mex nẽ ma akupÿm
mra.

**Parijew nhõ xwÿnh mẽ Tirtũm kapër tũm o mẽ ahkre
xwÿnhjê jarënh**
Makre 7.1-13

15 Tã nhũm Parijew nhõ xwÿnh mẽ Tirtũm kapër
tũm o mẽ ahkre ho mẽ pa xwÿnhjaja Jerujarë
rũm ma Jejus wÿr mra. Na htem mẽ ixkukamã mẽ in-
hîgêtjê pyrã nẽ apkur kaxyw nẽ amnhî nhîhkra kuhõnh
ryy nẽ. Amnhî nhîhkra htyk pix kuhõnh nẽ hkrî hkêt nẽ
ãm amnhî nhîhkra kuhõnh japjê nẽ. Nẽ õ prat
kuhõnh japjê nẽ kormã apkur kaxyw hkrî. Tirtũm kot
ja hã mẽ omunh nẽ mẽ mex ã mẽ harënh ã amnhî
kamnhîx jakamã na pre ã amnhî nhîpêx anhÿr o pa.
Jakamã nhũm mẽ ma Jejus wÿr mra. ² Hãmri nẽ omu
nẽ kãm:

—Pa Jejus? E kwa mẽ inhmã mẽmoj jarë. Amnepêm
mẽ panhîgêtjaja na prem apkur kaxyw nẽ amnhî
nhîhkra kuhõnh japjê nẽ rî kormã apku. Tã pa htem arî
ijaxwÿja ã amnhî nhîpêx anẽ. No akõt mẽ pa ho mẽ pa
xwÿnhjaja na htem mẽ ixpyrã nẽ ã amnhî nhîpêx anhÿr
kêt nẽ. Kwa mo na htem amnhî nhîhkra tyk kuhõnh
tokyx anẽ nẽ hkrî nẽ apku? Anẽ.

³ Hãmri nhũm mẽ kuma nẽ mẽ kãm:

—Tk. Na ka htem ãm mẽ panhîgêtjê hkõt pix mã
amnhî nhîpêx o apa no Tirtũm kapër kõt amnhî nhîpêx
kêt nẽ. ⁴ Tirtũm na pre mẽmoj tã mẽ pamã karõ ho:

Kêr ka mẽ anhîpêxã nẽ mẽ akatorxã wa hã apijaam
nẽ mẽ ho ajuta rãhã ho ri apa. Kot kaj mẽ ã amnhî
nhîpêx anhÿr kêt nẽ tanhmã mẽ kãm akapër punuj to
ho ri apa. Hã koja mẽ akwÿjaja ja mÿrapê mẽ apa. Anẽ.

—Na pre ã Tirtũmja mẽ pamã karõ anẽ. ⁵ No mẽ ka-
jaja na ka htem ã akwÿjê mã karõ anhÿr kêt nẽ. ãm
kapërja kwÿm na ka htem mẽ kãm karõ nẽ mẽ kãm:

Kot kaj mẽ mẽmo arîgro hã akãxpore japër nom kêr
ka mẽ ho tanhmã akatorxã rÿ anhîpêxã ho ajuta hto
kaxyw wa kãm hkwy nhõr kêt nẽ. ãm ho ate wa ho aju-
ta hkêt ã wa kãm amnhî jarë hãmri nẽ Tirtũm mã am-
nhî jarënh xã hã ixkre hwÿr o tẽ nẽ mẽ ixte tanhmã
ixkreta ho mex to kaxyw mẽ inhmã agõ. Kot kaj mẽ ã
amnhî nhîpêx anẽ nhũm Tirtũm ja hã mẽ apumu
nhũm ja kãm mex nẽ. Kêr ka mẽ ã amnhî nhîpêx anhÿr
o ri apa.

—Anhÿr o na ka htem mẽ kãm karõ ho ri apa. ⁶ Nom
Tirtũm kapër tũm kot ã ja jarënh anhÿr kêt. ãm amnhî
krã hkõt na ka htem ã mẽ kãm karõ punuj o ri apa anẽ.
Te mẽ akapërja mex o kot Tirtũm kapër jakrenh pyrãk.
⁷ Mẽ ate Tirtũm kõt amnhî nhîpêx ã amnhî jarënh tã
ãm amnhî to axêx nẽ hkõt amnhî nhîpêx kêt nẽ. Na
pre Tirtũm amnepêm mẽ akukamã tanhmã mẽ
ajarënh to. Nhũm ÿ hã mẽ kãm kapër jarënh xwÿnh
Ijaisja ô ri mẽ kãm mẽ ajarë nẽ hã kagã. Te Tirtũm tãm
kot mẽ ajarënh pyrãk. ⁸ Na pre mẽ akukamã mẽ
ajarënh o:

Mẽ kãm ixkînh ã mẽ kot amnhî jarënh tã mẽ kãm
ixkînh kêt. Na htem kãm ixprãm ã amnhî jarënh kaprÿ.

⁹ Mẽ kot ixkuhpa hã amnhî krã hkõt mẽmoj tã hkwyjê
mã karõ ho pa jakamã na htem kot ixkõt amnhî nhîpêx
o pa hã amnhî jarënh kaprÿ. Anẽ.

—Na pre ã Ijaisja Tirtũm nhÿ hã mẽ akukamã mẽ
ajarë nẽ mẽ atã kagã anẽ. Anẽ.

Nhũm pre ã Jejus Parijew nhõ xwÿnhjê mẽ Tirtũm
kapër tũm o mẽ ahkre xwÿnhjê mã kapër anẽ.

Mẽmoj kot mẽ pahomnu hã harënh
Makre 7.14-23

¹⁰ Tã nhũm Jejus amnhî wÿr mẽ kot mar o kuhê xwÿn-
hÿ hÿwÿ nẽ axte mẽ kãm kapër nẽ mẽ kãm:

—E mẽ inhma nẽ inhmar tÿx nẽ. ¹¹ Na hte Tirtũm
kapër tũm o mẽ ahkre xwÿnhjaja amnhî krã hkõt mẽ
ate amnhî nhîhkra kuhõnh japjê hã mẽ amã karõ ho
pa. Nẽ amnhî krã hkõt mẽ axãpkur xã hã tanhmã mẽ
amã karõ hto ho pa. Tirtũm kot ja hã mẽ apumunh kõt
mẽ amex ã mẽ ajarënh kaxyw ã mẽmoj tã mẽ amã
karõ anẽ. Nom na hte Tirtũm tanhmã mẽ kot amnhî
nhîhkra kuhõnh to hã mẽ omunh xã hkõt tanhmã mẽ
harënh to hkêt nẽ. Rÿ mẽ axãpkur xã pumunh kõt mẽ
mex ã mẽ ajarënh kêt nẽ. Ja tanhmã kãm kute hkêt. Na
hte ã mẽ kot amnhî nhîpêx anhÿr ã mẽ omunh xã hkõt
mẽ mex ã mẽ harënh rÿ mẽ mex kêt ã mẽ harënh kêt
nẽ. Na hte mẽmoj kur ã mẽ omu nẽ ãm mẽ omu nẽ hã
tanhmã mẽ harënh to hkêt nẽ. ãm mẽ kapër punuj rÿ
mẽ kapër mex ã mẽ mar kõt pix mã na hte tanhmã mẽ
harënh to. Anẽ.

¹² Nhũm pre ã Jejus mẽ kãm kapër anẽ pa mẽ hkõt
mẽ ixpa ho mẽ ixpa xwÿnhjaja kuma hãmri nẽ hwÿr
mra nẽ kãm:

—Kwa na ka ã mẽ kãm akapër anẽ nhũm Parijew
nhõ xwÿnhjaja tee ri ama nhũm ja mẽ kêp omnuj nẽ.
Anẽ.

¹³ Hãmri nhũm mẽ inhma nẽ tanhmã mẽ inhmã Pari-
jew nhõ xwÿnhjê jarënh to nẽ hprî hã mẽ hkukamã mẽ
harënh o:

—Tk. Kwãr mãmri mẽ kêp omnuj. Mẽ kot Tirtũm
kapër tũm o mẽ ahkre ho pa htã na htem hkõt amnhî
nhîpêx kêt. Jakamã te mẽ nohkre xwÿnh kot amnhî
nhîpêx pyrãk. Koja mẽhõ nohkre htã amnhî kõt
nhÿhÿm nohkre hõ ho mõ hãmri nẽ wa hamë pry
pumunh kêt nẽ htÿx mõ hãmri nẽ nhÿri ahkrehti kamã
tẽm. Tã Parijew nhõ xwÿnhjaja te kot wam htẽm xwÿn-
hta pyrãk nhũm mẽ kot mẽ mar xwÿnhjaja te kot wam

htêm xwÿnhjê kôt hõ htêmta pyrâk. Jakamã Parijew nhõ xwÿnhjê mē kot mē mar o pa xwÿnhjê mē koja mē hpimrààtã nhÿrmã te ahkrehti kamã rôrôk par pyrâk o amnhÿ nhÿpêx nē mex kêt nē pa ho pa. Koja kaxkwa kamã inhõ Papaj nhÿrmã amnhÿ nē mē hanor pa.

—Inhõ Papaj te kēp mēmo hy hkre ho pa xwÿnhjê pyrâk. Na htem mēmo hy hkre nhÿm higrôt hapôj nē higrôt mex nē. Hāmri nhÿm mē hwÿr mra nē omu nē nē mēmoj nhÿgrôt punuj jarê nē kurê. Ja pyrã nē koja nhÿrmã inhõ Papaj amnhÿ nē Parijew nhõ xwÿnhjê janor pa nhÿm mē mex kêt nē pa ho pa. Jakamã kwa kēr ka mē hkôt ri amnhÿ nhÿpêx kêt nē. Anē.

Nhÿm pre ã Jesus mē ixte hkôt ixpa ho ixpa xwÿnhjê mã hprÿ hã Parijew nhõ xwÿnhjê hkukamã ã mē harēnh anē pa mē mar o ixkrÿ. ¹⁵ Hāmri nhÿm Simãw Pêtre tee ri Tirtÿm kot mē apkur xà hã mē omunh xà hkôt tanhmã mē harēnh to hkêt ã harēnh ma. Nē ãm tanhmã mē kapēr to pix ã mē mar kôt tanhmã mē harēnh toja ma hāmri nē hã Jesus kukja nē kãm:

—Kwa mon ka ri ã ja jarēnh anē Pahihti? Anē.

¹⁶ Hāmri nhÿm kuma nē hprÿ hã mē inhãm awjarê nē mē inhãm:

—Kwa xan ka mē kormã aprÿ hã ja mar kêt nē? ¹⁷ E pa ixprÿ hã mē amã harê ka mē inhãm. Nà na htem mēmoj ku nhÿm hte mē hkrã hi hwÿr gjêx kêt nē. Na hte mē õhy pix wÿr agjê nē gaa nē nhãm hapôj nē hapêx. Na htem mē apkur xàja ku nē ÿ hã tanhmã amnhÿ tomnu hto hkêt nē. Jakamã na hte Tirtÿm ja hã mē omunh xà hkôt tanhmã mē harēnh to hkêt nē. ¹⁸ ãm mē hkrã kamã mē hamaxpēr punuj pix nhÿ hã mē kot tanhmã amnhÿ tomnuj to jakamã na hte Tirtÿm mē hamaxpēr ã mē omunh xà hkôt tanhmã mē harēnh to. ¹⁹ Koja mēhõ tanhmã hamaxpēr punuj to nē ra hkôt amnhÿ tomnuj pix o pa. Na htem nhãm mē hpar o pa nē mē kēp ahkÿ nē amnhÿ to hêx nē mē hakwa kamã nhãm axpēn mã mē hixi jarēnh o pa. Nē nhãm mē kēp mē hprõ ho amnhÿkati nē mē hkuprÿ hwÿr mra nē mē ho amnhÿkati. Nē tanhmã ri axpēn tomnuj to ho pa. ²⁰ Mē hamaxpēr punuj nhÿ hã na htem ã amnhÿ nhÿpêx anhÿr o pa. No na hte Tirtÿm mē kot amnhÿ nhÿhkra kuhõnh japjê hkêt ã mē omunh xà hkôt mē kot amnhÿ to mex xwÿnh ã mē harēnh kêt nē. Ja tanhmã kãm kute hkêt. Anē.

Jesus kot Ijaew kêt xwÿnh ni kamã ukaprÿ hã harēnh

Makre 7.24-30

²¹ Tã nhÿm Jesus mē inhãm kapēr pa hāmri nē mē inhãm anē pa mē ma hkôt mō. Ma Xir mē Sitõja wa pu hã ri ixpa. ²² Nhÿm mēhõ nija omu nē hwÿr tē. Mē ixkÿnhã kēp Ijaew kêt tã hwÿr tē. Kanaã nhõ xwÿnh na pre. Tã Jesus wÿr tē nē kãm:

—Ka Pahihti Jesus? Apê Tirtÿm kot mē ixwÿr amēnh xwÿnh jakamã xē ixujarēnh ma nē ixkamã axukaprÿ hkêt wehe. Na mēkarõmnutija tanhmã ixpê ixkra ho nhÿm ixpê omnuj tÿx kumrêx. Anē.

²³ Hāmri nhÿm Jesus kuma nē ãm kuma nē kãm tanhmã nē hkêt nē. Jakamã pa mē ixpê hkôt ixpa ho ixpa xwÿnhjê kãm:

—Kwa hano kē ma akupÿm tēē ri. Na ãm ri mē pahkôt xatã hkrata jarēnh pix o ri pa. Anē.

²⁴ Nom nhÿm kot amnhÿ tã kamã hamak kaxyw tanhmã mē inhãm hã kapēr to nē mē inhãm:

—Nà ãm Ijaewjê pix wÿr na pre Tirtÿm inhãm. Te mē kēp ôwēhti pikunor pyrâk o na htem htÿx ri amnhÿ nhÿpêx o pa. Jakamã ãm mē hwÿr pix mã na pre inhãm. Na kormã inhãm tanhmã nhãm mē hkwyjê jarēnh to hkêt nē. Anē.

²⁵ Hāmri nhÿm nitita tee ri amnhÿ tã kuma nē hwÿr tē nē kutã hkõnkrã ho htêm nē nhÿ nē kãm:

—Xê ma we ixkamã axukaprÿ hkêt wehe. Anē.

²⁶ Hāmri nhÿm kãm:

—Nà kormã. Na pre Tirtÿm mē kēp Ijaewjê pix wÿr inhãm. Jakamã na pa kormã nhãm tanhmã mē akwyjê ho mex to hkêt nē. Anē.

²⁷ Hāmri nhÿm kãm:

—Ma ãm hāmri na ka akapēr. Nom ixpê Ijaew kêt tã mē kuxwar ãm ixto mex grire kêt wehe. Anē.

²⁸ Hāmri nhÿm kuma nē kãm:

—Nà ãm hāmri na ka ã akra kaxyw inhãm ajamaxpēr tÿx anē. Jakamã kot paj nē mēkarõmnutita jano. Koja axte tanhmã apê ho hkêt kumrêx.

Anhÿr o kãm kapērja rôm nhÿm hkraja akupÿm mex kurê kumrêx.

Jesus kot mē à xwÿnhjê ho ohtõ nē mē ho mex ã harēnh

Makre 7.31-37

²⁹ Tã nhÿm Jesus mē inhãm anē pa mē ixrohã krÿja pē ixkato nē ma himõ rax pē Garirej wÿr mō. Nē nhÿri gô mÿri hixêt wÿr mō nē hã api nē ixkrÿ. ³⁰ Hāmri nhÿm mē ohtõ nē ma mē ixkôt mra. Nē mē à xwÿnhjê nhÿm mē hamÿ nē Jesus wÿr mē o mra. Na prem ohtõ rax kumrêx. Ra ri mē pa hkêt xwÿnhjê nē mē nohkre xwÿnhjê nē mē hyk o mē pa xwÿnhjê. Nē mē kapēr kêt xwÿnhjê nē ahpÿnhã ri tanhmã mē à kute xwÿnhjê nhÿm mē hamÿ nē ma Jesus wÿr mē o mra nē kutã mē haxwÿ. Hāmri nhÿm mē omu nē ahpÿnhã akupÿm mē ho mex pa. ³¹ Jakamã na pre mē kapēr kêt xwÿnhjê akupÿm kapēr mex nē. Nē ri mē pa hkêt xwÿnhjê akupÿm mrar mex nē. Nē mē hyk o mē pa xwÿnhjê akupÿm tãm ri mra. Nē mē nohkre xwÿnhjê akupÿm rÿt mex nē. ã ahpÿnhã akupÿm mex par anē. Hāmri nhÿm mē kot hwÿr mē hamÿnh nē Jesus wÿr mē o mrar xwÿnhjê amnhÿ jaêr pē akupÿm mē mex ã mē omu nē mē kamã no puma nē hkÿnh nē. Hāmri nē Tirtÿm mã mex o mex ã harê nē axpēn mã harēnh o:

—Nà ãm hāmri mē panhõ Tirtÿmjê ãm mex o mex. Anē.

Jesus kot mē ho 4.000 nē mē kãm mē õ hã harēnh

Makre 8.1-10

³² Tã nhÿm Jesus mē ixte hkôt ixpa ho ixpa xwÿnhjê amnhÿ wÿr mē ixwÿ nē mē ixkôt mē mrar xwÿnhjê jahkre nē mē inhãm:

—E. Ka mē rÿ kam jajê pumu. Na pa ra inhãm mē hkaprÿ nē. Na mē pahkôt ri pa hã apkati axkrunēpxi

nhũm ra mẽ kêp mẽõja hapêx pa. Koja mẽ apkur kêt rãhã ma akupým mẽ õ krĩ hwýr pa hãmri nẽ pry hã hirot nẽ rôrôk o pa. Mẽ õ krĩ hwýr awryy. Anẽ.

³³ Nhũm pre ã mẽ inhmã mẽ harênh anẽ pa mẽ tee ri kuma hãmri nẽ kãm:

—Kwa nom nhýri kot pu mẽ kãm mẽmoj japrô nhũm mẽ tokyx kuku? Ja kapôt pix kênã. Nẽ mẽ ohtô griiã. Anẽ.

³⁴ Hãmri nhũm mẽ inhmã:

—No mẽ panhõ pãwtita? Tanhmã na arĩ kute nẽ hikwý? Anẽ.

Hãmri pa mẽ kãm:

—Nà ãm kêp 7 pix. Nẽ kaxyw tep kwý no ãm grêre. Kot mẽ ho dare kaxyw ã. Anẽ.

³⁵ Hãmri nhũm mẽ inhma nẽ mẽ ixkôt mẽ mrar xwýnhjê mã anẽ nhũm mẽ hkrĩ pa. ³⁶ Hãmri nhũm pãwti mẽ tep grêreta jamý nẽ ho Tirtũm wý nẽ kãm:

—Pa Papaj. Nà apê mẽ inhmã mẽ inhõ ho apa xwýnh jakamã amex o amex. ãm amex kumrêx. Anẽ.

Hãmri nẽ mẽ kãm mẽmojta o hkry hpa nẽ mẽ inhmã kugõ pa mẽ õ ri ho xa nẽ ho mẽ hipêx pa. ³⁷ Hãmri nhũm mẽ piitã apku nẽ õhy htu hpa. Nhũm prem mẽmyjaja kêp 4.000 nẽ kaxyw mẽnijaja nẽ mẽhprĩjaja. Mẽ ohtô rax kumrêx tã nhũm Jejus mẽõ ho mẽ hipêx pa. Hãmri pa mẽ hakrêx o akuprõ nẽ ho kawà ho 7 nẽ ho nyt. ³⁹ Hãmri nhũm Jejus ma akupým mẽ õ krĩ hwýr mẽ hano pa mẽ pãr krem agjê hãmri nẽ ma ijaxwýja mẽ. Ma pika pê Makatã hwýr mẽ.

Parijew nhõ xwýnh kwý kot aa mẽ kot mẽmoj pumunh kêt õ ho anhýr ã Jejus wýr ã mẽ harênh

16 Tã pa mẽ ra hwýr pøj nhũm Parijew mẽ Satusew nhõ xwýnhjaja Jejus pumu nẽ hwýr mra. Nẽ hêx rom kot kamã hamak kaxyw hwýr mra nẽ kãm:

—Pa Jejus? E kwa mẽ inhmã aa mẽ ixte mẽmoj pumunh kêt õ ho anẽ nà? Pa mẽ ate ho anhýr ã apumu nẽ Tirtũm kot mẽ ixwýr amênh ã akôt ijamaxpêr kurê kumrêx. E kwa tokyx. Anẽ.

² Hãmri nhũm mẽ kuma nẽ mẽ kãm:

—Tk. Nà kot paj mẽ amã ho anhýr kêt nẽ. Mẽ ate hã ixpumunh nẽ ixkôt ajamaxpêre kaxyw ã. Na ka htem kaxkwa kamã kakrã pumu nẽ axpên mã na wrýk ã harê. Nẽ kaxkwa mex pumu nẽ axpên mã amgrà hã harê. Tã ixte tanhmã mẽ amã mẽmoj nhĩpêx to hã ixpumu nom Tirtũm kot mẽ awýr inhmênh xwýnh ã ixkôt ajamaxpêr kêt nẽ. ⁴ ãm mẽ ajamaxpêr punuj pix o na ka htem ri ajamaxpêr o apa. Ixpê Tirtũm kot mẽ awýr inhmênh xwýnh tã ka mẽ ja hã ixkôt ajamaxpêr kêt nẽ. Tã mẽ ate aa mẽmoj pumunh kêt kwý ixte mẽ amã ho anhýr kaxyw ka mẽ inhmã hã karõ. Nà kot paj mẽ amã ho anhýr kêt nẽ. Kormã. Kot paj ãm nhýrmã te amnepêm Jõhti kot amnhĩ nhĩpêx pyrãk o amnhĩ nhĩpêx. E ja pix kot paj mẽ amã harê. Nom kot paj mẽ amã aa mẽ ate mẽmoj pumunh kêt õ ho anhýr kêt nẽ. Anẽ.

Nhũm pre ã Jejus mẽ kãm kapêr anẽ hãmri pa mẽ ixrohã mẽ kêp ixkato nẽ ma ixpa.

Jejus kot hkôt mẽ pa xwýnhjê jahkre hã harênh

Makre 8.14-21

⁵ Tã pa mẽ Jejus mẽ ixrohã ma mẽ nẽ pãr mã agjê nẽ ma xarmã akupým rê nẽ hikjê hã mẽ. Hãmri nẽ tee ri mẽ ixàpkur xà japêr nẽ axpên mã:

—Kwa na pu mẽ panhõ pãwti ho pajamakêtkati nẽ kure. Anẽ.

⁶ Hãmri nhũm Jejus mẽ inhma nẽ tanhmã mẽ inhmã Parijew mẽ Satusew nhõ xwýnhjê jarênh to. Nom pãwti hã kuxi nẽ mẽ inhmã mẽ harê nẽ mẽ inhmã:

—Kwa mẽ o kora. Kêr ka mẽ Parijew mẽ Satusew nhõ xwýnhjê mẽ kêp pãw kaxkrit xà hkwy hpyr kêt nẽ. Anẽ.

⁷ Hãmri pa mẽ tee ri kuma nẽ ixprĩ hã mar mex kêt nẽ. Nẽ arĩ kapêrta ã axpên kukjêr o hkôt mẽ nẽ axpên mã:

—Kwa mẽ pahte mẽ panhõ pãwti rer jakamã mãn mẽ pahte mẽ õ pãw kaxkrit xà kwý hpyr nẽ mẽ pahkurê nà? Anẽ.

⁸ Hãmri nhũm mẽ inhma nẽ mẽ inhmã:

—Hêxta waa nẽ. Mon ka mẽ ãm axpên mã mẽ panhõ pãwti hkêt pix jarênh o mẽ? Pêr kormã mẽ ate amnhĩ kaxyw inhmã ajamaxpêr tỳx kêt. ⁹ Jãã ixte mẽ anoo mã pãwti kêp 5 pix tã nhũm ixte ho mẽ kêp 5.000tajê nhĩpêx par. Nhũm mẽ kot hkur nẽ ho õhy htu hpar nhũm mẽ ate mẽõ jakrêx o apikuprõnh par nẽ ho kawà ho 12 nẽ ho hipu. ¹⁰ Nẽ ham pãwti kêp 7 o mẽ kêp 4.000 nhĩpêx par nhũm mẽ kot hkur nẽ ho õhy htu hpar nhũm mẽ ate mẽõ jakrêx o apikuprõnh raxja.

¹¹ Ra ixte mẽ anoo mã ja ho anhýr o axkrut tã ka mẽ ra hã ano hkêt nẽ arĩ axpên mã mẽ paxàpkur xà pix jarênh o ixkôt mẽ. Nà mẽ paxàpkur xàja na pa harênh kêt nẽ. Parijew mẽ Satusew nhõ xwýnhjê nhõ pãwti kaxkrit xà pix na pa hã kuxi nẽ mẽ amã tanhmã harênh to. Anẽ.

¹² Nhũm pre ã mẽ inhmã kapêr anẽ hãmri pa mẽ atã kuma nẽ kãm:

—Nà na pa xep mẽ hãmri tã ama. Xep mẽ ixte Parijew mẽ Satusew nhõ xwýnhjê kapêr kôt amnhĩ nhĩpêx nẽ na ka mẽ ixkurê nẽ ã mẽ harênh anẽ. Anẽ.

Jejus kot amnhĩ tã hkôt mẽ pa xwýnhjê kukjêr ã harênh

Makre 8.27-30; Rukre 9.18-21

¹³ Tã pa mẽ axte Jejus kôt mẽ nẽ pika pê Sejarej Piri-pos kamã kormã mẽ nhũm Jejus amnhĩ tã mẽ ixkukja nẽ mẽ inhmã:

—E mẽ inhmã mẽmoj jarê. Tanhmã na hte mẽ akwýjaja axpên mã ijarênh to wehe? Anẽ.

¹⁴ Hãmri pa mẽ kãm:

—Nà na htem ahpýnhã tanhmã ajarênh to. Na hte kamã mẽ hkwyjaja ajarênh o finat Juãw Paxis ã ajarê. Nhũm kamã mẽ hkwyjaja ato finat Eris ã ajarê nhũm mẽ hkwyjaja tõhã apê Tirtũm nhý hã akapêr o apa xwýnhjê hõ akupým atĩr ã ajarê. Nẽ tõhã finat Jeremĩstija rý axtem hõ hã ajarê. ã na htem ahpýnhã axpên mã ajarênh anẽ. Anẽ.

¹⁵ Hãmri nhũm mẽ inhma nẽ mẽ inhmã:

—No më kajaja? Ixpê mëhõ hä na ka htem axpën mã ijarê? Anê.

¹⁶ Hämri nhüm Simāw Pêtre kām:

—Nà apê Tirtüm kot më ixkaxyw axām në më ixwÿr amēnh xwÿnh na ka. Nê apê më ixpiitã më inhõ Pahi Maati na ka. Ä na pa htem axpën mã ajarēnh anê. Anê.

¹⁷ Hämri nhüm kuma në kām:

—Nà äm hämri na ka ä ijarēnh anê Simāw Pêtre. Nom amnhĩ krã hkõt na ka ä ijarēnh anhÿr kêt në. Tirtüm tãm kot amã ixto amnhĩrit xà hkõt na ka ä ijarēnh anê. ¹⁸ Nà akumrēx na ka ä ijarēnh anê. Tã koja më apyrã në nhÿrmã më kot ixkõt amnhĩ xunhwÿr xwÿnhjaja ma hkwyjê mã ja hä ijarēnh o ri krĩ piitã hkõt pa. Hämri nhüm më hkwyjaja më kuma në më apyrã në ixkõt amnhĩ xunhwÿ. Hämri nhüm më kēp ixprãm nõkati xwÿnhjaja tee ri tanhmã më kot ijarēnh toja ma në ä ijarēnh anhÿrja në më kām kapēr tã nom ho hkapyrÿ. Ä koja ixkõt më kot amnhĩ xunhwÿr xwÿnhjaja më kām ijarēnh o pa anê. Jao te më apê kēn nhüm ixte më ato amnhĩm inhõrkwÿ nhĩpēx pyràk. Tã akumrēx ate ä ijarēnh kot anhÿr jakamã kot paj te ixte akumrēx amÿnh në ato ixtēm në inhõrkwÿ nhĩpēx kaxyw amnhĩm akumrēx axām pyràk o anhĩpēx Simāw Pêtre.

¹⁹ —E kēp ka ma inhÿ hä tanhmã më piitã më kām ijarēnh to ho ri apa. Mē kot hprĩ hä amar kaxyw. Koja më hkwyjaja ama në amnhĩ kaxyw ixkõt hamaxpēr në ixkõt amnhĩ xunhwÿ. Ka ja hä më omu në më kām: “E ra më ate Jesus kõt amnhĩ xunhwÿr jakamã kot ka më nhÿrmã ty në ma kaxkwa hwÿr api në Tirtüm më wa kuri amex kumrēx në atĩr tũm në apa ho apa.” Anhÿr o më kām ijarēnh o apa. No më kot akapēr mar në äm mar në ixkõt amnhĩ xunhwÿr kêt xwÿnhjaja ka më kām: “No më kajaja më ate Jesus kõt amnhĩ xunhwÿr kêt jakamã kot kaj më nhÿrmã Tirtüm më Krata wa kuri atĩr tũm në apa ho apa hkêt në.” Anhÿr o ä inhÿ hä më kām akapēr anhÿr o ri më hkõt apa. Jao te ate kaxkwa hwÿr saf pyr në Tirtüm krajê mã kahê xà rēnh në Tirtüm kra hkêt xwÿnhjê pē kahê pyràk o amnhĩ nhĩpēx o apa. Anê.

Nhüm pre ä Jesus Simāw Pêtre mã kapēr anê. ²⁰ Hämri në hpãnhã më ixpiitã më inhmã kapēr në më inhmã:

—E. Kwa kēp ka më kormã më piitã më kām Tirtüm kot më awÿr inhmēnh ä më kām ijarēnh o ri apa hkêt në. Kormã. Anê.

Jejus kot amnhĩ kukamã amnhĩ jarēnh ä harēnh

Makre 8.31-33; Rukre 9.22

²¹ Hämri nhüm Jesus hprĩ hä amnhĩ kukamã tanhmã më inhmã amnhĩ jarēnh to në më inhmã:

—Nà më kajaja më ate aprĩ hä ixpumunh mex. No më pahkwÿjaja kãm hprĩ hä ijarēnh mar në ixpumunh prãm kêt. Ijaew krãhtũmjaja në Tirtüm kapēr tũm o më ahkre xwÿnhjaja në patre krãhtũmjaja. Mē kām hprĩ hä ixpumunh në kãm ixkapēr mar prãm kêt jakamã kot paj tokyx ma Jerujarē hwÿr mõ nhüm më kamã ixpynê në ixtak rax në ixpĩ. Nom kot paj ixtyk ä apkati axkrunēpxi nhüm Tirtüm akupÿm ixto ixtĩr. Anê.

²² Hämri nhüm Simāw Pêtre tee ri kot ä më kām amnhĩ jarēnh anhÿrja ä kuma në hwÿr tē në hpa hä kupy në më ixpê ho kato në më ixkãx ä o xa. Nê ä kot amnhĩ jarēnh anhÿrja në kām kapēr në kām:

—Kwa nà Pahihti. Ri ä amnhĩ jarēnh anhÿr kêt në. Mo kot kêt më ri axtem në ä anhĩpēx anê? Anê.

²³ Hämri nhüm kuma në hwÿr apkjê në omu në kām:

—Tk. Te apê Satanasti kapēr pyràk o na ka ä inhmã akapēr anê. Kot kaj ä akapēr anê hämri në ixkõt apa hkêt në. Tirtüm kãm hprãm xà hkõt na ä më kot inhĩpēx anhÿr kaxyw kēnã. Tã ka Tirtüm jamaxpēr o ajamaxpēr kêt në amnhĩ jamaxpēr o ä inhmã akapēr anê. Te apê ixpê axãmnãr xwÿnh pyràk o amnhĩ nhĩpēx. Anê.

Jejus krajaja kot tanhmã amnhĩ nhĩpēx to hä më harēnh

Makre 8.34-9.1; Rukre 9.23-27; Juãw 12.24-26; mãänēn Römãn 15.1; Wam Korĩt 10.23-24; Karatas 5.24; Piripos 2.4; Wam Pêtre 4.1; Apokarip 2.10, 12.11

²⁴ Nhüm pre ä Jesus Simāw Pêtre mã kapēr anê hämri në hpãnhã më ixpê hkõt ixpa ho ixpa xwÿnh piitã më inhmã kapēr në më inhmã:

—E kot kaj më ixkõt amnhĩ xunhwÿr ä amnhĩ jarē hämri në mãänēn amnhĩ jarēnh o: “Jejus kēp inhõ Pahihti jakamã kot paj kapēr kõt pix mã amnhĩ nhĩpēx rãhã ho ri ixpa. Kwãr ixkwÿjaja tanhmã hä inhĩpēx hto.” Anhÿr o amnhĩ jarē.

²⁵ —Koja më ixtã më atõx pĩ rÿ tanhmã më atõ hto ka ty. Tã nom koja akaxwÿnh ma ixwÿr àpir kurē kumrēx. Hämri ka ixkuri atĩr tũm në amex rãhã në apa ho apa. Nom kot kaj më jar atĩr prãm xàj ixkaga hämri në inhõ krĩ hwÿr axàpir kêt në.

²⁶ —Nê koja mëhõ hikukrēx rax gryk ä Tirtüm kaga. Tã nhÿrmã ty hämri në amnhĩ kõt hikukrēx õ hpyr në o mõr kêt në. Koja tee ri kuwy hwÿr mõr pymaj amnhĩ në hikukrēx rax o amnhĩ pãnhã amnhĩrer prãm kaprÿ. Tanhmã koja amnhĩ to në Tirtüm mã amnhĩre në ma õ krĩ hwÿr api? Koja ä amnhĩ nhĩpēx anhÿr kêt në.

²⁷ —Nê ixpê Tirtüm kot më awÿr inhmēnh xwÿnh kot paj nhÿrmã kaxkwa rũm akupÿn më awÿr wrÿ nhüm Tirtüm kapēr o më wrÿk xwÿnhjaja man ixkõt wrÿ. Hämri pa inhõ Papaj nhÿ hä ixte më piitã tanhmã më kot amnhĩ nhĩpēx to hä më omunh xà hkõt ahpÿnhã tanhmã më harēnh to. ²⁸ äm hämri na pa ä më amã amnhĩ jarēnh anê. Kot paj nhÿrmã akupÿn ixte më ato amnhĩptãr kaxyw man më awÿr wrÿ. Tã kot kaj më akwÿjaja akupÿn ixwrÿyta kukamã tokyx ixte tanhmã ixte amnhĩ nhĩpēx to hä ixpumu. Anê.

Jejus kot hixēt prēk nhĩmõk ä hirã kamã äm ä harēnh

Makre 9.2-13; Rukre 9.28-36; mãänēn Sikũn Pêtre 1.16-18

17 Tã nhüm semãnja hapēx nhüm Jesus ma nhÿri hixēt prēk wÿr mõ. Nê kaxyw Simāw Pêtre në Xiakre në Xiakre htõ Juãwja nhüm ma amnhĩ kõt wa më o mõ. Nhüm wa më mõ në hixēt prēk ä api në himõk ä kuhê. ² Hämri nhüm Jesus xep ra axtem në xa. Axtem hkuk nhĩrã htÿx në xa. Te myyti nhĩrã htÿx pyràk. Nê ê

haka htÿx kumrêx. ³Hămri nhũm xep ja wa kaxkwa rŭm hwÿr wrÿ nê kuri kãm kapêr o xa. Mojes mê Erisja wa nhũm hwÿr wrÿ nê kuri xa. Tirtũm amnepê m amnhĩ wrÿ wa ho àpir tã wa akupÿn wrÿ nê Jesus mã kapêr o xa. ⁴Hămri nhũm Jesus kôt mê mör xwÿnhjaja wa mê omu nhũm Simãw Pêtre tanhmã hamaxpêr to nê Jesus wÿr tẽ nê kãm:

—Kwa Pahihti. Nà ãm hãmri na pu mê amnê mō. Kwa pu mê kritpê m jar axkamê nê tokyx panojarê t kêt nê. Pa mê amã pô nhĩrõnh o axkrunêpxi nê hipêx. Amã hō nhĩpêx nê Mojes mã hō nhĩpêx nê Eris mã hō nhĩpêx ka mê kamã akrĩ. E kwa pa mê amã ho anê nà? Anhÿr o kãm kapêr. Nom amnhĩ krã hkôt ã kapêr anê. ⁵Hămri nê kormã ã kãm kapêr anhÿr rôm nhũm ra kakrã jaka htÿxja wrÿ nê wa mê hkunor pa nhũm wa mê kamã kuhê. Nhũm kakrã kamã Tirtũm mê kãm kapêr nê mê kãm:

—E ota Ixkra xa. Inhmã hapê ho inhmã hapê. E kêr ka mê kapêr mar tÿx rãhã ho ri apa. Anê.

⁶Hămri nhũm mê tee ri kuma nê kãm ma htÿx nê umaj pikap rōrōk nê htu mÿrpê hikwÿ. ⁷Hămri nhũm Jesus mê hwÿr tẽ nê mê hã thkra jaxwÿ nê mê kãm:

—E mê kãnhmã akuhê nê amã ma hkêt nê. Anê.

⁸Hămri nhũm mê kuma nê kãnhmã rĩt nê Jesus pix pumu nhũm ahte xa nhũm kuri wa ãm xwÿnhta wa ra ma akupÿm api. ⁹Hămri nhũm mê kormã akupÿm hixêt nhĩmōk rŭm mê ixwÿr wrÿk o mō nhũm Jesus mê kãm:

—E kêr ka mê ham ate mêmōj pumunh xwÿnhta kormã nhãm mê kãm harênh kêt nê. Kot paj nhÿrmã ty nê akupÿm ixtĩr ka mê rĩ kormã mê kãm ja hã ijarênh o ri apa. Anê.

¹⁰Hămri nhũm mê kormã akupÿn mê ixwÿr wrÿk o mō nhũm mê Jesus mã:

—Kwa mê inhmã mêmōj jarê. Na htem Tirtũm kapêr tũm o mê ijahkre xwÿnhjaja mê inhmã: “Eris kumrêx koja Tirtũm mê pahwÿr kumê nhũm Krisja kormã hapu hã wrÿ.” Anê. Na htem ã mê inhmã war ajarênh anê. Tã ka ra wrÿ nom kormã akukamã Erisja wrÿk kêt. Anê.

¹¹Hămri nhũm mê kãm:

—Nà ãm hãmri na prem ã wa ijarênh anê. Na pre ra ixkukamã te Eris kot amnhĩ nhĩpêx pyrãk xwÿnhta tẽ nê ixkutêp mê kãm ijarênh o pa. ¹²Tã nom nhũm mê ja hã omunh kêt nê. Na prem axtem nê kãm hprãm xà hkôt tanhmã hipêx to nê kupĩ. Tã koja mê nhÿrmã ã hipêx anhÿr pyrãk o inhĩpêx. Anê.

¹³Hămri nhũm mê ra hprĩ hã kuma nê axpên mã:

—Kwa Juãw Paxis pimràata na ã mê pamã harênh anê. Tapxipix na pre te Eris kot amnhĩ nhĩpêx pyrãk o amnhĩ nhĩpêx o pa. Tã tãm na mê pamã harê. Anê.

Jejus kot mēhō hkra nē mēkarōmnuti kator ã harēnh

Makre 9.14-29; Rukre 9.37-43

¹⁴Tã nhũm mê ra akupÿm ahpar mã man mê ixwÿr hpōx o mō nhũm mê ohtō rax nê Jesus kutêp kuhê. Hămri nhũm mēhō myja mē omu nê mē kutã tẽ nê mē hkaxpa nê Jesus kutã hkõn krã ho tēm nê nhÿ nê hkra ho kuwÿ nê kãm:

¹⁵—Pa Jejus. Kwa inhmã ixkra kamã axukaprĩ nê. Na hte mēkarōmnutija xatã tanhmã ixpê ho nhũm hte ÿ hã mra nê rōrōk nê tōhã kuwy kamã rōrōk nê tōhã gōx kãm mran mrō nê ixpê homnuj tÿx nê. ¹⁶Tã pa akôt mē pa ho mē pa xwÿnhjê hwÿr o tẽ nom nhũm mē kot inhmã ho mex kaxyw tee ri tanhmã ho hkaprÿ. Kwa xà kot kaj akupÿm inhmã ho mex nà? Anê.

¹⁷Hămri nhũm kuma nê mē ixte hkôt ixpa ho ixpa xwÿnhjê mã kapêr nê mē inhmã:

—Hêxta waa nê. Ra mē ate ixte Tirtũm nhÿ hã mē ho mex ã ixpumunh o ixkôt apa ryy htã kormã ixpyrà nê ã mē hipêx anhÿr kêt nê. Nà kormã mē kaxyw Tirtũm kôt mē ajamxpêr tÿx kêt jakamã na ka mē tee mē ho mex kaxyw. Anê.

Hămri nê myta mã kãm:

—E amnê ixwÿr akrata o tẽ pa omu. Anê.

¹⁸Hămri nhũm kuma nê hwÿr o tẽ nhũm omu nê nê mēkarōmnutija kator nhũm akupÿm mex kurê kumrêx. ¹⁹Hămri pa mē ixte Jejus kôt ixpa ho ixpa xwÿnhjaja ja hã omu mē hkã ã amnhĩ tã hkukja nê kãm:

—Kwa na pa mē axwakre kamã tee ri nê hanor prãm kaprÿ. Kwa mon pa mē apyrã nê nê hanor nhũm kator nê ma htēm kêt nê? Anê.

²⁰Hămri nhũm mē inhmã:

—Nà kormã mē ate mē kaxyw Tirtũm kôt ajamxpêr tÿx kêt. Nom kot ka mē kaxyw hkôt ajamxpêr tÿx hãmri nê hkôt amnhĩ nhĩpêx kukwak ri mêmōj tã awÿ nhũm mē ama nê mē ate mêmōj tã axàhwÿr xà hkôt mē amã tanhmã mêmōj nhĩpêx to. Te mē ate pĩ hpàr mÿj mã akapêr nê kãm: “Kwa amnhĩ jarê nê ma tẽ nê gō xujanãr kãm mãn mrō.” Anhÿr nhũm kot amar nê amar xà hkôt ã amnhĩ nhĩpêx anhÿr kurê kumrêx pyrãk. Ja pyrã nê kot kaj mē amnhĩ kaxyw Tirtũm kôt ajamxpêr tÿx kukwak ri mêmōj tã awÿ nhũm mē ama nê mē amã mêmōj tanhmã ho rÿ mē amã mêmōj gō. Anê.

Jejus kot htyk kukamã amnhĩ jarēnh ã harēnh

Makre 9.30-32; Rukre 9.43-45

²²Tã hãmri pa mē Jejus kôt ma mō nê nhÿri pika pē Garirej kamã kormã ixpa. Hãmri nhũm Jejus axte amnhĩ kukamã mē inhmã tanhmã htyk ã amnhĩ jarēnh to nê mē inhmã:

—Nà koja mē tokyx mē kãm ixtã amÿnê nhũm mē ixpĩ. Mē kot ixpĩr tã kot paj ixtÿk ã apkati axkrunêpxi nhũm Tirtũm akupÿm ixto ixtĩr. Anê.

Hămri pa mē tee ri ã kot amnhĩ jarēnh anhÿrja ã kuma nê ixkaprĩ htÿx kumrêx.

Jejus kot Tirtũm nhōrkwy hwÿr àr

Römãn 13.5-7; Wam Korĩt 10.32-11.1

²⁴Tã pa mē Jejus kôt ma mō nê ra Kapanaũ hwÿr pōj. Hãmri nhũm mē kot Tirtũm mã amnhĩ jarēnh xà hã ixkre ho mex kaxyw mē kêp kãxpore hkwy jamÿnh xwÿnhjaja mē ixpumu nê mē ixwÿr mra nê Simãw Pêtre mã kãm:

—Pa. Kwa xà na hte mẽ ajahkre xwýnhja mẽ pahpê hkwýjê pyrã nê Tirtùm mã amnhĩ jarênh xà hã ixkre ho mex kaxyw kàxpore hkwý nhõr kêt nê nà? Anê.

²⁵ Hãmri nhũm mẽ kuma nê mẽ kãm:

—Tỳ kot mẽ kãm òr o pa kênã. Anê.

Hãmri nê ma mẽ ixkõt tẽ nê mẽ ixkõt mēhõ nhõrkwý hwýr axà. Hãmri nê kot Jejus mã mẽ harênh mã tã nhũm ra hamaxpêr ã omu nê kumrêx kãm kapêr nê kãm:

—Kwa inhmã mẽmoj jarê Simãw Pêtre. Xà na hte pahi hkrajaja ò papaj mã kàxpore hkwý nhõr o pa nà? Xà na hte ãm hkra hkêt xwýnh pixjaja kãm hkwý nhõr o pa? Anê.

²⁶ Hãmri nhũm mẽmoj kuma nê mẽ kãm:

—Nà mẽ kêp hkra hkêt xwýnh pixjaja na hte kãm òr o pa. Anê.

Hãmri nhũm Jejus kãm:

—Tỳ. Nà ãm hãmri na ka ja jarê. Na hte pahi hkrajaja ò papaj mã kàxpore nhõr kêt nê. Mẽ kêp hkra kênã. Tã ixpê Tirtùm Kra jakamã mo kaxyw kot pa kêt òrkwý hwýr inhgýx kaxyw kãm kàxpore hkwý gõ? ²⁷ Tã nom kot paj òr kêt nhũm kàxpore hkwý jamýnh xwýnhjaja tee ri ja hã ixpumu nê axpên mã ixte amnhĩ tomnuj xwýnh ã ijarê. Jakamã e ma gônhamã tẽ nê tep ò kanhê. Hãmri nê ho api nê apy nê hakwa jakjê nê kamã kàxpore htýxre pumu. Nê apy nê man o tẽ nê pahpãnhã kàxpore jamýnh xwýnhhta mã agõ. Anê.

Nhũm pre ã Jejus Simãw Pêtre mã karõ anê nhũm kuma nê ma hwýr tẽ nê kot kãm karõ xà hkõt ã amnhĩ nhípêx anê.

Mẽ kot amnhĩ to rũnh xwýnhjê jarênh

Makre 9.33-37; Rukre 9.46-48; mãânên Piriapos 2.3-7; Wam Pêtre 3.4, 5.5-6

18 Tã mẽ ixte Jejus kõt ixpa ho ixpa xwýnhjaja amnhĩ kukamã ijamaxpêr nê amnhĩ tã Jejus kuk-ja nê kãm:

—Kwa mẽ inhmã mẽmoj jarê Pahihti. Nhýrmã mẽ ixpê pahi nê anhĩkõ hã mẽ ho amnhĩptàr o ri ixpata ã mẽ ixtõ kot paj we mẽ ho amnhĩptàr rax o ixkwýjê jakre? Anê.

² Hãmri nhũm mẽ inhma nê amnhĩ wýr mẽhprĩre hõ mã hpa ho apê nhũm hwýr tẽ nê mẽ ixkuri xa. ³ Hãmri nhũm Jejus omu nê hã mẽ inhmã:

—E mẽ inhma. Kêr ka mẽ apê pahi pyrãk o tanhmã amnhĩ jarênh to ho ri apa hkêt nê. ãm te amarĩ ri mẽ apa pyrãk o amnhĩ nhípêx. Te mẽhprĩre kot amnhĩ nhípêx pyrãk. Kot kaj mẽ ã amnhĩ nhípêx anhýr o apa hkêt hãmri nê nhýrmã inhĩkõ hã mẽ ho amnhĩptàr kêt nê. ⁴ Jakamã kot kaj mẽ amã nhýrmã inhĩkõ hã mẽ ho amnhĩptàr o apa hprãm. Hã kot kaj mẽ te mẽhprĩre kot amnhĩ nhípêx pyrã nê amã amnhĩ to rũnh prãm kêt nê apa.

⁵ —Nê kêr ka mẽ apê pahi kot amnhĩ nhípêx pyrãk o tanhmã amnhĩ jarênh to ho apa hkêt nê. ãm te amarĩ ri mẽ apa pyrãk o amnhĩ nhípêx. Jao nhýri mẽhprĩjê hõ pumu nê kamã axukaprí nê kãm mẽmoj tanhmã ho rý kãm mẽmoj gõ. Hãmri nê te pa ate tanhmã ixto mex

to pyrãk o amnhĩ nhípêx. Kot kaj mẽ ã amnhĩ nhípêx anhýr o apa hãmri nhũm Tirtùm ja hã mẽ apumu nê mẽ ate amnhĩ to rũnh kêt tã mẽ ate amnhĩ to rũnh xwýnh ã mẽ ajarê. E kot kaj mẽ amã amnhĩ to rũnh prãm hã kot kaj mẽ ã amnhĩ nhípêx anhýr o ri apa. Anê.

Mẽ kot amnhĩ tomnuj xwýnhjê hkukamã mẽ harênh

⁶ Nhũm Jejus arĩ mẽ inhmã mẽhprĩ jarê nê mẽ inhmã:

—Nê mẽhprĩre na htem amnhĩ kaxyw ixkõt hamaxpêr o pa. Tã koja mēhõ inhnê tanhmã mẽ kãm kapêr to. Mẽ kot tanhmã amnhĩ tomnuj to hprãm xà tanhmã mẽ kãm kapêr to ho pa. Hãmri nhũm mẽ kuma nê mẽ kapêr xà hkõt tanhmã amnhĩ tomnuj to. Hã koja Tirtùm ja hã omu hãmri nê kot inhnê tanhmã kãm kapêr to xwýnhhta pumu nê homnuj tỳx nê. Te mẽ kot mēhõ pynênh nê mut ã kên pytĩ hõ nhõr nê ma o htēm nê gõ xupým kãm mēnh pyrãk o hipêx. Te ho ja pyrãk no ãm homnuj tỳx o hakre.

⁷ —Nê koja mēhõ inhnê tanhmã mẽ kot ixkõt amnhĩ xunhwýr xwýnhjê hõ mã kapêr to. Kot tanhmã amnhĩ tomnuj to hprãm xà tanhmã kãm kapêr to. Rý kot ixk-aga hprãm xà tanhmã kãm kapêr to. Hãmri nhũm kuma nê mar xà hkõt ixkapêr kwým tanhmã amnhĩ tomnuj to. Tã koja Tirtùmja ja hã omu nê mãânên kot inhnê kêp ãmnàr xwýnhhta pumu nê ã inhnê kãm kapêr anhýrja mýrapê homnuj tỳx kumrêx.

⁸ —E kwa mẽ okora. Kot kaj mẽ anhĩhkra ho tanhmã amnhĩ tomnuj to rý apar o tanhmã amnhĩ tomnuj to. Hã kêr ka mẽ axte ã amnhĩ nhípêx anhýr pymaj te mẽ ate amnhĩ pê krãhyr nê mēnh pyrãk o amnhĩ nhípêx nê axte ã amnhĩ tomnuj anhýr kêt nê. Rý ka mẽ ano ho mẽmoj punuj pumu. Hã kêr ka kãm ajamaxpêr pix o apa pymaj te mẽ ate amnhĩ pê ano katõk nê kaxàr nê mēnh pyrãk o amnhĩ nhípêx nê nhãm arĩt kurê kumrêx. Kêr ka mẽ ã amnhĩ nhípêx anhýr o ri apa. Hãmri nê nhýrmã ty nê ma Tirtùm nhõ krĩ hwýr api. No kot ka mẽ arĩ akutã ano nê arĩ akutã apar nê arĩ akutã anhĩhkra rãhã ri apa htã ho amnhĩ tomnuj o apa. Hãmri nê nhýrmã ty nê ate amnhĩ tomnuj mýrapê ma mẽ kot amnhĩ xà htýx kamã hamak tũm xà hwýr ma mõ.

¹⁰ —Nê kêr ka mẽ mẽhprĩrejê kamã axukaprí rãhã ho apa. Na hte kaxkwa kamã Tirtùm kapêr o mẽ wrýk xwýnh kwýjaja Tirtùm mã mẽ hamãr mex o pa. Tã koja mēhõ tanhmã kêp hõ hto nhũm mẽ hã omu nê ma tẽ nê Tirtùm mã harênh kurê kumrêx. Anê.

ôwêhti pikunor jarênh

Rukre 15.3-7

¹² Nhũm Jejus arĩ mẽ inhmã kapêr nê mẽ inhmã:

—E pa mẽ amã awjarê ka mẽ ixujarênh ma. Nà koja mēhõ my hkrit ôwêhti xohtõ nê. Nê apkati mẽ ma hamãr o pa. Hãmri nhũm pyxire nê tanhmã amnhĩ to nê kêp akunok. Kwý kaga nê ma nhýhým ahte tẽ nê kêp akunok. Hãmri nhũm mytita ma akupým o mõr kaxyw hkwý ho pikuprõnh pa hãmri nê tee ri hkwý kaêx ã pikunor xwýnhhta japêr nom nhýri omunh kêt

ně. Hāmri ně tee ri hkukamā hamaxpēr ně ma hkwý ho mō ně nhýri kure. Kutêp apkur kaxyw nhýri kure hāmri ně ma akupým pikunor xwýnhhta japêr o tē. ¹³ Hāmri ně hapêr ryy ně nhýri hwýr kato ně omu ně hkính ně. Hāmri ně kutu ně ma akupým o tē. Na hte pikunor kêt xwýnhjê nhý hā hkính tã pikunor xwýnhhta mã kato ně hkính týt ně. Krit sohtô htã nom âm kãm ho pixi ně ho hpikunor prãm kêt. Ā mẽ ujarênh kot anhýr. ¹⁴ Ja pyrã ně Tirtúm kãm mēhō pyxi ně nhýrmã ma kuwy wýr mōr prãm kêt kumrêx. Mě piitã mẽ kot hkôt amnhĩ xunhwýrja na kãm hprãm. Aně.

Jejus kôt mẽ pahtôjê hō kot mẽ pahtomnuj jarênh

¹⁵ Nhům Jejus arĩ mẽ inhmã kapêr ně mẽ inhmã:
—Ně ja. Koja ixkôt mẽ atō rý mẽ atōx tanhmã atomnuj to. Hã kêr ka ma hwýr tē ně kot tanhmã anhípêx to hã amnhĩ tã kãm akapêr. Nom kêr ka mẽ nhãm mēhō mã harênh kêt ně. Âm tanhmã kot ato xwýnhhta pix wýr tē ně kumê war axpên mã akapêr ně war axpên ma. Nhům ama ně akupým tãm anhípêx hã kêr ka akupým te ixkôt kêp atō rý atōx pyrãk o ka wa axpên nhípêx ně axte jam ajamaxpêr kêt ně. ¹⁶ Nom koja ama ně âm ama rý tanhmã ato hkêt ã amnhĩ jarênh japêr. Hã kêr ka ma akupým tē ně akupým amnhĩ kôt Kris kôt atō rý atōx o axkrut rý mẽ ho axkrunêpxi ně amnhĩ kôt hwýr mẽ o mra kê mẽ axpên tã war ama. Amnepêm Tirtúm kapêr ã kagã htům kot ja jarênh o:
Kêr ka mẽ atō tanhmã axpên nhípêx to. Hāmri ně hã axpên mã akapêr kaxyw ně amnhĩ kôt akwýjê ho axkrut rý ho axkrunêpxi ně akupým hwýr mẽ o mra kê mẽ axpên tã war ama. Aně.
—Ā Tirtúm kapêr ã kagã htům kot ja jarênh kot anhýr. ¹⁷ Jakamã kêr ka mẽ amnhĩ kôt akupým kot tanhmã ato xwýnhhta wýr mẽ o mra kê mẽ atã kuma. Hāmri nhům arĩ mẽ kãm kot tanhmã ato hkêt ã amnhĩ jarê ka tee ri amnhĩ tã omu ně ikrêsti hwýr tē ně Kris kwý hã mẽ pikuprônh xwýnhjê mã harê. Kê mẽ ama hāmri ně ja hã axte kot tanhmã ato xwýnhhta mã kapêr. Nhům mẽ mar kêt ně arĩ kot tanhmã ato hkêt ã amnhĩ jarê ka mẽ amnhĩ nê hanor kurê kumrêx. Hāmri ně te kêp Kris kôt mẽ atō rý mẽ atōx kêt pyrãk o hipêx.
¹⁸ —Ně koja mēhō ixkôt amnhĩ xãm ně Inhípêxã Tirtúm kôt ri amnhĩ nhípêx o pa. Ka mẽ ja hã omu ně inhý hã tanhmã kãm akapêr to ně kãm: “E ra ate Jejus kôt amnhĩ xãm jakamã kot kaj nhýrmã Tirtúm mẽ wa kuri amex kumrêx ně atír tům ně apa ho apa.” Anhýr o kãm akapêr. Nom mẽ kot ixkôt amnhĩ xunhwýr kêt xwýnhjaja ka mẽ ã mẽ kãm akapêr anhýr kêt ně. Âm inhý hã mẽ kãm: “No mẽ kajaja mẽ ate Jejus kôt amnhĩ xunhwýr kêt jakamã kot kaj mẽ Tirtúm mẽ Krata wa kuri atír tům ně amex ně apa hkêt ně.” Aně. Kêr ka mẽ inhý hã ã ahpýnhã tanhmã mẽ kãm akapêr to ho apa aně.
¹⁹ —Ně kot kaj mẽ Tirtúm mã amnhĩ jarênh kaxyw te axkrutre rý axkrunêpxire htã axpên wýr akuprô nom mẽ kapxipixjaja apikuprônh kêt ně. Kot paj mẽ akaêx ã mẽ anhíhkô hã mẽ amar o xa. Mě ate ano ho ixpumunh kêt tã pa wa mẽ anhíhkô hã mẽ amar o xa.

Jakamã kot kaj mẽ axpên wýr akuprô ně mẽmoj tã Tirtúm wý nhům kaxkwa kamã ja hã mẽ ama. Ně mẽ ate hã axáhwyr xwýnhhta nhům mẽ amã tanhmã ho. Kêr ka mẽ ã ixkamnàr rom axàmnhix amnhĩ to Inhípêxã hwýr aně. Aně.

Nhům pre ã Jejus mẽ inhmã kapêr aně.

Mě pahte tanhmã axpên nhípêx to hã mẽ pamã karô

Matêwre 6.14-15; Rukre 17.3-4; mãânên Epes 4.32; Korosê 3.13

²¹ Tã nhům Simãw Pêtre Jejus wýr tē ně mẽmoj tã hkukja ně kãm:
—Kwa inhmã mẽmoj jarê Pahiht. Xã koja akôt ixtō rý ixtōx tanhmã inhípêx to pa amnhĩ tã omu ně âm omu ně amnhĩ tã tanhmã ho hkêt ně. Nhům axte tanhmã ixto ně axte tanhmã ixto ho 6 tã pa âm amnhĩ tã omu ně amnhĩ tã tanhmã ho hkêt ně. Âm ho ijamakêtkati ně axte kãm ijamaxpêr kêt ně. Ā amnhĩ tã hipêx anhýr o 7 nhům ja amã mex ně nã? Aně.
²² Hāmri nhům kãm:
—Nã kot kaj ã amnhĩ tã hipêx anhýr o 7 pix kêt ně. Koja mēhō xatã tanhmã ato rãhã ně ka amnhĩ tã omu ně ajaxwýja amnhĩ tã xatã tanhmã ho hkêt ně. Âm amnhĩ tã omu ně âm omu ně tãm hipêx rãhã ho ri apa. Mãmri ho anhýr o apa rãhã ně aa jam anhürer kêt ně.
²³ —E kot paj ixprĩ hã mẽ amã tanhmã ja jarênh to ka mẽ inhma. Tirtúm na hte xatã mẽ ate tanhmã amnhĩ tomnuj to hã mẽ apumu ně mẽ anê rênh o pa. Te kot pahi kot ã hkwýjê nhípêx anhýr pyrãk. Koja mẽ õ pahija kãm mẽ ãpênh xwýnhjaja kot kêp kàxpore ho ãpresa hã mẽ omunh kaxyw nhý. ²⁴ Hāmri nhům mẽ hwýr ja ho tē ně kutã âm. Ra kot kêp hikàxpore ho ãpresta rax xwýnhja. ²⁵ Tã no âm aa akupým kãm ör kêt ně ra kêp ho hapêx pa. Hāmri nhům pahija tee ri amnhĩ tã omu ně hkwýjê mã hã amýnê ně mẽ kãm: “E. Mě ma o tē ně hprô ně hkrajaja ně òrkwý ně hikukrêx mērohã ho wēnê hpa ně hpãnhã kàxpore py ně man inhmã o tē. Kot ixpê ixkàxpore ho ãpresta ně akupým inhmã ör kêt mýrapê.” Aně.
²⁶ —Hãmri nhům kot ho ãpresta xwýnhhta tee ri amnhĩ tã kuma ně kutã hkônkrã ho nhý ně amnhĩ to hwýr kãm hihtyx ně kãm: “Kwa nã ri ixto anhýr kêt ně pahiht. Ixkamã axukaprí ně hkêt wehe. Nã kot paj akupým amã kugô kãm ga.” Aně.
²⁷ —Hãmri nhům amnhĩ tã kuma ně kãm hkaprí ně. Hāmri ně kãm: “Tôe. Nã kot paj ã anhípêx anhýr kêt ně. Kot paj anhõ kôt kaxôn pa ně kumê ka mãmri ma ajamakêtkati ně axàmnhix apa.” Aně. ²⁸ Nhům ã kãm kapêr aně nhům kuma ně hkính ně. Hāmri ně ma tē ně kato ně ixkre kapem pôristi hō pumu. Na pre ra kêp kàxpore hkwý ho grire ně ho ãpresta nhům kato ně omu. Hāmri ně hwýr tē ně amnhĩ kínhã òkre hã kumý ně kãm: “Kwa tokyx akupým ate ixpê kàxpore ho ãpresa pãnhã inhmã agô.” Aně. ²⁹ Hãmri nhům tee ri amnhĩ tã omu ně ra ham kot pahi kutã amnhĩ nhípêxã pyrã ně kutã hkônkrã ho nhý ně kãm: “Kwa nã. Kwa ri ixto anhýr kêt ně. Nã kot paj hpãnhã amã kugô. Kwa ixkamã axukaprí ně hkêt wehe.” ³⁰ Anhýr tã nom nhům kuma ně âm kuma ně hã amýnê. Hã hkwýjê mã amýnê

ně mě kām: “E mě ma jahti ho tě ně haxà. Koja kot ixpě kàxpore ho ĩpresta pānhā inhmā kugō ně ři kormā kato ně ři amnhī pumu.” Aně. Hāmri nhūm mě kuma ně ma o tě ně haxà.

³¹ —Hāmri nhūm hkwyjaja tee ri mar o kuhē nhūm mě kēp ja omnuj ně nhūm mě pahi hwyr agjē ně kām harē. ³² Hāmri nhūm tee ri harēnh ma ně kamā gryk tẏx ně akupým amnhī wyr hā karō nhūm akupým hwyr axà nhūm kām: “Tk. Kwa na ka pre amnhī tomnuj tẏx ně. Ate amnhī to ixwyr nhūm inhmā akapří ně ixte anhō kōt kaxōnh ně mēnh tā ³³ ka amnhī kīnhā anhīōta kamā axukapří hkēt ně ri ā hipēx aně.” Aně. ³⁴ Hāmri ně kamā gryk ně hā ō pōristi mā amýnē nhūm mě ma o tě ně haxà. Mě kot mě hagjēnh xà hā ixkre kamā apkati mě tanhmā mě kot hipēx to kaxyw nhūm mě kām hā amýnē. Tanhmā mě kot hipēx to rāhā nhūm kot akupým kàxpore raxta nhōr par ně ři kormā kator kaxyw nhūm mě ma o tēn haxà. Ā mě ujarēnh kot anhýr. Aně.

³⁵ Nhūm pre ā Jejus mě ixte hkōt ixpa ho ixpa xwýnhjē mā kapēr aně. Hāmri ně mě inhmā:

—Ja pyrā ně koja ixkōt mě atō rý mě atōx tanhmā mě atomnuj to ka mě amnhī tā omu ně ām omu ně ho ajamakētkati kurē kumrēx ně axte kām ajamaxpēr kēt ně. Te pahi kot mēhō nhō kōt kaxōnh par ně axte kām hamaxpēr kēta pyrāk. No kot kaj mě ā amnhī nhīpēx anhýr kēt nhūm kaxkwa kamā inhō Papaj ja hā mě apumu ně te ho pahi tee ri kot amnhī tomnuj xwýnhhta kot amnhī nhīpēx ā omunh ně hā àmnēnh nhūm mě kot apkati mě tanhmā omnuj tota pyrāk o mě anhīpēx. Aně.

Jejus kot mě pahte axpēn kaga ně mě pahkurē

Matêwre 5.31-32; Makre 10.1-12; Rukre 16.18; määnēn Wam Korīt 7.10-16

19 Tā nhūm Jejus mě inhmā kapēr pa ně mě inhmā aně pa mě ixrohā Garirej rūm ixkato ně pyhti pē Jotāw hā rē ně hpānhā ihkjē hā ri ixpa. Pika pē Jutej kamā. ² Hāmri nhūm mě ohtō ně Jejus pumu ně man mě ixwyr mra nhūm mě omu ně mě kām akupým mě à xwýnhjē ho mex. ³ Hāmri nhūm Parijew nhō xwýnh kwýjaja hwyr mra. Hēx rom kot kamā hamak ně tanhmā ho kapēr punuj to kaxyw hwyr mra ně kām:

—Pa? Kwa mě inhmā měmoj jarē. Tanhmā na pre amnepēm finat Mojesja mě pahte mě pahprō kaga hā mě panhīgētjē mā karō hto? Xà kot mě pahprō pahkwým ri tanhmā amnhī nhīpēx to pu mě hkaga nhūm ja Tirtūm mā mex ně nà? Aně.

⁴ Hāmri nhūm mě kām:

—Nà na ka mě aprī hā Mojes kot tanhmā ja jarēnh to mar mex kēt ně. Ja kot anhýr kēt. Amnepēm měmoj piitā hkrax kām na pre Tirtūm my ně nija wa hipēx. Axpēn kaxyw wa hipēx. ⁵ Hāmri ně wa hkukamā tanhmā wa kot amnhī nhīpēx to hā wa harē ně wa harēnh o:

Koja měmyjaja hprō kaxyw hāmri ně gryk ā katorxà mě hipēxà wa hkaga ně ām hprō kōt pix mā pa ho pa. Te wa tipxi ně ri wa pa pyrāk o amnhī nhīpēx. Aně.

—Na pre ā Mojes Tirtūm nhý hā mě kām ja jarēnh aně. ⁶ Jakamā koja te wa tipxi ně ri wa pa pyrāk o axpēn nhīpēx o pa. Tirtūm tām kot axpēn mā wa ōr kēnā kot kēt wa axtem ně ri htẏx ri hamaxpēr ně axpēn kaga. Aně.

⁷ Hāmri nhūm mě kuma ně kām:

—Tý. Nom finat Mojes na pre mě pakukamā mě panhīgētjē mā ā ja hā karō aně ně mě kām:

Kot kaj mě aprō kaga kaxyw hāmri ně ra kēp aprō hkēt ā hā kagā nhīpēx ně kām agō ně amnhī ně hano kē ma tē.

—Anhýr o na pre mě kām hā karō. Tā ka na ka mě ixte axpēn kaga hkēt ā mě inhmā karō. Aně.

⁸ Hāmri nhūm mě kuma ně mě kām:

—Tý no ām mě kām Tirtūm kapēr kōt amnhī nhīpēx prām kēt jakamā na pre ā mě kām ja jarēnh aně. No amnepēm měmoj piitā hkrax kām na prem ā amnhī nhīpēx anhýr o pa hkēt ně. ⁹ Jakamā kēr ka mě aprō kaga hkēt ně apa. Kot kaj mě hkaga ně hpānhā nhām mēhō ho aprō nhūm Tirtūm noo mā te ate wam aprō kamā nhām aprō nyw o amnhīkati pyrāk. Tirtūm pē ja omnuj tẏx ně. Rý koja mēhō hprō kaga ka hpānhā ho aprō nhūm Tirtūm noo mā te ate wam mjēn pē ho amnhīkati pyrāk. Ja määnēn Tirtūm pē omnuj tẏx ně. Aně.

Nhūm pre ā Parijew nhō xwýnhjē mā kapēr aně.

¹⁰ Hāmri pa mě ixte hkōt ixpa ho ixpa xwýnhjaja ā kapēr anhýrja ā kuma ně kām:

—Xà na hte mě mjēn ra kām mě hprō hkīnh kēt tā hkaga hkēt ně arī hkōt pa ho pa nhūm hte Tirtūm mā ja mex ně nà? Jakamā kwa xà kot paj mě nhýrmā ixprō kaga pymaj ixprō hkēt kumrēx ně ixpa ho ixpa nhūm ja mě inhmā mex ně nà? Aně.

¹¹ Hāmri nhūm mě inhmā:

—Nà ām hāmri na ka mě ja jarē. No mě ate harēnhja na mě piitā mě kām mex kēt. Koja Tirtūm tām amā aprō hkēt ā ajarē ka ři aprō hkēt ně ahte ajamakētkati ně ri apa. ¹² Na htem piitā hprō ně pa hkēt ně.

Na hte kamā tanhmā mě kute xwýnhjaja kormā hprīre ri tanhmā kute mýrapē kām hprō hprām kēt ně pa.

Ně kamā tanhmā mě ho mýrapē nhūm mě hkurē hkēt ně hprō hkēt ně pa.

Ně kamā mě kām Tirtūm mā tanhmā amnhī to ho pa pix prām xāj kām hprō hprām kēt ně pa.

Tā kot kaj mě jajē pyrā ně ā amnhī nhīpēx anhýr prām ně ři kam ně aprō hkēt ně apa. Aně.

Jejus kot amnhī ně mēhprījē janor kēt ā harēnh

Makre 10.13-16; Rukre 18.15-17

¹³ Tā nhūm Ijaew kwýjaja Jejus pumu ně hwyr mě hkrarejē jamý ně mě o mra. Kot mě hā ĩhkra jaxwyr ně mě ho Tirtūm wyr kaxyw hwyr mě o mra. Hāmri pa mě ixte hkōt ixpa ho ixpa xwýnhjaja tee ri mě omu ně tanhmā ně mě kām ixkapēr to ně mě kām:

—Tk. Mo kaxyw na ka mě Jejus wyr mě o mra? Kormā mě ràxre kēnā. Kwa mě ma akupým mě o mra nà? Aně.

¹⁴ Hāmri nhūm Jejus mẽ inhma nẽ mẽ inhmã:

—Kwa nà mẽ ri inhnẽ mẽhprjê kurê hkêt nẽ. Kwār mẽ māmri ixwỳr mẽ o mra. Anẽ.

Hāmri nẽ amnhĩ wỳr mẽ mẽ kām hpa ho apê nhūm mẽ hwỳr mẽ o mra nhūm mẽ kuri kuhê nhūm mẽ omu nẽ mẽ hã mẽ inhmã:

—E mẽ jarejê pumu. Na htem hamakêtkati nẽ hkĩnh nẽ ri pa. Nẽ mẽ kām amnhĩ to rũnh prãm kêt nẽ. Tã Tĩrtũm kôt mẽ kot amnhĩ nhĩpêx o mẽ pa xwỳnhjaja te mẽ kot jajê pyrãa nẽ kām amnhĩ to rũnh prãm kêt nẽ pa. Anẽ.

¹⁵ Hāmri nẽ mẽ hã ãhkra jaxwỳ nẽ mẽ ho Tĩrtũm wỳ hāmri nẽ mẽ inhmã anẽ pa mẽ ma axte mẽ kurũm mō.

Kàxpore rũnh xwỳnh jarẽnh

Makre 10.17-22; Rukre 18.18-23; mããnhẽn Rõmãn 3.19-20; Wam Xi-motre 6.6; Xiakre 2.10

¹⁶ Tã nhūm Ijaew òja Jejus wỳr tẽ nẽ kãm:

—Pa mẽ ijahkre xwỳnh? Kwa inhmã mẽmoj jarẽ. Tanhmã kot pa nhỹrmã Tĩrtũm ri ixtĩr tũm nẽ ixpa ho ixpa kaxyw amnhĩ nhĩpêx to wehe? Anẽ.

¹⁷ Hāmri nhūm kãm:

—Tk. Ra Tĩrtũm kot nhỹrmã mẽ atĩr tũm nẽ apa kaxyw mẽmoj tã mẽ amã karõ nhūm ate mar mex kênã kot ka kêt ri axte ja hã ixkukja. Nà Tĩrtũmja mex o mex jakamã kot kaj amã kuri atĩr tũm nẽ apa hprãm hã kot kaj kapêr kôt amnhĩ nhĩpêx no ri apa. Anẽ.

¹⁸ Hāmri nhūm kãm:

—No nhỹ kapêr kôt kot paj amnhĩ nhĩpêx o ri ixpa wehe? Anẽ.

Hāmri nhūm kãm:

—Na pre mẽ amã mẽmoj tã karõ ho:

Kêr ka mẽ axpên par kêt nẽ.

Nẽ nhãm mẽ hprõ ho amnhĩkati hkêt nẽ.

Nẽ mẽ kêp axàhkĩnh kêt nẽ.

Nẽ tanhmã mẽ ho axê to hkêt nẽ.

¹⁹ Nẽ anhĩpêxà mẽ akatorxà wa hã apijaàm nẽ wa ho mex pê wa kutã anojarêt o ri apa.

Nẽ amã akwỳjê hã ma ho te ka amã amnhĩ tã ma pyrãk o mẽ hipêx. Jao tãm mẽ hipêx o ri apa.

E kot kaj amã nhỹrmã Tĩrtũm kuri atĩr tũm nẽ apa hprãm hã kêr ka ã amnhĩ nhĩpêx anhỹr o ri apa. Anẽ.

²⁰ Hāmri nhūm kuma nẽ kãm:

—Ku nhūm. Ra ã ixte amnhĩ nhĩpêx anhỹr o ri ixpa kênã. Nom te kormã ixtĩr tũm nẽ ixpa kaxyw ixte tãm kêt pyrãk. Kwa axte inhmã mẽmoj jarẽ nà? Anẽ.

²¹ Hāmri nhūm kãm:

—Nà kormã mẽmoj pyxi nẽ arĩk. Na ka amã akukrêx rax prãm tỳx o amã Tĩrtũm prãm jakre. Jakamã ma akupỳm tẽ nẽ akukrêx rax o wênê hpa nẽ hpãnhã kàxpore jamỳ nẽ ma mẽ kêp amrakati xwỳnhjê mã òr pa. Hāmri nẽ rĩ akupỳn ixwỳr tẽ nẽ rĩ ixkôt apa ho apa. Anẽ.

²² Hāmri nhūm kuma nẽ tee ri amnhĩ kukamã hamaxpêr. Kãm hikukrêx rax japê nẽ kãm kamã ãhkra karo hprãm kêt nẽ. Hāmri nẽ tee ri Jejus kot ã kãm hã karõ anhỹrja ma nhūm ja kêp omnuj nẽ nhūm ma

akupỳm htêm kurê kumrêx. ²³ Hāmri nhūm Jejus tee ri omu nẽ mẽ inhmã:

—Hêxta waa nẽ. Koja mẽ hikukrêx rũnh xwỳnhjaja ohtõ nẽ kãm mẽ hikukrêx japê xàj Tĩrtũm mẽ wa ixri htĩr tũm nẽ pa ho pa hkêt nẽ. Wa ixte amnhĩ nhĩpêxja mẽ kêp hihtỳx. ²⁴ Mẽ kãm hikukrêx rũnh mã ãhkra karo hprãm kêt rãhã tee ri kãm Tĩrtũm kôt amnhĩ nhĩpêx prãm kaprỳ. Te ho mẽhõ kot menh kagõ hã hkre nẽ kãm kagõ katõk prãm kêt rãhã kãm guhkrax kãm àr prãm kaprỳta pyrãk. Anẽ.

Nhūm pre ã Jejus mẽ inhmã kapêr anẽ. ²⁵ Hāmri pa mẽ kuma nẽ tee ri amnhĩ kukamã ijamaxpêr nẽ kãm:

—Kwa mẽ xpiitã mẽ inhmã mẽ ixkukrêx japê kênã. Jakamã xà kot paj mẽ xpiitã nhỹrmã war ari ixtĩr tũm nẽ ixpa ho ixpa hkêt nẽ nà? Anẽ.

²⁶ Hāmri nhūm mẽ inhmã:

—Nà kot kaj mẽ amnhĩ krã hkôt mẽ amã mẽ akukrêx japêja mã anhũrer kêt nẽ. ãm Tĩrtũm pix na hte ja kaxyw tanhmã mẽ akrã hto ka mẽ amã akukrêx japê hkêt nẽ. Jao ra mẽ apê Tĩrtũm mẽ wa ixri atĩr tũm nẽ mẽ apa ho mẽ apa mã xwỳnh. Anẽ.

²⁷ Hāmri nhūm Simãw Pêtre kãm:

—Kwa no we mẽ pajaja Pahihti? Na pa prem agryk ã mẽmoj piitã hkaga hpa nẽ akõt ixpa ho ixpa. Jakamã kot paj mẽ nhỹrmã war ari ixtĩr tũm nẽ ixpa ho ixpa nà? Anẽ.

²⁸ Hāmri nhūm kuma nẽ mẽ xpiitã mẽ inhmã:

—Tỳ. Kot paj nhỹrmã mẽmoj piitã ho nyw pa hāmri nẽ ixte mẽ ho amnhĩptar o ixkrĩ xà maati kamã nhỹ nẽ mẽ piitã mẽ kot tanhmã amnhĩ nhĩpêx to hã mẽ omunh xà hkôt tanhmã mẽ harênh to. Tã mẽ kajaja mẽ ate ixkôt apa ho apa xwỳnhjaja kot kaj mẽ inhmã Ijaew kot amnhĩ nhĩpêx ã mẽ omunh xà hkôt ahpỳnhã tanhmã inhmã mẽ harênh to. Mẽ mex ã mẽ harê rỳ mẽ mex kêt ã mẽ harê. Kot kaj mẽ ã inhmã mẽ harênh anẽ. ãm hāmri na pa mẽ amã ixkapêr anẽ.

²⁹ —Nẽ ka mẽ atõ inhmã tanhmã amnhĩ nhĩpêx to ho apa kaxyw akwỳjê re nẽ ma inhmã mẽmoj to anhỹr o ri apa. Tanhmãn anhõrkwỳ rỳ atõ rỳ atõx re. Rỳ aprõ nẽ akrajê re. Rỳ akatorxà mẽ anhĩpêxà war are. Rỳ akukrêx piitã rer pa hāmri nẽ ma mẽ piitã mẽ kãm ixkapêr o mẽ ahkre ho ri mẽ hkôt apa. Hã kot paj mẽ apumu nẽ mẽ ato mex rax nẽ. Hāmri ka mẽ ma mẽ hkôt apa nẽ mẽ kãm ixkapêr jarẽnh o apa nhūm mẽ kot mẽ amar xwỳnh kwỳjaja mẽ ama nẽ kãm mẽ akĩnh nẽ. Nẽ ra mẽ ate akwỳjê rer par tã mẽ tãmjaja te mẽ apê mẽ hkra rỳ mẽ htõ rỳ mẽ htõx pyrãk o mẽ anhĩpêx nẽ mẽ ato mex o pa. Hāmri ka mẽ nhỹrmã ty nẽ ma Tĩrtũm mẽ wa inhõ krĩ hwỳr api nẽ wa ixkuri amex kumrêx nẽ atĩr tũm nẽ apa ho apa. ³⁰ Nom kwa kêr ka mẽ amnhĩ tã ja ma nẽ amnhĩ to rũnh xwỳnh ã amnhĩ kamnhix kêt nẽ. Jar mẽ kot amnhĩ to rũnh ã amnhĩ to jarkrar xwỳnhjaja koja mẽ nhỹrmã amnhĩ to hkryre hã amnhĩ pumu. No jar mẽ kot amnhĩ to hkryre xwỳnh ã amnhĩ jarẽnh xwỳnhjaja koja mẽ nhỹrmã amnhĩ to rũnh ã amnhĩ pumu. Anẽ.

Jejus kot nhÿrmã hkrajê ho mex ã harênh

Rômãn 9.14-16

20 Nhÿm Jejus arÿ mẽ ixte hkôt ixpa ho ixpa xwÿnhjê mã awjarê mẽ mẽ inhmã:

—Nê kot paj nhÿrmã tanhmã mẽ ato mex to. Te ixpê hpur nhõ dôn kot amnhÿ nhÿpêx pyrãk o mẽ anhÿpêx. Koja pur nhõ dônja ihpur kãm mẽmo xô ra hkà hpa nhÿm omu hãmri mẽ kaxyw mẽ àpênh xwÿnhjê japêr kaxyw ma gãm tê. Nê gáp xa mẽ mẽ kãm akir nhÿm mẽ hã akuprõ. ² Hãmri nhÿm mẽ kãm: “E. Kot kaj mẽ jarãhã inhmã ixpur kãm apê. Kot kaj mẽ inhmã axàpênh o amÿkry pa hpãnhã mẽ kot apkati pixi hã mẽ àpênh pãnhã mẽ kãm amnhÿrer xàja kôt mẽ amã amnhÿre.” Anê hãmri nhÿm mẽ kuma mẽ kãm: “Tõe. Nà kot paj mẽ amã apê.” Anê nhÿm pur wÿr mẽ kurê nhÿm mẽ ma kãm àpênh mã mra.

³ —Tã nhÿm arÿ kÿx mã myt tê nhÿm pur nhõ dôn akupÿm gãm tê nhÿm mẽ hkwyjã arÿ kuhê. ⁴ Nhÿm tee ri mẽ omu mẽ mẽ kãm: “Kwa mon ka mẽ axàpênh kêt mẽ arÿ akuhê? E. Mẽ ma wamtajê hkôt mra mẽ inhmã apê pa hpãnhã mẽ amã amnhÿrer mex mẽ.” Anê.

⁵ Hãmri nhÿm mẽ kuma mẽ ma mẽ hkôt mra. Tã nhÿm ra myt kaxkwa nhÿpôk ri ajêt nhÿm hpur nhõ dônja mã hkwyjê ho anê mẽ. Kê axte mẽ hkôt jajê jano nhÿm mẽ ma mẽ hkôt mra. Tã nhÿm ra myt ahpanh grire nhÿm ma akupÿm kêwe gãm tê mẽ mã mẽ ho anê mẽ axte mẽ hkôt jajê rê.

⁶ —Tã nhÿm ra myt grire nhÿm ma akupÿm kêwe gãm tê mẽ jajê pumu nhÿm kê wem arÿ gáp kuhê. Hãmri nhÿm tee ri mẽ omu mẽ mẽ kãm: “Kwa mon ka mẽ axàpênh kêt mẽ atÿx gáp akuhê ho akuhê?” Anê. ⁷ Hãmri nhÿm mẽ kãm: “Nà mẽhõ kot mẽ inhmã mẽ ixàpênh ã karõre hã.” Anê. Hãmri nhÿm mẽ kãm: “Tõe. Mẽ ma mẽ hkôt ixpur wÿr mra mẽ inhmã mãn apê.” Anê hãmri nhÿm mẽ kuma mẽ ma hkwyjê hkôt mra.

⁸ —Tã nhÿm ra kamàt. Hãmri nhÿm hpur nhõ dônja kãm àpênh xwÿnhjê krãhtÿm wÿr tê mẽ kãm: “E. Ma mẽ hwÿr tê mẽ mẽ kãm anê kê mẽ àpênh kaga mẽ man akôt mra ka inhmã mẽ kãm amnhÿre. Nom kêr ka hapu hã mẽ mõi xwÿnhjê kumrêx mã amnhÿre mẽ wam mẽ mõi xwÿnhjê ho hapu mẽ mẽ kãm amnhÿre.” Anê. Hãmri nhÿm kãm: “Tõe. Nà kot paj mẽ ho anê.” Anê.

⁹ Hãmri mẽ ã mẽ kãm amnhÿrer anê. Hapu hã mẽ mrar xwÿnhjê kumrêx mã amnhÿre. Te mẽ kot kwÿhtã àpênh o amÿkry pyrãk o nhÿm hpãnhã mẽ kãm amnhÿre.

¹⁰ Hãmri nhÿm wam mẽ mrar xwÿnhjaja ja hã mẽ omu mẽ hkÿnh mẽ. Hãmri mẽ htÿx hamaxpêr o: “Nà kot paj xep kàxpore jamÿnh rax o mẽ hakre. Ixàpênh rax o ixte mẽ hakrenh kênã.” Anhÿr tã no nhÿm mẽ piitã mẽ kãm amnhÿrer o axpên pyrãk. Ra pur nhõ dôn kot kãm hã karõ xa hkôt. ¹¹ Hãmri nhÿm mẽ hamÿ mẽ tee ri hkre kamã omu mẽ we ra hpur nhõ dônja kamã gryk mẽ. ¹² Hãmri mẽ hwÿr mra mẽ kãm: “Kwa jajaja na mẽ amã àpênh o ore pyxi mẽ. No kêt mẽ pajaja na pa mẽ kwÿhtã ixàpênh rax o kamàt. Arÿgro htÿx kãm ixàpênh o ixãm o ixtã kamàt tã ka pêr ãm mẽ inhmã amnhÿrer o axpên pyrãk. Kwa na ka mẽ ixtomnuj mẽ.” Anê.

¹³ Hãmri nhÿm mẽ kuma mẽ mẽ kãm: “Tk. Nà na pa mẽ atomnuj kêt mẽ. Na pa kwÿhtã tanhmã mẽ amã amnhÿrer to xà jarê ka mẽ inhma nhÿm ja mẽ amã mex mẽ ka mẽ ma hwÿr axàpênh mã mra. ¹⁴ Kwa mẽ akàxpore jamÿ mẽ ma mra. ãm pa inhmã hprãm xa hkôt na pa ã mẽ amã amnhÿrer anê. ¹⁵ Ixkàxpore jakamã kot paj nhãm inhmã mẽhõ mã õr prãm xa hkôt kãm kugõ. Tã ka mẽ ã mẽ hã ixkamã agryk anê. E mẽ akàxporeja mÿ mẽ ma mra.” Anê. Nhÿm ã hpur nhõ dôn mẽ kãm kapêr anê. ã mẽ ujarênh kot anhÿr. Anê.

¹⁶ Nhÿm pre ã Jejus mẽ inhmã ujarênh anê mẽ mẽ inhmã:

—Ja pyrã mẽ wam mẽ ate ixkôt amnhÿ xunhwÿr xwÿnhjaja mẽ hapu hã mẽ kot kormã ixkôt amnhÿ xunhwÿr mã xwÿnhjaja kot paj nhÿrmã mẽ apiitã mẽ ato mex kumrêx o axpên pyrãk. Anê.

Jejus kot htyk kukamã amnhÿ jarênh

Makre 10.32-34; Rukre 18.31-34

¹⁷ Tã nhÿm Jejus mẽ inhmã anê pa mẽ ixrohã ma Jerujarê hwÿr mõ. Mẽ ohtõjê hkôt mõ. Hãmri nhÿm Jejus mẽ ixpê 12jê mã anê mẽ mẽ ixkwÿjê hkàx ã mẽ inhmã kapêr kaxyw ahte hapu hã mẽ ixto mõ. ¹⁸ Hãmri mẽ mẽ inhmã amnhÿ kukamã tanhmã amnhÿ jarênh to mẽ mẽ inhmã:

—E na pu mẽ ra Jerujarê hwÿr mõ. Kamã koja mẽ pahkwÿjaja inhÿpêx kati mẽ. Koja mẽ patre krãhtÿmjê mẽ Mojes kapêr o mẽ ahkre xwÿnhjê nhÿhkram ijaxã nhÿm mẽ kot ixpÿr kaxyw ixtã amÿnê. ¹⁹ Koja mẽ kãm ixkurê xwÿnhjaja ixpÿnê mẽ Rõm nhõ xwÿnhjê nhõ põristijê hwÿr ixto mẽ mẽ mẽ kãm tanhmã ixto hêx to. Hãmri nhÿm mẽ kuma mẽ mẽ mar xa hkôt tanhmã inhÿpêx to. Nhÿm mẽ hkwyjaja ixtã hpêr o axkê mẽ ixtã akunha nhÿm mẽ hkwyjaja ixto kapêr punuj mẽ tanhmã ijapry hto mẽ ixtak. Hãmri mẽ ma ixto mẽ mẽ pÿ kahpa hã inhõ mẽ ixpÿ. ã koja mẽ inhÿpêx anê. Nom kot paj ixtyk ã ixtã apkati axkrunêpxi nhÿm Tÿrtÿm akupÿm ixto ixtÿr. Anê.

Xiakre mẽ Juãw wa katorxà kot wa ho Jejus wÿr ã harênh

Makre 10.35-45; mãänên Rômãn 12.3, 12.10, 12.16; Epes 4.2; Piripos 2.3-8; Xiakre 4.6; Wam Pêtre 5.3

²⁰ Tã nhÿm Jepetew prõja amnhÿ kôt Jejus wÿr hkra Xiakre mẽ Juãwja wa o tê. Kot wa ho Jejus wÿr kaxyw hwÿr wa o tê. Mẽ ixpyrà mẽ wa kot Jejus kôt pa ho pa xwÿnhjê hõ na pre wa nhÿm wa katorxàja Jejus wÿr wa o tê. Hãmri mẽ kutã hkõnkrã ho tẽm mẽ nhÿ ²¹ nhÿm kãm:

—Pa mo na? Anê.

Hãmri nhÿm kãm:

—Ma ixkrata na pa ixte wa ho awÿr kaxyw awÿr wa o tê. Xê kot kaj nhÿrmã ate mẽ piitã mẽ ho amnhÿptàr kaxyw nhÿ nhÿm ixkrata wa akutã anhÿjê mẽ wa kêp anhõ kôwenatõ mẽ akutã anhÿjê mẽ wa ato nhÿ. Ja prãm xàj na pa ã wa ho awÿr anê. Anê.

²² Hãmri nhÿm kuma mẽ Xiakre mẽ Juãw wa omu mẽ wa kãm:

—Nà na war akatorxàja htÿx ã war ato ixwÿr anê. Koja mē tokyx ixpī kot paj amnhī xà htÿx kām ijamak kām ty. Tã xà koja mē ixpyrà nê ã war anhīpêx anê ka wa ixpyrà nê amnhī xà htÿx kamã ajamak rax kām ty nà? Anê.

Hāmri nhūm wa kām:

—Tÿ. Nà kot pa wa ijaxwÿja anê nê apyrà nê amnhī xà htÿx kām ijamak kām ty. Anê.

²³ Hāmri nhūm wa kām:

—Nà ãm hāmri na ka wa amnhī jarê. War ate ixpyrà nê ixkôt amnhī xà htÿx kām ajamak kām atyk mã kênã. Tã nom war akatorxà kot war ato ixwÿrta ã kot paj tanhmã war amã nê hkêt nê. Kêt inhō Papaj tãm koja ixkaxyw mēhō japêr nhūm inhīhkô hã nhÿ. No pa kot paj amnhī kaxyw mēhō jarênh kêt nê.

Anhÿr o wa kām kapêr. ²⁴ Hāmri pa mē ixte wa uràk nê Jejus kôt ixpa ho ixpa xwÿnhjaja wa katorxà kot ã wa ho Jejus wÿr anhÿrja ã kuma nê wa kamã inhgryk nê. Hāmri nê xepên mã ixkapêr o:

—Tk. Nà koja Juãw mē Xiakre wa nhÿrmã kêp ò kôwenatô nê mē pahto amnhīptàr kêt kumrêx. Anê.

²⁵ Nhūm Jejus mē inhma nê amnhī wÿr mē ixpiitã mē inhmä hpa ho apê nê mē inhmä:

—E mē amnê ixwÿr axkamê pa mē amã awjarê mãn. Anê.

Hāmri pa mē hwÿr axkamê nhūm mē inhmä:

—E mē inhma. Na hte Ijaew kêt xwÿnhjê nhō pahijaja ã amnhī nhīpêx anhÿr o ri pa nê amarī hkrī xà kamã hkrī ho hkrī. àhpumunh tÿx jakamã amarī ixkre hkre jakry kamã hkrī ho hkrī nê kām mē àpênh xwÿnhjê pix mã mēmo mē àpênh ã karô. Na htem ã amnhī nhīpêx anhÿr o hkrī. Nê mē kot mex ã harênh kaxyw tanhmã mē ho mex to ho pa. ²⁶ Tã no mē kajaja. Kêr ka mē ho mē uràk kêt nê. ãm te amarī ri mē apa pyrãk o xepên nhīpêx o ri apa. Nê te mē apê mē kām axàpênh xwÿnh pyrãk o amnhī nhīpêx o ri mē hkôt apa. No kêr ka mē ho amnhīptàr mã ajamaxpêr o ri apa hkêt nê. ²⁸ Mē ate mēmoj tã pa ixkutã anojarêr ho apa kaxyw na pa pre mē awÿr ixwÿryk kêt nê. Ixte amarī mēmoj to mē kamjaja mē akutã inhnojarêr o ixpa kaxyw na pa pre mē awÿr wrÿ. Nê mē ate ixkôt amnhī xunhwÿr xwÿnhjê nê ixtyk kaxyw na pa pre wrÿ. Anê.

Jejus kot no hkre xwÿnh wa ho mex ã harênh

Matêwre 9.27-31; Makre 10.46-52; Rukre 18.35-43

²⁹ Tã pa mē Jejus kôt kormã Jerujarê hwÿr ra Jeriko htêp o mō. Hāmri nê kurūm ixkaton mō nhūm mē ohtô nê mē ixkôt mra. ³⁰ Nhūm pry nhīhkjê hã no hkre xwÿnh wa àhwÿr o hkrī xwÿnhja wa amnhī wÿr mē inhmrar mar o nhÿ. Mē ohtô nê Jejus kôt mē mrar xwÿnhjê mrar ma nê mē kām:

—Kwa mo na? Mēmoj wÿr na ka mē axohtô nê mra? Anê.

Hāmri nhūm mē wa kām:

—Nà Jejus pē Najare nhō xwÿnhhta kôt na pa mē mra. Anê.

Hāmri nhūm wa mē kuma hāmri nê kàx pē Jejus mã kapêr nê kām:

—Pa Pahihti? E apê mē inhō Pahihti mex na ka. Te apê amnepêm anhīgêr pahihti Tawita pyrãk. Jakamã kwa wa ixkamã axukapri nê akupÿm wa ixto mex. Anê.

³¹ Hāmri nhūm Jejus kôt mē mōr xwÿnhjaja wa kuma nê wa kām:

—Tk. Kwa war akapêr kêt nê nhÿ nà. Anê.

Tã no nhūm wa ãm mē kuma nê xatã amnhī to kuwÿ. Kàx pē amnhī to kuwÿ. ³² Hāmri nhūm Jejus wa kuma nê xa nê wa omu nê wa kām:

—Pa mo na? Tanhmã kot pa wa ato? Anê.

³³ Hāmri nhūm wa kām:

—Nà akupÿm wa inhmä wa ixrīt mex prãm. Anê.

³⁴ Hāmri nhūm kām wa hkapri nê wa no htok nhūm wa akupÿm rīt mex kurê kumrêx. Hāmri nê rīt mex ã amnhī pumu nê hkīnh tÿx nê ma Jejus kôt hkwÿjê hkôt mō.

Jejus kot Jerujarê hwÿr àr ã harênh

Makre 11.1-11; Rukre 19.28-40; Juãw 12.12-19

21 Tã nhūm Jejus kormã Jerujarê hwÿr kormã mō. Pa mē hkôt mō nê ra Petake hwÿr ixàhtêp o mō.

Hixêt pē Oriwêhti kahti ri na pre krīja xa. Jakamã pa mē wa hwÿr ixàhtêp o mō nhūm Jejus mē ixte hkôt ixpa ho ixpa xwÿnhjê wa ho axkrut nê amnhī kukamã wa kumê. ² Nê wa kām:

—E wa ma krī mÿj wÿr mē ixkukamã wa tē. Nê wa hwÿr axà nê nhÿri jumênre mē hkra wa kām ê nê wa ãm xwÿnh wa omu hāmri nê kām ê xà hpôt nê man akupÿn amnê hamê wa o tē. ³ Kojã mēhō ja hã war apumu nê hã tanhmã war amã kapêr to ka wa kām ã ijarênh anê nê kām: “Nà mē panhō Pahihti na hã karô pa wa hwÿr tē.” Anhÿr o wa kām ijarê. Hāmri nhūm war ama nê war amã òr kurê kumrêx. E wa ma hwÿr tē. Anê.

⁴ Tirtūm kapêr ã kagà htūm ra kot ja kukamã harênh. Na pre ra Tirtūm nhÿ hã kapêr xwÿnhjê hō ja jarê nê hã kagà ho:

⁵ Pa Jerujarê nhō xwÿnhjaja. Kwa mē tee ri amnhī kukamã ajamaxpêr ho amã ma hkêt nê. Ota mē anhō pahī nywta ra jumênre hã nhÿ nê mē awÿr hpôx o tē. Te kot amnhī to grire xwÿnh pyrãk o amnhī nhīpêx nê tē.

⁶ Anhÿr o kot hkukamã harênh jakamã nhūm Jejus amnhī kukamã ja wa kumê hāmri nhūm wa ma hwÿr htêm kurê kumrêx. ⁷ Nê krīta wÿr pōj nhūm Jejus kot wa kām harênh xà hkôt nhūm wa jumênreta pumu. Hāmri nê hamê wa kām ê xà hpôt nê ma Jejus wÿr wa o tē. Hāmri nê kaxyw amnhī xê hkwÿ hkwÿr nê kām ho jumênre nywta kô kahty. Nê kām ho htÿx nê o xa nhūm Jejus hã nhÿ nê hã mō. ⁸ Kormã Jerujarê hwÿr hixêt ã àpir o mō. Nhūm mē kot omunh o kuhê xwÿnhjaja hkīnh nê ma hkukamã pry ho mex kaxyw amnhī xê hkwÿptyr ho mō. Nê pô hkwÿ jakà nê utyr o mō.

⁹ Nhūm mē hkwÿjaja Jejus kukamã mra nhūm mē hkwÿjaja hapu hã hkôt mra. Nê piitã kàx pē Tirtūm mex o mex ã harênh o hkôt mō nê harênh o:

Ota Tirtūm kot mē pahwÿr mēnh xwÿnhhta ra pōj. ãm hāmri na mē pahwÿr wrÿ. Ja na mex kumrêx. Kêp mē

panhõ Pahihti mex na. Æm hãmri na pre Tirtùm mē pahwyr kumē. Tirtùm mex kumrēx. Æm mex o mex. Anhÿr o Jejus kôt Jerujarē hwÿr harēnh o mō. Kot mē ho amnhĩptār kurē kumrēx ã hkamnhĩx jakamã hkĩnh nē hkôt ã harēnh anhÿr o mō. ¹⁰ Hãmri nhũm krĩ nhõ xwÿnhjaja tee ri mē kuma nē xapēn mã:

—Kwa mēhõ na we hpõx o mō nhũm mē ã hkôt harēnh anhÿr o mō? Anē.

¹¹ Hãmri nhũm Jejus kôt mē mrar xwÿnhjaja mē kuma nē mē kãm:

—Nà Tirtùm nhÿ hã kapēr jarēnh xwÿnh pē Jejus na. Kēp Garirej kamã krĩ pē Najare nhõ xwÿnhhta na. Anē.

Jejus kot Tirtùm nhõrkwÿ hwÿr àr ã harēnh

Makre 11.15-19; Rukre 19.45-48; Juãw 2.13-22

¹² Tã hãmri nhũm Jejus Jerujarē wÿr axà nē jumēnre rùm wrÿ nē ma Tirtùm mã amnhĩ jarēnh xà hã ixkre hwÿr tē nē axà. Hãmri nē tee ri mē kot tanhmã ixkre kamã amnhĩ nhĩpēx to hã mē omunh o xa. Nhũm mē axtem nē mōx nē òwēhti nē tuuti ho wēnē ho kuhē. Mē kot haprōr nē Tirtùm mã amnhĩ jarēnh kaxyw kãm hpar nē òr kaxyw mē kãm ho wēnē ho kuhē. Nom axtem nē mē kãm hã ohtō rax kãm mē kãm ho wēnē. Hãmri nhũm Jejus mē hwÿr axà nē tee ri mē omu nhũm ja kēp omnuj tÿx kumrēx. Hãmri nhũm mē hwÿr tē nē mē kot kàxpore ho pinhpanh xwÿnhjē pē mē ò mēsti rēnh pa. Nē mē kot tuuti ho wēnē xwÿnhjē pē hkrĩ xà hkujate nē rēnh pa. Hãmri nē mē kãm:

—Tk. Kwa Tirtùm kapēr ã kagà htũm kot ixkreja jarēnh kot:

Inhõrkwÿja ãm mē ate inhmã amnhĩ jarēnh xà hã ixkre pix kaxyw na.

Anhÿr o kot harēnh tã ka mē axtem nē kamã ã amnhĩ nhĩpēx anē. E kwa mē ajapõx tokyx anē. Anē.

Hãmri nē mē kator pa nhũm mē ma hapēx. ¹⁴ Hãmri nhũm mē ho hkre xwÿnhjaja nē mē hyk o mē pa xwÿnhjaja mra nē agjē nē Jejus kutã kuhē nhũm mē omu nē akupÿm mē ho mex. ¹⁵ Hãmri nhũm mēhprĩ hwÿjaja hwÿr mra nē kuri kãm mex o mex ã gre nē kãm grer o: Amex kumrēx Pahihti.

Tirtùm na pre mē ixwÿr amē.

Kot kaj te anhĩgēt Tawi pyrã nē mē ixto amnhĩptār o apa.

Anhÿr o kãm grer o kuhē. Hãmri nhũm patre krãhtũm mē Tirtùm kapēr tũm o mē ahkre ho mē pa xwÿnhjaja tee ri ã mē grer anhÿr ã mē kuma. Nē tee ri Jejus kot mē no hkre xwÿnhjē mē mē hyk o mē pa xwÿnhjē ho mex ã omunh o kuhē nē gryk nē Jejus wÿr tē nē kãm:

—Kwa na mēhprĩjaja mē grer kãm ã ajarēnh anē ka mē mar kēt nē? Mē grerja mexti hã. Anē.

Hãmri nhũm mē kãm:

—Tÿ ixte mē mar kēnã. Tirtùm kãm hprãm xà hkôt na mē ã inhmã inhmex o inhmex ã ixtã grer anē.

Tirtùm kapēr ã kagà htũm kot ã mē hkukamã harēnh kot anhÿr. Mē harēnh kot:

Koja mēhprĩjaja Pahihti mã mex o mex ã grer o kuhē.

Anhÿr o kot mē hkukamã harēnh kēnã. Tã mãn ka mē kormã kamã harēnh kēt jakamã na ka mē ja jarēnh mar kēt nē. Kwãr mē mãmri ã inhmex ã grer anē.

¹⁷ Anhÿr o mē kãm kapēr hãmri nē mē inhmã anē pa mē ixkreta rùm ijapõj nē ma akupÿm Petãn wÿr mra nē kamã amnhĩm hikra.

Jejus kot mēmo hpār mã kapēr ã harēnh

Makre 11.12-14; määnēn Xiakre 1.6

¹⁸ Tã nhũm kwÿhtã nhũm Jejus kãnhmã nhÿ nē mē inhmã anē pa mē ixrohã ma akupÿm Jerujarē hwÿr mra. Hãmri nē kormã mō nhũm Jejus pry kahti ri ra kãm prãm nē. ¹⁹ Hãmri nē mēmo pĩ pē fikēhti jarēnhja pumu nē kot ò hwÿr rēnh nē hkrēr kaxyw hwÿr māt. Hãmri nē tee ri ò japēr nhũm ò hkēt nē ãm hõ hpix harir. Hãmri nhũm tee ri omu nē kãm:

—E kot kaj axte axõ hkēt kumrēx.

Anhÿrja o nhũm grã par kurē kumrēx. ²⁰ Hãmri pa mē ixte hkôt ixpa ho ixpa xwÿnhjaja omu nē Jejus mã:

—Kokÿÿ. Kwa tanhmã na we amnhĩ nhĩpēx to nē grã kurē kumrēx? Anē.

²¹ Nhũm mē inhmã:

—Nà kot kaj mē ixpyrã nē fikēhti kot tanhmã amnhĩ nhĩpēx to kaxyw Tirtùm mã ajamxpēr tÿx nē nhũm amã hprãm xà hkôt amã tanhmã hipēx to. Nom kēr ka mē ajamxpēr kati ho tee ri hkukamã ajamxpēr kēt nē. Æm kaxyw Tirtùm kôt ajamxpēr tÿx nē nhũm mē amã tanhmã mēmoj nhĩpēx to. Æm hãmri na pa mē amã ja jarē. No ãm ja pix kēt. Kot kaj mē määnēn hixēt mÿj mã akapēr nē kãm: “E anhÿr xàta rùm akato nē ma tē nē gõ rax kãm mrõ.” Anē nhũm amar xà hkôt ã amnhĩ nhĩpēx anē.

²² —Nē kot kaj mē mēmoj tã Tirtùm wÿ nē kaxyw kãm ajamxpēr tÿx kãm hã awÿ nhũm amã mēmoj prãm xwÿnhhta gõ. Anē.

Mēhõ nhÿ hã Jejus kot mē ahkre hã harēnh

Makre 11.27-33; Rukre 20.1-8

²³ Nhũm arĩgro hõ hã nhũm Jejus kēwe axte Tirtùm mã amnhĩ jarēnh xà hã ixkreja wÿr axà nē kamã mē ahkre ho nhÿ. Mē kãm tanhmã mē kot amnhĩ nhĩpēx to nē nhÿrmã Tirtùm mē wa kuri htĩr tũm nē pa kaxyw tanhmã mē kãm kapēr to ho nhÿ. Hãmri nhũm Ijaew krãhtũmjē mē mē ò patre krãhtũmjaja hãmri hwÿr mra nē hēx rom mēmoj tã hkukja nē kãm:

—Kwa mē inhmã amnhĩ jarē. Mēhõ nhÿ hã na ka hte ã amnhĩ nhĩpēx anhÿr o apa? Na ka hte akupÿm mē ho mex o apa nē tanhmã mē ahkre hto ho apa. Xà amnhĩ krã hkôt na ka hte ã amnhĩ nhĩpēx anē nã? Anē.

²⁴ Hãmri nhũm mē kãm:

—Nà kot pa ixkumrēx mēmoj tã mē akukja. Ka mē inhma nē tanhmã inhmã harēnh to pa rĩ kormã mē amã amnhĩ jarē. ²⁵ Finat Juãw Paxis ã kot paj mē akukja. Mēhõ nhÿ hã na pre hte mē hkrã kumrãr o pa? Xà amnhĩ krã hkôt nã? Xà Tirtùm nhÿ hã? E mē atõ inhmã ja jarē. Anē.

Hāmri nhūm mē kuma nē tee ri kot tanhmā kutā kām harēnh to hkukamā hamaxpēr pē axpēn pumunh o kuhē nē axpēn mā:

—Kwa tanhmā kot puj wem kām ja jarēnh to? Or mē kot mar o kuhē xwŷnhjaja na htem kēp Tirtūm nhŷ hā kapēr jarēnh xwŷnh ā harē. Tā kot puj mē kām kot amnhī krā hkôt kot mē hkrā kumrār ā harē nhūm mē tee ri mē pama nē mē pakamā gryk tŷx nē. Nē mē paxēx rom ā mē pahte kām pakapēr anhŷr ā mē pah-pumu nē kēn o mē pahtak o mē panhīmex. No kot puj mē kām Tirtūm nhŷ hā kot mē hkrā kumrār ā harē hāmri nhūm mē pamā: “Kwa ā kot anhŷr kēnā na ka prem kapēr ma nē hkôt ajamaxpēr kēt nē?” Anē. Jakamā kot puj mē ja pymaj tanhmā kām harēnh to hkēt nē. Kot puj mē ām kām aa te mē pahte ja jarēnh mar kēt pyrāk o harē. Anē.

Mē kot tanhmā Jejus mā nē nhūm kot ta pānhā tanhmā mē kām nē pymaj nhūm mē tee ri kām tanhmā nē hprām kaprŷ o kuhē. ²⁷ Hāmri nē kām: —Konēn. Mē ixte mēhō nhŷ hā kapēr o pa hā omunhre hā. Anē.

Hāmri nhūm mē kuma nē mē kām:

—Tk. Tōe kot pa xep ijaxwŷja mē amā tanhmā amnhī jarēnh to hkēt nē. Ijaxwŷja ixte mēhō nhŷ hā ā ixte amnhī nhīpēx anhŷr o ri ixpa hā amnhī pumunhre hā. Anē.

Mēhō my mē hkra wa pijakrut ā wa harēnh

Matêwre 7.21-23; Rukre 7.29-30

²⁸ Hāmri nhūm Jejus axte Ijaew krāhtūmjē mē mē ō patre krāhtūmjē mā kapēr nē mēmoj tā kuxi nē tanhmā mē kām ujarēnh to nē mē kām:

—E pa mē amā awjarē ka mē inhma. Koja mēhō hkra my hamēxkrut. Hāmri nē hkra kot waja mā tanhmā kapēr to nē kām: “E kēr ka jarāhā ma tē nē inhmā pur kām apē.” Anē. ²⁹ Hāmri nhūm kuma nē pur mā htēm kaga nē hitōt nē. Tāā no ām hā ahtūmre nē tanhmā hamaxpēr to hāmri nē ma hwŷr tē nē kamā àpēnh o xa. ³⁰ Hāmri nhūm wa hipêêxāja hpānhā hkra kot hapu hwŷr tē nē mā kām kapēr anē nē kām: “E kēr ka ajaxwŷja atō hkôt tē nē wa inhmā apē.” Anē nhūm kuma nē kām: “Tōe. Nà kot paj ma tē.” Anhŷr tā no ām hōta kīnhā htēm kēt nē.

³¹ —Jakamā e. Nhŷ hkra na pre hipêêxà kapēr ma nē hkôt amnhī nhīpēx nē kapēr nhīrōp ām kēt nē? Xà kot waja nà? Xà kot haputa? E mē atō tanhmā inhmā wa harēnh to. Anē.

Hāmri nhūm mē kuma nē kām:

—Nà kot wata. Kot wata na hitōt tā tanhmā hamaxpēr to nē ma tē nē kām apē. Anē.

Hāmri nhūm mē kām:

—Tŷ ām hāmri na ka harē. No mē kajaja te mē ate hkra kot haputa kot amnhī nhīpēx pyrāk. Mē ate Tirtūm kapēr kôt amnhī nhīpēx o apa hā amnhī jarēnh tā hkwŷm ri amnhī nhīpēx o apa. Te mē ate kot hapu kot hipêêxà mā àpēnh ā amnhī jarēnh tā kām àpēnh kêeta pyrāk. No kēt mē kot amnhī tomnuj o mē pa xwŷnh kwŷjaja na mē arom Tirtūm kapēr ma nē hkôt

amnhī nhīpēx. Jao ra tām amnhī nhīpēx o pa. Jakamā mē arom ma kaxkwa hwŷr pa kaxyw ra tām nē. Ām hāmri na pa mē amā ixkapēr. ³² Na ka mē finat Juāw Paxis ā ixkukja. Juāw Paxisja na pre hte mē ate tām amnhī nhīpēx ā mē amā karō ho pa. Tā no ka mē ām ama nē ām ama nē aa kapēr kôt amnhī nhīpēx kēt nē. Nom mē kot amnhī tomnuj o mē pa xwŷnh kwŷjaja mē arom kuma nē Tirtūm kôt amnhī nhīpēx. Ka mē ja hā mē omu nē ām mē omu nē mē urāk nē ā amnhī nhīpēx anhŷr kēt nē. Anē.

Mē àpēnh punu xwŷnhjē jarēnh

Makre 12.1-12; Rukre 20.9-18

³³ Nhūm Jejus arī Ijaew krāhtūmjē mē mē ō patre krāhtūmjē mā kapēr. Nē mē kot tanhmā hipēx to hkukamā mē kām tanhmā amnhī jarēnh to. No ām amnhī tā kuxi nē mē kām awjarē nē mē kām:

—Koja mēhō mē kot kām pur kām àpēnh kaxyw hk-wŷjē mā karō nhūm mē ma hwŷr mra nē kamā mēmo hy hkre nē hkre pa. Hāmri nhūm hpur nhō dōn nhŷhŷm nojarēt nē kām mē àpēnh xwŷnhjē mā tanhmā hpur jarēnh to nē mē kām: “E or ixpur nō. Kē kamā mēmoj kà hpa ka mē māmri kamā axujamŷnh pa nē ho axkjē. Nē ixkutēp inhmā inhō jaxwŷy nē māmri anhō tanhmā ho hprām xà hkôt tanhmā ho.”

—Anhŷr o mē kām kapēr hāmri nē ma nhŷhŷm mō. ³⁴ Tā nhūm ra pur kām mēmoj hkà pa nom nhūm hpur nhō dōn arī krī hō kamā hā ujahkre ho ri pa htā kuri kām àpēnh xwŷnhjē ho axkrunēpxi nē akupŷm mē hwŷr mē kurē. Mē kot mē kām hkwŷy nhōr nhūm mē ma kot kām o mōr kaxyw nhūm ma mē hwŷr mē kurē. ³⁵ Nhūm mē ma hwŷr mō. Mōō nē ra hwŷr pōj nhūm mē amnhī wŷr mē omu nē axtem nē mē homnuj nē. Nē mē unē nē ja tak nē ja pī nē hōja nhūm mē kēn o htak hāmri nē amnhī nē wa hano nhūm wa ma akupŷm ŷ kamā mō. ³⁶ Hāmri nhūm mē ō patrāwja tee ri wa omu nē hamaxpēr o: “Kwa nà na mē ixpē inhmā mē àpēnh xwŷnhjē homnuj tŷx nē. Nà kot paj axte mē hwŷr mē hkwŷjē rē. Nom hpānhā mē ho ohtō nē mē kurē. Kē mē ohtō nē mē hwŷr mō nē tā inhmā inhō hkwŷy jamŷy nē man ixwŷr o mō.”

—Anhŷr o hamaxpēr hāmri nē mē hwŷr jajē rē nhūm mē ma akupŷm mē hwŷr mō. Nhūm mē amnhī wŷr mē ohtō hā nē mā mē ho anē nē mē hipēx kati nē nhūm mē ŷ kamā ma ō patrāwja wŷr akupŷm mō. ³⁷ Hāmri nhūm tee ri mē omu nē hamaxpēr o: “Hēxta waa nē. Tanhmā kot paj amnhī nhīpēx to? Nà kot paj pēr mē hwŷr ixkraja mǎn mē. Inhā hapē htŷx tā kot paj mē hwŷr kumē kē ma mē hwŷr mō. Hāmri nhūm mē kēp ixkra hā omu nē tanhmā ixpē ho hkēt nē. Nē tā inhmā kām inhōja kwŷy gō.” Anē.

—Hāmri nē mē hwŷr kumē nhūm ma mō. ³⁸ Tā hāmri ra mē hwŷr hpōx o mō nhūm mē amŷm amnhī wŷr omu nē kēp hkra hā omu nē axtem nē hā axpēn mā amŷnē nē axpēn mā: “E onēj hpur nhō dōn krata tē. Koja nhŷrmā ō papaj mŷr pē amnhīm hpur ā pykata pytà nē ho ō. Jakamā kwa pu mē hpīr kurē kumrēx nē

kêp hpur ho arîk nê ho panhõ. E tokyj pu mē kupī ri.” Anê.

³⁹ —Hāmri nhūm ra tē nê mē hwÿr pōj nhūm mē unê nê hpur nê ho kato nê mā ho anê nê kupī. Ā mē ujarēnh kot anhÿr. Anê.

⁴⁰ Nhūm pre ã Jejus mē kām ujarēnh anê. Hāmri nê hã mē hkukja nê mē kām:

—E koja pur nhõ dōnja hkra jarēnh ma hāmri nê tām mē hwÿr mō hāmri nê tanhmã mē hipêx to wehe? Anê.

⁴¹ Hāmri nhūm mē kām:

—Nà koja ma akupÿm mē hwÿr mō hāmri nê mē homnuj tÿx nê mē himex pa. Hāmri nê hpānhã nhām hpur ã mēmojjê rē nhūm mē tã katāt kōt kām àpēnh o pa. Anê.

⁴² Hāmri nhūm Jejus mē kām:

—Tÿ ãm hāmri na ka ã mē harēnh anê. Kot mē ho anhÿr mā tām kēnã. Mãn ka prem ra Tirtūm kapēr ã kagà htūm kot tanhmã ja jarēnh toja ma? Harēnh kot: Mē kot kēn o amnhīm ōrkwÿ nhīpêx kaxyw nê kēn maati pumu nê htÿx omnuj ã hkamnhix nê hkagata. Mē kot hkaga htã nhūm Tirtūm mē kurom mex o kot kēn piitã hakrenh par ã omunh kurê kumrêx. Tirtūm kot kēn maati mex ã harēnh xwÿnhhta mē pamã mex o mex.

Ā Tirtūm kapēr ã kagà htūm kot ja jarēnh kot anhÿr.

⁴³ Ja pyrã nê na pre ra Tirtūm amnhī kaxyw mē apê Ijaew xunhwÿ. Mē apê hkra nê hkōt mē ate amnhī nhīpêx kaxyw amnhī kaxyw mē axunhwÿ. Tã ka mē axtem nê hkaga. Te mē kot kēn maati pumunh nê mex kêt ã hkamnhix nê hkagata pyrãk. Jakamã koja mē apānhã Ijaew kêt xwÿnh kwÿjê xunhwÿ nhūm mē arom hkōt amnhī nhīpêx mex o pa. Jao ra mē kêp hkra nê. Anê.

⁴⁴ Nhūm pre ã Jejus mē kām te kêp kēn maati pyrãk o mē kām amnhī jarēnh anê. Hāmri nê axte amnhī tã kuxi nê mē kām axte kēn jarēnh pyrãk ã amnhī jarē nê mē kām:

—Nà kot kaj mē atõ ixkaga hāmri nê te mēhõ htÿx htēm nê kēn pumunh kêt nê hã htêk nê tēm pyrãk o amnhī nhīpêx. Jao ixkutã amnhī xãm. Rÿ ka tanhmã ajamaxpēr to nê ixkaga nhūm te kēn maati kot anhīpy tēm nê axôm par pyrãk o anhīpêx ka mē amex kêt kumrêx. Anê.

⁴⁵ Nhūm pre ã mē kām ujarēnh kām mē harēnh anê. Hāmri nhūm patre krãhtūmjê mē Parijew nhõ xwÿnhjaja tee ri amnhī tã kuma ⁴⁶ nhūm ja mē kêp omnuj tÿx jakamã nhūm mē kām unênh nê haxàr prãm nê. No mē ãm amnhī tã kām mē kot mar o kuhê xwÿnhjê puma nê. Mē kurom Jejus kêp Tirtūm nhÿ hã kapēr xwÿnh ã hkamnhix jakamã nhūm mē kām mē uma nê. Hāmri nê kormã tanhmã ho hkêt nê.

Pahi kot hkra hprõ kaxyw hkwyjê hwÿr ã harēnh

Rukre 14.15-24; mãänēn Wam Korit̄ 6.9-11; Epes 5.5-6; Apokarip 19.7-8

22 Tã nhūm Jejus axte mē kām awjarê. Ijaew kot Tirtūm kaga hã mē kām hã kuxi nê awjarê nê mē kām:

—E pa mē amã ahpÿnhã mē kot Tirtūm kapēr mar nê tanhmã amnhī nhīpêx to xwÿnhjê jarē ka mē inhma. Te mē kot pahihti kot hkra hprõ kaxyw nhūm kot amnhī wÿr hkwyjê hwÿr nhūm mē kot harēnh mar nê ahpÿnhã tanhmã amnhī nhīpêx to xwÿnhjaja kot amnhī nhīpêx pyrãk. Kojã pahihtija hkra hã hkĩnh nê hã apkur mex kaxyw amnhī wÿr hkwyjê hã karõ. ³ Hāmri nhūm kām mē àpēnh xwÿnhjaja ra kot amnhī wÿr mē hã karõ xwÿnhjê hwÿr mra nê mē kām nojarêt nhūm mē kuma nê ãm mē kuma nê axtem nê mē kêp hitõt nê. Hāmri nhūm mē tee ri mē kuma nê akupÿm tē nê pahihti mã mē harê.

⁴ —Hāmri nhūm tee ri amnhī tã mē harēnh ma nê hpānhã mē hwÿr axtem kām àpēnh xwÿnh kwÿjê rē nhūm mē ma mē hwÿr mra nê mē kām: “Pa. E kwa mē tokyx. Na ra pahihti mē akutêp mēõ nhīpêx pa. Na mē mōx kwÿ hpa nê ho àr mex nê. Nê mē akutêp mēmojjê nhīpêx par jakamã e kwa mē tokyx nã.” Anê. ⁵ ã mē kām kapēr anhÿr tã nhūm mē kuma nê ãm mē kuma nê ma ahpÿnhã nhÿhÿm mra. Nhūm ja ma àpēnh mã mra nhūm ja ma ihpur kām àpēnh mã ma tē nhūm ja ma nhÿhÿm mēmo to wēnê ho tē. ⁶ Nhūm mē hkwyjaja mē kām ujarēnh xwÿnhjê pynê nê mē htak o mē kupa.

⁷ —Hāmri nhūm pahihtija mē harēnh ma nê àhkurê nê. Hāmri nê mē hwÿr pōristi hkwyjê rē nhūm mē ma mē hwÿr mra nê mē unê nê mē kupa nê mē õ krĩ hã hpôk pa. ⁸ Hāmri nhūm pahihti kām mē àpēnh xwÿnh kwÿjê mã kām: “Kwa ra ixte mē kutêp mēõ mex kwÿ xunhwÿr tã nhūm mē ixwÿr mrar kêt nê. Ixtÿx ho mē mex ã mē hkamnhix nê amnhī wÿr mē hã karõ no mē mex kêt. Mē kot mē ixkutã apkur mã tãm kêt. ⁹ E kwa mē ma krĩ hkōt axtem mē hkwyjê japêr o mra. Nê nhÿri mēhõ pumu nê kām awjarê kê man ixwÿr tē nê ixkra hã hkĩnh nê mē ixkutã apku. Mē ã mē kām axu-jarēnh o amrar anê.” Anê.

¹⁰ —Hāmri nhūm mē kuma nê ma mē hapêr o mra nê mē piitã mē kām anhÿr o mra. Nhūm mē kuma nê wam tajê rom ma mē hkōt mrar kurê kumrêx. Mē kot amnhī to mex xwÿnhjaja nê mē kot amnhī tomnuj xwÿnhjaja hāmri piitã ma mē hkōt mra. Hāmri nê ixkreja wÿr mra nê hwÿr gjêx kaxyw nhūm mē kām mē ê mex gõ nhūm mē hagjê hāmri nê kormã mē apkur xã hã ixkre hwÿr agjê nê ho nÿt pa. ¹¹ Hāmri nhūm pahihtija mē hwÿr axà nê mē piitã mē omu. Nhūm ja pixi nê axtem nê hkwyjê hkĩnhã mē kot kām ê mex nhõrja jaxàr kêt rãhã axà nê apkur o nhÿ. ¹² Hāmri nhūm tee ri ja hã omu nê hwÿr tē nê kām: “Pa. Tk. Kwa na htem ixkrem gjêx kaxyw nê mē kot mē kām mē ê mex nhõr jagjê nê rĩ kormã hwÿr agjê nê apku. Tã mon ka akwyjê hkĩnhã haxàr kaga? Kwa na htem ã amnhī nhīpêx anhÿr kêt nê.” Anhÿr o kām kapēr nom nhūm kuma nê ãm kuma nê tanhmã kutã kām nê hkêt nê. Ām htÿx apkur o nhÿ. ¹³ Jakamã nhūm tee ri omu hāmri nê hã mē kot kām àpēnh xwÿnhjê mã amÿnê nê mē kām: “E mē hwÿr tē nê unê nê hpa nê hte hpre nê ma o tē nê kamāt kō kamã amē. Kê tee ri mur nê amnhī xã htÿx kamã hamak o amnhī nham o axpēn kamnhar tÿx

kapry ho nõ nõ rĩ amnhĩ pumu." Anẽ. Hãmri nhũm mẽ kuma nõ kãm ho anẽ. Æ mẽ ujarẽnh kot anhỹr. Anẽ.

¹⁴ Nhũm pre Jejus ã mẽ kãm ujarẽnh anẽ hãmri nõ mẽ kãm:

—Nà Tĩrtũm kot pahihitita pyrà nõ amnhĩ wỹr mẽ ho ohtõ nõ mẽ hwỹr tã na hte mẽ piitã hkõt amnhĩ xunhwỹr kêt nõ. Jakamã na hte ãm mẽ ho grẽre nõ amnhĩ wỹr mẽ ho api. Anẽ.

Parijew nhõ xwỹnh kot Jejus kamã hamak ã mẽ harẽnh

Makre 12.13-17; Rukre 20.20-26; mããnẽn Rõmãn 12.1, 13.7

¹⁵ Tã nhũm Parijew nhõ xwỹnhjaja ã Jejus kot mẽ kãm ujarẽnh anhỹrja ma hãmri nõ kurũm kato nõ tanhmã hkukamã axpẽn mã hã ãmnẽn to. Hãmri nõ hwỹr mẽ hkwyjẽ mẽ Erox kõt mẽ pa xwỹnh kwỹjẽ rẽ. Hẽx rom mẽ kot mẽmoj tã hkukjẽr kaxyw hwỹr mẽ kurẽ nhũm mẽ ma hwỹr mra nõ omu nõ kãm:

—Kwa Jejus. Nã ãm hãmri na ka hte Tĩrtũm kapẽr o mẽ ahkre mex o ri apa nõ mẽ kamã akahak o apa hkêt nõ. Mẽ kot tanhmã ato kapẽr punuj to htã ka aprĩ hã mẽ ahkre mex o ri apa. ¹⁷ E kwa mẽ inhmã mẽmoj jarẽ. Rõm nhõ pahihiti kot mẽ pahpẽ Ijaew mẽ pahte kãm kãxpore hkwy nhõr ã mẽ pamã karõta. Kwa xà ja amã mex nã? Xà kot pu mẽ kãm hkwy gõ? Nã xà kot pu mẽ kãm õr kêt nõ? E kwa mẽ inhmã tanhmã ja jarẽnh to. Anẽ.

¹⁸ Nhũm prem ã hẽx rom ãhkukjẽr anhỹr tã no nhũm ra mẽ hamaxpẽr ã mẽ omu nõ mẽ kãm:

—Tk. Kwa mon ka mẽ ã axẽx rom ja hã ixkukjẽr anẽ? ¹⁹ E mẽ atõ inhmã kãxpore htỹxre hõ gõ pa omu. Anẽ. Hãmri nhũm mẽ kãm ja gõ nhũm kupy nõ kãnhmã mẽ kãm kupẽ nõ mẽ kãm:

—E mẽhõ nhĩxi nõ mẽhõ karõ na ja hã? Anẽ.

²¹ Hãmri nhũm mẽ kãm:

—Pahi Sesti karõ nõ hixi na hã. Anẽ.

Hãmri nhũm mẽ kuma nõ mẽ kãm:

—Tỹ. Tõ kër ka mẽ mãmrĩ kãm hkwy nhõr o apa. Hã hkarõ nõ hã hixi. Tãm kot hipẽx xwỹnh jakamã õ na. No mẽ kajaja na pre Tĩrtũm mẽ anhĩpẽx nhũm mẽ apẽ õ jakamã kwa kër ka mẽ kapẽr kõt pix mã ri amnhĩ nhĩpẽx o ri apa. Anẽ.

²² Hãmri nhũm mẽ amnhĩ jaẽr pẽ ã kot kãxpore jarẽnh anhỹrja ma nõ axte kãm tanhmã nõ hkêt nõ. Hãmri nõ akryk omu hãmri nõ ma akupỹm mra.

Akupỹm mẽ htĩr ã mẽ harẽnh

Makre 12.18-27; Rukre 20.27-40; Juãw 5.21, 6.39-40; mããnẽn Wam Korĩt 6.14, 15.12-28; Wam Tesarõn 4.13-18

²³ Tã nhũm Satusew nhõ xwỹnh kwỹjaja mẽ kot akupỹm mẽ htĩr kêt ã mẽ hkamnhĩx kêt xwỹnhjaja na pre mẽ. Na pre htem mẽ htyk nõ mẽ hapẽx kumrẽx ã mẽ hkamnhĩx jakamã axpẽn mã tanhmã Jejus jarẽnh to nõ axpẽn mã:

—E kwa pu mẽ hwỹr mra nõ mẽmoj xihtỹx ã hkukja. Kẽ mẽ pama nõ tee ri tanhmã mẽ pamã kapẽr to hkukamã hamaxpẽr kapry. Kẽ mẽ piitã ja hã omu nõ ãhpumunh kêt ã omunh kurẽ kumrẽx. E tokyx pu mẽ hwỹr.

Anhỹr jakamã Parijew nhõ xwỹnhjẽ pyrà nõ hẽx rom ma hwỹr mra nõ hkukja nõ kãm:

²⁴ —Pa Jejus? Kwa mẽ inhmã mẽmoj jarẽ. Na pre finat Mojesja Tĩrtũm nhỹ hã ã mẽ panhĩgõtjẽ mã karõ anẽ. Mẽ hkra hkêt rãhã mẽ pa nõ mẽ htyk xwỹnhjaja nhũm mẽ harẽnh o:

Koja mẽhõ hprõ nõ kamã hkra hkêt rãhã pan ty. Hã koja hkõt htõja hpãnhã hprõ ho hprõ nõ kamã hkra. Hãmri nhũm kato nõ te kẽp htõ htyk xwỹnhhta hkra pyràk. Anẽ.

Æ na pre Mojesja Tĩrtũm nhỹ hã mẽ kãm karõ anẽ.

²⁵ Jakamã kwa ga mẽ ixujarẽnh ma. Koja mẽ kot axpẽn to htõ xwỹnhjaja kẽp 7. Nhũm kot waja hãmri hprõ nõ wa pa nhũm kamã hkra hkêt rãhã ty. Nhũm hkõt htõja hpãnhã ho hprõ ²⁶ nõ wa axpẽn to pa. Nhũm mããnẽn kamã hkra hkêt rãhã ty. Nhũm htõ hõta haxwỹja hpãnhã tãm o hprõ nõ we wa axpẽn to pa grire nhũm haxwỹja kamã hkra hkêt rãhã ty. Hãmri nhũm htõ hkwyjaja ni pyxi nõ axpẽn pãnhã ho hprõ hpa no mẽhõ kamã hkra hkêt rãhã htyk pa. ²⁷ Hãmri nhũm mẽ hprõta mẽ hkõt amnhĩ to hitep nõ ty. ²⁸ Tã Tĩrtũm kot akupỹm nhỹrmã mẽ ho htĩr ronhỹx nhỹ nhỹx kẽp nija mjẽn kumrẽx? Ra piitã kot ho hprõ kẽnã. E mẽ inhmã ja jarẽ. Anẽ.

²⁹ Hãmri nhũm Jejus mẽ kuma nõ mẽ kãm:

—Nã kaxkwa kamã mẽ kot amnhĩ nhĩpẽxja axtem na. Mẽ htĩr ri mẽ kot Tĩrtũm kõt amnhĩ xunhwỹr xwỹnhjaja na htem ty hãmri nõ Tĩrtũm nhõ krĩ kamã axte kãm hprõ hprãm kêt nõ pa. Jakamã hprõ hkêt nõ pa. Rỳ ni japẽr nõ mjẽn kêt nõ pa. Nom ri kãm mjẽn rỳ hprõ hprãm kêt nõ pa. Hãmri nõ Tĩrtũm kapẽr o mẽ wryk xwỹnhjẽ pyrà nõ axte htyk kêt nõ. Æm htĩr tũm rãhã nõ pa ho pa. Pẽr mẽ ate Tĩrtũm kapẽr ã kagã htũm mar mex kêt jakamã na ka mẽ ã ja hã ixkukjẽr anẽ. Tĩrtũm ãhpumunh tỹx o ãhpumunh tỹx jakamã kumã mẽ ate mẽmoj tã ixkukjẽr xwỹnhhta na tanhmã kẽp kute hkêt. Ra ja kukamã ãhpumunh tỹx kẽnã.

³¹ —Nom mẽ ate akupỹm mẽ htĩr kêt ã mẽ hkamnhĩxja kot paj ixprĩ hã mẽ amã harẽ. Amnepẽm na pre Tĩrtũm pĩ hpõkja kamã tanhmã Mojes mã kapẽr to. Mãn ra mẽ ate mar. Na pre kãm:

Ixpẽ Apraãw nhõ Tĩrtũm na pa. Nẽ mããnẽn ixpẽ Apraãw kra Ijak mẽ htãmnhwỹ Jako wa õ Tĩrtũm na pa. Anhỹr o Mojes mã amnhĩ jarẽ nhũm kuma nõ hã kagã. Kẽp apu arĩ mẽ htyk rãhã nhỹx pre ã mẽ harẽnh anhỹr kêt nõ. Nhỹx pre mẽ harẽnh o: "Amnepẽm Apraãw nõ hkra nõ htãmnhwỹ mẽ htĩr ri ixpẽ mẽ õ Tĩrtũm na pa pre." Anhỹr o nhỹx pre mẽ harẽ. Nom na pre ã amnhĩ jarẽnh anhỹr kêt nõ. Mẽ pamã te Apraãwja mẽ htyk nõ mẽ hapẽx pyràk. Nom nhũm prem ra Tĩrtũm ri ra akupỹm htĩr nõ mex nõ pa ho pa. Tã ka htem Tĩrtũm kapẽr kwỹm ri akupỹm mẽ htĩr kêt ã mẽ harẽnh o apa.

Anhỹr o Satusew nhõ xwỹnhjẽ mã kapẽr. ³³ Hãmri nhũm mẽ kot mar o kuhẽ xwỹnhjaja amnhĩ jaẽr pẽ kot mẽ ahkreja ma.

Tirtûm kapêr maati jarênh

Matêwre 10.37; Makre 12.28-34; Rukre 10.25-28; määnên Wam Juâw 5.3

³⁴ Tã nhûm Parijew nhõ xwýnhjaja Satusew nhõ xwýnhjê jarênh ma. Më kot tee ri kãm hamaxpêr o Jesus jakrenh prãm kaprý hä më harênhja ma hämri në axpên wýr akuprõ në Jesus wýr mra. Kot më uräk në hêx rom àhkukjêr në hamaxpêr o hakrenh kaxyw hwýr mra. ³⁵ Hõja kêp Tirtûm kapêr tûm o më ahkre o më pa xwýnh jakamã hêx rom kamã hamak kaxyw kãm kapêr në kãm:

³⁶ —Kwa Jesus. Ot pa më awýr mra. Kwa më inhmã mëmoj jarê. Na pre Tirtûm ahpýnhã mëmoj to 10 në hä më pamã karõ. Më pahte hkõt amnhî nhîpêx kaxyw hä më pamã karõ. Tã nhý kapêr na mex o kot hkwy jakrenh wehe? Anê.

³⁷ Hämri nhûm kuma në më kãm:

—Nà kot më pamã hä karõ kot:

Kêr ka më anhi piitã ho amã Tirtûm kînh tÿx o apa. Më amã hkînh tÿx o mëmoj piitã hakrenh par o apa.

³⁸ E Tirtûm kot më pamã hä karõ ja na mex o piitã hakrenh par. ³⁹ Nê hkõt ja:

Kêr ka më amã akwýjê hä ma ho te ka amã amnhî tã ma pyræk. Jao ra tãm më hipêx.

⁴⁰ ã Tirtûm kapêr ã kagà htûm kot më pamã hä karõ kot anhÿr. ã më pahte amnhî nhîpêx anhÿr o papaja na Tirtûm kãm hprãm tÿx kumrêx. Kot kaj më ja wa hkõt amnhî nhîpêx rãhã ho ri apa në määnên ra Tirtûm kot më pamã mëmoj tã karõ xwýnh piitã hkõt amnhî nhîpêx. Ja na pre Mojes më Tirtûm nhý hä kapêr xwýnhjaja amnepêm Tirtûm nhý hä më panhîgêjtê mã hä karõ ho pa. Anê.

Jejus kot amnhî tã më hkukjêr ã harênh

Makre 12.35-37; Rukre 20.41-44; määnên Römân 1.3-4

⁴¹ Nhûm Parijew nhõ xwýnhjaja arí Jesus mar o kuhê nhûm amnhî tã tanhmã më hkukjêr to. Nom te nhãm mëhõ hä më hkukjêr pyræk o më hkukja në më kãm:

⁴² —E më inhmã mëmoj jarê. Tanhmã na ka htem axpên mã Tirtûm kot më akaxyw ãm mã xwýnhja jarênh to? Kêp mëhõ kanrêhã htàmnhwý koja wehe? Anê.

Hämri nhûm më kãm:

—Nà koja kato në kêp pahi finat Tawi kanrêhã htàmnhwý koja.

⁴³ Anê nhûm Jesus më kuma në më kãm:

—Tÿ. ãm hämri na ka më harê. No mo na htem axpên mã kêp pahi Tawi hkanrêhã htàmnhwý pix ã harê në määnên kêp õ pahihti hä harênh kêt në? Tawi na pre Tirtûm Karõ nhý hä tanhmã harênh to në harênh o:

⁴⁴ Na pre Tirtûm inhõ Pahihti mã ã kapêr anê në kãm: "E amnê ixwýr tẽ në inhîhkõ hä nhý në inhmã më ho amnhîptar o akrí. Kot paj më kot kãm akurê xwýnh piitã më unênh pa në awýr më o mra në anhîhkram më haxàr pa." Anhÿr o pre kãm kapêr.

⁴⁵ ã Tawija Tirtûm kot Kris mã kapêr jarênh në kêp õ pahi hä kagà anê. Më kajaja na ka htem ãm kêp Tawi

tàmnhwý pix ã axpên mã harênh o ri apa. No kêt Tawija na pre kêp õ Pahihti hä harênh o pa. Anê.

⁴⁶ Hämri nhûm më kuma në tee ri kot tanhmã kutã kãm kapêr to hkukamã hamaxpêr në axte mëmoj tã hkukjêr kêt në. Tanhmã kot më amnhî to në hamaxpêr o hakre? Na prem tee ri kãm hamaxpêr o hakrenh prãm kaprý. Jesus mëmoj piitã hkukamã àhpumunh tÿx o àhpumunh tÿx.

Jejus kot tanhmã Parijew nhõ xwýnhjê jarênh to

Makre 12.38-40; Rukre 11.43-46, 20.45-47

23 Tã nhûm Jesus më ixte hkõt ixpa ho ixpa xwýnhjê më më kot mar o kuhê xwýnhjê mã kapêr në më inhmã tanhmã Parijew nhõ xwýnh më Mojes kapêr o më ahkre xwýnhjê jarênh to në më inhmã:

² —Nà Parijew nhõ xwýnh më Tirtûm kapêr tûm o më ahkre xwýnhjaja na htem hprí hä Tirtûm kapêr ã kagà htûm mar mex në. ³ Jakamã kêr ka më mar tÿx në më kot ho më ajahkre kõt amnhî nhîpêx. No më kot amnhî nhîpêxja kêr ka më hkõt amnhî nhîpêx kêt në. Më kot Tirtûm kapêr tûm o më ajahkre htã hkõt amnhî nhîpêx kêt në. ⁴ Te më kot mëhõ kot më katut ã më kãm më jênh pytí janhôr tã no ãm më kuxwar hkwy htur kêt kot amnhî nhîpêx pyræk o na htem amnhî nhîpêx o pa. Jao më amã mëmoj tã karõ në më amã: "E kêr ka më ã amnhî nhîpêx anê në ã amnhî nhîpêx anê." Anhÿr pix o më amã kapêr o pa. Nom më tãmjaja amnhî kapêr kõt amnhî nhîpêx kêt në.

⁵ —Na htem hkwyjê kot më omunh në më kot amnhî to mex ã më harênh kaxyw më noo mã tanhmã amnhî nhîpêx to. Nê më më noo mã më ê mex pix kãm pa. Nê amnhîm Tirtûm kapêr ã kagà htûm kwý hä kagà në amnhî nhõkrã hä hanhõ në amnhî pa hä hanhõ në hä pa. Më kot hä nohtÿx rãhã hä më hkamnhîx kaxyw nhûm htem ã amnhî nhîpêx anhÿr o pa. Nê më kãm më piitã më kot amnhîm më rûnh ã më harênh o paja nhûm htem kãm hprãm.

⁶ —Nê më pahpê Ijaewjê nhõ Tirtûm kapêr o më ahkre xà hä ixkre kamã më kot amnhî to rûnh xwýnhjê hkrí xà mex pix kamã kãm hkrí hprãm. Nê mëmoj tã më apkur xà mex ã arígro hä nhûm htem ma më apkur xà hä ixkre hwýr akuprõ nhûm më kot amnhî to rûnh xwýnhjê hkrí xà mex pix kamã kãm hkrí hprãm. ⁷ Nê nhÿri pry hä mra nhûm më kot më omunh në më kêp më ahkre xwýnh maati hä më hä hpijaàm kãm tanhmã më kãm kapêr mex toja nhûm htem kãm hprãm. ã na hte Parijew nhõ xwýnh më Tirtûm kapêr tûm o më ajahkre xwýnhjaja hêx rom më anoo mã amnhî nhîpêx anhÿr o pa.

⁸ —No më kajaja. Kêr ka më ho më uräk kêt në. Kê më axpên mã më ajarênh o: "Pahi Maati" anhÿr o më ajarênh kêt në. Rÿ më ajarênh o: "më ijahkre xwýnh maati" anhÿr o axpên mã më ajarênh hkêt në. Kêt paxipix na pre Tirtûm më akaxyw ixãm jakamã paxipix na ixpê më anhõ Pahi Maati. Nê paxipix na ixpê më ajahkre xwýnh maati. No më kajaja ixkõt më apê axpên to atõx në atõ na ka më.

—Nê kêr ka mê ri axpên jarênh o: “Mêpahpâm” anhÿr kêt nê. Kêt kaxkwa kamã na Mêpahpâmja.

¹¹ —Nê kot ka mê amnhî to rax prãm xàj tanhmã amnhî to jarkrar to ho apa htã no nhùm akwÿjaja ama nê ãm ama nê akôt hamaxpêr kêt nê. No kot kaj mê piitã mê kutã tanhmã anojarêt to ho apa nhùm mê amnhî tã mê apumu nê axpên mã mê amex ã mê ajarê. Jakamã kot kaj mê amã mê piitã mê kot mê amex ã mê ajarênh prãm hãmri nê ri mê piitã mê kãm tanhmã amnhî nhîpêx to pê mê kutã anojarêt rãhã ho ri apa. Anê.

Jeus kot mê hkwÿjê mã kapêr tÿx ã harênh

Makre 12.40; Rukre 11.39-52, 20.45-47

¹³ Tã nhùm Jeus hpãnhã Parijew nhõ xwÿnh mê Tirtûm kapêr tûm o mê ahkre ho mê pa xwÿnhjê mã kapêr. Nê mê kãm kapêr kãm hihtÿx nê mê kãm:

—E mê apê Parijew nhõ xwÿnh mê Tirtûm kapêr tûm o mê ahkre xwÿnhjaja. E mê inhma. Kot kaj mê amex kêt nê. Mê apê mê no kupyr xwÿnh na ka mê. Nê mê amã Tirtûm kôt amnhî nhîpêx prãm kêt. Nê nhÿrmã atyk nê mê amã õ krî hwÿr axàpir prãm kêt. Nê akwÿjaja kot hwÿr àpir pymaj na ka htem akwÿjê nê tanhmã mê kãm axêx to ho apa. Mê kot mê apyrã nê Tirtûm kapêr kwÿm amnhî nhîpêx prãm xàj na ka htem amnhî mê tanhmã mê kãm axêx to ho ri apa. Jao te mê ate mê kêp Tirtûm nhõ krî hwÿr kahêxã kahê htÿx pyrãk o apa.

¹⁵ —Nê mê akwÿjaja kot mê akôt amnhî xunhwÿr nê mê akôt amnhî nhîpêx prãm xàj na ka htem ma awry hã nhÿhÿm tanhmã mê kãm ri axujarênh to ho ri apa. Jakamã nhùm mêmhõ mê ama nê mê akôt amnhî xãm hãmri nê ra amnhî tomnuj tÿx o mê ajakre. Jakamã koya mê nhÿrmã mê apyrã nê ma mê kot amnhî xã htÿx kamã hamak tûm xata wÿr pa. Jakamã kwa mê o kora. Kot kaj mê amex kêt nê.

¹⁶ —Hêxta waa nê. Mê apê Parijew nhõ xwÿnhjê mê mê apê Tirtûm kapêr tûm o mê ahkre xwÿnhjaja kot kaj mê amex kêt kumrêx. Na ka htem mê kêp mê hikàxpore jamÿnh prãm xàj atÿx ri tanhmã mê ahkre hto ho apa nê mê kãm: “Kot kaj mê ãm hãmri mëmoj tã amnhî jarênh kaxyw hãmri nê Tirtûm mã amnhî jarênh xã hã ixkre nhÿxi jarênh kôt mêmhõ mã amnhî jarê nhùm ama nê hamaxpêr o: ‘Ko. Apu ãm hãmri na inhmã amnhî jarê rÿ ko na apu ãm amnhî to hêx.’ Anhÿr o hamaxpêr. Nom kot kaj mê ixkreta ho mex kaxyw mê kãm kàxpore hkwy gõ hãmri nê ate mê kãm õr xata jarênh kôt ãm hãmri mëmoj tã mêmhõ mã amnhî jarê. Hãmri nhùm ama nê hamaxpêr o: ‘Nã ãm hãmri na ã inhmã amnhî jarênh anê. Kot ixkre ho mex kaxyw kàxpore hkwy nhõr kôt ã amnhî jarênh anê. Jakamã na amnhî to hêx kêt nê.’” Anhÿr o hamaxpêr. Na ka htem ã mê ahkre ho apa anê. ¹⁷ Nom mê ate mê ahkreta mex kêt. Pêr mê ajamaxpêr mexti hã. Tirtûm mã amnhî jarênh xã hã ixkreta mex o ixkre ho mex kaxyw kàxpore nhõrta jakrenh. Tã ka htem axtem nê mê kot kãm kàxpore nhõrta mex o ixkre jakrenh ã harê. No mê pahte ãm hãmri mëmoj tã amnhî jarênh

nê aa paxêx kêt rãhã ho papaja na Tirtûm kãm hprãm.

¹⁸ —Nê na ka htem mê kêp mê hikukrêx jamÿnh prãm xàj ã atÿx ri mê ahkre anê nê mê kãm: “Kot kaj mê ãm hãmri mëmoj tã amnhî jarênh kaxyw nê Tirtûm mã mëmoj nhõr xã hã mêmstija jarênh kôt mêmhõ mã tanhmã amnhî jarênh to. Hãmri nhùm mê ama nê hamaxpêr o: ‘Nã ãm hãmri na inhmã amnhî jarê rÿ ko na apu ãm inhmã amnhî to hêx.’ Anhÿr o hamaxpêr. Nom kot kaj mê Tirtûm mã mëmoj nhõr xã hã mêmstija ã kãm mëmoj xi. Hãmri nê ra mê ate kãm õr xata jarênh kôt ãm hãmri mëmoj tã mêmhõ mã amnhî jarê. Hãmri nhùm ama nê hamaxpêr o: ‘Nã ãm hãmri na ã inhmã amnhî jarênh anê. Kot Tirtûm mã mëmoj nhõr ã amnhî jarênh kôt kot amnhî jarênh anhÿr jakamã na amnhî to hêx kêt nê.’ Anhÿr o hamaxpêr.” Anê. Na ka htem ã mê ahkre anê. ¹⁹ Mê ajamaxpêr kêt xwÿnh na ka mê. Tirtûm mã mëmoj nhõr xã hã mêmstija na mex o mê kot hã kãm mëmoj nhõrta jakrenh. Tã na ka htem axtem nê mê kot hã kãm mëmoj nhõrta mex o mêmsti jakrenh ã harê. ²⁰ Nom Tirtûm mã mêmsti mê mê kot hã kãm mëmoj nhõrta te kot axpên pyrãk jakamã kot kaj mê mêmstija jarênh kôt mëmoj tã amnhî jarê nê määnen mê ate hã Tirtûm mã mëmoj xirja jarênh kôt amnhî jarê. Hamê wa kot axpên pyrãk jakamã hamê wa harênh pê amnhî to axêx kêt nê. Jakamã kêr ka mê mëmoj tã amnhî jarênh kaxyw nê hamê wa harênh kôt ãm hãmri mëmoj tã amnhî jarê nê ho axêx kêt nê. ²¹ Tã kot kaj mê ãm hãmri amnhî jarênh ã mëmoj tã amnhî jarênh kaxyw nê Tirtûm mã amnhî jarênh xã hã ixkre hkôt hã amnhî jarê nê määnen Tirtûm kêp ixkre hpãm kôt hã amnhî jarê. Jakamã kêr ka mê hamê wa harênh pê amnhî to axêx kêt nê.

²² —Nê kot kaj mê ãm hãmri amnhî jarênh ã mëmoj tã amnhî jarênh kaxyw nê kaxkwa jarênh kôt amnhî jarênhja o määnen kaxyw kaxkwa kamã Tirtûm krî xã maati hkôt amnhî jarê. Nê määnen Tirtûm kôt amnhî jarê. Jakamã kwa hamê wa harênh pê amnhî to axêx kêt nê.

²³ —Hêxta waa nê. Mê apê Parijew nhõ xwÿnh mê mê apê Tirtûm kapêr tûm o mê ahkre xwÿnhjaja kot kaj mê amex kêt nê. Mê ate mê no kupyr xwÿnh na ka mê. Na ka htem Tirtûm kapêr piitã hkôt amnhî nhîpêx kêt nê ãm hkwy kôt pix mã amnhî nhîpêx o ri apa. Na ka htem ãm kapêr o hpÿnhre nê hkôt amnhî nhîpêx ã amnhî pumu nê ate amnhî to mex xwÿnh ã amnhî jarênh o apa. No Tirtûm kãm hprãm xã piitã hkôt amnhî nhîpêx kêt nê. Mê ate tãm mê hipêx nê mê ho mex nê mê kamã axukapri hã kot mê amã karõja. Nê mê amã Tirtûm kÿnh ã kapêr kôt amnhî nhîpêx hã karõja ra mê ate mar tã hkôt amnhî nhîpêx kêt nê. Mê ate kapêr piitã hkôt amnhî nhîpêx ronhÿx ja mê amã mex o mex. ²⁴ Mê ate ãm kapêr o hpÿnh nê hkôt amnhî nhîpêx jakamã te mê ate atÿx ri tanhmã axàpkur to ho mê akrÿ pyrãk. Jao te mê axàpkur xã hã mêmhõ kamã pure pumunh nê nê hanhir nê rênh tã määnen kamã kên rax pumunh tã nê hanhir nê rênh kêt rãhã hkur pyrãk. Jao Tirtûm kapêr o hpÿnhre nê hkôt amnhî

nhîpêx no piitã hkôt amnhî nhîpêx kêt nê. Pêr mē aja-maxpêr kêt tã na ka htem atÿx mē ahkre ho ri apa.

²⁵ —Hêxta waa nê. Mē apê Parijew nhõ xwÿnh mē mē apê Tirtûm kapêr tûm o mē ahkre xwÿnhjaja kot kaj mē amex kêt nê. Mē ate mē no kupyx xwÿnh na ka mē. Nà mē apê Parijew nhõ xwÿnhjaja te mē ate mē kot apkur kaxyw prat kre kuhõnh punuj tã mex ã harênh nê kamã apkur pyrãk o na ka mē. Jao ãm mē akrãhkã rûm pix mã mē amex. Nê mē noo mã te mē amex pyrãk no mē anhõxãhkre kaxwÿnh kãm mē aja-maxpêrja mex kêt. Mē akapêr prãm nê mē axãhkurê nê mē anhõxyÿ. ²⁶ Mē ajamaxpêr mex kêt kênã. Kwa kêr ka mē tãm ajamaxpêr o tãm akwÿjê nhîpêx o ri apa. Nê axãmnhîx ri mē kêp amrakati xwÿnhjê mã mē-moj nhõr o ri apa. Kot kaj mē ã amnhî nhîpêx anê nhûm Tirtûm ja hã mē apumu nê amnhîm mē amex ã mē ajarê. No na ka htem amã mē amnhî to mex prãm xaj ãm tee ri amnhî kuhõnh japjê kaprÿ.

²⁷ —Hêxta waa nê. Mē apê Parijew nhõ xwÿnhjê mē mē apê Tirtûm kapêr tûm o mē ahkre ho mē apa xwÿnhjaja kot kaj mē amex kêt nê. Te mē ate mē htykjê jagjênh xà pyrãk. Na htem mē hagjênh xà ho mex o pa nom kamã mē hi nê ahpunuj pix. ²⁸ Ja pyrã nê ã mē ate amnhî nhîpêx anhÿr. Kapôt rûm mē anhîja na mex. Te mē ate mē ho mex o apa pyrãk o na ka htem amnhî nhîpêx nhûm mē ãm akrãhkã pix pumu nom ãm mē akrã hi kaxwÿnh kãm mē ajamaxpêr punuj rãhã hã mē apumunh kêt nê. Mē ate tanhmã mē no kupyx to pix kukamã ajamaxpêr jakamã te mē ate mē htykjê jagjênh xà pyrãk.

²⁹ —Hêxta waa nê. Mē apê Parijew nhõ xwÿnh mē mē apê Tirtûm kapêr tûm o mē ahkre xwÿnhjaja kot kaj mē amex kêt nê. Mē ate mē no kupyx xwÿnh na ka mē. Na ka htem ma mē hã pika hwÿr apa nê Tirtûm nhÿ hã kapêr o mē pa xwÿnhjê hã pika ho mex. Nê mē kot amnhî to mex xwÿnhjê hã pika ho mex. Nê axpên mã mē harênh o: “Hêxta waa nê. Na pre amnepê mē pakukamã mē panhîgêjtaja Tirtûm nhÿ hã mē kãm kapêr xwÿnhjê homnuy nê mē kupa. No kêt mē papajaja mē kamã ri papa ronhÿx pu prem mē urãk nê ã mē hipêx anhÿr kêt nê.” Anhÿr o axpên mã mē hkaprÿ ho ri apa. ³¹ Nom ãm amnhî to axêx. Mē ate ã amnhî nhîpêx anhÿr o apa kênã. ã mē ate amnhî nhîpêx anhÿr jao ra apê mē hkanrêhã mē hkra kumrêx ã amnhî to amnhîrÿt mex o apa. ³³ Te mē ate kagã xoprê kot mē hkamnhar nê mē homnuy tÿx pyrãk jakamã koja Tirtûm nhÿrmã ma mē kot amnhî xà htÿx kamã hamak tûm xàta wÿr mē ajano ka mē ma hwÿr ajapêx. Hãmri nê tee ri amã ajapôx prãm kaprÿ nê rÿ amnhî pumu.

³⁴ —Kot paj nhÿrmã ma mē awÿr inhÿ hã ixkapêr jarênh o mē pa xwÿnh kwÿ rê. Nê inhÿ hã mē àh-pumunh xwÿnh kwÿ rê. Nê ixkapêr o mē ahkre xwÿnh kwÿ rê. Nom kot kaj mē ãm mē kapêr ma nê apê mē hprãm nõkati nê tanhmã mē homnuy tÿx to ho apa. Nê ixpê mē hkwyjê hpar o apa. Jao pÿ kahpa hã mē hanhõr o mē hkwyjê hpa. Nhûm mē hkwyjê Tirtûm kapêr o mē ahkre xà hã ixkre kamã mē ahkre ho hkrÿ ka mē omu nê mē unê nê ixkreja kamã mē htak. Hãm-

ri nhûm mē apymaj nhãm ahpÿnhã krÿ hkwyÿ hwÿr hprõt nê mra. ã kot kaj mē inhÿ hã ixkapêr jarênh xwÿnhjê nhîpêx anhÿr o apa. ³⁵ Na prem ra mē himex rax nê. Amnepê mē panhî kator krax rûm Atãw kra Apewta na pre Tirtûm nhÿ hã kapêr o pa nhûm htõja kãm mar prãm kêt nê kupÿ. Tã nhûm Tirtûm axte mē hwÿr ÿ hã kapêr o mē pa xwÿnh kwÿjê rê nhûm prem mã mē ho anê nê mē hkwyjê nhîmex. Nhûm pre xatã mē hwÿr mē hkwyjê rê nhûm mē xatã mē kupa. Apew rûm Parakis kra Jakaris wÿr na prem mē himex rûnh nê. Hãmri nhûm prem Tirtûm mã amnhî jarênh xà hã ixkre kamã Jakarisja pÿ. Tã mē kajaja mē ate mē urãk nê mē amã Tirtûm kapêr mar prãm kêt nê mē urãk nê amã Tirtûm nhÿ hã kapêr xwÿnhjê nhîmex prãm nê. ã mē ate mē anhîgêjtê pyrã nê mē hipêx anhÿr mÿrapê koja Tirtûm mē apê mē hkanrêhã mē hkra nê mē htãmnhwÿjaja mē ato hpimrãatã tanhmã mē ato htÿx to ka mē amnhî xà htÿx kamã ajamak rãhã ho ri apa. Anê.

Jejus kãm Jerujarê nhõ xwÿnhjê japê htÿx ã harênh
Rukre 13.34-35; mãänên Rõmãn 11.25-27

³⁷ Hãmri nhûm Jesus te ra kot Jerujarê nhõ xwÿnhjê pumunh nê mē kãm kapêr pyrãk o tanhmã kapêr to ho xa. Nê mē kãm:

—Hêxta waa nê Jerujarê nhõ xwÿnhjaja. Tirtûm kot xatã mē awÿr ÿ hã kapêr jarênh xwÿnhjê rênh nhûm mē kot mē akôt mē amã kapêr jarênh o pa htã ka mē kapêr mar kêt kumrêx. Nê axtem nê kên o mē htak o mē himex o apa. ã na ka htem amnhî tomnuy o apa anê. Tã nom arÿ inhmã mē ajamãr o ri ixpa hprãm. Te ho krãhyre kot nore hpro nê ho hikwÿ pyrãk o na pa inhmã mē anhîpêx prãm nê. Nom mē amã ixprãm nõkati nê mē ate ixkaga kumrêx. ³⁸ Mÿrapê koja Tirtûm mē anhõ krÿ jamãr kêt nê. ³⁹ Kot paj tokyx ty nê mē api-itã mē are nê ma akupÿm api ka mē axte ixpumunh kêt nê. ãm akupÿn ixwÿrÿk xà hã arÿgrota pix ã koja mē akwÿjaja mē amÿrpê krÿ ja kamã ixpõx ã ixpumu. Hãmri nê mē akurom ixpumu nê hkÿnh tÿx nê. Nê tã ixkôt amnhî xunhwÿr kurê kumrêx. Hãmri nê axpên mã ijarênh o:

Ota Tirtûm kot mē pahwÿr mênh xwÿnhhta wrÿ. Nà ãm hãmri na mē pahwÿr wrÿ. Ja mex o mex. Koja mē ã axpên mã ijarênh anê. Anê.

Jejus kot mē pakukamã mēmoj jarênh

Makre 13.1-13; Rukre 21.5-19; mãänên Wam Ximotre 4.1-3; Sikÿn Ximotre 3.1-9; Apokarip 6.1-17

24 Tã nhûm Jesus Tirtûm mã amnhî jarênh xà hã ixkre rûm kato nê ma tẽ. Pa mē ixte hkôt ixpa ho ixpa xwÿnhjaja kormã ixkreja pumunh o ixkuhê nê kãm harê nê kãm:

—Kwa Pahihti. Hêxta waa nê. Ixkreja ãm mex kumrêx. Anê.

Hãmri nhûm mē inhmã:

² —Tÿ mex nom koja nhÿrmã mē kãm Tirtûm kurê xwÿnhjaja grãnh pa. Koja arÿ kên õ axkrutre nê axpên

mÿnh nê nõr kêt nê. Koja piitã anhrã nê ahpÿnhã ri hikwÿ. Anê.

³ Hãmri pa mē kuma nē tee ri hkukamã ijamaxpēr. Hãmri nhũm Jejus ma tē nē hixēt pē Oriwēhti hã api nē hã nhÿ pa mē ma hkôt mra nē mē kot ã ixkre nhĭpêx anhÿrta ã hkukja nē kãm:

—Kwa xà ãm hãmri koja mē ã ixkreta nhĭpêx anê? Kwa mē inhmã aprĭ hã harē. Xà koja mē nhÿrmã ho anê nà? Xà koja mē tokyx ho anê? Nē akupÿn mē ixwÿr awrÿk nhũm mēmoj piitã hapêxja. Kwa mēmo koja we wÿj ri tanhmã amnhĭ nhĭpêx to wehe? Anê.

⁴ Hãmri nhũm mē inhmã hprĭ hã tanhmã mēmoj kot amnhĭ nhĭpêx to hkukamã ujarēnh o nhÿ nē mē inhmã:

—Nà nhÿrmã mēmoj piitã hapêx kaxyw tanhmã amnhĭ nhĭpêx toja kumrêx kot paj mē amã harē ka mē inhma. Nà koja mē ohtô nē mē awÿr mra nē hêx rom te pa ixte amnhĭ nhĭpêx pyrãk o amnhĭ nhĭpêx o mē akôt pa. ⁵ Nē mē amã amnhĭ jarēnh o: “E Tĭrtũm na pre mē awÿr inhmē. Ixpê kaxkwa rũm ixwÿr xwÿnhhta na pa.” Anhÿr o mē akôt mē amã amnhĭ to hêx o pa. Jao ohtô nē mē nokupyr o pa.

⁶ —Nē koja mē nhÿri awry hã axpēn par o pa nē mē atã axpēn par o pa. Nom kêr ka mē harēnh ma nē ri tokyx mēmoj piitã hapêx ã hkamnhĭx kêt nê. Kormã mēmoj piitã hapêx xà hã arĭgroja kormã. ⁷ Koja mēmoj piitã hapêx kaxyw nhũm ahpÿnhã ri pika piitã hkôt mē pa xwÿnhjaja pika hõ nhõ xwÿnhjê kutã kuhê nē pijapu ho kuhê. Jao ra axpēn par o pa. Hãmri nhũm nhÿri pika hkwy htertet tÿx kumrêx. Nē mē hpur kãm mēõja hapêx nhũm mē kãm prãm tÿx nē pa. Jakamã nhũm mē ohtô nē prãm xàj axkaprã. ⁸ Nom ja kormã mēmoj hapêx kaxyw krax pix na. Te ho mēnijê hõ hpijagri kaxyw nē kormã kawax pē õhy xà pyrãk.

⁹ —Nē koja mē piitã ixkôt mē akamã gryk nē kãm mē akurê htÿx o pa. Nē mē awÿr mra nē ixtã mē apynê nē mē atomnuj tÿx nē mē apa. ¹⁰ Jakamã koja mē kot ixkôt amnhĭ xunhwÿr xwÿnh kwÿjaja mē umaj tee ri amnhĭ kukamã hamaxpēr hãmri nē ixkaga. Nē ixkôt mē kãm axpēn tã amÿnê nē axpēn kãm gryk o pa.

¹¹ Nhũm nhÿri mē hkwyjaja Tĭrtũm nhÿ hã kapēr jarēnh xwÿnh ã amnhĭ to hêx o pa. Jao mē ohtô nē mē nokupyr o pa. ¹² Koja mē ã amnhĭ nhĭpêx anhÿrja o ra piitã kãm axpēn kamã ukaprĭ hkêt o pa. ¹³ Koja mē ã ixtã mē atomnuj o pa anê. Tã nom kêr ka mē amnhĭ to htÿx nē ixkaga hkêt nê. Mē kot mē apar tã ka mē kaxkwa kamã akupÿm atĭr kurê kumrêx.

¹⁴ —Nē kot kaj mē apê ixkwÿjaja ma krĭ piitã hkôt Tĭrtũm kapēr o mē ahkre ho apa. Mē kot amnhĭ tomnuj kaga nē ixkôt amnhĭ xunhwÿr nhũm Tĭrtũm kot ja hã mē omunh nē mē ho hkra hã mē kãm harēnh o ri mē piitã mē hkôt apa. Kot kaj mē piitã mē kãm ijarēnh pa pa rĭ kormã akupÿn mē awÿr wrÿ. Anê.

Mē pahomnuj tÿx xwÿnh maati hã harēnh

Makre 13.14-23; Rukre 21.20-24; mãänēn Sikũn Tesarõn 2.3-4

¹⁵ Nhũm Jejus arĭ mēmoj kukamã mē inhmã kapēr nē mē inhmã:

—Amnepēm Tĭrtũm nhÿ hã kapēr xwÿnh finat Tãñewja na pre tanhmã mē atomnuj tÿx xwÿnh maati-ja jarēnh to. Tã koja nhÿrmã ra kot harēnh xà hkôt axtem nē Tĭrtũm mã amnhĭ jarēnh xà hã ixkre hwÿr axà nē Tĭrtũm xãm xà kamã xa. Ka mē ja hã omu hãmri nē mē kot krĭ grãnh par ã hkamnhĭx kurê kumrêx. ¹⁶ Koja ã amnhĭ nhĭpêx anê ka mē amÿm amnhĭ wÿr mē omu hãmri nē ajapôj nē ma aprôt nē amrar kurê kumrêx. Mē apê jar pika pē Jutej kamã mē apa xwÿnhjaja kaj mē omu hãmri nē mē kot mē apar pymaj aprôt nē ma amrar kurê kumrêx. ¹⁷ Rÿ ka mē anhõrkwy hkrãmnhēn o akrĭ japêr nē amÿm amnhĭ wÿr mē omu nē akukrêx wÿr axàr nē hõ hpyr mã ajamaxpēr kêt nê. ãm wrÿ nē aprôt nē ma atēm kurê kumrêx. ¹⁸ Rÿ ka mē apur kãm axapēnh o apa japêr nē amÿm mē omu hãmri nē akupÿm anhõrkwy hwÿr axê jamÿnh kaxyw atēm kêt nê. ãm mē umaj aprôt nē ma atēm kurê kumrêx.

¹⁹ —No mē htujarô nē mē hkra karãre xwÿnhjaja koja mē kêp mēmoj omnuj tÿx nê. Tanhmã kot mē amnhĭ to nē mē umaj hprôt tÿx? Nà pika ja kamã koja mē mex kêt o mex kêt. Mē kot amnhĭ tomnuj mÿrapê koja Tĭrtũm tanhmã mē homnuj tÿx to.

²⁰ —Nē kwa kêr ka mē amnhĭ to Tĭrtũm wÿr kê ã mē kot amnhĭ nhĭpêx anhÿr xà hã arĭgroja na wrÿk pē ã amnhĭ nhĭpêx anhÿr kêt nê. Rÿ mē hkôt xà hã arĭgro pē sap ã ã amnhĭ nhĭpêx anhÿr kêt nê.

²¹ —Nē ã mē kot amnhĭ nhĭpêx anhÿr ã arĭgroja ã koja mē piitã amnhĭ xà htÿx kãm hamak tÿx kumrêx. Amnepēm Tĭrtũm kot pika ho kator krax rũm amnê mē pa xwÿnhjaja kormã aa kot ã amnhĭ xà htÿx kamã hamak anhÿr kêt tã arĭgroja ã koja mē amnhĭ xà htÿx kumrêx kamã ama. Hãmri nē axte pika ja kamã ã amnhĭ xà htÿx kumrêx kamã hamak anhÿr kêt nê. ²² Kop apu Tĭrtũm kot mē kot amnhĭ xà htÿx kamã hamak xà hã arĭgro hkwy ho gri hkêt ronhÿx ka mē apiitã apikaprãr pa. Ja pymaj koja mē amã ho gri. Kot ra amnhĭ kaxyw mē arēnh xwÿnhjê japê xàj mē amã ho gri.

²³ —Tã ã mēmoj kot amnhĭ nhĭpêx anhÿr jakamã koja mēmojaja tanhmã mē amã ixto hêx to nē mē amã: “Ota ra Kris akupÿn wrÿ. Kwa mē hwÿr mra nē omu.” Anê. Rÿ mē amã: “Krisja krĭ mÿj kamã na raa. Kwa mē ma hwÿr mra nē omu.” Anhÿr o mē amã ixto hêx o pa. Rÿ mē awÿr mra nē mē amã amnhĭ to hêx nē mē amã: “E. Ot pa ixpê Kris ã mē awÿr wrÿ. Tĭrtũm na mē awÿr inhmē pa wrÿ.” Anê. Rÿ mē amã: “E ixpê Tĭrtũm nhÿ hã ixkapēr xwÿnh na pa mē awÿr mõn pøj.” Anhÿr o mē amã amnhĭ to hêx. Hãmri nē mē anokupyr kaxyw mē amã aa mē kot mēmoj pumunh kêt kwÿ ho anhÿr o pa. Tĭrtũm kot amnhĭ kôt mē arēnh xwÿnhjaja kãm mē ate ja hã mē omunh nē mē gryk ã ixkaga hprãm xàj koja mē ã mē anoo mã amnhĭ nhĭpêx anhÿr o pa. Nom ãm ã amnhĭ nhĭpêx anhÿr kaprÿ ka mē ixkaga hkêt nê.

²⁵ —E kwa mē inhmar tÿx nê. Na pa ra ixprĭ hã ã mē kot amnhĭ nhĭpêx anhÿrja kukamã ã mē amã mēmoj jarēnh anê. Tã kêr ka mē amnhĭ nê ã mē kot amnhĭ to hêx anhÿr o mē pa xwÿnhjê pumunh mex o apa nē axkãm ajamak rom. ²⁶ Rÿ koja mē tanhmã mē amã ixto hêx to nē mē amã: “Ota Tĭrtũm kot mē pahwÿr mēnh

xwÿnhhta kapôt ã mōn pōj. E mē tokyx ma hwÿr mra nē omu." Anhÿr o mē amã ijarē ka mē ama nē ãm mē ama nē hwÿr amrar kêt nē. Rÿ nhÿm mē amã: "Ota hitom kãm xa. E mē mamrÿ hwÿr agjê nē omu." Anē no ka mē ãm mē ama nē ãm mē ama nē hwÿr agjêx kêt nē.

²⁷ Kot paj nhÿrmã akupÿn mē awÿr ixwrÿk kaxyw hãmri nē ixpimxur kãm ixwrÿk kêt nē. Koja pika piitã hkôt mē pa xwÿnhjaja anhÿpê ixwrÿk kãm ixpumu. Te mē piitã anhÿpê mē kot na haxênh pumunh pyrãk o kot kaj mē anhÿpê apiitã ixpumu. ²⁸ Te nhÿri mēmoj kro nē nōr nhÿm nhōnhti kot omunh nē hã htor nē hpinhpanh nhÿm mē piitã hã omunh pyrãk o kot paj amnhÿ nhÿpêx. Anē.

Jejus akupÿn wrÿk xwÿj ri mēmoj kukamã harênh

Makre 13.24-31; Rukre 21.25-33; määnen Wam Tesarōn 4.16-17

²⁹ Nhÿm Jejus arÿ mē ixte hkôt ixpa ho ixpa xwÿnhjê mã kapêr nē mē inhmã:

—Nē kot paj akupÿn mē awÿr inhnojarêt nhÿm rÿ Tÿrtÿm kaxkwa kamã tanhmã mēmoj nhÿpêx to. Kapêr ã kagã htÿm kot tanhmã ja kukamã harênh to nē harênh kot:

Koja Tÿrtÿm kaxkwa ho àk nhÿm kanhêti piitã rôrōk pa nhÿm myyti ahtyk nhÿm mytwrÿre urãk nē axte hpōk kêt nē. Anē.

³⁰ Koja ã mēmoj amnhÿ nhÿpêx anhÿr pa hãmri pa kaxkwa hã mē amã mēmoj nhō. Hãmri nhÿm pika piitã hkôt ri mē pa xwÿnhjaja piitã omu nē tee ri amnhÿ kukamã hamaxpêr o hkaprÿ nē mÿr rax kumrêx. No mē kajaja kot kaj mē omu hãmri nē akupÿn mē awÿr ixwrÿk nē mē ato amnhÿptar mã ajamxpêr kurê kumrêx. Kot paj kakrã kamã hirã htÿx kãm akupÿn ixihtÿx kãm mē awÿr wrÿ. ³¹ Hãmri nē Tÿrtÿm kapêr o mē wrÿk xwÿnh maati mã anē nhÿm pifti kakō hãmri nhÿm hk-wÿjaja kuma nē ma mē awÿr pika piitã hkôt anhrã nē ma mra nē inhmã mē ato akuprō. Ixte amnhÿ kaxyw mē axunhwÿr xwÿnhjê o akuprō nē man akupÿn ixwÿr mē ato hapêx. Anē.

Jejus kot mēmoj pãr o ejêp jarênh

Makre 13.28-31; Rukre 21.29-33

³² Nhÿm Jejus arÿ mē inhmã kapêr nē mē inhmã:

—E ka mē pÿ hpãr mÿj pumu. Na hte mēmoj mytwrÿ hã rã nhÿm mē omu nē ô hkukamã hamaxpêr kurê kumrêx. ³³ Ja pyrã nē koja ã ixte mēmoj jarênh anhÿr xwÿnhja amnhÿ nhÿpêx par mē ka mē omu nē akupÿn mē awÿr ixwrÿk mã ajamxpêr kurê kumrêx. Kot paj te ra mē anhōrkwÿ kapem ixãm pyrãk o amnhÿ nhÿpêx.

³⁴ Nom akupÿn ixwrÿk kêt ri koja ã mē kot mēmoj kot amnhÿ nhÿpêx anhÿr pumunh xwÿnhjaja kormã piitã htyk kêt ri pa akupÿn wrÿ.

³⁵ —Nē koja nhÿrmã pika nē kaxkwa wa hapêx pa. Tã no ãm ixkapêrja koja wa urãk nē aa hapêx kêt nē. Koja ãm rãhã ho rãhã. Kot paj aa ihkjê ho tanhmã mēnh to hkêt nē. Anē.

Mē pahte akupÿn Jejus wrÿk xã hã arÿgro pumunh kêt ã mē pajarênh

Makre 13.32-37; Rukre 12.37, 17.26-30, 17.34-36; määnen Wam Tesarōn 5.2

³⁶ Nhÿm Jejus arÿ mē inhmã kapêr nē mē inhmã:

—Nē ixte akupÿn mē awÿr ixwrÿk xã hã arÿgroja mē ate omunh kêt. Nē kaxkwa kamã Tÿrtÿm kapêr o mē wrÿk xwÿnhjaja haxwÿja kot ja pumunh kêt. Nē ijaxwÿja ixpê Tÿrtÿm Kra htã ixte ja hã amnhÿ pumunh kêt. ãm inhō Papaj pix na kot ja pumunh.

³⁷ —Nē kot paj nhÿrmã man akupÿn mē awÿr wrÿ. Akupÿn mē awÿr ixwrÿk xã hã arÿgrota ã koja mē htÿx ri amnhÿ tomnuj o pa. Te amnepê m Noehti kormã htÿr ri mē pa xwÿnhjaja kot htÿx ri amnhÿ tomnuj o pata pyrãk. ³⁸ Na pre htem amnhÿ kaxyw Tÿrtÿm mã hamaxpêr kêt nē. ãm jar mē kot amnhÿ nhÿpêx pix kukamã hamaxpêr kôt pix mã amnhÿ nhÿpêx o pa. Rôm nhÿm Noehti ja gō htãm pymaj pãr rax nhÿpêxta mã axã.

³⁹ Nhÿm mē ja hã omu nē ãm omu nē tanhmã ri amnhÿ kukamã hamaxpêr to hkêt nē. Hãmri nhÿm naja mē haêr pê wrÿ nē wrÿk rax o mē hanhir pa. Tã akupÿn ixwrÿk xã hã arÿgroja ã koja mē htÿx ri ã amnhÿ nhÿpêx anhÿr o paja o pa mē haêr pê naja pyrã nē akupÿn wrÿ.

⁴⁰ —E kot paj mē amã nhÿrmã akupÿn ixwrÿk nē tanhmã mē anhÿpêx to hã amnhÿ jarê. Te kot ja pyrãk. Koja mēmyjê hō wa hamêxkrut nē hpur kãm àpênh o xa. Nhÿm hōja ra ixkôt amnhÿ xãm nhÿm hōja ixkôt amnhÿ xãm kêt japêr. Hãmri pa amnhÿ wÿr ra kot ixkôt amnhÿ xãm xwÿnhhta o api nhÿm kot ixkôt amnhÿ xãm kêt xwÿnhhta hpur kãm ahte arÿ xa. Hãmri nē tee ri hkrãmnhwÿ japêr rÿt o xa. ⁴¹ Rÿ nhÿm mēnijê wa hamêxkrut nē harōj kahuk o xa. Nhÿm hōja ra ixkôt amnhÿ xãm nhÿm hōja ixkôt amnhÿ xãm kêt japêr. Hãmri pa amnhÿ wÿr kot ixkôt amnhÿ xãm xwÿnhhta ho api nhÿm kot ixkôt amnhÿ xãm kêt xwÿnhja tee ri hkrãmnhwÿ japêr rÿt o xa hãmri nē hamaxpêr rax kumrêx. Kot paj nhÿrmã akupÿn wrÿ nē ã mē anhÿpêx anē. ⁴² Tã mē ate akupÿn ixpōx xã hã arÿgro pumunh kêt jakamã kwa kêr ka mē ijamãr rãhã ho ri apa. ⁴³ Na htem htÿx ri nhÿri tanhmã amnhÿ nhÿpêx to ho pa nhÿm mē kêp àhkÿnh xwÿnh mē ôrkwÿ hwÿr agjê nē mē kêp ahkÿ. ⁴⁴ Tã mē ate akupÿn ixwrÿk xã hã arÿgro pumunh kêt jakamã kwa kêr ka mē ixwakre kamã te mē apê mē ôrkwÿ nhō dōn kot amnhÿ nhÿpêx pyrã nē atÿx ri tanhmã amnhÿ tomnuj to ho apa hkêt nē. Ixkutêp axkãm ajamak rom nē ri apa. Jao tãm ixkutêp amnhÿ nhÿpêx rãhã ho ri apa. Anē.

Mē kãm mē àpênh mex xwÿnhjê jarênh

Rukre 12.41-48

⁴⁵ Nhÿm Jejus arÿ mē inhmã kapêr nē mē inhmã:

—E koja mē kãm àpênh xwÿnhjê hō àpênh mex o pa hãmri nhÿm ô patrãw àpênh ã omu hãmri nē ma nhÿhÿm mōr kaxyw nē ÿhkram mēmoj piitã haxàr pa nē kãm: "E kêr ka ixwakre kamã inhmã inhōrkwÿ tãnopxar mex nē. Nē inhmã mē àpênh xwÿnhjê mã mē apkur xã nhōr o apa." Anhÿr o kãm mēmoj tã karō

hämri në kato në ma nhÿhÿm mõ. ⁴⁶ Hämri nhÿm kot kãm àpênh mex xwÿnhja wakre kamã kãm àpênh mex o pa. Jakamã nhÿm õ patrãw akupÿn hpõx o mõ nhÿm amnhÿ wÿr harênh ma në hkÿnh në. Në tee ri amnhÿ kukamã hamaxpêr o kãm uma hkêtnë. Kot wakre kamã kutêp kãm àpênh mex jakamã tee ri tanhmã amnhÿ kukamã hamaxpêr to hkêtnë. ⁴⁷ Jakamã nhÿm õ patrãwja akupÿn pøj në kot kãm àpênh mex ã omu në hkÿnh në. Hämri në kot kãm õ mëmoj piitã hamãr o pa kaxyw ïhkram haxàr pa. ⁴⁸ No koja axtem në wakre kamã kãm àpênh mex kêt japêr. Në hamaxpêr o: "Tk. Nà koja tokyx akupÿn mõr kêt në." Anhÿr o hkamnhÿx. ⁴⁹ Hämri në wakre kamã kãm më àpênh xwÿnhjê htak në pipãnh pix o pa. Në kãm kagõxyhti xành xwÿnhjê kôt pix mã pa. ⁵⁰ Hämri nhÿm õ patrãwja haêr pè akupÿn pøj në tee ri ja hã omu. ⁵¹ Hämri në kamã gryk tÿx në tanhmã homnuj htÿx to në kãm më àpênh punuj xwÿnhjê më mẽ ho hpimrààtã amnhÿ në mẽ kator pa. Hämri në mẽ kot kapêr kwÿm amnhÿ nhÿpêx xwÿnhjê mẽ mẽ ho hpimrààtã tanhmã mẽ homnuj to në amnhÿ në mẽ kator. Hämri nhÿm mẽ tee ri amnhÿ kukamã hamaxpêr në mur në tee ri amnhÿ nhÿpêx. Tã kêr ka mẽ ixwakre kamã ho mẽ uràk kêt në. Mẽ kurom ixwakre kamã ixkapêr kôt amnhÿ nhÿpêx mex rãhã ho ri apa. Anê.

Kormã mẽ mjên kêt xwÿnhjê ho 10 në mẽ harênh

Wam Tesarõn 5.1-3

25 Nhÿm Jejus arÿ mẽ inhmã kapêr në mẽ inhmã: —Në mẽ ate Tirtÿm kôt amnhÿ nhÿpêx o mẽ apa xwÿnhjaja kêr ka mẽ akupÿn amnhÿ wÿr ixkãm ajamak rom në ri apa. Nom mẽ kêp Tirtÿm prãm nõkati xwÿnhjaja koja mẽ akÿnhã ãm htÿx tanhmã amnhÿ to pix kukamã hamaxpêr o pa. Te kormã mẽ mjên kêt xwÿnhjaja kot amnhÿ nhÿpêxta pyrãk. E pa mẽ amã tanhmã mẽ harênh to ka mẽ inhma. Koja kormã mẽ mjên kêt xwÿnhjê kèp 10jaja ma hkrãmnhwÿ mjên mã xwÿnh kutã pry hã mra. Amnhÿ kôt kanê jamÿ në o mra në kutêp pry nhÿkrepp hkrÿ. ² Nhÿm mẽ kêp 5jaja hkwyjê rom amnhÿ kukamã hamaxpêr mex në kanê kaxyw amnhÿ kôt orti hkwy ho mõ. No nhÿm mẽ kêp 5 në mẽ hkÿnhã ãm htÿx kanê pix jamÿ në o mra. ⁵ Hämri në mẽ mjên mã xwÿnhja kutêp axpên mã kapêr o hkrÿ. Nhÿm tokyx htêm kêt nhÿm mẽ kutêp hkrÿ në gaa në ra õtxwa në gaa në hikwÿ në ra õt pa.

⁶ —Tã nhÿm kôt ã kamãt hämri nhÿm mjên mã xwÿnhja hpõx o tẽ. Hämri nhÿm kot hkukamã harênh xwÿnhja mẽ õt o mẽ hikwÿ xwÿnhjê mã amÿra në mẽ kãm: "Kwa mẽ hämri. Ota mjên mã xwÿnhja tẽ. Mẽ tokyx kãnhmã akrÿ pu mẽ kutã mra." Anê. ⁷ Hämri nhÿm mẽ hkrã hapøj në kanê hpõk. ⁸ Nom nhÿm mẽ hkwyjê hkÿnhã õ kanê kaxyw orti ho pa hkêtnë xwÿnhjaja ra mẽ kêp mẽ kanêja hkapy hpa nhÿm mẽ tee ri kot hpõk kaxyw. Hämri në orti hkwy hã hkwyjê hwÿ në mẽ kãm: "Xê mẽ inhmã orti ho inhõ kanê go." Anê. ⁹ Nom nhÿm mẽ kêp në mẽ mẽ kãm: "Ma mẽ inhõ kanê kamã orti grire kênã kot pa kêt mẽ amã ho go. Xê mẽ tokyx ma mra në nhÿri amnhÿm hkwy japrõ mẽ." Anê.

¹⁰ Hämri nhÿm mẽ tee ri mẽ kuma në ma amnhÿm hkwy japrõr mã ma mra.

—Rõm nhÿm mjên mã xwÿnhja mẽ hãnh tẽ nhÿm kanê kamã arÿ mẽ orti xwÿnhjaja omu në hã jêt kurê kumrêx. Hämri në ma hkôt mõn mẽ pikuprõnh xà hã ixkreja wÿr wa hã hkÿnh në apkur kaxyw gjêx pa nhÿm mẽ hã kahê. Mẽ gjêx xà hã oreja ra hwÿr hpõx jakamã nhÿm mẽ hã kahê.

¹¹ —Tã nhÿm ma mẽ kot orti japrõr mã mra xwÿnhjaja hämri amnhÿ to hapu në mra në tee ri mẽ hã hakwakre kupê në htatak në tee ri mẽ kãm akir në mẽ kãm: "Xê mẽ inhmã kahê xà mẽ pa mẽ awÿr agjê." Anê. ¹² Hämri nhÿm hprõ mã xwÿnhja mẽ kuma në mẽ kãm: "Tk. Nà ixte mẽ apumunhre hã kot pa kêt mẽ amã kahê xà mẽ. Kwa mẽ ma akupÿm mra." Anê. ã mẽ ujarênh kot anhÿr. Anê.

¹³ Nhÿm pre ã Jejus mẽ inhmã ujarênh anê. Hämri në mẽ inhmã:

—E kêr ka mẽ te kot amnhÿ kôt orti hkwy ho mõ xwÿnhjaja kot amnhÿ nhÿpêx pyrãk. Mẽ ate akupÿn ixwÿr xà hã arÿgro pumunh kêt jakamã kêr ka mẽ apkati mẽ ixkamã ajamak rãhã ho apa. Anê.

Mẽ kãm mẽ àpênh xwÿnhjê jarênh

Rukre 19.11-27

¹⁴ Nhÿm Jejus arÿ mẽ inhmã kapêr në mẽ inhmã:

—E kêr ka mẽ ixwakre kamã inhmã tanhmã amnhÿ nhÿpêx mex to ho ri apa pa hpãnhã mẽ amã amnhÿrer mex në. Mẽ ate tanhmã inhmã amnhÿ nhÿpêx to ho apa xà hkôt kot paj mẽ amã amnhÿre. Te mẽhõ my kot kãm mẽ àpênh xwÿnhjê nhÿpêx pyrãk. Koja nhÿhÿm nojarêt në kãm mẽ àpênh xwÿnhjê mã hikukrêx piitã hkaga hpa. Örkwÿ në hpur në hkrit. ãm mẽmoj piitã mẽ kot wakre kamã kãm hamãr o pa kaxyw mẽ kãm hkaga hpa. ¹⁵ Hämri në ahpÿnhã mẽ kãm kãxpore hkwy gõ. Mẽ kot kutêp kãm tanhmã ho rÿnh to kaxyw ahpÿnhã mẽ kãm õr pa. Kot kãxpore pumunh mex xwÿnhja mã nhÿm ho 5.000 në kugõ. Në kot hkôt kax pè omunh xwÿnhja mã nhÿm ho 2.000 në kugõ. Në kormã kot omunh tÿx kêt xwÿnhja mã nhÿm ãm ho 1.000 pix në kugõ. Hämri në mẽ kãm amnhÿ jarê në ma nhÿhÿm mõ. ¹⁶ Hämri nhÿm kot ho 5.000 në hamÿnh xwÿnhja kãxporeta py në ma o mõr kurê kumrêx në tanhmã ho àpênh to ho mõr kãm ra hipy axte ho 5.000 në kumê. ¹⁷ Nhÿm kot ho 2.000 në hamÿnh xwÿnhja mãnhên tanhmã ho àpênh to ho mõr kamã ra hipy axte ho 2.000 në kumê. ¹⁸ Nom nhÿm kot ho 1.000 pix në hpyr xwÿnhja wa hkÿnh ã axtem në ma o tẽ mẽ kãm kakwÿ mẽ kamã haxà në hity hpa mẽ ma akupÿm tẽ.

¹⁹ —Tã nhÿm mẽ õ patrãwja akupÿn mõn pøj në mẽ kãm: "E mẽ amnê ixwÿr mra në ixte mẽ amã kãxpore ho ixpigrãnh xwÿnhja jarê. Tanhmã na ka prem ixkutêp inhmã hipêx to?" Anê. ²⁰ Hämri nhÿm kot ho 5.000 në hpyr xwÿnhja kumrêx hwÿr tẽ mẽ kãm: "E ota akãxporeta. Ate inhmã ho 5.000 pix në õr tã pa amã ho rax mẽ amã hipy axte ho 5.000 në kumê nhÿm ho axkamur mẽ ra ho 10.000. Tã ota." Anhÿr o kãm kapêr

hämri në kãm kugõ ²¹ nhùm amnhĩm hamý në omu në hkĩnh në. Hämri në kãm: “Nà ãm hämri na ka inhmã ho anë. Ixte amã ho 5.000 pix në õr tã ka ra inhmã ho rax jakamã kot kaj apê inhmã mẽ àpênh xwýnhjê hkrãhtũm. E amnê ixwýr axà pu mẽ apku në pahkĩnh.” Anë.

²² —Hämri nhùm hpãnhã kot ho 2.000 në hpyr xwýnh-ta hwýr tẽ në õ patrãwta mã kãm: “E ota akàxporeta. Ate inhmã ho 2.000 pix në õr tã pa amã ho rax në amã hipy axte ho 2.000 në kumê. Tã ota.” Anë.

²³ Hämri nhùm kuma në amnhĩm hamý në omu në hkĩnh në. Hämri në kãm: “Nà ãm hämri na ka ã inhmã ho rax anë. Ixte amã ho 2.000 pix në õr tã ka inhmã ho rax jakamã kot kaj apê inhmã mẽ àpênh xwýnhjê hkrãhtũm. E amnê ajaxwýja ixwýr axà pu mẽ apku në pahkĩnh.” Anë.

²⁴ —Tã nhùm kot ho 1.000 pix në hpyr xwýnh-ta hapu hã wa hkõt tẽ. Hämri në õ patrãw mã tanhmã kapêr to në kãm: “Nà ra ixte apumunh tũm. Pêr axàhkurê pix kãm na ka hte apa. Nê amã akàxpore ho rax në anhõ ho rax pix kukamã ajamaxpêr o ri apa. Nom mẽ pajaja mẽ ixàpênh rax pix kukwak ri na ka hte akàxpore rax në apa. ²⁵ Jakamã na pa inhmã apyama nê. Nê akàxporeta py në ma o tẽ nê kaxyw kre nê kamã haxà. Tã ka akupýn mõn pøj pa ajarênh ma hämri në hkapa nê man akupýn amã o tẽ. Tã ota anhõ 1.000ta.” Anë.

²⁶ Hämri nhùm tee ri kuma në kãm: “Tk. Kwa amã ixpy-ma nê ate ixpumunh mex anhýr tã na ka ixte amã kàxpore nhõrta pyr në ma ho atêm. Nê mẽ kot mẽ kêp kàxpore jamýnh o kuhê xà kamã mẽ kãm õr nhùm mẽ ixkutêp tanhmã inhmã ho rax to hkêt nê? Pêr ãm amã kaga nê ate amnhĩ tomnu pix o ri apa xwýnh.” Anë.

²⁸ Hämri në kêp kàxporeta py në nhãm jam kugõ në kãm: “E amý nê o tẽ nê kot inhmã ho 10.000 në õr xwýnh-ta mã agõ. Hämri në jahti pynê nê ma o tẽ nê kamàt kô kamã amê. Apênh mexti hã. Koja tee amýra nê amnhĩ xà htýx kamã hamak xàj tee ri amnhĩ nham o xypên kamnhar týx kaprý nê rĩ amnhĩ pumu.” Anhýr o kãm kapêr nhùm kuma nê hpa hã kupy nê ma o tẽ. Hämri nhùm mẽ õ patrãwja mẽ àpênh xwýnhjê mã kãm: “E mẽ ate ixwakre kamã mẽ axàpênh mex xwýnh-jaja kot paj ã mẽ ato mex rax anë ka mẽ akĩnh nê. Nom mẽ kot inhmã mẽ àpênh mex kêt xwýnhjaja kot paj mẽ kêp mẽõ mẽmojta jamý nê nhãm mẽhõm kugõ nhùm hkaprĩ nê.” Anë. ã mẽ ujarênh kot anhýr. Anë.

Jejus kot nhýrmã mẽ piitã tanhmã mẽ harênh to hã harênh

Matêwre 13.35-43, 13.47-50; mããnên Apokarip 20.11-15

³¹ Nhùm Jejus arĩ mẽ inhmã kapêr nê mẽ inhmã: —Nê kot paj nhýrmã akupýn mẽ awýr wrý nhùm Tirtũm kapêr o mẽ wrýk xwýnh piitã man ixkõt wrý. Kot paj wrý nê ixpê pahi maati hã ixkrĩ xà maati kamã inhmex nê nhý. ³² Hämri në Tirtũm kapêr o mẽ wrýk xwýnhjê mã anë nhùm mẽ ma krĩ piitã hkõt mẽ apiitã mẽ ato pikuprõnh pa nê akupýn ixwýr mẽ ato hapêx. Pa mẽ apumu nê tanhmã mẽ axunhwýr to. Te ôwêhti jamãr o pa xwýnh kot ôwêhti kaêx ã motre pumunh nê

nhãm nê motre xunhwýr parta pyrãk. ³⁴ Hämri në ix-upõk rũm mẽ ate ixkõt amnhĩ xunhwýr xwýnhjê mã ixkapêr nê mẽ amã: “E mẽ kajaja kot kaj mẽ amex kumrêx nê ri apa ho apa. Amnepêm kormã mẽmoj pi-itã hkêt ri na pa pre Inhĩpêêxà mẽ wa mẽ akukamã tanhmã ijamaxpêr to nê mẽ amã mẽmoj mex xunhwýr rũnh nê. ³⁵ Tã ka prem ajapøj hämri në ixkõt amnhĩ xunhwý nê tanhmã ixto mex to ho ri apa.

Na pa pre inhmã prãm nê ixpa ka prem ixpumu nê ixkamã axukaprĩ nê inhmã mẽmoj gõ pa kuku.

Nê na pa pre inhmã kôr nê ixpa ka prem ja hã ix-pumu nê inhmã gõ pa ho ixkõ nê akupým ixihtýx.

Nê aa mẽ ate ixpumunh kêt tã ka prem nhýri ixpumu nê amnhĩ nhõrkwý hwýr ixwý.

³⁶ Nê na pa pre ixê pynajti nê ri ixpa ka prem ja hã ix-pumu nê inhmã axê gõ pa haxà nê ri hã ixpa.

Nê na pa pre ixà nê inhĩkwý ka prem ixwýr mra nê ixkane nê tanhmã ixto mex to pa akupým inhmex.

Nhùm prem ijaxà pa mẽ hagjênh xà kamã ixkrĩ ka prem ixwýr mra nê tanhmã ixto mex to.

ã mẽ ate ixto mex anhýr o ri apa jakamã nhùm inhõ Papajja ixtã mẽ apumu. Tã koja ixtã mẽ ato mex rax nê.” Anë.

³⁷ —Kot paj ã mẽ ate tãm amnhĩ nhĩpêx xwýnhjê mã ixkapêr anë. Hämri ka mẽ tee ri inhma nê amnhĩ tã ixkukja nê inhmã: “Kwa xà mẽ pajaja na pa prem ã ato mex anê? Nà mẽ ixte ã anhĩpêx anhýr kãm amnhĩ pumunh kêt tã na ka ã mẽ ijarênh anë. Kwa nhýri na ka pre amã prãm nê apa pa prem apumu nê amã mẽ-moj gõ ka aku? Nê nhýri na ka pre amã kôr nê apa pa prem amã gõ hkwy ka ho ixkõ? ³⁸ Nê nhýri na pa prem apumu nê amnhĩ nhõrkwý hwýr awý? Rý ka pre axê pynajti nê apa pa prem amã inhĩnõhkà gõ ka hagjê?

³⁹ Nê nhýri na ka pre axà nê anhĩkwý pa prem apumu nê akane? Nê nhýri na prem ajaxà pa mẽ hagjênh xàja wýr mra nê kamã tanhmã ato mex to? Nà mẽ pa hkêt.” Anhýr o amnhĩ tã ixkukja. ⁴⁰ Hämri pa mẽ amã: “Nà mẽ kêp amrakati xwýnhjaja na pre htem pa pyrãk. Tã ka prem mẽ kamã axukaprĩ hã tanhmã mẽ kutã anojarêt to ho ri apa jao te pa tanhmã ixto mex to ho apa pyrãk. ãm hämri na ka prem ã mẽ ho mex anhýr o ri apa.” Anë. Kot paj ã mẽ ate amnhĩ to mex xwýnhjê mã ixkapêr anë.

⁴¹ —Hämri në hpãnhã apke rũm mẽ kot ixkõt amnhĩ xunhwýr kêt xwýnhjê mã tanhmã ixkapêr to nê mẽ kãm: “No mẽ kajaja kot paj ixupõk rũm mẽ unhwýr xwýnh-tajê hkĩnhã mẽ ato mex kêt nê. Amnepêm na pre Tirtũmja Satanasti mẽ mẽ kot tanhmã kãm amnhĩ nhĩpêx to ho mẽ pa xwýnhjê mẽ mẽ ho hpimràatã mẽ kaxyw kuwy rax kumrêxja nhĩpêx. Mẽ kot amnhĩ tom-nuj týx mýrapê nhýrmã kamã amnhĩ xà htýx kamã hamak rãhã nê pa ho pa kaxyw. Tã kot kaj mẽ ajaxwýja ma mẽ hkõt hwýr ajapêx. Mẽ apê Satanasti hkõt mẽ ate amnhĩ nhĩpêx o apa xwýnh jakamã kot kaj mẽ uràn ma hwýr ajapêx pa. ⁴² Aa mẽ ate tanhmã ixto mex to hkêt. Na ka pre htem inhmã prãm nê ixpa hã ixpumu nom inhmã mẽmoj nhõr kêt nê. Nê inhmã kôr nê ixpa hã ixpumu nom inhmã gõ hkwy hkêt nê. ⁴³ Nê nhýri

ahte ixpa hã ixpumu nom amnhĩ nhõrkwỹ hwÿr ixwÿr kêt nê. Nê ixê pynajre nê ixpa hã ixpumu nom inhmã axê nhõr kêt nê. Nê ixà nê inhĩkwỹ hã ixpumu nom ixkane hkêt nê. Nê mē kot ijaxàr nhũm arĩ ixkrĩ hã ixpumu nom ixwÿr amrar nê tanhmã ixto mex to hkêt nê. Ā mē ate inhĩpêx anhÿr o apa jakamã e mē ma kuwy hwÿr apa kurê kumrêx." Anê. Kot paj Ā mē kãm ixkapêr anê. ⁴⁴ Hãmri nhũm mē tee ri inhma nê amnhĩ tã ixkukja nê inhmã: "Kwa nà Ā mē ijarênh anhÿr kêt nê. Aa mē ixte Ā anhĩpêx anhÿre hã. Nhÿri na pa prem tanhmã akute hã apumu? Nà aa mē ixte nhÿri Ā ate amnhĩ nhĩpêx anhÿr Ā apumunhre hã." Anê.

⁴⁵ —Koja mē Ā inhmã amnhĩ tã aprār anhÿr kaprÿ. Kot paj mē kãm: "Nà na ka pre htem mē kêp amrakati xwÿnhjê pumu nê ãm mē omunh o ri apa nê mē kamã axukaprĩ hkêt nê. Ā mē hipêx anhÿr jao te pa Ā inhĩpêx anhÿr pyrãk. Jakamã kwa mē tokyx ma kuwy hwÿr ajapêx kurê kumrêx." Anê. Kot paj Ā kuwy hwÿr mē hanor anê. ⁴⁶ Hãmri nê hwÿr mē rênh pa nhũm mē ma hwÿr hapêx nê kamã amnhĩ xà htÿx kãm hamak rãhã nê pa ho pa nê aa kator kêt kumrêx. No kêt mē ate tãm amnhĩ nhĩpêx o mē apa xwÿnhjaja kot kaj mē kurom ma Tirtũm mē wa inhõ krĩ hwÿr api nê kamã amex nê atĩr tũm nê apa ho pa. Kot paj Ā ahpÿnhã mē apiitã mē anhĩpêx anê. Anê.

Nhũm pre Ā Jejus akupÿn wrÿk Ā amnhĩ kukamã mē inhmã ujarênh anê. Hãmri nê mē inhmã ujarênh pa.

Mē kot Jejus Ā àmnênh Ā amnhĩ jarênh

Makre 14.1-2; Rukre 22.1-2; Juãw 11.45-53

26 Tã nhũm Jejus mē ixte hkôt ixpa ho ixpa xwÿnhjê mē ujarênh pa nê mē inhmã:

² —E kot puj mē axte pahtã apkati axkrut hãmri nhũm arĩgro pê Pas kato. Jakamã koja mē piitã amnepêm Tirtũm kot Ejit nhõ xwÿnhjê pê mē pakukamã mē panhĩgêjtjê kator mē hamaxpêr nê hã hkĩnh kaxyw Jerujarê hwÿr akuprõ. Kamã koja mē ixpynê nê pĩ kahpa hã inhõ nê ixpĩ. Koja mē tokyx Ā inhĩpêx anê. Anê.

Nhũm pre Ā amnhĩ kukamã mē inhmã amnhĩ jarênh anê. ³ Rõm nhũm Jerujarê kamã patre krãhtũmjê mē Ijaew pigêjtjaja patre maati Kajpasja nhõrkwỹ kamã axpên wÿr akuprõ. ⁴ Ra mē kãm Jejus pĩr prãm tã mē kãm mē kot hkôt kapêr mar o pa xwÿnhjê pyma nê. Hãmri nê tee ri hamaxpêr nê axpên mã:

—Hêxta waa nê. Tanhmã kot puj wem ho nê kupĩ? Kot puj mē pahkĩnh kãm tanhmã ho nhũm mē hkĩnh xwÿnhjaja hã mē pakamã gryk tÿx nê. Pu mē hã axpu nê hã tanhmã axpên to. Jakamã kwa pu mē kormã tanhmã ho hkêt nê.

Anhÿr o axpên ma.

Mêhõ ni kot Jejus krã gregrer Ā harênh

Makre 14.3-9; Rukre 7.36-50; Juãw 12.1-8

⁶ Tã nhũm Jejus kormã krĩ pê Petãn kamã Simãw nhõrkwỹ kamã apkur o nhÿ. Simãwja na pre hkà kro xàpêr tÿx o pa nhũm Jejus ra arĩgro hõ hã akupÿm hkã ho mex. Hãmri nê akupÿm õ krĩ hwÿr pøj nê õrkwỹ

hwÿr tē nē kuri apkur o nhÿ. ⁷ Hãmri nhũm mêhõ nija hpõx Ā omu nê hamaxpêr o:

—Ma koja pêr Jejusja pa hã apkati grêre hãmri nê ty. An pa ma hwÿr tē nê mêhkuxwa xà ho hkuxwa.

Anê hãmri nê kên jaka ho kàx kãm mêhkuxwa xàja nhũm kumÿ nê ma hwÿr o tē. Hãmri nê ho hkrã gregrer nê hã hkapĩr pa nê ho hkuxwa hpa. Mêhkuxwa xà hã kàxpore xohtõ rax tã nhũm Ā hã hkapĩr par anê.

⁸ Hãmri pa mē ixte Jejus kôt ixpa ho ixpa xwÿnhjaja tee ri Ā kot hipêx anhÿr Ā omu nê axpên mã:

—Tk. Kwa na hã mêhkuxwa xàta kapĩr pa. ⁹ Kop apu ma kot o htēm nê ho wēnē nê hpãnhã kàxpore ho rax kumrêx nê hamÿnh nê ho mē kêp amrakati xwÿnhjê nhĩpêx par o nhÿx ja kãm mex nê. Kwa mo na we Ā amnhĩ nhĩpêx anhÿr kêt nê? Anê.

¹⁰ Hãmri nhũm Jejus amnhĩ tã mē inhma nê mē inhmã:

—Kwa kot ixto mex kaxyw kênã na ka mē axtem nê ixtã kãm akir. ¹¹ Mē kêp amrakati xwÿnhjaja koja mē arĩ mē akôt pa rãhã nê. Ka mē amã mēmo arĩgro hã tanhmã mē ho ajuta hto hprãm nê tanhmã mē ho ajuta hto nê mē kãm mēmoj gõ. No pa kot paj ri mē akôt ixpa ka mē ixto mex ry ho apa hkêt nê. Kot paj tokyx mē apiitã mē are. ¹² Ixtyk nhũm mē kot ijaxàr kukamã na Ā ixkuxwa anê. Ām hãmri na Ā inhĩpêx anê. ¹³ Ām hãmri na pa mē amã kot Ā inhĩpêx anhÿrja jarê. Koja mē krĩ piitã hkôt axpên mã ijarênh Ā kagã kamã ijarênh o pa nê kamã nija kot Ā inhĩpêx anhÿr kamã harê nê kuma. Anê.

Jut Kariot kot mē kãm Jejus Ā àmnênh

Makre 14.10-11; Rukre 22.3-6

¹⁴ Tã nhũm Jut Kariotja. Kêp mē ixpê Jejus kôt ixpa ho ixpa xwÿnh pê 12 hõ htã ra tanhmã hamaxpêr to nê axtem nê Satanasti nhÿ hã ma patre krãhtũmjê hwÿr tē nê tanhmã Jejus o mē mar to nê mē kãm:

¹⁵ —E ot pa mē amã Jejus jarênh o tē. Xà kot paj mē amã hã amÿnê ka mē hpãnhã inhmã amnhire nà? Anê.

Hãmri nhũm mē kuma nê hkĩnh nê. Hãmri nê kãm:

—Nà kot paj mē amã amnhire.

Anê hãmri nê kãm kàxpore ho 30 nê õr kurê kumrêx nhũm hamÿ nê hkĩnh nê kato nê ma tē. ¹⁶ Hãmri nê mē kãm Jejus pynênh kaxyw tãnopxar o ri hkôt ri pa. Mē kot mar o ri pa xwÿnhjê hkàx Ā unênh nê ma mē hwÿr o htēm kaxyw.

Jejus kot hkôt mē pa xwÿnhjê kutã apkur

Makre 14.12-21; Rukre 22.7-13; Juãw 13.21-30

¹⁷ Tã nhũm mē hkĩnh pê Pasja kato. Amnepêm kormã Ejit kãm mē pa ri na pre mē inhĩgêjtjaja õwêhti hkrare hkwy hpa nê ho anê nê kuku. Tirtũm kot ja hã mē omunh nê Ejit nhõ xwÿnhjê nê mē kator kaxyw nhũm prem Ā amnhĩ nhĩpêx anê. Tã mē ixpê mē hkanrêhã mē htãmnhwÿjaja na pa htem arĩ amgrã mē arĩgro pê Pasja Ā axpên wÿr akuprõ nê jam ijamaxpêr pê mē urãk nê õwêhti hkrare hkwy pa nê pãwti kaxkrit kêt kãm kuku. Jakamã pa mē ixte Jejus kôt ixpa ho ixpa

xwÿnhja wa axkrut nê Jejus wÿr tē nê amnhî tã hkukja nê kãm:

—Kwa nhÿri kot paj we wa tē nê mē akutêp Pas ã mē panhō hã apê? Anê.

¹⁸ Hãmri nhũm wa kãm:

—Nà wa mãmri ma Jerujarēja wÿr wa tē. Nê krím axà nê mēhō myti pumunh kurê kumrêx nê kãm: “E Jejus na wa inhmē pa wa awÿr tē. Na awÿr hpēr mēnh o: ‘E na pa ra inhnojarêt. Jakamã nhÿri kot paj we ixkôt ri mē pa ho mē pa xwÿnhjê mē Pas ã axpên kutã apku? Anhÿr o awÿr hpēr mē.” Anê. E wa ã kãm akapēr anê kê war ama nê war amã ôrkwÿ nhĩmök ã ixkre rax ô jahkre. Kamã ra kaxyw mē paxàpkur xà hã mēmoj pi-itãã. Ka wa omu hãmri nê mãmri mē ixkutêp kamã mēmoj tã apê. Anê.

¹⁹ Hãmri nhũm wa kuma nê ma Jerujarē hwÿr tē. Nê hwÿr axà hãmri nê ra kot wa kãm mēmoj jarēnh xà hkôt mēmoj piitã omu hãmri nê mē ixkutêp mēō hã àpēnh o wa xa.

²⁰ Tã nhũm kamãt pa mē Jejusja kôt ixkreta wÿr ixpôx pa nê hwÿr agjê nê ixàpkur kaxyw ixkrî. Mē ixte Jejus kôt ixpa ho ixpa xwÿnhjê pē 12jaja pa mē ixpiitã Jejus kutã ixàpkur o ixkrî. ²¹ Hãmri nhũm Jejus tanhmã mē inhîō jarēnh to nê mē inhmã:

—E pa mē amã mēmoj jarē ka mē inhma. Kot kaj mē atō mē kãm ixkurê xwÿnhjê nhĩhkram ijaxà. Anê.

²² Hãmri pa mē tee ri kuma nê ixkaprî htÿx nê. Hãmri nê axpên pãnhã amnhî tã hkukja nê kãm:

—Kwa xà pa? Nà pa hkêt. Kot paj ã anhîpêx anhÿr kêt kumrêx Pahihti.

Anhÿr o axpên pãnhã kãm amnhî tã aprã. ²³ Hãmri nhũm mē inhmã:

—Nà ãm hãmri na pa mē amã ixkapēr. Mē ate ixkutã guhkrax kãm anhō pãwti ho mry kagô nhek o akrî xwÿnhjê hō kot kaj mē kãm ixtã amÿnê. ²⁴ Tirtũm kapēr ã kagã htũm ra kot ixkukamã harēnh xà hkôt koja mē tanhmã ixto rax nê ixpî. Nom kot mē kãm ixtã àmnēnh mã xwÿnhhta hēxta waa nê. ã kot amnhî nhîpêx anhÿrja mÿrapê koja amnhî xà htÿx kãm hamak rax kumrêx. Kop apu aa ô mãmãj nhōxà hkre rũm kator kêt ronhÿx ja kãm mex nê. Anê.

²⁵ Hãmri nhũm Jut Kariot kot mē kãm hã àmnēnh mã xwÿnhhta hãmri amnhî tã kuma nê kãm:

—Kwa xà we pa Jejus? Xà pa kot paj ã anhîpêx anê? Kwa nà pa hkêt. Anê.

Hãmri nhũm kãm:

—Tÿ. Ka ã ate inhîpêx anhÿr mã kēnã. Anê.

Jejus kot amnhî kamrô pikapîr kukamã harēnh

Makre 14.22-26; Rukre 22.14-23; määñen Wam Korît 11.23-26

²⁶ Tã nhũm Jejus pãwti hō py nê Tirtũm mã harē nê mē inhmã ho hkry nê ho mē inhîpêx pa nê mē inhmã:

—E na pa ã mē amã pãwti ho hkry nê mē amã ôr anê. Ja pyrã nê koja mē ã inhîpêx anê nê te ixto hkry hpar pyrãk o inhîpêx pa amnhî xà htÿx kamã ijamak kãm ty. Nom mē anê kot paj ty. E mē mãmri aku.

Anhÿr o mē inhmã amnhî jarē pa mē kuma nê kot mē inhmã ho hkry xwÿnhja ku. ²⁷ Hãmri nhũm hpãnhã

kop py nê mã ho anê nê Tirtũm mã harē nê mē inhmã kugō nê mē inhmã:

—Mē kot ixpîr xà hã arîgroja ã koja ixkamrô axkapî. Nom koja mē amarî ixpîr nhũm amarî ixkamrô hpikapîr kêt nê. ãm paa. Pa kot paj mē anê mē îhkram amnhî jaxà nhũm mē ã inhîpêx anê nê ixpî. Koja ixkamrô axkapî nhũm Tirtũm omu nê ixkukwak ri mē ate ixkôt amnhî xunhwÿr xwÿnhjê nê mē ate amnhî tomnuj piitã te amnhî katut kôt rēnh par pyrãk o hipêx nê mē ato hkra. Ra amnepēm kot ã amnhî jarēnh anhÿr xà hkôt. Jakamã e mē ixkamrô pikapîr mã ajamaxpēr pē wĩhti ho akôm o axpên nhîpêx. ²⁹ ãm hãmri na pa ã mē amã amnhî jarēnh anê. Kot paj axte wĩhti ho ixkôm kêt rãhã nhũm nhÿrmã inhō Papaj akupÿn mē awÿr inhmē. Hãmri pu mē akupÿn ixwÿr xà hã arîgrota ã pahkînh rax kumrêx. No ãm axtem tanhmã hã pahkînh to. Anê.

Nhũm pre ã Jejus mē inhmã amnhî jarēnh anê. Pa mē axpên pãnhã kopta py nê wíta kwÿ ho ixkō. ³⁰ Hãmri nê mē ixpiitã ho ixkôm pa nê Tirtũm mã mex ã gre. Hãmri nê ijapōj nê hixêt prêk pē Oriwēhti hwÿr ma mra.

Jejus kot Simãw Pêtre mã kapēr ã harēnh

Makre 14.27-31; Rukre 22.31-34; Juãw 13.36-38

³¹ Tã nhũm Jejus tanhmã mē ixte hkôt ixpa ho ixpa xwÿnhjê jarēnh to nê mē inhmã:

—E Tirtũm kapēr ã kagã htũmta kot tanhmã mē akukamã mē ajarēnh to nê mē ajarēnh kot:

Kot paj ôwēhti jamãr o pa xwÿnhja pî hãmri nhũm ôwēhti hpigrãnh pa nê ma angrã nê ri mra.

Anhÿr o kot mē ajarēnh. Te ho mē apê ôwēhti pyrã nê ã mē ajarēnh anê. Tã kamãt ja kamã koja mē tanhmã inhîpêx to ka mē ixtã mē omu nê mē umaj ôwēhti pyrã nê apiitã ixkaga hpa nê ma aprôt nê mra. ³² Nê mē kot ixpîr tã kot paj akupÿm ixtîr. Hãmri nê ma akupÿm mē akukamã pika pē Garirej wÿr mō. Kamã kot puj mē axte axpên pumu. Anê.

³³ Hãmri nhũm Simãw Pêtre tee ri tanhmã mē kot amnhî nhîpêx to hkukamã amnhî jarēnhja ma nê hkaprî nê kãm:

—Tk. Nà kot paj ã amnhî nhîpêx anhÿr kêt nê Pahihti. Koja pahkwÿja akaga japêr no pa kot paj aa akaga hkêt nê. Kot paj akôt ixpa rãhã nê. Anê.

³⁴ Hãmri nhũm Jejus kãm:

—Nà ra ixte akukamã ixàhpumunh mex. Koja apkati hkôt krãhyre hkàr kêt ri ka ra mē umaj ate ixkôt apa hkêt ã mē kãm amnhî tã axàprãr o axkrunēpxi kãm ga. Kwa jam ajamaxpēr tÿx nê. Anê.

³⁵ Hãmri nhũm tee ri kuma nê axte kãm:

—Kwa nà. Mē kot ajaxàr nê apîr tã kot paj arî akôt ri ixpa nhũm mē pahto amÿrà nê tanhmã panhîpêx to. Nà kot paj aa akaga hkêt nê.

Anhÿr o kãm amnhî jarē. Pa mē ijaxwÿja ã kãm amnhî jarēnh anê.

Jejus kot Tirtûm mã amnhĩ jarênh

Makre 14.32-42; Rukre 22.39-46

³⁶ Tã nhũm Jejus mẽ inhmã anê pa mẽ ma nhỹri mẽ kot kãm "Gesêm" anhỹr xwỹnhja wỹr mra. Hãmri nhũm mẽ inhmã:

—E mẽ jar ixkutêp akrĩ. Pa ma mĩtũm tẽ nẽ Tirtũm mã amnhĩ jarẽ mãn. Anẽ.

³⁷ Hãmri nẽ mẽ ixkwỹjê ho axkrunêpxi nẽ amnhĩ kôt mẽ kuwỹ. Simãw Pêtre nẽ Jepetew kra pijakrut pê Xi-akre nẽ Juãwja wa nhũm amnhĩ kôt mẽ kuwỹ nhũm mẽ ma hkôt mra. Hãmri nhũm Jejus tee ri mẽ kot tanhmã hipêx tota kukamã hamaxpêr o hkaprĩ nẽ amnhĩ kamã kahak tỹx nẽ. ³⁸ Hãmri nẽ mẽ kãm:

—Hêxta waa nẽ. Na pa tee ri amnhĩ xà htỹx kamã ijamakja kukamã ijamaxpêr nẽ amnhĩ kamã ixkahak tỹx o ra ixkaprĩ nẽ. Te ixkaprĩ kot ixpĩr o mõi pyrãk. Jakamã e mẽ jar anohtỹx nẽ ixto Tirtũm wỹr o akrĩ kê tanhmã ixto pa mẽ kot tanhmã ixtoja kutã ixihitỹx nẽ. Anẽ.

³⁹ Hãmri nẽ mẽ kurũm htêm grire nẽ Tirtũm mã amnhĩ jarênh kaxyw htũ mỳr pê tẽm nẽ pikap nõ nẽ kãm:

—Kwa Papaj. Hêxta waa nẽ. Inhmã amnhĩ xà htỹx kãm ijamak prãm kêt kumrêx. Na pa tee ri amnhĩ kukamã ijamaxpêr nẽ amnhĩ kamã ixkahak tỹx nẽ. Jakamã kot kaj amã inhnê ja ho ajapêx prãm nẽ mãmrĩ inhnê ho ajapêx nhũm mẽ kãm ixkurê xwỹnhjaja tanhmã ixto hkêt nẽ. Rỳ ko. Kot kaj amã mẽ kot tanhmã ixto hprãm kê mẽ mãmrĩ tanhmã inhĩpêx to. Nom pam inhmã hprãm xà hkôt kêt. Anẽ.

⁴⁰ Hãmri nẽ kãnhmã xa nẽ akupỹm Simãw Pêtreja mẽ hwỹr tẽ nẽ tee ri mẽ omũ nhũm mẽ ra ôt pa nẽ hikwỹ. Nhũm mẽ omũ nẽ Simãw Pêtre mã kãm:

—Kwa Simãw Pêtre. E mẽ hãmri akrã hapôj. Kwa wem anohtỹx grire ⁴¹ nẽ ixkutêp amnhĩ to Inhõ Papaj wỹr o akrĩ kê mẽ ixkôt tanhmã mẽ ato htã ka mẽ amã mẽ uma xãj ixkaga hkêt nẽ arĩ mẽ kutã amnhĩ to htỹx nẽ akuhê. Á mẽ amã mẽ ate amnhĩ nhĩpêx anhỹr prãm nom kormã mẽ amã maa.

⁴² Anhỹr o mẽ kãm kapêr hãmri nẽ akupỹm tẽ nẽ axte Tirtũm mã amnhĩ jarẽ nẽ kãm:

—Kwa Papaj. Nà inhmã amnhĩ xà htỹx kãm ijamak prãm kêt. Na pa amnhĩ kukamã ijamaxpêr nẽ amnhĩ kamã ixkahak tỹx kumrêx. Jakamã kot kaj amã inhnê ja ho ajapêx prãm nẽ mãmrĩ inhnê ho ajapêx kê mẽ kãm ixkurê xwỹnhjaja tanhmã ixto hkêt nẽ. Nom ko. Kot kaj amã mẽ kot tanhmã ixto hprãm kê mẽ mãmrĩ tanhmã inhĩpêx to. Nom pam inhmã ja prãm xà hkôt kêt. Anẽ.

⁴³ Hãmri nẽ kãnhmã xa nẽ Simãw Pêtreja mẽ hwỹr akupỹm tẽ. Nẽ mẽ omũ nhũm kê mẽ axte gõi nẽ hikwỹ. Ra mẽ õtxwa htỹx nẽ axte gõi nẽ hikwỹ. Nhũm Jejus tẽ nẽ tee ri mẽ omũnh o xa ⁴⁴ nom axte tanhmã mẽ kãm nẽ hkêt nẽ. ãm awjanã nẽ akupỹm tẽ nẽ kê wam kot Tirtũm mã amnhĩ jarênh xà hkôt axte kãm amnhĩ jarẽ. ⁴⁵ Hãmri nẽ akupỹm mẽ hwỹr tẽ nẽ mẽ kãm:

—Kwa xàn ka mẽ arĩ gõi nẽ anhĩkwỹ? E mẽ tokyx akrã hapôj. Na mẽ ra mẽ kot ixwỹr mrar nẽ ixpynênh mã. Koja mẽ tokyx ixkutã mẽ kot amnhĩ xunhwỹr

xwỹnhjaja mẽ kãm ixtã amỹnê. Ota ra kot ixtã mẽ kãm àmnênh xwỹnhta tẽ. E mẽ tokyx kãnhmã akrĩ pu mẽ kutã mra. Anẽ.

Mẽ kot Jejus pynênh ã harênh

Makre 14.43-50; Rukre 22.47-53; Juãw 18.2-11

⁴⁷ Nhũm Jejus mẽ kãm kapêr o ãm rãhã nhũm Jut Kariot pê mẽ inhĩõja hwỹr tẽ. Nẽ amnhĩ kôt mẽ ohtõ nẽ hwỹr mẽ o tẽ nhũm mẽ wapohti nẽ kô jamỹ nẽ hkôt o mra. Patre krãhtũm mẽ Ijaew krãhtũmjaja kot Jejus wỹr mẽ rênh xwỹnhjaja nhũm mẽ man hkôt Jejus wỹr mra. ⁴⁸ Na pre ra Jut Kariot amnhĩ kukamã mẽ kãm amnhĩ jarênh o:

—Kot paj ixkumrêx hwỹr tẽ ka mẽ ixkôt hapu hã mra. Kot paj hwỹr tẽ nẽ kãm ixkapêr nẽ kahti hkôt kumỹ. Ka mẽ hã ixpumu nẽ hwỹr mra nẽ unênh kurê kumrêx. Ixte kahti hkôt mỹnh xwỹnhta kot kaj mẽ unê. Anẽ.

⁴⁹ Hãmri nẽ Jejus wỹr tẽ nẽ kãm:

—Pa Jejus? Xàn ka kormã anhõt kêt nẽ xa?

Anẽ nẽ kahti hkôt kumỹ. ⁵⁰ Hãmri nhũm amnhĩ tã omũ nẽ kãm:

—Kwa Jut. Ate tanhmã ixto kaxyw mã xwỹnh jakamã e kam nẽ mãmrĩ tanhmã ixto. Anẽ.

Hãmri nhũm Jut kôt mẽ mrar xwỹnhjaja Jut kot kahti hkôt mỹnh ã omũ nẽ hwỹr mra nẽ unênh kurê kumrêx.

⁵¹ Hãmri nhũm mẽ inhĩõja tee ri ja hã mẽ omũ nẽ õ wapo kapa nẽ patre maati mã ãpênh xwỹnh kot mẽ hkôt htêm xwỹnhta mã ho apê. Nẽ kot ho hkrã nhĩpônũ mã tã kuhpaw nẽ upók rũm hamak nhĩkjê pix krãhta. ⁵² Hãmri nhũm Jejus omũ nẽ nẽ kãm kapêr nẽ kãm:

—Kwa akupỹm awapota hkãm haxà nẽ amarĩ xa. Na htem wapo ho mẽ oprê ho pa nhũm mẽ amnhĩ xwar wapo ho mẽ kupa. ⁵³ Xà kot paj amnhĩ to Tirtũm wỹ nhũm ãm inhma nẽ tanhmã jajê pê ixpytãr to hkêt nẽ? Nà kot paj amnhĩ to kuwỹ nhũm ixwỹr kapêr o mẽ wryk xwỹnhjê rênh kurê kumrêx nhũm mẽ ohtõ rax kumrêx nẽ wry nẽ mẽ kêp ixpytã. ⁵⁴ Nom kot paj ã amnhĩ to hwỹr anhỹr kêt nẽ. Tirtũm kapêr ã kagã htũm kot amnepêm ixkukamã ã mẽ kot inhĩpêx anhỹr ã mẽ harênh jakamã kwãr mẽ mãmrĩ Tirtũm kãm hprãm xà hkôt ã inhĩpêx anê. Anẽ.

⁵⁵ Hãmri nẽ hpãnhã mẽ kot unênh xwỹnhjê mã kapêr nẽ mẽ kãm:

—Kwa na pa pre apkati mẽ Tirtũm mã amnhĩ jarênh xà hã ixkre kamã mẽ kãm ixujarênh o ixpa. Ka prem tokyx ixpynênh kêt tã jarãhã te ixte amnhĩ tomũj xwỹnh pyrãk o inhĩpêx nẽ ixwỹr wapohti nẽ kô hã akapên nẽ ixwỹr tẽ. ⁵⁶ Tã nom ra Tirtũm kapêr ã kagã htũm kamã Tirtũm nhỹ hã mẽ kapêr xwỹnh kot mẽ akukamã mẽ ajarênh nẽ mẽ atã kagã xà hkôt na ka mẽ ri ã inhĩpêx anê. Anẽ.

Nhũm pre ã Jejusja amnhĩ tã mẽ kãm kapêr anê. Hãmri pa mẽ ixte hkôt ixpa ho ixpa xwỹnhjaja mẽ omũ nẽ tee ri amnhĩ kukamã ijamaxpêr nẽ mẽ umaj ixprõt nẽ angrã nẽ ma inhmrar kurê kumrêx.

Mê kot patre maati hwÿr Jejus o mör ã harênh

Makre 14.53-65; Rukre 22.54-55, 22.63-71; Juãw 18.12-14, 18.19-24

⁵⁷ Nhũm pre Ijaew krãhtũmjê mê Tirtũm kapêr tũm o mê ahkre xwÿnhjaja ra patre maati Kajpas nhõrkwy hwÿr akuprõ nê Jejus kutêp hkrĩ. Hãmri nhũm mê kot unênh xwÿnhjaja ma mê hwÿr o tẽ. ⁵⁸ Hãmri nê mê hwÿr ho axà nê hkõt gjêx pa. Nhũm Simãw Pêtre mê hkõt hapu hã mê htãnopxar o tẽ nê kítare hwÿr axà nê pôristi nhĩkhõ hã nhÿ. Hãmri nê tee ri Jejus kukamã hamaxpêr o nhÿ nê hamaxpêr o:

—Kwa tanhmã koja mê ixpê mê inhõ Pahihti nhĩpêx to? E pa jar amÿm tanhmã mê kot hipêx to hã mê omunh o nhÿ. Anê.

⁵⁹ Hãmri nhũm patre krãhtũmjê mê juistijaja kãm Jejus pĩr prãm tÿx nê. Jakamã na prem Ijaew wa ho hamêxkrut nê axpên kõt tanhmã mê kãm ho hêx to nhũm mê kot hã wa mar nê ra hpĩr kaxyw mê pikuprõnh xwÿnhjê kapi. ⁶⁰ Jakamã nhũm prem axpên pãnhã mê hwÿr mra nê tanhmã ho hêx to. Nom axpên kõt harênh kêt nê. ãm ahpÿnhã tanhmã ri harênh to nom wahõ wa axkrut nê axpên kõt harênh kêt nê. Jakamã nhũm mê tee ri hã mê kuma.

Tã nhũm ja wa mê hwÿr tẽ nê axpên kõt harê nê mê kãm:

⁶¹ —Nà na pre tanhmã Tirtũm mã amnhĩ jarênh xà hã ixkre jarênh to nê harênh o: “Kot paj nhÿrmã inhmã ixkreja grãnh par prãm nê kugrà hãmri nê ãm ixtã apkati axkrunêpxi pix nê akupÿm hipêx pa. Ja kaxyw ixãhpumunh tÿx.” Anhÿr o na amnhĩ jarê pa wa kuma.

⁶² Anhÿr o mê kãm ho hêx. Hãmri nhũm patre maati ja wa kuma nê kãnhmã xa nê Jejus mã kapêr nê kãm:

—Kwa xà ãm hãmri na wa ã ajarênh anê nà? Xàn ka pre ã amnhĩ jarênh anê? E mê inhmã tanhmã amnhĩ jarênh to. Anê.

⁶³ Nom nhũm amarĩ mê kãm xa nê mê kãm tanhmã nê hkõt nê. Hãmri nhũm patre maatija tee ri omu nê axte kãm kapêr nê kãm:

—Kwa aprĩ hã mê inhmã tanhmã amnhĩ jarênh to. Tirtũm noo mã amã ixkapêr jakamã kêr ka akatãt kõt mê inhmã amnhĩ jarê nê amnhĩ to axêx kêt nê. Xà apê Tirtũm Kra? Xà ka na pre Tirtũm mê ixkaxyw axãm? Kwa akatãt kõt mê inhmã amnhĩ jarê. Anê.

⁶⁴ Hãmri nhũm mã hpĩr hã mê kãm amnhĩ jarê nê mê kãm:

—Tÿ. Nà ãm hãmri na ka ã ijarênh anê. Ixpê Tirtũm kot mê akaxyw ixãm xwÿnhnta na pa. Na pre mê awÿr inhmê pa mê awÿr wrÿ. Tã kot paj nhÿrmã axte kaxkwa rũm amnê akupÿn kakrã kamã mê awÿr wrÿ. Hãmri nê Tirtũm xãhpumunh o ãhpumunh xwÿnhnta nhĩkhõ hã nhÿ hãmri nê pam tanhmã mê ajarênh to ka mê amnhĩ mã ixpumu nê inhma. Anê.

⁶⁵ Hãmri nhũm patre maatija tee ri ã kot amnhĩ jarênh anhÿr ã kuma nê kamã gryk tÿx nê. Hãmri nê gryk xãj kêp patre maati hã ê kapa nê hkaxõnh pa nê kumê nê hkwyjê mã kãm:

—Tk. Kwa mo kaxyw kot puj mê axte ri tanhmã kot amnhĩ tomnuj to hã harênh xwÿnh õ japêr? Tãm kot

amnhĩ pê Tirtũm Kra hã amnhĩ jarênh ã amnhĩ to hêx nhũm mê pahte mar kênã. ⁶⁶ Jakamã e kwa tanhmã kot puj mê hipêx to? Anê.

Hãmri nhũm mê kãm:

—Nà ã kot amnhĩ jarênh anhÿr mÿrapê koja ty. Ra htyk mã tãm kênã. Anê.

⁶⁷ Hãmri nê tanhmã hipêx kati hto. Mê hkwyjaja hkuk kuhtõ nê ãhkra ho htak nhũm mê hkwyjaja ãhkra hpo ho htak nê hã hpêr o axkê nê kãm:

⁶⁸ —E apê Tirtũm Kra hã ate amnhĩ jarênh jakamã mãn urak nê axãhpumunh tÿx. Jakamã e mê kot atak xwÿnhnta nhĩxi jarê pa mê ama. Anê.

Simãw Pêtre kot Jejus kõt pa hkõt ã amnhĩ jarênh

Makre 14.66-72; Rukre 22.56-62; Juãw 18.15-18, 18.25-27

⁶⁹ Rõm nhũm Simãw Pêtre arĩ kítare kamã nhÿ. Hãmri nhũm mê kãm ãpênh xwÿnh nitita omu nê hpĩr hã omunh kurê kumrêx. Hãmri nê kãm:

—Xê pêr apê Jejus kõt mê pa xwÿnhjê hõ na ka. Anê.

⁷⁰ Hãmri nhũm tee ri amnhĩ mã kuma nê kãm mê uma xãj mê kãm amnhĩ mã aprã nê kãm:

—Tk. Kokÿ. Ixte mēhõ my ata pumunhre hã. Anê.

⁷¹ Hãmri nê mê umaj kãnhmã xa nê tẽ nê kítare hwÿr hakwakrem ahte mê hkàx ã xa. Tã nhũm hpãnhã hõja omu nê hã mê kãm:

—Xê ma pêr ãm hãmri na mê harê. Kêp Jejus kõt ri mê pa xwÿnhjê hõ na pêr. Anê.

⁷² Hãmri nhũm amnhĩ mã kuma nê kãm:

—Tk. Nà mê ri ã amnhĩ krã hkõt ri ixto axêx anhÿr kêt nê. Ixte aa mēhõta pumunh kêt kumrêx. Anê.

⁷³ Tã nhũm mê hkwyjaja hwÿr mra nê kãm kapêr nhũm tanhmã mê kãm kapêr to nhũm mê kuma nê kãm:

—Kwa pêr ãm hãmri na mê ajarê. Apê Jejus kwÿ na ka. War akapêr kot axpên pyrak kênã. Anê.

⁷⁴ Hãmri nhũm tee ri mê kuma mê kãm amnhĩ mã ãprãr kãm hihtÿx nê mê kãm:

—Kwa nà. Na pa Tirtũm noo mã mê amã amnhĩ jarê. Kot paj amnhĩ to ixêx japêr nhũm inhma nê hã tanhmã ixto. Nà urak ixpê Garirej nhõ xwÿnhre hã. Ixte mēhõ mÿj pumunh kêt kumrêx mã ka mê xatã axpên kõt ixte hkõt ixpa ho ixpa xwÿnh ã ixkamnhix o xa.

Anhÿrja o ra mê kãm amnhĩ mã aprãr o axkrunêpxi nhũm krãhyre hkàr kurê kumrêx. ⁷⁵ Hãmri nhũm Simãw Pêtre kuma nê ra Jejus kot hkukamã krãhyre hkàr kêt ri kot hã amnhĩ aprãr o axkrunêpxi hã harênhnta mã hamaxpêr kurê kumrêx. Hãmri nê kãnhmã hakry hpar o tẽ nê hkaprĩ htÿx kumrêx nê kítare pê ka to nê tẽ nê awry hã xa nê mÿr rax nê.

Mê kot pahihti Pirat wÿr Jejus o htẽm ã mê harênh

Makre 15.1; Rukre 23.1-2; Juãw 18.28-32

27 Tã nhũm ra myt kator o mör mê nhũm mê hkrãhtũmjê mê patre krãhtũmjaja axpên wÿr pikuprõnh pa. Hãmri nê Jejus ã axpên mar o hkrĩ nê axpên mã:

—Nà kot puj mê hã amÿnê kê mê kupĩ. Kêp Tirtũm Kra hã kot amnhĩ jarênh o amnhĩ to hêx kênã. Anê.

² Hāmri nê mēō pōristijê mā anê nhūm mē hpa hpre hpa nê ma pahihiti Pirat wūr o tē. Pirat kēp Rōm nhō pahihiti nhỹ hã mē ixpê Ijaewjê ho amnhĩptār jakamã nhūm mē ma hwūr o tē nê thkram haxà.

Jut Kariot kot amnhĩ pĩr ã harēnh

Atre 1.15-19

³ Rōm nhūm Jut Kariot tee ri mē kot Jejus pĩr kaxyw mē harēnh ma nê hkaprĩ nē. Ra kot mē kãm hã àmnēnh tã mē kot hpĩr kaxyw ã mē harēnh ma nē tee ri amnhĩ kukamã hamaxpēr o hkaprĩ htỳx nē. Hāmri nē hamaxpēr o:

—Hêxta waa nē. Mo na pa pre ri axtem nē ã amnhĩ nhĩpēx anē? Nà na pa pre amnhĩ tomnuj tỳx kumrēx. Anē.

Hāmri nē ra mē kot kãm kàxpore ho 30 nē òrta jamỹ nē ma akupỹm patre krãhtũmjê mē Ijaew pigêtjê hwūr o tē. Hāmri nē mē kot Tĩrtũm mã amnhĩ jarēnh xà hã ixkreja wūr mē hwūr axà ⁴ nē nhỹri mē omu nē mē hwūr tē nē mē kãm:

—E ota mē akàxporeta. Na pa ã mē amã Jejus ã ixàmnēnh anhyrja o amnhĩ tomnuj tỳx nē. Kot tãm amnhĩ nhĩpēx o pa htã pa axtem nē ã mē amã hã ixàmnēnh anē. Jakamã e mĩ. Mē akupỹm akàxporeta jamỹ. Kot paj amnhĩm hamỹnh kêt nē. Anē.

Hāmri nhūm mē tee ri kuma nē kãm:

—Kokỹ. Nom ka na ka pre mē ixwūr tē nē ho mē inhmar kēnã. Anē.

⁵ Hāmri nhūm tee ri mē kuma hāmri nē pikap kàxpore rēnh pa nē ma tē nē kato. Hāmri nē hkaprĩ htỳx kumrēx nē hamaxpēr o:

—Kwa tanhmã kot pa we amnhĩ to? Nà kot paj amnhĩ pĩ. Anē.

Hāmri nē krĩ pē kato nē ma mē kot pika kakwỹnh nē ho amnhĩm poti nhĩpēx xà hã pika hwūr tē hāmri nē amnhĩ mut mã ê nē ho amnhĩ pĩ. Hāmri nhūm patre krãhtũmjaja harēnh ma nē tee ri kot kàxpore rēnhhta kawrà nē hã axpēn kukja nē axpēn mã:

—Kwa tanhmã kot puj wem ja ho? Jut kot mē pamã Jejus ã àmnēnh nhūm mē pahte hpĩr xà hã kàxpore na. Jakamã kot puj mē ho Tĩrtũm mã amnhĩ jarēnh xà hã ixkre ho mex kêt nē. Finat Mojes kot ja nē mē panhĩgêtjê kurê jakamã na htem mē hpar xà hã kàxpore ho ixkreta ho mex kêt nē. Jakamã kwa tanhmã kot puj mē ho? Anē.

Hāmri nhūm ja mē kãm:

—E na pa ra ijamaxpēr. Pu mē ho Jut kot amnhĩ pĩr xà hã pikata japrō hāmri nē kamã jar mē kēp mē pahkwỹ hkêt htyk xwỹnhjê jagjēnh o papa. Anē.

Hāmri nhūm mē kuma nhūm ja mē kãm mex nē. Jakamã nhūm arĩgro hō hã nhūm mē ma hwūr mra nē haprō. ⁸ Hāmri nē hã hixi mē nhūm kēp “mē hkamrō pikapĩr xà kamã pika”. Mē kot Jejus pĩr xà hã kàxpore ho haprōr jakamã nhūm prem ã hã hixi mēnh anē. Nhūm htem arĩ axpēn mã ã hixi jarēnh anhyr o pa.

⁹ Nhūm pre ra amnepēm Tĩrtũm nhỹ hã kapēr o pa xwỹnh finat Jeremĩsti mē hkukamã hpĩr hã ja jarē nē hã kagà. Nē hã kagà o:

Koja Ijaew nhō patrejaja mēhō kot mē kãm mēhō my hã àmnēnh pãnhã kãm kàxpore ho 30 nē òr xwỹnhja jamỹ. Hāmri nē ma o tē nē nhỹri mē kot amnhĩm pika kakwỹnh nē ho poti nhĩpēx o pa xà hã pika hkwy japrō. Ra Tĩrtũm kot inhmã mē harēnh xà hkôt koja mē ã amnhĩ nhĩpēx anē. Anē.

ã finat Jeremĩsti kot Tĩrtũm nhỹ hã mē hkukamã mē harēnh nē hã kagà anhyr xàja kôt nhūm prem ã amnhĩ nhĩpēx anē.

Pahihiti Pirat kot Jejus kukjêr ã harēnh

Makre 15.2-5; Rukre 23.3-5; Juãw 18.33-38

¹¹ Rōm nhūm mē pahihiti Pirat wūr Jejus o tē nē hwūr ho axà nē kutã ãm nhūm xa nhūm Piratja omu nē kãm:

—E. Kwa inhmã amnhĩ jarē. Xà apê Ijaew nhō pahi na ka nà? Xà ka na htem amnhĩ wūr ajamãr o pa? Anē.

Hāmri nhūm kãm:

—Tỳ. Nà ãm hāmri na ka ijarē. Anē.

¹² Hāmri nhūm mē hkrãhtũmjê mē patre krãhtũmjaja pahihiti Pirat mã tanhmã ho kapēr punuj to. Nhūm amnhĩ tã mē kuma nom tanhmã kãm amnhĩ tã àprār to hkêt nē. ¹³ Jakamã nhūm pahihiti Pirat tee ri ja hã omu nē kãm:

—Kwa xà na ka ã mē kot ato kapēr anhyrja mar kêt nē nà?

¹⁴ Anhyr tã nom nhūm Jejus akryk xa nē axte tanhmã kãm nē hkêt nē. Hāmri nhūm Pirat tee ri kot ã amnhĩ nhĩpēx anhyr ã omu nē hamaxpēr o:

—Kokỹỹ. Mē kot ho kapēr punuj tã nhūm ãm mē kuma nē te kãm mē uma hkêt pyrã nē tanhmã inhmã amnhĩ tã àprār to hkêt nē. Anē.

Pirat kot Jejus pĩr kaxyw hã àmnēnh ã harēnh

Makre 15.6-15; Rukre 23.13-26; Juãw 18.39-19.16

¹⁵ Tã nhūm Pirat kormã mē kot axpēn mar xà hã ixkre kamã ýr rãhã nhūm hprōja hwūr hpēr mē nē kãm:

—Xê tanhmã mē kãm Jejusja ã axàmnēnh to hkêt nē. Na pa kamàt ja kamã hkôt amỹti nē tee ri hkukamã ijamaxpēr. Kot amnhĩ to mex xwỹnh na. Aa tanhmã kot amnhĩ tomnuj to hkêt jakamã xê tanhmã mē kãm hã axàmnēnh to hkêt nē. Kwarĩ. Anē.

Hāmri nhūm Piratja kuma nē hamaxpēr o:

—Nà ixte Ijaew krãhtũmjê pumunh tũm. Ijaew kwỹja ja kãm Jejus kĩnh nhūm mē hkrãhtũmjaja kot mē hã Jejus kamã gryk nē. Jakamã ixte tanhmã mē kãm hã ixàmnēnh to kaxyw na mē ã ixwūr o htēm anē. Anē.

Na htem Pas nhō arĩgrota hapōx mē nhūm pre htem Ijaew o amnhĩptār xwỹnhja mē kãm mē hagjēnh xà kamã hkrĩ xwỹnhjê ho hpỹnh nē mē hapōj. Mē kãm hprãm xà hkôt nhūm mē kãm mē hapōj nhūm mē akupỹm kapôt ã hamakêtkati nē amnhĩx pa. Jakamã nhūm ra mē hagjēnh xà kamã mēhō my pē Parapasja hkrĩ. Na pre tanhmã amnhĩ tomnuj to nhūm mē mýrapē unē nē haxà. Jakamã nhūm Ijaewjaja mē ho amnhĩptār xwỹnh Pirat wūr akuprō nē kuhē nhūm mē kãm:

—E kot paj jarähã më amã më hagjênh xà kamã më hkrí xwýnhjê hõ mã inhûre kê àmnhíx kato në ri pa. Nhý kot paj më amã kãm inhûre? Xà Parapas nà? Xà më akwý kot amnhím ho më anhõ pahihti Jejus pê Tirtüm kot më akaxyw ãm xwýnhta kot paj më amã kãm inhûre? Nhý wehe? E më inhmã nhý jarë. Anë.

Pirat na pre më inhõ patre krãhtümjê pumunh mex në. Ijaew kãm Jejus kapër mar prãm týx ã nhùm më hã kamã gryk týx në hwýr o mrarja kôt nhùm më omunh mex në. Jakamã ã hã më hkukjêr anë. Hãmri nhùm mëhpigêt më patre krãhtümjaja kuma hãmri në më pikuprõnh në më kuhê xwýnhjê mã kãm:

—Kwa më kãm anë kê më pamã Parapas mã mãn ure në mãmrí Jejus Kris pĩ. E kwa më tokyx kãm anë kê Parapas mã ure. Anë.

Hãmri nhùm më më kuma në pahihti Pirat mã kãm:

—Nà më inhmã Parapas mã mãn anhûre. Anë.

²² Hãmri nhùm tee ri më kuma në më kãm:

—Kwa no më ate Jejus pê Tirtüm kot më akaxyw ãm xwýnh ã harênh xwýnhta? Tanhmã kot paj hipêx to? Anë.

Hãmri nhùm më kãm:

—Apĩ ri. Tokyx pĩ kahpa hã anhõ kê ty. Anë.

²³ Hãmri nhùm tee ri më kuma në më kãm:

—Tk. Kwa nà. Tanhmã kot amnhí tomnuj tore hã kot pa kêt ri pĩ kahpa kunhõ nhùm ty. Anë.

Hãmri nhùm më xatã àmra kamã kãm:

—Kwa pĩ kahpa hã mãn anhõ kê ty. Kwa tokyx ã më inhmã hipêx anë. Anë.

²⁴ Hãmri nhùm tee ri ja nê tanhmã më kãm kapër to no nhùm më mar kêt në. Nhùm tee ri më àmra mar o xa. Hãmri në kãm Jejus pĩr prãm kêt jakamã amnhím gô hkwy janhi në më piitã më noo mã amnhí nhĩkra kuhõnh o xa. Më kot hã omunh xà hkôt kãm hpĩr prãm kêt ã omunh kaxyw. Hãmri në më kãm:

—E na pa më anoo mã ã amnhí nhĩkra kuhõnh anë ka më ja hã ixpumu. Nà inhmã hpĩr prãm kêt. Tanhmã kot amnhí tomnuj tore hã. Më kaxipixjaja më amã hpĩr hprãm jakamã më kam në tanhmã ho. No pa kot paj tanhmã ho hkêt në. ãm kwarĩ ho kwarĩ. Anë.

²⁵ Hãmri nhùm më kuma në më kãm:

—Tõe. Nà ãm hãmri. Kot paj më pamjaja amnhí tã htykja nhõ. Nê më ixkra në më ixtãmnhwýjê më amnhí to ixpimràatã amnhí tã kunhõ. Kê Tirtüm kãm tanhmã hã më ixtõ hto hprãm në mamrĩ tanhmã hã më ixtõ hto. Anë.

²⁶ Hãmri nhùm më kuma në më kãm hprãm xà hkôt më kãm Jejus ã amýnê në më kãm Parapas mã ure. Ra Parapas kot pahi Pirat pê õ pôristi kutã amnhí xãm në kêp hõxpĩrja mýrapê nhùm më kot unênh në haxàr tã Ijaew kãm hprãm xà hkôt akupým kãm ure. Hãmri në õ pôristijê mã anë nhùm më Jejus tak. Nê htaç rax në hãmri nhùm Pirat më kãm hã amýnê nhùm më kot pĩ kahpa hã nhõ o hpĩr kaxyw ma o tẽ.

Pôristi kot Jejus ã hpër o pikênh ã harênh

Makre 15.16-20; Juãw 19.2-3

²⁷ Tã nhùm pôristijaja më kot pĩ kahpa hã Jejus nhõ kaxyw ma o tẽ në pahihti Pirat nhõrkwy kamã ixkre hõ hwýr ho axà. Nhùm pôristi ohtõ në hwýr akuprõ në hã pẽr o pikênh kaxyw axpẽn mã:

—E kwa tokyj pu më kãm pahi xê jaxà ri. Kêp pahi hã kot amnhí jarênh kênã. Anë.

²⁸ Hãmri në kêp ê kapa në hpãnhã kêp pahi hã më ê kamrêk mexja py në kãm haxà. ²⁹ Nê kãm pahi hã më ahkã nhípêx në hkrãm haxà. Nom axtem akunĩ kamã mëmo mrõ nhĩ te kot ronh kanêre pyrãk xwýnhja nhùm më hikãx në hkrãm haxà. Nê kãm pahi hã kô gõ nhùm kupy në o xa. Hãmri nhùm më ho anhýr pa në kutã hkõn krã ho rôrõk në hkrĩ hpa në hã pẽr o pikênh kamã kãm:

—E ãm hãmri. Apê Ijaew nhõ pahi punuti na ka. Anë.

³⁰ Hãmri në kãnhmã kuhê në hkuk kuhtõ në kêp kô pytã në xatã ho hkrãx pê htaç. Nhùm prem ã pẽr o pikênh kãm hipêx anë. ³¹ Hãmri në kêp pahi hã ê kapa në akupým kãm ê jaxà në më kot pĩ kahpa hã nhõ kaxyw ho kato në ma o tẽ.

Pôristi kot pĩ kahpa hã Jejus nhõ ã harênh

Makre 15.22-32; Rukre 23.27-43; Juãw 19.17-25

³² Nhùm pôristijaja Jejus o kato në ma kapõt mã o tẽ. Nê kãm pĩ kahpa pytĩja gõ nhùm kumý në më hkôt o hkwy. Nom ra hiroç týx në nhùm më tee ri ja hã omu në mëhõ kot ho ajuta kaxyw më kot omunh xwýnhjê kapi ho xa. Hãmri në Sirên nhõ xwýnh Simãw kã htyk pumu në unê në kãm kot Jejus o ajuta kaxyw hã karõ nhùm hwýr tẽ në kêp pĩ kahpata mý në hkôt kãm kumý në o tẽ. ³³ Hãmri nhùm më kên nhĩxêt te kot më hkrã hi pyrãk xwýnhta wýr më o pøj. Më kapër kãm na prem hixêtja jarênh o: "Korkot." No më pakapër kãm Korkot jarênhja kêp "më hkrã hi xà" nhùm më ma hwýr Jejus o pøj. ³⁴ Hãmri në më kot pĩ kahpa hã nhõ kaxyw nhùm à htýx kumrêx kamã hamak pymaj kãm mëmo më hkanexàja gõ. Wĩhti më mëmo mry ma xà ho pihkàr nhùm më kãm hkwy gõ. Nom nhùm hkaki në më kot amnhí xà htýx kamã hamak kêt xà hã omunh kurê kumrêx në hkaga. Nhùm më tee ri ja hã omu hãmri në kêp ê kapa në kumê në pĩ kahpa hã kuxi në prek o ãhkra në hpar o htýx pa. Hãmri në kãnhmã pĩ jarĩ në ahkre kamã ãm në ho htýx nhùm kýxpê ajêt. ³⁵ Hãmri nhùm pôristi hkwyjaja axpẽn mã ê hkwy ho pigrãnh kaxyw hã kênre ho jõka. ³⁶ Hãmri në ho anhýr pa në pikap Jejus jamãr o hkrĩ.

³⁷ Na htem më hpar kaxyw në tanhmã më kot amnhí tomnuj to hã kagã në më mýri pĩ kahpa hã hanhõ. Jakamã na prem tapti hõ py në tanhmã Jejus ã kagã hto në hã kagã ho:

*IJAEW NHÕ PAHI NA JA
HIXI PÊ JEJUS*

Hãmri në hwýr ho api në mýri kunhõ. ã Jejus kot amnhí jarênh anhýrja mýrapê na prem kupĩ.

³⁸ Hāmri nhūm mē hpānhā wa àhkīnh xwýnh wa ho axkrut nē mǎānēn pī kahpa hā wa kunhō. Nē akutā ho Jejus nhījē nhūm war ajēt.

³⁹ Tā nhūm pry hā mē mrar xwýnhjaja Jejus pumu nē hā hpēr o pikēnh o mra nē kām:

⁴⁰ —Kwa ka na ka pre ate Tirtūm mā amnhī jarēnh xà hā ixkre grānh par nē atā apkati axkrunēpxi nē akupým hipēx par ā amnhī jarē. Nē apē Tirtūm Kra hā amnhī jarē. Nē axàhpumunh o axàhpumunh jakamā e kwa amnhī kapa nē wrý pa mē ja hā apumu. Kwa tokyx. Anē.

⁴¹ Nē patre krāhtūmjē mē Tirtūm kapēr tūm o mē ahkra o mē pa xwýnh mē mē hkrāhtūmjaja piitā hwýr mra nē hā hpēr o axkē. ⁴² Nē xapēn mā harēnh o:

—E jahti na xep pre mē kām ukaprī ho pa nē tanhmā mē ho ajuta hto ho pa. Tā nom tām tanhmā amnhī to nē wrýk kēt nē. Kwa pu mē arī pakuhē nē kot amnhī kaxàr nē wrýk kām omu. Koja wrý pu mē omu nē kēp mē panhō pahihti hā hkôt pajamāxpēr kurē kumrēx. E tokyx wrý Jejus. Pa mē awrýk kām apumu. Nà kot kaj awrýk rax nē. ⁴³ Na hte amnhī kaxyw Tirtūm mā hamāxpēr o pa. Nē kēp Kra hā amnhī jarēnh o pa. Jakamā e. Kē Tirtūm tām hwýr tē nē kēp Kra hā akupým mē pahpē utā. Anē.

⁴⁴ Hāmri nhūm wa kot akutā hijē nē jēt xwýnhhta wa haxwýja mē mar xà hkôt mā ho kapēr anē.

Jejus tyk ā harēnh

Makre 15.33-41; Rukre 23.44-49; Juāw 19.28-30; mǎānēn Eprēw 10.19-20

⁴⁵ Tā nhūm kaxkwa nhīpōk ri myt ýr mē nhūm te kamàt pyrāk nhūm kamàt kō rax kumrēx. Jao hā awry mē nhūm ra akupým myt katēr o mō. ⁴⁶ Hāmri nhūm Jejus kapēr kām hihtýx nē àmra htýx kām Tirtūm mā kapēr nē kām:

—Inhō Tirtūm inhō Tirtūm. Kwa mon ka ixkaga? Anē.

Nom kapēr kamā kām kapēr o:

—Eri Eri. Rāmā sapatani. Anē.

⁴⁷ Hāmri nhūm mē kot mar xwýnhjaja kot Eri jarēnh ā kuma nē htýx ho finat Eris mā kapēr ā hkamnhīx.

⁴⁸ Nhūm Jejus par pē guhkrax kām wīhti punure xa. Jakamā nhūm mē ā kapēr anhýr ā kuma nhūm mēhō kām hkaprī nē. Hāmri nē mēmo rerek py nē o tē nē kaxyw pī rytija py nē ho hkanhwý. Nē akupýn o tē nē ho wīhti nhek nē Jejus kot hkaōr kaxyw kām kupē.

⁴⁹ Hāmri nhūm hkwyjaja tee ri ja hā omu nē nē kām kapēr nē kām:

—Tk. Kwa nhām xa. Pu mē kop Eris jamā mǎn. Koja hwýr tē nē ho wrýk japēr. Anē.

⁵⁰ Hāmri nhūm kamàt kō mē nhūm Jejus ra htyk kaxyw nē axte àmra htýx nē hāmri nē ty. ⁵¹ Tykja kōt nhūm Tirtūm mā amnhī jarēnh xà hā ixkre kamā hakwakre hā kupēxēja kýj rūm ahpār mā axkjē nē amnhī kahē xà mēnh kurē kumrēx. Utí rax tā axkjē nē amnhī kahē xà mē. Te Jejus htyk o te kot mē pahte hkôt amnhī xunhwýr xwýnhjē mā Tirtūm wýr pry jakwa kre kahē xà mēnh pyrāk o ā amnhī nhīpēx anē. Nhūm pika htertēt týx kumrēx o kēn rūnh kwý ohtō nē hkrakrak

pa. ⁵² Hāmri nhūm mē htyk ā pika kamā mē htykjē nhōrkwý ho ohtō nē mē hā axkjē nhūm mē hikwý xwýnhjaja akupým htír nē hapōj nē kuhē. Na prem kormā htyk kēt ri amnhī kaxyw Tirtūm kōt hamāxpēr. Tā nhūm Jejus ty nhūm mē ohtō nē akupým htír nē hapōj nē kuhē. ⁵³ Nom kormā nhýhým mrar kēt nē. Arī mē hā pika nhīpy Jejus akupým htír ā hamār o kuhē. Tā nhūm Jejus apkati hō hā akupým htír ā arīgrota ā nhūm mē rī kormā ma Jerujarē hwýr mra nē hwýr agjē nhūm mē ohtō nē akupým mē htír ā mē omu.

⁵⁴ Nhūm kormā Jejus htyk o mōrta ā nhūm pōristi krāhtūm mē pōristi hkwyjaja hāmri hparpē hamār o kuhē nē htyk kām omu. Nē pika htertēt kamā ama nē mēmoj kot tanhmā amnhī nhīpēx toja pumu nē tee ri hamāxpēr nē kām ma htýx kumrēx. Hāmri nē xapēn mā:

—Hēxta waa nē. Pēr ām hāmri na pre htyk xwýnhhta amnhī jarē. Kēp Tirtūm Kra kēnā. Tā pu mē amarī pahýtýx kupī. Anē.

⁵⁵ Nhūm pre mēnijaja ohtō nē amým Jejus tyk kām omunh o kuhē. Marir Matarēn nē Xiakre mē Juje wa katorxà Marir nē Xiakre hō mē Juāw wa katorxàja nhūm mē kormā htyk kām omunh o kuhē. Na prem Garirej rūm hkôt tanhmā ho ajuta hto ho hkôt Jerujarē wýr mō.

Mē kot Jejus jaxàr ā harēnh

Makre 15.42-47; Rukre 23.50-56; Juāw 19.38-42

⁵⁷ Tā nhūm ra myt grire nhūm krī pē Arimatej rūm hikàxpore rax xwýnh pē Jujeja tē. Nom axtem Juje hō na pre. Ra kot Jejus kōt amnhī xām jakamā kām ho wrýk nē haxàr prām nē. ⁵⁸ Hāmri nē ma pahi Pirat wýr tē nē í hā kuwý nē kām:

—E ot pa awýr tē. Kwa inhmā htyk xwýnhhta gō pa ma o tē nē haxà nà? Anē.

Hāmri nhūm kuma nē kām harē nhūm ma o tē nē haxà. ⁵⁹ Kaxyw kupēxē mex ō py nē ho hkupu pa ⁶⁰ nē ma o tē nē ō kēn kre kamā haxà. Na pre htyk kukamā kēn kre kakwý nhūm mē kot kormā kamā mēhō jaxàr kēt tā kamā na pre Jejus jaxà. Hāmri nē hā kēn rax ō xām nē ho hitom nē ma akupým tē. ⁶¹ Nhūm Marir Matarēn mē Marir ōja wa kēn kreta kapem omunh o wa nhý.

Pōristi kot kēn kre jamār o kuhē ā harēnh

⁶² Tā nhūm apkati nhūm mē inhō arīgromnu pē sap kato. Hāmri nhūm Parijew nhō xwýnhjē mē patre krāhtūmjaja ma pahi Pirat wýr mra nē kām:

⁶³ —Kwa pahihti. Nà amnhī to hēx o pa xwýnhhta na pre kormā htír nē pa ri tanhmā amnhī jarēnh to ho pa. Nē nhýrmā ty nē htyk ā apkati axkrunēpxi pix nē akupým htír ā amnhī jarē. ⁶⁴ Jakamā kwa hwýr anhō pōristi hkwy rē kē mē ma hwýr mra nē hamār mex o apkati axkrunēpxi. Kot ka anhýr kēt nhūm hkôt mē pa ho mē pa xwýnhjaja ma hwýr mra nē ho ahkí nē ma o mra nē nhýri haxà nē mē piitā mē kām ra akupým htír ā harēnh o hēx o pa. Te tām kot amnhī kukamā amnhī jarēnh pyrāk. Nom mē kot axte ā harēnh anhýrja koja

omnuj tÿx o tãm kot ã amnhî jarênh anhÿrja jakre. Anê.

⁶⁵ Hãmri nhÿm mē kuma nē mē kām:

—Tōe. Nà koja mē ho anê. E mē ma hwÿr amnhî kôt pôristi hkwȳ ho mra kê mē hakwakre kahê xà jamār mex o kuhê. Anê.

⁶⁶ Hãmri nhÿm mē kuma nē ma hwÿr mra nē hakwakre hã kēn raxta o htÿx pa. Nē mēhō kot omunh nē kahê mēnh pymaj menh ê ho hkukō. Hãmri nē ho anhÿr pa nē pôristi mā kām:

—E Kêr ka mē jar kuri hamār mex o akuhê. Kê mēhō tē nē tanhmã ho hkêt nē. Anê.

Jejus akupÿm htÿr ã harênh

Makre 16.1-8; Rukre 24.1-12; Juãw 20.1-10

28 Tã nhÿm apkati nhÿm tōmîk. Hãmri nhÿm Marir Matarênh mē Marir ôja kwÿhtã kãnhmã nhÿ nē ma akupÿm kēn kreta wÿr wa tē. ² Puh nhÿm pika httert tÿx nē nhÿm Tirtÿm kapêr o mē wrÿk xwÿnhja kēn kre wÿr wrÿ nē nhãm hakwakre nē kēn raxta mē nē hã nhÿ. ³ Hirã htÿx kām nhÿ. Te na jaxênh pyrãk. Nē ê haka htÿx kumrêx. ⁴ Nhÿm pôristijaja tee ri omu nē kām ma htÿx nē httert nē umaj pikap rôrôk pa nē te htyk pyrã nē hikwÿ. ⁵ Hãmri nhÿm wa nita kēn kre hwÿr pōj nē tee ri Tirtÿm kapêr o mē wrÿk xwÿnhhta pumu. Nhÿm wa kām:

—Kwa wa amã ma hkêt nē. War ate Jejus pumunh kaxyw na ka wa tē. Mē kot pî kahpa hã nhôr xwÿnhhta. ⁶ Nom jar amrakati. Na ra akupÿm htÿr nē kato nē ma tē. E wa kam nē amnē axà nē nôr xà kaprÿ pumu. Anê.

Hãmri nhÿm wa kuma nē tee ri kēn kre kamã Jejus japêr nhÿm kamã amrakati. ⁷ Hãmri nhÿm Tirtÿm kapêr o wrÿk xwÿnh wa kām:

—E wa tokyx ma akupÿm tē nē hkôt mē pa ho mē pa xwÿnhjê mã harê. Koja ma Jejus mē akukamã akupÿm Garirej wÿr mō. Garirej kamã kot kaj mē axte axpēn pumu. Ra kot mē amã amnhî jarênh xà hkôt. E kwa wa tokyx ma akupÿm mē hwÿr tē. Anê.

⁸ Hãmri nhÿm wa kuma nē ma akupÿm hprôt nē htēm kurê kumrêx. Kām ma htã hkÿnh nē. Nē ma Jejus kôt mē pa ho mē pa xwÿnhjê mã ujarênh kaxyw ma mē hwÿr hprôt nē wa tē. ⁹ Pu nhÿm ra Jejus tãm wa kutã tē nē wa hkaxpa. Hãmri nē wa haêr pē wa kām kapêr nē wa kām:

—Pa? Nhÿhÿm na ka wa tē? Anê.

Hãmri nhÿm wa omu nē hkÿnh tÿx kumrêx nē hwÿr hprôt nē hpar pē hkôn krã ho tēm nē akutã hpar ã kumÿ nē kām mex o mex ã harê nē kām:

—Hêxta gaa nē. Ma amex kumrêx. Amex o amex. Anê.

¹⁰ Hãmri nhÿm wa kām:

—E war amã ma hkêt nē. Mamrî ma tē nē ixkôt mē pa ho mē pa xwÿnhjê mã ijarê kê mē ma Garirej wÿr mra. Kamã kot paj mē axte axpēn pumu. Anê.

Pôristi kot kàxpore hprãm xàj Jejus o hêx ã harênh

¹¹ Rôm nhÿm pôristi hkwȳjaja akupÿm tãm hkrã hãmri nē ma kēn kreta rÿm akupÿm krîm mra. Hãmri

nē patre krãhtÿmjê hwÿr mra nē mē kãm ujarênh pa. ¹² Hãmri nhÿm mē tee ri mē kuma nē mēhpigêtjê ho akuprô nē mē hã axpēn mar o hkrî. Hãmri nē axpēn mar pa nē pôristi mã amnhîrer rax nē mē kām:

¹³ —E mē amnhîm kàxpore jamÿ nē ma ri ã mē kãm amnhî jarênh anhÿr o apa. Nom kêr ka mē kãm amnhî to axêx nē mē kãm: “Na pa prem kēn kre kapem ixtÿx gôr nē inhîkwÿ nhÿm Jejus kôt mē pa ho mē pa xwÿnhjaja mra nē mē ixpê ï ho ahkî nē ma o mra.” Anhÿr o mē kãm amnhî to axêx o apa. Mē ixte kàxpore ho mē amã amnhîrerta pãnhã. ¹⁴ Koja pahihtî Piratja mē anhôt ã mē ajarênh ma nē hã tanhmã mē ato kaxyw hã kot paj mē axy pē tanhmã kãm ixkapêr to nhÿm tanhmã mē ato hkêt nē. Jakamã e. Mē tee ri amnhî kukamã ajamaxpêr kêt nē. Mē mãmri ma mra nē ã mē kãm axujarênh anhÿr o ri apa. Anê.

¹⁵ Hãmri nhÿm mē kuma nē mē kot amnhî to hêxta pãnhã kàxpore jamÿ nē ma mē mar xà hkôt mē piitã mē kãm Jejus kôt mē pa xwÿnhjê ho hêx o pa. Tã na htem arî jarãhã Ijaewjaja ã axpēn mã mē harênh anhÿr rãhã ho pa.

Jejus kot hkôt mē pa ho mē pa xwÿnhjê mã mē àpênh ã karô

Makre 16.14-18; Rukre 24.36-49; Juãw 20.19-23; Atre 1.6-8

¹⁶ Tã pa mē ixte Jejus kôt ixpa ho ixpa xwÿnh pē 11jaja hãmri akupÿm Jejus htÿr ã harênh ma hãmri nē ma Garirej wÿr mra. Nhÿri Jejus kot mē inhmã mēmo hixêt prêk jarênhja wÿr.

¹⁷ Nē ra hwÿr ixpôx o mrrar mē Jejus pumu. Tã nom nhÿm mē ixkwÿjaja tee ri omu nē htÿx ho nhãm mēhō hã hkamnhîx. No kêt mē pajaja na pa prem ixprî hã omunh kurê kumrêx nē ixkÿnh tÿx nē. Nē ixkÿnh nē hwÿr ixprôt nē kām:

—Pa Jejus? Hêxta waa nē. Amex o amex. Anê.

¹⁸ Hãmri nhÿm mē inhmã:

—E na pre Tirtÿm ã inhmã kapêr anê nē inhmã: “E kêr ka amnhî nhÿ hã mēmoj piitã tanhmã ho ho apa. Kaxkwa kamã nē pika kamã. Mamrî nhÿhÿm amnhî krã hkôt amã tanhmã amnhî to hprãm xà hkôt tanhmã amnhî nhÿpêx to ho ri apa.” Anê. Na pre mē akaxyw ã inhmã kapêr anê.

¹⁹ —Jakamã e. Kêr ka mē ma pika piitã hkôt ri mē kãm ijarênh o ri apa. Kê mē ixte mē nē tanhmã amnhî nhÿpêx to hã ijarênh ma hãmri nē ixkôt amnhî xunhwÿ nē ixkôt ri amnhî nhÿpêx o pa. Nē kêr ka mē ja hã mē omu nē Tirtÿm mē wa inhmã mē hkrã kumrã. Wa ixkarô nhÿ hã mē hkrã kumrã. Mē kot wa inhÿ hã pix mã tanhmã amnhî nhÿpêx to ho pa kaxyw.

²⁰ —Nē mē kãm anê kê mē ixkapêr piitã hkôt amnhî nhÿpêx rãhã ho pa. E kêr ka mē ma mē kãm ã ijarênh anhÿr o ri mē hkôt apa. Kot paj mē anhîhkô hã ri ixpa rãhã nhÿm nhÿrmã pikaja hapêx o hapêx. Anê.

Na pre ã Jejus mē inhmã mē ixapênh ã karô anê.

Matêwre kot Jejus jarênh nē hã kagãja ja kôt na hapêx.

Makre

Juāw Makre na pre kagàja nhîpêx. Na pre hte ma hkwÿjê hkôt mẽ kām Jejus kot tanhmã amnhî nhîpêx to hã harênh o ri pa. Na pre ra Simãw Pêtreja hprî hã Tirtûm kapêr o ahkre nhûm kuma nê mar tÿx nê. Hãmri nê mẽ pamã tanhmã Jejus ã kagà hto. Simãw Pêtre xô ri tanhmã kot amnhî nhîpêx to hã kagà. Jejus kêp Tirtûm Kra hã hihtÿx o hihtÿx nê àhpumunh o àhpumunh ã nhûm pre harê nê hã kagà. Nê kêp mẽ pakutã nojarêt xwÿnh ã harê nê hã kagà. ã Juāw Makreja mẽ pamã Jejus jarê nê hã kagà anê.

Matêwre 3.1-10; Rukre 3.1-9; Juāw 1.6-8, 1.19-23

1 Pa Kris kôt ixkràmnhwÿjaja. E kot paj mẽ amã tanhmã Jejus kot amnhî nhîpêx to ho pa hã kagà ka mẽ kamã harê nê ama. Kêp Tirtûm Kra na. Tãm na pre mẽ pakaxyw ãm nê mẽ pahwÿr kumê. Tã tãm kot mẽ pahwÿr wrÿk nê tanhmã amnhî nhîpêx to ho paja kot paj mẽ amã ixprî hã harê nê hã kagà ka mẽ kamã harê nê ama.

Juāw Paxis kot Jejus kukamã harênh

² Kormã Jejus mẽ pahwÿr wrÿk xwÿj ri na pre Tirtûm nhÿ hã kapêr o pa xwÿnhjê hõ pê Ijaisja kukamã tanhmã harênh to nê hã kagà. Nê Jejus kukamã harênh o mör xwÿnh Juāw Paxisja nhûm pre mãänên hkukamã tanhmã harênh to nê hã kagà. Te Tirtûm tãm hamaxpêr pyrãk o harê nê harênh o:

E kot paj Ixkra hkukamã ma mẽ hwÿr kot harênh xwÿnhjê hõmê kê ma kutêp mẽ kãm harênh o ri pa. Kê mẽ kuma nê kutêp tãm amnhî nhîpêx mex o pa.

³ Koja kukamã harênh xwÿnhja ma kapôt ã ri hwÿr mẽ mrar xwÿnhjê mã harênh o ri pa. Nê kÿx pê mẽ kãm kapêr nê mẽ kãm: “E mẽ inhma. Kojã Tirtûm tokyx mẽ pahwÿr mẽ panhõ Pahihti mẽ nhûm wrÿ pu mẽ pahpiitã omu. Jakamã kwa mẽ tokyx kutêp tãm amnhî nhîpêx. Te ho mẽ kot mēhõ kutêp pry ho mex pyrãk o amnhî nhîpêx. Nom pry kumrêx o mex kêt nê. ãm amnhî nhî ho tãm amnhî nhîpêx nê tãm axpên nhîpêx. Pahihtita kutêp. Mẽ pahte amnhî nhîpêx tûmja te kot pry nhînur nê krã hakÿx nê pry juk nhûm mẽ tee ri kot kãm hã mrar mex prãm kaprÿ pyrãk. Jakamã kot kaj mẽ Pahihti nyw kutêp ate amnhî tomnuj kaga nê tãm amnhî nhîpêx nê tãm axpên nhîpêx. Hãmri nê te mẽ kot pry nhînur o mex nê ho katat nhûm ra katat mux nê nõr pyrãk o amnhî nhîpêx. E kwa kêr ka mẽ ã kutêp amnhî nhîpêx anê.” Anhÿr o koja mẽ kãm harênh o pa. Anê.

Na pre ã Tirtûm Juāw Paxis kukamã harênh anê nhûm ÿ hã kapêr xwÿnh pê Ijaisja mẽ pamã hã kagà.

⁴ Tã ra kot harênh xà hkôt nhûm Juāw Paxisja tẽ. Hãmri nê kapôt ã ri mẽ kãm Tirtûm kapêr jarênh o pa nê mẽ kãm:

—Kwa mẽ tokyx amnhî tomnuj kaga nê tãm ri amnhî nhîpêx. Kê Tirtûm ja hã mẽ apumu nê mẽ anê mẽ ate amnhî tomnuj rênh pa nê mẽ ato hkra. Pa mẽ piitã mẽ

kot ra mẽ apê hkra hã mẽ apumunh kaxyw mẽ akrã kumrã. Anê.

⁵ Hãmri nhûm mẽ ohtô nê kot kapêr mar kaxyw ma nhÿhÿnh hwÿr kapôt mã mra. Pyka pê Jutej rûm nê Jutej kamã krî pê Jerujarê rûm nhûm mẽ ohtô nê hwÿr mra. Hãmri nê nhÿri omu nê kãm:

—E ixte amnhî tomnuj kaga hprãm xàj na pa awÿr amnhî to tẽ. Na pa hte amnhî tomnuj pix o ri ixpa. Tã tee ri ja hã amnhî pumu nê ixkaprî nê. Hãmri nê ra inhã amnhî tomnuj kaga nê tãm amnhî nhîpêx prãm nê.

Anhÿr ã amnhî jarê. Hãmri nhûm Tirtûmja kaxkwa kamã hkrî htã mẽ kuma nê amnhî katut kôt mẽ kot amnhî tomnuj piitã rênh pa nê axte kãm hamaxpêr kêt nê. Jakamã nhûm Juāw Paxis gôx kãm mẽ hkrã kumrã. Pyhti pê Jotãw kamã. ⁶ Juāw Paxisja hikàxpore hkêt jakamã na pre ê mex kêt nê pa. ãm mẽmo mry pê kamer kí ho amnhîm ê nhîpêx nê hagjê nê hã pa. Nê mẽmo mry hkà ho amnhî pre nê ri pa. Nê mẽõ mex kur kêt nê ãm krit ku nê menh ôr o ri pa. ⁷ Hãmri nê mẽ kãm tanhmã Jejus jarênh to ho pa nê mẽ kãm:

—E mẽ inhma. Kojã tokyx Tirtûm kot mẽ pakaxyw ãm xwÿnhta mẽ pahwÿr wrÿ. Ahpumunh tÿx o kot ijakrenh jakamã na pa hte ãm kukwak ri ixpa nê amnhî tã hã xpijaam rãhã ho ri ixpa. Te ixkrãm ã xpijaam o amnhî nhîpêx pyrãk. ⁸ Na pa hte gô pix o Tirtûm mã mẽ akrã kumrãr o ri ixpa. Nom mẽ pahwÿr wrÿk mã xwÿnhja koja mẽ awÿr Tirtûm Karõ rê nhûm mẽ akaxwÿnh mã agjê. Ka mẽ ÿ hã tãm ri amnhî nhîpêx rãhã ho ri apa. Anê.

Juāw Paxis kot Jejus krã kumrãr ã harênh

Matêwre 3.13-17; Rukre 3.21-22; Juāw 1.32-34

⁹ Tã nhûm Jejusja tãm Juāw Paxis wÿr tẽ. Garirej kamã krî pê Najare rûm ma hwÿr tẽn pøj. Hãmri nhûm Juāwja hkrã hkumrã. Pyhti pê Jotãw kamã hkrã kumrã.

¹⁰ Hãmri nê wa gôj rûm api nê mÿr ri kaxkwa pumunh o xa. Nhûm kaxkwa axkjê nhûm kurûm Tirtûm Karõ te tuuti pyrã nê Jejus wÿr wrÿk o tẽ nê ÿkre hã xa nhûm amnhî tã omunh o xa. ¹¹ Hãmri nhûm Tirtûm kaxkwa rûm kãm kapêr nê kãm:

E apê Ixkra mex na ka. ãm hãmri na ka hte ixkanrêhã amnhî nhîpêx mex o apa. Inhã ajapê kamã na ka ri apa ho apa. Anê.

Jejus kot Satanasti kaga hã harënh

Matêwre 4.1-11; Rukre 4.1-13; mãänën Eprêw 2.18, 4.15

¹² Tã nhũm Tirtũm Karõja ma kapõt mã Jejus o mõ
¹³ nhũm kapõt ã mry xoprê kaêx ã ri mrar o hã arĩgrom
 pê 40. Hãmri nhũm Satanasti omu nê ma hwÿr tẽ nê ri
 hkõt pa. Kapõt ã ri hkõt hêx rom tanhmã kãm kapêr to
 nhũm kot mar nê hkõt amnhĩ xãm prãm xaj ma hkõt
 pa. Nom nhũm Jejus hkaga kumrêx nhũm tee ri ho an-
 hÿr kaprÿ nê ma akupÿm tẽ. Hãmri nhũm Tirtũm kapêr
 o mẽ wrÿk xwÿnhjaja Jejus wÿr wrÿ nê tanhmã ho mex
 to.

Jejus kot Tirtũm mã àpênh krax ã harënh

Matêwre 4.12-17; Rukre 4.14-15

¹⁴ Nhũm pre ra mẽ ixpê Ijaew o amnhĩptar xwÿnh pê
 Eroxa Juãw Paxis kot mẽmoj tã kãm àkjêr mÿrapê
 nhũm pre ra unê nê haxà. Tã kot haxàr jakành pê
 nhũm Jejus ma akupÿm pyka pê Garirej wÿr mõ nê
 kamã mẽ kãm Tirtũm kapêr jarënh o pa. Nê Tirtũm kot
 mẽ hwÿr mẽnh ã amnhĩ jarënh o pa. Nom te nhãm
 mẽhõ jarënh pyræk o amnhĩ jarê ¹⁵ nê mẽ kãm:

—E na Tirtũm kãm mẽ ato hkra hprãm nê. Jakamã na
 ra kot mẽ awÿr ãm xwÿnhhta mẽ nhũm mẽ awÿr wrÿ.
 Kwa mẽ tokyx kapêrja ma nê amnhĩ kaxyw hkõt aja-
 maxpêr. Hãmri nê ate amnhĩ tomnuj kaga nê Tirtũm
 kõt mãn amnhĩ nhĩpêx o ri apa. Kot kaj mẽ ã amnhĩ
 nhĩpêx anê nhũm Tirtũm amnhĩ tã mẽ apumu nê mẽ
 ato hkra. Anê.

Jejus kot amnhĩ kõt tep pynênh xwÿnh wa hwÿr ã harënh

Matêwre 4.18-22; Rukre 5.1-11

¹⁶ Tã nhũm Jejus ma Garirej kamã gô rax pê Garirej
 mÿri mõ. Hãmri nê Simãw mẽ htõ Andreja wa hwÿr ka-
 to nê wa omu. Wa kot tep pynênh xwÿnh jakamã na
 pre wa gôx kãm kryhti rënh o xa nhũm Jejus wa hãnh
 tẽ nê wa omu. ¹⁷ Hãmri nê amnhĩ kõt wa kuwÿ nê wa
 kãm:

—E war amnê ixkõt tẽ nê ixkõt mãn apa. War apê tep
 kanhêr rax o ri apa xwÿnh tã kêr ka war axàpênhta ka-
 ga nê hpãnhã ixkõt apa ho apa. Kot paj tanhmã war
 akrã hto ka wa tep pynênh pãnhã ma ri mẽ hkõt mẽ
 kãm ixkapêr jarënh o ri apa. Mẽ ohtô nê mẽ kot war
 amar nê Tirtũm kõt amnhĩ xunhwÿr kaxyw. Jao kot kaj
 te war ate tep kanhêr rax nê Tirtũm mã õr pyræk o
 amnhĩ nhĩpêx.

Anhÿr o wa kãm kapêr. ¹⁸ Hãmri nhũm wa kuma nê
 kryhti kaga nê ma hkõt pa ho pa kurê kumrêx. ¹⁹ Hãm-
 ri nê mẽ gô mÿri mõ nê Jepetew kra Xiakre mẽ htõ
 Juãw wa hwÿr kato nê wa omu. Nhũm wa kormã
 hipêêxà nhĩhkô hã pãr kãm kryhti ho mex o wa nhÿ
 nhũm Jejus wa mẽ hwÿr kato nê wa omu nê amnhĩ kõt
 wa kuwÿ. ²⁰ Hãmri nhũm wa kuma nê ma hkõt pa ho
 pa. Pãr kre kamã mẽ kãm àpênh xwÿnhjê ri hipêêxà re
 nê ma Jejus kõt pa ho pa.

Jejus kot mẽhõ nê mẽkarõmnuti janor ã harënh

Rukre 4.31-37

²¹ Hãmri nhũm Jejus mẽ hkõt mẽ pa ho mẽ pa xwÿn-
 hjaja ma krĩ pê Kapanaũ hwÿr mõ hãmri nê hwÿr pøj.
 Hãmri nhũm mẽ ixpê Ijaewjê nhõ arĩgromnu pê sap
 kato nhũm Jejus ma Tirtũm kapêr o mẽ ahkre xà hã
 ixkre hwÿr tẽ nê hwÿr axà. Hãmri nê kamã mẽ kot
 Tirtũm kapêr mar kaxyw axpên wÿr mẽ pikuprõnh
 xwÿnhjê jahkre ho nhÿ. ²² Nê mẽ ahkre mex nhũm mẽ
 kuma nê tee ri hamaxpêr nê axpên mã:

—Hêxta waa nê. Pêr ãm hãmri na ã mẽ pamã mẽmoj
 jarënh anê. Tirtũm kapêr tũm o mẽ ahkre xwÿnhjê
 rom àhpumunh tÿx kõt na hprĩ hã mẽ pajahkre mex
 nê. Anê.

²³ Hãmri nhũm mẽhõ myja mẽ hwÿr axà. Na pre ra
 mẽkarõmnuti hwÿr axà nhũm ÿ hã amnhĩ tomnuj o pa.
 Hãmri nê mẽ hwÿr axà nê Jejus pumu nê kãm kapêr.
 Nom tãm kapêr kêt nê. Mẽkarõmnuti nhÿ hã kãm
 kapêr. Kàx pê kãm kapêr nê kãm:

²⁴ —Pa Jejus? Kwa tanhmã mẽ ixto hkêt nê. Ixte
 apumunh mex. Apê Najare nhõ xwÿnh tã mãänën apê
 Tirtũm kot mẽ ixwÿr amênh xwÿnh maati na ka.
 Tirtũm rũm na ka pre mẽ ixwÿr wrÿ. Kwa xà kot kaj mẽ
 ixto ajapêx nà? Anê.

²⁵ Hãmri nhũm kãm:

—Tk. Kwa anhĩkrê nê myta kurũm akator kurê kum-
 rêx. Anê.

²⁶ Hãmri nhũm kuma nê àmra htÿx kãm myja o àk
 tÿx nê kêp nê ma tẽ nhũm akupÿm mex. ²⁷ Hãmri
 nhũm mẽ piitã omu nê kamã no puma nê. Hãmri nê
 xatã axpên mã harënh o pa nê axpên mã:

—Kokÿÿ. Jejus na pre àhpumunh tÿx kõt mẽkarõm-
 nuti jano nhũm kuma nê mẽ kurũm hapõx kurê kum-
 rêx. Anê.

²⁸ Hãmri nhũm Garirej kamã mẽ piitã ri axpên mã
 harënh o pa.

Jejus kot akupÿm Simãw xupãnhgêx o mex ã harënh

Matêwre 8.14-15; Rukre 4.38-39

²⁹ Tã nhũm Jejus Xiakre mẽ Juãw mẽrohã Tirtũm
 kapêr o mẽ ahkre xà hã ixkre rũm kato nê ma Simãw
 mẽ Andre wa õrkwÿ hwÿr mõ. ³⁰ Hãmri nê mẽ hwÿr
 agjê. Nhũm Simãw xupãnhgêxja ra à nê hkà kagro
 htÿx nê nõ nhũm Jejus mẽ hwÿr axà nhũm mẽ kãm
 harê. ³¹ Hãmri nhũm mẽ kuma nê hwÿr axà nê omu nê
 hpa hã kupy nê kãnhmã ÿr nhũm hkà hakry nê
 akupÿm mex kurê kumrêx. Hãmri nê kãnhmã xa nê tẽ
 nê mẽ kãm mẽmoj nhĩpêx nhũm mẽ hkur o hkrĩ.

Jejus kot akupÿm mẽ hkwÿjê ho mex ã harënh

Matêwre 8.16-17; Rukre 4.40-41

³² Tã nhũm myt axà nhũm mẽ ohtô nê Simãw mẽ An-
 dre wa õrkwÿ hwÿr mra nê hakwakrem Jejus ã akuprõ.
 Nê amnhĩ kõt mẽ à xwÿnhjê ho mra. Nê mẽkarõmnuti
 kot mẽ hwÿr gjêx xwÿnhjaja nhũm mẽ hwÿr mẽ o mra.
³⁴ Hãmri nhũm Jejus mẽ omu nê akupÿm àhpÿnhã mẽ
 piitã mẽ ho mex pa. Nê mẽkarõmnutija nhũm mẽ

kurŭm mẽ hapôj. Mëkarômnuti kot kêp Tirtŭm Kra hã omunh tã no nhŭm kapêr nê mẽ hkurê nê mẽ hano nhŭm mẽ kapêr kêt rãhã mẽ kurŭm hapôj nê ma mra.

Jejus kot Tirtŭm mã amnhĩ jarênh ã harênh

Rukre 4.42-44

³⁵ Tã nhŭm apkati nhŭm kormã myt kator kêt ri nhŭm Jejus kãnhmã nhỹ nê tẽ nê kato. Hãmri nê ma kapôt ã ahte nhỹhỹm tẽ nê nhỹri Tirtŭm mã amnhĩ jarênh o nhỹ.

³⁶ Hãmri nhŭm Simãw Pêtre mẽ hkwÿjaja hkrã hapôj nê tee ri ixkre kamã hapêr. Hãmri nê hapôj nê ma hpri jakop o mõ. ³⁷ Hãmri nê hwÿr kato nê omu nê kãm:

—Pa. Kwa na mẽ piitã tee ri ajapêr. Anê.

³⁸ Hãmri nhŭm mẽ kãm:

—Tô ma pu mẽ mõ. Nom kot puj mẽ akupÿm mẽ hwÿr pamôr kêt nê. Kot puj mẽ hpãnhã nhãm krĩ hkwÿ hkôt mãn ri pajapôj. Pa kamã mẽ kãm Tirtŭm kapêr jarê mãn. Ja kaxyw na pre mẽ awÿr inhmẽ. Krĩ piitã hkôt mẽ pa xwÿnhjaja kot kapêr mar kaxyw. Anê.

³⁹ Hãmri nê mẽ ma axte Garirej kamã krĩ hkwÿ hkôt pa. Nê krĩ piitã hkôt Tirtŭm kapêr o mẽ ahkre xà hã ixkre kamã mẽ kãm Tirtŭm kapêr jarênh o pa. Nê mẽ kurŭm mẽkarômnuti japôx o pa.

Jejus kot akupÿm mẽhõ hkãmnu ho mex ã harênh

Matêwre 8.1-4; Rukre 5.12-16

⁴⁰ Tã nhŭm mẽhõ hkã hkrõ xapêr tÿx xwÿnhja Jejus wÿr tẽ. Hãmri nê hã hpijaam kaxyw kutã hkônkrã ho tẽm nê nhỹ nê kãm:

—Pa Pahihti. E ot pa awÿr amnhĩ to tẽ. Akupÿm ate mẽ ixto mex kaxyw axãhpumunh tÿx jakamã kot ka akupÿm amã ixto mex prãm nê mãmri akupÿm ixto mex. Anê.

⁴¹ Hãmri nhŭm kuma nê kamã ukaprĩ nê hã ïhkra xi nê kãm:

—Nà kot paj ato mex. E akupÿm akà mex.

⁴² Anhÿrja kôt nhŭm akupÿm hkà mex kurê kumrêx.

⁴³ Hãmri nhŭm Jejus kãm kapêr kãm hihtÿx nê hano nê kãm:

—E kêr ka amnhĩ tã akwÿjê mã tanhmã ijarênh to hkêt rãhã ma patre hwÿr tẽ kê akupÿm akà mex ã apumu. Hãmri ka amnepêm Mojes kot mẽ ate akupÿm mẽ amex ã Tirtŭm mã tanhmã amnhĩ nhĩpêx to hã karõ xwÿnhja ka kãm ho anê. Kê mẽ piitã akupÿm akà mex ã apumu. Anê.

⁴⁵ Hãmri nhŭm kuma nê ma tẽ. Nom axtem nê ma mẽ piitã mẽ kãm amnhĩ jarênh o ri mra. Jejus kot kãm karõ xà kuhpa hã ma mẽ kãm amnhĩ jarênh o ri mra. Jakamã nhŭm mẽ kuma nê piitã nhỹhỹnh Jejus wÿr mra. Mẽ ohtô rax kumrêx nê hwÿr mra nhŭm tee ri mẽ noo mã nhỹri krĩm pa mã. Hãmri nê ãm krĩ pu hã ri pa htã nom nhŭm mẽ arĩ ohtô nê hwÿr mra.

Jejus kot akupÿm ã kamã htyk xwÿnh o mex ã harênh

Matêwre 9.1-8; Rukre 5.17-26; Juãw 10.37-38

2 Tã nhŭm Jejus hã apkati grêre nê hkôt mẽ pa ho mẽ pa xwÿnhjê mẽrohã ma akupÿm Kapanã wÿr

mõ. Hãmri nê hwÿr pøj nhŭm mẽ piitã nhỹri mẽhõ nhõrkwÿ kamã hpõx kôt harênh ma nê hã akuprõ. ² Ra hã pikuprõnh rax nê ixkre nhĩtom pa. Nhŭm mẽ hkwÿjaja kapôt ã kuhê nhŭm Jejus Tirtŭm kapêr o mẽ ahkre ho nhỹ. ³ Hãmri nhŭm mẽmyjaja kêp kwat nê ã kamã htyk xwÿnhja my nê Jejus kot ho mex kaxyw hwÿr o tẽ. ⁴ Hãmri nê tee ri hã mẽ pikuprõnh rax xwÿnhjê pumu nê nhỹhỹnh kot hwÿr o ãr kaxyw tee ri amnhĩ kukamã ho ukapi ho pa. Hãmri nê hamaxpêr nê ixkre nhĩmõk po hwÿr ho api nê himõk kwÿ grã nê hkôt ã kamã htyk xwÿnhja nør xà mẽrohã hkôt Jejus wÿr haxã. ⁵ Hãmri nhŭm mẽ kot kaxyw kãm hamaxpêr tÿx ã mẽ omu nê ã kamã htyk xwÿnhja mã kapêr nê kãm:

—Pa? Kwa tee ri amnhĩ kukamã ajamaxpêr kêt nê.

Na pa ra anê ate amnhĩ tomnuj piitã ho ijapêx. Kot paj axte kãm ijamaxpêr kêt nê. Anê.

⁶ Hãmri nhŭm Tirtŭm kapêr tũm o mẽ ahkre xwÿnhjaja tee ri ã kapêr anhÿrja ã kuma nê hamaxpêr o:

⁷ —Tk. Kwa pêr mẽhõ myti mÿj kêp Tirtŭm kêt tã te kapêr pyrãk o amnhĩ nhĩpêx nê mẽ nê mẽ kot amnhĩ tomnuj o hapêx ã amnhĩ jarê. Tirtŭm pix kot mẽ nê mẽ kot amnhĩ tomnuj o hapêx kênã. Anê.

⁸ Nom nhŭm Jejus mẽ hamaxpêr kôt mẽ omunh mex nê. Mẽ kot Tirtŭm pix kot mẽ nê mẽ kot amnhĩ tomnuj rênh nê akupÿm mẽ ã xwÿnhjê ho mex kôt mẽ hamaxpêrja nhŭm mẽ omunh mex nê mẽ kãm:

—Kwa mẽ ã ajamaxpêr anhÿr kêt nê. ⁹ Ixte mẽ nê mẽ kot amnhĩ tomnuj o ijapêx par ã amnhĩ jarênh tã mẽ ate mẽ ano ho ja kôt ixpumunh kêt jakamã na ka htem ja hã ixkôt ajamaxpêr kêt nê. Nom kot paj mẽ anoo mã akupÿm myja o mex. Ka mẽ ja hã ixpumu hãmri nê ixkôt ajamaxpêr kurê kumrêx. ¹⁰ Ixpê Tirtŭm kot mẽ awÿr inhmẽnh xwÿnh na pa. Ixte mẽ anê mẽ ate amnhĩ tomnuj rênh kaxyw na pre mẽ awÿr inhmẽ pa wÿr. Tã mẽ ate ja kôt ixpumunh kaxyw kot paj mẽ anoo mã mytija ho mex.

¹¹ Anhÿr o mẽ kãm kapêr hãmri nê ã kamã htyk xwÿnhja mã kapêr nê kãm:

—E kãnhmã xa nê anør xà my nê ma akupÿm anhõrkwÿ hwÿr tẽ. Anê.

¹² Hãmri nhŭm kuma nê kãnhmã ãm kurê kumrêx. Hãmri nê akupÿm mex ã amnhĩ pumu nê hkĩnh tÿx nê nør xà my nê mẽ noo mã kato nê ma akupÿm õrkwÿ hwÿr tẽ. Hãmri nhŭm mẽ kot omunh xwÿnhjaja amnhĩ jaêr pê omu nê no hapôx kaxyw nê hkôt omunh o kuhê nê kamã no puma htÿx nê. Nê tee ri omu nê axpên mã:

—Hêxta waa nê. Aa mẽ pahte ã mẽhõ kot amnhĩ nhĩpêx anhÿr ã omunh kêt kumrêx tã jarãhã ja pumu. Nà Tirtŭmja ãm mex o mex. Anê.

Jejus kot amnhĩ wÿr Rewi hwÿr ã harênh

Matêwre 9.9-13; Rukre 5.27-32

¹³ Hãmri nhŭm Jejus mẽ ma mra nê akupÿm gô rax pê Garirej wÿr mra nê gô my ri pa. Hãmri nhŭm mẽ piitã omu nê hwÿr mra nê hã akuprõ nhŭm Tirtŭm kapêr o mẽ ahkre ho nhỹ. ¹⁴ Hãmri nê mẽ kure nê axte hkôt mẽ pa ho mẽ pa xwÿnhjê mẽrohã ma axte mra nê

nhÿri Apew kra Rewija pumu. Rm km m õ pahihiti m amnh kwÿj p kxpore hkwÿ jamÿnh xwÿnh na pre. Jakam nhÿm pnh o nhÿ nhÿm Jejus hnh t n omu n amnh kt kuwÿ n km:

—Pa? E kwa axpnhhta kaga n hpnh amn m ixkt mn ri apa ho apa. An.

Hmri nhÿm kuma n pnh kaga n ma hkt m n hkt pa ho pa.

¹⁵ Hmri nhÿm mmo argro h nhÿm Rewi nh m apkur x h mõ rax n. Jakam nhÿm amnh nhrkwy hwÿr hkrmnhwÿjaja n Jejus m hkt m pa ho m pa xwÿnhj hwÿ. Hmri nhÿm m ma hkt mra n rkwy hwÿr agj n kuri apkur o hkr. N mnn m kp Rm nh pahi m m kp kxpore hkwÿ jamÿnh xwÿnh kwÿ n m oht n m kut apkur o hkr.

¹⁶ Hmri nhÿm Trtm kapr tm o m ahkre xwÿnh kwÿ p Parijew nh xwÿnhjaja mra n m apkur  m omu. N tee ri m hkax  Jejus pumu n hkt m pa ho m pa xwÿnhj hwÿr agj n h m km akir n m km:

—Kwa na htem m kot amnh tomnuj xwÿnhj kut apkur kt t ka m Jejus m apimrt axtem n m kut axpkur o akr. M ate amnh to mex ronhÿx ka m kut axpkur kt n. An.

¹⁷ Hmri nhÿm Jejus amnh t m kapr ma n m km:

—Tk. Ixte tm m unhwÿr kaxyw ixte m kut ixpkur o inhÿr kn. X na hte tt m mex xwÿnhj hwÿr mra n m hkane? N na hte m m  xwÿnhj pix kane ho pa. Ra m ate ja pumunh mex. Ja pyr n na pa pre m kot amnh to mex xwÿnhj hwÿr ixwÿrk kt n. m m kot amnh tomnuj xwÿnhj pix wÿr na pa pre wÿr. Ixte tm m unhwÿr kaxyw m hwÿr wÿr n jaj kut ixpkur o nhÿ. M ate amnh tomnuj m anhÿrer n hpnh tm amnh nhpx o apa kaxyw na pa pre m awÿr wÿr n m akam ixukapr ho ri m akt ixpa. T ka m atÿx  ixte m kut ixpkur anhÿrja  ixto akapr an. An.

M kot Trtm m amnh jarnh kaxyw mõ kaga h m harnh

Matwre 9.14-17; Rukre 5.33-39

¹⁸ Juw Paxis kt m pa xwÿnhj m Parijew nh xwÿnhjaja na prem th Trtm m amnh jarnh kaxyw n apkur kt rh kam km amnh jar. Nom nhÿm Jejus kt m pa ho m pa xwÿnhjaja na prem km amnh jarnh prm n apkur km amnh km amnh jarnh o pa. Jakam nhÿm Ijaew kwÿjaja tee ri ja h m omu n Jejus wÿr mra n m h hkukja n km:

—Pa? Kwa apr h m inhm mmoj jar. Na hte Parijew nh xwÿnhj m Juw Paxis kt m pa xwÿnhjaja th Trtm m amnh jarnh kaxyw n apkur kt rh km amnh jar. No akt m pa ho m pa xwÿnhjaja na htem mnhx apkur o pa kam km amnh jarnh o pa. Kwa mo na htem m urk n th apkur kt rh km amnh jarnh kt n? An.

¹⁹ Hmri nhÿm Jejus m km:

—Tk. Mo kaxyw kot m  amnh nhpx an? M hkapr hkt kn. M kot ixkt pa ho pa h amnh pumunh jakam na htem hknh n pa. Korm ixte m hkt ixpa kn kot kt m Trtm m kapr kaxyw n ho apkur kt kam km amnh jar. X na htem hkrmnhwÿ h hknh kaxyw h akupr n hkapr n apkur kt n mÿr o hkr? N na htem h akupr n hknh n apkur rnh n. Ja pyr n na hte ixkt m pa ho m pa xwÿnhjaja ixkt korm mnhx hknh n apkati m apkur km km amnh jarnh o pa. ²⁰ Nom kaja m km ixkur xwÿnhjaja nhÿrm tanhm ixto hmri nhÿm m r korm hkapr htÿx km ho apkur kt rh Trtm m amnh jar. An.

Nhÿm pre  Jejus m km hkt ri m pa ho m pa xwÿnhj jarnh an hmri n axte m km kapr n m km:

²¹ —M kot amnh tomnuj xwÿnhjaja m kot amnh nhpx tm o amnh pyrk jakam na htem m kot amnh nhpx nyw kaga. T ixte amnh nhpx nywja te kot m ate amnh nhpx tm pyrk kt jakam na ka htem inhma n m inhma. Kwa m inhma n m ate amnh nhpx tm gryk  ixkaga hkt n. An.

Jejus kp argromnu hpm  kot amnh jarnh

Matwre 12.1-8; Rukre 6.1-5

²³ T nhÿm m ixp Ijaew nh argromnu p sap kato nhÿm Jejus m hkt m pa ho m pa xwÿnhjaja ma nhÿhÿm m. Ma m hpur kahti hkt nhÿhÿm m nhÿm hkt m pa ho m pa xwÿnhjaja ra km prm n. Hmri n prm xj purta kam amnhm mmo hy te kot harj pyrk xwÿnhhta kwÿ r n ma Jejus kt hkanhar o m. M ixp Ijaewjaja na pa htem xpn pur km ixpa n  amnh nhpx an. ²⁴ Hmri nhÿm Parijew nh xwÿnhjaja m hkt mra n tee ri ja h m omu n Jejus wÿr mra n m h km akir n km:

—Kwa jarh sap t akt m pa ho m pa xwÿnhjaja mmo hy hkwÿ r n akt hkanhar o pa. Trtm kapr  kaga htm kot m panh argromnu h m pahte mmoj nhknh n m pahkur kn. Kwa m km an k m  amnh nhpx anhÿr kt n. An.

²⁵ Hmri nhÿm Jejus m kuma n hpr h m km Trtm kapr tm jar n m km:

—Kwa xn ka m korm Trtm kapr  kaga htm kam pahi Tawi kot tanhm amnh nhpx to kam harnh n mar kt n? Korm Apiatar kp patre maati ri na pre Tawi hkt ri m pa xwÿnhj m prm xj Trtm m amnh jarnh x h ixkre hwÿr agj. Hmri nhÿm Apiatar m km prm tÿx  m omu n m kam ukapr n m km mmoj g. M kot Trtm noo m pwti jaxwÿr xwÿnhhta nhÿm m km kug nhÿm m kuku. Trtm kapr  kaga htm kot ja n m kur ht nhÿm m km prm tÿx  m omu n m kam ukapr xj m km kug. Patre pix kot ja hkur kaxyw t nhÿm m km kug nhÿm m kuku. T nom nhÿm Trtm ja h m omu nhÿm ja kp omnuj kt n. Patre kot m kam ukapr n m km r nhÿm ja h omu nhÿm ja km mex n. An.

Hmri n m km:

²⁷ —Na pre Tirtüm panhí kumrëx o kato në kormä më hkôkôt në Tirtüm mã hamaxpër o hkrí kaxyw arí-gromnu ho kato. No na pre arí-gromnu kumrëx o kato në hpãnhã kaxyw panhí ho kator kêt në. ²⁸ Tã pa na pre Tirtüm më akaxyw ixãm në më awýr inhmë. Jakamã papxipix na pa hte arí-gromnu hã tanhmã më kot amnhí nhípëx to hã më kãm karõ ho ri ixpa. Jakamã kwär më mãmrí mëmojta rê në ixkôt hkanhar o mõ. Anë.

Jejus kot akupým ïhkra grà xwýnh o mex ã harënh

Matêwre 12.9-14; Rukre 6.6-11

3 Tã nhüm më ixpê Ijaewjê nhõ arí-gromnu pê sapja axte kato. Hãmri nhüm Jejus Tirtüm kapër o më ahkre xà hã ixkreja wýr tẽ në axà në kamã Tirtüm kapër o më ahkre ho nhý. Nhüm mëhõ my ïhkra grà xwýnhja më ïhkõ hã mar o nhý. ² Nhüm Parijew nhõ xwýnhjaja kãm më hkrãhtümjê mã Jejus o kapër prãm jakamã htãnopxar o kuhê në expën mã:

—E kwa pu më jar pakuhê në kot tanhmã amnhí nhípëx to hã omu. Xà koja jarãhã ïhkra grà xwýnh müj o mex nà? Jarãhã arí-gromnu kënë kot kêt kãm ïhkra ho mex. Koja ho anë në ra Tirtüm kapër tüm nhîrõp xa. E pu më xa në hã omu. Anë.

³ Hãmri nhüm Jejus ïhkra grà xwýnhnta pumu në kãm:

—Pa? E kãnhmã xa në amnë ixwýr tẽ. Anë.

Hãmri nhüm kãnhmã xa në hwýr tẽ në më piitã më noo mã xa. ⁴ Hãmri nhüm Jejus më kot omunh o hkrí xwýnhjê hwýr rít në arí-gromnu hã tanhmã më kot amnhí nhípëx to hã më hkukja në më kãm:

—E më inhma. Tanhmã na htem arí-gromnu hã axpën nhípëx to wehe? Xà kot ka më arí-gromnu hã axà htýx në amex prãm xà ma mëhõ hwýr amnhí to tẽ nhüm apumu në apkatim arígro mex jamãr pê akane hkêt ka ty nhüm ja amã mex në? Rý nhüm apumu në tanhmã atomnuj to në akupým amnhí në ajano nhüm ja amã mex në? Nà koja ã anhípëx anë nhüm ja amã mex kêt në. E më inhmã mëmoj jarë. Tanhmã na pre finat Mojesja Tirtüm nhý hã arí-gromnu hã më pahte axpën nhípëx ã më pamã karõ hto? Xà kot puj më hã axpën kãm paxukaprí rý hã më pamã axpën kurê ho papa? Xà kot puj më hã mëmoj punuj pê më utã rý kot puj më ãm arígro mex pix ã më utãr kaxyw arígro mex jamã? E më atõ inhmã ja jarë. Anë.

Ra kot hprí hã më hamaxpër ã më omunh mex në ã hêx rom më hkukjêr anë. Nom nhüm mëhõ tanhmã kutã kãm në hkêt në. Më ãm piitã akryk mar pê omunh o hkrí. Më kot tanhmã kãm në nhüm ta pãnhã tanhmã më kãm në pymaj nhüm më tee ri kãm tanhmã në hprãm nom akryk mar o hkrí. ⁵ Hãmri nhüm Jejus tee ri më ukaprí hkêt ã më omu në hkaprí në më kamã gryk në. Hãmri në ïhkra grà xwýnhja mã kãm:

—Tk. Më kot tanhmã inhmã ujarënh tore hã. E anhíhkra katàt. Anë.

Hãmri nhüm ïhkra katàt në akupým mex kurê kumrëx. ⁶ Hãmri nhüm Parijew nhõ xwýnhjaja tee ri ã Jejus kapër anhýrja ã kuma në kot sap ã akupým myta o

mex ã omu në kamã gryk týx në. Në hapõj në ma pahi Erox kôt më pa xwýnhjê hwýr mra në më kãm harë në tanhmã hã axpën kukjêr to në expën mã:

—Kwa tanhmã kot puj më ho? Na ã kapër anhýrja o më pahto kapër punuj në. Te hkínhã më papamjaja më kamã paxukaprí hkêt pyrãk ã më pajarë. Koja më pahkwýjaja kuma hãmri në më pahte amnhí nhípëx kaga në amnhí kaxyw hkôt pix mã hamaxpër o pa. Ja pymaj kwa tanhmã kot puj më ho? Anë.

Më ohtõ në kot Jejus kapër mar kaxyw hwýr mrrar ã më harënh

Matêwre 4.23-25; Rukre 6.17-19

⁷ Tã nhüm Jejus më hkôt më pa ho më pa xwýnhjê mërohã ma akupým gõ rax wýr mõ nhüm më ohtõ në omu në ma hkôt mra. Pyka pê Garirej më Jutej wa kurüm në krí pê Jerujarë rüm në pyka pê Itumêj rüm në pyhti pê Jotãw nhíkjê hã krí hkwy rüm në krí hkwy pê Xir më Sitõ wa pu hã krí hkwy rüm ohtõ në ma hwýr mra. Na prem ra harënh ma në nhýhým mõr ã omu në expën mã harënh o:

—E kwa tokyj pu më ma hwýr më à xwýnhjê o mõ kê akupým më ho mex. Anë.

Hãmri në hwýr më o mra në hã pikuprõnh rax në.

⁹ Hãmri nhüm Jejus akupým më à xwýnhjê ho mex. Gõ myri xa në tanhmã më ho mex to. Jakamã nhüm më axte ohtõ në hwýr mra në piitã kot htok në akupým mex kaxyw hwýr axpën nhígã. Hãmri nhüm tee ri amnhí wýr më omu në hkôt më pa ho më pa xwýnhjê mã:

—Kwa më ma mra në amnë kanõre jêt müj kjênh o tẽ në jar inhmã anhõ. Kê më ixtã axpën nhígãnh o ijanënh japër pa hwýr axà në amým më ho hpýnh në akupým më ho mex. Anë.

Hãmri nhüm më kuma në ma mra në kãm ja o tẽ në kunhõ. ¹¹ Na pre mëkarõmnuti hkwyjja më hkwyjê hwýr agjê. Jakamã nhüm më Jejus pumu në mëkarõmnuti nhý hã kêp Tirtüm Kra hã omunh kurê kumrëx. Hãmri në hã hpijaãm kaxyw kutã hkõnkrã ho hkrí në mëkarõmnuti nhý hã kãm kapër në kãm:

—Kwa apê Tirtüm Kra na ka. Anë.

¹² Hãmri nhüm tee ri amnhí tã më kuma. Kãm mëkarõmnuti ã kot harënh anhýr prãm kêt në. ãm më piitã më kot kapër mar në kot amnhí nhípëx ã omunh pê kêp Tirtüm Kra hã omunhja na kãm hprãm. Jakamã nhüm mëkarõmnuti ã harënh anë nhüm ja në më kãm kapër në më kãm:

—Tk kwa nà kêr ka më tanhmã ijarënh to hkêt në. Anë.

Jejus kot amnhí kaxyw më kêp 12 rënh ã harënh

Matêwre 10.1-4; Rukre 6.12-16

¹³ Tã nhüm Jejus hkôt më pa ho më pa xwýnh kwýjê mã kãm:

—E pu më ma mõ në krãhakýx müj ã api. Anë.

Hãmri në më ma hwýr mõ në hã api ¹⁴ nhüm Jejus amnhí kaxyw më ho 12 në më kurê. Më kot ma ý hã

Tirtüm kapër o më ahkre ¹⁵ në ý hã më në mëkarõm-nuti janor o pa kaxyw. ¹⁶ ã më hixi kot anhÿr.

Na pre ja kÛp Simãw no nhũm Jejus hpãnhã hã hixi hõ më nhũm hpãnhã mããnen kÛp Pêtre.

¹⁷ Nê hkõt Jepetew kra Xiakre më htõ Juãwja wa kuta. Hãmri nê kot Simãw nhĩpêx pyrã nê wa hã hixi hõ më nhũm wa hpãnhã mããnen kÛp Poanes. Wa kot amnhĩ prÛprÛk jakamã nhũm ã wa hã hixi mÛnh anÛ.

¹⁸ Nê hõ pÛ Andreja ta.

Nê hkõt Andre htõ Firitija ta.

Nê hkõt Patoromewja ta.

Nê hkõt MatÛwreja ta.

Nê hkõt Tomasja ta.

Nê hkõt ArpÛw kra Xiakreja ta.

Nê hkõt Tatewja ta.

Nê hkõt Simãw õja ta.

Simãwja na pre kãm më ixpÛ IjaewjÛ nhõ pika pÛ Ijaew kĩnh tÿx nÛ. Jakamã na pre kãm nhãm pika hõ nhõ pahi kot më ho amnhĩptãr prãm kÛt nÛ pa.

¹⁹ Nê hkõt Jut Kariotja ta.

Kormã kot më kãm Jejus kurÛ xwÿnhjÛ nhĩhkram õr mã nhũm Jejus kot amnhĩ kukamã omunh mex tã më hkõt amnhĩ kaxyw kuta.

Ã më kot ý hã më ahkre o pa kaxyw më rÛnh xwÿnhjÛ nhĩxi kot anhÿr.

Jejus më mëkarõmnuti wa harÛnh

MatÛwre 12.22-32; Rukre 11.14-23, 12.10; Juãw 10.19-21

²⁰ Hãmri nhũm Jejus hkõt më pa ho më pa xwÿnh kwÿjÛ rÛnh pa nÛ ma amnhĩ kõt mÛhõ nhõrkwy hwÿr më o mõ. Na prem apkur kÛt ry rax nÛ ra kãm prãm tÿx nÛ nhũm ma më apkur kaxyw amnhĩ kõt më o mõ. Hãmri nhũm axte më ã xwÿnhjaja më omu nÛ Jejus wÿr pikurõnh rax nhũm më tokyx apkur kÛt nÛ.

²¹ Hãmri nhũm Jejus katorxã nÛ htõjaja tee ri më apkur kÛt ã më harÛnh ma nÛ axpÛn më:

—Kwa mãn ãm ra tanhmã hkrã amnhĩ to nã? Hã na më kot omunh kaxyw hã hpikurõnh rax jakamã nhũm kormã apkur kÛt nÛ. E tokyx pu më ma hwÿr mra nÛ omu nÛ më kÛp utã nÛ akupÿn amnhĩ kõt o mõ. AnÛ.

²² Rõm nhũm Tirtüm kapÛr tũm o më ahkre xwÿnhjaja JerujarÛ rũm Jejus wÿr mõn põj. Hãmri nÛ tanhmã ho kapÛr punuj to. KÛp mëkarõmnuti hkwy hã hkamnhĩx jakamã harÛnh o:

—Tk pÛr hinhu nhĩkõõti nhÿ hã na hte më nÛ amnhĩ kwÿjÛ japõx o pa. AnÛ.

Hinhu nhĩkõõti nhĩxi hõ pÛ Satanasti nhũm prem ý hã Jejus kot amnhĩ nhĩpêx o pa hã hkamnhĩx. ²³ Hãmri nhũm amnhĩ tã më omu nÛ amnhĩ wÿr më kãm hpa ho apÛ nÛ më kãm amnhĩ jarÛ. Nom amnhĩ tã kuxi nÛ më kãm mëmoj jarÛ nÛ më kãm:

—Kwa më inhma më ate ixpÛ Satanasti hkwy hã ixkamnhĩx xwÿnhjaja. Xã na hte Satanasti më nÛ amnhĩ kwÿjÛ janor o pa? Nã na hte ã amnhĩ nhĩpêx anhÿr kÛt nÛ. ²⁴ Na hte pika nhõ xwÿnhjaja axpÛn kutã amnhĩ xunhwÿ nÛ axpu hãmri nÛ anhgrã nÛ ma ahpÿnhã ri

pa nÛ amnhĩ krã hkõt ri tanhmã amnhĩ to ho ri pa.

Jakamã nhũm më õ pahija më hamãr o pa hkÛt nÛ.

²⁵ Nê krĩ nhõ xwÿnhjaja haxwÿja. MÛ kot axpÛn to hkwy xwÿnhjaja koja mëmoj tã axpÛn kãm gryk nÛ axpÛn kutã amnhĩ xunhwÿ hãmri nÛ anhgrã nÛ ahpÿnhã pa hãmri nhũm më õ pahi tee ri kãm më hamãr o pa hprãm. Mo hkwyjaja kot kÛt ri më hamãr o pa? Nom tãm kot amnhĩ nÛ më hanoore hã. MÛ tãmjaja na prem axpÛn kãm gryk nÛ anhgrã nÛ ahpÿnhã pa. ²⁶ Tã ja pyrã nÛ ixte Satanasti nhÿ hã tanhmã amnhĩ nhĩpêx to ho ixpa ronhÿx pa ri më kurũm amnhĩ kwÿjÛ japõx o ri ixpa hkÛt nÛ. Mëkarõmnutijaja kÛp Satanasti hkwy kÛnã. Koja Satanasti ixte më kurũm më hapõx kaxyw tanhmã inhã nÛ hkÛt nÛ. ²⁷ ãhpumunh tÿx jakamã na hte më kot hkõt amnhĩ xunhwÿr xwÿnhjÛ pumunh tÿx o pa nhũm mÛhõ tee ri kÛp më utãr kaxyw. Tã ixãhpumunh tÿx o ixte hakrenh jakamã ixte kÛp më utãrja inhã tanhmã kute hkÛt. Na pa hte kÛp më utã nhũm më hpãnhã ixkõt amnhĩ nhĩpêx o pa nhũm Satanasti tee ri më hã ixpumunh o pa kaprÿ.

²⁸ —Ãm hãmri na pa më amã ixkapÛr. Kot kaj më tanhmã amnhĩ tomnuj to ho apa. NÛ amnhĩ tomnuj tÿx kumrÛx rãhã ho apa. Rÿ tanhmã akapÛr punuj to ho apa. Rÿ tanhmã Tirtüm o akapÛr punuj to ho apa. Tã tee ri ja hã amnhĩ pumu nÛ akaprÿ nÛ ã ate amnhĩ nhĩpêx anhÿrja kaga nÛ Tirtüm kõt amnhĩ xunhwÿ. Hãmri nhũm amnhĩ tã më apumu nÛ amnhĩ katut kõt më ate amnhĩ tomnuj nÛ më akapÛr punuj rÛnh pa nÛ axte kãm hamaxpÛr kÛt nÛ. Koja ho hapêx par kumrÛx. ²⁹ Nom koja Tirtüm Karõ xatã më amã ixto amnhĩrÿtã tã ka më ama nÛ ãm ama nÛ te kÛp amnhĩ jamak pro pyrãk o amnhĩ nhĩpêx. Jao Tirtüm Karõ hã apijaãm kÛt ã amnhĩ to amnhĩrÿt. Ja mÿrapÛ koja Tirtüm nhÿrmã amnhĩ xwar te më apÛ amnhĩ jamak pro pyrãk o më anhĩpêx ka më tee ri kãm amnhĩ kaprÿ kaprÿ. Hãmri nÛ më kot amnhĩ xã htÿx kamã hamak o pa htũm xã wÿr ma apa nÛ kamã apa rãhã apa ho apa. AnÛ.

³⁰ MÛ kot Satanasti nhÿ hã më nÛ mëkarõmnuti janor o pa hã hkamnhĩx jakamã nhũm pre Jejus ã më kãm kapÛr anÛ.

Jejus katorxã më htõjÛ jarÛnh

MatÛwre 12.46-50; Rukre 8.19-21; mããnen EprÛw 2.11-12

³¹ Rõm nhũm Jejus katorxã më htõjaja hwÿr mra no ãm kormã hwÿr gjÛx kÛt nÛ. MÛ kot hã htũ rax jakamã nhũm më tee ri hwÿr gjÛx kaxyw kormã kapõt ã kuhÛ. Hãmri nÛ më kot mar o kuhÛ xwÿnhjÛ hõ mã kapÛr nÛ kãm:

—Kwa ma tÛn Jejus mã më ijarÛ kÛ më ixwÿr kato. AnÛ.

³² Rõm nhũm ixkre kamã më hkrÿ xwÿnhjaja më omu nÛ Jejus mã më harÛ nÛ kãm:

—Kwa Pahihti. Ota akatorxã më atõjaja awÿr mra nÛ põj nÛ tee ri awÿr gjÛx mã nÛ kormã kapõt ã kuhÛ nÛ atã karõ. AnÛ.

³³ Hãmri nhũm më kuma nÛ më kãm:

—Tõe pa ixkato nÛ më omu. Inhã më hapÛ. Nom kot kaj më atõ Tirtüm kapÛr ma nÛ hkõt amnhĩ xãm nÛ

hkôt amnhĩ nhĩpêx. Hã kot kaj te apê ixtõ rý ixkatorxà kot amnhĩ nhĩpêx pyræk o pu mẽ axpên nhĩpêx. Pa te inhmã mẽ hapê pyrà nê inhmã mẽ ajapê nê. Anê.

Mëmo hy hkre xwýnh jarënh

Matêwre 13.1-9; Rukre 8.4-8

4 Tã nhũm Jejus axte gô jakà ã mẽ ahkre ho nhỹ. Hãmri nhũm mẽ axte hã htu rax jakamã nhũm tee ri mẽ omu hãmri nê pàr krem axà nê gôx kãm amým mẽ ahkre ho nhỹ. Nhũm mẽ piitã kýxpê omunh nê mar mex o kuhê. ² Hãmri nhũm mẽ ahkre ho nhỹ. Nom mẽ ujarënh pix kãm mẽ ahkre. Mẽ kot Tirtũm kapër mar nê tanhmã hkôt amnhĩ nhĩpêx to ho paja nhũm hã kuxi nê mẽ kãm hã ujarënh o nhỹ nê mẽ kãm:

³ —E mẽ inhma. Koja mēhõ ma pur mã mō nê pur kãm mẽmo hy ho ukapêr o pa nom nhũm hy piitã amex kãm rôrök kêt nê. Koja ahpýnhã rôrök. ⁴ Koja hkwy aptýx kãm rôrök nhũm kuwênhre omu nê hwýr mra nê hkrêr pa. ⁵ Nê koja kên kãm hkwy rôrök hãmri nê higrôt kutã nojarêt nê higrôt pa. Nom nhũm kamã aptýx nê kamã kêp pika hkryre jakamã nhũm higrôt nhũm hã myt apha nê arĩgro htýx mẽ nhũm grà pa. Harê hkryre jakamã grà pa. ⁷ Nê koja hkwy mrõnhĩ kamã rôrök nê higrôt tã no nhũm utĩja kêp amýtã nhũm ô hkêt nê.

⁸ —No koja hirã kamã pika mex kãm hkwy rôrök. Hãmri nê hirã kamã rôrök jakamã higrôt mex nê piitã ô rax nê. Kamã ô hkwy kêp 30 nê kamã hkwy kêp 60 nê kamã hkwy kêp 100. Æ mẽ ujarënh kot anhýr. ⁹ Kwa mẽ ama nê kãm ajamaxpêr týx rãhã ho ri apa. Anê.

Jejus kot hprĩ hã mẽmo hy jarënh

Matêwre 13.10-23; Rukre 8.9-15

¹⁰ Hãmri nhũm mẽ Jejus xujarënh mar pa nê anhgrã nê ma akupým mra nhũm hkôt mẽ pa ho pa xwýnh pê 12 mẽ hkwyjaja pix Jejus ri arĩk. Hãmri nê ujarënhã ã hkukja nê kãm:

—Kwa mon ka hte ã mẽ kãm axujarënh anê Pahihti? Na pa mẽ ixprĩ hã amar mex kêt nê. Anê.

¹¹ Hãmri nhũm mẽ kãm:

—Nà kot paj ixprĩ hã mẽ amã harê. Tirtũm kãm mẽ ate aprĩ hã mar prãm jakamã kot paj ixprĩ hã tanhmã mẽ amã harënh to. Nà mẽ kot amnhĩ tomnu kaga nhũm Tirtũm kot ja hã mẽ omunh xà hkôt mẽ ho hkra hã harënhja na pa hte mẽ kãm harê. No mũjjaja mẽ akĩnhã mẽ kãm mar prãm kêt jakamã na pa hte mẽ kãm mẽmoj tã haxwý nê awjarê nhũm mẽ ãm ixujarënh pix ma.

Na htem kuma nê ãm kuma nê htýx ri hã pa. No kêp apu mẽ kãm hprĩ hã mar prãm ronhýx mẽ ra hprĩ hã kuma nê Tirtũm kôt amnhĩ xunhwý nhũm amnhĩ tã mẽ omu nê mẽ kot amnhĩ tomnuj o hapêx. Nom mẽ kãm mar prãm kêt. Anê.

¹³ Tã mẽ ate aprĩ hã ixujarënhja mar mex kêt jakamã tanhmã kot kaj mẽ amnhĩ to nê ixujarënh piitã ama? E kot paj ixprĩ hã mẽ amã mẽmo hyta jarê ka mẽ inhma.

¹⁴ —Nà mẽmo hyta te kêp Tirtũm kapër pyræk. Nê ahpýnhã rôrök xà hã pikata te kêp ahpýnhã mẽ kot

Tirtũm kapër mar xwýnhjê kot mar nê ahpýnhã tanhmã amnhĩ nhĩpêx to pyræk. ¹⁵ Jakamã mẽ kot mar xwýnh kwýjaja hte kot aptýx kãm hkwy rôrök nhũm kuwênh kot hwýr mra nê hkrêr par xwýnhã pyræk. Jakamã na htem Tirtũm kapër ma nom nhũm Satanas-ti te kuwênh kot hy hkrêr parta pyræk o mẽ hipêx. Nê mẽ kot amnhĩ kaxyw hkôt hamaxpêr nê hkôt amnhĩ xunhwýr pymaj tanhmã nê mẽ hkrã hto. Jakamã nhũm mẽ Tirtũm kapër ma nom ho hamakêtkati tokyx anê nê axte kãm hamaxpêr kêt nê.

¹⁶ —Nê mẽ kot mar xwýnh kwýjaja te kot kênre kamã hkwy rôrök nê higrôt nhũm te hã myt apha nhũm grà par tokyx anhýr xwýnhã pyræk. Na htem Tirtũm kapër ma nê hkĩnh nê. Nê kãm mar prãm nê. Te hy higrôt tokyx anhýrta pyræk. ¹⁷ Tã nhũm mēhõ tē nê Tirtũm nê tanhmã mẽ kãm kapêr to nhũm mẽ kuma nê hkaga. Rý nhũm mẽ Tirtũm ã tanhmã mẽ homnuj to nhũm mẽ tee ri amnhĩ tã mẽ omu nê hkaga. Te mẽmo hy higrôt nê grà par tokyx anhýrta pyræk.

¹⁸ —Nê mẽ kot mar xwýnh kwýjaja te kot mrõnhĩ kamã hkwy rôrök nê higrôt nhũm mrõnhĩ kot kêp àm-nàr xwýnhã pyræk. Nê mẽ kãm Tirtũm kapêr mar prãm nê. ¹⁹ Nom mãänēn kãm hikukrêx rax nê hikàx-pore rax prãm jakamã ãm ja pix kukamã hamaxpêr o ri pa. Jao ra gryk ã axte Tirtũm kapêr mã hamaxpêr nê hkôt amnhĩ nhĩpêx kêt nê. Te mrõnhĩ kot higrôt pê àm-nàr nhũm ô hkêeta pyræk.

²⁰ —No mẽ kot mar xwýnh kwýjaja te hirã kamã pika mex kãm hy hkwy rôrök nê higrôt nê ô raxta pyræk. Na htem ixkapêr ma nê amnhĩ krã him hagjênh týx nê. Nê ixkôt ri amnhĩ nhĩpêx mex rãhã ho ri pa. Te mẽmo hy hkre kamã ô hkwyja kêp 30 nê kamã kêp 60 nê kamã kêp 100ta pyrã nê Tirtũm kapêr kôt amnhĩ nhĩpêx mex rãhã ho pa. E ãm ixujarënhja kot anhýr. Anê.

Kanê hpimxur ã harënh

Rukre 8.16-18, 8.24-25; Matêwre 13.10-15, 25.14-30

²¹ Nhũm Jejus arĩ hkôt mẽ pa ho pa xwýnhjê jahkre nê mẽ kãm:

—Xà na htem kanê hpök nê poti ho hpro rý hitom kãm par krak ri unhwý? Nà na htem hpök hãmri nê kýx pê mẽmoj nhĩmök ã unhwý. ²² Ja pyrã nê mẽ piitã kot hkwyjê pê tanhmã hamaxpêr punuj to ho hpimxur prãm tã tee ri kot ho hpimxur prãm kaprý. Koja nhýr-mã mẽ hamaxpêr piitã amnhĩ to amnhĩrĩt pa. Nê mẽmoj piitã ra hpimxur mex tã koja nhýrmã amnhĩ to amnhĩrĩt pa. Te mẽ kot kanê hpök nê kýx pê unhwýr nhũm amnhĩrĩt mex pyræk. Ja pyrã nê na pa hte Tirtũm kapêr o ri ixpimxur o ixpa hkêt nê. Na pa hte ixprĩ hã mẽ amã harënh mex o ixpa. ²³ Kwa mẽ ixujarënhja ma nê kãm ajamaxpêr týx rãhã ho ri apa. Anê.

Nhũm pre ã Jejus mẽ kãm kapêr anê. ²⁴ Hãmri nê mẽ kãm:

—Nê kêr ka mẽ axpên kãm axukaprí ho ri tanhmã axpên to mex to ho ri apa. Kêr kê Tirtũm ja hã mẽ apumu nê mẽ apyrã nê mẽ akamã ukaprí pê mẽ ato mex o pa. ²⁵ Koja mēhõ inhmã tanhmã amnhĩ nhĩpêx mex to pa ja hã omu nê kot inhmã àpênh mexta pãn-

hã ho mex nê. No koja inhmã àpênh mex kêt pa ja hã omu nê hã ho mex kêt nê.

—Nê koja mēhō kām ixkapēr mar prām nom kormã hprĩ hã mar mex kêt tã arĩ mar o pa nê gaa nê mar tỳx o mō. No koja kuma nê ãm kuma hãmri nê gaa nê hã no hkêt. Anê.

Pur kãm mēmo hy hkre xwỳnh jarēnh

Matêwre 13.24-30

²⁶ Nhũm Jejus arĩ hkôt mē pa ho mē pa xwỳnhjê jahkre ho nhỹ nê mē kãm:

—E pa mē amã tanhmã mē kot ixkapēr mar tỳx xwỳnhjê jarēnh to ka mē inhma. Koja mēhō ixkapēr mar tỳx nê ra hkôt ri amnhĩ nhĩpêx o pa. Hãmri nê hamaxpēr nyw o hamaxpēr o pa nê amnhĩ nhĩpêx nyw o amnhĩ nhĩpêx o pa. Te mē hpur kãm mēhō kot mēmo hy hkre xwỳnh kot amnhĩ nhĩpêx pyrãk. Na hte hyja kre ho pa. ²⁷ Hãmri nê hkre hpa nê kamãt mē ot o hikwỹ nê arĩgro mē mēmoj tã àpênh o pa. Rãhã nhũm mēmo hyja arĩ hikwỹ ho hikwỹ hkêt nê. Koja amnhĩ nhĩpêx õ ho amnhĩ nhĩpêx nê higrôt kato nê hprêk. Kre xwỳnh kot tanhmã kot amnhĩ nhĩpêx to hã omunh kêt tã nhũm kãm hprêk.

²⁸ —Na hte hpôm hapôx o pa nê higrôt o pyka kahte. Hãmri nê hprêk nê hô axpôt nê gaa nê hpãnhã ô. Hãmri nê hkamrêk pa nê xa. ²⁹ Hãmri nê mē kot hikênh mã mex nê nhũm kot hkre xwỳnh ta omu nê amnhĩm hamỳnh pa. Tã mē kot ixkapēr mar mex xwỳnhjaja te mēmo hy ra higrôt kator nê hprêk nê hô pipôt nê ô xwỳnh ta pyrãk. Nê urãk nê amnhĩ nhĩpêx õ ho amnhĩ nhĩpêx o pa. Anê.

Jejus te kot mēmo hy pyrãk ã kot amnhĩ jarēnh

Matêwre 13.31-32; Rukre 13.18-19

³⁰ Nhũm Jejus arĩ mē ahkre ho nhỹ nê mē kãm:

—Tĩrtũm kot mē awỳr ixte mē ato amnhĩptãr kaxyw inhmēnh ã jarēnhja. Te ixte mēmo hy pixire pyrãk. Koja mēhō mēmo hy hõ pixire nê hkre nhũm ra higrôt. Nê gaa nê hprêk. Hãmri nê hpa anhrã nhũm kuwēnhre hwỳr mra nê hõptĩ kamã amnhĩm haê nhĩpêx. Mēmo hyta grire htã nhũm hkre nhũm higrôt nê ã amnhĩ nhĩpêx anê. Tã kot paj nhỹrmã urã nê ixpyxi htã kot paj pika piitã hkôt mē ho amnhĩptã nê mē omunh mex rãhã ho ri ixpa. Anê.

—Na pre Jejusja hkôt mē pa ho mē pa xwỳnhjê mã amnhĩ tã kuxi nê ujarēnh anê. ³³ Mē kãm ujarēnh kãm mē ahkre ho pa. Te nhãm mēmoj jarēnh pyrã nê amnhĩ tã haxwỹ nê harê. Mē kot tanhmã mar to hã mē omunh xã hkôt tanhmã mē kãm ujarēnh to. ³⁴ Na pre ãm ujarēnh pix kãm mē kãm kapēr mar prãm kêt xwỳnhjê mã amnhĩ jarēnh rãhã ho pa. No mē kot hkôt pa ho pa xwỳnhjê mã nhũm hprĩ hã ujarēnh jarē nhũm mēhprĩ hã mar mex nê.

Jejus kot kôk o pinhkrênh ã harēnh

Matêwre 8.23-27; Rukre 8.22-25

³⁵ Tã nhũm amỹkry nhũm Jejus arĩ pãr kre kamã nhỹ. Hãmri nê hkôt mē pa ho mē pa xwỳnhjê mã kãm: “E

pu mē ma xarmã mō.” ³⁶ Anê hãmri nê mē kot mar o hkrĩ xwỳnhjê re nê pãr mã agjê nê ma xarmã mō. Garirej rũm kato nê ma xarmã pika hõ hwỳr mō. Nhũm pãr kwỳja ma mē hkôt mō. ³⁷ Nhũm Jejus ra otxwa nê tẽ nê pãr kre kamã hkrã japar xã hã hkrã xi nê ra ot tỳx nê nõ. Nhũm kôk àpêr tỳx nê nhũm gô kãnhmã harĩ nê axpên tak. Ra ri xatã axpên tak nê pãr kre kamã axkapĩ nhũm ra mē kêp àr o mō. Hãmri nhũm mē tee ri amnhĩ nhĩpêx nê tee ri amnhĩ kukamã hamaxpēr nê Jejus wỳr hprôt nê kumra nê kãm: —Kwa kãnhmã nhỹ Pahihti. Kot puj mē jarãhã pahtyk pa. Anê.

³⁹ Hãmri nhũm hkrãkato nê kãnhmã nhỹ nê kôk mē gôta pumu nê wa kãm kapēr o:

—E kwa wa anhĩkrê. Anê.

Hãmri nhũm gô mē kôk hpinhkrênh kurê kumrêx.

⁴⁰ Hãmri nhũm Jejus hkôt mē pa ho mē pa xwỳnhjê mã kãm:

—Hêxta waa nê. Kormã mē ate amnhĩ kaxyw Tĩrtũm mē wa inhmã ajamaxpēr tỳx kêt. Hã na ka mē ri amã ma nê tee ri amnhĩ kukamã ajamaxpēr. Anê.

⁴¹ Hãmri nhũm mē amnhĩ jaêr pê ã kot amnhĩ nhĩpêx anhỹr ã omu nê tee ri axpên pumunh pê omunh o kuhê. Hãmri nê axpên mã:

—Kokỹỹ. Jejus kêp mē panhĩõ hkêt. Mē pahtõ kot pu te kot amnhĩ nhĩpêx pyrã nê kôk mã pakapēr nhũm anhĩkrê? Nã mē pakurom àhpumunh tỳx o àhpumunh tỳx. Anê.

Jejus kot mēhō nê mēkarõmnuti janor ã jarēnh

Matêwre 8.28-33; Rukre 8.26-34

5 Tã nhũm Jejus mē hkôt mē pa ho mē pa xwỳnhjê mērohã mō nê xarmã Geras wỳr pøj. ² Hãmri nê pãr rũm hapøj nhũm mēhō myja Jejus pumu nê hwỳr tẽ. Mēkarõmnuti kot hwỳr àr nhũm y hã oprê htỳx kumrêx. Hãmri nê hkwỳjê hkàx ã kapôt ã mē hã pika kamã ri hkênh nê pa ho pa. Nhũm mē xatã kàx o hte hpre nê hpa hpre htã no nhũm kurê. ⁵ Nê kamãt kãm nê arĩgro hã àmra htỳx o mrrar pê kên o amnhĩ tak o mra. Mē hã pyka kamã nê kapôt ã hixêt ã amnhĩ tak tỳx rãhã ho mra. ⁶ Tã amỹm Jejus pumu nê hwỳr hprôt nê hã hpiaam kaxyw kutã hkôn krã ho tēm nê hparpê nhỹ. ⁷ Hãmri nhũm omu nê nê mēkarõmnuti mã kapēr nê kãm:

—Kwa kurũm akato nê ma tẽ. Anê.

Hãmri nhũm kuma nê tanhmã myta o nhũm tãm mēkarõmnuti nhỹ hã Jejus mã kapēr nê àmra kamã kãm:

—Pa Tĩrtũm Kra Jejus? Mo kaxyw na ka ixwỳr tẽ? Kwa tanhmã ixto hkêt nê nà?

⁹ Anê nhũm kãm:

—Tanhmã na anhĩxi te? Anê.

Nhũm kãm:

—Nã ixpê Mēohtõhti. Mēkarõmnuti ohtõ nê kot ixwỳr gjêx jakamã na htem ã inhĩxi jarēnh anê. Kwa nê mē ijanor kêt nê nà? Anê.

¹¹ Hãmri nhũm mēkarõmnuti tãm amnhĩ to kuwỹ nê kãm:

—Kwa kêr ka jahti nê mê ijapôx japêr nê mê kot amnhî xà htÿx kamã hamak o mê pa htÿm xàta wÿr mê ixrênh kêt nê. Hagrô hkwy mÿj wÿr mãn mê ixrê pa mê hpãnhã hwÿr mãn hagjê? Anê.

¹³ Hãmri nhÿm mê kãm:

—Tôe. Mê tãm hwÿr mra. Anê.

Hãmri nhÿm mëmyta pê hapôx pa nê ma hagrô hwÿr mra kurê kumrêx nê mê kãm gjêx pa nhÿm myja akupÿm tãm hkrã. No nhÿm hagrôja mëkarômnuti pymaj amÿra nê axkahkÿm nê hprôt nê himô hã krã hixêt ã axpum rôrôk nê gôx kãm mrô nê hpikaprãr pa. Ohtô rax kumrêx. Kêp 2.000 tã hpikaprãr pa. ¹⁴ Hãmri nhÿm hagrô jamãr o ri mê pa xwÿnhjaja tee ri ja hã omu nê ma mê ô patrãw wÿr akupÿm mê piitã mê kãm harênh o hprôt nê mra. Hãmri nê mê kãm ujarênh pa. ¹⁵ Nhÿm mê tee ri mê kuma nê ma Jejus wÿr mra nê hkaxpa nê kuri myta pumu. Nhÿm ra akupÿm tãm hkrã nê ã kamã tãm amnhî nhÿpêx nê nhÿ. Nhÿm mê kot hã omunh xwÿnhjaja mê kãm ujarênh pa nhÿm mê kuma nê myta pumu hãmri nê tee ri amnhî kukamã hamaxpêr o kãm Jejus puma nê. ¹⁷ Hãmri nê amnhî nê kãm kapêr nê kãm:

—Kwa mëmo kaxyw na ka mê ixwÿr rê? Mê ma akupÿm amrar tokyx anê. Anê.

¹⁸ Hãmri nhÿm mê kuma nê akupÿm pãr wÿr agjê nhÿm akupÿm mex xwÿnhhta tee ri ja hã mê omu nê mê hkôt hkrã. ¹⁹ No nhÿm Jejus kãm:

—Nà kot kaj mê ixkôt amôr kêt nê. Ma akupÿm anhô krÿ hwÿr mãn tã nê mê kãm Tirtÿm kot akupÿm ato mex ã amnhî jarênh o ri mê hkôt apa. Anê.

²⁰ Hãmri nhÿm kuma nê ma akupÿm tã. Hãmri nê ô pyka pê Tekap kãm mê kãm Jejus kot tanhmã ho mex to hã harênh ri mê hkôt pa nhÿm mê amnhî jaêr pê kuma nê tee ri hkukamã hamaxpêr.

Jejus kot akupÿm mëhõ ho mex nê akupÿm mëhõ ho htÿr ã harênh

Matêwre 9.18-26; Rukre 8.40-56

²¹ Tã nhÿm Jejus mê hkôt mê pa ho pa xwÿnhjê mërohã akupÿm xarmã mô nê rê. Hãmri nê pãr nhô nê api nê gô mÿri kuhê nhÿm pika nhô xwÿnhjaja Jejus pumu nê hã pikuprônh rax nê. ²² Hãmri nhÿm mëhõ my pê Jajtija hwÿr tã nê kutã hkônkrã ho htêm nê nhÿ. Kêp Tirtÿm kapêr o mê ahkre xà hã ixkre jamãr xwÿnh maati na pre. Nhÿm hkra nija kêp à htÿx nê htyk kaxyw nê nô. Kormã nyw. Kormã hã amgrã pê 12 pix tã ra kêp htyk kaxyw. Hãmri nhÿm Jajtija tee ri hkukamã hamaxpêr nê ma Jejus wÿr tã nê hpar pê hkôn krã ho tãm nê ho hwÿr kãm hihtÿx nê kãm:

—Pa akupÿm mê ixto mex xwÿnh maati. E awÿr na pa tã. Na ra ixkra ixpê htyk kaxyw. Pa tee ri omu nê kaxyw amã ijamaxpêr nê awÿr tã. Jakamã kwa ma ixkôt inhôrkwy hwÿr tã nê inhmã omu nê hã anhÿkra xi nê akupÿm inhmã ho mex. Anê.

²⁴ Hãmri nhÿm kuma nê ma hkôt tã. Nhÿm mê ohtô nê axpên nhÿgãnh nê axpên kujahêk o wa hkôt mra.

²⁵ Nhÿm mëhõ nija haxwÿja wa hkôt tã. Na pre hte hkamrô hkryre rãhã ho pa hã ra hã amgrã kêp 12.

²⁶ Nê tôtô mã amnhîrer rax nê nhÿm mê tee ri kot ho mex kaxyw nom xatã hkane kaprÿ. Hãmri nhÿm ra hikãxpore kêp hapêx nhÿm arÿ ãm rãhã nê pa. ²⁷ Hãmri nê tee ri amnhî kukamã hamaxpêr nê Jejus jarênh ma nê hamaxpêr o:

—Ma kot paj ma hwÿr tã nê kêp ê pix kupênh tã akupÿm inhmex japêr. Ma kot paj ho anê.

Anhÿr o hamaxpêr hãmri nê ma mê hkôt hwÿr htêm kurê kumrêx. Nhÿm mê ohtô raxja kaêx ã mê hkôt hwÿr tã. Hãmri nê katut kôt kêp ê nhÿrê kupê. ²⁹ ãm ê pix kupênh tã akupÿm mex ã amnhî pumunh kurê kumrêx. ³⁰ Hãmri nhÿm Jejus kot kêp ê kupênh ã amnhî tã omu nê hêx rom xa nê mê ho hakêx nê amnhî tã mê kãm kapêr nê mê kãm:

—Kwa mê atô na ka ri amnhî kaxyw inhmã ajamaxpêr tÿx pê ixpê ixê kupê? Anê.

Hãmri nhÿm mê piitã kuma nê tee ri axpên pumu nê kãm amnhî tã aprã. ³¹ Hãmri nhÿm hkôt mê pa ho pa xwÿnhjaja kãm:

—Mê kot apê amnãr griã kot ka kêt ri mëhõ kot apê hkupênh xwÿnh ã ri mê hkukja. Kwa mãn ãm mëhõ amarÿ apê hkupê. Anê.

³² Hãmri nhÿm mê kãm:

—Nà na amarÿ ixpê hkupênh kêt nê. Na amnhî kaxyw inhmã hamaxpêr tÿx pê ixpê hkupê. Tã na ixãhpumunh tÿx xà ho akupÿm mex. Nom ra ixte mëhõ kot ixpê hkupênh xwÿnhhta pumunh jakamã na pa ixêx rom ã amnhî tã ri mê hkukjêr anê. E kwa mê atô inhmã amnhî jarê. Anê.

³³ Hãmri nhÿm nija kuma nê tee ri kêp kot amnhî to hpimxur prãm. Hãmri nê hpijaãm nê hwÿr htetet o tã nê kutã hkôn krã ho tãm nê nhÿ nê kãm amnhî jarê nê kãm:

—Ma pa na pa inhmã inhmex prãm xàj apê axê kupê. Tã na pa akupÿm inhmex. Anê.

³⁴ Hãmri nhÿm kuma nê kãm:

—Tÿ. Nà ate amnhî kaxyw inhmã ajamaxpêr tÿx kôt ã ate amnhî nhÿpêx anhÿr jakamã na ka akupÿm amex. Kot kaj axte akamrô rãhã ho ri apa hkêt nê. E mãmri ajamakêtkati nê ma akupÿm anhôrkwy hwÿr tã. Anê.

Hãmri nhÿm kuma nê hkÿnh nê ma akupÿm tã.

³⁵ Rôm nhÿm Jajti mã mê àpênh xwÿnhjaja ôrkwy rÿm ma ô patrãw kutã mra nê wa hkaxpa nê Jajti mã kãm:

—Kwa na ra akra apê ty. Mo kaxyw kot ka kêt amnhî kôt Jejus o mô? Kwãr mãmri ma akupÿm awjanã nê tã. Anê.

³⁶ Hãmri nhÿm Jejus mê kuma nê Jajti mã kãm:

—Kwa tee ri akra hkukamã ajamaxpêr kêt nê. ãm kaxyw inhmã mãn ajamaxpêr tÿx rãhã nê. Anê.

³⁷ Hãmri nhÿm mê axte mô nê mê ôrkwy hwÿr pôj nê mê omu. Nhÿm mê ra hã hturax nê mÿr o hkrÿ. Hãmri nhÿm Jejus mê hwÿr axà nê mê omu nê kot mê hkra htyk kumrêx ã omunh tã mê kãm:

—Kwa mê hãmri amÿr kêt nê. Na nireta htyk kêt nê. Na ãm gôr nê nô. Anê.

Hãmri nhÿm mê kot ra htyk ã omunh mex jakamã kuma nê ãm kuma nê axtem nê ri axpên mã hã hpêr o

axkë. Hāmri nhūm Jejus mē hanor pa nē hitom kām htyk xwŷnh wŷr àr kaxyw nē amnhī kōt Juāw nē Xiakre nē Simāw Pêtre nē kaxyw htyk xwŷnh katorxà nē hipêêxà pix amnhī kōt mē ho axà. ⁴¹ Hāmri nē htyk xwŷnhhta wŷr tē nē hpa hā kupy nē kām kapēr nē kām: —Pa? E kwa kànhmā nhŷ. Anē.

Nom amnhī kapēr kām harē nē kām:

—Tarit kūm. Anē.

⁴² Hāmri nhūm kànhmā ŷr kurē kumrēx nē kànhmā xa nē ri mra. Na pre ra hprêk nē ty. Na ra hā amgrā kēp 12 tā ty nhūm Jejus akupŷm ho htīr nē kànhmā ŷr nhūm kànhmā xa nē ri mra. ⁴³ Hāmri nhūm kuri omunh xwŷnhjaja amnhī jaēr pē omu nē kamā no py-ma nē hkīnh tŷx kumrēx. Hāmri nhūm Jejus katorxà mē hipêêxàja wa kām:

—E mǎn ra kām prām nē. Wa tokyx kām mēmoj japēr kē kukrē. Nom kêr ka wa inhmar kumrēx. Kêr ka wa akupŷm ixte ho htīr ā ri mē kām ijarēnh o ri apa hkêt nē. Ām kwarī ho kwarī. Anē.

Najare nhō xwŷnhjaja kot Jejus kaga hā mē harēnh

Matêwre 13.53-58; Rukre 4.16-30; Juāw 1.11

6 Tā nhūm Jejus ma ò krī pē Najare hwŷr ma akupŷm mō nhūm hkôt mē pa ho mē pa xwŷnhjaja ma hkôt mō. ² Hāmri nē hwŷr pōj. Nhūm mē ò arī-gromnu pē sap kator jakamā nhūm Jejus ma Tīrtūm kapēr o mē ahkre xà hā ixkre hwŷr tē. Hāmri nē kamā mē ahkre ho nhŷ nhūm mē amnhī jaēr pē kapēr mex ā kuma nē tee ri axpēn pumunh pē hamaxpēr o hkrī. Jejus kēp mē hkwy hā hkamnhīx nom nhūm mē kurom àhpumunh tŷx nē kapēr mex jakamā nhūm mē kuma nē tee ri hamaxpēr o hkrī. Hāmri nē axpēn mǎ:

³ —Kwa kēp mē panhīō htā tanhmā kot we amnhī to nē ā àhpumunh tŷx kōt mē pamā kapēr anē nē ri mē kām aa mē kot mēmoj pumunh kêt kwŷ ho anhŷr o pa? Mē panoo mǎ na pre hprêk. Kēp pī kuprār xwŷnh Juje mē hprō Marir wa hkra na. Nē htō Xiakre nē Juje nē Simāw nē Jutja ra mē pahte mē kēp htō hā omunh mex. Nē htōxjaja jar mē pakamā pa nhūm mē pahte mē omunh mex kēnā kot kêt we mē kurom ā àhpumunh tŷx anē. Anē.

Anhŷr o axpēn mǎ harē. Hāmri nē kamā gryk nē hka-ga ⁴ nhūm tee ri amnhī tā mē omu nē hamaxpēr o:

—Hêxta waa nē. Mē kām amnhī kaxyw ixkôt hamaxpēr prām kêt kumrēx. Anē.

Hāmri nē mē kām:

—Nà Tīrtūm nhŷ hā kapēr jarēnh o mē pa xwŷnhjaja na htem krī hkwy kamā kām mē mar prām nē. Nom ò krī kamā mē kot karàre rūm hprêk o mōr kām omunh xwŷnhjaja na htem kuma nē ām kuma. Anē.

Hāmri nhūm mē kot amnhī kaxyw hkôt hamaxpēr kêt jakamā nhūm tee ri mē kām aa mē kot mēmoj pumunh kêt kwŷ ho anhŷr rax prām kaprŷ. Nē ām mē à xwŷnhjê ho grêre nē mē hā thkra jaxwŷ nē akupŷm mē ho mex. Hāmri nē mē kurūm kato nē ma krī hkwy hkôt ri Tīrtūm kapēr o mē ahkre ho pa.

Jejus kot mēmoj tā mē kēp 12jê mǎ karō hā harēnh

Matêwre 10.5-15; Rukre 9.1-6, 10.1-12; mǎānēn Atre 13.50-51, 18.6

⁷ Tā nhūm Jejus amnhī wŷr mē kot ŷ hā mē ahkre ho pa xwŷnh pē 12jê hwŷ. Ra kot amnhī kaxyw mē rēnh xwŷnhhtaja nhūm amnhī wŷr mē kuwŷ. Hāmri nē axpēn kaxyw mē ho axkrut nē mē kurē nē mē kām mē àpēnh ā karō nē ma mē hkwyjê hwŷr mē kurē. Nē mē kām:

—E kêr ka mē ma mē pahkwŷjê hwŷr mra nē inhŷ hā Tīrtūm kapēr jarēnh o ri mē hkôt apa. Nē mē kurūm mēkarōmnuti japōx o ri mē hkôt apa. ⁸ Nom kêr ka mē amnhī kōt akukrēx rax nē ri apa hkêt nē. Nē kawà htu nē ho ri apa hkêt nē. Nē amnhī kōt axàpkur xà ho ri apa hkêt nē. Rŷ akàxpore rax nē ri ho apa hkêt nē. Ām mē anhō Kamis nē mē apar kà ho pixire nē agjê nē ri hā apa. Nē mē amnhī kaxpar xà hā mē anhō kō pix o apa. Mē ā anhŷ kamā mē hkôt ri apa anē.

¹⁰ —Nē kêr ka mē nhŷri krī hō hwŷr pōj. Nē apōx xà kamā mēhō nhōrkwŷ kamā hkôt ri apikamēnh tām-tā kurūm akupŷm ajapōj nē ma hpānhā nhām krī hō hwŷr apa. Nom atŷx ri nhām mē hwŷr amrar nē nhām mē hwŷr amrar kêt nē.

¹¹ —Nē koja mē nhŷri mē akapēr kaga ka mē tee ri amnhī tā mē kamā ama hāmri nē tokyx mē kurūm ajapōj nē ma apa. Nē anojarēt nē mē noo mǎ akuhê nē amnhī par ā awjagrō kapī. Mē kot Tīrtūm kaga hā amnhī pumunh nhūm kot amnhī pyrā nē mē hkaga hā omunh kaxyw ka mē ā mē noo mǎ amnhī nhīpêx anē. Hāmri nē hpānhā ma nhŷhŷm apa.

¹² Anhŷr o mē kām mē àpēnh ā karō. Nhūm mē kuma nē hapōj nē ma mē hkwyjê hkôt pa. Ma krī piitā hkôt Tīrtūm kapēr o mē ahkre ho ri mē hkôt pa nē mē kām:

—E kwa mē tokyx amā ate amnhī tomnuj kaga hprām xàj Tīrtūm kōt mǎn amnhī xunhwŷ. Anē.

¹³ Hāmri nē mē nē mēkarōmnuti jano. Nē akupŷm mē à xwŷnhjê ho mex kaxyw mēmo htwŷm o mē hkrā gregrer nē Jejus nhŷ hā akupŷm mē ho mex.

Mē kot Juāw Paxis pīr ā mē harēnh

Matêwre 14.1-12; Rukre 9.7-9

¹⁴ Tā nhūm mē piitā Jejus jarēnh ma nē axpēn mǎ tanhmā harēnh to ho pa. Nom ahpŷnhā tanhmā harēnh to. Na prem kamā harēnh o:

—Nà Juāw Paxis pimrààta na. Pēr akupŷm htīr jakamā na hte ā mē kot aa mēmoj pumunh kêt kwŷ ho anhŷr o pa. Anē.

¹⁵ Nē kamā axtem harēnh o:

—Nà tām kêt. Pēr finat Eris na. Anē.

Nē kamā axtem harēnh o:

—Nà tām kêt. Pēr Tīrtūm nhŷ hā kapēr jarēnh xwŷnhjê hō na. Te kot amnepê mǎ mē kot Tīrtūm nhŷ hā tanhmā amnhī nhīpêx to xwŷnhjê kot amnhī nhīpêx pyrāk o kot amnhī nhīpêx kēnā.

Anhŷr o ahpŷnhā harē. ¹⁶ Hāmri nhūm Ijaew o amnhīptār xwŷnh pē Eroxx āxipasja mē kot ā harēnh anhŷr ā mē kuma nē Juāw Paxis mǎ hamaxpēr kurē kumrēx. Hāmri nē mē kām:

—Nà pēr Juāw Paxista na. Ixte mē kām hā ixàmnēnh nhūm mē kot inhmā mut krāhyr xwýnhhta mǎn ra tanhmā amnhī to nē akupým htír. Anē.

¹⁷ Na pre ra pahi Erox āxipasja htō Pirip pē hprō Eroxis pytā nē ho hprō nhūm hkra niti mē wa hwýr ahpa. Hāmri nhūm Juāw Paxisja tee ri ja hā pahihtī Erox āxipasja pumu nē hā kām akir nē kām:

—Tk. Kwa Tirtūm kēp ja omnuj. Ra kot ja nē mē pahkurē htā ka axtem nē ā amnhī nhīpēx anē.

Anhýr jakamā nhūm hprō Eroxisja amnhī tā kuma nē kamā gryk týx nē. Nē kām hpír prām nē. No nhūm pahi Erox āxipas kām hpír prām kēt nē. Juāw Paxis kot Tirtūm kōt amnhī nhīpēx nhūm kot hā omunh mex jakamā kām hpír prām kēt nē. Juāw na pre hte xatā kām Tirtūm kapēr jarēnh o pa. Nhūm pahihtī Erox āxipasja kormā hpír hā mar mex kēt tā hā hpijaàm nē kām mar prām nē. Nom nhūm hprō kām hpír prām jakamā nhūm kēp mē kām hā amýnē nhūm mē ma o tē nē haxà nhūm mex nē mē hagjēnh xà kamā hkrī ho krī.

²¹ Tā nhūm jāā nhūm pahi Erox āxipas kator ā arīgro kato nhūm mē piitā hwýr mra nē hā akuprō nē hā hkīnh nē hā apkur o hkrī. Ō kōwenatōjaja nē hkrāmn-hwýjaja nē krī hkwy kamā mēō pahijaja nhūm mē ohtō nē hā akuprō nē hā hkīnh. Hāmri nhūm hprō Eroxis kra nitija mē hwýr axà nē mē kām gre. Mē kot omunh nē kamā hkurē pix kaxyw mē noo mā hpijaàm kēt nē ā mē kām gre anē. Hāmri nhūm pahi Erox omu nhūm ja kām mex nē nhūm mē piitā hkīnh nē kamā nopyma nē. Nē gre kām hpijaàm kēt nē tanhmā mē kām gre to nhūm mē omu nē kamā no pyma nē. Hāmri nhūm pahi Erox āxipasja kām:

—Nà ām hāmri. Na ka mē inhmā agrer mex nē. Jakamā kwa māmri mēmoj tā ixwý. Amā mēmoj prām xà hkōt inhmā mēmoj jarē pa amā kugō. Ām hāmri na pa amā amnhī jarē. Na pa Tirtūm noo mā ā amā amnhī jarēnh anē. Ka mamri ixkukrēx mex kwý hā ixwý pu axpēn mā ho axkjē. E mēmo na amā hprām? Anē.

Hāmri nhūm kuma nē ma katorxà hwýr tē nē kām harē nē kām:

—Xē mēmoj tā kot paj we kuwý? Anē.

Hāmri nhūm kuma nē hamaxpēr o:

—Ma ām hāmri koja mē tā jarāhā inhmā Juāw Paxis pī. Anē.

Hāmri nē hkrata mā kām:

—Ma Juāw Paxis krā hā kot kaj awý kē mē amā kugō ka man ixwýr o tē. Anē.

²⁵ Hāmri nhūm kuma nē akupým pahi hwýr axà nē kām:

—Ma Juāw Paxis krā kot kaj inhmā agō. Pasiiti kamā axà nē inhmā agō pa ma amnhīm o ixtēm kurē kumrēx. Ām ja pix na inhmā hprām. Anē.

²⁶ Hāmri nhūm tee ri kuma nē hkaprī nē. Nē hamaxpēr o:

—Hēxta waa nē. Inhmā hpír prām kēt. Nom ra ixte ixkutā mē hkrī xwýnhjē noo mā inhmā kām mēmoj prām xwýnh nhōr ā amnhī jarēnh nhūm ixte kām ōr ā amnhī jarēnh nhūm mē piitā mē kot inhmar jakamā

tanhmā kot pa we amnhī to nē kēp nē? Nà pa nē hkēt nē. Anē.

²⁷ Hāmri nē ō pōristijē mā kām:

—E mē ma Juāw Paxis wýr mra nē mut krāhta nē pasiiti kamā hkrā xà nē akupým o tē nē kām agō. Anē.

Hāmri nhūm mē kuma nē ma mē hagjēnh xà hwýr mra nē Juāw wýr axà hāmri nē mut krāhta. ²⁸ Hāmri nē pasiiti kamā hkrā xà nē akupým o tē nē kot hā hwýr xwýnh mā kugō nhūm kumý nē ma katorxà hwýr o tē nē kām kugō.

²⁹ Hāmri nhūm Juāw Paxis kōt mē pa ho mē pa xwýnh-jaja tee ri harēnh ma nē hkaprī htýx nē. Hāmri nē pahi Erox āxipas wýr mra nē ĩ hā kuwý nhūm mē kām kugō nhūm mē kumý nē ma o mra nē kēn kre kamā haxà.

Jejus kot mē ho 5.000 nē mē kām ō hā harēnh

Matēwre 14.13-21; Rukre 9.10-17; Juāw 6.1-14

³⁰ Tā hāmri nhūm mē kot Jejus nhý hā mē ahkre ho mē pa xwýnhjaja akupým Jejus wýr mōn pōj nē kām amnhī jarē. Tanhmā mē kot mē ahkre hto ho pa nē tanhmā mē ho mex to ho pa hā kām amnhī jarēnh pa.

³¹ Tā nhūm mē piitā axpēn pānhā kot Jejus mar kaxyw mē hwýr mra nhūm mē kormā apkur kēt nē. Jakamā nhūm Jejus hkōt mē pa ho mē pa xwýnhjē mā: —E ma pu mē awrā kaprý hwýr mō nē nhýri pahkrī nē pakōkōt nē apku.

³² Anē hāmri nhūm mē gōx kām kanōre wýr agjē nē ma ahte xarmā awrā kaprý hwýr mō. ³³ Nhūm krī hkwy nhō xwýnhjaja mē omu hāmri nē nhýhým mē mōr xà hā mē omunh kurē kumrēx. Hāmri nē krī hkwy rūm ma mē ĩhkrep mra nē mē kām amnhī to wa nē pōj nē mē kutēp hkrī. ³⁴ Hāmri nhūm mē mō nē mē hwýr pōj nē kre kura nē kanōre nhō. Hāmri nhūm Jejus mē hwýr api nē mē omu nē hamaxpēr o:

—Hēxta waa nē. Na mē omnu nē pa. Te mē kēp ōwēhti jamār xwýnh kēt nē htýx ri pa xwýnh kot amnhī nhīpēx pyrāk. Mēhō kot mē kamā ukaprī nē tanhmā mē ho mex to ho pa? Anē.

Hāmri nē mē kamā ukaprī nē xa nē Tirtūm kapēr o mē ahkre rax nē.

³⁵ Tā nhūm myt àr kaxyw nhūm hkōt mē kot pa ho pa xwýnhjaja hwýr mra nē kām:

—Kwa hāmri na ra amýkry htýx nē. Mē hano kē mē ma nhýri krī hkwy hwýr mra nē tokyx amnhīm mēmoj japrō nē kuku nē hikwý nē gōr. Mo jar kapōt ā mē apkur xà? Anē.

³⁷ Hāmri nhūm mē kuma nē mē kām:

—Kwa nà mē kamjaja mē kām mēmoj gō kē mē kuku. Anē.

Hāmri nhūm mē kuma nē tee ri hamaxpēr nē kām:

—Kwa mo mē kaxyw mē pakàxpore rax? Kot pu mē pakàxpore ho 200 nē ho mē kām mēmoj japrōr tā nom nhūm mē ām ho hkryre nē kuku nē ho ōhy htu hkēt nē. Mē ohtō rax kumrēx kēnā. Anē.

³⁸ Hāmri nhūm mē kām:

—Nà kot puj më kãm mëmoj japrôr kêt në. No më panhõ pãwtita? Tanhmã na arí kute? E më atõ tẽ në omu në akupÿn tẽ në inhmã harẽ. Anẽ.

Hãmri nhũm ja ma tẽ në omu në akupÿn tẽ në kãm:

—Nà pãwti ãm kęp 5 pix. Nẽ kaxyw tep ãm pi-jakrutre. Anẽ.

³⁹ Hãmri nhũm Jejus kuma në më kãm:

—Tõe. Mẽ kãm anẽ kê mẽ ahpÿnhã ri hije në hkrĩ. Anẽ.

⁴⁰ Hãmri nhũm mẽ piitã ahpÿnhã kęp 50 në hije në hkrĩ hpa.

⁴¹ Nhũm Jejus pãwti mẽ tepta jamÿ në kãnhmã kaxk-wa hwÿr rít në Tirtũm mã kupẽ në kãm harẽ në kãm:

—Pa Papaj? Nà ka na apẽ mẽ inhmã mẽ inhõ ho apa xwÿnh jakamã amex o amex. Anẽ.

Hãmri në mẽ kãm ho hkry hpa në hkõt mẽ pa ho mẽ pa xwÿnhjẽ mã kugõ nhũm mẽ ô ri ho mra në ho mẽ hipêx pa. Pãwti mẽ tepta nhũm mẽ ho mẽ hipêx pa.

⁴² Nhũm mẽ piitã apkur mex në. Mẽõja mẽ kęp grire htã nhũm Jejus tanhmã mẽ kãm ho rax to nhũm mẽ ohtõ rax tã piitã kuku në ho õhy htu hpa. Mẽmyjaja kęp 5.000 në kaxyw mẽ hprõ në mẽ hkrajaja nhũm mẽõja ho mẽ hipêx pa nhũm arí hakrêx prã. Jakamã nhũm Jejus kõt mẽ pa ho mẽ pa xwÿnhjaja akupÿm hakrêx o pikuprõnh pa në ho kawà o 12 në ho nÿt.

Jejus kot gõ krãhkã hã htẽm ã harẽnh

Matêwre 14.22-33; Juãw 6.15-21

⁴⁵ Tã nhũm Jejus hkõt mẽ pa ho mẽ pa xwÿnhjẽ mã kãm:

—E mẽ kanõre mã axà në ma akupÿm ixkukamã krĩ pẽ Petsěj wÿr rê. Pa jajẽ jano hãmri në ma tẽ në nhÿri Tirtũm mã amnhĩ jarẽ në rĩ ma mẽ akõt tẽ. Anẽ.

Hãmri nhũm mẽ kuma në kanõre mã gjêx pa në ma mã nhũm Jejus mẽ kot mar xwÿnhjẽ janor pa në ma hixêt prêk ã api në Tirtũm mã amnhĩ jarẽnh o nhÿ.

⁴⁷ Tã nhũm kamàt nhũm arí ahte kýxpẽ nhÿ. Nhũm hkõt mẽ pa ho mẽ pa xwÿnhjaja kormã kanõre kamã mã. ⁴⁸ Hãmri nhũm Jejus amÿm mẽ omu nhũm kôk ra mẽ kutã àpêr tÿx kumrêx nhũm mẽ tee ri amnhĩ nhĩpêx në tee ri rrẽmti ho gõ rẽnh nhĩpêx o hkrĩ.

Tã nhũm ra krãhyre kã nhũm Jejus Tirtũm mã amnhĩ jarẽnh pa në kãnhmã xa në ma mẽ hkõt tẽ. Nom kanõre kamã htẽm kêt në gõ krãhkã hã xa në mẽ hwÿr hpar o tẽ. ⁴⁹ Hãmri në mẽ hwÿr kato në mẽ kamã hamak kaxyw hêx rom kot mẽ hakrenh mã. Nhũm mẽ amnhĩ wÿr omu në mẽkarõ hã hkamnhĩx në tee ri amnhĩ kukamã hamaxpêr në umaj httertet në àmra rax në. Hãmri nhũm mẽ kãm:

—Tk. Kwa mẽ amã ma hkêt në. Pa na pa mẽ akõt tẽ. Anẽ.

⁵¹ Hãmri në mẽ hwÿr kanõre hkrem axà nhũm kôk xapêr tÿxta hapêx. Hãmri nhũm mẽ Jejus kamã no py-ma në tee ri hamaxpêr në axpẽn mã:

—Kokÿÿ. Tanhmã na we amnhĩ to në gõ krãhkã hã hpar o man mẽ pahkõt tẽ mẽ pahwÿr àr mẽ nhũm kôk hapêx par kurẽ kumrêx. Anẽ.

Hãmri në tee ri kot ã amnhĩ nhĩpêx anhÿrja kukamã hamaxpêr o hkrĩ. ⁵² Kormã mẽ kot hprĩ hã Jejus tanhmã kute hã omunh kêt jakamã. Tirtũm pyrã në àh-pumunh o àhpumunh ã omunh mex kêt jakamã tee ri pãwti grêre ho mẽ hipêx par në gõ krãhkã hã htẽm në kôk o pinhkrênh ã omu në tee ri ã kot amnhĩ nhĩpêx anhÿrja kukamã hamaxpêr.

Kenẽjare kamã Jejus kot akupÿm mẽ ho mex ã harẽnh

Matêwre 14.34-36

⁵³ Tã nhũm mẽ xarmã rê në krĩ pẽ Jenẽjare hwÿr pøj. Hãmri në kanõre nhõ ⁵⁴ në api në kuhẽ nhũm krĩ nhõ xwÿnhjaja Jejus pumunh kurẽ kumrêx në axpẽn mã:

—Kwa pêr Jejusta na mõi. Nà tãm kênã. Anẽ.

⁵⁵ Hãmri në hkĩnh në ma kape hã mẽ à xwÿnhjẽ hkõt mmar kurẽ kumrêx në mẽ harir xà rãhã mẽ hamÿ në akupÿm Jejus wÿr mẽ o mra. Nhÿri hpõx xà kamã omu në hwÿr mẽ o mra.

⁵⁶ Na pre htem ã Jejus nhĩpêx anẽ. Jakamã nhũm hte ma nhÿhÿm mra. Krĩ rũnh kõt mra në krĩ hkryre hkõt mra nhũm mẽ omu në hwÿr mẽ à xwÿnhjẽ ho mra në mẽ ho kuwÿ në kãm:

—Pa? Kwa kê jajaja akupÿm mex kaxyw apẽ axê pix kupẽ nã? Anẽ.

Hãmri nhũm mẽ kãm:

—Tõe. Nà kwãr mẽ mãmri hkupê. Anẽ.

Hãmri në mẽ kot kęp ê kupênh xwÿnh piitã akupÿm mex pa.

Mẽ higêt hkõt mẽ kot amnhĩ nhĩpêx xwÿnhjẽ jarẽnh

Matêwre 5.21-48, 15.1-20

7 Tã nhũm Mojes kapêr o mẽ ahkre o mẽ pa xwÿnh kwÿjaja Jerujarẽ rũm Jejus wÿr mõi. Hãmri në hã akuprõ në hkõt mẽ pa ho mẽ pa xwÿnhjẽ kot amnhĩ nhĩpêx ã mẽ omunh o kuhẽ. Ijaew na prem mẽ hkukamã mẽ higêtjẽ kapêr kõt ri tanhmã amnhĩ nhĩpêx to ho pa. Jakamã mẽ urak në apkur kaxyw në xatã amnhĩ nhĩhkra kuhõnh japjẽ në rĩ kormã apku. No mẽ amnhĩ nhĩhkra grã pix kuhõnh në hkrĩ në apkur kêt në. Kuhõnh japjẽ në kormã hkrĩ në apku. Tirtũm kot ja hã mẽ omunh në amnhĩm mẽ mex ã mẽ harẽnh ã amnhĩ kamnhĩx jakamã na prem ã amnhĩ nhĩpêx anhÿr o pa. Nẽ nhÿri amnhĩm mẽõ hkwÿ japrõ në akupÿm òrkwÿ hwÿr o mra në haxwÿ në mẽ higêt pyrã në wÿr japjẽ rũnh kumrêx në rĩ kormã apku. Nẽ mẽ urak në poti në gõj në papêre hkre kahõnh japjẽ rũnh në rĩ kormã kamã õ nhĩpêx. Mẽ higêt pyrã në ã amnhĩ nhĩpêx anhÿr o pa. Tirtũm kot ja hã mẽ omunh në amnhĩm mẽ mex ã mẽ harẽnh prãm xaj. Nom nhũm Jejus kõt mẽ pa xwÿnhjaja na prem ã amnhĩ nhĩpêx anhÿr kêt në. Na prem apkur kaxyw në katã kõt amnhĩ nhĩhkra kuhõnh në àmnhĩx apkur o hkrĩ. Jakamã nhũm Parijew nhõ xwÿnh mẽ Tirtũm kapêr tũm o mẽ ahkre xwÿnhjaja tee ri ã mẽ kot amnhĩ nhĩpêx anhÿr ã mẽ omu në mẽ hã Jejus kukja në kãm:

⁵ —Pa Jejus? Kwa mẽ inhmã mẽmoj jarẽ. Amnepêm mẽ panhĩgêtjaja na pre htem apkur kaxyw në amnhĩ nhĩhkra kuhõnh japjẽ rũnh kumrêx në arí kormã hkrĩn

apku. Jakamã na pa htem mẽ uràk nẽ ã amnhĩ nhĩpêx anẽ. No akõt mẽ pa ho mẽ pa xwỳnhjaja na htem ho mẽ ixpyrà kêt nẽ. Kwa mo na htem ã amnhĩ nhĩpêx anhỹr kêt nẽ? Anẽ.

⁶ Hãmri nhũm mẽ kuma nẽ mẽ kãm amnepêm Tirtũm nhỹ hã kapêr xwỳnh pẽ Ijais kapêr jarẽ nẽ mẽ kãm:

—Nà ãm hãmri na pre finat Ijaisja amnepêm tanhmã mẽ ajarênh to. Te Tirtũm tãm kapêr pyràk o mẽ ajarẽ nẽ mẽ ajarênh o:

Mẽ kãm ixkĩnh ã amnhĩ jarênh tã mẽ kãm ixkĩnh kêt. Na htem ãm kãm ixprãm ã amnhĩ jarênh kaprỹ.

⁷ Mẽ kot ixkapêr kuhpa hã amnhĩ krã hkõt mẽmoj tã hkwỳjê mã karõ ho pa jakamã na htem ãm kot ixkõt amnhĩ nhĩpêx ã amnhĩ jarênh kaprỹ. Anẽ.

Á na pre mẽ ajarênh anẽ. ⁸ ãm hãmri na pre mẽ ajarẽ. Na ka htem mẽ panhĩgêt kapêr kõt pix mã amnhĩ nhĩpêx o apaja gryk ã ra Tirtũm kapêr kaga hpa. Te mẽ akapêr mex o kot Tirtũm kapêr jakrenh pyràk. ¹⁰ Na pre finat Mojes Tirtũm nhỹ hã mẽmoj tã mẽ pamã karõ ho:

Ker ka mẽ anhĩpêxà nẽ mẽ akatorxà wa hã apijaàm o ri apa. Jao wa kutã anojarêt rãhã nẽ. Nom kot kaj mẽ ho mex hkêt nẽ tanhmã mẽ kãm akapêr punuj to hãmri nhũm mẽ akwỳjaja ja mỳrapê mẽ apa. Anẽ.

Na pre ã finat Mojesja Tirtũm nhỹ hã mẽ pamã karõ anẽ. ¹¹ No mẽ kajaja na ka mẽ axtem nẽ tanhmã akwỳjê mã ja hã karõ hto nẽ mẽ kãm: “Kot kaj mẽ mẽmo arĩgro hã akàxpore hkwỳ nom anhĩpêxà ho ajuta kaxyw kãm hkwỳ nhõr kêt nẽ. Ám wa kãm ate ho ajuta kêt ã amnhĩ jarẽ hãmri nẽ Tirtũm mã amnhĩ jarênh xà hã ixkre hwỳr mãn o tẽ nẽ mẽ ixte ixkre ho mex kaxyw mẽ inhmã agõ. Kot kaj mẽ ã amnhĩ nhĩpêx anẽ nhũm Tirtũm ja hã mẽ apumu nhũm ja kãm mex nẽ. E kêr ka mẽ ã amnhĩ nhĩpêx anhỹr o ri apa.” Anhỹr o na ka htem akwỳjê mã karõ. ¹² Jao mẽ kot mẽ hipêxà nẽ mẽ katorxà ho ajuta nẽ mẽ hkurê. ¹³ Te mẽ amã mẽ panhĩgêt kapêr mex o kot Tirtũm kapêr jakrenh pyràk o na ka htem amnhĩ nhĩpêx. Jao te Tirtũm kapêr mex kêt pyràk o hipêx nẽ mar kêt nẽ apa. Á na ka htem Tirtũm kapêr kuhpa hã amnhĩ nhĩpêx anhỹr o ri apa. Anẽ.

Mẽ pajamxpêr punuj kõt mẽ pahomnu hã harênh

Matêwre 15.10-20

¹⁴ Tã nhũm Jejus Parijew nhõ xwỳnhjê mẽ hkwỳjê mã kapêr pa hãmri nẽ amnhĩ wỳr ra mẽ kot mar o kuhê xwỳnhjê mã hpa ho apê nẽ mẽ kãm:

—E pa mẽ amã mẽmoj jarẽ ka mẽ inhma nẽ inhmar mex nẽ. ¹⁵ Na hte Tirtũm kapêr tũm o mẽ ahkre xwỳnhjaja amnhĩ krã hkõt mẽ ate amnhĩ nhĩkra kuhõnh japjê hã mẽ amã karõ ho pa. Nẽ amnhĩ krã hkõt mẽ axàpkur xà hã tanhmã mẽ amã karõ hto ho pa. Mẽ ate ã amnhĩ nhĩpêx anhỹr nhũm Tirtũm kot ja hã mẽ apumunh kõt amnhĩm mẽ amex ã mẽ ajarênh kaxyw nhũm htem ã mẽmoj tã mẽ amã karõ anẽ. Nom na hte Tirtũm tanhmã mẽ panhĩkra kuhõnh to hã mẽ pahpumu nẽ ãm hã mẽ pa hpumu. Nẽ mẽmo mẽ paxàpkur xà hã mẽ pahpumu nẽ ãm hã mẽ pahpumu. Ja

kãm tanhmã kute hkêt. Na hte ja hã mẽ omunh xà hkõt amnhĩm mẽ mex ã mẽ harênh rỳ mẽ mex kêt ã mẽ harênh kêt nẽ. Rỳ mẽ hakwa ho mẽmoj kur ã mẽ omunh xà hkõt tanhmã mẽ harênh to hkêt nẽ. Ám mẽ hakwa ho tanhmã kapêr to pix ã mẽ mar kõt na hte tanhmã mẽ harênh to.

Anhỹr o mẽ kãm kapêr. ¹⁷ Hãmri nẽ mẽ kot mar o kuhê xwỳnhjê re nẽ hkõt mẽ pa ho mẽ pa xwỳnhjê mẽ mẽ amnhĩm hikranh xà hã ixkre hwỳr agjê. Hãmri nhũm hkõt mẽ pa ho mẽ pa xwỳnhjaja tee ri Jejus kot tanhmã mẽ hakwa jarênh to hã kuma nẽ hã hkukja nẽ kãm:

—Kwa mon ka ri mẽ inhmã ã ja jarênh anẽ? Anẽ.

¹⁸ Hãmri nhũm mẽ kãm:

—Kwa xàn ka mẽ kormã aprĩ hã ja mar mex kêt nẽ? E pa ixprĩ hã mẽ amã harê ka mẽ inhma. Nà mẽ apkur xà na hte mẽ hkrã hi kamã mẽ hamaxpêr wỳr gjêx kêt nẽ. ¹⁹ Na hte ãm mẽ õhy pix wỳr agjê nẽ gaa nẽ nhãm hapõj nẽ hapêx. Na htem mẽ apkur xà nhỹ hã tanhmã amnhĩ tomnu to hkêt nẽ. Jakamã na hte Tirtũm mẽ apkur xà hã mẽ omunh xà hkõt tanhmã mẽ harênh to hkêt nẽ. Anẽ.

Nhũm pre ã mẽ kãm kapêr anhỹr o mẽ paxàpkur xà piitã mex ã harê. Jakamã na hte Tirtũm krajaja ãmnhĩx mẽmoj piitã hkur o pa nẽ kãm mẽmoj kur puma hkêt nẽ. Jakamã nhũm Jejus ã mẽ kãm kapêr anẽ nẽ mẽ kãm:

²⁰ —Mẽ hkrã hi kamã mẽ hamaxpêr punuj pix nhỹ hã na htem tanhmã amnhĩ tomnuj to. Jakamã na hte Tirtũm tanhmã mẽ hamaxpêr to ho pa hã mẽ omunh xà hkõt tanhmã mẽ harênh to. Nom mẽ kot mẽmoj kur ã mẽ omunh xà hkõt rỳ mẽ ãhkra kuhõnh japjê hã mẽ omunh xà hkõt tanhmã mẽ harênh to hkêt nẽ. Ja tanhmã kêp kute hkêt. ²¹ Nom koja mẽhõ hamaxpêr punuj nẽ ra hkõt tanhmã amnhĩ tomnuj to.

Jao axpên kamã hpijaàm kêt nẽ.

Rỳ mẽhõx pĩ rỳ mẽ kêp ahkĩ.

Rỳ mẽ kêp mẽ hprõ rỳ mẽhkuprỹ ho amnhĩkati.

Rỳ ri axpên pẽ õxỳ.

Rỳ tanhmã hkwỳjê homnuj to.

Rỳ tanhmã mẽ ho kapêr punuj to.

Rỳ hêx rom mẽ no kupyro o ri pa.

Rỳ mẽmoj tã amnhĩ to jarkrar o pa.

Rỳ axpên kukrêx pumu nẽ kãm ho õ hprãm xàj hã õ xwỳnhhta kamã gryk.

Rỳ htỳx ri tanhmã amnhĩ nhĩpêx to.

Mẽ hamaxpêr punuj jakamã na htem ã ri amnhĩ nhĩpêx anhỹr o pa. ²³ Tã ã mẽ kot amnhĩ nhĩpêx anhỹr ã mẽ omunh xà hkõt na hte Tirtũm mẽ kot amnhĩ tomnuj xwỳnh hã mẽ harê. Anẽ.

Mẽhõ kot hkra kaxyw Jejus mã hamaxpêr ã harênh

Matêwre 5.21-28

²⁴ Tã nhũm Jejus mẽ hkõt mẽ pa ho mẽ pa xwỳnhjaja nhỹhỹm nojarêt hãmri nẽ krĩ rũm hapõj nẽ ma krĩ pẽ Xir pu hã ri pa. Hãmri nhũm Jejus hkwỳjê mã:

—E kwa pu mẽ tokyx ixkre mũj wỳr mỗ mẽ kuri põj nẽ kamã amnhĩm hikra. Pu mẽ pahpõx tokyx anẽ kê

krí nhõ xwýnhjaja mẽ pahpôx ã mẽ pahpumunh kêt nê.

Anhÿr tã nom nhũm mẽ piitã mẽ harênh ma nê mẽ hã akuprõ. ²⁵ Nhũm mẽhõ ni haxwýja Jejus hpôx ã harênh ma nê ma hwýr tẽ. Nom kêp Ijaew kêt axtem Gres nhõ xwýnh na pre. Pika pê Sir kamã krí mẽ kot kãm “Wēnīs” anhÿr xwýnh kamã na pre kato. Nhũm pre mẽkarõmnuti kêp hkra ni mã axà. Hãmri nhũm õ mãmãj tee ri omu nê ra Jejus hpôx ã harênh ma nê ma hwýr tẽ. Hãmri nê hwýr axà nê hparpê hkõnkrã ho htẽm nê nhÿ nê kãm:

—Xê Pahihti. Inhmã ixkra nê mẽkarõmnuti jano kê ma tẽ kê akupým inhmã mex. Anẽ.

²⁷ Hãmri nhũm kãm:

—Nà kormã. Na pre Tirtũm taxy kormã Ijaewjê pix wýr inhmẽ. Jakamã na pa kormã nhãm mẽ akwýjê hõ tanhmã mẽ ato mex to hkêt nê. Anẽ.

²⁸ Hãmri nhũm tee ri amnhĩ tã kuma nê kãm:

—Ma ãm hãmri na ka ja jarẽ. Ixpê Ijaew kêt tã nom mẽ kuxwar we ixto mex grire kêt wehe. Anẽ.

²⁹ Hãmri nhũm kãm:

—Nà ãm hãmri na ka ã akra kaxyw inhmã ajamaxpêr tÿx anẽ. Jakamã kot paj nê mẽkarõmnutita jano. Kojaxte tanhmã apê ho hkêt nê. E ma akupým hwýr tẽ nê omu. Anẽ.

³⁰ Hãmri nhũm kuma nê ma akupým õrkwý hwýr tẽ nê omu. Nhũm ra mẽkarõmnutija kêp kato nê ma tẽ nhũm akupým tãm hkrã nê hkĩnh nê par kãm hkõkõt o nõ.

Hamak kro nê kapêr krok xwýnh jarênh

Matêwre 15.29-31

³¹ Tã nhũm Jejus mẽ hkõt mẽ pa ho mẽ pa xwýnhjaja krí pê Xir rũm hapôj nê akupým gô rax pê Garirej wýr ma mra. Pyka pê Sitõ jakre nê mõ nê pyka pê Tekap jakre. ³² Hãmri nê kormã hpôx o mõr rôm nhũm mẽ amnhĩ wýr Jejus pumu nê hwýr mẽhõ myja o tẽ. Kapêr krok nê umar kêt xwýnhhta nhũm mẽ wýr o tẽ nê kãm:

—Pa? Ot pa mẽ awýr ixkrãmnhwýta o tẽ. Kwa hã anhĩkra xi kê akupým mẽ inhmã mex. Anẽ.

³³ Hãmri nhũm omu nê hpa hã kupy nê mẽ kêp o kato nê nhÿri mẽ hkàx ã o xa. Nê akutã hamak kre kupê nê argôx mẽ nê ho õhto htok. ³⁴ Hãmri nê kaxkwa hwýr rít nê htyk xà mẽnh tÿx nê kãm kapêr. Mẽ pakapêr kãm kãm: “E ajamak katêr nê anhõhto kaxkrit.” Anẽ. Nom kapêr kãm kãm: “Epata.” Anẽ.

³⁵ Hãmri nhũm hamak katêr nê õhto kaxkrit kurê kumrêx nê tãm kapêr nê tãm ama. ³⁶ Hãmri nhũm mẽ kot omunh xwýnhjaja amnhĩ jaêr pê Jejus kot ho mex ã omu nê kamã no puma nê. Hãmri nhũm mẽ kãm:

—Kwa kêr ka mẽ akwýjê mã ja hã ijarênh kêt nê.

Anhÿr tã no nhũm mẽ kuma nê ãm kuma nê ma mẽ piitã mẽ kãm harênh o ri hprõt nê mẽ kãm:

—Kwa Jejus na mex o mex. Na hte mẽ ho mex o pa nhũm mẽ umar kêt xwýnhjaja akupým tãm ama nhũm mẽ kapêr kêt xwýnhjaja akupým tãm kapêr. ãm hãmri na hte ã mẽ hipêx anhÿr o pa. Nà ãm mex o mex. Anẽ.

Jejus kot mẽ ho 4.000 nê mẽ kãm mẽ õ hã harênh

Matêwre 15.32-39

8 Tã nhũm arĩgro hõ hã nhũm mẽ ohtõ nê nhÿri kapõt ã Jejus ã htu rax nê kot mẽ ahkre mar o kuhê hã apkati axkrunêpxi. Nhũm mẽ apkur xà hã mẽõja ra mẽ kêp hapêx. Hãmri nhũm Jejus ja hã mẽ omu hãmri nê hkõt mẽ pa ho mẽ pa xwýnhjê mã akir nê mẽ kãm hpa ho apê nê mẽ kãm:

—E mẽ amnê ixwýr mra nê ixkapêr ma. Anẽ.

Nhũm mẽ hwýr mra nê kuhê nhũm mẽ kãm:

—Kwa na pa inhmã mẽ kot inhmar o kuhê xwýnhjê kaprĩ nê. Na mẽ ra mẽ pahkõt ri pa hã apkati axkrunêpxi nhũm mẽ apkur xà hã mẽõja mẽ kêp hapêx. ³ Mẽ õ krí hwýr awry jakamã koja mẽ mẽmoj kur kêt rãhã ma akupým pa hãmri nê pry hã hirot nê rôrôk o pa. Hãmri pa inhmã mẽ hkaprĩ nê. Anẽ

⁴ Hãmri nhũm mẽ kuma nê axte tee ri hamaxpêr nê kãm:

—Kwa nà nhÿhÿnh kot puj kêt mẽ kãm mẽmoj to mra? Jar ãm kapõt pix kênã. Anẽ.

Hãmri nhũm mẽ kãm:

⁵ —Nà tanhmã na mẽ anhõ pãwtija kute? Anẽ.

Nhũm mẽ kãm:

—ãm kêp 7 pix. Nê kaxyw tep kwý no ãm grêre. Anẽ.

⁶ Hãmri nhũm mẽ kuma nê mẽ kot mar o kuhê xwýnhjê mã anẽ nhũm mẽ kuma nê hkrĩ pa. Hãmri nhũm pãwti jamý nê ho Tirtũm wý nê kãm:

—Pa Papaj. Nà ka na apê mẽ inhmã mẽ inhõ ho apa xwýnh. Jakamã amex o amex. ãm amex kumrêx. Anẽ.

Hãmri nê mẽ kãm ho hkry pa nê hkõt mẽ pa ho mẽ pa xwýnhjê mã kugõ nhũm mẽ ho mẽ hipêx pa.

⁷ Nhũm hpãnhã tepta py nê mã ho anẽ nê ho Tirtũm wý. Hãmri nê hkõt mẽ pa ho mẽ pa xwýnhjê mã kugõ nhũm mẽ mã ho anẽ nê hamý nê ho mẽ hipêx pa.

⁸ Hãmri nhũm mẽ ohtõ rax kumrêx tã piitã apku nê õhy htu pa. Mẽmyjaja kêp 4.000 nê kaxyw mẽ hprõjaja nê mẽ hkrajaja. Tã nhũm Jejus mẽ apkur xàja o mẽ hipêx pa. Nhũm hkõt mẽ pa ho mẽ pa xwýnhjaja hakrêx o akuprõ nê ho kawà ho 7 nê ho nÿt. Hãmri nhũm Jejus ma akupým mẽ õ krí hwýr mẽ kot mar xwýnhjê jano nhũm mẽ ma akupým hapêx. ¹⁰ Hãmri nhũm Jejus hkõt mẽ pa ho mẽ pa xwýnhjê mẽ ro hã kanõre hkrem agjê nê mẽ hkwym ma Tamanut wýr mõ.

Parijew nhõ xwýnh kwý kot mẽmoj tã Jejus kamã hamak ã mẽ harênh

Matêwre 12.38-42, 16.1-4; Rukre 12.54-59

¹¹ Tã nhũm mẽ Tamanut wýr pøj nhũm Parijew nhõ xwýnh kwýjaja Jejus pumu nê ma hwýr mra nê mẽmoj tã kuwý nê kãm:

—Pa. Ot pa mẽ awýr mra. Kwa mẽ inhmã aa mẽ ixte mẽmoj pumunh kêt õ ho anẽ. Pa mẽ ja hã apumu nê Tirtũm kot mẽ ixwýr amênh ã akõt ijamaxpêr kurê kumrêx. E tokyx. Anẽ.

Kot tee ri mẽ kãm mẽmoj to anhÿr kaxyw nê ho anhÿr kêt nhũm mẽ kot hã omunh nê ma hkwýjê mã ho

kapër punuj kaxyw nhũm mẽ ã hêx rom kãm kapër anê. ¹² Nhũm ra kãm mẽ kot amnhĩ kaxyw hkôt hamaxpër kêt kãm ã kapër anhÿr mar kaga nê. Hãmri nê tee ri amnhĩ tã mẽ hamaxpër ã mẽ omu nê htyk xà mênh tÿx nê mẽ kãm:

—Hêxta waa nê. Mẽ ajamaxpër punuj pix o na ka htem ri ajamaxpër o apa. Ixpê Tirtũm kot mẽ awÿr inhmênh xwÿnh tã ka mẽ ja hã ixkôt ajamaxpër kêt nê. Nà mo kaxyw kot pa kêt mẽ amã mẽmoj to anê? Kot paj ho anê ka mẽ omu nê ãm omu nê ixkôt ajamaxpër kêt nê. Nà kot paj mẽ amã mẽmoj to anhÿr kêt nê. Anê.

¹³ Hãmri nê mẽ kure nê hkôt mẽ pa ho mẽ pa xwÿnhjê mẽrohã ma mra nê akupÿm kanõre hkrem agjê nê ma xarmã mō.

Jejus kôt mẽ pa xwÿnhjaja kot hprĩ hã omunh kêt ã mẽ harênh

Matêwre 16.5-12; mãânên Makre 6.52

¹⁴ Tã nhũm mẽ kormã kanõre kamã xarmã mōr rôm nhũm Jejus kôt mẽ pa ho mẽ pa xwÿnhjaja tee ri mẽ apkur xà japêr nê axpên mã:

—Kwa hêxta waa nê. Na pu mẽ panhõ pãwti re nê amnhĩ kôt o pamōr kêt nê. Nê ãm pixire nê o mō. Anê.

¹⁵ Hãmri nhũm Jejus tee ri mẽ kuma nê tanhmã hã mẽ kãm kapêr to. Nom mẽmoj tã kuxi nê mẽ kãm awjarê nê mẽ kãm:

—Kwa oko kêr ka mẽ amnhĩ nê Parijew nhõ xwÿnh mẽ Pahi Erox nhõ pãw kaxkrit xà pumunh mex nê. Anê.

¹⁶ Hãmri nhũm mẽ kuma nê tee ri kapêrja kukamã hamaxpêr pê hã axpên kukjêr o hkrĩ nê axpên mã:

—Kwa mo na ri ã mẽ pamã pãw kaxkrit xà jarênh anê? Mãn mẽ panhõ pãwti hkêt ã mẽ pahpumu hã na ri ã harênh anê nà? Anê.

¹⁷ Hãmri nhũm Jejus mẽ kapêr ã mẽ kuma nê mẽ kãm:

—Kwa mon ka wem ãm xatã axpên mã mẽ panhõ pãwti hkêt jarênh pix o mō? Xàn pa hte mẽ apyrã nê tee ri mẽ paxàpkur xà hkêt kukamã ijamaxpêr o ixpa? Nà inhmã ja tanhmã kute hkêt. ¹⁸ Ra mẽ ano ho mẽ ate ixpumunh mex tã kormã aprĩ hã tanhmã ixkute hã ixpumunh mex kêt. Nê mẽ ajamak o ixkapêr mar mex tã aprĩ hã mar tÿx kêt. Kwa wem ixte amnhĩ nhĩpêx mã ajamaxpêr tÿx nê. E mẽ inhmã mẽmoj jarê. ¹⁹ Jãã ixte mẽ kêp 5.000 mã pãwti kêp 5 nhĩrênhta. Tanhmã na ka prem hakrêx o akuprõ nê ho kawà ho nÿt to? E mẽ atõ inhmã harê. Anê

Hãmri nhũm ja kãm: “Na pa prem ho kawà ho 12 nê ho nÿt.” Anê. ²⁰ Nhũm kuma nê mẽ kãm:

—Tÿ na pre hakrêx ã kawà kêp 12. Tã ham ixte mẽ kêp 4.000 mã pãwti kêp 7 nhĩrênhta. Tanhmã na ka prem hakrêx ho akuprõ nê ho kawà ho nÿt to? Anê.

Nhũm ja kãm: “Na pa prem ho 7.” Anê. ²¹ Hãmri nhũm kuma nê mẽ kãm:

—Tÿ ra ixte mẽ anoo mã ã ja ho anhÿr o axkrut tã ka mẽ ra hã ano hkêt nê arĩ axpên mã mẽ panhõ pãwti

hkêt pix jarênh o ixkôt mō. Kormã mẽ ate ixàhpumunh tÿx ã ixpumunh kêt. Anê.

Jejus kot akupÿm nohkre xwÿnh o mex ã harênh

Juãw 9.1-7

²² Tã nhũm mẽ ma krĩ pê Pesêj wÿr mō nê ra hwÿr pøj. Hãmri nhũm krĩ nhõ xwÿnh kwÿjaja mẽ omu nê Jejus wÿr mẽhõ myja o tẽ. Ra nohkre nê rĩt kêt nê pa xwÿnhja nhũm mẽ hpa hã kupyn hwÿr o tẽ. Hãmri nê ho kuwÿ nê kãm:

—Pa Pahiiti? Ot pa mẽ awÿr ja ho tẽ. Kwa hã anhĩkra xi nê akupÿm mẽ inhmã no ho mex. Anê.

²³ Hãmri nhũm mẽ kuma nê nohkre xwÿnhhta pumu nê hpa hã kupy nê o tẽ nê krĩ pê ho kato nê nhÿri mẽ hkàx ã o xa. Hãmri nê no hã argõx mẽ nê hã ïhkra xi nê kãm:

—E mãn ka mẽmoj pumu nà? Anê.

²⁴ Hãmri nhũm kuma nê hkrãkato nê ri rĩt hãmri nê kãm:

—Tÿ na pa mẽmoj pumu. Nom ixprĩ hã omunh mex kêt nê. Te mẽmo pĩ hpàr kwÿ ri mrar pyrãk. Anê.

²⁵ Hãmri nhũm axte no hã ïhkra xi nhũm tã rĩt mex nê. Ri hprĩ hã mẽmoj piitã omunh mex nê. ²⁶ Hãmri nhũm Jejus akupÿm òrkwÿ hwÿr kumê nê kãm:

—E kêr ka kape hã ri amrar kêt nê. ãm ma ma akupÿm anhõrkwÿ hwÿr atêm kurê kumrêx. Anê.

Jejus kot amnhĩ tã hkôt mẽ pa xwÿnhjê kukjêr ã harênh

Matêwre 16.13-20; Rukre 9.18-21

²⁷ Tã hãmri nhũm Jejus ma hkôt mẽ pa ho mẽ pa xwÿnhjê mẽ mẽ ma mō. Ma krĩ pê Sejurej Piripos pu hã krĩ hkwÿ hkôt mō. Nê kormã pry hã mō nhũm Jejus amnhĩ tã hkôt mẽ pa ho mẽ pa xwÿnhjê kukja nê mẽ kãm:

—Kwa mẽ inhmã mẽmoj jarê. Tanhmã na htem ah-pÿnhã ri axpên mã ijarênh to wehe? Anê.

²⁸ Hãmri nhũm mẽ kãm:

—Nà na htem ah-pÿnhã tanhmã ajarênh to. Na hte kamã mẽ hkwÿjaja axpên mã ato finat Juãw Paxis ã ajarê. Nê kamã mẽ hkwÿjaja ato finat Eris ã ajarê nê mẽ hkwÿjaja apê Tirtũm nhÿ hã kapêr o pa xwÿnh ra htyk xwÿnhjê hõ hã ajarê. ã na htem ah-pÿnhã axpên mã ajarênh anhÿr o pa. Anê.

²⁹ Hãmri nhũm mẽ kuma nê mẽ kãm:

—No we mẽ kajaja? Ixpê mẽhõ hã na ka htem axpên mã ijarê? Anê.

Hãmri nhũm Simãw Pêtre kãm:

—Nà mẽ pajaja na pa htem apê Tirtũm kot mẽ ixkaxyw axãm nê mẽ ixwÿr amênh xwÿnh ã ajarê. Nê apê mẽ ixpiitã mẽ inhõ Pahi Maati hã ajarê. ã na pa htem axpên mã ajarênh anê. Anê.

³⁰ Hãmri nhũm kuma nê mẽ kãm:

—Nà ãm hãmri na ka htem ã ijarênh anê. ã ixte anhÿr. Kwa nom kwa kêr ka mẽ inhma. Kêr ka mẽ kormã ã akwÿjê mã ijarênh anhÿr kêt nê. Anê.

Jejus kot amnhĩ kukamã amnhĩ jarēnh ã harēnh

Matêwre 16.21-23; Rukre 9.22

³¹ Tã nhũm Jejus amnhĩ kukamã hkôt mẽ pa ho mẽ pa xwýnhjê mã tanhmã amnhĩ jarēnh to nẽ mẽ kãm:

—Nà ra mẽ ate Tirtũm kot mẽ akaxyw ixãm ã ix-pumunh mex. No mẽ pahkwýjaja kãm ja hã ijarēnh mar nẽ ixpumunh prãm kêt. Ijaew krãhtũmjê mẽ Tirtũm kapēr tũm o mẽ ahkre o mẽ pa xwýnhjê mẽ pa-tre krãhtũmjaja na mẽ kãm ja hã ixpumunh prãm kêt. Jakamã koja mẽ nhỹrmã ixpynê nẽ ixtak rax nẽ ixpĩ. Nom kot paj ixtyk ã ixtã apkati axkrunēpxi hãmri nhũm Tirtũm akupým ixto ixtĩr. Anẽ.

³² Hãmri nhũm mẽ kot hpĩr ã amnhĩ jarēnh ma nẽ tee ri hkukamã hamaxpēr. Hãmri nhũm Simãw Pêtreja hwýr tẽ nẽ hkwyjê pê ho kato nẽ mẽ hkàx ã o xa nẽ kãm:

—Kwa nà Pahihti. Koja Tirtũm anê mẽ omunh mex nẽ nhũm mẽ ã anhĩpêx anhỹr kêt nẽ. Kwa ri ã kapēr anhỹr kêt nẽ. Anẽ.

³³ Hãmri nhũm kuma nẽ hwýr apkjê nẽ pu hã hkôt mẽ pa ho mẽ pa xwýnh piitã omu. Hãmri nẽ mẽ hamak mã Simãw Pêtre mã kapēr nẽ kãm:

—Tk. Kwa na ka ã inhmã akapēr anhỹrja o te Satanasti nhỹ hã akapēr pyrãk. Tirtũm nhỹ hã na ka ã inhmã akapēr anhỹr kêt nẽ. Æm jar mẽ kãm Tirtũm kapēr mar prãm kêt xwýnhjê jamaxpēr o na ka ajamaxpēr nẽ ã inhmã akapēr anẽ. No Tirtũm jamaxpēr o ajamaxpēr kêt nẽ. Anẽ.

Jejus krajaja tanhmã kot amnhĩ nhĩpêx hto hã mẽ harēnh

Matêwre 6.24-28; Rukre 9.23-27; Juãw 12.24-26; mãänēn Apokarip 2.10, 12.11

³⁴ Tã nhũm Jejus amnhĩ wýr mẽ kot mar o kuhê xwýnhjê mẽ hkôt mẽ pa ho mẽ pa xwýnhjê mã anẽ nhũm mẽ hwýr axkamê nẽ kuhê. Hãmri nhũm tanhmã mẽ ahkre hto nẽ mẽ kãm:

—E mẽ inhma. Kot kaj mẽ ixkôt amnhĩ xunhwýr ã amnhĩ jarē hã kot kaj mẽ mãänēn amnhĩ jarēnh o: “Jes-jeus kęp inhõ Pahihti jakamã kot paj ãm kapēr kôt pix mã amnhĩ nhĩpêx rãhã ho ri ixpa. Kwãr ixkwýjaja tanhmã hã inhĩpêx to pa arĩ hkôt amnhĩ nhĩpêx rãhã ho ixpa.” Anhỹr o amnhĩ jarē.

³⁵ —Koja mẽ ixtã mẽ atõx pĩ rý ixtã tanhmã mẽ ato ka ty. Ate tanhmã ijarēnh to ho apa hã nhũm mẽ apĩ. Tã nom koja akaxwýnh ma inhõ krĩ hwýr àpir kurê kumrêx nẽ kamã atĩr tũm nẽ amex rãhã nẽ apa ho apa. Nom kot kaj mẽ jar atĩr prãm xàj ixkaga hãmri nẽ hwýr axàpir kêt nẽ.

³⁶ —Nẽ koja mēhõ hikukrêx gryk ã Tirtũm kaga. Hãmri nẽ nhỹrmã ty nẽ ý kamã kuwy hwýr ma mõi nẽ amnhĩ kôt kukrêx õ hpýr nẽ o mõi kêt nẽ. Koja tee ri kuwy hwýr mõi pymaj amnhĩ nẽ hikukrêx rax o amnhĩ pãnhã amnhĩrer prãm kaprý. Tanhmã koja amnhĩ to nẽ Tirtũm mã amnhĩre nẽ ma õ krĩ hwýr api? Koja ã amnhĩ nhĩpêx anhỹr kêt nẽ.

³⁸ —Nẽ koja mēhõ ixte mẽ ahkre hã inhma nhũm ja kęp omnuj japēr. Nhũm kot mẽ kãm ixprãm nõkati xwýnhjê hkôt pa gryk ã ixkaga. Hã kot paj nhỹrmã mẽ ato amnhĩptar kaxyw akupýn wrý nẽ amnhĩ xwar kot ixkaga xwýnhhta kaga. Æm hãmri na pa mẽ amã ja hã amnhĩ jarē. Kot paj nhỹrmã inhõ Papaj nhỹ hã ixte mẽ ho amnhĩptar kaxyw akupýn wrý nhũm kapēr o mẽ wrýk xwýnhjaja man ixkôt wrý. Pa mẽ wrý hãmri nẽ ra mẽ kot ixkaga xwýnhjaja pa amnhĩ pyrã nẽ amnhĩ xwar mẽ hkaga hpa. Anẽ.

9 Nhũm Jejus arĩ mẽ kãm kapēr nẽ mẽ kãm:

—Æm hãmri na pa mẽ amã amnhĩ jarē. Kot paj nhỹrmã akupýn ixte mẽ ato amnhĩptar kaxyw mẽ awýr wrý kãm ga. Tã kot kaj mẽ akwýjaja kormã atĩr ri ja kukamã tanhmã ixte amnhĩ nhĩpêx to hã ixpumu. Anẽ.

Jejus hirã htýx kãm ãm ã harēnh

Matêwre 17.1-9; Rukre 9.28-36; mãänēn Sikũn Pêtre 1.16-18

² Tã nhũm arĩgro kęp 6 nẽ hapêx nhũm Jejus ma nhỹri hixêt prêk wýr tẽ. Nẽ Simãw Pêtre nẽ Xiakre nẽ Juãwja nhũm ma amnhĩ kôt wa mẽ o mõi. Nhũm wa mẽ ahte mõi nẽ hixêt prêk ã api nẽ himõk ã kuhê. Hãmri nhũm Jejus axtem nẽ xa. ³ Ra ê haka htýx kumrêx nẽ xa. ⁴ Hãmri nhũm ja wa kaxkwa rũm hwýr wrý nẽ kuri kãm kapēr. Finat Mojes mẽ finat Erisja wa wrý nẽ kuri kãm kapēr o xa. Tirtũm amnepêm amnhĩ wýr wa ho àpir tã nhũm wa akupýn wrý nẽ kãm kapēr. ⁵ Nhũm wa mẽ mex kumrêx nẽ hirã htýx kãm kuhê nhũm Jejus kôt mẽ mõi xwýnhjaja wa mẽ omu nẽ mẽ kamã no pyma nẽ. Nẽ tee ri mẽ kãm tanhmã kapēr to hkukamã hamaxpēr. Hãmri nhũm Simãw Pêtre hamaxpēr nẽ Jejus mã kãm:

—Kwa Pahihti. Nã ãm hãmri na pu mẽ amnẽ mõi. Kwa pu mẽ kriptêm jar axkamê nẽ tokyx panojarêt kêt nẽ. Pa mẽ amã pô nhĩrõnh o axkrunēpxi nẽ hipêx. Amã nẽ Mojes mã nẽ Eris mã hõ nhĩpêx ka mẽ kamã akrĩ. Kwa xat pa mẽ amã ho anẽ nã? Anẽ.

⁷ Hãmri nhũm kakrã jaka htýx wrý nẽ wa mẽ hkunor pa nhũm wa mẽ kamã kuhê. Hãmri nhũm kakrã kamã Tirtũm mẽ kãm kapēr nẽ mẽ kãm:

—Ota Ixkra xa. Inhmã hapê ho inhmã hapê. Kêr ka mẽ kapēr mar týx rãhã ho ri apa. Anẽ.

⁸ Hãmri nhũm mẽ kuma nẽ amnhĩ pu hã rĩt nhũm ãm Jejus pix mẽ kuri xa nhũm Mojes mẽ Erisja wa ra ma akupým api nhũm mẽ ãm Jejus pix pumu.

⁹ Hãmri nhũm mẽ ma akupým hkwyjê hwýr wrýk o mõi nhũm Jejus mẽ kãm:

—Kwa kêr ka mẽ ham mẽ ate mẽmoj pumunh xwýnhhta kormã nhãm mẽ kãm harēnh kêt nẽ. Koja mẽ mẽmo arĩgro hã ixpĩ hãmri nhũm Tirtũm akupým ixto ixtĩr ka mẽ rĩ kormã mẽ kãm ja hã ijarēnh o ri apa.

¹⁰ Anẽ hãmri nhũm mẽ kuma nẽ mẽ kãm harēnh kêt nẽ. Æm axpên mã pix mã harē nẽ kot akupým htĩr ã amnhĩ jarēnhja ã axpên kukjêr o pa nẽ axpên mã:

—Kwa mo na ri ã akupým htĩr ã amnhĩ jarēnh anẽ? Tanhmã kot we amnhĩ to nẽ htyk tã akupým htĩr? Anẽ. Hãmri nẽ tee ri hkukamã hamaxpēr o hkôt pa.

Juãw Paxis te kot Eris pyrãk ã harënh

Matêwre 11.13-15, 17.10-13

¹¹ HãMRI nhũm mẽ kormã ahpãr mã wrÿk o mõr mẽ nhũm JeJus kõt mẽ mõr xwÿnhjaja mẽmoj tã hkukja nẽ kãm:

—Kwa mẽ inhmã mẽmoj jarë. Na hte Tirtũm kapër tũm o mẽ ahkre xwÿnhjaja mẽ inhmã: “Eris kumrëx koja Tirtũm mẽ pahwÿr kumë nhũm Krisja hapu hã wrÿ.” Anë. Na htem ã mẽ inhmã war ajarënh anë. Tã ka na ka ra wrÿ nom nhũm kormã Erisja akukamã wrÿk kêt nẽ. Anë.

¹² HãMRI nhũm mẽ kãm:

—Nã ãm hãMRI na htem mẽ amã ã ja jarënh anë. Na pre ra ixkukamã te kot Eris kot amnhĩ nhĩpëx pyrãk xwÿnhhta tẽ nẽ ixkutëp mẽ kãm ijarënh o pa. Nom mẽ kot ixkukamã ijarënh xwÿnh ã omunh kêt jakamã na prem axtem nẽ kãm tanhmã hipëx to hprãm xà hkõt tanhmã hipëx kati hton kupĩ. Tã koja mẽ ã hipëx anhÿr pyrã nẽ mã ixto anë nẽ inhĩpëx kati nẽ tokyx mẽ kãm ixprãm kêt xwÿnhjaja ixpynë nẽ ixpĩ pa amnhĩ xà htÿx kamã ijamak kãm ty. Tirtũm kapër ã kagã htũm kot wa ijamë wa ixkukamã wa ijarënh xà hkõt. Anë.

JeJus kot mẽhõ hkra nẽ mẽkarõmnuti janor ã harënh

Matêwre 17.14-21; Rukre 9.37-43

¹⁴ HãMRI nhũm JeJus nẽ Simãw Pêtre nẽ Xiakre nẽ Juãwja mẽ akupÿm hkwyjê hwÿr hpõx o mra nẽ amnhĩ kukamã hkwyjê pumu nhũm mẽ ohtõ nẽ mẽ hã akuprõ nẽ mẽ kãm kapër. Nhũm Tirtũm kapër tũm o mẽ ahkre ho mẽ pa xwÿnhjaja mẽmoj tã mẽ hkukjêr o kuhê. ¹⁵ Jakamã nhũm JeJus mẽ hwÿr hpõx o tẽ nhũm mẽ pikuprõnh xwÿnhjaja amnhĩ wÿr omu nẽ hkĩnh nẽ. HãMRI nẽ kutã hprõt nẽ kãm:

—Pa. Nã ãm hãMRI na ka akupÿn mẽ ixwÿr tẽ. Anë.

¹⁶ HãMRI nhũm mẽ kãm:

—Kwa mẽmoj tã na ka mẽ axpën mã axàkjêr o akuhê? Anë.

¹⁷ HãMRI nhũm mẽhõ myja kãm:

—Nã ixkra hã na pa mẽ axpën mã ixkapër. Na pre mẽkarõmnuti ixpê hwÿr axã nẽ tanhmã ixpê ho nhũm kapër kêt nẽ pa. Nhũm hte xatã tanhmã ixpê ho nhũm pykap amnhĩ rë nẽ hakwa jamrõ ho hikwÿ. HãMRI nẽ ã htÿx kamã ama nẽ amnhĩ nham o axpën kamnhar tÿx kumrëx pẽ htÿx pa nẽ hikwÿ nẽ ixpê omnuj tÿx nẽ. Na hte ã mẽkarõmnuti nhÿ hã amnhĩ nhĩpëx anhÿr o pa. Jakamã na pa ate inhmã ho mex kaxyw man o tẽ nẽ tee ri ajapër. HãMRI nẽ ho akõt mẽ pa ho mẽ pa xwÿnhjê hwÿ nhũm mẽ kot inhmã ho mex kaxyw tee ri tanhmã ho hkaprÿ. Anë.

¹⁹ HãMRI nhũm JeJus kuma nẽ hkõt mẽ pa ho mẽ pa xwÿnhjê mã kãm:

—Hêxta waa nẽ. Ra mẽ ate Tirtũm nhÿ hã ixte mẽ ho mex ã ixpumunh ryy htã ixpyrà nẽ ã amnhĩ nhĩpëx anhÿr kêt nẽ. Mãn ka mẽ kormã kaxyw Tirtũm kõt ajamaxpër tÿx kêt nẽ. E amnë ixwÿr akra ho tẽ pa omu. Anë.

²⁰ HãMRI nhũm mẽ hwÿr o tẽ nhũm mẽkarõmnuti JeJus pumu nẽ tanhmã hkrata o htÿx to nhũm pykap tẽm nẽ hakwa jamrõ nẽ amnhĩ rënh o nõ. ²¹ Nhũm JeJus omu nẽ hipêëxã mã:

—Kwa tanhmã na ra kot amnhĩ nhĩpëx ã mytwrÿ kute? Anë.

Nhũm kãm:

—Nã hprĩre rũm na hte ã amnhĩ nhĩpëx anhÿr o pa.

²² Na hte mẽkarõmnuti xatã ixpê hpĩr kaxyw kuwy kamã kurê nẽ gõx kãm kurê. Kwa kot ka ate ho mex kukamã axàhpumunh japër nẽ wa ixkamã axukaprĩ nẽ akupÿm inhmã ho mex. Anë.

²³ HãMRI nhũm JeJus kãm:

—Xãn ka tee ri ixte ho mex kaxyw ixkukamã ajamaxpër? Nã ixte mẽmoj piitã ho anhÿr kaxyw ixàhpumunh tÿx kënã. Kot ka mẽ atõ mẽmoj tã amnhĩ kaxyw ixkõt ajamaxpër tÿx hã kot paj amã ho anë. Anë.

²⁴ HãMRI nhũm kuma nẽ kãm hkra mex prãm tÿx xàj kapër tÿx nẽ kãm:

—Nã na pa amnhĩ kaxyw akõt ijamaxpër. Nom kot kaj tanhmã ixkrã hto pa akõt ijamaxpër tÿx rãhã ho ri ixpa Pahihti. Anë.

²⁵ Rõm nhũm mẽ ohtõ rax nẽ hwÿr kormã mra nhũm JeJus amnhĩ wÿr mẽ omu hãMRI nẽ mẽkarõmnutija mã kapër kurê kumrëx. Nẽ kãm kapër kãm hihtÿx nẽ kãm:

—Pa mẽkarõmnuti. E apê mẽ ho mẽ kapër kêt nẽ mẽ umar kêt o apa xwÿnh ã pa amã ixkapër ka inhma. Kêr ka mẽ hkrata pẽ akato nẽ ma amõr o mõ nẽ axte tanhmã ho hkêt nẽ. Anë.

²⁶ HãMRI nhũm tee ri kot kãm karõja ma nẽ gryk xàj xatã amÿra nẽ mẽ hkrata o htÿx kumrëx nhũm httert tÿx o nõ. HãMRI nhũm kêp kato nẽ ma tẽ nhũm te htyk pyrã nẽ nõ nhũm mẽ tee ri omu nẽ ra htyk ã hkamnhix. ²⁷ HãMRI nhũm JeJus hpa hã kupy nẽ kãnhmã ãm nhũm akupÿm mex nẽ kãnhmã xa nẽ ri mra. Nẽ tãm kapër o mra nẽ umar mex nẽ.

²⁸ Tã nhũm JeJus hkõt mẽ pa ho mẽ pa xwÿnhjê mẽrohã ma akupÿm amnhĩm hikranh xà hã ixkreja wÿr mra nẽ hwÿr agjê nẽ hkrĩ. HãMRI nhũm JeJus kõt mẽ pa ho mẽ pa xwÿnhjaja amnhĩ tã hkukja nẽ kãm:

—Kwa mẽ inhmã mẽmoj jarë Pahihti. Na pa mẽ tee ri axwakre kamã mẽ hkrata nẽ mẽkarõmnuti janor kaprÿ. Kwa mon pa mẽ apyrã nẽ ja ho anhÿr mex kêt nẽ? Anë.

²⁹ HãMRI nhũm mẽ kãm:

—Nã axtem na mẽkarõmnuti ja. Na htem mẽ nẽ hanor tokyx anhÿr kêt nẽ. Na htem ho Tirtũm wÿr tÿx nẽ rĩ kormã hano. Anë.

JeJus kot htyk kukamã amnhĩ jarënh

Matêwre 17.22-23; Rukre 9.44-45

³⁰ Tã nhũm JeJus mẽ hkõt ri mẽ pa ho pa xwÿnhjê mẽ krĩja rũm hapõj nẽ ma nhãm mõ. Nẽ ma pyka pẽ Garirej kahti hkõt mõ. Nom mẽ piitã mẽ hkàx ã mõ. JeJus kormã kot amnhĩ tã tanhmã hkõt mẽ pa ho mẽ pa xwÿnhjê jahkre hto ho pa jakamã kãm mẽ hkàx ã mẽ o pa hprãm nẽ. HãMRI nẽ amnhĩ kukamã mẽ kãm tanhmã amnhĩ jarënh to nẽ mẽ kãm:

—E kot paj mẽ amã tanhmã amnhĩ jarẽnh to ka mẽ inhma mẽ inhmar tỳx nẽ. Koja mẽ kãm ixprãm kêt xwỳnhjaja tokyx mẽ kãm ixtã amỳnẽ nhũm mẽ ixpĩ. Kot paj ixtyk ã ixtã apkati axkrunẽpxi hãmri nhũm Tĩrtũm akupỳm ixto ixtĩr. Kwa kêt ka mẽ ja ma nẽ hã anohtỳx nẽ ho apa. Anẽ.

³² Hãmri nhũm mẽ tee ri ã kot amnhĩ jarẽnh anhỳrja ma nẽ axpẽn mã:

—Kwa mo na ri ã mẽ pamã amnhĩ jarẽnh anẽ? Nà kêt mẽ panhõ Pahi Maati hã kot amnhĩ jarẽnh kẽnã kot kêt mẽhõ kupĩ.

Anhỳr o axpẽn mã harẽnh o hkõt mỗ. Hãmri nẽ ã kot amnhĩ jarẽnh anhỳr mar prãm kêt jakamã hprĩ hã tanhmã hkukjêr to hkêt nẽ. ãm akryk hkõt mar o mỗ.

Mẽ kot amnhĩ to rũnh xwỳnh jarẽnh

Matêwre 18.1-5; Rukre 9.46-48

³³ Tã nhũm Jejus mẽ hkõt mẽ pa ho pa xwỳnhjaja kor-mã ma krĩ pẽ Kapanau hwỳr mỗ nhũm hkõt mẽ pa ho mẽ pa xwỳnh pẽ 12jaja tanhmã amnhĩ kukamã hamaxpêr to hãmri nẽ axpẽn mã:

—Kwa mẽ pahtõ kot puj we nhỹrmã pahpê pahi nẽ mẽ ho amnhĩptar rax o ri pahkwỳjê jakre?

Anhỳr o axpẽn kukjêr o Jejus kõt mỗ. Nẽ axpẽn mã: “Nà pa.” Nhũm mẽ hkwỳjaja: “Nà kêt pa.” Anhỳr o hkõt mỗ. Hãmri nhũm Jejus mẽ mar o mỗ. Hãmri nhũm mẽ mỗ nẽ nhỹri amnhĩm hikranh xà hã ixkre hwỳr pøj nẽ hwỳr agjê nhũm mẽ kãm:

—Kwa mẽmoj tã na ka mẽ pry hã amnhĩ jarẽnh o mỗ? Anẽ.

Hãmri nhũm mẽ tee ri kuma nẽ hpjiaam nẽ. Nẽ kãm tanhmã amnhĩ jarẽnh to hkêt nẽ. ³⁵ Jakamã nhũm Jejus nhỹ nẽ mẽ kãm anẽ nhũm mẽ kuri hkrĩ pa nhũm mẽ kot mẽ kãm mẽ ho amnhĩptar rax prãmta ã mẽ kãm kapêr nẽ mẽ kãm:

—E mẽ inhma. Ka mẽ atõ amã mẽ ho amnhĩptar rax prãm. Hã kêt ka te apê mẽ piitã mẽ kãm amarĩ axapênh xwỳnh pyrãk o amnhĩ nhĩpêx o mẽ hkõt apa. Jao mẽmoj to mẽ kutã anojarêt rãhã nẽ. Anẽ.

³⁶ Hãmri nẽ amnhĩ wỳr mẽhprĩre hõ mã hpa ho apê nhũm hwỳr tẽ nhũm kumỳ nẽ o nhỹ nẽ hã mẽ kãm kapêr nẽ mẽ kãm:

³⁷ —E mẽ inhma. Kêt ka mẽ apê pahi pyrãk o tanhmã amnhĩ jarẽnh to ho ri apa hkêt nẽ. ãm te amarĩ ri mẽ apa pyrãk o amnhĩ nhĩpêx o ri apa. Jao nhỹri mẽhprĩre hõ pumu nẽ kamã axukaprĩ nẽ kãm mẽmoj tanhmã ho rỳ kãm mẽmoj gõ. Hãmri nẽ ã amnhĩ nhĩpêx anhỳr o te pa ate tanhmã ixto mex to pyrãk o amnhĩ nhĩpêx. Nẽ kot ka mẽ atõ pa tanhmã ixto mex to nẽ te ate Tĩrtũm o mex pyrãk o amnhĩ nhĩpêx. E kêt ka mẽ amã amnhĩ to rũnh prãm nẽ ã amnhĩ nhĩpêx anhỳr o ri apa. Anẽ.

³⁸ Hãmri nhũm Juãw nhỹhỹnh tẽn mẽ hwỳr axà nẽ Jejus mã:

—Kwa Pahihti. O mũj mẽhõ kêt mẽ pahkwỳ hkêt tã anhỹ hã mẽ nẽ mẽkarõmnuti janor o pa. Pa mẽ tee ri ja hã omu nẽ kêt mẽ pahkwỳ hkêt jakamã pa mẽ ã kot amnhĩ nhĩpêx anhỳrja nẽ kãm ixkapêr. Anẽ.

³⁹ Hãmri nhũm kuma nẽ kãm:

—Kwa nà nẽ tanhmã kãm nẽ hkêt nẽ. Koja mẽhõ inhỹ hã aa mẽ kot mẽmoj pumunh kêt kwỳ ho anẽ hãmri nẽ kêt mẽ panhõ nẽ ri mẽ pahkwỳm tanhmã mẽ ahkre hto ho pa hkêt nẽ. Ra mẽ pahkõt kot amnhĩ nhĩpêx mã kẽnã. Jakamã kwa mẽ ja nẽ tanhmã kãm nẽ hkêt nẽ. Kwãr mãmri ã amnhĩ nhĩpêx anẽ. Ja mex kẽnã.

⁴¹ —Koja mẽhõ nhỹri mẽ atõ amã kôr ã apumu nẽ hamaxpêr o: “Kwa Jejus kõt ri pa xwỳnh mũj kãm kôr. E pa kãm gô hkwy kê ho ixkõ.” Anhỳr o hamaxpêr nẽ apê ixkwỳ hã amã gô hkwy ka ho ixkõ. Nhũm ãm kot amã gô pix nhõr nhũm ate ho akõm tã nhũm Tĩrtũm atã omu nẽ ho mex rax nẽ. Anẽ.

Mẽ pahte amnhĩ tomnuj pymaj tanhmã amnhĩ nhĩpêx to hã mẽ pajarẽnh

Matêwre 18.6-9; Rukre 17.1-2

⁴² Nhũm Jejus arĩ hkõt mẽ pa ho mẽ pa xwỳnhjê mã kapêr nẽ mẽ kãm:

—Nẽ mẽ kot ixkõt amnhĩ xunhwỳr tohtuj anhỳr xwỳnhjaja. Koja mẽhõ ma mẽ hwỳr tẽ nẽ inhnẽ mẽ kãm kapêr. Mẽ kot mẽ mar nẽ tanhmã amnhĩ tomnuj to hprãm xàj hêx rom mẽ kãm kapêr nhũm mẽ mar xà hkõt tanhmã amnhĩ tomnuj to. Hã koja Tĩrtũm ja hã omu nẽ kot inhnẽ tanhmã kãm nẽ xwỳnhhta pumu nẽ homnuj tỳx nẽ. Te mẽ kot mẽhõ pynênh nẽ mut ã kên pytĩi hõ nhõr nẽ ma o htêm nẽ gô xupỳm rax kãm mênh pyrãk o hipêx. Te ho ja pyrãk no ãm homnuj tỳx o hakre.

⁴³ —E kwa mẽ o kora. Kot kaj mẽ anhĩhkra rỳ apar o tanhmã amnhĩ tomnuj to. Hã kêt ka mẽ axte ã amnhĩ nhĩpêx anhỳr pymaj te ate amnhĩ pẽ anhĩhkra rỳ apar krãhyr nẽ mênh pyrãk o amnhĩ nhĩpêx nẽ axte ã amnhĩ tomnuj anhỳr kêt nẽ. Rỳ ka mẽ ano ho mẽmoj punuj pumu. Hãmri nẽ kãm ajamaxpêr pix o apa pymaj te ate amnhĩ pẽ ano katõk nẽ mênh pyrãk o amnhĩ nhĩpêx nẽ nhãm arĩt kurê kumrêx. Kêt ka mẽ ã amnhĩ nhĩpêx o apa rãhã nẽ. Hãmri nẽ nhỹrmã ty nẽ ma Tĩrtũm mẽ wa inhõ krĩ hwỳr api. No kot ka mẽ arĩ akutã ano nẽ arĩ akutã apar nẽ arĩ akutã anhĩhkra rãhã ri mrar tã tõhã tanhmã ho amnhĩ tomnuj to. Hãmri nẽ nhỹrmã ty nẽ ma mẽ kot amnhĩ xà htỳx kamã hamak tũm xà pẽ kuwy maatita wỳr ma apa.

⁴⁸ Kuwyja kamã na htem mẽ kot amnhĩ tomnuj mỳrapê amnhĩ xà htỳx kamã hamak rãhã ho pa ho pa hãmri nẽ aa hapõx kêt nẽ.

⁴⁹ ã koja mẽ kot amnhĩ tomnuj o mẽ pa xwỳnh piitã amnhĩ nhĩpêx anhỳr rãhã nẽ pa ho pa. ⁵⁰ Jakamã kwa kêt ka mẽ axpẽn to mex rãhã ho ri apa. Nom axpẽn kãm agryk nẽ tanhmã axpẽn nhĩpêx to ho ri apa hkêt nẽ. Anẽ.

Nhũm pre ã Jejus hkõt ri mẽ pa ho mẽ pa xwỳnhjê jahkre anẽ.

Mẽ pahte axpẽn kaga nẽ Jejus kot mẽ pahkurê

Matêwre 5.31-32, 19.1-12; Rukre 16.18; mããnên Wam Korĩt 7.10-16

10 Tã nhũm Jejus mẽ hkõt mẽ pa ho pa xwỳnh mẽrohã ma pyka pẽ Jutej wỳr mỗ. Hãmri nẽ py-

hti pê Jotaw ã rê në hpãnhã ma xarmã mö. Nhũm mẽ axte mẽ hã akuprõ nhũm kê Jejus axte mẽ ahkre ho xa. ² Hãmri nhũm Parijew nhõ xwýnh kwýjaja hwýr mra. Mẽ kot hêx rom kamã hamak në mar në tanhmã ho kapër punuj to kaxyw hwýr mra në kãm:

—Pa. Ot pa mẽ mẽmoj tă akukjêr kaxyw awýr mra. Kwa tanhmã na pre amnepêm finat Mojesja mẽ pahte mẽ pahprõ kaga hã mẽ panhîgêjtê mã karõ hto? Xà koja mẽ pahprõ mẽ pakapër hkwým tanhmã amnhĩ nhĩpêx to pu mẽ mýrapê hkaga nhũm Tirtũm ja hã mẽ pahpumu nhũm ja kãm mex në nà? Anẽ.

³ Hãmri nhũm mẽ kãm:

—Tanhmã na pre Mojes Tirtũm nhỹ hã ja hã mẽ amã karõ hto? Anẽ.

⁴ Nhũm mẽ kãm:

—Nà na pre harênh o:

Kêr ka mẽ aprõ kaga kaxyw hãmri në ate hkaga hã amnhĩ jarênh ã kagã në kãm agõ në rĩ kormã hkaga. Anẽ.

Na pre ã mẽ inhmã ja hã karõ anẽ. Anẽ.

⁵ Hãmri nhũm mẽ kãm:

—Tý nom mẽ kãm Tirtũm kapër kôt amnhĩ nhĩpêx prãm kêt jakamã na pre ã mẽ kãm ja jarênh anẽ. ⁶ Amnepêm mẽmoj piitã hkrax kãm na prem axpên kaga hkêt në. Na pre Tirtũm wam myja nhĩpêx në hpãnhã kãm hprõ nhĩpêx. Axpên kaxyw wa hipêx. ⁷ Jakamã na hte mẽmyjaja hprõ kaxyw në gryk ã katorxã në hipêxã wa hkaga në ãm hprõ kôt pix mã pa ho pa. ⁸ Te wa tipxi në ri wa pa pyrãk o axpên nhĩpêx o pa. ⁹ Tirtũm tãm kot axpên mã wa õr kênã kot kêt mẽhõ wa kot axpên kaga kaxyw tanhmã wa hipêx to rý tanhmã wa kãm kapër to. Anẽ.

Nhũm pre ã Jejus mẽ kãm kapër anẽ. ¹⁰ Hãmri në hkôt mẽ pa ho mẽ pa xwýnhjê mẽ akupým ixkrem agjê nhũm mẽ kãm:

—Kwa aprĩ hã mẽ inhmã mẽ kot axpên kaga hã mẽ harênhhta jarẽ pa mẽ ixprĩ hã kuma nà. Anẽ.

Hãmri nhũm mẽ kãm:

¹¹ —Nà kot kaj mẽ aprõ kaga në hpãnhã nhãm mẽhõ ho aprõ nhũm Tirtũm noo mã te ate wam aprõ kamã nhãm aprõ nyw o amnhĩkati pyrãk. Tirtũm pê ja omnuj týx në. Rý koja mẽhõ hprõ kaga ka hpãnhã ho aprõ nhũm Tirtũm noo mã te ate wam mjên pê ho amnhĩkati pyrãk. Ja mãänñen Tirtũm pê omnuj týx në.

¹² —Nẽ mẽnijaja. Koja mẽhõ ni ra mjên kaga në hpãnhã nhãm mẽhõ ho mjên. Ja mex kêt. Mjên krax kêt mjên kumrêx kênã kot kêt hkaga në hpãnhã nhãm hõ ho mjên. Koja anẽ nhũm Tirtũm noo mã te kot wam mjên kamã nhãm hõ ho amnhĩkati pyrãk nhũm Tirtũm pê ja omnuj týx në. Anẽ.

Jejus kot amnhĩ në mẽhprĩjê janor kêt ã harênh

Matêwre 19.13-15; Rukre 18.15-17

¹³ Tã nhũm Ijaew kwýjaja Jejus wýr mẽ hkrarejê jamý në mẽ o mra. Kot mẽ hã ãhkra jaxwýr në mẽ ho Tirtũm wýr kaxyw hwýr mẽ o mra. Hãmri nhũm hkôt mẽ pa ho pa xwýnhjaja tee ri ja hã mẽ omu në mẽ kãm:

—Kwa mo kaxyw na ka mẽ Jejus wýr mẽ o mra? Kormã mẽ ràxre kênã. Mẽ ma akupým mẽ o mra nà? Anẽ.

¹⁴ Hãmri nhũm Jejus ja hã mẽ kuma në mẽ kãm:

—Kwa nã kwãr mẽ mãmrĩ ixwýr mẽ o mra. Mẽ ri inhnê mẽhprĩjê kurê hkêt në. Anẽ.

Hãmri në mẽ kãm hpa ho apê nhũm mẽ hwýr mẽ o mra nhũm mẽ kuri kuhê. Hãmri nhũm mẽ hã hkôt mẽ pa ho mẽ pa xwýnhjê mã kãm:

—E mẽ jarejê pumu. Na htem hamakêtkati në hkĩnh në ri pare. Mẽ kãm amnhĩ to rũnh prãm kêt në ri pare. Tã Tirtũm kôt mẽ kot amnhĩ nhĩpêx o ri mẽ pa xwýnhjaja na htem mẽ urãk në kãm amnhĩ to rũnh prãm kêt në ri pa.

¹⁵ —Na hte jarejaja hipêxã në katorxã wa kapër ma në wa hkôt ri amnhĩ nhĩpêx o ri pare. Tã ixpê Tirtũm kot mẽ awýr inhmênh xwýnh na pa. Kot ka mẽ amã ixkôt amnhĩ xunhwýr prãm hã kot kaj mẽ jarejê kot amnhĩ nhĩpêx pyrãk o amnhĩ nhĩpêx. Jao ixkapër ma në ixkôt ri amnhĩ nhĩpêx mex o ri apa. Anẽ.

¹⁶ Hãmri në mẽhprĩrejê jamý në mẽ hã ãhkra jaxwýr në mẽ ho Tirtũm wýr mẽ kãm:

—Pa Papaj. E kêr ka jarejê ho mex rãhã në kê mẽ mex në pa. Anẽ.

Hikãxpore rax xwýnh jarênh

Matêwre 19.16-22; Rukre 18.18-23; mãänñen Wam Ximotre 6.6-10; Xiakre 5.1-6

¹⁷ Tã nhũm Jejus mẽ hkôt mẽ pa ho pa xwýnhjaja nhỹri pry hã mö nhũm Ijaew krãhtũmja omu në hwýr tẽ në mẽmoj tă hkukja në kãm:

—Pa mẽ ijahkre xwýnh maati? E kwa inhmã mẽmoj jarẽ. Nhỹrmã Tirtũm ri ixĩr tũm në ixpa hprãm xaj mẽmo kot pa we ho anhýr o ri ixpa? Ate amnhĩ to mex pix o ri apa xwýnh jakamã kwa inhmã tanhmã ja jarênh to. Anẽ.

¹⁸ Hãmri nhũm kãm:

—Xà ate ixpê Tirtũm kwý hã ixpumunh kôt na ka ixte urãk në amnhĩ to mex xwýnh ã ijarẽ? Tirtũm pix na kot amnhĩ to mex rãhã xwýnh jakamã kot kaj ã ijarênh anẽ në ixpê Tirtũm Kra hã ijarẽ. Jao urãk në ixte amnhĩ to mex xwýnh ã ijarẽ. Nà xàn ka ãm atýx ri amnhĩ krã hkôt ã ijarênh anẽ?

¹⁹ —Tirtũm mex o mex jakamã kot kaj amã nhỹrmã kuri atĩr tũm në apa hprãm hãmri në ra kot mẽmoj tă mẽ amã karõ xã hkôt amnhĩ nhĩpêx o ri apa. Ra ate mar mex kênã. Na pre mẽ amã:

Kêr ka mẽ axãhkĩnh o ri apa hkêt në.

Nẽ mẽ hpar kêt në.

Nẽ tanhmã axêx kêt në.

Nẽ axêx rom tanhmã mẽ nokupyr to hkêt në.

Nẽ mẽ kêt mẽ hprõ ho amnhĩkati hkêt në.

Nẽ anhĩpêxã mẽ akatorxã wa hã apijaam në wa ho mex pê wa kutã anojarêt rãhã ho ri apa.

E kot kaj amã nhỹrmã Tirtũm kuri atĩr tũm në apa hprãm hã kot kaj ã amnhĩ nhĩpêx anhýr o ri apa. Anẽ.

²⁰ Hãmri nhũm kuma në mẽ kãm:

—Kwa ixprîre ri ra ã ixte amnhĩ nhĩpêx anhÿr o ri ixpa kênã. Nom te ixtĩr tũm nê ixpa kaxyw ixte kormã tãm kêt pyrãk. Anê.

²¹ Hãmri nhũm kuma nê hprĩ hã omu nê kãm hapê nê. Hãmri nê kãm:

—Nã kormã mêmoj pyxire nê arĩk. Na ka amã akukrêx rax kĩnh tÿx o Tĩrtũm jakre. Jakamã kêr ka ma akupÿm anhõrkwÿ hwÿr tẽ nê akukrêx rax o wênê hpa. Nê kãxpore jamÿ hãmri nê ma mē kēp amrakati xwÿnhjê mã õr o ri apa. Hãmri nê akupÿn tẽ nê arĩ ri ixtõt apa ho apa. Anê.

²² Hãmri nhũm kuma nê tee ri hikukrêx rax kukamã hamaxpêr. Kãm hapê jakamã kãm kãm ĩhkra karo hprãm kêt nê. Hãmri nê tee ri Jejus kot ã kãm hã karõ anhÿrja ma nhũm ja kãm mex kêt nhũm awjanã nê hkaprĩ nê ma akupÿm tẽ. ²³ Hãmri nhũm Jejus tee ri omu nê hkõt mē pa ho mē pa xwÿnhjê mã kãm:

—Hêxta waa nê. Koja mē hikukrêx rũnh xwÿnhjaja ohtõ nê kãm mē hikukrêx japê xaj Tĩrtũm mē wa ixri hĩr tũm nê pa ho pa hkêt nê. Wa ixte amnhĩ nhĩpêxja mē kēp hihtÿx. Anê.

²⁴ Hãmri nhũm mē tee ri kapêrja ma nhũm Jejus mē hamaxpêr kõt mē omunh mex jakamã axte tanhmã mē kãm harênh to nê mē kãm:

—Nã Tĩrtũm mē wa ixte amnhĩ nhĩpêxja na mē hikàxpore rũnh xwÿnhjaja pē ja hihtÿx. ²⁵ Mē kãm hikukrêx rax mã ĩhkra karo hprãm kêt rãhã tee kãm Tĩrtũm kõt amnhĩ nhĩpêx prãm kaprÿ. Te ho mēhõ kot menh kagõ hã hkre nê kãm kagõ katõk prãm kêt rãhã kãm guhkrax kãm àr prãm kaprÿta pyrãk. Anê.

²⁶ Hãmri nhũm mē kuma nê tee ri amnhĩ kukamã hamaxpêr nê kãm:

—Kwa no mē ixpiitã mē inhmã mē ixkukrêx japê kênã. Jakamã xà kot paj mē ixpiitã nhÿrmã war ari ixtĩr tũm nê ixpa ho ixpa hkêt nê? Anê.

²⁷ Hãmri nhũm mē kãm:

—Nã kot kaj mē amnhĩ krã hkõt mē amã mē akukrêx japê mã anhÿrer kêt nê. ãm Tĩrtũm pix na hte ja kaxyw tanhmã mē akrã hto ka mē amã akukrêx japê hkêt nê. Jao ra mē apê Tĩrtũm mē wa ixri atĩr tũm nê mē apa ho mē apa mã xwÿnh. Anê.

²⁸ Hãmri nhũm Simãw Pêtre kãm:

—Kwa Pahihti na pa prem agryk ã mēmoj piitã hkaga hpa nê akõt ixpa ho ixpa. Jakamã xà kot paj mē nhÿrmã war ari ixtĩr tũm nê ixpa ho ixpa kêt nê nã? Anê.

²⁹ Hãmri nhũm kuma nê hkõt mē pa ho pa xwÿnh piitã mē kãm:

—Nã ka mē atõ inhmã tanhmã amnhĩ to ho apa kaxyw akwÿjê re nê ma inhmã tanhmã amnhĩ nhĩpêx to ho ri apa. Anhõrkwÿ re rÿ atõ rÿ atõx rÿ aprõ nê akrajê re. Rÿ akatorxã nê anhĩpêxã wa are. Rÿ akukrêx piitã rer pa hãmri nê ma ixkapêr o mē piitã mē ahkre ho ri mē hkõt apa. ³⁰ Hã kot paj amnhĩ tã mē apumu nê mē ato mex rax nê. Hãmri ka mē ma mē kãm ixkapêr jarênh o mē hkõt apa nhũm mē kot mē amar xwÿnh kwÿjaja mē ama nê kãm mē akĩnh nê. Nê ra mē ate akwÿjê rer par tã mē tãmjaja te mē apê mē hkra rÿ

mē htõ rÿ mē htõx pyrãk o mē anhĩpêx. Jao tanhmã mē ato mex to ho pa.

—Nê koja mē kãm ixprãm kêt xwÿnhjaja ixtã tanhmã mē atomnuj to hã ka mē nhÿrmã ma Tĩrtũm mē wa inhõ krĩ hwÿr api nê wa ixkuri amex nê atĩr tũm nê apa ho apa. ³¹ Nom kêr ka mē ja hã amnhĩ pumunh kõt amnhĩ to rax xwÿnh ã amnhĩ to jarkrar kêt nê. Mē kot amnhĩ to rũnh xwÿnh ã amnhĩ jarênh xwÿnhjaja koja mē nhÿrmã amnhĩ to rũnh kêt ã amnhĩ pumu. Nê mē kot amnhĩ to hkryre xwÿnhjaja koja mē nhÿrmã amnhĩ to rũnh ã amnhĩ pumu. Anê.

Jejus kot amnhĩ kukamã axte amnhĩ jarênh

Matêwre 20.17-19; Rukre 18.31-34

³² Tã nhũm Jejus hkõt ri mē pa ho mē pa xwÿnhjê mã kapêr pa hãmri nê ma Jerujarê hwÿr mē o mō. Ra kamã kãm hkurê xwÿnhjaja kot hpĩr ã amnhĩ jarênh tã ma hwÿr mē o mō. Jakamã nhũm mē tee ri hkukamã hamaxpêr o hkõt mō. Nhũm mē amarĩ mē hkõt mrar xwÿnhjaja haxwÿja kãm ma nê. Hãmri nhũm Jejus mē kēp 12ta o mō nê hkwÿjê hkàx ã amnhĩ kukamã tanhmã mē kãm amnhĩ jarênh to ho mō nê mē kãm:

³³ —E na pu mē ra Jerujarê hwÿr mō. Kot puj mē hwÿr pøj nhũm mē kãm ixkurê xwÿnhjaja patre krãhtũmjê mē Tĩrtũm kapêr tũm o mē ahkre xwÿnhjê nhĩhkram ijaxã. Hãmri nhũm mē kãm Tĩrtũm kapêr kõt amnhĩ nhĩpêx prãm kêt xwÿnhjaja ixpĩr kaxyw mē kãm ixtã amÿnê ³⁴ nhũm mē mar xà hkõt tanhmã inhĩpêx kati hto. Nê mē hkwÿjaja ixtã hpêr o axkê nê ixtã akunha. Nê mē hkwÿjaja tanhmã ijaprÿ hto nê ixtã argõx rē nê ixtak hãmri nê ixpĩ. Koja mē ã inhĩpêx anê. Nom kot paj ixtÿk ã ixtã apkati axkrunêpxi nhũm Tĩrtũm akupÿm ixto ixtĩr. Anê.

Xiakre mē Juãw wa kot amnhĩ to Jejus wÿr ã wa harênh

Matêwre 20.20-28; Rukre 22.24-30; mããnēn Piripos 2.3-8; Wam Pêtre 5.3

³⁵ Tã nhũm Jepetew kra Xiakre mē Juãw wa tanhmã hamaxpêr to nê Jejus mã kãm:

—Kwa mē ijahkre xwÿnh. Pa wa amã mēmoj jarê ka wa inhmã “ÿ” anê nã? Anê.

Hãmri nhũm wa kãm:

³⁶ —Ko wa mamrĩ inhmã mēmoj jarê pa wa ama mãn. Anê.

³⁷ Hãmri nhũm wa kãm:

—Nã kot kaj nhÿrmã ate mē piitã mē ho amnhĩptar kaxyw nhÿ pa wa akutã anhĩjê. Nê wa papxipix ixpê anhõ kôwenatõ nê akutã anhĩjê nê ato nhÿ. Ja na pa wa inhmã hprãm. Anê.

³⁸ Hãmri nhũm wa kãm:

—Nã na ka wa ãm atÿx ri ã amnhĩ to ixwÿr anê. Koja mē tokÿx ixpĩ pa amnhĩ xà htÿx kamã ijamak rax nê ty. Tã xà koja mē ixpyrã nê ã war anhĩpêx anê ka wa ixpyrã nê amnhĩ xà htÿx kamã ajamak rax kãm ty nã? Anê.

³⁹ Hãmri nhũm wa kãm:

—Tÿ. Nã kot pa wa ijaxwÿja anê nê apyrã nê amnhĩ xà htÿx kamã ijamak kãm ty. Anê.

Hāmri nhūm wa kām:

—Nà ām hāmri na ka wa ja hā amnhī jarē. War ate ixpyrā nē ixkōt amnhī xà htỳx kām ajamak kām atyk mā kēnā. ⁴⁰ Tā nom war ate amnhī to ixwỳrta ā kot paj tanhmā war amā nē hkēt nē. Inhō Papaj tām koja ja kaxyw mēhō japēr nhūm inhīhkō hā nhỹ. No pa kot paj ri ja kaxyw mē atō rēnh kēt nē. Anē.

⁴¹ Hāmri nhūm wa urāk nē Jejus kōt mē pa ho mē pa xwỳnh kwỳjaja ā wa kot amnhī to hwỳr anhỳr ā wa kuma nē wa kamā gryk nē. ⁴² Jakamā nhūm Jejus mē piitā mē ho akuprō nē mē kām:

—E mē inhma. Na hte Ijaew kēt xwỳnhjē nhō pahihiti-jaja ā amnhī nhīpēx anhỳr o ri pa nē amarī hkrī xà kamā hkrī ho hkrī. àhpumunh jakamā amarī ixkre kre jakry kamā hkrī ho hkrī nē kām mē àpēnh xwỳnhjē pix mā mēmo mē àpēnh ā karō ho hkrī. Na htem ā amnhī nhīpēx anē. Nē mē kot amnhīm mex ā harēnh prām xàj tanhmā mē ho mex to ho pa. ⁴³ Tā no mē kajaja kēr ka mē atō amā amnhī to rax prām hāmri nē ho mē kot amnhī nhīpēx pyrāk kēt nē. Mē piitā mē kutā anojarēt rāhā ho ri apa. Kēt paa. Mē ate inhma axàpēnh o apa kaxyw na pa pre mē awỳr ixwỳrk kēt nē. Ām pa ixte tanhmā mē amā amnhī nhīpēx to ho ixpa kaxyw na pa pre mē awỳr wrỳ. Mē ate nhỹrmā kuwy wỳr apa pymaj mē anē ixtyk kaxyw na pa pre mē awỳr wrỳ. Jakamā kot kaj mē atō amā amnhī to rax prām hā kēr ka ixpyrā nē akwỳjē kutā anojarēt rāhā ho ri apa. Hāmri nē inhma te ate amnhī to rax o amnhī nhīpēx pyrāk o amnhī nhīpēx. Anē.

Jejus kot akupỳm Paximew o mex ā harēnh

Matēwre 20.29-34; Rukre 18.35

⁴⁶ Tā nhūm Jejus mē hkōt mē pa ho mē pa xwỳnhjaja kormā Jerujarē hwỳr mōr ri ra krī pē Jeriko hkōt mō. Hāmri nhūm mē ohtō nē mē hā ajēt nē mē hkōt mō. Nhūm mēhō myja pry nhīhkrep nhỹ. Ximew kra Paximew nohkre xwỳnhja pry kamā ahwỳr o hkrī. ⁴⁷ Hāmri nhūm Jejus mē hkwỳjaja hwỳr htēp o mō nhūm amnhī wỳr mē kuma nē mē kot Jejus nhīxi jarēnh o mōr ā kuma hāmri nē kàx pē kām kapēr nē amnhī to kuwỳ nē kām:

—Pa Jejus? Nà apē mē inhō Pahihiti mex kumrēx na ka. Te apē amnepēm anhīgēt pahihiti Tawi kot amnhī nhīpēx pyrāk. Jakamā kwa we ixkamā axukaprí nē akupỳm ixto mex kēt wehe. Ixte amnhī kaxyw akōt ija-maxpēr xwỳnh na pa. Anē.

⁴⁸ Hāmri nhūm Jejus kukamā mē mrar xwỳnhjaja kuma nē kām:

—Tk. Kwa akapēr kēt nē nhỹ nà. Anē.

Tā nom nhūm ām mē kuma nē xatā amnhī to kuwỳ. Kỳx pē amnhī to kuwỳ nē axte kām:

—Kwa ixkamā axukaprí nē akupỳm ixto mex Pahihiti. Anē.

⁴⁹ Hāmri nhūm Jejus kuma nē xa nē hkōt mē pa ho mē pa xwỳnhjē mā kām:

—E mē atō hwỳr tē nē hpa hā apy nē amnē ixwỳr o tē. Anē.

Hāmri nhūm mē kuma nē nohkre xwỳnhhta mā kapēr nē kām:

—E tee ri amnhī kukamā ajamaxpēr kēt nē. Na atā karō. E tokyx kànhmā xa. Anē.

⁵⁰ Hāmri nhūm mē kuma nē hkính tỳx nē. Nē kànhmā harī nē amnhī nē ō kajaati mē nē hwỳr htēm kurē kumrēx. ⁵¹ Hāmri nhūm Jejus kām:

—Pa mo na? Tanhmā kot pa ato? Anē.

Hāmri nhūm kām:

—Nà akupỳm inhma ixrīt mex prām Pahihiti.

⁵² Anē nhūm kām:

—Tōe. Nà ra ate amnhī kaxyw inhma ajamaxpēr tỳx jakamā kot kaj akupỳm arīt mex kurē kumrēx. E māmri ma akupỳm tē. Anē.

Nhūm akupỳm rīt mex ā amnhī pumu nē hkính o hkính. Hāmri nē Jejus ā ajēt nē ma hkōt hkính nē tē.

Jejus kot Jerujarē hwỳr àr ā harēnh

Matēwre 21.1-11; Rukre 10.28-40; Juāw 12.12-19

11 Tā nhūm Jejus mē hkōt mē pa ho mē pa xwỳnhjē mē kormā Jerujarē hwỳr mō. Hāmri nē krī pē Petake mē hō pē Petān wỳr ahtēp o mō. Hixēt pē Oriwēhti kahti ri na pre krīja wa xa. Jakamā nhūm Jejus hkōt mē pa ho mē pa xwỳnh wa ho axkrut nē mē amnhī kukamā wa kumē ² nē wa kām:

—E wa ma krī mūj wỳr mē ixkukamā wa tē. Hāmri nē hwỳr pōj nē nhỹri jumēnre nyw mā ē nē ām xwỳnhhta pumu. Kormā mē kot hā hkrī hkēt kumrēx xwỳnhhta. ³ Ka wa omu nē kām ē xà hpōt nē man akupỳn ixwỳr o tē. Koja mēhō war apumu nē hā tanhmā war amā kapēr to ka wa ā kām ijarēnh anē nē kām: “Nà mē panhō Pahihiti na hā karō pa wa hwỳr tē.” Anhỳr o kām ijarē. E wa ma hwỳr tē. Anē.

⁴ Hāmri nhūm wa kuma nē ma hwỳr htēm kurē kumrēx nē hwỳr pōj. Nhūm Jejus kot wa kām hā karō xà hkōt jumēnre nywreta pumu. ⁵ Hāmri nē kām ē xà hpōt o xa nhūm kuri mē kuhē xwỳnhjaja tee ri hā wa omu nē wa kām:

—Kwa mo kaxyw na ka wa kām ē xà hpōt o xa? Kwa kot ka wa mē ixpē ho ahkī nà? Anē.

⁶ Hāmri nhūm wa mē kām:

—Nà mē panhō Pahihiti na wa inhma hā karō pa wa hwỳr tē. Wa ixte ma hwỳr o ixtēm kaxyw. Anē.

Hāmri nhūm mē wa kām:

—Tỳ? Tōe wa māmri ma kām o tē. Anē.

⁷ Hāmri nhūm wa ma akupỳm Jejus wỳr o tē. Hāmri nē kaxyw amnhī xē hkwỳ hkwỳr nē kām ho hkō kahti hpa nē kām ho htỳx nē o xa nhūm Jejus hā nhỹ nē mō.

⁸ Nē kormā Jerujarē hwỳr hixēt ā àpir o mō. Nhūm mē kot omunh o kuhē xwỳnhjaja hkính nē ma hkukamā pry ho mex kaxyw amnhī xē hkwỳ hkwỳr nē ho kām uty. Nhūm mē hkwỳjaja nhỹri pō hkwỳ jakà nē o mra nē hkukamā kām uty. ⁹ Nhūm mē hixēt ā api nē ahpar mā wrỳk o mō nhūm mē piitā kàx pē Tirtūm mex o mex ā harēnh o hkōt mō. Nhūm mē hkwỳjaja kukamā mra nhūm mē hkwỳjaja hapu hā mra nhūm prem piitā hkōt Tirtūm mex o mex ā harēnh o mō. Nē harēnh o:

E ota Tirtüm kot më pahwÿr mēnh xwÿnhhta ra pōj. Nà ãm hāmri na më pahwÿr wrÿ. Ja mex kumrēx.

Kēp më panhō Pahihti mex na. Koja më panhīgēt pahi Tawi pyrā nē më pahto amnhīptā nē më pahto mex o pa.

Ām hāmri na Tirtüm më pahwÿr kumē.

Tirtüm mex kumrēx. Ām mex o mex. Kukwak ri pix mā na pu htem pajamakētkati nē paxāmnhīx papa rāhā ho papa.

Anhÿr o Jejus kōt harēnh o mō. Kot më ho amnhīptār kurē kumrēx ā hkamnhīx nē hkīnh nē ā hkōt kapēr anhÿr o mō. ¹¹ Jao ra Jerujarē hwÿr pōj nhūm Jejus Tirtüm mā amnhī jarēnh xā hā ixkre hwÿr tēn axā. Nom nhūm ra amÿkry htÿx jakamā nhūm hwÿr axā nē ãm hkre pumunh o xa hāmri nē akupÿm kato nē hkōt më pa ho më pa xwÿnh pē 12jē më nhūm më ma akupÿm Petān wÿr mra.

Jejus kot pī hpār pē fikēhti mā kapēr ā harēnh

Matēwre 21.18-22

¹² Tā nhūm apkati nhūm Jejus më hkōt më pa ho pa xwÿnhjē mērohā Petān rūm hapōj nē ma akupÿm Jerujarē hwÿr mra. Nhūm Jejus ra kām prām nē mō.

¹³ Hāmri nē amÿm mēmo pī hpār hōptī rax pē fikēhti pumu nē hamaxpēr o:

—E pa hwÿr tē nē ô hwÿr rē nē kuwō mǎn. Anē.

Hāmri nē hwÿr tē. Nhūm kormā ô kaxyw ô mytwrÿ kator kēt jakamā nhūm ô hkēt nē ãm hō pix nē xa.

¹⁴ Hāmri nhūm hwÿr tē nē tee ri ô japēr nē ãm hō pix pumu. Hāmri nē tee ri omu nē kām:

—E kot kaj axte axō hkēt kumrēx.

Anhÿr o kām kapēr nhūm hkōt më pa ho më pa xwÿnhjaja hā kuma.

Jejus kot Tirtüm nhōrkwÿ hwÿr àr ā harēnh

Matēwre 21.12-17; Rukre 19.45-46; Juāw 3.13-22

¹⁵ Tā nhūm Jejus më hkōt më pa ho më pa xwÿnhjaja Jerujarē hwÿr agjē nē Tirtüm mā amnhī jarēnh xā hā ixkre hwÿr agjē. Nhūm Jejus tee ri kamā më kuhē xwÿnhjē pumu. Nhūm më ra ixkre kamā axtem nē mōx nē ôwēhti nē tuuti ho wēnē ho kuhē. Ixkre hwÿr mra xwÿnhjaja kot haprōr nē Tirtüm mā amnhī jarēnh kaxyw kām hpar nē ōr kaxyw më kām ho wēnē. Nom axtem nē hā ohtō rax kām më kām ho wēnē nhūm më hwÿr jaja më kām më hikāxpore ho anhīpa. Hāmri nhūm Jejus më hwÿr axā nē tee ri më kot ā amnhī nhīpēx anhÿr ā më omu nē më kām akir nē më kām:

—Tk. Kwa Tirtüm kapēr ā kagā htūm kot ōrkwÿ jarēnh kot:

Inhōrkwÿja ãm pika piitā hkōt më piitā kot inhmā amnhī jarēnh xā hā ixkre pix kaxyw na.

Anhÿr o kot harēnh tā ka më axtem nē kamā ā amnhī nhīpēx anhÿr o akuhē. E kwa më ma mra nē ajapōx tokyx anē. Anē.

Nhūm pre ā më kām kapēr anhÿr pē më ahkre hāmri nē ixkreja nē më kator pa. ¹⁸ Hāmri nhūm patre krāhtūmjē më Tirtüm kapēr tūm o më ahkre xwÿnhjaja tee ri ā më hipēx anhÿr ā omu nē kapēr ma nē kamā

gryk tÿx nē. Hāmri nē më kot hā ãmnēnh kaxyw tanhmā axpēn mar to nē axpēn mā:

—Tk. Kwa na më ohtō nē kām mar prām nē. Koja më anē nē gryk ā më pahkaga nē axte më pakapēr mar kēt nē. Kwa pu më kupī ri. E tanhmā kot puj më ho nē kupī? Anē.

¹⁹ Tā nhūm myt axā nhūm Jejus më hkōt më pa ho pa xwÿnhjaja Jerujarē rūm hapōj nē ma nhÿri amnhīm hikranh kaxyw mra.

Më pahte tanhmā mēmoj tā Tirtüm wÿr to hā më pamā karō

Matēwre 6.14-15, 17.20; Makre 11.13; Juāw 14.13; mǎānēn Xiakre 1.6; Wam Juāw 3.22

²⁰ Tā nhūm apkati nhūm Jejus më hkōt më pa ho më pa xwÿnhjaja Jerujarē hwÿr akupÿm mra. Hāmri nē axte pī hpār pē fikēhtita pumu. Jejus ra kot kām kapēr xwÿnhhta pumu nhūm ra grā pa nē xa. ²¹ Hāmri nhūm Simāw Pētre Jejus kot tanhmā pī mā kapēr toja mā hamaxpēr nē hā kām:

—Kwa më ijahkre xwÿnh. Ga mēmoj mÿj pumu. Jǎā ate fikēhti mā akapēr xwÿnhhta na grā par kumrēx nē xa. Anē.

²² Hāmri nhūm kuma nē më piitā më kām:

—Tÿ nā ãm hāmri na pa më amā ixkapēr. Kot kaj më mēmo kaxyw Tirtüm mā ajamaxpēr tÿx pē mēmoj tā awÿ nhūm ama nē amā hprām xā hkōt tanhmā amā hipēx to. Ka më amnhī kaxyw Tirtüm mā ajamaxpēr tÿx pē hixēt mÿj mā akapēr nē kām: “E xa nē ma tē nē gō xujanār kām mrō.” Anhÿr o kām akapēr nhūm amar xā hkōt ā amnhī nhīpēx anē nē tēn kamā mrō. ²⁴ Kot kaj më mēmoj tā Tirtüm wÿr nē kaxyw ãm pix mā ajamaxpēr tÿx nē nhūm amā ho anē.

²⁵ —Nē kot kaj më Tirtüm mā amnhī jarēnh kaxyw nē ra mēhō kot tanhmā ato mā ajamaxpēr. Hāmri nē ja ho ajamakētkati kurē kumrēx nē axte kām ajamaxpēr kēt nē. Ām mēmoj nyw pix mā ajamaxpēr o tām amnhī nhīpēx o apa. Hāmri nhūm Tirtüm kaxkwa rūm ja hā apumu nē apyrā nē ate tanhmā amnhī tomnuj to ho hamakētkati nē axte kām hamaxpēr kēt nē. Anē.

Mēhō kapēr kōt Jejus kot më ahkre hā më kot hkukjēr

Matēwre 21.23-27; Rukre 20.1-8

²⁷ Nhūm më akupÿm Jerujarē hwÿr agjē nhūm Jejus kê axte Tirtüm mā amnhī jarēnh xā hā ixkre hwÿr axā. Nhūm hkōt më pa ho më pa xwÿnhjaja hkōt hwÿr mra nē hkōt agjē nē kormā kamā kuhē. Hāmri nhūm Ijaew krāhtūmjē më më kot Tirtüm kapēr tūm o më ahkre xwÿnh më më ō patre krāhtūmjaja Jejus pumu nē hwÿr mra nē hēx rom tanhmā kām kapēr to. Na pre ra Jejus ixkreja nē mēmoj to wēnē xwÿnh më kāxpore o më hpinhpanh xwÿnhjē jano nhūm më tee ri ja hā omu nē kamā gryk tÿx nē. Jakamā nhūm akupÿn më hwÿr axā nhūm më axte omu nē hwÿr mra kurē kumrēx ²⁸ nē kām:

—Kwa më inhmā amnhī jarē. Mēhō nhÿ hā na ka hte ā amnhī nhīpēx anhÿr o ri apa? Mēhō na pre më ixwÿr amē ka pre mō? Nà xā amnhī krā hkōt na ka hte ā

amnhĩ nhĩpêx anhÿr o ri apahti? E kwa mẽ inhmã amnhĩ jarẽ. Anẽ.

²⁹ Nhũm Jesus kot tanhmã mẽ hamaxpêr to hkôt mẽ omunh mex jakamã mẽ kãm:

—Nà kot pa ixkumrêx mẽmoj tă mẽ akukja. Ka mẽ inhmã harẽ pa rĩ kormã mẽ amã tanhmã amnhĩ jarẽnh to. ³⁰ Finat Juãw Paxisja ã kot paj mẽ akukja. Mẽhõ nhĩ hã na pre hte mẽ hkrã kumrãr o pa? Xà amnhĩ krã hkôt nà xà Tĩrtũm nhĩ hã? E mẽ atõ inhmã harẽ. Anẽ.

³¹ Hãmri nhũm mẽ kuma nẽ tee ri kot tanhmã kutã kãm harẽnh to hkukamã hamaxpêr nẽ axpên mã:

—Kwa tanhmã kot puj mẽ kãm ja jarẽnh to? Mẽ kot mar o kuhê xwÿnhjaja na htem Juãw Paxis kêp Tĩrtũm nhĩ hã kapêr jarẽnh xwÿnh ã axpên mã harẽnh o pa. Jakamã kot puj mẽ kãm kot amnhĩ krã hkôt mẽ hkrã kumrãr o pa hã harẽ nhũm mẽ tee ri mẽ pama nẽ mẽ pakamã gryk nẽ. Nẽ mẽ paxêx rom ã kãm mẽ pakapêr anhÿr ã mẽ pahpumu nẽ kên o mẽ pahtak o mẽ panhĩmex. No kot puj mẽ kãm Tĩrtũm nhĩ hã mẽ hkrã kumrãr ã harẽ nhũm mẽ pama nẽ mẽ pamã: “Kwa ã kot anhÿr kênã na ka prem kapêr mar tă ixkôt amnhĩ xunhwÿr kêt nẽ?” Anẽ. Nà kot puj pêr mẽ kãm tanhmã harẽnh to hkêt nẽ. Kot puj mẽ ãm kãm aa te mẽ pahte ja jarẽnh mar kêt pyrãk o harẽ. Anẽ.

Mẽ kot tanhmã kãm nẽ nhũm kot ta pãnhã tanhmã mẽ kãm nẽ pymaj nhũm mẽ tee ri tanhmã kãm nẽ hprãm kaprÿ ho kuhê.

³³ Hãmri nẽ Jesus mã kãm:

—Konẽn. Mẽ ixte mẽhõ nhĩ hã kapêr o pa hã omunhre hã. Anẽ.

Hãmri nhũm mẽ kuma nẽ mẽ kãm:

—Tk. Tõe kot pa xep ijaxwÿja mẽ amã tanhmã amnhĩ jarẽnh to hkêt nẽ. Ijaxwÿja ixte mẽhõ nhĩ hã ã ixte amnhĩ nhĩpêx anhÿr o ri ixpa hã amnhĩ pumunhre hã. Anẽ.

Mẽ àpênh punuj xwÿnhjê jarẽnh

Matêwre 21.33-46; Rukre 20.9-18

12 Nhũm Jesus arĩ Ijaew krãhtũm mẽ mẽõ patre krãhtũm mẽ Tĩrtũm kapêr tũm o mẽ ahkre xwÿnhjê mã kapêr o xa. Nẽ mẽ kãm mẽ kot tanhmã hipêx to hkukamã mẽ kãm tanhmã amnhĩ jarẽnh to. No ãm hã kuxi nẽ mẽ kãm awjarẽ nẽ mẽ kãm:

—Koja mẽhõ hpur ã hkwyjê mã karõ. Mẽ kot kamã kãm àpênh kaxyw mẽ kãm karõ. Hãmri nhũm mẽ ma hwÿr mra nẽ kamã mẽmo hy hkre nẽ hkre pa. Hãmri nẽ pu hã kahê hpa nẽ pur kaêx kãm ixkre hprêk nhĩpêx. Mẽ kot himõk ã mẽ kot kêp àhkĩnh pymaj mẽ hapêr o hkrĩ kaxyw. Hãmri nẽ hipêx pa nhũm mẽõ patrãwja awry hã krĩ hõ hwÿr nojarêt nẽ mẽ kãm tanhmã hpur jarẽnh to nẽ mẽ kãm: “E or ixpurta nõ. Kê kamã mẽmoj kà hpa ka mẽ mãmĩ kamã awjamÿ nẽ ho axkjê. Hãmri nẽ ixkutêp inhõ jaxwÿ nẽ mãmĩ anhõ tanhmã ho hprãm xà hkôt tanhmã ho.”

—Anhÿr o mẽ kãm kapêr hãmri nẽ ma mẽ. ² Tã nhũm ra pur kãm mẽmoj hkã pa. Nhũm hpur nhõ dõn arĩ krĩ hõ kamã hã ujahkre ho pa htã kuri kãm àpênh xwÿnhjê hõja nhũm akupÿm mẽ hwÿr kumẽ. Mẽ kot

kãm õ hkwy nhõr nhũm ma kot kãm o mõi kaxyw ma mẽ hwÿr kumẽ nhũm ma akupÿm mẽ hwÿr mẽ. Mõi nẽ ra mẽ hwÿr pøj. ³ Hãmri nhũm mẽ omu nẽ axtem nẽ homnuj nẽ. Nẽ unẽ nẽ htak nẽ akupÿm hano nhũm ÿ kamã ma akupÿm mẽ. ⁴ Hãmri nhũm õ patrãwja tee ri omu nẽ hpãnhã ja mẽ nhũm ma mẽ hwÿr mẽ. Mõi nẽ mẽ hwÿr pøj. Hãmri nhũm kê wem omu nẽ mã ho anẽ nẽ. Unẽ nẽ htak nẽ hkrãx pẽ htak nẽ akupÿm hano nhũm wamta pyrã nẽ ma akupÿm ÿ kamã mẽ. ⁵ Hãmri nhũm axpên pãnhã kãm mẽ àpênh xwÿnh kwÿjê rẽ nhũm mẽ axpên pãnhã ma mẽ hwÿr pa. Ma mẽ hwÿr pa nẽ pøj nhũm mẽ te ho wamtajê mẽ hipêx pyrã nẽ mẽ hkwyjê pynẽ nẽ htak rax nẽ mẽ hano nẽ mẽ hkwyjê pa. ⁶ Nhũm mẽ õ patrãw mẽ harẽnh ma nẽ tee ri amnhĩ kukamã hamaxpêr nẽ hamaxpêr o: “Hêxta waa nẽ. Tanhmã kot paj we amnhĩ nhĩpêx to nẽ inhõta kwÿ jamÿ? Nà kot paj mẽ hwÿr ixkraja mẽ. Inhmã hapêr htã kot paj mẽ hwÿr kumẽ kê ma mẽ hwÿr mẽ. Hãmri nhũm mẽ kêp ixkra hã omu nẽ tanhmã ixpê ho hkêt nẽ. Nẽ jatã inhmã kãm inhõja kwÿ gõ nhũm man ixwÿr o tẽ. Nà kot paj anẽ.”

—Anhÿr o hamaxpêr hãmri nẽ ma mẽ hwÿr hkraja mẽ nhũm ma mẽ hwÿr mẽ.

⁷ —Tã mẽ hwÿr hpõx o mẽ nhũm mẽ amÿm amnhĩ wÿr omu nẽ kêp hkra hã omunh kurê kumrêx nẽ hã axpên mã amÿnê nẽ axpên mã: “E. Nà onêj hpur nhõ dõn krata tẽ. Koja nhÿrmã õ papaj mÿrpê amnhĩm pur ã pyka pytã nẽ ho õ. Jakamã e pu mẽ kupĩ nẽ kêp hpur ho arĩk nẽ ho panhõ. E kwa tokyj pu mẽ kupĩ ri.” Anẽ.

⁸ —Rõm nhũm ra mẽ hwÿr hpõx o tẽ nẽ ra pøj nhũm mẽ unẽ nẽ pur nẽ ho kato nẽ ahkã kamã kupĩ. ã mẽ ujarẽnh kot anhÿr. Anẽ.

⁹ Nhũm pre ã Jesus Ijaew krãhtũmjê mã ujarẽnh anẽ. Hãmri nẽ hã tanhmã mẽ hkukjêr to nẽ mẽ kãm:

—E mẽ inhmã mẽmoj jarẽ. Koja pur nhõ dõnja tee ri mẽ kot hkra hpĩr ã harẽnh ma hãmri nẽ tãm mẽ hwÿr mẽ hãmri nẽ tanhmã mẽ hipêx to wehe? Nà koja ma mẽ hwÿr mẽ nẽ mẽ himex pa hãmri nẽ hpãnhã nhãm hpurta ã mẽmojjê rẽ. ¹⁰ Mãn ka prem ra Tĩrtũm kapêr ã kagã htũm kot ja jarẽnh ma nã? Harẽnh kot:

Na prem kên o amnhĩm õrkwÿ nhĩpêx kaxyw hãmri nẽ kên maati pumu nẽ htÿx omnuj ã hkamnhĩx nẽ hka-ga. Mẽ kot hkaga htã nom nhũm Tĩrtũm mẽ kurom mex o kot kên piitã hakrenh par ã omunh kurê kumrêx.

¹¹ ãm hãmri na pre ã mex ã omunh anẽ. Anẽ. ã Tĩrtũm kapêr ã kagã htũm kot harẽnh kot anhÿr. Anẽ.

¹² Nhũm pre ã Jesus mẽ kãm ujarẽnh kãm mẽ harẽnh anẽ nhũm mẽ amnhĩ tă kuma. Tĩrtũm kapêr tũm o mẽ ahkre xwÿnh mẽ mẽ õ patre krãhtũm mẽ Ijaew krãhtũmjaja nhũm mẽ kot mẽ kãm kên maati kaga xwÿnhjê jarẽnh o te mẽ tãm harẽnh pyrãkja ma nhũm ja mẽ kêp omnuj nẽ. Jakamã nhũm mẽ kãm unênh nẽ haxãr prãm nẽ. Nom amnhĩ tă kãm mẽ kot mar o kuhê xwÿnhjê puma nẽ. ¹³ Jakamã na prem ma mra nẽ hapøj hãmri nẽ Jesus wÿr Parijew nhõ xwÿnh mẽ pahi Erox kôt mẽ pa xwÿnh kwÿjê rẽ. Mẽ kot hêx rom mẽmoj tă

hkukjêr nhùm kot mẽ mar nê tanhmã Rôm nhõ xwỳnhjê nhõ pahi Sesti kapêr kuhpa hã ri tanhmã mẽ kãm nê nhùm mẽ kot mar kaxyw. ¹⁴ Jakamã nhùm mẽ ma hwỳr mra nê hêx rom kãm kapêr nê kãm:

—Kwa Jejus? Nà ãm hãmri na ka hte Tirtùm kapêr o mẽ ahkre mex nê. Na ka hte mẽ kamã akahak o apa hkêt nê. Nê mẽ kot tee ri mẽ kot tanhmã ato kapêr punuj to htã ka hte arí aprí hã mẽ ahkre mex o ri apa. E kwa mẽ inhmã mẽmoj jarê. Rôm nhõ pahihti kot mẽ pahpê Ijaew mẽ pahte kãm kàxpore hkwy nhõr ã mẽ pamã karõta. Kwa xà ja amã mex nà? Xà kot pu mẽ kãm kugõ? Xà kot pu mẽ kãm òr kêt nê? E kwa mẽ inhmã harê. Anê.

¹⁵ Nhùm prem ã hêx rom ja hã hkukjêr anhỳr tã no nhùm Jejus mẽ hamaxpêr ã mẽ omunh mex mẽ mẽ kãm:

—Tk. Kwa mon ka mẽ axêx rom ja hã ixkukja? E mẽ atõ inhmã kàxpore htyxre hõ gõ pa omu. Anê.

¹⁶ Hãmri nhùm ja kãm ja gõ nhùm kupy nê kànhmã kupê nê mẽ kãm:

—E mẽhõ nhìxi nê mẽhõ karõ na hã? Anê.

Anê nhùm mẽ kãm:

—Pahi Sesti karõ nê hixi na hã.

¹⁷ Anê nhùm mẽ kãm:

—Tỳ. Tô kêr ka mẽ mãmri kãm hkwy nhõr o apa. Hã hkarõ nê hã hixi. Tãm kot hipêx xwỳnh jakamã õ na. No mẽ kajaja na pre Tirtùm mẽ anhípêx nhùm mẽ apê õ jakamã kwa kêr ka mẽ kapêr kôt pix mã ri amnhĩ nhípêx o ri apa. Anê.

Nhùm pre ã mẽ kãm kapêr anê nhùm mẽ piitã mar o kuhê. Nhùm mẽ kot hêx rom hkukjêr xwỳnhjaja amnhĩ jaêr pê ã kàxpore jarênh anhỳrja ã kuma nê axpên mã:

—Kwa mẽ paxêx rom mẽ pahte hã hkukjêr tã nhùm ãm hãmri mẽ pakutã mẽ pamã harê. Kwa tanhmã kot puj wem hkukjêr to nhùm pahi Sesti kapêr kwỳm ri mẽ pamã mẽmoj jarê? Anê.

Hãmri nê tee ri tanhmã hkukjêr to hkukamã hamaxpêr o kuhê.

Akupỳm mẽ htír xwỳnhjê jarênh

Matêwre 22.23-33; Rukre 20.27-40; Juãw 6.21, 6.38-40; mãänên Wam Korít 6.14, 15.12-28; Wam Tesarõn 4.13-18

¹⁸ Tã nhùm Satusew nhõ xwỳnh kwỳjaja. Mẽ kot akupỳm mẽ htír mã hamaxpêr kêt xwỳnhjaja na pre mẽ. Tã mẽ kot mẽ htyk nê mẽ hapêx ã mẽ hkamnhĩx jakamã na prem axpên mã Jejus jarênh o:

—E kwa pu mẽ ma hwỳr mra nê mẽmoj xihtỳx ã hkukja kê mẽ pama nê tee ri tanhmã mẽ pamã kapêr to hkukamã hamaxpêr. Hãmri nhùm mẽ piitã ja hã omu nê àhpumunh kêt ã omunh kurê kumrêx. E tokyx ma pu mẽ hwỳr. Anê.

Hãmri nê ma hwỳr mra nê Parijew nhõ xwỳnhjê pyrà nê hêx rom kãm:

¹⁹ —Pa Jejus? Kwa mẽ inhmã mẽmoj jarê. Na pre finat Mojesja Tirtùm nhỹ hã ã mẽ panhígêjtjê mã karõ anê. Mẽ hkra hkêt rãhã mẽ pa nê mẽ htyk xwỳnhjaja nhùm mẽ harênh o:

Koja mẽhõ hprõ hãmri nê kamã hkra hkêt rãhã pa nê ty. Hã koja hkôt htõja hpãnhã hprõ o hprõ nê kamã hkra. Hãmri nhùm kato nê te kêp htõ htyk xwỳnhhta hkra pyràk. Anê.

Na pre ã Mojes Tirtùm nhỹ hã ja hã mẽ kãm karõ anê.

²⁰ Jakamã kwa ga mẽ ixujarênh ma. Koja mẽmojjaja mẽ kot axpên to htõ xwỳnhjaja kêp 7. Nhùm kot waja hprõ. Nê wa pa nhùm myja kormã hprõ kamã hkra hkêt rãhã ty. ²¹ Nhùm hkôt htõ hõta hpãnhã hprõ ho hprõ nê wa axpên to pa. Nhùm haxwỳja kamã hkra hkêt rãhã ty. Nhùm hkôt htõ hõta haxwỳja ho hprõ nê wa axpên to pa grire nhùm wamta wa uràk nê kamã hkra hkêt rãhã ty. ²² Hãmri nhùm htõ hkwyjaja piitã nija pyxi nê axpên pãnhã ho hprõ nom mẽhõ kamã hkra hkêt rãhã htyk pa. Hãmri nhùm mẽ hprõta mẽ hkôt amnhĩ to hitep nê ty. ²³ Tã Tirtùm kot akupỳm nhỹrmã mẽ ho htír ronhỹx nhỹ nhỹx kêp nija mjên kumrêx? Ra piitã kot ho hprõ kênã. E kwa mẽ inhmã ja jarê. Anê.

²⁴ Hãmri nhùm Jejus ã mẽ ujarênh anhỳrja ma nê mẽ kãm:

—Tk. Nà mẽ ate Tirtùm kapêr ã kagà htùm mar mex kêt. Nê mẽ aprí hã tanhmã Tirtùm kute hã omunh kêt jakamã na ka mẽ ã atỳx ja hã ixkukjêr anê. ²⁵ Kormã mẽ htír ri mẽ kot Tirtùm kôt amnhĩ xunhwỳr xwỳnhjaja na htem ty hãmri nê Tirtùm nhõ krí kamã axte kãm hprõ hprãm kêt pa. Rỳ ni japêr nê kãm mjên prãm kêt nê pa. Hãmri nê Tirtùm kapêr o mẽ wrỳk xwỳnhjê pyrà nê axte htyk kêt nê. ãm htír tùm rãhã nê pa ho pa.

²⁶ —Nom mẽ ate akupỳm mẽ htír kêt ã mẽ hkamnhĩxja kot paj ixprí hã mẽ amã harê. Amnepêm na pre Tirtùm pí hpòk kamã tanhmã Mojes mã kapêr to. Mãn ra mẽ ate mar. Na pre kãm:

Ixpê Apraãw nhõ Tirtùm na pa. Nê mãänên ixpê Apraãw kra Ijak mẽ htãmnhwỳ Jako wa õ Tirtùm na pa. Anhỳr o Mojes mã amnhĩ jarê nhùm kuma nê hã kagà.

²⁷ Kêp apu arí mẽ htyk rãhã nhỹx pre ã mẽ harênh anhỳr kêt nê. Nhỹx pre mẽ harênh o: “Amnepêm Apraãw nê hkra nê htãmnhwỳ mẽ htír ri ixpê mẽ õ Tirtùm na pa pre.” Anhỳr o nhỹx pre mẽ harê. Nom na pre ã amnhĩ jarênh anhỳr kêt nê. Mẽ pamã te Apraãwja mẽ htyk nê mẽ hapêx pyràk. Nom nhùm prem ra Tirtùm ri akupỳm htír nê mex nê pa ho pa. Tã ka htem Tirtùm kapêr kwỳm ri akupỳm mẽ htír kêt ã mẽ harênh o apa. Anê.

Tirtùm kapêr maati jarênh

Matêwre 10.37, 22.34-40; Rukre 10.25-27; mãänên Wam Juãw 2.15, 5.3; Apokarip 2.4

²⁸ Tã nhùm Tirtùm kapêr tùm o mẽ ahkre xwỳnhjê hõ mẽ hwỳr tẽ nê mẽ kot axpên mã kapêr ã mẽ omunh o xa. Hãmri nê Jejus kot tanhmã Satusew nhõ xwỳnhjê mã kapêr mex toja ma nê kãm:

—Nà ãm hãmri na ka ã mẽ kãm ja jarênh anê Pahihti. Kwa inhmã mẽmoj jarê. Na pre Tirtùm ahpỳnhã mẽmoj to 10 nê mẽ pamã hã karõ. Mẽ pahte hkôt amnhĩ nhípêx o ri papa kaxyw hã mẽ pamã karõ. Tã nhỹ kapêr na mex o kot hkwyjê jahkrenh wehe? Anê.

²⁹ Hãmri nhùm kãm:

—Nà Tirtùm kapër xohtôô. Kapër piitã hkôt mẽ pahte amnhĩ nhĩpêx o papaja na kãm hprãm. No pixi na mẽ pahte hkôt amnhĩ nhĩpêx o papaja nhũm kãm hprãm tỳx o kot hkwy jakrenh. Kapër mex maati na ja. Na pre kapër o:

E mẽ apê Ijaew nhõ xwỳnhjaja. Ixpê mẽ anhõ Tirtùm ã ixpixi mex na pa.

³⁰ Jakamã kêr ka mẽ amã ixkĩnh tỳx o mẽmoj piitã hakrenh pa. Jao mẽ anhĩ piitã ho amã ixkĩnh tỳx kumrêx o ri apa.

³¹ Anhỹr o na pre mẽ pamã karõ. Nê hkôt ja:

Kêr ka mẽ nhãm mẽ hipêx o te ka amã amnhĩ tã ma pyrãk o mẽ hipêx o ri apa. Jao tãm mẽ hipêx rãhã ho ri apa. Anê.

E ja wa kumrêx na Tirtùm kãm mẽ pahte hkôt amnhĩ nhĩpêx o ri papa hprãm tỳx nê. Anê.

³² Hãmri nhũm kuma nê kãm:

—Nà ãm hãmri na ka ja jarê Mějahkre xwỳnh. Tirtùm pyxi mex kênã. ³³ Amnepêm na pre htem kãm amnhĩ jarênh kaxyw nê kãm mẽmoj gõ nê rĩ kormã tanhmã kãm amnhĩ jarênh to. Tã nom kot puj mẽ ã ate harênhhta kôt amnhĩ nhĩpêx anhỹr o papa jao mẽ panhĩ piitã pamã Tirtùm kĩnh. Nê mẽ pamã hkĩnh o mẽmoj piitã hakrenh pa. Nê nhãm mẽ hipêx o te mẽ papamja-ja pamã amnhĩ tã ma pyrãk o mẽ hipêx. Jao tãm mẽ hipêx rãhã ho ri papa. Kot puj mẽ ã amnhĩ nhĩpêx anê nhũm Tirtùm kãm ja mex o mẽ pahte kãm mẽmoj nhõrta jakre.

Anhỹr o kãm kapër. ³⁴ Hamaxpêr mex pê ã Jejus mã kapër anê nhũm kuma nê kãm:

—Nà ãm hãmri na ka ja jarê. Na ka ra mẽ kot Tirtùm kôt amnhĩ nhĩpêx o amnhĩ nhĩpêx nyw pumunh mex o mõi. Nà te ate tokyx hkôt amnhĩ xãm kaxyw pyrãk. Anê.

Hãmri nhũm mẽ kãm hkurê xwỳnhjaja tee ri wa kot axpên mã kapër mar o kuhê nê axte kãm mẽmoj tã hkukjêr puma nê. Ra tee ri mẽ kot hêx rom mẽmoj tã hkukjêr kaprỳ jakamã axte tanhmã hkukjêr to hkêt nê.

Jejus kêp pahi finat Tawi nhõ Pahihti hã harênh

Matêwre 22.41-46; Rukre 20.41-44; määnên Rõmãn 1.3-4

³⁵ Hãmri nhũm Jejus arĩ Tirtùm mã amnhĩ jarênh xà hã ixkre kamã amnhĩ tã mẽ ahkre. Nom te nhãm mẽhõ hã mẽ hkukjêr pyrãk amnhĩ tã mẽ hkukja nê mẽ kãm:

—E mẽ inhmã mẽmoj jarê. Tirtùm kapër tũm o mẽ ajakre xwỳnhjaja na htem tanhmã mẽ amã Tirtùm kot mẽ akaxyw ãm mã xwỳnh jarênh to nê mẽ amã harênh o: “Koja kêp pahi finat Tawi kanrêhã htãmnhwỳ koja.” Anhỹr o kot mẽ amã harê. ãm kêp kanrêhã htãmnhwỳ pix ã mẽ amã harênh o pa. No na pre pahi Tawija kêp kanrêhã htãmnhwỳ hã harê nê määnên kêp õ pahihti hã harê. Tã nom nhũm Tirtùm kapër tũm o mẽ ajakre xwỳnhjaja na htem urà nê kêp pahihti hã mẽ amã harênh kêt nê. ãm kêp kanrêhã htãmnhwỳ pix ã harê. Kwa mo na htem Tawi pyrã nê kêp õ pahi hã harênh kêt nê? ³⁶ Na pre Tawi tãm Tirtùm kapër tũm kwỳ hã kagà nê tanhmã Tirtùm kot mẽ akaxyw ãm mã xwỳnhhta jarênh to. Tirtùm Karõ nhỹ hã tanhmã

harênh to. Tirtùm mex ã mẽ grer xàja kwỳ hã kagà nê hã kagà ho:

Tirtùm na pre inhõ Pahihti mã ã kapër anê nê kãm: “E amnê ixwỳr tẽ nê inhĩkõ hã nhỹ nê inhmã mẽ ho amnhĩptar o akrĩ. Kot paj mẽ kot kãm akurê xwỳnh pi-itã mẽ unênh pa nê awỳr mẽ o mra nê anhĩhkram mẽ haxàr pa.” Anhỹr o pre kãm kapër. Anê.

³⁷ —Na pre ã Tawi Tirtùm kot Kris mã kapër jarênh nê kêp õ pahi hã kagà anê. Tã nom Tirtùm kapër tũm o mẽ ajakre xwỳnhjaja na htem kêp Tawi htãmnhwỳ pix ã ri axpên mã harênh o ri pa. No kêt Tawija na pre kêp õ Pahihti hã harênh o pa. Anê.

Nhũm pre ã Jejus mẽ kãm amnhĩ jarênh anê nhũm mẽ mar o kuhê xwỳnhjaja kuma nê hkĩnh nê. Nê kãm axte mar prãm nê.

³⁸ Hãmri nhũm arĩ mẽ ahkre ho nhỹ nê mẽ kãm:

—Kwa mẽ o kora. Kêr ka mẽ Tirtùm kapër tũm o mẽ ahkre ho mẽ pa xwỳnhjê kot amnhĩ nhĩpêx o amnhĩ nhĩpêx kêt nê. Mẽ omu nê ãm mẽ omu nê mẽ kot amnhĩ nhĩpêx kôt amnhĩ nhĩpêx kêt nê. Na htem piitã mẽ hã hpijaam kaxyw ê mex pix kãm ri pa. Nê mẽ kot amnhĩm mẽ rũnh ã mẽ harênh nhũm mẽ kot amnhĩ jarênh marja na htem kãm hprãm. ³⁹ Nê Tirtùm kapër o mẽ ahkre xà hã ixkre kamã mẽ kãm amnhĩ to rũnh xwỳnhjê hkrĩ xà mex pix kamã na mẽ kãm hkrĩ hprãm. Nê mẽmoj tã mẽ apkur xà hã arĩgro hã ma hkwyjê hkôt mẽ apkur xà hã ixkre hwỳr akuprõ nê kãm mẽ kot amnhĩ to rũnh xwỳnhjê hkrĩ xà mex pix kamã hkrĩ hprãm.

⁴⁰ —Nê mẽ kot mẽ mjên htyk xwỳnhjê ho mex o pa hã amnhĩ jarênh tã amnhĩ to hêx. Nê na htem axtem nê mẽ nokupyw kaxyw mẽ hwỳr mra nê mẽ kãm: “E ot pa awỳr ato ajuta kaxyw tẽ. Ra amjên apê htyk jakamã kot paj pam amã akukrêx jamãr o ixpa.” Anê hãmri nê mẽ kêp mẽ òrkwy pytà nê amnhĩm mẽ kêp mẽ hikukrêx piitã ho hapêx. Te tãm kot mẽ hipêx o pa pyrãk nom tãm mẽ hipêx kêt nê. Nê te tãm amnhĩ nhĩpêx pyrã nê Tirtùm mã amnhĩ jarênh japjêê ho kuhê. Te mẽ kot Tirtùm mã ãm hãmri amnhĩ jarênh pyrãk tã hkwyjaja kot ja hã mẽ omunh pix kaxyw nhũm mẽ ã kãm amnhĩ jarênh anê. Mỳrapê koja mẽ mex kêt nê. Koja Tirtùm tanhmã mẽ hipêx kati hto. Jakamã kwa kêr ka mẽ ã mẽ kot amnhĩ nhĩpêx anhỹr o mẽ pa xwỳnhjê kôt amnhĩ nhĩpêx o ri apa hkêt nê. ãm kwarĩ ho kwarĩ. Anê.

Kêp mjên htyk xwỳnh jarênh

Rukre 21.1-4

⁴¹ Nhũm Jejus arĩ Tirtùm mã amnhĩ jarênh xà hã ixkre kamã mẽ omunh o xa. Na pre hte Ijaew ixkreja o mex kaxyw ixkre jamãr xwỳnhjê mã hikàxpore hkwy nhõr o pa. Nhũm mẽ hikàxpore rũnh xwỳnhjaja hwỳr agjê nê kàxpore gjênh xà kamã hkwy ho rax nê hagjê nê ma akupým mra. ⁴² Tã nhũm mẽhõ ni pê mjên htyk xwỳnh-ja haxwỳja hwỳr axà. Kêp amrakati kumrêx. Nê hikàxpore tỳxre ãm pijakrutre htã kàxpore rũnh xwỳnhjê hpãnhã ixkreta wỳr tẽ. Nê kãm Tirtùm kĩnh xà kàxpore gjênh xà kamã hamẽ kumẽ hãmri nê kato nê ma

akupým tě. ⁴³ Hāmri nhūm Jejus amým ā kot amnhī nhīpêx anhÿr ā omunh o xa nhūm ja kām mex nê. Hāmri nê hkôt mē pa ho mē pa xwÿnhjê mǎ harē nê mē kām:

—E mǎn ka mēnire htēm mÿj pumu. Na pre mjên kēp ty nhūm kēp amrakati nê hikàxpore grire htǎ amnhī pē ōr pa. Kwÿjê rom kām Tirtūm kīnh xàj amnhī pē ōr pa. Apkur xà hǎ hikàxpore na. ⁴⁴ Kēt mē hkwyjaja na hte hikàxpore hkwy pix o mra nê gjēnh xà kamǎ hagjê nom arī mē hikàxpore rūnh. No nija na mē uràk nê kām hikàxpore japê hkēt nê. Nê ho ōxy hkēt nê amnhīx piitǎ o tē nê ōr pa. Anê.

Jejus kot nhÿrmǎ mēmoj piitǎ ho hapêx ā harēnh

Matêwre 24.1-14; Rukre 21.5-9, 21.17-19; mǎānēn Wam Ximotre 4.1; Sikūn Ximotre 3.1

13 Tǎ hāmri nhūm Jejus kôt mē pa ho mē pa xwÿnhjaja arī Tirtūm mǎ amnhī jarēnh xà hǎ ixkre kaxwÿnh pumunh o kuhê nê hǎ Jejus mǎ:

—Hêxta waa nê. Ixkreja mex kumrêx Pahihti. Kēn rūnh o mē kot hipêx jakamǎ mex o mex. Nê mē kot ri Tirtūm mǎ hkīnh xà nhōr nēj haxwÿja piitǎ mex kumrêx. Anê.

² Hāmri nhūm mē kām:

—Nà mex tǎ koja nhÿrmǎ mē kām Tirtūm kurê xwÿnhjaja grành pa. Koja arī kēn axkrutre xepēn mÿnh nê nōr kēt kumrêx. Koja piitǎ anhgrà nê ahpÿnhǎ ri hikwÿ.

Anhÿr o mē kām kapêr. ³ Hāmri nê ixkreja rūm kato nê ma tē nê hixêt pē Oriwēhti hǎ api nê hǎ nhÿ. Tirtūm nhōrkwy kutǎ hixêtja nhūm hǎ api nê hǎ nhÿ. Hāmri nhūm Simǎw Pêtre mē Xiakre mē Juǎw mē Andreja ma hkôt mra. Ahte hkôt mra nê mē kot Tirtūm mǎ amnhī jarēnh xà hǎ ixkre grành par ā hkukja nê kām:

⁴ —Kwa xà ām hāmri koja mē ā ixkreja nhīpêx anê? E aprī hǎ mē inhmǎ harē. Xà koja mē nhÿrmǎ kugrà nà xà koja mē tokyx ho anê? Kwa mēmo koja we wÿj ri tanhmǎ amnhī nhīpêx to? Anê.

⁵ Hāmri nhūm mē kām:

—Nà kot paj mē amǎ harē. Nom nhÿrmǎ mēmoj piitǎ hapêx kaxyw tanhmǎ amnhī nhīpêx to kumrêx kot paj mē amǎ harē ka mē inhma. Koja mē ohtô nê mē apê ixkwÿjê hwÿr mra nê hêx rom te pa ixte amnhī nhīpêx pyrāk o amnhī nhīpêx o pa. Nê tanhmǎ mē amǎ amnhī jarēnh to nê mē amǎ: “E pa na pre Tirtūm mē awÿr inhmē. Ixpê kaxkwa rūm ixwÿk xwÿnhhta na pa.” Anhÿr o mē akôt mē amǎ amnhī to hêx o pa. Nê mē amǎ: “E na pa mē ato amnhīptār kaxyw mē awÿr wrÿ.” Anhÿr o mē amǎ amnhī jarē. Nom kêr ka mē ama nê ām mē ama. Mē kot amnhī to hêx xwÿnh na mē. Kormǎ akupÿn ixpôx xà hǎ arīgroja kormǎ.

⁷ —Nê koja mē nhÿri awry hǎ xepēn par o pa. Nê mē atǎǎ xepēn par o pa. Nom kêr ka mē harēnh ma nê ri tee ri tokyx mēmoj piitǎ hapêx ā hkamnhīx kēt nê. Mēmoj piitǎ hapêx xà hǎ arīgroja kormǎ.

⁸ —Nê koja mēmoj piitǎ hapêx kaxyw nhūm ahpÿnhǎ ri pika piitǎ hkôt mē pa xwÿnh piitǎ pika hō nhō xwÿnhjê kutǎ amnhī xunhwÿ nê axpu nê xepēn pa.

—Nê koja pika piitǎ hkôt tanhmǎ mē à kuteja mē hamÿ nhūm mē amnhī xà htÿx kām hamak o pa. Nhūm nhÿri pika httertēt tÿx nê. Nê nhÿhÿnh pika hkwy kamǎ mē pa xwÿnhjaja prām xàj pikaprār pa. Tǎ nom kormǎ mē kot amnhī xà htÿx kām hamak xà hkrapax pix na ja. Te mēnijaja pijagri kaxyw nê kormǎ ōhy xà hpÿnh pyrāk. Koja mēmoj piitǎ hapêx kaxyw nê ā amnhī nhīpêx anê.

⁹ —E pa hpānhǎ mē kot Tirtūm mǎ amnhī jarēnh xà hǎ ixkre grành par xwÿj ri mēmoj tanhmǎ kot hkukamǎ amnhī nhīpêx to hǎ hǎ harē. Mē ate hǎ ixkukjêr xwÿnhhta kot paj mē amǎ harē. Nà koja mē kām ixkurê xwÿnhjaja mē awÿr mra nê ixtǎ mē apynê nê mē atomnuj nê. Nê ma mē pikuprōnh xà hǎ ixkre hwÿr mē ato mra nê kamǎ mē kām mē ato kapêr punuj nê nhūm mē kuma nê ma mē ato mra nê mē ajagjê. Mē ate ixkôt apa ho apa xwÿnh ā ā mē anhīpêx anê. Nê mē ō pahihti hwÿr mē ato mra nê mē kām tanhmǎ mē ato kapêr punuj to. ¹⁰ Tǎ nom kwa kêr ka mē kutǎ akuhê nê mǎmrī tām mē kām ijarēnh o akuhê. ¹¹ Nom kêr ka mē kām amnhī jarēnh kukamǎ tee ri ajamaxpêr o ri amǎ mē uma hkēt nê akuhê. Rÿ mē ajamaxpêr o: “Hêxta waa nê. Mē kot ixkukjêr ā arīgrota ā tanhmǎ kot pa we ri mē kām amnhī jarēnh to?” Anhÿr o tee ri amnhī kukamǎ ajamaxpêr kēt nê. Koja Tirtūm Karō tanhmǎ mē akrǎ hto ka mē ŷ hǎ akatāt kôt tanhmǎ mē kām amnhī jarēnh to.

¹² —Nê mē atō nê mē anhīpêxà nê mē akrajaja koja mē ixtǎ mē atǎ amÿnê nê ma pahi hwÿr mē ato mra nê kām mē ajarē nhūm mē kuma nê mē ajagjê nê mē akwÿjê pa. ¹³ Koja mē piitǎ ixkôt mē akamǎ gryk nê ā kām mē akurê ho pa anê. Nom mē kot ā mē anhīpêx anhÿr mǎ tǎ kêr ka mē amnhī to htÿx nê ixkaga hkēt nê. Mē kot mē apar tǎ ka mē kaxkwa kamǎ akupým atīr kurê kumrêx. Hāmri nê mē kurom Tirtūm mē wa ixri atīr tūm nê amex rǎhǎ nê apa ho apa. Mē kot tanhmǎ mē ato htǎ mē apê akupým kaxkwa kamǎ atīr tūm nê apa mǎ xwÿnh jakamǎ kwa tee ri amnhī kukamǎ ajamaxpêr o ri apa hkēt nê. Anê.

Mē pahtomnuj tÿx xwÿnh maati hǎ harēnh

Matêwre 24.15-28; Rukre 21.20-24; mǎānēn Sikūn Tesarōn 2.3-4; Apokarip 13.11-17

¹⁴ Nhūm Jejus arī mē kām kapêr nê mē kām:

—Nê koja nhÿrmǎ kot mē atomnuj tÿx kumrêx xwÿnh maati axtem nê Tirtūm mǎ amnhī jarēnh xà hǎ ixkreja kamǎ amnhī xām. Hāmri ka mē ja hǎ omu nê mē kot krī grành par mǎ ajamaxpêr kurê kumrêx. Koja ā amnhī nhīpêx anê ka mē amým amnhī wÿr mē omu hāmri nê ajapôj nê ma aprôt nê amrar kurê kumrêx. Mē apê jar pika pē Jutej kamǎ mē apa xwÿnhjaja mē omu hāmri nê mē kot mē apar pymaj ma aprôt nê amrar kurê kumrêx. Hixêt prêk wÿr ajapôj nê aprôt nê ma mra. Nê jar Jerujarē nhō xwÿnhjaja kê mē umaj haxwÿja hapôj nê ma hprôt nê ma mrar o mra. Nê kapôt ā ri mē pa xwÿnhjaja kê mē ê jamÿnh kaxyw akupým krī hwÿr gjêx kēt nê. Ām ma mē umaj hprôt nê mrar o mrar kurê kumrêx.

¹⁷ —Ně mě htujarô xwýnhjaja ně mě hkra karàre xwýnhjaja. Jajê pê koja mëmoj omnuj tỳx ně. Tanhmã kot wem amnhĩ to ně hprôt tỳx? Nà pika ja kamã koja më mex kêt ně. Mě kot amnhĩ tomnuj mỳrapê koja Tirtũm tanhmã më homnuj tỳx to.

¹⁸ —Koja ã mëmoj amnhĩ nhĩpêx anê hãmri nhũm më piitã amnhĩ xà htỳx kãm hamak rũnh o pa. Tirtũm kot më piitã më ho kator krax rũm amnê më pa xwýnhjaja na më kormã à htỳx kamã hamak rũnh kêt ně. Kormã amnhĩ xà kamã hamak kryre. No nhỹrmã më hprôt xà hã arĩgrota ã koja më amnhĩ xà htỳx kamã hamak rax kumrêx.

—Tã akupỳn ixte më awỳr ixwỳk xà hã arĩgrota ã kot pa mëmoj punuj o ijapêx pa ka më axte ã mëmoj kot anhỳr pumunh kêt ně. Nom kormã akupỳn ixwỳk xwỳj ri kot kaj më amnhĩ xà htỳx kamã ajamak o apa.

Jakamã kêr ka më ã amnhĩ nhĩpêx anhỳrja kukamã amnhĩ to Tirtũm wỳ ně kãm: “Pa Tirtũm. Kwa kê mëmoj ã amnhĩ nhĩpêx anhỳr kaxyw hãmri kê amgrà pê ã amnhĩ nhĩpêx anê. Koja na pê ã amnhĩ nhĩpêx anê nhũm omnuj tỳx ně.” Anhỳr o amnhĩ to awỳ.

²⁰ —Mě hprôt xà hã arĩgrota ã koja Tirtũm kãm më apê hkrajaja më atyk par pymaj më anê mëmo punuta ã arĩgro hkwy grà ně më akukamã më amã ho grêre. Koja më akamã ukapří xàj ã më anê hipêx anê.

²¹ —Ně koja ã mëmoj amnhĩ nhĩpêx anhỳr kaxyw hãmri nhũm më hêx o më pa xwýnhjaja ma më awỳr mra ně hêx rom tanhmã më amã kapêr to ně më amã: “E ota ra Tirtũm kot më pakaxyw ãm xwýnhhta pôt. Kwa më tokyx hwỳr mra ně omu ně hkôt ri apa.” Anhỳr o më amã hêx. Hãmri nhũm më hkwyjaja tee ri më kuma ně më amã: “Nà tãm kêt. Jar më ixkamã na. E më tokyx amnê hwỳr mãn mra ně omu.” Anhỳr o më amã hêx o pa. Nom kêr ka më ama ně ãm më ama ně më hkôt amrar kêt ně.

²² —E kwa më inhma. Na pa ra ixprĩ hã mëmoj kot ã amnhĩ nhĩpêx anhỳrja kukamã më amã tanhmã harênh to. Tã kêr ka më axkãm ajamak rom ně ri apa. Koja më kot amnhĩ to hêx xwýnhjaja xypên pãnhã më awỳr mra ně më amã kêp Tirtũm kot më akaxyw ãm xwýnh ã amnhĩ to hêx. Ně më hkwyjaja kêp Tirtũm nhỹ hã kapêr jarênh xwýnh ã amnhĩ to hêx. Hãmri ně aa më kot mëmoj pumunh kêt kwỳ ho anhỳr o pa. Te Tirtũm nhỹ hã kot ho anhỳr pyrãk nom hêx rom më apê Tirtũm kot amnhĩm më arênh xwýnhjê nokupyr kaxyw ã amnhĩ nhĩpêx anhỳr o pa. Anê.

Akupỳn Jejus wỳk xà hã arĩgro jarênh

Matêwre 24.29-31; Rukre 21.25-28; määnên Sikũn Pêtre 3.10; Apokarip 1.7, 19.11-16

²⁴ Nhũm Jejus arĩ më kãm kapêr ně më kãm:

—Tã koja më kot amnhĩ xà htỳx kamã hamak xà hã arĩgrota hapêx nhũm Tirtũm ã mëmoj nhĩpêx anê.

Koja kaxkwa ho àk tỳx ně nhũm myyti ahtyk.

Nhũm mytwỳre axte hirã hkêt ně.

Nhũm kanhêti piitã axrê ně rôrôk pa.

²⁶ Hãmri pa man akupỳn pika hwỳr wỳr nhũm më piitã ixwỳk kãm ixpumu. Kakrã kamã kot paj ixihỳx o in-

hirã rax kãm akupỳn më awỳr wỳr. ²⁷ Hãmri ně ma krĩ piitã hwỳr Tirtũm kapêr o më wỳk xwýnhjê rê nhũm më ma mra ně amnepêm ixte amnhĩ kaxyw më axunhwỳr xwýnh piitã ho akuprô ně akupỳn ixwỳr më ho mra. Anê.

Jejus kot mëmo pĩ hpàr ã ejêp jarênh

²⁸ Nhũm Jejus arĩ më kãm kapêr ně më kãm:

—E ka më pĩ hpàr mỳj pumu. Na hte mëmo mytwỳr hã rã nhũm më omu ně ô hkukamã hamaxpêr kurê kumrêx. ²⁹ Ja pyrã ně koja mëmoj ã amnhĩ nhĩpêx anhỳr më ka më akupỳn më awỳr ixwỳk mã ajamaxpêr kurê kumrêx. ³⁰ Koja akupỳn ixpôx kêt ri ã më kot mëmoj kot amnhĩ nhĩpêx anhỳr pumunh xwýnhjaja kormã piitã htyk par kêt ri pa akupỳn më awỳr wỳr.

³¹ —Ně koja nhỹrmã pika ně kaxkwa wa hapêx pa. Tã no ãm ixkapêr koja wa urãk ně aa hapêx kêt ně. Koja ãm rãhã ho rãhã. Kot paj aa ihkjê ho tanhmã mênh to hkêt ně. Anê.

Mě pahte akupỳn Jejus wỳk xà hã arĩgro pumunh kêt ã më pajarênh

Matêwre 24.36-44; Rukre 12.37-40; määnên Atre 1.9-11; Wam Tesarôn 5.2; Sikũn Pêtre 3

³² Nhũm Jejus arĩ më kãm kapêr ně më kãm:

—Nom akupỳn ixwỳk xà hã arĩgroja më ate omunh kêt. Ně kaxkwa kamã Tirtũm kapêr o më wỳk xwýnhjaja kot ja pumunh kêt. Ně pa ixpê Tirtũm Kra htã ijaxwỳja ixte ja hã amnhĩ pumunh kêt. ãm Měpahpãm maatija tapxipix kot ja pumunh.

³³ —Tã më ate akupỳn ixwỳk xà hã arĩgro pumunh kêt jakamã kwa kêr ka më axkãm ajamak rom ně ri apa. Ně apkati më amnhĩ wỳr ijapêr arĩt rãhã ho ri apa.

³⁴ —E pa tanhmã më amã akupỳn ixwỳk xà hã arĩgro jarênh to ka më inhma. Koja mëhõ nhỹhỹm nojarêt hãmri ně kãm më àpênh xwýnhjê mã më àpênh ã karô ně ôrkwy jamãr xwýnh mã tanhmã kãm karô hto. Hãmri ně ôrkwy kahê xà jamãr xwýnh mã kãm: “E kêr ka ixwakre kamã ijapêr arĩt rãhã ho ri apa.” Anê hãmri ně ma nhỹhỹm mō. Tã më kot ijapêr rĩt rãhã ho më pa xwýnhjaja te kot ixkre kahê xà jamãr xwýnh kot amnhĩ nhĩpêx pyrãk. Ô patrãwja akupỳn hpôx xà hã arĩgro hã omunh kêt jakamã na hte kahê xà jamãr rãhã ho pa. Koja apu xypêr kamãt nhũm akupỳn hpôx japêr. Rỳ kôt ã kamãt rỳ krãhyre kà nhũm akupỳn hpôx japêr. Rỳ kwỳhtyk nhũm akupỳn hpôx japêr. Tã urãk ně më ate akupỳn ixwỳk xà hã arĩgro pumunh kêt jakamã kêr ka më ijamãr rãhã ho ri apa. Jao ixkutêp inhmã tanhmã amnhĩ nhĩpêx to rãhã ně. Ra ixte më amã hã karô xà hkôt. ³⁶ Kop ixkre kahê xà jamãr xwýnhja tee ri ô patrãw kamã ama hãmri ně ra ôtxwa ně htỳx ôt o ýr rôm nhũm haêr pê hwỳr hpôx ronhỹx ja kêp mex kêt ně. Ja pyrã ně kêr ka më ixkutêp ixkôt amnhĩ nhĩpêx rãhã ho ri apa. Nom tee ri amnhĩ wỳr ixkãm ama hãmri ně axte inhmã ajamaxpêr kêt pê atỳx ri tanhmã amnhĩ tomnuj to ho apa hkêt ně.

³⁷—E ixte më amã mëmoj jarënhja na pa hte ixkwÿjê piitã më kãm harë. Jakamã kwa kêr ka më akupÿn ixwrÿk ã ijapër arÿt rãhã ho ri apa. Anë.

Nhũm pre ã Jejus amnhÿ kukamã më kãm ujarënh anë.

Më kot Jejus pÿr kukamã hamaxpër ã më harënh

Matêwre 26.1-5; Rukre 22.1-2; Juãw 11.45-53

14 Tã nhũm Ijaew hkÿnhã ã arÿgro pë Pas wÿr apkati axkrut. Pas ã na hte më ixpë Ijaewjaja amnepëm Tÿrtũm kot pika pë Ejit pë më inhÿgët nã më ixpãmjê kator mã ijamaxpër kaxyw axpën wÿr akuprõ nã hã ixkÿnh. Na pa htem arÿgroja mã: “Pas” anë. Nã harënh o: “Më pahte pãw kaxkrit kêt kur ã arÿgro” anë. ²Jakamã nhũm më inhõ patre krãhtũmjê më Tÿrtũm kapër tũm o më ahkre xwÿnhjaja kãm Jejus pÿr prãm nã. Nom më kãm hkõt kapër mar o më pa xwÿnhjê py-ma nã. Nã tee ri hã amnhÿ jahkre nã axpën mã:

—Hêxta waa nã. Tanhmã kot puj wem ho nã kupÿi? Kot puj më pahkÿnh kãm tanhmã ho nhũm më hkÿnh xwÿnhjaja hã më pahpumu nã më pakamã gryk tÿx nã. Pu më hã axpu nã hã tanhmã axpën to. Jakamã kwa pu më kormã tanhmã ho hkêt nã. Anë.

Mêhõ ni kot Jejus krã gregrer ã harënh

Matêwre 26.6-13; Rukre 7.36-50; Juãw 12.1-8

³Rôm nhũm Jejus Simãw nhõrkwÿ kamã kormã apkur o nhÿ. Krÿ pë Petãn kamã. Simãwja na pre hkã kro xapër tÿx o pa nhũm Jejus akupÿn ho mex. Jakamã akupÿm õ krÿ hwÿr pøj nã kutã apkur o nhÿ. Hãmri nhũm mëhõ nija harënh ma nã më hkuxwa xà hã kàx õ py nã ma hwÿr o tã. Nã më hwÿr axà nã nhÿhÿnh kàx kahte nã më hkuxwa xà ho hkrã gregrer pa. ⁴Hãmri nhũm më apkur o hkrÿ xwÿnhjaja tee ri ã kot amnhÿ nhÿpêx anhÿr ã omu nã kamã gryk nã. Nã axpën mã:

—Tk. Kwa nã na hã më hkuxwa xàta kapÿr par kumrêx. ⁵Kop apu ma o htëm nã ho wënê nã hpãnhã kàx-pore ho rax kumrêx nã hamÿnh nã ho më kêp amrakati xwÿnhjê nhÿpêx par nhÿx ja kãm mex nã. Mo na ri ã amnhÿ nhÿpêx anhÿr kêt nã?

Anë nã hã kãm akir. ⁶Hãmri nhũm Jejus më kuma nã më kãm:

—Tk. Kwa më kãm axàkjêr kêt nã. Æm hãmri na ã inhÿpêx anë. ⁷Më kêp amrakati xwÿnhjaja koja më arÿ më akõt pa rãhã nã. Ka më amã mëmo arÿgro hã më ho ajuta hprãm nã tanhmã më ho ajuta hto nã më kãm mëmoj gõ. No pa kot paj ri më akõt ixpa ka më ixto mex ry ho apa hkêt nã. Kot paj tokyx më are. ⁸Ixtyk nhũm më kot ijaxàr kukamã na ã ixkrã gregrer anë. Æm hãmri na ã inhÿpêx anë. ⁹Æm hãmri na pa më amã ja jarë. Koja më krÿ piitã hkõt axpën mã ixte tanhmã më anë amnhÿ nhÿpêx to hã ijarënh o pa nã mãänën kot ã inhÿpêx anhÿrja mãänën harënh o pa. Nhũm më piitã kot tanhmã ixto mex to hã harënh ma. Anë.

Jut Kariot kot më kãm Jejus ã àmnênh kaxyw ã harënh

Matêwre 26.14-16; Rukre 22.3-6; Juãw 13.21-30

¹⁰Tã nhũm Jut Kariotja. Jejus kõt më pa ho më pa xwÿnh pë 12 hõ na pre. Tã axtem nã Satanasti nhÿ hã ma patre krãhtũmjê hwÿr tã nã axtem nã tanhmã Jejus o më mar to nã më kãm:

—E ot pa më amã Jejus jarënh o tã. Xà kot paj më amã hã amÿnê ka më hpãnhã inhã amnhÿre nã? Anë.

¹¹Hãmri nhũm më kuma nã hkÿnh nã. Hãmri nã kãm:

—Nã kot paj më amã amnhÿre. Anë.

Hãmri nhũm më kuma nã kato nã ma tã nã Jejus pÿnênh kaxyw htãnopxar o hkõt ri pa.

Jejus kot ÿ hã kapër o më pa xwÿnhjê kutã apkur ã harënh

Matêwre 26.17-19; Rukre 22.7-13

¹²Tã nhũm arÿgro pë Pas kato. Amnepëm më inhÿgët-jaja na prem õwêhti hkrare hkwy pa. Tÿrtũm kot ja hã më omunh nã Ejit kãm më kãm më hkurê xwÿnhjê nhÿhkra nã më kator kaxyw na prem ã amnhÿ nhÿpêx anë. Jakamã na pa htem arÿ më ixpë më hkanrêhã më htãmnhwÿjaja Pas ã axpën wÿr akuprõ nã jam ijamaxpër pë më uràk nã õwêhti hkrare hkwy hpa nã pãwti kaxkrit kêt kãm kuku.

Jakamã nhũm Jejus kõt më pa ho pa xwÿnh pë 12jaja Pas ã më apkur xà hã Jejus kukja nã kãm:

—Kwa nhÿri kot paj më akutêp Pas ã më panhõ hã apê? Anë.

¹³Hãmri nhũm më kuma nã ja wa ho axkrut nã më amnhÿ kukamã wa kumë nã wa kãm:

—E wa ma Jerujarê hwÿr wa tã. Nã hwÿr axà nã mëhõ myja pumunh kurê kumrêx. Nhũm amnhÿm gõ ru nã amnhÿ kre hã poti xãm nã o tã ka wa omu nã hã ajêt nã ma õrkwÿ hwÿr hkõt tã. ¹⁴Hãmri nã ixkre nhõ dõn pumu nã kãm: “E Jejus na wa inhme pa wa awÿr tã. Na awÿr pë mênh o: ‘Nhÿri kot paj we ixkõt ri më pa ho pa xwÿnhjê më Pas ã axpën kutã apku?’ Anhÿr o na awÿr pë më.”

¹⁵—Wa ã kãm akapër anë kê war ama nã war amã õrkwÿ nhÿmõk ã ixkre rax õ jahkre. Ra kamã kaxyw më paxàpkur xà hã mëmoj piitãã. Ka wa omu nã mãmrÿ kamã më ixkutêp më panhõ hã apê. Anë.

¹⁶Hãmri nhũm wa kuma nã ma hwÿr tã. Nã krÿm axà nã ra kot wa kãm mëmoj jarënh xà hkõt mëmoj piitã omu nã më kutêp më kãm mëõ hã àpênh o wa xa.

Jejus kot mëhõ kot më kãm hã àmnênh ã harënh

Matêwre 26.20-25; Rukre 22.21-23; Juãw 13.21-30

¹⁷Tã nhũm kamãtre nhũm Jejus më hkõt më pa ho pa xwÿnhjaja wa hkõt mõ. ¹⁸Hãmri nã kÿxpë ixkreja wÿr api nã hwÿr agjê nã apkur kaxyw hkrÿ hpa nã kormã apkur o hkrÿ nhũm Jejus më kãm:

—E pa më amã mëmoj jarë ka më inhma nã amnhÿ krãm haxàr tÿx nã. Kot kaj më ixkutã axàpkur o akrÿ xwÿnhjê hõ më kãm ixkurê xwÿnhjê mã ixtã amÿnê. Anë.

¹⁹ Hāmri nhūm mě tee ri kuma ně hkapří htýx ně. Ně axpěn pānhā amnhī tā hkukja ně kām:

—Kwa xà pa kot paj ā anhīpêx anê? Nà pa hkêt. Anê.

²⁰ Hāmri nhūm mě kām:

—Nà mě apê 12jê hō kot kaj ā inhīpêx anê. Mě ate ixkutā guhkrax kām anhō pāwti ho mry kagō nhek o akrī xwýnhjê hō kot kaj ixtā amýnê. ²¹ Tirtūm kapêr ā kagà htūm kot ixkukamā harēnh xà hkôt koja mě tanhmā ixto rax ně ixpī. Nom kot mě kām ixtā àmnēnh mā xwýnhhta hēxta waa ně. Ā kot amnhī nhīpêx anhýrja mýrapê koja amnhī xà htýx kām hamak rax kumrêx. Kop apu aa ô māmāj nhōxà hkre rūm kator kêt ronhýx ja kām mex ně.

²² Anê ně kormā mě apkur o hkrī rōm nhūm pāwti hō py ně ho Tirtūm wý. Hāmri ně mě kām ho hkry ně mě piitā mě kām ôr pa ně mě kām:

—E na pa mě amā pāwti ho hkry ně mě amā kugō. Ja pyrā ně koja mě ā inhīpêx anê ně te ixto hkry hpar pyrāk o inhīpêx pa amnhī xà htýx kamā ijamak kām ty. Nom mě anê kot paj ty. E mě māmří aku. Anê.

²³ Ně hpānhā wíhti hā kop py ně mā ho anê ně Tirtūm mā harē. Hāmri ně mě kām kugō ně mě kām:

—E mě kot ixpír xà hā arīgrota ā koja ixkamrô axkapí. Nom koja mě amarí ixpír nhūm amarí hpikapír kêt ně. Ām paa. Pa kot paj mě anê mě íhkram amnhī jaxà nhūm mě ā inhīpêx anê. Koja ixkamrô axkapí nhūm Tirtūm omu ně ixkukwak ri ně anê mě ate amnhī tomnuj piitā amnhī katut kôt rēnh pa ně mě ato hkra. Ra amnepēm kot ja hā amnhī jarēnh xà hkôt. Jakamā e. Mě axpěn pānhā ixkamrô pikapír mā ajamaxpêr pē ixte mě amā kop kām wíhti nhōrta o akōm o axpěn nhīpêx. Anê.

Nhūm pre ā mě kām amnhī jarēnh anê nhūm mě piitā ho hkōm o axpěn nhīpêx. ²⁵ Hāmri nhūm mě kām:

—Ām hāmri na pa mě amā amnhī jarē. Kot paj axte wíhti ho ixkōm kêt rāhā nhýrmā Inhō Papaj akupýn mě awýr inhmē. Hāmri pu mě rí kormā akupýn ixpōx xà hā arīgrota ā pahkính ně. Nom axtem tanhmā hā pahkính to. Anê.

²⁶ Nhūm pre ā mě kām kapêr anê hāmri nhūm mě Tirtūm mā mex o mex ā gre hāmri ně hapōx pa ně ma hixêt pē Oriwēhti hwýr mra.

Jejus kot Simāw Pêtre hkukamā tanhmā harēnh to

Matêwre 26.31-35; Rukre 22.31-34; Juāw 13.36-38

²⁷ Tā nhūm Jejus hkôt mě pa ho pa xwýnhjê hkukamā tanhmā mě kām ujarēnh to ně mě kām:

—E mě inhmā. Tirtūm kapêr ā kagà htūm kot ā mě pajarēnh kot anhýr.

Kot paj ôwēhti jamār o pa xwýnhja pī hāmri nhūm ôwēhti hpigrānh pa ně ma anhrà ně ri mra. Anhýr o te ixpê ôwēhti jamār xwýnh nhūm mě apê ôwēhti pyrāk ā mě pajarēnh. Tā kot puj mě ā amnhī nhīpêx anê. ²⁸ Mě kot ixpír tā koja Tirtūm akupým ixto ixtír. Pa akupým ixtír ně ma mě akukamā pika pē Garirej wýr mō. Kamā kot puj mě axte axpěn pumu. Anê.

²⁹ Hāmri nhūm Simāw Pêtre tee ri mě amnhī tā kuma ně kām:

—Kwa nà. Ri ā mě ijarēnh anhýr kêt ně Pahiht. Kot paj akaga hkêt ně. Jajaja koja anhrà ně hprôt ně ma mrrar japêr no pa kot paj anhýr kêt ně. Anê.

³⁰ Hāmri nhūm kām:

—Nà kot kaj anê Simāw Pêtre. Koja apkati hkôt krāhyre hkàr kêt ri ka ra mě umaj ate ixkôt apa hkêt ā mě kām amnhī tā axàprār o axkrunêpxi kām ga. Kwa jam ajamaxpêr týx ně. Anê.

³¹ Hāmri nhūm tee ri amnhī tā kuma kām amnhī tā àprār kām hihtýx ně kām:

—Tk. Kwa nà. Kot paj ā amnhī nhīpêx anhýr kêt ně. Koja mě tee akôt ixpír mā tā no pa ām aa akaga hkêt kumrêx. Kot paj akôt ixpa ho ixpa rāhā ně. Anê.

Hāmri nhūm hkôt mě pa ho mě pa xwýnh kwýjê piitā ā kām amnhī jarēnh anê.

Jejus kot Tirtūm mā amnhī jarēnh

Matêwre 26.36-46; Rukre 22.39-46

³² Tā nhūm Jejus ma nhýri mě kot kām “Gesēm” anhýr xwýnhja wýr hkôt mě pa ho pa xwýnhjê ho mō. Hāmri ně mě kām:

—E mě jar ixkutêp akrī. Pa ma mütüm tē ně Tirtūm mā amnhī jarē mán. Anê.

³³ Hāmri ně amnhī kôt mě ho axkrunêpxi ně mě o mō. Simāw Pêtre mě Jepetew kra pijakrut pē Xiakre ně Juāwja nhūm amnhī kôt mě o mō. ³⁴ Hāmri ně amnhī kukamā mě kām hkurê xwýnhjaja kot tanhmā hipêx tota kukamā hamaxpêr o ra amnhī kamā kahak týx o ra hkaprí ně. Hāmri ně hkôt mě mrrar xwýnhjê mā kām:

—Hēxta waa ně. Na pa tee ri amnhī xà htýx kamā ijamak kukamā ijamaxpêr ně amnhī kamā ixkahak týx o ixkaprí ně. Te ra ixkapríja kot ixpír o mōr pyrāk. Jakamā e mě jar anohtýx ně ixto Tirtūm wýr o akrī kêt tanhmā ixto pa mě kot tanhmā ixtoja kutā ixihtýx ně. Anê.

³⁵ Hāmri ně mě kurūm htēm grire ně amnhī kamā kahak o Tirtūm mā amnhī jarēnh kaxyw htu mýr pē htēm ně pikap nō ně kām:

³⁶ —Kwa Papaj. Hēxta waa ně. Inhmā amnhī xà htýx kām ijamak prām kêt kumrêx. Na pa tee ri amnhī kukamā ijamaxpêr ně amnhī kamā ixkahak týx ně. Jakamā kot kaj amā inhnē ja ho ajapêx prām ně māmří ho ajapêx nhūm mě kām ixkurê xwýnhjaja tanhmā ixto hkêt ně. Rý ko. Kot kaj amā mě kot tanhmā ixto hprām kêt mě māmří tanhmā inhīpêx to. Nom pam inhmā hprām xà hkôt kêt.

³⁷ Anhýr o Tirtūm mā amnhī jarē hāmri ně kànhmā xa ně akupým Simāw Pêtreja mě hwýr tē ně mě omu nhūm mě ra htýx gōr ně hikwý. Hāmri nhūm tee ri mě omu ně Simāw Pêtre mā kām:

—Kwa Simāw Pêtre. E mě hāmri akrā hapôj. Kwa wem anohtýx grire ně ixkutêp amnhī to Inhō Papaj wýr o akrī ³⁸ kêt mě ixkôt tanhmā mě ato htā ka mě amā mě uma xàj ixkaga hkêt ně arí mě kutā amnhī to htýx ně akuhê. Ā mě amā mě ate amnhī nhīpêx anhýr prām nom kormā mě amā maa. Anê.

³⁹ Hāmri nē akupŷm tē nē axte Tirtūm mā tanhmā amnhī jarēnh to.

⁴⁰ Nē akupŷm mē hwŷr tē nē mē omu nhūm mē axte ōt pa nē hikwŷ. Nhūm tē nē tee ri mē omu hāmri nē tanhmā mē kām nē hkēt nē. Ām awjanā nē ma akupŷm tē nē axte Tirtūm mā amnhī jarē. ⁴¹ Hāmri nē akupŷm mē hwŷr tē nē mē kām:

—Kwa xàn ka mē arī gōr nē anhīkwŷ? E mē tokyx akrā hapōj. Na mē ra ixwŷr mrar nē kot ixpynēnh mā. Kōja mē tokyx ixkutā mē kot amnhī xunhwŷr xwŷnhja-ja mē kām ixtā amŷnē. Ota ra kot ixtā mē kām àmnēnh xwŷnhhta tē. E mē tokyx kànhmā akrī pu mē kutā mra. Anē.

Mē kot Jejus pynēnh ā mē harēnh

Matēwre 26.47-56; Rukre 22.47-53; Juāw 18.1-11

⁴³ Nhūm Jejus kormā mē kām kapēr o ām rāhā nhūm Jut Kariotja tē. Mē hkôt mē pa ho mē pa xwŷnhjē hō htā nhūm ra amnhī kôt mē ohtō nē Jejus wŷr mē o tē nhūm mē wapohti nē kō jamŷ nē hkôt o mra. Patre krāhtūm mē Ijaew krāhtūmjē mē Tirtūm kapēr tūm o mē ahkre xwŷnhjaja ra Jut kôt mē kurē nhūm mē man hkôt Jejusja wŷr mra. ⁴⁴ Na pre ra Jut Kariotja mē kām tanhmā amnhī jarēnh to nē mē kām:

—E kot paj nhŷri mē pahte unēnh mā xwŷnhhta pumu nē hwŷr tē nē kahti hkôt kumŷ nē tanhmā kām ixkapēr to. Ka mē ixpumu nē hwŷr tē nē unē nē ma akupŷm o tē.

Anē hāmri nē ma hwŷr mē o tē. ⁴⁵ Nē Jejusja pumu nē hwŷr tē nē kām: “Pa mē ijahkre xwŷnh.” Anē hāmri nē kahti hkôt kumŷ. ⁴⁶ Hāmri nhūm hkôt mē mrar xwŷnhjaja omu nē Jejus wŷr mra nē unēnh kurē kumrēx. ⁴⁷ Hāmri nhūm Jejus kôt mē pa ho mē pa xwŷnhja-ja tee ri ja hā mē omu nhūm hōja ō wapo kapa nē patre maati mā àpēnh xwŷnh kôt mē hkôt htēm xwŷnhhta mā wapo ho apē. Nē kot ho hkrā nhīpōnh mā tā kuh-paw nē upōk rūm hamak nhīkjē krāhta. ⁴⁸ Hāmri nhūm Jejus amnhī tā mē kot unēnh xwŷnhjē mā kām:

—Kwa na pa pre apkati mē Tirtūm mā amnhī jarēnh xà hā ixkre kamā mē kām ixujarēnh o ixpa ka prem tokyx ixpynēnh kēt nē. Tā jarāhā te ixte amnhī tomnuj xwŷnh pyrā nē ixwŷr wapohti nē kō hā akapēn nē ixwŷr atēm rax nē. Nom ra mē ate tanhmā ixto kaxyw arīgro kator jakamā mē māmri tanhmā amā ixto hprām xà hkôt tanhmā ixto. Tirtūm kapēr ā kaga htūm kot mē akukamā ā mē ate inhīpēx anhŷr ā mē ajarēnh xà hkôt. Anē.

⁵⁰ Hāmri nhūm hkôt mē pa ho mē pa xwŷnhjaja tee ri mē kot unēnh ā mē omu hāmri nē mē umaj Jejus kaga nē ma hprōt pa nhūm ahte mē kuri xa. ⁵¹ Hāmri nhūm mē ma o tē. Nhūm kormā mēhō nyw xwŷnhja tee ri ja hā mē omu nē ma Jejus kôt tē. Nhūm mē amnhī kôt omu nē kot unēnh kaxyw kahty xà hā kupy nhūm mē umaj mē ihkra kamā kahty xàja re nē ma hkēnh nē hprōt nē tēn akunok.

Ijaew nhō patre maati kot Jejus kukjēr ā harēnh

Matēwre 26.57-68; Rukre 22.63-71; Juāw 18.12-14, 18.19-24

⁵³ Tā nhūm mē ma mē ō patre maati nhōrkwŷ hwŷr Jejus o tē. Hāmri nhūm patre krāhtūmjē mē Ijaew krāhtūmjē mē Tirtūm kapēr tūm o mē ahkre xwŷnhjaja ōrkwŷ hwŷr Jejus ā akuprō. ⁵⁴ Hāmri nhūm Simāw Pêtre mē hkôt tē nē mē hkôt patre maati nhō kítare hwŷr axà nē amŷm hā mē omunh o xa. Nhūm ra pôristijaja kítare kamā amnhīm kuto nē hā ànhunh o hkrī nhūm mē hwŷr tē nē mē ihkō hā ànhunh o nhŷ.

⁵⁵ Rôm nhūm ixkre kamā mē pikuprōnh xwŷnhjaja tee ri Jejus ā krī nhō xwŷnhjē kukja nē mē kām:

—E mē atō na ka pre Jejus kot tanhmā amnhī tomnuj to hā omu? Mē atō mē inhmā harē pa mē ama nē Rôm nhō xwŷnhjē nhīhkram haxà kē mē pamā kupī. Anē.

Hāmri nhūm mē axpēn pānhā tanhmā harēnh to. Tanhmā kot amnhī tomnuj to hā harēnh to htā nom ri ho hēx jakamā axpēn kwŷm ri tanhmā ri harēnh to nhūm mē tee ri mē kuma nē mē kām:

—Tk. Kwa mē axpēn kwŷm ri tanhmā harēnh to hkēt nē. Axpēn kôt mǎn ri tanhmā mē inhmā harēnh to. Anē.

⁵⁷ Hāmri nhūm mē hkwŷjaja kànhmā kuhē nē axpēn kôt tanhmā ho hēx to nē mē kām:

⁵⁸ —Nà kot paj mē amā tanhmā kot amnhī nhīpēx to hā harē. Na pa prem ā kapēr anhŷr ā kuma. Na pre tanhmā Tirtūm mā amnhī jarēnh xà hā ixkreta jarēnh to nē harēnh o: “Kot paj ixkreja grānh pa hāmri nē ixtā apkati axkrunēpxi nē akupŷm hipēx. Nom kot paj amnhī nhīhkra ho hipēx kēt nē.” Anhŷr ā ā amnhī jarēnh anē pa mē kuma.

⁵⁹ Anhŷr o harēnh tā nom axpēn kôt harēnh kēt nē.

Arī axpēn kwŷm ri harē. ⁶⁰ Hāmri nhūm mēō patre maati tee ri mē kot tanhmā ho kapēr toja ma nē mē aptār tūmjē noo mā kànhmā xa nē Jejus mā kām:

—E na ka ra mē kot ā ajarēnh anhŷrja ma. Xà kot kaj tanhmā mē inhmā amnhī tā axàprār to hkēt nē? Xà ām hāmri na mē ajarē? E kwa mē inhmā tanhmā amnhī jarēnh to. Anē.

⁶¹ No nhūm akryk xa nē tanhmā kām nē hkēt nē. Hāmri nhūm tee ri ā kot amnhī nhīpēx anhŷr ā omu nē axte kām:

—Kwa mē inhmā amnhī jarē. Xà apē Tirtūm Kra na ka? Xà ka na apē Tirtūm kot mē ixwŷr amēnh xwŷnh na ka? Anē.

⁶² Hāmri nhūm tā kām amnhī jarē nē kām:

—Tŷ. Ixpē tāmta na pa. Ra mē ate jarāhā tanhmā ijarēnh to kaxyw apikuprōnh tā nom kot paj nhŷrmā mē kamjaja tanhmā mē ajarēnh to ka mē amnhī tā ixpumu. Kot kaj mē Tirtūm kot mē ato amnhīptār xà kutā akrī hāmri pa hwŷr tē nē ihkō hā nhŷ. Kakrā kamā kot paj hwŷr tē nē ihkō hā nhŷ hāmri nē ŷ hā tanhmā mē ajarēnh to ka mē amnhī tā ixpumu. Anē.

⁶³ Hāmri nhūm tee ri ā kot amnhī jarēnh anhŷrja ā kuma nē gryk xàj amnhī xē kaxō nē mē àptār tūmjē mā kām:

—Kwa mo kaxyw kot puj më axte ri ho tanhmã kot amnhĩ tomnuj to hã harënh xwýnhjê hõ japêr? Ra tãm kot amnhĩ pê Tirtũm Kra hã amnhĩ to hêx nhũm më pahte pajamak o mar kênã. E tanhmã kot puj më ho? Anë.

Hãmri nhũm më kãm:

—Nà kot puj më kupĩ. Ra htyk mã tãm kênã. E kwa tokyx pu më ma Rõm nhõ pahihti hwýr o tẽ kê më pamã hã amýnê kê më kupĩ. Anë.

⁶⁵ Hãmri nhũm më hipêx kati rax nê. Nê hkuk kuhtô nê hpãnhã no hpro nê htak nê kãm:

—E më kot atak xwýnhjê nhĩxi jarê. Apê Tirtũm Kra hã ate amnhĩ jarënh jakamã mãn urak nê axàh-pumunh tỳx. Jakamã e më hixi jarê. Anë.

Nhũm prem ã hipêx anë hãmri nê pôristijê nhĩhkram haxà nhũm më htak rax o kuhê.

Simãw Pêtre kot Jejus kôt pa hkôt ã kot amnhĩ jarënh

Matêwre 26.60-75; Rukre 22.54-62; Juãw 18.15-18, 18.25-27

⁶⁶ Rõm nhũm Simãw Pêtre arĩ kítare kamã më ìhkô hã ànhunh o nhỹ. Hãmri nhũm mëõ patre maati mã àpênh xwýnh nitita më hwýr kato nê xa. Hãmri nê hirã kamã hprĩ hã Simãw Pêtre pumu nê omunh mex kurê kumrêx nê kãm:

—Xê pêr apê Najare nhõ xwýnh Jejus kôt më pa ho më pa xwýnhjê hõ na ka. Anë.

⁶⁸ Hãmri nhũm tee ri kuma nê ra kãm ma nê. Nê kãm amnhĩ tã aprã nê kãm:

—Tk. Koký. Ixte mëhõ my ata pumunhre hã. Anë.

Hãmri nê kànhmã xa nê ma tẽ nê kítare hwýr kahê hkôt ã më hkàx ã ahte xa nhũm krãhyre kà. ⁶⁹ Nê gaa nhũm hpãnhã më kãm àpênh xwýnhjê hõja omu nê hã më kãm:

—Xê ma ãm hãmri na harê. Kôt ri më pa xwýnhjê hõ na pêr. Anë.

⁷⁰ Hãmri nhũm amnhĩ tã kuma nê kãm:

—Tk. Kwa nà. Mẽ ri ã amnhĩ krã hkôt ri ixto axêx anhýr kêt nê. Aa ixte mëhõ ata pumunh kêt kumrêx. Anë.

Hãmri nhũm më hkwýja gaa nê kê axte hprĩ hã omu nê kãm:

—Kwa ãm hãmri na mẽ ajarê. Apê Jejus hkwý na ka. Ajaxwýja apê Garirej nhõ xwýnh kênã. Anë.

⁷¹ Hãmri nhũm tee ri mẽ kuma nê kãm ma htỳx nê. Hãmri nê mẽ kãm:

—Kwa nà. Na pa Tirtũm noo mã mẽ amã amnhĩ jarê. Kot paj amnhĩ to ixêx japêr nhũm inhma nê hã tanhmã ixto. Nà uràn ixpê Garirej nhõ xwýnhre hã. Ixte mëhõ mũj pumunh kêt kumrêx tã ka mẽ xatã axpên kôt ixte hkôt ixpa ho ixpa xwýnh ã ixkamnhĩx o xa.

Anhýr o ra mẽ kãm amnhĩ tã aprãr o axkrunêpxi.

⁷² Hãmri nhũm axte krãhyre kà. Jao ra hkàr o axkrut. Hãmri nhũm Simãw Pêtre kuma nê Jejus kot ra hkukamã ã amnhĩ nhĩpêx anhýr ã harënhja mã hamaxpêr kurê kumrêx. Krãhyre kormã hkàr o axkrut kêt ri kot mẽ kãm amnhĩ tã aprãr o axkrunêpxi hã harënhja mã hamaxpêr. Hãmri nê ra kànhmã hakry hpar o tẽ nê hkaprĩ htỳx kumrêx. Hãmri nê tee ri amnhĩ kukamã hamaxpêr nê amnhĩ mã:

—Hêxta waa nê. ãm hãmri na pre Jejus ijarê. Tã pa kot ijarënh xà hkôt ã amnhĩ nhĩpêx anë. Kwa mo na pa axtem nê ã mẽ kãm amnhĩ to ixêx anê?

Anë hãmri nê hkaprĩ xàj mýr rax nê.

Pirat kot Jejus kukjêr ã harënh

Matêwre 27.1-2, 27.11-14; Rukre 23.1-5; Juãw 18.28-38

15 Tã nhũm myt kato nhũm mẽ axte Jejus ã axpên wýr akuprõ. Patre krãhtũmjê mẽ Ijaew krãhtũmjê mẽ Tirtũm kapêr tũm o mẽ ahkre xwýnhjê mẽ Ijaew nhõ juistijaja nhũm mẽ piitã hã akuprõ.

Hãmri nê pôristi mã anë nhũm mẽ Jejus pa hpre nhũm mẽ ma Rõm nhõ xwýnhjê nhõ pahi Pirat wýr o tẽ. Piratja na pre hte Rõm nhõ xwýnhjê nhõ pahi Sesti nhỹ hã Ijaew o amnhĩptar o pa nhũm prem ma hwýr o tẽ.

² Hãmri nê kutã ãm nê tanhmã kãm harënh to nê kãm:

—E ot pa mẽ awýr jahti ho tẽ. Na hte mẽ inhmã hêx rũnh o pa. Mẽ ixte Pahihti Sesti kapêr kwým ri amnhĩ nhĩpêx prãm xàj tanhmã mẽ inhmã hêx to. Nê axtem nê mẽ ixte Sesti mã kàxpore hkwý nhõr kêt ã mẽ inhmã karõ. Nê Tirtũm kot mẽ ixkaxyw kêt mẽ inhõ pahi hã ãm ã amnhĩ jarënh o pa. Na hte ã mẽ inhmã amnhĩ to hêx anhýr o pa. Anë.

Hãmri nhũm Pirat mẽ kuma nê Jejus pumu nê tanhmã hkukjêr to nê kãm:

—E inhmã amnhĩ jarê. Xà ãm hãmri na mẽ ã ajarënh anë nà? Xà apê Ijaew nhõ pahi na ka? Xà ka na htem amnhĩ wýr akãm hamak o pa? Anë.

Hãmri nhũm kãm:

—Tỳ. Nà ãm hãmri na ka ã ijarënh anë. Anë.

³ Hãmri nhũm patre krãhtũmjaja tanhmã kãm ho kapêr to. ⁴ Nhũm mẽ kuma nê axte hkukja nê kãm:

—Kwa na mẽ ã ajarënh anë ka mẽ ama nê ãm mẽ ama nê inhmã tanhmã amnhĩ tã axaprãr to hkêt nê. Anë.

⁵ Nom nhũm Jejus ãm akryk xa nê tanhmã axte kãm nê hkêt nê. Jakamã nhũm Pirat tee ri omunh pê hamaxpêr o nhỹ.

Pirat kot Jejus pĩr ã àmnênh ã harënh

Matêwre 27.15-26; Rukre 23.13-25; Juãw 18.39-19.16

⁶ Na pre hte pahi Pirat arĩgro pê Pasja ã Ijaewjaja kãm hprãm xà hkôt mẽ hãgênh xwýnhjê ho hpýnh nê mẽ kãm ure. ⁷ Jakamã nhũm Ijaew kwýjaja hwýr mra nê kãm:

—Pa. Kwa xà kot kaj jarãhã mẽ inhmã mẽ hãgênh xwýnhjê hõ mã anhũre nà? Anë.

Hãmri nhũm mẽ kuma nê hamaxpêr o:

—E paj Jejus ã mẽ kuma nê kãm inhũre. Mẽ piitã mẽ kãm kapêr mar prãm nhũm mẽõ patre krãhtũmjaja pix kot mẽ hkôt kamã gryk nê ã ixwýr o mrrar anhýr kênã. Anë.

Hãmri nê mẽ kãm:

—Tỳ. Nà kot paj mẽ amã hõm inhũre. Kwa xà kot pa mẽ amã mẽ anhõ "pahihti" jarënhja mã inhũre nà? Anë.

¹¹ Hãmri nhũm patre krãhtũmjaja tee ri kuma nê mẽ kãm:

—Kwa mẽ kãm aně kê Parapas mã măn ure. Aně. Hãmri nhũm mẽ kuma nẽ Pirat mã kãm:
—Nà Jejus mã anhũrer kêt nẽ. Parapas mã măn an-
hũre. Aně.

¹² Hãmri nhũm mẽ kãm:

—No mẽ ate mẽ anhô pahi hã harěnh xwỳnhta?
Tanhmã kot paj ho? Aně.

¹³ Hãmri nhũm mẽ àmra kamã kãm hã amỳnẽ nẽ
kãm:

—Kwa pĩ kahpa hã anhô kê ty. Aně.

¹⁴ Hãmri nhũm tee ri mẽ kuma nẽ mẽ kãm:

—Tk. Kwa nà. Tanhmã kot amnhĩ tomnuj tore hã kot
pa ã hipěx aně.

Anhỹr tã nhũm mẽ xatã anhĩpẽ kãm kapěr kãm hi-
htỳx nẽ kãm:

—Kwa pĩ kahpa hã măn anhô kê ty. Tokyx ã mẽ
inhmã hipěx aně.

Anhỹr o kuhê. Kàx pẽ kãm anhỹr o kuhê. ¹⁵ Nhũm tee
ri mẽ kuma hãmri nẽ mẽ kãm hprãm xà hkôt mẽ kãm
Parapas mã ure. Nẽ pòristi hkwyjẽ mã Jejus ã amỳnẽ
nẽ mẽ kãm:

—Tõe. Mẽ mamrĩ hwỳr tẽ nẽ htak hãmri nẽ kapôt ã
mẽ hpar xà hã pika hwỳr o tẽ nẽ pĩ kahpa hã anhô.
Aně.

Mẽ kot Jejus tak ã mẽ harěnh

Matêwre 27.27-32; Juãw 19.2-3

¹⁶ Tã nhũm pòristijaja akupỹm ixkreja wỳr Jejus o axà
nẽ amnhĩ wỳr hkwyjẽ hã karô nhũm mẽ hwỳr agjẽ nẽ
Jejus ã akuprô. ¹⁷ Hãmri nẽ kệp pahi hã hpěr o pikěnh
kaxyw kãm pahi hã mẽ ahkà nhĩpěx nẽ hkrãm haxà.
Nom axtem nẽ akunĩ kamã mẽmo mrô nhĩ te kot ronh
kanêre pyræk xwỳnhja nhũm mẽ kãm hikãx nẽ hkrãm
haxà. Hãmri nẽ kệp ê kapa nẽ pahi hã mẽ ê kamrêk õ
py nẽ kãm haxà. ¹⁸ Hãmri nẽ kãm:

—E apê Ijaewjẽ nhô pahi na ka. Aně.

¹⁹ Hãmri nẽ xatã axpẽn pãnhã hwỳr mra nẽ pĩ ho
hkrãx pẽ htak nẽ hkuk kuhtô nẽ hã hpěr o pikěnh pẽ
hã hpijaam pyrà nẽ kutã hkõn krã ho hkrĩ. ²⁰ Hãmri nẽ
kệp pahi xê kapa nẽ akupỹm kãm ê jaxà nẽ pĩ kahpa
hã nhôr kaxyw ma o kato nẽ o tẽ.

²¹ Nom nhũm ra hirok tỳx nẽ nhũm mẽ tee ri omu
hãmri nẽ mẽhõ kot ho ajuta kaxyw mẽ kot hkôt
omunh o mör xwỳnhjẽ kapi ho xa. Hãmri nẽ Sirěn nhô
xwỳnh Simãw hkà htykreja pumu. Aresãn mẽ Rupti wa
hipêêxà na pre. Nhũm htỳx hamakêtkati nẽ mẽ kutã
krĩm tẽ. Hãmri nhũm mẽ haê nẽ unê nẽ kãm Jejus o
ajuta kaxyw hã karô nhũm kãm pĩ kahpaja mỳ nẽ mẽ
hkôt o tẽ.

Mẽ kot pĩ kahpa hã Jejus nhôr ã mẽ harěnh

Matêwre 27.33-44; Rukre 23.33-43; Juãw 19.17-27

²² Nhũm mẽ ra kẽn nhĩxêt te kot mẽ hkrã hi pyræk
xwỳnhja wỳr Jejus o pøj. Mẽ kot kãm “Korkot” anhỹr
xwỳnhja wỳr. Mẽ pakapěr kãm na htem Korkotja
jarěnh o: “Mẽ hkrã hi xà” aně. Jakamã nhũm mẽ ra
hwỳr o pøj. ²³ Hãmri nẽ kot pĩ kahpa hã nhôr kaxyw
wĩhti hkwy ho mẽ mẽmo mẽhkanexà pẽ mĩra ho ahkà.

Kot ho kôm nẽ amnhĩ xà htỳx kãm hamak kêt kaxyw
hipěx nẽ kãm kugõ nom nhũm hkaga nẽ ho hkôm kêt
nẽ. ²⁴ Hãmri nhũm myt kaxkwa nhĩpôk wỳr tẽ nhũm
mẽ pĩ kahpata ã Jejus xi nẽ prek o ãhkra ho htỳx nẽ
hpar o htỳx. Nẽ hpãnhã kaxyw kakwỳ nẽ kãnhmã pĩ
kahpa jarĩ nẽ kre kamã ãm nẽ hity hpa. Nhũm Jejus kỳx
pẽ amnhĩ xà htỳx kumrêx kamã hamak o ajêt. Nhũm
pòristi hõja tẽ nẽ tapti hõ py nẽ hã kagà ho:

IJAEWJÊ NHÔ PAHI NA JA

Hãmri nẽ Jejus wỳr ho api nẽ mỳ ri kunhõ. Hãmri
nhũm hparpẽ pòristi hkwyja axpẽn mã ê hkwy ho hpi-
grành kaxyw hã kẽnre ho jôka ho hkrĩ.

²⁷ Tã nhũm mẽ wa kot amnhĩ tomnuj xwỳnh wa ho
axkrut nẽ mã wa ho aně nẽ. Nẽ pĩ kahpa hã prek o wa
ãhkra ho htỳx nẽ wa hpar o htỳx hãmri nẽ akutã ho Je-
jus nhĩjẽ nhũm wa ajêt.

²⁹ Hãmri nhũm mẽ kot omunh mã mra xwỳnhjaja Je-
jus pumu nẽ hã hpěr o pikěnh punuj nẽ hkrã ho apê
nẽ kãm:

—Kwa na ka pre ate Tirtũm mã amnhĩ jarěnh xà hã
ixkre grành par nẽ atã apkati axkruněpxi nẽ akupỹm
hipěx par ã amnhĩ jarěnh o apa. Nẽ axàhpumunh o
axàhpumunh ã amnhĩ jarěnh o apa. ³⁰ Jakamã e kwa
amnhĩ kapa nẽ wry pa mẽ ja hã apumu. E kwa tokyx.
Aně.

³¹ Nẽ patre krãhtũmjẽ mẽ Tirtũm kapěr tũm o mẽ
ahkre xwỳnhjaja piitã hwỳr mra nẽ hã hpěr o pikěnh o
kuhê. Nẽ axpẽn mã kapěr o:

—E jahti na xep pre mẽ kamã ukaprĩ ho pa nẽ
tanhmã mẽ ho ajuta hto ho pa. Tã tãm tanhmã amnhĩ
to nẽ wryk kêt nẽ. ³² Kwa pu mẽ arĩ pakuhê nẽ kot
amnhĩ kaxàr nẽ wryk kãm omu. Koja wry pu mẽ omu
nẽ kệp mẽ panhõ pahihti hã hkôt pajamaxpěr kurê
kumrêx. E tokyx wry Jejus pa mẽ awryk kãm apumu.
Nà kot kaj awryk rax nẽ. Aně.

Hãmri nhũm akutã wa kot hijẽ nẽ jêt xwỳnh wa
haxwỳja kãm kapěr punuj o ajêt.

Jejus htyk ã harěnh

Matêwre 27.45-46; Rukre 23.44-49; Juãw 19.28-30

³³ Tã nhũm ra kaxkwa nhĩpôk ri myt nhỹr mẽ nhũm
te kamàt pyræk. Nhũm kamàt kô rax kumrêx o ra hã
awry mẽ nhũm akupỹm myt katêr o mō. ³⁴ Hãmri
nhũm Jejus àmra kamã Tirtũm mã kapěr nẽ kãm:

—Inhõ Tirtũm inhõ Tirtũm. Kwa mon ka ixkaga? Aně.

Nom kapěr kãm kapěr o:

—Eri Eri rãmã sapatani. Aně.

³⁵ Hãmri nhũm mẽ kot mar o kuhê xwỳnhjaja kot Eri
hã harěnh ma nẽ htỳx ho finat Eris mã kapěr ã hkanh-
hĩx. ³⁶ Hãmri nhũm ja hprôt nẽ mẽmo rereeti py nẽ pĩ
ho hkanhwỳ nẽ o tẽ nẽ ho wĩhti nhek nẽ Jejus wỳr o tẽ
nẽ kot hkaôr kaxyw kãm kupẽ. Hãmri nẽ hkwyjẽ mã
kãm:

—E hãmri pu mẽ jar hkà ã pakuhê nẽ Eris jamã
mãn. Koja kuma nẽ hwỳr tẽ nẽ o wry nà? Aně.

³⁷ Nom nhũm Jejus ra htyk kaxyw nẽ àmra htỳx nẽ ty.

³⁸ Hãmri nhũm Tirtũm mã amnhĩ jarěnh xà hã ixkre
kamã hakwakre hã kupêxêja axkjẽ nẽ amnhĩ kahê xà

mënh kurê kumrêx. Utí rax tá kÿj rûm ahpâr mã axkjê nê amnhî kahê xà mē. Te Jejus htyk o mē pahte hkôt amnhî xunhwÿr xwÿnhjê mã Tirtûm wÿr pry jakwa kre kahê xà mënh pyrâk o ã amnhî kaxônĥ anê. ³⁹ Nhûm pôristi krâhtûmjê hōja Jejus parpê kutã htyk kãm omunĥ o xa. Hãmri nê tee ri omu nê hamaxpêr o:

—Hêxta waa nê. Æm hãmri na pre hte kêp Tirtûm Kra hã amnhî jarênh o pa. Tã pa mē amarî kupî. Anê.

⁴⁰ Rôm nhûm mēni kwÿjaja amÿm htyk kãm omunĥ o kuhê. Na pre htem Garirej kamã Jejus mē hkôt mē pa ho mē pa xwÿnhjê mã mē apkur xà hã àpênh o mē hkôt pa nê mē hkôt Jerujarê hwÿr mō. Marir Matarêĥ nê Xiakre mē Jojes wa katorxà Marirja. Nê Sarome. Nê mãânêĥ mēni hkwÿjaja nhûm mē amÿm Jejus htyk kãm omunĥ o kuhê.

Mê kot Jejus jaxâr ã harêĥ

Matêwre 27.57-61; Rukre 23.50-56; Juãw 19.38-42

⁴² Nhûm prem arîgro pê sêsta hã Jejus pî nhûm ra amÿkry htÿx nê. Sap kukamã na pre htem Ijaewjaja amnhîm apkur xà hã mēō nhîpêx pa nhûm sap kato nhûm mēmoj to anhÿr kêt nê. ⁴³ Jakamã nhûm Juje hō pê Arimatej nhō xwÿnhja. Kêp Ijaewjê nhō juisti hō na pre. Nhûm mē piitã kãm hkînh nê axpêĥ mã mex o mex ã harêĥ o pa. Na pre Tirtûm kot mē pahwÿr Jejus mënh kôt hamaxpêr o pa. Tã Jejus htyk ã omu hãmri nê hamaxpêr o:

—E pa ma pahi Pirat wÿr tē nê Jejus nhî hã kuwÿ. Inhmã uma htã kot paj ma hwÿr tē nê hã kuwÿ kê inhmã kugō pa ma o tē nê tokyx haxà. Kot paj ho anhÿr tokyx anhÿr kêt nhûm mē panhō arîgromnu pê sapja wÿr ra myt axà hãmri pa haxâr kêt nê.

Anhÿr o hamaxpêr nê ma Pirat wÿr tē nê hã kuwÿ.

⁴⁴ Hãmri nhûm amnhî jaêr pê ra htyk ã harêĥ ma nê amnhî wÿr pôristi krâhtûmjê hō hã karō nê hã hkukja nê kãm:

—Kwa xà na ra Jejus ty? Anê.

Hãmri nhûm kãm:

—Tÿ na ra ty. Anê.

⁴⁵ Hãmri nhûm kuma nê Juje mã kãm:

—Tōe. Mamrî ma o tē nê haxà. Anê.

⁴⁶ Hãmri nhûm kuma nê akupÿm Jejus wÿr tē nê pôristi mã anê nhûm mē kãm ho wrÿ. Nhûm kumÿ nê kupêxê ho hkupu hpa nê o tē nê kên kre kakwÿnh kãm haxà. Hãmri nê kên rax o hitom mex nê ma akupÿm krîm tē. ⁴⁷ Nhûm Marir Matarêĥ mē Juje katorxà Marir ôja wa ma hkôt tē nê kot haxâr kãm omunĥ o xa. Kot mē hkuxwa xà ho gregrer kêt rãhã haxâr kãm omu.

Jejus akupÿm htîr ã harêĥ

Matêwre 28.1-10; Rukre 24.1-12; Juãw 20.1-10

16 Tã nhûm apkati. Nom nhûm ra mē inhō arîgromnu pê sap kator jakamã nhûm mē kormã akupÿm kênkreta wÿr mÿr kêt nê. Hãmri arîgro mex jamâr pê kôkôt o hkrî. Hãmri nhûm axte apkati nhûm tômîk nhûm ra mē inhō arîgromnu hapêx nhûm Marir Matarêĥ mē Sarome mē Xiakre katorxà Marirja mē ma akupÿm kênkreta wÿr mra. Kormã kwÿhtãã. Kormã

myt kator o mör mē nhûm mē kãnhmã hkrî hãmri nê mē kot Jejus gregrer kaxyw mē hkuxwa xà hkwy jamÿ nê ma hwÿr o mra. ³ Hãmri nê kormã mör ri tee ri amnhî kukamã hamaxpêr nê axpêĥ mã:

—Xê gàà nê. Mêhō koja mē pamã nhãm kênkre nê hitom raxta xãm pu mē Jejus wÿr agjê nê gregrer? Utí rax kumrêx kênã. Anê.

⁴ Hãmri nê hwÿr pōj nê omu nhûm ra hitom xàja kàx ã nō nhûm mē tee ri omu. Utí rax tã ra kàx ã nō.

⁵ Hãmri nhûm mē kênkre hwÿr agjê nê upôk rûm mëhō nyw pumu. Nhûm ê jakajre kamã nhÿ nhûm mē amnhî jaêr pê omu nê tee ri hamaxpêr. ⁶ Hãmri nhûm mē kãm:

—Kwa mē amã ma hkêt nê. Mē ate Najare nhō xwÿnh pê Jejus pumunĥ kaxyw na ka mē mra. Mē kot pî kahpa hã nhôr xwÿnhhta. Nom jar amrakati. Na ra Tirtûm akupÿm ho htîr. E mē kam nê amnê agjê nê ano ho nör xà kaprÿ pumu ⁷ nê tokyx ma akupÿm mra nê hkôt mē pa ho pa xwÿnhjê mã harê. Koja ma Jejus mē akukamã akupÿm Garirej wÿr mō. Garirej kamã kot kaj mē axte axpêĥ pumu. Ra kot mē amã amnhî jarênh xà hkôt. Kwa mē tokyx ma akupÿm mē hwÿr mra. Nê kwa kê Simãw Pêtreja harêĥ mar mex nê. Anê.

⁸ Hãmri nhûm mē kuma nê awjanã nê ma akupÿm hprôt. Nê tee ri hamaxpêr nê kãm ma xàĥ tertet tÿx jakamã kormã nhãm mëhō mã harêĥ kêt nê.

Jejus kot Marir Matarêĥ wÿr kator ã harêĥ

Juãw 20.11-18

⁹ Nhûm semãĥ nyw mã àr xà hã arîgro pê tômîkja ã nhûm Jejus akupÿm htîr. Hãmri nê Marir Matarêĥ kumrêx wÿr kato. Kot nê mëkarōmnuti ho ⁷ nê nê hanor xwÿnhhta kumrêx wÿr kato. ¹⁰ Hãmri nhûm akupÿm htîr kãm omu nê hkînh tÿx kumrêx. Nê ma akupÿm tē nê Jejus krãmnhwÿjê mã harê. Nhûm mē hkaprî nê mÿr o hkrî nhûm mē hwÿr axà nê mē omu nê mē kãm:

¹¹ —Xê mē amÿr kêt nê. Na ra Jejus akupÿm htîr nê ham ixwÿr kato pa inhno ho omu. Xê mē hãmri axte amÿr kêt nê.

Anhÿr tã nom nhûm mē htÿx ho amnhî krã hkôt kot ri ã harêĥ anhÿr ã hkamnhîx jakamã kuma nê ãm kuma.

Jejus kot hkwyjê hwÿr kator ã harêĥ

Rukre 24.13-35

¹² Tã nhûm Jejus axte ja wa hwÿr kato. Kôt mē pa ho pa xwÿnh wa ho axkrut nê wa hwÿr kato. Na pre wa Jerujarê rûm kato nê akupÿm wa ô krî hwÿr mör mē nhûm wa hwÿr kato. Nom axtem tanhmã amnhî nhîpêx to nê wa hwÿr kator jakamã nhûm wa tokyx hprî hã kêp Jejus ã omunĥ kêt nê. ¹³ Tã kêp Jejus ã omu hãmri nê akupÿm Jerujarê hwÿr mō nê hkwyjê mã harêĥ kurê kumrêx. Nom nhûm mē wa kuma nê ãm wa kuma nê akupÿm htîr kôt hamaxpêr kêt nê.

Jejus kot hkwyjê mã mẽmoj tă karõ hã harënh

Matêwre 28.18-20; Rukre 24.44-49; Juãw 20.19-23; mããnën Atre 1.6-8

¹⁴ Tã nhũm Jejus tă hkõt mẽ pa ho mẽ pa xwỳnhjaja pẽ 11 wỳr kato nhũm mẽ kamã no pyma nẽ hkĩnh tỳx nẽ omunh o kuhê. Hãmri nhũm mẽ kãm:

—Kwa hêxta waa nẽ. Marir Matarën mẽ akwỳta mẽ kot akupỳm ixtĩr kãm ixpumunh nẽ mẽ amã ijarënh tă ka mẽ ama nẽ ãm mẽ ama. Pêr ãm mẽ akrã hihtỳx jakamã na ka mẽ ama nẽ mẽ hkõt ajamaxpêr kêt nẽ. Anẽ.

¹⁵ Hãmri nẽ mẽ kot tanhmã kãm amnhĩ nhĩpêx to ho pa hã mẽ kãm karõ nẽ mẽ kãm:

—E kêr ka mẽ ma krĩ piitã hkõt mẽ kãm ijarënh o ri mẽ hkõt apa. Ixte tanhmã mẽ nẽ amnhĩ nhĩpêx toja ka mẽ aprĩ hã mẽ kãm ijarënh o ri mẽ hkõt apa. ¹⁶ Nẽ mẽ kot mẽ akapêr mar nẽ amnhĩ kaxyw ixkõt hamaxpêr xwỳnhjaja kêr ka mẽ hkrã kumrã nhũm mẽ nhỹrmã Tĩrtũm mẽ wa ixri htĩr tũm nẽ mex rãhã nẽ pa ho pa. No mẽ kot amnhĩ kaxyw ixkõt hamaxpêr kêt xwỳnhjaja koja Tĩrtũm nhỹrmã amnhĩ nẽ mẽ hano nhũm mẽ ma kuwy hwỳr pa.

¹⁷ —Nẽ amnhĩ kaxyw ixkõt mẽ ajamaxpêr xwỳnhjaja kot kaj mẽ inhỹ hã tanhmã amnhĩ nhĩpêx to ho ri apa. Aa mẽ kot mẽmoj pumunh kêt kwỳ ho anẽ nẽ inhỹ hã inhĩxi jarënh kêt mẽ nẽ mẽkarõmnuti janor o ri mẽ hkõt apa. Nẽ mẽ ate nhãm mẽ kapêr mar kêt tă inhỹ hã ho akapêr mex o apa. Mẽ ate mar kêt tă ra ho

akapêr nhũm mẽ kot mẽ kapêrta mar xwỳnhjaja hprĩ hã mẽ amar mex nẽ. ¹⁸ Nẽ kot kaj mẽ nhỹri atỳx kagã xoprê hõ hpyr tă no nhũm tanhmã mẽ ato hkêt nẽ. Rỳ atỳx mẽmoj to mẽ hpar xà hkwy ho akõm tă no nhũm tanhmã mẽ ato hkêt nẽ. Nẽ inhỹ hã mẽ à xwỳnhjê hã mẽ anhĩkra jaxwỳ nhũm mẽ akupỳm mex. Kot kaj mẽ amnhĩ kaxyw ixkõt mẽ ajamaxpêr xwỳnhjaja ã inhỹ hã amnhĩ nhĩpêx anhỹr o ri apa. Anẽ.

Jejus kot akupỳm kaxkwa hwỳr àpir ã harënh

Rukre 24.50-53; mããnën Atre 1.6-11

¹⁹ Tã nhũm mẽ panhõ Pahihti Jejusja hkõt mẽ pa ho mẽ pa xwỳnhjê mã kapêr pa hãmri nhũm Tĩrtũm ma akupỳm amnhĩ wỳr kaxkwa hwỳr ho api. Hãmri nhũm kaxkwa kamã Tĩrtũm nhĩhkô hã upôk rũm nhỹ. Kot ãhkô hã mẽmoj piitã ho amnhĩptar kaxyw hkrĩ ho hkrĩ. ²⁰ Hãmri nhũm hkõt mẽ pa ho pa xwỳnhjaja ma akupỳm àpir kãm omu hãmri nẽ angrã nẽ ma krĩ piitã hkõt mẽ kãm Tĩrtũm kapêr jarënh o pa nhũm Pahihti Jejus mẽ ãhkô hã pa ho pa. Nhũm mẽ ma ý hã hkwyjê mã aa mẽ kot mẽmoj pumunh kêt kwỳ ho anhỹr o ri mẽ hkõt pa nhũm mẽ ja hã mẽ omu nẽ axpên mã mẽ harënh o:

—Nà ãm hãmri na mẽ pamã Tĩrtũm kapêr jarënh o pa nẽ ho hêx kêt nẽ. ý hã mẽ kot aa mẽ pahte mẽmoj pumunh kêt kwỳ ho anhỹr o pa kênã. Nà ãm hãmri na ã mẽ pamã kapêr jarënh anhỹr o pa. Anẽ.

Ja kõt na Makre kot Jejus jarënhja hapêx.

Rukre

Rukre na pre kagàja nhípêx. Kêp Ijaew kêp xwýnh na pre. Tã amnhĩ kaxyw Jejus kôt hamaxpêr. Na pre kêp tôtô nê mẽ hkane ho pa. Nê Jejus nhỹ hã kapêr o pa xwýnhjê hõ pê Pawreja kôt pa ho pa. Tã tanhmã hamaxpêr to nê hkràmnhwý Teopre mã kagàja nhípêx nê kamã tanhmã Jejus kot amnhĩ nhípêx to ho pa hã harê nê hã kagà. Nê Jejus kêp Tirtũm nhỹ hã kapêr o pa xwýnh ã harê. Nê mẽ pahpyrà nê ĩ ho ĩ hã harê. Nê kêp mẽ pakamã ukapřĩ xwýnh ã harê. Nê kêp mẽ pahte amnhĩ tomnuj o hapêx xwýnh ã harê. Ā na pre Rukreja hkràmnhwý Teopre mã Jejus jarê nê hã kagà anê. Nê mãänēn mẽ pahpiitã mẽ pakaxyw harê nê hã kagà.

Rukre kot Teopre mã amnhĩ jarēnh

Atre 1.1-2

1 Pa pahi Teopre. Xà amex? E ot pa awýr kagà nhípêx nê awýr kumê. Ixte amã Jejus jarēnh kaxyw. Na prem ra ohtô nê jar mẽ pahkôt Jejus kot amnhĩ nhípêx o pa hã kagà rax nê. ² Jejus nhỹ hã Tirtũm kapêr jahkre ho mẽ pa xwýnhjaja na prem Jejus kot tanhmã amnhĩ nhípêx to hkrax kãm kot amnhĩ nhípêx o pa hã omunh o hkôt pa. Hãmri nê hprĩ hã mẽ inhmã harê nê hã kagà nhũm mẽ ohtô nê mẽ mar xà hkôt mẽ urà nê kot tanhmã amnhĩ nhípêx to ho pa hã kagà. ³ Tã pa mẽ harēnh ma nê ijamaxpêr o:

—E kot paj ijaxwýja Jejus kot amnhĩ nhípêx kwý hã kagà. Nà kot paj ho anê.

Anhỹr o ijamaxpêr jakamã ot pa ra ixte amã hã kagà kaxyw.

⁴ Tã kêr ka kamã harê nê ixpyrà nê ama nê aprĩ hã harēnh mar tỳx nê mẽ kot amã harēnh xwýnhjê hkôt ajamaxpêr tỳx o apa. Ām hãmri na prem mẽ amã harê. E kot paj amã hkwy hã kagà. Ixpê akràmnhwý Rukre kot paj ixprĩ hã amã harê nê hã kagà.

Tirtũm kapêr o wrýk xwýnh kot Juãw Paxis jarēnh

⁵ Juãw Paxis nhípêxà finat Jakarisja kumrêx kot paj amã harê. Kêp finat Apiasti kanrêhã htàmnhwý jakamã uràk nê kêp mẽ apê Ijaew nhõ patre na pre. Pahihti Eroxa kormã kot mẽ anhõ pika kamã mẽ ho amnhĩp-tar ri nhũm Jakaris kêp patre nê pa. Nê hprõ Ijapew mẽ wa kêp Parãw kanrêhã htàmnhwý. ⁶ Nê wa hamê na pre Tirtũm kôt tãm amnhĩ nhípêx o wa pa. Ām Tirtũm kapêr kôt pix mã ri amnhĩ nhípêx rãhã ho wa pa.

⁷ Nom Ijapewja tanhmã hkra xà kute jakamã nhũm wa hkra hkêt nê wa pa rãhã wa ra hpigêx tỳx nê.

⁸ Jakamã nhũm Jakaris ma mẽ kot Tirtũm mã amnhĩ jarēnh xà hã ixkre hwýr tẽ. Kwýjê pyrà nê kot Tirtũm mã tanhmã amnhĩ nhípêx to kaxyw ma mẽ hpãnhã hwýr tẽ nê axà. ⁹ Hãmri nê kamã Tirtũm mã amnhĩ jarēnh pê kãm mẽ hkuxwaxà ho xêt o xa. Nhũm Ijaew kwýjaja ixkreta wýr akuprõ nê kapem kutêp Tirtũm mã amnhĩ jarēnh o kuhê. ¹¹ Pu nhũm kaxkwa rũm Tirtũm

kapêr o mẽ wrýk xwýnhja wrý nê Jakaris kutã xa. Mẽ hkuxwa xà ho xêt xà hã mēs kunĩhti xupôk rũm xa.

¹² Hãmri nhũm amnhĩ jaêr pê amnhĩ kutã omu nê akryk omunh o xa. ¹³ Hãmri nhũm kãm:

—Pa Jakaris? Kwa tee ri ajamaxpêr o amã ma hkêt nê. Na pre Tirtũm ate akra hã hwýr o apa hã ama nê hã apumu. Jakamã koja tanhmã aprõ hkra xà ho ka kamã akra. Nhũm nõ nê rax nê kato nê myre. Ka wa hã hixi mẽ nhũm kêp Juãw. ¹⁴ Koja kato ka wa omu nê akĩnh tỳx kumrêx. Nhũm akwýjaja haxwýja ohtô nê war akra jarēnh ma nê war anhỹ hã hkĩnh nê. ¹⁵ Koja kormã akra kator kêr ri nhũm Tirtũm Karõja hkarõ hwýr axà. Hãmri nhũm kato nê gaa nê hprêk nê Tirtũm mã tanhmã amnhĩ nhípêx to ho pa. Tirtũm kãm hprãm xà hkôt pix mã tanhmã amnhĩ nhípêx to ho pa. Nom kêr ka inhmar kumrêx. Kê mẽmoj to wĩhti ho hkõm kêr nê pa. Nê kagóxyhti ho hkõm kêr nê pa. Ām kwarĩ ho kwarĩ. ¹⁶ Koja hprêk hãmri nê mẽ apê Ijaew mã Tirtũm kapêr jarēnh o mẽ hkôt pa. Nhũm mẽ ohtô nê kuma nê kot amnhĩ tomnuj kaga nê Tirtũm kôt amnhĩ xunhwý nê hkôt amnhĩ nhípêx mex o pa.

¹⁷ —Tirtũm kot mẽ awýr mẽ apytãr xwýnh maati mēnh mã xwýnh kukamã koja mẽ kãm harēnh o pa. Te Tirtũm nhỹ hã kapêr jarēnh xwýnh finat Eris kot amnhĩ nhípêx pyràk o koja amnhĩ nhípêx. Nê uràk nê Tirtũm Karõ nhỹ hã mẽ amã Tirtũm kapêr jarēnh o mẽ akôt pa. Jakamã nhũm mẽ akwýjaja kuma hãmri nê amnhĩ tomnuj kaga hpa nê Tirtũm kôt pix mã amnhĩ nhípêx o pa. Nê tãm mẽ hkrajê nhípêx o pa. Koja mẽ ã akra Juãwja kôt amnhĩ nhípêx anê. Jao Tirtũm kot mẽ awýr mēnh mã xwýnhhta kutêp tãm amnhĩ nhípêx o pa. Anê.

¹⁸ Nhũm pre ã Tirtũm kapêr o wrýk xwýnh Jakaris mã hkrata jarēnh anê. Hãmri nhũm tee ri kuma nê kãm:

—Kwa xà we ãm hãmri na ka ã inhmã ixkra jarēnh anê nà? Ra ixprõ mẽ wa ijamê wa ixpigêx tỳx kēnã kot pa kêt wa ixkra. Anê.

¹⁹ Hãmri nhũm kãm:

—Nà ãm hãmri na pa ã amã harēnh anê. Ixpê Garpriew na pa ã awýr ixwrýk nê Tirtũm nhỹ hã amã harēnh anê. Ixte Tirtũm nhĩhkô hã ixkuhê xwýnhjê hõ na pa. Tãm na awýr inhmẽ pa awýr wrý nê ã amã akra jarēnh anê. ²⁰ Tã ate ixkôt ajamaxpêr kêr jakamã kot kaj axte axumar kêr nê akapêr kêr rãhã nhũm akra ka-

to. Koja kato ka rí kormã akupým akapër në akupým ama. Ate ixkôt ajamxpër kêt jakamã kot kaj ã amnhĩ nhĩpêx anê në rí amnhĩ pumu. ãm hãmri na pa ã amã ixkapër anê. Anê.

Nhũm pre ã Tirtũm kapër o wrýk xwýnhja Jakaris mã kapër anê. Jakamã nhũm tokyx ixkre rũm kator kêt në.

²¹ Hãmri nhũm ixkre kapem mẽ kuhê xwýnhjaja tee ri kamã ama mẽ axpên mã:

—Tk. Kwa mo na we ri hitom kãm ho anhýr kãm unê mẽ tokyx kator kêt? Anê.

²² Tã nhũm akupým mẽ hwýr kato. Nê tee ri kot mẽ kãm kapër kaxyw no ãm ãhkra pix o ri mẽ kãm tanhmã ujahkre hto. Hãmri nhũm mẽ amnhĩ jaêr pê kot ã amnhĩ nhĩpêx anhýr ã omu mẽ tee ri hkukamã hamaxpër mẽ axpên mã:

—Kwa tanhmã na we amnhĩ to? Mãn hitom kãm mẽ-moj tanhmã kute hã omu hã na ri ã amnhĩ nhĩpêx anê nã? Anê.

²³ Hãmri nhũm Jakaris ixkre kamã mẽmoj tã àpênh pa hãmri mẽ ma akupým òrkwý hwýr tẽ.

²⁴ Tã nhũm hprõ Ijapewja htujarõ. Hãmri mẽ amnhĩ tujarõ hã amnhĩ pumu mẽ hkính tỳx nê. Nê hamaxpër o:

—Hêxta gàu nê. Ma ãm hãmri na pa pre ixkra hkêt mẽ amnhĩ kamã xpijaàm o ri ixpa. Tã ra ixtujarõ. Kot paj wa axte ri amnhĩ kamã xpijaàm kêt nê. Ma ãm hãmri na Tirtũm ã wa inhĩpêx anê. Na pa wa ixkính tỳx kumrêx. Anê.

Nhũm pre ã hamaxpër anê hãmri mẽ arĩ òrkwý kamã hkrĩ ho hkrĩ. Aa nhýhým kator mẽ mõi kêt rãhã hã mytwrý kêp 5.

Tirtũm kapër o wrýk xwýnh kot Marir mã hkra jarênh

Matêwre 1.18-21

²⁶ Tã nhũm Ijapew ra htujarõ hã mytwrý kêp 6 nhũm Tirtũm axte kapër o wrýk xwýnh pê Gapriewja mẽ. Nhýri Garirej kamã krĩ pê Najare hwýr kumẽ nhũm ma hwýr wrý. ²⁷ Mẽhõ pê Marir wýr wrý. Nhũm ra Juje ho mjên kaxyw. No ãm kormã hkukrit rãhã ho mjên kaxyw. Jujeja Marir pyrã nê kêp pahi finat Tawi kanrêhã htãmnhwý na pre. ²⁸ Jakamã nhũm Gapriew Marir wýr wrý mẽ kãm:

—Pa Marir? E ot pa amã Tirtũm kapër jarênh kaxyw awýr wrý. Kot akõt pa ho pa jakamã koja ato mex rax kumrêx. Anê.

²⁹ Hãmri nhũm amnhĩ tã kuma mẽ tee ri hamaxpër nê hamaxpër o:

—Xê mẽmo na we ri ã inhmã kapër anê? Tanhmã koja we Tirtũmja ixto mex rax to? Anê.

³⁰ Hãmri nhũm Gapriew kãm:

—Kwa tee ri amnhĩ kukamã ajamxpër kêt nê. Tirtũm kãm ajapê. ³¹ Kot kaj atujarõ nhũm akra kato mẽ myre. Ka hã hixi mẽ nhũm kêp Jejus. ³² Koja Tirtũm amã ho mex rax nê. Nê koja mẽ piitã mẽ kãm kêp amnhĩ Kra hã ho amnhĩrit. Nê mẽ apê Ijaew o amnhĩptar kaxyw koja mẽ akaxyw ãm nhũm higêt pahi Tawi pyrã nê mẽ ato amnhĩptar o pa. Mẽ ate amnhĩ wýr

kamã ajamak o apa xwýnhta koja. Tirtũm kãm hprãm xà hkõt koja mẽ ato amnhĩptar rãhã ho pa. Anê.

³⁴ Nhũm pre ã kãm kapër anê nhũm amnhĩ tã kuma mẽ tee ri amnhĩ kukamã hamaxpër hãmri mẽ kãm:

—Xê gàu nê. Tanhmã kot pa kêt we amnhĩ to mẽ ixtujarõ? Kormã ixkukrit mẽ mo kormã inhmjên? Mẽ. Xà Juje kot ixkamã hkra hkukamã na ka ã ri inhmã axujarênh anê? Anê.

³⁵ Hãmri nhũm kãm:

—Nã koja Tirtũm Karõ tãm tanhmã ato ka ý hã tanhmã amnhĩ to hkêt tã atujarõ. Jakamã koja akra kêp Tirtũm Kraa. ³⁶ Na ra haxwýja anã Ijapewja htujarõ. Ra hpigêx tỳx nê aa hkra hkêt nhũm hkwyjaja kot axpên mã õhy kamã hkra hkêt kumrêx ã harênh o pa htã ra htujarõ. Tirtũm kot tanhmã mẽ ho nhũm mẽ htujarõ tanhmã kêp kute hkêt. Jakamã nhũm tanhmã ho nhũm mjên tãm htu nhũm ra htujarõ hã mytwrý kêp 6. Tirtũm tãm kot mẽmoj piitã tanhmã ho kaxyw àhpumunh xihtỳx. Jakamã koja urak mẽ mã ato anê mẽ ka kormã akukrit tã atujarõ. Anê.

³⁸ Nhũm pre ã Gapriew Marir mã kapër anê nhũm amnhĩ tã kuma mẽ kãm:

—Ko. Kê mãmrĩ kãm tanhmã ixto hprãm xà hkõt mãmrĩ tanhmã inhĩpêx to. Inhmã Tirtũm kapër kõt amnhĩ nhĩpêx prãm. Kê mãmrĩ kãm tanhmã ixto hprãm xà hkõt tanhmã inhĩpêx to.

Anê nhũm kuma mẽ ma akupým api.

Marir kot Ijapew wýr mõi ã harênh

Rukre 11.27

³⁹ Tã nhũm Marir amnhĩ tujarõ hã amnhĩ pumu mẽ nã Ijapew wýr hkrã kurê kumrêx. Hãmri mẽ nojarêt mẽ õ krĩ rũm kato mẽ ma hwýr mõi. Ma Ijapew papxã hwýr mõi. Ijapew nhõ krĩa pika pê Jutej kamã nhýri hixêt kamã na pre. Nhũm ma hwýr mõi hãmri mẽ hwýr põi nê Ijapew wýr axà mẽ omu mẽ kãm:

—Ka? Xà wa amex? Anê.

⁴¹ Hãmri nhũm kuma mẽ kãm:

—Ý ma wa inhmex na pa wa ixpa.

Anhýrja kõt nhũm õhy kamã hkraja haxwýja te kot Marir kapër mar mẽ amnhĩ nhĩpêx pyrãk o htu kamã àxõnh tỳx o nõ. Hãmri nhũm Ijapew Tirtũm Karõ nhý hã tanhmã Marir mã kapër to. ⁴² Kàx pê kãm kapër nê kãm:

—Xê gàu nê. Ra Tirtũm kot ato mex jakamã na ka akính rax o mẽ inhni hkwyjê jakrenh pa. Anhõhy kamã akraja koja Tirtũm amã ho mex rax nê. ⁴³ Xê mon ka ã ixto mex mẽ ixwýr amõi anê? Apê inhõ Pahihti katorxã htã ixto mex mẽ ã ixwýr amõi anê. Hêxta gàu nê. ãm hãmri na ka ixwýr mõi Marir. ⁴⁴ Na ka ixwýr mõi põi nê inhmã akapër hãmri nhũm ixto kamã ixkrare akapër ma mẽ hkính xaj ixto kamã ixkamnãr tỳx o nõ. ⁴⁵ Na ka pre Tirtũm kapër o wrýk xwýnh kot amã kapërja ma mẽ hkõt ajamxpër tỳx nê. Jakamã kot kaj Tirtũm nhý hã akính mẽ ajamakêtkati mẽ amex mẽ ri apa. Anê.

Marir kot Tirtüm mã mex o mex ã gre ã harënh

Rukre 6.20-26

⁴⁶ Hãmri nhùm Marir Ijapew kot ã kãm kapër anhÿrja ma nẽ kãm Tirtüm mex o mex ã gre nẽ gre o:

Tirtüm na mex o mex.

⁴⁷ Kêp ixkaprĩ xwÿnh na.

Kêp ixkaprĩ xwÿnh jakamã na pa inhmex nẽ ixkĩnh nẽ ri ixa.

⁴⁸ Ixte amnhĩ to grire nhùm ja hã ixpumu nẽ ixkamã ukaprĩ nẽ ixto mex rax kumrëx.

Jakamã koja mẽ piitã xapën kanrêhã xapën mã ijarënh rãhã ho pa. Tirtüm kot tanhmã ixto mex to hã ijarënh rãhã ho pa.

Tirtüm na mex o mex nẽ hihtÿx o hihtÿx. Tã na ã in-hĩpëx anẽ.

⁵⁰ Ma na hte ã amnhĩ nhĩpëx anẽ nẽ xapën kanrêhã mẽ kot hã hpijaam xwÿnhjê pumu nẽ mẽ kutã nojarët rãhã ho pa.

Nẽ mẽ kamã ukaprĩ rãhã ho pa.

ã na hte mẽ hipëx mex anhÿr o pa.

⁵¹ Nẽ hihtÿx o hihtÿx jakamã na hte mẽ kot amnhĩ to jarkrar o ri mẽ pa xwÿnhjaja tanhmã mẽ ho nhùm mẽ axkaprã.

⁵² Nẽ pahihtĩ hwÿ kot kapër mar nẽ ãm mar xwÿnh-jaja.

Na hte amnhĩ tã mẽ omu nẽ mẽ àpënh nẽ mẽ hapôj nẽ mẽ hpãnhã mẽ kot amnhĩ to hkryre xwÿnh kwÿ jagjê.

⁵³ Na hte mẽ kãm kapër kôt amnhĩ nhĩpëx prãm xwÿnhjê ho mex o pa nhùm mẽ mex nẽ pa.

No mẽ kãm hprãm kêt xwÿnhjaja nhùm tanhmã mẽ ho mex to hkêt nẽ.

⁵⁴ ãm hãmri na pre amnepê mã mẽ panhĩgêt mã amnhĩ jarënh xà hkôt mẽ pahpê Apraaw rùm xapën kanrêhã hkrajaja mẽ pahto mex o pa.

Mẽ pahpê Ijaew mẽ pahte kãm tanhmã amnhĩ nhĩpëx to ho papa nhùm kãm mẽ pajapê xaj mẽ pahto mex rãhã ho pa.

Nẽ mẽ pakamã ukaprĩ rãhã ho pa. Anẽ.

Nhùm pre ã Marir Ijapew mã Tirtüm mex o mex ã gre anẽ. ⁵⁶ Hãmri nẽ ri hkôt pa hã mytwrÿ axkrunëpxi nẽ ma akupÿm õ krĩ hwÿr mỗ.

Juãw Paxis kator ã harënh

⁵⁷ Tã nhùm Ijapew hpijagri kaxyw õhy xà nhùm hkrare kato nẽ myre. ⁵⁸ Hãmri nhùm omu nẽ hkĩnh tÿx nẽ. Hãmri nhùm hkwyjaja Tirtüm kot wa kamã ukaprĩ hã wa kãm wa hkra myre nhõr ã harënh ma nẽ wa ÿ hã hkĩnh nẽ.

⁵⁹ Tã nhùm wa hkraja ra hã arĩgro pê 8 nhùm mẽ hkwyjaja kot my kwÿt kà krãhyr kaxyw hwÿr akuprõ. Tirtüm kot mẽ kãm hã karõ xà hkôt nhùm mẽ kot kãm õr ã amnhĩ to amnhĩrit kaxyw ã hipëx anhÿr kaxyw. Na htem ã mẽ kêp Ijaew krajê piitã mẽ hipëx anẽ. Jakamã nhùm prem ã hipëx anẽ hãmri nẽ hpãnhã tanhmã kot hã hixi mẽnh to kaxyw ri hã xapën kukja. Hãmri nẽ

hipêêxà hkôt kot hã Jakaris mẽnh kaxyw. ⁶⁰ Hãmri nhùm katorxà tee ri xapën tã mẽ kuma nẽ mẽ kãm:

—Ma koja kêp Jakaris kêt nẽ. Koja kêp Juãw. Anẽ.

⁶¹ Hãmri nhùm mẽ tee ri kuma nẽ kãm:

—Kokÿ. Mo jar mẽ pahtõ pê Juãw kot kêt ri kêp Juãw? Jar amrakati kênã kot ka kêt wa ri ã hã hixi rënh anẽ. Anẽ.

⁶² Hãmri nẽ hixi hã hipêêxà kukja. Nom nhùm arĩ umar kêt nẽ kapër kêt jakamã nhùm mẽ tanhmã ri kãm mẽ ïhkra nhĩpëx to. ⁶³ Hãmri nhùm ïhkra ho kagà hã ahwÿ nhùm mẽ kãm ja gõ nhùm kupy nẽ hã mẽ kãm hixi nhĩpëx. Nhùm mẽ kupy nẽ omu hãmri nẽ hixi pê Juãw kôt omu. Hãmri nẽ tee ri hixija kukamã hamaxpër. ⁶⁴ Rôm nhùm Jakaris akupÿm ama nẽ kapër mex kurê kumrëx nẽ Tirtüm mã mex o mex ã harënh o xa. ⁶⁵ Hãmri nhùm mẽ omu nẽ ma mẽ piitã mẽ kãm wa hkra jarënh o ri xapën kôt hprõt. Pika pê Jutej kamã hixët kape hã krĩ hkôt nhùm mẽ ri mẽ piitã mẽ kãm harënh o hprõt. Tirtüm kot wa hkra kôt tânopxar o pa nẽ ho mex ã harënh o hprõt. Hãmri nhùm mẽ kuma nẽ tee ri hkukamã hamaxpër nẽ xapën mã:

—Hêxta waa nẽ. Tirtüm tãm na xep hte jare hkôt ri pa ho pa. Jakamã koja nhÿrmã hprêk hãmri nẽ tanhmã koja we amnhĩ nhĩpëx to ho pa wehee? Anẽ.

Jakaris kot Tirtüm nhÿ hã kapër ã harënh

⁶⁷ Hãmri nhùm Jakaris Tirtüm Karõ nhÿ hã Tirtüm mex o mex ã harënh o xa. Tirtüm kot mẽ kêp Ijaew o mex ã harê nẽ mẽ kãm:

⁶⁸ Hêxta waa nẽ. Nà Tirtümja mex o mex. Na pre hte mẽ pahpãmjaja ãm hkôt pix mã amnhĩ nhĩpëx o pa. Jakamã nhùm hte Tirtüm mẽ pahpê hkrajê kamã ukaprĩ nẽ mẽ pahto mex o pa.

E kwa pu mẽ kãm mex o mex ã harënh rãhã nẽ.

⁶⁹ Ra kot mẽ pahwÿr mẽ pahkaprĩ xwÿnh pê mẽ panhõ pahihtĩ mẽnh mã. Ja kaxyw àhpumunh xihtÿx o hihtÿx jakamã na pre ra mẽ pahwÿr mẽnh ã amnhĩ jarê.

Koja kêp amnepêm Tirtüm mã tanhmã amnhĩ nhĩpëx to ho pa xwÿnh Tawija hkanrêhã htãmnhwÿ.

⁷⁰ Amnepêm Tirtüm nhÿ hã kapër xwÿnhjaja na prem mẽ kãm Tirtüm kapër jarënh o pa nẽ mẽ kãm:

⁷¹ “Koja Tirtüm mẽ panê mẽ kãm mẽ pahkurê xwÿnhjê pumunh mex o pa.” Anẽ.

⁷² Tirtüm ra kot mẽ pahpãmjê mã amnhĩ jarënh xà hkôt kãm mẽ pakamã ukaprĩ rãhã ho pa hprãm.

Koja aa ja ho anhÿr o hamakêtkati hkêt nẽ.

⁷³ Na pre ra mẽ pahpãm Apraaw mã mẽ pakukamã ã mẽ pahtã amnhĩ jarënh anẽ nẽ kãm: “Kot paj mẽ anê mẽ kãm mẽ akurê xwÿnhjê pumunh mex nẽ mẽ ïhkra nẽ mẽ ato ixkato. Jakamã kot kaj mẽ amnhĩ kamã amã mẽ uma hkêt nẽ axãmnhĩx ri ajamakêtkati nẽ mẽ kamã apa. Nẽ kot kaj mẽ mãmrĩ axãmnhĩx ri inhmã tanhmã amnhĩ nhĩpëx to ho ri apa rãhã nẽ. Nẽ ixkôt amnhĩ nhĩpëx o ri apa rãhã ty.” Anhÿr o na pre Tirtüm mẽ pakukamã mẽ pahtã amnhĩ jarê. Anẽ.

Nhùm pre ã Jakaris mẽ kãm Tirtüm kapër jarënh anẽ. Hãmri nẽ hkrareja mÿ nẽ o xa nẽ kãm:

⁷⁶ —No ka Xugitre. Kot kaj aprêk hămri nê apê Tirtüm maati nhỹ hã kapêr jarênh o apa xwýnh. Jakamã kot kaj Pahihti hkukamã mẽ piitã mẽ kãm harênh o ri mẽ hkôt apa. Mẽ kot amar nê kutêp tãm amnhĩ nhĩpêx kaxyw.

⁷⁷ —Tirtüm kot mẽ nê mẽ kot amnhĩ tomnuj rênh nê mẽ ho hkra hã harênhja kot kaj mẽ hkôt mẽ kãm harênh o ri apa.

⁷⁸ —Na hte Tirtüm mẽ pakamã ukaprí ho pa nê mẽ pakamã gryk tokyx anhỹr kêt nê. Jakamã koja mẽ pahwýr mẽ pahkaprí xwýnhja mẽ. Kormã mẽ pahwýr wrýk kêt jakamã te mẽ pahte kamàt kô kamã tee ri mẽ paxàhkupênh o ri papa xwýnh pyræk.

—Nom koja mẽ pahwýr wrýkja o te ra myt kator nê mẽ pamã hirã nê mẽmoj to amnhĩrít mex pyræk o mẽ panhĩpêx. Ja kaxyw koja Tirtüm mẽ pahwýr mẽ pahkaprí xwýnhja mẽ nhũm man mẽ pahwýr wrý nê mẽ pamã mẽ pahtyk pyma xwýnhjê mã Tirtüm kapêr o amnhĩrít o pa. Mẽ pahte mar nê ra pajamakêtkati nê paxàmnhĩx ri papa nê pahtyk kaxyw.

⁷⁹ —Mẽ kãm mẽ htyk pyma xwýnhjaja te kamàt kô kamã ri pa pyræk. Tã koja mẽ pahkaprí xwýnhja wrý hămri nê tanhmã mẽ hkrã hto nhũm mẽ te arĩgro hã ri mẽ pa xwýnh kot amnhĩ nhĩpêx pyræk o amnhĩ nhĩpêx. Jao hamakêtkati nê axte kãm htyk pyma hkêt nê ri pa. Anê.

Nhũm pre ã Jakaris Tirtüm Karõ nhỹ hã hkrare mã kapêr anê.

⁸⁰ Tã nhũm Juãwja gaa nê aptàr. Nê Tirtüm kôt amnhĩ nhĩpêx o pa. Nom kormã kot Ijaew jahkre ho pa hkêt ri kapôt ã ri mẽ puhã pa.

Á na pre Juãw kator nê amnhĩ nhĩpêx anhỹr o pa anê. Na pre kato nê hã mytwrý grêre hămri nhũm Jejusja hkôt kato.

Jejus kator ã harênh

Matêwre 1.18-25

2 Na pre ã Jejus kator anê. Nhũm pre Rôm nhõ xwýnhjê nhõ pahi Sesti Akusja õ pika piitã hkôt mẽ ho kôta kaxyw. Aa kot mẽ ho kôta hkêt tã ra kot mẽ ho kôta kaxyw. Kormã pahi Sirên haxwýja kot pika pê Sir kamã mẽ ho amnhĩptàr ri nhũm pahi Sesti Akus kot mẽ ho kôta kaxyw. Jakamã kãm àpênh xwýnhjê mã kapêr nê mẽ kãm:

—E kêr ka mẽ ho kôta kaxyw nê mẽ piitã mẽ hixi hã kagà hpa. Anê.

³ Hămri nhũm mẽ piitã ã kot mẽ hipêx anhỹr ã amnhĩ tã harênh ma hămri nê mẽ kot mẽ hixi hã kagà kaxyw piitã akupým papxà hwýr ma hapêx. ⁴ Nhũm pre Marir mjên Juje haxwýja ma krí pê Perěj wýr mõi. Garirej kamã õ krí pê Najare rùm kato nê ma hwýr mõi. Pika pê Jutej kamã na Perějja. Kamã na pre Juje nhĩgêt Tawija kato. ⁵ Nhũm Juje kêp kanrêhã htàmnhwý jakamã na pre ma akupým hwýr mẽ hkwyjê hkôt mõi. Nê ma amnhĩ kôt kot ho hprõ mã xwýnh Marir o mõi. Arĩ htu-jarô rax rãhã nhũm ma amnhĩ kôt o mõi. ⁶ Nhũm wa mõi hămri nê hwýr pøj. Nhũm Marir hpjagri xà hã mytwrý mã àr jakamã nhũm kamàt nhũm õhy xà.

⁷ Nom nhũm Perěj wýr mẽ hpõx nyw xwýnhjaja ra ixkre piitã ho nýt pa nhũm wa tee ri hpjagri kaxyw amnhĩ to ukapi ho pa. Hămri nê nhỹri mõi nhõrkwý punajre hwýr axà nhũm Marir kamã hpjagri. Nhũm hkra kato nê myre. Kra kot wa na pre. Hămri nhũm kumý nê kupêxê ho hkupu hpa nê mõi xàpkur xà hã kôsti kaprý kamã kuxi nhũm hamakêtkati nê gõi nê nõ.

ôwêhti jamãr xwýnhjê jarênh

⁸ Rôm nhũm ôwêhti jamãr o mẽ pa xwýnhjaja kapôt ã ri hkrit ôwêhti jamãr o pa. Nhũm ra kamàt nhũm mẽ hamãr o hkrí. ⁹ Pu nhũm kaxkwa rùm Tirtüm kapêr o wrýk xwýnhja wrý nê mẽ mýri ajêt. Hămri nê tanhmã amnhĩ to nê mẽ hpuhã ho hirã rax kumrêx. Nom nhũm Tirtüm tãm ã mẽ hipêx anê. Hămri nhũm mẽ tee ri jawý Tirtüm kapêr o wrýk xwýnhja pumu nê kãm ma htýx nê akryk omunh o hkrí. ¹⁰ Hămri nhũm mẽ kãm:

—Pa? Kwa mẽ amã ixpyma hkêt nê. Ixte mẽ amã mẽ-moj mex jarênh kaxyw na pa mẽ awýr wrý. Kot kaj mẽ harênh ma nê akĩnh nê. Nom mẽ kapxipixjaja kaj mẽ akĩnh kêt nê. Koja mẽ piitã ja jarênh ma nê mẽ apyrã nê hkĩnh nê pa. ¹¹ Na ra ham mẽ akamã ukaprí xwýnh-ta kato. Pahi Tawi nhõ krí mẽ mẽ anhõ krí pê Perěj kamã. Kêp mẽ apiitã mẽ anhõ pahihti na. Mẽ ate amnhĩ wýr kamã ajamak o apa xwýnh pê Kris na. Tãm na ham kato. ¹² E pa ixprí hã mẽ amã tanhmã harênh to ka mẽ inhma. Na kato nhũm katorxà kupêxê ho kupu hpa nê kôsti kamã kuxi nhũm nõ. Kwa mẽ tokyx ma hwýr mra nê kêp mẽ anhõ pahihti hã omu. Anê.

¹³ Nhũm pre ã mẽ kãm ujarênh anê. Hămri nhũm hk-wýjaja wamta kôt ohtôo nê mẽ hwýr wrý nê puhã harir. Hămri nê Tirtüm mã mex o mex ã grer o harir.

¹⁴ Nê hã grer o:

Tirtüm maati na mex o mex.

Jakamã mẽ kãm hprãm xà kôt pix mã amnhĩ nhĩpêx o mẽ pa xwýnhjaja koja amnhĩ tã mẽ omu nê tanhmã mẽ ho nhũm mẽ hamakêtkati nê àmnhĩx hkĩnh nê pa ho pa.

¹⁵ Anhỹr o grer o harir hămri nê ma akupým kaxkwa hwýr àpir pa nê akunok. Hămri nhũm ôwêhti jamãr xwýnhjaja mẽ kapêr ma nê ma akupým àpir ã mẽ omu nê axpên mã:

—E tokyx pu mẽ krím nê Tirtüm kot mẽ pamã ho amnhĩrít xwýnhja japêr nê tokyx nhỹri omu. Kwa ma pu mẽ tokyx hwýr nê omu. Anê.

¹⁶ Hămri nhũm mẽ ma hwýr mra. Hămri nê krím agjê nê mõi nhõrkwý wýr agjê nê mẽ hkrareta pumu. Nhũm kôsti kamã nõ nhũm mẽ omu nê kuri Marir mẽ Juje wa omu. ¹⁷ Hămri nê akupým hapôj nê ma mẽ pi-itã mẽ hkôt ri mẽ kãm harênh o pa. Ra Tirtüm kapêr o wrýk xwýnh kot mẽ kãm harênh xàja kôt nhũm mẽ ma mẽ kãm harênh o ri mẽ hkôt pa. ¹⁸ Nhũm mẽ amnhĩ jaêr pê mẽ kot harênh ma nê tee ri hkukamã hamaxpêr. ¹⁹ Nom nhũm Marir mẽ kot kãm hkrax rùm tanhmã hkra jarênh to xàta kukamã pix mã hamaxpêr rãhã ho pa.

²⁰ Jakamã nhũm ôwêhti jamãr xwýnhjaja ma akupým hkrit wýr mra. Tirtũm kapër o wrýk xwýnh ra kot mẽ kãm ujarënh xà hkôt nhũm mẽ kot Jejus pumunh jakamã ma akupým hkính nê Tirtũm mã mex o mex ã harënh pê hã grer o akupým mra.

Mẽ kot Jejus ã hixi mẽnh ã harënh

Matêwre 1.21; Rukre 1.31

²¹ Tã nhũm wa hkrareta ra hã arígro pê 8 nhũm mẽ hwýr akuprõ nê kãm my kwýr kà krãhta. Na hte Ijaew mẽ hkra myre piitã ã mẽ hipêx anê. Mẽ piitã mẽ kot Tirtũm mã õr ã mẽ omunh kaxyw. Jakamã nhũm mẽ kãm ho anê nê hpãnhã hã hixi mẽ. Marir kormã kot ho htujarõ hkêt ri Tirtũm kapër o wrýk xwýnh kot hkukamã kãm hixi jarënh xàja kôt nhũm mẽ hã hixi mẽ nhũm hixi kêp Jejus.

Mẽ kot Tirtũm mã Jejus nhõr pyrãk o hipêx

²² Tã nhũm Marir hpijagri ho hapêx. Jakamã nhũm Juje ma krí pê Jerujarë hwýr mẽ kot Tirtũm mã amnhĩ jarënh xà hã ixkre hwýr amnhĩ kôt o mõ. Na pre ra finat Mojes amnepêm Tirtũm nhỹ hã mẽ hkukamã mẽ hpãmjê mã ja hã karõ. Nê mẽ kãm hã karõ ho:

Koja mẽ aprõ hpijagri. Hãmri nê hpijagri ho hapêx ka mẽ ma Tirtũm mã amnhĩ jarënh xà hã ixkre hwýr o mra nê hpãnhã Tirtũm mã mẽmoj gõ. Kãm tutre ho gõ rý kãm tuuti hõ ho axkrut nê agõ kê patre hamý nê kãm kupa. Kot ja hã omunh nê hpijagri xwýnhhta akupým mex ã harënh kaxyw.

Anhýr o kot mẽ kãm ja hã karõ jakamã nhũm wa ma ã amnhĩ nhípêx anhýr kaxyw hwýr mõ. Nê amnhĩ kôt Jejus mý nê o mõ. Tirtũm kot mẽ kãm ja hã karõ nhũm mẽ kot hã kagà xà hkôt. Na pre ra finat Mojes mẽ kãm ja jarë nê mẽ kãm:

Kot kaj mẽ akra my kot wa hãmri nê te mẽ ate Tirtũm mã õr kaxyw hipêx pyrãk o hipêx. Kê tãm amnhĩ nhípêx o pa nê ý hã tanhmã kãm amnhĩ nhípêx to ho pa.

Anhýr jakamã nhũm wa ra Jerujarë hwýr nojarêr nê amnhĩ kôt Jejus mý nê ma amnhĩ kôt o mõ.

Simeãw kot Jejus kukamã harënh

²⁵ Rôm nhũm Jerujarë kamã Simeãwja. Tirtũm Karõ nhỹ hã kot tanhmã amnhĩ to mex to ho pa xwýnh na pre. Na pre hte Tirtũm kapër kôt pix mã tãm amnhĩ nhípêx o pa. Jakamã nhũm pre ra Tirtũm Karõ ã kãm kapër anê nê kãm:

—E inhma Simeãw. Kot kaj atír rãhã nhýrmã Tirtũm kot mẽ akaxyw ãm mã xwýnhja ka ano ho omu nê rí kormã ty.

Anhýr o kãm kapër jakamã nhũm kuma nê hkính nê ãm pix kamã hamak o pa. Mẽ kêp Ijaew wýr wrýk nê mẽ ho mex mã xwýnhhta pix kamã hamak rãhã ho pa.

²⁷ Jakamã nhũm Jejus katorxà mẽ hipêxà purota wa Tirtũm mã amnhĩ jarënh xà hã ixkreja wýr Jejus o axà nê kormã o xa. Finat Mojes kot mẽ kãm hã karõ xà hkôt. Hãmri nhũm Tirtũm Karõ mẽ hwýr Simeãwja mẽ

nhũm ma mẽ hwýr tẽ nê axà. ²⁸ Hãmri nê wa hkrata pumu nê hkính týx nê. Hãmri nê wa kêp kumý nê o xa nê hã Tirtũm mã mex o mex ã harë nê kãm:

²⁹ Pa Pahi Maati. E ot pa ixte amã tanhmã amnhĩ nhípêx to ho ixpa xwýnh ã amnhĩ jarë.

Nà ãm hãmri na ka pre ã inhã jare hkukamã harënh anê. Tã ate inhã harënh xà hkôt pa ra inhno ho omu. Kêp mẽ ixkamã ukaprí xwýnh ã omu. Nê kêp ate mẽ ixwýr mẽnh xwýnh ã omu.

Nà koja te arígro hã myt hirã nê mẽmoj piitã ho amnhĩrít mex pyrãk o koja mẽ inhípêx o pa. Jakamã koja hprêk hãmri nê ma Ijaew kêt xwýnhjê mã apê Tirtũm ã akapër o amnhĩrít o pa nhũm mẽhprí hã ajarënh ma. Nê mẽ ixpê Ijaew kot paj mẽ ijaxwýja kuma nê hã ixpijaàm o ri ixpa.

Jakamã kot paj ixãmnhĩx ri tanhmã amnhĩ nhípêx to ho ri ixpa nê ixãmnhĩx ty. Ra ixte inhno ho ate inhã harënh xwýnhhta pumunh kênã. Anê.

³³ Nhũm pre ã Simeãw Jejus jarënh anê. Nhũm katorxà mẽ hipêxà purota wa amnhĩ jaër pê kot ã harënh anhýrja mar o xa. ³⁴ Hãmri nhũm Simeãw wa ho Tirtũm wý nê kãm:

—E Tirtũm. Kêr ka ja wa ho mex nê. Wa ho mex o wa ho mex rãhã ho apa. Anê.

Hãmri nê Marir mã kapër nê kãm:

—Nà ãm hãmri na pre Tirtũm mẽ pakaxyw akrata xãm. Mẽ pahpê Ijaew kaxyw ãm. Jakamã koja hprêk nê ma Tirtũm kapër o mẽ piitã mẽ ahkre ho ri mẽ hkôt pa. Nhũm mẽ kuma hãmri nê ahpýnhã tanhmã hamaxpêr to xà hkôt tanhmã hipêx to. Jakamã nhũm mẽ hkwyjaja kuma nê hkôt amnhĩ xunhwý nê hkôt amnhĩ nhípêx o pa. Jao tãm hipêx o pa. No nhũm mẽ hkwyjaja kuma nê axtem nê kãm hkính kêt nê. Hãmri nê tanhmã hipêx to. Jakamã kot kaj tee ri ja hã mẽ omu nê akaprí htýx nê. Te mẽ kot wapo ho akanhwýr nê akamã ho kaxkep nhũm apê omnuj týx pyrãk o kot kaj amnhĩ kamã ama nê mẽ omu. Anê.

ãnti kot Jejus pumunh ã harënh

Wam Ximotre 5.5

³⁶ Rôm nhũm mẽhõ ni pê ãntija mẽ hwýr axà nê Jejus pumu. ãntija Panuew kra na pre. Nê Ase hkwy na pre. Ni htã kêp Tirtũm nhỹ hã kapër jarënh o pa xwýnh. Na pre ra mjên no ãm kormã mjên nê pa hã amgrà pê 7 pix nhũm pre kêp ty. Hãmri nhũm axte mjên kêt nê pa rãhã ra hpigêx týx nê. Ra hã amgrà pê 84. Na pre hte Tirtũm mã amnhĩ jarënh xà hã ixkre hwýr pa nê kãm amnhĩ jarënh rãhã ho pa. Nê kot kãm amnhĩ jarënh kaxyw nê apkur kêt rãhã kãm amnhĩ jarë. Nê arígro hã hwýr pa nê kamàt kãm hwýr pa. ã na pre hte amnhĩ nhípêx anhýr rãhã ho pa anê. Jakamã mẽ hwýr axà nê Jejus pumu nê hkính nê. Hãmri nê hã Tirtũm mã mex o mex ã harë nê kãm:

—Hêxta gàà nê Tirtũm. ãm hãmri na ka mẽ ixwýr Jejus mẽ. Ma amex o amex. Anê.

Hãmri nê Ijaew kot amnhĩ wýr mẽ kamã ukaprí xwýnh kamã hamak xwýnhjê mã ra Jejus kator ã harënh o ri mẽ hkôt pa.

Marir mẽ Juje wa kot akupÿm Najare hwÿr mör ã wa harënh

Matêwre 2.19-23

³⁹ Tã nhũm Marir mẽ Juje wa Tirtũm kapër ã kagà htũm kôt Tirtũm mã amnhĩ jarënh xà hã ixkre kamã tanhmã amnhĩ nhĩpêx to hpa hãmri nẽ kato nẽ ma akupÿm mō. Ma Garirej kamã õ krĩ pẽ Najare hwÿr wa ma akupÿm mō.

⁴⁰ Tã nhũm wa hkrata ra wa kãm hprêkre ho mō. Nẽ mex nẽ àhpumunh tÿx nẽ. Tirtũm kot tãnopxar nẽ mẽ-moj to kutã nojarêt rãhã ho pa jakamã nhũm mex nẽ hkĩnh nẽ pa.

Marir mẽ Juje wa kot tee ri Jejus japêr ã wa harënh

Rukre 4.22

⁴¹ Nhũm pre hte Marir mẽ Juje wa amgrà mẽ hkwÿjê hkôt ma Jerujarê hwÿr pa. Mẽ kot arĩgro pẽ Pas ã hkĩnh kaxyw. Pas ã na hte mẽ kêp Ijaew amnepêm Tirtũm kot pika pẽ Ejit rũm mẽ hpãmjê katorja mã hamaxpêr kaxyw axpên wÿr akuprō nẽ hã hkĩnh. Jakamã nhũm wa ma mẽ hkôt hã hkĩnh kaxyw Jerujarê hwÿr hkwÿjê hkôt mō. ⁴² Nhũm ra Jejus hprêk o mō. Ra hã amgrà pẽ 12 jakamã nhũm wa ma amnhĩ kôt o mō. ⁴³ Tã nhũm mẽ hkĩnh pa hãmri nẽ akupÿm nojarêt nhũm Marir mẽ Juje wa ma hkwÿjê hkôt akupÿm mō. Nhũm Jejus Jerujarê kamã ahte arĩk nẽ akupÿm wa hkôt mör kêt nẽ. Nhũm wa htÿx wam ma hkwÿjê hkôt htêm ã hkamnhĩx jakamã wa hapêr kêt nẽ. Hãmri nẽ wa hapu hã hamakêtkati nẽ mẽ hkôt mör o mör ã ra hã kamãt. Hãmri nẽ mẽ kot amnhĩm hikranh xàja wÿr mẽ hkôt pōj nẽ tee ri mẽ hkaêx ã hkra japêr o ri mra nom omunh kêt nẽ. ⁴⁵ Jakamã nhũm apkati nhũm wa awjanã nẽ ma akupÿm Jerujarê hwÿr mō nẽ kamã hapêr o ri pa. ⁴⁶ Nom tokyx kãm kator kêt nẽ. Mẽ hkaêx ã tee ri hapêr o pa hã apkati axkrut. Nẽ nõ nhũm apkati nhũm wa tã Tirtũm mã amnhĩ jarënh xà hã ixkreja wÿr hapêr o mō nẽ hwÿr axà. Hãmri nẽ omunh kurê kumrêx. Nhũm arĩ mẽ kot Tirtũm kapêr tũm o mẽ ahkre xwÿnhjê mar o mẽ kutã nhÿ. Nẽ mẽ-moj tã ri mẽ hkukja nẽ tanhmã mẽ kãm ujarënh to. ⁴⁷ Nhũm mẽ kot mar xwÿnhjaja tee ri kapêr ã kuma nẽ àhpumunh tÿx ã omu hãmri nẽ akryk mar o hkrĩ. ⁴⁸ Hãmri nhũm Marir mẽ Juje mẽ hwÿr axà nẽ mẽ kuri wa hkraja pumunh kurê kumrêx. Hãmri nhũm katorxàja hwÿr tẽ nẽ kãm:

—Xê Jejus. Mon ka axtem nẽ ã ri amnhĩ nhĩpêx anẽ nẽ akupÿm wa ixkôt amör kêt nẽ? Na pa wa mō nẽ mẽ pahkwÿjê hkôt pōj nẽ tee ri mẽ hkaêx ã ajapêr nẽ tee ri akukamã ijamaxpêr. Anẽ.

⁴⁹ Hãmri nhũm amnhĩ tã wa kuma nẽ wa kãm:

—Tÿ. Nom Inhĩpêxã nhõrkwÿ kamã ixarĩk kênã na ka wa tee ri ixkukamã ajamaxpêr nẽ ijapêr o ri apa. Anẽ.

⁵⁰ Hãmri nhũm wa kuma nẽ ã kot amnhĩ jarënh anhÿrja kukamã tee ri hamaxpêr. ⁵¹ Hãmri nẽ mẽ ma akupÿm mō nẽ Najare hwÿr pōj nẽ kamã pa. Nhũm pre Jejus wa kapêr kôt ri amnhĩ nhĩpêx rãhã ho pa.

Hãmri nhũm katorxàja hkrax rũm mẽ kot kãm tanhmã hkra kot amnhĩ nhĩpêx to hkukamã harënhja pix kukamã hamaxpêr rãhã ho pa.

⁵² Gaa nhũm Jejus ra àptàr o mō. Nẽ àhpumunh tÿx nẽ. Nhũm mẽ piitã ã kot amnhĩ nhĩpêx anhÿr ã omu nẽ kãm hkĩnh nẽ. Nhũm Tirtũm haxwÿja kãm hapê nẽ.

Juãw Paxis kot Tirtũm kapêr jarënh o pa hã harënh

Matêwre 3.1-10; Makre 1.1-8; Juãw 1.19-28

3 Tã nhũm kormã pahihti Tipeja mẽ ho amnhĩptàr o pa. Na pre ra mẽ ho amnhĩptàr ã amgrà pẽ 15. Nhũm Põn Piratja pahihti Xipe mã pika pẽ Ijaew nhõ xwÿnhjê ho amnhĩptà. Nhũm Eroxa kãm pika pẽ Garirej nhõ xwÿnhjê ho amnhĩptà. Nhũm Erox tō Firipja kãm pika pẽ Iturej nẽ hõ pẽ Takonit wa kamã mẽ pa xwÿnhjê ho amnhĩptà. Nhũm Risãnja kãm pika pẽ Apirên kamã mẽ ho amnhĩptà. Nhũm Anas mẽ Kajpasja wa kêp Ijaew nhõ patre maati.

Rôm nhũm Jejus mẽ Jakaris kra Juãwja wa ra hamẽ anhĩpê àptàr. Jakamã nhũm Tirtũm tanhmã Juãw mã kapêr to. Kormã kapôt ã ri pa ri nhũm kãm kapêr nẽ kãm tanhmã kot amnhĩ nhĩpêx to ho pa hã kãm karō nẽ kãm:

—Pa Juãw. E inhma. Kêr ka ma mẽ kãm ixkapêr jarënh rãhã ho ri apa. Anẽ.

³ Hãmri nhũm kuma nẽ ma ri mẽ kãm kapêr jarënh o pa. Pyhti pẽ Jotãw mÿri mẽ piitã mẽ kãm harënh o ri pa nẽ hpãnhã ihkjê hã ri mẽ pa xwÿnhjê mã harënh o ri pa. Nẽ mẽ kãm:

—E kwa mẽ tokyx amã amnhĩ tomnuj kaga hprãm xàj tãm ri amnhĩ nhĩpêx. Kê Tirtũm ja hã mẽ apumu nẽ mẽ anê mẽ ate amnhĩ tomnuj o hapêx pa. Pa mẽ piitã mẽ kot mẽ apê Tirtũm kra hã mẽ apumunh kaxyw mẽ akrã kumrã.

Anhÿr o mẽ kãm kapêr o ri pa. ⁴ Na pre ra amnepêm mẽ hkukamã Tirtũm nhÿ hã kapêr o pa xwÿnh Ijais ra Juãw kukamã kot tanhmã amnhĩ nhĩpêx to hã harê nẽ hã kagà. Nẽ hã kagà ho:

Koja nhÿrmã mēhō mōn pōj. Kapôt ã mōn pōj nẽ mẽ kãm ujarënh o ri pa. Nẽ mẽ kãm ujarënh o: “E mẽ inhma. Kojã Tirtũm tokyx mẽ pahwÿr mẽ panhõ pahihti mẽ nhũm wrÿ nhũm mẽ piitã omu. Jakamã kwa mẽ tokyx kutêp tãm amnhĩ nhĩpêx o apa. Te ho mẽ kot mēhō kutêp pry ho mex pyrãk o amnhĩ nhĩpêx. Jao tãm amnhĩ nhĩpêx. Nẽ tãm axpên nhĩpêx. Pahihtita kutêp. Mẽ pahte amnhĩ nhĩpêx te kot pry nhĩnur pyrãk nhũm mẽ tee ri kot kãm hã mrar mex prãm kaprÿ pyrãk. Hinur nẽ krã hakÿx nẽ pry juk pyrãk o na mẽ pahte amnhĩ nhĩpêxja. Jakamã kot kaj mẽ ate amnhĩ tomnuj kaga nẽ tãm amnhĩ nhĩpêx. Nẽ tãm axpên nhĩpêx. Hãmri nẽ te mẽ kot pry nhĩnur o mex nẽ ho katat nhũm katat muux nẽ nõr pyrãk o kot kaj mẽ amnhĩ nhĩpêx. Pahihti nywta kutêp. Kwa kêr ka mẽ ã amnhĩ nhĩpêx anẽ.

⁶ Kot kaj mẽ anẽ nhũm mẽ ohtō nẽ ja hã mẽ apumu hãmri nẽ mẽ apyrã Tirtũm kot mẽ ho hkra kaxyw amnhĩ to kuwÿ.” Anhÿr o mẽ kãm ujarënh o pa. Anẽ.

Nhũm pre ã finat Ijaisja Juãw Paxis kukamã mẽ kãm ujarẽnh anhỹr o pa. ⁷ Jakamã nhũm àptàr nẽ Ijais kot ra hkukamã harẽnh xà hkõt ma Tirtũm kapẽr o mẽ ahkre ho pa. Nhũm prem kuma hãmri nẽ kot mẽ hkrã kumrãr kaxyw hwỹr amnhĩ to mra. Nhũm mẽ omu nẽ tanhmã mẽ ahkre hto. Nẽ mẽ kãm kapẽr kãm hihtỹx nẽ mẽ kãm:

—Tk. Kwa kormã. Mẽ ate amnhĩ tomnuj pix o ri apa xwỹnh kẽnã. Xà kot paj mẽ ate amnhĩ tomnuj rãhã mẽ akrã kumrã nhũm Tirtũm ja hã mẽ apumu nhũm ja kãm mex nã? Nà koja ja kãm mex kêt nẽ. Koja ja mýrapẽ nhỹrmã tanhmã mẽ anhĩpẽx to ka mẽ tee ri umaj apimxur prãm kaprỹ.

⁸ —Na htem amnhĩ tomnuj kaga nẽ hpãnhã tãm amnhĩ nhĩpẽx. Nẽ tãm ri axpẽn nhĩpẽx. Jakamã e kwa mẽ ã amnhĩ nhĩpẽx anhỹr o apa. No na ka htem atỹx ri ajamaxpẽr o: “Mẽ ixpẽ finat Apraãw kanrẽhã htãmnhwỹ jakamã koja Tirtũm ja hã mẽ ixpumu hãmri nẽ mẽ ixte amnhĩ tomnuj mýrapẽ tanhmã mẽ ixto hkêt nẽ. Koja ãm mẽ ixto mex rãhã nẽ.” Anhỹr o atỹx ri amnhĩ kukamã ajamaxpẽr o apa. Nom ja kot anhỹr kêt. Mẽ apẽ Apraãw kanrẽhã htãmnhwỹ htã urak nẽ tãm amnhĩ nhĩpẽx o apare hã. Kot ka mẽ apẽ kanrẽhã htãmnhwỹ htã amnhĩ tomnuj o ri apa hãmri nẽ Tirtũm noo mã te mẽ apẽ pikap kẽnre nhĩkwỹ pix pyrãk.

⁹ —Na ra Tirtũm kot mẽ ate amnhĩ tomnuj mýrapẽ tanhmã mẽ ato kaxyw. Koja mẽ anhĩpẽx o te mẽhõ nhõ mẽmoj pàr ô hkêt nhũm kot tee ri omunh hãmri nẽ krãhyr nẽ kuwy kamã mẽnh nẽ ho xêt par pyrãk o mẽ anhĩpẽx. Jao amnhĩ nẽ kuwy hwỹr mẽ arẽnh pa ka mẽ kamã amnhĩ xà htỹx kamã ajamak rãhã ho ri apa. Anẽ.

Nhũm pre ã Juãw Paxisja mẽ kãm kapẽr anẽ. ¹⁰ Hãmri nhũm mẽ kuma nẽ tee ri amnhĩ kukamã hamaxpẽr nẽ kãm:

—Kwa xô wehe? Xà koja ã mẽ inhĩpẽx anẽ? Kwa tanhmã kot paj mẽ kot ã mẽ inhĩpẽx anhỹr pymaj amnhĩ nhĩpẽx to wehe? Anẽ.

¹¹ Hãmri nhũm mẽ kãm:

—Nà kêt ka mẽ axpẽn kãm axukaprĩ ho ri apa. Nẽ mẽ kęp amrakati xwỹnhjẽ mã amnhĩ kutã mẽmoj nhõr o ri apa. Nẽ mẽ anhĩnõhka axkrut nẽ mẽhõ hinõka hkêt xwỹnhjẽ mã ho pyxi nẽ agõ nẽ pyxi nẽ ho arĩk. Nẽ mẽ axàpkur xà ho anhõxy ho apa hkêt nẽ. ãm axãmnhĩx ri mẽ kęp amrakati xwỹnhjẽ mã amnhĩ kutã mẽ kãm mẽmoj to hkryre nẽ agõ. E kêt ka mẽ ã axpẽn nhĩpẽx anhỹr o ri apa. Anẽ.

¹² Hãmri nhũm Rõm kãm mẽ õ pahihti mã mẽ piitã mẽ kęp kàxpore hkwy jamỹnh xwỹnhjaja mẽ urak nẽ hwỹr mra. Kot mẽ urak nẽ mẽ hkrã kumrãr kaxyw hwỹr mra nẽ kãm:

—No we mẽ pajaja? Tanhmã kot paj wem amnhĩ nhĩpẽx to? Anẽ.

¹³ Hãmri nhũm mẽ kãm:

—Nà mẽ kajaja kêt ka mẽ Rõm nhõ pahi kot mẽ amã mẽ ate mẽ kęp kàxpore hkwy jamỹnh jarẽnh xà hkõt pix mã hamỹnh o ri apa. No mẽ atỹx ri amnhĩ krã hkõt

amnhĩm hkwy jamỹnh prãm xaj mẽ kãm hkre kamã ho rũnh nẽ mẽ kãm harẽnh o ri apa hkêt nẽ. Anẽ.

¹⁴ Hãmri nhũm hpãnhã pòristi hkwyjaja hwỹr mra nẽ kãm:

—Kwa no we mẽ pajaja? Tanhmã kot paj wem ri amnhĩ nhĩpẽx to ho ixpa? Anẽ.

Hãmri nhũm mẽ kãm:

—Nà kêt ka mẽ anhõ pahihti kot mẽ axapẽn hpãnhã mẽ amã kàxpore nhõrta pix jamỹ nẽ ajamakêtkati nẽ axãmnhĩx ri ho amnhĩm axujaprõr o ri apa. No mẽ akwỹjaja kãm apyma nẽ mẽ amã kàxpore nhõr prãm xaj ri mẽ kãm tanhmã amnhĩ pyma hto ho ri apa hkêt nẽ. E kêt ka mẽ ã amnhĩ nhĩpẽx anhỹr o ri apa. Anẽ.

Juãw Paxis kot tanhmã Jejus jarẽnh to hã harẽnh

Matêwre 3.11-12; Makre 1.7-8; Juãw 1.19-28; mãânẽn Atre 19.4

¹⁵ Nhũm pre ã Juãw Paxisja mẽ kãm kapẽr anẽ.

Nhũm mẽ kuma nẽ htỹx kęp Tirtũm kot mẽ pakaxyw ãm mã xwỹnhhta ã hkamnhĩx. ¹⁶ Hãmri nhũm amnhĩ tã ã mẽ hamaxpẽr anhỹr ã mẽ omu hãmri nẽ mẽ kãm amnhĩ tã aprã nẽ mẽ kãm:

—Nà pa hkêt. Na pa hte ãm Tirtũm mã gô pix o mẽ hkrã kumrãr o ri ixpa. No koja tokyx ixpãnhã Tirtũm kot mẽ pakaxyw ãm xwỹnhhta tãm mẽ pahwỹr pøj. àhpumunh tỹx o kot ijakrenh jakamã na pa hte ãm kukwak ri ixpa nẽ hã ixpĩaam o ri ixpa. Tirtũm kot mẽ pakaxyw ãm xwỹnhhta koja mẽ awỹr Karõ rẽ nhũm mẽ akaxwỹnh mã agjẽ ka mẽ ý hã tãm ri amnhĩ nhĩpẽx rãhã ho ri apa. Nom kormã mẽ kot tãm amnhĩ nhĩpẽx hkêt xwỹnhjaja koja ja hã mẽ omu hãmri nẽ mẽ hipẽx o te kuwy kot mẽmoj to kaxàr par pyrãk o mẽ hipẽx.

¹⁷ —Na htem pur kãm harõj nhĩkẽ nẽ ho grã nẽ hpãnhã kahtwỹ. Nẽ kahuk pa hãmri nẽ hkapĩ nhũm kòk apẽ nẽ prỹhkà ho htor nẽ ho hapẽx pa. Nhũm mẽ hy ho pa nẽ ixkre kamã gøj kãm unhwỹ. Ja pyrã nẽ koja tokyx Tirtũm mẽ piitã mẽ kot tanhmã amnhĩ nhĩpẽx to ho pa hã mẽ omunh xà hkõt mẽ ho axkjẽ. Mẽ kot tãm amnhĩ nhĩpẽx o mẽ pa xwỹnhjaja koja ma amnhĩ wỹr mẽ ho api nhũm mẽ kuri mex nẽ hkĩnh rãhã nẽ pa ho pa. No mẽ kot amnhĩ tomnuj xwỹnhjaja koja mẽ hkĩnhã tanhmã mẽ hipẽx to nhũm mẽ ma kuwy raxja wỹr pa nẽ kamã amnhĩ xà htỹx kamã hamak rãhã nẽ pa ho pa. Anẽ.

¹⁸ Nhũm pre ã Juãw Paxis Tirtũm kapẽr o mẽ ahkre anhỹr o pa.

Juãw Paxis kot Jejus krã kumrãr ã harẽnh

Matêwre 3.13-17; Makre 1.9-11

¹⁹ Tã nhũm Ijaew nhõ pahi Eroxo ra htõ hprõ pẽ Eroxis pytã nẽ ho hprõ nhũm Juãw Paxisja harẽnh ma nẽ ma hwỹr tẽ nẽ hã kãm akir. No ãm ja pix ã kãm àkjẽr kêt nẽ. Mãânẽn tanhmã kot amnhĩ tomnuj tỹx to ho pa hã kãm akir. ²⁰ Nhũm amnhĩ tã kuma nẽ kamã gryk tỹx nẽ amnhĩ tã mẽ kãm hã amỹnẽ nhũm prem unẽ nẽ haxà. Jao amnhĩ tomnuj tỹx nẽ. ²¹ Nom kormã mẽ kot haxàr kêt ri nhũm Juãw Paxis Ijaew kwỹjẽ krã kumrãr o xa. Rõm nhũm Jejusja hãmri tãm nhỹhỹnh hwỹr tẽ nẽ kot hkrã kumrãr kaxyw kãm anẽ nhũm kuma nẽ hkrã

kumrã. HãMRI nhũM JeJus gôJ rũM api nê kormã gô mÿ ri TĩrtũM mã amnhĩ jarẽnh o xa. ²² Pu nhũM kaxkwa axkjê nhũM kurũM TĩrtũM Karõ te tuuti pyrã nê hwÿr wÿk o tẽ nê ĩkre hã xa. HãMRI nhũM kaxkwa rũM TĩrtũM kãm kapẽr nê kãm:

Pa? E apê Ixkra mex na ka. Ām hãMRI na ka hte ixkan-rẽhã amnhĩ nhĩpêx o apa. Inhmã ajapê kamã na ka ri apa ho apa. Anẽ.

JeJus kukamã higêt nê hpãmjê nhĩxi hã harẽnh

Matêwre 1.1-17

²³ Tã nhũM JeJus TĩrtũM mã kapẽr o mẽ ahkre ho pa hkraX. Na pre ra hã amgrã pê 30 hãMRI nê kãm ho hkraX.

E kot paj hpãnhã amã JeJus kukamã hpãmjê nhĩxi jarẽ Teopre. Ijaewjaja na prem htÿx ho Juje kêp JeJus nhĩpêêxã kumrẽx ã hkamnhĩx nom kêp hipêêxã kumrẽx kêt ãm kêp hipêêxã puro na pre.

JeJus kêp Eri htãmnhwÿ na pre.

²⁴ Nê Eri kêp Matat kra na pre.

Nê Matat kêp Rewi hkra na pre.

Nê Rewi kêp Mewki hkra na pre.

Nê Mewki kêp Jãnaj kra na pre.

Nê Jãnaj kêp axtem Juje hõ hkra na pre.

²⁵ Nê Juje kêp Matatis kra na pre.

Nê Matatis kêp Amõs kra na pre.

Nê Amõs kêp Naũ hkra na pre.

Nê Naũ kêp Eri hkra na pre.

Nê Eri kêp Nakai hkra na pre.

²⁶ Nê Nakai kêp Mate hkra na pre.

Nê Mate kêp axtem Matatis õ hkra na pre.

Nê Matatis kêp Semeĩ hkra na pre.

Nê Semeĩ kêp Juje hõ hkra na pre.

Nê Juje kêp Jotre hkra na pre.

²⁷ Nê Jotre kêp Joanãn kra na pre.

Nê Joanãn kêp ReJ kra na pre.

Nê ReJ kêp Joropape hkra na pre.

Nê Joropape kêp Saraxi kra na pre.

Nê Saraxi kêp Neri hkra na pre.

²⁸ Nê Neri kêp axtem Mewki hõ hkra na pre.

Nê Mewki kêp Axi hkra na pre.

Nê Axi kêp Kojã hkra na pre.

Nê Kojã kêp Ematã hkra na pre.

Nê Ematã kêp Erti hkra na pre.

²⁹ Nê Erti kêp JoJue hkra na pre.

Nê JoJue kêp Eries kra na pre.

Nê Eries kêp Jorĩ hkra na pre.

Nê Jorĩ kêp Matat hkra na pre.

Nê Matat kêp axtem Rewi hõ hkra na pre.

³⁰ Nê Rewi kêp Simeãw kra na pre.

Nê Simeãw kêp Juta hkra na pre.

Nê Juta kêp axtem Juje hõ hkra na pre.

Nê Juje kêp Janã hkra na pre.

Nê Janã kêp Eriakĩ hkra na pre.

³¹ Nê Eriakĩ kêp Merea hkra na pre.

Nê Merea kêp Mena hkra na pre.

Nê Mena kêp Matata hkra na pre.

Nê Matata kêp Natã hkra na pre.

Nê Natã kêp Tawi hkra na pre.

³² Nê Tawi kêp Jese hkra na pre.

Nê Jese kêp Opex kra na pre.

Nê Opex kêp Poas kra na pre.

Nê Poas kêp Sarã hkra na pre.

Nê Sarã kêp Nasõ hkra na pre.

³³ Nê Nasõ kêp Amĩnatap kra na pre.

Nê Amĩnatap kêp Amĩ hkra na pre.

Nê Amĩ kêp Ari hkra na pre.

Nê Ari kêp Erõ hkra na pre.

Nê Erõ kêp Pere hkra na pre.

Nê Pere kêp Juta hkra na pre.

³⁴ Nê Juta kêp Jako hkra na pre.

Nê Jako kêp Ijak kra na pre.

Nê Ijak kêp Apraãw kra na pre.

Nê Apraãw kêp Tera hkra na pre.

Nê Tera kêp Nako hkra na pre.

³⁵ Nê Nako kêp Jeruk kra na pre.

Nê Jeruk kêp Rakau hkra na pre.

Nê Rakau kêp Parek kra na pre.

Nê Parek kêp Epti hkra na pre.

Nê Epti kêp axtem Sara hõ hkra na pre.

³⁶ Nê Sara kêp Kajnã hkra na pre.

Nê Kajnã kêp Apaxat kra na pre.

Nê Apaxat kêp Sêre hkra na pre.

Nê Sêre kêp Noehti hkra na pre.

Nê Noehti kêp Ramek kra na pre.

³⁷ Nê Ramek kêp Metujarẽ hkra na pre.

Nê Metujarẽ kêp Enok kra na pre.

Nê Enok kêp Jarate hkra na pre.

Nê Jarate kêp Marerer kra na pre.

Nê Marerer kêp axtem Kajnã hõ hkra na pre.

Nê Kajnã kêp Enos kra na pre.

³⁸ Nê Enos kêp Set kra na pre.

Nê Set kêp Atãw kra na pre.

Nê Atãw kêp TĩrtũM kra na pre. TĩrtũM kot wam my pê Atãwja pika ho hipêx jakamã te kêp hkra pyrãk.

Ā JeJus kukamã hpãmjê nhĩxi kot anhÿr.

Satanasti kot amnhĩ tã JeJus kamã hamak ã harẽnh

Matêwre 4.1-11, 16.23; Makre 1.12-13, 8.33; mããnhẽn Eprẽw 2.18, 4.15

4 Tã nhũM JeJus pyhti pê Jotãw rũM akupÿm ma mõ. HãMRI nê TĩrtũM Karõ nhÿ hã mẽmoJ kutã amnhĩ to htÿx nê. Jakamã nhũM nhÿhÿm ma kapõt wÿr o mõ ² nhũM Satanasti omu nê ma hwÿr tẽ nê ri hkõt pa. Kapõt ã ri hkõt hẽx rom tanhmã kãm nê ho pa. Kot mar nê TĩrtũM kapẽr nhĩrõp ãm prãm xaj ma hkõt tanhmã kãm kapẽr to ho pa. HãMRI nê hkõt pa o hã arĩgro pê 40 nhũM JeJus kormã apkur kêt o hã arĩgro pê 40 nê hapêx nhũM ra kãm prãm tÿx nê. ³ HãMRI nhũM Satanasti kãm:

—Kwa mãn ka ra amã prãm tÿx kumrẽx nã? Nom xep apê TĩrtũM Kra jakamã mẽmoJ tanhmã apê kute hkêt. Kwa kẽn nhĩkwÿ mÿj mã anê kê amã pãwti hã amnhĩ jahkre ka aku nê tokÿx ho amnhĩ xihtÿx. E kwa tokÿx kãm anê. Anẽ.

⁴ HãMRI nhũM kuma nê kãm:

—Tk. Nà kot paj akapër mar xà hkôt tanhmã amnhĩ nhĩpêx to hkêt nê. Koja Tirtũm kãm inhmã mêmõj nhõr prãm nê inhmã mêmõj gõ pa arĩ kormã kukrê. Kapër ã kagà htũm kot ja jarênh kot:

Na htem mē apkur xà pix kukwak ri htĩr nē pa hkêt nē. Na htem mãänēn Tirtũm kapër mar xà hkôt tanhmã ri amnhĩ nhĩpêx to ho pa ho htĩr nē mex nē pa. Anē.

Å kapër ã kagà kot ja jarênh kot anhÿr jakamã kot paj amar xà hkôt ã ri amnhĩ nhĩpêx anhÿr kêt nê. Åm kwarĩ ho kwarĩ. Anē.

⁵ Nhũm pre ã Jejus Satanasti mã kapër anē nhũm tee ri kuma hãmri nē hpãnhã ma nhÿhÿm o mō nē nhÿri kÿx pē mēmõj prēeti nhĩmõk ã o xa. Hãmri nē kãm pi-ka piitã ahkre ho xa. Nē kãm mē hikukrêx piitã ahkre. Kàxpore nē mēmõj piitã nhũm kãm ahkre hpa nhũm anhĩpê omunh o xa. ⁶ Hãmri nhũm Satanasti kãm:

—E mãn ka kam ri mēmõj mũj piitã omu. Piitã inhõ na. Inhmã na pre Tirtũm piitã õr pa. Kot paj inhmã mēhõ mã õr prãm nē kãm kugõ. ⁷ Tã amã kot paj kugõ. Jakamã e. Kwa tokyx ixkutã tēm nē inhmã inhmex o inhmex ã ijarē pa ama nē rĩ amã piitã õr pa. E tokyx. Anē.

⁸ Hãmri nhũm kuma nē kãm:

—Tk. Kot paj amã amex o amex ã ajarênh kêt kum-rêx. Åm kwarĩ ho kwarĩ. Amexti hã. Tirtũm kapër ã kagà htũm kot ja nē kapër kãm hihtyx kēnã. Kapër kot: Kêr ka mē ixkapër pix ma. Nē ixkutã pix mã mãn akõnkrã ho akrĩ nē inhmã inhmex o inhmex ã ijarênh o ri apa. Kêr ka mē ã amnhĩ nhĩpêx anhÿr o ri apa. Anhÿr o kot harênh jakamã kot paj ri amã amex o amex ã ajarênh kêt nē Satanasti. Anē.

⁹ Nhũm pre ã Jejus amnhĩ nē kãm kapër anē. Hãmri nhũm tee ri kuma nē hpãnhã ma krĩ pē Jerujarē hwÿr o mō. Nē mē kot Tirtũm mã amnhĩ jarênh xà hã ixkre hprêk nhĩmõk wÿr ho api nē kÿxpê hatur xà hã ãm nhũm xa. Nhũm amnhĩ parpê kēn rũnh nhĩkwÿ pumunh o xa. Hãmri nhũm Satanasti kãm:

—E apê Tirtũm Kra jakamã kwa ja rũm ahpar mã ajarĩ nē ma tē nē pikap tēm. Koja Anhĩpêêxà apumunh mex nē ka tanhmã amnhĩ to hkêt nē. ¹⁰ Kapër ã kagà htũm kot ja jarênh kot:

Tirtũm koja kapër o wÿk xwÿnh mã ajarē ka ajarĩ nē ahpar mã tē nhũm mē kÿx pē amÿ nhũm mēmõj akã hyr kêt nē.

Å kapër ã kagà kamã ajarênh kot anhÿr jakamã e tokyx ajarĩ nē ma tēn pikap ahto. Anē.

¹² Hãmri nhũm kuma nē kê axte amnhĩ tã kãm kapër nē kãm:

—Tk. Kwa nã. Kot pa ri amar xà hkôt ã amnhĩ nhĩpêx anhÿr kêt nē. Koja Tirtũm tãm inhmã ijarĩ hã karõ pa rĩ mar xà hkôt ijarĩ no kot pa ri amar xà hkôt ijarĩ hkêt nē. Tirtũm kapër ã kagà htũm kot ja jarênh kot:

Kêr ka mē amnhĩ krã hkôt amnhĩ tã ixkamã ajamak kaxyw inhĩxi jarênh kôt tanhmã amnhĩ nhĩpêx to hkêt nē.

Å ja nē kapër kot anhÿr jakamã ãm kwarĩ ho kwarĩ. Kot paj ri amar xà hkôt ã amnhĩ nhĩpêx anhÿr kêt nē. Tãm kot inhmã ijarĩ hã karõre hã. Anē.

¹³ Nhũm pre ã Jejus Satanasti mã kapër anē hãmri nhũm tee ri mēmõj piitã ho mar kaprÿ hãmri nē hkaga nē ma nhÿhÿm tē. Hãmri nē kot nhÿrmã axte hwÿr htēm nē kot mēmõj punuj o mar kaxyw kormã amnhĩm hamãr o ri pa.

Jejus kot Tirtũm kapër o mē ahkre ho hkrax ã harênh
Matêwre 4.12-17; Makre 4.14-15

¹⁴ Tã nhũm Jejus ma akupÿm Garirej wÿr mō. Nē Tirtũm Karõ nhÿ hã àhpumunh tÿx nē hkwyjê mã kapër jarênh o ri pa. Nhũm mē kuma nē piitã pikaja kamã axpēn mã tanhmã harênh to. ¹⁵ Na pre hte mē kot Tirtũm kapër o mē ahkre xà hã ixkre hwÿr agjê nē kamã mē ahkre ho hkrĩ. Nhũm mē piitã kuma nē kãm mar prãm nē. Hãmri nē axpēn mã mex ã harênh o ri pa.

Najare kamã mē kot Jejus kaga hã mē harênh
Matêwre 13.53-58; Makre 6.1-6; Juãw 1.11

¹⁶ Tã nhũm Jejus ma akupÿm krĩ kamã àptàr xàja wÿr ma mō. Najare hwÿr. Hãmri nē kamã pøj.

Nhũm Ijaew nhõ arĩgromnu pē sap kato nhũm Jejus ma mē hkôt Tirtũm kapër o mē ahkre xà hã ixkre hwÿr tē. Hãmri nē hwÿr axà nē mē kuri nhÿ. Hãmri nē kamã mē kãm Tirtũm kapër ã kagà htũm kamã harênh kaxyw kànhmã xa ¹⁷ nhũm mē omu nē kãm ja gõ. Finat Ijais pē Tirtũm nhÿ hã kapër xwÿnh kot Tirtũm kapër kwÿ hã kagàja nhũm mē kãm kugõ. Hãmri nhũm kupy nē kamã kormã Tirtũm kot tanhmã mēmõj jarênh to hõ japêr o xa. Nē kãm kato hãmri nē mē kãm kamã harē. Nom amnhĩ tã kamã mē kãm harênh o xa nē mē kãm:

¹⁸ Na pre ra Tirtũm Karõja ixto ixàhpumunh tÿx nē mē kêp amrakati xwÿnhjê hwÿr inhmē pa ra mō. Ixte mē kãm mēmõj mex jarênh o ixpa kaxyw. Nē Satanasti kot amnhĩ kôt mē unhwÿr xwÿnhjê hwÿr nhũm pre mãänēn inhmē. Ixte mē nē Satanasti japõx o ixpa kaxyw. Nē mē kot hprĩ hã Tirtũm kapër mar kêt xwÿnhjê hwÿr nhũm pre mãänēn inhmē. Ixprĩ hã ixte mē kãm kapër jarênh o ri mē hkôt ixpa kaxyw. Nē mē kot amnhĩ tomnuj o mē pa xwÿnhjê hwÿr nhũm pre mãänēn inhmē. Ixte mē nē mē kot amnhĩ tomnuj rēnh pa nhũm mē hamakêtkati nē àmnhĩx ri pa kaxyw. Å na pre Tirtũm jajê piitã hwÿr inhmēnh anē pa ra man mōn pøj.

¹⁹ Nē amgrà ja kêp Tirtũm kot mē ato mex xà hã am-gràja nhũm ixte mē amã harênh o ixpa kaxyw na pre inhmē pa mōn pøj. Anē.

²⁰ Nhũm pre ã Jejus Tirtũm kapër ã kagà htũm kamã mē kãm amnhĩ jarênh anē. Hãmri nē akupÿm mē kãm kagàja gõ nē ho mē ahkre kaxyw akupÿm nhÿ nhũm mē piitã omunh pē mar o hkrĩ. ²¹ Hãmri nhũm mē kãm tanhmã amnhĩ jarênh to nē mē kãm:

—E ra Ijais kot ã ixkukamã ijarënh anhÿr xà hkôt na pa mẽ awÿr wrÿ mẽ mẽ anoo mã ã amnhÿ nhÿpêx anhÿr o hkrax. Anë.

²² Hãmri nhÿm mẽ amnhÿ jaêr pê ã kot amnhÿ jarënh anhÿr ã kuma. Nê tee ri kuma mẽ axpên pumunh pê hamaxpêr o hkrÿ. Jejus mẽ kurom àhpumunh tÿx nê kapêr mex tã nhÿm mẽ ãm kêp amnhÿ kwÿ pix ã hkamnhÿx kãm hihtÿx nê. Hãmri mẽ axpên mã:

—Tk. Kwa kêp Juje hkra pix kênã koja we ri ã amnhÿ jarënh anë. Anë.

²³ Hãmri nhÿm amnhÿ tã mẽ kuma nê mẽ kãm:

—Nà na ka mẽ ixte amnhÿ jarënh ma nom ixkôt ajamaxpêr kêt nê. Jakamã axpên mã ijarënh o: “Tk. Kêp mẽ pahkaprÿ xwÿnh ro nhÿx jar mẽ panhõ krÿ kamã aa mẽ pahte mẽmoj pumunh kêt kwÿ tanhmã mẽ pamã hipêx to pu mẽ hã omu. Te ra kot krÿ pê Kapanaũ kamã mẽ kãm mẽmoj kwÿ ho anhÿrta pyrãk. Pu mẽ omu nê hkôt pajamaxpêr kurê kumrêx.” Anhÿr o ri axpên mã ijarê. ²⁴ Koja nhãm krÿ hõ kamã mẽhõ kêp Tÿrtũm kapêr jarënh xwÿnh ã amnhÿ jarê ka mẽ harënh ma nê amã ma hwÿr amrar nê mar prãm nê. No kêt jar mẽ panhõ krÿ kamã ixpê mẽ anhÿõ hã ã amnhÿ jarënh anë ka mẽ amã inhmar prãm kêt nê.

²⁵ —Kwa mẽ inhma. Amnepêm kormã finat Eris htÿr ri na pre mẽ hã na wrÿk kêt ry rax nê. Jao hã amgrã axkrunêpxi mẽ hkôt mytwrÿy pê 6. Nhÿm mẽ õ hkêt nê pa. Ra mẽ kêp mẽmoj grã pa mẽ hapêx nhÿm mẽ kãm prãm tÿx kumrêx nê pa. Nhÿm mẽ kêp mẽ mjên tyk xwÿnhjaja kãm prãm xà hirot o pa. ²⁶ Tã nom Tÿrtũm mẽ ho mex kaxyw mẽ hwÿr Eris mẽnh kêt nê. Erisja mẽ urãk nê kêp Ijaew tã nhÿm Tÿrtũm kot mẽ ho ajuta kaxyw mẽ hwÿr mẽnh kêt nê. Mẽ kot amnhÿ kaxyw Tÿrtũm kôt hamaxpêr kêt jakamã nhÿm mẽ hwÿr mẽnh kêt nê. Axtem Ijaew kêt xwÿnhjê hõ hwÿr na pre kumê. Nhãm Sitõ kamã krÿ pê Sarep kamã mjên htyk xwÿnhhta wÿr. Tokyx kot tanhmã ho mex to kaxyw. Jakamã nhÿm ma hwÿr mẽ nê tanhmã kãm kapêr to nhÿm kuma mẽ amnhÿ kaxyw Tÿrtũm kôt hamaxpêr kurê kumrêx.

²⁷ —Nê finat Eriasti haxwÿja. Eris pyrã nê kêp Tÿrtũm nhÿ hã kapêr o pa xwÿnh tã amnhÿ kwÿ pê Ijaew tanhmã mẽ ho ajuta hto hkêt nê. Na prem ohtõ nê hkã nhy mẽ hkro xàpêr o pa. Jao ra omnuj tÿx nê. Tã nhÿm Tÿrtũm kot akupÿm mẽ ho mex kaxyw mẽ hwÿr Eriasti mẽnh kêt nê. Amnhÿ kaxyw mẽ kot hkôt hamaxpêrê hã. ãm Sir nhõ xwÿnh Namãja pix na pre Tÿrtũm Eriasti mã anë nhÿm akupÿm ho mex. Kêp Ijaew kêt tã nhÿm akupÿm ho mex. Tã ja pyrã nê na pa ãm mẽ kot amnhÿ kaxyw ixkôt hamaxpêr pix xwÿnhjê mã tanhmã amnhÿ nhÿpêx to ho ri ixpa. No mẽ ate amnhÿ kaxyw ixkôt ajamaxpêr kêt xwÿnhjê mã tanhmã ri amnhÿ nhÿpêx to hkêt nê. Anë.

Nhÿm pre ã Jejus mẽ kãm amnhÿ jarënh anë.

²⁸ Hãmri nhÿm mẽ kuma nê kamã gryk tÿx nê axpên mã hã amÿnê mẽ axpên mã:

—Tk. Kwa pu mẽ ixkre nê kator nê ma o tẽ nê kupÿ ri. Anë.

²⁹ Hãmri mẽ kaxyw kànhmã kuhê hpa mẽ hwÿr hprôt nê unê. Mẽ kot ma o htêm nê hixêt prêk jatur xà hã hkujaêk nhÿm ahpãr mã tẽn htêm nê htyk kaxyw. Mẽ õ krÿja hixêt prêk nhÿmõk ã na pre. Jakamã nhÿm prem unê mẽ hatur xàta wÿr o tẽ. ³⁰ Tã nom nhÿm tanhmã amnhÿ nhÿpêx to mẽ mẽ kêp akunok nê hpãnhã nhãm ma tẽ nhÿm mẽ tee ri hapêr nom nhÿri omunh kêt nê.

Jejus kot mẽhõ nê mẽkarõmnuti kator ã harënh

Makre 1.21-28

³¹ Tã nhÿm Jejus ma akupÿm Garirej kamã krÿ pê Kapanaũ hwÿr mẽ. Nhÿm mẽ õ arÿgromnu pê sap kato nhÿm ma mẽ kot Tÿrtũm kapêr o mẽ ahkre xà hã ixkre hwÿr tẽ nê mẽ ahkre ho nhÿ. ³² Hãmri nhÿm mẽ kot mar o hkrÿ xwÿnhjaja kuma nê kãm mar prãm nê. Nê axpên mã:

—Hêxta waa nê. ãm hãmri na ã mẽ pamã kapêr anë. Àhpumunh tÿx xà hkôt na hte ãm hãmri mẽ pamã awjarê. Anë.

³³ Nhÿm mẽhõ myja mẽ ÿhkõ hã haxwÿja mar o nhÿ. Mẽkarõmnuti na pre ra hwÿr axà nhÿm ÿ hã tanhmã amnhÿ tomnuj to ho pa. Hãmri mẽ mẽ ÿhkõ hã Jejus mar o nhÿ nê ra àmra kamã tanhmã kãm kapêr to. Nom nhÿm tãm kãm kapêr kêt ãm kamã mẽkarõmnutija kãm kapêr. ³⁴ Nê kãm:

—Pa? Jejus pê Najare nhõ xwÿnh? Nà ate mẽ ixto ajapêx par kaxyw na ka mẽ ixwÿr mẽ. Ra ixte apumunh mex kênã. Apê Tÿrtũm kot mẽ ixwÿr amênh xwÿnh maatita na ka. Jakamã kwa tanhmã kot kaj mẽ ixto? Mo kaxyw na ka pre mẽ ixwÿr mẽ? Anë.

³⁵ Hãmri nhÿm kuma nê mẽkarõmnuti kot kãm ã kapêr anhÿr ã omunh kurê kumrêx. Jakamã kutã kãm kapêr nê kãm:

—Tk. Kwa anhÿkrê mẽ kêp akato. Anë.

Hãmri nhÿm kuma nê myta o pika kura nê kêp kato nê ma tẽ. ãm ho pika kuranh pix nhÿm nõ. Hãmri mẽ akupÿm kànhmã nhÿ nê akupÿm mex. ³⁶ Hãmri nhÿm mẽ piitã omu mẽ mẽkamã no puma nê. Hãmri mẽ axpên mã:

—Kokÿÿ. Na hte Jejus amnhÿ krã hkôt àhpumunh tÿx xà hkôt mẽkarõmnuti mã kapêr mẽ mẽ hano nhÿm htem kuma mẽ mẽ kêp hapõx kurê kumrêx. Anë.

³⁷ Hãmri nhÿm mẽ mẽõ pika kamã piitã ri axpên mã harënh o pa.

Jejus kot Simãw Pêtre xupãnhgêx o mex ã harënh

Matêwre 8.14-15; Makre 1.29-31

³⁸ Tã nhÿm Jejus Tÿrtũm kapêr o mẽ ahkre xàja rÿm kato nê ma Simãw Pêtre nhõrkwÿ hwÿr tẽ. Nê mẽ hwÿr axà nhÿm Simãw Pêtre omu mẽ kãm upãnhgêx tanhmã kute hã harê mẽ kãm:

—Kwa Pahihti. Tẽ nê inhãm ixupãnhgêx pumu. Na hkã kagro htÿx mẽ amnhÿ to àpêr o nõ. Kwa tẽn inhãm omu. Anë.

Hãmri nhÿm kãm:

—Tõe. Nà kot paj amã omu. Anë.

³⁹ Hãmri mẽ hwÿr tẽn kuri xa mẽ kãm:

—Pa? E kwa akã hakry. Anë.

Hämri nhũm kuma nê hkà hakry nê akupým hihtýx kurê kumrêx. Hämri nê kànhmã nhỹ nê mẽ kãm mẽõ hã àpênh o ri mra.

Jejus kot mẽ ho ohtô nê mẽ ho mex ã harênh

Matêwre 8.16-17; Makre 1.32-34

⁴⁰ Tã nhũm ra amýkry htýx mẽ nhũm mẽ Jejus wýr ahpýnhã ri mẽ à xwýnhjê ho mra. Nhũm amnhĩ wýr mẽ omu hãmri nê mẽ piitã ri mẽ hã ãhkra jaxwý nê akupým mẽ ho mex pa. ⁴¹ Nhũm ra mẽkarõmnuti mẽ hkwyjê hwýr agjê nhũm mẽ kurũm mẽ hano nhũm mẽ tee ri amnhĩ tã omu nê mẽ kêp hapõx kurê kumrêx. Hämri nê mẽ kêp hapõx kaxyw nê àmra kamã kãm kapêr nê kãm:

—Kwa tanhmã kot pa wem amnhĩ nê ato? Hêxta waa nê. Apê Tirtũm Kra hã axàhpumunh týx kênã.

Anhýr o kãm kapêr. Àm hãmri na prem ã harênh anê. Kêp Tirtũm kot mẽ pakaxyw àm xwýnh kênã. No nhũm Ijaew nhõ pahijaja kot mẽ kapêr mar nê kêp mẽkarõmnuti hkwy hã hkamnhĩx pymaj nhũm Jejus amnhĩ nê mẽ kãm kapêr nê mẽ kãm:

—Kwa mẽ ri ã ijarênh anhýr kêt nê.

Anhýr o mẽ kãm kapêr hãmri nê mẽ hano nhũm mẽ hapõj nê ma mra.

Mẽmo kaxyw Tirtũm kot mẽ pahwýr Jejus mẽnh ã harênh

Makre 1.35-39

⁴² Tã nhũm apkati nê myt kator grire nhũm Jejus kot Tirtũm mã amnhĩ jarênh kaxyw kànhmã nhỹ nê kato nê ma nhỹhým kapõt mã tẽ. Hãmri nhũm krĩ nhõ xwýnhjaja hkrã hapõj nê tee ri hapêr nê ma hkõt hpri jakop o mõ. Nê nhýri hwýr kato nê omu hãmri nê ma nhỹhým mõr nê kurê nê kãm:

—Kwa Jejus. Kêr ka tokyx ma nhỹhým amõr kêt nê. Kripêp mẽ ixkõt axkamẽ mãn. Anê.

⁴³ Hãmri nhũm mẽ kuma nê amnhĩ tã mẽ kãm:

—Nà kot paj kripêp mẽ akõt ixpikamênh kêt nê. Kot paj ma krĩ piitã hkõt ri Tirtũm kapêr o mẽ ahkre ho ri mẽ hkõt ixpa. Tirtũm kot tanhmã mẽ ho hkra hto hã harênhja kot paj mẽ hkõt ri mẽ kãm harênh o ri ixpa. Ja kaxyw na pre Tirtũm mẽ awýr inhmẽ. Anê.

⁴⁴ Nhũm pre ã mẽ kãm amnhĩ jarênh anê. Hãmri nê mẽ kêp kato nê ma Ijaew nhõ pika piitã hkõt Tirtũm kapêr o mẽ ahkre ho ri pa. Ijaew nhõ Tirtũm kapêr o mẽ ahkre xà hã ixkre kamã mẽ piitã ho mẽ ahkre ho ri pa.

Jejus kot amnhĩ kõt mẽ hkwyjê hwýr ã harênh

Matêwre 4.18-22; Makre 1.16-20

5 Tã nhũm Jejus ma gô rax pê Jenějare hwýr mõ. Hãmri nê hwýr pøj nê gô mýri Tirtũm kapêr o mẽ ahkre ho xa nhũm mẽ ohtô nê pu hã mar o kuhê. Nê kot hpri hã mar nê hkõt omunh kaxyw hã xpênh nhĩgãnh o kuhê. ² Hãmri nhũm tee ri amnhĩ tã mẽ omu nê amnhĩ pu hã hakêx nê rĩt nê gõx kãm pàr kaprý hamêxkrut nê jêtja wa omu. Nhũm õ dõn wa gõx kãm kryhti kuhõnh o xa. Nhũm pàr hamẽ hkaprý

nê ajêt nhũm Jejus omu. ³ Hãmri nê hwýr tẽ nê hõm axà nê õ dõn pê Simãwja mã anê nhũm hkõt axà nê kii mẽ kêp pàrja amým kunhõ nhũm ajêt. Hãmri nhũm pàr kre rũm amým mẽ ahkre ho nhỹ nhũm mẽ piitã omu nê mar mex o kuhê.

⁴ Tã nhũm mẽ ahkre hpa nê Simãw mã kãm:

—E gô xupým wýr anhõ pàr o axkamẽ nê axte anhõ kryhti mẽ nê ho amnhĩm tep kwýmnê. Anê.

⁵ Hãmri nhũm tee ri kuma nê kãm:

—Kwa na pa mẽ ra kamàt kãm tee rênh o apkati nê ho hõmnênh kêt tã ka ri inhmã anê. Nom kot paj amar xà hkõt kop kumẽ. Anê.

⁶ Hãmri nê upým wýr pàr o axkamẽ nê htõ Andre mẽ wa axte kryhti mẽ. Nê àm mẽnh tipxi htã ho tep pynênh rax kumrêx. Jakamã nhũm kryhtija ra pikaxõnh kaxyw. ⁷ Hãmri nhũm wa tee ri ho anê nê amnhĩ wýr pàr õ ho mrar xwýnhta wa kãm akir. Jepetew kra Juãw mẽ Xiakreja wa nhũm wa amnhĩ wýr wa kãm akir nhũm wa hwýr pàr õ ho tẽ hãmri nê mẽ kryhti hã hije nê pàr wýr ho api. Hãmri nê pàrta hamẽ tep o ho nýt pa nê hamẽ ho hipu mex nê. Jao nhỹx gõnh mã wa axà. ⁸ Hãmri nhũm mẽ amnhĩ jaêr pê tep xohtõ raxta pumu nê kamã no puma nê. Hãmri nhũm Simãwja Jejus kutã hkõn krã ho tẽm nê hipõ nê nhỹ nê hã hpijaàm kamã kãm kapêr nê kãm:

—Kwa Pahihti. Kii tamũ axkamẽ. Akĩnhã ixte amnhĩ tomnuj týx xwýnh na pa. Anê.

Hãmri nhũm kuma nê àm kuma nê kãm:

—Kwa nà tee ri amnhĩ kukamã ajamaxpêr kêt nê. Kot kaj jarãhã hpãnhã tãm amnhĩ nhĩpêx o apa. Na ka ra tep pynênh rũnh o apa. Tã kot kaj ja kaga nê hpãnhã ma ri mẽ hkõt Tirtũm kapêr o mẽ ahkre ho ri apa. Koja mẽ ohtô nê ama nê Tirtũm kõt amnhĩ xunhwý nê hkõt amnhĩ nhĩpêx o pa. Jakamã kot kaj te ate tep pynênh rũnh nê Tirtũm mã õr pyrãk o amnhĩ nhĩpêx o apa. Anê.

Nhũm pre ã Jejus Simãw mã kapêr anê. ¹¹ Hãmri nhũm mẽ gô jakàx ã pàr janhõr týx nê kamã hikukrêx piitã hkaga hpa nê ma Jejus kõt pa ho pa.

Jejus kot hkà nhy kro týx xwýnh o mex ã harênh

Matêwre 8.1-4; Makre 1.40-45

¹² Tã nhũm Jejus ma krĩ hõ hwýr mõ. Hãmri nhũm mẽhõ my hkà nhy hkro htýx xwýnhja omu nê hwýr tẽ nê hã hpijaàm kaxyw kutã hkõnkrã ho nhỹ nê kãm:

—Pa Pahihti. E ot pa awýr amnhĩ to tẽ. Kwa akupým ate mẽ ixto mex kaxyw axàhpumunh týx jakamã kot ka akupým amã ixto mex prãm nê mãmri akupým ixto mex. Anê.

¹³ Hãmri nhũm kuma nê hkà punuti hã ãhkra xi. Amnhĩ kamã kahak kêt nê hã ãhkra xi nê kãm:

—Nà kot paj ato mex. E akupým akà mex kurê kumrêx.

Anhýrja kõt hãmri nhũm hkàja akupým mex pa.

¹⁴ Hãmri nhũm Jejus kãm:

—E kêr ka amnhĩ tã akwyjê mã tanhmã ijarênh to hkêt rãhã ma patre hwýr tẽ kê akupým akà mex ã apumu. Hãmri ka amnepêp Mojes kot mẽ ate akupým

amex ä Tirtüm mã tanhmã amnhĩ nhĩpêx to hã karôta ka kãm ho anê. Kê mê mê piitã akupým akà mex ä apumu. Anê.

Hãmri nhũm kuma nê kãm:

—Tôe. Nà kot paj anê. Anê.

Hãmri nê ma hwÿr htêm kurê kumrêx.

¹⁵ Hãmri nhũm mê piitã axpên mã Jejus jarênh o ri hprôt nhũm mê kot kapêr mar kaxyw ma hwÿr mra. Nê mê à xwÿnhjaja nhũm kot mê ho mex kaxyw nhũm mê hwÿr amnhĩ to mra. ¹⁶ Jakamã nhũm pre hte Jejus tôhã mê kêp hapôj nê ahte ma kapôt ä Tirtüm mã amnhĩ jarênh kaxyw mra. Nê kãm amnhĩ jarênh pa hãmri nê ma akupým mê hwÿr mra.

Jejus kot ĩ kamã htyk xwÿnh o mex ä harênh

Matêwre 9.1-8; Makre 2.1-12; Juãw 10.37-38

¹⁷ Tã nhũm Jejus ma Tirtüm kapêr o Ijaew jahkre ho pa. Jakamã nhÿri mêhõ nhõrkwÿ kamã ho mê ahkre ho xa nhũm Parijew nhõ xwÿnhjê mê Tirtüm kapêr tũm o mê ahkre ho mê pa xwÿnhjaja kot mar kaxyw ma hwÿr mra. Na pre ra Garirej rũm mê hkwÿjaja ma hwÿr mra. Nê pika pê Jutej rũm mê hkwÿ haxwÿja ma hwÿr mra. Nê krĩ pê Jerujarê rũm. Ä na prem ohtô nê krĩ piitã kurũm kot mar kaxyw hwÿr akuprõ nhũm mê ahkre anê. Nê Tirtüm kot ho àhpumunh tÿx jakamã nhũm ÿ hã akupým mê à xwÿnhjê ho mex. ¹⁸ Hãmri nhũm hk-wÿjaja ĩ kamã htyk xwÿnh mÿ nê Jejus wÿr o tẽ. Nõr xà kamã nõr rãhã nhũm mê hã hije nê hwÿr o tẽ. Hãmri nê tee ri kot hwÿr ho àr kaxyw ri mê hkupu ho pa. ¹⁹ Nom nhũm mê ra ixkre ho nyt rax jakamã nhũm mê tee ri amnhĩ kukamã ho ukapi ho ri pa. Hãmri nê ra hamaxpêr nê ixkre nhĩmõk po hwÿr ho api nê ixkre nhĩmõk kwÿ grã nê hkôt ĩ kamã htyk xwÿnhhta jaxã. Nõr xà kamã nõr rãhã Jejus wÿr haxà nê mê hipõk ri ho wÿr nê kutã kuxi nhũm nõ. ²⁰ Hãmri nhũm Jejus amnhĩ tã mê kot kaxyw kãm hamaxpêr tÿx ä mê omunh mex nê. Hãmri nê ĩ kamã htyk xwÿnhhta mã kapêr nê kãm:

—Pa? E na pa ra anê tanhmã ate amnhĩ tomnuj to ho apaja o ijapêx pa. Kot paj axte kãm ijamaxpêr kêt nê. Anê.

²¹ Hãmri nhũm Parijew nhõ xwÿnhjê mê Tirtüm kapêr tũm o mê ahkre ho mê pa xwÿnhjaja tee ri kot ä kãm kapêr anhÿrja ä kuma nê axpên mã:

—Tk. Kwa kêp Tirtüm kêt tã te ri kot amnhĩ nhĩpêx pyrãk o ri mê nê mê kot amnhĩ tomnuj o hapêx ä amnhĩ jarênh o kuhê. Tirtüm pix na kot mê nê mê kot amnhĩ tomnuj o hapêx xwÿnh kênã. Anê.

²² Nhũm mê ä axpên mã Jejus jarênh anê nhũm amnhĩ tã mê kuma nê mê hamaxpêr kôt mê omunh mex nê. Jakamã mê kãm:

—Kwa mê ä ajamaxpêr anhÿr kêt nê. ²³ Ixte mê nê mê kot amnhĩ tomnuj o ijapêx par ä amnhĩ jarênh tã mê ate ja kôt ixpumunh kêt jakamã na ka mê ixkôt ajamaxpêr kêt nê. Nom kot paj mê anoo mã akupým ĩ kamã htyk xwÿnhhta o mex ka mê apiitã ja hã ixpumu hãmri nê ixkôt ajamaxpêr kurê kumrêx. ²⁴ Ixpê Tirtüm kot mê awÿr inhmênh xwÿnhhta na pa. Ixte mê anê mê ate amnhĩ tomnuj rênh kaxyw na pre mê awÿr inhmê

pa mê awÿr wÿr. Tã mê ate ja kôt ixpumunh kaxyw kot paj mê anoo mã myja o mex. Anê.

Hãmri nê hpãnhã ĩ kamã htyk xwÿnhja mã kapêr nê kãm:

—E kãnhmã xa nê anõr xà py nê ma akupým anhõrk-wÿ hwÿr tẽ. Anê.

²⁵ Nhũm kãnhmã ãm kurê kumrêx. Hãmri nê amnhĩ pumu nê hkĩnh tÿx nê nõr xà py nê mê noo mã kato nê akupým õrkwÿ hwÿr ma Tirtüm mã mex o mex ä harênh o tẽ. ²⁶ Hãmri nhũm mê amnhĩ jaêr pê omu. Nê no hapõx kaxyw hkôt omunh o kuhê nê kamã no py-ma nê. Nê tee ri omu hãmri nê axpên mã:

—Kokÿÿ. Aa mê pahte ä mêhõ kot amnhĩ nhĩpêx anhÿr ä omunh kêt tã na pu mê jarãhã ja pumu. Anê.

Hãmri nê Tirtüm mã mex o mex ä harênh o kuhê.

Jejus kot amnhĩ kôt Rewi hwÿr ä harênh

Matêwre 9.9-13; Makre 2.15-17; Rukre 15.1-2

²⁷ Tã nhũm Jejus ma hkôt mê pa ho mê pa xwÿnhjê mērohã ma nhÿhÿm mō. Hãmri nê nhÿri Rewi pumu. Rewi nhĩxi hõ pê na Matêwre. Rõm kãm mê õ pahihiti mã amnhĩ kwÿjê pê kàxpore hkwÿ jamÿnh xwÿnh na pre. Jakamã nhũm ujamÿnh xà hã ixkre kamã mê kêp hkwÿ jamÿnh o nhÿ nhũm Jejus mê hkôt mê pa o mê pa xwÿnhjaja hãnh mra. Hãmri nhũm Jejus àpênh ä omu nê amnhĩ kôt kuwÿ nê kãm:

—Pa? E kwa axapênhhta kaga nê hpãnhã amnê mê ixkôt mãn tẽ. Nê ixkôt mãn ri apa ho apa. Anê.

²⁸ Hãmri nhũm kuma nê àpênh kaga hpa nê ma hkôt mō nê hkôt pa ho pa.

²⁹ Hãmri nhũm mēmo arĩgro hã nhũm Rewi nhõ mê apkur xà hã mēõ rax nê. Jakamã nhũm amnhĩ nhõrkwÿ hwÿr hkrãmnhwÿjaja nê Jejus mê hkôt mê pa ho mê pa xwÿnhjê hwÿ. Mē kot kutã apkur kaxyw nhũm amnhĩ kôt mê kuwÿ nhũm mê ma hkôt mra nê õrkwÿ hwÿr agjê nê apkur o hkrĩ. Nê mê kêp Rõm nhõ pahĩ mã mê kêp kàxpore hkwÿ jamÿnh xwÿnh kwÿjaja nê mê ohtô nê hwÿr akuprõ nê axpên kutã apkur o hkrĩ. ³⁰ Hãmri nhũm Parijew nhõ xwÿnhjê mê Tirtüm kapêr tũm o mê ahkre ho mê pa xwÿnh kwÿjaja mra nê mê apkur ä mê omu nê tee ri mê hkaêx ä Jejus pumu hãmri nê Jejus kôt mê pa ho mê pa xwÿnhjê hwÿr agjê nê hã mê kãm akir nê mê kãm:

—Kwa mê kot amnhĩ tomnuj ho mê pa xwÿnhjê kutã mê apkur kêt tã ka mê apytàr xwÿnhja mê apimràatã axtem nê mê kutã axàpkur o akrĩ. Kwa mê ate amnhĩ to mex ronhÿx ka mê kutã axàpkur kêt nê. Anê.

³¹ Hãmri nhũm Jejus amnhĩ tã mê kapêr ä mê kuma nê mê kãm:

—Tk. Nà ixte tãm mê unhwÿr kaxyw na pa mê kutã ixàpkur o nhÿ. Xà na hte tõtõja mê mex xwÿnhjê hwÿr mra nê mê hkane? Nà ãm mê à xwÿnhjê pix wÿr na htem mra. Ra mê ate ja pumunh mex kênã. Ja pyrã nê na pa pre mê kot amnhĩ to mex xwÿnhjê hwÿr ixwÿr kêt nê. Mē kot amnhĩ tomnuj xwÿnhjê pix wÿr na pa pre wÿr. Ixte tãm mê unhwÿr kaxyw na pa pre mê hwÿr wÿr nê ä jajê kutã ixàpkur o inhÿr anê. ³² ãm mê kot amnhĩ tomnuj xwÿnhjê hwÿr na pa pre wÿr nê mê

kamã ixukapří ho ri ixpa. Mě kot amnhí tomnuj mã ur-er nê hpãnhã tãm amnhí nhípêx o pa kaxyw na pa pre mẽ hwÿr wrÿ. Tã ka mẽ atÿx ã ri mẽ ixto akapêr anê. Anê.

Mě hpãmjaja kot amnhí nhípêx gryk ã Jejus kaga hã mẽ harênh

Matêwre 9.14-17; Makre 2.18-22

³³ Tã nhũm Ijaew kwÿjaja Jejus wÿr mra nê kãm:

—Pa? E ot pa mẽ awÿr mra. Kwa apří hã mẽ inhmã mẽmoj jarê. Na hte Parijew nhõ xwÿnhjê mẽ Juãw kôt mẽ pa xwÿnhjaja tõiã Tirtũm mã amnhí jarênh kaxyw nê apkur kêt rãhã kãm amnhí jarê. No akôt mẽ pa ho mẽ pa xwÿnhjaja na htem àmnhix apkur o pa kamã kãm amnhí jarê. Kwa mo na htem mẽ urak nê tõiã apkur kêt ri kãm amnhí jarênh hkêt nê? Anê.

³⁴ Hãmri nhũm mẽ kuma nê mẽ kãm:

—Tk. Nã mo kaxyw koja mẽ apkur kêt rãhã kãm amnhí jarê? Mě hkaprí hkêt kênã. Mě kot ixkôt pa ho pa hã amnhí pumunh jakamã hkĩnh nê pa. Kormã ixte mẽ kamã ixpa kênã kot kêt mẽ Tirtũm mã amnhí jarênh kaxyw nê apkur kêt rãhã kãm amnhí jarê. Xà na htem hkrãmnhwÿ hã hkĩnh kaxyw hã akuprõ nê hkaprí nê apkur kêt nê mÿr o hkrí? Na htem hã akuprõ nê hkĩnh nê hã apkur rũnh nê. Ja pyrã nê na hte ixkôt mẽ pa ho mẽ pa xwÿnhjaja ixkôt kormã àmnhix ri hkĩnh nê apkati mẽ apkur o pa. ³⁵ Nom koja mẽ kãm ixkurê xwÿnhjaja nhÿrmã tanhmã ixto hãmri nhũm mẽ rí kormã ixtã hkaprí htÿx kãm apkur kêt ri tanhmã amnhí nhípêx to. Anê.

³⁶ Nhũm pre ã Jejus mẽ kãm hkôt ri mẽ pa ho mẽ pa xwÿnhjê jarênh anê hãmri nê mẽ kãm:

—Nã mẽ kot amnhí tomnuj xwÿnhjaja mẽ kot amnhí nhípêx tũm o amnhí pyrãk jakamã na htem mẽ kot amnhí nhípêx nyw kaga. ³⁷ Ixte amnhí nhípêx nywja te kot mẽ ate amnhí nhípêx tũm pyrãk kêt jakamã ka htem inhma nê ãm inhma. Kwa mẽ ixkapêr ma nê mẽ ate amnhí nhípêx tũm gryk ã ixkaga hkêt nê. Anê.

Jejus kêp arĩgromnu hpãm ã harênh

Matêwre 12.1-8; Makre 2.23-28

6 Tã nhũm Ijaew nhõ arĩgromnu pê sapja axte kato. Hãmri nhũm Jejus mẽ hkôt ri mẽ pa ho mẽ pa xwÿnhjê mẽ ma mẽ hpur kôt ri nhÿhÿm ri pa. Hãmri nhũm hkôt mẽ pa ho mẽ pa xwÿnhjaja ra kãm prãm nê mra hãmri nê prãm xaj mẽmo hy te kot harõj pyrãk xwÿnhhta kwÿ rê nê kugrã nê ma Jejus kôt hkanhar o mõi. Ijaew kot amnhí nhípêx xà hkôt. ² Hãmri nhũm Parijew nhõ xwÿnhjaja kãm mẽmoj tã Jejus o kapêr prãm jakamã ã mẽ kot amnhí nhípêx anhÿr ã mẽ omu nê mẽ hã Jejus kukjêr kurê kumrêx nê kãm:

—Kwa Tirtũm kapêr tũm kot mẽ panhõ arĩgromnu hã mẽ pahte mẽ pahpur kãm mẽmoj nhíkênh nê mẽ pahkurê htã nhũm ri akôt mẽ pa ho mẽ pa xwÿnhjaja axtem nê mẽmo hyta kwÿ rê nê akôt hkanhar o mõi. Kwa mẽ kãm anê kê mẽ ã amnhí nhípêx anhÿr kêt nê. Na htem arĩgromnu hã ã amnhí nhípêx anhÿr kêt nê. Anê.

³ Hãmri nhũm Jejus mẽ kuma nê hprí hã mẽ kãm Tirtũm kapêr tũm jarê nê mẽ kãm:

—Kwa xà na ka mẽ Tirtũm kapêr ã kagã htũm kamã pahi Tawi kot tanhmã amnhí nhípêx tota kamã harênh nê mar kêt nê? Na pre Tawija hkôt ri mẽ pa xwÿnhjê mẽ nhũm mẽ prãm xaj Tirtũm mã amnhí jarênh xà hã ixkre wÿr agjê nhũm patre maatija mẽ kãm prãm tÿx ã mẽ omu nê mẽ kãm mẽmoj gõi. Mě kot Tirtũm noo mã pãwti jaxwÿr xwÿnhhta nhũm mẽ kãm kugõi nhũm mẽ kuku. Tirtũm kapêr ã kagã htũm kot ja nê mẽ kurê htã nhũm mẽ kãm prãm tÿx ã mẽ omu nê mẽ kamã ukaprí xaj mẽ kãm kugõi. Patre pix kot ja kur kaxyw tã nhũm mẽ kãm kugõi nhũm mẽ kuku. Tã nhũm Tirtũm ja hã mẽ omu nhũm ja kêp omnuj kêt nê. Kot mẽ kamã ukaprí nê mẽ kãm õr nhũm mẽ hã omu nhũm ja kãm mex nê. ⁵ Tã pa na pre Tirtũm mẽ akaxyw ixãm nê mẽ awÿr inhmênh jakamã papxipix na pa hte arĩgromnu hã tanhmã mẽ kot amnhí nhípêx to hã mẽ kãm karõ ho ri ixpa. Ixpê arĩgromnu hpãm na pa. Anê.

Jejus kot ïhkra grã xwÿnh o mex ã harênh

Matêwre 12.9-14; Makre 3.1-6

⁶ Tã nhũm Ijaew nhõ arĩgromnu pê sapja axte kato. Hãmri nhũm Jejus Tirtũm kapêr o mẽ ahkre xà hã ixkre hwÿr tẽ nê axà nê Tirtũm kapêr o mẽ ahkre ho nhÿ. Nhũm mẽhõ myja upõk rũm ïhkra grã xwÿnhja mẽ ïhkõ hã mar o nhÿ. ⁷ Nhũm Parijew nhõ xwÿnhjê mẽ Tirtũm kapêr tũm o mẽ ahkre ho mẽ pa xwÿnhjaja mẽ kãm mẽ hkrãhtũmjê mã Jejus o kapêr prãm xaj htãnopxar o kuhê. Nê ïhkra grã xwÿnhhta pumu nê hã axpên mã:

—Kwa pu mẽ jar pakuhê nê Jejus tanhmã kot amnhí nhípêx to hã omu. Xà koja jarãhã mũjti ho mex nã? Jarãhã arĩgromnu kênã kot kêt kãm ïhkra ho mex. Koja anê nê Tirtũm kapêr kwÿm ri amnhí nhípêx. E pu mẽ kop pakuhê nê hã omu. Anê.

⁸ Nhũm Jejus ra kot mẽ hamaxpêr kôt mẽ omunh mex jakamã amnhí wÿr myta mã hpa ho apê nê kãm: —Pa? E kãnhmã xa nê amnê ixwÿr tẽ. Anê.

Hãmri nhũm kuma nê kãnhmã xa nê hwÿr tẽ. ⁹ Hãmri nhũm Jejus amnhí pu hã ri mẽ ho hakêx nê mẽ kot mar o hkrí xwÿnhjê pumu nê mẽ kãm:

—E mẽ inhmã mẽmoj jarê. Tanhmã na htem arĩgromnu hã axpên nhípêx to ho pa wehe? Xà kot ka arĩgromnu hã axà htÿx nê nõ hãmri nê amnhí mex prãm xaj ma mẽhõ hwÿr amnhí to tẽ. Hãmri nhũm ãm apumu nê apkatim arĩgro mex jamãr pê akane hkêt ka ty nhũm ja amã mex nê nã? Rÿ nhũm tanhmã atomnuj to nê akupÿm amnhí nê ajano nhũm ja amã mex nê nã? Nã koja ã anhípêx anê nhũm ja amã mex kêt nê. Na ka htem ã amnhí nhípêx anhÿr o apa hkêt nê. E mẽ inhmã mẽmoj jarê. Tanhmã na pre finat Mojesja Tirtũm nhÿ hã mẽ pamã arĩgromnu hã mẽ pahte axpên nhípêx ã karõ hto? Xà kot puj mẽ axpên kãm paxukapří ho papa nã? Kot puj mẽ pamã axpên kurê ho papa? Xà kot puj mẽ hã mẽmoj punuj pê axpên pytà nã? Xà kot puj mẽ hã axpên pytàr pymaj arĩgro mex jamã? E mẽ atõ inhmã ja jarê. Anê.

Nhũm pre ă mẽ hkukjêr anê. ¹⁰ Mẽ hamaxpêr ă mẽ omunh mex pê ă mẽ hkukjêr anhÿr o xa. Nom nhũm arĩ mẽhõ tanhmă kută kăm nê hkêt nê. Ăm akryk mar pê omunh o hkrĩ. Mẽ kot tanhmă kăm nê nhũm ta pănă tanhmă kot mẽ kăm nê pymaj nhũm mẽ tee ri kăm tanhmă nê hprăm nom akryk mar o hkrĩ. Hămri nhũm Jejus tee ri mẽ omu hămri nê myta mă kăm:

—Tk. Mẽ kot tanhmă inhmă kapêr tore hă. E an-hĩkra katăt. Anê.

Hămri nhũm ĩhkra katăt nê akupÿm mex kurê kumrêx. ¹¹ Hămri nhũm mẽ kăm Jejus kurê xwÿnhjaja tee ri ja hă omu nê kamă gryk tÿx nê. Arĩgromnu hă kot ho mex jakamă nhũm mẽ kamă gryk tÿx nê. Nê hă xpên kukjêr o kuhê nê xpên mă:

—Kwa ă kot amnhĩ nhĩpêx anhÿr mÿrapê tanhmă kot puj wem ho? Na ă kapêr anhÿrja o tanhmă mẽ pahto kapêr punuj to. Te mẽ papamjaja mẽ pahte hkĩnhă pahkwÿjê kamă paxukapĩrĩ hkêt pyrăk ă mẽ pajarê. Kojă mẽ pahkwÿjaja kuma hămri nê mẽ pahte amnhĩ nhĩpêx kaga nê amnhĩ kaxyw ăm hkôt pix mă hamaxpêr o pa. Jakamă kwa tanhmă kot puj mẽ ja nê ho? Anê.

Jejus kot amnhĩ kaxyw mẽ ho 12 nê mẽ rênh ă harênh

Matêwre 10.1-4; Makre 3.13-19

¹² Tă nhũm arĩgro hõ hă nhũm Jejus ma kot Tĩrtũm mă amnhĩ jarênh kaxyw ma hixêt prêk wÿr tẽ nê hă api. Hămri nê kăm amnhĩ jarênh o apkati.

¹³ Tă nhũm kwÿhtă nhũm amnhĩ kôt kot ri mẽ o pa xwÿnhjê hwÿ nê amnhĩ kaxyw mẽ ho 12 nê mẽ kurê. Nê mẽ kăm:

—E mẽ kajaja kot paj ma mẽ pahkwÿjê hwÿr mẽ arê ka mẽ ma inhÿ hă Tĩrtũm kapêr o mẽ ahkre ho ri mẽ hkôt apa. Kot kaj mẽ apê inhÿ hă mẽ ahkre ho apa xwÿnh. Anê.

¹⁴ Kot amnhĩ kaxyw mẽ rênh xwÿnhjê nhĩxi na jajaja: Simăw kumrêx na pre kuta nê axte hă hixi mẽ nhũm kêp Pêtre.

Nê Simăw Pêtre hkôt htõ Andreja ta.

Nê hkôt Xiakre hta.

Nê hkôt Juăw ta.

Nê hkôt Firiptija ta.

Nê hkôt Patoromew ta.

¹⁵ Nê hkôt Matêwreja ta.

Nê hkôt Tomasja ta.

Nê hkôt Apew kra axtem Xiakre hõja ta.

Nê hkôt Simăw Jeroxja ta.

¹⁶ Nê hkôt Xiakre hõ hkra Jutja ta.

Nê hkôt Jut Kariot ta.

Jut Kariotja na pre kormă kot mẽ kăm Jejus kurê xwÿnhjê nhĩhkram õr mă. Nhũm kot amnhĩ kukamă omunh mex tă mẽ hkôt amnhĩ kaxyw kuta.

Ă mẽ kot Jejus nhÿ hă mẽ ahkre o pa kaxyw mẽ rênh xwÿnhjê nhĩxi kot anhÿr.

Jejus xapênh ă harênh

Matêwre 4.23-25

¹⁷ Tă nhũm Jejus akupÿm ÿ hă mẽ ahkre ho pa xwÿnhjê mẽ hămri hixêt prêêta kurũm wrÿ nê nhÿri hinur kăm kuhê. Hămri nhũm nhÿhÿnh mẽ kot mar mă xwÿnhjaja hă akuprõ. Kôt mẽ pa ho mẽ pa xwÿnh kwÿjaja nê nhÿhÿnh krĩ hkwy rũm mẽ hkwyjaja. Pika pê Jutej kurũm mẽ hkwyjaja. Nê krĩ pê Jerujarê kurũm mẽ hkwyjaja. Nê gô mÿ ri Xir mẽ Sitõja wa kamă mẽ pa xwÿnh kwÿjaja. Ăm ahpÿnhă ri nhÿhÿnh krĩ hkwy rũm mẽ kot mar mă xwÿnhjaja hă pikuprõnh rax nê. ¹⁸ Mẽ kot kapêr mar nhũm kot akupÿm mẽ ho mex kaxyw nhũm prem ma hwÿr amnhĩ to pa. Mẽ hkwyjaja tanhmă ri ă kute. Nhũm mẽ hkwyjaja mẽkarõmnuti kot mẽ hwÿr gjêx xwÿnhjaja nhũm mẽ piită ma hwÿr amnhĩ to pa. Na prem ra amnhĩ kaxyw kăm hamaxpêr o:

—E pa ma hwÿr tẽ nê ăm hkupênh pix tă akupÿm inhmex japêr. Anê.

Hămri nê ma hwÿr mra nhũm mẽ omu nê Tĩrtũm xăhpumunh tÿx o akupÿm mẽ ho mex pa.

Jejus kot hkôt mẽ pa ho mẽ pa xwÿnhjê jahkre hă harênh

Matêwre 5.1-12

²⁰ Tă nhũm Jejus hkôt mẽ pa ho mẽ pa xwÿnhjê jahkre nê mẽ kăm:

E kot kaj mẽ atõ amnhĩ kaxyw tanhmă inhmă ajamaxpêr to nê ajamaxpêr o: “Nă ixkukrêx rax kêt tă na hte Tĩrtũm ixkôt pa ho pa. Kojă ixkôt pa hkêt pa ixtÿx ri tanhmă amnhĩ nhĩpêx to ho ri ixpa rãhă nê. Tĩrtũmja mex kumrêx o kot mẽ hikukrêx raxta jakrenh par.” Anhÿr o ajamaxpêr. Hămri nhũm Tĩrtũm ă ajamaxpêr anhÿr ă apumu nhũm ja kăm mex nê. Hămri nhũm apê hkra hă ato mex nê atănopxar o akôt pa ka ajamakêtkati nê akĩnh nê axàmnhĩx ri apa.

²¹ Nê kot kaj mẽ atõ amă Tĩrtũm kăm hprăm xă hkôt tanhmă amnhĩ nhĩpêx to ho ri apa hprăm tÿx nê. Nhũm amnhĩ tă apumu nhũm ja kăm mex nê nhũm ato mex nê. Nê tanhmă ato ka hkôt pix mă amnhĩ to mex o ri apa nê ajamakêtkati nê akĩnh nê axàmnhĩx ri apa.

Nê kot kaj mẽ tanhmă amnhĩ tomnuj to. Hămri nê tee ri ja hă amnhĩ pumu nê ajamaxpêr. Nê apijaam nê akapĩrĩ xaj amÿr o nhÿ. Amÿr rax nê. Hămri nhũm Tĩrtũm ja hă apumu nhũm ja kăm mex nê. Jakamă nhũm anê akapĩrĩ hta nê ato mex nê. Ka ajamakêtkati nê akĩnh nê axàmnhĩx ri apa.

²² Nê kwâr mẽ mămri ixtă tanhmă mẽ ato kapêr punuj to nê tanhmă mẽ ato hêx to nê tanhmă ri mẽ atomnuj to ho pa. Kwâr mẽ mămri ă mẽ anhĩpêx anhÿr o pa. Ka mẽ ăm inhmă pix mă ajamaxpêr rãhă ho apa pê ajamakêtkati nê axàmnhĩx ri apa. Kwâr mẽ mămri ă mẽ anhĩpêx anê nê mẽ amex kêt ă mẽ ajarênh o pa. Amnepêm na pre Tĩrtũm nhÿ hă kapêr xwÿnhjaja nhũm prem ă mẽ hipêx anê. Jakamă kojă mẽ urăk nê ă mẽ anhĩpêx anhÿr o pa. Nhũm Tĩrtũm ja

hã mẽ apumu nẽ amnhĩm mẽ amex ã mẽ ajarẽ. Hãmri nẽ nhỹrmã kaxkwa kamã wa inhõ krí kamã mẽ ato mex rax nẽ. Ka mẽ akĩnh nẽ ajamakêtkati nẽ axãmnhĩx ri apa. Jakamã kwãr mẽ mãmri pika jakamã ã ixtã mẽ anhĩpêx anẽ. Anẽ.

Jejus kot arĩ mẽ kot mar xwỳnhjê jahkre hã harẽnh

Xiakre 5.1-5

²⁴ Nhũm Jejus nhãm hkõt mẽ pa ho mẽ pa xwỳnhjê nhĩhkõ hã mẽ kot Tĩrtũm kõt amnhĩ nhĩpêx o pa hkõt xwỳnhjê hwỳr apkjê. Nẽ mẽ omu nẽ tanhmã mẽ kãm kapêr to. Mẽ hikukrêx rũnh xwỳnhjê kumrêx mã kapêr nẽ mẽ kãm:

E kwa mẽ o kora mẽ akukrêx rũnh xwỳnhjaja. Na ka htem ãm akukrêx rũnh pix mã ajamaxpêr o ri apa nẽ gryk ã Tĩrtũm mã ajamaxpêr o apa hkõt nẽ. Jao mẽ amã kapêr mar prãm kêt nẽ. Nẽ ãm akukrêx rũnh mã ajamaxpêr pẽ akĩnh nẽ ri apikunhar o ri apa. Tã kot ka mẽ nhỹrmã ty hãmri nhũm akĩnh xàja apê hapêx.

²⁵ Nẽ mẽ amã Tĩrtũm kõt ri amnhĩ nhĩpêx prãm kêt xwỳnhjaja. Kot kaj mẽ nhỹrmã akapri htyx kãm tee ri amnhĩ to hwỳr kaprý kãm ga. Koja mẽ amar kêt nẽ.

Nẽ mẽ atyx ri mẽ ate tanhmã amnhĩ tomnuj to hkukamã ajamaxpêr nẽ apikunhar pẽ amnhĩ tomnuj o apa xwỳnhjaja. Kot kaj mẽ nhỹrmã ã mẽ ate amnhĩ nhĩpêx anhỹrja mýrapê mẽ kot amnhĩ xà htyx kamã hamak o pa htũm xà hwỳr ma apa. Hãmri nẽ kamã akapri xà amýr rãhã ho ri apa. Jakamã kwa mẽ o kora mẽ amã Tĩrtũm prãm kêt xwỳnhjaja. Kêr ka mẽ ixkapêr ma nẽ axkãm ajamak rom nẽ ri apa.

²⁶ Amnepêm mẽ pakukamã mẽ pa xwỳnhjaja na prem Tĩrtũm kapêr o hkwỳjê jahkre ho pa. Nom axtem nẽ hkwym ri tanhmã mẽ kãm ho hêx to nhũm mẽ kuma nhũm ja mẽ kãm mex nẽ nhũm mẽ amnhĩm mẽ mex ã mẽ harẽ. No ãm mẽ mex kêt. Tã mẽ kajaja. Mẽ kot mẽ urak nẽ axpên mã mẽ amex ã mẽ ajarênh tã Tĩrtũm mã mẽ amex kêt. Jakamã kot kaj mẽ amex kêt nẽ. Anẽ.

Mẽ kãm mẽ pahkurê xwỳnhjê jarênh

Matêwre 5.38-48; Rukre 23.34; mãänên Atre 7.60; Römãn 12.14

²⁷ Hãmri nhũm Jejus hpãnhã mẽ piitã mẽ ahkre nẽ mẽ kãm:

—E mẽ ate inhmar xwỳnhjaja. Kêr ka mẽ kot mẽ atomnuj xwỳnhjaja amnhĩ tã tanhmã mẽ ho hkõt nẽ. ãm mẽ ho mex pix o ri apa hkukamã mãn ajamaxpêr.

²⁸ —Nẽ mẽ kot mẽ ato kapêr punuj xwỳnhjaja. Kêr ka mẽ amnhĩ xwar amnhĩ tã tanhmã mẽ ho akapêr punuj to hkõt nẽ. ãm tãm mẽ kãm akapêr pẽ mẽ kãm akapêr mex o ri apa. Nẽ mẽ kot tanhmã ri mẽ ato ho pa xwỳnhjaja ka mẽ ho mex pix o ri apa. Nẽ mẽ ho Tĩrtũm wýr pix kukamã mãn ajamaxpêr.

²⁹ —Nẽ koja mẽhõ anhĩnep akura ka ãm omu nẽ tanhmã amnhĩ tã ho hkõt nẽ. Te ate kãm ihkjê pẽr nhũm kot ihkjê kamã akuranh pyrak o amnhĩ nhĩpêx nhũm ja amã mex nẽ. No kêr ka mẽ amnhĩ tã tanhmã mẽ ho hkõt nẽ.

—Nẽ koja mẽhõ apê anhĩnhkã py ka tanhmã hã kãm nẽ hkõt nẽ. Kwãr mãmri apê kupy. Ka mãänên te

ate kry pẽ anhĩnhkã hpakã ry jagjênh xwỳnhhta anhĩnhkã hkõt kãm òr pyrak o hipêx. Nom kamã agryk kãm kãm òr kêt nẽ.

³⁰ —Nẽ koja mẽhõ kêp amrakati kumrêx nẽ awýr tẽ nẽ mẽmoj tã awý. Ka anhõ mẽmoj japêr nẽ mãmri kãm mẽmoj gõ. Kêp anhõxy hkõt kamã kãm mẽmoj gõ. Rý koja mẽhõ apê mẽmoj to ahkĩ ka axãhkurê hkõt nẽ. Nẽ tanhmã hã ho hkõt nẽ. ³¹ Mẽ piitã mẽ kot tãm mẽ anhĩpêxja na mẽ amã hprãm. Tã kêr ka mẽ amnhĩ pyrã nẽ tãm mẽ piitã mẽ hipêx o ri apa. Mẽ kot tãm mẽ anhĩpêx kêt tã kêr ka mẽ axãmnhĩx ri anhõxy hkõt nẽ tãm mẽ hipêx o ri apa.

³² —Nom kot kaj mẽ amã mẽ piitã mẽ ho mex o apa hprãm kêt japêr. Nẽ ãm mẽ kot mẽ ato mex xwỳnhjê pix ka mẽ amã mẽ ho mex prãm. Xà koja Tĩrtũm ja hã mẽ apumu nhũm ja kãm mex nẽ? Nà koja kãm mex kêt nẽ. Koja mẽhõ mẽ ato mex kêt tã ka mẽ amnhĩ rom ho mex nẽ nhũm Tĩrtũm ja hã mẽ apumu hãmri nẽ mẽ amex ã mẽ ajarẽ. Mẽ kot amnhĩ tomnuj o mẽ pa xwỳnhjaja na htem ãm mẽ kot mẽ ho mex xwỳnhjê pixjaja nhũm htem amnhĩ xwar mẽ ho mex o pa. No tãm mẽ kot amnhĩ nhĩpêx o mẽ pa xwỳnhjaja na htem mẽ piitã mẽ ho mex o pa. Mẽ kot tãm amnhĩ nhĩpêx xwỳnhjaja nẽ mẽ kot amnhĩ tomnuj xwỳnhjaja nhũm mẽ ho hpimràatã mẽ ho mex o axpên pyrak o pa.

³³ —Nẽ mẽ kot amnhĩ tomnuj xwỳnhjaja na htem ãm mẽ kot mẽ ho mex xwỳnh pixjaja nhũm htem amnhĩ xwar mẽ ho mex o pa. No mẽ kajaja. Kêr ka mẽ mãmri mẽ piitã mẽ kamã axukapri pix nẽ. Jao axãmnhĩx ri mẽ piitã mẽ kãm mẽmoj nhõr o ri apa. Nhũm Tĩrtũm ja hã mẽ apumu nẽ ja hã mẽ ato mex nẽ.

—Jakamã kêr ka mẽ amarĩ mẽ kãm akurê xwỳnhjê ho mex nẽ. Nẽ mẽ kamã axukapri nẽ. Nẽ mẽ piitã mẽ kãm mẽmoj nhõr o ri apa. Kê nhỹrmã Tĩrtũm maati mẽ hã mẽ amã mẽmoj nhõr rax nẽ. Nẽ mẽ ate kot amnhĩ nhĩpêx kõt amnhĩ nhĩpêx xwỳnh ã mẽ ajarẽ. Tĩrtũm na hte mẽ kot amnhĩ tomnuj xwỳnhjê kamã ukapri ho pa. Jakamã kêr ka mẽ urak nẽ ã mẽ hipêx anhỹr o ri apa. E kêr ka mẽ ã axpên nhĩpêx anhỹr rãhã nẽ. Anẽ.

Mẽ pahte axpên to pakapêr punuj kêt ã mẽ pamã karõ

Matêwre 7.1-5; mãänên Römãn 2.1-3, 14.1; Wam Korit 4.5; Xiakre 4.11-12

³⁷ Nhũm Jejus arĩ mẽ ahkre nẽ mẽ kãm:

—Nẽ kêr ka mẽ atyx ri amnhĩ krã hkõt tanhmã mẽ kot amnhĩ tomnuj to hã tanhmã axpên jarênh to ho ri apa hkõt nẽ. Kêr kê Tĩrtũm mẽ apyrã nẽ ã mẽ ajarênh anhỹr kêt nẽ.

—Nẽ kêr ka mẽ tanhmã mẽhõ kot ra atomnuj tota mã ajamaxpêr rãhã hkõt nẽ. ãm ho ajamakêtkati tokyx anẽ nẽ axte kãm ajamaxpêr kêt nẽ. Kêr kê Tĩrtũm ja hã mẽ apumu nẽ mẽ apyrã nẽ axte tanhmã mẽ ate amnhĩ tomnuj to mã hamaxpêr kêt nẽ.

³⁸ —Nẽ kêr ka mẽ axpên kamã axukapri pẽ tanhmã axpên to mex to ho ri apa. Kêr kê Tĩrtũm ja hã mẽ apumu nẽ mẽ apyrã nẽ mẽ akamã ukapri pẽ tanhmã mẽ ato mex to ho pa. Na hte mẽ pahte axpên kamã

paxukapří hã mě pahpumunh xà hkôt tanhmã mě pakamã ukapří to.

³⁹ —Nom kêr ka mẽ atỳx ri tanhmã axpên to akapêr to hkêt nê. Mẽ ate aprí hã axpên jamaxpêr kôt axpên pumunhre hã. Jakamã kot kaj mẽ atỳx ri mēhõ ho akapêr punuj hãmri nê te mẽ nohkre xwỳnhjê hõ kot mẽmoj pumunh kêt tãã te kot no ho omunh nê tanhmã harênh to pyrãk o amnhĩ nhĩpêx. ⁴⁰ Tĩrtũmja tapxipix na kot mẽ pajamaxpêr kôt mẽ pahpumunh par. Mẽ axàhpumunh tỳx o mẽ pahte hakrenh kêt jakamã kwa kêr ka mẽ ãm hkôt pix mã amnhĩ nhĩpêx o ri apa. Kot kaj mẽ ã amnhĩ nhĩpêx anê hãmri nê gaa nê urãk nê mẽ piitã mẽ kamã axukapří pix o ri apa. ⁴¹ Jao mēhõ kot tanhmã amnhĩ tomnuj to hã omu hãmri nê tanhmã hã kãm nê tokyx anhỹr kêt nê. Akumrêx ate tanhmã amnhĩ tomnuj to hã amnhĩ pumu nê hkaga hãmri nê rĩ kormã mēhõta hwỳr tẽ nê kot tanhmã amnhĩ tomnuj to hã kãm akapêr to. Anê.

Mẽ pajamaxpêr xà hkôt mẽ pakapêr ã mẽ pajarênh

Matêwre 7.16-20, 12.33-37

⁴³ Nhũm Jejus arĩ mẽ ahkre nê mẽ kãm:

—Nê koja mẽmo pĩ hpàr mex nê ô mex nê. Nom koja pàr punuj hãmri nê ômnuj nê.

—Nê na htem mẽmo xô pumu nê hkôt tanhmã pàr kute hã omu. No na htem rãrãj pumu nê kêp akunĩ kamã mrõnhĩ xô hã hkamnhĩx kêt nê. Na htem mẽmo xỳ hpàr pumu nê ô xànhre hã hkamnhĩx kêt nê. Ja pyrã nê koja mẽhõ hamaxpêr punuj nê mããnên hakwa ho kapêr punuj pix nê. Nê htỳx tanhmã amnhĩ tomnuj to ho ri pa. Nom koja hamaxpêr mex nê hãmri nê mããnên hakwa ho kapêr mex o pa. Na htem ahpỳnhã amnhĩ jamaxpêr xà hkôt tanhmã hakwa ho kapêr to ho ri pa. Anê.

Ixkre pijakrut jarênh

Matêwre 7.24-27; mããnên Xiakre 1.22-25; Wam Juãw 2.3-6

⁴⁶ Nhũm Jejus arĩ mẽ hkôt mẽ pa ho pa xwỳnhjê jahkre ho nhỹ nê mẽ kãm:

—Nê kot kaj mẽ ixpê mẽ anhõ pahihti hã ijarê hã kot kaj mẽ ixkapêr kôt amnhĩ nhĩpêx rãhã ho ri apa.

⁴⁷ —E pa mẽ amã ixprĩ hã mẽ kot ixkôt amnhĩ nhĩpêx xwỳnhjê kot amnhĩ nhĩpêx jarê ka mẽ aprĩ hã inhma. ⁴⁸ Mẽ kot amnhĩ nhĩpêxja te mẽhõ hamaxpêr mex pê aptỳx kãm amnhĩm òrkwỹ nhĩpêx pyrãk. Koja aptỳx kãm òrkwỹ nhĩpêx nhũm mẽmo arĩgro hã na wrỳk rax nê. Nê gô htãm rax nê hanhi nom nhũm arĩ ãm tỳx nê xa. Tã kot kaj mẽ ixkôt amnhĩ nhĩpêx ã kot kaj mẽ te ixkre jarênhja pyrãk. Jao amex nê ajamakêtkati nê ri apa. Te gô htãm kot ixkre janhir tã nhũm ãm tỳxta pyrãk. ⁴⁹ Nom koja mẽhõ hamaxpêr mex kêt nê htỳx mõ nê gô mỳri gyw rerek kãm amnhĩm òrkwỹ nhĩpêx. Hãmri nhũm mẽmo arĩgro hã na wrỳk rax nê. Nê hã gô htãm rax nê òrkwỹ janhi nê kêp grãnh pa. Tã koja mẽhõ ixkôt amnhĩ nhĩpêx kêt nê te ho mẽhõ kot gô mỳri gyw rerek kãm ixkre nhĩpêxta pyrãk. Jao mex kêt nê pa. Jakamã kwa mẽ ixkapêr mar tỳx nê te gô htãm

kot ixkre janhir nê grãnh parta pyrãk o amnhĩ nhĩpêx o apa hkêt nê. Anê.

Jejus kot mẽhõ mã àpênh xwỳnh o mex ã harênh

Matêwre 8.5-13

7 Tã nhũm Jejus mẽ kãm ujarênh pa hãmri nê ma akupỹm Kapanaũ hwỳr mõ. ² Nê mõõ nê ra hwỳr pøj. Nhũm krĩ kamã pôristi krãhtũm mã àpênh xwỳnhja à htỳx nê nõ. Ra htyk kaxyw nê nõ nhũm ò patrãw tee ri omu nê kãm hapê jakamã tee ri hkukamã hamaxpêr o hkaprí nê. ³ Hãmri nê Jejus pôx ã harênh ma nê hwỳr Ijaew pigêt kwỳjê rẽ nê mẽ kãm:

—Kwa mẽ ma Jejus wỳr mra nê kãm ijarê kê tokyx man ixwỳr tẽ nê inhã àpênh xwỳnhta o mex. Anê.

⁴ Hãmri nhũm mẽ kuma nê ma hwỳr mra nê omu nê kãm:

—Pa. Na pôristi krãhtũm na awỳr mẽ inhme pa mẽ mra. Mẽ pahkĩnhã kêp Ijaew kêt tã kãm mẽ pahkĩnh nê. Tãm na pre mẽ inhõ krĩ kamã mẽ inhã Tĩrtũm kapêr o mẽ ahkre xà hã ixkreja nhĩpêx. Tã na kãm àpênh xwỳnhta kêp à htỳx nê nõ nhũm apôx hã ajarênh ma nê man awỳr mẽ inhme. Kwa ma hwỳr tẽ nê kãm ho mex nà? Anê.

⁶ Hãmri nhũm mẽ kuma nê mẽ kãm:

—Tõe. Ma pu mẽ hwỳr. Anê.

Hãmri nê ma mẽ hkôt tẽ. Hãmri nê kormã òrkwỹ htêp o htêm mẽ nhũm axte kutã hkrãmnhwỹ hkwỹ rẽ nhũm mẽ ma kutã mra. Hãmri nê mra nê mẽ hkaxpa nê Jejus pumu nê kãm:

—Pa? Kwa na pôristi krãhtũmta ã awỳr karõ anê. Na mẽ inhã: “E kêr ka mẽ mra nê nhỹri Jejus kaxpa nê kãm awjarê kê ãm ata rũm kapêr pix o inhã à xwỳnhta o mex. Kĩnh ã ixpê Ijaew kêt jakamã ixte amnhĩ kuk ã ixpijaãm tỳx. Jakamã kot paj pam hwỳr ixtêm kêt nê. Kwa kãm anê kê ata rũm kapêr pix o inhã akupỹm ho mex. ⁷ Ixpê mẽ hkrãhtũm jakamã na pa hte inhõ pôristi mã mẽmoj tã karõ nhũm mẽ inhmar xà hkôt inhã mẽmoj tanhmã hipêx to. Na pa hte mẽ kãm: ‘E mẽ ma mra nê ã amnhĩ nhĩpêx anê.’ Anê nhũm mẽ inhma nê ma mrar kurê kumrêx. Rỳ pa mẽ kãm: ‘E mẽ amnê ixwỳr mra nê ã amnhĩ nhĩpêx anê.’ Anê nhũm mẽ inhma nê ixwỳr mra. No kêt Jejus na hte ixrom tanhmã mẽ à kuteja mã kapêr nhũm kuma nê mẽ kêp hapøj nê ma mrar kurê kumrêx. Jakamã koja ata rũm kapêr pix o inhã ho mex.” Anhỹr o awỳr karõ. Jakamã na pa mẽ akutã mra nê akaxpa nê ã amã kapêr jarênh anê. Anê.

⁹ Hãmri nhũm Jejus amnhĩ jaêr pê mẽ kapêr ma nê hkĩnh nê. Hãmri nê hkôt mẽ kot mar o pa xwỳnhjê mã kãm:

—Kwa xà na ka mẽ ã kot ixwỳr karõ xwỳnh jamaxpêr anhỹrta ã ama? Mẽ pahkĩnhã kêp Ijaew kêt tã mẽ arom amnhĩ kaxyw inhã hamaxpêr tỳx nê. Aa mẽ atõ urãk nê ate amnhĩ kaxyw ã inhã ajamaxpêr tỳx anhỹr kêt tã nhũm mẽ arom kãm àpênh xwỳnh kaxyw inhã hamaxpêr tỳx nê. Anê.

¹⁰ Nhũm pre ã mẽ kãm kapêr anê hãmri nhũm pôristi krãhtũm krãmnhwỳjaja kuma nê awjanã nê ma

akupým hkrähtüm nhörkwýja wýr mra. Nhüm ra Jejus kãm äpênh xwýnhhta akupým ho mex nhüm mex në ri mra. Hämri nhüm më akupým pøj në akupým mex ä omu.

Jejus kot akupým mëhõ hkra ho htír ä harënh

Juãw 11.1-46

¹¹ Tã nhüm Jejus ma krí pê Naí hwýr hkôt më pa ho më pa xwýnhjê mërohã mõ nhüm më ohtô në më hkôt mra. ¹² Nhüm më ra Naí hwýr hpõx o mõ. Në hwýr agjê. Axpêr kãm agjê në mõ nhüm kêp mjên htyk xwýnhja më kutã tẽ. Nhüm hkra myja ham kêp ty. Kra pyxi htã kêp ty nhüm më kasãw kamã kuxà në kumý në kot haxàr kaxyw o mõ nhüm katorxà më hkôt mýr o mõ. Nhüm krí nhõ xwýnh kwýjaja ma hkôt mõ. Piitã hkaprî në hkôt mýr o mõ. ¹³ Tã nhüm Jejus më hkwyja më mõ në më hkaxpa në katorxà mýr ä omu nhüm Jejus kãm hkaprî në. Hämri në xa në kãm:

—Pa? Kwa amýr kêt në. Anë.

¹⁴ Hämri në kasãwta wýr tẽ në hã ðhkra xi nhüm më kot mýnh xwýnhjaja omu në amarí kãm o xa. Hämri nhüm htyk xwýnhhta mã kapêr në kãm:

—E kwa kãnhmã nhý. Anë.

¹⁵ Pu nhüm kãnhmã ýr kurê kumrêx. Në kapêr o nhý. Hämri nhüm Jejus nita mã kãm:

—E ota akrata. Na akupým amã htír. Anë.

Hämri nhüm akupým htír ä omu në hkính týx kumrêx. ¹⁶ Hämri nhüm më kot omunh xwýnhjaja amnhí jaêr pê akupým hkra htír kãm omu në ý hã haxwýja hkính në. Në Tirtüm mã mex o mex ä harë në axpên mã:

—Kwa ãm hämri na Tirtüm ä më panhípêx anë në më pahwýr ý hã kapêr jarënh xwýnhhta më nhüm më pahwýr mõ. Tirtüm më pakamã ukaprî jakamã na ä më panhípêx anë. Nã ãm hämri na ä më panhípêx anë. Anë.

¹⁷ Hämri në piitã ma pikaja rüm më kãm harënh o hprôt nhüm më piitã harënh ma.

Juãw Paxis tee ri Jejus kukamã hamaxpêr ä harënh

Matêwre 11.2-6, 11.22; Rukre 4.16-21

¹⁸ Rôm nhüm Juãw Paxisja kêp prês në hkrí nhüm hte hkôt më pa xwýnhjaja hwýr mra në kãm Jejus kot tanhmã amnhí nhípêx to ho pa hã harë. Hämri nhüm harënh ma në tee ri hkukamã hamaxpêr. Hämri në hkôt më pa xwýnh wa ho axkrut në wa kuta ¹⁹ në Jejus wýr wa kumê në wa kãm:

—Kwa wa ma hwýr tẽ në hkukja. Në kãm: “Xà ka na pre Tirtüm më ixwýr amê nã? Nã xà kormã axtem hõ na pa mã kormã amnhí wýr hamãr o ri ixpa?” Anë. E wa ma hwýr tẽ në ä hkukjêr anë në tanhmã kot amnhí jarënh to hã ama hämri në man akupýn tẽ në inhmã harë. Anë.

²⁰ Hämri nhüm wa kuma në ma hwýr tẽ. Nhüm Jejus kormã më ho mex o xa. Më nohkre xwýnhjaja nhüm akupým më no ho mex. Në mëkarõmnuti kot më hwýr gjêx xwýnhjaja nhüm më në më hapõx o ãm rãhã nhüm wa ra hwýr tẽ në kormã hã më omunh o xa.

Hämri në kãm Juãw Paxis kapêr jarë. ²² Hämri nhüm wa kuma në wa kãm:

—Tý. Nã ãm hämri na ja hã ijarë. Ixpê më ate ixkamã ajamak o apa xwýnhhta na pa. Jakamã e. Wa kam në tanhmã ixte amnhí nhípêx to hã ixpumu hämri në ma akupým hwýr tẽ në aprí hã kãm ijarë. Më nohkre xwýnhjaja na pa akupým më no ho mex. Në më hkãnhy xwýnhjaja pa akupým më hkà ho mex. Në më htyk xwýnhjaja pa akupým më ho htír. Në më kêp amrakati në ri më pa xwýnhjê mã mëmoj mex jarënh o ri ixpa. Na pa hte ä më ho mex o ri më hkôt ixpa anë. Jakamã e kwa wa ma akupým hwýr tẽ në ä kãm ijarënh anë. ²³ Kê ijarënh ma në arí amnhí kaxyw ixkôt hamaxpêr týx rãhã në. Kojã ä amnhí nhípêx anë në hamakêtkati në ri pa. Në tee ri ijarënh kukamã hamaxpêr kêt në. E wa tokyx ma akupým hwýr tẽ në ä kãm ijarënh anë. Anë.

Jejus kot Juãw Paxis mex ä harënh

Matêwre 11.7-19

²⁴ Nhüm pre ä Jejus wa kãm amnhí jarënh anë nhüm wa kuma në ma akupým Juãw Paxis wýr tẽ. Hämri nhüm Jejus më kot mar o kuhê xwýnhjê mã tanhmã Juãw Paxis jarënh to në më kãm:

—Na ka prem kapôt ä mar kaxyw ma hwýr mra. Nom ê mex ä omunh kaxyw rý hpíjaãm kãm tanhmã kapêr to hã mar kaxyw hwýr amrar kêt në. ²⁶ Kêp Tirtüm nhý hã kapêr xwýnh jakamã na ka prem mar kaxyw ma hwýr mra. Tirtüm nhý hã kot ixkukamã ijarënh o pa xwýnh na. Ixpê Tirtüm kot më akaxyw ixãm xwýnh ä na pre më amã ijarënh o pa. Në hprí hã tanhmã më amã ijarënh to. Jakamã na kapêr mex o kot wam Tirtüm nhý hã kapêr jarënh o më pa xwýnhjê kapêr jakrenh. ²⁷ Tirtüm kapêr ä kagã htüm kot Juãw kukamã tanhmã harënh to në harënh kot:

Kot paj Ixkra hkukamã ma më hwýr harënh o pa xwýnh më kê ma ri hkukamã më kãm harënh o ri pa. Kê më kuma në kutêp tãm amnhí nhípêx.

Anhýr o Tirtüm Juãw Paxis kukamã harë nhüm më hã kagã. Tã nhüm më awýr kumê. ²⁸ Juãwja mex kumrêx. Na pre hprí hã ixkukamã tanhmã ijarënh to ho pa. Nom ixkôt më pa ho më pa xwýnhjê hkínhã ixkôt pa ho pa hkêt ãm ixkukamã ijarënh o pa. Jakamã ixkôt më pa ho më pa xwýnhjaja na mex o kot Juãw Paxisja jakrenh. Më kot ixkôt hprí hã inhmar o pa jakamã më mex o kot hakrenh. Anë.

²⁹ Nhüm pre ä Jejus më kãm Juãw Paxis jarënh anë. Më kot Juãw mar o kuhê xwýnh kwýjaja na pre htem tanhmã amnhí tomnuj to ho pa. Tã Juãw kot më kãm Tirtüm kapêr jarënh ma në axpên mã Tirtüm mex ä harë. Në axpên mã:

—Nã ãm hämri. Tirtüm kapêr na mex kumrêx. Anë.

Hämri në amnhí tomnuj kagã në Tirtüm kôt amnhí xunhwý. Jakamã nhüm Juãw Paxis Tirtüm mã më hkrã kumrã.

³⁰ No nhüm Parijew nhõ xwýnhjê më Tirtüm kapêr tùm o më ahkre ho më pa xwýnhjaja jajê hkínhã Juãw

Paxis kaga kumrêx. Jakamã nhũm mẽ hkrã kumrãr kêt nê. Mẽ kot Tirtũm kapêr kaga jakamã na pre htem Jejus kapêr ma nê ãm kuma. ³¹ Hãmri nhũm Jejus mẽ kãm:

—E pa mẽ amã mẽ piitã htỳx ri hamaxpêr ã tanhmã mẽ harênh to ka mẽ kot amnhĩ nhĩpêx ã mẽ harênh ma. ³² Te mẽ kot mẽhprĩre kot amnhĩ nhĩpêx pyrãk. Mẽhprĩrejaja na htem òrkwỹ kapem hije nê mẽmoj to amnhĩkati ho hkrĩ. Nê tee ri hkwyjê kot amnhĩ nhĩpêx pumu nê mẽ kãm:

Kwa na pa mẽ amã gre htã ka mẽ ixkutã anhökrepôx kêt nê. Pa mẽ ja hã mẽ apumu nê hpãnhã mẽ amã mẽ htyk jarê htã ka mẽ akaprĩ nê amỳr kêt nê. Kwa mẽ ri ã amnhĩ nhĩpêx anhỳr kêt nê.

Anhỳr o axpên mã kapêr. Tã te mẽ ate mẽ uràk. Tirtũm kot mẽ awỳr ý hã kapêr xwỳnhjê rênh tã ka mẽ te mẽhprĩre kot amnhĩ nhĩpêxta pyrã nê mẽ ama ãm mẽ ama nê mẽ hkôt amnhĩ nhĩpêx kêt nê.

³³ —Juãw Paxis na pre mẽ awỳr mō mẽ ixpyrà nê apkur mex o ri pa hkêt nê. Nê ixpyrà nê wĩhti ho hkôm kêt nê pa. Tã ka mẽ ja hã omu nê hkaga nê atỳx ri Satanasti nhỹ hã kot tanhmã amnhĩ nhĩpêx to ho pa hã hkamnhĩx nê ri harênh o ri apa. Hãmri nê mẽhprĩre kot amnhĩ nhĩpêx pyrã nê hkôt amnhĩ nhĩpêx kêt nê.

³⁴ Tã pa Juãw pãnhã mẽ awỳr mō. Nê kurom apkati mẽ ixàpkur mex o ri ixpa. Nê kurom wĩhti hkwy ho ixkôm o ri ixpa. Ka mẽ ja hã ixpumu nê atỳx ri ixàpkur rũnh nê ixpĩpãnh o ri ixpa hã ixkamnhĩx nê ã axpên mã ixto akapêr anhỳr o ri apa. Nê mẽ kot amnhĩ tomnuj xwỳnhjê hkôt ri ixpa hã axpên mã ijarênh o ri apa. ã na ka htem axpên mã ijarênh anê. Jao te mẽ ate Juãw Paxis nhĩpêx pyrã nê ixkaga nê ixkôt amnhĩ nhĩpêx kêt nê. Na hte ã htỳx ri tanhmã mẽ hamaxpêr to ho mẽ pa xwỳnhjaja amnhĩ nhĩpêx anhỳr o ri pa.

³⁵ —No tãm ri mẽ hamaxpêr o mẽ pa xwỳnhjaja na htem ahpỹnhã Juãw mẽ wa ixte amnhĩ nhĩpêx ã wa ixpumu nê axpên mã wa ijarênh o: “Nà ahpỹnhã wa kot amnhĩ nhĩpêx tã wa hamê ãm hãmri Tirtũm nhỹ hã kapêr jarênh mex o pa. E pu mẽ wa uràk nê Tirtũm kôt amnhĩ xunhwỹ.” Anhỳr o axpên mã wa ijarênh o pa. Anê.

Parijew nhõ xwỳnh pê Simãwre jarênh

Matêwre 26.6-13; Makre 14.3-9; Juãw 12.1-8

³⁶ Tã nhũm Parijew nhõ xwỳnh pê Simãwreja amnhĩ nhõrkwỹ hwỳr Jejus mẽ hkôt mẽ pa ho pa xwỳnhjê mẽ kuwỳ. Mẽ kot kutã apkur kaxyw amnhĩ wỳr mẽ kuwỳ nhũm mẽ òrkwỹ hwỳr mra nê mẽ hwỳr agjê nê apkur kaxyw hkrĩ. ³⁷ Hãmri nhũm mẽhõ nija mẽ hwỳr axà. Na pre hte amnhĩ tomnuj pix o pa. Hãmri nê Jejus ò krĩ hwỳr hpôx nê Simãwre nhõrkwỹ kamã apkur ã harênh ma nê ma hwỳr tẽ. Mẽ hkuxwaxà hã à py nê ma hwỳr o tẽ. ³⁸ Hãmri nê hwỳr axà nê Jejus pumu nê hwỳr tẽ nê pum xa. Nê tee ri tanhmã kot amnhĩ tomnuj to ho paja mã hamaxpêr nê hpijaam nê hkaprĩ nê mỳr o xa. Hãmri nê Jejus kutã hkõn krã ho tẽm nê nhỹ nê no kagô ho hpar go. Hãmri nê amnhĩ krã kí ho hpar grà nê kupã hãmri nê hpãnhã mẽ hkuxwa xà ho kuxwa. Kãm hkĩnh

xà ã hipêx anê. ³⁹ Hãmri nhũm Simãwre tee ri ja hã omu nê hamaxpêr o:

—Tk. Kwa jahti kot amnhĩ tomnuj pix o pa xwỳnh tã mẽ ixwỳr axà nê ã Jejus nhĩpêx anê nhũm amnhĩ nê hanor kêt nê. Kêp ãm hãmri Tirtũm nhỹ hã kapêr jarênh o pa xwỳnh ronhỹx ja hã omu nê amnhĩ nê hanor kurê kumrêx. Anê.

⁴⁰ Hãmri nhũm Jejus amnhĩ tã hamaxpêr ã omu nê hêx rom kãm kapêr nê kãm:

—E Simãwre. Pa amã awjarê ka inhma. Anê.

Hãmri nhũm kãm:

—Tõe. Mex. Mãmri inhma awjarê pa ama. Anê.

⁴¹ Hãmri nhũm kãm:

—Nà koja mẽhõ my wa hamèxkrut. Nhũm hõja mẽhõ pê kàxpore ho rax kumrêx nê ho ìpresta. Nhũm hõja ãm kêp ho grire nê ho ìpresta. Hãmri nê wa hamê kàxpore ho hapêx pa. ⁴² Hãmri nê akupỹm kot kêp ho ìpresta xwỳnhhta mã hpãnhã òr kaxyw tee ri amnhĩ kukamã hamaxpêr. Ra kot ho hapêx par jakamã tee ri amnhĩ kukamã hamaxpêr. Tã nhũm kot wa kãm ho ìpresta xwỳnhhta wa hwỳr tẽ nê wa kãm: “Kwa wa tee ri amnhĩ kukamã ajamaxpêr kêt nê. Na pa ra war ate ixto tewên ã kagàta kaxõnh pa nhũm ja hapêx. Kot paj axte kãm ijamaxpêr kêt nê. Jakamã wa mãmri ajamakêtkati nê axàmnhĩx ri apa.” Anhỳr o wa kãm kapêr. ã mẽ ujarênh kot anhỳr. Anê.

Nhũm pre ã Jejus Simãwre mã ujarênh anê. Hãmri nê hã hkukja nê kãm:

—E nhỹ myja koja we kãm ho tewên xwỳnhhta kĩnh tỳx nê wehe? Anê.

⁴³ Hãmri nhũm kãm:

—Nà kot kêp ho rax nê ho ìpresta xwỳnhhta koja kãm hkĩnh tỳx o hõta jakre. Anê.

Hãmri nhũm kãm:

—Tỳ. Nà ãm hãmri na ka ã harênh anê. ⁴⁴ Tã mãn ka ni kot ã inhĩpêx anhỳr xwỳnhhta pumu. Na ka amnhĩ nhõrkwỹ hwỳr ixwỳ pa axà nom ka inhmã gô hkwy pa ho amnhĩ par kuhõnh kêt nê. Tã nhũm nija arom ã inhĩpêx anê nê no kagô ho ixpar kuhõ nê amnhĩ krã kí ho grà ho nhỹ.

⁴⁵ —Nê anhõrkwỹ hwỳr ixarta ã ka ixkahti hkôt inhmỳnh nê ixpãr kêt nê. Tã kêt nija arom xatã ixpar pãr o nhỹ. ⁴⁶ Nê ate orti ho ixkrã gregrer kêt tã nhũm arom mẽ hkuxwaxà ho ixpar kuxwa ho nhỹ. Mẽhkukwaxà hã kàxpore xohtô htã nhũm àmnhĩx ho ixpar kuxwa ho nhỹ. ⁴⁷ ãm hãmri na pa amã ja jarê. Nija kot amnhĩ tomnuj tỳx tã pa ra nê kot amnhĩ tomnuj o ijapêx pa. Ra kot amnhĩ tomnuj tỳx xwỳnh ã amnhĩ pumunh jakamã na amnhĩ kaxyw inhmã hamaxpêr pê kãm ixkĩnh nê ã inhĩpêx anê. No ka na ka hte uràk nê amnhĩ tomnuj tỳx o apa htã uràk nê tee ri ja hã amnhĩ pumunh kêt nê. Tã nita kĩnhã ate amnhĩ tomnuj kaga hkêt jakamã na ka ãm amã ixkĩnh grire. Anê.

Nhũm pre ã Jejus Simãwre mã kapêr anê. ⁴⁸ Hãmri nê nija mã kapêr nê kãm:

—E kànhmã xa. Ra ate amnhĩ kaxyw inhmã ajamaxpêr jakamã na pa ra ate amnhĩ tomnuj piitã amnhĩ katut kôt rênh pa. Kot paj axte kãm ijamaxpêr kêt nê.

Jakamã māmri ma ajamakêtkati nê axàmnhix anhörkwý hwýr tẽ. Anẽ.

Hãmri nhũm mẽ kot axpẽn kutã apkur xwýnhjaja tee ri kot kãm kapër anhýrja ã kuma nhũm ja mẽ kãm mex kêt nê. Jakamã nhũm mẽ ri axpẽn mã harẽnh o:

—Tk. Kwa mẽhõ na hte ri kot Tirtũm kot amnhĩ nhĩpẽx pyrãk o amnhĩ nhĩpẽx nê mẽ kot amnhĩ tomnuj o hapẽx ã amnhĩ jarẽnh o we ri pahti? Anẽ.

Mënijë hkwý kot Jejus kõt pa hã mẽ harẽnh

Makre 15.40-41, 16.9

8 Tã nhũm Jejus ma mẽ piitã mẽ kãm Tirtũm kapër o mẽ ahkre ho ri mẽ hkõt pa. Krĩ rũnh kamã nê krĩ hkryre kamã. Mẽ kot amnhĩ tomnuj kaga nê Tirtũm kõt amnhĩ xunhwýr nhũm kot amnhĩ tã mẽ omunh nê mẽ ho hkra kaxyw nhũm ri mẽ hkõt mẽ kãm harẽnh o pa. Nhũm ý hã mẽ ahkre ho mẽ pa xwýnh pẽ 12jaja ma hkõt ri pa. ² Nê mẽnĩ hkwýjaja. Na pre ra Jejus mẽ hkwýjẽ nê mẽkarõmnuti japõj. Nê mẽ hkwýjaja tanhmã mẽ à kute xwýnhjaja nhũm akupým mẽ ho mex. Xwýnhjaja nhũm prem haxwýja ma hkõt ri pa. Hõ pẽ na pre Marir Matarẽn nhũm pre ra Jejus nê mẽkarõmnuti ho 7 nê hapõj. ³ Nê Joanã. Joanã mjẽn Kujahiti na pre kęp pahihiti Erox mã mẽ ãpẽn xwýnhjẽ krãhtũm. Nê Sujãjre. Nê kaxyw mẽnijẽ ohtõ nê Jejus kõt tanhmã mẽ ho ajuta hto ho mẽ hkõt pa. Jao mẽ hikãxpore ho mẽmoj japrõ nê ho mẽ kãm mẽ õ nhĩpẽx o ri mẽ hkõt pa.

Mëmo hy hkre xwýnh

Matẽwre 13.1-9; Makre 4.1-9

⁴ Tã nhũm mẽ ra krĩ piitã rũm Jejus wýr akuprõ. Jakamã nhũm mẽ ohtõ rax kumrẽx nhũm Jejus mẽ kãm ujarẽnh o nhý. No ãm hprĩ hã ujarẽnh kêt nê. Mẽ kot Tirtũm kapër mar nê tanhmã hkõt amnhĩ nhĩpẽx to nhũm hã kuxi nê mẽ kãm hã ujarẽnh o nhý. ⁵ Nê mẽ kãm:

—E mẽ inhma. Koja mẽhõ ma pur mã mõ nê pur kãm mẽmo hy ho ukapër o ri pa. Nom nhũm piitã amex kãm rôrõk kêt nê. Kwý ahpýnhã nhýri rôrõk. Hãmri nhũm hkwý aptýx kãm rôrõk nhũm kuwẽnhre omu nê hwýr mra nê hkrër pa.

⁶ —Nê kẽn kãm hy hkwý rôrõk nê higrõt kutã nojarêt nê higrõt pa. No nhũm kamã aptýx nê kamã kęp pika hkryre jakamã nhũm higrõt nhũm hã myt ahpa nê arĩgro htýx mẽ nhũm grã pa. Kamã kẽn nhũm amgo mex kêt jakamã nhũm grã pa.

⁷ —Nê mrõnhĩ kamã rôrõk xwýnhja haxwýja higrõt tã no nhũm utĩ kęp amýtã nhũm õ hkêt nê.

⁸ —No hirã kamã pika mex kãm rôrõk xwýnhja. Hãmri hirã kamã rôrõk nê higrõt mex nê piitã õ rax nê. Piitã kamã õ kęp 100. ã mẽ ujarẽnh kot anhýr. E kwa mẽ ixujarẽnh ma nê kãm ajamãxpër týx rãhã ho ri apa. Anẽ.

⁹ Nhũm pre ã Jejus mẽ kãm ujarẽnh anẽ. Hãmri nhũm hkõt mẽ pa ho mẽ pa xwýnhjaja kuma nê tee ri hkukamã hamãxpër nê kãm:

—Kwa na pa mẽ ixprĩ hã axujarẽnh kõt mẽmoj pumunh kêt nê. Aprĩ hã mẽ inh mã tanhmã harẽnh to pa mẽ ixprĩ hã kuma nã? Anẽ.

¹⁰ Hãmri nhũm mẽ kãm:

—Tõe. Nã kot paj mẽ amã harẽ. Tirtũm kãm mẽ ate aprĩ hã mar prãm jakamã kot paj ixprĩ hã mẽ amã harẽ. Mẽ kot amnhĩ tomnuj kaga nhũm Tirtũm kot ja hã mẽ omunh nê mẽ ho hkra. Ja na pa harẽ.

—No mũjjaja na mẽ akĩnhã kãm mar prãm nõkati. Jakamã na htem ixujarẽnh ma nê ãm kuma nê htýx ri pa. Anẽ.

Jejus kot prĩ hã mẽmo hy jarẽnh

Matẽwre 13.18-23; Makre 4.13-20

¹¹ Hãmri nhũm Jejus hkõt mẽ pa ho mẽ pa xwýnhjẽ mã:

—E kot paj ixprĩ hã mẽ amã mẽmo hy ho ukapër ã mẽ ujarẽnh ta jarẽ ka mẽ inhma.

—Nã mẽmo hyta te kęp Tirtũm kapër pyrãk. Nê ahpýnhã hy rôrõk ã pikata te kęp ahpýnhã mẽ kot Tirtũm kapër mar xwýnhjẽ kot amnhĩ nhĩpẽx pyrãk. ¹² Mẽ kot mar xwýnh kwýjaja te kot aptýx kãm hy rôrõk nhũm kuwẽnh kot hwýr mrar nê hkrër par xwýnh ta pyrãk. Jao Tirtũm kapër ma nhũm Satanasti te kuwẽnh kot hy hkrër parta pyrã nê mẽ kot amnhĩ kaxyw Tirtũm kapër kõt hamãxpër nê hkõt amnhĩ xunhwýr pymaj tanhmã nê mẽ hkrã hto. Jakamã nhũm mẽ kapër ma nom ho hamakêtkati tokyx anẽ nê axte kãm hamãxpër nê hkõt amnhĩ nhĩpẽx kêt nê.

¹³ —Nê mẽ kot mar xwýnh kwýjaja te kot kẽnre kamã hkwý rôrõk nê higrõt nê grã par tokyx anhýr xwýnh ta pyrãk. Jao Tirtũm kapër ma nê hkĩnh nê. Nê kãm mar prãm nê. Tã nhũm mẽhõ tẽ nê Tirtũm nê tanhmã kãm kapër to nhũm mẽ kuma nê Tirtũm kaga. Te mẽmo hy higrõt nê grã par tokyx anhýr ta pyrãk.

¹⁴ —Nê mẽ kot mar xwýnh kwýjaja te kot mrõnhĩ kamã hkwý rôrõk nê higrõt nhũm mrõnhĩ kot kęp ãm nãr xwýnh ta pyrãk. Jao kãm Tirtũm kapër mar prãm nê. No ãm mããnẽn kãm hikukrẽx rax nê hikãxpore rax prãm xaj ãm ja pix mã hamãxpër o pa. Nê gaa nê ra gryk ã axte Tirtũm kapër mã hamãxpër nê hkõt amnhĩ nhĩpẽx kêt nê.

¹⁵ —Nê mẽ kot mar xwýnh kwýjaja te hirã kamã pika mex kãm hy hkwý rôrõk nê higrõt nê õ rax ta pyrãk. Nê ixkapër ma nê amnhĩ krã him hagjẽn týx nê ixkõt ri amnhĩ nhĩpẽx mex rãhã ho ri pa. Jakamã te ra mẽmo hy hkreta õ rax mex pyrãk. E. ã ixujarẽnh kot anhýr. Anẽ.

Kanẽ mẽ guhkrax wa harẽnh

Makre 4.21-25

¹⁶ Nhũm Jejus arĩ mẽ kãm ujarẽnh o nhý nê mẽ kãm:

—E mẽ inhma. Xã na htem kanẽ hpõk hãmri nê guhkrax o hpro rý par krak ri unhwý? Nã na htem ã hipẽx anhýr kêt nê. Na htem hpõk nê kýxpẽ kuhẽ xã kamã unhwý nhũm hirã mex o kuhẽ. Nhũm htem ixkrem agjẽ nê hirã kamã mẽmoj pumunh mex nê. Ja pyrã nê na pa hte mẽ ate inhmar týx kaxyw ixprĩ hã mẽ amã awjarẽ. ¹⁷ Kormã mẽ ate mẽmoj pumunh nê aprĩ hã mar kêt tã kot kaj mẽ tokyx aprĩ hã omu nê ama. Te mẽmoj kot mẽ apẽ hpimxur pyrãk tã koja

tokyx mẽ amã amnhĩ to amnhĩrit ka mẽ aprĩ hã omunh pa. Te mẽ ate kanê hpôk kãm aprĩ hã mẽmoj pumunh mexta pyrãk. ¹⁸ Jakamã kêr ka mẽ ixkapêr mar tỳx nê hkôt ajamaxpêr rãhã ho ri apa. Jao ixkapêr piitã mar tỳx nê. Nom kot ka mẽ mar tỳx kêt nê hã ano hkêt pa nê axte kãm ajamaxpêr o apa hkêt nê. Anê.

Jejus kot tanhmã katorxã mẽ htôjê jarênh to hã harênh

Matêwre 12.46-50; Makre 3.31-35; mãânên Eprêw 2.11-12

¹⁹ Nhũm Jejus arĩ mẽ ahkre ho nhỹ. Rôm nhũm katorxã nê htôjaja nhỹhỹnh hwỳr mơn pôj. No nhũm mẽ kot mẽ hã htu rax jakamã nhũm mẽ tee ri hwỳr gjêx kaxyw nê kormã kapôt ã kuhê. ²⁰ Hãmri nhũm mẽhõja mẽ omu nê Jejus mã mẽ harê nê kãm:

—Kwa Pahihti. Ota ra akatorxã mẽ atôjaja awỳr pôj nê tee ri awỳr gjêx mã. O mũj mẽ kormã kapôt ã kuhê. Anê.

²¹ Hãmri nhũm mẽ kuma nê mẽ kãm:

—Tôe pa ixkato nê mẽ omu. Inhmã mẽ hapêê. Nom kot kaj mẽ atô Tirtũm kapêr ma nê hkôt amnhĩ xãm nê hkôt amnhĩ nhĩpêx. Hã kot kaj te apê ixtô rỹ ixkatorxã kot amnhĩ nhĩpêx pyrãk o pu mẽ axpên nhĩpêx. Pa te inhmã mẽ hapê pyrã nê inhmã mẽ ajapê nê. Anê.

Jejus kot kôk mã kapêr ã harênh

Matêwre 8.23-27; Makre 4.35-41

²² Tã nhũm apkati hõ hã nhũm Jejus himô rax ã rêr kaxyw nojarêr nê hkôt mẽ pa ho mẽ pa xwỳnhjê mã kãm:

—E kot puj mẽ jarãhã ma xarmã mỗ. Anê.

Hãmri nê mẽ pãr mã gjêx pa nê ma xarmã mỗ. Garirej rũm kato nê ma xarmã pika hõ hwỳr kormã mỗ. ²³ Nhũm ra Jejus ôtxwa nê pãr kre kamã gôr nê nõ. Pu nhũm kôk ãpêr tỳx nê nhũm gô axpên tak tỳx nê kãnhmã harĩ. Nê pãr kre kamã pikapĩr rax nhũm pãrta mẽ kãm ãr o mỗ nhũm mẽ tee ri amnhĩ nhĩpêx. No nhũm Jejus arĩ htỳx gôr nê nõ. ²⁴ Hãmri nhũm mẽ tee ri amnhĩ kukamã hamaxpêr nê kumra nê kãm:

—Kwa Pahihti kãnhmã nhỹ. Kot puj mẽ jarãhã pahtyk pa. Anê.

Hãmri nhũm kãnhmã nhỹ nê kôk mã kapêr nê kãm:

—E. Kwa hãmri anhĩkrê. Anê.

Hãmri nhũm hpinhkrênh par mẽ nhũm gô tãm nôr kurê kumrêx. ²⁵ Hãmri nhũm Jejus hkwyjê hwỳr apkjê nê mẽ kãm:

—Kwa kormã te mẽ ate amnhĩ kaxyw Tirtũm mẽ wa inhmã ajamaxpêr tỳx kêt pyrãk. Anê.

Hãmri nhũm mẽ amnhĩ jaêr pê kot ã amnhĩ nhĩpêx anhỹr ã omu nê no hawênh rũnh nê tee ri axpên pumunh pê hamaxpêr o kuhê nê axpên mã:

—Kokỹỹ. Jejus kêp mẽ panhĩõ hkêt. Mẽ pahtô kot pu we te kot amnhĩ nhĩpêx pyrã nê we kôk mã pakapêr nhũm we pama anhĩkrê? Nã Jejus mẽ parom ãh-pumunh tỳx o ãhpumunh tỳx. Jakamã na ã anê. Anê.

Jejus kot mẽhõ nê mẽkarõmnuti kator ã harênh

Matêwre 8.28-34; Makre 5.1-20

²⁶ Tã nhũm mẽ ra himô nhĩhkjê hã krĩ pê Geras wỳr rê. Himô nhĩkjê hã na pre pika pê Garirej. Nê Garirej nhĩkjê hã na Gerasja. Jakamã nhũm mẽ ra hwỳr rê.

²⁷ Hãmri nê pãr kre rũm hapôj nê api nê mra nhũm mẽhõ myja mẽ kutã tẽ. Na pre ra hwỳr mẽkarõmnuti hkwy agjê nhũm mẽ ý hã oprê htỳx nê hkênh nê ri mra. Nê ôrkwy kamã hkrĩ hkêt nê. ãm ri kapôt ã pa ho pa. Mẽ htykjê hã pika kamã kên kre kaêx kôt ri pa. Na pre ra krĩ nhõ xwỳnhjaja xatã tee ri unê nê hkaxpre. Tee ri kàx o ri hkaxpre htã no nhũm amnhĩ nê rênh pa. Nhũm mẽkarõmnutija tanhmã hkrã hto nhũm kapôt pix ã ri mra. Jakamã nhũm Jejus mẽ pãr rũm hapôj nê api nhũm mẽ omu nê mẽ kutã tẽ nê Jejus kaxpa. Nhũm amnhĩ wỳr omu nê nê tanhmã mẽkarõmnuti mã kapêr to. Hãmri nhũm my xoprêja hwỳr tẽ nê kutã hkôn krã ho tẽm nê nhỹ. Hãmri nê kãxpêê amnhĩ tã kãm kapêr. Nom tãm kapêr kêt nê. Mẽkarõmnuti nhỹ hã kãm kapêr nê kãm:

—Pa Tirtũm Kra Jejus? Kwa mo kaxyw na ka mẽ ixwỳr tẽ? Kwa tanhmã mẽ ixto hkêt nê. Anê.

³⁰ Hãmri nhũm mẽ kãm:

—Kwa tanhmã na mẽ anhĩxi kute? Anê.

Nhũm mẽ kãm:

—Nã mẽ ixpê Mẽohtôhti. Anê.

Mẽkarõmnuti ra kot hwỳr ohtô nê gjêx jakamã na prem ã kãm amnhĩ nhĩxi jarênh anê. ³¹ Hãmri nê Jejus mã:

—Kwa jahti nê mẽ ijpôj nê mẽ kot amnhĩ xà htỳx kamã hamak tũm xà hwỳr mẽ ixrênh kêt nê. Hagrô hk-wỳ mũj wỳr mãn mẽ ixrê pa mẽ hpãnhã hwỳr mãn hagjê nã? Anê.

Hagrôja kii mẽ kêp amỳm hixêt ã ri apkur o pa nhũm mẽ ã Jejus mã mẽ hwỳr amnhĩ to hwỳr anê. Hãmri nhũm mẽ kãm:

—Tôe. Tô mẽ tãm hwỳr mãn mra. Anê.

³³ Hãmri nhũm mẽ kuma nê myta pê hapôj nê ma hagrôja wỳr mrrar kurê kumrêx nê mẽ kãm gjêx pa. Hãmri nhũm myja akupỹm tãm hkrã. No nhũm hagrôja mẽkarõmnuti pymaj amỹra nê axkahkũm nê hprôt nê himô hã krã hixêt ã axpum rôrôk nê gôx kãm mrô nê pikaprãr pa. ³⁴ Hãmri nhũm hagrô jamãr xwỳnhjaja tee ri omu hãmri nê ma mẽ ô patrãw wỳr akupỹm mẽ piitã mẽ kãm harênh o hprôt nê mra. ³⁵ Nhũm mẽ tee ri mẽ kuma hãmri nê ma kot Jejus pumunh mã hwỳr mra nê hkaxpa. Nê kuri myta pumu nhũm ra akupỹm tãm hkrã nê tãm amnhĩ nhĩpêx nê ê kamã mex nê nhỹ. Nhũm mẽ kot hã omunh xwỳnhjaja mẽ kãm ujarênh pa. Nhũm mẽ kuma nê tee ri amnhĩ kukamã hamaxpêr o ra kãm ma nê. ³⁷ Hãmri nê amnhĩ nê Jejus mã kapêr nê kãm:

—E kwa mẽ tokyj ma akupỹm amrar kurê kumrêx. Anê.

Hãmri nhũm mẽ kuma nê awjanã nê ma akupỹm pãr wỳr mra nê agjê. Nhũm akupỹm mex xwỳnhhta mẽ hkôt hkrã nom nhũm Jejus kãm:

—Nà kot kaj mẽ ixkôt amõr kêt nẽ. Ma akupým anhõ krĩ hwýr mǎn tẽ nẽ Tirtũm kot tanhmǎ akupým ato mex to hǎ mẽ kǎm amnhĩ jarẽnh o ri mẽ hkõt apa. Anẽ.

Hǎmri nhũm kuma nẽ ma akupým krĩm tẽ nẽ ri mẽ kǎm Jejus kot tanhmǎ ho mex to hǎ harẽnh ri mẽ hkõt pa.

Jejus kot wa ho axkrut nẽ wa ho mex ǎ harẽnh

Matêwre 9.18-26; Makre 5.21-43

⁴⁰ Tǎ nhũm Jejus mẽ ma akupým xarmǎ mõ nẽ rê nẽ mẽ kutêp mẽ pikuprõnh xwýnhjê pumu. Nhũm mẽ ra amnhĩ wýr mẽ omu nẽ mẽ kutêp gô jakàx ǎ pikuprõnh rax nẽ. Jakamǎ nhũm mẽ mẽ hwýr pøj nhũm mẽ amnhĩ wýr Jejus pumu nẽ hkĩnh nẽ. ⁴¹ Hǎmri nhũm Jajti ma hwýr tẽ. Ijaew nhõ Tirtũm kapêr o mẽ ahkre xà hǎ ixkre jamǎr xwýnh na pre. Nhũm pre hkra ni pyxire. Hǎ amgrǎ pê 12. Tǎ ra kêp ǎ htýx nẽ htyk kaxyw nẽ nõ. Hǎmri nhũm hipêêxàja tee ri omu hǎmri nẽ Jejus wýr tẽ nẽ kutǎ hkõnkrǎ ho tẽm nẽ nhỹ nẽ ho kuwý nẽ kǎm:

—Pa akupým mẽ ixto mex xwýnh maati. E awýr na pa tẽ. Na ra ixkra ixpê htyk kaxyw. Pa tee ri omu nẽ kaxyw amǎ ijamaxpêr nẽ awýr tẽ. Kwa ma ixkôt inhõrkwý hwýr tẽ nẽ inhmǎ omu nẽ tokyx inhmǎ ho mex nǎ? Anẽ.

Hǎmri nhũm kuma nẽ ma hkõt tẽ. Nhũm mẽ ohtô nẽ wa hkõt pry hǎ mra nẽ axpên nhĩgǎ nẽ axpên kujahêk o hkõt mra. ⁴³ Hǎmri nhũm mẽhõ nija haxwýja wa hkõt tẽ. Na pre hte hkamrô hkryre rǎhǎ ho pa hǎ ra amgrǎ kêp 12. Nhũm tõtô tee ri kot ho mex kaxyw hkane kaprý ho pa. ⁴⁴ Jakamǎ nhũm tee ri amnhĩ kukamǎ hamaxpêr hǎmri nẽ Jejus jarẽnh ma nẽ ma mẽ hkõt hwýr htẽm kurê kumrêx. Nom nhũm mẽ ohtô rax nẽ hkõt mõr jakamǎ nhũm mẽ hkaêx kôt hwýr tẽ nẽ hkatut kôt kêp ê nhĩrê kupê. Hǎmri nẽ ǎm kêp ê pix kupênh tǎ akupým mex. ⁴⁵ Hǎmri nhũm Jejus kot kêp ê kupênh ǎ amnhĩ tǎ omunh tǎ hêx rom mẽ ho hakêx nẽ mẽ omu nẽ mẽ kǎm:

—Kwa mẽ atõ na ka ri amnhĩ kaxyw inhmǎ ajamaxpêr týx pê ixpê ixê kupê? Anẽ.

Hǎmri nhũm mẽ piitǎ tee ri axpên pumu nẽ kǎm amnhĩ tǎ aprǎ. Hǎmri nhũm Simǎw Pêtre kǎm:

—Mẽ kot apê amnàr griǎ kot ka kêt ri mẽhõ kot apê hkupênh xwýnh ǎ ri mẽ hkukja. Kwa mǎn ǎm mẽhõ amarĩ apê hkupê. Anẽ.

⁴⁶ Hǎmri nhũm kǎm:

—Nà mẽhõja amarĩ hkupênh kêt nẽ. Na amnhĩ kaxyw inhmǎ hamaxpêr týx pê ixpê hkupê. Tǎ ixàhpumunh týx xàja kôt na akupým mex. Nom ixte mẽhõ kot ixpê hkupênh xwýnhja pumunh jakamǎ na pa ixê rom ǎ amnhĩ tǎ ri mẽ hkukjêr anẽ. Kwa mẽ atõ inhmǎ amnhĩ jarẽ. Anẽ.

⁴⁷ Hǎmri nhũm mẽhõ nita kuma nẽ tee ri kêp kot amnhĩ to hpimxur prǎm kaprý. Hǎmri nẽ hpijaam kǎm hwýr htet o tẽ nẽ kutǎ hkõn krǎ ho tẽm nẽ nhỹ nẽ kǎm amnhĩ jarẽ nẽ kǎm:

—Ma pa na pa inhmǎ inhmex prǎm xàj apê axê kupê. Tǎ na pa akupým inhmex. Anẽ.

⁴⁸ Hǎmri nhũm Jejus kuma nẽ kǎm:

—Tõe. Nà ra ate amnhĩ kaxyw inhmǎ ajamaxpêr týx kôt ate ǎ amnhĩ nhĩpêx anhýr jakamǎ na ka akupým amex. E mǎmri ajamakêtkati nẽ ma akupým tẽ. Anẽ.

Hǎmri nhũm kuma nẽ hkĩnh nẽ ma akupým tẽ.

⁴⁹ Rôm nhũm Jajti mǎ àpênh xwýnhjê hõ õrkwý rũm ma õ patrǎw kutǎ tẽ nẽ wa hkaxpa nẽ Jajti mǎ kǎm:

—Kwa na ra apê akra ty. Jakamǎ mo kaxyw kot ka kêt amnhĩ kôt hwýr Jejus o mõ? Kwǎr mǎmri ma akupým tẽ. Anẽ.

⁵⁰ Hǎmri nhũm Jejus kuma nẽ Jajti mǎ kǎm:

—Kwa tee ri akra hkukamǎ ajamaxpêr kêt nẽ. Kaxyw inhmǎ mǎn ajamaxpêr týx nẽ. Koja te ra apê htyk tǎ koja akupým amǎ htĩr. Anẽ.

⁵¹ Hǎmri nhũm mẽ mõ nẽ õrkwý hwýr pøj nẽ hwýr axà nẽ mẽ omu nhũm mẽ ra htyk xwýnhnta ǎ hturax nẽ. Nẽ omũj ri mur. Hǎmri nhũm Jejus mẽ hwýr axà nẽ mẽ mýr ǎ mẽ omu nẽ mẽ kǎm:

—Kwa mẽ hǎmri amýr kêt nẽ. Na nireta mẽ apê htyk kêt na ǎm gõr nẽ nõ. Anẽ.

Hǎmri nhũm ra mẽ kot htyk ǎ omunh mex jakamǎ kuma nẽ ǎm kuma nẽ axtem nẽ ri axpên mǎ hǎ hpêr o axkê. Hǎmri nhũm Jejus htyk xwýnhnta wýr hitom wýr ǎr kaxyw nẽ amnhĩ kôt Juǎw nẽ Xiakre nẽ Pêtre nẽ kaxyw htyk xwýnh katorxà nẽ hipêêxàja. Jajê pix na pre amnhĩ kôt mẽ ho agjê. ⁵⁴ Hǎmri nẽ htyk xwýnhnta wýr tẽ nẽ hpa hǎ kupy nẽ kǎm:

—Pa? Kwa tokyx kǎnhmǎ nhỹ. Anẽ.

⁵⁵ Hǎmri nhũm akupým htĩr nẽ kǎnhmǎ ýr kurê kumrêx. Hǎmri nhũm Jejus mẽ kǎm:

—E kwa mẽ tokyx kǎm mẽmoj japêr kê kukrê. Mǎn ra kǎm prǎm nẽ. Anẽ.

⁵⁶ Hǎmri nhũm katorxà mẽ hipêêxà wa amnhĩ jaêr pê akupým htĩr kǎm omu nẽ kamǎ no puma ho hkĩnh týx nẽ. Hǎmri nhũm Jejus wa kǎm:

—E wa inhma. Kêr ka wa akupým ixte war amǎ ho htĩr ǎ ri mẽ kǎm ijarẽnh o ri apa hkêt nẽ. ǎm kwarĩ ho kwarĩ. Anẽ.

Jejus kot mẽ ho 12 nẽ ahpýnhǎ mẽ rẽnh ǎ harẽnh

Matêwre 10.1, 10.5-15; Makre 6.7-13; Rukre 10.1-12; mǎânên Atre 13.49-50, 18.6

9 Tǎ nhũm Jejus hkõt mẽ pa ho mẽ pa xwýnh pê 12jê mǎ kapêr nẽ mẽ kǎm:

—E mẽ amnẽ ixwýr mra nẽ ixkapêr ma. Na pa ra mẽ amǎ ixàhpumunh týx xà hkwy gõ. Jakamǎ kêr ka mẽ inhỹ hǎ ma ri akwýjê hkõt tanhmǎ mẽ ho mex to ho ri mẽ hkõt apa. Mẽ ǎ xwýnhjê ho mex o ri mẽ hkõt apa. Nẽ mẽ hkwyjê nẽ mẽkarõmnuti japôj. Nẽ mẽ piitǎ mẽ kǎm anẽ kê mẽ tokyx Tirtũm kôt amnhĩ xunhwý kê mẽ ho hkra. ³ Nom kêr ka mẽ amnhĩ kôt akukrêx ho ohtô nẽ ri ho apa hkêt nẽ. Nẽ amnhĩ kaxpar xà hǎ kô ho apa hkêt nẽ. Nẽ kawà htur nẽ ho apa hkêt nẽ. Nẽ amnhĩ kôt axàpkur xà hǎ anhõ ho apa hkêt nẽ. Rý akàxpore rax nẽ ho apa hkêt nẽ. ǎm mẽ anhõ kamıs ho pixi nẽ haxà nẽ ri hǎ apa. Nẽ anhỹ kamǎ ǎ ri mẽ hkõt apa anẽ. Kê mẽ kot mẽ akapêr mar xwýnhjaja tǎm mǎn mẽ amǎ mẽ anhõ ho pa.

⁴—Ně kêr ka mẽ nhÿri krÿ hõ hwÿr pøj mẽ apõx xà kamã mẽhõ nhõrkwÿ kamã hkõt ri apikamẽnh tãmtã kurũm akupÿm ajapøj mẽ ma hpãnhã nhãm krÿ hõ hwÿr apa. Nom atÿx ri nhãm mẽ hwÿr amrar mẽ nhãm mẽ hwÿr amrar kêt mẽ.

⁵—Ně koja mẽ nhÿri mẽ akapër kaga ka mẽ amnhÿ tã mẽ kamã ama mẽ tokyx mẽ kurũm ajapøj mẽ ma nhãm apa. Nẽ anojarêt mẽ mẽ noo mã akuhẽ mẽ amnhÿ par ã awjagrõ kapÿ. Mẽ kot Tirtũm kaga hã amnhÿ pumunh nhũm Tirtũm kot amnhÿ pyrã mẽ mẽ hkaga hã mẽ kot omunh kaxyw ka mẽ ã mẽ mẽ noo mã amnhÿ nhÿpẽx anẽ. Hãmri mẽ ma hpãnhã krÿ hõ hwÿr apa. Anẽ.

⁶ Nhũm pre ã Jejus mẽ kãm mẽ àpẽnh ã karõ anẽ. Nhũm mẽ kuma hãmri mẽ hapøj mẽ ma mẽ hkõt pa. Ma krÿ piitã hkõt akupÿm mẽ ã xwÿnhjẽ ho mex mẽ Tirtũm kapër o tanhmã mẽ ahkre hto ho ri mẽ hkõt pa.

Pahi Erox tee ri kot Jejus kukamã hamaxpër ã harẽnh
Matêwre 14.1-12; Makre 6.14-29

⁷ Hãmri nhũm pika pê Garirej kamã mẽ piitã Jejus jarẽnh ma mẽ ahpÿnhã ri tanhmã axpẽn mã harẽnh to. Mẽ hkwyjaja kęp finat Juãw Paxis akupÿm htÿr ã ri harẽ. Nhũm mẽ hkwyjaja amnepẽm mẽ hkukamã Tirtũm nhÿ hã kapër jarẽnh xwÿnhjẽ hõ ra akupÿm htÿr ã harẽ. Nhũm mẽ hkwyjaja kęp finat Eris ã axpẽn mã harẽ. Jakamã nhũm pahihti Eroxa mẽ kot ahpÿnhã tanhmã ri harẽnh toja ma mẽ tee ri hkukamã hamaxpër. ⁹ Nẽ hamaxpër o:

—Kwa mẽhõ na hte we ri ã amnhÿ nhÿpẽx anhÿr o pa wehe? Nã finat Juãw Paxis kêt. Ra ixte amnepẽm hã ixãmnhẽnh nhũm mẽ kot inhmã mut krãhyr mẽ hpÿr kẽnã. Kwa mẽhõ na hte we ri ã amnhÿ nhÿpẽx anẽ?

Anhÿr o hamaxpër hãmri mẽ kãm omunh prãm mẽ.

Jejus kot mẽ ho ohtõ mẽ mẽ kãm mẽ õ hã harẽnh
Matêwre 14.13-21; Makre 6.30-44; Juãw 6.1-14

¹⁰ Tã nhũm Jejus nhÿ hã kapër o mẽ pa xwÿnhjaja akupÿn hwÿr mran pøj mẽ mẽ kot ri tanhmã amnhÿ nhÿpẽx to ho pa hã kãm amnhÿ jarẽ. Hãmri nhũm mẽ kuma mẽ ma krÿ pê Pesěj wÿr kormã mẽ o mõ. ¹¹ Hãmri nhũm krÿ hkwy nhõ xwÿnhjaja ra ma mẽ mõr ã mẽ harẽnh ma mẽ ohtõ mẽ ma mẽ hkõt mra mẽ nhÿri mẽ hkõt pøj. Nhũm Jejus amnhÿ kõt mẽ omu hãmri mẽ tanhmã mẽ ho mex to ho xa. Kõt mẽ ã mẽ mẽ pa xwÿnhjaja nhũm akupÿm mẽ ho mex. Hãmri mẽ Tirtũm kapër o mẽ ahkre mẽ mẽ kãm:

—E kot kaj mẽ atõ amã amnhÿ tomnuj kaga hprãm xaj Tirtũm kõt amnhÿ xãm nhũm amnhÿ tã apumu mẽ ato hkra. Hãmri ka ajamakêtkati mẽ amex mẽ axãmnhÿx ri apa.

Anhÿr o mẽ kãm kapër pê mẽ ahkre ho xa.

¹² Tã nhũm myt àr kaxyw nhũm Jejus nhÿ hã mẽ ahkre ho mẽ pa xwÿnhjaja pøj mẽ mẽ kãm:

—Kwa na ra kamãt o mõ. Mẽ hano kê mẽ amnhÿ to krÿ hõ japër mẽ tokyx amnhÿm mẽmoj japrõ mẽ kuku mẽ hikwÿ mẽ gõr. Mo mẽ panhõ? ãm jar kapõt pix kẽnã. Anẽ.

¹³ Hãmri nhũm mẽ kuma mẽ mẽ kãm:

—Kwa ka mẽ kamjaja mẽ kãm mẽmoj gõ kê mẽ kuku. Anẽ.

Nhũm mẽ ohtõ rax mẽ mẽ hkõt mra. Mẽmyjaja kęp 5.000 mẽ kaxyw mẽ hprõ mẽ mẽ hkrajaja. Jakamã nhũm mẽ kęp 12jaja Jejus kot ã mẽ kãm kapër anhÿrja ma mẽ tee ri mẽ hkukamã hamaxpër mẽ mẽ kãm:

—Kwa nã mo mẽ panhõ rax? Mẽ panhõ pãwti kęp sÿk mẽ kaxyw tep grã axkrutre kẽnã kot kêt we mẽ piitã mẽ hipẽx pa. Xà kot paj mẽ ma mra mẽ nhÿri mẽ kãm mẽ apkur xà japrõ nhũm mẽ kuku? Anẽ.

Hãmri nhũm mẽ kãm:

—Nã pu mẽ kãm mẽmoj japrõr kêt mẽ. Mẽ panhõta kot puj mẽ kãm ho anhgrã. E mẽ kãm anẽ kê mẽ ahpÿnhã ri hije mẽ hkrÿ mẽ apku. Anẽ.

¹⁵ Hãmri nhũm mẽ kuma mẽ mẽ kãm anẽ nhũm mẽ piitã hkrÿ pa. ¹⁶ Hãmri nhũm Jejus pãwti mẽ tepta jamÿ mẽ kãnhmã kaxkwa hwÿr rÿt mẽ kãnhmã kupẽ mẽ Tirtũm mã harẽ mẽ mẽ kãm:

—Pa Papaj? Apẽ mẽ inhmã mẽ inhõ xwÿnh jakamã amex o amex. Anẽ.

Hãmri mẽ mẽ kãm ho hkry hpa mẽ mẽ hkõt mẽ pa ho mẽ pa xwÿnhjẽ mã kugõ nhũm mẽ ô ri ho xa mẽ mẽ hipẽx par kumrẽx. ¹⁷ Nhũm mẽ piitã apkur mex o hkrÿ. Mẽõja mẽ kęp grire htã nhũm Jejus tanhmã mẽ kãm ho rax to nhũm mẽ ohtõ rax tã piitã kuku mẽ ho õhy htu hpa. Nhũm arÿ mẽõ jakrẽx prã nhũm Jejus kõt mẽ pa ho mẽ pa xwÿnhjaja akupÿm hakrẽx o pikuprõnh pa mẽ ho kawà ho 12 mẽ ho nÿt pa.

Jejus kot amnhÿ tã hkõt mẽ pa xwÿnhjẽ kukjẽr ã harẽnh

Matêwre 16.13-19; Makre 8.27-29

¹⁸ Tã nhũm arÿgro hõ hã nhũm Jejus nhÿri ahte Tirtũm mã amnhÿ jarẽnh o nhÿ nhũm hkõt ri mẽ pa ho mẽ pa xwÿnhjaja ma hwÿr mra. Hãmri nhũm amnhÿ wÿr mẽ omu mẽ amnhÿ tã tanhmã mẽ hkukjẽr to mẽ mẽ kãm:

—Kwa mẽ inhmã mẽmoj jarẽ. Tanhmã na htem ahpÿnhã axpẽn mã ijarẽnh to wehe? Anẽ.

¹⁹ Hãmri nhũm mẽ kãm:

—Nã na htem ahpÿnhã tanhmã ajarẽnh to. Na hte kamã mẽ hkwyjaja ato finat Juãw Paxis ã ajarẽ. Nhũm kamã mẽ hkwyjaja ato finat Eris ã ajarẽ nhũm mẽ hkwyjaja tõhã apẽ Tirtũm nhÿ hã kapër jarẽnh xwÿnhjẽ hõ ra akupÿm htÿr ã ajarẽ. ã na htem ahpÿnhã ajarẽnh anẽ. Anẽ.

²⁰ Hãmri nhũm mẽ kuma mẽ mẽ kãm:

—No mẽ kajaja? Ixpẽ mẽhõ hã na ka htem ixkamnhÿx? Anẽ.

Hãmri nhũm Simãw Pêtre kãm:

—Nã mẽ pajaja na pa htem apẽ Tirtũm kot mẽ ixkaxyw axãm mẽ mẽ ixwÿr amẽnh xwÿnh ã ajarẽ. Nẽ apẽ mẽ ixpiitã mẽ inhõ Pahi Maati hã ajarẽ. ã na pa htem ajarẽnh anẽ. Anẽ.

²¹ Hãmri nhũm kuma mẽ mẽ kãm:

—Tÿ. Nã ãm hãmri na ka htem ã ijarẽnh anẽ. ã ixte anhÿr kẽnã. Nom kêr ka mẽ inhmar kumrẽx. Kêr ka mẽ

kormã ã akwÿjê mã ijarênh anhÿr o ri apa hkêtnê. Anê.

Jejus kot amnhĩ kukamã amnhĩ jarênh

Matêwre 16.21; Makre 8.31-33

²² Nhũm Jejus arĩ hkôtnê mã pa ho pa xwÿnhjê mã kapêr nê hprĩ hã tanhmã mã kãm amnhĩ jarênh to nê mã kãm:

—Nã ãm hãmri na Simãw Pêtre ijarê. Mẽ kajaja ra mẽ ate ja hã ixpumunh mex. No mẽ pahkwÿjaja na mẽ akĩnhã mẽ kãm ja hã ijarênh mar nê ja hã ixpumunh prãm kêt. Ijaew pigêtjaja nê Tirtũm kapêr tũm o mẽ ahkre o mẽ pa xwÿnhjaja nê patre krãhtũmjaja mẽ kãm ja hã ixpumunh prãm kêt. Jakamã koja mẽ nhÿr mã ixpynê nê ixtak rax nê. Hãmri nê ixpĩ. Nom kot paj ixtak ã apkati axkrunêpxi nhũm Tirtũm akupÿm ixto ixtĩr. Anê.

Jejus krajaja tanhmã kot amnhĩ nhĩpêx to hã mẽ harênh

Matêwre 10.31, 16.24-28; Makre 8.34-9.1; Rukre 14.25-33; Juãw 12.24-26; mããnhên Karatas 5.24; Piriapos 2.4; Wam Pêtre 4.1-2; Apokarip 2.10-12

²³ Nhũm pre ã Jejus amnhĩ kukamã hkôtnê mã pa ho mẽ pa xwÿnhjê mã amnhĩ jarênh anê hãmri nê hpãnhã mẽ kot mar o kuhê xwÿnh piitã mẽ kãm kapêr nê mẽ kãm:

—E kot ka mẽ atõ ate ixkôtnê amnhĩ xãm ã amnhĩ jarê hãmri nê mããnhên ã amnhĩ jarênh anê nê amnhĩ jarênh o: “Jejus kêp inhõ Pahihti jakamã kot paj kapêr kôtnê pix mã amnhĩ nhĩpêx rãhã ho ri ixpa. Kwãr ixkwÿjaja tanhmã hã inhĩpêx to.” Anhÿr o apkati mẽ ã amnhĩ jarênh anê.

²⁴ —Koja mẽ ixtã mẽ atõx pĩ rÿ tanhmã mẽ atõ hto ka ty. Tã koja akaxwÿnh ma inhõ krĩ mex wÿr àpir kurê kumrêx. Hãmri nê kamã atĩr tũm nê amex rãhã apa ho apa. Nom kot kaj mẽ jar atĩr prãm xaj ixkaga hãmri nê hwÿr axàpir kêt nê.

²⁵ —Nê koja mẽhõ hikukrêx rax gryk ã Tirtũm kaga. Hã koja nhÿrmã ty nê ÿ kamã kuwy hwÿr ma mẽ nê amnhĩ kôtnê hikukrêx õ hpyr nê o mõi kêt nê. Koja tee ri kuwy hwÿr mõi pymaj amnhĩ nê hikukrêx rax o amnhĩ pãnhã amnhĩrer prãm kaprÿ.

²⁶ —Nê koja mẽhõ ixte mẽ ahkre hã inhma nhũm ja kêp omnuj nhũm ixkaga japêr. Hã kot paj nhÿrmã akupÿn mẽ ato amnhĩptãr kaxyw akupÿn wrÿ nê amnhĩ xwar kot ixkaga xwÿnhhta kaga. ãm hãmri na pa ã mẽ amã amnhĩ jarênh anê. Kot paj nhÿrmã man akupÿn inhõ Papaj nhÿ hã ixte mẽ ho amnhĩptãr kaxyw akupÿn wrÿ. Nhũm kapêr o mẽ wrÿk xwÿnhjaja man ixkôtnê wrÿ. Pa mẽ wrÿ hãmri nê mẽ kot ixkaga xwÿnhjaja pa amnhĩ pyrã nê mẽ hkaga. ²⁷ ãm hãmri na pa ã mẽ amã amnhĩ jarênh anê. Kot paj nhÿrmã akupÿn ixte mẽ ato amnhĩptãr kaxyw mẽ awÿr wrÿ. Tã kot kaj mẽ akwÿjaja kormã atĩr ri ja kukamã tanhmã ixte amnhĩ nhĩpêx to hã ixpumu. Anê.

Jejus kot kên prêk nhĩmõk ã hirã kamã ãm ã harênh

Matêwre 17.1-8; Makre 9.2-8; mããnhên Sikũn Pêtre 1.16-18

²⁸ Tã nhũm semãnja hapêx nhũm Jejus Simãw Pêtre nê Xiakre nê Juãw wa mẽ kãm kapêr nê mẽ kãm:

—E pu mẽ ma hixêtnê prêk mũj wÿr mẽ nê hwÿr api nê himõk ã Tirtũm mã amnhĩ jarê. Anê.

Hãmri nê ma amnhĩ kôtnê hwÿr mẽ o mẽ nê hwÿr mẽ ho api. ²⁹ Hãmri nhũm Jejus Tirtũm mã amnhĩ jarênh o xa. Nom nhũm hkôtnê hixêtnê wÿr mẽ mõi xwÿnhjaja õtxwa htÿx nê ra gõi nê hikwÿ. Pu nhũm Jejus axtem hkuk nê xa. Nê ê haka htÿx nê xa. Hãmri nhũm ja wa kaxkwa rũm wrÿ nê kuri kãm kapêr o xa. Finat Mojes mẽ finat Erisja wa kuri kãm kapêr o xa. Na pre ra amnepem Tirtũm amnhĩ wÿr wa ho api. Tã nhũm wa ra akupÿn wrÿ nê Jejus mã kapêr o xa. Mẽ hpimràatã hirã htÿx kãm axpên mã kapêr o kuhê. Jejus kormã krĩ pê Jerujarê kapem mẽ kot hprĩ kêt ri nhũm wa mẽ axpên mã htyk kukamã harênh o kuhê. Nhũm wa kãm:

—Nã Tirtũm jamaxpêr xà hkôtnê kot kaj ã amnhĩ nhĩpêx anê.

Anhÿr o Jejus tyk kukamã kãm hamaxpêr o hihtÿx o wa xa.

Rõm nhũm mẽ õt xwÿnhjaja hkrã hapõj nê tee ri Jejus pumu. Nhũm mex kumrêx nê hirã htÿx kãm xa nhũm mẽ omu nê kuri wa ãm xwÿnhhta wa omu.

³³ Hãmri nhũm Mojes mẽ Eris wa ra akupÿm nojarêtnê nhũm Simãw Pêtre tee ri ja hã wa omu nê Jejus mã kãm:

—Kwa Pahihti. Nã ãm hãmri na pu mẽ amnê mẽ. Kwa pu mẽ kritpêtnê jar axkamê nê tokyx panojarêtnê kêt nê. Pa mẽ amã põi nhĩrõnh o axkrunêpxi nê hipêx. Amã hõ nhĩpêx nê Mojes mã hõ nhĩpêx nê Eris mã hõ nhĩpêx ka mẽ kamã akrĩ. E kwa pa mẽ amã ho anê nã? Anê.

Nhũm amnhĩ krã hkôtnê ã kãm kapêr anê. ³⁴ Hãmri nê kormã kãm kapêr rõm nhũm kakrã jaka tÿxja wrÿ nê mẽ hkunor nhũm wa mẽ kamã kuhê. Hãmri nhũm Simãw Pêtre mẽ Juãw mẽ Xiakreja mẽ tee ri kakrã kot amnhĩ nhĩpêx ã omu nê kãm ma nê. ³⁵ Hãmri nhũm kakrã kamã Tirtũm mẽ kãm kapêr nê mẽ kãm:

—E ota Ixkra xa. Mẽ ate kamã ajamak o apa xwÿnhhta na. Inhmã hapêê. Kêr ka mẽ ãm tapxipix kapêr mar tÿx o ri apa. Anê.

³⁶ Hãmri nhũm mẽ kuma nê kãnhmã rĩt nê ãm Jejus pix pumu nhũm ahte xa. Nhũm kuri wa ãm xwÿnhhta wa ra ma akupÿm api nhũm mẽ Jejus pix pumu.

Mẽ tapxipixjaja na prem ã Jejus kot amnhĩ nhĩpêx anhÿr ã omu nom taxy kormã nhãm hkwÿjê mã harênh kêt nê. ãm axpên pix mã harênh pê hkukamã hamaxpêr o ri Jejus kôtnê pa.

Jejus kot mẽhõ nê mẽkarõmnuti janor ã harênh

Matêwre 17.14-21; Makre 9.14-29

³⁷ Tã nhũm apkati nhũm mẽ ma akupÿm ahparmã hkwÿjê hwÿr wrÿk o mẽ. Nê mẽ hwÿr hpõx o mẽ nhũm mẽ ra mẽ kutêp pikuprõnh rax nê kuhê. ³⁸ Hãmri

nhũm mēhō myja amnhī wỳr mē omu nē mē kutā tē nē mē hkaxpa nē Jejus pumu nē kām:

—Pa Jejus. Kwa ixkamā axukaprī nē inhmā ixkra ho mex. Ām ixpē pyxire. ³⁹ Na hte mēkarōmnuti xatā ixpē tanhmā ho nhũm ý hā amýra nē mra nē rōrōk nē haka-wa jamrō ho hikwý nhũm tokyx kām urer kēt nē. Nhũm ra ixpē homnuj tỳx nē. ⁴⁰ Hāmri pa akōt mē pa ho mē pa xwýnhjē hwỳr o tē nhũm mē kot inhmā ho mex kaxyw tee ri tanhmā ho hkaprý. Anē.

⁴¹ Hāmri nhũm kuma nē hkōt mē pa ho pa xwýnhjē mā kām:

—Hēxta waa nē. Na ka mē ra ixte Tirtũm nhỹ hā mē ho mex ā ixpumunh o ixkōt apa ryy tā kormā ixpyrā nē ā mē hipēx anhỳr kēt nē. Mān ka mē kormā mē kaxyw Tirtũm kōt ajamaxpēr tỳx kēt nē. Anē.

Hāmri nē myta mā kām:

—E amnē ixwỳr akra ho tē pa inhno ho omu. Anē.

⁴² Hāmri nhũm hwỳr o tē nhũm mēkarōmnuti axte kēp ho pika kura nhũm amýra nē tēm nē nō. Hāmri nhũm Jejus omu nē nē mēkarōmnuti kator nhũm akupým mex nē kànhmā nhỹ. Hāmri nhũm akupým hipéèxà mā kugō. ⁴³ Hāmri nhũm mē amnhī jaēr pē Jejus kot ā hipēx anhỳrja ā omu nē ri axpēn mā harēnh o:

—Kokýỹ. Hēxta waa nē. Pēr ām Tirtũmja ām àh-pumunh o àhpumunh. Anē.

Jejus kot htyk kukamā amnhī jarēnh

Matēwre 17.22-23; Makre 9.30-32

⁴⁴ Hāmri nhũm Jejus hkōt mē pa ho mē pa xwýnhjē mā kām:

—E kot paj mē amā tanhmā amnhī jarēnh to ka mē inhmar tỳx nē. Na pa pre mē ate aa mēmoj pumunh kēt kwý ho anhỳr o ixpa pix kaxyw mē awỳr ixwryk kēt nē. Koja mē tokyx mē kām ixtā amýnē nhũm mē ixpī. E kwa kēr ka mē ja ma nē hā anohtỳx nē ho apa. Anē.

⁴⁵ Hāmri nhũm mē tee ri kot ā amnhī jarēnh anhỳrja ma nē axpēn mā:

—Kwa mo na pēr ri ā amnhī jarēnh anē? Kēp mē panhō Pahi Maati hā kot amnhī jarēnh kēnā kot kēt mēhō kupī.

Anhỳr o axpēn mā ri harēnh o kuhē. Hāmri nē mē kām ā kot amnhī jarēnh anhỳrja mar prām kēt jakamā hprī hā tanhmā hā hkukjēr to hkēt nē. Ām akryk mar o kuhē.

Mē kot amnhī to rũnh xwýnhjē jarēnh

Matēwre 18.1-5; Makre 9.33-37; Rukre 22.24-27; määnēn Piripos 2.3-9; Wam Pētre 5.5

⁴⁶ Tā nhũm Jejus kōt mē pa ho mē pa xwýnhjaja tanhmā amnhī kukamā hamaxpēr to hāmri nē axpēn mā:

—Kwa mē pahtō kot puj we nhỹrmā pahpē pahi nē mē ho amnhīptār rax o pahkwý jakre? Anē.

Hāmri nē ja hā axpēn kukjēr o Jejus kōt mō nē axpēn mā: “Nà pa.” Nhũm mē hkwýja: “Nà kēt pa.” Anhỳr o hkōt mō. ⁴⁷ Hāmri nhũm Jejus mē kuma nē mē hamaxpēr kōt mē omu. Hāmri nē xa nē amnhī wỳr mēhprījē

mā hpa ho apē nhũm hwỳr tē nē kuri xa. ⁴⁸ Hāmri nhũm Jejus hkōt mē pa ho pa xwýnhjē mā tanhmā harēnh to nē mē kām:

—E mē inhma. Kēr ka mē apē pahi pyrāk o tanhmā amnhī jarēnh to ho ri apa hkēt nē. Ām te amarī ri mē apa pyrāk o amnhī nhīpēx o ri apa. Jao nhỹri mēhprīre hō pumu nē kamā axukaprī ho kām mēmoj tanhmā ho rý kām mēmoj gō. Hāmri nē te pa ate tanhmā ixto mex to pyrāk o amnhī nhīpēx. Nē kot ka mē atō pa tanhmā ixto mex to nē te ate Tirtũm tanhmā ho mex to pyrāk o amnhī nhīpēx. Kot kaj mē ā amnhī nhīpēx anhỳr o ri apa nhũm Tirtũm ja hā mē apumu nē mē ate amnhī to rũnh kēt tā nhũm tām mē ate amnhī to rũnh xwýnh ā mē ajarē. E kot kaj mē amā amnhī to rũnh prām nē ā amnhī nhīpēx anhỳr o ri apa. Anē.

Mēhō kot Jejus nhỹ hā tanhmā amnhī nhīpēx to hā harēnh

Makre 9.38-41

⁴⁹ Hāmri nhũm Jejus kōt mē pa ho pa xwýnhjē hō pē Juāwja nhỹhỹnh hwỳr hpōx o tē nē kām:

—Kwa Pahihti. O mỳj mēhō kēp mē pahkwý hkēt tā anhīxi jarēnh kōt mē nē mēkarōmnuti janor o pa. Pa mē tee ri kot ā amnhī nhīpēx anhỳr ā omu nē nē kām ixkapēr. Kēp mē pahkwý hkēt kēnā kot kēt ā mē hanor anhỳr o pa. Anē.

⁵⁰ Hāmri nhũm kuma nē kām:

—Kwa nà ja nē tanhmā kām nē hkēt nē. Kōja mēhō mē pahkwým ri tanhmā mē ahkre hto hkēt nē hāmri nē kēp mē panhīōō. Ra mē pahkōt kot amnhī nhīpēx o pa mā kēnā. Jakamā kwa mē ja nē tanhmā kām akapēr to hkēt nē. Kwār māmri ā amnhī nhīpēx anhỳr o ri pa. Ja mex kēnā. Anē.

Samar nhō xwýnhjaja kot Jejus kaga hā mē harēnh

Atre 8.14-15

⁵¹ Hāmri nhũm Jejus akupým kaxkwa hwỳr àpir kaxyw ra hwỳr apkati grēre ho mōr jakamā nhũm hamaxpēr o:

—E pa ma akupým Jerujarē hwỳr mō. Nà kot paj anē. Mē kot kamā tanhmā ixto mā tā kot paj ma akupým mē hwỳr mō. Anē.

⁵² Hāmri nē amnhī kukamā mē hkwýjē rē nhũm mē ma mē hkukamā Samar nhō krī kamā nhỹri mē kot amnhīm hikranh xà japēr o mō. ⁵³ Nom nhũm Samar nhō xwýnhjaja kēp Jerujarē nhō xwýnhjē hprām nōkati jakamā Jerujarē hwỳr mōr ā mē harēnh ma nē amnhī nē mē hkurē. ⁵⁴ Hāmri nhũm mē tee ri amnhī tā mē kuma nē awjanā nē akupým Jejus wỳr mra nē kām mē harē. Hāmri nhũm Juāw mē Xiakre wa mē harēnh ma nē mē kamā gryk nē nē Jejus mā:

—Kwa Pahihti. Nà na mē axtem nē amnhī nē mē pahkurē. Jakamā e kwa pu mē kaxkwa rùm mē hipy kuwy hpōk kwý rē kē mē hkaxār pa nà? Anē.

⁵⁵ Hāmri nhũm wa kuma nē wa kām:

—Tk. Kwa nà wa ajamaxpērja mex kēt. Pu mē ā ri mē hipēx anhỳr kēt nē. Kōja Tirtũm kām ja ho anhỳr prām nē rī tām tanhmā mē ho. No mē papajaja pu mē ri mē

kamã pagryk xàj tanhmã mẽ hipêx to hkêt nê. Pu mẽ ã mẽ hipêx anê nê ra amnhĩ tomnuj tỳx nê. Kwa wa ri ã ajamaxpêr anhỹr kêt nê. Anê.

⁵⁶ Hãmri nê mẽ ma Samar rûm hapôj nê hpãnhã nhãm krĩ hõ hwỳr pa.

Mẽ hkwyjaja kãm Jejus kôt pa hprãm ã mẽ harênh
Matêwre 8.18-22

⁵⁷ Tã nhũm Jejus mẽ kormã mõi ri nhũm mẽhõja hwỳr tẽ nê kãm:

—Pa Jejus? E kot paj ma akôt ixpa ho ixpa. Anê.

⁵⁸ Hãmri nhũm kuma nê kãm:

—Ko ka mã. Kam nê rĩ ma ixkôt ri apa ho apa. Nom kêr ka inhmar kumrêx nê rĩ kormã ixkôt apa. Na hte xore pika hkre kamã hikwỹ xà. Nê kuwênhre pĩ nhĩmõk ã hikwỹ xà. No pa na Tĩrtũm kot mẽ awỳr inhmênh xwỳnh tã jajê hkĩnhã inhõrkwỹ hkêt. Na pa hte ãm nhãm krĩ hõ hwỳr ixpa nê nhãm ixpa. Tã xà kot kaj ixpyrà nê ã amnhĩ nhĩpêx anhỹr o ri apa nà? Anê.

⁵⁹ Nhũm pre ã kãm kapêr anê hãmri nê nhãm mẽhõja wỳr apkjê nê kãm:

—Pa? No ka? Xà kot ka ma ixkôt apa ho apa nà? Anê. Hãmri nhũm kãm:

—Tỳ no ãm kormã. Koja nhỹrmã inhĩpêêxàja tanhmã amnhĩ to nê ty mãn. Pa haxà hãmri nê rĩ kormã ma akôt ixpa ho ixpa. Anê.

⁶⁰ Hãmri nhũm Jejus kuma nê kãm:

—Kwa nà ri ã ajamaxpêr anhỹr kêt nê. Ma ixkôt apa ho apa kurê kumrêx. Kê mẽmoj ano kupy rỳ inhnê apê amnàr kêt nê. Kwãr mẽ htĩr tũm nê mẽ pa hkêt mã xwỳnhjaja mãn axwakre kamã amã anhĩpêêxà jamãr o pa nhũm nhỹrmã ty kê mẽ amã haxà. Ka mãmrĩ ma Tĩrtũm kapêr o mẽ ahkre ho ri mẽ hkôt apa. Kê mẽ ama nê mẽ hkwyjaja hkôt amnhĩ xunhwỳ nhũm mẽ ho hkra. Anê.

⁶¹ Nhũm pre ã kãm kapêr anê hãmri nhũm nhãm mẽhõ myja haxwỳja hwỳr tẽ nê kãm:

—E. Pa kot pa ma akôt ri ixpa ho ixpa. Nom kormã. Pa ma akupỹm tẽ nê ixkwỳjê mã amnhĩ jarê nê tanhmã amnhĩ to hpa mãn. Hãmri nê mẽmo arĩgro hã rĩ kormã ma akôt ixpa ho ixpa. Anê.

⁶² Hãmri nhũm tee ri kuma nê kãm:

—Kwa nà. Kot kaj ã ajamaxpêr anê hãmri nê ixkôt apa htã te amnhĩ katut kôt arĩt rãhã ho ri apa pyrãk o amnhĩ nhĩpêx. Kwa ã ajamaxpêr anhỹr kêt nê ma ixkôt apa kurê kumrêx. Anê.

Jejus kot mẽ hwỳr mẽ kêp 72 rênh ã harênh

Matêwre 10.1, 10.5-15; Makre 6.7-13; Rukre 9.1-6, 9.10-11; mããnêh
Atre 13.50-51, 18.6

10 Tã nhũm Jejus axte amnhĩ kaxyw mẽ ho 72 nê mẽ kurê. Hãmri nê mẽ ho axkrut kapên nê ma nhỹhỹm krĩ hkwy hkôt amnhĩ kukamã mẽ kurê. Mẽ kot mẽ hkôt ri Tĩrtũm kapêr o mẽ ahkre ho pa kaxyw.

² Hãmri nê mẽ kãm:

—Na mẽ ohtô rax nê kormã Tĩrtũm kapêr mar kêt nê. No ãm kormã mẽ ate mẽ kãm harênh o apa kaxyw mẽ agrêre. Te pur kãm harôj kamrêk pa nê ãm tã no

ãm kaxyw hikênh xwỳnh grêre pyrãk. Jakamã kwa mẽ ho Tĩrtũm wỳ kê axte mẽ kaxyw mẽ hkwyjê rê.

³ —E kot paj ma mẽ hwỳr mẽ arê. Ma mẽ hkôt mẽ ate Tĩrtũm kapêr o mẽ ahkre ho ri apa kaxyw. Jakamã kot kaj mẽ te ate ôwêhti kot mry xoprê hwỳr amnhĩ to mrrar nhũm kot hkwy hpar pyrãk o amnhĩ nhĩpêx. Koja mẽ hkwyjaja mẽ ate mẽ ahkre ma nhũm ja mẽ kêp omnuj nê nhũm mẽ hã tanhmã mẽ anhĩpêx to. Tã kêr ka mẽ tee ri amnhĩ kukamã ajamaxpêr nê amã mẽ uma hkêt nê.

⁴ —Nê kêr ka mẽ hwỳr anojarêr nê amnhĩ kôt amryka rỳ akawà rỳ aparkà hõ ho apa hkêt nê. ãm anhỹ kamã ma mẽ hwỳr apa. Nê mẽ hwỳr mra nhũm mẽ nhỹri pry hã mẽ atõ kaxpa nê amã kapêr o xa ka wa axpên mã akapêr ry hkêt nê. Anojarêr kãm kãm akapêr krãnre nê mẽ hakre nê ma krĩm pa.

⁵ —Nê kêr ka mẽ hwỳr pøj nê nhỹri mẽ õrkwỹ hwỳr agjê nê mẽ kãm: “Xà kot paj mẽ ato Tĩrtũm wỳ kê mẽ ato mex nê ka mẽ ajamakêtkati nê ri apa?” Anê. ⁶ Hãmri nhũm mẽ ama nhũm ja mẽ kãm mex japêr nhũm mẽ hkĩnh nê amã: “ÿ kam nê mãmrĩ mẽ ixto awỳ.” Anê. Hãmri ka mẽ ama nê tanhmã mẽ ho Tĩrtũm wỳr to. No koja mẽ apê ja kaga ka mẽ ho hwỳr kêt nê.

⁷ —Nê kêr ka mẽ nhỹri mẽ õrkwỹ kamã mẽ hwỳr pøj hãmri nê mẽ hkôt ri apikamênh tãmtã nê akupỹm mẽ kurũm ajapôj nê ma hpãnhã krĩ hõ hwỳr apa. Nê mẽ axàmnhĩx mẽ kuri axàpkur o ri apa. Mẽmoj to akõm o ri apa. Ra mẽ ate mẽ ho mex pê mẽ kãm Tĩrtũm kapêr o mẽ ahkre ho apa kênã. Jakamã kwãr mẽ mãmrĩ amnhĩ pãnhã mẽ amã mẽ axàpkur xà gõ ka mẽ kuri mẽ apku.

⁸ —Nê kêr ka mẽ nhỹri mẽ hwỳr pøj nhũm mẽ ato mex nê. Nê mẽ amã mẽmo mẽ apkur xà gõ ka mẽ mãmrĩ axàmnhĩx aku. Aa kormã mẽ ate mẽmojta kur kêt tã mãmrĩ ajamakêtkati nê aku. No tee ri amnhĩ kukamã tanhmã ajamaxpêr to hkêt nê.

⁹ —Nê kêr ka mẽ ã mẽ kãm akapêr anê nê mẽ kãm: “Tĩrtũm kãm mẽ ato hkra hprãm. Na hte amnhĩ wỳr mẽ awỳ.” Anê hãmri nê akupỹm mẽ kãm mẽ à xwỳnhjê ho mex. ã kot kaj mẽ mẽ kãm amnhĩ nhĩpêx anhỹr o ri mẽ hkôt apa.

¹⁰ —Nê kêr ka mẽ nhỹri mẽ hwỳr pøj nhũm mẽ ãm mẽ apumu nê amnhĩ nhõrkwỹ hwỳr mẽ awỳr kêt japêr. Hãmri ka mẽ tee ri amnhĩ tã mẽ omu hãmri nê ra ma nhãm apa kaxyw. ¹¹ Hãmri nê anojarêr nê mẽ kãm: “E mẽ inhma. Tĩrtũm kot mẽ pahwỳr mênh xwỳnhnta na mẽ awỳr wa inhmê pa wa mẽ awỳr mõi. Wa ixte Tĩrtũm kapêr o mẽ ajahkre kaxyw. Kãm mẽ ato hkra hprãm nhũm wa ixte mẽ amã harênh kaxyw na pa pre wa ã mẽ awỳr inhmõi anê. Tã ka mẽ harênh ma nê wa ixkaga. Jakamã kot paj wa jar mẽ anhõ krĩ kamã amnhĩ par kà hã awjagrô kapĩ. Mẽ ate Tĩrtũm kaga hã amnhĩ pumunh nhũm Tĩrtũm kot amnhĩ pyrã nê mẽ akaga hã mẽ ate omunh kaxyw kot paj wa mẽ anoo mã ã amnhĩ par kà hã awjagrô kapĩr anê. Kot kaj mẽ nhỹrmã tee ri ã amnhĩ nhĩpêx anhỹrja mã ajamaxpêr nê akapĩr htỳx kumrêx kãm ga. ãm hãmri na pa wa mẽ amã ja jarê.”

Anhÿr o mẽ kãm akapër nẽ mẽ kęp ajapôj nẽ ma hpãnhã nhãm krĩ hõ hwÿr apa kurẽ kumrẽx.

¹²—Koja nhÿrmã Tirtũm mẽ kot amnhĩ tomnuj mÿrapẽ tanhmã mẽ ho. Na pre ra ã krĩ pẽ Sotõ nhõ xwÿnhjẽ nhĩpẽx anẽ. Na prem amnhĩ tomnuj tÿx o pa nhũm Tirtũm tanhmã mẽ kot amnhĩ tomnuj tÿx ã tanhmã mẽ ho. Tã jar mẽ kot kãm ixkapër mar prãm kêt nẽ mẽ kot ixkaga xwÿnhjaja. Koja Tirtũm ixtã mẽ omu nẽ kot Sotõ nhõ xwÿnhjẽ nhĩpẽx pyrãk o mẽ hipẽx nom tanhmã mẽ ho htÿx o mẽ hakre.

—E kęp ka mẽ ma krĩ hkwÿ hkõt apa nẽ ã mẽ kãm akapër anhÿr o ri apa. Anẽ.

Mẽ kot Tirtũm kõt hamaxpër kêt xwÿnhjẽ jarẽnh

Matêwre 11.20-24

¹³Tã nhũm Jejus krĩ hkwÿ nhõ xwÿnhjẽ mã kapër o xa nẽ mẽ kot amnhĩ tomnuj ã mẽ kãm akir. Krĩ pẽ Korajĩ mẽ Pesěj nhõ xwÿnhjẽ kumrẽx mã kapër nẽ mẽ kãm:

—E mẽ inhma. Amnepêm krĩ pẽ Sitõ mẽ Xir wa kamã mẽ pa xwÿnhjaja na prem tanhmã amnhĩ tomnuj tÿx to ho pa nhũm Tirtũm mẽ omu nẽ hã mẽ homnuj tÿx nẽ. Tã kwa mẽ o kora Korajĩ mẽ Pesěj wa kamã mẽ apa xwÿnhjaja. Ra ixte mẽ amã mẽ ate mẽmoj pumunh kêt o anhÿr rax o ixpa htã ka mẽ omu nẽ arĩ amnhĩ tomnuj o ri apa nẽ tokyx amnhĩ tomnuj kaga hkêt nẽ. Jakamã kot kaj mẽ amex kêt nẽ. Kop apu Sitõ rÿ Xir kamã mãn ixte mẽ kãm aa mẽ kot mẽmoj pumunh kêt kwÿ ho anhÿr o ri ixpa ronhÿx mẽ omu nẽ mẽ arom amnhĩ kaxyw ixkõt hamaxpër kurẽ kumrẽx. Nẽ tee ri tanhmã amnhĩ tomnuj to ho pa hã amnhĩ pumu nẽ hkaprĩ nẽ ã amnhĩ nhĩpẽx anhÿr kaga hpa. No mẽ kajaja na pa tee ri mẽ amã tanhmã amnhĩ nhĩpẽx to ho ri ixpa kaprÿ. Ka mẽ ja hã ixpumu nẽ ãm ixpumu nẽ amnhĩ tomnuj kaga hkêt nẽ. Tã koja nhÿrmã Tirtũm mẽ piitã mẽ kot amnhĩ tomnuj mÿrapẽ tanhmã mẽ hipẽx to. Hãmri nẽ tanhmã Sitõ mẽ Xir wa kamã mẽ pa xwÿnhjẽ jarẽnh to nhũm mẽ kot amnhĩ tomnuj mÿrapẽ amnhĩ xà htÿx kamã hamak o ri pa. No mẽ kajaja mẽ ate amnhĩ tomnuj tÿx o mẽ hakrenh jakamã koja Tirtũm mẽ hkĩnhã mẽ atomnuj tÿx o mẽ atomnuj tÿx. Ka mẽ amnhĩ xà htÿx kamã ajamak rãhã ho ri apa ho apa. Anẽ.

¹⁵Nhũm pre ã Jejus mẽ kãm kapër anẽ. Hãmri nẽ hpãnhã Kapanaũ nhõ xwÿnhjẽ mã kapër nẽ mẽ kãm:

—No mẽ apẽ Kapanaũ nhõ xwÿnhjaja. Kot kaj mẽ ajaxwÿja mẽ amex kêt nẽ. Mẽ ate amnhĩ tomnuj kagare pyrã nẽ Tirtũm nhõ krĩ hwÿr akra ho apa. Nom kot kaj mẽ atõ hwÿr axãpir kêt nẽ. Kot kaj mẽ ma kuwy maati hwÿr ajapẽx pa kãm ga.

¹⁶Anhÿr o mẽ kãm kapër hãmri nẽ hpãnhã hkõt mẽ pa ho mẽ pa xwÿnhjẽ mã kapër nẽ mẽ kãm:

—Kot kaj mẽ Tirtũm kapër o mẽ ahkre ho ri apa nhũm mẽhõ ama nẽ akapër kõt amnhĩ nhĩpẽx. Hã koja te pa kot ixkõt amnhĩ nhĩpẽx pyrãk o amnhĩ nhĩpẽx. No koja amar kêt nẽ akaga hãmri nẽ te pa kot inhmar kêt nẽ ixkaga pyrãk o amnhĩ nhĩpẽx. Jao mãänen Tirtũm kaga.

Anẽ hãmri nhũm mẽ kuma hãmri nẽ anhgrã nẽ axkrut kapẽn nẽ ma ahpÿnhã krĩ hkõt anhgrã.

Mẽ hkĩnh nẽ ri mẽ pa xwÿnhjẽ jarẽnh

Apokarip 3.5

¹⁷Tã nhũm mẽ kęp 72jaja krĩ hkwÿ rũm akupÿn Jejus wÿr pøj. Piitã hkĩnh nẽ hpõx pa. Hãmri nẽ kãm:

—Kwa Pahiiti. Na pa prem anhÿ hã mẽ nẽ mẽkarõmnuti japõx rax nẽ. Na pa prem mẽ nẽ mẽ hano nhũm mẽ ãm mẽ kurũm hapõx kurẽ kumrẽx. Anẽ.

¹⁸Hãmri nhũm mẽ kuma nẽ mẽ kãm:

—Tõe. Ixãhpumunh tÿx o ixte Satanasti jakrenh jakamã na ka htem inhÿ hã mẽ hano nhũm mẽ tee ri mẽ akutã hihtÿx prãm. Hãmri nẽ te na haxẽnh prẽprẽk pyrãk o amnhĩ nhĩpẽx nẽ mẽ kurũm hapõx kurẽ kumrẽx pa ja hã mẽ omu. ¹⁹Mẽkarõmnuti te kot kagã xoprẽ rÿ te kot makre pyrãk. Tã ra ixte mẽ amã ixãhpumunh tÿx xà hkwÿ nhõr jakamã na ka prem mẽ kãm akapër nhũm mẽ tee ri akutã tanhmã amnhĩ tÿx to hprãm. Tã koja Satanasti tee ri mẽ ate nhÿrmã Tirtũm mẽ wa ixri atĩr tũm nẽ apa pymaj tanhmã mẽ ano kupyri to kaprÿ. Ra Tirtũm kot õ kagã kamã mẽ atĩr tũm nẽ mẽ apa kaxyw mẽ anhĩxi hã kagã kẽnã. Jakamã kwa mẽ jam ajamaxpër o akĩnh nẽ ajamakêtkati nẽ ri apa. No kêt mẽkarõmnuti kot mẽ akapër mar nẽ mẽ kurũm hapõxta ã mẽ omunh xà hkõt pix mã akĩnh nẽ ri apa hkêt nẽ. Anẽ.

Jejus kĩnh kãm kot Hipêêxã mã amnhĩ jarẽnh

Matêwre 11.25-27

²¹Tã nhũm Tirtũm Karõ tanhmã Jejus to nhũm ÿ hã hkĩnh nẽ xa. Hãmri nẽ Tirtũm mã kapër nẽ kãm:

—Pa Papaj? Nã apẽ mẽ xpiitã mẽ inhõ Pahi Maati na ka. Pikap ri mẽ pa xwÿnhjaja nẽ kaxkwa kamã mẽ pa xwÿnhjaja apẽ mẽ xpiitã mẽ inhõ Pahi Maati na ka. ãm hãmri na ka hte amnhĩ nhĩpẽx mex o ri apa. Na ka hte mẽ àhpumunh tÿx ã mẽ kot amnhĩ jarẽnh xwÿnhjẽ mã axãhpumunh tÿx o amnhĩrĩt kêt nẽ. ãm mẽ àhpumunh kêt ã mẽ kot amnhĩ jarẽnh xwÿnhjẽ pix mã na ka hte ja ho amnhĩrĩt nhũm mẽ tapxipixjaja ja hã apumu. ãm hãmri na ka hte amã hprãm xà hkõt ã mẽ piitã mẽ hipẽx anhÿr o ri apa. Jakamã mẽ kot amnhĩ to hkrye xwÿnh pixjaja na htem ate amnhĩ nhĩpẽx ã apumunh o pa.

²²—Na ka pre inhĩhkra kamã mẽmoj piitã haxàr pa. Ixte ho amnhĩptàr o ri ixpa kaxyw. Jakamã kapxipix na ka hte ixpẽ akra hã ixpumunh par. No jar ri mẽ pa xwÿnhjaja na mẽ kot ja hã ixpumunh kêt. Nẽ mãänen papxipix na ixte ate tanhmã amnhĩ nhĩpẽx to hã apumunh par. Jakamã na pa hte ã amnhĩ nhĩpẽx anẽ nẽ inhã hprãm xà hkõt mẽ hkwÿjẽ mã ato amnhĩrĩt o ri ixpa nhũm mẽ ixpyrà nẽ ate tanhmã amnhĩ nhĩpẽx to ho apa hkõt apumu. Anẽ.

Jejus kõt mẽ pa xwÿnhjaja kot hkõt omunh o pa hã mẽ harẽnh

Matêwre 13.16-17

²³Nhũm pre Jejus ã Tirtũm mã amnhĩ jarẽnh anẽ hãmri nẽ hpãnhã hkõt mẽ pa ho mẽ pa xwÿnhjẽ mã kapër nẽ mẽ kãm:

—E na ka htem ixkôt mě ano ho ixte tanhmã amnhĩ nhĩpêx to hã ixpumunh o ri apa. Nê mě ajamak o ixkapêr mar o ri ixkôt apa. No amnepêm mě akukamã pahijaja nê Tirtũm nhỹ hã kapêr jarênh o ri mě pa xwýnhjaja kãm ixpumunh prãm tỳx o pa htã mě akĩnhã ixpumunh kêt rãhã htyk pa. Kormã ixwryk nê jar ixkator kêt jakamã na prem ixpumunh kêt rãhã ty. Nê mě kãm ixkapêr mar prãm tã mě akĩnhã ixkapêr mar kêt nê. Ām mě kapxipixjaja na ka mě mỳr pê ixte amnhĩ nhĩpêx ā ixpumunh nê ixkapêr mar o ixkôt apa. Tã mě kurom mě ate ano ho ixpumunh nê ajamak o ixkapêr mar jakamã kwa mě ja hã amnhĩ pumu nê tãm amnhĩ nhĩpêx o akĩnh nê ri apa. Anê.

Samar nhõ xwýnh jarênh

Matêwre 22.34-40; Makre 12.28-34; mãänēn Wam Juãw 3.17-18

²⁵ Tã nhũm Tirtũm kapêr tũm o mě ahkre o mě pa xwýnhja Jejus wỳr tẽ nê hêx rom kot kamã hamak kaxyw kãm:

—Pa? E kwa inhmã mēmoj jarē. Tanhmã kot paj we nhỹrmã Tirtũm ri ixťir tũm nê ixpa kaxyw amnhĩ nhĩpêx to wehe? Anê.

²⁶ Hãmri nhũm kãm:

—Tanhmã na ka hte Tirtũm kapêr ā kagã htũm kot mẽ hťir tũm nê pa hã kagã kamã harênh nê mar to? Anê.

²⁷ Hãmri nhũm kãm:

—Nã harênh kot:

Kêr ka mẽ anhĩ piitã ho amã Tirtũm kĩnh o ri apa. Mě amã hkĩnh tỳx o mēmoj piitã hakrenh par o ri apa.

Nê kêr ka mẽ amã mẽ piitã hã ma ho te ka amã amnhĩ tã ma pyrãk o mẽ hipêx o ri apa. Jao tãm mẽ hipêx o ri apa. Anê.

Ā Tirtũm kapêr ā kagã htũm kamã ja jarênh kot anhỹr. Anê.

²⁸ Hãmri nhũm Jejus kuma nê kãm:

—Tỳ. Nã Ām hãmri na ka harē. Kot kaj ā mẽ hipêx anhỹr o ri apa nê nhỹrmã Tirtũm mẽ wa ixri atĩr tũm nê apa ho apa. Anê.

²⁹ Hãmri nhũm kuma nom kãm mẽ piitã mẽ ho mex prãm kêt nê. Ām amnhĩ kwý pixjaja nhũm kãm mẽ ho mex o pa hprãm. Jakamã hêx rom kãm:

—Kwa no mēmojaja kot pa we ri ā mẽ hipêx anhỹr o ri ixpa? Xà mẽ pahkwý pê Ijaew pixjaja nã? Anê.

³⁰ Hãmri nhũm kuma nê tanhmã kãm ujarênh to. Nom hã kuxi nê kãm awjarē nê kãm:

—E pa amã awjarē ka inhma. Koja Ijaew nhõ xwýnhja ma Jerujarē rũm Jeriko hwỳr ahpar mã ma mō. Mōõ nhũm ra mẽ ahkĩnh xwýnhjaja kutã mra. Hãmri nê pry kahti ri hwỳr kato nê unê nê htak rax nê. Nê kêt ê hk-wrynh pa nê ma kurũm hprõt nê mra nê akunok nhũm mẽ kot htak o hkã rênh rãhã ra htyk kaxyw nê nõ.

³¹ Hãmri nhũm patreja tẽ nê omu. No Ām omunh o hãnh tẽ nê hkupu nê ma tẽ. Urãk nê kêt Ijaew tã Ām omu nê tanhmã ho ajuta hto hkêt nê hãnh omunh o tẽ nê hkupu nê ma tẽ. ³² Hãmri nhũm patre ho ajuta xwýnhja mãänēn tẽ. Nê patre pyrã nê omu nê Ām omu

nê hkupu nê ma tẽ. Urãk nê kêt Ijaew tã omu nê Ām omu nê hkupu nê ma tẽ.

³³ —Tã nhũm Samar nhõ xwýnhja mãänēn mō. Samar nhõ xwýnhjê mẽ Ijaew na prem kãm axpên kĩnh kêt tã nhũm mō nê omu nê kamã ukapří nê. Kêt Ijaew ā omunh tã tee ri omu nê kamã ukapří nê.

³⁴ Hãmri nê hwỳr tẽ nê omu nê kãm mẽ kot htak o hkã rênh xà kane nê kãm hkupu pa. Hãmri nê kãnhmã Ām nê hkrit jumēnre hã kumē nê ma nhỹri mẽ kot amnhĩm hikranh xà hã ixkre hwỳr o mō nê hwỳr o pōj. Hãmri nê omunh mex o apkati. ³⁵ Hãmri nê akupým nojarêt nê kãxpore hwý jamý nê o tẽ nê kot mẽ kãm õ xwýnhja mã kugõ nê kãm: “E kot paj hãmri ma mō. Ota ixkãxporeta. Kêr ka inhmã ā xwýnhta tãnopxar mex nê. Nê inhmã omunh mex kê akupým mex. Koja kãxporeja apê grire hã kot paj nhỹrmã akupým mō nê axte hkôt amã hkwy gõ.” Anhỹr o kãm kapêr nê ma akupým mō. Ā mẽ ujarênh kot anhỹr. Anê.

³⁶ Nhũm pre ā Jejus kãm ujarênh anê. Hãmri nê kãm:

—E nhỹ na pre kãm mẽ kot htak xwýnhta kapří ho te tãm kãm amnhĩ tã ma pyrãk wehe? Anê.

Hãmri nhũm Tirtũm kapêr tũm o mẽ ahkre xwýnhta kãm:

—Nã kot kamã ukapří xwýnhta na pre omu nê kamã ukapří nê ho mex o te tãm kãm amnhĩ tã ma pyrãk o hipêx. Anê.

³⁷ Hãmri nhũm Jejus kãm:

—Tỳ. Nã Ām hãmri na ka harē. Urãk nê kêt Ijaew kêt tã kamã ukapří nê ho mex nê. Tã kêr ka urãk nê ā mẽ piitã mẽ hipêx anhỹr o ri apa. Urãk nê mẽ kêt akwý hkêt tã mẽ kamã axukapří ho ri apa. Anê.

Jejus kot Matre mẽ Marir wa hwỳr mōr ā harênh

Rukre 12.29-31

³⁸ Tã nhũm Jejus krĩ rũm kato hãmri nê hkôt mẽ pa ho mẽ pa xwýnhjê mẽ mẽ ma nhãm krĩ hõ hwỳr mō. Mōõ nê hwỳr pōj. Hãmri nhũm Matre mẽ omu nê amnhĩ nhõrkwy hwỳr mẽ kuwý nhũm mẽ ma hwỳr mō nê õrkwy hwỳr pōj. ³⁹ Hãmri nhũm Jejus mẽ ahkre ho nhỹ nhũm Matre htõx Marirja arĩ hpar pê mar o nhỹ.

⁴⁰ Hãmri nhũm Matre mẽ hwỳr axà nê omu. Nê tee ri àpênh rax kukamã hamaxpêr nê Jejus wỳr tẽ nê kãm:

—Xê ma Pahihti. Kormã ixàpênh rax tã nhũm Marir ixto ajuta hkêt nê. Ām akapêr pix mar gryk ā ixkôt htēm nê ixto ajuta hkêt nê. Pa ahte mẽ panhõ hã ixàpênh o xa. Xà amã ja mex? Xê kãm anê kê tokyx ixkôt tẽ pa wa hã axkrut nê mẽ panhõ hã ixàpênh tokyx anê. Anê.

⁴¹ Hãmri nhũm tee ri kuma nê kãm:

—Kwa Matre. Na ka Ām mẽ panhõ pix kukamã ri aja-maxpêr nê gryk ā tee ri amnhĩ nhĩpêx. ⁴² Ām hãmri na Marir kãm ixkapêr mar prãm nê. Jakamã kot paj ri amnhĩ nê akôt hanor kêt nê. Anê.

Mě pahte tanhmã Tirtũm mã amnhĩ jarēnh to hã mẽ pamã karõ

Matêwre 6.9-13, 7.7-11

11 Tã nhũm apkati hõ hã nhũm Jejus nhỹri Tirtũm mã amnhĩ jarēnh o nhỹ. Nẽ kãm amnhĩ jarēnh pa nhũm hkõt mẽ pa ho mẽ pa xwýnhjaja kot kãm amnhĩ jarēnh ã omu nẽ hwýr mra nẽ kãm:

—Kwa Pahihti. Amnhĩ pyrã nẽ mẽ ixte Tirtũm mã amnhĩ jarēnh kaxyw tanhmã mẽ ijahkre hto. Kêr pa mẽ apyrã nẽ tanhmã kãm amnhĩ jarēnh to ho ri ixpa. Na pre finat Juãw Paxisja hkõt mẽ pa ho mẽ pa xwýnhjê mã ja jahkre nhũm mẽ kuma nẽ tãm kãm amnhĩ jarē. E kwa mẽ inhmã tanhmã ja jahkre hto nã? Anẽ.

² Hãmri nhũm mẽ kãm:

—Tõe. Nã kêr ka mẽ kãm amnhĩ jarēnh kaxyw nẽ mãmri amnhĩ krã hkõt tanhmã kãm amnhĩ jarēnh to. Rý kãm amnhĩ jarēnh o:

Pa Měinhĩpêêxã maati? Nã amex o amex Tirtũm.

Apê mẽ ijamãr mex xwýnh maati na ka.

³ Nẽ kwa kêr ka apkati mẽ mẽ inhmã mẽmo gõ pa mẽ akukwak ri ho ixãpkur o ri ixpa.

⁴ Nẽ na pa hte tõhã amnhĩ tomnuj nẽ Tirtũm. Nom mẽ kot tanhmã ixtomnuj to xwýnhjaja na pa hte ãm mẽ omu nẽ amnhĩ tã tanhmã mẽ ho hkêt nẽ. Nẽ ja ho ijamakêtkati kurê kumrêx. ã na pa hte amnhĩ nhĩpêx anhýr o ri ixpa.

Jakamã kwa kêr ka ja hã ixpumu nẽ ixpyrã nẽ ixte tanhmã amnhĩ tomnuj to hã ixpumu nẽ hã tanhmã ixto hkêt nẽ. ãm ho ajamakêtkati kurê kumrêx nẽ axte kãm ajamaxpêr kêt nẽ.

Nẽ kot paj tanhmã amnhĩ tomnuj to kaxyw japêr ka ja hã ixpumu nẽ ixte ã amnhĩ nhĩpêx anhýrja nẽ ixto htýx nẽ pa ja ho anhýr kêt nẽ.

E ãm ja pix na hapêx. Anẽ.

E kêr ka mẽ ã Tirtũm mã amnhĩ jarēnh anhýr o ri apa. Anẽ.

Mě pahte amnhĩ to Tirtũm wýr rãhã hã mẽ pamã karõ

Matêwre 7.7, 15.21-28; Makre 11.24; Rukre 18.1-8; Juãw 14.13-14; mãänñen Rõmãn 12.12; Epes 6.18; Wam Tesarõn 5.17-18

⁵ Nhũm Jejus arĩ hkõt mẽ pa ho pa xwýnhjê jahkre ho nhỹ nẽ mẽ kãm:

—Nẽ ja. Koja mẽ akrãmnhwýjê hõ. Nhũm kõt ã kamàt nhũm nhỹhýnh awýr mõn pøj. Ka anhõ mẽmoj kêt hãmri nẽ anhĩjuk ri akrãmnhwý hwýr tẽ. Hãmri nhũm ra amnhĩ tã kahê nẽ nõ. Ka tee ri omu hãmri nẽ hakwa krem xa nẽ kãm akapêr nẽ kãm: “Pa ixkrãmnhwý. Na ka mẽ ra gõr? Kwa kãnhmã nhỹ nẽ inhmã anhõ mẽmoj japêr. Na ra ham ixkrãmnhwýta mõn pøj. Nẽ kãm prãm týx nẽ mõ nom kaxyw inhõ hkêt. Kwa kãnhmã nhỹ nẽ inhmã anhõ mẽmoj japêr nẽ inhmã hkwy pa ma o tẽ kê kukrê. ãm inhõ hkêt kumrêx. ãm hãmri na pa amã amnhĩ jarē. Kwa tokyj kãnhmã nhỹ nẽ inhmã mẽmoj japêr nã?” Anhýr o kãm akapêr.

⁷ Hãmri nhũm ama nom kãm kãnhmã ýr prãm kêt nẽ. Nẽ amã: “Tk. Nã ra mẽ ixte amnhĩ tã kahê hpar nẽ inhĩkwý kênã kot pa kêt kãnhmã nhỹ nẽ amã mẽmoj

japêr.” Anẽ. ⁸ Ka tee ri ama nẽ xatã kãm: “Kwa ã inhĩpêx anhýr kêt nẽ ixkrãmnhwý. Kwa tokyx.” Anhýr o xa. Nẽ xatã kãm anojarêt o xa. Hãmri nhũm ra kãm amar kaga hãmri nẽ tã kãnhmã nhỹ nẽ amã ate ho presija xwýnhta gõ. No ãm kêp akrãmnhwý hã ate hã axãhwýr tipxi hã amã õr kêt nẽ. ãm xatã ate ho presija htýx xwýnhja mã hamaxpêr nẽ tã kãnhmã nhỹ nẽ amã kugõ. ã mẽ ujarēnh kot anhýr.

⁹ —Tã kêr ka mẽ ja pyrã nẽ amnhĩ to Tirtũm wýr rãhã ho ri apa nhũm ama nẽ ate mẽmoj tã hwýrta amã kugõ. ãm xatã ate hã axãhwýr o ri apa nhũm amã kugõ. ãm mẽmoj to hwýr rãhã ho ri apa nhũm ama hãmri nẽ amã mẽmoj tanhmã hipêx to. Te ho mēhõ kãm tep xành nẽ gõx kãm xatã tep rēnh xà rēnh o ãm pyrã nẽ xatã mẽmoj tã hwýr o ri apa. Hãmri nhũm ama nẽ amã hprãm xwýnhta gõ. Te ho tep kanhêr xwýnhta tã kot tep õ kanhêr pyrãk o anhĩpêx nẽ amã mẽmoj prãm xwýnhta gõ. Anẽ.

Tirtũm kot hkrajê mã mẽmoj mex nhõr ã harēnh

Makre 7.9-11

¹¹ Nhũm Jejus arĩ hkõt mẽ pa ho mẽ pa xwýnhjê jahkre nẽ mẽ kãm:

—Nẽ xà koja akra kãm tep xành nẽ hã awý ka ama nẽ axtem nẽ kãm kagã xoprê hõ py nẽ agõ? ¹² Rý nhũm krãhyre gre hã awý ka axtem nẽ kãm makre hõ py nẽ agõ? Nã na ka htem ã akrãjê nhĩpêx anhýr kêt nẽ. Na ka htem mẽ kot mẽmoj tã ãhwýr xà hkõt kãm mẽmoj gõ. ¹³ Mẽ kamjaja mẽ ate amnhĩ tomnuj o ri apa htã ka htem akrãjê ho mex o ri apa. Tã kaxkwa kamã Tirtũmja na hte mẽ pahto mex o mẽ ate mẽ akrãjê ho mexta jakrenh. Kãm mẽ pajapê htýx kõt na hte mẽ pamã mẽmoj mex nhõr o pa. Nẽ mãänñen amnhĩ Karõja na hte mẽ pamã kugõ. Jakamã kot kaj mẽ atõ Karõ hã awý nhũm ama nẽ awýr kumẽ nhũm wrý nẽ akarõ mã axã. ã na hte Tirtũm kãm mẽ pajapê xãj mẽ pamã mẽmoj mex nhõr o pa anẽ. Anẽ.

Jejus mẽ Satanasti wa harēnh

Matêwre 12.22-32; Makre 3.20-30

¹⁴ Tã nhũm Jejus nhỹri axte mēhõ nẽ mẽkarõmnuti kator. Na pre ra mẽkarõmnuti tanhmã ho nhũm kapêr kêt nẽ pa. Hãmri nhũm Jejus omu nẽ nẽ kator nhũm akupým kapêr mex nẽ. Nhũm mẽ piitã amnhĩ jaêr pẽ omu nẽ no hawēnh rũnh nẽ omunh o kuhê. ¹⁵ Nom nhũm mẽ hkwyjaja Jejus kot ã hipêx anhýr ã omu nẽ htýx ho kêp mẽkarõmnuti hkwy hã hkamnhix nẽ axpēn mã harēnh o:

—Tk pêr hinhu nhĩkõõti nhỹ hã na hte mẽ nẽ amnhĩ kwýjê japõx o pa. Anẽ.

Hinhu nhĩkõõti nhĩxi hõ pẽ Satanasti nhũm prem Satanasti nhỹ hã Jejus kot ã amnhĩ nhĩpêx anhýr o pa hã hkamnhix. ¹⁶ Jakamã nhũm mẽ hkwyjaja hwýr mra nẽ kãm:

—Kwa mẽ inhmã aa mẽ ixte mẽmoj pumunh kêt õ ho anẽ. Pa mẽ omu nẽ ate Tirtũm nhỹ hã tanhmã amnhĩ nhĩpêx to ho apa hã apumunh kurê kumrêx. Anẽ.

Nom hêx rom mẽ kot kamã hamak kaxyw ã kãm kapêr anê. ¹⁷ Nhũm ra Jejus mẽ hamaxpêr kôt mẽ omunh mex jakamã mẽ kapêr ma nê mẽ kãm:

—Kwa mẽ inhma mẽ ate ixpê Satanasti hkwy hã ixkamnhĩx xwýnhjaja. Koja pika nhõ xwýnhjaja axpên kutã amnhĩ xunhwý nê axpu hãmri nê anhgrã nê ma ahpýnhã ri pa. Hãmri nê amnhĩ krã hkôt ri tanhmã amnhĩ to ho ri pa. Jakamã nhũm mẽ õ pahi mẽ hamãr o pa hkêt nê. Rý koja krí nhõ xwýnhjaja. Mẽ kot axpên to hkwy xwýnhjaja mẽmoj tã axpên kãm gryk nê axpên kutã amnhĩ xunhwý hãmri nê axpên pê anhgrã nê ahpýnhã pa hãmri nhũm mẽ õ pahi tee ri kãm mẽ hamãr o pa hprãm. Mo õ krí kamã mẽ hkwy kot ri mẽ hamãr o pa? No na pre mẽ õ pahi tãm amnhĩ nê mẽ hanor kêt nê.

¹⁸ —Tã ja pyrã nê ixte Satanasti nhỹ hã tanhmã amnhĩ nhĩpêx to ho ixpa ronhỹx pa mẽ nê amnhĩ kwýjê janor o ri ixpa hkêt nê. Nhỹx Satanasti ixte mẽ nê mẽ hanor kaxyw tanhmã inhã nê hkêt nê.

¹⁹ —No kêt mẽ akwýjaja? Xã Satanasti nhỹ hã na htem mẽ nê mẽ hapõx o pa nã? Kêp apu pa ixte ý hã mẽ nê mẽ hapõx ronhỹx mẽ akwýjaja ixpyrã nê ý hã mẽ nê mẽ hapõx o pa. Nã Tirtũm nhỹ hã mẽ ixte mẽ nê mẽ hapõx o mẽ ixpa kênã. Jakamã ã mẽ ate ijarênh anhýr o apaja mex kêt. ²⁰ Tirtũm Karõ nhỹ hã ixte mẽ nê mẽ hapõx o ri ixpa kênã. Jakamã kwa mẽ ja hã ixpumu nê Tirtũm kot ixte mẽ ato amnhĩptãr kaxyw mẽ awýr inhmênh kôt ixpumunh kurê kumrêx kêt wehe. Pa na ka htem ixkamã ajamak o apa.

²¹ —Satanastija àhpumunh tỳx jakamã na htem tee ri kêp mẽ kot hkôt amnhĩ xunhwýr xwýnhjê pytãr kaxyw nhũm mẽ nê mẽ omunh mex nê. Nom ixàhpumunh tỳx o ixte Satanasti jakrenh jakamã pa na pa hte kêp mẽ utã nhũm mẽ hpãnhã ixkôt ri amnhĩ nhĩpêx.

²³ —Mẽ amã ixkapêr mar prãm tã na ka mẽ kormã ixkôt amnhĩ xunhwýr kêt nê. Kwa wem ma amnhĩ to amõr gri nê tokyx ixkôt amnhĩ xunhwý kêt wehe. Kot kaj mẽ anhýr kêt nê hãmri nê te mẽ ate ixkutã amnhĩ xunhwýr xwýnh pyrãk o amnhĩ nhĩpêx. ²⁴ Mẽ ate ixkôt amnhĩ xunhwýr kêt xwýnhjaja te mẽ ate mēhõ nê mẽkarõmnuti japõx xwýnh pyrãk. Nhũm te kêp kator nê ma mõ nê nhỹri amgrã kamã ri pa. Nhũm ja kêp omnuj nhũm tee ri kamã nhỹri hkôkôt xã japêr o pa. Nom tee ri hapêr o pa nê hamaxpêr o: “E kot paj ma akupým mẽ kot nê ixkator xwýnhhta wýr tẽ nê hwýr axã nê hkôt mãn ixpa.” Anê. ²⁵ Hãmri nê ma akupým hwýr tẽ. Nom kormã akupým hwýr àr kêt ri nhũm kamã amrakati nê pa. ²⁶ Jakamã nhũm ma akupým hwýr tẽn axã. Nom ahte àr kêt nê. Ra amnhĩ kôt amnhĩ kwýjê ho 7 nê hwýr mẽ ho agjê. Nê hwýr gjêx pa. Mẽ kêp 7jaja nê wamta mẽ nhũm mẽ piitã hwýr gjêx pa. No mẽ kêp 7jaja omnuj tỳx o kot wamta jakrenh jakamã nhũm mẽ kot hwýr gjêx xwýnhhta mẽ ý hã amnhĩ tomnuj tỳx o pa. Oprê htỳx nê. Wam pyxire nê kot hwýr àr nhỹ hã amnhĩ tomnuj o ri pa nom ãm kawax pê oprê. Tã axte hwýr mẽ ohtõ nê gjêxta nhỹ hã oprê htỳx kumrêx. Ja pyrã nê kot kaj mẽ tokyx ixkôt amnhĩ xunhwýr kêt nê hãmri nê ãm amnhĩ tomnuj tỳx pix o ri apa. Anê.

Mẽ hkính nê mẽ pa xwýnhjê jarênh

Rukre 8.19-21

²⁷ Nhũm pre ã Jejus mẽ ahkre anê nhũm mēhõ nija kuma nê kãm:

—Hêxta gàà nê. Mãn akatorxã ã ate amnhĩ nhĩpêx anhýr o apa hã apumu nê hkính nê. Anê.

²⁸ Hãmri nhũm kãm:

—Tỳ. Nã kot anhýr kênã. Nom kot ka mẽ atõ Tirtũm kapêr ma nê hkôt amnhĩ nhĩpêx hãmri nê akính rax o ixkatorxã kot ixpumunh nê hkínhta jakre. Anê.

Jejus kot tanhmã Jõhti jarênh to

Matêwre 12.38-42; Makre 8.12

²⁹ Tã nhũm mẽ ohtõ nê Jejus ã akuprõ nê mẽmoj tã kuwý nê kãm:

—Pa. Kwa mẽ inhã aa mẽ ixte mẽmoj pumunh kêt õ ho anê pa mẽ omu. Anê.

Hãmri nhũm mẽ kuma nê mẽ kãm:

—Tk. Kwa mẽ ajamaxpêr punuj pix o na ka htem ri ajamaxpêr o apa. Ixpê Tirtũm kot mẽ awýr inhmênh xwýnh tã ka mẽ ja hã ixkôt ajamaxpêr kêt nê. Tã mẽ ate aa mẽmoj pumunh kêt kwý ixte mẽ amã ho anhýr kaxyw hã inhã karõ. Nã kot paj kormã mẽ amã ho anhýr kêt nê. Kot paj nhỹrmã te amnepêm finat Jõhti kot amnhĩ nhĩpêx pyrãk o amnhĩ nhĩpêx ka mẽ hã ijarênh ma nê kormã ja hã ixpumu. ³⁰ Tirtũm nhỹ hã kapêr xwýnh pê Jõhtija amnepêm na pre tep rax kukrê. Tã nom nhũm htĩr rãhã õxàhkre rũm kato nhũm mẽ omu nê Tirtũm kot mẽ hwýr mênh ã omu. Tã kot paj nhỹrmã Jõhti pyrã nê tanhmã amnhĩ nhĩpêx to nhũm mẽ ja hã ixpumu nê Tirtũm kot mẽ awýr inhmênh xwýnh ã ixpumunh kurê kumrêx.

³¹ —Nê koja nhỹrmã Tirtũm akupým mẽ htyk nê mẽ hikwý xwýnh piitã akupým mẽ ho htĩr hãmri nhũm mẽ piitã Inhĩpêêxã mẽ wa ixkutã hkrĩ. Pa wa mẽ piitã tanhmã mẽ harênh to. Tirtũm mẽ wa ixkuri mẽ htĩr tũm nê mẽ pa ho mẽ pa mã xwýnh ã mẽ hkwyjê jarê. Nê wa ixkuri mẽ pa ho mẽ pa hkêt xwýnhjê jarê. Mẽ piitã ã mẽ harênh anê. Amarĩ mẽ pa xwýnhjaja nê mẽ õ pahijaja. Hãmri nhũm sur kãm mẽ õ pahi niti Tirtũm mã tanhmã amnhĩ jarênh to hãmri nê hpãnhã tanhmã mẽ ajarênh to nê kãm mẽ ajarênh o: “Na pa pre inhã pahi Sarumãw kot anhỹ hã àhpumunh tỳx ã harênh ma hãmri nê inhã mar prãm xaj ma awry hã õ pika hwýr ixpa nê omu nê kapêr ma. Hãmri nê ma akupým inhõ pika hwýr ixpa nê ixkwýjê mã àhpumunh tỳx ã harênh o ixpa. Tã Akra Jejus na àhpumunh tỳx o pahi Sarumãw jakrenh tã or war akutã mẽ hkrĩ xwýnh kwý mũj na prem kapêr ma no ãm ixkínhã kãm mar prãm kêt nê. Na prem kuma nê ãm kuma.” Anhýr o wa inhã mẽ ajarê. Hãmri nê ja hã mẽ amã akir ka mẽ tee ri mar o akrĩ nê amnhĩ kamã agryk o akrĩ.

³² —Hãmri nhũm hpãnhã Nĩniwe nhõ xwýnhjaja wa inhã tanhmã amnhĩ jarênh to. Jõhti kot mẽ hwýr mör nê mẽ kãm Tirtũm kapêr jarênh o pa xwýnhjaja nhũm mẽ tanhmã wa inhã amnhĩ jarênh to. Hãmri nê pahi nita pyrã nê wa inhã tanhmã mẽ ajarênh to nê wa

inhmā: “Na pre Jōhti man mẽ inhō krī hwỳr mō nē mẽ inhmā akapēr jarēnh o ri mẽ ixkōt pa. Pa prem kuma nē mẽ ixte amnhī tomnuj kaga nē akōt amnhī xunhwỳr kurē kumrēx Tirtūm. Nom or war akutā mẽ hkrī xwỳnh kwỳ mūj na pre Akra Jejus tām mẽ hwỳr mō nē mẽ kām kapēr o ri mẽ hkōt pa nhūm prem kuma no ām mẽ ixkīnhā amnhī tomnuj kaga nē hkōt amnhī xunhwỳr kēt nē. Mē kot Akra mar tā amnhī kaxyw kām hamaxpēr kēt nē.” Anhỳr o koja mẽ wa inhmā mẽ ajarē ka mẽ tee ri mẽ ama nē amnhī kamā agryk tỳx nē. Jakamā e kwa ixte mẽ amā ā ixkapēr anhỳrja ma nē kām ajamaxpēr tỳx rāhā ho ri apa. Anē.

Mē pajamaxpēr mex te kot kanē hpōk mex pyrāk ā harēnh

Matēwre 5.15, 6.22-23

³³ Nhūm Jejus arī mẽ ahkre ho nhỹ nē mẽ kām:

—Xà na htem kanē hpōk nē poti ho hpro? Nà na htem ho anhỳr kēt nē. Na htem hpōk nē kỳx pē mẽmoj nhīmōk ā unhwỳ nhūm mẽ piitā mẽ kām hirā mex nhūm htem ixkrem agjē nē hirā kamā mẽmoj pumunh mex o mra. ³⁴ Ja pyrā nē kot ka mẽ atō ixkapēr ma nē ixkōt amnhī nhīpēx nē tām amnhī nhīpēx o ri apa. Nē tām mẽ hipēx o ri apa. Jao te hirā kamā mẽ rīt mex xwỳnhjaja kot amnhī nhīpēx pyrāk. Nom koja mẽhō inhma nē ām inhma nē ixkwỳm ri tanhmā amnhī nhīpēx to ho pa. Jao te kamāt kō kamā mẽ rīt mex kēt xwỳnhjaja kot htỳx amnhī nhīpēx o pa pyrāk o amnhī nhīpēx.

³⁵ —E kēr ka mẽ ā amnhī nhīpēx anhỳr pymaj ixkapēr ma nē kām ajamaxpēr tỳx rāhā ho ri apa. ³⁶ Kot kaj mẽ ixkapēr ma nē ixkōt amnhī nhīpēx. Hāmri nē te mẽ ate kanē hpōk mex nhīrā kamā ri apa pyrāk o amnhī nhīpēx. Jao aprī hā ixkapēr ma nē aprī hā ixte tanhmā amnhī nhīpēx to hā ixpumunh mex nē. Anē.

Jesus kot tanhmā Parijew nhō xwỳnhjē jarēnh to

Matēwre 23.25-26

³⁷ Tā nhūm Jejus ra mẽ ahkre pa. Hāmri nhūm Parijew nhō xwỳnhjaja hwỳr tē nē kām:

—Pa. E kwa ma ixkōt tē nē mẽ ixkutā apku. Anē.

Hāmri nhūm kuma nē kām:

—Tōe. Nà kot paj ma akōt tē. Anē

Hāmri nē ma hkōt tē nē ōrkwỳ hwỳr axà nē apkur kaxyw mẽ t̄hkō hā nhỹ. ³⁸ No ām mẽ hkukamā mẽ hpāmjē pyrā nē amnhī nhīhkra kuhōnh ryy hkēt nē. Ām amnhī nhīhkra htyk pix kuhōnh tokyx anē nē nhỹ. Nē ō prat kuhōnh ryy hkēt rāhā apkur kaxyw nhỹ. Jakamā nhūm kot amnhī kōt hwỳr xwỳnhhta tee ri ja hā omu nē hamaxpēr o:

—Tk. Kwa na hte mẽ ixte amnhī nhīpēx kōt amnhī nhīpēx mex kēt nē.

³⁹ Anē nhūm Jejus amnhī tā hamaxpēr ā omu nē kām:

—Nà mẽ apē Parijew nhō xwỳnhjaja te mẽ ate mẽ kot apkur kaxyw prat kre kuhōnh punuj tā mex ā harēnh pyrāk o amnhī nhīpēx. Nē ām mẽ akrā hkà rūm pix mā na mẽ amex. Nē mẽ noo mā te mẽ amex pyrāk

no ām mẽ anhōxāhkre kaxwỳnh kām mẽ ajamaxpēr mex kēt. Ām mẽ akapēr prām. Nē mẽ axāhkurēē. Nē mẽ anhōxyỳ. ⁴⁰ Mē ate atỳx ri amnhī nhīpēx o ri mẽ apa xwỳnh kēnā. Kwa kēr ka mẽ ām akrāhkà pix rūm amex nē ri apa hkēt nē. Mē määnēn anhōxāhkre kaxwỳnh kām ajamaxpēr mex o ri apa. Nē tām mẽ piitā mẽ hipēx o ri apa. ⁴¹ Kēr ka mẽ tām ajamaxpēr o tām mẽ hipēx o ri apa. Nē axāmnhīx ri mẽ kēp amrakati xwỳnhjē mā mẽmoj nhōr o ri apa. Kot kaj mẽ ā amnhī nhīpēx anē hāmri nhūm Tirtūm ja hā mẽ apumu nē amnhīm mẽ amex ā mẽ ajarē. No na ka htem mẽ amā mẽ amnhī to mex prām xāj tee ri amnhī kuhōnh japjē kaprỳ. Anē.

Jesus kot Parijew nhō xwỳnhjaja mex kēt kukamā mẽ harēnh

Matēwre 23.4, 23.7, 23.13-24, 23.27-38; Makre 12.38-39

⁴² Nhūm Jejus arī Parijew nhō xwỳnhjē jahkre nē mẽ kām:

—Kwa mẽ okora Parijew nhō xwỳnhjaja. Kot kaj mẽ amex kēt nē. Na ka htem Tirtūm kapēr piitā hkōt amnhī nhīpēx o apa hkēt nē ām hkwy kōt pix mā amnhī nhīpēx o ri apa. Nē ām kapēr o hpỳnhre nē hkōt amnhī nhīpēx hāmri nē hā amnhī pumu nē ate amnhī to mex xwỳnh ā amnhī to jarkrar o ri apa. Nom Tirtūm kām hprām xà piitā hkōt amnhī nhīpēx hkēt nē. Mē ate tām mẽ piitā mẽ hipēx o ri apa hā kot mẽ amā karōja. Nē mẽ amā Tirtūm kīnh ā kapēr kōt amnhī nhīpēx o ri apa hā karōja mẽ ate mar mex tā hkōt amnhī nhīpēx kēt nē. Mē ate kapēr piitā hkōt amnhī nhīpēx ronhỳx ja mẽ amā mex kumrēx.

⁴³ —Kwa mẽ o kora. Mē piitā mẽ kot amnhīm mẽ ate amnhī to rūnh xwỳnh ā amnhīm mẽ ajarēnhja na mẽ amā hprām. Nē mẽ piitā mẽ kot amnhīm mẽ apē mẽ ahkre mex xwỳnh maati hā mẽ ajarēnhja na mẽ amā hprām.

⁴⁴ —Kwa mẽ o kora. Kot ka mẽ amex kēt nē. Mē kot mẽ akapēr mar nē mẽ akōt amnhī nhīpēx xwỳnhjaja te mẽ kot htỳx ri mẽ hā pika nhīmōk ā ri mẽ pa xwỳnh kot amnhī nhīpēx pyrāk. Jao mẽ ate amnhī to mex ā amnhī kamnhīx nom mẽ ate amnhī to mex kēt. Te mẽ kot pika mex ā hkamnhīx nē htỳx ri mẽ hā pika nhīmōk ā ri mẽ pata pyrāk o na htem amnhī nhīpēx. Anē.

Nhūm pre ā Jejus Parijew nhō xwỳnhjē mā mẽ kot amnhī nhīpēx jarēnh anē.

Jesus kot Tirtūm kapēr tūm o mẽ ahkre xwỳnhjē mā kapēr

Matēwre 23.1-4, 23.13, 23.29-36

⁴⁵ Hāmri nhūm Tirtūm kapēr tūm o mẽ ahkre ho pa xwỳnhjaja kuma nē kànhmā xa nē kām:

—Kwa na ka ā Parijew nhō xwỳnhjē jarēnh punuj anhỳr jao määnēn ā mẽ paja jarēnh anē nà? Mē ixte amnhī nhīpēxja ām tipxi kēnā. Anē.

⁴⁶ Hāmri nhūm kām:

—Tỳ. Määnēn mẽ kajaja. Kwa o kora mẽ apē Tirtūm kapēr tūm o mẽ ahkre xwỳnhjaja. Kot kaj mẽ urāk nē amex kēt nē. Na ka htem mẽ kām mẽmoj tā karō ho ri

apa nê mē kām: “E kêr ka mē ã amnhĩ nhĩpêx anê nê ã amnhĩ nhĩpêx anê.” Anhÿr tã no ãm mē kajaja amnhĩ kapêrja kôt amnhĩ nhĩpêx kêt nê. Te mē ate mēhõ kot mē katut ã mē kām mē jênh pytĩ janhõr tã mē ho ajuta nê hkwy htuur kêeta pyrãk o na ka htem amnhĩ nhĩpêx o ri apa.

⁴⁷ —Na pre Tirtũm amnepê mē pahpãmjê hkukamã tanhmã mē harênh to. àhpumunh tÿx xà hkôt tanhmã mē hkukamã mē harênh to nê mē harênh o: “Kot paj ma mē hwÿr inhÿ hã ixkapêr jarênh xwÿnhjê rê. Nom koja mē omu nê ãm mē omu nê kêt mē hprãm nõkati nê tanhmã mē hipêx to ho pa. Nê ixpê mē hkwyjê hpar o pa. ã koja mē inhÿ hã ixkapêr jarênh xwÿnhjê nhĩpêx anê.” Anhÿr o mē hkukamã mē harê. Tã ã mē harênh anhÿr xà hkôt nhũm prem ã mē hipêx anê nê mē hkwyjê hpa nê mē hkwyjê pynê nê mē hagjê.

—Amnepê mē akukamã mē kot ã mē hipêx anhÿr nhũm mē ate mē ano ho ja hã mē omunh kêt tã ka htem arĩ mē hã pika ho mex o ri apa. Te mē amã mē hapê nê mē ho ajamak pyrã nê mē hã pika ho mex o ri apa. Nom mē amã mē hapê hã ho mex hkêt nê. ãm ra mē htyk nê hapêx nê mē amã Tirtũm kapêr jarênh o pa hkêtja ã na ka htem akĩnh nê ã axêx rom mē hã pika ho mex anhÿr o ri apa.

⁵⁰ —Na prem Tirtũm nhÿ hã kapêr jarênh o mē pa xwÿnhjê nhĩmex rax nê. Amnepê mē panhĩ kator krax rũm finat Atãw kra finat Apewja na pre Tirtũm nhÿ hã kapêr o pa nhũm htõ kãm mar prãm kêt nê kupĩ. Tã nhũm Tirtũm axte mē hwÿr ÿ hã kapêr jarênh o mē pa xwÿnh kwÿjê rê nhũm prem mã mē ho anê nê mē hkwyjê nhĩmex. Nhũm pre xatã mē hwÿr mē hkwyjê rê nhũm mē xatã mē kupa. ã Apew rũm finat Jakaris wÿr na prem mē himex rax anê. Nê hpãnhã Jakarisja nhũm prem Tirtũm mã amnhĩ jarênh xà hã ixkre kamã kupĩ. Tã ka mē ajaxwÿja amã Tirtũm kapêr mar prãm kêt nê mē urãk nê amã ÿ hã kapêr jarênh o mē pa xwÿnhjê nhĩmex prãm. Tã ã mē pahpãmjê mē ato hpimràatã mē ate mē hipêx anhÿrja mÿrapê koja Tirtũm ja hã mē apê mē hkanrêhã mē htãmnhwÿjaja tanhmã mē ato htÿx to ka mē amnhĩ xà htÿx kamã ajamak o ri apa rãhã nê kãm ga.

⁵² —Jakamã kwa mē o kora mē apê Tirtũm kapêr tũm o mē ahkre xwÿnhjaja. Mē ajaxwÿja na ka htem Parijew nhõ xwÿnhjê pyrã nê Tirtũm kapêr o mē ahkre ho apa. Nê aprĩ hã mar mex tã no ãm amnhĩ kaxyw hkôt ajamaxpêr nê hkôt amnhĩ nhĩpêx kêt nê. Hãmri nê mē kot mē amar o pa xwÿnhjê mã atÿx ri tanhmã mē ahkre hto nhũm htem mē ama nê mē apyrã nê amnhĩ kaxyw Tirtũm kôt hamaxpêr nê hkôt amnhĩ nhĩpêx kêt nê. Mē kãm hprĩ hã kapêr mar mex prãm tã mē amar xà hkôt mē ate amnhĩ nhĩpêx pyrãk o amnhĩ nhĩpêx o pa. Nom mē kajaja na ka htem mē kãm mē hamaxpêr mex nhõr kêtja mÿrapê nhũm htem ã amnhĩ nhĩpêx anhÿr o pa. Jakamã kwa mē o kora kot kaj mē amex kêt nê. Anê.

Nhũm pre ã Jesus mē kãm kapêr anê. ⁵³ Hãmri nê kato nê ma tẽ. Nhũm Tirtũm kapêr tũm o mē ahkre ho

mē pa xwÿnhjê mē Parijew nhõ xwÿnhjaja hãmri kot tanhmã mē kãm kapêr toja ma nê kamã gryk tÿx nê. Jakamã ma hkôt mra. Hêx rom mēmoj tã hkukjêr o hkôt mra. Nê hã hkukjêr kãm hihtÿx o hkôt mra. Kot tanhmã mē kãm ujarênh to nhũm mē kot mar nê ra hã àmnênh kaxyw ma hkôt àhkukjêr o mra.

Mē pahte Tirtũm pê mē pajamaxpêr punuj o pahpimxur kêt

Matêwre 10.26-33

12 Tã nhũm mē Jesus ã htu rax kumrêx nê hã axpên nhĩgãnh o kuhê. No nhũm kormã mē kãm tanhmã kapêr to hkêt nê. ãm kormã hkôt mē pa ho mē pa xwÿnhjê kumrêx mã kapêr nê mē kãm:

—Mē piitã kãm amnhĩ kwÿjê pê hamaxpêr punuj o hpimxur hprãm tã koja nhÿrmã mē hamaxpêr piitã amnhĩrĩt pa. Nê mēmoj piitã ra hpimxur mex tã koja nhÿrmã piitã amnhĩrĩt pa. Nê mē kot kamãt kô kamã hpimxur pê mēmoj jarênh tã koja mē piitã nhÿrmã kot mēmoj jarênh ta ma. Nê mē kot hitom kãm kawax pê axpên mã mēmoj punuj jarênh tã koja nhÿrmã mē piitã mēmoj jarênh ta ma. Jakamã kwa kêr ka mē tanhmã Parijew nhõ xwÿnhjaja kot amnhĩ nhĩpêx to ho pa hã mē omu nê ãm mē omu nê mē hkôt amnhĩ nhĩpêx kêt nê. Te mē kot tãm amnhĩ nhĩpêx pyrãk o amnhĩ nhĩpêx tã no ãm tãm amnhĩ nhĩpêx o pa hkêt. Na htem ãm htÿx ri tanhmã amnhĩ to hêx to ho pa. Tã kêr ka mē urãk nê ã amnhĩ nhĩpêx anhÿr kêt nê. Anê.

Mē pahte pahkwÿjê pumaj Tirtũm kaga hkêt ã mē pamã karõ

Matêwre 10.28-31

⁴ Nhũm Jesus arĩ hkôt mē pa ho mē pa xwÿnhjê mã kapêr nê mē kãm:

—E ixkrãmnhwÿjaja. Kêr ka mē amã akwÿjê puma rÿ nhãm mē hkwyjê puma ho ri apa hkêt nê. Koja mē apar tã ãm mē anhĩ pix pa nom tanhmã mē akarõ hto hkêt nê. ⁵ Tirtũmja tapxipix na hte mē ÿ nê mē hkarõ ho hpimràatã mē kot amnhĩ xà htÿx kamã hamak tũm xà hwÿr mē kurê. Tã kêr ka mē ja pumaj Tirtũm kapêr kwÿm tanhmã ri amnhĩ nhĩpêx to ho apa hkêt nê.

⁶ —Nê Tirtũm kot mē pahto hapêx par pumunh tã mããnen kot mē pajamãr pumunh mex. Mãã ka htem kuwênhre pumu. Na hte Tirtũm hamãr mex o pa. Mē piitã mē kot ãm kuwênhre pumunh o pa htã nhũm Tirtũm mē kurom hamãr mex o pa. Nê htãnopxar rãhã ho pa. Nom kãm mē pajapê htÿx o kuwênhre jakrenh jakamã kwa mē tee ri amnhĩ kukamã ajamaxpêr o ri akaprĩ nê apa hkêt nê. Koja Tirtũm mē pahtãnopxar rãhã ho pa. Ra kot tanhmã mē pakute hã mē pahpimunh par. Nê ahpÿnhã tanhmã mē pahkrã hkĩ kute hkôt mē pahpumunh par. Tã kot mē pahtãnopxar rãhã jakamã mo kaxyw kot kaj kêt mē ri amã mēhõ puma ho ri apa?

⁸ —Jakamã kwa mē mãmrĩ mē kãm mē apê ixkra hã amnhĩ jarênh o ri apa nê amã mē uma xaj tee ri amnhĩ nhĩpêx o ri apa hkêt nê. Kot ka mē kãm ra mē ate ixkôt amnhĩ xunhwÿr ã amnhĩ jarê. Pa ja hã mē apumu

hämri në më apyrà në kaxkwa kamã Tirtüm kapër o më wryk xwýnhjê mã ra më ate ixkôt amnhĩ xunhwýr ã më ajarê. ⁹ Nom kot ka më kot ixtã tanhmã më ato py-maj apê ixkwý hã amnhĩ jarênh kêt japêr. Pa ja hã më apumu hämri në nhýrmã amnhĩ xwar më kãm më apê ixkwý hkêt ã më ajarê. Jakamã kwa më mãmrĩ më kãm apê ixkwý hã amnhĩ jarênh o ri më hkôt apa kê më ama në tanhmã inhã hamaxpêr to. ¹⁰ Koja më ama në ãm ama në kãm ixprãm kêt japêr. Hämri nhüm Tirtüm ixtã më omu nom tokyx ixtã tanhmã më ho hkêt në. Koja kormã amnhĩ tã më hamãr o pa. Karõ kot axte më kãm ijarênh o amnhĩrit nhüm më hkwyjaja kot mar në kãm ixprãm në ixkôt amnhĩ xunhwýr kaxyw nhüm kormã amnhĩ tã më hamãr o pa. Nom ko-ja Karõ xatã më kãm ixto amnhĩrit tã nhüm më kuma në ãm kuma në te më kot kêp amnhĩ jamak pro pyrãk o amnhĩ nhípêx o pa. Jao Karõ hã hpijaãm kêt mýrapê koja Tirtüm nhýrmã amnhĩ xwar te kot më kêp amnhĩ jamak pro pyrãk o më hipêx nhüm më tee kãm amnhĩ kaprĩ kaprý. Hämri në amnhĩ xà htýx kamã hamak tùm xàta wýr ma pa në kamã pa ho pa. Jakamã kwa më mãmrĩ më kãm më apê ixkra hã amnhĩ jarênh o ri më hkôt apa në tanhmã më kãm ijarênh to ho ri apa. ¹¹ Koja më ama në kãm më amar prãm kêt japêr hämri në ixtã më apynê në tanhmã më anhípêx to kaxyw. Në Ijaew nhõ Tirtüm kapër o më ahkre xà hã ixkre hwýr më ato mrar japêr. Rý më õ pahi hwýr më ato mrar në tanhmã kãm më ato hêx to. Nom kêr ka më më kãm amnhĩ jarênh kaxyw në tee ri amnhĩ kukamã ajamaxpêr o mã më uma kêt në. ¹² Koja Tirtüm Karõ ja kaxyw më mã më ajamaxpêr mex gõ hämri ka më õ ri më kãm amnhĩ jarê. Jakamã kwa më tee ri më kãm amnhĩ jarênh kukamã ajamaxpêr o ri më mã më uma ho apa hkêt në. Anê.

Më hikukrêx rûnh pix kukamã hamaxpêr xwýnhjê jarênh

Wam Ximotre 6.9-10; Xiakre 4.13-17, 5.1-6

¹³ Nhüm Jejus arĩ më ahkre o xa nhüm më mar o kuhê. Rôm nhüm mëhõ myja hwýr tẽ në kãm kapêr në kãm:

—Pa? Kwa ot pa awýr mã mëmoj jarênh mã tẽ. Na pre inhípêxã ty nhüm ixtõ ixrom amnhĩm õ mëmoj pi-itã ho ãrĩk pa. Õ pika në hkrit në hikukrêx në ãm mëmoj piitã ho ãrĩk par kumrêx. Kwa ma ixkôt tẽ në kãm anê pa wa amnhĩm ho axkjê nà? Anê.

¹⁴ Hämri nhüm kuma në kãm:

—Tk. Koký. Na pa pre më mã mëmoj to ixpikjêr kaxyw më awýr ixwryk kêt në. Anê.

¹⁵ Hämri në më kot mar o kuhê xwýnh piitã më kãm kapêr në më kãm:

—Kwa kêr ka më mã anhõ mëmoj rûnh prãm o ri apa hkêt në. Na htem mëmoj rûnh kukwak ri Tirtüm wýr apir kêt në. Mëmojta kêp pika pix nhõ xwýnh na.

¹⁶ Anhýr o më kãm kapêr hämri në më kãm awjarê. Më hukukrêx rax ã kuxi në më kãm awjarê në më kãm:

—Nà koja mëhõ õ mëmoj rax në. Në hpur kãm õ rax në. No ãm õ jaxwýr xà hã ixkre kêp grire. ¹⁷ Hämri

nhüm tee ri hpur kãm õ rax kukamã hamaxpêr në hamaxpêr o: “Kwa tanhmã kot pa amnhĩ to në ja piitã nhýri haxwý wehe? Inhã amarĩ më kêp amrakati xwýnhjê mã hkwy nhõr prãm kêt. Kot paj ãm amnhĩm piitã ir pa në kritpêh hkur o ixpa. Nom ixpê haxwýr xà hã ixkreja ixpê grire.” Anê.

¹⁸ —Hämri në hamaxpêr o: “Nà na pa ra ijamaxpêr. Kot paj ixkre grireta grã në hpãnhã rax õ nhípêx. Hämri në ixpur kãm inhõta jamý në kamã ir pa. Në ixãpênh xà hã ixkukrêx piitã kamã haxwýr pa. Nà kot paj ho anê.” Anê.

¹⁹ —Hämri në ra ixkreja grãnh pa në hpãnhã rax õ nhípêx. Në hipêx pa hämri në kamã hpur kãm õta xir pa. Në ãpênh xà hã hikukrêx piitã kamã unhwý. Hämri në omu në hkĩnh në. Në hamaxpêr o: “Nà hämri. Kot paj tokyx axte mëmoj tã ixãpênh kêt në. Ra inhõ rax kumrêx kênã. Kot paj kritpêh ho ixãpur mex o ixpa. Nà ãm hämri na pa amnhĩ kukamã ijamaxpêr mex pê ixkre rax nhípêx.” Anê. ²⁰ Tã nhüm Tirtüm tee ri ã kot amnhĩ nhípêx anhýr ã omu nhüm ja kãm mex kêt në. Hämri nhüm hã kãm kapêr në kãm: “Nà na ka atýx ri anhõ rax më akukrêx rax o apikuprõnh kaprý. Na ka ãm amnhĩ pix kukamã ajamaxpêr o apa pê ã amnhĩ nhípêx anê. Nom kot kaj kamãt ja kamã ty në anhý kamã ma mõ në amnhĩ kôt anhõ mëmoj rax õ ho amõr kêt në. Koja hpãnhã mëhõ amýr pê ho amnhĩptar pa ka rĩ amnhĩ pumu.” Anê. Nhüm ã Tirtüm kãm kapêr anê. ã më ujarênh kot anhýr.

²¹ —Më kot amnhĩ nhõ në amnhĩ kukamã pix mã hamaxpêr o më pa xwýnhjaja na htem myja pyrã në Tirtüm mã hamaxpêr o pa hkêt në. Jakamã koja më nhýrmã ty hämri në hukukrêx pix kukamã hamaxpêr në amnhĩ mã pix mã hamaxpêr o paja mýrapê Tirtüm më wa ixri htĩr tùm në mex në pa ho pa hkêt në. Më kot amnhĩ nhõ pix kukamã hamaxpêr xwýnhjaja në amnhĩ kukamã pix mã më hamaxpêr xwýnhjaja në më mã ukaprĩ hkêt xwýnhjaja më õ mëmoj rûnh tã koja më nhýrmã ty hämri në amnhĩ kôt hõ ho pixi në o mõr kêt në. Koja më mëmoj piitã rer pa në ma ý kamã ma mõ. Jakamã kwa kêr ka më jajê pyrã në anhõ mëmoj to anhõxy ho ri apa hkêt në. Anê.

Më pahte tee ri amnhĩ kukamã pajamaxpêr kêt ã më pamã karõ

Matêwre 6.25-34; mãänên Wam Pêtre 1.3-9

²² Tã nhüm Jejus hpãnhã tanhmã hkôt më pa ho më pa xwýnhjê jahkre hto në më kãm:

—Kwa kêr ka më tee ri amnhĩ kukamã ajamaxpêr o ri apa hkêt në. Amnhĩ xãpkur xà rý axê ka më tee ri hkukamã ajamaxpêr kêt në. Në më ãm mëmoj piitã hkukamã tee ri ajamaxpêr kêt në. ²³ Tirtüm àhpumunh týx o àhpumunh týx xwýnh na. Na pre àhpumunh týx o më anhípêx ka më kukwak ri atĩr në apa. Tã xà kot më mã më anhõ ho pa hkukamã àhpumunh kêt? Nà ja kukamã àhpumunh xihtýx kênã. Kêp më anhípêx xwýnh jakamã mãänên kêp më mã mã anhõ ho pa xwýnh. Në kêp më mã mã axê nhõr o pa xwýnh.

²⁴ —Mãn ka htem kuwênhre pumu. Na hte tee ri amnhî xàpkur xà hkukamã hamaxpêr o hkaprî nê ri pa hkêt nê. Na hte Tirtûm tãm kot kãm õ ho pa. Tã kãm mẽ pajapê htÿx o kuwênhre jakrenh jakamã koja uràk nê mẽ pamã mẽ panhõ mex o pa rãhã nê. ²⁵ Jakamã kwa kêr ka mẽ mẽmo arıgro hã axàpkur xà hkryre pumu nê ate amnhî pê hkrêr par nê amã prãm o akaprî nê apa hkukamã tee ri ajamxpêr kêt nê. Æm Tirtûm kamnàr rom axàmnhîx anhõ hkryreta ku nê akĩnh kãm tanhmã amnhî nhîpêx to ho ri apa. Xà kot ka anhõ mry grire pumu nê akaprîre nhùm ra tanhmã amã amnhî to rax to? Na htem ãm tee ri mẽmo hkukamã hamaxpêr o hkaprî nê pa kaprÿ. Jakamã kêr ka mẽ ã ri ajamxpêr anhÿr o akaprî nê apa hkêt nê.

²⁷ —Mãn ka htem akunî kamã pixôrare pumu. Na hte tee ri tanhmã amnhî kute hkukamã hamaxpêr o hkaprî nê harir kêt tã muxre nê harir ka mẽ omu. Te ho amnepêm finat pahihti Sarumãw xê mex pyràk nom ãm mex o kot hakrenh.

²⁸ —Pixôrareja arıgro ja hã htîr nê muxre nê harir tã koja mẽmo arıgro hã grã pa nê hapêx. Kêp pixôrà pix nê hapêx tokyx anhÿr tã na hte Tirtûm ho mex nê nhùm mux nê harir. Nom mẽ pajaja na hte mẽ pahto mex o pixôrare ho mexja jakrenh. Jakamã kwa mẽmo kaxyw kot ka mẽ tee ri amnhî xê hkukamã ajamxpêr o akaprî nê apa? Nà kot kaj mẽ anê nê amnhî kaxyw Tirtûm mã ajamxpêr tÿx kêt nê.

²⁹ —Kwa mẽ tee ri amnhî xàpkur xà hkukamã ajamxpêr rãhã o ri akaprî nê apa hkêt nê. Nê mẽ tee ri amnhî kukamã tanhmã ajamxpêr to ho ri akaprî nê apa hkêt nê. ³⁰ Mẽ kot Tirtûm kôt amnhî xunhwÿr kêt xwÿnhjaja na htem ã ri hamaxpêr anhÿr o hkaprî nê pa. Tã kêr ka mẽ ho mẽ uràk kêt nê. Tirtûm kot mẽ panhõ mẽmoj kêt kôt mẽ pahpumunh mex kênã. ³¹ Jakamã kêr ka mẽ ãm hkôt ri amnhî nhîpêx rãhã nê. Nê amã ja pix kukamã ajamxpêr o ri apa hprãm. Hãmri nhùm amnhî tã mẽ apumu hãmri nê apkati mẽ tãm mẽ amã mẽmoj nhõr o pa. Anê.

Kaxkwa kamã mẽ pakurêx rax jarênh

Matêwre 6.19-21; mãänën Sikûn Ximotre 4.8; Eprêw 10.34; Wam Pêtre 1.4

³² Nhùm Jejus arı mẽ kãm kapêr nê mẽ kãm:

—E mẽ ate ixkôt amnhî xunhwÿr xwÿnhjaja. Ra Tirtûm kot mẽ ato hkra jakamã kwa mẽ axàmnhîx hkamnàr rom ri tanhmã amnhî nhîpêx to ho ri apa. Na hte mẽ apê hkra hã mẽ apumu nê hkĩnh nê. Koja nhÿr mã kaxkwa kamã õ krî hwÿr mẽ ato api ka mẽ kamã wa ixkuri amex nê atır tûm nê apa ho apa. Ja na mex o kot jar pika ja kôt mẽ õ mẽmoj rûnh nê pa xwÿnhta jakrenh. ³³ Jakamã kêr ka mẽ axàmnhîx ri akurêx kwÿ ho wênê nê hpãnhã kàxpore jamÿ nê mẽ kêp amrakati xwÿnhjê mã ho apigrãnh o ri mẽ hkôt apa. Kot kaj mẽ ã amnhî nhîpêx anê hãmri nê kaxkwa kamã akurêx rax nê. Mo kaxkwa kamã mẽ àhkĩnh xwÿnh koja mẽ apê ho ahkî? Nê kamã mo amnhõre kot mẽ apê homnu? Kaxkwa kamã ja amrakati kumrêx. Jakamã Tirtûm kot mẽ amã mẽ akurêx nhõr mã xwÿnhta koja aa apê

omnuj nê hapêx kêt kumrêx. ³⁴ Kot kaj mẽ jar pika ja kamã akurêx rax hãmri nê tanhmã apê omnu hto pix kukamã ajamxpêr rãhã ho ri apa. Nom kot kaj mẽ apê Tirtûm kra hã kot kaj mẽ jar akurêx rax kêt tã kaxkwa kamã akurêx pix kukamã ajamxpêr rãhã ho ra akĩnh nê ri apa. Anê.

Mẽ pahte Jejus kutêp tanhmã amnhî nhîpêx to hã mẽ pamã karõ

Matêwre 24.42-43; Makre 13.32-37; Rukre 21.34-36; mãänën Wam Tesarõn 5.4-8

³⁵ Nhùm pre Jejus arı mẽ ahkre nê mẽ kãm:

—E na pa pre ra mẽ apê ixkôt mẽ apa ho apa xwÿnhjê mã tanhmã amnhî kukamã amnhî jarênh to. Ixtyk nê akupÿm ixtır nê ma akupÿm ixàpir hãmri nê mẽmo arıgro hã akupÿn mẽ awÿr ixwÿrkja na pa pre ra mẽ amã ja hã amnhî jarê. Tã kwa kêr ka mẽ ixwakre kamã ixte mẽ amã ã amnhî jarênh anhÿrja mã ajamxpêr tÿx pê ixkôt amnhî nhîpêx rãhã ho ri apa.

³⁶ —Te mẽ õ patrãw mã mẽ àpênh mex xwÿnhjaja kot amnhî nhîpêx pyràk o amnhî nhîpêx o ri apa. Koja mẽ õ patrãw ma mẽ kot xpeñ mã wa rer mã xwÿnh pumunh mã ma nhÿhÿm tẽ. Hãmri nhùm kãm mẽ àpênh xwÿnhjaja arı kutêp òrkwÿ kamã hkrî. Axkãm hamak rom nê kutêp hkrî. Akupÿn htêm nhùm mẽ kot amnhî wÿr mar nê kãm kahê xà mẽnh tokyx anhÿr kaxyw arı kutêp òt kêt nê hkrî. Kôt ã kamàt nhùm akupÿn hpôx o htêm rÿ arıgro hwÿr hpôx o htêm nhùm mẽ kot amnhî wÿr mar nê kãm kahê xà mẽnh tokyx anhÿr kaxyw kutêp òt kêt nê hkrî. Akupÿn hpôx ã omunh hãmri nê tokyx apkur kaxyw kãm õ nhîpêx kaxyw. Kêr kê akupÿn pøj nê ã mẽ kot amnhî nhîpêx anhÿr ã mẽ omu nê hkĩnh nê. Tã kêr ka mẽ àpênh xwÿnhhtajê pyrã nê ixwakre kamã inhmã ajamxpêr rãhã ho ri apa. Jao ixkamã ajamak o apa ho ixkôt amnhî nhîpêx mex rãhã nê. No kot paj akupÿn mẽ awÿr wrÿ hãmri ka mẽ àpênh xwÿnhjê pyrã nê inhmã mẽmoj nhõr kêt nê. Kêt pa kot paj mẽ õ patrãwta kurom mẽ amã mẽmoj mex gõ.

³⁹ —Na htem mẽ kêp àhkĩnh pymaj amnhî nhõrkwÿ jamãr rãhã ho pa. ⁴⁰ Ja pyrã nê mẽ ate akupÿn ixwÿrk xà hã arıgro pumunh kêt jakamã kêr ka mẽ òrkwÿ nhõ dõnta pyrã nê ixkutêp axkãm ajamak rom rãhã nê ri apa. Jao tãm amnhî nhîpêx rãhã nê. Anê.

Mẽ õ patrãw mã mẽ àpênh mex xwÿnhjê jarênh

Matêwre 24.45

⁴¹ Nhùm pre ã Jejus hkôt mẽ pa ho pa xwÿnhjê jahkre anê. Hãmri nhùm Simãw Pêtre kuma nê kãm:

—Kwa Pahihti. Xàn ka mẽ piitã mẽ kãm ã akapêr anê nà? Xà ãm mẽ papxipixjê mã? Anê.

⁴² Hãmri nhùm kãm:

—Nà ãm ixwakre kamã mẽ ate ixkôt tanhmã inhmã amnhî nhîpêx to ho mẽ apa xwÿnh piitã mẽ amã na pa ã ixkapêr anê. Koja mẽ àpênh xwÿnhjê hõ õ patrãw mã àpênh mex o pa nhùm amnhî tã omu nê ma nhÿhÿm mõi kaxyw nê ïhkram mẽmoj piitã haxàr pa. Hãmri nê kãm: “E kêr ka ixwakre kamã inhmã inhõrkwÿ

htānopxa. Nē mē àpēnh xwýnhjê mã õ mex kê mē apkur mex o pa." Anē. Koja ã kām mēmoj tã karõ anē hāmri nē kato nē ma nhýhým mō. ⁴³ Hāmri nhũm kām àpēnh mex xwýnhhta wakre kamã kām àpēnh mex o pa. Jakamã nhũm õ patrãw akupýn hpõx o mō nhũm amnhĩ wýr harēnh ma nē hkĩnh nē. Nē mēmoj tã amnhĩ tã kamã kahak kêt nē. Rý tee ri wakre kamã kām àpēnh punuj ã amnhĩ pumu nē tee amnhĩ kukamã hamaxpēr kêt nē. Kot wakre kamã kutêp àpēnh mex jakamã akupýn hpõx ã harēnh ma nē hkĩnh nē.

⁴⁴ —Jakamã nhũm õ patrãwja akupýn pōj nē kot kām àpēnh mex ã omu nē haxwýja hkĩnh nē. Hāmri nē kot kām hamãr o pa kaxyw kām mēmoj piitã ãhkram haxãr pa. ⁴⁵ Nom koja kām àpēnh xwýnhhta axtem nē wakre kamã kām àpēnh mex kêt nē. Nē tokyx akupýn mōr kêt ã hkamnhĩx nē wakre kamã kām mē àpēnh xwýnhjê htak nē pipãnh pix nē mē kām gō xành xwýnhjê kôt pix mã pa japēr. ⁴⁶ Hāmri nhũm õ patrãw haēr pē akupýn pōj nē tee ri ã amnhĩ nhĩpêx anhýr ã omu. Hāmri nē gryk tỳx nē tanhmã homnuj to. Hāmri nē kām mē àpēnh punuj xwýnhjê mē mē ho pimràãtã amnhĩ nē mē hanor pa. Tã kēr ka mē ixwakre kamã ho mē uràk kêt nē. Mē kurom ixkapēr kôt tãm amnhĩ nhĩpêx mex rãhã ho ri apa.

⁴⁷ —Nē koja mēhõ kormã Tirtũm kapēr mar kêt nē htỳx ri tanhmã amnhĩ tomnuj to ho pa. Hã koja Tirtũm ja hã omu nē nhýrmã kot amnhĩ tomnuj o pata mýrapê tanhmã ho nhũm amnhĩ xà htỳx kamã hamak tũm xà kamã pa. Nom akrànhmã amnhĩ xà kamã hamak o pa. Aa kot Tirtũm kapēr mar kêt jakamã koja ãm akrànhmã amnhĩ xà kamã hamak o pa. Nom koja mēhõ kapēr mar mex tã ãm kuma nē hkôt amnhĩ nhĩpêx kêt nē. Nē xatã hirôp kuhê nē tanhmã amnhĩ tomnuj to. Hã koja Tirtũm tee ri ja hã omu nē nhýrmã tanhmã homnuj tỳx to. Hāmri nhũm wamtajê pyrã nē amnhĩ xà htỳx kamã hamak tũm xàta kamã pa ho pa nom mē kĩnhã amnhĩ xà htỳx kamã hamak rãhã ho pa. Anē.

Jejus kot nhýrmã mē kot amnhĩ tomnuj xà ho hapêx ã harēnh

Matêwre 10.34-36

⁴⁹ Nhũm Jejus arĩ hkôt mē pa ho mē pa xwýnhjê jahkre nē mē kām:

—Nà ixte mē omnu xà piitã ho ijapêx par nē mē kot tanhmã amnhĩ tomnuj to piitã ho ijapêx par kaxyw na pa pre wrý. Tã ra ixte piitã ho ijapêx par o inhmōr ronhýx ja inhmã mex kumrêx. Nom kormã. ⁵⁰ Kot paj amnhĩ xà htỳx kām ijamak rax o mē kot amnhĩ tomnuj o ijapêx o hkrax. Hāmri nē nhýrmã ho ijapêx pa. Na pa ra ixtýx kaxyw ixte amnhĩ kà xà kamã ijamak kukamã ijamaxpēr o ra amnhĩ kamã ixkahak nē ri ixpa. Tã kot paj ja ho ijapêx pa nē ixkĩnh tỳx kumrêx. Anē.

Mē kot Jejus ã axpēn kutã amnhĩ xunhwýr ã mē harēnh

Matêwre 10.21, 10.34-35

⁵¹ Nhũm Jejus arĩ mē ahkre nē mē kām:

—Nē ra mē awýr ixwrýk tã koja mē piitã ixkukwak ri hamakêtkati nē àmnhĩx ri pa hkêt nē. Kormã. Koja mē akwýjaja ixkapēr ma nē mē apyrã nē amnhĩ kaxyw ixkôt hamaxpēr. No nhũm mē akwýjaja mē akĩnhã kuma nē ãm kuma. Hāmri nē ixtã tanhmã mē anhĩpêx to ka mē ixpyrã nē amnhĩ xà htỳx kamã ajamak o ri apa.

⁵² —Nē koja tanhmãn ixkre pyxi kamã mēmojaja ohtõn pa. Nhũm war axkrutere nē ixkôt amnhĩ xunhwý nhũm mē axkrunêpxi nē ixkwým ri amnhĩ nhĩpêx nē ixkutã amnhĩ xunhwý. ⁵³ Nhũm mē hipêêxã hkra my mē wa ixtã axpēn kutã amnhĩ xunhwý. Nhũm mē katorxã hkra ni mē wa ixtã axpēn kutã amnhĩ xunhwý. Nhũm mē wýj umregêx mē wa haxwýja ixtã axpēn kutã amnhĩ xunhwý. Koja mē ã ixtã axpēn nhĩpêx anhýr o pa. Anē.

Mē pahte amnhĩ tomnuj kaga nē Tirtũm kôt amnhĩ nhĩpêx ã mē pamã karõ

Matêwre 5.25-26, 16.2-4

⁵⁴ Nhũm Jejus hpãnhã mē kot hkôt amnhĩ xunhwýr kêt xwýnhjê mã kapēr nē mē kām:

—Kwa mē inhma mē ate ixkôt amnhĩ xunhwýr kêt xwýnhjaja. Na htem kaxkwa kamã na htyk rax pumu nē na wrýk mã hamaxpēr kurê kumrêx. Hāmri nhũm na wrý. ⁵⁵ Nē amgrã pē kôk krihkritja nhũm htem kuma nē arĩgro htỳx mã hamaxpēr kurê kumrêx. Hāmri nhũm arĩgro htỳx nē. ⁵⁶ ã na ka htem aprĩ hã mēmoj pumunh kôt mēmoj kukamã ajamaxpēr mex o ri apa anē. Nom nhũm Tirtũmja mē ate tanhmã amnhĩ tomnuj to mýrapê tanhmã mē ato kaxyw nhũm mē ate ja hã amnhĩ pumunh tã tokyx amnhĩ tomnuj kaga hkêt nē.

⁵⁸ —Na htem tanhmã axpēn tomnuj to. Hāmri nhũm kot tanhmã war axpēn to xwýnhhta pahi hwýr htēm nē kām tanhmã kot ho xwýnhhta jarēnh kaxyw. Hāmri nhũm kamã gryk xwýnhhta kot pahi mã harēnh kaxyw ã harēnh ma nē hāmri tokyx hwýr tē nē wa tãm akupým axpēn xãm. Na htem ã amnhĩ nhĩpêx anē. Pahi kot ja mar nē tanhmã mē ho pymaj na htem ã amnhĩ nhĩpêx anē nē tokyx akupým tãm axpēn xunhwý. No koja mē ã amnhĩ nhĩpêx anhýr kêt nē nhũm pahija mē harēnh ma hāmri nē tanhmã kot hõ ho xwýnhhta pynê nē haxã nhũm tee kām kator prãm o hkrĩ kaprý. Hāmri nē tanhmã amnhĩ to nē amnhĩ pãnhã kām amnhĩ rer pa nhũm pahihitja kormã mē kām anē nhũm mē kām ure nhũm kato. Ja pyrã nē kêr ka mē Tirtũm tanhmã kot mē anhĩpêx to pymaj tokyx mē ate amnhĩ tomnuj kaga nē hkôt amnhĩ nhĩpêx rãhã ho ri apa. Anē.

13 Tã nhũm axtem mē hkwýjaja Jejus wýr mra nē kām:

—Pa? Kwa xàn ka ra Garirej nhõ xwýnh kwýjê jarēnh ma nà? Na xep prem Jerujarê hwýr mra nē ham mē kot Tirtũm mã amnhĩ jarēnh xà hã ixkre kamã kām amnhĩ jarēnh kaxyw kormã kām mry hpar o kuhê nhũm xep pahihiti Piratja mē harēnh ma nē mē hã amýnê nhũm mē ma mē hwýr mra nē mē himex pa. Kwa mãn mē kot amnhĩ tomnuj tỳx o mē pajakrenh ã na prem mē himex nà? Anē.

² Hämri nhùm mē kām:

—Nà mē kot amnhī tomnuj tỳx mỳrapê mē kot mē himex kêt. Mē apiitã mē ate amnhī tomnuj o axpên pyrãk kênã. Tã kot ka mē amnhī tomnuj kaga nê Tirtũm kôt amnhī xunhwỳr kêt hã kot ka mē nhỹrmã ty hãmri nê ò krĩ hwỳr axàpir kêt nê. ⁴ No Jerujarê kamã ixkre prêkja mē kot kãm “Siroe” anhỹr xwỳnhhta mē ho 18 nê mē hipy htem nê mē himex par xwỳnhjaja. Xà mē kot amnhī tomnuj tỳx mỳrapê na prem ty? Xà mē kot amnhī tomnuj tỳx o Jerujarê kamã arĩ mē hĩr xwỳnhjê jakrenh? ⁵ Nà kot anhỹr kêt. Mē apiitã mē ate amnhī tomnuj o axpên pyrãk. Jakamã kot kaj mē ã amnhī nhĩpêx anhỹr kaga nê Tirtũm kôt amnhī nhĩpêx kêt nê hãmri nê mē urak nê nhỹrmã ty hãmri nê Tirtũm nhõ krĩ hwỳr axàpir kêt nê. Jakamã kwa mē ixkapêr ma nê kãm ajamxpêr tỳx rãhã ho ri apa. Anê.

Tirtũm kot mē pakamã gryk tokyx anhỹr kêt ã harênh
Römãn 2.4; Sikkũn Pêtre 3.8-9

⁶ Tã nhùm Jejus kê axte tanhmã mē ahkre hto. Nê Tirtũm kot tanhmã mē panhĩpêx to hã kuxi nê mē kãm awjarê nê mē kãm:

—Koja hpur nhõ dõn mẽmo pãr kre nhùm ra hprêk mex nê ò mã tãm nê. Tã aa ò hkêt ã ra hã amgrã axkrunêpxi. ⁷ Hãmri nhùm kot hkre xwỳnhja tee ri omu nê kãm àpênh xwỳnh wỳr tẽ nê kãm: “E kwa ma tẽ nê mẽmo pãr mũj krãhta nê amê. Mexti hã. Ra ò hkêt ã amgrã axkrunêpxi kênã. Koja pêr aa ò hkêt nê. Mo kaxyw kot kêt ò hkêt tã ò mex xwỳnh kaêx ã mē kêt àmnar ò kuhê? E hwỳr tẽ nê krãhta nê amê.” Anê.

⁸ Hãmri nhùm tee ri kot kãm hã karõja ma nê kãm: “Kwa nã kormã. Pa kop ixãmnhĩx pãr krax ã mẽmo japõk kwỳ kapĩ nê kop hamã mãn. Kê axte hã amgrã pyxi nê hapêx nê ò hkêt pa kormã krãhta nê kumê. Koja amgrã ja kamã amã ò japêr ka omu nê akĩnh nê.” Anê. ã mē ujarênh kot anhỹr.

Nhùm Jejus ã mē kãm ujarênh anê. Mē kot amnhĩ tomnuj tỳx o pa htã nhùm Tirtũm kot pur nhõ dõn mã àpênh xwỳnhhta pyrã nê mē kamã gryk tokyx anhỹr kêt ã nhùm ã hã kuxi nê mē kãm ujarênh anê.

Jejus kot arĩgromnu hã mēhõ ho mex ã harênh
Rukre 14.1-6; Juãw 5.16-17

¹⁰ Tã nhùm mē ò arĩgromnu pê sap kato nhùm Jejus Ijaew pikuprõnh xà hã ixkre hwỳr axà nê kamã Tirtũm kapêr o mē ahkre ho nhỹ. ¹¹ Nhùm kamã mēhõ ni hikõt rãhã nê pa xwỳnhja nhỹ. Na pre ra amnepê mēkarõmnuti tanhmã ho nhùm katat nê ri mrar kêt kumrêx. ãm hikõt rãhã nê ri pa hã ra hã amgrã pê 18. ¹² Hãmri nhùm Jejus omu nê amnhĩ wỳr kãm hpa ho apê nhùm hwỳr tẽ nhùm hã tĩkra xi nê kãm:

—E na ka ra akupỹm amex.

Anê nhùm akupỹm katat nê mex kurê kumrêx. Hãmri nê amnhĩ pumu nê hkĩnh tỳx nê Tirtũm mã mex o mex ã harênh o xa. ¹⁴ Nom nhùm mē pikuprõnh xà hã ixkre jamãr xwỳnh maatija tee ri ja hã omu hãmri nê Jejus kamã gryk tỳx nê. Mē ò arĩgromnu hã akupỹm kot ho

mex jakamã nhùm kamã gryk tỳx nê. Hãmri nê mē pikuprõnh xwỳnhjê mã kãm:

—Tk. Kwa semãn ã mē àpênh xà hã arĩgro xohtõ. Kêp 6. Kot kaj mē mãmri tòmik nê sikkũn nê tês nê kwa-ta nê kĩa nê sêsta ja ã ka mē apê rỳ mãmri Jejus wỳr amnhĩ to mra kê akupỹm tanhmã mē ato mex to. No sap ã kwarĩ. Sap kêp mē pahpê Ijaew nhõ arĩgromnu kênã. Na pu htem hã paxàpênh kêt nê. Jakamã arĩgro ja hã kot akupỹm mē ato mexja mex kêt. Anê.

¹⁵ Hãmri nhùm Jejus kuma nê kãm:

—Kwa xà mē kajaja na ka htem sap ã axàpênh kêt nê apa? Nà mē ate hã axàpênh kênã. Xàn ka htem sap ã akrit kawar nê akrit mõi ma mē ho apa nê mē hkõm kêt nê? Nà na ka htem ma mē ho apa nhùm htem ixkõ. Mot ka kêt mē ri axtem nê mē kot sap ã tanhmã amnhĩ toja nê mē kãm akapêr? ¹⁶ Ixte ni ho mex xwỳnhhta mē pahpyrã nê kêp finat Apraãw kagrõt nyw ò na. Nhùm pre Satanasti te kot kãm ê nê ri o pa pyrãk o hipêx jakamã nhùm ý hã hikõt nê ri paja ã ra hã amgrã kêp 18. Tã pa nê te ixte Satanasti ho ixkrihkrit nê ixte kêp utar pyrãk o hipêx nê akupỹm ho mex. Mot kot pa kêt ri omu nê ãm omu nê arĩgromnu hã ho mex kêt nê? Nà ixte arĩgro piitã hã akupỹm mē ho mex o ixpa xwỳnh kênã. Anê.

¹⁷ Hãmri nhùm mē kot kãm kapêr mar prãm kêt xwỳnhjaja kuma nê kamã gryk nê. Te ho mēhpriẽ mã mē hamaxpêr nhõr pyrãk o mē hipêx pyrãk jakamã nhùm mē amnhĩ tã kuma nê kamã gryk nê. No nhùm mē kot ra ã amnhĩ nhĩpêx anhỹr o pa hã omunh xwỳnhjaja ja hã omu nê kãm hkĩnh nê.

Jejus te kot mẽmo hy pyrãk ã harênh
Matêwre 13.31-33; Makre 4.30-32

¹⁸ Nhùm Jejus arĩ mē ahkre nê tanhmã mē kãm amnhĩ tã ujarênh to nê mē kãm:

—Nê Tirtũm kot mē awỳr ixte mē ato amnhĩptar kaxyw inhmênh ã ijarênhja. Te ixte mẽmo hy pixire pyrãk. Na htem hkre nhùm higrõt. Nê gaa nê rĩ hprêk. Hãmri nê pa angrã nhùm kuwênhre hwỳr mra nê hò pytĩ kamã amnhĩm haê nhĩpêx. Tã kot paj nhỹrmã mẽmo hy jarênhhta pyrã nê ixpiti htã kot paj pika piitã hkõt mē ho amnhĩptã nê mē omunh mex rãhã ho ri ixpa. Anê.

Jejus te kot pãwti kaxkrit xà pyrãk ã harênh
Matêwre 13.33-35

²⁰ Nhùm Jejus arĩ mē ahkre ho xa. Nom hprĩ hã amnhĩ jarênh kêt nê. ãm amnhĩ tã kuxi nê mē kãm awjarê nê mē kãm:

—E kot pa hpãnhã tanhmã mē amã pãwti kaxkrit xà jarênh to. Koja mênijê hò ãm hkwy ho grire nê kupy nê kaxyw mẽmo xõm kãm kumê nê ho pihkãr pa nê ho pãwti nhĩpêx. Nhùm kaxkrit xàja grire htã pãwti piitã ho kaxkrit mex nê. Ja pyrã nê kot paj ixpyxi htã koja mē nhỹrmã pika piitã hkõt ixkõt amnhĩ nhĩpêx mex o pa. Anê.

Nhùm pre ã Jejus mē kãm amnhĩ tã pãw kaxkrit xàja xi nê harênh anê.

Kaxkwa hwÿr hakwa kre kahê xà jarênh

Matêwre 7.13-14, 7.21-23; Juãw 10.7-10

²² Tã nhũm Jejus arĩ krĩ pê Jerujarê hwÿr krĩ hkôt ri mẽ ahkre ho mẽ hkôt ri pa. ²³ Hãmri nhũm mēhõ myja hwÿr tē nē mẽmoj tã hkukja nē kãm:

—Pa. Kwa inhmã mẽmoj jarê. Xà koja mẽ ohtô nē nhÿrmã Tirtũm ri htĩr tũm nē papa ho nà koja mẽ grêre? Anê.

²⁴ Hãmri nhũm kuma nē mẽ kot mar o kuhê xwÿnh piitã kãm:

—Nà mẽ kot Tirtũm kôt amnhĩ xunhwÿr xwÿnhjê pix koja mẽ õ krĩ hwÿr agjê. Wÿr mẽ gjêx xàja ãm pixii nom koja mẽ ohtô nē kãm hkôt wÿr gjêx prãm kêt nē. Na htem te hwÿr mẽ gjêx xà hõ japêr o pa pyrãk. Nom pa na te ixpê hwÿr mẽ gjêx xà pixita pyrãk. Jakamã kwa kêr ka mẽ tokyx ixkôt amnhĩ xunhwÿr tÿx nē ixkôt ri amnhĩ nhĩpêx o ri apa. Na htem ohtô nē kãm ixkôt amnhĩ xunhwÿr prãm kêt nē. Ixte amnhĩ nhĩpêxja mẽ kêp hihtÿx jakamã nhũm htem ixkaga.

²⁵ —Tã koja mẽ nhÿrmã ty nē tee ri kãm Tirtũm wÿr gjêx prãm kaprÿ. Kot paj te mẽ kêp kahê pyrãk o mẽ hipêx nhũm mẽ kapôt ã kuhê nē tee ri amnhĩ tã ixpumu nē inhmã: “Kwa mẽ inhmã kahê xà mẽ pa mẽ awÿr agjê Pahihti.” Anê. Hãmri pa mẽ kãm: “Nà ixte mẽ apumunhre hã kot pa kêt ri mẽ amã kurê.” Anê.

²⁶ —Hãmri nhũm mẽ tee ri inhma nē inhmã: “Kwa nà ra ate mẽ ixpumunh mex kênã. Na ka pre mẽ inhõ krĩ kamã mẽ ijahkre ho ri apa nē mẽ ixkutã axãpkur o ri apa.” Anê. ²⁷ Hãmri pa mẽ kãm: “Tk. Ixte mẽ akutã ixãpkur tã mẽ ate ixkôt amnhĩ xunhwÿre hã. Jakamã e mẽ ma mra. Mẽ ate amnhĩ tomnuj pix o mẽ apa xwÿnh jakamã kot kaj mẽ ixwÿr agjêx kêt nē.” Anê. Kot paj ã mẽ kãm ixkapêr anê.

²⁸ —Hãmri nhũm mẽ amÿm ri mẽ inhmex ã mẽ ixpumunh o kuhê. Kaxkwa kamã mẽ ixkĩnh nē ri mẽ inhmex nē ixpa hã amÿm mẽ ixpumunh o kuhê. Apraãw nē Ijak nē Jako nē Tirtũm kapêr jarênh o mẽ pa xwÿnh piitã nhũm mẽ amÿm mẽ ixkĩnh nē mẽ ixãpkur mex ã mẽ ixpumunh o kuhê. Hãmri nē tee ri mẽ ixwÿr kãm gjêx prãm kaprÿ nē hkaprĩ nē mur nē amnhĩ krã hkĩ jarê nē amnhĩ kã nhê nē amnhĩ kamã gryk tÿx nē. No ãm tee ri amnhĩ kamã gryk kaprÿ. ã koja mẽ amnhĩ nhĩpêx anê. ²⁹ Nom Tirtũm kôt mẽ kot amnhĩ xunhwÿr xwÿnhjaja koja mẽ kurum pika piitã kurũm axpên wÿr akuprõ nē Tirtũm wÿr agjê nē kuri hkĩnh nē apkur mex o hkrĩ. Mẽ akwÿjjaja nē pika piitã kurũm hohô rax nē axpên wÿr akuprõ nē hwÿr agjê nē kuri apkur mex nē hkĩnh nē pa ho pa.

³⁰ —Mẽ apê Ijaewjaja mẽ amã Ijaew kêt xwÿnhjê hprãm nõkati htã koja mẽ hkwÿjjaja mẽ akwÿjê rom Tirtũm ri axpên wÿr akuprõ nē hkĩnh nē axpên kutã apkur mex o hkrĩ. Jakamã kwa kot kaj mẽ urak nē amã Tirtũm mẽ wa ixwÿr agjêx prãm hã kot kaj mẽ ixkôt amnhĩ xunhwÿr nē ixkapêr kôt amnhĩ nhĩpêx mex o ri apa. Anê.

Jesús kãm Jerujarê nhõ xwÿnhjê japê hã harênh

Matêwre 23.37-39

³¹ Hãmri nhũm Parijew nhõ xwÿnh kwÿjjaja Jejus wÿr mra nē kãm:

—Pa. E ot pa mẽ awÿr mra. Kwa kêr ka ma Jerujarê hwÿr amõr kêt nē. Na ra mẽ hkĩnh wÿr pahi Eroxja põj nē kot tanhmã ato kaxyw atã amnhĩ jarê pa mẽ kuma. Jakamã kwa mẽ hwÿr amõr kêt nē. Nhãm krĩ hõ hwÿr mãn mõ. Anê.

³² Hãmri nhũm mẽ kuma nē mẽ kãm:

—Tk. Nà kot pa umaj nhãm krĩ hõ hwÿr inhmõr kêt nē. Kot paj ma mẽ hkwÿjê nē mẽkarõmnuti japõx pê mẽ hkwÿjê ho mex o ma hwÿr mõ. Pahi Erox kãm mẽ hpar pix prãm. E mẽ mãmri ma akupÿm hwÿr mra nē ã kãm ixkapêr jarênh anê. No kot paj umaj nhÿhÿm ixprõt nē ixtêm nē kêp ixpimxur kêt nē. Ra ixte õ krĩ hwÿr inhnojarêr kênã. Anê.

³³ Hãmri nē mẽ kot mar xwÿnhjê mã amnhĩ jarê nē mẽ kãm:

—Kot paj tanhmã amnhĩ nhĩpêx to ho ri ixpa rãhã Jerujarê hwÿr mõn põj nē kamã ty. Kamã na htem mẽ kot Tirtũm nhÿ hã kapêr jarênh xwÿnhjê nhĩmex. Tã hwÿr kot paj mõ. Anê.

Nhũm pre ã Jejus mẽ kãm amnhĩ jarênh anê. ³⁴ Hãmri nē te ra kot Jerujarê nhõ xwÿnhjê pumunh o ãm nē mẽ kãm kapêr pyrãk o kapêr nē mẽ kãm:

—Hêxta waa nē mẽ apê Jerujarê nhõ xwÿnhjaja. Tirtũmja xatã mẽ awÿr ý hã kapêr jarênh o mẽ pa xwÿnhjê rênh tã ka mẽ kapêr mar kêt nē. Nē axtem nē kên o mẽ htak o mẽ himex o apa. Na ka htem ã amnhĩ tomnuj o apa anê. Tã arĩ inhmã mẽ ajamãr o ri ixpa hprãm. Te ho krãhyre kot nore hpro nē ho hikwÿ pyrãk o na pa inhmã mẽ anhĩpêx prãm tã ka mẽ apê ixprãm nõkati nē ixkaga. ³⁵ Mÿrapê koja Tirtũm mẽ anhõ krĩ jamãr kêt nē. Kot paj tokyx ty nē mẽ apiitã mẽ are nē ma akupÿm api ka mẽ axte ixpumunh kêt nē. ãm akupÿn ixwÿr xà hã arĩgrota pix ã koja mẽ akwÿjjaja mẽ amÿr pê krĩ ja hwÿr ixwÿr kãm ixpumu. Hãmri nē mẽ akurom ixpumu nē hkĩnh tÿx nē. Nē tã ixkôt amnhĩ xunhwÿr nē axpên mã ijarênh o:

E ota Tirtũm kot mẽ pahwÿr mênh xwÿnhhta põj. Nà ãm hãmri na mẽ pahwÿr wrÿ. Na mex kumrêx. Anê.

Jesús kot axte arĩgromnu hã mēhõ ho mex ã harênh

Rukre 13.10-17

14 Tã nhũm sap nhũm Jejus ma Parijew nhõ xwÿnhjê krãhtũm kutã apkur kaxyw õrkwÿ hwÿr tē.

Hãmri nhũm mẽ wa hã htu rax nē Jejus apkur ã tãnopxar o kuhê. Mẽ kot amnhĩ nhĩpêx kwÿm ri tanhmã amnhĩ nhĩpêx to nhũm mẽ kot hã omunh nē ra hã ãmnênh kaxyw nhũm mẽ kuri tãnopxar o kuhê.

² Nhũm ixkreja kamã mēhõ my hte hikot xwÿnh mẽ kuri xa. ³ Hãmri nhũm Jejus omu nē hã Parijew nhõ xwÿnhjê mẽ Tirtũm kapêr tũm o mẽ ahkre xwÿnhjê kukja nē mẽ kãm:

—Kwa mẽ inhmã mẽmoj jarê. Jarãhã na mẽ panhõ arĩgromnu pê sap. Tanhmã na pre finat Mojesja Tirtũm

nhỹ hã mẽ pahte sap ã tanhmã amnhĩ nhĩpêx to hã mẽ pamã karõ hto? Xà kot puj mẽ akupỹm mẽ ho mex nã? Kot puj mẽ ãm mẽ omu nẽ akupỹm mẽ ho mex kêt nẽ? E mẽ atõ inhmã ja jarẽ. Anẽ.

⁴ Hãmri nhũm mẽ kuma nẽ tanhmã kutã kãm nẽ hkêt nẽ. ãm akryk mar o kuhê. Mẽ kot tanhmã kãm nẽ nhũm kot ta pãnhã mẽ kãm tanhmã nẽ pymaj nhũm mẽ akryk mar o kuhê nẽ tanhmã kutã kãm nẽ hkêt nẽ. Hãmri nhũm tee ri mẽ omu hãmri nẽ myja ã ãhkra xi nẽ akupỹm ho mex. Hãmri nẽ hano nhũm ma akupỹm mex nẽ hkĩnh nẽ ma tẽ. ⁵ Hãmri nhũm Jejus mẽ kãm:

—E mẽ inhma. Xà koja mẽ akra sap ã mẽ apẽ ahkrehti xupỹm kãm tẽm ka mẽ ãm omu nẽ arĩgro mex jamãr pẽ tokyx ho axàpir kêt nẽ? Nà kot kaj mẽ ho axàpir kurẽ kumrẽx. Rỹ koja akrit mõi gyw mã axà xat ka mẽ omu nẽ ãm omu nẽ arĩgro mex jamãr pẽ tokyx hkaxàr kêt nẽ? Nà kot kaj mẽ hkaxàr kurẽ kumrẽx. Na htem sap ã tanhmã mẽ ho mex to ho pa. Mẽ panhõ arĩgromnu htã pu htem hã tanhmã mẽ ho mex to. Jakamã na pa ã hã myta ho mex kurẽ kumrẽx anẽ nẽ ri arĩgro mex jamãr kêt nẽ. Anẽ.

⁶ Nhũm pre ã Jejus mẽ kãm amnhĩ jarẽnh anẽ nhũm mẽ kuma nom kutã kãm mẽmoj jarẽnh kêt nẽ. Ra kot akupỹm ho mex jakamã nhũm mẽ tanhmã hã kãm nẽ hkêt nẽ kuhê.

Mẽ pahte amnhĩ to hkryre hã mẽ pajarẽnh

Matêwre 23.6-14; Rukre 6.32-36; mãänën Xiakre 4.10; Wam Pêtre 5.5-6

⁷ Hãmri nhũm mẽ apkur kaxyw mẽ hkrĩ xà hã hkrĩ hpa. Nhũm mẽ hkwyjaja hkwyjê pẽ amnhĩ to wa nẽ mẽ hkrĩ xà mex kãm hkrĩ hpa. Hãmri nhũm Jejus ja hã mẽ omunh o xa nẽ axte mẽ kãm mẽmoj jarẽ. No ãm mẽmoj tã kuxi nẽ mẽ kãm awjarẽ nẽ mẽ kãm:

⁸ —Nà koja mẽ axpẽn mã mẽhõ rer kaxyw nẽ amnhĩ wỳr mẽ atã karõ. Mẽ ate kutã axàpkur kaxyw. Hãmri kêr ka mẽ hwỳr mra nẽ axàpkur kaxyw nẽ kupĩp kãm akrĩ kurẽ kumrẽx. No kot kaj mẽ kêp amnhĩ to wa nẽ mẽ hkrĩ xà mex pytã nẽ hã akrĩ nhũm ra kot amnhĩ to rax xwỳnhjê hõja hapu hã mẽ akõt tẽn axà. ⁹ Hãmri nhũm ixkre nhõ dõn kot amnhĩ wỳr mẽ awỳr xwỳnhta mẽ hkrĩ xà mexta ã mẽ awỳ nẽ mẽ amã: “Kwa mẽ atõ kànhmã xa nẽ kãm mẽ hkrĩ xà kaprã.” Anẽ. Hãmri ka nhãm xa nẽ kãm anhỹr xàta gõ. Hãmri nẽ apijaàm kãm hpãnhã kupĩp kãm nhỹ. ¹⁰ Ja pymaj kêr ka mẽ kupĩp kãm akrĩ kurẽ kumrẽx. Kê ixkre nhõ dõnja tee ri ja hã mẽ apumu nẽ mẽ amã: “Tk. Kwa ixkrãmnhwỳjaja. Mẽ kupĩp kãm akrĩ hkêt nẽ. Kwa mẽ mra nẽ jar mẽ hkrĩ xà mex ã mãn akrĩ.” Anẽ hãmri nhũm ja mẽ amã mex nẽ. Nhũm mẽ piitã kot mẽ ato mex ã mẽ atã omu ka mẽ ajaxwỳja amnhĩ tã omu nẽ akĩnh nẽ ajamakêtkati nẽ akrĩ.

¹¹ —Nẽ koja mẽhõ te amnhĩ to rax o hkwyjê jakrenh pyrãk o amnhĩ nhĩpêx o ri pa hãmri nhũm Tĩrtũm ja hã omu nẽ tanhmã hã ho. Hãmri nhũm ra amnhĩ to grire hã amnhĩ pumunh o ri pa nẽ rĩ amnhĩ pumu. Nom koja mẽhõ amnhĩ to rax o hkwyjê jakrenh pyrãk o amnhĩ

nhĩpêx o ri pa hkêt nhũm Tĩrtũm ja hã omu hãmri nẽ tãm amnhĩm kot amnhĩ to rax xwỳnh ã harẽ. Anẽ.

Mẽ pahte mẽ kêp amrakati xwỳnhjê ho mex ã mẽ pamã karõ

¹² Nhũm pre ã Jejus mẽ ahkre anẽ hãmri nẽ hpãnhã mẽ apkur xà hã ixkre nhõ dõnja mã kapêr nẽ kãm: —Nà na ka hte amnhĩ wỳr akwỳjê pix wỳ. Atõjê hwỳ nẽ akràmhwỳjê hwỳ. Nẽ mẽ hikàxpore rũnh xwỳnhjê hwỳ. Nom nhỹrmã mẽ kot amnhĩ xwar amnhĩ nhõrkwỳ hwỳr awỳr pix kaxyw na ka hte ã amnhĩ wỳr mẽ hwỳr anẽ. ¹³ No kêt amnhĩ wỳr mẽ no kre xwỳnhjê mãn wỳ. Nẽ mẽ hyk o mẽ pa xwỳnhjê mãn wỳ. Nẽ mẽ hkrã pipãnh puro xwỳnhjê mãn wỳ. Nẽ mẽ hpigêx tỳx xwỳnhjê mãn wỳ. Nẽ mẽ hirot nẽ àpênh kêt xwỳnhjê mãn wỳ. Kêr ka amnhĩ wỳr jajê mãn wỳ kê mẽ awỳr mra nẽ akutã apku. ¹⁴ Mo mẽ kot amnhĩ xwar awỳr kaxyw mẽ õ mẽmoj? Mẽ kêp amrakati. Tã kot kaj mãm rĩ amnhĩ wỳr mẽ awỳ nhũm Tĩrtũm mẽ hã apumu hãmri nẽ nhỹrmã kot akupỹm mẽ ho htĩr xà hã arĩgrota ã mẽ hã amã mẽmoj mex gõ nẽ ato mex nẽ. Hãmri ka akĩnh nẽ. Anẽ.

Tĩrtũm kutã mẽ paxàpkur xà maati jarẽnh

Matêwre 8.11, 25.1-10, 26.29; mãänën Apokarip 19.9

¹⁵ Hãmri nhũm mẽ apkur kaxyw hkrĩ pa nhũm Jejus nhĩhkõ hã mẽ apkur o mẽ krĩ xwỳnhjê hõja tanhmã Jejus mã kapêr to nẽ kãm:

—Hêxta waa nẽ. Kot puj mẽ nhỹrmã Tĩrtũm nhõ krĩ hwỳr api nẽ kutã paxàpkur o pahkrĩ nẽ pahkĩnh tỳx kumrẽx. Anẽ.

¹⁶ Hãmri nhũm kuma nẽ kê axte mẽ ahkre. Mẽ kot Tĩrtũm kutã apkur kaxyw kot amnhĩ wỳr mẽ hwỳrta ã nhũm mẽ ahkre. No ãm hã kuxi nẽ tanhmã mẽ kãm ujarẽnh to nẽ mẽ kãm:

—Koja mẽhõ amnhĩ wỳr mẽ ho ohtõ nẽ mẽ kot kutã mẽ apkur mex kaxyw mẽ kuwỳ. ¹⁷ Hãmri nẽ mẽ hwỳr kãm àpênh xwỳnh mẽ nẽ kãm: “E ma tẽ nẽ mẽ kãm awjarẽ kê mẽ tokyx mra pa mẽ apku.” Anẽ. ¹⁸ Hãmri nhũm kuma nẽ ma mẽ hwỳr mẽ kãm ujarẽnh o tẽ. Hãmri nẽ wamta mã anẽ nhũm kuma hãmri nẽ hitõt nẽ kãm: “Nà kot paj hwỳr ixtẽm kêt nẽ. Na pa ham amnhĩm pika hkwyjap rã. Jakamã kot paj ma hwỳr tẽ nẽ ixprĩ hã omu mãn. Kwa kêr ka kãm ijarẽ kê ixte tanhmã hã nẽ xà hkõt ã ixte amnhĩ nhĩpêx anhỹrja mã hamaxpêr kêt nẽ.” Anẽ.

¹⁹ —Hãmri nhũm kuma nẽ hpãnhã nhãm ja wỳr tẽ nẽ kãm awjarẽ nhũm kuma nẽ haxwỳja hitõt nẽ kãm: “Nà kot paj hwỳr ixtẽm kêt nẽ. Na pa ham amnhĩm mõi o 10 nẽ haprõ. Jakamã kot paj ma hwỳr tẽ nẽ ixprĩ hã ri omu mãn. Kwa kêr ka kãm ijarẽ kê tee ri tanhmã hamaxpêr to hkêt nẽ. Ixte tanhmã hã nẽ xà hkõt ã ixte amnhĩ nhĩpêx anhỹr kêt.” Anẽ.

²⁰ —Hãmri nhũm kuma nẽ hpãnhã ma ihõta wỳr tẽ nẽ kãm awjarẽ nhũm kuma nẽ haxwỳja hitõt nẽ kãm: “Nà kot pa hwỳr ixtẽm kêt nẽ. Na pa kormã ham ixprõ. Kormã ixprõ nyw nẽ inhmã rer prãm kêt jakamã kot paj ma hwỳr ixtẽm kêt nẽ.” Anẽ.

²¹ —Hämri nhüm kām àpènh xwýnhhta tee ri mẽ kuma mẽ awjanã mẽ ma akupým tẽ. Kot ma mẽ hwýr mènň xwýnhhta wýr ma akupým tẽ mẽ kãm mẽ harẽ. Hämri nhüm tee ri mẽ harènh ma mẽ mẽ kamã gryk mẽ. Hämri mẽ hpãnhã mẽ kèp amrakati xwýnhjê hwýr kãm àpènh xwýnhhta mẽ. Mẽ hkrã pipãnh puro xwýnhjê hwýr kumẽ. Nẽ mẽ hpigêx tỳx xwýnhjê hwýr kumẽ. Nẽ mẽ hirot mẽ àpènh hkêt xwýnhjê hwýr kumẽ nhüm ma mẽ kãm ujarènh o tẽ. Hämri mẽ amnhĩ kôt mẽ kuwý nhüm mẽ kuma mẽ wamtajê rom hkôt mrar kurê kumrêx. Hämri mẽ agjê mẽ apkur kaxyw mẽ hkrĩ xà kamã hkrĩ hpa. ²² Hämri nhüm kãm àpènh xwýnhja õ patrãw wýr tẽ mẽ kãm mẽ harẽ mẽ kãm: “E ate mẽ hã karõ xàta kôt na mẽ ra hkrĩ hpa htã arĩ mẽ hkrĩ xà hk-wýr hkaprý.” Anẽ.

²³ —Hämri nhüm kuma mẽ kãm: “Hêxta waa mẽ. Kêt ãm mẽ hkrĩ xàta hipu mex ronhýx pa omu mẽ ixkĩnh mẽ. No ãm kormã piitã hipu hkêt. Kwa ma krĩ pu hã ri mẽ hapèr o mra. Nẽ nhýri mẽ hkwyjê pumu mẽ mẽ haprõ mẽ man amnhĩ kôt mẽ o mra kè mẽ hkrĩxà ho hipu hpa. ²⁴ No kêt wam ixte amnhĩ wýr mẽ hwýr xwýnhhtaja. Mẽ hitõt xwýnhhtaja kot paj axte amnhĩ wýr mẽ hwýr kêt mẽ.” Anẽ. ã mẽ ujarènh kot anhýr. Na hte ã Tirtüm amnhĩ wýr mẽ piitã mẽ hwýr anẽ. Anẽ.

Mẽ pamã Jejus kĩnh tỳx ã mẽ pamã karõ

Matêwre 10.37-38; Makre 8.34; Rukre 9.23-25; Juãw 12.26

²⁵ Tã nhüm Jejus mẽ òrkwý rüm kato mẽ kormã Jeru-jarẽ hwýr mõ nhüm mẽ hohtõ rax mẽ hkôt mõ. Hämri nhüm Jejus xa mẽ mẽ ho hakèx mẽ mẽ omu mẽ mẽ kãm:

²⁶ —E kot ka mẽ atõ amã ixkôt amnhĩ xãm prãm mẽ ã amnhĩ nhípèx anẽ. Nẽ amã atõ mẽ atõx mẽ anhípèxã mẽ akatorxà japê htỳx tã kèr ka amã ixkĩnh tỳx o wa mẽ hakrenh pa. Nẽ amã aprõ mẽ akrajê japê htỳx tã kèr ka amã ixkĩnh tỳx o wa mẽ piitã mẽ hakrenh pa. Nẽ amã ixkĩnh tỳx o amã amnhĩ japê jakre. Kèr ka mẽ atõ ixkôt amnhĩ xãm kaxyw mẽ ã amnhĩ nhípèx anẽ.

²⁷ —Koja mẽ ixpĩ pa mẽ anẽ ty. Tã mẽ ate ixkôt amnhĩ nhípèx o mẽ apa xwýnhhtaja. Koja mẽ ixtã mẽ apar mã tã kèr ka mẽ amã ixkĩnh tỳx o mẽ umaj ixkaga hkêt mẽ. Kwãr mẽ mãmrĩ tanhmã ixtã mẽ ato. Kot kaj mẽ nhýr-mã Tirtüm mẽ wa ixri axte amnhĩ xà kamã ajamak kêt mẽ atĩr tũm mẽ amex rãhã apa ho apa. Nom kot kaj mẽ ixkĩnhã jar pika ja kamã amã amex mẽ apa hprãm xaj ixkaga hãmri mẽ nhýrmã wa ixri atĩr tũm mẽ apa hkêt mẽ. Anẽ.

Mẽ pahte amnhĩ kukamã pajamxpèr mex ã mẽ pamã karõ

²⁸ Nhüm Jejus arĩ mẽ kãm kapèr mẽ mẽ kãm: —Kwa kèr ka mẽ ixkôt amnhĩ xunhwýr kaxyw mẽ amnhĩ kukamã ajamxpèr mex mẽ. Na htem amnhĩm òrkwý rũnh nhípèx kaxyw hãmri mẽ hkukamã hamaxpèr mex mẽ. Nẽ kaxyw krax mã kuhê xà hkukamã hamaxpèr. Nẽ kaxyw kỳx pè kãm hikwý xàja kukamã hamaxpèr. Nẽ òkwaêja kukamã hamaxpèr. Nẽ hã põja kukamã hamaxpèr. ã na htem amnhĩm òrkwý rũnh

nhípèx kaxyw hkukamã hamaxpèr mex anẽ. ²⁹ Nom kot kaj mẽ hkukamã ajamxpèr mex kêt mẽ ãm kaxyw pĩ ho grèrè mẽ hakà. Rỳ ra hã axàpènh rax kurê ra amã ho anhýr kaga mẽ hkaga hpa mẽ hatur xàm mènň kêt mẽ. Hämri nhüm mẽ hkwyjaja hãnh mra mẽ omu mẽ atã hpèr o axkẽ. ³⁰ Nẽ axpèn mã ri ajarènh o: “E ga mẽ ixkre mũj pumu. Na pre hipèx xwýnhja hkurê kãm kaga mẽ hipèx par kêt mẽ.” Anhýr o axpèn mã ajarẽ. Ja pyrã mẽ kèr ka mẽ ixkôt amnhĩ xunhwýr kaxyw mẽ amnhĩ kukamã ajamxpèr mex mẽ. Nẽ ajamxpèr o: “Nà mẽ kot Jejus ã tanhmã ixto htỳx tã kot paj hkaga hkêt mẽ. Kot paj hkôt amnhĩ nhípèx rãhã ho ri ixpa.” Anhýr o amnhĩ kukamã ajamxpèr. Hämri mẽ rĩ kormã ixkôt amnhĩ xãm. No kot ka mẽ umaj ixkaga hkukamã ajamxpèr hãmri mẽ ixkôt amnhĩ xãm kêt kurê kumrêx.

³¹ —Nẽ koja krĩ hõ kamã pahшти nhõ pòristi xohtõ mẽ. Nẽ kutã nhãm krĩ hõ kamã pahшти nhõ pòristija grèrè. Tã nhüm wa hpìjapu kaxyw nhüm krĩ hõ rüm pahшти nhõ pòristi xohtõja mẽ grèreta wýr mra. Hämri nhüm kutã krĩ hõ kamã mẽ õ pòristi grèrè nhõ pahшти nhõ mẽ tee ri mẽ amnhĩ kukamã hamaxpèr mẽ hamaxpèr o: “Kwa koja apu krĩ hõ rüm pòristi xohtõ raxja nhüm inhõ pòristi grèreja mẽ axpèn kutã kuhê mẽ axpu nhüm mẽ inhnẽ mẽ himex. Nã inhõ pòristi grèrè kènã.” Anhýr o hamaxpèr.

³² —Hämri mẽ pahшти hõta wýr õ kòwenatõ mẽ. Kormã krĩ hõ rüm mẽ hohtõtaja mẽ htèp kêt nhüm mẽ kutã kumẽ nhüm ma mẽ kutã tẽ. Hämri mẽ awry hã mẽ hkaxpa mẽ mẽ õ pahшти mã kãm: “E na mẽ inhõ pahшти akutã inhmẽ pa tẽ. Na inhmã: ‘Ma tẽ mẽ mẽ kãm awjarẽ. Kot puj pèr mẽ papìjapu hkêt mẽ. Kwãrĩ. Kot puj mẽ tãm axpèn xunhwý.’ Anhýr o kapèr mẽ mẽ akutã inhmẽ pa tẽ.” ã mẽ ujarènh kot anhýr. Ja pyrã mẽ na htem mẽmoj kukamã hamaxpèr mex mẽ rĩ kormã tanhmã amnhĩ nhípèx to.

³³ —Tã kèr ka mẽ atõ amã ixkôt amnhĩ xãm prãm hãmri mẽ pahшти pyrã mẽ amnhĩ kukamã ajamxpèr tỳx mẽ rĩ kormã tanhmã amnhĩ nhípèx to. Kèr ka ate inhmã tanhmã amnhĩ nhípèx to ho apa kaxyw hãmri mẽ inhgryk ã te ate amã amnhĩ japê hkêt pyrãk o mẽmoj piitã mã anhĩhkra karo pyrãk o amnhĩ nhípèx. Hämri mẽ rĩ kormã ixkôt amnhĩ xãm. ³⁴ No kot kaj mẽ amnhĩ kukamã ajamxpèr kêt mẽ atỳx ri ixkôt amnhĩ xunhwýr japèr. Hämri mẽ mẽmo arĩgro hã mẽ kot ixtã tanhmã mẽ ato xwýnhjê pymaj ra ixkaga mã. Hã kot kaj mẽ te mẽ ate kaxwa punu pyrãk o amnhĩ nhípèx. Kaxwaja mẽ apkur xà kamã mex. Na htem amnhĩm ho õ xành mẽ kuku. Nom koja mẽhõ kamã pika hkwy mẽ mẽ ho ahkà hãmri tanhmã kot mẽ ho mẽ akupým ho mex? ãm mẽ kot hkapĩr pix kaxyw koja mex. Ja pyrã mẽ kot ka mẽ atõ ate inhmã tanhmã amnhĩ nhípèx to ho apa hã amnhĩ jarènh tã gaa mẽ amã ixkôt amnhĩ nhípèx prãm nõkati. Hämri mẽ ra te ate kaxwa punu kapĩr mã tãmta pyrãk. E kwa mẽ mẽmoj tã ixujarènhja ma mẽ mẽ urak mẽ amnhĩ kukamã ajamxpèr mex mẽ. Anẽ.

ôwêhti pikunor jarênh

Matêwre 18.12-14

15 Tã nhũm mẽ kot pahihti mã hkwyjê pê kàxpore hkwy jamynh xwýnhjê mẽ mẽ kot amnhĩ tomnuj xwýnhjaja Jejus kapêr mar kaxyw hwýr mra. ² Hãmri nhũm Parijew nhõ xwýnhjê mẽ mẽ kot Tirtũm kapêr tũm o mẽ ahkre xwýnhjaja mẽ hã Jejus pumu. Hãmri mẽ kê wem axte axpên mã tanhmã ho kapêr punuj to mẽ axpên mã:

—Tk. Kwa na hte mũjti axtem mẽ mẽ kot amnhĩ tomnuj xwýnhjaja amnhĩ wýr mẽ kuwý mẽ tõiã mẽ kutã apku. Kwa mẽ kot amnhĩ tomnuj xwýnh kênã kot kêt mẽ kutã apkur o pa. Anẽ.

³ Hãmri nhũm Jejus amnhĩ tã mẽ kuma mẽ tanhmã mẽ kãm kapêr to. Nom hprĩ hã mẽ kãm kapêr kêt mẽ. Kê ãm amnhĩ tã kuxi mẽ mẽ kãm ôwêhti pikunor jarê mẽ mẽ kãm:

⁴ —Koja mēhõ õ ôwêhti xohtõ mẽ. Nẽ ma nhýri hamãr o pa. Hãmri nhũm pyxire mẽ hkwy kaga mẽ ma nhýhým ahte tẽ mẽ akunok. Hãmri nhũm õ dõnja ma kot akupým piitã o mõr kaxyw hkwy ho pikuprõnh pa hãmri mẽ tee ri hkwy kaêx ã pikunor xwýnhhta japêr. Hãmri mẽ ma hkwy ho mõ mẽ nhýri kure. Kot nhýri kutêp apkur o ri pa kaxyw kure hãmri mẽ ma akupým pikunor xwýnhhta japêr o tẽ. Hãmri mẽ hapêr ryy mẽ nhýri hwýr kato. ⁵ Nẽ omu mẽ hkĩnh tỳx mẽ. Hãmri mẽ amnhĩ kre hã kumẽ mẽ ma akupým hkwy hwýr o tẽ. ⁶ Hãmri mẽ mẽ ãhkõ hã kumẽ mẽ hkĩnh mẽ hkrãmnhwýjê ho akuprõ mẽ õrkwý htã mẽ õrkwý xwýnhjê ho akuprõ mẽ mẽ kãm: “Kwa na pre ixpê ixkriita õ akunok. Pa pre hapêr kãm ixihýtỳx mẽ kãm ixkato mẽ omu mẽ ixkĩnh mẽ. Jakamã kwa wem mãänên inhý hã akĩnh.” Anẽ.

—Ã mẽ ujarênh kot anhýr. ⁷ Ja pyrã mẽ koja mẽ kot amnhĩ tomnuj tỳx xwýnhjê hõ tee ri amnhĩ pumu mẽ kot amnhĩ tomnuj kaga mẽ Tirtũm kõt amnhĩ xãm. Hãmri nhũm kaxkwa kamã mẽ piitã ja hã omu mẽ hkĩnh tỳx mẽ. Te ho my kot ôwêhti hpikunor xwýnh mã kator mẽ hkĩnh tỳxta pyrãk. Na hte Tirtũm tãm mẽ kot amnhĩ nhĩpêx o mẽ pa xwýnhjê pumu mẽ hkĩnh mẽ. Tã koja mēhõ kot amnhĩ tomnuj tỳx tã ã amnhĩ nhĩpêx anhýrja kaga mẽ Tirtũm kõt amnhĩ xãm hãmri nhũm amnhĩ tã omu mẽ hkĩnh tỳx mẽ. Jakamã na pa hte mẽ akurom ã mẽ kot amnhĩ tomnuj xwýnhjê hkõt Tirtũm kapêr o mẽ ahkre rãhã ho ri ixpa. Anẽ.

Nhũm pre ã Jejus mẽ kot tanhmã ho kapêr punuj to xwýnhjê mã amnhĩ jarênh anẽ.

Kàxpore pikunor jarênh

⁸ Nhũm Jejus arĩ mẽ kãm awjarẽ mẽ mẽ kãm:

—Nẽ ja. Koja mēhõ ni hikàxpore kêp 10. àpênh o arĩgro pê 10 pãnhã kàxpore kêp 10. Tã ho pyxi mẽ ho akunok. Hãmri mẽ tee ri hapêr mẽ hkaprĩ mẽ. Hãmri mẽ kanê hpõk mẽ hitom kapõnh pê hprĩ hã hapêr o ri pa mẽ kãm kato. ⁹ Hãmri mẽ kupy mẽ hkĩnh mẽ hkrãmnhwýjê ho akuprõ mẽ õrkwý htã mẽ õrkwý xwýnhjê ho akuprõ mẽ mẽ kãm amnhĩ jarê mẽ mẽ kãm: “Xê na pre

ixpê ixkàxpore hõta akunok pa tee ri hapêr tã akupým kãm ixkato mẽ kupy mẽ ixkĩnh mẽ. Jakamã xê wem inhý hã mãänên akĩnh.” ã mẽ ujarênh kot anhýr.

¹⁰ —Ja pyrã mẽ koja mẽ kot amnhĩ tomnuj xwýnhjê hõ pyxire mẽ amnhĩ tomnuj kaga mẽ ixkõt amnhĩ xãm. Hãmri nhũm kaxkwa kamã mẽ piitã ja hã omu mẽ hkĩnh mẽ. Te mēhõ ni kot kàxpore pikunor xwýnh mã kator mẽ hkĩnhhta pyrãk. Anẽ.

Mẽ hkra pikunor jarênh

¹¹ Nhũm Jejus arĩ mẽ ahkre ho xa. Tirtũm kãm mẽ piitã mẽ hapê htỳx ã mẽ ahkre ho xa. No kê ãm hã kuxi mẽ kê we tanhmã mẽ kãm ujarênh to mẽ mẽ kãm:

—Nẽ koja mēhõ hkra my wa axkrut. ¹² Hãmri nhũm kot hapu õ papaj wýr tẽ mẽ kãm: “E papaj. Ot pa awýr tẽ. Kot kaj nhýrmã ty pa wa amýr pê akukrêx o ixarĩk. Jakamã e kwa tokyx atĩr ri amnhĩ kamã wa inhmã ho axkjê pa inhõ ho amnhĩptar kurê kumrêx nã?” Anẽ. Hãmri nhũm kuma mẽ wa kãm hikukrêx o axkjê. Kot wa mã hkwy gõ mẽ kot hapu mã hkwy gõ. ¹³ Hãmri nhũm kot haputa ãm ri hipêêxã hkõt pa hkrãnhre hãmri mẽ kot kãm hikukrêx nhõr jamynh pa mẽ ma nhýhým o mõ mẽ ho wênê hpa. Hãmri mẽ hpãnhã kàxpore jamý mẽ ma nhýhým mõ. Nhýhým awry hã pika hõ hwýr ma mõ. Mõõ hãmri mẽ krĩ hõ kamã htỳx ri tanhmã amnhĩ tomnuj to ho ri pa. Hãmri mẽ gaa mẽ ra mẽ hkuprýjê hã kàxpore ho hapêx pa. Nẽ kagõxyhti hã ho hapêx pa. Nẽ gaa hãmri mẽ hikàxpore hkêt mẽ ri pa.

¹⁴ —Rõm nhũm pikaja kamã mẽ hã na wrýk kêt ry rax mẽ. Nẽ gaa nhũm mẽ hpur kãm mẽ kêp mẽ apkur xã hã mẽõja hapêx pa. Jakamã nhũm mẽ hkra kot haputa kêp amrakati mẽ kãm prãm tỳx mẽ ri pa. Hãmri mẽ tee ri amnhĩ kukamã hamaxpêr. ¹⁵ Hãmri mẽ amnhĩ to krĩ nhõ xwýnhjê mar o ri pa. Kot mẽ kãm tanhmã àpênh to mẽ hpãnhã apkur kaxyw. Hãmri nhũm mēhõ kot kãm hkrit hagrõ jamãr kaxyw hã kumẽ nhũm ma hwýr tẽ mẽ kãm hamãr o pa. Nom kot kãm hamãr o pata pãnhã ãm kãm mẽmoj nhõr kryre nhũm arĩ kãm prãm tỳx kumrêx.

¹⁶ Nẽ tee ri kot hagrõ kutã õta kur prãm mẽ tee ri omunh o pa. ¹⁷ —Nẽ gaa hãmri mẽ tanhmã hamaxpêr to. Nẽ tee ri kot tanhmã amnhĩ tomnuj toja ã amnhĩ pumu mẽ hamaxpêr o: “Hêxta waa mẽ. Mãn mũtar inhõ krĩ kamã inhõ papaj mã mẽ àpênh xwýnhjaja ixrom apkur mex o pa. àpkur mex mẽ nhũm mẽõ jakrêx prãr rũnh tã pa jar mẽ hkĩnhã prãm xaj ra ixtyk o mõ. ¹⁸ Nã kot paj ma akupým mõ. Hãmri mẽ inhõ papaj pumu mẽ ã kãm amnhĩ jarênh anẽ mẽ kãm: ‘Kwa Papaj. Na pa pre ixpê akra hã amnhĩ tomnuj tỳx kumrêx nhũm ja apê omnuj mẽ. Nhũm Tirtũm pê ja omnuj mẽ. ¹⁹ Jakamã na pa ixpê akra hã amã amnhĩ jarênh ã ixpijaãm mẽ. Ixte tãm kêt kumrêx. Jakamã kwa xã kot pa amã mẽmoj tã ixãpênh o ri ixpa ka hpãnhã inhmã inhõ pa apku nã?’ Anhýr o kot pa kãm amnhĩ jarê. Nã kot paj anẽ.”

²⁰ —Anhýr o amnhĩ kukamã hamaxpêr hãmri mẽ ma akupým mõ. Mõõ mẽ ra hpõx o mõ. Nẽ kormã amým mõr ri nhũm õ papaj hwýr rĩt mẽ omu mẽ amnhĩ kra hã

omunh kurê kumrêx nê hkînh nê ma kutã hprôt nê tẽ. Omu nê kãm hkaprî nê. Nê hwÿr hprôt nê hkaxpa nê kahti hkôt kumÿ. ²¹ Hãmri nhũm kãm amnhî jarê nê kãm: “Kwa papaj. Na pa pre amnhî tomnuj nê nhũm ja apê omnuj nê. Nê Tirtũm pê ja omnuj nê. Jakamã ixte ixpê akra hã amã amnhî jarênh ã ixpijaãm. Ixte tãm kêt kumrêx.” Anê. ²² Nom kormã kãm amnhî jarênh par kêt ri nhũm hipêêxà kãm mē àpênh xwÿnhjê mã akir nê mē kãm: “E kwa mē atõ ma tẽ nê kãm ê mex õ py nê akupÿn ixkrata wÿr ho aprôt nê kãm haxà. Nê hpar kà nê ìhkra kamã kàx nê amnê kãm hamÿ nê ho aprôt. ²³ Nê akupÿm aprôt nê môx kra htwÿm mexta õ pumu nê unê nê apî. Nê mē ho anê pu mē ixkra hã pahkînh nê apku. E mē amnhî prêprêk nê tokyx ã amnhî nhîpêx anê. ²⁴ Na pre ma ixpê mör o te ixpê htyk pyrãk. Tã akupÿn mō nê ixwÿr pōj nê te akupÿm inhmã htîr pyrãk. Jakamã e mē tokyj.” Anhÿr jakamã nhũm mē hã môx kra pî nê ho anê nê hkînh nê hã apkur o hkrî.

²⁵ —Rôm nhũm hkra kot wata kormã pur kãm htyx àpênh o xa. àpênh o ãm tã akupÿn hpõx o tẽ. Hãmri nê amnhî kukamã mē kot ri mēmoj tatak nê mē grer ma. ²⁶ Hãmri nê tee ri hamaxpêr o tẽ nê örkwÿ hwÿr pōj nê kormã kapem xa nê mē hã mē àpênh xwÿnhjê hõ kukja nê kãm: “Kwa mēmoj tã na ka wem ã akînh rax anê?” ²⁷ Anê nhũm kãm: “Nà mēhõ hkêt. Atõ na akupÿn pōj nhũm anhîpêêxà omu nê hkînh tÿx nê. Nê mē inhmã anê pa mē hã môx kra htwÿm mexja pî nê hã ho anê nê hã ixkînh nê hkur o ixkrî.” Anê. ²⁸ Hãmri nhũm tee ri htõ jarênh ma nê gryk tÿx nê. Hãmri nê gryk xaj kapem hkuk punuj o mē omunh o xa nê mē hwÿr àr kêt nê. Hãmri nhũm hipêêxàja tee ri omu nê hwÿr kato nê tee ri kot mē hwÿr ho àr kaxyw ho anhÿr kaprÿ. ²⁹ Hãmri nhũm kãm: “Tk. Kwa na pa hte amã ixàpênh rÿnh rãhã ho ri ixpa hã ra ixtã amgrà xohtõ nê. Nê aa akapêr nhîrõp tanhmã ixãm to hkêt. Tã ka hte ixpumunh nê akînh nê ixtã mēmoj tōx pîr kêt nê. ³⁰ Tã nhũm akra kot haputa apê akukrêx kwÿ jamÿnh pa nê ma o mō nê axtem nê mē hkuprÿjê mã ör par tã akupÿn mō nê pōj. Ka omu nê akînh nê hã môx kra twÿmta pî. Nà kot paj mē awÿr ixàr kêt nê.” Anê.

—Hãmri nê gryk tÿx nê xa. ³¹ Hãmri nhũm õ papaj tee ri kuma nê kãm: “Kwa nà ri ã akapêr anhÿr kêt nê. Inhmã ajapê kênã. Na ka hte ixkôt apa ho apa rãhã nê. Nê ixkukrêx piitã kêp anhõõ. ³² No atõja na pre te ixpê htyk pyrãk tã arî htîr. Nê te pikunor pyrãk tã te ra akupÿm kator pyrãk jakamã na pa omu nê ixkînh nê. Nê inhmã hapê ho te mãänen inhmã ajapê pyrãk.” Anê.

—Ã mē ujarênh kot anhÿr. Ja pyrã nê koja mēhõ te kot amnhî tomnuj tÿx o ri pa htã amnhî kaxyw Tirtũm mã hamaxpêr nê amnhî to kuwÿ nê hkôt amnhî xãm. Hãmri nhũm amnhî tã omu nê hkînh nê. Nê kãm hprãm nê. No mē kajaja. Mē apê Parijew nhõ xwÿnhjê mē Tirtũm kapêr tũm o mē ahkre xwÿnhjaja. Na ka htem mē kot amnhî tomnuj xwÿnhjaja kot Tirtũm kapêr mar o kuhê hã mē omu nê Tirtũm kînhã akînh kêt nê. Nê te hkra kot wata jamaxpêr pyrãk o ajamax-

pêr nê tee ri ja hã mē omu nê mē kamã agryk nê. Nê mē amã mē hprãm nõkati. Anê.

Mē panhõxÿ nê Jejus kot mē pamã karõ

16 Tã nhũm kê Jejus axte hkôt ri mē pa ho mē pa xwÿnhjê jahkre. No ãm mēmoj tã kuxi nê mē kãm tanhmã ujarênh to nê mē kãm:

—Nà koja mēhõ hikàxpore rax xwÿnhja kãm àpênh xwÿnh mã mēmoj to wênê ho pa kaxyw ãm. No nhũm kãm ho mex kêt nê. Axtem nê kêp amarî mē kãm mēmoj to fiat par o mō. Hãmri nhũm ra mēhõ kot ã amnhî nhîpêx anhÿr ã omu nê ma õ patrãw wÿr tẽ nê kãm harê. ² Hãmri nhũm tee ri harênh ma nê amnhî wÿr hã karõ. Hãmri nhũm hwÿr tẽ nê axà nhũm kãm: “Pa. Kwa xà ãm hãmri na mē inhmã ajarê? Kwa nà mon ka ri axtem nê ã ixpê inhõ mēmoj nhîpêx anê? E inhmã ate mē kãm ho fiat par xwÿnhjê nhîxi hã kagà nê inhmã agõ hãmri nê ma tẽ. Kot ka axte inhmã axàpênh kêt nê rî amnhî pumu.” Anê.

³ —Hãmri nhũm kuma nê tee ri amnhî kukamã hamaxpêr nê hamaxpêr o: “Hêxta waa nê. Tanhmã kot paj amnhî to? Ixihtÿxre hã kot pa mēhõ mã pur ã apê. Nom inhmã amarî ri ixàhwÿr o ri ixpa hprãm kêt. Ixte amnhî kuk ã ixpijaãm.” Anê. ⁴ Hãmri nê tanhmã amnhî kukamã hamaxpêr to nê hamaxpêr o: “Nà kot paj amnhî wÿr ixte mē kãm ho fiat xwÿnhjê hã karõ. Nê mē kãm mē õ kōõta ahpär mã hkamê kê mē ãm inhõ patrãw mã hkwy pix gõ. Kêr kê mē amnhî tã ixpumu nê kãm ixkînh nê. Hãmri nê inhõ patrãw kot ixkaga hã ixtã harênh ma nê ixkamã ukaprî japêr. Hãmri nê amnhî wÿr ixwÿ pa ahpÿnhã mē kutã ixàpkur o ri ixpa nhũm prãm ixpîr kêt nê. Nà kot paj anê.” Anê.

⁵ Hãmri nê amnhî wÿr mē hã karõ nhũm mē hwÿr mra. Nhũm mē omu nê ja mã kãm: “E tanhmã na ka pre inhõ patrãw pê mēmoj to fiat to? E inhmã harê.” Anê. ⁶ Hãmri nhũm kãm: “Na pa pre kêp orti hã à ho 100 nê ho fiat. Ota hã kagàta. Tã pa kormã kãm amnhîrer kêt nê.” Anê nhũm kuma nê kãm: “Tõe ka inhma. Kot paj amã anhõ köt o gri ka ãm kãm ho 50 pix nê agõ pa ixte anhõ köt ho ijapêx par pyrãk o anhîpêx.” Anê. ⁷ Hãmri nê hpãnhã nhãm ja mã kãm: “No ka. Tanhmã na ka pre kêp mēmoj to fiat to?” Anê nhũm kãm: “Na pa pre kêp pãÿ hã xak o 1.000 nê ho fiat. Tã pa kormã hpãnhã kãm amnhîrer kêt nê.” Anê nhũm kãm: “Tõe. Kot paj hãmri amã anhõ köt o gri ka ãm kãm ho 800 pix nê agõ pa ixte anhõ köt ho ijapêx par pyrãk o anhîpêx.” Anê. Nhũm ã mē hipêx anê. Hãmri nê hamaxpêr o: “E. Na pa mē kãm mē õ köt o hkry pa. Koja mē amnhî tã kãm ixkînh japêr.” Anê.

⁸ —Hãmri nhũm õ patrãwja ã kot mē hipêx anhÿr ã harênh ma nê kãm: “Tk. Kwa ate pa ixkukamã ajamaxpêr nê inhmã mēmoj to anhÿr mex kêt tã ka amnhî kukamã ajamaxpêr mex pê ã mē hipêx mex anê.” Anê. ã mē ujarênh kot anhÿr. Anê.

Nhũm pre ã Jejus mē kãm ujarênh anê. Hãmri nê mē kãm:

—Tã ja pyrã nê na hte mē kot Tirtũm köt amnhî xunhwÿr kêt xwÿnhjaja ãm amnhî pix kukamã hamaxpêr

mex o pa. Jao amnhĩ kaxyw pix mã mẽ piitã tanhmã mẽ ho mex to ho pa. Mẽ kot amnhĩ tã mẽ omunh nẽ mẽ kãm mẽ hkĩnh nẽ amnhĩ xwar tanhmã mẽ ho mex to kaxyw nhũm htem ã amnhĩ nhĩpêx anhỹr o pa. Tã mẽ ate ixkõt amnhĩ xunhwỹr xwỹnhjaja. Tĩrtũm kot tanhmã mẽ ate amnhĩ kwỹjê ho mex to hã amnhĩm mẽ ajarênh kaxyw kêr ka mẽ amnhĩ mẽ mẽ piitã mẽ hkukamã ajamaxpêr mex nẽ. Pê tanhmã mẽ ho mex to ho ri apa. ã mẽ ate amnhĩ nhĩpêx anhỹrja na mex. Nom kormã mẽ ate ã amnhĩ nhĩpêx anhỹr kêt.

⁹—Hêxta waa nẽ. Mon ka htem mẽ urak nẽ ã xpên to mex anhỹr kêt nẽ? Kwa mẽ àpênh xwỹnhhta kot amnhĩ nhĩpêx pyrã nẽ tanhmã xpên to mex to o ri apa hkêt wehe. Jao akukrêx nẽ akàxpore ho anhõxy hkêt nẽ. Kêr ka nhỹrmã ty nẽ Tĩrtũm wỹr api nhũm ja hã mẽ ato mex rax nẽ. Te ho kot õ patrãw mã àpênh xwỹnhhta kot tanhmã mẽ ho mex to xwỹnhjê hwỹr mrar nhũm mẽ kot amnhĩ xwar tanhmã ho mex tota pyrãk.

¹⁰—Na hte Tĩrtũm tanhmã mẽ pakute hã mẽ pah-pumunh mex nẽ. Koja mẽ amã mẽmoj gõ ka mẽ kãm hprãm xà hkõt ho anhõxy hkêt nhũm ja hã mẽ apumu nẽ axte mẽ amã mẽmoj gõ. Nom hpãnhã mẽ amã õr rax o wamta jakre nẽ kugõ. Nom kot ka mẽ ri mẽmojta o anhõxy ho ri apa nhũm tee ri ja hã mẽ apumu nẽ axte mẽ amã mẽmoj nhõr kêt nẽ. Koja mẽ amã mẽmoj gõ ka mẽ ho anhõxy ho ri apa nhũm ja kêp homnuj nẽ.

¹²—Nẽ kot kaj mẽ jar Tĩrtũm kot mẽ amã mẽmoj nhõr xwỹnhja ho anhõxy ho ri apa. Hã koja nhỹrmã kaxkwa kamã mẽ amã mẽmoj mex nhõr kêt nẽ.

¹³—Nẽ kot kaj apyxi nẽ anhõ patrãw hamêxkrut nẽ arĩgro pyxi hã hamê wa kãm axàpênh o amỹkry hkêt nẽ. Kot kaj anê nẽ hõ gryk ã hõ kaga. Ja pyrã nẽ kot kaj mẽ jar pika ja kamã akàxpore nẽ akukrêx pix kukamã ajamaxpêr o ri apa hã kot kaj mẽ amã hapê htỹx nẽ mẽ kêp ho anhõxy ho ri apa. Nẽ akukrêx rax gryk ã Tĩrtũm kãm hprãm xà hkõt akukrêx o tanhmã xpên to ajuta hto ho ri apa hkêt nẽ. Ja pymaj kwa kêr ka mẽ ãm Tĩrtũm pix mã mãn ajamaxpêr rãhã ho ri apa. Jao te akukrêx nẽ akàxpore mã axãmnhĩx ri anhĩkra karo ho ri apa pyrãk. Anẽ.

Nhũm pre ã Jejus mẽ ahkre anê. ¹⁴Hãmri nhũm Parijew nhõ xwỹnhjaja mar o kuhê. Na prem ra mẽ hikàxpore rax gryk ã Jejus kaga. Jakamã ã kot mẽ kãm kàxpore jarênh anhỹrja ma nhũm ja mẽ kêp omnuj nẽ nhũm mẽ hã hpêr o pikênh o kuhê. ¹⁵Hãmri nhũm amnhĩ tã mẽ kuma nẽ mẽ kãm:

—Nà na ka htem te mẽ ate tãm mẽ kot amnhĩ nhĩpêx xwỹnh pyrãk o amnhĩ nhĩpêx nom ri mẽ kãm amnhĩ to axê o ri apa. No nhũm Tĩrtũmja kot tanhmã mẽ ate amnhĩ nhĩpêx to nẽ tanhmã mẽ ajamaxpêr to hkõt mẽ apumunh par. Nẽ hprĩ hã mẽ anhõxy hã mẽ apumu. Te mẽ ate tãm amnhĩ nhĩpêx pyrãk nom mẽ anhõxy kamã na ka htem apa. Mẽmoj te mex pyrãk nhũm htem omu nẽ mex ã hkãmnhĩx. No nhũm Tĩrtũm àhpumunh tỹx xà hkõt hprĩ hã mẽmojta pumu nhũm kêp omnuj nẽ. Mẽ akurom omnuj ã omunh kurê kumrêx. Na hte hprĩ hã mẽ ate amnhĩ nhĩpêx ã mẽ apumu. Anẽ.

Tĩrtũm kapêr aa hapêx kêt ã harênh

Matêwre 5.17-18

¹⁶ Nhũm Jejus arĩ mẽ ahkre nẽ mẽ kãm:

—Nẽ na pre finat Mojesja kumrêx mẽ kãm Tĩrtũm kapêr kwỹ hã kagã. Tã nhũm hpãnhã Tĩrtũm nhỹ hã kapêr jarênh xwỹnh kwỹjaja mããnen mẽ kãm hkwy hã kagã. Nhũm prem kuma nẽ mẽ hkõt amnhĩ nhĩpêx o ri pa. Tã nhũm finat Juãw Paxisja mẽ hpãnhã kato nẽ Tĩrtũm kapêr o mẽ ahkre ho ri pa. Tã pa hpãnhã ho mẽ ajahkre ho ri ixpa nhũm mẽ ohtõ nẽ ixkõt amnhĩ xunhwỹ nẽ kãm ixkapêr kõt pix mã amnhĩ nhĩpêx o ri pa hprãm nẽ.

¹⁷—Tĩrtũm kapêr tũmja mex o mex. Koja aa hapêx kêt nẽ. Koja nhỹrmã kaxkwa nẽ pika wa hapêx pa no nhũm Tĩrtũm kapêr tũmja aa hapêx kêt nẽ. Koja rãhã ho rãhã nẽ aa ihkjê ho mênh kêt nẽ. Anẽ.

Mẽ pahte xpên kaga hkêt ã mẽ pamã karõ

Matêwre 5.31-32, 19.9-12; Makre 10.2-12

¹⁸ Nhũm Jejus arĩ mẽ ahkre nẽ mẽ kãm:

—Nẽ kêr ka mẽ aprõ kaga hkêt nẽ apa. Kot kaj mẽ hkaga nẽ hpãnhã nhãm hõ ho aprõ nhũm Tĩrtũm noo mã te ate wam aprõ kamã nhãm ho amnhĩkati pyrãk. Nhũm ja kêp omnuj nẽ. Rỳ ka ra mēhõ kot hprõ kaga xwỹnhhta ka hpãnhã ho aprõ. Nhũm Tĩrtũm noo mã te ate wam mjên pê ho amnhĩkati pyrãk. Nhũm Tĩrtũm pê ja omnuj nẽ. Anẽ.

Hikàxpore rax xwỹnh mẽ kêp amrakati xwỹnh wa harênh

Rukre 6.20-26

¹⁹ Nhũm Jejus arĩ mẽ ahkre kamã mẽ kãm awjarê nẽ mẽ kãm:

—Koja mēhõ kàxpore rax xwỹnh ê mex pix kãm ri pa. Nẽ apkati mẽ apkur mex o pa. ²⁰ Nhũm amrakati xwỹnh pê Rajareja hkà nhyre nẽ arĩ pry kamã àhwỹr o hkrĩ. Nhũm htem hamỹ nẽ ma o pa nẽ hikàxpore rax xwỹnh nhõrkwỹ jakwakrem haxwỹ. ²¹ Nhũm õ jakrêx kwỹ hkrêr prãm xà hakwa krem àhwỹr o hkrĩ. Nhũm rop hwỹr mra nẽ hkà nhy kunhnwỹnh o kuhê.

²²—Tã nhũm Rajare ty nhũm Tĩrtũm kapêr o mẽ wrỹk xwỹnhjaja hwỹr wrỹ nẽ ma akupỹm kaxkwa hwỹr hkarõ ho mõ nẽ ho api. Hãmri nhũm kaxkwa kamã mẽ pahpãm Apraãw nhĩhkõ hã hkĩnh nẽ apkur mex o hkrĩ.

—Tã nhũm hikàxpore rax xwỹnhhta mããnen hkõt ty. Nhũm hkwyjaja hã akuprõ nẽ hã mur nẽ ma o tẽ nẽ haxã. ²³ Hãmri nhũm hkarõ ma mẽ kot amnhĩ xà htỹx kamã hamak tũm xà pê kuwy maatita wỹr ma mõ. Nẽ kamã amnhĩ xà htỹx kãm hamak rãhã ho pa. Hãmri nẽ amnhĩ xà hã maj kãnhmã rĩt nẽ kaxkwa kamã Apraãw pumu. Nhũm Rajare ra kuri mex nẽ nhỹ. ²⁴ Hãmri nhũm tee ri wa omu nẽ Apraãw mã akapêr nẽ kãm: “Kwa Apraãw. Kwa we ixkamã axukapri nẽ ixwỹr Rajare mẽ kê ixwỹr tẽ nẽ ãhkrakrã ho gõ htok nẽ ho inhõhto jakry. Na pa kuwy kamã amnhĩ xà htỹx kãm ijamak tỹx kumrêx.” Anẽ. ²⁵ Hãmri nhũm kuma nẽ kãm: “Tk. Nà kot pa awỹr mênh kêt nẽ. Na ka pre atĩr ri amex nẽ

akĩnh nê ri apa. No nhũm Rajare akĩnhã hkà nhy rax nê amnhĩ xà htỳx kãm hamak rãhã ho ri pa. Tã ra jar inhĩhkõ hã hkĩnh nê pa. Ka pre kurom amex nê apa htã kot kaj hpãnhã amnhĩ xà htỳx kãm ajamak rãhã ho ri apa. ²⁶ Nê pahkaêx kãm ahkaprỳ griã. Jakamã nhỹhỹnh kot kêt awỳr rê? Ka ajaxwỳja nhỹhỹnh kot ka kêt mễ ixwỳr rê?" Anê.

²⁷ —Nhũm ã kãm kapêr anê nhũm tee ri kuma nê kãm: "Kwa tô ma inhõ krĩ hwỳr mãn amê kê ma ixk-wỳjê hwỳr wrỳ. ²⁸ O mũj arĩ inhõ krĩ kamã ixtõ kệp 5 nê arĩ htĩr nê pa. Kê wa mễ kãm awjarê kê mễ amnê kuwy hwỳr pa pymaj tokyx amnhĩ tomnuj kaga nê Tĩrtũm kôt mãn amnhĩ xunhwỳ nê hkôt ri amnhĩ nhĩpêx o pa." Anê.

²⁹ —Hãmri nhũm Apraãw kãm: "Nà pa mễ hwỳr mễnh kêt nê. Ra mễ kuri Tĩrtũm kapêr jarênh xwỳnhjê mễ Mojes kot Tĩrtũm kapêr ã kagà kênã. Kê mễ kamã harê nê ja ma nê rĩ tãm tanhmã amnhĩ nhĩpêx to." Anê. ³⁰ Hãmri nhũm tee ri kuma nê kãm: "Kwa nã. Koja mễ kagàja mar kêt nê. No kêt Rajare na pre ra htyk tã akupỳm htĩr jakamã koja mễ hwỳr wrỳ nê mễ kãm awjarê nhũm mễ akupỳm htĩr ã omu nê kapêr ma hãmri nê amnhĩ tomnuj kaga kurê kumrêx. Kwa nã ã ri anhỳr kêt nê mễ hwỳr amê hêxta waa nê." Anê.

³¹ —No nhũm kãm: "Nà koja mễ Tĩrtũm kapêr ã kagà mar kêt ã koja mễ määnên Rajare tyk nê akupỳm htĩr nê mễ hwỳr wrỳk nê kot mễ kãm tanhmã ujarênh to hã mar kêt nê. Jakamã kwarĩ pa mễ hwỳr mễnh kêt nê. Kot paj ho anê nê ãm ixte mễ hwỳr mễnh kaprỳ pyrãk o amnhĩ nhĩpêx." Anê. ã mễ ujarênh kot anhỳr. Anê.

Mễ kot Jejus nê mễ no kupyř ã mễ harênh

Matêwre 18.6; Makre 9.42; määnên Rômãn 1.32; Sikũn Pêtre 2.1, 2.18

17 Tã nhũm Jejus hkôt mễ pa ho mễ pa xwỳnhjê jahkre ho nhỹ nê mễ kãm:

—E kot paj mễ kot ixkôt amnhĩ xunhwỳr tohtuj anhỳr xwỳnhjê jarê ka mễ inhma. Nà koja mễhõ mễ hwỳr tẽ nê inhnê mễ kãm kapêr. Mễ kot mễ mar nê amnhĩ tomnuj prãm xàj tanhmã mễ kãm kapêr to. Hãmri nhũm mễ mar xà hkôt tanhmã amnhĩ tomnuj to. Hã koja Tĩrtũm ja hã omu nê kot inhnê tanhmã kãm nê xwỳnhta pumu nê ja hã homnuj tỳx nê. Te mễ kot mễhõ pynênh nê mut ã kên pytĩ hõ nhôr nê ma o htêm nê gô rax kãm mễnh pyrãk o koja hipêx. Te ho ja pyrãk no ãm homnuj tỳx o ja jakre. Jakamã kwa mễ ixkapêr ma nê kãm ajamexpêr tỳx rãhã ho ri apa. Anê.

Mễ pahte amnhĩ tã tanhmã mễhõ hto hkêt ã mễ pamã karõ

Matêwre 18.21; Makre 11.25-26; määnên Epes 4.32; Korosê 3.13

³ Nhũm Jejus arĩ mễ ahkre nê mễ kãm:

—Nê koja ixkôt atõjê hõ tanhmã atomnuj to. Ka amnhĩ tã omu hãmri nê ma hwỳr tẽ nê ja hã kãm akapêr nê kãm: "Kwa mon ka axtem nê ri ã inhĩpêx anê ixtõ? Kwa nã ri ã inhĩpêx anhỳr kêt nê." Anê hãmri nhũm amnhĩ tã ama nê amã: "Nà na pa tee ri ixte tanhmã atota ã amnhĩ pumu nê ixkaprĩ nê. Nà kot paj

axte ã ri anhĩpêx anhỳr kêt nê. Kwa kêr ka axte tanhmã ja mễ ajamexpêr to hkêt nê. Te ate amnhĩ katut kôt mễnh pyrãk o hipêx pu akupỳm tãm xpên nhĩpêx o papa." Anê. Koja ã amã kapêr anê ka amnhĩ tã ama hãmri nê axte tanhmã kot atoja mễ ajamexpêr kêt nê.

⁴ —Koja arĩgro pyxi hã xatã tanhmã atomnuj to japêr. Hãmri nê xatã tee ri ja hã amnhĩ pumu nê awỳr mra nê xatã amnhĩ tã amã kapêr nê amã: "Pa ot pa awỳr tẽ. Na pa ra ixkaprĩ nê. Kwa ixte ã anhĩpêx anhỳrja pumu nê ãm omu. Kot paj axte hkêt nê." Anhỳr o xatã amã kapêr. Nê ra axte tanhmã atomnuj to nê kê axte awỳr tẽ nê ã amnhĩ tã amã kapêr anê. Nom kêr ka ama nê kamã agryk kêt nê. ãm xatã kãm: "Nà kot puj anê nê akupỳm tãm xpên nhĩpêx. Kot paj axte tanhmã ate ix-tota mễ ijamexpêr kêt nê. Kot puj ja ho pajapêx nê tãm xpên nhĩpêx o akupỳm papa." Anhỳr o kêr ka mễ xatã xpên nhĩpêx anhỳr rãhã ho ri apa nê aa jam anhũrer kêt nê. Anê.

Mễ pahte mễmoj tã Tĩrtũm wỳr hã mễ pajarênh

Matêwre 17.20-21, 21.21-22; Makre 11.23

⁵ Tã nhũm Jejus nhỹ hã mễ ahkre ho mễ pa xwỳnhja-ja hãmri kãm:

—Kwa Pahihti. Tanhmã mễ ixto pa mễ amnhĩ kaxyw Tĩrtũm kôt ijamexpêr tỳx rãhã ho ri ixpa. Anê.

⁶ Hãmri nhũm mễ kãm:

—Nà ra mễ ate amnhĩ kaxyw hkôt ajamexpêr jakamã na ra amnhĩ tã mễ apumu. Jakamã mễ ate hkôt amnhĩ nhĩpêx kukwak ri na ka htem mễmoj tã awỳ nhũm mễ ate mễmoj tã hwỳr xà hkôt mễ amã tanhmã mễmoj nhĩpêx to. Te mễ ate pĩ hpàr mũj mễ akapêr nê kãm: "E amnhĩ jarê nê ma tẽ nê gô xujanãr kãm mãn mrõ." Anê nhũm kot amar nê amar xà hkôt ã kot amnhĩ nhĩpêx anhỳrta pyrãk. Ja pyrã nê kot kaj mễ ate Tĩrtũm kôt amnhĩ nhĩpêx o apa kukwak ri mễmoj tã awỳ nhũm mễ ama nê mễ amã mễmoj tanhmã ho. Rỳ mễ amã mễmoj gô. Anê.

Te mễ pahpê Tĩrtũm mễ paxàpênh xwỳnh pyrãk

⁷ Nhũm Jejus arĩ mễ ahkre nê mễ kãm:

—Nê ja. Kot kaj mễ amã mễ àpênh xwỳnh kwỳjaja nhũm hõ amã mễmoj tã àpênh o pa ã ho anhỳr pa. Hãmri tanhmã kot kaj kãm akapêr to wehe? Xà kot kaj kãm: "E hãmri axàpênhta kaga nê tẽ nê nhỹ nê apku." Anhỳr o kãm akapêr? ⁸ Nà kot kaj kãm anhỳr kêt nê. Kot kaj kãm: "E kwa tokyx tẽ nê hpãnhã inhmã inhõ hã apê. Kot pa ixàpkur pa ka ixpãnhã nhỹ nê apku." Anhỳr kãm akapêr. Kệp amã àpênh xwỳnh jakamã ka ã kãm akapêr anê. ⁹ Ja pyrã nê kot puj mễ Tĩrtũm kot mễ pamã mễmoj tã karõ xà hkôt tanhmã kãm amnhĩ nhĩpêx to ho ri papa. Mễ õ patrãwta pyrã nê kot tanhmã mễ pamã karõ hto xà hkôt pu mễ amnhĩ nhĩpêx.

—Xà na htem mễ õ patrãw mễ mễmoj tã àpênh pa hãmri nê hkwỳjê mễ amnhĩ to jarkrar o ri pa nê mễ kãm: "E ka mễ ixpumu. Na pa hte inhõ patrãw mễ ixàpênh mex o mễ hakre ka mễ ja hã ixpumu. Hêxta

waa në. Mon pa hte ri axtem ä amnhĩ nhĩpêx anê?" Anhÿr o xà kot kaj mẽ kãm amnhĩ to jarkrar o ri apa? Nà na ka htem ä amnhĩ nhĩpêx anhÿr kêt në.

¹⁰—Tã pa hte mẽ õ patrãwta pyrã në tanhmã mẽ amã mẽmoj tã karõ hto ho ixa. Jakamã kêr ka mẽ inhma në ixte mẽ amã mẽmoj tã karõ xà hkõt tanhmã inhmã amnhĩ nhĩpêx to ho ri apa. Hãmri në hã amnhĩ to jarkrar pẽ amnhĩ jarênh o: "Äm hãmri na pa ä Jejus mã amnhĩ nhĩpêx anê. Hêxta waa në. Ixpê Jejus mã tanhmã ixte amnhĩ nhĩpêx to mex xwÿnh na pa." Anhÿr o amnhĩ to jarkrar kêt në. Kêt äm amnhĩ jarênh o: "Nà ixte kãm tanhmã amnhĩ nhĩpêx to ho ixa xwÿnh pix na pa. Na hte mẽmoj tã inhmã karõ pa kuma në ý hã tanhmã kãm amnhĩ nhĩpêx to." Anhÿr o amnhĩ jarênh o ri apa. No ri amnhĩ krã hkõt atÿx tanhmã amnhĩ to jarkrar to ho ri apa hkêt në. Anê.

Jejus kot mẽ ho 10 në akupÿm mẽ ho mex ä harênh

Matêwre 8.1-4

¹¹Tã nhũm Jejus arĩ Garirej rũm pika pẽ Samar hkàx ä Jerujarê hwÿr kormã mõ. ¹²Nê nhÿri krĩ hõ htêp o mõi mẽ nhũm krĩ pu hã ri mẽ pa xwÿnhjaja kêp 10 në kutã mra. Mẽ hkànhy hkro htÿx xwÿnhjaja kutã mra në hkaxpa në amÿm kuhê në omu. ¹³Hãmri në kãm:

—Pa Pahihti. Kwa mẽ ixpumu në mẽ ixkamã axukapri mẽ tanhmã mẽ ixto mex to. Anê.

¹⁴Hãmri nhũm mẽ kãm:

—Tõe. Nà kot paj mẽ ato mex. E mẽ mãmri awjanã në ma akupÿm mẽ anhõ patrejê hwÿr mra kê mẽ akupÿm mẽ akã mex ä mẽ apumu. Anê.

Hãmri nhũm mẽ kuma në kapêr mar xà hkõt awjanã. Kà nhy rãhã awjanã në ma akupÿm patre hwÿr mra. Nê kormã akupÿm hwÿr pry hã mrar rãhã piitã hkã mex pa. ¹⁵Hãmri nhũm äm pyxi në hkwyjê rom awjanã në akupÿm Jejus wÿr Tirtũm mã mex o mex ä harênh o hwÿr tẽ. ¹⁶Hãmri në Jejus kaxpa në kutã hkõnkrã ho tẽm në nhÿ në amnhĩ tã kãm kot ho mex ä kãm amnhĩ jarê. Kwÿjê hkĩnhã kêp Ijaew kêt axtem kêp Samar nhõ xwÿnh tã mẽ kurom akupÿn hwÿr tẽ në kãm mex o mex ä harê. ¹⁷Hãmri nhũm amnhĩ tã kuma në kãm:

—No mẽ akwÿjaja? Ixte mẽ ato 10 në mẽ ato mex tã ka äm kapxipix awjanã në akupÿn ixwÿr tẽ. Akwÿjê hkĩnhã apê Ijaew kêt tã akupÿm amnhĩ mex ä amnhĩ pumu hãmri në mẽ kurom awjanã në Tirtũm mã mex o mex ä harênh o ixwÿr tẽ. Hêxta waa në. Mo na hte ixkwÿjaja apyrã në amnhĩ kaxyw ixkõt hamaxpêr kêt nê? E kãnhmã xa në mãmri ma ajamakêtkati në akĩnh në ma akupÿm tẽ. Anê.

Jejus akupÿn wrÿk xà hã arĩgro jarênh

Matêwre 24.23-24, 24.37-44; Makre 13.32-37; mãänên Wam Tesarõn 5.2-8; Sikũn Pêtre 3.3-10

²⁰Tã nhũm Parijew nhõ xwÿnh kwÿjaja Jejus wÿr mra në omu në kãm:

—Kwa mẽ inhmã mẽmoj jarê. Xà koja apu Tirtũm tokyx kot mẽ pahwÿr mẽnh mã xwÿnhhta mẽ nhũm mẽ pahwÿr wrÿ mẽ mẽ pahto amnhĩptãr kurê kumrêx nã kormã? Anê.

Hãmri nhũm mẽ kuma në mẽ kãm amnhĩ jarê. Te ho nhãm mẽhõ jarênh pyrã në mẽ kãm:

—Nà ra kot mẽ ho amnhĩptãr o pa kênã. Nom nhÿri hkrĩ xà kamã mẽ ho amnhĩptãr o hkrĩ hkêt në. Na htem amnhĩ kaxyw hkõt hamaxpêr në hkõt amnhĩ xunhwÿ hãmri nhũm kêp mẽ õ pahihti hã mẽ ho amnhĩptãr o pa. Nê mẽ kãm mẽ hamaxpêr mex gõ nhũm htem hkõt ri hamaxpêr mex o pa. Anê.

²²Hãmri në hpãnhã hkõt mẽ pa ho mẽ pa xwÿnhjê mã kapêr. Mẽ kot nhÿrmã tee ri kamã hamak o pa hã mẽ kãm kapêr në mẽ kãm:

—Kot kaj mẽ nhÿrmã tee ri amã tokyx akupÿn ixwrÿk në ixte mẽ ato amnhĩptãr prãm xaj tee ri inhmã anojarêtkapry ho ri apa. Nê axpên mã ri ijarênh o: "Hêxta waa në. Mo na we Pahihti tokyx akupÿn mẽ pahwÿr wrÿk kêt nê?" Anhÿr o inhmã anojarêtkapry o ri apa pẽ ixkamã ajamak rãhã ho apa.

²³—Nê koja mẽ ra akupÿn ixwrÿk ä tanhmã mẽ amã ixto hêx to ho pa. Nhÿri ixkuhê nhũm mẽ kot ixpumunh ä mẽ amã ixto hêx o pa. Nom kêr ka mẽ ama në äm mẽ ama. ²⁴Kot paj nhÿrmã akupÿn mẽ awÿr ixwrÿk kaxyw nhũm mẽ pika piitã hkõt akupÿn ixwrÿk kãm anhĩpê ixpumu. Te mẽ piitã mẽ kot anhĩpê na jaxênh pumunh pyrãk o kot kaj mẽ apiitã ixpumu.

²⁵Nom kormã jar pika ja kamã ixa ri koja mẽ ohtõ në ixkaga pa amnhĩ xà htÿx kamã ijamak kãm ty. Hãmri në mẽmo arĩgro hã ma akupÿm kaxkwa hwÿr api. Hãmri në nhÿrmã akupÿn mẽ awÿr wrÿ.

²⁶—Nà kot paj nhÿrmã man akupÿn mẽ awÿr wrÿ. Akupÿn ixwrÿk xà hã arĩgrota ä koja jar pika ja kamã mẽ pa xwÿnhjaja htÿx ri tanhmã amnhĩ tomnuj to ho pa. Te amnepêm finat Noehti htĩr ri mẽ kot htÿx ri tanhmã amnhĩ tomnuj to ho pa pyrãk o koja mẽ amnhĩ nhĩpêx o pa. ²⁷Na prem amnhĩ kaxyw Tirtũm mã hamaxpêr o pa hkêt në. Nê äm jar pika ja kamã mẽ kot amnhĩ nhĩpêx pix kukamã hamaxpêr o ri paja o äm kõt pix mã tanhmã ri amnhĩ nhĩpêx to ho pa. Rõm nhũm Noehti gõ htãm pymaj pãr raxja nhĩpêx në kãm axà. Nhũm prem hã omu në äm omunh o pa në tanhmã ri amnhĩ kukamã hamaxpêr to hkêt në. Tã nhũm nata mẽ haêr pẽ wrÿ. Hãmri në wrÿk rax o ra pika piitã hãnh nhũm mẽ piitã pikaprãr pa.

²⁸—Akupÿn ixwrÿk xà hã arĩgrota ä koja mẽ mãänên te amnepêm Sotõ nhõ xwÿnhjaja kot htÿx ri tanhmã amnhĩ tomnuj to pyrãk o amnhĩ nhĩpêx. Finat Rohti kormã htĩr ri mẽ kot htÿx ri tanhmã amnhĩ tomnuj to ho pata pyrãk o koja mẽ amnhĩ nhĩpêx. Na pre hte Sotõ nhõ xwÿnhjaja äm pika ja kamã mẽ kot amnhĩ nhĩpêx pix kukamã hamaxpêr o ri pa. Nê äm kõt pix mã ri amnhĩ nhĩpêx o pa. Nê htÿx ri amnhĩ xãpkur xà pix kukamã hamaxpêr. Nê mẽ hpur kãm ri àpênh pix kukamã hamaxpêr. Nê ri amnhĩ xujaprõr pix kukamã hamaxpêr në axpên mã mẽmoj to wênê pix kukamã hamaxpêr. Nê amnhĩm õrkwÿ nhĩpêx pix kukamã hamaxpêr. Ä na prem pika ja kamã mẽ kot amnhĩ nhĩpêx pix kukamã hamaxpêr o ri pa anhÿrja o amnhĩ kaxyw Tirtũm mã hamaxpêr o pa hkêt në.

²⁹ —Tã nhũm Rohti mẽ õ krí rũm kator mẽ nhũm Tirtũm krí nhõ xwỳnhjaja kot amnhĩ tomnuj tỳx o paja mỳrapê mẽ himex pa. Jao kaxkwa rũm mẽ hipy mẽmo hpõk kwỳ rẽ nhũm mẽ hkaxàr pa. ³⁰ Tã akupỳn mẽ awỳr ixwỳrkja mẽ koja mẽ te Rohti nhõ krí kamã mẽ kot amnhĩ nhĩpêx pyrã nẽ htỳx ri amnhĩ tomnuj pix o pa.

³¹ —Nẽ akupỳn ixwỳryta ã ka mẽ anhõrkwỳ nhĩmõk ã hkrãmnhẽn o akrĩ japêr nẽ akupỳn ixwỳrk kãm ix-pumu. Hãmri nẽ akukrêx wỳr axàr nẽ hõ hpyr mã ajamaxpêr kêt nẽ. Rỳ ka mẽ apur kãm axàpênh o akuhẽ japêr nẽ akupỳn ixwỳrk kãm ixpumu. Hãmri nẽ akupỳm anhõrkwỳ hwỳr atẽm mã ajamaxpêr kêt nẽ. Mo kaxyw kot ka kêt hwỳr tẽ? Kêt ãm inhmã mẽ ajapê hã akupỳn mẽ awỳr ixwỳrk mã ajamaxpêr o akĩnh nẽ ixpumunh o akuhẽ.

³² —Nẽ kêr ka mẽ Rohti prõ kot tanhmã amnhĩ nhĩpêx toja mã ajamaxpêr rãhã ho ri apa. Na pre Tirtũm kapêr nhĩrõp xa nẽ amnhĩ katut kõt Sotõta wỳr rĩt hãmri nẽ ã amnhĩ nhĩpêx anhỳrja mỳrapê htyk kurê kumrêx. Tã kêr ka mẽ ho uràk nẽ amã akukrêx rax japê xàj ixkõt amõr kaxyw anhĩtõt kêt nẽ.

³³ —Nẽ kwa kêr ka mẽ jar pika ja kamã tanhmã mẽ ate amnhĩ nhĩpêx to pix kukamã ajamaxpêr o ri apa hkêt nẽ. Nẽ mẽ akukrêx rax pix kukamã ajamaxpêr kêt nẽ. Koja nhỹrmã ja piitã mẽ apê hapêx pa. Mẽ ate kãm anhĩhkra karo hpar pyrãk o piitã hipêx hãmri nhũm Tirtũm ja hã mẽ apumu nẽ hpãnhã nhỹrmã mẽ amã mẽmoj mex nhõr rax nẽ.

³⁴ —Nẽ kot paj kamãt kãm akupỳn ixwỳrk japêr nhũm nhỹri mẽhõ ra ixkõt amnhĩ xãm xwỳnh mẽ mẽhõ kot ixkõt amnhĩ xãm kêt xwỳnh wa par kãm nõr japêr. Hãmri pa amnhĩ wỳr ra ixkõt kot amnhĩ xãm xwỳnhhta o api nhũm kot ixkõt amnhĩ xãm kêt xwỳnhhta arĩ gõr nẽ nõ. ³⁵ Rỳ pa arĩgro hã akupỳn ixwỳrk japêr nhũm mẽnijẽ hõ wa hamẽxkrut nẽ harõj kahuk o ãm japêr. Hãmri pa ra kot ixkõt amnhĩ xãm xwỳnhja ho api nhũm kot ixkõt amnhĩ xãm kêt xwỳnhja ahte arĩ harõj kahuk o xa. Hãmri nẽ hamaxpêr mex kêt kumrêx o xa. ³⁶ Rỳ koja mẽmyjẽ hõ wa axkrut nẽ hpur kãm àpênh o ãm japêr. Pu pa amnhĩ wỳr kot ixkõt amnhĩ xãm xwỳnhhta o api nhũm kot ixkõt amnhĩ xãm kêt xwỳnhhta pur kãm ahte arĩ apênh o xa. Hãmri nẽ tee ri hkrãmnhwỳ hkukamã hamaxpêr o xa. Anẽ.

Nhũm pre ã Jesus hkõt mẽ pa ho mẽ pa xwỳnhjẽ mã amnhĩ jarẽnh anẽ. ³⁷ Hãmri nhũm mẽ kuma nẽ kãm:

—Kwa nhỹri koja mẽmoj ã amnhĩ nhĩpêx anẽ? Anẽ.

Hãmri nhũm mẽ kãm:

—Nã koja nhỹri mẽmojja ã amnhĩ nhĩpêx anẽ ka mẽ omunh kurê kumrêx. Te nhỹri mẽmoj kro nẽ nõr nhũm nhõnhti kot omunh nẽ hã htor nẽ hpinhĩpanh nhũm mẽ kot hã omunh kurê kumrêxta pyrãk. Anẽ.

Mẽ pahte Tirtũm mã amnhĩ jarẽnh rãhã ho papa hã mẽ pamã karõ

Rukre 11.5-8; mããnhẽn Wam Tesarõn 5.17

18 Tã nhũm Jesus hkõt mẽ pa ho mẽ pa xwỳnhjẽ mã mẽmoj tã karõ. Mẽ kot tanhmã Tirtũm mã

amnhĩ jarẽnh to hã mẽ kãm karõ. Mẽ kot xatã kãm amnhĩ jarẽnh o pa nẽ amnhĩ kaxyw kãm hamaxpêr rãhã ho pa kaxyw. No ãm hã kuxi nẽ tanhmã mẽ kãm hã ujarẽnh to nẽ mẽ kãm:

² —Koja nhỹri krí hõ kamã juistija kãm Tirtũm prãm nõkati. Nẽ mããnhẽn kãm amnhĩ kwỳjẽ hprãm nõkati htã kêp juisti nẽ tanhmã mẽ kãm kapêr to ho hkrĩ.

³ Jakamã nhũm mẽhõ ni pẽ mjên htyk xwỳnh. Nhũm hte mẽhõ xatã tanhmã kêp õ mẽmoj to ho pa. Hãmri nhũm tee ri amnhĩ tã omu nẽ xatã juistita wỳr mra nẽ kãm harẽ nẽ kãm: “Xê gàà nẽ. Na hte pahkwỳjẽ hõja ix-tomnuj rãhã ho pa. Xê ixtã tanhmã kãm akapêr to kê tãm inhĩpêx.” Anẽ. Nẽ xatã hwỳr mra nẽ amnhĩ to kuwỳ nẽ xatã hwỳr mra nẽ amnhĩ to kuwỳ. ⁴ No nhũm kuma nẽ ãm kuma. Kãm hkwyjẽ ho ajuta hprãm kêt jakamã ãm kuma. Tã nhũm xatã hwỳr mra. Gaa nhũm rĩ kãm mar kaga nẽ. Hãmri nẽ hamaxpêr o: “Tk. Hẽxta waa nẽ. Jahti na hte xatã ixwỳr mra nẽ tanhmã inhmã amnhĩ jarẽnh to. Nẽ ãm xatã ixwỳr mra. Nã na pa ra inhmã mar kagyk nẽ. E pa tokyx tanhmã nẽ kot tanhmã ho xwỳnhhta mã ixkapêr to. Inhmã Tirtũm py-ma kamã rỳ inhmã ixkwỳjẽ kaprĩ kamã pa tanhmã nẽ kãm nẽ hkêt tã kot pa anhỹr kêt nhũm amnhĩ tã inhmã harẽnh pix nẽ pa ra mar kurê ixkrã tãtãk nẽ.” Anhỹr o hamaxpêr. ã mẽ ujarẽnh kot anhỹr.

⁶ —Juisti tãm hamaxpêr kêt tã nhũm nija xatã hwỳr mrar nẽ amnhĩ to hwỳr jakamã nhũm jatã tanhmã ho ajuta hto. ⁷ No kêt Tirtũmja. Xàn ka htem mẽmoj tã awỳ nhũm juisti punutita pyrã nẽ mẽ ama nẽ ãm mẽ ama? Nã koja ã amnhĩ nhĩpêx anhỹr kêt nẽ. Kot ka mẽ-moj tã kãm amnhĩ jarẽ nhũm ama nẽ tanhmã amã mẽ-moj to rỳ tanhmã amã amnhĩ nhĩpêx to. Juistita rom mẽ pakamã ukaprĩ xwỳnh na. Tã kot paj nhỹrmã akupỳn wry nẽ mẽ apumu ka mẽ arĩ amnhĩ kaxyw hkõt ajamaxpêr mex pẽ kãm amnhĩ jarẽnh rãhã ho ri apa pa ja hã mẽ apumu nẽ ixkĩnh tỳx nẽ. Ja na inhmã hprãm. Anẽ.

Tanhmã mẽ kot Tirtũm mã amnhĩ jarẽnh to hã mẽ harẽnh

Matêwre 6.5-8; mããnhẽn Wam Pêtre 5.5-6

⁹ Tã nhũm Jesus mẽ kot amnhĩ to mex o hkwyjẽ jakrenh ã amnhĩ to jarkrar o ri mẽ pa xwỳnhjẽ pumu nẽ tanhmã mẽ kãm kapêr to. Nom mẽ kot amnhĩ to jarkrarta ã kuxi nẽ mẽ kãm awjarẽ nẽ mẽ kãm:

¹⁰ —Koja mẽhõ wa hamẽxkrut nẽ Tirtũm mã amnhĩ jarẽnh kaxyw wa tẽ. Ja kêp Parijew nhõ xwỳnh nhũm hõja kêp mẽ õ pahi mã hkwyjẽ pẽ kàxpore hkwy jamỳnh xwỳnh. Nhũm wa Tirtũm mã amnhĩ jarẽnh xã hã ixkre hwỳr wa tẽn axà. ¹¹ Hãmri nhũm Parijew nhõ xwỳnhhta kumrêx tẽ nẽ nhỹri mẽ piitã mẽ noo mã Tirtũm mã amnhĩ jarẽ. Nẽ amnhĩ to jarkrar pẽ kãm amnhĩ jarẽnh o: “Pa Tirtũm. E ra ate ixpumunh mex. Na pa hte amnhĩ to mex pix o ri ixpa. Ra ate ja hã ix-pumunh mex. Na pa hte kàxpore hkwy jamỳnh xwỳnh nẽj rom tãm amnhĩ nhĩpêx. Nẽ semãnh piitã hã ixàpkur kêt rãhã amã amnhĩ jarẽnh rãhã ho ixtã apkati axkrut. Nom ja pix kêt. Na pa hte mããnhẽn ixàpênh pãnhã kàx-

pore jamý ně mě kot amã tanhmã amnhĩ nhĩpêx to ho pa xwýnhjê mã hkwy nhõr o i xpa. Ně na pa hte ri ixãhkĩnh o ri i xpa hkêť ně. Ně nhãm mẽ kêp mẽ hprõ ho amnhĩkati ho ri i xpa hkêť ně. Na pa hte mẽ piitã mẽ kurom tãm amnhĩ nhĩpêx ã amnhĩ pumu ně ixkĩnh týx kumrêx. Hêxta waa ně. Mon pa hte ri ã amnhĩ to mex o i xpa anê?" Anhýr o Tĩrtũm mã amnhĩ to jarkrar pê kãm amnhĩ jarênh o xa.

¹³ —Hãmri nhũm hpãnhã mẽ kêp kãxpore hkwy jamýnh xwýnhhta haxwýja Tĩrtũm mã amnhĩ jarê. No ãm Parijew nhõ xwýnhhta rom ki hkwyjê pê awry ně ahte hipõ ně kãm amnhĩ jarê. Ně kãm amnhĩ jarênh pê amnhĩ tak ně mur ně kãm: "Kwa Tĩrtũm. Na pa hte amnhĩ tomnuj týx o ri i xpa. Ně ixtýx ri amã prãm xã kuhpa hã tanhmã amnhĩ nhĩpêx to. Na pa tee ri ja hã amnhĩ pumu ně ixkaprĩ htýx ně. Ā inhmã amnhĩ nhĩpêx anhýr o ri i xpa hprãm kêt tã pa hte ã amnhĩ nhĩpêx anhýr o ri i xpa. Kwa xã kot ka ixkamã axukaprĩ ně amnhĩ katut kôt ixte amnhĩ tomnuj rênh pa Tĩrtũm?" Anhýr o kãm amnhĩ jarê.

¹⁴ —Hãmri nhũm Tĩrtũm hamê wa kot kãm amnhĩ jarênh ma no ãm wamta ma ně ãm kuma. No kêt hkôt hõja ma hãmri ně kot kãm amnhĩ tã àhwýr xã hkôt amnhĩ katut kôt kot amnhĩ tomnuj rênh pa ně ho hkra. Jakamã nhũm mex ně hkĩnh ně pa. Ra tãm hkrã hãmri ně hkĩnh ně ma htêm kurê kumrêx. Ā mẽ ujarênh kot anhýr. Ām hãmri na pa mẽ amã ja jarê. Koja mēhõ Parijew nhõ xwýnhhta pyrã ně kot amnhĩ to mex xwýnh ã amnhĩ kamnhĩx hãmri ně Tĩrtũm kot amnhĩ katut kôt kot amnhĩ tomnuj rênh kaxyw amnhĩ to hwýr kêt ně. Koja ãm kãm amnhĩ to jarkrar pix ně. Jakamã koja Tĩrtũm te kot mar ně ãm mar pyrãk o hipêx. No koja mēhõ kot kãxpore hkwy jamýnh xwýnhhta pyrã ně tee ri tanhmã amnhĩ tomnuj to hã amnhĩ pumu ně hkaprĩ ně. Hãmri ně amnhĩ to Tĩrtũm wý nhũm kuma ně tanhmã ho mex to. Anê.

Jejus kot amnhĩ wýr mēhprĩrejê hwýr ã harênh

Matêwre 19.13-15; Makre 10.13-16

¹⁵ Tã nhũm Jejus mẽ hkôt mẽ pa ho mẽ pa xwýnhjaja arĩ pry hã Jerujarê hwýr mõ nhũm Ijaew kwýjaja mẽ omu ně mẽ hkrare jamý ně Jejus wýr mẽ o mra. Kot mẽ hã ĩhkra jaxwýr ně mẽ ho Tĩrtũm wýr kaxyw. Hãmri nhũm hkôt mẽ pa ho mẽ pa xwýnhjaja tee ri ja hã mẽ omu ně mẽ mẽ kãm kapêr ně mẽ kãm:

—Tk. Kwa mẽ ma akupým mẽ akrata o mra nã? Mo kaxyw na ka mẽ Jejus wýr mẽ o mra? Kormã mẽ ràxre kênã. Anê.

¹⁶ Hãmri nhũm amnhĩ tã mẽ kuma ně mẽ kãm:

—Tk. Kwa nã mẽ ri inhnê mēhprĩjê kurê hkêť ně. Kwãr mẽ mãmri ixwýr mẽ o mra. Anê.

Hãmri ně amnhĩ wýr mẽ kãm hpa ho apê nhũm mẽ hwýr mẽ o mra nhũm mẽ kuri kuhê. Hãmri nhũm hkôt mẽ pa ho mẽ pa xwýnhjê mã kãm:

—E mẽ jareja mẽ omu. Na htem hamakêtkati ně hkĩnh ně ri pare. Ně kãm amnhĩ to rũnh prãm kêt ně ri pa. Tã Tĩrtũm kôt mẽ kot amnhĩ nhĩpêx xwýnhjaja na

htem mẽ urãk ně kãm amnhĩ to rũnh prãm kêt ně ri pa.

¹⁷ —Jarejaja na htem hipêêxã ně katorxã wa kapêr ma ně wa hkôt ri amnhĩ nhĩpêx mex o ri pa. Tã ixpê Tĩrtũm kot mẽ awýr inhmênh xwýnh kot ka mẽ amã ixkôt amnhĩ xunhwýr prãm. Hã kot kaj mẽ te ho jarejê kot amnhĩ nhĩpêx pyrãk o amnhĩ nhĩpêx. Jao ixkapêr ma ně ixkôt ri tanhmã amnhĩ nhĩpêx mex to ho ri apa. Anê.

Kãxpore rax xwýnh jarênh

Matêwre 19.16-30; Makre 10.17-31; mããnhên Wam Ximotre 6.6

¹⁸ Tã nhũm Ijaew nhõ pahihtĩ hõja Jejus wýr tẽ ně kãm kapêr ně kãm:

—Pa? Mẽ ijahkre xwýnh maati? Kwa inhmã mẽmoj jarê. Tanhmã kot pa we nhýrmã Tĩrtũm ri ixtĩr tũm ně i xpa kaxyw amnhĩ nhĩpêx mex to ho ri i xpa wehe? Anê.

¹⁹ Hãmri nhũm kãm:

—Xã ate ixpê Tĩrtũm kwý hã ixpumunh kôt na ka ixte urãk ně amnhĩ to mex xwýnh ã ijarê? Tĩrtũm pix na kot amnhĩ to mex rãhã xwýnh jakamã kot kaj ã ijarênh anhýr jao ixpê Kra hã ijarê. Ně urãk ně ixte amnhĩ to mex xwýnh ã ijarê. Nã xãn ka ãm atýx ri amnhĩ krã hkôt ã ijarênh anê?

²⁰ —Tĩrtũmja mex o mex xwýnh jakamã kot kaj amã nhýrmã kuri atĩr tũm ně apa hprãm hãmri ně ra kot mẽmoj tã mẽ amã karõ xã hkôt amnhĩ nhĩpêx o ri apa. Ra ate mar mex kênã. Na pre mẽ amã:

Kêr ka mẽ axpên pê axãhkĩnh hkêť ně.

Ně mẽ axpên par kêt ně.

Ně mẽ axpên to axêx o ri apa hkêť ně.

Ně mẽ axpên pê aprõ ho amnhĩkati hkêť ně.

Ně mẽ anhĩpêêxã mẽ akatorxã wa hã apijaãm pê wa kutã anojarêť pix o ri apa.

E kot kaj amã nhýrmã Tĩrtũm kuri atĩr tũm ně apa hprãm hã kêr ka ã amnhĩ nhĩpêx anhýr o ri apa. Anê.

²¹ Nhũm pre ã Jejus kãm kapêr anê nhũm kuma ně kãm:

—Kwa ixprĩre ri ra ã ixte amnhĩ nhĩpêx anhýr o ri i xpa kênã. Nom ixte ixtĩr tũm ně i xpa kaxyw kormã ixte tãm kêt pyrãk. Anê.

²² Hãmri nhũm Jejus kãm:

—Nã kormã mẽmoj pyxire ně arĩk. Na ka amã akukrêx rax japê htýx o Tĩrtũm jakre. Jakamã kêr ka ma akupým tẽ ně akukrêx o wênê hpa ně hpãnhã kãxpore jamý hãmri ně ma mẽ kêp amrakati xwýnhjê mã õr pa. Hãmri ně rĩ akupýn ixwýr tẽ ně ixkôt apa ho apa. Anê.

²³ Hãmri nhũm kuma ně tee ri amnhĩ kukamã hamaxpêr. Kãm kukrêx rax japê ně kãm ĩhkra karo hprãm kêt ně. Jakamã tee ri Jejus kot ã kãm hã karõ anhýrja ma ně awjanã ně ma akupým tẽ. ²⁴ Hãmri nhũm tee ri ja hã omu ně hã mẽ kot mar xwýnhjê mã kapêr ně mẽ kãm:

—Hêxta waa ně. Koja mẽ hikukrêx rũnh xwýnhjaja ohtõ ně kãm mẽ hikukrêx japê xãj Tĩrtũm mẽ wa ixri htĩr tũm ně pa ho papa hkêť ně. Wa ixte amnhĩ nhĩpêxja mẽ kêp hihtýx. ²⁵ Na htem kãm hikukrêx rax mã ĩhkra karo hprãm kêt rãhã tee ri kãm Tĩrtũm kôt amnhĩ

nhîpêx prâm kaprÿ. Te ho mēhō kot menh kagō hã hkre nē kãm kagō katōk prâm kêt rãhã kãm guhkrax kãm àr prâm kaprÿta pyrāk. Anē.

Nhũm pre ã Jejus mē kãm kapēr anē. ²⁶ Hãmri nhũm mē kuma nē tee ri amnhĩ kukamã hamaxpēr nē kãm:

—Kwa nom mē ixpiitã mē inhmã mē ixkukrêx japê kênã. Jakamã xà kot paj mē ixpiitã nhÿrmã war ari ixtĩr tũm nē ixpa ho ixpa hkêt nē nà? Anē.

²⁷ Hãmri nhũm mē kãm:

—Nà kot kaj mē amnhĩ krã hkôt mē amã mē akukrêx japêja mã anhũrer kêt nē. Tĩrtũm pix na hte ã mē kot amnhĩ nhîpêx anhÿr kaxyw tanhmã mē hkrã hto nhũm mē kãm mē hikukrêx japê htÿx kêt nē. Jao mē kêp Tĩrtũm mē wa ixri htĩr tũm nē mē pa ho pa mã xwÿnh. Anē.

²⁸ Hãmri nhũm Simãw Pêtre kãm:

—Kwa Pahihti no mē pajaja? Na pa prem agryk ã mē-moj piitã hkaga hpa nē akôt ixpa ho ixpa. Jakamã kot paj mē nhÿrmã war ari ixtĩr tũm nē ixpa ho ixpa nà? Anē.

²⁹ Hãmri nhũm kãm:

—Tÿ. Nà ka mē atō inhmã tanhmã amnhĩ nhîpêx to ho apa kaxyw akwÿjê re nē ma inhmã tanhmã amnhĩ nhîpêx to ho ri apa. Anhörkwÿ re rÿ atō rÿ atōx rÿ aprō nē akrajê re. Rÿ akatorxã nē anhîpêxã war are. Rÿ akukrêx piitã rer pa hãmri nē ma ixkapēr o mē piitã mē ahkre ho ri mē hkôt apa. ³⁰ Hã kot paj ja hã mē apumu nē mē ato mex rax nē. Hãmri ka mē ma nhÿhÿm apa nē nhÿri mē kãm ixkapēr jarēnh o ri mē hkôt apa nhũm mē kot mē amar xwÿnh kwÿjaja mē ama nē ra kãm mē akĩnh nē. Nē ra mē ate akwÿjê rer par tã nhũm mē tãmjaja te mē apê mē hkra rÿ mē htō rÿ mē htōx pyrāk o mē anhîpêx nē tanhmã mē ato mex to ho pa. Hãmri ka mē nhÿrmã ty nē ma Tĩrtũm mē wa inhō krĩ hwÿr api hãmri nē wa ixkuri amex kumrêx nē atĩr tũm nē apa ho apa. Anē.

Nhũm pre ã Jejus Simãw Pêtre mē hkwÿjê mã kapēr anē.

Jejus kot axte htyk kukamã amnhĩ jarēnh

Matêwre 20.17-19; Makre 10.32-34

³¹ Tã nhũm Jejus mē kot ÿ hã kapēr jarēnh o mē pa xwÿnh pê 12jaja mē hkwÿjê pê mē ho kato. Nē nhÿri mē hkàx ã mē o xa nē tanhmã mē kãm amnhĩ jarēnh to nē mē kãm:

—Amnepêm Tĩrtũm nhÿ hã kapēr jarēnh xwÿnhjaja na prem ixkukamã tanhmã mē kot inhîpêx to hã ijarê nē ixtã kagã. Tã pu mē ra Jerujarê hwÿr mō. Kamã koja mē tanhmã ixto rax nē. Ra mē kot ixkukamã ijarēnh nē ixtã kagã xà hkôt koja mē ixto anē. ³² Koja mē kãm ixkurê xwÿnhjaja ixpynê nē Rôm nhō xwÿnhjê nhō pôristi hwÿr ixto tē nē mē kãm ixto hêx nhũm mē kuma nē mē mar xà hkôt tanhmã inhîpêx to. Nē mē hk-wÿjaja ixtã hpēr o axkê nē akunha. Nē mē hk-wÿjaja ixto kapēr punuj nē ijapry nē ixtã argôx rē nē ixtak. Hãmri nē ixpĩ. ã koja mē inhîpêx anē. Nom kot paj ãm ixtÿk ã apkati axkrunêpxi nhũm Tĩrtũmja akupÿm ixto ixtĩr. Anē.

³⁴ Hãmri nhũm mē kuma nē tee ri htyk nē akupÿm htĩrja kukamã hamaxpēr no ãm hpri hã hkôt hamaxpēr kêt nē.

Jejus kot no hkre xwÿnh o mex ã harēnh

Matêwre 20.29-34; Makre 10.46-52

³⁵ Tã nhũm Jejus mē kormã Jerujarê hwÿr Jerikoja têt o mō. Hãmri nhũm pry nhĩhkjê hã no hkre xwÿnhja àh-wÿr o nhÿ. ³⁶ Hãmri nē amnhĩ wÿr mē mrar ma. Mē ohtôo nē Jejus kôt mē mrar xwÿnhjê mrar ma nē mē kãm:

—Kwa mēmo ri? Mēmoj wÿr na ka mē axohtô nē mra? Anē.

³⁷ Hãmri nhũm mē kãm:

—Nà Jejus pê Najare nhō xwÿnh kôt na pa mē mō. Anē.

³⁸ Hãmri nhũm mē kuma nē kàx pê Jejus mã kapēr nē kãm:

—Pa Jejus? Apê mē inhō Pahihti mex na ka. Te apê amnepêm anhîgêt pahihti Tawi kot amnhĩ nhîpêx pyrāk. Jakamã kwa ixkamã axukapri nē akupÿm ixto mex kêt wehe. Ixte amnhĩ kaxyw akôt ijamaxpēr xwÿnhjê hō na pa. Anē.

³⁹ Hãmri nhũm Jejus kukamã mē mrar xwÿnhjaja tee ri kuma nē kãm:

—Tk. Kwa akapēr kêt nē nhÿ nà. Anē.

Tã no nhũm ãm mē kuma nē xatã amnhĩ to hwÿr o nhÿ. Kàx pê kãm kapēr o nhÿ. ⁴⁰ Hãmri nhũm Jejus kuma nē xa nē amnhĩ wÿr hã karō nhũm mē hpa hã kupy nē hwÿr o tē nhũm kãm:

⁴¹ —Pa mo na? Tanhmã kot pa ato? Anē.

Nhũm kãm:

—Nà akupÿm inhmã ixrit mex prâm. Anē.

⁴² Hãmri nhũm kãm:

—Tôe. Nà ra ate amnhĩ kaxyw inhmã ajamaxpēr tÿx jakamã kot kaj akupÿm ri rit. Anē.

⁴³ Hãmri nhũm akupÿm rit mex kurê kumrêx nē ja hã amnhĩ pumu nē hkĩnh tÿx nē. Hãmri nē ma Jejus kôt Tĩrtũm mã mex o mex ã harēnh o mē hkôt tē. Hãmri nhũm mē kot hã omunh xwÿnhjaja haxwÿja Tĩrtũm mã mex o mex ã harēnh o Jejus kôt mō.

Jakew kãm Jejus pumunh prâm ã harēnh

Rukre 3.8, 3.12-13

19 Tã nhũm Jejus arĩ Jerujarê hwÿr mō nē Jeriko hwÿr pōj. Hãmri nē krĩ kahti hkôt pry hã mō.

² Nhũm mē ra hkôt htu rax nē hkôt omunh o mō. Jakamã nhũm Jakew pê Rôm nhō pahi mã kwÿjê pê kàxpore hkwy jamÿnh xwÿnhjê krãhtũm xwÿnhja. Na pre hikàxpore rax nē. ³ Tã haxwÿja kãm Jejus pumunh prâm nē. Nom ãm hakooti nē hprihti jakamã tee ri kot omunh kaxyw amnhĩ nhîpêx nhũm mē kêp àmnar rax nē. ⁴ Hãmri nhũm ra hamaxpēr nē ma kukamã hprôt nē tē nē nhÿri pry mÿri pí xãm pumu nē hã api nē kutêp ajêt. Hãmri nhũm Jejus mō nē hapa. ⁵ Nē kãnhmã rit nē omu nē kãm:

—Pa Jakew. E kwa tokyx tēn wÿr pa ma akôt anhörkwÿ hwÿr tē nē ari amnhĩm hikra. Anē.

⁶ Hämri nhüm kuma në hkính në. Në wrÿk kurê kum-rêx në ma amnhî kôt në o tẽ. ⁷ Hämri nhüm mẽ kot omunh o kuhê xwÿnhjaja tee ri ja hã omu nhüm ja mẽ kêp omnuj në nhüm mẽ axpên mã harênh o:

—Tk. Kwa nà. Jakew kot amnhî tomnuj xwÿnh tã nhüm Jejus ma hkôt tẽ në kuri pøj. Anẽ.

⁸ Hämri nhüm wa örkwÿ hwÿr axà në nhÿ nhüm Jakew Jejus mã amnhî jarênh o:

—E. Nà ra ixte pahihtì mã kàxpore jamÿnh xwÿnhhta na pa pre hte ho prês jakre në amnhîm hamÿnh rax në. Tã kot paj akupÿm mẽ kãm ör pa. Na pa pre hte mẽ hkwyjê pê ho 10 në hamÿ. Tã kot paj hipy ho 40 në kurê në akupÿm mẽ kãm ho ixpigrành pa. Æ kot paj mẽ hipêx anẽ. Në ixkàxpore jakrêx kot paj ho axkjê në mẽ kêp amrakati xwÿnhjê mã ho ixpigrành pa. Anẽ.

⁹ Hämri nhüm kuma nhüm ja kãm mex në. Jakamã nhüm kãm:

—Nà ãm hãmri. Ate pahkukamã panhîgêt Apraãw pyrà në jarãhã ate amnhî tomnuj kaga jakamã na ra jarãhã anhörkwÿ hwÿr mẽ mex xà axà. Kojã Tirtüm jarãhã amnhî katut kôt ate amnhî tomnuj rênh pa në axte kãm hamaxpêr kêt në. ¹⁰ Mẽ ate amnhî tomnuj xwÿnhjê hwÿr na pre Tirtüm inhmẽ pa wrÿ. Te nhÿri mẽ apikunor nhüm ixte mẽ ajapêr o ixpa kaxyw Tirtüm kot mẽ awÿr inhmẽnh nhüm ixwrÿk në nhÿri ixte mẽ ajapêr o ixpa në mẽ amã ixkator në ixkính në ma akupÿm hwÿr mẽ ato inhmörta pyræk. Anẽ.

Mẽ pahte Tirtüm mã tanhmã amnhî nhípêx to

Matêwre 25.14-30

Hämri nhüm mẽ ohtô në Jejus mar o hkôt Jerujarê hwÿr mra. Na prem htÿx tanhmã kot amnhî nhípêx to hã hkamnhîx o hkôt mō mẽ axpên mã:

—E ma pu mẽ hkôt. Kojã Jerujarê hwÿr pøj hãmri në kêp mẽ pahpê Ijaew nhō pahi mẽ mẽ pahto amnhîptàr kurê kumrêx. E kwa ma pu mẽ hkôt. Anẽ.

¹² Nhüm Jejus mẽ hamaxpêr kôt mẽ omunh mex në. Jakamã kot mẽ piitã mẽ ho amnhîptàr xà hã arıgro hã mẽ kãm amnhî jarênh kaxyw. Kormã Jerujarê hwÿr ahtêp kêt ri mẽ kãm amnhî jarênh kaxyw. Nom hprî hã mẽ kãm hã amnhî jarênh kêt në. Æm amnhî tã kuxi në mẽ kãm awjarê në mẽ kãm:

—Kojã nhÿri krî hō kamã mēhō myja. Kot amnhî to rax o hkwyjê jakrenh xwÿnhja. Në krî hō kamã krî piitã hkôt pahi nhō pahihtija hãmri harênh ma në amnhî wÿr kuwÿ. Kot ma hwÿr mör nhüm õ krî kamã në mããnen krî hkwy kamã kêp mẽ õ pahi kaxyw kot ãm kaxyw nhüm hwÿr nojarêt. ¹³ Hämri në amnhî wÿr kãm mẽ àpênh xwÿnhjê ho 10 në tanhmã mẽ hã karō hto. Nhüm mẽ hwÿr mra nhüm mẽ kãm amnhî jarê në mẽ piitã mẽ kãm kàxpore hkwy gõ. Ahpÿnhã mẽ kãm hpÿnh në kugõ në mẽ kãm: “E ota ixkàxpore hkwyta. Kot kaj mẽ ixkutêp tanhmã ri inhmã ho rax to. Kêr pa mẽmo arıgro hã akupÿn mō kê ra ixahã inhmã ho ohtô në pa hamÿ.” Anhÿr o mẽ kãm kapêr hãmri në ma mō.

¹⁴ Hämri nhüm õ krî nhō xwÿnhjaja ra kêp mẽ õ pahi kaxyw harênh ma nhüm ja mẽ kêp omnuj në. Në mẽ kãm hkính kêt jakamã ma krî hō kamã kot mẽ kaxyw

ãm xwÿnhhta wÿr hkwy rê nhüm mẽ ma hwÿr mra në hwÿr pøj. Hämri në kot mẽ kaxyw ãm mã xwÿnhhta pumu në kãm: “Pa. E ot pa mẽ awÿr mra. Kwa na ka xep ra mẽ ixkaxyw mẽ inhiōja xãm kaxyw. Kwa nà mẽ inhmã jahti hkínhhti hã. Kwa mẽ ixkaxyw ãm kêt në nà?” Anhÿr o kãm kapêr.

¹⁵ —Tã no nhüm ãm mẽ kuma në ãm mẽ kuma nhüm mẽ awjanã në mã akupÿm mra. Hämri nhüm pahija mẽ kaxyw mẽ kãm hkính kêt xwÿnhhta xãm nhüm ma akupÿm õ krî hwÿr mō. Mōõ në ra pøj hãmri në amnhî wÿr kãm mẽ àpênh xwÿnhjê hã karō në mẽ kãm: “E no ixte mẽ amã kàxpore nhör xwÿnhhta? Tanhmã na ka prem ixkutêp inhmã ho rax to? E mẽ inhmã agō pa omu.” Anẽ.

¹⁶ —Hämri nhüm wamta kãm: “Ota akàxpore ate inhmã ör xwÿnhhta. Na ka pre inhmã ho pyxi në agō pa kupy në ho mẽmo hy hkwy japrō mẽ hkre. Nhüm õ pa mẽ kãm ho wênê ho ri ixpa në hpãnhã kàxpore jamÿ mẽ hipy amã kurê nhüm ra kêp 10. Ota. E amÿ.” Anẽ.

¹⁷ —Hämri nhüm kuma në hkính në. Hämri në kãm: “Nà ãm hãmri na ka ã inhmã ho rax anẽ. Ixte amã ho pyxi në ör tã ka pre inhmã hamãr mex në nhüm kãnhmã axkamẽ në ra kêp 10. Tã ra ixpê krî hkwy kamã mẽ õ pahi jakamã kot ka inhmã krî ho 10 në inhmã hamãr o ri apa. Jakamã kwa mãmrî amnhîm kàxporeta o arık.” Anẽ.

¹⁸ —Hämri nhüm hpãnhã hōja hwÿr tẽ në kãm: “E ota akàxporeta. Na pa pre ho mẽmo hy hkwy japrō mẽ hkre nhüm õ pa mẽ kãm ho wênê në hpãnhã kàxpore jamÿ mẽ hipy amã kurê nhüm ra kêp 5. Tã ota. E amÿ.” Anẽ. ¹⁹ Hämri nhüm kuma në kãm: “Nà ãm hãmri. Hãmri na ka ã inhmã ho rax anẽ. Jakamã kot kaj hpãnhã inhmã krî ho 5 në ho amnhîptàr o apa. E mãmrî amnhîm kàxporeta o arık.” Anẽ.

²⁰ —Hämri nhüm hpãnhã hkôt hōta tẽ. Nom hkwyjê hkínhã õ patrãw mã tanhmã kàxpore ho rax to hkêt në. Æm tanhmã hamaxpêr punuj to në htÿx ri kot kêp ho õxÿ mẽ amnhîm piitã hamÿnh par mẽ akupÿm kãm hkwy nhör kêt ã hkamnhîx. Jakamã tanhmã kãm ho rax to hkêt në. Æm hkupu mẽ o tẽ mẽ nhÿri kutêp kuxi. Hämri nhüm õ patrãw amnhî wÿr hã karō nhüm hwÿr tẽ mẽ amnhî nê kãm kapêr punuj mẽ kãm: “Tk. Ota akàxporeta. Ixte amã tanhmã ho rax tore hã. Ixte amã ho rax ronhÿx ka amnhîm piitã hamÿnh pa mẽ akupÿn inhmã hkwy nhör kêt në. Rÿ ixte tanhmã apê homnuj to ronhÿx ka hã inhmã akir. Jakamã na pa tanhmã amã ho rax to hkêt në. Æm hkupu mẽ o tẽ mẽ ho amũxu nhüm arı akutêp hikwÿ. Tã ota.” Anhÿr o amnhî nê õ patrãw mã kapêr punuj mẽ. ²² Hämri nhüm tee ri amnhî tã kuma. Kot amnhî to mex xwÿnh në kãm mẽ àpênh xwÿnhjê ho mex o pa xwÿnh tã ã kãm àpênh xwÿnh kot kãm kapêr anhÿrja ma mẽ amnhî tã kamã gryk në. Hämri në kãm: “Tk. Kwa xà ã ixte amnhî nhípêx anhÿr? Nà ixte ã amnhî nhípêx anhÿr kêt. Æ ixte amnhî nhípêx anhÿr nhüm amã ixpuma ronhÿx ka pre amã ixpuma xàj ixkàxporeta py mẽ ixwakre kamã amnhî krã hkôt tanhmã inhmã ho rax to. Tã nhÿx pa pre ra akupÿn awÿr tẽ mẽ hamÿ. Nà na ka ã ijarênh anhÿr o

axêx nê amnhî krã hkôt tanhmã inhmã ho rax to hkêt nê. Mÿrapê kot paj atomnuj tÿx nê ka rî amnhî pumu. Pêr ãm ajamaxpêr punuj.”

²⁴ —Nhũm pre ã kãm kapêr anê hãmri nê mẽ kot mar o kuhê xwÿnhjê mã kãm: “E mẽ atõ kêp kàxpore py nê wam kot ho 10 nê hamÿnh xwÿnhhta mã agõ.” Anê. ²⁵ Hãmri nhũm mẽ tee ri kuma nhũm ja mẽ kêp omnuj nhũm mẽ kãm: “Kwa nà ra hikàxpore rax kênã. Ra ate kãm ho 10 nê òr kênã.” Anê. ²⁶ Hãmri nhũm mẽ kãm: “ÿÿ nom tãã. Mãmrî kãm agõ. Koja mēhõ inhmã àpênh mex pa amnhî tã omu nê kot inhmã àpênh mexta pãnhã ho mex nê. No koja inhmã àpênh mex kêt nê pa tee ri ja hã omu nê ho mex kêt nê. E mãmrî kãm agõ.” Anê. ²⁷ Hãmri nê hpãnhã mẽ kãm: “E hpãnhã mẽ kãm ixprãm nõkati xwÿnhjaja. Ixte mẽ ho amnhîptàr mã tã mẽ kãm ixprãm nõkati xwÿnhjaja. Mẽ ma mẽ hwÿr mra nê mẽ ho akuprõ nê akupÿn amnê ixwÿr mẽ o mra nê inhnoo mã mẽ himex pa.” Anê. ã mẽ ujarênh kot anhÿr. Anê.

Nhũm pre Jejus ã mẽ kãm ujarênh anê. Te tãm kêp patrãwta pyrã nê ã amnhî jarênh anê. Mẽ kot tanhmã amnhî nhîpêx to ho pa hã mẽ omunh xà hkôt tanhmã mẽ hipêx to hã amnhî jarê.

Jejus kot Jerujarê hwÿr àr ã harênh

Matêwre 12.1-11; Makre 11.1-11; Juãw 12.12-19

²⁸ Nhũm Jejus kormã Jerujarê hwÿr mõ. ²⁹ Hãmri nê ra Petake mẽ Petãn wa htêp o mõ. Hixêt pê Oriwêhti kahti ri na krî wa xa. Jakamã nhũm Jejus hkôt mẽ pa ho mẽ pa xwÿnh wa ho akkrut nê amnhî kukamã wa kumê. ³⁰ Nê wa kãm:

—E. Wa ma krî mÿj wÿr mẽ ixkukamã wa tẽ. Nê wa hwÿr pøj nê nhÿri jumênre nyw mã ê nê ãm ata pumu. Kormã mẽ kot hã hkrî hkêt xwÿnhhta. Ka wa omu nê kãm ê xà hpôt nê man akupÿn ixwÿr o tẽ. ³¹ Nhũm mēhõ ja hã war apumu nê hã tanhmã war amã kapêr to ka wa kãm ã ijarênh anê nê kãm: “Mẽ panhõ Pahihti na hã karõ pa wa hwÿr tẽ.” Anhÿr o wa kãm ijarê. E wa ma hwÿr tẽ. Anê.

³² Hãmri nhũm wa kuma nê ma hwÿr htêm kurê kumrêx. Nê wa krîm pøj nhũm Jejus kot wa kãm harênh xà hkôt jumênreta pumu. ³³ Hãmri nê kãm ê xà hpôt o xa nhũm õ dõnjaja mra nê hã wa omu nê wa kãm:

—Tk. Kwa mo kaxyw na ka wa ri mẽ ixpê mẽ ixkrit mã ê xà pôt o wa xa? Kwa xà kot kaj wa mẽ ixpê ho ahkî nà? Anê.

³⁴ Hãmri nhũm wa mẽ kãm:

—Nà mẽ panhõ Pahihti na wa inhmã anê pa wa tẽ. Wa ixte ma akupÿm kutã ho inhmõr kaxyw. Anê.

Hãmri nhũm mẽ wa kuma nê wa kãm:

—Tõe. Nà wa mãmrî ma kãm o tẽ. Anê.

³⁵ Hãmri nhũm wa ma akupÿm Jejus wÿr o tẽ. Hãmri nê kaxyw amnhî xê hkwy hopøj nê kãm ho hkô kahty nê kãm ho htÿx nê o xa nhũm hã nhÿ nê mõ. ³⁶ Kormã Jerujarê hwÿr hixêt ã àpir o mõ. Nhũm mẽ kot omunh o mrrar xwÿnhjaja hkÿnh nê ma hkukamã kot pry ho mex kaxyw amnhî xê hkwyptyr o mõ. ³⁷ Hãmri nhũm

mẽ hixêt ã api nê kormã ahpar mã wÿr o mõ. Hãmri nhũm Jejus kôt mẽ pa ho pa xwÿnhjaja kàx pê Tirtũm mex o mex ã harênh o hkôt mõ. Ra mẽ kot hkôt pikamênh ry nê kot mẽ kãm aa mẽmoj pumunh kêt kwÿ ho anhÿr rax ã omunh jakamã hkÿnh nê nê Tirtũm mex o mex ã harênh o hkôt mõ. ³⁸ Nê harênh o:

E ota Tirtũm kot mẽ pahwÿr mēnh xwÿnhhta na ra pøj. ãm hãmri na mẽ pahwÿr wÿr. Na mex kumrêx. Kêp mẽ panhõ Pahihti mex na. ãm hãmri na pre Tirtũm mẽ pahwÿr kumê.

Tirtũmja mex kumrêx. Mex o mex. Kukwak ri pix mã na pu htem pajamakêtkati nê paxãmnhÿx ri papa rãhã ho papa.

Anhÿr o Jejus kôt harênh o mõ. Ra kot mẽ ho amnhîptàr kurê kumrêx ã hkamnhÿx jakamã hkÿnh nê hkôt ã kapêr o mõr anê. ³⁹ Hãmri nhũm Parijew nhõ xwÿnh kwÿjaja mẽ hkôt mra nê tee ri mẽ kuma hãmri nê Jejus mã kãm:

—Kwa Jejus. Mẽ kãm anê kê mẽ anhîkrê nà? Anê.

⁴⁰ Hãmri nhũm mẽ kãm:

—Tk. Nà kot paj mẽ kãm anhÿr kêt nê. ã mẽ kapêr anhÿrja na inhmã mar hprãm. Kwãr mẽ mãmrî Tirtũm mã mex o mex ã harênh o ixkôt mõ. Kot mẽ anhÿr kêt nhũm ra pikap kên nhîkwÿ xwÿnhja tee ri ja hã mẽ omu hãmri nê tãm tanhmã amnhî nhîpêx to nê mẽ hpãnhã tãm Tirtũm mã mex o mex ã harênh o hikwÿ. Jakamã kwãr mẽ mãmrî kapêr anê. Anê.

Jejus tee ri kot Jerujarê hkukamã hamaxpêr ã harênh

Rukre 23.27-31

⁴¹ Nhũm mẽ kormã Jerujarê hwÿr hpõx o mõ. Kormã hixêt rÿm ahpar mã hwÿr wÿr o mõ. Hãmri nhũm Jejus amÿm amnhî hkukamã Jerujarê nhõ xwÿnhjê pumunh o mõ nê mẽ hkukamã hamaxpêr o hkaprî nê. Hãmri nê hkaprî xaj mÿr o mõ. ⁴² Hãmri nê te kot mẽ kuri mẽ omunh o ri pa pê mẽ kãm kapêr pyrãk o mẽ kãm kapêr nê mẽ kãm:

—Hêxta waa nê Jerujarê nhõ xwÿnhjaja. Kot kaj mẽ amex kêt nê. Mẽ ate amnhî kukamã axãhpumunh mex ronhÿx ka mẽ ra mẽ kãm mẽ akurê xwÿnhjê pumaj ixkôt amnhî xunhwÿr kurê kumrêx nhũm mẽ tee ri tanhmã mẽ ato mã. Ka mẽ ra ixkukwak ri amex nê ajamakêtkati nê akÿnh nê ri apa ho apa. ⁴³ Tirtũm tãm kot mẽ awÿr inhmēnh tã ka mẽ amã ixprãm kêt nê. Jakamã koja nhÿrmã mẽ kãm mẽ akurê xwÿnhjaja mẽ awÿr mra nê mẽ anhõ krîm hipõk pa. Hãmri ka mẽ amnhî wÿr mẽ omu nê tee ri ajapõx kaxyw nhũm mẽ awÿr agjê nê mẽ anhîmex pa nê mẽ anhõ krîja grãnh pa. Nê ahpÿnhã ri mẽ anhõrkwy grãnh pa. ã koja mẽ mẽmoj piitã grãnh par anê. Anê.

Jejus kot Tirtũm nhõrkwy hwÿr àr ã harênh

Matêwre 21.12-17; Makre 11.15-19; Juãw 2.13-22

⁴⁵ Tã nhũm Jejus Jerujarê hwÿr axà nê jumênre rÿm wÿr hãmri nê ma Tirtũm mã amnhî jarênh xà hã ixkreja wÿr tẽ. Hãmri nê hwÿr axà nê tee ri kamã mẽ pa xwÿnhjê pumunh o xa. Nhũm mẽ ra axtem nê mõx nê õwêhti nê tuuti ho wēnê ho kuhê. Mẽ kot haprõr nê

Tirtüm mã hpar nê kãm òr pè kãm amnhĩ jarènh kaxyw mẽ kãm ho wênê ho kuhê. Nê axtem nê mẽ kãm hã ohtô rax kãm mẽ kãm ho wênê. Hãmri nhũm Jejus mẽ hwÿr axà nê tee ri mẽ omu mẽ kãm akir nê mẽ kãm:

—Tk. Kwa nà. Tirtüm kapër ã kagà htùm kot òrkwÿ jarènh kot:

Inhòrkwÿja ãm mẽ ate inhmã amnhĩ jarènh xà hã ixkre pix kaxyw na.

Anhÿr o kot harènh tã ka mẽ axtem nê kamã ã amnhĩ nhĩpèx anhÿr o apa. E mẽ ajapôj nê ma ajapèx tokyx anê.

Anhÿr o mẽ kãm kapër hãmri nê ixkre nê mẽ kator nhũm mẽ ma hapèx pa.

⁴⁷ Tã nhũm Jejus apkati mẽ Tirtüm mã amnhĩ jarènh xà hã ixkreja wÿr mra nê kamã mẽ ahkre ho hkrĩ. Hãmri nhũm mẽ ò patre krãhtùm mẽ Tirtüm kapër tùm o mẽ ahkre xwÿnhjê mẽ mẽ kot amnhĩ to rũnh xwÿnhja-ja kot mẽ ahkre ma nhũm ja mẽ kèp omnuj nê nhũm mẽ kãm hpĩr prãm nê. ⁴⁸ Nom nhũm amarĩ mẽ pa xwÿnhjaja mẽ kurom kãm mar prãm nê akryk mar o kuhê. Jakamã nhũm mẽ tee ri ja hã mẽ omu nê tanhmã mẽ kot hpĩr to hkukamã hã axpèn ma.

Mêhõ nhÿ hã Jejus kot mẽ ahkre hã harènh

Matêwre 21.23-27; Makre 11.27-33

20 Nhũm arĩgro hõ hã nhũm Jejus kê axte Tirtüm mã amnhĩ jarènh xà hã ixkreja wÿr axà nê mẽ ahkre ho nhÿ. Tanhmã mẽ kot amnhĩ nhĩpèx to nê nhÿrmã Tirtüm mẽ wa kuri htĩr tùm nê pa hã mẽ kãm kapër o nhÿ. Hãmri nhũm Ijaew nhõ pahijê mẽ mẽ kot Tirtüm kapër tùm o mẽ ahkre xwÿnhjê mẽ mẽ ò patre krãhtùmja hêx rom mar o kuhê. ² Hãmri nê kãm:

—Kwa mẽ inhmã amnhĩ jarê. Mêhõ nhÿ hã na ka hte ã amnhĩ nhĩpèx anhÿr o ri apa? Na ka hte akupÿm mẽ ho mex o apa nê tanhmã mẽ ahkre hto ho apa. Xà amnhĩ krã hkôt na ka hte ã amnhĩ nhĩpèx anê nà? Anê.

³ Hãmri nhũm mẽ kãm:

—Nà ixkumrèx kot paj mẽmoj tã mẽ akukja. Ka mẽ inhma nê inhmã harê pa rĩ kormã tanhmã mẽ amã amnhĩ jarènh to. ⁴ Finat Juãw Paxisja ã kot paj mẽ akukja. Mêhõ nhÿ hã na pre mẽ hkrã kumrãr o pa? Xà amnhĩ krã hkôt nà xà Tirtüm nhÿ hã? E mẽ atõ inhmã harê. Anê.

⁵ Hãmri nhũm mẽ kuma nê tee ri kot tanhmã kutã kãm harènh to hkukamã hamaxpèr nê axpèn mã:

—Kwa tanhmã kot puj mẽ kãm harènh to? Jar mẽ kot mar xwÿnhjaja na htem kèp Tirtüm nhÿ hã kapër jarènh o pa xwÿnh ã harènh o pa. Tã kot puj mẽ kãm kot amnhĩ krã hkôt mẽ hkrã kumrãr o pa hã harê nhũm mẽ tee ri mẽ pama nê mẽ pakamã gryk tÿx nê. Nê mẽ paxèx rom mẽ pahte kãm pakapèr ã mẽ pah-pumunh kurê kumrèx nê kèn o mẽ pahtak o mẽ pan-hĩmex. Nom kot puj mẽ kãm Tirtüm nhÿ hã mẽ hkrã kumrãr ã harê nhũm mẽ pamã kapèr o: “ã kot anhÿr kènã na ka prem kapèr ma nê ra ixkôt amnhĩ xunhwÿr kêt nê?” Anê. Nà kot puj mẽ kãm tanhmã harènh to

hkêt nê. Kot puj mẽ ãm kãm aa te mẽ pahte ja jarènh mar kêt pyrãk o harê. Anê.

Mẽ kot tanhmã kãm nê nhũm kot ta pãnhã tanhmã mẽ kãm nê pymaj nhũm mẽ ãm tee ri kãm tanhmã nê hprãm kaprÿ o kuhê.

⁷ Hãmri nê kãm:

—Konèn. Mẽ ixte mêhõ nhÿ hã kapèr o pa hã omunhre hã. Anê.

⁸ Hãmri nhũm mẽ kuma nê mẽ kãm:

—Tk. Tõe kot pa xep ijaxwÿja mẽ amã tanhmã amnhĩ jarènh to hkêt nê. Ijaxwÿja ixte mêhõ nhÿ hã ã ixte amnhĩ nhĩpèx anhÿr o ri ixpa hã amnhĩ pumunhre hã. Anê.

Mẽ àpènh punuj xwÿnhjê jarènh

Matêwre 21.33-46; Makre 12.1-12

⁹ Nhũm Jejus arĩ Ijaew nhõ pahijê mã kapèr. Nê mẽ kot tanhmã hipèx to hkukamã mẽ kãm tanhmã amnhĩ jarènh to. No ãm amnhĩ tã kuxi nê mẽ kãm awjarê nê mẽ kãm:

—Koja mêhõ hpur ã hkwyjê kot kamã kãm àpènh kaxyw mẽ kãm karõ. Hãmri nhũm mẽ ma hwÿr mra nê kamã mẽmo hy hkre nê hkre pa. Hãmri nhũm ra hpur nhõ dõnja nhÿhÿm nojarèt nê kãm mẽ àpènh xwÿnhjê mã tanhmã hpur jarènh to nê mẽ kãm: “E or ixpur nõ. Kê kamã mẽmoj hkà hpa ka mẽ mãmri kamã axu-jamÿnh pa nê ho axkjê. Nê ixkutèp inhõ jaxwÿ nê mãmri mẽ anhõ tanhmã ho hprãm xà hkôt tanhmã ho.” Anê.

—Nhũm ã mẽ kãm kapèr anê hãmri nê ma nhÿhÿm mõi.

¹⁰ —Tã nhũm ra hkà hpa. Nom nhũm hpur nhõ dõnja kormã krĩ hõ kamã ri hã ujahkre ho ri pa. Tã kuri kãm àpènh xwÿnhjê hõja nhũm akupÿm mẽ hwÿr kumê. Mẽ kot kãm kwÿ nhõr nhũm ma kot kãm o mõi kaxyw ma mẽ hwÿr kumê nhũm ma mẽ hwÿr mõi. Mõi nê mẽ hwÿr pøj nhũm mẽ omu nê axtem nê unê nê htak nê akupÿm hano nhũm ma akupÿm ÿ kamã mõi. ¹¹ Hãmri nê pøj nhũm ò patrãwja tee ri omu nê hpãnhã ja mẽ nhũm ma mẽ hwÿr mõi. Mõi nê mẽ hwÿr pøj nhũm kê wem mã ho anê nê unê nê htak nê akupÿm hano nhũm wamta pyrã nê ma akupÿm ÿ kamã mõi.

¹² —Hãmri nhũm kê axte hkôt ja mẽ nhũm ma mẽ hwÿr mãänèn mõi. Ma mẽ hwÿr mõi nê pøj nhũm mẽ te ho wamta wa hipèx pyrãk o hipèx nê unê nê htak rax nê amnhĩ nê hano nê pur nê kapôt ã kumê. Hãmri nhũm ma akupÿm mãänèn ÿ kamã mõi. ¹³ Nhũm mẽ ò patrãw tee ri mẽ omu nê hamaxpèr o: “Hêxta waa nê. Tanhmã kot paj amnhĩ nhĩpèx to? Nà kot paj mẽ hwÿr ixkra mãn mẽ. Inhmã hapè htã kot paj mẽ hwÿr kumê kê ma mẽ hwÿr mõi. Hãmri nhũm mẽ kèp ixkra hã omu nê tanhmã ixpè ho hkêt nê. Nê tã inhmã kãm inhõja kwÿ gõ.” Anhÿr o hamaxpèr hãmri nê ma mẽ hwÿr kumê nhũm ma mẽ hwÿr mõi.

¹⁴ —Tã ra mẽ hwÿr hpõx o mõi nhũm mẽ amÿm amnhĩ wÿr omu nê kèp hkra hã omu nê hã axpèn mã amÿnê nê axpèn mã: “E onêj hpur nhõ dõn krata tẽ. Koja nhÿrmã ò papaj mÿr pè amnhĩm pur ã pyka pyta

ně ho õ. Kwa pu mẽ hpír kurê kumrêx në kêp hpurja o panhõ. E tokyj pu mẽ kupí ri." Aně.

¹⁵ —Hămri nhũm tẽ në mẽ hwỳr pøj nhũm mẽ unê në pur në ho kato në ma o tẽ në kupí. Ā mẽ ujarênh kot anhỳr. Aně.

Nhũm pre Ā Jejus mẽ kãm ujarênh aně në hã tanhmã mẽ hkukjêr to në mẽ kãm:

—E koja hpur nhõ dõnja hkra jarênh ma hămri në tãm mẽ hwỳr mõ në tanhmã mẽ hipêx to wehe? ¹⁶ Koja ma mẽ hwỳr mõ hămri në mẽ himex pa. Hămri në hpãnhã hpur Ā nhãm mẽmojjê rẽ nhũm mẽ tã kãm hamãr mex o pa. Aně.

Nhũm pre Ā Jejus mẽ kãm ujarênh aně hămri nhũm mẽ kot mar xwỳnhhtaja ujarênh kamã amnhĩ jarênh mar kurê kumrêx. Mẽ kot Tirtũm kot mẽ hwỳr rênh xwỳnhjê kapêr mar kêt nhũm myrapê mẽ kãm mẽ hkurê xwỳnhhaja kot mẽ kêt mẽ õ pika pytãr në mẽ himex par Ā amnhĩ jarênh ma nhũm ja mẽ kêt omnuj tỳx në. Hămri në hêx rom Jejus mã kãm:

—Tk. Kwa nã nhỳx pre kêt pur nhõ dõnja Ā mẽ hipêx anhỳr kêt në. Aně.

¹⁷ Hămri nhũm mẽ kuma në mẽ omunh o xa. Nẽ mẽ omunh pê mẽ no kagãr mã mẽ kãm kapêr në mẽ kãm:

—Nã Ā mẽ hipêx anhỳr mã mẽ tãm kênã. Mãn ka prem ra Tirtũm kapêr Ā kagã htũm kot ja jarênh ma. Harênh kot:

Mẽ kot kên o amnhĩm õrkwỳ nhĩpêx kaxyw në kên maati pumu në htỳx omnuj Ā hkamnhĩx në hkaga.

Mẽ kot hkaga htã Tirtũm mẽ kurom mex o kot kên pi-itã hakrenh par Ā omunh kurê kumrêx. Aně.

Ā Tirtũm kapêr Ā kagã htũm kot mẽ ajarênh te mẽ kot kên maati punuj Ā hkamnhĩx në hkaga xwỳnhjê jarênh pyrãk o Ā mẽ ajarênh kot anhỳr. Aně.

¹⁸ Nhũm pre Ā Jejus mẽ kãm te kêt kên maati pyrãk o mẽ kãm amnhĩ jarênh aně. Hămri në axte amnhĩ tã kuxi në mẽ kãm axte kên jarênhhta pyrãk në mẽ kãm:

—Nã kot kaj mẽ atõ ixkaga hămri në te mẽhõ htỳx htẽm në kên pumunh kêt në hã htêk në tẽm pyrãk o amnhĩ nhĩpêx. Jao ixkutã amnhĩ xãm. Rỳ ka tanhmã amnhĩ to në ixkaga nhũm te kên maati hõ htẽm në kot anhĩpy htẽm në axõm par pyrãk o anhĩpêx ka amex kêt në. Aně.

¹⁹ Nhũm pre Ā Jejus mẽ kãm ujarênh kãm mẽ harênh aně. Hămri nhũm Tirtũm kapêr tũm o mẽ ahkre xwỳnhjê mẽ mẽ õ patre krãhtũmjaja kot mẽ kãm kên jarênh o te mẽ tãm harênh pyrãkja ma nhũm ja mẽ kêt omnuj tỳx në. Jakamã nhũm mẽ kãm Jejus pynênh në haxãr prãm në. Nom amnhĩ tã kãm mẽ kot mar o kuhê xwỳnhjê puma në.

Mẽ kot hêx rom Jejus kukjêr Ā mẽ harênh

Matêwre 22.15-22; Makre 12.13-17; mãänênh Rõmãn 12.1, 13.6-7

²⁰ Hămri nhũm Tirtũm kapêr tũm o mẽ ahkre xwỳnhjê mẽ mẽ õ patre krãhtũmjaja Jejus tãnopxar o kuhê. Hămri në ra amnhĩ wỳr mẽmy hkwy hã karõ në mẽ kãm:

—E. Mẽ ma Jejus wỳr mra në te mẽ ate hkõt amnhĩ xunhwỳr kaxyw pyrãk o amnhĩ nhĩpêx në mẽmojjê tã ri

hkukja. Mẽmojjê tã hkukjêr rax në. Kêr kê Rõm nhõ pahi Sesti kapêr kwỳm ri tanhmã mẽ amã kapêr to ka mẽ ama në man akupỳn mra në mẽ inhmã harênh kurê kumrêx. Pa mẽ ama në ma hwỳr mra në hã unê në ma Sesti nhỹ hã mẽ pahto amnhĩptãr xwỳnhhta wỳr o tẽ në ãhkram haxã. Aně.

²¹ Hămri nhũm mẽ kuma në mẽ kãm:

—Tõe. Nã kot paj mẽ aně. Aně.

Hămri në ma hwỳr mra në hêx rom kãm kapêr në kãm:

—Pa Jejus? Nã ãm hămri na ka hte Tirtũm kapêr o mẽ ahkre mex o ri apa. Na ka hte mẽ kamã akahak kêt në. Nẽ mẽ kot tee ri tanhmã ato kapêr punuj to htã ka aprĩ hã mẽ ahkre mex o ri apa. ²² Kwa mẽ inhmã mẽmojjê jarê. Rõm nhõ pahihti kot mẽ pahte kãm kãxpore hkwy nhõr Ā mẽ pahpê Ijaew mã karõta. Kwa xã we ja amã mex nã? Xã kot pu mẽ kãm kugõ nã xã kot pu mẽ kãm õr kêt në? E kwa mẽ inhmã tanhmã harênh to. Aně.

²³ Nhũm prem Ā hêx rom kãm kapêr anhỳr tã nhũm ra mẽ hamaxpêr Ā mẽ omu në mẽ kãm:

²⁴ —E mẽ atõ anhõ kãxpore htỳxre japêr në inhmã hõ gõ pa omu. Aně.

Hămri nhũm mẽ kãm ja gõ nhũm kupy në omu në kãnhmã mẽ kãm kupê në mẽ kãm:

—E mẽhõ nhĩxi në mẽhõ karõ na ja hã? Aně.

Hămri nhũm mẽ kãm:

—Pahi Sesti karõ në hixi na hã kênã. Aně.

²⁵ Hămri nhũm mẽ kuma në mẽ kãm:

—Tỳ. Tõ kêr ka mẽ mãmrĩ kãm hkwy nhõr o apa. Hã hkarõ në hã hixi. Tãm kot hipêx xwỳnh jakamã õ na. No mẽ kajaja na pre Tirtũm mẽ anhĩpêx nhũm mẽ apê õ jakamã kwa kêr ka mẽ kapêr kõt pix mã ri amnhĩ nhĩpêx o ri apa. Aně.

²⁶ Nhũm pre Ā Jejus mẽ kãm kapêr aně nhũm mẽ pi-itã mar o kuhê. Nhũm mẽ kot hêx rom kãm kapêr mã xwỳnhhaja amnhĩ jaêr pê Ā kot kãxpore jarênh anhỳrja ma. Hămri në tee ri axte mẽmojjê tã hkukjêr nhũm kot pahi Sesti kwỳm ri kot tanhmã harênh to kaxyw ãm tee ri tanhmã hkukjêr to kaprỳ. Hămri në axte tanhmã kãm në hkêt në ãm akryk omunh pê mar o kuhê.

Akupỳm mẽ htĩr jarênh

Matêwre 22.23-33; Makre 12.18-27; Juãw 5.21, 6.39; mãänênh Wam Korĩt 6.14, 15.12-28; Wam Tesarõn 4.13-18; Apokarip 20.4

²⁷ Tã nhũm Satusew nhõ xwỳnh kwỳjjaja. Mẽ kot akupỳm mẽ htĩr mã hamaxpêr kêt jakamã mẽ htyk në mẽ hapêx Ā mẽ hkamnhĩx. Jakamã na prem tanhmã axpên mã Jejus jarênh to në axpên mã:

—E kwa pu mẽ ma hwỳr mra në mẽmojjê xihtỳx Ā hkukja kê mẽ pama në tee ri tanhmã mẽ pamã harênh to hkukamã hamaxpêr. Hămri nhũm mẽ piitã ja hã omu në ãhpumunh tỳx kêt Ā omunh kurê kumrêx. E ma pu mẽ hwỳr.

Aně në ma hwỳr mra në Parijew nhõ xwỳnhjê pyrãk në hêx rom ahkukja në kãm:

²⁸ —Pa Jejus? Kwa mẽ inhmã mẽmojjê jarê. Na pre fi-nat Mojesja Tirtũm nhỹ hã mẽ panhĩgêt mã Ā karõ

anë. Më hkra hkêt rãhã më pa nê më htyk xwÿnhjaja nhÿm më harënh o:

Koja mëhõ hprõ nê kormã kamã hkra hkêt rãhã pa nê ty. Hã koja hkõt htõja hpãnhã hprõta o hprõ nê kamã hkra. Hãmri nhÿm kato nê te kêp htõ htyk xwÿnhhta hkra pyrãk. Anë.

Na pre ã Mojes më kãm karõ anë. ²⁹ Jakamã kwa ga më ixujarënh ma. Koja më kot xapën to htõ xwÿnhjaja kêp 7. Nhÿm kot waja mëhõ ho hprõ nê wa pa nhÿm kamã hkra hkêt rãhã ty. Nhÿm hkõt htõ hõta hpãnhã hprõ ho hprõ ³⁰ nê wa xapën to pa. Nhÿm mãänën ty. Kamã hkra hkêt rãhã ty.

³¹ —Nhÿm htõ hõta. Haxwÿja hpãnhã tãm o hprõ nê wa xapën to pa grire nhÿm haxwÿja kamã hkra hkêt rãhã ty. Hãmri nhÿm htõ hkwyjaja piitã nija pyxi nê xapën pãnhã ho hprõ hpa. No ãm mëhõ kamã hkra hkêt rãhã ra htyk pa. ³² Hãmri nhÿm më hprõta më hkõt amnhÿ to hapu nê ty. ³³ Tã Tirtÿm kot akupÿm nhÿrmã më ho htÿr ronhÿx nhÿ nhÿx kêp nija mjên kumrëx? Ra piitã kot ho hprõ kênã. E më inhmã ja jarë. Anë.

³⁴ Hãmri nhÿm Jejus më kãm:

—Nà kaxkwa kamã më kot amnhÿ nhÿpëxja axtem na. Pika ja kamã na htem pa nê àptàr nhÿm më xapën mã më kure. Ja mex. ³⁵ No më kot Tirtÿm kõt amnhÿ xunhwÿr xwÿnhjaja na htem ty hãmri nê Tirtÿm nhõ krÿ kamã kuri axte kãm hprõ hprãm kêt nê ri pa. Rÿ ni japêr nê kãm mjên prãm kêt nê ri pa. ³⁶ Hãmri nê Tirtÿm kapêr o më wrÿk xwÿnhjê pyrã nê axte htyk kêt nê. ãm htÿr tÿm rãhã nê pa ho pa. Tirtÿm ra akupÿm kot më ho htÿr jakamã koja më kêp hkra nê kuri htÿr tÿm nê mex nê pa ho pa nê axte kãm hprõ rÿ mjên prãm kêt nê ri pa.

³⁷ —Nom më ate akupÿm më htÿr mã ajamaxpêr kêt ã harënhja kot paj më amã harë. Amnepêm na pre Tirtÿmja pÿ hpõk kamã Mojes mã kapêr nê kãm:

Ixpê Apraãw nhõ Tirtÿm na pa. Nê mãänën ixpê Apraãw kra Ijak më htãmnhwÿ jako wa õ Tirtÿm na pa. Anhÿr o Mojes mã amnhÿ jarë nhÿm kuma nê mã kagã.

³⁸ Kêp apu arÿ më htyk rãhã nhÿx pre ã më harënh anhÿr kêt nê. Nhÿx pre më harënh o: “Amnepêm Apraãw nê hkra nê htãmnhwÿ më htÿr ri ixpê më õ Tirtÿm na pa pre.” Anhÿr o nhÿx pre më harë. Nom na pre ã amnhÿ jarënh anhÿr kêt nê. Më pamã te Apraãwja më htyk nê më hapêx pyrãk. Nom nhÿm prem ra Tirtÿm ri akupÿm htÿr nê mex nê pa ho pa. Tã ka htem Tirtÿm kapêr kwÿm ri akupÿm më htÿr kêt ã më harënh o apa. Anë.

³⁹ Nhÿm pre ã Jejus më kãm kapêr anë. Hãmri nhÿm Tirtÿm kapêr tÿm o më ahkre ho më pa xwÿnh kwÿjaja kuma nê tee ri axte tanhmã kãm nê hprãm kaprÿ nê kãm:

—Tÿ. Nã ãm hãmri na ka ã ja jarënh anë. Anë.

⁴⁰ Hãmri nhÿm më axte mëmoj tã hkukjêr kêt nê. Tanhmã kot wem amnhÿ to nê hamaxpêr o hakre? Na prem ãm tee ri kãm hamaxpêr o hakrenh prãm kaprÿ ho kuhê. Jejus kot mëmoj piitã hkukamã àhpumunh tÿx o àhpumunh tÿx.

Jejus kêp pahi finat Tawi nhõ Pahihti hã kot amnhÿ jarënh

Matêwre 22.41-46; Makre 12.35-37; mãänën Römãn 1.3-4

⁴¹ Tã nhÿm Jejus kãnhmã xa nê amnhÿ tã tanhmã më kot mar o kuhê xwÿnhjê hkukjêr to. Nom te nhãm mëhõ hã më hkukjêr pyrã nê më kãm:

—E kwa më inhmã mëmoj jarë. Tirtÿm kot më akaxyw ãm mã xwÿnhhta ã na pa më akukja. Mo na htem xapën mã kêp finat pahi Tawi kanrêhã htãmnhwÿ pix ã harë nê mãänën kêp õ pahihti hã harënh kêt nê? ⁴² Na pre Tawi Tirtÿm kapêr kwÿ hã kagã nê tanhmã harënh to. Tirtÿm mex ã më grer xàja kwÿ kamã harë nê mã kagã nê mã kagã ho:

Na pre Tirtÿm inhõ Pahihti mã ã kapêr anë nê kãm: “E amnê ixwÿr tã nê inhÿkõ hã nhÿ nê inhmã më ho amnhÿptàr o akrÿ.

⁴³ Kot paj më kot kãm akurê xwÿnh piitã më unên pa nê awÿr më o mra nê anhÿhkram më haxàr pa.” Anhÿr o pre kãm kapêr. Anë.

⁴⁴ Na pre ã Tawija Tirtÿm kot Kris mã kapêr jarënh anë. Më kajaja na ka htem ãm kêp Tawi kanrêhã tãmnhwÿ pix ã ri xapën mã harënh o ri apa. No kêt Tawi na pre kêp õ Pahihti hã harënh o pa. Anë.

Jejus kot tanhmã Tirtÿm kapêr tÿm o më ahkre xwÿnhjê jarënh to

Matêwre 23.1-12; Makre 12.38-40

⁴⁵ Nhÿm pre ã Jejus më kãm kapêr anë nhÿm më piitã mar o kuhê. Hãmri nhÿm hpãnhã hkõt më pa ho më pa xwÿnhjê mã kapêr nê më kãm:

—Kwa më o kora. Kêr ka më Tirtÿm kapêr tÿm o më ahkre xwÿnhjê kot amnhÿ nhÿpêx o amnhÿ nhÿpêx kêt nê. ãm më omu nê ãm më omu nê më kot amnhÿ nhÿpêx kêt amnhÿ nhÿpêx o ri apa hkêt nê. ⁴⁶ Na htem më piitã më kot më mã hpÿjaãm kaxyw më ê mex pix kãm ri pa. Nê më kãm më piitã më kot amnhÿm më rÿnh xwÿnh ã më harënh o më paja na më kãm hprãm. Nê më panhõ Tirtÿm kapêr o më ahkre xà mã ixkre kamã më kãm amnhÿ to rÿnh xwÿnhjê hkrÿ xà mex pix ã na mã kãm më hkrÿ hprãm. Nê mëmoj tã më hkÿnh ã arÿgro mã nhÿm htem më apkur xà mã ixkre hwÿr akuprõ nê më kãm më kot amnhÿ to rÿnh xwÿnhjê hkrÿ xà mex pix ã më kãm më hkrÿ hprãm. ã na htem amnhÿ nhÿpêx anhÿr o pa.

⁴⁷ —Nê më kêp më mjên htyk xwÿnhjê ho ajuta ho pa mã amnhÿ jarënh tã ãm amnhÿ to hêx nê axtem nê më nokupyr pè më kêp më hikukrêx piitã ho hapêx par o pa. Nê më kêp më örkwÿ pytà. Nê më hêx rom te tãm më kot amnhÿ nhÿpêx pyrã nê Tirtÿm mã amnhÿ jarënh japjêe ho kuhê. Mÿrapê koja mã mex kêt nê. Koja Tirtÿm tanhmã ja mã hipêx to rax nê. Jakamã kwa kêr ka mã ã më kot amnhÿ nhÿpêx anhÿr xwÿnhjê hkõt amnhÿ nhÿpêx o apa hkêt nê. ãm kwarÿ ho kwarÿ. Anë.

Kêp mjên htyk xwÿnh jarênh

Makre 12.41-44

21 Nhũm Jejus kormã Tirtũm mã amnhĩ jarênh xà hã ixkre kamã mẽ omunh o xa. Na pre hte Ijaew piitã ixkreta ho mex kaxyw kãm mẽ hikàxpore hkwÿ nhõr o pa. Jakamã nhũm mẽ hikàxpore rũnh xwÿnhjaja hwÿr agjê nê kamã kàxpore gjênh xà kamã hkwÿ gjê nê ma akupÿm mra. ²Jakamã nhũm mẽhõ ni pê mjên htyk xwÿnh haxwÿja hwÿr axà. Kêp amrakati kumrêx nê hikàxpore tÿxre ãm axkrutre htã mẽ hpãnhã hwÿr axà. Nê kãm Tirtũm kĩnh xàj hamê kamã kuxà hãmri nê kato nê ma akupÿm tẽ. ³Hãmri nhũm Jejus arĩ omunh o xa. Kot ã amnhĩ nhĩpêx anhÿr ã omunh o xa nhũm ja kãm mex nê. Hãmri nê hkõt mẽ pa ho pa xwÿnhjê mã harê nê mẽ kãm:

—E mãn ka mênire htẽm mũj pumu. Kêp amrakati nê hikàxpore ãm kêp grire htã amnhĩ pê õr pa. Kwÿjê rom kãm Tirtũm kĩnh xàj amnhĩ pê õr par kumrêx. Apkur xà hã hikàxpore na. Mẽ hkwÿjaja na htem hikàxpore hkwÿ ho mra nê kugjê nom arĩ mẽ hikàxpore rax. No nhũm nire nêj mẽ kurom kãm hikàxpore japê hkêt nê. Nê ho õxÿ hkêt nê àmnhĩx piitã Tirtũm mã õr pa. Anê.

Mẽ kot amnhĩ tomnuj xwÿnhjê hkukamã mẽ harênh

Matêwre 24.1-2; Makre 13.1-2

⁵Tã hãmri nhũm Jejus kõt mẽ pa ho mẽ pa xwÿnhjaja kormã Tirtũm mã amnhĩ jarênh xà hã ixkre kaxwÿnh pumunh o kuhê nê axpên mã harê nê axpên mã harênh o:

—Hêxta waa nê. Ixkreja mex kumrêx. Kên rũnh o mẽ kot hipêx jakamã mex o mex. Nê mẽ kot ri Tirtũm mã hkĩnh xà nhõr nêj haxwÿja piitã mex. Anê.

Hãmri nhũm Jejus mẽ kuma nê mẽ kãm:

⁶—Nà mex tã koja nhÿrmã mẽ kãm Tirtũm kurê xwÿnhjaja grãnh pa. Koja arĩ kên õ axkrutre nê axpên mÿnh nê nõr kêt nê. Koja piitã anhgrã nê ahpÿnhã ri hikwÿ. Anê.

⁷Nhũm pre ã mẽ kot hipêx anhÿrja kukamã mẽ kãm mẽ harênh anê nhũm mẽ tee ri hkukamã hamaxpêr nê kãm:

—Kwa xà koja mẽ ã hipêx anê? Kwa mẽ inhmã aprĩ hã mẽ kot ixkre grãnh parta jarê. Xà koja mẽ tokyx ho anê nà xà kormã? Kwa mẽmo koja wÿj ri tanhmã amnhĩ nhĩpêx to? Anê.

⁸Hãmri nhũm mẽ kãm:

—Nà nhÿrmã mẽmoj piitã hapêx kaxyw tanhmã amnhĩ nhĩpêx to kumrêx kot paj mẽ amã harê ka mẽ inhma. Koja mẽ ohtô nê mẽ apê ixkrajê hwÿr mra nê hêx rom te pa ixte amnhĩ nhĩpêx pyrãk o amnhĩ nhĩpêx o pa. Nê tanhmã mẽ amã amnhĩ jarênh to nê amnhĩ jarênh o: “E mẽ ixpumu. Pa na pre Tirtũm mẽ awÿr inhmẽ. Ixpê kaxkwa rũm ixwÿrÿk xwÿnh na pa.” Anhÿr o mẽ akõt mẽ amã amnhĩ to hêx o pa. Hãmri nê mẽ amã: “E ot pa ra mẽ ato amnhĩptar kaxyw mẽ awÿr wrÿ.” Anhÿr o amnhĩ jarênh o mẽ akõt pa. Nom kêr ka mẽ ãm mẽ ama nê ãm mẽ ama. ãm mẽ kot mẽ amã

amnhĩ to hêx o pa kênã. Kormã akupÿn ixpôx xà hã arĩgrota kormã.

⁹—Nê koja mẽ nhÿri awry hã axpên par o pa. Nê mẽ atãã axpên par o pa. Nom kêr ka mẽ harênh ma nê ri tee ri tokyx mẽmoj piitã hapêx kukamã ajamaxpêr kêt nê. Mẽmoj piitã hapêx xà hã arĩgrota kormã.

¹⁰Koja mẽmoj piitã hapêx kaxyw nhũm ahpÿnhã ri pika piitã hkõt mẽ pa xwÿnhjaja axpên kutã amnhĩ xunhwÿ nê pijapu nê axpên pa.

¹¹Nê koja pika piitã hkõt tanhmã ahpÿnhã mẽ à kute mẽ hamÿ nhũm mẽ amnhĩ xà htÿx kamã hamak o pa. Nê koja pikaja tertet tÿx nê.

Nê koja mẽ nhÿri pika hkwÿ kamã prãm xàj hpikaprãr pa.

Nê koja kaxkwa kamã mẽmoj tanhmã amnhĩ anhĩpêx to nhũm pika nhõ xwÿnhjaja tee ri omu nê kãm ma htÿx kumrêx nê httert o kuhê.

Koja mẽmoj ã amnhĩ nhĩpêx anê pa rĩ kormã akupÿn mẽ awÿr wrÿ nhũm mẽmoj piitã hapêx pa. Koja mẽmoj ã amnhĩ nhĩpêx anê.

¹²—E Tirtũm mã amnhĩ jarênh xà hã ixkre grãnh par xwÿj ri mẽmoj tanhmã hkukamã kot amnhĩ nhĩpêx to hã mẽ ate ixkukjêr xwÿnhhta kot paj hpãnhã mẽ amã harê ka mẽ inhma. Koja mẽ kãm ixkurê xwÿnhjaja mẽ awÿr mra nê ixtã mẽ apynê nê tanhmã ixtã mẽ anhĩpêx to. Nê ma mẽ pikuprõnh xà hã ixkreja wÿr mẽ ato mra nê kamã mẽ kãm tanhmã mẽ ato kapêr punuj to. Nhũm mẽ kuma hãmri nê ma mẽ ato mra nê mẽ ajagjê. Mẽ ate ixkõt apa ho apa jakamã koja mẽ ã mẽ anhĩpêx anê. Nê mẽ õ pahiti hwÿr mẽ ato mra nê mẽ kãm tanhmã mẽ ato kapêr punuj to. ¹³Tã kêr ka mẽ kutã akrĩ nê axãmnhĩx mãmrĩ tanhmã mẽ kãm ijarênh to ho akrĩ.

¹⁴—Nom kwa kêr ka mẽ kãm tanhmã amnhĩ jarênh to hkukamã tee ri ajamaxpêr o ri mẽ amã mẽ uma hkêt nê. Rÿ mẽ ajamaxpêr o: “Hêxta waa nê. Tanhmã koja we mẽ kot ixkukjêr ã arĩgrota ã pa we ri mẽ kãm ixkapêr to?” Anhÿr o tee ri amnhĩ kukamã ajamaxpêr kêt nê. ãm amnhĩ kaxyw inhmã pix mã ajamaxpêr tÿx rãhã nê. ¹⁵Tanhmã mẽ kot mẽ anhĩpêx to hã arĩgrota ã kot paj tanhmã mẽ akrã hto ka mẽ inhÿ hã tanhmã mẽ kãm amnhĩ jarênh to. Hãmri nhũm mẽ amnhĩ tã mẽ ama nê axte tanhmã mẽ ato kapêr to hkukamã tee ri hamaxpêr o kuhê.

¹⁶—Nê koja mẽ anhĩpêxã nê mẽ akatorxã nê mẽ atõ nê mẽ akrãmnhwÿjaja. Nê kaxyw krĩ hkõt mẽ akwÿjaja ixtã mẽ atã amÿnê nê ma mẽ õ pahi hwÿr mẽ ato mra nhũm mẽ ajagjê nê mẽ akwÿjê pa. ¹⁷Koja mẽ piitã ixtã mẽ akamã gryk nê kãm mẽ akurê nê. ¹⁸Nom mẽ kot ã mẽ anhĩpêx anhÿr mã tã kêr ka mẽ amnhĩ to htÿx nê ixkaga hkêt nê. Mẽ kot mẽ apar tã ka mẽ kaxkwa kamã akupÿm atĩr kurê kumrêx. Hãmri nê ã mẽ kot mẽ anhĩpêx anhÿr xwÿnhjê rom Tirtũm mẽ wa ixri atĩr tũm nê amex rãhã apa ho apa. Mẽ kot tanhmã mẽ ato htã mẽ ate kaxkwa kamã atĩr tũm nê apa mã xwÿnh jakamã kwa kêr ka mẽ tee ri amnhĩ kukamã ajamaxpêr o ri apa hkêt nê.

²⁰ —Koja nhÿrmã nhÿhÿnh pôristi ohtô nê mra nê Jerujarê hwÿr pôj hãmri nê mē kãm hipôk pa nê kuhê. Ka mē ja hã mē omu nê mē kot krÿja grãnh par mã aja-maxpêr kurê kumrêx. ²¹ Kojã mē ã amnhÿ nhÿpêx anê ka mē amÿm amnhÿ wÿr mē omu hãmri nê ajapôj nê ma aprôt nê amrar kurê kumrêx. Mē apê jar pika pê Jutej kamã mē apa xwÿnhjaja ka mē omu nê mē kot mē apar pymaj ma aprôt nê amrar kurê kumrêx. Hixêt prêk wÿr ajapôj nê aprôt nê ma mra.

—Nê kê Jerujarê nhô xwÿnhjaja mē umaj haxwÿja hapôj nê ma hprôt nê ma mra o mra.

—Nê jar kapôt ã ri mē pa xwÿnhjaja kê mē akupÿm krÿ hwÿr gjêx kêt nê. Æm ma mē umaj hprôt nê mra kurê kumrêx.

²² —Mê kot amnhÿ tomnuj mÿrapê kojã Tÿrtÿm ã mē hwÿr mē kãm mē hkurê xwÿnhjê rênh anê. Kapêr ã kagã htÿm ra kot mē hkukamã ja jarênh kot anhÿr. Jakamã kojã mē nhÿrmã mē hkukamã mē harênh xãja kôt ã mē hipêx anê.

²³ —No mē htujarô xwÿnhjaja nê mē hkra karêre xwÿnhjaja kojã mē kêp mēmoj omnuj tÿx nê. Tanhmã kot mē amnhÿ to nê hprôt tÿx? Nã pika ja kamã kojã mē piitã mex kêt nê. Mē kot amnhÿ tomnuj mÿrapê kojã Tÿrtÿm ã mē hipêx anê. ²⁴ Kojã mē nhÿhÿnh krÿ hõ rÿm mē hwÿr mra nê mē unê nê mē hkamnhwÿr o mē kupa. Nê mē hkwyjê pynê nê ma nhÿhÿm ahpÿnhã mē ô pika hwÿr amnhÿ kôt mē o pa nhÿm mē kamã mē hkôt pa ho pa. Kojã mē kêp Ijaew kêt xwÿnhjaja Jerujarê o amnhÿptã nê ã mē hipêx anê. Nê kamã pa ho pa rãhã nhÿm Tÿrtÿm nhÿrmã akupÿm nê mē kator pa. Tã kojã mē nê mē kator parja o pa ra akupÿn mē awÿr inhnojarê. Anê.

Nhÿm pre ã Jesus mē kãm mē kot Jerujarê grãnh par xwÿnhjê hkukamã harênh anê.

akupÿn Jesus wrÿk xwÿj ri mēmoj kot tanhmã amnhÿ nhÿpêx to

Matêwre 24.29-35; Makre 13.24-31; mãänênh Sikÿn Pêtre 3.10; Apokarip 1.7

²⁵ Nhÿm Jesus arÿ hkôt mē pa ho pa xwÿnhjê mã kapêr nê mē kãm:

—Nê kot paj nhÿrmã akupÿn mē awÿr inhnojarê nhÿm kaxkwa kamã kanhêti nê myyti nê mytwÿre axtem tanhmã ri amnhÿ nhÿpêx to. Nhÿm gô xujanãr haxwÿja hkoko htÿx jao xapên tak tÿx nê. Hãmri nhÿm pika piitã hkôt mē pa xwÿnhjaja kuma nê omu nê nê kãm ma htÿx nê mur nê httert nê tee ri amnhÿ kukamã hamaxpêr.

²⁶ —Nê kojã Tÿrtÿm tanhmã kaxkwa ho àk to nhÿm kanhêti piitã pikarê pa. Hãmri nhÿm pika hkôt ri mē pa xwÿnhjaja omu nê tee ri amnhÿ kukamã hamaxpêr o amnhÿ japrãr pa nê hikwÿ. ²⁷ Kojã ã mēmoj amnhÿ nhÿpêx anê ka mē ja hã omu nê akupÿn mē awÿr inhnojarê mã ajamaxpêr kurê kumrêx. Hãmri nê mē kot ixkôt amnhÿ xunhwÿr kêt xwÿnhjê rom akÿnh kãm ijapêr arÿt o akuhê.

—Nã kot paj akupÿn mē awÿr wrÿ. Kakrã kamã hirã htÿx kãm akupÿn ixihtÿx kãm mē awÿr wrÿ. Hãmri ka

mê apiitã pika piitã hkôt ano ho ixpumu. Kot paj ã ixwrÿk anê hãmri nê mēmoj punuj piitã pê mē apytãr pa. Jakamã ka mē ã mēmoj kot amnhÿ nhÿpêx anhÿrja ã omu hãmri nê tokyx ixkôt axãpirtã mã ajamaxpêr nê akÿnh tÿx nê. Anê.

²⁹ —E ga mē pÿ hpãr mÿj pumu. ³⁰ Na hte mēmo mytwÿrÿ hã rã nhÿm mē omu nê ô hkukamã hamaxpêr. ³¹ Ja pyrã nê kojã ã mēmoj amnhÿ nhÿpêx par anhÿr mē ka mē omu nê akupÿn mē awÿr ixwrÿkja mã ajamaxpêr kurê kumrêx. ³² Kojã akupÿn ixpôx kêt ri mē kot ã mēmoj kot amnhÿ nhÿpêx anhÿr pumunh xwÿnhjaja kormã piitã htyk kêt ri pa ra akupÿn wrÿ.

³³ —Nê kojã nhÿrmã pika nê kaxkwa wa hapêx pa. Tã no ãm ixkapêr kojã wa urãk nê aa hapêx kêt nê. Kojã ãm rãhã ho rãhã. Kot paj aa ihkjê ho tanhmã mênh to hkêt nê.

³⁴ —Nê kwa mē o kora. Mē axkãm ajamak rom. Mē kot ixkôt amnhÿ xunhwÿr kêt xwÿnhjaja na htem kãm tanhmã amnhÿ nhÿpêx to hprãm xã hkôt pix mã tanhmã amnhÿ nhÿpêx to ho ri pa. Jao ãm amnhÿ xãp-kur xã nê amnhÿ to mex xã nê kãxpore pix kukamã hamaxpêr o pa. Nê htÿx ri tanhmã amnhÿ tomnuj to ho pa. Nê pipãnh kãm tanhmã amnhÿ to ho pa. Tã kojã mē ã amnhÿ nhÿpêx anhÿr o pa rãhã pa ra mē haêr pê akupÿn wrÿ nhÿm mē tee ri ixpumu nê kãm ma htÿx kumrêx. Te tutre htÿx ri harôj kajyr o pa nê rapuuti hwÿr àr nhÿm kot haê nê unênh nhÿm tee kãm kator prãm pyrãk. Kojã mē ã amnhÿ nhÿpêx anê. Nom kêr ka mē ho mē urãk kêt nê. Æm pa inhmã hprãm xã hkôt pix mã tanhmã inhmã amnhÿ nhÿpêx to rãhã ho ri apa.

³⁶ —Tã kêr ka mē ã mē kot amnhÿ tomnuj o pa anhÿrja kôt amnhÿ nhÿpêx o apa pymaj amnhÿ to Tÿrtÿm wÿr rãhã ho apa. Kê tanhmã mē ato hihtÿx to ka mē ÿ hã ho mē urãk kêt nê. Kêr pa nhÿrmã akupÿn wrÿ ka mē ixpumu nê mē kurom amnhÿ kamã akahak kêt nê akÿnh tÿx nê man ixwÿr mra. Anê.

Nhÿm pre ã Jesus hkôt mē pa ho mē pa xwÿnhjê jahkre anê.

³⁷ Hãmri nê apkati mē Tÿrtÿm mã amnhÿ jarênh xã hã ixkre kamã mē pikuprônh xwÿnhjê jahkre ho hkrÿ. Nhÿm kamãt nhÿm hkôt mē pa ho mē pa xwÿnhjê mē mē krÿ rÿm hapôj nê ma hixêt prêk pê Oriwêhti hwÿr mra nê kamã amnhÿm hikra nê hikwÿ. ³⁸ Nhÿm kwÿhtã nhÿm mē kãnhmã hkrÿ nê ma akupÿm krÿm mra nê ixkreja wÿr agjê. Hãmri nhÿm mē piitã hã akuprô nê kot mē ahkre hã mar o hkrÿ.

Mê kot Jesus ã ãmnênh ã mē harênh

Matêwre 26.14-16; Makre 14.1-2; Juãw 11.47-57

22 Tã nhÿm Ijaew kÿnhã arÿgro pê Pasja àhtêp o mō. Pas ã na htem amnepênh Tÿrtÿm kot pika pê Ejit pê mē hpãmjê kator mã hamaxpêr kaxyw xapên wÿr akuprô nê hã hkÿnh. Na htem arÿgroja jarênh o: “Pas” anhÿr ã harê. Nê mãänênh harênh o: “Mê pahte pãw kaxkrit kêt kur ã arÿgro.” Anhÿr o harê. ² Jakamã nhÿm mē ô patre krãhtÿmjê mē Tÿrtÿm kapêr tÿm o mē ahkre xwÿnhjaja ra kãm Jesus pÿr prãm nê. No mē

kām hkôt mẽ kot kapër mar xwýnhjê pýma nê. Nê tee ri kot tanhmã ho hkukamã hamaxpër nê axpën mã:

—Hêxta waa nê. Kwa tanhmã kot puj wem ho nê mẽ kêp kupî? Kot puj mẽ noo mã tanhmã ho nhũm mẽ hã mẽ pakamã gryk tỳx kumrêx. Anê.

Jut Kariot kot Jejus ã àmnênh ã harênh

Matêwre 26.14-16; Makre 14.10-11; Juãw 13.21-30

³ Tã nhũm Jut Kariotja. Jejus nhỹ hã mẽ ahkre ho pa xwýnh pê 12 hõ na pre. Tã axtem nê tanhmã hamaxpër to nê Satanasti nhỹ hã ma mẽ õ patre krãhtũm mẽ Tirtũm mã amnhĩ jarênh xà hã ixkre jamãr xwýnh krãhtũmjê hwýr tẽ. Hãmri nê tanhmã Jejus o mẽ mar to nê mẽ kãm:

—E ot pa mẽ amã Jejus jarênh o tẽ. Xà kot paj mẽ amã hã amýnê ka mẽ hpãnhã inhmã amnhĩre nà? Anê.

⁵ Hãmri nhũm mẽ kuma nê hkính nê. Hãmri nê kãm:

—Nà kot paj mẽ amã amnhĩre.

⁶ Hãmri nhũm mẽ kot kãm amnhĩrer ã harênh ma nê hkính nê mẽ kãm:

—Tõe. Nà kot paj mẽ amã ho anê. Anê.

Hãmri nê ma tẽ nê kato. Nê Jejus pynênh kaxyw htãnopxar o ri hkôt pa. Mẽ kot mar o pa xwýnhjê hkàx ã nhỹri unênh nê ma mẽ hwýr o htêm kaxyw.

Jejus kot ý hã mẽ ahkre xwýnhjê kutã apkur ã harênh

Matêwre 26.17-25; Makre 14.12-21; Juãw 13.21-30

⁷ Tã nhũm Pasja kato. Amnepêm Ijaewjê nhĩgêjtaja na prem ôwêhti hkrare hkwý hpar o pa. Tirtũm kot ja hã mẽ omunh nê Ejit kãm mẽ kãm mẽ hkurê xwýnhjê nhĩhkra nê mẽ kator kaxyw nhũm prem ã amnhĩ nhĩpêx anê. Jakamã na htem arí mẽ kêp mẽ hkanrêhã mẽ htãmnhwýjaja arĩgro pê Pas ã axpën wýr akuprõ nê mẽ kãm hamaxpër pê mẽ urãk nê ôwêhti hkrare hkwý hpa. Hãmri nê pãwti kaxkrit kêt kãm kuku.

⁸ Jakamã nhũm Jejus ý hã mẽ ahkre ho mẽ pa xwýnhjê wa ho axkrut nê mẽ amnhĩ kukamã wa kumê. Simãw Pêtre mẽ Juãwja nhũm wa mẽ amnhĩ kukamã wa kumê nê wa kãm:

—E wa ma mẽ ixkukamã tẽ nê mẽ ixkutêp Pas ã mẽ panhõ hã apê. Anê.

⁹ Hãmri nhũm wa kuma hãmri nê kãm:

—Tõe. Nhỹri kot paj we wa tẽ nê mẽ akutêp hã apê? Anê.

¹⁰ Hãmri nhũm wa kãm:

—Nà wa mãmrĩ ma Jerujarê hwýr wa tẽ. Nê hwýr axà nê mêmõ mytita pumunh kurê kumrêx. Nhũm amnhĩm gô ru nê amnhĩ kre hã poti xãm nê o tẽ. Ka wa omu nê hã ajêt nê ma hkôt òrkwý hwýr tẽ. ¹¹ Hãmri nê ixkre nhõ dõn pumu nê kãm: “E jar na pa wa awýr tẽ. Jejus na wa inhmẽ pa wa awýr tẽ. Na awýr pēr mênh o: ‘Nhỹri kot paj ixkôt ri mẽ pa ho mẽ pa xwýnhjê mẽ axpën kutã Pas ã apku?’ Anê. Na ã awýr hpēr mênh anê.” Anê.

¹² —E ã kãm akapër anê kê war ama nê ra war amã òrkwý nhĩmõk ã ixkre rax õ jahkre. Kamã ra kaxyw mẽ paxàpkur xà hã mẽmoj piitãã. Ka wa omu hãmri nê mãmrĩ mẽ ixkutêp kamã mẽmoj tã apê. Anê.

¹³ Hãmri nhũm wa kuma nê ma krĩm tẽ. Ma tẽ nê hwýr axà hãmri nê ra kot wa kãm mẽmoj jarênh xà hkôt mẽmoj piitã omu hãmri nê mẽ kutêp mẽõ hã àpênh o wa xa.

¹⁴ Tã nhũm myt axà nhũm mẽ wa hkôt mõ nê ixkreta wýr àpir pa. Hãmri nê apkur kaxyw hkrĩ hpa nhũm Jejus mẽ ìhkô hã nhỹ. ¹⁵ Hãmri nê mẽ kãm tanhmã amnhĩ jarênh to nê mẽ kãm:

—E na pa inhmã Pas ã mẽ anhĩhkô hã ixàpkur prãm nê. Kormã ixte amnhĩ xà htỳx kãm ijamak xwýj ri.

¹⁶ Kwa mẽ inhma. Kot paj axte mẽ akutã Pas ã ixàpkur kêt ry rax nê. Nom koja nhỹrmã Tirtũm akupýn ixte mẽ ato amnhĩptàr kaxyw inhmẽ hãmri pu mẽ rĩ kormã axte arĩgro mex maatija ã pahkính kãm axpën kutã paxàpkur rax nê. Anê.

¹⁷ Nhũm ã mẽ kãm amnhĩ jarênh anê nê hpãnhã wĩhti py nê o xa nê Tirtũm mã harê nê kãm:

—Pa Papaj. Nà ãm hãmri na ka hte mẽ inhnê mẽ kãm mẽ ixkurê xwýnhjê pumunh mex nê mẽ ìhkra pê mẽ ijapôj. Amex o amex. Anê.

Hãmri nê hpãnhã hkôt mẽ pa ho mẽ pa xwýnhjê hõ mã kugõ nê kãm:

—E mĩ. Apy nê mẽ axpën pãnhã hkwý ho ixkõ. ¹⁸ ãm hãmri na pa mẽ amã amnhĩ jarê. Kot paj axte wĩhti ho ixkõm kêt rãhã nhũm nhỹrmã Inhõ Papaj akupýn mẽ awýr inhmẽ. Hãmri pu mẽ rĩ kormã akupýn ixpõx xà hã arĩgrota ã pahkính rax nê. No ãm ra axtem tanhmã hã mẽ pahkính to. Anê.

¹⁹ Hãmri nê hpãnhã pãwti py nê mã ho anê nê Tirtũm mã harê. Hãmri nê ho hkry hpa nê mẽ piitã mẽ kãm òr pa nê mẽ kãm:

—E na pa ã pãwti ho hkry nê mẽ amã òr anê. Koja mẽ ã inhĩpêx anê nê te mẽ kot ixto hkry hpar pyrãk o inhĩpêx pa amnhĩ xà htỳx kamã ijamak kãm ty. Nom mẽ anê kot paj ty. Jakamã kêr ka mẽ ixwakre kamã tõhã axpën wýr akuprõ nê ixte mẽ ate amnhĩ tomnuj pãnhã amnhĩrer kaxyw mẽ anê ixtykja mã ajamaxpër pê akính nê pãwti hkur o akrĩ. E mẽ mãmrĩ axãmnhĩx aku. Anê.

Nhũm pre ã mẽ kãm amnhĩ jarênh anê nhũm mẽ mar pê pãwtita hkur o hkrĩ. ²⁰ Hãmri nê ra hkur pa. Hãmri nhũm Jejus axte kopta py nê mẽ kãm:

—Mẽ kot ixpĩr xà hã arĩgro hã koja ixkamrõ axkapĩ. Nom koja mẽ amarĩ ixpĩr nhũm ixkamrõ amarĩ hpikapĩr kêt nê. ãm paa. Pa kot paj mẽ anê mẽ ìhkram amnhĩ jaxà nhũm mẽ ã inhĩpêx anê. Koja ixkamrõ axkapĩ nhũm Tirtũm omu nê ixkukwak ri mẽ anê mẽ ate amnhĩ tomnuj piitã te amnhĩ katut kôt rênh par pyrãk o hipêx nê mẽ ato hkra. Amnepêm kot ja hã amnhĩ jarênh xà hkôt. Jakamã e mẽ ixkamrõ pikapĩrta mã ajamaxpër pê wĩhti hkwý ho ixkõ. Anê.

Jejus ã mẽ kãm àmnênh xwýnh jarênh

Matêwre 26.21-25; Makre 14.18-21; Juãw 13.18-19

²¹ Nhũm Jejus arĩ mẽ kãm kapër nê mẽ kãm:

—Nê kot mẽ kãm ixtã àmnênh mã xwýnhta na jar mẽ pahkaêx ã mẽ pakutã apkur o nhỹ. ²² Tirtũm kãm hpãm xà hkôt koja mẽ tanhmã ixto rax nê ixpĩ. Nom

kot mẽ kãm ixtã àmnênh mã xwỳnhta hêxta waa nê. Æ kot inhípêx anhỳrja mỳrapê koja amnhĩ xà htỳx kãm hamak rax kumrêx. Anê.

²³ Nhũm pre ã Jejus mẽ kãm amnhĩ jarênh anê. Nhũm mẽ kuma nê tee ri axpên pumunh o hkrĩ. Hãmri nê ri axpên kukja nê axpên mã:

—Kwa nà mẽ pahtõ kot pu we ã ri hipêx anê? Nà pa hkê.

Anhỳr o tee ri axpên kukjêr o hkrĩ.

Mẽ pamã amnhĩ to rũnh prãm kêt ã mẽ pamã karõ

Matêwre 20.20-28; Makre 10.35-45; mãânên Rômãn 12.3-5, 12.10, 12.16; Epes 4.2-4; Piripos 2.3-8; Xiakre 4.1-10; Wam Pêtre 5.3

²⁴ Tã nhũm Jejus nhỹ hã mẽ ahkre ho mẽ pa xwỳnhja-ja axpên mã tanhmã kapêr to ho hkrĩ nê axpên mã:

—Kwa mẽ pahtõ kot puj wem nhỹrmã pahpê pahi nê mẽ ho amnhĩptàr rax o ri papa? Anê.

Hãmri nê mẽ axpên mã: “Nà pa.” Anê nê nhãnh axpên mã: “Nà kêt paa.” Anê. Hãmri nhũm mẽ nêtãnh axpên mã: “Nà kêt pa kênã.” ²⁵ Anhỳr o axpên mã kapêr o hkrĩ. Hãmri nhũm Jejus tee ri axpên mã mẽ kuma nhũm mẽ ã hamaxpêr anhỳrja kêp omnuj nê nhũm mẽ kãm tanhmã hã kapêr to nê mẽ kãm:

—E mẽ inhma. Na hte Ijaew kêt xwỳnhjê nhõ pahijaja ã amnhĩ nhípêx anhỳr o ri pa nê amarĩ hkrĩ xà kamã hkrĩ ho hkrĩ. àhpumunh tỳx jakamã na htem amarĩ ixkre hkre jakry kamã kãm mẽ àpênh xwỳnhjê mã mẽmo mẽ àpênh ã karõ ho hkrĩ. Na htem ã amnhĩ nhípêx anhỳr o pa. Nê mẽ kot amnhĩm mex ã harênh kaxyw tanhmã mẽ ho mex to ho pa. ²⁶ Tã kêt ka mẽ ho mẽ uràk kêt nê. Kêt ãm te amarĩ ri mẽ apa xwỳnh pyràk o axpên nhípêx. Ixpyrà nê amarĩ mẽmoj to mẽ kutã anojarêr rãhã ho ri apa. No mẽ ate mẽ ho amnhĩptàr rax kukamã ajamaxpêr kêt nê. ²⁸ Na prem axpên mã ixto hêx nê tanhmã ixto kapêr punuj to htã ka mẽ ama nê ãm mẽ ama nê arĩ ixkôt ri apa rãhã nê. Æm hãmri na ka htem arĩ ixkôt ri apa anê. ²⁹ Kot paj amnhĩ tã mẽ ato mex rax nê. Na pre ra Tĩrtũm nhỹrmã ixte mẽ ato amnhĩptàr o ixkrĩ kaxyw ixãm. Tã ot pa amnhĩ pyrã nê mẽ pahkwỳ Ijaew kaxyw mẽ axunhwỳ ka mẽ nhỹrmã mẽ piitã mẽ ho amnhĩptàr o apa. Nê mẽ apê ixkrãmnhwỳ hã nhỹrmã ixkutã axàpkur o apa. Anê.

Jejus kot Simãw Pêtre mã kapêr ã harênh

Matêwre 26.31-35; Makre 14.27-31; Juãw 13.36-38

³¹ Tã nhũm Jejus Simãw Pêtre mã kapêr nê kãm:

—Kwa Simãw. Na Satanasti kãm hprĩ hã ixtã mẽ apiitã mẽ kamã hamak prãm nê. Tanhmã kot mẽ akrã hto nhũm mẽ ate mẽ kãm ixkurê xwỳnhjê pumaj ixkaga hã kãm mẽ akamã hamak prãm tỳx nê. Jakamã ã kot mẽ anhípêx anhỳr kaxyw na pre ra amnhĩ to Inhõ Papaj ma nhũm kãm: “Tõe. Kam nê mãmrĩ tanhmã mẽ kamã ajamak to.” Anê.

³² —Tã ate mẽ umaj ixkaga nê axte ate amnhĩ kaxyw inhmã ajamaxpêr kêt pymaj na pa ra ato Inhõ Papaj wỳr kãm ixihitỳx nê Simãw Pêtre. Jakamã kêt ka mẽmo arĩgro hã tee ri ixkaga hã amnhĩ pumu hãmri nê tokyx tãm akupỳm ixkôt amnhĩ xãm tỳx nê. Kêr kê nhỹrmã

akwỳjê hõ tanhmã amnhĩ tomnuj to nê tee ri amnhĩ kukamã hamaxpêr ka ja hã omu hãmri nê kãm ate tanhmã amnhĩ tomnuj tota jarê. Kê mẽ ã ate amnhĩ nhípêx anhỳr ã ajarênh ma nê apyrã nê tokyx akupỳm tãm ixkôt amnhĩ xãm tỳx kurê kumrêx. E kêt ka ã akupỳm ixkôt mẽ piitã mẽ hipêx anhỳr o ri apa Simãw Pêtre. Anê.

Nhũm pre ã Simãw Pêtre kot tanhmã amnhĩ nhípêx to hkukamã kãm ujarênh anê. ³³ Hãmri nhũm tee ri amnhĩ tã kuma nê kãm:

—Kwa nà Pahihti. Kot paj ri akwỳm tanhmã amnhĩ tomnuj to hkêr nê. Koja mẽ te ajaxà nê apĩ htã kot paj arĩ akôt ri ixpa ho ixpa nhũm mẽ pahto amỳrà nê tanhmã pahto. Anê.

³⁴ Hãmri nhũm kuma nê kãm:

—Nà koja apkati hkôt krãhyre hkàr kêt ri ka ra mẽ umaj ate ixkôt apa hkêr ã mẽ kãm amnhĩ tã axàprãr o axkrunêpxi kãm ga. Anê.

Jejus kot hkwỳjê mã mẽmoj tã karõ

Matêwre 10.5-15; Rukre 9.1-3

³⁵ Hãmri nhũm Jejus arĩ hkôt mẽ pa ho pa xwỳnhjê mã kapêr nê mẽ kãm:

—E wam ixte mẽ hwỳr mẽ arênhta ã na ka prem amnhĩ kôt aparkà hkwỳ ho apa hkêr nê. Nê kawà jamàn nê ho apa hkêr nê. Nê mrykà jamàn nê amnhĩ kôt ho apa hkêr nê. Æm mẽ anhỹ kamã mẽ hwỳr apa hã na pa pre mẽ amã karõ. Tã xàn ka prem ã mẽ hwỳr apa anê nhũm mẽ amnhĩ wỳr awỳr kêt nê? Nà xà na prem amnhĩ wỳr mẽ awỳr? Anê.

Hãmri nhũm mẽ kãm:

—Tỳ na prem amnhĩ wỳr mẽ ixwỳ. Mẽ ixte amnhĩ kôt mẽmoj to ixpa hkêr tã na pa prem amarĩ mẽ kutã ixàpkur mex o ri mẽ hkôt ixpa. Anê.

³⁶ Hãmri nhũm mẽ kãm:

—Tõe. Nà mẽ kot mẽ ato mex tã nom koja mẽ hpãn- hã axtem hõ ho mẽ anhípêx. Jakamã kêt ka mẽ akupỳm mẽ kãm ijarênh o apa kaxyw anojarêr hãmri nê anhõ mrykà rỳ akawà htu nê ma amnhĩ kôt ho apa. Nê awapo. Kot kaj mẽ awapo hkêr japêr hãmri nê apipro xà ho wênê nê amnhĩm hõ japrõ nê ma amnhĩ kôt ho apa. E kêt ka mẽ ã amnhĩ nhípêx anê.

—Nê Tĩrtũm kapêr ã kagà htũm kot ra ixkukamã tanhmã ijarênh to nê kot ijarênh kot:

Koja mẽ hipêx o te mẽ kot amnhĩ tomnuj tỳx xwỳnh nhípêx pyràk. Anê.

Æ mẽ kot inhípêx anhỳr kukamã ijarênh kot anhỳr. Tã na mẽ ra ã inhípêx anhỳr kaxyw. Anê.

³⁸ Nhũm pre ã Jejus mẽ kãm kapêr anê nhũm mẽ kuma nê kãm:

—Ota mẽ panhõ wapohti hamêxkrut Pahihti. Anê.

Hãmri nhũm mẽ kãm:

—Tõe. Nà hãmri. Mẽ amnhĩm axi nê ho amnhĩm mẽmoj to anê. Anê.

Jejus kot Tirtüm mã amnhĩ jarēnh

Matêwre 26.36-46; Makre 14.32-42

³⁹ Tã nhũm Jejus kê axte krĩja rũm kato nẽ hixêt pẽ Oriwêhti hwÿr tẽ nẽ api nhũm hkõt mẽ pa ho mẽ pa xwÿnhjaja ma hkõt mra. ⁴⁰ Hãmri nẽ nhÿri hixêt kahti ri hkrĩ nhũm Jejus mẽ kãm:

—E kwa kêr ka mẽ ixkutêp amnhĩ to Inhõ Papaj wÿr o akrĩ. Kê mẽ ixkõt tanhmã mẽ ato htã ka mẽ amã mẽ uma xàj ixkaga hkêt nẽ. Arĩ mẽ kutã amnhĩ to htÿx nẽ akuhê. Anẽ.

⁴¹ Hãmri nẽ mẽ kurũm htẽm grire nẽ Tirtüm mã amnhĩ jarēnh kaxyw hkõn krã ho tẽm nẽ nhÿ. ⁴² Hãmri nẽ kãm:

—Kwa Papaj. Nà na pa ra amnhĩ xà htÿx kukamã ija-maxpẽr nẽ amnhĩ kamã ixkahak tÿx kumrẽx. Inhmã amnhĩ xà kamã ijamak prãm kêt o ijamak prãm kêt. Jakamã kot kaj amã inhnẽ ho ajapêx prãm nẽ mãmri inhnẽ ho ajapêx nhũm mẽ kãm ixkurẽ xwÿnhjaja tanhmã ixto hkêt nẽ. Rÿ ko. Kot kaj amã mẽ kot tanhmã ixto hprãm hã kê mẽ mãmri tanhmã inhĩpêx to. Nom pam inhmã hprãm xà hkõt kêt. Anẽ.

Nhũm pre ã Jejus amnhĩ to Hipêêxà Tirtüm wÿr anẽ.

⁴³ Hãmri nhũm kuma nẽ hwÿr kapẽr o wrÿk xwÿnhja mẽ nhũm hwÿr wrÿ nẽ kuri xa. Hãmri nẽ õxàhkre kaxwÿnh kãm tanhmã ho hihtÿx to. ⁴⁴ Nhũm kê axte amnhĩ to Hipêêxà hwÿr kãm hihtÿx nẽ. Tee ri amnhĩ kukamã hamaxpẽr pẽ amnhĩ kamã kahak tÿx kumrẽx. Jao hã gô rax nẽ te hkamrõ xàhàr pyrãk o pikap ahã.

⁴⁵ Hãmri nẽ kànhmã xa nẽ akupÿm hkõt mẽ pa ho mẽ pa xwÿnhjê hwÿr tẽ nẽ mẽ omu nhũm mẽ ra õt pa nẽ hikwÿ. Mẽ kot tee ri Jejus kot mẽ kãm amnhĩ jarēnhja kukamã hamaxpẽr o hkaprĩ nẽ õt pa nẽ hikwÿ. ⁴⁶ Hãmri nhũm Jejus tẽ nẽ tee ri mẽ omu nẽ mẽ kumra nẽ mẽ kãm:

—Kwa nà. Mẽ ri ã amnhĩ nhĩpêx anhÿr kêt nẽ. Kwa mẽ kànhmã akrĩ nẽ amnhĩ to Inhõ Papaj wÿr kê mẽ ato mẽ axihtÿx. Hãmri nhũm mẽ tanhmã ixkõt mẽ ato ka mẽ inhÿ hã mẽ kutã amnhĩ to htÿx nẽ akuhê. Anẽ.

Mẽ kot Jejus pynênh ã mẽ harēnh

Matêwre 26.47-56; Makre 14.43-50; Juãw 18.1-11

⁴⁷ Nhũm pre ã Jejus mẽ kãm kapẽr anhÿr rôm nhũm hkõt pa ho pa xwÿnh pẽ Jut Kariotja amnhĩ kõt mẽ kot Jejus pynênh xwÿnhjê ho tẽ. Mẽ ho htẽm rax nẽ. Hãmri nẽ kot Jejus kahti hkõt mÿnh kaxyw hwÿr tẽ ⁴⁸ nhũm amnhĩ tã omu nẽ kãm:

—Kwa Jut. Xà mẽ kahti hkõt mẽ hamÿnh nẽ mẽ hpãr o na htem mẽ kãm mẽ hã amÿnê? Anẽ.

⁴⁹ Hãmri nhũm hkõt mẽ pa ho mẽ pa xwÿnhjê hõja tee ri mẽ kot amnhĩ nhĩpêx ã mẽ omu hãmri mẽ õ wapota mã hamaxpẽr kurẽ kumrẽx nẽ Jejus mã:

—Kwa Pahihti. Xà kot paj mẽ panhõ wapohiti py nẽ ho mẽ panê mẽ hkwy hpa? Anẽ.

⁵⁰ Hãmri nhũm hõta kuma nẽ mẽ kaxyw ja kapa. Nhũm mẽ õ patre maati mã àpênh xwÿnhja mẽ hkõt tẽ nhũm omu nẽ kãm wapõ ho apê. Nẽ kot ho hkrã nhĩpõnh mã tã kuhpaw nẽ ho upõk rũm hamak nhĩkjê

pix krãhta. ⁵¹ Hãmri nhũm Jejus omu nẽ nẽ kãm kapẽr nẽ kãm:

—Kwa nà ri ã amnhĩ nhĩpêx anhÿr kêt nẽ. Amarĩ xa. Anẽ.

Hãmri nẽ hamakja py nẽ akupÿm kãm hamak ã kuxi nẽ ho mex. ⁵² Hãmri nẽ mẽ kot unênh mã xwÿnhjê mã tanhmã kapẽr to. Mẽ õ patre krãhtũmjê mẽ Tirtüm mã amnhĩ jarēnh xà hã ixkre jamãr xwÿnhjê krãhtũm mẽ Ijaew nhõ pahijê mẽ nhũm mẽ ho pimràatã mẽ kãm kapẽr nẽ mẽ kãm:

—Kwa na pa pre apkati mẽ Tirtüm nhõrkwÿ kamã mẽ kãm ixkapẽr o ixpa ka prem tokyx ixpynênh kêt tã jarãhã te ixte amnhĩ tomnuj xwÿnh pyrãk o inhĩpêx nẽ ixwÿr wapõ nẽ kô hã akapên nẽ ixwÿr ã atẽm rax anẽ. No ãm ra mẽ ate tanhmã ixto kaxyw arĩgro kator kênã. Jakamã kot kaj mẽ mãmri tanhmã amã ixto hprãm xà hkõt mãmri tanhmã ixto. Satanasti nhÿ hã ã mẽ ate inhĩpêx anhÿr mã kênã. Anẽ.

Simãw Pêtre kot Jejus kõt pa hkêt ã kot amnhĩ jarēnh

Matêwre 26.69-75; Makre 14.66-72; Juãw 18.15-18, 18.25-27

⁵⁴ Tã nhũm mẽ Jejus pynê nẽ ma o tẽ. Ma mẽ õ patre maati nhõrkwÿ hwÿr o tẽ. Nhũm Simãw Pêtre ma hapu hã mẽ hkõt hã mẽ omunh o tẽ. ⁵⁵ Nhũm mẽ patre maati nhõrkwÿ hwÿr Jejus o axà nẽ hkõt gjêx pa hãmri nhũm Simãw Pêtre kítare hwÿr axà nẽ mẽ kuri xa. Nhũm mẽ kítare kamã amnhĩm kuto nẽ hã ànhunh o hkrĩ nhũm ⁵⁶ mẽ ìhkõ hã ànhunh o nhÿ. Hãmri nhũm mẽ kãm àpênh xwÿnh niti hirã kamã hprĩ hã omunh kurẽ kumrẽx nẽ mẽ kãm:

—Xê pẽr myti ja kêp Jejus kõt mẽ pa ho mẽ pa xwÿnhjê hõ na. Anẽ.

⁵⁷ Hãmri nhũm tee ri amnhĩ tã kuma nẽ kãm mẽ uma nẽ mẽ kãm amnhĩ tã aprã nẽ kãm:

—Tk. Kokÿ. Ixte mẽhõ my ata pumunhre hã. Anẽ.

⁵⁸ Tã nhũm hpãnhã mẽhõ myja kãm:

—Kwa nà. ãm hãmri na ajarẽ. Apê Jejus kõt ri mẽ pa xwÿnhjê hõ na ka.

Anẽ nhũm kuma nẽ kê axte kãm:

—Kwa mẽ ri ã amnhĩ krã hkõt ri ixto axêx anhÿr kêt nẽ. ãm ixte aa mẽhõta pumunh kêt kumrẽx. Anẽ.

⁵⁹ Tã nhũm ja haxwÿja axte omu nẽ kãm:

—Kwa ãm hãmri na mẽ ajarẽ. Apê Jejus kwÿ hõ na ka. Urãk nẽ te apê Garirej nhõ xwÿnh pyrãk kênã. Anẽ.

⁶⁰ Hãmri nhũm tee ri kuma nẽ mẽ kãm amnhĩ tã àprãr kãm hihtÿx nẽ mẽ kãm:

—Tk. Ixpê Garirej nhõ xwÿnh kêt. ãm ixte mẽhõ mũj pumunh kêt kumrẽx tã ka mẽ ãm xatã hkõt ixpa ho ixpa xwÿnh ã ixkamnhix o akuhê.

Anhÿrja o ra mẽ kãm amnhĩ tã aprãr o axkrunẽpxi mẽ nhũm krãhyre kà. ⁶¹ Hãmri nhũm Jejus arĩ ixkre kamã ãm tã Simãw Pêtre ho hakêx nẽ omu. Hãmri nhũm amnhĩ tã no pumu nẽ kot hkukamã kãm ã amnhĩ nhĩpêx anhÿr jarēnhja mã hamaxpẽr kurẽ kumrẽx. Krãhyre hkàr kêt ri kot mẽ kãm amnhĩ tã àprãr o axkrunẽpxi hã harēnhja mã hamaxpẽr nẽ kànhmã hakry hpar o tẽ nẽ hkaprĩ htÿx nẽ. ⁶² Hãmri nẽ hkaprĩ

xàj kītare pē kato nē tē nē awry hā xa nē mỳr rax kum-rēx.

Mě kot Jejus tak ā mě harēnh

Matēwre 26.67-68; Makre 14.65

⁶³ Hāmri nhūm mě kot Jejus pumunh o kuhê xwỳnh-jaja hā hpēr o axkē nē htak o kuhê. ⁶⁴ Nē no hpro nē htak nē kām:

—E atak xwỳnh nhīxi jarē. Apē Tirtūm Kra hā ate amnhī jarēnh jakamā mǎn urāk nē axàhpumunh tỳx. Jakamā e hixi jarē. Anē.

⁶⁵ Hāmri nē xatā hapry nē kām kapēr punuj nē.

Mě kot mě hkrāhtūm wỳr Jejus o htēm ā mě harēnh

Matēwre 26.57-68; Makre 14.53-65; Juāw 18.19-24

⁶⁶ Tā nhūm myt kator o mōr mě nhūm Ijaew nhō pahijē mě patre krāhtūmjē mě Tirtūm kapēr tūm o mě ahkre xwỳnhjaja axpēn wỳr pikuprōnh pa. Hāmri nhūm mě ma mě hwỳr Jejus o tē. ⁶⁷ Nhūm mě omu nē tanhmā kot amnhī jarēnh to hā hkukja nē kām:

—Kwa mě inhmā amnhī jarē. Xà ka na apē Tirtūm kot mě ixkaxyw axām xwỳnhhta? Xà ka kot kaj Rōm nhō xwỳnhjē pē mě ixpytā nē mě ixto amnhīptār o apa? Anē.

Hāmri nhūm mě kām:

—Nà kot paj tanhmā mě amā amnhī jarēnh to ka mě ixkōt ajamaxpēr kēt nē. Ixte ām hāmri mě amā amnhī jarēnh tā ka mě inhma nē ām inhma. Nē kot pa amnhī xwar mēmoj tā mě akukja ka mě amnhī xwar inhmā tanhmā harēnh to hkēt nē. Ām mě axēx rom mě ate ā ixkukjēr anhỳr kēnā. ⁶⁹ Tā nom kot paj tokyx ma akupỳm Inhīpēxà Tirtūm wỳr api. Hihtỳx o hihtỳx rāhā nē pa ho pa xwỳnh na. Jakamā kot paj hwỳr api nhūm amnhī nhīkhō hā inhỳr pa upōk rūm mě apiitā mě ato amnhīptār o ixkrī. Hāmri nē nhỳrmā paa tanhmā mě ajarēnh to. Anē.

⁷⁰ Hāmri nhūm mě tee ri kot ā amnhī jarēnh anhỳrja ma nē kām:

—Tk. Kwa akatāt kōt mě inhmā amnhī jarē nà. Xà apē Tirtūm Kra na ka? Anē.

Hāmri nhūm mě kām:

—Tỳ ixpē Kra na pa. Anē.

⁷¹ Hāmri nhūm mě tee ri ā amnhī jarēnh anhỳrja ā kuma nē axpēn mā:

—Kwa mo kaxyw kot puj mě axte mě hkwỳjē japēr nhūm mě tanhmā kot amnhī tomnuj to hā harē? Tām kēp Tirtūm Kra hā amnhī to hēx nhūm mě pahte pah-piitā mar kēnā. E kwa tokyx pu mě ma Rōm nhō pah-hti hwỳr o tē kē mě pamā hā amỳnē nē mě pamā kupī. Anē.

Mě kot pahi Pirat wỳr Jejus o htēm ā mě harēnh

Matēwre 27.1-2, 27.11-26; Makre 15.1-5; Juāw 18.28-38

23 Tā nhūm mě Jejus o kato nē nhām Pahihti Pirat wỳr o tē. ² Hāmri nē kutā ām nē tanhmā kām ho hēx to nē kām:

—E ot pa mě awỳr jahti ho tē. Na hte mě inhmā hēx rūnh o pa. Mě ixte Pahihti Sesti kapēr kwỳm ri amnhī

nhīpēx prām xàj tanhmā mě inhmā mēmoj tā karō hto ho pa. Nē axtem nē mě ixte Sesti mā kàxpore hkwy nhōr kēt ā mě inhmā karō. Nē Tirtūm kot mě pakaxyw kēp mě panhō pahi hā ām xwỳnh ā amnhī jarē. Ā na hte mě inhmā amnhī to hēx anhỳr o pa. Anē.

³ Hāmri nhūm Pirat mě kuma nē Jejus pumu nē kām: —E kwa inhmā amnhī jarē. Xà apē Ijaew nhō pahi na ka? Xà ka na htem amnhī wỳr akām hamak o pa? Anē.

Hāmri nhūm kām:

—Nà ām hāmri na ka ā ijarēnh anē. Anē.

⁴ Hāmri nhūm Pirat tanhmā hkukjēr to nē tee ri kot amnhī jarēnh ā kuma hāmri nē patre krāhtūmjē mā kām:

—Kwa mēmo mỳrapē kot pa tanhmā mě amā hā ixàmnēnh to? Kot tanhmā amnhī tomnuj tore hā. Nà kot pa kām inhūre. Anē.

⁵ Hāmri nhūm mě tee ri kuma nē kot mě kām hā àm-nēnh prām xàj hā kām kapēr kām hihtỳx nē. Nē kām:

—Kwa nà. Na pre hte pika pē Jutej kamā tanhmā mě kām hēx to ho pa. Hāmri nhūm mě ra hā axpēn kutā amnhī xunhwỳ nē hā pijapu rūnh o pa. Tā mǎnēn Garirej kamā ā amnhī nhīpēx anhỳr o hkrax nē hpānhā amnē mě pahwỳr ā amnhī nhīpēx anhỳr kaxyw mōr anē. Anē.

Mě kot Erox wỳr Jejus o htēm ā mě harēnh

Rukre 9.7-9

⁶ Hāmri nhūm Pahi Pirat mě kuma nē mě kām:

—Kwa xà kēp Garirej nhō xwỳnh na? Anē.

Hāmri nhūm mě kām:

—Tỳ. Kēp Garirej nhō xwỳnh kēnā.

⁷ Anē nhūm mě kām:

—Tō mě ma pahihti Erox āxipas wỳr mǎn o tē. Kēp Garirej nhō xwỳnhjē nhō pahi na. Tā ra jar Jerujarē kamā ham pōj. No axtem ixpē Jutej kamā mě pa xwỳnh-jē nhō pahi jakamā kwa mě ma ō pahita wỳr mǎn o tē kē tām tanhmā mě amā ho. Anē.

⁸ Hāmri nhūm mě kuma nē ma pahi Erox āxipas wỳr o tē. Na pre ra Erox āxipasja xatā Jejus jarēnh ma nē kām omunh prām nē. Kām aa kot mēmoj pumunh kēt ō ho anhỳr ā omunh prām tỳx jakamā nhūm mě ma hwỳr o tē nhūm omu nē hkīnh nē. ⁹ Hāmri nē tee ri mēmoj tā hkukja no nhūm akryk xa nē tanhmā kām nē hkēt nē. ¹⁰ Hāmri nhūm mě ō patre krāhtūmjē mě Tirtūm kapēr tūm o mě ahkre xwỳnhjaja kām ho kapēr punuj nē ho hēx kām hihtỳx nē. ¹¹ Hāmri nhūm pahi Erox āxipas mě kuma hāmri nē ō pôristi mě wa kām kapēr punuj nē hā hpēr o axkē nē tanhmā ri hapry to. Hāmri nē hā hpēr o pikēnh kām kēp pahi hā mě ē mexja py nē kām haxà nē akupỳm pahi Pirat wỳr kumē.

¹² Na pre Pahi Pirat mě Pahi Erox āxipasja wa kām axpēn kīnh kēt nē. Tā hāmri nhūm Erox āxipasja tee ri Jejus kot kām tanhmā amnhī jarēnh to hā mar prām xàj tee ri hkukamā hamaxpēr hāmri nē Pirat ā hpijām kaxyw akupỳm hwỳr kumē. Hāmri nhūm amnhī tā omu hāmri nē wa ra akupỳm kām axpēn kīnh nē. Nē

akupým axpën mã hpër o axkë në pikunhar o pa pë akupým axpën to hkràmnhwỳ.

Pirat kot Jejus pĩr ã àmnênh

Matêwre 27.15-26; Makre 15.6-15; Juãw 18.39-19.16; mãänên Atre 3.13-14

¹³ Tã nhũm Pirat akupým amnhĩ wỳr mẽ hã karõ. Ijaew kwỳjaja në mẽ õ pahijaja në mẽ õ patre krãhtũm-jaja nhũm akupým amnhĩ wỳr mẽ piitã mẽ hã karõ. ¹⁴ Hãmri nhũm mẽ akupým hwỳr gjêx pa në kuhê nhũm mẽ kãm:

—E na ka mẽ ixwỳr mytita o tẽ në tanhmã inhmã harênh to. Kot mẽ akwỳjê mã tanhmã hêx to ho pa hã harê. Tã pa ra jar mẽ anoo mã tanhmã hkukjêr to në tee ri kot inhmã tanhmã amnhĩ jarênh to hã kuma. Te kot amnhĩ to mex xwỳnh pyrãk. Mẽ ate tanhmã ho akapêr to htã nom kot anhỳr kêt. Kot amnhĩ to mex xwỳnh na. ¹⁵ Pahi Eroxa ra ixpyrà në tee ri tanhmã hkukjêr to nom nhũm tanhmã kãm në hkêt në. Nhũm tee ri ja hã omu në akupým ixwỳr kumẽ. Jakamã kwa mẽmo mỳrapê kot paj mẽ amã hã amỳnê nhũm mẽ amã kupĩ? Tanhmã kot amnhĩ tomnuj tore hã. ¹⁶ Kot paj ãm mẽ kãm anê kê mẽ htak në kãm ure kê mãmrĩ ma tẽ. Anê.

¹⁷ Arĩgro pê Pas ã na pre hte mẽ õ pahi mẽ kot mẽ ho prês nhũm mẽ hkrĩ xwỳnhjaja nhũm pre htem mẽ ho hpỳnh mẽ mẽ kãm ure. Jakamã na pre ã mẽ kãm kapêr anê mẽ kot Jejus tak në kãm urer mã. ¹⁸ Nom nhũm mẽ kuma nhũm ja mẽ kêp omnuj mẽ nhũm mẽ kãm:

—Kwa nà. Apĩ ri. Apĩ mẽ mẽ inhmã Parapas mã mãn anhũre. Anê.

Parapas na pre mẽ õ krĩ kamã õ pòristi mẽ pahi Piratja mẽ kutã amnhĩ xãm në kêp õ pòristi hõxpĩ. Mỳrapê na prem ra haxà nhũm hkrĩ ho hkrĩ. Jakamã nhũm mẽ Pirat kot kãm urer kaxyw ã kãm kapêr anê. ²⁰ Nom nhũm kãm Jejus mã urer prãm jakamã axte hã mẽ hkukja mẽ mẽ kãm:

—Kwa nom mẽmoj mỳrapê kot paj mẽ kãm hã amỳnê nhũm mẽ amã kupĩ?

²¹ Anhỳr tã nhũm mẽ kuma mẽ ãm kuma. Nê xatã kãm:

—Kwa tokyx pĩ kahpa hã anhô kê ty. Anê.

²² Hãmri nhũm tee ri mẽ kuma mẽ mẽ kãm:

—Tk. Kwa nà. Tanhmã kot amnhĩ tomnuj tore hã kot pa kêt hã kunhò nhũm ty. Nà kot paj ãm mẽ kãm anê kê mẽ htak në kãm ure kê ma tẽ. Anê.

²³ Hãmri nhũm mẽ xatã hã kãm kapêr kãm hihtỳx në kãm:

—Kwa nà. Pĩ kahpa hã mãn anhô kê ty.

Anhỳr o ãm xatã kàx pê àmra kamã kãm hã amỳnê. ²⁴ Hãmri nhũm Pirat tee ri mẽ kuma hãmri në tã mẽ kãm hprãm xà hkôt mẽ kãm ã amỳnê. ²⁵ Hãmri në mẽ kãm Parapas mã ure. Ra kot pahi Pirat pê õ pòristi kutã amnhĩ xãm në kêp hõx pĩr tã nhũm mẽ kãm hprãm xà hkôt akupým kãm ure. Hãmri në mẽ ìhkram Jejus jaxà. Mẽ kãm hprãm xà hkôt ri mẽ kot tanhmã hipêx to kaxyw.

Mẽ kot pĩ kahpa hã Jejus nhô ã mẽ harênh

Matêwre 27.31-43; Makre 15.21-32; Juãw 19.17-20, 19.27-31; mãänên Atre 7.59-8.1

²⁶ Tã nhũm pòristijaja Jejus o kato në ma kapôt mã o tẽ. Nê kãm õ pĩ kahpa gõ nhũm amnhĩ kaxyw kumỳ mẽ o tẽ. Nom mẽ kot htak rax kurê nhũm hirot tỳx në nhũm mẽ ja hã omu mẽ mẽhõ kot ho ajuta kaxyw mẽ hkapi ho xa. Hãmri në Sirên nhõ xwỳnh Simãw hkà htyk pumu. Nhũm pre htỳx hamakêtkati mẽ mẽ kutã krĩm tẽ. Hãmri nhũm mẽ haêr pê unê mẽ kãm Jejus o ajuta kaxyw hã karõ nhũm kãm õ pĩ kahpaja mỳ mẽ mẽ hkôt o tẽ.

²⁷ Hãmri nhũm mẽ ohtô mẽ Jerujarê rũm Jejus kôt mỗ. Nhũm mẽni hkwỳjaja omu mẽ kãm hkaprĩ xàj mỳr o hkôt mỗ. ²⁸ Hãmri nhũm mẽ mỳr ã mẽ kuma mẽ mẽ ho hakêx mẽ mẽ omu mẽ mẽ kãm:

—Kwa nà Jerujarê nhõ xwỳnhjaja. Mẽ amã ixkaprĩ xàj amỳr kêt në. Kêt mẽ kamjaja amã amnhĩ kaprĩ xàj mãn mur. Nê mẽ akrajê kamã axukaprĩ xàj mãn mur. ²⁹ Koja mẽ nhỹrmã mẽ apê mẽ anhõ krĩ grành pa ka mẽ apunuj mẽ amnhĩ xà htỳx kamã ajamak o ri apa. Nê tee ri mẽ akrajê hkukamã tanhmã ajamaxpêr to në ajamaxpêr o: "Hêxta gàà mẽ. Na ixkrajaja ixpê amnhĩ xà htỳx kãm hamak o pa. Kêp apu mẽ hkra hkêt xwỳnhjê pyrã mẽ ixkra hkêt mẽ ixpa ro nhỹx inhmã mex mẽ. Nhỹx pa ixkĩnh mẽ." Anhỳr o kot kaj mẽ nhỹrmã ajamaxpêr nom ã ajamaxpêr anhỳr kaprỳ.

³⁰ —Nê kot kaj mẽ apiitã mẽmo punujta pymaj tee ri amã tokyx atyk mẽ ajapêx par prãm kaprỳ mẽ axpën mã akapêr o: "Hêxta gàà mẽ. Kot kên prêk mũj mẽ panhĩpy rôrôk mẽ tokyx mẽ panhĩmex par ronhỹx mẽ pamã ja mex." Anhỳr tã no ãm tee ri ã ajamaxpêr anhỳr kaprỳ. ³¹ Nom kêt pa. Aa ixte tanhmã amnhĩ tomnuj to hkêt tã nhũm mẽ ã inhĩpêx anê. Nom mẽ ate amnhĩ tomnuj mỳrapê koja mẽ nhỹrmã tanhmã mẽ ato rax o ã mẽ kot inhĩpêx anhỳrja jakrenh pa. Hêxta waa mẽ. Na pa mẽ akukamã ijamaxpêr mẽ ixkaprĩ htỳx mẽ. Anê.

³² Tã nhũm mẽ ja wa ho hamêxkrut mẽ tanhmã wa kot amnhĩ tomnuj toja mỳrapê Jejus kôt wa hpĩr kaxyw hkôt mãänên wa o tẽ. ³³ Jakamã nhũm mẽ ra kên nhĩxêr te kot mẽ hkrã hi pyrãk xwỳnhhta wỳr mẽ o pỏj. Mẽ kot kãm "mẽ hkrã hi xà" anhỳr jarênhja wỳr mẽ o pỏj. Hãmri në Jejus pê ê kapa mẽ pĩ kahpa hã kuxi mẽ prek o ìhkra mẽ hpar o htỳx pa. Hãmri në kànhmã pĩ kahpa xãm mẽ ho htỳx nhũm xa. Hãmri nhũm mẽ hpãnhã wa kot amnhĩ tomnuj xwỳnhhta mã wa ho anê mẽ. Nê prek o wa ìhkra mẽ wa hpar o htỳx pa hãmri në akutã ho Jejus nhĩjê mẽ wa ãm nhũm wa ajêr. ³⁴ Hãmri nhũm Jejus kỳx pê amnhĩ xà htỳx kumrêx kamã hamak o jêr rãhã mẽ ho Tĩrtũm wỳr mẽ kãm:

—Kwa Papaj. ãm ixtã jajê pumu. Mẽ kot mẽmoj mex pumunh kêt jakamã na mẽ ã inhĩpêx anê. Jakamã ãm ixtã mẽ omu mẽ mẽ kamã axukaprĩ mẽ. Anê.

Hãmri nhũm hparpê pòristi hkwỳjaja axpën mã ê hk-wỳ ho pigrành kaxyw hã kênre ho jỏka ho hkrĩ.

³⁵ Nhũm mẽ ohtô rax mẽ Jejus parpê omunh o kuhê.

Nhũm mẽ õ pahijaja mẽ noo mã hã hpër o axkê nẽ mẽ kãm:

—E jahti na pre te kệp mẽ pakaprí xwýnh ã amnhĩ jarênh o ri pa. Nẽ Tĩrtũm kot mẽ pakaxyw ãm xwýnh ã amnhĩ jarênh o ri pa. Jakamã e kwa pu mẽ xa nẽ kot amnhĩ kaxàr nẽ wrýk kãm omu. Anẽ.

³⁶ Nhũm pòristi mãänën tanhmã hã hpër o pikênh to. Nẽ hparpê kãm wĩhti punuti jahkre nẽ kãm:

—Kwa wrý nẽ mẽ ixkutã ja hkwý ho ixkõ nã. Anẽ.

³⁷ Hãmri nẽ kãm:

—E apê Ijaew nhõ pahi hã kot kaj amnhĩ kapa nẽ akupýn wrý. Kwa tokyx pa mẽ ja hã apumu. Anẽ.

³⁸ Nhũm pòristija tapti hõ py nẽ tanhmã hã kagã hto. Nẽ hã kagã ho:

IJAEW NHÕ PAHI NA JA

Anhýr o hã kagã hãmri nẽ Jejus wýr api nẽ mý ri kunhõ.

Wa kot Jejus nhĩjê nẽ wa jêt xwýnh wa harênh

Matêwre 27.44; Makre 15.32

³⁹ Hãmri nhũm wa kot ãhkõ hã jêt xwýnhhta õ haxwýja kãm kapër punuj nẽ kãm:

—Kwa kot kaj apê Tĩrtũm kot mẽ ixkaxyw axãm xwýnh hã kot kaj amnhĩ kapa nẽ wrý. Nẽ mãänën amnhĩ kõt wa ixto wrý. Anẽ.

⁴⁰ Hãmri nhũm ihõta kuma nẽ hã kãm akir nẽ kãm:

—Tk. Kwa amarĩ ajêt. Xà amã Tĩrtũm puma hkêt ã na ka ã kệp Krata mã akapër anẽ? Nã koja kãm wrýk prãm nẽ kot wrý. No pajamẽ pahte amnhĩ tomnuj myrapê koja mẽ pahpĩ. No tãm kot tanhmã amnhĩ tomnuj to hkêt tã nhũm mẽ amarĩ ã hipêx anẽ.

⁴² Anhýr o kãm kapër hãmri nẽ Jejus mã kãm:

—Kwa Jejus. Kêr ka nhýrmã mẽ ixto amnhĩptã hãmri nẽ inhmã ajamaxpêr nẽ ixkamã axukaprí nẽ ixto mex nẽ. Anẽ.

⁴³ Hãmri nhũm kãm:

—Nã kot kaj jarãhã ma ixkõt kaxkwa hwýr api nẽ hpãnhã ixkuri amex nẽ atĩr tũm nẽ apa ho apa. ãm hãmri na pa ã amã ixkapër anẽ. Anẽ.

Jejus tyk ã harênh

Matêwre 27.45-56; Makre 15.33-41; Juãw 19.28-30

⁴⁴ Tã nhũm kaxkwa nhĩpõk ri myt nhýr mẽ nhũm te ra kamãt pyrãk nhũm kamãt kô rax kumrêx. Nẽ kamãt kô ho ra hã awry nẽ. Ja mẽ nhũm akupým myt katêr o mõ. ⁴⁵ Nom nhũm kormã kamãt kôta ã nhũm Jejus ra htyk kaxyw nẽ àmra kamã Tĩrtũm mã kapër nẽ kãm:

—E Papaj. Mãmrĩ ixkarõ ho amnhĩptã.

Anhýrja kõt hãmri ty. Pu nhũm Tĩrtũm mã amnhĩ jarênh xà hã ixkre kamã hakwakre hã kupêxêja axkjê nẽ amnhĩ kahê xà mẽnh kurê kumrêx. Utĩ rax tã kõt ã axkjê nẽ amnhĩ kahê xà mẽ. Te Jejus htyk o kot mẽ pahte hkõt amnhĩ xunhwýr xwýnhjê mã Tĩrtũm wýr pry jakwa kre kahê xà mẽnh pyrãk o ã amnhĩ nhĩpêx anẽ. ⁴⁷ Hãmri nhũm mẽ piitã mẽmoj ã kot amnhĩ nhĩpêx anhýr ã omunh o kuhê xwýnhjaja. Nẽ kaxyw Je-

jus krãmnhwýjaja nhũm mẽ amým omunh o kuhê. Nẽ Garirej rúm mẽni kot Jejus kõt mẽ pa ho mẽ pa xwýnh-

jaja mãänën mẽ kuri amým hkaprí nẽ omunh o kuhê.

Nhũm pòristi krãhtũmjê hõja ã mẽmoj kot amnhĩ nhĩpêx anhýr ã omu nẽ tee ri hamaxpêr o:

—Hêxta waa nẽ. Pêr ãm hãmri na pre hte tãm amnhĩ nhĩpêx o pa. Tã pa mẽ amarĩ mẽ mar xà hkõt ixtýx kupĩ. Anẽ.

Nhũm ã hamaxpêr anhýrja kõt Tĩrtũm mã mex o mex ã harênh o xa. Nhũm amarĩ mẽ kuhê xwýnhjaja mãänën mẽmoj ã kot amnhĩ nhĩpêx anhýrta pumu nẽ tee ri hkukamã hamaxpêr o ra kãm ma htýx nẽ. Hãmri nẽ awjanã nẽ ma akupým krĩm mrar kurê kumrêx.

Mẽ kot Jejus jaxàr ã mẽ harênh

Matêwre 27.57-61; Makre 15.42-47; Juãw 19.38-42

⁵⁰ Tã nhũm axtem Juje pê Arimatej nhõ xwýnhja. Ari-matejja pika pê Ijaew kamã na. Nhũm Jujeja kot amnhĩ to mex jakamã Tĩrtũm kõt amnhĩ nhĩpêx o pa. Jakamã na pre hkwýjê rom Tĩrtũm kot mẽ pahwýr Jejus mẽnh xwýnh ã omu nẽ hkõt hamaxpêr. Kệp Ijaew nhõ pahi hõ htã hkwýjê hkõt hamaxpêr kêt nẽ. Jakamã nhũm prem kot Jejus pĩr ã amýnê nhũm tee ri harênh ma nhũm ja kệp omnuj nẽ. ⁵² Jakamã nhũm Jejus ty nhũm Juje ma pahi Pirat wýr tẽ nẽ ã hã kuwý nẽ kãm:

—Pa? E ot pa awýr tẽ. Kwa inhmã htyk xwýnhhta gõ pa ma o tẽ nẽ haxã. Anẽ.

⁵³ Hãmri nhũm kuma nẽ kãm kugõ nhũm ma o tẽ nẽ haxã. Kaxyw kupêxê hõ py nẽ ho hkupu nẽ ma o tẽ nẽ kên kre kaprý kamã haxã. Mẽ kot kormã kamã mẽhõ jaxàr kêt nhũm mẽ kamã Jejus jaxã. ⁵⁴ Arĩgro pê sêsta hã nhũm prem kupĩ nhũm myt xàr o mör mẽ nhũm Ju-je ma o tẽ nẽ haxã. Ijaew kõt xà hã arĩgromnuja wýr haxã. ⁵⁵ Nhũm Garirej rúm mẽni hkwý kot Jejus kõt pa xwýnhjaja ma hkõt mra nẽ kot haxàr kãm omu. Mẽ hkuxwaxà ho gregrer kêt rãhã haxàr kãm omu. ⁵⁶ Hãmri nẽ ma akupým krĩm mra nẽ kaxyw mẽ hkuxwaxà hkwý ho anẽ.

Tã nhũm apkati nhũm mẽ õ arĩgromnu pê sap kator jakamã nhũm mẽ kormã akupým hwýr mrar kêt nẽ. Hãmri arĩgro mex jamãr pê arĩ hkõkõt o hkrĩ.

Jejus akupým htĩr jarênh

Matêwre 28.1-10; Makre 16.1-8; Juãw 20.1-10

24 Tã nhũm apkati nhũm tòmĩk. Hãmri nhũm mẽnijaja kwýhtã kãnhmã hkrĩ nẽ ma akupým kên kreta wýr mẽ hkuxwaxà ho mra. ² Hãmri nẽ hwýr àhtêp o mra nhũm ra hakwakre kahê xà raxta kahê xà hkàx ã xa nhũm mẽ tee ri omu. ³ Hãmri nẽ kên kre wýr agjê nẽ kamã tee ri Jejus japêr no nhũm kamã am-rakati. ⁴ Nhũm mẽ tee ri axpên pumunh pê hkukamã hamaxpêr.

Hãmri nhũm Tĩrtũm kapër o wrýk xwýnh wa axkrut nẽ mẽ haêr pê mẽ hwýr kato nẽ wa xa. Wa ê jaka nẽ hirã htýx kãm wa xa. ⁵ Nhũm mẽ tee ri wa omu nẽ kãm wa uma htýx nẽ. Nẽ wa umaj hkõn krã ho rôrõk nẽ hkrĩ hpa. Nhũm wa mẽ omu nẽ mẽ kãm:

—Kwa mon ka mẽ ri mẽ htykjê kamã ra akupým htĩr xwýnhhta japêr o ri apa? ⁶ Jar amrakati. Na ra akupým htĩr. Kormã Garirej kamã pa ri kot mẽ amã amnhĩ

jarënh xà hkôt na ra akupým htír. Mãn ka mẽ arí kot ã mẽ amã amnhĩ jarënh anhýrja ã anohtýx japêr. ⁷ Mẽ kot unênh nê pí kahpa hã nhôr nhùm htyk nê htyk ã apkati axkrunêpxi hãmri nê akupým htír ã kot mẽ amã amnhĩ jarënhhta mãn ka mẽ arí hã anohtýx japêr.

⁸ Anhýr o mẽ kãm kapêr nhùm mẽ kuma hãmri nê ra Jejus kot mẽ kãm ã amnhĩ jarënh anhýrja mã hamaxpêr kurê kumrêx. ⁹ Hãmri nê awjanã nê ma akupým krím hkính nê mra. Nê hwýr pøj nê mẽ kot Jejus nhý hã mẽ ahkre ho mẽ pa xwýnhjê mã awjarê. Mẽ kêp 11 xwýnhhtajê mẽ kaxyw hkwyjê mã awjarê. ¹⁰ Mëni kot mẽ kãm ujarënh xwýnhhtajê nhĩxi na pre Marir Matarën nhùm ja kêp Joanã. Nê Xiakre katorxà Marir ôta. Nê kaxyw mëni hõja. Jakamã nhùm mẽ ma akupým Jejus nhý hã mẽ ahkre ho mẽ pa xwýnhjê hwýr mra nê mẽ kãm awjarê. ¹¹ Nom nhùm mẽ kuma nê ãm nê kuma nê htyx ho amnhĩ krã hkôt mẽ kot ri ã harënh anhýr ã mẽ hkamnhĩx nê ãm mẽ kuma. ¹² Nhùm Simãw Pêtre hamaxpêr hãmri nê kànhmã xa nê ma kën kreta wýr hprôt nê htêm kurê kumrêx. Hãmri nê tee ri kën kre kaprý kamunh o xa nê kamã Jejus kupu xà pix pumu nê tee ri hkukamã hamaxpêr hãmri nê ma akupým tẽ.

Jejus kot Emau hwýr wa mõi xwýnh wa hwýr kator ã harënh

Makre 16.12-13

¹³ Tã nhùm ra amýkry ho mõi nhùm Jejus kwýjê hõ wa hamêxkrut nê Jerujarê rúm kato nê ma akupým wa õ krí pê Emau hwýr wa mõi. Jerujarê rúm Emau hwýr ahkrãre. ¹⁴ Jakamã nhùm wa hwýr pry hã axpên mã tanhmã Jejus jarënh to ho mõi. Kën kre kamã mẽ kot haxàr nhùm ra ã pikunorja nhùm wa axpên mã harënh o wa mõi. Nê tee ri hkukamã hamaxpêr o wa mõi. ¹⁵ Hãmri nhùm Jejus tãm tẽ nê wa hã ajêt nê wa hkôt tẽ. ¹⁶ Nom nhùm wa hprí hã omunh kêt nê. Týx ho nhãm mõi hã hkamnhĩx nê wa arí axpên mã harënh o wa mõi. ¹⁷ Hãmri nhùm Jejus hêx rom wa kãm:

—Kwa mẽmon ka wa axpên mã harënh o wa mõi? Anê.

Hãmri nhùm wa hkaprí kamã kãm harê. ¹⁸ Ihõ pê Kroptija kãm:

—Kwa xà na ka Jerujarê kamã ri apa htã kamã mẽ kot tanhmã amnhĩ nhípêx toja jarënh mar kêt nê? Kurüm amõi kênã na ka ri mẽmoj mar kêt nê ri apa. Anê.

¹⁹ Hãmri nhùm wa kãm:

—Nà amrakati ixte mẽmoj maare hã. Kwa mo na wehe? Kwa war aprí hã inhmã harê pa kuma. Anê.

Hãmri nhùm wa kãm:

—Nà mẽ kot mẽ ixpê tanhmã Jejus pê Najare nhõ xwýnhhta to kênã. Kêp Tirtüm nhý hã kapêr jarënh o pa xwýnh na pre. Nê Tirtüm nhý hã tanhmã amnhĩ nhípêx to ho pa nhùm prem piitã amnhĩm mex ã harê. ²⁰ Tã nhùm mẽ panhõ patre krãhtümjê mẽ mẽ panhõ pahijaja axtem nê mẽ kãm hã amýnê. Mẽ kot pí kahpa hã nhôr nhùm htyk kaxyw mẽ kãm hã amýnê. ²¹ Pa prem ixtýx ho kêp Tirtüm kot mẽ pahwýr mênh xwýnh ã hkamnhĩx nê kot Rõm nhõ xwýnhjê pê mẽ ixpytãr ã

hkamnhĩx tã nhùm prem mẽ ixpê kupí. Jãã na prem ã hipêx anê nê kupí. Na ra htyk ã apkati axkrunêpxi.

²² —Nê jarãhã kwýhtã mëni hkwyjaja ma haxàr xà hã kën kre hwýr mra nê xep tee kamã hapêr nê omunh kêt nê. Xep ãm Tirtüm kapêr o wrýk xwýnhja wa ho axkrut nê wa omu nhùm wa xa. Nhùm mẽ kãm ra akupým htír ã harê nhùm mẽ akupýn mẽ ixwýr mra nê mẽ ijaêr pê mẽ inhmã harê. ²⁴ Hãmri nhùm mẽ ixkwýjaja ma mẽ hpãnhã kën kreta wýr mra nhùm ra mẽ kot harënh xà hkôt tee ri kamã hapêr nom nhùm kamã amrakati kumrêx. Anê.

²⁵ Hãmri nhùm Jejus amnhĩ tã wa kuma nê wa kãm tanhmã amnhĩ jarënh to nê wa kãm:

—Hêxta waa nê. Pêr ãm mẽ ate mẽmoj mã ajamaxpêr týx mex kêt kumrêx. Na pre ra Tirtüm nhý hã kapêr jarënh xwýnhjaja Tirtüm kapêr ã kagã htüm kamã ã kot amnhĩ nhípêx anhýrja kukamã hprí hã harê nê hã kagã. Mẽ akukamã mẽ anhígêjtê mã harê nê hã kagã. Tã ka mẽ kormã aprí hã mar týx kêt nê. ²⁶ Kêt mẽ anê na Tirtüm kot ãm xwýnhhta ty. Tã ra akupým htír nê akupým kaxkwa hwýr àpir kaxyw. Kot mẽ ato amnhĩptãr kaxyw ra akupým hwýr àpir mã. ²⁷ Amnepêm na pre finat Mojesja tanhmã hkukamã mẽ anhígêjtê mã harënh to nê hã kagã. Nê hprí hã harënh o pa. Nhùm hpãnhã Tirtüm nhý hã kapêr jarënh o mẽ pa xwýnhjaja ma anê nê mẽ kãm harënh o pa. Anê.

Nhùm pre ã Jejus wa hkôt hprí hã wa kãm amnhĩ jarënh anhýr o tẽ. Te ho nhãm mõi jarënh pyrãk nom tãm wa kãm amnhĩ jarënh o wa hkôt tẽ. No nhùm kormã wa hprí hã kêp Jejus ã omunh kêt nê.

²⁸ Nhùm ã wa kãm amnhĩ jarënh anhýr o mõi rãhã nhùm mẽ ra wa õ krí hwýr hpõx o mõi. Nhùm ra kamãtre nhùm Jejus te kot wa rer nê nhýhým ma htêm kaxyw pyrãk o amnhĩ nhípêx nhùm wa tee ri omu nê kãm:

—Kwa xà kot kaj wa ixre nê ma tẽ? Ra kamãt o mõi kênã. Kwa ma wa ixkôt tẽ nê wa inhõrkwý kamã mãn wa ixri pøj. Anê.

Hãmri nhùm wa kuma nê ma wa hkôt tẽ. ³⁰ Nê mẽ wa õrkwý hwýr pøj nê hwýr agjê. Hãmri nê apkur kaxyw hkrí nhùm Jejus tãm pãwti py nê Tirtüm mã harê nê hpãnhã ho axkjê nê wa kãm kugõ. ³¹ Hãmri nhùm wa atã kêp Jejus ã omunh kurê kumrêx. Jao nhùm wa kêp akunok nhùm wa tee ýr xà kamã hapêr nhùm hkaprý mex nê xa. ³² Hãmri nhùm wa tee ri axpên pumu nê ri hkukamã hamaxpêr nê axpên mã:

—Hêxta waa nê. Xep tãm na. Tãm na pahkôt mõi nê pry hã hprí hã pamã Tirtüm kapêr ã kagã jarê pu hkôt pahkính nê mar o mõi. Hêxta waa nê. Xep tãm na. Anê.

³³ Hãmri nê wa kãnhmã xa nê kato nê ujanãr kurê kumrêx. Hãmri nê ma akupým Jerujarê hwýr wa hkwyjê hwýr tẽ. Nê mẽ hwýr pøj nê axà. Nhùm Jejus nhý hã mẽ ahkre ho mẽ pa xwýnh pê 11jaja ra axpên wýr akuprõ nê hkrí. Mẽ hkwyjê mẽ axpên wýr akuprõ nê axpên mã tanhmã Jejus jarënh to ho hkrí. Hãmri nhùm wa mẽ hwýr axà nhùm mẽ wa omu nê wa kãm:

—Kwa na xep ra Jejus akupým htír nê Simãw Pêtre hwýr kato. Anê.

Hāmri nhūm wa mẽ kuma nẽ mẽ kām:

—Tỳ na akupỹm htĩr kēnā. Na pa wa ijaxwỳja ham omu. Na pry hā wa ixtā ajēt nẽ ma wa ixkõt mō nẽ wa inhōrkwỳ kamā pōj. Hāmri pa mẽ ixàpkur kaxyw ixkrĩ nhūm pāwti py nẽ Tĩrtũm mā harē nẽ ho axkjē nẽ wa inhmā kugō pa wa ixprĩ hā kēp Jejus ā omunh kurē kumrēx. Ixprĩ hā omunh jao nhūm wa ixpē hapēx. Anē.

Jejus kot hkwyjē piitā hwỳr kator ā harēnh

Matēwre 28.16-17; Makre 16.14; Juāw 20.19-23

³⁶ Nhūm mẽ kormā axpēn mā Jejus jarēnh o hkrĩ rōm nhūm tām nhỹhỹnh mẽ hwỳr axà nẽ xa. Mẽ haēr pē mẽ hwỳr nhỹhỹnh axà nẽ mẽ kām:

—Pa? Xàn ka mẽ arĩ akrĩ? Anē.

³⁷ Hāmri nhūm mẽ amnhĩ jaēr pē omunh jao kànhmā hakry hpar o mra. Jao hakryk kām ma htỳx kām omunh o hkrĩ. ³⁸ Hāmri nhūm mẽ kām:

—Kwa mon ka mẽ amā ixpyma kamā tee ri ixpumunh o akrĩ? Kwa mẽ ixkarō hā ixkamnhĩx nẽ amā ixpyma hkēt nẽ. ³⁹ Na pa akupỹn inhĩ ho mẽ awỳr ixkato nẽ xa. Ga mẽ inhĩhkra kamā prek tatak xàja pumu. Nẽ ixpar kām omu. Kwa mẽ amā ixpyma hkēt nẽ. E mẽ māmri mra nẽ anhĩhkra ho ixkupē. Kēp apu ixkarō hpix ronhỹx ka mẽ inhĩ kupēnh kēt nẽ. Mo mẽhkarōja ĩ? Nà na pa akupỹm ixtĩr nẽ inhĩ ho mẽ awỳr ixkato. Anē.

⁴⁰ Hāmri nẽ mẽ kām amnhĩ nhĩhkra hpē nẽ mẽ kām amnhĩ par pē. ⁴¹ Tā nom nhūm mẽ arĩ akryk omunh o hkrĩ. Mẽ kot omunh nẽ hkĩnh tã tee ri omunh o hkrĩ. Hāmri nhūm tee ri ja hā mẽ omu nẽ mẽ kām:

—E kwa mẽ inhmā mẽmoj japēr pa kukrē. Anē.

⁴² Hāmri nhūm mẽ kām tep gōj kām āmta gō
⁴³ nhūm kupy nẽ hkur o nhỹ nhūm mẽ arĩ hā omunh o hkrĩ. Jao ra akupỹm htĩr ā omunh kurē kumrēx.

Jejus akupỹm nojarēt nẽ hkwyjē mā mẽmoj tã karō

Matēwre 28.18-20; Makre 16.15-18; määnēn Atre 1.6-8

⁴⁴ Hāmri nhūm Jejus hprĩ hā mẽ kām Tĩrtũm kapēr ā kagà htũm kot hkukamā harēnh ā amnhĩ jarē nẽ mẽ kām:

—Nà kormā ixtyk kēt ri na pa pre ixprĩ hā mẽ amā amnhĩ kukamā amnhĩ jarē. Tĩrtũm kapēr ā kagà htũm kot tanhmā mẽ kot inhĩpēx to hkukamā ijarēnhja. Na pre finat Mojes Tĩrtũm nhỹ hā ixkukamā tanhmā ijarēnh to. Nẽ Tĩrtũm nhỹ hā kapēr jarēnh o mẽ pa xwỳnhjaja Mojes mỳr pē haxwỳja ixkukamā tanhmā ijarēnh to. Nẽ Tĩrtũm mex o mex ā mẽ grer ā kagà xwỳnhjaja haxwỳja ixkukamā tanhmā ijarēnh to. Jajē piitā na prem Tĩrtũm kapēr ā kagà htũm kamā ixkukamā ijarē. ⁴⁶ Nẽ ijarēnh o:

Tĩrtũm kot mẽ pakaxyw ām xwỳnh pē Krisja koja nhỹrmā ty. Nẽ htyk o apkati axkrunēpxi nẽ akupỹm htĩr.

Anhỹr o mẽ kot ijarēnh. Tã pa ra mẽ kot ixkukamā ijarēnh xà hkõt ā mẽ anē amnhĩ nhĩpēx anē.

⁴⁷ —No ām Tĩrtũm kapēr ā kagà htũm kot papxipix ixkukamā ijarēnh kēt. Kamā määnēn mẽ kajaja tanhmā mẽ akukamā mẽ ajarēnh kute. Mẽ apē ixkõt amnhĩ xunhwỳr xwỳnhjaja ixwakre kamā tanhmā mẽ ate inhmā amnhĩ nhĩpēx to ho apa hkukamā tanhmā mẽ ajarēnh kute. Nẽ mẽ ajarēnh kot:

E mẽ ate ixkõt amnhĩ xunhwỳr xwỳnhjaja. Kēr ka mẽ ma pika piitā hkõt mẽ kām Tĩrtũm kot mẽ awỳr mēnh xwỳnhhta jarēnh o ri mẽ hkõt apa. Mẽ kot mẽ amar nẽ amnhĩ tomnuj kaga nẽ Tĩrtũm kõt amnhĩ xunhwỳr kaxyw. Kēr kē Tĩrtũm ja hā mẽ omu nẽ amnhĩ katut kõt mẽ kot amnhĩ tomnuj rēnh pa. E kēr ka mẽ ma krĩ piitā hkõt mẽ kām ā ja jarēnh anhỹr o ri mẽ hkõt apa. Krĩ pē Jerujarē kumrēx kām hāmri nẽ rĩ kormā pu hā krĩ kuhē xwỳnh piitā hkõt ajapōj nẽ mẽ kām harēnh o ri apa. Anē.

Ā Tĩrtũm kapēr ā kagà htũm kot mẽ akukamā mẽ ajarēnh kot anhỹr. ⁴⁸ Tã kēr ka mẽ ā mẽ kām tanhmā ijarēnh to ho ri apa anē. ⁴⁹ No ām kormā. Kēr paj ma akupỹm kaxkwa hwỳr api hāmri nẽ amnhĩ pānhā mẽ awỳr Tĩrtũm Karō rē mǎn. Tĩrtũm kot ixte amnhĩ nhĩpēx ā ijarēnh xà hkõt kot paj amnhĩ pānhā mẽ awỳr kurē. Tã kēr ka mẽ kormā krĩ ja kamā kutēp apa. Kēr kē mẽ awỳr wrỳ nẽ mẽ amā agjē ka mẽ rĩ kormā anghrà nẽ ma ĩ hā mẽ kām ijarēnh o ri mẽ hkõt apa. Anē.

Jejus kot akupỹm kaxkwa hwỳr àpir ā harēnh

Makre 16.19-20; määnēn Atre 1.9-11

⁵⁰ Tã nhūm Jejus Jerujarē rǔm hkõt mẽ pa ho pa xwỳnhjē kator nẽ ma krĩ pē Petān wỳr mẽ o mō. Nẽ kormā hwỳr mẽ o mōr ri nhỹri mẽ o xa nẽ kànhmā ĩhkra pē nẽ mẽ ho Tĩrtũm wỳ. ⁵¹ Ā mẽ ho hwỳr anhỹrja rōm nhūm Tĩrtũm amnhĩ wỳr ho àpir o mō nhūm mẽ noo mā ma akupỹm tēn api. ⁵² Hāmri nhūm mẽ kām mex o mex ā harēnh pē ma akupỹm àpir kām omunh o kuhē. Nhūm ma tē nẽ mẽ kēp kakrām axà nẽ mẽ kēp akunok. Hāmri nhūm mẽ awjanā nẽ ma akupỹm Jerujarē hwỳr hkĩnh nẽ pa. ⁵³ Hāmri nẽ apkati mẽ Tĩrtũm mā amnhĩ jarēnh xà hā ixkre hwỳr agjē nẽ kamā Tĩrtũm mā mex o mex ā harēnh o hkrĩ rāhā nẽ.

Tã ām ja pix ixkràmnhwỳ Teopre. Ixpē Rukre na pa awỳr kagàja nhĩpēx nẽ kamā Jejus kot tanhmā amnhĩ nhĩpēx to hā harē nẽ hā kagà nẽ awỳr kumē.

Juãw

Juãw na pre kagàja nhípêx. Na pre mãänên Wam Juãw nê Sikün Juãw nê Hapuhã Juãw nê Apokarip nhípêx. Juãw Paxis kêt axtem Juãw õ. Nê Jejus kôt mẽ pa ho mẽ pa xwýnhjê hõ na pre. Nê ý hã mẽ ahkre ho pa xwýnhjê hõ na pre. Nom kormã ã amnhĩ nhípêx anhýr o pa hkêt ri na pre kêt tep kanhêr xwýnh. Nê kêt Jejus kràmnhwý mex na pre. Jakamã na pre kagàja nhípêx nê kamã Jejus kot tanhmã amnhĩ nhípêx hã harê nê hã kagà. Nê tanhmã kapêr to hã kagà.

Na pre Jejus kêt Tirtüm Kra hã harê nê hã kagà. Nê ãm pix kukwak ri Tirtüm wa kuri mẽ pahťir tùm nê mẽ papa ho mẽ papa hã harê nê hã kagà. Æ na pre Juãwja mẽ pamã Jejus jarê nê hã kagà anê.

Jejus te kot Tirtüm pyrãk ã harênh

Matêwre 1.23; Juãw 8.12, 8.58, 10.30, 20.28; mãänên Atre 10.36; Sikün Korĩt 4.4; Piripos 2.6-11; Korosê 1.13-17, 2.9; Xitre 2.13; Eprêw 1.1-4; Wam Juãw 1.1-4, 5.20; Apokarip 1.17-18

1 Amnepê mã kormã mẽmoj kêt ri nhũm kot Tirtüm kapêr o amnhĩrit xwýnhja Tirtüm kôt pa ho pa. Te kêt urãk nê pa. Wa kot amnhĩ nhípêxja ãm tipxi. Nê wa àhpumunh ãm tipxi. Nê wa hkarõ mãänên ãm tipxi. Æm wa tipxi rãhã nê pa ho pa. ² Kormã mẽmoj kêt ri na pre Tirtüm kapêr o amnhĩrit xwýnhja Tirtüm kôt ri pa ho pa. ³ Nê Tirtüm nhý hã na pre mẽmoj piitã hã apê nê ho kato. Jao pyka ho kato nê kaxkwa ho kato nê gô xujanãr o kato. Nê kamã mẽmoj piitã Tirtüm nhý hã ho kator pa. Kop apu mẽmoj to kator kêt ronhýx mẽmoj amrakati kumrêx.

⁴ Nê Tirtüm o amnhĩrit xwýnhja pix kukwak ri na hte mẽmoj piitã hťir nê pa. Nê ãm pix kukwak ri na htem Tirtüm ri hťir tùm nê pa ho pa. Nê te myyti kot mẽ pamã mẽmoj piitã hirã ho pa pu mẽ kukwak ri mẽmoj piitã omunh mexja pyrã nê na pre hte mẽ pahpiitã mẽ pamã mẽ pahte amnhĩ nhípêx nyw nê mẽ pajamãxpêr nyw o amnhĩrit pu mẽ pahprĩ hã mar mex nê. ⁵ Ja kaxyw na pre wrý nê ri mẽ kãm Tirtüm kapêr jarênh o ri mẽ hkôt pa. Jao mẽ kot amnhĩ nhípêx nyw jarê nhũm mẽ kot amnhĩ tomnuj xwýnhjaja tee ri kuma nê kãm mar prãm kêt nê. Nê tee ri kãm kapêr o hapêx prãm kaprý.

Juãw Paxis kumrêx kot tanhmã Jejus jarênh to hã harênh

Matêwre 3.1-3; Makre 1.1-4; Rukre 3.2-6

⁶ Tã nhũm kormã Jejus mẽ kãm kapêr o pa hkêt ri nhũm Juãw Paxis kumrêx mõ nê hkukamã Tirtüm nhý hã mẽ kãm tanhmã harênh to ho pa. ⁷ Mẽ kãm mẽ kot amnhĩ nhípêx nyw nhõr xwýnh pê Jejus Kris kukamã mẽ kãm harênh o ri mẽ hkôt pa. Mẽ kot mar nê amnhĩ kaxyw Jejus kôt hamãxpêr kaxyw. ⁸ No Juãw Paxisja na pre hte mẽ kãm mẽ kot amnhĩ nhípêx nyw nhõr o pa hkêt nê. Na pre ãm kot mẽ kãm õr xwýnhja kukamã mẽ kãm harênh o pa. ⁹ Jakamã na pre hte mẽ kãm harênh o ri pa nê mẽ kãm harênh o:

—E ot pa mẽ amã mẽhõ jarênh o ri ixpa. Kot mẽ pamã mẽ pahte amnhĩ nhípêx nyw nhõr xwýnhja. Kojã tokyx mẽ pakamã pøj pu mẽ omu. Kojã pøj nê mẽ piitã mẽ kãm Tirtüm kapêr jarênh o ri pa. Mẽ pahte pahprĩ hã mar mex kaxyw. Anê.

Tirtüm kot mẽ ho hkra hprãm xwýnhjê jarênh

Rõmãn 8.14; Karatas 3.26; Epes 1.5

¹⁰ Tã nhũm Jejus man kot mẽmoj piitã ho kator xwýnhja wýr wrý nê mẽ hkôt ri pa. No nhũm mẽ kot kêt mẽmoj piitã ho kator xwýnh ã omunh kêt jakamã na prem kapêr ma nê ãm kuma nê amnhĩ kaxyw hkôt hamãxpêr kêt nê. ¹¹ Na pre wrý nê mẽ pakamã ĩ ho kato. Kêt mẽ pahpiitã mẽ pahto kator xwýnh tã nhũm mẽ ohtõ nê omu nê ãm omu nê hkôt amnhĩ nhípêx kêt nê. ¹² Na prem ãm grêre nê kuma nê amnhĩ kaxyw hkôt hamãxpêr nê hkôt amnhĩ xunhwý. Hãmri nhũm amnhĩ tã mẽ omu nê mẽ kãm:

—E nã ãm hãmri. Ra mẽ ate amnhĩ kaxyw ixkôt ajãmaxpêr nê ixkôt amnhĩ xunhwýr jakamã na ka mẽ ixkukwak ri apê Tirtüm kraa. Anê.

¹³ Na htem ã kêt Tirtüm kra hprãm xaj Jejus kôt amnhĩ xunhwýr anê. No na htem mẽ katorxã nhõxã hkre rüm hapõx kôt kêt Tirtüm kra hkêt nê. Rý amnhĩ krã hkôt tanhmã amnhĩ nhípêx to kukwak ri kêt hkra hkêt nê. Æm Tirtüm tãm kot mẽ ho hkra pix kukwak ri na htem kêt hkra.

Jejus wrýk nê ĩ ho kator ã harênh

Matêwre 1.20; mãänên Rõmãn 1.2-4; Piripos 2.6-7; Eprêw 2.9, 4.15; Wam Juãw 4.2

¹⁴ Jakamã na pre Tirtüm o amnhĩrit xwýnhja mẽ pahwýr wrý nê mẽ pakamã ĩ ho kato nê mẽ pakamã pa. Kêt Tirtüm Kra hã pixi mex na pre. Nê kot amnhĩ nhípêxja te Tirtüm kot amnhĩ nhípêx pyrãk. Urãk nê mex o mex. Nê urãk nê mẽ pakutã nojarêt xwýnh. Na pre hte katãt kôt Tirtüm kapêr jarênh o ri mẽ hkôt pa. Pa prem kuma nê mex o mex ã omu.

¹⁵ Nhũm Juãw Paxis na pre hkukamã mẽ kãm harênh o ri pa nê mẽ kãm:

—E ra ixte mẽ amã harênh o ri ixpa xwýnhja na ra pøj. Te pa ixte wa nê ixkator pyrãk nom amnepê mã

kormā ixkêt ri nhũm htír rāhā nē pa ho pa. Ham ĩ ho kator tā kēp Tirtũm Kra jakamā urāk nē rāhā ho rāhā hā pa xwýnh na. Jakamā kot amnhĩ to rax o kot ijakrenh par. Anē.

¹⁶ Nē kēp mē pakutā nojarēt rāhā nē pa ho pa xwýnh jakamā na hte mē pahto mex rāhā pu mē kukwak ri pamex nē ri papa ho papa.

¹⁷ Na pre finat Mojesja mē panhígêjtjē mā Tirtũm kapēr jarēnh o ri mē hkôt pa nē mē kām:

—Na pre Tirtũm mē pahte tām amnhĩ nhĩpêx o papa hā mē pamā karō. Jakamā kot puj mē kot mē pamā mēmoj tā karō xā hkôt ā amnhĩ nhĩpêx anhýr o papa nē ra tām amnhĩ nhĩpêx o papa. Anē.

Nhũm pre Mojesja ā mē kām kapēr o pa anē. Hāmri nhũm mē kuma no ām tee ri kām Tirtũm kôt tām amnhĩ nhĩpêx o pa hprām kaprý. Jakamā nhũm hpānhā Je- jus Krisja wrý nē mē pamā kapēr ō ho kapēr o pa nē mē pamā:

—E mē ate Tirtũm kôt amnhĩ nhĩpêx o apa hkêt tā nhũm arĩ kām mē ajapê nē. Nē kām mē ato mex prām. Jakamā kot kaj mē amnhĩ to awý nhũm tanhmā mē akrā hto ka mē ra tām ri amnhĩ nhĩpêx o apa. Ām hāmri na pa ā mē amā ja jarēnh anē.

Anhýr o mē pamā Tirtũm kapēr jarēnh o pa. Tirtũm kapēr na mex o mex.

¹⁸ Nē aa mē pahō mē pahte pano ho Tirtũm pumunh kêt. Ām Kraja pix na kot no ho omunh. Kaxkwa kamā kuri ri pa ho pa jakamā kot omunh mex. Nē te kot Hipêxàja pyrāk jakamā na pre wrý nē hprĩ hā tanhmā kute hā mē pamā harēnh o pa. Jakamā na pu mē ra pahpiitā Tirtũm kot amnhĩ nhĩpêx ā omu nē mar mex nē.

Juāw Paxis kot mē kām Jejus jarēnh o pa hā harēnh

Matêwre 3.1-12; Makre 1.1-8; Rukre 3.15-17; määnēn Atre 19.4

¹⁹ Na pre Juāw Paxis ma hkwyjê hkôt mē kām Jejus jarēnh o pa nhũm mē hkwyjaja kuma nē amnhĩ kaxyw Jejus kôt hamaxpēr nē hkôt amnhĩ xunhwý. Hāmri nhũm Juāw Paxis ja hā mē omu nē Tirtũm mā mē hkrā kumrā. Pyhti pē Jotāw nhĩkjê hā krĩ pē Petān tā ri mē hkrā kumrār o pa. Hāmri nhũm krĩ pē Jerujarē kamā Ijaew krāhtũmjaja harēnh ma nē ma hwýr hkwyjê rē. Mē kot tanhmā hkukjêr to nhũm kot mē kām tanhmā amnhĩ jarēnh to kaxyw. Jakamā nhũm mēō patre hkwyjê mē Tirtũm mā amnhĩ jarēnh xā hā ixkre kamā mē ho ajuta xwýnh kwýjê mē Parijew nhō xwýnh kwýjê mē nhũm mē ma hwýr mra. Juāw Paxis wýr mra nē omu nē kām:

—Pa. E ot pa mē awýr mra. Kwa mē inhmā amnhĩ jarē. Apê mē atō na ka we? Xā ka na apê Tirtũm kot mē ixkaxyw axām mā xwýnhhta na ka nà? Xā ka na pa htem amnhĩ wýr akamā ijamak o ixpa? Anē.

Hāmri nhũm mē kuma nē mē kām: “Nà pa hkêt.” Anē hāmri nhũm mē kām:

—Tō mǎn xep apê amnepê mā Tirtũm nhỹ hā kapēr jarēnh xwýnh pē finat Erisja. Hā na ka tanhmā amnhĩ to nē akupým atír nē mē ixkôt apa nà? Anē.

Hāmri nhũm mē kām:

—Nà ixpê Eris kêt. Anē.

Hāmri nhũm mē kām:

—Tō mǎn xep apê finat Mojes kot mē kām harēnh o pa xwýnhhta na ka nà? Anē.

Hāmri nhũm mē kuma nē kē axte mē kām:

—Nà ixpê tām kêt. Anē.

Hāmri nhũm mē tee ri kot ā amnhĩ tā aprār anhýrja ma nē kām:

—Kwa apê jajê hō hkêt tā na ka hte mē hkrā kumrār o ri apa. Kwa nà akatāt kôt mē inhmā amnhĩ jarē. Pa mē ama nē ma akupým mra nē mē kot awýr mē ixrēnh xwýnhjê mā tanhmā ajarēnh to. Tanhmā na ka hte mē kām amnhĩ jarēnh to ho ri apa? E kwa mē inhmā amnhĩ jarē pa mē ama. Anē.

Hāmri nhũm tā hprĩ hā mē kām amnhĩ jarē. Amnepê mā mē hkukamā Tirtũm nhỹ hā kapēr jarēnh xwýnh pē finat Ijais kot hkukamā tanhmā harēnh to nē hā kagā xā hkôt nhũm mē kām amnhĩ jarē nē mē kām:

—Tōe. Nà kot paj ixprĩ hā mē amā amnhĩ jarē ka mē inhma. Amnepēm Tirtũm kapēr jarēnh xwýnhjê hō pē finat Ijaisja na pre hte mē kām mēhō hkukamā harēnh o ri pa. Mēhō kot mē panhō Pahihti hkukamā htēm nē kapôt ā kutêp mē kām harēnh o pa xwýnhhta nhũm pre hkukamā harēnh o ri pa. Nē mē kām harēnh o:

Koja nhýrmā mēhōja kapôt ā mōn pōj nē mē kām tanhmā ujarēnh to ho ri pa. Nē mē kām ujarēnh o: “E mē inhma. Koja Tirtũm tokyx mē pahwýr mē panhō Pahihti mē nhũm wrý nhũm mē piitā omu. Jakamā kwa mē tokyx kutêp tām amnhĩ nhĩpêx o ri apa. Te ho mē kot mēhō kutêp pry ho mex pyrāk o amnhĩ nhĩpêx o ri pa. Jao amnhĩ nhĩ ho tām amnhĩ nhĩpêx nē tām axpēn nhĩpêx o ri apa. Pahihtita kutêp.”

—Anhýr o na pre hte finat Ijaisja kot Pahihti hkukamā harēnh o ri pa xwýnhhta kukamā harēnh anē. Tā paa. Pa na pre Ijaisja ā ixkukamā ijarēnh anhýr o pa. Pa na pa hte ā Pahihti kutêp mē kām harēnh o ri ixpa anē. Tā ā ixte harēnh anhýr xwýnhhta na ra mē pakamā pa ka mē kormā ja hā omunh kêt nē. Kukamā na pa hte mē piitā mē kot hkôt amnhĩ xunhwýr ā mē omunh kaxyw gō pix o mē hkrā kumrār o ri mē hkôt ixpa. Nom na pre ra mē pahwýr Tirtũm kot mē pakaxyw ām xwýnhhta tām mē pahwýr wrý. Àhpumunh tỳx o kot ijakrenh jakamā na pa hte ām kukwak ri ixpa nē amnhĩ tā hā ixpijaam o ri ixpa. Anē.

Juāw Paxis kot mē kām Jejus jahkre hā harēnh

Matêwre 3.11; Makre 1.10; Rukre 3.22

²⁹ Tā nhũm apkati nhũm Juāw Paxis amnhĩ wýr Jejus pumu nē mē kot mar o kuhê xwýnhjê mā ĩhkra ho ahkre nē mē kām:

—E. Oněj Tirtũm kot mē pakaxyw ām xwýnhhta tē. Mē pahpê Ijaew na pu htem xatā pahte amnhĩ tomnuj pānhā amnhírer kaxyw Tirtũm mā pahkrit ôwêhti hkra nyw kwý hpa nē ho amnhĩ pānhā kām amnhírer o pa. No kêt htēm nēj koja nhýrmā kām mē pahpiitā mē pahte amnhĩ tomnuj pānhā amnhírer pa. ³⁰ Na pa pre ra mē amā harēnh o: “Te pa ixte wa nē ixkator nē ixtír nē ixpa pyrāk. Nom amnepēm kormā ixkêt ri na pre

htír rāhā nē pa ho pa. Nē ī ho wrýk nē jar kator tā kēp Tirtūm Kra jakamā urāk nē rāhā nē pa ho pa xwýnh na. Jakamā kot amnhī to rax o kot ijakrenh par." Anhýr o pa pre mē amā harēnh o ri ixpa ka prem inhma.

³¹ —Ixte mē amā ā harēnh anhýr tā ijaxwýja kormā ixte kēp Tirtūm Kra hā omunh kēt nē ām hkukamā Tirtūm nhý hā mē amā ā harēnh anhýr o ri ixpa. Nē hkukamā Tirtūm mā mē akrā kumrār o ri ixpa. Tā na pa kēp Tirtūm Kra hā omu nē ā mē amā ahkre anē ka mē omu. Anē.

³² Nhūm pre ā Juāw Paxis mē kām Jejus jahkre anē nē mē kām:

—Nà Tirtūm na pre ixte mē akrā kumrār o ixpa kaxyw inhmā hā karō. Tā na inhmā kot mē pakaxyw ām xwýnhta o amnhīrīt nē inhmā harēnh o: "Koja nhýrmā Ixkarōja mēhō hwýr wrý nē kuri arík. Ka ja hā omu nē kēp Ixkra hā omunh kurē kumrēx. Koja amnhī xō ri amnhī pyrā nē mē kām Ixkarō nhōr o pa nhūm mē hkarō mā agjē." Anhýr o inhmā harē. Tā na pa ra omu. Na pre Tirtūm Karō kaxkwa rūm te tuuti pyrā nē hwýr wrýk o tē nē ĩkre hā xa. ³⁴ Pa ā kot hipēx anhýr ā omu nē kēp Tirtūm Kra hā omunh kurē kumrēx. Jakamā na pa ā mē amā ahkre nē mē amā harēnh anē. Anē.

Juāw Paxis kōt pa xwýnh wa kot Jejus kōt pa hā wa harēnh
Atre 19.4

³⁵ Tā nhūm apkati nhūm Juāw Paxis axte Jejus pumu. Kot hkōt ri pa ho pa xwýnh mē wa nhýri xa nē omunh o xa. ³⁶ Nhūm ra mē hānh tē nhūm Juāw Paxis omu nē hkōt ri pa xwýnh wa kām:

—E onēj Tirtūm kot mē pakaxyw ām xwýnhta tē. Nēj koja mē pahte amnhī tomnuj pānhā amnhīre. Anē.

³⁷ Hāmri nhūm wa kuma nē omu nē ma hkōt tē nē hā ajēt. ³⁸ Nhūm wa omu nē wa kām: "Pa mo na?" Anē nhūm wa kot kēp mē ahkre xwýnh ā omunh jakamā kām:

—Nà wa ixte ma akōt ixtēm nē nhýri anhōrkwý pumunh mā na pa wa akōt tē. Anē.

³⁹ Hāmri nhūm wa kām:

—Tōe. Nà wa kam nē rī ma ixkōt tē. Anē.

Hāmri nhūm wa kuma nē ma hkōt wa tē nē ōrkwý hwýr pōj nhūm ra amýkry nhūm wa hkōt axà nē kuri ýr o kamàt hāmri nē kato nē ma akupým tē. ⁴⁰ Kōt htēm xwýnhjē hōta na pre kēp Andre. Simāw Pētre htō na pre. Nē kaxyw hōja. Wa kumā na pre Juāw Paxis Jejus jahkre nē harē nhūm wa ma hkōt tē. Tā wa ra akupým wa tē. ⁴¹ Hāmri nhūm Andreja htō Simāw wýr tē nē kām:

—Kwa na pa wa jarāhā Tirtūm kot mē pakaxyw ām xwýnhta pumu. Ma pu hwýr ka wā ixwar ano ho omu nà. Anē.

Ijaew kapēr kām "Tirtūm kot mē pakaxyw ām xwýnh" anhýrja te kot Gres kapēr kām "Kris" anhýr jarēnh pyrāk. Ijaew na prem ā Jejus jarēnh anē nē harēnh o: "Tirtūm kot mē pakaxyw ām xwýnh." Anhýr o harē.

⁴² Jakamā nhūm ā Andreja htō mā harēnh anē nē ma

akupým hwýr o tē. Nē wa hwýr pōj nhūm wa omu. Wa kēp Juāw kra hā wa omu hāmri nē Simāw mā kapēr nē kām:

—Pa Simāw. Nà apē Simāw tā kot paj axte atā anhīxi hō mē. Kot kaj määnēn apē Septi. Anē.

Mē pakapēr kām Septija te kēp "kēn" jarēnh pyrāk. No Gres kapēr kām te kēp "Pētre" jarēnh pyrāk. No Ijaew kapēr kām kēp "Septi." Jakamā nhūm pre Jejus ā Simāw Pētre hā hixi mēnh anē.

Jejus kot amnhī kōt Firipti mē Natānaew wa hwýr ā harēnh

⁴³ Tā nhūm apkati nhūm ra Jejus pyka pē Garirej wýr nojarēt nē nhýri Firipti pumu. Firiptija Andre mē Simāw Pētre wa urāk nē krī pē Pesēj nhō xwýnh na pre. Jakamā nhūm Jejus nhýri omu nē amnhī kōt kuwý nē kām:

—E kwa ma ri ixkōt apa ho apa. Anē.

⁴⁵ Hāmri nhūm kuma nē ma tē nē nhýri Natānaew pumu nhūm nhýri pī hpār parpē nhý nhūm omu nē kām:

—Kwa na pa jarāhā finat Mojes kot amnepēm mēhō hā kagà xwýnhta pumu. Tirtūm kot mē pakaxyw ām xwýnhta na. Tirtūm nhý hā kapēr jarēnh o mē pa xwýnhjaja kot hkukamā harēnh nē hā kagà xwýnhta. Kēp Najare nhō xwýnh nē määnēn kēp finat Juje hkra. E kwa tokyx pu hwýr ka ixkuxwar ano ho omu. Anē.

⁴⁶ Hāmri nhūm tee ri kot tanhmā harēnh toja ma nē kām:

—Tk. Koký. Najare nhō xwýnh piitā kot amnhī to mexti hā kot kēt we hō kēp Tirtūm kot mē pakaxyw ām xwýnh. Anē.

Hāmri nhūm kām:

—Kwa nà ā akapēr anhýr kēt nē. Ma ixkōt tē nē ixpyrā nē ano ho omu mǎn. Nē rī ā ri akapēr anē. Anē.

Hāmri nhūm kuma nē ma hkōt tē. ⁴⁷ Hāmri nhūm Jejus amnhī wýr wa omu nē kuri mē kuhē xwýnhjē mā Natānaew jarēnh kurē kumrēx nē harēnh o:

—E onēj Ijaew ōja mē pahwýr hpōx o tē. Ām hāmri na hte tām amnhī nhīpēx o pa. Na hte higēt finat Jako kurom hēx rom ri tanhmā mē kām amnhī to hēx to ho pa hkēt nē. Na hte ām kapēr mex pix o ri kapēr o pa. Anē.

⁴⁸ Hāmri nhūm tee ri amnhī tā kuma nē kām:

—Kwa mēhō na pre ā amā ijarēnh anē? Aa ixte nhýri apumunh kēt kumrēx tā ka ri ām hāmri ā ijarēnh anē. Anē.

Hāmri nhūm kām:

—Nà mēhō kot tanhmā inhmā ajarēnh to hkēt. Ām pa na pa hte inhno ho apumunh o ixpa. Kormā Firipti kot awýr htēm nē amā ijarēnh kēt ri pa ra ixprī hā inhno ho apumu. Na ka kormā pīta parpē nhý pa apumu. Anē.

⁴⁹ Hāmri nhūm tee ri kot hprī hā harēnh ā amnhī tā kuma nē kām:

—Kwa mē ijahkre xwýnh. Pēr ām hāmri apē Tirtūm Kra kumrēx jakamā na ka ā ijarēnh anē. Xep ka na mē

ixte amnhĩ wýr akãm ijamak o ixpa xwýnhhta na ka. Nà ka na apê mẽ ixpê Ijaew nhõ Pahihti. Anê.

⁵⁰ Hãmri nhũm Jejus kuma nê kãm:

—Nà ãm hãmri na ka ixte pĩ hpar pê apumunh ã ajarênhja ma nê hkõt pix mã ixpê Tirtũm Kra hã ixpumu. Tã kot kaj ja nhĩrõ pê axte mẽmoj mex o kot ja jakrenh pumu. ⁵¹ Koja nhỹrmã kaxkwa axkjê nhũm Tirtũm kapêr o mẽ wryk xwýnhjaja kurũm axpên japa ka mẽ omu. Finat jako pyrã nê mẽ omu. Ixte Tirtũm kot mẽ akaxyw ixãm xwýnh wýr koja mẽ ã wryk nê amnhĩ nhĩpêx anê ka ja hã mẽ omu. Kwa jam ajamaxpêr tỳx rãhã ho apa. Anê.

Jejus kot gô ho mẽ kãm wĩhti nhĩpêx ã harênh

2 Tã nhũm apkati axkrut nê hapêx nhũm Jejus arĩ Garirej kamã pa. Nhũm krĩ pê Kanã kamã axpên mã wahõj wa rer kaxyw nhũm Jejus katorxã ma mẽ hwýr mō. ² Hãmri nhũm mẽ amnhĩ wýr Jejus mẽ hkõt ri mẽ ixpa xwýnhjê wý pa mẽ ijaxwýja ma mẽ hwýr mō nê ra mẽ hwýr pōj. ³ Hãmri nê mẽ hkõt wa hã ixkĩnh nê apku nê wĩhti hkwy ho ixkõm o ixkrĩ. Tã nhũm ra wĩhti mẽ kêp hapêx nhũm Jejus katorxãja harênh ma nê Jejus mã harê nê kãm:

—Xê Jejus. Na xep ra mẽ kêp wĩhti hapêx pa. Xàt ka tanhmã mẽ ho ajuta hto mẽ? Anê.

⁴ Hãmri nhũm kãm:

—Tõe. Kwa tee ri ajamaxpêr kêt nê. Kot paj tanhmã mẽ kãm ho. Nom kot paj kormã ixpê Tirtũm kot mẽ akaxyw ixãm xwýnh ã pa kormã amnhĩ to amnhĩrit kêt nê. Anê.

⁵ Hãmri nhũm katorxã kuma nê mẽ kãm mẽ àpênh xwýnhjê hwýr tẽ nê mẽ kãm:

—An koja Jejus mẽ awýr tẽ nê tanhmã mẽ amã mẽmoj tã karõ hto ka mẽ ama nê kãm ho anhýr kurê kumrêx. Anê.

⁶ Nhũm mẽ kuri kên o poti kêp 6 nê kuhê. Piitã umpým rũnh kumrêx. Koja hõ pyxi nê nýt nê kamã gô kêp 80 rit nê hkwy kamã kêp 100 rit. Ijaew na htem apkur kaxyw nê amnhĩ nhĩhkra kuhõnh jappê rũnh nê kormã apku. Nê apkur pa nê axte amnhĩ nhĩhkra kuhõ. ã mẽ kot xatã amnhĩ nhĩhkra kuhõnh jakamã nhũm pre htem amnhĩ ri ã poti rũnh kwý xunhwýr anê. No nhũm ra hkaprý nê kuhê. ⁷ Hãmri nhũm Jejus tẽ nê omu mẽ àpênh xwýnhjê mã kãm:

—E mẽ ma mra nê gô ru nê ho poti kuhê mũj piitã ho nýt pa. Anê.

Nhũm mẽ kuma nê ma mra nê ho nýt pa. ⁸ Hãmri nhũm mẽ kãm:

—Nà hãmri. Pãnhã hõ kamã gô hkwy janhi nê o tẽ nê mẽ anhõ patrãw mã agõ kê hkwy ho ixkõ nê kamã ama. Anê.

Hãmri nhũm mẽ mar xà hkõt kãm hkwy janhi nê hwýr o tẽ nê kãm kugõ. ⁹ Nom nhũm gôja arĩ kêp gô kumrêx kêt nê. Jejus kot tanhmã ho jakamã nhũm ra hpãnhã kêp wĩhti. Jakamã nhũm mẽõ patrãw wýr hkwy ho tẽ nê kãm kugõ nhũm hkaki nê kamã ama. Nom Jejus kot gô ho hipêx ã omunh kêt nê. ãm htỳx ho wĩhti kumrêx ã hkamnhĩx nê mex kumrêx ã hkaki. Hãmri nê

amnhĩ wýr mjên nyw xwýnh mã hpa ho apê nhũm hwýr tẽ nhũm kãm:

—Kwa na htem wĩhti mex o wa nê mẽ kãm kugõ hãmri nhũm mẽ hpenh pa nhũm mẽ rĩ kormã hkõt omnu ho hapu nê mẽ kãm kugõ. Tã ka pêr mẽ axtem nê wam mẽ kãm omnu nhõr pa hãmri nê kormã mex kumrêxja o hapu nê mẽ kãm agõ. Kêt wĩhti ja na mex kumrêx. ãm mex o mex. Anê.

Jejus kot gô ho hipêx ã omunh kêt jakamã nhũm ã kãm kapêr anê. ãm mẽ àpênh xwýnh pixjaja na prem ja hã omu. ¹¹ Nhũm Jejus kormã mẽ kãm aa mẽ kot mẽmoj pumunh kêt õ ho anhýr kêt tã krĩ pê Kanã kamã ã mẽ kãm amnhĩ nhĩpêx anhýr o hkrax. Jao amnhĩ to rax o amnhĩ to rax ã mẽ inhmã amnhĩ to amnhĩrit. Pa mẽ ixpê hkõt ri ixpa xwýnhjaja ã kot amnhĩ nhĩpêx anhýr ã omu hãmri nê kêp Tirtũm kot mẽ pakaxyw ãm xwýnh ã omunh kurê kumrêx.

¹² Tã nhũm Jejus hpãnhã ma krĩ pê Kapanãũ hwýr mō. Pa mẽ hkõt ri ixpa xwýnhjaja nê katorxã nê htõjaja pa mẽ ma ixpiitã hkõt mō. Hãmri nê hwýr pōj nê kamã mẽ hkõt ixpa hã ixtã apkati grêre nê ma hpãnhã krĩ hõ hwýr ixpa.

Jejus kot Tirtũm nhõrkwý hwýr àr ã harênh

Matêwre 21.12-13; Makre 11.15-19; Rukre 19.45-46

¹³ Tã nhũm ra arĩgro pê Pas ahtêp o mō. Pasja ã mẽ ixpê Ijaew na pa htem amnepêm Tirtũm kot pika pê Ejit rũm mẽ inhĩgêjtê kator mã ijamaxpêr kaxyw axpên wýr akuprõ nê hã ixkĩnh. Jakamã nhũm Jejus ma hkwyjê hkõt krĩ pê Jerujarê hwýr mō. Pa mẽ ixpê hkõt ri ixpa xwýnhjaja pa mẽ ma hkõt ixpa. Hãmri nê hwýr pōj ¹⁴ nê Tirtũm mã amnhĩ jarênh xà hã ixkre hwýr mra nê ixkre puhã kahêja wýr agjê. Nhũm mẽ kamã axtem nê mẽmoj to wênê ho kuhê. Mõx o wênê nê õwêhti ho wênê nê tutre ho wênê ho kuhê. Mẽ kot haprõr nê ho Tirtũm mã hkĩnh xà kaxyw mẽ kãm ho wênê. Nê kàxpore ho pinhpanh xwýnhjaja haxwýja mẽ kuri hkrĩ. ¹⁵ Hãmri pa mẽ Jejus kõt mẽ hwýr agjê nê ja hã mẽ omu hãmri nhũm Jejus pê ja omnuy tỳx nê. Jakamã nhũm tee ri mẽ omu hãmri nê amnhĩm mry hkã ho mẽ htak xà nhĩpêx nê ho ixkreja nê mẽ piitã mẽ kator pa. Nê mōx nê õwêhti nê mẽmoj piitã kator pa. Nê kàxpore ho pinhĩpanh xwýnhjaja nhũm mẽ kêp mẽ õ mẽsti rênh pa nhũm mẽ hikàxpore pykap rôrõk pa nê anghrà nê hikwý. ¹⁶ Hãmri nhũm Jejus tutre ho wênê xwýnhjê mã kãm:

—Kwa mẽ anhõ tutre jamý nê tokyx ma mra. Na htem Inhĩpêêxà nhõrkwý kamã mẽmoj to wênê hkêt nê. Kêp mẽ ujaaprõr xà hã ixkre hkêt. E kwa mẽ tokyx ma mra. Anê.

Nhũm pre ã mẽ kãm kapêr anê nhũm mẽ tee ri kuma hãmri nê ma mrar kurê kumrêx. ¹⁷ Pa mẽ hkõt mẽ ixpa ho ixpa xwýnhjaja ã kot mẽ hipêx anhýr ã omu hãmri nê ra Tirtũm kapêr ã kagà htũm kot ã amnhĩ nhĩpêx anhýrja kukamã hã kagàta mã ijamaxpêr kurê kumrêx. Kagà kot amnepêm Jejus kukamã te ra ã kapêr anhýr pyrãk o harênh. Nê harênh kot:

Na pa hte Tirtüm nhörkwý ho mex rãhã ho ixpa. Nhüm mëmoj punuj hwýr axà pa omu nhüm ja inhmã mex kêt në. Anhýr o kot hkukamã harënh jakamã na pa më ã Jejus kot më hipêx anhýrja ã omu hãmri në ra hkukamã hã kagàta mã ijamaxpër kurê kumrëx.

Ijaew krãhtümjaja kot Jejus kukjêr ã më harënh

¹⁸ Tã nhüm Ijaew krãhtümjaja tee ri Jejus kot ixkreja në më kator ã omu hãmri në hwýr mra në kãm:

—Pa. Kwa mon ka ri ã Tirtüm mã amnhí jarënh xà hã ixkreja në më kator anê? Mëhõ na we më ixwýr amê ka ý hã ã më hipêx anêhti? Nà xà Tirtüm na më ixwýr amê? E më inhmã aa më ixte mëmoj pumunh kêt õ ho anê. Pa më ja hã apumu hãmri në Tirtüm kot më ixwýr amënh xwýnh ã apumunh kurê kumrëx. E kwa tokyx më inhmã ho anê. Anê.

¹⁹ Hãmri nhüm më kuma në më kãm amnhí jarê. Nom amnhí tã kuxi në më kãm awjarê në më kãm:

—Nà kot paj aa më ate mëmoj pumunh kêt õ ho pixi në më amã ho anê ka më omu. Tirtüm nhörkwý jaa. Kot kaj më agrà pa ixtã apkati axkrunëpxi në akupým hipêx ka më ja hã ixpumu.

²⁰ Anhýr o më kãm kapër. No ãm ixkreja jarënh kêt në. Na pre ãm amnhí tã kuxi në ã më kãm kapër anê. Më kot hpír nhüm htyk ã apkati axkrunëpxi në akupým htír ã më kãm ã amnhí jarënh anê. Te më kot Tirtüm mã amnhí jarënh xà hã ixkreta grành nhüm hã apkati axkrunëpxi në akupým kot hipêx parta pyrãk ã hã kuxi në ã më kãm amnhí jarënh anê. Jakamã nhüm mëhprí hã mar mex kêt në. ãm tee ri kuma në kãm:

—Tk. Kwa ixkre ja na prem hipêx kaxyw në hã amgrà xohtõ rax në hipêx. Hã amgrà pê 46 në hipêx par kênã kot ka kêt atã apkati axkrunëpxi pix në akupým hipêx. Anê.

Më kot hprí hã mar kêt jakamã na prem ã kãm kapër anê. Pa më hkõt më ixpa ho ixpa xwýnhjaja ã më kãm kapër anhýrja ã kuma në hã inhnohtýx rãhã ho ri ixpa. Tã nhüm më kot Jejus píř nhüm hã apkati axkrunëpxi në akupým htír nhõ arígrota ã pa më kot ã amnhí jarënh anhýrja mã ijamaxpër kurê kumrëx. Nê axpën mã:

—Hêxta waa në. Xep ãm hãmri na pre Pahihti amnhí kukamã ã amnhí jarënh anê. Më kot hpír nhüm htyk ã apkati axkrunëpxi në akupým htír ã amnhí kukamã amnhí jarënh mex në. Te më kot Tirtüm nhörkwý grành par nhüm hã apkati axkrunëpxi në akupým hipêx ã amnhí jarënh pyrãk. ãm hãmri na pre amnhí kukamã ã amnhí jarënh anê. Anê.

Jejus kot më pajamaxpër kôt më pahpumunh ã harënh

²³ Tã nhüm Jejus më hkõt më ixpa ho ixpa xwýnhjaja arí Jerujarê kamã ri ixpa ho ixpa. Nhüm ra arígro pê Pasja kato nhüm më piitã hkính kaxyw axpën wýr akuprõ. Nhüm Jejus më kãm aa më kot mëmoj pumunh kêt kwý ho anhýr o ri më hkõt pa. Nhüm më omu nhüm më hkwyjaja Tirtüm kot më pakaxyw ãm

xwýnh ã hkõt hamaxpër tã no ãm hkõt hamaxpër týx kêt në. ²⁴ Jakamã nhüm Jejus amnhí tã më hamaxpër ã më omu në hamaxpër o:

—Nà më kot ixkõt hamaxpër kryre xwýnhjaja koja më hã apkati grêre në ixto hamakêtkati në htýx ri pa. Anê.

²⁵ Jejus kot më pahte pahtýx ri amnhí tomnuj o papa hã më pahpumunh par. Nê pahtýx ri pajamaxpër punuj o papa hã më pahpumunh par. Jakamã na pre ã më harënh anê.

Jejus më Níkotë wa kot axpën mã kapër ã wa harënh

Juãw 1.12-13; mãänën Wam Pêtre 1.23

3 Tã nhüm Parijew nhõ xwýnhjê õ pê Níkotë. Mãänën kêp Ijaew krãhtümjê hõ. ² Jakamã na pre Jejus jarënh ma në kãm omunh prãm në. Hãmri në hk-wý pymaj kamãt kãm hwýr tã në omu në kãm:

—Pa më ijahkre xwýnh. E ot pa awýr tã. Ra më ixte apumunh mex. Tirtüm na pre ate më ijahkre ho apa kaxyw më ixwýr amê ka më ixwýr wrý. Mëhõ koja apyrã në aa më inhmã më kot mëmoj pumunh kêt kwý ho anhýr o pa? Nà amrakati kumrëx. Kop apu Tirtüm kot më ixwýr amënh kêt ronhýx ka ã amnhí nhípêx anhýr kêt në. Anê.

³ Hãmri nhüm kuma në tanhmã kãm kapër to. No ãm amnhí tã kuxi në kãm awjarê në kãm:

—Na htem piitã më katorxà nhõxà hkre rüm hapõj. Tã Tirtüm kãm më piitã axte më hapõx prãm. Jakamã kot kaj më akator o axkrut kêt në hãmri në nhýrmã Tirtüm ri atír tùm në apa ho apa hkêt në. ãm hkrajê pix na htem kuri htír tùm në pa ho pa. Jakamã kwa jam ajamaxpër týx në ri ho apa. Anê.

⁴ Hãmri nhüm Níkotëja kuma në tee ri ã kot kãm kapër anhýrja kukamã hamaxpër në kãm:

—Kwa ra ixãptàr kênã kot pa kêt tanhmã amnhí to në akupým ixkatorxà nhõxà hkre hwýr axà në axte kurüm ixkato. Anê.

⁵ Hãmri nhüm Jejus kãm:

—Nà na hte më hkrarejaja më katorxà nhõxà hkre rüm kagõ hkõt hapõj hãmri në kêp katorxà më hipêxà wa hkwyý. Jao wa kot amnhí nhípêx kôt amnhí nhípêx o pa. Ja pyrã në ka më atõ amã apê Tirtüm kra hprãm hã kot kaj amnhí to awý nhüm wa Ixkarõja akarõ mã axà hãmri ka ra apê hkraa. Te ra axte akator pyrãk o amnhí nhípêx. Nê te më hkra kot katorxà në hipêxà wa kot amnhí nhípêx kôt amnhí nhípêx o pata pyrã në apãm Tirtüm kot amnhí nhípêx kôt amnhí nhípêx o ri apa. Nom koja Tirtüm më wa Ixkarõja akarõ mã àr kêt në ka apê hkra hkêt në. Jao te axte akator kêt pyrãk o amnhí nhípêx. Jakamã na pa amã te ate akator pijakrut o amnhí nhípêx pyrãk o amã ã ja jarënh anê. Kwa jam ajamaxpër týx rãhã ho ri apa. No ama në tee ri amnhí kukamã ajamaxpër kêt në.

⁸ —E pa ixprí hã amã ja jarê ka inhma. Na hte kók kãm nhýhým àpêr prãm xà hkõt àpêr o pa. Pu më kamã ama no ãm pano ho nhýhýnh mör xà hkõt omunh kêt në. Nê nhýhým ma mör xà hkõt omunh kêt në. Ja pyrã në na hte Tirtüm më wa Ixkarõja më

hkaxwŷnh mã agjê nê mẽ ho Tirtũm kra nom nhũm mēhprĩ hã kot tanhmã mẽ ho hã amnhĩ tã omunh kêt nê. Anê.

⁹ Hãmri nhũm Nĩkotê ã Jejus kot kãm kapēr anhỹr ã kuma nê tee ri hamaxpēr nê kãm:

—Kwa na pa ixprĩ hã amar kêt nê. Anê.

¹⁰ Hãmri nhũm kãm:

—Kwa mon ka hte Tirtũm kapēr tũm o Ijaew jahkre ho apa tã aprĩ hã ixkapēr mar kêt nê? ¹¹ Ixte mẽmoj pumunh xà hkôt ixte mẽ amã harēnh o ixpa htã ka mẽ apê Ijaew krãhtũmjaja mẽ amã ixkapēr mar prãm kêt nê. ã mẽ ate anhỹr kumrēx. Kwa jam ajamxpēr tỹx nê. ¹² Na pa ra Tirtũm kot jar tanhmã amnhĩ nhĩpêx to hã harēnh o ixpa htã ka mẽ ãm ama nê ixkôt ajamxpēr kêt nê. Jakamã xà kot pa hpãnhã mẽ amã kaxkwa kamã tanhmã kot amnhĩ nhĩpêx to hã harē ka mẽ ama nê mar tỹx nê? Nà kot ka mẽ ama nê ãm ama nê hkôt ajamxpēr kêt nê. ¹³ Mēhõ na we ra ma kaxkwa hwỹr api nê kamã mẽmoj mex pumu nê man akupỹn mẽ awỹr wrỹ nê mẽ amã tanhmã harēnh to? Nà amrakati kumrēx. ãm paxipix ixpê Tirtũm kot mẽ akaxyw ixãm xwỹnh na pa pre amnê kurũm mẽ awỹr wrỹ hãmri nê ixprĩ hã mẽ amã tanhmã harēnh to ho ri ixpa.

¹⁴ —Amnepēm finat Mojesja kormã kapõt ã mẽ o pa ri na pre mẽ kãm kax o kagã karõja nhĩpêx nê kỹxpê mẽ kãm kunhõ. Kagã kot mẽ hkamnar xwỹnhjaja kot hwỹr rĩt nê omunh nê akupỹm mex kaxyw mẽ kãm kunhõ. Tã ixpê Tirtũm kot mẽ akaxyw ixãm xwỹnh kot paj nhỹrmã kagã karõta pyrã nê kỹx pê pĩ kahpa hã ajêt. ¹⁵ Ka mẽ te mẽ kot kagã karõ pumunh nê akupỹm mexta pyrã nê amnhĩ kaxyw inhmã ajamxpēr nê ixkôt amnhĩ xunhwỹr hãmri nê nhỹrmã Tirtũm mẽ wa ixri atĩr tũm nê amex rãhã nê apa ho apa.

¹⁶ —Tirtũm kãm pika piitã hkôt mẽ apiitã mẽ ajapê htỹx. Nê mẽ ajapê xaj na pre ixpê Kra hã ixpyxi hã mẽ awỹr inhmẽ. Ka mẽ atõ amnhĩ kaxyw ixkôt ajamxpēr nê ixkôt amnhĩ xãm. Hãmri nê nhỹrmã atyk tã nhũm Tirtũm akupỹm ato atĩr ka wa ixkuri atĩr tũm nê amex rãhã nê apa ho apa. Hãmri nhũm Tirtũm aa amnhĩ nê nhỹhỹm amēnh kêt kumrēx. ¹⁷ No mẽ ate amnhĩ tomnuj mỳrapê tanhmã ixte mẽ anhĩpêx to kaxyw na pre mẽ awỹr inhmēnh kêt nê. ãm ixkukwak ri mẽ atĩr tũm nê mẽ amex rãhã apa ho apa hprãm xaj na pre mẽ awỹr inhmẽ pa mẽ awỹr wrỹ. ¹⁸ Jakamã kot ka mẽ atõ amnhĩ kaxyw ixpê Tirtũm Kra hã ixkôt ajamxpēr nê ixkôt amnhĩ xãm nhũm Tirtũm ixtã apumu nê ate amnhĩ tomnuj mỳrapê tanhmã anhĩpêx to hkêt nê. No kêt mẽ kot ixkôt amnhĩ xunhwỹr kêt xwỹnhjaja na Tirtũm ma mẽ kot amnhĩ xà htỹx kamã hamak tũm xà hwỹr mẽ pa mã xwỹnhjê hã mẽ harē. Mẽ kot ixkôt amnhĩ xunhwỹr kêt mỳrapê. Anê.

Mẽ kot amnhĩ tomnuj o hpimxur prãm kapry ã mẽ harēnh

¹⁹ Nhũm Jejus arĩ Nĩkotê mã kapēr nê kãm:

—Na pre Tirtũm amnê pika hwỹr mẽ awỹr inhmẽ. Mẽ ate amnhĩ tomnuj xwỹnh ã amnhĩ pumunh kaxyw mẽ awỹr inhmẽ. Tã nhũm mẽ ohtõ nê amnhĩ tomnuj gryk

ã kãm kapēr mar prãm kêt nê. Jao ixkaga nê kãm ixkapēr mar prãm kêt nê. ²⁰ Ra ixprĩ hã ixte mẽ kot tanhmã amnhĩ tomnuj to ho pa hã mẽ omunh mex jakamã mẽ kãm ixkapēr mar prãm kêt. Nê ixte mẽ kot tanhmã amnhĩ tomnuj to ho pa hã mẽ harēnh pymaj ixkôt kãm pa hprãm hkêt nê. ²¹ No kêt mẽ kot ixkôt amnhĩ xunhwỹr xwỹnhjaja na mẽ kot amnhĩ nhĩpêx o pa hã hpĩaam kêt. Na htem ãmnhĩx ixkôt amnhĩ nhĩpêx o pa. Jakamã koja mẽ piitã ja hã mẽ omu nê Tirtũm kot tanhmã mẽ hkrã hto nhũm mẽ ra kãm hkôt pix mã amnhĩ nhĩpêx ho pa hprãm ã mẽ omunh kurē kumrēx. Anê.

Nhũm pre ã Jejus Nĩkotēja mã kapēr anê.

Juāw Paxis kot Jejus jarēnh o pa hã harēnh

Juāw 1.19-28

²² Tã pa mẽ ixpê Jejus kôt ri ixpa ho ixpa xwỹnhjaja Jejus kôt Jerujarē rũm ijaopj nê pika pê Jutej kwỹ kamã ixpa. Jejus nhỹ hã Tirtũm mã mẽ hkrã kumrãr o ri mẽ hkôt ixpa. ²³ Nhũm finat Juāw Paxis haxwỹja mẽ ixpyrã nê mẽ hkrã kumrãr o pa. Krĩ pê Sarĩ htã krĩ pê Enõ mỳri pyhti rax jakamã nhũm pre htem hwỹr mra nhũm kamã mẽ hkrã kumrã. ²⁴ Kormã mẽ kot haxar kêt ri nhũm kamã mẽ hkrã kumrãr o pa.

²⁵ Rõm nhũm Ijaew hõja Juāw Paxis kôt mẽ pa ho mẽ pa xwỹnhjê hwỹr tẽ nê Juāw Paxis kot mẽ hkrã kumrãr ã tanhmã mẽ hkukjêr to nhũm mẽ kuma nê tee ri hã axpēn kukjêr o kuhê. ²⁶ Hãmri nê akupỹm Juāw Paxis wỹr tẽ nê kãm:

—Kwa mẽ ijahkre xwỹnh. Pyhti pê Jotãw nhĩkjê hã ate mēhõ pumunh nê tanhmã mẽ inhmã harēnh to xwỹnhhta kôt mẽ pa ho mẽ pa xwỹnhjaja na xep htem apyrã nê mẽ hkrã kumrãr o pa nhũm xep mẽ ra ohtõ nê mẽ pahkaga nê mẽ hkôt pa. Kwa xà ja amã mex nã? Anê.

²⁷ Hãmri nhũm mẽ kuma nê mẽ kãm:

—Tỹ ja mex kēnã. Tirtũm kãm hprãm xà hkôt na htem mẽ hwỹr mra nhũm mẽ ixpãnhã mẽ hkrã kumrã. Nà ja mex. ²⁸ Ixpê Tirtũm kot mẽ pakaxyw ãm xwỹnh kêt. Na pa pre ra mẽ amã ja hã amnhĩ jarē ka prem inhma. ãm hkukamã na pre Tirtũm amnê inhmẽ pa mō nê ã jar ri ixpa anê.

²⁹ —Te ixte mẽ umre kot amnhĩ nhĩpêx pyrãk. Na htem axpēn mã mẽ rer kaxyw nhũm mẽ umreja myta wỹr tẽ nê hpa hã kupy nê ma ni hwỹr o tẽ nê axpēn mã wa kure. Hãmri nhũm hpãnhã mēhõja axpēn tã wa hakre. Nhũm umreja wa kuri hkĩnh nê mar o xa. Tã te ixte mẽ umre kot amnhĩ nhĩpêx pyrãk jakamã koja mẽ ma Tirtũm kot mẽ pakaxyw ãm xwỹnhhta wỹr mra nê kapēr ma pa mẽ harēnh ma nê ixkĩnh nê. ³⁰ Na htem mẽ umre hã hkĩnh kêt nê. Mjēn nyw xwỹnhja ã na htem hkĩnh. Tã ja pyrã nê koja mẽ axte ixte mẽ kãm Jejus jarēnh mar kaxyw ixwỹr mrar kêt nê. ãm hwỹr koja mẽ hpãnhã mra nê tãm mar o kuhê. Ja mex kumrēx.

³¹ Jejus kēp kaxkwa rũm amnê mẽ pahwỹr wrỹk xwỹnh jakamã kot amnhĩ to rax o kot mẽ pahpiitã mẽ pajakrenh par. Mẽ papajaja mẽ pahpê pika nhõ xwỹnh jakamã Jejus kĩnhã mẽ pahte mẽmoj piitã omunh to-

htuj anhÿr. Nê pika nhô xwÿnhjê jamaxpêr pix o paja-maxpêr o ri papa.

³² —Na hte Jejus mê kãm kaxkwa kamã kot mêmoj pumunh xwÿnh kwÿjê jarênh o pa. Nê kamã kot mêmoj mar xwÿnh kwÿ jarênh tâ nhũm mê ohtô nê kuma nê ãm kuma. ³³ No mê kot mar nê amnhÿ kaxyw hkôt hamaxpêr xwÿnhjaja na htem kuma nê xpên mã harênh o: “Nà ãm hãmri na ã Tirtũm kapêr jarênh anê. Nà Tirtũm kapêr mex kumrêx.” Anhÿr o xpên mã harê.

³⁴ —Tirtũm na pre mê pahwÿr Jejus mê nhũm amnê mê pahwÿr wrÿ nê Tirtũm Karô nhÿ hã mê pamã kapêr jarênh o ri mê pahkôt pa. ³⁵ Tirtũm kãm Krata japê htÿx kumrêx jakamã na pre ïhkram mêmoj piitã haxàr pa nhũm urak nê hihtÿx o hihtÿx nê mêmoj piitã ho amnhÿptâr o pa. ³⁶ Jakamã mê kot amnhÿ kaxyw hkôt hamaxpêr nê hkôt amnhÿ xunhwÿr xwÿnhjaja koja mê nhÿrmã wa kuri htÿr tũm nê mex rãhã nê pa ho pa. No mê kot hkaga xwÿnhjaja koja mê ã amnhÿ nhÿpêx anhÿr kêt nê. Koja Tirtũm mê kot amnhÿ xà htÿx kamã hamak tũm xata wÿr mê rênh pa. Anê.

4 Tã nhũm Parijew nhô xwÿnhjaja Jejus jarênh ma. Nê hkôt mê pa xwÿnhjaja ohtô rax o Juāw Paxis kôt mê pa xwÿnhjê jakrenh ã mê harênh ma. Nê Jejus kot mê hkrã kumrâr rax o Juāw Paxis jakrenh ã harênh ma. ² Nom Jejus na pre mê hkrã kumrâr kêt nê. ãm mê ixte hkôt ri mê ixpa ho mê ixpa xwÿnhjaja na pa prem kãm mê hkrã kumrâr o ri ixpa. ³ Jakamã nhũm Jejus amnhÿ tâ Parijew nhô xwÿnhjê jarênh ma hãmri nê mê kêp kato nê hpãnhã ma akupÿm Garirej wÿr mō pa mê ma hkôt ixpa.

Mêhō ni kot amnhÿ nhÿpêx nyw o amnhÿ nhÿpêx ã harênh

Juāw 7.37-39; mãänênh Apokarip 22.1, 22.17

⁴ Tã pa mê mō nê kormã pyka pê Samar mã axà nê hkôt ixpa. ⁵ Hãmri nê krÿ pê Sika hwÿr ixpōx o mō. Amnepêm finat jako kot hkra Juje mã pyka nhôr xwÿnh tâ krÿja xa pa mê ra hwÿr ixpōx o mō. ⁶ Nê amnepêm jako kot gôm kakwÿnhhta wÿr pōj. Nhũm ra kaxkwa nhÿpōk ri myt nhÿr mê nhũm Jejus ra mrar ryy kurê hkêngrà nê. Hãmri nê gôm kakwÿnh mÿ ri tēm nê hkôkôt o nhÿ. ⁷ Hãmri pa mê kure nê mê ixàpkur xà japrôr kaxyw ma krÿm ijapêx.

Rôm nhũm Samar nhô xwÿnh nija amnhÿm gô runh mã tē nhũm Jejus omu nê kãm:

—Kwa inhmã anhō gôta kwÿ pa ho ixkō. Anê.

⁹ Nhũm amnhÿ jaêr pê amnhÿ tâ kuma. Ijaew na pre htem Samar nhô xwÿnhjê kutã apkur rÿ mê hkôt ri pa rÿ mê ho mjên kêt nê. Rÿ mê kutã hkôm kêt nê. Tã nhũm Jejus ã gô hã nija wÿr anê nhũm tee ri amnhÿ tâ kuma nê kãm:

—Xê pêr apê Ijaew tâ axtem nê ri gô hã ixwÿ. Xà ate ixpê Samar nhô xwÿnh ã ixpumunh kêt? Hãn ka ri hã ixwÿ. Anê.

¹⁰ Hãmri nhũm kuma nê kãm amnhÿ jarê. No ãm amnhÿ tâ kuxi nê kãm kapêr nê kãm:

—Nà aprÿ hã ate ixpumunh ro nhÿx ka kam gô hã ixwÿ pa amã hkwy. Inhō gô na axte mã. Tirtũm kãm amarÿ mê amã ôr prãm. Na htem ho ixkō hãmri nê mex nê htÿr tũm nê pa ho pa. Anê.

¹¹ Hãmri nhũm tee ri kot ã ô gô jarênh anhÿrja ã kuma nê htÿx ho gôm kakwÿnh kamã gô hã hkamnhÿx nê tee ri hkukamã hamaxpêr nê kãm:

—Xê tanhmã kot ka kêt amnhÿ to nê inhmã gôta kwÿ janhi? Mo kaxyw anhō gô janhir xà? Gôm kakwÿnhhta upÿm rax kênã kot ka kêt tanhmã amnhÿ to nê hkwy janhi. Nhÿhÿnh kot ka anhō gô jarênh xwÿnhhta kwÿ janhi pa ho ixkō hãmri nê ixtÿr tũm nê ixpa ho ixpa? ¹² Mê inhō gôm kakwÿnhja amnepê mã mê panhÿgêt finat jako nhô gôm kakwÿnh na pre. Jako hkwyjaja na prem hkakwÿ nhũm kamã gô kato nhũm pre htem hanhi nê ho hkôm o pa. Nê hkrajaja nê hkrit piitã ho hkôm o pa. Jakamã na pre mê ixpê hkanrêhã htãmnhwÿjê mã hkaga. Tã xep axtem anhō gô. Mê kot ho hkôm nê htÿr tũm kaxyw na xep. Jakamã xê xà ate amnhÿ to rax o mê panhÿgêt jako jakrenh mê? Anê.

¹³ Hãmri nhũm Jejus kãm:

—Nà mê anhō gôta na htem ho ixkō nê arÿ kãm kôr o pa. ¹⁴ No ixte amã gô jarênh xwÿnhhta kot ka hkwy ho ixkō hãmri nê axte amã kôr kêt kumrêx nê apa. Nhũm te akaxwÿnh kãm hinore hprôt pyrak o ka amnhÿ nhÿpêx. Hãmri nê te hinore kamã gôja aa grà hkêt pyra nê aa ajapêx kêt kumrêx. Nhÿrmã atyk tâ akupÿm atÿr nê atÿr tũm nê amex rãhã apa ho apa. Anê.

¹⁵ Nhũm nija kuma hãmri nê kãm:

—Xôwehe? Xê tô tokyx inhmã anhō gôta kwÿ. Pa ho ixkō nê axte inhmã kôr kêt nê ixpa. Nê axte amnê amnhÿm gô janhir mã inhmrar kêt nê. Xê tokyx inhmã hkwy mê? Anê.

Tÿx gô kumrêx ã hkamnhÿx nê ã hã àhwÿr anê.

¹⁶ Hãmri nhũm kãm:

—Tô ma akupÿm krÿm tē nê amjên japrô nê man akupÿn ixwÿr wa tē. Anê.

¹⁷ Hãmri nhũm tee ri kuma nê kãm:

—Ma mo inhmjên? Inhmjên kêt na pa hte ri ixpa. Anê.

Hãmri nhũm kãm:

—Tÿ. Nà ãm hãmri na ka ã amnhÿ jarênh anê. ¹⁸ Na ka pre ra amjên kêp 5. Nê my mê ri war apa xwÿnh ata te kêp amjên pyrak nom kêp amjên kumrêx kêt. Anê.

¹⁹ Hãmri nhũm amnhÿ jaêr pê kot ã kãm kapêr anhÿrja ma hãmri nê kãm:

—Xê pêr aprÿ hã ate ixpumunh par pyrak. Mãn apê Tirtũm nhÿ hã kapêr jarênh o mê pa xwÿnhjê hō mãn ka mê? ²⁰ Xê inhmã mêmoj jarê. Nhÿhÿm kot paj wem xpên kôt mra nê Tirtũm mã mex o mex ã harê? Amnepê mã mê panhÿgêtjaja na prem hixêt mÿj nhÿmōk ã api nê hã kãm amnhÿ jarê nê kãm mex o mex ã harê. No mê apê Ijaew na ka htem krÿ pê Jerujarê pix kãm mê ixte xpên kôt mrar nê ã amnhÿ nhÿpêx anhÿr ã mê inhmã karô. Xà hixêt nhÿmōk ã mê ixte kãm amnhÿ jarênhja xà apê omnuj mê? Ma xà apê omnuj kêt? Anê.

²¹ Hãmri nhũm Jejus kãm:

—Nà kot kaj mẽ nhÿrmã ãm Jerujarẽ pix kãm rÿ hixet mÿj nhÿmök pix ã axpën wÿr akuprõ nẽ Tÿrtÿm mã amnhÿ jarẽnh kêt nẽ. ²² Mẽ apê Samar nhõ xwÿnhjaja mẽ ate Tÿrtÿm mã mex o mex ã harẽnh o apa htã aprÿ hã kot amnhÿ nhÿpêx ã omunh kêt. Nẽ tanhmã hamaxpêr to ho pa hã omunh kêt. No mẽ ixpê Ijaew na pa mẽ arom kot tanhmã amnhÿ nhÿpêx to nẽ tanhmã hamaxpêr to hã omunh mex. Mẽ inhÿõ kukwak ri koja Tÿrtÿm mẽ kot hkôt amnhÿ xunhwÿr xwÿnh piitã nẽ mẽ kot amnhÿ tomnuj rênh pa. ²³ Tã koja mẽ piitã Mẽpah-pãm Tÿrtÿm mã mex o mex ã harẽnh kaxyw nhÿhÿm pa hkêt nẽ. Koja mẽ nhÿri pa xà kamã mẽ õpinh xà kaxwÿnh kãm ã kãm amnhÿ jarẽnh anhÿr o pa. Ja na Tÿrtÿm kãm hprãm. No nhÿhÿm mrar nẽ nhÿri kuhê xà pix kamã kãm amnhÿ jarẽnhja nhÿm kãm hprãm kêt nẽ.

²⁴ —Nẽ Tÿrtÿmja mẽ pahpyrà nẽ ã hkêt jakamã na te kaxkwa nẽ pika piitã hkôt pa ho pa. Jakamã na htem nhÿri pa nẽ õpinh xà kaxwÿnh kãm amnhÿ kaxyw kãm hamaxpêr nẽ kãm mex o mex ã harẽ nhÿm ra amnhÿ tã mẽ kuma. ã mẽ kot amnhÿ nhÿpêx anhÿrja na kãm hprãm. Anẽ.

²⁵ Nhÿm pre ã Jejus nija mã kapêr anẽ nhÿm kuma nẽ kãm:

—Ma koja xep nhÿrmã Tÿrtÿm kot mẽ pakaxyw ãm mã xwÿnh pê Krisja mẽ pahwÿr wÿr hãmri nẽ hprÿ hã mẽ pamã mẽmoj piitã ho amnhÿrÿt pu mẽ kuma. Anẽ.

²⁶ Hãmri nhÿm kãm:

—Kwa nhÿm paa. Ixte amã ixkapêr xwÿnhjaja ixpê Kris na pa. Jakamã na pa ixprÿ hã amã ã ixkapêr anẽ. Anẽ.

²⁷ Nhÿm pre ã kãm amnhÿ jarẽnh anhÿrja rôm pa mẽ ixte hkôt ri mẽ ixpa ho ixpa xwÿnhjaja ra ixujaprôr pa nẽ akupÿn hwÿr ixpôx o mra. Hãmri nẽ amnhÿ jaêr pê kot Samar nhõ xwÿnh nita mã kapêr ã omu nẽ tee ri hkukamã ijamaxpêr nom tanhmã hã hkukjêr to hkêt nẽ. Nija kêp Samar nhõ xwÿnh tã nhÿm ãmnhÿx kãm kapêr o nhÿ. Pa mẽ omu nẽ ãm omu nẽ tanhmã hã kãm nẽ hkêt nẽ. ²⁸ Hãmri nhÿm nita gôm kakwÿnh mÿr ri õ poti re nẽ ma akupÿm krÿm tẽ nẽ hkwyjê mã aw-jarẽ. ²⁹ Nẽ mẽ kãm:

—Xê mẽ tokyx ma ixkôt gôm kakwÿnh wÿr mra nẽ mÿ ri mẽhõ my mÿj pumu. Tÿrtÿm kot mẽ pahwÿr mẽnh mã xwÿnhhta na. Aa kot nhÿri ixpumunh kêt tã kot hprÿ hã ixpumunh par. Ixte tanhmã amnhÿ nhÿpêx to hã ixpumunh par. Xê mẽ ma ixkôt mra nẽ ixpyrà nẽ kapêr ã ama. Anẽ.

³⁰ Hãmri nhÿm mẽ kuma nẽ ma hkôt Jejus wÿr mrar kurê kumrêx.

³¹ Rôm pa mẽ ixte Jejus kôt ri ixpa ho ixpa xwÿnhjaja tee ri mẽ ixapkur xà ho Jejus ma nẽ kãm:

—E ota mẽ panhõta. Kwa mẽmoj py nẽ aku mãn.

³² Anhÿr tã nhÿm mẽ inhma nẽ tanhmã mẽ inhmã amnhÿ jarẽnh to. Nom amnhÿ tã kuxi nẽ amnhÿ jarẽ nẽ mẽ inhmã:

—Nà kormã. Inhõja axtem na. Mẽ ate inhõja pumunh kêt. Anẽ.

³³ Hãmri pa mẽ kuma nẽ tee ri hã axpën kukja nẽ axpën mã:

—Kwa mãn ra mẽhõ mẽ paxwakre kamã kãm mẽmoj to tẽ nhÿm kukrê nà? Anẽ.

³⁴ Hãmri nhÿm mẽ inhma nẽ mẽ inhmã:

—Nà mẽhõ kot kêt ri inhmã mẽmoj to mra pa kuku? Kot paj kot mẽ awÿr inhmênh xwÿnhhta mã tanhmã amnhÿ nhÿpêx to hãmri nẽ te ra ixapkur mex nẽ hã ixihtÿx mex pyrãk o amnhÿ nhÿpêx. Tã kot paj ã kãm amnhÿ nhÿpêx anhÿr o ri ixpa rãhã ho ijapêx pa. Jao te ixapkur rax pyrãk.

³⁵ Anhÿr o mẽ inhmã amnhÿ jarẽ. Hãmri nẽ ra Samar nhõ xwÿnhjaja mẽ ixwÿr mrar ã mẽ omu nẽ mẽ inhmã tanhmã mẽ harẽnh to nom mẽ hã kuxi nẽ mẽ harẽ nẽ mẽ harẽnh o:

—Kot kaj mẽ axte mẽ atã mytwrÿ kêp 4 hãmri nhÿm ra mẽ apur kãm mẽ anhõja hamÿnh mã tãm nẽ. Nom kormã. E ka mẽ pahwÿr mẽ mrar xwÿnh nêj pumu. Ra mẽ kot amnhÿ kaxyw ixkôt hamaxpêr nẽ ixkôt amnhÿ xunhwÿr mã tãm jakamã te mẽ apur kãm ra mẽ anhõ jamÿnh mã tãm pyrãk. Jakamã ka mẽ atõ ma mẽ hwÿr mõ nẽ mẽ kot amnhÿ kaxyw ixkôt hamaxpêr nẽ ixkôt amnhÿ xunhwÿr kaxyw mẽ kãm ijarẽ. Hãmri nẽ te ate ixpur kãm inhmã inhõ jamÿnh xwÿnh pyrãk o amnhÿ nhÿpêx.

³⁶ —Jakamã koja mẽhõ kumrêx mẽ hwÿr tẽ nẽ mẽ kãm Tÿrtÿm kapêr jarẽ hãmri nẽ te kêp õ pahi mã hpur kãm ahkre ho pa pyrãk. Nhÿm mẽ kot mar xwÿnhjaja kuma nom kormã hprÿ hã mar tÿx kêt nẽ. Tã kot kaj mẽ atõ wamta kôt mẽ hwÿr tẽ nẽ mẽ kot ixkôt amnhÿ xunhwÿr kaxyw aprÿ hã mẽ kãm ijarẽnh o mẽ hkôt apa hãmri nẽ te apê mẽ anhõ pahi mã hpur kãm axu-jamÿnh xwÿnh pyrãk. Hãmri nhÿm mẽ hkwyjaja mẽ ama nẽ ixkôt amnhÿ xunhwÿr nẽ ixkôt ri amnhÿ nhÿpêx o pa. Hã koja nhÿrmã mẽ apyrã nẽ Tÿrtÿm mẽ wa ixri mex rãhã nẽ htÿr tÿm nẽ pa ho pa. Ka mẽ amnhÿ tã mẽ omu nẽ akÿnh nẽ apa. Te mẽ kot mẽ hpur kãm ahkre xwÿnhjaja nẽ mẽ kot hamÿnh xwÿnhjaja mẽõ rÿnh pumunh nẽ hkÿnhhta pyrãk.

³⁷ —Na htem tõhã ã mẽ pur kãm mẽ àpênh xwÿnhjê jarẽnh anẽ nẽ mẽ harẽnh o: “Axtem mẽ ahkre xwÿnhjaja nẽ axtem mẽ kot hamÿnh xwÿnhjaja.” Anẽ. Tã te mẽ ate mẽ ujarẽnh ja pyrãk. ³⁸ Na pa pre ra ma mẽ hwÿr mẽ arẽ. Mẽ ate aprÿ hã mẽ kãm ijarẽnh nhÿm mẽ kot mẽ amar nẽ amnhÿ kaxyw ixkôt hamaxpêr nẽ ixkôt amnhÿ xunhwÿr kaxyw. Nom mẽ kajaja na ka prem akumrêx mẽ hwÿr amrar nẽ mẽ kãm ijarẽnh kêt nẽ. Tÿrtÿm kapêr jarẽnh o mẽ pa xwÿnhjaja na prem kumrêx mẽ hwÿr mra nẽ ixkukamã mẽ kãm ijarẽnh o ri mẽ hkôt pa. Te mẽ kot hpur kãm ahkre ho pata pyrãk. Tã kot kaj mẽ hpãnhã mẽ kot amnhÿ kaxyw ixkôt amnhÿ xunhwÿr kaxyw aprÿ hã mẽ kãm ijarẽnh o apa. Jakamã te mẽ ate mẽ hpur kãm mẽõ jamÿnh xwÿnh kot amnhÿ nhÿpêxta pyrãk. Anẽ.

Mẽ hkwy kot amnhÿ nhÿpêx nyw o amnhÿ nhÿpêx ã mẽ harẽnh

Sikÿn Korÿt 5.17; Wam Juãw 4.14

³⁹ Rôm nhÿm Samar nhõ xwÿnh kwÿjaja nija kot mẽ kãm amnhÿ jarẽnh ma hãmri nẽ urãk nẽ amnhÿ kaxyw

Jejus kôt hamaxpêr. Na pre ra amnhĩ tã tanhmã mẽ kãm Jejus jarênh to nê mẽ kãm harênh o:

—Ma aa kot nhÿri ixpumunh kêt tã ra kot hprĩ hã ixpumunh par. Ixte tanhmã amnhĩ nhĩpêx to hã ixpumunh par.

Anhÿr jakamã nhũm mẽ kuma nê uràk nê amnhĩ kaxyw hkôt hamaxpêr kurê kumrêx.

⁴⁰ Hãmri nê man mẽ ixwÿr mra nê Jejus pumu nê amnhĩ wÿr kuwÿ nê kãm:

—Pa. E kwa mẽ tokyx anojarêt kêt nê. Mẽ ma mẽ ixkôt mẽ inhõ krĩ hwÿr mō nê mẽ ixkôt ri apa grire nê arĩ ma mō. Anê.

Hãmri nhũm mẽ kuma nê mẽ kãm:

—Tõe. Nà kot paj mẽ anê. Anê.

Hãmri pa mẽ ma mẽ hkôt mō nê mẽ õ krĩ kamã mẽ hkôt ri ixpa hã apkati axkrut. ⁴¹ Nhũm Jejus mẽ kãm Tirtũm kapêr jarênh o ri mẽ hkôt pa nhũm mẽ axte ohtō nê kuma nê nita pyrã nê hkôt amnhĩ xunhwÿ.

⁴² Hãmri nê nita wÿr mra nê kãm:

—E nà ãm hãmri. Akumrêx na ka mẽ inhmã Jejus o amnhĩrit. Pa mẽ akôt ma hwÿr mra nê mẽ pam omu nê kapêr ã kuma. Jao apyrã nê amnhĩ kaxyw hkôt ijamaxpêr nê hkôt amnhĩ xunhwÿ. Pêr ãm hãmri kêp pyka piitã hkôt mẽ pahte amnhĩ tomnuj pãnhã amnhĩrer mã xwÿnhta na. Anê.

Garirej nhõ xwÿnhjaja kot Jejus pumunh ã mẽ harênh Matêwre 13.57

⁴³ Tã pa mẽ Jejus kôt Samar rũm ixkato nê ma pika pê Garirej wÿr mō. Kamã Jejus nhõ krĩ pê Najare htã pa mẽ hwÿr inhmōr kêt nê. ⁴⁴ Na pre ra Jejus mẽ inhmã tanhmã õ krĩ nhõ xwÿnhjê jarênh to nê mẽ harênh o:

—Tirtũm nhÿ hã kapêr jarênh o mẽ pa xwÿnhjaja na htem amnhĩ nhõ krĩ kamã mẽ kãm Tirtũm kapêr jarênh o pa nhũm mẽ kuma nê ãm kuma. Jakamã kot paj Najare hwÿr inhmōr kêt nê. Mẽ kãm ixkapêr mar prãmre hã.

⁴⁵ Anhÿr jakamã na pa prem hwÿr inhmōr kêt nê. Pãnhã nhãm krĩ hõ hwÿr mō nê hwÿr pōj hãmri nhũm mẽ amnhĩ wÿr Jejus pumu nê hkĩnh nê. Na prem ra krĩ pê Jerujarê kamã arĩgro pê Pas ã mẽ hkĩnh kãm tanhmã kot amnhĩ nhĩpêx to ho pa hã omu. Jakamã amnhĩ wÿr omu nê hkĩnh nê.

Jejus kot mẽhõ hkra ho mex ã harênh

⁴⁶ Tã pa mẽ kormã Garirej kamã ixpa nê akupÿm krĩ pê Kanã hwÿr mō. Kamã na pre Jejus mẽ kãm gō ho wĩhti nhĩpêx. Jakamã pa mẽ akupÿm mẽ hwÿr mō. Nhũm mẽõ pahi nhõ kōwenatōjê hõ hkra myja kêp à htÿx nê nõ. Nom Kanã kamã hkêt axtem krĩ hõ pê Kapanau kamã. ⁴⁷ Jakamã nhũm hipêexàja tee ri hkra pumu hãmri nê ra Jejus kot Jutej rũm Kanã hwÿr hpōx ã harênh ma nê hkra kaxyw kãm hamaxpêr nê ma hwÿr mōr kurê kumrêx. Hãmri nê nhÿri omu nê hwÿr tẽ nê kãm kapêr kãm hihtÿx nê kãm:

—Pa. E ot pa awÿr tẽ. Na ra ixkra ixpê htyk kaxyw. Kwa ixkamã axukapĩ nê ma ixkôt mō nê akupÿm inhmã ho mex. Anê.

⁴⁸ Hãmri nhũm kuma nê kãm:

—Kwa pêr ãm ixte mẽ amã aa mẽ ate mẽmoj pumunh kêt kwÿ ho anhÿr ã ixpumunh kôt pix mã na ka htem amnhĩ kaxyw ixkôt ajamaxpêr. Nom amarĩ amnhĩ kaxyw ixkôt ajamaxpêr kêt nê. Anê.

⁴⁹ Hãmri nhũm tee ri kuma nê kãm:

—Kwa tokyx. Kot kaj tokyx ixkôt amōr kêt koja ixpê ty. Anê.

⁵⁰ Hãmri nhũm kãm:

—Nà koja apê htyk kêt nê. Ra ixte akupÿm amã ho mex kênã. Mãmri ma akupÿm mō nê tokyx omu. Na ra akupÿm amã mex. Anê.

Hãmri nhũm kuma nê kaxyw hkôt hamaxpêr kurê kumrêx nê ma akupÿm hwÿr mō. Nê mōr o apkati.

⁵¹ Nê kormã õ krĩ hwÿr hpōx o mōr ri nhũm ra kãm mẽ ãpênh xwÿnhjaja kutã mra nê nhÿri pry hã hkaxpa nê kãm:

—Pa. Kwa na ra akra hkà hakry nê akupÿm amã mex. Anê.

⁵² Hãmri nhũm mẽ kuma nê hkĩnh tÿx nê. Nê mẽ kãm:

—Kwa xō wehe? Mẽmo ore hã na pre we ra hkà hakry? Anê.

Nhũm mẽ kãm:

—Nà jãã na pre kaxkwa nhĩpōk ri myt nhÿ nhũm hkà hakry nê akupÿm amã mex kurê kumrêx. Anê.

⁵³ Hãmri nhũm mẽ kuma nê mẽ kãm:

—Hêxta waa nê. Kwa pêr ãm hãmri Jejus kot inhmã akupÿm mex ã harênh xà hã ore kamã na pre akupÿm inhmã mex. Nà ãm hãmri. Anê.

Hãmri nê amnhĩ kaxyw Jejus kôt hamaxpêr kurê kumrêx. Nhũm òrkwÿ kamã ri mẽ pa xwÿnhjaja uràk nê amnhĩ kaxyw hkôt hamaxpêr.

⁵⁴ Nhũm Jejus ã kãm hkra ho mex anê. Na pre ra pika pê Garirej kamã mẽ kot mẽmoj pumunh kêt õ ho anhÿr o tipxi nê mẽ kãm gō pix o wĩhti nhĩpêx. Tã ra pyka pê Jutej rũm akupÿm mẽ hwÿr mō nê ã akupÿm mẽ hkrata o mex anê.

Jejus kot himō mÿ ri akupÿm mẽhõ ho mex ã harênh Juãw 7.23, 10.30-33

5 Tã mẽ ixpê Ijaew mẽ ixte Tirtũm ã ixkĩnh kaxyw Jerujarê hwÿr akuprō nhũm Jejus haxwÿja ma hwÿr mō. Pa mẽ hkôt mẽ ixpa ho mẽ ixpa xwÿnhjaja ma hkôt mō. ² Jerujarê kamã na himōja hikwÿ. Nhÿhÿnh mẽ kot krĩ hwÿr ôwêhti ho gjêx xà htã hikwÿ. Himōja nhĩxi pê na Petes. Nê pu hã mẽ à xwÿnhjê nhĩkwÿ xà hã ixkre kêp 5. ³ Piitã kamã na pre hte tanhmã mẽ à kute xwÿnhjaja hikwÿ. Mẽ nohkre xwÿnhjaja nê mẽ hyk o mẽ pa xwÿnhjaja nê mẽ ĩ kamã mẽ htyk xwÿnhjaja. ãm ahpÿnhã tanhmã mẽ à kute xwÿnhjaja ixkre hkwyja kamã akupÿm mex prãm xàj hikwÿ. ⁴ Na pre hte Tirtũm kapêr o mẽ wÿk xwÿnhja tōhã himō hwÿr wÿr nê gō xok. Hãmri nhũm mẽ à xwÿnhjê hõ kot amnhĩ to wa nê kumrêx hwÿr wÿk nê kamã mōr xwÿnhja akupÿm mex. Kwÿjê rom akupÿm mex kurê kumrêx. Jakamã nhũm pre hte mẽ à xwÿnhjaja akupÿm mex prãm xàj gō xok jamãr o hikwÿ. ⁵ Jakamã

nhūm mēhō myja ixkre hō kamā hikwỹ. Te omnuj nē arĩ hikwỹ hā amgrà xohtō rax nē. Ra hā amgrà kēp 38. ⁶Jakamā nhūm Jejus mē hwỹr tē nē omu. Nē hprĩ hā omu nē hamaxpēr o:

—Kwa mũj na hte omnuj nē ri pa hkēt ā amgrà xohtō rax nē. E pa akupỹm ho mex.

Anhỹr o hamaxpēr hāmri nē kām:

—Pa. E kwa inhmā amnhĩ jarē. Xà amā akupỹm amex prām? Anē.

⁷Hāmri nhūm kuma nē kām:

—Ku nhūm. Inhmā tokyx akupỹm inhmex prām tỳx kumrēx kēnā. No mēhō kot tokyx inhmỹ nē mē kēp ix-to wa nē ixkumrēx gō xok kamā inhmōr? Na pa tee ri ixkumrēx hwỹr ixtēm nē inhmā inhmōr prām nhūm mē xatā ixpē amnhĩ to wa nē mra nē kamā mrō. Anē.

⁸Hāmri nhūm Jejus kām:

—Tỳ? Tōe. E na ka akupỹm amex. E kànhmā xa nē akupĩp py nē ma akupỹm anhōrkwỹ hwỹr tē. Anē.

⁹Hāmri nhūm kuma nē ra akupỹm mex nē kànhmā xa nē ri mra. Nē hkĩnh tỳx nē hikupĩp py nē ma akupỹm ōrkwỹ hwỹr tē. Ijaew nhō arĩgromnu pē sap ā nhūm Jejus kot akupỹm ho mex ¹⁰nhūm ma akupỹm pry hā hikupĩp py nē o tē. Nhūm Ijaew nhō pahi hkwyj-ja nhỹhỹnh mra nē tee ri kot sap ā hpyr nē o htēm ā omu nē kām:

—Tk. Kwa mē pahpē Ijaew na pu htem mē panhō arĩgromnu hā paxàpēnh kēt nē. Finat Mojes kot ja nē mē pahkurē htā ka axtem nē akupĩpta py nē nhỹhỹm o tē. Anē.

¹¹Hāmri nhūm mē kuma nē mē kām:

—Tỳ. Kot anhỹr tã kot ixto mex xwỹnhhta na ā inhmā kapēr anē pa mar xà hkôt kupy nē akupỹm inhōrkwỹ hwỹr tē. Anē.

¹²Hāmri nhūm mē tee ri kuma nē kām:

—Kwa mēhō na we ā ri amā karō anē? Anē.

¹³Nhūm kormā kot Jejus nhĩxi mar kēt jakamā kot mē kām ahkre kaxyw hakēx nē tee ri hkwyjē kaēx ā hapēr rĩt o xa. Nom nhūm mē ohtō nē pry hā mrar jakamā nhūm tee ri hapēr nhūm Jejus ra ma nhỹhỹm tē.

¹⁴Tã nhūm hā ahtũmre nhūm Jejus Tĩrtũm mē amnhĩ jarēnh xà hā ixkre hwỹr tē nē axà nē kot ho mex xwỹnhhta pumu nē kām:

—Pa. E na ka ra akupỹm amex. Nom kwa kēp ka axte tanhmā amnhĩ tomnuj to ho ri apa hkēt nē. Kot kaj axte ā amnhĩ nhĩpēx anē hāmri nē apunuj tỳx o wam ate apunujta jakre kām ga. Anē.

¹⁵Hāmri nhūm kuma nē ma tē nē kato. Nē ma mē ō pahijē hwỹr tē nē mē kām:

—E na pa ra kot ixto mex xwỹnhhta nhĩxi ma. Xep kēp Jejus. Anē.

¹⁶Hāmri nhūm mē hixi ma nē hā tanhmā axpēn mē ho kapēr punuj to. Mē ō arĩgromnu hā kot mē ho mex o pa jakamā nhūm mē axpēn jakwa kamā ri hixi ho rē nē nhỹri omu nē tanhmā hā kām àkjēr to. ¹⁷Hāmri nhūm amnhĩ tã mē kuma nē mē kām:

—Ku nhūm. Inhĩpēxà Tĩrtũm na hte apkati mē tanhmā mē pahto mex to ho pa. Jakamā pa hte urāk

nē ā mē ho mex rāhā ho ri ixpa anē nē aa mēmo arĩgro hā ja ho anhỹr kaga hkēt nē.

¹⁸Anhỹr o mē kām amnhĩ jarē nhūm mē kuma nē kamā gryk tỳx nē. Nom mē ō arĩgromnu hā kot mē ho mexja pix mỳrapē kamā gryk kēt. Määnēn Tĩrtũm kēp hipēxà hā harēnhja mỳrapē nhūm prem kamā gryk tỳx kumrēx nē axpēn mē:

—Tk. Kwa na ā amnhĩ jarēnh anhỹr jao te kēp Tĩrtũm pyrāk ā amnhĩ jarē. E kwa pu mē kupĩ ri. Anē.

Tĩrtũm Kra kot Hipēxà nhỹ hā amnhĩ nhĩpēx ā harēnh
Juāw 14.10-13

¹⁹Hāmri nhūm Jejus axte mē kēp Ijaew nhō pahijē mē kapēr nē mē kām:

—Na pa hte amnhĩ krā hkôt tanhmā amnhĩ nhĩpēx to ho ri ixpa hkēt nē. Na pa hte Inhĩpēxà kot tanhmā amnhĩ nhĩpēx to hā omunh xà hkôt urāk nē mē ho mex o ri ixpa. Kwa mē amnhĩ krā him ja jaxà nē kām ajamaxpēr tỳx nē ho apa.

²⁰—Inhĩpēxàja kām ijapēē. Na hte inhmā kot tanhmā mē ho mex to piitā ho amnhĩrĩt. Ixte omunh nē urāk nē y hā tanhmā mē ho mex to ho ri ixpa kaxyw. Jakamā kot paj ām akupỹm mē à xwỹnhjē ho mex pix o ri ixpa hkēt nē. Kot paj määnēn mē kām mē-moj mex o ja jakrenh o anhỹr o ri ixpa ka mē hā ix-pumu nē ixkamā ano puma ho apa.

²¹—Nē Inhĩpēxà kot akupỹm mē htyk xwỹnhjē ho htĩr jakamā kot paj urāk nē akupỹm mē htyk xwỹnhjē ho htĩr o ri ixpa. Anē.

Mē htĩr tũm nē mē pa mē xwỹnhjē jarēnh

Juāw 3.16-17, 3.36, 6.27, 6.40, 6.60, 10.28, 17.2-3; Römān 6.23; Karatas 6.8; Xitre 1.2; Wam Juāw 2.25, 5.11-13

²²Nhūm Jejus arĩ mē kēp Ijaew nhō pahijē mē kapēr nē mē kām:

—Koja nhỹrmā Inhĩpēxàja mē htĩr tũm nē mē pa ho mē pa mē xwỹnhjē jarēnh kēt nē. Ja kaxyw na pre pa ixām. ²³Tã mē piitā mē kot ja hā ixpemunh nē ixtā hpi-jaàm o ri pa kaxyw na pre mē kaxyw ixām. Te mē kot Inhĩpēxà hā hpijaàmta pyrā nē pa ixtā hpijaàm o pa kaxyw. Jakamā koja mēhō ixtā hpijaàm kēt nē hāmri nē määnēn Inhĩpēxà hā hpijaàm kēt ā amnhĩ to amnhĩrĩt. Tãm kot mē awỹr inhmēnh kēnā. ²⁴Jakamā koja mēhō ixkapēr ma nē amnhĩ kaxyw kot mē awỹr inhmēnh xwỹnhhta kôt hamaxpēr nē ixkôt amnhĩ xām. Hā koja nhỹrmā htyk tã ma mē kot amnhĩ xà htỳx kamā hamak o pa htũm xàta wỳr mōr kēt nē. Kojā Inhĩpēxà akupỹm ho htĩr nhūm wa ixri htĩr tũm nē mex kumrēx nē pa ho pa. Jakamā koja mēhō ixkôt amnhĩ xām hāmri nē ra kēp wa ixri htĩr tũm nē pa ho pa mē xwỹnh. Kwa mē jam ajamaxpēr tỳx rāhā ho apa.

²⁵—No mē kām ixkapēr mar prām kēt xwỹnhjaja kēp Inhĩpēxà mē wa ixri mē htĩr tũm nē mē pa mē xwỹnh kēt. Tã ixpē Tĩrtũm Kra jakamā koja mē ixkapēr ma nē ixkôt amnhĩ xunhwỹ. Hā kot paj amnhĩ tã mē omu nē mē htĩr tũm nē mē pa mē xwỹnh ā mē harē nhūm mē àmnhĩx ri hkĩnh nē pa ho pa. Kwa mē jam ajamaxpēr tỳx rāhā ho apa.

²⁶ —Ně Inhípêêxà tã m kêp mẽ ho mẽ htír xwýnh. Tã ixpê Kra jakamã na pre amnhĩ pyrã mẽ ja kaxyw ixãm.

²⁷ —Ra kot mẽ akaxyw ixãm jakamã na pre mãänën ixte tanhmã mẽ ajarênh to kaxyw ixãm. Wa ixri mẽ atír tũm mẽ apa ho apa mã xwýnhjê hã mẽ ajarênh rý wa ixri mẽ atír tũm mẽ apa hkêt mã xwýnhjê hã mẽ ajarênh kaxyw. ²⁸ Jakamã kot paj nhýrmã ra mẽ htyk mẽ mẽ hikwý xwýnh piitã mẽ kãm ixkapêr nhũm mẽ inhma. Koja mẽ ixkapêr ma hãmri mẽ akupým htír mẽ pika rũm hapôx pa. Hãmri nhũm mẽ kot kormã htír ri Tirtũm kapêr kôt amnhĩ nhípêx hkêt xwýnhjaja mẽ kot amnhĩ tomnuj mýrapê ma mẽ kot amnhĩ xà htýx kamã hamak tũm xàta wýr ma hapêx pa. Nom nhũm mẽ kot amnhĩ to mex xwýnhjaja. Ra mẽ kot Tirtũm kôt amnhĩ nhípêx jakamã koja mẽ ma Tirtũm mẽ wa ixwýr api mẽ wa ixri mex mẽ hkingh rãhã htír tũm mẽ pa ho pa.

—Kot paj ja kaxyw tanhmã mẽ apiitã mẽ ajarênh to. Nom kot paj amnhĩ krã hkôt inhmã hprãm xà hkôt tanhmã mẽ ajarênh to hkêt mẽ. Kot paj Inhípêêxà kot mẽ awýr inhmênh xwýnhhta nhý hã àhpumunh týx xà hkôt tanhmã mẽ ajarênh to. Jao ãm hãmri mẽ ajarê. Kwa mẽ jam ajamaxpêr týx mẽ. No ã ixte mẽ amã amnhĩ jarênh anhýrja ma mẽ tee ri ajamaxpêr kêt mẽ. Anê.

Mẽ kot Jejus kêp Tirtũm Kra hã harênh xwýnhjê jarênh

Juãw 8.18; Wam Juãw 5.6-8

³¹ Nhũm Jejus arĩ mẽ kêp Ijaew nhõ pahijê mã kapêr mẽ mẽ kãm:

—E na pa ra tanhmã mẽ amã amnhĩ jarênh to. Nom kop ãm papxipix ixte ã amnhĩ jarênh anhýr ronhýx ka mẽ inhma mẽ ajamaxpêr o: “Ko. Na apu ãm hãmri ã mẽ inhmã amnhĩ jarênh anê rý apu ãm amnhĩ to hêx.” Anhýr o ajamaxpêr. ³² Nom papxipix na pa hte ã amnhĩ jarênh anhýr kêt mẽ. Inhípêêxà haxwýja na hte ã ijarênh anê. Nê ãm hãmri na hte tanhmã ijarênh to ho pa. Tirtũmja hêx kêt. ³³ No mẽ amã pika nhõ xwýnhjê pix kapêr mar prãm jakamã na ka prem finat Juãw Paxisja wýr akwýjê rê nhũm mẽ ma hwýr mra mẽ ixtã hkukja nhũm mẽ kãm tanhmã ijarênh to. Nê hprĩ hã mẽ kãm ijarê. ³⁴ No mẽ apê pika nhõ xwýnhjaja mẽ ate axpên mã tanhmã ijarênh toja na ixpê tanhmã kute hkêt. Koja mẽhõ tanhmã ixto kapêr punuj to rý tanhmã ijarênh mex to pa amnhĩ jarênh ma mẽ tee ri amnhĩ kukamã ijamaxpêr o ixkaprĩ hkêt mẽ. Tã nom Juãw Paxis kapêrja mẽ amã mex jakamã na pa ã mẽ amã harênh anê. Ka mẽ ra kot tanhmã ijarênh toja ma mẽ amnhĩ kaxyw ixkôt ajamaxpêr mẽ ixkôt amnhĩ xunhwý mẽ nhýrmã ty mẽ ma mẽ kot amnhĩ xà htýx kamã hamak tũm xàta wýr apa hkêt mẽ.

³⁵ —Juãw Paxis na pre te kanê hpôk mex mẽ mẽmoj to amnhĩrít mex pyrã mẽ mẽ amã Tirtũm kapêr o amnhĩrít mex o pa. Ka prem te maripôtre kot kanê hã htu pyrã mẽ hwýr akuprõ mẽ mar o akuhê. Nom hkôt ajamaxpêr týx kêt mẽ. ³⁶ Na pre hprĩ hã mẽ amã ijarênh o ri pa.

—Tã pa pam mẽ awýr wrý mẽ Inhípêêxà nhý hã mẽ akamã aa mẽ ate mẽmoj pumunh kêt kwý ho anhýr o

ri ixpa. Mẽ ate ja hã ixpumunh mẽ Inhípêêxà tã kot mẽ awýr inhmênh kôt ixpumunh kaxyw.

³⁷ —Ně Inhípêêxàja mãänën ixpê Kra hã mẽ amã ixto amnhĩrít. Ra mẽ anhõpinh xà kaxwýnh kãm kot mẽ amã ixto amnhĩrít tã ka mẽ ama mẽ ãm ama mẽ ixkôt ajamaxpêr kêt mẽ. ³⁸ Mẽ amã mẽ ate hkôt amnhĩ nhípêx o apa hprãm kêt. Mẽ ate kapêr mar týx ronhýx ka mẽ ixkapêr ma mẽ amnhĩ kaxyw ixkôt ajamaxpêr kurê kumrêx. Ixpê Tirtũm kot mẽ awýr inhmênh xwýnh kênã.

³⁹ —Ně Tirtũm kapêr ã kagà htũm haxwýja kot tanhmã ijarênh to. Ka htem wa ixri atír tũm mẽ apa ho apa hprãm xàj kamã harênh rãhã ho ri apa. Nê kot tanhmã pa ijarênh to htã ka mẽ ixkapêr ma mẽ amnhĩ kaxyw ixkôt ajamaxpêr kêt mẽ. Anê.

Ijaew nhõ pahijaja kot Jejus kaga hã mẽ harênh

⁴⁰ Nhũm Jejus arĩ mẽ kêp Ijaew nhõ pahijê mã kapêr mẽ mẽ kãm:

—Ně pa na ixte Inhípêêxà mẽ wa ixri ixte mẽ ho mẽ htír tũm mẽ mẽ pa mã xwýnh ã mẽ harênh tã ka mẽ amnhĩ kaxyw ixkôt ajamaxpêr kêt mẽ. ⁴¹ Nom mẽ ate inhmex ã ijarênh kêt tã ja ixpê tanhmã kute hkêt. ãm Inhípêêxà pix kot inhmex ã ijarênhja na inhmã hprãm. ⁴² Ra ixte mẽ apumunh mex. Mẽ amã Tirtũm kình kêt. ⁴³ Tã kot mẽ awýr inhmênh tã ka mẽ ixpumu mẽ ixkaga mẽ ixkôt amnhĩ nhípêx kêt mẽ. Nom koja mẽhõ amnhĩ krã hkôt mẽ awýr tẽ mẽ tanhmã mẽ ajahkre hto ka mẽ ama mẽ hkôt amnhĩ nhípêx kurê kumrêx.

⁴⁴ —ãm pika nhõ xwýnh pixjaja kot mẽ amex ã mẽ ajarênhja na mẽ amã hprãm. No Tirtũm kot amnhĩm mẽ amex ã mẽ ajarênhja mẽ amã hprãm ã mẽ ate amnhĩ jarênh tã mẽ amã ja prãm kêt. Jakamã na ka htem ixkaga kumrêx. ⁴⁵ Tã kot paj pam nhýrmã Tirtũm mã mẽ apê ixkwý hkêt ã mẽ ajarênh kêt mẽ. Mo kaxyw kot pa kêt ri ã kãm mẽ ajarênh anê? Finat Mojes tã koja ja hã kãm mẽ ajarê. Na ka htem tanhmã ajamaxpêr to mẽ ajamaxpêr o: “Kot paj finat Mojes kot mẽ inhmã tanhmã kapêr to hkôt amnhĩ nhípêx o ri ixpa hãmri mẽ nhýrmã Tirtũm ri ixtír tũm mẽ inhmex mẽ ixpa ho ixpa.” Anhýr o ajamaxpêr nom hkôt amnhĩ nhípêx kêt mẽ. Mojes na pre hte pa ijarênh o pa. Tã mẽ ate kapêr kôt amnhĩ nhípêx ronhýx ka mẽ amnhĩ kaxyw ixkôt ajamaxpêr mẽ ixkôt amnhĩ xunhwý. No mẽ ate ixkaga jakamã koja Mojes tãm Tirtũm mã mẽ apê ixkwý hkêt ã mẽ ajarê. ⁴⁷ Mẽ ate Mojes kapêr kôt amnhĩ nhípêx kêt jakamã kot kaj mẽ mãänën ixkôt amnhĩ nhípêx hkêt mẽ. Anê.

Nhũm pre ã Jejus Ijaew nhõ pahijê mã kapêr anê.

Jejus kot mẽ ho 5.000 mẽ mẽ kãm mẽ õ hã harênh

Matêwre 14.13-21; Makre 6.30-44; Rukre 9.10-17

6 Tã nhũm ra arĩgro pê Pas ahtêp o mõ. Pasja ã mẽ ixpê Ijaewjaja na pa htem axpên wýr akuprõ mẽ hã ôwêhti hkra nyw kwý pa mẽ ĩ hkur o ixkrĩ. Amnepêm Tirtũm kot pika pê Ejit rũm mẽ inhigêtjê kator kaxyw nhũm prem nojarêr mẽ ã hkwy hpar mẽ ĩ hkur anê. Tã arĩ mẽ ixpê mẽ hkanrêhã mẽ htãmnhwýjaja jam ija-

maxpêr pê ixkĩnh kaxyw ã amnhĩ nhĩpêx anê. Jakamã nhũm Jejus pàr krem axà nê ma himô pê Garirej ã rêr kaxyw ma xarmã mō nê rê. Himôja nhĩxi hō pê na Tipe nhũm hã xarmã mō nê rê. Pa mẽ hkôt ixpa ho ixpa xwỳnhjaja ma hkôt ixpa.

Hãmri nhũm pika nhō xwỳnh kwỳjaja Jejus ma mōr kãm omu hãmri nê ma gō kape hã pikap mẽ inhĩhkrep mra. Na pre ra Jejus mẽ kamã mẽ à xwỳnhjê ohtô nê akupỳm mẽ ho mex nhũm mẽ axte omu hãmri nê ma mẽ inhĩhkrep gō mỳ ri hpar o pa.

Tã pa mẽ xarmã rê nê pàr rũm ijapōj nê gō mỳ ri kỳx-pê ixkrĩ hpa.

⁵ Hãmri nhũm mẽ inhĩhkrep mẽ mrar xwỳnhjaja mẽ ixwỳr hpōx o mra nhũm Jejus amnhĩ wỳr mẽ omu nê mẽ inhĩō pê Firipti mã kapêr nê kãm:

—Kwa Firip. Měmoj kot puj mẽ pahwỳr mẽ mōr nējje mã ho anê nhũm mẽ kuku? Tanhmã kot puj mẽ amnhĩ to nê nhĩri mẽ kãm mẽmoj japrō nhũm mẽ kuku? Anê.

⁶ Ra tãm kot tanhmã mẽ kãm ô hto hã amnhĩ pumunh mex tã ã mẽ hã Firipti kamã hamak kaxyw mẽ hã hkukjêr anê. ⁷ Hãmri nhũm kuma nê tee ri mẽ hkukamã hamaxpêr nê kãm:

—Konên. Mě ohtô rax kumrêx kênã. Mo mẽ kaxyw mẽ pakàxpore rax? Kot pu mẽ pakàxpore ho 200 nê ho mẽ kãm mẽmoj japrōr tã nhũm mẽ ãm ho hkryre nê kuku nê ho õhy htu hkêt nê. Mě ohtô rax o mẽ ohtô rax kênã. Anê.

⁸ Hãmri nhũm mẽ inhĩōja kuma nê Jejus wỳr tẽ nê kãm kapêr. Simãw Pêtre htō Andreja hwỳr tẽ nê kãm:

—E ota mẽhō hkrata amnhĩ kôt ô hkwy ho mō. No ãm grire. Na pãwti kêp 5 nê kaxyw õ tep axkrutre. No mẽ ohtô gri ã kot kêt mẽ hipêx pa. Anê.

¹⁰ Hãmri nhũm kuma nê hkôt mẽ ixpa ho mẽ ixpa xwỳnhjê mã kapêr nê mẽ inhmã:

—Tôe. Nà hãmri. E mẽ kãm anê kê mẽ hkrĩ pa. Anê.

Hãmri pa mẽ kãm anê nhũm mẽ pō kamã hkrĩ hpa. Na prem ohtô kumrêx. Měmyjê pixjaja kêp 5.000. Nê kaxyw mẽ hprō nê mẽ hkrajaja. Na prem ohtô ho ohtô. Tã piitã hkrĩ pa. ¹¹ Hãmri nhũm Jejus mẽhō hkrata pê õ pãwti jamỳ nê o xa nê Tirtũm mã harê nê kãm:

—Pa Papaj. Na ka hte mẽ inhmã mẽ inhō ho apa. ãm kapxipix amex o amex. Anê.

Hãmri nê mẽ inhmã pãwtija gō pa mẽ ô ri mẽ hkrĩ xwỳnhjê mã õr o mra nê ho mẽ piitã mẽ hipêx pa. Pãwtija ãm hkryre htã nhũm Jejus tanhmã ho nhũm ra ohtô rax kumrêx. Jakamã pa mẽ ô ri mẽ kãm õr o mra nê ho mẽ piitã mẽ hipêx pa. Nhũm Jejus hpãnhã tep axkrutreta py nê mã ho anê nê Tirtũm mã harê hãmri nê amnhĩ xō ri mẽ inhmã kugō pa mẽ mã ho anê nê. Te ho pãwti nhĩpêx pyrã nê ho mẽ piitã mẽ hipêx. Hãmri pa mẽ ixpiitã apku nê inhōhy htu nhũm arĩ mẽõ jakrêx kwỳ hprã. Hãmri nhũm Jejus mẽ inhmã:

—E kwa mẽ hkôt mra nê mẽõ jakrêx o akuprō kê omu hkêt nê. Anê.

¹³ Hãmri pa mẽ kuma nê ho akuprō nê kawà o 12 nê ho nýt. Pãwti hkryreja ãm kêp 5 pix tã nhũm Jejus tanhmã ho nhũm rũnh kumrêx. Jakamã pa mẽ hakrêx prãr o kawà ho 12 nê ho nýt pa. ¹⁴ Hãmri nhũm mẽ in-

hĩhkrep mẽ mōr xwỳnhjaja amnhĩ jaêr pê Jejus kot mẽ kãm mẽõ ho rax ã omu nê ri axpên mã harênh o:

—Kokỳy. Tãm mãn pre finat Mojesja amnepêr mẽ panhĩgêjtjê mã harênh o ri pa. Tã ra mẽ pahwỳr wỳr nã? ¹⁵ Kwa pu mẽ kãm pakapêr kãm paxihtỳx nê ma akupỳm amnhĩ kôt o mō nê amnhĩ kaxyw ãm kê mẽ pahto amnhĩptàr o pa. Anê.

Hãmri nhũm Jejus amnhĩ tã mẽ kapêr ma nhũm ja kêp omnuj nê. Jakamã nhũm mẽ kêp kato nê ma hpãnhã ahte nhĩri hixêt ô hwỳr tẽ.

Jejus kot gō krãhkã hã htêm ã harênh

Matêwre 14.22-27; Makre 6.45-52

¹⁶ Tã nhũm ra kamàtre pa mẽ Jejus kôt ri ixpa ho ixpa xwỳnhjaja ma akupỳm himô hwỳr mra. ¹⁷ Nhũm kormã Jejus mẽ ixwỳr akupỳn htêm kêt jakamã pa mẽ tee ri kamã ama hãmri nê akupỳm pàr mã axà nê ma akupỳm Kapanaũ hwỳr xarmã ixrêr o mō.

¹⁸ Pu nhũm ra kôk àpêr tỳx nhũm gō xatã kãnhmã harĩ nê axpên wỳr mra nê axpên tak tỳx nê. ¹⁹ Pa mẽ kormã gō nhĩpôk ri mō. Nê tee ri rrêmti ho gō rênh nhĩpêx kaprỳ nom kormã ixrêr kêt nê. Nê kormã inhmōr o ixtã 5 kirôm pix nê. Hãmri nhũm ra Jejus gō krãhkã hã hpar o mẽ ixkôt tẽ. Pa mẽ ixprĩ hã amnhĩ wỳr omunh mex kêt nê ixtỳx mẽkarō hã hkamnhĩx nê mẽ inhmã uma htỳx kumrêx. ²⁰ Tã nhũm mẽ inhmã ixkapêr nê mẽ inhmã:

—Tk. Kwa mẽ amã ma hkêt nê. Pa na pa mẽ akôt tẽ. Anê.

²¹ Hãmri pa mẽ kapêr ma nê ixkĩnh nê. Nê amnhĩ wỳr pàr kre hwỳr ho api nhũm axà pa mẽ xarmã ixrêr kurê kumrêx nê pàr kre rũm ijapōx pa.

Mě kot Jejus japêr mrar ã mẽ harênh

²² Tã nhũm apkati nhũm xarpê mẽ kot Jejus wỳr mrar nhũm kot mẽ kãm õ xwỳnhjaja tee ri hapêr o pa nê axpên mã:

—Kwa nhỹhỹm mãn pre we tẽẽ? Na pre hkôt ri mẽ pa xwỳnhjaja pix mẽ õ pàr kãm ma akupỳm xarmã mō nom nhũm Jejusja mẽ hkôt htêm kêt nê. Nà mãn kormã jar nhỹhỹm ri mrar jakamã pu mẽ kormã omunh kêt nê. Anê.

²³ Rôm nhũm Tipe rũm pàr kwỳja mẽ hwỳr pōj. Jejus kot mẽ apkur xà ho Tirtũm wỳr nê mẽ kãm ho rax xà hã pikata wỳr nhũm mōn pōj. ²⁴ Hãmri nhũm mẽ amnhĩ wỳr omu nê tee ri pàr kãm Jejus mẽ hkôt mẽ ixpa ho mẽ ixpa xwỳnhjê japêr hãmri nê axpên mã:

—E kwa pu mẽ ma mẽ hkôt xarmã mō nê Kapanaũ kamã mẽ hapêr. Anê.

Hãmri nê mẽ kãm amnhĩ jarê nê mẽ õ pàr kwỳ hwỳr agjê nê ma mẽ hkôt xarmã mōn rê. ²⁵ Hãmri nê ra mẽ ixwỳr rê nê mẽ ixkôt pōj nê mẽ ixkaêx ã Jejus pumu nê hwỳr mra nê kãm:

—Pa mẽ ijahkre xwỳnh. Kwa na pa prem tee ri xarpê ajapêr hãmri nê man akôt mōn rê. Kwa tanhmã na ka pre we amnhĩ to nê man tẽn rê? Anê.

²⁶ Hãmri nhũm mẽ kãm:

—Nà mëmo kaxyw na ka wem ri ijpêr o ri ixkôt apa? ãm jãã më ate ixkutã axàpkur nê anhõhy htu jakamã na ka më axte ixkutã axàpkur pix kaxyw ijpêr o ri apa. No ixte ã më amã amnhĩ nhĩpêx anhÿr ã ixpumu nê ixpê Tirtũm Kra hã ixkôt ajamaxpêr kêt nê. Kwa më ixpê Kra hã inhmã ajamaxpêr tÿx nê kêt wehe. Anê.

Jejus te kêp kaxkwa rũm më paxàpkur xà maati pyrãk ã kot amnhĩ jarênh

²⁷ Nhũm Jejus arĩ hwÿr më mrrar xwÿnhjê mã kapêr nê më kãm:

—Kwa kêr ka më ri axàpkur xà pix kukamã ajamaxpêr o ri apa hkêt nê. Na htem më apkur xà kukwak ri Tirtũm më wa ixri htĩr tũm nê pa ho pa hkêt nê. No kot kaj më amnhĩ kaxyw pa ixkôt ajamaxpêr nê ixkôt amnhĩ xunhwÿ. Hã kot kaj më ixkukwak ri nhÿrmã atĩr tũm nê wa ixri amex nê apa ho apa. Te ixpê më kot më apkur xà hkur nê ÿ hã htĩr tũm nê pa ho pa xwÿnh pyrãk. Ja kaxyw na pre Inhĩpêêxà Tirtũm më awÿr papxpix inhmê pa më awÿr wrÿ. Anê.

²⁸ Hãmri nhũm më kuma nê kãm:

—Kwa tanhmã kot paj wem amnhĩ nhĩpêx to nhũm Tirtũm hã më ixpumu nê më ixto mex nê? Anê.

²⁹ Hãmri nhũm më kuma nê axte më kãm amnhĩ jarê nê më kãm:

—Nà kot kaj më amnhĩ kaxyw pa Tirtũm kot më awÿr inhmênh xwÿnh kôt ajamaxpêr hãmri nhũm ixtã më apumu nê tanhmã më akrã hto ka më ajamakêtkati nê axàmnhĩx akĩnh nê tanhmã amnhĩ nhĩpêx to ho ri apa. Anê.

³⁰ Hãmri nhũm më kuma nê kãm:

—Tõe. Kwa axte më inhmã aa më ixte mëmoj pumunh kêt õ ho anê. Pa më ja hã apumu nê amnhĩ kaxyw akôt ijamaxpêr kurê kumrêx. E mëmo kot ka më inhmã ho anê? Kwa tokyx më inhmã axte mëmoj tanhmã ho pa më omu. ³¹ Amnepêm finat Mojes pyrã kot kapôt ã më panhĩgêjtjê ho pa ri na pre hte apkati më më kãm mëõ më kot kãm “manã” anhÿr xwÿnhhta gõ nhũm pre htem hkur o pa. Tirtũm kapêr ã kagã htũm kot ja jarênh kot:

Na pre kaxkwa rũm më hwÿr më apkur xà rê nhũm më hkur o pa.

Anhÿr o kot harênh. Tã kot kaj Mojes nê apkati më më inhmã më inhõ ho ri apa pa më ja hã apumu nê rĩ kormã amnhĩ kaxyw akôt ijamaxpêr japêr. Anê.

³² Hãmri nhũm më kãm:

—Xà Mojes na pre hte më kãm kaxkwa rũm më apkur xà rênh o pa? Nà tãm kêt. Inhĩpêêxà na pre hte më hwÿr kurê nhũm më hkawrà nê kuku nê kukwak ri hihtÿx nê htĩr nê pa. Tã nhũm ra më awÿr hpãnhã pa ixpê Kra hã inhmê. Kwa më ixkapêr ma nê amnhĩ krãm haxàr tÿx nê. ³³ Na pre Tirtũm inhĩpêx o te amnepêm kot më hwÿr kaxkwa rũm më apkur xà rênhhta pyrã nê amnê pika hwÿr inhmê. Jakamã te ixpê kaxkwa rũm më apkur xà maati wrÿk xwÿnhhta pyrãk. Më ate amnhĩ kaxyw ixkôt ajamaxpêr nê ixkôt amnhĩ xunhwÿr hãmri nê ixkukwak ri wa ixri atĩr tũm nê apa ho apa kaxyw. Anê.

³⁴ Nhũm pre ã Jejus më kãm amnhĩ jarênh anê nhũm më kuma nom hprĩ hã mar mex kêt nê. ãm htÿx ho axtem më apkur xà mex pix ã harênh ã hkamnhĩx nê kãm:

—Kwa tô më inhmã më apkur xà maati kwÿ gõ pa më apkati më hkur o ri ixpa. Anê.

³⁵ Hãmri nhũm më kuma nê amnhĩ tã më kãm:

—Nà më apkur xà kumrêxja ãm paa. Te ixpê më apkur xà maati pyrãk. Jakamã kot kaj më atõ amnhĩ kaxyw ixkôt ajamaxpêr nê ixkôt amnhĩ nhĩpêx o apa hã kot kaj më akĩnh nê apa. Te ra axàpkur nê anhõhy htu nê akĩnh o ri apa pyrãk. Jao amnhĩ tã ixpumu nê akĩnh nê ajamakêtkati nê ri apa.

³⁶ —Ra më ate ixpumunh mex tã kormã amnhĩ kaxyw ixkôt ajamaxpêr kêt nê. Kwa më ixkapêr ma nê amnhĩ krãm haxàr tÿx nê. ³⁷ Tirtũm kot inhmã më õr mã xwÿnhjaja koja më ixpumu nê amnhĩ kaxyw ixkôt hamaxpêr mex kurê kumrêx. ã më kot amnhĩ nhĩpêx anhÿr xwÿnhjaja kot paj aa amnhĩ nê më hanor kêt nê.

³⁸ —Nê ixte amnhĩ krã hkôt kaxkwa rũm ixwrÿk nê inhmã hprãm xà hkôt tanhmã amnhĩ nhĩpêx to ho ixpa kaxyw na pa pre ixwrÿk kêt nê. Inhĩpêêxà kot më awÿr inhmênh jakamã kãm hprãm xà hkôt pix mã na pa hte tanhmã amnhĩ nhĩpêx to ho ri ixpa.

³⁹ —Tã mo na hte Inhĩpêêxà kãm hprãm? Nà kot inhmã më õr mã xwÿnh piitã nhÿrmã wa ixkuri htĩr tũm nê mex nê pa ho paja na kãm hprãm. Jakamã nhÿrmã akupÿm më htĩr ã arĩgrota ã ixte akupÿm më ho htĩr nhũm ixte ãm pixire nê ho ixpikunor kêtja na kãm hprãm.

⁴⁰ —Tã kot ka më atõ ixpê Tirtũm Kra hã ixpumu nê amnhĩ kaxyw ixkôt ajamaxpêr nê ixkôt amnhĩ xãm. Hã kot kaj nhÿrmã atyk tã pa akupÿm më atĩr xà hã arĩgrota ã akupÿm ato atĩr ka wa ixkuri atĩr tũm nê amex nê apa ho apa. Ja na Inhĩpêêxaja kãm hprãm. Anê.

Nhũm pre ã Jejus më kãm amnhĩ jarênh anê. ⁴¹ Hãmri nhũm Ijaew nhõ pahijaja më kuri mar o kuhê nê tee ri kêp kaxkwa rũm më apkur xà maati pyrãk ã amnhĩ jarênh ma nhũm ja më kãm mex kêt nhũm më kamã gryk nê. ⁴² Jakamã axpên mã ri harênh o:

—Tk. Kwa mo na ri ã amnhĩ jarênh anê? Kêp më panhĩõ kênã kot kêt ri kêp kaxkwa nhõ xwÿnh ã amnhĩ jarê. Kêp Juje më Marir wa hkra na. Më pahte katorxà më hipêêxà wa omunh mex kênã kot kêt axtem nê kêp kaxkwa nhõ xwÿnh ã amnhĩ jarê. Anê.

⁴³ Hãmri nhũm amnhĩ tã më kuma nê më kãm:

—Kwa më ã ijarênh anhÿr kêt nê. ⁴⁴ Koja Inhĩpêêxà kot më awÿr inhmênh xwÿnhhta tanhmã më hkrã hto nhũm më rĩ kormã amnhĩ tã ja hã ixpumu nê amnhĩ kaxyw ixkôt hamaxpêr. Tã ã më kot amnhĩ nhĩpêx anhÿr xwÿnhjaja koja më nhÿrmã htyk tã pa akupÿm më ho më htĩr nhũm më wa ixri htĩr tũm nê mex kumrêx nê pa ho pa.

⁴⁵ —Amnepêm Tirtũm kapêr jarênh o më pa xwÿnhjaja na prem ã ja jarênh anhÿr o:

Koja Tirtũm më hkrã kaxwÿnh kãm tanhmã më kãm kapêr o amnhĩrĩt to ho pa.

Anhÿr o harënh. Jakamã më kot Tirtÿm kapër mar në hkôt amnhÿ nhÿpëx xwÿnhjaja koja më mãänën amnhÿ kaxyw pa ixkôt hamaxpër në ixkôt ri amnhÿ nhÿpëx o pa.

⁴⁶ —Në më apê pika nhö xwÿnhjê hõ aa më ate ixkÿn-hã ano ho Inhÿpêêxà pumunh kêt. Æm papxipix na ixte omunh. Kurÿm na pa pre më awÿr wrÿ. ⁴⁷ Tã kot ka më atõ amnhÿ kaxyw ixkôt ajamaxpër. Hã kot kaj nhÿrmã wa ixkuri atÿr tÿm në amex në apa ho apa. Kwa më jam ajamaxpër tÿx në.

⁴⁸ —Në ixpê më axàpkurxà maati jakamã pa na ixpê akupÿm më ho më htÿr xwÿnh. ⁴⁹ Amnepêm më panhÿgëtjaja kormã kapôt ã më pa ri më kot “manã” anhÿr xwÿnhhta kur o ri pata ã na prem kukwak ri htÿr tÿm në pa ho pa hkêt në. Na prem ri pa në gaa në rÿ hpigêt në htyk pa. ⁵⁰ Axtem kaxkwa rÿm më apkur xà maati jarënh xwÿnhhta pix kukwak ri na htem nhÿrmã htyk tã akupÿm htÿr në wa ixri htÿr tÿm në mex në pa ho pa. ⁵¹ Æm paa. Pa na htem inhÿ hkwÿ hkrë hãmri në wa ixri htÿr tÿm në mex në pa ho pa. Na pa pre ra amnhÿ grõnh kôt më awÿr wrÿ. Jakamã ka më atõ inhÿ hkwÿ hkrë hãmri në nhÿrmã atyk tã pa akupÿm ato atÿr ka Tirtÿm më wa ixri atÿr tÿm në amex në apa ho apa. Anë.

⁵² Nhÿm pre ã Jejus Ijaew mã amnhÿ jarënh anë. No ãm më kãm amnhÿ tã kuxi në amnhÿ jarë. Jakamã nhÿm më tee ri kuma hãmri në tanhmã hã axpën mã kapër to. Më kot hprÿ hã mar kêt në ãm më kot ÿ hkwÿ hkrërja pix jarënh mar jakamã tee ri hamaxpër në axpën mã:

—Kwa tanhmã kot kêt we amnhÿ to në më pamã amnhÿ nhÿ hkwÿ gõ pu më kuku? Anë.

⁵³ Hãmri nhÿm amnhÿ tã më kuma në më kãm:

—Nà më kot inhÿ hkwÿ hkrër në ixkamrô hkwÿ ho hkõm xwÿnh pixjaja koja më nhÿrmã Tirtÿm më wa ixri htÿr tÿm në pa ho pa. Ixte akupÿm më ho më htÿr xà hã arÿgrota ã kot paj më ho më htÿr nhÿm më wa ixri htÿr tÿm në mex në pa ho pa. No kot kaj më inhÿ hkwÿ hkrër kêt në ixkamrô hkwÿ ho akõm kêt hãmri në wa ixri atÿr tÿm në amex në apa ho apa hkêt në. Kwa më jam ajamaxpër tÿx rãhã në. ⁵⁵ Kêt inhÿja kêp më apkur xà maati na. Në ixkamrôja kêp më hkõm xà maati na. Jakamã na htem inhÿ hkwÿ hkrë në ixkamrô hkwÿ ho ixkõ në ra kêp wa ixri më htÿr tÿm në më pa ho më pa mã xwÿnh. ⁵⁶ Jakamã kot ka më atõ inhÿ hkwÿ hkrë në ixkamrô hkwÿ ho ixkõ. Hãmri pa amnhÿ tã apumu në akarõ mã axà ka te apê pa pyrãk o amnhÿ nhÿpëx o apa. ⁵⁷ Inhÿpêêxà kot më awÿr inhmënh xwÿnhhta kukwak ri na pa hte ixtÿr tÿm në ixpa ho ixpa. Tã ja pyrã në kot kaj më inhÿ hkwÿ hkrë hãmri në ixkukwak ri wa ixri atÿr tÿm në apa ho apa mã xwÿnh.

⁵⁸ —Jakamã na pa ã më amã ixpê kaxkwa rÿm më axàpkur xà maati hã amnhÿ jarënh anë. Amnepêm më panhÿgëtjaja na pre htem kapôt ã mëõta kur o pa hãmri në gaa në hpigêt në htyk pa. No kêt pa koja më inhÿ hkwÿ hkrë hãmri në më kurom wa ixri htÿr tÿm në mex në pa ho pa. Anë.

⁵⁹ Nhÿm pre ã Jejus më kãm amnhÿ jarënh anë. Kormã Kapanaÿ kamã Tirtÿm kapër o më ahkre xà hã ixkre kamã ã më ahkre anhÿr o xa.

Më ohtô në më kot Jejus kaga hã më harënh

Sikÿn Korÿt 3.6; Sikÿn Pêtre 3.16

⁶⁰ Hãmri nhÿm më kot Jejus kôt mar o më pa xwÿnhjaja ohtô në ã kapër anhÿrja ma në tee ri amnhÿ kukamã hamaxpër në hã axpën mã:

—Tk. Kwa pëp kapërja ãm ri katii. Mëhõ koja we kuma në hkôt hamaxpër në hkamrô në ÿ kur o ri hkôt pa? Nà më piitã më kãm ja mexti hã. Anë.

⁶¹ Hãmri nhÿm amnhÿ tã më kuma në më kãm:

—Kwa xà ixkapërja më apê omnuj? ⁶² Nà kot paj nhÿrmã ma akupÿm kaxkwa hwÿr api. Ixpê Tirtÿm kot më akaxyw ixãm xwÿnh ã ma akupÿm hwÿr api. Hãmri ka më ã ixte amnhÿ nhÿpëx anhÿr ã ixpumu në rÿ kormã ixkôt amnhÿ xunhwÿr japêr. ⁶³ Na htem mëmoj kur kukwak ri kêp Tirtÿm më wa ixri htÿr tÿm në pa ho pa xwÿnh kêt në. Rÿ amnhÿ krã hkôt tanhmã amnhÿ nhÿpëx to ho kêp wa ixri htÿr tÿm në pa ho pa mã xwÿnh kêt në. Tirtÿm më wa Ixkarõ tãm na hte më hkarõ mã agjê në më ho Tirtÿm wa ixkuri më htÿr tÿm në më pa ho më pa mã xwÿnh. Tã ÿ hã na pa ã më amã ixkapër anë. Nom më amã amnhÿ tã kuxi në amnhÿ jarë. Tã kot kaj më ixkapër ma në ixkôt amnhÿ nhÿpëx. Hã kot kaj më nhÿrmã wa ixri atÿr tÿm në amex në apa ho apa. ⁶⁴ No më akwÿjaja na ka më ixkapër ma në ãm ama në ixkôt ajamaxpër kêt në. Jakamã na pa ã më amã ixkapër anë në më amã: “Koja Inhÿpêêxàja tanhmã më akrã hto ka më rÿ kormã amnhÿ tã ixpumu në amnhÿ kaxyw ixkôt ajamaxpër.” Anhÿr o më amã ixkapër. Anë.

Nhÿm ã Jejus më kãm kapër anë. Ra kot më hkukamã më omunh mex. Ra kot amnhÿ kaxyw më kot hkôt hamaxpër mã xwÿnhjê pumunh në mãänën më kamã kot mëõ pahi nhÿhkram haxàr mã xwÿnhja nhÿm mãänën ra kot amnhÿ kukamã omunh mex. Jakamã nhÿm ã më kãm kapër anë. ⁶⁶ Hãmri nhÿm më kot hkôt kapër mar o më pa xwÿnh kwÿjaja tee ri kuma hãmri në hkaga në axte hkôt pa hkêt në. ⁶⁷ Hãmri nhÿm tee ri më kot hkaga në ma më mrar ã më omu në më ixpê hkôt ixpa ho ixpa xwÿnh pê 12jê mã kapër në më inhmã:

—Pa? No më kajaja. Xà kot kaj më uràk në ixkaga në ma akupÿm mra nà? Anë.

⁶⁸ Hãmri nhÿm Simãw Pêtre kãm:

—Nà kot paj më akaga hkêt në. Kapxipix na htem amnhÿ kaxyw akôt hamaxpër jao kêp Tirtÿm më war akuri htÿr tÿm në pa ho pa mã xwÿnh. ⁶⁹ Ka na pre Tirtÿm më ixwÿr amë. Jakamã na pa më amnhÿ kaxyw akôt ijamaxpër o ri ixpa. Nà kot paj më aa akaga hkêt në. Anë.

⁷⁰ Hãmri nhÿm kuma në kãm:

—Nà ixte amnhÿ kaxyw më apê 12jê rënh tã na ka më atõ akwÿjê hkÿnhã axtem në Satanasti hkôt amnhÿ xãm. Anë.

⁷¹ Nhũm pre ã finat Jut Kariot kot mẽ inhõ pahijê nhĩhkram haxàrja kukamã mẽ inhmã harênh anê. Mẽ inhĩ ò na pre. Nê kêp Simãw Kariot kra na pre. Tã ra kot mẽ ìhkram haxàr kaxyw nhũm Jejus kot amnhĩ kukamã omunh jakamã ã mẽ inhmã harênh anê.

Jejus tøjaja kot mẽ hkĩnh wỳr amnhĩ kôt hwỳr ã mẽ harênh

Matêwre 10.36, 13.57-58

7 Tã nhũm Jejus arĩ Garirej kamã ri pa nê kormã akupỳm Jutej wỳr mõi kêt nê. Jutej kamã Ijaew nhõ pahijaja ra kot hã àmnênh nhũm mẽ kot hpĩr ã harênh jakamã nhũm mẽ umaj kormã hwỳr mõi kêt nê.

² Tã mẽ ixpê Ijaew mẽ ixte ixkre hkryre nhĩpêx nê hã ixkĩnh ã arĩgroja ra ahtêp o mõi. Mẽ ixkĩnh ta ã na pa pre htem ixpiitã Jutej wỳr axpên wỳr akuprõ nê ahpỳn-hã ri amnhĩm ixkre hkryre nhĩpêx nê kamã ixkrĩ.

³ Jakamã nhũm Jejus tøjaja hwỳr mra nê kãm nojarêt nê amnhĩ kôt kuwỳ nê kãm:

—E kwa tokyx pu mẽ pahkwỳjê hkôt. Ka mẽ kãm aa mẽ kot mẽmoj pumunh kêt kwỳ ho anhỳr o ri mẽ hkôt apa kê mẽ kãm akapêr mar prãm xwỳnhjaja ja hã apumu. ⁴ Na ka hte jar te apimxur pyràk o amnhĩ nhĩpêx. E kwa tokyx ma pu mẽ hkôt. Anê.

⁵ Katorxà hkôt mẽ kêp Jejus tõi htã kormã amnhĩ kaxyw hkôt hamaxpêr kêt jakamã na prem ã kãm kapêr anê. ⁶ Hãmri nhũm mẽ kãm:

—Nà kormã. Kormã ixte mẽ kãm amnhĩ to amnhĩrĩt xà hã arĩgro kormã kator kêt. Jakamã kot ka mẽ amã mẽ hkôt amrar prãm nê mãmri ma mẽ hkôt mra. ⁷ Kojja mẽ apumu nê kãm mẽ akurê hkêt nê. Nê mẽ akamã gryk kêt ka mẽ ri tanhmã amnhĩ nhĩpêx to ho mẽ hkôt apa. No pa kot paj mẽ hwỳr mõi nê mẽ kãm mẽ kot amnhĩ tomnuj o pa hã mẽ harênh o ri mẽ hkôt ixpa nhũm mẽ tee ri amnhĩ tã inhma nê ixkamã gryk nê. ⁸ Jakamã mẽ mãmri ma mẽ hkôt mõi. Kot paj kormã. Kormã ixte mẽ kãm amnhĩ to amnhĩrĩt xà hã arĩgroja kormã kator kêt.

⁹ Anê nhũm mẽ tee ri kuma hãmri nê kure nê ma mẽ hkwyjê hkôt Jutej wỳr mõi. Nhũm Jejus kormã Garirej kamã ri pa hã apkati grêre. ¹⁰ Hãmri nê kormã ma hapu hã mẽ hkôt mõi. Pa mẽ hkôt ri ixpa ho ixpa xwỳnhjaja ma hkôt ixpa.

Mẽ kot ahpỳnhã tanhmã Jejus jarênh to hã mẽ harênh

Juãw 7.37-44, 9.22, 10.19-21, 12.42-43

¹¹ Rôm nhũm ra mẽ ixpê Ijaew nhõ pahijaja mẽ hkĩnhja kamã mẽ pikuprõnh xwỳnhjê kaêx ã Jejus japêr o ri mra. Nê hã axpên kukjêr o mra nê axpên mã:

—Kwa nok? Nhỹri mãn we? Anê.

¹² Nhũm Ijaew piitã tanhmã axpên mã Jejus jarênh to ho pa. Nê kamã mẽ hkwyjaja harênh o:

—Nà kot amnhĩ to mex o pa xwỳnh na.

Anhỳr o harênh o pa. Nê kamã mẽ hkwyjaja axtem nê harê nê harênh o:

—Tk. Kot mẽ no kupyur o pa xwỳnh kênã. Anê.

¹³ Nom mẽ ò pahi pymaj mẽ piitã mẽ nom tanhmã harênh to hkêt nê. ãm axpên mã pix mã tanhmã harênh to ho pa.

Jejus kot mẽ hkĩnh xwỳnhjê jahkre hã harênh

Makre 3.22; Juãw 5.16

¹⁴ Tã pa mẽ mẽ hwỳr pøj. Jejus mẽ pa mẽ hkôt ixpa ho ixpa xwỳnhjaja mẽ hwỳr pøj. Kormã mẽ hkĩnhja hapêx kêt ri. Hãmri pa mẽ Jejus kôt Tĩrtũm mã amnhĩ jarênh xà hã ixkreja wỳr mra nê agjê nhũm Jejus mẽ ahkre ho nhỹ. ¹⁵ Hãmri nhũm mẽ inhõ pahijaja tee ri kot tanhmã mẽ ahkre hto hã kuma nê hã axpên kukja nê axpên mã:

—Kwa mẽ pahkĩnhã kot Tĩrtũm kapêr o istuda hkêt tã ã mẽ ahkre anê. Anê.

¹⁶ Hãmri nhũm amnhĩ tã mẽ kuma nê mẽ kãm:

—Nà na pa hte amnhĩ krã hkôt tanhmã ri mẽ ajahkre hto hkêt nê. ãm kot mẽ awỳr inhmênh xwỳnh ta nhỹ hã na pa hte ã mẽ ajahkre anhỳr o ri mẽ akôt ixpa.

¹⁷ Tã kot kaj mẽ amã Tĩrtũm kãm hprãm xà hkôt amnhĩ nhĩpêx prãm hã kot kaj mẽ ixte y hã ixkapêr ã ix-pumunh kurê kumrêx. ¹⁸ Amnhĩ krã hkôt mẽ kãm kapêr o ri mẽ pa xwỳnhjaja na htem mẽ kot mẽ mar nê mẽ hã hpijaam pix kaxyw tanhmã mẽ kãm kapêr to ho ri pa. No kêt pa na mẽ ate ixkapêr mar nê kot mẽ awỳr inhmênh xwỳnh ta ã apijaam pix kaxyw na pa hte tanhmã mẽ amã ixkapêr to ho ri ixpa. Jakamã ãm hãmri na pa hte mẽ amã ixkapêr o ri ixpa.

¹⁹ —Finat Mojes na pre mẽ panhĩgêjtaja kot tanhmã amnhĩ nhĩpêx to ho pa nhũm Tĩrtũm kot mẽ kãm hã karõ jarênh o ri mẽ hkôt pa htã ka mẽ hkôt amnhĩ nhĩpêx kêt nê. Tã ixte hkôt amnhĩ nhĩpêx kêt ã ixto axêx nê mẽ ate ixpĩr kaxyw ixtã amnhĩ jarênh ri apa. Anê.

²⁰ Hãmri nhũm mẽ ã Jejus kot mẽ kãm kapêr anhỳrja ma nê hêx rom kãm:

—Kwa mẽ ixtõ na pa apĩr mã ka ri ã mẽ ijarênh anê? Amrakati kênã. Kwa mãn ka akrã axpã nã? Hã na ka ã ri akapêr anê. Anê.

²¹ Hãmri nhũm mẽ kãm:

—Nà ixte mẽ pahkôt xà hã arĩgro hã akupỳm mẽhõ myta ho mex jakamã na ka prem ja hã ixpumu nhũm ja mẽ apê omnuj nê. Nê te ixte mẽ pahkôt xà hã arĩgro hã xpijaam kêt xwỳnh pyràk ã ijarê. ²² Nom na ka htem ixpyrà nê mẽ panhõ arĩgromnu hã mẽmoj tã axàpênh o ri apa. E pa mẽ amã mẽmoj jarê ka mẽ inhma. Na pre finat Mojes mẽ pamã mẽ pahte mẽ pahkra myre pê my kwỳt kà jakàr ã mẽ pamã karõ. Kukamã higêjtaja kot kãm ja hã karõ xà hkôt. Jakamã na htem mẽ hkra myre hapøj nê hã semãn pyxi nê hapêx nhũm mẽ kêp mẽmy hkwrýt kà jakà. ²³ Mẽ pahkôt xà hã arĩgro hã hõ kator tãã nhũm mẽ hã semãn pyxi nê mẽ panhõ arĩgromnu hõ hã kêp my kwỳt kà hkwy krãhta. Mojes kot Tĩrtũm nhỹ hã ja hã mẽ pamã karõ xà hkôt. Jao mẽ panhõ arĩgromnu hã apê. Tã pa pre mẽ apyrà nê arĩgromnu hã ixàpênh pê akupỳm mẽhõ myta ho mex ka mẽ ja hã ixpumu nê axtem nê ixtỳx ri ixte amnhĩ nhĩpêx o ixpa xwỳnh ã

ijarē nē mē ate ixpīr kaxyw ā amnhī jarē. ²⁴ Kwa mē amnhī krā hkôt tanhmā mē harēnh to ho ri apa hkêt nē. Ām mē kot tanhmā amnhī nhīpêx to ho pa hā mē omu nē ajamaxpēr o: “Kwa xà we Tirtūm kām ja mex nà?” Anhÿr o mǎn kêt mē ajamaxpēr nē rī kormā tanhmā mē harēnh to. Anē.

²⁵ Hāmri nhūm Jerujarē nhō xwÿnh kwÿjaja ja hā kuma nē tee ri hkukamā hamaxpēr. Hāmri nē hā axpēn kukja nē axpēn mā:

—Kwa xà tām na mē panhō pahijaja mē kot hpīr kaxyw hā amÿnê? ²⁶ Ota jar mē pakamā ri pa htā nhūm mē ām omu nē kām tanhmā nē hkêt nē. Mǎn mē ām hāmri kēp Kris ā hkamnhīx jakamā kapēr ma nē ām kuma nē kēp Kris ā tanhmā ho hkêt nē.

²⁷ Hāmri nhūm mēhōja kuma nē kām:

—Tk. Nà kēp Tirtūm kot mē pahwÿr mēnh xwÿnhre hā. Kēp Najare nhō xwÿnh kēnā. Mē pahte hipêêxā mē katorxà wa omunh mex. No kêt Tirtūm kot mē pahwÿr mēnh mā xwÿnhhta koja xep mē pahwÿr kato pu mē nhÿhÿnh htēm xà hkôt omunh kêt nē. Anē.

²⁸ Rōm nhūm Jejus arī Tirtūm mā amnhī jarēnh xà hā ixkreja kamā mē ahkre ho nhÿ. Jakamā mē kot axpēn mā harēnh ā amnhī tā mē kuma nē mē kām:

—Xà mē ate aprī hā ixpumunh nē nhÿhÿnh ixtēm xà hkôt ixpumunh? Nà mē ate ja hā ixpumunh kêt. Na pa pre amnhī hkrā hkôt mē awÿr inhmōr kêt nē. Na pre mēhō mē awÿr inhmē. Nom kot mē awÿr inhmēnh xwÿnhja kormā mē ate omunh kêt. ²⁹ Ām papxipix na ixte omunh. Kurūm ixwrÿk xwÿnh na pa. Kot mē awÿr inhmēnh nhūm kurūm ixwrÿk jakamā ixte ixprī hā omunh par. Anē.

³⁰ Hāmri nhūm mē hkwyjaja tee ri ā kot amnhī jarēnh anhÿrja ma nē ri axpēn mā harēnh o:

—Kwa Tirtūm kot mē pahwÿr mēnh ā kot amnhī to hēx kēnā. E kwa pu mē ā kot amnhī to hēx anhÿr ja ā unē nē haxà nà?

Anhÿr o axpēn mā hā amÿnê. Nom kormā mē kot unēnh nē haxà xà hā arīgroja kormā kator kêt jakamā nhūm Tirtūmja nē mē omunh mex nē nhūm mē ām kām unēnh prām kaprÿ. ³¹ No nhūm mē hkwyjaja mē kurom kuma nē kēp Tirtūm kot mē pakaxyw ām xwÿnh ā omunh kurē kumrēx nē amnhī kaxyw hkôt hamaxpēr. Hāmri nē axpēn mā harēnh o:

—Kwa mǎn kēp Tirtūm kot mē pahwÿr mēnh mā xwÿnhhta mǎn nà? Mē pahtō kot pu urāk nē aa mē kām mē kot mēmoj pumunh kêt o anhÿr rax o ri papa? Amrakati kumrēx. Nà pēr tām kēnā. Anē.

Pōristi hkwy kot Jejus pynēnh kaxyw ā mē harēnh

³² Nhūm prem ā axpēn mā Jejus jarēnh anhÿr o kuhē hāmri nhūm Parijew nhō xwÿnhjaja hā mē kuma. Hāmri nē patre krāhtūmjē mē mē ma Jejus wÿr mēō pōristi hkwy rē nē mē kām:

—E mē ma Jejus wÿr mra nē unē nē man akupÿn o tē. Anē.

³³ Hāmri nhūm mē kuma nē ma hwÿr mra nē omu nom tokyx unēnh kêt nē. Kormā kapēr ā mar o kuhē. Nhūm Jejus arī mē kām kapēr o xa nē mē kām:

—Nà kot paj jar mē akôt ri ixpa hā mytwrÿ grēre hāmri nē ma akupÿm kot mē awÿr inhmēnh xwÿnhhta wÿr api. ³⁴ Ka mē tee ri jar ijapēr o ri apa nom nhÿri ixpumunh kêt nē. Nē ma inhmōr xàta wÿr kot kaj mē atō ma ixkôt amōr kêt nē. Anē.

³⁵ Hāmri nhūm mē tee ri ā kot amnhī jarēnh anhÿrja ma nē axpēn mā:

—Kwa nhÿhÿm koja we ma mō pu mē hkôt papa hkêt nē? Mǎn mē pahkwÿjaja kot Gresjē kamā mē pa xwÿnhjē hwÿr koja ma mō nē hpānhā mē hkôt mē ahkre ho pa nà? Hā na ā mē pamā amnhī jarēnh anē? ³⁶ Mo na ri mē pahte tee ri hapēr o papa hā mē pajarē nē mē pahte hkôt pamrar kêt ā mē pajarē? Anē.

Tirtūm Karō te kēp gō nyw pyrāk ā harēnh

Juāw 4.13-14; Apokarip 22.1, 22.17

³⁷ Tā nhūm ra mē hkīnhja hapêx kaxyw hitep xà hā arīgro maatija kato. Jakamā nhūm Jejus kànhmā xa nē kÿxpê mē hpikuprōnh xwÿnhjē mā kapēr nē mē kām:

—E te mē amā kōr o apa pyrāk xwÿnhjaja. Mē amnē ixwÿr akuprō. Kot kaj mē amnhī kaxyw ixkôt ajamaxpēr pa tanhmā mē ato ka mē apē Tirtūm mē wa ixri atīr tūm nē apa ho apa mā xwÿnh.

³⁸ —Kot kaj mē ja hā amnhī pumu hāmri nē ma mē kām ixkapēr jarēnh o ri mē hkôt apa. Te mē kām kōr nhūm mē ate mē kām gō hkwy nhūm mē kot ho hkōm pyrāk o mē hipêx o ri mē hkôt apa. Hāmri nhūm mē ama nē mē apyrà nē amnhī kaxyw ixkôt hamaxpēr. Pa ixte tanhmā mē atoja pyrà nē tanhmā mē ho nhūm mē apyrà nē kēp wa ixri htīr tūm nē pa ho pa mā xwÿnh. Anē.

³⁹ Nhūm pre ā Jejus mē kām kapēr anē. No ām hā kuxi nē mē kām kapēr nē hprī hā harēnh kêt nē. Tirtūm Karō kot nhÿrmā mē kot amnhī kaxyw Jejus mā hamaxpēr xwÿnhjē karō mā gjēxja nhūm ā mē kām hā kuxi nē harēnh anē. No kormā akupÿm kaxkwa hwÿr àpir nē mex nē hkrī hkêt jakamā kormā mē hwÿr Karō rēnh kêt nē.

Mē kot ahpÿnhā tanhmā Jejus jarēnh to hā mē harēnh

Juāw 7.11-13, 7.25, 10.19-21

⁴⁰ Hāmri nhūm mē kot Jejus mar o hkrī xwÿnhjaja ā kapēr anhÿrja ā kuma nē ahpÿnhā tanhmā harēnh to nē harēnh o:

—Kwa finat Mojes pyrà nē kēp Tirtūm nhÿ hā kapēr jarēnh o pa xwÿnh na nà? Anē.

⁴¹ Nhūm kamā mē hkwyjaja mē kām:

—Nà Tirtūm kot mē pakaxyw ām xwÿnhhta na. Anē.

Nhūm kamā mē hkwyjaja ja hā mē kuma nē mē kām:

—Tk. Nà kēp Garirej nhō xwÿnh kēnā kot kêt Tirtūm mē pakaxyw ām. ⁴² Tirtūm kapēr ā kagà htūm kot kēp Garirej nhō xwÿnh ā harēnh kêt. Kēp Pahi Tawi hkanrēhā hkagrōt nyw jakamā koja urāk nē Jutej kamā krī pē Perēj kamā kato. Jao koja urāk nē kēp Jutej nhō xwÿnh.

Anhÿr o ri axpēn mā harē. Mē kot htÿx Jejus pika pē Garirej kamā kator ā hkamnhīx jakamā ā axpēn mā harēnh anē. Nom pika pē Jutej kamā na pre kato. Krī

pê Perěj kamã. Tã no nhũm mẽ hkwỳjaja ja hã mar kêt jakamã kêp Tirtũm kot mẽ pahwỳr mēnh xwỳnh kêt ã hkamnhĩx.

⁴³ Jakamã nhũm mẽ ã ahpỳnhã axpēn mã harēnh anē. ⁴⁴ Nhũm mẽ hkwỳjaja ra kot unēnh kaxyw tã tokyx unēnh kêt nē.

Pôristi kot Jejus pynēnh kêt ã mẽ harēnh

Matēwre 7.28-29

⁴⁵ Tã nhũm patre nhõ pôristijaja. Mẽ kot Jejus pynēnh mã hwỳr mrar tã hãmri ã kapēr anhỳrja ã kuma nē tee ri hamaxpēr nē unēnh kêt nē. Nē awjanã nē ahte ý kamã ma akupỳm patre krãhtũmjê mẽ Parijew nhõ xwỳnhjê hwỳr mra. Hãmri nhũm mẽ omu nē mẽ kãm: —Pa nok? Tanhmã na ka mẽ amnhĩ to nē unēnh nē ho amõr kêt nē? Anē.

⁴⁶ Hãmri nhũm mẽ kãm:

—Nà na pa mẽ unēnh kêt nē. Kapēr mex kēnã. Te kot mẽ pakapēr pyrãk kêt jakamã pa mẽ tee ri kapēr ã kuma nē unēnh kêt nē. Anē.

⁴⁷ Hãmri nhũm Parijew nhõ xwỳnhjaja mẽ kuma nē mẽ kãm:

—Tk. Kwa mãn ka mẽ ra mẽ urãk nē tanhmã kot amnhĩ to hēx toja ma nē hkõt ajamaxpēr nã? ⁴⁸ Mẽ ix-pê Parijew nhõ xwỳnhjaja nē mẽ panhõ pahijaja na pa htem hkõt ijamaxpēr kêt nē. ⁴⁹ No kêt mẽ kot mar nē hkõt hamaxpēr xwỳnhjaja na htem mẽ ixkĩnhã finat Mojes kapēr mar kêt nē. ãm Jejus kapēr pix na htem kuma nē hkõt hamaxpēr. Mỳrapê koja Tirtũm tanhmã mẽ homnuj tỳx to nhũm mẽ rĩ amnhĩ pumu. Anē.

Nĩkotē kot Jejus xyr pē kapēr ã harēnh

Juãw 3.1-21

⁵⁰ Hãmri nhũm Nĩkotēja mẽ mar o xa. Mẽ urãk nē kēp Parijew nhõ xwỳnh tã na pre ra kamãt õ hã Jejus wỳr tē nē kãm kapēr. Jakamã tee ri hã mẽ kapēr ma hãmri nē yr pē mẽ kãm kapēr nē mẽ kãm:

⁵¹ —Tk. Kwa kormã mẽ pahte pahpĩrĩ hã kapēr mar nē tanhmã kot amnhĩ nhĩpēx to hã omunhre hã. Na pre finat Mojesja Tirtũm nhỹ hã mẽ panhĩgētjê mã ja jarēnh o:

Kēr ka mẽ aprĩ hã mẽ kapēr ã mẽ ama nē mẽ kot amnhĩ nhĩpēx ã mẽ omu nē rĩ kormã tanhmã mẽ harēnh to.

Anhỳr tã ka mẽ kormã aprĩ hã Jejus kot amnhĩ nhĩpēx ã omunh kêt tã ra kot amnhĩ tomnuj xwỳnh ã harē. Anē.

⁵² Hãmri nhũm mẽ tee ri kuma nē mẽ kãm:

—Tk. Kwa xà we urãk nē apē Garirej nhõ xwỳnh hã na ka ã yr pē akapēr anē? Xà Tirtũm kapēr ã kagà htũm kot Garirej nhõ xwỳnhjê hõ kēp ý hã kapēr jarēnh o pa xwỳnh ã harēnh? Nà ã kot harēnh anhỳr kêt. Anē.

⁵³ Nhũm mẽ ã Nĩkotē mã kapēr anē hãmri nē angrã nē Tirtũm nhõrkwỳ rũm hapõj nē ma akupỳm õrkwỳ hwỳr àhkurē ho mra.

Mēhõ ni kot nhãm mẽ mjên o amnhĩkati hã harēnh

Xiakre 2.10-13

8 Tã nhũm Jejus Tirtũm nhõrkwỳ kamã mẽ ahkre hpa hãmri nē kato nē ma hixēt prêk pē Oriwēhti hwỳr tē. Hãmri nē hã api nē nhỹri nõ nē ra gõr.

² Tã nhũm apkati nē myt kator o mõr mẽ nhũm kãnhmã nhỹ nē akupỳm wrỳ nē Tirtũm mã amnhĩ jarēnh xà hã ixkre hwỳr tē. No ãm kormã ixkre pu hã kahē hkre kamã nhỹ. Nhũm krĩ nhõ xwỳnhjaja omu nē hã htu rax nē nhũm tanhmã mẽ ahkre hto ho nhỹ.

³ Hãmri nhũm Parijew nhõ xwỳnhjê mẽ Tirtũm kapēr tũm o mẽ ahkre ho mẽ pa xwỳnhjaja hwỳr mēhõ nija o tē. Na ra ham mēhõ pē mjên o amnhĩkati ho nõ nhũm mẽ ja hã omu nē unē nē hpa hã kupy nē ma Jejus wỳr hkjēnh o mõ. Hãmri nē mẽ kot mar o kuhē xwỳnhjê kutã ãm nhũm xa. ⁴ Hãmri nhũm mẽ Jejus mã:

—E ot pa mẽ awỳr jahti ho tē ka omu. Na ham mēhõ pē mjên o amnhĩkati ho nõ. Pa mẽ ja hã omu nē unē nē man awỳr o tē. ⁵ E tanhmã kot puj mẽ hipēx to? Na pre finat Mojes Tirtũm nhỹ hã mẽ panhĩgētjê mã ja jarēnh o:

Koja mēnijê hõ axtem nē nhãm mēhõ pē mjên o amnhĩkati ho nõ ka mẽ ja hã omu nē apiitã ahpỳnhã kēn rũnh jamỳ nē ho htak o apĩ.

Anhỳr o kot harēnh. No ka? Tanhmã kot kaj mẽ inhmã ja jarēnh to? Tanhmã kot paj mẽ hipēx to nhũm amã mex nē? E mẽ inhmã tanhmã mẽ ixte hipēx to jarē. Anē.

⁶ Nhũm mẽ ã hēx rom nija ã Jejus kukjēr anē. Kot mẽ kot hpĩr nē mẽ kãm kapēr nhũm mẽ kot hã mar nē mẽ hkrãhtũmjê hwỳr mõr nē kãm kot Mojes kapēr kwỳm ri mẽ ahkre hã harēnh kaxyw nhũm mẽ hēx rom ã hkukjēr anē. Hãmri nhũm mẽ kuma nē tanhmã hã mẽ kãm nē hkēt nē. ãm htỳx hikõt nē ãhkrãkrã ho pyka kagà ho nhỹ. ⁷ Nhũm mẽ tee ri omu nē axte hã hkukja nhũm kãnhmã xa nē mẽ kãm:

—Tõe. Nà kot ka mẽ atõ aa tanhmã amnhĩ tomnuj to hkēt kumrēx ã amnhĩ pumu hãmri nē kam nē rĩ kaxyw kēn õ py nē akumrēx ho hkura. Kê akwỳjaja rĩ kormã akõt hkwỳ jamỳ nē ho htak. Anē.

⁸ Hãmri nē akupỳm hikõt nē pyka kagà ho nhỹ.

⁹ Hãmri nhũm mẽ tee ri kapērja kõt kuma hãmri nē mẽ kot mar o kuhē xwỳnhjê rũm angrã nē ma mra. Mẽ piitã mẽ kot amnhĩ tomnuj xwỳnh ã amnhĩ pumunh mex jakamã tee ri ã kot mẽ kãm kapēr anhỳrja ma nē angrã nē ma akupỳm hpỳnh nē axpēn kõt mrar o xa. Mēhpigēt kumrēx nē hpãnhã mẽ nywjaja nhũm mẽ hpỳnh nē ma axpēn kõt mrar o ãm kãm hapēx. Nhũm Jejus mēnija pix wa ahte mẽ kot mar xwỳnhjê kutã wa arĩk. ¹⁰ Hãmri nhũm Jejus kãnhmã xa nē nita mã kapēr nē mẽ kãm:

—Pa? No mẽ kot ato kapēr xwỳnhhta mẽ? Xà na mēhõ kēn o akuranh kêt nē? Anē.

¹¹ Nhũm kãm: “Ma amrakati.” Anē nhũm kãm:

—Tõe. Nà kot paj ijaxwỳja tanhmã ato hkēt nē. E mamrĩ ma akupỳm anhõrkwỳ hwỳr tē. No ãm kēr ka

axte ã amnhĩ nhĩpêx anhÿr kêt nê. Ām kwarĩ ho kwarĩ. Anê.

Jejus kot hprĩ hã amnhĩ jarênh

Juāw 1.4; Rōmān 13.12-14; Epes 5.8-14; Wam Tesarōn 5.5-8

¹² Tã nhũm arĩgro hõ hã nhũm Jejus axte Tĩrtũm nhõrkwÿ hwÿr tẽ nê kamã mẽ ahkre ho nhÿ nê mẽ kãm:

—Nà te ixpê mẽ piitã mẽ õ kanê pyræk. Na hte kanêja mẽ kãm hirã mex nê nhũm mẽ kamã rĩt mex o pa. Jao kamàt kô kamã ri pa hkêt nê. Ja pyrã nê na pa hte Tĩrtũm kot amnhĩ nhĩpêx o amnhĩrĩt mex o ri ixpa. Kot ka mẽ atõ amnhĩ kaxyw inhmã ajamaxpêr nê ixkõt amnhĩ xãm hãmri nê tanhmã amnhĩ tomnuj to ho apa hkêt nê. Ām Tĩrtũm kãm hprãm xà kõt pix mã tanhmã ri amnhĩ nhĩpêx to ho ri apa. Jao te ate kanê hpøk nhĩrã kamã arĩt mex pyrã nê apê wa ixri atĩr tũm nê apa ho apa mã xwÿnh. Anê.

¹³ Hãmri nhũm Parijew nhõ xwÿnhjaja tee ri ã kapêr anhÿr ã kuma nê kãm:

—Tk. Kapxipix na ka ã amnhĩ jarênh anê. Mẽhõ kot ã ate amnhĩ jarênh anhÿrja kõt kot mẽ inhmã ajarênhre hã. Jakamã kot paj mẽ ama nê ãm ama. Anê.

¹⁴ Hãmri nhũm mẽ kãm:

—Nà mẽhõ kot ã ijarênh anhÿr kêt tã no ãm hãmri na pa mẽ amã amnhĩ jarê. Ixêx kêt. Mẽ arom ixte nhÿhÿnh ixwrÿk xà hã amnhĩ pumunh mex. Nê mẽ arom ma akupÿm nhÿhÿm ixàpir xà hã amnhĩ pumunh mex. Jakamã ãm hãmri na pa ã mẽ amã amnhĩ jarênh anê. ¹⁵ Na ka htem amnhĩ krã hkõt tanhmã ri ijarênh to. No pa na pa kormã amnhĩ xwar tanhmã mẽ ajarênh to hkêt nê. ¹⁶ Ixte tanhmã mẽ ajarênh to ronhÿx pa ãm hãmri mẽ ajarê. Nhÿx pa ãm papxipix amnhĩ krã hkõt tanhmã mẽ ajarênh to hkêt nê. Nhÿx mãänên Inhĩpêêxà pê kot mẽ awÿr inhmênh xwÿnhnta inhĩhkõ hã pa wa ãm hãmri axpên kõt tanhmã mẽ ajarênh to. Mẽ ate amnhĩ to mex ã mẽ ajarê rÿ mẽ ate amnhĩ tomnuj ã mẽ ajarê. ¹⁷ Tĩrtũm kapêr ã kagà htũm kot ja jarênh kot:

Koja mẽhõ wa hamêxkrut nê tanhmã mẽmoj jarênh to nê ãm axpên kõt harênh o htĩpxi. Hã kot kaj mẽ wa ama nê ãm hãmri wa kot harênh kõt ajamaxpêr kurê kumrêx.

¹⁸ Anhÿr o kot harênh. Tã pa ã amnhĩ jarênh anê nhũm Inhĩpêêxà kot mẽ awÿr inhmênh xwÿnhnta mãänên ã ijarênh anê. Wa ixpijakrut tã ã wa ixte axpên kõt amnhĩ jarênh anhÿr jakamã kwa mẽ ixte tanhmã amnhĩ jarênh toja ma nê ixkõt ajamaxpêr kêt wehe. Anê.

¹⁹ Nhũm pre ã Jejus mẽ kãm kapêr anê. Hãmri nhũm mẽ kuma nê kãm:

—No nhÿri na we anhĩpêêxà ja? Anê.

Hãmri nhũm mẽ kãm:

—Nà mẽ ate Inhĩpêêxà pumunhre hã. Mẽ ate aprĩ hã ixpumunh ronhÿx ka mẽ mãänên aprĩ hã Inhĩpêêxà pumunh mex kurê kumrêx. Nom mẽ ate ixpumunh mex kêt jakamã na ka mẽ mãänên omunh mex kêt nê. Anê.

²⁰ Nhũm pre ã Jejus mẽ kãm kapêr anê. Arĩ Tĩrtũm mã amnhĩ jarênh xà hã ixkreja kamã mẽ ahkre ho xa. Mẽ kot kàxpore gjênh xà kuri mẽ ahkre ho xa. Nhũm mẽ kãm hkurê xwÿnhjaja tee ri kot tanhmã mẽ ahkre htoja ma nê kãm unênh nê haxàr prãm nê. Nom kormã mẽ kot ã hipêx anhÿr ã arĩgro kormã kator kêt jakamã nhũm Tĩrtũmja nê mẽ omunh mex nê nhũm mẽ ãm kãm unênh prãm kaprÿ.

²¹ Hãmri nhũm Jejus arĩ mẽ kãm kapêr o xa nê mẽ kãm:

—Nà kot paj nhÿrmã mẽ arũm ixkato nê ma akupÿm api. Ka mẽ tee ri ijarêr nom nhÿri ixpumunh kêt nê. Hãmri nê mẽ ate amnhĩ tomnuj o apa rãhã ty nê mẽ atõ ixwÿr axàpir kêt nê. Anê.

²² Hãmri nhũm Ijaew nhõ pahijaja tee ri ã kapêr anhÿrja ã kuma nê axpên mã hã hpêr o pikênh o kuhê nê axpên mã:

—Kwa mãn ra kot amnhĩ pĩr kaxyw ã na ri hkõt mẽ paxàpir kêt ã mẽ pajarênh anê nã? Anê.

²³ Hãmri nhũm amnhĩ tã mẽ kuma nê mẽ kãm:

—Nà mẽ kajaja mẽ apê pyka nhõ xwÿnh na ka mẽ. No pa na mẽ arom ixpê kaxkwa nhõ xwÿnh jakamã mẽ pajamaxpêr kot axpên pyræk kêt. ²⁴ Kot kaj mẽ ixpê kaxkwa rũm ixwrÿk xwÿnh ã ixpumu nê amnhĩ kaxyw inhmã ajamaxpêr nê ixkõt amnhĩ xunhwÿr kêt hã kot kaj mẽ ate amnhĩ tomnuj o apa rãhã nhÿrmã atyk o mẽ kamjaja Tĩrtũm mã amnhĩ pãnhã amnhĩre. Anê.

²⁵ Nhũm Jejus ã mẽ inhõ pahijê hkukamã mẽ kot amnhĩ nhĩpêx jarênh anê nhũm mẽ tee ri amnhĩ tã kuma nê kãm:

—Kwa mẽ atõ na ka we ri ã mẽ inhmã akapêr anê? Anê.

Hãmri nhũm mẽ kãm:

—Nà ra ixte mẽ amã amnhĩ jarênh kênã. Xàn ka mẽ kormã aprĩ hã inhmar kêt nê? ²⁶ Kot paj nhÿrmã mẽ amã mẽ ate amnhĩ tomnuj piitã ho amnhĩrĩt pa. Na pa kot mẽ awÿr inhmênh xwÿnhnta pix xõ ri tanhmã mẽ amã ixkapêr to ho ri ixpa. Ām hãmri na hte tanhmã mẽmoj jarênh to. Na hte hêx kêt nê. Anê.

²⁷ Nhũm pre ã Jejus mẽ kãm Hipêêxà kot mẽ hwÿr mẽnh ã harênh anhÿr tã no nhũm mẽ Hipêêxà kêp Tĩrtũm ã hkõt hamaxpêr kêt nê. ²⁸ Jakamã nhũm mẽ kãm:

—Nà koja mẽ nhÿrmã pĩ kahpa hã inhõ ka mẽ rĩ kormã aprĩ hã ixpê Tĩrtũm rũm mẽ awÿr ixwrÿk xwÿnh ã ixpumu. Nê ixte amnhĩ krã hkõt ixkapêr o ri ixpa hkêt ã ixpumu. Nê ãm Inhĩpêêxà xõ ri ixprĩ hã ixkapêr o ri ixpa hã ixpumu. ²⁹ Ixte kãm hprãm xà hkõt pix mã tanhmã ri amnhĩ nhĩpêx to ho ri ixpa jakamã na hte ix-tãnopxar mex o ixkõt pa ho pa. Koja aa ixkaga hkêt nê. Anê.

³⁰ Hãmri nhũm mẽ hkwyja kuma nê hkwyjê rom kapêr kõt hamaxpêr ³¹ nhũm amnhĩ tã mẽ omu nê mẽ kãm:

—Nà ãm hãmri na ka mẽ tã ixkõt ajamaxpêr. Tã kêr ka mẽ ixkõt amnhĩ xunhwÿr nê ixkapêr kõt pix mã ri amnhĩ nhĩpêx mex o ri apa. Hãmri pa ja hã mẽ apumu nê mẽ apê ixkwÿ kumrêx ã mẽ ajarê. ³² Ām hãmri na

pa hte ã ixkapër anhÿr o ri ixpa. Tã kot kaj mẽ ixkõt ri amnhĩ nhĩpêx o ri apa hãmri nẽ aprĩ hã inhmar tÿx nẽ. Nom na hte kormã mẽmoj kot amnhĩ tã mẽ ato htÿx pyrãk o mẽ anhĩpêx ka mẽ tee ri amnhĩ krã hkõt kãm anhÿrer prãm kaprÿ. Tã kot kaj mẽ ixkõt amnhĩ xunhwÿ nẽ ixkõt ri amnhĩ nhĩpêx hãmri nẽ Tĩrtũm nhÿ hã tãm amnhĩ nhĩpêx. Jao ÿ hã ate amnhĩ tomnuj mã anhÿre. Anẽ.

³³ Nhũm pre ã Jejus mẽ kãm kapër anẽ hãmri nhũm mẽ tee ri kuma nẽ kãm:

—Kwa mẽ ixpê mẽ pahpàr krax finat Apraãw kanrêhã htãmnhwÿ kênã. Na pre mẽmoj te kot amnhĩ tã ho htÿx pyrãk o hipêx kêt nẽ. Jakamã mẽmo kot we mẽ ixpê hkanrêhã htãmnhwÿjê ho htÿx ka we ri ã mẽ ijarênh anẽ? Nà amrakati kênã. Tã kwa mon ka ã mẽ ijarênh anẽ? Anẽ.

³⁴ Hãmri nhũm Jejus hprĩ hã mẽ kãm awjarẽ nẽ mẽ kãm:

—Kwa mẽ ixkapër ma nẽ amnhĩ krãm haxàr tÿx nẽ. Nà mẽ kot amnhĩ tomnuj o mẽ pa xwÿnhjaja te mẽ kot amnhĩ tomnuj tãm ri kot amnhĩ tã mẽ ho htÿx pyrãk o mẽ hipêx. Jakamã nhũm mẽ urer kêt rãhã nẽ pa ho pa. Nẽ ã amnhĩ nhĩpêx anhÿr rãhã ho pa. ³⁵ Jakamã ixkĩnhã mẽ kêp Tĩrtũm kwÿ hkêt. No pa na ixpê Tĩrtũm Kra jakamã mãänên ixpê hkwÿ na pa. ³⁶ Tã mẽ kajaja. Kot kaj mẽ ixpê Tĩrtũm Kra hã ixkõt amnhĩ xunhwÿ hã kot pa tanhmã mẽ ato ka mẽ ixpyrà nẽ apê wa ixkwÿy. Hãmri nhũm mẽ ate amnhĩ tomnuj te kot mẽ amã urer pyrãk o mẽ anhĩpêx ka mẽ ra wa ixkõt amnhĩ nhĩpêx o ri apa. Anẽ.

Mẽ kêp Tĩrtũm kra hkêt xwÿnhjê jarênh

³⁷ Nhũm Jejus arĩ mẽ kãm kapër nẽ mẽ kãm:

—Nà ãm hãmri na ka mẽ apê finat Apraãw kanrêhã htãmnhwÿ hã amnhĩ jarẽ. Nom mẽ apê hkanrêhã htãmnhwÿ htã urãk nẽ amnhĩ kaxyw Tĩrtũm kõt ajamaxpër kêt nẽ. Jakamã na ka htem ixkapër ma nẽ ãm ama nẽ ixkaga. Nẽ axtem nẽ ixpĩr mã. Kop apu Apraãw arĩ mẽ akamã pa ronhÿx ã inhĩpêx anhÿr kêt nẽ. ³⁸ Na pa hte Inhĩpêxã hkõt pix mã ri amnhĩ nhĩpêx o ri ixpa. No mẽ kajaja axtem nẽ mẽ ate nhãm mẽ kapër kõt amnhĩ nhĩpêx jakamã na ka htem ixkĩnhã Inhĩpêxã hkõt amnhĩ nhĩpêx kêt nẽ. Anẽ.

³⁹ Hãmri nhũm mẽ tee ri amnhĩ tã kuma nẽ kãm:

—Tk. Kwa mon ka ã mẽ ijarênh anẽ? Mẽ ixte Apraãw kõt amnhĩ nhĩpêx o ri ixpa kênã. Anẽ.

Hãmri nhũm mẽ kãm:

—Nà. Mẽ ate hkõt ri amnhĩ nhĩpêx o apa ronhÿx ka mẽ urãk nẽ Inhĩpêxã kapër kõt amnhĩ nhĩpêx. ⁴⁰ No na ka mẽ ra axtem nẽ ixpĩr mã. ãm hãmri na pre Tĩrtũm inhmã awjarẽ pa ô ri tanhmã mẽ amã mẽmoj jarênh to ho ri ixpa htã ka mẽ ra axtem nẽ ixpĩr mã. Kwa xà na pre Apraãwja ã mẽ hipêx anhÿr o pa? Nà na pre ã mẽ hipêx anhÿr kêt nẽ. ⁴¹ Mẽ ate hkõt amnhĩ nhĩpêx xwÿnhhta axtem na. Kêp Apraãw kêt. Nẽ mãänên kêp Tĩrtũm kêt. Anẽ.

Hãmri nhũm mẽ tee ri kuma nẽ kãm:

—Tk. Kwa nà ã mẽ ijarênh anhÿr kêt nẽ. Mẽ ixte Apraãw kõt amnhĩ nhĩpêx xwÿnh kênã. Tã ka ri axtem nẽ ã mẽ ijarênh anẽ. Mẽhõ hkõt kot pa kêt wem ri axtem amnhĩ nhĩpêx o ri ixpa? Anẽ.

⁴² Hãmri nhũm mẽ kãm:

—Nà mẽ ate Apraãw kõt amnhĩ nhĩpêx ronhÿx ka mẽ ixpumu nẽ urãk nẽ amã ixprãm nẽ. Apraãw kot hkõt amnhĩ nhĩpêx o pa xwÿnhhta tãm kot mẽ awÿr inhmênh nhũm mẽ awÿr ixwrÿk kênã. Na pa pre amnhĩ krã hkõt man mẽ awÿr ixwrÿk kêt nẽ. Tãm na pre mẽ awÿr inhmê pa wrÿ. ⁴³ Kwa mon ka mẽ aprĩ hã ixkapër mar mex kêt nẽ? Nà mẽ amã ixkõt amnhĩ nhĩpêx prãm kêt jakamã na ka mẽ tee ri ixkapër ma nẽ aprĩ hã mar mex kêt nẽ. ⁴⁴ Mẽ ate hkõt amnhĩ nhĩpêx xwÿnhhta Satanasti na. Aa tãm kot amnhĩ nhĩpêx kêt kumrêx. Kêp mẽ hpar o pa xwÿnhjê hpãm maati na. Nẽ kêp mẽ kãm hêx o pa xwÿnhjê pãm maati na. ã kot amnhĩ nhĩpêx kot anhÿr. Nẽ kãm mẽ kapër mex mar prãm kêt o pa. Nẽ ãm hêx pix o pa jakamã kêp mẽ hêx xwÿnhjê pãm. ã kot amnhĩ nhĩpêx anhÿr xwÿnh tã ka htem hkõt amnhĩ nhĩpêx o ri apa.

⁴⁵ —Na pa hte kurom ãm hãmri ixkapër o ri ixpa. No mẽ kajaja mẽ apê hêx nhi xwÿnh maati ja hkra jakamã mẽ amã ixkapër mar prãm kêt. ⁴⁶ Xà na ka pre mẽ atõ ixte tanhmã amnhĩ tomnuj to hã ixpumu? Nà amrakati. Ixte amnhĩ to mex o ri ixpa xwÿnh na pa. Nẽ tãm ixkapër o ri ixpa xwÿnh tã ka mẽ inhma nẽ ãm inhma nẽ ixkõt ajamaxpër kêt nẽ. Kwa mon ka mẽ ja hã ixpumunh nẽ ixkõt ajamaxpër nẽ ixkõt amnhĩ xunhwÿr kêt nẽ? ⁴⁷ Tĩrtũm krajaja na htem kapër mar tÿx nẽ hkõt amnhĩ nhĩpêx o pa. No mẽ apê hkra hkêt jakamã mẽ amã kapër mar prãm kêt. Anẽ.

Mẽ kot Jejus kêp Satanasti hkwÿ hã harênh

⁴⁸ Hãmri nhũm mẽ ã Jejus kot mẽ harênh anhÿrja ma nẽ kamã gryk tÿx kumrêx. Hãmri nẽ kãm:

—Tk. Kwa ate amnhĩ tomnuj o apa xwÿnhhti kênã. Ra Satanasti hkwÿ pê mẽkarõmnuti tanhmã kot akrã hto jakamã na ka ã mẽ inhmã akapër anẽ. Anẽ.

⁴⁹ Hãmri nhũm mẽ kãm:

—Nà mẽkarõmnuti kot tanhmã ixto hkêt. Na pa hte Inhĩpêxã hã ixpijaàm pix o ri ixpa. Tã mẽ ate ixkĩnhã hã apijaàm kêt jakamã mãänên pa ixtã apijaàm kêt nẽ. ⁵⁰ Na pa hte amnhĩ krã hkõt mẽ piitã mẽ kot ixtã hpijaàm prãm xàj tanhmã mẽ kãm ixkapër to hkêt nẽ. No mẽ piitã mẽ kot ixtã hpijaàm o paja na Inhĩpêxã kãm hprãm. Tã koja nhÿrmã amnhĩ nẽ ixtã mẽ hpijaàm kêt xwÿnhjaja mẽ kot amnhĩ xà htÿx kamã hamak tũm xàta wÿr mẽ rênh pa.

⁵¹ —Nẽ kot ka mẽ atõ wa ixkapër ma nẽ ixkõt amnhĩ nhĩpêx. Hã kot kaj wa ixri atĩr tũm nẽ apa ho apa. Kwa mẽ ixkapër ma nẽ amnhĩ krãm haxàr tÿx nẽ. Anẽ.

Nhũm pre ã Jejus Ijaew nhõ pahijê mã kapër anẽ.

⁵² Nhũm mẽ kuma nẽ kãm:

—Kwa pêr ãm hãmri na ka hte Satanasti nhÿ hã ã mẽ htĩr tũm nẽ mẽ pa ho pa hã mẽ harênh anhÿr o ri axêx o ri apa. Finat Apraãw na pre ri paa nẽ ty. Tã mẽ kot Tĩrtũm nhÿ hã kapër jarênh o mẽ pa xwÿnhjaja na

prem uràk nê ri paa nê mãânên htyk pa. Tã ka axtem nê mẽ kot akapêr kôt amnhĩ nhĩpêx o mẽ pa xwýnhjaja ari htĩr tũm nê pa ho pa hã mẽ harê. Nà na ka ãm mẽ inhmã mẽ ho axêx o xa. ⁵³ Na pre mẽ pahpãm Apraãwja kot amnhĩ to rax tã ty nê hapêx. Nhũm mẽ kot Tĩrtũm nhỹ hã kapêr jarênh xwýnhjaja mãânên mẽ kot amnhĩ to rũnh tã htyk pa nê hapêx. Mẽ kot amnhĩ to rũnh tã htyk pa nê hapêx kênã kot kêt mẽ tanhmã amnhĩ to nê ari htĩr tũm nê pa. ãm mẽ ixte akapêr mar nê atã ixpijaàm pix prãm xàj na ka ã mẽ inhmã mẽ htĩr tũm nê pa hã mẽ harênh anê. Nom na ka ã mẽ harênh anhỹr kaprỹ. Kot paj mẽ ri akapêr mar kêt nê. Anê.

⁵⁴ Hãmri nhũm mẽ kuma nê mẽ kãm:

—Nà na pa hte amnhĩ krã hkôt mẽ ate ixtã apijaàm hprãm xàj tanhmã mẽ amã ixkapêr to hkêt nê. Kot paj anê nê ãm ixtýx ã amnhĩ nhĩpêx anhỹr kaprỹ. No In-hĩpêxã tãm kãm mẽ apiitã mẽ ate ixtã apijaàm o apa-ja nhũm kãm hprãm. Mẽ ate Tĩrtũm kôt amnhĩ nhĩpêx o apa hã amnhĩ to axêx xwýnhhta tãm na kãm mẽ ate ixtã apijaàmja nhũm kãm hprãm. Tã ka htem ã amnhĩ nhĩpêx anhỹr kêt nê. Na ka htem ixkuk pumu nê axtem nê ixte Satanasti nhỹ hã mẽ amã ixêx o ri ixpa hã ijarê. ⁵⁵ Mẽ ate Inhĩpêxã hkôt amnhĩ nhĩpêx ã amnhĩ jarênh tã ãm amnhĩ to axêx o ri apa. No pa na pa hte mẽ arom ãm hãmri hkôt amnhĩ nhĩpêx mex o ri ixpa. ⁵⁶ Amnepêm mẽ pahpãm krax Apraãwja na pre mẽ awỹr ixwryk kukamã ijarênh ma nê mẽ arom inhỹ hã hkĩnh tỳx nê pa. Anê.

Nhũm pre ã Jejus mẽ kãm amnhĩ jarênh anê. ⁵⁷ Hãmri nhũm mẽ kuma nê tee ri kot mẽ kãm tanhmã Apraãw jarênh toja ma nê kãm:

—Tk. Xà na ka pre finat Apraãwja ano ho omu? Nà kormã anyw kênã. Apraãw amnepêm htyk nê hapêx kênã kot ka kêt kot akukamã ajarênh mar nê hkĩnh tỳx ã harê. Xàn ka pre ano ho omu? Kormã akator kêt ri na pre amnepêm htyk nhũm mẽ haxàr kênã. Nà na ka ãm mẽ inhmã amnhĩ to axêx. Te amnepêm mẽ hkukamã apa nê ate mẽ omunh nê mẽ harênh pyrãk. Kwa akatàt kôt mẽ inhmã awjarê. Anê.

Jejus kêp rãhã ho rãhã xwýnh ã harênh

⁵⁸ Hãmri nhũm Jejus mẽ kãm:

—Nà ixêx kêt. ãm hãmri na pa ã mẽ amã amnhĩ jarênh anê. Amnepêm kormã Apraãw kator kêt ri na pa pre ixrãhã ho ixrãhã ixpa na pa. Ixrãhã ho ixrãhã ixpa xwýnh jakamã na pa pre hte inhno ho Apraãw pumunh mex o ri ixpa. Kwa mẽ ixkapêr ma nê amnhĩ krã him haxàr tỳx nê. Anê.

⁵⁹ Hãmri nhũm mẽ tee ri kot ã amnhĩ jarênh anhỹrja ã kuma nê kamã gryk tỳx nê. Nê axpên mã:

—Kwa tanhmã kot we amnhĩ to nê amnepêm rãhã nê pa ho pa xwýnh ã amnhĩ jarê? Tĩrtũm pix na rãhã ho rãhã pa xwýnh. Anê.

Hãmri nê kamã gryk xàj kên rũnh kwý kawrà ho ri hprõt nê kot ho htao o hpir kaxyw. Nom nhũm ra amnhĩ tã mẽ omu nê mẽ kêp akunok nê Tĩrtũm mã amnhĩ jarênh xà hã ixkreja rũm kato nê ma tẽ.

Jejus kot no hkre xwýnh o mex ã harênh

Makre 8.22-26

⁹ Hãmri nhũm Jejus ma tẽ pa mẽ hkôt ri mẽ ixpa ho mẽ ixpa xwýnhjaja ma hkôt mra. Hãmri nê nhỹri no hkre xwýnh pumu. Katorxà nhõxà hkre rũm na pre no hkre nê kato. Hãmri nê ra hprêk nê hpry kamã àhwýr o hkrĩ. ² Tã hãmri pa mẽ mra nê omu nê hã Jejus kukja nê kãm:

—Kwa mẽmoj mýrapê na pre we myti nêj no hkre nê kato? Xà tãm kot tanhmã amnhĩ tomnuj to mýrapê nà? Xà katorxà rý hipêxã kot amnhĩ tomnuj mýrapê na pre ã no hkre nê kator anê? Anê.

³ Hãmri nhũm mẽ inhmã:

—Nà mẽhõ kot tanhmã amnhĩ tomnuj to mýrapê no hkre nê kator kêt. ãm Tĩrtũm kot ho mex nhũm mẽ kot ja hã omunh kaxyw na pre ã no hkren kator anê. Tã kot paj Tĩrtũm nhỹ hã no ho mex ka mẽ ja hã ixpumu. Na pa hte kormã jar pikap ri ixpa ri Tĩrtũm mã tanhmã amnhĩ nhĩpêx mex to ho ri ixpa. ⁴ Na htem arĩgro hã mẽmoj tã apê nhũm kamàt nhũm mẽ kãm ure nê àpênh kêt nê. Ja pyrã nê na pu htem kormã pahĩr ri jar pikap ri papa ri Tĩrtũm mã tanhmã amnhĩ nhĩpêx to ho ri papa. Tã kot puj mẽ nhỹrmã ty hãmri nê axte jar ã amnhĩ nhĩpêx anhỹr kêt nê. Jakamã kwa kêr pu mẽ ri jar pikap ri papa ri kãm tanhmã amnhĩ nhĩpêx mex to ho ri papa. ⁵ Na pa hte ã kãm amnhĩ nhĩpêx anhỹr jao te kanê hirã mex pyrã nê ixprĩ hã mẽ kãm Tĩrtũm kot amnhĩ nhĩpêx o amnhĩrit mex o ri ixpa. Anê.

⁶ Nhũm pre ã Jejus mẽ inhmã amnhĩ jarênh anê. Hãmri nê kot nohkre xwýnhhta no o mex kaxyw hikôt nê argõx mẽ nê ho gyw kwý nhĩpêx nê kãnhmã xa nê ho no kukõ. ⁷ Hãmri nê kãm:

—E ma gõ gjênh xà pê Siroe hwýr tẽ nê kamã amnhĩ no kuhõ. Anê.

Mẽ pakapêr kãm Siroeja mẽ kot kãm: “Nhỹhỹm mênh xwýnh” anhỹr jarênh pyrãk. Tã nhũm Jejus hwýr kumẽ nhũm ma hwýr tẽ. Hãmri nê kamã amnhĩ no hã gyw kuhõnh pa jao rĩt mex kurê kumrêx. Hãmri nê rĩt mex ã amnhĩ pumu nê hkĩnh tỳx nê ma akupỹm õrkwỹ hwýr tẽ. ⁸ Hãmri nhũm õrkwỹ kuri mẽ õrkwỹ xwýnhjaja nê mẽ kot pry kamã ahwýr o hkrĩ hã omunh xwýnhjaja amnhĩ jaêr pê ra rĩt mex ã omu nê tee ri hã axpên kukja nê axpên mã:

—Kwa pêr pry kamã àhwýr o hkrĩ xwýnhhta na nà? Anê.

⁹ Hãmri nhũm kamã mẽ hkwyjaja mẽ kãm:

—Tý. Tãm na. Anê.

Nhũm kamã mẽ hkwyjaja mẽ kãm:

—Nà tãm kêt. Axtem mẽhõ na. Te kot uràk nom tãm kêt. Anê.

Anhỹr o ri axpên mã harê. Tã nhũm tãm mẽ kãm amnhĩ jarê nê mẽ kãm:

—Tý pa kênã. Pa na pa pre hte inhno hkre nê ri ixpa htã ra ixrit mex. Anê.

¹⁰ Hãmri nhũm mẽ tee ri kuma nê kãm:

—Kwa no tanhmã na ka we amnhĩ to nê ra arĩt mex?

¹¹ Anê nhũm mẽ kãm:

—Nà mẽ kot kām “Jejus” anhÿr xwÿnhhta na ixwÿr tē nē ixkaxyw gyw kwÿ kagō nē ho inhno kukō. Hāmri nē mẽ kot gō mã: “Siroe” anhÿr xwÿnhhta kamã ixte amnhÿ no kuhōnh kaxyw hwÿr inhmã anē pa ma hwÿr tē nē kamã amnhÿ no kuhō nē ixrÿt mex kurê kumrêx. Anē.

¹² Hāmri nhũm mẽ kuma nē kām:

—No nhÿhÿm na ato mex xwÿnhja ma tē? Anē.

Hāmri nhũm mẽ kām:

—Konēn. Ixte nhÿhÿm htēm xà hkôt omunhre hã. Anē.

¹³ Hāmri nhũm mẽ kuma nē ma Parijew nhō xwÿnhjê hwÿr o mō nē mẽ kām harē. ¹⁴ Nē mẽ kām:

—E ot pa mẽ awÿr jahti ho tē. Na xep Jejusja jarãhã akupÿm kām no ho mex. Mē panhō arÿgromnu htã nhũm hã no ho mex. Anē.

¹⁵ Hāmri nhũm mẽ tee ri mẽ kuma nē myta pumu nē kām:

—E mẽ inhmã amnhÿ jarē. Tanhmã na ka pre we amnhÿ to nē anohkre nē akrÿ htã ra ano mex nē? Anē.

Hāmri nhũm mẽ kām:

—Nà na pre Jejus gyw o inhno kukō nē inhmã anē pa gō ho amnhÿ no kuhō nē ixrÿt kurê kumrêx. Anē.

¹⁶ Hāmri nhũm mẽ kuma nē tee ri Jejus ã axpēn kukjêr o kuhê nē axpēn mã harēnh o:

—Kwa mẽ panhō arÿgromnu hã kot ho mex jakamã kēp Tÿrtũm rũm mẽ pahwÿr wrÿk xwÿnh kêt. ãm kot amnhÿ tomnuj xwÿnh kênã. Anē.

Nhũm mẽ hkwÿjaja harēnh o:

—Kwa nà. Kot amnhÿ tomnuj xwÿnh ronhÿx àh-pumunh tÿx kôt no ho mex kêt nē. Anē.

¹⁷ Hāmri nē hpãnhã no mex xwÿnhhta mã kām:

—No ka? Ate kot ano ho mex xwÿnh ã amnhÿ tã harēnh jakamã mēhō hã na ka hkamnhÿx? Mēhō na wehe? Anē.

Hāmri nhũm mẽ kām:

—Konēn. Mãn kēp Tÿrtũm kapēr jarēnh o ri mẽ pa xwÿnh mãn. Hã na ã inhno ho mex anē. Anē.

¹⁸ Hāmri nhũm mẽ tee ri kuma nē axpēn mã:

—Kwa pēr aa nohkre hkêt kênã. Na pre ãm amnhÿ to hēx o pa. E kwa pu mẽ amnhÿ wÿr katorxà nē hipêêxà wa hã karō kê wa man tē nē tanhmã mẽ pamã harēnh to. Anē.

Hāmri nē wa hã karō ¹⁹ nhũm wa mẽ hwÿr tēn axà nhũm mẽ wa kām:

—Pa. E mẽ inhmã mẽmoj jarē. Xà we wa akrata na ãm ja nà? Xà tãm na ka hte wa nohkre nē kator ã harē? Kwa tanhmã na we amnhÿ to nē ra rÿt mex? Anē.

²⁰ Hāmri nhũm wa mẽ kām:

—ÿÿ wa ixkra kênã. Na pre wa ixpê nohkre nē kato. ²¹ Tã ra tanhmã amnhÿ to nē ra rÿt mex. No wa ixte kot ho mex xwÿnhhta pumunh kêt. Kwa mẽ tãm mãn hkukja nē ama. Ra àptàr kênã. Kê tãm mãn mẽ amã tanhmã amnhÿ jarēnh to ka mẽ ama.

²² Anhÿr o mẽ kām wa hkrata jarē. No ãm wa kām mẽ uma nē ã mẽ kām kapēr anē nē mẽ kām Jejus nhÿxi jarēnh kêt nē. Na pre Parijew nhō xwÿnhjaja ra Jejus nē mẽ kām kapēr nē mẽ kām:

—Ka mẽ atō Tÿrtũm kot mẽ pakaxyw Jejus xãm ã harē hāmri nē axte Tÿrtũm kapēr o mẽ ahkre xà hã ixkreja wÿr agjêx kêt kumrêx nē rÿ amnhÿ pumu.

²³ Anhÿr o nē mẽ hkurê jakamã nhũm wa mẽ umaj ã mẽ kām hkra jarēnh anē nē kot ho mex xwÿnh nhÿxi jarēnh kêt nē. ²⁴ Hāmri nhũm mẽ axte amnhÿ wÿr no mex xwÿnhhta ã karō nē kām:

—Kwa akatàt kôt mẽ inhmã amnhÿ jarē. Ate kot ano ho mex ã harēnh xwÿnhhta na kot amnhÿ tomnuj pix o pa xwÿnh kênã kot kêt ano ho mex. Jakamã kwa Tÿrtũm noo mã akatàt kôt mẽ inhmã amnhÿ jarē nē axêx kêt nē. Anē.

²⁵ Hāmri nhũm mẽ kām:

—Ko ixte ja hã omunh kêt. ãm ja pix na ixte omunh. Na pa pre inhno hkre nē ri ixpa htã ra ixrÿt mex nē. Anē.

²⁶ Hāmri nhũm mẽ tee ri kot amnhÿ jarēnhja ã kuma nē kām:

—No tanhmã na we mytita amnhÿ to nē amã ano ho mex? Anē.

²⁷ Hāmri nhũm tee ri axte mẽ kot hã hkukjêr ã mẽ kuma nē mẽ kām:

—Kwa ra ixte mẽ amã ãm hāmri amnhÿ jarēnh griã. Tã ka mẽ inhma nē ãm inhma nē arÿ hã ixkukja. Mãn ka mẽ amã hkôt amnhÿ xunhwÿr prãm hã na ka mẽ aprÿ hã ixkukja nà? Mē ate kot amnhÿ nhÿpêx ã aprÿ hã harēnh mar nē hkôt amnhÿ xunhwÿr prãm xàj na ka mẽ aprÿ hã amã harēnh prãm nē. Anē.

²⁸ Hāmri nhũm mẽ tee ri kuma nē kamã gryk nē. Nē hã kām akir nē kām:

—Tk. Ka na ka hte kapēr kôt amnhÿ nhÿpêx. No kêt mẽ pajaja na pa htem finat Mojes kapēr kôt pix mã amnhÿ nhÿpêx. ²⁹ Mojes mã na pre hte Tÿrtũm kapēr o pa. Jakamã pa htem ãm hkôt pix mã amnhÿ nhÿpêx o ri ixpa. No ate kot ano ho mex ã harēnh xwÿnhhta mẽ ixte omunh kêt. Nē mēhō nhÿ hã kot tanhmã amnhÿ nhÿpêx to ho pa xwÿnhja mẽ ixte omunh kêt. Anē.

³⁰ Hāmri nhũm tee ri mẽ kuma nē mẽ kām:

—Kwa kot inhmã inhno ho mex nhũm ra ixrÿt mex tã ka mẽ tee ri hkukamã ajamaxpēr nē mēhō nhÿ hã kot ã amnhÿ nhÿpêx anhÿr o pa hã omunh kêt ã amnhÿ jarē. ³¹ Mē pahte Tÿrtũm kot amnhÿ nhÿpêx ã omunh mex. Koja mēhō kot amnhÿ tomnuj xwÿnh mẽmoj tã kuwÿ nhũm kuma nē ãm kuma. No kêt mẽ kot hkôt ri amnhÿ nhÿpêx xwÿnhjaja. Nē mẽ kot kām mex o mex ã harēnh xwÿnhjaja na htem mẽmoj tã kuwÿ nhũm mẽ kuma nē mẽ kām tanhmã mẽmoj nhÿpêx to rÿ mẽ kām mẽmoj gō. ³² Tã aa mẽ pahte mēhō kot mẽ no ho mex ã harēnh mar kêt tã nhũm ã Jejus inhmã inhno ho mex anē. ³³ Kēp Tÿrtũm kwÿ hkêt ronhÿx pre inhno ho mex kêt nē. Anē.

³⁴ Hāmri nhũm mẽ kuma hāmri nē kām:

—Tk. Kwa pēr ãm akator kôt ate amnhÿ tomnuj o ri apa htã na ka ã mẽ inhmã akapēr anē. Kwa ixkreja rũm akato nē ma atēm kurê kumrêx.

Anhÿr o kām kapēr hāmri nē mẽ amnhÿ nē hano nhũm kato nē ma tē.

³⁵ Tã nhũm Jejus ra mẽ kot amnhĩ nê hanor ã harênh ma nê ma hapêr o tẽ nê nhÿri omu. Hãmri nê amnhĩ tã hkukja nom te nhãm mēhõ hã hkukjêr pyrã nê kãm:

—Pa? Xàn ka ra Tirtũm kot mẽ awÿr mēnh xwÿnhhta amnhĩ kaxyw hkõt ajamaxpêr nà? Anê.

³⁶ Hãmri nhũm kormã kot no ho omunh kêt jakamã kêt Jejus ã omunh kêt nê. Na pre kormã no hkre nê ãm kapêr pix ma. Tã ra akupÿm rĩt mex nom kormã no ho omunh kêt nê. Jakamã nhũm Jejus hwÿr tẽ nê ã kãm kapêr anê nhũm omu nê kormã kêt Jejus ã omunh kêt nê kãm:

—Tÿ kot kaj inhmã ahkre pa omu nê hkõt amnhĩ xãm kurê kumrêx. Anê.

³⁷ Hãmri nhũm kãm:

—Kwa paa. Ixte amã ixkapêr xwÿnhhta pa na pa. Anê.

³⁸ Hãmri nhũm kãm:

—Kwa xõwehe Pahihti? Nà kot paj amnhĩ kaxyw akõt pix mã ijamaxpêr nê akõt pix mã amnhĩ nhĩpêx o ri ixpa. Anê.

Hãmri nê kutã hkõn krã ho tēm nê nhÿ nê kãm mex o mex ã harênh o nhÿ. ³⁹ Hãmri nhũm Jejus kãm:

—Nà ixte mẽ apiitã tanhmã mẽ ajarênh to kaxyw na pa pre kaxkwa rũm man mẽ awÿr wrÿ. Ahpÿnhã mẽ amã ixprãm xwÿnhjê jarênh nê ahpÿnhã mẽ kãm ixprãm kêt xwÿnhjê jarênh kaxyw. Mẽ kãm ixprãm kêt xwÿnhjaja kot hprĩ hã Tirtũm kapêr mar mex kêt tã na htem htÿx ri kot mar mex ã amnhĩ jarênh o pa. Jakamã te mẽ nohkre xwÿnhjaja kot amnhĩ nhĩpêx pyrãk. Nom koja mẽ Tirtũm kapêr ma nê ixkõt amnhĩ xunhwÿr japêr. Hãmri nê te ra rĩt mex pyrãk o amnhĩ nhĩpêx. Jao ra hprĩ hã Tirtũm kapêr mar mex o pa. Anê.

⁴⁰ Nhũm pre ã Jejus kãm kapêr anê. Nhũm Parijew nhõ xwÿnh kwÿjaja kot kuri mar o kuhê xwÿnhjaja ã kapêr anhÿr ã kuma nê amnhĩ tã kãm:

—Kwa nà. Xà we mẽ pajaja na ka ã mẽ inhnokre hã mẽ ijarênh anê? Xà mẽ ixte ixprĩ hã Tirtũm kapêr mar mex kêt ã na ka mẽ ijarê nà? Anê.

⁴¹ Hãmri nhũm mẽ kãm:

—ÿÿ kop apu mẽ ate aprĩ hã kapêr mar mex kêt ã amnhĩ jarênh ronhÿx ja mẽ amã mex nê. Tã mẽ ate aprĩ hã mar mex ã amnhĩ to axêx o apa jakamã na ka mẽ ra amnhĩ tomnuj tÿx nê. Na hte Tirtũm ja hã mẽ apumu nê amnhĩ mẽ ate amnhĩ tomnuj xwÿnh ã mẽ ajarê. Anê.

ôwêhti jarênh

Matêwre 9.36, 12.11-12; Rukre 15.3-7

10 Nhũm Jejus arĩ Ijaew mã kapêr nê mẽ kãm:

—E pa mẽ amã awjarê ka mẽ inhma nê amnhĩ krã him haxàr tÿx nê ho apa. Mẽ hkrit ôwêhti kot paj mẽ amã harê ka mẽ inhma. Na hte ôwêhti jamãr o pa xwÿnhjaja ôwêhti apkur kaxyw mẽ o pa hãmri nhũm kamàt nhũm akupÿm kahê hwÿr mẽ o pa. Kahê jakwakreja ãm pixii. Tã koja mēhõ kahê xà hkõt hwÿr àr kêt nê axtem nê tẽ nê nhÿhÿnh kahê hã api nê ôwêhti hwÿr àr japêr nhũm mẽ omu nê kot hkwy ho àhkĩnh ã omunh kurê kumrêx.

² —No ôwêhti jamãr o pa xwÿnhja na hte mẽ kurom katàt kõt kahê jakwakre rũm ôwêhti hwÿr agjê. ³ Nhũm kahê xà jamãr xwÿnhja amnhĩ wÿr omu nê kãm kahê xà rēnh kurê kumrêx nhũm axà. Na hte apkati mẽ ma nhÿhÿm apkur kaxyw mẽ o pa. Nê nojarêt nê mẽ kãm akir. Ahpÿnhã tanhmã mẽ hixi kute hã mẽ omunh xà hkõt mẽ kãm àkjêr o pa. Hãmri nhũm mẽ kuma nê hwÿr mra nê hã pikuprõnh pa nhũm mẽ ho hapôj nê ma nhÿhÿm ri mẽ apkur kaxyw mẽ o pa. ⁴ Ma mẽ apkur kaxyw nhÿhÿm mẽ o pa. Nhũm ôwêhti ra kot kapêr mar mex jakamã ma àmnhĩx ri hkõt apkur o pa.

⁵ —Na hte hamãr o pa xwÿnh pix kapêr ma nê hkõt pa nê nhãm mēhõ hkõt ri pa hkêt nê. Kot kapêr mar kêt jakamã tee ri kuma nê umaj axkahkũm nê hprõt nê ma mra. Na hte ôwêhti ã amnhĩ nhĩpêx anê. Anê.

Jejus te kêt ôwêhti gjênh xà hã hakwakre pyrãk

⁶ Nhũm pre ã Jejus mẽ kãm ujarênh anê. Nê ujarênhja kamã amnhĩ kwÿjê jarê nê mããñen tãm amnhĩ jarê. Nom mẽ amnhĩ tã kuxi nê mẽ kãm amnhĩ jarênh o te ho ôwêhti jarênh pyrãk nhũm mẽ tee ri kuma nê mar mex kêt nê. ⁷ Jakamã nhũm axte mẽ kãm awjarê nê mẽ kãm:

—E pa ixprĩ hã mẽ amã ixujarênhhta jarê ka mẽ inhma. Te ixpê ôwêhti jagjênh xà hã hakwakre pyrãk. Kwa mẽ ja ma nê amnhĩ krã him haxàr tÿx nê. ⁸ Na pre ra ixkukamã mẽ ohtô nê te ãm hãmri mẽ amã Tirtũm kapêr jarênh pyrãk o mẽ akõt ri pa. Nom mẽ amã hêx o pa. Te mẽ kot ôwêhti o àhkĩnh xwÿnhhta kot amnhĩ nhĩpêx pyrãk. Nom na hte ôwêhtija ãm hamãr xwÿnh pix kapêr ma nê nhãm mēhõ kapêr mar kêt nê. Ja pyrã nê mẽ kot ixkõt amnhĩ xunhwÿr xwÿnhjaja na htem Tirtũm kapêr o hêx o mẽ pa xwÿnhjê ma nê ãm mẽ kuma nê mẽ hkõt amnhĩ nhĩpêx kêt nê. Na htem ãm ixkapêr pix ma nê ixkõt pix mã amnhĩ nhĩpêx o pa.

⁹ —Te ixpê ôwêhti gjênh xà hã hakwakre pyrãk. Na hte ôwêhti mẽmoj punuj pymaj kahê hwÿr agjê nê kamã mex nê kuhê. Nê kurũm hapôj nê ma apkur o pa. Ja pyrã nê mẽ kot ixkõt amnhĩ xunhwÿr xwÿnhjaja koja mẽ ixkukwak ri hkĩnh nê mex nê hamakêtkati nê pa ho pa. Nê nhÿrmã Tirtũm mẽ wa ixri htĩr tũm nê pa ho pa. Ja kaxyw na pa pre man mẽ awÿr pika hwÿr wrÿ.

—No ôwêhti ho àhkĩnh xwÿnhjaja na htem amnhĩm ho ahkĩ nê kupa nê ma amnhĩm o pa. Tã mẽ kot Tirtũm kapêr o hêx o mẽ pa xwÿnhjaja te mẽ kot jajaja kot amnhĩ nhĩpêx pyrãk. Anê.

Jejus te kêt ôwêhti jamãr xwÿnh pyrãk

Eprêw 13.20; Apokarip 7.17

¹¹ —Nê ôwêhti jamãr mex xwÿnhja koja nhÿri mēhõ kêt ôwêhti hõxpĩr kaxyw hwÿr htēm ã omu nê wa hã axpu. Nhũm ho àhkĩnh mã xwÿnhhta ôwêhti jamãr xwÿnh pĩ nhũm ôwêhti nê ty. Tã ixkwÿjaja hamakêtkati nê mex nê pa kaxyw na pa pre amnhĩ grõnh kõt mẽ hwÿr wrÿ. Jakamã kot paj te ôwêhti jamãr xwÿnh kot amnhĩ nhĩpêx pyrãk o amnhĩ nhĩpêx.

¹² —Nê na htem tõhã ôwêhti jamãr xwÿnh nhÿhÿm pa kaxyw nê mēhõ mã amnhĩre nhũm wakre kamã

kām hkrit jamār o pa. Kàxpore pix prām xàj kām hamār o pa. Jakamā koja nhỹhỹnh mry xoprê ra hwỳr kato nhũm amnhĩ wỳr omu nê umaj ôwêhti re nê ma hprôt nê tẽ. Kām ôwêhti japê hkêt âm kām htĩr pix prām xàj ôwêhti mã hamaxpêr kêt nê rer pa nê ma tẽ. Nhũm mry xoprêta ôwêhti hwỳr hprôt nê hkwy pynê nhũm hkwy umaj axkahkũm nê hprôt nê ma mra. No kêt pa na te ixte ôwêhti mã hamaxpêr kêt nê kot rer nê ma hprôt nê htẽm xwỳnhhta pyræk kêt. Kot paj aa ixkwỳjê rer kêt nê. Kot paj mẽ hkôt ixpa ho ixpa rãhã nê.

¹⁴ —Te ixte ôwêhti jamār xwỳnh mex pyræk jakamā na pa hte uræk nê ahpỹnhã mẽ kot ixkôt amnhĩ xunhwỳr xwỳnhjê pumunh mex o ri mẽ hkôt ixpa. Te mẽ kêp ixkrit ôwêhti pyræk nhũm te ixpê mẽ hamār mex o ri mẽ hkôt ixpa nê aa mẽ rer kêt xwỳnhhta pyræk.

—Nê mẽ kot ixkôt amnhĩ xunhwỳr xwỳnhjaja ra mẽ ixte amnhĩ nhĩpêx kôt axpẽn pumunh mex. Nê mẽ inhmã axpẽn japêê. Te Inhĩpêêxã mẽ wa inhmã axpẽn japê pyræk. Tã kot paj nhỹrmã mẽ nê tanhmã amnhĩ nhĩpêx to.

¹⁶ —Mẽ kot ixkôt amnhĩ xunhwỳr xwỳnhjaja piitã kêp Ijaew pix kêt. Koja Ijaew kêt xwỳnh kwỳjaja mãânẽn ixkapêr ma nê ixkôt amnhĩ xunhwỳr nê ixkôt amnhĩ nhĩpêx. Jao ra te kêp ixkrit ôwêhti pyræk. Tã kot paj mẽ ho ixpimràa tã mẽ ho tipxi nê mẽ hamār o ri mẽ hkôt ixpa.

¹⁷ —Nê mẽ kot ixkôt amnhĩ nhĩpêx o mẽ pa xwỳnhjaja mẽ mex kaxyw na pa pre amnhĩ grõnh kôt mẽ hwỳr wrỳ. Jakamā kot paj nhỹrmã mẽ nê ty. Tã inhmã mẽ nê ixyk puma hkêt jakamā na Inhĩpêêxã kãm ijapêê. Koja akupỹm ixto ixtĩr. ¹⁸ Kop apu inhmã mẽ nê ixyk prãm kêt ronhỹx mẽ kãm ixkurê xwỳnhjaja tee ri kãm ixpĩr prãm kaprỳ. Nom ixte mẽ kot ixkôt amnhĩ nhĩpêx xwỳnhjê nê amnhĩ grõnh kôt mẽ hwỳr ixwrỳk kênã. Jakamā kot paj arĩ mẽ kãm amnhĩ grõnh kôt amnhĩ gõ nê arĩ mẽ kãm xa nhũm mẽ ixpĩ. Nom kot paj akupỹm ixtĩr. Mẽhõ koja tanhmã ixto nê ixpĩr o ixpĩ? Nà koja mẽhõ ixpĩr o ixpĩr kêt nê. Inhĩpêêxã nhỹ hã kot paj nhỹrmã ã amnhĩ nhĩpêx anê nê akupỹm ixtĩr. Anê.

Nhũm pre ã Jesus mẽ kãm amnhĩ jarênh anê. ¹⁹ Hãmri nhũm Ijaew tee ri ã kot amnhĩ jarênh anhỹr ã kuma nê kê axte axpẽn kwỳm ri tanhmã harênh to ho kuhê. ²⁰ Nê kamã mẽ hkwyjaja harênh o:

—Tk. Kwa mẽ mar kêt nê. Satanasti nhỹ hã na hte htỳx ri ã mẽ pamã amnhĩ jarênh anhỹr o pa. Anê.

²¹ Hãmri nhũm mẽ hkwyjaja mẽ kuma nê mẽ kãm:

—Nà kot anhỹr kêt. Xà na htem Satanasti nhỹ hã ã kapêr mex anê nê ã mẽ no hkre xwỳnhjê ho mex anê? Nà kot anhỹr kêt. Satanastija ukapĩre hã. Anê.

Ijaew nhõ pahijaja kot Jesus kaga hã mẽ harênh

Juāw 5.18, 8.59

²² Tã nhũm ra amgrà hapêx pa mẽ ixpê Ijaew akupỹm krĩ pê Jerujarê kamã axpẽn wỳr akuprõ. Axte mẽ ixte mẽ ixkĩnh kaxyw axpẽn wỳr akuprõ. Amnepêm mẽ inhĩgêtjaja kot akupỹm Tĩrtũm mã amnhĩ jarênh xà hã ixkre ho mex pa nê ho Tĩrtũm wỳr mã hamaxpêr nê hã

ixkĩnh ã arĩgroja ã pa mẽ hwỳr akuprõ. ²³ Hãmri nhũm Jesus ma mẽ ixkôt Tĩrtũm mã amnhĩ jarênh xà hã ixkre-ta wỳr tẽ no âm hwỳr àr kêt nê. Âm ixkre hpu hã kahê xà kape hã ri pa. Mẽ kot kãm: “Pahi finat Sarumãw pa xà” anhỹr xwỳnhhta kamã ri pa. ²⁴ Hãmri nhũm kê ra mẽ inhõ pahijaja omu nê hã akuprõ nê hêx rom kãm kapêr nê kãm:

—Kwa tokyx aprĩ hã mẽ inhmã amnhĩ jarê. Xà apê Tĩrtũm Kra na ka nà? Xà ka na pre Tĩrtũm mẽ ixkaxyw axãm? Kwa aprĩ hã mẽ inhmã amnhĩ jarê pa mẽ ama. Mon ka hte aprĩ hã mẽ inhmã amnhĩ jarênh kêt nê? Na pa mẽ tee ri ate amnhĩ nhĩpêx ã apumu nê akukamã ijamaxpêr rũnh kumrêx o ri ixpa. Xà âm hãmri apê Tĩrtũm kot mẽ ixkaxyw axãm xwỳnhhta na ka? Anê.

²⁵ Hãmri nhũm mẽ kãm:

—Tk. Ra ixte mẽ amã amnhĩ jarênh xohtô htã ka mẽ inhma nê âm inhma. Na pa hte xatã Inhĩpêêxã nhỹ hã mẽ amã mẽ ate aa mẽmoj pumunh kêt kwỳ ho anhỹr o ri ixpa ka mẽ ja hã ixpumu nê âm ixpumu nê ixkôt ajamaxpêr kêt nê. ²⁶ Mẽ apê ixkwỳ hkêt jakamã na ka mẽ ixkôt ajamaxpêr kêt nê. Te mẽ apê ixkrit ôwêhti pyræk kêt. ²⁷ Ixkwỳjaja na te ho ôwêhti kot hamār xwỳnh kapêr mar nê hkôt ri pata pyrã nê ixkapêr ma nê ixkôt amnhĩ nhĩpêx o pa. Ixpê mẽ õ pahihtĩ hã mẽ kot ix-pumunh mex jakamã na htem ixkôt amnhĩ nhĩpêx mex o pa. Ixte ja hã mẽ omunh mex nê. ²⁸ Koja mẽ nhỹrmã htyk tã no âm ixkukwak ri akupỹm htĩr hãmri nê Tĩrtũm mẽ wa ixri htĩr tũm nê pa ho pa nê aa hapêx kêt nhũm mẽhõ ixpê mẽ utàr kêt nê. Te inhĩkra hpo nhĩpôk ri mẽ hkrĩ nhũm te mẽ hã inhĩkra pikamỳr pyræk nhũm mẽmoj tee ri ixpê tanhmã mẽ ho hprãm kaprỳ. ²⁹ Inhĩpêêxã tãm kot inhmã mẽ õr kênã. Hihtỳx o kot mẽ piitã mẽ hakrenh par jakamã koja mẽ inhĩkra po nhĩpôk ri hkrĩ nê mãânẽn Inhĩpêêxã nhĩkra hpo nhĩpôk ri hkrĩ. Te ixpê Inhĩpêêxã Tĩrtũm pyræk jakamã mẽhõ kot wa ixpê wa inhĩkra rũm mẽ utã? Nà amrakati kumrêx.

Anhỹr o mẽ kãm amnhĩ jarê. ³¹ Hãmri nhũm mẽ te kêp Tĩrtũm pyræk ã amnhĩ jarênh ã kuma nê kamã gryk tỳx nê. Hãmri nê kot kên o htak kaxyw ra kaxyw hkwy kawrà ho ri hprôt. ³² Hãmri nhũm amnhĩ tã mẽ omu nê mẽ kãm:

—Kwa ra ixte Inhĩpêêxã nhỹ hã mẽ amã aa mẽ ate mẽmoj pumunh kêt kwỳ ho anhỹr rax o ixpa. Jao tanhmã mẽ ho mex to pix o ri ixpa. Tã ka mẽ axtem nê ã inhĩpêx anhỹr kaxyw. Anê.

³³ Hãmri nhũm mẽ kãm:

—Nà ã ate amnhĩ nhĩpêx anhỹr ja mỳrapê hkêt. Kêt apê mẽ inhĩõ htã ri axtem nê te apê Tĩrtũm pyræk ã amnhĩ jarênhja mỳrapê na pa mẽ kên o atak kaxyw. Na pu htem ã amnhĩ jarênh anhỹr o papa hkêt nê. Anê

³⁴ Hãmri nhũm mẽ kãm:

—No âm hãmri ixte ã amnhĩ jarênh anhỹr kênã. Tanhmã na Tĩrtũm kapêr ã kagã htũm kot ja jarênh to wehe? Na pre Tĩrtũm Ijaew nhõ pahijê mã kapêr nê mẽ kãm:

E mẽ ate inhỹ hã mẽ ho amnhĩptar jakamã te mẽ apê pa ixpê Tĩrtũm pyræk.

Anhÿr o kot mẽ harēnh. ³⁵ Ām hāmri na Tirtūm kapē-ja. Tām kot ā mẽ harēnh kot anhÿr. Mẽ kot ŷ hã mẽ kām kapēr jakamã te mẽ kêp urāk ā mẽ harēnh anhÿr kēnã. ³⁶ Tã tãm kot ā mẽ harēnh anhÿr tã hpānhã mẽ akaxyw pa ixpê Kra hã ixām mẽ mẽ awÿr inhmēnh nhūm ixwryk mẽ ixpê Kra hã amnhĩ jarēnh tã ka mẽ ja hã inhma mẽ am inhma mẽ ixkôt ajamaxpēr kêt mẽ. Kwa mon ka mẽ ja hã ixpumunh mẽ ixkôt ajamaxpēr kêt mẽ? ³⁷ Kot paj Inhĩpêêxã mẽ wa ixàhpumunh kôt mẽ amã aa mẽ ate mẽmoj pumunh kêt kwÿ ho anhÿr kêt ka mẽ ja hã ixpumu mẽ mẽ rĩ kam mẽ māmri ixkôt ajamaxpēr kêt mẽ. ³⁸ Mẽ amã ixkapēr mar prām kêt tã kwa ixte Tirtūm pyrã mẽ aa mẽ ate mẽmoj pumunh kêt kwÿ ho anhÿr ā ixpumu mẽ Inhĩpêêxã mẽ wa ixte amnhĩ nhĩpêx tipxi hkôt ajamaxpēr. Anẽ.

³⁹ Hāmri nhūm mẽ kuma nhūm ja mẽ kêp omnuj tÿx mẽ. Te kot Tirtūm pyrã ā amnhĩ jarēnhja nhūm mẽ kêp omnuj mẽ. Jakamã nhūm mẽ ra kot unēnh mẽ ixkre rūm ho kator mẽ kapôt ā mēnh mẽ kēn ho htak kaxyw nhūm kê axte mẽ kêp akunok mẽ ma nhÿhÿm tẽ.

Jejus kot Jotãw nhĩhkjẽ hã ri pa hã harēnh

⁴⁰ Tã nhūm Jejus ma tẽ mẽ pyhti pẽ Jotãw ã rê. Pa mẽ hkôt ri ixpa ho ixpa xwÿnhjaja ma hkôt mẽ. Finat Juāw Paxis kot Tirtūm mã wam mẽ hkrã kumrãr o pa xàta wÿr. ⁴¹ Hāmri nhūm mẽ ohtô mẽ mẽ ixwÿr mra mẽ Jejus kapēr ma mẽ kot tanhmã amnhĩ nhĩpêx to hã omunh o kuhê. Hāmri mẽ hã tanhmã axpẽn mã kapēr to mẽ axpẽn mã:

—Kwa am hāmri na pre finat Juāw Paxisja mẽ pamã Jejus jarēnh o pa. Aa kot mẽ pamã mẽ pahte mẽmoj pumunh kêt kwÿ ho anhÿr kêt tã am xatã hkukamã mẽ pamã harēnh o pa. Kêp Tirtūm Kra hã Juāw rom hihtÿx o hihtÿx ã harēnh o pa. Nẽ Tirtūm kot mẽ pakaxyw am xwÿnh ã nhūm mẽ pamã harēnh o pa. Nã am hāmri na pre ã mẽ pamã harēnh anẽ. Anẽ.

⁴² Hāmri nhūm mẽ ohtô mẽ amnhĩ kaxyw Jejus kôt hamaxpēr mẽ hkôt amnhĩ xunhwÿ.

Rajare htyk jarēnh

Juāw 5.21-29, 6.40

11 Rôm nhūm krĩ pẽ Petãn kamã mẽhõ my pẽ Rajareja ra à htÿx mẽ nõ. Na pre htõx wa hamēxkrut. Hõ kêp Matre nhūm hõ kêp Marir. ² Marir na pre kormã arĩgro hõ hã kot Jejus o mex kaxyw mẽ hkuxwaxà ho hkuxwa mẽ amnhĩ kí ho hpar põnh kaxyw. Nom kormã. Jakamã nhūm wa hkamyja wa kêp à htÿx mẽ nõ. ³ Hāmri nhūm wa tee ri hkukamã hamaxpēr mẽ ma krĩ hõ hwÿr Jejus wÿr mẽhõ mẽ nhūm ma hwÿr tẽ. Nẽ hwÿr pøj mẽ omu mẽ kãm:

—Pa Pahihti. E ot pa awÿr tẽ. Na ra amã akràmnhwÿ japê htÿx xwÿnhhta à htÿx mẽ nõ nhūm htõx wa tee ri hkukamã hamaxpēr mẽ awÿr inhmẽ pa tẽ. Kwa tokyx pu ma hwÿr tẽ ka akupÿm wa kãm ho mex nã? Anẽ.

⁴ Hāmri nhūm kuma mẽ kãm:

—Nã à htÿx mẽ nõr tã koja akupÿm mex. Mẽ kot akupÿm mex ã harēnh mar hāmri mẽ Tirtūm mẽ wa ix-tã hpijaam mẽ wa ixihÿx o wa ixihÿx ã wa ixpumunh

kaxyw na ã à htÿx mẽ nõr anẽ. Nẽ pa ixpê Tirtūm Kra hã akupÿm ho mex ã ixpumunh mẽ ixkôt hamaxpēr kaxyw na ã à htÿx mẽ nõr anẽ. Anẽ.

⁵ Na pre Jejus kãm Rajare mẽ htõx wa mẽ hapê mẽ.

⁶ Tã à htÿx ã harēnh ma mẽ hwÿr mör tokyx anhÿr kêt mẽ. Pa mẽ arĩ amnhĩm hikranh xà kamã ri ixpaja o ixtã axte apkati axkrut. ⁷ Hāmri nhūm rĩ kormã hwÿr no-jarêt mẽ mẽ inhmã:

—E ma pu mẽ jarãhã akupÿm Jutej kamã Rajare hwÿr mō mẽ omu. Anẽ.

⁸ Hāmri pa mẽ tee ri ja hã kuma mẽ kãm:

—Kwa ham mẽ panhõ pahijaja kot kēn o atak o apĩr mã tã ka ra akupÿm mẽ hwÿr akrã. Kwa pu mẽ hwÿr pamör kêt mẽ nã? Anẽ.

⁹ Hāmri nhūm mẽ inhmã:

—Nã koja mẽ kormã tanhmã ixto hkêt mẽ. Kormã ixte Tirtūm mã tanhmã amnhĩ nhĩpêx to jatur xàm mēnhre hã. Te ixte kormã arĩgro hã ixrĩt mex mẽ ixpa pyrã mẽ kormã Tirtūm kot mẽmoj tã inhmã karõ xà hkôt pix mã tanhmã amnhĩ nhĩpêx to ho ri ixpa. ¹⁰ Tã kot paj hatur xàm kumẽ nhūm te myt ar nhūm ra kamãt kô pyrãk nhūm mẽ rĩ kormã tanhmã ixto mẽ ix-pĩ. Jakamã e ma pu mẽ hwÿr. Koja mẽ tokyx tanhmã ix-to hkêt mẽ. Anẽ.

¹¹ Hāmri mẽ mẽ inhmã Rajare jarēnh o:

—Na mẽ pahkràmnhwÿ Rajareta ra gõr mẽ nõ. Tã kot puj mẽ ma hwÿr mō pa kumra. Anẽ.

¹² Ra htyk ã omunh tã ã mẽ inhmã harēnh anẽ. Pa mẽ kuma mẽ ixtÿx ho am õt mẽ nõr ã hkamnhĩx mẽ kãm:

—Kwa mãn ra akupÿm amnhĩ kãm hamak o mör jakamã na ra amnhĩ krit mẽ gõr mẽ nõ. Kwa pu mẽ aw-janã mẽ hwÿr pamör kêt mẽ nã? Anẽ.

¹⁴ Hāmri nhūm mẽ inhma mẽ hprĩ hã mẽ inhmã harẽ mẽ mẽ inhmã:

—Nã na pre ty. ¹⁵ Nom kormã à mẽ hikwÿta ã na pa hwÿr inhmör kêt mẽ. Tã kot paj ma hwÿr mō mẽ hã mẽ amã ixàhpumunh tÿx ã amnhĩ to amnhĩrĩt. Ka mẽ ja hã ixpumu mẽ amnhĩ kaxyw ixkôt ajamaxpēr tÿx o ri apa. Ā mẽ ate amnhĩ nhĩpêx anhÿr kaxyw na pa kormã à mẽ nõr ã hwÿr inhmör kêt mẽ. E ma pu mẽ hwÿr. Anẽ.

¹⁶ Hāmri nhūm mẽ inhĩõ pẽ Tomas pihpohti tee ri ã kapēr anhÿrja ã kuma mẽ mẽ inhmã:

—Tõe ma pu mẽ hkôt. Kê mẽ māmri hkôt mẽ pahto hpimràatã mẽ panhĩmex pa ri. Anẽ.

¹⁷ Tã pa mẽ ma hkôt mẽ hwÿr mō mẽ ra Rajare nhõ krĩ hwÿr ixpõx o mẽ hāmri mẽ harēnh ma. Ra htyk nhūm mẽ kot haxàr ã arĩgro pẽ kwat ã harēnh ma. ¹⁸ Nhūm Matre mẽ Marir wa hkamy ho hamak xàj arĩ mÿr o hkrĩ. Jakamã nhūm Ijaew kwÿjaja Jerujarẽ rūm ma wa hwÿr mra. Mẽ kot wa kãm kapēr nhūm tokyx akupÿm tãm wa hkrã kaxyw nhūm mẽ wa hwÿr mra. Wa õ krĩ pẽ Petãnja Jerujarẽ hwÿr am 3 kirõm pix jakamã nhūm mẽ ma wa hwÿr mra mẽ wa kuri wa kãm kapēr o hkrĩ.

²⁰ Rôm nhūm Matre Jejus hpõx o mör ã harēnh ma mẽ kãnhmã xa mẽ man mẽ ixkutã tẽ. No nhūm Marir arĩ mÿr o nhÿ mẽ hkôt htēm kêt mẽ. ²¹ Hāmri nhūm Matre

mě ixkutã të në mẽ ixkaxpa në Jesus pumu në mỳr kamã kãm kapër në kãm:

—Hêxta gòa në Pahihti. Na pre ra wa ixkamy wa ixpê ty. Kop apu jar mẽ ixkôt ri apa ronhỹx pre htyk kêt në. Xê mon ka pre we tokyx mẽ ixwỳr atêmre hkêt në?

²² Tã na pa arĩ akôt ijamaxpêr tỳx në. Kot kaj mẽmoj tã tanhmã Tĩrtũm wỳr to nhũm ama në tanhmã amã mẽmoj to. Ra ixte ja hã apumunh mex kênã. Anẽ.

²³ Hãmri nhũm Jesus kuma në kãm:

—Kwa tee ri ajamapêr në akapĩrĩ hkêt në. Koja akamy akupỹm war amã htĩr kãm ga. Anẽ.

²⁴ Hãmri nhũm kuma në kãm:

—Ma koja anẽ. Nhỹrmã Tĩrtũm kot mẽ piitã akupỹm mẽ ho htĩr xà hã arĩgrota ã koja akupỹm htĩr. Anẽ.

Kamy akupỹm htĩr ã harênh mar tã Jesus kot akupỹm ho htĩr tokyx anhỹr ã hkamnhĩx kêt në ã kãm kapêr anẽ.

²⁵ Jakamã nhũm kãm:

—Nà pa na ixpê akupỹm mẽ ho mẽ htĩr xwỳnh. Jakamã mẽ kot amnhĩ kaxyw ixkôt hamaxpêr në ixkôt amnhĩ xunhwỳr xwỳnhjaja koja mẽ htyk tã koja mẽ hkarõ Tĩrtũm mẽ wa ixri htĩr tũm mẽ mex mẽ pa ho pa. Xà ate ja kaxyw ixkôt ajamapêr tỳx nã? Anẽ.

²⁷ Hãmri nhũm Matre kuma në kãm:

—Xê nhũm. Apê Tĩrtũm Kra hã na pre mẽ ixkaxyw axãm. Ka na pa htem amnhĩ wỳr akãm ijamak o ixpa. Anẽ.

Hãmri nhũm Jesus kãm:

—Nà ãm hãmri na ka ã ijarênh anẽ. E ma akupỹm të në atõx mã anẽ kê tokyx man ixwỳr të pa omu. Anẽ.

²⁸ Hãmri nhũm kuma në ma akupỹm të. Hãmri në Marir wỳr axà në kãm Jesus jarẽ. Kôt mẽ hkrĩ xwỳnhjê hkàx ã kãm harẽ në kãm:

—An xê hãmri amỳr kêt në. Na ra mẽ pajahkre xwỳnh-ta hpõx o mẽ mẽ mũtar nhỹ mẽ atã karõ. Anẽ.

²⁹ Hãmri nhũm kuma në kànhmã xa mẽ ma mẽ ixwỳr htêm kurê kumrêx. ³⁰ Hãmri pa mẽ kormã krĩm ixpõx kêt në. Arĩ Matreja Jesus wỳr htêm xà kamã arĩ ixkrĩ.

³¹ Jakamã nhũm Matre ma mẽ nhũm Marir mã Jesus jarẽ nhũm kato mẽ man mẽ ixwỳr të. Hãmri nhũm Jerujarẽ rũm wa hwỳr mẽ mrar xwỳnhjaja omu mẽ htỳx kot hkamy hã pika pumunh mẽ mỳr kaxyw htêm ã hkamnhĩx mẽ man hkôt mra. ³² Hãmri nhũm Marir mẽ hkukamã mẽ ixwỳr të mẽ Jesus pumu mẽ hpar pê tẽm mẽ kãm kapêr pê hipô mẽ mỳr o nhỹ. Nẽ kãm:

—Hêxta gòa në Pahihti. Na pre ra wa ixkamy wa ixpê ty. Kop apu jar mẽ ixkôt ri apa ronhỹx pre htyk kêt në. Hô mon ka pre we tokyx man mẽ ixwỳr atêmre hkêt në? Anẽ.

³³ Hãmri nhũm Jesus kuma mẽ mỳr ã omu. Nẽ hkôt mẽ mrar xwỳnhjaja mẽ mỳr ã mẽ omu mẽ kãm mẽ hkapĩrĩ mẽ. ³⁴ Hãmri mẽ mẽ kãm:

—Nhỹri na ka prem haxã? E mẽ hwỳr ixto të pa omu. Anẽ.

Hãmri nhũm mẽ kuma mẽ ma hã pyka hwỳr mẽ ixto mẽ ³⁵ nhũm Jesus mẽ urak mẽ hwỳr mỳr o mẽ ³⁶ nhũm mẽ ja hã omu mẽ xpeñ mã:

—Kwa mãn kãm hapê htỳx. Hã na ho ama mẽ hwỳr mỳr o mẽ. Anẽ.

³⁷ Nom nhũm mẽ hkwỳjaja axtem mẽ mẽ kãm:

—Tk. Ra kot no hkre xwỳnh-ta o mex tã mo na we tokyx man kormã htĩr ri hwỳr htêm mẽ omunh mẽ akupỹm ho mex kêt në? Anẽ.

Jesus kot akupỹm Rajare ho htĩr ã harênh

³⁸ Tã pa mẽ ra kên kre kamã mẽ kot Rajare jaxàr xàta wỳr ixpõx o mẽ nhũm Jesus hkapĩrĩ mẽ hwỳr të mẽ omu. Nhũm prem ra kên rax o hitom ³⁹ nhũm omu mẽ mẽ kãm:

—E mẽ akwỳjaja nhãm inhmã nê kahê xà mẽ. Anẽ.

Hãmri nhũm Matre kuma mẽ tee ri hamaxpêr mẽ kãm:

—Xê ma Jesus. Mẽ ri ã anhỹr kêt në. Ra htyk ã arĩgro kêt 4 kênã. Mãn ra hkatõk mẽ hkro htỳx kumrêx. Anẽ.

⁴⁰ Hãmri nhũm kuma mẽ kãm:

—Kwa ri ã ajamapêr anhỹr kêt në Matre. Na pa ra amã ixkapêr mẽ amã ixkapêr o: “Kot kaj amnhĩ kaxyw ixkôt ajamapêr tỳx në. Hã kot kaj Tĩrtũm mẽ wa ixihtỳx o wa ixihtỳx xàja pumu.” Anhỹr o amã ixkapêr. Jakamã kwa ja kaxyw Tĩrtũm mẽ wa ixkôt mãn ajamapêr tỳx mẽ hkêt wehe. Anẽ.

Hãmri nhũm kuma mẽ kãm:

—Ma ãm hãmri na ka inhmã akapêr. Ma kot paj kaxyw war amã ijamapêr tỳx mẽ. Anẽ.

⁴¹ Rõm nhũm mẽ kãm nhãm kên jakwa kre kahê xà mẽ. Hãmri nhũm Jesus Tĩrtũm mã amnhĩ jarênh kaxyw kànhmã kaxkwa hwỳr rĩt mẽ kãm:

—Pa Papaj. Nà na pa hte tanhmã mẽmoj tã awỳr to ka inhma mẽ tanhmã inhmã mẽmoj nhĩpêx to. Amex o amex Papaj. ⁴² Na ka hte ã inhmã amnhĩ nhĩpêx anẽ. Tã pa jajê noo mã ã amã ixkapêr anẽ. Ate inhmar mẽ tanhmã Rajare hto nhũm mẽ kot ja hã ixpumunh mẽ ixte anhỹ hã pix mã tanhmã amnhĩ nhĩpêx to ho ri ixpa hã ixpumunh kaxyw. Nẽ ka ate mẽ hwỳr inhmênh ã apumunh kaxyw. Anẽ.

⁴³ Nhũm pre ã Tĩrtũm mã kapêr anẽ. Hãmri mẽ kỳx pê Rajare mã kapêr mẽ kãm:

—Pa Rajare. Kwa tokyx kànhmã nhỹ mẽ amnẽ mẽ ixwỳr të mẽ akato. Anẽ.

⁴⁴ Puh nhũm akupỹm htĩr mẽ hkupu xà rãhã të mẽ mẽ ixwỳr kato mẽ xa. Arĩ hkuk mẽ ãhkra mẽ hpar kupu rãhã mẽ ixwỳr kato mẽ xa. Hãmri nhũm Jesus mẽ kãm:

—Kwa mẽ atõ nê kupu xà hpôt kê ma akupỹm òrkwỹ hwỳr të. Anẽ.

⁴⁵ Hãmri nhũm mẽ kot Marir mẽ Matre wa hwỳr mrar xwỳnh kwỳjaja ã Jesus kot Rajare nhĩpêx anhỹr ã omu mẽ amnhĩ kaxyw hkôt hamaxpêr mẽ hkôt amnhĩ xunhwỳr kurê kumrêx. ⁴⁶ Nom nhũm mẽ hkwỳjaja axtem mẽ omu nhũm ja mẽ kêt omnuj mẽ. Jakamã nhũm mẽ ma Parijew nhõ xwỳnhjê hwỳr mra mẽ mẽ kãm harẽ.

Mẽ kot Jesus pĩr ã amnhĩ grõnh

Matêwre 26.1-5; Makre 14.1-2; Rukre 22.1-2

⁴⁷ Hãmri nhũm Parijew nhõ xwỳnhjaja tee ri Jesus kot akupỹm Rajare ho htĩr ã harênh ma hãmri mẽ patre

krãhtũmjê më amnhĩ wÿr më inhõ juisti ho akuprõ në axpën mã Jejus o kapër punuj pê hã axpën mar o hkrĩ. Hãmri nhũm mëhõ më kãm:

—Kwa tanhmã kot puj më ho? Na ra më kãm mëmoj pumunh kêt kwÿ ho anhÿr rax o pa.⁴⁸ Kot puj më ãm omu në tanhmã ho hkêt nhũm më pahkwÿjaja kot ã amnhĩ nhĩpêx anhÿr ã omu në htÿx ãm hãmri ã kot amnhĩ nhĩpêx anhÿr ã hkamnhĩx. Hãmri në amnhĩ kaxyw hkôt hamaxpër në hkôt amnhĩ xunhwÿ. Jao ra amnhĩ kaxyw kêp më õ pahihtĩ hã ãm. Koja më ã amnhĩ nhĩpêx anê nhũm Rõm kamã pahihtija më kot kator në hpãnhã Jejus xãm ã harënh ma. Hãmri në gryk xaj më pahwÿr õ pôristi hkwÿ rë nhũm më pahwÿr mra në më panhĩmex pa në Tĩrtũm nhõrkwÿ grãnh pa. Kwa tanhmã kot puj wem tokyx amnhĩ në ho? Anê.

⁴⁹ Hãmri nhũm Kajpas më kãm kapër. Kajpasja na pre amgrãja kamã kêp mëõ patre nhõ pahi maati. Jakamã më kãm:

—Nà na pa ra ijamaxpër. Kwa më inhma.⁵⁰ Nà kot puj më hpĩr tokyx anê kê tapxipix ty pu më arĩ mÿrpê pahpiitã pajamakêtkati në ri papa. Anê.

⁵¹ Nhũm pre ã më kãm kapër anê. Nom amnhĩ krã hkôt ã më kãm kapër anhÿr kêt në. Arĩ kêp mëõ patre krãhtũmjê nhõ pahi maati jakamã Tĩrtũm nhÿ hã Jejus kot Ijaew në tykja kukamã ã harënh anê. Nom ja hã amnhĩ pumunh kêt në.⁵² Na pre Jejus më ixpê Ijaew pix në htyk kêt në. Krĩ piitã hkôt Tĩrtũm krajê në na pre ty. Më piitã më kot axpën to hkwÿ në ri axpën to pa kaxyw na pre më në ty.⁵³ Hãmri nhũm ã Kajpas më kãm kapër anê nhũm më inhõ pahijaja kuma nhũm ja më kãm mex në. Jakamã nhũm më kot tanhmã Jejus ã àmnênh to nhũm më kot më kãm tanhmã hpĩr to kaxyw ã axpën mar anhÿr o pa.⁵⁴ Jakamã nhũm Jejus axte më noo mã ri pa hkêt në. Hãmri ma krĩ pê Epraĩ hwÿr ma mõ. Pa më hkôt ixpa ho ixpa xwÿnhjaja ma hkôt ixpa. Epraĩja kapôt ã krĩ na pre. Jakamã pa më ma hwÿr mõ hãmri në kamã ri ixpa.

⁵⁵ Tã nhũm arĩgro pê Pasja ra ahtêp o mõ. Amnepêm finat Mojes kot Ejit rũm më panhĩgêtjê kator mã hamaxpër kaxyw na pa pre htem hã ixkĩnh kaxyw Pas ã Jerujarê hwÿr akuprõ. Na pa pre htem hwÿr pøj në kamã Tĩrtũm noo mã më inhĩmex kaxyw tanhmã amnhĩ nhĩpêx to.

⁵⁶ Jakamã nhũm ra Ijaew ohtõ në ma Jerujarê hwÿr pa. Nê kãm Jejus pumunh prãm xaj Tĩrtũm mã amnhĩ jarënh xà hã ixkre wÿr mra në hwÿr agjê në kamã hapêr në axpën mã:

—Kwa nok? Xà koja më hpakĩnh wÿr mõr kêt në nà? Anê.

Nhũm Parijew nhõ xwÿnhjê më më inhõ patre krãhtũmjaja haxwÿja hapêr o kuhê. Nom më kot axtem në unê në haxàr kaxyw. Jakamã më kãm hã karõ në më kãm:

—E kêr ka më nhÿri Jejus pumu në man më ixwÿr mra në më inhĩmã harënh kurê kumrêx. Anê.

Marir kot Jejus kuxwa hã harënh

Matêwre 26.6-13; Makre 14.3-9; Rukre 7.36-50

12 Tã nhũm ra Pas wÿr apkati grêre. Ra hwÿr apkati kêp 6. Jakamã pa më ma akupÿm krĩ pê Petãn wÿr Jejus kôt mõ. Jejus kot akupÿm Rajare ho htĩr xwÿnhta më õ krĩ hwÿr pa më akupÿm mõ në Rajare nhõrkwÿ hwÿr pøj në më hwÿr agjê.² Hãmri nhũm më Jejus pumu në hkĩnh në. Nê më inhĩmã mëmoj mex nhĩpêx pa më ixàpkur o ixkrĩ. Nhũm Rajare haxwÿja më ixkutã apkur o nhÿ. Nhũm htõx Matre më inhĩmã mëõ ho pa në mēsti hã unhwÿr o xa.³ Hãmri nhũm wa htõx Marir Jejus kukamã tanhmã hamaxpër to në hamaxpër o:

—Ma kot paj tokyx më kot më ixpê hpĩr kukamã më hkuxwaxà ho hkuxwa. Anê.

Hãmri në kàx rax kãm më hkuxwaxàja py në o tẽ. Ra rit kahti hkôt hitep xà nhũm kupy në hwÿr o tẽ. Më kot mëmo htwÿm o më hkuxwaxà mex nhĩpêxja na pre hã kàxpore xohtõ rax kumrêx. Jakamã nhũm kupy në Jejus wÿr o tẽ në hpar ã hkapĩr pa në amnhĩ krã hkĩ ho hpar grà ho nhÿ nhũm ra ixkre kuxwa htÿx kumrêx.⁴ Hãmri nhũm më inhĩõ pê Jut Kariotja. Kot kormã më ïhkram Jejus nhõr mã xwÿnhta tee ri ã kot amnhĩ nhĩpêx anhÿr ã omu nhũm ja kêp omnuj në⁵ nhũm më inhĩmã:

—Tk. Kwa pèr më hkuxwaxà hã kàxpore xohtõ rax kumrêx tã nhũm ri axtem në Jejus par ã hkapĩr pa. Mo na ma o htêm në ho wênê në hpãnhã kàxpore ho rax në hpyr në ho më kêp amrakati xwÿnhjê nhĩpêx kêt në? Kot ho wênê ronhÿx hpãnhã kàxpore ho rax kumrêx në kupy në ho mëmoj japrõr rax o rax. Tã axtem në amarĩ Jejus par ã hkapĩr pa. Anê.

⁶ Te kãm më kêp amrakati xwÿnhjê japê pyrãk tã kãm më hapêr hkêt. ãm hêx rom ã kapêr anê. Na pre hte më inhĩmã më ixkàxpore jamÿ në më ixkôt më inhĩmã hamãr o pa. Nom tõiã axtem në më ixpê hkwÿ ho ahkĩr në ho amnhĩm mëmoj japrõ. Jakamã Marir kot më hkuxwaxà ho hapêx par ã omu në tee ri hpãnhã kàxpore rax mã hamaxpër në kamã gryk në ã më inhĩmã kapêr anê.⁷ Hãmri nhũm Jejus amnhĩ tã hamaxpër ã omu në kãm:

—Tk. Kwa tanhmã kãm akapêr to hkêt në. Ixtyk nhũm më kot ixkuxwa hkukamã na ã inhĩpêx anê.⁸ Na hte më kêp amrakati xwÿnhjaja më akôt pa rãhã në. Ka më amã mëmo arĩgro hã tanhmã më ho ajuta hto hprãm në rĩ më ho ajuta në më kãm mëmoj gõ. No kêt pa kot paj ri më akôt ixpa ka më ixto mex ry ho apa hkêt në. Kot paj tokyx më apiitã më are. Jakamã ãm hãmri na ã inhĩpêx anê. Anê.

Patre krãhtũmjaja kot Rajare hã àmnênh ã harënh

⁹ Rõm nhũm Jerujarê nhõ xwÿnhjaja ra Jejus Petãn wÿr hpõx ã harënh ma në kot omunh mã ma hwÿr mra. No ãm tapxipix pumunh mã hwÿr mra kêt në. Mãñnên kot akupÿm ho htĩr xwÿnhta pumunh mã nhũm më ma hwÿr mra.¹⁰ Na pre ra Ijaew ohtõ në Jejus kot akupÿm Rajare ho htĩr ã harënh ma hãmri në

mě inhõ patre kaga në Jejus kôt amnhĩ xunhwỳ. Jakamã nhũm patre krãhtũmjaja tee ri ja hã mẽ omu në xepẽn mã:

—Nà kot puj mẽ Jejus pix pĩr kêt në. Kot puj mẽ mããnẽn hkôt Rajare pĩ hãmri nhũm wa hixi hamẽ mẽ kệp hapêx japêr. Anẽ.

Jejus kot Jerujarẽ hwỳr àr ã harẽnh

Matêwre 21.1-11; Makre 11.1-11; Rukre 19.28-40

¹² Tã nhũm apkati nhũm Ijaew Jerujarẽ kamã mẽ hkĩnhja kryx në Jejus ra mẽ hwỳr àhtêp o mõi ã harẽnh ma. ¹³ Hãmri në xepẽn mã:

—Kwa ma pu mẽ mõi në pô hkwy jakà në kutã ho mra. Anẽ.

Hãmri në hkwy jakà në hamỳ në ma kutã ho mra. Hãmri në ra hkaxpa në omu në hkĩnh në. Nẽ kãm:

Pa. Nà ãm hãmri na ka mẽ ixwỳr mõi. Tĩrtũm na pre mẽ ixwỳr amẽ ka ã amõi anẽ.

Tĩrtũmja mex o mex. ãm hãmri na pre mẽ ixwỳr amẽ.

Kot kaj mẽ inhõ pahi hpãnhã mẽ ixto amnhĩptãr o ri apa. Anẽ.

¹⁴ Hãmri nhũm Jejus nhỹri jumẽnre pumu në hwỳr tẽ në hã nhỹ nhũm mẽ pimràatã ma akupỳm Jerujarẽ hwỳr mõi. Tĩrtũm kapêr ã kagà htũm ra kot ja jarẽnh kot:

¹⁵ Pa Jerujarẽ nhõ xwỳnhjaja. Kwa mẽ tee ri amnhĩ kukamã ajamaxpêr ho amã ma hkêt në.

Ota mẽ anhõ pahi nyw ra mẽ awỳr jumẽnre hã nhỹ në hpõx o tẽ. Anẽ.

¹⁶ No Jejus kôt mẽ ixpa ho mẽ ixpa xwỳnhjaja pa mẽ ã kot amnhĩ nhĩpêx anhỹrja ã omu në tee ri hkukamã ijamaxpêr në xepẽn mã:

—Kwa mo na ri ã amnhĩ nhĩpêx anẽ në jumẽnre hã nhỹ në mẽ hkôt mõi? Anẽ.

Tã nhũm arĩgro hõ hã ty në akupỳm kaxkwa hwỳr api pa prem hã omu hãmri në kormã Tĩrtũm kapêr ã kagà htũm kot hkukamã ã harẽnh kot anhỹrja mã ijamaxpêr kurẽ kumrêx. Hãmri në xepẽn mã harẽnh o:

—Kwa ãm hãmri na Tĩrtũm kapêr ã kagà htũm kot ra ã Kraja jumẽnre hã yr në mẽ hkôt mõi ã hkukamã kot harẽnh anhỹrta. Anẽ.

¹⁷ Hãmri nhũm Jejus kot Rajare mã kapêr pẽ akupỳm ho htĩr ã omunh xwỳnhjaja arĩ nhãm mẽ hkwyjẽ mã ujarẽnh o pa. ¹⁸ Nhũm mẽ kuma në ma Jejus wỳr omunh mã mra. ¹⁹ Hãmri nhũm Parijew nhõ xwỳnhjaja tee ri ja hã mẽ omu në xepẽn mã:

—Kwa na pu mẽ tee ri Jejus në mẽ kãm pakapêr kaprỳ nhũm mẽ pamar kêt në ra piitã hkôt amnhĩ nhĩpêx o pa. Kwa nà. Anẽ.

Ijaew kêt xwỳnhjẽ jarẽnh

²⁰ Tã nhũm ra Gres kwỳjaja Ijaew kôt hkĩnh kaxyw ma Jerujarẽ hwỳr mẽ hkôt mra në mẽ ãhkõ hã Tĩrtũm mã mex o mex ã harẽnh o hkôt mra. ²¹ Jakamã nhũm mẽ nhỹri mẽ inhõ pẽ Firipti pumu në hwỳr mra. Firipti kệp pyka pẽ Garirej kamã krĩ pẽ Pesêj nhõ xwỳnh nhũm Gres nhõ xwỳnhjaja omu në hwỳr mra në kãm:

—Pa. Kwa na pa mẽ inhmã Jejus pumunh prãm në. Tanhmã kot pa wem amnhĩ to në omu në kãm ixkapêr? Anẽ.

²² Hãmri nhũm mẽ kuma në ma Andre hwỳr mẽ o mra në kãm mẽ harẽ. Hãmri në wa ma Jejus wỳr mẽ o mra në kãm mẽ harẽ në kãm:

—Pa Pahihti. Ota Gres nhõ xwỳnhjaja kãm apumunh prãm në awỳr mõi. Mẽ pahkĩnhã mẽ kệp Ijaew kêt tã mẽ kãm apumunh prãm në. Anẽ.

Jejus kot amnhĩ kukamã amnhĩ jarẽnh

Matêwre 16.24-28; mããnẽn Apokarip 2.10, 12.11

²³ Hãmri nhũm Jejus mẽ omu në mẽ kãm tanhmã amnhĩ jarẽnh to. Kot mẽ ohtõ në mẽ nẽ htyk nhũm mẽ kukwak ri Tĩrtũm wa kuri htĩr tũm në pa ho pa hã mẽ kãm amnhĩ jarẽ në mẽ kãm:

—Nà na ra ixtyk ã arĩgro hwỳr apkati grêre. Ixpê Tĩrtũm kot mẽ akaxyw ixãm xwỳnh jakamã kot paj mẽ apiitã mẽ anê ty hãmri në akupỳm ixtĩr në ma kaxkwa hwỳr akupỳm api. ²⁴ Mẽ axohtõ në nhỹrmã Tĩrtũm mẽ wa ixri atĩr tũm në apa ho apa kaxyw kot paj ã amnhĩ nhĩpêx anẽ. Kwa mẽ ã ixte amnhĩ jarẽnh anhỹrja ma mẽ mẽ amnhĩ krãm haxàr tỳx në ri hã apa. Te ixte mẽmo hy kot amnhĩ nhĩpêx pyrãk. Na htem pikap hagjẽ nhũm te htyk pyrã në pika kaxwỳnh kãm hikwỳ. Tã gaa në higrõt në hprêk në ô. Nẽ ô rax kumrêx. Hyja pyxire në hikwỳ htã kamã ô rax kumrêx. Nom koja mẽ hkre hkêt në nhũm ô hkêt në. Na hte ã mẽmo hyja amnhĩ nhĩpêx anẽ. Ja pyrã në kot paj mẽ anê ixtyk kêt në te mẽ kot mẽmo hy hkre hkêt nhũm hprêk në ô hkêeta pyrãk ka mẽ ixkukwak ri Tĩrtũm mẽ wa ixri atĩr tũm në apa hkêt në. Jakamã kot paj mẽ anê ty nhũm mẽ ijaxà. Hãmri pa akupỳm ixtĩr ka mẽ axohtõ në ixkukwak ri wa ixri atĩr tũm në apa ho apa.

²⁵ —Nẽ koja mẽ ixpĩ pa mẽ anê ty. Tã mẽ ate ixkôt amnhĩ nhĩpêx o apa xwỳnhjaja. Koja mẽ ixtã mẽ apar mã tã kwa kêt ka mẽ atyk pymaj ixkaga hkêt në. Kwãr mẽ mãmrĩ tanhmã ixtã mẽ ato ka mẽ nhỹrmã Tĩrtũm mẽ wa ixri axte amnhĩ xà kamã ajamak kêt kumrêx në atĩr tũm në amex në apa ho apa. No kot kaj mẽ ixkĩnhã jar amã amex pix prãm hãmri në nhỹrmã wa ixri atĩr tũm në apa hkêt në. ²⁶ Kot kaj mẽ ã ixkôt amnhĩ nhĩpêx anhỹr o ri apa hãmri nhũm mẽ kot inhĩpêx pyrãk o mẽ anhĩpêx. Hãmri ka mẽ nhỹrmã ma ixkôt kaxkwa hwỳr api në kamã ixri atĩr tũm në apa ho apa. Hãmri nhũm Inhĩpêxã ixtã mẽ apumu në mẽ ato mex kumrêx. Anẽ.

Tĩrtũm kot Jejus mã kapêr ã harẽnh

Matêwre 3.17, 17.5

²⁷ Tã nhũm Jejus tee ri amnhĩ kukamã htyk mã hamaxpêr në hkaprĩ htỳx në. Nẽ hkôt mẽ ixpa ho mẽ ixpa xwỳnhjẽ mã amnhĩ jarẽ në mẽ inhmã:

—Hêxta waa në. Na pa tee ri amnhĩ kukamã ijamaxpêr. Nẽ tee ri amnhĩ xà htỳx kamã ijamak kukamã ijamaxpêr pẽ ra amnhĩ kamã ixkahak në. Nom ixte pika piitã hkôt mẽ kot ixkôt amnhĩ xunhwỳr xwỳnhjẽ nẽ ixtyk kaxyw ixwỳk kênã. Jakamã kot paj Inhĩpêxã kot

mě kệp ixpytär kaxyw tanhmã amnhĩ to hwÿr to hkêt nê. Anê.

²⁸ Hãmri nê hpãnhã Hipêêxà mã kapêr nê kãm:

—Pa Papaj. Æm mëmoj pixi na inhmã hprãm. Kê më piitã ixkukwak ri amex o amex ã apumu. Ja na kêt inhmã hprãm tÿx kumrêx.

Anhÿr o Tirtüm mã amnhĩ jarê. Hãmri nhũm kuma nê kaxkwa rùm kãm kapêr. Kÿxpê kãm kapêr nê kãm:

—Nà na pa pre ra ã më kãm amnhĩ to amnhĩrít anê nhũm më ja hã ixpumu. Tã kot paj axte akukwak ri amnhĩ to amnhĩrít nhũm më piitã axte inhmex o inhmex ã ixpumu. Anê.

²⁹ Nhũm pre ã Tirtüm Jejus mã kapêr anê. Hãmri nhũm më kot më ixkuri mar o kuhê xwÿnhjaja kuma no ãm hprĩ hã kot kãm tanhmã kapêr toja mar mex kêt nê. Nê htÿx ho ãm mëmoj tã hkamnhix. Jakamã nhũm më hkwyjaja xypên mã:

—Kwa mo na wehe? Na mãn katötök nà? Anê.

Nhũm më hkwyjaja më kãm:

—Nà na katötök kêt. Tirtüm kapêr o wryk xwÿnh mãn tanhmã kãm kapêr to. Anê.

³⁰ Hãmri nhũm Jejus më kãm:

—Nà Tirtüm tãm na inhmã kapêr. Nom pa ixte mar kaxyw inhmã kapêr kêt nê. Më kajaja më ate ixtã mar kaxyw na kÿx pê ã inhmã kapêr anê. Anê.

Hãmri nê më kãm:

³¹ —E hãmri. Kot paj tokyx më apiitã më ate amnhĩ tomnuj pãnhã amnhĩrer kaxyw tanhmã amnhĩ nhípêx to. Jao mãänên Satanasti pê hihtÿx xà ho ijapêx. ³² Koja më pĩ kahpa hã inhò pa kÿxpê ajêt. Tirtüm kot më awÿr inhmênh tã nhũm më ã inhípêx anê pa ty. Jakamã koja pika piitã hkôt më ohtô nê ixkôt amnhĩ xunhwÿ nê amnhĩ kaxyw inhmã hamaxpêr rãhã ho pa. Anê.

³³ Më ixte tanhmã htyk to hã harênh mar kaxyw nhũm pre ã më inhmã amnhĩ jarênh anê. ³⁴ Hãmri nhũm më kot më ixkuri mar o kuhê xwÿnhjaja tee ri kot htyk ã amnhĩ jarênhja ma nê kãm:

—Kwa më ixte amnhĩ wÿr kamã ijamak o ixpa xwÿnhja htír tùm nê pa ho pa xwÿnh na. Tirtüm kapêr ã kagà htùm kot ã harênh kot anhÿr tã ka ã ri më kot apír nhũm atyk ã amnhĩ jarênh anê. Ate Tirtüm kot më ixwÿr amênh xwÿnh ã amnhĩ jarênh tã ã ri atyk ã amnhĩ jarênh anê. Kwa xà apê më ixte amnhĩ wÿr kamã ijamak o ixpa xwÿnh kêt? Anê.

³⁵ Hãmri nhũm më kuma nê amnhĩ tã më kãm:

—Tÿ ixpê tãm kênã. Tã kot paj tokyx më are. Jakamã kêr ka më ixte arĩ më akamã ixpa ri ixkôt amnhĩ xunhwÿ nê amnhĩ kaxyw ixkôt ajamaxpêr o ri apa. Te ixpê kanê hpòk pyræk jakamã na pa hte më kãm Tirtüm kapêr o më ahkre o ri ixpa. Nom kot paj kritpêm më akôt ixpa ry hkêt nê. Jakamã kwa kêr ka më tokyx te më kot kanê hpòk nhĩrã kamã ri më pa xwÿnh kot amnhĩ nhípêx pyrã nê Tirtüm kôt amnhĩ nhípêx o ri apa. Kormã më akôt ixpa ri. Kot paj tokyx ma mõ nhũm te ra kamàt kô pyræk. Na hte kamàt kô kamã më pa xwÿnhjaja tee ri rít mex mã nom rít mex kêt nê. Nê mëmoj pumunh mex kêt nê. ³⁶ Jakamã kwa më tokyx

ixte arĩ më akamã ixpa ri amnhĩ kaxyw inhmã ajamaxpêr nê ixkôt amnhĩ xunhwÿ. Te ixpê kanê hpòk nhũm kamã më arít mex pyræk. Jao ixpyrà nê te më apê kanê hpòk nhĩrã mex pyræk o amnhĩ nhípêx. Nê ixpyrà nê tãm ri amnhĩ nhípêx o apa. Anê.

Nhũm pre ã më kãm kapêr anê hãmri pa më kệp ixkato nê ma nhãm mõ.

Më hkwyjaja kot Jejus kôt hamaxpêr kêt ã më harênh

³⁷ Na pre hte Jejus më noo mã më kot aa mëmoj pumunh kêt kwÿ ho anhÿr rax o pa. Tã nom nhũm më ohtô nê hã omu nê ãm hã omu nê kệp Tirtüm kot më pahwÿr mênh xwÿnh ã hkôt hamaxpêr kêt nê. ³⁸ Nom ra më hukamã Tirtüm nhÿ hã kapêr jarênh o pa xwÿnh pê finat Ijaisja më hkukamã ja hã më harê nê hã kagà. Nê hã kagàja o:

Pa Pahi Maati. Nà ra ixte më kãm ajarênh o ixpa ryy htã no nhũm më inhma nê ãm inhma.

Nê më kot axihtÿx o axihtÿx ã ajarênh mar tã no ãm ajarênh ma nê amnhĩ kaxyw akôt hamaxpêr kêt nê. Anê.

³⁹ Më kãm Tirtüm kapêr mar prãm kêt jakamã na prem mãänên Jejus kệp Tirtüm kot më pahwÿr mênh xwÿnh hkôt hamaxpêr kêt nê. Nhũm pre finat Ijaisja axte më hkukamã ja hã më harê nê më hã kagà. Nê hã kagà ho:

⁴⁰ Na pre Tirtümja tanhmã amnhĩ nê më hkrã hto nhũm më hkôt hamaxpêr kêt nê.

Ra më kot hihtÿx o hihtÿx ã omunh tã omu nê ãm omu.

Nê më kot kapêr mar tã amnhĩ tomnuj kaga hkêt nê.

Nê Tirtüm kot më nê më kot amnhĩ tomnuj o hapêx prãm xàj hkôt amnhĩ xunhwÿr kêt nê. Anê.

⁴¹ Kormã Jejus më hwÿr wryk kêt ri nhũm finat Ijaisja hpimtir kãm kot amnhĩ to rax kumrêx ã omu nê hkukamã ã harênh nê hã kagà anê.

⁴² Hãmri nhũm Ijaew krãhtüm kwÿjaja hkwyjê rom amnhĩ kaxyw Jejus kôt hamaxpêr nê hkôt amnhĩ xunhwÿ. Tã Parijew nhõ xwÿnhjaja kot ã më kot amnhĩ nhípêx anhÿr ã më harênh mar pymaj ja hã amnhĩ to amnhĩrít kêt nê. Më kot Tirtüm kapêr o më ahkre xà hã ixkreja nê më kator pymaj nhũm më kãm amnhĩ to amnhĩrít kêt nê. ⁴³ Na prem hamaxpêr o:

—Nà kot paj ja hã amnhĩ to amnhĩrít nhũm më amnhĩ nê ixtomnuj nê. Hãmri nê amnhĩ pyrã nê xypên mã inhmex ã ijarênh kêt nê.

Anhÿr o më umaj amnhĩ kukamã hamaxpêr o pa. Nom Tirtüm tãm kot amnhĩm më mex ã më harênhja nhũm më hkukamã hamaxpêr kêt nê.

Jejus kot Hipêêxà nhÿ hã kapêr ã harênh

⁴⁴ Nhũm Jejus axte më kãm kapêr nê kÿx pê kapêr nê më kãm:

—Nà koja mëhõ amnhĩ kaxyw ixkôt hamaxpêr hãmri nê ixkôt pix mã hamaxpêr kêt nê. Mãänên amnhĩ kaxyw kot më awÿr inhmênh xwÿnhja kôt hamaxpêr.

⁴⁵ Wa ixte amnhĩ nhípêxja te tipxi pyræk jakamã koja

mě tanhmã ixte amnhĩ nhĩpêx to hã ixpumu nê te kot Tirtũm kot amnhĩ nhĩpêx ã omunh pyrãk.

⁴⁶ —Nê te ixpê kanê hpôk nhũm inhĩrã kamã mẽ apa pyrãk kaxyw na pre Inhĩpêêxã mẽ awyr inhmẽ pa mẽ awyr wrý. Ixte kapêr o mẽ ajahkre ho ri mẽ akôt ixpa kaxyw. Jakamã koja mēhõ amnhĩ kaxyw ixkôt hamaxpêr nê ixkôt amnhĩ xãm hãmri nê te kanê hpôk nhĩrã kamã rĩt mex o pa pyrãk o amnhĩ nhĩpêx. Jao amnhĩ nhĩpêx nyw o amnhĩ nhĩpêx o pa. ⁴⁷ No mẽ kot ixkapêr mar nê ãm mar xwýnhjaja te mãänën Inhĩpêêxã kapêr mar nê ãm mar pyrãk. Mýrapê koja mẽ nhýrmã ma kuwy hwýr pa nê mẽ kot amnhĩ tomnuj mýrapê kamã pa ho pa. Tã no ã mẽ ate amnhĩ nhĩpêx anhýr o ri mẽ apa kaxyw na pa pre mẽ awyr ixwrýk kêt nê. Ixte mẽ ate amnhĩ tomnuj pãnhã amnhĩrer par kaxyw na pa pre mẽ awyr wrý.

⁴⁹ —Nê na pa hte amnhĩ krã hkôt tanhmã ri mẽ amã ixkapêr to ho ri ixpa hkêt nê. ãm kot mẽ awyr inhmēnh xwýnhja nhý hã na pa hte tanhmã mẽ amã ixkapêr to ho ri mẽ akôt ixpa. ⁵⁰ Tã mẽ kot Tirtũm kapêr mar nê amnhĩ kaxyw hkôt hamaxpêr xwýnhjaja koja mẽ nhýrmã wa ixri htĩr tũm nê mex nê pa ho pa. Jakamã na pa hte tanhmã kot inhmã karõ hto xà hkôt pix mã tanhmã mẽ amã ixkapêr to ho ri ixpa. Anê.

Jejus kot hkwyjê hpar kuhõnh ã harēnh

Rukre 22.24-27

13 Tã nhũm ra Pas ã mẽ ixkĩnhhta ahtêp. Pas ã na hte mẽ ixpê Ijaewjaja axpēn wýr akuprõ nê hã õwēhti hkra nyw pa nê ho anê nê hkur o ixkrĩ. Amnepēm Tirtũm kot pika pē Ejit rũm mẽ inhĩgêxjê kator kaxyw nhũm mẽ nojarêt nê ã hkwy hpar nê ho anhýr nê hkwy hkurta pyrãk. Na prem nojarêt nê mẽ hkra myt kot wa mẽ kēp htyk pumaj õwēhti hkra nyw kwý hpa nê ho anê nê ĩ hku. Jakamã nhũm arĩ mẽ ixpê mẽ hkanrēhã mẽ htãmnhwýjaja ã mẽ kot amnhĩ nhĩpêx anhýrja mã ijamaxpêr nê hã ixkĩnh kaxyw mẽ urãk nê hkwy hpa nê kuku. Jakamã nhũm ra Pas ahtêp nhũm Jejus amnhĩ kukamã tanhmã hamaxpêr to kurê kumrêx. Ra ma akupým Hipêêxã hwýr àpir xà hã arĩgro hwýr apkati grēre. Jakamã nhũm akupým nojarêt ã amnhĩ pumu nê kãm mẽ pahte hkôt amnhĩ xunhwýr xwýnhjê japê jakamã kãm mẽ pajapê rãhã mẽ panê htyk mã. ² Tã nhũm myt axà pa mẽ Pas ã ixàpkur o ixkrĩ. Nhũm Simãw Kariot kra Jut Kariotja mãänën mẽ ixkutã apkur o nhý. Kēp mẽ ixkwý htã nhũm pre Satansti tanhmã hkrã hto nhũm ra axtem nê kot mẽ kãm Jejus kurê xwýnhjê nhĩhkram haxàr kaxyw.

³ Tã pa mẽ kormã axpēn kutã ixàpkur kaxyw ixkrĩ hpa nhũm Jejus kãnhmã xa nê hinõkã kapa nê toajti py nê ho amnhĩ krax pre. Kot amnhĩ to rax ã amnhĩ pumunh tã ja hã amnhĩ to jarkrar pē tanhmã ri mẽ inhnõ mã amnhĩ nhĩpêx to ho pa hkêt. Kēp mẽ inhõ pahi htã te kēp mẽ inhmã àpēnh xwýnh pyrãk o amnhĩ nhĩpêx o pa. ⁵ Jakamã toajti py nê ho amnhĩ krax pre nê pasiiti hõ py nê kamã gô hkwy ru nê ho mẽ ixpar kuhõ nê toajti o mẽ ixpar grã ho mõ. ⁶ ã mẽ inhĩpêx anhýr o

mõ. Pê ra hpãnhã Simãw Pêtre hpar kuhõnh kaxyw nhũm tee ri amnhĩ tã omu nê kãm:

—Tk. Kwa apê inhmã axàpēnh xwýnh kêt kēnã kot ka kêt ri axtem nê ixpar kuhõ Pahihti. Apê mẽ inhõ Pahi kēnã kot ka kêt ã mẽ inhĩpêx anê. Anê.

⁷ Hãmri nhũm kãm:

—Kwa nà. Kormã ate ja hã amnhĩ tã ixpumunh mex kêt. Nom kot kaj nhýrmã aprĩ hã amnhĩ tã ixpumu. Anê.

⁸ Hãmri nhũm kãm:

—Nà nom kot kaj ãm ixpar kuhõnh kêt nê. Kwarĩ. Anê.

Hãmri nhũm Jejus kãm:

—Tõe. Kot paj apar kuhõnh kêt nê ka te apê ixkwý hkêt pyrãk. Anê.

⁹ Hãmri nhũm tee ri kuma nê kãm:

—Tõe mamrĩ ixpar kuhõ. Nom ixpar pix kuhõnh kêt nê. Mãänën inhĩhkra kuhõ nê ixkuk kuhõ. Inhmã ixte apyrãk prãm tỳx kumrêx kēnã. Anê.

¹⁰ Hãmri nhũm Jejus kãm:

—Nà amýkry hkôt mẽ wýr xwýnhjaja na htem mex nê axte wýr kêt rãhã hikwý. Na htem ãm amnhĩ par pix kuhõ nê hikwý. Ja pyrã nê Tirtũm kot mẽ anê mẽ ate amnhĩ tomnuj ho hapêx par xwýnhjaja te amýkry hwýr mẽ axwýr nê amex pyrãk. Ka mẽ te mẽ kot amnhĩ par pix kuhõnhhta pyrã nê axte tanhmã amnhĩ tomnuj to hãmri nê Tirtũm mã amnhĩ jarēnh kurê kumrêx kē anê amnhĩ katut kôt ate amnhĩ tomnujta mẽ nê ho hapêx. Na pre ra mẽ anê mẽ ate amnhĩ tomnuj o hapêx. No ãm mẽ apiitã hkêt. Ota arĩ mẽ anhõja pyxire nê arĩ amnhĩ tomnuj rãhã ri pa. Jakamã te wýr kêt nê arĩ grã htyk rax kãm ri pa pyrãk. Anê.

¹¹ Nhũm pre ã Jejus mẽ inhmã kapêr anê. Ra kot hprĩ hã mẽ kot kãm hkurê xwýnhjê mã õr mã xwýnhja pumunh jakamã te wýr kêt nê arĩ grã htyk rax kãm ri pa pyrãk ã ã harēnh anê.

¹² Tã mẽ ixpar kuhõnh pa nê akupým hinõkã py nê haxà nê nhý hãmri nê mẽ inhmã:

—E mẽmo kaxyw na pa we ã mẽ apar kuhõnh anê? Kot paj ixprĩ hã mẽ amã amnhĩ jarē ka mẽ inhma. ¹³ Na ka htem ixto “mẽ ijahkre xwýnh” nê ixto “pahihti” anhýr o ijarēnh o ri apa. ãm hãmri na ka htem ã axpēn mã ijarēnh anê. Ixpê mẽ ajahkre xwýnh nê mãänën ixpê mẽ anhõ pahihti htã inhmã mẽ ate tanhmã axpēn nhĩpêx to ho apa hprãm xà na pa ã mẽ apar kuhõnh anê. Tã kēp ka mẽ ixpyrà nê tanhmã axpēn to mex to ho ri apa. ¹⁵ Jao amnhĩ kuxwar axpēn to mex pē mẽmoj to axpēn kutã anojarêt rãhã ho ri apa. ¹⁶ Kwa mẽ ixkapêr ma nê kãm amnhĩ krãm haxàr tỳx rãhã ho ri apa. Mẽ ate amnhĩ to rax o ijakrenh kêt. Te ixpê mẽ anhõ patrãw nhũm mẽ ate inhmã tanhmã amnhĩ nhĩpêx to ho apa xwýnh pyrãk. Nê te ixte mẽmoj tã mẽ amã karõ nhũm mẽ ate inhmar nê inhmã tanhmã mẽmoj nhĩpêx to pyrãk. Tã te ixpê mẽ anhõ patrãw pyrãk tã pa ã mẽ apar kuhõnh anê. Ka mẽ amnhĩ tã ixpumu hãmri nê amnhĩ xwar tanhmã axpēn to ajuta hto ho ri apa. No ri axpēn pumu nê ajamaxpêr o: “Tk. Nà ixte amnhĩ to rax o hakrenh kēnã kot pa kêt ri tanhmã ho ajuta

hto. Kê tām mǎn pa ixto ajuta.” Anhÿr o ajamaxpêr o ri apa hkêt nê.

¹⁷ —E na pa ã mē amã ixujarēnh anê. Kot kaj mē inhma nê ixujarēnh kôt ã axpēn nhîpêx anhÿr o ri apa. Hã kot kaj mē akînh nê ri apa. Anê.

Jejus kot amnhî tã hã àmnēnh xwÿnh o amnhîrît ã harēnh

Matêwre 26.20-25; Makre 14.17-21; Rukre 22.21-23

¹⁸ Nhũm Jejus arî mē inhmã kapêr nê mē inhmã: —Kot kaj mē apiitã mē akînh nê apa hkêt nê. Ixte mē arēnh xwÿnhjaja mē apiitã mē apumunh mex. Jakamã na pa Tirtũm kot mē apiitã mē ate amnhî tomnuj o hapêx par kêt ã mē anhîõja jarê. Tirtũm kapêr ã kagã htũm kot harēnh kot:

Ixkutã apkur o ÿr xwÿnhjê hõ koja axtem nê mē kot kãm ixkurê xwÿnhjê nhîhkram ijaxã. Kêp ixkôt pa ho pa xwÿnh tã koja axtem nê ã inhîpêx anê.

Anhÿr o kot harēnh. Tã koja tokyx ã inhîpêx anê.

¹⁹ Nom kormã kot ã inhîpêx anhÿr kêt ri na pa hkukamã mē amã harê. Jakamã koja ã inhîpêx anê ka mē ja hã ixpumu nê ra ixte amnhî kukamã mē amã amnhî jarēnhhta mã ajamaxpêr nê ixpê Tirtũm rũm mē awÿr ixwrÿk xwÿnh kôt ajamaxpêr tÿx kurê kumrêx.

²⁰ —Kwa mē ixkapêr ma nê amnhî krã kamã kãm ajamaxpêr tÿx o ri apa. Koja mēhõ ixte mē hwÿr mē arēnh xwÿnhjê hã tanhmã mē ato mex to. Hãmri nê te pa kot tanhmã ixto mex to pyrãk. Nê koja mēhõ tanhmã pa ixto mex to nê mãânēn te kot mē awÿr inhmēnh xwÿnhhta tanhmã ho mex to pyrãk. Anê.

²¹ Nhũm pre ã Jejus mē inhmã kapêr anê. Hãmri nê tee ri amnhî kukamã hamaxpêr nê hkaprî nê mē inhmã:

—Hêxta waa nê. Nà kot kaj mē atõ mē kot kãm ixkurê xwÿnhjê nhîhkram ijaxã. Kwa mē amnhî krã kamã ixkapêrja mã ajamaxpêr tÿx nê. Anê.

²² Hãmri pa mē amnhî tã kuma nê tee ri axpēn pumunh o ixkrî. ²³ Ixpê Juāw na pa pre ixpê Jejus krãmnhwÿ mex ã ïhkõ hã ixàpkur o inhÿr ²⁴ nhũm Simãw Pêtreja ixpumu nê inhmã nomgõr nê kawax pê inhmã:

—Kwa mē pahtõ nhîxi hã hkukja nà? Anê.

²⁵ Hãmri pa kuma nê Jejus mã kãm:

—Kwa Pahihti. Mē ixtõ koja we ã anhîpêx anê? Anê.

²⁶ Hãmri nhũm mē inhmã:

—Nà kot paj pãwti hõ py nê guhkrax kãm ho mry kagõ nhek nê kot mē ïhkram ijaxãr mã xwÿnhhta mã kugõ ka mē hkôt omu. Anê.

Hãmri nê kupy nê ho mry kagõ nhek nê Simãw Kariot kra Jut Kariotja mã kugõ nhũm kupy. ²⁷ Pyrja kôt nhũm Satanasti tanhmã hkrã hto. Hãmri nhũm Jejus te kot kãm amnhî to nojarêr pyrãk o amnhî tã kãm kapêr nê kãm:

—E kwa tokyx nà. Anê.

²⁸ Hãmri nhũm kuma nê kato nê ma kamàt kô kamã htēm kurê kumrêx. Hãmri pa mē ixàpkur o ixkrî xwÿnhjaja Jejus kot ã kãm kapêr anhÿrja ã kuma nê tee ri hkukamã ijamaxpêr. Hãmri nê kot ma mē hkînh ã mēõ

hkwÿr japrôr kaxyw ma htēm ã hkamnhîx. Nhũm mē ixkwÿjaja axtem Jejus kot mē kêp amrakati xwÿnhjê mã mēmoj nhõr ã kãm karõ nhũm ma mē hwÿr htēm ã hkamnhîx. Kêp mē inhmã mē ixkàxpore jamãr o pa xwÿnh jakamã pa mē ã ixtÿx mēmoj tã hkamnhîx anê.

Jejus akupÿm nojarêr nê mē kãm mēmoj tã karõ hã harēnh

Matêwre 22.39-40; mãânēn Wam Juāw 3.11-24

³¹ Hãmri nhũm Jejus mē inhmã:

—Nà kot kaj mē tokyx mēmoj pumu nê Tirtũm mã mex o mex ã harê nê ijaxwÿja inhmã inhmex o inhmex ã ijarê. Kot kaj mē tokyx mēmojta pumu kãm ga.

³³ —Te mē apê ixkra pyrãk tã kot paj arî ri mē akôt ixpa grire hãmri nê ma akupÿm api. Kot kaj mē tee ri jar ijapêr o ri apa nom nhÿri ixpumunh kêt nê. Nê kormã tokyx ma ixkôt apa hkêt nê.

³⁴ —E kot paj axte mē amã mēmoj tã karõ. Kormã ixte mē amã ja hã karõ hkêt. Kêr ka mē amã axpēn kînh o ri apa. Te pa inhmã mē ajapê pyrãk o axpēn nhîpêx rãhã ho ri apa. ³⁵ Kot kaj mē ã amnhî nhîpêx anê nhũm mē akwÿjaja ja hã mē apumu nê mē apê ixkwÿ hã mē apumunh kurê kumrêx. Anê.

Simãw Pêtre kot Jejus ã amnhî to hêx kukamã harēnh

Matêwre 26.31-35; Makre 14.27-31; Rukre 22.31-34

³⁶ Nhũm Jejus ã kot mē ixrer nê ma nhÿhÿm mõr ã amnhî jarēnh anê hãmri nhũm Simãw Pêtre tee ri kot amnhî jarēnh ma nê kãm:

—Kwa Pahihti. Nhÿhÿm kot kaj kêt mõ pa mē akôt ixpa hkêt nê? Anê.

Hãmri nhũm kãm:

—Nà ma inhmõr xàta wÿr kot kaj mē kormã ma ixkôt apa hkêt nê. Nom kot kaj mē nhÿrmã ma ixkôt apa. Anê.

³⁷ Hãmri nhũm Simãw Pêtre kãm:

—Kwa mo kot pa mē omu nê tokyx ma akôt inhmarr kêt nê? Inhmã akôt ixyk puma hkêt kênã. Kwãr mē mãmrî atã ixpî. Inhmã ajapê htÿx kumrêx kênã. Anê.

³⁸ Hãmri nhũm Jejus kãm:

—Xà ãm hãmri na ka ã inhmã amnhî jarēnh anê Simãw Pêtre? Xà amã ixkôt atyk puma hkêt? Kwa o ko-ra. Koja apkati hkôt krãhyre hkàr kêt ri ka ra mē umaj ate ixkôt apa hkêt ã amnhî tã axàprãr o axkrunêpxi kãm ga. Kwa amnhî krã kamã ixkapêrja mã ajamaxpêr tÿx nê. Anê.

Jejus kot Tirtũm nhõ krî jarēnh

Eprêw 11.16

14 Nhũm Jejus arî mē inhmã kapêr nê mē inhmã: —Kwa ã ixte mē amã amnhî jarēnh anhÿrja ma nê tee ri amnhî kukamã ajamaxpêr nê akaprî hkêt nê. Arî amnhî kaxyw Tirtũm mē wa inhmã ajamaxpêr tÿx rãhã ho ri apa. ² Inhîpêxã nhõ krî kamã ixkre xohtõd. ãm hãmri na pa ã mē amã harēnh anê. Tã kot paj ma akupÿm hwÿr api nê mē akutêp mã amã mē anhõrkwÿ ho mex. ³ Hãmri nê ho mex pa nê rî man akupÿn mē awÿr wrÿ. Hãmri nê ma akupÿm amnhî kôt mē ato

ixàpir pa ka mẽ Tirtũm mẽ wa ixkõt apa rãhã apa ho apa. Jakamã kwa mẽ ri akapri mẽ apa hkêt mẽ. Anẽ.

Jejus te kęp Tirtũm wỳr pry pyræk

Epes 2.18

⁴—Nẽ ma nhỹhỹm inhmõr xàta ra mẽ ate harẽnh mar mex. Nẽ hwỳr pryja mããnẽn mẽ ate harẽnh mar mex. Anẽ.

⁵Hãmri nhũm Tomas tee ri kuma mẽ kãm:

—Kwa mẽ ixte nhỹhỹm amõr xàta pumunhre hã kot pa kêt mẽ hwỳr pryja pumu. Anẽ.

⁶Hãmri nhũm kãm:

—Kwa paa. Te xipê Inhĩpêêxà hwỳr pry pyræk. Na htem amnhĩ kaxyw inhmã hamaxpêr mẽ ixkõt amnhĩ xunhwỳ hãmri mẽ nhỹrmã ixkukwak ri pix mã ma Inhĩpêêxà mẽ wa inhõ krĩ hwỳr api. Ixkukwak ri pix mã na htem hprĩ hã Tirtũm kapêr ma. Nẽ ixkukwak ri pix mã na htem wa ixri htĩr tũm mẽ pa ho pa. ⁷Kot kaj mẽ aprĩ hã ixpumu mẽ mããnẽn te aprĩ hã Inhĩpêêxà pumunh pyræk. Tã ra mẽ ate tanhmã ixte amnhĩ nhĩpêx to hã ixpumunh mex jakamã mããnẽn te ra mẽ ate Inhĩpêêxà kot amnhĩ nhĩpêx ã omunh mex pyræk. Anẽ.

Jejus mẽ Tirtũm wa kot amnhĩ nhĩpêx tipxi hã wa harẽnh

Juāw 1.1, 10.30; Piriapos 2.6; Korosẽ 2.9

⁸Nhũm Jejus ã mẽ inhmã kapêr anẽ nhũm Firipti kuma mẽ kãm:

—Kwa nom mẽ inhmã inhno ho Anhĩpêêxà pumunh prãm. Kot pa mẽ omu mẽ ixkĩnh tỳx kumrêx. Anẽ.

⁹Hãmri nhũm Jejus kãm:

—Kwa na pa pre ra mẽ akõt ri ixpa ryy mẽ. Ka mẽ aprĩ hã ixpumunh mex mẽ. Kêt ra mẽ kot ixpumunh mex xwỳnhjaja te mẽ kot mããnẽn Inhĩpêêxàja no ho omunh mex pyræk. ¹⁰Wa ixte amnhĩ nhĩpêxja ãm tipxi. Xà ate kormã amnhĩ krã hi mã ixkapêr jaxàr tỳx kêt? Inhĩpêêxà mẽ wa ixte amnhĩ nhĩpêxja ãm tipxi. Nẽ kot axpẽn pyræk. Jakamã na pa hte amnhĩ krã hkõt ri tanhmã amnhĩ nhĩpêx to ho ri ixpa hkêt mẽ. ãm Inhĩpêêxà nhỹ hã na pa hte ri tanhmã mẽ amã ixkapêr to ho ri ixpa. Nẽ hihtỳx xà ho tanhmã amnhĩ nhĩpêx to ho ri ixpa. Ka mẽ ja hã ixpumu mẽ te ano ho Inhĩpêêxà pumunh pyræk. ¹¹Kwa mẽ ixkapêr ma mẽ hkõt ajamaxpêr tỳx mẽ. Inhĩpêêxà mẽ wa ixte amnhĩ nhĩpêxja ãm tipxi. Nẽ kot axpẽn pyræk. Rỳ ka mẽ tee ri ja kukamã ajamaxpêr japêr hãmri mẽ ixte aa mẽ ate mẽmoj pumunh kêt kwỳ ho anhyr ã mãn ixpumu mẽ ja hã wa ixte amnhĩ nhĩpêx tipxi kõt ajamaxpêr.

¹²—Kwa mẽ ixkapêr ma mẽ amnhĩ krã kamã amnhĩ krãm haxàr tỳx mẽ. Mẽ ate amnhĩ kaxyw ixkõt ajamaxpêr xwỳnhjaja kot kaj mẽ ixte tanhmã amnhĩ nhĩpêx to ho ixpa hã ixpumu mẽ ixkõt ã amnhĩ nhĩpêx anhyr o ri apa. Kot paj akupỹm Inhĩpêêxà hwỳr api mẽ kuri ixpa ho ixpa. Ka mẽ ixwakre kamã ixihitỳx xà ho tanhmã mẽ akwỳjẽ mã amnhĩ nhĩpêx to ho ri apa.

¹³—Nẽ kot kaj mẽ apê ixkwỳ hã tanhmã mẽmoj tã ixwỳr to pa mẽ ama mẽ mẽ amã tanhmã mẽmoj nhĩpêx

to. Mẽ kot omunh mẽ Inhĩpêêxà mex o mex ã omunh kurê kumrêx kaxyw. ¹⁴Nà kot kaj mẽ apê ixkwỳ hã mẽmoj tã ixwỳ pa mẽ ama mẽ mẽ amã tanhmã mẽmoj to. Anẽ.

Jejus kot mẽ pahwỳr Tirtũm mẽ wa Karõ rẽnh ã kot amnhĩ jarẽnh

Juāw 7.37-39, 16.7-17; Atre 2.1-4; mããnẽn Rõmãn 5.5; Wam Korĩt 12.7-11; Epes 3.16; Wam Juāw 2.27

¹⁵Nhũm Jejus arĩ mẽ inhmã kapêr mẽ mẽ inhmã:

—Nà kot kaj mẽ amã ixkĩnh hã kot kaj mẽ ixkapêr kõt pix mã ri amnhĩ nhĩpêx rãhã ho ri apa.

¹⁶—Kot paj akupỹm kaxkwa hwỳr api hãmri mẽ mẽ ato Inhĩpêêxà wỳ nhũm inhma mẽ mẽ awỳr kot mẽ ato ajuta xwỳnh maatita rẽ nhũm man mẽ awỳr wrỳ mẽ mẽ akaxwỳnh mã agjê. Hãmri mẽ mẽ akõt tanhmã mẽ ato ajuta hto ho pa rãhã ho pa. ¹⁷Wa Ixkarõ koja mẽ awỳr kurê nhũm mẽ amã agjê. Hãmri mẽ hprĩ hã mẽ amã Tirtũm kapêr o amnhĩrit o mẽ akõt pa ka mẽ aprĩ hã mar mex mẽ. No mẽ kęp Tirtũm kra hkêt xwỳnhjaja koja hprĩ hã wa Ixkarõ jarẽnh mar kêt mẽ. Mẽ kot wa ixkõt amnhĩ xunhwỳr kêt jakamã koja mẽ hkarõ mã gjêx kêt mẽ. ãm mẽ ate ixkõt amnhĩ nhĩpêx o apa xwỳnhjê pix wỳr koja wrỳ mẽ mẽ awỳr agjê mẽ mẽ akamã pa ho pa.

¹⁸—Nẽ ixte mẽ arer mẽ ma inhmõr mã tã kot kaj mẽ te mẽ hã awrãre pyrã mẽ ahte atỳx ri apa pyræk kêt mẽ. Kot paj te pa akupỹn mẽ awỳr ixwỳrk pyrã mẽ mẽ awỳr wa Ixkarõ rẽ nhũm mẽ akãm agjê mẽ mẽ akamã pa ho pa.

¹⁹—Nẽ koja tokyx mẽ kot amnhĩ kaxyw Tirtũm mã hamaxpêr kêt xwỳnhjaja axte ixpumunh kêt mẽ. No mẽ papajaja kot puj mẽ tokyx axte nhỹri axpẽn pumu.

—Nẽ kot paj akupỹm ixtĩr hãmri mẽ ixtĩr tũm mẽ ixpa ho ixpa ka mẽ ixkukwak ri ajaxwỳja nhỹrmã Tirtũm mẽ wa ixri atĩr tũm mẽ apa ho apa.

²⁰—Tã koja wa Ixkarõ mẽ awỳr wrỳ mẽ mẽ akarõ mã agjê ka mẽ aprĩ hã Tirtũm mẽ wa ixte amnhĩ nhĩpêx ã wa ixpumunh mex kurê kumrêx. Te wa ixte amnhĩ nhĩpêx tipxi pyræk o ka mẽ hã wa ixpumu. Nẽ mããnẽn mẽ papajaja te ra mẽ pahitpxi mẽ ri mẽ papa pyræk ka mẽ hã amnhĩ pumunh mex kurê kumrêx.

²¹—Nẽ mẽ kãm ixkĩnh xwỳnhjaja na htem ixkapêr ma mẽ hkõt amnhĩ nhĩpêx o pa. Jakamã nhũm Tirtũm ixtã mẽ omu mẽ kãm mẽ hapê htỳx mẽ. Pa mããnẽn amnhĩ tã mẽ omu mẽ inhmã mẽ hapê htỳx mẽ. Jakamã kot paj mẽ kãm amnhĩ to amnhĩrit nhũm te mẽ kot no ho ixpumunh pyræk. Anẽ.

Nhũm pre ã Jejus hkõt mẽ ixpa ho mẽ ixpa xwỳnhjê mã amnhĩ jarẽnh anẽ. ²²Hãmri nhũm Jutre hõja. Jut Kariot kêt axtem Jutre hõja Jejus axte kot mẽ inhmã pix mã kot amnhĩ to amnhĩrit ã harẽnhja ma mẽ kãm:

—Kwa aprĩ hã mẽ inhmã mẽmoj jarẽ mẽ ijahkre xwỳnh. Mon ka mẽ kęp akwỳ hkêt xwỳnhjê mã axte amnhĩ to amnhĩrit kêt ã amnhĩ jarẽ? Nẽ ãm mẽ papxipix mã amnhĩ to amnhĩrit ã amnhĩ jarẽ? Anẽ.

²³Hãmri nhũm kãm:

—Nà mẽ amã ixkĩnh xwýnhjaja na ka htem ixkapër ma nẽ hkõt amnhĩ nhĩpêx. Nhũm Inhĩpêêxà ja hã mẽ apumu nẽ ixtã kãm mẽ ajapê htỳx nẽ. Hãmri pa wa mẽ akõt ixpa ho ixpa. Jao mẽ amã amnhĩ to amnhĩrit mex o ixpa. ²⁴ Na pa hte amnhĩ krã hkõt ri mẽ kãm ixkapër o ixpa hkêt nẽ. ãm Inhĩpêêxà nhỹ hã na pa hte mẽ kãm ixkapër o ri ixpa. Kot mẽ awýr inhmẽnh xwýnhhta nhỹ hã. Tã nhũm mẽ kãm inhmar prãm kêt jakamã na pa hte wa mẽ kãm mẽ apyrà nẽ amnhĩ to amnhĩrit o ixpa hkêt nẽ.

²⁵ —E na pa kormã ixte mẽ akõt ri ixpa ri ã mẽ amã amnhĩ jarẽnh anẽ. ²⁶ Tã koja Inhĩpêêxà ixpãnhã mẽ awýr wa Ixkarõ rẽ. Ixte hã mẽ amã ixàhwýr xà hkõt. Hãmri nhũm man mẽ awýr wrý nẽ mẽ akaxwýnh mã agjê nẽ mẽ akõt ri tanhmã mẽ ato ajuta hto ho pa. Nẽ ra ixte ã mẽ amã ixkapër anhýrja koja hprĩ hã mẽ amã ho amnhĩrit mex nẽ. Ka mẽ amnhĩ krã kamã kãm ajamaxpër nẽ hã ano htỳx nẽ ho apa. Anẽ.

Jejus kệp mẽ pajamakêtkati nhõr xwýnh

Rõmãn 5.1; Karatas 5.22; Piriopos 4.7; Korosẽ 3.15

²⁷ Nhũm Jejus arĩ mẽ inhmã kapër nẽ mẽ inhmã:

—Nẽ mẽ kệp ixkwý hkêt xwýnhjaja na htem tee ri amnhĩ kukamã hamaxpër o ri pa. Jao hkaprĩ nẽ pa. No pa na pa hte mẽ kurom ijamakêtkati nẽ ixkĩnh nẽ ri ixpa ho ixpa. Tã kot paj tanhmã mẽ ato ka mẽ ixpyrà nẽ ajamakêtkati nẽ axãmnhix akĩnh nẽ ri apa. Jakamã kwa mẽ ixte amnhĩ jarẽnh ma nẽ tee ri amnhĩ kukamã ajamaxpër o amã ma ho ri apa hkêt nẽ.

²⁸ —Na pa pre ra mẽ amã ma ixàpir nẽ nhỹrmã man akupým mẽ awýr ixwryk ã mẽ amã amnhĩ jarẽ. Tã na pa ra ma akupým Inhĩpêêxà hwýr ixàpir mã. Kot amnhĩ to rax o kot ijakrenh. Kot paj akupým hwýr api nẽ kuri inhmex nẽ ixpa ho ixpa. Tã ka mẽ amã ixkĩnh hã kot kaj mẽ ma akupým hwýr ixàpir ã ijarẽnh ma nẽ inhỹ hã akĩnh nẽ.

²⁹ —Kormã ma akupým ixàpir kêt ri na pa ã mẽ amã amnhĩ kukamã amnhĩ jarẽnh anẽ. Kêr pa mẽmo arĩgro hã ma akupým api ka mẽ ja hã ixpumu nẽ ajamaxpër o: “Nà ãm hãmri na pre mẽ inhmã amnhĩ kukamã akupým Hipêêxà hwýr àpir ã amnhĩ jarẽ.” Anhýr o ajamaxpër. Jao ixkõt ajamaxpër tỳx rãhã ho ri apa.

³⁰ —Kot paj tokyx axte tanhmã mẽ amã ixkapër to hkêt nẽ. Mẽ kệp ixkwý hkêt xwýnhjê nhõ pahihiti Satanastija na ra kot tanhmã ixto kaxyw. Nom koja tee ri tanhmã kãm ixto hprãm kapry. Kurom ixihitỳx o ixihitỳx o ixte hakrenh par jakamã koja tanhmã ixto hkêt nẽ.

³¹ Kwãr kãm tanhmã ixto hprãm xà hkõt tanhmã ixto pa omu. Inhmã Inhĩpêêxà hkõt ixte amnhĩ nhĩpêx prãm jakamã kot paj jahti mã arĩ xa nhũm te tanhmã kot ixto pyrãk o inhĩpêx nom tanhmã ixto hkêt nẽ. Mẽ ate inhmã Inhĩpêêxà japê htỳx ã ixpumunh kaxyw kot paj ã mẽ anoo mã amnhĩ nhĩpêx anẽ. Nẽ mẽ ate ixte kãm tanhmã amnhĩ nhĩpêx to ho ri ixpa rãhã mẽ kot ixpĩr ã ixpumunh kaxyw. E hãmri. Ma pu mẽ mẽ nẽ amnhĩ to Tirtũm wý. Anẽ.

Nhũm pre ã Jejus hkõt mẽ ixpa ho mẽ ixpa xwýnhjê mã kapër anẽ. Pa mẽ kuma nẽ kãnhmã ixkuhẽ nẽ inhnojarêt nhũm axte mẽ inhmã awjarẽ.

Jejus te kệp mẽmo krõ pyrãk

Karatas 2.20; Wam Juãw 2.28

15 Nhũm Jejus arĩ mẽ inhmã kapër nẽ mẽ inhmã: —Nà te ixpê mẽmo pĩ pẽ “uwa” anhýr xwýnhhta kahkõ maati pyrãk. Nẽ Inhĩpêêxàja te kot uwa hkre nẽ hamãr o pa xwýnhhta pyrãk. ² Nẽ mẽ kot ixkõt amnhĩ xunhwýr xwýnhjaja te mẽ kot uwa kahkõ rũm krõ pyrãk. Na hte mẽ hkwyjaja htỳx ri kệp ixkwý hã amnhĩ jarẽnh ã amnhĩ to hẽx. Jao te kot krõja rã htã ô hkêt pyrãk. Koja rã htã ô hkêt nẽ nhũm kot hamãr xwýnhja tee ri omu nẽ kahkõ nẽ krãhta nẽ kumẽ. No koja ô mex nẽ nhũm omu nẽ hkĩnh nẽ. Hãmri nẽ rã nẽ ô rax kaxyw tanhmã ho mex to. Tã na hte Tirtũm uwa krõ jamãr xwýnhhta pyrã nẽ ã mẽ ate ixkõt amnhĩ xunhwýr xwýnhjê nhĩpêx anẽ. ³ No mẽ kajaja na ka prem mẽ kot ixkwý hã amnhĩ to hẽx xwýnhjê rom ixkapër mar tỳx nẽ. Nẽ amnhĩ kaxyw inhmã ajamaxpër nẽ ixkõt amnhĩ nhĩpêx mex o apa. Jao te mẽ ate krõ rã nẽ ô rũnh pyrãk o amnhĩ nhĩpêx.

⁴ —Na hte krõja amnhĩ krã hkõt ô hkêt nẽ. ãm kahkõ pix kukwak ri na hte rã nẽ ô. Ja pyrã nẽ kot kaj mẽ ixkukwak ri pix mã inhmã hprãm xà hkõt ri tanhmã amnhĩ nhĩpêx to ho apa. Jakamã kwa kêr ka mẽ ixkapër pix mãn mar o apa pa mẽ akõt ixpa ho ixpa. ⁵ Te ixpê kahkõ nhũm te mẽ apê krõ pyrãk jakamã kot kaj mẽ inhmã hprãm xà hkõt tanhmã amnhĩ nhĩpêx to ho ri apa nẽ te krõ rã nẽ ô rũnh pyrãk o amnhĩ nhĩpêx. No kot kaj mẽ amnhĩ krã hkõt ri amnhĩ nhĩpêx o ri apa nẽ te krõ grã nẽ ô hkêt pyrãk o amnhĩ nhĩpêx.

⁶ Na hte uwa krõ nhõ dõnja nhỹri hã krõ grã pumu hãmri nẽ kahkõ nẽ hakã nẽ ma o mra nẽ mẽ kuwy kamã kurẽ nẽ ho hxêt pa. Ja pyrã nẽ mẽ kot htỳx ri ixkõt amnhĩ xunhwýr ã amnhĩ jarẽnh xwýnhjaja koja mẽ nhỹrmã amnhĩ xà htỳx kamã hamak rãhã ho pa.

⁷ —Tã no mẽ kajaja. Kêr ka mẽ ixkapër kõt pix mã amnhĩ nhĩpêx rãhã ho ri apa. Te mẽ pahitpixi nẽ ri papa pyrãk o amnhĩ nhĩpêx. Hãmri nẽ mãmirĩ amã hprãm xà hkõt mẽmoj tã Tirtũm wý nhũm ama nẽ amã mẽmoj tã ate hwýr xàta kõt kugõ. ⁸ Kot kaj mẽ Inhĩpêêxà mẽ wa ixkapër kõt amnhĩ nhĩpêx o ri apa nhũm mẽ piitã ja hã mẽ apumu nẽ hamaxpër o: “Hẽxta waa nẽ. Jajaja na htem Tirtũm kot amnhĩ nhĩpêx o amnhĩ nhĩpêx o pa. Mãn Tirtũmja mex o mex.” Anhýr o hamaxpër.

⁹ —Nẽ na pa hte Inhĩpêêxà kãm ijapê pyrãk o inhmã mẽ ajapê nẽ. Tã kêr ka mẽ amarĩ inhmã mẽ ajapê hã ri ixkõt amnhĩ nhĩpêx mex o apa. ¹⁰ Na pa hte ãm Inhĩpêêxà kapër kõt pix mã ri amnhĩ nhĩpêx o ri ixpa. Jakamã na pa hte kãm ijapê hã ixkĩnh nẽ ri ixpa. Tã kêr ka mẽ ixpyrà nẽ ixkapër kõt pix mã tanhmã amnhĩ nhĩpêx to ho ri apa. Nẽ ixpyrà nẽ inhmã mẽ ajapê hã amnhĩ pumu nẽ akĩnh nẽ ri apa.

¹¹ —E na pa ã mẽ amã ixkapër anẽ. Mẽ ate inhmar nẽ ixpyrà nẽ axãmnhix ajamakêtkati nẽ akĩnh nẽ ri apa

kaxyw. Tā kêr ka mē ã amnhĩ nhĩpêx anē nē te pa ixte ã amnhĩ nhĩpêx anhÿr pyrāk. Anē.

Jejus kot mē pamã axpên kĩnh tÿx ã mē pamã karō

¹² Nhũm Jejus arĩ mē inhmã kapêr nē mē inhmã:

—E kêr ka mē te inhmã mē ajapê pyrāk o mē amã axpên japê ho mē amã axpên kĩnh o ri apa. Jao axpên to mex o ri axpên kôt apa. ¹³ Koja mēhō kãm hkràmnhwÿ japê htÿx nē nhũm ra mēhō mēmo mÿrapê kot kêp hpĩr mã nhũm tee ri hã omu nē nē kãm amnhĩ mē nhũm kupĩ. Hãmri nhũm mē ja hã omu nē kãm hkràmnhwÿ japê htÿx ã nē htyk ã axpên mã harē.

¹⁴ —E kot paj axte mē apê inhmã mē axapênh xwÿnh ã mē ajarênh kêt nē. Na hte mē ò patrāwaja hprĩ hã kãm mē apênh xwÿnhjê mã amnhĩ jarênh kêt nē. Na htem ãm mē apênh pix ã mē kurē. Nom mē kajaja mē ate ixkapêr mar nē hkôt pix mã amnhĩ nhĩpêx jakamã kot paj hpãnhã mē apê ixkràmnhwÿ hã mē ajarē. Na htem axpên to hkràmnhwÿ nē ma nhÿhÿm pa kaxyw nē tanhmã amnhĩ kukamã hkràmnhwÿ mã amnhĩ jarênh to. Tã mē apê ixkràmnhwÿ jakamã na pa hte ã amnhĩ kukamã mē amã amnhĩ jarênh anē. Nom ja pix jarênh kêt nē. Na pa hte mãänñen Inhĩpêxã xô ri mē amã mēmoj piitã ho amnhĩrit o mē akôt ixpa.

¹⁶ —Nē mē kajaja na ka prem ixpê mē akràmnhwÿ kaxyw ixãm kêt nē. Pa na pa pre amnhĩ kaxyw inhmã mē aprãm. Ixkapêr kôt pix mã ri mē ate tanhmã amnhĩ nhĩpêx to ho apa kaxyw. Te uwa krô ô rÿnh nē aa grã hkêeta pyrāk. Jakamã kot kaj mē mēmoj tã Inhĩpêxã wÿ nhũm mē ama nē mē ate mēmoj tã hwÿr xà hkôt amã kugō.

¹⁷ —E. Kwa kêr ka mē amã axpên kĩnh nē tanhmã axpên to ajuta hto ho axpên mã mēmoj kutã anojarêt pix o mãn kêt ri apa. Nà ja na kêt inhmã hprãm. Anē.

Mē kot Jejus kwÿjê kamã gryk xwÿnhjê jarênh

Matêwre 10.22; mãänñen Juāw 7.7, 17.14; Wam Juāw 3.13

¹⁸ —Nē koja ixkwÿ hkêt xwÿnhjaja kãm mē aprãm nõkati. Tã kêr ka mē amnhĩ tã mē omu nē tee ri amnhĩ kukamã ajamaxpêr kêt nē. Ixkumrêx na prem kãm ixprãm nõkati. Tã koja mē mã ixtã mē ato anē nē kãm mē aprãm kêt nē. ¹⁹ Mē apê mē hkwy ronhÿx mē amnhĩ tã mē apumu nē kãm mē ajapê nē. Nom apê mē hkwy hkêt. Ra ixte amnhĩ kaxyw mē arênh jakamã na htem tee ixtã mē apumu nē kãm mē akĩnh kêt o kãm mē akurê nē. ²⁰ Koja mē ixtã hpijaàm kêt nē nē mãänñen mē atã hpijaàm kêt nē. Nē mē anhĩpêx o te mē kot pa ixpê mē anhō patrāw nhĩpêx pyrāk. Ka mē ixpyrà nē amnhĩ xà htÿx kãm ajamak o ri apa. Na pa pre ra mē amã ja jarē. Nom koja mē akwÿjaja jajê rom te ra mē kot ixkapêr mar nē hkôt amnhĩ nhĩpêxã pyrà nē mãänñen mē akapêr ma nē hkôt amnhĩ nhĩpêx o pa. Kwa kêr ka mē ixkapêrja mã mãn ajamaxpêr tÿx rãhã ho ri apa.

²¹ —Koja mē ixtã tanhmã mē anhĩpêx to. Mē kot Tirtũm kapêr kôt amnhĩ nhĩpêx kêt jakamã koja mē ã ixtã mē anhĩpêx anē. Tirtũm kot mē awÿr inhmēnh kôt hamaxpêr kêt nē ã mē anhĩpêx anē. ²² Ixwÿrk nē mē

kãm Tirtũm kapêr jarênh o ri ixpa htã nhũm mē inhma nē ãm inhma nē ixkôt amnhĩ nhĩpêx kêt nē. Jakamã koja mē kot amnhĩ tomnuj xwÿnh ã amnhĩ to hpimxur kêt nē.

²³ —Nē koja mēhō kêp ixprãm nõkati nē mãänñen te kêp Inhĩpêxã prãm nõkati pyrāk. ²⁴ Na pa pre mē piitã mē hkôt aa mē kot mēmoj pumunh kêt kwÿ ho anhÿr o ri mē hkôt ixpa nhũm mē hã ixpumu. ãm papxipix na pa pre ã amnhĩ nhĩpêx anhÿr o ri mē hkôt ixpa nhũm mē hã ixpumu. Kêp ãm mē kot ja hã ixpumunh kêt ronhÿx prem axpên mã ijarênh o: “Tk. Mē pahte mēhōja nhÿhÿnh mē pahwÿr hpôx ã omunhre hã kot puj kêt mē ri hã pahpijaàm o ri papa.” Anhÿr o nhÿx prem axpên mã ijarē. Tã ra mē kot ja hã ixpumunh mex tã axtem nē Inhĩpêxã mē wa mē kãm wa ixkurê nē. Jao mē kot amnhĩ tomnuj xwÿnh ã amnhĩ to hpimxur kêt nē. ²⁵ No Tirtũm kapêr ã kagã htũm kot mē hkukamã mē harênh nē mē hã kagã nē kot mē hã kagã kot:

Mēmo tanhmã kute mÿrapê na htem kãm ixkurê? Nà ãm amarĩ na htem kãm ixkurê ho pa. Anē. Tã ã ixtã kagã kot anhÿr xà hkôt na htem ã kãm ixkurê anē. Jakamã koja mē mãänñen ixtã kãm mē akurê nē. Nom kêr ka mē arĩ mē kãm ixkapêr jarênh o ri mē hkôt apa nē tee ri amnhĩ kukamã ajamaxpêr kêt nē.

²⁶ —Nē tokyx ma akupÿm Inhĩpêxã hwÿr ixãpir mã tã kot paj hwÿr pōj nē aa mē ato ijamakêtkati hkêt nē. Kot paj amnhĩ pãnhã mē awÿr wa Ixkarō rē. Mē kot kãm: “Mē kutã nojarêt xwÿnh maati” anhÿr xwÿnhnta kot paj mē awÿr kurē nhũm ixpãnhã mē awÿr wrÿ nē mē amã agjê nē hprĩ hã mē amã Tirtũm mē wa ixto amnhĩrit o ri mē akôt pa. ²⁷ Kot kaj mē ama hãmri nē ma mē piitã mē hkôt ri mē kãm ixkapêr jarênh o ri apa. Na pa pre ra mē kãm Tirtũm kapêr jarênh rÿy ho mē hkôt ri ixpa ka mē ixkôt ri inhmar o apa ry nē. Jakamã kêr ka mē ixwakre kamã arĩ mē kãm ixkapêr jarênh o ri mē hkôt ri apa. Anē.

16 Nhũm Jejus arĩ mē inhmã kapêr nē mē inhmã:

—Nē mē kot nhÿrmã ixtã tanhmã mē anhĩpêx to nhũm mē ate tee ri amnhĩ kukamã ajamaxpêr nē mē umaj ixkaga pymaj na pa hte ã mē amã ixprĩ hã mēmoj jarênh ry anē. ² Kot kaj mē kãm ixkapêr jarênh o ri apa nhũm mē hkwyjaja tee ri mē ama nhũm ja mē kêp omnuj nē. Nhũm mē Tirtũm kapêr o mē ahkre xà hã ixkreja rÿm amnhĩ nē mē ajano nē mē akwÿjê hpar o pa. Hãmri nē hamaxpêr o: “E pu mē axte mē hkwyjê pynê nē mē kupa. Tirtũm kãm ja mex kênã.” Anhÿr o htÿx hamaxpêr o pa. ³ Mē kot hprĩ hã Inhĩpêxã mē wa ixkapêr mar mex kêt nē ã htÿx wa inhmã ja mex ã wa ijarênh anē. ⁴ Nom mē ate ixkôt amnhĩ xunhwÿrta krax kãm na pa pre ã mē amã mē harênh anhÿr kêt nē. Arĩ mē akôt ixpa kênã. Kot ka mē ixkôt apa rãhã amã mē uma hkêt nē. Tã pa ra akupÿm inhnojarêt nē ã mē amã mē harênh anē. Jakamã koja mē nhÿrmã ã mē anhĩpêx anē ka mē amnhĩ tã mē omu nē ra ixte mē akukamã ã mē harênh anhÿrja mã ajamaxpêr kurê kumrêx nē tee ri amnhĩ kukamã ajamaxpêr kêt nē. E kwa ixkapêrja mã mãn mē amnhĩ krã him haxàr tÿx nē ri hã apa. Anē.

Jejus mě Tirtūm wa hkarō jarēnh

⁵ Nhūm Jejus arī mě inhmā kapēr ně mě inhmā:

—E na pa ra kot mě awyr inhmēnh xwýnhhta wýr ra akupým inhnojarēt ka mě ixte amnhī jarēnh ā inhma ně akapří ně. Ně tee ri amnhī kukamā ajamxpēr tā mě atō aprí hā ma inhmōr xà ā ixkukjēr kêt ně. Ry inhmā: “Kwa mo kaxyw kot kaj kêt mě ixre ně ma akupým mō? Xà we ja amā mex?” Anhýr o mě atō ixkukjēr kêt ně. ⁷ Kêt ma akupým ixàpirja mě amā mex kumrēx. Kop ām akupým ixàpir kêt ronhýx mě amā měmoj kutā nojarēt xwýnhhta ixpānhā mě awyr wrýk kêt ně. Tā kot paj ma akupým api ně amnhī pānhā mě awyr kurē. Jakamā kwa mě ja ma ně tām ajamxpēr o ri apa. ⁸ Koja ixpānhā mě awyr wrý hāmri ně mě kēp ixkwý hkêt xwýnhjē mā měmoj to axkrunēpxi ně ho amnhīrīt. Koja mě kām mě kot tanhmā amnhī tomnuj to xà ho amnhīrīt. Ně määnēn mě kām tanhmā mě kot amnhī to mex to xà ho amnhīrīt. Ně määnēn Tirtūm kot nhýrmā mě kot amnhī tomnuj mýrapē tanhmā mě homnuj to xàta nhūm määnēn mě kām ho amnhīrīt. Koja mě kām ja piitā ho amnhīrīt.

⁹ —Jakamā koja mě ja kukamā tanhmā hamaxpēr to ně hamaxpēr o: “Kwa kot paj xep amnhī tomnuj kaga ně amnhī kaxyw Tirtūm Kra Jejus mā ijamxpēr ně hkôt amnhī xām kêt nhūm Tirtūm nhýrmā ixte amnhī tomnuj mýrapē tanhmā ixto. ¹⁰ Nà kot paj hkôt amnhī xām hāmri ně ra urak ně Tirtūm kapēr kôt tām ri amnhī nhípēx o ixpa. Na pre Jejus tām ri amnhī nhípēx o pa nhūm Tirtūm amnhī wýr ho api pa mě axte jar nhýri omunh kêt ně. ¹¹ Na xep Tirtūm nhýrmā kot ma kuwy hwýr mě kēp Jejus kwý hkêt xwýnhjē nhō pahi maatija mēnh ā ra amnhī kukamā hā amnhī jarē. Jakamā kwa arī ixpē hwý jakamā kot paj tokyx Jejus kôt amnhī xām kêt nhūm hkôt kuwy hwýr inhmē.” Anhýr o hamaxpēr. Koja ā wa Ixkarōja mě kēp ixkwý hkêt xwýnhjē mā měmoj to amnhīrīt mex anē.

¹² —Ně na pa kormā mě amā měmoj piitā ho amnhīrīt kêt ně. Kormā mě ate aprí hā měmoj pumunh ně mar mā tām kêt. ¹³ Tā koja ixpānhā wa Ixkarō mě awyr wrý ně mě akarō mā agjē hāmri ně hprí hā mě amā Tirtūm kot amnhī nhípēx o amnhīrīt o mě akôt pa ho pa. Nom koja amnhī krā hkôt tanhmā mě amā ho amnhīrīt to hkêt ně. Koja ām Tirtūm pix xō ri mě amā ho amnhīrīt o mě akôt pa. Jao hprí hā mě amā ixkôt mě ate amnhī nhípēx nyw o mě amā amnhīrīt o mě akôt pa. Ā koja hprí hā ra ixte mě amā ixujarēnh xà hkôt axte mě amā měmoj to amnhīrīt mex o pa anē.

¹⁴ —Ně koja hprí hā mě amā pa ixto amnhīrīt o pa. Jao mě amā inhmex o inhmex ā ixto amnhīrīt o mě akôt pa. ¹⁵ Inhípēxà mě wa ixkapērja ām htipxi. Tā koja wa Ixkarō ixkapēr xō ri ā mě amā měmoj to amnhīrīt anē. Jao ra wa ijamē wa ixkapēr o amnhīrīt mex o pa. Koja ā wa mě apē ixkwý hā mě ato mex o pa anē. Anē.

Mě kot akupým Jejus tír ā omunh ā mě harēnh

¹⁶ Nhūm Jejus arī mě inhmā kapēr ně mě inhmā:

—Ně kot paj tokyx mě ano pé akunok ka mě axte amnhī kaēx ā ixpumunh kêt ně. Nom kwa kēr ka mě tee ri ixkapērja kukamā ajamxpēr kêt ně. Kot paj ixtā apkati grēre ka mě axte ixpumu. Anē.

¹⁷ Nhūm pre ā Jejus hkôt mě ixpa ho mě ixpa xwýnhjē mā kapēr anē. Pa mě tee ri ā kapēr anhýr ā kuma ně xpēn mā:

—Kwa mo na ri ā amnhī jarēnh anē? Ně tokyx mě pano pé pikunor tā hā apkati grēre nhūm axte mě pahte omunh ā amnhī jarē ně akupým Hipēxà hwýr āpir ā amnhī jarē. Pēr kapērja ām ri katii. Anē.

¹⁹ Nhūm amnhī tā mě inhma ně mě inhmā:

—Kwa xà na ka mě kormā aprí hā ixkapēr ā inhmar kêt ně? ²⁰ Kot paj ty nhūm mě kēp ixkwý hkêt xwýnhja-ja ijarēnh ma ně hkính ně. No mě kajaja kot kaj mě akapří ně amýr o apa. Ně gaa ně akupým akính ně. Kwa mě ixkapērja ma ně kām ajamxpēr týx o apa.

²¹ Te mě ate mě hpijagri xwýnh kot amnhī nhípēx pyrāk. Na htem ōhy xà ně gaa ně ra ōhy xà htýx ně. Ně hkính kêt ně tee ri amnhī nhípēx o hikwý. Tā gaa ně hpijagri nhūm hkrare kato nhūm omu ně akupým hkính ně axte ōhy xà htýx mā hamaxpēr kêt ně. ²² Tā ā mě ate amnhī nhípēx anhýr kaxyw. Kot kaj mě akính kêt ně ri apa. Tā kot paj akupým tokyx ixtír ně axte mě awyr ixkato ka mě ixpumu ně akính ně. Hāmri ně akính rāhā ri apa ho apa. Nhūm mēhō mě apumu ně tee ri tanhmā mě akính ně mě ato kaprý ka mě arī akính rāhā ri apa ho apa.

²³ —Ně ixte akupým kaxkwa hwýr ixàpir ně amnhī pānhā mě awyr wa Ixkarō rēnh nhūm mě awyr wrýk ně hprí hā mě amā měmoj piitā ho amnhīrīt jakamā kot kaj mě axte amā měmoj tā ixkukjēr prām kêt ně. Anē.

Jejus kwýjaja kot àmnhix měmoj tā Tirtūm wýr

Matěwre 18.19-20; Juāw 14.13-14

Nhūm Jejus arī mě inhmā kapēr ně mě inhmā:

—E kwa mě ā ixkapēr anhýrja ma ně amnhī krā kamā kām ajamxpēr týx ně ho apa. Kot kaj mě apē ixkwý hā měmoj tā Inhípēxà wý nhūm mě ama ně mě ate hā axàhwýr xà hkôt mě amā měmoj tanhmā ho rý mě amā měmoj gō. ²⁴ Na ka mě kormā apē ixkwý hā měmoj tā axàhwýr kêt ně. Tā kēr ka mě amā měmoj tā hwýr prām ně māmri měmoj tā hwýr o apa. Kē mě ama hāmri ně tanhmā mě amā měmoj nhípēx to ka mě amnhī tā omu ně akính ně.

²⁵ —Ně na pa pre mě amā měmoj jarēnh kaxyw ně měmoj tā haxwý ně mě amā ixujarēnh rax ně. Nom kot paj axte ā mě amā ri ixujarēnh anhýr kêt ně. Kot paj tā ixprí hā mě amā tanhmā Inhípēxà jarēnh to ka mě aprí hā mar mex kurē kumrēx. ²⁶ Hāmri ně mě kamjaja mě apē ixkwý hā tanhmā amnhī to hwýr to ho apa. Jakamā mo kaxyw kot pa kêt axte tanhmā mě ato hwýr to? Kot kaj mě kamjaja amnhī to hwýr jakamā arī ixte mě ato hwýr kaxyw ixto presija hkêt ně.

²⁷ —Na ka mě ra amā ijapē ně. Ně ixte Inhípēxà rŭm mě awyr ixwrýk ā ixpumu. Jakamā nhūm Inhípēxàja ixtā määnēn kām mě ajapē ně. Tā kot kaj mě kamjaja

mëmoj tâ amnhî to hwÿr o apa nhÿm më ama në kãm më ajapê htÿx kãm më amã mëmoj gô.

²⁸ —Na pa pre Inhîpêêxà rÿm amnê më awÿr wrÿ. Hãmri në kãm hprãm xà hkôt tanhmã amnhî nhîpêx to hpar o mō në ra akupÿm hwÿr inhnojarê t kaxyw. Anê.

Nhÿm pre ã Jejus më inhmã amnhî jarênh anê. ²⁹ Pa më tâ ixprî hã mar mex në. Hãmri në kãm:

—Tÿ. Nà na pa më tâ ixprî hã ate amnhî jarênh ma. Ka amnhî tâ haxwÿr në axujarênh kêt jakamã pa më tâ ixprî hã amar mex në. ³⁰ Pêr ãm ate mëmoj piitã omunh par xwÿnh na ka. Jakamã ate më ijamaxpêr piitã hkôt aprî hã më ixpumunh par kumrêx kênã kot ka tanhmã më ijamaxpêr to hã më ixkukja. ãm hãmri na ka Tirtÿm rÿm awrÿk ã amnhî jarê. Anê.

³¹ Hãmri nhÿm më inhma në më inhmã:

—Xà ãm hãmri na ka më ixkôt ajamaxpêr tÿx në?

³² Kwa më o kora. Kot kaj më tokyx më umaj ixre në anhrã në ma ahpÿnhã më anhō krî hwÿr mra. Më kot ixkôt tanhmã më anhîmex to pymaj kot kaj më ã amnhî nhîpêx anê kãm ga. Kot paj ahte më kãm ixãm pyrãk o amnhî nhîpêx nom ahte ixãm kêt në. Inhîpêêxà aa kot ixrere hã.

³³ —E ixkukwak ri më ajamakêtkati në axãmnhîx më apa kaxyw na pa ã më amã ixkapêr anê. Nom më kêp ixkwÿ hkêt xwÿnhjaja koja nhÿrmã ixtã më atomnuj tÿx o pa. Tã kêr ka më amã më uma në tee ri amnhî kukamã ajamaxpêr o ri apa hkêt në. Nhÿrmã ixte mëmoj punuj piitã ho ijapêx par ã arîgrota ã kot paj më atã më ho ijapêx par kumrêx. Anê.

Jejus kot amnhî to Tirtÿm wÿr ã harênh

Rômãn 8.34; Eprêw 7.25

17 Tã nhÿm Jejus më inhmã kapêr pa në hpãnhã kaxkwa hwÿr rît në Tirtÿm mã amnhî jarê në kãm:

“Pa Papaj. E na pa ra amã hprãm xà hkôt tanhmã amã amnhî nhîpêx to hpar o mō në akupÿm awÿr inhnojarê t kaxyw. Jakamã kot kaj ixpê Akra hã ma akupÿm amnhî wÿr ixto api. Më kot ja hã ixpumunh në amã amex o amex ã ajarênh o pa kaxyw. ² Na ra pyka piitã hkôt ri më pa xwÿnh kwÿjaja amnhî kaxyw ixkôt hamaxpêr në ixkôt amnhî xunhwÿ nom ka na ka pre inhmã më agô. Ixte më htîr tÿm në më pa mã xwÿnh ã më harênh kaxyw. Jakamã koja më nhÿrmã ixkukwak ri pakuri htîr tÿm në pa ho pa.

³ Na më ra ixkapêr mar mex në. Nê ixpê Jejus Kris pê ate më hwÿr inhmênh xwÿnhja kôt hamaxpêr mex në. Nê apê Tirtÿm ã ãm apyxi mex ã mããnen akôt hamaxpêr mex në. Nê amex o amex ã akôt hamaxpêr në kãm akînh në. Jakamã koja më nhÿrmã pakuri htîr tÿm në pa ho pa. Nà koja më anê.

⁴ Amnepêm amnê pyka ja hwÿr inhnojarê t nhÿm ate tanhmã ixte amnhî nhîpêx to hã inhmã karôta na pa ra hatur xãm mênh kaxyw. Na pa xatã më kãm akapêr jarênh o ri më hkôt ixpa. Jao ra më kãm apê Pahi Maati hã apixi mex ã ajarê në amex o amex në axãhpumunh o axãhpumunh ã më kãm ajarênh o ri ixpa. ⁵ Jakamã e Papaj. Kêr ka tokyx ixpê

akra hã ma akupÿm amnhî wÿr ixto api. Pa akupÿm awÿr pōj në te amnepêm akuri ixpaja pyrã në axte akuri ixpa ho ixpa.” Anê.

Jejus kot hkwyjê ho Tirtÿm wÿr ã harênh

Nhÿm Jejus arî Tirtÿm mã kapêr në kãm:

⁶ “E Papaj. Nà ra ate pyka hkôt inhmã më ôr xwÿnhjaja na pa ra më kãm akapêr jarênh rÿy ho ri më hkôt ixpa nhÿm më akapêr kôt pix mã amnhî nhîpêx o pa. ⁷ Tã ixte anhy hã tanhmã amnhî nhîpêx to ho ri ixpaja ra më kot ja hã ixpumunh mex. ⁸ Na pa pre hte axô ri më ahkre ho ri ixpa nhÿm më amnhî kaxyw ixkôt hamaxpêr mex në. Nê ate më hwÿr inhmênh nhÿm më hwÿr ixwÿrkja ã më kot ixpumunh mex.

⁹ Tã ot pa më ho awÿr o xa. Nom na pa më kêp ixkwÿ hkêt xwÿnhjê ho awÿr kêt në. ãm ate inhmã më ôr xwÿnhjê pix o na pa awÿ. Më kêp akra jakamã mããnen më kêp ixkraa. Jakamã na htem pamã pamex o pamex ã pajarênh o ri pa.

¹¹ Axihtÿx o axihtÿx jakamã na ka pre amnhî xwar inhmã axihtÿx xà hkwy gô pa te ixte axihtÿx pyrãk. Tã na pa ra akupÿm awÿr inhnojarê t kaxyw. Kot paj jar pyka hkôt ri ixpa ry hkêt në. Nom ixkwÿjaja koja më arî kamã pa jakamã kwa Papaj. Kêr ka inhmã më omunh mex në kê më inhÿ hã tãm ri amnhî nhîpêx o pa. Nê pahpyrà në te ixkre tipxi kamã më htixi në më pa pyrãk o axpên kôt pa.

¹² Kormã më kamã ixpata ã ate inhmã axihtÿx xà hkwy nhôrta o pa më htãnopxar mex o ri më hkôt ixpa. Jakamã nhÿm më ri ixkôt amnhî nhîpêx o pa. ãm Jut Kariot pix koja më hkînhã tanhmã amnhî tomnuj to në hapêx. No ãm ra akapêr ã kagã kot hkukamã ã kot amnhî nhîpêx anhyr ã harênh xaja kôt koja ã amnhî nhîpêx anê në hapêx.

¹³ Tã na pa ra akupÿm awÿr inhnojarê t kaxyw jakamã na pa ixte tokyx më rer mã xwÿnhjê ho awÿr o xa. Kormã më hkôt ri ixpa ri. Më kot inhmar në ixpyrà në hkînh në hamakêtkati në ri pa kaxyw. ¹⁴ Na pa pre ra më kãm akapêr jarênh ry në nhÿm më ixpyrà në akôt pix mã amnhî nhîpêx o ri pa. Jakamã nhÿm hte më kêp ixkwÿ hkêt xwÿnhjaja tee ri ja hã më omu në axtem në kãm më hkurê në. Nom më kêp më hkwy hkêt jakamã na htem ã më kamã gryk anê.

¹⁵ Tã na pa ã më ho awÿr anhyr o xa. Nom më kot amnhî tomnuj xwÿnhjê hkà ã më pa kaxyw na pa më ho awÿr kêt në. Koja më arî më hkôt ri pa. Nom më urãk në amnhî tomnuj o pa pumaj na pa ã më ho awÿr anê. ¹⁶ Më kêp më hkwy hkêt. Axtem më kot amnhî nhîpêx. Te më kot më pahte amnhî nhîpêx pyrãk jakamã kê më amarî më hkôt pa htã më kot amnhî nhîpêx kôt amnhî nhîpêx o pa hkêt në. ãm pahkôt pix mã amnhî nhîpêx o pa. ¹⁷ Akapêr pix na mex o mex jakamã koja më hkôt amnhî nhîpêx o pa në gaa në te pahte amnhî nhîpêx pyrãk o amnhî nhîpêx.

¹⁸ Na ka pre amnê më hwÿr inhmê pa pre ixte më kãm akapêr jarênh o ri ixpa kaxyw më hwÿr wrÿ. Nê amnhî pyrà nê më kot akapêr jarênh o më hkôt pa kaxyw pa më kurê nê ma më hwÿr më kurê.

¹⁹ Inhmã më hapê jakamã kot paj amnhî grôn timer kôt nhãm më kot axpên mã ri inhgrôn timer o pa xwÿnhjê mã amnhî gô. Amã hprãm xà hkôt. Ixkwÿjaja kot ja hã ixpumunh nê ixpyrà nê amã hprãm xà hkôt pix mã tanhmã amnhî nhîpêx to ho pa kaxyw." Anê.

Jejus kot hkrajê piitã ho Tirtÿm wÿr

²⁰ Nhÿm Jejus arí Tirtÿm mã amnhî jarê nê kãm:

"Tã na pa ã jajê ho awÿr anê Papaj. Nom ixkôt më pa ho më pa xwÿnhjê pix o na pa awÿr kêt nê. Mããnhên më ô ri nhÿrmã më kot ixkôt amnhî xunhwÿr mã xwÿnhjaja na pa më ho ixpimràã tã më ho awÿ. ²¹ Kê më pahpyrà nê te hamaxpêr tipxi pyrà nê ri axpên to pa. Nê pahte amnhî nhîpêx kôt pix mã amnhî nhîpêx o pa. Koja më ã amnhî nhîpêx anhÿr o pa nhÿm më kêp pahkwÿ hkêt xwÿnhjaja pahtã më omu nê ate më hwÿr inhmênh ã apumunh kurê kumrêx.

²² Nê koja më ixkukwak ri panhÿ hã te pahpyrà nê hamaxpêr tipxi nê ri pa pyrãk o amnhî nhîpêx o pa.

²³ Na pa htem te ixkre tipxi kamã më ixtipxi pyrãk o axpên nhîpêx o ri ixpa. Te pahte axpên nhîpêxã pyrãk. Tã koja më ixwakre kamã ã axpên nhîpêx anhÿr o pa nhÿm më kêp pahkwÿ hkêt xwÿnhjaja ja hã më omu nê hamaxpêr o: 'Nà pêr ãm hãmri na pre Tirtÿm tãm më pahwÿr Jejus më. Kãm hapê htÿx tã më pahwÿr kumê nhÿm wrÿ nê amnhî xwar kãm hk-wÿjê japê nê.' Anhÿr o koja axpên mã pajarênh o pa.

²⁴ Amnepêm amrakati ri pa pre amã ijapê hã ri ixpa. Tã ot pa jajê ho awÿ. Ka na ka pre inhmã më agô. Tã ma awÿr inhmôr mã xàta wÿr na pa inhmã më àpir prãm nê. Koja më nhÿrmã ma pahwÿr api pu më pahpiitã pahpimràãtã pamã axpên japê hã ri papa ho papa.

²⁵ E Papaj. Amex o amex tã më kêp ixkwÿ hkêt xwÿnhjaja na kormã ate më hwÿr inhmênh xwÿnh ã ixkôt hamaxpêr kêt nê. Nom më kot ixkôt amnhî xunhwÿr xwÿnhjaja na më kurom ja hã ixkôt hamaxpêr mex nê.

²⁶ Na pa ra ixprî hã më kãm akapêr o amnhîrit o ri ixpa. Tã kot paj axte më kãm akapêr kwÿ jarê. Amã ijapêta pyrà nê më kãm axpên kînh ã axpên to pa kaxyw na pa më kãm hã karô. Kot paj inhî hã më hkôt ixpa hkêt tã koja Pahkarôja më hwÿr wrÿ nê më hkarô mã agjê nê te pa më hkôt ixpa pyrãk o më hipêx. Ja na pa inhmã hprãm. Tã koja anê. Jakamã na pa ã më ho awÿr anê. Tã ãm ja pix Papaj." Anê. Nhÿm pre ã Jejus ô Papaj mã më inhnoo mã amnhî jarênh anê pa më ixpiitã hã kuma.

Mê kot Jejus pynênh ã më harênh

Matêwre 26.47-56; Makre 14.43-50; Rukre 22.47-53

18 Tã nhÿm Jejus më ixto Hipêêxã hwÿr pa. Hãmri nê ixkreja rÿm ma tã nê Jerujarê rÿm kato nê

ma gô pê Kirô hwÿr tã pa më hkôt ixpa ho ixpa xwÿnhjaja ma hkôt mra. Nê gô hã rê nê hikjê hã më kot mëmo pî hkô hkre xwÿnhjaja wÿr mra nê parpê ixkrî hpa.

² Na pre hte Jejus xatã hwÿr amnhî kôt më ixto pa ho kuhê. Jakamã nhÿm Jut Kariot kot më kãm ôr mã xwÿnhjaja ra kot hwÿr më ixpa ho ixkuhê xàta pumunh mex. ³ Jakamã pa më hwÿr pôj nê ixkrî hpa nhÿm më më ixwÿr mra. Jut Kariot më pôristijaja. Rôm nhô xwÿnhjê nhô pôristijê më patre nhô pôristijaja nhÿm më më ixwÿr Jut Kariot kôt mra. Ijaew nhô pahjê nhÿ hã më ixwÿr mra. Piitã wapohti jamÿ nê pô hpôk nê kanê jamÿ nê më ixwÿr hpôk o kato. ⁴ Hãmri nhÿm Jejus amnhî wÿr më omu nê kãnhmã xa nê ma më kutã tã. Jut Kariot kot më kãm ôr kaxyw nhÿm amnhî tã omunh mex jakamã amnhî wÿr më omu nê ma më kutã tã. Hãmri nê më hkaxpa nê më omunh o xa nhÿm Jut Kariot më kuri xa nhÿm Jejus më omu nê më kãm:

—Pa. Mëmoj japêr na ka më pô hpôk o ri apa? Anê. Hãmri nhÿm më kãm:

—Nà Jejus pê Najare nhô xwÿnhjaja japêr o na pa më ri ixpa. Anê.

Hãmri nhÿm më kãm:

—Tÿ ot pa xa. Pa na ixpê Jejus. Anê.

⁶ Hãmri nhÿm më kuma nê tee ri axpên pumu nê umaj katê ho axkamê nê kuhê. Nom katê ho pikamênh o ra rôrôk pa nê hikwÿ. ⁷ Hãmri nê kãnhmã kuhê hpa nhÿm Jejus axte më kãm:

—Kwa më inhmã amnhî jarê. Mêhô japêr o na ka më apa? Anê.

Hãmri nhÿm më kãm:

—Jejus pê Najare nhô xwÿnhjaja japêr o na më ri ixpa kênã. Anê.

⁸ Hãmri nhÿm më kãm:

—Kwa ra ixte më amã amnhî jarênh kênã. Paa. Ijapêr o na ka më ri apa. Jakamã kwa kêr ka më ixkôt ri më pa xwÿnhjaja tanhmã më ho hkêt nê. Kê më mãmri anhrã nê ma mra.

⁹ Anhÿr o më inhnê më kãm kapêr. Na pre ra ham Hipêêxã mã më ixtã kãm amnhî jarê nê kãm:

—Kormã më kamã ixpa ri ate inhmã ixihtÿx xà nhôrta o na pa më htãnopxar mex o ri më hkôt ixpa.

Anhÿr o më ixtã kãm amnhî jarênh jakamã nhÿm ã më inhnê më kot unênh mã xwÿnhjê mã kapêr anê.

Simãw Pêtre kot mêhô pê hamak krãhyr ã harênh

Matêwre 26.51-54; Makre 14.47; Rukre 22.49-51

¹⁰ Hãmri nhÿm Simãw Pêtre tee ri Jejus ã më omu hãmri nê ô wapo kapa nê jam ho apê nê ho hamak nhîkjê krãhta. Mawti jamak krãhta. Mawtija mëô patre mã apênh xwÿnhjê hã na pre nhÿm Simãw Pêtre hamak krãhta. ¹¹ Hãmri nhÿm Jejus ja hã omu nê nê kãm kapêr nê kãm:

—Tk. Kwa nà amarî xa nê akupÿm awapota hkãm haxã. Ixte më anê amnhî xà htÿx kamã ijamak kaxyw na pa pre Inhîpêêxã rÿm amnê më awÿr pika hwÿr wrÿ. Kêt inhmã kãm hprãm xà hkôt pix mã na inhmã tanhmã amnhî nhîpêx to ho ixpa hprãm. Jakamã kwãr

mě māmřĩ tanhmã kãm ixto hprãm xà hkõt māmřĩ tanhmã ixto. Aně.

Mě kot Anas wýr Jejus o htěm ã mě harěnh

Matěwre 26.57-58; Makre 14.53-54; Rukre 22.54

¹² Tã nhũm pōristi mě mě hkrãhtũm nẽ měõ patre nhõ pōristijaja Jejus pyně nẽ hpa hpre hpa ¹³ nẽ ma Anas wýr o tẽ. Anasja Kajpas piinhõ na pre. Nhũm Kajpas kormã amgràja ã Anas pyrã nẽ kęp měõ patre maati. ¹⁴ Jakamã na pre ra Ijaew nhõ pahijẽ mã Jejus jarěnh o:

—Nà kot puj mě Jejus pĩr tokyx aně. Kê tapxipix ty pu mě arĩ mýrpê pahpiitã pajamakêtkati nẽ ri papa. Aně.

Jakamã nhũm mě Jejus pyně nẽ kormã ma patre maati hwýr o tẽ.

Simãw Pêtre kot Jejus kõt pa hkõt ã kot amnhĩ jarěnh

Matěwre 26.69-75; Makre 14.66-72; Rukre 22.54-62

¹⁵ Hãmri pa ixpê Juãw mě ixkrãmnhwý Simãw Pêtre mě pa wa ma mě hkõt wa tẽ. Nhũm mě ra mě inhõ patre maati nhõrkwý hwýr Jejus o axà. Nhũm patre maati kot ixpumunh jakamã nhũm kãm àpěnh xwýnhja ixpumu nẽ inhmã aně pa mě hkõt axà. ¹⁶ Nom nhũm Simãw Pêtre arĩ kapõt ã hakwa krem xa. Hãmri pa omu nẽ akupým hwýr tẽ nẽ mēhõ niti kot hakwa kre jamãr o ãm xwýnhja mã aně nhũm kãm kahê xà mě nhũm mě ixkõt axà. ¹⁷ Hãmri nhũm nita hprĩ hã omu nẽ kãm:

—Xêê. Pěr apê mě kot uněnh nẽ o mōr mũj kõt ri mě pa xwýnhjê hõ na ka mē? Aně.

Hãmri nhũm kuma nẽ kãm:

—Tk. Nà ixte mēhõ myti ata pumunhre hã. Aně.

¹⁸ Hãmri nhũm ra kõt ã kamãt nẽ ra kryy nẽ nhũm mě àpěnh xwýnh kwý mě měõ patre nhõ pōristi hkwyjaja amnhĩm kuto nẽ hã ànhunh o kuhê. Nhũm Simãw Pêtre mě omu nẽ mě hwýr tẽ nẽ mē ĩhkõ hã ànhunh o xa.

Patre maati kot Jejus kujêr ã harěnh

Matěwre 26.59-66; Makre 14.55-64; Rukre 22.66-71

¹⁹ Rôm nhũm Anasja hêx rom tanhmã Jejus kujêr to nẽ kãm:

—E kwa inhmã amnhĩ jarě. Tanhmã na ka hte we akõt mě pa ho mě pa xwýnhjê jahkre hto ho apa wehe? Aně.

²⁰ Hãmri nhũm amnhĩ tã kãm:

—Nà na pa hte mě piitã mě noo mã ri mě kãm ixkapěr o ixpa. Tĩrtũm kapěr o mě ahkre xà hã ixkre kamã nẽ Tĩrtũm mã amnhĩ jarěnh xà hã ixkre kamã pa hte mě piitã mě noo mã ri mě kãm tanhmã ixkapěr to ho ri ixpa. Na pa hte nhýri ixpimxur pẽ ri mě kãm tanhmã ixkapěr to ho ri ixpa hkõt nẽ. ²¹ Tã ka ixtã mě kot inhmar o kuhê xwýnhjaja tanhmã ixtã mě hkukjêr to hkõt nẽ. ãm papxipix ri ixkukja. Kwa ixtã mě hkukja kê mě kot tanhmã ixkapěr mar to xà hkõt tanhmã amã ijarěnh to nã? Aně.

²² Hãmri nhũm patre nhõ pōristi hõja kuma nẽ hwýr tẽ nẽ kãm:

—Tk. Kwa na htem ã patre maati mã kapěr anhýr kêt nẽ. Na htem hã hpijaãm o kãm kapěr. Tã na ka axtem nẽ ri ã kãm akapěr aně. Aně.

Hãmri nẽ hinep hkura.

²³ Hãmri nhũm Jejus amnhĩ tã omu nẽ kãm:

—Kwa kot pa tanhmã mě amã amnhĩ to ixêx to ka mě hã inhma nẽ rĩ kormã tanhmã axpěn mã ixto akapěr to rý hã ixtak. Nom ãm hãmri ixte mě amã amnhĩ jarěnh tã ka axtem nẽ ri inhĩnep ixtak. Aně.

²⁴ Hãmri nhũm Anas tanhmã mar to hpa hãmri nẽ umre Kajpas wýr kumě. Na pre Kajpasja kormã hitom kãm ri tanhmã amnhĩ nhĩpêx to ho nhý nhũm Anas mě kãm aně nhũm mě kuma nẽ hwýr Jejus o tẽ nẽ ho axà. Arĩ hpa hpre rãhã hwýr o tẽ nẽ ho axà nhũm xa nẽ kãm amnhĩ jarě.

Simãw Pêtre kot axte Jejus kõt pa hkõt ã amnhĩ tã aprãr ã harěnh

Matěwre 26.71-75; Makre 14.69-72; Rukre 22.58-62

²⁵ Nhũm Simãw Pêtre arĩ mě ĩhkõ hã ànhunh o xa nhũm mēhõja kãm kapěr nẽ kãm:

—Kwa pěr apê Jejus kõt ri mě pa xwýnhjê hõ na ka. Aně.

Hãmri nhũm kuma nẽ kãm:

—Tk. Koký ixte mēhõ něj pumunhre hã. Aně.

²⁶ Hãmri nhũm hpãnhã měõ patre maati mã àpěnh xwýnhja mããnen omu. Simãw Pêtre kot kęp hamak krãhyr xwýnhhta kwý na pre. Jakamã nhũm hprĩ hã omunh mex kurê kumrêx nẽ kãm:

—Kwa nã ka na ka mũtar pĩ hkõta kamã mě ĩhkõ hã xa pa apumu. Aně.

²⁷ Hãmri nhũm tee ri kuma nẽ axte mě kãm amnhĩ tã aprãr kãm hihtýx nẽ. Jao ra mě kãm amnhĩ tã aprãr o axkruněpxija mě nhũm krãhyre hkãr kurê kumrêx. Ra Jejus kot hkukamã harěnh xà hkõt kęp hkwyjêr ã amnhĩ tã aprãr o axkruněpxi.

Jejus kot Pirat mã amnhĩ jarěnh

Matěwre 27.1-2, 27.11-31; Makre 15.1-20; Rukre 23.1-5, 23.13-25

²⁸ Hãmri nhũm mě ixpê Ijaew hkrãhtũmjaja ra Kajpas rũm Jejus o kato nẽ ma Pirat wýr o tẽ. Piratja na pre te Rõmjê nhõ pahi pẽ Sesti mã mě ixpê Ijaew jamãr o pa nhũm mě ma hwýr o tẽ. Nhũm ra myt kator grire nhũm mě hwýr o tẽ nẽ õrkwý kapem o xa. Pirat kęp Ijaew kêt jakamã nhũm mě õrkwý hwýr gjêx kêt nẽ kapõt ã kuhê. Na hte Ijaew kormã Pas ã hkĩnh hãmri nẽ nhãm mě kęp Ijaew kêt xwýnhjê nhõrkwý hwýr gjêx kêt nẽ. Koja mě hwýr agjê nẽ amnhĩ tomnu nẽ Pas ã apkur kêt nẽ. Jakamã nhũm mě Pirat wýr Jejus o tẽ no ãm hwýr o àr kêt nẽ. ãm ixkre kapem o xa. ²⁹ Hãmri nhũm Pirat mě hwýr kato nẽ omu nẽ hã mě hkukja nẽ mě kãm:

—Kwa tanhmã na we amnhĩ tomnuj to ka mě ixwýr o tẽ? Aně.

³⁰ Hãmri nhũm mě kãm:

—Nà kot amnhĩ tomnuj o pa xwýnh kênã. Jakamã na pa mě awýr o tẽ. Ate tanhmã kot amnhĩ tomnuj to hã harěnh mar nẽ mýrapê tanhmã ho kaxyw. Aně.

³¹ HãMRI nhũM mẽ kuma nẽ mẽ kãm:

—Tk. Kwa mẽ kamjaja ma amnhĩ kôt o tẽ nẽ amnhĩ krã hkôt tanhmã ho. Mẽ ate tanhmã kot amnhĩ nhĩpêx to hã omunh xà hkôt. Anẽ.

HãMRI nhũM mẽ tee ri kuma nẽ mẽ kãm:

—Kwa amnepêm mẽ ixpê Ijaewjaja na pa pre htem kên o mẽ kot amnhĩ tomnuj xwýnhjê tak o mẽ kupa. Tã na ra Rôm nhõ pahihtija mẽ pamjaja mẽ ixte mẽ hpar nẽ mẽ ixkurê. Tapxipix kãm mẽ hpar ã àmnênh prãm. Jakamã kot kaj ý hã mẽ inhmã tanhmã hã axàmnênh to kê mẽ kupĩ. Ra ja kaxyw mẽ kot mẽ ixkaxyw axãm kênã. Anẽ.

³² Rôm nhõ xwýnhjaja na htem mẽ kot amnhĩ tomnuj xwýnhjê hpar kaxyw nẽ pĩ kahpa hã mẽ hanhõ nẽ mẽ kupa. NhũM JeJus amnhĩ kukamã tanhmã mẽ kot hpĩr to hã mẽ omunh mex jakamã ra hprĩ hã mẽ inhmã mẽ kot tanhmã hipêx to hã mẽ harê. Jakamã nhũM pre ã Ijaew Pirat kot mẽ kãm hpĩr prãm xàj ã kãm kapêr kãm xihtýx anẽ. ³³ HãMRI nhũM mẽ kuma nẽ akupým örkwý hwýr axà nẽ amnhĩ wýr JeJus ã karõ nhũM hwýr axà nhũM kãm:

—E kwa inhmã amnhĩ jarẽ. Xà apê Ijaew nhõ pahi na ka? Xà ka na htem amnhĩ wýr akãm hamak o pa? Anẽ.

³⁴ HãMRI nhũM kãm:

—Tý ãm hãMRI na ka ã ijarênh anẽ. Nom jar pika ja kamã ixpê mẽõ pahi hkêt. Axtem ixpê mẽõ pahi na pa. Mo kaxyw na ka ã ixkukjêr anẽ? Xà na pre mẽõ ixte mẽ anhõ pahi Sesti kutã ixãm ã amã ijarê ka ama nẽ tee ri ixkukamã ajamaxpêr? Nà xà ãm hãMRI amã Tĩrtũm kot Ijaew wýr inhmênh ã ixpumunh prãm? Mo kaxyw na ka ã ixkukjêr anẽ? Anẽ.

HãMRI nhũM tee ri kuma nẽ mẽ kãm:

—Tk. Mo kot pa kêt ri axtem nẽ Tĩrtũm kot Ijaew wýr amênh ã akukja? Mẽ apyrã nẽ ixpê Ijaew kêt kênã. Mẽ kot ixwýr ato htêm xwýnhjaja na mẽ ã ate amnhĩ jarênh anhýr ã ajarênh anẽ. Nà mẽ akwýjê mẽ mẽ anhõ patre krãhtũmjaja na mẽ ã inhmã ajarênh anẽ. Jakamã e aprĩ hã inhmã amnhĩ jarẽ. Tanhmã na ka we amnhĩ tomnuj to nhũM mẽ ixwýr ato tẽ? Anẽ.

HãMRI nhũM kuma nẽ mẽ kaxe kãm:

—Nà ixpê pyka ja kamã mẽ õ pahi hkêt. Kop ãm ixpê pyka ja kôt mẽ õ pahi ronhýx ra ixkôt ri mẽ pa xwýnhjaja tanhmã ixtã mẽ ato. Nom jar ixpê mẽ õ pahi hkêt. ãm axtem ixpê mẽ õ pahi na pa. ãm hãMRI na pa ã amã amnhĩ jarênh anẽ. Anẽ.

³⁷ NhũM ã kãm amnhĩ jarênh anẽ hãMRI nhũM tee ri kuma nẽ mẽ kãm:

—Xà apê mẽ õ pahi hõ na ka? Anẽ.

HãMRI nhũM kãm:

—Tý. Nà ãm hãMRI na ka ã ijarênh anẽ. Na pa pre amnẽ pikaja wýr wrý nẽ jar mẽ akamã ixkato nẽ mẽ akamã ixãptãr. Ixte tanhmã mẽ kãm ixkapêr to ho ri ipa kaxyw na pa pre wrý nẽ mẽ akamã ixpa nẽ ãm hãMRI mẽ kãm ixkapêr o ri ixpa. Na pa hte tãm ixkapêr o ri ixpa. Tã mẽ kot ixkapêr mar nẽ ixkôt ri amnhĩ nhĩpêx o mẽ pa xwýnhjaja na htem ixpê mẽ õ pahihiti hã ijarênh o pa. Anẽ.

³⁸ HãMRI nhũM Pirat kot tãm kãm kapêr ã amnhĩ jarênhja ã kuma nẽ mẽ kãm:

—Tk. Aa ixte pika ja kamã mẽõ pumunh nhũM tãm kapêr o pare hã. Anẽ.

HãMRI nẽ kapêr ã kuma nẽ tee ri hkukamã hamaxpêr. HãMRI nẽ akupým Ijaew wýr ho kato nẽ mẽ kutã o xa nẽ mẽ kãm:

—Kwa tanhmã kot amnhĩ tomnuj tore hã. ³⁹ E mẽ inhma. Na pa hte amgrã mẽ arĩgro pê Pas kãm mẽ amã mẽ hagjênh xà rũm mẽ akwýjê ho hpýnh nẽ mẽ hapõj nhũM mẽ hamakêtkati nẽ amnhĩx ri pa. Ka mẽ ja hã omu nẽ Pas ã akĩnh nẽ. Jakamã e. Pa mẽ amã mẽ anhõ "pahihiti" jarênhja mã inhũre. E na pa ra kãm inhũre. Anẽ.

⁴⁰ HãMRI nhũM mẽ tee ri ã kapêr anhýr ã kuma nhũM ja mẽ kêp omnuj týx nẽ. NhũM mẽ hã kàx pê gryk kamã kãm kapêr kãm hihtýx nẽ mẽ kãm:

—Tk. Kwa nà kãm anhũrer kêt nẽ. Kêt Parapas mã mãn anhũre. Anẽ.

Parapasja na pre hte tanhmã amnhĩ tomnuj týx to ho ri pa nhũM prem mýrapê unẽ nẽ haxà. Tã nhũM mẽ axtem nẽ Pirat kot kãm urer prãm xàj JeJus kaga.

Mẽ kot JeJus tak ã mẽ harênh

Matêwre 27.27-31; Makre 15.16-21; Rukre 23.20-25

19 Tã nhũM Pirat akupým örkwý hwýr JeJus o axà nẽ õ pôristijê mã hã amýnê nhũM mẽ hwýr mra nẽ htak o kuhê. ² HãMRI nẽ kêp pahi hã hpêr o pikênh kaxyw kãm pahi hã mẽ ahkã nhĩpêx nẽ hkrãm haxà. Nom axtem mẽmo mrônhi te kot ronh kanêre pyrãk xwýnhja nhũM mẽ hikãx nẽ hkrãm haxà. Nẽ kêp pahi hã mẽ ê kamrêk py nẽ kãm haxà. ³ HãMRI nẽ xatã hwýr mra nẽ hinep htak nẽ hã hpêr o pikênh o xa nẽ mẽ kãm:

—E apê Ijaew nhõ pahi punuti na ka. Anẽ.

⁴ HãMRI nhũM Piratja akupým Ijaew wýr kato nẽ mẽ kãm:

—E koja inhõ pôristi akupým mẽ awýr ho kato ka mẽ omu. Na pa tee ri kot tanhmã amnhĩ tomnuj to hã hkukja. Pêr tanhmã kot amnhĩ tomnuj to hkêt kênã. Anẽ.

⁵ HãMRI nhũM JeJus kato nẽ arĩ pahi hã àhkã tu nẽ ê kamrêk jaxà nẽ o xa nhũM Pirat mẽ kãm:

—E kwa mẽ omu nẽ kamã axukapri hkêt wehe. Anẽ.

⁶ HãMRI nhũM patre krãhtũmjê mẽ mẽõ pôristijaja tee ri ja hã kuma nhũM ja mẽ kêp omnuj nẽ. HãMRI nẽ hã kãm kapêr kãm hihtýx nẽ mẽ kãm:

—Tk. Kwa nà pĩ kahpa hã mãn anhõ. Kê pĩ kahpa hã mãn ajêt nẽ ty. Anẽ.

HãMRI nhũM tee ri hã mẽ kuma nẽ mẽ kãm:

—Nà mẽ kam nẽ ma amnhĩm o tẽ nẽ mẽ kam amnhĩm ho anẽ. No pa kot paj ho anhýr kêt nẽ. Mo mýrapê kot pa kêt hã amýnê nhũM mẽ kupĩ? Nà kwarĩ kot pa ho anhýr kêt nẽ. Anẽ.

⁷ HãMRI nhũM mẽ tee ri kuma nẽ mẽ kãm:

—Kwa kêp Tĩrtũm Kra hã amnhĩ jarênh kênã. Mẽ inhĩgêjtaja na prem ã mẽ ixte amnhĩ jarênh anhýrja nẽ mẽ inhmã kapêr pa htem ã amnhĩ jarênh anhýr kêt nẽ.

Koja mēhō ã ri amnhĩ jarēnh anē nhũm mē ja mýrapê kupĩ. Anē.

⁸ Hãmri nhũm Pirat tee ri Jejus kēp Tĩrtũm Kra hã amnhĩ jarēnhja ma nē kãm uma nē kãm tanhmã ho hprãm kêt nē. ⁹ Hãmri nē akupým ōrkwý hwýr ho axã nē axte hkukja nē kãm:

—Kwa aprĩ hã inhmã amnhĩ jarē. Nhýhýnh na ka pre mē ixwýr mō? Anē.

Nom nhũm axte tanhmã kãm nē hkêt nē. Ām arĩ akryk mar o xa. ¹⁰ Nhũm tee ri omu hãmri nē kãm:

—Kwa xã ate ixpumunh kêt? Inhý hã na htem mē ku-pa nē inhý hã akupým mē hapōj. Tã ka pēr aprĩ hã inhmã tanhmã amnhĩ jarēnh to hkêt nē ri akryk akuhē. Anē.

¹¹ Hãmri nhũm Jejus kãm:

—Nom Tĩrtũm nhý hã pix mã na ka hte ã amnhĩ nhĩpēx anē. Kēp ãm Tĩrtũm kãm ja prãm kêt ronhýx ka tee ri tanhmã amã ixto hprãm hkaprý. Tãm kot mē ixkaxyw axãm kēnã. Tã mē kot awýr inhmēnh nē ri ix-tyk ã ijarēnh xwýnh pē Ijaew nhō pahijaja. Ra mē kot ixkaga jakamã na mē ã amã ijarēnh anē. Jakamã mē kot amnhĩ tomnuj týx o ajakrenh. Anē.

¹² Hãmri nhũm Piratja tee ri ã kapēr anhýr ã kuma nē kot kãm urer prãm nē. Hãmri nē akupým Ijaew wýr ka-to nē hã mē kãm kapēr nhũm mē tee ri kot kãm urer kaxyw ã amnhĩ jarēnhja ma nē kãm ja prãm kêt kum-rēx. Jakamã kàxpē nē kãm kapēr nē kãm:

—Kwa nã ra kēp mē inhō pahi hã kot amnhĩ to hēx kēnã. Kot mēhō ã ri amnhĩ jarēnh anē nhũm Rõm kamã mē panhō pahi Sestija ja hã harēnh ma nē kamã gryk týx nē. Tã kot kaj kãm anhũre nhũm ajarēnh ma nē akamã gryk nē. Anē.

¹³ Hãmri nhũm tee ri mē kuma hãmri nē ma pahi kot tanhmã mē harēnh to xã hã kēn pota wýr ma tē nē hã nhý. Mē ixpē Ijaew kapēr kãm mē ixte kãm: “Kapata” jarēnh xwýnhhta wýr kot tanhmã Jejus jarēnh to kaxyw ma hwýr tē nē hã nhý nhũm mē hwýr o tē.

¹⁴ Hãmri nhũm ra arĩgro pē sēsta. Mē ixpē Ijaewjaja mē ixte Pas ã amnhĩ tomnuj mýrapê mry hkwy hpar nē Tĩrtũm kôt pix mã amnhĩ nhĩpēx ã amnhĩ jarēnh xã hã arĩgroja kato. Jakamã nhũm kaxkwa nhĩpôk ri myt nhý nhũm Piratja mē kot Jejus kator ã harēnh prãm xàj arĩ mē kãm ho mē ã pahi hã harē nē mē kãm:

—E ota mē anhō Pahihtita. Anē.

¹⁵ Hãmri nhũm mē tee ri ã harēnh anhýrja ã kuma nē kãm:

—Kwa apĩ ri. Ma o tē nē pĩ kahpa hã anhō kê tokyx ty.

Anē nhũm tee ri mē kuma nē mē kãm:

—Kwa nã. Kēp mē anhō pahi kēnã kot paj kêt ri ax-tem nē mē apē kupĩ. Anē.

Hãmri nhũm mē kãm:

—Nã kēp mē inhō pahi hkêt. Pahi Sesti pix na kēp mē inhō pahi. Anē.

Mē kãm Sesti hkĩnh kêt tã ã kãm Jejus htyk prãm xàj ri harēnh anē. ¹⁶ Hãmri nhũm Pirat tee ri ja hã mē ku-ma nē tã Jejus ã pôristi mã karō nē mē kãm:

—E mē mãmri ma o tē nē pĩ kahpa hã anhō kê ty. Anē.

Hãmri nhũm mē kuma nē ma o tē.

Mē kot pĩ kahpa hã Jejus nhô ã mē harēnh

Matêwre 27.32-44; Makre 15.21-32; Rukre 23.26-43

¹⁷ Hãmri nhũm pôristija Jejus mã ã pĩ kahpa gō nhũm kutu nē ma mē hkôt hkjēnh o mō. Nhũm mē krĩ rũm ho kato nē ma hixêt prék wýr o tē. Hixêt prékja mē kot harēnh o: “Korkot” anē. No mē ixpē Ijaewjê kapēr kãm na pa pre htem harēnh o “Mē hkrã hi xã” anhýr xwýnh-ta wýr nhũm mē ma o tē nē hã ho api. ¹⁸ Hãmri nē pikap pĩ kahpa xi nē hã Jejus xi nhũm hã nõ nhũm mē prek o ãnkra ho htýx nē hpar o htýx. Hãmri nē kaxyw hkakwý nē hkakwýnh pa nē kamã pĩ kahpata xãm nē hity hpa nhũm Jejus kýx pē ajêt. Hãmri nhũm mē mãänēn wa ho hamēxkrut nē pĩ kahpa hã wa kunhō nhũm wa kuri ajêt. Wa kot tanhmã amnhĩ tomnuj to xwýnhja wa ho akutã Jejus nhĩjê nhũm wa urak nē kýx-pē ajêt.

¹⁹ Hãmri nhũm Piratja ã pôristi mã anē nhũm mē tap ã py nē hã tanhmã kagã hto nē kagã ho:

*IJAEW NHÕ PAHI JEJUS NA JA
KĒP NAJARE NHÕ XWÝNH*

²⁰ Nom mē ixpē Ijaew kapēr pix kãm hã kagã hkêt nē. Mãänēn Gresjê kapēr kãm nē Raxijê kapēr kãm nhũm mē mãänēn hã kagã nē Jejus mýri kunhō. Hãmri nhũm Ijaew kwýjaja Jerujarē rũm hwýr mra nē mē kot ã hã kagã nhĩpēx anhýrta pumu nē kamã harē. Jerujarēja hixêt prēeta wýr jawý jakamã nhũm mē kurũm ohtō nē hwýr mra nē omunh o kuhê. ²¹ Hãmri nhũm patre hkrãhtũmjaja tee ri ã Jejus jarēnh anhýr ã kagãta pumu nhũm ja mē kēp omnuj nē. Jakamã nhũm mē ma Pirat wýr mra nē kãm:

—Kwa mon ka ri hã mē kãm anē nhũm mē axtem nē ã ri kagã nhĩpēx anē? Kwa nã kēp mē inhō pahi hkêt. Ām htýx ri kot ã kot amnhĩ jarēnh anhýr o pa kēnã. Kwa hã kagãja o anhĩpa nē hpãnhã hã kagã ho: “Kēp Ijaew nhō pahi hã kot amnhĩ to hēx xwýnh.” Anhýr o hpãnhã hã hipēx nē anhō nã? Anē.

²² Hãmri nhũm mē kuma nē mē kãm:

—Tk. Nã pa ho ixpinhpanh kêt nē. Ra ixte hã kagã hpar kēnã. Anē.

Pôristijaja kot axpēn mã Jejus xē ho pigrành

Matêwre 27.35-36, 27.55-56; Makre 15.24; Rukre 23.34

²³ Hãmri nhũm pôristijaja kot axpēn mã Jejus xē o pi-grành kaxyw amnhĩ tã haxwýr o tē. Mē kēp 4 no nhũm Jejus xē kēp 5 jakamã nhũm mē amnhĩ kôt ho 4 nē haxwý nhũm pyxi nē hprã. ê rytita. Na pre hipēx muxre. Nhýhýnh hkayr xã pumunh kêt kumrēx.

²⁴ Jakamã nhũm mē omu nē kãm hkĩnh nē. Hãmri nhũm hō kot amnhĩm hpyr nē ho arĩk kaxyw nhũm mē hã kēnre ho jōka. Na pre ra Tĩrtũm kapēr ã kagã htũm kot mē hkukamã ja hã mē harēnh nē mē harēnh kot:

Na prem axpēn mã ixê o anhrã nē hã kēnre ho jōka ho hkrĩ.

Anhÿr o kot mẽ hkukamã mẽ harēnh. Tã nhũm mẽ ra hkôt ã amnhĩ nhĩpêx anhÿr o hkrĩ.

Jejus kot Juāw nhĩhkram katorxà jaxà ã harēnh

²⁵ Nhũm Jėjus par pē katorxà xa. Nē htōx nē Kropti hprō Marir nē Marir Matarēn mẽ nhũm mẽ Jėjus katorxà nhĩhkô hã Jėjus pumunh o kuhê. Nhũm amnhĩ tã mẽ omu ²⁶ nē mẽ kuri pa ixpē Juāw pumu. Hãmri nē kēp ixkràmnhwÿ mex ã ixtã katorxà mã kapēr nē kãm: —E ota Juāwta. Kojã ixpãnhã te kēp akra pyrãk o anhĩpêx nē tanhmã ato ajuta hto ho pa. Anē.

²⁷ Hãmri nē hpãnhã pa inhmã kapēr nē inhmã: —E Juāw. Kêr ka te kēp akatorxà pyrãk o inhmã hipêx mex o ri apa.

Anhÿr jakamã pa kuma nē kot inhmã hã karō xà hkôt inhōrkwÿ hwÿr haxà nē amnhĩ kôt ri ho ixpa.

Jejus htyk ã harēnh

Matêwre 27.45-56; Makre 15.33-41; Rukre 23.44-49

²⁸ Tã nhũm Jėjus ra amnhĩ pumu hãmri nē hamaxpēr o:

—Nà Inhĩpêxà kot mẽmoj tã inhmã karōta na pa ra kãm ho anhÿr o hitep xà xir kaxyw. Anē.

Hãmri nē kãm kôr ã amnhĩ jarē. Nom ra hkukamã Tirtũm kapēr ã kagà htũm kot htyk kaxyw nē kãm kôr kukamã harēnh jakamã nhũm ã amnhĩ jarēnh anē nē kapēr o:

Nà na pa ra inhmã kôr nē. Anē.

²⁹ Nhũm hpar pē guhkrax kãm wĩhti punureta ãm jakamã nhũm mẽ ã kot amnhĩ jarēnh anhÿrja ma nē kaxyw mẽmo rerek py nē o tē nē kaxyw pĩ ryti hō py nē ho hkanhwÿ. Nē akupÿn o tē nē ho wĩhti mã haxà nē kãm kupē. ³⁰ Nhũm hkaô nē hkaôr pa hãmri nē kapēr o:

E nà hãmri na pa ra mẽ piitã mẽ kot amnhĩ tomnuj pãnhã amnhĩrer pa. Jao ra Inhĩpêxà kãm hprãm xà hkôt kãm tanhmã amnhĩ nhĩpêx to jatur xàm kumē. Anhÿr o amnhĩ jarēnhja kôt ahpãr mã hkrã nē ty.

Mẽ kot kô xwa ho Jėjus kamnhwÿr ã harēnh

Wam Juāw 5.6-8

³¹ Nhũm ra sēsta nhũm apkati nhũm mẽ inhō arĩ-gromnu pē sap kaxyw. Sapja ã na hte mẽ ixpē Ijaew mẽ ixkĩnh pē Pas ã ixkĩnh rũnh o ixpa. Nhũm mẽ kãm sap ã arĩ mẽ htyk nē mẽ harir xwÿnhjê pumunh prãm kêt jakamã nhũm Ijaew krãhtũmjaja ma Pirat wÿr mra nē kãm:

—Kwa pôristi mã anē kê mẽ tokyx mẽ hte hi kukē kê mẽ htyk tokyx anē. Kê mẽ tokyx mẽ o wrÿ nē ma mẽ o mra nē mẽ hagjê. Kormã sap kêt ri. Anē.

³² Hãmri nhũm mẽ kuma nē õ pôristijê mã anē nhũm mẽ ma mẽ hwÿr mra nē akutã wa kot Jėjus nhĩjê nē jêt xwÿnhta wa kumrêx wa hte hi hkwÿr. ³³ Hãmri nē hpãnhã Jėjus wÿr tē nē omu nhũm ra htyk mex nē ajêt nhũm mẽ ja hã omu nē kēp hte hi hkwÿnh kêt nē.

³⁴ Nhũm pôristi hōja kô xwa py nē ho ihkjê rũm hkanhwÿ nhũm hkamrô mẽ ĩ kagô ahkà nē hprôt nhũm mẽ

hkwÿja omunh o kuhê. ³⁵ Nē ixpē Juāw na pa pre ijaxwÿja mẽ ĩhkô hã xa nē ja hã omunh jakamã pa ã mẽ amã hã kagà anē. ãm hãmri na pa mẽ amã harē nē hã kagà. Mẽ ate kamã harēnh nē harēnh mar nē hkôt ajamaxpēr kaxyw. ³⁶ Na pre ra Tirtũm kapēr ã kagà htũm kamã ra hkukamã tanhmã kot mẽ pahwÿr mẽnh xwÿnhta jarēnh to nē hã kagà. Nē hã kagà kot: Kojã mẽ nhÿhÿnh hi hkwÿnh kêt nē. Anē.

Tã nhũm mẽ ra hã kagàja kôt ã hipêx anē nē kēp hi hkwÿnh kêt nē. ³⁷ Nē Tirtũm kapēr ã kagà htũmja mããnhēn ja hã harēnh kot:

Mẽ kot hpĩr nē hkanhwÿr xwÿnhja kojã mẽ hpar pē omunh o kuhê. Anē.

Tirtũm kapēr ã kagà htũm kamã ã Jėjus tyk kukamã harēnh kot anhÿr.

Mẽ kot Jėjus jaxà ã mẽ harēnh

Matêwre 27.57-61; Makre 15.42-47; Rukre 23.50-56

³⁸ Tã nhũm Juje pē Arimatej nhō xwÿnhja Jėjus ra htyk ã omu nē ma Pirat wÿr tē nē hã kãm kapēr. Kot ma o mōr nē tokyx haxàr kaxyw. Na pre ra Jėjus kôt amnhĩ xãm nom Ijaew krãhtũmjê pymaj mẽ kãm amnhĩ to amnhĩrit kêt nē. Jakamã nhũm ma Pirat wÿr tē nē hã kãm kapēr nē kãm:

—Pa e ot pa awÿr tē. Ixte mẽmoj tã amã ixkapēr kaxyw. Kot kaj apu inhmã “ÿ” anhÿr japēr. Kwa xà kot pa ma Jėjus o mō nē haxà? Anē.

Hãmri nhũm kuma nē kãm: “Nà mãmrĩ ho anē.” Anē hãmri nhũm ma hwÿr tē nē ho wrÿ nē kumÿ nē ma haxàr mã o mō. ³⁹ Nhũm Nĩkotēja ma hkôt tē. Amnepē mã kot kamãt kãm Jėjus wÿr htēm nē wa axpēn mã kapēr o ĩr xwÿnhta. Jakamã ma Juje hkôt tē. Nē amnhĩ kôt mẽ hkuxwa xà hkwÿ ho mō. ãm ho mōr rax kumrêx. Ho 34 kir nē kutu nē o mō. Mẽ hkuxwa xàja na pre mẽ kot mẽmo kuxwa xà mã “mĩra” nē “aroe” anhÿr jarēnhja nhũm kaxyw hkwÿ jakà nē ho ahkà nē ho mẽ hkuxwa xà nhĩpêx. Hãmri nē kutu nē ma Juje kot Jėjus jaxàr nhũm kot ho hkuxwa kaxyw hkôt o mō. ⁴⁰ Hãmri nhũm wa ho kupêxê kukōnh pa nē ho Jėjus kupu. Mẽ ixpē Ijaew mẽ ixte mẽ htykjê jagjênh kaxyw ã mẽ hipêx anhÿr xà hkôt nhũm wa ã hipêx anē nē haxà. ⁴¹ Nhũm ra mẽ kot pĩ kahpa hã nhôr xà tã mẽ kot mẽmo pĩ ho pa nē hkre xwÿnh kwÿ kuhê. Nē kamã kēn kre nyw. Kormã mẽ kot kamã mẽ htykjê hō jaxàr kêt xwÿnhta.

⁴² Jakamã nhũm wa omu nē axpēn mã:

—E kwa pu hwÿr Jėjus o tē nē kamã mãn tokyx haxà. Kêr pu kormã sap kêt ri ra tanhmã amnhĩ to hpa. Anē.

Hãmri nē hwÿr kumÿ nē o tē nē kamã haxà nē hã hitom pa hãmri nē ma akupÿm krĩm wa tē.

Jejus akupÿm htĩr ã harēnh

Matêwre 28.1-10; Makre 16.1-8; Rukre 24.1-12

20 Tã nhũm sap tē nē hapêx nē hpãnhã semãn nyw krax xà pē tōmĩk. Hãmri nhũm Marir Matarēn kwÿhtã kãnhmã nhÿ. Kormã myt kator kêt ri kãnhmã nhÿ nē ma kēn kreta wÿr tē. Nē hwÿr pōj nē tee ri hitom xà hã kēn rax pumu. Nhũm ra nhãm hakwa kre kuhpa hã ri hikwÿ nhũm omu nē tee ri

hkukamã hamaxpêr pê omunh o xa. ² HãMRI nê awjanã nê ma akupÿm hprôt nê nhÿri Simãw Pêtre nê pa ixpê JeJus krãmnhwÿ mex ã wa ixpumu nê hkaprÿ kamã wa inhmã harê nê wa inhmã:

—Xê na pêr mē pahpê mē panhō Pahihiti kapa nê nhÿhÿm ma o tē. Xê nhÿhÿm mǎn pre wem o tē? Anē.

³ HãMRI pa wa kuma nê hwÿr ixprôt kurê kumrêx. ⁴ HãMRI pa Simãw Pêtre mã wa nê ixkumrêx hwÿr pōj. ⁵ Nom kormã kēn kre hwÿr ixàr kêt ri kormã hakwa krem inhikôt nê kaxwÿnh kām nōr xà kamã JeJus japêr ixrît o xa. Nhÿm kupêxê nhîrê pix nō pa omu. ⁶ HãMRI nhÿm Simãw Pêtre ixkôt tē nê ixrom krem àr kurê kumrêx nê kupêxê nhîrêta pumu. ⁷ Nê hkrã kupu xà pumu nhÿm axtem hkrã muxre nê ahte nō. ⁸ HãMRI pa hkôt axà nê nōr xà kaprÿ pumu nê ijamaxpêr o:

—Hêxta waa nê. Nà mǎn akupÿm htÿr. Hã na nōr xà hkaprÿ mex nê. Nà mǎn akupÿm htÿr kām ga. Anē.

⁹ Ra Tÿrtÿm kapêr ã kaga htÿm kot ja kukamã akupÿm htÿr ã harēnh tã pa wa kormã ixprÿ hã ja hã omunh kêt nê. Tã kēn kre kaprÿ pumu nê kām ijamaxpêr kurê kumrêx. ¹⁰ HãMRI nê wa ixkato nê awjanã nê ma akupÿm wa ixkwÿjê hwÿr wa tē.

JeJus kot Marir Matarēn wÿr kator ã harēnh

Makre 16.9-11

¹¹ No nhÿm Marir Matarēnja arÿ kēn kre kapem hkaprÿ nê mÿr o xa. Nê mÿr pê hikôt nê kēn kre kamu ¹² nê kamã Tÿrtÿm kapêr o wrÿk xwÿnh wa ho axkrut nê wa omu. Nhÿm wa ê jakajre kamã wa nhÿ. Nhÿm hōja hkrãm nhÿ nhÿm hōja htem nhÿ. ¹³ HãMRI nê wa Marir Matarēn mã kapêr nê kām:

—Kwa mon ka ri omu nê amÿr o xa? Anē.

Nhÿm kām:

—Xê nhÿm. Na prem ma nhÿhÿm mē ixpê mē inhō Pahihiti mÿ nê ma o tē nê hpãnhã nhÿri kuxi. Anē.

¹⁴ Rôm nhÿm JeJus tām tē nê hkatut kôt xa nhÿm Marir Matarēn ho hakêx nê omu nom hprÿ hã omunh kêt nê. Omu nê htÿx ho axtem mēhō hã hkamnhÿx.

¹⁵ HãMRI nhÿm kām:

—Kwa mon ka ri amÿr o xa? Mēhō na ka ri hapêr arÿt pê amÿr o xa? Anē.

HãMRI nhÿm kuma nê htÿx ho pÿ hkre jamãr xwÿnh ã hkamnhÿx nê kām:

—Xê xà ka na ka mē ixpê mē inhō Pahihiti ho ahkÿ nê ma o tē nê nhÿri axi mē? Xê ka japêr nê akatàt kôt inhmã harê. Nhÿri inhmã nōr xà jarê pa ma hwÿr tē nê kumÿ nê man akupÿn o tē nê akupÿm kēn kre kamã kuxi. Anē.

¹⁶ HãMRI nhÿm JeJus kām hixi jarê nê kām:

—Kwa Marir Matarēn. Amnē ixpumu nê arÿ ã akapêr anē nà. Anē.

HãMRI nhÿm jatã hprÿ hã kuma nê ho hakêx nê amnhÿ jaêr pê hprÿ hã omu nê kām:

—Xê Pahihiti. Xep ka na ka. Hêxta gǎa nê. Anē.

Nom mē ixpê Ijaew kapêr kām Pahita jarēnh o: “Raponÿ” anē. Nhÿm ã kām kapêr anē hãMRI nê axte ma nhÿhÿm kēp htēm pymaj hpa hã kupy. ¹⁷ HãMRI nhÿm kām:

—Kwa inhmã anhÿre. Na pa kormã ma akupÿm Inhÿpêêxà hwÿr ixàpir kêt nê. E tokyx ma akupÿm tē nê ixtō nê ixtōxjê mã ijarê. Na ka prem apê ixkrãmnhwÿ pix tã ra mē apê ixtō nê ixtōx na ka mē. Jakamã ma akupÿm mē hwÿr tē nê mē kām ijarê. Nê mē kām: “Na JeJus mē awÿr pêr mēnh o: ‘Kot paj tokyx ma akupÿm Inhÿpêêxà Tÿrtÿm wÿr api. Nom kēp pa Inhÿpêêxà pix kêt mãānēn kēp mē Anhÿpêêxà na. Nê mãānēn kēp mē anhō Tÿrtÿm na.’ Anhÿr o mē awÿr pêr mē.” Anē. E ma akupÿm mē hwÿr tē nê tokyx ã mē kām ijarēnh anē. Anē.

¹⁸ HãMRI nhÿm kuma nê ma akupÿm mē ixwÿr tē nê mē inhmã awjarê nê mē inhmã:

—Xê na pa ham mē panhō Pahihiti pumu. Na akupÿm mē pamã htÿr. Anē.

HãMRI nê mē inhmã kot tanhmã kām kapêr to hã harê pa mē kuma nê tee ri hkukamã ijamaxpêr.

JeJus kot hkWÿjê hwÿr kator ã harēnh

Rukre 24.36-43

¹⁹ Tã nhÿm tōmÿk nê kamàt pa mē JeJus kôt ixpa ho ixpa xwÿnhjaja axpēn wÿr akuprō hãMRI nê Ijaew krãhtÿmjê pymaj hakwakre kahê hpa nê axpēn mã ixkapêr o ixkrÿ. Nhÿm JeJus mē ijaêr pê nhÿhÿnh mē ixwÿr axà nê mē ixkuri xa nê mē inhmã:

—Pa. Xà kormã mē anhōt kêt? Anē.

²⁰ HãMRI nê mē inhmã amnhÿ nhÿhkra kamã prek tatak xà jahkre nê hakÿx kôt mē kot hkanhwÿr xàja nhÿm mē inhmã hahkre. Pa mē akupÿm htÿr kām omu nê ixkÿnh tÿx kumrêx. ²¹ HãMRI nhÿm mē inhmã:

—E kwa kêr ka mē tee ri amnhÿ kukamã ajamaxpêr o amã ma ho ri apa hkêt nê. Na pre Inhÿpêêxàja mē awÿr inhmē pa pre wrÿ. Tã kot paj amnhÿ pyrã nê mē piitã mē hwÿr mē arê. Anē.

²² HãMRI nê mē ixkaxyw htyyxà mē nê mē inhmã Tÿrtÿm mē wa Karō jarê nê mē inhmã:

—E koja Tÿrtÿm mē wa Ixkarōja wrÿ nê mē akarō mã gjêx pa. ²³ Ka mē ÿ hã ma mē piitã mē hwÿr apa nê mē kām Tÿrtÿm kapêr jarēnh o ri mē hkôt apa. Nê nhÿri mēhō pumu nê inhÿ hã kām: “Kot kaj Tÿrtÿm kôt amnhÿ xãm nhÿm amnhÿ tã apumu nê anê ate amnhÿ tomnuj rēnh pa.” Anē. Ka mē ã kām akapêr anē nhÿm mē ama nê hkôt amnhÿ xãm nhÿm Tÿrtÿm amnhÿ tã omu nê nê kot amnhÿ tomnuj rēnh pa. Nom koja mē ama nê ãm mē ama nê hkôt amnhÿ xãm kêt japêr ka mē inhÿ hã kām: “Nà kot kaj Tÿrtÿm kôt amnhÿ xãm kêt nê nhÿm anê ate amnhÿ tomnuj rēnh kêt nê.” Anhÿr o kām akapêr nhÿm Tÿrtÿm ho anē nê nê rēnh kêt nê. E kêr ka mē ã inhÿ hã amnhÿ nhÿpêx anhÿr o ri apa. Anē.

Nhÿm pre ã JeJus mē inhmã kapêr anē hãMRI nê kato nê ma nhÿhÿm tē.

JeJus kot Tomas mã kapêr ã harēnh

Matêwre 28.17

²⁴ No nhÿm mē inhÿo pê Tomas pihpohtita kormã mē ixkÿnhã akupÿm JeJus htÿr kām omunh kêt nê. Na pre ma kape hã tē nhÿm wakre kamã mē ixwÿr axà nê mē inhmã kapêr hãMRI nê ma nhÿhÿm tē. Jakamã nhÿm

Tomas akupÿn mẽ ixwÿr tẽ nõ axà pa mẽ kãm harẽ nhũm tee ri mẽ inhma nõ mẽ ixkõt hamaxpẽr kêt nõ.
²⁵ Nẽ mẽ inhmã:

—Nà kot pa ìhkra kamã prek tatak xà pumu nõ kamã inhìhkra hkrã jaxà. Nẽ hakÿx kõt hkanhwÿr xàta pa mã ho anẽ nõ omu nõ kamã inhìhkra hkrã jaxà nõ rĩ kor-mã akupÿm htĩr kõt ijamaxpẽr. Anẽ.

²⁶ Tã nhũm semãn pyxi nõ hapêx pa mẽ axte axpẽn wÿr akuprõ nõ axte Ijaew krãhtũmjẽ pymaj amnhĩ tã kahẽ htÿx nõ ixkrĩ. Nhũm Tomas tã mẽ ixkuri nhÿ. Hãmri nhũm Jejus axte nhÿhÿnh mẽ ixwÿr axà nõ mẽ inhmã:

—Pa. Na ka mẽ rĩ akrĩ. Anẽ.

²⁷ Hãmri nõ Tomas pumu nõ hwÿr tẽ nõ kãm ìhkra pẽ nõ kãm:

—E ota inhìhkra kamã prek tatak xàta. Mãmrĩ kamã anhìhkra hkrã jaxà. Nẽ hpãnhã ijakÿx kõt mẽ kot ixkanhwÿr xà kamã mã ho anẽ nõ haxà nõ akupÿm ixtĩr kõt ixpumunh kurẽ kumrẽx. Anẽ.

²⁸ Hãmri nhũm kuma nõ kãm:

—Nà pẽr ãm hãmri apẽ inhõ Pahihti Tĩrtũm na ka. Anẽ.

²⁹ Hãmri nhũm kãm:

—Tÿ. ãm ano ho ixpumunh kõt pix mã na ka ixkõt ajamaxpẽr. Tã no ãm koja mẽ nhÿrmã mẽ amÿr pẽ mẽ pa xwÿnhjaja mẽ akĩnhã mẽ no ho ixpumunh kêt tã akupÿm ixtĩr ã ijarẽnh mar pix tã ixkõt hamaxpẽr. Ja na mex kumrẽx. Anẽ.

Juãw kot tanhmã amnhĩ jarẽnh to hã harẽnh

Rõmãn 15.4; Wam Juãw 5.13

³⁰ Na pre Jejus kormã mẽ ixto pa ri mẽ inhnoo mã mẽmoj tanhmã hipêx to rax nõ nom kot paj kagàja kamã piitã hã kagà hpar kêt nõ. ³¹ ãm hkwy pix na pa mẽ amã hã kagà. Mẽ ate mẽ ixpyrà nõ omunh nõ kęp Tĩrtũm Kra hã kot mẽ pakaxyw ãm xwÿnh ã omunh nõ hkõt amnhĩ xunhwÿr kaxyw na pa ã mẽ amã harẽnh nõ hã kagà anẽ. Tã kot kaj mẽ amnhĩ kaxyw hkõt ajamaxpẽr nõ hkõt amnhĩ xunhwÿr hãmri nõ nhÿrmã atyk tã nhũm akupÿm mẽ ato mẽ atĩr ka mẽ ixpyrà nõ kuri amex nõ atĩr tũm nõ apa ho apa. Tã pa ã mẽ amã mẽmoj piitã harẽnh nõ hã kagà anẽ.

Jejus kot hkwyjẽ hwÿr kator ã harẽnh

Matẽwre 26.32, 28.7, 28.10

21 Tã nhũm Jejus axte hkõt mẽ ixpa ho mẽ ixpa xwÿnh kwÿjẽ hwÿr kato. Himõ pẽ Tipeja mÿri.
² Pa mẽ ixpẽ 7 nõ axpẽn wÿr akuprõ. Na pre Simãw Pẽtre nõ Tomas pihpohti nõ Natãnaew. Natãnaewja Garirej kamã krĩ pẽ Kanã nhõ xwÿnh na pre. Nẽ wa pa wa ixpẽ Jepetew krata wa nõ wa inhõ wa pijakruuta wa. Pa prem wa mẽ nhÿri axpẽn wÿr akuprõ. ³ Hãmri nhũm Simãw Pẽtre mẽ inhmã:

—E pa jarãhã ma tep wÿr tẽ nõ hkwyjẽ. Anẽ.

Pa mẽ kuma nõ kãm:

—Tõe. Nà pa mẽ ijaxwÿja ma akõt mõ. Anẽ.

Hãmri nõ mẽ ma himõ rax pẽ Tipeja wÿr mõ nõ kanõre mã agjẽ nõ gõx kãm kryhti rẽnh o ixkuhẽ. Nom

tee ri ho tep õmnẽnh kaxyw rẽnh o ixkuhẽ nõ hõm-nẽnh kêt nõ ixtã apkati nhũm tep amrakati kumrẽx.

⁴ Tã nhũm myt kato nhũm Jejus gõ mÿri xa. Pa mẽ ixpiitã omu nõ ãm ixprĩ hã kęp Jejus ã omunh kêt nõ. Tã no nhũm tãm xa. ⁵ Hãmri nõ mẽ inhmã kapẽr nõ mẽ inhmã:

—Pa. E mãn ka mẽ ra tep kwÿmnẽnh rax nõ nà? Anẽ. Hãmri pa mẽ kãm:

—Tk. Nà mo tep? Amrakati kumrẽx kẽnã. Anẽ.

⁶ Hãmri nhũm mẽ inhmã:

—Xõ wehe? Tõe. Axte mẽ axupõk rũm kryhti mẽ nõ omu. Anẽ.

Hãmri pa mẽ mar xà hkõt ho anẽ nõ kumẽ. Hãmri nhũm kamã tep hipu rax kumrẽx nhũm utĩ rax nõ. Pa mẽ tee ri ixte ho ixàpir kaxyw ri hkukjẽ. ⁷ Hãmri pa kęp Jejus ã omunh kurẽ kumrẽx nõ Simãw Pẽtre mã kãm:

—Kwa pẽr mẽ panhõ Pahihtita na. Anẽ.

Hãmri nhũm inhma nõ hkĩnh tÿx nõ akupÿm hinõkà jaxà nõ gõx kãm mrõ nõ ma hwÿr ho nana ho tẽ.

⁸ Hãmri pa mẽ hkõt kanõre kamã kryhti kjẽnh o mõ. Ra amgrà hwÿr amgrire. Wÿr 100 met pix jakamã pa mẽ hwÿr ixpõx tokyx anẽ. ⁹ Nẽ pàr o hkre kura nõ kuxi nõ ijapõx pa nõ Jejus wÿr ixprõt nõ mra. Nhũm ra mẽ ixkutêp kuto nõ par nhĩpêx nõ nhÿhÿnh tep kwÿ par kãm haxwÿ nõ ho àr o nhÿ. Nẽ kaxyw pãwti nõ amnhĩ ri haxwÿ nõ o nhÿ. ¹⁰ Hãmri nõ mẽ ixpumunh mẽ mẽ inhmã:

—E mẽ amnẽ anhõ tep o mra pu mẽ hkuxõt nõ kuku. Anẽ.

¹¹ Hãmri nhũm Simãw Pẽtre akupÿm pàr wÿr tẽ nõ kryhti ho htÿx xà hpõt nõ amgrà hwÿr hkjẽnh o mõ. Kamã tep rũnh pix. Nẽ ohtõ nõ. Kamã kęp 153 nõ hikwÿ htã nhũm nhÿhÿnh kryhti hkwy pikaxõnh kêt nõ.

¹² Hãmri nhũm Jejus mẽ inhmã:

—E kwa mẽ tokyx mra pu mẽ apku. Anẽ.

Hãmri pa mẽ kuma nõ hwÿr mra nõ ixkrĩ pa. Hãmri nõ tee ri omunh o ixkrĩ. Mẽ ixprĩ hã omunh mex kêt tã kot ã mẽ inhmã amnhĩ nhĩpêx anhÿr ã omu nõ kęp mẽ inhõ Pahihti hkõt omunh kurẽ kumrẽx jakamã hixi hã hkukjẽr kêt nõ. ãm akryk omunh o ixkrĩ. ¹³ Hãmri nhũm mẽ inhmã pãwti ho hkry pa. Nẽ hpãnhã tep jamÿ nõ mã ho anẽ nõ ho hkry pa nõ ho mẽ inhĩpêx pa pa mẽ ixàpkur o ixkrĩ.

¹⁴ Nhũm Jejus akupÿm htĩr kãm ra ahpÿnhã mẽ ixwÿr hapõx o axkrunẽpxi.

Jejus kot akupÿm tãm Simãw Pẽtre xãm

Atre 20.28-31; Wam Pẽtre 5.1-4

¹⁵ Tã pa mẽ ra ixàpkur pa nõ kãnhmã ixkuhẽ nõ gõ mÿ ri mra. Hãmri nhũm Jejus Juãw hkra Simãw Pẽtre mã tanhmã kapẽr to. Nom ixpẽ Juãw nhũm kęp ixkra hkêt axtem Juãw õ hkra na pre. Jakamã nhũm Jejus kãm kapẽr nõ kãm:

—Kwa Simãw. Xà we amã ijapê ho ate pika hkõt mẽmoj piitã hakrenh par nà? Anẽ.

Hãmri nhũm kuma nõ kãm:

—Tÿ inhmã ajapê htÿx kẽnã Pahihti. Ra ate ja hã amnhĩ tã ixpumunh mex. Inhmã ajapêê. Anẽ.

HãMRI nhũM kuma nẽ kãm:

—Tõe. Nà kër ka inhmã mẽ kot ixkõt amnhĩ xunhwÿr xwÿnhjê jahkre mex o ri mẽ hkõt apa. Te ho ôwêhti hkrare jamãr xwÿnh kot hamãr mex o ri hkõt pata pyrãk. Anẽ.

HãMRI nhũM kãm:

—Tõe. Nà kot paj amã mẽ ho anẽ. Anẽ.

¹⁶ Tã nhũM hã ahtũmre nhũM kê axte kãm:

—Kwa Simãw. Xà we ãm hãMRI na ka inhmã amnhĩ jarẽ. Xà we amã ijarêê nà? Anẽ.

HãMRI nhũM kãm:

—Tÿ. Ra ate inhmã ajapê hã ixpumunh kênã. Anẽ.

HãMRI nhũM kê axte kãm:

—Tõe. Kër ka inhmã mẽ kot ixkõt amnhĩ xunhwÿr mã xwÿnhjê jahkre mex o ri mẽ hkõt apa. Te ho ôwêhti jamãr xwÿnh kot ôwêhti jamãr mex o hkõt pa xwÿnh kot amnhĩ nhĩpêx pyrãk. Anẽ.

HãMRI nhũM kãm:

—Nà kot paj amã mẽ ahkre mex o ri mẽ hkõt ixpa. Anẽ.

¹⁷ Tã hãMRI nhũM hã ahtũmre nhũM kê axte kãm:

—Kwa Simãw. Xà we ãm hãMRI na ka inhmã amnhĩ jarẽ? Xà we amã ijarê htÿx kumrêx nà? Anẽ.

HãMRI nhũM tee ri amnhĩ tã kuma nẽ hkaprĩ nẽ. Ra kot amnhĩ tã hkukjêr o axkrunêpxi jakamã nhũM hkaprĩ nẽ tee ri hamaxpêr. HãMRI nẽ kãm:

—Kwa Pahihti. Ate mẽmoj piitã omunh par. Nẽ ate inhmã ajapê htÿx ã ixpumunh par kênã. Anẽ.

HãMRI nhũM kê axte kãm:

—Tõe. Kër ka inhmã mẽ kot ixkõt amnhĩ xunhwÿr mã xwÿnhjê jahkre mex o ri mẽ hkõt apa. Te ho ôwêhti jamãr xwÿnh kot hamãr mex o ri pata pyrãk. Anẽ.

HãMRI nhũM kãm:

—Nà kot paj amã mẽ ho anẽ Pahihti. Anẽ.

Simãw Pêtre tanhmã htyk to hkukamã harênh

¹⁸ NhũM JeJus arĩ Simãw Pêtre mã kapêr nẽ kãm tanhmã htyk to hkukamã harênh to nẽ kãm:

—Kwa ixkapêr ma nẽ amnhĩ krã him haxàr tÿx nẽ hã apa Simãw Pêtre. Nà kormã anyw ri na ka pre hte ma nhÿhÿm apa kaxyw nẽ anojarêh hãMRI nẽ anhĩnôhkà mex jagjê nẽ ma nhÿhÿm amã apa hprãm xà hkõt ri apa. Tã kot kaj apigêh nhũM mẽ apynê nẽ akahti hpre nẽ apa hpre nẽ ma nhÿhÿm ato mõi ka mẽ kãm amnhĩ gõi nẽ amnhĩ nẽ tanhmã mẽ kãm nẽ hkêt nẽ. Amã mẽ hkõt amõi prãm kêt tã mãmrĩ mẽ kãm amnhĩ gõi kê mẽ ma nhÿhÿm ato mõi. ¹⁹ Tã kër ka arĩ ixkõt amnhĩ xãm tÿx nẽ atĩr prãm xaj mẽ umaj axte ixkaga hkêt nẽ. HãMRI nhũM mẽ apĩ nẽ tanhmã atyk to hã apumu nẽ amã Tĩrtũm kĩnh ã apumunh mex kurê kumrêx. HãMRI nẽ atã Pahi Maati Tĩrtũm mex o mex ã harê. Anẽ.

NhũM pre ã JeJus Simãw Pêtre tyk kukamã kãm ujarênh anẽ. HãMRI nẽ kãm:

—E kër ka ixte amnhĩ to htÿx nẽ amarĩ mẽ kãm ixãm nhũM mẽ kot ixpĩrja pyrã nẽ ã amnhĩ nhĩpêx anẽ. Anẽ.

HãMRI nhũM kuma nẽ kãm:

—Tõe. Nà kot paj hãMRI tã ã amnhĩ nhĩpêx anẽ Pahihti. Anẽ.

Juãw tyk kukamã tanhmã harênh to hkêt ã harênh

²⁰ NhũM pre ã JeJus Simãw Pêtre mã tanhmã htyk to hkukamã harênh anẽ. HãMRI nhũM kuma nẽ ixpê Juãw ã ixto hakêx nẽ ixpê JeJus kràmnhwÿ mex ã ixpumu. Kormã JeJus htyk kêt ri kamãt kãm mẽ ixàpkur o ixkrĩta ã na pa pre tĩhkô hã ixàpkur o nhÿ nẽ kot mẽ kãm õr mã xwÿnhhta nhĩxi hã hkukja. ²¹ Jakamã nhũM Simãw Pêtre ixto hakêx nẽ ixpumu nẽ ixtã JeJus kukja nẽ kãm: —Kwa no pêr pahkõt mõi mÿj? Tanhmã koja we htyk to? Anẽ.

HãMRI nhũM kãm:

²² —Nà kot paj amã tanhmã htyk to hkukamã harênh hkêt nẽ. Kot pa inhmã arĩ kritpêh pa rãhã pa akupÿn ixwrÿk prãm nhũM arĩ pa nẽ htyk kêt rãhã pa akupÿn wrÿ. Kër ka ri htyk kukamã tee ri tanhmã ajamaxpêr to hkêt nẽ. ãm ixkõt pix mã ate amnhĩ nhĩpêx tÿx pix kukamã mãn ajamaxpêr o ri apa.

²³ Anhÿr o kãm ijarênh jakamã nhũM mẽ ixkwÿjaja kot ã ijarênh anhÿrja ã kuma ma nẽ htÿx nhÿrmã ixtyk kêt ã ixkamnhĩx. Nẽ gaa nẽ rĩ piitã axpên mã ã ijarênh anhÿr o pa. Nom na pre ã ijarênh anhÿr kêt nẽ. Na kêt pre ijarênh o:

—Kot pa inhmã arĩ ri kritpêh pa rãhã pa akupÿn ixwrÿk prãm nhũM arĩ pa nẽ htyk kêt rãhã pa akupÿn wrÿ.

Anhÿr o ijarê. Nom ãm hãMRI ixtyk kêt rãhã nhũM akupÿn wrÿk ã ijarênh kêt nẽ.

Juãw kot JeJus kot tanhmã amnhĩ to hã kagà hpar kêt ã kot amnhĩ jarênh

Juãw 20.30-31

²⁴ E na pa mẽ amã JeJus kot tanhmã amnhĩ nhĩpêx to ho pa hã harê nẽ hã kagà. Ixpê hkõt ri ixpa ho ixpa xwÿnhjê hõ na pa ãm hãMRI ã hã kagà anẽ. Ka mẽ kamã harê nẽ ama nẽ ãm hãMRI ixte kagà nhĩpêx kêt ixpumunh mex kurê kumrêx. ²⁵ No na pre JeJus ãm ja pix o anhÿr o pa hkêt nẽ. Na pa ãm mẽ amã hkwÿ pix jarê nẽ hã kagà. Na pre tanhmã ri mẽmoj to rax kumrêx o ri pa. Nom kêp ãm ixte kot tanhmã ri amnhĩ nhĩpêx to piitã hã kagà hpar ronhÿx hã kagàja katutxõ rax kumrêx. Jao te ra kaxkwa htêp o mõi pyrãk.

Tã ãm ja pix. Na hapêx.

Atre

Rukre na pre kagàja nhìpêx. Na pre kèp tôtô nê hkwyjê kane ho pa. Nê Jejus nhỹ hã mẽ ahkre ho pa xwýnh pê Pawre kôt pa ho pa. Hãmri nê hamaxpêr nê hkràmnhwýr Teopre mã kagàja nhìpêx nê hwýr kumê. Nê kagàja kamã Jejus nhỹ hã mẽ ahkre ho mẽ pa xwýnh maatijaja kot Jejus mýr pê tanhmã amnhĩ nhìpêx to ho pa hã mẽ harê.

Nê Ijaew nhõ patrejaja nê mẽ hkwy pê Parijew nhõ xwýnhjaja nê mẽ hkwy pê Satusew nhõ xwýnhjaja kot Tirtùm kapêr ã kagà htùm kamã harênh nê mar nê hkôt amnhĩ nhìpêx tã Tirtùm Kra Jejus kôt amnhĩ nhìpêx kêt ã mẽ harê. Mẽ kot kèp Tirtùm Kra hkêt ã hkamnhix jakamã na prem kãm mẽ kot hkôt amnhĩ xunhwýr xwýnhjê kurê nê. Tã nhùm Simãw Pêtre mẽ Pawre mẽ Jejus nhỹ hã mẽ ahkre ho mẽ pa xwýnh kwýjaja mẽ urak nê kèp Ijaew tã mẽ kurom Jejus hkôt amnhĩ xunhwýr nhùm mẽ tee ri ja hã mẽ omu mẽ kamã gryk tỳx nê tanhmã mẽ hipêx to ho pa. Tã nom nhùm mẽ tee ri amnhĩ kukamã hamaxpêr nê Jejus kaga hkêt nê. Mẽ kot mẽ hipêx kati htã na prem arĩ Tirtùm Karõ nhỹ hã mẽ piitã mẽ kãm tanhmã Jejus kot mẽ panê amnhĩ nhìpêx to hã harênh o pa. Kam nê kapit 1 kamã wesik 8 japêr nê kamã harê. Hãmri nhùm Rukre ã mẽ kot amnhĩ nhìpêx anhýrja piitã hã kagà nê Teopre hwýr kumê. Nê kãm mẽ harênh o:

Tirtùm Karõ jarênh

Matêwre 28.16; Makre 16.14; Rukre 24.36; Juãw 20.19

1 Pa Teopre? Xà amex? E ot pa axte awýr kagà nhìpêx nê kumê. Nà wam ixte awýr kagà nhìpêx nê mênhta kamã na pa pre amã Jejus kot tanhmã amnhĩ nhìpêx to hã harê nê hã kagà. Kot tanhmã amnhĩ nhìpêx to ho pa nê tanhmã mẽ ahkre hto ho paja krax rùm pa pre piitã hã kagà hpa nê awýr kumê. ² Kormã akupým kaxkwa hwýr àpir xwýj ri na pre ý hã mẽ ahkre ho pa kaxyw hkôt mẽ pa xwýnh kwýjê rê. Tã nhùm mẽ kãm hkurê xwýnhjaja kupĩ nhùm amnhĩ xà htỳx kãm hamak rax kãm ty. Hãmri nhùm Tirtùm akupým ho htír. Nom nhùm ma akupým kaxkwa hwýr àpir kurê kumrêx kêt nê. Na pre xatã mẽ kot ý hã mẽ ahkre ho mẽ pa xwýnh maatijê hwýr hapôj nhùm mẽ akupým htír kãm omu. Na pre hte nhýri mẽ hwýr hapôj nê tanhmã mẽ ahkre hto nê mẽ kãm:

—Na pre Tirtùm mẽ ato hkra nê tãm mẽ ate amnhĩ nhìpêx o apa kaxyw mẽ axunhwý.

Anhýr o mẽ ahkre hã arĩgro ho 40. Hãmri nê kormã mẽ kamã pa ri axte tanhmã mẽ kãm kapêr to. Tirtùm Karõ nhỹ hã mẽ kãm kapêr nê mẽ kãm:

—E kèr ka mẽ krĩ ja kamã ri apa nê tokyx ma nhỹhým apa hkêt nê. Kê Inhìpêxà Tirtùm mẽ awýr amnhĩ Karõ rê mãn. Ra ixte mẽ amã harênh xà hkôt koja mẽ awýr kurê nhùm mẽ awýr wrý nê mẽ akarõ mã agjê ka mẽ rĩ kormã anhgrà nê ma nhỹhým krĩ hkôt ri mẽ kãm kapêr jarênh o ri mẽ hkôt apa.

⁵ —Juãw Paxis na pre hte Tirtùm mã gôx kãm mẽ hkrã kumrãr o pa. Tã koja Tirtùm tokyx mẽ awýr amnhĩ Karõ rê. Kot ixpãnhã amnhĩ kaxyw mẽ ato mẽ amã ma hkêt kaxyw mẽ awýr kurê. Koja hã apkati grêre nhùm mẽ awýr kurê nhùm ixpãnhã mẽ awýr wrý nê mẽ amã agjê nê mẽ akamã mẽ akôt pa ho pa. Ka mẽ rĩ kormã

Jerujarê rùm ajapôj nê ma mẽ kãm Tirtùm kapêr jarênh o ri mẽ hkôt apa. Anê.

Jejus akupým kaxkwa hwýr àpir ã harênh

Makre 16.19; Rukre 24.50

⁶ Tã nhùm mẽ axte akuprõ. Jejus nê ý hã mẽ ahkre ho mẽ pa xwýnh maatijaja nhùm mẽ hixêt pê Oriwêhti nhĩmõk ã axte axpên wýr akuprõ. Hãmri nhùm mẽ amnhĩ tã Jejus kukja nê kãm:

—Kwa Pahihti mẽ inhmã mẽmoj jarê. Xà kot kaj tokyx apê Tirtùm kot mẽ ixwýr amênh xwýnh ã amnhĩ jarê nê Rõm nhõ xwýnhjê nê mẽ pahpê Ijaew kator nà? Hãmri pa mẽ pamjaja amnhĩ to amnhĩptàr o ri ixpa. Anê.

⁷ Hãmri nhùm mẽ kãm:

—Nà Inhìpêxà pix na ã mẽmoj kot anhýrja kukamã àhpumunh. Tapxipix na kot mẽmoj tanhmã ho hã arĩgro nê mẽmoj tanhmã ho hã mytwrý pumunh mex. No mẽ kajaja mo kaxyw kot ka mẽ amnhĩ katorta kukamã amnhĩ jarênh ma? ⁸ Nà kot paj ãm mẽ amã mẽmoj to pyxire nê hkukamã harê. Koja Tirtùm tokyx mẽ awýr amnhĩ Karõ rê nhùm ixpãnhã kot mẽ ato amnhĩptàr kaxyw mẽ akarõ mã agjê. Hãmri ka mẽ ma pyka piitã hkôt anhgrà nê ma mẽ kãm ixkapêr jarênh o ri mẽ hkôt apa. Jar Jerujarê kamã nê pika pê Jutej kôt nê nhãm pika pê Samar kamã nê pika piitã hkôt mẽ kãm ijarênh o ri mẽ hkôt apa. ã mẽ ate amnhĩ nhìpêx anhýr pix kukamã kot paj mẽ amã harê. Anê.

⁹ Nhùm pre ã Jejus mẽ kãm kapêr anê hãmri nê mẽ kèp kànhmã àpir o tẽ nê mẽ noo mã ma kaxkwa hwýr àpir o tẽ nê kakrãm axà nê mẽ kèp akunok. ¹⁰ Hãmri nhùm mẽ tee ri hapêr o kuhê rãhã nhùm mēhõ myja wa axkrut nê mẽ hwýr wrý nê mẽ kutã wa xa. Wa ê hakaj nê wa xa. ¹¹ Hãmri nê mẽ kãm:

—Pa Garirej nhõ xwýnhjaja? Kwa mo kaxyw na ka mẽ tee ri kaxkwa pumunh o akuhê? Tirtùm na akupým

amnhĩ wỳr Kra Jejus o api ka mẽ àpir kãm omu. E mẽ tee ri hkukamã ajamaxpěr kêt nẽ. Koja nhỹrmã man akupỳn mẽ awỳr wrỳ. Te mẽ arũm kaxkwa hwỳr àpirja pyrà nẽ akupỳn mẽ awỳr wrỳ ka mẽ omu. Anẽ.

Akupỳm Jerujarẽ hwỳr mẽ mrar ã mẽ harẽnh

Rukre 24.52

¹² Tã nhũm Jejus nhỹ hã mẽ ahkre ho mẽ pa xwỳnh maatiijaja wa kuma nẽ awjanã nẽ ma akupỳm krĩm mra. Hixết pẽ Oriwẽhti rũm ma akupỳm Jerujarẽ hwỳr mra. Wỳr jawỳ nhũm mẽ akupỳm hpõx tokyx anẽ.

¹³ Hãmri nẽ akupỳm kỳx pẽ ixkreja wỳr api nẽ agjẽ. Na pre

Simãw Pêtre nẽ

Juãw nẽ

Xiakre nẽ

Andrehti nẽ

Firipti nẽ

Tomas nẽ

Patoromew nẽ

Matêwre nẽ

Xiakre hõ pẽ Apew kraja nẽ

Simãw Jerox nẽ

Jut pẽ Xiakre hkraja.

Mẽ piitã Jejus nhỹ hã mẽ ahkre ho mẽ pa xwỳnh maatiijaja na pre mẽ. ¹⁴ Nẽ mãânẽn mẽ hkõt mẽ hkwyjaja. Jejus katorxà Marir nẽ Jejus tøjaja nẽ Jejus kot tanhmã mẽni ho mex to xwỳnh kwỳjaja nhũm prem kỳx pẽ ixkreja wỳr Jejus nhỹ hã mẽ ahkre ho mẽ pa xwỳnh maatiijẽ hkõt gjẽx pa. Hãmri nẽ xatã axpẽn wỳr akuprõ nẽ Tirtũm mã amnhĩ jarẽnh o hkrĩ.

Tirtũm kot Jut Kariot pãnhã mẽhõ xãm ã harẽnh

Matêwre 27.3-10; Juãw 15.27

¹⁵ Tã nhũm mẽ kot Jejus kõt amnhĩ xunhwỳr xwỳnhjaja ra kệp 120. Jakamã nhũm mẽmo arĩgro hã axpẽn wỳr akuprõ nẽ hkrĩ. Nhũm Simãw Pêtre kãnhmã xa nẽ tanhmã mẽ kãm Jut Kariot jarẽnh to nẽ mẽ kãm:

—E Jejus kõt ixtõ nẽ ixtõxjaja. Pa mẽ amã tanhmã finat Jut Kariot jarẽnh to ka mẽ inhma. Na pre axtem nẽ mẽ pahkwỳjẽ mã Jejus ã amỳnẽ nẽ hpãnhã kàxpore hkwy jamỳ nẽ o tẽ nẽ ho amnhĩm pyka hkwy japrõ. Tã tanhmã amnhĩ to nẽ nhỹri õ pyka kamã tẽm nẽ amnhĩ tu katõk nẽ hkrêx kato nẽ ty nẽ hkamrõ ho õ pyka xy hpa. Jakamã nhũm Jerujarẽ nhõ xwỳnhjaja harẽnh ma nẽ pykaja ã hixi mẽ nhũm kệp “pyka kamrõhti.” No mẽ pahpẽ Ijaew kapěr kãm kệp “Ajetãm.” Amnepêm na pre Tirtũm Karõ finat Tawi mã Jut Kariot kukamã tanhmã harẽnh to. Kormã kator nẽ kot tanhmã amnhĩ to hkõt tã nhũm ra hkukamã omu nẽ Tawi mã harẽ. Kot axtem nẽ mẽ kãm Jejus ã àmnẽnhja nhũm hkukamã omu nẽ Tawi mã harẽ nhũm kuma nẽ ô ri hã kagà. Tã nhũm kot hkukamã hã kagà hkõt nhũm ã Jejus nhĩpêx anẽ. Jut Kariotja mẽ panhĩõ na pre. Na pre Jejus mẽ pahpyrà nẽ amnhĩm kuta. Mẽ pahpyrà nẽ ý hã kapěr jarẽnh o pa kaxyw. Tã nhũm axtem nẽ ã hipêx anẽ.

²⁰ Nom na pre Tawi kot Tirtũm mex ã grer ã kagà kot ra hkukamã tanhmã harẽnh to. Kagà hkwy pẽ Sam kamã kot harẽnh kot:

Kot amnhĩ tomnuj xwỳnhnta nhõrkwỳ koja hkaprỳn kuhẽ ho kuhẽ nhũm mẽhõj mỳr pẽ kamã pa hkõt kumrêx. Koja ãm arĩ hkaprỳn kuhẽ ho kuhẽ.

Nom kot Jejus mã tanhmã amnhĩ nhĩpêx to ho paja kẽ mẽhõ mỳr pẽ ho amnhĩptã nẽ hpãnhã Jejus nhỹ hã mẽ ahkre ho pa. Anẽ.

À Tirtũm kapěr ã kagà htũm kot Jut Kariot kukamã harẽnh kot anhỹr. ²¹ Jakamã e ixkwỳjaja. Kot puj mẽ hpãnhã mẽ atõ xãm ka Jut mỳr pẽ mẽ pahpẽ Jejus nhỹ hã mẽ ahkre ho ixpa xwỳnhjẽ hkõt Jejus akupỳm htĩr ã harẽnh o apa. ²² E mẽ atõ na ka pre mẽ ixpyràn finat Juãw Paxis kot Jejus hkrã kumrãr ã omu? Nẽ Jejus kot ri tanhmã amnhĩ nhĩpêx to ho pa xà hkax rũm ka mẽ ixkõt ri omunh o ri apa? Nẽ htyk kãm omu nẽ akupỳm htĩr kãm omu nẽ ma akupỳm kaxkwa hwỳr àpir kãm omu? E mẽ atõ na ka pre mẽ ixpyràn ã kot amnhĩ nhĩpêx anhỹr ã omunh par o ri hkõt apa? ã mẽ ate kot amnhĩ nhĩpêx anhỹr ã omunh o apa xwỳnhjẽ hõ kot paj mẽ ata ka Jut Kariot mỳr pẽ mẽ ixpyràn ma mẽ kãm Jejus akupỳm htĩr ã harẽnh o ri apa. Anẽ.

²³ Nhũm pre ã Simãw Pêtre mẽ kãm kapěr anẽ. Hãmri nhũm mẽ kuma nẽ axpẽn pumunh o hkrĩ hãmri nẽ Maxitre mẽ Jujere wa kãm hamaxpěr. Jujere na pre hixi axkrunẽpxi. Na pre kệp Jujere nẽ kệp Pasapas nẽ kệp Justi. ²⁴ Hãmri nhũm mẽ wa hã Tirtũm kukja nẽ kãm:

—Pa Tirtũm? Nà na pre finat Jut Kariotja Jejus kaga nẽ ty nẽ kot amnhĩ tomnuj mỳrapê ma mẽ kot amnhĩ xà htỳx kamã hamak tũm xàta wỳr ma mõ. Tã ot pa mẽ ixte mẽhõ kot mỳr pẽ mẽ ixpyrà nẽ Jejus nhỹ hã mẽ ahkre ho pa kaxyw mẽhõ hã akukjêr kaxyw akuprõ. Ate mẽ ixpiitã tanhmã mẽ ixte amnhĩ nhĩpêx to ho ixpa hã mẽ ixpumunh par Tirtũm. Ate mẽ ijamaxpěr kõt mẽ ixpumunh par nẽ mẽ ixte tanhmã amnhĩ nhĩpêx to hã mẽ ixpumunh par. Jakamã e. Ota Maxitre mẽ Jujereja wa nhỹ. Nhỹ kot kaj amnhĩm ata? Kot paj mẽ kẽn pijakrutja ã wa hixi xi nẽ ho àk nẽ hõ py. Hãmri ka amã hprãm xwỳnhnta ta. Kêr pa mẽ kẽn pumunh kêt rãhã hõ py nẽ hã hixi pumu nẽ amã hprãm xwỳnh kõt omunh kurê kumrêx. Anẽ.

²⁶ Nhũm prem ã Tirtũm mã kapěr anẽ hãmri nẽ kẽnja o axkamur nẽ ho àk nẽ omunh kêt rãhã ja py nẽ omu nhũm hã Maxitre nhĩxi nõ. Jakamã nhũm Jejus nhỹ hã mẽ ahkre ho mẽ pa xwỳnh maatiijaja amnhĩ kõt kumẽ nhũm mẽ akupỳm kệp 12.

Tirtũm Karõ kot mẽ hwỳr wrỳk ã harẽnh

Rukre 24.49; Atre 4.31, 8.15, 10.44, 19.2

2 Tã nhũm mẽ hkĩnh pẽ Pêtekos kato nhũm mẽ kot Jejus kõt amnhĩ xunhwỳr xwỳnhjaja nhỹri axpẽn wỳr akuprõ nẽ hã hkĩnh. Pêtekosja ã na pre hte Ijaew mẽ hpur kãm mẽõ rũnh ã hkĩnh kaxyw axpẽn wỳr akuprõ nẽ hã hkĩnh. Jakamã nhũm mẽ kot Jejus kõt amnhĩ xunhwỳr xwỳnhjaja haxwỳja axpẽn wỳr akuprõ. ² Hãmri nẽ kaxkwa kamã mẽmoj ma. Nhũm mẽmoj te kõt xàpêr tỳx krihkrit pyràk o mẽ hwỳr wrỳk o mõ nẽ

mě pikuprõnh xà hã ixkreja wÿr axà nhũm mẽ piitã ku-ma. ³ HãMRI nhũm mẽmoj te kuwy jakrax pyrãkja ahpÿnhã mẽ hwÿr anhrã nẽ mẽ hkrã nhĩmõk ã hikwÿ. ⁴ Tĩrtũm Karõ na pre. Tãm mẽ hwÿr wrÿk jakamã ã ri mẽ hipêx anẽ. HãMRI nẽ kot mẽ ho amnhĩptãr kaxyw mẽ hkarõm gjêx pa nhũm mẽ ý hã tanhmã kapêr to ho kuhê. Nom mẽ kapêr o kapêr kêt nẽ. Axtem mẽ kapêr kwÿ ho kapêr. Tĩrtũm Karõ kot tanhmã mẽ ho jakamã nhũm mẽ axtem mẽ kapêr kwÿ ho kapêr. Jao ahpÿnhã mẽ kapêr kwÿ ho Tĩrtũm mã mex o mex ã harẽ. Na pre Ijaew kwÿjaja ahpÿnhã pyka hõ kamã ri mẽ hkõt pa nẽ mẽ kapêr ma nẽ ho kapêr o pa. Tã akupÿm Jerujarẽ hwÿr pan pøj nẽ kamã ri pa ho pa. HãMRI nẽ mẽmojta ma nẽ ma Jejus kwÿjê hwÿr hprõt nẽ ahpÿnhã mẽ kapêr ã mẽ kuma nẽ tee ri mẽ omunh o kuhê. Amnhĩ jaêr pẽ mẽ kuma nẽ tanhmã axpẽn mã mẽ harênh to ho:

—Kokÿÿ. Garirej nhõ xwÿnhjaja kot mẽ pakapêr mar kêt tã ra tanhmã amnhĩ to nẽ ahpÿnhã ri mẽ pakapêr o kapêr. Ahpÿnhã mẽ pakapêr nẽ ahpÿnhã mẽ panhõ pyka htã nhũm mẽ ã ri mẽ pakapêr o kapêr anẽ.

Na pika pẽ Pat
nẽ Met
nẽ Erãw
nẽ Mêsopotãm
nẽ Jutej
nẽ Kapatos
nẽ Põt
nẽ As
nẽ Prik
nẽ Pãpir
nẽ Ejit
nẽ Sirẽn wÿr Ripja
nẽ krĩ pẽ Rõm
nẽ gõ hipõk pẽ Kret
nẽ Arap.

Nẽ mẽ pahkwÿjaja mẽ pahpê Ijaew kumrêx
nẽ mẽ pahkwÿjaja amarĩ ri amnhĩ to Ijaew.
ãm ahpÿnhã mẽ panhõ pyka nẽ ahpÿnhã ri mẽ pakapêr.

—Tã pu mẽ ahpÿnhã mẽ pakapêr kãm mẽ kapêr ma. Tĩrtũm mex ã mẽ kot axpẽn mã harênhja pu mẽ hã mẽ mar mex nẽ. Anẽ.

Nhũm prem ã axpẽn mã mẽ harênh anẽ nẽ tee ri mẽ omunh o kuhê. Amnhĩ jaêr pẽ amnhĩ kapêr kãm mẽ kapêr ma nẽ tee ri hamaxpêr nẽ axpẽn mã:

—Kokÿÿ. Tanhmã mãn pre wem amnhĩ to nẽ ra mẽ pakapêr ma nẽ mẽ pakapêr o kapêr? Anẽ.

Nhũm mẽ hkwÿjaja axtem nẽ ri mẽ hã hpêr o axkê nẽ axpẽn mã:

—Tk. ãm mẽ pipãnh ã ã ri mẽ kot amnhĩ nhĩpêx anhÿr kênã. Anẽ.

Simãw Pêtre kot mẽ kãm ujarênh

Atre 3.12-26

¹⁴ HãMRI nhũm Simãw Pêtre ã mẽ kapêr anhÿrja ma hãMRI nẽ kÿx pẽ mẽ kãm kapêr nẽ mẽ kãm:

—E Jerujarẽ nhõ xwÿnhjaja nẽ mẽ apê ixkwÿ Ijaew. Pa mẽ amã mẽmoj jarẽ ka mẽ inhma nẽ inhmar tÿx nẽ. ¹⁵ Na ka mẽ atÿx ri mẽ ixpipãnh ã mẽ ixkamnhĩx. Mẽ ixkrã pipãnh kêt. Kormã myt kaxkwa nhĩpõk wÿr htêm kênã. Na hte Ijaew kwÿhtã kagõxÿhti ho hkõm kêt nẽ. ¹⁶ Ja na pre Tĩrtũm amnepê mã ã mẽ ixte amnhĩ nhĩpêx anhÿrja kukamã mẽ ijarẽ nhũm ý hã kapêr o pa xwÿnh finat Joew mẽ ixkukamã hã kagà. Nẽ hã kagà ho:

¹⁷ Koja nhÿrmã mẽmoj piitã hapêx kaxyw pa mẽ piitã mẽ hwÿr Ixkarõ rẽ nhũm ma mẽ hwÿr wrÿ nẽ mẽ hkarõ mã agjê. HãMRI nhũm mẽ hkanrêhã mẽ hkra xãptãr nywjaja ma mẽ kãm ixkapêr jarênh o ri mẽ hkõt pa. Koja mẽ hpimtir kãm amnhĩ kukamã mẽmoj pumu. Nẽ mẽhpigêtjaja haxwÿja. Kot paj mẽ hpimtir kãm tanhmã mẽ kãm ixkapêr to.

¹⁸ Nẽ kot paj mẽ kot ixkõt ri tanhmã amnhĩ nhĩpêx to ho mẽ pa xwÿnhjê hwÿr Ixkarõ rẽ nhũm mẽ ý hã ma mẽ kãm tanhmã ixkapêr jarênh to ho ri mẽ hkõt pa.

¹⁹ Kot paj kaxkwa kamã nẽ pyka kamã aa mẽ kot mẽmoj pumunh kêt kwÿ ho anẽ nhũm mẽ amnhĩ jaêr pẽ omu. Jao nhÿri mẽ hkamrõ pumu nẽ kuwy kũm pumu hãMRI nẽ tee ri amnhĩ kukamã hamaxpêr.

²⁰ Nẽ koja myyti ahtyk nhũm mytwrÿre haxwÿja te mry kamrõ pyrãk. Pahihti Jejus akupÿn hpõx xà hã arĩgro xwÿj ri koja mẽmoj ã amnhĩ nhĩpêx anẽ. Akupÿn hpõx xà hã arĩgro koja mex kumrêx.

²¹ Tã koja mẽhõ mẽmoj kot ã amnhĩ nhĩpêx anhÿr ã omu nẽ amnhĩ kaxyw inhã hamaxpêr nẽ amnhĩ to ixwÿ pa kuma nẽ ho ixkra nẽ mẽmoj punujta pẽ utã. Anẽ.

Na pre ã Tĩrtũm kapêr anẽ nhũm finat Joewja mẽ pamã hã kagà. ²² E pa mẽ amã tanhmã Jejus jarênh to ka mẽ inhma. Nã Najare nhõ xwÿnh na pre. Mẽ pahte Tĩrtũm nhÿ hã kot tanhmã amnhĩ nhĩpêx to ho pa hã omunh kaxyw na pre Tĩrtũm mẽ pahwÿr kumẽ nhũm ý hã mẽ panoo mã tanhmã amnhĩ nhĩpêx to ho pa. Nẽ aa mẽ pahte mẽmoj pumunh kêt kwÿ ho anhÿr o pa pu prem hã omu.

²³ —Tã ka prem tanhmã kaxyw ajamaxpêr punuj to nẽ apĩ. Tĩrtũm ra kot amnepê mã ja kukamã ja hã mẽ apumunh mex tã mẽ pahwÿr kumẽ ka mẽ axtem nẽ apĩ. Jao mẽ kot htÿx ri amnhĩ nhĩpêx o mẽ pa xwÿnhjê mã agõ nhũm mẽ kupĩ. Pĩ kahpa hã kunhõ nhũm ty. No ãm mẽ kajaja na ka prem mẽ kãm hã amÿnê nhũm mẽ ã mẽ amã hprãm xà hkõt hipêx anẽ nẽ mẽ amã kupĩ.

²⁴ —Tã nhũm Tĩrtũm akupÿm ho htĩr nhũm akupÿm htĩr o htĩr nhũm mẽ htykja tee ri kot amnhĩ kõt mẽnh prãm kaprÿ. ²⁵ Amnepêm na pre finat Tawija Jejus akupÿm htĩr kukamã harẽ. Te Jejus tãm kapêr pyrãk o kapêr nẽ kapêr o:

Na hte Pahi Maati ixkõt pa ho pa rãhã nẽ. Kot inhĩhkõ hã ixtãnopxar o pa jakamã kot paj inhã ma hkêt nẽ ri ixãmnhĩx ijamakêtkati nẽ ri ixpa.

²⁶ Pa Tĩrtũm? Nã kot paj nhÿrmã ixtyk tã arĩ amnhĩ wÿr akãm ama. Kot kaj mẽ htykjê kamã ixkarõ rer kêt nẽ. Ixte akapêr kõt amnhĩ nhĩpêx mex o ri ixpa jakamã

koja inhí kormã omnu nê hkro hkêť ri ka akupým ixto ixtír. Jakamã na pa inhmã ixtyk puma hkêť nê ixkính nê ijamakêtkati nê ri ixpa. Nê amnhí kính jarênh rãhã ho ri ixpa.

²⁸ Na ka pre akupým ixto ixtír ã amnhí jarê pa ixtír tũm nê ixpa ho ixpa kaxyw. Tã ate ixkôt ri apa rãhã jakamã pa ixkính nê ri ixpa. Anê.

²⁹ Æ na pre mē panhīgêť finat Pahi Tawija Jeju htyk nê akupým htír kukamã harênh anê. No tãm amnhí jarênh kêt nê. Tawija na pre ty nhũm mē haxã nhũm htem arí haxãr xã hã pika ho mex o pa. Tã tãm ã kot amnhí jarênh anhýr ro nhýx akupým htír nhũm mē arí haxãr xã kaprý ho mex o pa hkêť nê. ³⁰ Pahi Tawi kêp Tirtũm nhý hã kapêr jarênh o pa xwýnh jakamã nhũm Tirtũm kãm hkanrêhã htãmnhwý Jejuja kukamã harê nê kãm:

Koja nhýrmã akanrêhã atãmnhwýjê hõ amýr pē apyrã nê mē ho amnhíptãr o pa. Æm hãmri na pa amã ja jarê. Anê.

³¹ Nhũm pre ã Tirtũm Tawi mã mē pakaxyw ãm mã xwýnhhta jarênh anê nhũm kuma. Nê mar týx jakamã hkukamã htyk nê akupým htír ã harê nê hã kagã. Nê hã kagã ho:

Koja Tirtũm mē htykjê kamã hkarõ rer kêt nê nhũm aa í omnu nê hkro kêt. Anê.

Æ na pre finat Tawija Jeju Kris kukamã harê nê hã kagã anê. ³² Kot harênh xwýnh Jejuja tãm na pre Tirtũm akupým ho htír pa mē pamjaja akupým htír kãm omu. Hãmri nê mē ixte omunh xã hkôt ã mē amã harênh anê. Anê.

Nhũm pre ã Simãw Pêtre mē kãm Jeju jarênh anê. Hãmri nê mē kãm:

³³ —Na pre Tirtũm akupým amnhí wýr Kra Jeju o api. Hãmri nê kãm anê nhũm íhkô hã mēmoj piitã ho amnhíptãr o hkrí. Hãmri nhũm Tirtũm kot kãm amnhí jarênh xã hkôt kãm amnhí Karõ gõ. Tã nhũm ra amnhí pyrã nê mē ixwýr kurê nhũm jarãhã mē ixwýr te kuwy jakrax pyrã nê mē ixwýr wry nê mē ixkarõ hwýr gjêx pa. Hãmri pa mē ý hã ahpýnhã mē akapêr o ixkapêr ka mē inhma. Tã mē akwýjjaja axtem nê mē xpipãnh ã mē ixkamnhíx. ³⁴ No finat Tawija na pre tãm kaxkwa hwýr àpir ã amnhí jarênh kêt nê. Jeju kot í ho kaxkwa hwýr àpirja na pre harê nê harênh o:

Na pre Tirtũm inhõ Pahihti mã kapêr nê kãm:

³⁵ “E jar inhíhkô hã nhý.

Pa amã mē kãm akurê xwýnhjê gõ ka mē ho amnhíptãr o akrí.” Anê.

Æ na pre finat Tawija Tirtũm kapêr jarênh anê. Nom tãm í rãhã kaxkwa hwýr àpir ã amnhí jarênh kêt nê. Pahihti Jeju na pre ã hã harênh anê. ³⁶ Jakamã kwa ixkwý Ijaew. Mē inhma nê inhmar týx nê. Mē ate Jeju ã axãmnhên nhũm mē kot mē amã pí kahpa hã hpír xwýnhhta. Tãm na pre Tirtũmja kêp mē panhõ Pahihti kaxyw ãm. Nê kêp mē papytãr xwýnh kaxyw mē pakaxyw ãm. Anê.

³⁷ Nhũm pre ã Simãw Pêtre mē kãm ujarênh anhýr o xa. Hãmri nhũm mē tee ri ujarênhja ma nê hkaprí nê. Nê tee ri amnhí kukamã hamaxpêr nê hamaxpêr o:

—Hêxta waa nê. Pêr ãm hãmri na pre Jeju mē pamã amnhí jarênh tã pu prem amnhí kaxyw hkôt pajamaxpêr kêt nê axtem nê kupí. Anê.

Hãmri nê amnhí tã mē hkukja nê Simãw Pêtre mã:

—Kwa ã kot anhýr jakamã tanhmã kot paj mē amnhí nhípêx to? Anê.

³⁸ Hãmri nhũm mē kãm:

—Nã kêr ka mē tee ri ate amnhí tomnuj mã ajamaxpêr nê akaprí nê. Hãmri nê Jeju Kris kôt amnhí xunhwý. Pa mē ja hã mē apumu nê Jeju nhý hã mē akrã kumrã. Hãmri nhũm Tirtũm ja hã mē apumu nê te amnhí katut kôt mē ate amnhí tomnuj piitã rênh par pyrã nê axte kãm hamaxpêr kêt nê. Hãmri nê mē ixkuxwar mē awýr amnhí Karõ rē. ³⁹ Kãm mē awýr rênh prãm. Mē amã nê mē akanrêhã mē akra nê mē atãmnhwýjê mã nê mē kot kormã Tirtũm kapêr mar kêt xwýnhjê mã. Æm mē kot amnhí to hwýr xwýnh piitã nhũm kãm mē hwýr rênh prãm. Anê.

⁴⁰ Nhũm pre ã Simãw Pêtre mē kãm ujarênh anê. Mē kãm kapêr xihtýx o kapêr ry nê. Hãmri nê mē kãm:

—Koja nhýrmã Tirtũm mē kot tanhmã amnhí tomnuj to ho mē pa xwýnhjaja tanhmã mē homnuj týx to. Jakamã kwa mē tokyx mē ate amnhí tomnuj kaga kê tanhmã mē ato hkêť nê. Anê.

⁴¹ Hãmri nhũm mē hkwyjjaja kapêr mar týx nê amnhí kaxyw Jeju kôt hamaxpêr nê hkôt amnhí xunhwý. Mē ohtô rax nê hkôt amnhí xunhwý. Mē kêp 3.000 nê hkôt amnhí xunhwý. Hãmri nhũm mē kot Jeju nhý hã kapêr jarênh o mē pa xwýnhjaja mē hkrã kumrãr pa. Mē kêp Jeju kwý hã amnhí to amnhírit kaxyw mē hkrã kumrãr pa. ⁴² Hãmri nhũm mē ra mē kot Jeju kôt amnhí nhípêx xwýnhjê hkôt amnhí nhípêx o pa nhũm Jeju nhý hã mē ahkre xwýnh maatijaja apkati mē Jeju kapêr o mē ahkre nhũm mē mar týx nê ra Jeju kôt amnhí nhípêx mex o mō. Nê gaa nê hkôt amnhí nhípêx mex o pa. Mē kãm kapêr mar prãm týx jakamã na pre htem axpên wýr akuprõ nê axpên kutã apku nê Tirtũm mã amnhí jarênh o hkrí. Nê mē kãm axpên to mex pix prãm o axpên kôt pa ho pa.

Jeju kwý kot tanhmã amnhí nhípêx to hã mē harênh
Atre 4.32-35

⁴³ Tã nhũm Jeju nhý hã mē ahkre ho mē pa xwýnh maatijaja xatã Tirtũm nhý hã aa mē kot mēmoj pumunh kêt kwý ho anhýr o ri krí nhõ xwýnhjê hkôt pa nhũm mē piitã ja hã mē omu. Amnhí jaêr pē mē omu nê mē kamã no puma ho tee ri tanhmã Tirtũm mã hamaxpêr to. ⁴⁴ Nhũm mē kot Jeju kôt amnhí xunhwýr xwýnh piitã mēmoj to axpên kutã nojarêť o pa. Jao axpên pē ri mēmoj to õxy hkêť nê pa. ⁴⁵ Jakamã nhũm mēhõ kêp amrakati nhũm mē ja hã omu hãmri nê õ pyka hkwy ho wênê rý mē hikukrêx kwý ho wênê nê kãxpore jamý nê ma o mra nê mē kãm kugõ. Na pre hte ã mē kot Jeju kôt amnhí xunhwýr xwýnhjaja axpên nhípêx anhýr o pa. ⁴⁶ Hãmri nê apkati mē Tirtũm mã amnhí jarênh xã hã ixkre hwýr mra nê kãm mex o mex ã harê. Nê hamakêtkati nê ãmnhíx ri hkính kãm axpên nhõrkwy hkôt ri apkur o pa. ⁴⁷ Pê Tirtũm

mã mex o mex ã harënh o ri axpën kôt pa. Æ mẽ kot amnhĩ nhĩpëx anhÿr o pa jakamã nhũm krĩ nhõ xwÿnh piitã kãm mẽ hkĩnh nẽ. Nẽ mẽ hkwÿjaja apkati mẽ mẽ hwÿr mra nẽ mẽ hkôt axkamẽ nẽ mẽ uräk nẽ Jesus kôt amnhĩ xunhwÿ nhũm Tirtũm ja hã mẽ omu nẽ mẽ ho hkra. Jakamã nhũm mẽ ra ohtô rax kumrëx o mõ.

Te grà xwÿnh jarënh

Juãw 14.12-14; Atre 14.8-10

3 Tã nhũm apkati hõ hã nhũm Simãw Pêtre mẽ Juãw wa ma Tirtũm mã amnhĩ jarënh xà hã ixkre hwÿr wa tẽ. Na pre hte myt àhpanh grire nhũm mẽ piitã kot Tirtũm mã amnhĩ jarënh kaxyw hwÿr mra. Jakamã nhũm Simãw Pêtre mẽ Juãw wa haxwÿja ma hwÿr wa mra. ² Nhũm mēhõja hakwakrem hkrĩ. Katorxà nhõxà hkre rũm hte grà nẽ kator xwÿnh. Nẽ arĩ hkrĩ ho hkrĩ nẽ aa kànhmã ãm nẽ ri pa hkêt nẽ. Nhũm hte hkràmnhwÿjaja apkati mẽ hamÿ nẽ ma o pa nẽ Tirtũm mã amnhĩ jarënh xà hã ixkre jakwakrem hkrĩ nhũm mẽ hwÿr o hkrĩ. Hakwakreja mẽ kot kãm: “Mẽ gjêx xà mex” anhÿr xwÿnh. Kapem hwÿr mẽ mrar xwÿnhjê hwÿr o hkrĩ. ³ Tã nhũm Simãw Pêtre mẽ Juãw wa tẽ nẽ ixkreja wÿr wa àr o tẽ nhũm hte grà xwÿnh. Tã wa omu nẽ kàxpore hã wa kuwÿ ⁴ nhũm Simãw Pêtre omu nẽ kãm:

—E amnẽ wa ixpumu. Anẽ.

⁵ Hãmri nhũm kuma nẽ htÿx ho wa kot kãm kàxpore hkwy nhõr ã wa hkamnhix nẽ wa omu ⁶ nhũm Simãw Pêtre kãm:

—Nà ixkàxpore hkêt. Nom kot paj Jesus Kris xàhpumunh xà ho tanhmã anhĩpëx to. E pa Jesus Kris pẽ Najare nhõ xwÿnh. Nã nhỹ hã amã ixkapër jakamã tokyx kànhmã xa nẽ ri mra. Anẽ.

⁷ Hãmri nẽ upòk rũm hpa hã kupy nẽ kànhmã ãm nhũm hte mex nẽ kànhmã xa nẽ amnhĩ te karo ho ri mra. ⁸ Hãmri nẽ hte mex ã amnhĩ pumu nẽ hkĩnh tÿx nẽ. Nẽ hkĩnh xaj ma wa hkôt harĩ ho tẽ nẽ wa hkôt ixkre axà. Tirtũm mã mex o mex ã harënh pẽ harĩ ho wa hkôt tẽn axà. ⁹ Hãmri nhũm mẽ piitã amnhĩ jaër pẽ akupÿm mex ã omu nẽ kamã no puma nẽ. ¹⁰ Nẽ axpën mã:

—Kokÿ mÿjti na pre hte mẽ gjêx xà mex kamã mẽ hwÿr rãhã ho hkrĩ htã nhũm Tirtũm tanhmã ho nhũm kànhmã xa nẽ ri mrar mex kurẽ kumrëx. Hêxta waa nẽ. Anẽ.

Simãw Pêtre kot mẽ kãm ujarënh

Rukre 24.46-47; Atre 2.14-36

¹¹ Hãmri nhũm hte mex xwÿnhja Simãw Pêtre mẽ Juãw wa hkôt ixkre hwÿr axà nẽ wa kuri xa. Nhũm mẽ piitã amnhĩ jaër pẽ harënh ma nẽ hwÿr hprõt nẽ agjê nẽ omu. Mẽ kot ixkre nhĩkjê jarënh o: “Pahi Sarumãw nhõ” anhÿr xwÿnh jarënhja wÿr nhũm mẽ hprõt nẽ hte mex xwÿnh. Tã kamã no puma no kuhê. Nẽ kuri Simãw Pêtre mẽ Juãw wa omu nẽ axpën mã wa harënh o:

—Hêxta waa nẽ. Tanhmã na we wa amnhĩ to nẽ akupÿm kãm hte ho mex nhũm ri mra?

Anẽ nẽ wa kamã no puma nẽ. ¹² Hãmri nhũm Simãw Pêtre mẽ kuma nẽ mẽ kãm:

—Pa ixkwÿjaja. Kwa mẽmo na ka mẽ ri mẽ ixkamã ano puma ho akuhê? Xà wa ixàhpumunh tÿx xà ho na pa wa ho mex? Nà ja kot anhÿr kêt. Rÿ xà wa ixte Tirtũm kôt amnhĩ nhĩpëx mex o ixpaja o na pa wa ho mex? Nà mãänën ja kot anhÿr kêt. ¹³ Mẽ ate omunh xwÿnh. Tã Jesus tãm kot ho mex kênã. Kot amnhĩ kaxyw kãm hamaxpër tÿx jakamã nhũm akupÿm ho mex ka mẽ omu.

—Finat Apraãw nẽ Ijak nẽ Jako mẽ hkwyjaja kot hkôt amnhĩ nhĩpëx o pa xwÿnh pẽ Tirtũmja. Tãm na pre akupÿm Kra Jesus o htĩr nẽ mex o mex ã harẽ. Mẽ ate hã axàmnhën nhũm mẽ kot hpĩr xwÿnh. Tã Pahihti Pirat kot kãm urer kaxyw tã ka mẽ nẽ kãm akapër kãm axihtÿx nẽ. Nom Jesus tãm kot amnhĩ nhĩpëx o pa xwÿnh na pre. Na pre hte amnhĩ nhĩpëx mex rãhã ho pa htã ka mẽ axtem nẽ hkaga. Nhũm pahihti Pirat mẽ ate kot kãm urer kêt ã axihtÿx nhũm kãm urer kêt nẽ õ pòristi mã kugõ nhũm mẽ amã kupĩ. Mẽ kajaja mẽ amã hprãm xà hkôt mẽ amã kupĩ. Tirtũm kot mẽ pahwÿr mēnh tã ka mẽ axtem nẽ apĩ.

—Nom mẽ ate kęp Tirtũm Kra hã omunh kêt jakamã na ka prem ã hipëx anẽ. Mẽ kot mẽ ato amnhĩptar xwÿnhjê mẽ na ka prem amarĩ apĩ. Na prem mẽ axàmnhën xà hkôt mẽ amã pĩ kahpa hã kunhõ nẽ ã hpĩr anẽ. Kęp akupÿm mẽ pahto mẽ pahĩr xwÿnh tã ka prem axtem nẽ apĩ. No nhũm Tirtũm akupÿm ho htĩr pa prem akupÿm htĩr kãm omu.

¹⁸ —Amnepêm Tirtũm nhỹ hã kapër jarënh o mẽ pa xwÿnhjaja na prem Tirtũm kot mẽ pakaxyw ãm xwÿnhja kukamã tanhmã harënh to nẽ hã kagà nẽ mẽ kãm harënh o pa. Kot amnhĩ xà htÿx kãm hamak kãm htykja kukamã nhũm pre htem harënh o pa. Tã ã Tirtũm kot kukamã harënh anhÿr xaja kôt ka mẽ ã hipëx anẽ nẽ apĩ.

¹⁹ —Jakamã kwa mẽ tee ri mẽ ate amnhĩ tomnuj ã amnhĩ pumu nẽ tokyx hkaga. Hãmri nẽ amnhĩ to Tirtũm wÿ kẽ mẽ anẽ mẽ ate amnhĩ tomnuj piitã amnhĩ katut kôt rënh pa. ²⁰ Hãmri nẽ mẽ ato mex nẽ ka mẽ kukwak ri akĩnh nẽ ajamakêtkati nẽ axàmnhix ri apa. Kojã nhỹrmã akupÿn mẽ pahwÿr Jesus mẽ. Ra kot mẽ pakaxyw ãm kênã.

²¹ —Nom koja tokyx akupÿn wrÿk kêt nẽ. Kojã kormã kaxkwa kamã pa rãhã nhũm Tirtũm akupÿm kot mẽmoj piitã ho mex par mẽ nhũm rĩ kormã akupÿn mẽ pahwÿr wrÿ. Amnepêm Tirtũm nhỹ hã kapër jarënh o pa xwÿnhjaja kot ja kukamã harënh nẽ hã kagà xà hkôt.

²² —Na pre finat Mojes haxwÿja Tirtũm nhỹ hã mẽ pahpãmjê mã tanhmã ja jarënh to nẽ harënh o:

Kojã nhỹrmã mẽ panhõ Pahi Maati Tirtũmja te kot ra mẽ akaxyw pa ixãmja pyrã nẽ axte mẽ panhĩõ xãm. Mẽ panhĩõ koja. Kojã nhỹrmã inhmÿr pẽ mōn pōj nẽ mẽ amã Tirtũm kapër jarënh o pa. Ka mẽ kapër ma nẽ mar tÿx nẽ kapër kôt amnhĩ nhĩpëx o ri apa.

²³ Kojã mēhō kuma nē ãm kuma nē hkôt amnhī nhīpēx kēt nē nhūm Tirtūm tee ri ja hã omu nē kēp hkra hkēt ã harēnh kurē kumrēx. Anē.

²⁴ Æ na pre finat Mojesja mē kãm Jejus kukamã ujarēnh anē. No ãm tapxipix na pre ã harēnh anhūr kēt nē. Tirtūm nhỹ hã mē kapēr o mē pa xwýnh piitã na prem ã mē kãm harēnh anhūr o pa. Kot harēnh o pa xwýnh kot wa finat Sãmuewja nē hkôt mē hkwýjē piitã ã Jejus kukamã hkwýjē mã harēnh anhūr o pa.

²⁵ —Tã mē pahpē mē hkamrō hkwý na pu mē. Mē pahpē mē hkanrēhã mē htãmnhwýy. Mē pakaxyw na pre Tirtūm ã mē kãm kapēr anē. Nē Kraja kukamã finat Apraãw mã kãm:

Koja nhỹrmã akanrēhã atãmnhwýjē hō pyka piitã hkôt mē piitã mē ho mex o pa nhūm mē kukwak ri mex kumrēx nē ri pa. Anē.

²⁶ Æ kot Kra hkukamã harēnh anhūr tã mē pakumrēxjē hwýr na pre kumē. Kot mē pahto mex nhūm mē pahte amnhī tomnuj kaga kaxyw nhūm mē pahpē Ijaew kumrēxjē hwýr kumē. Anē.

Nhūm pre ã Simãw Pētreja hte grã xwýnh pumunh o mē kuhē xwýnhjē mã ujarēnh anē.

Simãw Pētre mē Juãw wa kot mē àptàr tūmjē mã kapēr ã wa harēnh
Rukre 21.12-13

4 Nhūm Simãw Pētre mē Juãw wa arī mē kãm Tirtūm kapēr jarēnh o wa xa nē mē kãm:

—Nà na pre Jejus ty nhūm Tirtūm akupým ho htír. Tã kot akupým ho htír jakamã koja nhỹrmã urak nē akupým mē htyk xwýnh piitã mē ho htír pa. Anē.

Hãmri nhūm mē kot wa mar o kuhē xwýnh kwýjaja wa kuma nē wa hkôt hamaxpēr nē wa urã nē Jejus kôt amnhī xunhwý. Jakamã nhūm ra mē kot Jejus kôt amnhī xunhwýr xwýnhjaja ohtō rax kumrēx. Ra mē kēp 5.000.

Hãmri nhūm axtem mē hkwýjaja wa hwýr mra nē wa mar o kuhē. Mē ò patre nhō pôristi krãhtūm mē Satusew nhō xwýnh kwýjē mē nhūm mē ma Simãw Pētre mē Juãw wa hwýr mra nē tee ri wa kot mē ahkre hã wa mar o kuhē. Nē mē kãm akupým mē htír jarēnhja ma nē wa kamã gryk nē. Satusew nhō xwýnhjaja na pre htem akupým mē htír kôt hamaxpēr kēt jakamã nhūm wa akupým mē htír jarē nhūm mē tee ri wa kuma nē hamaxpēr punuj nē wa kamã gryk kato. Hãmri nē wa hã amýnē nhūm mē wa unē nē ma wa o tē nē mē hagjēnh xà kamã wa haxà. Ra myt grire nhūm mē wa haxà. Wa kot mē hagjēnh xà kamã hã apkati nhūm rī kormã mē kot ujarēnh ã tanhmã wa ho kaxyw.

⁵ Tã nhūm apkati nhūm mē ohtō nē wa ujarēnh ã wa mar kaxyw Jerujarē kamã axpēn wýr akuprō. Ijaew pigétjaja nē mē àptàr tūm kwýjaja. Nē mē kot finat Mojes kapēr o mē ahkre ho mē pa xwýnhjaja. Nē mē ò patre maati Anas mē hkwýja. Nē Ijaew nhō juisti Kajpas mē Juãw ò mē Aresãnja. Nhūm mē kot Simãw Pētre mē Juãw wa mar kaxyw axpēn wýr akuprō.

⁷ Hãmri nē wa hã karō nhūm pôristi wa hwýr tē nē wa haprō nē ma mē hwýr wa o tē nē wa ho axà nē mē

kutã wa ýr nhūm wa nhỹ. Hãmri nhūm mē wa omu nē wa kãm:

—E mē inhmã amnhī jarē. Mēhō xàhpumunh xà ho na ka pre wa hte grã xwýnhhta ho mex? Mēhō na pre hwýr war amē ka wa ho mex? Anē.

⁸ Hãmri nhūm Simãw Pētre mē kãm awjarē. Tirtūm Karō kot kãm hamaxpēr o hihtýx jakamã nhūm ý hã Ijaew pigétjē mē mē àptàr tūmjē mã awjarē nē mē kãm:

⁹ —Tōe mēhō kot ho mex xwýnhja ã mē ate wa ixkukjēr ¹⁰ jakamã kot paj mē amã harē ka mē ixte harēnhja ma. Wa ixpyrà nē mē apē Ijaew kēr ka mē wa ixkapēr mar týx nē. Jejus Kris pē Najare nhō xwýnhhta. Mē ate hpír nhūm Tirtūm kot akupým ho htír xwýnhhta. Tãm na pre àhpumunh týx o akupým hte grã xwýnhhta o mex. ý hã ixte kaxyw kãm ixkapēr nhūm tãm akupým ho mex. ¹¹ Tirtūm kot mex o mex ã harēnh nē mē pakaxyw ãm tã ka prem axtem nē hkaga. Nom Tirtūm kapēr ã kagã htūm kot ra mē akukamã ã mē ate amnhī nhīpēx anhūr ã mē ajarēnh nē mē ajarēnh kot:

Mē kot kēn o amnhīm òrkwý nhīpēx kaxyw nē nhỹri kēn maati pumu nē htýx omnuj ã hkamnhix nē hkaga. Mē kot hkaga htã nhūm Tirtūm mē kurom mex o kot kēn piitã hakrenh par ã omunh kurē kumrēx.

Anhūr o kot mē ajarēnh. Te mē ate kēn maati kaga xwýnh ã mē ajarēnh pyrãk. Tã ka mē ã mē kot mē akukamã mē ajarēnh anhūrja kôt te mē ate kēn maati kaga pyrã nē Jejus kaga nē apī. Tirtūm kot amnhīm mex o mex ã omunh nē harēnh tã ka prem axtem nē hkaga. ¹² Tapxipix na hte mē panē mē pahte amnhī tomnuj rē. Mēhō koja urak nē àhpumunh týx o mē panē kurē? Mēhō koja ahpýnhã pyka piitã hkôt urak nē ã mē panhīpēx mex anē? Nà ãm amrakati kumrēx. Æm Jejus pix. Tapxipix na pre Tirtūm ja kaxyw ãm jakamã tapxipix na kēp mē pahkaprī xwýnh maati. Anē.

¹³ Nhūm pre ã Simãw Pētreja mē kãm kapēr anē.

Hãmri nhūm mē amnhī jaēr pē kuma nē axpēn mã:

—Kwa wa kãm mē pahpyma wa hã hkwý jēt kēt kumrēx. Te ri wa htýx ri wa pa pyrãk tã wa hamaxpēr týx kumrēx. Mãn wa kēp Jejus kôt mē pa ho mē pa xwýnh kwý jakamã na wa ã kapēr anē nà? Anē.

¹⁴ Hãmri nē tee ri kot tanhmã mēmoj tã wa kãm àkjēr to hkukamã hamaxpēr. No nhūm hte grã xwýnh ra kot mē hwýr àr nē Simãw Pētre wa kuri mex nē ãm nhūm mē kot no ho omunh jakamã wa kãm àkjēr kēt nē.

¹⁵ Hãmri nē wa kãm anē nhūm wa mē kēp kato nē kapôt ã xa nhūm mē tanhmã wa kãm nē kaxyw wa hã axpēn ma nē axpēn mã:

¹⁶ —Kwa tanhmã kot puj mē wa ho? Ra jar Jerujarē kamã mē piitã mē kot akupým hte grã xwýnhhta mex ã wa omunh kēnã kot puj kēt mē kãm wa kot ho mex hkēt ã wa harē. ¹⁷ Tã mē kot harēnh o hprôt pymaj kot puj mē axte Jejus jarēnh o pa nē wa hkurē. Kē hte grã xwýnh jarēnhja ãm jar mē pakamã hapēx. Nà kot puj mē ã wa kãm karō anē. Anē.

¹⁸ Nhũm mẽ wa hã axpën mar pa hãmri nẽ akupÿn wa hã karõ nhũm wa akupÿn mẽ hwÿr axà nhũm mẽ wa kãm:

—E Simãw Pêtre mẽ Juãw wa. Wa mãmri ma tẽ. Nom kêr ka wa mẽ ixkapër mar kumrëx. Kêr ka wa axte ri tanhmã mẽ kãm Jejus jarënh to ho ri apa hkêt nẽ. Æm kwarĩ ho kwarĩ. Anẽ.

¹⁹ Hãmri nhũm wa tee ri mẽ kuma nẽ mẽ kãm:

—Nà Tirtũm tãm kot ja hã wa inhmã karõ kênã kot pa kêt wa mẽ akapër ma nẽ harënh o ixpa hkêt nẽ.

²⁰ Na pa pre wa Jejus kôt ri ixpa nẽ xatã kot tanhmã amnhĩ nhĩpêx to hã omunh o hkôt ixpa. Nẽ xatã tanhmã mẽ ahkre hto hã mar o hkôt ixpa. Nẽ akupÿm hĩr kãm omu. Jakamã tanhmã kot pa wa amnhĩ to nẽ mẽ kãm ja jarënh kêt nẽ? Nà kot pa wa mẽ akapër mar xà hkôt ã amnhĩ nhĩpêx anhÿr hkêt nẽ. Anẽ.

²¹ Hãmri nhũm mẽ kuma nẽ tee ri mẽ kot tanhmã wa ho kaxyw. Te grà xwÿnhhta hte grà nẽ hkrĩ ho hã amgrà pẽ 40 tã ra akupÿm mex nhũm mẽ piitã ja hã omu nẽ hã axpën mã Tirtũm mex o mex ã harënh o ri pa. Jakamã nhũm mẽ utãr xwÿnhjaja mẽ kuma nẽ kãm mẽ uma nẽ. Hãmri nẽ mẽ umaj tanhmã Simãw Pêtre mẽ Juãw wa ho hkêt nẽ. Æm axte wa kot Jejus jarënh o pa nẽ wa kãm kapër kãm hihtÿx nẽ wa hano nhũm wa ma tẽ.

Mẽ kot amnhĩ to Tirtũm wÿr ã mẽ harënh

Matêwre 18.19-20

²³ Tã nhũm Simãw Pêtre mẽ Juãw wa ma akupÿm Jejus kôt htõ nẽ htõxjê hwÿr wa tẽ nẽ mẽ kãm amnhĩ jarë. Nẽ patre krãhtũmjê mẽ mẽ ãptãr tũmjaja kot Jejus kapër jarënh nẽ wa hkurê kamã hihtÿxja nhũm amnhĩ tã mẽ kãm mẽ harë. ²⁴ Hãmri nhũm mẽ wa kuma nẽ amnhĩ to Tirtũm wÿr kurê kumrëx nẽ kãm:

—Pa Pahi Maati? Nà mẽmoj piitã ho akator xwÿnhhta na ka. Na ka pre kaxkwa ho akato nẽ pyka ho akato nẽ gõ xujanãr o akato. Hãmri nẽ kamã mẽmoj piitã ho akator pa. ²⁵ Amnepêm na pre mẽ inhĩgêt Tawija amã tanhmã amnhĩ nhĩpêx to ho pa. Nẽ Akarõ nhÿ hã akapër kwÿ jarë nẽ hã kagà. Nẽ kagàja kamã mẽ kot Pahihti Jejus kutã amnhĩ xunhwÿr xwÿnhjê jarë nẽ mẽ hã kagà. Mẽ hkukamã mẽ hã kagà nẽ mẽ hã kagà ho:

Mẽmo mÿrapê na prem Ijaew kêt xwÿnhjaja Tirtũm kutã amnhĩ xunhwÿ?

Nẽ Ijaew haxwÿja. Mẽmo mÿrapê na prem htÿx ri hamaxpër o ri pa?

Nẽ pyka piitã hkôt pahijaja na prem Pahi Maati kutã amnhĩ xunhwÿr pa.

Nẽ kot mẽ pakaxyw ãm xwÿnh Jejus Krisja nhũm mẽ mããnen kutã amnhĩ xunhwÿr pa.

Nẽ mẽ kot hpĩr kaxyw mẽ kãm hã amÿnê.

Kwa mẽmo mÿrapê na prem axtem nẽ ã amnhĩ nhĩpêx anẽ? Anẽ.

Ã na pre finat Tawija Akarõ nhÿ hã mẽ harë nẽ hã kagà anẽ Tirtũm. ²⁷ Æm hãmri na pre mẽ hkukamã mẽ hã kagà. Ra mẽ kot ã amnhĩ nhĩpêx anhÿr kênã. Krĩ ja kamã na prem ã amnhĩ nhĩpêx anhÿr kaxyw axpën wÿr akuprõ. Pahi Eroxo nẽ pahi Põn Pirat nẽ mẽ ixkwÿjaja nẽ

mẽ kêt Ijaew kêt xwÿnhjaja axpën wÿr akuprõ nẽ Akra Jejus kutã amnhĩ xunhwÿ nẽ mẽ kot hpĩr kaxyw hã amÿnê. Kot tãm amnhĩ nhĩpêx o pa nhũm ate mẽ ixkaxyw ãm xwÿnhja nhũm mẽ axtem nẽ kutã amnhĩ xunhwÿ.

²⁸ —Nom amnepêm kormã mẽ ixkêt ri na ka pre mẽ hkukamã ã mẽ kot amnhĩ nhĩpêx anhÿr ã mẽ omu. Mẽ kot tanhmã apê Akra Jejus to nẽ hpĩrta kukamã ka pre hã mẽ omu. Tã mẽ ixwÿr amẽ nhũm prem kupĩ. No ãm ajamaxpër xà hkôt.

²⁹ —Tã ka mẽ omu. Na mẽ Jejus ã mẽ ixkamã gryk tÿx nẽ tanhmã hã mẽ ixto kaxyw. Jakamã kot kaj mẽ ixpê amã tanhmã amnhĩ nhĩpêx to ho ixpa xwÿnhjaja ka tanhmã mẽ ixkrã hto pa mẽ inhmã mẽ uma hkêt nẽ mẽ hkôt ixpa ho ixpa. Mẽ kot tanhmã mẽ ixto hã mẽ ixkagrõnh tã pa mẽ inhmã mẽ uma hkêt nẽ ixãmnhĩx ri ixkĩnh nẽ ri ixpa. Nẽ anhÿ hã mẽ kutã amnhĩ to htÿx nẽ arĩ mẽ kãm akapër jarënh o ri mẽ hkôt ixpa. Mẽ kot Jejus ã tanhmã mẽ ixto htãã.

³⁰ —Akra Jejus mex o mex jakamã kot paj mẽ àh-pumunh tÿx xà ho tanhmã mẽ piitã mẽ ho mex to ho ri mẽ hkôt ixpa. Mẽ à xwÿnhjaja akupÿm mẽ o mex. Nẽ mẽ kot aa mẽmoj pumunh kêt kwÿ ho anẽ. Kê mẽ omu nẽ axàhpumunh o axàhpumunh ã apumunh mex kurê kumrëx. E ãm ja pix na ra hapêx. Anẽ.

³¹ Nhũm prem ã amnhĩ to Tirtũm wÿr anẽ. Puh nhũm ixkreja mẽ kãm htertet tÿx nẽ nhũm Tirtũm Karõ axte tanhmã mẽ hkrã hto nhũm mẽ ÿ hã kãm mẽ uma hkêt nẽ. Æm amnhĩ to htÿx nẽ mẽ kãm Tirtũm kapër jarënh rãhã ho ri mẽ hkôt pa.

Jejus kwÿjaja tanhmã kot axpën nhĩpêx to hã mẽ harënh

Atre 2.42-47

³² Nhũm Jejus nhÿ hã mẽ ahkre ho mẽ pa xwÿnh maatiijaja. Na pre Tirtũmja mẽ ho mẽ kãm ma hkêt jakamã nhũm pre htem akupÿm Jejus hĩr kôt mẽ kãm harënh o ri mẽ hkôt pa. Nhũm Tirtũm mẽ kot Jejus kôt amnhĩ xunhwÿr xwÿnh piitã mẽ kutã nojarêt rãhã ho pa nhũm mẽ ra ohtõ rax nẽ. Nẽ mẽ kãm axpën to mex pix prãm o ri axpën kôt pa. Mẽ ohtõ htã te mẽ tipxi pyrãk. Nẽ axpën pẽ mẽmoj to õxÿ hkêt nẽ. Na pre htem axpën mã mẽ hikurêx nẽ mẽ apkur xà jarënh o: “Inhõ pix kêt mẽ pahpiitã mẽ panhõ na.” Anhÿr o ri mẽmoj tã axpën kutã nojarêt o ri pa. No kêt axpën mã mẽmoj jarënh o: “Tk. Nà ãm inhõ pix na.” Anhÿr o harënh kêt nẽ. ³⁴ Na pre htem tõhã õ ixkre hõ ho wẽnê. Rÿ õ pyka hkwy ho wẽnê nẽ kàxpore jamÿ nẽ ma o mra nẽ Jejus nhÿ hã mẽ ahkre ho mẽ pa xwÿnhjê mã kugõ nhũm mẽ hamÿ nẽ mẽ kêt amrakati xwÿnhjê mã ho anhgrà. Hãmri nhũm mẽ amnhĩm hamÿ nẽ ho amnhĩm awjaprõ. Jakamã na pre hte mẽ hkwyjaja kãm prãm nẽ ri pa rÿ ê hkêt nẽ ri pa hkêt nẽ.

³⁶ Jujere na pre ã amnhĩ nhĩpêx anẽ nẽ mẽ kaxyw õ pika hkwy ho wẽnê. Hãmri nẽ kàxpore py nẽ o tẽ nẽ Jejus nhÿ hã mẽ ahkre xwÿnh maatiijê mã kugõ. Jujereja Ijaew nhõ patre ho ajuta xwÿnh na pre. Gõ hipõk pẽ Sipre kamã na pre kato. Kêt Jujere htã no nhũm Jejus

nhỹ hã mẽ ahkre ho mẽ pa xwýnhjaja na prem kãm: “Panãpe” Anẽ. Mẽ kapër kãm Panãpeja te kệp “mẽ hamaxpër o mẽ hihtýx o pa xwýnh” anhỹr pyræk. Jakamã nhũm õ pika hkwý ho wẽnê nẽ kàxpore py nẽ o tẽ nẽ Jejus nhỹ hã mẽ ahkre xwýnhjê mã kugõ nhũm mẽ kupy nẽ mẽ kệp amrakati xwýnhjê mã ho anhgrà.

Ananĩs mẽ Sapire wa kot amnhĩ to hêx ã wa harênh

Karatas 6.7; Eprêw 10.26-31

5 Tã nhũm Ananĩs mẽ hprõ Sapire wa Jujere jarênh ma nẽ uræk nẽ õ pyka hkwý ho wẽnê. ²Hãmri nẽ kàxpore py. Nom na pre wa ra hã axpên ma. Jakamã nhũm Ananĩs Jujere kĩnhã kàxpore hkwý pix py nẽ o tẽ nẽ Jejus nhỹ hã mẽ ahkre xwýnh maatijê mã kugõ. Nom katát kôt mẽ kãm õr ã amnhĩ jarênh kêt nẽ. Kot kàxpore ho pikjêr nẽ amnhĩm hkwý ho àrĩk ã amnhĩ jarênh kêt nẽ. Âm mẽ kãm amnhĩ jarênh o hêx. Te piitã õr par pyræk o amnhĩ nhĩpêx nẽ mẽ kãm:

—E ota ixkàxporeta. Na pa wa inhõ pika hkwý ho wẽnê nẽ kàxpore hpy nẽ hpãnhã Jujere pyrã nẽ man mẽ awýr piitã o tẽ. Anẽ.

³Hãmri nhũm Simãw Pêtre ra ã kot amnhĩ nhĩpêx anhỹr ã omu hãmri nẽ kãm:

—Tk. Kwa mon ka axtem nẽ Satanasti kapër ma nẽ hkôt amnhĩ nhĩpêx nẽ te akàxpore piitã õr pyræk ã amnhĩ to axêx anẽ? Te ate piitã õr pyræk tã no ãm hkwý pix gõ. Hêxta waa nẽ. Na ka axtem nẽ Tirtũm Karõ mã akàxpore nhõr par o axêx. ⁴Anhõ pyka kênã. Nẽ hpãnhã kàxporeja anhõ kênã. Kot kaj amã tanhmã ho hprãm xà hkôt mãmrĩ tanhmã ho. Amã piitã ho axàrĩk prãm nẽ mãmrĩ piitã ho arĩk. Rý amã hkwý hpix nhõr prãm nẽ mãmrĩ hkwý pix gõ. No ri ate õr par pyræk o amnhĩ to axêx kêt nẽ. Te ate mẽ inhmã pix mã axêx pyræk nom mẽ inhmã pix mã hkêt. Na ka mãänen te Tirtũm mã axêx pyræk. Anẽ.

⁵Nhũm pre ã Simãw Pêtre Ananĩs mã kapër anẽ nhũm kuma nẽ pykap tẽm nẽ htyk kurê kumrêx. Hãmri nhũm mẽ àptar nywjaja hwýr tẽ nẽ kupêxê ho hkupu nẽ kumý nẽ ma o tẽ nẽ haxà. Hãmri nhũm mẽ kot ã kot amnhĩ nhĩpêx anhỹr ã harênh mar xwýnhjaja tee ri harênh ma nẽ kãm ma htýx nẽ.

⁷Tã nhũm ra hã ahtũm nẽ. Ra hã 3 ore nẽ hapêx nhũm Ananĩs prõ Sapireja htýx hamakêtkati nẽ mẽ hwýr tẽ nẽ axà. Kormã mjên htyk ã harênh mar kêt nẽ hamakêtkati nẽ hkĩnh nẽ mẽ hwýr tẽ nẽ axà. ⁸Hãmri nhũm Simãw Pêtre omu nẽ hêx rom hkukja nẽ kãm:

—Pa? E kwa inhmã mẽmoj jarẽ. Tanhmã na prem war anhõ pykaja pãnhã war amã amnhĩrer to? Xà ãm hãmri na amjên mẽ inhmã harẽ nà? Anẽ.

Hãmri nhũm kuma nẽ mjên pyrã nẽ kãm ho hêx nẽ kãm:

—Ýy. Âm hãmri kot amã harênh kênã. Anẽ.

⁹Hãmri nhũm Simãw Pêtre tee ri kuma nẽ kãm:

—Tk. Hêxta waa nẽ. Kwa mon ka war ajamẽ war akàxpore ho te Tirtũm mã axêx pyræk? Mãn ka wa ajamaxpër o: “Koja Tirtũm ja hã wa ixpumu nẽ ãm hã wa ixpumu nẽ tanhmã hã wa ixto hkêt nẽ.” Anhỹr o mãn ka wa ajamaxpër nà? Nom na ka wa ãm kãm axêx

kaprý. Oněj ra mẽ kot amjên jaxàr xwýnhjaja akupým hpõx o mra. Koja mẽ anhĩpêx o te hipêx pyrã nẽ mãänen ato tẽ nẽ ajaxà ka rĩ amnhĩ pumu.

¹⁰Anẽ nhũm kuma nẽ mjên pyrã nẽ pykap tẽm nẽ htyk kurê kumrêx. Hãmri nhũm mẽ kot mjên jaxàr xwýnhjaja mra nẽ mẽ hwýr agjê nẽ omu nhũm ra htyk mex nẽ nõ nhũm mẽ kumý nẽ ma o tẽ nẽ mjên nhĩhkõ hã haxà. ¹¹Hãmri nhũm mẽ piitã wa harênh ma nẽ kãm ma htýx nẽ. Mẽ kot Jejus kôt amnhĩ xunhwýr xwýnhjê mẽ amarĩ ri mẽ pa xwýnhjaja nhũm mẽ tee ri wa hkukamã hamaxpër o kãm ma htýx kumrêx.

Mẽ kot aa mẽmoj pumunh kêt kwý ho anhỹr ã mẽ harênh

Makre 16.17-20; Atre 19.11-12

¹²Na pre hte Jejus kôt mẽ kot amnhĩ xunhwýr xwýnhjaja xatã Tirtũm mã amnhĩ jarênh xà hã ixkre hwýr akuprõ. Mẽ kot ixkre nhĩkjê mã: “Pahi Sarumãw nhõ” anhỹr xwýnh jarênhja wýr nhũm pre htem akuprõ. Nhũm mẽ piitã kãm mẽ hkĩnh nẽ mẽ ohtõ nẽ mẽ hkôt akuprõ nẽ mẽ uræk nẽ Jejus kôt amnhĩ xunhwý. Mënjaja nẽ mẽmyjaja. No nhũm mẽ hkwýja Ananĩs mẽ Sapire wa kot amnhĩ nhĩpêxja mã hamaxpër nẽ kãm mẽ hkôt mrar pyma nẽ. Kãm mẽ hkĩnh tã kãm mẽ hkôt mrar pyma nẽ.

Nhũm pre hte Jejus nhỹ hã mẽ ahkre ho mẽ pa xwýnhjaja aa mẽ kot mẽmoj pumunh kêt kwý ho anhỹr o ri mẽ piitã mẽ hkôt pa. ¹⁵Jakamã nhũm pre htem mẽ ã xwýnhjê jamý nẽ ma mẽ hwýr mẽ o mra nẽ Simãw Pêtre kutêp pry kamã mẽ haxwý nẽ mẽ kãm:

—E mẽ jar anhĩkwý. Kê Simãw Pêtre ja kôt mẽ ajãnh tẽ nẽ mẽ akupênh o akupým mẽ ato mex rý nhũm hkarõ pix mẽ atã harir ka mẽ akupým amex japêr.

Anhỹr o mẽ kãm kapër hãmri nhũm mẽ kupĩp kãm kutêp hikwý. ¹⁶Nẽ Jerujarê pu hã krĩ hkwý kamã. Mẽ ã xwýnhjaja nẽ mẽkarõmnuti kot tanhmã mẽ ho xwýnhjaja nhũm pre htem mẽ hamý nẽ ma mẽ ãhkrep mẽ o mra nhũm mẽ piitã akupým mex pa.

Mẽ kot Jejus kwýjê jagjênh ã mẽ harênh

Rukre 21.12-15; Juãw 15.26-27; Atre 4.1-22

¹⁷Tã nhũm mẽ õ patre maati mẽ hkrãmnhwý Satusew nhõ xwýnhjaja tee ri akupým mẽ mex ã mẽ harênh ma nẽ axpên mã:

—Tk. Kwa na mẽ ra ohtõ nẽ Jejus gryk ã mẽ pahte mẽ ahkre kaga nẽ ãm hkôt pix mã ri amnhĩ nhĩpêx o pa. Anẽ.

Hãmri nẽ Jejus nhỹ hã mẽ ahkre maati xwýnhjê kamã gryk nẽ ra tanhmã mẽ ho kaxyw. ¹⁸Hãmri mẽ unê nẽ mẽ hagjê nhũm mẽ hagjênh xà kamã hkrĩ hpa.

¹⁹Tã nhũm kamàt nhũm Tirtũm kapër o mẽ wrýk xwýnhja ma mẽ hagjênh xà hwýr mẽ hwýr wrý nẽ mẽ hwýr axà nẽ mẽ kãm hakwakre kahê xà mẽ nẽ mẽ kator pa. Hãmri nẽ mẽ kãm:

²⁰—E mẽ ma akupým Tirtũm mã amnhĩ jarênh xà hã ixkre hwýr mra nẽ axte mẽ kãm awjarê. Tanhmã mẽ kot amnhĩ nhĩpêx to nẽ Jejus kôt amnhĩ nhĩpêx nyw o amnhĩ nhĩpêx ã mẽ kãm hã karõ kê mẽ ama. Anẽ.

²¹ Hämri nhũm mẽ kuma nẽ ma akupým hwýr hapêx kurẽ kumrẽx. Nhũm myt kator o mör mẽ nhũm mẽ hwýr agjẽ nẽ mẽ kãm Tirtũm kapër jarẽnh o kuhẽ.

Tã nhũm mẽõ patre maati mẽ hkõt ri mẽ pa xwýnhjaja amnhĩ wýr mẽ àptàr tũm xwýnhjẽ hwý nhũm mẽ piitã xpẽn wýr pikuprõnh pa. Hämri nẽ htýx arĩ Jejus kwýjaja mẽ hagjẽnh xà kamã mẽ hkrĩ hã mẽ hkamnhĩx nẽ amnhĩ wýr mẽ hã karõ. ²² Nhũm pòristijaja ma kot mẽ haprõr kaxyw mẽ hagjẽnh xà hã ixkre hwýr mra nẽ tee ri kamã mẽ hapêr nhũm mẽ kamã amrakati. Hämri nhũm mẽ akupým mẽ pikuprõnh xwýnhjẽ hwýr hprõt nẽ mẽ kãm:

²³ —Nà na pòristi hkwýjaja arĩ hakwakrem ixkre jamãr mex nhũm hakwakre arĩ kahẽ htýx nẽ xa. Tã pa mẽ hwýr agjẽ nẽ tee ri hkre kamã mẽ hapêr nhũm mẽ kamã amrakati kumrẽx. Anẽ.

²⁴ Hämri nhũm mẽ kuma nẽ tee ri hamaxpër. ²⁵ Rõm nhũm ja mẽ hwýr tẽn axàn mẽ kãm:

—Kwa jãã mẽ ate mẽ hagjẽnh xwýnhjaja na mẽ axte Tirtũm mã amnhĩ jarẽnh xà hã ixkre kamã mẽ ahkre ho kuhẽ pa ham mẽ omu nẽ mẽ kurũm tẽ. Anẽ.

²⁶ Hämri nhũm patre nõ pòristi krãhtũmja kuma nẽ mẽ hwýr pòristi hkwýr rẽ nhũm mẽ ma mẽ hwýr mra nẽ mẽ hwýr agjẽ nẽ kẽ axte mẽ unẽ nẽ akupým mẽ o mra. Nom tanhmã mẽ ho hkêt nẽ. Mẽ kot hkõt ri mẽ pikamẽn xwýnhjẽ pymaj mẽ ho mex nẽ mẽ o mõ. Nẽ mẽ hã xpẽn mã:

—Nà kot puj mẽ tanhmã mẽ ho nhũm mẽ ja hã mẽ pahpumu nẽ kẽn o mẽ pahkapê nẽ tanhmã amnhĩ to nẽ hã mẽ panhĩmex. Anẽ.

²⁷ Hämri nẽ mẽ ho mex nẽ akupým mẽ o mõn mẽ hwýr mẽ ho agjẽ nẽ mẽ pikuprõnh xwýnhjẽ kutã mẽ hkrĩ. Hämri nhũm mẽõ patre maati mẽ kãm:

²⁸ —Kwa ra mẽ ixte Jejus kapër jarẽnh nẽ mẽ akurẽ htã ka xep mẽ ãm mẽ inhma nẽ arĩ mẽ kãm harẽnh o ri apa. Nẽ jar Jerujarẽ kamã mẽ piitã mẽ kãm harẽ. Nẽ mẽ pajaja mẽ ixte Jejus pĩr ã ka mẽ ri mẽ kãm mẽ ijarẽnh o apa. Anẽ.

²⁹ Hämri nhũm Simãw Pêtre mẽ kuma nẽ mẽ amnhĩ tã mẽ kãm kapër nẽ mẽ kãm:

—Tý kot kaj mẽ Tirtũm kapër kuhpa hã mẽ inhmã mẽmoj tã karõ pa mẽ ama nẽ ãm mẽ ama nẽ ãm Tirtũm kapër pix ma nẽ hkõt ri amnhĩ nhĩpêx. ³⁰ Amnepêm mẽ panhĩgêtjaja na prem Tirtũm kõt pix mã amnhĩ nhĩpêx o pa. Tã ka prem axtem nẽ kệp mẽ kãm Kra Jejus ã amýnẽ nhũm mẽ pĩ kahpa hã kunhõ nẽ kupĩ. Nom nhũm Tirtũm akupým ho htĩr ³¹ nẽ kệp mẽ panhõ Pahihti hã harẽ. Nẽ kệp mẽ pahkaprĩ xwýnh mex ã harẽ. Hämri nẽ ra amnhĩ ri ýr nhũm ãhkõ hã mẽmoj piitã ho amnhĩptàr o hkrĩ. Nhũm kãm: “Koja Ijaew mẽ kot amnhĩ tomnuj kaga nẽ akõt amnhĩ xunhwý pa ja hã mẽ omu nẽ amnhĩ katut kõt mẽ kot amnhĩ tomnuj rẽn pa nẽ mẽ ho ixkra.” Anẽ. ³² Tã mẽ pajaja mẽ ixte Jejus htyk nẽ akupým htĩr ã omunh mex jakamã na pa hte Tirtũm Karõ nhỹ hã ã mẽ amã harẽnh anẽ. Karõja na pre Tirtũm mẽ ixte hkõt amnhĩ nhĩpêx xwýnhjẽ hwýr kurẽ nhũm mẽ ixwýr wrý nẽ mẽ ixkarõ mã

agjẽ. Tã ý hã na pa htem ri ã harẽnh anhýr o ri mẽ akõt ixpa. Anẽ.

³³ Hämri nhũm mẽ kuma nẽ mẽ kamã gryk týt nẽ. Nẽ mẽ kãm mẽ himex prãm nẽ mẽ kãm mẽ hã amýnẽ.

³⁴ Hämri nhũm Kamariewtija tee ri ja hã mẽ omu hãmri nẽ kãnhmã xa nẽ Jejus nhỹ hã mẽ ahkre xwýnh maati-jẽ xyr pẽ hkwýjẽ mã kapër. Parijew nõ xwýnh na pre. Nẽ kệp Tirtũm kapër ã kagà htũm o mẽ ahkre ho pa xwýnhjẽ hõ na pre. Nhũm mẽ piitã kãm hkĩnh nẽ. Jakamã nhũm kãnhmã xa nẽ pòristi mã anẽ nhũm mẽ amnhĩ nẽ Jejus nhỹ hã mẽ ahkre ho mẽ pa xwýnhjẽ kator nhũm mẽ kapõt ã kuhẽ. ³⁵ Hämri nhũm Kamariewtija mẽ nẽ tanhmã mẽ kãm kapër to nẽ mẽ kãm:

—E ixkwýjaja. Kwa kër pu mẽ tanhmã mẽ ho hkukamã pajamaxpër mex nẽ. ³⁶ Mãn arĩ mẽ ate finat Tetastija jarẽnh ã anohtýx nẽ ho apa japêr. Mytwrý hõ hã na pre mẽ kãm amnhĩ to rax ã amnhĩ jarẽnh o pa. Hämri nhũm hkõt ri mẽ pa xwýnhjaja ohtõ nẽ. Mẽ kệp 400. Tã nhũm prem mẽ kệp Tetasti pĩ nhũm hkõt ri mẽ pa xwýnhjaja xpẽn pẽ anghrà nẽ ma hapêx.

³⁷ —Tã nhũm mẽ kot mẽ piitã mẽ ho kõta xa hã arĩgroja ã nhũm Garirej nõ xwýnh pẽ finat Jut haxwýja hkõt mẽ pa xwýnhjaja ohtõ nẽ. Tã nhũm mẽ mããnen mẽ kệp kupĩ nhũm hkõt ri mẽ pa xwýnhjaja haxwýja xpẽn pẽ anghrà nẽ ma hapêx.

³⁸ —Jakamã kwa pu mẽ tanhmã jajẽ ho hkêt nẽ. Pu mẽ ãm mẽ omu. Kojã mẽ amnhĩ krã hkõt ã ujarẽnh anhýr o pa japêr hã kojã Tetasti mẽ Jut wa hkõt pa xwýnhjẽ pyrã nẽ tokyx xpẽn pẽ anghrà nhũm Jejus jarẽnh o paja hapêx o hapêx. ³⁹ Nom kojã mẽ ãm hãmri Tirtũm nhỹ hã ã mẽ ahkre ho pa anhýr japêr hã kot puj mẽ tee ri ja ho pajapêx mã. Jakamã kwarĩ. Kot puj mẽ tanhmã mẽ ho nẽ te mẽ pahte Tirtũm kutã amnhĩ xunhwýr pyrãk. Anẽ.

Nhũm pre ã Kamariewti Jejus nhỹ hã mẽ ahkre ho mẽ pa xwýnh maati-jẽ xyr pẽ hkwýjẽ mã kapër anẽ.

⁴⁰ Hämri nhũm mẽ kuma nẽ kãm:

—Tý nã ãm hãmri na ka ã akapër anẽ. Kot puj xep mẽ tanhmã mẽ ho hkêt nẽ. Anẽ.

Hämri nẽ akupým mẽ hã karõ nhũm mẽ akupým mẽ hwýr agjẽ. Hämri nhũm mẽ pòristi mã mẽ hã amýnẽ nhũm mẽ htak. Hämri nhũm mẽ àptàr tũmrejaja mẽ kãm:

—E mẽ mãmrĩ ma akupým mra. Nom kër ka mẽ axte mẽ kãm Jejus kapër jarẽnh o ri apa hkêt kumrẽx. Anẽ.

⁴¹ Hämri nhũm mẽ kãm ure nhũm mẽ ma mra. Kĩnh nẽ ma mra nẽ xpẽn mã:

—Nà kwãr mẽ Jejus ã mẽ pahtak nẽ tanhmã hã mẽ pahto. Kwãr mẽ mãmrĩ ã hã mẽ pahto anẽ. Kot pu mẽ hkaga hkêt nẽ. Ra Tirtũm kot ja hã mẽ pahpumunh mex kẽnã.

Anhýr o xpẽn mã kapër o xpẽn jamaxpër o hihtýx mex o pa.

⁴² Hämri nẽ arĩ apkati mẽ hkwýjẽ mã Jejus kapër jarẽnh o mẽ ahkre ho mẽ hkõt pa. Tirtũm mã amnhĩ jarẽnh xà hã ixkre kamã nẽ nhãm mẽ òrkwý kamã ri

mě ahkre ho pa. Tirtüm kot mě pakaxyw Jejus xām ā mě kām harēnh o ri mě hkôt pa.

Mě kēp mě mjēn htyk xwŷnhjē jarēnh

Wam Ximotre 3.8-9

6 Tā nhūm mě kot Jejus kôt amnhī xunhwŷr xwŷnhjaja ohtô rax kumrēx o mō. Mě piitā kēp Ijaew no nhūm mě hkwŷjaja axtem Gres kapēr o kapēr nhūm mě hkwŷjaja Ijaew kapēr o kapēr. Na pre hte Ijaew kapēr o kapēr xwŷnhjaja apkati mě mě kēp mě mjēn htyk xwŷnhjē mā měō ho pa. No ām mě piitā mě hipēx o axpēn pyrāk kēt jakamā nhūm Gres kapēr o mě kapēr xwŷnhjaja tee ri ā mě kot amnhī nhīpēx anhŷr ā mě omu ně mě kamā gryk ně. Hāmri ně mě kām:

—Kwa na ka htem amnhī kamā mě kēp mě mjēn htyk xwŷnhjē mā měō ho rūnh ně agō. No mě ixkamā jajē mā na ka htem ām ho hkryre ně agō. Kwa mě ri ā mě hipēx anhŷr kēt ně. Mě hipēx o axpēn pyrāk nā. Anē.

² Hāmri nhūm Jejus nhŷ hā mě ahkre xwŷnh maatijaja mě hā mě kapēr ma hāmri ně mě piitā mě ho akuprō ně mě kām:

—Kwa kēr ka mě ja hā axpēn mā axākjēr kēt ně. E pu mě kot mě kēp mě mjēn htyk xwŷnhjē mā ō ho pa kaxyw mě akwŷjē rē. No mě pajaja kot paj ja ho anhŷr o ri ixpa hkēt ně. Kot pa mě anē ně Jejus kapēr o ri mě ajahkre hkēt ně nhūm ja mex kēt ně. Jakamā mě atō kot kaj mě akatāt kôt mě kām mě ō ho apa? ³ E mě amnhī kamā mě ho 7 ně mě arē pu mě kēp mě mjēn tyk xwŷnhjē mā ō ho pa kaxyw mě unhwŷ.

Tām mě hamaxpēr xwŷnhjaja.

Ně mě ate axpēn mā mě mex ā mě harēnh xwŷnhjaja.

Ně Tirtüm Karō nhŷ hā mě kot amnhī nhīpēx o mě pa xwŷnhjaja.

Ā mě kot amnhī nhīpēx anhŷr xwŷnhjaja ka mě ho 7 ně arē pu mě kaxyw mě unhwŷ. ⁴ Nom mě pajaja kot paj mě akôt arī mě amā Tirtüm kapēr jarēnh o ri mě ajahkre pix tănopxar o ri ixpa. Anē.

⁵ Hāmri nhūm mě kuma nhūm ja mě kām mex ně. Nhūm mě ma mra ně axpēn mā hkwŷjē nhīxi jarē hāmri ně mě ho 7 ně mě kurē. Ā mě hixi kot anhŷr.

Estewāw. Estewāwja na pre Jejus kôt amnhī nhīpēx mex o pa. Tirtüm Karō kaxwŷnh mā àr ně ho amnhīptār jakamā nhūm pre hte tām ri amnhī nhīpēx o pa.

Ně kaxyw Firipti

ně Prokot

ně Nīkanō

ně Timā

ně Parmēnti

ně Nīkoraw. Nīkorawja krī pē āxiok nhō xwŷnh na pre. Kēp Ijaew kēt tā kām Tirtüm kīnh o pa. Tā ra määnēn Kra Jejus kôt amnhī xām.

⁶ Jakamā nhūm mě mě kēp 7tajē rē ně Jejus nhŷ hā mě ahkre xwŷnh maatijē hwŷr mě o mra. Hāmri nhūm mě omu ně mě àpēnh ā mě unhwŷr kaxyw mě hā ūkra jaxwŷ ně mě ho Tirtüm wŷ. Hāmri nhūm mě kēp mě

mjēn htyk xwŷnhjē mā mě ō ho pa ně mě piitā mě hipēx o axpēn pyrāk.

⁷ Tā nhūm mě ra ohtô rax ně Tirtüm kapēr ma ně hkôt amnhī nhīpēx o pa. Jakamā nhūm Jerujarē kamā mě kot Jejus kôt amnhī xunhwŷr xwŷnhjaja ra ohtô rax kumrēx. Ně mě ō patre hkwŷ haxwŷja ohtô ně mě urāk ně amnhī kaxyw hkôt hamaxpēr ně hkôt amnhī xunhwŷ.

Mě kot Estewāw pynēnh ā mě harēnh

Rukre 21.14-15

⁸ Tā nhūm Estewāwja. Kot mě kēp mě mjēn htyk xwŷnhjē mā mě ō ho pa xwŷnhjē hōja. Tirtüm kot kutā nojarēt mex jakamā na pre hte ŷ hā àhpumunh tŷx o aa mēmoj pumunh kēt kwŷ ho anhŷr o ri mě hkôt pa.

⁹ Hāmri nhūm Ijaew kwŷjaja tee ri ja hā omu nhūm ja mě kēp omnuj tŷx ně nhūm mě hā kām akir. Urāk ně mě kēp Ijaew ně Jerujarē kamā ri mě hkôt pa htā ah-pŷnhā mě ō pyka. Mě kot kām “Ripetat” xwŷnh kwŷ na pre mě. Ně ah-pŷnhā mě ō krī.

Mě hkwŷjaja kēp Sirēn nhō xwŷnh.

Ně mě hkwŷjaja kēp Aresān nhō xwŷnh.

Ně mě hkwŷjaja kēp Siris nhō xwŷnh.

Ně mě hkwŷjaja kēp As nhō xwŷnh.

Ahpŷnhā měō pika ně mě ō krī htā na prem Jerujarē kamā ri axpēn kôt pa ho pa. Tā Estewāw kot ā amnhī nhīpēx anhŷr o pa hā omu nhūm ja mě kēp omnuj tŷx ně nhūm mě hā kām akir. ¹⁰ No nhūm Tirtüm Karō nhŷ hā hamaxpēr tŷx o mě kām kapēr nhūm mě kuma ně tee ri kutā tanhmā kām ně hprām kaprŷ. ¹¹ Hāmri ně ma mra ně tanhmā ho hēx to kaxyw amnhī kwŷjē rē ně mě kām hā amŷnē ně mě kām:

—E kēr ka mě krī nhō xwŷnhjē mā Estewāw o axēx ně tanhmā mě kām ho akapēr punuj to ho ri mě hkôt apa. Kē mě ama ně kamā gryk kato. Kot kaj mě ā amnhī nhīpēx anē pa mě hpānhā mě amā amnhīre. Anē.

Hāmri nhūm mě kuma ně ma mra ně hapōj ně ma krī nhō xwŷnhjē mā tanhmā ho hēx to ho ri mě hkôt pa ně mě kām:

—E mě amnē akuprō ně mě inhma. Kwa kēr ka mě Estewāwti kapēr mar kēt ně. Na hte finat Mojes mě Tirtüm wa ho kapēr punuj pix o ri pa. Pa mě ra kot wa ho kapēr punuj ā kuma. Anē.

¹² Hāmri nhūm mě kuma. Krī nhō xwŷnhjē mě ně mě àptār tūmrejē mě Tirtüm kapēr tūm o mě ahkre ho mě pa xwŷnhjaja nhūm mě tee ri mě kot Estewāw o hēxja ma ně kamā gryk ně. Hāmri ně ma hwŷr mra ně unē ně ma mě ō juisti hwŷr o tē. ¹³ Hāmri nhūm mě kām ho hēx xwŷnhjaja mě hkôt mra ně juisti mā tanhmā ho hēx to ně mě kām:

—E jahti na hte finat Mojes kot Tirtüm nhŷ hā mě pahte tanhmā amnhī nhīpēx to hā karō ho hēx rāhā ho pa. Ně Tirtüm mā amnhī jarēnh xā hā ixkreja nhūm tanhmā ho hēx to pa mě kuma. ¹⁴ Na hte mě kām: “Koja nhŷrmā Jejus pē Najare nhō xwŷnh Tirtüm mā amnhī jarēnh xā hā ixkreja grānh pa kām ga.” Anhŷr o mě kām hēx o pa. Ně Mojes kot mě pahte amnhī nhīpēx ā karō ně mě pahkurē pa prem kuma. Anē.

¹⁵ Nhũm prem ã mẽõ juisti mã Estewãw o hêx anê. Hãmri nhũm mẽ kuma nê Estewãw wỳr rít nê hkuk pumu nhũm te kot Tirtũm kapêr o mẽ wrỳk xwỳnhjê kuk nhĩrã rax pyrã nê xa nhũm mẽ tee ri omu nê kamã no pyma nê.

Estewãw kot juistijê mã ujarênh

7 Hãmri nhũm mẽ õ patre maatija Estewãw mã kapêr nê kãm:
—E mẽ inhmã amnhĩ jarê. Xà ãm hãmri na mẽ ri ã ajarênh anê nà? Anê.
² Hãmri nhũm kuma nê mẽ piitã mẽ kãm kapêr. Mẽ kãm kapêr ryy nê mẽ kãm:
—Tõe kot paj mẽ amã mẽ panhĩgêt finat Apraãw tanhmã harênh to ka mẽ inhma. Amnepêm na pre Tirtũm maatija Apraãw wỳr kato. Kormã pyka pê Mẽ-sopotãm kamã pa ri. Kormã kot ma krĩ pê Arã hwỳr mõi kêt ri nhũm hwỳr kato nê kãm: ³ “E kêt ka mẽ an-hõ krĩ pê akato nê akwỳjê re nê ma mẽ. Kot paj ma nhỹhỹm hpãnhã pyka hõ hwỳr mẽ ato mẽ.” Anê.
⁴ —Hãmri nhũm kuma nê amnhĩ to akuprõ nê ma mẽ. Õ pyka pê Katej pê kato nê ma krĩ pê Arã hwỳr mẽ nê hpãnhã kamã pa. Tã nhũm hipêêxã Terahti kêt ty nhũm Tirtũm amnê jar mẽ panhõ pyka hwỳr kumẽ. Jar mẽ papapxã hwỳr kumẽ.
⁵ —Nom nhũm kormã kãm pykaja nhõr kêt nê. Kormã kãm hkwy ho grire nê õr kêt nê. Na pre ãm kãm:
E kot paj nhỹrmã amã pykaja gõ. Amã nê akanrêhã akra nê atãmnhwỳjê mã kugõ ka mẽ kamã ri apa ho apa.
Anhỳr o kãm mẽ panhõ pika pê Kanaãja jarê. Apraãw kormã hkra hkêt ri nhũm ã kãm kapêr anê. ⁶ Hãmri nê kãm:
Koja akanrêhã atãmnhwỳjaja nhỹrmã ma nhỹhỹm pyka hõ hwỳr pa nê hpãnhã kamã pa. Mẽ õ pyka kamã pa hkêt tã nhãm pyka hõ kamã pa hãmri nê pika nhõ xwỳnhjê mã àpênh rũnh o pa nhũm pyka nhõ xwỳnhjaja mẽ hipêx kati rũnh o pa. Nê mẽ àpênh ã mẽ kãm amnhĩrer kêt nê. ãm mẽ homnuj o pa hã amgrã xohtõ rax kumrêx. Nhũm mẽ hã amgrã pê 400.
⁷ Nom kot paj mẽ hã mẽ homnuj tỳx nê. Akanrêhã atãmnhwỳjê hã mẽ homnuj tỳx nê nhũm mẽ rĩ kormã mẽ kurũm kato nê man akupỹn pa nê jar põi. Hãmri nê jar inhmã inhmex o inhmex ã ijarênh rãhã ho pa. Anê.
⁸ Hãmri nê kãm:
E pu axpên ma. Koja ka nê akanrêhã akra nê atãmnhwỳjaja ka mẽ ixkõt ri amnhĩ nhĩpêx o apa hã kot paj mẽ ato ixkra. Tã koja ja amã mex japêr hã kêt ka mẽ amnhĩ my kwỳt kã hkwy jakã. Nê koja mẽ akrajaja hapõi nê my ka mẽ mã mẽ ho anê nê mẽ kêt mẽmy kwỳt kã hkwy jakã. Mẽ piitã mẽ kot mẽ apê ixkra hã mẽ apumunh kaxyw kot kaj mẽ ã amnhĩ nhĩpêx anê. Anhỳr o Apraãw mã kapêr nhũm kuma nê mar xã hkõt hkra Ijak my kwỳt kã hkwy krãhta. Kormã hkarãre ri. Kormã hã arĩgro pê 8 pix ri nhũm kêt hkwy krãhta.
—Tã nhũm Ijak hprêk nê hprõ nê hkra. Hãmri nê mã hkra jako ho anê nê. Nhũm jako hprêk nê mã hkra pê

12jê ho anê nê mẽ piitã mẽmy kwỳt kã hkwy jakã pa. ã na pre mẽ pahpãr kraxjaja amnhĩ nhĩpêx anhỳr o pa.
⁹ —Jako hkrajê hõ na pre kêt Jujê. Nhũm Jujê htõjaja hipêêxã hkõt kamã gryk nê axtem nê mẽ urojê mã ho wênê nhũm mẽ kêt haprõ nê ma pyka pê Ejit wỳr o mẽ. Amarĩ Ejit nhõ xwỳnhjê mã àpênh o pa kaxyw. Tã no nhũm Tirtũm arĩ tãnopxar rãhã ho hkõt pa. ¹⁰ Hãmri nê Ejit kãm mẽ kot homnuj xwỳnhjê nhĩhkra rũm hkapa nê tanhmã hkrã hto nhũm àhpumunh tỳx nê hamaxpêr mex nê. Jakamã nhũm Ejit nhõ xwỳnhjê nhõ pahi Parahtija omu nê kãm hkĩnh nê. Kot tãm amnhĩ nhĩpêx nê àhpumunh tỳx kõt omu nê kãm hkĩnh nê. Hãmri nê amnhĩ ri kumẽ nhũm ãhkõ hã àpênh o pa. Kãm õrkwỳ pumu nê Ejit nhõ xwỳnhjê ho amnhĩptãr o pa.
¹¹ —Rõm nhũm mẽ hpur kãm mẽmoj nhĩgrõt mex kêt nê nhũm mẽ kêt mẽ apkur xã hã mẽ õja ra ri mẽ kêt kryre. Ejit kamã nê jar Kanaã kamã nhũm mẽ apkur xã hã mẽ õja mẽ kêt hapêx par o mẽ. Nhũm mẽ piitã prãm xaj ra hiire nê kãm prãm tỳx o pa nhũm mẽ panhĩgêtjaja hãmri prãm xaj tee ri amnhĩ xãpkur xã hã mẽmoj japêr.
¹² —Tã nhũm Jakoja Ejit kãm arĩ mẽ apkur xã hã mẽ õ rax ã harênh ma nê ma hwỳr hkra hkwyjê rê. Mẽ panhĩgêtjaja nhũm ma mẽ hwỳr mẽ kurê nhũm mẽ ma mẽ hwỳr mra. Hãmri nê mẽ hwỳr põi nê mẽ kêt mẽmo hy hkwy japrõ nê ma akupỹm o mra. Wam mẽ mõiarta ã mẽ kêt mẽmoj japrõ nê ma akupỹm o mra.
¹³ —Tã nhũm mẽ kêt mẽmo hy japrõr xwỳnhja hapêx nhũm mẽ axte akupỹm mẽ hwỳr mra. Hãmri nhũm mẽ htõ Jujê mẽ kãm amnhĩ to amnhĩrít nê kêt mẽ htõ hã mẽ kãm amnhĩ jarê. Mẽ kot ra htyk ã hkamnhĩx tã nhũm mẽ kãm amnhĩ jarê. Hãmri nhũm Parahtija mẽ kêt Jujê htõ hã mẽ harênh ma.
¹⁴ —Tã nhũm Jujê amnhĩ wỳr hipêêxã Jako mẽ htãmnhwỳjaja mẽ hã karõ nhũm mẽ piitã ma Ejit wỳr hapêx. Mẽ kêt 75 nê ma Ejit kamã Jujê hwỳr hapêx hãmri nê kamã pa ho pa.
¹⁵ —Á kot anhỳr jakamã nhũm Jakoja ma Ejit wỳr mẽ nê hpãnhã kamã pa ho pa. Tã hãmri kamã ty. Nhũm hkrajê piitã Ejit kãm pa hãmri nê gaa nê htyk pa.
¹⁶ Hãmri nhũm mẽ hkanrêhã mẽ hkrajaja mẽ hamỳ nê ma akupỹm Kanaã hwỳr krĩ pê Sikê hwỳr mẽ o pa nê kamã mẽ hagjê. Na pre mẽ hkukamã finat Apraãw kot Amõi krajê pê kênkre japrõ nê kamã hprõ jaxã. Jakamã nhũm prem mỳr pê ma hwỳr mẽ o pa nê kamã mẽ hagjê hãmri nê ma akupỹm Ejit wỳr pa.
¹⁷ —Tã gaa nê rĩ ohtõ rax kumrêx o mẽ. Mẽ panhĩgêtjaja ohtõ rax kumrêx o mẽ. Hãmri nhũm Tirtũm kot Apraãw mã mẽ õ pyka jarênh xwỳnhja nhũm kot mẽ kãm õr kaxyw. ¹⁸ No nhũm Ejit nhõ pahi kot Jujê ho mex xwỳnhta na pre ra ty nhũm axtem hpãnhã hõja mẽ ho amnhĩptãr o pa. Nê aa Jujê jarênh mar kêt nê. Kormã pahi xàr nyw kêt ri htyk jakamã nhũm mỳr pê harênh mar kêt nê. ¹⁹ Hãmri nê hkwyjê homnuj o pa. Tanhmã mẽ panhĩgêtjê nhĩpêx to ho pa. Nê mẽ kãm mẽ hkra my hapõx xwỳnhjê hã amỹnê. Mẽ hapõx

nhũm mẽ kot pikap mẽ rēnh nhũm mẽ htyk kaxyw nhũm mẽ kām mẽ hã amỹnê.

²⁰ —Rôm nhũm finat Mojesja kato. Nê mexre. Hãmri nhũm katorxà Ejit nhõ xwỹnhjê kot kêp hpĩr pymaj òrk-wỹ kamã ri mẽ kêp ho hpimxur o pa hã mytwrỹ axkrunêpxi.

²¹ —Tã nhũm ra htỹxre nhũm katorxà mẽ hipêêxà wa tee ri hkukamã hamaxpêr hãmri nê mẽ kot wa kêp hpĩr pymaj kumỹ nê ma o tẽ nê kaxyw à nhĩpêx nê nhỹri gô nhĩpôk ri pô kamã ho amũxu. Tã nhũm Paraohti hkra nija ra gôx mã wỹr mã tẽ nê ra omu hãmri nê amnhĩm kumỹ nê ma o tẽ nê ho hkra. ²² Jakamã nhũm Mojes Ejit nhõ xwỹnhjê kamã hprêk. Hãmri nê mẽ àh-pumunh xà hã kagà pumunh pa. Nê hihtỹx nê mẽ kãm kapêr kãm hihtỹx mex o pa.

²³ —Tã hãmri ra hã amgrà pê 40 nê hapêx nhũm Mojes hamaxpêr nê ra kãm amnhĩ kwỹ pê Ijaewjê pumunh prãm nê ma mẽ hwỹr tẽ. ²⁴ Hãmri nê htêm kôt ja wa omu. Nhũm Ejit nhõ xwỹnhja Ijaewja homnuj o xa nhũm Mojes tẽn tee ri hã omu nê hamaxpêr o: “E pa ma wa hwỹr tẽ nê ixkwỹ mũj ã Ejit nhõ xwỹnhta pĩ kê ixkwỹjaja ja hã ixpumu nê Tĩrtũm kot mẽ hwỹr inhmēnh ã ixpumu. Ixte Ejit nhõ xwỹnhjê nê mẽ kator kaxyw mẽ ja hã ixpumunh kurê kumrêx.”

—Anhỹr o hamaxpêr hãmri nê wa hwỹr tẽ nê amnhĩõja nê Ejit nhõ xwỹnh pĩ. Tã no nhũm hkwyjaja kot hpĩr ã harēnh mar tã tanhmã amnhĩ kaxyw kãm hamaxpêr to hkêt nê. ²⁶ Nhũm apkati nhũm mēhõja war axkrut nê axte pijapu ho wa xa. Hamẽ wa kêp Ijaew. Jakamã nhũm Mojes akupỹm mẽ hwỹr tẽ nê tee ri axpēn tã wa omu nhũm ja kêp omnuj nê. Hãmri nhũm wa hwỹr tẽ nê axpēn nê wa kãm kapêr nê wa kãm: “Pa? Kwa war ajamẽ war apê Ijaew kēnã na ka wa ri axtem nê ã axpēn nhĩpêx anê.” Anê. ²⁷ Hãmri nhũm kot amnhĩ kaxyw hkryx xwỹnhja kuma nê nhãm amnhĩ nê hkujate nê kãm: “Tk. Kwa xà apê mẽ inhõ pahi hã na ka ã wa inhmã akapêr anê? Nà apê mẽ inhõ pahi hkêt kēnã. ²⁸ Kot kaj inhĩpêx o te ate Ejit nhõ xwỹnhta nhĩpêx pyrã nê wa ixtõ hpĩr kêt nê.” Anê.

²⁹ —Hãmri nhũm tee ri kuma nê ra kãm ma nê Ejit rũm kator kurê kumrêx nê ma pyka pê Mijiã hwỹr mō nê kamã hpãnhã pa. Kamã hprõ nê hkra. Nhũm hkra myja wa hamẽxkrut.

³⁰ —Tã nhũm Mijiã kamã pa hã axte hã amgrà pê 40. Hãmri nê mẽmo arĩgro hã kapôt ã krã hakỹx pê Sinai kape hã ri pa nhũm Tĩrtũm kãm kapêr. Nom nhũm Mojes omunh kêt nê. ãm utĩ kaôk kamã kuwy hpôk pix pumu. ³¹ Amnhĩ jaêr pê ã kot amnhĩ nhĩpêx anhỹr ã omu hãmri nê amnhĩ tã hpĩr hã omunh kaxyw hwỹr tẽ nhũm Tĩrtũm kãm:

³² Pa Mojes? E ixpê Tĩrtũm na pa. Ixpê akukamã anhĩgêt Apraãw nhõ Tĩrtũm na pa. Nê ixpê Apraãw kra Ijak mẽ htãmnhwỹ jako wa õ Tĩrtũm na pa. Anê. Hãmri nhũm tee ri kuma nê kãm ma xaj httertet tỹx nê. Hãmri nê umaj axte pĩ hpôkja wỹr rĩt kêt nê. ãm nhãm hkrã nê rĩt o xa. ³³ Hãmri nhũm Tĩrtũm kãm:

E kwa ixpê Tĩrtũm maati hã ixtã apijaãm ã aparkà ka-pa nê apar kēnh nê xa.

³⁴ Na pa ra ixkra Ijaewjaja Ejit kãm mẽ omu. Na ra Ejit nhõ xwỹnhjaja ixpê mẽ homnuj tỹx kumrêx rãhã ho pa nhũm mẽ amnhĩ xà hã maj tee ri amnhĩ nhĩpêx. Pa ja hã mẽ omu nê inhmã mẽ hkaprĩ nê. Jakamã kot paj Ejit nhõ xwỹnhjê nhĩhkra rũm mẽ kator pa. E ka kot paj mẽ hwỹr amê ka ma akupỹm mẽ hwỹr mō nê mẽ kurũm mẽ kator.

Anhỹr o kãm mẽ kaxyw karõ. ³⁵ Ra Ijaew kot Mojes hkaga tã nhũm mẽ kaxyw ãm nê ma akupỹm kot mẽ hwỹr mēnh kaxyw. Na prem ra omu nê hkaga. Te mẽ ate Jejus kagaja pyrã nê hkaga. Jakamã nhũm pijapu xwỹnhta tee ri amnhĩ tã omu nê kamã gryk nê amnhĩ nê kãm kapêr nê kãm: “Tk. Kwa xà apê mẽ inhõ pahi hã na ka ã wa inhmã akapêr anê? Nà apê mẽ inhõ pahi kêt.” Anhỹr tã nhũm Tĩrtũm mẽ kaxyw tãm xãm. Kot mẽ ho amnhĩptar nê Ejit nhõ xwỹnhjê rũm mẽ kator kaxyw. Ja kaxyw na pre pĩ hpôk kamã kãm kapêr nê mẽ kaxyw ãm.

³⁶ —Jakamã nhũm Mojes ma akupỹm Ejit wỹr mō nê mẽ kurũm hkwyjê kator nê ma mẽ o pa. Na pre mẽ ho mex nê Tĩrtũm nhỹ hã mẽ kãm aa mẽ kot mẽmoj pumunh kêt kwỹ ho anhỹr o ri mẽ o pa. Ejit kamã nê määnēn mẽ kot gô xujanãr mã: “Gô kamrêk” anhỹr xwỹnhta kamã. Nê kapôt ã mẽ kãm ã amnhĩ nhĩpêx anhỹr o mẽ o pa. Nê kapôt ã ri mẽ o pa ho ra hã amgrà pê 40.

³⁷ —Tã tãm na pre mẽ panhĩgêtjê mã mẽhõ hkukamã mẽ kãm tanhmã harēnh to nê mẽ kãm harēnh o: “Koja Tĩrtũm nhỹrmã te ra mẽ akaxyw pa ixãm pyrã nê inhmỹr pê mẽ panhĩõ xãm. ỹ hã mẽ amã kapêr jarēnh o pa kaxyw nhũm nhỹrmã mẽ akaxyw ãm ka mẽ omu.”

—Anhỹr o ã Jejus kukamã harēnh anê. ³⁸ Na pre Mojes kapôt ã mẽ panhĩgêtjê ho pa nhũm mẽ krã hakỹx pê Sinaija wỹr pa. Mẽ panhĩgêtjaja hãmri hwỹr pa nhũm Tĩrtũm kapêr o mẽ wrỹk xwỹnhja mẽ kaxyw Mojes mã kapêr nhũm ô ri mẽ kãm awjarẽ nê hã kagà. Mẽ kot mar nê hkôt amnhĩ nhĩpêx nyw o amnhĩ nhĩpêx o pa kaxyw nhũm mẽ kãm Tĩrtũm kapêr jarēnh o pa. Nê mẽ pajaxwỹja. Mẽ pahte hkôt amnhĩ nhĩpêx nyw o amnhĩ nhĩpêx o papa kaxyw na pre mẽ pamã hã kagà.

³⁹ Tã no nhũm mẽ panhĩgêtjaja Mojes ma nê ãm kuma nê hkaga kumrêx nê akupỹm Ejit wỹr hkrã. ⁴⁰ Jakamã nhũm Mojes kormã nhỹri mẽ kaxyw Tĩrtũm mã kapêr o ãm rôm nhũm mẽ wakre kamã htõ Arãw wỹr mra nê kãm: “Kwa Mojes ra kot tanhmã amnhĩ to kēnã. Kot Ejit rũm mẽ pakator nê mẽ pahto mōr tã ra nhỹri arĩk nê tanhmã amnhĩ to. Jakamã e. Kwa hpãnhã mẽ inhmã mẽmo karõ nhĩpêx pu mẽ ho panhõ sãnti kê tãm ma akupỹm Ejit wỹr mẽ pahto pa.” Anê.

⁴¹ —Hãmri nhũm mẽ kuma nê mẽ kãm kax o mōx krare karõ ho sãnti nhĩpêx nê mẽ kãm ãm. Hãmri nhũm mẽ axtem nê te ho Tĩrtũm nhĩpêx pyrãk o hipêx nê kãm ôwēhti hkwy pa nê kãm haxwỹ nê hã apku. Hãmri nê ã amnhĩ nhĩpêx anhỹr ã amnhĩ pumu nê hkĩnh nê. ⁴² Hãmri nhũm Tĩrtũm tee ri ja hã mẽ omu nhũm ja kêp omnuj tỹx nê nhũm mẽ hkaga hpa. Jakamã nhũm prem amnhĩ krã hkôt ri myyti nê mytwrỹre nê kanhêti karõ nhĩpêx nê te mẽ kot Tĩrtũm

nhîpêx pyrâk o hipêx o pa. Hâmri nê amnhî kaxyw kumã pix mã hamaxpêr o pa hã amgrã xohtô nê. Tã nhũm Tirtũm nhỹ hã kapêr jarênh o mẽ pa xwýnhjaja tanhmã mẽ kãm kapêr to nê mẽ hã kagã. Te Tirtũm tãm mẽ kãm kapêr pyrâk o mẽ kãm kapêr nê hã kagã kot:

Pa mẽ apê Ijaewjaja? E mẽ inhma. Amnepêm mẽ ate kapôt ã ri mẽ apa hã amgrã pê 40ta ã. Xà we inhmã na ka prem akrit kwý hpar o apa?

⁴³ Nã inhmã hkêt. Na ka prem axtem nê ri amnhî krã hkôt amnhîm mẽmo karõ nhîpêx nê hipêx o te mẽ ate pa inhîpêx pyrâk. Pê kãm akrit kwý hpar nê òr o ri apa.

Mẽ anhõ mẽmo karõ nhîpêxta mẽ ate amnhîm hã hixi pê Mõrok mẽnh xwýnhjaja ka pre htem ã kamã amnhî kôt ho apa.

Nê amnhîm kanhêti karõ nhîpêx nê hã hixi mẽ nhũm kêp Repã. Ka mẽ ixkuhpa hã wa kêp mẽ apãm ã harênh o ri apa.

Tã ã mẽ ate amnhî nhîpêx anhÿrja mÿrapê kot paj pãnhã nhÿhÿm mẽ arê.

Koja mẽ akutã amnhî xunhwÿr xwýnhjaja mẽ apynê nê ma pyka pê Papirõn rũm hamũ mẽ ato hapêx ka mẽ amarĩ mẽ kãm axapênh rũnh o ri apa kãm ga. Anê. Æ na pre Tirtũm mẽ panhîgêjtê mã kapêr anê nhũm ÿ hã kapêr jarênh o pa xwýnhjaja mẽ kãm hã kagã.

⁴⁴ —Tã nhũm mẽ panhîgêjtê kormã kapôt ã ri pa ri amnhî kôt mry kã ho ixkre ho pa. Tirtũm mã kapêr xà hã ixkreja nhũm prem amnhî kôt ri o pa. Mẽ kot kãm “Tirtũm nhõrkwÿ kaàkre” anhÿr xwýnhjaja. Tirtũm kot mẽ kãm hã karõ xà hkôt nhũm mẽ hipêx nê amnhî kôt ri o pa. Na pre Tirtũm hpri hã Mojes mã tanhmã kot hipêx to hã karõ nhũm mẽ hkôt hipêx nê amnhî kôt ri o pa.

⁴⁵ —Tã nhũm Mojes ty nhũm hpãnhã Jojueja amnhî kôt mẽ o pa. Ma Tirtũm kot mẽ kãm pyka mex nhõrta wÿr Mojes mÿr pê mẽ o pa. Hâmri nê hwÿr mẽ o pøj nhũm Tirtũm mẽ nê mẽ kot ra kamã mẽ pa ho mẽ pa xwýnhjê japøj nhũm mẽ pãnhã kamã pa ho pa. Nê amnhî kôt Tirtũm nhõrkwÿ kaàkreta o pa. Rãhã nhũm finat Tawija mẽ hpãnhã mẽ ho amnhîptã. ⁴⁶ Na pre Tirtũm Tawi kot tanhmã amnhî nhîpêx to ho pa hã omu nê kãm hapê nê. Jakamã nhũm Tawi kãm kapêr nê kãm: “Pa Tirtũm? Kwa xà kot paj amã ixkre mex õ nhîpêx nã? Mẽ ixpê Ijaewjaja mẽ ixte kamã amã amex o amex ã ajarênh o ixkrĩ kaxyw pa hipêx. Xà kot paj amã hipêx?” Anhÿr tã no nhũm Tirtũm kormã kãm ja prãm kêt nê. ⁴⁷ Jakamã nhũm Tawi hkra Sarumãwja hipêêxã mÿr pê hpãnhã kêp mẽ õ pahi nê kãm hipêx. ⁴⁸ Nom xà na hte Tirtũm maatija mẽ pahte kãm panhîhkra ho ixkre nhîpêx xwýnh kamã hkrĩ? Nã kaxkwa kamã na hkrĩ xà. Na pre ra Tirtũm nhỹ hã kapêr jarênh o pa xwýnhjaja Tirtũm kot tanhmã mẽ pajamãr to ho pa hã kagã nê hã kagã ho:

⁴⁹ Na pa hte kaxkwa rũm pyka hkôt mẽ piitã mẽ hamãr mex o ixkrĩ.

Tã tanhmã kot paj amnhî to nê mẽ ïhkra ho mẽ kot inhmã ixkre nhîpêxta wÿr axà nê kamã ixpa ho ixpa?

⁵⁰ Nã ixte mẽmoj piitã ho ixkator xwýnh kênã kot pa kêt ã amnhî nhîpêx anê. Anê.

Nhũm pre ã Tirtũm amnhî tã mẽ kãm kapêr anê nhũm ÿ hã kapêr jarênh xwýnhjaja ô ri mẽ pamã hã kagã.

⁵¹ —E kwa mẽ inhma ixkwÿjaja. Mẽ akrã hihtÿx kumrêx jakamã mẽ amã Tirtũm kapêr mar prãm kêt. Na ka htem mẽ panhîgêjtê pyrã nê amnhî nê Tirtũm Karõ kaga nê kapêr mar kêt nê. ⁵² Na pre hte Tirtũm nhỹ hã kapêr o mẽ pa xwýnhjaja mẽ panhîgêjtê hwÿr mra nê mẽ kãm kapêr jarênh o ri mẽ hkôt pa. Tã nhũm mẽ hkaga nê mẽ hipêx kati ho pa. Na pre htem Jejus wÿrk kukamã mẽ kãm: “E koja nhÿrmã kot Tirtũm kapêr mar nê hkôt amnhî nhîpêx mex rãhã xwýnh maatija mẽ pahwÿr wÿr.” Anhÿr o mẽ kãm harênh o pa. Tã no nhũm mẽ kãm ja mar prãm kêt jakamã axtem nê hã mẽ hpar o pa. Mẽ kot mẽ kãm Jejus jarênh o mẽ pa xwýnhjê hpar o pa. Tã nhũm tãm mẽ pahwÿr wÿr ka mẽ omu nê mẽ kot amnhî nhîpêxta pyrã nê hã amÿnê nhũm prem mẽ amã kupi.

⁵³ —Tirtũm kapêr o mẽ wÿrk xwýnhjaja kot Tirtũm nhỹ hã tanhmã mẽ pahte amnhî nhîpêx to ho papa hã mẽ pamã karõ nhũm mẽ ate mar tã mẽ apê hprãm nõkati. Nê ama nê ãm ama nê hkôt amnhî nhîpêx o ri apa hkêt nê. Anê.

Mẽ kot Estewãw pïr ã mẽ harênh

Rukre 21.16-19, 23.34; Atre 22.20

⁵⁴ Hâmri nhũm juistijaja tee ri Estewãw xujarênh ma nê kamã gryk tÿx nê kãm kapêr punuj nê. ⁵⁵ Nom nhũm Tirtũm Karõja tanhmã hkrã hto nhũm kãm mẽ uma hkêt nê. Hâmri nê kãnhmã rĩt nê kaxkwa pumunh o xa nê kamã Tirtũm rũm hirã rax pumu. Nhũm Jejus Tirtũm nhîhkô hã xa nhũm omu nê hkĩnh nê mẽ kãm:

⁵⁶ —Kokÿÿ. Na kaxkwa axkjê nhũm kamã Tirtũm nhÿ pa omu. Nhũm kuri kot mẽ pahwÿr mẽnh xwýnh Jejusja xa. Hêxta waa nê. Nã na pa jarãhã wa omu nê ixkĩnh tÿx kumrêx. Anê.

⁵⁷ Hâmri nhũm mẽ kuma nê kamã gryk tÿx nê. Hâmri nê kãm mar prãm kêt nê kêp amnhî jamak pro. Hâmri nê gryk xaj ãmra htÿx nê hwÿr hprõt ⁵⁸ nê unê nê krĩ pê ho kato nê ma o tẽ nê nhÿri o xa. Hâmri nê kên o htak o hpïr kaxyw amnhî nhînokã hkwrÿ nê mẽhõ my pê Sawti mã kugõ nhũm mẽ kãm hamÿ. Hâmri nhũm mẽ kên rũnh kwÿ jamÿ nê o mra nê Estewãw wÿr rênh prêprêk o kuhê. Nê ho ï kamã htak nê hkrãx pê htak. ⁵⁹ Hâmri nhũm ra htyk kaxyw nê Jejus mã amnhî jarê nê kãm:

—Pa Pahihti Jejus? E koja ixkarõ awÿr api ka ixto amnhîptã. Anê.

⁶⁰ Hâmri nê hkõn krã ho tẽm nê nhÿ nê axte kãm amnhî jarê nê mẽ kot hpïr xwýnhjê nê kãm kapêr nê kãm:

—Kwa Pahihti. Mẽ kot ixpïr tã kwa tanhmã ixtã mẽ ho hkêt nê.

Anhÿr o mẽ nê Jejus mã kapêrja kôt ra ty.

Mě kot Estewāw jaxàr ã mě harěnh

Atre 22.4, 26.9-11

8 Hāmri nhūm mě kot Jejus kôt amnhĩ nhĩpêx xwýnhjaja Estewāw wýr mra ně htyk kām omu ně hkapřĩ ně. Ně mur ně kumý ně ma o mō ně haxà. Nom nhūm Sawtija mě kot hpřĩ ã omu nhūm ja kām mex ně.

Sawti kot Jejus kwýjê nhĩpêx kati ho pa hã harěnh

Atre 1.8

Tã nhūm Jerujarě kamã Ijaewjaja mě kot Jejus kôt amnhĩ xunhwýr xwýnhjê homnuj tỳx o pa. Hāmri nhūm mě tee ri amnhĩ kukamã hamaxpěr ně mě hk-wýjaja mě umaj hapôj ně ma pika hkwý hkôt hpigrành pa. Mě hkwýjaja Jutej wýr ma pa nhūm mě hkwýjaja Samar hwýr ma pa. Ā na prem mě umaj nhýhým hpi-grành par aně. Ām Jejus nhý hã mě ahkre xwýnh maati pixjaja na prem Jerujarě kamã arík ně nhýhým mōr kêt ně. Simāw Pêtre ně Juāw ně Xiakre ně Andre ně Firipti ně Patoromew ně Matêwre ně Makre ně Tomas ně Xiakre hōja ně Simāw ō ně Maxitreja. Ām jajaja pix na prem arík.

³ Nhūm Sawti haxwýja Jejus kôt mě kot amnhĩ xunhwýr xwýnhjê homnuj o pa. Mě kot Jejus kaga hprãm xàj tanhmã mě hipêx to ho pa. Na pre hte mě ōrkwý hwýr agjê ně mě unê. Měmyjê pynê ně mēnijê pynê ně ma mě o mra ně mě haggjênh xà kamã mě haggjê. Mě uràk ně kēp Ijaew tã ã mě hipêx anhýr o pa.

⁴ Tã nhūm mě umaj Jerujarě rŭm pika hō hwýr mě hpigrành xwýnhhtaja amarĩ pika hkwý hkôt ri pa hkêt ně. Na prem ma mě piitã mě kām Jejus kapěr jarěnh o ri mě hkôt pa. Kēp Tirtŭm kot mě pakaxyw ãm xwýnh ã harěnh rãhã ho ri mě hkôt pa.

Wajaga kot amnhĩ tã Firipti mar ã harěnh

Juāw 2.23-24

⁵ Tã nhūm Firipti haxwýja ma mō. Ma krĩ pē Samar hwýr mō ně kamã mě kām Tirtŭm kot mě pakaxyw ãm xwýnhhta jarěnh o pa. Samar kamã na pre wajaga Simāwti ri Samar nhō xwýnhjê hkôt mě no kupyř rãhã ho ri mě hkôt pa. Ně àhpumunh tỳx ã amnhĩ to jarkrar o ri pa. Jakamã nhūm mě kot amnhĩ nhĩpêx ã omu ně kamã no pyna ně. Ně htỳx ho ãm hāmri kot amnhĩ jarěnh ã hkamnhĩx. Jakamã nhūm pre mě kām tanhmã ri amnhĩ to hêx to ho pa pē mě no kupyř rãhã ho ri pa nhūm mě amnhĩ jaēr pē omu. Mě kot amnhĩ to hkryre xwýnhjaja ně mě kot amnhĩ to rŭnh xwýnhjaja nhūm mě amnhĩ jaēr pē kot tanhmã amnhĩ nhĩpêx to hã omunh o hkôt pa. Ně ri axpēn mã harěnh o:

—Kokýř. Wajagaja àhpumunh tỳx kumrêx. Tirtŭm nhý hã mǎn te ã amnhĩ nhĩpêx anhýr o pa nà? Mǎn pre Tirtŭm kām àhpumunh xà hkwý gō nhūm ý hã ã amnhĩ nhĩpêx anhýr o pa. Aně.

Hāmri ně hkôt hamaxpěr o ri hkôt amnhĩ nhĩpêx o pa.

Tã nhūm Firipti mě ō krĩ hwýr mō ně mě kām Jejus Kris jarěnh o ri mě hkôt pa ně mě kām:

—Jesús kēp Tirtŭm kot mě pahwýr mēnh xwýnh jakamã kot kaj mě amnhĩ kaxyw hkôt ajamaxpěr ně hkôt amnhĩ xunhwý nhūm Tirtŭm hã mě apumu ně mě ato hkra. Aně.

Hāmri ně Tirtŭm nhý hã akupým tanhmã mě kute xwýnhjê ho mex to ho pa. Mě ĩ kamã mě htyk xwýnhjaja ně mě hyk o mě pa xwýnhjaja nhūm mě ohtō ně akupým mě ho mex o pa. Ně mě hkwýjê ně mēkarōm-nuti hkwý jano nhūm mě àmra htỳx o mě hkaga ně ma mě kurŭm hapōx ně mra. Ā Firiptija Jejus nhý hã mě ho mex o pa aně nhūm mě piitã ja hã omu ně kapěr ma ně hkĩnh ně. Ně kapěr mar tỳx ně hkôt hamaxpěr. Jao wajaga Simāwti kaga ně hpãnhã amnhĩ kaxyw Jejus kôt pix mã hamaxpěr ně hkôt amnhĩ xunhwý. Hāmri nhūm Firipti ja hã mě omu ně mě hkrã kumrã. Měmyjaja ně mēnijaja ně mě piitã mě hkrã kumrã. Ra mě kot Jejus kôt amnhĩ xunhwýr ã mě piitã mě kām amnhĩ to amnhĩřit kaxyw nhūm mě hkrã kumrã pa.

¹³ Hāmri nhūm wajaga Simāwti haxwýja Jejus kapěr ma ně mě uràk ně amnhĩ kaxyw hkôt hamaxpěr ně hkôt amnhĩ xām nhūm Firipti hkrã kumrã. Hāmri nhūm hkĩnh ně Firipti hkôt ri pa. Ně aa mě kot mēmoj pumunh kêt kwý ho anhýr o ri pa hã omu ně kamã no pyna ho hkôt ri pa. Ně kot Tirtŭm nhý hã akupým mě ho mex ã omu ně tee ri hamaxpěr.

¹⁴ Tã hāmri nhūm Jerujarě kamã Jejus nhý hã mě ahkre xwýnh maati jaja Samar nhō xwýnhjê jarěnh ma. Ra mě kot Tirtŭm kapěr kôt amnhĩ nhĩpêx ã mě harěnh ma ně hkĩnh ně. Hāmri ně ma mě hwýr Simāw Pêtre mě Juāw wa kumê. ¹⁵ Hāmri nhūm wa ma mě hwýr wa mō ně pōj. Hāmri nhūm Firipti wa omu ně wa kām krĩ nhō xwýnhjê jarě ně wa kām:

—Nà na pa pre mě kām Jejus kapěr jarě nhūm mě inhma ně hkôt amnhĩ xunhwý. Jakamã pa pre mě hkrã kumrã. Nom na kormã Tirtŭm Karōja mě hkarō mã gjêx kêt ně. Aně.

Hāmri nhūm wa mě harěnh ma ně mě himōk ã wa ĩhkra jaxwýr o ri mě hkôt mra. Ja kôt nhūm Tirtŭm Karō mě hwýr wrý ně mě hkarō mã gjêx pa. ¹⁸ Hāmri nhūm wajaga Simāwja mě amnhĩ tã wa omunh o xa ně hamaxpěr o:

—Kokýř. Kwa wa kot mě hã ĩhkra jaxwýrja kôt na hte Tirtŭm Karō mě hkarō mã agjê. Hêxta waa ně. Inhmã ã mě hipêx anhýr o ri ixpa hprãm tỳx. E pa ixkàxpore hkwý jamý ně o tē ně wa kām kugō kê wa tanhmã ixto pa wa uràk ně ã mě hipêx anhýr o ri ixpa. Nà kot paj aně. Aně.

Hāmri ně wa hwýr tē ně wa kām:

—E ota ixkàxporeta. Kwa amnhĩm apy ně hpãnhã tanhmã ixto pa war apyrã ně mě hã inhĩhkra jaxwýr o ri mě hkôt ixpa kê Tirtŭm Karōja mě hkarō mã agjê. Inhmã ja ho anhýr prãm tỳx. Aně.

²⁰ Hāmri nhūm wa tee ri ã kapěr anhýrja ã omu nhūm Pêtre kām:

—Tk. Kwa ajamaxpěrja mex kêt. Xà na htem kàxpore ho Tirtŭm mã amnhĩrer pē ý hã mě ho hwýr o pa nhūm Karō mě hwýr agjê? Nà na htem kàxpore ho Tirtŭm Karō japrōr kêt ně. Kot kaj wa ixpyrã ně ã mě

hipêx anhÿr kêt nê. Ajamaxpêrja mexre hã. Kormã ate Tirtûm kôt amnhĩ xãm tÿx kêt jakamã na ka atÿx ã ri ajamaxpêr anê.

—Na ka ã wa ixte Tirtûm nhÿ hã mẽ hipêx anhÿr ã wa ixpumu nê amã wa ixpyrà nê ã mẽ hipêx anhÿr o ri apa hprãm xàj ajamaxpêr punuj nê. Nhũm ajamaxpêr punuj te kot apa hã apyr ka tee ate kêp amnhĩ kjênh pyrãk. Kwa tokyx ajamaxpêr punuj ã amnhĩ pumu nê akaprĩ nê tokyx hkaga. Hãmri nê amnhĩ to Tirtûm wÿ kê amnhĩ katut kôt ajamaxpêr punujja mẽ ka axte ã ajamaxpêr anhÿr kêt nê. ã mẽ hamaxpêr punuj anhÿr xwÿnhjaja koja mẽ nhÿrmã ma kuwy hwÿr pa. Anê.

²⁴ Hãmri nhũm tee ri amnhĩ tã kuma nê hkaprĩ nê wa kãm:

—Kwa xà wehe? Tô tokyx ixto Tirtûm wÿ kê ã ijamaxpêr anhÿrja mÿrapê hwÿr inhmênh kêt nê. Anê.

²⁵ Tã nhũm Simãw Pêtre mẽ Juãw wa Samar nhõ xwÿnhjê mã Pahihti Jejus kapêr jarênh pê ho mẽ ahkre hãmri nê ma akupÿm Jerujarê hwÿr mō. Ma pyka pê Samar hkôt mẽ kãm Jejus kapêr jarênh o ma akupÿm mō.

Firipti mẽ Exiop nhõ xwÿnh wa harênh

Ijais 53.7-8

²⁶ Hãmri nhũm Firipti arĩ Samar kamã arĩk. Hãmri nhũm Tirtûm kapêr o mẽ wrÿk xwÿnhja hwÿr wrÿ nê kãm:

—Pa? E ot pa awÿr wrÿ nê tẽ. Nà kêr ka tokyx akato nê ma mō nê Jerujarê rũm kãnhmã Kas wÿr pry kahpêr ta nê hã juk nê ma hã mō. Kapôt ã pry nōrta kahpêr ta nê hã mō. E kwa tokyj.

Anhÿr o kãm kapêr hãmri nê ma akupÿm tẽ nê kaxk-wa hwÿr api. ²⁷ Hãmri nhũm Firipti kuma nê kato nê ma hwÿr mōr kurê kumrêx. Mōō hãmri nê pryja kahpêr ta nê hã mō.

Hãmri nhũm ra mẽhō myja mō. Exiop nhõ xwÿnh na pre. Exiop kamã mẽō pahi na pre niti. Hixi pê na pre Kãtatre. Nhũm pry hã mōr xwÿnhja kêp kãm kãxpore jamãr o pa xwÿnh. Exiop kamã te kêp mẽ ò kōwenatō pyrãk. Tã kot Tirtûm mã mex o mex ã harênh kaxyw ma Jerujarê hwÿr mō. ²⁸ Hãmri nê akupÿm Exiop wÿr kormã mō. Ò pãr kãm nhÿ nê Tirtûm kapêr ã kagã htũm kamã kapêr o mō. Tirtûm nhÿ hã kapêr o pa xwÿnh pê Ijais kot Tirtûm kapêr ã kagã htũmja nhũm kamã kapêr o mō. ²⁹ Hãmri nhũm Tirtûm Karō Firipti mã harê nê kãm:

—E mẽhō mÿj wÿr aprōt nê tẽ nê hã ajêt nê ma hkôt tẽ. Anê.

³⁰ Hãmri nhũm kuma nê ma hwÿr hprōt nê hã ajêt nê kot kagã kamã kapêr ã kuma. Ijais kot Tirtûm kapêr ã kagã htũm kamã kapêr ã kuma nê kãm:

—Pa? Mãn ka aprĩ hã ate kamã akapêr xwÿnhnta ma nà? Anê.

³¹ Hãmri nhũm kãm:

—Nà ixte maare hã. Mẽhō kot hprĩ hã inhmã harê pa ixprĩ hã kuma? Xàt ka ixwÿr api nê ixri nhÿ nê aprĩ hã inhmã harênh o ixkôt mō nà? Anê.

Hãmri nhũm kuma nê hwÿr api nê ìhkō hã nhÿ nê kagãta pumunh o nhÿ. ³² Nhũm hã kagã kot:

Na htem ôwêhti par kaxyw nhũm amarĩ mẽ kãm akryk kuhê.

Nê mẽ kot kêp hkĩ jakàr kaxyw nhũm ma anê nê amarĩ mẽ kãm akryk kuhê.

Tã na pre mẽhōja ôwêhti kot amnhĩ nhĩpêx pyrãk o amnhĩ nhĩpêx.

Jakamã nhũm mẽ kot tanhmã hipêx to htã no nhũm arĩ mẽ kãm akryk xa. Amnhĩ nê tanhmã mẽ kãm kapêr punuj to hkêt nê. ãm arĩ mẽ kãm xa.

³³ Na prem homnuj tÿx nê ri hipêx kati rax nê.

Aa kot tanhmã amnhĩ tomnuj to hkêt kumrêx tã nhũm mẽ ã hipêx anê nhũm mẽhō yr pê tanhmã nê mẽ kãm kapêr to hkêt nhũm prem kupĩ.

Nhũm amnhĩ kanrêhã hkra hkêt rãhã ty. Jakamã kot puj mẽ hkrajê nhĩxi mar kêt nê. Kra hkêt rãhã htyk kênã. Anê.

³⁴ Nhũm pre ã Exiop nhõ xwÿnh Tirtûm kapêr ã kagã htũm kamã harênh anê. Hãmri nê tee ri ã kot mẽhō jarênh anhÿrja kukamã hamaxpêr nê hã Firipti kukja nê kãm:

—Kwa aprĩ hã inhmã mẽhōja jarê. Mẽhō na prem ã hipêx rax anê? Xà kot kagã xwÿnhnta na prem ã hipêx anê nà xà nhãm mẽhō na prem ã hipêx anê? E kwa aprĩ hã inhmã harê pa ã mẽ kot hipêx anhÿr xwÿnh kôt omu. Anê.

³⁵ Hãmri nhũm kãm:

—Tôe kot paj amã harê. Nà Jejus na prem ã hipêx anê nhũm prem hã kagã. Anê.

Hãmri nê hprĩ hã kãm kot kamã harênh xwÿnhnta jarê. Jejus kot tanhmã mẽ panê amnhĩ nhĩpêx toja nhũm hprĩ hã kãm harênh o hkôt mō.

³⁶ Hãmri nhũm wa kormã mō nê pry htã himô hãnh mō nhũm Exiop nhõ xwÿnh omu nê Firipti mã kãm:

—E mÿj gō mÿj nō. Xà kot kaj kamã ixkrã kumrã nà? Anê.

³⁷ Nhũm kãm:

—Nà kot kaj amnhĩ kaxyw Jejus Kris kôt ajamaxpêr nê hkôt amnhĩ xãm hã kot paj akrã kumrãr kurê kumrêx. Anê.

Hãmri nhũm kãm:

—Tÿ. Kêp Tirtûm Kra kênã kot paj kêt amnhĩ kaxyw hkôt ijamaxpêr kêt. Anê.

³⁸ Hãmri nê pãr o mrar xwÿnh mã anê nhũm pãr o nō nhũm wa kato nê himô hwÿr wrÿ nhũm Firipti hkrã kumrã. Kot Jejus kôt amnhĩ xãm ã hkrã kumrã. ³⁹ Hãmri nê wa akupÿm api nhũm Tirtûm Karō Firipti mÿ nê ma nhÿhÿm o mō nhũm Exiop nhõ xwÿnhja axte omunh kêt nê. Hãmri nê ma akupÿm papxã hwÿr mō. Ra kot Jejus kôt amnhĩ xãm jakamã hkĩnh nê ma akupÿm mō.

⁴⁰ Rôm nhũm Firipti krĩ pê Ajôt kamã pōj. Tirtûm Karō kot Exiop nhõ xwÿnh pê kator nê tanhmã ho nê Ajôt wÿr o mō hãmri nê kamã kumê. Hãmri nhũm mẽ kãm Jejus kot tanhmã mẽ panê amnhĩ nhĩpêx to hã harênh pê ma krĩ hō hwÿr mẽ kãm ujarênh anhÿr o pa rãhã krĩ pê Sejarej wÿr mō nê pōj.

Sawti kot Jejus kôt amnhĩ xãm ã harënh

Atre 22.6-11, 26.12-18

9 Rôm nhũm Sawtija xatã Jerujarë kamã Pahihti Jejus kôt mẽ kot amnhĩ xunhwÿr xwÿnhjaja tanhmã mẽ homnuj tÿx to ho ri mẽ hkôt pa. Kãm mẽ himex par prãm jakamã na pre hte ã amnhĩ nhĩpêx anhÿr pix o pa. Tã ra hamaxpêr nê ma patre maati hwÿr tẽ nê mẽ hã amnhĩ jarẽ nê kãm:

²—E ot pa awÿr tẽ. Kwa inhmã kagã nhĩpêx pa kupy nê ma krĩ pê Tamas kãm mẽ pahpê Ijaew xaptar tũm-rejê hwÿr o mỗ nê mẽ kãm kugõ. Kê mẽ kamã harë nê omu hãmri nê hkôt inhĩhkra kamã Jejus kôt mẽ kot amnhĩ nhĩpêx xwÿnhjê jagjê. Mënijaja nê mẽmyjaja. Hãmri pa mẽ unê nê man akupÿn awÿr mẽ o mỗ ka mẽ omu nê kam tanhmã mẽ hipêx to. Anê.

Hãmri nhũm kuma nhũm ja kãm mex nê. Hãmri nhũm kãm kagã nhĩpêx nê kugõ nhũm kupy nê hkôt mẽ pa xwÿnhjê mẽ ro hã ma Tamas wÿr mẽ hwÿr mör kurê kumrêx.

³Mỗ mẽ ra hpôx o mör mẽ nhũm puh kaxkwa rũm hirã rax kumrêx wrÿ nê hã ajêt nhũm hipôk ri xa.

⁴Hãmri nê tee ri omu nê kãm ma xaj pykap tẽm nê akryk nõ. Hãmri nhũm kaxkwa rũm mễhõ kãm kapêr nê kãm:

—Pa Sawti? Hêxta waa nê. Kwa mon ka hte ixtomnuj tÿx o ri apa? Anê.

⁵Hãmri nhũm amnhĩ jaêr pê kuma nê kãm:

—Kwa mẽ atõ na ka ã inhmã akapêr anê pahihti? Anê.

Hãmri nhũm kãm:

—Kwa nhũm ixpê Jejus ixte amã ixkapêr kênã. Pa na ka hte ixpê ixkôt mẽ kot amnhĩ xunhwÿr xwÿnhjê nhĩpêx kati ho apa. Jao te pa ate ixtomnuj tÿx pyrãk.

⁶Nom kot kaj axte ã amnhĩ nhĩpêx anhÿr kêt kumrêx. E kànhmã xa nê mãmri ma krĩ hwÿr tẽ. Kot kaj hwÿr pøj nhũm mễhõ awÿr tẽ nê mẽmoj tã amã karõ ka ama nê hkôt amnhĩ nhĩpêx. Anê.

⁷Nhũm pre ã Jejus Sawti mã kapêr anê. Nhũm hkôt mẽ pa xwÿnhjaja mẽmoja ma no ãm hprĩ mar nê mẽ-moj pumunh kêt nê. Hãmri nê tee ri hamaxpêr nê kãm ma xaj akryk kapêr kêt kumrêx nê kuhê. ⁸Hãmri nhũm Sawti kànhmã xa nom rĩt kêt nê tee ri rĩt mã nhũm mẽ hpa hã kupy nê ma krĩm o mỗ. ⁹Nê Tamas wÿr o pøj nê nhÿri mễhõ nhõrkwÿ hwÿr ho axà nhũm kamã nohkre nê arĩ hkrĩ. Tee ri amnhĩ kukamã hamaxpêr o hkrĩ. Nê apkur kêt nê hkõm kêt o ra hã apkati axkrunêpxi.

¹⁰Tamas kamã na pre mễhõ my pê Ananĩsja pa. Kot Jejus kôt amnhĩ xunhwÿr xwÿnhjê hõ na pre. Jakamã nhũm Jejus hwÿr kato nê kãm kapêr. Te hpimtir kãm hwÿr kator nê kãm kapêr pyrã nê kãm:

—Pa Ananĩs? Anê.

Nhũm kãm:

—ÿ? Ot pa xa. Mo na Pahihti? Anê.

¹¹Nhũm Jejus kãm:

—E kêr ka akato nê ma mẽ kot kãm: “Pry katat” anhÿr xwÿnhta wÿr tẽ. Hãmri nê kamã jut nhõrkwÿ japêr.

Kamã na Tas nhõ xwÿnh pê Sawtija hkrĩ. Na no hkre nê inhmã amnhĩ jarënh o hkrĩ. Ka hwÿr axà nê omu. ¹²Ate hwÿr atẽm nê inhÿ hã hã anhĩhkra xir nhũm akupÿm rĩt mex kaxyw na ato amÿti. Jakamã e ma hwÿr tẽ nê ã hipêx anê. Anê.

¹³Hãmri nhũm Ananĩs tee ri kuma nê kãm Sawti puma ho amnhĩ kamã kahak nê. Hãmri nê kãm:

—Kwa na Pahihti. Tãm na xep hte Jerujarë kamã mẽ kot amnhĩ kaxyw akôt mẽ hamaxpêr xwÿnhjê nhĩpêx kati ho pa. Pa ra mẽ hã harënh ma. ¹⁴Tã na xep ra jar Tamas wÿr pøj. Patre krãhtũm kapêr nhÿ hã kot mẽ ixpê akôt amnhĩ xunhwÿr xwÿnhjê pynênh nê ma akupÿm hwÿr mẽ ixto mör kaxyw. Tãn ka ri hwÿr ijano. Kwa na ri ixto anhÿr kêt nê Pahihti. Anê.

¹⁵Nhũm Jejus kãm:

—Nã mãmri ma hwÿr tẽ. Ra ixte amnhĩ kaxyw ãm kênã. Jakamã koja ã mẽ anhĩpêx anhÿrta hpãnhã ma mẽ piitã mẽ kãm ixkapêr jarënh o pa. Mẽ apê Ijaew mã nê mẽ anhõ pahi hkwyjê mã nê mẽ kêp Ijaew kêt xwÿnhjê mã. Koja mẽ piitã mẽ kãm ixkapêr jarënh mex o ri mẽ hkôt pa. ¹⁶Koja mẽ ixtã homnuj tÿx nê nhũm amnhĩ xà htÿx kamã hamak o pa. Nom kot paj ixprĩ hã mẽ kot tanhmã ixtã hipêx to hkukamã kãm ixujarënh pa nhũm amnhĩ kukamã amnhĩ jarënh ma. E tokyx mãmri ma axãmnhix hwÿr tẽ. Anê.

¹⁷Hãmri nhũm kuma nê kato nê ma Sawti hwÿr htẽm kurê kumrêx. Hãmri nê ixkre hwÿr axà nê omu nê hkrã hã ãhkra xi nê kãm:

—Pa Jejus kôt ixtõ Sawti? E na Pahihti Jejus awÿr inhmẽ pa awÿr tẽ. Pry kahti ri kot awÿr kator xwÿnhta. Tã akupÿm arĩt nhũm Tirtũm Karõ kot akarõ mã àr kaxyw na awÿr inhmẽ pa tẽ. Anê.

¹⁸Hãmri nhũm mẽmoj te tep kã pyrãkja Sawti no rũm hapøj nê rôrõk nhũm akupÿm rĩt mex kurê kumrêx. Hãmri nê kànhmã xa nhũm Ananĩs hkrã kumrã. Ra amnhĩ kaxyw Jejus kôt hamaxpêr ã hkrã kumrã. ¹⁹Hãmri nhũm nhÿ nê apku nê akupÿm hihtÿx.

Sawti kot Tamas kamã Jejus kapêr jarënh

Sikũn Korĩt 11.22-23

Nhũm Sawti Tamas kãm mẽ kot Jejus kôt amnhĩ xunhwÿr xwÿnhjê hkôt amnhĩ xãm nê mẽ hkôt ri pa nê tokyx ma akupÿm mör kêt nê. ²⁰Kormã mẽ hkôt ri pa nê Ijaew nhõ Tirtũm kapêr o mẽ ahkre xà hã ixkre hwÿr mra nê kamã mẽ kãm Jejus kapêr jarẽ. Kêp Tirtũm Kra hã harënh o kuhê. ²¹Hãmri nhũm mẽ amnhĩ jaêr pê ã harënh anhÿrja ma nê tee ri hamaxpêr nê axpẽn mã:

—Kokÿÿ. Kwa tãm na xep pre Jerujarë kamã amnhĩ kaxyw Jejus kôt mẽ kot amnhĩ xunhwÿr xwÿnhjê homnuj tÿx o pa. Tã xep jar kot mẽ hkwyjê pynênh nê ma mẽ o mör nê Jerujarë kamã patre krãhtũmjê mã mẽ õr kaxyw na pre man mẽ pahwÿr mỗ. Tã ra tanhmã hamaxpêr to nê axtem nê mẽ pamã Jejus kapêr jarënh o mẽ pajahkre ho pa. Anê.

²²Hãmri nhũm Sawti arĩ Tamas kãm Ijaew mã tanhmã Jejus jarënh to kamã hihtÿx o mẽ hkôt pa nê mẽ kãm:

—Nà Jejus Krisja na pre Tirtüm mě pakaxyw ãm ně mě pahwyr kumě. Æm hãmri na pa mě amã ja jarě. Aně.

Hãmri nhũm mě kuma ně tee ri kutã tanhmã kapěr to hkukamã hamaxpěr.

²³ Tã ra hã apkati xohtô ně nhũm Tamas kãm Ijaew kwýjaja kot Sawti pír kaxyw hã axpěn ma. ²⁴ Hãmri nhũm mēhōja hã ama ně Sawti hwyr tě ně kãm mě harě ně kãm:

—Kwa Sawti kēr ka axkãm ajamak rom. Na mě pahkwýjaja atã amýnē. Na mě ra krí puhã kahē xã hã hakwakre piitã hamãr ho kuhē. Kot kaj nhýhým akato nhũm mě apumu ně apynē ně apí. Aně.

²⁵ Jakamã nhũm kamãt nhũm Sawti hkôt ri mě pa xwýnhjaja kawã rax õ my ně hwyr o tě ně kãm ãm nhũm hwyr axã ně nhý. Hãmri nhũm mě hkagrí ně kěn o krí puhã kahēja nhîrõ pē ho wrý nhũm mě kēp kato ně ma mõ.

Sawti kot Jejus kwýjê hkôt pikaměnh ã harěnh

Karatas 1.15-24

²⁶ Tã nhũm Sawti krí pē Tamas rŭm kato ně ma akupým Jerujarě hwyr mõ hãmri ně hwyr pōj. Hãmri ně mě kot Jejus kôt amnhí xunhwyr xwýnhjê hkôt amnhí jarěnh kaxyw mě hwyr tě. Hãmri nhũm mě tee ri amnhí wyr omu ně kot Jejus kôt amnhí xãm ã amnhí to hēx ã hkamnhix hãmri ně amnhí kamã kahak o amnhí ně hkurē ně mě piitã kãm uma ně. ²⁷ Æm Panãpe pix ãm hãmri kot Jejus kôt amnhí xãm kôt hamaxpěr. Hãmri ně ma hwyr tě ně haprõ ně ma Jejus nhý hã mě ahkre xwýnh maatijê hwyr o tě ně yr pē mě kãm kapěr ně mě kãm:

—Kwa ãm hãmri na Sawti amnhí jarě. Na ra mě pahpyrã ně Jejus kôt amnhí xãm. Na xep pre Tamas wyr pry hã kormã mõ nhũm xep Pahihti Jejus hwyr kato ně kaxkwa rŭm kãm kapěr nhũm kuma ně hkôt amnhí xãm. Jakamã nhũm xep ra axtem kot amnhí nhîpěx nyw o Tamas nhõ xwýnhjê mã Jejus kapěr jarěnh o ri mě hkôt pa. Ra amnhí kamã kãm mě uma hkēt ně àmnhix ri mě kãm harěnh o ri mě hkôt pa. Aně.

²⁸ Hãmri nhũm mě kuma ně amnhí kôt Sawti mě nhũm mě hkôt ri pa. Hãmri ně Jerujarě kamã mě piitã mě kãm Jejus kapěr jarěnh o pa. Kãm Jejus kôt amnhí xunhwyr kēt xwýnhjê pyma hkēt ně àmnhix ri mě kãm kapěr jarěnh o ri mě hkôt pa. ²⁹ Ně Ijaew kwý pē Gresjê kapěr o mě kapěr xwýnhjê mã nhũm xatã mě kãm Jejus jarěnh o ri mě hkôt pa. Kēp Tirtüm kot mě pakaxyw ãm xwýnh ã harěnh rãhã ho ri mě hkôt pa. No nhũm mě kãm mar prãm kēt ně ra kot Jejus ã hpír mã.

³⁰ Hãmri nhũm mě kot Jejus kôt amnhí xunhwyr xwýnh kwýjaja mě harěnh ma ně mě kēp ho kato ně ma krí pē Sejarej wyr o mõ. Hãmri ně kurŭm ma akupým õ krí pē Tas wyr kumě nhũm ma akupým mõ.

³¹ Tã ra Sawti kot Jejus kôt amnhí xãm jakamã nhũm mě kãm mě hkurē xwýnhjaja axte Jejus ã tanhmã hkwyjê hto hkēt nhũm mě piitã hamakêtkati ně àmnhix ri pa. Pika pē Jutej kamã ně Garirej kamã ně Samar kamã nhũm mě piitã hamakêtkati ně àmnhix ri pa. Hãmri ně

Tirtüm mã mex o mex ã harěnh o ri pa. Nhũm Tirtüm Karõ tanhmã mě hkrã hto nhũm mě ra kapěr kôt amnhí nhîpěx mex o mõ. Hãmri nhũm mě ohtõ rax ně mě urak ně Jejus kôt amnhí xunhwyr ně hkwyjê hkôt axkamě.

Enejti akupým mex ã harěnh

Atre 3.1-10

³² Tã nhũm Simãw Pêtreja ma mě kot Jejus kôt amnhí xunhwyr xwýnhjê mã Tirtüm kapěr jarěnh o mě ahkre kaxyw ma krí piitã hkôt pa. Jakamã krí pē Rit wyr mõ ³³ ně hwyr pōj ně kamã Enejti pumu. Nhũm ĩ kamã htyk pa ně kupír kãm hikwý rãhã hã amgrã pē 8. ³⁴ Hãmri nhũm Simãw Pêtre omu ně Jejus nhý hã kãm kapěr ně kãm:

—Pa Enejti? E na Jejus Kris akupým ato mex. Jakamã e kãnhmã xa ně akupípta py. Aně.

Hãmri nhũm akupým mex ně kãnhmã xa ně amnhí pumu ně hkính o hkính. ³⁵ Hãmri nhũm kríja kamã ně krí hõ pē Sarõ kamã mě piitã harěnh ma ně mě kot amnhí tomnuj kaga hpa ně hpãnhã Jejus kôt amnhí xunhwyr ně hkôt amnhí nhîpěx o pa.

Tapitre akupým htír ã harěnh

Rukre 8.49-56; Atre 20.7-12

³⁶ Nhũm Tapitreja krí pē Jope kamã na pre pa. Gres kapěr kãm hixi pē Nokre. Mě kapěr kãm Nokreja te kēp “karã” anhýr jarěnh pyrãk. Na pre ra Tapitre pē Nokreja Jejus kôt amnhí xãm ně mě piitã mě ho mex o ri mě hkôt pa. Ně mě kēp amrakati xwýnhjê kamã ukapří ho ri měmoj to mě kutã nojarêt o ri mě hkôt pa. ³⁷ Tã ra à htýx ně hãmri ty. Hãmri nhũm mě tee ri omu ně hkapří ně mýr rax ně. Ně kumý ně kuhõ hãmri ně kormã haxãr kēt ri kýx pē ixkre kamã kuxi ně kuri mýr o hkrí.

³⁸ Nhũm Simãw Pêtre kormã krí hõ pē Rit kamã ri pa. Rit rŭm Jope hwyr jawý jakamã nhũm Jope kamã mě kot Jejus kôt amnhí xunhwyr xwýnhjaja Simãw Pêtre jarěnh ma hãmri ně hwyr ja wa ho haměxkrut ně wa kumě. Nhũm wa ma hwyr tě ně hwyr pōj ně omu ně kãm:

—Pa? E jar na pa wa awyr tě. Na Jejus kôt mě pahpõx Tapitre ham mě pahpē ty. Kwa tokyx kormã mě kot haxãr kēt ri ma wa ixkôt hwyr tēn omu nã? Aně.

³⁹ Hãmri nhũm wa kuma ně ma wa hkôt htēm kurē kumrēx. Hãmri ně Jope hwyr pōj ně mě hwyr tě nhũm mě kýx pē htyk ně nōr xwýnhja wyr ho api nhũm hwyr axã. Nhũm kuri mě kēp mě mjên htyk xwýnhjaja hkapří ně mýr o hkrí. Hãmri nhũm Simãw Pêtre mě hwyr axã nhũm mě omu ně kãm Tapitre kormã htír ri kot tanhmã mě ho mex to hã harě. Ně mě ê hkwy jamý ně kãm kupē ně kãm:

—Ga ja pumu. Tyk xwýnhhta na pre mě inhmã hkay ně kugõ. Na pre hte mě ixto mex o pa. Tã mě ixpē ty. Hēxta gãã ně. Na pa mě ixkaprí htýx kumrēx. Aně.

⁴⁰ Hãmri nhũm mě kuma ně mě kator pa hãmri ně htyk xwýnhhta ri hkõn krã ho nhý ně ho Tirtüm wý. Hãmri ně htyk xwýnhhta mã kapěr ně kãm:

—Pa Tapitre? E kwa kànhmã nhỹ. Anẽ.

Pu nhũm no amra nẽ Simãw Pêtre pumu nẽ kànhmã nhỹ. ⁴¹ Hãmri nhũm hpa hã kupy nẽ kànhmã ãm nẽ kapôt ã mẽ kuhê xwýnhjê mã anẽ nhũm mẽ akupỹm wa hwýr agjê nhũm mẽ kãm:

—E ota. Na Tirtũm akupỹm mẽ amã ho htĩr. Anẽ.

Hãmri nhũm mẽ amnhĩ jaêr pê omu nẽ hkĩnh tỳx nẽ. ⁴² Hãmri nhũm Jope kamã mẽ piitã harẽnh ma nẽ mẽ ohtô nẽ amnhĩ kaxyw Jesus kôt hamaxpêr nẽ hkôt amnhĩ xunhwý. ⁴³ Hãmri nhũm Simãw Pêtre Jope kamã ri pa hã apkati xohtô nẽ tokyx mẽ kurũm kato nẽ ma krĩ hõ hwýr mõi kêt nẽ. Na pre mry kà ho mẽmoj nhĩpêx o pa xwýnh pê Simãw ri pøj nẽ kuri pa hã apkati xohtô nẽ.

Konẽre kot Simãw Pêtre hã karõ hã harẽnh

Rukre 7.1-10

10 Tã nhũm Ijaew kêt xwýnh Konẽre. Kêp Rõmjê nhõ pôristi krãhtũm na pre. Õ pôristija pika pê Itar nhõ xwýnh na pre mẽ nhũm Konẽre kêp mẽ hkrãhtũm. Krĩ pê Sejarej kamã. ² Konẽreja kot amnhĩ to mex o pa xwýnh na pre. Kêp Ijaew kêt tã na pre hte õrkwỹ kamã hkwyjê mẽ Tirtũm ã hpijaãm nẽ kãm mex o mex ã harẽnh o pa. Apkati mẽ kãm amnhĩ jarẽ. Nẽ mẽ kêp amrakati xwýnhjê mã kàxpore hkwy nhõr o pa. ³ Jakamã nhũm mẽmo arĩgro hã ra myt japanh greire nhũm mẽmoj pumu. Te hpimtir kãm kot omunh pyrã nẽ kaxkwa kamã Tirtũm kapêr o wrýk xwýnh pumu. Nhũm hwýr wrý nẽ tanhmã kãm kapêr to nẽ kãm:

—Pa Konẽre? Anẽ.

⁴ Nhũm tee ri omu nẽ kãm ma htỳx kumrêx. Hãmri nẽ kãm:

—Mo na? Anẽ.

Hãmri nhũm kãm:

—Nà ate amnhĩ to Tirtũm wýr o apaja nhũm ra amnhĩ tã ama nhũm ja kãm mex nẽ. Nẽ ate mẽ kêp amrakati xwýnhjê mã kàxpore hkwy nhõr o apaja nhũm ja mããnên kãm mex nẽ.

⁵ —Jakamã e inhma. Kêr ka ma Jope hwýr amã mẽ àpênh xwýnh kwý rê kê mẽ ma hwýr mra nẽ kamã mẽhõ pê Simãw Pêtre japrõ nẽ man akupỹn awýr o mõi. ⁶ Simãw kot mry kà ho mẽmoj nhĩpêx o pa xwýnh hta nhõrkwỹ kamã na hte pa. Õrkwỹja gô mý ri na. E hwýr mẽ arẽ kê mẽ ma hwýr mõi nẽ haprõ nẽ man awýr o mõi kê amã mẽmoj mex jarẽ ka ama. Anẽ.

⁷ Nhũm pre ã Tirtũm kapêr o wrýk xwýnhja Konẽre mã kapêr anẽ hãmri nẽ kato nẽ ma akupỹm api. Hãmri nhũm kot mar xà hkôt jajê rê nẽ Simãw Pêtre hwýr mẽ kurẽ. Kãm àpênh xwýnhjê ho hamẽxkrut nẽ kaxyw õ pôristi hõ. Pôristija na pre hte Konẽre pyrã nẽ Tirtũm ã hpijaãm o pa. ⁸ Jakamã nhũm mẽ kurẽ nẽ mẽ kãm kapêr hãmri nẽ ma Jope hwýr Simãw Pêtre hwýr mẽ kurẽ nhũm mẽ kato nẽ ma hwýr mõi. ⁹ Hãmri nhũm apkati nhũm kaxkwa nhĩpøk ri myt nhỹ nhũm mẽ hwýr hpõx o mõi.

Simãw Pêtre tanhmã hpimtir to hã harẽnh

Atre 11.5; Karatas 2.11-21

Rõm nhũm Simãw Pêtre kot Tirtũm mã amnhĩ jarẽnh kaxyw ixkre nhĩmøk ã api nẽ himøk po hã kãm amnhĩ jarẽnh o nhỹ. ¹⁰ Hãmri nẽ ra kãm prãm nẽ nom nhũm mẽ kormã kãm õ hã àpênh jakamã nhũm arĩ ixkre nhĩmøk ã Tirtũm mã amnhĩ jarẽ.

Hãmri nẽ Konẽre pyrã nẽ te hpimtir kãm kot mẽmoj pumunh pyrã nẽ mẽmoj pumu nhũm Tirtũm Konẽre hkukamã tanhmã kãm mẽmoj to amnhĩrit to. No ãm hã kuxi nẽ kãm harẽnh jakamã nhũm Simãw Pêtre te hpimtir kãm kot mẽmoj pumunh pyrã nẽ mẽmoj pumu. ¹¹ Nhũm kaxkwa katêr nhũm kurũm mẽmoj te kot mẽ hpiro xà pyrãk xwýnhja pyka hwýr wrýk o mõi. Nẽ hatur xà piitã axpên tã akuprõ nẽ ajêt nẽ wrýk o mõi nhũm omu. ¹² Mẽ hpiro xàta kamã mẽmo mry piitã hikwỹ. Mẽmo mry hpar o ri pa xwýnhjaja nẽ htu mýr pê ri pa xwýnhjaja nẽ mẽmo àk kỳx pê htor o ri mrrar xwýnh piitã mẽ hpiro xàja kamã hikwỹ nhũm omu. ¹³ Hãmri nhũm Tirtũm kãm:

—Pa Simãw Pêtre? Mãn ka ra amã prãm nẽ nà? E kànhmã xa nẽ axãmnhĩx mãmrĩ mryta õ kapi nẽ apĩ nẽ ho anẽ nẽ aku. Piitã mẽ ate hkur mã mex. Anẽ.

¹⁴ Hãmri nhũm tee ri kuma nẽ kãm:

—Kwa nà Pahi Maati. Mẽ ixpê Ijaew mẽ ixte mry piitã hkur kêt. ãm hkwy pix na pa htem kuku. No mry jaja aa mẽ ixte hõ hkwy hkrêr kêt. Anẽ.

¹⁵ Hãmri nhũm Tirtũm kãm:

—Nà kot anhýr tã kot paj pam amã mẽmoj jarẽ ka kamã anhõkre kahak kêt nẽ. Mãmrĩ amnhĩm hõ kapi nẽ apĩ nẽ ho anẽ nẽ axãmnhĩx hkwy hkre. Anẽ.

¹⁶ Nhũm pre ã kãm mry hã karõ anhýr o axkrunêpxi. Simãw Pêtre kot mãmrĩ Ijaew kêt xwýnhjê hkôt pa nẽ ãmnhĩx ri mẽ kutã apkur nhũm Tirtũm kãm ja mex nhũm kot hã amnhĩ pumunh kaxyw nhũm ã kãm harẽnh anhýr o axkrunêpxi. Hãmri nhũm mẽ hpiro xàja ma akupỹm kaxkwa hwýr àpir o mõi nẽ akunok.

¹⁷ Hãmri nhũm Pêtre te hkrãkator pyrãk jao tee ri hpimtir kukamã hamaxpêr o nhỹ nẽ hamaxpêr o:

—Kwa mo kaxyw na Tirtũm ã inhã ja hã karõ anẽ? Anẽ.

Rõm nhũm Konẽre kot hwýr mẽ rênh xwýnhjaja ra hwýr hpõx o mõi. Ijaew kêt xwýnhhtaja Simãw nhõrkwỹ hã mẽ hkukjêr o mõi nẽ hwýr pøj nẽ hakwakrem kuhê.

¹⁸ Hãmri nẽ õrkwỹ nhõ xwýnhjê mã kãm:

—Pa na ka mẽ arĩ akrĩ? E Simãw Pêtre hwýr na pa mẽ mõi. Xà jar na hte pa nà? Anẽ.

Hãmri nhũm mẽ kãm: —Tỳ. Omũj kỳx pê ixkre nhĩmøk ã na nhỹ. Anẽ.

¹⁹ Nhũm Simãw Pêtre arĩ kot mẽmoj pumunhta kukamã hamaxpêr o nhỹ nhũm Tirtũm Karõ kãm mẽ hpõx xwýnhjê jarẽ nẽ kãm:

—E Simãw Pêtre. Ota Ijaew kêt xwýnhjaja axkrunêpxi nẽ ajapêr o mõi nẽ ra anhõrkwỹ hwýr pøj. ²⁰ Mẽ hwýr wrý nẽ mẽ kot amã mẽmoj jarẽnh ma nẽ mãmrĩ axãmnhĩx ma mẽ hkôt mõi. Tanhmã ajamaxpêr to hkêt nẽ. Pa na pa awýr mẽ kumẽ nhũm mẽ mõi. Anẽ.

²¹ Hāmri nhūm kuma nē mē hwÿr wrÿ nē mē omu nē mē kām:

—Pa? Xà pa na ka mē ijaep̄er o mō? E ot pa xa. Kam nē mē inhmā mẽmoj jarē pa mē ama. Mẽmo kaxyw na ka mē ixwÿr mō? Anē.

²² Hāmri nhūm mē kām:

—Nà mē inhō patrāw Konēre na awÿr mē inhmē pa mē mō. Na hte tām amnhī nhīpēx o pa. Nē Tirtūm ã hpijaam nē kām mex o mex ã harēnh o pa. Nhūm mē inhō krī kamā Ijaew kām hkīnh nē. Tã na Tirtūm kapēer o wrÿk xwÿnhja ham hwÿr wrÿ nē kām ajarē. Kot amnhī wÿr atã karō nhūm ate hwÿr amōr nē kām axu-jarēnh kaxyw kām ajarēnh jakamā nhūm mē ixte ajaprōr kaxyw awÿr mē inhmē pa mē man awÿr mō. Anē.

²³ Hāmri nhūm mē kuma nē mē kām:

—Tōe nà na pa mē ama. E mē agjē nē akrī nē jar mē ixri nō kê apkati pu mē rī ma akupÿm mō. Anē.

Hāmri nhūm mē kuma nē mē hwÿr agjē.

Tã nhūm apkati nhūm mē akupÿm nojarēt nhūm Simāw Pētre ma mē hkôt mō. Nhūm Jope kamā mē kot Jesus kôt amnhī xunhwÿr xwÿnh kwÿjaja ma mē hkôt mō. Nhūm mē mōr o kamāt.

²⁴ Hāmri nhūm apkati nhūm mē Sejurej wÿr hpōx o mō. Nhūm ra Konēre mē kutēp amnhī wÿr hkwyjē ho akuprō nhūm mē Simāw Pētre kutēp ōrkwÿ kamā akuprō nē hkrī. ²⁵ Hāmri nhūm mē hwÿr pōj nē mē hwÿr àr kaxyw nhūm Konēre amnhī wÿr omu nē kànhmā xa nē kutã tē nē hpar pē hkōnkrã ho tēm nē nhÿ. ²⁶ Hāmri nhūm tee ri ja hã omu nē pa hã kupy nē kànhmā ãm nē kām:

—Kwa kànhmā xa. Ixpē Tirtūm kēt tã ka ri ã inhīpēx anē. Anē.

²⁷ Hāmri nē hkôt ōrkwÿ hwÿr axà nē kutēp mē pikuprōnh xwÿnhjē pumu nē mē kām:

²⁸ —Pa na ka mē arī akrī? E măn ra mē ate mē ixpē Ijaew kot amnhī nhīpēx ã mē ixpumunh mex. Na pa htem mē apē axtem nhō xwÿnhjē hkôt ri ixpa hkēt nē. Nē mē anhōrkwÿ hwÿr inhgjēx kēt nē. Tã ham Tirtūm inhmā mē ixte ã amnhī nhīpēx anhÿr o ixpaja nē ixkurē nē inhmā: “Kot paj pam mē hkwyjaja mex ã mē harē ka mē kamā anhōkre kahak kēt nē.”

²⁹ —Anhÿr jakamā ka xep pre ixtã karō pa inhītōt kēt nē man mē awÿr inhmōr kurē kumrēx. E mē inhmā mẽmoj jarē pa mē ama. Mẽmo kaxyw na ka mē ixtã karō? Anē.

³⁰ Hāmri nhūm Konēre kām:

—Nà jãã na pa pre jar inhōrkwÿ kamā Tirtūm mē amnhī jarēnh o nhÿ. Ra myt xàpanh grire pa kām amnhī jarē. Hāmri nhūm Tirtūm kapēer o wrÿk xwÿnh ixwÿr wrÿ nē hirã rax kām xa. ³¹ Hāmri nē inhmā: “Pa Konēre? E na hte Tirtūm ate kām amnhī jarēnh ta mar o hkrī. Nē ate mē kêp amrakati xwÿnhjē ho mex o apa-ja nhūm hã apumu.

³² Jakamā e ma Jope hwÿr amã mē àpēnh xwÿnh kwÿr rē kê mē ma hwÿr mō nē kamā Simāw Pētre japrō nē man akupÿn awÿr o mō. Mry kà ho mẽmoj nhīpēx o pa

xwÿnh Simāw nhōrkwÿ kamā na hte pa. Ōrkwÿja gō mÿ ri na.” Anē.

³³ —Ã kot inhmā kapēer anhÿr jakamā na pa kuma hāmri nē awÿr jajē rēnh kurē kumrēx. Tã ka mē hkôt man mē ixwÿr mō nē ã apōx anē. ãm hāmri na ka mē hkôt mō. Mē apē Ijaew kot amnhī nhīpēx kuhpa hã amnhī nhīpēx nē axàmnhīx man mē ixwÿr mō. Tã ot pa mē Tirtūm noo mã ixkrī. Kam nē māmri ÿ hã mē inhmā mẽmoj jarē pa mē ama. Anē.

Simāw Pētre kot Konēre mã ujarēnh

³⁴ Hāmri nhūm Simāw Pētre Konēre kot kām amnhī jarēnhja ma nē mē kām awjarē nē mē kām:

—Nà ãm hāmri na Tirtūm mē akukamā tanhmã inhmā kapēer to. Xep kām mē ixpē Ijaew pix japē hkēt. Kām mē pahpiitã mē pajapē nē mē panhīpēx o axpēn pyrāk. ³⁵ Kojã ahpyñhã pyka piitã hkôt mēhō mē ixpyrã nē kêp Ijaew kēt tãã hkôt amnhī xãm nē hã hpijaam pē kām mex o mex ã harē nē tãm amnhī nhīpēx. Hāmri nhūm Tirtūm ja hã omu nhūm ja kām mex nē.

³⁶ —Na pre ra mē ixpē Ijaew mã tanhmã Kra Jesus Kris jarēnh to. Jesus kot mē panē htyk kukwak ri na hte mē ixte hkôt amnhī xunhwÿr xwÿnhjē ho hkra. Tã ra mããnen ã mē apē Ijaew kēt xwÿnhjē mã ã amnhī jarēnh anē nē Jesus htyk kukwak ri mē ate mē ixpyrã nē hkôt amnhī xunhwÿr xwÿnhjē ho hkra. Jakamã Jesus Krisja kêp mē pahpiitã mē panhō Pahihti.

³⁷ —Mãn ka prem ra harēnh ma. Mē ixpē Ijaew nhō pika pē Jutej kumrēx kām na pre Juãw Paxisja Jesus kukamã mē kām harē nē mē hkrã kumrãr o pa. Mē piitã mē kot amnhī tomnuj kaga nē Tirtūm kôt amnhī xunhwÿr ã mē omunh xà hkôt mē hkrã kumrã. Jesusja krī pē Najare kamā na pre hprēk. Tã hwÿr na pre Tirtūm amnhī Karō mē nhūm wrÿ nē hkarō mã axà nē hkôt pa ho pa. Jakamã nhūm àhpumunh o àhpumunh nē ma krī piitã hkôt tanhmã mē ho mex to ho ri mē hkôt pa. Pika pē Garirej kumrēx kamā mē piitã ri mē kām Tirtūm kapēer jarēnh o pa. Nē mẽkarōmnuti kot Satanasti nhÿ hã tanhmã mē ho xwÿnhjaja nhūm mē nē mẽkarōmnuti japōx o pa. ã na pre Tirtūm nhÿ hã amnhī nhīpēx anhÿr o pa.

³⁹ —Tã Jesus nhÿ hã hkrajē jahkre ho mē ixpa xwÿnhjaja na pa prem kot ri tanhmã amnhī to ho pa hã omunh par o ri hkôt ixpa. Mē ixpē Ijaew nhō pyka kamã nē mē inhō krī pē Jerujarē kamã kot ri tanhmã amnhī nhīpēx to ho paja pa prem piitã omunh o hkôt ri ixpa. Tã nhūm prem axtem nē mē ixpē pī kahpa hã kunhō nē kupī. ⁴⁰ Hāmri nhūm htyk o apkati axkrunēpxi nhūm Tirtūm akupÿm ho htīr nē akupÿm mē ixwÿr kumē pa prem akupÿm htīr kām omu. ⁴¹ No nhūm mē piitã akupÿm htīr kām omunh kēt nē. ãm mē ixwÿr pix na pre kato nē mē ixkutã apku pa mē paxipixjaja akupÿm htīr ã omu. Hāmri nhūm Tirtūm mē ixte ma mē piitã mē kām akupÿm htīr ã harēnh o ri ixpa kaxyw mē ixrē. ⁴² Amnepēm Tirtūm nhÿ hã kapēer jarēnh o mē pa xwÿnhjaja na prem Jesus kukamã tanhmã hã kagã hto nē mē kām harēnh o pa. Nē mē kām:

Koja nhÿrmã mēhōja man mē pahwÿr wrÿ nē mē panē tanhmã amnhÿ nhÿpēx to. Ka mē atō amnhÿ kaxyw hkōt ajamxpēr nē hkōt amnhÿ xām hã koja Tÿrtÿm ja hã apumu nē mēhō kot tanhmã mē panē amnhÿ nhÿpēx to xwÿnhhta kukwak ri amnhÿ katut kōt ate amnhÿ tomnuj rēnh pa nē axte kām hamxpēr kēt nē. Anē.

Na pre Tÿrtÿm nhÿ hã kapēr jarēnh o mē pa xwÿnhjaja Jejus kukamã ã harēnh nē hã kagà anē. Tã koja Jejus nhÿrmã akupÿn wrÿ hāmri nē mē htyk xwÿnhjē nē arÿ mē hÿr xwÿnhjē mē pahto pimràatã tanhmã mē pajarēnh to. Mē pahte tanhmã amnhÿ nhÿpēx to ho papa hã mē pahpumunh kōt tanhmã mē pajarēnh to. Hāmri nē Tÿrtÿm mē wa kuri mē pahÿr tÿm nē mē papa ho papa mã xwÿnhjē jarē nē määnēn wa kuri mē hÿr tÿm kēt xwÿnhjē jarē. Mē pahpiitã tanhmã mē pajarēnh to kaxyw na pre Tÿrtÿm mē pakaxyw Jejus xām. Tã ã kot mē pajarēnh anhÿrja kukamã na pre mē ixte mē amã tanhmã harēnh to ho ixpa kaxyw mē awÿr mē ixrē. Mē ate kapēr mar nē tokyx Jejus kōt amnhÿ xunhwÿr kaxyw. Anē.

⁴⁴ Nhÿm Simãw Pētre ã mē kām ujarēnh anhÿr rōm nhÿm Tÿrtÿm mē kot mar o hkrÿ xwÿnhjē hwÿr amnhÿ Karō rē nhÿm mē hwÿr wrÿ nē mē hkarō mã gjēx pa.

⁴⁵ Hāmri nhÿm mē Tÿrtÿm mã mex o mex ã harēnh o hkrÿ. No ãm mē kapēr kām harēnh kēt nē. Mē kapēr kwÿ hō ho kām mex o mex ã harē. Aa mē kot mē kapēr mar kēt tã ra ho kapēr mex nē. Jakamã nhÿm Jope rÿm mē kot Simãw Pētre hkōt mē mōr xwÿnhjaja. Ijaew kwÿ kot ra Jejus kōt amnhÿ xunhwÿr xwÿnhjaja amnhÿ jaēr pē ja hã mē omu nē xapēn mã:

—Hēxta waa nē. Mē kēp Ijaew kēt tã nhÿm Tÿrtÿm kot mē panhÿpēx pahpyrà nē mē hwÿr amnhÿ Karō rē nhÿm mē hwÿr wrÿ nē mē kām agjē. Nà ãm hāmri na mē pahpyrà nē ã mē hipēx anē. Anē.

Hāmri nhÿm Simãw Pētre mē kuma nē mē kām:

⁴⁷ —Kwa pu mē hkrã kumrãr kurē kumrēx. Ra Tÿrtÿm Karō kot mē pahpyrà nē mē hkarō mã gjēx kēnã kot kēt mēhō mē nē tanhmã mē pahpē àmnàr to. Ra mē kot mē pahpyrà nē Jejus kōt amnhÿ xunhwÿr kēnã. Anē.

⁴⁸ Hāmri nē Konēre mē hkwyjē mã kām:

—E kot paj mē ate Jejus Kris kōt amnhÿ xunhwÿr ã mē akrã kumrã. Anē.

Hāmri nē mē hkrã kumrãr pa nhÿm mē Simãw Pētre mã kām:

—Kwa kormã anojarēt kēt nē. Kritpēm ri mē ixkōt ri apa hã atã apkati grēre nē kormã ma akupÿm mō. Anē.

Hāmri nhÿm mē kuma nē mē hkōt ri pa hã apkati grēre hāmri nē nojarēt nē ma akupÿm mō.

Simãw Pētre kot hkwyjē mã Konēre jarēnh

Atre 10.1-48

11 Hāmri nhÿm Simãw Pētre ma akupÿm mō. Jutej kamã krÿ pē Jerujarē wÿr ma akupÿm mō hāmri nē pōj. Hāmri nhÿm Jutej kamã Jejus nhÿ hã mē ahkre xwÿnh maatijē mē mē kot Jejus kōt amnhÿ xunhwÿr

xwÿnhjaja Ijaew kēt xwÿnhjē jarēnh ma. Konēre mē hkwy kot mē urak nē Jejus kōt amnhÿ xunhwÿr ã mē harēnh ma. Jakamã nhÿm Simãw Pētre akupÿm mē hwÿr pōj nhÿm mē omu nē mē hã àhkukjēr kurē kumrēx. Hāmri nhÿm mē hkwyjaja mē hã kām akir nē kām:

³ —Kwa mē pahpē Ijaew pyrà nē mē kot amnhÿ my kwÿr kà jakar kēt tã ka mēmo hwÿr mē hwÿr mō mē kuri pōj nē mē kutã apku. Anē.

⁴ Hāmri nhÿm Pētre tee ri mē kuma hāmri nē hprÿ hã mē kām amnhÿ jarē. Nē tanhmã Tÿrtÿm kot kām Ijaew kēt xwÿnhjē jarēnh to hã mē kām harē nē mē kām:

⁵ —Kwa mē ã ri ajamxpēr anhÿr kēt nē. E pa mē amã amnhÿ jarē ka mē inhma măn. Nà na pa pre jãã Jope kamã Tÿrtÿm mã amnhÿ jarēnh o nhÿ nē te ixpimtir kām mēmoj pumunh pyràk. Nhÿm mēmoja te mē hpiro xà pyrà nē kaxkwa rÿm ixwÿr wrÿk o mō pa ixprÿ hã omu. ⁶ Nhÿm kamã mry piitãã. Mry xoprē nē mry xuwapō nē mry hpar o ri pa xwÿnhjaja nē mry htu mÿr pē ri pa xwÿnhjaja nē àk. Nē mē pahte hkur xwÿnhjaja nē mē pahte hkur kēt xwÿnhjaja. ⁷ Kamã mry piitã pa omu. Hāmri nhÿm Tÿrtÿm inhã: “Pa Simãw Pētre? Măn ka ra amã prãm nē nà? E kànhmã xa nē axàmnhÿx māmri mryta ò kapi nē apÿ nē ho anē nē aku. Piitã mē ate hkur mã mex.” Anē.

⁸ —Pa tee ri kuma nē kām: “Kwa Pahi Maati. Mē ixpē Ijaewjaja mē ixte mryja piitã hkur kēt. ãm hkwy hpx na pa htem kuku. No ja hkwy aa mē ixte hō hkwy hkrēr kēt.” Anē. ⁹ Nhÿm inhã: “Nà nom kot anhÿr tãã. Kot paj pam amã mēmoj jarē ka kamã anhōkre kahak kēt nē. Jakamã e māmri amnhÿm hō kapi nē apÿ nē ho anē nē axàmnhÿx hkwy hkrē.” Anē.

¹⁰ —Na pre ã Ijaew kēt xwÿnhjē hwÿr inhmōr kukamã inhã karō ho axkrunēpxi anē. Nom hã kuxi nē inhã mē pahte mry kur kēeta jarē. Hāmri nhÿm mē hpiro xàja ma akupÿm kaxkwa hwÿr api nē kakrãm axà nē akunok. ¹¹ Hāmri nhÿm Ijaew kēt xwÿnhjaja mē ixwÿr axkrunēpxi nē mra nē pōj. Konēreja Sejarej rÿm ixwÿr mē rēnh xwÿnhjaja nhÿm mē mra nē ixwÿr pōj.

¹² Hāmri nhÿm Tÿrtÿm Karō ma mē hkōt inhme. Mē kēp Ijaew kēt tã nhÿm ixàmnhÿx ma mē hkōt ixpa kaxyw mē hkōt inhme pa ma mē hkōt mō. Nhÿm Jope kamã mē kot Jejus kōt amnhÿ xunhwÿr xwÿnh kwÿjaja kēp 6ja ma mē ixkōt mō. Pa mē mō nē Sejarej kamã Konēreja wÿr pōj. ¹³ Hāmri nhÿm mē ixpumu nē mē inhã amnhÿ jarē. Tÿrtÿm kapēr o wÿk xwÿnh kot hwÿr wrÿk nē òrkwy hwÿr àr nē tanhmã kām kapēr toja nhÿm inhã harē. Na xep pre kām: “E kē ka ma Jope hwÿr amã mē àpēnh xwÿnh kwÿjē rē kē mē ma hwÿr mō. Hāmri nē kamã Simãw Pētre japrō nē man akupÿn awÿr o mō kē tanhmã mē amã ujarēnh to.

¹⁴ Koja mē amã tanhmã mē apē Tÿrtÿm kra hprãm xàj tanhmã mē ate amnhÿ nhÿpēx to hã mē amã karō ka mē ama nē mar tÿx nē hkōt amnhÿ nhÿpēx. Ka mē anhōrkwy kamã akwyjē mē apimràatã ama nē mar tÿx nē. Hāmri nē kot mē amã hã karō xà hkōt amnhÿ nhÿpēx nhÿm Jejus mē ate amnhÿ tomnuj pē mē apytàr pa.” Anē.

—Na xep pre ã Tirtüm kapër o wryk xwýnhja kãm ijarënh anë. Jakamã nhùm ixwýr jajë rë pa ma mẽ hkõt mõ. ¹⁵ Hãmri nẽ kormã mẽ kãm tanhmã Jejus jarënh to. Tanhmã kot mẽ panë amnhĩ nhĩpëx to hã harë. Nẽ kormã mẽ kãm ixujarënh o ixãm rôm nhùm Tirtüm Karõ te wam kot mẽ panhĩpëxta pyrã nẽ mẽ hwýr wry nẽ mẽ hkarõ mã gjëx pa. ¹⁶ Pa ja hã mẽ omu nẽ Pahihti Jejus kot akupým kaxkwa hwýr nojarët nẽ tanhmã mẽ pamã kapër tota mã ijamaxpër kurë kumrëx. Na pre mẽ pamã: “Finat Juãw Paxis na pre hte gô ho mẽ hkrã kumrãr o pa. Tã koja Tirtüm ta hpãnhã mẽ awýr amnhĩ Karõ rë nhùm mẽ akarõ mã agjë.” Anë.

—Á na pre Pahihti Jejus akupým nojarët nẽ mẽ pamã kapër anë. Jakamã pa ã kot mẽ hipëx anhýr ã mẽ omu nẽ ã kapër anhýrja mã ijamaxpër kurë kumrëx. ¹⁷ Na pu prem Pahihti Jejus Kris kõt amnhĩ xunhwý nhùm Tirtüm ja hã mẽ pahpumu nẽ mẽ pahwýr amnhĩ Karõ rë. Tã te kot mẽ panhĩpëxta pyrã nẽ mãänën Ijaew kët xwýnhjajë hwýr kurë nhùm mẽ hkarõ mã agjë. Mẽ kęp Ijaew kët tã nhùm mẽ pahpyrà nẽ mẽ hwýr kurë nhùm mẽ hkarõ mã agjë. Tirtüm tãm kot amnhĩ krã hkõt mẽ hwýr rënh kënë kot pa kët mẽ nẽ tanhmã kęp ixãmnrã to. Anë.

¹⁸ Nhùm pre ã Simãw Pêtre mẽ kãm amnhĩ jarënh anë nhùm mẽ kuma nẽ tãm hamaxpër nẽ hkĩnh nẽ. Nẽ axte mẽ hã tanhmã kãm nẽ hkët nẽ. Ám mẽ hã Tirtüm mã mex o mex ã harë. Hãmri nẽ axpën mã:

—Nà ãm hãmri. Mẽ kęp Ijaew kët tã na prem Jejus kõt amnhĩ xunhwý nhùm Tirtüm kot mẽ panhĩpëxta pyrã nẽ amnhĩ katut kõt mẽ kot amnhĩ tomnuj rënh pa. Nhýrmã wa hkuri mẽ pahpyrà nẽ htĩr tùm nẽ pa ho pa kaxyw nhùm ã mẽ hipëx anë. Nà ãm hãmri na ã kot mẽ panhĩpëx pyrã nẽ mẽ hipëx anë. Anë.

ãxiok kamã Jejus kwý jarënh

Atre 4.36-37

¹⁹ Tã ra mẽ kot kën o Estewãw kapër o hpĩr xwýj ri mẽ kot ã hipëx anhýrta pyrã nẽ mẽ kot Jejus kõt amnhĩ xunhwýr xwýnhjaja omnuy tỳx o pa. Jakamã nhùm mẽ hkwyjaja mẽ umaj ma ahpýnhã krĩ hkwy hkõt pigrãnh pa. Wënis wýr nẽ Sipre hwýr nẽ ãxiok hwýr nhùm mẽ ma ahpýnhã krĩ hkwy hkõt anhgrã nẽ kamã pa ho pa. Nẽ mẽ kãm tanhmã Pahihti Jejus kot mẽ panë amnhĩ nhĩpëx to hã harënh o ri mẽ hkõt pa. No ãm kormã Ijaew pix mã harënh o pa.

²⁰ Tã hãmri nhùm mẽ hkwyjaja Sipre mẽ Sirën rüm ãxiok hwýr pan pøj. Hãmri nẽ kamã mẽ kęp Ijaew kët xwýnhjê mã Pahihti Jejus kot amnhĩ nhĩpëx jarënh o pa. Á mẽ kot amnhĩ nhĩpëx anhýr jakamã na mẽ ra ahpýnhã ri mẽ kãm harënh o ri pa. Ijaew mã nẽ mãänën Ijaew kët xwýnhjê mã ²¹ nhùm mẽ ma mẽ hkõt ri Pahihti Jejus nhý hã mẽ kãm kapër jarënh o ri mẽ hkõt pa. Hãmri nhùm mẽ ohtõ nẽ amnhĩ nhĩpëx tùm kaga hpa nẽ hpãnhã amnhĩ kaxyw Jejus kõt hamaxpër nẽ hkõt amnhĩ xunhwý.

²² Hãmri nhùm Jerujarë kamã Jejus kwýjaja mẽ harënh ma nẽ mẽ hwýr Panãpe mẽ. Áxiok hwýr mẽ hwýr kumë. Ma mẽ hwýr mõr nẽ Jejus kõt mẽ hamax-

për o hihtỳx kaxyw. ²³ Hãmri nhùm ma mẽ hwýr mõ nẽ mẽ hwýr pøj nẽ mẽ omu. Tirtüm kot mẽ ho mex ã mẽ omu hãmri nẽ mẽ ý hã hkĩnh nẽ. Nẽ mẽ kãm:

—Nà ãm hãmri na ka mẽ ra Jejus kõt amnhĩ xunhwý nẽ hkõt amnhĩ nhĩpëx mex o ri apa. Tã kër ka mẽ ãm kapër kõt pix mã ri amnhĩ nhĩpëx rãhã ho ri apa nẽ aa hkaga hkët nẽ. Anë.

²⁴ Panãpeja na pre tãm amnhĩ nhĩpëx o pa. Nẽ amnhĩ kaxyw Jejus kõt pix mã hamaxpër mex o pa. Nẽ Tirtüm Karõ hkõt amnhĩ nhĩpëx rãhã jakamã na pre hte ý hã mẽ kãm Pahihti Jejus kot mẽ panë tanhmã amnhĩ nhĩpëx to hã harënh o ri mẽ hkõt pa. Hãmri nhùm mẽ kuma nẽ ohtõ nẽ Jejus kõt amnhĩ xunhwý.

²⁵ Tã nhùm Panãpe ãxiok rüm kato nẽ kot Sawti japrõr kaxyw ma krĩ pë Tas hwýr mõ. ²⁶ Hãmri nẽ hwýr pøj nẽ Sawti pumu nẽ haprõ nẽ ma akupým amnhĩ kõt ãxiok hwýr o mõ. Hãmri nẽ kamã mẽ kot Jejus kõt amnhĩ xunhwýr xwýnhjê hkõt wa ri pa hã amgrã pyxi nẽ hapëx. Nẽ mẽ ho ohtõ nẽ ri mẽ kãm Jejus kapër o mẽ ahkre ho ri mẽ hkõt pa. Jakamã nhùm krĩ nhõ xwýnhjaja mẽ kot Jejus kõt amnhĩ nhĩpëx xwýnhjê pumu nẽ mẽ hã mẽ hixi rë nẽ mẽ harënh o: “Kris tõ nẽ htõxjaja” anhýr o mẽ harë. Áxiok kumrëx kãm na prem ã mẽ kot Jejus kõt amnhĩ xunhwýr xwýnhjê jarënh anë. Jakamã nhùm mẽ piitã ã mẽ harënh anhýr o pa.

²⁷ Tã nhùm Panãpe mẽ Sawti wa kormã ãxiok kamã paja rôm nhùm Tirtüm nhý hã kapër jarënh xwýnh kwýjaja mẽ hwýr mran pøj. Jerujarë rüm mẽ hwýr mran pøj. ²⁸ Hãmri nhùm mẽ piitã mẽ kot mẽ kapër mar kaxyw mẽ hwýr akuprõ. Jakamã nhùm hõ pë Akapõja kãnhmã xa nẽ tanhmã mẽ kãm ujarënh to. Tirtüm Karõ nhý hã mẽmoj kukamã mẽ kãm awjarë nẽ mẽ kãm:

—Kwa okora kër ka mẽ axkãm ajamak rom. Koja tokyx pika piitã hkõt mẽ apkur xà hã mẽõja mẽ kęp hkryre nẽ mẽ piitã mẽ hipëx kët nẽ. Anë.

Tã nhùm gaa nẽ ujarënh xaja kõt mẽmoj ã amnhĩ nhĩpëx anë. Kormã Pahihti Krawti kot mẽ ho amnhĩp-tàr ri nhùm mẽmoj ã amnhĩ nhĩpëx anë. No nhùm kormã ã amnhĩ nhĩpëx anhýr kët ri nhùm Akapõja kukamã ã mẽ kãm ujarënh anë. ²⁹ Hãmri nhùm mẽ kuma nẽ tee ri Jutej kamã Jejus kõt mẽ hkwyjê hkukamã hamaxpër nẽ axpën mã:

—E kwa pu mẽ Jutej kamã Jejus kõt mẽ pahtõ nẽ pahtõxjê mã pahkàxpore hkwy gõ kê mẽ ho amnhĩm awjaprõ nẽ hkur o pa. Anë.

Hãmri nẽ mẽ kaxyw kàxpore hkwy ho akuprõ. Nhùm mẽ hikàxpore hkryre xwýnhjaja ãm mẽ kãm ho hkryre nẽ kugõ nhùm mẽ hikàxpore rũnh xwýnhja mẽ kãm ho rũnh nẽ kugõ. ³⁰ Jakamã nhùm mẽ ho hpikuprõnh pa nẽ Panãpe mẽ Sawti wa kot mẽ hwýr o mõr nẽ mẽ kãm õr kaxyw wa kãm kugõ. Hãmri nhùm wa hamý nẽ ma Jutej kamã Jerujarë hwýr mẽ hwýr o mõ. Hãmri nẽ hwýr pøj nẽ mẽ kot Jejus kapër o mẽ ahkre xwýnhjê mã kugõ. Hãmri nhùm mẽ kãm Jejus kõt mẽ htõ nẽ htõxjê mã o anhgrã nhùm mẽ hamý nẽ hkĩnh nẽ ho amnhĩm awjaprõ.

Mě kot Simāw Pêtre pynênh nê haxàr ã mẽ harênh
Matêwre 18.19-20

12 Tã nhũm mẽ õ pahi Eroxja õ pôristi mã Kris kwÿjê hã amÿnê nhũm mẽ mẽ hipêx kati nê nhũm mẽ amnhĩ xà htÿx kamã hamak o pa. ² Juãw tõ Xiakreja nhũm mẽ pahi Erox nhÿ hã unê nê hkanhwÿr o kupĩ. ³ Hãmri nhũm Ijaew kãm ja mex jakamã nhũm pahi Erox hpãnhã mẽ kãm Simāw Pêtre hã amÿnê nhũm unê nê haxà. Mě kot pãwti kaxkrit kêt kur ã mẽ hkĩnh xà hã arĩgro pê Pasja ã nhũm prem unê. ⁴ Na pre Erox Simāw Pêtre hkukamã hamaxpêr o:

—Nà koja mẽ hkĩnh hapêx pa Ijaew nom kupĩ nhũm rĩ amnhĩ pumu. Anê.

Hãmri nhũm pôristi kot Simāw Pêtre jamãr xwÿnhja-ja kêp 16. Nhũm mẽ axpên pãnhã kêp 4 kapên nê hamãr rãhã ho kuhê. ⁵ Nhũm arĩ mẽ hagjênh xà kamã hkrĩ ho hkrĩ. Hãmri nhũm Kris kôt htõ nê htõxjaja harênh ma nê tee ri hkukamã hamaxpêr hãmri nê axpên wÿr akuprõ nê ho Tirtũm wÿr rãhã ho hkrĩ.

Tirtũm kapêr o wrÿk xwÿnh kot Simāw Pêtre kator ã harênh

⁶ Tã nhũm ra mẽ hkĩnh hapêx nhũm kamàt. Hãmri nhũm pahi Erox kot tanhmã Simāw Pêtre ho xà hã arĩgroja wÿr nhũm kamàt nhũm pôristijaja arĩ mẽ hagjênh xà kamã hamãr mex o kuhê. Nhũm kuri wa hamêxkrut nê akutã hijê nê hamãr o nõ. Kàx o akutã kãm ê nê wa ho nõ nhũm wa hkaêx kãm htÿx gõr nê nõ. Nhũm ja wa hakwa krem mãânên hamãr o xa. ⁷ Puh nhũm Tirtũm kapêr o wrÿk xwÿnhjê hõja mẽ hwÿr axà nê wrÿhtak rax kãm xa. Hãmri nê Simāw Pêtre grêk nê kumra nê kãm:

—Pa Simāw Pêtre? E kwa tokyj kànhmã xa pu mõi. Anê.

Hãmri nhũm hkrãkato nê omu nê kànhmã ãm kurê kumrêx nhũm kaxprexà hã kàxja axrê nê pykap rôrôk nê hikwÿ. No nhũm kuri pôristi wa nõr xwÿnhhta wa mar kêt nê. Wa arĩ õt tÿx nê nõ. ⁸ Hãmri nhũm Tirtũm kapêr o wrÿk xwÿnhja Simāw Pêtre mã:

—E tokyx anhõ kamĩs jaxà nê amnê ixkôt tẽ pu pakato nê ma tẽ. Anê.

⁹ Hãmri nhũm kamĩs nê hparkà jaxà nê ma hkôt tẽ. No ãm kormã amnhĩ pumunh mex kêt nê. Te hpimtir kãm ã kot amnhĩ nhĩpêx anhÿr pyrãk ã amnhĩ kamnhĩx. ¹⁰ Hãmri nhũm wa hakwakrem pôristi wa kot hamãr o wa ãm xwÿnhja hãnh wa tẽ nê wa hakre nê hpãnhã ihõja wa hãnh wa tẽ no nhũm mẽ õt tÿx nê hkrĩ nê wa omunh kêt nê. Nhũm wa hakwakre nhĩtep xà hkôt wa tẽn kato nê hpãnhã krĩ nê kahê xà hã hakwakreja wÿr wa tẽ. Hãmri nhũm tãm wa kãm amnhĩ kahê xà mẽ nhũm wa kato nê pry hã tẽ. Ja kôt nhũm Tirtũm kapêr o wrÿk xwÿnhja akunok nhũm Simāw Pêtre axte omunh kêt nê. ¹¹ Hãmri nê hprĩ hã amnhĩ pumunh kurê kumrêx nê hamaxpêr o:

—Kwa te ixpimtir kãm ã ixte amnhĩ nhĩpêx anhÿr pyrãk tã xep ixpimtir kêt. Tirtũm na ixwÿr kapêr o wrÿk xwÿnhja mẽ nhũm ixwÿr wrÿ nê mẽ kêp ixkator. Pahi

Erox ra kot ixpĩr nhũm ixkwÿ Ijaew kãm ja prãm tã nhũm mẽ kêp ixkator. Nà ãm hãmri na Tirtũm ã mẽ kêp ixkator anê. Anê.

¹² Hãmri nê Marir nhõrkwÿ hwÿr htêm kurê kumrêx. Juãw Makre katorxà Marirja nhũm õrkwÿ hwÿr tẽ nhũm mẽ ra kamã hpikuprõnh rax nê ho Tirtũm wÿr o hkrĩ nhũm tãm mẽ hwÿr tẽ. ¹³ Hãmri nê kormã kapôt ã hakwa krem mẽ kãm kahê xà tatak o xa nhũm ixkre kamã mẽ kãm àpênh xwÿnh Rotreja kuma nê hwÿr tẽ. ¹⁴ Hãmri nhũm kãm kapêr nhũm amnhĩ jaêr pê kuma nê hkĩnh nê. Nê kormã kãm kahê xà mênh kêt ri ma akupÿm tẽ nê mẽ kot ho Tirtũm wÿr xwÿnhjê hwÿr axà nê mẽ kãm:

—Xê pêr Simāw Pêtre na tẽ nê kapôt ã hakwakrem xa nê inhmã kapêr.

¹⁵ Hãmri nhũm mẽ tee ri kuma nê kãm:

—Kwa arĩ mẽ hagjênh xà kamã hkrĩ kênã. Mãn ka tanhmã amnhĩ krã amnhĩ to hã na ka ri atÿx ã akapêr anê. Anê.

Hãmri nhũm mẽ kãm:

—Ma tanhmã kot pa kêt ri ixkrã amnhĩ to? ãm hãmri na pa mẽ amã harê. Mě kam nê mra nê omu. Anê.

Nom nhũm mẽ kuma nê ãm kuma nê kãm:

—Nà tãm kêt. Kaxkwa rũm Tirtũm mã hamãr o pa xwÿnh mãm amã kapêr nom tãm kêt. Anê.

¹⁶ Rõm nhũm Simāw Pêtre arĩ hakwakre tatak o xa. Hãmri nhũm mẽ jatã hwÿr mra nê kãm kahê xà mẽ nê amnhĩ jaêr pê omu nê hkĩnh nê. ¹⁷ Hãmri nhũm kànhmã mẽ kãm ãhkra hpê nê mẽ ho hpinhkrênh pa nê mẽ kãm:

—Nà Tirtũm na ixwÿr kapêr o wrÿk xwÿnhja mẽ nhũm ixwÿr wrÿ nê pôristi pê ixkator. Anê.

Hãmri nê mẽ kãm:

—E kêr ka mẽ Xiakre nê Jejus kôt mẽ pahtõ nê pahtõxjê mã ijarê kê mẽ ijarênh mar kurê kumrêx. Nom kot paj ixkato nê ma krĩ hõ hwÿr mõi. Anê.

Hãmri nê mẽ kêp kato nê ma mõi.

¹⁸ Tã nhũm apkati nhũm pôristi kot hamãr o hkrĩ xwÿnhjaja hkrã hapôj nê tee hapêr nê nhÿri omunh kêt nê. Hãmri nê tee ri amnhĩ kukamã hamaxpêr o kãm ma htÿx kumrêx nê axpên mã:

—Kwa tanhmã na pre we amnhĩ to nê mẽ pahpê akunok? Tanhmã koja we pahi Erox hã mẽ pahkukja pu mẽ harênh to? Anê.

¹⁹ Hãmri nhũm pahi Erox hpikunor ã harênh ma nê axtem pôristi hkwyjê mã anê nhũm mẽ mra nê tee ri mẽ hagjênh xà kamã hapêr nom nhÿri omunh kêt nê. Hãmri nhũm Erox mẽ kot hamãr xwÿnhjê kamã gryk tÿx kumrêx nê amnhĩ wÿr mẽ hã karõ nê mẽ kãm:

—Kwa nok? Mě ate hamãr rãhã ho akuhê hã ixte mẽ amã karõ htã nhũm tanhmã amnhĩ to nê akunok. Nà kot paj mẽ anhĩmex ka mẽ rĩ amnhĩ pumu. Anê.

Hãmri nhũm mẽ tee ri kãm amnhĩ tã àprãr kaprÿ nhũm mẽ hã amÿnê nhũm mẽ ho kator nê ma mẽ o mra nê mẽ himex. Hãmri nhũm pahi Erox Jutej rũm ka-
to nê ma Sejarej wÿr mõi nê hpãnhã kamã pa ho pa.

Pahi Erox tanhmã htyk to hã harënh

Wam Pêtre 1.24-25

²⁰ Krí pê Xir mẽ Sito wa kamã mẽ pa xwýnhjaja na pre htem pahi Erox nõ pyka hwýr pa nõ mẽ kêp amnhím apkur xà hã mẽõ japrôr o pa. Tã nhũm Erox kot mẽmoj mýrapê mẽ kamã gryk jakamã nhũm mẽ tee ri mẽ kêp ujaprôr kaxyw mẽ hwýr mra nom nhũm mẽ kãm mẽ-moj kwý ho wëne hkêt nõ. Hãmri nhũm mẽ tee ri amnhĩ kukamã hamaxpër nõ pahi Erox nõ kôwenatô Pratôja wýr mra nõ kãm:

—E awýr na pa mẽ mra. Kwa mẽ ixyr pê pahi Erox mã tanhmã akapër to kê ama nõ mẽ ixkamã gryk kêt nõ. Pa mẽ axte mẽ awýr mra nõ mẽ apê mẽmoj kwý japrôr o ri ixpa. Anë.

²¹ Hãmri nhũm mẽ kuma nõ hwýr tẽ nõ mẽ yr pê tanhmã kãm kapër to nhũm kuma hãmri nõ kot tanhmã mẽ kãm kapër to kaxyw mẽ kãm arıgro hta.

Tã nhũm ra kot arıgro hyr xwýnhhta kato nhũm Erox kêp pahi hã ê mex jaxà nõ tẽ nõ kêp pahi hã mẽ hkrı xà kamã nhý nõ tanhmã mẽ kãm kapër to. ²² Mẽ kãm kapër ryy nõ. Hãmri nhũm mẽ kuma nõ hëx rom kãm mex o mex ã harë. Nẽ kýx pêe axpën mã harë nõ harënh o:

—Kwa pahi Erox kêp mẽ panhıõ hkêt. Për kaxkwa rúm Mëpahpãm na pre mẽ pahwýr wrý nõ ã mẽ pamã kapër mex anë. Anë.

Hãmri nõ te kêp Tirtúm pyrãk o hipëx nõ kãm mex o mex ã harë. Nom hëx rom ã harënh anë. Kot mẽ mar nõ kãm mẽ hkınh nõ akupým mẽ kãm mẽmoj to wëne hprãm xàj nhũm mẽ hëx rom ã axpën mã mex ã harënh anë. ²³ Hãmri nhũm mẽ kuma nhũm ja kãm mex nõ nhũm hkınh nõ mẽ mar o nhý nõ kêp Tirtúm pyrãk ã harënhja nõ tanhmã mẽ kãm nõ hkêt nõ. Jakamã nhũm tee ri amnhĩ tã omu nõ hwýr kapër o wrýk xwýnhjê hõ mẽ nhũm hwýr wrý nõ tanhmã ho nhũm ôhy kamã kutôj rax nõ htyk tokyx anë.

Panãpe mẽ Sawti wa akupým äxiok hwýr mör ã wa harënh

Atre 11.27-30

²⁴ Tã nhũm mẽ ra ohtô nõ Tirtúm Kra Jesus kot tanhmã mẽ panê amnhĩ nhípëx to hã harënh ma nõ hkôt amnhĩ xunhwý.

²⁵ Hãmri nhũm Panãpe mẽ Sawti wa ra Kris kôt htõ nõ htõxjê mã kãxporeta jamý nõ ma Jerujarë hwýr o mō nõ mẽ kãm kugō. Hãmri nõ ma akupým äxiok hwýr nojarët nõ war amnhĩ kôt Juãw Makre o mō. Hãmri nõ mẽ ma mō nõ akupým mẽ hwýr pøj.

Tirtúm kot Panãpe mẽ Sawti wa hyr

Atre 9.15-16; Römãn 1.1

13 Äxiok kamã Kris kôt mẽ kot axpën to htõjaja kot Tirtúm nhý hã kapër o mẽ ahkre ho pa xwýnhjê nhıxi ã kot anhýr. Na pre Panãpe nõ Sawti nõ Simeãw kà htykre nõ Rusti pê Sirën nõ xwýnh nõ pahi Erox krãmnhwý Mãnahëja. ² Jakamã nhũm prem mẽmo arıgro hã axpën wýr akuprõ nõ Tirtúm mã mex o mex ã

harënh kaxyw apkur kêt rãhã kãm amnhĩ jarënh o hkrı. Hãmri nhũm Tirtúm Karõ mẽ kãm tanhmã kapër o amnhĩrit to nõ mẽ kãm:

—E kêr ka mẽ Panãpe mẽ Sawti war ata nõ wa kot inhmã tanhmã amnhĩ nhípëx to ho pa kaxyw wa ãm. Anë.

³ Hãmri nhũm mẽ kuma nõ wa hyr kurê kumrëx nõ wa himök ã mẽ thkra jaxwý nõ wa ho Tirtúm wý. Hãmri nõ wa kot Tirtúm mã tanhmã amnhĩ nhípëx to ho pa kaxyw wa kumë nhũm wa ma mō.

Wajaga kot Jesus nõ hkrãmnhwý kurê hã harënh

Atre 8.9-24

⁴ Tã nhũm Tirtúm Karõ krı pê Serêw wýr Panãpe mẽ Sawti wa kumë nhũm wa ma hwýr mō. Nẽ amnhĩ kôt Juãw Makre ho mō. Kot tanhmã wa ho ajuta hto ho wa hkôt pa kaxyw. Hãmri nõ wa mẽ mō nõ Serêw wýr pøj nõ pãr krem axà nõ ma gō hipök pê Sipre hwýr mō. Hãmri nõ gō hipök ã krı pê Saramın wýr pøj nõ Ijaew nõ Tirtúm kapër o mẽ ahkre xà hã ixkre hwýr tẽ nõ kamã Jesus kot mẽ panê tanhmã amnhĩ nhípëx to hã mẽ kãm harënh o wa xa.

⁶ Tã nhũm mẽ krıja rúm kato nõ hpãnhã gō hipök kôt mō nõ hatur xà kamã krı pê Papos wýr pøj. Hãmri nõ kamã wajaga Pajejus pumu. Gresjê kapër kãm hixi pê Erım. Erım haxwýja kêp Ijaew. Na pre hte hëx rom te kêp Tirtúm nhý hã kapër jarënh o pa xwýnh pyrãk o amnhĩ nhípëx nõ ma mẽ kãm ujarënh o ri mẽ hkôt pa. No ãm mẽ kãm amnhĩ to hëx o pa. Gō hipökja ã pahi Sejupaw hkrãmnhwý na pre. Pahi Sejupawja àh-pumunh týx jakamã na pre Panãpe mẽ Sawti wa harënh ma nõ kãm wa kapër mar prãm nõ wa kot kãm Tirtúm kapër jarënh kaxyw amnhĩ wýr wa kuwý. Nom nhũm hkrãmnhwý wajaga Erımja kãm wa hkınh kêt nõ wa nõ kãm kapër kãm hihtýx nõ kãm:

—Kwa nà wa kapër mar kêt nõ. Kot kaj war ama nõ wa urãk nõ amnhĩ kaxyw Jesus kôt ajamaxpër nõ hkôt amnhĩ xãm. Kwarı wa kapër mar kêt nõ. Anë.

⁹ Hãmri nhũm Sawti ra axtem pãnhã hixi. Ra hpãnhã kêp Pawre. Nhũm Tirtúm Karõ ra hkarõ mã ãr jakamã nhũm ý hã wajagata pumu nõ wa nõ hkrãmnhwý mã kapër ã kãm akir nõ kãm:

¹⁰ —Tk. Kwa pëp apê Satanasti hkwy hã na ka ã wa inhnê kãm akapër anë. Na ka hte mẽmoj punuj pix kukamã ajamaxpër nõ mẽmoj mex nõ mẽ no kupyri o apa. Tirtúm kapër mex kumrëx tã ka axtem nõ nõ mẽ hkurê ho ri apa. ¹¹ Æ ate amnhĩ nhípëx anhýrja mýrapê koja Tirtúm tanhmã ato ka ano hkre nõ arıt kêt o atã apkati xohtõ nõ kãm ga. Anë.

Hãmri nhũm no hkre kurê kumrëx nõ tee ri rıt kaxyw no pikrar pýnh o xa nom mẽmoj pumunh kêt nõ. Hãmri nõ mẽhõ kot hpa hã hpýr nõ örkwý hwýr ho mör kaxyw ri amnhĩ pu hã mẽ hapër pënh o xa. ¹² Hãmri nhũm hkrãmnhwý pahıhtija tee ri ja hã omu nõ amnhĩ kaxyw Jesus kôt hamaxpër nõ hkôt amnhĩ xãm kurê kumrëx. Hãmri nõ Pawre mẽ Panãpe wa kot tanhmã Tirtúm kapër jarënh to hã wa kuma nõ hamaxpër o:

—Hêxta waa nê. Aa ixte ã mēhō kapēr kot anhÿr mar kêt tã pa jarãhã kuma. Nà ãm hãmri na Jejus jarēnhja. Anê.

Pawre mē Panãpe ãxiok ò hwÿr wa mōr ã wa harēnh
Atre 15:38

¹³ Tã nhũm Pawre mē Panãpe mē Juãw Makre wa mē krí pē Papos rŭm kato nê hpãnhã ma pyka hō hwÿr mō. Pàr kãm ma pyka pē Pãpir wÿr mō nê kamã krí pē Perke hwÿr pōj. Hãmri nhũm Juãw Makre tanhmã hamaxpēr to nê tee ri axte wa hkôt mōr kukamã hamaxpēr hãmri nê wa hkaga nê awjanã nê ma akupÿm Jerujarē hwÿr ahte mō. ¹⁴ Jakamã nhũm Pawre mē Panãpe wa ahte Perke rŭm kato nê hamũ pika pē Pisit kãm krí pē ãxiok wÿr mō nê hwÿr pōj. Nhũm Ijaew nhō arígmomnu pē sap kato nhũm wa Tirtũm kapēr o mē ahkre xà hã ixkre hwÿr wa tē nê hwÿr axà nê nhÿ. ¹⁵ Hãmri nhũm mēhō mē kãm Tirtũm kapēr ã kagà htũm kwÿ kamã harēnh o xa. Mojes mē Tirtũm nhÿ hã kapēr o mē pa xwÿnh kot kapēr ã kagà hkwy kamã nhũm mē kãm kamã harēnh o xa. Hãmri nê kamã harēnh pa nhũm mē ahkre xwÿnhjaja Pawreja wa omu nê wa hwÿr mēhō mē nhũm wa hwÿr tē nê wa kãm: —E na mē ijahkre xwÿnhjaja war ate mē inhmã axujarēnh prãm nê mãmri mē inhmã mēmoj jarēnh kaxyw nhũm mē war atã anê. Anê.

¹⁶ Hãmri nhũm wa kuma nhũm Pawre kãnhmã xa nê mē hpinkrēnh kaxyw mē kãm kãnhmã ìhkra nhũm mē omu nê hpinkrēnh pa nhũm mē kãm awjarē. Amnhĩ kwÿ pē Ijaewjê mē mē kēp Ijaew kêt xwÿnhjê kãm Tirtũm kính xwÿnhjê mã nhũm mē kãm awjarē. Nê mē kãm kapēr ryy nê. Tirtũm kot tanhmã mē hkukamã Ijaew nhĩgêt nê pãmjê nhĩpêx to hã mē kãm awjarē nê mē kãm:

—E kot paj mē amã awjarē ka mē inhma. ¹⁷ Nà mē ixpê Ijaew nhō Tirtũmja amnepēm na pre mē ixpê Ijaew pãmjê rē. Kormã Ejit kãm mē pa ri nhũm amnhĩ kaxyw mē kurê nê mē ho ohtô rax kumrêx. Hãmri nê mē kaxyw hihtÿx jakamã Ejit rŭm mē kator pa. ¹⁸ Hãmri nê mē ho mex ryy ho mē hkôt pa. Mē kot kapôt ã ri pa hã amgrà pē 40 kamã mē kot htÿx ri tanhmã amnhĩ nhĩpêx to ho pa htã nhũm mē kamã ukapri ryy ho mē hkôt pa. ¹⁹ Na pre mē kãm pyka pē Kanaã kamã mē pa xwÿnhjê nhĩmex pa. Kanaã kamã mē pa xwÿnhjaja ahpÿnhã axpēn kaxyw mēo krí pē 7ja nhũm mē kãm mē ho hapêx pa. Hãmri nê hpãnhã mē inhĩgêtjê mã pykaja o hpigrãnh pa. Mē ixpê Ijaew nhĩgêtjê mã ho hpigrãnh pa nhũm mē kamã pa hã amgrà xohtô nê. Hã amgrà pē 450. Tã nhũm Tirtũm hpãnhã mē kãm juisti hkwy rē nê mē kaxyw mē unhwÿ nhũm mē ho pa. Tã nhũm hpãnhã Sãmuew mē ho amnhĩptã nê mē o pa. Kēp Tirtũm nhÿ hã kapēr jarēnh o pa xwÿnhjê hō nhũm Tirtũm mē kaxyw ãm.

²¹ —Tã nhũm mē ixpãmjaja axpēn ma nê ra te krí hkwy kamã mē urak nê mēo pahi kot Sãmuew pãnhã mē ho amnhĩptãr o pa hprãm xà amnhĩ to Tirtũm wÿ nê kãm: “Pa Tirtũm. Kwa mē ixkaxyw pahi hō xãm kê mē

ixto amnhĩptãr o pa nà. Ja na mē inhmã hprãm tÿx kumrêx.”

—Anhÿr o amnhĩ to hwÿr jakamã nhũm mē kuma nê mē kaxyw Sawti xãm. Kisti hkra na pre. Nê mē inhĩgêt Pëjamĩ kanrêhã htãmnhwÿ na pre. Hãmri nhũm Tirtũm mē kaxyw ãm nhũm kēp mēo pahi nê mē ho amnhĩptãr o pa hã amgrà pē 40. ²² Tã nhũm Tirtũm kator nê hpãnhã mē kaxyw Tawi xãm. Hãmri nê harēnh o: “Nà Jese hkra Tawija na hte inhmã hprãm xà hkôt amnhĩ nhĩpêx mex o pa.” Anê.

²³ —Tã Jejus kēp Tawi hkanrêhã htãmnhwÿ na pre. Kukamã na pre Tirtũm mē ixpê Ijaew nhĩgêtjê mã harē nê harēnh o: “Koja nhÿrmã Tawi hkanrêhã htãmnhwÿjê hō mē ate amnhĩ tomnuj pē mē apytã.” Anhÿr o hkukamã mē kãm harē. ²⁴ No nhũm kormã Jejus kot mē ixpê Ijaewjê mã amnhĩ to amnhĩrit kêt ri nhũm Juãw Paxis kumrêx hkukamã mē ixwÿr mō nê mē inhmã Tirtũm kapēr jarēnh o ri mē ixkôt pa. Nê mē ixte amnhĩ tomnuj kaga nê hpãnhã tãm amnhĩ nhĩpêx o ipxa hã mē ixpumunh kôt mē ixkrã kumrãr ã mē inhmã karō ho pa.

²⁵ —Tã mē kãm kapēr o pa ryy nê ra hatur xàm mēnh kaxyw nê amnhĩ tã tanhmã mē inhmã kapēr to nê mē inhmã: “Na ka mē ixpumu nê atÿx Tirtũm kot mē akaxyw pa ixãm ã ixkamnhix nom pa hkêt. Kot mē pakaxyw ãm mã xwÿnhta kukamã na pa pre mō. Tãm kot amnhĩ to rax o ijakrenh. Nê kot amnhĩ to mex o kot ijakrenh. Jakamã na pa hte ãm kukwak ri ixpa nê amnhĩ tã hã ixpijaam o ipxa.” Anê.

—Na pre ã Juãw Paxisja mē inhmã Jejus jarēnh anhÿr o pa.

²⁶ —Tã kwa mē inhma mē apê Apraãw kanrêhã htãmnhwÿjaja nê mē apê Ijaew kêt xwÿnh kãm Tirtũm kính xwÿnhjaja. E mē apiitã ixkapēr ma nê kãm ajamaxpēr tÿx rãhã ho ri apa. Nà mē pahpiitã mē pakaxyw na Tirtũm kapērja. Kot mē pahte amnhĩ tomnuj pē mē papytãr ã amnhĩ jarēnhja mē ixpê Ijaew pix kaxyw kêt. Mē pahpiitã mē pakaxyw na. Mē pahpiitã mē pahte ja mar nê hkôt amnhĩ nhĩpêxja na Tirtũm kãm hprãm. ²⁷ Nom Jerujarē nhō xwÿnhjê mē mē àptãr tũmrejaja na prem Jejus kēp Tirtũm kot mē pakaxyw ãm xwÿnh ã harēnh mar tã hkôt hamaxpēr kêt nê. Na pre htem mē inhō arígmomnu pē sap ã akuprō nê axpēn mã Tirtũm kapēr ã kagà htũm kamã ujarēnh o hkrí. Kagàja kamã Tirtũm nhÿ hã mē kapēr o mē pa xwÿnhjaja kot hprí hã Jejus jarēnh nê hã kagà nhũm mē kot mar tã hprí hã mar tÿx kêt nê. Jakamã na prem axtem nê mē kãm hã amÿnê. Tirtũm nhÿ hã kapēr jarēnh xwÿnhjaja kot mē hkukamã mē harēnh xàja kôt nhũm mē kot hpír kaxyw mē kãm hã amÿnê.

²⁸ Kot tanhmã amnhĩ tomnuj to hkêt tã nhũm mē amarí hã pahi Pirat wÿ. Kot mē kãm hã àmnēnh nhũm ò pôristijaja kot hpír kaxyw nhũm mē hã kuwÿ nhũm mē kãm kupí. Ra Tirtũm kapēr ã kagà htũm kot mē hkukamã mē harēnh xà hkôt. Hãmri nhũm mē kot hkôt pa ho pa xwÿnhjaja pí kahpa nê ho wrÿ nê ma o tē nê kēn kre kamã haxà. ³⁰ Tã nhũm Tirtũm akupÿm ho htír ³¹ nhũm xatã hkôt mē pa ho pa xwÿnhjê hwÿr

hapôj. Kormã htyk kêt ri ra Garirej rûm Jerujarê hwÿr hkôt mê pa ho mê pa xwÿnhjê hwÿr xatã mê hwÿr hapôx o pa. Jao hã arÿgro xohtô nê nhÿm prem piitã omu. Tã mê tãmjaja na htem mê ixpê Ijaew mã harênh o pa.

³² —Amnepêm Tirtûm na pre mê ixpê Ijaew nhÿgêjtê mã tanhmã Kra Jejus jarênh to. Kormã mê pahwÿr wrÿk kêt ri tanhmã mê kãm harênh to. Jakamã ra kot hkukamã harênh xà hkôt nhÿm pre mê pahwÿr wrÿ nê tanhmã mê panê amnhÿ nhÿpêx to. Tã mê ate harênh mar kaxyw na pa wa man mê awÿr mō. Amnepêm finat Tawi na pre Tirtûm kapêr kwÿ hã kagà. Tirtûm mex ã mê grer xà pê Sam 2ja kamã hã kagà. Te Tirtûm tãm Jejus mã kapêr pyrãk o hã kagà nê hã kagà ho:

Apê Ixkra na ka.

Tã mê piitã mê kot apê Ixkra hã apumunh kurê kumrêx kaxyw na pa jarãhã mê kãm ato amnhÿrÿt. Anê. Nhÿm pre ã Tirtûm Jejus mã kapêr anê nhÿm Tawi ô ri mê pamã hã kagà.

³⁴ —Amnepêm na pre Tirtûm tanhmã Kra Jejus kukamã harênh to. Mê kot hpÿr nhÿm kot akupÿm ho htÿr kukamã hã amnhÿ jarê. ĩ hkro pymaj kot mê htykjê pê hkaxàr nê akupÿm ho htÿr ã nhÿm hkukamã hã amnhÿ jarê. Te Kraja mã amnhÿ jarênh pyrã nê amnhÿ jarênh o:

E kot paj ato mex rax nê. Ixte Tawi mã amnhÿ jarênh xà hkôt.

Anhÿr o hkukamã harênh xà hkôt akupÿm ho htÿr nhÿm axte htyk kêt ã harê.

³⁵ —Nê kagàja nhãm hô hō kot tanhmã Jejus jarênh kute. Te Jejus tãm Tirtûm mã kapêr pyrã nê harênh o:

Ixpê Akra hã ixte akapêr kôt ri amnhÿ nhÿpêx rãhã ho ixpa jakamã kot kaj ixpumunh mex pa inhÿ hkro hkêt nê. Anê.

Tirtûm kapêr ã kagà htÿm kot ã Jejus jarênh kot anhÿr.

³⁶ Nom ã Tawi jarênh anhÿr kêt nê. Tawi na pre Tirtûm kapêr kôt amnhÿ nhÿpêx mex o pa hãmri nê ty nhÿm prem mê panhÿgêjtê nhÿhkô hã haxà hãmri nhÿm ĩ hkro nê hapêx.

³⁷ —Tã no Jejusja Tirtûm kot akupÿm ho htÿr jakamã nhÿm Tawi pyrãn ĩ hkro nê hapêx kêt nê.

³⁸ —E mê inhmar tÿx nê ixkwÿjaja. Kra Jejus pix kukwak na hte Tirtûm amnhÿ katut kôt mê pahte amnhÿ tomnuj rê. ³⁹ Jakamã kot kaj mê ãm Mojes kapêr kôt pix mã ri amnhÿ nhÿpêx nhÿm Tirtûm tee ri ja hã mê apumu nê amnhÿ katut kôt mê ate amnhÿ tomnuj rênh kêt nê. Jejusja tapxipix na pre htyk o Tirtûm mã mê pahte amnhÿ tomnuj piitã hpãnhã amnhÿrer pa. ⁴⁰ Amnepêm na pre Tirtûm kapêr nhÿ hã kapêr xwÿnhjê hōja mã kãm Tirtûm kapêr jarê nê hã kagà. Te Tirtûm tãm mê kot kapêr ã hpêr o pikênh xwÿnhjê mã kapêr pyrã nê mê kãm:

E kot paj aa mê ate mêmoj pumunh kêt ò ho anê.

Nhÿm mêhō mê amã harê ka mê harênh ma nê ãm ama.

Nhÿm mê kot omunh mex xwÿnhjê hō kot hprÿ hã mê amã harênh tã ka mê ãm ama nê hkôt ajamaxpêr kêt nê.

Hãmri nê tee ri tanhmã kãm ajamaxpêr to ho ri apa. Anê.

Ã Tirtûm mê kãm kapêr anhÿr jakamã kwa mê o kora. Apu mê kajaja na pre ã mê ajarênh anê rÿ ko. Anê.

⁴² Nhÿm pre ã Pawre mê kãm ujarênh rÿy anê. Hãmri nê Panape mê wa ixkreta rûm kator kaxyw nhÿm mê kot mar o hkrÿ xwÿnhjaja tee ri ma wa mōr ã wa omu nê ma wa hkôt mra nê wa kãm:

—Kwa war axujarênhja na mex kumrêx. Mê inhmã axte mar prãm. Xà koja axte sap kato ka wa akupÿn mê ixwÿr wa tē nê axte mê inhmã awjarê? Anê.

Hãmri nhÿm wa mê kãm:

—Tōe. Nà kot paj war anê. Anê.

⁴³ Hãmri nê wa ma tē nhÿm mê hkwyja ma wa hkôt mra. Ijaew kwÿjaja nê Ijaew kêt xwÿnh kãm Tirtûm kÿnh xwÿnhjaja nhÿm mê ma wa hkôt mra. Hãmri nhÿm wa pry hã mê kãm kapêr o mō. Tirtûm kot mê kutã nojarêr rãhã ho pa nhÿm mê kot amnhÿ tã omunh nê hkôt amnhÿ nhÿpêx tÿx rãhã ho pa nê hkaga hkêt ã mê kãm kapêr o mō.

⁴⁴ Tã nhÿm axte sap nhÿm krÿ nhō xwÿnh piitã axte Tirtûm kapêr mar kaxyw ixkre wÿr akuprō. Ijaewjaja nê Ijaew kêt xwÿnhjaja. ⁴⁵ Hãmri nhÿm Ijaew kwÿjaja tee ri mê amnhÿ wÿr Ijaew kêt xwÿnhjê pumu nê mê hã Pawre mê Panape wa kamã gryk nê. Mê kãm Ijaew kêt xwÿnhjaja kot Tirtûm kapêr mar prãm kêt jakamã mê hã wa kamã gryk nê. Hãmri nê Pawre kapêr ma nê xatã kãm kapêr punuj nê kãm:

—Tk. Kwa na ka Tirtûm kapêr jarênh o axêx. Ja kot anhÿr kêt. Anê.

⁴⁶ Nom nhÿm wa kãm mê uma hkêt nê. Wa ãm Tirtûm Karō nhÿ hã amnhÿ to htÿx nê wa mê kãm kapêr. Nê amnhÿ tã tanhmã mê kãm kapêr to nê mê kãm:

—Nà wa ixpyrà nê mê apê Ijaew jakamã na pa mê akumrêxjê mã Tirtûm kot mê pakaxyw Jejus xãm ã harê. Tã ka mê ama nê ãm ama nê te mê ate hkaga pyrã nê ã wa inhmã akapêr anê nê wa ixte kapêr o ixêx ã wa ijarê. Pêr ãm mê ate mê amã Tirtûm mê Kra wa kuri mê atÿr tÿm nê mê apa hprãm kêt. Jakamã kot paj wa mê apê ixkato nê hpãnhã ma Ijaew kêt xwÿnhjê mã Jejus kapêr jarênh o ri mê hkôt ixpa. ⁴⁷ Tirtûm kapêr ã kagà htÿm ã kot mê ixte amnhÿ nhÿpêx anhÿrja kukamã mê ijarê nê mê ijarênh o:

Mê ate Ijaew kêt xwÿnhjê mã ixkapêr jarênh o ri apa kaxyw na pa pre mê kaxyw mê arê.

Jakamã koja pyka piitã hkôt mê pa xwÿnhjaja ohtô nê mê akapêr ma nê ixkra hkôt amnhÿ xunhwÿ.

Koja mê ã amnhÿ nhÿpêx anê pa ja hã mê omu nê mê ho ixkra. Anê.

Tirtûm kot ã ja kukamã mê ijarênh anhÿr jakamã kot paj wa mê apê ixkato nê mê apãnhã ma Ijaew kêt xwÿnhjê mã Tirtûm kapêr jarênh o ri mê hkôt ixpa. Anê.

⁴⁸ Hãmri nhÿm Ijaew kêt xwÿnhjaja amnhÿ tã wa kapêrja ma nê hkÿnh nê Tirtûm kapêr mex o mex ã harê. Hãmri nhÿm ra Tirtûm kot nhÿrmã amnhÿ ri mê htÿr tÿm nê mê pa ho mê pa kaxyw mê rênh xwÿnhjaja

amnhĩ kaxyw Pahihti Jejus kôt hamaxpër nê hkôt amnhĩ xunhwý.

⁴⁹ Tã nhũm pika pë äxiok kamã mē piitã Tirtũm kapër jarēnh ma. ⁵⁰ Nom nhũm Ijaew xaptãr tũmrejaja kãm Pawre mē Panãpe wa hkĩnh kêt jakamã na prem krĩ hkôt mē kot amnhĩ to rũnh xwýnhjê mã wa ho kapër punuj o pa. Mē õ pahi mē mēni kot amnhĩ to rũnh xwýnhjaja nhũm mē kãm tanhmã wa ho kapër to nhũm mē kuma nê mē hkôt hamaxpër. Mēnijaja kãm Tirtũm prãm tã amnhĩ kaxyw Jejus kôt hamaxpër kêt jakamã tanhmã mē kot Pawre mē Panãpe wa ho hêx toja ma nê hkôt hamaxpër nê wa kamã gryk nê. Jakamã nhũm mē ohtõ nê tanhmã wa hipêx to nê amnhĩ nê wa hano. ⁵¹ Hãmri nhũm wa mē kēp kato nê xa nê mē kot Tirtũm kapër kaga hã amnhĩ pumunh kaxyw mē noo mã wa hparkã kapa nê nê awjagrõ kapĩ nê ma wa tē. Hãmri nê ma krĩ pē Ikõn wýr hpãnhã wa mō. ⁵² Hãmri nhũm äxiok kamã mē kot Jejus kôt amnhĩ xunhwýr xwýnhjaja hkĩnh nê ri pa. Tirtũm Karõ kot mē hkarõ mã gjêx jakamã nhũm mē hkĩnh nê ri pa ho pa.

Pawre mē Panãpe wa kot Ikõn wýr mōr ã wa harēnh
Matêwre 10.34-35

14 Hãmri nhũm Pawre mē Panãpeja wa äxiok rũm kato nê hpãnhã ma krĩ pē Ikõn wýr wa mō. Hãmri nê hwýr pōj nê Ijaew nhõ Tirtũm kapër o mē ahkre xã hã ixkre hwýr wa tē nê kamã mē kãm Jejus jarēnh o nhỹ. Mē kãm harēnh kãm hihtýx jakamã nhũm mē hkwyjaja wa kuma nê amnhĩ kaxyw hkôt hamaxpër nê hkôt amnhĩ xunhwý. Ijaew kwýjaja nê mē kēp Ijaew kêt xwýnh kwýjaja nhũm mē ohtõ nê Jejus kôt amnhĩ xunhwý.

² Tã nhũm mē hkwyjaja kãm Jejus jarēnh mar prãm kêt nê. Hãmri nê kato nê ma Ijaew kêt xwýnh kwýjê hwýr mra nê tanhmã mē kãm Pawre mē Panãpe wa ho hêx to nê wa ho kapër punuj nê nhũm mē mar xã hkôt wa kamã gryk nê. ³ Nom nhũm wa tokyx kator nê ma mōr kêt nê arĩ Tirtũm Karõ nhỹ hã amnhĩ to htýx nê mē kãm Tirtũm kapër jarēnh o ri mē hkôt pa. Nê kēp mē kutã nojarêt xwýnh ã harēnh o pa. Nê ý hã mē kãm aa mē kot mēmoj pumunh kêt kwý ho anhýr o ri mē hkôt pa. Jakamã nhũm mē hkwyjaja ja hã wa omu nê wa kapër ma nê hamaxpër o:

—Kwa ãm hãmri na wa Tirtũm kēp mē pakamã ukapřĩ xwýnh ã harē. Për ý hã wa kot ã amnhĩ nhĩpêx anhýr o pa kēnã. Anē.

⁴ Hãmri nhũm Ijaew kêt xwýnh kwýjaja wa hkôt hamaxpër nê wa hkôt amnhĩ xunhwý. No nhũm mē hkwyjaja wa hkôt hamaxpër kêt nê. Ra mē kot Ijaew kwý kot tanhmã wa ho kapër punuj toja ma nê mē hkôt hamaxpër jakamã nhũm krĩ nhõ xwýnhjaja axpēn kwým ri tanhmã wa hkôt hamaxpër to ho pa. Jao axpēn kwým ri wa hkôt hamaxpër o pa.

⁵ Tã nhũm wa hkôt hamaxpër kêt xwýnhjaja axpēn wýr akuprõ nê wa hã amýnê. Ijaew kwýjaja nê Ijaew kêt xwýnh kwýjaja nê mē õ pahijaja nhũm mē kot kēn o wa htak o wa hpĩr kaxyw wa hã amýnê. ⁶ Hãmri nhũm wa amnhĩ tã ama nê mē kēp kato nê hpãnhã ma

pika hõ hwýr mō. Ma Rikõn kãm krĩ hkwy hwýr hpãnhã mō. Risti wýr nê Tepe wýr nê pu hã krĩ hkwy hwýr wa mō. ⁷ Wa mō nê pōj nê ma mē kãm Jejus kot tanhmã mē panē amnhĩ nhĩpêx to hã harēnh o ri mē hkôt pa.

Te grã xwýnh jarēnh

Atre 3.1-10

⁸ Nhũm Risti kamã mēhõ my hte grã nê hkrĩ xwýnhja. Katorxã nhõxã kre rũm hte grã nê kator jakamã ri pa hkêt nê arĩ hkrĩ xã kamã hkrĩ ho hkrĩ. ⁹ Jakamã nhũm Pawre mē kãm ujarēnh o xa nhũm kuri mar o nhỹ. Hãmri nê hamaxpër o:

—Nã pēr Tirtũm àhpumunh o àhpumunh. Mãn kot ixto mex kaxyw àhpumunh týx. Nã koja ixto mex. Anē.

Hãmri nhũm Pawre ã hamaxpër anhýr ã omu ¹⁰ nê kãx pē kãm kapër nê kãm:

—E kwa kãnhmã xa. Anē.

Hãmri nhũm kuma nê kãnhmã ãm kurê kumrêx nê ri mra. Nê amnhĩ te kamã hamak o ri mra nê hkĩnh týx kumrêx. ¹¹ Hãmri nhũm kuri mē kuhê xwýnhjaja Pawre kot ã hipêx anhýrja ã omu nê htýx wa kēp kaxkwa kamã mēhpãm ã wa hkamnhĩx nê hkĩnh nê axpēn mã: —Kwa pēr mēpahpãm na wa. Mēpahpãm Jupti mē Mēkurtija na wa panhĩ hã amnhĩ jahkre nê mē pahwýr wrý. Nã ãm hãmri na wa mē pahwýr wrý. Anē.

Nom mē kapër pē Rikaõn o axpēn mã kapër jakamã nhũm Pawre mē Panãpe wa mē mar kêt nê. Wa kot mē kapër mar kêt jakamã ã mē kot wa harēnh anhýrja mar kêt nê htýx wa xa. ¹² Nhũm mē ã wa kēp mēhpãm ã wa harēnh anē nê hkĩnh týx nê. Panãpeja nhũm prem kēp mē hpãm Jupti hã hkamnhĩx no Pawreja nhũm prem kēp mēhpãm Mēkurti hã hkamnhĩx. Pawreja Mēkurti pyrã nê kapër japjê rũnh jakamã nhũm mē kēp hã hkamnhĩx. ¹³ Na prem krĩ htã mēhpãm Juptija mã amnhĩ jarēnh xã hã ixkre nhĩpêx nê hkarõ nhĩpêx. Hãmri nê hwýr akuprõ nê kãm mex o mex ã harē nê amnhĩ to hwýr o pa. Jakamã nhũm Jupti nhõ patrejaja Pawre mē Panãpe wa kēp mēhpãm ã wa harēnh ma hãmri nê wa hã hkwyjê mã kãm:

—Kwa pu mē wa kãm mōx kwý hpa nê pixõrã hkwy rê. Hãmri nê wa kãm wa mex o wa mex ã wa harē nê wa kēp mēpahpãm ã amnhĩ to wa kuwý. Wa kēp mēpahpãm kēnã. Anē.

Hãmri nê ra ã wa hipêx anhýr kaxyw ¹⁴ nhũm wa tee ri mē kot amnhĩ nhĩpêx ã mē omu nhũm ja wa kēp omnuj týx nê. Jakamã nhũm wa amnhĩ pē hinõkã kaxõnh pa nê mē kutã hprõt nê ã mē kot wa hipêx anhýrja nê mē kãm kapër kãm hihtýx nê. ¹⁵ Nê mē kãm:

—Kwa mē ri ã wa inhĩpêx anhýr kêt nê. Wa ixpē mēapãm kêt kēnã kot ka kêt mē ã wa inhĩpêx anē. Nom mēapãmja na ka htem ãm amnhĩ to hwýr kapřy nê kãm mex o mex ã harēnh kapřy o ri apa. Tã mē ate ã amnhĩ nhĩpêx anhýr kaga nê hpãnhã Tirtũm kôt amnhĩ xunhwýr nê amnhĩ to pix wýr o apa kaxyw na pa pre wa mē awýr mō nê pōj. Tirtũmja mē ate mē apãm jarēnhhta rom htĩr o htĩr. Na pre mēmoj piitã ho kato. Kaxkwa ho kato nê pyka ho kato nê gõ xujanãr o kato. Nê kamã ri mēmoj piitã ho kator pa.

¹⁶ —Amnepêm më pa xwÿnhjaja na pre htem amnhî krã hkôt pix mã tanhmã ri amnhî nhîpêx to ho pa nhũm Tirtũm ja hã më omu nê ãm më omu nê tanhmã më ho hkêt nê. ¹⁷ Më pahte amnhî tã omunh kaxyw na hte amarî tanhmã më pahto mex to ho pa. Na hte më pahwÿr na rê nhũm më pahpur go mex nê. Nhũm më pamã tanhmã më pahpur kãm mëmo hyja to nhũm ra më pamã ô rũnh nê. Pu htem hamÿ nê ho paxàpkur mex nê pahkĩnh nê ri papa. Tirtũm pix kukwak ri na pu htem ã amnhî nhîpêx anhÿr o ri papa. Anê.

¹⁸ Nhũm pre ã Pawre më kot wa kãm môx parja nê më kãm kapêr kãm hihtÿx anê. No nhũm më kuma nê ãm kuma nê wa kãm mry hkwy hpar kaxyw wa hã hihtÿx nê. Jakamã kritpêm nhÿx prem wa kãm hkwy pa. Tã tanhmã hamaxpêr to nê hkaga nê wa kãm hpar kêt nê.

Më kot Pawre pĩr ã àmnênh ã më harênh

Sikũn Ximotre 3.10-11

¹⁹ Tã nhũm Ijaew kwÿjaja më hwÿr mran pøj. Krĩ pê ãxiok më Ikõn rũm ma më hwÿr mran pøj nê më kãm Pawre ho hêx o më hkôt pa nhũm më kuma nê axtem nê Pawre kamã gryk kato. Hãmri nê më kot hpĩr kaxyw kên runh kwÿ jamÿ nê ho htak prêprêk o kuhê. Hãmri nhũm amnhî xà htÿx kamã ama nê tẽm nê akryk nõ nhũm më omu nê htÿx ho ra htyk ã hkamnhĩx. Hãmri nê hwÿr tẽ nê hpa hã kupy nê ma hkjênh o mō nê krĩ pum kumê nê ma akupÿm mra. ²⁰ Hãmri nhũm Jesus kôt më kot axpên to htõjaja tee ri ã më kot hipêx anhÿr ã omu nê hkaprĩ htÿx nê hwÿr hprõt nê omu nê mÿr o kuhê. Hãmri nhũm te htyk pyrã nê nõr tã Jesus nhÿ hã akupÿm hihtÿx mex nê kãnhmã nhÿ hãmri nê ma akupÿm më hkôt krĩm tẽ.

Tã nhũm apkati nhũm Panãpe më wa krĩja rũm kato nê ma wa mō. Pãnhã ma krĩ pê Tepe hwÿr wa mō.

Pawre më Panãpe akupÿm ãxiok wÿr wa mōr ã wa harênh

²¹ Tã nhũm wa ma Tepe hwÿr mō nê pøj. Hãmri nê kamã më kãm Jesus tanhmã kot më panê amnhî nhîpêx to hã harênh o ri më hkôt wa pa nhũm më wa kuma nê ohtô nê Jesus kôt amnhî xunhwÿ.

Tã nhũm wa kato nê awjanã nê ma akupÿm pika pê Pisit wÿr wa mō. Nê kamã krĩ hkwy hkôt ri ra më kot Jesus kôt amnhî xunhwÿr xwÿnhjê jahkre ho ri më hkôt pa. Krĩ pê Risti nê Ikõn nê ãxiokja kôt. Nê më ahkre kamã Jesus kôt më ho më hihtÿx o wa pa nê më kãm:

—E ra më ate Jesus kôt amnhî xunhwÿr jakamã koja më kãm Jesus kurê xwÿnhjaja tee ri ja hã më apumu nê hã tanhmã më anhîpêx to. Tã kêr ka më ãm amnhî tã më omu nê ãm më omu nê Jesus kaga hkêt nê. Nê arĩ hkôt amnhî nhîpêx mex o ri apa rãhã nhÿrmã ma õ krĩ hwÿr api nê Tirtũm wa kuri amex kumrêx nê atĩr tũm nê apa ho apa. Anê.

²³ Hãmri nê ahpÿnhã krĩ piitã hkôt ri më kot pastô nhÿ hã më ahkre kaxyw më hkwyjê rê nê më kaxyw më unhwÿ nê më ho Tirtũm wÿ. àpkur kêt rãhã më ho kuwÿ nê kãm:

—Pa Tirtũm? E jajê pumu. Më kot krĩ ja kamã pastô nhÿ hã akrajê jahkre ho pa kaxyw na pa wa më unhwÿ. Jakamã e kêr ka më kutã anojarêt rãhã ho ri më hkôt apa. Anê.

Hãmri nê wa më kêp kato nê ma hpãnhã nhÿhÿm wa mō. ²⁴ Pyka pê Pisit kamã mō nê hpãnhã nhãm pyka pê Pãpir kôt mō. Wa ma më kãm tanhmã Jesus kapêr jarênh to ho më hkôt mō. ²⁵ Hãmri nê krĩ pê Perke hwÿr wa pøj nê kamã më kãm Jesus kot tanhmã amnhî nhîpêx to hã harê hãmri nê më kurũm kato nê axte mō. Pãnhã ma krĩ pê Atari hwÿr wa mō. ²⁶ Hãmri nê hwÿr pøj nê hpãnhã kurũm akupÿm ãxiok wÿr wa mō. Pãr rax kãm ma akupÿm mō. ãxiokja kamã na pre wa nojarêt nhũm Jesus kôt wa htõ nê wa htõxjaja wa ho Tirtũm wÿ nê ma krĩ hkwy hwÿr wa kumê. Wa kot ma më hkôt tanhmã Jesus kot më panê amnhî nhîpêx to hã harênh o wa pa kaxyw wa kumê. Jakamã nhũm wa ra ja ho anhÿr pa nê akupÿm më hwÿr wa mō. ²⁷ Hãmri nê wa akupÿm pøj nê Jesus kôt më kot axpên to htõ nê htõxjê ho akuprõ nê më kãm amnhî jarê nê më kãm:

—Nà ãm hãmri na pa wa ra ixkãhkĩnh pê akupÿn më awÿr pøj. Na pre Tirtũm wa ixkutã nojarêt rãhã ho wa inhĩhkõ hã pa. Jakamã pa pre wa ma ÿ hã Ijaew kêt xwÿnhjê mã Jesus jarênh o ixpa nhũm më hkwyjaja wa inhma nê hkôt amnhî xunhwÿ.

²⁸ Anhÿr o wa më kãm kapêr hãmri nê wa tokyx ma nhÿhÿm krĩ hõ hwÿr axte mōr kêt nê. War arĩ ãxiok kamã Jesus kôt wa htõ nê htõxjê hkôt ri pa.

Jerujarê kamã Jesus kwÿ hpikuprõnh ã më harênh

Matêwre 23.1-4; Karatas 2.1-5, 5.1-16

15 Tã hãmri nhũm Ijaew kwÿjaja ãxiok wÿr Jesus kwÿ pê Ijaew kêt xwÿnhjê hwÿr mōn pøj. Pika pê Jutej rũm më hwÿr pøj nê tanhmã më ahkre hto ho pa. Nom axtem nê Tirtũm kapêr kuhpa hã më ahkre nê më kãm:

—Kot ka më amã Jesus kôt amnhî xunhwÿr prãm hãmri nê më ixpyrà nê finat Mojes kot më pamã karõ xà hkôt amnhî my kwÿt kã kwÿ jakã nê rĩ kormã hkôt amnhî xunhwÿ. Kot kaj më ã amnhî nhîpêx anhÿr kêt nê nhũm Tirtũm tee ri ja hã më apumu nê amnhî katut kôt më ate amnhî tomnuj rênh nê më ato hkra hkêt nê. Anê.

² Hãmri nhũm Pawre më Panãpe tee ri më kapêr anhÿrja ma nhũm wa kêp ja omnuj tÿx nê. Hãmri nhũm wa më kãm:

—Tk. Kwa kot anhÿr kêt. Na hte Tirtũm më pahte amnhî my kwÿt kã jakãr ã më pahpumunh kôt më pahto hkra hkêt nê. Anê.

Hãmri nê tee ri më kapêrja nê më kãm kapêr no nhũm më ãm wa kuma nê wa hkôt hamaxpêr kêt nê. Nê arĩ ã më ahkre anhÿr o më hkôt pa. Jakamã nhũm më ja hã axpên mã kapêr rax nê. Hãmri nhũm Jesus kwÿ pê Ijaew kêt xwÿnhjaja amnhî tã Pawre më Panãpe wa hkukja nê wa kãm:

—Kwa xà kot paj më apyrã nê amnhî my kwÿt kã jakã nhũm Tirtũm kãm ja mex nê nà? Kwa wa ma akupÿm Jerujarê hwÿr mō nê ja hã Jesus nhÿ hã më

ahkre xwýnh maatijê mẽ mẽ kot Jejus kwý jahkre xwýnhjê kukja nê hã mẽ ama. Nê ota mẽ ixkwýjaja ko-ja ma war akôt mra. Kê mẽ tanhmã mẽ amã ja jarênh to ka mẽ ama nê man akupýn mẽ ixwýr mra nê tanhmã mẽ inhmã mẽ kapêr jarênh to. Anê.

Hãmri nhùm wa mẽ kãm: “Tôe. Nà kot paj mẽ anê.” Anê. ³ Hãmri nê wa mẽ ma Jerujarê hwýr mō. Ma pyka pē Wēnīs mẽ Samar hkôt ma hwýr mō. Hãmri nê nhýri Jejus kôt mẽ htō nê htōxjê pumu nê mẽ kãm Ijaew kêt xwýnhjê jarê. Mẽ hkwyjaja mẽ urak nê Jejus kôt amnhĩ xunhwýr ã mẽ harênh o mō. Hãmri nhùm mẽ harênh ma nê mẽ ý hã hkĩnh nê. ⁴ Hãmri nhùm mẽ ra Jerujarê hwýr Jejus kôt mẽ htōjê hwýr mōn pōj. Hãmri nê mẽ ahkre xwýnhjê mẽ Jejus nhý hã mẽ ahkre xwýnh maatijê pumu nhùm mẽ haxwýja amnhĩ wýr mẽ omu nê mẽ hkĩnh nê. Nê tanhmã mẽ ho mex to nê mẽ kãm kapêr mex nê. Hãmri nhùm Pawre mẽ Panãpe wa mẽ kãm amnhĩ jarê. Tirtüm kot wa ãhkô hã wa hkôt pa nhùm wa ý hã kot Ijaew kêt xwýnhjê mã kapêr o pa nhùm mẽ hkwyjaja kot wa mar nê Jejus kôt amnhĩ xunhwýr ã nhùm wa mẽ kãm amnhĩ jarê. ⁵ Nhùm Jejus kwýjê kamã mẽ kêp Parijew nhō xwýnh kwýjaja. Mẽ kêp Parijew tã hkwyjê rom Jejus kôt amnhĩ xunhwý. Jakamã nhùm mẽ tee ri Pawre mẽ Panãpe wa kot Ijaew kêt xwýnhjê jarênh ma nê kãnhmã kuhê nê wa kãm:

—Kwa kê mẽ pahpyrà nê amnhĩ my kwrýt kà jakà nê finat Mojes kot Tirtüm nhý hã mẽ pamã mẽmoj tã karō hkôt amnhĩ nhĩpêx o pa. No kot mẽ ã amnhĩ nhĩpêx anhýr kêt nhùm ja mẽ pahpê omnuj nê. Anê.

⁶ Hãmri nhùm Jejus nhý hã mẽ ahkre xwýnh maatijê mẽ mẽ hkwyjê jahkre xwýnhjaja mẽ kuma nê hapōj nê nhýri akuprō. Ijaew kêt xwýnh kot Jejus kôt amnhĩ xunhwýr xwýnhjaja kot tanhmã amnhĩ nhĩpêx to hã axpên mar kaxyw nhýri akuprō. ⁷ Hãmri nê mẽ hã axpên mar ryy nê. Hãmri nhùm Simãw Pêtre tã kãnhmã xa nê mẽ kãm:

—Nà na pre Tirtüm mẽ pahkapi nê Ijaew kêt xwýnhjê kaxyw pa ixta. Ixte mẽ kãm Jejus kot tanhmã mẽ panê amnhĩ nhĩpêx to hã harênh o ri mẽ hkôt ixpa nhùm mẽ kot inhma nê hkôt amnhĩ xunhwýr kaxyw nhùm mẽ kaxyw ixta. Ra mẽ ate ja hã ixpumunh mex.

⁸ Tirtüm kot tanhmã ri mẽ pakute hkôt mẽ pahpumunh par jakamã te kot ra mẽ panhĩpêxta pyrà nê mãänēn Ijaew kêt xwýnhjê nhĩpêx. Mẽ kot mẽ pahpyrà nê amnhĩ kaxyw Jejus kôt hamaxpêr jakamã nhùm Tirtüm te ra mẽ panhĩpêx pyrà nê amnhĩ katut kôt mẽ kot amnhĩ tomnuj rē nê mẽ ho hkra. Hãmri nê mẽ hwýr amnhĩ Karō rē nhùm mẽ hkarō mã agjê. Tirtüm tãm kot amnhĩ mẽ rēnh kēnã.

¹⁰ —Tã xà mẽ pahpê Ijaew na pu htem wam Tirtüm kot finat Mojes mã kapêr kôt amnhĩ nhĩpêx mex o papa? Nà na pu htem hkôt amnhĩ nhĩpêx mex kêt nê. Nê mẽ panhĩgêjtaja na xep prem haxwýja hkôt amnhĩ nhĩpêx mex o pa hkêt nê. Mẽ pahpiitã mẽ pahpê hihtýx kēnã. Tã Ijaew kêt xwýnhjaja kot hkôt amnhĩ nhĩpêx o pa hã ka mẽ ra mẽ kãm karō kaxyw. Kwa kot kaj mẽ anê nhùm Tirtüm tee ri ja hã mẽ apumu nhùm

ja kêp omnuj nê. Kãm ja prãm kêt. ¹¹ Kwa mẽ ã mẽ kãm hã karō anhýr kêt nê. Mẽ panhō pahihiti Jejus na hte mẽ pahpiitã mẽ pakutã nojarêt o axpên pyràk. Jakamã Ijaew kêt xwýnhjaja nê mẽ pahpê Ijaewjaja kot puj mẽ amnhĩ kaxyw hkôt pajamaxpêr nê hkôt amnhĩ xunhwý. Hãmri nhùm Tirtüm ja hã mẽ pahpumu nê mẽ panhĩpêx o axpên pyrà nê Jejus kukwak ri amnhĩ katut kôt mẽ pahte amnhĩ tomnuj rē nê mẽ pahto hkra. No na hte mẽ pahte amnhĩ my kwrýt kà jakà rý finat Mojes kapêr kôt amnhĩ nhĩpêx ã mẽ pahpumunh kôt mẽ pahto hkra hkêt nê. Anê.

¹² Nhùm pre ã Simãw Pêtre mẽ kãm kapêr anê. Hãmri nhùm hpãnhã Panãpe mẽ Pawreja mẽ kãm amnhĩ jarê. Tirtüm kot tanhmã wa ho nhùm wa kot Ijaew kêt xwýnhjê hwýr wa mōr ã amnhĩ jarê. Nê Tirtüm nhý hã mẽ kãm aa mẽ kot mẽmoj pumunh kêt kwý ho anhýr o ri mẽ hkôt pa hã mẽ kãm amnhĩ jarê nhùm mẽ piitã akryk wa mar o hkrĩ nê wa ujarēnhta hkukamã hamaxpêr. ¹³ Hãmri nhùm Simãw Pêtre mẽ Panãpe wa mẽ kãm ujarēnh pa hãmri nhùm Xiakre wa hpãnhã kãnhmã xa nê mẽ kãm kãnhmã ãhkra pē nê mẽ kãm:

¹⁴ —E pa ijaxwýja mẽ amã ixkapêr ka mẽ inhma. Nà na pu mẽ ra Simãw Pêtre kapêr ma. Tirtüm kot wam amnhĩ kaxyw Ijaew kêt xwýnh kwýjê rēnh ã mẽ harēnhja pu mẽ ra kuma. ¹⁵ ãm hãmri na ã mẽ harēnh anê. Amnepêp Tirtüm kapêr nhý hã mẽ kapêr o mẽ pa xwýnhjaja na prem ra ja kukamã Tirtüm kot tanhmã mẽ hipêx to hã amnhĩ jarênh kukamã hã kagà. Te ho tãm kot kãm kapêr pyrà nê hã kagà ho:

¹⁶ Amnepêp finat Tawija na pre hte inhma amnhĩ kwýjê ho amnhĩptar o pa.

Mẽ kêp Ijaewjaja nhùm pre inhma mẽ ho amnhĩptar o pa.

Hãmri nhùm mẽ gaa nê axpên pē angrà nê ahpýnhã ri pa.

Tã ixpê Tirtüm kot paj nhýrmã ma mẽ hwýr wry nê axte mẽ ho akuprō nê tãm mẽ unhwýr pa.

¹⁷ Jakamã Ijaewjê kukwak ri koja Ijaew kêt xwýnh kwýjaja mãänēn ixkôt amnhĩ xunhwý.

Pa te ixte Ijaewjê nhĩpêx pyrà nê mẽ ho ixkra.

¹⁸ ã mẽ hkukamã ijamaxpêr anhýr xà hkôt.

¹⁹ Anhýr o mẽ harēnh jakamã nhùm ra mẽ hkwyjaja mẽ higêt kot amnhĩ nhĩpêx kaga hpa nê hpãnhã Tirtüm kôt amnhĩ xunhwý. Jakamã kwa kê pu mẽ axte ja nhĩjuk ri mẽ kãm mẽmoj tã karō hkêt nê. Ja pix na mex. ²⁰ ãm ja pix kot puj mẽ kãm hã karō nê hã kagà nê mẽ hwýr kumê:

Mẽ kot sãnti hã mẽ õ hkur nê kot puj mẽ hkurê.

Nê mẽ kot mẽmo mry hpar nê hkamrō runh kêt rãhã hkur nê mẽ hkurê.

Nê mẽ kot mẽmo mry kamrō kur nê mãänēn mẽ hkurê.

Nê mẽmyjaja kot amnhĩ prō pix tãnopxar ã mẽ kãm karō.

Nê mẽnijaja haxwýja kot amnhĩ mjên pix tãnopxar ã mẽ kãm karō.

—ãm ja pix kot puj mẽ kãm hã kagà nê mẽ kãm hã karō. ²¹ Mẽ panhĩgêjtê mã finat Mojes kot ã mẽ kãm

karõ anhÿrja na htem arí krí piitã hkõt ã më kãm hä karõ anë. Më panhõ arígmomnu pê sap ã na htem arí ri Tirtüm kapër o më ahkre xà hä ixkre kamã ã më kãm hä karõ anë. Anë.

Më kot Ijaew kêt xwÿnhjê hwÿr kagà mënh ã më harënh
Karatas 5.1

²² Hämri nhüm më Xiakre kapër mar o hkrí. Jeus nhÿ hä më ahkre ho më pa xwÿnh maatijaja në më kot hk-wÿjê jahkre xwÿnhjaja në Kris kwÿjê piitã Xiakre kapër ma nhüm ja më kãm mex në. Jakamã nhüm më axpën mã:

—Tõe. Nà ãm hämri na Xiakre ã Ijaew kêt xwÿnhjê jarënh anë. Nà ja mex. Pu më ã ãxiok nhõ xwÿnhjê mã ja hä kagà anë hämri në më hwÿr kumë. Koja Pawre më Panãpeja wa kupy në ma akupÿm më hwÿr o mõ në më kãm kugõ. E më pahtõ kot puj më ma wa hkõt më hwÿr mõ? Anë.

Hämri nhüm më kuma në Siras më Jut Pasapas wa kuta. Jeus kõt më kot axpën to htõ në htõxjaja kot axpën mã hamë wa kot amnhí to mex xwÿnh ã wa harënh jakamã nhüm më ma Pawre më Panãpe wa hkõt mõr kaxyw wa kuta. ²³ Hämri në ãxiok kamã Kris kwÿ pê Ijaew kêt xwÿnhjê kaxyw kagà nhípêx në kamã ã më kãm kapër anë në më kãm:

Pa? ãxiok më Sir më Siris kamã Ijaew kêt xwÿnhjaja? Xà më amex? Më ixpê Jeus kõt më atõjaja na pa më awÿr kagàja nhípêx në më awÿr kumë. Më ixpê Jeus kõt më kot amnhí xunhwÿr xwÿnhjê jahkre ho ixpa xwÿnhjaja në Jeus nhÿ hä më ahkre ho më pa xwÿnh maatijaja pa më awÿr kumë.

²⁴ Na xep ra ja rüm më ixkwÿjaja ma më awÿr mõ në mëmoj tã tanhmã më amã karõ hto. Më ate amnhí my kwÿt kã jakàr në amnepêm më inhígêt Mojes kapër kõt amnhí nhípêx o apa hä më amã karõ. Ka xep më tee ri ja kukamã ajamaxpër. No më pajaja na pa prem më awÿr më rënh kêt në. ãm amnhí krã hkõt na prem më awÿr mõ në ã më amã ja hä karõ anë.

²⁵ Tã pa tee ri më harënh ma nhüm ja më ixpê omnuj tÿx në. Jakamã na pa më jar akuprõ në më akaxyw më inhíõja wa kuta. Wa kot ma Panãpe më Pawre wa hkõt më awÿr wa mõr në më amã më ixkapër jarënh kaxyw. Panãpe më Pawreja më inhmã wa hapê htÿx. ²⁶ Na hte më amã Pahihtí Jeus Kris kapër jarënh o pa kaxyw wa amnhí grõnh kõt më amã harënh o pa.

²⁷ Tã pa më akupÿm më awÿr wa kumë në wa hkõt më pahtõ Jut më Siras wa kumë. Më ixte më amã kagà kamã më ixkapërja nhüm wa kot hprí hä më amã harënh kaxyw pa më wa hkõt më awÿr wa kumë.

²⁸ E ja pix në kot paj më akurê:

Kêr ka më sãntí hä më õ hkur kêt në.

Në mëmo mry kamrõ kur kêt në. Jao mëmo mry pa në hkamrõ runh kêt rãhã hkur kêt në. Kamrõ runh pa në rí kormã tanhmã ho në aku.

Në kêr ka më amyjaja amnhí prõ pix tãnopxar o apa.

Në më anijaja ajaxwÿja amnhí mjên pix tãnopxar o apa.

E ãm ja pix kot paj më amã hä karõ. Tirtüm Karõ kãm ja mex. Në më inhmã mãänën ja mex. Kot kaj më ã amnhí nhípêx anhÿr o ri apa në amex në apa.

Tã ãm ja pix. Më ixpê Jeus kwÿjê jahkre xwÿnhjê më Jeus nhÿ hä më ahkre xwÿnh maatijê më pa më më awÿr kagàja nhípêx në kumë. E kêr ka më amex në akính në ri axpën kõt apa. ãm ja pix na hapêx. Anë. Nhüm prem ã kagà kamã më kãm mëmoj tã karõ anë.

³⁰ Hämri në Jut wa më kãm kugõ në ma ãxiok wÿr wa më kumë nhüm wa më ma akupÿm hwÿr o mõ. Jut në Siras në Pawre në Panãpeja nhüm wa më ma akupÿm më hwÿr o mõ. Mõõ hämri në më hwÿr pøj. Hämri në Jeus kwÿjê ho akuprõ në më kãm kagàja gõ ³¹ nhüm më kupy në kamã harë në kuma. Kamã më kot më kãm mëmoj tã karõ kamã harë në kuma në ÿ hä hkính në akupÿm tãm hamaxpër.

³² Jut më Siras wa kêt Tirtüm nhÿ hä kapër o pa xwÿnh na pre wa. Jakamã na prem më hwÿr mõn pøj hämri më kãm tanhmã ujarënh to ho pa. Më kot Jeus kõt pix mã hamaxpër o pa kaxyw më kãm ujarënh o pa në më kãm:

—E kêr ka më mãmrí Jeus kõt amnhí nhípêx mex rãhã ho ri apa në aa hkaga hkêt në. Anë.

³³ Hämri në më hkõt ri pa hä apkati xohtõ në. Hämri në wa akupÿm Jerujarê hwÿr nojarêr në më kãm amnhí jarë nhüm më wa kuma në wa kãm:

—Tõe. Nà wa mãmrí ma akupÿm mõ. Koja Tirtüm war apumunh mex në ka wa ma akupÿm amex në akã hkính pê akwÿjê hwÿr akato. Anë.

³⁴ Hämri nhüm wa nojarêr tã nhüm Siras tanhmã hamaxpër to në hitõt në më kuri arík nhüm Jut Pasapas pix ma akupÿm hkwyjê kot më hwÿr wa mënh xwÿnhjê hwÿr mõ.

³⁵ Hämri nhüm Pawre më Panãpe wa Siras pyrã në kormã ãxiok kamã pa. Hämri në Jeus kõt më htõ hk-wÿjê më pimràatã më ahkre ho pa. Tirtüm kapër o më hkõt më ahkre ho pa.

Pawre më Panãpe wa kot axpën pê pikjêr ã wa harënh
Atre 13.13; Korosë 4.10

³⁶ Hämri nhüm Pawre më Panãpe war arí më hkõt ri pa hä apkati xohtõ në. Tã nhüm Pawre hamaxpër në Panãpe mã:

—Kwa ma pu ma akupÿm ra pahte krí hkwy hkõt më kãm Jeus jarënh o papa xwÿnhjê hkõt akupÿm mõ. Pu ma më hwÿr mõ në Jeus kõt pahtõ në pahtõxjê kot tanhmã ri amnhí nhípêx to hä më omu. Anë.

³⁷ Hämri nhüm kuma në kãm:

—Tõe. Nà pu ma mõ. Nom kêr pu ma amnhí kõt Juãw Makre ho mõ kê axte pahto ajuta ho pahkõt mõ. Anë.

³⁸ Hämri nhüm Pawre tee ri kuma nhüm ja kêt omnuj në nhüm kãm:

—Tk. Kwa na pre pahkõt pa htã Pãpir kamã tanhmã hamaxpër to në pahkaga në ma akupÿm Jerujarê hwÿr mõ. Jakamã kwarí koja axte pahkõt mõr kêt në. Anë.

³⁹ Hämri nhüm Panäpe tee ri hä hihtÿx no nhüm kÛp hkaga kumrÛx. Jakamä nhüm wa ja hä axpÛn pÛ axkjÛ nÛ ma ahpÿnhä mö. Nhüm Panäpe amnhÿ kÛt Juäw Makre ho mö nÛ wa ma pàr kãm gö hipÛk pÛ Sipre hwÿr wa mö. ⁴⁰ Nhüm Pawre axtem amnhÿ kÛt Siras wÿ nÛ ma wa mö. Hämri nÛ wa nojarÛt nhüm Jejus kÛt wa htÛjaja wa ho TÿrtÛm wÿ nÛ kãm:

—Pa TÿrtÛm. E koja Pawre mÛ Siras wa ma krÿ hkwy hkÛt mÛ kãm akapÛr jarÛnh o ri wa pa. Jakamä kÛr ka wa htãnopxar o ri wa hkÛt apa. AnÛ.

Hämri nhüm wa kato nÛ ma krÿ hkÛt ri Jejus kapÛr o mÛ ahkre ho wa pa. ⁴¹ Wa ma pyka pÛ Sir mÛ Siris kÛt Jejus kÛt mÛ htÛ nÛ mÛ htÛxjÛ pumunh nÛ Jejus kÛt mÛ ho mÛ hihtÿx o wa pa kaxyw.

Ximotre kot Pawre mÛ Siras wa hkÛt ri pa hä harÛnh

Wam Ximotre 1.1-2; SikÛn Ximotre 1.5; Piripos 2.19-22

16 Tã nhüm Pawre mÛ Siras wa ma akupÿm krÿ pÛ Tepe hwÿr wa mö nÛ hwÿr pÛj nÛ hpãnã kurÛm ma Risti hwÿr mö. Hämri nÛ wa hwÿr pÛj nÛ kamä Ximotre pumu. Ximotre na pre ra katorxã pyrã nÛ Jejus kÛt amnhÿ xãm nhüm mÛ kot Jejus kÛt axpÛn to htÛ xwÿnhjaja kãm hapÛ nÛ. NÛ kot Jejus kapÛr kÛt amnhÿ nhÿpÛx mex o pa hä axpÛn mã harÛ.

Krÿ pÛ Risti mÛ IkÛn kamä nhüm prem ä axpÛn mã Ximotre jarÛnh anhÿr o pa. Jakamä nhüm Pawre mÛ Siras wa mö nÛ mÛ hwÿr pÛj nÛ Ximotre kot amnhÿ nhÿpÛx ä omu nhüm Pawre kãm war amnhÿ kÛt o mÛr prãm nÛ. Nom Ximotre hkamrÛ pihkãr na pre. Katorxã kÛp Ijaew nhüm hipÛÛxã kÛp Gres jakamä nhüm ä Ximotre hkamrÛ pihkãr anÛ. Nhüm Ijaew kot katorxã hkÛt kÛp Ijaew ä omunh jakamä nhüm Pawre hamaxpÛr nÛ mÛ kaxyw kÛp my kwÿrÿt kã krãhta nÛ arÿ kormã mÛ hwÿr amnhÿ kÛt o mö. ⁴ Hämri nÛ mÛ ma krÿ hkwy hkÛt mö. MÛd nÛ Ijaew kÛt xwÿnhjaja ra kot amnhÿ kaxyw Jejus kÛt hamaxpÛr xwÿnhjÛ jahkre ho mÛ hkÛt pa. Ra JerujarÛ kãm mÛ kot Jejus kwÿjÛ jahkre ho pa xwÿnhjÛ mÛ Jejus nhÿ hä mÛ ahkre xwÿnh maatijaja mÛ kot mÛ kãm mÛmoj tã karÛta nhüm mÛ ma mÛ kãm harÛnh o ri mÛ hkÛt pa. ⁵ Hämri nhüm mÛ kuma nÛ ra Jejus kÛt amnhÿ nhÿpÛx mex o mö. Hämri nhüm apkati mÛ krÿ nhÛ xwÿnh kwÿjaja mÛ urãk nÛ Jejus kÛt amnhÿ xunhwÿ. Jakamä nhüm mÛ ra ohtÛ rax o mö.

Pawre tanhmã hpimtir to hä harÛnh

RÛmãn 15.18-21

⁶ Tã nhüm Pawre mÛ Siras mÛ Ximotre mÛ ma pyka pÛ As wÿr nojarÛt. MÛ kot mÛ kãm tanhmã Jejus jarÛnh to ho pa kaxyw mÛ hwÿr nojarÛt tã nhüm TÿrtÛm KarÛ kormã mÛ nÛ mÛ hkurÛ. Jakamä nhüm mÛ hpãnã ma pyka hkwy pÛ Prik mÛ Karatas wa hkÛt pa. IxpÛ Rukre na pa pre mÛ hä ajÛt nÛ ma mÛ hkÛt ixpa ho ixpa.

⁷ Hämri nÛ mÛ pyka pÛ Mÿs ä mö nÛ hpãnã ma Pitÿn wÿr inhmÛr mã tã no nhüm TÿrtÛm KarÛ axte kÛ mÛ mÛ nÛ ixkurÛ. ⁸ Jakamä pa mÛ arÿ Mÿs jakãr ä mö nÛ gö xujanãr mÿ ri krÿ pÛ TÛx wÿr pÛj.

⁹ Tã nhüm kamãt pa mÛ ixpiitã gÛr nÛ inhÿkwÿ nhüm Pawre tanhmã hpimtir to. Nhüm xep pika pÛ MasetÛn

nhÛ xwÿnhjaja mÛ amnhÿ wÿr hwÿr kãm hihtÿx o xa nhüm hprÿ hä omu nÛ kapÛr ma. Nhüm xep pre kãm: —Pa Pawre? Kwa amnÛ MasetÛn wÿr mÛ ixwÿr mö nÛ tanhmã mÛ ijahkre hto. AnÛ.

¹⁰ Hämri nhüm Pawre hkrãkato nÛ mÛ inhmã hpimtir jarÛ. Pa mÛ kuma nÛ axpÛn mã:

—TÛ kwa tokyx pu mÛ hwÿr. TÿrtÛm kot mÛ hwÿr mÛ parÛnh kÛnã. E pu mÛ ma mÛ hwÿr mö nÛ mÛ kãm Jejus jarÛnh o mÛ ahkre. AnÛ.

Hämri nÛ amnhÿ to akuprÛ nÛ mÛ hwÿr inhnojarÛt kurÛ kumrÛx.

Ritre kot Jejus kÛt amnhÿ xãm ä harÛnh

Piripos 1.1

¹¹ Hämri pa mÛ ma MasetÛn wÿr mö. TÛx rÛm ma pàr kãm hwÿr mö. Hämri nÛ gö nhÿpÛk pÛ SamÛtas wÿr pÛj nhüm mÛ hä pàr nhÛ. Hämri nhüm apkati pa mÛ axte mö nÛ MasetÛn kamã krÿ pÛ NÛep wÿr pÛj.

¹² Hämri nÛ pàr rÛm ijpÛj nÛ hpãnã kurÛm hamÛ krÿ pÛ Piripos wÿr ixpar o mö. Piriposja MasetÛn kamã krÿ maati na. RÛm nhÛ xwÿnhjaja na prem ho kato. Jakamä pa prem ma hwÿr mö nÛ pÛj nÛ tokyx axte kurÛm nhÿhÿm inhmÛr kÛt nÛ. ¹³ Hämri nhüm sap kato pa mÛ axpÛn mã:

—Kwa pyhti mÿri mãn hte Ijaewjaja axpÛn wÿr akuprÛ nÛ TÿrtÛm mã amnhÿ jarÛnh o hkrÿ nã. E kwa pu mÛ hwÿr nÛ gö mÿri mÛ hapÛr o ri papa. AnÛ.

Hämri nÛ ma hwÿr mra nÛ mÛ hapÛr o ri ixpa nhüm äm mÛni pixjaja axpÛn wÿr akuprÛ. Pa mÛ omu nÛ mÛ kuri ixkrÿ nÛ mÛ kãm Jejus kapÛr jarÛnh o mÛ ahkre o ixkrÿ. ¹⁴ Nhüm mÛ kot mÛ inhmãr o hkrÿ xwÿnhjÛ hÛ pÛ Ritreja. Krÿ pÛ Xijaxir nhÛ xwÿnh na pre. NÛ kÛp kupÛxÛ mex o wÛnÛ xwÿnh. Na pre hte kãm TÿrtÛm prãm o pa. Jakamä nhüm Pawre kot mÛ ahkre ho ÿrja rÛm nhüm Pahihti Jejus tanhmã Ritre hkrã hto nhüm hprÿ hä hwÿr kapÛr mar tÿx nÛ. ¹⁵ Hämri nÛ amnhÿ kaxyw Jejus kÛt hamaxpÛr nÛ hkÛt amnhÿ xãm kurÛ kumrÛx. Örkwÿ kamã hkwyjÛ mÛ nhüm mÛ hkÛt amnhÿ xunhwÿr pa. Jakamä pa mÛ kÛp Jejus kwÿ hä mÛ hkrã kumrã. MÛ piitã mÛ kot mÛ kÛp TÿrtÛm kra hä mÛ omunh kaxyw. Hämri nhüm Ritre amnhÿ kÛt mÛ ixwÿ nÛ mÛ inhmã:

—An kot kaj mÛ ixte Jejus kÛt amnhÿ xãm tÿx ä ixpumu hä kot kaj mÛ ma ixkÛt mö nÛ hpãnã inhÛrkwy kamã pÛj nÛ apa. AnÛ.

Pa mÛ kuma nÛ ma hkÛt mö.

MÛ kot Pawre mÛ Siras wa haxãr ä mÛ harÛnh

Makre 1.23-26, 1.34

¹⁶ Tã nhüm arÿgro hÛ hä pa mÛ TÿrtÛm mã amnhÿ jarÛnh kaxyw axte pyhti mÿri mÛ pikuprÛnh xãja wÿr mö. Hämri nÛ pry kamã mÛ kãm äpÛnh xwÿnh nija pumu. Ra mÛkarÛmnuti kot tanhmã hkrã hto nhüm ÿ hä ähpumunh tÿx xwÿnhjaja. Nhüm hte mÛkarÛmnuti nhÿ hä mÛ kãm mÛmo hkukamã tanhmã ujarÛnh to ho pa. Jakamä nhüm ò patrãwjaja kukwak ri ujamÿnh rÛnh pÛ hkrÿnh nÛ pa. ¹⁷ Jakamä pa mÛ mö nhüm nija

mě ixpumu ně mě ixtā ajêt ně ma mě ixkôt mō. Hāmri ně mě kām mě ijarēnh o mě ixkôt mō ně mě kām:

—Xê mě mran jajê pumu. Na htem Tirtūm maati mā tanhmā amnhī nhīpêx mex to ho pa. Tirtūm kot mě ate amnhī tomnuj pē tanhmā mě apytār to hā mě amā ujarēnh kaxyw na mě awyr mra. Aně.

¹⁸ Nē ām xatā mě kām mě ijarēnh o mě ixkôt paja o ra hā apkati xohtō nē. Tā nhūm Pawre ra kām mar ka ga nē nē mēkarōmnuti mā kapēr nē kām:

—Tk. Kwa kēp akato nē ma tē. Pa Jejus Kris nhỹ hā amā ixkapēr ka inhma nē kēp akato nē ma atēm kurē kumrēx. Aně.

Hāmri nhūm kuma nē kēp kato nhūm akupým tām hkrā. ¹⁹ Jakamā nhūm ō patrāwjaja tee ri ja hā omu ně gryk tỳx ně axpēn mā:

—Kwa ra mēkarōmnutijaja kēp kator jakamā koja axte mēmoj kukamā tanhmā ujarēnh to hkêt nē. Pu mě kukwak ri axte paxujamýnh kêt nē. Aně.

Hāmri ně Pawre mě Siras wa kamā gryk tỳx ně. Hāmri ně wa unē ně ma mě kot axpēn mar xā hā ixkre hwýr wa hkjēnh o tē ²⁰ ně mě kot mě ho amnhīptār xwýnhjē mā tanhmā wa ho hēx to ně mě kām:

—Kwa mě amnē Ijaewja wa omu. Na hte wa mě panhō krī kamā hēx pix o pa nhūm mě tee ri wa kapēr ma ně wa kamā gryk tỳx ně. ²¹ Mě ixte amnhī nhīpêx te kot axpēn pyrāk kêt tā nhūm wa mě kot amnhī nhīpêx o mě pajahkre kaxyw nhỹhýnh mě pahwýr mō. Nom mě pahpē Rōm nhō xwýnhjaja axtem mě pahte amnhī nhīpêx kēnā kot pu kêt wa kuma nē wa kapēr kôt amnhī nhīpêx. Aně.

²² Hāmri nhūm mě kuma ně piitā wa kamā gryk tỳx ně. Hāmri nhūm mě ho amnhīptār xwýnhjaja wa kēp wa ê kaxōnh o hkapa ně wa hā mě ō pōristi mā amýnē ně mě kām:

—E mě ma wa o tē ně mě htak xā ho wa htak. Aně.

²³ Hāmri nhūm mě kuma ně ma wa o tē ně wa htak rax ně. Hāmri ně wa haxà ně mě hagdēnh xā jamār xwýnh mā kām:

—E kēp ka ja wa omunh mex ně kē wa kator kêt nē. Aně.

²⁴ Hāmri nhūm mě kuma ně wa o tē ně ixkre jatur xā kamā wa haxà ně wa kator pymaj hamē wa htem pī jaxà ně ho htỳx nhūm wa arī hte tỳx ně nhỹ.

²⁵ Tā nhūm kamāt. Nē kôt ā kamāt nhūm wa Tirtūm mā amnhī jarē ně mex o mex ā wa grer o wa nhỹ nhūm wa urāk ně mě hagdēnh xwýnhjaja wa mar o hkrī. ²⁶ Puh nhūm pyka mě kām htetert tỳx ně nhūm mě hā ixkreja amnhī to àpēr tỳx ně amnhī kahē xā rēnh pa. Nhūm mě hagdēnh xwýnhjē kaxpre xā piitā mě nē pirēnh pa. ²⁷ Hāmri nhūm mě hamār o kuhē xwýnhja pika tertet kamā ama ně hkrākato. Hāmri ně mě hā ixkre jakwakre kahē xā rēnh parja pumu ně mě hagdēnh xwýnhjaja hapôx par ā mě hkamnhīx ně tee ri amnhī kukamā hamaxpēr. Hāmri ně pahi kot mě hā hpīr pymaj ō wapo kapa ně ra tām kot ho amnhī pīr kaxyw. ²⁸ Hāmri nhūm Pawre tee ri ja hā omu ně kax pē kām amýra ně kām:

—Kwa amnhī pīr kêt nē. Ot pa mě arī ixpiitā ixkuhē. Na pa mě ixtō ixkator ně ixprôt kêt nē. Aně.

²⁹ Hāmri nhūm kuma ně kanē hā ahwý ně kuwy ně mě hwýr axà ně mě piitā mě omu. Hāmri ně Pawre mě Sirasja wa omu ně wa hwýr kām ma ho htetert o tē. Hāmri ně wa hā hpijaam kaxyw wa kutā tēm ně hkōnkrā ho nhỹ. ³⁰ Hāmri ně kànhmā xa ně wa ho kato ně ixkre kapem wa o xa ně wa kām:

—Kwa tanhmā kot pa amnhī nhīpêx to kē Tirtūm war apyrā ně ixte amnhī tomnuj pē ixpytā? Aně.

³¹ Hāmri nhūm wa kām:

—Nà kot kaj amnhī kaxyw Jejus Kris kôt ajamaxpēr ně hkôt amnhī xām nhūm Tirtūm ja hā apumu ně amnhī katut kôt ate amnhī tomnuj piitā rēnh pa. Nhūm anhōrkwý kamā akwýjaja apyrā ně Jejus kôt amnhī xunhwý nhūm ā mě hipêx aně. Aně.

³² Hāmri ně wa ma hkôt ōrkwý hwýr tē ně hprī hā mě kām Tirtūm kapēr jarē nhūm mě wa mar o hkrī.

³³ Hāmri nhūm mě hagdēnh xā jamār xwýnhja wa kām wa htak xā kuhō. Kormā kamāt kō hkwy kamā wa kām kuhō ně hkane. Hāmri nhūm wa mě kot Jejus kôt amnhī xunhwýr par ā mě omu ně mě hkrā kumrā. Mě hamār xwýnh mě hkwyjē mě hkrā kumrār pa. ³⁴ Hāmri nhūm mě kot amnhī kaxyw Tirtūm kôt hamaxpēr jakamā piitā hkīnh ně. Hāmri nhūm mě hamār xwýnhja ōrkwý hwýr Pawre mě Siras wa o tē ně wa kām ō nhūm wa apku nhūm ma akupým mě hagdēnh xā hwýr wa o tē ně akupým wa haxà.

Mě kot Pawre mě Siras wa kām urer ā mě harēnh

Atre 22.25-29

³⁵ Hāmri nhūm apkati nhūm krī pytār xwýnhjaja mě ō pōristi mā aně nhūm mě hagdēnh jamār xwýnh wýr tē ně kām:

—E na mě papytār xwýnhjaja ate Pawre mě Siras wa kām anhūrer nhūm wa māmri ma akupým htēm kaxyw hā karō. Aně.

³⁶ Hāmri nhūm mě kuma ně wa hwýr axà ně wa kām:

—E na krī pytār xwýnhjaja ixte war akator kaxyw war atā inhmā karō. Jakamā e wa māmri axamnhīx ma mō. Aně.

³⁷ Hāmri nhūm Pawre kām:

—Nà wa ixte tanhmā amnhī tomnuj to hkêt tā nhūm mě kot wa ixpynēnh ně wa ixtak. Wa ijaxwýja wa ixpē Rōm nhō xwýnh tā nhūm prem axtem ně mě piitā mě noo mā wa ixtak ně wa ijaxà. Mě kot amarī Rōm nhō xwýnh tak ně mě hagdēnh kêt tā nhūm mě ā mě noo mā ā wa inhīpêx aně. Kormā wa ixte tanhmā amnhī tā ixaprār to hkêt tā nhūm mě ā wa inhīpêx aně. Jakamā kwarī kot kaj mě no hkax ā wa ixkator kêt nē. Kē mě kot wa ijaxà xwýnhjaja tām man mra ně wa ixkator pa war arī ma mō. Aně.

³⁸ Hāmri nhūm pōristija kuma ně ma akupým mě hwýr mra ně mě kām wa kapēr jarē. Hāmri nhūm mě tee ri mě uràn wa kēp Rōm nhō xwýnh ā wa harēnh ma ně kām ma htỳx ně. ³⁹ Hāmri ně ma wa hwýr tē ně wa hwýr axà ně wa kām:

—Pa? E māmri war akato nē axāmnhīx ma mō. Na pa prem war anhīpēx kati rax nē. Tā kēr ka wa axte ja mā ajamaxpēr hkēt nē. Kē ja ām jar mē pakamā hapēx. Anē.

Hāmri nē wa kator nē wa kām:

—E kwa wa mē inhō krī pē akato nē ma nhỹhỹm mō. Anē.

⁴⁰ Hāmri nhũm wa kuma nē kato nē ma akupỹm Ritre nhōrkwy hwȳr wa tē. Hāmri nē Jejus kōt wa mē htōjē pumu nē wa mē kām amnhī jarē nē mē kām:

—E kot paj hāmri wa mā mō. Nom kēr ka mē arī Jejus Kris kōt amnhī nhīpēx mex rāhā ho ri apa nē aa hkaga hkēt nē. Anē.

Hāmri nē wa mē kurũm kato nē ma krī hō hwȳr wa mō.

Tesarōn kamā mē kot wa kamā gryk ā mē harēnh

Wam Tesarōn 1.1, 2.13-14

17 Tā nhũm Pawre mē Sirasja wa ma krī hkwȳ hkōt pa. Piripos rūm ma Apiporip mē Apōrōn kōt wa mō hāmri nē ra Tesarōn wȳr wa pōj. Na pre hte Pawre nhȳri pōj nē Ijaew nhō Tirtũm kapēr o mē ahkre xā hā ixkre hwȳr agjē nē kamā mē kām Jejus kapēr jarēnh o kuhē. Jakamā nhũm wa mō nē Tesarōn wȳr pōj nē ixkre hwȳr mē hwȳr tē nē mē kām ujarēnh o xa. Nē mē kām ujarēnh o hā arīgromnu pē sap o axkrunēpxi. ³ Nē hprī hā mē kām tanhmā Tirtũm kapēr jarēnh to nē mē kām:

—Nā Tirtũm kapēr ā kagā htũm kot mē pakaxyw ām xwȳnh jarēnh. Amnhī xā htȳx kamā hamak kām htyk hāmri nē akupỹm htīr ā nhũm kot hkukamā harēnh. Tā na pre Jejusja ā amnhī nhīpēx anē. Tām kēp Krisja. Tirtũm kot mē pakaxyw ām xwȳnhhta na. Anē.

⁴ Hāmri nhũm mē hkwȳja kuma nē wa hkōt hamaxpēr nē wa urāk nē Jejus kōt amnhī xunhwȳ. Ijaew kwȳjē nē Ijaew kēt xwȳnh kwȳjaja nē mēni kot amnhī to rūnh xwȳnh kwȳjaja nhũm mē ohtō nē amnhī kaxyw Jejus kōt hamaxpēr nē hkōt amnhī xunhwȳ. ⁵ Tā nhũm Ijaew kwȳjaja tee ri hkwȳ kot wa hkōt amnhī xunhwȳr ā mē omu nē mē hā Pawre mē Siras wa kamā gryk tȳx nē. Hāmri nē ma mra nē wa kaxyw mē kot amnhī tomnuj tȳx xwȳnh kwȳjē ho akuprō nē mē kām wa hā amȳnē. Jakamā nhũm mē ma kapēr punuj pē wa hapēr o ri mra nhũm mē piitā mē omu nē mē kuma. Hāmri nhũm mē wa hapēr o ra Jasāw nhōrkwy hwȳr mra. Nē mē kot Pawre mē Siras pynēnh nē ma mē utār xwȳnhjē hwȳr wa o htēm kaxyw mē kēp kahē xā mē nē mē hwȳr agjē. ⁶ Hāmri nē tee ri ōrkwy kamā wa hapēr nhũm wa kamā amrakati. Jakamā nhũm mē Jasāw mē kot Jejus kōt axpēn to htō xwȳnh kwȳjē pynē nē ma mē kot mē ho amnhīptār xwȳnhjē hwȳr mē o mra. Hāmri nē mē kām tanhmā Pawre mē Siras wa ho hēx to. Ām kapēr punuj kām kax pē mē kām wa harē nē mē kām:

—Kwa na hte Pawre mē Siras wa pyka piitā hkōt mē kām ri mēmoj to hēx o pa. Tā wa ra mē panhō krī hwȳr pōj nē jar mē pamā ri tanhmā hēx to ho ri mē pahkōt pa. ⁷ Jasāw nhōrkwy kamā na pre wa pōj nhũm amnhī wȳr wa kuwȳ. Na hte wa hkōt mē hamaxpēr xwȳnhjaja

pahihti Sesti kapēr kwȳm ri kuhpa hā kapēr o pa nē axtem nē mēō pahi pē “Jejus” anhyr xwȳnhja kapēr kōt amnhī nhīpēx o pa. Anē.

⁸ Hāmri nhũm mē kot mē ho amnhīptār xwȳnhjē mē krī nhō xwȳnhjaja mē kuma nē gryk tȳx kumrēx.

⁹ Hāmri nē Jasāw mā kām:

—E kot paj mē apē mē akāxpore hkwȳ jamȳ. Ka mē ajapōj nē ma mē panē Pawre mē Siras wa hano nhũm wa kato nē ma mō pa rī akupỹm mē amā kugō. Anē.

Hāmri nē mē kēp mē hikāxpore hkwȳ jamȳ.

Pawre mē Siras kot Perej wȳr mōr ā wa harēnh

¹⁰ Tā nhũm ra kamāt nhũm mē kot Jejus kōt axpēn to htōjaja hāmri Pawre mē Sirasja wa ma krī pē Perej wȳr wa kumē. Hāmri nhũm wa kato nē ma hwȳr mō nē hwȳr pōj. Hāmri nē Ijaew nhō Tirtũm kapēr o mē ahkre xā hā ixkre hwȳr htēm kurē kumrēx nē wa axā.

¹¹ Perej kamā Ijaew na pre te mē kot Tesarōn kamā Ijaew pyrāk kēt nē. Mē kurom mē kām Tirtũm kapēr mar prām nē. Jakamā nhũm pre Pawre mē Siras Tirtũm kapēr o mē ahkre ho pa. Apkati mē mē ahkre mex o pa nhũm mē wa kuma nē hkīnh nē. Nē Tirtũm kapēr ā kagā htũm kamā wa kot mē ahkreta japēr nē kamā omu nē axpēn mā wa harēnh o:

—Nā ām hāmri na wa ā Tirtũm kapēr o mē pajahkre anē. Tirtũm kapēr ā kagā htũm hkōt na hte wa mē pajahkre. Anē.

¹² Hāmri nē ohtō nē Jejus kōt amnhī xunhwȳ. Ijaew kwȳ nē Ijaew kēt xwȳnh kwȳ nē mēni kot amnhī to rūnh xwȳnhjaja nhũm mē ohtō nē Jejus kōt amnhī xunhwȳ.

¹³ Tā nhũm Tesarōn kām Ijaewjaja Pawre jarēnh ma. Kot Perej nhō xwȳnhjē mā Tirtũm kapēr jarēnh o pa hā harēnh ma. Hāmri nē ma mē hwȳr mra nē mē kām tanhmā ho hēx to nhũm krī nhō xwȳnhjaja mē kuma nē ra Pawre kamā gryk tȳx nē. ¹⁴ Jakamā nhũm Jejus kōt mē htōjaja mē harēnh ma nē mē umaj Pawre kator nē ma gō xujanār wȳr o mō. No nhũm Siras mē Ximotre wa Perej kamā mē kuri arīk. ¹⁵ Hāmri nhũm mē hkwȳjaja ma Pawre o mō. Ma krī pē Atenas wȳr o mō. Hāmri nē hwȳr o pōj nē kamā kure. Hāmri nē ra akupỹm Perej wȳr nojarēt nhũm Pawre mē kām:

—E kēr ka mē ma akupỹm mō nē Siras mē Ximotre wa kām ijarē kē war amnhīm nojarēt nē tokyx man ixkōt wa mō. Anē.

Pawre kot Atenas nhō xwȳnhjē mā kapēr ā harēnh

Rōmān 1.18-20

¹⁶ Tā nhũm Pawreja kormā Atenas kamā pa. Siras mē Ximotre wa kamā hamak o ri kormā kamā mē kot amnhī nhīpēx ā mē omunh o pa. Na pre Atenas nhō xwȳnhjaja sānti ho ohtō rax nē mē ō krī kamā unhwȳ nhũm Pawre ri omunh o ri kuhē ho pa. Na pre htem ahpȳnhā mēmo karō nhīpēxja o te Tirtũm nhīpēx pyrā nē kutā hkōn krā ho rōrōk nē hkrī nē kām mex o mex ā harēnh o pa. Hāmri nhũm Pawre tee ri ja hā mē omunh o ri mē hkōt pa nē hkaprī nē. ¹⁷ Hāmri nē ma amnhī kwȳjē nhō Tirtũm kapēr o mē ahkre xā hā ixkre

hwÿr pa nê kamã mē ahkre ho kuhê. Ijaewjê mē Ijaew kêt xwÿnh kot Tirtûm ã hpijaam xwÿnhjê mã nhûm Tirtûm kapêr jarênh o kuhê. Nê apkati mē mē kot mē-moj to wênê xà hwÿr mra nê mē ujaarôr xwÿnhjê mã Tirtûm kapêr jarênh o kuhê. ¹⁸ Hâmri nhûm mē mar o pa. Atenas nhô xwÿnhjaja na prem axpên kôt amnhî nhîpêx o pa hkêt nê. Mē hkwyjaja kêp Epikure hkôt amnhî nhîpêx xwÿnh. Nê mē hkwyjaja axtem kêp Etok kôt amnhî nhîpêx xwÿnh. Hâmri nhûm Pawre mē kãm Jesus kot tanhmã mē panê amnhî nhîpêx to hã harênh o pa nê akupÿm htîr ã harênh o pa. Hâmri nhûm mē tee ri kuma nê hã axpên kukjêr o kuhê nê axpên mã:

—Tk. Kwa mo na hte myti ata harênh o pa? Anê.

Nhûm mē hkwyjaja mē kãm:

—Ko. Axtem mēpahpãm ô na hte tanhmã harênh to. Anê.

¹⁹ Atenas nhô xwÿnhjê mē axtem krî hõ nhô xwÿnhjaja na prem kãm mē ujarênh nyw mar prãm nê. Jakamã nhûm prem mēmoj jarênh nyw ma hãmri nê ãm axpên mã harênh pix o ri pa. Tã ra Pawre xujarênh nyw ma nê ma amnhî kôt mē kot axpên mar xà hã ixkre hwÿr o tẽ. Ixkre pê Areopja wÿr nhûm prem amnhî kôt o tẽ nê kãm:

—E kwa aprî hã mē inhmã ate mēmo jarênh nywta jarê pa mē ama. Mē inhmã mar prãm. Anê.

²² Hâmri nhûm mē kuma nê mē kãm ujarênh o xa. Mē kot axpên mar xà hã ixkre kamã Atenas nhô xwÿnhjê mã awjarê nê mē kãm:

—E nã na ka htem anhô mēmo karô nhîpêx xohtôta ã apijaam pê kãm amnhî jagrer o ri apa. Pa hte ja hã mē apumunh o mē akôt ixpa. ²³ Na pa ra mē anhô sãnti piitã hkôt omunh o ri ixpa nê o mÿj hõ kuhê xà kapryja wÿr ixkato. Nhûm himök ã mēmo karô nhîpêx amrakati nom à hã kagà kot:

MĚPAHPÂM PUMUNH KÊT KUHÊ XÀ NA JA

Ã mē ate hã kagà kot anhÿr. Mē ate omunh kêt tã ka htem arî hã apijaam o ri apa. No pa na ixte mēhõja jarênh mar mex. Tã kot paj mē amã harê ka mē inhma.

²⁴ —Mēpahpãm mē ate omunh kêt ã amnhî jarênhta Tirtûm na. Tãm na pre pyka ho kato nê kamã mēmoj piitã ho kator pa. Gô ho kato nê mry ho kato nê panhî ho kato. ãm mēmoj piitã ho kator par kumrêx. Na hte pika kamã nê kaxkwa kamã mēmoj piitã ho amnhîptar mex rãhã ho pa. Jakamã mēmo kaxyw kot puj mē jar kãm ôrkwy nhîpêx? Tãm kêp mēmoj piitã ho kator xwÿnh jakamã kot mēmoj to presija hkêt. ²⁵ Kêp mēmoj piitã hpãm jakamã mēmoj piitã ô na. Jakamã tanhmã kot pu wem amnhî to nê kãm mēmoj gô? Tãm kot mēmoj piitã ho kator nê ho htîr nê kot mēmoj piitã ôr kênã kot puj kêt mē amnhî pyrã nê kãm mēmoj gô.

²⁶ Na pre mē pahkukamã ahpÿnhã mē pahpiitã mē papaxã jarê nê mē pakator hã arîgro jarê. Na pre mē pahpãm kot wa Atãwja nhîpêx. Jakamã nhûm Atãw kêp mē pahpiitã mē pahpâr krax.

²⁷ —Tã mēmo kaxyw na pre ã Tirtûm mē panhîpêx mex anê? Nã ãm mē pahte amnhî kaxyw hkôt paja-maxpêr nê hkôt amnhî xunhwÿr kaxyw na pre mē pan-

hîpêx. Ja mē pahpê hihtÿx kêt. Kojã mēhõ kãm Tirtûm prãm nhûm amnhî tã omunh kurê kumrêx.

²⁸ —Nê Tirtûm pix kukwak ri na pu htem pahtîr nê tanhmã amnhî nhîpêx to ho ri papa. Mē akwy kot kagà jahkre xwÿnhja na pre ja hã kagà nê hã kagà ho: “Mē pahpê mēpahpãm kra na pu htem papa.” Anê. ã hã kagà kot anhÿr.

²⁹ —Tã ka prem amnhîm mēmo karô nhîpêx. ôr o hkwy nhîpêx nê prat o hkwy nhîpêx nê kên o hkwy nhîpêx. Hâmri nê hipêx pa nê ho mēpahpãm ã harê nê ri hã apijaam o apa. No mē ãm amnhî krã hkôt mē ate hipêx. Tirtûm te kot ja pyrãk kêt.

³⁰ —Amnepê mē pa xwÿnhjaja na prem mē apyrã nê ã mēmoj nhîpêx anhÿr o pa nhûm Tirtûm ja hã mē omu nê ãm mē omu nê hã tanhmã mē hipêx to hkêt nê. Kormã mē kot kapêr mar kêt jakamã nhûm pre ja hã mē omu nê ãm mē omu. Tã na ra mē pahte mēmo karô nhîpêx o mēpahpãm nê mē pamã kapêr. Mē pahte hpãnhã amnhî kaxyw ãm kôt pix mã pajamaxpêr o papaja na kãm hprãm. ³¹ Kojã nhÿrmã tanhmã mē pahte amnhî nhîpêx to ho papa hã mē pahpumunh kôt tanhmã mē pajarênh to. Nê amnhî ri mē htîr tûm nê mē pa ho pa xwÿnhjê jarê nê amnhî ri mē pa hkêt xwÿnhjê jarê. Na pre ra ã mē harênh anhÿr kaxyw arîgro hta. Arîgrota ã kot hprî hã kãm tanhmã mē pajarênh to kaxyw na pre ra Jesusja xãm. Kaxyw na pre akupÿm ho htîr. Nê akupÿm ho htîr jao kot nhÿrmã kãm tanhmã mē pajarênh to xwÿnh ã ho amnhîrit. Anê.

³² Nhûm pre ã Pawre mē kãm Tirtûm kapêr jarênh anê nhûm mē mar o kuhê. Kot mē kãm Jesus tyk nê akupÿm htîr ã harê nhûm mē mar o kuhê. Nhûm mē hkwyjaja kuma nê ãm kuma nê axtem nê ri hã akunha. Nom nhûm mē hkwyjaja mē kurom mar tÿx nê Pawre mã kãm:

—E kwa mē inhmã ja mar prãm. Apkati hõ hã ka axte mē inhmã ja jarê pa mē ixprî hã mar mex nê. Anê.

³³ Hâmri nhûm Pawre akupÿm nhÿri hpôx xà hã ixkre hwÿr ma tẽ. ³⁴ Hâmri nhûm Xiônîs pê Areop kãm mē kãm kapêr xwÿnh nê mēhõ ni pê Tãmaris nê mē hkwyjaja kapêr mar tÿx nê amnhî kaxyw Jesus kôt hamaxpêr nê hkôt amnhî xunhwÿ. Hâmri nê Pawre kôt pa.

Pawre Korît wÿr mör ã harênh

Wam Korît 1.1-3

18 Tã nhûm Pawre krî pê Atenas rûm kato nê ma krî pê Korît wÿr mör nê pøj. ² Hâmri nê nhÿri Akirti pumu. Haxwÿja kêp Ijaew. Krî pê Pôt kamã na pre kato. Tã ma pyka pê Itar wÿr mör nê Itar kamã krî pê Rôm kamã hpãnhã pa. Pa ho pa htã nhûm mē ô pahhti Krawti tanhmã hamaxpêr to hãmri nê mē amnhî nê Ijaew piitã mē hanor pa. Jakamã nhûm Akirti kato nê hprô Prisire mē wa ma Korît wÿr mör. Hâmri nê hwÿr pøj nê kamã pa ho pa. Jakamã nhûm Pawre Korît wÿr pøj nê wa omu ³ nê wa kuri pøj nê wa hkôt ri pa. Nê Siras mē Ximotre wa kamã hamak pê wa îhkô hã àpênh o pa. Wa urak nê kupêxê pytî ho ixkre nhîpêx nê ho wênê ho ri wa hkôt pa. ⁴ Hâmri nhûm sap kato

nhũm ma Tirtũm kapër o mẽ ahkre xà hã ixkre hwÿr pa nẽ kamã mẽ kãm Tirtũm kapër jarënh o hkrĩ. Ijaew mẽ Ijaew kêt xwÿnhjê mã nhũm mẽ kãm ujarënh o hkrĩ. Nẽ mẽ kãm Jejus kot mẽ panê tanhmã amnhĩ nhĩpêx to hã harê.

⁵ Tã nhũm Siras mẽ Ximotre wa ma Masetõn rũm Pawre wÿr mõi pøj. Jakamã nhũm Pawre axte ixkre nhĩpêx ã àpênh kêt nẽ. Pãnhã apkati mẽ Ijaewjê jahkre ho pa. Mẽ kãm tanhmã Jejus jarënh to ho ri mẽ hkõt pa. Kêp Tirtũm kot mẽ pakaxyw ãm xwÿnh ã harënh o ri mẽ hkõt pa. Xatã mẽ kãm ujarënh o pa. ⁶ Nom nhũm mẽ kãm mar prãm kêt nẽ kamã gryk kato nẽ kãm kapër punuj nẽ. Nhũm Pawre tee ri amnhĩ tã mẽ kuma nẽ mẽ kãm:

—E ixte mẽ amã Jejus kot mẽ panê tanhmã amnhĩ nhĩpêx to hã harënh tã ka mẽ amã mar prãm kêt nẽ. Nà mẽ kam nẽ mẽ mãmri ate amnhĩ tomnuj kãm ty nẽ arĩ kam amnhĩ pumu no ãm amnhĩ tã tanhmã inhmã nẽ hkêt nẽ. Ra mẽ ate Tirtũm kapër kaga kênã. Nà kot paj mẽ akaga nẽ ma hpãnhã Ijaew kêt xwÿnhjê hkõt ri mẽ kãm ja jarënh o ri ixpa. Anẽ.

Hãmri nẽ kãnhmã xa nẽ hinõkã kapa nẽ ho apê. Mẽ kot hkaga hã amnhĩ pumunh kaxyw nhũm mẽ noo mã ã amnhĩ nhĩpêx anẽ. ⁷ Hãmri nẽ ixkre rũm kato nẽ hijuk ri Ijaew kêt xwÿnh pẽ Xijutre nhõrkwy hwÿr tẽ nẽ hpãnhã Xijutre hkõt pa ho pa. Xijutre kêp Ijaew kêt tã amnhĩ kaxyw Tirtũm mã hamaxpër rãhã ho pa.

⁸ Tã nhũm Ijaew õ pẽ Kriptija hkwyjê rom amnhĩ kaxyw Pahihti Jejus kõt hamaxpër nẽ hkõt amnhĩ xãm. Kêp Ijaew nhõ Tirtũm kapër o mẽ ahkre xà hã ixkre kamã mẽ ahkre xwÿnh na pre. Jakamã õrkwy kamã hkwyjê mẽ mẽ hpimràatã Pahihti Jejus kõt amnhĩ xunhwÿr pa. Nẽ krĩja kamã ra Ijaew kêt xwÿnh ohtõ nẽ Kripti pyrã nẽ amnhĩ kaxyw Jejus kõt hamaxpër nẽ hkõt amnhĩ xunhwÿ. Jakamã nhũm Pawre mẽ kêp Jejus kwÿ hã mẽ piitã mẽ hkrã kumrã.

⁹ Tã nhũm kamãt nhũm Pawre gõr nẽ nõ nẽ amÿti nhũm kêwe Pahihti Jejus axte hwÿr kato nẽ kãm kapër nẽ kãm:

—Pa Pawre? E kwa kêp ka mãmri axãmnhix ri atar mẽ kãm ijarënh rãhã ho ri apa nẽ amnhĩ kamã akahak o ri mẽ hkõt apa hkêt nẽ. ¹⁰ Kot paj atãnopxa nhũm mẽhõ tanhmã ato hkêt nẽ. Krĩ ja kamã koja mẽ ohtõ nẽ ixkõt amnhĩ xunhwÿ. Anẽ.

¹¹ Nhũm pre ã Pahihti Jejus Pawre hpimtir kãm kãm kapër anẽ. Jakamã nhũm Korĩt kãm arĩ ri mẽ hkõt pa ryy nẽ. Arĩ mẽ hkõt pa hã amgrã pyxi nẽ hkõt mytwÿr kêp 6. Jao Tirtũm kapër o mẽ ahkre ho ri mẽ hkõt pa.

¹² Tã nhũm Korĩt nhõ xwÿnhjê nhõ pika pẽ Gres kamã mẽ ho amnhĩptãr xwÿnh nyw Gartija. Korĩt kãm pa jakamã nhũm Ijaew xãptãr tũmrejaja Pawre pynê nẽ ma hwÿr o tẽ nẽ kãm tanhmã ho hẽx to. ¹³ Jakamã nhũm Ijaew pikuprõnh xà hã ixkre kamã mẽ kãm kapër xwÿnh Sostenesja Garti mã Pawre o hẽx nẽ kãm:

—Kwa jahti na hte mẽ ixpê Ijaew kot amnhĩ nhĩpêx kwÿm ri mẽ ahkre ho pa. Jao mẽ ixte axtem nẽ tanhmã Tirtũm kõt ri amnhĩ nhĩpêx to ho ri ixpa kaxyw mẽ

inhmã karõ ho pa. Nom mẽ ixte amnhĩ nhĩpêx kuhpa hã mẽ inhmã karõ. Anẽ.

¹⁴ Hãmri nhũm ra Pawre kot Garti mã amnhĩ jarënh mã tã nhũm Garti amnhĩ to wa nẽ hã mẽ kãm kapër nẽ mẽ kãm:

—Tk. Kwa kot tanhmã amnhĩ tomnuj tore hã. Kot tanhmã amnhĩ tomnuj to nhũm mẽ ate inhmã harënh ronhÿx pa arĩ mẽ ama nẽ tanhmã mẽ amã hipêx to.

¹⁵ No xep ãm kot mẽ axãptãr tũmrejaja kot amnhĩ nhĩpêx kuhpa hã pix mã kot amnhĩ nhĩpêx o pa kênã. Nẽ mẽ ate mẽ ahkre kuhpa hã kot ri mẽ ahkreja pix myrapê na ka mẽ kamã agryk nẽ ã inhmã ho akapër anẽ. Nà kot paj ja hã tanhmã ho hkêt nẽ. Ka mẽ kam nẽ amnhĩ krã hkõt tanhmã ho hprãm xà hkõt tanhmã ho. Anẽ.

¹⁶ Hãmri nẽ amnhĩ nẽ mẽ hano. ¹⁷ Hãmri nhũm mẽ tee ri kuma nẽ ra Sostenes kamã gryk nẽ. Kot Garti mã tanhmã Pawre jarënh to htã nhũm kuma nẽ ãm mar jakamã nhũm mẽ hã Sostenes kamã gryk. Hãmri nẽ unê nẽ Garti noo mã htak o xa. Nẽ htak rax nẽ. Nom nhũm hã mẽ omu nẽ ãm mẽ omu nẽ nẽ tanhmã mẽ kãm nẽ hkêt nẽ.

Pawre kot akupÿm ãxiok wÿr mõi ã harënh

¹⁸ Tã nhũm Pawre arĩ Korĩt kamã mẽ hkõt pa nẽ gaa nẽ nojarêt nẽ Jejus kõt htõjê mã amnhĩ jarẽ nẽ mẽ kãm:

—E kot paj ma akupÿm pika pẽ Sir wÿr mõi. Anẽ.

Hãmri nẽ mẽ kêp kato nẽ ma hwÿr mõi. Nẽ ma amnhĩ kõt Akirti mẽ hprõ Prisire wa o mõi. Mõõ nẽ krĩ pẽ Sënkrej wÿr pøj. Nhũm Pawre amnhĩ kukamã mẽmoj tã tanhmã Tirtũm mã amnhĩ jarënh to nẽ amnhĩ jarënh xà hkõt amnhĩ krã hkênã pa. Ijaew kot amnhĩ nhĩpêx xà hkõt ã amnhĩ nhĩpêx anẽ. Hãmri nẽ mẽ pãr wÿr agjê nẽ Sënkrej rũm kato nẽ ma Sir wÿr mõi.

¹⁹ Mõõ nẽ krĩ pẽ Epes wÿr pøj. Hãmri nhũm Pawre mẽ hkwyjaja pãr rũm hapøj nẽ krĩ hwÿr agjê nẽ Ijaew nhõ Tirtũm kapër o mẽ ahkre xà hã ixkre hwÿr mra nẽ hwÿr agjê nhũm Pawre mẽ kãm Tirtũm kapër jarënh o nhÿ. Hãmri nhũm mẽ kuma nẽ kãm mar prãm nẽ. Nẽ kãm:

—Kwa anojarêt kêt nẽ. Kritpêm mẽ ixkõt ri apa ryre nẽ Tirtũm kapër o mẽ ijahkre. Mẽ inhmã ja mar prãm.

Anhÿr tã no nhũm mẽ kãm:

—Nà kot paj ma mõi. Nom koja Tirtũm nhÿrmã akupÿn mẽ awÿr inhmẽ pa man akupÿn mẽ awÿr mõi nẽ axte kapër o mẽ ajahkre. Anẽ.

Hãmri nẽ ma mõi. Ma Epes rũm pãr kãm mõi. Nom nhũm Akirti mẽ Prisireja wa Epes kamã arĩk nẽ hpãnhã kamã pa ho pa.

²² Tã nhũm Pawre krĩ pẽ Sejarej wÿr pøj. Hãmri nẽ hpãnhã kurũm ma akupÿm Jerujarê hwÿr mõi. Kot Jejus kõt htõjê pumunh mã ma mẽ hwÿr mõi. Hãmri nẽ mẽ hwÿr pøj nẽ mẽ omu nẽ tanhmã mẽ kãm amnhĩ jarënh to nẽ mẽ kêp kato nẽ ma akupÿm ãxiok wÿr mõi.

²³ Hãmri nẽ hwÿr pøj nẽ kamã mẽ hkõt ri pa ryy nẽ mẽ kurũm kato nẽ hpãnhã ma akupÿm pyka pẽ Prik mẽ Karatas wa hwÿr mõi. Nẽ kamã mẽ kot Jejus kõt amnhĩ

xunhwÿr xwÿnhjê jahkre ho pa. Më kot Jejus kôt amnhÿ nhÿpêx tÿx rãhã ho pa kaxyw më hkôt më ahkre mex o ri më hkôt pa.

Apor kot Epes kãm Tÿrtÿm kapêr jarênh

Epes 1.1-2; Wam Korÿt 3.6-9

²⁴ Tã nhÿm Epes wÿr Ijaew õ pê Aporja mõ nê hwÿr pøj. Krÿ pê Aresãn kamã na pre kato. Na pre hte amnhÿ kaxyw Tÿrtÿm kôt pix mã hamaxpêr nê kapêr ã kagã htÿm mar tÿx nê. Jakamã më kãm harênh mex o pa nhÿm më piitã kãm mar prãm nê. ²⁵ Nom kormã Jejus jarênh jatur xã mar kêt jakamã ãm më kãm hkrax pix jarênh o pa. Juãw Paxis kot tanhmã më ahkre htoja nhÿm mar tÿx nê. Nê tanhmã kot më hkrã kumrãr to ho paja nhÿm mããnhen mar tÿx nê. Jakamã na pre hte më kãm ja pix jarênh o pa. No Jejus kêt Tÿrtÿm kot më pahwÿr mënh xwÿnh ã harênhja nhÿm kormã mar kêt nê. Tã Epes wÿr mõ nê pøj. ²⁶ Hãmri nê Ijaew nhõ Tÿrtÿm kapêr o më ahkre xã mã ixkre hwÿr axã nê kamã më kãm ujarênh o nhÿ. Amnhÿ kamã kahak kêt nê àmnhÿx ri më kãm ujarênh mex nê. Hãmri nhÿm Prisire më Akirti wa kot më kãm ujarênh ã kuma nê war axpên mã:

—Kwa mãn kormã Jejus jarênh piitã mar kêt. E pu amnhÿ kôt panhõrkwÿ hwÿr o tẽ nê pahprÿ mã kãm harênh jatur xãm kumê kê hprÿ mã mar pa. Anê.

Hãmri nê war amnhÿ kôt kuwÿ nê hprÿ mã kãm ujarênh jatur xãm kumê nhÿm hprÿ mã harênh piitã mar tÿx nê.

²⁷ Tã ra pyka pê Gres wÿr nojarêr nê Jejus kôt htõjê mã amnhÿ jarê nhÿm më kuma nhÿm ja më kãm mex nê. Hãmri nê Gres kamã Jejus kôt më htõjê mã kagã nhÿpêx. Apor kot më hwÿr amnhÿ kôt o mör nê më kãm ör nhÿm më kot omunh nê kamã harênh nê ho mex kaxyw më kãm hipêx. Hãmri nê hipêx pa nê kãm kugõ nhÿm kupy nê më kurÿm kato nê ma më hwÿr mõ. Hãmri nê më hwÿr pøj. Gres nhõ xwÿnh kwÿjaja na prem ra Jejus kôt amnhÿ xunhwÿ. Tÿrtÿm kot më kutã nojarêr jakamã nhÿm më ra hkôt amnhÿ xunhwÿ. Jakamã nhÿm Apor më hwÿr pøj hãmri nê më ïhkõ mã tanhmã më ho ajuta hto ho pa. ²⁸ Nê xatã Ijaew mã tanhmã Jejus jarênh to kamã hihtÿx o më hkôt pa nê më kãm:

—Nã Jejusja tãm na pre Tÿrtÿm më pakaxyw ãm. Tÿrtÿm kapêr ã kagã htÿm kamã ã harênh kot anhÿr. Anê.

Pawre akupÿm Epes wÿr mör ã harênh

Rukre 3.15-16

19 Tã nhÿm Apor kormã Korÿt kãm pa ri nhÿm Pawre ma akupÿm Epes wÿr mõ. Ma krãhakÿx kôt akupÿm hwÿr mõ. Hãmri nê hwÿr pøj nê më kot Jejus kôt amnhÿ nhÿpêx o më pa xwÿnhjê pumu. Nhÿm më kormã Jejus jarênh jatur xã mar kêt nê. ² Jakamã nhÿm Pawre më hwÿr mõ nê më omu nê Tÿrtÿm Karõ mã më hkukja nê më kãm:

—Kwa më ate Jejus kôt amnhÿ xunhwÿr xã mã arÿgro-tã xã na pre Tÿrtÿm Karõ më akarõ mã agjê? Anê.

Hãmri nhÿm më kuma nê kãm:

—Nã më ixte Tÿrtÿm Karõ jarênh mar kêt. Anê.

³ Hãmri nhÿm më kãm:

—No mëmoj kôt na prem më akrã kumrã? Anê.

Nhÿm më kãm:

—Nã Juãw Paxis kot më hkrã kumrãr o paja kôt na prem më ixkrã kumrã. Anê.

⁴ Hãmri nhÿm Pawre më kãm:

—Nã Juãw Paxis na pre Ijaew mã kapêr o: “Kot kaj më më ate amnhÿ tomnuj kaga nê hpãnhã tãm amnhÿ nhÿpêx pa mã më akrã kumrã.” Anhÿr o më kãm kapêr o pa. Nê më kãm Jejus jarênh o: “Koja tokyx mëhõ ixkôt hapu mã më pahwÿr kato nê tanhmã amnhÿ nhÿpêx to ho pa. Ka më omu nê amnhÿ kaxyw hkôt ajamaxpêr nê hkôt amnhÿ xunhwÿ.” Anê. Tã Jejusja na pre ã më kãm harênh anhÿr o pa. Anê.

⁵ Nhÿm pre ã Pawre më kãm Juãw Paxis më Jejus wa harênh anê nê hpãnhã Jejus nhÿ mã më hkrã kumrã.

⁶ Hãmri nê hpãnhã mã mã ïhkra jaxwÿ nhÿm Tÿrtÿm Karõ më hwÿr wÿr nê më hkarõ mã gjêx pa. Hãmri nhÿm më ÿ mã ahpÿnhã axtem më kapêr kwÿ ho kapêr nê ÿ mã Tÿrtÿm mex o mex ã harênh o kuhê. ⁷ ã më kot amnhÿ nhÿpêx anhÿr xwÿnhjaja kêt 12.

⁸ Tã nhÿm Pawre Epes kãm Ijaew nhõ Tÿrtÿm kapêr o më ahkre xã mã ixkre hwÿr mrar ã mytwÿr axkrunêpxi. Amnhÿ kamã kahak kêt nê hprÿ mã Ijaew mã hprÿ mã Jejus jarê nê më kãm:

—E pa më amã Jejus jarê ka më inhma. Nã Tÿrtÿm kot më pahwÿr mënh xwÿnhhta na. Nê më pahte kamã pajamak o papa xwÿnhhta na. Jakamã kot ka më amnhÿ kaxyw hkôt ajamaxpêr nê hkôt amnhÿ xunhwÿ nhÿm Tÿrtÿm ja mã më apumu nê më ato hkra. Anê.

Hãmri nhÿm më hkwyjaja kuma nê hkôt hamaxpêr kurê kumrêx. ⁹ Nom nhÿm më hkwyjaja kuma nê ãm kuma nê Jejus o kapêr punuj nê. Më piitã më noo mã kuhê nê ho kapêr punuj tÿx nê. Nhÿm Pawre tee ri ja mã omu hãmri nê më kurÿm kato. Më pikuprõnh xã mã ixkreta rÿm kato nê hpãnhã nhãm më kot kãm “Xirãn kot më ahkre xã mã ixkre” anhÿr xwÿnhja wÿr hpãnhã mõ. Nê amnhÿ kôt më kot Jejus kôt amnhÿ xunhwÿr xwÿnhjê ho pa nê hpãnhã ixkreta kamã më ahkre ho pa. Apkati më hwÿr mra nê më ahkre. ¹⁰ Jao mã amgrã axkrut. Jakamã nhÿm pyka pê As kamã më piitã Pahihti Jejus jarênh ma. Ijaew nê Ijaew kêt xwÿnhjaja nhÿm më piitã harênh ma.

Wajaga hkwyj jarênh

¹¹ Tã nhÿm Pawre Tÿrtÿm nhÿ mã më kãm aa më kot mëmoj pumunh kêt kwÿ ho anhÿr o ri më hkôt pa.

¹² Jakamã nhÿm pre htem hwÿr mra nê kêt ê hkwy jamÿ nê ma mã ã xwÿnhjê hwÿr o mra nê mã mã haxwÿ nhÿm më akupÿm mex. Nê mëkarõmnuti kot tanhmã më ho ho pa xwÿnhjê mã nhÿm prem mããnhen mã mã ê kwÿ jaxwÿ nhÿm mëkarõmnutija mã kurÿm hapõj nê ma mrar kurê kumrêx nhÿm më akupÿm tãm hkrã.

¹³ Tã nhÿm mëõ patre maati Sewahtija hkra my kêt 7 nê piitã kêt wajaga. Hãmri nê më kãm Pawre pyrã nê

mě nê mēkarōmnuti japōx o pa hprām nê. Jakamā kor-mā Jejus kōt amnhī xunhwŷr kêt tā mẽ kot ý hã Pawre pyrã nê mēhō nê hkwy janor kaxyw nê kãm:

—E Pawre kot Jejus jarēnh o ri pa xwŷnhhta nhŷ hã kot paj amã ixkapēr. Jakamã e kwa tokyx myta rŷm akato nê ma tē. Anē.

¹⁵ Hãmri nhŷm mēkarōmnutija mẽ kuma nê ãm mẽ kuma nê mẽ kãm:

—Tk. Mě apē Jejus mẽ Pawre wa hkwy hkêt tā mẽ nê ã mẽ inhmã akapēr anhŷr o apa. Nã Jejus mẽ hkwy pix-jaja na htem Tirtŷm nhŷ hã mẽ kēp mẽ ijapōx o pa. Mě apē mẽ hkwy hkêt kēnã. Nã pa ixkatoore kaxyw ã. Anē.

¹⁶ Hãmri nhŷm mēkarōmnuti kot tanhmã ho xwŷnhhta mēkarōmnuti nhŷ hã wajagajē pynē nê mẽ htak rax o kēp mẽ ê kaxōnh pa nhŷm mẽ tee ri amnhī nhīpēx. Hãmri nê hkēnh nê ōrkwŷ rŷm hapōj nê ma umaj hprōt nê mra. ¹⁷ Hãmri nhŷm Epes kamã mẽ piitã ã kot mẽ hipēx anhŷr ã mẽ harēnh ma nê tee ri hamaxpēr nê kãm ma nê. Ijaew nê Ijaew kêt xwŷnhhaja nhŷm mẽ piitã tee ri kãm hamaxpēr o pa. Nê Pahihti Jejus mã mex o mex ã harē. ¹⁸ Jakamã nhŷm mẽ kot Jejus kōt amnhī xunhwŷr nyw xwŷnhhaja piitã tanhmã amnhī jarēnh to. Nê mẽ hkwyjaja amnhī jarēnh o:

—Nã kormã ixte Jejus kōt amnhī xãm kêt ri na pa pre ã amnhī tomnuj anhŷr o ri ixpa. Tã Jejus kōt amnhī xãm hãmri nê axte ã amnhī nhīpēx anhŷr kêt nê. Anē.

Nhŷm mẽ hkwyjaja kēp wajaga htã mẽ urãk nê Jejus kōt amnhī xunhwŷ hãmri nê amnhī jarēnh o:

—Nã ijaxwŷja kormã Jejus kōt amnhī xãm kêt ri na pa pre hte nê mẽ no kupyr nê mẽ y pix o ri mẽ hkôt ixpa. Tã Jejus kōt amnhī xãm hãmri nê axte ã amnhī nhīpēx anhŷr kêt nê. Pãnhã axtem amnhī nhīpēx nyw o amnhī nhīpēx o ri ixpa. Anē.

¹⁹ Hãmri mẽ ō wajaga xàhpumunh xã hã kagã jamŷ nê ma o mra nê kaxyw kuto nê kamã rēnh pa nê mẽ piitã mẽ noo mã ho xēt pa. Wajaga xàhpumunh xã hã kagãja ã kàxpore xohtō rax kumrēx tã nhŷm mẽ Jejus gryk ã hamŷ nê o mra nê ho hxēt pa nhŷm hapēx.

²⁰ Hãmri nhŷm krī nhō xwŷnhhaja ã mẽ kot amnhī nhīpēx anhŷr ã mẽ omu nê ohtō rax nê mẽ urãk nê Jejus kōt amnhī xunhwŷ.

Pawre kot Rōm wŷr hkrã hã harēnh

Rōmãn 1.13-15, 15.22-29

²¹ Tã nhŷm Pawre ra akupŷm Jerujarē hwŷr nojarēt nê hamaxpēr o:

—E kot paj ixkato nê hpãnhã ma Masetōn mẽ Gres wa hkôt ma akupŷm Jerujarē hwŷr mō. Ma mẽ kot Jejus kōt amnhī xunhwŷr xwŷnhjē pumunh o mẽ hkôt mō. Hãmri nê Jerujarē hwŷr pōj nê kamã tanhmã amnhī to hpa hãmri nê hpãnhã ma Rōm wŷr mō. Anē.

²² Hãmri nê hkôt ho ajuta ho wa pa xwŷnh Ximotre mẽ Eras wa kãm amnhī jarē nê wa kãm:

—E kēr ka wa ma ixkukamã Masetōn wŷr wa mō. Kot paj kormã jar As kamã ixpa grire hãmri nê ma war akôt mō pu mẽ hamŷ ma Jerujarē hwŷr mō. Anē.

Hãmri nhŷm wa kuma nê kato nê ma hkukamã Masetōn wŷr mō.

Mě kot sãnti hã Pawre mã àkjêr ã mẽ harēnh

Sikŷn Korīt 1.8-9

²³ Rōm nhŷm Epes nhō xwŷnhhaja tee ri Pawre kot tanhmã Pahihti Jejus jarēnh to hã kuma nhŷm ja mẽ kēp omnuj nê. Nhŷm mẽ Jejus ã kamã gryk tŷx nê.

²⁴ Na prem amnhī kaxyw Tirtŷm kōt hamaxpēr kêt nê. Na prem axtem sãnti ho mẽ hpãm nê amnhī to hwŷr pē hã hpijaãm nê kãm mex o mex ã harēnh o pa. Mě ō sãntija ni Xiãnre na pre. Nhŷm mẽ kãm ixkre nhīpēx nê kamã hkarō nhīpēx xãm. Hãmri nê hwŷr akuprō nê hã hkīnh nê hkarō hã hpijaãm nê kãm mex o mex ã harē. Nhŷm pre hte Temētja Xiãnre nhōrkwŷ karō hkryre hkwy nhīpēx nê mẽ kãm ho wēnē ho pa. Prat o hipēx nê ho wēnē ho pa. Jao ra hã mẽ àpēnh xwŷnhjē mẽ nhŷm mẽ kot haprōr xwŷnhjē kukwak ri kàxpore jamŷnh rŷnh o pa.

²⁵ —Jakamã nhŷm Pawre mẽ hwŷr mō nê pōj nê mẽ kãm Mēpahpãm Tirtŷm jarēnh o ri mẽ hkôt pa nhŷm Temēt tee ri kuma nhŷm ja kēp omnuj nê. Hãmri nhŷm hamaxpēr nê mẽ kot urãk nê Xiãnre nhōrkwŷ karō hkryre nhīpēx nê ho wēnē ho pa xwŷnhjē ho akuprō nê mẽ kãm:

—E kwa mẽ inhma. Na pu htem mēpanã Xiãnre nhōrkwŷ karō hkryre pãnhã kàxpore jamŷnh rŷnh o papa. ²⁶ Tã mãn ka mẽ ra ham hpōx xwŷnh Pawreja pumu nê kapēr ma. Na hte jar mẽ panhō krī kamã nê As piitã hkôt mẽ kãm mēpanã Xiãnre karō nê mẽ kãm kapēr o pa. Xep mẽ pahte mẽ hkarō nhīpēxja kēp mēpanã kumrēx kêt ã mẽ kãm harēnh o pa nhŷm xep mẽ ohtō nê kuma nê ra hkôt hamaxpēr.

²⁷ —Kwa ja mex kêt. Koa mẽ kapēr ma nê hkôt amnhī nhīpēx hãmri nê axte mẽ pahte ixkre karō hkryre nhīpēx xwŷnhhta japrōr kêt nê. Hãmri nê mẽ paxápēnh o kapēr punuj nê. No ãm ja pix omnuj kêt. Koa mēpanã Xiãnre mã amnhī jarēnh xã hã ixkreja kaga hpa. Nê haxwŷja karōja kaga. Mě piitã kãm hapē kēnã. As kamã nê pyka piitã hkôt mẽ piitã kãm hapē nê hwŷr mra nê amnhī to hwŷr o pa. Kēp mēpanã mex kumrēx tã koja mẽ Pawre kapēr gryk ã hkaga hpa nê axte kãm hamaxpēr kêt nê. Hãmri pu mẽ axte mẽ kukwak ri pakàxpore rax nê papa hkêt nê. Kwa tanhmã kot puj mẽ amnhī nhīpēx to? Anē.

²⁸ Hãmri nhŷm mẽ tee ri ã kapēr anhŷr ã kuma nê Pawre kamã gryk tŷx kumrēx. Nê gryk xàj kàx pēē kapēr nê xatã kapēr tŷx kãm kapēr punuj nê. Nê kapēr o:

—Xiãnre na mex kumrēx. Kēp mẽ pahpē Epes nhō xwŷnhjē nã maati na.

Anhŷr o kàxpēē kapēr o kuhē. ²⁹ Hãmri nhŷm krī nhō xwŷnh piitã mẽ kuma nê mẽ hwŷr hprōt nê haxwŷja gryk nê kàxpēē mẽ hkôt ã harēnh anhŷr o kuhē. Hãmri nê gryk xàj Pawre hkôt ri wa pa xwŷnhja wa unē nê ma mẽ kot axpēn mar xã hã ixkre hwŷr wa hkjēnh o tē. Masetōn nhō xwŷnh wa kēp Gajore mẽ Aristakja nhŷm mẽ wa unē. ³⁰ Hãmri nhŷm Pawre mẽ kot wa unēnh ã mẽ omu nê tee ri wa hkukamã hamaxpēr nê mẽ hkôt hprōt nê mẽ kãm tanhmã kapēr to kaxyw nom nhŷm

mê kot Jejus kôt amnhî xunhwÿr xwÿnhjaja ja nê kãm kapêr kãm hihtÿx nê. ³¹ Hãmri nhũm As kamã mê kot mê ho amnhîptâr xwÿnh kwÿjaja ã mê kot amnhî nhîpêx anhÿr ã mê omu nê Pawre hwÿr hpêr mê. Mê kãm hkînh jakamã kot mê hkôt htêm nhũm mê kot hpîr pymaj hwÿr hpêr mê nê mê hkôt htêm nê hkurê kamã hihtÿx nê.

³² Rôm nhũm mê piitã mê kot axpên mar xà hã ixkre hwÿr pikuprôn pa nê kàx pê kapêr punuj o kuhê. Nom axpên kôt kapêr kêt nê. Âm axpên kwÿm ri kàx pê tanhmã kapêr punuj to ho. Nhũm mê hkwÿjaja hprî hã mê mar kêt tâ amarî amnhî krã hkôt kàx pê kapêr punuj nê. ³³ Nhũm Ijaew kwÿjaja tee ri ja hã mê omu nê axpên mã:

—Tk. Kwa okora. Koja mê nã Xiânre hã gryk hãmri nê tanhmã mê pahpê Ijaew to nà? Anê.

Hãmri nê hamaxpêr nê mê hwÿr amnhîo pê Aresãnja mê nê kãm:

—Kwa ma mê hwÿr tẽ nê mê kãm tanhmã mê pahtã axàprâr to. Pawre kêp mê pahkwÿ htã tãm na mê kãm mê gryk jaxà. No mê papajaja na pu mê kãm mê gryk jaxàr kêt nê. Anê.

Hãmri nhũm mê kuma nê mê hwÿr tẽ nê xa nê tee ri kot mê ho hpinhkrênh kaxyw kànhmã mê kãm ïhkra pêr kaprÿ. ³⁴ Nhũm mê omu nom hpinhkrênh kêt nê arî kàx pêê kapêr punuj ã 2 or. Nê kàx pê kapêr o:

—Mêpanã Xiânreja mex o mex. Kêp mê pahpê Epes nhõ xwÿnhjê nã mex na. Anê.

³⁵ Tã nhũm mê õ pahi nhõ kôwenatô jatã tanhmã Epes nhõ xwÿnhjê ho hpinhkrênh to hãmri nê ja nê mê kãm kapêr nê mê kãm:

—Kwa mê anhîkrê. Mê piitã kot Xiânre mex o mex ã omunh kênã. Nê mê pahpê kãm amnhî jarênh xà hã ixkre jamãr xwÿnh ã mê kot mê pahpumunh mex. Nê kaxkwa rûm karô kot mê pahwÿr têm nhũm mê pahpê hamãr o papa xwÿnh ã nhũm mê kot mê pahpumunh mex. ³⁶ Jakamã mêhõ kot kêt we mê pahpê hamãr xwÿnh kêt ã mê pajarê? Ra mê piitã mê kot ja hã mê pahpumunh jakamã kwa mê anhîkrê nê ri ã akapêr anhÿr kêt nê. ³⁷ No mê ate wa unênh nê amnhî kôt wa ho atêm xwÿnhhta wa. Wa kot tanhmã mêpanã Xiânre ho kapêr punuj to rÿ kêp õ ixkre kamã àhkînh kêt tâ ka mê amarî wa unê nê amnê amnhî kôt wa o tẽ.

³⁸ —Kwa kê Temêt mê hkwÿjaja kãm tanhmã wa ho kapêr to hprãm nê ma pahihti hwÿr wa o tẽ nê kumã mãn tanhmã wa ho kapêr to. Mêmoj tã axpên mã mê kapêr xà hã arîgrota ãã. ³⁹ Rÿ ka mê amã mêmoj jarênh prãm nê arîgroja ã mãn rî kormã mêmoj jarê.

⁴⁰ No jarãhã mê ate amnhî nhîpêxja te mê ate pahihti kutã amnhî xunhwÿr nê ho akapêr punuj pyrãk. Koja Rôm nhõ xwÿnhjê nhõ pahi mê ajarênh ma hãmri nê mê ate kamã agryk ã amnhî kamnhîx. Hãmri nê mê atã ixkukja pa tanhmã kãm mê ajarênh to? Mêhõ nhÿ hã na ka mê ã apikuprôn nê amnhî nhîpêx anê? Nà amnhî krã hkôt na ka mê akuprô nê ã amnhî nhîpêx anê. Anê.

⁴¹ Hãmri nê mê kãm kapêr pa nê mê hano nhũm mê anhrã nê ma akupÿm ôrkwÿ hwÿr hapêx.

Pawre ma Masetôn mê Gres wa hwÿr mör ã harênh

20 Hãmri nhũm Pawre ra nojarêt. Jerujarê hwÿr mör mã nom kormã pika pê Masetôn kumrêx wÿr mör nê kurûm ma akupÿm Jerujarê hwÿr mör mã. Hãmri nê nojarêt nê mê kot Jejus kôt amnhî xunhwÿr xwÿnhjê ho akuprô nê mê kãm amnhî jarê nê mê kãm: —E kot paj ma mō. Nom kêr ka mê arî ixwakre kamã Tirtûm kapêr kôt amnhî nhîpêx mex rãhã ho ri apa nê aa hkaga hkêt nê. Anê.

Hãmri nê mê kãm:

—E mê mãmri ixwa kre kamã axàmnhîx ajamakêtkati nê ri apa. Anê.

Hãmri nê kato nê ma Masetôn wÿr mō. ² Nê hwÿr pøj nê kamã krî hkwÿ hkôt mō nê nhÿri mê kot Jejus kôt amnhî xunhwÿr xwÿnhjê pumu nê Tirtûm kapêr o mê ahkre. Mê kot hkôt amnhî nhîpêx mex nê kãm hprãm xà hkôt pix mã amnhî nhîpêx kaxyw mê kãm kapêr o ri mê hkôt pa. Hãmri nê kato nê ma mō nê pyka pê Gres wÿr pøj. ³ Nê kamã mê hkôt pa hã mytwrÿ axkrunêpxi hãmri nê akupÿm pyka pê Sir wÿr nojarêt. Nê ma pâr kãm hwÿr mör kaxyw nê amnhî tã Sir kamã Ijaew kwÿ kot tanhmã harênh to hã amnhî jarênh ma. Na prem ra hã axpên mã amÿnê nê axpên mã:

—E koja amnê mê pahwÿr mō pu mê nhÿri omu nê hpîr kurê kumrêx. Anê.

Hãmri nhũm Pawre amnhî tã mê kapêr ma nê pâr kaga nê mê hwÿr mör kêt nê. Hãmri nê awjanã nê Jerujarê hwÿr Masetôn kamã pa. ⁴ Nhũm Jejus kôt htõ hkwÿjaja ma hkôt mō. ã mê hixi kot anhÿr.

Perej nhõ xwÿnh Sopatôja. Piro hkra na pre.

Nê Tesarôn nhõ xwÿnh Aristak mê Sikûn wa.

Nê Tepe nhõ xwÿnh Gajoreja.

Nê As nhõ xwÿnh Xikitre mê Torow wa.

Nê Ximotreja.

Jajaja na prem ma Pawre hkôt Jerujarê hwÿr mō. ⁵ Nê pa ixpê Rukre ixte mê amã ja jarênh nê hã kagã xwÿnhja na pa axte Pawre hã ajêt nê hkôt mō. Jakamã nhũm jajaja piitã ma wa ixkukamã Tôx wÿr mō nê kamã wa ixkãm hamak o pa.

⁶ Tã pa wa ma krî pê Piripos rûm ixkato nê pâr kãm ma mê hkôt mō. Arîgro pê Pas jakàn hê ma mê hkôt mō.

Tã wa ixtã arîgro pê 5 nê mê hkôt Tôx wÿr pøj nê kamã mê omu nê mê hkôt ixpa hã ixtã ù semãn.

Pawre kot akupÿm Exik o htîr ã harênh

Juãw 5.21; Atre 9.36-43

⁷ Tã nhũm sap nê kamãt pa mê kot Jejus kôt amnhî xunhwÿr xwÿnhjê hkôt akuprô nê axpên kutã apku nhũm Pawre mê kãm kapêr. Ra apkati hkôt mê inhnojarêt kaxyw jakamã nhũm mê kãm Tirtûm kapêr jarênh rÿy nê. Ra kôt ã kamãt nhũm arî mê kãm harênh o nhÿ. ⁸ Ixkre hprêk axpên nhîpy axkrunêpxi nhîtep xà kamã na pa prem akuprô nê mar o ixkrî. Ixkreja kamã kanê ohtô nê hpôk o harir. Jakamã nhũm Pawre arî mê kãm ujarênh o nhÿ nhũm mêhõ xàptâr nyw Exikja ra ôtxwa htÿx nê mê ixkuri ôt o nhÿ. Janere

hã ôt o nhÿ. Tã ra gôr nê janere pê kato nê ahparmã tẽ nê pykap tẽm. Pa mẽ tee ri omu nê ahparmã hwÿr ix-prôt nê wrÿ nê omu nhÿm htyk mex nê nõ. Kÿj rÿm ah-par mã htẽm ryy jakamã htyk mex nê nõ. Hãmri nhÿm hkwÿjaja tee ri omu nê hkaprÿ htÿx nê kumÿ nê mÿr o hkrÿ. ¹⁰ Hãmri nhÿm Pawre mẽ ixkôt wrÿ nê hwÿr tẽ nê htyk ã omu nê kumÿ nê mẽ kãm:

—E mẽ amÿr kêt nê. Ra htyk tã koja Tÿrtÿm akupÿm mẽ pamã ho htÿr.

Anhÿrja kôt nhÿm akupÿm htÿr. ¹¹ Hãmri nhÿm mẽ akupÿm htÿr ã omu nê hkÿnh tÿx kumrẽx. Hãmri pa mẽ akupÿm kÿx pê ixkre hwÿr api nhÿm Pawre mẽ inhmã pãwti hkwÿ nhÿrê nê mẽ inhmã kugõ pa mẽ Jesus kot mẽ panê htyk mã ijamaxpẽr pê kuku. Hãmri nhÿm Pawre axte mẽ kãm kapẽr o ÿr rãhã nhÿm myt kato pa mẽ kęp anhrã nê ma ixpa.

Pawre Mÿrêt wÿr mõi ã harẽnh

¹³ Hãmri pa mẽ inhnojarêt nhÿm Pawre mẽ ixte hkôt mẽ inhmõi xwÿnhjê mã:

—E kêt ka mẽ ma pãr kãm ixkukamã mõi. Kot paj ahte ma kÿx pê mẽ akôt ixpar o Asôt wÿr mõi. Hãmri nê hwÿr põi nê mẽ anhõ pãr mã axà pu mẽ ma pah-pimràãtã ma hamũ mõi. Anẽ.

¹⁴ Hãmri pa mẽ kuma nê ma mõi nê mẽmo arÿgro hã Asôt kamã axpẽn wÿr põi. Hãmri nhÿm Pawre mẽ ixkôt pãr wÿr axà pa mẽ ma krÿ pê Mÿtirẽn wÿr mõi.

¹⁵ Nê hwÿr põi nê kurÿm kormã mõi nhÿm apkati pa mẽ gõ hipõk pê Kiw jakrenh o mõi. Nê hakre nê mõi nhÿm apkati pa mẽ gõ hipõk pê Sãm wÿr põi nê hã pãr nhõ. Hãmri nhÿm apkati pa mẽ axte mõi nê Mÿrêt wÿr põi. ¹⁶ Nom nhÿm ra Pawre nojarêt nê. Kãm tokyx As rÿm kator nê Jerujarẽ hwÿr mõi nê tokyx hpõx pãm nê. Kãm mẽ hkÿnh pê Pẽtekos xwÿj ri hwÿr hpõx pãm jakamã nojarêt tÿx pa mẽ Epes wÿr inhmõi kêt nê.

Pawre kot Epes kamã Kris kwÿjê mã amnhÿ jarẽnh

¹⁷ Tã pa mẽ Mÿrêt wÿr põi nhÿm Pawre amnhÿ wÿr Epes wÿr Jesus kwÿ jahkre ho mẽ pa xwÿnhjê hã karõ.

¹⁸ Hãmri nhÿm mẽ man mẽ ixwÿr mõi nhÿm Pawre mẽ omu nê mẽ kãm amnhÿ jarẽ nê mẽ kãm:

—Nà ixte mẽ amã amnhÿ jarẽnh kaxyw na pa mẽ atã karõ. Ra mẽ ate tanhmã ixte amnhÿ nhÿpêx to hã ix-pumunh mex. Wam mẽ awÿr As wÿr ixpõxta ã ka prem aprÿ hã ixpumunh mex nê. ¹⁹ Na pa pre mẽ akôt ri mẽ amã tanhmã amnhÿ nhÿpêx to ho ri ixpa. Te ixpê mẽ amã ixàpênh xwÿnh pyrãk. Nê Pahihti Jesus mã tanhmã amnhÿ nhÿpêx to ho ri mẽ akôt ixpa. Nê ixkwÿ Ijaew kwÿ kot Jesus kapẽr kaga hã mẽ omu nê ixkaprÿ nê inhmÿr o ixpa. Nhÿm prem Jesus ã ixtomnuj pa amnhÿ xà htÿx kamã ijamak o ri mẽ hkôt ixpa. ²⁰ Nom arÿ ri Tÿrtÿm kapẽr o mẽ ajahkre ho ri mẽ akôt ixpa rãhã nê aa hkaga hkêt nê. Mẽ anhõrkwÿ kamã nê mẽ ahkre xà hã ixkre kamã. Mẽ ate tãm amnhÿ nhÿpêx pãm xaj pa pre ã mẽ ajahkre mex anhÿr rãhã ho ri mẽ akôt ixpa.

²¹ —Nê mẽ ixpê Ijaewjê mẽ mẽ apê Ijaew kêt xwÿnhjê mẽ pa pre mẽ ajahkre ho axpẽn pyrãk. Mẽ apiitã mẽ ate amnhÿ tomnuj kaga nê hpãnhã Tÿrtÿm kôt amnhÿ nhÿpêx kaxyw. Nê amnhÿ kaxyw mẽ panhõ Pahihti Jesus Kris kôt ajamaxpẽr kaxyw na pa pre mẽ akôt ri mẽ ajahkre rãhã ho ri ixpa.

²² —Tã ra Tÿrtÿm Karõ kot akupÿm Jerujarẽ hwÿr inhmẽnh jakamã pa kormã hwÿr mõi. Kot paj hwÿr põi nhÿm krÿ nhõ xwÿnhjaja Jesus ã ixtomnuj nê nom tanhmã mẽ kot ixtoja kukamã ixte ixprÿ hã ixàh-pumunh kêt. ²³ Ja pix na ixte omunh. Na pa hte nhÿri põi nhÿm htem Jesus ã ixpynê nê mẽ hagjẽnh xà kamã ijagjê nê tanhmã inhÿpêx to. Tÿrtÿm Karõ na pre ra ã mẽ kot inhÿpêx anhÿrja kukamã inhmã mẽ harẽ. Jakamã ixte amnhÿ kukamã amnhÿ tã ixàhpumunh mex. Kot paj xep akupÿm Jerujarẽ hwÿr põi nhÿm mẽ ixpumu nê Jesus ã tanhmã inhÿpêx to. ²⁴ Tã no pa amnhÿ kamã ixkahak kêt o inhmã mẽ uma hkêt nê. Koja mẽ kãm ixpÿr pãm nê mãmrÿ ixpÿ. Inhmã ixtyk puma hkêt. Æm mẽmoj pixi na inhmã hprãm. Ra Pahihti Jesus kot mẽmoj tã inhmã karõ xaja na inhmã kormã ixtÿr ri hatur xàm mẽnh pãm. Tÿrtÿm kãm mẽ pajapê hã kot mẽ pahto mex pãm xaj mẽ pahwÿr Kra Jesus mẽnh nhÿm mẽ panê tanhmã amnhÿ nhÿpêx to hã harẽnhja na inhmã mẽ piitã mẽ kãm harẽnh jatur xàm mẽnh pãm.

²⁵ —Tã e ixkrãmnhwÿjaja. Na pa pre mẽ akôt mẽ ajahkre rãhã ho ri ixpa. Mẽ ate Jesus kôt amnhÿ nhÿpêx mex rãhã ho ri apa kaxyw. Tã kot puj pẽr mẽ axte axpẽn pumunh kêt nê.

²⁶ —Na pa pre ra mẽ amã Tÿrtÿm kapẽr piitã harẽnh pa. Mẽ ate mar tÿx nê hkôt pix mã amnhÿ nhÿpêx o apa kaxyw. Jakamã koja mẽ anhõ krÿ nhõ xwÿnhjê hõ amnhÿ kaxyw Jesus kôt hamaxpẽr pãm kêt nê rÿ tãm. Kwãr mãmrÿ kot amnhÿ tomnuj kamã ty nê arÿ tãm amnhÿ pumu no ãm kê amnhÿ tã tanhmã inhmã nê hkêt nê.

²⁸ —E mẽ ate Kris kwÿ jahkre ho apa xwÿnhjaja. Kêt ka mẽ amnhÿ pumunh mex o ri apa. Nê mẽ kot Jesus kôt amnhÿ xunhwÿr xwÿnhjê jamãr mex o ri apa. Ja kaxyw na pre Tÿrtÿm Karõ mẽ kaxyw mẽ axunhwÿ. Tÿrtÿm Kra Jesus kot htyk o Tÿrtÿm mã mẽ pahte amnhÿ tomnuj piitã hpãnhã amnhÿrer pa jakamã kêt ka mẽ kãm mẽ omunh mex o ri mẽ hkôt apa. Te ôwêhti jamãr xwÿnh kot ôwêhti jamãr mex o ri pata pyrãk.

²⁹ —Kot paj ma mõi nhÿm mẽmojjaja ixpãnhã mẽ awÿr põi nê mẽ ate Jesus kaga hprãm xaj tanhmã mẽ amã hêx to ho ri mẽ akôt pa. ³⁰ Nê mẽ akwÿjaja mẽ urã nê tanhmã hamaxpẽr punuj to nê mẽ ate Jesus kaga hprãm xaj hêx rom tanhmã mẽ amã kapẽr to ho ri mẽ akôt pa. ³¹ Jakamã kwa mẽ o kora. Kêt ka mẽ axkãm ajamak rom nê ri apa. Kê jajaja nhÿrmã ã mẽ amã kapẽr anê ka mẽ ama nê mẽ hkôt ajamaxpẽr kêt nê. Mẽ ate mẽ mar nê mẽ hkôt ajamaxpẽr pymaj na pa pre mẽ akôt ri mẽ ajahkre ho ri ixpa hã ixtã amgrã axkrunẽpxi. Arÿgro hã nê kamãt kãm mẽ ajahkre rÿnh o ri ixpa. Nê mẽ ate mẽ amã mẽ hêx xwÿnhjê hkôt amnhÿ xunhwÿr pymaj mẽ ajahkre pê te inhmÿr pyrãk o ri mẽ akôt ixpa.

³² —E kot paj Tirtüm nhĩhkram mẽ ajagjênh pa. Koja mẽ atãnopxar o ri mẽ akôt pa nê mẽ akutã nojarêr rãhã ho pa. Hãmri ka mẽ ãm hkôt pix mã amnhĩ nhĩpêx. Jao Jejus kaga hkêt nê. Hãmri nhũm nhỹrmã Tirtüm mẽ pahpê hkrajê piitã tanhmã mẽ pahto mex to.

³³ —Na pa pre mẽ akôt ixpa ry htã no ãm aa mẽmoj tã mẽ awyr kêt nê. Mẽ axê hkwy hã mẽ awyr rý mẽ akãxpore hã mẽ awyr o ri ixpa hkêt nê. ³⁴ Na pa pre amnhĩ pa kukwak ri amnhĩm ixujaprôr pê ixãpkur o ri mẽ akôt ixpa. Nê ixkôt mẽ pa xwýnhjê mã ixujaprôr o ri ixpa. Ra mẽ ate ja hã ixpumunh mex.

³⁵ —Tã mẽmo kaxyw na pa pre ã mẽ akôt amnhĩ nhĩpêx anhỹr o ri ixpa? Nà mẽ ate ja hã ixpumunh nê ixpyrà nê ã amnhĩ nhĩpêx anhỹr o ri apa kaxyw. Nê ixpyrà nê tanhmã mẽ kute xwýnhjê ho ajuta hto ho ri mẽ apa kaxyw. Na pre Pahihti Jejus ja jarênh o: “Koja mẽhõ amã mẽmoj gõ ka amnhĩm apy nê akĩnh nê. Nom kot kaj kam nhãm mẽhõ mã mẽmoj gõ hãmri nê akĩnh tỳx o ate mẽhõ mã mẽmoj nhõrta jakre.” Anê.

³⁶ Na pre ã Pawre mẽ kãm ujarênh anhỹr pa hãmri pa mẽ ra inhnojarêr. Hãmri nhũm mẽ piitã hkõnkrã ho hkrĩ pa nhũm Pawre mẽ ho Tirtüm wý. ³⁷ Hãmri nhũm mẽ piitã kãm Pawre hkĩnh tỳx jakamã mýr rax o kuhê. Tee ri kot axte mẽ kot axpên pumunh kêt ã mẽ kãm amnhĩ jarênhja ma nê hkaprĩ htỳx nê. Nê hkaprĩ xàj kahti hkôt hamý nê mur. Hãmri nê ma Jerujarê hwýr hkujaêk kaxyw mẽ ixkôt pàr wýr hkaprĩ nê mẽ ixkôt mýr o mõ.

Pawre kot Jerujarê hwýr hpõx ã harênh

21 Tã pa mẽ gõ mýri Jejus kôt mẽ ixtõjê re nê pàr krem agjê nê axte mõ. Ma gõ hipòk pê Kosti hwýr ixkatàt kôt mõ nê hã ajêt. Hãmri nhũm apkati pa mẽ axte hamũ mõ nê hpãnhã gõ hipòk pê Roxti hwýr mõ nê hwýr pøj nê hã pàr xi. Hãmri nê hpãnhã axte krĩ pê Patar wýr mõ. ² Hãmri nê hwýr pøj nê pàr rùm ijapøj nê pàr õ pumu. Nhũm ra pyka pê Wênĩs wýr nojarêr pa mẽ hwýr agjê nê ma kamã axte mõ. ³ Mõõ nê amým amnhĩ kukamã gõ hipòk pê Sipre pumu. Hãmri nê upòk rùm hakrenh mã mõ nê pyka pê Sir wýr mõ nê kamã Xir hwýr pøj nê hã pàr nhõ. Pàr pãm kot krĩ kamã pàr kukrêx rer kaxyw pa mẽ kormã hã ajêt nê tokyx axte nhãm inhmõr kêt nê. ⁴ Hãmri pa mẽ kutêp api nê krĩ kamã mẽ kot Jejus kôt axpên to htõ nê htõx xwýnhjê japêr o mõ. Hãmri nê nhỹri mẽ omu nê mẽ hkôt ri ixpa ho ixtã ù semãn. Nhũm prem Tirtüm Karõ nhỹ hã Pawre mã kapêr nê kãm:

—Kwa Pawre mẽ inhma. Kot ka Jerujarê hwýr pøj nhũm xep mẽ kãm akurê xwýnhjaja tanhmã anhĩpêx to. Tirtüm Karõ na ã akukamã mẽ inhmã ajarênh anê. Jakamã kwa hwýr amõr kêt nê. Na pa mẽ tee ri akukamã ijamaxpêr. Anê.

⁵ Hãmri nhũm amnhĩ tã mẽ kuma nê ãm mẽ kuma nê Jerujarê wýr hkrã kamã hihtỳx nê. Jakamã nhũm semãn hapêx pa mẽ axte inhnojarêr. Axte Jerujarê hwýr kormã inhmõr kaxyw inhnojarêr. Nhũm Jejus kôt mẽ ixtõjaja mẽ kot mẽ ixkujaêk kaxyw piitã pàr wýr mẽ

ixkôt mõ. Mẽ hprõ nê mẽ hkrajê mẽ nhũm mẽ pim-rãatã mẽ ixkôt mõ. Hãmri pa mẽ pàr wýr pøj nê gõ mýri ixpiitã ixkõnkrã ho ixkrĩ hpa nê amnhĩ to Tirtüm wý.

⁶ Hãmri nê mẽ kãm amnhĩ jarênh pa nê mẽ noo mã pàr krem agjê nê ma axte mõ nhũm mẽ awjanã nê ma akupým õrkwy hwýr hapêx. Hãmri pa mẽ kurùm kormã ma Jerujarê hwýr mõ. ⁷ Mõõ nê krĩ pê Poremax wýr pøj nê hã ajêt. Hãmri nê pàr rùm ijapøj nê axte krĩ kamã Jejus kôt mẽ ixtõ nê mẽ ixtõxjê japêr o mõ nê nhỹri mẽ omu nê mẽ kuri amnhĩm hikra.

⁸ Tã nhũm apkati pa mẽ axte mõ. Pãnhã ma krĩ pê Sejarej wýr mõ. Hãmri nê hwýr pøj nê Firipti kuri pøj. Firiptija kormã nyw ri mẽ kot Jerujarê kamã mẽ mjên htyk xwýnhjê mã mẽ apkur xà nhõr ho pa kaxyw mẽ ho 7 nê mẽ unhwýr xwýnhtajê hõ na pre. Tã hpãnhã kêp Tirtüm kapêr jarênh o pa xwýnh. ⁹ Nhũm hkra nija-ja kêp kwat. Piitã mjên kêt nê hkukrit rãhã pa. Mẽ kêp Tirtüm nhỹ hã kapêr o mẽ pa xwýnh na pre mẽ.

Jakamã pa mẽ mẽ kuri pøj. ¹⁰ Hãmri nê mẽ hkôt ri ixpa hã ixtã apkati grêre nhũm Akapõ Jutej rùm man mẽ ixwýr mõn pøj. Kêp Tirtüm nhỹ hã kapêr jarênh o pa xwýnh na pre. ¹¹ Hãmri nê mẽ ixwýr pøj nê Pawre pumu nê hkukamã kot tanhmã harênh to kaxyw hwýr tẽn kêp hprexà kapa nê ho amnhĩ te hpre nê ho amnhĩ pa hpre nê xa. Hãmri nê mẽ inhnoo mã Tirtüm Karõ nhỹ hã mẽ kot tanhmã hipêx to hkukamã kãm awjarê nê kãm:

—E kot kaj Jerujarê hwýr pøj nhũm Ijaew xàptàr tũm-jaja apumu nê ã anhĩpêx anê nê apa hpre nê ate hpre hãmri nê Ijaew kêt xwýnhjê nhĩhkram ajaxà. Koja mẽ ã anhĩpêx anê. Anê.

¹² Hãmri pa mẽ tee ri ã ujarênh anhỹrja ma nê Pawre kamã ixkahak tỳx nê ixkaprĩ nê inhmýr o ixkrĩ. Nê xatã kot mẽ hwýr mõr nê kãm ixkapêr kãm ixihỳx nê kãm:

—Kwa mẽ ixkapêr ma Pawre. Mẽ hwýr amõr kêt o mẽ hwýr amõr kêt. Anê.

¹³ Hãmri nhũm mẽ inhmã:

—Tk. Kwa mẽ amýr kêt nê. Na pa mẽ apumu nê ixkaprĩ nê. Nà kot paj ma mẽ hwýr mõ. Kwãr mẽ mãmrĩ Pahihti Jejus ã tanhmã ixto rý hã ixpĩ. Ixte amnhĩ kamã ixkahak kêt. Anê.

¹⁴ Hãmri pa mẽ tee ri mẽ hwýr mõr nê hkurê kapry nê kãm:

—Tõe. Nà kam nê Tirtüm kãm hprãm xà hkôt mãmrĩ mẽ hwýr mõ rý mẽ hwýr amõr kêt nê. Anê.

¹⁵ Tã pa mẽ ra inhnojarêr nê amnhĩ to ixpikuprõnh pa nê ma Pawre hkôt Jerujarê hwýr tã ma mõ. ¹⁶ Hãmri nhũm Sejarej kamã Jejus kôt mẽ ixtõ hkwyjaja ma mẽ ixkôt mõ. Pa mẽ mõõ nê Jerujarê hwýr pøj. Hãmri nhũm mẽ ixkôt mẽ mõr xwýnhjaja mẽ ixto mõ nê Mẽ-nasõ nhõrkwy hwýr mẽ ixto pøj. Mẽnasõja Sipre kamã na pre kato. Tã hpãnhã Jerujarê hwýr ahpa nê kamã ri pa ho pa. Na pre ra Jejus kôt amnhĩ xãm ã hã amgrã xohtõ nê. Tã pa mẽ kuri pøj.

Pawre mẽ Xiakre wa harënh

Atre 15.3-21; Wam Korîť 9.19-22, 10.32-33

¹⁷ Tã pa mẽ Jerujarë hwÿr pøj nhũm Jejus kôt mẽ ixtõ-jaja mẽ ixpumu nẽ hkĩnh nẽ. ¹⁸ Hãmri nhũm apkati pa mẽ ma Pawre hkôt Xiakre hwÿr mõ. Nhũm mẽ kot Tirtũm kapër o mẽ ahkre xwÿnh piitã ra kuri akuprõ nẽ mẽ ixkutêp hkrĩ. ¹⁹ Jakamã nhũm Pawre mẽ hwÿr axã nẽ mẽ kãm tanhmã amnhĩ nhĩpêx to ho pa hã amnhĩ jarë nẽ mẽ kãm:

—Pa na ka mẽ rĩ akrĩ. E ot pa axte mẽ apumunh mã mõ. Ixte mẽ amã amnhĩ jarënh ã amnhĩ jarënh kaxyw. Nã na pa pre ma Ijaew kêt xwÿnhjê hkôt ixpa nẽ mẽ kãm Jejus kot mẽ panë tanhmã amnhĩ nhĩpêx to jarënh o ri mẽ hkôt ixpa. Nhũm Tirtũm inhĩhkõ hã ixkutã nojarêt mex jakamã nhũm prem inhma nẽ ohtõ rax nẽ mẽ pahpyrà nẽ Jejus kôt amnhĩ xunhwÿ. Anẽ.

²⁰ Hãmri nhũm mẽ Ijaew kêt xwÿnh kwÿjaja kot Jejus kôt amnhĩ xunhwÿr ã mẽ harënh ma nẽ mẽ ý hã hkĩnh nẽ mẽ hã Tirtũm mã mex o mex ã harë. Hãmri nẽ Pawre mã kãm:

—Nã na pa prem ra mẽ harënh ma. Hãmri nẽ mẽ kãm kagã nhĩpêx nẽ mẽmoj tã mẽ kãm karõ nẽ mẽ hwÿr kumẽ. Mẽ kot omunh nẽ kamã harënh nẽ hkôt amnhĩ nhĩpêx o pa kaxyw.

Na pa prem kagãja kamã mẽ kot sãnti nhõ hkur nẽ mẽ hkurẽ.

Nẽ mry kamrõ hkur nẽ mẽ hkurẽ.

Nẽ mẽmo mry hpar nẽ hkamrõ runh kêt rãhã hkur nẽ mẽ hkurẽ.

Nẽ mẽ kot amnhĩ prõ pix tãnopxar kaxyw mẽ kãm hã karõ.

Nẽ mẽnijaja kot amnhĩ mjên pix tãnopxar kaxyw mẽ kãm hã karõ.

Nẽ nhãm mẽ kot axpën to amnhĩkati nẽ mẽ hkurẽ. ã na pa prem ja hã kagã nẽ mẽ hwÿr mẽnh anẽ. Jakamã e mẽ inhma. Na ra mẽ pahpê Ijaew kwÿjaja ohtõ rax kumrëx nẽ mẽ pahpyrà nẽ Jejus kôt amnhĩ xunhwÿ. Mãn ka pre mẽ harënh ma. Na htem Jejus kôt amnhĩ nhĩpêx o pa jao mãänën Tirtũm nhÿ hã Mojes kapër kôt amnhĩ nhĩpêx mex o pa. Tã nhÿri mẽ kot tanhmã ato hêx to hã ajarënh ma. Na ka xep hte Ijaew kêt xwÿnhjê nhõ krĩ kamã pøj hãmri nẽ mẽ õ krĩ kamã Ijaew kwÿjê pumu nẽ mẽmoj nẽ tanhmã mẽ kãm akapër to ho ri apa. Nom Ijaew kêt xwÿnhjê mã ka xep hte ã mẽmoj nẽ akapër anhÿr kêt nẽ. ãm Ijaew mã pix mã ka xep hte mẽ kot finat Mojes kapër kôt amnhĩ nhĩpêx nẽ mẽ hkurẽ ho ri apa. Nẽ mẽ panhĩgêt kot amnhĩ nhĩpêx kuhpa hã mẽ kot mẽ hkra my kwÿr kã jakàr nẽ ka xep hte mẽ hkurẽ ho ri apa. Nẽ mẽ kot mẽ panhĩgêt kôt amnhĩ nhĩpêx nẽ ka xep hte mãänën mẽ hkurẽ ho ri apa. Mẽ kêt Ijaew tã ka xep pre hte ã mẽmoj nẽ mẽ hkurẽ anhÿr ho ri apa. Na prem jar ã Ijaewjê mã ato hêx o pa anẽ nhũm mẽ kuma nẽ mẽ hkôt hamaxpër kurẽ kumrëx. Jao ra ate mẽ pahpê Ijaew kot amnhĩ nhĩpêx kôt amnhĩ nhĩpêx kêt ã akamnhĩx.

—Tã ra mẽ kot apõx ã ajarënh mar jakamã tanhmã kot kaj we mẽ kãm amnhĩ tã axaprãr to? Nẽ tanhmã kot kaj we mẽ noo mã amnhĩ nhĩpêx to kê mẽ arĩ mẽ pahte amnhĩ nhĩpêx kôt ate amnhĩ nhĩpêx o apa hã apumu? E na pa mẽ ra ijamaxpër. Kot ka ã amnhĩ nhĩpêx anẽ. Na ra jar mẽ pahkwÿjaja kêt kwat nẽ Tirtũm mã tanhmã amnhĩ jarënh to jatur xãm mẽnh kaxyw amnhĩ krã hkênh mã. Jakamã e kêr ka ma mẽ hkôt tẽ nẽ mẽ urak nẽ amnhĩ krã hkênh nẽ kam nẽ mẽ ate amnhĩ krã kênhta pãnhã amnhĩre. Kot kaj ã mẽ hkôt amnhĩ nhĩpêx anẽ hãmri nhũm mẽ pahkwÿjaja arĩ mẽ pahte amnhĩ nhĩpêx o ate amnhĩ nhĩpêx o apa hã apumu nẽ mẽ kot ato hêx ã apumunh kurẽ kumrëx. Nẽ arĩ ate finat Mojes kapër kôt amnhĩ nhĩpêx o ri apa hã apumu. Anẽ.

²⁶ Hãmri nhũm Pawre mẽ kuma nẽ mẽ kãm:

—Tõe. Nã ãm hãmri na ka mẽ inhma awjarë. Nã kot paj ã amnhĩ nhĩpêx anẽ. Anẽ.

Jakamã nhũm apkati nhũm ma mẽ kêt 4tajê o mõ nẽ mẽ mex kaxyw tanhmã amnhĩ nhĩpêx to. Hãmri nẽ Tirtũm mã amnhĩ jarënh xã hã ixkre hwÿr mra nẽ agjê nẽ mẽ õ patre mã mẽ amnhĩ jarë nẽ kãm:

—E ot pa mẽ awÿr mra. Na pa prem ra mẽmoj tã tanhmã Tirtũm mã amnhĩ jarënh to. Tã kot paj mẽ axte ixtã ù semãnh hãmri nẽ hatur xãm mẽnh kaxyw akupÿn awÿr mra nẽ amã mẽmoj gõ ka mẽ inhma Tirtũm mã agõ nẽ hkôt kãm mẽ ijarë. Nẽ pa kot paj mẽ ixpiitã hpãnhã amã amnhĩre. Anẽ.

Mẽ kot Pawre pynënh ã mẽ harënh

Atre 24.12

²⁷ Tã nhũm semãnja hapêx kaxyw nhũm pika pê As rũm Ijaew kwÿjaja ma mra nẽ Tirtũm mã amnhĩ jarënh xã hã ixkre hwÿr agjê. Hãmri nẽ kamã Pawre pumu nẽ kamã gryk tÿx nẽ hwÿr hprõt nẽ unẽ nẽ tanhmã hk-wÿjê mã ho hêx to nẽ ho kapër punuj nẽ. Nẽ mẽ kãm:

²⁸ —E mẽ amnẽ mra nẽ jahti pumu. Na hte krĩ piitã hkôt ri mẽ pahkwÿjê mã tanhmã ri hêx to ho pa. Tirtũm nhÿ hã finat Mojes kapër nhũm mẽ kãm ho kapër punuj o pa. Nẽ mẽ pahte Tirtũm mã amnhĩ jarënh xã hã ixkreja nhũm hte mãänën tanhmã mẽ kãm ho kapër punuj to. Mẽ pahpyrà nẽ kêt Ijaew tã mẽ pahpê hkwy ho kapër o pa. Tã ra axtem nẽ amnhĩ kôt Tirtũm nhõ ixkre hwÿr Ijaew kêt xwÿnh kwÿjê ho agjê. Mẽ kot hwÿr gjêx kêt kumrëx tã nhũm axtem nẽ amnhĩ kôt mẽ ho agjê. Anẽ.

²⁹ Na pre krĩja kamã Ijaew kêt xwÿnh Topĩja Pawre hkôt pa nhũm mẽ omu. Kêt Epes nhõ xwÿnh nhũm mẽ kot pry ã Pawre hkôt pa hã omu. Tã hã ahtũm nẽ Tirtũm mã amnhĩ jarënh xã hã ixkre kamã Pawre pumu nẽ htÿx amnhĩ kôt Topĩ ho àr ã hkamnhĩx nẽ ã mẽ kãm harënh anẽ. ³⁰ Hãmri nhũm mẽ kuma nẽ Pawre kamã gryk tÿx nẽ. Nẽ hwÿr hprõt nẽ unẽ nẽ ixkre rũm ho kato nẽ kêt hakwa kre kahê. ³¹ Hãmri nẽ ma o tẽ nẽ htak rax nẽ. Ra mẽ kot htak o hpĩr mã tã nhũm mẽhõja pôristi krãhtũm wÿr hprõt nẽ kãm awjarë nẽ kãm:

—Kwa o mŭj mẽ ra kot axpën nhĩmex kaxyw pijapu ho kuhê. Anê.

Hãmri nhũm tee ri kuma nê pōristi hkwyjê mã anê nê mẽ ma mẽ hwyr hprôt kurê kumrêx. Nhũm mẽ arĩ Pawre htak tã amnhĩ wyr mẽ omu nê mẽ umaj kãm ure. ³³ Hãmri nhũm pōristi krãhtũm Pawre hã amỹnê nhũm pōristijaja unê nê kàx o mẽ hkaxprexà ho axkrut nê ho hkaxpre pa. Hãmri nhũm mẽ hkrãhtũm Pawre hã mẽ hkukja nê mẽ kãm:

—Kwa mẽ atō inhmã jahti jarê. Tanhmã na hixi te? Tanhmã na we amnhĩ tomnuj to hã na ka mẽ ã hipêx anê? Anê.

³⁴ Hãmri nhũm mẽ kuma nê piitã anhĩpê kàxpê kãm tanhmã harênh to. Nom axpën kwym tanhmã ri kãm harênh to. Hãmri nhũm tee ri hprĩ hã kot mẽ mar kaxyw hãmri nê pōristi mã anê nhũm mẽ kêp Pawre ho kato nê ma mẽ àpênh xà hã ixkre hwyr o tẽ.

³⁵ Hãmri nhũm Ijaew kwỹ ohtô nê pry hã axpën nhĩgãnh o hkôt mra. Nê gryk xàj kapêr punuj tỹx o mẽ hkôt mō nê kàx pê pōristi mã kapêr nê mẽ kãm:

—Kwa mẽ apĩhti ri. Mexti hã. Mẽmo kaxyw na ka mẽ ri amã hapê ho apahti? Anê.

Jakamã nhũm pōristija tee ri mẽ kuma hãmri nê mẽ kot tanhmã ho pymaj kumỹ nê kỹx pê mẽ kêp kupẽ nê o mō. Jao ixkreja wyr mẽ àpir xà hã ho àpir o mō. ³⁷ Nê kot ho àr kaxyw tã nhũm Pawre mẽ hkrãhtũm mã kãm:

—E pa amã mẽmoj jarê ka inhma. Anê.

Mẽ kapêr o kãm kapêr hãmri nhũm amnhĩ jaêr pê kuma nê kãm:

—Kwa xà na ka mẽ ixpyrà nê Gresjê kapêr o akapêr?

³⁸ Na pa ixtỹx apê Ejit nhõ xwỹnh pê mẽ hpar o apa xwỹnhata ã akamnhĩx. Ham na pre mẽ inhõ pahihiti kutã amnhĩ xãm nê kot hkurê kaxàr kaxyw mẽ ho ajuta xwỹnhjê ho 4.000 nê mẽ hkurê nê ma kapôt ã mẽ o pa. Nom tãm na xep Gresjê kapêr o kapêr kêt nê. Anê.

³⁹ Hãmri nhũm Pawre kãm:

—Nà ixpê Ejit nhõ xwỹnhata kêt. Ixpê Ijaew na pa. Pyka pê Siris kamã krĩ rax pê Tas kamã na pa pre ixkato. E xà kot paj ixkôt mẽ mōr xwỹnh nêj mã ixkapêr nà? Anê.

⁴⁰ Hãmri nhũm kãm:

—Tõe. Kam nê mãmri tanhmã mẽ kãm akapêr to. Anê.

Hãmri nhũm mẽ àpir xàta ã kỹx pê mẽ mỹri xa nê kànhmã mẽ kãm ĩhkra pẽ nhũm mẽ omu nê hpinhkrênh pa nhũm mẽ kãm amnhĩ jarê.

Pawre kot kãm hkurê xwỹnhjê mã amnhĩ jarênh

Atre 9.1-19, 26.1-23

22 Nhũm Pawre amnhĩ kwỹ Ijaew kapêr o mẽ kãm kapêr nê mẽ kãm:

—E ixkwỹjaja. Pa mẽ amã amnhĩ jarê ka mẽ inhma. Anê.

Hãmri nhũm kot mẽ kapêr o kapêr ma nê hpinhkrênh pa nê akryk mar o kuhê nhũm mẽ kãm:

³ —Nà ixpê mẽ anhĩõ na pa. Ijaxyjaja ixpê Ijaew. Pyka pê Siris kamã krĩ pê Tas kamã na pa pre ixkato no ãm

jar Jerujarê kamã na pa pre ixàptàr. Kamariew na pre hte ijahkre ho pa. Finat Mojes kot Tĩrtũm nhỹ hã mẽ panhĩgêjtjê mã kapêrja nhũm pre hprĩ hã ho ijahkre ho pa. Na pa pre mẽ apyrà nê inhmã Tĩrtũm kôt amnhĩ nhĩpêx prãm nê.

⁴ —Jakamã na pa pre mẽ pahkwỹ kot Jejus kôt amnhĩ xunhwyr xwỹnhjê japêr o ixpa nê nhỹri mẽ kãm ixkato nê mẽ unê. Mẽmyjê pynê nê mênijê pynê. Hãmri nê mẽ kot mẽ hpar kaxyw mẽ hagjênh o ri ixpa. ⁵ Na pa pre ã mẽ hipêx o ri ixpa anê. Mẽ panhõ patre maati nê mẽ àptàr tũmrejaja ra mẽ kot ja hã ixpumunh mex. Mẽ tãmjaja na prem krĩ pê Tamas kãm mẽ pahkwỹjê kaxyw kagà nhĩpêx nê inhmã kugõ pa kupy nê ma mẽ hwyr o mō. Ixte mẽ õ krĩ kamã Jejus kwỹjê pynênh par nê man akupỹn Jerujarê hwyr mẽ ho inhmōr nhũm mẽ kot tanhmã mẽ ho kaxyw.

⁶ —Tã ra myt aha pa mẽ hwyr ixàhtêp o mō. Puh nhũm kaxkwa rũm hirã rax kumrêxja ixwyr wrỹ nê ixtã ajêt pa hipôk ri xa. ⁷ Hãmri nê umaj pykap tẽm nhũm mẽhõ kapêr nê inhmã: “Pa Sawti? Hêxta waa nê. Kwa mon ka hte axtem nê ixtomnuj tỹx o ri apa?” Anê.

⁸ Hãmri pa kãm: “Kwa mẽ atō na ka ri ã inhmã akapêr anê pahihiti?” Anê nhũm inhmã: “Ixpê Najare nhõ xwỹnh Jejus. Pa na ka hte ixpê ixkôt mẽ kot amnhĩ xunhwyr xwỹnhjê homnuj tỹx o ri apa. Jao te pa ixtomnuj pyràk.”

⁹ —Anhỹr o inhmã kapêr nhũm ixkôt mẽ pa xwỹnhjaja kuma no ãm hprĩ hã mar mex kêt nê. ãm hirã raxta pix pumu. ¹⁰ Tã pa kãm: “No tanhmã kot pa we amnhĩ to Pahihiti?” Anê nhũm inhmã: “E kànhmã xa nê mãmri ma Tamas wyr mō. Kot kaj hwyr pōj nhũm mẽhõ awyr tẽ nê mẽmoj tã amã karõ ka ama nê hkôt amnhĩ nhĩpêx.” Anê.

¹¹ —Nhũm pre ã inhmã kapêr anê. Hãmri pa hirã rax pumunh o ixãm kurê ra inhno hkre nê ixrĩt kêt nhũm ixkôt mẽ pa xwỹnhjaja ixpa hã ixpy nê ma Tamas wyr ixto mō nê ixto pōj.

¹² —Tã nhũm Tamas nhõ xwỹnh pê ãnãnisti ixwyr tẽ. Na pre hte Tĩrtũm kapêr ã kagà htũm kôt amnhĩ nhĩpêx mex nhũm Tamas kamã Ijaew piitã kãm hkĩnh nê axpën mã mex ã harê. ¹³ Jakamã nhũm ixwyr tẽ nê inhmã: “Pa Jejus kôt ixtõ Sawti? E akupỹm rĩt.” Anhỹrja kôt pa akupỹm ixrĩt mex kurê kumrêx nê omu. ¹⁴ Hãmri nhũm inhmã: “Nà mẽ panhĩgêjtjê nhõ Tĩrtũm na amnhĩ kaxyw ata. Ate kapêr mar nê hkôt tanhmã amnhĩ nhĩpêx to ho apa kaxyw. Nê ate kaxkwa kamã Kra mex pumunh nê kapêr mar kaxyw. Tã ka xep ham hirã rax kamã omu nê kapêr ma. ¹⁵ Jakamã kêr ka ma mẽ piitã mẽ kãm ate omunh xwỹnhja jarênh o ari mẽ hkôt apa. Nê mẽ kãm kapêr jarênh o mẽ ahkre ho ri apa. ¹⁶ E tokyx kànhmã xa nê Jejus mã amnhĩ jarê nê hkôt amnhĩ xãm kê anê ate amnhĩ tomnuj rênh pa. Hãmri pa apê hkwy hã akrã kumrã ka ma mẽ kãm kapêr jarênh o ri apa.” Anê.

—Nhũm pre ã ãnãnisti inhmã kapêr anê.

¹⁷ —Tã pa man akupỹn jar Jerujarê hwyr mẽ awyr mō. Hãmri nê jar Tĩrtũm mã amnhĩ jarênh xà hã ixkre kamã kãm amnhĩ jarênh o ixãm rôm axte mẽmoj pumu.

¹⁸ Nhũm Jejus axte ixwỳr kato nẽ xa nẽ inhmã kapẽr nẽ inhmã: "E inhma. Jerujarẽ nhõ xwỳnhjaja kãm ixkapẽr mar prãm kêt jakamã kot kaj mẽ kãm ixkapẽr jarẽ nhũm mẽ amar kêt nẽ. Jakamã kwa tokyx akato nẽ hpãnhã ma nhỹhỹm mỗ." Anẽ.

—Hãmri pa tee ri ã kapẽr anhỹrja ã kuma nẽ kãm:

¹⁹ "Kwa nà koja mẽ inhma Pahihti. Ra mẽ kot ixte amnhĩ nhĩpêx ã ixpumunh mex. Ixte amnhĩ nhĩpêx tũmta kôt mẽ kot ixpumunh mex. Na pa pre hte krĩ piitã hkôt mra nẽ Tĩrtũm kapẽr o mẽ ahkre xà hã ixkre kamã mẽ kot akôt amnhĩ kaxyw hamaxpẽr xwỳnhjẽ pynẽ nẽ mẽ htak nẽ mẽ hagjẽnh xà kamã mẽ hagjẽ nhũm mẽ kot ja hã ixpumunh mex. ²⁰ Nhũm mẽ kot akapẽr jarẽnh o pa xwỳnh Estewãw pĩrta pa pre hã mẽ omu nhũm ja inhmã mex pa mẽ kãm mẽ hinôkà jamỳnh o hã mẽ omunh o xa. Na pa pre ã amnhĩ nhĩpêx anhỹr o ri ixpa. Tã hpãnhã akôt amnhĩ xãm hãmri nẽ akôt amnhĩ nhĩpêx o ri ixpa. Jakamã koja mẽ ixte amnhĩ nhĩpêx nyw ã ijarẽnh ma nẽ kãm ixkapẽr mar prãm nẽ." Anẽ.

²¹ —Pa pre ã Jejus mã amnhĩ jarẽnh anẽ nhũm inhmã: "Nà. Kêr ka mãmri krĩja rũm akato nẽ ma nhỹhỹm mỗ. Kot paj hpãnhã ma Ijaew kêt xwỳnhjẽ hwỳr amẽ ka hpãnhã ma mẽ hwỳr mỗ nẽ mẽ hkôt mẽ kãm ixkapẽr jarẽnh o ri apa." Anẽ.

²² Nhũm pre Pawre ã amnhĩ hkwyjẽ mã amnhĩ jarẽnh anẽ nhũm mẽ arĩ mar o kuhẽ rãhã Ijaew kêt xwỳnhjẽ jarẽnh ma nẽ kamã gryk tỳx nẽ. Ijaew kêt xwỳnhjaja kot mẽ uràk nẽ Tĩrtũm kapẽr marja nhũm mẽ kãm hprãm kêt jakamã nhũm Pawre ã mẽ harẽnh anẽ nhũm mẽ kuma nẽ kamã gryk tỳx kumrẽx. Nẽ gryk xàj kapẽr punuj nẽ kapẽr o:

—Kwa mẽ mãmri apĩhti ri. ãm hpĩr mã htãmti kênã. Anẽ.

²³ Hãmri nẽ gryk xàj amnhĩ nhĩnôkà hkwrỹ nẽ ho apẽ nẽ pyka jamỹ nẽ kãnhmã ri ho ahkapẽ.

Pawre kot pôristi krãhtũm mã amnhĩ jarẽnh

Atre 16.35-39

²⁴ Hãmri nhũm pôristi krãhtũmja tee ri ã mẽ kot amnhĩ nhĩpêx anhỹr ã mẽ omu nẽ mẽ kapẽr ma nẽ pôristijẽ mã kapẽr nẽ mẽ kãm:

—Kwa tanhmã na we jahti amnhĩ tomnuj to nhũm mẽ ã kamã gryk tỳx anẽ? E mẽ tokyx ixkre hwỳr ho axà nẽ mẽ htak xà ho htak kê mẽ pamã tanhmã amnhĩ jarẽnh to. Anẽ.

²⁵ Hãmri nhũm mẽ kuma nẽ ho axà nẽ htak kaxyw kormã hpre ho xa. Hãmri nhũm pôristi krãhtũm nhõ kôwenatôja mẽ hkôt axà nẽ hã mẽ omunh o xa nhũm Pawre omu nẽ amnhĩ tã kãm kapẽr nẽ kãm:

—Kwa kormã ixte tanhmã mẽ amã amnhĩ jarẽnh to hkêt tã ka mẽ ixtak kaxyw. Ixpẽ Ijaew tã mãänën ixpẽ Rõm nhõ xwỳnh kênã. Xà na htem ã Rõm nhõ xwỳnhjẽ nhĩpêx anẽ? Anẽ.

²⁶ Hãmri nhũm tee ri ã amnhĩ jarẽnh anhỹrja ã kuma nẽ pôristi krãhtũmja wỳr hprõt nẽ kãm:

—Kwa taxy pu mẽ tanhmã ho hkêt nẽ. Xep kệp Rõm nhõ xwỳnh kênã. Anẽ.

²⁷ Hãmri nhũm tee ri kuma nẽ Pawre hwỳr axà nẽ kãm:

—Kwa xà ãm hãmri na ka amnhĩ jarẽ? Xà apẽ Rõm nhõ xwỳnh na ka? Anẽ.

Hãmri nhũm kãm:

—Tỳ. ãm hãmri ixte mẽ amã amnhĩ jarẽnh kênã. Ixpẽ Rõm nhõ xwỳnh na pa. Anẽ.

²⁸ Hãmri nhũm kãm:

—Kwa pa na pa pre amnhĩ to Rõm nhõ xwỳnh prãm xàj amnhĩ pãnhã mẽ kãm amnhĩrer rax nẽ. Anẽ.

Nhũm Pawre kãm:

—Tỳ nom pa na pa pre amnhĩ pãnhã mẽ kãm amnhĩrer kêt nẽ. Inhpêxã hkôt ixpẽ Rõm nhõ xwỳnh na pa. Anẽ.

²⁹ Hãmri nhũm mẽ kuma nẽ tee ri hamaxpẽr o kãm ma nẽ. Nẽ kãm ma ho hkaga kurẽ kumrẽx. Nhũm mẽ hkrãhtũm nhõ pahija mãänën kãm ma nẽ. Kệp Rõm nhõ xwỳnh tã nhũm mẽ axtem nẽ kot unẽnh nẽ kàx o hkaxpreja mã hamaxpẽr nẽ kãm ma nẽ. Na htem ã Rõm nhõ xwỳnhjẽ nhĩpêx anhỹr kêt nẽ. Na htem tanhmã mẽ hkukjêr to nẽ hprĩ hã mẽ kuma nẽ rĩ kor-mã tanhmã mẽ hipêx to.

Pawre kot Ijaew xàptàr tũmrejẽ mã amnhĩ jarẽnh

Matêwre 23.27-28

³⁰ Tã nhũm apkati nhũm pôristi krãhtũmja Ijaew kwỹ ho akuprõ. Mẽõ patre maati nẽ patre krãhtũmja nẽ mẽ àptàr tũmrejaja nhũm kot mẽ kãm tanhmã Pawre jarẽnh to kaxyw mẽ ho hpikuprõnh pa. Hãmri nẽ Pawre pẽ hkaxpre xà rẽ nẽ ma mẽ hwỳr o tẽ nẽ mẽ kutã ỳr.

23 Hãmri nhũm mẽ omu nẽ mẽ kãm amnhĩ jarẽ nẽ mẽ kãm:

—E ixkwỳjaja. Pa mẽ amã amnhĩ jarẽ ka mẽ inhma. Na pa hte Tĩrtũm nom tãm amnhĩ nhĩpêx o ixpa nẽ mẽ pahpẽ Ijaew mẽ pahte amnhĩ nhĩpêx kwỹm ri tanhmã amnhĩ nhĩpêx to hkêt nẽ. Anẽ.

² Hãmri nhũm mẽ õ patre maati ãnãñisti kuma nẽ kamã gryk nẽ. Axtem ãnãñisti hõ na pre. Hãmri nẽ ã Pawre kot amnhĩ jarẽnh anhỹrja ã kuma nẽ kamã gryk nẽ. Hãmri nẽ mẽ kot mar o kuhẽ xwỳnhjẽ mã kãm:

—Kwa mẽ atõ hakwap hkurahti ri. Tãm kot amnhĩ nhĩpêxti hã. Na ãm mẽ pamã amnhĩ to hẽx o xa. Anẽ.

³ Hãmri nhũm Pawre kuma nẽ hwỳr rĩt nẽ omu nẽ kãm:

—Nà ka koja Tĩrtũm akura kãm ga. Te ate finat Mojes kot ỳ hã kapẽr kôt amnhĩ nhĩpêx pyrãk tã ri axtem nẽ ri mẽ kot ijakwap ixkuranh kaxyw ri mẽ kãm ixtã amỹnẽ. Anẽ.

⁴ Hãmri nhũm kuri mẽ kuhẽ xwỳnhja tee ri ã kãm kapẽr anhỹrja ã kuma nẽ kãm:

—Kwa kệp patre maati kênã kot ka kêt ri ã kãm akapẽr anẽ. Anẽ.

⁵ Hãmri nhũm amnhĩ jaêr pẽ ja hã kuma nẽ kãm:

—Kwa ixte ja hã omunh kêt jakamã na pa ã ixtỳx kãm ixkapẽr anẽ. Ixte kệp patre maati hã omunh ron-hỹx pa ã kãm ixkapẽr anhỹr kêt nẽ. Tĩrtũm kapẽr ã kagã htũm kot ja nẽ mẽ pamã kapẽr kênã. Mẽ pahte

tanhmã mě panhõ pahi ho pakapër punuj to nê mě pamã kapër. Tã pa ãm ixtÿx ã kãm ixkapër anë. Anë.

⁶ HãMRI nê hprĩ hã mě kot mar o hkrĩ xwÿnhjê pumu. Nhũm mě kamã Satusew nhõ xwÿnh kwÿ nê Parijew nhõ xwÿnh kwÿ. Satusew mě Parijew nhõ xwÿnhjaja na htem axpën kwÿm ri tanhmã mě htykjê jarënh to. Satusew nhõ xwÿnhjaja na htem mě htyk nê mě hkarõ mē ro hã mě hapêx o mē hapêx ã mē hkamnhĩx. Nê Tirtũm kapër o mē wrÿk xwÿnh kêt ã mē harënh o pa. No Parijewjaja na hte mē kurom mē htyk nê akupÿm mē htĩr ã mē hkamnhĩx nê Tirtũm kapër o mē wrÿk xwÿnh ã mē hkamnhĩx. Nhũm Pawre kot ja hã mē omunh jakamã tanhmã hamaxpër to hãMRI nê mē kãm kapër. Na pre Parijew nhõ xwÿnhjê pyrã nê mē htyk nê akupÿm mē htĩr kôt hamaxpër nê Tirtũm kapër o mē wrÿk xwÿnh kôt hamaxpër. Jakamã mē omu nê kax pē mē kãm kapër nê mē kãm:

—Nã ijaxwÿja ixpē Parijew nhõ xwÿnh. Nhũm inhĩpēxã haxwÿja kēp Parijew nhõ xwÿnh. Jakamã na pa hte mē apē Parijew nhõ xwÿnhjê pyrã nê mē htyk nê akupÿm mē htĩr kôt ijamaxpër. Tã ãm ja pix mÿrapē na ka mē ixpynē nē ã inhĩpēx anë. Anë.

HãMRI nhũm Parijew mē Satusew nhõ xwÿnhjaja kuma nē ja hã axpën kãm gryk nē. Nē hã axpën mã akir. ⁹ HãMRI nē ra axpën mã ãkjê rax nē. HãMRI nhũm Parijew kwÿ pē Mojes kapër o mē ahkre ho mē pa xwÿnhjaja kãnhmã kuhē nē mē kãm Pawre hã àprãr kãm hihtÿx nē mē kãm:

—Kwa pēr tanhmã kot amnhĩ tomnuj tore hã. Mãn ãm hpimtir kãm na pre ã ri kaxkwa kamã mēmoj mar anë. Rÿ apu Tirtũm kapër o wrÿk xwÿnh kãm tanhmã kapër to nhũm pre Tamas wÿr pry kamã mar o xa rÿ ko. Anë.

¹⁰ HãMRI nhũm Satusew nhõ xwÿnhjaja tee ri Tirtũm kapër o mē wrÿk xwÿnh kot kãm kapër ã harënhja ma nē hã axpën mã ãkjê rax nē. HãMRI nhũm pôristi krãhtũmja tee ri mē kot axpën mã ãkjê ã mē omu hãMRI nē pôristi mã kãm:

—Kwa mē Pawre hwÿr tē nē mē kēp utã nē ma akupÿm o tē nē haxã. Kot ka mē ho anhÿr kêt nhũm mē tanhmã hamaxpër to nē gryk xaj axpën nhĩhkra kamã hkaxõnh pa. Anë.

HãMRI nhũm mē kuma nē hwÿr tē nē mē kēp utã nē akupÿm o tē nē ixkre hwÿr ho axã.

Jejus kot Pawre jamaxpër o hihtÿx ã harënh

Atre 18.9-10

¹¹ Tã nhũm kamãt nhũm Jejus tãm Pawre hwÿr kato nē kãm:

—Pa Pawre? Kwa tee ri amnhĩ kukamã ajamaxpër o amnhĩ kamã akahak kêt nē. Kot kaj te ra ate jar Jeru-jarē kamã mē kãm ijarēnhta pyrã nē ma krĩ pē Rõm wÿr mō nē krĩ nhõ xwÿnhjê mã ijarē. Anë.

Mē kot Pawre hã àmnēnh ã mē harënh

Sikũn Ximotre 4.18

¹² Tã nhũm apkati nhũm Ijaew kwÿjaja axpën wÿr akuprõ. Mēmyjaja kēp 40 nē axte hkõt mē hkwÿjaja ax-

pën wÿr akuprõ. Mē kot Pawre pĩr kaxyw hã axpën mar kaxyw hã akuprõ nē hã axpën mã amÿnē nē axpën mã:

—Tõe. Nã kot puj mē hpĩr kaxyw amnhĩ jagri htÿx o paxãpkur kêt rãhã kupĩ nē rĩ kormã apku nē ixkõ. Nã kot puj mē ho anë. Ra Tirtũm noo mã mē pahte ja hã amnhĩ jarënh kēnã. Anë.

¹⁴ HãMRI nē mē ma mē õ patre krãhtũmjê mē mē àp-tãr tũmrejê hwÿr mra nē mē kãm hã amnhĩ jarē nē mē kãm:

—Ot pa mē amã amnhĩ jarënh mã mra. Nã kot paj mē tã Pawre pĩ. Kot paj mē kormã hpĩr kêt ri ixãpkur kêt rãhã kupĩ. Ra mē ixte Tirtũm noo mã ja hã amnhĩ jarënh xã hkõt. ¹⁵ Jakamã e mē inhma. Kêr ka mē axêx rom pôristi krãhtũm mã anë kē apkati kē man mē awÿr Pawre ho tē. Te mē ate aprĩ hã hkukjêr kaxyw pyrãk o kãm axêx. Kojã mē kormã mē awÿr ho hpõx kêt ri pa mē unēn kupĩ. Anë.

¹⁶ HãMRI nhũm Pawre tãmnhwÿ mē kot ã hã amnhĩ jarënh anhÿrja ma hãMRI nē ma pôristi xãpēnh xã hã ixkrej wÿr Pawre hwÿr hprõt nē kãm mē harē. ¹⁷ HãMRI nhũm kuma nē amnhĩ wÿr pôristi krãhtũm nhÿ hã mē hamãr xwÿnh ã karõ nē kãm:

—Kwa ma mē akrãhtũm wÿr ixtãmnhwÿta o tē kē kãm mēmoj jarē nã? Anë.

¹⁸ HãMRI nhũm kuma nē ma hwÿr o tē nē kãm:

—E Pawre na inhmã anë pa awÿr htãmnhwÿ ho tē. Kot tanhmã amã ujarënh to kaxyw. Anë.

¹⁹ HãMRI nhũm omu nē hpa hã kupy nē o tē nē ahte mē hkã ã o xa nē kãm:

—E mãmrĩ inhmã mēmoj jarē pa ama. Mēmo na ka te inhmã harënh kaxyw? Anë.

²⁰ HãMRI nhũm kãm:

—Nã Ijaew xãptãr tũmrejaja na mē kot inhĩgêt Pawre pĩr kaxyw hã amnhĩ jarē pa amã harënh o tē. Kojã xep mē hã awÿ. Xep apkati nhũm ate ma mē hwÿr mē hkukjêr xã hã ixkre hwÿr ho amõr nhũm mē kot hprĩ hã kot amnhĩ nhĩpēx ã hkukjêr kaxyw. Nom kojã mē ãm amã amnhĩ to hêx. Kojã xep mē kēp 40 nē pry kamã kutêp amũxu nē kuhê. Na mē ra hã axpën mar pa nē axpën mã: “Kot puj mē paxãpkur kêt rãhã Pawre pĩ nē rĩ kormã apku nē ixkõ.” Anhÿr o amnhĩ jarē pa mē kuma. Jakamã na mē kormã ate mē hwÿr mēnh kaxyw akãm ama. Kwa mē hwÿr ho amõr kêt nē. Anë.

²² HãMRI nhũm kuma nē kãm:

—Tõe. Nã na pa ra ama. Mãmrĩ ma akupÿm tē. Nom kêr ka inhmar kumrêx. Kêr ka nhãm mēhõ mã ja jarënh kêt kumrêx. ãm kwarĩ ho kwarĩ. Anë.

HãMRI nhũm kuma nē kato nē ma akupÿm tē.

Mē kot Ijaew pymaj nhÿhÿm Pawre mēnh ã mē harënh

²³ Tã nhũm pôristi krãhtũmja amnhĩ wÿr ÿ hã pôristi jamãr o mē pa xwÿnh wa ho hamëxkrut nē wa hã karõ nē wa kãm:

—E wa inhma. Kojã kôt ã kamãt ka wa ma krĩ pē Se-jarej wÿr Pawre ho mō kē hkã hkĩnh pē pahihtĩ Peris wÿr pōj.

Nē amnhĩ kôt pôristi ho 200 nē o mō.

Ně kê mě kêp 70 ně kawar ã hkrĩ ně mẽ akõt mõ.
Ně kê mẽ kêp 200 ně wapo jamỳ ně mẽ akõt o mõ.
Kê mẽ ã ohtô rax aně.
Ně Pawre kot kawar ã ỳr ně mōr kaxyw ka mẽ kãm
hõ ho mõ.

E kêr ka mẽ ã axohtô ně hkõt amōr aně kê hkà hkĩnh
pê pahĩti Peris wỳr pōj. Aně.

²⁵ Hãmri ně pahĩti Peris mã kagà nhĩpêx ně kamã
kãm Pawre jarě ně kãm:

²⁶ Pa pahĩti Peris? Xà amex? Ixpê Kraw Risas na pa
awỳr kagà mẽ.

²⁷ E ot pa awỳr Ijaew pê Pawre mẽ. Na pre hkwyja
kot hpĩr kaxyw unênh tã pa mãânên kêp Rõm nhõ
xwỳnh ã harênh ma hãmri ně hwỳr inhõ pōristi rě
nhũm mẽ hwỳr hprõt ně mẽ kêp utà. ²⁸ Hãmri ně Ijaew
xàptàr tũmrejê hwỳr o tẽ. Mẽ kot inhãmã tanhmã kot
amnhĩ tomnuj to hã harênh kaxyw. ²⁹ Tanhmã kot
amnhĩ tomnuj to nhũm mẽ kot haxàr rỳ hpĩr ronhỹx ja
mex ně. No xep ãm kot mẽ higêtjê kot amnhĩ nhĩpêx
kõt amnhĩ nhĩpêx kêt pix mỳrapê na mẽ kamã gryk.

³⁰ Tã pa mẽ kot hpĩr kaxyw hã mẽ harênh ma ně mẽ
umaj awỳr kumẽ. Hãmri ně kamã mẽ gryk xwỳnhjê mã
ajarẽ. Jakamã koja mẽ mẽmo arĩgro hã awỳr pōj ně
tanhmã kot amnhĩ nhĩpêx to hã amã harẽ ka kam ja hã
mẽ ama ně tanhmã ho.

Tã ãm ja pix na pa amã harẽ. Ixpê Kraw Risas na pa
awỳr kagàja mẽ. Tã mãn ka arĩ ixte amã harênhja ma.
Aně.

³¹ Tã nhũm kamãt nhũm mẽ hkrãhtũm kot mẽ kãm
karõ xà hkõt nhũm pōristijaja ma Pawre o mõ. Hãmri
ně krĩ pê ãxipat wỳr pōj ně kamã amnhĩm hikra.

³² Nhũm apkati nhũm mẽ kot mẽ hkõt pykap mōr
xwỳnhjaja mẽ õ pahi kot mẽ kãm hã karõ xà hkõt aw-
janã ně ma akupỳm mõ nhũm kawar ã mẽ mōr xwỳnh
pixjaja ma Pawre ho mõ. ³³ Hãmri ně mõ ně Sejarej wỳr
pōj ně pahĩti Peris nhĩhkram Pawre jaxà ně kãm
kagàja gõ ně awjanã ně ma akupỳm hapêx. ³⁴ Hãmri
nhũm Perisa kagàja py ně omu. Nẽ omunh pa ně
Pawre mã kãm:

—E inhãmã amnhĩ jarẽ. Tanhmã na anhõ pyka hixi te?
Aně.

Nhũm kãm:

—Kêp Siris. Aně.

³⁵ Nhũm kãm:

—Tõe. Kê mẽ kot ato kapêr xwỳnhjaja pōj pa kormã
ixprĩ hã mẽ kot tanhmã ajarênh to ma mãn. Aně.

Hãmri ně õ pōristi mã aně nhũm mẽ ma Pawre o tẽ.
Ma pahi Eroxy htyk xwỳnh nhõrkwy hwỳr o tẽ ně kamã
haxà nhũm hkrĩ ho hkrĩ.

Ijaew kot tanhmã Pawre ho kapêr punuj to hã mẽ harênh

Rukre 21.12-13; Atre 25.7

24 Tã nhũm arĩgro kêp 5 ně hapêx nhũm Ijaew
kwỳjaja Sejarej wỳr pōj. Mẽ õ patre maati
ãnanĩsti ně Tetur ně kaxyw mẽ àptàr tũmrejaja nhũm
mẽ ma hwỳr mõ ně pōj. Tetur kêp axiwôkat ã mẽ yr pê
kapêr xwỳnh jakamã nhũm mẽ kot tanhmã Pawre o

kapêr punuj to kaxyw pahi Peris wỳr amnhĩ kõt o mõ.
² Hãmri nhũm mẽ amnhĩ wỳr Pawre hã karõ nhũm
pōristi haprõ ně mẽ hwỳr o tẽn ho axà. Hãmri nhũm
Teturja pahĩti Peris mã Pawre kot tanhmã amnhĩ
tomnuj to hã harẽ ně kãm:

—E pahĩti inhma. Nà na ka hte tãm mẽ inhĩpêx ně
mẽ ixto mex o apa. Jakamã nhũm hte nhãm pika hkwy
nhõ xwỳnhjaja mẽ ixkurê kaxàr kaxyw mẽ ixwỳr hprõt
kêt ně. Pa htem ixpiitã akukwak ri ijamakêtkati ně
ixãmnhĩx inhmx nə ixpa. ³ Nẽ mẽ ixkĩnh rãhã ho ixpa.
Hêxta waa ně. Mẽ ixpiitã inhãmã akĩnh. ⁴ E kot paj amã
awjarẽ ka inhma. Kot paj ixujarênh o hakotre ka inhma
ně tokyx ma akupỳm tẽ. ⁵ Nã Pawre na hte amnhĩ tom-
nuj pix o pa. Kêp Jejus pê Najare nhõ xwỳnhhta kõt
amnhĩ nhĩpêx o mẽ pa xwỳnhjê nhõ pahi na. Jakamã
na hte pyka piitã hkõt mẽ ixpê Ijaew tanhmã axpên
kaxyw mẽ ixkryx to ho pa. ⁶ Jãã na pre Tĩrtũm mã amn-
hĩ jarênh xà hã ixkre hwỳr amnhĩ kõt mẽ kêp Ijaew kêt
xwỳnh kwỳjê ho agjê ně mẽ ixpê ixkreja omnu kaxyw
mã tã pa mẽ omu ně unẽ. ⁷ Tã nhũm pōristi krãhtũm
Risasja mẽ ixpê utà ⁸ ně awỳr mẽ ixte tanhmã amã
harênh to xwỳnhjê rě. Tã ot pa mẽ ixkrĩ. Nẽ ota Pawre
nhỹ. Kam kot amnhĩ nhĩpêx ã hkukja kê tanhmã amã
amnhĩ jarênh to ka ama ně ixte amã harênh xà hkõt
tanhmã mar to. Aně.

⁹ Hãmri nhũm Ijaew hkwy haxwỳja kãm:

—Nã ãm hãmri na ã amã harênh aně pahĩti. Aně.

Pawre kot pahĩti mã amnhĩ jarênh

Rukre 21.14-19

¹⁰ Hãmri nhũm pahĩti Peris Pawre mã aně nhũm kot
kãm amnhĩ tã àprãr kaxyw kãnhãmã xa ně kãm:

—Nà na ka ra inhõ pyka kamã mẽ ixto amnhĩptàr
mex o atã amgrà xohtô ně pahĩti. Jakamã na pa pre
ate ixkapêr mar kaxyw ã ajarênh ma ně ixkĩnh ně.

¹¹ —E kot paj amã amnhĩ jarẽ ka inhma. Ham na pa
pre Jerujarê hwỳr mõ ně pōj. Na pa hwỳr ixpõx ã ixtã
arĩgro pê 12 pix. Kam ně ixtã ixkwỳjê kukja ně mẽ ama.
Ixte Tĩrtũm mã amnhĩ jarênh xà hã ixkre kamã Tĩrtũm
mã mex o mex ã harênh kaxyw na pa pre hwỳr mõ.

¹² No na pa pre nhỹri axpên kaxyw tanhmã ri mẽ hkryx
to hkêt ně. Nẽ mẽ ixte Tĩrtũm mã amnhĩ jarênh xà hã
ixkre kamã rỳ kapêr o mẽ ahkre xà hã ixkre kamã rỳ
nhỹri pry kamã tanhmã axpên kaxyw ri mẽ hkryx to
hkêt ně. ãm amrakati ho amrakati. ¹³ Mẽ kot ã ri
ijarênh anhỹrja amrakati kumrêx. Mẽhõ kot ã ixte
amnhĩ nhĩpêx anhỹr ã ixpumunh kêt tã na htem amnhĩ
krã hkõt amã ijarênh o hêx. ¹⁴ Na htem mẽ ixte Jejus
kõt amnhĩ nhĩpêx xwỳnhjaja mẽ ixte amnhĩ nhĩpêx
mex kêt ã mẽ ijarẽ nom kot anhỹr kêt. ãm mẽ in-
hĩgêtjê nhõ Tĩrtũm kapêr nywja kõt na pa hte amnhĩ
nhĩpêx mex o ri ixpa rãhã ně. Nhũm ixkwỳjaja htyx ax-
tem kapêr õ hkõt ixte amnhĩ nhĩpêx o ixpa hã ixkamn-
hĩx no ãm kapêr õ hkêt. Ijaxwỳja na pa hte mẽ uràk ně
finat Mojes kapêr ã kagà mar o ixpa. Nẽ Tĩrtũm nhỹ hã
mẽ kapêr o mẽ pa xwỳnh kot kapêr ã kagàja pa hte
mẽ uràk ně hkõt amnhĩ nhĩpêx mex o ri ixpa. ¹⁵ Nẽ mẽ
uràk ně Tĩrtũm kot nhỹrmã akupỳm mẽ ho htĩr kõt pa

hte ijaxwýja ijamaxpër tÿx nê. Mê htyk xwýnh piitää. Mê kot amnhî to mex xwýnhjê mê mê kot amnhî tomnuj xwýnhjê mê mê ho hpimràatã akupým mê ho htír-ja kôt pa hte mê uräk nê ijamaxpër tÿx o ri ixpa.

¹⁶Jakamã na pa hte tãm amnhî nhîpêx rãhã nê. Tirtüm noo mã nê mê piitã mê noo mã tãm ri amnhî nhîpêx mex rãhã nê.

¹⁷—Tã na pa pre pyka hkwý hkôt ri ixpa hã ixtã amgrã xohtô nê. Hãmri nê ma akupým Jerujarê hwýr ixkwýjê hwýr mõ. Amarí ixte mê kãm kãxpore hkwý nhôr kaxyw pa akupým mê hwýr mõ. Nê mãänên Tirtüm mã mëmoj nhôr kaxyw. ¹⁸Hãmri nê mê ixte amnhî nhîpêx xà hkôt pa mê amnhî to mex pa nê ma tèn Tirtüm mã amnhî jarênh xà hã ixkre hwýr axà nhüm mê kamã ixpumu. Nom na pa pre ri ixkreja kamã tanhmã amnhî tomnuj to hkêt nê. Rý tanhmã ixkapër punuj to hkêt nê. Na pa prem ãm inhgrêre nê akryk ixkuhê nhüm mê ixpumu. ¹⁹Pika pê As rüm Ijaew kwýjaja na prem ixkre kamã ixpumu. Nar mê tãmjaja mãn awýr mra nê tanhmã amã ijarênh to.

²⁰—Nê jar mê kot ixto kapër xwýnhjaja. Na pa pre mê àptär tùmrejê mã amnhî jarênh pa nhüm mê inhma nê tanhmã inhmã nê hkêt nê. Kam nê ja hã mê hkukja nê mê ama. ²¹Rý ko. Koja apu mê amã ãm ja pix ã ijarênh japêr. Na pa pre mê kãm ixkapër nê mê kãm: “Na pa hte mê htyk nê akupým mê htír kôt ijamaxpër tÿx nê. Tã ja pix mýrapê na ka prem ixpynê nê ã inhîpêx anê.” Anhýr o mê kãm ixujarênh jakamã nhüm apu mê hkwyjaja kêp ja omnuj nê. Jakamã koja apu mê amã ja hã ijarênh japêr. Nom ja pix jarê. Anê.

Ã na pre Pawreja pahi Peris mã amnhî jarênh anê.

Peris mê hprõ wa kot Pawre mar ã wa harênh

²²Tã nhüm pahihtî Peris kot mê kot Jejus kôt amnhî xunhwýr xwýnhjê kot amnhî nhîpêx ã mê omunh mex jakamã hãmri Pawre mar pa nê ho kapër xwýnhjê mã kãm:

—Nà hãmri. Na pa ra mê ama. E mê mamrí ma mra. Kê pôristi krãhtüm Risasja mõ nê pøj pa wa ixprí hã mê ate tanhmã harênh toja ma nê rí kormã tanhmã Pawre jarênh to. Anê.

²³Hãmri nê hpãnhã pôristi pytär xwýnh mã Pawre jarê nê kãm:

—E mê ma akupým ixkre hwýr o tẽ nê kamã hamãr o apa. No ãm kwãr mãmrí àmnhîx ri ixkre kamã tanhmã amnhî to ho ri pa. Nê kê hkrãmnhwýjaja mãmrí hwýr mëmoj to mra kê kuku. Anê.

Hãmri nhüm mê kuma nê ma o tẽ nê akupým ixkre hwýr ho axà nhüm kamã pa ho pa.

²⁴Tã ra hã apkati grêre nhüm Peris mê hprõ wa ma Pawre hwýr tẽ. Prõ haxwýja kêp Ijaew. Hixi pê na pre Turujire. Jakamã nhüm wa ma Pawre nhôrkwý hwýr wa tẽ. Nhüm Peris Pawre hã karõ nhüm kato nê wa hwýr tẽ nê wa kãm awjarê. Tanhmã wa kot amnhî to nê amnhî kaxyw Jejus Kris kôt hamaxpër nê hkôt amnhî xãm prãm xaj hprí hã wa kãm harê. ²⁵Nê wa kãm:

—Nà na htem Jejus Kris kôt amnhî nhîpêx nê tãm ri amnhî nhîpêx o pa. Kãm tanhmã amnhî tomnuj to

hprãm tã ho anhýr kêt nê. Nê arí Jejus kot amnhî nhîpêx kôt amnhî nhîpêx o pa. Koja Tirtüm nhýrmã mê pahpiitã mê pahte tanhmã amnhî nhîpêx to ho papa hã mê pahpumunh xà hkôt tanhmã mê pajarênh to. Mê pahte tãm amnhî nhîpêx xwýnh ã mê pajarê rý mê pahte amnhî tomnuj xwýnh ã mê pajarê. Anê.

Nhüm pre ã Pawre Peris mê Turujire wa kãm kapër anê. Hãmri nhüm Peris tee ri ujarênhja ma nê kãm ma nê. Kot amnhî tomnuj o pa xwýnh ã amnhî pumu nê ã kãm kapër anhýrja mar puma nê. Hãmri nê Pawre mã kãm:

—E hãmri. Nà na pa wa ra ama. Mamrí ma akupým tèn axà. Kot paj mëmo arígro hã mëmoj to anhýr kêt nê axte amnhî wýr atã karõ ka axte tanhmã wa inhmã axujarênh to. Anê.

²⁶Nê htÿx hamaxpër o:

—Nà kot paj mëmo arígro hã axte amnhî wýr hã karõ kê ixwýr tẽ nê ixte kator prãm xaj inhmã amnhîr-er japêr. Anê.

Hãmri nê xatã amnhî wýr hã karõ htã no nhüm aa kot kator kaxyw tanhmã kãm nê hkêt nê.

²⁷Tã nhüm amgrã axkrut nê hapêx nhüm Pos Pesti pahi Peristi hpãnhã kêp mê õ pahi nê mê ho amnhîp-tã. Jakamã nhüm Peris akupým õ krí hwýr nojarêt nê Pawre mã ðhkra karo hkêt rãhã ma mõ. Na pre hamaxpër o:

—Nà kot paj Pawre kator nhüm Ijaew ja hã ijarênh ma nê ixkamã gryk nê. Nà kwãr mê hagjênh xà hã ixkre kamã hkrí ho hkrí. Kot paj kator kêt nê. Anê.

Hãmri nê kãm ðhkra karo hkêt rãhã ma akupým õ krí hwýr mõ. Jakamã nhüm Pawre arí ixkre kamã kêp prês nê hkrí ho hkrí.

Pawre Rõm wýr hkrã ã harênh

25 Tã nhüm pahi nyw Pos Pesti krí pê Sejarej wýr mõn pøj. Hãmri nê kamã ri pa hã apkati axkrunêpxi pix nê ma Jerujarê hwýr mõ. ²Hãmri nê hwýr pøj nhüm Ijaew kwýjaja omu nê hwýr mra nê kãm Pawre ho kapër nê hã hwýr kurê kumrêx. Mëõ patre krãhtümjê mê Ijaew xàptär tùmrejaja nhüm mê hwýr mra nê kãm:

³—Pa pahihtî? E ot pa mê awýr mra. Kwa xà kot ka Pawre hã karõ kê man awýr mõ ka jar kot tanhmã amnhî tomnuj to hã hkukja nê ama? Anê.

No ãm hêx rom ã hã kãm kapër anê. Kot hã karõ nhüm mê kot pry hã hpír kaxyw nhüm mê hêx rom ã kãm kapër anê. ⁴Hãmri nhüm mê kuma nê mê kãm:

—Tk. Kwa ra Sejarej kamã kêp prês nê hkrí kênã kot pa kêt amnhî wýr hã karõ. Kot pa tokyx ma akupým hwýr mõ. ⁵Jakamã kêr ka mê axàptär tùmjaja ma ixkôt mra. Hãmri nê Sejarej kamã inhmã tanhmã kot amnhî tomnuj to hã harênh to pa mê ama nê rí kormã tanhmã harênh to. Anê.

⁶Hãmri nê mê kamã pa hã apkati grêre nê ma akupým Sejarej wýr mõ. Hãmri nê hwýr pøj nhüm apkati nhüm mê hkukjêr xà hã ixkre hwýr tẽ nê mê kot mê mar xà hã mê hkrí xà kamã nhý nê amnhî wýr Pawre hã karõ. ⁷Nhüm mê hwýr o tẽ nê ýr nhüm hkwý

kot Jerujarë rûm më mör xwÿnhjaja kãm hipök në pahi Pos Pesti mã tanhmã ho kapër to në ho kapër punuj tÿx në. Kot tanhmã amnhĩ tomnuj to ho pa hã ho kapër o kuhê. Nom më kot ã kot amnhĩ nhĩpêx anhÿr ã omunh kêt tâ ãm amnhĩ hkrã hkôt ri tanhmã ho hêx to. ⁸Jakamã nhũm Pawre tee ri amnhĩ tâ më kot ho hêxja ma në kãnhmã xa në Pos Pesti mã amnhĩ tâ aprã në më kãm:

—Nà aa ixte ã amnhĩ nhĩpêx anhÿr kêt. Na pa finat Mojes kot Tirtũm nhÿ hã kapër nhĩröp ixãm në hkwÿm ri tanhmã amnhĩ nhĩpêx to hkêt në. Në më ixte Tirtũm mã amnhĩ jarênh xà hã ixkre kamã ri tanhmã ixtÿx ri amnhĩ nhĩpêx to hkêt. Në pahihti Sesti kapërja pa pre hiröp ixãm në tanhmã amnhĩ tomnuj to hkêt në. Aa ixte ã amnhĩ nhĩpêx anhÿr kêt kumrêx. Anê.

⁹Hãmri nhũm Pos Pesti kuma në tanhmã hkukamã hamaxpër to në hamaxpër o:

—Kwa nhÿ krĩ kamã kot pa we Pawre kot inhmã tanhmã amnhĩ jarênh toja ma nhũm Ijaew ja hã kãm ixkĩnh japêr? Nà mëõ krĩ pê Jerujarë hwÿr kot paj akupÿm më hwÿr o mõ në kamã mãn hkukja në kuma. Nà ja na mex. Nà kot paj anê. Anê.

Hãmri në Pawre mã kãm:

—E xà kot puj ma akupÿm Jerujarë hwÿr mõ pa kamã axte më kot ajarênh ma në tanhmã ajarênh to nà? Anê.

¹⁰Hãmri nhũm kãm:

—Nà jar ixte pahihti Sesti nhÿ hã më kot më hkukjêr xà hã ixkre kamã inhÿr në amnhĩ jarênh kênã. Jar na htem më hkukja në tanhmã ri më mar to. Na pa pre tanhmã ixkwÿjê ho hkêt në. Mëmo kaxyw kot pa akupÿm më hwÿr mõ në axte më kãm amnhĩ jarê?

¹¹Kop apu pa tanhmã ixte amnhĩ tomnuj to ronhÿx më mãmrĩ ja hã ixpĩ pa më kêp tanhmã ri amnhĩ to hkêt në. Nom më kot ixto hêx pix o ã ijarênh anhÿr kênã. Jakamã mëmo mÿrapê kot kaj më ïhkram ijaxà? E Röm kãm pahi maati Sesti hwÿr mãn inhmẽ pa kumã mãn amnhĩ jarê. Anê.

Pahi Sesti kêp pyka piitã hkôt më ho amnhĩptar xwÿnh maati jakamã nhũm Pawre kot mar kaxyw hwÿr hkrã. ¹²Hãmri nhũm Pos Pesti kuma në ma tẽ në hã õ kôwenatôjê ma. Hãmri në hã axpên mar pa në akupÿm hwÿr tẽ në kãm:

—Tôe. Nà kot paj pahi maati Sesti wÿr amẽ. Ra hwÿr akrã kênã. Anê.

Pos Pesti kot Akrip mã Pawre jarênh

¹³Tã nhũm apkati grêre në hapêx nhũm pahi hõ pê Akripja ma Pos Pesti hwÿr mõ. Tõx Perênĩs më wa mõ. ¹⁴Hãmri në wa hwÿr pøj në kuri wa pa hã apkati grêre nhũm Pos Pesti wa kãm Pawre jarê në wa kãm:

—E pa war amã mëhõ jarê. Na pre pahi Perisja më hagjênh xà kamã mëhõ jaxà në kormã kator kêt ri nhũm më ãpênh në kator pa hpãnhã ãpênh o amnhĩptã. ¹⁵Tã ra ma Jerujarë hwÿr mõ nhũm Ijaew nhõ patre krãhtũmjê më më ãptar tũmrejaja inhmã ho kapër punuj rax në. Në ixte më kãm hpĩr kaxyw inhmã hã ãmnênh kãm hihtÿx në. ¹⁶Nom pa më kêp ja kaga në

më kãm: “Nà më ixpê Röm nhõ xwÿnhjaja na pa htem ã më hipêx anhÿr kêt në. Na pa htem më kot ho kapër xwÿnh noo mã tanhmã hkukjêr to nhũm tanhmã amnhĩ tâ ãprãr to pa htem kuma në rĩ kormã tanhmã më ho. No na pa htem kormã më kot tanhmã amnhĩ jarênh to hkêt ri tanhmã më ho hkêt në.” Anê.

¹⁷—Jakamã nhũm prem kaxyw Sejarej wÿr pøj nhũm apkati pa hã më hkukjêr kurê kumrêx. Në më kot më hkukjêr xà hã më hkrĩ xà kamã nhÿ në ixte hkukjêr kaxyw amnhĩ wÿr Pawre hã karõ. ¹⁸Na pa pre ijamaxpêr o: “Mãn pre tanhmã amnhĩ tomnuj tÿx to hã na më inhmã harênh kaxyw.” ¹⁹Anhÿr ã hkamnhĩx tâ te kot amnhĩ to mex xwÿnh pyrãk. ãm kot më hkôt amnhĩ nhĩpêx kêt pix ã nhũm më inhmã harê. Në kaxyw mëhõ htyk xwÿnh jarê. Më kot kãm “Jejus” anhÿr xwÿnhja na xep hte më kãm akupÿm htĩr ã harênh o pa. ãm ja pix na prem inhmã harê. ²⁰Pa tee ri ixte nhÿri ixpĩ hã tanhmã më kot harênh to hã më mar kaxyw hkukamã ijamaxpêr. Hãmri në hã Pawre kukja në kãm: “Xà kot puj ma akupÿm Jerujarë hwÿr mõ pa axte akwÿ kot tanhmã ajarênh to ma në rĩ kormã tanhmã ajarênh to nà?” ²¹Anhÿr tâ no nhũm akupÿm Jerujarë hwÿr mõ kaga kumrêx në amnhĩm Röm kãm pahi maati Sesti jarê. Ixte ma hwÿr mênh nhũm kot kãm amnhĩ jarênh nhũm kot mar në tãm tanhmã harênh to kaxyw. Jakamã pa kormã ixte hwÿr mênh kaxyw amnhĩ xa hã akupÿm më hagjênh xà kamã haxà nhũm arĩ hkrĩ ho hkrĩ. Anê.

²²Hãmri nhũm Akrip kuma në kãm:

—Xôwehe? Kwa na pa inhmã tanhmã kapër to mar prãm në. Anê.

Hãmri nhũm kãm:

—Tôe. Nà kê apkati pa hã karõ ka tanhmã kapër mar to. Anê.

²³Jakamã nhũm apkati nhũm Akrip më htõx Perênĩs wa pahi hã më ê mex jagjê në ma më hkukjêr xà hã ixkre hwÿr wa tẽ. Pôristi krãhtũm kwÿjê më Sejarej kamã më kot amnhĩ to rũnh xwÿnh kwÿjê më nhũm më hwÿr akuprõ. Nhũm më piitã Akrip më htõx wa kêp pahi hã wa ê mex ã wa omu në wa kamã no puma në. Hãmri nhũm Pos Pesti Pawre hã karõ nhũm më haprõ në ma më hwÿr o tẽ. ²⁴Hãmri nhũm Pos Pesti omu në Akrip më htõx më më kot mar o hkrĩ xwÿnhjê mã kãm:

—E pahihti Akrip më më apikuprõnh xwÿnhjaja. Ota Pawre xa. Jerujarë kamã në jar Sejarej kamã na pre hk-wÿjaja inhmã ho kapër rax në. Hãmri në ixte hpĩr kaxyw inhmã hã ãmnênh kãm hihtÿx në. ²⁵Nom më-moj mÿrapê kot pa kêt kupĩ? Tã nhũm amnhĩm pahi maati Sesti jarê pa ma hwÿr mênh kaxyw. ²⁶Nom na htem amarĩ pahi maati Sesti hwÿr më rênh kêt në. Na htem kãm më kot tanhmã amnhĩ tomnuj to hã kaga në hwÿr kaga më ro hã më kurê. No jahti kot tanhmã amnhĩ tomnuj toja na ixte omunh kêt. Te inhmã tanhmã kot amnhĩ tomnuj to hkêt pyrãk. Jakamã na pa më awÿr o tẽ. Më ate kapër mar në kot tanhmã amnhĩ tomnuj to hã inhmã harênh nhũm ixte hã kaga në pahi Sesti hwÿr mênh kaxyw. Jakamã e më kam në hkukja në ama në tanhmã mar to. Anê.

Pawre kot pahihti Akrip mã amnhĩ jarēnh

Atre 8.3, 9.1-19, 22.1-21

26 Hāmri nhūm Akrip Pos Pesti kot tanhmã Pawre jarēnh toja ma nē Pawre mã kãm:

—E māmri mẽ inhmã amnhĩ jarē pa mẽ ama. Anē.

Hāmri nhūm kuma nē kãm amnhĩ jarēnh kaxyw kànhmã kãm ĩhkra pē nē kãm:

²—Hêxta waa nē. Nà na pa amã amnhĩ jarēnh kaxyw nē ixkĩnh nē pahi Akrip. Ra ate mẽ ixpē Ijaew kot amnhĩ nhĩpêx ã mẽ ixpumunh mex. Nē mẽ ixte tanhmã amnhĩ nhĩpêx to hã mẽ ixte axpēn kukjêrta ate hã mẽ ixpumunh mex. Jakamã na pa amã amnhĩ jarēnh kaxyw nē ixkĩnh nē. E tokyx anojarêt kêt nē inhma. Pa amã ixujarēnh jatur xàm kumē ka aprĩ hã inhma. ⁴Nà ixkwýjaja ra mẽ kot ixte amnhĩ nhĩpêx ã ixpumunh mex. Ixpĩre rúm ixpapxà kamã nē mãänēn Jerujarē kamã ixte tanhmã amnhĩ nhĩpêx to ho ixpaja mẽ kot hã ixpumunh mex. ⁵Ixpē mẽ hwý pē Parijew nhõ xwýnh kwýjê hã mẽ kot ixpumunh. Kojã mẽ apu ja hã amã ijarēnh japêr rý ko. Mẽ ixpē Parijew nhõ xwýnhjaja na pa htem amnepēm finat Mojes kot Tirtüm nhỹ hã mẽ inhĩgêjtjê mã mẽmoj tã karõ xà hkôt amnhĩ nhĩpêx mex o ixkwýjê jakre.

⁶—Amnepēm na pre Tirtüm mẽ inhĩgêjtjê mã tanhmã amnhĩ jarēnh to. Kot nhỹrmã mẽ piitã akupým mẽ ho htĩr ã amnhĩ jarē. Tã ixte ja kôt ijamaxpêr pix mýrapê na prem kot hã amã ixto kapêr kaxyw awýr ixto mõ. ⁷Mẽ ixpē Ijaew nhĩgêjtjê piitã na prem Tirtüm kapêr kôt hamaxpêr o ri pa. Kot nhỹrmã akupým mẽ ho htĩr ã amnhĩ jarēnh kôt hamaxpêr tỳx o pa. Amnepēm finat jako mẽ hkra pē 12jaja na prem hkôt hamaxpêr. Nē ixpē mẽ hkanrêhã mẽ htãmnhwý na pa hte ijaxwýja ja kôt ijamaxpêr tỳx rãhã ho ri ixpa. Tã ãm mẽmoj pixi mýrapê na ixkwýjaja ã amã ixto kapêr punuj anē. ⁸Mẽ kot ixpyrã nē ja kôt hamaxpêr ã amnhĩ jarēnh tã nhūm pre Tirtüm akupým Kra Jejus o htĩr nom nhūm mẽ ixkĩnhã ja kôt hamaxpêr kêt. Nom Tirtüm kêp akupým mẽ pahto pahtĩr xwýnh kênã.

⁹—Amnepēm kormã Jejus kôt ijamaxpêr kêt ri na pa pre ijaxwýja mẽ urak nē akupým htĩr kôt ijamaxpêr kêt nē. Nē ixtỳx ijamaxpêr o: “Kot paj Jejus pē Najare nhõ xwýnh kôt mẽ kot amnhĩ xunhwýr xwýnhjê nhĩpêx kati ho ixpa nhūm Tirtüm ja hã ixpumu nhūm ja kãm mex nē.”

¹⁰—Anhỹr jakamã pa pre hte tanhmã mẽ homnuj tỳx to ho ri ixpa. Jao Jerujarē kamã mẽ inhõ patre krãhtümjê nhỹ hã mẽ unê nē mẽ hagjênh xà kamã mẽ hagjênh o ixpa nhūm mẽ kot mẽ himex kaxyw mẽ hã inhmã amnhĩ jarē nhūm ja inhmã mex nē. Pa mẽ harēnh ma nē ixkĩnh nē. ¹¹Pa pre hte xatã tanhmã mẽ hipêx to nē mẽ kot Jejus kaga hprãm xaj mẽ hipêx kati rũnh nē. Tirtüm kapêr o mẽ ahkre xà hã ixkre piitã kamã pa pre hte ã mẽ hipêx anē. Nē mẽ kamã inhgryk tỳx jakamã ma krĩ hwý hkôt mẽ hapêr o ri ixpa. ã na pa pre mẽ hipêx anhỹr o ri ixpa.

¹²—Tã axte ixte mẽ hwýjê pynēnh nē mẽ hagjênh kaxyw ma Tamas wýr mõ. Mẽ inhõ patre krãhtümjê

nhỹ hã ma mẽ hwýr mõ. ¹³Hāmri nhūm ra kaxkwa nhĩpôk ri myt nhỹ pa kormã pry hã inhmör ri kaxkwa rúm mẽmo nhĩrãja pumu. Nhūm hirã htỳx o myt jakre nē ixtã ajêt pa ixkôt ri mẽ pa xwýnhjê mẽ hipôk ri ixkuhê. ¹⁴Hāmri nē mẽ inhmã ma xaj pykap ixrôrok pa nhūm kaxkwa rúm mēhõj inhmã kapêr. Mẽ ixpē Ijaew kapêr o kapêr nē inhmã: “Pa Sawti? Hêxta waa nē. Kwa mon ka hte axtem nē ixtomnuj tỳx o ri apa? Nom na ka tee ri ã amnhĩ nhĩpêx anhỹr kaprý.” Anē. ¹⁵Hāmri pa tee ri kuma nē kãm: “Kwa mẽ atõ na ka ã inhmã akapêr anē?” Anē.

—Hāmri nhūm inhmã: “Ixpē Jejus na pa amã ixkapêr. Pa na ka hte ixpê ixkôt mẽ kot amnhĩ xunhwýr xwýnhjê homnuj tỳx o apa ho te pa ixtomnuj tỳx pyrak. ¹⁶E kànhmã xa. Ate inhmã tanhmã amnhĩ nhĩpêx to ho apa kaxyw na pa amã amnhĩ to amnhĩrit. Jarãhã ate ixpumunh xà hkôt ate mẽ kãm ma ijarēnh nē mẽ kãm ixkapêr jarēnh o mẽ ahkre ho ri mẽ hkôt apa kaxyw na pa amnhĩ kaxyw ata. Kot paj nhỹrmã axte awýr ixkato nē tanhmã amã ixkapêr to ka inhma nē ma mẽ kãm ixkapêr jarēnh o ri mẽ hkôt apa. Ja kaxyw na pa amnhĩm ata.” Anhỹr o inhmã kapêr. ¹⁷Hāmri nē inhmã: “E kot paj Ijaew mẽ Ijaew kêt xwýnhjê hwýr amē nē anē mẽ omunh mex nē nhūm mēhõ apĩr kêt nē. ¹⁸Kêr ka ma mẽ hkôt mẽ kãm ixkapêr jarēnh o ri apa kê mẽhprĩ hã kuma. Mẽ kot amnhĩ tomnuj kaga nē amnhĩ kaxyw ixkôt hamaxpêr nē ixkôt amnhĩ xunhwýr kaxyw. Hāmri nhūm Tirtüm ja hã mẽ omu nē ixkukwak ri amnhĩ katut kôt mẽ kot amnhĩ tomnuj piitã rēnh pa nē axte kãm hamaxpêr kêt nē. Hāmri nē mẽ ho hkra. Kojã mẽ ã amnhĩ nhĩpêx anē hāmri nē axte Satanasti nhỹ hã tanhmã amnhĩ nhĩpêx to hkêt nē. Pãnhã Tirtüm kôt pix mã amnhĩ nhĩpêx o pa.” Anē.

¹⁹—ã na pre Pahihti Jejus inhmã kapêr anē. Tã kot kaxkwa rúm inhmã ixapênh jarēnh ã karõja pa pre mar tỳx nē hkôt amnhĩ nhĩpêx rãhã ho ri ixpa pahi Akrip. ²⁰Jakamã na pa pre ma mẽ hkôt mẽ kãm kapêr jarēnh o ri ixpa. Tamas kumrêx hwýr nē hpãnhã Jerujarē hwýr nē hpãnhã pika pē Jutej piitã hkôt Ijaew mã kapêr jarēnh o ri ixpa. Tã hpãnhã Ijaew kêt xwýnhjê mã harē. Na pa hte mẽ kãm ixkapêr o: “Kwa mẽ ate amnhĩ tomnuj kaga nē hpãnhã Tirtüm kôt amnhĩ xunhwý. Hāmri nē hkôt pix mã amnhĩ nhĩpêx o ri apa. Mẽ piitã mẽ kot apê hwý hã mẽ apumunh kaxyw.” Anē.

²¹—ãm ja pix mýrapê na pre ixkwýjaja ixpynê. Tirtüm mã amnhĩ jarēnh xà hã ixkre kamã ixpynê nē ra mẽ kot ixpĩr kaxyw. ²²Nom na hte Tirtüm ixtãnopxa nē ixto ixihtỳx mex rãhã ho pa pa arĩ mẽ kãm harēnh o ri ixpa. Mẽ kot amnhĩ to rũnh xwýnhjê mã nē mẽ kêp amrakati xwýnhjê mã nē mẽ piitã mẽ kãm harēnh o ri ixpa. Finat Mojes mẽ Tirtüm nhỹ hã kapêr jarēnh o mẽ pa xwýnhjaja kot ra hkukamã tanhmã harēnh to xà hkôt pa hte mẽ kãm harēnh o ri ixpa. Nē mẽ kãm: “Tirtüm kot mẽ pakaxyw ãm xwýnhta na pre amnhĩ xà htỳx kamã hamak kãm ty. Tã nhūm Tirtüm akupým ho htĩr. Kumrêx na pre akupým ho htĩr jakamã kumrêx na pre tanhmã mẽ kãm kapêr to ho ri mẽ hkôt pa. Mẽ kot amnhĩ kaxyw hkôt hamaxpêr nē hkôt amnhĩ xunhwýr

xwýnh piitã uràk nê nhÿrmã Tirtùm mẽ wa õ krí kamã htír tùm nê pa ho pa hprãm xàj mẽ harênh o pa. Mẽ ix-pê Ijaew nê mãänën mẽ apê Ijaew kêt xwýnhjaja nhùm pre ã mẽ pajarênh anê." Anhÿr o pa hte mẽ kãm harênh o ri mẽ hkôt ixpa pahi Akrip. Anê.

²⁴ Nhùm Pawre kormã kot mẽ kãm amnhĩ jarênh par kêt ri nhùm Pos Pesti tee ri tanhmã Jejus jarênh to hã kuma nê kàx pê kãm kapêr nê kãm:

—Kwa na ka akrã axpã nà? Pêr ate kagà pumunh tÿx kurê akrã pipãnh pyrãk o ri atÿx ã ri mẽ inhmã axu-jarênh anê. Anê.

²⁵ Hãmri nhùm kãm:

—Nà ixkrã pipãnh kêt. ãm hãmri na pa mẽ amã aw-jarê. ²⁶ Jerujarê kamã na prem Jejus pĩ nhùm mẽ piitã omu. Tã nhùm akupÿm htír hãmri nê hpimxur pê ri pa hkêt nê. Na pre mẽ ohtô nê akupÿm htír kãm omu. Pahi Akrip ra kot ja mar mex jakamã na pa ixãmnhĩx ã mẽ amã harênh anê.

²⁷ Anhÿr o kãm kapêr hãmri nê pahi Akrip wÿr rĩt nê kãm:

—Kwa pahi Akrip. Xà Tirtùm nhÿ hã kapêr jarênh o mẽ pa xwýnhjaja kot Jejus kukamã tanhmã harênh to-ja kôt na ka hte ajamaxpêr? Nà ra hkôt ajamaxpêr kênã. Ra ixte ajamaxpêr kôt apumunh mex. Anê.

²⁸ Hãmri nhùm tee ri kuma nê kãm:

—Tk. Kwa xà kot kaj ã inhmã akapêr anê pa ama nê apyrã nê amnhĩ kaxyw Jejus kôt ijamaxpêr? Nà na ka ixte ã ate Jejus jarênh anhÿrja kôt ijamaxpêr ã ixkamnhĩx kaprÿ. Anê.

²⁹ Hãmri nhùm Pawre kãm:

—Ko. Kot kaj ixpyrã nê amnhĩ kaxyw hkôt ajamaxpêr pa ixkĩnh nê. Nom kaxixix kêt. Mẽ apiitã mẽ ate inhma o akrĩ xwýnhjaja mãänën. Mẽ ate mẽ ixpyrã nê Jejus kôt amnhĩ xunhwÿr na inhmã hprãm. ãm ixpyrã nê mẽ apê prês pix na inhmã hprãm kêt. Anê.

³⁰ Hãmri nhùm pahi Akrip nê htõx Perênĩs nê pahi Pox Pesti nê mẽ hkôt mẽ mõi xwýnhjaja kãnhmã kuhê nê ma mrar kaxyw. ³¹ Nê nojarêr nê Pawre hã axpên mã:

—Kwa tanhmã kot amnhĩ tomnuj to hkêt kênã kot kêt mẽ haxà rÿ kupĩ. Anê.

³² Hãmri nhùm Akripja Pos Pesti mã kãm:

—Kwa kop apu kot amnhĩ kaxyw pahi maati Sesti hwÿr hkrã hkêt ronhÿx pu mẽ ra kator. Anê.

Mẽ kot Rõm wÿr Pawre mẽnh ã mẽ harênh

Atre 23.11, 25.12

27 Tã nhùm mẽ pyka pê Itar wÿr pahi maati Sesti hwÿr Pawre mẽnh kaxyw. Itar kamã mẽ õ krĩ maati na pre kêp Rõm. Jakamã nhùm Pawre mẽ mẽ kot mẽ hagjênh xà kamã mẽ hkrĩ xwýnh mẽ ho hpim-ràatã ma mẽ o mra nê pôristi krãhtùm Jurti nhĩhkram mẽ haxà pa. Kot ma Rõm wÿr mẽ o mõi kaxyw. Jurtija kêp Itar kamã mẽ õ pahi maati hã pôristi krãhtùm nhùm prem ma mẽ kãm mẽ o mõi kaxyw ïhkram mẽ hagjênh pa. Ixpê Rukre na pa pre inhmã Pawre hkôt inhmõi prãm nê mẽ hã ajêt nê mẽ hkôt mẽ.

² Tã pa mẽ ra inhnojarêr nhùm Aristak haxwÿja ma mẽ ixkôt mẽ. Pyka pê Masetõn nhõ xwýnh na pre. Õ krĩ pê na pre Tesarõn. Jakamã nhùm ma wa ixkôt mẽ. Hãmri nhùm pãrja nojarêr. Atamĩx rùm pãr nhùm ra As wÿr nojarêr pa mẽ hwÿr inhgjêx pa nê ma kamã mẽ. ³ Hãmri nhùm apkati pa mẽ krĩ pê Sito hwÿr põi nê hã pãr xi. Nhùm pôristi krãhtùm Jurtija Pawre ho mex jakamã pa mẽ Sito hwÿr põi nhùm Pawre mã anê pa mẽ ixkato nê ma ixkrãmnhwÿjê hwÿr mra nê mẽ kutã apku nê ma akupÿm pãr wÿr mra.

⁴ Tã pa mẽ axte mẽ. Nom nhùm kôk mẽ ixkutã àpêr tÿx jakamã pa mẽ umaj juk nê gô hipôk kupu ho mẽ. Gô hipôk pê Sipreja pa mẽ upôk rùm ma hkupu ho mẽ nhùm mẽ inhnê kôk pê àmnãr mex nê. ⁵ Hãmri pa mẽ mõi nê pyka pê Siris mẽ Pãpir wa hakrenh o mẽ nê pyka pê Ris kamã Mira hwÿr põi nê hã pãr xi nê ijarôx pa. ⁶ Hãmri nhùm pôristi krãhtùmja Aresãnrir rùm pãr pumu nhùm ra Itar wÿr nojarêr. Pa mẽ hwÿr inhgjêx kurê kumrêx hãmri nê ma kamã axte mẽ. ⁷ Hãmri nhùm pãrja kôk kutã tee ri mõi prêprêk kaxyw nê ãm amnhĩm hprĩ nê mõi ã apkati xohtô nê pa mẽ tokyx ix-pôx kêt nê. Tã Sito hwÿr ixàhtêp o mẽ nom nhùm kôk mẽ ixkutã hihtÿx rax kumrêx. Jakamã pa mẽ juk nê gô hipôk pê Kret jatur xà jahpa nê ma kape hã mẽ nhùm mẽ inhnê kôk pê àmnãr mex nê. Hãmri pa mẽ ma Sar-mõn jakrenh o mẽ ⁸ nhùm pãr kôk kutã amnhĩm hprĩ nê kape hã mẽ. Pa mẽ mẽ nê jatã Rasej tã pãr nhĩkwÿ xà mex wÿr põi nê kamã pãr xi. ⁹ Nom pãr kot amnhĩm hprĩ nê mõi jakamã nhùm ra kôk xàpêr tÿx nê kamã kry htÿx ã mytwrÿ mẽ ixtã kato. Mytwrÿja ã mẽ kot kôk xàpêr tÿx pymaj nhÿhÿm pãr kãm mrar kêt. Jakamã nhùm Pawre tokyx mẽ inhmõi nê pãr nhõ xwýnhjê mã kapêr kãm hihtÿx nê mẽ kãm:

¹⁰ —Kwa pu mẽ jar kôk xàpêr tÿx jamãr o ri papa nà. Kê kôk mẽ kry htÿxja hapêx pu mẽ rĩ kormã axte mẽ. Kot puj mẽ anhÿr kêt nê kôk xàpêr tÿx kãm mẽ nhùm nhÿri pãrja mẽ pahpê axà nhùm gô mẽ apê mẽ akukrêx o hapêx pa. Pu mẽ pajaxwÿja axkaprã.

¹¹ Anhÿr o mẽ kãm kapêr tã no nhùm mẽ kuma nê ãm kuma. Pãr pãm mẽ pãr o mrar xwýnh wa nojarêr tÿx nê kapêr ma nê ãm kuma. Nhùm pôristi krãhtùm wa nojarêr ã wa kuma nê haxwÿja Pawre mar kêt nê. ¹² Nhùm mẽ kot pãr nhĩkwÿ xà mex jarênhja mẽ kot mex ã harênh tã mẽ kêp omnuj nê. Hã na wrÿk nê kôk xàpêr tÿx nhùm mẽ kêp omnuj tÿx nê. Jakamã nhùm mẽ piitã Pawre rom ra nojarêr nê. Mẽ kãm tokyx krĩ pê Wênĩs wÿr hpôx prãm jakamã nojarêr tÿx nê. Gô hipôk pê Kret kamã na Wênĩsja. Nê kamã kôk xàpêr tÿx kêt jakamã nhùm mẽ hwÿr nojarêr nê axpên mã:

—E kwa pu mẽ tokyx Wênĩs wÿr mẽ nê kamã mãn kôk xàpêr tÿx japêx jamãr o papa. Anê.

Hãmri nê piitã hwÿr nojarêr.

Kôk kot pãr o àpêr tÿx ã harênh

¹³ Tã nhùm kahpa hkôt kôk xàpêrja katat kôt kawax pê apê nhùm mẽ kamã ama nê axpên mã:

—E hãmri. Tokyx pu mẽ mẽ. Anê.

Jakamã pa mẽ pàr o htỳx xà ho api nẽ axte mỗ. Ma gô hipôk pẽ Kret jakàr ã mỗ. ¹⁴ Puh nhũm na wrỳ nẽ kôk àpêr tỳx kumrêx. Mẽ kot kãm “kôk xàpêr tỳx maati” anhỳr xwỳnhja gô hipôk rũm mẽ ixto àpêr tỳx kumrêx o mỗ. ¹⁵ Hãmri nẽ mẽ ixkutã àpêr tỳx nhũm pàr tee ri kutã hkarôt. Pa mẽ kormã Wênĩs wỳr ixpôx kêt ri ra ho awjanã nhũm amnhĩ krã hkôt kôk kôt mỗ. ¹⁶ Hãmri nẽ mỗ nẽ gô hipôk pẽ Krawti jahpa nẽ hakàr ã mỗ nhũm mẽ inhnê kôk pẽ amýtã nhũm amnhĩm hprĩ nẽ kawax pẽ apê. Hãmri pa mẽ pàr krare kot mẽ ixkôt mỗr xwỳnhja pa mẽ kumỳ nẽ pàr rax kãm kumẽ. Ra kamã gô rax tã pa mẽ ixkarôt tỳx nẽ nẽ hkapĩr pa nẽ ho api nẽ pàr rax kãm kumẽ nẽ ho htỳx. Hãmri nẽ hpãnhã kôk xàpêr tỳx pymaj pàr rax kaxpre hpa. Hãmri nẽ kôk kot pykahti grã maati pẽ Sirteja wỳr pàr mênh nhũm kot amnhĩ to pykahti xãm o htêm pymaj nhũm mẽ kot ho mrar xà hã kupêxê rax o wrỳ nhũm pàr amnhĩ krã hkôt ma kôk kôt mỗ.

¹⁸ Tã nhũm apkati nhũm kôk arĩ mẽ ixpê pàr o àpêr tỳx nẽ arĩ na wrỳk rax rãhã nẽ. Jakamã pa mẽ pàr àr pymaj nẽ mẽ hikukrêx kwỳ gôx kãm rênh pa. Kaxkritre nẽ àr kêt kaxyw.

¹⁹ Tã nhũm apkati pa mẽ hpãnhã pàr kre kamã ri nẽ hikukrêx kwỳ rê nẽ gôx kãm kurê. ²⁰ Nhũm kôk arĩ àpêr tỳx kumrêx ã apkati xohtô nẽ. Nẽ na wrỳk rax rãhã jakamã pa mẽ kanhêti pumunh kêt nẽ myt pumunh kêt o mẽ ixtã apkati xohtô rax kumrêx. Hãmri nẽ tee ri ahkapi nẽ tee ri amnhĩ kukamã ijamaxpêr. Nẽ ixyk par pix kukamã ijamaxpêr o ixkaprĩ nẽ ixkrĩ.

²¹ Hãmri nẽ mẽ inhmã ma xàj ixàpkur kêt ryy nẽ. Hãmri nhũm Pawre tee ri ja hã mẽ ixpumu nẽ pàr nhỗ xwỳnh wa kãm kapêr nẽ wa kãm:

—Kwa na pa pre tee ri Kret kãm man mẽ pamôr nẽ war amã ixkapêr. Kop apu mũtar mãn mẽ kuri arĩ ri mẽ hkôt mẽ papa ronhỹx pu mẽ pajamakêtkati nẽ paxàmnhĩx ri papa. Tã nhỹx pu mẽ ri mẽ hikukrêxja gôx kãm rênh par kêt nẽ. ²² Nom kwa kêr ka mẽ tee ri amnhĩ kukamã ajamaxpêr kêt nẽ. Kot puj mẽ pahtô pahtyk kêt nẽ. ãm pàrja pix koja axà nẽ hapêx. ²³ Ixpê Tĩrtũm krajê hõ na pa. Na pa hte kãm tanhmã amnhĩ nhĩpêx to ho ri ixpa. Jakamã na pre kamàt ja kamã ixwỳr kapêr o wrỳk xwỳnhjê hõ mẽ nhũm ixwỳr wrỳ nẽ inhmã awjarê ²⁴ nẽ inhmã: “Pa Pawre? Kwa tee ri amnhĩ kukamã ajamaxpêr o amã ma hkêt nẽ. Kot kaj akà hkĩnh pẽ ma Itar kamã Rõm wỳr mỗ nẽ pôi nẽ pahi maati Sesti pumu nẽ kãm amnhĩ jarê. Jakamã koja Tĩrtũm akôt mẽ mỗr xwỳnh piitã omunh mex nẽ ka mẽ atõ tanhmã amnhĩ to hkêt nẽ.” Anẽ.

²⁵ —ã kot inhmã kapêr anhỳr jakamã kwa mẽ amnhĩ to htỳx nẽ tee ri amnhĩ kukamã ajamaxpêr kêt nẽ. Tĩrtũm kapêr o wrỳk xwỳnh kot inhmã ujarênh xà hkôt koja Tĩrtũm ã mẽ panhĩpêx anẽ. Ixte ja hã omunh mex kênã. ²⁶ Koja xep kôkja nhỹri gô hipôk ã pàr krakrak pa. Nom mẽ papajaja kot puj mẽ pahkà hkĩnh pẽ hwỳr pahpôx pa. Anẽ.

²⁷ Tã pa mẽ mỗ nẽ ã inhmôr anhỳrja ã ixtã semãn axkrut nẽ ra gô rax pẽ Ariax kôt axà. Kamàt kãm hkôt axà nhũm kôkja arĩ pàr o apêr tỳx rãhã ho mỗ. Hãmri

nhũm kôt ã kamàt nhũm pàr o mrar xwỳnhja ra pàr kot pykahti grã htêp ã hkamnhĩx. ²⁸ Jakamã nhũm mẽ gô xupỳm pumunh xà ho gô pumu nhũm upỳm kêp 36 met. Hãmri nhũm hã ahtũmre nẽ axte omu nhũm ra hpãnhã kêp 27 met pix. Jao ra pàr kot gô kokwe htêp o mỗr ã omu. ²⁹ Hãmri nẽ kot kên kuranh nẽ hã pikrakrak pymaj katê rũm ho htỳx xà ho 4 nẽ gôx kãm kurê nhũm arĩ ajê. Hãmri nhũm mẽ tokyx kãm arĩgro hprãm o arĩgro mã nojarê. ³⁰ Hãmri nhũm pàr kãm mẽ àpênh xwỳnhjaja tanhmã hamaxpêr to nẽ hêx rom pàr krare ho wrỳk o tẽ. Mẽ kot mẽ ixrer nẽ ahte xarmã mỗr nẽ rên nẽ tokyx gô hipôk wỳr hpôx kaxyw. No ãm hêx rom te mẽ kot axte pàr krã rũm ho htỳx xà hõ mênh kaxyw pyrãk o amnhĩ nhĩpêx nẽ kaxyw ho wrỳk o tẽ. ³¹ Nom nhũm Pawre mẽ hamaxpêr ã mẽ omu hãmri nẽ pòristi mẽ mẽ hkrãhtũm mã mẽ harê nẽ mẽ kãm:

—Kwa koja mũjjaja mẽ pare nẽ ahte pàr krare kamã xarmã mỗn rê ka mẽ apikaprãr pa kãm ga. Anẽ.

³² Hãmri nhũm mẽ tee ri kuma nẽ mẽ hwỳr hprôt nẽ mẽ kêp pàr krare pẽ hkaxpre xà jakà nhũm gôx kãm tẽm nẽ ma gô hkôt hkaprỳn mỗ.

³³ Tã hãmri nhũm ra myt kator o mỗ nhũm Pawre akupỳm mẽ piitã mẽ ho mẽ hamaxpêr o hihtỳx kaxyw mẽ kãm:

—Kwa na ka mẽ tee ri amnhĩ kukamã ajamaxpêr o akaprĩ nẽ axàpkur kêt o atã semãn axkrut. ³⁴ E pu mẽ mẽmoj krê nẽ ho amnhĩ xihtỳx. Kot puj mẽ pahtô pahtyk kêt nẽ. ãm hãmri na pa mẽ amã ixkapêr. Anẽ.

³⁵ Hãmri nẽ mẽmoj py nẽ mẽ noo mã Tĩrtũm mã harê nẽ hkur o xa ³⁶ nhũm mẽ ja hã omunh xà hkôt akupỳm tãm hamaxpêr o mỗ. Hãmri nẽ amnhĩm mẽõ hkwy jamỳ nẽ kumẽ kuku. ³⁷ Pàr kãm mẽ inhmôr xwỳnhjaja na pa prem ixpê 276. ³⁸ Tã pa mẽ ra ixàpkur pa. Hãmri nẽ pàr kaxkrit kaxyw mẽ apkur xà hã mẽmoj y jakrêxja gôx kãm hkapĩr pa.

Pàr mẽ kêp pikrakrak ã harênh

³⁹ Tã nhũm ra myt kator mex nẽ nhũm mẽ amnhĩ kukamã gô hipôk pumu nẽ axpên mã:

—Kwa nhỹ pika na mũj wehe? Anẽ.

Hãmri nẽ nhỹri hakàx ã amnhĩm nõr xà mex pumu nẽ hwỳr pàr o mỗr kaxyw hã axpên ma. ⁴⁰ Hãmri nẽ kaxyw pàr o htỳx xà jakà nhũm axrê nẽ gôx kãm rôrôk pa. Nẽ pĩ ho pàr o juk xà nhõ xê xàja nhũm mẽ mããnên krãhta. Hãmri nẽ akupỳm mrar xà hã kupêxê nhõ nhũm kôk ho hikot nẽ ma gô jakàx wỳr o mỗ.

⁴¹ Nom nhũm pàr kormã hakàx pẽ awry hã mỗr ri amnhĩ to kokwe kura nẽ pyka nhĩmôk ã nõ nhũm mẽ tee ri kot hkaxàr nẽ akupỳm gô xupỳm mã mênh kaxyw. Nom nhũm gô kot pàr nhĩxô htak tỳx kurê nhũm mẽ ixpê pikrakrak par o mỗ. ⁴² Jakamã nhũm pòristijaja tee ri omu hãmri nẽ ra mẽ kêp prêsjê nhĩmex kaxyw. Mẽ kot gôx kãm rôrôk nẽ gô hipôk wỳr hpa ho nana nẽ mẽ kêp pikunor pymaj kot mẽ himex kaxyw. ⁴³ Nom nhũm mẽ hkrãhtũmja kãm Pawre pĩr prãm kêt jakamã ja nẽ mẽ hkurê nẽ mẽ inhmã:

—E mẽ ate apa ho gô rēnh mex xwýnhjaja. Akumrēx mra mẽ mrõ mẽ ho nana ho mra mẽ rē. ⁴⁴No mẽ ate apa ho nana punuj xwýnhjaja kêr ka mẽ tapti rý pàr kukrēx ò mý mẽ hã ajēt mẽ hã ma mōn rē. Anē.

Hāmri pa mẽ ã amnhĩ nhĩpēx anē mẽ ixpiitã ixkã hkĩnh pê ixrēr pa.

Gô hipôk pê Maw kamã mẽ pa hã mẽ harēnh

Makre 16.17-18

28 Tã pa mẽ ixpiitã ixkã hkĩnh pê ixrēr pa. Nhũm gô hipôk ã mẽ pa xwýnhjaja mẽ inhmã gô hipôk nhĩxi jarē nhũm xep kêp Maw. ²Nhũm Maw nhõ xwýnhjaja mẽ ixto mex mẽ. Nhũm axte na wrýk rax mẽ nhũm kry htýx kumrēx nhũm mẽ ixkamã ukapřĩ mẽ mẽ inhmã kuto mẽ mẽ inhmã kapēr mex mẽ. ³Hāmri nhũm Pawre kuwy kaxyw ri pĩ kawrà ho mra mẽ kuwy hwýr o tē mẽ hã haxwýr o xa. Hāmri nhũm kagã xoprē ò wēnēn xihtýxja kuwy kagro pymaj pĩ rũm kato mẽ ĩhkra hã kunha mẽ hã àpēr o ajēt. ⁴Hāmri nhũm Pawre omu mẽ amnhĩ nē ho apē mẽ kuwy kamã kumē nhũm kamã tēm mẽ xēt pa. Hāmri nhũm gô hipôk nhõ xwýnhjaja tee ri ja hã omu mẽ axpēn mã:

—Kwa ga mẽmyti mũj pumu. Mãn kêp mẽ hpar o pa xwýnh na. Hã na kagã ò wēnēn xihtýxta kunha. Nà koja ty mẽ rĩ amnhĩ pumu. Ra hkã hkĩnh pê gô rũm mẽ pahwýr rēr tã koja tã ty kãm ga. Anē.

⁶Hāmri nhũm mẽ tee ri kot tanhmã amnhĩ to hã hkamnhĩx mẽ hamār o kuhē. à htýx mẽ ĩhkra hikot rý htyk kurē kumrēx ã hkamnhĩx tã nhũm tanhmã amnhĩ kamã hamak to hkēt mẽ. Ām htýx ri hkĩnh mẽ kapēr mẽ hpikunhar o ri mra. Hāmri nhũm mẽ tee ri omu mẽ axpēn mã:

—Kwa tanhmã kot amnhĩ tore hã. Kêp mẽ hpar o pa xwýnh kêt. Mãn kêp kaxkwa kamã mẽpahpãmjē hõ nà? Hã na kagã kunha nhũm tanhĩ to hkēt mẽ. Anē.

⁷Nhũm gô hipôk ã mẽ ò pahihiti pê Puptija. Örkwý hã jawý jakamã nhũm amnhĩ kôt mẽ ixwý pa mẽ ma hkôt mō mẽ kuri hkôt ixpa ho ixtã apkati axkrunēpxi nhũm mẽ ixto mex mẽ. ⁸Nhũm ra Pupti nhĩpēēxã kêp à mẽ nõ. Kà kagro htýx mẽ haòk. Hāmri nhũm Pawre hwýr tē mẽ omu mẽ hã ĩhkra xi mẽ ho Tirtũm wý nhũm akupým ho mex kurē kumrēx. ⁹Hāmri nhũm gô hipôk nhõ xwýnhja harēnh ma mẽ Pawre hwýr mẽ à xwýnh piitã o mra nhũm mẽ omu mẽ Tirtũm nhỹ hã akupým mẽ ho mex pa. ¹⁰Hāmri nhũm gô hipôk nhõ xwýnhjaja mẽ ixto mex rax mẽ.

Pawre axte Rõm wýr nojarēt ã harēnh

Rõmãn 1.10-12, 15.30-32

Tã pa mẽ gô hipôõta kamã ixpa hã mytwrý axkrunēpxi. Hāmri nhũm kôk xàpēr týtta hapēx pa mẽ axte inhnojarēt mẽ ma mō. Pàr ò kamã hpãnhã mō. Aresãnrir rũm pàrja pa mẽ hpãnhã kamã mō. Mē kot kãm “sãnti pihpo” anhýr xwýnhnta kamã. Na pre gô hipôk kamã haxwýja kôk xàpēr týt hapēx jamār xa hã hikwý htã ra axte nojarēt. Hāmri nhũm gô hipôk nhõ xwýnhja ma mẽ inhmõr xà hã mẽ inhmã mẽ ixàpkur xà hkwy nhõr rax mẽ. Hāmri pa mẽ pàr wýr inhgijēx pa

nē ma kamã mō. ¹²Mõõ mẽ Sirakus wýr pøj mẽ hã pàr xi. Hāmri mẽ krĩja kamã mẽ ixtã apkati axkrunēpxi mẽ axte mō. ¹³Mõõ hāmri mẽ Rekre hwýr pøj mẽ hã pàr xi. Hāmri mẽ kamã mẽ ixtã apkati. Nhũm ra kahpa hkôt kôkja kawax pê àpēr mex jakamã pa mẽ ma hkôt mō. Nē mẽ ixtã apkati axkrut mẽ Potew wýr pøj mẽ hã pàr xi. ¹⁴Hāmri mẽ pàr rũm ijpøj mẽ krĩ kamã Jesus kôt mẽ ixtõ mẽ htõx kwýjē pumu nhũm mẽ amnhĩ wýr mẽ ixwý. Pa mẽ ma mẽ hkôt mra mẽ mẽ hkôt ri ixpa hã ixtã ù semãn. Hāmri mẽ ma Rõm wýr hpãnhã ixpar o mō.

¹⁵Hāmri mẽ kormã amým inhmõr ri nhũm Rõm kãm Jesus kôt mẽ ixtõ mẽ ixtõxjaja mẽ ijarēnh ma mẽ man mẽ ixkutã mra. Ma krĩ pê Prasxi Apja mẽ “Wēn Pi-jakrunēpxi” anhýr xwýnh jarēnhja wa hwýr mẽ ixkutã mra. Hāmri pa mẽ axpēn kaxpa nhũm Pawre mẽ omu mẽ hkĩnh mẽ. Nē mẽ hã Tirtũm mã amnhĩ jarē mẽ kãm:

—Pa Tirtũm? Nà ãm hāmri na ka mẽ ixkutã jajē rē. Na pa mẽ omu mẽ ixkĩnh mẽ. Nà amex o amex Tirtũm. Anē.

¹⁶Hāmri pa mẽ ma mẽ hkôt Rõm wýr mō mẽ pøj. Jatã Itar kãm Rõm wýr pøj. Hāmri nhũm pōristi krãhtũm Pawre mã:

—E kot paj mẽ hagjēnh xà kamã ajaxàr kêt mẽ. Kot kaj amã nhýri ixkre kamã apa hprãm mẽ mamřĩ kamã apa. Nom koja pōristi hõ akôt pa ho pa.

Anhýr jakamã nhũm nhýri ixkre kamã pahihiti Sesti kot mar kaxyw kamã hamak o pa.

Pawre kot Rõm kamã tanhmã amnhĩ nhĩpēx to hã harēnh

Atre 17.5-6

¹⁷Tã nhũm Pawre Rõm kamã hã apkati axkrunēpxi mẽ amnhĩ wýr Ijaew xàptàr tũmrejē hwý nhũm mẽ hã akuprõ nhũm mẽ kãm amnhĩ jarē mẽ mẽ kãm:

—E ixkwýjaja. Pa mẽ amã amnhĩ jarē ka mẽ inhma. Nà na pa pre mẽ panhĩgētjē kapēr nhĩrõp tanhmã ixãm to hkēt mẽ rý ixte tanhmã mẽ pahkwýjē hõ hto hkēt tã nhũm mẽ pahkwýjaja amarĩ ixpynē. Jerujarē kamã ixpynē mẽ Rõm nhõ xwýnhjē nhĩhkram ijaxà.

¹⁸Hāmri nhũm mẽ ixte amnhĩ nhĩpēx ã ixkukja mẽ tee ri mẽ kot mẽmoj mýrapē ixpĩr kaxyw tanhmã ixkukjēr to kaprý. Jakamã nhũm mẽ kãm ixkator prãm mẽ.

¹⁹Nom nhũm mẽ pahkwýjaja kãm ja mex kêt jakamã pa pre jar pahi maati Sesti kot ixte kãm amnhĩ jarēnh ã inhmar kaxyw amnhĩm harē mẽ man hwýr mō. Kot paj tanhmã kãm mẽ pahkwýjē ho ixkapēr punuj to hkēt mẽ. Ām ixte amnhĩ tã tanhmã mar to hpix kaxyw na pa hwýr mō.

²⁰—Tã pa amnhĩ wýr mẽ awý. Ixte mẽ amã amnhĩ jarēnh kaxyw. Mē pahkapřĩ xwýnhnta. Mē pahte kormã kamã pajamak o papa xwýnh Justa. Ām ixte amnhĩ kaxyw hkôt ijamaxpēr pix mýrapē na prem ã kàx o ixkaxpre anē. Anē.

²¹Hāmri nhũm mẽ kuma mẽ mẽ kãm:

—Nà jar tanhmã ajarēnh kute hkēt. Na pre Jutej kamã mẽ pahkwýjaja tanhmã ajarēnh to hã kagà mẽ mẽ ixwýr mẽnh kêt mẽ. Nē ham mẽ kurũm mẽ hpõx xwýnhjaja na prem tanhmã mẽ inhmã ajarēnh to hkēt

ně. ²² No na xep hte pyka piitã hkôt mẽ kãm mẽ ate Je-
jus kôt amnhĩ xunhwýr xwýnhjê kurê ně. Na pa pre mẽ
ajarěnh ma ně mẽ inhmã axujarěnh mar prãm ně.
Aně.

²³ Hãmri nhũm mẽ kot mar kaxyw arĩgro hta.

Tã nhũm mẽ kot arĩgro hyr kato nhũm mẽ Pawre
nhõrkwý hwýr pikuprõnh rax ně nhũm mẽ kãm aw-
jarě. Mě kãm ujarěnh ry ně. Ně ho kamãt. Ně mẽ kãm:

—Nã mẽ pahte amnhĩ wýr kamã pajamak o papa
xwýnh Jejusja. Kot kaj mẽ atõ amnhĩ kaxyw hkôt aja-
maxpěr ně hkôt amnhĩ xãm nhũm Tirtũm ja hã apumu
ně ato hkra. Aně.

Nhũm pre ã mẽ kãm kapěr aně. Ně finat Mojes kot
Tirtũm nhỹ hã Jejus kukamã tanhmã hã kagã htoja
nhũm mẽ kãm harě. Ně Tirtũm nhỹ hã kapěr jarěnh o
mě pa xwýnhjaja kot tanhmã hã kagã htoja nhũm mẽ
kãm harě. ²⁴ Hãmri nhũm mẽ hkwýjaja kuma ně hkôt
hamaxpěr ně amnhĩ kaxyw Jejus kôt hamaxpěr ně
hkôt amnhĩ xunhwý. No nhũm mẽ hkwýjaja kuma ně
ãm kuma ně kãm axte mar prãm kêt ně.

²⁵ Jakamã kãnhmã kuhê ně nojarět nhũm Pawre mẽ
kãm:

—Nã amnepêm na pre Tirtũm finat Ijaisti mã
tanhmã kapěr to. ý hã kot mẽ panhĩgêtjê mã tanhmã
kapěr jarěnh to kaxyw. Tirtũm Karõ nhỹ hã kot mẽ kãm
kapěr ně tanhmã mẽ harěnh to kaxyw. Te Tirtũm tãm
mě kãm kapěr pyrãk mẽ kãm kapěr. Ně ãm hãmri
tanhmã mẽ pahkwýjê jarěnh to. Na pre mẽ kãm:

E Ijaisti. Kêr ka ma akwýjê hkôt ri mẽ kãm tanhmã
ixkapěr jarěnh to ho ri apa.

Ně mẽ kãm: “Kot kaj mẽ ajamak o axumar tỳx tã aprĩ
hã ixkapěr mar kêt ně.

Ně mẽ ano ho arĩt tỳx tã aprĩ hã ixte amnhĩ nhĩpêx ã
ixpumunh kêt ně.

Mě amã ixkapěr mar prãm kêt jakamã te mẽ ate mar
pymaj amnhĩ jamak pro pyrãk o amnhĩ nhĩpêx o ri apa.

Ně mẽ amã ixte amnhĩ nhĩpêx ã ixpumunh prãm kêt
jakamã te mẽ ate ixte amnhĩ nhĩpêx ã ixpumunh py-
maj te mẽ anomnhõt pyrãk o amnhĩ nhĩpêx o ri apa.

Ja o amnhĩ kaxyw ixkôt ajamaxpěr kêt ně.

Kop mẽ amã ixkapěr mar prãm ronhỹx ka mẽ aprĩ hã
inhmar tỳx ně.

Ně aprĩ hã ixte amnhĩ nhĩpêx ã ixpumunh mex ně.

Ja o amnhĩ tomnuj kaga hpa ně ixkôt amnhĩ xunhwý.

Pa ja hã mẽ apumu ně mẽ ato mex ně.

Tã ka mẽ ã amnhĩ nhĩpêx anhýr kêt ně.” Anhýr o kêr
ka mẽ kãm ixkapěr jarěnh o ri mẽ hkôt apa Ijaisti. Aně.

Na pre ã Tirtũm mẽ panhĩgêtjê kaxyw Ijaisti mã kapěr
aně nhũm ô ri mẽ kãm ujarěnh o pa ně mẽ pamã hã

kagã. Jakamã kwa mẽ okora. Kêr ka mẽ jajê pyrãk ně ã
amnhĩ nhĩpêx anhýr hkêt ně. Kwa mẽ inhma ně

inhmar tỳx ně. Ijaew kêt xwýnhjaja kot kapěr marja na
ra Tirtũm kãm hprãm ně. Jakamã koja mẽ hwýr mẽ kot

kapěr jarěnh o mẽ pa xwýnh kwýjê rě nhũm mẽ hkôt
mě kãm ujarěnh o pa nhũm mẽ kuma ně mẽ akurom
kãm mar prãm ně. Aně.

Hãmri nhũm mẽ kuma ně hapôx pa ně ma akupým
axpên mã tanhmã kapěr jarěnh to ho mra. ³⁰ Hãmri
nhũm pahĩ maati Sesti tokyx amnhĩ wýr Pawre hwýr ně

tanhmã mar to hkêt nhũm õrkwý kamã kêp prês ně pa
ho hã amgrã axkrut. Ně tãm õrkwý pãnhã mẽ kãm

amnhĩre. Nhũm pre krĩ nhõ xwýnhjaja ohtõ ně hwýr
mra nhũm amnhĩ wýr mẽ omu ně hkĩnh ně. ³¹ Na pre

hte amnhĩ wýr mẽ kuwýr ně mẽ kãm Tirtũm kapěr
jarěnh o hkrĩ. Mě kot Tirtũm Kra Pahĩti Jejus Kris kôt

amnhĩ xunhwýr nhũm Tirtũm kot ja hã mẽ omunh ně
amnhĩ katut kôt mẽ kot amnhĩ tomnuj rěnh par ně mẽ

ho hkra hã mẽ kãm ujarěnh o hkrĩ. Ně mẽ kot hkôt
amnhĩ xunhwýr xwýnhjê jahkre. Tanhmã mẽ kot Jejus

kôt amnhĩ nhĩpêx mex to ho pa hã mẽ kãm karõ ho
hkrĩ. Hãmri nhũm mēhõ ja ně tanhmã kãm kapěr to

hkêt ně.

Tã ãm ja pix Teopre. Ixpê Rukre na pa awýr kagãja
nhĩpêx ně kumě. Ně kamã amã tanhmã mẽ pahkwýjê

jarěnh to. Tã ãm ja pix na hapêx.

Römãn

Kagà ja na pre Pawre hipêx. Kêp Jejus nhỹ hã mẽ ahkre ho pa xwỳnh na pre. Na pre hte mry kà ho ixkre nhĩpêx nẽ mẽ kãm ho wẽnê ho mẽ hkôt pa pê mẽ piitã mẽ kãm Tĩrtũm kapêr jarênh o pa. Tã krĩ pê Rôm kamã mẽ kot Jejus kôt amnhĩ xunhwỳr xwỳnhjê hwỳr kagàja nhĩpêx nẽ mẽ hwỳr kumê. Kormã ma mẽ hwỳr mõi nẽ mẽ omunh kêt ri.

Nẽ Jejus kêp Tĩrtũm mã tanhmã mẽ pajarênh to xwỳnh ã nhũm pre mẽ kãm harẽ nẽ hã kagà. Jejus kot mẽ pahte amnhĩ tomnuj pãnhã mẽ panê htyk jakamã na hte Tĩrtũm mẽ pahte hkôt amnhĩ xunhwỳr ã mẽ pahpumu nẽ Jejus kukwak ri mẽ pahte amnhĩ to mex xwỳnh ã mẽ pajarê.

Nẽ Tĩrtũm Karõ nhỹ hã mẽ kot amnhĩ nhĩpêx nyw nẽ hamaxpêr nyw o pa hã nhũm Pawre mẽ kãm karõ nẽ hã kagà. Æ na pre mẽ kãm mẽmoj jarẽ nẽ hã kagà anẽ. Nẽ hã kagà ho:

1 Pa Rôm nõ xwỳnhjaja? Xà mẽ amex? E ot pa mẽ awỳr kagà nhĩpêx nẽ kumê. Tĩrtũm na pre mẽ akaxyw ixãm. Ixte mẽ amã Jejus kot tanhmã mẽ panê amnhĩ nhĩpêx to hã harênh o ri ixpa kaxyw. Na pre ixpê Pawre hã ixpumu nẽ ixãm. Jakamã na pa ã mẽ awỳr kagà nhĩpêx nẽ mẽnh anẽ. Ixte Jejus nhỹ hã mẽ ahkre ho ri ixpa xwỳnh na pa. Na pa hte kãm tanhmã amnhĩ nhĩpêx to ho ri ixpa. Tã ã mẽ awỳr kagà nhĩpêx nẽ mẽnh anẽ.

² Amnepêm na pre Tĩrtũm nhỹ hã kapêr jarênh o ri mẽ pa xwỳnhjaja mẽ pakukamã mẽ panhĩgêjtjê mã Jejus kukamã tanhmã harênh to ho ri pa. Nẽ mẽ kãm kapêr jarênh o mẽ hkôt pa nẽ mẽ kãm:

—Koja nhỹrmã Tĩrtũm mẽ pahpiitã mẽ panê tanhmã kot amnhĩ nhĩpêx to mã xwỳnh mẽ nhũm mẽ hpiitã hprĩ hã harênh ma nẽ omu. Anẽ.

Nhũm prem ã Jejus kukamã mẽ kãm harênh anhỹr o ri mẽ hkôt pa. Tĩrtũm kapêr ã kagà htũm kamã harênh xà hkôt tanhmã mẽ kãm harênh to. ³ Tĩrtũm Kra Jejus Krisja na pre mẽ kãm harênh o ri mẽ hkôt pa. Mẽ panhõ Pahihti na. Kêp Tĩrtũm Kra htã na pre mẽ pahpyrà nẽ ĩ ho amnhĩ nhĩpêx nẽ wrỹ nẽ katorxà nhõxà hkre rũm kato. Jakamã kêp Tĩrtũm Kra pix kêt mããnên katorxà hkôt kêp higêt Tawi hkanrêhã htãmnhwỳ.

⁴ Kêp Tĩrtũm Kra htã nhũm prem axtem nẽ tanhmã hamaxpêr to nẽ kupĩ. Nom nhũm Tĩrtũm kêp amnhĩ Kra hã akupỹm ho htĩr. Jakamã na pu htem harênh ma nẽ kãm pajamaxpêr o:

—Jesup kêp Tĩrtũm Kraa. Mẽ kot kêp hprĩ tã nhũm akupỹm ho htĩr. Jakamã nhũm Tĩrtũm pyrà nẽ hihtỹx o hihtỹx. Anẽ.

⁵ Tã ã Tĩrtũm kot Kra nhĩpêx anhỹrja ri na mããnên pa ixto mex nẽ mẽ akaxyw ixãm. Jakamã na pa hte ma krĩ piitã hkôt mẽ kãm tanhmã Jejus Kris jarênh to ho ri mẽ hkôt ixpa. Ijaew mã nẽ Ijaew kêt xwỳnhjê mã. Mẽ kot harênh mar nẽ amnhĩ kaxyw kãm hamaxpêr nẽ kapêr kôt pix mã amnhĩ nhĩpêx mex kaxyw. ⁶ Nẽ mẽ apê Rôm nõ xwỳnhjaja. Na ka prem Jejus kôt amnhĩ xunhwỳr nhũm Tĩrtũm ja hã mẽ apumu nẽ mẽ ato hkra nẽ mẽ

apê Jejus mẽ wa hkwy hã mẽ ajarê. Mẽ ate hkôt amnhĩ nhĩpêx kaxyw nhũm pre ã mẽ ajarênh anẽ.

Tã ot pa kagà nhĩpêx nẽ mẽ awỳr mẽnh kaxyw. Tĩrtũm kot mẽ ato hkra xwỳnhjê hwỳr. Tĩrtũm kãm mẽ ajapêê.

Na pa hte mẽ ato mẽ panhĩpêxà maati Tĩrtũm mẽ Pahihti Jejus Kris wa hwỳr rãhã ri ixpa. Nẽ mẽ ato wa hwỳr o:

—Kwa kêr ka wa Rôm kamã war akrajê pumunh mex nẽ mẽ kutã anojarêt rãhã nẽ. Kê mẽ hamakêtkati nẽ ãmnhĩx ri tanhmã amnhĩ nhĩpêx to ho ri pa. Anẽ.

Pawre kot Rôm nõ xwỳnhjê pumunh prãm ã amnhĩ jarênh

Atre 28.15-16; Römãn 15.22-29

⁸ Nẽ na ka prem amnhĩ kaxyw Jejus Kris mã ajamaxpêr nẽ hkôt amnhĩ xunhwỳr nhũm krĩ piitã hkôt mẽ pa xwỳnhjaja mẽ ajarênh ma. Nẽ mẽ ate amnhĩ nhĩpêx nyw ã mẽ ajarênh ma nẽ axpên mã tanhmã mẽ ajarênh to ho pa. Nẽ mẽ ajarênh o:

—Kwa na xep Rôm kãm mẽ hkwyjaja amnhĩ kaxyw Jejus mã hamaxpêr tỹx nẽ. Nẽ hkôt amnhĩ nhĩpêx mex rãhã ho ri pa. Anẽ.

Pa ã mẽ kot mẽ ajarênh anhỹrja ma nẽ ixkĩnh tỹx nẽ. Nẽ Tĩrtũm mã mẽ anhỹ hã ixkĩnh ã amnhĩ jarênh o ri ixpa. ⁹ Na pa hte mẽ ato hwỳr rãhã ho ri ixpa. Nẽ nhỹri mẽ kãm Tĩrtũm Kra Jejus kapêr jarênh o ri ixpa nẽ mẽ amã ijamaxpêr nẽ mẽ ato kuwỳ. Nẽ tanhmã Tĩrtũm mã amnhĩ nhĩpêx to ho ixpa pê mẽ amã ijamaxpêr nẽ mẽ ato kuwỳ. Tĩrtũm kot ja hã ixpumunh mex. ¹⁰ Na pa hte tanhmã kãm amnhĩ jarênh to kaxyw nẽ mẽ akaxyw amnhĩ to kuma nẽ kãm:

—Pa Tĩrtũm? Na pa ra inhmã ma Rôm wỳr inhmõi nẽ kamã akôt ixkwỳjê pumunh prãm tỹx kumrêx. Xà kot ka tokyx mẽ hwỳr inhmẽ nà? Anẽ.

¹¹ Na pa ra inhmã mẽ awỳr inhmõi prãm tỹx nẽ. Na pre Tĩrtũm Karõ tanhmã ixkrã hto pa ĩ hã kapêr ã kagà mar tỹx nẽ. Nẽ hkôt mẽmoj mex pumunh rax nẽ. Tã ra inhmã ma mẽ awỳr inhmõi nẽ amnhĩ xõ ri mẽ amã harênh prãm nẽ. Mẽ ate inhmar nẽ aprĩ hã Jejus Kris

kõt amnhĩ xunhwÿr tÿx nê hkõt amnhĩ nhĩpêx mex rãhã ho ri apa kaxyw. ¹² Kot paj nhÿrmã ma mẽ awÿr mõ. Nê mẽ awÿr pøj pu mẽ axpên pumu nê pahkĩnh nê. Mẽ pahte amnhĩ kaxyw Jejus Kris mã pajamaxpêr mex o papa hã axpên pumu nê pahkĩnh nê. Nê mẽ pahpiitã hkõt amnhĩ nhĩpêx mex o ri papa.

¹³ E ixkwÿjaja. Xatã ixte mẽ awÿr ixkrã htã nhũm mẽ-moj xatã tanhmã ixpê àmtàr to pa kormã jar ixpa. Nom kot paj nhÿrmã ma mẽ awÿr mõ. Mẽ ate ja hã inhmar kaxyw na pa ã Tirtũm noo mã mẽ amã amnhĩ jarênh anê. Na pa pre krĩ hkwy kamã mẽ apê Ijaew kêt xwÿnh kwÿjê hwÿr ixpa. Nê mẽ kãm Jejus kot mẽ panê tanhmã amnhĩ nhĩpêx to hã harênh o ri mẽ hkõt ixpa. Nhũm mẽ hkwyjaja inhma nê hkõt amnhĩ xunhwÿ. Ja kaxyw na pa inhmã ma mẽ anhõ krĩ hwÿr inhmõr prãm nê. Mẽ akwÿjaja kot ixkapêr mar nê mẽ apyrã nê Jejus kõt amnhĩ xunhwÿr kaxyw. ¹⁴ Na pre ra Tirtũm ixte kapêr o mẽ ajahkre ho ixpa kaxyw mẽ piitã mẽ kaxyw ixãm. Tanhmã ri mẽ kute xwÿnhjê kaxyw. Mẽ kãm ma ho mẽ pa xwÿnhjê mẽ mẽ kãm ma hkêt o mẽ pa xwÿnhjê mã. Nê mẽ kot kagã pumunh xwÿnhjê mẽ mẽ kot kagã pumunh kêt xwÿnhjê mã. Mẽ piitã mẽ kaxyw na pre ixãm. Ixte mẽ kãm Jejus kot tanhmã mẽ panê amnhĩ nhĩpêx to hã harênh o ri mẽ hkõt ixpa kaxyw. ¹⁵ Jakamã na pa ra inhmã mẽ apê Rõm nhõ xwÿnhjê hwÿr inhmõr prãm nê. Ixte mẽ anhõ krĩ kamã mẽ piitã mẽ kãm ja jarênh o ri ixpa nhũm mẽ kot inhmar nê mẽ pahpyrà nê Jejus kõt amnhĩ xunhwÿr kaxyw.

Jejus kot mẽ panê htyk ã harênh

Sikũn Ximotre 1.6-12

¹⁶ Nê Jejus kot mẽ panê htyk ã harênhja ãm hãmri na. Harênhja mex o mex. Na htem kuma nê kãm hamaxpêr nê amnhĩ kaxyw hkõt hamaxpêr nê hkõt amnhĩ xunhwÿ. Hãmri nhũm Tirtũm ja hã mẽ omu nê mẽ nê mẽ kot amnhĩ tomnuj o hapêx pa nê mẽ ho hkra. Nom mẽ ixpê Ijaew nhõ xwÿnhjê pix kêt. Määnêh mẽ apê Ijaew kêt xwÿnhjaja nhũm kãm mẽ pajapê ho axpên pyrãk. Jakamã na pu htem Jejus kõt amnhĩ xunhwÿ nhũm Tirtũm ja hã mẽ pahpumu nê mẽ pahto hkra. Ja kaxyw àhpumunh tÿx o àhpumunh tÿx. ¹⁷ ãm mẽ kot amnhĩ kaxyw Jejus mã hamaxpêr xwÿnh pixjaja na hte mẽ ho hkra. Kapêr ã kagã htũm kot tanhmã ja jarênh to nê harênh kot:

Na hte Tirtũm mẽ kot amnhĩ kaxyw Kra mã hamaxpêr ã mẽ omunh xà hkõt mẽ ho hkra nhũm mẽ amnhĩ kaxyw kãm hamaxpêr rãhã ho pa. Jao ra ô ri tãm amnhĩ nhĩpêx o pa. Anê.

Mẽ pahpiitã mẽ pahte amnhĩ tomnuj xwÿnh ã mẽ pajarênh

Atre 14.15, 17.22-29; Apokarip 9.20-21

¹⁸ Nê mẽ kot amnhĩ tomnuj o ri mẽ pa xwÿnhjaja na hte Tirtũm axtem tanhmã mẽ harênh to. Na htem Tirtũm kapêr ma nom amnhĩ tomnuj gryk ã ãm kuma. Nê mẽ hkwyjaja kot kapêr mar pymaj kapêr õ ho mẽ kêt àmnãr rãhã ho ri pa nhũm Tirtũm ja hã mẽ omu

nhũm ja kêt omnuj nê. ¹⁹ Te mẽ kot Tirtũm kot amnhĩ nhĩpêx ã omunh kêt pyrãk o amnhĩ nhĩpêx tã mẽ kot omunh mex. Tirtũm kot mẽmoj to kator krax rũm ra kot mẽ pamã amnhĩ to amnhĩrit mex. Pu mẽ pano ho omunh kêt tã no ãm kot amnhĩ nhĩpêx kõt ra kêt Tirtũm ã omunh mex nê. Nê kêt mẽmoj piitã ho kator xwÿnh ã omunh mex nê. Nê mẽ mex o mex ã omu nê hihtÿx o hihtÿx hã omu. Tirtũm kot amnhĩ nhĩpêx kot amnhĩrit mex nhũm mẽ kot omunh mex tã hkõt amnhĩ xunhwÿr kêt nê. Nê axtem nê hamaxpêr o:

—Tk. Tirtũm kot inhmã amnhĩ to amnhĩritre hã kot pa kêt ri hkõt amnhĩ nhĩpêx. Kot pa inhno ho omu nê rĩ kormã hkõt amnhĩ nhĩpêx japêr. Anê.

Ra mẽ kot amnhĩ nhĩpêx ã omunh mex tã ri ã hamaxpêr anê. Jakamã nhũm Tirtũm tee ri ja hã mẽ omu nhũm ja kêt omnuj tÿx nê. ²¹ Mẽ kot amnhĩ nhĩpêx ã omunh mex tã amnhĩ kaxyw tanhmã kãm hamaxpêr hto hkêt. Rÿ arĩ hamaxpêr japêr nê kãm:

—Nã Tirtũm. ãm hãmri amex kumrêx. ãm amex o amex. Apê Tirtũm ã ãm apixi mex kumrêx na ka. ãm hãmri na ka hte mẽ ixto mex o apa.

Anhÿr o amnhĩ kaxyw kãm kapêr kêt nê. Nê ãm htÿx tanhmã hamaxpêr punuj to pix o ri pa. Te kamãt kô kamã ri mẽ pa xwÿnhjê kot amnhĩ nhĩpêx pyrã nê mẽ-moj mex pumunh kêt nê.

²² Mẽ kot àhpumunh tÿx ã amnhĩ to jarkrar o ri pa htã no ãm te mẽ hkrã kanhĩn kêt nê mẽ hamaxpêr kêt pyrãk o amnhĩ nhĩpêx. ²³ Jakamã na htem amnhĩm mẽmo karõ nhĩpêx. Mẽmo htyk mã xwÿnhjê hõ karõ nhĩpêx. Tanhmãnh panhĩ karõ rÿ mẽmo mry karõ rÿ mẽmo kuwênh karõ. Rÿ mẽmo kagã karõ nhĩpêx. Hãmri nê ho õ sãnti nê te ri ho Tirtũm nhĩpêx pyrãk o hipêx. Jao hpar pê hkõn krã ho rôrõk nê amnhĩ to kuwÿ nê kãm amnhĩ jagrer pê kãm mex o mex ã harê. Tirtũmja sãnti rom htĩr o htĩr tã nhũm mẽ axtem nê sãnti gryk ã hkaga nê ã amnhĩ nhĩpêx o pa anê. ²⁴ Jakamã nhũm tee ri ã mẽ kot amnhĩ nhĩpêx anhÿr ã mẽ omu nê amnhĩ pyrã nê mẽ hkaga nê ãm mẽ omu. Jakamã nhũm mẽ ãm amnhĩ krã hkõt tanhmã ri amnhĩ tomnuj to ho pa. Nê axpên kãm ri tanhmã hpijaàm kêt to. ã na htem htÿx ri amnhĩ tomnuj anhÿr o pa.

²⁵ Tirtũm kapêrja ãm hãmri htã nhũm mẽ axtem nê te amnhĩ pum rênh pyrãk o hipêx nê kãm hamaxpêr kêt nê. Nê hpãnhã ri mẽ hêx xwÿnhjê kapêr pix ma nhũm ja te mẽ kãm mex pyrãk. Na htem ã amnhĩ nhĩpêx anê hãmri nê axtem nê Tirtũm kot mẽmoj nhĩpêx pix parpê rôrõk nê amnhĩm mex o mex ã harê. Nom kot hipêx xwÿnh Tirtũm parpê mãn ã amnhĩ nhĩpêx anhÿr kêt nê. Nom kot mẽmoj nhĩpêx xwÿnhnta mex o mex jakamã koja mẽ kot hkõt amnhĩ nhĩpêx xwÿnhjaja jajê rom kãm mex o mex ã harênh tũm rãhã ho ri pa. ²⁶ No mẽ kot amnhĩ tomnuj xwÿnhjaja na hte Tirtũm amnhĩ pyrã nê mẽ hkaga nhũm mẽ htÿx amnhĩ krã hkõt ri tanhmã amnhĩ tomnuj to ho ri pa. Jao mẽni hkwyjaja axtem nê axpên gryk ã mjên kaga nê axpên nhĩõ ho mjên. ²⁷ Nhũm mẽmy hkwyjaja mãänêh axtem nê amnhĩ kwÿjê my gryk ã hprõ kaga nê axpên nhĩõ ho hprõ. Na htem ã axpên kamã hpijaàm kêt o pa anê.

Mýrapê koja mẽ à pix kãm amnhĩ xà htỳx kamã hamak o pa. ²⁸ Na htem amnhĩ tomnuj gryk ã Tirtũm mã hamaxpêr kêt nhũm tee ri amnhĩ tã mẽ omu nê hamaxpêr o:

—Mẽ kãm amnhĩ tomnuj pix prãm jakamã kwãr mẽ mãmri ã amnhĩ nhĩpêx anê. Kot paj axte ja nê tanhmã mẽ kãm ixkapêr to hkêt nê. Anê.

Jakamã nhũm mẽ arĩ htỳx ri amnhĩ krã hkôt tanhmã amnhĩ tomnuj to ho ri pa rãhã nê.

²⁹ Hãmri nê mẽmoj punuj pix mã hamaxpêr.

Nê kãm amnhĩ mex pix prãm mã hamaxpêr.

Nê kãm axpên tomnuj pix prãm.

Nê mẽmoj tã axpên kãm gryk pix prãm.

Nê mẽ kãm axpên par pix prãm.

Nê mẽmoj tã ri kãm axpên mã àkjêr prãm.

Nê mẽmoj tã kãm axpên mã hêx prãm.

Nê kãm axpên kaxyw tanhmã hamaxpêr punuj to pix prãm.

Nê kãm tanhmã axpên to kapêr punuj to pix prãm.

³⁰ Nê kãm mẽmoj tã axpên to hêx pix prãm.

Nê kãm Tirtũm prãm kêt o ri pa.

Nê mẽmoj tã axpên mã àkjêr o ri pa.

Nê mẽmoj tã amnhĩ to jarkrar rãhã ho ri pa.

Nê tanhmã amnhĩ tomnuj to pix kukamã hamaxpêr.

Nhũm mẽ katorxà nê mẽ hipêêxà tee ri ja nê

tanhmã mẽ kãm kapêr to no nhũm mẽ mar kêt kumrêx.

³¹ ã mẽ kot amnhĩ nhĩpêx anhỹr o ri mẽ pa xwỳnhjaja na hte Tirtũm kãm mẽmoj mex nhũm mẽ kêp omnuj nê nhũm Tirtũm kêp mẽmoj omnuj nhũm mẽ kãm mex nê. Nê axpên mã mẽmoj tanhmã ho hã amnhĩ jarênh tã ho anhỹr kêt nê. Nê axpên kãm ukaprí ho ri pa hkêt nê. ³² Tirtũm kapêr ã kagà htũm kot tanhmã mẽ hkukamã mẽ harênh to nê mẽ harênh kot:

ã mẽ kot amnhĩ nhĩpêx anhỹr o ri mẽ pa xwỳnhjaja koja mẽ nhỹrmã ty hãmri nê amnhĩ xà htỳx kamã hamak rãhã ho ri pa ho pa. Anê.

Nhũm mẽ kot amnhĩ tã ja mar tỳx tã aa amnhĩ tomnuj kaga hkêt nê. Arĩ ã amnhĩ nhĩpêx anhỹr o pa rãhã nê. Nhũm mẽ hkwỳjaja mẽ kot amnhĩ tomnuj ã mẽ omu nê mẽ uràk nê ã amnhĩ nhĩpêx anhỹr o ri mẽ hkôt pa nhũm mẽ amnhĩ pyrà nê mẽ omu nê hkĩnh nê. Na htem ã amnhĩ nhĩpêx anhỹrja gryk ã Tirtũm kaga nhũm tee ri amnhĩ tã mẽ omu nê amnhĩ pyrà nê mẽ hkaga nê ãm mẽ omu. Jakamã nhũm mẽ amnhĩ tomnuj tỳx pix rãhã ho pa.

Mẽ kot amnhĩ tomnuj xwỳnhjê hkukamã mẽ harênh

Matêwre 7.1-5; Sikũn Tesarõn 1.6; Eprêw 9.27; Sikũn Pêtre 2.4, 3.7; Jutre 6-14; Apokarip 6.15, 20.11

2 Nê kot ka mẽ atõ ã mẽ kot amnhĩ tomnuj anhỹr xwỳnhjê kot amnhĩ nhĩpêx ã mẽ harênh ma nê ã ajamaxpêr anê nê ajamaxpêr o:

—Tk. Mẽ kot amnhĩ tomnuj pix o ri pa xwỳnh kênã. No pa na ã ixte amnhĩ nhĩpêx anhỹr o ri ixpa hkêt. Mẽ kurom ixte tãm amnhĩ nhĩpêx o ri ixpa xwỳnh na pa.

Anhỹr o amnhĩ jarê. Kwa nà mẽ ã ajamaxpêr anhỹr kêt nê. Mẽ pajaxwỳja na pu htem tõiã mẽ uràk nê

tanhmã amnhĩ tomnuj to. Tã ka mẽ ã mẽ kot amnhĩ tomnuj ã mẽ harênh anê nê te ka ate amnhĩ jarênh pyràk. ² Tirtũm kapêr ã kagà htũm kot mẽ kot amnhĩ tomnuj o ri mẽ pa xwỳnhjê jarênh kot:

Mẽ kot amnhĩ tomnuj mýrapê koja mẽ nhỹrmã amnhĩ xà htỳx kamã hamak rãhã ho ri pa. Anê.

ãm hãmri ã mẽ harênh kot anhỹr. ³ Mãn ka mẽ atõ tanhmã amnhĩ kukamã ajamaxpêr to nê ajamaxpêr o:

—Nà koja Tirtũm nhỹrmã amnhĩ nê kuwy hwỳr mẽ kot amnhĩ tomnuj xwỳnhjê rê. No pa koja hwỳr inhmênh kêt nê. Anê.

Kwa mẽ ã ajamaxpêr anhỹr kêt nê. Kot ka mẽ ã amnhĩ kukamã ajamaxpêr anhỹr tã tõiã mẽ uràk nê tanhmã amnhĩ tomnuj to. Jakamã koja Tirtũm mẽ uràk nê hã tanhmã mẽ ato. ⁴ Kot kaj mẽ atõ tanhmã amnhĩ tomnuj to hãmri nê ãm ja hã amnhĩ pumu nê ajamaxpêr o:

—Ixte amnhĩ tomnuj xwỳnh tã na hte Tirtũm ja hã ixpumu nê ãm ixpumu nê hã tanhmã ixto hkêt nê. Kêp mẽ ixkamã ukaprí xwỳnh jakamã na hte gryk tokyx anhỹr kêt nê. Jakamã kot paj arĩ tanhmã amnhĩ tomnuj to ho ri ixpa nê aa jam inhũrer kêt nê. Tirtũm kot ja hã tanhmã ixtore kaxyw hã.

Anhỹr o ajamaxpêr. No ãm ja kot anhỹr kêt. Na hte Tirtũm kormã amnhĩ tã mẽ pajamã. Mẽ pahte amnhĩ tomnuj kaga nê hpãnhã hkôt amnhĩ xunhwỳr kaxyw na hte kormã amnhĩ tã mẽ pajamã. Jakamã na kormã tanhmã ate amnhĩ tomnuj tota ã tanhmã ato hkêt nê.

⁵ Mẽ akrã hihtỳx jakamã mẽ amã hkôt amnhĩ xunhwỳr prãm kêt. Na ka htem tanhmã amnhĩ tomnuj to pix kukamã ajamaxpêr o ri apa. Nê gaa nê ra anhỹr kumrêx. Nhũm Tirtũm tee ri ja hã mẽ apumu nhũm ja kêp omnuj tỳx o mõi. Jakamã koja nhỹrmã tanhmã mẽ ajarênh to nê gryk tỳx kãm tanhmã mẽ atomnuj tỳx to. ãm hãmri na hte mẽ pahte amnhĩ nhĩpêx ã mẽ pahpumunh xà hkôt ahpỳnhã tanhmã mẽ panhĩpêx to.

⁶ Koja nhỹrmã mẽ pahpiitã kormã mẽ pahpũri ri mẽ pahte amnhĩ nhĩpêx ã mẽ pahpumunh xà hkôt tanhmã mẽ panhĩpêx to. Mẽ kot amnhĩ to mex o ri mẽ pa xwỳnhjaja nhũm mẽ ho mex nê. Nê mẽ kot amnhĩ tomnuj o ri mẽ pa xwỳnhjaja nhũm mẽ homnuj nê. Koja nhỹrmã mẽ pahpiitã mẽ pahto hpimràatã ã mẽ panhĩpêx anê. ⁷ Mẽ kot hkôt tãm ri amnhĩ nhĩpêx o pa pẽ kãm Tirtũm kot amnhĩm mẽ mex ã mẽ harênh prãm xwỳnhjaja koja nhỹrmã amnhĩm mẽ mex ã mẽ harê. Hãmri nhũm mẽ kuri htĩr tũm nê hkĩnh nê mex kumrêx nê pa ho pa. ⁸ Nom mẽ kot amnhĩ mã pix mã ri hamaxpêr o ri mẽ pa xwỳnhjaja. Nê mẽ kot tanhmã amnhĩ tomnuj to gryk ã Tirtũm kapêr kaga xwỳnhjaja koja kãm mẽ hkĩnh kêt nê tanhmã mẽ homnuj tỳx to. ⁹ Mẽ kot amnhĩ tomnuj xwỳnh piitã koja mẽ nhỹrmã amnhĩ xà htỳx kamã hamak rãhã nê pa ho pa. Ijaew kumrêxjaja nê hpãnhã Ijaew kêt xwỳnhjaja nhũm mẽ amnhĩ xà htỳx kamã hamak rãhã nê pa ho pa. Mẽ kot amnhĩ tomnuj tỳx o paja mýrapê.

¹⁰ No kêt tãm mẽ kot amnhĩ nhĩpêx xwỳnhjaja koja Tirtũm mẽ ho mex rax rãhã ho pa ho pa. Nê amnhĩm mẽ kot amnhĩ to mex xwỳnhjê hã mẽ harê. Nê tanhmã

mě ho mex to nhūm mě kamā amnhī krit ně pa ho pa. Hamakêtkati ně hkīnh ně àmnhīx ri pa ho pa. Ijaew kwý kumrēxjaja ně mǎānēn Ijaew kêt xwýnh kwýjaja nhūm mě mex ně hamakêtkati ně hkīnh ně àmnhīx ri pa ho pa. ¹¹ Koja Tirtūm nhýrmǎ ahpýnhǎ mě pahte amnhī nhīpêx ā mě pahpumunh xà hkôt tanhmǎ mě pajarēnh to pē tanhmǎ mě panhīpêx to. Mě ixpê Ijaew-jaja ně mě apê Ijaew kêt xwýnhjaja nhūm ā mě pahpi-itā mě panhīpêx anē.

¹² Amnepēm na pre finat Mojes mǎ tanhmǎ kapēr to nhūm kuma ně ô ri hǎ kagà hpa. Mě ixpê Ijaew ri na kapēr ā kagàja. Ra mě ixte mar týx jakamǎ koja mě ix-tō ra kapēr mar týx tā hkôt amnhī nhīpêx kêt hāmri nhūm Tirtūm tee ri amnhī tā omu ně ā amnhī nhīpêx anhýrja mýrapê nhýrmǎ ma mě kot amnhī xà htýx kamǎ hamak tūm xàta wýr kumē. Kot kapēr mar týx tā hkôt amnhī nhīpêx kêt mýrapê nhūm ā hipêx anē. No kêt mě apê Ijaew kêt xwýnhjaja mě ixkīnhǎ mě ari Tirtūm kapēr ā kagà hkêt jakamǎ koja mě ate kapēr nhīrōp mě akuhê hǎ mě apumunh kôt tanhmǎ mě anhīpêx to hkêt ně. Koja hpānhǎ mě ate tanhmǎ amnhī tomnuj to ho apa mýrapê mě kot amnhī xà htýx kamǎ hamak o pa tūm xàta wýr mě arē.

¹³ Na hte mě kot kapēr mar ā mě omunh xà hkôt amnhīm mě kot amnhī to mex xwýnh ā mě harēnh kêt ně. Ām mě kot kapēr kôt amnhī nhīpêx ā mě omunh xà hkôt pix mǎ na hte amnhīm mě kot amnhī to mex xwýnh ā mě harē. ¹⁴ No mě hkwyjaja kormǎ kot kapēr mar kêt tā te ra mě kot mar mex pyrāk o amnhī nhīpêx. Jao amnhī krǎ hkôt tām ri amnhī nhīpêx kurê kumrēx. Te kot Ijaew pyrǎ ně Tirtūm kapēr mar týx ně hkôt amnhī nhīpêx o ri pata pyrāk. ¹⁵ Na htem amnhī krǎ hkôt tanhmǎ amnhī nhīpêx mex to. Te Tirtūm kapēr kot mě hkrām gjêx pyrāk o amnhī nhīpêx o pa. Jakamǎ tee ri tanhmǎ amnhī tomnuj to hǎ amnhī pumu ně hkaprī ně. Ně tām amnhī nhīpêx ā amnhī pumu ně hkīnh ně.

¹⁶ Tǎ koja nhýrmǎ Tirtūm Jejus Kris mǎ anē nhūm kuma hāmri ně mě piitǎ kormǎ mě htír ri tanhmǎ mě kot amnhī nhīpêx to hǎ mě omunh xà hkôt tanhmǎ mě harēnh to. Ně mě hamaxpēr kôt mě omunh mex xà hkôt tanhmǎ mě harēnh to. Mě papajaja mě pahte axpēn jamaxpēr kôt axpēn pumunh kêt tā Jejus kot mě pajamaxpēr kôt mě pahpumunh par.

Tǎ na pa hte mě kām Jejus kot tanhmǎ amnhī nhīpêx to hǎ harēnh o ixpa pē ā mě kām ixujarēnh anhýr o ri ixpa.

Pawre kot hkwyjê mǎ kapēr

Rōmān 3.19-20

¹⁷ Ně ixpyrǎ ně mě apê Ijaew kwýjaja na ka mě axtem ně Ijaew kêt xwýnhjê mǎ tanhmǎ amnhī to jarkrar o ri apa ně mě kām:

—Nà mě ixpê Ijaew ri Tirtūm kapēr ā kagà jakamǎ ām mě papxipixjaja na hte Tirtūm amnhīm mě inhmex ā mě ijarē. Ně ām mě papxipixjaja na hte mě ixto hkra. ¹⁸ Ně mě papxipixjaja na mě ixte Tirtūm kām hprām xà hkôt měmoj pumunh par ně mě kot amnhī to mex xà

pumunh par ně mě kot amnhī tomnuj xà pumunh par. Mě apê Ijaew kêt xwýnhjê rom mě ixte měmoj piitǎ omunh par kumrēx. Anē.

¹⁹ Ně amnhī jarēnh o:

—Nà te mě ixpê mě nohkre xwýnhjê pa hǎ mě hamýnh ně ri mě ho ixpa xwýnh pyrāk. Jakamǎ Ijaew kêt xwýnh pē htýx ri mě pa xwýnhjaja na pa htem mě kām Tirtūm kapēr tūm o mě ahkre mex o ri ixpa. Kormǎ mě kot hprī hǎ mar kêt jakamǎ na pa htem ho mě ahkre ho ri mě hkôt ixpa. Mě kurom mě ixte mar par kēnǎ.

²¹ Anhýr ā amnhī jarēnh ně mě ate kapēr o mě ahkre ho apa htǎ hkôt amnhī nhīpêx kêt ně.

Ně mě ate mě kot axpēn pē àhkīnh ně mě hkurê htǎ no ām mě kamjaja axpēn pē axàhkīnh o ri apa.

²² Ně mě amǎ sānti hkīnh kêt ā amnhī jarēnh tā axtem ně hwýr agjê ně hpar pē kǎxpore nhīkwý xwýnh o axàhkīnh o ri apa.

Ně mě kot axpēn prō ho amnhīkati ně mě hkurê ho apa htǎ mě kamjaja ā ri amnhī nhīpêx anhýr o ri apa.

²³ Ně mě ate Tirtūm kapēr ā kagà mex o mex ā harēnh tā hkôt amnhī nhīpêx hkêt ně. Jakamǎ nhūm mě akwyjaja ja hǎ mě apumu ně mě apyrǎ ně Tirtūm ā hpjjaàm kêt o pa.

²⁴ Tirtūm kapēr ā kagà htūm kot tanhmǎ mě ate amnhī nhīpêx ā mě ajarēnh to ně mě ajarēnh kot:

Mě kēp Ijaew kêt xwýnhjaja na htem Ijaew kot htýx ri amnhī nhīpêx o ri mě pa hǎ mě omu ně mě ý hǎ tanhmǎ Tirtūm o kapēr punuj to ho ri pa. Anē.

²⁵ Mě pahpê Ijaew na pu htem mě pahkrajaja mě hapôx kôt kormǎ mě hkryre ri pu htem mě kēp měmy kwryt kà jakà. Finat Mojes kot Tirtūm nhý hǎ mě panhīgêjtjê mǎ hǎ karō xà hkôt na pu htem ā mě hipêx anē. Mě pahte Tirtūm mǎ mě pahkrajê nhōr ā amnhī to amnhīrīt kaxyw. Jakamǎ na pu htem arī Mojes kapēr kôt ā mě hipêx anē nhūm Tirtūm kām ja mex ně. Nom kot pu mě kapēr kwým ri tanhmǎ amnhī nhīpêx to ho papa nhūm ja kēp omnuj týx ně hāmri pu mě tee ri mě pahkrajê my kwryt kà jakàr kapry. Na hte Tirtūm ā mě pahkrajê nhīpêx anhýr ā mě pahpumunh kôt amnhīm mě pamex ā mě pajarēnh kêt ně. Nom mě pahte kapēr kôt amnhī nhīpêx mex o papa pē měmy kwryt kà jakàrja nhūm kām mex ně. ²⁶ Ijaew kêt xwýnhjaja kot ā mě hkrajê nhīpêx anhýr kêt tā ra mě hkwyjaja Tirtūm kapēr ma ně hkôt amnhī nhīpêx o ri pa. Jao te mě kot amnhī my kwryt kà jakàr pyrāk o amnhī nhīpêx. Jakamǎ nhūm Tirtūm ja hǎ mě omu ně mě kām:

—Nà ām hāmri. Mě ate amnhī my kwryt kà jakàr kêt tā mě apê ixkra na ka mě. Anē.

²⁷ Mě kot amnhī jakàr kêt tā Tirtūm kapēr kôt amnhī nhīpêx mex o ri pa nhūm amnhī tā mě omu ně mě arom amnhīm mě kot amnhī to mex xwýnh ā mě harē. Mě kot amnhī jakàr kêt tǎā.

No mě kajaja mě ate Tirtūm nhý hǎ Mojes kapēr ā kagà mar týx tā hkôt amnhī nhīpêx kêt ně. Ja mýrapê koja ja hǎ mě apumu ně Ijaew kêt xwýnhjê kīnhǎ mě ate amnhī tomnuj xwýnh ā mě ajarē. Ra mě ate amnhī jakàr tā mě ate amnhī tomnuj xwýnh ā mě ajarē.

²⁸ Nē kot ka mē atõ tanhmã amnhĩ to jarkrar to nē amnhĩ jarēnh o:

—Nà ixpē Ijaew jakamã na hte Tirtũm mē kot inhmy kwryt kã krãhyr kõt ixto kraa. Anē.

Nom xà na hte Tirtũm ã mē pahte amnhĩ nhĩpēx anhỹr ã mē pahpumunh kõt mē pahto hkra? Nà kot anhỹr kēt. Na htem ãm htỹx ã amnhĩ to jarkrar anhỹr kaprỹ ho pa.

²⁹ Nē Tirtũm Karõ kot mē hkarõ mã gjēx xwỹnhjaja kēp Tirtũm kra jakamã na htem Tirtũm kãm hprãm xà hkõt amnhĩ nhĩpēx. Nom ri amnhĩ krã hkõt tanhmã amnhĩ nhĩpēx to ho pa hkēt nē. Rỹ htỹx hamaxpēr o:

—Nà kot paj Mojes kapēr ã kagã hkõt amnhĩ nhĩpēx nhũm Tirtũm ja hã ixpumu nē amnhĩm inhmx ã ijarē nē ixto hkra.

Anhỹr o hamaxpēr kēt nē. Na htem hamaxpēr o:

—Nà ra Tirtũm Karõ kot ixkarõm ãr jakamã ixpē hkra nhũm amnhĩm inhmx ã ijarē. Jakamã kot paj ãm kõt pix mã ri amnhĩ nhĩpēx o ri ixpa rãhã ty. Kwãr mãmrĩ ixkwỹjaja amnhĩm inhmx kēt ã ijarē. Anē.

Kēr ka mē ã ajamaxpēr anhỹr o ri pa. ã mē hamaxpēr anhỹr na mex o mex.

3 Nē mãn ka mē ra tee ri tanhmã amnhĩ kukamã ajamaxpēr to nē ajamaxpēr o:

—Kwa mo kaxyw na pa ixpē Ijaew? Mon pa pre we ixpē Ijaew kētre hkēt nē? Mē kēp Ijaew kēt xwỹnhjaja kot amnhĩ jakãr kēt tã nhũm Tirtũm mē pahpyrà nē mē ho hkra. Anē.

Kwa mē ã ri ajamaxpēr anhỹr kēt nē. ² Mē pahpē Ijaew na pre Tirtũm Ijaew kēt xwỹnhjē rom mē pahto mex rax nē. Na pre amnepē mã mē panhĩgēt mã tanhmã kapēr to. Mē pahpiitã mē pahte mar nē hkõt amnhĩ nhĩpēx kaxyw. Nom Ijaew kēt xwỹnhjē nhĩgēt mã ã kapēr anhỹr kēt nē. ãm mē pahpē Ijaew nhĩgēt pix mã kapēr. Jakamã mē pahpē Ijaew mã ja mex kumrēx. ³ Nom kot kaj mē atõ ja ma nē ajamaxpēr o:

—Nà Tirtũm kot mē ixto mex mã mē ixtã amnhĩ jarēnh tã no nhũm xep mē inhĩgēt kwỹjaja hkõt amnhĩ nhĩpēx kēt nē. Na xep prem kapēr kwỹm ri amnhĩ tomnuj o pa. Jakamã ko. Koja Tirtũm mē ixpē mē hkanrēhã mē htãmnhwỹjaja tanhmã mē ixto mex to japēr ko. Anē.

⁴ Kwa mē ri ã ajamaxpēr anhỹr kēt nē. Tirtũm na hte mē pahpiitã mē pakurom mēmoj tã amnhĩ jarēnh o hēx kēt nē. Tã ra kot tanhmã mē pahtã amnhĩ jarēnh to xà hkõt koja ã mē pahto mex anē. Kapēr ã kagã htũm kot mēhõ tanhmã Tirtũm mã kapēr to nē harēnh kot:

Pa Tirtũm. Nà ãm kapxpix na ka hte mēmoj tã amnhĩ jarēnh xà hkõt amnhĩ nhĩpēx o ri apa.

Jakamã na htem ãm axpēn mã axēx ã akapēr ã ajarēnh kaprỹ. Anhỹr o harē.

⁵ No kot ka mē atõ atỹx ajamaxpēr nē ajamaxpēr o:

—Xà koja Tirtũm tanhmã mē ixte amnhĩ tomnuj to hã mē ixpumu nē gryk? Nà koja gryk kēt nē. Jakamã kot paj arĩ amnhĩ tomnuj o ri ixpa. Kē mē piitã ja hã ixpumu nē ixrom Tirtũm tapxpix kot amnhĩ to mex o pa xwỹnh ã harēnh o pa. Nà ja mex. Jakamã kot paj arĩ

amnhĩ tomnuj rãhã ho ri ixpa nhũm mē Tirtũm pix mã mãn kot tãm amnhĩ nhĩpēx xwỹnh ã harē. Hãmri nhũm Tirtũm amnhĩ tã ixpumu nē tanhmã ixto hkēt nē. Koja tanhmã ixto japēr hãmri nē ixpyrà nē amnhĩ tomnuj nē. Anē.

Kot kaj mē ã ajamaxpēr anē nē ãm amnhĩ krã hkõt ã ajamaxpēr anhỹr kaprỹ. Nom ã ajamaxpēr anhỹrja Tirtũm jamaxpēr kõt kēt. ⁶ Kwa mē ri ã ajamaxpēr punuj anhỹr kēt nē. Tirtũm kot mē pahpyrà nē aa kot amnhĩ tomnujre hã. Kop ãm mē pahpyrà nē tanhmã kot amnhĩ tomnuj to ronhỹx tanhmã kot we amnhĩ to nē mē pahte amnhĩ tomnuj xwỹnh ã mē pajarē? Nhỹx mē pahpyrà nē ã amnhĩ jarēnh anē. Nà ã mē ajamaxpēr anhỹrja mex kēt.

⁷ E pa ixprĩ hã mē amã ja jarē ka mē inhma. Kot kaj mē atõ amnhĩ kukamã ajamaxpēr o:

—E kot paj mãmrĩ ri mēmoj tã ixēx o ri ixpa kē mē ixēx nhi hã ixpumu nē ixrom Tirtũm pix mã mãn kot amnhĩ to mex ã harē. Nē ãm pix mã mãn hēx kēt xwỹnh ã harē. Hãmri nhũm Tirtũm amnhĩ tã ixpumu nē mē ã mē kot harēnh anhỹrja ma nhũm ja kãm mex nē nhũm hkĩnh nē. Jakamã ixēx o ri ixpaja ã tanhmã ixto hkēt nē. Ra mē kot ixrom tãm kot amnhĩ nhĩpēx o pa xwỹnh ã harēnh jakamã nhũm ixēx nhita ã tanhmã ixto hkēt japēr. Jakamã kot paj ixte amnhĩ tomnuj o ri ixpaja mã inhũrer kēt nē. Kēr kē mē ja hã ixpumu nē ixrom Tirtũm tapxpix kot amnhĩ to mex xwỹnh ã harē.

Anhỹr o ajamaxpēr nom mē ajamaxpērja kot anhỹr kēt. Na hte akwỹjaja pa ixpē Pawre ixēx o ixpa hã ri axpēn mã ijarē no na pa hte ixēx o ri ixpa hkēt nē. ã mē ajamaxpēr anhỹr o ri apa xwỹnhjaja koja Tirtũm mē atomnuj tỹx nē kãm ga.

Mē mē pahte amnhĩ tomnuj xwỹnh ã mē pajarēnh

Wam Korĩt 6.9; Karatas 3.22; Xitre 3.3

⁹ Tã tanhmã kot puj mē pahpē Ijaew amnhĩ jarēnh to? Xà kot pu mē pahte amnhĩ to mex o Ijaew kēt xwỹnhjē jakrenh ã amnhĩ jarē? Nà mē pahte ã amnhĩ nhĩpēx anhỹre hã. Mē pahpē Ijaew nē Ijaew kēt xwỹnhjaja. Mē pahpiitã mē pahte amnhĩ tomnuj o axpēn pyrãk. Na pa pre ra mē amã ja jarē. ¹⁰ Tirtũm kapēr ã kagã htũm kot ja jarēnh kot:

Mēhõ na we aa kot amnhĩ tomnuj kēt kumrēx nē pa?

¹¹ Nē mēhõ na we kot mēmoj mex piitã omunh par? Nē mēhõ na kãm Tirtũm prãm?

¹² Nà amrakati kumrēx. Na mē ra piitã hkaga hpa.

Nē kapēr kwỹm ri tanhmã amnhĩ tomnuj to ho pa.

ãm mēhõ pyxire nē amnhĩ to mex o ri pa hkēt kumrēx.

¹³ Na htem kapēr punuj pix o ri pa.

Jakamã Tirtũm noo mã mē kot amnhĩ nhĩpēxja te kot mēmoj tyk nē hkro punuj pyrãk.

Na htem ãm ri hēx pix kukamã ri hamaxpēr o pa. Tanhmã mē hēx to xàja te kēp kagã xoprē nhõ wenēn xihtỹx pyrãk.

¹⁴ Nē na htem mē piitã mēmoj nhĩxi ho ri axpēn mã mē hixi jarēnh o pa. Nē ri tanhmã axpēn japrỹ hto ho pa.

¹⁵ Nē tanhmã kapēr mã gēt kãm mẽ kãm kapēr to.

¹⁶ Nē tanhmã mẽ hkwýjê homnuj to. Jakamã nhũm mẽ piitã ri hkaprĩ nē mex kêt nē pa.

¹⁷ Nhũm htem ãm xapẽn mã mẽ gryk xà pix o kapēr o pa.

¹⁸ Nē Tĩrtũm ã hpijaàm kêt o pa. Na htem kapēr ma nē ãm kuma nē kãm hkĩnh kêt o pa.

À na htem amnhĩ nhĩpêx anhỹr rãhã ho pa. Anẽ.

À Tĩrtũm kapēr ã kagã htũm kot mẽ pajarênh anhỹr.

¹⁹ Mẽ pahpê Ijaew ra mẽ pahte ja jarênh mar tỳx.

Tĩrtũm kapēr ã kagã htũm kwý na. Na hte ã mẽ kot amnhĩ tomnuj xwýnhjê jarênh anẽ. Nē mããnẽn mẽ papajaja. Mẽ pahpê Ijaew na hte ã mẽ pajarênh anẽ. No ãm mẽ papapxipix hkêt. Krĩ piitã hkôt ri mẽ pa xwýnhjaja nhũm ã mẽ harênh kot anhỹr. Ijaew kêt xwýnhjaja nē mẽ pahpê Ijaew. Mẽ pahpiitã mẽ pahte amnhĩ tomnuj xwýnh jakamã mẽmo kaxyw kot pu mẽ pahte amnhĩ tomnuj kêt ã ri amnhĩ to jarkrar o papa? Kot puj mẽ ã amnhĩ jarênh anhỹr kaprỹ. Jakamã koja Tĩrtũm mẽ pahpiitã mẽ pahte amnhĩ tomnuj mýrapê tanhmã mẽ panhĩpêx to. ²⁰ Mẽ pahtõ koja mẽ pahte kapēr kôt pix mã amnhĩ nhĩpêx o papa hã mẽ pajarê? Nē mẽ pahtõ mã koja mẽ pamã kapēr nē mẽ pamã:

—Nà na ka hte akatãt kôt ixkapēr kôt pix mã amnhĩ nhĩpêx mex nē. ãm hãmri na ka hte ã amnhĩ nhĩpêx anhỹr o apa.

Anhỹr o mẽ pahtõ mã kot we ã kapēr anẽ? Nà aa kot mẽ pahtõ mã kapēr anhỹr kêt. Na pu htem ãm kapēr ma nē tee ri amnhĩ kukamã pajamaxpêr. Mẽ pahte amnhĩ tomnuj ã amnhĩ pumunh kaxyw na pre mẽ pamã kapēr ã kagã htũmja gõ. Mẽ pahtõ mẽ pahte kapēr ã kagã hkôt amnhĩ nhĩpêx mex o papa hkêt kênã kot kêt ri amnhĩm mẽ pahte amnhĩ to mex xwýnh ã mẽ pajarê.

Tanhmã Tĩrtũm kot mẽ pahto hkra to hã harênh

Atre 17.30-31; Karatas 2.16-21; Píripós 3.7-9; Xítre 3.5; Xiakre 2.10

²¹ Nē na hte Tĩrtũm mẽ pahte kapēr kôt amnhĩ nhĩpêx ã mẽ pahpumunh kôt amnhĩm mẽ pahte amnhĩ to mex xwýnh ã mẽ pajarênh kêt nē. Jakamã mẽhõ kukwak ri koja we ã mẽ pajarênh anẽ? Nà nhãm mẽhõ kot tãm amnhĩ nhĩpêx rãhã ho pa hã omunh pix kukwak ri koja ã mẽ pajarênh anẽ. Tã mẽhõ kukwak ri kot ã mẽ pajarênh anhỹr xwýnhhta na pre ra mẽ pamã ho amnhĩrĩt. Amnepêm Tĩrtũm kapēr ã kagã htũm kamã na pre mẽhõ hkukamã tanhmã harênh to. Nē Tĩrtũm nhỹ hã mẽ kapēr jarênh o pa xwýnhjaja haxwýja kukamã tanhmã harênh to ho pa. ²² Jejus Krisja na prem hkukamã harênh o pa. Tãm na pu htem hkôt amnhĩ xunhwý nē amnhĩ kaxyw kãm pajamaxpêr rãhã ho papa nhũm Tĩrtũm ja pix ã mẽ pahpumunh kôt amnhĩm mẽ pahte amnhĩ to mex xwýnh ã mẽ pajarê. Mẽ kot Jejus kôt amnhĩ xunhwýr xwýnh piitãã. Mẽ xipê Ijaew nē mẽ apê Ijaew kêt xwýnhjaja. Mẽ pahpiitã mẽ pahte xapẽn pyrãk jakamã kot puj mẽ pahtõ Jejus kôt amnhĩ xãm nhũm Tĩrtũm Kra Jejus kot amnhĩ to mex pix o pa kukwak ri mẽ pahpumu nē amnhĩm pajarênh o:

—Nà ãm hãmri. Ra kot ixkra Jejus kôt amnhĩ xãm jakamã ra inhmã te Jejus kot amnhĩ nhĩpêx pyrã nē amnhĩ to mex o pa. Anẽ.

²³ No mẽ pahtõ na mẽ pahte Tĩrtũm mẽ Jejus wa urãk nē amnhĩ nhĩpêx mex rãhã ho ri papa? Nà amrakati kumrêx. Mẽ pahpiitã mẽ pahte amnhĩ tomnuj xwýnh kênã. ²⁴ Tã Tĩrtũm kot mẽmoj tã mẽ pakutã nojarêr rãhã jakamã na hte Jejus Kris kukwak ri amarĩ amnhĩm mẽ pahte amnhĩ to mex xwýnh ã mẽ pajarênh o pa. Mẽ pahte Jejus kôt amnhĩ xunhwýr xwýnh piitãã nhũm ã mẽ pajarênh anẽ. Ra Jejus kot htyk o mẽ pahte amnhĩ tomnuj piitã hpãnhã amnhĩrer par jakamã na hte Tĩrtũm Jejus kukwak ri amarĩ mẽ pahte amnhĩ to mex xwýnhjê hã mẽ pajarê. Te mẽ pahte amnhĩ tomnuj kêt kumrêx pyrãk mẽ pajarê. ²⁵ Na pre mẽ pahwýr Jejus mẽ nhũm mẽ pahwýr wrý nē mẽ panê ty nē htyk o mẽ pahte amnhĩ tomnuj piitã hpãnhã amnhĩrer pa. Jakamã kot pu mẽ pahtõ amnhĩ kaxyw hkôt pajamaxpêr nhũm Tĩrtũm ja hã mẽ pahpumu nē Kra kukwak ri amnhĩ katuk kôt mẽ pahte amnhĩ tomnuj piitã rênh pa. Jao te aa mẽ pahte amnhĩ tomnuj kêt kumrêx pyrãk ã mẽ pahpumu.

No kêt amnepêm kormã Jejus wrýk nē mẽ panê htyk kêt ri mẽ pa xwýnhjaja. Tanhmã na pre Tĩrtũm mẽ kot hkôt amnhĩ xunhwýr xwýnhjê nhĩpêx to? Kormã Jejus mẽ panê htyk kêt ri mẽ pa xwýnhjaja tanhmã na pre mẽ hipêx to? Nà na pre mẽ hkwýjaja amnhĩ kaxyw Tĩrtũm kôt hamaxpêr nē hkôt amnhĩ xunhwý nhũm amnhĩ tã mẽ omu nē amnhĩm mẽ harênh o:

—Nà ãm hãmri. Koja nhỹrmã Ixkra ma mẽ hwýr wrý nē mẽ nê ty nē htyk o mẽ kot amnhĩ tomnuj pãnhã amnhĩrer pa. Jakamã koja mẽ tãmjaja amnhĩ tomnuj pãnhã amnhĩrer kêt nē. Anẽ.

Tã nhũm Jejus tãm mẽ pahwýr wrý nē mẽ pahpiitã mẽ panê ty. Jakamã nhũm Tĩrtũm ra mẽ pahte hkôt amnhĩ xunhwýr xwýnhjaja Kra kukwak ri amnhĩ katuk kôt mẽ pahte amnhĩ tomnuj piitã rênh pa. No na hte amarĩ ã mẽ panhĩpêx anhỹr kêt nē. ãm Jejus tyk pix kukwak ri na hte ã mẽ panhĩpêx anẽ. ãm hãmri na hte ã mẽ panhĩpêx mex anẽ. Na hte tãm mẽ panhĩpêx rãhã ho pa. ²⁷ Jakamã kot puj mẽ ã pajamaxpêr anẽ nē pajamaxpêr o:

—Nà na pa hte amnhĩ to mex rãhã o ri ixpa. Amnhĩ to mex o mẽ piitã mẽ hakrenh pa.

Anhỹr o pajamaxpêr kêt nē. Koja mẽhõ ã hamaxpêr anẽ nē ãm amnhĩ jarênh o hêx. Na hte Tĩrtũm mẽ pahte amnhĩ to mex ã mẽ pahpumunh kôt amnhĩm mẽ pahte amnhĩ to mex xwýnh ã mẽ pajarênh kêt nē. Mẽ pahte amnhĩ to mex rãhãre hã. Nom na pu htem amnhĩ kaxyw Jejus mã pajamaxpêr nē hkôt amnhĩ xunhwý nhũm ja hã mẽ pahpumu nē rĩ kormã amnhĩm mẽ pamex ã mẽ pajarê.

²⁸ E pa axte tanhmã mẽ amã ja jarênh to ka mẽ aprĩ hã inhma. Mẽmoj pumunh kôt na hte Tĩrtũm mẽ pahte amnhĩ to mex xwýnh ã mẽ pajarênh wehe? Xà mẽ pahte kapēr tũm kôt amnhĩ nhĩpêx o ri papa hã mẽ pahpumunh kôt? Nà na hte ja hã mẽ pahpumunh kôt ã mẽ pajarênh anhỹr kêt nē. Mẽ pahte hkôt amnhĩ

nhípêx rãhã ho papare hã. Æm mẽ pahte amnhĩ kaxyw Kra Jejus kôt pajamxpêr nê hkôt amnhĩ xunhwÿr ã mẽ pahpumunh kôt pix mã na hte mẽ pahte amnhĩ to mex xwÿnh ã mẽ pajarê. Ja pix ã mẽ pahpumunh kôt na hte ã mẽ ajarênh anê.

²⁹ Nê xà Tirtüm kêp mẽ ixpê Ijaew pix nhõ Tirtüm pix na? Nà kêp mẽ ixpix nhõ Tirtüm kêt. Kêp mẽ ixpê Ijaew nhõ Tirtüm nê mãänên kêp mẽ apê Ijaew kêt xwÿnhjê nhõ Tirtüm.

³⁰ Nê Tirtüm ãm pyxi mex. Axtem hõ kêt. Na hte mẽ pahpiitã mẽ panhípêx o axpên pyræk. Jakamã na hte mẽ kot amnhĩ kaxyw Jejus kôt hamaxpêr o mẽ pa xwÿnhjê pumu nê mẽ kot amnhĩ to mex xwÿnh ã mẽ harê. Mẽ ixpê Ijaew nê mãänên mẽ apê Ijaew kêt xwÿnhjaja.

³¹ Tã koja mēhõ htÿx hamaxpêr o:

—Nà ixte amnhĩ kaxyw Jejus kôt ijamxpêr mex o ixpa nhũm Tirtüm kot amnhĩm inhmx ã ijarênh jakamã kot paj axte kapêr kôt amnhĩ nhípêx kêt nê. Kot paj ãm amnhĩ krã hkôt amnhĩ nhípêx o ri ixpa. Ra Tirtüm kot ixto hkra kênã.

Anhÿr o ajamxpêr japêr. Kwa mẽ ã ri ajamxpêr anhÿr kêt nê. Na htem amnhĩ kaxyw Jejus kôt hamaxpêr hãmri nê kãm hkôt amnhĩ nhípêx prãm rãhã nê pa ho pa.

Apraãw kot amnhĩ kaxyw Tirtüm kôt hamaxpêr

Karatas 3.6-18; Xiakre 2.23

4 Nê mẽ panhigêt finat Apraãwja kêp mẽ pahpê Ijaew pàr krax. Tã mẽmoj tã na pre Tirtüm omu nê kot amnhĩ to mex xwÿnh ã harê? ² Xà kot kãm tanhmã amnhĩ nhípêx to hã karõ xà hkôt amnhĩ nhípêx mex ã omunh xà hkôt nhũm pre ã harênh anê? Nà ja kôt kêt. Kop apu ja kôt ã kot harênh anhÿr ronhÿx Apraãw amnhĩ tã omu nê Tirtüm mã amnhĩ to jarkrar nê kãm: —Pa Tirtüm? E mãn ka ixpumu. Na pa hte akapêr kôt amnhĩ nhípêx mex o ri ixpa.

Anhÿr o nhÿx pre kãm amnhĩ to jarkrar. No na pre tanhmã kãm amnhĩ to jarkrar to hkêt nê. ³ Tã mẽmoj tã omunh xà hkôt na pre Tirtüm amnhĩm mex ã harê? Nà Tirtüm kapêr ã kagà htüm kot tanhmã Apraãw jarênh to kot:

Na pre Apraãw amnhĩ kaxyw Tirtüm kôt hamaxpêr nê hkôt amnhĩ xãm nhũm amnhĩ tã omu nê amnhĩm mex ã harê. Anê.

⁴ Mẽ õ patrãwja na htem kãm mẽ àpênh xwÿnhjaja àpênh mex ã mẽ omunh xà hkôt mẽ kãm amnhĩre.

⁵ No Tirtüm na hte ã mẽ panhípêx anhÿr kêt nê. Na hte mẽ pahte tãm amnhĩ nhípêx ã mẽ pahpumunh kôt amnhĩm mẽ pahte amnhĩ to mex xwÿnh ã mẽ pajarênh kêt nê. Æm mẽ pahte amnhĩ kaxyw Kra Jejus kôt pajamxpêr nê hkôt amnhĩ xunhwÿr ã mẽ pahpumunh kôt pix mã na hte amnhĩm ã mẽ pajarênh anê. Ra mẽ pahte amnhĩ tomnuj o ri papa htã hpãnhã amnhĩ kaxyw Jejus kôt pajamxpêr xwÿnh pixjaja na hte ã mẽ pajarênh anê.

⁶ Jakamã na hte mẽ pamã amnhĩ jarênh o:

—Ixte mẽ amex ã mẽ ajarênh tã no ãm mẽ ate amnhĩ to mex kôt mẽ apumunh kôt na pa ã mẽ ajarênh anhÿr kêt nê. Æm mẽ ate amnhĩ kaxyw Ixkra mẽ wa ixkôt ajamxpêr nê wa ixkôt amnhĩ xunhwÿr ã mẽ apumunh kôt na pa hte ã mẽ ajarênh anê. Anê.

Pu mẽ ã kot pamã kapêr anhÿr ã amnhĩ tã kuma nê pahkính nê. Pahi finat Tawi na pre haxwÿja ja jarênh o:

⁷ Na hte Tirtüm amnhĩ katut kôt mẽ pahte amnhĩ tomnuj piitã rênh pa nê axte kãm hamaxpêr kêt nê.

Jakamã pu mẽ ja hã amnhĩ pumu nê pahkính nê.

⁸ Nê amnhĩ kukamã pajamxpêr o: “Hêxta waa nê. Na pa pre amnhĩ tomnuj o ixpa nê tee ri ja hã amnhĩ pumu nê ixkaprĩ nê.

Hãmri nê amnhĩ to Tirtüm wÿ nhũm inhma nê ixte amnhĩ tomnuj o hapêx pa nê axte kãm hamaxpêr kêt nê.

Nà ãm hãmri. Ja mex kumrêx.” Anê.

⁹ Tã mẽ kot ja hã amnhĩ pumunh nê hkính xwÿnhjaja mẽmojaja na mẽ? Xà mẽ kot amnhĩ my kwÿt kà jakàr xwÿnh pix kwÿjaja na pre pahi Tawija ã mẽ harênh anê nã? Nà mẽ tapxipixjaja kêt. Mãänên mẽ kot amnhĩ jakàr kêt xwÿnh kwÿjaja. Tanhmã na pre ra Tirtüm kapêr ã kagà htüm kot finat Apraãw jarênh to? Na pre harênh o:

Na pre Apraãw amnhĩ kaxyw Tirtüm kôt hamaxpêr nê hkôt amnhĩ xãm nhũm amnhĩ tã omu nê amnhĩm mex ã harê. Anê.

¹⁰ Xà Apraãw ra kot amnhĩ my kwÿt kà krãhyr nhĩrõ pê na pre Tirtüm amnhĩm mex ã harê? Nà kormã kot amnhĩ krãhyr kêt ri na pre ã harênh anê. ¹¹ Kormã kot amnhĩ krãhyr kêt ri kãm kapêr nê kãm:

—E ate amnhĩ kaxyw inhã ajamxpêr nê ixkôt amnhĩ xãm ã ixte apumunh kôt na pa amnhĩm amex ã ajarê.

Anhÿr o kãm kapêr hãmri nê rĩ kormã kãm tanhmã amnhĩ krãhyr to hã kãm karõ nhũm kuma nê mar xà hkôt amnhĩ my kwÿt kà hkwy krãhta. Kot Tirtüm mã amnhĩ nhõr ã amnhĩ to amnhĩrit kaxyw ã amnhĩ nhípêx anê.

Nom kormã amnhĩ krãhyr kêt ri na pre Tirtüm amnhĩm mex ã harê. Tã Ijaew kêt xwÿnhjaja kot amnhĩ jakàr kêt tã mẽ hkwyjaja Apraãw pyrã nê amnhĩ kaxyw Tirtüm mã hamaxpêr nê kãm amnhĩ nhõr jakamã Apraãw te kêp mẽ hpàr krax maati pyræk. ¹² Nê mãänên mẽ pahpê Ijaew. Kot puj mẽ pahpê amnhĩ kaxyw Tirtüm kôt pajamxpêr nhũm amnhĩ tã mẽ pahpumu nê mẽ pamex ã mẽ pajarê. No ãm mẽ pahte amnhĩ jakàr ã mẽ pahpumunh kôt ã mẽ pajarênh anhÿr kêt nê. Æm Apraãw pyrã nê amnhĩ kaxyw Tirtüm kôt pajamxpêr pix ã mẽ pahpumunh kôt na hte mẽ pamex ã mẽ pajarê. Kormã Apraãw kot amnhĩ my kwÿt kà krãhyr kêt ri ra kot amnhĩ kaxyw Tirtüm mã hamaxpêr jakamã kêp mẽ pahpê Ijaew mẽ pahte uræk nê amnhĩ kaxyw Tirtüm mã pajamxpêr xwÿnhjê hpàr krax maati. Ijaew kêt xwÿnhjê pyrã nê kêp mẽ pahpàr krax maati.

Tirtüm kot Apraãw mã mẽmoj mex jarënh

Karatas 3.22

¹³ Amnepêm na pre Tirtüm Apraãw mã tanhmã kapër to nõ kãm:

—E koja nhÿrmã akanrëhã akra nõ atãmnhwÿjaja amÿrpê apyrã nõ krÿ piitã hkõt mẽ kêp mẽ õ pahi. Anë.

Tã tanhmã Apraãw kot amnhÿ nhÿpêx to hã omunh xà hkõt na pre ã kãm kapër anë? Xà kot kãm tanhmã amnhÿ nhÿpêx to hã karõ nhÿm kot hkõt amnhÿ nhÿpêx mex ã omunh xà hkõt na pre hkÿnh nõ ã kãm kapër anë? Nà kot anhÿr kêt. Mẽ pahtõ kot pu we Tirtüm kapër xà hkõt pix mã amnhÿ nhÿpêx mex rãhã ho ri papa? Mẽ pahpê hihtÿx kënã. Æm kot amnhÿ kaxyw Tirtüm kõt hamaxpër nhÿm kot amnhÿ tã omunh nõ amnhÿm mex ã harënh kõt pix mã na pre ã kãm kapër anë. ¹⁴ Kop apu kot kãm tanhmã kapër to nõ kãm:

—E Apraãw. Kot kaj ixkapër piitã ama nõ hkõt amnhÿ nhÿpêx mex rãhã ho ri apa. Hã koja nhÿrmã akanrëhã akra nõ atãmnhwÿjaja kêp krÿ piitã hkõt mẽõ pahihti.

Anhÿr o kãm kapër ronhÿx ãm kãm ã kapër anhÿr kaprÿ. Apraãw aa kot kapër piitã hkõt amnhÿ nhÿpêx mex o pare hã. Kop apu ã kãm kapër anhÿr ronhÿx pre kuma nõ tee ri amnhÿ kukamã hamaxpër nõ hamaxpër o:

—Kwa nã. Ra ixte Tirtüm kõt amnhÿ xãm tã tanhmã kot pa amnhÿ to nõ kapër piitã hkõt amnhÿ nhÿpêx mex rãhã ho ri ixpa? Kot paj tee ri inhmã ã amnhÿ nhÿpêx anhÿr o ixpa hprãm kaprÿ. Jakamã koja nhÿrmã ixkanrëhã ixkra nõ ixtãmnhwÿjaja kêp mẽ õ pahi hkõt nõ pa. Hêxta waa nõ. ¹⁵ Kojã Tirtüm ixte kapër kwÿm ri tanhmã ixte amnhÿ tomnuj to hã ixpumu nõ tanhmã ixtomnuj to. No mẽõ kot we kapër piitã hkõt amnhÿ nhÿpêx mex rãhã ho pa? Nã amrakati kumrëx.

Anhÿr o nhÿx pre hamaxpër. ¹⁶ No na pre Tirtüm ã kãm kapër anhÿr kêt nõ. Ra kot hprÿ hã mẽ pahte amnhÿ nhÿpêx ã mẽ pahpumunh mex kënã. Na pre ãm kãm:

—E ate amnhÿ kaxyw ixkõt ajamaxpër nõ ixkõt amnhÿ xãm jakamã kot paj amarÿ ato mex nõ. Anë.

Tirtüm na hte mẽmoj tã amnhÿ jarënh o amnhÿ to hêx kêt nõ. Na hte mẽmoj tã amnhÿ jarënh xà hkõt tanhmã mẽmoj nhÿpêx to ho ri pa. Jakamã koja mẽ pahte Apraãw pyrã nõ amnhÿ kaxyw hkõt pajamaxpër xwÿnh piitã mẽ pahto mex nõ.

Nõ xà na pre ã mẽ pamã kapër anë nõ mẽ pamã:

—E kot kaj mẽ ixkapër kõt pix mã ri amnhÿ nhÿpêx o ri apa hã kot paj mẽ ato mex rax nõ.

Anhÿr o mẽ pamã kapër? Nà na pre ã mẽ pamã kapër anhÿr kêt nõ. Na pre mẽ pamã:

—Kot kaj mẽ finat Apraãw pyrã nõ amnhÿ kaxyw ixkõt ajamaxpër nõ ixkõt amnhÿ xunhwÿ hã kot paj mẽ ato mex nõ.

Anhÿr o mẽ pamã kapër. Tã Apraãw kumrëx kot mẽ pakukamã amnhÿ kaxyw hkõt hamaxpër jakamã te kêp mẽ pahpiitã mẽ pahte urak nõ ã amnhÿ nhÿpêx anhÿr xwÿnhjê pãr krax maati pyrãk.

¹⁷ Amnepêm na pre Tirtüm tanhmã Apraãw mã kapër to. Kot tanhmã kãm kapër toja Tirtüm kapër ã kagã htüm kamã na. Na pre kãm:

Kot kaj apê ahpÿnhã ri mẽ urojê hpãr krax. Anë. Kormã Apraãw kra hkêt tã nhÿm hkra hkukamã ã kãm kapër anë. Hãmri nhÿm kuma nõ hkõt hamaxpër kurê kumrëx nõ hamaxpër o:

—Hêxta waa nõ. Ra ixprõ mẽ wa ijamẽ wa ixpigêt tÿx nõ wa ixkra hkêt kumrëx. Kot paj wa tanhmã amnhÿ to nõ tokyx ty. Tã ra Tirtüm kot ixkra nõ ixtãmnhwÿjê hkukamã ã inhmã mẽ harënh anhÿr kënã. Jakamã kot pa xep wa ixpigêt tÿx tã tanhmã amnhÿ to nõ ixkra. Nà kot pa xep wa anë. Nõ koja ixkrajã tanhmã amnhÿ to nõ ixpê htyk japêr tã koja Tirtüm akupÿm inhmã ho htÿr. Nã koja inhmã ho anë. Ra kot inhmã ixkra nõ ixkanrëhã ixtãmnhwÿ xohtõ jarënh kënã. Anë.

¹⁸ Na pre ra hpigêt tÿx nõ. Ra hã amgrã pẽ 100 nõ hkurê kêt nõ pa. Nhÿm hprõ mããnen hpigêx tÿx nõ. Nõ õhy kamã hkra hkêt kumrëx. Kormã wa hkra hkêt tã nhÿm Tirtüm Apraãw mã hkra nõ htãmnhwÿ xohtõ hã harë. Nõ kêp mẽ urojê xohtõjê pãr krax ã kãm harë. Hãmri nhÿm kuma nõ amnhÿ kaxyw hkõt hamaxpër tÿx kurê kumrëx. ²⁰ Nõ ã amnhÿ nhÿpêx anhÿr rãhã ho pa. Na pre war amnhÿ kra hã amnhÿ jarënh ma nõ tee ri amnhÿ kukamã hamaxpër kêt nõ. Æm Tirtüm tãm kot wa kãm wa hkra jarënh pix mã hamaxpër pẽ amnhÿ kaxyw kãm hamaxpër tÿx o ri wa pa. Nõ hamaxpër o:

—Nã ra wa ixpigêt tÿx kumrëx tã koja xep Tirtüm wa inhmã wa ixkra hõ gõ. Nã koja wa inhmã kugõ. Hêxta waa nõ. Æm hãmri Tirtümja mex o mex. ²¹ Nã kot wa inhmã wa ixkra jarënh xà hkõt koja wa inhmã kugõ. Ja kaxyw àhpumunh o àhpumunh. Tirtümja hêx kêt. Anë.

²² Hãmri nhÿm Tirtüm ã hamaxpër anhÿr ã omu nõ amnhÿm mex ã harë. Nõ kot kãm amnhÿ jarënh xà hkõt wa kãm wa hkrajã gõ.

²³ Nom na pre amnhÿm Apraãwja pix mex ã harënh kêt nõ. ²⁴ Kot puj mẽ pahtõ urak nõ amnhÿ kaxyw hkõt pajamaxpër nhÿm amnhÿ tã mẽ pahpumu nõ ra kot Apraãw jarënhã pyrã nõ amnhÿm mẽ pamex ã mẽ pajarë. Na pre mẽ panhõ Pahihti Jesus ty nhÿm Tirtüm akupÿm ho htÿr. Tã mẽ papajaja na pu prem amnhÿ kaxyw Jesus kõt pajamaxpër nhÿm Tirtüm ja hã mẽ pahpumunh kõt mẽ pahte amnhÿ to mex xwÿnh ã mẽ pajarë. ²⁵ Na pre mẽ pahwÿr Kra Jesus mẽ nhÿm mẽ pahwÿr wrÿ. Tã nhÿm mẽ axtem nõ kupÿ nom nhÿm amarÿ htyk kêt nõ. Na pre htyk o mẽ pahte amnhÿ tomnuj pãnhã amnhÿrer pa. Ja kaxyw na pre Tirtüm mẽ pahwÿr kumẽ. Jakamã nhÿm prem kupÿ nhÿm akupÿm ho htÿr. Tã mẽmo kaxyw na pre Tirtüm ã mẽ pahwÿr Krajã mẽnh nhÿm mẽ panê htyk anë nhÿm akupÿm ho htÿr? ãm kot kukwak ri amnhÿm mẽ pahte amnhÿ kaxyw hkõt pajamaxpër xwÿnhjaja mẽ pahte amnhÿ to mex xwÿnh ã mẽ pajarënh pix kaxyw.

Tirtüm kot mẽ pahto hkwyõ hã harẽnh

Matêwre 5.12; Sikũn Korĩt 4.8, 5.18-21; Xiakre 1.2-4; Wam Pêtre 4.12, 5.9

5 Nẽ na pu prem amnhĩ tomnuj o ri papa nhũm Tirtüm ja hã mẽ pahpumu nhũm ja kęp omnuj nẽ. Jakamã nhũm Jejus amnhĩ grõnh kõt wrý nẽ mẽ panẽ ty. Nhũm Tirtüm htykja kukwak ri mẽ pahto hkwyõ. Mẽ pahte amnhĩ kaxyw hkõt pajamexpẽr nẽ hkõt amnhĩ xunhwýr ã mẽ pahpumu hãmri nẽ ã mẽ panhĩpẽx anẽ pu mẽ ra pahpẽ hkwyõ hã papa. ² Na pre Jejus Tirtüm mã mẽ pajarẽnh o:

—E jajẽ pumu. Na mẽ ra amnhĩ kaxyw pamã hamaxpẽr nẽ pahkõt amnhĩ xunhwý. Anẽ.

Hãmri nhũm kuma nẽ mẽ pahto mex nẽ mẽ pakutã nojarêt rãhã ho pa. Tã kot puj mẽ pahpẽ hkrajaja nhýr mã pano ho Tirtüm mex o mex xwýnhja pumu. Jakamã na pu htem amnhĩ kukamã ã pajamexpẽr anhýr o pahkĩnh nẽ papa nẽ pajamexpẽr o:

—Hêxta waa nẽ. Kot paj nhýrmã inhno ho Tirtüm mex o mex ã omu nẽ kuri ixpa ho ixpa. Nã ãm hãmri. Inhmã omunh prãm tỳx kumrẽx. Anẽ.

³ Nẽ na htem Jejus ã mẽ pahpumu nẽ pu mẽ pahpunuj nẽ ri papa. Pamex kêt nẽ tã tee ri amnhĩ kukamã pajamexpẽr o ri pahkaprĩ nẽ papa hkêt nẽ. Kwãr mẽ mãmri ã mẽ panhĩpẽx anẽ. Pu mẽ pahpunuj kurẽ Jejus kõt amnhĩ xunhwýr tỳx o kormã mõ. Nẽ mẽ umaj hkaga hkêt nẽ. Arĩ amnhĩ wýr kamã pajamak o papa. Jao amnhĩ kaxyw kumã pix mã kãm pajamexpẽr tỳx rãhã pahkĩnh nẽ ri papa.

Kot puj mẽ ã amnhĩ nhĩpẽx anhýr o ri papa nhũm Tirtüm ja hã mẽ pahpumu nhũm ja kãm mex nẽ. Hãmri nhũm ja kaxyw tanhmã mẽ pahto paxihtỳx to pu mẽ pahpunuj tã hkõt pajamexpẽr tỳx rãhã nẽ.

⁵ Nẽ ra mẽ kot Jejus ã tanhmã mẽ panhĩpẽx to htã pu mẽ amnhĩ kaxyw tee ri kãm pajamexpẽr kaprý hkêt nẽ. Ra kot mẽ pamã amnhĩ Karõ nhõr nhũm kot mẽ pahkarõ mã gjêx kênã kot pu kêt mẽ ri tee ri amnhĩ kaxyw kãm pajamexpẽr kaprý. Na hte Karõja mẽ pahkarõ kamã mẽ pamã Tirtüm kapẽr jarẽnh o amnhĩrĩt nẽ kãm mẽ pajapê htỳx ã harẽnh o amnhĩrĩt rãhã nẽ.

⁶ Amnepê mã na pre mẽ piitã amnhĩ tomnuj o ri pa nẽ tee ri kãm amnhĩ to mex rãhã hprãm kaprý. Mẽhõ kot we ja kaxyw tanhmã mẽ hkrã hto? Jakamã nhũm Tirtüm ja hã mẽ omu hãmri nẽ mẽ kaxyw Kra Jejus mã kãm:

—E inhma. Ka kot kaj mẽ kot tanhmã amnhĩ tomnuj to ho paja ã ma mẽ hwýr wrý. Ixte mẽ nẽ atyk kaxyw agrõnh kõt mẽ hwýr amẽnh jakamã kot kaj wrý nẽ mẽ kãm ixkapẽr jarẽnh o ri mẽ hkõt apa. Rãhã nhũm mẽ hkwyõjaja apĩ ka mẽ piitã mẽ nẽ ty. Anẽ.

Hãmri nhũm kuma nẽ kãm:

—Tõe. Nã kot paj amã hprãm xà hkõt ã amnhĩ nhĩpẽx anẽ. Anẽ.

Hãmri nẽ man amnhĩ grõnh kõt mẽ pahwýr wrý. ⁷ Xà koja mẽhõ kãm axpẽn japê xà axpẽn nẽ ty nã? Xà kot mẽhõ tãm kot amnhĩ nhĩpẽx xwýnh tã nhũm mẽ kot

hpĩr kaxyw nhũm hkrãmnhwýja kãm hapê nẽ. Nẽ nẽ amnhĩ grõnh kõt mẽ kãm xa nhũm mẽ kupĩ nhũm nẽ ty? Nã kot apu nẽ htyk japêr ko. No mẽ papajaja. Na pu htem mẽhõ hkrãmnhwýta kĩnhã arĩ amnhĩ tomnuj rãhã ho ri papa htã nhũm Tirtümja arĩ kãm mẽ pajapê nẽ. Nẽ kãm mẽ pajapê xà mẽ pahwýr Kris mẽ nhũm mẽ panẽ ty. Arĩ mẽ pahte amnhĩ tomnuj rãhã ho papa tãã. Na pre ã Tirtümja kãm mẽ pajapê hã ã mẽ pahwýr mẽnh anẽ. ⁹ Na pre ty nhũm hkamrõ hkwyõ axkapĩ nhũm Tirtüm ja hã omunh xà hkõt tãm amnhĩm mẽ paxunhwý. Tã Jejus kukwak ri koja ma mẽ kot amnhĩ xà htỳx kamã hamak tũm xàta wýr mẽ parẽnh kêt nẽ. Mẽ pahpẽ hkwyõ kênã kot kêt hwýr mẽ parẽ.

¹⁰ Nom kormã mẽ pahpẽ hkwyõ hkêt ri na pu prem te ra kutã amnhĩ xunhwýr pyrãk o amnhĩ nhĩpẽx. Tã nhũm Kra mẽ panẽ ty pu mẽ hkõt amnhĩ xunhwý. Jakamã nhũm Tirtüm Jejus tyk kukwak ri mẽ pahto hkwyõ. Nẽ ra akupým Kra ho htĩr jakamã kot puj mẽ pahte hkõt amnhĩ xunhwýr xwýnhja nhýrmã wa urak nẽ wa kuri pahtĩr tũm nẽ pamex kumrẽx nẽ papa ho papa.

¹¹ Nẽ mẽ pahpẽ kuwy rax wýr mẽ papa mã xwýnh kêt jakamã na pu htem pahkĩnh nẽ pajamakêtkati nẽ ri papa. Nom ja pix ã na pu htem ã amnhĩ nhĩpẽx anhýr kêt nẽ. Mẽ pahpẽ Tirtüm krãmnhwý jakamã na pu htem mããnen pahkĩnh nẽ ri papa. Pahihti Jejus Kris kot mẽ panẽ htyk ã omunh xà hkõt na pre Tirtüm mẽ pahte hkõt amnhĩ xunhwýr xwýnhjê ho hkwyõ jakamã na pu htem pahkĩnh nẽ pajamakêtkati nẽ ri papa.

Atãw mẽ Kris wa harẽnh

Wam Korĩt 15.20-22, 45-49

¹² Nẽ amnepem na pre Tirtüm finat Mojes mã tanhmã kapẽr to. Hãmri nhũm kuma nẽ Ijaew kot tanhmã amnhĩ nhĩpẽx to ho pa kaxyw mẽ kãm mẽmojta ã karõ nẽ mẽ kãm hã hkagã. Mẽ kot kamã harẽnh nẽ mar nẽ Tirtüm kõt amnhĩ nhĩpẽx kaxyw. Hãmri nhũm mẽ tee ri ã kot mẽ kãm mẽmoj tã karõja ma nẽ tanhmã axpẽn mã kapẽr to nẽ axpẽn mã:

—Kwa na pu htem ã amnhĩ nhĩpẽx anhýr kêt nẽ. Na pu htem ãm amnhĩ tomnuj tỳx kumrẽx o ri papa nẽ amnhĩ to mex kêt kumrẽx. Anẽ.

Ãm hãmri na prem ã amnhĩ jarẽnh anẽ. Mẽ pahpiitã mẽ pahte amnhĩ tomnuj xwýnh kênã. My kot wa pê finat Atãwja kumrẽx na pre tanhmã mẽ pahte amnhĩ tomnuj to ho hkra. Mýrapê na pre htĩr tũm nẽ ri pa ho pa hkêt nẽ. Na pre ri pa nẽ gaa nẽ rĩ hpigêt tỳx nẽ ty. Tã mýr pê ri mẽ papa xwýnhjaja na pu htem urak nẽ tanhmã amnhĩ tomnuj to ho ri papa. Mýrapê na pu htem ri papa nẽ gaa nẽ Atãw pyrã nẽ pahtyk pa. Tirtüm kot mẽ pahpẽ Atãw mã kapẽr xà hkõt. ¹⁴ Jakamã na prem kormã Mojes kator xwýr ri pika piitã hkõt ri pa nẽ gaa nẽ haxwýja htyk pa. Mẽ kot amnhĩ tomnuj mýrapê ty. Atãw pyrã nẽ Tirtüm kot mẽmo xõ nẽ hkurẽ xwýnhhta krẽr kêt tã urak nẽ tanhmã amnhĩ tomnuj to ho ri pa. Hãmri nẽ mýrapê ty.

Na pre ã Atãwja mẽ pahpiitã mẽ pamã Tirtüm kapẽr nhĩrõp ãm nẽ amnhĩ tomnuj o hkra anẽ nẽ mẽmo xõta krẽ. Jao te mẽ pahpiitã mẽ pahte urak nẽ kumẽ hkur

pyràk o mẽ panhípêx. Mýrapê nhùm htem arí pika pi-itã hkôt hapôj nê kormã hprîre htã ra Atãw pyrà nê tanhmã amnhí tomnuj to ho ri pa. Jakamã nhùm Tirtũm Atãw kot tanhmã amnhí tomnuj to hã omunh xà hkôt mẽ pakukamã hamaxpêr o:

—Nà koja mẽ Atãw pyrà nê amnhí tomnuj o ri pa. Mýrapê kot paj ma mẽ kot amnhí xà htýx kamã hamak tũm xàta wýr mẽ rênh pa. Anê.

Tã Jejus Kris mẽ Atãw wa harênhja kot axpên pyràk jakamã na hte Atãw kanrêhã hkra nê htãmnhwýjaja Atãw kot amnhí nhípêx kôt amnhí nhípêx o ri pa rãhã nê. Urãk nê amnhí tomnuj rãhã ho ri pa. Nhùm axtem Jejus kôt mẽ kot amnhí xunhwýr xwýnhjaja Jejus kôt amnhí nhípêx rãhã ho ri pa. Te mẽ kêp hkanrêhã hkra nê htãmnhwýjê pyrà nê urãk nê tãm amnhí nhípêx. Na htem ã ahpýnhã amnhí nhípêx anhýr o ri pa. Na pre Jejus mẽ pahte amnhí tomnuj pãnhã amnhírer par kaxyw mẽ panê ty. Jakamã mẽ pahte hkôt amnhí xunhwýr xwýnhjaja na hte Tirtũm ja hã mẽ pahpumunh kôt mẽ pahto hkra. Kot puj mẽ nhýrmã pahtyk tã nhùm akupým mẽ pahto mẽ pahťír pu mẽ wa kuri pahťír tũm nê papa ho papa.

Atãw kot Tirtũm kapêr nhîrôp ãm jakamã na hte Tirtũm mẽ pahpiitã mẽ pahte amnhí tomnuj xwýnh ã mẽ pajarê. Nom nhùm Jejus Atãw rom kot Tirtũm kapêr mar nê hkôt amnhí nhípêx rãhã jakamã na hte Tirtũm mẽ pahte hkôt amnhí xunhwýr xwýnhjaja amnhím mẽ pahte amnhí to mex xwýnh ã mẽ pajarê.

Nhùm Atãw kot Jejus kînhã Tirtũm kapêr nhîrôp ãm mýrapê na hte mýr pê mẽ pa xwýnhjaja ohtô nê pa nê gaa nê Atãw pyrà nê htyk pa. Hãmri nê kormã htír ri amnhí to mex o pa hkôt mýrapê ma mẽ kot amnhí xà htýx kamã hamak tũm xàta wýr ma hapêx. Tã nhùm Tirtũmja mex o mex jakamã na hte Jejus Kris mẽ wa mẽ pakamã ukaprí nê. Jakamã na pre mẽ pahwýr Jejus mẽ nhùm mẽ pahwýr wrý hãmri nê htyk o mẽ pahte amnhí tomnuj pãnhã amnhíre. Nhùm Tirtũm ã kot amnhí nhípêx anhýr kukwak ri mẽ pahte hkôt amnhí xunhwýr xwýnhjaja amarí tanhmã mẽ pahto mex to ho ri pa. Atãw kot amnhí tomnuj pix pumunh kôt na pre Tirtũm mẽ pahpiitã mẽ pahte amnhí tomnuj xwýnh ã mẽ pajarê. Tã nhùm Jejus mẽ pakamã ukaprí nê mẽ panê ty nhùm Tirtũm ja hã omunh xà hkôt ra mẽ pahte amnhí kaxyw hkôt pajamaxpêr xwýnhjaja te mẽ pahte aa tanhmã amnhí tomnuj to hkôt pyràk o mẽ panhípêx. Na hte amarí ã mẽ panhípêx anê.

Nê Atãw kot amnhí tomnuj mýrapê na htem piitã ri pa nê tanhmã amnhí to nê ty rý ri pa nê gaa nê wejre nê ty. No na pre Jejus Krisja aa kot amnhí tomnuj kêt kumrêx tã amarí mẽ panê ty. Jakamã nhùm Tirtũm ra kukwak ri mẽ pahte hkôt amnhí xunhwýr xwýnhjê kutã nojarêr rãhã nê mẽ pakukamã hamaxpêr o:

—Nà mẽ kot Ixkra hkôt amnhí xunhwýr xwýnhjaja na pa mẽ omunh pa. Tã kot paj Ixkrata kukwak ri tãm mẽ unhwý nhùm mẽ nhýrmã wa ixri mex nê htír tũm nê pa ho pa. Anê.

²⁰ Nê na pre Tirtũm tanhmã finat Mojes mã kapêr to. Mẽ piitã mẽ kot amnhí tomnuj o ri mẽ pa hã amnhí

pumunh kaxyw. Hãmri nê mẽ kot kapêr mar nê hkôt amnhí nhípêx o pa kaxyw tanhmã mẽ kaxyw Mojes mã kapêr to. Nhùm kuma nê amnhí xô ri mẽ kãm hã kagã nê mẽ kãm harênh o ri mẽ hkôt pa. No nhùm prem kapêr ma nê ãm kuma nê hkwým pix mã ri tanhmã amnhí tomnuj to ho pa. Nê pika piitã hkôt ja arí rãhãã. Ja mýrapê koja mẽ nhýrmã ty nê ma mẽ kot amnhí xà htýx kamã hamak tũm xàta wýr ma pa. Nom Tirtũm arí kãm pika piitã hkôt mẽ papa xwýnhjê japê nê. Mẽ pahte amnhí tomnuj o papa tã nhùm kãm mẽ pahto mex prãm nê. Jakamã na pre mẽ pahwýr Kra Jejus Kris mẽ nhùm mẽ pahwýr wrý. Mẽ panê htyk o kot mẽ pahte amnhí tomnuj pãnhã amnhírer kaxyw. Tã kukwak ri kot puj mẽ pahte amnhí kaxyw hkôt pajamaxpêr xwýnhjaja nhýrmã Tirtũm mẽ wa kuri pahťír tũm nê pa mex nê papa ho papa.

Mẽ kot mẽ pahkrã kumrã ã mẽ harênh

Sikũn Korít 5.17; Karatas 2.19-20, 5.24, 6.14; Epes 4.17-24; Korosê 3.1-11; Wam Pêtre 4.1-6

6 Nê mẽ pahte arí tõiã tanhmã amnhí tomnuj to htã nhùm Tirtũm arí kãm mẽ pajapê nê. Nê arí mẽ pakutã nojarêr rãhã nê. Jakamã xà kot kaj mẽ atõ ã harênh anhýrja ma nê atýx ri ã ajamaxpêr anê nê ajamaxpêr o:

—Nà Tirtũm kãm ijapê nê kot ixkutã nojarêr rãhã ho ri pa jakamã mo kaxyw kot pa Jejus kôt amnhí nhípêx o ri ixpa? Nà kot paj ho anhýr kêt nê. Anê.

Ka ã mẽ atõ atýx ri ajamaxpêr anhýr japêr. Kwa xà ajamaxpêrja mex? Nà mex kêt. ² ã ajamaxpêr anhýrja mẽ hamaxpêr mex xà hkôt kêt. Ra mẽ pahte Jejus kôt amnhí xunhwýr nê mẽ pahte amnhí tomnuj kaga jakamã nhùm mẽ pahte amnhí tomnujja te ra mẽ pahpê hapêx pyràk. Jakamã kot puj mẽ arí tanhmã amnhí tomnuj to ho ri papa hkôt nê. ³ Mẽmo kaxyw na htem Tirtũm mã mẽ pahkrã kumrã? Nà mẽ pahte ra Jejus kôt amnhí xunhwýr ã amnhí to amnhírit kaxyw. Te Jejus htyk nhùm mẽ pahte amnhí tomnujja haxwýja hkôt htyk nê hapêx par pyràk o amnhírit kaxyw. Jakamã na pu htem pajamaxpêr o:

—Nà kot paj axte tanhmã amnhí tomnuj to ho ri ixpa hkôt nê. Anê.

⁴ Na htem Tirtũm mã gôx kãm mẽ pahkrã kumrã nhùm mẽ pahte amnhí nhípêx tũmja te mẽ kot Jejus kôt haxwýja haxàr pyràk. Hãmri nhùm mẽ akupým mẽ pahto api. Te Tirtũm hihtýx o hihtýx o kot akupým Kra Jejus ho htír pyràk. Te mẽ pahtyk tã nhùm akupým kot mẽ pahto mẽ pahťír pyràk. Pãnhã mẽ pahte amnhí nhípêx nyw o amnhí nhípêx kaxyw. ⁵ Nhùm mẽ pahte amnhí nhípêx tũmja te Jejus kôt htyk nê hapêx par pyràk. Nê mẽ pahte amnhí nhípêx nywja te Jejus akupým htír pyràk o amnhí nhípêx.

⁶ Amnepêm na pu pre htem amnhí tomnuj rãhã ho ri papa. Te mẽ kãm mẽ ãpênh xwýnhjaja kot mẽ õ pa-trãw mã ãpênh rãhãta pyràk. Tã nhùm Kris mẽ panê ty. Kot mẽ panê mẽ pahte amnhí tomnuj pãnhã amnhírer nê ho hapêx par kaxyw mẽ panê ty. Jakamã te mẽ pahte amnhí tomnuj mẽ pajamaxpêr punujja te pí kah-

pa hã Jejus kôt harir nẽ htyk nẽ hapêx par pyrãk. Pãn-hã mẽ pahte amnhĩ nhĩpêx nyw pix o amnhĩ nhĩpêx kaxyw. Nẽ mẽ pajamaxpêr nyw pix o pajamaxpêr papa kaxyw. ⁷ Na hte mẽ htyk xwýnhjaja axte tanhmã amnhĩ tomnuj to hkêt nẽ. Tã kêr pu mẽ urãk nẽ axte ã amnhĩ nhĩpêx anhÿr kêt nẽ. ⁸ Na pu prem Jejus kot mẽ panê htyk ã harênh ma nẽ pajamaxpêr o:

—Nà ra Jejus kot mẽ panê htyk jakamã kot paj ixte amnhĩ nhĩpêx tũm kaga hpa nẽ hpãnhã kot amnhĩ nhĩpêx kôt pix mã ri amnhĩ nhĩpêx o ri ixpa. Te ra ixtyk nẽ axte tanhmã ixte amnhĩ tomnuj to ho ri ixpa hkêt pyrãk. Jao amnhĩ nhĩpêx nyw pix o amnhĩ nhĩpêx o ri ixpa. Anẽ.

⁹ Nẽ Jejus htyk nhũm Tirtũm akupÿm ho htĩr jakamã koja axte htyk kêt nẽ. Ra mẽ pahte ja mar mex. ¹⁰ Na pre ãm htyk tipxi htã htykja o mẽ pahpiitã mẽ pahte amnhĩ tomnuj pãnhã amnhĩre. Tã ra akupÿm htĩr o htĩr nẽ kaxkwa kamã Tirtũm mã tanhmã amnhĩ nhĩpêx to ho ri pa. ¹¹ Tã mẽ papajaja kot puj mẽ ã kot amnhĩ nhĩpêx anhÿrja ma nẽ ã pajamaxpêr anẽ nẽ pajamaxpêr o:

—Nà ãm hãmri. Te ixte Jejus pyrã nẽ ra ixtyk pyrãk jakamã kot paj axte amnhĩ tomnuj o ri ixpa hkêt nẽ. Te ixte Jejus pyrã nẽ akupÿm ixtĩr nẽ ãm Tirtũm kôt pix mã amnhĩ nhĩpêx o ri ixpata pyrãk o kot paj hpãnhã amnhĩ nhĩpêx o ri ixpa. Anẽ.

¹² Jakamã kot ka mẽ atõ nhÿrmã tanhmã amnhĩ kukamã ajamaxpêr punuj to japêr hãmri nẽ ajamaxpêr o:

—Nà inhmã ã amnhĩ tomnuj anhÿr prãm nẽ. Omnuj tã kot paj ho anẽ. Nà ixte ho anhÿr mã kênã.

Anhÿr o ajamaxpêr japêr tã kwa mẽ ã ajamaxpêr anhÿr kêt nẽ.

¹³ Kêt Tirtũm mã mãn amnhĩ gõ nẽ hkôt amnhĩ nhĩpêx o ri apa. Hãmri nẽ amnhĩ krã kamã mẽmoj mex pix mã ajamaxpêr nẽ tãm akapêr. Nẽ mẽ kot amnhĩ to mex xwýnhjê kôt pix mã mãn ri apa.

Na ka pre htem akapêr punuj nẽ.

Nẽ ajamaxpêr punuj nẽ.

Nẽ mẽ kot amnhĩ tomnuj o mẽ pa xwýnhjê hkôt ri apa.

Nẽ kagôxÿhti japrõ nẽ ho akõm o ri mẽ hkôt apa. Tã ra hpãnhã Tirtũm mã amnhĩ gõ nẽ axte ã amnhĩ nhĩpêx anhÿr kêt nẽ.

¹⁴ Amnepêr na pu prem tanhmã mẽ pahte amnhĩ nhĩpêx to ho papa hkukamã pajamaxpêr nẽ pajamaxpêr o:

—Nà kot paj Tirtũm kapêr kôt pix mã mãn ri amnhĩ nhĩpêx o ri ixpa nẽ amnhĩ to mex o ri ixpa nhũm Tirtũm ja hã ixpumu nẽ amnhĩm inhmex ã ijarẽ. Nà kot paj anẽ.

Anhÿr tã no ãm tee ri mẽ pamã hkôt amnhĩ nhĩpêx o ri papa hprãm kaprÿ nẽ arĩ ri kapêr kwÿm tanhmã amnhĩ nhĩpêx to ho ri papa. Tã ra hpãnhã axtem pajamaxpêr o:

—Nà Tirtũm kot ixkutã nojarêr rãhã ho pa xwýnh. Tã ra ixte hkôt amnhĩ xãm jakamã koja tanhmã ixto pa hkôt amnhĩ nhĩpêx mex o ri ixpa. Nà koja ixto anẽ.

Anhÿr jakamã ra amnhĩ kaxyw kãm pajamaxpêr tÿx o mẽmoj punuj kutã amnhĩ to htÿx nẽ.

Mẽ pahte Tirtũm mã tanhmã amnhĩ nhĩpêx to hã mẽ

pajarênh

Juãw 8.34

¹⁵ Tã ã kot anhÿr jakamã tanhmã kot puj wem pajamaxpêr to? Xà kot pu mẽ ã pajamaxpêr anẽ nẽ pajamaxpêr o:

—Nà na hte Tirtũmja ixte kapêr kôt amnhĩ nhĩpêx o ixpa hã ixpumunh kôt amnhĩm inhmex ã ijarênh kêt nẽ. ãm kêp ixkutã nojarêr rãhã nẽ amarĩ amnhĩm inhmex ã ijarênh xwýnh jakamã kot paj arĩ amnhĩ tomnuj rãhã nẽ aa ja kaga hkêt nẽ.

Anhÿr o kot puj mẽ pajamaxpêr? Nà kot puj mẽ ã pajamaxpêr anhÿr kêt nẽ. ã mẽ pajamaxpêr anhÿrja mex kêt. ¹⁶ Koja mẽhõ nhÿri kot amnhĩ tomnuj tÿx xwýnhjê hõ pumu nẽ kãm amnhĩ jarênh japêr nẽ kãm:

—E inhma. Kot paj ãm akôt pix mã tanhmã amnhĩ nhĩpêx to ho ri ixpa. Jakamã e inhmã mẽmoj tã karõ pa ama nẽ amã tanhmã ho ho ri ixpa.

Anhÿr o kãm kapêr japêr. Hãmri nẽ ã amnhĩ nhĩpêx anhÿr tã amnhĩ tomnuj pix o ri pa. Tã ã mẽ kot amnhĩ nhĩpêx anhÿr o mẽ pa xwýnhjaja koja nhÿrmã ty hãmri mẽ kot amnhĩ xà htÿx kamã hamak tũm xàta wÿr ma hapêx.

No koja mẽhõ Tirtũm mã amnhĩ jarênh nẽ kãm:

—Pa Tirtũm. E kot paj ãm akapêr kôt pix mã ri amnhĩ nhĩpêx o ri ixpa.

Anhÿr o kãm amnhĩ jarê nẽ hkôt amnhĩ nhĩpêx mex o pa. Nẽ tãm amnhĩ nhĩpêx o ri pa. Hãmri nẽ nhÿrmã ty nẽ ma õ krĩ hwÿr api nẽ Jejus mẽ Tirtũm wa kuri htĩr tũm nẽ mex rãhã nẽ pa ho pa.

¹⁷ Tã mẽ kajaja na ka xep prem tee ri mẽ amã mẽ ate amnhĩ tomnuj mã anhÿrer prãm tã nhũm te tãm kot amnhĩ tã mẽ ato htÿx pyrãk o mẽ anhĩpêx ka mẽ tee ri kãm anhÿrer prãm kaprÿ. Tã nhũm Tirtũm tanhmã mẽ akrã hto ka mẽ kapêr ma nẽ amnhĩ kaxyw hkôt ajamaxpêr tÿx nẽ ãm hkôt pix mã amnhĩ nhĩpêx. Pa ja hã mẽ ajarênh ma nẽ mẽ anhÿ hã ixkĩnh nẽ. Nẽ Tirtũm mã ixte mẽ ajarênh mar nẽ mẽ anhÿ hã ixkĩnh ã amnhĩ jarê. ¹⁸ Na pre Tirtũm tanhmã mẽ akrã hto ka mẽ amnhĩ tomnuj mã anhÿrer pa nẽ hpãnhã hkôt pix mã amnhĩ nhĩpêx.

¹⁹ E kot paj ixprĩ hã tanhmã mẽ amã ja jarênh to. Te ixte ixkrajê jahkre pyrãk o kot paj mẽ amã awjarê. Nà amnepêr na ka prem ajamaxpêr punuj kôt amnhĩ tomnuj o ri apa. Nẽ gaa nẽ ra amnhĩ tomnuj pix kukamã ajamaxpêr. Tã kêr ka mẽ arĩ ã amnhĩ nhĩpêx anhÿr kêt nẽ. Pãnã tãm ri ajamaxpêr o ri apa. Jao gaa nẽ ra Tirtũm kãm hprãm xà hkôt tãm amnhĩ nhĩpêx mex nẽ. ²⁰ Na ka prem tee ri amã amnhĩ tomnuj mã anhÿrer prãm kaprÿ. Te tãm kot amnhĩ tã mẽ ato htÿx nẽ amnhĩ kôt mẽ ato pa pyrãk o mẽ anhĩpêx. ²¹ Xàn ka prem ã amnhĩ tomnuj anhÿr o apa nẽ akĩnh nẽ ajamakêtkati nẽ ri apa? Nà na ka prem akĩnh nẽ apa hkêt nẽ. Tã na ka prem Jejus kôt amnhĩ xunhwÿ nẽ tee ri ate tanhmã amnhĩ tomnuj to hã amnhĩ pumu nẽ akaprĩ nẽ

apijaam nê. Ā mẽ kot amnhĩ tomnuj anhÿr o pa xwÿn-hjaja na htem ja mÿrapê ty nê ma mẽ kot amnhĩ xà htÿx kamã hamak tÿm xàta wÿr pa. ²² No na pre ra Tirtÿm tanhmã mẽ akrã hto ka mẽ amnhĩ tomnuj kaga hpa. Te Tirtÿm tãm kot hpãnhã amnhĩ tã mẽ ato htÿx nê amnhĩ kôt mẽ ato pa pyrãk ka mẽ ra ãm hkôt pix mã amnhĩ nhĩpêx mex o ri apa. Nê hpãnhã amã kapêr kôt pix mã amnhĩ nhĩpêx mex prãm. Nê hkôt pix mã amnhĩ nhĩpêx hprãm. Jakamã kot kaj mẽ nhÿrmã kuri amex kumrêx nê atĩr tÿm nê ri apa ho apa.

²³ Na hte mẽ kãm àpênh o ri mẽ pa xwÿnhjaja mẽ kãm mẽmoj tã apê nê àpênh pa nê hpãnhã amnhĩrer xà jamÿ. Ja pyrã nê koja mẽ kot amnhĩ tomnuj xwÿnh-jaja nhÿrmã ty hãmri nê ma mẽ kot amnhĩ xà htÿx kamã hamak tÿm xàta wÿr ma pa.

No mẽ pahte amnhĩ kaxyw Jejus Kris kôt pajamaxpêr xwÿnhjaja na hte Tirtÿm ja hã mẽ pahpumu nê mẽ pajarênh o:

—Nà ãm hãmri. Jajaja koja nhÿrmã Ixkra mẽ wa Ixkuri mex kumrêx nê htĩr tÿm nê pa ho pa. Hêxta waa nê. Nà ãm hãmri koja mẽ anê. Anê.

Xà tãm mẽ pahte amnhĩ nhĩpêx ã mẽ pahpumunh kôt na hte ã mẽ pajarênh anê? Nà ãm mẽ pahte Kra Jejus Kris kôt amnhĩ xunhwÿr ã mẽ pahpumunh kôt pix mã na hte ã mẽ pajarênh anê.

Mẽ pahte amnhĩ tomnuj kot axte amnhĩ tã mẽ pahto htÿx kêt ã harênh

Römãn 8.2, 10.4; Karatas 4.1; Epes 2.2; Korosê 3.7

7 E Jejus kôt ixkwÿjaja. Nà Tirtÿm kot mẽ pakaxyw tanhmã Mojes mã kapêr tota na ka mẽ ra mar tÿx nê. Na pu htem kormã pahĩr ri hkôt amnhĩ nhĩpêx o ri papa. Tã ty hãmri nê axte hkôt amnhĩ nhĩpêx kêt nê. Ra mẽ ate ja mar tÿx. E pa mẽ amã ja hã ejêp jarê ka mẽ inhma. ² Nà finat Mojes kot Tirtÿm nhÿ hã mênijaja kot tanhmã amnhĩ nhĩpêx to ho pa hã mẽ kãm karõja. Koja mẽhõ ho mjên hãmri nê ãm kôt pix mã ri pa ho pa nê aa hkaga hkêt nê. No koja nhÿrmã mjên kêp ty nhÿm ahte ri pa. Hãmri nê kãm axte mẽhõ ho mjên prãm nê mãmrĩ axte mẽhõ ho mjên. Ja tanhmã kute hkêt. ³ Nom koja wam mjên arĩ htĩr japêr nhÿm hprõ tanhmã hamaxpêr to nê hkaga nê hpãnhã nhãm mẽhõ ho mjên. Hã koja Tirtÿm pê ja homnuj nê. Nom koja mjên ra kêp ty nhÿm mÿrpê axte kãm mẽhõ ho mjên prãm nê mãmrĩ ho mjên. Ja na Tirtÿm pê homnuj kêt. Ra wam mjênja htyk kênã. Ā Tirtÿm kot Mojes mã mẽ pakaxyw mẽmoj tã karõ kot anhÿr.

⁴ Tã ja pyrã nê na pu prem amnepêm pajamaxpêr o:

—Ixte Tirtÿm kapêr kôt pix mã amnhĩ nhĩpêx o ri ixpa jakamã nhÿm Tirtÿm ja hã ixpumu nê amnhĩm inhmx ã ijarê. Anê.

Tã pu mẽ ra tanhmã pajamaxpêr to nê hpãnhã pajamaxpêr õ ho pajamaxpêr o:

—Nà na xep hte Tirtÿm mẽ ixte kapêr kôt amnhĩ nhĩpêx ã mẽ ixpumunh kôt amnhĩm mẽ inhmx xwÿnh ã mẽ ijarênh kêt nê. Mẽ ixte hkôt amnhĩ nhĩpêx mex o ri ixpare hã. Kêt ãm Kris kot mẽ inhne htyk nhÿm mẽ ixte amnhĩ kaxyw hkôt ijamaxpêr nê hkôt amnhĩ xun-

hwÿr pix ã mẽ ixpumunh kôt na hte mẽ inhmx ã mẽ ijarê. Ām ja pix ã mẽ ixpumunh kôt na hte mẽ ixto hkra nê mẽ ixkutã nojarêr o pa. Kra Jejus pix kukwak ri na hte ã mẽ inhĩpêx anhÿr o pa. Anê.

Ā mẽ pajamaxpêr nyw kot anhÿr. Jakamã te mẽ pahte mẽhõ kot mjên nyw xwÿnh gryk ã axte mjên htyk xwÿnh mã hamaxpêr kêeta pyrãk o na pu htem amnhĩ nhĩpêx o papa. Jao Kris kapêr kôt pix mã amnhĩ nhĩpêx o ri papa. Nê Tirtÿm noo mã tãm ri amnhĩ nhĩpêx. Nê axte mẽ pahte amnhĩ tomnuj kukamã tanhmã pajamaxpêr to hkêt nê.

⁵ Nê amnepê mã mẽ pahte amnhĩ krã hkôt tanhmã mẽ pahte amnhĩ nhĩpêx to ho ri papata ã na pu prem amnhĩ tomnuj pix o ri papa. Ra mẽ pahte Tirtÿm kapêr mar tÿx tã kuma nê ãm kuma nê ri papa nê ri hkôt amnhĩ nhĩpêx kêt nê. Mÿrapê nhÿm Tirtÿm tee ri ja hã mẽ pahpumu nê mẽ pahtyk nê ma mẽ kot amnhĩ xà htÿx kamã hamak tÿm xà hwÿr papa mã xwÿnhjê hã mẽ pajarê.

⁶ Nê amnepêm na pu pre htem ã pajamaxpêr anhÿr o:

—Nà kot paj Tirtÿm kapêr kôt pix mã amnhĩ nhĩpêx o ri ixpa nhÿm amnhĩ tã ixpumu nê ixte amnhĩ tomnuj kêt xwÿnh ã ijarê.

Anhÿr o pajamaxpêr no ãm tee ri ã pajamaxpêr anhÿr kaprÿ. Nê arĩ tanhmã amnhĩ tomnuj to ho ri papa. Tã hpãnhã te Jejus Kris kôt pahtyk pyrãk o amnhĩ nhĩpêx nê hpãnhã Karõ nhÿ hã tãm amnhĩ nhĩpêx. Jao ra tee ri mẽ pamã Tirtÿm kapêr kôt amnhĩ nhĩpêx prãm kaprÿ hkêt nê. Ra Tirtÿm Karõ nhÿ hã amnhĩ nhĩpêx nyw o amnhĩ nhĩpêx mex o ri papa.

Tirtÿm kapêr ã kaga htÿm kot tanhmã mẽ pajarênh to

Römãn 3.20, 5.20; Karatas 3.23-24

⁷ Tã Tirtÿm mẽ pahte kapêr kôt ri amnhĩ nhĩpêx ã mẽ pahpumunh kôt amnhĩm mẽ pamex ã mẽ pajarênh kêt jakamã mẽmo kaxyw na kapêr ã kaga htÿmja? Nà mẽ pahte mar nê pahprĩ hã Tirtÿm noo mã mẽ kot amnhĩ tomnuj xà jarênh mar nê omunh mex kaxyw na. Na hte mẽ pahkwÿjê kukrêx kĩnh o pamã ho panhõ hprãm nê mẽ pamã karõ. Ā kot mẽmoj punuj piitã nê mẽ pamã karõ kot anhÿr. Tã mẽ pahte ja mar kêt ronhÿx pu mẽ Tirtÿm kêp ja homnuj ã harênh mar kêt nê.

⁸ Tã ra mẽ pahte harênh mar nê kêp ja homnuj ã harênh ma. Mẽ pamã axpên kukrêx kĩnh o ho pamã panhõ hprãmja mãänên kêp ja homnuj ã harênh mar tã nom aa hkaga hkêt nê arĩ pamã axpên kukrêx kĩnh o pamã ho panhõ hprãm tÿx rãhã ho ri papa. Kop ãm Tirtÿm kapêr kêt ronhÿx pu mẽ kot amnhĩ tomnuj xàja aa mar kêt kumrêx nhÿm te mẽ pamã amrakati pyrãk. ⁹ Amnepê mã ixte Tirtÿm kapêr mar kêt ri na pa pre ix-tÿx ri amnhĩ kukamã ijamaxpêr o ri ixpa nê ijamaxpêr o:

—E kot paj nhÿrmã Tirtÿm ri ixĩr tÿm nê inhmx nê ixpa ho ixpa.

Anhÿr tã hpãnhã pamã axpên kukrêx kĩnh o ho pamã panhõ hprãm nê kapêrta ma nê ja hã amnhĩ

pumunh kurê kumrêx. Hãmri nê tee ri amnhĩ kukamã ijamaxpêr nê ijamaxpêr o:

—Hêxta waa nê. Nà ã ixte amnhĩ nhĩpêx anhÿr o i xpa jakamã kot paj nhÿrmã ty nhÿm Tirtũm akupÿm ixto ixtĩr pa kuri ixtĩr tũm nê i xpa ho i xpa hkêr nê. Hêxta waa nê. Ixte amnhĩ tomnuj xwÿnh na pa. Kot paj nhÿr-mã ty nhÿm Tirtũm ma mẽ kot amnhĩ xà htÿx kamã hamak tũm xàta wÿr amnhĩ nê inhmê. Anê.

Hãmri nê ixkaprĩ nê tee ri amnhĩ kukamã ijamaxpêr o ri i xpa. ¹⁰ Tã hpãnhã axtem ijamaxpêr o:

—Nà kot paj Tirtũm kapêr kôt pix mã mãn ri amnhĩ nhĩpêx o ri i xpa hãmri nê nhÿrmã ixyk tã hwÿr api nê kuri ixtĩr tũm nê inhmex nê i xpa ho i xpa. Nà kot paj anê.

Anhÿr ã ijamaxpêr tã no ãm tee ri inhmã hkôt amnhĩ nhĩpêx o i xpa hprãm kaprÿ. Na pa pre xatã kapêr nhĩrôp ixkuhê nê tee ri ja hã amnhĩ pumu nê ijamaxpêr o:

—Kwa tanhmã kot pa amnhĩ nhĩpêx to nê ãm Tirtũm kôt pix mã ri amnhĩ nhĩpêx? Na pa hte tee ri inhmã ã amnhĩ nhĩpêx anhÿr prãm tÿx kaprÿ. ãm ixte amnhĩ tomnuj pix o ri i xpa xwÿnh jakamã ãm hãmri koja amnhĩ nê kuwyta wÿr inhmê. Nà koja ixto anê. Hêxta waa nê. Tanhmã kot paj we ja nê kãm ixkapêr to? Anê.

¹¹ No mēhō koja Tirtũm kapêr kôt amnhĩ nhĩpêx mex o ri pa? Na pu htem pahpiitã tee ri pamã ho anhÿr prãm kaprÿ. Mē pahpê hihtÿx kumrêx jakamã na pa pre ixtÿx ixte Tirtũm kuri ixtĩr tũm nê ri i xpa hã amnhĩ kukamã amnhĩ jarênh kaprÿ. ãm xatã kapêr nhĩrôp ixkuhê nê amnhĩ tomnuj pix o ri i xpa mÿrapê koja mẽ kot amnhĩ xà htÿx kamã hamak tũm xàta wÿr amnhĩ nê inhmê. ¹² Kot anhÿr tã tanhmã kot puj mẽ Tirtũm kapêr ã kagã htũmta jarênh to? Nà kot mẽ pamã mẽ pahte amnhĩ nhĩpêx ã karôta mex kumrêx. Mex o mex. ¹³ Mex kumrêx tã na htem kuma nê tee ri kãm hkôt amnhĩ nhĩpêx hprãm kaprÿ. Jao nhÿrmã ty nê ma kuwy hwÿr pa. Kêr pa na pa pre ra mar nê omunh mex tã hkôt amnhĩ nhĩpêx mex kêt nê. Jao ra ixte amnhĩ tomnuj xwÿnh ã amnhĩ pumu. Na pa pre tee ri inhmã hkôt amnhĩ nhĩpêx o ri i xpa hprãm tã no ãm xatã kapêr nhĩrôp ixkuhê nê hkwÿm ri amnhĩ nhĩpêx rãhã ho ri i xpa. Tã ra tee ri ja hã amnhĩ pumu nê amnhĩ kukamã ijamaxpêr o:

—Nà na pa hte ãm tee ri inhmã Tirtũm kôt amnhĩ nhĩpêx prãm kaprÿ no ãm ho anhÿr kêt nê. ãm ixte amnhĩ tomnuj pix o i xpa xwÿnh na pa. Ja mÿrapê koja Tirtũm amnhĩ nê ma kuwy hwÿr inhmê. Nà koja ixto anê. Anê.

Mē pahte mē pamã amnhĩ tomnuj kaga hprãm kaprÿ hã mẽ pajarênh

Karatas 5.17

¹⁴ Nê Tirtũm kapêr ã kagã htũmta Tirtũm kapêr na. Nê Tirtũm kĩnhã ãm inhĩ pix na pa ri i xpa jakamã tanhmã kot pa amnhĩ to nê kapêr kôt ri amnhĩ nhĩpêx mex o ri i xpa? ¹⁵ Inhmã tãm ixte amnhĩ nhĩpêx prãm tã no ãm amnhĩ tomnuj pix o ri i xpa. Mēmoj ixpê omnuj tã pa hte ra hkôt tanhmã amnhĩ tomnuj to ho ri i xpa.

Hãmri nê ja hã amnhĩ pumu nê tee ri amnhĩ kukamã ijamaxpêr o:

—Hêxta waa nê. Mon pa hte axtem nê ã amnhĩ nhĩpêx anhÿr o ri i xpa? Mēmoj ixpê omnuj nhÿm inhmã ho anhÿr prãm kêt tã ra ho anê. Nhÿm mēmoj mex nhÿm inhmã ho anhÿr prãm tã ho anhÿr kêt nê. Mon pa hte axtem nê ã amnhĩ nhĩpêx anhÿr o ri i xpa? Anê.

¹⁶ ã ixte amnhĩ nhĩpêx anhÿr o ri i xpa htã ra Tirtũm kapêr mexta ma hãmri nê ra ijamaxpêr o:

—Nà Tirtũm kapêrja mex kumrêx tã pa tee ri inhmã hkôt amnhĩ nhĩpêx mex hprãm kaprÿ ho ri i xpa. Hêxta waa nê. Anê.

¹⁷ Inhmã amnhĩ tomnuj prãm kêt tã arĩ ixkaxwÿnh kãm ijamaxpêr punuj nhÿ hã ã amnhĩ nhĩpêx anhÿr o ri i xpa. ¹⁸ Nê inhmã tãm amnhĩ nhĩpêx prãm tã no ãm tee ri ã inhmã amnhĩ nhĩpêx anhÿr prãm kaprÿ. Tanhmã kot pa amnhĩ to nê tãm amnhĩ nhĩpêx o ri i xpa? Na pa tee ri inhmã ja ho anhÿr prãm kaprÿ. Ixte amnhĩ tomnuj xwÿnh na pa. Nê aa ixte amnhĩ to mex kêt kumrêx xwÿnh. ¹⁹ Inhmã mēmoj mex kôt pix mã amnhĩ nhĩpêx prãm tã no ãm ã amnhĩ nhĩpêx anhÿr kêt nê. Nê ãm hkwÿm ri tanhmã amnhĩ tomnuj to ho ri i xpa. Mēmoj ixpê omnuj tã pa hkôt amnhĩ nhĩpêx o ri i xpa. ²⁰ Ixte Tirtũm kapêr kôt amnhĩ nhĩpêx kêt jakamã na pa hte ã amnhĩ tomnuj anhÿr o ri i xpa. Mēmoj ixpê omnuj pa inhmã ho anhÿr prãm kêt tã ra hkôt amnhĩ nhĩpêx. Ixte Tirtũm kapêr kôt amnhĩ nhĩpêx kêt jakamã ã amnhĩ nhĩpêx anhÿr o ri i xpa. ²¹ Nê mēmoj mex nhÿm inhmã hkôt amnhĩ nhĩpêx prãm tã ra hk-wÿm ri amnhĩ nhĩpêx. ã ixte amnhĩ nhĩpêx anhÿr xwÿnh na pa. ²² Nê inhmã Tirtũm kapêr mar nê hkôt ri amnhĩ nhĩpêx prãm tã ²³ nom ixte amnhĩ tomnuj xwÿnh jakamã hkôt amnhĩ nhĩpêx kêt nê. Na pa tee ri ja hã amnhĩ pumu nê amnhĩ kukamã ijamaxpêr o:

—Nà kot paj axte amnhĩ tomnuj kêt nê. Kot paj ãm amnhĩ to mex pix kukamã ijamaxpêr o ri i xpa.

Anhÿr tã no ãm arĩ amnhĩ tomnuj o ri i xpa nê amnhĩ to mex kêt. Ixte amnhĩ tomnuj xwÿnh jakamã na pa hte ã amnhĩ nhĩpêx anhÿr rãhã ho ri i xpa nê tee ri inhmã amnhĩ tomnuj kaga hprãm kaprÿ. ²⁴ Hêxta waa nê. Na pa ixkaprĩ htÿx nê ri i xpa. ã ixte amnhĩ nhĩpêx anhÿr o ri i xpa mÿrapê kot paj nhÿrmã ty nê ma mẽ kot amnhĩ xà htÿx kamã hamak tũm xàta wÿr ma mō. Mēhō kot tanhmã ixkrã hto pa ã amnhĩ nhĩpêx anhÿrja kaga? ²⁵ Nà mẽ panhō Pahihti Jejus Krisja pix. Tãm koja ixte amnhĩ tomnuj kutã tanhmã ixto ixihtÿx to. Jakamã na pa axte tee ri amnhĩ kukamã ijamaxpêr kêt nê. Pãnhã ixkĩnh nê ri i xpa nê Tirtũm mã kãm:

—Pa Tirtũm. Nà ãm hãmri amex o amex. Anê.

Tã ra ixte Jejus Kris kôt amnhĩ xãm jakamã koja tãm tanhmã ixto ixihtÿx to pa rĩ kormã Tirtũm kapêr kôt amnhĩ nhĩpêx mex o ri i xpa. No kot pa pam amnhĩ krã hkôt amnhĩ tomnuj rãhã ho ri i xpa. ã ixte anhÿr xwÿnh na pa.

**Tirtüm Karõ kot mẽ pahto tãm mẽ pahte amnhĩ nhĩpêx
xwýnh ã harênh**
Karatas 5.16-26

8 Nẽ Jejus Kris kêp mẽmoj punuj kutã mẽ pahto mẽ paxihtýx xwýnh jakamã mẽ pahte hkõt amnhĩ xunhwýr xwýnhjaja na pu htem ý hã amnhĩ tomnuj o ri papa hkêt nẽ. Jao mẽ pahte kuwy hwýr papa mã xwýnh kêt. ² Te ra mẽ pahtyk nhũm Tirtüm kot akupým mẽ pahto mẽ pahtír pyrãk jakamã nhũm Karõja mẽ pahkarõ mã agjê pu mẽ ý hã tãm amnhĩ nhĩpêx o ri papa. Te tãm kot amnhĩ nhĩpêx pyrãk o amnhĩ nhĩpêx nhũm Karõ mẽmoj punuj piitã kutã mẽ pahto mẽ paxihtýx. Kêp mẽ pajamxpêr punuj kutã mẽ pahto mẽ paxihtýx xwýnh jakamã kot puj mẽ nhýrmã mẽ kot amnhĩ xà htýx kamã hamak tũm xàta wýr papa hkêt nẽ.

³ Nom kormã mẽ pahte Jejus kõt amnhĩ xunhwýr kêt ri na pu prem tee ri pamã Tirtüm kapêr piitã hkõt amnhĩ nhĩpêx prãm kaprý nhũm mẽ pahpê hihtýx kumrêx. Jakamã tanhmã koja Tirtüm amnhĩ to nẽ amnhĩ mã mẽ pamex xwýnh ã mẽ pajarê? Na pre tee ri amnhĩ tã mẽ pajamã hãmri nẽ mẽ pahwýr Kraja mẽ nhũm man mẽ pahwýr wrý nẽ mẽ pahpyrà nẽ í ho mẽ pakamã kato. Nom mẽ parom aa tanhmã amnhĩ tomnuj to hkêt kumrêx nẽ ri pa. Tã mẽ kot hpír tã nhũm amarí htyk kêt nẽ. Na pre htyk o mẽ pahte amnhĩ tomnuj piitã hpãnhã amnhĩrer pa. Jakamã tãm kêp mẽ pajamxpêr punuj kutã mẽ pahto paxihtýx xwýnh. Na pu htem hkõt amnhĩ xunhwý hãmri nẽ kukwak ri amnhĩ tomnuj o ri papa hkêt nẽ. ⁴ Pãnhã Tirtüm kot amnhĩ nhĩpêx kõt amnhĩ nhĩpêx o ri papa nẽ axte mẽ pahte amnhĩ nhĩpêx tũm kõt amnhĩ nhĩpêx kêt nẽ. Hãmri hpãnhã Tirtüm Karõ kot amnhĩ nhĩpêx kõt pix mã amnhĩ nhĩpêx. Nẽ hamaxpêr kõt pix mã pajamxpêr. Ja kaxyw na pre Tirtüm mẽ pahwýr Kraja mẽ nhũm wrý nẽ mẽ pahpiitã mẽ panê ty.

⁵ Nẽ mẽ kot amnhĩ krã hkõt tanhmã amnhĩ nhĩpêx to ho ri mẽ pa xwýnhjaja na htem htýx ri tanhmã hamaxpêr to xà hkõt amnhĩ nhĩpêx o ri pa. No kêt Tirtüm Karõ kot mẽ pahkarõ mã gjêx xwýnhjaja na pu htem mẽ kurom te Jejus jamaxpêr pyrãk o pajamxpêr o pa-pa.

⁶ Nẽ mẽ kot amnhĩ krã hkõt amnhĩ nhĩpêx xwýnhjaja koja mẽ nhýrmã ty nẽ ma kuwy hwýr pa nẽ kamã pa ho pa. No mẽ pahte Tirtüm Karõ hkõt amnhĩ nhĩpêx xwýnhjaja kot puj mẽ pajamxpêr nyw o pajamxpêr nẽ amnhĩ nhĩpêx nyw o amnhĩ nhĩpêx. Jao paxãmnhix ri pajamakêtkati nẽ ri papa. Nẽ nhýrmã ty hãmri nẽ Tirtüm mẽ Jejus wa kuri akupým pahtír tũm nẽ pamex kumrêx nẽ papa ho papa.

⁷ Nẽ mẽ kot amnhĩ krã hkõt ri amnhĩ nhĩpêx xwýnhjaja kãm Tirtüm kĩnh kêt. Nẽ kãm kapêr mar prãm kêt jakamã tanhmã kot mẽ amnhĩ to nẽ hkõt amnhĩ nhĩpêx? ⁸ Koja mẽhõ amnhĩ krã hkõt kãm hprãm xà hkõt pix mã amnhĩ nhĩpêx hãmri nhũm Tirtüm tee ri ja hã omu nẽ hkĩnh kêt nẽ. ⁹ No mẽ papajaja na pu htem mẽ urãk nẽ ã amnhĩ nhĩpêx anhýr kêt nẽ. Ra Tirtüm

Karõ kot mẽ pahkarõ mã gjêx jakamã na pu htem hkõt pix mã amnhĩ nhĩpêx hprãm. No koja Tirtüm Karõ mẽhõ kaxwýnh mã àr kêt nẽ nhũm kêp hkra hkêt nẽ.

¹⁰ Tã mẽ papajaja. Mẽ pahte amnhĩ tomnuj myrapê koja mẽ pakrãhkàja nhýrmã ty. No nhũm Tirtüm ra kot amnhĩm mẽ pahte amnhĩ to mex xwýnh ã mẽ pajarênh nhũm Kris Karõ kot mẽ pahkarõ mã gjêx jakamã koja mẽ pahkarõja htyk kêt nẽ. Mẽ pakrãhkà pix koja ty nhũm mẽ pahkarõja ma kaxkwa hwýr àpir kurê kumrêx. Tã nhũm nhýrmã Tirtüm akupým mẽ pakrãhkà ho htír nẽ akupým mẽ pahkarõja mẽ pakrãhkãm hagjê pu mẽ wa kuri pahtír tũm nẽ papa ho papa. ¹² Jakamã e kwa ixkwýjaja. Kêr pu mẽ axte ri mẽ pajamxpêr tũm kõt amnhĩ nhĩpêx o ri papa hkêt nẽ. ¹³ Kot puj mẽ arí ã amnhĩ nhĩpêx anhýr o ri papa hãmri nẽ nhýrmã ty nẽ ma mẽ kot amnhĩ xà htýx kamã hamak tũm xàta wýr papa. Jakamã kêr pu mẽ mẽmo arígro hã pamã tanhmã amnhĩ tomnuj to hprãm hãmri nẽ amnhĩ kukamã pajamxpêr o:

—Nà inhmã ã amnhĩ nhĩpêx anhýr prãm tã kot paj Tirtüm Karõ nhý hã ja kutã amnhĩ to htýx nẽ ho anhýr kêt nẽ. Anẽ.

Kot puj mẽ ã pajamxpêr anẽ hãmri nẽ nhýrmã kuwy wýr papa hkêt nẽ. Pãnhã Tirtüm mẽ Jejus wa kuri pamex nẽ pahtír tũm nẽ ri papa ho papa. ¹⁴ Mẽ kot Tirtüm Karõ hkõt amnhĩ nhĩpêx xwýnhjaja kêp Tirtüm kraa.

¹⁵ Nom amnepêm kormã mẽ pahte hkõt amnhĩ xunhwýr kêt ri. Nẽ kormã mẽ pamã kapêr mar prãm kêt ri nhũm kot amnhĩ tã mẽ pahpumunh nẽ tanhmã mẽ pahto pumaj na pu prem pamã uma ho ri papa. Tã hkõt amnhĩ xunhwý nhũm Karõja mẽ pahkarõ mã gjêx jakamã na pu htem ra pamã uma hkêt nẽ ri papa. Karõ kot mẽ pahpê Tirtüm kra hã mẽ pajarênh jakamã pu mẽ amnhĩ kamã kot tanhmã mẽ panhĩpêx to puma hkêt nẽ ri papa. Nẽ paxãmnhix pajamakêtkati nẽ kãm amnhĩ jarê nẽ kãm amnhĩ jarênh o:

—Pa Inhĩpêxà maati? Ot pa ixpê akra hã amã amnhĩ jarênh kaxyw amnhĩ kaxyw amã ijamxpêr. Anẽ.

Jao ra mẽ pamã uma hkêt nẽ ri papa. ¹⁶ Karõ kot mẽ pahkarõ mã gjêx nhũm mẽ pahte amnhĩ tã omunh jakamã na pu htem pajamxpêr o:

—Nà Tirtüm Karõ kot ixkarõ mã àr jakamã ixpê hkra na pa. Anẽ.

Nhýrmã mẽmoj piitã akupým mex par ã harênh

Sikũn Korĩt 4.16-18; Korosê 3.4; Wam Pêtre 4.13

¹⁷ Nẽ mẽ kãm Tirtüm prãm kêt xwýnhjaja na htem te mẽ kot Tirtüm Kra Jejus nhĩpêx pyrãk o mẽ panhĩpêx pu mẽ pahpunuj nẽ ri papa. Nom kot puj mẽ nhýrmã Tirtüm mex o mex xwýnhja kuri pamex kumrêx nẽ papa. Mẽ pahpê hkra jakamã kot puj mẽ Kra Jejus pyrã nẽ õ krí kamã kuri pamex kumrêx nẽ ri papa ho papa. ¹⁸ Jar Jejus ã mẽ pahpunuj nẽ ri papa htã kot puj mẽ nhýrmã kuri pamex kumrêx nẽ papa ho papa. Hãmri nẽ mẽ pamex o pamex ã amnhĩ pumu nẽ jar pika ja kamã tanhmã mẽ pahpunuj toja mã axte pajamxpêr kêt kumrêx.

¹⁹ Nê pika hkôt Tirtüm kot mëmoj ho kator xwýnhjaja na htem Tirtüm kot më pahto mex par jatur xàm mënh ã arıgro jamãr rãhã ho pa. àk nê mry nê pı nê gô nê mëmoj piitã më pajamãr o pa. Te kot më pakukamã hamaxpêr o:

—Kwa mëmo arıgro hã koja Tirtüm hkrajê piitã ho amnhırit nê më ho mex par jatur xàm kumê pu më ja hã më omu? Hêxta waa nê. Inhmã tokyx ja hã më omunh prãm tıx. Koja tokyx ã më hipêx anê pa ixkĩnh tıx kumrêx.

Anhıy o hamaxpêr pyrãk. ²⁰ Mëmo kaxyw na hte mryja ã më pakukamã hamaxpêr anê? Nà amnepê mã Tirtüm kot mëmoj piitã ho katorta ã nhüm pre piitã mex o mex. Pı nê mry nê gô. Mëmoj piitã mex kumrêx rãhã nê. Aa grã nê htyk kêt kumrêx. Tã Atãw kot amnhı tomnuj mırapê nhüm ra ý hã mëmoj piitã homnu par jakamã na hte mëmoj htır nê pa nê gaa nê ty nê hapêx. Nê më pahpur kãm ahkagrôt punuj hapôj. Atãw kot amnhı tomnuj mırapê nhüm Tirtüm kapêr xà hkôt ã mëmoj omnu hpar anê. ²¹ Nom koja arı rãhã ho rãhã hkêt nê. Koja nhıymã Tirtüm akupým mëmoj piitã ho mex pa nhüm mex o mex nê axte grã rı axte htyk nê hapêx kêt nê. Nê axte omnu nê hikwý hkêt nê. Koja më pahpyrã nê mex o mex. Jakamã na htem Tirtüm kot më pahto mex par jatur xàm mënh xà hã arıgro jamãr rãhã ho pa. ²² Te mëhõ ni hpıjagri kaxyw õhy xà htıx nê tokyx kãm hpıjagri hprãm xà àmra ho nör pyrãk o amnhı nhıpêx pê më pahto mex jatur xàm mënh ã arıgrota jamãr o pa.

²³ Nê më papajaja na pu htem tanhmã pahpunuj to nê jajê pyrã nê te amnhı kamnhêr o ri papa pyrãk. Rı tanhmã paxà kute nê ri papa. Rı pamã prãm nê paxà nê ri papa. Nê tanhmã më pahpunuj to nê ri papa. Jao te pı nê gô nê mryja pyrã nê amnhı tã Tirtüm kot më pahto mex par jatur xàm mënh ã arıgro jamãr rãhã ho ri papa.

Na pre Tirtüm më pahwır Karõ rê nhüm më pahkarõ mã agjê nê më pakukamã Tirtüm tanhmã kot më pah-to mex to hã më pamã ho amnhırit nê më pamã ho amnhırit o:

—Koja nhıymã Tirtüm më ato mex par jatur xàm kumê nê më piitã më kãm më apê hkra hã më ato amnhırit. Hãmri nê më amã më anhı nyw gõ ka më axte axà nê ri apa nê atyk kêt nê. Hãmri nê Tirtüm ri amex kumrêx nê ri apa ho apa. Nà kot kaj më nhıymã ã amnhı nhıpêx anê. Anê.

Ã Tirtüm Karõ kot më pakukamã më pajarênh anhıy jakamã na pu htem amnhı tã kot më pahto mex jatur xàm mënh pix jamãr o ri papa. ²⁴ Nom na kormã ã më pahto mex anhıy kêt nê. Kormã më pamã më panhı nyw nhör kêt nê. Nom ra kot më pahto hkra jakamã pu më ja hã amnhı pumu nê pajamaxpêr o:

—Nà ra Tirtüm kot ixto hkra jakamã koja nhıymã mããnên inhmã inhı nyw gõ. Nà koja inhmã kugõ.

²⁵ Anhıy o pajamaxpêr tã kormã. Na pu htem kormã amnhı tã hamãr rãhã ho ri papa nê aa hkaga hkêt nê papa.

Mê pahte Tirtüm Karõ nhı hã Tirtüm mã amnhı jarênh

²⁶ Nê na pu htem Tirtüm mã amnhı jarênh kaxyw nhüm hte Karõja më pahto ajuta pu më ý hã pakatãt kôt kãm tanhmã amnhı jarênh to. No kot puj më amnhı krã hkôt kãm amnhı jarênh mex kêt nê. Na pu htem ja kaxyw tee ri amnhı kukamã pajamaxpêr o:

—Kwa tanhmã kot pa Tirtüm mã amnhı jarênh to? Tanhmã kot pa mëmoj tã ixãhwır to rı amnhı to hwır to? Nà kot paj amnhı krã hkôt ja ho anhıy mex kêt nê. Hêxta waa nê. Anê.

No nhüm Tirtüm Karõ ra kot më pahkarõ mã gjêx jakamã na hte tanhmã më pahkrã hto pu më ý hã kãm amnhı jarênh mex nê pakatãt kôt mëmoj tã kuwı. Te Karõja tanhmã më pakute hã më pahpumunh nê më pakamã ukaprı xàj tãm më pahto hwır pyrãk.

²⁷ Jakamã pu më ý hã tanhmã Tirtüm mã amnhı jarênh to nhüm më pamar kurê kumrêx. Ra kot më pajamaxpêr kôt më pahpumunh par kênã. Nhüm ra Karõ kot më pahkarõ mã gjêx jakamã na pu htem kãm hprãm xà hkôt kãm amnhı jarê nê tanhmã amnhı to paxãhwır to.

Tirtüm kot më pamã mëmoj piitã ho mex ã harênh

Römãn 8.37; Piripos 1.12; Wam Pêtre 5.10

²⁸ Nê më pamã Tirtüm kĩnh xwýnhjaja. Tirtüm kot më pahto hkra xwýnhjaja. Koja mëmoj më pakamã tanhmã amnhı to htã kêr pu më ãm ja hã amnhı pumu nê tee ri amnhı kukamã pajamaxpêr kêt nê. Koja te më pahpê omnuj pyrãk tã koja nhıymã hpãnhã më pamã mex nê. Koja Tirtüm nhıymã tanhmã më pamã mëmojta o mex to. ²⁹ Amnepê mã mëmoj piitã hkêt ri na pre Tirtüm më pakukamã tanhmã më pajarênh to nê më pajarênh o:

—E kot paj nhıymã më kot Ixkra Jejus kôt amnhı xunhwır xwýnhjê ho ixkra jakamã nhüm më Jejus pyrã nê kêp ixkraa. Nê urãk nê ixkapêr kôt amnhı nhıpêx o pa. Jao pa ra ixkra xohtõ nê. Nà ja na inhmã hprãm. Anê.

³⁰ Tã pu htem pajapôj nê ri papa. Hãmri nê kapêr ma nê amnhı kaxyw Kra Jejus kôt pajamaxpêr nê hkôt amnhı xunhwı. Hãmri nhüm Tirtüm ja hã më pahpumu nê pahto hkra nê amnhım më pamex xwýnh ã më pajarê nê më pahto mex nê. Nê te ho Kra Jejus nhıpêx pyrãk o më panhıpêx. Jao nhıymã wa kuri më pahtır tım nê papa ho papa mã xwýnh ã më pajarê.

Mêhõ kot Tirtüm pê aa më papytãr kêt ã harênh

Römãn 5.1

³¹ Tã ã Tirtüm kãm më pajapê nê më pahto mex kot anhıy. ã kot më panhıpêx mex anhıy jakamã ra më pahkôt pa ho pa rãhãã. Jakamã mëhõ koja ïhkra pê më pahpytã? Nê mëhõ koja tanhmã ri kêp më pahto? Nà koja kêp më papytãr rı tanhmã kêp më pahto hkêt nê.

³² Tirtüm kãm Kra Jejus japê htıx tã na pre më pahpê nê hkêt nê më pahwır kumê. Te kot më pamã õr pyrãk o hipêx nhüm më pahwır wrıy nê më panê ty. Tã ra Tirtüm kot më pamã õr jakamã koja mããnên kãm më

pahte Kra hkõt amnhĩ xunhwÿr xwÿnhjê japê nê mē pahto mex rãhã ho ri pa. Nà koja ã mē pahto mex anē.

³³ Jakamã mēhõ koja kãm mē pahte amnhĩ tomnuj xwÿnh ã mē pajarê? Ra tãm kot mē pahto hkra nê mē pahte amnhĩ to mex xwÿnh ã mē pajarēnh kēnã kot kêt mēhõ kãm tanhmã mē pahto kapēr punuj to nhũm mē kuma. Koja mē tee ri kãm tanhmã mē pahto kapēr to kaprÿ. ³⁴ Na pre ra Jejus Kris mē pahte amnhĩ tomnuj pãnhã amnhĩrer kaxyw mē panê ty nhũm Tirtũm akupÿm ho htĩr. Hãmri nhũm ma akupÿm kaxkwa hwÿr api nē Pahi Maati krĩ xà kamã Tirtũm nhĩhkõ hã hkrĩ ho hkrĩ. Nē Tirtũm mã mē pakutã nojarēt rãhã ho kuri hkrĩ ho hkrĩ. Jakamã mēhõ koja kēp mē kot amnhĩ xà htÿx kamã hamak tũm xàta wÿr mē pajano? Nà amrakati kumrēx.

³⁵ Nē Krisja kaxkwa kamã Tirtũm nhĩhkõ hã hkrĩ ho hkrĩ htã mãänēn jar mē pahkõt pa ho pa. Kãm mē pajapê htÿx jakamã kot puj mē tanhmã pahpunuj to htã nhũm arĩ kãm mē pajapê nē mē pahkõt pa ho pa.

Rÿ nhũm mē kot hkõt amnhĩ xunhwÿr kêt xwÿnhjaja tanhmã hã mē pahto htã nhũm arĩ kãm mē pajapê kamã mē pahkõt pa ho pa.

Rÿ mē pamã prãm nē ri papa. Rÿ mē paxê hkēt nē pamã kry nē ri papa htã nhũm arĩ kãm mē pajapê kamã mē pahkõt pa ho pa.

Rÿ ra mē kot hã mē panhĩmex kaxyw rÿ hã mē pahpar kumrēx. Tã nhũm arĩ kãm mē pajapê kamã mē pahkõt pa ho pa rãhã nē.

Kãm mē pajapê kamã mē pahkõt pa ho pa rãhã jakamã pu mē tee ri amnhĩ kukamã pajamexpēr kêt nē. ãm hkõt paxãmnhĩx ri pajamakêtkati nē ri papa ho papa. ³⁶ Tirtũm kapēr ã kagã htũm te mē papajaja mē pahte kãm tanhmã amnhĩ jarēnh to pyrã nē mē pajarēnh kot:

Pa Tirtũm. Na htem atã mē ixtomnuj tÿx o pa.

Nē ra mē kot mē inhĩmex kaxyw.

Nē mē inhĩpêx o te mē kot ôwēhti ho mōr nē hpar kaxyw tanhmã hipêx to pyrãk.

Jakamã na pa mē ra ixyk kaxyw.

Anhÿr o kot mē pajarēnh. ³⁷ Tã kwãr mē ã mē panhĩpêx anē. Arĩ Kris kãm mē pajapê kamã mē pahkõt pa ho pa rãhã jakamã mē kot tanhmã mē pahto htã pu mē arĩ amnhĩ kaxyw kãm pajamexpēr tÿx rãhã ho ri papa. Nhũm arĩ mē kutã mē pahto paxihtÿx pu mē arĩ mē kãm pakuhê.

³⁸ Mēmoj koja tanhmã mē pahto nhũm Tirtũm tee ri ja hã mē pahpumu nē kãm mē pajapê hkēt nē? Nà amrakati kumrēx. Koja mēhõ rÿ mēmoj mē pahpê àmnàr kêt nē. Na hte jar pika ja kamã Kris kãm mē pajapê kamã mē pahkõt pa ho pa. Nē kot puj mē nhÿrmã ty nhũm arĩ kãm mē pajapê kamã mē pahkõt pa ho pa rãhã nē. Jakamã koja mēkarõ rÿ mēkarõmnuti rÿ jar pika ja kamã mē kãm Tirtũm prãm kêt xwÿnhjaja mē pahpê àmnàr kêt nē. Rÿ mēmoj tanhmã kute. Rÿ kor-mã hapu hã mēmoj tanhmã kute. Koja mēmoj piitã tee ri tanhmã kēp mē pahto htã nhũm Kris arĩ kãm mē pajapê kamã mē pahkõt pa ho pa rãhã nē nhũm mēmoj tee ri mē pahpê àmnàr kaprÿ. ³⁹ Nē koja kÿj rũm mē-

moj wrÿ nē tanhmã kēp mē pahto japêr. Rÿ pyka rũm mēmoj kato nē tanhmã kēp mē pahto japêr. Rÿ kuwy rÿ kòk xapêr tÿx tanhmã kēp mē pahto. Tã nhũm mē panhõ Pahihti Jejus Kris arĩ kãm mē pajapê kamã mē pahkõt pa ho pa rãhã nē. Te Tirtũm kãm mē pajapê pyrãk o kãm mē pajapê htÿx kãm mē pahkõt pa ho pa rãhã jakamã nhũm mēmoj tee ri mē pahpê àmnàr kaprÿ.

Ijaew jarēnh

Atre 3.25; Rõmãn 3.1-2

9 Nē na pa tee ri ixkwÿ Ijaew kot tanhmã amnhĩ nhĩpêx to ho pa hã mē omu nē ixkaprĩ nē. Ixpyrã nē mē kēp Ijaew tã ixkĩnhã amnhĩ kaxyw Kris kõt hamaxpēr kêt jakamã nhũm Kris tee ri kãm mē hamakêtkati nē àmnhĩx ri mē pa hprãm kaprÿ. Pa tee ri mē hkukamã ijamexpēr nē ixkaprĩ nē ri ixpa. Nē aa ixkaprĩ ixpê kator kêt kumrēx. Mē kot inhmã mē hkĩnh kêt ã amnhĩ tã ijarēnh tã inhmã mē hkĩnh kēnã. ãm hãmri na pa ã amnhĩ jarēnh anē. Tirtũm Karõ kot ja hã ixpumunh mex nē inhmã:

—Nã ãm hãmri na ka amã mē hkĩnh ã amnhĩ jarē. Anē.

³ Mē kēp ixkwÿ na mē. Mē ixpär kraxja ãm pixi mex. Tã nhũm mē ixkĩnhã amnhĩ kaxyw Kris kõt hamaxpēr kêt jakamã kop ãm Tirtũm kot mē nē kuwy hwÿr pa inhmēnh ronhÿx ja inhmã mex. Nhÿx pa kãm:

—Kwa Tirtũm. Amnhĩ nē kuwy hwÿr ixkwÿjê rēnh kêt nē. Inhmã mē hapê htÿx kumrēx. Mē hpãnhã pa mãn mē nē hwÿr inhmē nã.

Anhÿr o nhÿx pa kãm ixkapēr. Nom kot paj amnhĩ to ã ixãhwÿr anhÿr kaprÿ. Tirtũm kot mē kamã ukaprĩ htã no nhũm mē amnhĩ kaxyw Kris mã hamaxpēr kêt jakamã tanhmã koja amnhĩ to nē mē hpãnhã pa mē nē kuwy wÿr inhmē nhũm mē ixrom kuri htĩr tũm nē pa ho pa? Mē kot hkõt amnhĩ xunhwÿr hã. ⁴ Mē ixpê Ijaew nhĩgêtjaja na pre Tirtũm amnepê mã mē ho mex rax nē. Nē kãm mē ho hkra hprãm nē. Nhũm prem tanhmã kot amnhĩ nhĩpêx mex to hã no ho omunh o pa. Nē hirã htÿx kãm ri pa hã omu nhũm mē kãm:

—E kot kaj mē ixkapēr ma nē ixkõt amnhĩ nhĩpêx o ri apa. Hã kot paj mē akõt ixpa ho ixpa nē mē ato mex nē ka mē axpēn kanrēhã axàmnrã rax nē. Hãmri pa mē amã pika mex gõ ka mē kamã ajamakêtkati nē axãmnhĩx ri apa ho apa.

Anhÿr o mē kãm kapēr. Hãmri nē mē kaxyw Mojes mã tanhmã kapēr to nē mē kaxyw kãm mēmoj piitã hã karõ. Mē kot tanhmã amnhĩ tomnuj to hãmri nē tee ri ja hã amnhĩ pumunh nē tanhmã amnhĩ to Tirtũm wÿr to nhũm kot mē mar nē mē nē ja ho hapêx par kaxyw. Finat Mojes kot amnhĩ xõ ri mē kãm ujarēnh nhũm mē kot mar nē hkõt amnhĩ nhĩpêx mex o ri pa kaxyw. ⁵ Mē ixkukamã mē ixpãmjaja. Aprãaw nē Ijak nē Jako kanrēhã mē hkra nē mē htãmnhwÿjaja na pre mē. Mē hwÿr na pre Tirtũmja Kra Jejus Kris mē nhũm mē hwÿr wrÿ nē mē kamã ï ho ï ho kator jakamã haxwÿja kēp Ijaew na pre. Kēp Mēpahpãm nē mex o mex nē hihtÿx o hihtÿx tã Ijaew wÿr wrÿ nē mē kamã kato. Hãmri

nhũm Ijaew kêt xwýnhjaja harênh ma nê tee ri hamaxpêr nê hamaxpêr o:

—Hêxta waa nê. Kêp âm Jejus mẽ papa kamã mãn kator ronhỹx mẽ pamã mex kumrêx. Anê.

⁶No nhũm kormã Ijaew hwýr wrýk kêt ri nhũm Tirtũm ra kot mẽ ho hkra kaxyw mẽ hã amnhĩ jarê nhũm mẽ hkwyjã kãm ja prãm kêt nê hkaga. Tã xà na pre Tirtũm kot mẽ ho hkra hã amnhĩ jarênh ã amnhĩ to hêx? Nà aa hêx kêt kênã kot kêt ri mẽmoj tã amnhĩ jarê nê hã amnhĩ to hêx. Jakamã na pre mẽ hkwyjaja hkwyjê rom hkaga hkêt nê nhũm amnhĩ tã mẽ omu nê mẽ ho hkra. Nom mẽ piitã mẽ ho hkra hkêt nê. Mẽ hkwyjaja kot hkaga jakamã nhũm âm mẽ hkwyjê pix o hkra.

⁷Nê finat Apraãwja na pre hkanrêhã hkra nê htãmnhwý hwý sohtô nê. Tã xà na pre Tirtũm htãmnhwý piitã mẽ ho hkra hã amnhĩ jarê? Nà mẽ piitã ã mẽ harênh anhýr kêt nê. Âm mẽ hkwyjê pix na pre mẽ ho hkra hã mẽ harê. Apraãw kra Ijak kôt hkanrêhã htãmnhwý pixjaja nhũm kot mẽ ho hkra hã mẽ harê.

⁸Nê Apraãw kormã hprõ kamã hkra hkêt ri na pre kãm àpênh xwýnh kamã hkra nhũm kato nê myre nê hixi pê Ismael. Nom kêp Apraãw prõ kumrêx kamã hkra hkêt. Prõ kuprý kamã hkra na pre. Tã nhũm Tirtũm kãm hkra kumrêx kukamã harê nê kãm:

—E kot paj ma tẽ hãmri nê mẽmo arĩgro hã akupýn awýr tẽ nhũm ra aprõ hpijagri nhũm war akra myre. Anê.

Tã nhũm hprõ Saraja htujarô. Nê gaa nê hpijagri nhũm hkraja myre. Hixi pê Ijak. Kêp Apraãw prõ kamã hkra jakamã Tirtũm nom kêp Apraãw kra kumrêx. Jakamã hkra Ijak kanrêhã htãmnhwýjaja na pre Tirtũm kot mẽ ho hkra hã mẽ harê. Ra kot Apraãw mã ja hã amnhĩ jarênh xà hkôt.

¹⁰Tã nhũm Ijakja hprêk nê Repek o hprõ. Nê gaa nê ra haxwýja wa hkra nhũm hkraja wa ahpo nê kato nê wa hamẽ my. Kot wa pê Ejau nhũm kot hapu pê Jako.

¹¹Nom nhũm kormã wa kator kêt ri nhũm Tirtũm wa hkukamã tanhmã wa harênh to. àhpumunh xà hkôt wa katorxà mã wa harê nê kãm:

—E kot paj amã war akra wa hkukamã tanhmã wa harênh to ka inhma. Nà koja wa kato nê gaa nê hprêk hãmri nhũm kot haputa amnhĩ to rax o kot wa jakre. Anê.

Kot wata koja kot hapu kĩnhã amnhĩ to grire nê ri pa nhũm ã wa hkukamã wa harênh anê. Kãm wa kot tanhmã amnhĩ nhĩpêx to hprãm xà hkôt ã wa harênh anê. Kormã wa kot tanhmã amnhĩ tomnuj to rý tanhmã amnhĩ to mex to hã kot wa omunh kêt tã kãm hprãm xà hkôt ã wa hkukamã wa harênh anê.

¹³Tirtũm kapêr ã kagà htũm kot wa harênh nê wa hã kagà kot:

Ejau rom Jako kanrêhã hkra nê htãmnhwý pixjaja na pre Tirtũm amnhĩ mẽ ho hkra. Anê.

¹⁴Mãn ka mẽ Tirtũm kot ã wa harênh anhýrja ma nê ajamaxpêr o:

—Tk. Kwa ja mexti hã. Mo na pre hamẽ wa hkanrêhã wa hkra nê wa htãmnhwý piitã ho hkra hkêt nê? Anê.

Kwa mẽ ã ajamaxpêr anhýr kêt nê. Tirtũm na hte kãm hprãm xà hkôt tanhmã mẽ panhĩpêx to ho pa pu mẽ kot tanhmã mẽ panhĩpêx to hã omu nê âm omu nê amnhĩ tã tanhmã kãm nê hkêt nê. ¹⁵Na pre finat Mojes mã amnhĩ jarênh o:

Inhmã hprãm xà hkôt na pa hte mẽ omu nê tanhmã mẽ kamã ixukaprí hto ho ri ixpa.

Nê inhmã hprãm xà hkôt na pa hte ahpýnhã tanhmã mẽ hipêx to ho ri ixpa.

Anhýr o kãm amnhĩ jarê. ¹⁶Nom tanhmã mẽ pahte amnhĩ nhĩpêx to hã mẽ pahpumunh kôt na hte mẽ pakamã ukaprí hkêt nê. Âm tãm kãm hprãm xà hkôt na hte tanhmã mẽ pakamã ukaprí hto ho pa. ¹⁷Amnepê mã Ejit kãm mẽ õ pahihtti Paraohiti hwýr na pre Mojes mẽ nhũm ma hwýr mō nê kãm tanhmã Tirtũm kapêr jarênh to nê kãm:

—E Tirtũm na awýr inhmẽ pa mō. Tãm na pre apê Ejit nhõ xwýnhjê nhõ pahi kaxyw axãm. Akrã hihtýx tã nhũm mẽ kaxyw axãm. Tã ra xatã àhpumunh týx o tanhmã anhĩpêx to. Krĩ piitã hkôt ri mẽ pa xwýnhjaja kot atã harênh mar nê àhpumunh o àhpumunh ã omunh kaxyw. Tã ixte amã ja jarênh kaxyw na pre awýr inhmẽ pa man awýr mō. Anê.

¹⁸À na hte Tirtũm kãm hprãm xà hkôt tanhmã mẽ panhĩpêx anhýr to ho pa. Jao mẽ hkwyjê kamã ukaprí ho pa. No mẽ hkwyjaja nhũm tee ri mẽ hkrã hihtýx ã mẽ omu nê âm mẽ omu nhũm mẽ amnhĩ krã hkôt ri tanhmã amnhĩ tomnuj to ho ri pa.

Tirtũm kêp mẽ pakamã ukaprí xwýnh ã harênh

¹⁹Nê kot kaj mẽ atõ Tirtũm kot ã mẽ hipêx anhýrja ã harênh ma nê tanhmã hã ixkukjêr to nê inhmã:

—Kwa na xep hte Tirtũm ahpýnhã tanhmã mẽ hipêx to. Nê mẽ hkwyjê kamã ukaprí ho pa nê mẽ hkwyjaja mẽ hkrã hihtýx ã mẽ omu nê âm mẽ omu nê mẽ kamã ukaprí hkêt nê. Jakamã kwa mo na hte mẽ kot amnhĩ tomnuj xwýnh ã mẽ harê? Tãm kot ã mẽ hipêx anhýr kênã kot kêt mẽ kot amnhĩ tomnuj xwýnh ã mẽ harê.

Anhýr o ajamaxpêr japêr. ²⁰Kwa mẽ ri ã atýx Tirtũm jarênh anhýr kêt nê. E pa mẽ amã ejêp jarê ka mẽ inhma. Xà kot mēhõ gyw kwý ho amnhĩm poti nhĩpêx nhũm tee ri amnhĩ tã omu nê amnhĩ tã tanhmã kãm kapêr to nê kãm: “Tk. Kwa mon ka ri ã inhĩpêx anê?” Anhýr o amnhĩ tã kãm kapêr? Nà koja kãm tanhmã nê hkêt nê. ²¹Hipêx xwýnh kãm hprãm xà hkôt kot ã hipêx anhýr kênã kot kêt amnhĩ tã kãm akir. Koja amnhĩm gyw kwý kakwý nê ho poti ho axkrut nê hipêx. Nê hõ ho muxre. Ho mex kumrêx nhũm xa. Nhũm ihõja mã ho anê nê hipêx no âm wamta kĩnhã ho hanhãjti nhũm omnajti nê xa. No âm tãm kot hamẽ wa hipêx prãm xà hkôt wa hipêx kênã.

²²Tã na hte ã Tirtũm mẽ panhĩpêx anê. Te poti pynajre pyrã nê mẽ pahkwýjê nhĩpêx nhũm mẽ kãm kapêr mar prãm kêt nê htýx ri tanhmã amnhĩ tomnuj to ho ri pa. Hãmri nhũm amnhĩ tã mẽ omu nê te amnhĩ nê mẽ rênh kaxyw pyrãk o mẽ hipêx no âm kormã hamaxpêr o:

—Nà kot paj nhÿrmã mẽ kot amnhĩ tomnuj mÿrapê mẽ ho ijaxpê pa nhÿm mẽ piitã ja hã ixpumu nê inhmã ixãhpumunh o ixãhpumunh ã ijarê. Nê inhmã mẽmoj punuj piitã hkĩnh kêt kumrêx ã axpên mã ijarê. Anê.

²³ Nom na hte jajê rom mẽ pahkwÿjê nhĩpêx o te poti mexta nhĩpêx pyrã nê amnhĩ kaxyw mẽ paxunhwÿ nê mẽ pahto hkra kaxyw. Nê mẽ pajarênh o:

—Nà koja mẽ amnhĩ kaxyw Ixkra Jejus mã hamaxpêr nê hkôt amnhĩ xunhwÿ pa ja hã mẽ omu nê mẽ kamã ixukapri ho ri ixpa. Nê mẽ ho mex pê mẽ kutã inhnojarêr rãhã ho ri ixpa. Hãmri nhÿm mẽ nhÿrmã Ixkra mẽ wa ixri htĩr tũm nê mex nê pa ho pa. Kot paj ã mẽ ho mex anê nhÿm mẽ amnhĩ tã ixpumu nê inhmã inhmex o inhmex ã ijarênh o pa. Anê.

À na hte Tirtũm ahpÿnhã mẽ pahpiitã mẽ panhĩpêx anê.

²⁴ Nê na hte mẽ ixpê Ijaew pix o hkra hkêt nê. Na hte mããnên mẽ apê Ijaew kêt xwÿnhjê ho hkra. ²⁵ Amnepê mã mẽ kãm kapêr jarênh o ri mẽ pa xwÿnhjê hõ pê finat Ojejja na pre te Tirtũm tãm kot Ijaew kêt xwÿnhjê jarênh pyrã nê mẽ harênh o:

Amnepêm na pa pre mẽ ho ixkra hkêt tã kot paj mẽ hkwyjê ho ixkra.

Na pa pre mẽ kamã ixukapri hkêt tã pa ra inhmã mẽ hapê nê.

²⁶ Nê ixte mẽ kêp ixkra hkêt ã mẽ harênh tã kot paj ra mẽ kêp ixkra hã mẽ harê.

Ixpê mẽõ Tirtũm kot paj ã mẽ harênh anê. Anê.

²⁷ Hãmri nhÿm finat Ijais Ojej pãnhã tanhmã Ijaew jarênh to. Ijaisja Tirtũm nhÿ hã kapêr jarênh o ri pa xwÿnhjê hõ na pre. Jakamã nhÿm Tirtũm kãm tanhmã mẽ ijarênh to nhÿm kuma nê ô ri mẽ ixkukamã mẽ inhĩgêxjê mã ujarênh o pa nê hã kagã. Nê hã kagã ho:

Ijaew na mẽ ohtô rax kumrêx.

Te gô xujanãr mÿri pykahti grã hkryre xohtô pyrãk.

Tã koja mẽ piitã ixkôt amnhĩ xunhwÿr kêt nê.

Koja mẽ ãm grêre nê amnhĩ kaxyw inhmã hamaxpêr nê ixkôt amnhĩ xunhwÿ.

Jakamã mẽ tapxipixjaja koja hkwyjê rom nhÿrmã inhõ krĩ hwÿr api.

²⁸ No mẽ kot amnhĩ kaxyw inhmã mẽ hamaxpêr kêt xwÿnhjaja kot paj tokyx tanhmã mẽ harênh to.

Mẽ kot amnhĩ tomnuj mÿrapê tanhmã mẽ harênh to nhÿm mẽ ma mẽ kot amnhĩ xã htÿx kamã hamak tũm xãta wÿr ma pa.

Nà kot paj tokyx ã mẽ hipêx anê.

Anhÿr o mẽ harê. ²⁹ Nom nhÿm kormã ã mẽ harênh anhÿr kêt ri nhÿm ra wam tanhmã mẽ harênh to nê mẽ harênh o:

Amnepêm Sotõ mẽ Komo kamã mẽ pa xwÿnhjaja na prem amnhĩ tomnuj tÿx rãhã ho ri pa.

Mÿrapê nhÿm Tirtũm xãhpumunh o ãhpumunh xwÿnhja tee ri ja hã mẽ omu hãmri nê kaxkwa rũm mẽ õ krĩ wa hipy mẽmoj põõta rê.

Nhÿm mẽ hã rôrôk nê mẽ ho hkaxãr pa nhÿm mẽ hapêx.

Tã na pu htem mẽ urãk nê amnhĩ tomnuj o ri papa.

Jakamã kop ãm Tirtũm kot mẽ pahkwÿjê kamã ukapri kêt ronhÿx pu mẽ ra mẽ urãk nê pahpiitã pajapêx pa. Anê.

Ijaew kwÿ kot Jejus kôt amnhĩ xunhwÿr kêt ã mẽ harênh

Rõmãn 10.1-4

³⁰ Nê Ijaew kêt xwÿnhjaja na prem Ijaew pyrã nê kãm Tirtũm prãm kêt tã Jejus jarênh ma nê Ijaew rom amnhĩ kaxyw hkôt hamaxpêr nê hkôt amnhĩ xunhwÿ. Hãmri nhÿm Tirtũm ja hã mẽ omu nê mẽ ho hkra nê mẽ kot amnhĩ to mex xwÿnhjê hã mẽ harê. ³¹ Hãmri nhÿm Ijaew tee ri mẽ kot Jejus kôt amnhĩ xunhwÿr ã mẽ omu nhÿm ja mẽ kãm mex kêt nê. Hãmri nhÿm mẽ hamaxpêr o:

—Tk. Kwa ra mẽ ixte finat Mojes kapêr kôt amnhĩ nhĩpêx mex o ri mẽ ixpa xwÿnh jakamã koja Tirtũm ja hã mẽ ixpumu nê mẽ ixte amnhĩ to mex xwÿnhjê hã mẽ ijarê nê mẽ inhnê mẽ ixte amnhĩ tomnuj rênh pa. No kot paj mẽ Ijaew kêt xwÿnhjê pyrã nê Jejus kôt amnhĩ xunhwÿr kêt nê. Æm kwarĩ ho kwarĩ.

Anhÿr ã amnhĩ jarê. No ãm ã mẽ hamaxpêr anhÿrja mex kêt. Na prem htÿx Tirtũm noo mã kot amnhĩ to mex ã amnhĩ jarênh kaprÿ nê arĩ ri tanhmã amnhĩ tomnuj to ho ri pa. Te pry kamã kên nõr nhÿm mẽ kot nhãm nê mênh kaxyw hkamnãr nê ho amnhĩ par krã hi kukênh pyrãk o na htem amnhĩ nhĩpêx. Jao amnhĩ krã hkôt tanhmã amnhĩ nhĩpêx to ho pa hprãm xaj te Jejus kapêrja nhãm amnhĩ nê rênh pyrãk o hipêx. Jakamã koja mẽ Tirtũm nhõ krĩ hwÿr ãpir kêt nê.

³³ Tirtũm kapêr ã kagã htũm kot ja jarênh kot:

E mẽ inhma. Kot paj nhÿrmã Ijaewjê hwÿr mẽhõ mẽ nhũm mẽ hkôt kapêr o pa.

Nom koja mẽ kapêr mar kêt nê. Koja mẽ kuma nê ãm kuma.

Te pry kamã kên nõr nhÿm mẽ kot nhãm pry nê mênh kaxyw hkamnãr nê ho amnhĩ par krã hi kukênh pyrãk o koja mẽ amnhĩ nhĩpêx.

No te mẽ kot nhãm pry nê mênh kaxyw hkamnãr kêt pyrãk xwÿnhjaja koja mẽ kurom nhÿrmã ma Tirtũm nhõ krĩ hwÿr api.

Hãmri nê hkĩnh nê pa ho pa. Anê.

Nom kên kumrêx jarênh kêt nê. Na prem Jejus ã kuxi nê ã harênh anê. Ijaew te mẽ kot kên nhĩpêx pyrãk o Jejus nhĩpêx nê amnhĩ kaxyw hkôt hamaxpêr kêt nê axtem nê hkaga nê ãm kamã gryk pix o ri pata ã nhÿm mẽ harê. No mẽ kot amnhĩ kaxyw hkôt hamaxpêr ronhÿx Jejus te kên kot mẽ kêp ãmnãr pyrãk kêt nê. Jakamã ã mẽ harênh kot anhÿr.

10 Hêxta waa nê. Ijaxwÿja ixpê Ijaew. Mẽ kêp ixkwÿ jakamã kêp apu mẽ kot amnhĩ kaxyw Jejus mã hamaxpêr nê hkôt amnhĩ xunhwÿr ronhÿx pa ixkĩnh tÿx kumrêx. Inhmã mẽ kêp Tirtũm kra hprãm tÿx kumrêx kênã. Inhmã ja prãm xaj na pa hte mẽ ho Tirtũm wÿr rãhã ho ri ixpa. ² Ra ixte mẽ omunh mex. Mẽ kãm Tirtũm mã tanhmã amnhĩ nhĩpêx to hprãm tã no ãm mẽ kot hprĩ hã kapêr mar kêt. Jakamã na htem tee ri tanhmã kãm amnhĩ nhĩpêx to ho ri pa hprãm kaprÿ.

³ Nhũm pre Tirtũm tee ri amnhĩ tã mẽ omu nẽ hamaxpẽr o:

—Koja mẽhõ amnhĩ kaxyw Ixkra Kris kõt hamaxpẽr nẽ hkõt amnhĩ xãm pa ja hã omu nẽ kot amnhĩ to mex xwýnh ã harẽ nẽ ho ixkra kurẽ kumrẽx. Nom na hte Ijaew ohtõ nẽ ã amnhĩ nhĩpẽx anhỹr kêt nẽ.

Anhỹr o mẽ harẽ. Æm hãmri na ã mẽ harẽnh anẽ. Na htem ãm axtem nẽ hamaxpẽr o:

—Tk. Kot paj amnhĩ kaxyw Kris kõt ijamaxpẽr nẽ hkõt amnhĩ xãm kêt nẽ. Kot paj ãm pam amnhĩ krã hkõt tãm ri amnhĩ nhĩpẽx o ri ixa. Mẽ ixpẽ Ijaewjẽ mẽ ixte amnhĩ nhĩpẽx xà hkõt. Hãmri nhũm Tirtũm ja hã ixpumu nẽ amnhĩm inhmex ã ijarẽ. Nom kot paj Kris kõt amnhĩ xãm kêt nẽ. Æm kwarĩ ho kwarĩ.

Anhỹr ã amnhĩ jarẽ. ⁴ Nom na htem ãm htýx ri amnhĩ krã hkõt amnhĩ to mex o pa hã amnhĩ kamnhix kaprý. Koja mẽ tee ri kãm finat Mojes kapẽr kõt amnhĩ nhĩpẽx o ri pa hprãm kaprý. Jejus tapxipix na pre tãm amnhĩ nhĩpẽx mex rãhã ho pa. Na pre Tirtũm kapẽr kõt amnhĩ nhĩpẽx mex o ri pa nẽ aa kapẽr õ nhĩrõp ãm nẽ hk-wým ri tanhmã amnhĩ tomnuj to hkõt nẽ. Kot amnhĩ tomnuj kêt xwýnh ã ãm pixi mex na. Jakamã tapxipix kukwak ri na hte Tirtũm amnhĩm mẽ pahte amnhĩ to mex xwýnh ã mẽ pajarẽ.

Tirtũm kãm mẽ pahpiitã mẽ pahto hkra hprãm ã harẽnh

⁵ Nẽ amnepẽm na pre finat Mojes Tirtũm nhỹ hã Ijaew mã tanhmã ujarẽnh to nẽ hã kagà. Nẽ mẽ kãm ujarẽnh o:

—E kot kaj mẽ atõ Tirtũm nhỹ hã ixujarẽnh ma nẽ hkõt amnhĩ nhĩpẽx mex o ri apa nẽ hkwym ri tanhmã amnhĩ nhĩpẽx to hkõt nẽ. Hã koja Tirtũm hã apumu nẽ amnhĩm ate amnhĩ to mex xwýnh ã ajarẽ ka nhỹrmã kuri atĩr tũm nẽ amex nẽ apa ho apa. Anẽ.

⁶ Æ mẽ kãm kapẽr anhỹr tã mẽ pahte Mojes kapẽr xà hkõt amnhĩ nhĩpẽx o papaja na mẽ pahpẽ hihtýx kumrẽx. Tirtũm kapẽr tũm na. Kapẽr ã kagà kamã kot mẽ pamã mẽ pahte tanhmã amnhĩ nhĩpẽx to hã karõja ohtõ rax kumrẽx jakamã pu mẽ tee ri pamã piitã hkõt amnhĩ nhĩpẽx prãm kaprý. Nhũm Tirtũm tee ri amnhĩ tã mẽ pajamã hãmri nẽ mẽ pahwýr Kra Jejus mẽ. Jakamã na pu htem amnhĩ kaxyw hkõt pajamaxpẽr nẽ hkõt amnhĩ xunhwý nhũm Tirtũm hã mẽ pahpumu nẽ kukwak ri mẽ pahto hkra kurẽ kumrẽx. Kra kukwak ri kot mẽ pahto hkra kaxyw kot mẽ pahwýr mẽn nhũm mẽ kot hpir nhũm akupým ho htĩr jakamã na pu htem harẽnhja ma nẽ pajamaxpẽr o:

—Nà na xep pre Jejus ixto ixpẽ Tirtũm kra. Anẽ.

Nom xà na hte Tirtũmja ã mẽ pamã kapẽr anẽ nẽ mẽ pamã:

—E kot kaj mẽ ma kaxkwa hwýr api nẽ Kris japrõ nẽ man amnhĩ kõt akupým o wrý pa ja hã mẽ apumu nẽ mẽ ato ixkra.

Anhỹr o mẽ pamã kapẽr? Nà na hte ã mẽ pamã kapẽr anhỹr kêt nẽ. Tanhmã kot puj mẽ amnhĩ to nẽ ã amnhĩ nhĩpẽx anẽ? ⁷ Rý xà na hte ã mẽ pamã kapẽr anẽ nẽ mẽ pamã:

—E na pre Krisja ty. Jakamã mẽ kam nẽ ma hwýr mra nẽ akupým amnhĩm ho htĩr. Hãmri pa ja hã mẽ apumu nẽ mẽ ato ixkra.

Anhỹr o mẽ pamã kapẽr? Nà na hte ã mẽ pamã kapẽr anhỹr kêt nẽ. Tanhmã kot pu mẽ amnhĩ to nẽ akupým ho htĩr? Ja pyrã nẽ na hte Tirtũm mẽ pamã mẽmoj tã karõ pu mẽ kãm ho anhỹr nhũm ja hã mẽ pahpumunh kõt mẽ pahto hkra hkõt nẽ. ⁸ Æ mẽ pahte amnhĩ kaxyw Jejus kõt pajamaxpẽr nẽ hkõt amnhĩ xunhwýr ã mẽ pahpumunh kõt pix mã na hte mẽ pahto hkra. Hãmri nẽ mẽ pahwýr Karõ rẽ nhũm mẽ pahkarõ mã gjẽx jakamã mẽ pahte Tirtũm kãm hprãm xà hkõt amnhĩ nhĩpẽx o papaja na mẽ pahpẽ hihtýx kêt. Te kapẽr ra mẽ pahkrã hi kaxwýnh kãm hikwý pyrãk o pu mẽ piitã mẽ kãm harẽnh o ri mẽ hkõt papa. Jakamã na pa hte mẽ piitã mẽ kot amnhĩ kaxyw Jejus kõt hamaxpẽr kaxyw tanhmã mẽ kãm harẽnh to ho ri mẽ hkõt ixa nẽ mẽ kãm:

⁹ —Kot ka mẽ atõ Jejus kęp anhõ Pahihti hã harẽ nẽ Tirtũm kot akupým ho htĩr kõt ajamaxpẽr. Hã koja Tirtũm ja hã apumu nẽ anẽ ate amnhĩ tomnuj o hapẽx nẽ ato hkra. Æm ja pix ã mẽ pahpumunh kõt na hte mẽ pahto hkra. Anẽ.

¹⁰ Nẽ na pu htem mẽ pahkrãhi kaxwýnh kãm amnhĩ kaxyw Jejus mã pajamaxpẽr. Nẽ mẽ pajakwa ho kęp mẽ panhõ Pahihti hã harẽ. Hãmri nhũm Tirtũm ja hã mẽ pahpumu nẽ amnhĩm mẽ pahte amnhĩ to mex xwýnh ã mẽ pajarẽ nẽ mẽ pahto hkra. ¹¹ Tã mẽ pahte amnhĩ kaxyw Jejus kõt pajamaxpẽr nẽ hkõt amnhĩ xunhwýr xwýnhjaja kot puj mẽ pahkĩnh nẽ papa ho papa. Mẽ pahpiitã. Ijaew nẽ Ijaew kêt xwýnhjaja. Mẽ pahpiitã mẽ panhõ Pahi Maatija ãm pyxi mex na. Jakamã koja Ijaewjẽ hõ rý Ijaew kêt xwýnhjẽ hõ amnhĩ to kuwý nhũm kuma nẽ ho hkra. Kapẽr ã kagà htũm kot ja jarẽnh kot:

Mẽ kãm kęp Tirtũm kra hprãm xwýnhjaja koja mẽ amnhĩ to Tirtũm wý nhũm mẽ kuma nẽ Jejus kot mẽ nẽ htyk kukwak ri mẽ nẽ mẽ kot amnhĩ tomnuj o hapẽx nẽ mẽ ho hkra nhũm mẽ hkĩnh nẽ pa. Anẽ.

¹⁴ Xà na htem kormã amnhĩ kaxyw Kris mã hamaxpẽr kêt rãhã amnhĩ to Tirtũm wý nhũm mẽ kuma nẽ mẽ ho hkra? Nà tanhmã kot wem amnhĩ to nẽ amnhĩ kaxyw kãm hamaxpẽr kêt rãhã amnhĩ to kuwý? Na hte Tirtũm ma mẽ hwýr mẽ hkwyjẽ rẽ nhũm mẽ ma mẽ hwýr mra nẽ Tirtũm kapẽr o mẽ ahkre ho ri mẽ hkõt pa. Nhũm mẽ hkwyjaja mẽ kuma nẽ amnhĩ kaxyw Jejus kõt hamaxpẽr nẽ amnhĩ to Tirtũm wý. Kapẽr ã kagà htũm kot ja jarẽnh kot:

Koja mẽmoj mex jarẽnh xwýnhjaja ma mẽ hwýr mra.

Nẽ mẽ hwýr hpõx o mõ nhũm mẽ amým amnhĩ wýr mẽ omu nẽ hkĩnh nẽ. Anẽ.

¹⁶ Tã ra mẽ piitã kot kapẽr mar tã piitã amnhĩ kaxyw hkõt hamaxpẽr kêt nẽ. Jakamã nhũm finat Ijais tee ri ja hã mẽ omu nẽ Tirtũm mã mẽ harẽnh o:

Pa Pahi Maati. Kwa ra mẽ kot akapẽr mar týx tã akõt amnhĩ nhĩpẽx kêt nẽ. Mẽ kãm akapẽr kõt amnhĩ nhĩpẽx o pa hprãm kêt. Na htem ãm grẽre nẽ akõt amnhĩ xunhwýr nẽ akõt amnhĩ nhĩpẽx o ri pa. Anẽ.

¹⁷ Kot anhÿr tã ãm mẽ kot Kris kapër jarënh mar kôt pix mã na htem amnhĩ kaxyw hkôt hamaxpër. Koja mẽ harënh mar kêt tã tanhmã koja wem amnhĩ to nẽ amnhĩ kaxyw hkôt hamaxpër nẽ hkôt amnhĩ xunhwÿ?

¹⁸ Mãn ka mẽ atõ atÿx ã ajamaxpër anhÿr o:

—Ko mãn Ijaew kormã Jejus kot mẽ panẽ tanhmã amnhĩ nhĩpêx to hã harënh mar kêt jakamã na mẽ kormã hkôt amnhĩ xunhwÿr kêt nẽ.

Anhÿr o ajamaxpër. Nom ja kot anhÿr kêt. Ijaew piitã ra mẽ kot harënh mar kênã. Tirtũm kapër ã kagã htũm kot ja hã mẽ harënh kot:

Na prem ma mẽ piitã mẽ kãm ja jarënh o ri mẽ hkôt pa nhũm mẽ piitã kuma. Anẽ.

¹⁹ Tã mãn ka prem ra ja ma mẽ atÿx ajamaxpër o:

—Kot anhÿr tã no mãn kormã hprĩ hã Jejus jarënh mar kêt jakamã mẽ hkôt amnhĩ xunhwÿr kêt nẽ. Anẽ.

Nom ja haxwÿja kot anhÿr kêt. Ra mẽ kot hprĩ hã harënh mar mex tã kuma nẽ ãm kuma nẽ amnhĩ kaxyw kãm hamaxpër kêt nẽ. No mẽ apẽ Ijaew kêt xwÿnh kwÿjaja na ka mẽ kurom harënh ma mẽ amnhĩ kaxyw hkôt ajamaxpër nẽ hkôt amnhĩ xunhwÿr kurẽ kumrẽx. Hãmri nhũm Ijaew tee ri ja hã mẽ apumu nẽ mẽ akamã gryk tÿx nẽ. Nom ra Tirtũm kot ã mẽ hkukamã mẽ kot amnhĩ nhĩpêx anhÿr ã mẽ omunh nẽ mẽ harënh kot anhÿr kênã. Na pre finat Mojes mẽ kãm tanhmã hã kagã hto. Te Tirtũm tãm kot mẽ hã kagã pyrã nẽ kapër ã kagã htũm kamã kot mẽ harënh kot:

Mẽ ate mẽ kamã mẽ akahak o apa xwÿnhjaja.

Mẽ kot htÿx ri amnhĩ nhĩpêx o mẽ pa hã mẽ ate mẽ harënh tã no kot paj mẽ arom amnhĩm mẽ kot amnhĩ to mex xwÿnhjẽ hã mẽ harẽ.

Kot kaj mẽ tee ri ja hã mẽ omu nẽ mẽ kamã agryk tÿx kumrẽx.

Nẽ mããnẽn pa ixte mẽ ho mex ã ixpumu nẽ mẽ hã ixkamã agryk nẽ. Anẽ.

²⁰ Nẽ finat Ijais na pre haxwÿja ã mẽ harënh anẽ. Na pre kãm amnhĩ kwÿ pẽ Ijaew puma hkêt nẽ xatã Tirtũm nhÿ hã tanhmã mẽ kãm Ijaew kêt xwÿnhjẽ jarënh to ho pa. Te Tirtũm tãm kot mẽ harënh pyrãk o mẽ kãm:

Nã Ijaew kêt xwÿnhjaja kot Tirtũm japêr kêt tã koja tãm mẽ kãm amnhĩ to amnhĩrĩt nhũm mẽ hkôt amnhĩ xunhwÿ.

Mẽ kot kormã amnhĩ kaxyw kãm hamaxpër kêt tã koja tãm mẽ kãm amnhĩ to amnhĩrĩt. Anẽ.

²¹ ã Ijaew kêt xwÿnhjẽ jarënh kot anhÿr. Nẽ axte mã tanhmã Ijaewjẽ jarënh to kot:

Te mẽ katorxã kot tanhmã hkrajẽ ho mex to kaxyw tee ri amnhĩ wÿr mẽ kãm ãkjêr pyrãk o na hte Tirtũm Ijaewjẽ nhĩpêx o pa.

Jao tee ri kãm tanhmã mẽ ho mẽ mex to hprãm tã no nhũm mẽ amnhĩ tã kuma nẽ ãm kuma nẽ hkôt amnhĩ nhĩpêx kêt nẽ. Anẽ.

Tirtũm kot Ijaew kamã ukapřĩ hã harënh

Matêwre 13.10-17

11 Tã ra Ijaew kot Tirtũm kaga jakamã mãn ka mẽ atõ mẽ harënh ma mẽ ajamaxpër o:

—Mãn pre Tirtũm tee ri amnhĩ tã mẽ omu nẽ amnhĩ pyrã nẽ mẽ hkaga.

Anhÿr o ajamaxpër. Nom na pre mẽ hkaga hkêt nẽ. Ijaxwÿja ixpẽ Ijaew na pa. Mẽ urãk nẽ ixpẽ Ijaew pãr krax pẽ finat Apraãw kanrẽhã htãmnhwÿ Pẽjamĩ kanrẽhã hõ na pa. Tã xã na pre Tirtũm ixkaga? Nã kot ixkaga hkêt. ² Amnepêm kormã mẽmoj piitã hkêt ri na pre mẽ ixpẽ Ijaew hkukamã mẽ ixto hkra hã amnhĩ jarẽ. Tã nhũm amgrã xohtõ nẽ hapêx nhũm mẽ hapõj hãmri nẽ Tirtũm kôt amnhĩ nhĩpêx o pa hkêt nẽ. Hãmri nhũm finat Erisja tee ri mẽ kot amnhĩ nhĩpêx ã mẽ omunh o pa nẽ Tirtũm mã tanhmã mẽ harënh to nẽ mẽ hã kagã. Nẽ hã kagã ho:

³ Kwa Tirtũm. Mẽ ixte amã amnhĩ jarënh xã hã mẽsti hkwy na prem ra hkrakrak pa. Nẽ anhÿ hã akapër jarënh o ri mẽ pa xwÿnh kwÿ nhĩmex rax nẽ. ãm papxix na pa arĩ ixtĩr nẽ ri ixpa nom nhũm mẽ ra kot ixpĩr kaxyw ixtã amnhĩ jarẽ. Anẽ.

⁴ Tã tanhmã na Tirtũm kutã kãm kapër to? Na pre kãm: Nã kapxix na ka arĩ atĩr kêt nẽ. Arĩ mẽ ohtõ nẽ apyrã nẽ amnhĩ kaxyw ixkôt hamaxpër. Mẽ ohtõ. Arĩ mẽ kệp 7.000 nẽ akwÿjẽ rom ri sãnti Paaw kutã hkõnkrã ho hkrĩ nẽ kãm mex ã harënh kêt nẽ. Anẽ.

⁵ Tã arĩ ã jarãhã mẽ kot ã amnhĩ nhĩpêx anhÿr kênã.

Tirtũm kãm Ijaew japê jakamã mẽ kamã ukapřĩ. Jakamã nhũm ra mẽ hkwyjaja mẽ pahpyrã nẽ amnhĩ kaxyw Kris kôt hamaxpër nhũm Tirtũm mẽ ho hkra.

⁶ Nom mẽ kot amnhĩ to mex ã mẽ omunh xã hkôt mẽ ho hkra hkêt nẽ. Amarĩ kãm mẽ hapê htũm xã hkôt na hte mẽ ho hkra. Kop apu mẽ kot amnhĩ to mex ã mẽ omunh xã hkôt kot mẽ ho hkra ronhÿx amarĩ mẽ ho hkra hkêt nẽ. Nhÿx mẽ kot tanhmã amnhĩ nhĩpêx to ho pa hã mẽ omunh xã hkôt pix mã mẽ ho hkra.

⁷ Ijaew piitã Tirtũm kot amnhĩm mẽ mex ã mẽ harënh prãm tã no ãm mẽ grẽre nẽ hamaxpër xã hkôt Jejus kôt amnhĩ xunhwÿ. Na htem ohtõ rax nẽ kapër ma mẽ ãm kuma nẽ tee ri kot amnhĩm mẽ mex ã mẽ harënh prãm xaj amnhĩ krã hkôt tanhmã amnhĩ nhĩpêx to ho ri pa. Nom ra mẽ kot Jejus kaga jakamã ã amnhĩ nhĩpêx anhÿr kaprÿ. Mẽ kot hkaga jakamã te ri mẽ hamak kro nẽ Tirtũm kapër mar kêt pyrã nẽ pa.

⁸ Tirtũm kapër ã kagã htũm kot mẽ harënh kot:

Tirtũm na hte mẽ kãm kapër mar prãm kêt xwÿnhjẽ pumu nẽ ãm mẽ omu nhũm htem htÿx ri pa ho pa. Nẽ Tirtũm mã hamaxpër kêt o ri pa. Mẽ kot kapër mar tã hprĩ hã mar tÿx kêt nẽ. Nẽ mẽ kot kapër ã kagã kamã harënh tã hprĩ hã mar tÿx kêt nẽ. Jakamã na htem amnhĩ kaxyw hkôt hamaxpër kêt o pa.

Tã na htem arĩ jarãhã ã amnhĩ nhĩpêx anhÿr o ri pa. Te mẽ nohkre nẽ mẽ hamak kro xwÿnh kot amnhĩ nhĩpêx pyrãk. Anẽ.

⁹ Nẽ amnepêm na pre pahi finat Tawija amnhĩ kwÿ Ijaew jarënh o:

Na htem htÿx ri hkĩnh kãm apkur o pa.

Te tutre kãm prãm nẽ kot rapuuti hwÿr àr nẽ tee ri kãm kator prãm kaprÿ pyrãk.

Ja pyrà nē mē kot Tirtūm kapēr mar kêt mýrapê koja Tirtūm tanhmā mē ho nhūm mē tee ri kām mex prām kaprý.

¹⁰ Te mē nohkre xwýnhjaja tee ri mē hpa nhípêx o pa pyrāk.

Nē omnuj nē à nē ho gjêx o ri pa pyrāk o amnhī nhípêx o ri pa.

Anhýr o mē harē. ¹¹ Tā arí Ijaew Jejus kaga nē kām kapēr mar prām kêt jakamā xà na Tirtūm tee ri ja hā mē omu nē mē hkaga kumrêx? Nà kot mē hkaga hkêt. Ām mē tāmjaja kêt Jejus prām nōkati jakamā nhūm tee ri ja hā mē omu nē mē hpānhā Ijaew kêt xwýnhjê mā amnhī to amnhīrīt nē mē hkwyjê ho hkra. Jakamā koja Ijaew kwýjaja ja hā mē omu nē tee ri hamaxpēr nē hamaxpēr o:

—Kwa na xep Ijaew kêt xwýnh kwýjaja Jejus kôt amnhī xunhwý nhūm Tirtūm ja hā mē omu nē mē ho hkra. Kwa mon pu prem axtem nē ri Jejus kaga? E pu mē kuxwar amnhī kaxyw hkôt mán pajamaxpēr nē hkôt amnhī xunhwý kêt Tirtūm ja hā mē pahpumu nē Ijaew kêt xwýnhjê pyrà nē mē pahto hkra. Hāmri nē amnhī mā mē pahte amnhī to mex xwýnh ā mē pajarē. Anē.

Ā Ijaewjaja hamaxpēr anhýr kaxyw na pre Tirtūm Ijaew kêt xwýnhjê mā amnhī to amnhīrīt. ¹² Hāmri nhūm mē amnhī tā omu nē hkính nē pa. No nhūm Ijaew kwýjaja. Mē kām Jejus prām nōkati ho mē pa xwýnhjaja mē hkínhā hkaprī nē pa. Tā koja mē nhýrmā amnhī kaprī hā amnhī pumu nē amnhī kính kêt ā amnhī pumu hāmri nē Tirtūm kôt amnhī xunhwýr nē amnhī kaxyw Kra Jejus Kris mā hamaxpēr japêr. Koja mē ā amnhī nhípêx anē hāmri nē Ijaew kêt xwýnhjê pyrà nē hkính nē ri pa. Hāmri nhūm Tirtūm ja hā mē omu nē Ijaew kêt xwýnhjê mē mē ho hpimràatā mē ho mex rax nē nhūm mē hkính nē hamakêtkati nē pa ho pa.

Tirtūm kot Ijaew kêt xwýnhjê ho hkra hā harēnh

¹³ E kot paj hpānhā mē apê Ijaew kêt xwýnhjê mā ixkapēr nē mē atā kagà. Na pre Jejus ma mē awýr inhmē. ý hā ixte mē ajahkre ho ri mē akôt ixpa kaxyw. Pa pre ma krī hkwy kamā mē akwyjê hwýr mō nē ixkính kām mē kām kapēr jarēnh o ri mē hkôt ixpa. Nhūm mē hkwyjaja inhma nē amnhī kaxyw Jejus kôt hamaxpēr nē hkôt amnhī xunhwý. ¹⁴ Tā koja apu ixkwýjaja mē harēnh mar japêr. Ijaew tee ri mē apê Ijaew kêt xwýnhjê jarēnhja ma hāmri nē ra amnhī kamā gryk japêr. Jao mē apyrà nē Jejus kôt amnhī xunhwý nē nhýrmā kuri htír tūm nē mex nē pa ho pa. ¹⁵ Kormā mē kot amnhī kaxyw kām hamaxpēr kêt jakamā na pre Tirtūm hpānhā mē apê Ijaew kêt xwýnhjê mā amnhī to amnhīrīt. Ka mē ra krī piitā hkôt axohtō nē hkôt amnhī xunhwý nē hkôt amnhī nhípêx mex o ri apa. Tā koja Ijaewjaja nhýrmā amnhī kaxyw Tirtūm mā hamaxpēr nē mē apyrà nē Jejus kôt amnhī xunhwýr japêr. Hāmri nē te mēhō hkra kêt htyk nhūm hkaprī htā nhūm hkraja tanhmā amnhī to nē akupým kām htír nhūm kot omunh nē hkính týx kumrêxta pyrāk o amnhī nhípêx. Jao Tirtūm mē kot hkôt amnhī xunhwýr ā mē

omu nē hkính nē. Pu mē pahpimràatā urāk nē pahkính nē ri papa.

¹⁶ E pa mē amā mē ujarēnhja ā ejêp kwý jarē. Koja mēmo pī hpār jarē mex nē hā koja pàr mex nē xa. Ja pyrà nē Ijaew pàr krax finat Apraāwja kumrêx na pre amnhī kaxyw Tirtūm mā hamaxpēr nhūm ho hkra. Jakamā koja nhýrmā hkanrēhā htāmnhwýjaja urāk nē amnhī kaxyw kām hamaxpēr nhūm mā mē ho anē nē määnen mē ho hkra nhūm mē mex nē pa. Te kot mēmo pī hpār jarē mexja nhý hā pàr mexta pyrāk.

¹⁷ Nē na htem akunī kamā mēmo pī hpa jakà nē hamý nē ma amnhī kôt o mra. Nē ixkre kapem ra mē kot mēmo pī hkreja hpa jakàr nē rēnh xwýnh xwakre kamā wam pī hpa jakàr xwýnhhta nhō nē axpēn tā hkaxpre nē gaa nē axpēn jamýnh mex nē grà hkêt nē. Nē arí htír mex nē. Te kêt hpa kumrêx pyrāk. Tā Ijaew kwý kot amnhī kaxyw Jejus kôt hamaxpēr xwýnhjaja te mē kêt ixkre kapem pī hpàrta pyrāk. No mē hkwyjaja mē kot Jejus kaga xwýnhjaja te mē kêt mē kot kêt hpa jakàr nē rēnhhta pyrāk. Jakamā nhūm Tirtūm te mē kot pàr pē hpa jakàr nē rēnhhta pyrāk o mē hipêx nē mē hkaga. Nē axtem te mē kot mēmoj pàr pa jakàr nē hpānhā kamā axtem pī hpa janhōr nē hā hkaxpreta pyrāk o mē apê Ijaew kêt xwýnhjê nhípêx nē mē amā amnhī to amnhīrīt. Ka mē ra amnhī kaxyw Jejus mā ajamaxpēr nē hkôt amnhī xunhwý nhūm Tirtūm mē ato mex nē.

¹⁸ Tā kēr ka mē arí Ijaew o mex o ri apa. Tanhmā ri mē hipêx to mā ajamaxpēr to hkêt nē. Rý ajamaxpēr o: —Nà ām hāmri na Tirtūm mē hkaga nē ām kām mē papxipixjê japê.

Anhýr o ajamaxpēr kêt nē. Ijaew te ixkre kapem pī hpār mexta pyrāk. No mē kajaja te mē ate akunī rūm pī hpa kot ixkre kapem pàr mex pix kukwak ri htír nē hā harirta pyrāk. Kêt akunī rūm pī hpa jakàr kukwak ri na hte ixkre kapem pàrta htír nē kuhê hkêt nē. Kop apu pàrta mex kêt ronhýx ra akunī rūm hpaja grà pa. Ja pyrà nē Ijaew kukwak ri kot kaj mē nhýrmā Tirtūm ri atír tūm nē apa ho apa. Jakamā kwa kēr ka mē ate amnhī to rūnh o mē hakrenh ā amnhī to jarkrar kêt nē.

¹⁹ Mán ka mē atō ajamaxpēr o:

—Ra Tirtūm kot Ijaew kaga nē hpānhā mē pajaja mē ixto hkra jakamā mán kām mē ijapê ho mē hakre. Ra mē hpānhā mē ixto hkra kēnā. Anē.

²⁰ Nà ām hāmri na pre Tirtūm Ijaew kwý kaga. Mē kot Jejus kôt amnhī xunhwýr kêt mýrapê na pre te mēmo pī hpa jakàr nē rēnhhta pyrāk o mē hipêx. Ka mē ra mē kurom amnhī kaxyw hkôt ajamaxpēr jakamā nhūm Tirtūm te kot akunī kamā pī hpa jakàr nē ho htēm nē ixkre kapem pī hpār mex ā hanhōr nē hā hkaxpre pyrāk o mē anhípêx. Nom kwa kēr ka mē ja hā amnhī pumu nē ri hā Ijaewjê mā amnhī to jarkrar kêt nē. Ām amnhī to mex nē Tirtūm kapēr kôt amnhī nhípêx mex o ri apa. No kot kaj mē ā amnhī nhípêx anhýr kêt nhūm amnhī tā mē apumu nē ra kot Ijaew kwý nhípêxta pyrà nē tanhmā mē ato nē mē akaga.

²¹ Ā Ijaew jarēnh kot anhýr. Te mē kêt pàr mex pyrāk. Tā nhūm mē kot Jejus kôt amnhī xunhwýr kêt jakamā

nhũm Tirtũm te kot pĩ hpa jakàr nẽ rënhta pyràk o mẽ hipêx nẽ mẽ homnuj nẽ. Kot kaj mẽ uràk nẽ ã amnhĩ nhĩpêx anẽ nhũm mã mẽ ato anẽ nẽ. ²² Ijaew kot Jejus kôt amnhĩ xunhwỳr kêt jakamã nhũm Tirtũm mẽ hpãnhã mẽ apê Ijaew kêt xwỳnhjê mã amnhĩ to amnhĩrĩt. Tã ka mẽ Ijaew rom amã Jejus prãm nhũm Tirtũm ja hã mẽ apumu nẽ amnhĩ pyrã nẽ kãm mẽ aprãm nẽ mẽ akamã ukapřĩ rãhã nẽ pa ho pa. Tã kwa mẽ okora. Kêr ka mẽ hkôt pix mã amnhĩ nhĩpêx o ri apa rãhã ty. Kot kaj mẽ hkaga nhũm amnhĩ tã mẽ apumu nẽ te Ijaew kot hkaga xwỳnhjê nhĩpêx pyràk o mẽ anhiêpêx nẽ mẽ akaga.

²³ Koja Ijaew nhỹrmã Jejus kôt amnhĩ xunhwỳr japêr nhũm Tirtũm ja hã mẽ omu nẽ mẽ ho hkra. Te mẽ kot pãr pa jakàr nẽ rênh nhũm grã par xwỳnh nhũm kot akupỹm amnhĩm hamỹnh nẽ ixkre kapem pãr wỳr o htẽm nẽ akupỹm hã hanhõr nẽ hã hkaxpre ho htỹx nhũm kukwak ri akupỹm htĩrta pyràk. Ja kêt tanhmã kute hkêt. Kot ã hipêx anhỹr kaxyw àhpumunh tỹx. ²⁴ Mẽ apê Ijaew kêt xwỳnhjaja te mẽ ate akunĩ kamã pĩ hpa jakàr nẽ ixkre kapem pãr ã hanhõr nẽ hã kaxpreta pyràk. Jao Jejus kôt amnhĩ xunhwỳ nhũm mẽ ato hkra kurê kumrêx. No Ijaew te mẽ kêt ixkre kapem pãrta pyràk jakamã Tirtũm kot akupỹm hanhõrta tanhmã kêt kute hkêt. Kêt Tirtũm kênã kot tanhmã kêt kute. Jakamã koja mẽ hkôt amnhĩ xunhwỳ nhũm amnhĩ tã mẽ omu nẽ mẽ ho hkra kurê kumrêx.

Tirtũm kot mẽ piitã mẽ kamã ukapřĩ hã harênh

Matêwre 23.37-39; Rukre 21.24; Juãw 10.16

²⁵ E kot paj mẽ amã mẽmoj to amnhĩrĩt ka mẽ inhma. Nà na pa ra mẽ amã Ijaew krã xihtỹx xwỳnhjê jarê ka mẽ harênh ma. Ra mẽ kot Jejus kaga hã mẽ harênhja. Tã koja mẽ ã amnhĩ nhĩpêx anhỹr o pa rãhã hkêt nẽ. Na hte Tirtũm kormã amnhĩ tã mẽ apê Ijaew kêt xwỳnhjê jamãr o pa. Amnepêm na pre amnhĩ kaxyw mẽ akukamã tanhmã mẽ akwỳjê jarênh to. Tã kot kaj mẽ kot tanhmã mẽ ajarênh to xwỳnh piitã Jejus kôt amnhĩ xunhwỳr pa nhũm rĩ Ijaew amnhĩ to hapu nẽ kormã hkôt amnhĩ xunhwỳ. Æ mẽ kot amnhĩ nhĩpêx anhỹr kaxyw. Jakamã kwa kêr ka mẽ ri ja hã amnhĩ to jarkrar o ri mẽ hkôt apa hkêt nẽ. Mẽ pahpyrà nẽ mẽ kot Jejus kôt amnhĩ xunhwỳr mã xwỳnh kênã. ²⁶ Koja Tirtũm nhỹrmã Ijaew piitã ho hkra. Kapêr ã kagã htũm kot mẽ harênh kot:

Nhỹrmã kot mẽ ate amnhĩ tomnuj pẽ mẽ apytãr mã xwỳnhja Ijaew õ koja.

Jako hkanrêhã htãmnhwỳjê hõ koja.

Koja nhỹrmã wrỹ nẽ mẽ ate amnhĩ tomnuj pẽ mẽ apytã nẽ mẽ ate amnhĩ tomnuj o hapêx pa. Anẽ. Anhỹr o kot harênh. ²⁷ Nẽ mããnen ja:

Kot paj mẽ nẽ mẽ kot amnhĩ tomnuj o ijpêx pa.

Amnepê mã ixte mẽ hkukamã mẽ hã amnhĩ jarênh xã hkôt. Anẽ.

²⁸ Nom arĩ mẽ kãm Jejus mar prãm kêt jakamã te mẽ kot kutã amnhĩ xunhwỳr pyràk o amnhĩ nhĩpêx. Tã ã mẽ kot amnhĩ nhĩpêx anhỹrja ri ka mẽ kamjaja mẽ hpãnhã mẽ apê Tirtũm kra. Nom nhũm Tirtũm arĩ kãm

mẽ hapêê. Na pre amnepê mã kot tanhmã mẽ ho mex to hkukamã tanhmã mẽ hã amnhĩ jarênh to. Mẽ hpãr kraxjê mã tanhmã mẽ hã amnhĩ jarênh to. Finat Apraãw mẽ Ijak mẽ Jakoja mã mẽ hkanrêhã mẽ htãmnhwỳjê hã tanhmã amnhĩ jarênh to.

²⁹ Na hte Tirtũm mẽmoj tã tanhmã amnhĩ jarênh to nẽ ãm hãmri hã amnhĩ jarê nẽ amnhĩ jarênh xã hkôt tanhmã hipêx to. No na hte mẽmoj tã amnhĩ jarênh tã gaa nẽ ho hamakêtkati hkêt nẽ. Rỹ hpãnhã axtem tanhmã hipêx to hkêt nẽ. Na hte mẽmoj tã amnhĩ jarênh xã hkôt tanhmã hipêx to. Tã ra amnepê mã kot Ijaew o mex ã amnhĩ jarênh jakamã koja nhỹrmã mẽ ho mex rax nẽ ã mẽ hipêx anhỹrja o hamakêtkati hkêt nẽ.

³⁰ No mẽ kajaja mẽ apê Ijaew kêt xwỳnhjaja. Amnepêm na ka prem ajaxwỳja Tirtũm kôt amnhĩ nhĩpêx kêt nẽ. Tã nhũm mẽ akamã ukapřĩ nẽ kãm mẽ ajapê nẽ. Ka mẽ ra harênh ma nẽ hkôt amnhĩ xunhwỳ nẽ hkôt amnhĩ nhĩpêx mex nẽ. No ãm Ijaew kukwak ri. Mẽ kot kapêr kôt amnhĩ nhĩpêx o pa hkêt jakamã nhũm Tirtũm mẽ hpãnhã nhãm mẽ amã amnhĩ to amnhĩrĩt nẽ mẽ ato mex rax nẽ. Jakamã te Ijaew kukwak ri mẽ amex nẽ ri mẽ apa pyrãk. ³¹ Tã koja nhỹrmã kot mẽ anhiêpêxta pyrã nẽ Ijaew ho hkra. Nẽ mẽ apyrã nẽ mẽ kamã ukapřĩ nẽ. Mẽ kot mẽ apyrã nẽ amnhĩ kaxyw Kra hkôt hamaxpêr xwỳnhjaja nhũm mẽ apyrã nẽ mẽ ho hkra nẽ mẽ ho mex nẽ. ³² Mẽ apê Ijaew kêt xwỳnhjaja nẽ mẽ ixpê Ijaew mẽ pahte xpên pyrãk. Na pu htem pahpiitã Tirtũm kapêr piitã hkôt amnhĩ nhĩpêx rãhã ho ri papa hkêt nẽ. Tã kot puj mẽ tee ri ja hã amnhĩ pumu nẽ amnhĩ to kuwỳ nhũm mẽ pama nẽ amarĩ mẽ pakamã ukapřĩ nẽ mẽ pahto mex nẽ.

Pawre kot Tirtũm mex o mex ã harênh

Epes 3.20; Korosê 1.16; Wam Korĩt 2.9, 2.16

³³ Tirtũmja àhpumunh tỹx o àhpumunh tỹx. Nẽ ukapřĩ ho ukapřĩ nẽ mex o mex. Mẽ pahtõ na pu uràk nẽ ã amnhĩ nhĩpêx anhỹr o papa? Nà amrakati kumrêx. Nẽ mẽ pahtõ na pahte Tirtũm jamaxpêr kôt omunh? Nà mẽ pahte hamaxpêr kôt omunh kêt. ³⁴ Kapêr ã kagã htũm kot ja jarênh kot:

Mẽ pahte Tirtũm jamaxpêr kôt omunh kêt.

Nẽ kot pu mẽ pahtõ mẽmoj tã hakre hkêt nẽ.

Mẽ parom àhpumunh o àhpumunh xwỳnh kênã.

³⁵ Nẽ mẽ pahtõ kot puj we kãm pakapêr nẽ kãm: "Kwa Tirtũm. Ra ixte amã mẽmoj nhõrta pãnhã kwa amnhĩ xwar inhmã mẽmoj gõ." Anẽ.

Nà mẽmoj piitã õ kênã kot puj kêt ri ã kãm mẽmoj nhõr ã amnhĩ jarênh anẽ. Anẽ.

³⁶ Tãm na pre amnhĩ kaxyw mẽmoj piitã ho kator pa. Nẽ ãm pix kukwak ri na mẽmoj piitã htĩr nẽ pa. Jakamã kwa pu mẽ kãm mex o mex ã mãn harênh rãhã ho ri papa.

Mě pahte Tirtũm mã amnhĩ nhõr ã mẽ pajarẽnh

Wam Korĩt 6.20; Epes 4.1; Piripos 4.8-9; Korosẽ 1.10; Wam Tesarõn 4.1-3; Wam Pẽtre 2.11

12 Kwa Jejus kõt ixkwỳjaja. Tirtũm na hte mẽ pahto mex nõ mẽ pakamã ukaprĩ rãhã jakamã na pa ã mẽ amã ixkapẽr anẽ. Kwa mẽ tokyx kãm amnhĩ jarẽ nõ kãm amnhĩ gõ. Te mẽ ate kãm hkĩnh xà nhõr pyràk o amnhĩ nhĩpẽx nõ kãm amnhĩ gõ. Jao mẽ amã kapẽr kõt pix mã amnhĩ nhĩpẽx o ri apa hprãm ã kãm amnhĩ jarẽ. Nẽ kãm hprãm xà hkõt pix mã tanhmã amã amnhĩ nhĩpẽx to ho ri apa hprãm ã kãm amnhĩ jarẽ. Kot kaj mẽ ã kãm amnhĩ jarẽnh anẽ nhũm amnhĩ tã mẽ ama nõ hkĩnh nõ. ã mẽ pahte kãm amnhĩ jarẽnh anhỹrja na kãm mar prãm.

² Nẽ kẽr ka mẽ kãm Tirtũm prãm kêt xwỳnhjaja kot amnhĩ nhĩpẽx o ri amnhĩ nhĩpẽx o ri apa hkõt nõ. Nẽ mẽ amnhĩ to Tirtũm mãn wỳ kẽ mẽ amã mẽ ajamaxpẽr mex jagjẽ. Koja mẽ ama nõ mẽ amã hagjẽ ka mẽ ra aprĩ hã hamaxpẽr xà hkõt mẽ pahte amnhĩ to mex xà pumunh mex nõ. Na pu htem hkõt amnhĩ nhĩpẽx o ri papa nhũm amnhĩ tã mẽ pahpumu nõ hkĩnh nõ. Pu mẽ pajaxwỳja ý hã pahkĩnh nõ ri papa.

Kris kwỳjaja kot tanhmã axpẽn nhĩpẽx to hã mẽ kãm karõ

Rõmãn 12.1-11; Epes 4.11-16; Wam Pẽtre 4.10-11

³ Nẽ na pre Tirtũm ixto mex nõ. Nẽ mẽ akaxyw ixãm. Ixte mẽ amã Kra Jejus kot tanhmã mẽ panẽ amnhĩ nhĩpẽx to hã harẽnh o ri mẽ akõt ixpa kaxyw. Tã na pa ã kagãja kamã mẽ amã harẽnh anẽ.

Jakamã kwa kẽr ka mẽ amnhĩ to jarkrar o ri mẽ kãm apa hkõt nõ. ãm kwarĩ ho kwarĩ. Rỳ atỳx ri ajamaxpẽr o:

—Nà pa na ixte amnhĩ to mex o ixte ixkwỳjẽ piitã mẽ hakrenh par.

Anhỹr ã amnhĩ to jarkrar o ri mẽ hkõt apa hkõt nõ. Kêt mẽ ãm amnhĩ jarẽnh o:

—Na pa pre amnhĩ kaxyw Jejus kõt ijamaxpẽr nhũm Tirtũm ixpumu nõ ixto hkra. Jakamã na pa hte Jejus Kris pix kukwak ri tãm amnhĩ nhĩpẽx o ri ixpa. No amnhĩ krã hkõt ã amnhĩ nhĩpẽx anhỹr kêt nõ. Anẽ.

⁴ E pa mẽ amã mẽmoj jarẽ ka mẽ inhma. Nà mẽ panhĩja pyxi htã kamã mẽmoj xohtõ. Na kamã mẽ pano nõ mẽ pajakwa. Nẽ kamã mẽ pajamak nõ mẽ pahte. Na pu htem mẽ pano ho rĩt nõ mẽ pajakwa ho pakapẽr. Nẽ mẽ pajamak o ri ama nõ mẽ pahte ho ri mra. ⁵ Ja pyrà nõ Kris kõt mẽ pahte amnhĩ xunhwỳr xwỳnhja ãm pyxi tã hkõt mẽ pahte amnhĩ xunhwỳr xwỳnhjaja mẽ paxohtõ. Jakamã na pu htem ahpỹnhã tanhmã axpẽn to mex to ho ri papa. Jao Kris kõt axpẽn to pahtõ nõ pahtõx o papa.

⁶ Tirtũm na hte mẽ pahpẽ hwỳ hã ahpỹnhã mẽ pamã tanhmã mẽmoj tã karõ to nõ kaxyw mẽ pahto mẽ paxihtỳx. Tã kẽr pu mẽ ra kot mẽ pamã mẽmoj tã karõ xà hkõt kãm amnhĩ nhĩpẽx rãhã ho ri papa. Jakamã koja mẽhõ ate Tirtũm kapẽr jarẽnh o ri apa

kaxyw axãm nõ amã anẽ ka Tirtũm kamnàr rom mẽ kãm kapẽr jarẽnh mex o ri mẽ hkõt apa.

⁷ Rỳ ate akwỳjẽ mã tanhmã axapẽn to ho ri apa kaxyw axãm ka mẽ kãm axapẽn mex o ri mẽ hkõt apa.

Rỳ ate Tirtũm kapẽr ho mẽ ahkre ho ri apa kaxyw axãm ka ho mẽ ahkre mex o ri apa.

⁸ Rỳ ate Tirtũm kapẽr o ri Jejus kõt mẽ akwỳjẽ jamaxpẽr o hihtỳx o ri apa kaxyw axãm ka mẽ kãm kapẽr jarẽnh pẽ mẽ ho mẽ hihtỳx mex o ri mẽ hkõt apa.

Rỳ ka mẽ atõ akukrẽx rax japẽr nõ ate mẽ kęp amrakati xwỳnhjẽ mã mẽmoj nhõr o ri apa kaxyw axãm ka axãmnhĩx ri mẽ kãm mẽmoj nhõr o ri mẽ hkõt apa.

Rỳ ate akwỳjẽ ho amnhĩptãr kaxyw axãm ka mẽ ho amnhĩptãr mex o ri apa.

Rỳ ate tanhmã mẽ akwỳjẽ ho mex to nõ mẽmoj to mẽ kutã anojarẽt o ri apa kaxyw axãm ka akĩnh kãm ã mẽ hipẽx anhỹr rãhã ho ri apa nõ tanhmã akapẽr punuj to hkukamã ri ajamaxpẽr o ri mẽ hkõt apa hkõt nõ.

⁹ Nẽ kẽr ka mẽ apiitã amã axpẽn kĩnh kãm axpẽn to mex rãhã ho ri apa nõ ri axẽx rom amã axpẽn kĩnh ã amnhĩ jarẽnh o ri apa hkõt nõ. Nẽ mẽ kot amnhĩ tomnuj xà piitã hkaga hpa nõ hpãnhã mẽ kot amnhĩ to mex xà pix pyr tỳx nõ hkõt amnhĩ nhĩpẽx rãhã ho ri apa. ¹⁰ Nẽ mẽ apẽ Kris kwỳ hã amã axpẽn kĩnh kãm tãm axpẽn nhĩpẽx o ri apa. Nẽ mẽ akwỳjaja mẽ kot amnhĩ to mex xwỳnh ã mẽ harẽnh o ri mẽ hkõt apa. No mẽ ri atỳx ajamaxpẽr o:

—Nà koja mẽhõ ixkumrẽx ixte tãm amnhĩ nhĩpẽx xwỳnh ã ijarẽ pa rĩ kormã amnhĩ xwar tãm kot amnhĩ nhĩpẽx xwỳnh ã harẽ.

Anhỹr o ajamaxpẽr kêt nõ. Kẽr ka akumrẽx tãm kot amnhĩ nhĩpẽx xwỳnh ã harẽ.

¹¹ Nẽ kẽr ka mẽ Tirtũm mã mẽmoj to anhỹr kaxyw nõ kamã amã kaga hkõt kãm tanhmã kãm mẽmoj to ho ri apa. Jao akĩnh kamã kãm ho anhỹr mex nõ. ¹² Nẽ mẽ nhỹrmã Tirtũm kot kaxkwa kamã mẽ ato mex rax kukamã ajamaxpẽr nõ akĩnh rãhã kãm mẽmoj to anhỹr o ri apa.

Nẽ kẽr ka mẽ tanhmã amnhĩ to rỳ nhũm mẽhõ tanhmã mẽ ato ka mẽ akaprĩ nõ ri apa htã no ãm tee ri amnhĩ kukamã ajamaxpẽr o Tirtũm kaga hkõt nõ. Arĩ amnhĩ to hwỳr rãhã ho ri apa. ¹³ Nẽ koja Kris kõt atõjẽ hõ kęp amrakati ka mẽ ja hã omu nõ anhõ mẽmoj japẽr nõ mãmrĩ kãm hkwỳ gõ. Nẽ amnhĩ wỳr awỳ nõ tanhmã ho mex to.

¹⁴ Nẽ mẽ kot tanhmã mẽ atomnuj to xwỳnhjaja kẽr ka mẽ amnhĩ tã mẽ omu nõ agryk nõ wajaga kot tanhmã amã ho kaxyw hwỳr atẽm nõ kãm tanhmã hã axãmnhẽnh to hkõt nõ. Kêt ãm ho Tirtũm pix wỳ nõ kãm:

—Pa mẽ ijamãr mex xwỳnh maati. Nà na ixkwỳjẽ hõja ã inhĩpẽx anẽ. Tã nom kẽr ka ixtã tanhmã homnuj to hkõt nõ. ãm tanhmã ho mex to.

Anhỹr o mãn mẽ ho awỳ.

¹⁵ Nẽ koja akwỳjẽ hõ mẽmoj tã hkĩnh nõ. Ka omu nõ urak nõ ý hã akĩnh nõ. No koja mẽmoj tã hkaprĩ nõ mỳr o nhỹ ka omu nõ ra urak nõ ý hã akaprĩ nõ.

¹⁶ Nê kêr ka mẽ piitã mẽ hipêx o axpên pyrãk o ri apa. Te mẽ ate amnhĩ to rax o akwÿjê jakrenh o te mẽ-moj kamã akahak o amnhĩ nhĩpêx pyrãk kêt nê. Nê axãhpumunh tÿx o ate mẽ piitã mẽ hakrenh par pyrãk o ri amnhĩ nhĩpêx o ri apa hkêt nê.

¹⁷ Nê koja mẽhõ tanhmã ato htã ka ãm amnhĩ tã omu nê tanhmã amnhĩ tã ho hkêt nê. Nê mẽ piitã mẽ noo mã tãm ri amnhĩ nhĩpêx o ri apa.

¹⁸ Nê kêr ka mẽ tãm ri axpên mã akapêr rãhã ho ri apa.

Nê kot kaj akrãmnhwÿ mẽ wa tanhmã axpên nhĩpêx to. Hãmri ka wa akupÿm tãm axpên xãm kaxyw kãm akapêr tã nhũm ama nê ãm ama nê akaga. Ka ãm amnhĩ tã omu nê kamã agryk kêt nê. Koja Tirtũm tãm tanhmã atã ho. Kapêr ã kagã htũm kot ja jarênh kot: Kêr ka mẽ amnhĩ tã tanhmã kot ato xwÿnh to hkêt nê. Pa kot paj mẽ atã tanhmã ho. Anê. Nê harênh kot:

²⁰ Kêr ka mẽ amã mẽ kãm mẽ akurê xwÿnhjê o mex pix o ri apa.

Kê mẽ kãm prãm ka ja hã mẽ omu nê mẽ kamã axukapri nê mẽ kãm mẽmoj kwÿ gõ kê mẽ kuku.

Rÿ nhũm mẽ kãm kôr ka mẽ kãm gõ hkwy kê mẽ ho ixkõ.

Kot kaj mẽ ã amnhĩ tã mẽ hipêx mex anê nhũm mẽ tee ri amnhĩ tã mẽ apumu nê amnhĩ kamã hpijaãm jao mẽ atã amnhĩ kamã gryk nê. Anê.

²¹ Nom kot kaj mẽ amnhĩ tã tanhmã mẽ homnuj to hãmri nê ajaxwÿja urãk nê amnhĩ tomnuj nê. Ja pymaj kêr ka mẽ amnhĩ rom tãm mẽ hipêx. Hãmri nhũm mẽ amnhĩ tã mẽ apumu nê mẽ apyrã nê tãm mẽ anhipêx japêr.

E kêr ka mẽ ã axpên nhĩpêx o ri apa anê.

Mẽ pahto amnhĩptãr xwÿnhjê jarênh

Matêwre 22.21; Xitre 3.1; Wam Pêtre 2.13-17

13 Nê kêr ka mẽ kot mẽ ato amnhĩptãr xwÿnhjê kapêr ma nê kapêr kôt ri amnhĩ nhĩpêx rãhã ho ri apa. Tirtũm kot mẽ pakaxyw mẽ unhwÿr kênã. Mẽ kot mẽ pahto amnhĩptãr o pa kaxyw na hte mẽ unhwÿ. ² Jakamã koja mẽhõ mẽ kapêr ma nê ãm kuma nê hkôt amnhĩ nhĩpêx kêt nê hãmri nê te kot Tirtũm kapêr mar nê ãm mar pyrãk o amnhĩ nhĩpêx. Hãmri nhũm Tirtũm tee ri ja hã omu nê nhÿmã tanhmã hã ho.

³ Xã na hte tãm mẽ kot amnhĩ nhĩpêx xwÿnhjaja kãm mẽ kot mẽ ho amnhĩptãr xwÿnhjê puma ho pa? Nã na htem kãm mẽ uma hkêt kãm ri pa. ãm mẽ kot amnhĩ tomnuj xwÿnh pixjaja na amnhĩ kamã kãm mẽ uma ho pa. Tã ka mẽ amã mẽ kot mẽ ato amnhĩptãr xwÿnhjê puma hprãm kêt xwÿnhjaja kêr ka mẽ kapêr ma nê hkôt amnhĩ nhĩpêx kê amnhĩ tã mẽ apumu nê hkĩnh nê. Nê amnhĩm mẽ ate amnhĩ to mex xwÿnh ã mẽ ajarê. ⁴ Tirtũm nhÿ hã mẽ panhõ pahi kot mẽ pahto amnhĩptãr jakamã na htem mẽ kãm mẽ pahto mex prãm nê. Nê kot pu mẽ pahtõ axtem nê tanhmã amnhĩ tomnuj to hãmri nhũm tee ri ja hã pajarênh ma nê tanhmã hã mẽ pahto. ãm hãmri na hte ã mẽ pahto amnhĩptãr xwÿnhjaja mẽ panhipêx anê. Tirtũm kãm

hprãm xã hkôt. ⁵ Jakamã kwa mẽ kapêr ma nê hkôt ri amnhĩ nhĩpêx mex rãhã ho ri apa. Nom amã kot tanhmã ato pix pymaj hkôt ri amnhĩ nhĩpêx kêt nê. Mããnen ã amnhĩ kukamã ajamaxpêr anê nê ajamaxpêr o:

—Nã Tirtũm kot mẽ ixkaxyw unhwÿr jakamã na pa hte kapêr ma nê hkôt amnhĩ nhĩpêx mex o ri ixpa.

Anhÿr o ajamaxpêr.

⁶ Nê mẽ pahto amnhĩptãr xwÿnhjaja kot Tirtũm nhÿ hã tanhmã mẽ panhipêx to ho pa jakamã na pu htem mẽ ãpênh pãnhã mẽ kãm amnhĩre. Mẽ pahpiitã axpên kaxyw kãm kãxpore ho hkryre nê kugõ. Tanhmã kot ho mẽ pamã mẽmoj to mex to kaxyw. ⁷ Jakamã kêr ka mẽ hã apijaãm o ri apa kamã mãmrĩ mẽ kãm kãxpore hkwy ho hkryre nê õr o ri apa. Mẽ kot hã ãhwÿr xã hkôt.

Mẽ pahte tanhmã axpên nhĩpêx to hã mẽ pamã karõ

Matêwre 22.39-40; Karatas 5.13-15; Wam Juãw 3.11-24

⁸ Nê kêr ka mẽhõ ho tewên japêr nê tokyx kãm amnhĩre. Nê mẽ amã axpên kĩnh o aa ho ajamakêtkati hkêt nê. Jao mẽmoj to axpên kutã anojarêr rãhã ho ri apa. Kot kaj mẽ ã axpên nhĩpêx anê nê Tirtũm kapêr piitã hkôt amnhĩ nhĩpêx mex o ri apa.

⁹ Amnepê mã na pre finat Mojesja Tirtũm nhÿ hã Ijaew mã mẽmoj tã karõ nê mẽ kãm:

Kêr ka mẽ aprõ pix tãnopxa nê nhãm mênijê hõ kamã ri akurê ho apijaãm kêt o apa hkêt nê.

Nê mẽ anijaja mẽ amjên pix tãnopxa nê nhãm ri mẽmyjê hõ kamã akurê ho apijaãm kêt o ri apa hkêt nê.

Nê mẽ ri axpên par kêt nê.

Nê mẽ ri axpên pê axãhkĩnh o ri apa hkêt nê.

Nê mẽ amã ri axpên kukrêx kĩnh o ri amã ho anhõ hprãm o ri apa hkêt nê. Anê.

Nê mããnen ja:

Kêr ka mẽ nhãm mẽ axpên nhĩpêx o te ka amã amnhĩ tã ma pyrãk. Jao tãm axpên nhĩpêx o ri apa. Anê.

ã kot mẽ kãm hã karõ kot anhÿr. Kot puj mẽ ã pamã pahkwÿjê kĩnh anê nê mããnen wam finat Mojes kot mẽmoj tã mẽ panhĩgêttjê mã karõ hkôt amnhĩ nhĩpêx o ri papa rãhã nê. Jao axpên par kêt nê. Nê axpên pê paxãhkĩnh kêt nê. Nê axpên kutã panojarêr rãhã nê.

¹⁰ Koja mẽhõ kãm amnhĩ tã ma pyrãk o hkwyjê nhĩpêx nê mẽ ho mex pix o pa. Jakamã kot kaj mẽ amã ri axpên kĩnh nê mẽmoj to axpên kutã anojarêr pix nê. Jao Tirtũm kapêr piitã hkôt amnhĩ nhĩpêx mex o ri apa.

¹¹ Amnepê mã mẽ pahte amnhĩ kaxyw Jesus kôt paja-maxpêr xã hã arĩgrota ã na pre kormã akupÿn mẽ pahwÿr hpõx xã hã arĩgro kormã hwÿr awry rax nê. Tã ra hwÿr ahtêp o mõ. Koja tokyx akupÿn mẽ pahwÿr wrÿ nê ma akupÿm kaxkwa hwÿr mẽ pahto api. Jakamã kwa kêr pu mẽ arĩ hamãr rãhã ho ri apa. Jao tanhmã amnhĩ tomnuj to kaxyw nê pajamaxpêr o:

—Kwa koja Jesus tanhmã amnhĩ to nê jarãhã akupÿn wrÿk japêr. Tã kot pa ri ã amnhĩ nhĩpêx anê nhũm wrÿ nê tee ri ja hã ixpumu pa amnhĩ kamã ixpijaãm tÿx nê. Nã kot paj ã amnhĩ tomnuj anhÿr kêt nê. Anê.

Hämri nõ Jejus kamã ajamak pê kutêp Tirtüm kapêr kôt pix mã ri amnhĩ nhĩpêx mex rãhã ho ri papa.

¹² Na pu htem kamãt kãm gõr nõ arĩgro jamãr pê kamã pajamak o panhĩkwý. Arĩgro te kêp Jejus akupýn wrýk pyrãk. Jakamã kwa pu mẽ kamã pajamak pê kãm panojarêt rãhã ho ri papa nõ amnhĩ nõ tanhmã mẽ omnu xà kute pumunh mex o ri papa. Te ho pôristi kot amnhĩ nõ mẽ kot kãm mẽ hkurê xwýnhjê pumunh mex pyrãk o Jejus kutêp tãm amnhĩ nhĩpêx o ri papa. Na pre tanhmã mẽ pahkrã hto pu mẽ ý hã tãm ri amnhĩ nhĩpêx. Tã kêr pu mẽ arĩ ã amnhĩ nhĩpêx anhýr o ri papa nõ te mẽ pahte arĩgro hã mẽ pa xwýnhjê kot amnhĩ nhĩpêx pyrãk o amnhĩ nhĩpêx. ¹³ Kot puj mẽ ã amnhĩ nhĩpêx anê nõ mẽ piitã mẽ noo mã tee ri tanhmã mẽ pahte amnhĩ tomnuj to mã pajamaxpêr kêt nõ. Jao amnhĩ kamã pahpijaam nõ ri papa hkêt nõ. Nê pajamakêtkati nõ paxãmnhĩx ri papa. Te ho hirã kamã ri mẽ pa xwýnhjê kot amnhĩ nhĩpêx pyrã nõ ãm ri paxãmnhĩx tãm amnhĩ nhĩpêx o ri papa.

Nê mẽ pahprõ pix tãnopxar o ri papa.
Nê mẽ pahpipãnh nõ ri papijapu ho ri papa hkêt nõ.
Nê mẽmoj tã axpên mã paxãkjêr hkêt nõ.
Nê mẽmoj tã axpên kãm pagryk kêt nõ.

¹⁴ Nom kot puj mẽ axtem nõ ã amnhĩ tomnuj anê nõ mẽ pahte amnhĩ nhĩpêx tũm kôt pix mã amnhĩ nhĩpêx. Tã kêr pu mẽ ã amnhĩ nhĩpêx anhýr pumaj hpãnhã amnhĩ to Pahihti Jejus Kris wý nõ kãm:

—Pa Jejus. Nã kormã jar apa ri na ka pre mẽ kot tanhmã amnhĩ tomnuj to kutã axihtýx o axihtýx nõ aa tanhmã amnhĩ tomnuj to hkêt nõ. Tã inhmã apyrã nõ ixte amnhĩ tomnuj kutã ixihtýx o ixihtýx o ixpa hprãm. Anê.

Jao mẽ pajamaxpêr tũmja te ra kot amnhĩ tã mẽ pah-to htýx kêt pyrãk o pu mẽ amnhĩ nhĩpêx o ri papa.

Mê pahte Kris kôt pahkwýjê mã paxãkjêr kêt ã mẽ pamã karõ

Matêwre 7.1-5; Rõmãn 2.1; Wam Korĩt 10.23-33; Xiakre 4.11

14 Nê koja mēhõ kormã Jejus kôt amnhĩ xãm nyw ri kormã hkôt hamaxpêr tohtuj anê. Hämri nõ htýx tanhmã hamaxpêr to nõ mẽmoj mex kaga. Ka mẽ ja hã omu nõ ãm omu nõ hã tanhmã kãm nõ hkêt nõ. Kwãr mãmrĩ ã amnhĩ nhĩpêx anê. Koja gaa nõ rĩ hprĩ hã Tirtüm kapêr mar týx nõ hämri nõ hkôt mẽmojta pumunh mex nõ. ² Jakamã koja Jejus kôt akwýjê hõ mẽ apkur xà piitã hkur pymaj tanhmã hõ kute hã harê nõ hkaga nõ hamaxpêr o:

—Na kot pa ja hkur kêt nõ. Kot pa apu kuku nõ hkur o amnhĩ tomnuj nõ. Anê.

Kwãr mãmrĩ ã hamaxpêr anê nõ hkur kêt nõ. Nom mẽ pahte Jejus kôt amnhĩ xunhwýr týx xwýnhjaja na pu htem paxãmnhĩx Jejus kamnãr rom mẽmoj piitã kuku. Nom mẽ pahkĩnhã ham mẽ kot hkôt amnhĩ xunhwýr xwýnhjaja kormã kapêr piitã mar kêt jakamã kwãr mẽ mãmrĩ anê nõ mẽmoj kur kêt nõ. ³ Nom kêr ka mẽ ri tanhmã hã mẽ kãm akapêr to hkêt nõ. Rý mẽ kãm:

—Kwa mẽ ixpyrã nõ mẽmoj piitã aku.

Anhýr o mẽ kãm akapêr kêt nõ. Ano ho ãm hã mẽ omu.

Nê mẽ ate mẽmoj piitã hkur kêt xwýnhjaja kêr ka mẽ ajaxwýja mẽ ixte mẽmoj piitã hkur ã tanhmã mẽ inhmã axãkjêr to hkêt nõ. Mẽ ixte mẽmoj piitã hkur o ixpa hã mẽ ixpumu nõ ãm hã mẽ ixpumu nõ hã tanhmã mẽ inhmã axãkjêr to hkêt nõ. Rý hã mẽ inhmã:

—Kwa nã kot kaj mẽ ja kur o amnhĩ tomnuj nõ.

Anhýr o hã mẽ inhmã akapêr kêt nõ. Ano ho ãm ja hã mẽ ixpumu. Mẽ pahte ahpýnhã tanhmã paxãpkur to htã Tirtüm kot mẽ pahte Kra Jejus kôt amnhĩ xunhwýr xwýnh piitã mẽ pahto hkra kênã. ⁴ Jakamã kwa mẽmoj tã tanhmã axpên mã axãkjêr to ho ri apa hkêt nõ. Koja Kris kôt atõjê hõ axtem tanhmã hamaxpêr to ka mẽ tee ri ja hã omu nõ tanhmã hã kãm nõ hkêt nõ. Rý ajamaxpêr o:

—Tk. Na hte ã ri amnhĩ nhĩpêx anhýr o pa. Ja omnuj. Pa na pa hte ã amnhĩ nhĩpêx anhýr kêt nõ.

Anhýr o ri axpên kukamã ajamaxpêr hkêt nõ. Mẽ pahpê Tirtüm kêt kênã kot pu kêt mẽ ã ri axpên kukamã pajamaxpêr anê. Tirtüm pix na hte tanhmã mẽ pajarênh to xwýnh. àhpumunh o àhpumunh xwýnh jakamã koja tanhmã mẽ hkrã hto nhũm mẽ rĩ kormã tãm hamaxpêr pê ãmnhĩx ri tanhmã amnhĩ nhĩpêx to ho pa.

⁵ Nê koja Jejus kôt atõjê hõ mẽmo arĩgromnu jarê nõ hã àpênh kêt nõ. Ka mẽ apê hkwyjaja tee ri ja hã omu nõ ajamaxpêr o:

—Nã arĩgro piitã mẽ pamã mex kênã. Kot paj mãmrĩ arĩgro piitã hã apê.

Anhýr o ajamaxpêr japêr. Nom kêr ka mẽ ja hã axpên mã tanhmã axãkjêr to hkêt nõ. Na pu htem ahpýnhã pamã tanhmã mẽ pahte amnhĩ nhĩpêx to hprãm xà hkôt tanhmã amnhĩ nhĩpêx to. No tanhmã ri hã axpên mã paxãkjêr to ho ri papa hkêt nõ. ⁶ Kêt mẽ kot arĩgromnu jarênh xwýnhjê mẽ mẽ pahte arĩgro piitã mex ã harênh xwýnhjaja mẽ pahpiitã mẽ pahpê Tirtüm kraa. Jakamã mẽ pahpiitã na pu htem pajamaxpêr o:

—Na pa hte Tirtüm kãm hprãm xà hkôt ã amnhĩ nhĩpêx anhýr o ri ixpa. Anê.

Nê mẽ pahte mẽmoj piitã hkur xwýnhjaja nõ mẽ kot mẽmoj kwý hkur kêt xwýnh piitã mẽ pahpê Tirtüm kraa. Mẽ pahpiitã mẽ pamã kãm hprãm xà hkôt amnhĩ nhĩpêx prãm jakamã na pu htem paxãpkur kaxyw nõ Tirtüm mã amnhĩ jarê nõ kãm:

—Pa mẽ ijamãr mex xwýnh maati. Nã ãm hämri na ka hte apkati mẽ mẽ inhmã mẽ inhõ ho apa. Amex o amex Tirtüm.

Anhýr o kãm amnhĩ jarê. Hämri nõ kormã hkamnãr rom paxãmnhĩx ri tanhmã mẽõ kuteta ku. ⁷ Mẽ pahpê Tirtüm kra jakamã na pre ra mẽ pakukamã tanhmã mẽ pajarênh to. Mẽ pakukamã pahtýk ã arĩgro jarê nõ mẽ pahte pahtĩr ri tanhmã ri amnhĩ nhĩpêx to ho papa hkukamã hamaxpêr. No mẽ papajaja na pu htem amnhĩ krã hkôt tanhmã mẽ pahte amnhĩ nhĩpêx to kukamã paxãhpumunh kêt. ⁹ Jakamã na pre Kris ja hã mẽ pah-

pumu nõ tõm mẽ pakaxyw amnhĩ to kęp mẽ panhõ Pahihti nõ mẽ panẽ ty. Hãmri nõ akupým htĩr. Kęp mẽ panhõ Pahihti hã akupým htĩr. Kęp mẽ pahte hkõt amnhĩ xunhwýr xwýnhjẽ nõ Pahihti kaxyw. Jakamã kęp ra mẽ pahkwý htyk xwýnhjẽ nõ Pahihti nõ mããnen kęp arĩ mẽ pahťĩr xwýnhjẽ nõ Pahihti. ¹⁰ No mẽ papajaja mẽ pahpẽ Kris kõt mẽ pahkwýjẽ nõ pahi hkõt jakamã kër mẽ Kris kõt akwýjẽ hõ tanhmã amnhĩ nhĩpẽx to hã omu hãmri nõ tanhmã ho akapẽr to hkõt nõ. Rý ajamaxpẽr o:

—Kwa na ã amnhĩ nhĩpẽx anẽ. Inhmã ja mex kêt.

Anhýr o ajamaxpẽr kêt nõ. Koja nhýrmã Tĩrtũm tõm mẽ pahpiitã tanhmã mẽ pahte amnhĩ nhĩpẽx to hã mẽ pahpumunh xã hkõt tanhmã mẽ pajarẽnh to. Nom kęp pu mẽ papajaja amnhĩ hkrã hkõt ã axpẽn jarẽnh anhýr kêt nõ. ¹¹ Kot puj mẽ nhýrmã pahpiitã Tĩrtũm kutã pahkrĩ nõ kãm tanhmã amnhĩ jarẽnh to. Kormã mẽ pahťĩr ri tanhmã mẽ pahte amnhĩ nhĩpẽx to ho papa hã kãm pahprĩ hã amnhĩ jarẽ. Kẽ mẽ pama nõ tanhmã mẽ pajarẽnh to. Kapẽr ã kagã htũm kot mẽ pakukamã mẽ pajarẽnh kot:

Koja nhýrmã mẽ piitã ixpẽ mẽ õ pahi hã ixkutã hkõn krã ho rõrõk nõ hkrĩ nõ inhmã inhmex o inhmex ã ijarẽ.

Nẽ mẽ piitã ixpẽ Tĩrtũm ã ixpyxi mex ã ijarẽ. Æm hãmri na pa ã mẽ hkukamã mẽ harẽnh anẽ. Anẽ.

Mẽ pahte Kris kõt pahkwýjẽ ho mex ã mẽ pamã karõ

Wam Korĩt 8.9-13

¹³ Nẽ kwa kër ka mẽ akwý kot Jejus kõt amnhĩ xunhwýr tohtuj anhýr xwýnhjaja tanhmã mẽ kot amnhĩ nhĩpẽx to ho pa hã mẽ omu nõ ja nõ tanhmã mẽ kãm akapẽr to hkõt nõ. Æm mẽ noo mã tõm ri amnhĩ nhĩpẽx rãhã ho ri apa. Mẽ kot ja hã mẽ apumunh nõ mẽ akõt amnhĩ nhĩpẽx kaxyw. No kot ka mẽ kot tanhmã amnhĩ nhĩpẽx toja ã kãm akapẽr nhũm ama nõ tee ri amnhĩ kukamã hamaxpẽr nõ hkaprĩ nõ.

¹⁴ E kot pa hpãnhã mẽ paxãpkur xã hã tanhmã mẽ panhõ jarẽnh to. Ixte Pahihti Jejus jamaxpẽr xã hkõt tanhmã ijamaxpẽr to ho ri ixpa jakamã kot paj ixkatat kõt mẽ amã tanhmã mẽ panhõ jarẽnh to nõ ãm hãmri harẽ. Nã mẽ paxãpkur xãja ãm pixi nõ omnu hkõt. Piitã mex o mex. Nom koja mẽhõ tee ri mẽmo mẽ apkur xã hõ pumu nõ hamaxpẽr o:

—Nã kot paj ja hkur kêt nõ. Kot paj apu kuku nõ ho amnhĩ tomnuj nõ. Anẽ.

Hãmri nõ hkur kêt nõ. Tã kwãr mãmrĩ ã hamaxpẽr anẽ nõ hkur kêt nõ. Nom na ãm amnhĩ krã hkõt Tĩrtũm kęp ja omnuj ã hkamnhĩx. Kęp omnuj kêt. Ra kot mẽmo mẽ paxãpkur xã piitã mex ã harẽnh. ¹⁵ Tã kot kaj mẽ kot mẽmoj kur kêt xwýnhhta py nõ o tẽ nõ kot hka-ga xwýnh noo mã hkur o xa nhũm apumu nõ tee ri hamaxpẽr nõ hkaprĩ nõ. Jakamã kot ka mẽ ã noo mã amnhĩ nhĩpẽx anhýrja o ho mex kêt nõ. Kwa mẽ ã ri axpẽn nhĩpẽx anhýr hkõt nõ. Kot ka mẽ ã axpẽn nhĩpẽx anẽ nõ te amnhĩ pix kukamã ajamaxpẽr pyrãk o amnhĩ nhĩpẽx. Jao akwýjẽ ho mex kukamã ajamaxpẽr kêt nõ. Kris kãm mẽ hapẽ htyx kõt mẽ kot amnhĩ tomnuj pãn-

hã amnhĩrer kaxyw ra nõ htyk kẽnã kot ka kêt mẽ axtem nõ ri ã mẽ noo mã mẽ kot mẽmoj kur kẽnã kur anẽ. Rý koja apu tee ri kot mẽmoj kur kẽnã kur ã mẽ apumu nõ tanhmã amnhĩ tomnuj to. Jao Kris kaga japẽr. Jakamã kwa mẽ ã mẽ noo mã mẽmojta kur kêt nõ. ¹⁶ Mẽmo mẽ apkur xãja mex tã nhũm mẽ akwýjẽ hõ kãm mex kêt japẽr ka mẽ noo mã hkur kêt nõ. Nẽ tanhmã hã kãm nõ hkõt nõ. Kot kaj mẽ anẽ nhũm Kris kra hkõt xwýnhjaja tee ri ja hã mẽ apumu nõ tanhmã axpẽn mã mẽ apẽ Kris kwýjẽ ho kapẽr punuj to. ¹⁷ Mẽ pahpẽ Tĩrtũm krajaja na pu htem paxãpkur xã nõ pahkõm xã pix kukamã pajamaxpẽr o ri papa hkõt nõ. Na pu htem amnhĩ mẽ pahkwýjẽ mex kukamã pajamaxpẽr. Nẽ mẽ pahte tõm amnhĩ nhĩpẽx kukamã pajamaxpẽr. Nẽ tõm axpẽn nhĩpẽx kukamã pajamaxpẽr. Kot puj mẽ ã amnhĩ nhĩpẽx anẽ nhũm Tĩrtũm Karõ ja hã mẽ pahpumu nõ mẽ pahto mẽ pahkĩnh nõ. Pu mẽ pahkĩnh nõ pajamakẽtkati nõ ri axpẽn kõt papa. ¹⁸ Tã kot puj mẽ ã Kris mã tanhmã amnhĩ nhĩpẽx to ho ri papa anẽ nhũm Tĩrtũm ja hã mẽ pahpumu nhũm ja kãm mex nõ. Nẽ Kris kõt mẽ pahkwýjẽ mã haxwýja ja mex nõ.

¹⁹ Jakamã kër pu mẽ tõm axpẽn mã pakapẽr o ri papa. Nẽ pajamakẽtkati nõ axpẽn kõt ri pajapõj. Nẽ Kris kõt tanhmã axpẽn to paxihtyx to ho ri papa. ²⁰ No kot ka mẽ axãpkur xã gryk ã akwý hkukamã ajamaxpẽr kêt nõ atyx ri mẽhõ noo mã mẽmoj kur japẽr. Kęp omnuj tã ka mẽ ãm amnhĩ pix kukamã ajamaxpẽr nõ noo mã hkur japẽr. Hãmri nhũm ja hã mẽ apumu nõ ra kot Tĩrtũm kaga mã. Ra kęp hkra jakamã kwa mẽ noo mã mẽ kot mẽmoj punuj ã harẽnh xwýnhhta kur kêt nõ. Nom mẽ paxãpkur xãja piitã mex. Tĩrtũm kot mẽ pamã õr jakamã piitã mẽ panhõõ. Tã koja akwýjẽ hõ Tĩrtũm kęp mẽmoj omnuj ã hkamnhĩx tã ka mẽ noo mã aku nõ ho amnhĩ tomnuj nõ. ²¹ Kęp pu mẽ pahkwýjaja tanhmã kot amnhĩ tomnuj to pymaj pu mẽ pahte amnhĩ nhĩpẽx kukamã pajamaxpẽr mex o papa. Mẽmo mẽõ nõ mẽmo kagõ pẽ wĩhtija. Tĩrtũm kot mẽ pamã mẽmoj piitã õr tã no nhũm mẽ pahkwýjaja kęp ja omnuj nõ pu mẽ noo mã hkur rý ho pahkõm kêt nõ. Mẽmo mry nõ mẽmo wĩhti pu mẽ noo mã hkur rý ho pahkõm kêt nõ.

²² Nẽ kër ka mẽ atõ mẽmoj krẽr kaxyw nõ hkukamã ajamaxpẽr o:

—Nã kot paj ja krẽ. Tĩrtũm kãm ja mex kẽnã. Anẽ.

Hãmri nõ mãmrĩ Tĩrtũm kamnãr rom axãmhĩx akrẽ. Kãm ja mex kẽnã kot ka kêt ri tee ri hkrẽr kaxyw hkukamã ajamaxpẽr nõ hkaga. ²³ No kot kaj mẽ atõ mẽmoj to anhýr kaxyw nõ tee ri amnhĩ kukamã ajamaxpẽr nõ ajamaxpẽr o:

—Ko kot paj apu ja ho anẽ nhũm Tĩrtũm hã ixpumu nhũm ja kęp omnuj nõ rý ko. Anẽ.

Hãmri nõ tee ri amnhĩ kukamã ajamaxpẽr. Tã ra ã amnhĩ nhĩpẽx anẽ nõ akrẽ rý mẽmoj to anẽ. Hãmri nhũm Tĩrtũm tee ri ã ate amnhĩ nhĩpẽx anhýr ã apumu nhũm ja kęp omnuj nõ. Ate hkamnãr rom mẽmoj to anhýr kêt nõ amarĩ amnhĩ krã hkõt ho anhýr jakamã ho amnhĩ tomnuj nõ.

Mě pahte amnhĩ pix kukamã pajamxpěr kêt ã mě pamã karõ

Makre 10.45; Wam Korĩt 10.24; Piripos 2.3-5

15 Ně kêt pu mě pahte ra Jejus kôt amnhĩ xunhwýr týx xwýnhjaja amnhĩ kôt kormã mě kot Jejus kôt amnhĩ xunhwýr totuj janhýr xwýnhjê jamãr mex ně. Jao mě kamã pagryk tokyx anhýr kêt ně. Ām mě kutã panojarêt pix o papa. Jao ra amnhĩ pix kukamã pajamxpěr kêt ně. ² Mããnen amnhĩ mě Kris kôt mě pahkwýjê hkukamã mãn mě pajamxpěr. Jao mě kot tãm amnhĩ nhĩpêx kaxyw mě ho mex o ri papa. ³ Kris na pre jar pa ri amnhĩ pix kukamã hamaxpěr kêt ně. Na pre mããnen õ Papaj kukamã hamaxpěr. Jakamã Tĩrtũm kapěr ã kagã htũm kot kãm kapěr jarěnh kot: Pa Papaj. Na hte mě pahkurê xwýnhjaja ixto kapěr punuj ně. Nom mããnen ã ato kapěr o pa aně. Aně. ⁴ Mě pakaxyw na Tĩrtũm kapěr ã kagãja. Mě pahte kamã harěnh ně mar ně amnhĩ kaxyw hkôt pajamxpěr týx o ri papa kaxyw. Jakamã na pu htem tanhmã pahpunuj to htã kapěr kwý ma ně pahkĩnh ně. Jao tee ri amnhĩ kukamã pajamxpěr o ri pahkaprĩ hkêt ně. Ām nhýrmã Tĩrtũm kot mě pahto mex kukamã pajamxpěr o akupým paxihtýx ně pahkĩnh ně ri papa. Mě pahkĩnh ně ri papa kaxyw na Tĩrtũm kapěr ã kagãja. ⁵ Na pu htem Tĩrtũm kamnar rom pahkĩnh ně. Ně axpěn kamã paxukaprĩ ho ri papa. Jakamã na pa hte tanhmã mě ato Tĩrtũm wýr to ně kãm:

—Pa Tĩrtũm. Apê mě ijamãr xwýnh maati na ka. Ně apê mě inhõ Pahihti Jejus Kris nhõ Papaj na ka. Nã xep ra Rõm nhõ xwýnh kwýjaja kãm akapěr kôt amnhĩ nhĩpêx prãm jakamã kwa tanhmã mě hkrã ho mex to kê mě hamakêtkati ně ajamxpěr kôt hamaxpěr rãhã ho ri akôt pa. Hãmri nhũm mě amnhĩ tã apumu ně pitã amex o amex ã ajarê.

Anhýr o pa hte mě ato kuwý.

Ijaew kêt xwýnhjê jarěnh

Atre 10.34; Rõmãn 9.24; Karatas 3.28

⁷ Ně kwa kêt ka mě amã axpěn tã ma ho ri apa. Te ho Kris kãm mě pahtã mata pyrãk. Jao axpěn to mex pix o apa. Kot kaj mě ã axpěn nhĩpêx aně nhũm mě piitã axpěn tã mě apumu ně mě anhýr hã Tĩrtũm mã mex o mex ã harê.

⁸ Amnepêm Tĩrtũm Ijaew mã tanhmã Kris jarěnh to. Kormã pika hwýr wrýk kêt ri nhũm hkukamã nhýrmã mě hwýr wrýk ně mě kamã kator ã harê.

Tã nhũm mě hwýr wrýr ně mě kamã kato. Ijaew hkanrêhã htãmnhwýjê kamã kato ně mě ho mex o ri mě hkôt pa. Mě kot amnhĩ tã omunh ně ã hamaxpěr anhýr kaxyw. Ně hamaxpěr o:

—Amnepêm Tĩrtũm kot mě panhĩgêt mã hkukamã harěnh xã hkôt na mě ixwýr Kraja mě nhũm wrýr ně mě ixto mex o ri pa. Nã ãm hãmri na pre mě ixwýr kumê.

Anhýr o hamaxpěr kaxyw. ⁹ Ně mě apê Ijaew kêt xwýnhjaja mě ajaxwýja mě ate tanhmã kot amnhĩ nhĩpêx to hã harěnh mar ně Tĩrtũm mã mex o mex ã harěnh kaxyw. Ně Tĩrtũm kot mě akamã ukaprĩ hã mě

ate amnhĩ tã omunh ně mex o mex ã harěnh kaxyw na pre wrý. Tĩrtũm kapěr ã kagã htũm kot tanhmã mě ixpê Ijaew jarěnh to ně mããnen tanhmã mě apê Ijaew kêt xwýnhjê jarěnh to ně mě pajarěnh kot:

Kot paj Ijaew kêt xwýnhjê jamak mã amã amex ã ajarěnh o ri mě hkôt ixpa.

Ně amex ã inhgrer o ri mě hkôt ixpa. Aně.

¹⁰ Ně ja:

Kwa mě apê Ijaew kêt xwýnh mě mě apê Ijaew. Kêr ka mě apiitã Tĩrtũm nhý hã akĩnh ně ri apa. Aně.

¹¹ Ně mããnen ja:

E kêt ka mě apê Ijaew kêt xwýnhjaja ně krĩ piitã hkôt mě apa xwýnhjaja mě apiitã Tĩrtũm mã mex o mex ã harěnh o ri apa.

Anhýr o kot harěnh. ¹² Ně Tĩrtũm nhý hã kapěr o pa xwýnh finat Ijais haxwýja Ijaew mã Jejus jarěnh o:

Koja nhýrmã Jese kanrêhã htãmnhwýjê hõja mě pahwýr kato.

Hãmri ně mě pahpê Ijaew mě Ijaew kêt xwýnhjê ho amnhĩptãr o pa.

Jakamã nhũm mě amnhĩ kaxyw hkôt hamaxpěr o pa. Aně.

¹³ Ně na pa hte tanhmã mě ato Tĩrtũm wýr to ho ri ixpa ně kãm:

—Pa Tĩrtũm. Kwa kêt ka Rõm nhõ xwýnhjê ho mex kê mě amnhĩ kaxyw Akra hkôt hamaxpěr mex o ri pa. Jao hkôt hkĩnh ně hamakêtkati ně ri axpěn to pa. Ně kê Akarõ mě ho mě hihtýx o pa kê mě amnhĩ kaxyw amã mãn hamaxpěr týx rãhã ho ri pa. Aně.

Pawre kot hprĩ hã amnhĩ jarěnh

Sikũn Pêtre 1.12-13

¹⁴ E Kris kôt ixkwýjaja. Nã ra ixte mě ajarěnh mar mex. Na ka xep htem amnhĩ to mex o ri apa. Ně mẽmoj to axpěn kutã anojarêt rãhã ho ri apa. Ně mẽ kot tanhmã Tĩrtũm kapěr kôt amnhĩ nhĩpêx to xãja ka mě omunh mex ně ho axpěn jahkre ho ri apa. ¹⁵ Tã ot pa kagã ja kamã mě amã ixujarěnh kãm ixihitýx ně. Tĩrtũm nhý hã. Ra mě ate mẽmoj mar mex tã pa axte mě amã harê. Mě ate mar týx ně hã anohtýx kaxyw. Nã ã ixte amnhĩ nhĩpêx anhýr kaxyw na pre Tĩrtũm mě akaxyw ixãm. ¹⁶ Ixte Jejus Kris mã mě apê Ijaew kêt xwýnhjê mã kapěr jarěnh o ri mě akôt ixpa kaxyw. Ně mẽ ato hwýr o ri ixpa kaxyw. Tã pa hte krĩ hkwy kamã ã mě akwýjê mã harěnh anhýr o ri mě hkôt ixpa. Ně Jejus jarěnhja pa hte mě hkôt mě kãm harěnh o ri ixpa. Mě kot mar ně hkĩnh kãm hkôt amnhĩ nhĩpêx mex kaxyw. Hãmri nhũm Tĩrtũm Karõ mě kãm mě hamaxpěr nyw jagjê nhũm Tĩrtũm hã mě omu nhũm ja kãm mex ně nhũm hkĩnh ně hamaxpěr o:

—Nã ãm hãmri. Koja mě nhýrmã wa ixri htĩr tũm ně mex ně pa ho pa. Aně.

¹⁷ Tã na pa ixte Jejus Kris nhý hã Tĩrtũm mã tanhmã amnhĩ nhĩpêx to ho ixpa hã amnhĩ pumu ně ixkĩnh ně.

¹⁸ Na pa hte ý hã mě apê Ijaew kêt xwýnhjê mã Tĩrtũm kapěr jarěnh o ri mě akôt ixpa. Ně mẽ anoo mã tanhmã ri Kris kot mě amã amnhĩ nhĩpêx to hã harê. Ně mẽ amã aa mě kot mẽmoj pumunh kêt kwý ho an-

hÿr o ri mẽ akõt ixpa. Tirtũm Karõ nhÿ hã. Nhũm hte mẽ akwÿjaja amnhĩ jaêr pẽ omu mẽ kamã no puma mẽ. Hãmri mẽ mẽ pahpyrà mẽ Jejus kõt amnhĩ xunhwÿ. Nom pa hte ã amnhĩ nhĩpêx anhÿr ã amnhĩ pumu mẽ ri hã amnhĩ to jarkrar kêt mẽ. ãm ixte Kris pix nhÿ hã mẽ kãm ixkapêr ã mẽ kãm amnhĩ jarênh o ri mẽ hkõt ixpa. Tã pa ra Jerujarẽ rũm Irir wÿr krĩ piitã hkõt mẽ kãm Kris kapêr jarẽ. Tirtũm Karõ kot tanhmã ixto hihtÿx to jakamã pa mẽ piitã mẽ kãm harênh mex mẽ. ²⁰ Na pa hte mẽ hwÿr inhnojarêr mẽ ã ijamaxpêr anê mẽ ijamaxpêr o:

—Kormã mẽ kot Kris jarênh mar kêt xwÿnhjê hwÿr kot paj mẽ. Nom ra mẽ kot harênh mar xwÿnhjê nhõ krĩ hwÿr inhmõrja inhmã prãm kêt. Anê.

²¹ Tirtũm kapêr ã kagã htũm kot kapêr mar kêt xwÿnhjê jarênh kot:

Kormã mẽ kot Tirtũm kapêr mar kêt xwÿnhjaja koja mẽ kuma mẽ hprĩ hã mar tÿx mẽ. Anê.

Pawre kot Rõm wÿr hkrã hã amnhĩ jarênh

Rõmãn 1.8-15

²² Hêxta waa mẽ. Inhmã mẽ apumunh prãm tÿx mẽ Rõm kãm Jejus kõt ixkwÿjaja. Na pa hte xatã mẽ awÿr ixkrã nom kormã mẽ awÿr inhmõr kêt mẽ. Kormã ixte krĩ hkwy kamã mẽ kãm Kris jarênh o ri ixpa jakamã kormã mẽ awÿr inhmõr kêt mẽ. ²³ Na pa ra xatã mẽ awÿr ixkrã hã ixtã amgrã xohtõ mẽ. Tã ra jar mẽ kãm Kris kot mẽ panê tanhmã amnhĩ nhĩpêx toja jarênh pa.

²⁴ Jakamã kot paj tokyx ma mẽ awÿr mẽ. Hãmri mẽ mẽ awÿr pøj pu mẽ axpên pumu mẽ pahkĩnh mẽ axpên mã pakapêr o papa. Pa mẽ akõt ri ixpa tãmtã hamũ pyka pẽ Espãnhã wÿr ma mẽ. Nê kot paj inhnojarêr ka mẽ ixto Tirtũm wÿr mẽ inhmã ixãpkur xã hkwy gõ pa ma mẽ hwÿr pry hã hkur o mẽ.

²⁵ No na pa kormã mẽ awÿr inhnojarêr kêt mẽ. Kot paj ja rũm awjanã nê akupÿm Jerujarẽ hwÿr mẽ. Kamã Kris kõt mẽ pahkwÿjaja kêp amrakati mẽ ri pa nhũm pika pẽ Gres mẽ Masetõn kamã Kris kõt mẽ pahkwÿjaja mẽ harênh ma mẽ mẽ kãm kãxpore hkwy ho akuprõ mẽ mẽ kaxyw inhmã kugõ. Tã kot paj ma mẽ hwÿr o mẽ mẽ mẽ kãm kure mẽ rĩ kormã ma mẽ awÿr mẽ. ²⁷ Jerujarẽ kamã Kris kõt mẽ pahkwÿjaja Ijaew na mẽ. Mẽ kumrêx na prem Kris kõt amnhĩ xunhwÿ. Hãmri nhũm mẽ hkwyjaja ma mẽ apê Ijaew kêt xwÿnhjê mã kapêr jarênh o ri mẽ akwÿ hkõt pa. Hãmri nhũm pika pẽ Gres kamã mẽ pa xwÿnhjaja mẽ kapêr ma mẽ mẽ urak mẽ Kris kõt amnhĩ xunhwÿr kurê kumrêx. Jakamã amnhĩ xwar kãm nhãm krĩ hõ kamã Kris kõt mẽ pahkwÿjê ho mex prãm mẽ. Hãmri mẽ kãm kãxpore hkwy ho akuprõ mẽ mẽ kaxyw inhmã kugõ.

²⁸ Tã kot paj ma Jerujarẽ hwÿr mẽ kãm o mẽ mẽ mẽ kãm kure hãmri mẽ awjanã mẽ rĩ kormã ma Rõm wÿr mẽ awÿr mẽ. Hãmri mẽ mẽ awÿr pøj pu mẽ axpên pumu mẽ pahkĩnh mẽ. Nê axpên mã Jejus Kris mex o mex ã harê mẽ kãm tanhmã amnhĩ jarênh to ho papa. Jao pahkĩnh mẽ papa. Tã pa hpãnhã hamũ ma Espãnhã wÿr mẽ.

³⁰ Nê na pu prem Jejus Kris o panhõ Pahihti. Jao te mẽ pahpê hkõt axpên to pahtõ mẽ pahtõx pyrãk o axpên nhĩpêx. Nê Karõ nhÿ hã pamã axpên kĩnh mẽ. Jakamã kwa Jejus kõt ixkwÿjaja. Kêr ka mẽ ixpê mẽ atõ hã ixto Tirtũm wÿr kãm axihtÿx mẽ. ³¹ Kêr pa ma pyka pẽ Jutej kamã Jerujarẽ kamã Kris kõt mẽ pahkwÿjê hwÿr mẽ mẽ mẽ kãm kãxporeta gõ nhũm mẽ omu mẽ Ijaew kêt xwÿnhjê kot mẽ kãm õr ã mẽ omunh tã tee ri hamaxpêr kêt mẽ. ãm hkĩnh kãm mãmrĩ ãmnhĩx hamÿ mẽ ho amnhĩm awjaprõ.

Nê kêr ka mẽ ixto awÿr kêt inhnê mẽ kêp mẽ pahkwÿ hkêt xwÿnhjê pumunh mex mẽ.

³² E kêr ka mẽ ã ixto Tirtũm wÿr anê. Kê ixte ma Jerujarẽ rũm ma Rõm wÿr pãr kãm inhmõrta ã kêt ixpumunh mex mẽ. Pa inhmex pẽ mẽ kurũm ma mẽ awÿr mõn pøj pu mẽ tokyx axpên pumu mẽ pahkĩnh mẽ. Pa mẽ ate tanhmã amnhĩ nhĩpêx to ho ri apa hã mẽ apumunh o mẽ akõt ri ixpa mẽ ixkĩnh mẽ. ³³ Tã ãm ja pix. Kê Tirtũm mẽ akõt pa ho pa. Tãm na hte tanhmã mẽ pahto pu mẽ ÿ hã pajamakêtkati paxãmnhĩx ri pahkĩnh mẽ ri papa.

Pawre kot ahpÿnhã hkrãmnhwÿjê mã kapêr

16 Ku mẽ mããnhẽn ja. Ot pa mẽ awÿr Kris kõt pahtõx Pepreja mẽ awÿr kumẽ. Na hte krĩ pẽ Sênkrej kamã Kris kõt mẽ pahkwÿjê tanhmã mẽ ho mex to ho ri mẽ hkõt pa. ² Nê mããnhẽn pa na hte tanhmã ixto mex to. Tã kêt mẽmo arĩgro hã mẽ awÿr pøj ka mẽ kêp Kris kõt mẽ pahtõx ã omu mẽ ho mex mẽ tanhmã ho ajuta hto.

³ Nê kêr ka mẽ atar Kris kõt ixkrãmnhwÿjê mã ijarẽ. Na pa hte mẽ kãm ijamaxpêr rãhã ho ri ixpa. Nê Akirti mẽ hprõ Prisireta ka mẽ wa kãm ijarẽ. Na pre hte wa inhĩhõ hã Jejus Kris mã tanhmã amnhĩ nhĩpêx mex to ho wa pa. ⁴ Jao wa amnhĩ grõnh kõt mẽ kãm ixkurê xwÿnhjê pẽ ixpytã. Pa amnhĩ tã wa omu mẽ inhmã wa hkĩnh mẽ. No ãm papxipix inhmã wa hkĩnh kêt mẽ. Na pre Ijaew kêt xwÿnh kwÿ pẽ Kris kwÿjaja ixtã wa harênh ma mẽ haxwÿja kãm wa hkĩnh mẽ.

⁵ Nê na hte Kris kwÿjaja wa õrkwÿ kamã axpên wÿr akuprõ. Mẽ kot Tirtũm mã amnhĩ jarênh mẽ kapêr ã kagã hkwy mar kaxyw axpên wÿr akuprõ. Tã kêr ka mẽ mẽ kãm ijarẽ.

Nê Kris kõt mẽ pahtõ Epênre mã ijarẽ. Kêp ixkrãmnhwÿ mex na. Inhmã hkĩnh. Kumrêx na pre jar pika pẽ As kamã amnhĩ kaxyw Kris kõt hamaxpêr mẽ hkõt amnhĩ xãm.

⁶ Nê Kris kõt mẽ pahtõx Marir ka mẽ kãm ijarẽ. Na xep hte tanhmã mẽ ato mex to rũnh o pa.

⁷ Nê Kris kõt mẽ pahtõ ãrõhti mẽ Jũhti wa kãm ijarẽ. Ixpyrà mẽ wa kêp Ijaew na wa. Kormã ixte Kris kõt amnhĩ xãm kêt ri na pre wa kumrêx hkõt amnhĩ xãm. Na hte Jejus nhÿ hã mẽ ahkre ho mẽ pa xwÿnhjaja wa kot Kris kapêr jarênh mex ã wa harê. Tã ã amnhĩ nhĩpêx anhÿrja mÿrapê na pre mẽ hkwyjaja wa unê mẽ wa haxã pa prem ixpimràatã ixpê prês mẽ mẽ hagjênh xã kamã ixkrĩ.

⁸ Nê Kris kôt mẽ pahtõ äpřitre mã ka mẽ ijarẽ. Kêp Kris kôt ixkràmnhwý mex na.

⁹ Nê Kris kôt mẽ pahtõ Upãnre mã ijarẽ. Na hte ixpyrà nê Kris mã tanhmã amnhĩ nhĩpêx to ho ri pa.

Nê Kris kôt mẽ pahtõ Etaki mẽ ijarẽ. Kêp ixkràmnhwý mex na.

¹⁰ Nê Kris kôt mẽ pahtõ Apes ka mẽ kãm ijarẽ. Na prem ra Kris ã hipêx punuj nê no nhũm mẽ kutã amnhĩ to htýx nê Kris kaga hkêt nê.

Nê Aristopti nhõrkwý kamã hkwýjê mã ijarẽ.

¹¹ Nê Kris kôt mẽ pahtõ Erojawti mã ijarẽ. Ixpyrà nê kêp Ijaew na.

Nê Nasisti nhõrkwý kamã Kris kwýjaja ka mẽ kãm ijarẽ.

¹² Nê Kris kôt mẽ pahtõx Xiripêre mẽ Xiripos wa kãm ijarẽ. Wa kêp Pahihti Jejus mã tanhmã amnhĩ nhĩpêx mex to xwýnh na wa.

Nê Kris kôt mẽ pahtõx Pesixti mã ijarẽ. Haxwýja kêp ixkràmnhwý na. Na hte Pahihti Jejus mã tanhmã amnhĩ nhĩpêx mex to ho ri pa.

¹³ Nê Kris kôt mẽ pahtõ Rupti mã ijarẽ. Na hte Kris kôt amnhĩ nhĩpêx mex o ri pa. Nê katorxà mã ijarẽ. Na pre te ixpê hkra nhĩpêx pyrãk o inhĩpêx.

¹⁴ Nê Kris kôt mẽ pahtõ Asĩnre mã nê Prekõxti nê Emes nê Patopas nê Emas mẽ. Jajê piitã mẽ pahkwý kot mẽ hwýr pikuprõnh xwýnhjê mẽ mẽ ho apimràatã mẽ kãm ijarẽ.

¹⁵ Nê Kris kôt mẽ pahtõ Pirorti mã nê mẽ pahtõx Jure mẽ Nêrew wa nê htõxja nê mẽ pahtõ Orĩpti wa mẽ kãm ijarẽ. Nê mẽ pahkwý kot mẽ hwýr pikuprõnh xwýnhjê mẽ mẽ ho apimràatã mẽ kãm ijarẽ.

E kêr ka mẽ jajê piitã mẽ kãm ijarẽ. Na pa hte mẽ kãm ijamaxpêr rãhã ho ri ixpa.

¹⁶ Nom mẽ tapxipixjaja kêt. ã mẽ apiitã mã na pa hte ijamaxpêr rãhã ho ixpa.

Nê ota jar Kris kwýjaja mẽ awýr hpêr mẽ.

¹⁷ Kwa ixkràmnhwýjaja. Na ka mẽ ra aprĩ hã Tĩrtũm kapêr mar týt nê. Tã kêr ka mẽ amnhĩ nê mẽ kot Tĩrtũm kapêr o hêx xwýnhjê pumunh mex o apa. Mẽ kãm axpên nê mẽ ato hpigrãnh par prãm. Nê mẽ ate Kris kaga nê hpãnhã mẽ kot amnhĩ nhĩpêx o amnhĩ nhĩpêxja mẽ kãm hprãm jakamã kwa mẽ amnhĩ nê mẽ omunh mex nê axkãm ajamak rom. ¹⁸ Na htem ã amnhĩ nhĩpêx anhýr o Pahihti Kris mã tanhmã amnhĩ nhĩpêx to ho pa hkêt nê. ãm amnhĩ hkrã hkôt tanhmã ri hkwýjê jahkre hto ho pa. Kot mẽ no kupyw kaxyw tanhmã mẽ kãm hêx to ho ri mẽ hkôt pa. Te mẽ ahkre mex pyrãk tã mẽ ahkre mex kêt nê. Jakamã nhũm htýt ri mẽ pa xwýnhjaja mẽ kot mẽ ahkreja ma nhũm te mẽ kãm mex pyrãk. Jakamã kwa mẽ okora mẽ amnhĩ nê mẽ omunh mex nê. ¹⁹ Na ka htem mẽ kurom Kris kôt amnhĩ nhĩpêx mex nê nhũm xep mẽ piitã mẽ apumu nê axpên mã ja hã mẽ ajarênh o ri pa. Pa mẽ ajarênh ma nê ixkĩnh nê. Tã kêr ka mẽ arĩ ajamaxpêr mex rãhã ho ri ajamaxpêr o apa. Nê amnhĩ nhĩpêx mex rãhã nê. No tanhmã ajamaxpêr punuj to ho ri amnhĩ tomnuj o ri apa hkêt nê. ã mẽ ate amnhĩ nhĩpêx anhýrja na inhã hprãm.

²⁰ Nê na hte Satanasti mẽ hkwýjaja mẽ ate Jejus kaga hprãm xàj mẽ akôt tanhmã ri mẽ anhĩpêx to ho ri pa htã kêr ka mẽ amnhĩ tã mẽ omu nê tee ri amnhĩ kukamã ajamaxpêr kêt nê. Koja gaa nhũm Tĩrtũm mẽ hipêx o te mẽ kot kagã xoprê hkrã xôm nê hpĩr pyrãk o mẽ hipêx. Jakamã ã mẽ kot mẽ anhĩpêx anhýr tã koja Tĩrtũm mẽ amã mẽ ajamakêtkati xàja gõ. Tapxipix na kot mẽ pajamakêtkati xà nhõr kaxyw àhpumunh týt.

Nê na pa hte mẽ ato Pahihti Jejus wý nê kãm:

—Pa Pahihti. Kwa kêr ka Rõm kãm akwýjê pumu nê mẽ ho mex nê mẽmoj to mẽ kutã anojarêr rãhã ho ri apa. Anê.

²¹ Nê ota mẽ pahtõ Ximotreja mẽ awýr hpêr mẽ. Na hte inhĩhkõ hã Kris mã tanhmã amnhĩ nhĩpêx to ho ri pa. Nê ixtõ Rusti mẽ Jasãwti mẽ Sosipa wa mẽ haxwýja mẽ awýr hpêr mẽ.

²² Nê kot inhã ixkapêr ã kagã xwýnh Testi haxwýja mẽ awýr hpêr mẽ. Kêp Kris kôt mẽ pahtõ na. ²³ Nê Kris kôt mẽ pahtõ Gajre haxwýja mẽ awýr hpêr mẽ. Õrkwý kamã na hte Kris kwýjaja axpên wýr akuprõ nê kamã Tĩrtũm mã amnhĩ jarê nê kapêr ã kagã kamã harê nê mar o hkrĩ. Õrkwý kamã na pa pre põj.

Nê mẽ pahtõ Eras haxwýja mẽ awýr pêr mẽ. Na hte jar krĩ ja kamã Rõm nhõ pahihti mã õ kãxpore jamãr pê ho mẽmoj to anhýr o pa.

Nê Kris kôt pahtõ Kwatre haxwýja mẽ awýr hpêr mẽ. E jajaja piitã na mẽ awýr hpêr rê.

²⁴ E kê Pahihti Jejus Krisja mẽ akutã nojarêr rãhã ho pa.

Pawre kot Tĩrtũm mex o mex ã harênh

Epes 1.3, 3.20-21; Wam Ximotre 1.17; Eprêw 13.20; Jutre 24-25

²⁵ Nê kwa kêr pu mẽ Tĩrtũm mã mex ã harênh rãhã ho ri papa.

Nê ixte mẽ amã Jejus Kris jarênhã ã ka prem ama nê hkôt amnhĩ xunhwý. Tã koja mẽ ato mẽ axihtýt ka mẽ hkôt axihtýt kãm hkôt ri amnhĩ nhĩpêx mex o ri apa. Amnepêm na pre Tĩrtũm mẽ apê Ijaew kêt xwýnhjê ho hkra kaxyw hã amnhĩ jarênh kêt nê. Kormã ja ho hpimxur ryy nê. ²⁶ Tã ã mẽ anhĩpêx anhýrja o amnhĩrĩt nê ý hã mẽ kapêr jarênh o ri pa xwýnhjê mã kapêr nê mẽ kãm:

—E Jejus kot tanhmã amnhĩ nhĩpêx to ho pata kêr ka mẽ piitã mẽ kãm hã kagã kê mẽ pyka piitã hkôt kamã harê nê kuma. Nom kê Ijaew pixjaja mar kêt nê. Kê piika piitã hkôt kamã harê nê kuma. Panhĩ nê kupê nê kupê hkà htykre nê mẽ hkà haka nê mẽ hkà kamrêkja. Kê mẽ piitã Jejus jarênh ma nê amnhĩ kaxyw hkôt hamaxpêr nê hkôt amnhĩ xunhwý. Hãmri nê hkôt amnhĩ nhĩpêx mex o ri pa. Anê.

Nhũm pre ã mẽ pakaxyw mẽ kãm kapêr anê nhũm prem kuma nê hã kagã.

²⁷ Nã Tĩrtũmja tapxipix na àhpumunh týt xwýnh ã ãm pyxi mex. Nê tapxipix kêp mẽ pahpiitã Mëpahpãm. Tã kêr pu mẽ Jejus Kris kot mẽ panê htyk ã omunh xà hkôt Tĩrtũm pix mã mex o mex ã mãn harênh rãhã ho papa.

Tã ãm ja pix. Ixpê Pawre na pa ã mẽ awỳr ixpěr
mẽnh anẽ. Na hapêx.

Wam Korīt

Pawre na pre kagàja nhípêx. Jejus nhỹ hã kapër jarënh o pa xwýnhjê hõ na pre. Na pre hipêx nẽ ma krĩ pẽ Korīt kãm Jejus krajê hwýr kumẽ. Nẽ kagàja kamã mẽ kãm tanhmã mẽmoj tã karõ hto. Na pre mẽ kot àhpumunh tỳx ã amnhĩ to jarkrar o pa nẽ mẽ kãm kapër. Nẽ tanhmã amnhĩ tomnuj to nẽ mẽ kãm kapër. Nẽ mẽ hprõ nẽ mẽ mjên xwýnhjaja tanhmã wa kot axpën nhípêx to hã mẽ kãm karõ. Nẽ mẽ kot Tirtũm mã mex o mex ã harënh kaxyw axpën wýr mẽ pikuprõnh nẽ tanhmã amnhĩ nhípêx to hã nhũm mẽ kãm karõ. ã na pre Pawre mẽ kãm mẽmoj tã karõ nẽ hã kagà anẽ. Nẽ mẽ kãm:

1 Pa Korīt kãm Jejus kõt ixkwýjaja. Xà mẽ amex? Ot pa mẽ awýr kagàja nhípêx nẽ kumẽ. Ixpê Pawre na pa Kris kõt mẽ pahtõ Sostenes mẽ wa awýr ixpër mẽ. Tã kagàja nhípêx nẽ mẽ awýr kumẽ. Tirtũm na pre ixte Jejus Kris nhỹ hã mẽ ajahkre ho ri ixpa kaxyw ixãm. ²Tã ot pa mẽ awýr kagà nhípêx nẽ mẽnh mã. Korīt kãm ixpyrà nẽ mẽ apê Tirtũm krajê hwýr.

Tirtũm kot amnhĩ kaxyw mẽ axunhwýr jakamã na ka prem amnhĩ tomnuj kaga nẽ Kris kõt amnhĩ xunhwý nẽ hkõt amnhĩ nhípêx mex o ri apa. Krĩ piitã hkõt mẽ kot amnhĩ to Jejus Kris wýr o mẽ pa xwýnhjê pyrã nẽ. Mẽ panhõ Pahihti Jejus Krisja ãm pixi mex na.

³Nẽ Tirtũm kệp Měpahpãm maati nẽ Jejus Kris kệp mẽ panhõ Pahihti jakamã na pa hte mẽ ato wa hwýr rãhã o ri ixpa nẽ mẽ ato wa hwýr o:

—Kwa Tirtũm mẽ Jejus wa. Kêr ka wa Korīt nhõ xwýnhjê kutã anojarêt rãhã ho wa ri apa. Nẽ mẽ ho mex rãhã nẽ. Kê mẽ amnhĩ tã war apumunh kõt ri hamakêtkati nẽ hkĩnh nẽ ãmnhĩx tanhmã ri amnhĩ nhípêx to ho ri pa. Anẽ.

Tirtũm kot Jejus Kris kukwak ri mẽ pahto mex ã harënh
Sikũn Pêtre 1.2; Wam Tesarõn 5.23-24

⁴Nẽ mẽ ate amnhĩ kaxyw Jejus Kris kõt ajamexpër o ri apa jakamã na hte Tirtũm mẽ ato mex nẽ. Tã pa hte kãm amnhĩ jarënh kaxyw nẽ kãm mẽ ajarënh o:

—Pa Tirtũm. ãm hãmri na ka pre Korīt nhõ xwýnhjê ho akra. Nà ja mex o mex. Anẽ.

⁵Nẽ ra mẽ ate Kris kõt amnhĩ xunhwýr jakamã na ka mẽ ra amex kumrëx nẽ ri apa. Nẽ aprĩ hã Kris kot amnhĩ nhípêx pumunh mex nẽ aprĩ hã akwýjê mã harënh o ri mẽ hkõt apa. ⁶Na pa pre mẽ awýr mõ nẽ mẽ amã Kris kot amnhĩ nhípêx ã harënh o ri mẽ akõt ixpa. Ka prem inhma nẽ hkõt amnhĩ xunhwýr tỳx kurê kumrëx. ⁷Jakamã nhũm Tirtũm mẽ ate kãm tanhmã amnhĩ nhípêx to ho apa kaxyw mẽ ato mẽ axihtỳx. Nẽ kaxyw mẽ amã mẽ ate axpën to mex xà piitã mẽ amã kugõ. Mẽ ate Jejus kot akupýn mẽ pahwýr wrýk jamãr pẽ hapêr arĩt o apa pẽ tanhmã kãm axpën nhípêx to ho apa kaxyw. ⁸Koja Tirtũm tanhmã mẽ akrã hto ka mẽ hkõt pix mã ri amnhĩ nhípêx rãhã nhũm Pahihti Jejus Krisja akupýn mẽ pahwýr wrý. Hãmri nẽ mẽ ate amnhĩ nhípêx ã mẽ apumu nẽ mẽ ajarënh o:

—Nà ãm hãmri na hte jajaja amnhĩ to mex pix o ri pa. Anẽ.

⁹Nẽ koja Tirtũm ra kot amnhĩ jarënh xà hkõt mẽ ato mex nẽ. Ra kot mẽ ate Pahihti Jejus Kris kõt apa kaxyw amnhĩm mẽ axunhwýr jakamã koja ra kot amnhĩ jarënh xà hkõt mẽ ato mex rãhã nẽ.

Mẽ pahte mẽmoj tã axpën pẽ pahpigranh kêt ã mẽ pamã karõ

Rõmãn 15.5-6; Sikũn Korīt 13.11; Epes 4.1-6; Piripos 2.1-4; Wam Pêtre 3.8

¹⁰E Kris kõt ixkwýjaja. Na ka xep htem mẽmoj tã axpën mã axàkjêr pix o ri apa nhũm pre Krojre hkwyjaja amnẽ ixwýr pøj nẽ inhmã mẽ ajarẽ. Kwa nà mẽ ã amnhĩ nhípêx anhýr kêt nẽ. Kêr ka mẽ axpën kõt ri amnhĩ nhípêx rãhã ho ri apa. Nẽ axpën kõt ri ajamexpër rãhã nẽ. Te ixkre tipxi kamã mẽ ri apa pyrãk o mãn kêt mẽ axpën nhípêx o ri axpën kõt apa. Nẽ mẽ axpën kutã anojarêt rãhã ho ri apa. No mẽmoj tã axpën mã axàkjêr pẽ axpën pẽ apigranh kêt nẽ. Na pa Pahihti Jejus Kris nhỹ hã mẽ amã ã ja hã karõ anẽ.

¹²Nẽ na ka xep htem ahpýnhã ri mẽ apê mẽ ixkwý hã amnhĩ jarënh o ri apa. Jao mẽ akwýjaja pa ixkõt ri amnhĩ nhípêx xwýnh ã amnhĩ jarẽ. Nẽ mẽ akwýjaja axtem Apor kõt ri amnhĩ nhípêx xwýnh ã amnhĩ jarẽ. Nẽ mẽ akwýjaja axtem Simãw Pêtre hkõt amnhĩ nhípêx xwýnh ã amnhĩ jarẽ. Nẽ mẽ akwýjaja axtem Kris kõt amnhĩ nhípêx o ri apa xwýnh ã amnhĩ jarẽ. ã na ka xep htem ahpýnhã amnhĩ jarënh anhýr o ri pa.

¹³Kwa nà ka mẽ ã ahpýnhã amnhĩ jarënh anẽ nẽ te mẽ ate Kris o apigranh pyrãk o hipêx. Kwa mon ka hte mẽ akwýjaja apê ixkwý hã amnhĩ jarẽ? Xà pa na pa pre pĩ kahpa hã ajêt nẽ mẽ anẽ ty? Nà Kris pix na pre mẽ panê hã ajêt nẽ ty. Xà mẽ apê pa ixkwý hã amnhĩ jarënh kaxyw na prem mẽ akrã kumrã? Nà mẽ apê Kris kwý hã amnhĩ jarënh kaxyw na prem ã mẽ anhípêx anẽ. Mẽ kot ja hã mẽ apumunh xwýnhjaja kot mẽ apê Kris kwý hã mẽ apumunh kaxyw. Tã na ka xep htem axtem nẽ ã ri ahpýnhã mẽ kãm amnhĩ jarënh anhýr o ri apa.

¹⁴Kop ãm ixte amnhĩ kõt mẽ axunhwýr prãm ronhýx pa mẽ ato mẽ axohtõ nẽ mẽ akrã kumrã nẽ mẽ amã: “E ra mẽ apê ixkwý na ka mẽ.” Anẽ. Nom na pa pre ã

mě amā ixkapēr anhÿr kêt nē. Ām hāmri na pa pre ām mě ato grēre nē mě akrā kumrā. Ām Kripti mě Gajre wa pix. ¹⁶ Ku nē xep määnēn Estepti nē kaxyw mě hk-wÿjaja. Ām jajē pixjaja. Nom ko apu axte mě hkwÿ ko. Ixte mě hkrā kumrār xwÿnhjē mā ijamaxpēr tÿx kêt. ¹⁷ Na pre Kris ixte mě hkrā kumrār o ri ixpa kaxyw ixām kêt nē. Ām ixte mě kām kapēr jarēnh o ri mě hkôt ixpa pix kaxyw na pre ixām.

Nē na pa hte amnhī krā hkôt ri ixujarēnh o ri mě akôt ixpa hkêt nē. Kot pa ā amnhī nhīpēx anē nhūm mě ixkapēr mex ā inhma nē pa ixkôt amnhī xunhwÿ. Ja py-maj na pa hte amnhī krā hkôt ri tanhmā ixujarēnh to ho ri ixpa hkêt nē. Na pa hte ām ixprī hā Kris kot tanhmā mě panē amnhī nhīpēx to hā harēnh o ri mě hkôt ixpa. Mě pahpiitā mě panē htyk ā harēnhja pa hte mě kām harē. Mě kot hprī hā mar nē hkôt amnhī xunhwÿr kaxyw. Jao amnhī krām mě ujarēnh mexta jagjēnh nē hā no htÿx kaxyw. Pa ja hā mě omu nē ixkīnh nē ijamaxpēr o:

—Na htem ixkapēr ma nē Jejus kôt amnhī xunhwÿr kurē kumrēx. Nā ām hāmri na pa hte mě kām ixkapēr kaprÿ ho ri ixpa hkêt nē. Anē.

¹⁸ No kêt mě pahte Tirtūm kot mě pahto hkra xwÿnhjaja ra mě pahte Kris pī kahpa hā mě panē htyk ā harēnh mar nē pahkīnh nē papa xwÿnh na pu mě. Jakamā na pu htem pajamaxpēr o:

—Nā ām hāmri na Tirtūm Kraja htyk kukwak ri mě ixto mex nē mě ixto hkra. Mě ujarēnhja mex kumrēx. Anē.

No kêt mě kēp hkra hkêt xwÿnhjaja na htem tee ri Kris tyk ā harēnh ma nē hamaxpēr o:

—Tk. Tanhmā kot kêt we amnhī to nē mě panē ty? ām amarī mě kot amnhī krā hkôt pī kahpa hā nhôr nē hpīr kēnā. Anē.

Tirtūm kra hkêt xwÿnhjē jarēnh

Matēwre 11.25-26; Wam Korīt 3.19

¹⁹ Nē Tirtūm kapēr ā kagā htūm kot mě kēp hkra hkêt xwÿnhjē jarēnh kot:

Mě kot htÿx ri àhpumunh tÿx ā amnhī to jarkrar o pa htā kot paj mě kēp ja ho ijapēx pa nhūm mě ā amnhī jarēnh anhÿr kaprÿ. Anē.

²⁰ Jakamā mě àhpumunh tÿx ā mě kot amnhī to jarkrar xwÿnhjaja nē mě kot Mojes kapēr o mě ahkre ho ri mě pa xwÿnhjaja nē mě kapēr rūnh xwÿnhjaja. Mě kot Tirtūm Kra hkôt amnhī xunhwÿr kêt jakamā te mě àhpumunh kêt pyrāk. Tirtūm kra hkêt xwÿnhjaja kot mě àhpumunh tÿx ā mě harēnh tā no ām Tirtūm noo mā te mě àhpumunh kêt pyrāk. Nē te htÿx ri mě kot amnhī nhīpēx o pa pyrāk. ²¹ Tirtūm àhpumunh o àhpumunh jakamā na pre ra mě hkukamā hamaxpēr o:

—Nā kot paj mě àhpumunh tÿx ā mě omunh xā hkôt mě ho ixkra hkêt nē. Ām mě kot ixkra Jejus kot mě nē htyk ā harēnh mar nē amnhī kaxyw hkôt hamaxpēr pix ā mě omunh xā hkôt kot paj mě ho ixkra. Anē.

²² No Ijaewjaja kām amnhī krā hkôt pix mā amnhī nhīpēx prām jakamā na pa hte mě ixpē Jejus kwÿjaja mě hwÿr mra nē mě kām Kris kapēr jarēnh o ri ixpa

nhūm mě inhma nē ām mě inhma. Nē te mě kot mě inhmar kêt pyrā nē mě inhmä:

—Tk. Nā kot paj mě tokyx axujarēnh kôt amnhī nhīpēx kêt nē. Kot kaj mě inhmä mě ixte aa mēmoj pumunh kêt ō ho anē pa mě ja hā apumu nē axihtÿx ā apumu nē rī kormā hkôt amnhī nhīpēx.

Anhÿr o inhmä kapēr. Tā no pa mě kām ā amnhī nhīpēx anhÿr kêt nē. Ām Kris kot mě panē pī kahpa hā htykja pix pa htem mě kām harēnh o ri ixpa. Ja kamā nhūm mě hkwÿjaja mě inhma nē ām mě inhma nē Kris xihÿtÿx kêt ā ām amarī htyk ā harē. No mě hkwÿjaja. Tirtūm kot amnhī kaxyw mě unhwÿr xwÿnhjaja na htem mě kurom mě inhma nē ra mě inhmar tÿx kurē kumrēx. Nē mě inhmä kapēr o:

—Nā ām hāmri na Krisja Tirtūm pyrā nē hihtÿx o hihtÿx. Ām hāmri na ka ā harēnh anē. Anē.

No Ijaew kêt xwÿnhjaja na Ijaew pyrā nē kām amnhī krā hkôt amnhī nhīpēx o pa hprām kêt nē. Nē mě kām mě àhpumunh tÿx pix prām o pa. Jakamā na pa htem mě kām Kris kapēr jarēnh o ri mě hkôt ixpa nhūm mě hkwÿjaja mě inhma nē Ijaew kwÿjē pyrā nē ām mě inhma nē mě inhmä:

—Tk. Nā na ka htem ām ri axēx o ri apa. Kot pa mě akapēr mar kêt nē. Kot paj mě axàhpumunh tÿx ā mě apumu nē rī kormā mě ama nē mě akôt amnhī nhīpēx.

Anhÿr tā pa mě ām arī Kris kot mě panē htykja pix pa mě kām harēnh o ri mě hkôt ixpa. Nhūm mě hkwÿjaja mě inhma nē mě inhmä:

—Nā mě axàhpumunh kêt jakamā na ka htem atÿx ri ā ja jarēnh anē.

Anhÿr tā no nhūm mě hkwÿjaja. Tirtūm kot amnhī kaxyw mě unhwÿr xwÿnhjaja na htem mě inhma nē mě inhmä kapēr o:

—Nā ām hāmri na ka mě ā Krisja jarēnh anē. Tirtūm pyrā nē àhpumunh o àhpumunh kēnā. Anē.

²⁵ Tirtūm mě Jejus wa mě pakurom àhpumunh o àhpumunh nē hihtÿx o hihtÿx.

Tirtūm mě parom hihtÿx o hihtÿx ā harēnh

Matēwre 11.25; Sikūn Korīt 12.7-10; Xiakre 2.5

²⁶ E Kris kôt ixtō nē ixtōxjaja. Amnepē mā Tirtūm kot amnhīm mě axunhwÿrta ā tanhmā na ka prem amnhī nhīpēx to ho ri apa? Nā na ka prem axohtō nē jar mě noo mā axàhpumunh kêt nē ri apa. Nē mě apē pahi hkêt nē ri apa. Mě axohtō nē amnhī to hkryre nē ri apa. ²⁷ Tā nhūm Tirtūm amnhī kôt mě ate amnhī to hkryre xwÿnhjē xunhwÿ. Koja nhÿrmā kot tanhmā mě pahpiitā mě pajarēnh to xā hā arīgrota kato hāmri nhūm mě àhpumunh tÿx ā amnhī to jarkrar xwÿnhjaja Tirtūm kot mě kurom mě pahto hkra hā mě pahpumu hāmri nē tee ri amnhī kukamā hamaxpēr nē amnhī kamā hpijaam tÿx nē. Nē mě hihtÿx ā amnhī to jarkrar xwÿnhjaja haxwÿja. Nhūm Tirtūm kot mě kurom mě pahto hkra hā mě pahpumu nē tee ri amnhī kukamā hamaxpēr nē amnhī kamā hpijaam tÿx nē.

²⁸ Na hte Tirtūm amnhī kaxyw mě kot amnhī to hkryre xwÿnhjē xunhwÿ. Nē mě kot mě kamā kahak o pa xwÿnhjē xunhwÿ. Jar pyka ja kamā mě hkwÿ kot mě

hkaga htã nhũm Tirtũm amnhĩ mã mẽ unhwỳ. Mẽmo kaxyw na hte ã amnhĩm mẽ unhwỳr anẽ? Nà mẽ kot nhỹrmã tee ri mẽ àhpumunh tỳx ã amnhĩ jarẽnh xwỳnhjẽ pumunh nẽ axpẽn mã mẽ harẽnh o:

—Kwa mẽ pahte mẽ àhpumunh tỳx ã mẽ harẽnh tã nhũm Tirtũm mẽ pahpyrà nẽ amnhĩ kaxyw mẽ unhwỳr kêt nẽ. Nà te mẽ àhpumunh kêt pyràk.

Anhỹr o axpẽn mã mẽ harẽnh kaxyw na pre Tirtũm amnhĩm mẽ kot amnhĩ to hkryre xwỳnhjẽ xunhwỳ.

²⁹Jakamã kot puj mẽ nhỹrmã Tirtũm mã amnhĩ to jarkrar pẽ tanhmã kãm amnhĩ jarẽnh to hkêt nẽ. Rỳ kãm:

—Kwa ga ixpumu Tirtũm. Na pa hte ã amnhĩ nhĩpẽx anẽ nẽ ã amnhĩ nhĩpẽx anẽ. Kwa ja hã ixpumu nẽ ixto akra nã?

Anhỹr o amnhĩ to hwỳr kêt nẽ. ³⁰ ãm Jejus pix kukwak ri na hte Tirtũm mẽ pahto hkra. Tãm na pre Tirtũm noo mã amnhĩm mẽ paxunhwỳ. Mẽ pahte uràk nẽ pahpẽ hkra kaxyw. Jakamã na pu htem ãm pix kukwak ri amnhĩ nhĩpẽx mex o ri papa. Nhũm mẽ pamã àhpumunh tỳx xà hkwỳ gõ. Tã ra kot mẽ pahte amnhĩ tomnuj pẽ mẽ papytãr jakamã kot puj mẽ nhỹrmã pahpyrà tã no ãm akupỹm pahpyrà nẽ Tirtũm mẽ wa kuri pahpyrà tũm nẽ pamex kumrẽx nẽ papa ho papa. ³¹ Tã ã Jejus kot mẽ panhĩpẽx kot anhỹr jakamã Tirtũm kapẽr ã kagã htũm kot ja jarẽnh kot:

Kot ka mẽ amã mẽmoj tã jarkrar prãm nom kêt ka mẽ kamjaja amnhĩ to jarkrar kêt nẽ. Mẽ panhõ Pahihti ra kot mẽ panẽ tanhmã amnhĩ nhĩpẽx toja pix ã tanhmã ho jarkrar to ho ri apa. Anẽ.

Pawre kot tanhmã Kris jarẽnh to hã harẽnh

Sikũn Korīt 4.1-7; Wam Pẽtre 3.15

2 E Kris kôt ixtõ nẽ ixtõxjaja. Amnepẽ mã ixte mẽ awỳr inhmõrta ã na pa pre inhnojarẽt nẽ ijamaxpẽr o:

—Kot paj ma mẽ hwỳr mõ nẽ mẽ kãm Kris kapẽr jarẽ. Kot amnhĩ grõnh kôt mẽ inhnẽ htykja pa mẽ kãm harẽ. ãm ja pix jarẽnh o ri mẽ hkõt ixpa. Nom kot paj mẽ kapẽr japjẽ xwỳnhjẽ pyrà nẽ mẽ kãm ixkapẽr japjẽ hkêt nẽ. Rỳ mẽ uràk nẽ te ixàhpumunh tỳx o ri ixkapẽr japjẽ pyràk o ri mẽ kãm ixkapẽr japjẽ hkêt nẽ. Kot paj ãm ixkatãt kôt ri mẽ kãm tanhmã Jejus jarẽnh to pix o ri mẽ hkõt ixpa.

Anhỹr o mẽ akukamã ijamaxpẽr. Hãmri nẽ ma mẽ awỳr mõ nẽ mẽ awỳr põj nẽ mẽ amã Jejus kot mẽ panẽ htyk nẽ akupỹm hĩrja pix jarẽnh rãhã ho ri ixpa. ³ Na pa pre tee ri amnhĩ kukamã ijamaxpẽr nẽ ijamaxpẽr o:

—Hẽxta waa nẽ. Tanhmã kot pa we mẽ kãm Tirtũm kapẽr jarẽnh to nhũm mẽ inhmar tỳx nẽ hkõt amnhĩ xunhwỳr kurẽ kumrẽx wehe? Kot paj amnhĩ krã hkõt mẽ kãm harẽnh kêt nẽ. Ja kaxyw ijamaxpẽr tỳx kêt kẽnã. Kot paj amnhĩ krã hkõt mẽ kãm harẽ nhũm mẽ ãm inhma nẽ hkõt amnhĩ xunhwỳr kêt nẽ. Nà kot paj Tirtũm nhỹ hã mẽ kãm tanhmã ixkapẽr to kẽ tãm tanhmã mẽ hkrã hto kẽ mẽ inhma nẽ hkõt amnhĩ xunhwỳr japẽr.

Anhỹr o ijamaxpẽr. ⁴ Nẽ mẽ ate inhmar kaxyw na pa pre ixẽx rom tanhmã mẽ ano kupyw to ho ri ixpa hkêt nẽ. Rỳ mẽ pajaja mẽ ixàhpumunh xà hkõt tanhmã mẽ amã ixkapẽr to hkêt nẽ. Na pa pre ãm Tirtũm Karõ nhỹ hã mẽ amã awjarẽ. Mẽ ate mar nẽ hihtỳx o hihtỳx ã omunh kaxyw. ⁵ Jakamã na ka prem Tirtũm xihtỳx ã omu nẽ amnhĩ kaxyw hkõt ajamaxpẽr kurẽ kumrẽx. No pa ixàhpumunh tỳx ã ixpumunh kôt ixkõt ajamaxpẽr kêt nẽ. Na ka prem ixkapẽr ma nẽ ajamaxpẽr o:

—Nà Tirtũm na mẽ parom àhpumunh o àhpumunh nẽ hihtỳx o hihtỳx.

Anhỹr o ajamaxpẽr kôt ajamaxpẽr kurẽ kumrẽx.

Tirtũm Karõ kot mẽ pamã àhpumunh xà nhõr ã harẽnh

Matẽwre 7.6; Juãw 14.22, 16.13-15; Xiakre 3.13-18

⁶ Nẽ na hte Tirtũm kra hkwỳjaja Tirtũm kot amnhĩ nhĩpẽx ã omunh mex. Nẽ hamaxpẽr ã omunh mex. Jakamã na pa hte mẽ ahkre japjẽ ho mẽ hkõt ixpa. Nom jar pika ja kamã mẽ pajamaxpẽr tỳx xà ho mẽ ahkre hkêt nẽ. Rỳ pika piitã hkõt mẽ utãr xwỳnhjẽ jamaxpẽr tỳx xà ho ri mẽ ahkre ho ri ixpa hkêt nẽ. Koja nhỹrmã mẽ àhpumunh xàja mẽ kẽp hapẽx pa. ⁷ Jakamã na pa hte ãm Tirtũm xàhpumunh xà pix o mẽ ahkre o ri ixpa.

Amnepẽ mã kormã mẽmoj piitã hkêt ri na pre Tirtũm amnhĩ kukamã amnhĩ jarẽnh o:

—Mẽ kot amnhĩ kaxyw Ixkra hkõt mẽ hamaxpẽr o mẽ pa xwỳnhjaja kot paj mẽ ho ixkra nhũm mẽ mex kumrẽx nẽ pa ho pa.

Anhỹr o mẽ harẽ. Nom mẽ kot hkõt amnhĩ xunhwỳr kêt xwỳnhjaja nhũm kormã mẽ kãm ja ho amnhĩrĩt kêt nẽ. Tã ja na pa hte ra mẽ kãm harẽnh rãhã ho ri mẽ hkõt ixpa nhũm mẽ Tirtũm kãm mẽ pahto hkra hprãm hã harẽnh ma. ⁸ Nom pika piitã hkõt mẽ ho amnhĩptãr xwỳnhjaja na mẽ kormã ja mar kêt nẽ. Kẽp apu mẽ kot mar ronhỹx prem pĩ kahpa hã mẽ panhõ Pahihti nhõr nẽ hprãm kêt nẽ. Mex o mex tã nhũm prem axtem nẽ ã hipẽx anẽ. ⁹ Mẽ kot mẽmoj mex pumunh kêt tã Tirtũm kapẽr ã kagã htũm kot mẽmoj mex jarẽnh kot:

Na pre Tirtũm mẽ kãm hkĩnh xwỳnhjẽ kutẽp mẽmoj mex kwỳ jaxwỳ nhũm mex o mex nẽ mẽ ahã hikwỳ.

Aa mẽhõ kot mẽmoj mex o mexja pumunh kêt.

Nẽ aa mẽhõ kot ã mẽmoj kot anhỹr pumunh kêt.

Nẽ aa ã mẽmoj mex kot anhỹr kukamã hamaxpẽr kêt.

Tã nhũm Tirtũm mẽ kutẽp hkwỳ jaxwỳ.

Anhỹr o kot harẽnh tã no nhũm mẽ kot hkõt amnhĩ xunhwỳr kêt xwỳnhjaja ã kapẽr anhỹrja mar kêt nẽ.

¹⁰ Mẽ pamã na pre Tirtũm ja ho amnhĩrĩt. Na pre ra mẽ pamã Karõ gõ nhũm mẽ pamã gjẽx o mẽ pamã mẽmoj to amnhĩrĩt mex nẽ. Tirtũm Karõja àhpumunh tỳx o àhpumunh tỳx. Nẽ kot hprĩ hã Tirtũm jamaxpẽr pumunh par. ¹¹ No mẽ papajaja na pu htem axpẽn jamaxpẽr kôt axpẽn pumunh kêt nẽ. Na pu htem papam amnhĩ jamaxpẽr ã amnhĩ pumu. Ja pyrà nẽ Tirtũm Karõ pix na hte Tirtũm jamaxpẽr pumunh. ¹² No mẽ pahpẽ hkraja ja na hte mẽ pahkarõja pix mẽ pakamã pa hkêt nẽ. Na hte mããnẽn Tirtũm Karõja mẽ pakamã pa nẽ mẽ pamã

tanhmã mëmoj to amnhĩrīt to ho mẽ pahkõt pa. Nẽ Tirtũm kot mẽ pakutêp mëmoj mex jaxwýrja nhũm ja kukamã mẽ pamã harênh o amnhĩrīt.

¹³ Jakamã na pa htem amnhĩ krã hkõt ri mẽ kãm ixu-jarênh kêt nẽ. ãm Tirtũm Karõ nhỹ hã na pa hte ixprĩ hã mẽ kãm kapêr jarênh o ri mẽ hkõt ixpa. Ra Tirtũm Karõ kot mẽ amã gjêx xwýnhjê mã pa ý hã ixkapêr.

¹⁴ No mẽ kãm Tirtũm Karõ kapêr mar prãm kêt xwýnhjaja na htem Tirtũm kot amnhĩ nhĩpêx pumu nẽ hprĩ hã omunh kêt nẽ. Mẽ kãm kapêr mar prãm kêt jakamã na htem ri kot tanhmã mẽ pahto mex to hã harênh ma nẽ hamaxpêr o:

—Tk. Kwa mo kaxyw na htem ri ã Tirtũm jarênh anẽ? Tanhmã kot we amnhĩ to nẽ mẽ pahto mex? Nà kot anhýr kêt. Anẽ.

¹⁵ Nom mẽ pahpê Tirtũm kra hkwý hã mẽ pahte Karõ kapêr mar mex xwýnhjaja na pu hte mẽ kurom Tirtũm kot amnhĩ nhĩpêx ã omunh mex nẽ. Nẽ Karõ xô ri mar mex nẽ nhũm mẽ kot Karõ kapêr mar kêt xwýnhjaja tee ri ã mẽ pahte amnhĩ nhĩpêx anhýr ã mẽ pahpumu. Nom hprĩ hã mẽ pahte Tirtũm kõt amnhĩ nhĩpêx pumunh kêt nẽ. ¹⁶ Tirtũm kapêr ã kagã htũm kot ja jarênh kot:

Mẽhõ na kot Tirtũm jamaxpêr pumunh?

Nẽ mẽhõ na pre we kãm hamaxpêr gõ?

Nà amrakati kumrêx. Tapxipix na àhpumunh týx o àhpumunh týx. Anẽ.

Tã mẽ papajaja mẽ pahte Tirtũm Karõ kapêr mar týx xwýnhjaja na pu htem Kris xô ri pahprĩ hã hamaxpêr kõt omunh mex nẽ.

Mẽ kot Tirtũm mã tanhmã amnhĩ nhĩpêx to xwýnhjê jarênh

Wam Korīt 14.20; Karatas 5.16-21; Epes 4.14; Eprêw 5.11

3 E Kris kõt ixtõ nẽ ixtõxjaja. Pa mẽ amã mëmoj jarê ka mẽ inhma nẽ kãm ajamaxpêr. Nà amnepê mã kormã mẽ ate Kris kõt amnhĩ nhĩpêx tohtuj anhýrta ã tanhmã na ka prem amnhĩ nhĩpêx to ho ri apa wehe? Na ka prem arĩ ajamaxpêr tũm kõt pix mã amnhĩ nhĩpêx. Kormã mẽ ate Tirtũm Karõ hkõt amnhĩ nhĩpêx mex kêt jakamã na ka pre htem mẽhprĩre kot amnhĩ nhĩpêx pyrãk o amnhĩ nhĩpêx. Nẽ mẽ urãk nẽ kormã mëmoj piitã omunh kêt nẽ. Jakamã na pa pre mẽ amã ixujarênh kaxyw nẽ te mẽ ate kormã Tirtũm kapêr mar kêt xwýnhjê pyrãk o mẽ anhĩpêx nẽ mẽ amã tanhmã ixujarênh to. ² Mẽ hkarãre na htem mẽ hkã kagõ pix kaõ nẽ kormã mẽ apkur xà mex kur kêt nẽ. Ja pyrã nẽ na pa pre te ixte mẽ ato hpijaõr pyrã nẽ mẽ amã Tirtũm kapêr piitã harênh par kurê kumrêx kêt nẽ. ãm mẽ amã hkwý pix jarê ka prem ama nẽ Jejus kõt amnhĩ xunhwý. Tã na pa hte arĩ mẽ amã hkwý pix jarênh o ri ixpa nẽ kormã piitã ho mẽ ajahkre jatur xãm mênh kêt nẽ. ³ Na ka htem arĩ te mẽ apê Kris kwý hkêt pyrãk o amnhĩ nhĩpêx o apa. Nẽ mëmoj kõt axpên kãm agryk axpên mã axàkjêr o apa. ã amnhĩ nhĩpêx anhýr jao arĩ mẽ ate amnhĩ nhĩpêx tũm kõt amnhĩ nhĩpêx rãhã nẽ.

⁴ Na hte mẽ akwýjaja amnhĩ jarênh o: “Ixpê Pawre hkwý na pa.” Anẽ. Nẽ mẽ akwýjaja amnhĩ jarênh o: “Pa

na ixpê Apor kwý na pa.” Anẽ. Kwa na ka htem ã amnhĩ jarênh anhýr o te mẽ apê Kris kwý hkêt pyrãk. ⁵ Apor mẽ pa ãm wa ixte Tirtũm kapêr o mẽ ajahkre xwýnhpix na pa wa. Wa ixpê mẽ anhõ pahihtu hkêt kênã kot ka kêt mẽ axtem nẽ mẽ apê ahpýnhã wa ixkwý hã amnhĩ jarê. Na pa pre wa mẽ amã Tirtũm kapêr jarênh o ri mẽ akõt ixpa ka prem wa inhma nẽ amnhĩ kaxyw hkõt ajamaxpêr týx nẽ. Nẽ hkõt amnhĩ xunhwý nom wa pa wa ixkõt amnhĩ xunhwýr kêt nẽ. Na pa wa ãm Tirtũm kapêr o mẽ ajahkre nom amnhĩ kõt mẽ axunhwýr kêt nẽ.

⁶ E pa ixprĩ hã mẽ amã war amnhĩ jarê ka mẽ inhma. Te wa ixpê Tirtũm pur kãm wa ixapênh xwýnh pyrãk no mẽ kajaja te mẽ apê hpur pyrãk. Na htem hpur karê nhũm hirã nhũm mẽ kamã ahkre ho pa. Ja pyrã nẽ na pa pre ixkumrêx mẽ awýr ixpa nẽ mẽ amã Tirtũm kapêr jarênh o ri mẽ akõt ixpa. Te mẽ kot pur kãm ahkre ho ri pata pyrãk. Tã nhũm Apor ixpãnhã ma mẽ awýr pa nẽ te mẽ kot pur karêta pyrãk o mẽ anhĩpêx nẽ mẽ amã Tirtũm kapêr o mẽ ajahkre mex o ri pa. Xà na hte pur karêr xwýnhjaja rý kamã ahkre xwýnhjaja tãm tanhmã mëmo hy hto nhũm ra higrõt nẽ hprêk nẽ ô? Nà na htem ãm ahkre hpa nhũm arĩ hikwý. Nhũm Tirtũm tãm tanhmã hyta to nhũm higrõt nẽ hprêk nẽ ô. Ja pyrã nẽ na hte Tirtũm mẽ ho hkra nẽ tanhmã mẽ ho nhũm mẽ amnhĩ kaxyw hkõt hamaxpêr týx nẽ hkõt amnhĩ nhĩpêx mex o pa. Nom mẽ kãm harênh o pa xwýnhhta kõt amnhĩ xunhwýr kêt nẽ.

Nẽ na hte pur karêr xwýnh rý kamã ahkre xwýnhjaja tãm tanhmã hyta to nẽ ho htĩr kêt nẽ. Tirtũm pix na hte tanhmã ho nhũm higrõt. Ja pyrã nẽ na pa hte Tirtũm kapêr o mẽ ajahkre o ri mẽ akõt ixpa nom pa tanhmã mẽ ato ka mẽ apê Tirtũm kra nẽ ri apa hkêt nẽ. Tanhmã kot pa mẽ ato ka mẽ apê hkra? Tapxipix na kot mẽ pahto hkra kaxyw àhpumunh. Nẽ tapxipix na hte tanhmã mẽ pahkrã hto pu mẽ kãm hprãm xà hkõt amnhĩ nhĩpêx mex o ri papa.

Nẽ pur karêr xwýnh mẽ pur kãm ahkre xwýnhjaja wa. Hamẽ wa àpênh mex jakamã koja hamẽ wa kot pur kãm àpênh pãnhã amnhĩm ujamýnh rax nẽ. Ja pyrã nẽ kot paj mẽ ixte Tirtũm kapêr o mẽ ajahkre ho ri mẽ akõt ixpa xwýnhjaja nhũm Tirtũm nhýrmã mẽ ixapênh pãnhã mẽ inhã amnhĩrer mex nẽ.

Nẽ te mẽ ate Tirtũm nhõ ixkre pyrãk. ¹⁰ Nẽ pa te ixpê Tirtũm mã ixkre hã ixapênh xwýnh pyrãk jakamã na pre Tirtũm mẽ akaxyw tanhmã ixto pa mẽ amã tanhmã kot amnhĩ nhĩpêx to hã harênh o ri mẽ akõt ixpa. Te ixte õ ixkre kaxyw ãm xà maati xãm pyrãk o mẽ anhĩpêx. Jao mẽ amã kapêr jarênh o ri mẽ akõt ixpa. Mẽ ate amnhĩ kaxyw hkõt ajamaxpêr nẽ hkõt amnhĩ xunhwýr kaxyw. Tã na ka prem hkõt amnhĩ xunhwý nhũm ixpãnhã Tirtũm kapêr o mẽ ahkre ho mẽ pa xwýnh kwýjaja mẽ awýr mra nẽ mẽ amã kapêr jarênh jatur xãm kurê. Nẽ hprĩ hã ho mẽ ajahkre ho ri mẽ akõt pa. Te ho mẽ kot ixkre krax nhĩpêx pyrãk o mẽ anhĩpêx.

Nẽ kwa mẽ ate mẽ ahkre o mẽ apa xwýnhjaja kêr ka mẽ akatãt kõt mẽ ahkre mex rãhã ho ri mẽ hkõt apa.

¹¹ Nê Jejus Kris tapxipix na pu htem hkôt amnhĩ xunhwÿ nhũm mẽ panê mẽ pahte amnhĩ tomnuj o hapêx. Jakamã te kêp kÿxpê ixkre nhĩmök ã nõr xà maatita pyrãk.

¹² Nê na htem tõhã ixkre nhĩpêx kaxyw nê pĩ htÿx jakã nê ho hipêx nhũm kritpêm mẽ kãm mex ry nê kuhê. No na htem tõhã nojarêk kãm ixkre hã apê nê pĩ rerek o hipêx nhũm mẽ kãm mex ry hkêt nê. Koja rôr nhyre hwÿr mra nê mẽ kêp hapôk nê homnu. Ja pyrã nê na hte Tirtũm kapêr o mẽ ahkre ho ri mẽ pa xwÿnh kwÿjaja te mẽ kot katãt kôt pĩ htÿx o ixkre nhĩpêxta pyrã nê katãt kôt mẽ ahkre ho ri mẽ hkôt pa. No nhũm mẽ hkwÿjaja axtem nê te mẽ kot pĩ rerek o ixkre nhĩpêxta pyrãk o amnhĩ nhĩpêx nê htÿx ri Tirtũm kapêr kwÿm ri tanhmã mẽ ahkre hto ho pa. Jao hkwÿm ri amnhĩ nhĩpêx rãhã ho ri pa.

¹³ Nê nõ mēhõ pĩ htÿx pix o amnhĩm òrkwÿ nhĩpêx hãmri nhũm mẽmo arĩgro hã tanhmã amnhĩ to nê kêp pòr. No ãm hã pòja pix xêt pa nhũm kãm hikwÿ xà nê òkwa êja arĩ piitã mex nhũm ixkre hpãm axte hã pò janhòr o nyw. No koja pĩ rerek o hipêx nhũm mẽmo arĩgro hã kêp pòr hãmri nê piitã kêp kaxàr pa. Ja pyrã nê koja nhÿrmã Krisja akupÿn mẽ pahwÿr wrÿ hãmri nê mẽ pahte kãm tanhmã amnhĩ nhĩpêx to ho papaja piitã hã mẽ pahpumunh kôt tanhmã mẽ pajarênh to. Koja mẽ pahkwÿjaja mẽ pahte mẽ kot pĩ htÿx o ixkre nhĩpêxta pyrã nê Tirtũm mã mẽ pahte amnhĩ nhĩpêx mex o mẽ papa xwÿnhjê xapênh pumu nê mẽ pahte amnhĩ to mex xwÿnh ã mẽ pajarê. Hãmri nê hpãnhã mẽ kot pĩ rerek o ixkre nhĩpêxta pyrã nê mẽ kot kãm amnhĩ nhĩpêx mex kêt xwÿnhjê pumu nê mẽ kot amnhĩ to mex kêt xwÿnh hã mẽ harê.

¹⁴ Nê pĩ htÿxja na hte tanhmã amnhĩ to nê hpòr no ãm arĩ mex nê kuhê nhũm mẽ piitã arĩ mex ã omu. Ja pyrã nê koja Krisja mẽ kot kãm tanhmã amnhĩ nhĩpêx mex to ho mẽ pa xwÿnhjê pumu nê mẽ kot tanhmã kãm amnhĩ nhĩpêx to hpãnhã mẽ kãm amnhĩre nhũm mẽ piitã mẽ kot amnhĩ to mex ã mẽ omu. ¹⁵ No pĩ rerekja na hte pòr nê kaxàr pa. Ja pyrã nê mẽ kot Kris mã amnhĩ nhĩpêx mex hkêt xwÿnhjaja koja Tirtũm mẽ kãm amnhĩrer kêt nê. Nom arĩ mẽ kêp hkra jakamã koja mẽ arĩ kuri htĩr tũm nê pa. No ãm mẽ kot Tirtũm mã amnhĩ nhĩpêx mex kêt jakamã koja mẽ hkwÿjê hkĩnh ã amnhĩm mẽmoj mex kwÿ jamÿnh kêt nê. Te mẽhõ nhòrkwÿ kêp hpòr nhũm mẽ hukrêx kwÿ jamÿnh kêt nê ÿ kamã kurũm hapôx pyrãk.

¹⁶ E pa mẽ amã mẽmoj jarê. Ra mẽ ate mar tã mãn ka mẽ ra tanhmã amnhĩ to nê hã ano hkêt rÿ ko. Nà te mẽ pahpê Tirtũm nhòrkwÿ pyrãk. Tirtũm nhòrkwÿja ò na. Tã mẽ pahpê hkra nhũm Karõ kot mẽ pakaxwÿnh mã gjêx jakamã te mẽ pahpê òrkwÿ pyrãk. Jakamã mẽ kot kapêr kwÿm ri mẽ ajahkre o ri mẽ pa xwÿnhjaja te mẽ kot Tirtũm nhòrkwÿ grãnh xwÿnh pyrãk. Koja mẽ nhÿrmã amnhĩ xà htÿx kamã hamak o pa.

Mẽ pahte amnhĩ to jarkrar kêt ã mẽ pamã karõ

Wam Korit 1.10-25

¹⁸ Nê kot kaj mẽ atõ axàhpumunh tÿx o amnhĩ to jarkrar o ri apa japêr. Kwa mẽ jam anhÿre nê axte ri ã amnhĩ nhĩpêx anhÿr kêt nê. Nê te mẽ ate amnhĩ nê axàhpumunh tÿx xàja nhãm rênh par pyrãk o amnhĩ nhĩpêx. Mẽ paxàhpumunh xàja pika kamã mẽ àhpumunh pix jakamã kêt ka mẽ te amnhĩ nê nhãm rênh pyrã nê hpãnhã Tirtũm xàhpumunh xà hkôt pix mã amnhĩ nhĩpêx o ri apa. ¹⁹ No pika kamã mẽ àhpumunh xwÿnhjaja Tirtũm noo mã te mẽ hkrã pipãnh nê htÿx ri pata pyrãk. Tirtũm kapêr ã kagà htũm kot mẽ harênh kot:

Pika ja kamã mẽ àhpumunh tÿx ã mẽ kot amnhĩ to jarkrar xwÿnhjaja Tirtũm noo mã te mẽ kot amnhĩ to hêx o pa pyrãk. Anê.

²⁰ Nê mããnen mẽ harênh kot:

Mẽ kot amnhĩ xàhpumunh tÿx ã amnhĩ to jarkrar o ri mẽ pa xwÿnhjaja na hte Tirtũm mẽ omu nê mẽ kot ã amnhĩ jarênh anhÿr kaprÿ hã mẽ harê. Anê.

²¹ Jakamã kwa kêt ka mẽ axte mẽ apê ixkwÿ rÿ mẽ apê Apor kwÿ hã amnhĩ jarênh o ri apa hkêt nê. Mẽ apê wa ixkwÿ hkêt kênã. Nê mẽ apê nhãm mẽhõ hkwÿ hkêt. Mẽ pahpiitã mẽ pahpê Kris kwÿ na pu mẽ.

Nê kot puj mẽ nhÿrmã pahtÿk tã akupÿm pahtĩr nê Tirtũm mẽ Jejus wa kuri pamex nê pahtĩr tũm nê ri papa. Jakamã kwa mẽ tee ri amnhĩ kukamã ajamaxpêr kêt nê.

Nê jarãhã mẽmoj piitã mẽ panhõ. Nê kormã mẽmoj kot amnhĩrit kêt xwÿnhjaja haxwÿja mẽ panhõ na. ãm mẽmoj piitã mẽ panhõ jakamã te mẽ pahpê mẽmoj piitã mẽõ pahi pyrãk. ²³ No mẽ papajaja axtem Kris kêp mẽ panhõ Pahihti. Nê Tirtũm kêp Kris nhõ Pahihti.

Tirtũm pix kot tanhmã mẽ pajarênh to xwÿnh ã harênh

Eprêw 13.17

4 Nê mẽ pajaja mẽ ixpê mẽ anhõ pahi hkêt. ãm mẽ ixte Kris mã tanhmã amnhĩ nhĩpêx to ho ixpa xwÿnh pix jakamã Tirtũm kormã kapêr kwÿ ho amnhĩrit kêtja na pa htem mẽ amã ho amnhĩrit o ri mẽ akôt ixpa. Ja kaxyw na pre mẽ ixunhwÿ. ² Na pre Kris tanhmã mẽ inhmã kapêr to nê mẽ inhmã:

—E kêt ka mẽ ixkapêr pix o mãn mẽ ahkre ho ri mẽ hkôt apa. Anê.

³ Kumã pix mã ixte amnhĩ nhĩpêx o ri ixpa jakamã koja tapxipix ixte kãm amnhĩ nhĩpêx ã ixpumunh kôt tanhmã ijarênh to. Ixte kãm amnhĩ nhĩpêx mex ã ijarê rÿ ixte kãm amnhĩ nhĩpêx mex kêt ã ijarê. ãm tapxipix koja tanhmã ijarênh to. No koja nhãm mẽhõ rÿ mẽ atõ ã ijarênh anê pa ama nê ãm ama. Rÿ papam tanhmã kãm ixte amnhĩ nhĩpêx mex to hã kãm amnhĩ jarênh japêr hãmri nê ãm ixtÿx kãm ã amnhĩ nhĩpêx anhÿr ã amnhĩ jarênh kaprÿ. Pahihti Kris pix kot hprĩ hã mẽ pahte amnhĩ nhĩpêx kôt pahpumunh jakamã tapxipix koja tanhmã mẽ pajarênh to.

⁵ Jakamã kwa kêt ka mẽ ri mẽ kot Tirtũm mã tanhmã amnhĩ nhĩpêx to hã mẽ omunh xà hkôt tanhmã mẽ

harēnh to hkēt nē. Koja nhǎrmā Pahihti Krisja akupǎn mē pahwǎr wrǎ nē rǐ tām tanhmā mē pahte amnhǐ nhǐpēx to hā mē pahpumunh xà hkôt tanhmā mē pajarēnh to. Nē mē kot hpimxur pē tanhmā amnhǐ tomnuj to ho mē pa xwǎnhjaja nhǔm mē piitā mē noo mā mē kām ja ho amnhǐrīt nhǔm mē ja hā mē omu. Nē mē pahpiitā mē pajamxpēr xà ho amnhǐrīt nhǔm mē piitā hprǐ hā ja hā axpēn pumu. Hāmri nhǔm Tǐrtǔm rǐ kormā mē pahte kām tanhmā amnhǐ nhǐpēx mex to ho pa xwǎnhjē jarē.

⁶ E Jejus kôt ixkwǎjaja. Nà na pa ā mē amā Apor mē wa amnhǐ jarēnh anē. Mē ate inhmar nē Tǐrtǔm kapēr ā kagà hkôt tanhmā wa ijarēnh to kaxyw. Kot kaj mē ā amnhǐ nhǐpēx anē hāmri nē ahpǎnhā tanhmā mē ixte Kris kapēr jarēnh xwǎnhjē jarēnh to hkēt nē. Nē axpēn mā mē ijarēnh o:

—Nà tām kot Kris kapēr jarēnh mex o kot hkwǎjē jakrenh jakamā kot paj hkôt pix mā mǎn ri ixpa.

Anhǎr o axpēn mā mē ixtō jarēnh kēt nē. Kot kaj mē ā mē ixtō jarēnh anē nē te mē ixto jarkrar pyrāk o amnhǐ nhǐpēx. ⁷ Kwa mēhō na pre mē amā tanhmā ri mē ijarēnh to ka mē mar xà hkôt ā mē ijarēnh anē? Nē mē ixkapēr mex ā mē ixkwǎjē jarē nē mē ixkapēr mex kēt ā mē ixkwǎjē jarē. Nà na ka mē ām amnhǐ krā hkôt ā mē ijarēnh anē nom Kris xàhpumunh xà ho ā mē ijarēnh anhǎr kēt nē. Ām mē ixte Tǐrtǔm kapēr o mē ajahkre xwǎnhjaja na pa prem mē amā mēmoj jarē ka mē ama nē mē inhǎ hā hkôt axàhpumunh mex nē. No amnhǐ krā hkôt mē axàhpumunh kēt kēnā kot ka kēt mē ā ahpǎnhā tanhmā mē ixto jarkrar anhǎr to ho ri apa.

⁸ Te mē ate Apor mē wa ixrom Tǐrtǔm kapēr mar par nē hkôt amnhǐ nhǐpēx mex pyrāk. Te wa ixrom mē ate Jejus nhǐhkō hā mē ho amnhǐptār pyrāk. Hēxta waa nē. Kop apu ām hāmri mē ate ĩhkō hā mē ho amnhǐptār ronhǎx pa ijaxwǎjaja mē apyrà nē ā amnhǐ nhǐpēx anē. Hāmri nē ixkǐnh tǎx kumrēx. ⁹ Nom ja kot anhǎr kēt.

Jejus nhǎ hā mē ahkre xwǎnhjē jarēnh

Sikǔn Korīt 4.8-10; Eprēw 12.1

Nē mē ixpē Jejus nhǎ hā mē ajahkre ho mē ixpa xwǎnhjaja te Tǐrtǔmja axtem tanhmā mē inhǐpēx to pyrāk pa mē inhmex kēt nē ixpa. Te mē ixte gyw kām amnhǐ rēnh nhǔm mē kot mē ixkamā ōkre kahak pyrāk o na htem mē inhǐpēx. Jakamā na hte mē hkwǎjaja mē ixpumu nē mē ixkapēr ma nē ām mē inhma nē axpēn mā mē ijarēnh o:

—Tk. Kot mē ahkreja mexti hā. Kwa pu mē himex ri.

Anhǎr jakamā te ra mē ixyk nē mē inhǐkwǎ nhǔm mē piitā mē ixtā htu nē mē ixpumunh nē ma pa pyrāk o amnhǐ nhǐpēx. Jakamā na htem mē ixte mē ahkre ma nē ām kuma nē ma pa. Nom Tǐrtǔm kapēr o mē wryk xwǎnhjaja na htem ja hā mē pahpumu nē axpēn mā mē pajarēnh o:

—Kwa mē kot Jejus ā mē hipēx kati htā nhǔm mē arǐ hkôt amnhǐ nhǐpēx mex nē aa hkaga hkēt nē. Hēxta waa nē. Nà ām hāmri na htem ā amnhǐ nhǐpēx anhǎr o pa. Anē.

¹⁰ Na hte mē kot mē ixkapēr mar xwǎnh kwǎjaja kām mē ixkǐnh kēt nē tanhmā mē ixto kapēr punuj to. No mē kajaja nhǔm mē ā mē ato kapēr anhǎr kēt nē. Na htem mē ixkrā pipānh ā mē ijarē no mē kajaja nhǔm mē Kris nhǎ hā mē axàhpumunh tǎx ā mē ajarē. Nē mē ixte Tǐrtǔm kapēr kôt amnhǐ nhǐpēx mex kēt ā mē ijarē no mē kajaja na htem Tǐrtǔm kôt mē ate amnhǐ nhǐpēx mex ā mē ajarē. Nē mē kot mē ixkamā ōkre kahak tǎx tā mē akamā ōkre kahak kēt nē mē kām mē akapēr mar prām nē. ¹¹ Na pa htem arǐ Kris ā ixpunuj nē ixpa. Nē mē inhma prām nē mē inhma kōr nē ri ixpa. Nē mē ixē pikaxōnhre nē ri ixpa. Nhǔm htem Kris ā mē ixtak rūnh nē. Pa mē inhōrkwǎ hkēt nē nhām ri ixpa nē nhām ri ixpa. Na pa htem arǐ ā amnhǐ nhǐpēx anhǎr o ri ixpa. ¹² Nē ixàpkur xà kaxyw ixàpēnh rūnh o ri ixpa. Nhǔm hte mē kām Jejus prām kēt xwǎnhjaja mē ijapyr ho pa htā pa mē amnhǐ kurom mē kām ixkapēr mex nē mē kām:

—E kē Tǐrtǔm mē ato mex nē ka mē amex nē apa. Anē.

Nē mē kot mē inhǐpēx kati htā pa htem mē kutā amnhǐ to htǎx nē arǐ mē hkôt ixpa. Na htem te mē kot ahpunuj nhǐpēx pyrāk o mē inhǐpēx nē mē ixwǎr mrar kēt nē. Ā na htem mē ixte Jejus nhǎ hā mē ahkre o mē ixpa xwǎnhjē nhǐpēx anē.

Pawre te kēp mē hpām pyrāk ā kot amnhǐ jarēnh

Wam Tesarōn 2.11-12

¹⁴ E Kris kôt ixkwǎjaja. Na pa ā mē amā kagà nē mēnh anē. Nom mē ate inhmar nē amnhǐ kamā apijaam kaxyw kēt. Inhma mē ajapē jakamā na pa ā mē amā ixkapēr nē hā kagà nē mēnh anē. Na mē ra ohtō nē ixpānhā mē awǎr pa nē mē amā Tǐrtǔm kapēr o mē ajahkre. Nom ixkumrēx na pa pre mē amā kapēr jarē ka prem inhma nē Kris hkôt amnhǐ xunhwǎ nē amnhǐ kaxyw hkôt ajamxpēr tǎx nē. Jakamā paxipix te ixpē mē apām nhǔm te mē apē ixkra pyrāk. ¹⁶ Jakamā kwa mē ixte amnhǐ nhǐpēx kôt ixpumu nē ixkōt mǎn kēt mē amnhǐ nhǐpēx o ri apa. ¹⁷ Ā mē ate amnhǐ nhǐpēx anhǎr kaxyw na pa pre ijamxpēr nē ma mē awǎr Ximotre mē. Haxwǎjaja Kris kôt te kēp ixkra pyrāk. Nē inhma hapēē. Na hte jar Kris mā tanhmā amnhǐ nhǐpēx mex to ho pa. Tā pa pre mē awǎr kumē. Koja ma mē awǎr mō nē pōj nē mē amā Kris kapēr jarēnh o ri mē akōt pa. Nē mē amā tanhmā ijarēnh to nē mē amā:

—Nà Pawre na hte Jejus Kris jamxpēr kôt hamxpēr o pa. Nē kot amnhǐ nhǐpēx kôt amnhǐ nhǐpēx o pa. Nē krǐ piitā hkôt mē kot urāk nē ā amnhǐ nhǐpēx o pa anhǎr kaxyw mē ahkre mex o pa. Anē.

¹⁸ Nē na xep mē akwǎjaja te ra àhpumunh tǎx pyrā nē tanhmā ijarēnh to nē ijarēnh o:

—Pawreja akupǎn mē pahwǎr mōr ā amnhǐ jarēnh tā koja akupǎn mōr kēt nē kām ga. Ām kapēr kati xwǎnh na.

¹⁹ Anhǎr ā ijarēnh tā koja Tǐrtǔm kām tokyx ma mē awǎr inhmōr prām hā kot pa ma mē awǎr inhmōr kurē kumrēx. Hāmri nē pōj nē ixprǐ hā ā mē kot ixto kapēr anhǎr xwǎnhajē pumu. Nē mēhō kot ā mē kām

ijarēnh anh̄ȳr xw̄ynhta ã ahkukja. ²⁰ Tirtūm krajaja na htem hkôt pix mã amnh̄i nh̄ipêx jakamã na htem hkôt tanhmã amnh̄i nh̄ipêx to hã mẽ omu nê rĩ kormã kêp hkra hã mẽ harê. Tã kot paj nh̄yrmã mẽ aw̄ȳr pøj nê ã ixto kapêr anh̄ȳr xw̄ynhjê pumu nê ixprĩ hã mẽ kot amnh̄i nh̄ipêx ã mẽ omu nê rĩ kormã tanhmã mẽ harēnh to. Jao Tirtūm nh̄ȳ hã mẽ kot mẽ ajahkre hã mẽ omu r̄y amnh̄i krã hkôt mẽ kot mẽ ajahkre hã mẽ omu nê rĩ kormã tanhmã mẽ harēnh to. ²¹ Jakamã kwa mẽ tokyx ixkutêp tãm amnh̄i nh̄ipêx o ri apa. Kêr pa mō nê mẽ aw̄ȳr pøj nê mẽ ate tãm amnh̄i nh̄ipêx ã mẽ apumu nê ixkĩnh nê. Nê mẽmoj tã mẽ amã ixãkjêr kêt nê. Nê mẽ amã ixkapêr mex pix o ri mẽ amã ixkapêr. Te mẽ hipêêxà kot hkrajê mã kapêr mex pyrãk o mẽ amã ixkapêr mex nê. Hãmri pu mẽ axpên pumu nê pahkĩnh nê.

Mêhõ kot tanhmã amnh̄i tomnuj to hã harēnh

Sikūn Korīt 2.5-11

5 Nê kwa na pa pre tee ri mẽ anh̄iõja jarēnh ma nê ixkaprĩ ht̄yx nê. Na xep hte amnh̄i tomnuj t̄yx pē nã puro hã hpijaàm kêt o pa. Kwa mẽ pahpê Kris kw̄ȳjaja mẽ pahte ã amnh̄i nh̄ipêx anh̄ȳr kêt nh̄um mẽ kot Kris kôt amnh̄i xunhw̄ȳr kêt xw̄ynhjaja haxw̄ȳja ã amnh̄i nh̄ipêx anh̄ȳr kêt tã nh̄um ra mẽ anh̄iõja kot Kris kôt amnh̄i xãm tã ã amnh̄i nh̄ipêx anê. Kwa ja omnuj t̄yx kumrêx. ² Na xep ri ã amnh̄i nh̄ipêx anh̄ȳr o pa ka mẽ ja hã omu nê ãm omu nê nê tanhmã kãm nê hkêt nê. Amarĩ hã omunh o ri hkôt apa. Mẽ ate Tirtūm kôt axãhpumunh t̄yx ã amnh̄i jarēnh tã no ãm ja hã omu nê ãm hã omu nê nê tanhmã kãm nê hkêt nê. Kwa nã. Mẽ tee ri kot ã amnh̄i nh̄ipêx anh̄ȳrja ã omu nê akaprĩ nê hkêt wehe. Nê mẽ tokyx amnh̄i nê hano kê mẽ akôt Tirtūm mã amnh̄i jarēnh xà hã ixkre hw̄ȳr axte m̄rar kêt nê.

³ Ixte mẽ apê awry htã ã kot amnh̄i nh̄ipêx anh̄ȳr ã harēnh ma nê hkukamã tanhmã ijamaxpêr to. Nã ra ixte mẽ aw̄ȳr ixpõx ronh̄yx pa mẽ ato akuprõ. Pahihti Jejus nh̄ȳ hã mẽ ato akuprõ nê mẽ amã kot amnh̄i tomnuj xw̄ynhta jarē nê mẽ anê hanor kurê kumrêx. Jakamã e kêr ka mẽ mãmri ã amnh̄i nê hipêx anê. Mẽ panhõ Pahihti Jejus nh̄ȳ hã amnh̄i nê hano nê te Satanasti mã rer pyrãk kê tee ri ja hã amnh̄i pumu nê tokyx kãm urer japêr. Hãmri nê akup̄ym tãm amnh̄i nh̄ipêx. Kê nh̄yrmã Pahihti akup̄yn mẽ pahw̄ȳr wr̄y nh̄um ma mẽ pahkôt õ krĩ hw̄ȳr api.

⁶ Mẽ ate Tirtūm kapêr jarēnh mar mex ã amnh̄i jarēnh tã kormã amnh̄i nê ã kot amnh̄i nh̄ipêx anh̄ȳr xw̄ynhta janor kêt nê. Kwa mẽ tokyx amnh̄i nê hano. Na htem pãwti nh̄ipêx kaxyw nê kamã kot ho hikot xà ho hkryre nê kamã kurê nê gaa nê rĩ ho piitã hikot pa. Ja pyrã nê kot ka mẽ amnh̄i nê kot amnh̄i tomnuj xw̄ynhta janor kêt nê hãmri nê gaa nê ra urãk nê apiitã ã amnh̄i nh̄ipêx anh̄ȳr o ri apa.

⁷ Kwa mẽ tokyx amnh̄i nê hano. Kêr ka mẽ arĩ amnh̄i to mex pix o ri axpên kôt apa nê tãm ri amnh̄i nh̄ipêx o ri axpên kôt apa. Na pre ra Jejus Kris mẽ pahte amnh̄i to mex o papa kaxyw mẽ panê ty. Mẽ pahpiitã mẽ

panê ty. ⁸ Jakamã na pu htem ãm amnh̄i to mex pix o ri papa. Nê tãm amnh̄i nh̄ipêx o ri papa. Jao tanhmã amnh̄i tomnuj to ho ri papa hkêt nê.

⁹ Nê wam ixte mẽ aw̄ȳr kagã nê mēnh̄ta kamã na pa pre mẽ amã:

—Kêr ka mẽ nhãm mẽ kot mēnijê kamã hpijaàm kêt o mẽ pa xw̄ynhjê hkôt ri apa hkêt nê. ãm ri mẽ hkàx ã apa.

Anh̄ȳr o mẽ amã hã karõ. ¹⁰ Nom na pa pre mẽ piitã ã mẽ nê mẽ akurê anh̄ȳr kêt nê. ãm mẽ kêp Kris kw̄ȳ hã amnh̄i jarēnh tã ã ri amnh̄i tomnuj anh̄ȳr xw̄ynh pixjaja na pa pre mẽ nê mẽ akurê. Koja mẽhõ kêp Kris kôt mẽ pahtõ r̄y mẽ pahtõx ã amnh̄i jarēnh tã mẽ kamã hpijaàm kêt o ri pa ka mẽ ja hã omu nê hkôt ri apa hkêt kurê kumrêx.

Nê mẽ kãm nhãm mẽ hukrêx kĩnh o kãm ho õ hprãm o ri mẽ pa xw̄ynhjaja.

Nê sãnti kutã hkõn krã ho rôrõk nê hkrĩ nê kãm mex ã harēnh o ri mẽ pa xw̄ynhjaja.

Nê mẽ kot axpên to kapêr punuj o ri mẽ pa xw̄ynhjaja.

Nê mẽ pipãnh o ri mẽ pa xw̄ynhjaja.

Nê axpên pē ri mẽ àhkĩnh o mẽ pa xw̄ynhjaja.

Koja mẽhõ kêp Kris kw̄ȳ hã amnh̄i jarēnh tã ã amnh̄i nh̄ipêx anh̄ȳr o ri pa ka mẽ ja hã mẽ omu nê hkôt ri apa hkêt kumrêx. Nê mẽ kutã axãpkur kêt nê. ãm mẽ hkàx ã ri mra.

No mẽ kêp Kris kw̄ȳ hkêt xw̄ynhjê nê na pa pre ã mẽ akurê anh̄ȳr kêt nê. Mẽ piitã ã mẽ kot amnh̄i nh̄ipêx anh̄ȳr o pa kēnã. Na htem axpên kãm hpijaàm kêt o ri pa.

Nê mẽ kãm axpên kukrêx kĩnh o kãm ho õ hprãm o ri pa.

Nê sãnti kutã hkõn krã ho rôrõk nê hkrĩ nê kãm amnh̄i jagrer pē amnh̄i to hw̄ȳr o pa.

Nê mẽ axpên pē àhkĩnh pix o pa.

Kris kw̄ȳ hkêt xw̄ynhjaja na htem ã amnh̄i nh̄ipêx anh̄ȳr o pa. Tã tanhmã kot ka wem amnh̄i to nê mẽ hkàx ã ri apa? Mẽ piitã ã mẽ kot amnh̄i nh̄ipêx anh̄ȳr kēnã. Kot puj mẽ nh̄yrmã Tirtūm nhõ krĩ mex w̄ȳr api nê rĩ kormã mẽ hkàx ã ri papa.

¹² Nê mẽ kêp Kris kw̄ȳ hkêt xw̄ynhjaja na pa hte mẽ kot amnh̄i tomnuj ã mẽ omu nê ãm mẽ omu nê tanhmã hã mẽ kãm nê hkêt nê. Tirtūm tãm koja nh̄yrmã ja hã tanhmã mẽ hipêx to. No koja Kris kôt mẽ pahtõ r̄y mẽ pahtõxjê hõ tanhmã amnh̄i tomnuj to ho pa pu mẽ pahtõ ja hã omu nê nê tanhmã kãm pakapêr to kurê kumrêx. Tirtūm kapêr ã kagã ht̄um kot ja jarēnh kot:

Kêr ka mẽ amnh̄i nê Kris kôt akw̄ȳjê hõ kot tanhmã amnh̄i tomnuj to ho pa xw̄ynhjê jano. ã harēnh kot anh̄ȳr.

Mẽ pahte Kris kw̄ȳjê ho pakapêr kêt

Matêwre 5.38-40

6 Nê na ka xep htem Kris kôt atõ r̄y atõxjê hõ mẽ ka wa tanhmã axpên tomnuj to nê axtem nê juisti hw̄ȳr axpên to mra. Mẽ apyrã nê kêp Kris kw̄ȳ hkêt tã

ka htem ma hwÿr amnhĩ to mra nhũm war axpĕn tã war ama nĕ tanhmã war ajarĕnh to. Kwa mon ka htem axtem nĕ ã Kris kwÿ hkĕt xwÿnhjĕ hwÿr mĕ amnhĩ to amrar anĕ? Kĕt mĕ Kris kôt anhĩõ hwÿr mãn kĕt mĕ amnhĩ to mra nĕ kumã mãn amnhĩ jarĕ kĕ axpĕn tã war ama nĕ axpĕn tã tanhmã war amã kapĕr to.

² Ra mĕ ate ja mar tÿx tã hkĕt amnhĩ nhĩpĕx kĕt nĕ. Mĕmoj ãm grire htã ka wa tokyx akupÿm hã tãm axpĕn xãm kĕt nĕ. Rÿ Kris kôt war atõjĕ hõ hwÿr wa amnhĩ to atĕm nhũm akupÿm tãm axpĕn tã war axãm kĕt nĕ. ãm axtem nĕ mĕ kĕp Kris kôt mĕ atõ hkĕt xwÿnhjĕ hwÿr amnhĩ to mra. Kwa mĕ ã amnhĩ nhĩpĕx anhÿr kĕt nĕ. Mĕ pahpĕ Kris kwÿjaja kot puj mĕ nhÿr-mã Kris nhĩhkõ hã mĕ kĕp hkwy hkĕt xwÿnhjĕ tanhmã mĕ harĕnh to. ³ Nĕ Tirtũm kapĕr o mĕ wryk xwÿnhjaja kot puj mĕ mãññen nhÿrmã tanhmã mĕ harĕnh to ho pahkrĩ. Jakamã kwa mãmrĩ ã mĕ pahte amnhĩ nhĩpĕx anhÿrja kukamã akupÿm tanhmã axpĕn xunhwÿr to ho apa. Mĕmoj tã mĕ atõjĕ hõ wa kot tanhmã axpĕn to hã wa omu nĕ tokyx akupÿm axpĕn tã wa kãm akapĕr kĕ wa tokyx akupÿm tãm axpĕn nhĩpĕx. ã mĕ kot axpĕn nhĩpĕx anhÿr o paja na kĕt mex. ⁴ No na ka xep htem arĩ Kris kôt mĕ akwy hkĕt xwÿnhjĕ hwÿr axpĕn to mra nĕ mĕ kãm amnhĩ jarĕ. Kwa mĕ ri ã amnhĩ nhĩpĕx anhÿr kĕt nĕ. ⁵ Mĕ tokyx tee ri ja hã amnhĩ pumu nĕ amnhĩ kamã apijaãm kĕt wehe. Xà mĕ akamã Kris kôt mĕ atõjĕ hõ pixire nĕ kot tãm akupÿm mĕ axunhwÿr kaxyw amrakati kumrĕx? ⁶ Na ka xep htem mĕmoj tã axpu. Kris kôt mĕ atõjĕ hõ mĕ mĕmoj tã axpu nĕ ra mĕ kĕp Kris kwÿ hkĕt xwÿnhjĕ hwÿr amnhĩ to mra. Kot tãm akupÿm mĕ unhwÿr xwÿnhjĕ hwÿr amnhĩ to mra.

⁷ Mĕ apijapu ho apa jakamã na ka mĕ amnhĩ tomnuj tÿx nĕ. Hãmri nĕ te mĕ apĕ Kris kwÿ hkĕt xwÿnh pyrà nĕ mĕ hwÿr amnhĩ to mra. Kwa kwãr Kris kôt anhĩõ mãmrĩ apĕ ahkĩ rÿ tanhmã anhĩpĕx to. Ka mĕ ãm amnhĩ tã omu kĕ tapxipix tanhmã amnhĩ tomnuj to. ⁸ Ja mex tã mĕ ate ã amnhĩ nhĩpĕx anhÿr kĕt. Na ka htem axpĕn pĕ ahkĩ. Mĕ ate Kris kôt axpĕn to atõ nĕ atõx tã axtem nĕ ã axpĕn nhĩpĕx anĕ. Te mĕ apijaãm kĕt pyràk o amnhĩ nhĩpĕx o ri apa. ⁹ Mĕ kot tanhmã amnhĩ tomnuj to xwÿnhjaja koja mĕ nhÿrmã ma Tirtũm nhõ krĩ mex wÿr àpir kĕt nĕ. Ra mĕ ate ja jarĕnh mar tÿx.

Mĕmyjĕ hõ kot nhãm mĕnijĕ hõ ho amnhĩ kati xwÿnhjaja.

Nĕ mĕnijĕ hõ kot nhãm mĕmyjĕ hõ ho amnhĩ kati xwÿnhjaja.

Nĕ mĕnijaja axtem nĕ mĕ kot amnhĩõ ho mjĕn o ri mĕ pa xwÿnhjaja.

Nĕ mĕmyjaja haxwÿja axtem nĕ amnhĩõ ho hprõ ho ri mĕ pa xwÿnhjaja.

Nĕ mĕ àhkĩnh o ri mĕ pa xwÿnhjaja.

Nĕ mĕ kãm nhãm mĕ hkukrĕx kĩnh o kãm ho õ hprãm o ri mĕ pa xwÿnhjaja.

Nĕ ri mĕ pipãnh o mĕ pa xwÿnhjaja.

Nĕ ri axpĕn to kapĕr punuj o mĕ pa xwÿnhjaja.

Nĕ mĕ kot amnhĩ to sãnti hwÿr o mĕ pa xwÿnhjaja.

ã mĕ kot amnhĩ nhĩpĕx anhÿr xwÿnh piitã koja mĕ Tirtũm nhõ krĩ hwÿr àpir kĕt nĕ.

¹¹ Kormã mĕ ate Kris kôt amnhĩ xunhwÿr kĕt ri na ka pre mĕ akwÿjaja ã amnhĩ nhĩpĕx anhÿr o ri apa. Tã amnhĩ kaxyw Jejus kôt ajamxpĕr nĕ hkĕt amnhĩ xunhwÿ. Hãmri nhũm Tirtũm Karõ mĕ Pahihti Jejus Krisja wa mĕ anĕ mĕ ate amnhĩ tomnuj piitã rĕnh pa nĕ mĕ apĕ Tirtũm kra hã mĕ axunhwÿ nĕ amnhĩm mĕ ate amnhĩ to mex xwÿnh ã mĕ ajarĕ.

Mĕ pahte tãm amnhĩ nhĩpĕx o papa hã mĕ pamã karõ

Matĕwre 5.27; Rõmãn 12.1-2; Epes 5.3; Korosĕ 3.5; Wam Tesarõn 4.1-8

¹² Nĕ na ka hte mĕ akwÿjaja amnhĩ jarĕnh o:

—Nà na pa hte pa inhmã tanhmã amnhĩ nhĩpĕx to hprãm xà hkĕt amnhĩ krã hkĕt amnhĩ nhĩpĕx o ri ixpa. Anĕ.

Mĕ ate ã amnhĩ jarĕnh anhÿr tã no ãm mĕ ate amnhĩ jarĕnhja mex kĕt. Mĕmoj piitã mĕ pamã mex kĕt. Na pu htem pamã hprãm xà hkĕt mĕmoj to anĕ nĕ gaa nĕ ra ho amnhĩ pyrà nĕ ho anhÿr pix o papa. Nĕ gaa nĕ kãm panhÿrer kĕt kumrĕx. Jao ra pahpipãnh pix o ri papa. Rÿ paxĕx pix o ri papa. Rÿ paxàhkĩnh pix o ri papa. Jakamã kĕr pu mĕ pamã tanhmã amnhĩ nhĩpĕx to hprãm xà hkĕt tanhmã amnhĩ nhĩpĕx to ho papa hkĕt nĕ. ãm amnhĩ mĕ amnhĩ kaxyw Jejus mã pajamxpĕr pix nĕ.

¹³ Nĕ na htem amnhĩ jarĕnh o:

—Nà kot paj inhmã prãm nĕ mãmrĩ mĕmoj ku. Nĕ inhmã nhãm mĕhõ kamã ixpijaãm kĕt prãm nĕ mãmrĩ ã amnhĩ nhĩpĕx anĕ. Ja tanhmã inhmã kute hkĕt. Anĕ.

Tã koja nhÿrmã Tirtũm mĕ panhÿja o hapĕx pa. Na pre mĕ pahte nhãm mĕ kamã pahpijaãm kĕt o papa kaxyw mĕ panhĩpĕx kĕt nĕ. ãm mĕ pahte mĕ panhĩpĕx xwÿnh maatija mã tanhmã amnhĩ nhĩpĕx mex to ho papa pix kaxyw na pre mĕ panhĩpĕx.

¹⁴ Nĕ na pre Pahihtija ty nhũm Tirtũm akupÿm ho htĩr. Ja pyrà nĕ kot puj mĕ nhÿrmã mĕ pajaxwÿja ty nhũm akupÿm mĕ pahto mĕ pahtĩr. Ja kaxyw tapxipix pix na àhpumunh tÿx o àhpumunh tÿx. ¹⁵ Na pu htem Kris kôt amnhĩ xunhwÿr kôt pahpĕ hkwy nĕ te pahpĕ ĩ pyràk. Jakamã kwa mĕ ja hã anohtÿx nĕ axte nhãm mĕ hkuprÿjĕ hwÿr amrar nĕ mĕ ho amnhĩkati hkĕt nĕ. Tirtũm kĕp ja omnuj. Te mĕ pahte Kris nhĩ pyràk jakamã kot kaj mĕ ã amnhĩ nhĩpĕx anhÿr jao te Kris tãm kot ã amnhĩ nhĩpĕx anhÿr o pa pyràk. Kwa ja mex kĕt. Xà kot we Krisja ã amnhĩ nhĩpĕx anĕ? Nà koja ã amnhĩ nhĩpĕx anhÿr kĕt nĕ. ¹⁶ Tirtũm kapĕr ã kagà htũm kot ja jarĕnh kot:

Kot ka mĕ atõ mĕnijĕ hõ ho aprõ nhũm kĕp aprõ kumrĕx. Hãmri nĕ te ra war atipxi pyràk o axpĕn nhĩpĕx. Anĕ. ã kot aprõ mĕ wa ajarĕnh anhÿr jakamã kwa kĕr ka mĕ atÿx ri nhãm mĕ hkuprÿjĕ hwÿr apa hkĕt nĕ. Kot kaj mĕ ã amnhĩ nhĩpĕx anĕ nĕ Tirtũm noo mã te ate aprõ kuhpa hã hkuprÿta o aprõ pyràk. Te wam aprõta kuhpa hã war atipxi pyràk. ¹⁷ Na pu htem Pahihti Jejus Kris kôt amnhĩ xunhwÿr nhũm amnhĩ tã mĕ pahpumu nĕ mĕ pamã Karõ gõ nhũm mĕ pamã agjĕ. Pu mĕ ra Karõja kôt te ra Jejus mĕ wa pahtipxi nĕ ri papa pyràk

o xpën nhîpêx. Jao Kris jamaxpër më më pajamaxpër-ja te wa kot xpën pyrâk. Nê Kris kot amnhî nhîpêx më më pahte amnhî nhîpêxja te kot xpën pyrâk.

¹⁸ Jakamã kwa kêr ka më amnhî prô pix tânopxar o ri apa. Nê më anijaja amjên pix tânopxar o ri apa. No më nhâm mëmyjê ho amnhîkati ho ri apa hkêt nê. Nê më amyjaja nhâm mënijê ho amnhîkati ho ri apa hkêt nê. Kot ka më nhâm mëmoj tanhmã omnuj kute ho anê no ãm amnhî nhî homnu hkêt nê. Nom kot kaj më nhâm mënijê ho amnhîkati rý nhâm mëmyjê ho amnhîkati hãmri nê ra amnhî nhî homnu hpa. ¹⁹ Më panhî kamã na hte Tirtüm Karô agjê nê kamã hkrî. Tirtüm na pre më pahwýr kurê nhüm më pahkarô mã agjê pu më te më pahpê örkwy pyrâk. Jakamã na pu htem amnhî krã hkôt pahkýx ri mëmoj tanhmã ho ho papa hkêt nê. ãm Tirtüm jamaxpër xà hkôt pix mã na pu htem tanhmã mëmoj nhîpêx to ho papa. ²⁰ Na pre ra Jejus më pahte amnhî tomnuj pãnhã amnhîrer kaxyw më pahpiitã më panê ty. Te htyk o amnhîm më pajaprô pyrâk o më panhîpêx. Jakamã kwa kêr pu më ãm hkôt pix mã mãn ri amnhî nhîpêx rãhã ho ri papa. Kê më pahkwýjaja ja hã më pahpumunh kôt Tirtüm mã mex o mex ã harênh o ri pa.

Më mjên më më hprô wa kot xpën to mex ã më pamã karô

Epes 5.22; Korosê 3.18; Eprêw 13.4

7 Nê ota më ate ixwýr kagã nê mênhta na pre ixwýr pøj pa omu. Nê kamã më ate më aprô hã ixkukjêr xwýnhta pa kamã harê nê omu. Tã kot paj më amã tanhmã harênh to ka më inhma.

Nà kot ka më amyjê hõ amã aprô hkêt nê ahte ri apa hprãm nê kam nê aprô hkêt apa. Ja tanhmã kute hkêt. Nom kêr ka më hkuprýjê ho presija ho ri apa hkêt nê. ² Na htem tõhã kãm hprô hprãm kêt nê ri pa nê gaa nê më hkuprýjê hõ pumu rý më kêp më hprôjê hõ pumu nê kamã hpijaàm kêt o ri pa. Ja pymaj kêr ka më amyjaja mãmrî aprô nê më anijaja mãmrî amjên.

³ Nê më anijaja. Koja më amjên akamã hkurê ka më mãmrî kãm amnhî gô kê më anî. Nê më amyjaja mãänê. Koja më aprô më akamã hkurê ka më mãmrî më anî. ⁴ ãm ka amã tanhmã amnhî nhîpêx to hprãm xà hkôt pix mã amnhî nhîpêx kêt nê. Mãänê amã aprô kot kãm tanhmã amnhî nhîpêx to hprãm xà hkôt mãänê hkôt kãm amnhî nhîpêx.

⁵ Nê kot kaj më mëmo arïgro hã amã Tirtüm mã amnhî jarênh ryy hprãm japêr. Hãmri nê aprô mã:

—E kot puj jarãhã xpën to amnhîkati hkêt nê. Kot puj ãm Tirtüm pix mã amnhî jarênh o amýkry. Anê.

Hãmri nê mãmrî ã amnhî nhîpêx anê. No kwa kêr ka më ãm ja ho anhýr o apkati pixi nê kãm anhüre. Nhüm jãã ka më amã xpën to amnhîkati hprãm nê mãmrî tanhmã xpën nhîpêx to. No kot kaj më ã amnhî nhîpêx anhýr kêt o hã atã apkati xohtô nê gaa nê ra akurê xà axtem nê Satanasti jamaxpër o ajamaxpër. Jao nhâm mëhõ ni hwýr mra nê aprô kuhpa hã kamã akurê ho kamã apijaàm kêt. Rý nhüm mënijaja nhâm

mëmyjê hõ hwýr mra nê mjên kuhpa hã kamã hkurê ho war xpën kamã hpijaàm kêt.

⁶ E më ate ja hã ixkukjêr jakamã na pa ã ixprî hã më amã ja jarênh anê. Ka më akwýjaja amã aprô hprãm nê mãmrî aprô nê ri apa. Nê më akwýjaja amã aprô hprãm kêt nê mãmrî aprô hkêt nê ri apa. Nom kot pa paa më amã më aprô hã ixàmnhênh kêt nê. Ka më kam amnhî krã hkôt ajamaxpër xà hkôt tanhmã amnhî nhîpêx to. ⁷ Na pa hte ixprô hkêt nê ri ixpa nom inhmä ja mex pa hte ahte ixpa.

Më mjên kêt nê më hprô kêt xwýnhjê jarênh

Nê kormã më aprô hkêt xwýnhjaja. Ka më ixpyrà nê aprô hkêt nê ri apa ronhýx inhmä ja mex nê. Na hte mëmy hkwyjaja hprô kêt nê ri pa nhüm Tirtüm ja hã më omu nê tanhmã më ho nhüm më mex nê ri pa nê mënijê kamã hkurê ho më kamã hpijaàm kêt o ri pa hkêt nê. No na hte më hkwyjaja hprô kêt nê ri pa nê gaa nê ra hkurê xà mënijê kamã hpijaàm kêt. ã më ate amnhî nhîpêx anhýr pymaj kêr ka më amã aprô hprãm nê mãmrî aprô. Tirtüm mã ja mex kênã.

⁸ E më aprô hkêt nê më amjên kêt xwýnhjaja. Nê ra më apê më aprô htyk rý më amjên htyk xwýnhjaja. Pa më amã mëmoj jarê. Nà kot kaj më ixpyrà nê më aprô hkêt nê ri apa rý më amjên kêt nê ri apa nhüm ja inhmä mex nê. ⁹ No kot ka më atô ra akurê japêr nê mãmrî aprô rý mãmrî amjên. Ja mãänê tanhmã kute hkêt.

Më pahte xpën kaga hkêt ã më pamã karô

Matêwre 5.31, 19.3-9; Makre 10.2

¹⁰ E kot paj hpãnhã ra më ate xpën to amjên nê xpën to aprô xwýnhjê mã ixkapêr. Nom kot paj amnhî krã hkôt tanhmã ixkapêr to hkêt nê. Pahihti Jejus Kris kapêr xà hkôt kot paj më amã ixkapêr. Jakamã e kêr ka më anijaja më amjên kaga hkêt nê. ¹¹ Nom kot kaj më tanhmã ajamaxpër to nê hkaga japêr hãmri nê ahte ri apa nê axte nhâm mëhõ ho amjên kêt nê. Rý tee ri amnhî kukamã ajamaxpêr nê mãmrî akupým amjênta wýr tã nê akupým hkôt ri apa. No kêr ka më axte nhâm mëhõ ho amjên kêt nê.

Nê ra më amyjaja kêr ka më ajaxwýja ã amnhî nhîpêx anê nê më aprô kaga hkêt nê. E kêr ka më ã amnhî nhîpêx anhýr o ri apa.

¹² Nê më ate ixwýr kagã mënh kamã xpën tã ixkukjêrta kot paj hpãnhã më amã harê. Na Pahihti Jejusja ja hã tanhmã inhmä nê hkêt nê. ãm amnhî krã hkôt kot paj më amã tanhmã harênh to ka më inhma.

Ka më amyjê hõ ra Kris kôt amnhî xãm nom nhüm aprô kormã hkôt amnhî xãm kêt japêr. Nom koja kãm arî ri akôt pa hprãm ka hkaga hkêt nê. Kê arî ri akôt pa. ¹³ Nê më anijaja. Ka më ajaxwýja ra apê Kris kwý hã ri apa nhüm amjên kêp hkwy hkêt tã arî ri akôt pa hprãm nê arî ri akôt pa ka hkaga hkêt nê. ¹⁴ Kêp Kris kwý hkêt tã koja akôt Kris kwýjê hkôt ri pa. Rý më aprô kêp Kris kwý hkêt tã koja akôt Kris kwýjê hkôt ri pa. Jao Tirtüm kapêr mar o pa nê gaa nê apyrã nê hkôt amnhî xãm japêr. Nê më akra kêp Kris kwý hkêt xwýnhjaja

haxwýja më akôt Kris kwýjê hkôt ri pa në Tirtüm kapër mar o pa në gaa në akôt Jesus kôt amnhí xunhwýr japêr.

¹⁵ Nom koja aprô kêp Kris kwý hkêt ã kãm akaga hprãm në rí tãm mãmrí akaga. Rý amjên kêp Kris kwý hkêt ã kãm akaga hprãm në rí tãm mãmrí akaga. Kêr ka më kot akaga në tee ri kãm tanhmã akapêr to hkêt në. Kwãr mãmrí akaga ka ahte ajamakêtkati në axãmnhix ri apa. Më pajamakêtkati në më pamex në ri papaja na Tirtüm kãm hprãm.

¹⁶ No koja amjên kêp Kris kwý hkêt tã kãm më akaga hprãm kêt në ka më hkaga hkêt në. Rý aprô kêp Kris kwý hkêt tã ka më kam hkaga hkêt në. Koja arí ate amnhí nhípêx ã apumunh o ri akôt pa në gaa në rí apyrà në Kris kôt amnhí xãm japêr. ¹⁷ Jakamã kot ka më aprô rý amjên ra Kris kôt ahte amnhí xãm. Hãmri në wa arí ri axpên kôt ri apa ho apa. Na pa hte krí piitã hkôt Jesus kôt më pahkwýjê mã ã ixujarênh anhýr o ri ixpa. Tã kêr ka më ã amnhí nhípêx anhýr o ri apa.

Kris kôt amnhí xunhwýr kêt ri tanhmã më pakute hã më pajarênh

¹⁸ Ja pyrà në kot kaj më ra amy kwryt kà jakàr japêr. Tã ra Kris kôt amnhí xãm në arí arãhã ri apa. Rý amnhí jakàr kêt rãhã hkôt amnhí xãm japêr në arí arãhã ri apa. Mo kaxyw kot ka kêt amnhí jakà? ¹⁹ Tirtüm na hte më pahte amnhí my kwryt kà jakàr ã më pahpumunh kôt tanhmã më pajarênh to hkêt në. Rý më pahte amnhí jakàr kêt ã më pahpumunh kôt mãänên tanhmã më pajarênh to hkêt në. ãm më pahte hkôt amnhí nhípêx pix ã më pahpumunh kôt na hte tanhmã më pajarênh to. ²⁰ Jakamã kêr pu më pahte Kris kôt amnhí xunhwýr kêt ri tanhmã më pakuteja arí rãhã ri papa. ²¹ Ka më akwýjaja ate nhãm më kãm më axápênh o apa htã Jesus kôt amnhí xunhwý. Tã kêr ka më mãmrí më kãm axápênh o ri apa. Nom koja anhõ patrãwja amnhí në më ajano ka më mãmrí ma mra në amnhí mã tanhmã axápênh to ho ri apa.

²² Në koja mëhõ Kris kôt amnhí xãm. Tanhmã kêp më õ patrãw rý kot më kãm më àpênh xwýnhjê hõ. Tã Kris kôt amnhí xãm hãmri në arí amnhí nhípêx tüm kôt ri amnhí nhípêx o pa hkêt në. Ra Kris kôt amnhí nhípêx nyw o amnhí nhípêx o pa. Jao ra tanhmã amnhí tomnuj to hkêt në. Te kot õ patrãw punuj kaga në hpãnhã õ patrãw mex kapêr kôt amnhí nhípêx pix o pa pyrãk.

²³ Na pre Jesus më pahte amnhí tomnuj piitã hpãnhã amnhírer kaxyw më panê ty. Te htyk o kot amnhím më pajaprôr pyrãk o më panhípêx. Jakamã kwa kêr ka më jar më anhõ patrãw kôt pix mã amnhí nhípêx o ri apa hkêt në. Më mãänên Tirtüm kapêr kôt amnhí nhípêx o ri apa. ²⁴ Jakamã kêr pu më pahte Kris kôt amnhí xunhwýr kêt ri tanhmã më pakuteta pu më arí rãhã ri hã papa.

Ra më pahte amnhí jakà rý më pahte amnhí jakàr kêt.

Rý ra më pahte nhãm mëhõ mã paxápênh o papa rý amnhí mã paxápênh o papa.

Rý ra më pahprô në ri papa rý më pahprô hkêt në ri papa.

Pu më pahte Kris kôt amnhí xunhwýr kêt ri tanhmã më pakuteta ãm arí rãhã hã ri papa. Jao Tirtüm kãm hprãm xà kôt pix mã amnhí nhípêx o ri papa.

Më hprô në më mjên kêt xwýnhjê jarênh

Matêwre 19.10-12

²⁵ Në më ate ixwýr kagã mênhta kamã na ka më mãänên kormã më hprô hkêt xwýnhjê hã ixkukja. Tã kot paj më amã tanhmã më harênh to. Nom Pahihti Jesus Kris na pre ja hã tanhmã inhmã në hkêt në. ãm pa kot paj ãm amnhí krã hkôt tanhmã hã më amã ixkapêr to. Na pre Pahihti më akaxyw tanhmã ixkrã hto pa hte ý hã tanhmã më amã mëmoj tã karõ hto ho ri ixpa. Jakamã e më inhma në inhmar týx në.

²⁶ Nã ra më kãm më pahkurê xwýnhjaja Kris ã më pahtomnuj o pa jakamã koja ixpyrà në më hprô hkêt rãhã më pa xwýnhjaja ahte ri pa nhüm ja mex në. Nhüm më umaj amnhí pix tânopxar o ri pa. Në më aprô xwýnhjaja kêr ka më kãm më pahkurê xwýnhjê pymaj më aprô kaga hkêt në. ãm pix tânopxar o ri apa.

²⁸ Tã kot ka më atõ amã aprô hprãm në mãmrí aprô. Ja mãänên tanhmã ixpê kute hkêt. Në më anijaja më amã amjên prãm në mãmrí amjên. Ja tanhmã ixpê kute hkêt. Nom kot ka më akwýjê pyrã në aprô rý amjên. Në gaa në akra. Hãmri në tanhmã mëmoj kute kamã ka tee ri wa më amnhí kukamã ri ajamaxpêr o ri apa. Ja pymaj na pa hte më amjên kêt në më aprô hkêt ã më amã awjarê.

²⁹ Në Kris tokyx akupýn më pahwýr wrýk kaxyw jakamã kwa ra më aprô në apa xwýnhjaja. Kêr ka më amnhí prõ në amnhí kra pix kukamã ajamaxpêr o ri apa hkêt në. Te ho më hprô hkêt në më pa xwýnhjaja kot amnhí nhípêx pyrã në Kris kutêp kumrêx mã ajamaxpêr pê tanhmã amnhí nhípêx to ho apa në arí kor-mã aprô në akrãjê ho hapu në tanhmã më kutã anojarêt to ho apa.

³⁰ Kris kot tokyx akupýn më pahwýr wrýk jakamã kwa më ri amýr o ri më apa xwýnhjaja. Kêr ka më kutêp tee ri amnhí kaprî pix mã ajamaxpêr o akaprî në ri apa hkêt në. Në më akính në ri apikunhar o ri më apa xwýnhjaja kêr ka më Kris kutêp amnhí kính xà pix mã ajamaxpêr o ri apa hkêt në. Në ri më axujaprôr o ri më apa xwýnhjaja kêr ka më Kris kutêp tanhmã axujaprôr to pix kukamã ri ajamaxpêr kêt në. ³¹ Në më apê më ate mëmoj to wênê ho ri më apa xwýnhjaja Kris kutêp ãm ri më akukrêx pix kukamã ajamaxpêr kêt në. Koja më panhõ pika piitã hkôt më pakukrêxja në mëmoj piitã arí rãhã hkêt në. ³² Jakamã kot kaj më akukrêx pix kukamã ajamaxpêr në amnhí pix kukamã ajamaxpêr nhüm ja apê omnuj në. Kris kwý pê më hprô hkêt xwýnhjaja na htem Pahihti Jesus Kris kãm hprãm xà hkôt pix mã kãm tanhmã amnhí nhípêx to ho ri pa hprãm. Jao ãm pix kutã tanhmã nojarêt to rãhã ho ri pa. ³³ No kêt ra më hprô në më pa xwýnhjaja na htem hprô pix kukamã kãm tanhmã amnhí nhípêx to ho pa hprãm. Jao pix kukamã amnhí nhípêx o pa. ³⁴ Më kãm Tirtüm kapêr kôt amnhí nhípêx prãm tã no ãm

määnēn kām hprō kapēr mar nē hkôt kām tanhmā amnhī nhīpêx to ho ri pa hprām.

Nē mēnijaja kot Jejus kôt amnhī nhīpêx nē kormā mē mjēn kêt xwýnhjaja na htem kām Pahihti Jejus kām hprām xà hkôt pix mā kām tanhmā amnhī nhīpêx to ho pa hprām. Nē am pix mā hamaxpēr o pa. Nē am hkôt pix mā amnhī nhīpêx o pa. No ra mē mjēn nē mē pa xwýnhjaja na htem arī ri mē hikukrêx tãnopxar o pa. Nē mjēn mā hprām xà hkôt tanhmā kām amnhī nhīpêx to ho pa. Jakamā tanhmā kot wem amnhī to nē Jejus kām prām xà hkôt pix mā amnhī nhīpêx o pa?

³⁵ E ixte mē ato ajuta kaxyw na pa ā mē amā ixkapēr anē. Jakamā na pa mē ate mēhō ho aprō nē mē akurē hkêt nē. Am mē ate Tirtūm kapēr kôt pix mā amnhī nhīpêx o apa hā na pa mē amā karō. Mē ate kumā pix mā ajamaxpēr o ri apa pix kaxyw. Nē kumā pix mā tanhmā ri amnhī nhīpêx to ho apa kaxyw na pa mē amā tanhmā mēmoj tā karō hto.

Mē kot mē hprō mā xwýnhjê jarēnh

³⁶ E kot paj hpānhā mē ate mēhō ho aprō mā xwýnhjê mā ixkapēr ka mē ixkapēr ma. Nà kot kaj mē atō ate ho aprō mā xwýnhta kukamā ajamaxpēr o:

—Nà kot paj ho ixprō hkêt nē. Inhmā hkīnh tỳx tā kot paj ho ixprō hkêt nē. Kot paj am ixprō hkêt nē ahte ri ipa. Anē.

Hāmri nē ahte ri apa. Tā ra tee amnhī kurē kamā ama nē ajamaxpēr o:

—Hēxta waa nē. Mon pa pre ho ixprō hkêt nē ahte ri ipa? Anē.

Hāmri nē māmri ma hwýr tē nē kām amnhī jarē nē ho aprō. Ra ate aprō hkêt nē ahte ri apa hā amnhī jarēnh tā no am māmri ho aprō. Ja tanhmā kute hkêt kēnā. ³⁷ Nom kot kaj ho aprō hkêt ā amnhī jarē nē määnēn akurē hkêt nē ri apa. Hāmri nē māmri ho aprō hkêt nē ri ahte ri apa. Ja määnēn tanhmā kute hkêt.

³⁸ Kot ka ho aprō nē war amex nē apa. Rỳ kot ka ho aprō kêt nē määnēn amex kumrêx nē ri apa. Ja na mex o ate mēhō ho aprō nē ho apata jakrenh.

Mē kēp mē mjēn tyk xwýnhjê jarēnh

³⁹ E kot paj hpānhā mē apē mē amjēn tyk xwýnhjê mā ixkapēr. Nà koja amjēn arī htīr ri ka am hkôt pix mā axkamē nē hkaga hkêt nē. No koja nhýrmā apē ty hāmri ka tee ri amnhī kukamā ajamaxpēr hāmri nē amā axte amjēn prām nē māmri axte amjēn. Nom kwa kêr ka mē amnhī pyrā nē Kris kôt akwýjê hō pix o amjēn. No mamri nhām mēhō ho amjēn kêt nē. ⁴⁰ No kot ka mē axte amjēn kêt nē ahte ri apa hāmri nē axamnhīx ri ajamakêtkati nē apa. No na pa am amnhī krā hkôt mē amā ā ja jarēnh anē. Mān Tirtūm Karō mā määnēn ja mex nē.

Sānti hā mē apkur xà jarēnh

Rōmān 14.13-23; Wam Korīt 10.14-22, 13.2; Karatas 5.13; Wam Pētre 4.8; Wam Juāw 3.18

8 Nē mē ate ixwýr kagā mēnhta kamā na ka prem määnēn sānti hā mē apkur xà hā ixkukja. Tā kot paj mē amā tanhmā ja jarēnh to ka mē inhma.

Nà na hte Kris kôt pahkwý hkêt xwýnhjaja mēmo karō ho sānti nhīpêx mā mēō hkwy nhīpêx nē hwýr o mra. Hāmri nē hpar pē haxwý nē kutā hkōn krā ho rôrōk nē hkrī nē kām mex o mex ā harē nē kām amnhī jagrer pē amnhī to kuwý. Hāmri nē kām amnhī jagrer pa nē akupým amnhīm mēōta jamý nē ma o mra nē hkwyjê mā ho wēnē. Na htem ā amnhī nhīpêx anhýr o pa. Tā na ka prem kagāta kamā mē ate mē kēp mēō japrōr nē hkur ā ixkukja. Nà ra mē ate sānti pumunh mex. Am mē kot t̄hkra pix o hipêx ā omunh mex jakamā na pu htem hā pamā mē apkur xàta hkur prām nē māmri paxamnhīx ri kuku. Ja tanhmā Tirtūm pē kute hkêt. Ra mē pahte ja pumunh mex. Tā nom kwa kêr pu mē ja hā Kris kôt mē pahkwýjê mā amnhī to jarkrar o ri papa hkêt nē. Nē ja hā mē kurom paxàh-pumunh tỳx ā mē kām amnhī to jarkrar hkêt nē. Kot pu mē ā amnhī nhīpêx anhýr o mē hamaxpēr o hihtyx hkêt nē. Kêr pu mē am mē kamā paxukapri pē tanhmā mē ho mex to ho papa. Nē Kris kôt mē hamaxpēr o hihtyx o papa. Am mē pa hte amnhī nhīpêxja na Tirtūm kām hprām. ² No koja mēhō mēmoj pumunh tỳx ā amnhī to jarkrar o ri pa nē am tee ri ā amnhī jarēnh anhýr kaprý. ³ No koja mēhō àhpumunh tỳx kêt tā kām Tirtūm kính nhūm amnhī tā omu nē kām hapē nē ho hkra. Kêt ja na mex o mex.

⁴ E kot paj ixpri hā mē amā tanhmā sānti hā mē apkur xàta jarēnh to ka mē inhma. Nà Mēpahpāmja pixii. Axtem hō hkêt. Nom mē kot sānti nhīpêxta am mē kot t̄hkra o hipêx jakamā htīr kêt. Ra mē pahte ja jarēnh mar tỳx nē omunh mex. ⁵ Na htem ohtō nē ri sānti kēp Mēpahpām ā hkamnhīx o pa. Kaxkwa kamā mēmo karō nhīpêxja nē pika kamā mēmo karō nhīpêxja nhūm htem kēp Mēpahpām ā harēnh ho pa. Nom ja kot anhýr kêt. ⁶ Mēpahpāmja am pixi ho pixi mex. Mē panhō Tirtūmja. Tām na pre mēmoj piitā ho kator pa. Jakamā na pu htem kapēr kôt pix mā amnhī nhīpêx o ri papa.

Nē mē panhō Pahihti haxwýja pixii. Pahihti Jejus Krisja. Na pre Tirtūm nhīhkō hā mēmoj piitā ho kator pa. Na pu htem ja hā omunh xà hkôt ri pamex nē ri papa. Ra mē pahte ja jarēnh mar tỳx nē omunh mex. Jakamā na pu htem paxamnhīx ri mēmoj piitā hkur o papa. Tirtūm kot mēmoj piitā ho kator par kēnā. ⁷ Tā no am ham mē kot Kris kôt amnhī xunhwýr xwýnhjaja na htem mē pahkīnhā kām sānti hā mē apkur xà hkur puma nē. Ham mē kot sānti kaga nē amnhī kaxyw Kris kôt amnhī xunhwýr jakamā kormā Tirtūm kôt amnhī nhīpêx tohtuj anē. Jakamā na htem tee ri sānti hā mē apkur xàja pumu nē hamaxpēr o:

—Nà kot paj ja kur kêt nē. Kot paj anē nhūm apu Tirtūmja pē ja omnuj nē. Anē.

⁸ Nom na kêt hte Tirtūm mẽ paxàpkur xà hã mẽ pahpumpunh kôt mẽ pahte amnhĩ to mex xwỳnh ã mẽ pajarēnh kêt nẽ. Kot puj mẽ mẽmoj ku rỳ mẽmoj kur kêt nẽ nhũm ja hã mẽ pahpumpunh kôt tanhmã mẽ pamex ã pajarēnh to hkêt nẽ. Jakamã na pu htem mãmri paxàmnhĩx ri mẽmoj tã mẽ apkur xà hkur o papa nẽ tanhmã amnhĩ to hkêt nẽ. ⁹ Nom kwa mẽ okora. Kêr ka mẽ sãnti mã amnhĩ jarēnh xà hã ixkre hwỳr agjêx nẽ kamã axàpkur hkêt nẽ. Kot kaj mẽ atõ ã amnhĩ nhĩpêx anẽ nhũm mẽhõ kormã kot Kris kôt amnhĩ xãm tohtuj anhỳr xwỳnhja ja hã mẽ apumu nẽ tee ri hamaxpêr. Axàhpumpunh tỳx ã ate amnhĩ jarēnh tã sãnti nhõrkwỳ kamã axàpkur o nhỹ nhũm ja hã apumu nẽ tanhmã amnhĩ nhĩpêx to wehe? Koja ja kêp omnuj tã apyrà nẽ tẽ nẽ axà nẽ mẽ kutã apku. Hãmri nẽ apkur pa nẽ tee ri amnhĩ kukamã hamaxpêr o:

—Hêxta waa nẽ. Kwa mon pa axtem nẽ ri ã mẽmojja kur anẽ? Nà na pa anẽ nẽ ra amnhĩ tomnuj tỳx nẽ. Anẽ.

Hãmri nẽ hkaprĩ nẽ pa. ¹¹ Ate axàhpumpunh tỳx ã amnhĩ jarēnh tã amnhĩ kôt atõja mex kukamã ajamaxpêr kêt nẽ. Kris ra mỳrapê htyk tã nhũm ã ate sãnti hã mẽhõ hkur ã apumu nẽ tee ri hamaxpêr o Jesus hkôt amnhĩ nhĩpêx mex kêt nẽ. ¹² Kormã kot Kris kôt amnhĩ xãm tỳx kêt tã tee ri ja hã mẽ apumu nẽ hamaxpêr mex kêt nẽ. Jakamã ka Kris noo mã amnhĩ tomnuj nẽ. ¹³ Tã ã ixte Kris kôt ixkwỳjê nhĩpêx anhỳr pymaj koja ix-tõjê hõ kãm mẽmoj kur puma nẽ. Nẽ htỳx ho Tirtūm kêp omnuj ã hkamnhĩx. Pa ja hã omu nẽ ijaxwỳja axte hkur kêt nẽ. Ixte mex ã omunh tã no ãm kot tee ri ja hã ixpumpunh nẽ hamaxpêr o:

—Kwa Tirtūm kêp ja mex kêt tã nhũm Pawreja ri kuku. Jakamã kot paj ijaxwỳja uràk nẽ kuku. Omnuj tãã.

Anhỳr o hamaxpêr pymaj kot paj uràk nẽ mẽmota kur kêt nẽ. Na pa hte ã Kris kôt ixtõjê mex kukamã ri ijamaxpêr anhỳr o ixpa.

Pawre kot amarĩ Tirtūm kapêr o mẽ ahkre hã amnhĩ jarēnh

Atre 9.1-18, 20.33-35; Sikũn Korĩt 11.7-9

⁹ Nẽ ixte Jesus nhỹ hã mẽ ahkre ho mẽ pa xwỳnhjê hõ jakamã na pa hte Tirtūm kapêr o mẽ ajahkre ho ri ixpa. Na pa pre inhno ho mẽ panhõ Pahihti Jesus pumu nẽ mẽ amã harēnh o ri mẽ akôt ixpa ka prem inhma nẽ hkôt amnhĩ xunhwỳ. ² Mẽ hkwỳjaja kot axpên mã ixpê Jesus nhỹ hã mẽ ahkre xwỳnh kêt ã ijarēnh tã mẽ kajaja mẽ ate ja hã ixpumpunh mex. Ixte mẽ amã mẽ ujarēnh mexja jarēnh nhũm mẽ ate mar nẽ hkôt amnhĩ xunhwỳrja kukwak ri na ka mẽ apê Jesus kwỳ. ³ Jakamã koja mẽ atã ixto kapêr japêr kot paj ã mẽ kãm mẽ ajarēnh anẽ. ⁴ Nẽ ixte Jesus nhỹ hã kapêr jahkre o ixpa xwỳnh jakamã kot paj inhma Kris kwỳjê kutã amarĩ ixàpkur prãm nẽ mãmri mẽ kutã apku. Ja tanhmã kute hkêt tã kot paj ã amnhĩ nhĩpêx anhỳr kêt nẽ. Kot paj ixàpkur kaxyw nẽ amnhĩ pãnhã amnhĩre nẽ rĩ kormã apku. Na pa hte ã amnhĩ nhĩpêx anhỳr o ri mẽ akôt ixpa. ⁵ Rỳ kot pa ixkwỳjê pyrã nẽ inhma Kris

kôt ixkwỳjê hõ ho ixprõ hprãm nẽ mãmri ho ixprõ. Nẽ wa ma krĩ piitã hkôt Kris kwỳjê kukwak ri ixàpkur o ixpa hprãm nẽ wa mãmri ã amnhĩ nhĩpêx anhỳr o ixpa. Ja mex kênã. Na hte ã Simãw Pêtre mẽ Jesus tõ kot hapujaja amnhĩ nhĩpêx anhỳr o pa nhũm ja tanhmã kêp kute hkêt. No ãm mẽ hkĩnhã ixprõ hkêt na pa hte ri ixpa.

⁶ Nẽ ixkwỳjaja na htem apkur xà hpãnhã àpênh o pa hkêt nẽ. Na htem Jesus nhỹ hã kapêr jarēnh o ri pa nhũm hte Jesus kwỳjaja mẽ kãm mẽ apkur xà gõ nhũm mẽ amarĩ hkur o pa. Tã no pa na pa hte Panãpe mẽ wa ã amnhĩ nhĩpêx anhỳr kêt nẽ. Na pa hte wa mry kà ho ixkre nhĩpêx nẽ mẽ kãm ho wênê nẽ hpãnhã amnhĩm awjaprõ. Na pa hte wa ã amnhĩ pa kukwak ri ixujaprõ nẽ ho ixàpkur o ri ixpa anẽ.

⁷ Mẽ kãm pur kãm harõj jamỳnh o mẽ pa xwỳnhjaja na htem amarĩ hkwỳ jamỳ nẽ ho apkur o pa. Nẽ motre jamãr o mẽ pa xwỳnhjaja haxwỳja amarĩ hkà kagõ janẽ nẽ ho hkõm o pa. Nẽ pòristijaja na hte mẽ õ pahija mẽ àpênh pãnhã mẽ kãm amnhĩrer o pa. Jajê piitã na htem mẽ àpênh pãnhã mẽ kãm amnhĩrer o pa. Ja pyrã nẽ te ixpê mẽ amã ixàpênh o ixpa xwỳnh pyrãk jakamã ixte mẽ ajahkreta pãnhã kot ka mẽ inhma inhõ ho apa nhũm ja mãänen mex nẽ. ⁸ No ãm papxipix na pa hte ja mex ã harēnh kêt nẽ. Tirtūm kapêr ã kagã htũm haxwỳja kot ja mex ã harēnh. ⁹ Kamã na pre finat Mosesja Tirtūm nhỹ hã harēnh kot:

Koja akrit amã àpênh o pa ka omu nẽ ho mex nẽ. Kãm õ mex nẽ.

Anhỳr o kot harēnh. Xà na pre Tirtūmja ãm mẽ pahkrit pix kukamã ukaprĩ nẽ ã harēnh anẽ nà? Nà kot anhỳr kêt. ¹⁰ Mãänen mẽ pahpê panhĩ kaxyw na pre ã ja jarēnh anẽ. Mẽ pahte mẽ hpur kãm paxàhkre xwỳnhjaja nẽ mẽ pahte kamã paxujamỳnh o papa xwỳnhjaja. Jajê kaxyw mẽ pahte pur kukwak ri amarĩ paxàpkur o ri papa kaxyw ã pre ã ja jarēnh anẽ. ¹¹ Tã ja pyrã nẽ na pa hte mẽ awỳr mõ nẽ mẽ amã Tirtūm kapêr jarēnh o ri mẽ akôt ixpa. Nẽ mẽ akôt ho mẽ ajahkre ho ri ixpa ka htem inhma ixàpênhta pãnhã amnhĩrer kêt nẽ. Ixkwỳjaja kot Tirtūm kapêr o mẽ ajahkre hpãnhã mẽ ate mẽ kãm amnhĩrer tã pa inhma amnhĩrer kêt nẽ. Na pa pre mẽ ajahkreta pãnhã mẽmoj tã mẽ awỳr kêt nẽ. ãm nhãm ixàpênh õta kukwak ri na pa hte ixàpkur o ri ixpa.

¹² Nẽ na hte mẽ ixkwỳjaja mẽ awỳr mra nẽ Tirtūm kapêr o mẽ ajahkre o ri mẽ akôt pa. Hãmri nẽ hpãnhã mẽ apkur xà hã mẽ awỳ ka mẽ kãm mẽmoj gõ. No kêt pa na pa hte mẽ uràk nẽ ixàpkur xà hã mẽ awỳr kêt nẽ. Kot pa apu hã mẽ awỳ ka mẽ tanhmã ixto akapêr to nẽ axpên mã ijarēnh o:

—Pêr ãm mẽ pahte kãm amnhĩrer pix kaxyw na hte Pawre mẽ pahwỳr mra nẽ mẽ pamã Jesus Kris kot tanhmã mẽ panê amnhĩ nhĩpêx to hã harēnh o pa. Pêr ãm apkur xà pix prãm xàj ã kot mẽ pamã ujarēnh anhỳr o pa. Jakamã kot puj mẽ kuma nẽ ãm kuma.

Anhỳr o axpên mã ijarēnh pymaj na pa hte mẽ ajahkre hpãnhã mẽmoj tã mẽ awỳr kêt nẽ. Na pa hte ãm mry kà ho ixkre nhĩpêx nẽ ho wênê nẽ ja pix kuk-

wak ri ixàpkur o ri ixpa. Nē amarī ri mē ajahkre ho ri mē akôt ixpa.

¹³ Nē Tirtūm mā amnhī jarēnh xà hā ixkre kamā mē àpēnh xwýnhjaja na htem hwýr mē mrar xwýnhjaja mē àpēnh pānhā mē kām amnhīre. Nē mē kot mē kām Tirtūm mā mēmoj nhōr o kuhē xwýnhjaja na htem määnēn mē àpēnh pānhā mē kām amnhīre. ¹⁴ Nē Pahihti Krisja na pre ja hā mē pakukamā pahā karō kot:

—Kēr ka mē kot tanhmā mē amā ijarēnh to ho ri mē pa xwýnhjē mā amnhīrer o ri apa. Anē.

¹⁵ Tā no na pa hte aa mēmoj tā ixàhwýr kēt nē. Nē mē ate inhmā amnhīrer kaxyw pa mē amā ja jarēnh kēt nē. Aa ixte mēmoj tā mē awýr kēt. Kot paj apu anē nē xpijaam nē. Rý kot pa apu anē nē mē akukwak ri ixàpkur o ri ixpa hāmri nhūm mē akwýjaja ja hā ixpumu nē hā ijarēnh o:

—Tk. Na hte amarī mē pajahkre o ri pa hkēt nē. Ām mē apkur xà pix prām xàj na hte ā mē pajahkre ho pa anē. Anē.

Jakamā na pa hte mēmoj tā mē awýr kēt nē. ¹⁶ Ixte mē amā mē ujarēnh mexja jarēnh o ri ixpa htā na pa hte ja hā amnhī to jarkrar o ri ixpa hkēt nē. Pahihti Jesus na pre ja hā inhmā karō pa hte kām ho anhýr o ri ixpa. Kot paj kām ho anhýr kēt nē ixpunuj nē ri ixpa. ¹⁷ Kēp ām amnhī krā hkôt mǎn tanhmā mē amā ixujarēnh to ho mē akôt ri ixpa ronhýx pa hpānhā ixàmnhīx kàxpore hā mē awý. No ām ā ixte amnhī nhīpēx anhýr kēt. Tirtūm tām kot inhmā ja hā karō jakamā na pa hte amarī ixàmnhīx ri mē amā kapēr jarēnh o mē ajahkre ho ri mē akôt ixpa nē mēmoj tā ixàhwýr o ri ixpa hkēt nē. ¹⁸ Ixte amarī ri mē amā mē ujarēnh mexta jarēnh o ri ixpaja na inhmā hprām. Ja na inhmā mex. Na pa hte ā amnhī nhīpēx anhýr o ri ixpa nhūm ja inhmā mex pa ixkīnh nē ri ixpa. Jakamā na pa hte hpānhā ixàhwýr kēt nē. Nē inhmā mēmoj prām o ri ixpa hkēt nē. ¹⁹ Nē nhām mē kām tanhmā ixàpēnh to ho ixpa hkēt tā pa hte mē piitā tanhmā mē kām amnhī nhīpēx to ho ri ixpa. Pē mē kām Jesus kapēr jarēnh o ri ixpa. Jakamā na mē ra ohtō nē ixujarēnh ma nē amnhī kaxyw Jesus kôt hamaxpēr nē hkôt amnhī xunhwý.

Pawre kot tām mē piitā mē hipēx o pa hā amnhī jarēnh

Wam Korīt 10.33

²⁰ Nē na pa hte Ijaewjē hwýr ixpa nē mē kot amnhī nhīpēx kôt amnhī nhīpēx o ri mē hkôt ixpa. Ixte mē kurom Tirtūm kot finat Mojes mā mēmoj tā karō hkôt amnhī nhīpēx o ixpa hkēt tā mē hkôt ri ixpa nē mē urāk nē hkôt amnhī nhīpēx o ri ixpa. Mē kot ja hā ixpumunh nē ixte mē kām Jesus jarēnh mar nē ixpyrà nē amnhī kaxyw hkôt hamaxpēr kaxyw.

²¹ Tā pa hpānhā mē kēp Ijaew kēt xwýnhjē hwýr ixpa nē mē kot amnhī nhīpēx kôt amnhī nhīpēx o ri mē hkôt ixpa. Mē kot ja hā ixpumunh nē ixkapēr mar nē ixpyrà nē amnhī kaxyw Jesus kôt hamaxpēr kaxyw. Tirtūm mē Kris wa hamaxpēr xà hkôt na pa hte ahpýn-

hā mē kot amnhī nhīpēx xwýnhjē hwýr mra nē ā amnhī nhīpēx anhýr o ri mē hkôt ixpa.

²² Nē na pa hte kormā mē kot Kris kôt amnhī xunhwýr tohtuj anhýr xwýnhjē hkôt ri ixpa nē te ixte ho mē urāk nē kormā hkôt amnhī xām nyw pyrāk o amnhī nhīpēx o ri mē hkôt ixpa. Mē kot ja hā ixpumunh nē ixkapēr mar nē hkôt amnhī nhīpēx mex kaxyw. Ā na pa hte mē piitā mē hkôt ri ixpa nē mē hkôt amnhī nhīpēx o ri ixpa anē. Mē kot ja hā ixpumunh nē inhmar nē ixpyrà nē Kris kôt amnhī nhīpēx týx kaxyw. ²³ Mē kot mē ujarēnh mex mar kaxyw na pa hte mē piitā mē hkôt ā amnhī nhīpēx anhýr o ri ixpa. Tirtūm kot mē ho hkra nē mē ho mex kaxyw. Nē määnēn pa kot mē hā ixto mex kaxyw.

Pawre kot htýx ri amnhī nhīpēx kēt ā kot amnhī jarēnh

Sikūn Ximotre 4.7; Eprēw 12.1-3

²⁴ Mē hprōt xwýnhjaja na htem hprōt týx no nhūm mēhō pixi nē wam hkwýjē re nē wam tēn pōj nhūm htem ja hā omu nē kām mē hkīnhxà gō. Ja pyrā nē kēr ka mē apiitā tām amnhī nhīpēx mex rāhā ho ri apa kē Tirtūm mē apumu nē nhýrmā ja pānhā mē amā mēmoj mex gō.

²⁵ Nē mē hprōt xwýnhjaja na htem mē hkīnhxà hpýr prām xàj mē hprōt xà hā arīgro hwýr apkati mē hprōt o kuhē. Prōt týx prām xàj. Tā mē hprōt xà hā arīgrota ā nhūm hkwýjē pē amnhī to wa nē amnhīm hkīnhxà py. Nom koja hkīnhxàja kritpēm kām mex ry hkēt nē. Koja gaa nē hapēx tokyx anē. Tā nom kot puj mē Tirtūm kapēr kôt amnhī nhīpēx mex o ri papa. Nē mē hprōt xwýnhjē kot hkīnhxà hpýr prām xàj apkati mē hprōt o kuhēta pyrā nē apkati mē hkôt amnhī nhīpēx mex o ri papa. Hāmri nhūm amnhī tā mē pahpumu nē nhýrmā mē pamā hkīnhxà mex ō gō. No ām jar hkīnhxà kurom koja aa mē pahpē hapēx kēt nē. Koja mē pamā mex rāhā ho rāhā.

²⁶ Nē na hte mē hprōt xwýnhjaja htýx ri tanhmā hprōt to ho pa hkēt nē. Na htem hkwýjē pē amnhī to wa kaxyw hprōt nē nhýri mē àhuk xàta pix pumunh pē hwýr hprōt nē mra hāmri nē kamā ahtwý. Nē kamā àhuk pix kukamā hamaxpēr o hprōt týx nē mra. Ja pyrā nē na pa hte apkati mē Tirtūm kôt pix mā amnhī nhīpēx o ri ixpa. Nhýrmā kot inhmā mēmoj mex nhōr kaxyw.

Nē mē pijapu mex xwýnhjaja na htem htýx ri nhýhýnh axpēn tak kēt nē. Na htem nhýhýnh kot mē htak o mē rēnh xà pix kamā mē htak o mē rēnh kukamā hamaxpēr pē kamā mē htak. Ja pyrā nē na pa hte ixtýx ri tanhmā amnhī nhīpēx to ho ri ixpa hkēt nē. Na pa hte Tirtūm mā ijamaxpēr pē tanhmā amnhī nhīpēx to rāhā ho ixpa. Kot nhýrmā inhmā mēmoj mex nhōr kaxyw. ²⁷ No na pa hte ixtýx ri amnhī jamaxpēr xà hkôt tanhmā amnhī nhīpēx to ho ri ixpa hkēt nē. Kot pa ā amnhī nhīpēx anē nē ixte mē kām Jesus kapēr jarēnh o ri ixpa htā ām ri ixtýx ri ā amnhī nhīpēx anhýr kaprý nhūm Tirtūmja tee ri ja hā ixpumu nē inhmā mēmoj mex nhōr kēt nē.

Ijaew kot amnhĩ nhĩpêx
Rômân 15.4; Eprêw 3.8-11; Jutre 5

10 E Kris kôt ixkwýjaja. Kot paj mẽ amã amnepê mã mẽ ixpê Ijaew hkukamã mẽ inhĩgêjtaja tanhmã mẽ harênh to ka mẽ inhma. Mẽ kot pahi finat Mojes kôt ri mẽ pa xwýnhjaja kot paj mẽ amã harê. Mẽ pahte mẽ uràk nê pahtýx ri amnhĩ nhĩpêx pymaj kot paj mẽ amã tanhmã mẽ harênh to ka mẽ inhma. Mãn ka mẽ arĩ mẽ harênh ã anohtýx japêr. Na prem piitã pika pê Ejit kamã pa htã kurũm kator pa. Hãmri nê ma kapôt ã kakrã pumunh o hkôt pa ho pa. Pry hkêt jakamã nhũm pre Tirtũm tanhmã kakrã hto nhũm ma mẽ hkukamã pa nhũm mẽ omu nê hkôt pa. Hãmri nê ra gô xujanãr mẽ kot kãm: “Gô kamrêk” anhýr xwýnhjaja wýr pøj nê tee ri rêr prãm xàj amnhĩ kukamã hamaxpêr. Hãmri nhũm Tirtũm mẽ kãm hkôt ã ho amgrã nhũm mẽ hkôt mex pê rêr pa nê axte kakrã hkôt pa ho pa. ² Finat Mojes kot mẽ o pa jakamã nhũm prem kêp hkwȳ hã amnhĩ jarê nê kãm amnhĩ jarênh o:

—Nà kot paj mẽ akapêr ma nê akôt ri amnhĩ nhĩpêx o ixpa. Anê.

Te mẽ pahpê Kris kwý hã amnhĩ jarênh kaxyw mẽ kot gôx kãm mẽ pahkrã kumrãr nhũm mẽ pahte Kris mã amnhĩ jarênhhta pyrãk. ³ Na prem kapôt ã ri pa nhũm Tirtũm tãm kaxkwa rũm mẽ hwýr mẽ apkur xà rê nhũm mẽ hkawrà nê ho apkur o pa. ⁴ Tã ra kôr xàj hirot nhũm Tirtũm tanhmã mẽ kãm kên prêkja to nhũm kurũm mẽ kãm gô axkapĩ nhũm mẽ ho ixkô nê akupým hihtýx. ã Krisja mẽ hkôt mẽ ho mẽ hihtýx o pa anê. Mẽ kot no ho omunh kêt tã nhũm mẽ hkôt mẽ ho mẽ hihtýx o pa.

⁵ Tã no nhũm mẽ ohtô nê Tirtũm kôt amnhĩ nhĩpêx kêt nê. Kot mẽ ho mex kumrêx tã nhũm mẽ ãm amnhĩ tã omu nê ãm omu nê kapêr kôt amnhĩ nhĩpêx kêt nê. ãm kapêr kwým ri tanhmã amnhĩ tomnuj to ho pa nhũm tee ri amnhĩ tã mẽ omu nê tanhmã mẽ ho nhũm mẽ hkwȳja hpikaprãr pa. Hãmri nhũm arĩ mẽ htĩr xwýnhjaja kapôt ã mẽ hagjênh pa nê axte ma pa.

⁶ Jakamã kwa kêr pu mẽ kot ã amnhĩ nhĩpêx anhýr ã mẽ harênh ma nê hã pano htýx nê ho papa hãmri nê ho mẽ uràk kêt nê. Mẽ uràk nê pahtýx ri tanhmã amnhĩ nhĩpêx to ho ri papa hkêt nê.

⁷ Nê na pre mẽ hkwȳjaja sãnti kutã hkôn krã ho rôrôk nê hkrĩ nê kãm amnhĩ jagrer pê amnhĩ to kuwý. Tirtũm kapêr ã kagã htũm kot mẽ kot amnhĩ nhĩpêx anhýr ã mẽ harênh kot:

Na prem sãnti kutã apkur o hkrĩ nê kãm amnhĩ jagrer o hkrĩ nê gaa nê pipãnh pix o pa. Jao axpên kamã hpijaãm kêt o pa.

Anhýr jakamã kwa kêr pu mẽ ã mẽ kot amnhĩ nhĩpêx anhýrja ã pano htýx nê ho mẽ uràk hkêt nê.

⁸ Nê na pre mẽ hkwȳjaja htýx ri mjên nê hprõ kuhpa hã nhãm ri mẽ kamã hpijaãm kêt o pa. Mýrapê nhũm arĩgro pixi hã mẽ ohtô rax kumrêx nê axkaprã. Mẽ kêp 23.000 nê pikaprãr pa. Tã ã Tirtũm kot mẽ panhĩpêx anhýr pymaj kêr pu mẽ ja hã pano htýx nê ho mẽ uràk kêt nê. ãm kwarĩ ho kwarĩ.

⁹ Nê na pre mẽ hkwȳjaja axtem nê htýx ri tanhmã axpên mã Tirtũm jarênh to nê harênh o:

—Nà Tirtũmja gryk tokyx anhýr kêt jakamã kwa pu mẽ ã amnhĩ tomnuj anhýr o papa. Koja mẽ pahpumu nê tanhmã mẽ pahto hkêt nê.

Anhýr tã nhũm tee ri ja hã mẽ kuma nê mẽ omu nhũm ja kãm mex kêt nê nhũm mẽ hwýr kagã xoprê nhõ wenên xihtýx kwý rê nhũm mẽ hwýr mra nê mẽ hkamnhar o mẽ hkwȳjê pa. Tã ã kot mẽ panhĩpêx anhýr pymaj kwa kêr pu mẽ ja hã pano htýx nê mẽ uràk nê amnhĩ tã Tirtũm kamã pajamak o papa hkêt nê. Kwarĩ ho kwarĩ.

¹⁰ Nê na pre mẽ hkwȳjaja axtem nê Tirtũm o kapêr punuj nê nhũm tee ri amnhĩ tã mẽ kuma nê mẽ hwýr kapêr o wrýk xwýnh mẽ nhũm ma mẽ hwýr wrý nê ý hã mẽ hkwȳjê nhĩmex. Tã ã kot mẽ panhĩpêx anhýr pymaj kwa kêr pu mẽ ja hã pano htýx nê ho mẽ uràk nê Tirtũm o pakapêr punuj kêt nê.

¹¹ Na pre mẽ ixpê Ijaew nhĩgêjtaja ã htýx ri amnhĩ nhĩpêx o pa anê. Tirtũm kapêr ã kagã htũm kot ã mẽ kot amnhĩ nhĩpêx anhýr piitã harênh par. Mẽ panhõ ejêp kaxyw. Mẽ pahte kamã harênh nê mẽ harênh martýx nê mẽ uràk nê ã amnhĩ nhĩpêx anhýr kêt kaxyw. Ra Jejus akupýn mẽ pahwýr wrýk xà hã arĩgro hkukamã grêre jakamã kwa kêr pu mẽ kutêp mẽ kurom kapêr kôt pix mã ri amnhĩ nhĩpêx mex rãhã ho ri papa.

Mẽ pahte mẽmoj punuj nê amnhĩ to htýx ã mẽ pamã karõ

Matêwre 4.1, 6.9-13; Wam Korït 1.8; Sikũn Pêtre 2.9; Jutre 24

¹² Tã kêr ka mẽ ã Ijaew kot amnhĩ nhĩpêx anhýr ã mẽ harênhja ma nê ã ajamaxpêr anhýr kêt nê. Rý mẽ ajamaxpêr o:

—Nà mẽmoj piitã kutã ixihtýx kênã kot pa hkêt mẽ uràk nê ã amnhĩ nhĩpêx anhýr o ri ixpa.

Anhýr o mẽ ajamaxpêr kêt nê. Kot kaj mẽ ã amnhĩ jarênh anê nê ra mẽ uràk nê tanhmã amnhĩ tomnuj to.

¹³ Nê na prem kapôt ã pare ri omnuj nê ri pa. Nhũm mẽkarõmnuti tanhmã mẽ hkrã hto nhũm mẽ tanhmã amnhĩ tomnuj to ho pa. Ja pyrã nê na hte arĩ mẽ pahte amnhĩ tomnuj hprãm xàj tanhmã mẽ pahkrã hto ho pa. Mẽ pahpiitã ã mẽ pahto anhýr o ri mẽ pahkôt pa. Nom nhũm Tirtũm ra kot mẽ pamã amnhĩ jarênh xà hkôt mẽ panê omunh mex rãhã ho pa. Jakamã na pu htem tanhmã amnhĩ tomnuj to hkukamã pajamaxpêr nhũm ja hã mẽ pahpumu nê mẽ panê mẽkarõmnuti mã kapêr. Nê kutã mẽ pahto paxihtýx nê pu mẽ ý hã amnhĩ tomnuj kêt nê. Nê ãm kôt pix mã amnhĩ nhĩpêx mex o ri papa.

Mẽ kot sãnti mã mẽmoj nhõr xwýnhjê jarênh

Wam Korït 8.1-13; Karatas 4.8; Apokarip 9.20

¹⁴ Jakamã e Kris kôt ixkwýjaja. Kêr ka mẽ amnhĩ kaxyw sãnti hkôt ajamaxpêr o ri apa hkêt nê. Nê amnhĩ to hwýr kêt nê. ãm kwarĩ ho kwarĩ.

¹⁵ E mẽ axãhpumunh týx ã amnhĩ jarênh jakamã kot paj mẽ amã mẽmoj jarê ka mẽ aprĩ hã inhmar týx japêr. ¹⁶ Nà na pu htem tõhã Jejus kot mẽ panê htyk

mā pajamaxpēr kaxyw axpēn wūr akuprō. Hāmri nē mēmo kagō hkwỳ ru nē Tirtūm mā mex ā harē nē mēmoj o pahkōm pē Jesus kot mē panē hkamrō pikapīr mā pajamaxpēr. Nē hpānhā pāwti hō py nē axpēn mā ho hkry nē mē kot Kris pīr nē ī kamā hkamnhwūr nhūm mē panē htykja mā pajamaxpēr pē kuku.

¹⁷ Pāwtita ām pixire htā pu htem axpēn mā ho hkry nē pahpiitā kuku. Mē pahpē Kris kwỳ hā mē pahte amnhī jarēnh nhūm mē pahkwỳ kot ja hā mē pahpumunh kaxyw. Te mē pahtipxi nē ri mē papa pyrāk nē pāwti pixire htā pu mē pahpiitā kuku.

¹⁸ E kot paj hpānhā mē amā amnepē mā Ijaew kot tanhmā amnhī nhīpēx to jarē ka mē inhma. Na pre htem Tirtūm mā mex ā harēnh nē kām amnhī nhōr ā kot amnhī tā mē omunh kaxyw nhūm prem tanhmā amnhī nhīpēx to. Jao kām mē apkur xā hkwỳ gō nē kām mex o mex ā harē. Hāmri nē amnhī mā mēmojta kwỳ xā nē hkur o hkrī. Jao ra Tirtūm mā mex o mex ā harē nē kām kēp hkra hā amnhī jarē.

¹⁹ Nom mē kot sānti mā mēmoj nhōr xwỳnhjaja na htem kām mēmo mē apkur xā hkwỳ gō nom ām kām ōr kaprỳ. Tanhmā kot we amnhī to nē amnhī tā mē omu? Mo rīt kaxyw no? Ām mē īhkra ho mē kot amnhīm hipēx kēnā. Jakamā na htem ām kām mē apkur xā hkwỳ nhōr kaprỳ. ²⁰ Mē kot sānti mā mēmoj nhōr xwỳnhjaja na htem Tirtūm mā ōr kēt nē. Mēkarōmnuti mā na htem kugō. Jakamā kot kaj mē urāk nē sānti mā mēmoj gō nē apē mēkarōmnuti hkwỳ hā amnhī to amnhīrīt nē apē hkwỳ hā ri apa. Jakamā mē ate sānti mā mēmoj nhōrta na inhā hprām kēt kumrēx. ²¹ Kot kaj mē panhō Pahihti Jesus kot mē panē htyk ā mēmoj kagō hkwỳ ho ixkō hāmri nē ma mra nē hpānhā sānti pē mēkarōmnuti hā mēmoj to ixkō. Hāmri nhūm Tirtūmja tee ri ja hā mē apumu nhūm ja kēp omnuj tỳx nē. Rỳ ka mē Pahihti Jesus kot mē panē htyk ā pāwti hkwỳ hku nē hpānhā ma mra nē sānti pē mēkarōmnuti hā mēmoj hku. Hāmri nhūm Tirtūm kēp ja omnuj tỳx nē. Mē pahte ā amnhī nhīpēx anhỹrja na axpēn kuhpa hā. ²² Jakamā kot ka mē ā amnhī nhīpēx anē nē te ra mē amā mēkarōmnuti hkīnh nē mǎānēn amā Tirtūm kīnh pyrāk o amnhī nhīpēx. Nē te Tirtūm kurom mē kajaja mē axāhpumunh tỳx pyrāk o amnhī nhīpēx. Nhūm tee ri amnhī tā mē apumu nē mē akamā gryk tỳx nē. Kwa mē okora. Koja Tirtūm akamā gryk ka amex kēt kumrēx.

Mē pamā Kris kōt mē pahkwỳjē hkīnh pē mē ho mex ā mē pamā karō

Matēwre 20.28; Rōmān 14.1–15.7; Piripos 2.1-4

²³ Nē na htem tōhā amnhī jarēnh o:

—Nà kot pa inhā mēmoj to anhỹr prām nē ixāmnhīx ā amnhī nhīpēx anhỹr o ri ixpa. Anē.

Tā no ām mēmoj piitā mē pamā mex kēt. Na htem kām mēmoj to anhỹr prām xā hkōt mēmoj piitā tanhmā ho ho ri pa nē tanhmā amnhī tomnuj to. Hāmri nhūm mē hkwỳjaja ja hā mē omu nē mē urāk nē tanhmā ri amnhī tomnuj to. Jao Kris kōt amnhī xunhwūr tỳx kēt nē. ²⁴ Jakamā kwa kēp pu mē amnhī pix

kukamā pajamaxpēr pē tanhmā amnhī nhīpēx to ho papa hkēt nē. Mǎānēn amnhī kwỳjē hkukamā pajamaxpēr pē tanhmā mē ho mex to ho ri papa pē tām ri amnhī nhīpēx o papa.

²⁵ Nē kot kaj mē amnhī xāpkur xā japrōr kaxyw ma nhỹhým mra nē māmri axāmnhīx ri amā mēmoj prām xā hkōt mēmoj japrō. Nom kēr ka mē axujaprōrja kēp sānti xāpkur xā hā mē hkukjēr kēt nē. Ām axāmnhīx ri mē kēp mēmoj japrōr o ri apa. ²⁶ Tirtūm kapēr ā kagā htūm kot ja jarēnh kot:

Pika piitā hkōt mēmoj piitā kēp Tirtūm nhō na. Anē. Jakamā mē māmri axāmnhīx ri mēmoj piitā haprō nē mēmoj piitā hkur o apa.

²⁷ Tā koja mē kēp Kris kwỳ hkēt xwỳnhjē hō ate kutā axāpkur kaxyw amnhī wūr awỳ ka amā hwūr amōr prām nē māmri ma hwūr mō. Nhūm mēmoj to amā anhō ka axāmnhīx ri māmri aku. No ri tee ri amnhī kukamā ajamaxpēr nē tanhmā hā hkukjēr to hkēt nē. Rỳ kām:

—Kwa xā we mryja sānti hā mē apkur xā na nà?

Anhỹr o hā mē hkukjēr kēt nē. Ām māmri axāmnhīx hkur o akrī. ²⁸ Nom koja Kris kōt mē kot amnhī xām tohtuj anhỹr xwỳnhjē hō mē awūr axā nē tee ri ja hā apumu nē amā:

—Kwa sānti hā mē apkur xā na ka ri mē kutā hkur o akrī.

Anhỹr o amā kapēr ka ama nē hkaga kurē kumrēx nē hkur kēt nē. Amā mex tā Kris kōt atōja kēp omnuj jakamā ka hkaga nē hkur kēt nē. No kot ka ām ama nē arī hkur o anhỹr japēr. Kot amā harēnh xwỳnhhta kēp omnuj tā ka arī noo mā hkur japēr. Nhūm ja hā apumu nē tee ri Tirtūm kapēr kukamā tanhmā hamaxpēr to. Hāmri nē apyrā nē kuku nē gaa nē tee ri amnhī kukamā hamaxpēr nē amnhī mā:

—Hēxta waa nē. Sānti nhōja mex kēt tā pa ri kuku. Kwa na pa pēr hkurja o amnhī tomnuj nē. Hēxta waa nē. Anē.

Hāmri nē tee ri amnhī kukamā hamaxpēr o hkaprī nē. Ā kot amnhī nhīpēx anhỹr pymaj koja mēhō ā mēmo mē apkur xā nē amā kapēr anē ka ama nē hkaga kurē kumrēx. Jao amnhī pix kukamā ajamaxpēr kēt nē. Mǎānēn Kris kōt atō nē atōxjē mex kukamā ajamaxpēr. Nom koja amā kēp sānti hā mē apkur xā hā harē ka ama nē ā ajamaxpēr anhỹr japēr nē ajamaxpēr o:

—Nà kēp omnuj tā kot paj mamri kuku. Ja inhā mex kēnā. ³⁰ Ra ixte Tirtūm mā harēnh nē ixāmnhīx hkur o inhỹr kēnā kot kēt ā nē inhā kapēr anē. Anē.

Kwa mē ā ajamaxpēr anhỹr kēt. Kot kaj mē ā ajamaxpēr anē hāmri nē Kris kōt atō rỳ atōx mex kukamā ajamaxpēr kēt nē.

³¹ Jakamā kēr ka mē tām tanhmā amnhī nhīpēx to ho ri apa. Nē axāpēnh mex nē. Kēr kē mē piitā ja hā mē apumu nē mē apumunh kōt amnhīm Tirtūm mex ā harē. ³² Nē kēr ka mē piitā mē noo mā tām ri amnhī nhīpēx o apa. Ijaew noo mā nē Ijaew kēt xwỳnhjē noo mā. Nē Jesus kwỳjē noo mā. Mē piitā mē noo mā tām ri amnhī nhīpēx rāhā ho ri apa. Mē kot tee ri mēmoj tā mē apumunh nē hpijaàm pymaj ka mē tām ri mē piitā

mě noo mā tanhmā amnhī nhīpêx mex to ho ri apa.
³³ Na pa hte ā amnhī nhīpêx anhÿr o ri ixpa. No na pa hte pa amnhī pix kukamā ijamaxpêr kêt nê. Mě piitā mẽ mex kukamā na pa hte ijamaxpêr o ri ixpa. Pê tanhmā amnhī nhīpêx to ho ri ixpa. Mě kot ja hã ix-pumunh nê ixpyrà nê Jesus kôt amnhī xunhwÿr nê ām kôt pix mã ri amnhī nhīpêx o pa kaxyw.

11 Na pre hte Kris ā ā amnhī nhīpêx anê nê mẽ pi-itā mẽ mex kukamā hamaxpêr rāhā ho ri pa. Tā na pa hte urāk nê ā amnhī nhīpêx anê. Jakamā kwa kêt ka mẽ ixpyrà nê ā amnhī nhīpêx anhÿr o mǎn ri apa.

Měnijaja mẽ mjên ā hpijaàm ā mẽ kām karō

Epes 5.22; Wam Pêtre 3.1-6

² Nê na ka xep htem arī ra ixte tanhmā mẽ amā ixkapêr toja mã ajamaxpêr tÿx o ri apa. Na pa pre Kris kôt mẽ pahtō nê mẽ pahtōxjaja xepên wÿr pikuprōnh nê tanhmā amnhī nhīpêx to hã mẽ amā karō ka prem inhma nê mẽ urāk nê ā amnhī nhīpêx anê. Ām hāmri na ka htem ā amnhī nhīpêx anhÿr o apa. Ja na inhmā mẽ.

³ Na pa pre krī hō kamā mėnijaja kot amnhī krā hpro hã mẽ amā mẽ harê. Ka prem inhma nhūm mẽ akwÿ-jaja kām ja mex nê nhūm mẽ akwÿjaja tee ri ja kukamā ajamaxpêr. No mẽmo kaxyw na hte mėnijaja amnhī krā hpro? E kot paj ixprī hã mẽ amā ja jarê ka mẽ inhma. Nà Tirtūm kêt Kris jamār xwÿnh nhūm Kris kêt Tirtūm mã mẽ inhmyjê jamār xwÿnh. No mẽ anijaja mẽ amjên kêt Kris mã mẽ ajamār xwÿnh. Na hte mėnijaja ohtō nê ra mẽ mjên ā amnhī to amnhīrīt kaxyw amnhī krā hpro nê ri pa. No mẽ inhmyjaja na pa htem ā amnhī nhīpêx anhÿr kêt nê. Na pa htem amarī ixkrā hkênh nê ixpa. ⁴ Jakamā na pa htem Tirtūm kapêr mar xà hã ixkre hwÿr xepên wÿr akuprō nê Tirtūm nhÿ hã mẽ anijê mã kapêr jarênh o ixkuhê. Rÿ Tirtūm mã tanhmā mẽ pajarênh to. No ām amnhī krā hpro hkêt rāhā kām mẽ ajahkre rÿ kām mẽ pajarê. Kot pa mẽ amnhī krā hpro nê te mẽ apê ixprōjaja mẽ apê mẽ ijamār xwÿnh ā mẽ ajarênh pyrāk. Jao te mẽ ixte mẽ ijamār xwÿnh Kris ā ixpijaàm kêt pyrāk o amnhī nhīpêx. ⁵ No mẽ anijaja mẽ ixte Kris mã mẽ ajamār xwÿnh jakamā na ka htem Tirtūm nhÿ hã mẽ inhmā kapêr jarênh rÿ kām mẽ pajarênh kaxyw nê amnhī krā hpro. Mě ixte Kris mã mẽ ajamār xwÿnhjê hã apijaàm kaxyw ā amnhī nhīpêx anê nê mẽ amnhī krā hpro. Kot ka mẽ ā amnhī nhīpêx anhÿr kêt nê te mẽ ate mẽ ixtā apijaàm kêt pyrāk o amnhī nhīpêx nhūm mẽ amjên tee ri ja hã apumu nê hpijaàm nê. Te ate amnhī krā hkênh nê ri apa nhūm tee ri apumunh nê hpijaàm pyrāk.

⁶ Kot kaj mẽ amnhī krā hkênh nê ri apa nê amnhī kamā apijaàm nê ri apa. Mě anijaja na ka htem akrā hkī japjê nê kamā amex nê ri apa. No kot ka mẽ amnhīm akrā hkênh nê apunuj nê amnhī kamā apijaàm nê ri apa. Jakamā kêt ka mẽ Tirtūm mã amnhī jarênh kaxyw nê amnhī krā hpro. Nom kot ka mẽ amjên ā apijaàm kêt nê ri apa hprām japêr nê mamrī amnhīm akrā hkênh nê ri amnhī kuk ā apijaàm kêt nê ri apa.

⁷ No mẽ inhmyjaja na pa htem amnhī krā hpro hkêt nê. Te mẽ ixpê Tirtūm pyrāk nhūm mẽ anijaja te mẽ apê Tirtūm kra pyrāk o na pu htem xepên nhīpêx. Tirtūm krajaja na htem mẽmoj tā Tirtūm mã karō hkêt nê. Ja pyrā nê mẽ anijaja na ka htem mẽ inhmyjê mã mẽmoj tā karō kamā axihtÿx o apa hkêt nê. Na ka htem mẽ ixtā apijaàm kām mẽmoj tā mẽ ixwÿ.

⁸ Amnepê mã Tirtūm kot mẽmoj to kator krax rūm na pre myja kumrêx nhīpêx hāmri nê kêt òkwa i hō ka-pa nê ho kām hprō nhīpêx. No na pre nija kumrêx nhīpêx nê òkwa i ho kām mjên nhīpêx kêt nê. ⁹ Myja mã na pre hprō nhīpêx. No nija mã mjên nhīpêx kêt nê. ¹⁰ Jakamā kêt ka mẽ anijaja amjên ā apijaàm ā amnhī to amnhīrīt kaxyw hāmri nê mẽ inhmā Tirtūm nhÿ hã tanhmā akapêr jarênh to kaxyw rÿ kām amnhī jarênh kaxyw hāmri nê amnhī krā hpro nê akuhê. Hāmri nhūm Tirtūm kapêr o mẽ wÿk xwÿnhjaja ja hã mẽ apumu nê hkīnh nê tee ri mẽ akukamā hamaxpêr kêt nê.

¹¹ Nê wam ni kator xwÿnhnta na pre myja rūm kato. Tā na pa htem jarāhā mẽ inhmyjaja hpānhā mẽ anijê rūm ijaapōj. Tirtūm jamaxpêr xà hkôt. Tām na pre ā mẽ pahte amnhī nhīpêx anhÿr kaxyw ā mẽ panhīpêx anê. Tā mẽ ixpê Pahihti Kris kwÿ hã mẽ inhmyjaja nê mẽ anijaja na pu htem ri ahte papa hkêt nê. Na pu htem xepên kutā pamā xepên hkīnh o papa nê mẽmoj to ax-pên kutā panojarêt o ri papa. Nê xepên to presija ho papa. Na hte mẽ anijaja mẽ amjên o presija ho apa. Nê mẽ amyjaja na ka htem mẽ aprō ho presija ho apa. Tā kêt ka mẽ anijaja mẽ amjên ā apijaàm o ri hkôt apa. ¹³ Jakamā kwa mẽ kot amnhī krā hproja kukamā ajamaxpêr tÿx nê. Xà mẽ anhō krī kamā mėnijaja mẽ mjên ā hpijaàm ā amnhī to amnhīrīt kaxyw amnhī krā hpro nà? Koja mẽ ja kaxyw ā amnhī nhīpêx anhÿr japêr kêt mẽ rī mẽ anoo mã Tirtūm mã amnhī jarênh kaxyw nê kupê xê hkwy ho amnhī krā hprō nê rī kām amnhī jarê. Nom koja mẽ ā amnhī nhīpêx anhÿr kêt nhūm mẽmyjaja tee ri ja hã mẽ omunh nê ho kapêr hkêt japêr hāmri kêt mẽ rī amnhī krā hpro hkêt nê ri pa.

¹⁴ Mě kot mẽ pahte amnhī nhīpêx ā mẽ pahpumunh nê hkīnh kaxyw na pu htem tanhmā amnhī nhīpêx to ho ri papa. Na htem mẽ pahkrā hkī jarênh o: “Koja mẽmyjaja hkrā hkī japjê nê ri pa nê ra kamā omnajti.” Anhÿr jakamā na pa htem amnhī krā hkênh nê ri ixpa. ¹⁵ No mẽ anijaja na htem mẽ ajarênh o: “Mėnijaja na htem hkrā hkī japjê nê ri pa nê kamā muxti.” Anhÿr jakamā na ka htem akrā hkī japjê nê ri apa. Mě akī te kêt mẽ akrā hpro xà pyrāk. Na ka htem ā amnhī nhīpêx anhÿr o apa.

¹⁶ E na pa ra mẽ amā krī hkwy kamā Kris kwÿ nijaja kot mjên ā hpijaàm ā amnhī to amnhīrīt kaxyw tanhmā amnhī nhīpêx to hã mẽ harê. Tā koja mēhō nija tee ri ja ma nhūm ja kêt omnuj japêr. Nhūm amnhī jarênh o:

—Kêt. Kot paj tanhmā inhmā amnhī nhīpêx to hprām xà hkôt tanhmā ri amnhī nhīpêx to ho ri ixpa. Koja inhmjên ja hã ixpumu nê hpijaàm nê rī tām.

Anhÿr ã amnhĩ jarẽ ka mẽ tee ri ã kot amnhĩ jarẽnh anhÿrja ã ama nẽ kãm:

—Kwa nà ã ri ajamaxpër anhÿr kêt nẽ. Na hte Kris kwÿjaja ã hamaxpër anhÿr kêt nẽ. Anẽ.

Jejus tyk mã mẽ pajamaxpër pê tanhmã mẽ pahte amnhĩ to hã mẽ pajarẽnh

Matêwre 26.26-30; Makre 14.22-26; Rukre 22.19-20

¹⁷ Nẽ na ka xep htem Tĩrtũm mã amnhĩ jarẽnh xà hã ixkre hwÿr axpẽn wÿr akuprõ nẽ kamã amnhĩ to mex kêt nẽ. Na ka htem tanhmã amnhĩ tomnuj to pa tee ri mẽ ajarẽnh ma nẽ ixkaprĩ nẽ. Nẽ amnhĩm mẽ amex ã mẽ ajarẽnh kêt nẽ. ¹⁸ Na ka xep htem axpẽn wÿr akuprõ nẽ mẽmoj tã axpẽn mã akir nẽ axpẽn pê angrã. Nẽ ahpÿnhã mẽmoj mã ajamaxpër jao ra mẽ amã axpẽn kĩnh kêt nẽ. Na pa tee ri ã mẽ ajarẽnh anhÿrja ma nẽ ixkaprĩ htÿx nẽ. ¹⁹ Xà na hte Tĩrtũm ahpÿnhã tanhmã mẽ pahte amnhĩ anhĩpêx to hã mẽ pahpumunh kôt kãm mẽ pajapê hkêt ã amnhĩ jarẽ? Nà na hte ã amnhĩ nhĩpêx anhÿr kêt nẽ. Kãm mẽ pajapê ho axpẽn pyrãk kênã.

²⁰ Nẽ na hte Kris kwÿjê piitã tõiã axpẽn wÿr akuprõ nẽ Jesus tyk mã hamaxpër kaxyw pãwti hkwy hku. Tã mẽ kajaja na ka xep htem ja kaxyw axpẽn wÿr akuprõ nom axtem nẽ Jesus tyk mã ajamaxpër pê axãpkur kêt nẽ. Am mẽ axãpkur pix kukamã ajamaxpër nẽ axtem nẽ axãpkur rũnh o akrĩ. ²¹ Jao amnhĩ pix kukamã ajamaxpër. Mẽ akwÿjaja wam mrar nẽ hpõx nẽ mẽ apkur xà hã mẽ hkrĩ xwÿnhjaja na xep htem hkwyjê rom mẽõta pinh pa. Nẽ wĩhtija nhũm mẽ mãânên hpenh pa nẽ axtem nẽ ho xpã. Jakamã nhũm mẽ akwÿjaja kot amnhĩ to hapu nẽ hpõx xwÿnhjaja mẽmojta ã hprãr pa. ²² Kwa mon ka mẽ amã hprãm nẽ anhõrkwy kamã axãpkur kêt nẽ? Mẽ kot Tĩrtũm mã amnhĩ jarẽnh xà hã ixkre kamã na htem apkur rũnh hkêt nẽ. Ka mẽ ã amnhĩ nhĩpêx anẽ nhũm mẽõ hkêt xwÿnhjaja amnhĩ to hapu nẽ mra nẽ mẽõ hã prã nẽ amnhĩ kamã hpjiaãm nẽ. Kwa xà kot pa ã mẽ ate amnhĩ nhĩpêx anhÿr ã mẽ ajarẽnh ma nẽ ixkĩnh nẽ mẽ ate amnhĩ nhĩpêx mex ã mẽ ajarẽ? Nà kot paj ã mẽ ajarẽnh anhÿr kêt nẽ.

²³ Pahihti Jesus na pre ja hã tanhmã inhmã kapër to nẽ inhmã:

—Kêr ka mẽ tõiã axpẽn wÿr akuprõ nẽ axãpkur pê ixtyk mã mãn mẽ ajamaxpër pê ã amnhĩ nhĩpêx anẽ nẽ ã amnhĩ nhĩpêx anẽ. Anẽ.

Jakamã kot paj ixprĩ hã amnhĩ xõ ri mẽ amã kot tanhmã inhmã kapër tota jarẽ ka mẽ inhma. Nà Jesus kormã htyk kêt ri Jut Kariot ra kot pôristi mã hã àm-nênh kaxyw nhũm kamàt nhũm Jesus mẽ ÿ hã mẽ ahkre xwÿnhjê mẽ apkur kaxyw hkrĩ hpa. Hãmri nhũm Jesus pãwti hõ py nẽ o xa ²⁴ nẽ Tĩrtũm mã harẽ nẽ kãm:

—Pa Papaj. Nà ãm hãmri na ka hte mẽ inhmã mẽ inhõ mex o apa. Anẽ.

Nẽ hpãnhã pãwja o hkry pa nẽ ho mẽ kot ÿ hã mẽ ahkre ho mẽ pa xwÿnhjê nhĩpêx pa nẽ mẽ kãm:

—E na pa ã pãwti ho hkry nẽ mẽ amã õr anẽ. Koja mẽ ã inhĩpêx anẽ nẽ te mẽ kot ixto hkry hpar pyrãk o inhĩpêx pa amnhĩ xà htÿx kamã ijamak kãm ty. Nom

mẽ anẽ kot paj ty. Jakamã e kêr ka mẽ ixwakre kamã tõiã axpẽn wÿr akuprõ nẽ ixte mẽ ate amnhĩ tomnuj pãnhã amnhĩrer kaxyw mẽ anẽ ixtyk mã ajamaxpër pê akĩnh nẽ pãwta kur o akrĩ. E mẽ mãmrĩ axãmnhĩx aku. Anẽ.

²⁵ Hãmri nẽ hpãnhã kop kãm wĩhtita py nẽ o xa nẽ mẽ kãm:

—E kop kãm wĩhtija te kêt Tĩrtũm kot mẽ atã amnhĩ jarẽnh nyw xà jarẽnh pyrãk. Ixtyk kukwak ri koja mẽ ato hkra. Kot paj ty nhũm ixkamrõ mẽ anẽ axkapĩ. Jakamã e. Mẽ kopja kamã wĩhti ho akõm o axpẽn nhĩpêx. Nẽ ho akõm pê ixte mẽ anẽ ixtyk mã ajamaxpër. Anẽ.

²⁶ Tã ã kot amnhĩ jarẽnh anhÿr jakamã na pu htem axpẽn wÿr akuprõ nẽ pãwti hkwy hku nẽ mẽmo kagõ hkwy o ixkõ. Nẽ ho pahkõm pê axpẽn mã Jesus tyk jarẽnh o pahkrĩ. Tã kêr pu mẽ arĩ ã amnhĩ nhĩpêx anhÿr o ri papa rãhã nhũm Jesus akupÿn mẽ pahwÿr wrÿ.

²⁷ Jakamã kot kaj mẽ tõiã mẽmo arĩgro hã kot mẽ panẽ htykja mã ajamaxpër kaxyw axpẽn wÿr akuprõ. Hãmri nhũm mẽ anhĩõ mẽ awÿr axã nẽ nhÿ. Nom axtem nẽ Jesus tyk mã hamaxpër kêt japêr. Nẽ htÿx pãwti kur o nhÿ. Nẽ hkõt amarĩ mẽmo kagõ ho hkõm o nhÿ. Koja ã htyk mã hamaxpër kêt rãhã amnhĩ nhĩpêx anẽ nẽ te Jesus o kapër pyrãk o amnhĩ nhĩpêx. Te ho kapër o:

—Nà Jesus amarĩ htyk nhũm hkamrõ amarĩ hpikapĩr kênã. Na pre mẽ panẽ htyk kêt nẽ.

Anhÿr o ho kapër pyrãk. ²⁸ Jakamã kwa kêr ka mẽ ate pãwta kur kaxyw nẽ taxy kormã tanhmã ate amnhĩ nhĩpêx to mã ajamaxpër nẽ ajamaxpër o:

—Kwa mãn pa Tĩrtũm kapër kôt amnhĩ nhĩpêx mex rãhã ho ri ixpa nà?

Anhÿr o mãn ajamaxpër. Hãmri nẽ ate hkõt amnhĩ nhĩpêx mex ã amnhĩ pumu nẽ amarĩ axãmnhĩx aku. No kot ka mẽ kormã mẽmoj punuj kaga hkêt nẽ arĩ ri ho anhÿr o pa hãmri nẽ kãm ajamaxpër nẽ hkur kêt nẽ. Rÿ tanhmãn tee ri tanhmã ate amnhĩ tomnuj tota mã ajamaxpër nẽ akaprĩ nẽ. Hãmri nẽ tokyx Tĩrtũm mã amnhĩ jarẽ nẽ amnhĩ to mex prãm xàj amnhĩ to awÿ hãmri nẽ arĩ kormã axãmnhĩx pãwtita ku. ²⁹ Koja mẽhõ mẽ akõt axã nẽ mẽmoj kukamã hamaxpër pê htÿx pãwti nhĩrênhta õ py hkur o nhÿ. Hãmri nhũm Tĩrtũm tee ri ja hã omu nẽ hã tanhmã ho. ³⁰ Na ka mẽ ra axohtõ nẽ ã amnhĩ nhĩpêx anẽ nẽ atÿx ri mẽmoj kukamã ajamaxpër pê pãwta ku. Jesus kot mẽ panẽ htykja mã ajamaxpër kêt pê atÿx tanhmã ajamaxpër to pê hkwy hkur o akrĩ. Mÿrapê na ka mẽ ra ja hã axã nẽ ri apa. Nẽ mẽ akwÿjaja ra htyk rax nẽ. ³¹ Nom kot ka mẽ axpẽn wÿr akuprõ hãmri nẽ akupÿm tãm axpẽn kôt ajamaxpër nẽ axpẽn kôt amnhĩ nhĩpêx nẽ rĩ kormã pãwtita ku. Hãmri nhũm Tĩrtũm ja hã mẽ apumu nẽ tanhmã mẽ ato hkêt nẽ. ³² Na hte mẽ pahte tanhmã amnhĩ tomnuj to hã mẽ pahpumu nẽ hã tanhmã mẽ pahto. Mẽ pahte ja hã amnhĩ pumunh nẽ axte ã amnhĩ nhĩpêx anhÿr kêt kaxyw na hte ã mẽ pahpê hkrajê nhĩpêx anẽ. Jakamã kot puj mẽ nhÿrmã mẽ kêt hkra hkêt xwÿnhjê hkõt kuwyta wÿr ma papa hkêt nẽ.

³³ Jakamã e Kris kôt ixtõ në ixtõxjaja. Kêr ka mẽ axte Pahihti Jejus tyk mã ajamxpêr kaxyw axpên wýr akuprõ. Hãmri në ra axpên wýr apikuprõnh pa hã axpên pumu në rĩ kormã pãwti hkwy hku në hkur pê Jejus kot mẽ panê htyk mã ajamxpêr o akrĩ. ³⁴ Nê ka mẽ atõ ra amã prãm japêr në anhõrkwý kamã apku në rĩ kormã mẽ hkõt tẽ. Jao ra anhõhy htu në ajamakêtkati në akwýjê jamãr o nhý. Kê mẽ hpõx pa ka mẽ atixpi në Pahihti Jejus tyk mã ajamxpêr pê hkur o akrĩ. Hãmri nhũm Tirtũm ja hã mẽ apumu në hkĩnh në tanhmã mẽ ato hkêt në.

Na ka prem mẽ ate inhmã kagà në mênhta kamã mẽmoj tã ixkukjêr rax në. Tã na pa ra kagà ja kamã mẽ amã hkwy jarênh rax në. Nom kot paj piitã harênh par kêt në. Kot paj ãm mẽ amã hkwy pix jarê. Hãmri në nhýrmã ma mẽ awýr mõ mẽ apumu në kormã axte mẽ amã harênh jatur xãm kumẽ.

Mẽ kot Tirtũm kapêr o hêx xwýnhjê jarênh

Rõmãn 12.6-8; Wam Korīt 14.29; Wam Pêtre 4.10-11; Wam Juãw 4.1-2

12 Nê kot paj hpãnhã mẽ amã tanhmã Tirtũm Karõ jarênh to ka mẽ inhma. Tanhmã kot mẽ pahkrã hto nhũm mẽ pahte ahpýnhã tanhmã kãm amnhĩ nhĩpêx to ho papaja kot paj mẽ amã harẽ. ² Amnepê mã kormã mẽ ate Kris kôt amnhĩ xunhwýr kêt ri na ka prem sãnti hkõt ri amnhĩ nhĩpêx o ri apa. Kapêr kêt tã ka prem hkõt ri amnhĩ nhĩpêx rãhã ho ri apa. Te kot mẽ ano kupyrr pyrãk ka mẽ kãm mex o mex ã harênh o ri apa. Nê kãm amnhĩ jagrer pê amnhĩ to hwýr o ri apa. ã na ka prem amnhĩ nhĩpêx anhýr o ri apa. ³ Tã ra hpãnhã Tirtũm kôt amnhĩ xunhwý.

Na htem ohtõ në Tirtũm nhý hã kapêr jarênh o pa hã amnhĩ jarênh tã no ãm mẽ hkwyjaja ja hã amnhĩ to hêx. Tã kot paj ixprĩ hã mẽ amã tanhmã mẽ harênh to. Koja mẽhõ mẽ kãm Tirtũm nhý hã kapêr jarênh o pa hã amnhĩ jarê hã koja Jejus o kapêr punuj o pa hkêt në. Koja harênh o:

—Jesús kêp mẽ panhõ Pahihti jakamã kwa pu mẽ hkõt amnhĩ xunhwý në hkõt amnhĩ nhĩpêx o ri papa.

Anhýr o harẽ. Koja mẽhõ ã mẽ amã kapêr anê ka mẽ ama në mẽ kot Tirtũm nhý hã kapêr jarênh o pa xwýnh ã omunh kurê kumrêx. No koja mẽ amã ã kapêr anhýr kêt në ka mẽ ama në Tirtũm kapêr o hêx o pa hã omunh kurê kumrêx.

Tirtũm Karõ kãm mẽ pahte axpên to mex prãm ã harênh

Rõmãn 12.6; Epes 4.7; Wam Pêtre 4.10

⁴ Nê ahpýnhã kot tanhmã mẽ panhĩpêx to xwýnhja ãm pixii. Kêp Tirtũm Karõ. Na hte mẽ pahkarõ mã agjê në ahpýnhã tanhmã mẽ pahte axpên to mex kaxyw tanhmã mẽ panhĩpêx to. Kot tanhmã mẽ panhĩpêx to xàja ohtõ. Mẽ pahte ahpýnhã ri tanhmã kãm amnhĩ nhĩpêx to në tanhmã axpên to mex to ho ri papa kaxyw na. Tirtũm Karõ na hte ja kaxyw tanhmã mẽ pahkrã hto.

⁵ Nê mẽ pahte kãm tanhmã amnhĩ nhĩpêx to ho papa xwýnhja haxwýja ãm pixii. Kêp Pahihti Jejus. Tã na pu htem ahpýnhã kãm tanhmã amnhĩ nhĩpêx to ho ri papa.

⁶ Nê kot mẽ pahto ajuta nhũm mẽ pahte ahpýnhã tanhmã axpên to mex to ho papa xwýnhja haxwýja ãm pyxii. Kêp Tirtũm. Na pu htem ahpýnhã tanhmã hkõt axpên xunhwýr týx to kaxyw tanhmã axpên to mex to ho papa.

⁷ Nê Karõja na hte ahpýnhã tanhmã axpên kaxyw mẽ panhĩpêx to pu mẽ axpên to ajuta mex o ri papa.

⁸ Jakamã na pu hte mẽ pahkwýjaja Tirtũm Karõ nhý hã ma mẽ pahkwýjê mã Tirtũm kapêr jarênh o ri mẽ hkõt papa.

Nê mẽ pahkwýjaja ma ý hã paxãhpumunh mex pê ma ri kapêr o mẽ ahkre ho mẽ hkõt papa.

⁹ Nê mẽ pahkwýjaja Karõ nhý hã Tirtũm kot tanhmã mẽ pahto ajuta hto kaxyw hkõt pajamxpêr týx në. Nê mẽ pahkwýjaja akupým mẽ ã xwýnhjê ho mex o papa nhũm mẽ akupým mex në pa.

¹⁰ Nê mẽ pahkwýjaja aa mẽ kot mẽmoj pumunh kêt kwý ho anhýr o ri mẽ hkõt papa.

Nê mẽ pahkwýjaja Tirtũm kapêr mar týx në ô ri mẽ kãm harênh o mẽ hkõt ri papa.

Nê mẽ pahkwýjaja Tirtũm Karõ nhý hã tanhmã mẽ kot amnhĩ nhĩpêx to hã mẽ omunh o papa. Rý pahprĩ hã mẽkarõmnuti nhý hã mẽ kot amnhĩ nhĩpêx ã mẽ omunh o papa.

Nê mẽ pahkwýjaja nhãm mẽ kapêr mar kêt tã ra mẽ kapêr o pakapêr.

Nê mẽ pahkwýjaja mẽ kapêr o pakapêrja ma në mẽ kot mar kêt xwýnhjê mã harẽ. Kormã aa pahte mar kêt tã ra pahprĩ hã mar mex në mẽ kãm harẽ.

¹¹ ã na hte Tirtũm Karõ kãm hprãm xà hkõt tanhmã mẽ panhĩpêx to pu mẽ ahpýnhã ý hã ã axpên nhĩpêx anhýr o ri axpên kôt papa.

Te mẽ pahpê Kris nhĩ pyrãk ã mẽ pajarênh

Rõmãn 12.3-8; Epes 1.22-23, 4.11-16; Korosê 3.15

¹² E pa hpãnhã mẽ amã mẽ panhĩ kamã tanhmã mẽmoj jarênh to ka mẽ inhma në hã anohtýx në. Mẽ panhĩja ãm pixi htã no ãm kamã mẽmoj xohtõ. Kamã mẽ pahte në kamã mẽ pahpa në kamã mẽ pajakwa. Nê mẽ panhĩnhu në mẽ pano. ã mẽ panhĩ kamã mẽmoj xohtõ kot anhýr. Ja pyrã në Kris nhĩja ãm pixi htã te mẽ pahpê ý kamã mẽmoj xohtõta pyrãk. Mẽ pahkwýjaja te mẽ pahpê hte pyrãk. Nê mẽ pahkwýjaja te mẽ pahpê ãhkra pyrãk. Nê mẽ pahkwýjaja te mẽ pahpê no pyrãk.

¹³ Mẽ pahpê Kris kwýjaja axpên kaxyw mẽ paxohtõ. Mẽ ixpê Ijaewjaja në mẽ apê Ijaew kêt xwýnhjaja. Nê amarĩ ri mẽ kãm mẽ axapênh o mẽ apa xwýnhjaja në amnhĩ mã ri mẽ axapênh o mẽ apa xwýnhjaja. ã ahpýnhã mẽ paxohtõ kot anhýr tã nhũm Tirtũm Karõ te mẽ pahpê Kris nhĩ pixi pyrãk o mẽ panhĩpêx. Nhũm Krisja mẽ pahpiitã mẽ pamã Karõ gõ nhũm mẽ pahkarõ mã agjê. Pixi htã mẽ pahpiitã mẽ pahkarõ mã agjê.

¹⁴ Nē mẽ panhīja pixi tā kamā tanhmā mẽ pakute xà-ja ohtôô. Tã Kris nhīja te kot mẽ panhīja pyrāk. Urāk nē kamā mẽ paxohtôô. Jakamā na pu htem ahpýnhã tanhmā kãm amnhī nhīpêx to ho ri papa. Karô kot tanhmā amnhī kaxyw mẽ panhīpêx to xà hkôt.

¹⁵ Nē kop âm mẽ pahparja kapêr ronhýx tee ri mẽ panhīhkra pumu nē amnhī mã:

—Hêxta waa nē. Kêp âm ixpê mẽ ĩhkra ronhýx pa inhmex nē ijarir. No âm ixpê mẽ hpar pix jakamã pêr âm mẽ hkĩnhã ixpê mẽ hkwý hkêt âm ixpê mẽ hatur xà pix na pa.

Anhýr o amnhī jarênh japêr. Nom ja kot anhýr kêt. Axtem nhýhým kot mẽ pahto pa kaxyw na mẽ pahparja. Nē axtem mẽmoj tã mẽ paxápênh rý mẽmoj jamýnh kaxyw na mẽ panhīhkraja. Na pu htem hamẽ wa ho presija rãhã ho papa. Ja pyrã nē kot puj mẽ pahkwýjê hõ mẽ parom Tĩrtũm Karô nhý hã mẽmoj tã àpênh týx ã omu nē hkĩnhã mẽ pahte amnhī to warê hkêt ã amnhī jarênh o papa hkêt nē.

¹⁶ Nē mẽ pajamakja kapêr ronhýx kapêr o:

—Hêxta waa nē. Kêp apu ixpê mẽ no ronhýx pa inhmex nē ijarir. No âm ixpê mẽ umar xà pix jakamã pêr âm ixte ho warê hkêt kumrêx.

Anhýr o amnhī jarênh japêr. Nom ja kot anhýr kêt. Hamẽ wa mex kênã. Axtem ho mẽ paxumar kaxyw na mẽ pajamakja. Nē axtem ho mẽ parĩt kaxyw na mẽ panoja. ¹⁷ Kêp âm mẽ pano pix ronhýx pu mẽ parĩt pix nē paxumar kêt nē ri papa. Rý kêp âm pajamak pix ronhýx pu mẽ paxumar pix nē parĩt kêt nē mẽ paxupâr kêt nē ri papa. ¹⁸ Mẽ panhīja pixi htã kamã hikukrêx xohtôô. Na pre Tĩrtũm amnhī krã hkôt kamã mẽmoj piitã hipêx nē hanhõ. ¹⁹ Kêp âm mẽ panhīja kamã âm mẽmoj pixi ronhýx pu mẽ pamex kêt nē papa. ²⁰ Tã no âm kot anhýr kêt. Mẽ panhīja âm pixi htã kamã hikukrêx xohtôô. ²¹ Jakamã na hte mẽ panoja amnhī nē mẽ panhīhkra mã kãm:

—Tk kwa ma tẽ. Ixte ato presijare hã.

Anhýr o kãm kapêr kêt nē. Rý mẽ pahkrãja amnhī nē mẽ pahpar mã kãm:

—Tk kwa ma tẽ. Na pa ato presija hkêt nē.

Anhýr o kãm kapêr kêt nē. Ja pyrã nē kot puj mẽ nhýri Kris kôt panhīõ pumu nē pamex o pahte hakrenh ã amnhī jarênh kêt nē. ²² Nē mẽ panhī kamã mẽmoj kwý te hirerek pyrãk tã no pu mẽ arĩ pamã hapê nē. Ja pyrã nē kêr pu mẽ kormã mẽ kot Kris kôt amnhī xunhwýr tohtuj anhýr xwýnhjaja pu mẽ pamã mẽ hkĩnh kãm tanhmã mẽ kutã panojarêt to ho ri papa.

²³ Nē na pu htem mẽ panhī kamã mẽ pakukrêx kwý hã pahpijaàm nē hpro nē ri ho papa. Nē hkwý hã pahpijaàm kêt nē hpro hkêt nē ho ri papa. Nē hkwý mẽ pahpê omnajti htã pu mẽ ho mex nē ri ho papa. Tĩrtũm kot ã mẽ panhīpêx anhýr jakamã na pu htem mẽ pakamã mẽ pakukrêx kwý mẽ pahpê omnajti htã pu mẽ ho mex nē ri ho papa. Ja pyrã nē kêr pu mẽ Tĩrtũm kôt mẽ pahtõ nē mẽ pahtõx piitã ho mex o ri papa. Nē tãm mẽ hipêx. Mẽ pahkwýjaja muxre nē mẽ pahkwýjaja omnajti htãã. Tanhmã mẽ kute htã pu mẽ

kêp mẽ Jejus kôt mẽ pahtõ nē mẽ pahtõx ã mẽ ho mex o ri apa.

²⁵ Nē na hte mẽ panhī kamã mẽ pahpar nē mẽ panhīhkra nē piitã axpên kôt àpênh mex o pa. No na hte mẽ pahparja nhýhým ma mra nhũm ihõja hkwým nhýhým ma mrar kêt nē. Na hte wa axpên kôt àpênh mex o pa. Ja pyrã nē kêr pu mẽ pahpê Tĩrtũm krajaja axpên kôt amnhī nhīpêx rãhã ho ri papa. Nē axpên to mex rãhã ho ri papa. No ri axpên kwým ri tanhmã amnhī nhīpêx to ho ri papa hkêt nē.

²⁶ Na pu htem tõhã nhýhýnh panhī kamã paxà nē ri papa. Pahkrã tãtãk rý pakatut gêk. Jao te mẽ panhī piitã kamã mẽ paxà pyrãk. Nē nhýhýnh akupým pamex nē te panhī piitã hkôt akupým pamex pyrãk. Ja pyrã nē koja Kris kôt panhīõ nhýhýnh ã nē ri pa. Rý tanhmã amnhī to nē ra hkaprĩ nē ri pa pu mẽ ja hã omu nē ý hã pahkaprĩ nē papa. No koja mẽmoj tã hkĩnh nē pa pu mẽ ja hã omu nē ý hã pahkĩnh nē papa.

Te mẽ pahpê Kris nhī pixi pyrãk ã mẽ pa jarênh

²⁷ Nē mẽ pahpê Kris kwýjaja te mẽ pahpê Kris nhī pixi pyrãk. Ahpýnhã mẽ pahte tanhmã amnhī nhīpêx to ho papa htã mẽ pahpê Kris kwý jakamã te mẽ pahpê ĩ pixi pyrãk.

²⁸ Nē mẽ pahte Kris kôt tanhmã pahkwýjê ho ajuta hto ho papa kaxyw na pre Kris ahpýnhã tanhmã mẽ paxunhwýr to.

Mẽ pahkwýjaja mẽ pahte ý hã nhãm mẽ kãm kapêr jarênh o papa kaxyw mẽ paxunhwý.

Nē mẽ pahkwýjaja mẽ pahte ý hã tanhmã kapêr jarênh to ho ri papa kaxyw mẽ paxunhwý.

Nē mẽ pahkwýjaja Tĩrtũm kapêr jarênh o mẽ ahkre ho ri mẽ papa kaxyw mẽ paxunhwý.

Nē mẽ pahkwýjaja mẽ pahte aa mẽ kot mẽmoj pumunh kêt kwý ho anhýr o ri papa kaxyw mẽ pa xunhwý.

Nē mẽ pahkwýjaja akupým mẽ à xwýnhjê ho mex o mẽ papa kaxyw mẽ pa xunhwý.

Nē mẽ pahkwýjaja mẽ kapêr o mẽ hihtýx o mẽ papa kaxyw mẽ pa xunhwý.

Nē mẽ pahkwýjaja mẽ pahte tanhmã mẽ ho ajuta ho ho ri papa kaxyw mẽ pa xunhwý.

Nē mẽ pahkwýjaja nhãm mẽ kapêr õ ho mẽ pakapêr o mẽ papa kaxyw mẽ pa xunhwý.

Ã na pre ahpýnhã mẽ pahpê hkwýjê piitã mẽ paxunhwýr anê. ²⁹ No na pu htem pahpiitã axpên kôt Tĩrtũm kapêr o mẽ ahkre ho ri papa hkêt nē.

Nē mẽ pahpiitã ý hã tanhmã pakapêr to ho ri papa hkêt nē.

Nē mẽ pahpiitã kapêr jarênh o ri papa hkêt nē.

Nē mẽ pahpiitã aa mẽ kot mẽmoj pumunh kêt kwý ho anhýr o ri papa hkêt nē.

³⁰ Nē mẽ pahpiitã akupým mẽ à xwýnhjê ho mex o ri papa hkêt nē.

Nē mẽ pahpiitã mẽ kapêr õ ho ri pakapêr o ri papa hkêt nē.

Nē mẽ pahpiitã ri mẽ kapêrja ma nē pakapêr kãm pahkwýjê mã harênh o ri papa hkêt nē.

Na pu htem ahpŷnhā tanhmā Kris kôt mě pahkwŷjê ho ajuta hto ho ri papa. ³¹ Tā kêr pu mě pahpiitā pamā axpên kĭnh pê tanhmā axpên to mex to ho ri papa. Ja na mex o kot měmoj piitā hakrenh par. E kot paj ixprĭ hā tanhmā mě amā ja jarênh to ka mě inhma.

Mě pahte axpên kamā paxukapřĭ ho papa hā mě pamā karō

Juāw 13.31-35; Karatas 5.13-15; Korosē 3.12-14

13 Kot pa ma mě piitā ahpŷnhā mě kapêr kām mě kām Tĭrtŭm kapêr jarênh o ri ixpa japêr. Ām mě piitā mě kapêr o ixkapêr mex o mě kām harênh o ri ixpa japêr. Nê Tĭrtŭm kapêr o mě wrŷk xwŷnhjê kapêr o mě ahkre ho ri ixkwŷjê hkôt ixpa japêr. Tā inhma mě hkĭnh kêt kām ixte mě ahkre ho ri ixpa ronhŷx mě inhma nê ām inhma. Nhŭm ixkapêrja te ixte rat tatak pyrāk o pa tee ri Tĭrtŭm kapêr o mě ahkre kaprŷ ho ri mě hkôt ixpa nhŭm Tĭrtŭm tee ri inhma mě hkĭnh kêt ā ixpumu nê inhma:

—Nā amā mě hkĭnh kêt jakamā na ka tee ri ixkapêr o mě ahkre kaprŷ. Anê.

² Rŷ kot paj Tĭrtŭm xāhpumunh tŷx o mě kām kapêr pimxur kwŷ jarênh o ri ixpa japêr. Rŷ Tĭrtŭm mě kurom inhma měmoj to amnhĭřĭt pa omu nê mě kām harênh o ri ixpa japêr. Rŷ pa Tĭrtŭm kot amnhĭ nhĭpêx piitā omunh par japêr. Rŷ ixte amnhĭ kaxyw hkôt ijamaxpêr tŷx kôt ŷ hā kĕn krā hprêk ō mā ixkapêr nhŭm kot inhmar nê inhmar xā hkôt nhām pikamênh japêr. Tā inhma ixkwŷjê hkĭnh kêt kām ā amnhĭ nhĭpêx anê nhŭm Tĭrtŭm tee ri ja hā ixpumu nê inhma:

—Nā amā mě hkĭnh kêt jakamā te axāhpumunh tŷx kêt kumrêx pyrāk. Na ka tee ri ā mě kām ixkapêr jarênh anhŷr o ri apa kaprŷ. Anê.

³ Rŷ pa mě kêp amrakati xwŷnhjê mā ixkukrêx nhŏr par japêr. Rŷ Kris ā mě kām amnhĭ grŏnh kôt mě kām xa nhŭm mě hā ixprĭ japêr. Tā inhma mě hkĭnh kêt kām ā amnhĭ nhĭpêx anê nhŭm Tĭrtŭm tee ri ja hā ixpumu nê inhma:

—Nā ā ate mě kām amnhĭ nhĭpêx anhŷr o ri apa htā amā mě hkĭnh kêt jakamā na ka tee ri ā mě kām amnhĭ nhĭpêx anhŷr kaprŷ. Anê.

⁴ Kot puj mě pamā axpên kĭnh hā kot puj mě kritpêm mě piitā mě kām pahprĭ ho papa.

Jao axpên kām pagryk tokyx anhŷr kêt nê.

Nê pamā axpên to mex pix prām.

Nê měmoj tā axpên kamā pagryk kurê kumrêx kêt nê.

Nê měmoj tā amnhĭ to jarkrar o ri papa hkêt nê.

Kot puj mě pamā axpên kĭnh hā kot puj mě ā amnhĭ nhĭpêx anhŷr o ri papa hkêt nê.

⁵ Nê kot puj mě axpên kamā paxukapřĭ ho papa hā kot puj mě tām axpên nhĭpêx rāhā ho papa. Jao amnhĭ pix kukamā pajamaxpêr o ri papa hkêt nê. Nê mě pagryk tokyx anhŷr kêt nê. Rŷ axpên kām pagryk tokyx anhŷr hkêt nê. Rŷ koja mēhŏ tanhmā mě panhĭpêx kati hto pu mě ām amnhĭ tā omu nê axte kot tanhmā mě panhĭpêx tota mā pajamaxpêr kêt nê.

⁶ Nê kot puj mě pamā axpên kĭnh o papa hā kot puj mě tee ri mēhŏ kot tanhmā amnhĭ tomnuj to hā omu

nê pahkapřĭ nê. Rŷ tanhmā kot amnhĭ to mex to hā omu nê pahkĭnh nê.

⁷ Nê kot puj mě pamā axpên kĭnh o papa hā kot puj mě arĭ Tĭrtŭm kot mě pahto mex par jatur xā mēnh xā hā arĭgro jamār rāhā ho ri papa. Nê mě kot Kris ā tanhmā mě pahto htā pu mě tee ri amnhĭ kukamā tanhmā pajamaxpêr to hkêt nê. Ām mě kutā amnhĭ to htŷx nê mě kām pakuhê nê arĭ amnhĭ kaxyw Tĭrtŭm mā pajamaxpêr tŷx rāhā nê.

⁸ Nê kot puj mě pamā axpên kĭnh o papa hāmri nê aa mě pahte ā amnhĭ nhĭpêx anhŷrja mā panhŷrer kêt nê. Nê arĭ mě pamā axpên kĭnh rāhā ho papa ho papa. Jar pika ja kamā mě pahte Tĭrtŭm nhŷ hā mě kām kapêr jarênh o ri papa htā kot puj mě nhŷrmā ma ō krĭ hwŷr api hāmri nê kuri axte ā kām amnhĭ nhĭpêx anhŷr kêt nê. Mo kaxyw kot puj mě axte ri mēhŏ mā kapêr jarê? Kot puj mě ō krĭ hwŷr api nê ra mě pahpiitā paxāhpumunh o axpên pyrāk.

Nê na pu htem tŏhā mě kapêr ō ho pakapêr o ri papa. Nom kot puj mě nhŷrmā Tĭrtŭm nhŏ krĭ hwŷr api hāmri nê kuri axte nhām ri mě kapêr o pakapêr kêt nê.

Nê na pu htem jar mě pahkwŷjaja mě paxāhpumunh mex kôt Tĭrtŭm kapêr jarênh o ri papa. Tā kot puj mě nhŷrmā ō krĭ hwŷr api hāmri nê axte ā amnhĭ nhĭpêx anhŷr kêt nê. Ām mě pamā axpên kĭnh pixja kot puj mě arĭ ō krĭ kamā mě pamā axpên kĭnh tŭm rāhā papa ho papa. ⁹ Jar mě pahpiitā mě paxāhpumunh tohtuj anhŷr o pakapêr jakamā na pu htem kormā Tĭrtŭm kapêr jarênh tohtuj anhŷr o ri papa. ¹⁰ Tā kot puj mě nhŷrmā ō krĭ hwŷr api nê kuri paxāhpumunh jatur xām mēnh pa. Jakamā nhŭm jar mě paxāhpumunh tohtuj anhŷr xwŷnhta mě pahpê hapêx.

¹¹ E pa mě amā ja hā ejêp jarê ka mě inhma. Nā amnepê mā ixprĭre ri na pa pre ixtŷx ri mēhprĭjê kot amnhĭ nhĭpêx o amnhĭ nhĭpêx nê mě hamaxpêr o ijamaxpêr. Nê mě kapêr mex kêt o ixkapêr o ri ixpa. Tā ra ixāptār hāmri nê mě āptārjê jamaxpêr o ijamaxpêr o ri ixpa. Te ra mě pahte kaxkwa kamā mě paxāhpumunh jatur xām mēnh parta pyrāk mě aptārjê jamaxpêr o ijamaxpêr o ri ixpa.

¹² Ja pyrā nê na pu htem kormā Tĭrtŭm kot amnhĭ nhĭpêx ā omunh tohtuj anhŷr. Te mě pahte amnhĭ pumunh xā pynajre kamā pahprĭ hā amnhĭ pumunh mex kêeta pyrāk. Nom kot puj mě nhŷrmā ō krĭ hwŷr api hāmri nê pahprĭ hā paxāhpumunh jatur xām kumê. Te Tĭrtŭm kot hprĭ hā tanhmā mě pakute hā mě pahpumunh parja pyrāk.

¹³ E arĭ mě pahte Tĭrtŭm kôt amnhĭ nhĭpêx o papa xā-ja na axkrunêpxi. Mě pahte hkôt amnhĭ nhĭpêx o papa rāhā ho papa kaxyw. Wamta na ja: Kêr pu mě arĭ amnhĭ kaxyw Tĭrtŭm mā pajamaxpêr mex rāhā ho ri papa. Nê hkôt ja: Kêr pu mě arĭ Tĭrtŭm kot mě pahto mex par jatur xā mēnh xā hā arĭgro jamār rāhā ho papa. Nê hkôt ja: Kêr pu mě arĭ pamā axpên kĭnh pê tanhmā axpên to mex to rāhā ho papa. Ja na mex o kot wamta wa hakrenh. E kêr pu mě ā amnhĭ nhĭpêx anhŷr rāhā ho ri papa.

Tirtūm Karō kot mẽ pahto mẽ paxihtỳx ã harēnh

Wam Korīt 12.7-11, 12.27-31

14 E kêr ka mẽ arĩ amã axpēn kĩnh pê axpēn to mex rãhã ho ri apa nẽ aa jam anhũrer nẽ ho ajamakêtkati hkêt nẽ. Nẽ amnhĩ to Tirtūm Karō mãn amnhĩ to awỳ kê mẽ amã tanhmã mẽ ajamaxpēr to ka mẽ ahpỳnhã tanhmã axpēn to mex to ho ri axpēn kôt apa. Nẽ kêr ka mẽ ã ajamaxpēr anẽ nẽ ajamaxpēr o:

—Inhmã mẽ hkĩnh o ri ixpa hprãm tỳx. Nẽ Tirtūm Karō kot tanhmã ixto nhũm ixte ahpỳnhã tanhmã mẽ ho ajuta hto ho ixpaja pa määnēn inhmã ho anhỹr prãm. Nẽ kot tanhmã ijakwa hto nhũm ixte ahpỳnhã mẽ kapēr õ ho ixkapērja pa määnēn inhmã ho anhỹr hprãm. No kêt ixte Tirtūm nhỹ hã mẽ kãm kapēr jarēnhja na inhmã ho anhỹr prãm tỳx kumrēx. Anẽ.

² Mẽ pakamã mẽ kapēr õ ho Tirtūm mã kapēr xwỳnhjaja na htem Tirtūm Karō nhỹ hã ãm kumã pix mã kapēr õta o kãm kapēr nhũm tapxipix mẽ kuma. No mẽ papajaja na pu htem tee ri mar o pahkrĩ nom mar kêt nẽ. ãm kapēr xwỳnhhta pix koja mẽ pakurom amnhĩ ma. Nom koja mẽ pakapēr kãm Tirtūm mã amnhĩ jarē pu mẽ mar mex nẽ. Nhũm mẽ pakapēr kãm Tirtūm nhỹ hã mẽ pamã kapēr jarē pu mẽ pahprĩ hã kuma. Jao mẽ pamã kapēr kôt amnhĩ nhĩpēx prãm nẽ. Nẽ mẽmo tã pahkaprĩ nẽ ri papa htã mẽ kuma nẽ amnhĩ kaxwỳnh kãm amnhĩ to paxihtỳx.

⁵ Mẽ apiitã mẽ ate nhãm mẽ kapēr õ ho Tirtūm mã amnhĩ jarēnhja na mex. Nom mẽ ate mẽ akapēr o mẽ akwỳjê mã Tirtūm kapēr jarēnh o ri mẽ apaja na mex o wamta jakre. Kot ka mẽ nhãm mẽ kapēr õ ho Tirtūm mã amnhĩ jarē nhũm mẽ akwỳjaja mẽ amar kêt jakamã ka mẽ ã akapēr anhỹrja o Kris kôt mẽ ho mẽ hamaxpēr o hihtỳx kêt nẽ. ãm kapxipix amnhĩ ma. Rỳ koja kapēr õja mar mex xwỳnhjê hõ amar japēr nẽ mẽ akapēr kãm akwỳjê mã harẽ. Hã koja ja mex nẽ. Nom kot kaj mẽ apiitã ma mẽ kapēr kãm mẽ kãm Tirtūm kapēr jarēnh o ri apa nhũm mẽ piitã hprĩ hã amar mex nẽ. Nẽ amar xà hkôt Tirtūm kapēr kôt amnhĩ nhĩpēx mex nẽ. ⁶ Jakamã e Kris kôt ixtõ nẽ ixtõxjaja. Kot paj apu nhỹrmã ma mẽ awỳr mõ hãmri nẽ nhãm mẽ kapēr õ ho mẽ amã ixkapēr japēr ka mẽ inhmar kêt nẽ. Nom kot paj mẽ akapēr o mẽ amã ixkapēr ka mẽ apiitã aprĩ hã inhmar mex nẽ. Pa Tirtūm nhỹ hã mẽ amã mẽmoj jarē rỳ tanhmã kot amnhĩ nhĩpēx toja pa mẽ amã harẽ. Rỳ Karō nhỹ hã mẽ amã mẽmoj jarēnh o ã mẽ amã Tirtūm kapēr jarēnh anẽ ka mẽ aprĩ hã inhmar mex nẽ. ⁷ Nom mẽ kapēr õ ho mẽ kapēr o mẽ akôt ri mẽ pa xwỳnhjaja te mẽhõ kot htỳx ri wiorãwti kakrēnh xwỳnh pyrãk. Koja htỳx ri hkakrēnh o xa nhũm mẽ tee ri kot grer mar mã. Rỳ nhũm mẽhõ htỳx ri pifti kakôr o xa nhũm mẽ tee ri mẽmo mẽ grer mar mã.

⁸ Pôristijaja na htem amarĩ ri tanhmã amnhĩ nhĩpēx to ho pa nhũm mẽ hkrãhtũmja mẽ kãm pifti kakô nhũm mẽ kuma nẽ mẽ pijapu mã hamaxpēr kurê kumrēx nẽ hwỳr hprõt. Nom koja kawax pê hkakô rỳ htỳx ri tanhmã hkakôr to nhũm mẽ kuma nẽ ãm ku-

ma. ⁹ Ja pyrã nẽ kot kaj mẽ kapēr õ ho akwỳjê mã akapēr nhũm mẽ ama nẽ ãm mẽ ama. Ka te ãm mẽ kãm ajakwa momok pyrãk o axãm o amnhĩ nhĩpēx.

¹⁰ Nẽ ahpỳnhã mẽ pakapēr xohtõ. Na htem ahpỳnhã mẽ kapēr o amnhĩ kwỳjê mã kapēr nẽ axpēn mar mex nẽ. ¹¹ Nom koja mẽhõ nhỹhỹnh pika hõ rũm ixwỳr mõ nẽ mẽ kapēr o inhmã kapēr pa mar kêt nẽ. Nẽ amnhĩ xwar kutã ixkapēr o kãm ixkapēr nhũm ixpyrã nẽ inhmar kêt nẽ. ¹² Jakamã kot kaj mẽ amã Tirtūm Karō xihtỳx xà ho amã tanhmã kãm amnhĩ nhĩpēx to ho apa hprãm hã kot kaj mẽ amnhĩ to awỳ nẽ kãm:

—Kwa amnhĩ kôt ijamaxpēr o axihtỳx Tirtūm. Pa anhỹ hã ixkapēr o ma Kris kôt ixkwỳjê ho mẽ hamaxpēr o ixihtỳx o ri mẽ hkôt ixpa. Kê mẽ akapēr ma nẽ Kris kôt amnhĩ xunhwỳr tỳx nẽ. Nẽ hkôt amnhĩ nhĩpēx mex o ri pa. Anẽ.

¹³ Nẽ kêr ka mẽ nhãm mẽ kapēr õ ho Tirtūm mã amnhĩ jarēnh xwỳnhjaja amnhĩ to Tirtūm Karō wỳ nẽ kãm:

—Ixte mẽ kapēr õ ho ixkapēr tã ixte amnhĩ mar kêt. Jakamã kwa tanhmã ixto ijamaxpēr mex to pa amnhĩ mar mex nẽ ixkapēr kãm ixprĩ hã Kris kôt ixkwỳjê mã ja jarē kê mẽ inhmar tỳx nẽ. Anẽ.

¹⁴ Nom kot paj nhãm mẽ kapēr õ ho Tirtūm mã mex ã harēnh tã amnhĩ mar kêt nẽ. Te ixpimtir kãm ixkarõ pix kapēr pyrãk. No kot paj pam amnhĩ krã hkôt ixkapēr o kãm mex ã harẽ hãmri nẽ ra amnhĩ mar mex nẽ. ¹⁵ Nà ja na inhmã mex jakamã kot paj nhãm mẽ kapēr õ ho Tirtūm mã mex ã harẽ nẽ kãm gre. Nẽ määnēn ijamaxpēr xà hkôt ixkapēr o määnēn kãm mex ã harẽ nẽ kãm gre. Nà ja na inhmã mex. ¹⁶ Nom kot puj mẽ ma mẽ kot Tirtūm kapēr mar xà hã ixkre hwỳr mra nẽ kamã Tirtūm mã mex ã harẽ. Tã pa nhãm mẽ kapēr õ ho kãm ixkapēr japēr. Ka mẽ ate inhmar o akrĩ xwỳnhjaja tee ri inhma. Jakamã tee ri inhma nẽ ixkôt Tirtūm mã akapēr kêt nẽ. Rỳ kãm:

—Nà ãm hãmri na ã amex ã ajarēnh anẽ Tirtūm.

Anhỹr o kãm akapēr kêt nẽ. Mẽ ate inhmaare hã kot ka mẽ ã kãm akapēr anẽ. Jakamã kot paj ri mẽ akamã mẽ kapēr õ ho ixkapēr kêt nẽ. ãm mẽ akapēr pix o mẽ anom Tirtūm mã mex ã harẽ. ¹⁷ Kot paj mẽ kapēr õ ho Tirtūm mã mex o mex ã harēnh mex tã ka mẽ mẽmo mẽ kapērja aprĩ hã mar kêt jakamã inhmar pê Tirtūm kôt amnhĩ xunhwỳr tỳx kêt nẽ.

¹⁸ Na pa hte tõhã mẽ arom nhãm mẽ kapēr õ ho Tirtūm mã amnhĩ jarē. Nom nhỹri ahte nhỹ nẽ ã kãm amnhĩ jarēnh anẽ. ãm hãmri na pre Tirtūm ja kaxyw tanhmã ixto pa hte ã amnhĩ nhĩpēx anhỹr o ri ixpa.

¹⁹ Tã na pu htem Tirtūm mã mex o mex ã harēnh kaxyw nẽ ma mẽ kot kãm amnhĩ jarēnh xà hã ixkreta wỳr axpēn wỳr mra pa mẽ pikuprõnh xwỳnhjê kapēr o mẽ kãm ixkapēr. Nom kot paj nhãm mẽ kapēr õ ho mẽ kãm ixkapēr ry rax kumrēx tã no nhũm mẽ inhmar kêt nẽ. Nom kot paj mẽ kapēr o ãm ixkapēr krãnre htã no nhũm mẽ inhmar mex kurê kumrēx. Ja na inhmã mex.

²⁰ Kwa mẽ ixkapēr ma nẽ mar tỳx nẽ. Nẽ mẽhprĩrejê jamaxpēr o ajamaxpēr kêt nẽ. ãm Kris kôt mẽ ãptãr tũmjê jamaxpēr o mãn kêt mẽ ajamaxpēr o ri apa. ãm

měmoj pixire hkôt kot kaj mě äm hāmri te mēhprījē ja-maxpēr pyrāk o ajamaxpēr. Mēhprījaja na htem měmoj punuj kukamā hamaxpēr kêt nē. Na htem äm htýx pa. Tã kêt ka mě urāk nē měmoj punuj kukamā ajamaxpēr o ri apa hkêt nē.

²¹ Amnepēm na pre Tirtüm tanhmã Ijaewjē mã kapēr to. Mě kapēr o mě kãm kapēr tã no nhũm mẽ kuma nē äm kuma. Jakamã nhũm tee ri ja hã mẽ omu nē amnhĩ tã tanhmã mẽ harēnh to. Tanhmã mẽ harēnh toja Tirtüm kapēr ä kagã htũm kamã na. Kot mẽ harēnh kot:

E kot paj ma mẽ hwýr axtem pika hõ rũm pôristi hk-wý rē kē mẽ ma mẽ hwýr mra nē mẽ unē. Hāmri nē amnhĩ kapēr o mẽ kãm kapēr nhũm mẽ tee ri mẽ kuma no äm hkôt měmoj pumunh kêt nē.

Koja mẽ ä mẽ hipêx anhýr tã nhũm mẽ arĩ kãm ixkapēr mar nē amnhĩ kaxyw ixkôt hamaxpēr prãm kêt nē. Anē.

Tirtüm kapēr ä kagã htũm kot ä mẽ harēnh kot anhýr.

²² Jakamã kot kaj mẽ Tirtüm mã amnhĩ jarēnh xã hã ixkre hwýr akuprõ nē mẽ kapēr õ ho Tirtüm mã amnhĩ jarēnh japêr. Nhũm Kris kôt amnhĩ xunhwýr kêt xwýnhjaja mẽ akôt agjē nē hkrĩ nē tee ri mẽ akapêr ma nē Kris kôt amnhĩ xunhwýr kêt nē. Tanhmã kot mẽ amnhĩ to nē hkôt amnhĩ xunhwýr? Mě kot akapêrta maare hã. No kot ka mẽ akapêr o Tirtüm nhỹ hã mẽ kãm akapêr nhũm mēhprĩ hã amar mex nē. Jao tanhmã hamaxpēr to nē mẽ apyrã nē Kris kôt amnhĩ xunhwýr japêr.

²³ Nom kot ka mẽ apiitã nhãm mẽ kapēr õ ho Tirtüm mã mex ä harē nhũm amarĩ ri mẽ pa xwýnhjaja mẽ awýr agjē nē mẽ akapêr ä mẽ ama nē hã mẽ apumu. Hāmri nē tee ri hamaxpēr nē mẽ akrã pipãnh ä axpēn mã mẽ ajarē. ²⁴ Nom koja mẽ awýr agjē ka mẽ akatãt kôt mẽ amnhĩ kapēr o Tirtüm kapēr jarēnh o akuhê nhũm mēhprĩ hã mẽ amar mex nē. Hāmri nē amnhĩ kapēr o akapêr ma nē hamaxpēr o:

—Hêxta waa nē. Xep ixte amnhĩ tomnuj xwýnh na pa. Nã äm hāmri na mẽ Tirtüm kapēr jarē. Nã äm hāmri na kêt ja. Anē.

²⁵ Hāmri nē mẽ amã tanhmã kot amnhĩ tomnuj to hã amnhĩ jarēnh pa hāmri nē hkaga nē Jejus kôt amnhĩ xunhwý. Nē hkõnkrã ho htēm nē hkrĩ nē Tirtüm mã mex o mex ä harē. Hāmri nē mẽ amã:

—Nã äm hāmri na hte Tirtüm mẽ akamã pa ho pa. Anē.

Tirtüm nhõrkwý kamã mẽ pahte tanhmã amnhĩ nhĩpêx to hã mẽ pamã karõ

Atre 2.42, 5.12-13; Eprêw 10.25

²⁶ E Jejus kôt ixkwýjaja. Kot paj hpãnhã axtem mẽ amã mẽmoj tã karõ. Mě kot Tirtüm mã amnhĩ jarēnh xã hã ixkre kamã tanhmã mẽ ate amnhĩ nhĩpêx to hã karõ ka mẽ inhma.

Nã kêt ka mẽ axpēn wýr akuprõ nē akrĩ ka mẽ atõ amã Tirtüm mã mex ä harēnh ä mẽ grer o agrer prãm hāmri nē mãmrĩ kãm ho gre. Hāmri nē agrer pa kē apãnhã mēhõ kãnhmã xa nē Tirtüm kapēr kwý ho mẽ ajahkre. Nē ho anhýr pa nhũm hpãnhã mēhõ kãnhmã

xa nē Tirtüm kot tanhmã ho mex to hã mẽ amã amnhĩ jarē. Nē amnhĩ jarēnh pa hāmri nhũm mēhõ nhãm mẽ kapēr õ ho mẽ amã ujarēnh japêr. Hāmri nē ujarēnh pa kē mēhõ hpãnhã mẽ akapêr o hprĩ hã mẽ amã kapêrta jarē.

E kêt ka mẽ axpēn wýr akuprõ nē Kris kôt axpēn to axihtýx kaxyw ä axpēn pãnhã amnhĩ nhĩpêx anē.

²⁷ Nē ka mẽ atõ amã nhãm mẽ kapēr õ ho mẽ kãm akapêr prãm japêr. Nom kêt ka mẽ axohtõ nē ä mẽ kãm amnhĩ nhĩpêx anhýr kêt nē. Äm mẽ atõ wa axkrutre rý axkrunêpxire nē mẽ kapēr õ ho mẽ kãm akapêr. Hāmri nē axpēn pãnhã akapêr pa kē mēhõ kot hprĩ hã mẽ kapêr õta mar japêr nē mẽ apãnhã xa nē mẽ akapêr o mẽ kãm harē kē mēhprĩ hã mar mex nē.

²⁸ Nom koja ja kaxyw mēhõ amrakati japêr ka mẽ kapêr õ ho akapêr kêt nē. Äm kapxipix nhỹri ahte Tirtüm mã akapêr.

²⁹ Nē kē Tirtüm nhỹ hã kapêr jarēnh xwýnhjē hõ wa axkrut rý axkrunêpxi nē mẽ ajahkre ka mẽ aprĩ hã mar o akrĩ. Hāmri nē mar pa nē tanhmã mẽ harēnh to. Äm hāmri Tirtüm nhỹ hã kapêr ä mẽ harē rý ho hêx ä mẽ harē.

³⁰ Nē koja mēhõ Tirtüm nhỹ hã mẽmoj jarēnh o xa. Rôm nhũm Tirtüm mẽ kaxyw mẽ atõ mã ajamaxpēr kwý gõ. Ka kapêr o äm xwýnhhta mã kãnhmã anhĩkra pē kē apumu nē anhĩkrē. Hāmri ka hpãnhã xa nē mẽ kãm tanhmã ajamaxpēr tota jarē. ³¹ Nom kêt ka mẽ anhĩpê mẽ kãm akapêr hkêt nē. Äm axpēn pãnhã Tirtüm kapêr o axpēn jahkre nē ho axpēn jamaxpēr o axihtýx. Ja mex. ³² Nom kêt ka mẽ axpēn wýr akuprõ nē apiitã anhĩpê atýx ri akapêr kêt nē. Ja na Tirtüm kēp hprãm nõkati. Mě ate axpēn pãnhã axpēn mã akapêrja na kãm hprãm. Jakamã kē mẽ kot Tirtüm nhỹ hã mẽ kapêr jarēnh o pa xwýnhjaja taxy axpēn jahkre hã axpēn jamã. Nhũm mēhõ kumrêx kapêr pa hāmri ka hpãnhã mẽ kãm akapêr.

Nē kē mēnijaja amarĩ mẽ ahkreja mar o hkrĩ. Ijaew kot amnhĩ nhĩpêx xã hkôt. Jakamã kwa mẽ anijaja. Kêt ka mẽ amarĩ akryk mẽ mar o akrĩ nē axpēn mã akapêr o akrĩ hkêt nē. ³⁵ No kot kaj mẽ tee ri mẽmoj ma nē mar mex kêt japêr tã hã axpēn kukjêr kêt nē. Äm akryk arĩ mar o akrĩ. Hāmri nē akupým anhõrkwý hwýr tē nē rĩ kormã hã amjên kukja. Nom kot ka mẽ apikuprõnh xã hã ixkre kamã axpēn mã akapêr o akrĩ nhũm mẽ amjênjaja tee ri ja hã mẽ apumu nē hpijaàm nē.

³⁶ E na pa ä Tirtüm mã amnhĩ jarēnh xã hã ixkre kamã tanhmã mẽ pahte amnhĩ nhĩpêx to hã mẽ amã karõ anē. Tã te mẽ apê ja mex kêt pyrāk. Kwa mon ka wem ja ma nhũm mẽ apê omnuj nē? Xã mẽ ate Tirtüm kapêr mar mex o ijakrenh kôt na ka mẽ ä ajamaxpēr anē? Xã na pre Tirtüm mẽ akumrêx mã kapêr? Hã na ka mẽ ä ajamaxpēr anē? Rý xã mẽ kapxipix mã na pre kapêr? Hã na ka mẽ ixkapêr ma nhũm mẽ apê omnuj nē? Nã ixkumrêx na pa pre mẽ awýr inhmõr nē mẽ amã Tirtüm kapêr jarēnh kēnã kot ka kêt mẽ axtem nē ä ajamaxpēr anē. ³⁷ Kot kaj mẽ atõ ä ajamaxpēr anhýr japêr nē ajamaxpēr o:

—Nà na pre Tirtùm tanhmã inhmã kapër to pa ô ri mẽ kãm ixujarënh mex o ri ixpa.

Anhÿr o ajamaxpër. Rÿ ajamaxpër o:

—Nà na pre Tirtùm Karô mẽ kaxyw tanhmã ixto pa ÿ hã tanhmã mẽ ho mex to ho ri ixpa.

Anhÿr o ajamaxpër. Kot kaj mẽ ã ajamaxpër anë hãmri nê mãänën pa ã ixte amnhĩ nhĩpêx anhÿr ã ixpupunh mex kurê kumrêx. Amnhĩ pyrã nê ixte Tirtùm nhÿ hã mẽ kãm ixkapër xwÿnh ã ixpupunh nê hã ijarënh kurê kumrêx. ³⁸ Nom koja ja hã ijarënh kêt ka mẽ ja hã omu hãmri nê tanhmã kot mẽ amã kapër toja ma nê ãm ama.

³⁹ E Kris kôt ixtô nê ixtôxjaja. Kêr ka mẽ amnhĩ to Tirtùm Karô wÿ kê ma mẽ ate mẽ kãm Tirtùm kapër jarënh o ri apa kaxyw mẽ ato mẽ axihtÿx.

Nê koja mẽhõ kãm nhãm mẽ kapër ô ho kapër prãm ka mẽ ja nê kãm akapër kêt nê. Kwãr mãmri ã amnhĩ nhĩpêx anë. ⁴⁰ Nom kêr ka mẽ ate Tirtùm mã amnhĩ jarënh xà hã ixkre kamã axpën pãnhã axpën mã akapër nom anhĩpê kãm akapër hkêt nê.

Kris akupÿm htĩr kumrêx ã harënh

Atre 2.23-36, 10.39-41; Wam Korīt 6.14

15 E Kris kôt ixkwÿjaja. Kot paj axte mẽ amã Jejus kot mẽ panë tanhmã amnhĩ nhĩpêx to hã harë ka mẽ inhma. Na pa pre ra mẽ amã ja jarë ka mẽ ama nê hkôt amnhĩ xunhwÿ. Nê hkôt amnhĩ nhĩpêx mex o ri apa. ² Na pa pre mẽ amã harë ka mẽ amnhĩ kaxyw kãm ajamaxpër tÿx nê nhũm Tirtùm mẽ ato hkra. Tã ka htem arĩ kapër kôt amnhĩ nhĩpêx mex o ri apa. Koja mẽhõ kot Tirtùm kapër mar tã amnhĩ kaxyw hkôt hamaxpër kêt nê nhũm Tirtùm tee ri amnhĩ tã omu nê ho hkra hkêt nê.

³ Na pa pre amnhĩ krã hkôt mẽ amã tanhmã Kris jarënh to hkêt nê. Ixte kapër mar xà hkôt na pa hte amnhĩ xô ri mẽ amã tanhmã harënh to ho ri ixpa. Jejus jarënhja na mex o kot mẽ ujarënh piitã hakrenh par kumrêx. Tã tãm kot paj mẽ amã harë. Na pre Krisja mẽ pahte amnhĩ tomnuj pãnhã amnhĩrer kaxyw mẽ panë ty. Tirtùm kapër ã kagà htũm kot hkukamã harënh xà hkôt. ⁴ Hãmri nhũm mẽ kën kre kamã haxà nhũm kamã nõr o apkati. Nê axte hã apkati. Hãmri nhũm Tirtùm akupÿm ho htĩr. Kapër ã kagà htũm kot hkukamã harënh xà hkôt. ⁵ Tã nhũm Simãw Pêtre kumrêx akupÿm htĩr ã omu nhũm hpãnhã Jejus nhÿ hã mẽ ahkre ho mẽ pa xwÿnh maatijaja haxwÿja omu. ⁶ Hãmri nhũm mẽ kot hkôt mẽ pa xwÿnh pê 500 jakrenh xwÿnh piitã anhĩpê haxwÿja akupÿm htĩr kãm omu. Na pre ra mẽ hkwyjaja ty nhũm mẽ hkwyjaja arĩ htĩr nê pa. ⁷ Jakamã nhũm prem ra akupÿm htĩr kãm omu. Hãmri nhũm hpãnhã Xiakreja omu. Nhũm hpãnhã ÿ hã mẽ ahkre o mẽ pa xwÿnh piitã omu. Akupÿm htĩr kãm omu. ⁸ Tã pa na pa pre ijaxwÿja amnhĩ to hapu nê akupÿm htĩr kãm omu. Te ixpê mẽ hkra kot hapu pyrã nê amnhĩ to hapu nê omu. Na pre kaxkwa kamã inhmã kapër o xa pa ixprĩ hã omu. ⁹ No mẽ kot ixpyrã nê Kris nhÿ hã mẽ ahkre ho mẽ pa xwÿnh maati hkwyjaja na mẽ mex o kot ijakrenh. Na pa pre hte mẽ hkĩn-

hã amnhĩ tomnuj tÿx nê. Jao Kris pê hkrajê homnuj tÿx o ri ixpa. Tã hkôt amnhĩ xãm hãmri nê tee ri ã amnhĩ nhĩpêx anhÿr ã amnhĩ pumu nê amnhĩ kamã xpijaam tÿx nê. Jakamã na pa hte Kris nhÿ hã kapër jarënh o ixpa hã amnhĩ pumu nê ixte hkôt amnhĩ xãm kêt ri tanhmã ixte amnhĩ nhĩpêx toja mã ijamaxpër nê xpijaam nê. ¹⁰ Na pa pre amnhĩ tomnuj tÿx o ixpa htã nhũm Tirtùm arĩ kãm ijapê nê. Nê ixkamã ukapri nê. Pa pre hkôt amnhĩ xãm nhũm ixto hkra pa ra kãm tanhmã amnhĩ nhĩpêx to mex rãhã ho ixpa. Jakamã na hte tee ri amnhĩ tã xpumu nê tanhmã hamaxpër to hkêt nê. Rÿ hamaxpër o:

—Hêxta waa nê. Inhmã Pawre japê nê ixte ho mex tã nhũm ixkôt amnhĩ nhĩpêx kêt kumrêx.

Anhÿr o tee ri hamaxpër kêt nê. Na pa hte kãm tanhmã amnhĩ nhĩpêx to ho ixpa rũnh o ÿ hã mẽ kapër o pa xwÿnh kwÿjê jakre ho ixpa. Nom amnhĩ krã hkôt mẽ ahkre hkêt nê. Ja kaxyw na pre Tirtùmja ixto ixihtÿx pa ÿ hã kãm tanhmã amnhĩ nhĩpêx to ho ri ixpa nhũm ja hã xpumu nê hkĩnh nê.

¹¹ Nê Jejus jarënhja ãm pixii. Axtem hõ hkêt. Nê ÿ hã mẽ ahkre ho mẽ pa xwÿnhjê kapërja nê pa ixte mẽ amã harënhja kot axpën pyrãk. Harënh tipxi. Kris kot mẽ pahte amnhĩ tomnuj mÿrapê mẽ panë htyk nhũm Tirtùm kot akupÿm ho htĩr ã wa harënhja na pa hte pix jarënh o ri mẽ akôt ixpa. Ka prem inhma nê amnhĩ kaxyw hkôt ajamaxpër tÿx nê.

Tirtùm kot akupÿm mẽ pahto mẽ pahtĩr ã harënh

Rukre 20.37

¹² Nê kwa ra ixte mẽ amã Kris htyk nê akupÿm htĩr ã harënh tã ka xep mẽ akwÿjaja axtem nê mẽ htyk nê akupÿm mẽ htĩr kêt ã mẽ hkamnhix o ri apa. ¹³ Kwa mẽ ajamaxpërja mex kêt. Kêp apu ãm hãmri mẽ ate ã mẽ harënh anhÿr ronhÿx pre Kris haxwÿja akupÿm htĩr kêt nê. Nhÿx pre htyk o ty.

¹⁴ Nê kêp apu Kris akupÿm htĩr kêt ronhÿx pa mẽ ãm mẽ amã kapër jarënh o ixpa kaprÿ. Ka mẽ ajaxwÿja amnhĩ kaxyw hkôt ajamaxpër kaprÿ.

¹⁵ Nê kêp ãm akupÿm mẽ htĩr kêt ronhÿx pa mẽ ixte mẽ amã Tirtùm kapër jarënh o ri ixpa xwÿnhjaja mẽ amã ho ixêx o ri ixpa. Na pa htem mẽ amã Tirtùm ra kot akupÿm Jejus o htĩr ã harënh o mẽ akôt ixpa. Tã kêp apu akupÿm mẽ htĩr kêt ronhÿx pa mẽ ãm mẽ amã harënh o ixêx.

¹⁶ Nê kêp apu akupÿm mẽ htĩr kêt ronhÿx pre Kris haxwÿja akupÿm htĩr kêt nê. Nhÿx pre ãm amarĩ tyn hapêx.

¹⁷ Nê Kris amarĩ htyk nê hapêx ronhÿx kot pu mẽ ri amnhĩ kaxyw hkôt pajamaxpër nê hkôt amnhĩ xunhwÿr kaprÿ.

Nê Kris amarĩ htyk nê hapêx ronhÿx pre Tirtùm Jejus kukwak ri mẽ panë mẽ pahte amnhĩ tomnuj o hapêx kêt nê. Nhÿx pu mẽ pahpiitã nhÿrmã ma kuwy hwÿr pajapêx pa.

¹⁸ Nê kêp apu Kris htyk nê hapêx ronhÿx ra mẽ kot amnhĩ kaxyw hkôt hamaxpër tã ra htyk xwÿnhjaja ma mẽ kot amnhĩ tomnuj mÿrapê kuwyta wÿr hapêx.

¹⁹ Nē kēp apu Kris htyk kumrēx nē hapēx ronhỹx pu mē kormā pahtyk kēt xwỹnhjaja tee ri amnhĩ wỹr kamā pajamak o ri papa kaprỹ. Nē pahpē hkra hā amnhĩ jarēnh kaprỹ. Jao pahkaprĩ htỹx o mēmoj piitā hakrenh par kumrēx nē ri papa.

Kris kumrēx akupỹm htĩr ā harēnh

Atre 26.23; Sikũn Korīt 4.14; Piripos 3.10-11; Wam Tesarõn 4.15-18; Apokarip 20.1-15

²⁰ Nà mē htyk nē nhỹrmā akupỹm mē htĩr kēt ā mē harēnhja kot anhỹr kēt. Ra Tĩrtũm kot akupỹm Kris o htĩr jakamā koja mǎānēn hkra htyk xwỹnhjaja nhũm mē piitā Jejus pyrā nē nhỹrmā akupỹm mē ho htĩr pa. Jakamā na pu htem Kris akupỹm htĩrja mǎ pajamāxpēr nē amnhĩ kukamā pajamāxpēr o:

—Nà ra Tĩrtũm kot akupỹm Jejus o htĩr jakamā koja urāk nē nhỹrmā akupỹm mē pahte hkõt amnhĩ xunhwỹr xwỹnh piitā mē pahto mē pahtĩr. Nà koja ā mē panhĩpēx anē. Ja kaxyw àhpumunh tỹx kumrēx xwỹnh kēnā. Anē.

²¹ Nē amnepēm na pre Tĩrtũm my kot waja nhĩpēx. Hāmri nhũm kot tanhmā amnhĩ tomnuj to ho ra mē htykja o hkrax. Tā nhũm wamta kõt my hõta wamta rom amnhĩ to mex o mē htyk tā akupỹm mē ho htĩr o hkrax. ²² Tā mē pahpē wam my pē Atāw kanrēhā tāmnhwỹ jakamā kot puj mē urāk nē nhỹrmā ty. No ām mǎānēn mē pahpē Kris kraa. Kris kumrēx na pre akupỹm htĩr. Tā koja nhỹrmā akupỹn mē pahwỹr wry hāmri nhũm Tĩrtũmja kot hipēx pyrā nē akupỹm mē pahto mē pahtĩr. Mē pahte hkõt amnhĩ xunhwỹr ā mē pahpumunh kõt akupỹm mē pahto mē pahtĩr pa. No ām kormā.

Kris nhỹrmā kot mē htyk o hapēx ā harēnh

Juāw 11.25; Rõmān 6.23; Wam Korīt 15.54; Sikũn Ximotre 1.10; Eprēw 2.14; Apokarip 20.14

²⁴ Nē koja Kris arĩ mē ho amnhĩptār rāhā nhũm Tĩrtũm mē kot kutā amnhĩ xunhwỹr xwỹnhjē pē mē hihtỹx xā ho hapēx pa. Kapēr ā kagā htũm kot ja jarēnh kot:

Koja nhỹrmā Tĩrtũm Kris kot kām mē ho amnhĩptār kaxyw ām. Anē.

Jakamā Jejus tapxipix koja mē ho amnhĩptār o pa. Koja Tĩrtũm pix mē ho amnhĩptār kēt nē. Nom koja pahi hk-wỹjē hõ axte nhām mē ho amnhĩptār kēt kumrēx.

Tā mē kot mēkarõmnuti hkõt kām tanhmā amnhĩ to ho mē pa xwỹnhjaja koja Tĩrtũm ma amnhĩ nē kuwy hwỹr mē rēnh pa. Nē mēhtykja o hapēx nhũm mēhõ axte htyk kēt kumrēx. Jakamā koja Jejus Kris mēmoj punuj piitā ho hapēx nē Mēpahpām Tĩrtũm nhĩhkram akupỹm mēmoj piitā haxār pa. Tĩrtũm jamāxpēr xā hkõt ā mēmoj to anhỹr par anē hāmri nē thkram mēmoj jaxār pa. Nē mǎānēn tām kām amnhĩ gõ. Jakamā nhũm Tĩrtũm tapxipix mēmoj piitā ho amnhĩptār pa.

Mē htyk xwỹnhjē jarēnh

²⁹ Nē na hte mē pahkwỹjaja kormā kēp Tĩrtũm kra hkõt tā Jejus kõt mē kot amnhĩ xunhwỹr nē mē htyk

xwỹnhjē mǎ hamāxpēr o pa. Hāmri nē mē kām nhỹr-mā axte mē omunh prām xāj mē urāk nē Jejus kõt amnhĩ xunhwỹ nhũm mē hkrā kumrā. Tā akupỹm mē htĩr kēt ronhỹx mē ām ā pajamāxpēr anhỹr kaprỹ.

³⁰ Nē paa. Na pa hte ma mē kām Tĩrtũm kapēr jarēnh o ri mē hkõt ixpa. Nhũm mē hkwyjaja ja hā inhma nē ixkamā gryk nē ixtā amỹnē pa mē mỹrapē ixpunuj nē ri ixpa. No ām amnhĩ to htỹx nē arĩ ri mē kām Kris kapēr jarēnh o ri mē hkõt ixpa. Tā kēp ām nhỹrmā akupỹm ixtĩr mǎ kēt ronhỹx pa tee ri ā amnhĩ nhĩpēx anhỹr o ri ixpa kaprỹ. ³¹ Na htem apkati mē ixtā tanhmā àmnēnh to ho ri pa. Ām hāmri na pa mē amā ā mē harēnh anē. Nom na pa hte tee ri amnhĩ kukamā ijamāxpēr o ri ixkaprĩ nē ixpa hkēt nē. Mē kot ixpĩr mǎ tā pa hte mē ate Pahihti Jejus Kris kõt amnhĩ nhĩpēx mex ā mē apumunh kõt ixkĩnh nē ri ixpa. Nhũm te ixkamā mēmoj kēt pyrāk pa hte ri ixpa. ³² Na pa hte jar Epes kamā mē oprē xwỹnhjē kutā amnhĩ to htỹx pē mē kām Jejus kapēr jarēnh o ri mē hkõt ixpa nhũm mē kām mar prām kēt jakamā hā ixtomnuj tỹx nē. No nhỹrmā ixtyk nē akupỹm ixtĩr mǎ kēt ronhỹx pa mē kēp Kris kwỹ hkēt xwỹnhjē jamāxpēr o ijamāxpēr nē mē urāk nē ijamāxpēr o:

Ixte ixtyk ā arĩgro pumunh kēt jakamā kot paj mǎmrĩ mēmoj piitā hkur o ri ixpa.

Nē mǎmrĩ mēmoj piitā ho ixkõm o ri ixpa.

Nē mǎmrĩ mēmoj piitā ri tanhmā ho ho ri ixpa.

Ixtyk nē axte ixte ā amnhĩ nhĩpēx anhỹr o ixpare kaxyw ā.

Anhỹr o nhỹx pa ijamāxpēr o ixpa. Kēp ām Tĩrtũm kot akupỹm mē pahto mē pahtĩr mǎ kēt ronhỹx pu mē ā mē kēp Kris kwỹ hkēt xwỹnhjē jamāxpēr anhỹrja kõt pajamāxpēr pix o ri papa. No ām ja kot anhỹr kēt.

³³ Na htem mēmoj jarēnh o:

—Mē kot htỹx ri amnhĩ tomnuj xwỹnhjē hkõt ri mē pa xwỹnhjaja koja mē gaa nē mē kot amnhĩ nhĩpēx kõt amnhĩ nhĩpēx o ri pa. Anē.

Ām hāmri na ā mē harēnh anhỹrja. Jakamā kwa mē okora. Kēr ka mē ā amnhĩ nē mē kot amnhĩ nhĩpēx anhỹr o mē pa xwỹnhjē pumunh mex o ri apa. ³⁴ Kwa mē tokyx mē ate tanhmā amnhĩ tomnuj to hā amnhĩ pumu nē axte ā amnhĩ nhĩpēx anhỹr kēt nē. Nē mē ate Tĩrtũm kot akupỹm mē ho htĩr kēt ā harēnh xwỹnhjaja. Te mē ate Tĩrtũm kot amnhĩ nhĩpēx ā omunh kēt pyrāk. Tā mē ate tokyx ja hā amnhĩ pumunh nē amnhĩ kamā apijaām kaxyw na pa ā mē amā ixkapēr anē.

Mē panhĩ nyw jarēnh

Rukre 20.34-36; Rõmān 8.10-11; Sikũn Korīt 5.1; Piripos 3.20-21

³⁵ Nē mǎn ka mē atõ akupỹm mē htĩr ā mē harēnh ma nē tee ri mē hkukamā ajamāxpēr nē hā ri tanhmā axpēn kukjēr to nē axpēn mǎ:

—Kwa tanhmā koja we Tĩrtũm akupỹm hkra htyk xwỹnhjē ho htĩr to? Ra mē htyk nē mē ĩ katõk nē hapēx par mǎ kēnā. Tanhmā kot wem amnhĩ to nē akupỹm htĩr? Nē tanhmā koja we mē ĩ nywja kute wehe? Anē.

³⁶ Nà na ka mē atỹx ri ā ajamāxpēr anē nē tee ri mē hkukamā ajamāxpēr. E kot paj ixpĩr hā ja hā ejēp jarē

ka mẽ inhma. Nà na htem mẽmo y hkre. Te mẽ kot mẽ htyk jaxàr pyràk o hipèx nê hkre nhùm hikwý nê gaa nê higrôt hapôj. Nom te kêp mẽmo yta pyràk kêt.

³⁷ Æm hy pix na htem hkre. No higrôt kre hkêt nê. Rý tanhmãn pàr nywja kre hkêt nê. Æm hy pix na htem hkre. Tã nhùm higrôt hapôj nê hprêk nê gaa nê ô.

³⁸ Tirtùm na hte hamaxpêr xà hkôt tanhmã ho nhùm higrôt hapôj nê hprêk nê ô. Tã ja pyrà nê kot puj mẽ Tirtùm jamaxpêr xà hkôt pahtyk tã koja akupým mẽ pahto mẽ pahtír nê mẽ pamã mẽ panhí nyw gô.

³⁹ Nê mẽmo hy piitã te kot axpên pyràk kêt. Ahpýnhã na. Ja pyrà nê ahpýnhã ri mẽmoj piitã í. Na axtem mẽ panhí nê axtem mry nhí nê axtem àk nhí nê axtem tep nhí. Mẽmoj piitã ahpýnhã ri í.

⁴⁰ Nê kaxkwa kamã haxwýja mẽmoj piitã ahpýnhã no ãm muxre. Myytija mex. Nê mytwrýreja axte mã no ãm haxwýja mex. Nê kanhêti haxwýja mex. Haxwýja axte mã. Kamã hkwy hpòk kryre nê kamã hkwy hpòk rúnhti no ãm piitã mex.

Nê jar pika ja kamã haxwýja mẽmoj piitã mex. No ãm te kot kaxkwa kamã mẽmoj jarir xwýnhja mex pyràk kêt. Axtem na raa.

⁴² Tã koja mẽ panhí nywja haxwýja axte mã. Te kot panhí htùm pyràk kêt. Na htem ty nhùm mẽ ma mẽ o mra nê mẽ hagjê. Nhùm mẽ hikwý nê gaa nê í rerek nê hapèx. Tã koja Tirtùm akupým tanhmã mẽ pahto mẽ pahtír to pu mẽ hpãnhã pamex kumrêx. Hãmri nê axte mã mẽ panhí nyw mex o mex jakamã koja axte htyk nê í rerek kêt nê.

⁴³ Na htem ty nhùm mẽ hagjê nhùm htyk xwýnhhta tanhmã amnhí to hkêt nê amarí hikwý. Omnuj nê í nhenhek nê hikwý. Tã koja Tirtùm akupým mẽ ho mẽ htír nê mẽ kãm mẽ í nyw gô nhùm mẽ hpãnhã mex kumrêx nê hihtyx nê Tirtùm nhõ krí kamã pa ho pa.

⁴⁴ Mẽ htyk nhùm mẽ kot mẽ hagjênh xwýnhjaja na htem arí í htùm ã hikwý. Æm jar pika ja pix kãm ri mẽ papa kaxyw na mẽ panhí htùmja. No mẽ panhí nywja axtem Tirtùm nhõ krí kamã ri mẽ papa kaxyw jakamã koja mẽ panhí nywja axte mã. Tirtùm Karõ koja mẽ pamã kugô.

Mẽ panhí nyw te kot Kris nhí pyràk ã harênh

Rukre 20.34-36

⁴⁵ Nê Tirtùm kapêr ã kagà htùm kot Atãw jarênh kot: Na pre Tirtùm my kot wa Atãwja nhípèx. Jakamã Atãw kêp pika nhõ xwýnh na pre. Anê.

Æ Atãw jarênh kot anhýr. Ja pyrà nê na pu htem pakatorxà nhõhy rùm pajapôj nê Atãw pyrà nê pahpê pika nhõ xwýnh. Tã nhùm Atãwja pa nê gaa nê hpigêt nê ty. Jakamã kot puj mẽ uràk nê papa nê gaa nê ty. Nom nhùm Krisja Atãw kurom kêp akupým mẽ ho mẽ htír xwýnh jakamã kot puj mẽ pahpê hkwyjaja Atãw pyrà nê nhýrmã mẽ pahtyk tã nhùm Kris akupým mẽ pahto mẽ pahtír. Hãmri nhùm Tirtùm Karõ mẽ pamã mẽ panhí nyw gô pu mẽ axte pahtyk kêt nê. Pãnhã axte mã mẽ pahpê kaxkwa nhõ xwýnh.

⁴⁷ Nê Atãw na pre Tirtùm pika ho hipèx nê ho htír nhùm ri pa. Nom Kris na pre Atãw rom kaxkwa rùm

mẽ pahwýr wrý. ⁴⁸ Tã mẽ pahpê pika nhõ xwýnhjaja te mẽ pahpê Tirtùm kot wam my nhípèx xwýnhhta pyràk. No mẽ pahte kaxkwa hwýr ma papa mã xwýnhjaja te mẽ pahte kaxkwa rùm my kot mẽ pahwýr wrýk xwýnh Krista pyràk. ⁴⁹ Tã kormã mẽ pahpê pika nhõ xwýnh jakamã te mẽ pahpê my pika ho hipèx xwýnhhta nhí pyràk. Nom kot puj mẽ nhýrmã ty hãmri nê hpãnhã te pahpê kaxkwa rùm my kot mẽ pahwýr wrýk xwýnhhta nhí pyràk.

Axte mẽ pahtyk kêt kumrêx ã mẽ pajarênh

Juãw 11.25; Sikün Korit 5.4; Wam Tesarôn 4.13-18

⁵⁰ Nê kot puj mẽ panhí htùm rãhã Tirtùm nhõ krí hwýr paxàpir kêt nê. Panhí htùm na hte ty nê rerek nê hapèx. Jakamã koja Tirtùm Karõ mẽ pamã mẽ panhí nyw gô pu mẽ rí kormã ma ô krí hwýr pajapèx pa nê kamã papa ho papa.

⁵¹ E mẽ inhma. Na pre kormã Tirtùm mẽ amã mẽmoj to amnhírít kêt tã ra inhma ho amnhírít. Jakamã kot paj ý hã mẽ amã harê ka mẽ inhma. Nà kot puj mẽ pahpiitã mẽ pahtyk kêt nê. Koja nhýrmã Tirtùm kapêr o mẽ wrýk xwýnhjê hõja mẽ pamã pifti kakô. Mẽ pajær pè hkakô. Hãmri nhùm Tirtùm kra ra mẽ htyk nê mẽ hikwý xwýnhjaja akupým í nyw o htír kurê kumrêx. Nê kormã mẽ pahtyk kêt xwýnhjaja kot pu mẽ mẽ pahtyk kêt ri mẽ uràk nê panhí nyw kurê kumrêx. Hãmri pu mẽ pahpiitã pahtír o pahtír tùm nê papa.

⁵³ Koja Tirtùm mẽ panhípèx o te mẽ pahte paxê htùm o papinhípanh nê hpãnhã paxê nyw jagjênh pyràk. Jao mẽ panhí htùm o hapèx nê hpãnhã mẽ pamã mẽ panhí nyw gô pu mẽ axte pahtyk kêt kumrêx nê ri papa ho papa. ⁵⁴ Tirtùm kapêr ã kagà htùm kot ja jarênh kot:

Na ra Tirtùmja mẽhtyk ho hapèx pa. Anê. Te ra kot ho hapèx par pyràk o ã harênh kot anhýr. No ãm kormã. Jakamã kot puj mẽ nhýrmã panhí nyw nê ri papa nê mẽ pahtõ axte pahtyk kêt kumrêx. ⁵⁵ Mẽ pahtykja te mẽ kot makre par nhùm axte kot mẽ hkamnhwýr kêtja pyràk. Urà nê koja Tirtùm akupým mẽ pahto mẽ pahtír pu mẽ axte pahtyk kêt nê. Nê axte ri pamã ma hkêt nê papa. Nê axte paxà hkêt nê.

⁵⁶ Tirtùm kapêr ã kagà htùmja ã mẽ pakukamã mẽ pajarênh kot anhýr. Mẽ pahte amnhí tomnuj xwýnh jakamã kot puj mẽ nhýrmã ty. ⁵⁷ Nom nhùm Tirtùm àhpumunh tỳx o àhpumunh tỳx jakamã na hte Pahihti Jejus Kris kukwak ri mẽ pahte hkôt amnhí xunhwýr xwýnhjê nê mẽ pahte amnhí tomnuj rên pa. Pu mẽ nhýrmã mẽ pahtyk tã nhùm akupým mẽ pahto pahtír.

Mẽ pahte Jejus mã tanhmã amnhí nhípèx mex to hã mẽ pamã karõ

Karatas 6.9; Korosê 1.10

⁵⁸ Jakamã e kwa Jejus kôt ixkwýjaja. Kêr ka mẽ arí Pahihti Jejus kôt mãn amnhí xunhwýr tỳx rãhã ho ri apa. Nê kapêr kôt pix mã ri amnhí nhípèx rãhã nê kãm tanhmã amnhí nhípèx mex to ho ri apa. Kot kaj mẽ ã amnhí nhípèx anê hãmri nê kãm tanhmã amnhí nhípèx to kaprý ho ri apa hkêt nê. Æm hãmri kãm mẽmoj to anhýr mex rãhã ho ri apa.

Mě kêp amrakati xwỳnhjê jarēnh

Atre 11.27-30; Rōmān 15.25-27; Sikūn Korīt 8.1-24, 9.1-5; Wam Xi-motre 6.18

16 Nē na pa pre krī pê Karatas kamā tanhmā Jeru-jarē kamā Kris kwỳjê jarēnh to. Ijaew kwỳ kot mē pahpyrà nē Jejus kôt amnhī xunhwỳr ā mē harē nē mē kêp amrakati hā mē harē hāmri nē mē kām:

—E. Kwa kêr ka mē kām mē akàxpore hkwỳ ho akuprō nē ma mē hwỳr amē.

Anhỳr o mē kām ixkapēr. Jakamā kwa kêr ka mē urāk nē mē kaxyw mē kām kàxpore hkwỳ ho akuprō. ² Mē panhō arīgromnu pê sap ā hkwỳ ho akuprō. Kot kaj mē akàxpore rax japēr nē mē kaxyw hkwỳ ho rax nē axi. Nom kot kaj akàxpore grire japēr nē mē kaxyw mē kām ho grire nē agō. Kêr pa mēmo arīgro hā ma mē awỳr mō ka mē ra mē kaxyw ho apikuprōnh rax nē.

³ Nē ma mē kot mē kām ho mōr mā xwỳnhjaja ka mē ixkutêp mē akwỳjê rê. Kêr pa pōj nē mē omu hāmri nē mē kaxyw kagā nhīpêx nē kamā mē harē. Nē mē kām kugō nhūm mē ma Jerujarē hwỳr kàxpore mē ro hā amnhī kôt o mō nē mē kām kugō. Mē kot kamā harēnh nē mar hāmri nē mē kamjaja mē ate mē kaxyw mē rēnh ā mē ajarēnh ma. ⁴ Rỳ kot ka mē amā mē hkôt inhmēnh prām nē māmri mē hkôt inhmē pa ma mē hkôt mō.

Pawre kot amnhī kukamā amnhī jarēnh

Atre 19.21-22

⁵ Nom kot paj tokyx mē awỳr inhmōr kêt nē. Kot paj ja rūm ixkato nē hpānhā ma pika pê Masetōn wỳr mō. Hāmri nē mē hkôt ixpa grire nē ma kormā mē awỳr Korīt wỳr mō. ⁶ Hāmri nē pōj nē mē akôt ri ixpa ryy nē. Nē ixtā amgrà pixi nē hapêx nē rī kormā ma axte nhām krī hō hwỳr mō. Nē inhojarēt ka mē ixto Tirtūm wỳ nē inhmā ixàpkur xà hkwỳ gō pa ma mē hwỳr pry hā hkur o mō. ⁷ No ixte mē awỳr ixpōx nē tokyx mē akurūm ixkator nē hpānhā ma nhām krī hō hwỳr inhmōrja na inhmā hprām kêt. Jakamā koja Tirtūm kām ja mex pa arī ri mē akôt ri ixpa hā ixtā mytwrỳ xoh-tô nē tokyx ma nhām inhmōr kêt nē. ⁸ Kot paj kormā jar Epes kamā ri ixpa rāhā nhūm mē hkīnh pê Pētekos kato nē hapêx pa rī kormā ma Masetōn wỳr mō. ⁹ Na pa hte jar kormā mē kām Jejus kapēr jarēnh o ri mē hkôt ixpa nhūm mē ohtô nē inhmar o pa. Mē kām mar prām. Tā no nhūm mē hkwỳjaja ohtô nē mē kêp ja om-nuj nē nhūm mē hā ixkamā gryk nē ixtomnu o pa.

Mě kot Ximotre ho mex ā mē harēnh

Hapuhā Juāw 5

¹⁰ Nē kwa koja Ximotre mēmo arīgro hā mē awỳr pōj ka mē omu nē ho mex nē. Nē mē amnhī nhōrkwỳ hwỳr awỳ kê mē akutā apkur o pa. Na hte ixpyrà nē Pahihti Jejus mā tanhmā amnhī nhīpêx to mex o pa. ¹¹ Kormā mē pahkīnhā nyw tā kêr ka mē tee ri ja hā

omu nē ri axpēn mā tanhmā harēnh to hkêt nē. Mē ām akapēr mex pix o kām akapēr. Nē koja akupỳn no-jarēt ka mē pry hā kām apkur xà hkwỳ gō kê mex pê man akupỳn ixwỳr mō pa tokyx omu. Kot paj jar mē pahkwỳjê mē akupỳn hpōx kamā ijamak o ixpa.

¹² Nē na pa hte xatā jar mē pahtō Aporja ma mē awỳr mōr kaxyw mē awỳr hano. Kot jar mē pahtō hkwỳjê mē ma mē awỳr mōr kaxyw. Nom kormā. Koja xep mē jar tanhmā amnhī to hpa nē rī kormā ma mē awỳr mō.

Kagā jatur xà kamā Pawre kot mēmoj tā karō

Epes 6.10-12; Sikūn Ximotre 1.7; Wam Pētre 5.8-9

¹³ E kwa kêr ka mē arī amnhī wỳr Jejus kamā ajamak rāhā ho ri apa. Nē hamār pê kutêp tām amnhī nhīpêx o ri apa. Nē amnhī kaxyw hkôt ajamapēr tỳx rāhā nē.

¹⁴ Nē mē amā axpēn kīnh pê tanhmā axpēn to mex to.

¹⁵ Mān ka mē ra Estepti mē hkwỳjê jarēnh ma. Mē hkumrēxjaja na prem pika pê Gres kamā Kris kôt amnhī xunhwỳ. Tā xep mē ra Kris kôt hkwỳjê ho mex o ri mē hkôt pa. ¹⁶ Kêr ka mē ā mē kot amnhī nhīpêx anhỳr xwỳnhjê kapēr ma nē hkôt ri amnhī nhīpêx o ri apa. Mē kot Kris mā mē ajamār xwỳnh piitā kêr ka mē kapēr ma nē mē hkôt ri amnhī nhīpêx mex nē.

¹⁷ Nē ota Estepti nē Akajkre nē Putunatretra na mē ra jar pōj. Pa mē Sostenes mē wa mē omu nē wa ixkīnh nē. Te ixte mē apumunh nē ixkīnh tỳxta pyrāk. ¹⁸ Na xep prem ma mē awỳr mō nē tanhmā mē amā kapēr to ka prem mē ama nē akīnh nē. Tā mē ra amnē ixwỳr mō nē tanhmā inhmā kapēr mex to pa mē kuma nē ijaxwỳja ixkīnh nē. Kwa kêr pu mē ā mē kot mē pan-hīpêx anhỳr xwỳnhjê ho mex o papa.

¹⁹ Nē ota jar pika pê As kamā Kris kôt mē pahkwỳjaja piitā mē awỳr hpēr mē. Nē Akir mē hprō Prisireja wa. Nē wa ōrkwỳ kamā mē kot Tirtūm mā amnhī jarēnh kaxyw mē pikuprōnh xwỳnh piitā mē awỳr hpēr mē.

Nē kêr ka mē nhỳri axpēn pumu nē mē apê Kris kôt mē ate axpēn to atō nē atōx ā axpēn mā akapēr mex nē akīnh nē.

²¹ E kot paj kagā jatur xà kamā inhīhkra ho mē amā amnhī nhīxi nhīpêx ka mē omu. Koja inhmā ixkapēr ā kagā xwỳnhhta ja hā kagā hkêt nē. Pa kot paj hipêx. Ix-pê Pawre na pa ā amnhī nhīxi nhīpêx anē ka mē omu.

²² Nē kwa kêr ka mē arī amā Pahihti Jejus kīnh o ri apa. Koja mēhō kām hkīnh kêt hā koja Tirtūm ja hā homnuj tỳx kumrēx.

E “maranat.” Mē pakapēr kām na htem maranat jarēnh o: “Kwa tokyx akupỳn mē ixwỳr wrỳ Pahihti.” Anē.

²³ E kê Pahihti Jejus Krisja mē ato mex nē mē akutā nojarēt rāhā ho pa. ²⁴ Ixpyrà nē mē apê Jejus Kris kwỳ jakamā na pa hte inhmā mē akīnh nē.

Tā ām ja pix. Ixpê Pawre na pa ā mē awỳr kagā nhīpêx nē mēnh anē.

Sikũn Korĩt

Pawre na pre kagàja nhĩpêx. Kêp mry hkà ho ixkre nhĩpêx nê ho wênê ho pa xwýnh na pre. Tã hpãnhã kêp Jejus nhỹ hã hkrajê jahkre ho pa xwýnh. Jakamã na pre kagàja nhĩpêx nê Korĩt kãm mẽ kot Jejus kôt amnhĩ xunhwýr xwýnhjê hwýr kumê. Na pre ra mẽ hwýr wamta nhĩpêx nê kumê. Wam kagà nhĩxi pê Wam Korĩt. Tã axte hkôt ja nhĩpêx nê mẽ hwýr mênh jakamã kagà nhĩxi pê Sikũn Korĩt.

Na pre Korĩt kãm Jejus kôt mẽ htõjê hõ axtem nê nã puro kamã hpijaàm kêt o pa nhũm Pawre tee ri harênh ma nê mẽ hwýr wam kagàta mẽ nê kamã tanhmã mẽ kot hipêx to hã mẽ kãm karõ. Tã kagà ja kamã axte tanhmã hã mẽ kãm karõ hto.

Na pre ra Korĩt wýr mẽ kêp Kris nhỹ hã mẽ ahkre hã amnhĩ to hêx xwýnhjaja mẽ hwýr pøj nê tanhmã mẽ kãm kapêr jarênh to ho mẽ hkôt pa. Nê tanhmã mẽ kãm Pawre ho hêx to. Jakamã nhũm kagàja kamã tanhmã mẽ kãm amnhĩ tã àprãr to nê kãm mẽ hkĩnh tỳx ã amnhĩ jarê. ã na pre Pawre mẽ kãm mẽmoj jarênh nê hã kagà anê. Nê mẽ kãm hã kagà ho:

1 Pa Korĩt kãm Tĩrtũm krajaja. Xà mẽ apiitã mẽ amex na ka mẽ apa? E ot pa mẽ awýr kagà nhĩpêx nê kumê. Mẽ amã nê mẽ anhõ pika pê Gres kamã Tĩrtũm krajê mẽ mẽ ato ixpimrààtã mẽ awýr hipêx nê kumê. Ixpê Pawre na pa hte Tĩrtũm jamaxpêr xà hkôt ma Jejus Kris nhỹ hã krĩ piitã hkôt hkrajê jahkre ho ri ixpa. Tã Kris kôt mẽ pahõt Ximotre mẽ wa mẽ awýr hipêx nê kumê.

² E kê Měpahpãm Tĩrtũm mẽ Pahihti Jejus Kris wa mẽ ato mex rãhã ho pa. Nê mẽmoj to mẽ akutã nojarêt rãhã ho pa. Ka mẽ wa kukwak ri ajamakêtkati nê amex nê ri akĩnh nê apa ho apa.

Pawre kãm amnhĩ xà htỳx kamã hamak pyma hkêt ã harênh

Rõmãn 1.11-12; Korosê 1.11; Sikũn Tesarõn 2.16

³ Nã Tĩrtũm kêp mẽ panhõ Pahihti Jejus Kris nhĩpêêxã na. Nê kêp Měpahpãm maati jakamã na hte mẽ pakamã ukaprí nê tanhmã mẽ pahoto mex to ho pa. Kot puj mẽ mẽmoj tã tanhmã amnhĩ to nê pahkaprí nê ri papa nhũm ja hã mẽ pahpumu hãmri nê hamaxpêr pix o akupým mẽ pahoto mẽ paxihtỳx. Mẽmo kaxyw na hte ã mẽ pahoto mex anê? Nã mẽ pahte amnhĩ tã omunh nê amnhĩ pyrãk mẽ hkaprí nê ri mẽ pa xwýnhjê jamaxpêr o hihtỳx o mẽ hkôt papa kaxyw. Ja kaxyw na hte mẽ pajamaxpêr o hihtỳx. Jakamã kwa pu mẽ kãm mex o mex ã mãn harênh rãhã ho papa.

⁵ Na htem tõhã ixto Kris nhĩpêx pyrã nê tanhmã ixto pa amnhĩ xà htỳx kamã ijamak o ri ixpa. Tã nhũm Tĩrtũm inhĩpêx o te Kris nhĩpêx pyrã nê hamaxpêr pix o tanhmã ixkrã hto pa mẽ kutã amnhĩ to htỳx nê arĩ mẽ hkôt ixpa. ⁶ Na pa hte mẽ amã Kris kapêr jarênh o ixpa. Mẽ ate inhmar nê hkôt amnhĩ nhĩpêx kaxyw. Jakamã na hte mẽ kãm Tĩrtũm kapêr mar prãm kêt xwýnhjaja tõhã mẽ atã ixtomnuj nê pa amnhĩ xà htỳx kamã ijamak o ri ixpa. Tã kwãr mẽ mãmri ã inhĩpêx anê. Mẽ ate Jejus kôt amnhĩ xunhwýr tỳxja na inhmã hprãm. Na htem tanhmã Kris ã inhĩpêx to nhũm

Tĩrtũm mẽ hã ixpumu nê tanhmã ixkrã hto pa inhmã amnhĩ xà htỳx kamã ijamak pyma hkêt nê ixpa. Nê arĩ mẽ hkôt mẽ kãm kapêr jarênh rãhã ho ri ixpa. Na hte Tĩrtũm amarĩ ã inhĩpêx anhýr kêt nê. Mẽ ate ã kot inhĩpêx anhýr ã ixpumunh nê ixpyrà nê amnhĩ kaxyw kãm ajamaxpêr tỳx kaxyw na hte ã inhĩpêx anê. Mẽ ate ja hã ixpumunh nê ã ajamaxpêr anhýr kaxyw nê mẽ ajamaxpêr o:

—Nã kot pa nhýrmã Pawre pyrã nê tõhã mẽ mýrapê amnhĩ xà htỳx kamã ijamak o ixpa. Hãmri nhũm Tĩrtũm ja hã ixpumu nê te ho Pawre nhĩpêx pyrã nê tanhmã ixto pa inhmã amnhĩ xà htỳx kamã ijamak pyma hkêt nê ixpa. Nã koja ã inhĩpêx anê.

Anhýr o mẽ ajamaxpêr kaxyw na hte Tĩrtũm mẽ kutã ixto ixihtỳx. Mẽ ate ja hã ixpumunh nê akupým tãm ajamaxpêr pê Karõ nhỹ hã amnhĩ to axihtỳx kaxyw. Jakamã na pa tee ri mẽ akukamã ijamaxpêr kêt nê.

Tĩrtũm kêp mẽ papytãr xwýnh ã harênh

⁸ E Kris kôt ixkwýjaja. Kot paj ixprĩ hã mẽ amã tanhmã amnhĩ jarênh to ka mẽ inhma. Na pa pre ma pika pê As wýr mõ nê mẽ kãm Jejus kapêr jarênh o ri mẽ hkôt ixpa. Hãmri nhũm mẽ hkwyjaja ja hã ixtomnuj tỳx nê pa amnhĩ xà htỳx kamã ijamak pê mẽ hkôt ixpa. Kironhýx pa pre mẽ kamã ty. ⁹ Na pa pre tee ri amnhĩ kukamã ijamaxpêr o:

—Koja pêr mẽ ixpĩ. Tanhmã kot pa we amnhĩ to nê tokyx mẽ kêp amnhĩ pytã? Kot paj tee ri inhmã mẽ kêp amnhĩptãr prãm. Tĩrtũm pix na ja kaxyw mẽ kutã àhpumunh tỳx. Rỳ nhũm mẽ kot ixpĩr tã nhũm kot akupým ixto ixtĩr kaxyw tapxipix na àhpumunh tỳx. Nã kot paj amnhĩ kaxyw tapxipix mã mãn ijamaxpêr o ri ixpa nhũm amnhĩ tã ixpumu nê hkĩnh nê. ã ixte amnhĩ nhĩpêx anhýr o ixpaja na kãm hprãm. Anê.

¹⁰ Tã nhũm pre ã inhĩpêx anê nê xatã mẽ kêp ixpytãr o ixkôt pa. Koja ã mẽ kêp inhĩpêx anhýr rãhã ho pa. Nã ã kot inhĩpêx anhýr mã kênã.

¹¹ Nom kwa kêr ka mẽ apiitã arĩ ixto Tirtûm wÿr rãhã ho ri apa kê mẽ ama nẽ mẽ kãm ixkurê xwÿnhjê kutã ixto ixihtÿx rãhã ho pa. Nẽ ixto mex rãhã nẽ. Hãmri nhũm mẽ ohtõ nẽ kot mẽ kêp tanhmã ixpytãr to hã ix-tã omu nẽ ixtã kãm mex o mex ã harê.

Pawre kot mẽ kãm amnhĩ tã aprãr ã harênh

Wam Korîť 2.1-5

¹² Nẽ na xep pre atar Kris kôt mẽ pahkwÿjjaja tanhmã ixto kapêr punuj to nẽ Jejus kot mẽ awÿr inhmênh kêt ã mẽ amã ixto hêx. Nẽ ijakwa nhĩkjê ho inhmã mẽ akĩnh nẽ ijakwa nhĩkjê ho mẽ ato ixkapêr punuj ã ijarênh o ri pa. Nom ixte ã amnhĩ nhĩpêx anhÿr kêt. Aa ixte tanhmã mẽ ano kupyr to hkêt. Æm hãmri na pa mẽ amã amnhĩ jarê nẽ tãm mẽ amã ixkapêr o ri ixpa nẽ tãm ri mẽ anhĩpêx o ri ixpa. No ijamaxpêr tũm kôt tanhmã mẽ anhĩpêx to hkêt nẽ. Æm Tirtûm kot mẽmoj to mẽ pakutã nojarêť ã omunh xã hkôt pix mã na pa hte ý hã mẽ ato mex o ri ixpa. Ijamaxpêr nyw o. Na pa hte Tirtûm pyrã nẽ mẽ piitã mẽ ho mex nẽ. No mẽ kajaja ixpyrãn mẽ apê hkra jakamã na pa hte mẽ ato mex kumrêx o ri ixpa. ¹³ Na pa hte mẽ amã kagã hkwÿ nhĩpêx nẽ ixprĩ hã mẽ amã tanhmã mẽmoj jarênh to. Mẽ ate kamã harênh nẽ mar mex kurê kumrêx kaxyw. No na pa hte mẽ amã tanhmã ixêx to rÿ tanhmã mẽ ano kupyr to hkêt nẽ. ¹⁴ Æ ixte amnhĩ nhĩpêx anhÿr o ri ixpa htã kormã mẽ apiitã ja hã ixpumunh mex kêt nẽ. Nẽ Jejus kot mẽ awÿr inhmênh ã ixpumunh mex kêt nẽ. Jakamã na hte mẽ akwÿjjaja ixto akapêr punuj o pa. Tã kot kaj mẽ nhÿrmã Æm hãmri Jejus kot mẽ awÿr inhmênh ã axpên mã ijarê pa mẽ ama nẽ ixkĩnh nẽ. Hãmri nhũm nhÿrmã mẽ panhõ Pahihti Jejus mẽ pah-wÿr akupÿn wrÿ pa kãm mẽ ajarê nẽ kãm:

—E Pahihti. Jajê mã na pa pre akapêr jarênh o ixpa nhũm mẽ inhma nẽ akôt amnhĩ xunhwÿr kurê kumrêx nẽ tãm amnhĩ nhĩpêx mex o pa.

Anhÿr o kãm mẽ ajarê. Hãmri nẽ ã mẽ ate amnhĩ nhĩpêx anhÿr ã mẽ apumunh kôt ixkĩnh nẽ. Ka mẽ ajaxwÿja akĩnh pẽ tanhmã kãm ijarênh to ho akuhê.

Pawre hêx kêt ã kot amnhĩ jarênh

Wam Korîť 16.5-6

¹⁵ Nẽ na pa pre ra mẽ awÿr ixkrã. Ixte ma mẽ awÿr inhmõr nhũm mẽ ate ixpumunh nẽ akĩnh ã mẽ akamnhĩx nẽ mẽ awÿr ixkrã nẽ ijamaxpêr o:

—Nã ma Masetõn wÿr inhmõr xwÿj ri kot paj ma Korîť kumrêx wÿr mõ. Hãmri nẽ Kris kôt ixkwÿjê pumu nẽ rĩ kormã hamũ Masetõn wÿr mõ. Nẽ mẽ kamã ri ixpa tãmtã awjanã nẽ akupÿn Korîť wÿr mõ nẽ axte mẽ omu. Jao Tirtûm kapêr o mẽ ahkre ho axkrut nhũm mẽ amnhĩ tã ixpumu nẽ hkĩnh nẽ. Hãmri pa akupÿm Jutej wÿr inhnojarêť nhũm mẽ pry hã ixãpkur xã hã inhmã mẽmoj kwÿ nhõr japêr.

Anhÿr o ijamaxpêr. ¹⁷ Tã kormã jar tanhmã amnhĩ nhĩpêx to ho ixpa ka xep mẽ tee ri amnhĩ wÿr ixkãm ama nẽ axpên mã ijarênh o:

—Kwa Pawre kot ra mẽ pahwÿr nojarêť ã amnhĩ jarênh tã amnhĩm nojarêť kêt kumrêx. Mãn pre Æm mẽ

pamã amnhĩ to hêx nã? Ra kot mẽ pamã amnhĩ jarênh tã tokyx hpõx kêtne hã. Anê.

¹⁸ Kwa mẽ ri ã inhmã ajamaxpêr anhÿr kêt nẽ. Na pa pre mẽ amã ixêx kêt nẽ. Na pa hte Tirtûm noo mã Æm hãmri mẽmoj jarênh o ri ixpa nẽ mẽ amã mẽmoj jarênh o ixêx kêt nẽ. Nã Æm hãmri na pa pre ma mẽ awÿr inhmõr ã amnhĩ jarê.

¹⁹ Na pa pre ra Ximotre mẽ Siras mẽ wa mẽ amã Jejus Kris jarênh o ri mẽ akôt ixpa. Jejus kêp Tirtûm Kra hã harê nẽ kot amnhĩ nhĩpêx te kot Tirtûm kot amnhĩ nhĩpêx pyrãk ã harênh o ri ixpa. Jejus haxwÿja amnhĩ to hêx kêt. Kot mẽmoj tã amnhĩ jarênh xã hkôt na hte Æm hãmri tanhmã amnhĩ nhĩpêx to. Tã ã kot amnhĩ nhĩpêx anhÿrja kôt na pa inhmã ixte amnhĩ nhĩpêx o ixpa hprãm nẽ. ²⁰ Ra Tirtûm Jejus Kris kukwak ri kot mẽ pahto mẽ Æm amnhĩ jarênh jakamã na pu htem axpên mã harênh o:

—Koja Tirtûm Jejus kukwak ri mẽ pahto mex rax nẽ. Ra kot mẽ pahtã amnhĩ jarênh xã hkôt. Nã Tirtûm mex o mex. Anê.

Tirtûm kot mẽ pa hwÿr Karõ rênh ã harênh

Rõmãn 8.14; Epes 1.13

²¹ Nã Tirtûmja mex o mex. Kot mẽ pahpê hkra kaxyw amnhĩm mẽ paxunhwÿr jakamã na hte tanhmã mẽ pahkrã hto pu mẽ Kris kôt amnhĩ nhĩpêx mex o papa.

²² Na pu htem Kris kôt amnhĩ xunhwÿ nhũm Tirtûm ja hã mẽ pahpumu nẽ mẽ pahwÿr Karõ rê nhũm mẽ pahwÿr agjê. Mẽ piitã mẽ kot mẽ pahpê hkra hã mẽ pahpumunh kaxyw. Te mẽ kot tanhmã mẽ hikukrêx kagã hto nhũm mẽ kot kêp õ dõn ã omunhta pyrãk. Tã koja Tirtûm Karõ mẽ pakamã hkrĩ pu mẽ ja hã amnhĩ pumunh kôt Tirtûm kot nhÿrmã mẽ pahto mex rax ã amnhĩ tã omunh kurê kumrêx. Ra kot mẽ pahto mex tã koja nhÿrmã mẽ pahto mex rax o wam kot mẽ pah-to mex raxta jakre.

Pawre kãm mẽ kãm ãkjêr prãm kêt ã kot amnhĩ jarênh

Wam Korîť 4.21; Sikûn Korîť 10.1-2

²³ E Kris kôt ixtõ nẽ ixtõxjaja. Kot paj kormã ma mẽ awÿr inhmõr kêt ri ixprĩ hã mẽ amã tanhmã amnhĩ jarênh to ka mẽ ixte amnhĩ jarênh ma. Tirtûm tãm mẽ arom kot ijamaxpêr kôt ixpumunh mex jakamã kot paj noo mã ixprĩ hã mẽ amã tanhmã amnhĩ jarênh to ka mẽ inhma.

Na pa pre ra mẽ awÿr inhnojarêť tã no Æm tee ri amnhĩ kukamã ijamaxpêr nẽ ijamaxpêr o:

—Nã kot paj taxy kormã ma mẽ hwÿr inhmõr kêt nẽ. Kot paj tokyx mẽ hwÿr mõn põj nẽ kot amnhĩ tomnuj xwÿnhta ã mẽ kãm akir nẽ nẽ tanhmã mẽ kãm ixkapêr to. Hãmri nhũm mẽ amnhĩ tã inhma nẽ hkaprĩ nẽ tee ri amnhĩ kukamã hamaxpêr. Æ mẽ kot amnhĩ nhĩpêx anhÿr pymaj kot paj kormã mẽ hwÿr inhmõr kêt nẽ.

Anhÿr o ijamaxpêr. ²⁴ Inhmã ma mẽ awÿr inhmõr nẽ tanhmã mẽ ate amnhĩ nhĩpêx to hã axte mẽ amã karõ kamã ixihtÿx prãm kêt. Mẽ akwÿjê rom ra mẽ ate Kris hkôt amnhĩ xunhwÿr tÿx kênã. Tã mẽ ate hkôt amnhĩ nhĩpêx mex o akĩnh nẽ apaja na inhmã hprãm.

2 Na pa pre ma mẽ awÿr mõ nê mẽmoj tã mẽ amã akir nê nê tanhmã mẽ amã ixkapêr to ka prem inhma nê akaprî nê ri apa. Tã inhmã akupÿm mẽ awÿr inhmôr nê axte mẽ amã ixàkjêr prãm kêt jakamã na pa kormã mẽ awÿr inhmôr kêt nê. ² Kot kaj mẽ akînh nê apa pa ijaxwÿja ixkînh nê ixpa. No kot paj ma mẽ awÿr mõ nê mẽmoj tã mẽ amã akir ka mẽ tee ri inhma nê akaprî nê. Pa mẽ apumu nê ijaxwÿja ixkaprî nê.

³Ja pymaj na pa pre wam ixte mẽ awÿr kagà mênhta kamã mẽmoj nê tanhmã mẽ amã ixàkjêr to. Mẽ ate kamã harênh nê mar nê tokyx kormã mẽ awÿr inhmôr xwÿj ri tanhmã mẽ ate amnhî tomnuj tota kaga nê tãm amnhî nhîpêx kaxyw. Kêr pa mẽmo arîgro hã ma mẽ awÿr mõn pôj nê mẽ ate tãm amnhî nhîpêx o apa hã mẽ apumu nê ixkaprî hkêt nê ixkînh nê. Ka mẽ ajaxwÿja ixpumu nê akînh nê. ⁴Jakamã na pa pre ã mẽ amã kagàta nhîpêx nê mẽ awÿr mênh anê. Nê kamã mẽmojta nê tanhmã mẽ amã ixàkjêr to. Na pa pre ixkaprî htÿx nê tee ri mẽ akukamã ijamaxpêr o inhmÿr rax pê mẽ amã mẽmojta ã kagà. No ãm mẽ akaprî kaxyw na pa pre mẽ amã hipêx kêt nê. ãm mẽ ate kamã harênh nê inhmar nê ajamaxpêr o:

—Hêxta waa nê. Nà Pawre na kãm mẽ pahkînh tÿx kumrêx. Hã na pre mẽ pahte tanhmã amnhî tomnuj to hã mẽ pajarênh ma nê tee ri mẽ pakukamã hamaxpêr pê kagàja kamã hã mẽ pamã akir nê mẽ pahwÿr kumê. Nà kãm mẽ pahkînh tÿx kãm na ã mẽ pamã kapêr kãm hihtÿx anê.

Anhÿr o ajamaxpêr kaxyw na pa pre hipêx nê mẽ awÿr kumê.

Mẽ kot axte amnhî tomnuj mã hamaxpêr kêt ã mẽ kãm karô

Rukre 17.3-4; Wam Korîť 5.1-13; Karatas 6.1-2

⁵Nê wam kagàta kamã na pa pre mẽ amã mẽ akwÿjê hõ kot nã kaàkre kamã hpijaàm kêêta pa mẽ amã tanhmã hã karô hto. Ra mẽ ate harênh mar tã nê kãm akapêr kêt nê. Tã mẽ ate inhmar nê nê tanhmã kãm akapêr to nê amnhî nê hanor kaxyw na pa pre mẽ awÿr kagàja mẽ. Hãmri nê ijamaxpêr o:

—Ko. Kojã mẽ ixkapêr mar xà hkôt amnhî nê hanor japêr. Anê.

Tã ka xep prem kamã harê nê ama nê tee ri ja hã amnhî pumu nê akaprî nê. Nê ixpyrà nê apijaàm nê. Hãmri nê ijamaxpêr xà hkôt amnhî nê hanor kãm axihtÿx nê. ãm hãmri na ka prem ã hipêx anê. Nhũm xep tee ri ja hã amnhî pumu nê hkaprî nê hkaprî xàj ri mÿr o pa. Jao ra ã amnhî nhîpêx anhÿrta kaga nê akupÿm tãm amnhî nhîpêx. Tã ra ã kot amnhî nhîpêx anhÿr jakamã kwa mẽ tokyx akupÿm amnhî wÿr awÿ kê axte mẽ awÿr mra nê mẽ akôt pa. Ra kot amnhî tomnujta kaga jakamã kêr ka mẽ axte kãm ajamaxpêr kêt nê. Akupÿm tãm kãm akapêr kê tokyx akupÿm tãm hamaxpêr nê hkînh nê pa. Kot kaj mẽ tokyx ã hipêx anhÿr kêt nê nhũm tee ri amnhî kukamã hamaxpêr nê hkaprî nê pa. Ja pymaj kwa mẽ amã hkînh ã kãm amnhî jarê nê akupÿm tãm kãm akapêr pê tãm hipêx o ri apa. Kê amnhî tã mẽ apumu nê akupÿm hkînh nê tãm

hamaxpêr. ¹⁰E kêr ka mẽ axte kot tanhmã amnhî tomnuj tota mã ajamaxpêr kêt nê. Kwarî ho kwarî. Kot kaj mẽ ã hipêx anê pa ijaxwÿja ma hipêx anê. No pa na pre tanhmã ixtomnuj to hkêt nê. ãm Jejus kapêr kwÿm na pre ri ã amnhî nhîpêx anê. Tã ra kot amnhî tomnujta kaga jakamã kot paj Jejus nhÿ hã akupÿm tãm hipêx nê kot amnhî tomnujta o ijamakêtkati tokyx anê nê axte kãm ijamaxpêr kêt nê. Mẽ apiitã mẽ amex nê ri mẽ apa kaxyw. Jakamã kêr ka mẽ ajaxwÿja mẽ amex nê apa kaxyw ã amnhî nhîpêx anê nê axte kãm ajamaxpêr kêt nê. ¹¹Kwa mẽ tokyx ja ho ajamakêtkati. Kê Satanasti tee ri ja hã mẽ apumu nê mẽ amã mẽ ate tanhmã amnhî tomnuj to hprãm xàj tee ri tanhmã ri mẽ ato ho pa kaprÿ. Kêr pu mẽ Satanasti kot amnhî nhîpêx kôt amnhî nhîpêx o ri papa hkêt nê. Ra mẽ pahte Tirtûm kapêr kuhpa hã tanhmã kot amnhî nhîpêx to ho pa hã omunh mex kênã.

Pawre kot Xitre japêr o pa hã harênh

¹²Nê na pa pre ja rûm ixkato nê ma Tôx wÿr mõ. Ixte mẽ kãm Kris jarênh o mẽ hkôt ixpa kaxyw ma mẽ hwÿr mõ. Nhũm Pahiiti Kris ixkukamã tanhmã mẽ hkrã hto jakamã pa pre mẽ hwÿr pôj nhũm mẽ piitã kãm ixujarênh mar prãm nê. Pa pre mẽ kãm Tirtûm kapêr jarênh rÿy ho mẽ hkôt ixpa. ¹³Na pa pre Xitre ra mẽ hwÿr ixkukamã hpôx ã hkamnhîx tã nhÿri omunh kêt nê. Hãmri nê ijamaxpêr o:

—Hêxta waa nê. Inhmã Korîť kãm Jejus kwÿjê jarênh mar prãm. Na pa tee ri mẽ hkukamã ijamaxpêr o ixpa. Nom kormã Xitre mẽ kurûm akupÿn hpôx kêt. Mãn kormã Masetôn kamã pa.

Anhÿr o ijamaxpêr hãmri nê mẽ kãm amnhî jarê nê ixkato nê ma Masetôn wÿr krî hkwy hkôt hapêr o mõ. Tã ra hwÿr ixkato nê omu.

Te mẽ pahpê mēhkuxwa xà pyræk ã mẽ pajarênh

Epes 5.2; Piriapos 4.18

¹⁴Nà Tirtûmjã mex o mex. Na hte mẽ pahto mex rãhã ho pa. Nê mẽ kot mẽ panê ãmnâr xwÿnhjaja nhũm hte tanhmã mẽ ho pu mẽ ma paxãmnhîx ri mẽ hkôt mẽ kãm Kris kapêr jarênh o ri papa. Te mẽ pahte mẽ hkuxwa xà ho ri mẽ hkuxwa ho papa pyræk. Mẽ pahte Kris kôt amnhî nhîpêx jakamã Tirtûm mã te mẽ pahkuxware nê ri mẽ papa pyræk. Nê te mẽ kãm Kris jarênh o ri papa pê te mẽ hkuxwa xà ho mẽ hkuxwa ho ri mẽ hkôt papa pyræk. Nhũm hte mẽ hkwyjaja mẽ pama nê kãm mar prãm nê. Nê mẽ paxujarênhja haxwÿja te kot mẽ hkuxwa xà kuxwa mex nhũm htem hpâr nê kãm ho amnhî kuxwa hprãm pyræk. Jao kãm mẽ pamar prãm nê Kris kôt amnhî xunhwÿ. No nhũm mẽ hkwyjaja axtem nê mẽ kêp mẽ pamar prãm nôkati. Mẽ kumã Tirtûm kapêrja te kêp wenên kuxÿ htÿx nhũm mẽ kot hpâr nê htyk pymaj amÿm kuhê pyræk. Jao kapêr kaga nê kêp amÿm amnhî xunhwÿ.

Nê na pu htem amnhî krã hkôt mẽ kãm Kris kapêr jarênh o ri papa hkêt nê. ãm Tirtûm nhÿ hã pix mã tanhmã harênh to ho papa.

Pawre kot katàt kôt Tirtûm kapër o mẽ ahkre hä harênh

17 Na hte mẽ kot mẽ kêp Kris nhỹ hä mẽ ahkre hä amnhĩ to hêx xwýnhjaja te Tirtûm kapër o wênê pyràk o mẽ hkôt pa. Jao kàxpore hpràm xàj amnhĩ krã hkôt tanhmã mẽ kãm harênh to nhũm htem mẽ kuma nê hpãnhã tanhmã mẽ kãm amnhĩrer to. Nom pa na pa hte ã amnhĩ nhĩpêx anhỹr kêt nê. Nê mẽ uràk nê amnhĩ krã hkôt Tirtûm kapër jahkre ho ixpa hkêt nê. Tirtûm kot mẽ akaxyw ixãm jakamã na pa hte ixkatàt kôt Kris nhỹ hä amarĩ mẽ amã kapër jarênh o ri mẽ akôt ixpa. No mẽ uràk nê kàxpore prãm xàj mẽ amã harênh kêt nê. Tirtûm kot ja hä ixpumunh mex.

3 Mẽ kêp Kris nhỹ hä mẽ ahkre hä amnhĩ to hêx xwýnhjaja na htem nhỹhỹm nojarêt nê mẽ kot mar xwýnhjê mã:

—E kot paj ma nhãm krĩ hõ hwýr mõ nê Tirtûm kapër o mẽ ahkre. Jakamã kwa mẽ kaxyw inhmã kagà nhĩpêx nê kamã ixte Tirtûm kapër o mẽ ajahkre mex xwýnh ã ijarê nê hä kagà. Hãmri nê inhmã agõ pa ma amnhĩ kôt o mõ nê mẽ kot inhmar mã xwýnhjê mã kugõ kê mẽ kamã harê nê ijarênh ma nê kãm ixkapër mar prãm nê.

Anhỹr o na htem amnhĩ to mẽ hwýr o pa. No pa na inhmã ã amnhĩ nhĩpêx anhỹr prãm kêt. Inhmã nhãm mẽ kãm amnhĩ to jarkrar prãm kêt. Mẽ ate ja hä ixpumunh mex. Ra mẽ piitã mẽ kot ixkatàt kôt ixte Tirtûm kapër jarênh mex ã ixpumunh mex jakamã mo kaxyw kot pa ri amnhĩ kôt kagà jamý nê ho ixpa? Nà kot pa amnhĩ kôt hõ ho inhmõr kaxyw hä ixàhwýr kêt nê. 2 Mẽ kajaja te mẽ apê inhõ kagà pyràk. Na ka prem ixte mẽ ajahkre ma nê Jesus kôt amnhĩ xunhwýr kurê kumrêx. Hãmri nhũm Tirtûm mẽ amã amnhĩ Karõ rê nhũm mẽ amã agjê ka mẽ ý hä amnhĩ nhĩpêx nyw o amnhĩ nhĩpêx o apa. Hãmri nhũm mẽ akwýjaja amnhĩ jaêr pê mẽ ate amnhĩ nhĩpêx nyw ã mẽ apumu nê mẽ atã xpên mã ijarênh o:

—Hêxta waa nê. Pêr ãm hãmri na pre Kris mẽ hwýr Pawre mẽ. Na pre ma mẽ hwýr mõ nê mẽ kãm Tirtûm kapër o mẽ ahkre nhũm mẽ kuma nê amnhĩ tomnuj kaga hpa nê hpãnhã Tirtûm kapër kôt amnhĩ nhĩpêx nê tãm ri amnhĩ nhĩpêx o pa. ãm hãmri na hte Pawre mẽ ahkre mex o pa. Hêxta waa nê.

Anhỹr o mẽ atã ijarênh jakamã mo kaxyw kot pa kagà hkwy jamý nê amnhĩ kôt ho ixpa? Nà mẽ kajaja te mẽ apê inhõ kagà pyràk.

4 Na pa pre Jesus kôt amnhĩ xãm nhũm Tirtûm ja hä ixpumu nê tanhmã inhmã kapër o amnhĩrit to nê inhmã:

—E Pawre. Kêr ka ma mẽ kãm ixkapër jarênh o ri mẽ hkôt apa.

Anhỹr jakamã na pa hte Tirtûm kamnàr rom ã amnhĩ nhĩpêx anhỹr o ri mẽ hkôt ixpa. 5 Nom amnhĩ krã hkôt mẽ ahkre hkêt nê. Tanhmã kot pa we amnhĩ to nê amnhĩ krã hkôt mẽ kãm kapër o mẽ ahkre mex nê? Nà Tirtûm pix na hte ja kaxyw tanhmã ixkrã hto pa ô ri mẽ ahkre ho ri ixpa.

Tirtûm kapër nyw jarênh

6 Nê Tirtûm na hte tanhmã ixkrã hto pa Karõ nhỹ hä mẽ piitã mẽ kãm kapër nyw jarênh o ri ixpa. Amnepêm Tirtûm kot Ijaew mã mẽmoj tã karõ xwýnhhta. Mojes kot kapër tùm jarênh o pa xwýnhhta mex tã no nhũm mẽ tee ri hkôt kãm amnhĩ nhĩpêx prãm o pa. Nê xatã kamã harê nê omunh tã tee ri kot hkôt kãm amnhĩ nhĩpêx prãm. Tã mẽ kot hkôt amnhĩ nhĩpêx kêt mýrapê na prem pikaprãr pan hapêx. No kêt Tirtûm kapër nywja. Jejus jarênhja. Na hte Tirtûm Karõ tanhmã mẽ pahkrã hto pu mẽ Jejus kôt amnhĩ nhĩpêx o ri papa. Jao mẽ pahpê pahtır tùm nê papa mã xwýnh. No na hte nhãm mẽ hkwyjaja kãm harênhja mar prãm kêt nê amnhĩ jarênh o:

—Nà kot paj amnhĩ krã hkôt ã amnhĩ nhĩpêx anê nê ã amnhĩ nhĩpêx anê nhũm Tirtûm ja hä ixpumu nê ixtir tùm nê ixpa mã xwýnh ã ijarê.

Anhỹr tã no ãm ã amnhĩ jarênh anhỹr kaprý. Tirtûm Karõ nhỹ hä mẽ kot amnhĩ to mex o mẽ pa xwýnh pixjaja koja mẽ htir tùm nê pa ho pa.

7 Nê Tirtûm kapër tùmta na pre Mojes mẽ kãm harênh kaxyw nhũm mẽmoj tanhmã amnhĩ nhĩpêx to rax kumrêx. Naja hkrakrak nê haxênh nê kamã kamàt kô htyk. Hãmri nhũm Tirtûm mẽ kot hkôt amnhĩ nhĩpêx kaxyw kên po hä mẽ kãm mẽmoj tã karõ nhũm Mojes kumý nê mẽ hwýr o wrý nê mẽ kãm kamã harê. Tirtûm kot hirã htýx kamã kãm kapër nhũm kuri mar o ãm jakamã uràk nê ý hä hkuk nhĩrã htýx kumrêx nê mẽ kãm kapër jarênh o xa. Jakamã nhũm mẽ tee ri kot hprĩ hä omunh mex kaxyw no ãm nom gêk týx nê. Tã gaa nhũm hkuk kãm hirãja amnhĩm hprĩ nê hapêx o mõ. Na pre ã Tirtûm Ijaewjê mã kapër tùm nhõr anê. Hãmri nhũm Mojesja ô ri mẽ kãm kamã harê nê harênh pa hãmri nê mẽ kãm:

—E kêr ka mẽ Tirtûm kapër mar týx nê hkôt amnhĩ nhĩpêx mex rãhã ho ri apa. Kêr ka mẽ nhỹrmã atyk tã kê akupým mẽ ato mẽ atir ka mẽ õ krĩ kamã kuri atir tùm nê amex nê apa ho apa. Anê.

Hãmri nhũm mẽ kuma nê kãm:

—Tõe. Nà kot paj mẽ hkôt pix mã ri amnhĩ nhĩpêx mex rãhã ho ri ixpa.

Anhỹr ã amnhĩ jarênh tã no ãm hkôt amnhĩ nhĩpêx kêt nê nhũm Mojes tee ri mẽ kot amnhĩ nhĩpêx ã mẽ omu nê mẽ kãm:

—Nà mẽ ate Tirtûm kapër kôt amnhĩ nhĩpêx kêt jakamã kot kaj mẽ nhỹrmã ty nê Tirtûm pê awry rax kumrêx nê ri apa. Anê.

8 Tã na hte Tirtûm jarãhã axtem tanhmã mẽ pamã kapër to. Pãnhã kapër nyw o kapër nê mẽ pamã:

—Kot kaj mẽ Ixkra Jejus kôt amnhĩ xunhwý pa hä mẽ apumu nê mẽ ato ixkra. Hãmri nhũm Ixkarõ mẽ amã agjê. Anê.

Kapër ja na mex kumrêx o kot kapër tùm jakrenh. 9 Kapër tùmja mex tã nhũm htem hkôt amnhĩ nhĩpêx kêt nê. Jakamã na htem ty nê Tirtûm pê awry rax ã ri pa. No kapër nywja na tùmta rom mex o mex. Na hte Tirtûm mẽ pamã kapër nywja jarênh o:

—Kot paj tanhmã mě akrã hto ka mě amnhĩ to mex pix o ri apa. Jao ixkôt ri amnhĩ nhĩpêx mex o ri apa. Aně.

¹⁰ Ně kapěr tũmja te kot kaně hpôk kryre pyrãk. No kapěr nywja mex o kot tũm jakrenh jakamã te kot mẽmo hpôk rũnh o kaně hpôk kryre jakrenh pyrãk. Jakamã nhũm mě kot hirã rax kãm ri mrar gryk ã hpôk griire nhĩrã kamã mrar kêt pyrãk. ¹¹ Tĩrtũm kapěr tũm te kot Mojes kuk pyrãk. Na pre kamã hirã rax tã gaa nẽ amnhĩm hprĩ nẽ kamã hirã hapêx o mõ. Ně gaa nẽ hapêx. No kêt Tĩrtũm kapěr nywja te kot Tĩrtũm nhĩrã htỳx rãhã ho rãhãta pyrãk. Koja urãk nẽ aa hapêx kêt kumrẽx.

Ijaewjê jarěnh

Rõmãn 11.7-10

¹² Ně Tĩrtũm kapěr nywja mex o mex jakamã na pa hte ixãmnhĩx mẽ kãm harěnh o ri ixpa. ¹³ Te ixte Mojes kot amnhĩ nhĩpêx pyrãk kêt. Na pre hte Mojes ixkĩnhã ãmnhĩx Ijaewjê mã Tĩrtũm kapěr jarěnh o ri pa hkêt nẽ. Mě kot hkuk kãm hirãta ra hapêx o mõ ã omunh nhũm hpijaãm pymaj na pre kupêxê puroore ho amnhĩ kuk pro nẽ ri mẽ hkôt pa. ¹⁴ Jakamã nhũm prem hprĩ hã hkuk kãm hirã pumunh mex kêt nẽ. Ně Tĩrtũm kapěr ã kagã htũmja nhũm prem mããněh hprĩ hã mar mex kêt nẽ. Mě hkrã hihtỳx jakamã te mẽ kot amnhĩ jamak pro nẽ mẽmoj mar mex kêt pyrãk jakamã mẽ kot mar tã hprĩ hã mar kêt nẽ. Ně hkôt ri amnhĩ nhĩpêx mex kêt nẽ. No mẽ kot Kris kôt amnhĩ xunhwỳr xwỳnhjaja na hte Tĩrtũm amnhĩ tã mẽ omu nẽ te mẽ nẽ mẽ hamak hpro xãta rěnh par nẽ rěnh pyrãk o mẽ hipêx nhũm mẽhprĩ hã kapěr mar tỳx nẽ.

¹⁵ Tã na hte Ijaewjaja arĩ jarãhã Mojes kot Tĩrtũm kapěr ã kagã htũm kamã harěnh o pa. Nom arĩ mẽ hkrã hihtỳx jakamã te mẽ kot amnhĩ jamak pro nẽ kamã harěnh o pa pyrãk o amnhĩ nhĩpêx jakamã kormã hprĩ hã mar kêt nẽ. ¹⁶ Tã koja mẽ hkwyjaja Pahihti Jejus Kris kôt amnhĩ xunhwỳ nhũm amnhĩ tã omu nẽ te kot mẽ hamak nẽ hpro xã hpyr nẽ mēnh pyrãk o mẽ hipêx nhũm mẽhprĩ hã kapěr nyw mar tỳx nẽ. ¹⁷ Pahihti mẽ Karõja wa htipxi jakamã na hte mẽ pakamã agjê nẽ hprĩ hã mẽ pamã kapěr o amnhĩrĩt o pa. ¹⁸ Ra mẽ pahte Pahihti Kris kôt amnhĩ xunhwỳr jakamã te mẽ pahte mẽ kot amnhĩ jamak pro xwỳnh kot amnhĩ nhĩpêx pyrãk kêt. Nhũm Pahihti Karõja tanhmã mẽ panhĩpêx to pu mẽ ra hkôt amnhĩ nhĩpêx mex o mõ. Jakamã na htem mẽ pahte amnhĩ nhĩpêx nyw pumunh kôt Tĩrtũm kot tãm amnhĩ nhĩpêx ã omunh kurê kumrẽx. Kormã mẽ pahte hkôt amnhĩ nhĩpêx mex kumrẽx kêt tã ra hkôt amnhĩ nhĩpêx mex o mõ. Jao te tãm kot amnhĩ nhĩpêx pyrãk o amnhĩ nhĩpêx o mõ.

Jejus kapěr te kệp kaně pyrãk ã harěnh

Wam Korîť 2.1-5; Sikûn Korîť 1.12; Wam Tesarõn 2.1

4 Ně na pre Tĩrtũm ixto mex nẽ tanhmã kãm ixãpěnh to hã inhmã karõ. Ixte ma mẽ kãm kapěr jarěnh o ri mẽ hkôt ixpa kaxyw. Jakamã na pa hte ixãmnhĩx mẽ hkôt mẽ kãm harěnh o ri ixpa. ² Nhũm

mě hkwyjaja axtem nẽ ixêx o ri ixpa hã ijarěnh tã ixte ã amnhĩ nhĩpêx anhỳr kêt. Na pa hte amnhĩ tomnuj o ri ixpa hkêt nẽ. Mě hkwyjaja kot mẽ no kupyr kaxyw mẽ kãm Tĩrtũm kapěr o hêx o pa htã pa na pa hte ã amnhĩ nhĩpêx anhỳr kêt nẽ. Ixprĩ hã mẽ kãm harěnh o ixpaja na inhmã hprãm jakamã na pa hte ixkatãt kôt harěnh o ri mẽ hkôt ixpa. Mě piitã mẽ kot ixêx kêt kôt ixpumunh mex kaxyw. Tĩrtũm kot ixêx kêt kôt ixpumunh mex. ³ No nhỹrmã mẽ htyk nẽ ma kuwy hwỳr mẽ pa mã xwỳnh pixjaja na htem hprĩ hã ixkapěr mar mex kêt nẽ. ⁴ Satanasti tãm kệp mẽ hpãm. Kệp mẽ kãm Tĩrtũm kapěr mar prãm kêt xwỳnh piitã mẽ hpãm. Jakamã na pa hte mẽ kãm tanhmã Jejus jarěnh to. Kệp Tĩrtũm Kra hã harě nẽ te kot Tĩrtũm kot amnhĩ nhĩpêx pyrãk ã harěnh o ri ixpa. Hãmri nhũm Satanasti tee ri ja hã ixpumu nhũm ja kệp omnuj nẽ. Jakamã nhũm tanhmã Tĩrtũm nẽ mẽ hkrã hto nẽ te mẽ hamak pro pyrãk o mẽ hipêx. Mě kot hprĩ hã Jejus jarěnh mar nẽ hkôt amnhĩ xunhwỳr pymaj nhũm ã nẽ mẽ hipêx aně. Jejus jarěnh te kệp kaně hpôk mex pyrãk jakamã mẽ kot mar kêt xwỳnhjaja te kamãt kô kamã ri mẽ pa pyrãk. No nhũm Satanasti tãm kot nẽ mẽ no kupyr jakamã nhũm htem ã ri kamãt kô kamã mẽ pa pyrãk o amnhĩ nhĩpêx aně.

Amnepê mã kormã mẽmoj kêt ri nhũm kamãt kô pix. Tã nhũm Tĩrtũm tanhmã kapěr to nẽ kapěr o:

—E kê hirã kato. Aně.

Hãmri nhũm ra kapěr xã hkôt hirã kator kurê kumrẽx. Tã ja pyrã nẽ na pa pre kamãt kô kamã ixtyx ri ixpa pyrãk nhũm Tĩrtũm te kot inhmã kaně hpôk nhũm hirã pyrãk o inhĩpêx pa mex o mex ã omunh kurê kumrẽx. Hãmri nẽ Jejus Kris kot amnhĩ nhĩpêx ã omu nẽ te Tĩrtũm kot amnhĩ nhĩpêx ã omunh pyrãk. Wa kot amnhĩ nhĩpêx te kot axpěnh pyrãk.

Ně na pa hte pam tanhmã amnhĩ jarěnh to ho ri ixpa hkêt nẽ. ãm Jejus Krisja pix na pa hte harě. Tapxipix na kệp mẽ panhõ Pahihti. Jakamã hkĩnhã te ixpê mẽ amã ixãpěnh xwỳnh pyrãk o na pa hte mẽ amã kapěr jarěnh o ri mẽ akôt ixpa.

Pawre te kệp poti grãre nhĩpêx pyrãk ã harěnh

Wam Korîť 2.4-5; Sikûn Korîť 11.23, 12.9

⁷ Ně Tĩrtũm ixrom hihtỳx o hihtỳx. No pa na hkĩnhã ixihtỳx kêt. Te ixpê poti grãre nhĩpêx pyrãk jakamã na pa hte Tĩrtũm xihtỳx xwỳnh pix nhỹ hã mẽ kãm kapěr jarěnh o ri mẽ hkôt ixpa. Nhũm htem inhma nẽ ãm hãmri ixte ý hã ixkapěr ã ixpumunh kurê kumrẽx. No pa ixte amnhĩ krã hkôt ixkapěr ã ijarěnh kêt nẽ.

⁸ Na pa hte mẽ hkôt mẽ kãm Jejus jarěnh o ri ixpa nhũm mẽ hkwyja tõhã inhma nẽ ja hã inhĩpêx kati nẽ pa amnhĩ xã htỳx kamã ama. Nom nhũm Tĩrtũm mẽ kutã tanhmã ixkrã hto pa inhmã amnhĩ xã kamã ijamak puma hkêt nẽ arĩ mẽ kãm kapěr jarěnh o ri mẽ hkôt ixpa. Ně amnhĩ kaxyw Jejus kôt pix mã ijamaxpěr tỳx rãhã pẽ tee ri amnhĩ kukamã ijamaxpěr o ri ixpa hkêt nẽ.

⁹ Ně mẽ kãm ixkurê xwỳnhjaja ohtõ. Na htem xatã Jejus ã tanhmã ixtomnuj to htã pa kormã ixtyk kêt nẽ.

Na pa hte Tirtûm kamnàr rom arí mẽ hkôt ixpa nhùm Tirtûm ixkôt pa ho pa. ¹⁰ Na htem Jejus pyrà mẽ ixpír kaxyw tanhmã inhîpêx to. No âm ko. Koja mẽ nhÿrmã ixpír rÿ ko. Ixte amnhî kukamã ixàhpumunh kêt. Kot paj âm arí ixtír ri mẽ kãm Jejus jarênh o ri mẽ hkôt ixpa. Kêr kê mẽ hkwyjaja ixkapêr ma mẽ xypên mã tanhmã Jejus jarênh to mẽ harênh o:

—Nà pêr âm hãmri na pre Jejus akupÿm htír mẽ tanhmã hkwyjê ho mex to. Âm hãmri na hte Pawre ja hã harê. Anê.

¹¹ Mẽ kot Jejus ã ixpír mã tâ pa arí mẽ kãm akupÿm htír ã harê. Tirtûm na hte ja kaxyw tanhmã ixkrã hto pa arí mẽ kãm harênh o ri mẽ hkôt ixpa. ¹² Na pa pre ra mẽ amã harê ka prem inhma mẽ Jejus kôt amnhî xunhwÿr kurê kumrêx mẽ amnhî nhîpêx nyw o amnhî nhîpêx o ri apa. Jakamã ixpyrà mẽ mẽ apê atír tùm mẽ apa mã xwÿnh. Nhùm htem piitã mẽ ate Jejus kôt amnhî xunhwÿr ã mẽ apumu. Tã nhùm mẽ kot Jejus ã ixpír kaxyw. Nom kwâr mẽ mãmrí ixpír. Ja inhma tanhmã kute hkêt. Mẽ kot ixpír mã tâ kot paj arí Jejus kapêr jarênh o ri ixpa rãhã ty. Ra mẽ kot ixkapêr mar mẽ Jejus kôt amnhî xunhwÿr xwÿnhjaja mẽ pahpyrà mẽ kêp htír tùm mẽ pa ho pa mã xwÿnh kênã. ¹³ Jakamã kwâr mẽ mãmrí ixpír. Na pa hte arí amnhî kaxyw Tirtûm kôt ijamaxpêr mex rãhã mẽ. Amnepê mã na pre Pahi finat Tawija tanhmã Tirtûm kapêr jarênh to mẽ harênh o:

Âm hãmri na Tirtûm kapêrja. Hêx kêt jakamã na pa hte mẽ kãm harênh rãhã ho ri ixpa. Anê. Tã pa hte Tawi pyrã mẽ mẽ piitã mẽ kãm Tirtûm kapêr jarênh o ri ixpa. Tirtûm kot mẽ pamã tanhmã mẽmoj to hêx to hkêt. ¹⁴ Ra kot amnhî jarênh xà hkôt akupÿm Pahihti Jejus o htír jakamã kot puj mẽ nhÿrmã uràk mẽ ty nhùm akupÿm mẽ pahto mẽ pahtír mẽ ma war amnhî wÿr mẽ pahto api.

¹⁵ Amnepêm na pa pre ma mẽ awÿr mõ mẽ mẽ akôt mẽ amã Tirtûm kapêr jarênh o ri ixpa. Ka prem inhma mẽ Jejus kôt amnhî xunhwÿ mẽ ixpyrà mẽ Tirtûm mã mex o mex ã harê. Jakamã kwâr mẽ mãmrí Jejus ã tanhmã inhîpêx to. Koja mẽ gaa mẽ rí mẽ hkwyjaja mẽ pahpyrà mẽ Jejus kôt amnhî xunhwÿ mẽ Tirtûm mã mex o mex ã harê.

Pawre tee ri amnhî kukamã hamaxpêr kêt ã kot amnhî jarênh

Römãn 8.17; Sikûn Korîť 1.7; Wam Pêtre 1.3-9, 4.12-16, 5.10

¹⁶ Jakamã na pa tee ri amnhî kukamã ijamaxpêr o ixkaprî mẽ ixpa hkêt mẽ. Mẽ kot Jejus ã tanhmã ixtomnuj to htãã pa hte ixamnhîx kapêr jarênh o ri ixpa. Ra ixpigêt mẽ ixirerek o inhmôr tã inhôpinh xà kaxwÿnh kãm ijamaxpêr o Jejus kôt amnhî nhîpêx mex o mõ. ¹⁷ Mẽ kãm ixkurê xwÿnhjaja na htem Jejus ã inhîpêx kati htã ã inhîpêx anhÿr japjê hkêt mẽ. Nom kot paj nhÿrmã ty nhùm Jejus akupÿm ixto ixtír pa Tirtûm mẽ wa kuri inhmex kumrêx mẽ ixpa ho ixpa. Mẽ kot ixtomnujja na mẽ ho apkati grêre no kot paj nhÿrmã Tirtûm mẽ Krata wa kuri inhmex kumrêx mẽ ixtír tùm mẽ ri ixpa ho ixpa. Jao rãhã ho rãhã.

¹⁸ Jakamã na pa tee ri mẽ kot tanhmã ixtomnuj tota kukamã ijamaxpêr o ri ixpa hkêt mẽ. Ja koja tokyx hapêx. Na pa hte âm nhÿrmã Tirtûm nhô krí kamã inhmex mẽ ixkính rãhã ri ixpaja pix kukamã ijamaxpêr o ri ixpa.

Mẽ panhî nyw jarênh

Piripos 3.21; Sikûn Pêtre 1.13-14

5 Nẽ mẽ panhîja te kot tyrti hô ho ixkre pyrãk. Na htem tyrti hô ho ixkre nhîpêx nhùm gaa mẽ hapêx. Tã mẽ panhîja na hte uràk mẽ hapêx tokyx anê. Na pu htem ri papa mẽ gaa mẽ pawej mẽ ty. Tã nhùm Tirtûm hpãnhã mẽ pahpê hkrajê mã mẽ panhî nyw gõ pu mẽ kuri ô krí kamã pamex kumrêx mẽ pahtír tùm mẽ papa ho papa. ² Na pu htem jar pahpunuj mẽ papa. Nẽ mẽ paxà nhi mẽ mẽ pahkaprî mẽ. Mẽ panhî htùmja te kot mẽ paxê htùm pyrãk jakamã na pu htem ty mẽ te paxê htùm kwÿnh mẽ hpãnhã nyw jagjênh pyrãk o amnhî nhîpêx. Tã na pu htem amnhî kukamã panhî nywja mã pajamaxpêr o ri papa. Kot pu mẽ kaxkwa kamã pahkarô pix mẽ ri papa hkêt mẽ. Mẽ panhî nyw ã kot puj mẽ ri papa ho papa.

⁴ Nẽ na pu htem jar pahpunuj mẽ pamex kêt mẽ ri papa. Nẽ tokyx mẽ pahtyk mẽ panhî htùm o pajapêx mẽ hpãnhã panhî nyw ã mẽ papa hprãm. Tã koja Jejus tokyx akupÿn wrÿk japêr pu mẽ pahtyk kêt rãhã tokyx panhî nywta o panhî nyw. Nom koja tokyx akupÿn wrÿk kêt japêr pu mẽ nhÿrmã ty nhùm Tirtûm akupÿm mẽ pahto mẽ pahtír mẽ mẽ pamã mẽ panhî nyw gõ pu mẽ ho panhî nyw. ⁵ Na pre ra Tirtûm mẽ panhî nyw kukamã hamaxpêr mẽ mẽ pahtã tanhmã amnhî jarênh to. Nẽ mẽ pahwÿr Karô rê nhùm mẽ pahkarô mã agjê pu mẽ ja hã amnhî pumu mẽ pahkính mẽ pajamaxpêr o:

—Nà ra Tirtûm kot ixwÿr amnhî Karô mẽnh nhùm ixkarô mã ãr jakamã koja mããnen nhÿrmã inhma inhî nyw gõ. Kormã inhî htùm kamã ixpa mẽ Pahihti Jejus mẽ wa ô krí kamã ixpa hkêt tã koja nhÿrmã inhma inhî nywja gõ pa inhî nyw o wa kuri ixpa ho ixpa. Nà koja ã inhîpêx anê.

Anhÿr o pajamaxpêr pê pahkính mẽ papa.

⁷ Nẽ mẽ pahte jar pano ho nhÿri Jejus pumunh kêt tã no âm panhîpinh xà kaxwÿnh kãm kãm pajamaxpêr mex mẽ. ⁸ Jakamã na pu mẽ tee ri amnhî kukamã pajamaxpêr o papa hkêt mẽ. Na pu htem âm tokyx mẽ pahtyk mẽ ma Pahihti Jejus nhô krí hwÿr paxàpir jamãr o papa. Ô kríja kêp mẽ papapxà kumrêx jakamã na pu htem ma hwÿr paxàpir pix kukamã pajamaxpêr rãhã mẽ. ⁹ No âm mẽ pamã ja pix prãm kêt. Na pu htem mããnen pamã Jejus mã hprãm xà hkôt nhÿri tanhmã kãm amnhî nhîpêx to ho ri papa hprãm o papa. Jar mẽ panhî htùm rãhã rÿ mũtar kuri ô krí mex kãm mẽ panhî nyw ã tanhmã kãm amnhî nhîpêx to ho ri papaja na mẽ pamã hprãm.

¹⁰ Nẽ na hte Krisja jar mẽ pahte tanhmã amnhî nhîpêx to hã mẽ pahpumunh o hkrí. Mẽ pahte tãm amnhî nhîpêxja mẽ mẽ pahte amnhî tomnujja nhùm hte hã mẽ pahpumunh rãhã ho hkrí. Tã koja nhÿrmã

kot mē pahte tanhmā amnhī nhīpêx to hā mē pahpumpunh kôt tanhmā mē panhīpêx to. Mē pahte tām amnhī nhīpêx o ri papa xwŷnhjaja koja ra mē panē htyk kukwak ri mē pahto mex nē. No mē kot amnhī tomnuj o mē pa xwŷnhjaja koja mē homnuj tŷx nē. Jakamā na pa inhmā kām hprām xà hkôt pix mā amnhī nhīpêx o ixpa hprām nē.

Mē pajamaxpēr nyw jarēnh

Rômān 6.4-6; Sikûn Korît 4.2; Epes 4.22-24; Korosē 3.9-10

¹¹ Nē Tirtūm kot hprī hā mē pahpumpunh rāhā ho hkrī jakamā inhmā kām hprām xà hkôt pix mā amnhī nhīpêx o ri ixpa hprām. Mān ka mē ra ja hā ixpumpunh mex nē rŷ ko. Mē piitā mē kot hkôt amnhī xunhwŷr prām xāj na pa hte mē kām kapēr jarēnh o ri ixpa.

¹² Nom ixte ja hā amnhī to jarkrar o ri ixpa hkôt. Ām mē ate inhmā nē mē kēp Kris nhŷ hā mē ahkre hā amnhī to hēx xwŷnhjē mā tanhmā ijarēnh to kaxyw na pa ā mē amā amnhī jarēnh anē. Mē kot Tirtūm kapēr jahkre mex kumrēx ā amnhī to jarkrar tā na htem hkôt amnhī nhīpêx kêt nē. Tā mē ate aprī hā ixte Tirtūm kapēr kôt amnhī nhīpêx mex ā ixpumpunh nē tanhmā mē kām ijarēnh to kaxyw na pa ā te ixte amnhī to jarkrar pyrāk o mē amā amnhī jarēnh anē. ¹³ Mē kot ixkrā pipānh ā ijarēnh tā Tirtūm na mē akaxyw ixām pa hte mē amā kapēr jarēnh o ri mē akôt ixpa. Ixkrā pipānh kêt. Ixte Tirtūm kām hprām xà hkôt tanhmā amnhī nhīpêx to xwŷnh na pa. Tā mēmo kaxyw na pa hte ā kapēr jarēnh rūnh anhŷr o ri mē akôt ixpa? Nā inhmā mē akīnh kēnā. Mē ate Tirtūm kôt tām amnhī nhīpêx prām xāj na pa hte ā mē amā kapēr jarēnh anhŷr rāhā nē. Kris na pre tanhmā ixto pa inhmā mē akīnh nē. Te tām kām mē ajapē pyrāk. Na pre Kris amnhī grōnh kôt mē pahpiitā mē nē ty. Tirtūm kot mē pahte amnhī tomnuj mŷrapē tanhmā mē pahto pymaj nhūm mē pahpiitā mē panē ty. Jakamā te mē pahpiitā Jejus kôt mē pahtyk pyrāk o na pu htem amnhī nhīpêx. Jao te mē pahte amnhī nhīpêx tūmja mē pahpê hapêx par pyrāk o pu mē amnhī nhīpêx nyw o amnhī nhīpêx o ri papa. ¹⁵ Mē pajamaxpēr nyw o tām mē pahte amnhī nhīpêx o papa kaxyw na pre Jejus mē panē ty. Jakamā na pu htem axte amnhī pix kukamā ri pamā mēmoj prām o ri papa hkôt nē. Na pu htem māānēn Tirtūm kām hprām xà hkôt tanhmā kām amnhī nhīpêx to ho ri papa. Ja kaxyw na pre Tirtūm akupŷm Kris o htīr pu mē kukwak ri pajamaxpēr nyw o amnhī nhīpêx o papa. ¹⁶ Jao mē piitā mē hkrā hkā hā mē omunh xà hkôt pix mā tanhmā mē harēnh to hkôt nē. Mē kot amnhī tomnuj ā mē harēnh rŷ mē kot amnhī to mex ā mē harēnh kêt nē. Amnepē mā na pa pre ā Kris jarēnh anē nē harēnh o:

—Nā Krisja na hte mē pahte amnhī nhīpêx kôt amnhī nhīpêx kêt nē. Ām ri kot mē pahte amnhī nhīpêx kwŷm ri amnhī nhīpêx jakamā kot amnhī tomnuj tŷx xwŷnh na.

Anhŷr ā harēnh o ixpa. Tā axte ā harēnh anhŷr hkôt nē. Kot amnhī tomnuj xwŷnh kêt jakamā na pa hte

hpānhā hkôt pix mā tanhmā kām amnhī nhīpêx to ho ri ixpa.

Mē pahpê Tirtūm krāmnhwŷ hā mē pajarēnh

Rômān 5.1, 5.10; Epes 6.20; Korosē 1.20

¹⁷ Nē koja mēhō Kris kôt amnhī xām nhūm kot amnhī nhīpêx tūmja kēp hapêx nhūm hpānhā kot amnhī nhīpêx nyw pix o amnhī nhīpêx nē hamaxpēr nyw pix o hamaxpēr. ¹⁸ Tirtūm na hte tanhmā mē pahto pu mē ā amnhī nhīpêx anhŷr o ri papa. Na pu prem pamā hkurē htā nhūm Kris kukwak ri mē pahte hkôt amnhī nhīpêx xwŷnhjē ho hkrāmnhwŷ. Hāmri nē tanhmā mē pahte amnhī nhīpêx to hā mē pamā karō nē mē pamā:

—E kēr ka mē ma krī piitā hkôt ri mē kām ixkapēr jarēnh o ri apa kē mē ama nē mē apyrā nē Kris kôt amnhī xunhwŷ. Pa ja hā mē omu nē ixte mē anhīpêx pyrā nē mē ho ixkrāmnhwŷ. Anē.

¹⁹ Jakamā na pa hte ma mē kām kapēr jarēnh o ri mē hkôt ixpa nē mē kām:

—E pa mē amā mēmoj mex jarē ka mē inhma. Nā na pre Krisja mē pahte amnhī tomnuj mŷrapē mē panē ty. Nē htyk o Tirtūm mā mē pahpānhā amnhīrer par kumrēx. Jakamā na ra Tirtūmja Kris kukwak ri kām mē pahpiitā mē pahto hkrāmnhwŷ prām. Koja kukwak ri mē pahte amnhī tomnuj piitā ho hamakētcati nē axte kām hamaxpēr kêt kumrēx. Kām mē pahto hkrāmnhwŷ hprām jakamā koja ā mē panhīpêx anē. Jakamā e kwa mē tokyx Kris kôt amnhī xunhwŷ kē Tirtūm kot inhīpêx pyrā nē mē ato hkra nē mē ato hkrāmnhwŷ.

Anhŷr o mē kām harēnh o ri mē hkôt ixpa. ²⁰ Kris kot mē apiitā mē awŷr inhmēnh jakamā na pa hte ŷ hā mē amā kapēr jarēnh o ri mē akôt ixpa nē mē amā:

—E Tirtūm kām mē ajapē jakamā na mē awŷr inhmē pa mō. Jakamā kwa mē tokyx amnhī tomnuj kaga nē hkôt amnhī xunhwŷ. Kē amnhī tā mē apumu nē mē ato hkrāmnhwŷ. Anē.

²¹ Krisja aa kot tanhmā amnhī tomnuj to hkôt kumrēx tā nhūm pre Tirtūmja te mē kot amnhī tomnuj tŷx kumrēx xwŷnh pyrāk o hipêx. Tā mēmo kaxyw na pre ā hipêx anē? Nā mē panē kēnā. Mē pahte hkôt amnhī xunhwŷr nhūm kot mē panhīpêx o te aa mē pahte amnhī tomnuj kêt kumrēx xwŷnh pyrāk o mē panhīpêx kaxyw na pre ā mē panē Krata nhīpêx anē.

6 Tā kot ā Kra nhīpêx anhŷr jakamā kwa mē ixkapēr ma nē mar tŷx nē. No mē ama nē ām mar kêt nē. Tirtūm kām mē pajapē htŷx jakamā mē pakutā nojarēt rāhā ho pa. Kumā na pa hte ā mē amā kapēr jarēnh anhŷr o ri mē akôt ixpa. ² Amnepē mā na pre Ijaew mā kapēr nē mē kām:

Na ka prem amex kêt nē ri apa nē amnhī to ixwŷy pa pre mē ama nē mēmojta pē mē apytā nē mē ato mex nē. Anē.

Jakamā kwa mē inhma. Tirtūm kām mē ate amnhī tomnuj pē mē apytār prām tŷx jakamā kwa mē tokyx amnhī to awŷy kē ā kēp mē apytār anē.

Mě kot Kris ã tanhmã Pawre nhîpêx to hã mě harênh

Sikûn Korîť 4.7, 11.23-33; Korosê 1.10

³ Nê mě kot Tirtûm kapêr mar nê hã ixtomnuj tâ pa hte amnhî katut kôt mě kot tanhmã ixtomnuj toja rê nê ho ijamakêtkati tokyx anê. Nê arî mě kãm kapêr jarênh rãhã ho ri mě hkôt ixpa. Mě kot mar nê ãm mar nê hkaga pymaj na pa hte ã amnhî nhîpêx anhÿr rãhã nê. Mě kot ja hã inhîpêx punuj tâ pa arî mě kãm harênh o ri mě hkôt ixpa. ⁵ Mě kot Kris ã ixtak nê ijagjênh nê tanhmã ixto kaxyw ixtã htu htã pa hte mě kutã amnhî to htÿx nê ixkuhê. Na pa pre hte Tirtûm mã mě kãm kapêr jarênh rax nê. Jao tõhã inhôt kêt nê inhôtswa ho ri mě hkôt ixpa. Nê tõhã inhmã prãm tÿx nê ri ixpa. Tã no ãm arî mě kãm kapêr jarênh rãhã nê. ⁶ Inhmã tanhmã ixte amnhî tomnuj to hprãm kêt. Inhmã Tirtûm kot amnhî nhîpêx kôt pix mã amnhî nhîpêx prãm. Nê inhmã inhgryk tokyx anhÿr prãm kêt. Æm inhmã mě piitã mě hkînh kãm mě ho mex pix prãm. Æ na pa hte Tirtûm Karô nhÿ hã amnhî nhîpêx anhÿr o ri mě hkôt ixpa. Mě kot ja hã ixpumunh nê ra Tirtûm kapêr ma nê hkôt amnhî xunhwÿr kaxyw. ⁷ Na pa hte ixkatãt kôt mě kãm ixkapêr mex pix nê. Tirtûm xihtÿx xwÿnhja nhÿ hã ri mě kãm kapêr jarênh jao tãm amnhî nhîpêx nê tãm ri ijamaxpêr o ri mě hkôt ixpa. Jakamã na htem ja hã ixpumu nê ixte Tirtûm kapêr jarênh ma nê hkôt amnhî xunhwÿ. ⁸ Na hte mě hkwÿjaja kãm ixkînh nê nhÿm mě hkwÿjaja axtem kãm ixkurê nê. Nê mě hkwÿjaja amnhîm inhmex ã ijarê nhÿm mě hkwÿjaja axtem axpên mã tanhmã ixto kapêr punuj to. Mě kot ixêx nhi hã ijarênh tâ pa hte ixkatãt kôt mě kãm ixkapêr o ri ixpa. Nom kwãr mě mãmri tanhmã ri ixto kapêr to. Ja tanhmã inhmã kute hkêt. ⁹ Na hte mě hkwÿjaja ixkamã ôkre kahak nê pika piitã hkôt axpên mã tanhmã ijarênh to ho pa. Mě kãm ixpîr prãm tâ no pa arî ixtîr nê ixpa. Mě kot Jesus ã ixtomnuj tÿx tâ kormã ixpîr kêt nê pa ri ixtîr nê ixpa. ¹⁰ Ixte Kris ã amnhî xã htÿx kamã ijamak o ri ixpa htã arî ixkînh nê ixpa. Nê ixkãxpore hkêt tâ nhÿm mě ohtô nê ixte mě kãm Jesus kapêr jarênh kukwak ri mex nê pa. Nê ixkukrêx rax kêt tâ nhÿm Tirtûm ixto mex nê pa inhmex nê ixpa. Tã kot paj nhÿrmã ô krî kamã kuri inhmex kumrêx nê ixtîr tûm nê ixpa ho ixpa. Jakamã na pa hte arî mě kãm Jesus kapêr jarênh o ri mě hkôt ixpa. ¹¹ E Korîť kãm ixkrãmnhwÿjaja. Na pa ixprî hã mě amã amnhî nhîpêx jarênh par kumrêx. ¹² Inhmã mě akînh tÿx tâ te mě amã ixkînh kêt pyrãk. ¹³ Kwa te mě ate ixto mě akatut nê akuhê pyrãk o inhîpêx kêt nê. Amnhî pyrã nê amã ixkînh nê hkêt wehe. Te mě apê ixkra pyrãk o na pa ã mě amã ixkapêr anê.

Te mě pahpê Tirtûm nhôrkwÿ pyrãk ã mě pajarênh

Wam Korîť 10.20-22, 15.33; Epes 5.3-14; Sikûn Ximotre 2.4; Xiakre 4.4-5; Wam Pêtre 2.11, 4.1-6

¹⁴ Nê kêr ka mě kot Kris kôt amnhî xunhwÿr kêt xwÿnhjê mě mě měmoj tâ tanhmã axpên mar to hkêt nê. Rÿ mēhō ho amjên rÿ mēhō ho aprō hkêt nê. Ahpÿnhã mě pajamaxpêr kênã. Tanhmã kot we mě

hamaxpêr nyw xwÿnhjaja nê mě hamaxpêr tûm xwÿnhjaja amnhî to nê axpên kôt hamaxpêr nê ri axpên kôt pa? Nã koja mě ã amnhî nhîpêx anhÿr kêt nê. Ahpÿnhã mě pajamaxpêr. Na hte hirã htÿxja kamãt kô mě pihkãr kêt nê. ¹⁵ Xã na hte Kris mě Satanasti wa axpên kôt hamaxpêr? Nã wa kot axpên kôt hamaxpêr kêt. Ahpÿnhã wa hamaxpêr nê ahpÿnhã wa kot amnhî nhîpêx. Nê ahpÿnhã hirã nê ahpÿnhã kamãt kô. Nê mě pahpê Kris kwÿjaja nê mě kêp hkwÿ hkêt xwÿnhjaja ahpÿnhã mě pajamaxpêr nê ahpÿnhã mě pahte amnhî nhîpêx. ¹⁶ Na pu htem Tirtûm mã amnhî jarênh xã hã ixkre kamã sãnti xunhwÿr nê amnhî to hwÿr pê kãm mex o mex ã harênh kêt nê. Axtem na sãntija. Mě panhō Tirtûmja sãnti rom hÿr tûm rãhã nê pa ho pa xwÿnh. Nê mě papajaja te mě pahpê Tirtûm nhôrkwÿ pyrãk. Kapêr ã kagã htûm kot ja jarênh kot:

Ixkrajaja te kêp inhôrkwÿ nhÿm ixpê ô dõn pyrãk. Te ixpê inhôrkwÿ kamã ixpa xwÿnh pyrãk jakamã kot paj ixkrajê kamã ri ixpa ho ixpa. Ixpê Mēhpãm na pa. Anê. ¹⁷ Æ Tirtûm xihtÿx xwÿnhja kot amnhî jarênh anhÿr jakamã na hte mě kot amnhî tomnuj xwÿnhjê nê mě pahkurê ho:

Kêr ka mě hkôt ri apa hkêt nê. Kwarî ho kwarî.

Nê mě hkôt ri amnhî nhîpêx o apa hkêt nê.

Kot kaj mě ixkapêr ma nê ixkôt amnhî nhîpêx hã kot paj amnhî wÿr mě awÿ nê mě ato ixkra.

Nê pa kot paj ixpê Mēapãm maati. Anê.

7 Tã ã Tirtûm kot mě pahto hkra nê mě pahkôt pa ho pa hã amnhî jarênh kot anhÿr jakamã kwa ixkrãmnhwÿjaja. Kêr pu mě kapêr ma nê tanhmã amnhî tomnuj to hkêt nê. Nê měmoj punuj kukamã pajamaxpêr kêt nê. Nê ãm kapêr kôt pix mã amnhî nhîpêx mex rãhã nê.

Pawre kot Korîť nhō xwÿnhjê nhÿ hã hkînh ã harênh

² Nê kwa Kris kôt ixtô nê ixtôxjaja. Kêr ka mě tee ri amnhî tâ tanhmã inhmã ajamaxpêr to hkêt nê. Na pa pre tanhmã mě atō hto hkêt nê. Rÿ tanhmã mě atō hto ka mě ja hã ixpumu nê ixkôt tanhmã amnhî tomnuj to hkêt nê. Rÿ pa pre ixêx rom tanhmã mě anokupyr to ho ri ixpa hkêt nê. Kwa mě amã ixkînh nê tokyx ixkôt ajamaxpêr kêt wehe. ³ Mě ate inhmar nê amnhî tâ apijaãm kaxyw na pa ã mě amã ixkapêr anhÿr kêt nê. Inhmã mě akînh kênã. Na pa pre inhmã mě akînh ã amnhî jarênh rax nê. Inhmã ri mě akôt ixpa rãhã ho ixpa hprãm. Rÿ ka mě nhÿrmã apiitã apikaprãr par japêr pa inhmã mě akôt ixyk prãm nê. ⁴ Na pa hte ra mě amã ijamaxpêr pê ixkînh nê ixpa. Nã kot kaj mě ixkapêr ma nê Jesus kôt amnhî nhîpêx mex nê. Tã kêr ka mě ã amnhî nhîpêx anhÿr rãhã nê. Na pa hte jar ra amnhî xã htÿx kamã ijamak o ri ixpa htã no ãm mě amã ijamaxpêr nê ixkînh nê.

⁵ Nê na pa pre amnê Masetõn wÿr kormã Xitre japêr o mō. Hãmri nê Masetõnja wÿr pōj nê hapêr pê mě kãm Jesus kapêr jarênh o ri mě hkôt ixpa. Hãmri nhÿm mě kãm ixkurê xwÿnhjaja Kris ã inhîpêx punuj nê hã inhmã àkjêr pix o pa. Hãmri nê ma Masetõn kamã krî piitã hkôt ri mě kãm ixto kapêr punuj nê pa amnhî tâ

mê mar o ri mê hkôt ixpa. Nê mê kajaja mê ate Kris kaga nê nhâm mê hamaxpêr kôt amnhî nhîpêx pymaj na pa pre tee ri mê akukamã ijamaxpêr o ri mê hkôt ixkaprî nê ixpa. ⁶ Tã Tirtûm kêp mê hkaprî xwÿnhjê pumunh nê akupÿm mê ho mê hkînh xwÿnh jakamã na pre ixkaprî hã ixpumu nê ixwÿr Xitre mê. Pa pre omu nê akupÿm ixkînh nê tãm ijamaxpêr. ⁷ No ãm Xitre pumunh kôt pix mã ixkînh kêt. Na pre ixwÿr pøj nê tanhmã inhmã mê ajarênh to nê mê ate tanhmã ho mex to hã mê ajarê. Nê mê amã ixpumunh prãm tÿx ã mê ajarê. Nê Kris kôt mê atôta hpijaàm kêt o pa nhûm ixte kagà kamã hã mê amã ixàkjêr nhûm mê ate ja hã omunh nê ra amnhî kamã apijaàm o akaprî htÿx ã mê ajarê. Nhûm Tirtûm kot inhnê mê kãm ixkurê xwÿnhjê pumunh mex kaxyw mê ate ixto hwÿr ã mê ajarê. Na pre ã inhmã mê ajarênh anê pa kuma nê mê anhÿ hã ixkînh tÿx kumrêx.

⁸ Nê wam ixte mê amã kagàta nhîpêx kêt ri na pa pre tee ri mê ate amnhî nhîpêx ã mê ajarênh ma nê mê akaxyw hipêx. Nê kamã mê ate hpijaàm kêt xwÿnhhta kot tanhmã amnhî nhîpêx to hã omunh nê ãm omunh o arî hkôt apa hã kagàta kamã mê amã akir hãmri nê Xitre mã kugô nhûm kupy nê ma mê awÿr o mõ. Tã ka xep prem kamã harê nê ama nê amnhî kamã apijaàm nê. Nê akaprî nê ajamaxpêr o:

—Hêxta waa nê. ãm hãmri na Pawre ã mê ijarênh anê. Na pa mê ã amnhî nhîpêx anê nê amnhî tomnuj tÿx nê. Anê.

Tã nhûm Xitre akupÿn ixwÿr pøj nê inhmã mê ajarê. Pa mê ajarênh ma nê tee ri ijamaxpêr nê ijamaxpêr o:

—Hêxta waa nê. Mon pa pre axtem nê ã ri mê kãm ixàkjêr anê? Nà na xep prem kagàta kamã harê nê kuma nê hkaprî htÿx nê. Anê.

Tã ãm hãmri na pa pre ã mê akaxyw hipêx nê mêmojta ã mê amã ixàkjêr anê. Na ka xep prem kamã harê nê ama nê tee ri ajamaxpêr o ra akaprî nê. Nom Tirtûm kãm hprãm xà hkôt na ka prem ja hã amnhî pumu nê ã akaprî anê. Tã xep ra akupÿm tãm amnhî nhîpêx nê akupÿm Tirtûm kôt amnhî nhîpêx mex nê. Jao akupÿm akînh nê ri apa. Jakamã ãm hãmri na pa pre mê awÿr wam kagàta mênh nê mêmoj tã ã mê amã ixàkjêr anê.

¹⁰ Koja Tirtûm krajê hõ tanhmã amnhî tomnuj to. Hãmri nê tee ri ja hã amnhî pumu nê amnhî kamã hpijaàm nê akupÿm Tirtûm kôt tãm amnhî nhîpêx. Hãmri nê akupÿm mex nê tãm hamaxpêr pê hkînh nê ri pa. Nê axte tee ri amnhî kukamã hamaxpêr hkêt nê. Ja na Tirtûm kãm hprãm. Tã koja mê kêp hkra hkêt xwÿnhjê pyrã nê tanhmã amnhî tomnuj to nê ra hpijaàm japêr. Nom hkwyjaja kot ja hã omunh pix mÿrapê hpijaàm nê arî Tirtûm kôt amnhî nhîpêx kêt japêr. Hã koja nhÿrmã ty nê Tirtûm kra kot akupÿm hkôt tãm amnhî nhîpêx xwÿnhjê kînhã Tirtûm pê awry rax kumrêx nê ri pa.

¹¹ Mê pahte Tirtûm kapêr kwÿm ri tanhmã amnhî nhîpêx to hã tee ri amnhî pumunh nê amnhî kamã hpijaàm nê akupÿm tãm amnhî nhîpêxja na Tirtûm kãm hprãm. Tã na ka xep ã amnhî nhîpêx anê. Wam ixte mê awÿr kagà mênhta na ka xep prem kamã tanhmã ixte

nã puro kamã hpijaàm kêt xwÿnhhta ã mê amã ixàkjêr tota kamã akapêr nê ama. Hãmri nê tee ri mê ate kormã kot amnhî tomnuj ã kãm axàkjêr kêt ã amnhî kukamã ajamaxpêr nê amnhî kamã apijaàm nê. Nom Tirtûm kãm hprãm xà hkôt. Mê ate jam ajamaxpêr pê amnhî kamã apijaàmja na kãm hprãm. Tã ka mê hpijaàm xwÿnhhta kamã agryk nê kãm akapêr o:

—Kwa mê pahpê Jejus kwÿjaja mê pahte ã amnhî nhîpêx anhÿr kêt tã ka ã amnhî nhîpêx anê. Nà na ka amnhî tomnuj tÿx kumrêx. Kot kaj ã amnhî nhîpêx anê pa mê hã apumu nê gaa nê apyrã nê ã amnhî tomnuj anê. Kwa ja kaga nê axte ã amnhî nhîpêx anhÿr kêt nê. Nê akupÿm Tirtûm kôt amnhî xãm tÿx nê hkôt amnhî nhîpêx rãhã ho ri apa. Anê.

Hãmri nhûm krî nhõ xwÿnhjaja ja hã mê ajarênh ma nê mê apê jamnuj ã mê apumunh kurê kumrêx. ãm hãmri na ka prem ã kãm akapêr anê.

¹² Nê ixte mê awÿr kagà nê mênhta kamã na pa pre nã puro kamã hpijaàm kêt xwÿnhhta mã tanhmã ixàkjêr to hkêt nê. Rÿ nã purota mã tanhmã ixàkjêr to hkêt nê. Na pa pre mê apê Kris kwÿjê hwÿr kagà nhîpêx nê kamã tanhmã mê amã hpijaàm xwÿnhhta ã karô hto. Mê ate kamã harênh hãmri nê inhÿ hã amnhî nê hanor nhûm Korît nhõ xwÿnh piitã kot ã mê ate amnhî nhîpêx anhÿr ã mê apumunh kaxyw. Nê mê ate Tirtûm nom ã hipêx anhÿr jao mê amã ixkînh pê ixkapêr kôt ã hipêx anhÿr ã amnhî pumunh kaxyw.

¹³ Tã nhûm Xitre ixwÿr pøj nê tanhmã inhmã mê ajarênh to. Na xep pre mê awÿr nojarêr nê tee ri amnhî kukamã hamaxpêr. Mê ate kagàta kamã harênh nê ijarênh mar nê kamã agryk pymaj tee ri amnhî kukamã hamaxpêr. Tã ma mê awÿr mõn pøj nê mã amã kugô. Ka xep prem kamã harê nê ama nê hkôt amnhî nhîpêx kurê kumrêx nhûm mê ate amnhî nhîpêx ã mê apumu nê hkînh nê. Hãmri nê tãm hamaxpêr. Tã ra akupÿn ixwÿr mõ nê inhmã mê ajarê pa mê ajarênh ma nê ijaxwÿja ixkînh nê. ¹⁴ Na pre kormã mê awÿr nojarêr pa kãm tanhmã mê amex ã mê ajarênh to. Tã nhûm xep ma mê awÿr mõn pøj nê mê apumu nê hamaxpêr o:

—Nà pêr ãm hãmri na pre Pawre inhmã mê mex ã harê. Mê mex kênã. Anê.

¹⁵ Tã nhûm pre mê arÿm kato nê ra man akupÿn ixwÿr mõn pøj nê inhmã mê ajarênh o:

—Na pa pre ma mê hwÿr mõ nê mê kãm ixkapêr o ri mê hkôt ixpa nhûm mê ixkapêr ma nê ixkôt amnhî nhîpêx kurê kumrêx nê ixto mex nê. Kormã ixte mê hwÿr inhmõr kêt tã mê harênh ma nê inhmã mê hkînh nê. Tã pa ma mê hwÿr mõ nhûm mê ixto mex rax nê pa ra inhmã mê hkînh tÿx kumrêx. Anê.

¹⁶ ã inhmã mê ajarênh anê pa mê ajarênh ma nê ixkînh tÿx nê. ãm hãmri na ka htem mêmoj tã amnhî jarênh xà hkôt tanhmã amnhî nhîpêx to ho apa.

Mê kot Kris kôt mê hkwyjê pê ôxÿ hkêt ã mê kãm karô

Atre 11.27-30; Römãn 15.25-27; Wam Korît 16.1-4

8 E Kris kôt ixkwÿjaja. Kot paj hpãnhã mê amã jar Masetôn kamã tanhmã Jejus kwÿjaja kot amnhî nhîpêx to hã mê harê ka mê harênh ma. Na hte Tirtûm

mě kutā nojarêť nhũm mẽ mex nê pa. ² Mě hkwỳjaja kot Kris ā mẽ hipêx kati nhũm mẽ kot amnhĩ xà htỳx kām hamak o pa htā hkĩnh nê hamakêtkati nê ri pa. Nê mẽ hkàxpore hkryre htā ho õxỳ hkêť nê pa. Na htem àmnhĩx ri mẽ kêp amrakati xwỳnhjê mã hkwỳ nhõr o pa.

³ Tā na prem Jerujarê kamā Kris kôt mẽ pahkwỳjê jarênh ma. Mě kêp amrakati hā mẽ harênh ma nê kām mẽ hkaprĩ nê. Nê mẽ kām mẽ hwỳr mẽmoj rênh nê mẽ ho ajuta hprām nê. No ām pa ixte mẽ kām hā karõ xà hkôt kêt. Mě tāmjaja mẽ hamaxpêr xà hkôt na prem ā hamaxpêr anê nê mẽ kaxyw kàxpore ho pikuprõnh rax nê. Hāmri nê inhmā kugõ nê inhmā:

—Kwa na pa prem Jerujarê kamā Kris kôt mẽ pahkwỳjê jarênh ma nê mẽ inhmā mẽ hkaprĩ nê mẽ kām mẽ ixkàxpore hkwỳ ho akuprõ. Jakamā e amỳ nê ma mẽ hwỳr o mō nê mẽ kām agõ kê mẽ tokyx ho amnhĩm awjaprõ nê kuku. Anê.

⁵ Pa mẽ kuma nê ixtỳx ho ām kàxpore grire hā hkamnhĩx nê ijamaxpêr o:

—Kwa mo mẽ hikàxpore rax koja mẽ ri ho akuprõ nê mẽ kām kugõ? ām mẽ hikàxpore hkryre kênā.

Anhỳr o ijamaxpêr tā no nhũm mẽ kaxyw ho rax nê ho akuprõ. Mě hikàxpore hkryre htā mẽ kām õr rax nê. Hāmri nê inhmā amnhĩ jarênh o:

—Na pa mẽ ra Pahiťi Jejus Kris mã amnhĩ gõ. Mě ixte tanhmā kām amnhĩ nhĩpêx to ho ri ixpa kaxyw. Jakamā e tanhmā mẽ inhmā mẽmoj tā karõ hto. Kot pa mẽ ama nê akapêr kôt amnhĩ nhĩpêx. Ja na pa mẽ inhmā hprām nhũm Tirtũm haxwỳja kām ja prām. Anê.

⁶ Na pa pre ā mẽ kot amnhĩ nhĩpêx anhỳr ā mẽ omu nê mẽ apê Korîť nhõ xwỳnhjê mã ijamaxpêr kurê kumrêx. Hāmri nê Xitre mã mẽ ajarê. Na pre mẽ awỳr mō nê mẽ amā Jerujarê nhõ xwỳnhjê jarê. Mě ate mẽ kām kàxpore hkwỳ ho apikuprõnh kaxyw. Tā pa pre jam ijamaxpêr nê ra akupỳm mẽ awỳr mẽnh mã nê kām:

—Kwa ma akupỳm Korîť wỳr mō nê mẽ kām anê kê mẽ ra kot amnhĩ jarênh xà hkôt Jerujarê nhõ xwỳnhjê kaxyw kàxpore hkwỳ ho akuprõ nê tokyx mẽ hwỳr kumê. Ra mẽ kām Kris kôt mẽ hkwỳjê hkĩnh ā amnhĩ jarênh kênā. E kwa tokyj. Anê.

⁷ Na ka htem amnhĩ to mex o ri apa. Nê amnhĩ kaxyw Kris hkôt ajamaxpêr tỳx nê. Nê ma mẽ kām Tirtũm kapêr jarênh mex o ri mẽ hkôt apa. Nê mẽ ajamaxpêr mex nê. Nê mẽ piitā mẽ ho mex o ri apa. Nê mẽ amā ixkĩnh o ri apa. Jakamā kwa kêr ka mẽ axàmnhĩx mẽ kêp amrakati xwỳnhjê mã mẽ akàxpore hkwỳ nhõr o apa. Jao mẽ amā Tirtũm kĩnh tỳx ā amnhĩ to amnhĩrĩť. ⁸ Ixte ā mẽ amā ja hā karõ anhỳr tā hā mẽ atā ixihtỳx kêt nê. Ām mẽ kamā axukaprĩ hkôt mẽ ate mẽ kām axàmnhõr o apa kaxyw na pa ā mẽ amā ixkapêr anê. Masetõn kamā mẽ pahkwỳjaja kot amnhĩ nhĩpêxta pyrā nê. ⁹ Ra mẽ ate Jejus Kris kām mẽ pajapê hā kot tanhmā amnhĩ nhĩpêx to hā mar mex. Amnepêm na pre kaxkwa kamā mex kumrêx nê ri pa ho pa nhũm mẽmoj piitā kêp õ htā nhũm rer pa nê mẽ pahwỳr wry nê mẽ pakamā kêp amrakati nê ri pa. Hikàxpore hkêť nê ri pa. Tā mẽmo kaxyw na pre ā mẽmoj mex piitā rer

par nê mẽ pahwỳr wryk anê? ām kot mẽ pahto mex pix kaxyw. Kot mẽ pahto mex nhũm mẽ pahte kukwak ri mẽ paxàmnhĩx ri mẽ pajamakêtkati nê mẽ papa kaxyw na pre ā amnhĩ nhĩpêx anê. Mě pahte nhỳrmā urāk nê kaxkwa kamā pamex kumrêx nê ri papa ho pa-pa kaxyw.

¹⁰ E kwa kêr ka mẽ tokyx kàxpore hkwỳ ho apikuprõnh pa nê Jerujarê nhõ xwỳnhjê hwỳr amê. Mě akumrêxjaja na ka prem ham amgrā hapêxta kamā ra mẽ kaxyw ho apikuprõnhja krax. Mě amā mẽ ho mex prām xāj ham ho hkrax tā no ām kormā hatur xàm mẽnh nê mẽ hwỳr mẽnh kêt nê. ¹¹ Kwa mẽ tokyx ja ho ajapêx nà. Na ka prem ate ho anhỳr krax ā akĩnh pê kàxpore hkwỳ ho apikuprõnh o apa. Tā kêr ka mẽ arĩ akĩnh rāhā ho apikuprõnh par jatur xàm amê. No mẽ ri atỳx tanhmā ajamaxpêr to hkêť nê. Rỳ mẽ ajamaxpêr o:

—Nà kormā. Kot paj nhỳrmā ixkàxpore rax nê rĩ kormā mẽ hwỳr hkwỳ mẽ.

Anhỳr o mẽ ri ajamaxpêr hkêť nê. Mě ate tanhmā akàxpore hkra kamā kute hā omunh xà hkôt mẽ kām hkwỳ pix gõ. ¹² Kêr ka mẽ axàmnhĩx akĩnh kām mẽ kām ho akuprõ. Ate amnhĩ kàxpore pumunh xà hkôt. Ka mẽ akàxpore rax nê mẽ kām ho rax nê agõ. Rỳ mẽ akàxpore grire nê mẽ kām ho grire nê agõ. Ja na kêt mex. ¹³ No mẽ ate mẽ kām õr par nhũm mẽ arom mẽ hikàxpore rax nê ri paja mex kêt. ¹⁴ Nom ra mẽ akàxpore rũnh jakamā kwa mẽ amnhĩ kutā mẽ kām hkwỳ ho hkryre nê ho akuprõ kê mẽ apyrā nê hikàxpore nê ri pa. Kêr ka mẽ nhỳrmā tanhmā amnhĩ to nê axà nê nhũm akàxpore apê hapêx nhũm mẽ ajarênh ma nê amnhĩ kuxwar mẽ ato ajuta nê mẽ amā hkwỳ ho akuprõ nê mẽ awỳr kumê. Ka mẽ akàxpore ho axpên pyrā nê ri apa. ¹⁵ Amnepêm Tirtũm kot kaxkwa rũm Ijaewjê hwỳr mẽõ rênh nhũm mẽ kot apkati mẽ amnhĩm hkawrà nê ho apkur o pata ā na pre Tirtũm kapêr ā kagà htũmja ā mẽ harênh anê nê mẽ harênh kot:

Na pre mẽ hkra xohtõ xwỳnhjaja mẽ apkur xà hkawrà rũnh nê. Nê gõj kām unhwỳ nê kuku nê piitā ho õhy htu. Nhũm mẽ hkra grêre xwỳnhjaja haxwỳja hkwỳ kawrà no ām ho hkryre nê hkawrà. Nê gõj kām unhwỳ nê kuku nê haxwỳja ho õhy htu hpa. Na pre htem apkati mẽ ā amnhĩ nhĩpêx anhỳr o pa. Anê. Ja pyrā nê kêr ka mẽ akàxpore ho axpên pyrāk o ri ho apa.

Xitre mẽ hkràmnhwỳjê jarênh

¹⁶ Nê Xitre na pre ixpyrā nê kām mẽ ato ajuta hprām nê. Na pre inhmā mẽ atā amnhĩ jarê pa pre kuma nhũm ja inhmā mex nê pa ixkĩnh nê. Nê ijamaxpêr o: —Nà ām hāmri na Tirtũm tanhmā Xitre hkrā hto nhũm ā hamaxpêr mex anê. Anê.

¹⁷ Tā pa ma akupỳm mẽ awỳr mõr ā hkukja nhũm inhma nê hkĩnh nê mẽ awỳr nojarêť kurê kumrêx. Nom kormā ixte kām mẽ ajarênh kêt ri nhũm tām amnhĩ kukamā hamaxpêr nê mẽ awỳr hkrā. ¹⁸ Tā na ra nojarêť kaxyw. Kot paj ma hkôt Kris kôt mẽ pahtõjê hõ mẽ kê ma hkôt mō. Kôt ixte mẽnh xwỳnhhta na hte mẽ

kãm Tirtûm kapër jarênh mex nê nhûm htem amnhîm mex ã harê. ¹⁹ Na pre jar Jesus kwýjaja kot ma ixkôt Jerujarê hwýr kàxpore hkwy ho mör kaxyw nhûm prem amnhîm mẽ kurê. Tã koja Xitre mẽ wa mẽ awýr mōn pōj ka mẽ kãm kàxporeta gō nhûm man akupýn o mō pa wa rí kormã ma Jerujarê hwýr mẽ kãm o mō. Mẽ kot hamýnh nê mẽ pamã mẽ hkính ã kot amnhî tã mẽ pahpumunh kaxyw. Nê Tirtûm mã mex o mex ã harênh kaxyw. ²⁰ Nom kàxpore rax nhûm ixte mẽ hwýr o inhmör nhûm mẽ kot hã ixkamnhîx pymaj kot paj ma amnhî kôt Kris kôt mẽ pahtōta o mō. Ixte Xitre hkôt mẽ awýr mēnh xwýnhhta pa ma amnhî kôt o mō. Nom ixàhkính o ixpare hã. Tirtûm kot ja kôt ixpumunh mex tã kot paj ma amnhî kôt o mō.

²² Nê ot pa ma Xitreta wa hkôt axte mẽ awýr ja mẽ. Kêr kê mẽ axkrumēpxi nê ma ixkukamã mẽ awýr mō. Ixte wa hkôt mēnh xwýnhhta ixte kot amnhî nhípêx ã omunh mex. Na hte kãm mẽ piitã mẽ ho ajuta ho pa hprãm nê. Tã mẽ ajarênh ma nê inhmã mẽ ajarênh o:

—Nà koja mẽ Jerujarê nhō xwýnhjê mã kàxpore nhōr rax nê kãm ga. Mẽ kot amnhî to mex kēnã. Anê.

Jakamã ra mẽ awýr hkrà. Tã koja ma Xitre wa hkôt mō nê mẽ ato ajuta ka mẽ tokyx kàxpore ho apikuprōnh pa.

²³ Nê koja mẽhō tanhmã Xitre hã mẽ akukjêr to ka mẽ kêp ixkràmnhwý mex ã harê. Nê kot inhîkhō hã mẽ ho ajuta mex o pa hã harê. Na pre ra jar Kris kwýjaja mẽ akaxyw kuta nê ma mẽ awýr kumê. Jakamã koja ma mẽ awýr mō nhûm Kris kôt mẽ pahtōjê hō wa pijakrutja wa ma hkôt mō. Na hte wa haxwýja Kris kôt amnhî nhípêx mex o pa. ²⁴ Koja mẽ awýr pōj ka mẽ omu nê mẽ ho mex nê. Nê mẽ amã mẽ hkính nê. Kê krí piitã hkôt Kris kôt mẽ pahkwýjê piitã mẽ hã mẽ ajarênh ma nê axpēn mã mẽ amex ã mẽ ajarê. Nê mẽ ajarênh o:

—Pēr ãm hãmri na pre Pawreja mẽ pamã Korîť kãm mẽ pahkwýjê jarê. Na xep pre Xitre mẽ hkwyta ma mẽ hwýr mō nhûm mẽ ho mex rax nê. Ra Pawre kot mẽ pamã mẽ harênh xà hkôt. Anê.

Mẽ kot kàxpore ho pikuprōnh ã mẽ harênh

9 Kwa ixkràmnhwýjaja. Kot paj Jerujarê nhō xwýnhjê kaxyw mẽ atã ixihýtix kêt nê. Ra mẽ amã mẽ ho ajuta hprãm jakamã na pa pre Masetōn kamã Kris kôt mẽ pahkwýjê mã mẽ ajarênh o:

—Pika pē Gres kamã Kris kôt mẽ pahkwýjaja na prem ham amgrà hapêxta kamã Jerujarê kamã mẽ pahkwýjê jarênh ma nê kãm mẽ ho ajuta hprãm. Anê.

Hãmri nhûm mẽ ajarênh ma nê mẽ apyrã nê kãm tanhmã mẽ ho ajuta hto hprãm. ³ Tã ot pa mẽ awýr Xitre mẽ hōta wa mẽ ho ixpimràatã wa mẽ kumê. Mẽ kot kàxpore hã mẽ akukjêr kaxyw. Kêr pa mytwrý hō hã ma Masetōn nhō xwýnh kwýjê mẽ mẽ awýr mō nê ra ixte mẽ kãm kàxpore hkwy ho mẽ apikuprōnh ã mẽ ajarênh kôt mẽ ate ho apikuprōnh rax ã mẽ apumu nê ixkính nê. Nom kot pa mō nê tee ri hapêr nê te ixte Masetōn nhō xwýnhjê mã mẽ ato ixêx pyrã nê ixpijaam nê. Ka mẽ ajaxwýja amnhî kamã apijaam nê. ⁵ ã

mẽ pahte amnhî nhípêx anhýr pymaj na pa ã mẽ amã kagàja nhípêx nê Xitre mã ör nê ma amnhî kukamã mẽ awýr mēnh anê. Nê hkôt wa mör mã xwýnhhta mẽ ho ixpimràatã amnhî kukamã wa mẽ kumê. Tã kê mẽ awýr pōj nê mẽ amã kagàja gō ka mẽ kamã harê nê ama nê tokyx kàxpore ho apikuprōnh jatur xàm amê. Kêr pa mẽ hapu hã mẽ awýr mō ka mẽ ra mẽ ixkutêp ho apikuprōnh pa nê mẽ kãm agō nê ajamakêtkati nê apa. No pa ixte mẽ amã mẽ ate ho apikuprōnh kaxyw mẽ atã ixihýtix kêt. ⁶ Na htem piitã ã hamaxpēr anhýr o pa nê hamaxpēr o:

—Kot ka apur rax nê kamã anhō rax nê. Nom kot ka apur grire nê kamã anhō grire.

Anhýr o hamaxpēr jakamã kêr ka mẽ apiitã ajamakêtkati nê Jerujarê nhō xwýnhjê mã kàxpore nhōr mex nê. Kêr kê mẽ ho apikuprōnh pa nhûm rax nê. Te mẽhō ihpur rax nê kamã ò raxta pyrãk. Kê Tirtûm ã mẽ ate amnhî nhípêx anhýr ã mẽ apumu nê nhýrmã mẽ ato mex nê. ⁷ Nom kêr ka mẽ anhōxy kamã mẽ kãm ör kêt nê. Mẽ pahte pahkính kãm panhōxy hkêt kãm mẽ kêp amrakati xwýnhjê mã mẽmoj nhōr o papaja na Tirtûm kãm hprãm. ⁸ Koja mẽ hã mẽ apumu hãmri nê amnhîm mẽ amex ã mẽ ajarênh rãhã ho pa. Mẽ kãm Tirtûm kính xwýnhjaja na htem àmnhîx ri mẽ kêp amrakati xwýnhjê mã mẽmoj nhōr o pa. Te Tirtûm kot amnhî nhípêx pyrãk. Na hte àmnhîx ri mẽ pamã mẽmoj nhōr o pa. Mẽ pahwýr na rē nhûm wrý. Nhûm mẽ pamã mẽ paxàpkur xà nhōr o pa. Nê tanhmã mẽ pah-to pu mẽ paxà hkêt nê pajamakêtkati nê paxàpēnh o papa. Nê pamex nê ri papa. Panhō rính nê ri papa. Jakamã kwa pu mẽ urãk nê paxàmnhîx ri mẽ kêp amrakati xwýnhjê mã mẽmoj nhōr o papa.

¹⁰ E pa ixprí hã mẽ amã ja jarê ka mẽ inhma. Nà na hte ã Tirtûm mẽ pamã mẽ paxàpkur xà nhōr o pa anê. Kot kaj apur kãm ahkre nhûm tanhmã amã mẽmo hyta nhípêx to nhûm amã hapôx mex nê amã ô rính nê ka anhō rax nê. Nê hkwy ho axàpkur o apa nê axte hkwy hkre. Tã kêr ka mẽ ã Tirtûm kot mẽ ato mex anhýr ã amnhî pumu hãmri nê urãk nê axàmnhîx ri mẽ kêp amrakati xwýnhjê mã axàmnhōr pē mẽ ho mex o ri apa. Nhûm Tirtûm mẽ hã mẽ apumu nê mẽ amã mẽmoj nhōr rãhã nê. Ka mẽ amnhî pyrã nê mẽ kêp amrakati xwýnhjê mã hkwy nhōr o apa. ¹¹ Koja Tirtûm mẽ ato mex rax nê ka mẽ anhō mẽmoj rax nê. Ja o amnhî xwar mẽ kêp amrakati xwýnhjê kaxyw kàxpore hkwy jaxwý. Kêr pa mẽ amã hkwy jamý nê ma Tirtûm kôt mẽ pahkwýjê mã o mō nê mẽ kãm kugō kê mẽ omu nê hkính nê. Nê mẽ atã Tirtûm mã mex o mex ã harê. ¹² Hãmri nê mẽ akukwak ri mex nê ri pa. Nê axpēn mã Tirtûm mex o mex ã harênh o ri pa. ¹³ Koja mẽ amnhî tã mẽ apumu nê hkính nê. Hãmri nê Tirtûm mã amnhî tã tanhmã mẽ ajarênh to nê kãm:

—Pa Tirtûm. Nà ãm hãmri na pre Korîť kãm akôt mẽ ixkwýjaja amnhî jarê. Na htem akôt pix mã amnhî nhípêx mex o ri pa. Jao mẽ ixpê õxy hkêt nê mẽ inhmã kàxpore hkwy nhōr rax nê. àmnhîx ri hamakêtkati nê mẽ inhmã hkwy nhōr rax nê. No ãm mẽ papxipix na htem ã mẽ inhípêx anhýr kêt nê. Na htem mẽ kêp am-

rakati xwÿnh piitã ã më hipêx anhÿr o pa. Æm hãmri na ka pre tanhmã më hkrã hto nhÿm më anhÿ hã ã amnhÿ nhÿpêx anhÿr o pa. Amex o amex Tÿrtÿm. Anê.

¹⁴ Hãmri në më ato hwÿr o:

—Pa Tÿrtÿm. Æm hãmri na hte Korîit nhö xwÿnhjaja amnhÿ pyrã në mëmoj to më ixkutã nojarêt o pa. Jakamã aa më ixte amnhÿ tã më inhno ho më omunh kêt tã më inhmã më hkÿnh në. Kwa kêr ka më ixtã mëmoj to më kutã anojarêt rãhã ho apa Tÿrtÿm.

Anhÿr o më ato kuwÿ. ¹⁵ Tÿrtÿmja mex o mex. Nom na hte më pahto mex pê më pamã kãxpore nhö kêt në. Kra Jesusja na pre më pamã kugö. Kãm më pajapê ho më pahwÿr kumê nhÿm më pahwÿr wrÿ në më pahpiitã më pahte amnhÿ tomnuj pãnhã amnhÿrer kaxyw më panê ty. Ja na mex o kot më pamã kãxpore nhö jakrenh. Mëhö koja urãk në ã më panê htyk anê? Nã amrakati ho amrakati. Æm Jesus pix na pre ã amnhÿ nhÿpêx anê.

Pawre kêp Tÿrtÿm Karö nhÿ hã kapêr xwÿnh ã harênh
Epes 6.10-20; Wam Tesaröñ 5.8

10 E Kris kôt ixkwÿjaja. Nã ixpê Pawre kot paj më akwÿ kot tanhmã ixto kapêr to xwÿnhjê mã amnhÿ jarê ka më apiitã inhma. Nã na hte Kris më pakamã gryk tokyx anhÿr kêt në. Na hte më pahto mex japjê në. Tã inhmã urãk në ã më anhÿpêx anhÿr prãm në. No na hte më akwÿjaja xypên mã tanhmã ixto kapêr punuj to në ri xypên mã:

—Pawre na hte nhÿri krÿ kamã pa në më pamã kagã nhÿpêx në më pahwÿr kurê në kamã mëmoj tã më pamã kapêr kãm hihtÿx në hã më pamã akir. Tã amnê më pahwÿr mö hãmri në te kãm më pahpyma pyrãk o më pamã kapêr o pa.

Anhÿr o ijarê. ² Nom inhmã më awÿr inhmö r në mëmoj tã më amã ixãkjêr prãm kêt tã kot paj nhÿrmã më awÿr mö ka më tanhmã amnhÿ tomnuj to ho apa japêr. Pa ja hã më apumu në hã më amã akir kãm ga. ³ Na pa htem jar pika ja kamã Tÿrtÿm kwÿ hkêt xwÿnhjê kaêx ã ri ixpa nom më urãk në amnhÿ krã hkôt tanhmã amnhÿ nhÿpêx to ho ixpa hkêt në. Në më urãk në amnhÿ krã hkôt tanhmã ijamaxpêr to ho ixpa hkêt në. Na pa htem Tÿrtÿm Karö nhÿ hã àhpumunh xà ho amnhÿ nhÿpêx o ri ixpa. ⁴ Në Tÿrtÿm xàhpumunh tÿx xà ho më kãm kapêr jarênh o ri ixpa. Më kot mar në hkôt amnhÿ nhÿpêx kaxyw. Në àhpumunh tÿx o na pa htem më kot Tÿrtÿm kôt amnhÿ xunhwÿr pymaj më kêp àmnàr xwÿnhjaja tanhmã më në më ho. ⁵ Na htem htÿx ri tanhmã Tÿrtÿm në hkwÿjê mã kapêr to ho pa. Amnhÿ kaxyw hkôt më hamaxpêr kêt kaxyw tanhmã në më kãm kapêr to. Na pa htem ja hã më omu në Tÿrtÿm xàhpumunh tÿx xà ho tanhmã më kãm ixkapêr to nhÿm më tee ri inhma në axte më kêp àmnàr kêt në. Pa më kãm Tÿrtÿm kapêr jarê nhÿm më ohtö në kuma në Kris kôt amnhÿ xunhwÿr në hkôt amnhÿ nhÿpêx o pa. ⁶ Tã më kajaja kot kaj më Tÿrtÿm kôt amnhÿ nhÿpêx mex tã më atö ra kapêr nhÿröp xa në tanhmã amnhÿ tomnuj to. Pa ja hã apumu rÿ hã ajarênh ma në hã amã akir.

⁷ Më ate Tÿrtÿm kot më awÿr inhmênh kêt ã xypên mã

ijarênh tã kot kaj më atö ãm hãmri apê Kris kwÿ hã amnhÿ pumu në ra mãänên pa ixpê hkwy hã ixpumunh kurê kumrêx. Më apyrã në ixpê hkwy kênã. ⁸ Na pa pre ma më awÿr mö në tanhmã më amã amnhÿ jarênh to në më amã:

—Tÿrtÿm na pre më awÿr inhmê pa mö. Ixte ÿ hã më amã kapêr jarênh o ri më akôt ixpa kaxyw. Anê.

Tã pa hte arÿ ã amnhÿ jarênh anhÿr o ri ixpa. Æm hãmri na pre Tÿrtÿm më awÿr inhmê pa hte ãm hãmri më amã kapêr jarênh o ri më akôt ixpa. Na pa hte Tÿrtÿm nhÿ hã më amã ixkapêr në kapêr o ixêx o amnhÿ to jarkrar kêt në. Ixte tanhmã më atomnuj to ho ri ixpa kaxyw na pre Tÿrtÿm më awÿr inhmênh kêt. Më amã ixkapêr mex nhÿm më ate inhmar në Kris kapêr kôt amnhÿ nhÿpêx mex o apa kaxyw na pre më awÿr inhmê. ⁹ E kwa Kris kôt ixkwÿjaja. Na pa hte më amã ixpuma kaxyw më awÿr kagã rênh kêt në. Më ate kamã harênh në tee ri amnhÿ kukamã ajamaxpêr o amnhÿ kamã amã ma kaxyw kêt. ¹⁰ Më akamã më kãm ixkÿnh kêt xwÿnhjaja na htem ijarênh o:

—Pawre na hte awry hã pa në më pahwÿr kagã rênh në kamã te kêp pahi ho amnhÿ nhÿpêx pyrã në mëmoj tã më pamã kapêr kãm hihtÿx në. Tã më pahwÿr pöj hãmri në kapêr kaxyw nom kapêr kãm hihtÿx o kapêr kêt në. Jakamã mo kaxyw kot puj më hwÿr mra në kapêr ma?

Anhÿr o ijarê. ¹¹ Nom ã ixte anhÿr kêt. Kwa më inhma. Kot paj nhÿrmã ma më awÿr mö hãmri në te kagã ja kamã më amã ixkapêr pyrãk o më amã ixkapêr në ixkapêr xihtÿx o më amã ixkapêr kãm ga.

¹² Na hte më akwÿjaja kot amnhÿ to mex o më ajakrenh ã amnhÿ to jarkrar o ri pa. No ãm amnhÿ krã hkôt pix mã na htem ã ri amnhÿ jarênh anê. Na hte Tÿrtÿm ã më harênh anhÿr kêt në. ¹³ Tã inhmã më urãk në ã amnhÿ jarênh anhÿr prãm kêt. Æm ixte Tÿrtÿm kot tanhmã inhmã karö hto xà hkôt amnhÿ nhÿpêx o ixpaja na inhmã hprãm. Tã më kajaja më awÿr na pre inhmê. ¹⁴ Ra kot më awÿr inhmênh jakamã ixkumrêx na pa pre më awÿr mö në më akôt ri më amã tanhmã Kris jarênh to ho ri ixpa. Tÿrtÿm kãm nhÿhÿm ixpa hprãm xà pix wÿr na inhmã ixpa hprãm.

¹⁵ No kêt më kot amnhÿ krã hkôt htÿx ri Tÿrtÿm kapêr jahkre o më pa xwÿnhjaja na htem nhÿri krÿ kamã më kot Kris kôt amnhÿ xunhwÿr ã më harênh ma në më hã amnhÿ to jarkrar o ri pa. Te tãm kot më hwÿr mö r në më kãm ujarênh nhÿm më kot më mar xà hkôt Kris kôt amnhÿ xunhwÿr pyrãk. Në më hã amnhÿ to jarkrar o:

—E na pa pre ma më hwÿr mö në më kãm Tÿrtÿm kapêr jarê nhÿm më inhma në hkôt amnhÿ xunhwÿr kurê kumrêx. Ixkukwak ri na prem ã amnhÿ nhÿpêx anê. Anê.

Nom ã amnhÿ nhÿpêx anhÿrja ã amnhÿ to hêx. No pa na pa hte ho më urãk kêt në. Koja Tÿrtÿm ma nhÿri krÿ hwÿr ixkwÿjê hõ më nhÿm ma hwÿr mö në më kãm Kris kapêr jarê. Hãmri nhÿm më kuma në Kris kôt amnhÿ xunhwÿ. Pa më harênh ma në më ÿ hã ixkÿnh në nom pa ixkukwak ri më kot hkôt amnhÿ xunhwÿr ã amnhÿ to jarkrar kêt në. Ixte më hwÿr ixpa në më kãm

ixujarênhre hã kot pa hkêt mê hã amnhî to jarkrar. Âm Tirtûm kãm nhÿhÿm ixpa hprãm xà pix wÿr na pa hte ixpa nê mê kãm kapêr jarê. Jakamã kot kaj mê nhÿrmã Kris kôt amnhî nhÿpêx mex o ri apa pa ja hã mê apumu nê mê are nê hpãnhã ma krî hõ hwÿr Kris kot mê hwÿr inhmênh xà hõ hwÿr mō. Ka mê ja hã ixto Tirtûm wÿr o apa. ¹⁶ Kot paj mê anhō krî kamã mê piitã mê kãm Je-jus kapêr jarênh pa hãmri nê hpãnhã ma krî hkwy hkôt ijapōx o ri ixpa nê kamã mê kãm harênh o ri mê hkôt ixpa. Kormã aa mê kot mar kêt kumrêx xwÿnhjê mã harênh o ri mê hkôt ixpa. Na pa hte ã mê hwÿr ixpa nê mê kãm ixujarênh anê. Jakamã nhÿm mê ja hã ixpumu nê mê kot Tirtûm kapêr mar xwÿnhjê pix wÿr ixpa hã ijarênh kêt nê.

¹⁷ Nê Tirtûm kapêr ã kagã htûm kot mëmoj tâ mê kot amnhî to jarkrar ã harênh kot:

Kêr ka mê kamjaja amnhî mex ã amnhî to jarkrar kêt nê. Âm Tirtûm pix mã mãn mex o mex ã harênh o ri ho jarkrar o ri apa. Anê.

¹⁸ Kot pu mê Tirtûm noo mã amnhî to mex ã amnhî to jarkrar nê ãm amnhî to jarkrar kaprÿ. Nom koja Tirtûm tãm ja hã mê pahto jarkrar nê ãm hãmri mê pahte amnhî to mex xwÿnh ã pahto jarkrar.

Jejus kot mê hwÿr mê rênh ã amnhî to hêx xwÿnhjê jarênh

Matêwre 7.15; Rômãn 16.17; Karatas 1.6-9; Korosê 2.8; Sikûn Pêtre 2.1

11 E kot paj te mê hkrã pipãnh xwÿnh kot htÿx ri amnhî jarênh pyrãk o tanhmã mê amã amnhî to jarkrar to. Kwa mê inhma nê ixkamã agryk kêt nê. No mê ixkapêr kumrêx mãn ma. ² Inhmã mê akînh. Te ho Mëpahpãm Tirtûm kãm mê akînhta pyrãk. Te mê apê mēhō kukrit kãm my hkînh nê kot ho mjên prãm xwÿnhhta pyrãk. Kãm mëmyjê piitã mê hkînh kêt ãm kãm pix kînh. Ja pyrã nê kêr ka mê amã Kris kînh o nhãm amã mê hkînh xwÿnhjê jakre. Te ho mēhō ni kot kãm myta pix kînh nê kãm ho mjên prãm xwÿnhhta pyrãk. Ja na pa inhmã hprãm. ³ Ra mê amã Kris kînh tÿx o apa nê hkôt amnhî nhÿpêx mex o ri apa htã nhÿm mê kot amnhî krã hkôt htÿx ri Tirtûm kapêr jahkre ho mê pa xwÿnhjaja tee ri ja hã mê ajarênh ma nê axpên mã mê ajarênh o:

—Kwa nà ja mex kêt. Koja mê Pawre kapêr ma nê ãm kuma nhÿm ja mex nê. No mê pahkôt mê kot amnhî nhÿpêxja na mê pamã mex. Ja na kêt mê pamã mex o mex. Anê.

Hãmri nê ra kot Kris nê tanhmã mê amã hêx to kaxyw. Te amnepê mã kagã kot mê panã kot wa pê Ewa mã hêx nhÿm kot mar nê hkôt amnhî nhÿpêxta pyrãk. ⁴ Na pa pre ra mê awÿr mō nê mê amã tanhmã Jejus jarênh to. Nê tanhmã mê amã Tirtûm Karō jarênh to. Nê tanhmã wa kot mê pahto hkra hto hã mê amã wa harê ka prem inhma nê mar tÿx nê. Tã nhÿm ra mê kot htÿx ri Tirtûm kapêr jahkre xwÿnhjaja ixpãnhã mê awÿr mō nê Jejus kapêr kwÿm ri tanhmã mê amã ujarênh to nê mê amã harênh o hêx rãhã ho pa. Nê Tirtûm Karōja nhÿm mê amã tanhmã ho hêx to. Nê

ixte mê amã Tirtûm kapêr jarênh kwÿm ri ixpãnhã tanhmã mê amã harênh to ho pa. Na ka prem mê ama nê ãm hãmri harênh ã hkamnhîx. Kwa kêr ka mê ri mê ujarênh piitã mar nê hkôt amnhî nhÿpêx kêt nê. Mê kot Jejus jarênh tã no ãm katat kôt harênh kêt nê. Âm ri ho hêx o pa. Ka htem ama nê ãm hãmri harênh ã hkamnhîx nê mê amã mê mar prãm nê. Mê kot mê amã harênh o hêx o pa htã ka mê ama nê ra mê hkôt amnhî nhÿpêx kaxyw. Kwa mê ri ã amnhî nhÿpêx anhÿr hkêt nê. ⁵ Kris kot mê awÿr mê rênh ã mê kot amnhî jarênh tã amnhî to hêx. Ka prem ama nê ãm hãmri mê kot mê amã harênh ã mê hkamnhîx. Nom na pre Krisja mê awÿr mê rênh kêt nê. Kêt pa na pre mê awÿr inhmê. ⁶ Mê hkînhã ixkapêr krór pyrãk tã no ãm ixte Tirtûm kapêr mar tÿx. Nê kot amnhî nhÿpêxja na ixte omunh par. Ra mê ate ja hã ixpumunh mex.

⁷ Na pa pre mê akôt ri mê amã Jejus jarênh o ri ixpa no ãm hpãnhã mëmoj tâ mê awÿr o ri ixpa hkêt nê. Xà amarî ixte mê amã harênh nê hpãnhã mëmoj tâ mê awÿr kêtja mê apê omnuj? ⁸ Kormã ixte mê amã Tirtûm kapêr jarênh o ri ixpata ã na pa pre hte tōhã kàxpore ho presija no ãm aa hã mê awÿr kêt nê. Jar Masetôn kamã Kris kôt mê pahkwÿjjaja na prem ixwÿr hkwy rênh o pa pa ho ixàpkur xà japrōr o ri mê akôt ixpa. Mê kumã ixte Tirtûm kapêr jarênh o ri ixpa hkêt tâ pa hte mê kukwak ri mê akôt ho ixàpkur o ri ixpa. Tã kot paj arî ã mê akôt ixpa nê ã amnhî nhÿpêx anê nê mëmoj tâ mê awÿr o ri ixpa hkêt nê. ¹⁰ Ja inhmã mex. Jakamã kot paj amarî mê anhō pika pê Gres kãm ã mê amã Tirtûm kapêr jarênh o ixpa anê nê mëmoj tâ mê awÿr kêt nê. Âm hãmri na pa ã mê amã amnhî jarênh anê. Kris pyrã nê ixêx kêt kênã. ¹¹ Xà we inhmã mê akînh kêt kôt na pa hte ã mê amã Tirtûm kapêr jarênh pãnhã mê awÿr kêt anê? Nà inhmã mê akînh jakamã na pa hte kapêr jarênh pãnhã mê awÿr o ri ixpa hkêt nê. Inhmã mê akînh tÿx kênã. Tirtûm kot ja hã ixpumunh mex. ¹² No mê kot amnhî krã hkôt htÿx ri Tirtûm kapêr jahkre xwÿnhjaja na htem mê ajahkre hpãnhã kàxpore hã mê awÿr pix o pa. Nê mê amã tanhmã amnhî to hêx to nê mê amã:

—Nà mê ixte Pawre kot amnhî nhÿpêx pyrãk. Mê ixte amnhî nhÿpêxja kot axpên pyrãk.

Anhÿr o mê amã amnhî to hêx. Nom ixte ho mê urãk kêt kumrêx. Mê ixte amnhî nhÿpêx kot axpên pyrãk ronhÿx pa mê urãk nê kàxpore hã mê awÿr o ri ixpa. Nom ixte ã amnhî nhÿpêx anhÿr kêt. Kot paj aa ã amnhî nhÿpêx anhÿr o ixpa hkêt nê. ¹³ ã mê kot amnhî nhÿpêx anhÿr xwÿnhjaja na pre Tirtûm mê awÿr mê rênh kêt nê. Mê kot Kris nhÿ hã mê ahkre xwÿnh ã amnhî jarênh tã ãm amnhî to hêx. ¹⁴ Mê õ pahi Satanastija te mëmoj mex jarênh pyrãk tã no ãm na hte mê pano kupyri pê mê pamã tanhmã hêx to ho mê pahkôt pa. Te kot mëmoj mex ã ãm hãmri kot harênh pyrãk tã no ãm ho hêx. ¹⁵ Tã hkôt mê kot amnhî nhÿpêx xwÿnhjaja na htem urãk nê te tãm mê kot amnhî nhÿpêx xwÿnhjê pyrã nê mê pahwÿr mra nê tanhmã mê pamã hêx to. Satanasti pyrã nê mê pano kupyri kaxyw tanhmã mê pamã hêx to. Nom koja Tirtûm

nhÿrmã mẽ pahtã mẽ homnuj tÿx kumrêx nhÿm mẽ rÿ amnhÿ pumu.

Tanhmã mẽ kot Kris ã Pawre nhÿpêx to ã mẽ harênh

Atre 9.23-25

¹⁶ E kot paj axte te ixtÿx ri amnhÿ to jarkrar pyrãk o mẽ amã tanhmã amnhÿ jarênh to ka mẽ inhma nê ixkamã agryk kêt nê. ¹⁷ Pahihti Kris nhÿ hã kot paj mẽ amã amnhÿ jarênh kêt ãm amnhÿ krã hkôt kot paj mẽ amã amnhÿ jarê. ¹⁸ Na htem ohtô nê mẽ ate mẽ hã api-jaãm kaxyw tanhmã mẽ amã amnhÿ to jarkrar to ho pa. Tã kot paj mẽ urãk nê amnhÿ krã hkôt mẽ amã amnhÿ to jarkrar ka mẽ inhma. ¹⁹ Mẽ ate amnhÿ xãh-pumunh tÿx ã amnhÿ jarênh tã ka htem htÿx ri mẽ kot amnhÿ to jarkrar o ri mẽ pa xwÿnhjê kapêr ma nê mẽ hkôt ajamaxpêr nê mẽ hkôt amnhÿ nhÿpêx kurê kumrêx. ²⁰ Mẽ kot Kris nhÿ hã mẽ ahkre hã amnhÿ to hêx xwÿnhjaja mẽ pakurom mẽ kot amnhÿ to rax xwÿnh ã amnhÿ jarênh jakamã na htem mẽmoj tã mẽ amã karô ho pa.

Nê mẽ kãm hprãm xà hkôt nhÿhÿm mẽ arê nê nhÿhÿm mẽ arê.

Nê mẽ apa pix kukwak ri apkur o pa.

Nê mẽmoj tã mẽ ajakwap mẽ atak o pa.

Ã mẽ kot mẽ anhÿpêx anhÿr tã ka te mẽ ate atÿm kêt pyrã nê atÿx ri mẽ kapêr ma nê mẽ hkôt amnhÿ nhÿpêx o ri apa. ²¹ Tã ixte mẽ urãk nê ã mẽ anhÿpêx anhÿr kêt tã kot paj mẽ urãk nê mẽ amã tanhmã amnhÿ to jarkrar to ka mẽ inhmar japêr. Te ixtÿx ri amnhÿ jarênh pyrãk o kot paj mẽ amã amnhÿ jarê nom ãm hãmri mẽ amã amnhÿ jarê. ²² Mẽ kot Jejus nhÿ hã mẽ ahkre hã amnhÿ to mẽ hêx xwÿnhjaja na htem mẽ amã tanhmã amnhÿ to jarkrar to nê mẽ amã:

—E mẽ inhma. Mẽ ixpê Ijaew na pa mẽ. Mẽ arom mẽ ixpê finat Apraãw kanrêhã htãmnhwÿ jakamã kwa mẽ ixkapêr ma nê mẽ ixkôt amnhÿ nhÿpêx. Anê.

Nom ijaxwÿja ixpê Ijaew tã pa hte mẽ urãk nê ja hã amnhÿ to jarkrar hkêt nê. ²³ Nê mẽ kot Kris kapêr jarênh mex o pa hã amnhÿ jarênh tã pa na pa hte harênh mex o mẽ hakre. Te ixkrã pipãnh pyrãk o ã mẽ amã amnhÿ jarênh anhÿr tãã.

E pa mẽ amã tanhmã amnhÿ jarênh to ka mẽ inhma. Nà na pre Kris ã mẽ kãm ixkurê xwÿnhjaja mẽ kot amnhÿ to jarkrar xwÿnhjê hkÿnhã Kris ã ixpynênh nê ijagjênh xohtô nê. Nê mẽ hkÿnhã tãhã ixtak rÿnh kumrêx. Pa mẽ hkÿnhã xatã mẽ kot tanhmã ixto hã kritpêm ronhÿx pa pre ty. ²⁴ Na pre Ijaew krãhtÿmjaja Kris ã ixkatut kãm ixtak rÿnh nê. Nê ixtak xàja pÿ hã mry kà janhô o ixtak. Nê ixtak kaxyw nê ixtak xà jatur xà kamã kàx xwa gixre janhô nê ho ixtak rÿnh o ixkatut kà rê. Ixtak o 39 hãmri nê rÿ kormã mẽ kot ixpÿr pymaj inhmã ure. Na pre htem nhÿri ixpynê nê ã inhÿpêx anê. Na prem ã inhÿpêx anhÿr o 5 wês.

²⁵ Nê na prem ra mẽ kot ixpÿr kaxyw nê kên rÿnh kwÿ jamÿ nê ho ixtak o kuhê. Nê Rôm nhô xwÿnhjaja haxwÿja pÿ ho ixtak rax kumrêx. ã inhÿpêx anhÿr o axkrunêpxi.

Nê na pa pre hte gô xujanãr kãm nhÿhÿm Jejus jarênh o ri ixpa kaxyw pãr kãm mẽ hwÿr ixpa nhÿm pãrja tanhmã amnhÿ to nê agjê. Kritpêm nhÿx pre hte gôja ixpÿ. Pa pre ã amnhÿ nhÿpêx anhÿr o axkrut. Tã arÿ-gro hõ hã kê axte pãr õ mã axà nê ma axte krÿ hõ hwÿr mõ. Nhÿm kê pãrta axte mẽ ixpê axà nhÿm gôja nhÿx kê axte ixpÿ. Pa pãr jakà hã kumÿ nê hã ijêť o amÿkry. Nê ho apkati. Tã nhÿm nhÿhÿnh pãr ôja mõ nhÿm kamã mẽ mör xwÿnhjaja ixpumu nê ixwÿr pãr o mõ nê amnhÿ wÿr ixto api nê ma amnhÿ kôt ixto mõ.

²⁶ Na pa pre amnhÿ xà htÿx kamã ijamak o ri ã mẽ kãm Kris kapêr jarênh o ri ixpa anê. Kironhÿx pre gô tãmja ixpÿ. Nhÿm mẽ ãhkÿnh nhi xwÿnhjaja kironhÿx prem mããñên ixpÿ. Nê Ijaew nê Ijaew kêt xwÿnhjaja tãhã tanhmã ixtomnuj to ho pa. Pa pre krÿ hkwy hwÿr ixpa rÿ kapôt ã ixpa nhÿm mẽ ixtã amÿnê. Pa pre gô xujanãr kãm pãr kãm ri ixpa nê nhÿx kamã ty. Nhÿm mẽ kêp Kris kwÿ hã amnhÿ to hêx xwÿnhjaja haxwÿja tanhmã ixtomnuj to pa mẽ ÿ hã amnhÿ xà htÿx kamã ijamak o ri ixpa. Á na prem Kris ã inhÿpêx anhÿr o pa.

²⁷ Nê na pa Jejus kapêr jarênh o ri ixpa kurê ixkêngrã nê ri ixpa. Nê tãhã inhôt kêt ã ixtã apkati. Nê tãhã inhmã prãm nê inhmã kôr nê ri ixpa. Nê tãhã ixê mex kêt nê inhmã kry nê ri ixpa. ²⁸ Na pa hte Kris kapêr jarênh o ri ixpa pê ã amnhÿ nhÿpêx anê. Nom ja pix kêt. Na pa hte krÿ piitã hkôt Kris kwÿjê hkukamã tee ri ijamaxpêr nê ijamaxpêr o:

—Hêxta waa nê. Mãn mẽ arÿ Kris kôt amnhÿ nhÿpêx mex japêr rÿ ko. Mãn mẽ ra kapêr kwÿm ri tanhmã amnhÿ tomnuj to rÿ ra hkaga.

Anhÿr o ijamaxpêr o ixpa.

²⁹ Nê na hte mẽhõ Tÿrtÿm kapêr nhÿrôp xa nê tanhmã amnhÿ tomnuj to pa tee ri omu nê ixkaprÿ htÿx kumrêx. Kojã mẽhõ tanhmã Tÿrtÿm nê mẽhõ mã kapêr to nhÿm kuma nê Tÿrtÿm kôt amnhÿ nhÿpêx kêt pa tee ri ja hã omu nê nê kêp àmnàr xwÿnhta kamã inhgryk tÿx kumrêx.

³⁰ E Kris kôt ixkwÿjaja. Na pa ã mẽ amã amnhÿ jarênh anê. Te ixte amnhÿ to ijarkrar pyrãk no ãm mẽ ate ixirerek xwÿnh ã ixpumunh pix kaxyw. ³¹ ãm hãmri na pa ã mẽ amã amnhÿ jarênh anê. Ixêx kêt. Pahihti Jejus nhÿpêxà Tÿrtÿm kot ja hã ixpumunh mex. Tÿrtÿmjaja mex o mex. Kojã mex o mex tÿm nê pa rãhã ho pa. Tãm kot ixirerek ã ixpumunh mex. ³² Kormã krÿ pê Tamas kãm ixpare ri na pre mẽ õ pahi Arêťja mẽ kãm ixtã amÿnê nhÿm pôristijaja krÿ hpu hã kahê xà nhô hakwakre piitã kãm hipôk pa nê ixkãm hamak o kuhê. Pa tee inhmã nhÿhÿnh ixkator nê ma mẽ umaj ixprôt nê ixtêm prãm nê ixirerek xwÿnh ã amnhÿ pumunh kurê kumrêx. ³³ Tã nhÿm Kris kôt mẽ pahkwÿjaja hamaxpêr nê kawà rax mÿ nê o tẽ nê inhmã ãm pa hwÿr axà nê kamã nhÿ. Hãmri nhÿm mẽ pãr nhôr o kahê nhÿrô pê ixto wrÿ pa ixkato nê mẽ kêp amÿxu nê amnhÿm ixprÿ nê ma tẽ nê mẽ kêp akunok. Á na pre Tÿrtÿm ixirerek xwÿnh ã inhmã ixto amnhÿrÿt anê.

Tirtûm kot Pawre mã mẽmoj to amnhîřt ã harênh

12 E Kris kôt ixkwýjaja. Nà inhmã amnhî to jarkrar hprãm kêt tã kot paj tanhmã mẽ amã amnhî jarênh to ka mẽ inhma nê hã ixtã apijaãm japêr. Na hte Tirtûm tõhã inhõt kãm ixkarõ mã tanhmã kapêr to. ² Amnepê mã amgrã hõ hã na pre tanhmã ixkrã hto nê õ krî hwýr amnhî wýr ixto api. Na pre ra hã amgrã pê 14 ãn. Apu inhî rãhã ixto api rý apu ãm ixkarõ pix o api rý ko. Ixte ja hã amnhî pumunh mex kêt. Tirtûm pix kot ja hã ixpumunh. ⁴ Na pre ixto api pa pøj nê õ krî kamã axtem tanhmã mẽ kapêr to hã mẽ kuma. Na prem mẽmoj mex kumrêx jarê pa kuma nê ixkînh nê. Nê inhmã mar prãm nê. Hãmri nê ijamaxpêr o:

—Hêxta waa nê. Mẽmoj jarênhja mex kumrêx. Nà kot paj akupým wry nê ixkwýjê mã harê kê mẽ ixpyra nê kuma. Nà kot paj anê.

Anhýr tã nhũm Tirtûm Karõ ja nê ixkurê nê inhmã: —Nà kêr ka mẽ kãm ja jarênh kêt nê. ãm kapxipix kot kaj ama nê ri hã apa.

⁵ Anhýr jakamã pa pre paxipix mẽ arom mẽmojja pumu nê kuma nom kot paj ri hã amnhî to jarkrar kêt nê. Kot paj ãm Jesus pix tanhmã harênh to ho ri ixpa. Jao ixrom mex o mex ã harê. Nê ixrom hihtýx o hihtýx nê ãhpumunh o ãhpumunh ã harênh o ri ixpa.

⁶ Nê ixte Tirtûm nhõ krî hwýr ixàpirja ãm hãmri ixte hã amnhî jarênh tã kot paj ja hã amnhî to jarkrar o ri ixpa hkêt nê. Mẽ ate ja hã inhmar kôt inhmex ã ijarênhja na inhmã hprãm kêt. Nom kot ka mẽ ixte tãm amnhî nhîpêx ã ixpumu nê tãm ixkapêr ã inhma hãmri nê rî kormã inhmã inhmex ã ijarê. ã mẽ ate amnhî nhîpêx anhýrja na inhmã hprãm. ⁷ Na pre Tirtûm inhõt kãm inhmã mẽmoj mex kwý jarênh rax nê. Hãmri nê hpãnhã inhmã:

—E na ka akwýjê rom inhõ krî hwýr api nê mẽ kurom mẽmoj mex pumunh rax nê. Tã ate ja hã amnhî pumunh nê ma mẽ kãm hã amnhî to jarkrar o ri apa pymaj kot paj Satanasti mã anê nhũm inhma nê tanhmã atomnuj to ho pa. Nom ijamaxpêr xà hkôt ko-ja ã anhîpêx anê.

Anhýr jakamã nhũm tanhmã inhîpêx to pa inhmex kêt nê ixpa. Te mrõnhî rax nhýhýnh kot ixkamnhwýr nhũm inhmã tee ri hkaxàr prãm kaprý nê ý hã ho inhgýêx rãhã nê ixpaja pyrãk. ⁸ Tã pa tee ri ja hã amnhî pumu nê amnhî to Jesus wý nê kãm:

—Kwa Pahihti. Na pa ra mẽmojta nhý hã ixpunuj nê ixirerek nê ixpa. Kwa inhnê ata pa akupým ixihýtýx nê ijamakêtkati nê ri ixpa nã?

Anhýr o amnhî to hwýr o axkrunêpxi. ⁹ Hãmri nhũm inhmã:

—Nà kot paj anê hyr kêt nê. Kot paj ãm akutã inhnojarêr rãhã ho ri akôt ixpa. Ka axirerek nê apa htã ixihýtýx xwýnh ã ixpumunh kôt ixkamnãr rom tanhmã inhý hã amnhî nhîpêx to ho ri apa. Anê.

ã inhmã kapêr anhýr jakamã na pa ixpunuj nê ri inhîrot nê ixpa htã ixrom hihtýx xwýnhhta nhý hã ixkînh nê ixpa. Nê kurom ixirerek xwýnh pix ã amnhî to jarkrar o ri ixpa. ¹⁰ Jakamã kot paj Kris ã ixpunuj nê ri

ixpa htã ixkînh nê ijamakêtkati nê ri ixpa. Kwãr mẽ mãmrî hã tanhmã ixto kapêr to nê tanhmã hã inhîpêx to pa amnhî xà htýx kamã ijamak o ri ixpa. Nê ixpê amrakati nê inhîrot nê ri ixpa htã Kris nhý hã tanhmã kãm amnhî nhîpêx mex to rãhã ho ri ixpa.

Pawre kot tee ri mẽ hkukamã hamaxpêr ã harênh

¹¹ Tã mẽmo kaxyw na pa ã mẽ amã amnhî jarênh anê? Nà mẽ ate ixtã apijaãm kêt jakamã na pa ã mẽ amã amnhî jarênh anê. Mẽ kêp Kris nhý hã mẽ ajahkre xwýnh ã amnhî to hêx xwýnhjaja na ka htem ixrom kot amnhî to rûnh xwýnh ã mẽ harê nê mẽ hã apijaãm o ri apa. Nom ixte amnhî to grire xwýnh tã mẽ kot amnhî to rûnh o ijakrenh kêt. ¹² Na pa pre mẽ akamã ri ixpa nê Tirtûm nhý hã aa mẽ ate mẽmoj pumunh kêt kwý ho anhýr rax o ri mẽ akôt ixpa. Nê ý hã akupým mẽ ã xwýnhjê ho mex. Nê mẽ nohkre xwýnhjê no ho mex. Na pa pre hte ã mẽ amã mẽmoj nhîpêx anhýr o ri mẽ akôt ixpa. Amnhî xà htýx kamã ijamak o ri ixpa htã Tirtûm xihtýx xà ho amnhî to htýx nê ã mẽ amã mẽmoj to anhýr o ri mẽ akôt ixpa. Mẽ ate omunh nê Tirtûm ãhpumunh týx ã omunh kurê kumrêx kaxyw. Nê ixpê Kris nhý hã mẽ ajahkre hã ixpumunh kurê kumrêx kaxyw na pa pre ã mẽ amã amnhî nhîpêx anhýr o ri mẽ akôt ixpa. ¹³ Xàn pa pre nhãm krî hkwy kamã Kris kôt mẽ pahkwýjê ho mex tã mẽ kajaja tanhmã mẽ ato mex to hkêt nê? Nà na pa pre hte mẽ anhîpêx o axpên pyrãk. ãm mẽmoj pixire na pa pre mẽ urak nê mẽ awýr kêt nê. Nhãm krî hkwy kamã ixpata ã na pa pre mẽmoj to presija nhũm prem inhmã õr o pa. Tã pa pre mẽ mõ nê mẽ akôt ixpa nê mẽmoj to presija htã hã mẽ awýr kêt nê. Kwa mẽ ã ixte amnhî jarênh anhýrja ma nê ixkamã agryk kêt nê.

¹⁴ Tã ot pa ra akupým mẽ awýr inhnojarêr kaxyw. Na pa pre ra mẽ awýr inhmõr o axkrut. Tã ra axte mẽ awýr inhnojarêr kaxyw. Kot paj mẽ awýr mõ nê mẽ akôt ixpa nom te wam ixtêmta pyrã nê mẽmoj tã ri mẽ awýr kêt nê. ãm mẽ amã ixkînh pix na inhmã hprãm. Mẽ apiitã te mẽ apê ixkra pyrãk. Na hte mẽ hkrarejaja mẽ katorxà nê mẽ hipêêxã mã ujaaprõr o pa hkêt nê. Mẽ hipêêxã nê mẽ katorxà na hte hkrare mã kot mẽmoj to presija xà hkôt kãm haprõr o pa nom mẽmoj tã hwýr kêt nê. Ja pyrã nê kot paj mẽ apê ixkra pyrãk ã mẽmoj tã mẽ awýr kêt nê. ¹⁵ Kot kaj mẽ mẽmoj to presija japêr nê inhmã harê pa ixãmnhîx ixkînh kãm mẽ amã ixkãxpore piitã õr par pyrãk o amnhî nhîpêx. Nê mẽ amã tanhmã amnhî nhîpêx to ho ixpa rãhã ixtykja na inhmã hprãm. Inhmã mẽ akînh týx kumrêx tã mẽ kajaja mẽ amã ixkînhja mẽ atã hkwy jêr kêt kumrêx. ¹⁶ Ixte amnhî mã mẽmoj tã mẽ awýr kêt tã na hte mẽ akwýjaja ixêx rom ixte nhãm mẽ kêp amrakati xwýnhjê mã kãxpore hã mẽ awýr o ixpa hã ixkamnhîx.

¹⁷ Kwa tanhmã na pa pre ri mẽ ano kupyrt to? Xà ja kaxyw na pa pre mẽ awýr ixkrãmnhwýta wa kumê?

¹⁸ Na pa pre Xitre hã ixihýtýx nê mẽ awýr kumê. Nê Kris kôt mẽ pahtõja pa Xitre hkôt kumê nhũm wa ma mẽ awýr mõ. Tã xà na pre Xitre tanhmã mẽ ano kupyrt to? Nà na pre ã mẽ anhîpêx anhýr kêt nê. Tã wa ixte amn-

hĩ nhĩpêx ně wa ijamaxpêrja kot axpên pyrâk. Nà na pa hte urâk ně mẽ ano kupyř o ri ixpa hkêt ně. ¹⁹ Mãn ka mẽ axpên mã mẽ ijarênh o:

—Nà Pawre mẽ hkwyjaja mẽ kãm amnhĩ to rũnh xwýnh prãm jakamã na ã Pawre kagàja kamã mẽ pamã amnhĩ tã àprâr aně.

Anhỹř o mẽ ijarênh japêř nom mẽ inhmã amnhĩ tã tanhmã ixàprâr to hprãm kêt. Ām mẽ inhmã mẽ akĩnh ně mẽ ato mex prãm jakamã na pa htem tanhmã mẽ amã amnhĩ nhĩpêx to ho ri ixpa. Na pa Tĩrtũm noo mã Kris nhỹ hã ã mẽ amã mẽ amnhĩ jarênh aně.

²⁰ Tã kot paj jatã ma mẽ awýř mō ka mẽ akwyjaja tanhmã amnhĩ tomnuj to japêř.

Měmoj tã axpên mã axàkjêř o apa.

Rý mẽmoj tã axpên kãm agryk.

Rý axpên kãm agryk tokyx anhỹř o apa.

Rý axpên pē anhōxý.

Rý axpên to akapêř punuj o apa.

Rý mẽ ajakwa kamã nhãm mẽ hixi ho rêř o ri apa.

Rý amnhĩ to rũnh prãm xàj anhmã amnhĩ nhĩpêx to ho apa.

Kot kaj mẽ ã amnhĩ nhĩpêx anhỹř o ri apa pa ja hã mẽ apumu ně ixkaprĩ htyx kumrêx ka mẽ tee ri amnhĩ tã ixpumu. ²¹ Xà kot paj mẽ awýř mō ně mẽ apumu ka mẽ akwyjaja arĩ mẽ aprō kuhpa hã nhãm mēnijê ho amnhĩkati ho ri apa? Rý arĩ tanhmã ajamaxpêř punuj to ho apa? Rý atýx ri apijaàm kêt o apa? Kot ka mẽ arĩ ã amnhĩ nhĩpêx aně pa ja hã mẽ apumu ně ixkaprĩ xàj inhmýř rax ně. Ně mẽ anhỹ hã Tĩrtũm noo mã ixpijaàm týx kumrêx.

Pawre kot tanhmã amnhĩ kukamã mẽ kãm karō hto

13 Tĩrtũm kapêř ã kagà htũm tanhmã mẽ kot amnhĩ tomnuj to xwýnhjê jarênh kot:

Koja mēhō tanhmã amnhĩ tomnuj to nhũm mēhō pyxi ně ã amnhĩ nhĩpêx anhỹř ã omu ně awýř tē ně amã harē ka mẽ ama ně ãm ama ně hkôt ajamaxpêř kêt ně. No koja mẽmojaja axkrut rý axkrunēpxi ně hã omu ně awýř mra ně axpên kôt amã harē ka mẽ ama ně mẽ hkôt ajamaxpêř kurē kumrêx. Aně.

Tã ra mẽ awýř inhmōř o axkrut tã kot paj akupým mẽ awýř mō ně mẽ apumu. ² Hapu hã mẽ awýř inhmōřta ã na pa pre mẽ akwý kot tanhmã amnhĩ tomnuj to hã mẽ omu ně hã mẽ kãm akir ně mẽ kãm:

—Kot kaj mẽ amnhĩ tomnuj kaga ně tãm amnhĩ nhĩpêx kêt kot paj nhỹřmã akupýř mẽ awýř mō ně ã mẽ ate amnhĩ nhĩpêx anhỹř ã mẽ apumu ně hã mẽ atomnuj týx kumrêx kãm ga. Aně.

Jakamã kot paj mẽ ma mẽ awýř mō nhũm mẽ akwýjaja arĩ mẽ ate amnhĩ tomnuj o apa hã inhmã mẽ ajarē pa mẽ atã mẽ kuma ně tanhmã mẽ ato htýx ně. ³ Kot kaj mẽ ja hã ixpumu ně aprĩ hã ixte Kris nhỹ hã ixkapêř xwýnh ã ixpumunh týx kurē kumrêx. Kris ixrom hihtýx o hihtýx. Na pre ra mẽ ate amnhĩ tomnuj o apata mýrapê tanhmã mẽ anhĩpêx to. Tã kot kaj mẽ kormã ã ate amnhĩ nhĩpêx anhỹřja kaga hkêt hã koja tee ri ja hã mẽ apumu ně mẽ anhĩpêx kati ně. ⁴ Amnepêm na pre Krisja te hihtýx kêt pyrã ně ãm arĩ mẽ kãm xa

nhũm mẽ unē ně pĩ kahpa ã kunhō ně kupĩ. Tã nhũm Tĩrtũmja àhpumunh týx o akupým ho htĩř nhũm akupým htĩř o htĩř ně Tĩrtũm nhỹ hã hihtýx o hihtýx ã amnhĩ to amnhĩřĩť. Ja pyrã ně wam mẽ awýř inhmōřta ã na pa pre hte mẽ akamã te Kris kormã htyk kêt ri hihtýx kēeta pyrã ně mẽ akôt ixpa. Tã kot paj ma akupým mẽ awýř mō hãmri ně te Kris ra akupým htĩř ně hihtýx o hihtýxta pyrã ně Tĩrtũm xihtýx xà ho tanhmã mẽ kot amnhĩ tomnuj xwýnhjê nhĩpêx to. Hãmri nhũm mẽ amnhĩ tã ixpumu ně Tĩrtũm nhỹ hã ijamaxpêř týx ã ixpumunh kurē kumrêx.

⁵ Kwa mẽ aprĩ hã tanhmã mẽ ate amnhĩ nhĩpêx to hã amnhĩ pumu. Xàn ka htem ãm hãmri amnhĩ kaxyw Jejus Kris kôt ajamaxpêř o ri apa nã? Kot kaj mẽ apē hkwy hã koja mẽ akaxwýnh kãm mẽ akamã hkrĩ rãhã ně. Nom koja mẽ akaxwýnh kãm mẽ akamã hkrĩ hkêt ka mẽ ãm apē hkwy hã amnhĩ jarênh kaprý. ⁶ No pa na ixte ja hã amnhĩ pumunh mex. Ixpê Jejus kwý na pa. Ra ixkamã hkrĩ ně ixkôt pa ho pa jakamã ixpē hkwy na pa. Tã mẽ ate ja hã ixpumunh mexja na inhmã hprãm. Na pa hte ixpē Jejus kwý hã amnhĩ jarênh kaprý hkêt ně.

⁷ Ně na pa hte mẽ ato tanhmã Tĩrtũm wýř to ho ri ixpa ně mẽ ato hwýř o:

—Pa Tĩrtũm. Kwa tanhmã Korĩť nhō xwýnhjê hkrã hto kê mẽ tanhmã amnhĩ tomnuj to ho pa hkêt ně.

Anhỹř o mẽ ato kuwý. Měmo kaxyw na pa hte ã mẽ ato hwýř aně? Ixte mẽ ajahkre mex ã amnhĩ to amnhĩřĩť kaxyw kêt. Ām mẽ ate amnhĩ to mex rãhã ho ri apa kaxyw. Kot kaj mẽ ã amnhĩ nhĩpêx anhỹř o ri apa hãmri nhũm axtem mēhō mẽ awýř mōn pōj ně tanhmã mẽ amã mẽ ijarênh to ně mẽ ijarênh o:

—Kwa Pawre mẽ hkwyjaja na htem Tĩrtũm kapêř kwým ri Korĩť nhō xwýnhjê jahkre ho pa.

Anhỹř tã pa amnhĩ tã mẽ kuma ně ãm mẽ kuma. ⁸ Na pa hte Tĩrtũm kapêř kutã amnhĩ xunhwýř kêt ně. Na pa hte ãm mẽ ate hkôt amnhĩ nhĩpêx o ri apa hã mẽ amã karō kamã ixihitýx rãhã ho ri mẽ akôt ixpa.

⁹ Jakamã kot kaj mẽ hkôt amnhĩ nhĩpêx mex o apa pa ja hã mẽ apumu ně ixkĩnh ně. Mě kot axpên mã ixirerek ã ijarênh o pa htãã. Ā mẽ ate amnhĩ nhĩpêx anhỹř o apa kaxyw na pa hte mẽ ato Tĩrtũm wýř o ri ixpa ně kãm:

—Pa Tĩrtũm. Kwa tanhmã Korĩť nhō xwýnhjê hkrã hto kê mẽ kot amnhĩ tomnuj kaga hpa ně hpãnhã akapêř kôt pix mã mãn amnhĩ nhĩpêx rãhã ně. Aně.

¹⁰ Tã pa kormã mẽ awýř inhmōř xwýř ri ã amnhĩ kukamã kagà nhĩpêx ně mēnh aně. Mě ate kamã harēnh ně mar ně tokyx akupým tãm amnhĩ nhĩpêx kaxyw. Kot pa mẽ awýř mō ně Pahihti nhỹ hã mẽ ate amnhĩ tomnuj ã mẽ amã akir. Nom inhmã ã mẽmoj tã mẽ amã ixàkjêř anhỹř prãm kêt. Ām ý hã kapêř o mẽ ajahkre mex nhũm mẽ ate inhmar ně hkôt amnhĩ nhĩpêx rãhã ho apaja na inhmã hprãm.

¹¹ E Kris kôt ixkwýjaja. Ām ja pix. Kwa kêř ka mẽ ixkapêř mar týx ně hkôt amnhĩ nhĩpêx mex ně. Ně Tĩrtũm kôt pix mã ri tanhmã amnhĩ nhĩpêx to ho apa rãhã ho apa. Ně tãm ri amnhĩ nhĩpêx. Ně axpên kôt

ajamakêtkati nê akĩnh nê axàmnhĩx ri apa. Kot kaj mẽ
ã amnhĩ nhĩpêx anhỹr o apa nhũm Tĩrtũm mẽ akôt pa
ho pa. Kãm mẽ pajapê htỳx kumrêx. Kêp mẽ pamã mẽ
pahkĩnh nê mẽ pajamakêtkati jagjênh xwỳnh.

¹² Nê ota jar Kris kôt mẽ pahkwỳjaja pa mẽ ixpim-
rààtã mẽ awỳr ixpêr mẽ. Mẽ ixpiitã mẽ inhmã mẽ
akĩnh tỳx jakamã na pa mẽ awỳr ixpêr mẽ.

Nê kê Pahihti Jejus Kris mẽmoj to mẽ akutã nojarê
rãhã ho pa. Nhũm Tĩrtũm arĩ kãm mẽ ajapê rãhã ho
pa. Nhũm Karõ tanhmã mẽ akrã hto ka mẽ axpên to
mex pix kukamã mãn ajamaxpêr o apa.

Tã e ixkwỳjaja. ãm ja pix. Ixpê Pawre na pa mẽ awỳr
kagàja nhĩpêx nê ã mẽnh anê.

Karatas

Pawre na pre kagàja nhípêx nê pika pê Karatas kamã Kris kwýjê hwýr kumê. Na pre ra Ijaew kwýjaja mē hwýr mra nê Tirtüm kapêr kwým ri mē ahkre ho pa nê mē kãm:

—Kot kaj mē amnhĩ kaxyw Jejus Kris kôt ajamxpêr hãmri nê määnên mē ixpê Ijaew nhígêr kot amnhĩ nhípêx kôt amnhĩ nhípêx. Kê Tirtüm ja hã mē apumu nê mē ato hkra. Anê.

Nom ã mē kapêr anhýrja kot anhýr kêt. Mē pahte amnhĩ kaxyw Jejus Kris kôt pajamxpêr nê hkôt amnhĩ xunhwýr pix ã mē pahpumunh kôt na hte Tirtüm mē pahto hkra. Tã nhüm prem ã mē kãm ho hêx anhýr o pa nhüm Pawre tee ri ã mē kapêr anhýrja ã mē harênh ma nhüm ja kêp omnuj nê. Jakamã nhüm Karatas nhõ xwýnhjê mã kagàja nhípêx nê mē hwýr kumê. Nê kamã hprĩ hã Tirtüm kot mē ho hkra kaxyw tanhmã amnhĩ nhípêx to hã mē kãm harê nê hã kagà. Nê mē kãm:

1 Pa Karatas nhõ xwýnhjaja? Xà mē amex? Ixpê Pawre na pa mē awýr ixpêr mē nê mēmoj tã mē amã karõ.

Mēpahpãm Tirtüm mē Jejus Kris na pre wa mē akaxyw ixãm. Ixte wa ý hã ma ri mē akôt mē ajahkre o ri ixpa kaxyw. Na pre Jejus ty nhüm Tirtüm akupým ho htír. Hãmri nhüm wa mē akaxyw ixãm. Pyka ja kamã na pre mēhõ mē akaxyw ixãm kêt nê. Tirtüm mē Jejus Kris na pre wa ixãm. Jakamã na pa ã mē awýr kagà nhípêx nê mēnh anê. Mē apê Tirtüm krajê hwýr.

Nê ota jar krĩ ja kamã ixpyrà nê Kris kôt mē pahkwýjaja mē awýr hpêr mē.

³ E kê Mēpahpãm Tirtüm mē Pahihti Jejus Kris wa mēmoj to mē akutã nojarêr rãhã ho pa. Nê mē ato mex rãhã nê. Ka mē wa ý hã akính nê ajamakêtkati nê axãmnhĩx ri apa.

⁴ Nà na pre Krisja amnhĩ grõnh kôt mē pahwýr wrý nê mē panê ty. Mē pahte amnhĩ tomnuj pãnhã amnhĩrer kaxyw mē panê ty. Mēpahpãm Tirtüm kãm hprãm xà hkôt. Tã mēmo kaxyw na pre ã mē panê amnhĩ nhípêx anê? Nà pika ja kamã mē kot amnhĩ nhípêxja omnuj týx jakamã nhüm amnhĩ grõnh kôt te mē kot amnhĩ tomnuj pê mē papytãr pyrãk o mē panhípêx nê ã mē panê htyk anê. ⁵ Jakamã kwa kêr pu mē Tirtüm mã mex o mex ã mãn harênh o ri papa. Nà kot puj mē ã amnhĩ nhípêx anhýr rãhã ho ri papa.

Mē ujarênh pixi ãm hãmri hã harênh

Rõmãn 16.17; Sikün Korĩt 11.3-4; Epes 4.14; Korosê 2.8; Sikün Pêtre 2.1-3

⁶ Kwa ixkrãmnhwýjaja. Na pa pre mē ate tanhmã amnhĩ nhípêx to hã mē ajarênh ma nê ixkaprĩ nê tee ri mē akukamã ijamxpêr. Na pre Tirtümja Kris kukwak ri mē ato mex nê. Nê mē ate hkôt amnhĩ nhípêx o apa hprãm xàj te kot amnhĩ wýr mē awýr pyrãk o mē anhípêx ka mē hkôt amnhĩ xunhwý. Tã xep tanhmã mē ajamxpêr to nê ra hkaga kaxyw. Ra axtem mē ujarênh õja ma nê gryk ã Tirtüm kaga kaxyw. Pa tee ri mē ajarênh ma nê ixkaprĩ nê. Kwa mon ka mē axtem nê ri ã amnhĩ nhípêx anhýr mã? ⁷ Jejus jarênh pix na

ãm hãmri. Mo mē ujarênh mex õ kot ka kêt mē ama nê hkôt amnhĩ nhípêx? Nà amrakati kumrêx. ã mē amã ujarênh anhýr xwýnhjaja na htem Kris kapêr o pihkãr rünh kumrêx o pa nê katãt kôt harênh kêt nê. Ka xep mē ama nê ajamxpêr kati rünh nê.

⁸ Na pa pre ma mē awýr mõ nê ãm hãmri mē amã Jejus kot tanhmã mē panê amnhĩ nhípêx to hã harê ka prem inhma. Tã koja mēhõ mē awýr mõ nê mē amã nhãm mē ujarênh õ jarê nhüm Tirtüm ja hã omu nê nhýrmã ma mē kot amnhĩ xà htýx kamã hamak tùm xà hwýr kumê nhüm ma hwýr mõ nê aa kator kêt nê. Mē pahtõ rý Tirtüm kapêr o wrýk xwýnhjê hõ koja ã amnhĩ nhípêx anê nhüm ja hã omu nê ma kuwy pê himõta wýr amnhĩ nê kumê. ⁹ E kot paj axte mē amã ja jarê ka mē aprĩ hã inhma. Koja mēhõ mē awýr mõ nê mē ate hkôt amnhĩ xunhwýr xwýnhhta kwým ri tanhmã mē amã ujarênh to. Hã koja Tirtüm omu nê nhýrmã ma mē kot amnhĩ xà htýx kamã hamak tùm xà hwýr kumê nhüm ma hwýr mõ nê kamã pa ho pa nê aa kator kêt kumrêx.

Tirtüm pix kãm Pawre hkính hprãm ã kot jarênh

Juãw 5.44; Atre 26.9-20; Karatas 2.6

¹⁰ Nê koja mēmojaja ixkapêr ma nê kãm mar prãm kêt o kãm ixkính kêt japêr nê mãmrĩ kãm ixkính kêt. Tirtüm kãm ixkínhja pix na inhãm hprãm. Kop apu mē piitã kãm ixkínhja mãn inhãm hprãm ronhýx pa Kris nhý hã kapêr jarênh o ri ixpa hkêt nê.

Tirtüm kot Pawre mã Kra Jejus o amnhĩrĩt ã harênh

Sikün Korĩt 1.12; Wam Tesarõn 2.4

¹¹ E Jejus kôt ixkrãmnhwýjaja. Nà ixte mē ujarênh mex jarênh o ixpaja na pre jar pika ja kamã mēhõ amnhĩ krã hkôt inhãm harênh rý inhãm ahkre hkêt nê. Jejus Kris tãm na pre ixwýr kato nê inhãm ho amnhĩrĩt. Jakamã mex o kot pika jakamã mē ujarênh piitã hakrenh par. ¹³ E kot paj ixprĩ hã mē amã tanhmã amnhĩ jarênh to ka mē inhma. Tanhmã Tirtüm kot amnhĩ kaxyw ixãm to hã pa mē amã amnhĩ jarê. Nà na pre kormã ixkêt ri ixkukamã hamxpêr nê amnhĩm ixta nê

amnhĩ kaxyw ixãm nê kot ixto mex ã ixtã amnhĩ jarê. Tã pa pre ixkato nê gaa nê ixaptâr nom kormã Jejus Kris kôt amnhĩ xãm kêt nê. Na pa pre axtem nê inhmã mẽ ixpê Ijaew kot amnhĩ nhĩpêx kôt pix mã amnhĩ nhĩpêx o ri ixpa hprãm nê. Nhũm pre ixpyrà nê arĩ mẽ nywjaja haxwýja kãm mẽ hkôt pix mã ri amnhĩ nhĩpêx o pa hprãm nê. No inhmã mẽ hkôt amnhĩ nhĩpêx mex o mẽ hakrenh par prãm jakamã na pa pre mẽ inhĩgêt kôt amnhĩ nhĩpêx mex kumrêx o ri ixpa. Mẽ kapêr pi-itãã hkôt amnhĩ nhĩpêx mex nê. Tã ã amnhĩ nhĩpêx anhýr o ixpa kaprý. Na pa pre axtem nê mẽ kot Tirtũm Kra Jejus Kris kôt amnhĩ xunhwýr xwýnhjê nhĩpêx kati ho ri mẽ hkôt ixpa nê inhmã mẽ himex prãm týx kumrêx. Æ na pa pre amnhĩ nhĩpêx anhýr o ri ixpa. Ra mẽ ate ja hã ixpumunh mex.

¹⁶ Tã pa pre ma Tamas wýr mō. Kamã tanhmã Kris kwýjê nhĩpêx to kaxyw ma mẽ hwýr mō. Hãmri nê kormã mẽ hwýr ixãhtêp o inhmōr mẽ nhũm Tirtũm tanhmã ixto nê inhmã Kra Jejus o amnhĩrĩt pa jatã omu. Kêp Tirtũm Kra hã pa ixprĩ hã omu. Nhũm inhmã kapêr nê ixte kãm tanhmã amnhĩ nhĩpêx to ho ri ixpa kaxyw ixãpênh ã inhmã karō nê Ijaew kêt xwýnhjê hwýr inhmẽ. Ixkwý Ijaew wýr inhmênh kêt nê. Na pre inhmã:

—E kêr ka ma Ijaew kêt xwýnhjê hkôt ri mẽ kãm ixkapêr jarênh o ri apa.

Anhýr jakamã pa pre kuma nê hkôt amnhĩ xãm kurê kumrêx nê ã amnhĩ nhĩpêx anhýr o ri ixpa. Jao tanhmã ixte kêp hkwyjê nhĩpêx tota kaga nê ma pyka pê Arap wýr mō. Nom tanhmã amnhĩ tã Jejus kwýjê kukjêr to hkêt nê. Nê Jerujarê hwýr inhmōr nê Jejus nhý hã mẽ ahkre xwýnh maatiijaja tanhmã amnhĩ tã mẽ kukjêr to hkêt nê. Æm Tirtũm kot inhmã hã karō xà hkôt ma Arap wýr mō nê kamã kapôt ã ri ixpa. Kamã na pre Tirtũmja inhmã Jejus Kris kot tanhmã amnhĩ nhĩpêx to ho amnhĩrĩt o pa. Hãmri nê inhmã kapêr pa amnhĩ tã kuma hãmri nê ma akupým Tamas wýr mō.

¹⁸ Tã nhũm ra amgrã axkrunêpxi nê hapêx pa Tamas rũm ixkato nê ma Jerujarê hwýr Simãw Pêtre hwýr mō. Hãmri nê kuri pōj nê hkôt ixpikamênh ã ixtã semãn axkrut. ¹⁹ Nom mẽ kot Jejus nhý hã hkwyjê jahkre ho mẽ pa xwýnh maati hkwyjê hō pumunh kêt kumrêx. Æm Simãw Pêtre mẽ Pahihti Jejus tō Xiakreja pix wa omu. ²⁰ Æm hãmri na pa ã amnhĩ jarênh anê. Tirtũm kot ja hã ixpumunh mex. ²¹ Tã pa pre mẽ kurũm ixkato nê hpãnhã ma pika hkwyjê hkôt ijapôx o mẽ hkôt ixpa. Ma pika pê Sir mẽ Sirisja wa hwýr mō.

Mẽ kot amnhĩ jaêr pê Pawre kot amnhĩ nhĩpêx nyw ã omunh ã mẽ harênh

²² Nom Jutej kamã Kris kwýjaja na prem kormã ixpumunh kêt nê. Æm Simãw Pêtre mẽ Xiakre pix na pre wa ixpumu. ²³ Na pre ra mẽ hkwyjaja tanhmã hkwyjê kot axpên mã ijarênh toja ma. Na prem ijarênh o:

—Kwa Jejus ã mẽ panhĩpêx kati htýx o pa xwýnhhta na pre tanhmã hamaxpêr to nê hpãnhã mẽ kãm Jejus kapêr jarênh o ri mẽ hkôt pa. Mẽ kot amnhĩ kaxyw

hkôt hamaxpêr kaxyw. Ra kot Jejus nê mẽ pahkurê htã hpãnhã mẽ kãm kapêr jarênh o ri mẽ hkôt pa. Anê.

²⁴ Hãmri nhũm Kris kwýjaja amnhĩ jaêr pê ijarênh ma nê inhý hã hkĩnh nê. Nê ixtã Tirtũm mã mex o mex ã harê.

Pawre kot Kris kwý hkrãhtũmjê mã amnhĩ jarênh

Atre 15.1-11

2 Tã nhũm amgrã pê 14 nê hapêx nhũm Tirtũm akupým Jerujarê hwýr inhmẽ pa ma akupým mō. Panãpe nê Xitre mẽ pa mẽ mō nê mẽ hwýr pōj. Hãmri nê Kris kwý hkrãhtũmjê hwýr mra nê mẽ kãm amnhĩ jarê. Mẽ tapxipixjê mã amnhĩ jarê nê ixte Ijaew kêt xwýnhjê mã Jejus kapêr jarênh o ixpa hã amnhĩ jarê. Na pa pre ra amnhĩ kukamã ijamaxpêr o:

—Koonên. Kot pa apu mẽ kãm amnhĩ jarê nhũm mẽ inhma nê ixte Tirtũm kapêr kwým ri mẽ ahkre ho ixpa hã ixkamnhix rý hã inhmã akir. Na pa hte Ijaew kêt xwýnhjê mã Kris jarênh o ixpa no Æm mẽ ixpê Ijaew pyrà nê finat Mojes kapêr kôt mẽ kot amnhĩ my kwrýt kã jakàr ã mẽ kãm karō hkêt nê. Æm mẽ kot Kris kôt amnhĩ xunhwýr pix kaxyw na pa hte mẽ kãm hã karō ho ixpa. Tã kot paj Kris kôt mẽ ikrãhtũmjê mã ja hã amnhĩ jarê nhũm mẽ inhma nê tanhmã hamaxpêr to nhũm ja mẽ kêp omnuj japêr nhũm mẽ tanhmã amnhĩ to nê ixte Kris kapêr jarênh o ixpaja nê ixkurê. Jakamã nhũm ra ixte mẽ kãm Kris kapêr jarênh o ixpa nhũm mẽ kot inhmar xwýnhjaja ijarênh ma nê tee amnhĩ kukamã hamaxpêr o ra hkaprĩ nê pa.

Anhýr o ijamaxpêr. ³ Tã na prem ixte amnhĩ jarênhja ma nê ja nê tanhmã inhmã nê hkêt nê. Pa mẽ kãm amnhĩ jarênh pa nhũm mẽ inhma nhũm Ijaew kêt xwýnhjaja kot amnhĩ jakàr kêtja nhũm mẽ kãm mex nê. Mẽ kêp tanhmã kute hkêt nê. Nhũm Ijaew kêt xwýnh Xitre ixkôt pa nhũm mẽ kot omunh tã kot mẽ ixpyrà nê amnhĩ my kwrýt kã krãhyr ã kãm karō hkêt nê.

⁴ Tã nhũm mẽ kêp Jejus kwý hã amnhĩ jarênh o hêx xwýnhjaja mẽ ixtã akuprō. Nom hêx rom mẽ ixte Kris kôt amnhĩ nhĩpêx ã mẽ ixpumunh pix kaxyw. Hãmri nê ixkapêr ma nê Xitre hã inhmã akir nê inhmã:

—Kwa na pre Xitre Jejus kôt pix mã amnhĩ xãm nom finat Mojes kot mẽ pahpê Ijaew kot amnhĩ nhĩpêx ã karō hkôt amnhĩ nhĩpêx kêt nê. Kwa ja mex kêt. Na htem Jejus kôt amnhĩ xunhwý nê mãânên finat Mojes kapêr kôt amnhĩ nhĩpêx. Jakamã kwa kãm anê kê amnhĩ my kwrýt kã krãhta. Finat Mojes kot mẽ panhĩgêtjê mã hã karō xà hkôt.

⁵ Anhýr tã pa prem mẽ kuma nê Æm mẽ kuma. Kot pa ri mẽ kãm ja hã karō hkêt nê. Æm Jejus kapêr kôt pix mã kot puj mẽ amnhĩ nhĩpêx o papa nê finat Mojes kapêr mẽ Jejus kapêr o papihkàr kêt nê. Kot puj mẽ anhýr o Jejus kapêr o ahkà nhũm ja mex kêt nê. Jejus kapêr kãm mo mẽ kot mẽmy kwrýt kã jakàr ã mẽ kãm karō? Amrakati. Jakamã na pa pre Æm mẽ pano kupyr o mẽ pa xwýnhhtajê kapêr ma nê Æm mẽ kuma.

⁶ Tã pa pre ra Ijaew kwý pê Jejus kôt ixkwý hkrãhtũmjê mã amnhĩ jarênh pa. Tanhmã ixte Ijaew

kêt xwÿnhjê mã Jejus kapêr jarênh to hã mẽ kãm amnhĩ jarê nhũm mẽ inhma nhũm ja mẽ kãm mex nê. Jakamã Ijaew kêt xwÿnhjaja kot mẽ ixpê Ijaew pyrã nê finat Mojes kapêr kôt amnhĩ nhĩpêxja nhũm mẽ tanhmã mẽ kaxyw inhmã hã karõ hto hkêt nê. Tirtũm na hte mẽ kêp mẽ hkrãhtũm ã mẽ omunh xà hkôt mẽ hkwyjê rom tanhmã mẽ ho mex to hkêt nê. Na hte mẽ pahpiitã mẽ panhĩpêx o axpên pyrãk. Jakamã na pa hte ijaxwÿja Jejus kôt mẽ ixkrãhtũmjaja kot amnhĩ to rax o ijakrenh ã tanhmã ijamaxpêr to hkêt nê. ⁷ Na pa pre mẽ kãm amnhĩ jarênh pa nhũm mẽ inhma nê axpên mã:

—Nà ãm hãmri na pre Tirtũm ahpÿnhã Pawre mẽ Simãw Pêtre wa kãm wa àpênh ã karõ nê Ijaewjê hwÿr Simãw Pêtre mẽ nê axtem Ijaew kêt xwÿnhjê hwÿr Pawre mẽ. Wa kot ahpÿnhã mẽ hkôt mẽ kãm Jejus kapêr jarênh o ri pa kaxyw. Nà ãm hãmri na hte wa ã amnhĩ nhĩpêx anhÿr o pa. Nà ja mex. Anê.

⁸ Ra Tirtũm kot Ijaew wÿr Simãw Pêtre mênh tã hpãnhã Ijaew kêt xwÿnhjê kaxyw pa ixãm. Ý hã wa ixte mẽ kãm Jejus kapêr jarênh o ri mẽ hkôt wa ixpa kaxyw. ⁹ Jakamã nhũm mẽ ixkrãhtũm Xiakre mẽ Simãw Pêtre mẽ Juãwja ixte mẽ kãm amnhĩ jarênh ma nê hkĩnh nê. Tirtũm kot ixto mex nê Ijaew kêt xwÿnhjê hwÿr inhmênh ã ixte amnhĩ jarênhja ma nê hkĩnh nê. Hãmri nê Panãpe mẽ wa inhmã kapêr nê wa inhmã:

—Nà ãm hãmri. Kot puj xep mẽ anê. Ka mẽ Panãpe wa kot kaj wa ma Ijaew kêt xwÿnhjê hkôt mẽ kãm Jejus kapêr jarênh o ri apa. No mẽ pajaja kot paj mẽ axtem mẽ pahkwÿ Ijaew kôt harênh o ri ixpa. Á kot puj mẽ ahpÿnhã mẽ hwÿr papa anê. ¹⁰ Nom kêr ka wa inhmar kumrêx. Kêr ka wa mẽ ixpyrà nê Kris kôt mẽ pahkwÿjê pê amrakati xwÿnhjê ho mex o ri apa. Mêmioj to mẽ kutã anojarêt rãhã ho ri apa.

Anhÿr o wa inhmã kapêr pa wa mẽ kuma nê mẽ kãm:

—Tõe. Nà kot paj wa anê. Ra ã wa ixte amnhĩ nhĩpêx anhÿr kaxyw kênã. Anê.

Pawre kot Simãw Pêtre mã àkjêr ã harênh

Atre 10; Römãn 3.21-31, 6.1-14

¹¹ Tã nhũm Simãw Pêtreja man mẽ ixwÿr krĩ pê ãxiok wÿr mõ. Nê jar mẽ ixkôt ri pa. Ixpyrà nê kêp Ijaew tã Kris kôt Ijaew kêt xwÿnhjê hkôt pa nê mẽ kutã apkur o pa. Ixpyrà nê àmnhĩx ri mẽ kutã apkur o ri mẽ hkôt pa. Ijaew kêt xwÿnhjaja kot amnhĩ my kwÿr kà jakàr kêt jakamã na pa htem mẽ kutã ixàpkur kêt nê. Tã ra mẽ ixte Kris kôt amnhĩ xunhwÿr jakamã ja mẽ ixpê tanhmã kute hkêt. Na pa htem ixàmnhĩx mẽ hkôt ixpa nê mẽ kutã apku. Ra mẽ ixte Kris kôt amnhĩ xunhwÿr kênã kot pa hkêt ri mẽ hkôt ixpa hkêt. Na pa htem ixàmnhĩx mẽ hkôt tanhmã amnhĩ nhĩpêx to ho ri ixpa.

Tã nhũm Xiakre kot mẽ ixwÿr mẽ rênh xwÿnhjaja haxwÿja mẽ ixwÿr mõ. Mẽ ixpyrà nê mẽ kêp Ijaew tã mẽ ixpyrà nê Kris kôt amnhĩ xunhwÿ. Jakamã ra mõ nê mẽ ixwÿr pøj. Hãmri nhũm Simãw Pêtre mẽ omu nê mẽ umaj axte Ijaew kêt xwÿnhjê kutã apkur kêt nê. Axtem nê õja py nê o tẽ nê mẽ hkà ã ahte apkur o nhÿ.

Hãmri nhũm ra mẽ ixri Ijaew kwÿ pê Kris kôt mẽ pahkwÿjaja ja hã omu nê piitã urak nê ã amnhĩ nhĩpêx anê nê Simãw Pêtre ri Ijaew kêt xwÿnhjê hkà ã apkur o hkrĩ. Nhũm ixkôt pa xwÿnh Panãpeja haxwÿja ja hã mẽ omu nê mẽ urak nê ã amnhĩ nhĩpêx anê nê mẽ hkà ã apku. Hãmri pa tee ri ja hã mẽ omu nhũm ja inhmã mex kêt nê. Na prem ã amnhĩ nhĩpêx anhÿr o Tirtũm kapêr ã kagã htũm kamã mẽ ujarênh mex kwÿm ri amnhĩ nhĩpêx. Jakamã pa ã mẽ kot amnhĩ nhĩpêx anhÿrja nê Simãw Pêtre mã ixkapêr. Mẽ piitã mẽ noo mã xa nê ã kot amnhĩ nhĩpêx anhÿrja nê kãm ixkapêr nê kãm:

—Tk. Kwa nà Simãw Pêtre. Ri ã amnhĩ nhĩpêx anhÿr kêt nê. Pahpê Ijaew tã kormã pahkwÿjaja hpõx kêt ri ka hte ixpyrà nê axàmnhĩx Ijaew kêt xwÿnhjê kutã axàpkur o ri apa. Tã amnhĩ wÿr mẽ pahkwÿjê pumu nê axtem nê mẽ hkà ã axàpkur o akrĩ. Kwa nà na ka ã amnhĩ nhĩpêx anê nê ra axtem amnhĩ nhĩpêx. Te ate mẽ kãm akapêr nê mẽ kãm: “Kot kaj mẽ ixpyrà nê amnhĩ my kwÿr kà jakà pa rĩ mẽ akôt ri ixpa nê mẽ akutã ixàpkur o ixpa.” Anhÿr pyrãk. Kwa ja mex kêt.

¹⁵ —Mẽ pahpê Ijaew na pu htem mẽ kêp Ijaew kêt xwÿnhjê jarênh o: “Mẽ kot mẽ pahte amnhĩ nhĩpêx kôt amnhĩ nhĩpêx kêt xwÿnhjaja.” Anê. ¹⁶ Tã mẽ pahpê Ijaew tã na hte Tirtũmja mẽ pahte mẽ panhĩgêt kot amnhĩ nhĩpêx kôt mẽ pahte amnhĩ nhĩpêx ã mẽ pahpumunh kôt mẽ pahto hkra hkêt nê. Ra mẽ pahte ja pumunh mex. Ám mẽ pahte amnhĩ kaxyw Jejus Kris kôt pajamaxpêr ã mẽ pahpumunh kôt pix mã na hte mẽ pahto hkra. Kot pu mẽ amnhĩ kaxyw hkôt pajamaxpêr nhũm ja hã mẽ pahpumunh kôt pix mã mẽ pahto hkra.

¹⁷ —Mẽ pahpê Kris kwÿ jakamã na hte Tirtũm amnhĩm mẽ pamex ã mẽ pajarê nê mẽ pahte amnhĩ tomnuj xwÿnh kêt ã mẽ pajarê. Jakamã na pu htem paxàmnhĩx ri Ijaew kêt xwÿnhjê kot Kris kôt amnhĩ xunhwÿr xwÿnhjê hkôt ri papa ho papa. Ra Tirtũm kot mẽ pahpyrà nê amnhĩm mẽ mex ã mẽ harênh kênã. Tã koja mênhõ kormã ja mar kêt nê tanhmã hã mẽ pajarênh to nê mẽ pajarênh o: “Tk. Ra mẽ kot amnhĩ kaxyw Kris kôt hamaxpêr tã axtem nê Ijaew kêt xwÿnhjê hkôt ri pa. Jakamã arĩ mẽ kot amnhĩ tomnuj xwÿnh kênã.” Anhÿr o mẽ pajarênh japêr. Nom ãm mẽ pahte amnhĩ tomnuj xwÿnh ã mẽ pajarênh kaprÿ. Na pu htem Kris kôt amnhĩ nhĩpêx nê ra tãm amnhĩ nhĩpêx mex o papa. ¹⁸ No kot pu mẽ hkôt ri amnhĩ nhĩpêx o papa htã tanhmã pajamaxpêr to nê pahte amnhĩ nhĩpêx tũm o awjanã hãmri nê amnhĩ tomnuj tÿx kumrêx.

¹⁹ —Tã tanhmã kot puj wem amnhĩ to nê mẽ panhĩgêt kot amnhĩ nhĩpêx piitã hkôt amnhĩ nhĩpêx mex o ri papa? Na pu htem pajamaxpêr o: “Kot paj ã amnhĩ nhĩpêx anê nê ã amnhĩ nhĩpêx anê nhũm Tirtũm ja hã ixpumu nê amnhĩm inhmex ã ijarê.” Anhÿr o pajamaxpêr. Hãmri nê finat Mojes kot mẽ panhĩgêtjê mã kapêr piitã hkôt ri mnhĩ nhĩpêx o papa nom tõiã hkwyim ri tanhmã amnhĩ tomnuj to. Jakamã nhũm Tirtũm ja hã mẽ pahpumunh kôt mẽ pamex ã mẽ pajarênh kêt nê.

Kapër ã kagà htùm kot ã ja jarënh kot anhÿr. Nom kot puj më amnhÿ kaxyw Kris kôt pajamaxpër nhùm ja hã më pahpumunh kôt amnhÿm më pamex ã më pajarë. Hãmri pu më Tirtùm kôt amnhÿ nhÿpêx o ri papa nê axte më pahpê Ijaew nhÿgêtjê kot amnhÿ nhÿpêx kôt amnhÿ nhÿpêx hkêt nê. Te ra më pahtyk nê axte hkôt amnhÿ nhÿpêx kêt pyrã nê pãnhã Tirtùm kapër kôt pix mã ri amnhÿ nhÿpêx o ri papa.

²⁰ —Nê na prem pÿ kahpa hã Kris nhô nê kupÿ nhùm më pahte amnhÿ tomnuj te ðhkô hã jêt nê haxwÿja htyk pyrãk. Jakamã na pu htem amnhÿ tomnuj kaga nê Kris kôt amnhÿ xunhwÿ nhùm Karô më pahkarôm agjê pu më te Jejus Kris kot amnhÿ nhÿpêx pyrãk o amnhÿ nhÿpêx o papa. Jao hpãnhã më pahte amnhÿ nhÿpêx nyw pix o amnhÿ nhÿpêx o ri papa. Kris kãm hprãm xà hkôt pix mã tanhmã ri amnhÿ nhÿpêx to ho papa. Kris kêp Tirtùm Kra htã kãm më pajapê kamã më panê htyk jakamã na pu htem amnhÿ kaxyw kôt pix mã pajamaxpër rãhã ho papa.

²¹ —Ãm hãmri na pre Tirtùm më pahto mex kumrêx nê më pahwÿr Krisja më nhùm më pahwÿr wrÿ nê më panê ty. Tã na pa pre kapërja ma nê mar tÿx nê hã ri ixpa nê ho ijamakêtkati hkêt nê. Tã kop apu Tirtùm kot më pahte më panhÿgêtjê kot amnhÿ nhÿpêx o amnhÿ nhÿpêx ã më pahpumunh kôt më pamex ã më pajarënh ronhÿx pre Krisja ãm më panê htyk kaprÿ. Mo kaxyw nhÿx pre më panê ty? Anê.

Ã na pa Simãw Pêtre mã ixkapër anê nhùm më piitã apkur pê hã inhmar o hkrÿ.

Më pahte amnhÿ krã hkôt pahpê Tirtùm kra hkêt ã më pajarënh

Karatas 5.16-23; Epes 2.8; Piriapos 3.9; Sikün Ximotre 1.9; Xitre 3.4-7

3 Kwa Karatas nhô xwÿnhjaja. Te ri më ajamaxpër kêt kumrêx pyrãk. Amnepê mã më awÿr inhmôrta ã na pa pre më amã tanhmã Kris htykja jarënh to. Pÿ kahpa hã më panê htyk ã harê ka më aprÿ hã inhma. Tã nhùm Tirtùm kapër jarënh o më hêx xwÿnhjaja ixpãnhã më awÿr mra nê tanhmã më amã ujarënh to ka më ama nê më ajamaxpër o apihkâr rax nê. Jao axte Kris tyk mã ajamaxpër kêt nê. ² E më inhmã mëmoj jarê. Mëmoj tã më apumunh kôt na pre Tirtùm më awÿr amnhÿ Karô rê nhùm më awÿr agjê? Xà më anhÿgêt kot amnhÿ nhÿpêx kôt më ate amnhÿ nhÿpêx ã më apumunh kôt? Nà na pre ja hã më apumunh kôt më awÿr rënh kêt nê. Na ka prem Kris jarënh ma nê amnhÿ kaxyw hkôt ajamaxpër nhùm ja hã më apumunh kôt më awÿr kurê nhùm më awÿr agjê.

³ Na pu htem amnhÿ krã hkôt tanhmã amnhÿ nhÿpêx to ho pahpê Tirtùm kra hkêt nê. Tirtùm Karô pix kukwak ri na pu htem pahpê hkra. Tã ka më axtem nê ajamaxpër o:

—Nà Tirtùm ra kot ixto hkra jakamã kot paj arÿ ri më inhÿgêt kot amnhÿ nhÿpêx kôt amnhÿ nhÿpêx o ixpa rãhã nê inhmex kumrêx nê ri ixpa. Anê.

Kwa ã më ajamaxpër anhÿrja mex kêt. ⁴ Më akwÿ kot Kris ã më atomnuj tã ka më amnhÿ xà htÿx kamã ajamak o ri apa htã Kris kaga hkêt nê. Tã ra axtem nê më

kapër o më hêx xwÿnhjê jamaxpër kôt ajamaxpër o te Kris ã amnhÿ xà kamã ajamak kaprÿ pyrãk. Kwa nà më ri më hkôt ajamaxpër kêt nê. ⁵ Na pre Tirtùm më awÿr amnhÿ Karô rê nhùm më awÿr agjê nê më amã aa më ate mëmoj pumunh kêt kwÿ ho anhÿr o ri më akamã pa ho pa. Xà më anhÿgêt kot amnhÿ nhÿpêx kôt më ate amnhÿ nhÿpêx ã më apumunh kôt na pre ã më amã amnhÿ nhÿpêx anê? Nà ja kôt kêt. Ãm më ate Kris kapër mar nê amnhÿ kaxyw hkôt ajamaxpër ã më apumunh kôt pix mã na pre ã më amã amnhÿ nhÿpêx anê.

Tirtùm kot amnhÿ tã finat Apraãw pumunh kôt mex ã harënh

Römãn 4.1-25; Xiakre 2.23

⁶ Nê më ixpê Ijaew pãr krax finat Apraãw na pre amnhÿ kaxyw Tirtùm kôt hamaxpër nhùm amnhÿ tã omu nê kãm:

Nà ate amnhÿ kaxyw inhmã ajamaxpër tÿx jakamã na pa amnhÿm amex ã ajarê. Amex kumrêx Apraãw.

⁷ Anhÿr o kãm kapër jakamã më pahte urãk nê amnhÿ kaxyw hkôt pajamaxpër xwÿnhjaja te më pahpê Apraãw tãmnhwÿ pyrãk. ⁸ Nê më apê Ijaew kêt xwÿnhjaja. Na hte Tirtùm më pahto hpimrãk tã më pahte amnhÿ kaxyw kãm pajamaxpër ã më pahpumunh kôt amnhÿm më pamex ã më pajarê nê më pahto hkra. Amnepê na pre Apraãw mã kapër nê kãm:

E ate amnhÿ kaxyw ixkôt ajamaxpër jakamã kot paj akukwak ri pyka piitã hkôt më piitã më ho mex nê. Anhÿr o kãm kapër jao mããnen më apê Ijaew kêt xwÿnhjê jarê. ⁹ Jakamã më pahte Apraãw pyrã nê amnhÿ kaxyw Tirtùm kôt pajamaxpër xwÿnhjaja kot puj më pahpiitã urãk nê pamex kumrêx nê papa ho papa.

Tanhmã Tirtùm kot më panê pÿ kahpa hã jêt xwÿnhjê nhÿpêx to hã harënh

Römãn 4.14, 7.10; Wam Korÿt 15.56

¹⁰ Nê koja mëhõ hamaxpër o:

—E kot paj finat Mojes kapër kôt ri amnhÿ nhÿpêx o ri ixpa nhùm Tirtùm ja hã ixpumu nê amnhÿm inhmex ã ijarê nê ixto hkra. Anê.

No ãm ja kot anhÿr kêt. Tirtùm kapër ã kagà htùm kot ja jarënh kot:

Ixte amnhÿm më mex ã më harënh kaxyw më kot Mojes kapër kôt amnhÿ nhÿpêx xwÿnhjaja koja më ãm mëmoj pixire nê hirôp kuhê. Rÿ mëmoj pixire nê hkôt amnhÿ nhÿpêx kêt pa ja hã më omu nê hã më homnuj tÿx kumrêx.

Anhÿr jakamã tanhmã kot pu më amnhÿ to nê Mojes kapër piitã hkôt amnhÿ nhÿpêx nê aa ho pixi nê hirôp pakuhê hkêt? Nà kot puj më ho anhÿr kêt nê. Kot puj më tee ri pamã ja ho anhÿr prãm kaprÿ. Jakamã Tirtùm kot amnhÿm më mex ã më harënh kaxyw më kot ã amnhÿ nhÿpêx anhÿr mã xwÿnhjaja koja më mex kêt nê.

¹¹ Na hte Tirtùm më kot finat Mojes kapër kôt amnhÿ nhÿpêx o më pa hã më omunh xà hkôt më mex ã më harënh kêt nê. Ãm më kot amnhÿ kaxyw hkôt hamax-

për xwýnh pixjaja na hte ã më harënh anë. Kapër ã kagà htùm kot më harënh kot:

Më kot amnhì kaxyw ixkôt hamaxpër xwýnhjaja na pa hte më mex ã më harënh o ixpa. Më tapxixjaja koja më nhÿrmã Ixkra më wa ixri mex kumrëx në htír tùm në pa ho pa. Anë.

¹² Nom na htem amnhì kaxyw Tirtùm mã hamaxpër pë finat Mojes kapër kôt amnhì nhÿpëx o pa hkêt në. Mojes kapër ã kagà kot ja jarënh kot:

Më kot ixkapër piitã hkôt amnhì nhÿpëx mex o më pa xwýnh pixjaja koja më htír tùm në pa ho pa. Anë.

¹³ Tã kot pu më ãm kapër o pixire në hiröp pakuhë hãmri në mÿrapë pahÿr tùm në papa hkêt në. Në hpãnhã më kot amnhì xà htÿx kamã hamak tùm xàta hwÿr ma papa. Ja pymaj na pre Krisja ĩ ho më pahwÿr wrÿ në më pahte amnhì tomnuj mÿrapë më panë ty. Tirtùm kot më pahte amnhì tomnuj mÿrapë tanhmã më pahto pymaj ã më panë htyk anë. Jakamã nhùm Tirtùm më pahte amnhì tomnuj ã më pahpumunh kôt më pakuhpa hã Kraja homnuj në. Kapër ã kagà htùm kot ja jarënh kot:

Pĭ kahpa hã jët xwýnhhta na pre Tirtùm homnuj tÿx kumrëx. Anë.

Më kot amnhì kaxyw Kris kôt më hamaxpër xwýnhjê jarënh

¹⁴ Tã ã Jejus Kris kot më panë amnhì nhÿpëx anhÿr kukwak ri na pre Tirtùm kot Apraãw nhÿpëx pyrã në më ixpë Ijaew pix o mex kêt në. Mããnen më apë Ijaew kêt xwýnhjê ho mex në. Jakamã koja mëhõ. Ijaew õ rÿ Ijaew kêt xwýnhjê hõ amnhì kaxyw Kris kôt hamaxpër nhùm Tirtùm hã omu në ho hkra në hwÿr Karõ më nhùm kãm xà.

Tirtùm kot finat Mojes kukamã më pahto mex ã harënh

Römãn 3.19-20, 5.20-21, 11.32; Eprëw 6.13-18

¹⁵ E ixkrãmnhwÿjjaja. Kot paj ixprĭ hã më amã ja jarë ka më inhma. Nà koja mëhõ wa hamëxkrut në mëmoj tã axpën ma. Pika hã war axpën ma rÿ mëmoj tã war axpën ma. Hãmri në wa hã axpën mar pa nhùm ja ãm hãmri në ãm rãhãã. Koja nhãm mëhõ tẽ në axtem tanhmã harënh to hkêt në. ¹⁶ Ja pyrã në na hte ã Tirtùm mëmoj tã amnhì jarënh anë. Na hte mëmoj jarë nhùm arĭ rãhãã. Na hte jarãhã mëmoj jarë nhùm jãã nhùm axtem hijuk ri mëmoj jarënh kêt në. Na hte ãm kapër pÿnh në. Tã na pre Apraãw mã hkanrêhã htãmnhwÿjê hõ kukwak ri Apraãw o mex ã amnhì jarë. Tãmnhwÿ piitã kukwak ri ho mex ã amnhì jarënh kêt në. ãm kanrêhã htãmnhwÿ Krisja pix kukwak ri ã Apraãw o mex ã kãm amnhì jarënh anë.

¹⁷ E kot paj hpãnhã axtem tanhmã më amã harënh to. Na hte Tirtùm kot mëmoj tã amnhì jarënh xà hkôt tanhmã mëmoj to ho pa rãhã në. ã na pre finat Apraãw mã kot ho mex ã amnhì jarënh anë. Tã ra hã amgrã pë 430 në hapëx nhùm hpãnhã finat Mojes mã kapër. Kot mar në amnhì xõ ri Ijaew mã harënh o ri më hkôt pa kaxyw. Tã no nhùm ra kot Apraãw mã mëmoj

jarënhhta arĭ hã no htÿx rãhã në aa ho hamakêtkati hkêt në. Në kot Mojes mã tanhmã kapër toja në Apraãw mã tanhmã kapër toja nhùm hamë wa ho hamakêtkati hkêt në. Nhùm wa hamë arĭ rãhã ho rãhã. ¹⁸ Tã më ano kupyri o ri më pa xwýnhjaja na htem htÿx tanhmã më amã harënh to në më amã harënh o:

—Kwa kot puj më Mojes kapër kôt amnhì nhÿpëx o papa hkêt në nhùm Tirtùm tee ri ja hã më pahpumu në më pahto mex kêt në. Anë.

Nom ja kot anhÿr kêt. Kop apu ã kot anhÿr ronhÿx Tirtùm ra wam kot tanhmã Apraãw mã kapër tota ra ho hamakêtkati. Nom na hte arĭ kãm hamaxpër rãhã në ho pigrãnh në ho hapëx kêt në. Na pre Apraãw mã kãm:

Kot kaj amnhì kaxyw ixkôt ajamaxpër hã kot paj ato mex kumrëx. Anë.

Tã kot ho mex ã amnhì jarënhja arĭ rãhãã. Na hte arĭ më kot amnhì kaxyw hkôt hamaxpër xwýnhjê ho mex në. Nom më kot Mojes kapër kôt amnhì nhÿpëx o pa hã më omunh xà hkôt më ho mex kêt në. ãm më kot amnhì kaxyw hkôt hamaxpër xwýnh pixjaja na hte më ho mex.

Mo kaxyw na Mojes kapër ã kagà?

Römãn 3.20, 5.20, 7.7

¹⁹ Tã mo kaxyw na Mojes kapër ã kagàja? Nà më pahte tanhmã amnhì tomnuj to ho papa hã amnhì pumunh nhùm Tirtùm kot ã më pahte amnhì nhÿpëx anhÿrja në më pahkurë kaxyw. Na pre Mojes Tirtùm nhÿ hã mëmoj në më pahkurë. Më pahte axpën pë paxãhkĭnh në më pahkurë. Në më pahte axpën mã paxëx o ri papa në më pahkurë. ã mëmoj në më pahkurë anë. Më pahprĭ hã kapër mar në tãm amnhì nhÿpëx o papa kaxyw. Ja kaxyw na pre Tirtùm Ijaew kaxyw Mojes mã kapër gõ. Na pre kaxkwa rùm kapër o wrÿk xwýnhjaja kumrëx kãm harë nhùm kuma në Ijaew mã hã kagà. Jakamã na htem harënh o: “Mojes kapër” anhÿr o harë.

Tã Apraãw kanrêhã htãmnhwÿ Krisja kormã kator kêt ri nhùm Ijaew Mojes kapër ma në hkôt ri amnhì nhÿpëx o pa. Tã nhùm Krisja kator o Mojes kapër o hapëx. Ra Tirtùm kot Kris kukamã ho mex ã amnhì jarënh xà hã arĭgrota kator më nhùm Mojes kapër hapëx.

No na pre Tirtùm Ijaew mã ujarënh kaxyw tãm më kãm ujarënh kêt në. Kapër o wrÿk xwýnhjê mã na pre harë nhùm më amnhì xõ ri Mojes mã më kaxyw kãm awjarë. Kot më ô ri më kãm harënh kaxyw. No Apraãw mã na pre Tirtùm tãm kapër. Na pre hwÿr kapër o wrÿk xwýnhjê hõ mënh kêt në. Tãm kot kãm kapër jakamã kapërja na mex o Ijaew kaxyw Mojes mã kapër jakrenh.

²¹ Në na pre Tirtùm tanhmã më pamã kapër o amnhÿrĭt to në më pamã:

—E kot paj amnhì kaxyw ixkôt më ajamaxpër ã më apumunh kôt pix mã më amex ã më ajarë.

Anhÿr o më pamã kapër. Tã xà na pre kapërja nhĭjuk ri axte amnhì jarë në amnhì jarënh o:

—E kot paj mẽ ate Mojes kapër kôt amnhĩ nhĩpêx mex o apa hã mẽ apumunh kôt mẽ amex ã mẽ ajarẽ.

Anhỹr o mẽ pamã kapër? Xà na hte mẽmoj jarẽ nhũm jãã nhũm ra hijuk ri axtem mẽmoj jarẽ? Nà Tirtũm kapër ãm hpỹnh kênã. Kop ãm mẽ pahte Mojes kapër kôt amnhĩ nhĩpêx o papa hã mẽ pahpumunh kôt mẽ pamex ã mẽ pajarẽnh ronhỹx mẽ pamã:

—Ãm ja pix ã mẽ apumunh kôt kot paj mẽ amex ã mẽ ajarẽ. Anẽ.

²² Nom na pre ã kapër anhỹr kêt nẽ. Kapër ã kagã htũm kot ja jarẽnh o:

Mẽ apiitã mẽ ate amnhĩ tomnuj o mẽ apa xwỹnh na ka mẽ.

Anhỹr jakamã tanhmã kot puj mẽ amnhĩ to nẽ Mojes kapër kôt amnhĩ nhĩpêx mex o papa? Mẽ pahpiitã mẽ pahte amnhĩ tomnuj xwỹnh kênã. Mẽ pahte kapër piitã hkôt amnhĩ nhĩpêx kêt jakamã koja Tirtũm ja hã mẽ pahpumunh kôt mẽ pamex ã mẽ pajarẽnh kêt nẽ. Koja ãm mẽ pamã kapër o:

—Kot kaj mẽ amnhĩ kaxyw Jejus Kris mã ajamaxpër pa ja hã mẽ apumunh kôt mẽ amex ã mẽ ajarẽ nẽ mẽ ato ixkra nẽ mẽ ato mex o ri ixpa. Anẽ.

Mojes kapër te kệp Kris xwỹj ri mẽ hamãr xwỹnh pyrãk ã harẽnh

Rõmãn 10.4; Karatas 4.1

²³ Nẽ kormã Kris kot mẽ pahwỹr wrỹk nẽ mẽ panẽ htyk xwỹj ri na pre Ijaew Mojes kapër ma nẽ hkôt amnhĩ nhĩpêx o ri pa. Nhũm kapërja te kot amnhĩm mẽ unẽnh nhũm mẽ kot hkôt pix mã amnhĩ nhĩpêx o ri pa pyrãk. Na prem Tirtũm kot mẽ mex ã mẽ harẽnh prãm xaj ãm pix ma nẽ hkôt amnhĩ nhĩpêx o pa. Nom kapër piitã hkôt amnhĩ nhĩpêx mex kêt nẽ. ²⁴ Te mẽhprĩre nhũm Mojes kapër te kệp mẽ hamãr xwỹnh pyrãk. Mẽhprĩ jamãr xwỹnhjaja na htem mẽhprĩjẽ pumu nẽ tãm mẽ kot amnhĩ nhĩpêx kaxyw tanhmã mẽ ahkre hto ho mẽ hkôt pa. Ja pyrã nẽ na pre Ijaew tãm amnhĩ nhĩpêx o pa kaxyw Mojes kapër ma nẽ hkôt amnhĩ nhĩpêx o ri pa. Jejus Kris kutêp ã amnhĩ nhĩpêx anhỹr o ri pa. Tã nhũm Jejus tãm kaxkwa rũm wrỹ pa mẽ ixkwỹ pixjaja mẽ ixkwỹjẽ rom amnhĩ kaxyw hkôt ijamaxpër. Hãmri nhũm Tirtũm ja hã mẽ ixpumunh kôt mẽ inhmex ã mẽ ijarẽnh kurẽ kumrẽx.

Jejus kukwak ri mẽ pahpê Tirtũm kra ã mẽ pajarẽnh

Juãw 1.12; Rõmãn 8.14; Epes 1.5

²⁵ Tã ra mẽ ixte amnhĩ kaxyw Kris kôt ijamaxpër jakamã na pre Tirtũm mẽ ixto hkra pa mẽ ra te ixpê hkra xãptãr pyrãk o amnhĩ nhĩpêx nẽ kapër kôt amnhĩ nhĩpêx mex o ri ixpa. Jao Mojes kapër kaga. Te mẽhprĩre ra mẽ ahkre kamã mẽ ãptãr nẽ kot mẽ ahkre xwỹnh kaga pyrãk. Hãmri pa mẽ ixpê Tirtũm kra xãptãrjaja hãmri axte Mojes kapër kôt amnhĩ nhĩpêx hkêt nẽ.

²⁷ Tã mẽ kajaja na ka pre mẽ ixpyrã nẽ amnhĩ kaxyw Kris kôt ajamaxpër nhũm mẽ akwỹ kot mẽ apê Jejus kwỹ hã mẽ apumunh kaxyw nhũm mẽ akrã kumrã. Hãmri ka mẽ Jejus kot amnhĩ nhĩpêx kôt pix mã amnhĩ

nhĩpêx o ri apa. ²⁸ Tã ra mẽ pahpê Jejus Kris kôt amnhĩ xunhwỹr xwỹnh jakamã na hte Tirtũm ahpỹnhã ri tanhmã mẽ pakute hkôt mẽ pahpumunh kêt nẽ. Mẽ pahpê Ijaew rỹ mẽ pahpê Ijaew kêt xwỹnhjaja. Rỹ mẽ pahpê nhãm mẽ kãm paxãpênh xwỹnh rỹ amnhĩ mã mẽ paxãpênh xwỹnh nhũm hte ja hã mẽ pahpumunh kôt tanhmã mẽ pajarẽnh to hkêt nẽ. Rỹ mẽ anijê hkôt rỹ mẽ inhmyjê hkôt mẽ pahpumunh kôt tanhmã mẽ pajarẽnh to kêt nẽ. ãm mẽ pahte Jejus Kris kôt amnhĩ xunhwỹr ã mẽ pahpumunh kôt pix mã na hte ã mẽ pahpumunh o pa anẽ.

²⁹ Nẽ na pre Tirtũm Apraãw mã hkanrẽhã htãmnhwỹ Jejus Kris o mex ã amnhĩ jarẽ. Tã Kris kệp mẽ panhõ Pahihti jakamã pu mẽ Tirtũm noo mã urãk nẽ te mẽ pahpê Apraãw tãmnhwỹ pyrãk. Jakamã koja Apraãw nhĩpêxta pyrã nẽ mẽ pahto mex rax nẽ.

Mojes kapër te axte mẽ pahpynênh kêt pyrãk ã harẽnh

Rõmãn 7.1, 8.14-17; Karatas 3.23

4 E kot paj axte mẽ amã tanhmã mẽhprĩjẽ jarẽnh to ka mẽ inhma. Koja mẽhõ ra hkra mã mẽmo hikukrêx nhõr kaxyw. Hikukrêx nẽ õ pika. Õ mẽmoj piitã õr kaxyw. No nhũm hkraja kormã hprĩre nẽ hamaxpër mex kêt jakamã nhũm kormã hprêk jamãr o pa. Nhũm hkraja arĩ te kãm ãpênh o pa xwỹnh kot amnhĩ nhĩpêx pyrã nẽ amnhĩ krã hkôt ri amnhĩ nhĩpêx o pa hkêt nẽ. Kormã hipêêxã kapër kôt ri amnhĩ nhĩpêx o pa. Nhũm hipêêxãja kot kãm õ mẽmoj piitã õr kaxyw no ãm kormã hprêk jamã. ² Tã kormã hkraja hprĩre ri nhũm hipêêxã tanhmã amnhĩ to nẽ ty. Nom nhũm hkraja mỹr pẽ kormã õ mẽmoj o amnhĩptãr kêt nẽ. Kormã hprĩre jakamã nhũm hipêêxã mỹr pẽ kot kãm hamãr o pa xwỹnhja kormã kãm hamãr o pa. Tã nhũm hipêêxã kot kãm amgrã jarẽnh xwỹnhta kato nhũm tãm mẽmoj piitã ho amnhĩptã. Ra ãptãr mex nẽ hamaxpër mex nẽ amnhĩm ho amnhĩptãr pa. ³ Tã Ijaew na prem ã amnhĩ nhĩpêx anẽ. Amnepêm kormã mẽ kot Mojes kapër kôt ri amnhĩ nhĩpêx o pata ã na prem te mẽhprĩre hamaxpër kêeta pyrãk. Te kormã mẽ ãptãr kêt pyrã nẽ jar pika ja kamã mẽ kot amnhĩ nhĩpêx tũm kôt pix mã amnhĩ nhĩpêx o pa. Mẽ kot amnhĩ nhĩpêx tũm te kot amnhĩm mẽ unẽnh nẽ mẽ kãm ê pyrãk o mẽ hipêx nhũm mẽ hkôt pix mã amnhĩ nhĩpêx o ri pa. ⁴ Tã nhũm Tirtũm kot Kra hkukamã mẽ pahwỹr mẽnh xà hã arĩgrota kato hãmri nhũm mẽ pahwỹr kumẽ nhũm mẽ pahwỹr wrỹ nẽ mẽ pahpyrã nẽ mẽhõ nhõhy rũm kato. Nẽ mẽ pahpyrã nẽ gaa nẽ hprêk nẽ mẽ ixpê Ijaew rom Mojes kapër piitã hkôt amnhĩ nhĩpêx mex kumrẽx o ri pa. ⁵ Jao te kot Mojes kapër pẽ mẽ papytãr pyrãk o mẽ panhĩpêx pu mẽ hpãnhã pahpê Tirtũm kra kaxyw. ⁶ Tã mẽ ixpê Ijaew kwỹjaja nẽ mẽ apê Ijaew kêt xwỹnh kwỹjaja ra mẽ pahpê Tirtũm kra jakamã na pre mẽ pahwỹr Kra Jejus Karõja rẽ nhũm mẽ pamã agjẽ. Hãmri nẽ mẽ pamã kapër o:

—Ra mẽ apê Tirtũm kra jakamã kêr ka mẽ kãm amnhĩ jarẽnh kaxyw nẽ kãm: “Pa Papaj” anẽ. Kêr ka mẽ ã kãm akapër anẽ. Anẽ.

⁷Jakamã na pu mẽ ra te pahpê mẽ kãm paxàpênh xwÿnh pyrãk kêt nê. Ra mẽ pahpê Tirtùm kra jakamã na hte mẽ panhîpêx o te Kra Jejus nhîpêx pyrã nê mẽ pahto mex nê.

Mojes kapêr kôt mẽ kot amnhî nhîpêx xwÿnhjê jarênh
Sikûn Korît 11.3-4; Korosê 2.16-19; Eprêw 6.1; Wam Pêtre 1.14

⁸Nê amnepê mã kormã mẽ ate amnhî kaxyw Jejus kôt ajamaxpêr kêt ri na ka prem Tirtùm jarênh mar kêt nê. Âm atÿx ri sãnti mã mex ã harê nê kãm amnhî jagrer o ri apa. Nê amã mẽmoj kînh nê amã hprãm xaj tanhmã amnhî to hwÿr to ho ri apa. Te mẽ kãm mẽ àpênh o mẽ pa xwÿnhjaja kot amnhî nhîpêx pyrã nê sãnti mã tanhmã amnhî nhîpêx to ho ri apa. Nom sãntija kêp Tirtùm kêt.

⁹Tã ka prem Tirtùm jarênh ma nê hkôt amnhî xunhwÿ nhùm amnhî tã mẽ apumu. Tã tãm kot amnhî kaxyw mẽ paxunhwÿr jakamã kwa mon ka mẽ ra axtem nê akupÿm sãnti hkôt amnhî nhîpêx kaxyw? Nã mẽ ajamaxpêrja mex kêt. Sãnti nhîpêxta tanhmã koja amnhî to nê mẽ ato ajuta? âm mẽ kot ïhkra ho hipêx pix jakamã hihtÿxti hã. Amarî kuhê xà kamã kuhê ho kuhê xwÿnh kênã. Tã te kot akupÿm amnhî kôt mẽ arênh kaxyw pyrãk o mẽ anhîpêx ka mẽ ra axtem nê akupÿm hkôt amnhî nhîpêx kaxyw. Kwa nã mẽ ã ri amnhî nhîpêx anhÿr kêt nê.

¹⁰Nê na ka htem amnhî kukamã ajamaxpêr o:

—Na pre hte Ijaewjaja Mojese kapêr xà hkôt arîgro hkwy hã axtem tanhmã amnhî nhîpêx to nê mẽmo mytwrÿ hã tanhmã amnhî nhîpêx to nê mẽmo amgrã hã tanhmã amnhî nhîpêx to. Tã kot paj mẽ urãk nê ã amnhî nhîpêx anhÿr o ixpa. Kê Tirtùm ja hã ixpumu nê inhmex ã ijarê. Anê.

Kwa mẽ ã ajamaxpêr anhÿr kêt nê. Mon ka htem axtem nê ri ã ajamaxpêr anê? Na hte Tirtùm ã mẽ pahte amnhî nhîpêx anhÿr ã mẽ pahpumunh kôt mẽ pamex ã mẽ pajarênh kêt nê. ¹¹Na pa ja hã mẽ ajarênh ma nê tee ri mẽ akukamã ijamaxpêr. Te ixte Tirtùm kapêr o mẽ ajahkre kaprÿ ho ri ixpa pyrãk.

Karatas nhô xwÿnhjaja kot Pawre ho mex ã mẽ harênh
Wam Korît 9.21-23

¹²Kwa ixkrãmnhwÿjaja. Ixpê Ijaew tã te ixpê Ijaew kêt pyrãk o amnhî nhîpêx o ri mẽ apê Ijaew kêt xwÿnhjê hkôt ri ixpa. Jao Kris kapêr gryk ã mẽ inhîgêjtaja kot amnhî nhîpêx kaga nê axte hkôt amnhî nhîpêx kêt nê. Tã kwa mẽ ixpyrà nê ã amnhî nhîpêx anê. Wem ma amnhî to amôr gri kêt wehe. Wam ixte mẽ awÿr inhmôrta ã na pa pre mẽ amã Tirtùm kapêr jarênh o ri mẽ akôt ixpa ka prem inhma nhùm ja mẽ amã mex nê ka mẽ ja hã tanhmã ixto hkêt nê. ¹³Na pa pre ixàã nê mẽ awÿr mō nhùm ixàja ixto htÿx nê pa tokyx ixkator nê ma akupÿm mẽ arùm inhmôr kêt nê arî mẽ amã Tirtùm kapêr jarênh o ixpa. ¹⁴Kormã ixã nê tanhmã ixkute htã ka prem ja hã ixpumu nê ixto mex nê ixkamã anhökre kahak kêt nê. Na ka prem te ixto Jejus Kris nhîpêx pyrãk o inhîpêx. Nê te ixto Tirtùm kapêr o wrÿk xwÿnh nhîpêx pyrãk o inhîpêx. ¹⁵Jao mẽ amã

ixkînh nê ã inhîpêx anê nê mẽ amã ixto mex pix prãm. Nê nhÿri ixpumu nê ixkamã axukaprî nê inhmã akapêr o:

—Hêxta waa nê. Anopxàã. Inhmã amnhî no kaxàr nê amã ôr prãm nom tanhmã kot pa mẽ amnhî to nê hka-pa nê amã kugô? Anê.

Nê mẽ amã inhmã mẽmoj mex pix nhôr prãm. Tã ra tanhmã ajamaxpêr to nê axtem nê te mẽ amã ixkînh kêt pyrãk o inhîpêx.

Mê no kupyr xwÿnhjaja kot mẽ hamaxpêr o pihkàr ã mẽ harênh

¹⁶Nê na pa pre âm hãmri mẽ amã Tirtùm kapêr jarênh o ri mẽ akôt ixpa. Nom ra mẽ amã mar prãm kêt jakamã na ka mẽ axtem nê inhîpêx o te ixte mẽ akutã amnhî xãm pyrãk. ¹⁷Mê amã Tirtùm kapêr o mẽ hêx xwÿnhjaja te mẽ kãm mẽ akînh pyrãk o mẽ anhîpêx no âm mẽ kãm akînh kêt. Na htem mẽ amex kaxyw tanhmã mẽ amã kapêr to hkêt nê. Âm mẽ ate mẽ mar nê mẽ gryk ã ixkaga nê mẽ hkôt ri amnhî nhîpêx o apa pix prãm xaj na htem mẽ akôt tanhmã mẽ amã hêx to ho pa. ¹⁸Pa mẽ harênh ma hãmri nê mẽ kamã inhgryk o ã mẽ amã mẽ harênh anhÿr kêt nê. Koja mēhō mẽ awÿr mra nê ixwakre kamã rÿ inhnōo mã mẽ amã mẽmoj mex jarê nhùm ja inhmã mex nê. No nhùm mẽ amã mẽ hêx xwÿnhjaja axtem nê mẽ ajamaxpêr o pihkàr pix kaxyw na htem mẽ awÿr mrrar nê mẽ amã ã ujarênh o pa anê.

Pawre kot tee ri mẽ hkukamã hamaxpêr ã harênh

¹⁹Te mẽ apê ixkra pyrãk jakamã na pa hte mẽ ate amnhî nhîpêx ã mẽ apumu nê tee ri ijamaxpêr nê ixkaprî htÿx nê. Te nhÿhÿnh ixà htÿx nê ixte amnhî xà htÿx kamã ijamak o ri ixpaja pyrãk. Rÿ te mẽ hpijagri ho mẽ hikwÿ xwÿnh ôhy xà htÿxta pyrãk. Mẽ ate Kris kôt amnhî nhîpêx mex o apa hprãm xaj na pa hte ã amnhî nhîpêx anhÿr o ri ixpa. ²⁰Hêxta waa nê. Kop apu ra mẽ awÿr ixpôx nê mẽ akôt ixpa ronhÿx pa ixkînh tÿx kumrêx. Nhÿx pa ra ixprî hã mẽ amã ixkapêr ka mẽ inhma. Nê amnhî tã inhmã mẽ akînh tÿx ã mẽ akamã inhgryk kêt ã ixpumunh kurê kumrêx. No kagã pix kãm ixkapêrja ka mẽ kamã harê nom aprî hã inhmar mex kêt nê. Na pa tee ri mẽ akukamã ijamaxpêr o ixkaprî htÿx nê ixpa.

Mojese kapêr kôt mẽ kot amnhî nhîpêx xwÿnhjê jarênh
Eprêw 12.18-29

²¹Kwa mẽ amã arî Mojese kapêr kôt amnhî nhîpêx o ri mẽ apa hprãm xwÿnhjaja. Mãn ka mẽ kormã aprî hã Mojese kapêr piitã mar par kêt jakamã na ka mẽ amã hkôt amnhî nhîpêx prãm. E pa ixprî hã mẽ amã tanhmã harênh to ka mẽ inhma. ²²Nã Tirtùm kapêr ã kagã htùm kot finat Apraãw jarênhja. Na pre hkra myja wa hamêxkrut. Prô Sara kamã ja nê kot amnhîm haprôr nhùm ri kãm àpênh o pa xwÿnh Aga kamã ja. ²³Kãm àpênh xwÿnh kamã ja na pre mẽ pahpiitã mẽ pahpyrà nê amarî kato. No hprô Sara kamã ja. Sara na

pre ra hpigêx tÿx nê. Ra hkamrô hkêt ryy nê pa htã nhÿm Tirtÿm kot wa hkra hkukamã wa kãm ujarênh xà hkôt nhÿm Apraãwja htu nhÿm wa hkrata kato. Tirtÿm kot hkukamã wa kãm harênh xà hkôt nhÿm kamã hkra nhÿm kato.

²⁴ Tã wa nita ã wa harênh kot anhÿr. Na pre Tirtÿm mëmoj jarê. Te ho wa uràk o wa harê no ãm hã kuxi nê ã wa harênh anê. Jakamã ni wa harênhja te kot Tirtÿm kapêr pijakruuta pyrãk. Wam ni Agata te kot hixêt prêk pê Sinai nhÿmôk ã Tirtÿm kot Mojes mã kapêrta pyrãk. Hixêtja pika pê Arap kamã na pre. Jakamã nhÿm Tirtÿm Ijaew kaxyw Mojes mã kapêr nhÿm kuma nê amnhÿ xò ri më kãm hã kagà. Tã na hte arÿ jarãhã më hkwyjaja hamaxpêr o:

—E kot paj më panhÿgêt finat Mojes kapêr kôt amnhÿ nhÿpêx o ri ixpa nhÿm Tirtÿm ja hã ixpumu nê amnhÿm inhmex ã ijarê nê ixto hkra.

Anhÿr o hamaxpêr no ãm ã hamaxpêr anhÿr kaprÿ. Æ më hamaxpêr anhÿr xwÿnhjaja te më kêp Apraãw mã àpênh xwÿnh Aga hkrata pyrãk. Nê krÿ pê Jerujarê kêp Ijaew nhô krÿ jakamã haxwÿja te kêp Agata pyrãk. Nhÿm krÿ nhô xwÿnhjaja haxwÿja te më kêp Aga hkrata pyrãk. Na htem htÿx Tirtÿm kot më omunh nê më ho hkra hprãm xàj Mojes kapêr kôt amnhÿ nhÿpêx o pa hã amnhÿ jarênh kaprÿ. Jakamã haxwÿja te më kêp më kãm më àpênh o pa xwÿnh pyrãk.

Jejus kôt më kot amnhÿ kaxyw hamaxpêr xwÿnhjê jarênh

²⁶ Nê hapu hã Tirtÿm kapêrta. Apraãw prô kumrêx Saraja te kêp kaxkwa kamã Jerujarê ôja pyrãk. Krÿ ja kamã më pa mã xwÿnhjaja te më kêp më kãm më àpênh xwÿnhjê pyrãk kêt. Ra më kot amnhÿ kaxyw Kris mã hamaxpêr nê hkôt amnhÿ xunhwÿr jakamã na htem hamaxpêr o:

—Ixte amnhÿ kaxyw Kris mã ijamaxpêr nê hkôt amnhÿ xãm jakamã na Tirtÿm ixpumu nê amnhÿm inhmex ã ijarê nê ixto hkra. Anê.

Àm hãmri na më ã wamtajê rom hamaxpêr anê. Tã ã më hamaxpêr anhÿr xwÿnhjaja te më kêp Sara hkra pyrãk.

²⁷ Tirtÿm kapêr ã kagà htÿm kot ja jarênh kot:

E kormã akra hkêt nê apa htã kêr ka mãmri akÿnh nê ri apa.

Nê kormã apijagri hkêt tã kêr ka akÿnh tÿx nê ri apa.

Kormã amjên kot akamã hkra hkêt nê te kot akaga pyrãk tã kot kaj akra nê akanrêhã atàmnhwÿ sohtô rax nê.

Mê ohtô rax o ra amjên kot nhãm hprô hõ kamã hkrata jakre. Anê.

Æ kapêr kot anhÿr o më kot amnhÿ kaxyw Kris kôt hamaxpêr xwÿnhjê hkukamã më ohtô hã më harê.

²⁸ E ixkràmnhwÿjaja. Te më apê Ijak kanrêhã htàmnhwÿ pyrãk. Koja mëhõ amnhÿ kaxyw Kris kôt hamaxpêr hãmri nê te kêp Apraãw më hprô Sara wa hkra Ijak kanrêhã htàmnhwÿ pyrãk. Na pre Tirtÿm amnepê mã kormã Ijak kator kêt ri ra hkukamã hamaxpêr nê Apraãw mã harê. Nê më papajaja nhÿm Tirtÿm Ijak

pyrà nê më pakukamã më pamã hamaxpêr nê amnhÿm më paxunhwÿr ã amnhÿ jarê. Tã ra më ate amnhÿ kaxyw Kris kôt ajamaxpêr jakamã te më apê Ijak kanrêhã htàmnhwÿ pyrãk.

²⁹ Nhÿm Apraãw kot Aga kamã hkra Ismaewja na pre hprô kumrêx kamã hkrata pumu nê kãm hkÿnh kêt nê kamã gryk pix o pa. Nê tanhmã hipêx to pê ri haprÿ ho ri hkôt pa. Tã më kot amnhÿ krã hkôt amnhÿ to Tirtÿm kra hprãm xwÿnhjaja na htem ã më pahte Kris kôt amnhÿ xunhwÿr xwÿnhjê nhÿpêx anhÿr o pa. Na htem Tirtÿm kot më pahto hkra hã më pahpumu nê Ismaew kot Ijak nhÿpêx pyrã nê më pakamã gryk pix o pa. Nê tanhmã më pahptomnuj to pê më pahto kapêr o ri pa.

³⁰ Tã no ãm kwär më mãmri ã më panhÿpêx anê. Koja më pahpyrà nê nhÿrmã Tirtÿm nhô krÿ hwÿr àpir kêt nê. Tirtÿm kapêr ã kagà htÿm kot më harênh kot:

Na pre Tirtÿm Apraãw mã kapêr nê kãm: “E kêr ka amnhÿ nê ate haprôr nhÿm kot amã àpênh o ri pa xwÿnh më hkrata wa hano. Koja hkrata amÿr pê amnhÿm mëmoj to àrÿk kêt nê.

Ate aprô kumrêx kamã akrata pix koja hõja rom amÿr pê mëmoj piitã ho amnhÿptàr pa.” Anê.

³¹ Tã te më pahpê àpênh xwÿnh kamã hkrata pyrãk kêt. Te më pahpê Apraãw prô kumrêx kamã hkrata pyrãk. Te Tirtÿm kot Ijak kukamã hamaxpêr pyrãk o na pre më pakukamã hamaxpêr.

5 Nê Kris kot më pahte amnhÿ nhÿpêx tÿm pê më papytãr jakamã kwa ixkràmnhwÿjaja. Kêr ka më arÿ ate amnhÿ nhÿpêx tÿm kôt amnhÿ nhÿpêx kêt nê. Ra Kris kot ja pê më papytãr nhÿm më paxàmnhÿx ri papa kênã.

Më pahpê Tirtÿm kra hprãm xàj tanhmã më pahte amnhÿ nhÿpêx to

Juãw 8.32, 8.36; Korosê 2.20

² E më inhma. Kot kaj më atô Tirtÿm kot ato hkra hprãm xàj amnhÿ my kwÿt kã krãhta hã kot kaj më ãm amarÿ ã amnhÿ nhÿpêx anhÿr kaprÿ. Na hte Tirtÿm ja hã më omu nê ãm hã më omu. Kot kaj ã amnhÿ nhÿpêx anê nhÿm Krisja ãm ate amnhÿ tomnuj mÿrapê anê htyk kaprÿ pyrãk o amnhÿ nhÿpêx. ³ Hãmri nhÿm Tirtÿm tee ri ja hã më apumu nê te kot ã më amã kapêr anhÿr pyrã nê më amã kapêr o:

—E ra amã apê Kris kwÿ hprãm xàj amnhÿ my kwÿt kã krãhyr jakamã kot kaj mãänên Mojes kapêr piitã hkôt amnhÿ nhÿpêx o ri apa.

Anhÿr o më amã kapêr pyrãk.

⁴ Nom kot kaj më atô amnhÿ kukamã ajamaxpêr o:

—Nà kot paj Mojes kapêr piitã hkôt amnhÿ nhÿpêx o ri ixpa nhÿm Tirtÿm ja hã ixpumu nê inhmex ã ijarê nê ixto hkra kãm ga. Anê.

No ãm ja kot anhÿr kêt. Na hte Tirtÿm ã më pahte amnhÿ nhÿpêx anhÿr ã më pahpumunh kôt më pahto hkra hkêt nê. Jakamã kot kaj më ã amnhÿ nhÿpêx anê nê te ate Kris kutã amnhÿ xãm pyrãk nhÿm Tirtÿm ato mex kêt nê. ⁵ Nom kot ka më axtem ajamaxpêr o:

—Ra ixte amnhÿ kaxyw Kris kôt ijamaxpêr nê hkôt amnhÿ xãm jakamã koja Tirtÿm hã ixpumu nê inhmex

ã ijarë. Karõ ra kot ã inhmä ja ho amnhĩrit anhÿr kënã.

Anhÿr o ajamaxpër. Æm hãmri ã më ajamaxpër anhÿrja. ⁶ Jakamã më pahpë Kris kõt amnhĩ xunhwÿr xwÿnhjê kamã ra më kot amnhĩ my kwryt kà jakàr xwÿnhjaja nhÿm më pahkwÿjaja ã amnhĩ nhĩpêx anhÿr kêt në. Tã nhÿm Tirtÿm ja hã më pahpumu nhÿm ja tanhmã kêp kute hkêt. Na hte më pahte amnhĩ my kwryt kà jakàr ã më pahpumu në ãm hã më pahpumu. No kot pu më Jesus Kris kõt amnhĩ nhĩpêx mex o ri papa. Nê amnhĩ kaxyw hkõt pajamaxpër tÿx o ri papa. Nê më pamã axpën kÿnh pê tãm ri axpën nhĩpêx o ri papa. Ja na kêt Tirtÿm kãm hprãm.

⁷ Ra më ate Kris kõt amnhĩ nhĩpêx mex o ri apa htã nhÿm më hêx xwÿnhjaja më awÿr mra në tee ri ã më ate amnhĩ nhĩpêx anhÿr ã më apumu në tanhmã më amã Tirtÿm kapër o hêx to. Ka më ama në axte Tirtÿm kõt amnhĩ nhĩpêx mex hkêt në. ⁸ No ãm ã më kot më amã më ujarënh anhÿr xwÿnhjaja na pre Tirtÿm më awÿr më rênh kêt në. Tirtÿm kot amnhĩ wÿr më awÿr xwÿnh kënã kot kêt axtem në më awÿr kapër o më amã hêx o më pa xwÿnhjê rë.

⁹ Nê koja mëhõ pixi në tanhmã amnhĩ tomnuj to nhÿm më piitã ja hã omu në urak në kãm tanhmã amnhĩ tomnuj to hprãm. ¹⁰ No kêt më apê Kris kwÿ na ka më. Ixte ja hã më apumunh mex. Kot kaj më axte ixkapër ma në akupÿm Kris kõt amnhĩ nhĩpêx mex o ri apa. Nà kot kaj më ã amnhĩ nhĩpêx anë në axte më kot më apê àmnàr xwÿnhjê kapër mar në më hkõt amnhĩ nhĩpêx kêt në. Koja Kris më atã më homnuj tÿx kumrêx nhÿm më rĩ amnhĩ pumu.

Pawre kot më kot amnhĩ jakàr ã më kãm karõ hkêt ã harënh

¹¹ Nê na hte Tirtÿm kapër o më hêx xwÿnhjaja tanhmã më amã ixto hêx to ho pa. Ixte më kãm Tirtÿm kot më ho hkra kaxyw më kot amnhĩ my kwryt kà jakàr ã më kãm karõ hã ixto ri hêx o pa. Nom ixte anhÿr kêt ixkràmnhwÿjaja. Kop apu ixte më kãm ja hã karõ ho ixpa ronhÿx Ijaew krãhtÿmjaja ja hã ijarënh ma nhÿm ja më kãm mex në nhÿm më axte Kris ã tanhmã inhĩpêx to hkêt në. Nom ixte ja hã më kãm karõ hkêt. Æm ixte më kãm Kris kot më panê pĩ kahpa hã htyk jarënh pix mÿrapê na htem ixkamã gryk në.

¹² Hêxta waa në. Më kot më amã hêx o pa pê më ajamaxpër o pihkàr xwÿnhjaja kop më ãm më anhõ krĩ rÿm hapõx në ma nhÿhÿm hapêx ronhÿx pa ixkÿnh tÿx kumrêx.

Më pahte axpën to mex o papa hã më pamã karõ

Wam Korĩt 13; Eprêw 13.3, 13.16; Wam Pêtre 1.22; Wam Juãw 3.11

¹³ Kwa ixkràmnhwÿjaja. Nà na pre Kris amnhĩ kaxyw më parê. Axte më pahte amnhĩ nhĩpêx tÿm kõt amnhĩ nhĩpêx kêt kaxyw. Ra kot ã më pahte amnhĩ nhĩpêx anhÿr pê më papytãr jakamã kër ka më amnhĩ tã ja ma në axte atÿx ri amã hprãm xà hkõt tanhmã amnhĩ nhĩpêx to ho ri apa hkêt në. Më ãm amã axpën kÿnh pix o ri axpën kõt apa. Nê nhãm më hipêx o te ka amã amnhĩ tã ma pyrãk o më hipêx. Jao më piitã tãm më

hipêx o ri apa. Kot kaj më ã amnhĩ nhĩpêx anë në te më ate wam Tirtÿm kapër piitã hkõt amnhĩ nhĩpêx pyrãk. ¹⁵ No kot kaj më axtem në axpën kãm axoprê ho ri apa hãmri në te ra më ate axpën to ajapêx par o amõr pyrãk o amnhĩ nhĩpêx. Te mry xoprê kot axpën par o pata pyrãk. Kwa më ã amnhĩ nhĩpêx anhÿr hkêt në. Më ãm axpën to mex pix në më axpën kãm axukaprĩ ho ri axpën kõt apa.

Më pahte amnhĩ nhĩpêx nyw jarënh

Matêwre 26.41; Rõmãn 8.1-11

¹⁶ Nê kwa kër ka më amnhĩ to Tirtÿm Karõ wÿ kê më amã më ate amnhĩ nhĩpêx nyw jagjê ka më axte ate amnhĩ nhĩpêx tÿm kõt amnhĩ nhĩpêx hkêt në. Æm më ate amnhĩ nhĩpêx nyw kõt pix mã mãn amnhĩ nhĩpêx o ri apa. ¹⁷ Tirtÿm Karõ kot amnhĩ nhĩpêxja në më pahte amnhĩ nhĩpêx tÿmja wa kot axpën pyrãk kêt. Te wa kot axpën kutã amnhĩ xãm në wa pijapu pyrãk. Jakamã kot puj më pahte amnhĩ nhĩpêx tÿm o amnhĩ nhĩpêx në Tirtÿm Karõ mã hprãm xà hkõt amnhĩ nhĩpêx hkêt në. ¹⁸ No kot puj më Tirtÿm Karõ hkõt amnhĩ nhĩpêx në ra jar pika ja kamã më kot amnhĩ nhĩpêx kõt ri amnhĩ nhĩpêx kêt në. Ra axtem më pahte amnhĩ nhĩpêx nyw o amnhĩ nhĩpêx. ¹⁹ Jar më kot amnhĩ nhĩpêx tÿmta mex kêt. Ra më piitã më kot ja pumunh mex.

Na htem htÿx ri hkwÿjê kamã hpijaam kêt o pa.

Jao mëmyjaja hprõ kuhpa hã nhãm mënijê ho amnhĩkati.

Nhÿm më hprõjaja më mjên kuhpa hã nhãm mëmyjê ho amnhĩkati.

Nê mëmy hkwÿjaja axtem në mëmyjê hkwÿ ho amnhĩkati.

Nê mëni hkwÿ haxwÿja axtem në mënijê hkwÿ ho amnhĩkati.

²⁰ Nê më kãm mëmoj më hikukrêx japê htÿx o kãm Tirtÿm Kÿnh jakre.

Nê mëmoj kaxyw ma wajaga hwÿr amnhĩ to pa.

Nê hkwÿjê kamã oprê ho ri pa.

Nê mëmoj tã axpën kãm gryk pix në.

Nê mëmoj to axpën pê õxÿ në.

Nê mëmo mÿrapê axpën pê anhrã në amÿm ah-pÿnhã ri pa.

²¹ Nê mëmoj tã axpën kamnhÿx rãhã ho ri pa.

Nê axpã në më grer kãm ri axpën kãm hpijaam kêt o ri pa.

Æ na htem më kot amnhĩ nhĩpêx tÿm kõt amnhĩ nhĩpêx o ri më pa xwÿnhjaja amnhĩ nhĩpêx anë. Æ më kot amnhĩ nhĩpêx anhÿr xwÿnhjaja koja më Tirtÿm nhõ krĩ hwÿr gjêx kêt në. Ra ixte më amã ja jarënh tã pa axte më amã harê. Më ate hã ano htÿx rãhã ho ri apa kaxyw. ²² No më kot amnhĩ nhĩpêx nywja axtem na.

Tirtÿm Karõ hkõt më kot amnhĩ nhĩpêx nyw o amnhĩ nhĩpêx xwÿnhjaja na htem axtem kãm axpën kÿnh në.

Nê hkÿnh në ri hamakêtkati në àmnhÿx ri axpën kõt pa.

Nê gryk tokyx anhÿr hkêt në. Æm axpën to mex pix o ri axpën kõt pa.

Nê tãm axpën nhĩpêx.

Ně kot měmoj tā amnhī jarēnh xà hkôt tanhmā měmoj to.

²³ Ně axpēn mā kapēr mā hprī ho ri axpēn mā kapēr.

Ně měmoj punuj piitā nē amnhī to htýx o ri pa.

Ā na hte mě kot Tirtüm Karō hkôt amnhī nhīpēx o mě pa xwýnhjaja Karō nhý hā amnhī nhīpēx nyw o amnhī nhīpēx anhýr o pa. Jao määnen Mojes kapēr kwým ri amnhī nhīpēx hkêt nē. Jakamā koja mēhō mě pahte amnhī nhīpēx nyw nē tanhmā mě pahkurē hto hkêt nē. ²⁴ Tā mě pahpē Jejus Kris kwý jakamā na pu mě pahte amnhī nhīpēx tūmjā nhīpēx o te mě pahte amnhī nē hprīr pyrā nē axte hkôt amnhī nhīpēx kêt nē.

Tirtüm Karō hkôt mě pahte amnhī nhīpēx ā mě pamā karō

Epes 4.23-24; Korosē 3.10

²⁵ Tā ra Tirtüm Karō kot mě pahto hkra jakamā kwa kêr pu mě ām kôt pix mā amnhī nhīpēx nyw o amnhī nhīpēx o ri papa. ²⁶ Kot puj mě ā amnhī nhīpēx anē hāmri nē měmoj tā mě pahkwýjē mā amnhī to jarkrar o ri papa hkêt nē. Kot puj mě ā amnhī nhīpēx anē nhūm mě pakamā gryk nē. Jakamā kêr pu mě ā amnhī nhīpēx anhýr o ri papa hkêt nē.

Mě pahte tanhmā axpēn to ajuta hto hā mě pamā karō

Matēwre 18.15-17; Rukre 17.3-4; Sikün Tesarōn 3.14-15; Xiakre 5.19-20

6 Kwa ixkrāmnhwýjaja. Mě apē Tirtüm Karō hkôt amnhī nhīpēx o ri mě apa xwýnhjaja. Koja Kris kôt akwýjē hō tanhmā amnhī tomnuj to ka mě ja hā omu nē ā amnhī nhīpēx anhýrja nē kām akapēr. Nom kêr ka mě kamā agryk kamā kām tanhmā nē hkêt nē. Ām kām akapēr mā aprī ho kām akapēr nē akupým tām ām. Nom kwa kêr ka mě amnhī pumunh mex nē urāk nē ā amnhī tomnuj anhýr kêt nē.

Kot ka mě atō ā kot amnhī nhīpēx anhýr ā omu nē ām omu nē nē tanhmā kām akapēr to hkêt nē. Nē aja-maxpēr o:

—Tk. Kwār māmri ā amnhī nhīpēx anē. Pa ja nē tanhmā kām ixkapēr to hkêt nē. Kurom ixte amnhī nhīpēx mex o ri ixpa kēnā.

Anhýr o ajamaxpēr japēr. Kwa mě ā ajamaxpēr anhýr kêt nē. Kot kaj mě ā ajamaxpēr anē nē nē kām akapēr kêt nē hāmri nē te ate amnhī to mex ā amnhī jarēnh kapry pyrāk.

Ně kêr ka mě axpēn to ajuta mex o ri axpēn kôt apa. Jao Kris kôt amnhī nhīpēx mex nē.

⁴ Nē na htem piitā amnhīm àpēnh pix tånopxar o pa. Jakamā kêr ka mě amnhī tånopxar pē tām amnhī nhīpēx rāhā ho ri apa. Hāmri nē ja hā amnhī pumu nē akīnh nē. Nom kwa kêr ka mě ate amnhī nhīpēx mex o akwýjē jakrenh ā mě kām amnhī to jarkrar o ri apa hkêt nē.

⁶ Nē kêr ka mě kot Tirtüm kapēr o mě ajahkre xwýnhjē ho mex nē mě kām měmoj nhōr o ri apa.

⁷ Koja Tirtüm nhýrmā mě pahtrī ri mě pahte amnhī nhīpēx ā mě pahpumunh kôt tanhmā mě pajarēnh to. Hāmri pu mě tee ri amnhī kukamā pajamaxpēr nom

amnhī nē tanhmā kām paxēx to hkêt nē. Koja mēhō kām amnhī to hēx nē te tām kot amnhī mā hēx pyrāk nom kot puj mě Tirtüm mā amnhī nē tanhmā paxēx to hkêt nē. ⁸ Jakamā kot kaj mě amnhī krā hkôt tanhmā ri amnhī nhīpēx to rāhā ho apa hāmri nē nhýrmā ty nē Tirtüm pē awry rax ā ri apa. Nom kot kaj mě Tirtüm Karō mā hprām xà hkôt pix mā amnhī nhīpēx nē nhýr-mā ty nhūm Tirtüm akupým ato atīr ka kuri amex nē ajamakētkati atīr tūm nē ri apa ho apa.

Mě pahte axpēn to mex rāhā hā mě pamā karō

Atre 20.35; Wam Korīt 15.58; Xitre 3.14; Eprēw 13.3, 13.16; Xiakre 1.27

⁹ Jakamā kwa kêr ka mě arī tām ri amnhī nhīpēx nē tām axpēn nhīpēx o ri axpēn kôt apa nē jam anhüer kêt nē. Mě ā amnhī nhīpēx o ri apa anhýr rāhā ty nhūm Tirtüm nhýrmā ja hā mě ato mex rax nē. ¹⁰ Tā kêr pu mě arī Kris kôt pahtrōjē ho mex rāhā ho ri papa. Nom mě tapxipixjē ho mex kêt nē. Pu mě mě piitā mě ho mex o axpēn pyrāk.

¹¹ E ixte mě amā kagā nhīpēx nē mēnh nhūm mě ate ja hā ixpumunh kaxyw kot paj pam kagā jatur xà hā inhīkra ho inhīxi nhīpēx ka mě ixte inhīxi hā kagā rūnhtita pumu.

Jejus kot mě panē htyk ā Pawre kām harēnh prām ā harēnh

Wam Korīt 1.22-24, 2.1-2

¹² Nē mě amā Tirtüm kapēr o mě hēx xwýnhjaja na htem hamaxpēr o:

—Nā kot paj Karatas nhō xwýnhjē mā Kris pī kahpa hā htyk ā harēnh o ri ixpa hkêt nē. Kot pa anē nhūm mě ixpē Ijaew kwýjaja ja hā inhma nē hā tanhmā inhīpēx to. Ja pymaj kot paj mě kām tanhmā harēnh to hkêt nē. Kot paj ām mě kot amnhī my kwryt kà jakār pix ā mě kām karō kê mě ixkapēr xà hkôt ā amnhī nhīpēx anē. Pa hā mě omu nē ma ixkwýjē mā mě hā amnhī to jarkrar o ri ixpa. Anē.

¹³ Te mě kot finat Mojes kapēr kôt ri amnhī nhīpēx pyrāk tā no na htem ā amnhī nhīpēx anhýr kêt nē. Ra mě kot amnhī jakār tā no ām Mojes kapēr piitā hkôt amnhī nhīpēx hkêt nē. Ām hkwy hkôt pix mā amnhī nhīpēx o pa. Nom kot kaj mě ama nē mě urāk nē amnhī jakā nhūm mě ja hā mě apumu nē hkīnh nē. Nē ma ri mě hkwyjē mā mě atā amnhī to jarkrar o ri pa nē mě kām:

—E Karatas nhō xwýnhjaja na pa prem mě kot amnhī my kwryt kà jakār ā mě kām karō nhūm mě inhma nē mě pahpyrà nē ā amnhī nhīpēx anē. Anē.

¹⁴ No pa na pa hte ā mě kām měmoj tā karō anhýr o ri ixpa hkêt nē. Ām Tirtüm kot mě pahto hkra kaxyw mě panhō Pahiti Jejus Kris kot mě nē htykja pix na pa hte mě kām harē. Ra kot inhnē htyk jakamā te pa ixte kuri ijēt nē ixtyk pyrāk. Jakamā ra jar pika ja kamā mě kot amnhī nhīpēxja te ixpē htyk nē hapēx pyrāk pa axte hkôt amnhī nhīpēx kêt pyrāk.

¹⁵ No mě kot amnhī my kwryt kà jakār xwýnhjaja nē mě kot amnhī jakār kêt xwýnhjaja na hte Tirtüm ja hā

mě omu ně ãm mě omu. ãm mě pahte amnhĩ nhĩpêx nyw o amnhĩ nhĩpêx o ri papaja pix na kãm hprãm.

¹⁶ Kot kaj mě ã amnhĩ nhĩpêx anhÿr o ri apa ně apê Tĩrtũm kra mex nhũm mě ato mex rax ně. Ně mẽmoj to mẽ akutã nojarêť rãhã ně. Ka mẽ axãmnhĩx aja-makêtkati ně ri apa ho apa.

¹⁷ Ně na prem Kris ã ixtak rax ně nhũm ixkatut ã ixtak xà arĩ rãhã ně pa hte hã ixpa. Ixte Jejus Kris mã

tanhmã amnhĩ nhĩpêx to xwÿnh ã ixto amnhĩrĩť xà na. Jakamã kê mẽhõ axte Jejus kot mẽ awÿr inhměnh ã tee ri ixpumu ně tanhmã hã ixkukjêť to hkêť ně.

¹⁸ E ixkrãmnhwÿjaja. Kê Pahihti Jejus Kris mẽmoj to mẽ akutã nojarêť ně mẽ ato mex rãhã ho pa. Nà koja mẽ ato aně.

ãm ja pix na hapêx. Ixpê Pawre na pa ã mẽ amã kagà nhĩpêx ně mẽ awÿr mẽnh aně.

Epes

Pawre na pre kagàja nhípêx. Jejus nhỹ hã hkrajê jahkre o pa xwýnhjê hõ na pre. Jakamã na pre krĩ pẽ Epes kãm Kris kwýjê hwýr hipêx nẽ kumẽ. Epes nhõ xwýnhjaja Ijaew kêt xwýnh na pre mẽ. Nhũm pre ra Pawre ma mẽ hwýr mõi mẽ mẽ kãm Tirtũm kapẽr jarẽnh o ri mẽ hkõt pa nhũm mẽ hkwýjaja kuma nẽ Jejus kõt amnhĩ xunhwý. Na pre hte Pawre ma krĩ piitã hkõt ri Tirtũm kapẽr jarẽnh o ri mẽ hkõt pa. Hãmri nhũm mẽ hkwýjaja Jejus ã unê nẽ krĩ pẽ Rõm wýr kumẽ nẽ kamã haxà nhũm arĩ hkrĩ ho hkrĩ. Nom amarĩ hkrĩ hkêt nẽ. Na pre hte mẽ kot hwýr mrrar xwýnhjê mã Tirtũm kapẽr jarẽ. Nẽ krĩ hkwý hkõt Jejus kõt hkwýjê mã kagà nhípêx nẽ mẽ hwýr kurẽ. Jakamã na pre Epes kamã hkwýjê hwýr kagàja nhípêx nẽ mẽ hwýr kumẽ.

Nẽ kagàja kamã hprĩ hã mẽ kot Jejus kõt amnhĩ xunhwýr xwýnhjê kot tanhmã amnhĩ nhípêx to ho pa hã mẽ kãm karõ. Ra mẽ kot hkõt amnhĩ xunhwýr jakamã te mẽ htipxi nẽ ri mẽ pa xwýnh kot amnhĩ nhípêx pyrãk o amnhĩ nhípêx o pa hã mẽ kãm hã karõ. Nẽ jar pika hkõt te mẽ kêp Kris nhĩ pyrã nẽ pa hã mẽ harẽ. ã na pre Pawre mẽ kãm mẽmoj jarẽ nẽ hã kagà anẽ nẽ mẽ kãm:

1 Pa Epes kãm Kris kõt ixkwýjaja. Xà mẽ amex na ka mẽ apa? E ot pa mẽ awýr kagà nhípêx nẽ kumẽ. Ixpê Pawre na pa hipêx nẽ mẽ awýr kumẽ. Ixpê Jejus Kris nhỹ hã mẽ ahkre ho mẽ ixpa xwýnh na pa. Tirtũm kãm hprãm xà hkõt. Tã pa ã mẽ awýr kagà nhípêx nẽ mẽ awýr mẽnh anẽ. Mẽ apê Tirtũm krajê hwýr. Na ka xep htem Jejus Kris kõt amnhĩ nhípêx mex o ri apa. ãm hãmri na ka htem ã amnhĩ nhípêx anẽ.

² E kê Mẽpahpãm Tirtũm mẽ Pahihti Jejus Kris wa mẽ ato mex nẽ mẽmoj to mẽ akutã nojarêt rãhã ho pa. Ka mẽ wa ý hã axàmnhĩx ajamakêtkati nẽ akĩnh pẽ tanhmã amnhĩ nhípêx to ho ri apa.

Tirtũm kot mẽ pakukamã amnhĩm mẽ parênh ã harẽnh

Rõmãn 8.28-30; Wam Korĩt 1.21-22; Wam Tesarõn 1.4; Sikũn Tesarõn 2.13; Wam Pẽtre 1.2

³ Na hte mẽ panhõ Pahihti Jejus Kris nhĩpêxã Tirtũmja mẽ pahto mex rãhã ho pa. Mẽ pahpê Kra Kris kwý hã mẽ pahpumunh kõt tanhmã mẽ pahto mex to ho pa. Ra wa Karõja mẽ pahkarõ mã gjêx jakamã te ra mẽ pahte kaxkwa kamã wa kuri mẽ pamex nẽ mẽ papa pyrãk. Tã ra mẽ pahte jar pika ja kamã paxàmnhĩx pajamakêtkati mẽ pamex nẽ ri papa jakamã kwa kêp pu mẽ amnhĩm ãm mex o mex ã harẽnh rãhã nẽ.

⁴ Amnepê mã kormã mẽmoj kêt ri na pre Tirtũm mẽ pakukamã amnhĩm mẽ parê. Kris kukwak ri amnhĩm mẽ parê. Tã mẽmo kaxyw na pre ã mẽ pakukamã mẽ parênh anẽ? ãm mẽ pahte kapẽr kõt pix mã amnhĩ nhípêx o ri papa kaxyw. Jao tãm kot amnhĩ nhípêx pyrã nẽ noo mã tãm amnhĩ nhípêx o ri papa. Kãm mẽ pajapê jakamã na pre mẽ pakukamã tanhmã hamaxpêr to nẽ hamaxpêr o:

—Nà Ixkra Jejus Kris koja nhỹrmã ma mẽ hwýr wry nẽ mẽ nẽ ty. Tã mẽ kot mẽ nẽ htyk ã harẽnh mar nẽ amnhĩ kaxyw hkõt hamaxpêr xwýnhjaja kot paj mẽ ho ixkra. Nà kot paj ã mẽ hipêx anẽ. Anẽ.

⁶ No mẽ papajaja tanhmã mẽ pahte amnhĩ nhípêx mex to hã mẽ pahpumunh kõt na pre ã mẽ pahto hkra hã mẽ pajarẽnh anhýr kêt nẽ. ãm Kra Kris pix kukwak ri na pre ã mẽ pajarẽnh anẽ. Kãm Kra japê jakamã na hte mẽmoj to mẽ pahpê hkwý hã mẽ pakutã nojarêt rãhã ho pa. Jakamã na pu htem amnhĩ tã kãm mex o mex ã harẽnh o papa.

⁷ Na pre Krisja mẽ panê htyk o Tirtũm mã mẽ pahte amnhĩ tomnuj pãnhã amnhĩre. Nhũm Tirtũm ã kot amnhĩ nhípêx anhýr ã omunh xà hkõt mẽ pahte hkõt amnhĩ xunhwýr xwýnhjê nẽ mẽ pahte amnhĩ tomnuj rênh pa. Kojã aa tanhmã hã mẽ pahto hkêt nẽ. Pu mẽ axte amnhĩ amnhĩ tomnuj o papa hkêt nẽ. Hêxta waa nẽ. Kãm mẽ pajapê htýx kumrêx jakamã na pre ã mẽ pahto mex rax anẽ. ãm mex o mex nẽ ãhpumunh o ãhpumunh.

⁹ Amnepêm na pre hamaxpêr o:

—Nà na pa ra kaxkwa ho ixkato nẽ kamã mẽmoj piitã ho ixkato. Nẽ pika ho ixkato nẽ kamã mẽmoj piitã ho ixkato. Tã koja nhỹrmã Ixkra Kris mẽmoj piitã ho amnhĩptãr o pa. Kaxkwa kamã nẽ pika piitã hkõt mẽmoj piitã ho amnhĩptã nẽ tapxipix inhỹ hã kêp mẽõ Pahihti. Kojã ã amnhĩ nhípêx anhýr xà hã arĩgro kato nhũm ã amnhĩ nhípêx o pa anẽ. Nà ja na inhmã hprãm. Anẽ.

ã Tirtũm amnhĩ kukamã hamaxpêr anhýrja kõt na pre Kris kêp mẽ panhõ Pahihti hã harẽ. Tã nhỹrmã mẽ pahto amnhĩptãr kaxyw koja mẽ pakaxyw ãm. Amnepêm ri mẽ pa xwýnhjê mã kot kormã ja ho amnhĩrĩt kêt tã ra jarãhã mẽ pamã ho amnhĩrĩt.

¹¹ Kris kukwak ri na pre amnhĩm mẽ parê. Ra kot mẽ pakukamã mẽ pahtã amnhĩ jarẽnh xà hkõt. ¹² Tã mẽ ixpê Ijaew kwý kumrêx mẽ ixte Kris kõt amnhĩ xunhwýr jakamã koja mẽ piitã mẽ inhỹ hã Tirtũm mã mex o mex ã harẽnh o ri pa.

¹³ Nẽ mẽ kajaja na ka prem mẽ ixpyrà nẽ Tirtũm kapẽr ma nẽ ajaxwýja hkõt amnhĩ xunhwý. ãm hãmri na Tirtũm kapêrja. Tã ka prem ama nẽ hkõt amnhĩ

xunhwỳ. Hāmri nhũm amnhĩ tã mẽ apumu nẽ kot inhĩpêx pyrã nẽ mẽ anê mẽ ate amnhĩ tomnuj piitã rênh pa nẽ mẽ ato hkra. Hāmri nẽ mẽ awỳr Karõ rẽ nhũm mẽ awỳr wrỳ nẽ mẽ akarõ mã agjê nẽ mẽ akamã pa ho pa. Kris kukwak ri na pre mẽ awỳr kurẽ. Amnepê mã na pre mẽ pakukamã hamaxpêr o:

—Koja mẽ Ixkra hkôt amnhĩ xunhwỳ pa ja hã mẽ omu nẽ mẽ ho ixkra nẽ mẽ hwỳr Ixkarõ rẽ. Hāmri nhũm mẽ hkarõ mã agjê nẽ mẽ kamã hkrĩ ho hkrĩ.

¹⁴ Anhỳr jakamã na pre mẽ pahwỳr kurẽ nhũm mẽ pahwỳr wrỳ nẽ mẽ pahwỳr agjê nẽ mẽ pakamã hkrĩ ho hkrĩ. Pu mẽ ja hã amnhĩ pumu nẽ pajamaxpêr o:

—Nà ra Tirtũm kot ixwỳr Karõ mênh jakamã na ixkarõ hwỳr axã nẽ kamã hkrĩ ho hkrĩ. Tã koja ra kot mẽ ixtã amnhĩ jarênh xà hkôt ja hã ixto mex nẽ. Ra kot ixto hkra kênã. Jakamã koja nhỹrmã ma amnhĩ wỳr ixto api pa kuri inhmex kumrêx nẽ ixpa ho ixpa. Hāmri nẽ kukwak ri axte tanhmã amnhĩ tomnuj to ho ri ixpa hkêt nẽ. Anê.

Jakamã koja mẽ piitã ã kot mẽ ho mex anhỳr ã amnhĩ tã kamã ama nẽ amnhĩ tã omu nẽ kãm mex o mex ã harênh rãhã ho pa.

Pawre kot Epes nhõ xwỳnhjê ho Tirtũm wỳr ã harênh

Piripos 1.9; Korosê 1.9-12; Wam Tesarõn 5.23; Sikũn Tesarõn 1.11, 2.16; Eprêw 13.20

¹⁵ Nẽ na ka xep htem amnhĩ kaxyw Kris kôt ajamaxpêr tỳx pẽ amã Tirtũm krajê piitã mẽ hkĩnh o mẽ ho mex o apa. Na pa pre mẽ ajarênh ma nẽ ixkĩnh tỳx nẽ.

¹⁶ Nẽ xatã mẽ ato Tirtũm wỳr o ri ixpa nẽ mẽ ato hwỳr o:

—Pa Mëinhĩpêxã maati Tirtũm. Nà amex o amex. Ka na ka pre mẽ ixwỳr mẽ inhõ Pahihti Jejus Krisja mẽ nhũm mẽ ixwỳr wrỳ nẽ hprĩ hã mẽ inhmã ate tanhmã amnhĩ nhĩpêx to ho apa hã ato amnhĩrĩt. Tã Epes kãm akrajaja na xep htem akôt pix mã ri amnhĩ nhĩpêx rãhã ho ri pa. ãm hāmri na htem ã amnhĩ nhĩpêx anê.

—Nẽ kwa Tirtũm. Kê Akarõ tanhmã mẽ hkrã hto kê mẽhprĩ hã akapêr mar tỳx rãhã ho pa. Jao ra ate mẽ ixkukamã mẽ ixtã tanhmã mẽ ixto mex to hã amnhĩ jarênhja kê mẽ kãm hamaxpêr tỳx rãhã ho pa. Nẽ ate nhỹrmã mẽ ixpê akrajaja mẽ ixpiitã tanhmã mẽ ixto mex to jarênhja kê mẽ kãm hamaxpêr tỳx pẽ hkĩnh rãhã ho pa ho pa.

¹⁹ —Nẽ kê mẽ axàhpumunh o axàhpumunh ã ate akupỳm Akra Kris o htĩr ã apumunh mex nẽ Tirtũm. Na ka pre axàhpumunh xà ho akupỳm ho htĩr nẽ ma akupỳm anhõ krĩ hwỳr ho api nẽ amnhĩ nhĩhkô hã ỳr nhũm arĩ hkrĩ ho hkrĩ. Apyrã nẽ kot mẽ ixto amnhĩptãr kaxyw. ã axàhpumunh xà htỳx kot anhỳr. Tã kê akrajê piitã ja hã apumu nẽ axàhpumunh tỳx o ate tanhmã mẽ ixto ajuta hto ho apa hã apumu.

Anhỳr o na pa hte mẽ ato hwỳr o ri ixpa.

²¹ Nẽ Krisja àhpumunh tỳx o mẽkarõmnuti piitã hakrenh. Nẽ hihtỳx o mẽ hakrenh jakamã krĩ nhõ xwỳnhjê mã te mẽ àhpumunh tỳx kêt pyrãk o na htem htỳx ri amnhĩ nhĩpêx o pa pyrãk. Nẽ Krisja hihtỳx o pika piitã hkôt pahi piitã mẽ hakrenh par kumrêx. Nẽ hi-

htỳx o kot pika piitã hkôt mẽmoj piitã mẽ hakrenh par. Jakamã mẽhõ koja we tanhmã kot amnhĩ nhĩpêx to hã kãm karõ rỳ kãm hamaxpêr gõ? Nà amrakati kumrêx. Ra kot ã amnhĩ nhĩpêx anhỳr rãhã nẽ pa ho pa xwỳnh kênã. Nẽ hihtỳx o hihtỳx rãhã nẽ pa ho pa xwỳnh. Nẽ àhpumunh o àhpumunh rãhã nẽ pa ho pa xwỳnh. Nẽ hihtỳx o kot jar pika ja kôt mẽ pajakrenh par nẽ hihtỳx o Tirtũm nhõ krĩ kamã mẽ mẽmoj piitã hakrenh par. Tã koja mẽmoj piitã ho amnhĩptãr rãhã htĩr tũm nẽ pa ho pa.

Kris te kêp mẽ pahkrã pyrãk ã harênh

Rõmãn 12.4; Wam Korĩt 12.12; Epes 4.16; Korosê 3.25

²² Na pre Tirtũmja Kra Kris nhĩhkram mẽmoj piitã haxãr pa. ỳ hã kot nhỹrmã ho amnhĩptãr o pa kaxyw. Jakamã kot mẽ pahto amnhĩptãr xwỳnh ã kêp mẽ panhõ Pahihti. Nẽ te kêp mẽ pahkrã pyrãk. Nẽ mẽ papajaja te mẽ pahpê ã pyrãk jakamã na pu htem hkôt ri amnhĩ nhĩpêx o papa. ²³ Na hte mẽ panhĩja mẽ pahkrã kamã mẽ pajamaxpêr xà hkôt tanhmã amnhĩ nhĩpêx to. Ja pyrã nẽ na pu htem mẽ pahkrã pyrãk xwỳnh Krisja kapêr ma nẽ hkôt tanhmã ri amnhĩ nhĩpêx to ho ri papa.

Koja mẽhõ ãm hkrã pix nẽ ã hkêt nẽ pa hāmri nẽ mex kêt nẽ. Na htem hkrã nẽ mãänên ã nẽ pa nẽ mex nẽ. Ja pyrã nẽ na hte Kris mẽ pahte hkôt amnhĩ nhĩpêx o papa hã mẽ pahpumu nẽ hkĩnh nẽ mex nẽ pa. Pu mẽ pajaxwỳja hkôt ri amnhĩ nhĩpêx ã amnhĩ pumu nẽ pahkĩnh nẽ pamex nẽ papa ho papa.

Tanhmã Tirtũm kot mẽ pahto hkra hto ã harênh

Wam Korĩt 6.11; Xitre 2.11-3.7

2 Nẽ amnepê mã na pu pre htem Tirtũm kaxã ã tanhmã amnhĩ tomnuj to ho ri papa. ² Nẽ jar mẽ kot amnhĩ nhĩpêx o amnhĩ nhĩpêx. Jao amnhĩ tomnuj pix o ri papa. Nẽ mẽkarõmnuti nhõ pahi Satanasti kapêr kôt pix mã ri amnhĩ nhĩpêx rãhã nẽ. Na pre hte tanhmã mẽ pahkôt mẽ pahto ho pa. Mẽ pahte tanhmã amnhĩ tomnuj to kaxyw mẽ pamã mẽ pajamaxpêr punuj jagjê. Pu mẽ amnhĩ tã omunh kêt tã ỳ hã amnhĩ tomnuj o papa. Satanastija kêp mẽ kot Tirtũm kapêr kwỳm ri amnhĩ nhĩpêx o mẽ pa xwỳnhjê nhõ pahihti na. Tã pu pre htem pahtỳx ri hkôt amnhĩ nhĩpêx pix o ri papa. ³ Mẽ pahpiitã tanhmã amnhĩ tomnuj to hprãm xà hkôt pix mã tanhmã amnhĩ nhĩpêx to. Nẽ mẽmoj punuj kukamã pajamaxpêr nẽ ra hkôt ã amnhĩ tomnuj anê. ã na pu prem mnhĩ nhĩpêx anê nhũm Tirtũm ja hã mẽ pahpumu nhũm ja kãm mex kêt nẽ. Jakamã nhũm tee ri mẽ pakukamã hamaxpêr nẽ hamaxpêr o:

—Hêxta waa nẽ. Na htem ixkapêr kwỳm ri tanhmã amnhĩ tomnuj to rãhã ho pa. ã mẽ kot amnhĩ nhĩpêx anhỳr o mẽ pa xwỳnhjaja koja mẽ nhỹrmã ixri htĩr tũm nẽ mex nẽ pa ho pa hkêt nẽ. Ixkĩnhã mẽ kot amnhĩ tomnuj xwỳnh jakamã tanhmã kot mẽ amnhĩ to nẽ ixri htĩr tũm nẽ pa ho pa? Nà mẽ kot amnhĩ tomnuj mỳrapê koja mẽ nhỹrmã ma amnhĩ xà htỳx kamã hamak tũm xàta wỳr ma hapêx pa. Nà koja mẽ anê.

Hêxta waa nê. Inhmã ma hwÿr mē pa prãm kêt tã ra ma hwÿr mē pa kaxyw.

Anhÿr o hamaxpēr. ⁴ Nê amnepēm kormã mē pahte amnhĩ tomnuj o papata ã te mē pahte amnhĩ xà htÿx kamã pajamak tũm xà hwÿr pryta ã mē papa pyrãk. Nom Tirtũm kãm mē pajapê nê mē pakamã ukapřĩ jakamã na pre mē pahto mex rax nê. Nê akupÿm Kris o htĩrja ri te ra mē pahte amnhĩ xà htÿx kamã pajamak tũm xà hwÿr pryta nê mē pahto ujanãr pyrãk o mē panhĩpêx. Mē pakamã ukapřĩ nê kãm mē pajapê ho ã mē panhĩpêx anê. Amarĩ ã mē panhĩpêx anê nê mē panê mē pahte amnhĩ tomnuj rênh pa. Jakamã kot puj mē pahte Kra hkôt amnhĩ xunhwÿr xwÿnhjaja nhÿrmã amnhĩ xà htÿx kamã mē hamak tũm xàta wÿr papa hkêt nê. ⁶ Ra Tirtũm akupÿm Jejus Kris o htĩr jakamã te ra Jejus kôt akupÿm mē pahpê hkwÿjê ho mē pahřĩr pyrãk. Jakamã te ra õ krĩ kamã řhkô hã mē pamex kumrêx nê pahkrĩ pyrãk. ⁷ Mëmo kaxyw na pre Tirtũm kãm mē pajapê hkôt ã mē pahwÿr Jejus Kris mênh nhũm mē panê htyk anê? Nã kãm mē pajapê htÿx ã mē pahte pahpřĩ hã amnhĩ tã omunh kaxyw na pre ã mē pahwÿr mênh anê. Tã kot puj mē nhÿrmã kaxkwa kamã hwÿr pøj nhũm mē pamã amnhĩ jarênh o:

—E mē amnê ixpumu. Inhmã mē ajapê htÿx jakamã na pa pre mē akamã ixukapřĩ xaj ma mē awÿr Ixkra Jejus Krisja mē nhũm amnhĩ grônh kôt mē awÿr wrÿ nê mē anê ty. Inhmã mē ajapê htÿx jakamã na pa pre ã mē awÿr mênh nhũm mē anê htyk anê. Inhmã mē apê ixkrajê japê xaj na pa pre ã mē ato mex rax anê.

Anhÿr o mē pamã kapêr hãmri nê mē pahto mex rãhã ho pa. ⁸ Xà na pu prem pahpê hkra hprãm xaj amnhĩ krã hkôt mē papamjaja kãm tanhmã amnhĩ to mex to nê kãm:

—E kwa Tirtũm. Na pa ã amnhĩ to mex anê nê ã amnhĩ to mex anê. Jakamã kwa ja hã ixpumu nê ixto akra nã?

Anhÿr o na pu prem amnhĩ to kuwÿ? Nã na pu prem ã amnhĩ to hwÿr anhÿr kêt nê. Na pu prem amnhĩ kaxyw hkôt pajamexpēr nê hkôt amnhĩ xunhwÿ nhũm ja pix ã mē pahpumunh kôt mē panê mē pahte amnhĩ tomnuj rê nê mē pahto hkra. Kãm mē pajapê nê mē-moj to mē pakutã nojarêt rãhã ho pa jakamã na hte ã mē panhĩpêx mex anê. Jakamã na pu htem amnhĩ tã omu nê pajamexpēr o:

—Nã na xep hte Tirtũmja mē pahte tanhmã amnhĩ nhĩpêx to ho papa hã mē pahpumunh kôt mē pahto hkra hkêt nê. ãm mē pahte amnhĩ kaxyw kãm pajamexpēr ã mē pahpumunh kôt pix mã na hte mē pahto hkra. Anê.

¹⁰ Nê Tirtũm tapxipix na hte tanhmã mē pahto pu mē amnhĩ to mex rãhã ho papa. Nom kormã kot mē pahto hkra hkêt ri na pu prem ã amnhĩ nhĩpêx anhÿr kêt nê. Tã Jejus Kris kôt amnhĩ xunhwÿ nhũm Tirtũm ja hã mē pahpumu nê mē pamã mē pahte amnhĩ nhĩpêx nyw jagjê pu mē ŷ hã tãm amnhĩ nhĩpêx o ri papa. Amnepēm tanhmã kot mē pakukamã hamaxpēr to xà hkôt. No na hte tanhmã mē pahte amnhĩ krã hkôt

amnhĩ nhĩpêx to hã mē pahpumunh kôt mē pahto hkra hkêt nê.

Tirtũm krajaja te kot axpên to htõ nê htõx pyrãk

Karatas 3.28; Korosê 1.21-23

¹¹ E mē apê Ijaew kêt xwÿnhjaja. Na ka htem mē akatorxã nhõhy rũm ajapøj hãmri nê mē ixpê Ijaew pyrã nê amnhĩ my kwřÿt kã jakãr kêt nê. Jakamã na pre ixkwÿjaja mē akurom amnhĩ jakãr ã amnhĩ to jarkrar o ri pa nê amnhĩ jarênh o:

—Ra mē ixte amnhĩ my kwřÿt kã jakãr ã mē ixpumunh kôt na hte Tirtũm mē ixto hkra. Tã Ijaew kêt xwÿnhjaja kot mē ixkĩnhã amnhĩ jakãr kêt jakamã mē kêp hkra hkêt. Nê mããnen mē kêp mē pahkwÿ hkêt.

Anhÿr o mē ajarênh o pa. ¹² ãm hãmri na prem mē apê mē ixkwÿ hkêt ã mē ajarê. Na pa prem mē akurom amnhĩ my kwřÿt kã jakã nê mē akurom Kris kamã ijamak o ri ixpa. Jakamã nhũm Tirtũm kot mē ixto mex ã amnhĩ jarê pa mē mē apyrã nê tee ri amnhĩ kukamã ijamaxpēr o ri ixpa hkêt nê. Nê mē akurom amnhĩ kaxyw Tirtũm mã ijamaxpēr. Nã ãm hãmri na prem mē apê mē ixkwÿ hkêt ã mē ajarê. ¹³ Te Tirtũm kãx ã ri mē apa pyrãk tã ka mē arĩ ã amnhĩ nhĩpêx anhÿr kêt nê.

Jejus Kris kot mē panê htyk nhũm mē ate hkôt amnhĩ xunhwÿr jakamã ra mē apê hkwÿÿ. Jao arĩ hkãx ã ri apa hkêt nê. Te mē ixpê Ijaew kwÿ pyrã nê hpãnhã kuri ra ri apa pyrãk. ¹⁴ Jakamã na pu htem Kris kukwak ri ra axpên nhĩpêx nyw o axpên nhĩpêx o ri papa. Mē ixpê Ijaewjaja nê mē apê Ijaew kêt xwÿnhjaja na pu htem te ra ixkre tipxi kamã ri papa pyrãk. Nom amnepēm na pu prem ã axpên nhĩpêx anhÿr kêt nê. Mē pahte amnhĩ nhĩpêx tũmja ahpÿnhã na pre. Na pu prem pamã axpên kurê nê axpên kãx ã ri papa. Nê nhÿri axpên pumu nê te pahte axpên pumunh kêt pyrã nê nhãm parĩt o ri mra. Tã nhũm Kris mē panê htyk o mē pahte amnhĩ tomnuj piitã hpãnhã amnhĩrer pa. Mē ixpê Ijaew nê mē apê Ijaew kêt xwÿnhjaja. Nê htyk o te ra kot mē pahte axpên nhõrkwÿ hwÿr axpên wÿr o papa pyrãk. Jao mē pamã axpên kurê ho hapêx nê hpãnhã tãm axpên kaxyw mē paxunhwÿ pu mē hpãnhã axpên to mex rãhã ho ri papa. ¹⁵ Amnepēm Mojes kot Tirtũm nhÿ hã mē ixpê Ijaew mē ixte tanhmã amnhĩ nhĩpêx to ho ixpa hã karõja. Na pa prem mē apê Ijaew kêt xwÿnhjaja mē ate Tirtũm kôt amnhĩ nhĩpêx kêt ã mē apumu nê mē akamã inhgryk nê. Nê axpên mã mē ajarênh o:

—Nã mē pahkĩnhã mē kot Mojes kapêr kôt amnhĩ nhĩpêx kêt jakamã koja Tirtũm mē ho hkra hkêt nê.

Anhÿr tã nhũm Kris mē pahwÿr wrÿ nê mē pahpiitã mē panê htyk o mē pahte hkôt amnhĩ xunhwÿr ã mē pahpumunh kôt pix mã mē pahto Tirtũm kra. Jakamã pa mē axte mē ate Mojes kapêr kôt amnhĩ nhĩpêx kêt ã mē apumunh kôt mē apê Tirtũm kra hkêt ã mē ajarênh kêt nê. Hãmri nê mē ixpê Ijaew nê mē apê Ijaew kêt xwÿnhjaja pu mē axte axpên kãm pagryk o ri papa hkêt nê. Ra te ixkre tipxi kamã mē pahte axpên kôt ri papa pyrãk.

¹⁶ Kris na pre pĩ kahpa hã mē panê htyk o ã mē panhĩpêx anê nê mē pahte axpên kôt amnhĩ nhĩpêx o pa-

pa kaxyw më paxunhwÿ. Nom Tirtüm jamaxpër xà hkôt ã më panhîpêx anê. Jakamã na pu htem arî pamã axpên kurê ho papa hkêt nê. ¹⁷ Na pre Kris më pahwÿr wrÿ nê ã më panhîpêx anê. Më apê Ijaew kêt xwÿnhjaja më ate kormã Tirtüm kapêr mar kêt xwÿnhjaja nê mãânên më ixpê Ijaew më ixte kapêr mar mex xwÿnhjaja nhüm pre akupÿm tãm më pahte axpên kôt amnhî nhîpêx o papa kaxyw më paxunhwÿ. ¹⁸ Hämri nhüm Tirtüm më pahwÿr amnhî Karö rê nhüm më pahkarö mã agjê. Kris kukwak ri pix mã më pahwÿr kurê pu më ý hä paxàmnhîx ri kãm tanhmã amnhî jarênh to ho ri papa. ¹⁹ Hämri nê te më pahpê nhãm axpên kaxyw më urojê pyrã nê axpên kàx ã ri papa hkêt nê.

Te më pahpê Tirtüm nhörkwÿ pyrãk ã më pajarênh

Wam Korît 3.16; Sikün Korît 6.16; Wam Pêtre 2.5

²⁰ Nê më pahpê Jejus kwÿ jakamã te më pahte ixkre tipxikamã ri papa pyrãk. Nê te më pahpê ixkre nhîpêx mex pyrãk. Nê Kris te kêp ixkre hkrax mã kuhê xà nê kÿxpê kãm nör xà maatija pyrãk. Nê më kot Jejus nhÿ hä më ahkre xwÿnhjaja nê më kot Tirtüm nhÿ hä kapêr o ri më pa xwÿnhjaja te më kêp ixkre nhökwa êja pyrãk. Nê më papajaja te më pahpê ixkre nhîmök ã pöja pyrãk. ²¹ Ixkre mã kuhê xà nê kÿxpê kãm nör xà maati kukwak ri pix mã na hte ökwa ê nê hä pöja kÿxpê mex nê axpên tã harir. Ja pyrã nê ãm Kris kukwak ri pix mã na pu htem te ixkre tipxi kamã ri papa pyrãk o axpên nhîpêx mex o ri papa. Te më pahpê më kot ixkre rax kumrêx nhîpêx o mör nhüm muxre nê ãm xwÿnhhta pyrãk.

²² Na htem amnhîm örkwÿ nhîpêx nê hipêx pa nê hwÿr agjê nê kamã pa ho pa. Ja pyrã nê na hte Tirtüm Karöja më pahpê hkrajê karö mã agjê nê më pakamã pa ho pa. Te më pahpê Tirtüm nhörkwÿ pyrãk. Më ixpê Ijaew nê më apê Ijaew kêt xwÿnhjaja Tirtüm mã te më pahpê örkwÿ pyrãk.

Pawre kot Ijaew kêt xwÿnhjê mã mëmoj to amnhîrît ã harênh

Römãn 15.14-21; Korosê 1.24-29

3 Tã te më pahpê Tirtüm nhörkwÿ pyrãk jakamã na pa hte jar më hagjênh xà kamã më ato hwÿr rãhã ho ixkrî. Na pa pre hte ma më apê Ijaew kêt xwÿnhjê hwÿr ixpa nê ixprî hä më amã Jejus kapêr jarênh o ri më akôt ixpa. Mÿrapê na prem ixpynê nê ijaxà pa arî jar ixkrî ho ixkrî. Nom arî amnhî kaxyw Tirtüm mã ijamaxpêr tÿx pê më ato hwÿr rãhã ho ixkrî. ² Na pre kãm ijapê hä më apê Ijaew kêt xwÿnhjê kaxyw ixãm. Ma ixte ri më akôt ixpa nê më amã kapêr jarênh o ri më akôt ixpa kaxyw. Ra më ate ja hä ijarênh mar mex. ³ Na pre më pahto hpimràätã tanhmã më pahto mex to hä inhmã amnhî to amnhîrît pa pre omu. Më kajaja nê më pajaja. Pika piitã hkôt më piitãã tanhmã më ho mex to. Na pre kormã kot mëhõ mã ja jarênh kêt tã inhmã ho amnhîrît pa pre omu. Tã kagà ja kamã kot paj më amã hkwy ho grêre nê ho amnhîrît nê më amã hä kagà ka më ixpyrà nê kamã harê nê ama. ⁴ Jao aprî hä mar mex nê. ⁵ Amnepê m më pahkêt ri më pa xwÿnhjê mã

Tirtüm kot ja ho amnhîrît kêt tã nhüm Karö më ixkwÿjê kumrêx mã ho amnhîrît. ý hä kapêr o ri më pa xwÿnhjê më më ixpê Jejus nhÿ hä më ajahkre o më ixpa xwÿnhjê kumrêx mã ho amnhîrît. Më ixte kãm tanhmã amnhî nhîpêx to ho ixpa xwÿnhjê mã ho amnhîrît pa prem omu. ⁶ Na pre më inhmã tanhmã më ato amnhîrît to pa prem ja hä më apumu nê më akukamã ijamaxpêr o: —Nà ãm hämri koja xep Ijaew kêt xwÿnhjaja më ixpê Ijaew pyrã nê Tirtüm kapêr ma nê Jejus Kris kôt amnhî xunhwÿ nhüm Tirtüm ã më kot amnhî nhîpêx anhÿr ã më omu nê më ixpyrà nê më ho hkra nê më ho mex o pa. Anê.

⁷ Tã nhüm Tirtümja më awÿr inhmê. Ixte më amã ja jarênh o ri më akôt ixpa nhüm tokyx më ate mar kaxyw. Na pre ixto mex nê kãm hprãm xà hkôt më akaxyw ixãm nê ixte ý hä kãm tanhmã amnhî nhîpêx to ho ixpa kaxyw ixto ixihtÿx nê më awÿr inhmê. ⁸ Tã to kaxyw na pre më akaxyw ixãm? Te ixte ja kaxyw inhmê kêt pyrãk. Ixkwÿjaja ja kaxyw mex o kot ijakrenh tã nhüm pre ixpumu nê tanhmã hamaxpêr to nê më akaxyw ixãm nê më awÿr inhmê. Ixte më amã mëmoj mex kumrêx jarênh o ri më akôt ixpa kaxyw. Na pre inhmã:

—Kêr ka ma Ijaew kêt xwÿnhjê hwÿr mõ nê më kãm Jejus Kris kapêr jarênh o ri më hkôt apa. Nê më kãm: “Kot kaj më Jejus Kris kôt amnhî xunhwÿ hämri nê kukwak ri amex nê apa.” Anê. ⁹ Koja më apê Ijaew kwÿjê pyrã nê amnhî kaxyw Ixkra Kris kôt hamaxpêr nê hkôt amnhî xunhwÿ pa hä më omu nê më ho ixkra. Kormã aa ixte më kãm ja hä amnhî to amnhîrît kêt tã pa akumrêx mã harê. E ma më hkôt ri më kãm ã ijarênh anhÿr o ri apa kê më ijarênh ma.

Anhÿr o më pahto kator xwÿnh maatija inhmã kapêr. ¹⁰ Tã mëmo kaxyw na hte më pahto hpimràätã më pahto hkra? Nà kaxkwa kamã kapêr o më wrÿk xwÿnhjê pytàr xwÿnhjaja nê mëkarömnuti kot më pahte amnhî nhîpêx nyw o papa hä më pahpumunh kôt axpên mã tanhmã Tirtüm jarênh to kaxyw. Nê harênh o:

—Kokÿÿ. Tirtüm àhpumunh tÿx o àhpumunh tÿx jakamã na hte tanhmã më hipêx to nhüm më tãm amnhî nhîpêx mex o pa. Nà Tirtüm àhpumunh o àhpumunh nê hihtÿx o hihtÿx. Anê.

Koja më ate amnhî to mex o apa hä më apumu nê ã axpên mã Tirtüm jarênh anê.

¹¹ Amnepê m kormã mëmoj kêt ri na pre Tirtüm më pakukamã më pahtã tanhmã amnhî jarênh to hämri nê Jejus kukwak ri ã më panhîpêx anê. Jao më piitã më kãm àhpumunh o àhpumunh ã amnhî to amnhîrît.

¹² Tã pu më ra Jejus kukwak ri amnhî kamã pamã Tirtüm puma hkêt nê. Kãm më pajapê kênã kot pu kêt më ri amnhî kamã pamã uma ho papa. Kot puj më paxàmnhîx ri kãm amnhî jarênh rãhã ho ri papa. Te ra pahte hwÿr paxàpir nê pano ho omunh nê kãm pakapêr o pakuhê pyrãk. ¹³ Jakamã kwa kêr ka më kot më atã tanhmã ixtomnuj to hä ijarênhja ma nê tee ri ixkukamã ajamaxpêr hkêt nê. Kwär më mämri tanhmã inhîpêx to. ãm ixte më amã amnhî jarênh ma nê axpên mã ijarênh o:

—Hêxta waa nê. Mãn Pawre kãm mẽ pajapê hã na pre amnhĩ grõnh kõt mẽ pamex kaxyw mẽ pahwÿr mra nê mẽ pamã Tirtũm kapêr jarênh o pa. Mẽ kot ja hã tanhmã hipêx kati hto htã nhũm jam urer kêt nê. Anê.

Kris kãm mẽ pajapê kamã tanhmã mẽ panê amnhĩ nhĩpêx to

Juãw 3.16; Wam Juãw 3.1

¹⁴ Nê na pa hte mẽ ato Mẽpanhĩpêxã maati hwÿr kãm ixihtÿx o ixpa. ¹⁵ Kêp mẽ pahte hkõt amnhĩ xunhwÿr xwÿnhjê nõ Pahi Maati mex kumrêx na. Kra hk-wÿjaja ra kaxkwa kamã kuri htĩr tũm nê pa ho pa nê arĩ pyka ja kamã mẽ pahpê hk-wÿjaja kormã jar papa. Nom te mẽ pahpiitã mẽ pahte ixkre tipxi kamã Tirtũm kõt ri papa pyrãk. ¹⁶ Jakamã na pa hte mẽ ato hwÿr o:

—Pa Tirtũm. Nã amex o amex. E ot pa Epes nõ xwÿnhjê ho awÿr o ixkrĩ. Kwa kê Akarõ mẽ kãm axãhpumunh xã hk-wÿr gõ kê mẽ akõt ri amnhĩ nhĩpêx rãhã ho pa.

¹⁷ —Nê kê mẽ amnhĩ kaxyw Kris kõt hamaxpêr tÿx o pa. Te mẽmo pĩ hpãr jarê kot pika kaxwÿnh kãm pimãnh nê pika jamÿnh tÿxta pyrãk. Nhũm kók xãpêr tÿx tã tee kot kãm mẽnh prãmta pyrãk. Kê mẽ pĩ hpãr jarê kot pika jamÿnh pyrã nê kãm axpên kĩnh o pa. Jao mẽmoj to axpên kutã nojarêr rãhã ho pa.

¹⁸ —Nê kê krĩ piitã hkõt mẽ akrajê pyrã nê amnhĩ tã Kris kãm mẽ hapê htÿx o mẽ hapê htÿx ã amnhĩ pumu. Jao urãk nê mẽ kãm axpên kĩnh tÿx o pa. Nê kê mẽ ate amnhĩ nhĩpêx pix o amnhĩ nhĩpêx rãhã ho pa. Nê ajamaxpêr pix o hamaxpêr rãhã ho pa. Jao te mẽmo pĩ hpãrta pyrã nê akõt hihtÿx nê. Anê.

²⁰ Kot puj mẽ ã amnhĩ to Tirtũm wÿr anê nhũm mẽ pama nê ra ãhpumunh tÿx xã ho ã mẽ panhĩpêx anê. Ra kot mẽ pakamã pa ho pa kênã. ²¹ ã Tirtũm Jejus Kris kukwak ri mẽ pahpê hkrajê nhĩpêx anhÿr jakamã kwa pu mẽ pahpê hkra xwÿnhjaja kêr pu mẽ kãm mex o mex ã harênh rãhã ho papa. Nã kot puj mẽ ã kãm anhÿr o papa.

Te ixkre tipxi kamã axpên kõt ri mẽ papa pyrãk

Rõmãn 15.5; Piripos 2.1-4; Korosê 3.12-17; Wam Pêtre 3.8

4 Nê ra mẽ kot Kris ã ijaxãr nhũm ixkrĩ htã pa ã inhmã mẽ akĩnh xaj mẽ amã ixkapêr nê hã kagã anhÿr o ixkrĩ. Kwa kêr ka mẽ Tirtũm kot amnhĩ nhĩpêx kõt amnhĩ nhĩpêx mex rãhã ho ri apa. Ja kaxyw na pre amnhĩ kõt mẽ awÿr ka prem hkõt amnhĩ xunhwÿ.

² Nê kêr ka mẽ amã amnhĩ to rax o akwÿjê jakrenh prãm o ri apa hkêt nê. Nê mẽ agryk tokyx anhÿr kêt nê. ãm axpên kãm axukaprĩ pix o mãn ri axpên kõt apa. Kê mẽhõ tee tanhmã ri mẽ ato htã ka mẽ kamã agryk tokyx anhÿr kêt nê. ãm mẽ amã ri axpên hkĩnh pix o mãn ri axpên kõt apa. ³ Ra Tirtũm Karõ kot mẽ pahkarõ mã gjêx par jakamã te mẽ pahte ixkre tipxi kamã axpên kõt ri mẽ papa pyrãk. Jakamã kêr ka mẽ axpên to mex pix kukamã mãn kêt ajamaxpêr o ri axpên kõt apa. Nê tãm axpên nhĩpêx. Jao ajamakêtkati nê axãmnhix ri axpên kõt ri apa ho apa. ⁴ Te mẽ pahte

ixkre tipxi kamã ri axpên kõt papa pyrãk jakamã mẽ pahpiitã mẽ pahkarõ kamã Tirtũm Karõja hkrĩ ho hkrĩ. Jakamã kot puj mẽ nhÿrmã ma õ krĩ hwÿr api nê kamã mẽ mẽ pamex rãhã papa ho papa.

⁵ Nê mẽ panhõ Pahihtija ãm pixii. Na pu prem pahpiitã amnhĩ kaxyw hkõt pajamaxpêr jao ra mẽ pahpê hkraa. Tã mẽ pahpê Kris kwÿ hã amnhĩ to amnhĩrit kaxyw na prem Tirtũm mã mẽ pahkrã kumrã. ã mẽ panhĩpêx anhÿr o axpên pyrãk o mẽ panhĩpêx o pa anê.

⁶ Nê Tirtũm haxwÿja ãm pixii. Kêp mẽ pahpiitã mẽ panhĩpêxã maati na. Na hte mẽ pahpê hkrajê mã ãhpumunh xã hk-wÿr gõ pu mẽ ÿ hã kãm tanhmã amnhĩ nhĩpêx to ho papa. Nhũm hte mẽ pahkarõ kamã pa ho pa. Jakamã te mẽ pahte ixkre tipxi kamã ri axpên kõt papa pyrãk.

Kris kot ahpÿnhã tanhmã mẽ pahto mex to hã harênh

Rõmãn 12.3-8; Wam Korĩt 12.1-12; Wam Pêtre 4.10-11

⁷ Nê Tirtũm kapêr ã kagã htũm kot Kris jarênh kot: Na pre mẽ kot kutã amnhĩ xunhwÿr xwÿnhjê pytãr pa nê ma akupÿm kaxkwa hwÿr api.

Tã arĩ jar pika hkõt mẽ pahpê hk-wÿjê mã tanhmã mẽ pahto paxihtÿx to ho pa.

Na hte Krisja tanhmã mẽ pahte ahpÿnhã kãm amnhĩ nhĩpêx to ho papa kaxyw tanhmã mẽ pahto paxãhpumunh to. Kãm hprãm xã hkõt. ⁹ Tirtũm kapêr ã kagã htũm kot akupÿm kaxkwa hwÿr ãpir ã harênh. ãm tapxipix na pre ã pika hwÿr wrÿk nê akupÿm kaxkwa hwÿr ãpir anê. Na pre ty nhũm mẽ haxã. Hãmri nhũm akupÿm htĩr nê kato nê ma akupÿm api. Tapxipix na pre ã amnhĩ nhĩpêx anê. ¹⁰ Tã akupÿm kaxkwa hwÿr ãpir xwÿnhta na hte kaxkwa kamã nê pika hkõt amnhĩm mẽmoj piitã tanhmã ho ho hkrĩ. ¹¹ Na pre ahpÿnhã tanhmã mẽ pahto mex to. Ahpÿnhã mẽ pahte tanhmã kãm amnhĩ nhĩpêx to ho papa kaxyw na pre mẽ paxunhwÿ.

Nê mẽ pahkwÿjaja mẽ pahte krĩ piitã hwÿr pamrar nê ÿ hã hkrajê mã kapêr jarênh o papa kaxyw mẽ paxunhwÿ.

Nê mẽ pahkwÿjaja mẽ pahte krĩ pixi kamã Tirtũm nhÿ hã hkrajê jahkre ho ri mẽ hkõt papa kaxyw mẽ paxunhwÿ.

Nê mẽ pahkwÿjaja mẽ pahte pahprĩ hã mẽ piitã mẽ kãm tanhmã mẽ kot amnhĩ nhĩpêx to nê Jejus kõt amnhĩ xunhwÿr ã mẽ kãm harênh o papa kaxyw mẽ paxunhwÿ.

Nê mẽ pahkwÿjaja mẽ pahpê pastõ kaxyw mẽ paxunhwÿ.

Nê mẽ pahkwÿjaja mẽ pahte mẽ kãm Tirtũm kapêr ã kagã jarênh o mẽ ahkre ho papa kaxyw mẽ paxunhwÿ.

¹² ã kot puj mẽ pahpiitã ahpÿnhã Kris mã tanhmã amnhĩ nhĩpêx to ho ri papa anê. Kot puj mẽ ã mẽ hipêx anhÿr o ri papa nhũm mẽ pamar tÿx nê. Nê gaa nê mẽ pahpyrã nê Tirtũm mã amnhĩ nhĩpêx mex o pa. Pu mẽ pahpiitã hkõt amnhĩ nhĩpêx mex o papa. ¹³ Nê gaa nê mẽ pahpiitã mẽ pahpê Tirtũm kra hã Jejus kot amnhĩ

nhípêx kôt omunh mex nê. Nê amnhî kaxyw hkôt paja-maxpêr tÿx nê. Jao te ra hkôt mê paxàptàr mex pyràk. Nê te kot amnhî nhípêx pyràk o amnhî nhípêx.

¹⁴ Mèhprírejaja na htem nhâm hamaxpêr nê nhâm hamaxpêr o pa. Te kòk xàpêr nê nhâm mëmoj to mrar nê nhâm mëmoj to mrar pyràk. Nom kêr pu mê ho mê uràk kêt nê. Æm Kris kôt pix mã pajamaxpêr tÿx o pa-pa. Jakamã nhùm mê tee ri mê pahte hkwyòm ri tanhmã amnhî tomnuj to hprãm xàj tanhmã mê pahto kaprÿ. Nom kêr pu mê mê mar kêt nê. Æm pakatàt kôt mê àptàr kot amnhî nhípêx o amnhî nhípêx o papa. Jao Kris kôt axpên to paxihtÿx o papa. ¹⁵ Tãm axpên mã pakapêr nê pamã axpên kính o axpên mã paxêx kêt nê. Kwa kêr pu mê ã amnhî nhípêx anhÿr o mãn papa. Jao te mê pahkrã Kris kot amnhî nhípêx pyràk o amnhî nhípêx mex o mō.

¹⁶ Nê mê panhî kamã tanhmã mê pakuteja piitã na hte mê pahkrã kamã mê pajamaxpêr xà hkôt axpên kôt ahpÿnhã tanhmã axpên to ajuta hto. Te ixkre pixi kamã mê pahte axpên kôt tanhmã axpên to ajuta hto ho ri papa pyràk.

Kris kôt mê pahte amnhî nhípêx nyw ã mê pamã karō
Korosê 3.5-11; Wam Pêtre 4.7

¹⁷ E kot paj Pahihti nhÿ hã mê amã mëmoj jarê nê nê mê amã ixkapêr kãm ixihtÿx nê ka mê inhma. Nà kêr ka mê axte mê kêp Tirtùm kra hkêt xwÿnhjê kot amnhî nhípêx o amnhî nhípêx o ri apa hkêt nê. Na htem htÿx ri tanhmã hamaxpêr punuj to ho ri amnhî tomnuj o pa. ¹⁸ Jao Tirtùm mã hamaxpêr kêt nê pa. Kãm hamaxpêr prãm kêt kumrêx nê pa. Te mê kot omunh nê nhâm hkrã pyràk o amnhî nhípêx. Rÿ te mëhō wa kot axpên kãm gryk kãm axpên nhípêx pyràk o hipêx. Jao te kamàt kō kamã ri pa pyrã nê Tirtùm kot amnhî nhípêx pumunh kêt nê pa. Jakamã koja mê nhÿrmã kuri htír tùm nê pa hkêt nê. ¹⁹ Na htem tanhmã amnhî tomnuj to htã amnhî kamã hpijaàm kêt nê pa. Nê axpên kamã hpijaàm kêt rãhã ho pa. Æm amnhî pix kukamã hamaxpêr nê tanhmã amnhî tomnuj to ho ri pa. ²⁰ Nom Jejus Krisja ã kot amnhî nhípêx anhÿr kêt. Mê kurom tãm kot amnhî nhípêx mex o pa xwÿnh nê tãm kapêr o pa xwÿnh na. Na pa pre ma mê awÿr mō nê ixprí hã mê amã ja hã harê ka prem inhma nê inhmar tÿx nê. ²² Na pa pre mê amã:

—Kwa mê ri axte amnhî nhípêx tùm kôt amnhî nhípêx o ri apa hkêt nê. Ja na omnuj tÿx. Na ka prem ã amnhî nhípêx anê nê ajamaxpêr punuj pix o ri apa. Jao amnhî tomnuj rãhã nê. Tã kêr ka mê amnhî nê awry hã mënh pyrã nê axte ã amnhî tomnuj anhÿr o ri apa hkêt nê.

²³ —Nê kêr ka mê axte mê ajamaxpêr tùm nê mê ate amnhî nhípêx tùm kôt ri amnhî nhípêx kêt nê. Nê mê ajamaxpêr nyw nê mê ate amnhî nhípêx nyw kôt pix mã ri amnhî nhípêx o ri apa. Te mê kot mê ê htùm kwrynh nê rênh nê hpãnhã nyw jagjêx nê ri hã pata pyrã nê ãm amnhî nhípêx nyw kôt pix mã amnhî nhípêx o ri apa. ²⁴ Mê ajamaxpêr nyw nê mê ate amnhî nhípêx nywja axtem na. Te Tirtùm jamaxpêr nê kot

amnhî nhípêxta pyràk. Jakamã kwa kêr ka mê kãm hprãm xà hkôt pix mã tanhmã amnhî nhípêx to ho ri apa. Jao kãm amnhî nhípêx mex o ri apa. Nê kapêr kôt ri amnhî nhípêx. Anê.

Na pa pre ã mê amã ixkapêr anê. Tã kêr ka mê arí ixkapêr kôt pix mã amnhî nhípêx. ²⁵ Mê pahpê Kris nhí jakamã te pahte ixkre htipxi kamã axpên kôt amnhî nhípêx pyràk jakamã kwa mê axte axpên mã mëmoj to axêx kêt nê. Nê amarí axpên xō ri axpên mã mëmoj to axêx kêt nê. Æm tãm axpên mã mëmoj jarênh o ri apa.

²⁶ Nê kot kaj mê mëmoj tã agryk japêr. Rÿ mëhō kamã agryk rÿ amarí agryk japêr. Tã kêr ka ho ajapêx tokyx anê agryk japjê hkêt nê. Kêr kê kormã kamàt kêt ri ka akupÿm tãm akrã nhùm ja amã mex nê. ²⁷ Nom kot ka mê arí kamã agryk o ri apa nhùm mëkarōmnuti nhō pahi Satanastija ja hã mê apumu nê te mê ate amnhî tomnujta ã mê apynênh pyràk o mê anhípêx. Ka mê ra hkôt tanhmã amnhî tomnuj to. Ja pymaj kêr ka mê agryk japjê hkêt nê. Satanasti kãm hprãm xà hkôt ã amnhî nhípêx anhÿr kêt nê.

²⁸ Nê mê axàhkính o mê apa xwÿnhjaja kêr ka mê axte mê kêp axàhkính hkêt nê. Mëmoj tã apê nê hpãnhã kàxpore jamÿ nê ho amnhim awjaprō. Nê mê kêp amrakati xwÿnhjê mã mëmoj japrōr o ri apa. Kêr ka mê ate amnhî nhípêx tũmta pãnhã ã amnhî nhípêx nyw o amnhî nhípêx anhÿr o ri apa.

²⁹ Nê kêr ka mê amã axpên kính kamã tãm axpên mã akapêr o ri apa. Nê akapêr mã agêt kãm ri axpên mã akapêr kêt nê. Æm axpên mã akapêr mã aprí ho axpên mã akapêr. Nê mê amã axpên kính nê mê amã axpên to mex pix prãm xàj tãm axpên mã ri akapêr o ri apa.

³⁰ Tirtùm na pre mê pahwÿr amnhî Karō rē nhùm mê pahpê hkra hã mê pahkarō mã agjê nê mê pakamã hkrí ho hkrí. Koja mê pakamã hkrí ho hkrí rãhã nhùm nhÿrmã Tirtùm amnhî wÿr mê pahto api pu mê kuri pahtrí tùm nê papa ho papa. Jakamã kwa kêr ka mê tanhmã amnhî tomnuj to ho amnhî kamã Tirtùm Karō mã hkaprí jagjênh kêt nê. Nê kãm hpijaàm jagjênh kêt nê. Koja mê pahte amnhî tomnuj ã mê pahpumu nê mê pahkaga hkêt tã tee ri ja hã mê pahpumu nê hkaprí nê. Jakamã kêr pu mê ãm kãm hprãm xà hkôt pix mã tanhmã ri amnhî nhípêx to ho ri papa.

³¹ Nê kêr ka mê axte ri axàhkurê ho ri apa hkêt nê. Nê agryk kãm axpên mã tanhmã akapêr punuj to hkêt nê. Rÿ axpên japrÿ ho ri apa hkêt nê. Nê atÿx ri axpên tã apêr o apikênh kêt nê. Nê ri axpên tã mê kãm axàmnênh kêt nê. ³² Kêt mê ãm axpên to mex pix nê axpên kãm axukaprí ho ri apa. Nhùm mëhō tanhmã mê ato ka mê ãm amnhî tã omu nê tanhmã ho hkêt nê tanhmã kot atoja ho ajamakêtkati kurê kumrêx. Tirtùm na pre Kris kukwak ri mê pahte amnhî tomnuj grãnh pa nê axte kãm hamaxpêr kêt nê. Tã kêr ka mê uràk nê mëhō kot tanhmã atomnuj tota tokyx ho ajamakêtkati nê axte kãm ajamaxpêr kêt nê.

5 Nê koja mëhō kãm hkra japê nhùm amnhî tã omu nê hkính nê. Hãmri nê nhÿrmã hkra nê amnhî pyrã nê kãm hapê nê. Ja pyrã nê Tirtùm kãm mê pahpê hkwyjê japê jakamã kêr pu mê amnhî pyrã nê

pamã pahkwýjê hkính tỳx o papa. ² Kris haxwýja kãm mẽ pajapê jakamã na pre htyk o mẽ panê mẽ pahte amnhĩ tomnuj pãnhã amnhĩrer pa. Kêp Tirtũm Kra htã amnhĩ mex pix kukamã hamaxpêr kêt nê ã mẽ panê amnhĩ nhĩpêx anê. Tã ã kãm mẽ pajapê anhỹr jakamã nhũm Tirtũm ja hã omu nhũm ja kãm mex nê. Te ho mẽ hkuxwa xà mex kuxwa pyrãk. Jakamã kêr pu mẽ amnhĩ tã omu nê urãk nê pamã axpên kính o axpên to mex o mãn ri papa.

Mẽ pahte amnhĩ tomnuj kaga hã kot mẽ pamã karõ

Sikũn Korĩt 6.14-7.1; Korosê 3.16-17; Wam Juãw 1.5-10, 2.15

³ Nê mẽ pahpê Tirtũm kra jakamã kêr pu mẽ pahprõ pix tãnopxar o ri papa nê nhãm mênijê hõ kamã pahpijaãm kêt o ri papa hkêt nê.

Nê kêr pu mẽ amnhĩ pix kukamã pajamaxpêr kêt nê. ãm ja ho anhỹr hkêt kumrêx. Mẽ pahpê Tirtũm kra kênã kot pu kêt axtem nê ã amnhĩ nhĩpêx anhỹr o ri papa. Tirtũm krajaja na htem ã amnhĩ nhĩpêx anhỹr kêt nê.

⁴ Nê mãânên mẽ pakapêrja. Kêr pu mẽ ri tanhmã axpên mã pakapêr punuj to hkêt nê. Nê ri axpên japrý hkêt nê. Nê amnhĩ krã hkõt pahtỳx ri tanhmã pakapêr to hkêt nê. ãm tãm axpên mã pakapêr mex nê axpên mã Tirtũm mex o mex ã harênh o ri papa.

⁵ Nê Tirtũm kapêr kõt amnhĩ nhĩpêx kêt xwýnhjaja nê axpên kãm mẽ hpijaãm kêt xwýnhjaja nê amnhĩ pix kukamã mẽ hamaxpêr o pa xwýnhjaja. ã mẽ kot amnhĩ nhĩpêx anhỹr xwýnhjaja kêp Tirtũm mẽ Kris wa hkra hkêt. Na htem ã amnhĩ nhĩpêx anhỹrja gryk ã wa kãm hamaxpêr kêt nê.

⁶ Nê koja nhỹrmã mễhõ mẽ awýr mỗ nê mẽ ate tanhmã amnhĩ tomnuj to prãm xàj hêx rom amã kapêr nê mẽ amã:

—Kwa mon ka hte mẽ ixpyrà nê ã amnhĩ nhĩpêx anhỹr kêt nê? Ja mex kênã. Anê.

Koja ã mẽ amã kapêr anê ka mẽ ama nê ãm ama. ã mẽ kot amnhĩ nhĩpêx anhỹr xwýnhjaja koja Tirtũm nhỹrmã ja hã mẽ homnuj tỳx kumrêx. ⁷ Jakamã kwa kêr ka mẽ ate ho mẽ kot amnhĩ nhĩpêx pyrãk pymaj mẽ hkõt ri apa hkêt nê. Kwarĩ ho kwarĩ.

Mẽ pahte amnhĩ nhĩpêx nyw jarênh

Juãw 1.4, 3.19, 8.12, 12.35; Rõmãn 13.12; Wam Tesarõn 5.5; Wam Juãw 1.5

⁸ Amnepêm kormã mẽ ate Tirtũm kõt amnhĩ xunhwýr kêt ri na ka prem te kamàt kô kamã ri apa pyrã nê atỳx ri tanhmã amnhĩ tomnuj to ho ri apa. Tã ra Jesus kõt amnhĩ xunhwý hãmri nê te hirã kamã mẽ apa xwýnh pyrãk. Jakamã kwa kêr ka mẽ hpãnhã Tirtũm kãm hprãm xà hkõt pix mã mãn ri amnhĩ nhĩpêx o apa. Ra mẽ apê hirã kamã mẽ apa xwýnh kênã. ⁹ Kot kaj mẽ ã amnhĩ nhĩpêx anê nê tãm amnhĩ nhĩpêx mex nê tãm akapêr o apa. ¹⁰ Jao Tirtũm kãm hprãm xà hkõt pix mã amnhĩ nhĩpêx o ri apa ¹¹ nê te kamàt kô kamã ri mẽ pa xwýnhjaja kot amnhĩ nhĩpêx pyrãk o amnhĩ nhĩpêx kêt nê. ã mẽ kot amnhĩ nhĩpêx anhỹr xwýnhjaja na htem hpimxur pê tanhmã amnhĩ tomnuj tỳx to ho pa. Nom

kot paj ixprĩ hã mẽ amã tanhmã mẽ kot amnhĩ tomnuj to hã mẽ harênh kêt nê. Kot pa mẽ amã harê nê ixpijaãm tỳx nê. Ixte harênh mã xwýnhja omnuju. Tã kêr ka mẽ urãk nê ã amnhĩ nhĩpêx anhỹr kêt nê. ãm mẽ noo mã tãm ri amnhĩ nhĩpêx o ri apa. ¹³ Mẽ kot ja hã mẽ apumunh nê tee ri tanhmã kot amnhĩ tomnuj to hkukamã hamaxpêr kaxyw. Jao amnhĩ tomnuj kaga japêr. ¹⁴ Te mẽ kot kanê hpõk rax kãm mẽmoj piitã omunh mexta pyrãk. Tirtũm kapêr ã kagã htũm kot ja jarênh kot:

Mẽ amã Tirtũm prãm kêt xwýnhjaja te ra mẽ atyk nê mẽ anhĩkwý pyrãk.

Nê te kamàt kô kamã mẽ anhõt nê mẽ anhĩkwý pyrãk.

Jakamã kwa te mẽ akrã hapõx nê kãnhmã mẽ akrĩ pyrãk o amnhĩ nhĩpêx nê Tirtũm kõt amnhĩ xunhwý.

Kê Kris tanhmã mẽ akrã hto ka mẽ te myt kato nhũm mẽ ate arĩgro hã ri apa pyrãk o amnhĩ nhĩpêx. Anê.

Tirtũm krajaja kot tanhmã amnhĩ nhĩpêx to hã mẽ kãm karõ

Korosê 4.5; Sikũn Ximotre 4.2

¹⁵ Nê kwa kêr ka mẽ amnhĩ pumunh mex o ri apa. Nê mẽ ri htỳx ri mẽ kot amnhĩ nhĩpêx xwýnhjê hkõt amnhĩ nhĩpêx kêt nê. Nê ãm amnhĩ to mex pix o ri apa. ¹⁶ Na htem ra Kris ã mẽ pahtomnuj o pa pu mẽ pamex kêt nê ri papa. Tã nom kêr pu mẽ apkati mẽ arĩ Tirtũm mã tanhmã amnhĩ nhĩpêx to ho papa mã panhũrer kêt nê.

¹⁷ Nê ãm Tirtũm pix mã amnhĩ jarênh o ri papa nê kãm:

—Pa Tirtũm. Inhmã akõt pix mã amnhĩ nhĩpêx prãm jakamã kwa ixte amã mẽmoj to anhỹr kaxyw ixkrãm ijamaxpêr mex jagjê nê ho amnhĩrit mex pa tanhmã amã amnhĩ nhĩpêx to ho ri ixpa.

Anhỹr o amnhĩ to kuwý. Nom kêr pu mẽ pahtỳx ri pajamaxpêr kõt tanhmã kãm amnhĩ nhĩpêx to hkêt nê.

¹⁸ Nê kêr pu mẽ ri pahpipãnh o papa hkêt nê. Kwarĩ ho kwarĩ. Kot puj mẽ ã amnhĩ nhĩpêx anê nê te kagõxyhti kot amnhĩ tã mẽ pahkaxpre pyrãk o mẽ panhĩpêx pu mẽ tee ri pamã hkaga hprãm kaprý. Te kot amnhĩm mẽ pahto arĩk pyrãk o mẽ panhĩpêx nhũm ja mex kêt nê. Na htem pipãnh kãm hamaxpêr mex kêt nê ãm htỳx ri tanhmã amnhĩ nhĩpêx to ho pa. Tã kêr pu mẽ ã amnhĩ nhĩpêx anhỹr hkêt nê ãm Tirtũm Karõ pix hkõt mãn ri amnhĩ nhĩpêx o ri papa.

¹⁹ Nê kêr pu mẽ axpên wýr akuprõ nê pahkính kãm Tirtũm mã mex o mex ã harênh pê ho pagrer o pahkrĩ.

²⁰ Nê mẽ pamex nê ri papa rý pahpunuj nê ri papa htã arĩ kãm mex o mex ã harênh rãhã ho ri papa. Kêp Mẽpanhĩpêxã maati jakamã mẽ pahpê Pahihti Jesus Kris kwý hã pu mẽ kãm mex ã harênh rãhã ho papa nê aa ho pajamakêtkati hkêt nê.

²¹ Nê kêr ka mẽ Kris ã apijaãm rãhã o ri apa. Jao axpên kõt ajamaxpêr nê axpên kõt ri amnhĩ nhĩpêx mex o ri apa.

**Tanhmã mě hprõ ně mě mjên kot axpën nhîpêx to hã
mě kãm karõ**

Wam Korît 11.3; Korosë 3.18-19; Wam Pêtre 3.1-7

²² Ně kêr ka mě anijaja mě amjên ã apijaam o ri apa. Ně mě hamaxpër mex ã mě omu ně mě hkôt ri amnhî nhîpêx o ri apa. Te mě ate Pahihti Kris kapër kôt amnhî nhîpêx o ri apata pyrãk. ²³ Kris kêp mě pakamã ukapří xwýnh ně kêp mě papytãr xwýnh jakamã te kêp mě pahpiitã mě pahkrã pyrãk. Ně mě papajaja te mě pahpê ĩ pyrãk. Jakamã na pu htem pahpê ĩja te mě pahkrã kot tanhmã hamaxpër to xà hkôt amnhî nhîpêx o papaja pyrãk. Ja pyrã ně kêr ka mě anijaja mě amjên jamaxpër mex ã mě omu ně mě hkôt amnhî nhîpêx mex ně. ²⁴ Mě pahpê Kris kwý jakamã na pu htem hkôt amnhî nhîpêx mex o ri papa. Ja pyrã ně kêr ka mě amjên kôt amnhî nhîpêx mex o ri apa.

²⁵ Ně mě amyjaja. Kêr ka mě amã aprõ hã ma ho ri apa. Te ho Kris kot mě pahtã ma ho pata pyrãk. Na pre kãm mě pajapê xàj amnhî grõnh kôt mě pahwýr wrý ně mě panê ty. Tã kêr ka mě urãk ně ã amã aprõ hã ma ho apa anê. ²⁶ Na pre Kris kãm mě pajapê xàj mě pahte amnhî tomnuj pê mě pahpytã. Te mēhõ my kãm mēhõ ni hkính ně mēmoj punuj pê utãr ně ho hprõta pyrãk. Nhũm te mě kot axpën mã wa rer kaxyw nhũm nija ma gõx mã htēm ně wýr ně amnhî to mex nhũm mě kot axpën kaxyw wa ho mexta pyrãk. Hãmri ně te ra axpën mã wa rer nhũm wa kot axpën kôt pa ho pata pyrãk.

Ja pyrã ně na pre Jejus kãm mě pajapê ně kãm amnhî kuri mě papa ho mě papa hprãm xàj mě pahwýr wrý ně mě pahte amnhî tomnuj pê mě pahpytã ně mě pamã Tirtũm kapër jarēnh o pa. Tã mě pahpê hkrajaja na pu htem kapër ma ně hkôt amnhî nhîpêx o papa ho amnhî tomnuj kaga. Te gõx kãm mě paxwýr ně mě pahte amnhî ně amnhî grã htyk kuhõnh par pyrãk. Jao Tirtũm kapër kôt pix mã amnhî nhîpêx o ri papa. Te ra paxwýr ně amnhî ně tanhmã mě pahte amnhî tomnuj to grãnh par pyrãk. Ně te mjên mã xwýnh wýr ně amnhî to mex pyrãk.

²⁷ ã mě pahte amnhî nhîpêx anhýr jakamã te mě pamex ně ri papa pyrãk. Hãmri nhũm Krisja ja hã mě pahpumu ně kãm mě pajapê htýx ně. Jakamã koja nhýrmã akupýn wrý ně ma akupým amnhî kôt mě pah-to api pu mě kuri pa htír tũm ně papa ho papa.

²⁸ Ně xà mě amyjaja mě amã amnhî japêé? Nã mě amã amnhî japê ho na ka htem amã amnhî tã ma ho apa. Tã kêr ka mě aprõ nhîpêx o te ka amã amnhî tã mata pyrãk. Jao tãm mě hipêx o ri apa. Te war apixire ně war apa pyrãk o wa axpën nhîpêx. Kot kaj mě tanhmã hipêx to ně te ate amnhî nhî tanhmã hipêx to pyrãk. ²⁹ Na htem amnhî nhî ho mex pix o pa ně kamã gryk kêt ně. Ně kãm prãm ně apku. Ně kãm kôr ně ixkõ. Ně nhýhýnh à ně amnhî kane. Na pu htem ã amnhî to mex o ri papa anê. Ja pyrã ně te mě pahpê Kris nhî pyrãk jakamã na hte mě pahto mex o pa. Te mě pamã mě papa mě pahte amnhî nhî hã mata pyrãk. ³¹ Tirtũm kapër ã kagã htũm kot ja jarēnh kot:

Koja mēmyjê hõ hprõ kaxyw hãmri ně hipêêxã ně katorxã wa òrkwý kaga ně ãm hprõ kôt pix mã hpãnhã ri pa ho pa. Te wa tipxi ně ri pa pyrãk o wa axpën nhîpêx o pa. Anê.

³² Na pre Tirtũm ã ja jarēnh anê. Kapërja mex tã amnepê mã mě pa xwýnhjaja na prem hprí hã mar týx kêt ně. Na prem htýx mě mjên kot tanhmã mě hprõ nhîpêx to pix ã hkamnhix no ãm ja pix kêt. Mããnhēn te mě pahpê Kris nhî pyrã ně tãm mě pahte amnhî nhîpêx ně axpën nhîpêx o papa hã ã mě pajarēnh kot anhýr. Te ixkre tipxi kamã mě pahte Kris kôt mě papa pyrãk o ã mě pajarēnh anê.

³³ Jakamã kwa kêr ka mě amyjaja mě amã mě aprõ japê ho ri apa. Te ka amã amnhî tã ma pyrãk o mě hipêx. Jao tãm mě hipêx. Ně mě anijaja kêr ka mě ajaxwýja mě amjên ã apijaam o ri apa.

**Mě hkrajaja kot tanhmã hipêêxã ně katorxã nhîpêx to
hã mě kãm karõ**

Korosë 3.20-21

6 Ně mě apê mě hkrajaja kêr ka mě anhîpêêxã ně mě akatorxã wa kapër ma ně hã ano htýx ně wa hkôt ri amnhî nhîpêx rãhã ho ri apa. Mě amã Pahihti Kris kôt amnhî nhîpêx prãm xàj ã amnhî nhîpêx anhýr o ri apa. Kot kaj mě ã amnhî nhîpêx anhýrja o amnhî nhîpêx mex o ri apa. ² Tirtũm kapër ã kagã htũm kot ja jarēnh kot:

Kêr ka mě anhîpêêxã ně mě akatorxã wa kapër ma ně wa hkôt ri amnhî nhîpêx. Kot kaj mě ã amnhî nhîpêx anê ně amex ně kritpēm atír ně ri apa ry ně.

Anhýr jakamã kot kaj mě amã kritpēm atír ně ri apa hprãm hã kêr ka mě ã amnhî nhîpêx anhýr o ri apa. Kormã mě apríre htã ã amnhî nhîpêx anê. E kêr ka mě ã mě anhîpêêxã ně mě akatorxã nhîpêx anhýr o ri apa.

⁴ Ně mě apê mě hipêêxã ně mě katorxã kêr ka mě akrajê gryk kaxyw mě kãm apër o apikēnh hkêt ně. Tãm mě kãm akapër ně Pahihti Jejus kapër o mě ahkre ho ri apa. E kêr ka mě ã akrajê nhîpêx anhýr o ri apa.

**Mě pahte mě panhõ patrãw kapër kôt amnhî nhîpêx ã
mě pamã karõ**

Korosë 3.22-4.1; Wam Ximotre 6.1-2; Xitre 2.9-10; Wam Pêtre 2.18-25

⁵ Ně mě ate mě kãm mě axàpēnh o mě apa xwýnhjaja kêr ka mě anhõ patrãw kapër ma ně hkôt amnhî nhîpêx mex o ri apa. Te mě ate Kris kapër mar ně hkôt amnhî nhîpêx pyrãk. Jao mě hã apijaam rãhã ně.

⁶ Nom kêr ka mě ãm mě noo mã pix mã ri mě kãm axàpēnh mex kêt ně. Mããnhēn mě wa kre kamã mě kãm axàpēnh mex rãhã ně. Ja na Tirtũm kãm hprãm. Mě apê Tirtũm Kra Kris mã tanhmã amnhî nhîpêx to ho apa xwýnh jakamã kêr ka mě anhõ patrãw mã axàpēnh mex o ri apa. ⁷ Ně mě akính kãm mě kãm axàpēnh mex ně. Te mě ate Pahihti mã akính kãm tanhmã kãm amnhî nhîpêx to pyrã ně mě kãm tãm amnhî nhîpêx pê axàpēnh mex o ri apa. ⁸ Kot puj mě amnhî kaxyw Tirtũm mã pajamaxpër pê pahkính kãm tãm amnhî nhîpêx o ri papa nhũm Pahihti ja hã mě pahpumu ně nhýrmã ja hã mě pahto mex rax ně. Mě

pahpê hkrajê piitää. Mě pahte mě kām paxàpênh xwýnhjaja ně amnhí mā mě paxàpênh xwýnhjaja nhūm nhýrmā mě pahpiitā mě pahte tām amnhí nhípêx xwýnhjê ho mex rax ně.

Měo patrāwjaja kot tanhmā kām mě àpênh xwýnhjê nhípêx to
Korosê 4.1

⁹ Ně mě apê mě ō patrāwjaja kêr ka mě amā mě àpênh xwýnhjê ho mex ně mě àpênh ā mě kām axàkjêr o ri apa hkêt ně. Tām mě hipêx. Kaxkwa kamā mě panhō Pahi Maati ja määnen kêp mě ō Pahi Maati jakamā ā mě hipêx mex anhýr o apa. Tām na kām mě pahpiitā mě pajapê ho axpên pyrāk. E kêr ka mě ā mě hipêx anhýr o ri apa.

Tanhmā mě pahte Satanasti kutā amnhí to htýx to hā mě pamā karō

Rōmān 16.20; Sikūn Korīt 10.3-5; Wam Tesarōn 5.8-11; Xiakre 4.7; Wam Pêtre 5.8-11

¹⁰ E kot paj hpānhā tanhmā mě pahte mēkarōmnuti nhō pahi Satanasti kutā amnhí to htýx to jarē ka mě inhma. Kêr ka mě Pahihti nhý hā kutā amnhí to htýx rāhā ně apa. Ate tanhmā amnhí tomnuj to hprām xāj tanhmā kot ato htā ka Tirtūm xihtýx o anhōpinh xā kaxwýnh kām kutā amnhí to htýx ně. Rý koja ate mē-moj mex o anhýr ně tanhmā ato ka mě amnhí tā hamaxpêr ā omu ně ām omu ně arī Tirtūm xihtýx nhý hā tām ajamaxpêr mex rāhā ho ri apa. ¹¹ Na hte pôristijaja pijapu kaxyw hāmri ně amnhí ně kàx o mě ê jagjê nhūm mě tee ri kām mě hkamnhwýr prām hkaprý. Tā ja pyrā ně koja Satanasti mě ate kapêr kôt tanhmā amnhí nhípêx to hprām xāj tanhmā mě ato ka mě amnhí tā hamaxpêr ā omu hāmri ně Tirtūm xihtýx nhý hā kutā amnhí to htýx ně. Jao mě ate amnhí nhípêx nyw pix o amnhí nhípêx ně mě ajamaxpêr nyw pix o ajamaxpêr. Kot kaj mě ā amnhí nhípêx anē nhūm Satanasti tee ri tanhmā kām mě ato hprām hkaprý.

¹² Mě pahpê Tirtūm kra jakamā mě kot mě pakutā amnhí xunhwýr xwýnh maati jaja axtem na mě. Mě kêp mēkarōmnuti jakamā mě pahkīnhā mě ĩ hkêt. Ām mě hkarō kaxkrit pix na mě. Na htem kôk kôt tanhmā amnhí tomnuj týx to ho pa. Ně mě hihtýx. Na htem arī jar pika ja kamā mě kêp Tirtūm kra hkêt xwýnhjê ho amnhípta nhūm htem mě hkôt ri htýx tanhmā ri amnhí tomnuj týx to ho pa. Nom amnhí tā mě omunh kêt ně. ¹³ Jakamā kwa kêr ka mě Tirtūm kot mě akarō mā amnhí Karō jagjênh xwýnhhta kôt pix mā amnhí nhípêx o apa. Jao mě ate amnhí nhípêx nyw kôt pix mā mán ri mě amnhí nhípêx. Kêr kê mēkarōmnuti tee ri kām tanhmā mě ato hprām kaprý ka mě arī Tirtūm Karō xihtýx nhý hā kutā amnhí to htýx rāhā ho apa.

¹⁴ Jakamā kwa kêr ka mě axkām ajamak rom ně te ho sôrdat kot pijapu kaxyw ê jagjênh pyrāk o amnhí nhípêx. Na htem amnhí ně môx kà ho mě ê jagjê ně mě hpre xà ho amnhí pre hpa. Ně hipy kàx o mě hinô kà jagjê. Hāmri ně rī kormā ma mě kām mě hkurê xwýnhjê kutā mra ně axpu. No mě kajaja kêr ka mě

kurom amnhí krām Tirtūm kapêr jaxār týx ně hkôt pix mā ri ajamaxpêr rāhā ho ri apa. Ně hkôt ri amnhí nhípêx mex ně. Jao te sôrdat pijapu kaxyw kot amnhí nhípêxta pyrāk.

¹⁵ Na hte sôrdatjaja hpar kà jagjê ně aa hopôx kêt ně. Ām rāhā gôr ně hikwý. Jao ra mě kutā pijapu kaxyw amnhí grōnh rāhā gôr ně hikwý. Tā kêr ka mě ma mě kām Jesus kot tanhmā mě panê amnhí nhípêx to hā harênh o apa kaxyw ně sôrdat pyrā ně amnhí grōnh kôt ma mě hwýr apa ně amnhí kamā akahak kêt ně.

¹⁶ Ně sôrdatjaja na htem amnhí ně amnār xā hā kàx po jamý ně ho kuhê nhūm mě tee ri kām mě hkamnhwýr prām kaprý. Ja pyrā ně koja Satanasti tanhmā mě ato ka mě Tirtūm kêp mě anhō pahi hā hihtýx o kot Satanasti jakrenhja mā ajamaxpêr kurê kumrêx ně ām hkôt pix mā amnhí nhípêx. Na hte Satanasti te kot mě pahwýr krur rênh pyrāk o mě panhípêx. Jao xatā mě pahte Tirtūm kaga hprām xāj tanhmā mě pahto. Ně mě pahte Tirtūm mā tanhmā amnhí nhípêx to pymaj xatā tanhmā mě pahto kaprý. Pu mě amnhí tā omu hāmri ně Tirtūm Karō xihtýx nhý hā Tirtūm kôt pix mā amnhí nhípêx.

¹⁷ Ně na hte sôrdatjaja kàx o mě hkrājapap jagjê ně pijapu kaxyw mě kutā mra nhūm mě tee ri mě hkrā jayr prām kaprý. Ja pyrā ně kêr ka mě amnhí kaxyw Tirtūm kôt pix mā ajamaxpêr rāhā ho ri apa. Ně ra kot mě ato hkra mā ajamaxpêr rāhā ně. Kê Satanasti tee ri kām mě akrā kamā mě amā mě ajamaxpêr punuj jagjênh prām hkaprý.

Ně sôrdatjaja na htem mě kutā wapo jamý ně ho kuhê. Nom mě papajaja mě panhō wapoja na axtem kêp Tirtūm kapêr. Na hte Tirtūm Karō mě pahkrā kamā kapêr o amnhírīt pu htem pix mā pajamaxpêr o papa nhūm Satanasti tee ri kām mě pahkrām mě pajamaxpêr punuj jagjênh prām kaprý. Te mě papijapu nhūm mě pahte amnhí ně ho pakrihkrit pyrāk o hipêx.

¹⁸ ā Satanasti pê mě pahte amnhí ně amnhí nhípêx kot anhýr. Jakamā kêr pu mě amnhí to Tirtūm pix wýr o ri papa kê Satanasti kutā mě pahto paxihtýx pu mě hkôt tanhmā amnhí tomnuj to hkêt ně.

Ně kêr pu mě mēmoj to anhýr kaxyw ně ra Tirtūm Karō nhý hā amnhí to Tirtūm wý. Ně kām amnhí jarênh rāhā ho papa ně aa ja ho pajamakêtkati hkêt ně. Ně Tirtūm krajê piitā mě ho hwýr rāhā ho ri papa.

¹⁹ Ně kwa kêr ka mě määnen ixto Tirtūm wýr rāhā ně. Kot tanhmā ixto nhūm ixāmnhix ixte mě kām kapêr jarênh mex o ri mě hkôt ixpa kaxyw. Mě kot ja hā tanhmā ixto htā pa arī ixāmnhix mě kām harênh mex o ri mě hkôt ixpa. Ně ixprī hā mě kām Jesus kot tanhmā mě panê amnhí nhípêx to hā harê. Kormā mě kot hprī hā ja mar mex kêt. ²⁰ Tā ixte mě kām ja jarênh kaxyw na pre Tirtūm mě hwýr inhmē nhūm prem hā ijaxā pa arī mě hagjênh xā kamā ixkrī ho ixkrī. Jakamā kwa mě ixto Tirtūm wý kê tanhmā ixto ixihtýx to pa arī mě kām kapêr jarênh o ixkrī. Ja na Tirtūm kām hprām ně ijaxwýja inhmā ja prām.

Kagà jatur xà

Korosë 4.7-8

²¹ Ně ot pa mẽ awỳr Xikitre mẽ. Kot paj mẽ amã kagàja nhĩpêx pa mẽ kãm kugõ nhũm kupy mẽ ma mẽ awỳr o mõ. Hãmri mẽ mẽ awỳr o pøj mẽ mẽ amã kugõ mẽ mẽ amã tanhmã ijarěnh to ka mẽ ijarěnh ma mẽ akĩnh mẽ. Xikitre na hte Pahihti mã tanhmã amnhĩ nhĩpêx mex to o pa. Kris kôt mẽ pahtõ na. Ně inhmã hapêê. ²² Tã ot pa mẽ awỳr kumẽ. Kê mẽ awỳr pøj mẽ mẽ amã ijarě ka mẽ kam ama mẽ akupỹm tãm akrã mẽ

tee ri ixkukamã ajamaxpěr kêt ně. ²³ E ixkràmnhwỳjaja. Kê Měpahpãm Tĩrtũm mẽ Pahihti Jejus Krisja wa tanhmã mẽ akrã hto ka mẽ ajamakêtkati mẽ axàmnhĩx ri apa. Ně mẽ amã axpěn kĩnh o ri axpěn kôt apa. Ně mẽ apiitã wa hkôt ajamaxpěr mex o ri apa. ²⁴ E mẽ amã mẽ panhõ Pahihti Jejus Kris kĩnh rãhã ho apa xwỳnhjaja. Kê Tĩrtũm mẽ ato mex mẽ mẽmoj to mẽ akutã nojarêr rãhã ho pa.

Tã ãm ja pix na hapêx. Ixpê Pawre na pa mẽ awỳr kagàja nhĩpêx mẽ kumẽ.

Piripos

Pawre na pre kagàja nhípêx. Jejus nhỹ hã mě ahkre o mě pa xwýnhjê hõ na pre. Na pre Jejus ã mě kãm hkurê xwýnhjaja unê nê ma krí pê Rõm wýr kumê nê kamã haxà nhũm mě hagjênh xà kamã hkrí ho hkrí. Tã nhũm arí hkrí rãhã Piripos kamã Jejus kôt hkwyjê hwýr kagàja nhípêx nê kumê. Na prem Pawre jarênh ma nê kãm ukapří nê. Jakamã axpên kaxyw kàxpore hkwy ho akupřo nê hwýr kumê. Hãmri nhũm omu nê hkính nê amnhí tã kagàja nhípêx nê kamã mě kãm amnhí jarê nê mě hwýr kumê. Kot amnhí xà htýx kamã hamak o hkrí htã arí hwýr mě mrar xwýnhjê mã Tirtũm kapër jarênh rãhã ho hkrí hã amnhí jarê. Nê kãm Jejus kot amnhí nhípêx kôt pix mã amnhí nhípêx o pa hprãm ã amnhí jarê. Nê kãm Jejus jamaxpër kôt pix mã hamaxpër prãm ã amnhí jarê. Æ na pre Pawre kagàja kamã mě kãm amnhí jarênh anê. Nê mě kãm:

1 Pa Piripos kamã Jejus Kris kôt ixkwýjaja. Xà mě amex na ka mě apa? E ixpê Pawre na pa mě amã kagàja nhípêx nê kamã mě amã amnhí jarê nê mě awýr kumê. Nhũm Ximotre haxwýja kãm ja mex nê. Wa ixpê Jejus mã tanhmã amnhí nhípêx to ho wa ixpa xwýnh jakamã na pa wa mě awýr hipêx nê kumê. Mě ate Tirtũm kapër o mě ajahkre xwýnhjê hwýr nê mě kãm mě ate tanhmã amnhí to xwýnhjê hwýr nê mě ate mě mar o akrí xwýnhjê hwýr. Mě apê Kris kôt wa ixtõ nê wa ixtõxjê ho ixpimràatã mě awýr hipêx nê kumê.
² E kê Měpanhípêxà maati Tirtũm mě Pahihti Jejus Kris wa mêmoj to mě akutã nojarêt rãhã nê ka mě axãmnhix ri ajamakêtkati nê ri apa ho apa.

Pawre kot Piripos nhõ xwýnhjê ho Tirtũm wýr ã harênh

Epes 1.15-19; Korosë 1.9-12

³ Na pa hte xatã mě amã ijamaxpër o ixkrí nê mě panhõ Tirtũm kot tanhmã mě ato mex toja pa kãm ijamaxpër nê ixkính nê ixkrí. ⁴ Nê Tirtũm mã mě ajarênh nê mě ato kuwý. Ixkính kãm mě ato kuwý.

⁵ Wam ixte mě awýr inhmõrta ã na pa pre mě amã Jejus kot mě panê tanhmã amnhí nhípêx to hã harênh o ri mě akôt ixpa. Ka prem inhma nê hkôt amnhí xunhwýr týx nê hkôt amnhí nhípêx o ri apa. Jakamã inhmã axpên kaxyw ri kàxpore hkwy nhõr o apa. Te ham mě ate ixwýr mênhta pyrãk pa pre mě akukwak ri amnhim ho ixujaprõr o ri ixpa pê nhãm ri mě kãm Jejus jarênh o ri mě hkôt ixpa. Na pa hte arí jam ijamaxpër rãhã ho ixkính nê ixkrí. Nê Tirtũm mã mě ate ixto mex ã kãm mě ajarênh o ixkrí.

⁶ Nê na pa pre ma mě awýr mõ nê mě amã Jejus jarê ka prem inhma nê hkôt amnhí xunhwýr nhũm Tirtũm ja hã mě apumunh mex nê. Hãmri nê mě ate hkôt amnhí to htýx kaxyw tanhmã mě ato mě axihtýx to. Tã koja arí mě ato mě axihtýx rãhã nhũm Jejus Kris nhýrmã akupýn mě pahwýr wrý. Koja ã mě ato mex anê. ⁷ Na hte tanhmã ixto mex tota pyrã nê tanhmã mě ato mex to ho pa nê mě akutã nojarêt rãhã ho pa.

Nê kormã mě kot ijaxàr kêt ri pa pre ma mě piitã mě kãm Jejus jarênh o ri ixpa. Nê ãm hãmri mě kãm harê.

Mě kot mar nê hkôt amnhí xunhwýr týx kaxyw pa pre mě hkôt harênh rãhã ho ri ixpa. Ka prem ja kaxyw inhmã kàxpore hkwy gõ pa pre ho amnhim ixujaprõr pê mě hkôt ri mě kãm harênh o ri ixpa. Tã nhũm prem jar Rõm kamã ijaxà pa arí ixkrí htã ka mě axte ixwýr hkwy mě. Jakamã na pa hte mě amã ijamaxpër rãhã ho ixkrí nê inhmã mě akính týx nê. ⁸ Te Jejus Kris kãm mě ajapê htýx pyrãk. Tirtũm kot ja hã ixpumunh mex.

⁹ Na pa hte mě ato kuwý nê kãm:

—Pa Tirtũm. E Piripos nhõ xwýnhjê pumu. Na mě ra kãm axpên kính o axpên kôt pa. Kwa tanhmã mě hipêx to kê mě arí kãm axpên kính týx pix nê. Jao axpên to mex rãhã ho pa. Nê tanhmã mě hkrã hto kê mě amnhí krãm akapër jaxàr týx nê. Jao tãm amnhí nhípêx mex nê hamaxpër mex o ri pa. Nom kormã mě kot ja pumunh tohtuj anhýr. Tã kêr ka tanhmã mě ho kê mě ã amnhí nhípêx anhýr rãhã Jejus Kris akupýn mě ixwýr wrý.

Anhýr pa hte mě ato hwýr o ixpa. ¹¹ Nã koja Jejus Kris mě akaxwýnh kãm mě ato mě axihtýx ka mě ý hã axihtýx pê tãm ri amnhí nhípêx nê tãm axpên nhípêx o ri axpên kôt apa. Nhũm mě piitã ja hã mě apumu nê axpên mã Tirtũm mex o mex ã harê.

Pawre kãm Kris kôt amnhí nhípêx prãm ã harênh

Atre 28.30-31; Epes 6.19-20; Sikũn Ximotre 2.9

¹² E Kris kôt ixtõ nê ixtõxjaja. Kot paj mě amã tanhmã amnhí jarênh to ka mě inhma. Na prem ra Jejus ã ixtomnuj týx nê hã ijaxà pa amnhí xà htýx kamã ijamak o ixkrí. Nom mě kot ã inhípêx anhýr tã pa hte arí ixkrí xà kamã mě kãm Jejus jarênh o ixkrí. Jakamã na mě ra ohtõ nê tanhmã kot mě panê amnhí nhípêx to hã harênh ma. ¹³ Põristi kot inhĩkõ hã ixtãnopxar xwýnhjê mě ixwýr mě mrar xwýnh piitã ixte Kris kapër jahkre ho ixpa pix ã mě kot ijaxàr ã ijarênh ma. ¹⁴ Nê jar Kris kôt mě pahtõ nê mě pahtõxjaja haxwýja ijarênh ma nê ohtõ nê ixpyrà nê Kris nhỹ hã amnhí to htýx nê arí hkwyjê mã kapër jarênh rãhã ho pa. Ixpyrà nê kãm mě uma hkêt nê mě kutã amnhí to htýx pê mě kãm harênh rãhã ho pa.

¹⁵ Nē na pre mē hkwýjaja ixte mē amā Kris jarēnh o ipa hā ijarēnh ma nē hā ixkamā gryk nē axtem hamaxpēr nē ixwakre kamā gryk kām mē kām Kris kapēr jarēnh o pa. Na htem hamaxpēr o:

—E kot paj ma Pawre kot ra mē hwýr mōr xwýnhjē hwýr mō nē kot ra mē kām Jejus kapēr jarēnh nhīpy axte mē kām harēnh o ri mē hkôt ipa. Hāmri nhūm mē inhma nē inhgryk ā Pawre kaga. Hāmri nhūm mē hagjēnh xà kamā arī hkrī tā tee ri mē hā ijarēnh ma nē hkaprī nē rī amnhī pumu. Nà kot paj anē.

Anhýr o hamaxpēr tā pa mē harēnh ma nē ixkaprī hkēt nē. Mē kot mē amā hprī hā Kris kapēr jarēnh kēnā kot pa kēt tee ri mē harēnh ma nē ixkaprī. Kwār mē māmri ri ixkamā gryk kām kapēr jarēnh o ri pa. Pa mē harēnh ma nē ixkīnh nē. Nom na hte mē hkwýjaja jajē rom kām ixkīnh kām mē kām Kris kapēr jarēnh o pa. Nē tām hamaxpēr pē mē kām harēnh o pa. Ra mē kot ixpumunh mex jakamā nhūm Tirtūm kot jar mē hwýr inhmēnh nhūm ixte ām hāmri mē kām kapēr mex jarēnh o ri ixkrī hā ixpumunh mex. Jakamā kwār mē māmri tanhmā inhā hamaxpēr to xà hkôt mē ujarēnh mexja jarēnh o pa. Mē kām ixkīnh kām harē nē ixkamā gryk kām ri harēnh o pa. Ām hāmri Kris kapēr jarēnh o pa jakamā pa mē harēnh ma nē ixkīnh nē.

¹⁹ Nē ra mē ate ixto Tirtūm wýr o apa jakamā koja Karōja ixkaxyw tanhmā jar Rōm kamā pahihti nhīpēx to nhūm tokyx ixkator japēr. Pa ixamnhīx ijamakētkati nē ri ma mē akôt ipa. ²⁰ Nom inhmā Jejus kām hprām xà hkôt pix mā tanhmā amnhī nhīpēx to ho ipa hprām. Jakamā koja mē ixkator pa ixkīnh nē arī kām tanhmā amnhī nhīpēx to ho ri ipa. Nom koja mē tanhmā hamaxpēr to nē ixpī pa mē kutā mē kām amnhī to htýx nē ixām rāhā nhūm mē ixpī pa ijamakētkati nē ty. Kē mē ja hā ixpumu nē ixtā Kris mex o mex ā harē. Ām Jejus kām hprām xà hkôt pix mā na inhā amnhī nhīpēx prām. ²¹ Tā kot paj tanhmā amnhī to nē arī ixtīr japēr hā kot paj ām kôt pix mā amnhī nhīpēx rāhā ho ipa. Nom koja mē tanhmā hamaxpēr to nē hā ixpī pa ty nhūm Tirtūm ma kaxkwa hwýr ixkarō ho àpir kurē kumrēx. Pa Tirtūm mē Krata wa kuri inhmex o inhmex nē wa kuri ipa ho ipa. ²² Tā nhý na we inhmā mex o hō jakrenh wehe? Na pa tee ri amnhī kukamā ijamaxpēr. Inhmā tokyx ixyk nē Kris kuri ipa hprām. Ja na inhā hprām o inhā hprām. Nom ko. Kot pa arī ixtīr nē arī mē kām Jejus kot tanhmā mē panē amnhī nhīpēx to hā harēnh rāhā ho ri ipa. Ko. Ja māānēnh inhā mex. ²⁴ No mē amā na arī ixtīr nē ipa-ja mē amā hprām ²⁵ jakamā kot paj pēr tokyx ixyk kēt nē. Kot paj arī ri mē amā Kris kôt mē ato mē axihtýx o ri mē akôt ipa. Jao ām ho hkrānre ka mē ra amnhī kaxyw kām ajamaxpēr nē hkôt amnhī xunhwýr týx nē. Jao akīnh nē apa. ²⁶ Tā kot paj nhýrmā akupým ixtīr rāhā mē awýr mō ka mē ixpumu nē akīnh nē. Jejus Kris kot akupým ixkator ā akīnh nē. Hāmri nē ixtā Jejus mā mex o mex ā harē.

Mē pahte Jejus ā pahpunuj tā mē pahte amnhī to htýx ā mē pamā karō

Rukre 6.22; Sikūn Korīt 2.14-16; Xiakre 1.12; Jutre 3

²⁷ Jakamā e kêr ka mē Jejus Kris kapēr kôt pix mā amnhī nhīpēx. Nē axpēn kôt axpēn to axihtýx pē mē kām Jejus kot tanhmā mē panē amnhī nhīpēx to hā harēnh o ri apa kē mē ama nē mē pahpyrà nē hkôt amnhī xunhwý. E kêr ka mē ā amnhī nhīpēx anhýr o ri apa. Kêr pa nhýrmā mē hagjēnh xàja rūm ixkator japēr nē nhýri ja hā mē ajarēnh ma rý ma mē anhō krī hwýr mō nē ja hā mē apumu nē ixkīnh nē. ²⁸ Nom kwa kêr ka mē amā mē kot Kris ā tanhmā mē ato xwýnhjē py- ma hkēt nē. Mē kot tanhmā mē anhīpēx kati hto htā kêr ka mē kutā amnhī to htýx nē mē hkôt apa. Kêr kē mē amnhī tā mē apumu nē tee ri hamaxpēr hāmri nē axpēn mā:

—Kwa mē pahte Kris ā tanhmā mē hipēx to htā na htem amnhī to htýx nē arī mē pamā harēnh o ri pa. Pēr mē kām mē pahpyra hkēt. Mān hte Tirtūm tanhmā mē ho nhūm mē ý hā kām mē pahpyra hkēt nā? Kwa tanhmā kot puj mē ho nhūm mē Jejus kapēr jarēnh o pata kaga? Nà kot puj mē ām tee ri hā tanhmā mē ho kaprý. Mān ām hāmri na htem nhýrmā Tirtūm kuri htīr tūm nē pa ho pa hā amnhī jarēnh o pa nā? Anē.

Koja mē ā mē ajarēnh anē. Tirtūm kot mē ato mē axi-htýx ā mē apumunh kôt. ²⁹ Na pre tanhmā mē ato ka mē Kris kôt amnhī xunhwý. Tā mē kot tanhmā hā mē anhīpēx to htā na hte Tirtūm mē kutā tanhmā mē ato ka mē ý hā amnhī to htýx nē apa. ³⁰ Ijaxwýja na pa hte amnhī xà htýx kamā ijamak o ixkrī. Na pre htem Jejus ā ixtomnuj o pa ka prem ja hā ijarēnh ma nē hā ixpumu. Tā ota kē mē ra axte tanhmā hā inhīpēx to. Pa kē amnhī xà htýx kām ijamak o ixkrī ka mē ijarēnh ma. Tā xep mē ixpyrà nē Kris ā amnhī xà htýx kamā ajamak o apa. Nom kwa kêr ka mē tee ri amnhī kukamā ajamaxpēr o akaprī nē apa hkēt nē.

Jejus kām mē pajapē xāj tanhmā kot amnhī nhīpēx to hā harēnh

Rōmān 15.5-6; Epes 4.1-6; Piripos 2.18

2 Nē ra mē pahte Jejus kôt amnhī xunhwýr jakamā pu mē tee ri amnhī kukamā pajamaxpēr o pahkaprī nē ri papa hkēt nē. Ām kām mē pajapēja mā pajamaxpēr rāhā ho pahkīnh nē pajamakētkati nē ri papa. Nhūm Karō mē pahkarō mā agjē nē mē pahto mex nē mēmoj to mē pakutā nojarēt o ri mē pakamā pa. ² Tā kêr ka mē axpēn mar mex nē mēmoj tā axpēn mā axākjēr o ri apa hkēt nē. Te ri ixkre pixi kamā mē atipxi nē axpēn kôt amnhī nhīpēx pyrāk. Nē Tirtūm kām hprām xà hkôt pix mā ajamaxpēr o ri apa. Nē mē amā axpēn kīnh o ri apa. Kot kaj mē ā amnhī nhīpēx anē pa ja hā mē apumu rý hā mē ajarēnh ma nē ixkīnh týx kumrēx.

³ Nē kwa kêr ka mē axpēn pumu nē ā ajamaxpēr anhýr kēt nē. Mē ajamaxpēr o:

—Tk. Kot pa ri tanhmã jahti ho ajuta hto ho ixpa hkêt nê. Ixte amnhĩ to rax o hakrenh kênã kot pa hkêt ri ho ajuta. Kê tãm mãn tanhmã ixto ajuta hto.

Anhÿr o ajamexpêr kêt nê. Kêt nhÿri mêmõ pumu nhũm tanhmã kute ka hã omu nê ajamexpêr o:

—Hêxta waa nê. Kwa tanhmã kot pa we ho ajuta htoo?

Anhÿr o ajamexpêr hãmri nê ajamexpêr xà hkôt tanhmã ho ajuta hto.

⁴ Jao Jejus pyrã nê mêmõj to axpên kutã anojarêt o ri apa. No ri amnhĩ pix kukamã ajamexpêr o apa hkêt nê. ⁵ Kêr pu mē te Jejus tanhmã hamaxpêr toja pyrãk o pajamexpêr o ri papa.

⁶ Kêp Tirtũm Kra kumrêx jakamã te urak tã xà na pre ja hã amnhĩ pumu nê amnhĩ pix kukamã ã hamaxpêr anê nê hamaxpêr o:

Te ixte Tirtũm pyrãk jakamã mêmõj piitã inhõ na. Jakamã kot paj jar kaxkwa kamã inhmex nê ixkĩnh nê ixpa ho ixpa nê aa rer nê nhÿhÿm inhmõr kêt kumrêx. Anhÿr o na pre hamaxpêr? Nà na pre ã hamaxpêr anhÿr kêt nê.

⁷ Kãm mē pajapê xaj na pre kaxkwa kamã mêmõj mex piitã rer pa nê man mē pahwÿr wrÿ nê mē pahpyrã nê ĩ ho katorxã nhõhy rũm kato.

Kêp mē panhõ Pahihti htã te kêp mē panhĩõ nê te kot amnhĩ to grire pyrãk o amnhĩ nhĩpêx o ri pa.

Nê Tirtũm kãm hprãm xà hkôt pix mã amnhĩ nhĩpêx o pa.

Nê ãm kôt pix mã amnhĩ nhĩpêx o pa rãhã nhũm prem kupĩ nhũm arĩ mē kãm xa nê tanhmã amnhĩ tã mêmõ hto hkêt nê.

Na prem hipêx kati nê. Te kêp mē kot amnhĩ tomnuj tÿx xwÿnhjê nhĩpêx pyrãk o hipêx nê pĩ kahpa hã kunhõ nê kupĩ.

Tã no nhũm mē kêp tanhmã amnhĩmnuj to hkêt nê arĩ mē kãm xa. Mē panê na pre ã amnhĩ nhĩpêx anê.

⁹ Hãmri nhũm Tirtũm ã kot amnhĩ nhĩpêx anhÿr ã omu nê akupÿm ho htĩr nê akupÿm amnhĩ wÿr ho api.

Nê mex o mex ã harê.

Nê kot nhÿrmã mē pahpiitã mē pahto amnhĩptar kaxyw mē pakaxyw ãm.

¹⁰ Jakamã kot puj mē nhÿrmã pahpiitã Jejus kutã pahkõnkrã ho rôrõk nê pahkrĩ hpa nê kàx pêê kãm mex o mex ã harê.

Mē pahpiitãã. Kaxkwa kamã mē pa xwÿnhjaja nê pika piitã hkôt mē papa xwÿnhjaja.

Nê mē htyk xwÿnh piitã koja mē akupÿn htĩr pu mē pahpimràãtã Jejus kutã pahkõnkrã ho parõrõk nê pahkrĩ hpa nê kãm mex o mex ã harê.

¹¹ Nê kãm:

Pa Pahihti Jejus. Nà ãm hãmri na apê mē inhõ Pahi Maati hã apyxi mex na ka.

Jakamã mē ixtõ kot paj mêmõj tã tanhmã amã karõ hto? Nà kot paj mē ixtõ ã amnhĩ nhĩpêx anhÿr kêt nê. Anê.

Kot puj mē nhÿrmã ã Jejus mã pakapêr anê.

Jao mããnen Tirtũm hihtÿx o hihtÿx nê àhpumunh o àhpumunh ã omu. Nê mex o mex ã omu.

Te mē pahpê kanhêti pyrãk ã mē pajarênh

Matêwre 5.14-16

¹² Tã kwa ixkrãmnhwÿjjaja. Inhmã mē akĩnh. Kwa kêr ka mē arĩ Tirtũm kôt amnhĩ nhĩpêx mex rãhã nê. Te ixte mē akamã ixpare ri mē ate amnhĩ nhĩpêx mexta pyrãk o ixwakre kamã amnhĩ nhĩpêx mex o ri apa. Na pre ra Tirtũm mē panê mē pahte amnhĩ tomnuj rê nê tanhmã mē pahto pu mē ÿ hã kapêr kôt amnhĩ nhĩpêx o ri papa. Jakamã kwa kêr pu mē axte tanhmã amnhĩ tomnuj to ho papa hkêt nê. Nê mē pahte Tirtũm kapêr kwÿm ri amnhĩ nhĩpêx pymaj ãm hkôt pix mã amnhĩ nhĩpêx o ri papa.

¹⁴ Nê kêr ka mē mêmõj to anhÿr kaxyw nê agryk kãm tanhmã ri ho hkêt nê. Nê mêmõj tã axapênh kaxyw nê ri hã axpên mã akapêr kati kamã ho anhÿr kêt nê.

¹⁵ Mē kot amnhĩ tomnuj xwÿnhjaja na htem ã amnhĩ nhĩpêx anhÿr o pa. No kêt mē kajaja. Mē ate mē hkôt apa htã kêr ka mē hkôt amnhĩ nhĩpêx kêt nê. Mē kurom mē apê Tirtũm kra jakamã kêr ka mē hkôt pix mã amnhĩ nhĩpêx o ri apa. Nê tanhmã amnhĩ tomnuj to rÿ tanhmã ajamexpêr punuj to hkêt nê. Mē kot amnhĩ tomnuj xwÿnhjaja te ri kamat kô kamã ri mē kêp àhkĩnh o ri mē pa xwÿnhjê kot amnhĩ nhĩpêx pyrãk. Tã kot kaj mē hkôt tãm ri amnhĩ nhĩpêx o apa nê te ate kanhêtija kamat kô kamã hirã ho harir pyrãk o amnhĩ nhĩpêx. Jao mē kãm Tirtũm kapêr jarênh o ri mē hkôt apa. Mē kot amar nê apyrã nê nhÿrmã kuri htĩr tũm nê pa ho pa kaxyw. Kot kaj mē ã amnhĩ nhĩpêx anê nhũm nhÿrmã Jejus Kris akupÿn mē pahwÿr wrÿk ã arĩgrota ã pa mē apumu nê ixkĩnh nê. Nê ixkĩnh kãm Jejus mã mē ajarê nê kãm mē ajarênh o:

—Kwa Pahihti. E jajê pumu. Na pa pre mē kãm akapêr jarênh o ri mē hkôt ixpa nhũm mē inhma rÿx nê nê akapêr kôt amnhĩ nhĩpêx o ri pa. Jakamã na pa pre mē kãm akapêr jarênh kaprÿ hkêt nê.

Anhÿr o kãm mē ajarê. ¹⁷ Na pa pre mē akôt mē amã Tirtũm kapêr jarênh o ri ixpa ka prem inhma nê hkôt amnhĩ xunhwÿ. Jakamã te ixte Tirtũm mã mē ato ixkĩnh xà nê kãm mē anhõr pyrãk.

Nê koja jar Rõm nhõ pahihtija tanhmã ixto hkêt japêr. Rÿ tanhmã ixto. Nom kwãr mē mãmrĩ tanhmã kãm ixto hprãm xà hkôt tanhmã ixto rÿ ixpĩ. Koja mē ã ixte mē anhĩpêx anhÿr ã ixpĩ pa ixkĩnh nê. Nê tanhmã ijamexpêr to hkêt kãm ty. Jakamã na pa ra ã mē kot inhiĩpêx anhÿrja kukamã mē amã amnhĩ kĩnh ã amnhĩ jarê ka mē inhma. ¹⁸ Tã kêr ka mē ixpyrã nê ajaxwÿja ixtã akĩnh nê apa.

Ximotre mē Eparoxit wa harênh

¹⁹ Nê koja Pahihti Jejus kãm ja prãm hã kot paj ma mē awÿr Ximotre mē nhũm ma mē awÿr mō nê ri mē akôt pa nê tanhmã mē ate amnhĩ nhĩpêx to hã mē apumu. Hãmri nê man akupÿn ixwÿr mō nê inhma mē ajarê pa mē ajarênh ma nê ixkĩnh nê tee ri mē akukamã ijamexpêr o ixkrĩ hkêt nê. ãm tãm mē akukamã ijamexpêr o ixkrĩ. ²⁰ Ximotre tapxipix na ixpyrã nê kãm mē akĩnh nê kãm mē ato ajuta hprãm. Na

hte mẽ ajarênh rãhã ho pa. ²¹ Nom jar mẽ piitã Ximotre kĩnhã amnhĩ mex pix kukamã hamaxpêr o pa nê kãm Jejus Kris kôt tanhmã amnhĩ nhĩpêx to ho pa hprãm kêt nê.

²² Ximotre te kêp ixkra pyrãk. Na hte ixkôt pa nê ixpyrà nê Jejus mã tanhmã amnhĩ nhĩpêx mex to ho pa. Pa pre wa ijamê mẽ kãm mẽ ujarênh mex jarênh o wa ri mẽ hkôt ixpa. ²³ Tã koja mẽ tanhmã ixtã axpên mar to. Apu mẽ kot ixpĩr ã amnhĩ jarê rý ixkator ã amnhĩ jarê. Pa tanhmã amnhĩ tã mẽ mar to nê rĩ kormã ma mẽ awýr Ximotre mẽ kê ma mẽ awýr mō nê mẽ amã tanhmã ijarênh to.

²⁴ Nê koja Pahihti Jejus kãm ja mex pa ijaxwýja ma mẽ awýr mō pu mẽ axte axpên pumu.

²⁵ Nê kot paj tokyx ma akupým mẽ awýr Kris kôt mẽ pahtō Eparoxit mẽ. Na ka prem kãm kãxpore gō nhũm man ixwýr o mō nê inhmã kugō. Hãmri nê jar inhmã àpênh rax nê ixpyrà nê mẽ ujarênh mexja jarênh o pa. ²⁶ Tã ra à htýx nê. Kironhýx pre mẽ pahpê ty. Tã nhũm Tirtũm omu nê kamã ukapřĩ nê. Nê mãñnên pa ixkamã ukapřĩ nê. Nê tee ri ixte à htýx ã omunh nê ixkapřĩ htýx pymaj akupým inhmã ho mex nhũm ra akupým mex nê ri pa. Hãmri nê kãm mẽ apumunh prãm nê. Mẽ ate à htýx ã harênh mar nê akapřĩ hã mẽ ajarênh ma nê tee ri mẽ akukamã hamaxpêr. ²⁸ Jakamã inhmã akupým tokyx mẽ awýr mênh prãm. Tã koja mẽmo arĩgro hã mẽ awýr pōj ka mẽ omu nê akĩnh nê tãm ajamaxpêr. Pa ijaxwýja jar ixkĩnh nê tãm ijamaxpêr. ²⁹ Na ka prem ixwýr amê nhũm man ixwýr mō nê jar ixri mẽ kãm Kris kapêr jarênh o ri mẽ hkôt pa rãhã nhýx hã ty nom kot amnhĩ kamã kahak kêt. Jakamã kê akupým mẽ awýr pōj ka mẽ omu nê akĩnh nê. Nê kahti hkôt amý nê ho mex nê. Kêp Kris kôt mẽ pahtō mex kênã. ã na htem Kris mã mẽ kot tanhmã amnhĩ nhĩpêx to ho mẽ pa xwýnhjê nhĩpêx mex anhýr o pa.

Mẽmoj tã mẽ pahpumunh kôt Tirtũm kot tãm mẽ pax-unhwýr ã harênh

Piripos 2.18, 4.4

3 E Kris kôt ixtō nê ixtōxjaja. Kris kêp mẽ panhō Pahihti jakamã kwa mẽ jam ajamaxpêr nê akĩnh rãhã ho ri apa.

Na pa ra mẽ amã mẽmoj jarênh rax nê. Nê hã kagà rax tã kormã inhmã ja ho anhýr kaga hkêt nê. Kot paj axte mẽ amã hkwy hã kagà. Mẽ ate hã ano htýx nê ho apa kaxyw. ² Jakamã e kwa mẽ okora. Kêr ka mẽ amnhĩ nê mẽ kot Tirtũm kapêr o hêx xwýnhjê pumunh mex o ri apa. Na htem tanhmã mẽ amã kapêr ho pa nê mẽ amã:

—Kot kaj mẽ ixpê Ijaewjê pyrã nê amnhĩ my kwrýt kà jakà hãmri nê apê Tirtũm kra. Anê.

³ Nom ja kot anhýr kêt. Mẽ pahpê amnhĩ jakàr kôt mẽ pahpê Tirtũm kra hkêt. ã kot anhýr ronhýx pu mẽ amnhĩ krã hkôt tanhmã amnhĩ nhĩpêx to ho pahpê hkra. Nom ja kot anhýr kêt. Mẽ ate amnhĩ jakàr kêt tã mẽ ixpyrà nê amnhĩ kaxyw Jejus Kris mã ajamaxpêr jakamã mẽ ixpyrà nê mẽ apê Tirtũm kra na ka mẽ. Na ka htem mẽ ixpyrà nê Karō nhý hã kãm mex o mex ã

harênh o ri apa nê mẽ ixpyrà nê Jejus kukwak ri akĩnh nê ri apa. Nom na pu htem pahpê hkra kaxyw amnhĩ jakàr kêt nê. ⁴ Kop ãm amnhĩ krã hkôt mẽ pahpê amnhĩ to Tirtũm kra ronhýx pa ra amnepêm amnhĩ to hkra nê ri ixpa. Na pa pre ixpê hkra hprãm xàj amnhĩ krã hkôt tanhmã ri amnhĩ nhĩpêx to rax o ixpa nom ã amnhĩ nhĩpêx anhýr kapřý. E pa ja hã mẽ amã amnhĩ jarê ka mẽ ijarênh ma.

⁵ Na pa pre ixkato nê kormã ixtã semãn pixire nhũm mẽ ixpê Ijaew ã inhmy kwrýt kà krãhta. Nom pa ã mẽ kot inhihpêx anhýr kôt ixpê Tirtũm kra hkêt nê. Nê inhihpêxã hkôt ixpê finat Pějãmĩ kanrêhã htãmnhwý jakamã ixpê Ijaew mex na pa. Nê Ijaew kapêr o ixkapêr o ri ixpa. Nom ja kôt ixpê Tirtũm kra hkêt. Nê mãñnên ixpê Parijew nhō xwýnh jakamã na pa pre Tirtũm kot finat Mojes mã mẽ pakaxyw mẽmoj tã karō kot pix mã amnhĩ nhĩpêx o ixpa hprãm. ⁶ Jao tee ri mẽ kot Jejus kôt amnhĩ nhĩpêx xwýnhjê pumu nê mẽ homnuj týx o ri ixpa. Na pa pre ijamaxpêr o: “Nà mũjjaja na htem mẽ ixkwým ri amnhĩ nhĩpêx o pa.” Anê nê mẽ hipêx kati ho ri ixpa. Nê ijamaxpêr o: “Ra ixte finat Mojes kot Tirtũm nhý hã kapêr piitã hkôt amnhĩ nhĩpêx mex jakamã na pa hte tanhmã ri amnhĩ tomnuj to ho ri ixpa hkêt nê.” Anê.

⁷ ã na pa pre ixpê Tirtũm kra hprãm xàj amnhĩ nhĩpêx anhýr o ixpa. Tã nom ãm ã amnhĩ nhĩpêx anhýr hkapřý. Na htem ã ri amnhĩ nhĩpêx anhýr kôt kêp Tirtũm kra hkêt nê. Tã pa hpãnhã amnhĩ kaxyw Kris kôt ijamaxpêr nhũm ixto hkra kurê kumrêx.

⁸ Ra ixte Jejus Kris kôt amnhĩ xãm jakamã Jejus kêp inhō Pahihti pa inhmã kapêr kôt pix mã amnhĩ nhĩpêx o ri prãm. No hkrax rũm ixte amnhĩ nhĩpêx tũmja na pa ra Jejus gryk ã hkaga hpa. Te ixte mẽmoj punuj pyr nê amnhĩ katut kôt mênh nê axte kãm ijamaxpêr kêt pyrãk. Jao amnhĩ kaxyw Jejus kôt pix mã ijamaxpêr o ri ixpa. ⁹ Nom kormã ã ijamaxpêr anhýr kêt ri na pa pre ixtýx ri ijamaxpêr o:

—Nà ixte Mojes kot Tirtũm nhý hã kapêr kôt amnhĩ nhĩpêx o ixpa jakamã koja Tirtũm ja hã ixpumu nê ixto hkra.

Anhýr tã nom ja kot anhýr kêt. Na htem amnhĩ krã hkôt tanhmã ri amnhĩ nhĩpêx to ho pa nhũm Tirtũm ãm ja hã mẽ omu nê ãm hã mẽ omu nê mẽ ho hkra hkêt nê. Nom koja mẽ Kris kôt amnhĩ xunhwý nhũm ja hã mẽ omu nê mẽ ho hkra kurê kumrêx. Jakamã ixte Kris kôt amnhĩ xãm ã ixpumunh kôt pix mã na pre ixto hkra nê inhmex ã ijarê. ¹⁰ Hãmri pa ra inhmã Kris kôt pix mã amnhĩ nhĩpêx o ri ixpa hprãm. Na pre ty tã akupým htĩr nê hihtýx nê àhpumunh týx o tanhmã amnhĩ nhĩpêx to ho pa. Tã ijaxwýja inhmã uràn ã amnhĩ nhĩpêx anhýr prãm. Nê inhmã urak nê amnhĩ xà htýx kutã amnhĩ to htýx nê ixpa hprãm. Mẽ kot hã ixpĩr mã tã pa urak nê Tirtũm kapêr kaga hkêt nê ãm kôt pix mã amnhĩ nhĩpêx o ri ixpa rãhã urak nê hã ty. Ja na inhmã ho anhýr prãm. ¹¹ Kê Tirtũm kot hipêxta pyrã nê akupým ixto ixtĩr pa wa kuri ixtĩr tũm nê ixpa ho ixpa. ¹² Inhmã Kris kôt pix mã amnhĩ nhĩpêx o ixpa hprãm týx kumrêx. Kormã ixte hkôt amnhĩ nhĩpêx o inhmōr

ně kormã hatur xãm mënh kêt tâ inhmã tokyx hatur xãm mënh prãm. Na pa ã inhmã amnhĩ nhĩpêx anhÿr prãm tÿx kumrêx.

Ně na pa hte ixte amnhĩ tomnuj kêt ã amnhĩ to jarkrar o ri ixpa hkêt në. Na pa hte arĩ tũhã tanhmã amnhĩ tomnuj to nom inhmã ã amnhĩ nhĩpêx anhÿr prãm kêt. Ně na pa kormã ixprĩ hã Kris kot amnhĩ nhĩpêx mar o inhmõr në hatur xãm mënh kêt tâ inhmã hkõt amnhĩ nhĩpêx o inhmõr në tokyx hatur xãm mënh prãm. Ja kaxyw na pre Jejus Kris amnhĩ kaxyw ixta. ¹³ Na pa hte më akurom papxipix ixte Jejus kãm hprãm xã hkõt amnhĩ nhĩpêx o ixpa hã amnhĩ to jarkrar kêt në. Nom ra ixte tanhmã amnhĩ tomnuj to ho ixpata pa axte kãm ijamaxpêr kêt në. Te amnhĩ katut kêt ixte rênh par pyrãk o hipêx në axte kãm ijamaxpêr kêt në. Ně Jejus kãm hprãm xã hkõt pix mã amnhĩ nhĩpêx prãm xãj amnhĩ kaxyw kãm ijamaxpêr o ri ixpa.

¹⁴ Koja nhÿrmã Tirtũm ixpê Kris kwÿ hã amnhĩ wÿr ixwÿr në inhmã:

—E amnê ixwÿr api Pawre. Kot kaj jarãhã amnê më ixwÿr api.

Anhÿr o nhÿrmã inhmã kapêr jakamã na pa hte amnhĩ tâ ãm pix jamãr rãhã ho ixpa. Pê ra Jejus kot amnhĩ nhĩpêx piitã omunh par o mõ. Nã kot paj gaa në hkõt pix mã amnhĩ nhĩpêx mex o ri ixpa. ¹⁵ Kwa kêr pu më pahpiitã ã pajamaxpêr anê. Jao amnhĩ wÿr hamãr pê hkõt pix mã amnhĩ nhĩpêx o ri papa. Mě pahpiitã më pahpê Kris kwÿ kênã. Nom kot ka më atõ ja kaxyw tee ri amnhĩ kukamã ajamaxpêr në ajamaxpêr o:

—Nã tanhmã kot paj we amnhĩ to në Jejus kêt amnhĩ nhĩpêx mex rãhã o ri ixpa? Ja kaxyw ixãhpumunh tÿxre hã. Anê.

Hãmri në ã ajamaxpêr anhÿr o apaja apê hihtÿx japêr. Hã koja Tirtũm hprĩ hã tanhmã amã ja kukamã harênh to në kaxyw ato axihtÿx ka ixpyrà në hkõt pix mã ri amnhĩ nhĩpêx o apa. ¹⁶ Jakamã kêr pu më ãm Tirtũm kãm hprãm xã hkõt pix mã tanhmã kãm amnhĩ nhĩpêx to ho papa. Ra më pahte hkõt amnhĩ nhĩpêx o papa xãja kêt pix mã arĩ amnhĩ nhĩpêx rãhã ho papa.

¹⁷ E Kris kêt ixtõ në ixtõxjaja. Na pa ra më anoo mã Jejus kêt tãm ri amnhĩ nhĩpêx o ri ixpa. Tã kêr ka më ja hã ixpumu në ixpyrà në hkõt amnhĩ nhĩpêx o ri apa. Hãmri në nhÿri më kot ixpyrà në ã amnhĩ nhĩpêx anhÿr xwÿnhjê hõ pumu në urãk në ã amnhĩ nhĩpêx anê.

¹⁸ Jejus kot më pamã më pahte amnhĩ tomnuj mÿrapê pí kahpa hã më panê htykja nhũm më ra ohtõ në hprĩ hã mar tâ hkõt amnhĩ xunhwÿr kêt në. Mě kãm ã kot amnhĩ nhĩpêx anhÿrja ã mar prãm nõkati. Jakamã te më kãm Jejus kurê xwÿnh pyrãk. Na htem hã hpijaãm kêt kãm tanhmã ri amnhĩ tomnuj to ho pa. Ně kãm amnhĩ mex pix prãm. Ně tanhmã amnhĩ tomnuj to në ja hã amnhĩ pumu në hkĩnh në. Nom tee ri ja hã amnhĩ pumu në hkaprĩ në ri pa hkêt në. Tã ã më kot amnhĩ nhĩpêx anhÿr jakamã koja më nhÿrmã ma më kot amnhĩ xã htÿx kamã hamak o pa tũm xãta wÿr hapêx. Nã koja më ã amnhĩ nhĩpêx anê. Ra ixte më amã ja hã më harênh rax tâ pa axte më amã më harê. Inhmã më

hkaprĩ hkõt na pa hte xatã më amã ja hã më harê.

²⁰ Kêt më papajaja më kurom më pahpê kaxkwa nhõ xwÿnh nom kormã. Koja nhÿrmã Jejus Kris akupÿn më pahwÿr kaxkwa rũm wrÿ. Mě papytãr xwÿnh maati Pahihtija akupÿn wrÿ hãmri në ma akupÿm amnhĩ kêt më pahto api. Jakamã na pu htem arĩ pahkĩnh pê amnhĩ wÿr kamã pajamak rãhã ho ri papa. ²¹ Na pu htem jar pyka ja kamã Jejus kĩnhã paxirerek në pahpunuj në ri papa. Nom koja nhÿrmã akupÿn më pahwÿr wrÿ hãmri në amnhĩ pyrã në më pamã më panhĩ nyw gõ pu më urãk në paxihtÿx kãm pahťir tũm në papa ho papa. Æ kot më panhĩpêx anhÿr kaxyw ãhpumunh o ãhpumunh. Tã koja ãhpumunh tÿx kãm mëmoj piitã ho amnhĩptãr pa. Pu më pahpiitã hkõt amnhĩ nhĩpêx mex rãhã ho ri papa.

Pawre kot mëmoj tâ më kãm karõ

Epes 4.3; Piripos 2.2; Korosê 3.15

4 E Kris kêt ixtõ në ixtõxjaja. Inhmã më ajapêê. Na pa hte më ato ijamak o ixkrĩ në më amã ijamaxpêr në ixkĩnh në. Ně jar më pahkwÿjê mã më ajarênh o ri ixkrĩ. E kwa kêr ka më arĩ Pahihti kapêr kêt pix mã mãn amnhĩ nhĩpêx mex rãhã ho ri apa.

² Ně wa ka Ewox më Sïxika wa. Na ka xep hte wa mëmoj tâ axpên kamã agryk rãhã ho ri apa. Kwa wa ã amnhĩ nhĩpêx anhÿrja mã anhÿre në tãm axpên nhĩpêx. Pahihti Kris kêt war ate axpên to war atõx kênã kot ka kêt wa axtem në mëmoj tâ axpên kamã agryk o ri apa.

³ Ně ka Xikitre. Apê ixkrãmnhwÿ mex jakamã kêr ka axpên tâ wa nita wa kãm akapêr kãm axihtÿx në kê war ama në akupÿm tãm axpên nhĩpêx. Na pre wa ra Kremên më hkwyjê më hpimràatã ixpyrà në Jejus kot tanhmã më panê amnhĩ nhĩpêx to hã harênh o ri pa. Tirtũm nhõ kagã kamã më hixi piitã hikwÿ. Mě pahťir tũm në më papa mã xwÿnhjaja ra Tirtũm nhõ kagã kamã më panhĩxi jaxwÿr par.

⁴ Ně kêr ka më apê Pahihti hkwyjê hã akĩnh në ri apa. Mě ate ã amnhĩ nhĩpêx anhÿr o apaja na pa inhmã hprãm tÿx jakamã kot paj axte më amã harê. Kwa kêr ka më akĩnh në ri axpên kêt apa.

⁵ Pahihti Jejus ra akupÿn më pahwÿr nojarêt jakamã kêr ka më kutêp më piitã ri më ho mex o ri më hkõt apa.

⁶ Ně kêr ka më tee ri amnhĩ kukamã ajamaxpêr o ri apa hkêt në. Arĩ amnhĩ to Tirtũm wÿr rãhã në. Kot ka më mëmo arĩgro hã apê amrakati japêr në tee ri ja hã amnhĩ pumu në amnhĩ to awÿ kê më ama në më amã mëmoj gõ. Rÿ më ate mëmoj tâ hwÿr xwÿnhhta tanhmã më amã hipêx to ka më amnhĩ tâ omu në kãm:

—Nã ãm hãmri na ka ã inhĩpêx anê në inhmã ja gõ Tirtũm. Amex o amex.

Anhÿr o kãm amnhĩ jarê. ⁷ Kot kaj më ã amnhĩ to hwÿr anhÿr o ri apa nhũm tanhmã më akrã hto ka më më apê Jejus Kris kwÿ hã ajamakêtkati në axãmnhĩx ri apa. Hãmri në mëmoj tâ tee ri amnhĩ kukamã ajamaxpêr o ri akaprĩ në apa hkêt në. Æm akĩnh rãhã ri apa. Tirtũm kot tanhmã më pahto nhũm më pajamakêtkati

ně ri mẽ papaja mẽ pahte amnhĩ tã omunh kêt. Ām tapxipix kot ā mẽ panhĩpêx anhÿr kukamã àhpumunh tÿx.

⁸ E Kris kôt ixtõ ně ixtõxjaja. Nà ixkapër ā kagà jatur xà na ja. Kwa kêt ka mẽ ixujarēnh mar tÿx ně hkôt amnhĩ nhĩpêx o apa.

Ně kêt ka mẽ axàpēnh mex pix kukamã ri ajamaxpër o apa.

Ně mẽmoj mex pix kukamã ri ajamaxpër.

Ně axpēn mã akapër mex pix kukamã ri ajamaxpër. Ně akatāt kôt akapër xàptār pix o axpēn mã akapër hkukamã ri ajamaxpër o ri apa.

Ně tãm ri amnhĩ nhĩpêx hkukamã mǎn ajamaxpër o ri apa.

Ně mẽ piitã ri mẽ ho mex o apa hkukamã ajamaxpër.

Ně mẽ akapër mex pix kukamã mǎn ajamaxpër o ri apa.

E kêt ka mẽ ā amnhĩ nhĩpêx anhÿrja kukamã ajamaxpër rǎhã ho ri apa.

⁹ Ně mẽ akôt ixpare ri na pa pre Kris kôt amnhĩ to mex pix ně tãm ixkapër o ri ixpa. Tã kêt ka mẽ ixpyrà ně ā amnhĩ nhĩpêx aně. Kojã Tĩrtũm ja hã mẽ apumu ně mẽ akôt ri pa ho pa. Kêp mẽ pamã mẽ paxàmnhĩx pajamakêtkati xà nhõr xwÿnh na.

Mě kot Pawre hwÿr mẽmoj mẽnh nhũm kot omunh ně hkĩnh ā harēnh

Sikũn Korĩt 11.7-9; Piripos 1.5

¹⁰ Ně amnepēm na ka prem xatã tanhmã ixto mex to ho ri apa. Tã axte ā inhĩpêx anhÿr prãm nom mẽ apê awry ně ixpa jakamã ka xep prem tee ri tanhmã ixto mex to hkukamã ajamaxpër kaprÿ. Tã jar mẽ kot ijaxàr ā ijarēnh ma ně ixwÿr Eparoxit mẽ nhũm man ixwÿr mō ně inhmã kàxporeta gō. Mě amã ijapê hã ixwÿr amē pa omu ně ixkĩnh tÿx ně. Ně ixkĩnh kãm Tĩrtũm mã mẽ ajarē. Ām hãmri na ka prem ixwÿr amē.

¹¹ Ně na pa hte tanhmã ixkute htã arĩ ixkĩnh ně ijamakêtkati ně ri ixpa. Jakamã kot pa mẽmo arĩgro hã ixpê amrakati ně inhmã prãm japêr tã no ãm tee ri amnhĩ kukamã ijamaxpër o ri ixkaprĩ hkêt ně. Arĩ ixkĩnh rǎhã ixàmnhĩx ri ixpa. Rÿ pa inhõ mẽmoj rax japêr ně mǎãnēn ixkĩnh ně ixàmnhĩx ri ixpa. Na pa pre tōhã inhõ rax ně ixpa. Ně tōhã inhõ hkêt ně ixpa. Tã arĩ ixkĩnh rǎhã ně ixpa ho ixpa. ¹³ Na hte Kris mẽmoj piitã hkukamã ixto ixihtÿx pa ŷ hã mẽmoj kutã ixihtÿx ně ix-

pa. Jao mẽmo arĩgro hã inhmã prãm tÿx ně ri ixpa htã ŷ hã kutã ixihtÿx ně ixàmnhĩx ri ixpa. ¹⁴ Tã jar ixpunuj ně ixkrĩ ka mẽ ijarēnh ma ně ixwÿr kàxpore hkwy rē. Ām hãmri na ka prem ixwÿr arē. ¹⁵ Amnepēm na pa pre mẽ anhõ pika pē Masetõn rũm ixkato ně mẽ piitã mẽ kãm Jejus kot tanhmã mẽ panē amnhĩ nhĩpêx to hã harēnh o ri ixpa ka mẽ xatã ixwÿr kàxpore hkwy rē pa ho amnhĩm ixujaprõr o ri mẽ hkôt ixpa. Mě apê Piripos kamã Kris kôt ixtõ ně ixtõx pixjaja na ka prem ā inhĩpêx aně. Krĩ hkwy kamã Kris kôt mẽ pahkwÿjaja na mẽ akĩnhã ā inhĩpêx anhÿr kêt ně. Ām mẽ kapxipix na ka pre ā ixto mex aně. ¹⁶ Tesarõn kamã ixpare ri na pa pre ixpê amrakati kumrēx ně ri mẽ hkôt ixpa ka mẽ xatã ixwÿr kàxpore hkwy rē pa pre ho amnhĩm ixujaprõr rǎhã ho ri mẽ hkôt ixpa. ¹⁷ Nom mẽ ate ixwÿr hkwy rēnh kaxyw mẽ akamã ijamak o ri ixpa hkêt ně. Rÿ ijamaxpër o:

—Ko. Kojã Piripos nhõ xwÿnhjaja ijarēnh ma ně kãm ixkaprĩ ně ixwÿr kàxpore hkwy rēnh japêr.

Anhÿr o mẽ akukamã ijamaxpër kêt ně. Nom ra mẽ ate ixwÿr hkwy rēnh jakamã kojã Tĩrtũm ja hã mẽ apumu ně mẽ ato mex ně. Ā mẽ pahte axpēn kutã panojarêt anhÿrja na kãm hprãm.

¹⁸ Tã nhũm Eparoxitja ham mẽ arũm kato ně man ixwÿr mō ně inhmã kàxporeta gō. Kwa na ka mẽ inhmã õr rax ně. Kojã tokyx ixpê hapêx kêt pa kritpēm ho ixàpkur o ixkrĩ. Tã ot pa ho kōta ně tanhmã hkre kamã kute pumunh xà hkôt hã kagà ně mẽ awÿr kumē. Nà mẽ ate ixwÿr axàmnhõrta na Tĩrtũm omu ně ixtã mẽ apumu nhũm ja kãm mex kumrēx. Te mẽ kot mẽ hkuxwaxà hpār nhũm mẽ kãm mexta pyràk nhũm ja kãm mex ně. ¹⁹ Nà kojã Tĩrtũm mẽ apê Jejus Kris kwÿ hã mẽ amã mẽ ate mẽmoj to presija xà nhõr rǎhã ho pa. Měmoj piitã kêp õ kēnã.

²⁰ E kêt pu mẽ Měpanhĩpêxã maati Tĩrtũm mã mex o mex ā harēnh rǎhã o papa. Ja na inhmã hprãm.

²¹ Ně ot pa mẽ jar ixpiitã mẽ apê Jejus Kris kôt mẽ ixkwÿjê hwÿr kagàja kamã mẽ ixpēr mẽ. Mě ixpyrà ně mẽ apê Tĩrtũm kra hã. Pa ně Kris kôt mẽ pahtõ ně mẽ pahtõxjaja. Ně Rõm nhõ pahi mã mẽ àpēnh xwÿnh kot Kris kôt amnhĩ xunhwÿr xwÿnhjaja mǎãnēn. Ām jar mẽ ixpê Tĩrtũm krajê piitã pa mẽ awÿr ixpēr mẽ.

²³ E kē Pahihtĩ Jejus Kris mẽmoj to mẽ akutã nojarêt rǎhã ně. Jao mẽ ato mex o pa.

Tã ãm ja pix. Ixpê Pawre na pa mẽ awÿr kagàja nhĩpêx ně kumē.

Korosë

Pawre na pre kagàja nhìpêx. Jejus nhỹ hã hkrajê jahkre o mẽ pa xwýnhjê hõ na pre. Tã nhũm mẽ kêp Jejus kra hkêt xwýnh kwýjaja Jejus ã unê nẽ haxà nhũm arĩ hkrĩ ho hkrĩ. Hãmri nẽ krĩ pê Koros kamã Jejus krajê mã kagà nhìpêx nẽ mẽ hwýr kumẽ. Koros kamã Jejus kwýjê kamã Ijaew kwý nẽ kamã Ijaew kêt xwýnh kwý nhũm Pawre mẽ ho hpimràatã mẽ hwýr kumẽ. Kormã mẽ hwýr mõi nẽ mẽ omunh kêt tãã. Nẽ kagàja kamã mẽ kot tanhmã Jejus o hêx to ho pa xwýnhjê jarênh to. Jejus kêp Tirtũm Kra hkêt ã mẽ kot ho hêx xwýnhjê jarê nẽ mẽ nẽ mẽ kãm kapêr. Mẽ kot mẽ hkõt amnhĩ nhìpêx kêt kaxyw mẽ kãm kapêr nẽ hã kagà nẽ mẽ hwýr kumẽ nẽ mẽ kãm:

1 Pa Koros kamã Kris kôt ixkwýjaja. Xà mẽ amex na ka mẽ apa? Ixpê Pawre na pa mẽ awýr kagàja nhìpêx nẽ mẽ awýr kumẽ. Kris kôt mẽ pahťõ Ximotre mẽ wa kumẽ. Ixte Jejus Kris nhỹ hã mẽ ahkre ho mẽ ixpa xwýnhjê hõ na pa. Tirtũm kãm hprãm xà hkõt. ² Tã pa mẽ awýr kagà nhìpêx nẽ kumẽ. Mẽ apê Kris kôt mẽ ixtõ nẽ ixtõx na ka mẽ. Na ka xep htem Kris kapêr kôt amnhĩ nhìpêx mex o ri apa. E kê Tirtũm mẽ apê hkra hã mẽ akutã nojarêť rãhã nẽ. Ka mẽ amex nẽ ajamakêtkati nẽ axãmnhix ri tanhmã amnhĩ nhìpêx ho ri apa.

Koros nhõ xwýnh kwýjaja kot Jejus kôt amnhĩ xunhwýr ã mẽ harênh
Wam Tesarõn 1.2-5

³ Na pa ra Ximotre mẽ wa mẽ ajarênh ma. Mẽ ate amnhĩ kaxyw Jejus Kris kôt ajamaxpêr tỳx nẽ hkõt amnhĩ nhìpêx mex o apa hã mẽ ajarênhja ma. Nẽ mẽ kot Tirtũm kôt amnhĩ xunhwýr xwýnh piitã mẽ amã mẽ hkĩnh ã mẽ ho mex o apa hã mẽ ajarênhja ma nẽ wa ixkĩnh nẽ. Jakamã na pa wa Pahihti Jejus Nhìpêxã Tirtũm mã amnhĩ jarênh kaxyw nẽ kãm mẽ anhỹ hã wa ixkĩnh ã amnhĩ jarê. ⁵ Na pre Epas ma mẽ awýr mõi nẽ mẽ amã Jejus kot tanhmã mẽ panê amnhĩ nhìpêx to hã harênh o mẽ akõt pa. ãm hãmri kot mẽ amã harênhja. Tã ka xep prem ama nẽ amnhĩ kaxyw hkõt ajamaxpêr nẽ hkõt amnhĩ xunhwý. Hãmri nẽ amnhĩ wýr Jejus jamãr o ri apa. Kojã nhỹrmã akupýn mẽ pahwýr wrý nẽ amnhĩ pyrã nẽ ma akupým kaxkwa hwýr mẽ pahťõ api nẽ mẽ pahťõ mex kumrêx o mẽ pahťõ pa ho pa. Tã ka xep htem amnhĩ kaxyw hkõt ajamaxpêr tỳx nẽ ã kot amnhĩ nhìpêx anhỹr kutêp amnhĩ wýr kamã ajamak rãhã nẽ. Nẽ mẽ amã mẽ kot Tirtũm kôt amnhĩ xunhwýr xwýnhjê hkĩnh tỳx nẽ.

⁶ Na hte Tirtũm ãm hãmri mẽ pahťõ mex pix rãhã ho pa. Nẽ mẽmoj to mẽ pakutã nojarêť rãhã nẽ. Tã wam mẽ ate harênh marta ã ka mẽ hkõt amnhĩ xunhwýr kurê kumrêx nẽ ri kapêr kôt axpên kôt amnhĩ nhìpêx mex pix o ri apa. Jao hkõt pix mã amnhĩ nhìpêx mex nẽ. Tã na hte pika piitã hkõt ri mẽ pa xwýnh kwýjaja mẽ apyrã nẽ Jejus jarênh ma nẽ hkõt amnhĩ xunhwý. Nẽ mẽ apyrã nẽ axtem hkõt pix mã amnhĩ nhìpêx nẽ kapêr kôt amnhĩ nhìpêx mex o ri pa.

⁷ Nẽ mẽ awýr mõiťa ã na pre Epasja mẽ amã Tirtũm kapêr jarênh o ri mẽ akõt pa ka prem ama nẽ amnhĩ kaxyw hkõt ajamaxpêr nẽ hkõt amnhĩ xunhwý. Epasja wa ixpyrã nẽ kot Kris mã tanhmã amnhĩ nhìpêx to ho pa xwýnh. Nẽ wa inhmã hapêê. Na pre katãť kôt mẽ amã Tirtũm kapêr jarênh pa. Kot mẽmoj to mẽ pakutã nojarêť rãhã hã harênh o ri mẽ akõt pa. ⁸ Tã man akupýn wa ixwýr mõiň põi nẽ wa inhmã tanhmã mẽ ajarênh to. Tirtũm Karõ nhỹ hã mẽ amã Kris kôt atõ nẽ atõx piitã mẽ hkĩnh o ri apa hã mẽ ajarê. Pa wa mẽ ajarênh ma nẽ wa ixkĩnh tỳx kumrêx.

Pawre mẽ Ximotre wa kot Koros kãm hkwyjê ho Tirtũm wýr ã wa harênh

Epes 1.15-23, 3.14-21; Piripos 1.9; Wam Tesarõn 5.23-24; Sikũn Tesarõn 1.11, 2.16

⁹ Nẽ na pre Epas akupýn wa ixwýr põi nẽ wa inhmã tanhmã mẽ ajarênh to. Mẽ ate amnhĩ kaxyw Jejus kôt ajamaxpêr o apa nẽ mẽ amã Kris kôt akwýjê piitã mẽ hkĩnh o ri apaja nhũm wa inhmã mẽ ajarê. Pa wa mẽ ajarênh ma nẽ mẽ ato Tirtũm wýr rãhã o jar mẽ hagjênh xà kamã ixkrĩ. Nẽ arĩ mẽ ato hwýr rãhã ho ixkrĩ. Nẽ mẽ ato hwýr o:

—Pa Tirtũm. Ot pa Ximotre mẽ wa Korosë nhõ xwýnhjê ho awýr kaxyw amã mẽ harê. Kwa tanhmã mẽ hamaxpêr to kê mẽ amã hprãm xà hkõt pix mã amã tanhmã amnhĩ nhìpêx to ho pa. Nẽ Akarõ nhỹ hã hprĩ hã akapêr ma nẽ ãm hkõt pix mã tanhmã amnhĩ nhìpêx to ho pa. Anẽ.

¹⁰ Na pa hte wa ã mẽ ato Tirtũm wýr anhỹr rãhã ho ixkrĩ. Kot kaj mẽ ã amnhĩ nhìpêx anhỹr o ri apa nẽ Jejus kot amnhĩ nhìpêx o amnhĩ nhìpêx mex o ri apa. Nẽ aprĩ hã Tirtũm kot amnhĩ nhìpêx ã omunh mex o mõi. Jao mẽmoj to axpên kutã anojarêť pix o ri apa hprãm. Hãmri nhũm Tirtũm ja hã mẽ apumu nẽ hkĩnh nẽ. ¹¹ Tirtũmja mẽ pakuum mẽmoj piitã kaxyw ãhpumunh o ãhpumunh. Nẽ mẽmoj piitã kaxyw hihtỳx o hihtỳx. Jakamã na pa hte wa mẽ ato hwýr o:

—Pa Tirtũm. Kwa tanhmã Koros nhõ xwýnhjê ho kê mẽ axihtỳx nhỹ hã mẽmoj punuj kutã amnhĩ to htỳx nẽ. Mẽ kot Jejus ã tanhmã mẽ ho nhũm mẽ kot amnhĩ xà kamã hamak tã kê mẽ tee ri amnhĩ kukamã hamaxpêr o hkaprĩ nẽ ri pa hkêt nẽ. ãm anhỹ hã mẽ hkurê

xwýnhjê kutã amnhĩ to htýx ně hkĩnh kãm ri pa ho pa. Aně.

Na pa hte wa ã mě ato hwýr aně.

¹² Na pre ra Tirtům amnhĩ ri mě pakutêp měmoj mex kwý jaxwý. Mě pahpê hkrajê mã haxwý. Tã ka mě ý hã tãm amnhĩ nhĩpêx o apa jao mě ate měmoj mex jamýnh mã tãm. Ő krĩ nhĩrã rax kumrêx kamãã. Jakamã kwa mě kot Jejus ã tanhmã mě pahto htã kêr pu mě arĩ Tirtům mã mex o mex ã harěnh rãhã ho ri papa.

¹³ Ně Satanasti kêp kamãt kô kamã mě kot amnhĩ tomnuj ho mě pa xwýnhjê pãm. Tãm na hte mě ho amnhĩptãr o pa ně hkôt na pu prem amnhĩ nhĩpêx o papa rãhã nhũm Tirtům tee ri ja hã mě pahpumu. Hãmri ně kãm kêp mě papytãr prãm xaj mě pahwýr Kra japê htýx kumrêx xwýnhja mě. Nhũm mě pahwýr wrý ně mě paně htyk o mě pahte amnhĩ tomnuj pãnhã kãm amnhĩre. Tã pu prem hkôt amnhĩ xunhwý nhũm Tirtům hã mě pahpumu ně mě paně mě pahte amnhĩ tomnuj o hapêx pa. Te kot amnhĩ katut kôt rěnh par pyrãk. Jao Satanasti pẽ mě pahpytã nhũm hpãnhã Jejusja tãm kêp mě pahto amnhĩptãr o pa xwýnh.

¹⁴ Ra htyk o mě pahte amnhĩ tomnuj piitã hpãnhã amnhĩrer jakamã na pu htem hkôt amnhĩ xunhwý nhũm mě pahte amnhĩ tomnuj o hapêx pu mě axte Satanasti hkôt ri amnhĩ nhĩpêx kêt ně. Ām Jejus kôt pix mã amnhĩ nhĩpêx o ri papa.

Kris mě Tirtům wa kot amnhĩ nhĩpêx te wa kot axpěn pyrãk ã harěnh

Juãw 1.1-5; Korosě 2.9; Eprêw 1.1-14

¹⁵ Ně Krisja te kot Tirtům pyrãk. Mě pahte pano ho Tirtům pumunh kêt tã Kra Kris kot amnhĩ nhĩpêx ã harěnh mar kôt mããnen Tirtům kot amnhĩ nhĩpêx ã omunh mex ně. Amnepê mã kormã měmoj kêt ri nhũm Jejus pa ho pa rãhã ně. Jakamã kot amnhĩ to rax o Tirtům kot měmoj to katorja piitã hakrenh par kumrêx. ¹⁶ Na pre hipêxã Tirtům nhý hã měmoj piitã ho kator pa. Kaxkwa kamã ně pika hkôt měmoj piitã ho kator pa. Ně kaxkwa kamã mě pahte pano ho měmoj pumunh par xwýnhjaja nhũm pre ho kato. Ně kamã mě pahte pano ho měmoj pumunh kêt xwýnhjaja nhũm pre mããnen ho kato. Ně kapěr o wrýk xwýnhjaja ně mě hkrãhtũmjaja nhũm pre mě ho kato. Ně pika kamã mě ho amnhĩptãr xwýnhjaja nhũm pre mě piitã mě ho kator pa. Kãm hprãm xã hkôt Tirtům nhý hã měmoj piitã ho kator pa.

¹⁷ Tã na hte arĩ kaxkwa kamã ně pika hkôt měmoj piitã hamãr rãhã ho pa. Kêp apu kot hamãr kêt ronhýx měmoj piitã akupým hapêx pa.

¹⁸ Ně tãm na hte mě pahpê hkrajê ho amnhĩptãr o pa. Te kêp mě pahkrã nhũm te mě pahpê ĩ pyrãk jakamã na pu htem kapěr kôt pix mã amnhĩ nhĩpêx o papa. Kumrêx na pre akupým htĩr o htĩr jakamã kot amnhĩ to rax o měmoj piitã hakrenh par.

¹⁹ Ně na pre Tirtům ã hamaxpěr aně ně hamaxpěr o: "Nã Ixkra mě wa ixte amnhĩ nhĩpêxja te kot axpěn pyrãk. Ně wa ixihtýx mããnen te kot axpěn pyrãk. Ně

wa inhmex xã mě wa ixãhpumunhja te kot axpěn pyrãk. Ā wa ixte amnhĩ nhĩpêx kot anhýr. Wa ixte amnhĩ nhĩpêxja na mex kumrêx." Aně.

²⁰ Tã Jejus kot pĩ kahpa hã mě paně tyk ně hkamrô pikapĩr kukwak ri na hte Tirtům mě kot hkôt amnhĩ xunhwýr xwýnh piitã mě ho hkra nhũm mě hamakêtkati ně ãmnhĩx pa ho pa. Kaxkwa kamã ně pika piitã hkôt mě kot Jejus kôt amnhĩ xunhwýr xwýnhjaja na htem ã amnhĩ nhĩpêx mex anhýr o pa. Ā Jejus kot mě paně htyk anhýr jakamã kot amnhĩ to rax o kot měmoj piitã hakrenh par.

Jejus kêp tãm mě paxunhwýr xwýnh ã harěnh

²¹ Ně mě papajaja na pu prem pamã Tirtům prãm kêt o ri papa. Te hkãx ã ri papa pyrã ně kutã amnhĩ xunhwý ně pajamaxpěr punuj ně tanhmã amnhĩ tomnuj to pix o ri papa. ²² Tã Jejus kôt amnhĩ xunhwý nhũm amnhĩ tã mě pahpumu. Hãmri ně ra mě paně htyk jakamã amnhĩ tã mě pahpumu ně Tirtům noo mã tãm mě paxunhwý. Te aa mě pahte tanhmã amnhĩ tomnuj to hkêt pyrãk o mě panhĩpêx ně tãm mě paxunhwý. Pu mě arĩ pahpê Tirtům kutã amnhĩ xunhwýr xwýnh kêt ně hpãnhã pahpê hkrãmnhwý. ²³ Na pre Tirtům mě pahte amnhĩ kaxyw Kra Kris kôt pajamaxpěr ně hkôt amnhĩ xunhwýr ã mě pahpumunh kôt ã mě pahto mex aně. Tã kêr pu mě arĩ hkôt amnhĩ nhĩpêx o ri papa ně aa hkaga hkêt ně. Mě kot Kris ã tanhmã mě pahto htã pu mě arĩ hkôt amnhĩ nhĩpêx mex rãhã ho ri papa.

Kormã mě kot jar ijaxãr kêt ri na pa pre hte mě kãm ã harěnh anhýr o ri mě hkôt ixpa. Tã ka prem Jejus jarěnh ma ně hkôt amnhĩ xunhwýr kurê kumrêx. Nhũm krĩ piitã hkôt ri mě pa xwýnh kwýjaja mě apyrã ně harěnh ma ně hkôt amnhĩ xunhwý ně hkôt amnhĩ nhĩpêx o pa.

Pawre kêp Ijaew kêt xwýnhjê mã Jejus jarěnh xwýnh ã harěnh

Epes 3.1-13

²⁴ Ně ixte mě amã Kris kot tanhmã mě paně amnhĩ nhĩpêx to hã harěnh o ixpaja ã na prem tanhmã ixto htýx ně pa amnhĩ xã htýx kãm ijamak o ri ixpa. Tã arĩ Tirtům kãm hprãm xã hkôt ã amnhĩ nhĩpêx anhýr jakamã na pa ixkĩnh ně jar ixkrĩ. Ixte Kris kwýjê kaxyw amnhĩ xã kamã ijamak týx o ixkrĩ. Te mě apê Kris nhĩ pyrãk xwýnhjê mãã. Tã pa te ixpê Kris kot amnhĩ nhĩpêx pyrãk o mě akaxyw amnhĩ xã htýx kãm ijamak o ixkrĩ.

²⁵ Na pre Tirtům mě apê Ijaew kêt xwýnhjê kaxyw ixãm. Ixte mě amã kapěr piitã harěnh par nhũm mě ate mar ně hkôt amnhĩ nhĩpêx mex o ri apa kaxyw.

²⁶ Na pre kormã mēhō mě awýr mōr ně mě amã harěnh kêt ně. Tã ra Tirtům kãm mě ate mar prãm ně. Kãm mě apê Ijaew kêt xwýnhjê mě mě pahpê Ijaew xwýnhjê japê o axpěn pyrãk. Nom na pre amnepêm ri mě pa xwýnhjê mã kormã ja hã amnhĩ to amnhĩrĩt kêt ně. Tã ra jarãhã mě pahpê Kris kwýjê mã ja ho amnhĩrĩt. Mããnen kãm mě apê Ijaew kêt xwýnhjê japê hã amnhĩ to amnhĩrĩt. ²⁷ Mě apê Ijaew kêt tã na ka prem

Kris kôt amnhî xunhwÿ nhÿm Tirtÿm Karô mē akarô mā agjê nē mē akamā pa ho pa. Ka mē ra hkôt amnhî nhîpêx jakamā kot kaj mē ixpyrà nē nhÿrmā kuri atîr tÿm nē amex rāhā ho apa ho apa. Ja na mex kumrêx. Tā ja na Tirtÿm kām mē ate mar prām nē mē akaxyw ixām. ²⁸ Jakamā na pa pre Ximotre mē wa mē apiitā mē amā Kris kot mē panê tanhmā amnhî nhîpêx to hā harēnh kām ixihtÿx o ri mē akôt ixpa. Nē kapêr o mē ajahkre ho ri mē akôt wa ixpa. Nē jar mē hagjēnh xā kamā krî piitā hwÿr kagā nhîpêx nē mē hwÿr kurê. Mē kot kamā harēnh nē mar nē amnhî tomnuj kaga nē hpānhā Kris kôt amnhî xunhwÿr nē ām kôt pix mā amnhî nhîpêx o pa kaxyw. Kêr pa nhÿrmā kām mē ate inhmar nē hkôt amnhî xunhwÿr xwÿnhjê jahkre nē kām:

—E Pahihti. Ota akwÿjaja. Na htem akôt amnhî nhîpêx mex rāhā ho ri pa. Anê.

²⁹ ā ixte kām mē piitā mē harēnh anhÿrja na inh mā hprām. Ja kaxyw na pre Jejus ixto ixihtÿx. Jakamā na pa hte Tirtÿm nhÿ hā tanhmā kapêr o mē ahkre hto ho ri mē hkôt ixpa. Jao mē ho Tirtÿm wÿr o ri ixpa nē mē kām kagā nhîpêx nē mē hwÿr kurê nē kamā kapêr o mē ahkre o ri ixpa.

Pawre kot Jejus kapêr o Koros nhô xwÿnhjê o hihtÿx ā harēnh

Epes 3.14-19; Piripos 1.9

2 E kot paj mē amā tanhmā amnhî jarēnh to ka mē inhma. Na pa hte mē ato Tirtÿm wÿr rāhā ho ixkrî. Mē kajaja nē krî pē Ratisej kamā Jejus kôt mē pahkwÿjaja. Kormā ixte mē apumunh kêt tā pa hte mē ato Tirtÿm wÿr kām ixihtÿx āhā ho ixkrî. ² Mēmo kaxyw na pa hte ā mē ato hwÿr anê? Nē mēmo kaxyw na pa hte mē amā kagā nhîpêx nē mē awÿr kurê? Nā ām mē ate kamā harēnh nē mar nē Jejus kapêr kôt axpēn to axihtÿx o ri apa kaxyw. Nē mē amā axpēn kînh o ri apa kaxyw. Pê te mē ate ixkre tipxi kamā axpēn kôt amnhî nhîpêx o ri apa pyrāk. Jao aprî hā Tirtÿm kot amnhî nhîpêx pumunh mex nē amnhî kaxyw hkôt ajamaxpêr tÿx nē. Kot kaj mē ā amnhî nhîpêx anê nē Kris kot amnhî nhîpêxta pumunh pa. Na pre Tirtÿm tokyx mē kām Kris o amnhîrît kêt tā ra mē pamā ho amnhîrît. ³ Tirtÿm kot amnhî nhîpêx nē kapêrja na pu htem Kris nhÿ hā pahprî hā omunh nē mar mex nē. ⁴ Jakamā kaja mēmojaja mē awÿr mra hāmri nē hêx rom Tirtÿm kapêr kwÿm ri tanhmā mē amā mēmoj jarēnh to. Te mē àhpumunh tÿx pyrāk o mē amā harē no ām mē àhpumunh kêt. Ka mē ama nē ām mē ama nē Kris kaga hkêt nē.

⁵ Nē kormā arî Jejus ā ijaxàr nē ixkrî nē kormā mē akôt ixpa hkêt tā ot pa hte mē amā ijamaxpêr rāhā ho ixkrî. Nē ra tanhmā mē ajarēnh mar to. Na ka xep htem Kris kôt amnhî nhîpêx tÿx o ri apa. Te ahkrô pē kukryt mut kuxêeti kot pî kupu htÿxta pyrāk. Nē ka xep htem arî amnhî kaxyw Kris mā ajamaxpêr tÿx o ri apa. Pa mē ajarēnh ma nē ixkînh tÿx nē.

⁶ Na ka prem Pahihti Jejus Kris kôt amnhî xunhwÿr pa. Tā kêr ka mē arî hkôt amnhî nhîpêx mex rāhā ho

apa. Kêp mē panhō Pahihti kênā. ⁷ Jakamā mē ām kôt pix mā amnhî xunhwÿr tÿx nē aa hkaga hkêt nē. Te mēmo pî hpàr jarêja pika kaxwÿnh kām pimānh nē kot pika jamÿnh tÿxta pyrāk. Nhÿm kôk xàpêr tÿx tā tee kot mēnh kaxyw pyrāk. Tā kêr ka mē pî hpàrta pyrā nē hkôt amnhî xunhwÿr tÿx nē hkôt amnhî nhîpêx mex o ri apa. Ra Epas kot mē ajahkre ho pa xā hkôt. Nē amnhî krām Kris kapêr jaxàr tÿx nē aa ho ajamakêtkati hkêt nē. Pê akînh kām Tirtÿm mā mex o mex ā harēnh rāhā ho ri apa.

⁸ Nē kwa kêr ka mē kot hêx rom mē amā tanhmā kapêr to ho mē pa xwÿnhjaja ka mē amnhî nē mē omunh mex nē. Nē mē kapêr mar hkêt nē. Mē ate Kris kaga hprām xàj na htem tanhmā mē amā hêx to ho ri mē akôt pa. Te amnepēm mē kot Tirtÿm kapêr kwÿm ri tanhmā mē ahkre hto xwÿnhjê pyrāk. Hinhu hikôoti kapêr kôt na htem tanhmā mē amā hêx to nom Kris nhÿ hā mē amā kapêr kêt nē. Jakamā kwa mē amnhî nē mē omunh mex nē.

⁹ Nē Kris mē Tirtÿm wa kot amnhî nhîpêx kot axpēn pyrāk. Nē wa hamaxpêr kot axpēn pyrāk. ¹⁰ Tā kêr pu mē pajaxwÿja wa hamaxpêr o pajamaxpêr nē wa kot amnhî nhîpêx o amnhî nhîpêx. Jakamā kwa mē kot Tirtÿm kapêr kwÿm ri tanhmā mē kapêr to xwÿnhjê kot amnhî nhîpêx o amnhî nhîpêx kêt nē. Nē mē kapêr ma nē ām mē ama. Kris na hihtÿx o hihtÿx o kot mēkarômnuti nhô pahi piitā mē hakrenh par. Nē hihtÿx o hihtÿx o kot Tirtÿm kapêr o mē wrÿk xwÿnhjê piitā mē hakrenh par. Nē àhpumunh o àhpumunh o kot mēmoj piitā hakrenh par jakamā kêr ka mē kapêr kôt pix ma nē hkôt pix mā ri amnhî nhîpêx o ri apa.

Mē pahte amnhî nhîpêx nyw jarēnh

Rômân 6.3; Karatas 5.24

¹¹ Nē na hte ixkwÿ Ijaewjaja mē hkra nhÿrmā hprêk nē Tirtÿm kôt amnhî nhîpêx ā mē harēnh kaxyw mē kêp mēmy kwrÿt kà jakà. Tā mē kajaja. Mē apê Ijaew kêt xwÿnhjaja na pre Kris mē anhîpêx o te mē kot amnhî jakàrta pyrāk. Jao te kot mē anê mē ate amnhî nhîpêx tÿm jakàr par pyrāk o mē anhîpêx ka mē ra amnhî nhîpêx nyw o amnhî nhîpêx o apa. Nhÿm htem mē ate amnhî nhîpêx nyw ā mē apumu nē mē ate Jejus kapêr kôt amnhî nhîpêx ā mē apumunh kurê kumrêx. ¹² Tā na pu htem jarāhā mē pahte Tirtÿm kôt amnhî nhîpêx o papa hā amnhî jarēnh kaxyw amnhî jakàr kêt nē. Na pu htem hpānhā amnhî kaxyw Tirtÿm xihtÿx o hihtÿx xwÿnhja kôt pajamaxpêr. Kot mē panê pahte amnhî tomnuj rēnh par kôt pajamaxpêr hāmri nhÿm mē gôx kām mē pahkrā kumrā. Te mē pahte gôx kām mē pahte amnhî nhîpêx tÿm rer par pyrāk o amnhî nhîpêx. Te Jejus htyk nhÿm mē kot haxàr nhÿm nôr nhÿm mē pahte amnhî tomnujja îhkô hā nôr nē hapêx par pyrāk. Tā pu htem ra gôj rÿm pahkrā hapôj. Te Tirtÿm kot akupÿm Kris o htîr pyrāk. Jao ra mē pahte Kris kôt amnhî nhîpêx nyw o amnhî nhîpêx o papa hkrax ā amnhî to amnhîrît. ¹³ Amnepēm kormā mē pahte Jejus kôt amnhî xunhwÿr kêt ri na pu prem ri amnhî tomnuj to nē tanhmā pajamaxpêr punuj to ho

ri papa. Tirtūm noo mā te ra mẽ pahtyk pyrək. Tã Tirtūm te akupým Kris kôt mẽ pahto pahtír pyrək o mẽ panhípêx nẽ mẽ panẽ mẽ pahte amnhĩ tomnuj piitã ho hapêx nẽ axte kãm hamaxpêr kêt kumrêx. ¹⁴ Te mẽ pahte tanhmã amnhĩ tomnuj to ho papa nhũm Tirtūm kot ja hã mẽ pahpumunh nẽ mẽ pahte amnhĩ tomnuj piitã hã kagà hpar pyrək. Nẽ kot kagàja pyr nẽ Kris nhĩhkô hã pĩ kahpa hã nhôr pyrək. Jao te kot mẽ pahte amnhĩ tomnuj ã kagàta hkaxônh nẽ rênh par pyrək o hipêx. ¹⁵ Hãmri nhũm Krisja pĩ kahpa hã htykja o mẽkarõmnuti mẽ mẽ õ pahi Satanasti wa mẽ ho hirerek pa. Jao hihtýx o kot mẽ hakrenh par ã amnhĩ to amnhĩrit. Te mẽ kot kutã amnhĩ xunhwýr xwýnh piitã mẽ noo mã mẽ ho krihkrit par nẽ ma akupým õ krĩ hwýr hkĩnh nẽ grer o mórta pyrək.

¹⁶ Nẽ koja mẽmojaja mẽ awýr mra nẽ tee ri mẽ ate mẽmoj kur o akrĩ hã mẽ apumu nẽ mẽ amã:

—Kwa na hte Tirtūm kôt mẽ kot amnhĩ xunhwýr xwýnhjaja ja kur kêt nẽ. Nẽ ja ho hkõm kêt nẽ. Nẽ mẽ panhõ arĩgromnu pẽ sap ã ri mẽmoj tã ãpênh kêt nẽ. Nẽ mytwrý nyw ã mẽmoj tã ãpênh kêt nẽ. Na htem ã Tirtūm ã hkĩnh o pa anẽ. Tã ã mẽ ate mẽ ixkôt amnhĩ nhípêx anhýr kêt jakamã mãn mẽ apê Tirtūm kra hkêt nã. Anẽ.

Tã nom kër ka mẽ kapêr ma nẽ ãm ama. ¹⁷ Amnepêm kormã mẽ pahte Kris kôt amnhĩ xunhwýr kêt ri na pu prem ã amnhĩ nhípêx anhýr o papa. Tã Jejus kôt amnhĩ xunhwýr hãmri nẽ axte ã amnhĩ nhípêx anhýr kêt nẽ. Pãnhã kapêr pix ma nẽ hkôt pix mã amnhĩ nhípêx o ri papa.

Mẽ pahte mẽ kot Tirtūm kapêr o mẽ hêx xwýnhjê mar kêt ã mẽ pamã karõ

¹⁸ Nẽ koja mẽmojaja mẽ awýr mra nẽ hêx rom tanhmã mẽ amã amnhĩ jarênh to nẽ mẽ amã:

—Na pre Tirtūm ãm mẽ papxipix mẽ inhmã amnhĩ to amnhĩrit. Jakamã kwa mẽ ixkapêr ma. Kot kaj mẽ inhmar kêt nẽ hãmri nẽ mẽ amex kêt nẽ apa.

Anhýr o mẽ amã kapêr japêr ka mẽ ama nẽ ãm mẽ ma. Rý nhũm mẽ amã:

—Tirtūm mẽ parom kot amnhĩ to rax o kot mẽ pahpiitã mẽ pajakrenh par jakamã kwa mẽ tanhmã amnhĩ to hwýr to hkêt nẽ. Kot ka mẽ anẽ nhũm mẽ ama nẽ mẽ akamã gryk nẽ. No kêt mẽ amnhĩ to kapêr o wrýk xwýnhjê mãn wý. Koja mẽ ama nẽ mẽ akamã gryk kêt nẽ tanhmã mẽ amã mẽmoj nhípêx to. Anẽ.

Koja mẽ ã mẽ amã kapêr anẽ ka mẽ ama nẽ ãm mẽ ama. Te ho mẽ ãhpumunh týx kãm mẽ kot ã mẽ amã kapêr anhýr pyrək no ãm mẽ kapêrja mex kêt. Na htem amnhĩ krã hkôt te amnhĩ to rax pyrək o ã mẽ amã kapêr jao mẽ hamaxpêr tũm o hamaxpêr o ri pa. No mẽ apyrã nẽ mẽ hamaxpêr nyw o hamaxpêr kêt nẽ. ¹⁹ ãm mẽ kot Tirtūm kapêr kwým ri mẽ ahkre jakamã mẽ kêp Jejus kwý hkêt. No mẽ papajaja mẽ pahpê Jejus kwý na pu mẽ. Nhũm Jejus kêp mẽ panhõ Pahihti jakamã na hte tanhmã mẽ pahto paxihtýx to pu htem kukwak ri tanhmã axpên to ajuta hto ho ri pa. Nẽ hkôt axpên to paxihtýx o ri papa. Mẽ pahpiitã

mẽ pahte hkôt amnhĩ nhípêx mex o ri papa kaxyw. Tirtūm kãm hprãm xà hkôt.

Mẽ pahte amnhĩ krã hkôt tãm amnhĩ nhípêx kêt ã mẽ pajarênh

Karatas 3.1-5, 5.1-9; Epes 2.8; Piripos 3.9

²⁰ Nẽ wam mẽ pahte amnhĩ nhípêx tũm nẽ mẽ pajamaxpêr tũmta te kot Kris kôt htyk nẽ mẽ pahpê hapêx par pyrək jakamã na pu htem arĩ hkôt amnhĩ nhípêx kêt nẽ. Nẽ mẽkarõmnuti hkôt amnhĩ nhípêx kêt nẽ. Tã no nhũm xep ra mẽhõja mẽ awýr mõ nẽ hêx rom mẽmoj nẽ tanhmã mẽ amã kapêr to nẽ mẽ amã:

—Kwa mẽ ja jamýnh kêt nẽ. Nẽ ja hkur kêt nẽ. Nẽ ja kupênh kêt nẽ.

Anhýr o mẽmoj nẽ mẽ akurê ho pa. Xep mẽ ã mẽmoj nẽ mẽ akurê anẽ ka xep mẽ ama nẽ mẽ hkôt amnhĩ nhípêx. Kwa nã mon ka mẽ ri axtem nẽ mẽ hkôt amnhĩ nhípêx? ²² Tirtūm kot mẽmojja nẽ tanhmã mẽ pahkurê htore hã. ãm mẽ kot amnhĩ krã hkôt mẽmoj nẽ mẽ akurê ka mẽ ama nẽ mẽ hkôt amnhĩ nhípêx. Mẽmoj kur nẽ mẽ akurê xwýnhhta na htem kuku nhũm hapêx kurê kumrêx. Mo koja we Tirtūm omu nhũm kêp omnuj? Nã ja kot anhýr kêt kênã. Mẽ ãm amnhĩ krã hkôt mẽ kot ja nẽ mẽ akurê. ²³ Tã ã mẽmoj nẽ mẽ akurê anhýr xwýnhjaja na ka htem nhýri mẽ omu nẽ mẽ kapêr ma nẽ atýx ajamaxpêr o:

—Nã te Tirtūm kôt amnhĩ nhípêx mex o pa pyrək. Te mẽ ãhpumunh týx pyrək o ã mẽ inhmã mẽmoj jarênh anẽ. Anẽ.

No ãm mẽ kot mẽmoj jarênhja kot anhýr kêt. ã mẽ kot amnhĩ nhípêx anhýr xwýnhjaja kêp Tirtūm kra hkêt. Na htem ãm amnhĩ krã hkôt mẽmoj nẽ mẽ akurê ho pa. Nẽ hã amnhĩ to jarkrar o ri pa. Mẽ ate ja hã mẽ mar nẽ mẽ kot amnhĩ to rũnh ã mẽ hkamnhĩx kaxyw. Na htem kot amnhĩ tomnuj pymaj tanhmã amnhĩ nhĩ hto ho pa. No ãm ri ã amnhĩ nhípêx anhýr kaprý. Nẽ ãm htýx Tirtūm kapêr o mẽ wrýk xwýnhjê hwýr kaprý ho pa.

Mẽ pajamaxpêr nyw nẽ mẽ pahte amnhĩ nhípêx nyw jarênh

Rõmãn 6.4-11

3 Nẽ na pre Tirtūm akupým Kris o htĩr nhũm mẽ pahte hkôt amnhĩ xunhwýr jakamã te Tirtūm kot Kris nhípêx pyrã nẽ akupým mẽ pahto mẽ pahtír pyrək o mẽ panhípêx. Jakamã kwa kër pu mẽ axte pahte amnhĩ nhípêx tũm kôt amnhĩ nhípêx kêt nẽ. Te Kris pyrã nẽ ra kaxkwa hwýr paxãpir nẽ kamã ri papa pyrək o amnhĩ nhípêx. Jao pajamaxpêr nyw pix o pajamaxpêr nẽ pahte amnhĩ nhípêx nyw pix o amnhĩ nhípêx o ri papa. Te Kris kot amnhĩ nhípêx pyrək. Na pre akupým kaxkwa hwýr api nẽ Tirtūm nhĩhkô hã mẽ ho amnhĩptãr xà kamã hkrĩ ho hkrĩ.

² Nẽ ra mẽ pahte Kris kôt amnhĩ xunhwýr jakamã te jar pika hkôt pajapêx par nẽ Tirtūm wa kuri kaxkwa kamã pamex nẽ papa ho papa pyrək. Jakamã kwa kër pu mẽ pahte amnhĩ nhípêx nyw mã mãn pajamaxpêr

rähã ho papa. Nê axte më pahte amnhî nhîpêx tûm mã pajamaxpêr kêt nê.

⁴ Kris kêp akupÿm më pahto më pahtîr xwÿnh. Koja nhÿrmã akupÿn më pahwÿr wrÿ hãmri nhÿm Tirtûm te ho mex raxta pyrãk o më panhîpêx nê më pahto mex rax kumrêx.

Më pahte akupÿm amnhî nhîpêx tûm o paxujanãr kêt ã më pamã karõ

Epes 4.17-5.2

⁵ Jakamã kwa kêr ka më axte ate amnhî nhîpêx tûm kôt amnhî nhîpêx kêt nê. Te ra më apê htyk nê hapêx par pyrã nê axte kãm ajamaxpêr kêt nê.

Jakamã axte ri axpên mjên rÿ axpên prõ ho amnhîkati hkêt nê.

Nê nhãm ri mëmyjê hõ rÿ mënijê hõ ho amnhîkati hkêt nê.

Nê më amã tanhmã amnhî tomnuj to hprãm kêt nê.

Nê më amã akukrêx rax prãm kêt nê. Kot ka më ã amnhî nhîpêx anê nê gaa nê akukrêx rax gryk ã axte Tirtûm mã ajamaxpêr kêt nê.

⁶ ã më kot amnhî nhîpêx anhÿr xwÿnhjaja Tirtûm kãm më hprãm kêt. Koja nhÿrmã tanhmã ja hã më homnuj tÿx to. ⁷ Amnepêm kormã më ate Kris kôt amnhî xunhwÿr kêt ri na ka prem ã amnhî nhîpêx anhÿr o ri apa.

⁸ Tã kêr ka më axte ã amnhî nhîpêx anhÿr kêt nê.

Nê më ri axpên kãm agryk o ano hkã karõt o axpên pumunh kêt nê.

Nê më axpên kamã axãhkurê hkêt nê. Ri tanhmã axpên tomnuj to ho apa hkêt nê.

Rÿ axpên jakwa kamã mëmoj ma nê ri axpên xô ri tanhmã ri axpên mã ho axêx to ho ri apa hkêt nê.

Nê më akapêr mã agêt o ri më kãm akapêr kêt nê.

Nê më ri mëmoj to axpên mã axêx hkêt nê.

Ã më ate amnhî nhîpêx anhÿr tûmta ra më apê hapêx par kênã.

Më pahte amnhî nhîpêx nyw kôt amnhî nhîpêx ã më pamã karõ

Rõmãn 12.2; Epes 4.23; Wam Pêtre 2.11

¹⁰ Nê na ka më ra më ate amnhî nhîpêx nyw o amnhî nhîpêx o ri apa. Jao ra më pahto kator xwÿnh maatija kôt amnhî nhîpêx mex o mõ. Kot kaj më gaa nê rÿ hkôt amnhî nhîpêx mex kumrêx o ri apa. Kãm hprãm xã hkôt.

¹¹ Nê më pahpê Kris kwÿjaja ahpÿnhã na pu më. Na më pakamã Ijaew nê Ijaew kêt xwÿnhjaja. Nê më pakamã panhî nê kupê. Nê më kãm àpênh xwÿnhjaja nê më kot amnhî mã ri àpênh xwÿnhjaja. ãm ahpÿnhã më pahpê Kris kwÿjaja më pahte anhÿr tã na hte Tirtûm tanhmã më pakute hkôt më pahpumunh kêt nê. Na hte më panhîpêx o axpên pyrã nê më pahpiitã më pakamã pa ho pa pu htem pahpimràatã hkôt ri amnhî nhîpêx o papa.

¹² Nê Tirtûm kãm më pajapê nê kãm më pajapê xaj më pakukamã amnhîm më parê. Më pahte kãm tanhmã amnhî nhîpêx to ho ri papa kaxyw më pakukamã më parê.

Jakamã kêr ka më axpên kamã axukaprÿ ho ri axpên kôt apa.

Nê axpên to mex pix o ri axpên kôt apa.

Nê më amã amnhî to rax o axpên jakrenh prãm kêt nê.

Nê më ãm amnhî pix kukamã ri ajamaxpêr kêt nê.

Amnhî më nhãm më hkukamã ajamaxpêr o ri apa.

Nê më ri agryk tokyx anhÿr kêt nê.

¹³ Nê koja mëhõ tanhmã më ato ka më amnhî tã omu nê tanhmã amnhî tã ho hkêt nê. ãm ja ho ajamakêtkati kurê kumrêx nê axte kãm ajamaxpêr o ri apa hkêt nê. Ra Jejus kot më panê më pahte amnhî tomnuj piitã rênh par kênã kot pu kêt më amnhî tã tanhmã mëhõ hto. Tã kêr ka më axpên to mex o ri apa nê amnhî tã tanhmã axpên to ho ri apa hkêt nê.

¹⁴ E kêr ka më ã axpên nhîpêx anhÿr o ri apa. No ãm ja pix kêt. Nê më mãânên amã axpên kính pê axpên kutã anojarêt rähã nê. Kot kaj më ã amnhî nhîpêx anê nê mãânên ra ixte mëmoj tã më amã karõta ka më ho anhÿr mex kurê kumrêx. Më pamã axpên kínhja na mex kumrêx o kot mëmoj piitã hakrenh par.

¹⁵ Nê kêr ka më Kris kukwak ri anhõxãhkre kaxwÿnh kãm akính nê ajamakêtkati nê tãm ri axpên nhîpêx o ri axpên kôt apa. Te ixkre tipxi kamã më ate axpên kôt ri amnhî nhîpêx pyrãk. ã më pahte amnhî nhîpêx anhÿr o papa kaxyw na pre Tirtûm amnhî wÿr më pahwÿ. Më pahte hkôt amnhî xunhwÿr kaxyw.

Nê kêr ka më Tirtûm mã amnhî jarênh kaxyw nê kãm Kra Jejus ã akính ã amnhî jarênh o ri apa.

Më pahte Tirtûm mã mex ã pagrer ã më pamã karõ

Epes 5.19

¹⁶ Nê kêr ka më Kris kapêr piitã hkôt amnhî nhîpêx mex nê. Nê kapêr o axpên jahkre mex o ri axpên kôt apa. Tirtûm kot amnhî nhîpêx o axpên jahkre ho ri axpên kôt apa. Nê kãm agrer o ri apa. Kãm mex o mex ã agrer o ri axpên kôt apa. Nê kãm kukwak ri akính ã amnhî jarênh o kãm gre.

¹⁷ Nê kêr ka më Mëpahpãm Tirtûm mã amnhî jarênh o:

—Pa Tirtûm. Nã ãm hãmri na ka pre më ixwÿr Akra Jejus më nhÿm më ixwÿr wrÿ nê më inhnê ty.

Anhÿr o kãm amnhî jarê. Hãmri nê ãm Pahihti Jejus kot amnhî nhîpêx kôt pix mã tanhmã ri amnhî nhîpêx to rÿ ãm kôt pix mã tanhmã akapêr to ho ri apa.

Tanhmã më pahte axpên nhîpêx to hã më pamã karõ

Epes 5.22-6.9

¹⁸ Nê më anijaja. Tirtûm kot myja kumrêx nhîpêx nê hkôt kãm hprõ nhîpêx jakamã kêr ka më amjên ã apijaam o apa. Nê më hamaxpêr mex ã më omu nê më hkôt ri amnhî nhîpêx mex nê. ã më ate amnhî nhîpêxja na Tirtûm kãm hprãm.

¹⁹ Nê më amyjaja kêr ka më amã më aprõ japê nê. Te amã amnhî tã ma pyrãk o më hipêx o ri apa. Jao tanhmã më homnuj to hkêt nê.

²⁰ Nê më apê më hkrajaja kêr ka më anhîpêxã nê akatorxã wa hã apijaam nê wa kapêr ma nê wa hkôt ri

amnhĩ nhĩpêx. Æ mẽ ate amnhĩ nhĩpêx anhÿrja na Tirtũm kãm hprãm. Kojã ã mẽ ate amnhĩ nhĩpêx anhÿr ã mẽ apumu nẽ hkĩnh nẽ.

²¹ Nẽ kêr ka mẽ apê mẽ hipêêxà nẽ mẽ katorxà mẽ akra gryk kaxyw mẽ kãm apêr o apikênh kêt nẽ. Kot kaj mẽ ã mẽ hipêx anê nhũm mẽ tee ri amnhĩ tã mẽ ama nẽ hkaprĩ nẽ.

²² Nẽ mẽ ate mẽ kãm tanhmã amnhĩ nhĩpêx to ho ri mẽ apa xwÿnhjaja kêr ka mẽ anhõ patrãw kapêr ma nẽ hkôt amnhĩ nhĩpêx. Nẽ mẽ noo mã mẽ kãm tanhmã amnhĩ nhĩpêx mex to nẽ mãänên mẽ wa kre kamã mẽ kãm tanhmã amnhĩ nhĩpêx mex to. Nom mẽ kot axàpênh ã apumunh nẽ hã kãm akĩnh pix kaxyw axàpênh mex kêt nẽ. Mãänên mẽ amã Pahihti Kris kĩnh ã akatãt kôt mẽ kãm mẽmoj tã axàpênh mex nẽ. Mẽ noo mã nẽ mãänên mẽ wakre kamã. ²³ Nẽ mẽ akĩnh kãm mẽ kãm axàpênh mex o ri apa. Te mẽ ate Pahihti mã akĩnh kãm tanhmã kãm amnhĩ nhĩpêx to pyrà nẽ tãm amnhĩ nhĩpêx o tãm mẽ kãm axàpênh mex o ri apa. ²⁴ Te mẽ anhõ patrãw pix mã axàpênh pyràk nom kumã pix mã hkêt. Mãänên mẽ panhõ Pahihti Krisja mã. Jakamã kot kaj mẽ ã amnhĩ kaxyw Tirtũm mã ajamaxpêr pẽ akĩnh kãm anhõ patrãw mã mẽmoj tã apê nhũm Pahihtija ja hã mẽ apumu nẽ nhÿrmã mẽ ato mex rax nẽ. ²⁵ E kêr ka mẽ ã mẽ anhõ patrãw mã axàpênh mex o ri apa anê. No kot kaj mẽ kapêr kwÿm amnhĩ krã hkôt ri tanhmã amnhĩ nhĩpêx to nhũm Tirtũm tee ri ja hã mẽ apumu hãmri nẽ nhÿr mã tanhmã hã mẽ anhĩpêx to. Na hte ã mẽ kot amnhĩ tomnuj xwÿnhjê piitã mẽ hipêx anê nẽ mẽ hipêx o axpên pyràk. Jakamã kwa kêr ka mẽ anhõ patrãw mã axàpênh mex rãhã ho ri apa.

4 Nẽ mẽ apê mẽ õ patrãw kêr ka mẽ kot mẽ amã mẽ àpênh xwÿnhjê ho mex nẽ tanhmã mẽ homnuj to hkêt nẽ. Mẽ uràk nẽ kaxkwa kamã mẽ anhõ Patrãw maatija hkrĩ. Kot mẽ pahte tanhmã amnhĩ nhĩpêx to nẽ tanhmã mẽ pajamaxpêr to hã mẽ pahpumunh rãhã jakamã kêr ka mẽ noo mã mẽ ho mex rãhã ho ri apa.

E kêr ka mẽ apiitã ã axpên to mex anhÿr o ri apa.

Mẽ pahte Tirtũm mã amnhĩ jarênh rãhã hã mẽ pamã karõ

Matêwre 7.7; Rukre 11.1-8; Atre 1.14; Epes 6.18

² Nẽ kêr ka mẽ xatã Tirtũm mã amnhĩ jarênh rãhã ho ri apa. Nẽ tanhmã mẽhõ kot amnhĩ nhĩpêx to hã harênh ma nẽ ho Tirtũm wÿ. Nẽ mẽ ate kãm amnhĩ jarênh kamã kãm mex o mex ã harê. ³ Nẽ mãänên ixto awÿ kê mẽ tokyx ixkator japêr. Pa ixãmnhĩx mẽ kot kormã Kris jarênh mar kêt xwÿnhjê mã harênh o ri mẽ hkôt ixpa. Æ ixte amnhĩ nhĩpêx anhÿrta ã na prem ixpynê nẽ ijaxà pa kormã jar ixkrĩ. Jakamã kwa mẽ mãm- rĩ ja hã ixto Tirtũm wÿr o apa.

Mẽ pahte apkati mẽ mẽ pahkwÿjê mã Jejus jarênh ã mẽ pamã karõ

Epes 5.16

⁵ Nẽ kêr ka mẽ kêp Kris kwÿ hkêt xwÿnhjê hkôt nhÿhÿm ri apa nẽ tãm ri Tirtũm kapêr kôt amnhĩ nhĩpêx o mẽ hkôt ri apa.

⁶ Nẽ kê mẽhõ awÿr tẽ nẽ tanhmã Jejus ã akukjêr to ka amã hkĩnh ã aprĩ hã kãm awjarê. Ahpÿnhã tanhmã mẽ kot hã akukjêr to xà hkôt tanhmã mẽ kãm harênh to kê mẽhprĩ hã mar mex nẽ.

Pawre kot Koros wÿr Xikitre mẽ Ones wa mẽnh ã harênh

Epes 6.21-22

⁷ Nẽ ot pa mẽ awÿr mẽ pahtõ Xikitre mẽnh mã. Kot ma mẽ awÿr ixte mẽ amã ixkapêr ã kagà nhĩpêx o mõi kaxyw. Na hte ixkôt Tirtũm mã amnhĩ nhĩpêx o ri pa. Inhmã hapêê. Tã kot paj mẽ awÿr kumê kê ma mẽ awÿr mõi nẽ hprĩ hã mẽ amã ijarê. Mẽ ate ijarênh mar nẽ tãm ajamaxpêr nẽ akĩnh kaxyw. ⁹ Mẽ akwÿ Onesti hkôt koja ma mẽ awÿr mõi. Mãänên Kris kôt kêp mẽ pahtõ hã mẽ pamã hapê xwÿnh na. Na hte Tirtũm kapêr kôt amnhĩ nhĩpêx mex rãhã ho ri pa. Tã Xikitre mẽ koja wa ma mẽ awÿr mõi. Hãmri nẽ mẽ awÿr pøj nẽ jar tanhmã mẽ ixte amnhĩ nhĩpêx to hã mẽ ijarê ka mẽ ama.

Kris kôt mẽ hkwy kot mẽ hwÿr hpêr mẽnh ã mẽ harênh

¹⁰ Nẽ ota Aristakja ixpyrà nẽ kêp prês nẽ hkrĩ. Tã mẽ awÿr hpêr mẽ. Nẽ Panãpe htõ Juãw Makreja mãänên mẽ awÿr hpêr mẽ. Na pa pre ra mẽ amã Juãw Makre jarê. Tã koja mẽmo arĩgro hã akupÿn mẽ awÿr mõi japêr ka mẽ omu nẽ ho mex nẽ.

¹¹ Nẽ Jejus Justija mãänên mẽ awÿr hpêr mẽ. Jajaja mẽ ixpyrà nẽ kêp Ijaew. Tã mẽ tapxipixjaja na htem ixpyrà nẽ mẽ ixpê Ijaew kwÿjê rom mẽ kãm Tirtũm kapêr nyw o mẽ ahkre ho ri mẽ hkôt pa. Tirtũm kot Kra Kris kôt mẽ kot amnhĩ xunhwÿr xwÿnhjê ho hkra hã harênh nywja na htem mẽ kãm harênh o ri mẽ hkôt pa. Pa ja hã mẽ omu nẽ ixkĩnh nẽ. ¹² Nẽ mẽ anhõ Epasja mãänên mẽ awÿr hpêr mẽ. Na hte Jejus Kris mã tanhmã amnhĩ nhĩpêx mex to ho pa. Nẽ mẽ ato Tirtũm wÿr rãhã ho pa nẽ mẽ ato hwÿr o:

—Pa Tirtũm. E kwa tanhmã Koros kamã akrajê ho kê mẽ akôt amnhĩ xunhwÿr tyx nẽ. Nẽ amã hprãm xà hkôt pix mã amnhĩ nhĩpêx o ri pa. Nẽ amnhĩ kaxyw Kris kôt pix mã hamaxpêr tyx rãhã nẽ. Anê.

¹³ ãm hãmri na hte mẽ ato hwÿr o pa. Nom mẽ kapxipix o hwÿr kêt nẽ. Mãänên krĩ pẽ Ratisej kamã nẽ krĩ pẽ Jerop kamã Kris kôt mẽ pahtõjê ho hwÿr o ri pa. Mẽ ate Tirtũm kôt amnhĩ nhĩpêx mex o apa kaxyw. Ixte ja hã omunh mex.

¹⁴ Nẽ jar mẽ pahtõ tõtõ Rukre mẽ Tẽmtija wa mãänên mẽ awÿr hpêr mẽ. Tõtõ Rukreja kêp ixkrãmnhwÿ mex na.

¹⁵ Nê kêr ka më krí pê Ratisej kamã Kris kôt më pahkwýjê mã ijarë. Nê Nîpare mã nê òrkwý hwýr më pikuprõnh nê Tirtúm mã mex o mex ã harënh o më hkrí xwýnhjê mã mãänën ijarë.

¹⁶ Nê e kêr ka më ixte më awýr kagà mënhja kamã harënh pa nê hpãnhã krí pê Ratisej kamã Kris kôt më pahkwýjê hwýr amë kê më apyrà nê kamã harë nê pitã kuma. Nê më kãm anë kê ra ixte më hwýr kagà mënh xwýnhhta kê më amã kugõ ka më kuxwar kamã harë nê ama.

¹⁷ Nê kêr ka më Akip mã ijarë kê ra Tirtúm kot kãm mëmoj tã karõ xwýnhhta kê ho anhýr jatur xàm kumë. Kêp hkra hã kê tãm kãm àpênh jatur xàm kumë.

¹⁸ Tã ãm ja pix. E paj pam amnhí nhìhkra ho hatur xà hã kagà. Më ate ixte mëmoj tã kagà pumunh nê hkôt inhmã ajamaxpër kaxyw. Nê ixte më awýr mënh ã ijarënh mar kaxyw. Kwa kêr ka më arí ixpê prês ã ixto Tirtúm wýr rãhã ho ri apa.

E kê Tirtúmja mëmoj to më akutã nojarêt nê më ato mex nê ka më amex nê ajamakêtkati nê apa ho apa. Tã ãm ja pix. Ixpê Pawre na pa më awýr kagàja nhîpêx nê ã më awýr mënh anë.

Wam Tesarõn

Pawre na pre kagàja nhîpêx. Kêp Jejus nhÿ hã mẽ ahkre ho pa xwÿnhjê hõ na pre. Jakamã na pre kagàja nhîpêx nê ma krí pê Tesarõn kamã Jejus kôt hkwyjê hwÿr kumê. Tesarõn kamã Jejus ã kãm mẽ hkurê xwÿnhjaja na prem Jejus ã mẽ homnuj o pa nhÿm mẽ amnhÿ xà htÿx kamã hamak o pa. Hãmri nhÿm Pawre mẽ harênh ma nê kagàja nhîpêx nê mẽ hwÿr kumê. Kot mẽ kãm mẽ hamaxpêr o hihtÿx kaxyw mẽ kot arÿ Jejus kôt amnhÿ nhîpêx mex o pa nê aa hkaga hkêr ã mẽ kãm karõ. Nê nhÿrmã Jejus akupÿn kaxkwa rÿm mẽ pahpê hkwyjê hwÿr wrÿk nê ma akupÿm amnhÿ kôt mẽ pahto àpirja nhÿm mẽ kãm harê. Æ na pre mẽ kãm mẽmoj jarê nê hã kagà anê nê mẽ kãm:

1 Pa mẽ apê Tesarõn kamã Jejus kwÿ hã axpên wÿr mẽ apikuprõnh xwÿnhjaja? Xà mẽ amex na ka mẽ apa? Ixpê Pawre na pa mẽ awÿr kagàja nhîpêx nê mẽ awÿr kumê. Siras mẽ Ximotre mẽ pa mẽ awÿr kumê. Mẽ pahpê Mëpanhîpêêxà maati Tirtÿm mẽ Pahihti Jejus Kris wa hkwy jakamã na pa htem mẽ ato Tirtÿm wÿr rãhã ho ri ixpa. Kot mẽ akutã nojarêr rãhã nhÿm mẽ ajamakêtkati nê axamnhÿx mẽ apa kaxyw.

² Nã mẽmoj kêt. Na pa htem mẽ amã ijamaxpêr nê mẽ anhÿ hã ixkÿnh nê ixpa hãmri nê mẽ awÿr kagàja mẽ. Na pa htem mẽ ato Tirtÿm wÿr rãhã ho ri ixpa nê kãm mẽ ajarênh o:

—Pa Tirtÿm. E mãn ka Tesarõn kamã akrajê pumu. Æm hãmri na ka pre tanhmã mẽ hkrã hto nhÿm mẽ akôt amnhÿ nhîpêx mex o pa. Na htem amnhÿ kaxyw akôt hamaxpêr tÿx nê. Jao mẽ piitã mẽ kamã ukaprí kamã tanhmã mẽ ho ajuta hto ho pa. Nhÿm mẽ kãm mẽ ixkurê xwÿnhjaja Pahihti Jejus Kris ã tanhmã mẽ ho ho pa htã nhÿm mẽ tee ri amnhÿ kukamã hamaxpêr o hkaprí nê Jejus mẽ war akaga hkêr nê. Arÿ war anhÿ hã amnhÿ to htÿx nê Pahihti Jejus kutêp tanhmã kãm amnhÿ nhîpêx to ho pa. Æm hãmri na htem ã amnhÿ nhîpêx anê Tirtÿm. Na pa htem mẽ kot ã amnhÿ nhîpêx anhÿrja mã ijamaxpêr nê ixkÿnh nê.

Anhÿr o pa htem mẽ ato kuwÿ. ⁴ E Kris kôt ixkwÿjaja. Nã Tirtÿm kãm mẽ ajapê jakamã na pre amnhÿm mẽ arê. Kot mẽ ato hkra nhÿm nhÿrmã kuri mẽ amex nê atÿr tÿm nê apa ho apa kaxyw. Ra mẽ ixte ja hã mẽ ajarênh mar mex.

Mẽ piitã mẽ kot Tesarõn nhõ xwÿnhjê jarênh mar ã mẽ harênh

⁵ Nê na pa prem ma mẽ awÿr mõ nê mẽ amã Jejus jarênh o mẽ akôt ixpa. Kot mẽ panê tanhmã amnhÿ nhîpêx to hã harênh o ri mẽ akôt ixpa. Nom pa mẽ amnhÿ krã hkôt mẽ amã ixujarênh kêt nê. Æm Tirtÿm Karõ nhÿ hã na pa prem hihtÿx xà ho tanhmã mẽ amã ixkapêr to ka prem mẽ inhma nê mẽ ixkôt ajamaxpêr kurê kumrêx. Na pa prem tãm amnhÿ nhîpêx o ri ixpa ka mẽ ja hã mẽ ixpumunh o ri mẽ ixkôt apa. ⁶ Tã Jejus kôt amnhÿ xunhwÿ nê hkôt amnhÿ nhîpêx mex nê. Nê

mẽ ixkôt amnhÿ nhîpêx mex nê. Mẽ kot Jejus ã tanhmã mẽ ato htã ka htem Tirtÿm Karõ nhÿ hã akÿnh nê hkôt amnhÿ nhîpêx mex rãhã ho ri apa. ⁷ Tã nhÿm pika pê Masetõn mẽ Gres wa kamã Jejus kôt mẽ pahkwÿjaja ã mẽ ate amnhÿ nhîpêx anhÿr ã mẽ ajarênh ma nê mẽ apyrà nê ã amnhÿ nhîpêx anhÿr o pa. ⁸ Na ka prem tanhmã Jejus kot mẽ panê amnhÿ nhîpêx to hã harênh o ri mẽ hkôt apa nhÿm mẽ piitã mẽ akapêr ma. Nom mẽ tapxipixjaja mar kêt nê. Na mẽ ra ohtõ nê mẽ ajarênh ma nê mẽ apyrà nê ma mẽ kãm Jejus jarênh o pa. Ra mẽ ate Jejus kôt amnhÿ xunhwÿr ã amnhÿ jarênh o ri apa nhÿm mẽ piitã kot mẽ amar jakamã mẽ pajaja na pa htem mẽ kãm ã mẽ ajarênh anhÿr kêt nê. Mo kaxyw? Ra mẽ kot mẽ ajarênh mar mex kênã. ⁹ Na pa htem nhÿri krÿ hõ hwÿr pøj nhÿm mẽ ixpumu nê ra mẽ tãmjaja mẽ inhmã mẽ ajarênh kurê kumrêx. Nê mẽ ajarênh o:

—Kwa Tesarõn kamã Kris kôt mẽ pahkwÿjaja na xep kãm mẽ akÿnh nê. Amnepêm na pre htem amnhÿm sãnti nhîpêx nê kêp mëhpãm ã harê nê amnhÿ to hwÿr o pa. Tã ka xep prem ma mẽ hwÿr mõ nê mẽ kãm Tirtÿm kapêr jarê nhÿm mẽ ama nê Tirtÿmja sãnti rom ãm hãmri hã omunh kurê kumrêx. Hãmri nê gryk ã sãnti kaga hpa nê Tirtÿm kôt amnhÿ xunhwÿ nê hkôt pix mã amnhÿ nhîpêx mex o pa. ¹⁰ Nê amnhÿ wÿr Tirtÿm Kra kamã hamak rãhã ho ri pa. Anê.

Æm hãmri na ka htem amnhÿ wÿr kamã hamak rãhã ho apa. Na pre ty nhÿm Hipêêxà Tirtÿm akupÿm ho htÿr. Tã koja nhÿrmã akupÿn mẽ pahwÿr kumê nhÿm akupÿn mẽ pahwÿr wrÿ. Hãmri pu mẽ ãm pix kukwak ri mẽ kot amnhÿ xà htÿx kãm hamak o pa htÿm xàta wÿr papa hkêr nê.

Pawre kot amnhÿ jarênh

Sikÿn Korÿt 1.12, 4.1-6

2 Nê kormã mẽ awÿr mẽ inhmõr kêt ri na pa prem kormã Piripos nhõ xwÿnhjê mã Tirtÿm kapêr jarênh o ri mẽ hkôt ixpa. Nom nhÿm mẽ hkwyjaja kãm mẽ inhmar prãm kêt nê. Na prem Jejus ã mẽ inhmã kapêr punuj nê mẽ inhîpêx kati pa prem amnhÿ xà htÿx kamã ijamak o mẽ hkôt ixpa. Na ka prem ja hã mẽ ijarênh ma. Æ mẽ kot mẽ inhîpêx anhÿr tã pa mẽ tee ri

amnhĩ kukamã ijamaxpër pë Tirtüm kapër jarënh kaga hkêt në. Na pa prem arĩ mẽ kãm Jejus kot tanhmã mẽ panê amnhĩ nhĩpêx to hã harënh o ri mẽ hkôt ixpa. Tã mẽ awÿr inhnojarêt në Tirtüm nhÿ hã amnhĩ to htÿx në ma mẽ awÿr mõ. Hãmri në mẽ amã tanhmã Jejus jarënh to ho ri ixpa. Ka prem mẽ inhma hãmri në axohtô në hkôt amnhĩ xunhwÿ. ³ Nom pa prem ixêx rom tanhmã mẽ amã ixkapër to hkêt në. Rÿ mẽ inhmã mẽmoj prãm xàj mẽ ano kupyur pë mẽ amã ixkapër kêt në. ⁴ Rÿ mẽ ate mẽ ixkapër mar në mẽ inhmex ã mẽ ijarënh kaxyw pa tanhmã mẽ amã ixkapër to hkêt në. Æm Tirtüm kot mẽ inhmar në tapxipix mẽ inhmex ã mẽ ijarënh pix prãm xàj na pa prem mẽ amã kapër jarënh o ri mẽ akôt ixpa. Tirtüm tapxipix na hte tanhmã mẽ pakute hkôt mẽ pahpumunh rãhã ho pa. Tãm na pre mẽ ixte kapër jarënh o ri ixpa kaxyw mẽ ixunhwÿ.

⁵ Xàn pa prem mẽ ijakwa nhĩkjê ho mẽ ate tãm amnhĩ nhĩpêx ã mẽ ajarê hãmri në mẽ ijakwa nhĩkjê ho mẽ ato ixkapër punuj në? Nà na pa prem ã amnhĩ nhĩpêx anhÿr kêt në. Na pa prem ixkatàt kôt mẽ ate amnhĩ nhĩpêx ã mẽ apumunh kôt tanhmã mẽ ajarënh to ho ri ixpa.

Në xà mẽ ate mẽ ixkapër mar në akĩnh në hpãnhã mẽ inhmã amnhĩrer kaxyw na pa prem mẽ awÿr mõ mẽ mẽ amã Jejus kapër o mẽ ajahkre? Nà na pa prem kàxpore prãm xàj mẽ amã ixkapër kêt në. Tirtüm kot ja kôt mẽ ixpumunh mex.

⁶ Rÿ xà mẽ ate mẽ inhmex ã mẽ ixto jarkrar kaxyw na pa prem mẽ awÿr mõ? Nà mãänën ja kaxyw kêt. Æ mẽ ate mẽ ijarënh anhÿr prãm xàj na pa htem Tirtüm kapër o mẽ ajahkre ho ri ixpa hkêt në.

⁷ Rÿ xàn pa pre mẽ awÿr mõ mẽ mẽ amã amnhĩ jarënh o:

—E mẽ ixte Jejus nhÿ hã ixkapër o ixpa xwÿnh jakamã kot paj mẽ amã tanhmã ixkapër to ka mẽ inhma në hpãnhã mẽ inhmã amnhĩre.

Anhÿr o mẽ amã ixkapër? Nà na pa pre ã mẽ amã ixkapër anhÿr kêt në. Na pa prem te mẽ katorxà kot hkrajê nhĩpêx pyræk o mẽ anhĩpêx në amarĩ mẽ ajahkre ho ixpa në mẽmoj tã mẽ awÿr kêt në.

⁸ Mẽ inhmã mẽ akĩnh jakamã na pa prem mẽ amã ixprĩ hã Tirtüm kapër piitã harënh par o mẽ akôt ixpa mẽ mẽ kot ja hã tanhmã mẽ ixto pymaj tee ri amnhĩ kukamã ijamaxpër o ri ixkaprĩ hkêt në. Æm ixàmnhix ri tanhmã Jejus kot mẽ panê amnhĩ nhĩpêx to hã harënh o mẽ akôt ixpa. ⁹ Mẽ apê mẽ ixkwÿ jakamã na pa prem tanhmã mẽ amã ixkapër to hpãnhã mẽ ixàpkur xà rÿ mẽmoj tã mẽ awÿr kêt në. Na pa prem mẽ pamjaja mẽmoj tã ixàpênh pë mẽ amã ixkapër o ri ixpa. Nẽ ixàpênh rũnh kumrêx. Arĩgro hã në kamàt kãm. Mãn arĩ mẽ ate ã mẽ ixte amnhĩ nhĩpêx anhÿrja ã anohtÿx japêr ko. ¹⁰ Na pa prem tãm amnhĩ nhĩpêx o mẽ akôt ixpa. Tirtüm kãm hprãm xà hkôt. Jao tanhmã amnhĩ to mex to rãhã ho ri ixpa ka prem amnhĩ tã mẽ ixpumu. Nhũm Tirtüm haxwÿja ja hã mẽ ixpumu. ¹¹ Na pa pre mẽ apê mẽ ixkra pyræk mẽ anhĩpêx o ri mẽ akôt ixpa. ¹² Jao mẽ amã ixkapër mex në. Nẽ mẽ akaprĩ në apa

xwÿnhjaja pa prem akupÿm mẽ ajamaxpër o mẽ axihtÿx hãmri në mẽ apiitã mẽ amã ixkapër në mẽ amã: —Kwa kêr ka mẽ Tirtüm kôt amnhĩ nhĩpêx mex rãhã ho ri apa në aa hkaga hkêt në. Anê.

Tirtüm tãm na pre amnhĩ wÿr mẽ pahwÿ pu prem hkôt amnhĩ xunhwÿ. Tã koja nhÿrmã amnhĩ wÿr mẽ pahto api pu mẽ Kra Jejus kukwak ri wa kuri pamex kumrêx në ri papa ho papa. Jakamã kwa kêr ka mẽ hkôt amnhĩ nhĩpêx mex rãhã ho ri apa.

Jejus kwÿjaja kãm Jejus kôt amnhĩ xunhwÿr hkêt xwÿnhjê pÿma hkêt

Atre 17.1-9

¹³ Nẽ ma mẽ awÿr mẽ inhmõrta ã na pa prem mẽ amã Tirtüm kapër jarënh o ri mẽ akôt ixpa ka prem mẽ inhma në mẽ ixte amnhĩ krã hkôt mẽ ixkapër ã mẽ ixkamnhix kêt në. Na ka prem ãm hãmri mẽ ixte Tirtüm kapër jarënh ã mẽ ixpumunh kurê kumrêx në amnhĩ kaxyw hkôt ajamaxpër në Jejus mẽ Hipêêxà wa hkôt amnhĩ xunhwÿ. Jakamã na pa hte mẽ amã ijamaxpër në mẽ anhÿ hã ixkĩnh në. Hãmri në Tirtüm mã mẽ anhÿ hã ixkĩnh jarënh o ri ixpa. Nà na ka htem arĩ Tirtüm kapër kôt amnhĩ nhĩpêx mex në. ¹⁴ Nhũm hte mẽ akwÿjaja tee ri ja hã mẽ apumu në Jejus ã mẽ atomnuj në. Nom mẽ kapxipixjaja ã mẽ anhĩpêx anhÿr kêt në. Jutej kamã Ijaew kwÿjaja na prem mẽ apyrà në Jejus kôt amnhĩ xunhwÿ nhũm mẽ hkwyjaja tee ri ja hã mẽ omu në hã mẽ hipêx kati ho pa.

¹⁵ Amnepêem Ijaew na prem Tirtüm nhÿ hã mẽ kãm kapër o mẽ pa xwÿnhjê homnuj në mẽ hkwyjê hpar o pa. Hãmri nhũm hpãnhã mẽ hkanrêhã mẽ htãmnhwÿjaja mẽ uræk në Pahihti Jejusja pĩ. Tã jarãhã mãänën ã Jejus ã mẽ panhĩpêx anê nhũm Tirtüm tee ri mẽ pahtã mẽ omu nhũm ja kêp omnuj tÿx kumrêx nhũm mẽ pahtã mẽ kamã gryk në.

Na hte mẽ apê Ijaew kêt xwÿnhjê ho hkra nhũm Ijaew kãm ja prãm kêt ¹⁶ jakamã na htem mẽ akwÿ kot Tirtüm kôt amnhĩ xunhwÿr pymaj mẽ anê mẽ ixkurê në mẽ inhmã:

—Kwa Ijaew kêt xwÿnhjê mã Tirtüm kapër jarënh kêt në. Ja mex kêt. Anê.

Mẽ ate Jejus kôt amnhĩ xunhwÿr në nhÿrmã Tirtüm wa kuri atĩr tũm në apaja mẽ kãm hprãm kêt jakamã na htem ã mẽ anê àmnàr o pa anhÿrja o amnhĩ tomnuj në. Mẽ kot amnhĩ tomnuj tÿx o mẽ pa xwÿnh jakamã na Tirtüm mẽ kamã gryk në. Koja nhÿrmã mẽ kot amnhĩ xà htÿx kamã hamak tũm xà hwÿr mẽ rënh pa.

Pawre akupÿm Tesarõn nhõ xwÿnhjê hwÿr hkrà hã harënh

Atre 17.10-13

¹⁷ Nẽ ma mẽ awÿr mẽ inhmõr tã mẽ anhõ krĩ kamã mẽ kêp Kris kwÿ hkêt xwÿnhjaja na pre mẽ ixpumu mẽ mẽ anê mẽ ijano pa prem ijapõj në hpãnhã ma nhÿhÿm krĩ hõ hwÿr ixpa. Nom arĩ mẽ amã ijamaxpër rãhã në mẽ ato ijamak o ri ixpa në xatã akupÿm mẽ awÿr ixkrà. ¹⁸ Na pa prem inhmã akupÿm mẽ awÿr

inhmõr prãm tỳx nẽ. Ixpê Pawre na pa pre xatã mẽ awỳr ixkrã htã nhũm Satanasti tanhmã mẽ anê ixpê amnàr to pa kormã mẽ awỳr inhmõr kêt nẽ. Âm tee ri inhmõr prãm kaprỳ. ¹⁹ Mẽ inhmã mẽ akĩnh tỳx. Mẽ ate Tirtũm kõt amnhĩ nhĩpêx mex jakamã koja nhỹrmã Pahihti Jejus akupỳn mẽ pahwỳr wrỳ pa mẽ akuri xa nẽ kãm mẽ ajarênh o:

—Pa Pahihti. E Tesarõn nhõ xwỳnhjê pumu. Na ka pre mẽ hwỳr inhmẽ pa mẽ hwỳr mỗ nẽ mẽ kãm ajarê nhũm prem inhma nẽ amnhĩ kaxyw akõt hamaxpêr tỳx nẽ akõt amnhĩ xunhwỳ. Tã na htem akõt tãm amnhĩ nhĩpêx rãhã ho pa.

Anhỹr o kãm mẽ ajarê nẽ mẽ anhỹ hã ixkĩnh tỳx kumrêx.

Pawre kot Tesarõn wỳr Ximotre mẽnũh ã harênh

Atre 17.14-15, 18.5

3 Nẽ kormã mẽ akõt ixpa ri na pa pre Kris kwỳ hkêt xwỳnhjaja kot Kris ã tanhmã mẽ atomnuj to hkukamã mẽ amã mẽ harê ka prem mẽ inhma. Na htem ã Kris ã mẽ pahkurê xwỳnhjaja mẽ panhĩpêx anhỹr o pa. Tã nhũm prem ã mẽ anhĩpêx anê pa mẽ ajarênh ma nẽ tee ri mẽ akukamã ijamaxpêr nẽ axpẽn mã mẽ ajarênh o:

—Hêxta waa nẽ. Kwa mẽ kot Jejus ã tanhmã mẽ homnuj toja mỳrapê mãn mẽ tee ri amnhĩ kukamã hamaxpêr nẽ Jejus kaga rỳ ko. Mãn ra Satanasti tanhmã mẽ kãm Jejus o hêx to nhũm mẽ kuma nẽ tanhmã hamaxpêr to nẽ hkaga. Kwa mãn pu prem âm mẽ kãm Tirtũm kapêr jarênh kaprỳ nà? Anê.

Hãmri nẽ tee ri mẽ akukamã ijamaxpêr nẽ mẽ awỳr Ximotre mẽnũh kaxyw nẽ kãm:

—Mãn ra Tesarõn nhõ xwỳnhjaja Jejus ã tanhmã mẽ homnuj to nhũm mẽ amnhĩ xà htỳx kamã hamak o ra tee ri amnhĩ kukamã hamaxpêr. Kwa ma mẽ hwỳr mỗ nẽ ja hã mẽ omu. Hãmri nẽ mẽ kot Kris kõt amnhĩ xunhwỳr tỳx kaxyw mẽ hamaxpêr o axihtỳx. Hãmri nẽ akupỳn wa ixwỳr mỗ nẽ wa inhmã tanhmã mẽ harênh to. Kot paj Siras mẽ wa akutêp jar Atenas kamã wa arĩk. Anê.

Hãmri nẽ mẽ awỳr kumẽ. Ximotre na hte Siras mẽ wa inhĩhkô hã mẽ kãm Tirtũm kapêr jarênh o pa. Nẽ Kris kot tanhmã mẽ panê amnhĩ nhĩpêx toja nhũm wa inhĩhkô hã mẽ kãm harênh o pa. Tã pa pre mẽ awỳr kumẽ nhũm ma mẽ awỳr mỗ pa Siras mẽ wa Atenas kamã kutêp arĩk.

Ximotre akupỳn mõi nẽ Pawre mã mẽ harênh

⁶ Tã nhũm ra ham akupỳn mẽ arũm wa ixwỳr mỗ nẽ wa inhmã tanhmã mẽ ajarênh to pa wa mẽ ajarênh ma nẽ ixkĩnh nẽ. Na ka xep htem arĩ amnhĩ kaxyw Kris kõt ajamaxpêr tỳx rãhã nẽ. Jao mẽ amã mẽ piitã mẽ hkĩnh nẽ tanhmã mẽ ho mex to ho ri apa. Nẽ arĩ mẽ inhmã ajamaxpêr nẽ ixpyrà nẽ mẽ amã mẽ ixpumunh prãm o ri apa. ⁷ Nã âm hãmri na ka htem ã amnhĩ nhĩpêx anê. Na pa wa ra jar ixpunuj nẽ ixpa nẽ Kris ã amnhĩ xà htỳx kamã ijamak tã mẽ ajarênh ma nẽ tãm ijamaxpêr. ⁸ Tesarõn nhõ xwỳnhjaja kot Kris ã tanhmã

mẽ anhĩpêx to htã ka mẽ arĩ hkõt amnhĩ xunhwỳr tỳx rãhã nẽ. Pa wa mẽ ajarênh ma nẽ mẽ anhỹ hã ixkĩnh pê tanhmã Pahihti Jejus mã amnhĩ nhĩpêx to ho ri ixpa. ⁹ Nã na pa hte wa mẽ anhỹ hã ixkĩnh nẽ. Nẽ xatã Tirtũm mã mẽ ajarê nẽ kãm:

—Pa Tirtũm. Nã âm hãmri na ka pre amnhĩ kõt Tesarõn kãm akwỳjê xunhwỳr tỳx nẽ nhũm htem akõt amnhĩ nhĩpêx mex rãhã ho pa. Âm hãmri na ka hte ã mẽ hipêx anê. Na pa hte mẽ kot amnhĩ nhĩpêx mã ijamaxpêr o ri ixpa nẽ ixkĩnh nẽ.

Anhỹr o kãm mẽ ajarê. ¹⁰ Nom kãm ja pix jarênh kêt nẽ. Na pa hte wa mããnênh arĩgro hã nẽ kamàt kãm amnhĩ to Mẽpanhĩpêxà Tirtũm mẽ Pahihti Jejus Kris wa hwỳr kãm ixihtỳx rãhã ho ixpa nẽ wa kãm:

—Kwa Tirtũm mẽ Jejus wa. Na pa wa ra inhmã Tesarõn wỳr inhmõr nẽ mẽ pahkwỳjê pumunh prãm tỳx nẽ. Kormã mẽ kot akapêr jatur xà mar kêt. Tã wa inhmã akupỳm mẽ hwỳr wa inhmõr nẽ mẽ kãm akapêr jatur xãm mẽnũh prãm. Mẽ kot mar nẽ akõt amnhĩ nhĩpêx mex o pa kaxyw. Kwa xat ka wa akupỳm mẽ hwỳr wa inhmẽ nà? Anê.

Na pa hte wa ã amnhĩ to wa hwỳr rãhã ho ixpa anê. Tã koja wa akupỳm mẽ awỳr wa inhmẽ pa wa ma mẽ awỳr inhmõr kurê kumrêx. ¹² Kojã Tirtũm tanhmã mẽ akrã hto ka mẽ amã axpẽn kĩnh pê tanhmã axpẽn to ajuta hto ho ri apa. Nẽ mẽ amã akwỳjê hã ma ho te mẽ kam amã amnhĩ tã ma pyrãk o ri apa. ã kot kaj mẽ api-itã axpẽn nhĩpêx anê. Te wa inhmã mẽ akĩnh pê tanhmã mẽ ato mex to pyrãk. ¹³ Kojã Tirtũm ja kaxyw tanhmã mẽ akrã hto ka mẽ tãm ajamaxpêr mex nẽ. Kêr kê Jejus nhỹrmã akupỳn wrỳ. Mẽ kot hkõt amnhĩ xunhwỳr xwỳnhjê mẽ ro hã akupỳn wrỳ. Hãmri ka mẽ Mẽpanhĩpêxà Tirtũm kutã amnhĩ kukamã ajamaxpêr nẽ tãm mẽ ate amnhĩ nhĩpêx ã amnhĩ pumunh kõt akĩnh nẽ apikunhar o kuri akuhê. No ri tee ri amnhĩ kamã ajamaxpêr nẽ ajakwamnajre nẽ akuhê hkêt nẽ.

Tirtũm kãm mẽmoj prãm ã harênh

Rõmãn 13.11-14; Epes 5.3-14

4 E Jejus kõt ixkwỳjaja. Na pa prem ma mẽ awỳr mỗ nẽ Tirtũm kapêr o mẽ ajahkre ho ri mẽ akõt ixpa. Mẽ ate mar nẽ Tirtũm kãm hprãm xà hkõt tanhmã amnhĩ nhĩpêx to kaxyw. Ka prem mẽ inhma nẽ hkõt amnhĩ nhĩpêx mex o ri apa. Tã kot paj axte ja hã tanhmã mẽ amã karõ hto. Pahihti Jejus nhỹ hã axte mẽmoj tã mẽ amã karõ. Jakamã kwa kêr ka mẽ arĩ Tirtũm kapêr kõt pix mã ri amnhĩ nhĩpêx mex nẽ ý hã amnhĩ to htỳx pê ã amnhĩ nhĩpêx anhỹr o ri apa. ² Na pa prem ra Jejus nhỹ hã mẽ amã mẽmoj tã karõ. Mẽ ate hkõt amnhĩ nhĩpêx prãm xàj mẽ amã hã karõ ka prem mẽ inhma. ³ Nã mẽ pahte tãm amnhĩ nhĩpêx o papaja na Tirtũm kãm hprãm. No kêt mẽ pahtỳx ri nhãm mênijê ho amnhĩkati o papaja na kãm hprãm kêt. ⁴ Jakamã kwa kêr ka mẽ amyjaja aprõ pix tãnopxar o ri apa. No mẽ ri nhãm mênijê ho amnhĩkati ho ri apa hkêt nẽ. Nẽ mẽ anijaja kêr ka mẽ amjên pix tãnopxar o ri apa. No mẽ ri nhãm mẽmyjê ho amnhĩkati ho ri apa hkêt nẽ. ⁵ Jejus kwỳ hkêt xwỳnhjaja kot htỳx ri kãm

hprãm xà hkõt mënijê hwÿr mñar nê mē ho amnhĩkati htã kêr ka mē ho mē uràk kêt nê. Kwarĩ ho kwarĩ. ⁶ ã mē kot amnhĩ nhĩpêx anhÿr xwÿnhjaja koja Tĩrtũm nhÿrmã mē homnuj tÿx kumrêx. Na pa prem ra mē amã ja jarê ka prem mē inhma. Jakamã kwa kêr ka mē ã amnhĩ nhĩpêx anhÿr o ri apa hkêt nê. ⁷ Xà na pre Tĩrtũm ã mē pahte amnhĩ nhĩpêx anhÿr kaxyw amnhĩ wÿr mē pahwÿ nê mē pahto hkra? Nà ja kaxyw na pre mē pahto hkra hkêt nê. ãm mē pahte tãm amnhĩ nhĩpêx o ri papa kaxyw nê tãm ri axpên nhĩpêx o ri papa kaxyw na pre mē pahto hkra. ⁸ Jakamã kot kaj mē atõ ja hã mē inhma nê ãm mē inhma nê arĩ ã amnhĩ nhĩpêx anê. Hãmri nê mē pajaja mē ixkapêr nhĩrõp axãm kêt nê. Tĩrtũm kapêr nhĩrõp kot kaj xa. Nê mãânên kot mē pahwÿr Karõ mēnh xwÿnhja kapêr nhĩrõp kot kaj xa.

⁹ Nê mē amã axpên kính pê axpên to mex o apa hprãm xà na pre Tĩrtũm tanhmã mē amã kapêr o amnhĩrĩt to ka htem ã axpên nhĩpêx anhÿr o ri apa. Jakamã kot paj mē axte ja hã tanhmã mē amã nê hkêt nê. ¹⁰ Na ka mē ra amã axpên kính pê te mē kam amã amnhĩ tã ma pyrãk o axpên nhĩpêx o ri apa. Nê pika pê Masetõn kamã Kris kõt mē akwÿjaja ka mē mãânên amã mē hkĩnh pê ã mē hipêx anê. Tã kêr ka mē arĩ ã amnhĩ nhĩpêx anhÿr rãhã nê. ¹¹ Kot kaj mē ã amnhĩ nhĩpêx anê hãmri nê ajamakêtkati nê axãmnhĩx axapênh pix tãnopxar o ri apa. Jao mē hakwa kamã nhãm tanhmã mē hixi jarênh to ho ri apa hkêt nê. Nê ãm amnhĩ pix tãnopxar o ri apa. Nê amnhĩ pa kukwak ri axàpkur kaxyw amnhĩm axapênh mex o ri apa. Na pa prem ra ã ja hã mē amã karõ anê. ¹² Kot kaj mē ã amnhĩ nhĩpêx anê hãmri nê amã prãm xà axãhwÿr o ri apa hkêt nê. Nhũm Kris kwÿ hkêt xwÿnhjaja mē ate amnhĩ nhĩpêx ã mē apumu nê axpên mã mē ate tãm amnhĩ nhĩpêx xwÿnhjê hã mē ajarênh kurê kumrêx.

Kris kwÿ htyk xwÿnhjê jarênh
Matêwre 24.29-31; Wam Korĩt 15.51-58

¹³ E Kris kõt ixkwÿjaja. Na ka xep mē tee ri Kris kõt akwÿ htyk xwÿnhjê hkukamã ajamaxpêr. Jakamã kot paj ixprĩ hã tanhmã mē amã mē harênh to ka mē inhma. Nà Kris kwÿ hkêt xwÿnhjaja na htem ty nhũm mē hk-wÿjaja tee ri mē hkukamã hamaxpêr o hkaprĩ nê. Mē htyk nê ma Jejus wÿr àpir kêt jakamã na htem mē mÿr pê hkaprĩ htÿx nê pa. No mē papajaja na pu htem ho mē uràk kêt nê. ¹⁴ Jejus na pre ty nhũm Tĩrtũm akupÿm ho htĩr. Tã ra ã kot hipêx anhÿr jakamã koja nhÿrmã Jejus akupÿn wÿr nê mē kot hkõt amnhĩ xunhwÿr nê htyk xwÿnhjê karõ nhũm man amnhĩ kõt kaxkwa rũm mē o wÿr. Na pu htem ã ja kõt pajamaxpêr anê. ¹⁵ Na pre Pahihti Jejus inhma hkõt mē pahkwÿ htyk xwÿnhjê jarênh o:

—Kot paj nhÿrmã akupÿn mē awÿr wÿr ka mē ate ixkõt amnhĩ nhĩpêx xwÿnh piitã ma ixkutã axàpir o mō. Nom kot kaj mē arĩ atĩr nê apa xwÿnhjaja akumrêx axàpir kêt nê. Kormã. Koja Tĩrtũm kapêr o mē wÿr xwÿnh krãhtũmja Tĩrtũm mã pifti kakõ. Kakõr tÿx pa ixkwÿ htyk nê hikwÿ xwÿnhjê mã ixkapêr nê ixãmra

kamã mē kumra. Nhũm mē hkarõ akupÿn mē hwÿr wÿr nê mē kãm gjêx pa. Hãmri nhũm mē akupÿm htĩr nê kãnhmã hkrĩ hpa nê ma kumrêx ixkutã àpir o mō. ¹⁷ Hãmri ka mē ate ixkõt amnhĩ xunhwÿr xwÿnh arĩ mē atĩr nê apa xwÿnhjaja ka mē hã ajêt nê mē atipxi nê ma ixkutã axàpir o mō pu mē kakrã kamã axpên kaxpa. Hãmri nê mē pahpimràatã ma kaxkwam api nê inhõ krĩ hwÿr pøj. Kaj mē Tĩrtũm mē wa ixkuri amex kumrêx nê atĩr tũm nê apa ho apa. Anê.

¹⁸ ã Pahihti Jejus inhma mē pakukamã mē pajarênh anê. Jakamã kwa kêr ka mē tee ri mē pahkwÿ htyk xwÿnhjê hkukamã ajamaxpêr hkêt nê. ã ixujarênh anhÿrta ã anohtÿx pê axpên jamaxpêr o axihtÿx o ri axpên kõt apa.

Mē pahte akupÿn Jejus wÿr xà hã arĩgro pumunh kêt ã harênh

Matêwre 24.32-25.13; Wam Pêtre 3.8-13

5 Nê mē pahte Jejus akupÿm wÿr xà hã arĩgro pumunh kêt jakamã kot paj mē amã tanhmã hã kagã hto hkêt nê. Koja nhÿrmã akupÿn mē pahwÿr no-jarêt hãmri nê te kot mē ahkĩnh xwÿnh kot amnhĩ nhĩpêx pyrã nê mē pajaêr pê mē pahwÿr wÿr. ³ Jakamã koja kormã wÿr kêt ri nhũm Kris kwÿ hkêt xwÿnh kot amnhĩ wÿr kamã hamak kêt xwÿnhjaja hãmri mex nê pa hã amnhĩ pumu nê hkĩnh nê pa. Nê axpên mã kapêr o:

—Nà koja Tĩrtũm tanhmã mē pahto hkêt nê. Arĩ mē pamex nê ri mē papa kênã. Nà kot puj mē paxãmnhĩx ri pajamakêtkati nê ri papa ho papa.

Anhÿr o axpên mã kapêr rôm nhũm puh Jejus mē haêr pê akupÿn wÿr. Hãmri nê ma mē kot amnhĩ xà htÿx kamã hamak o pa htũm xà hwÿr mē rênh pa nhũm mē tee ri kêt hpimxur prãm kaprÿ. Te mē htu-jarõ xwÿnh kot amnhĩ nhĩpêx pyrãk. Na htem mex nê pa htã hpijagri kaxyw õhy xà htÿx kumrêx nê tee ri kãm õhy xà hkêt prãm kaprÿ ho hikwÿ. ⁴ Nom mē kaja-ja kot kaj mē urã nê amnhĩ jaêr pê akupÿm wÿr kãm omu nê tee ri amnhĩ kukamã ajamaxpêr o akaprĩ hkêt nê. ⁵ Mē pahpê Jejus kwÿ jakamã na pu htem kapêr kõt ri tãm amnhĩ nhĩpêx o ri papa. Jao te mē pahte mē kêt Jejus kwÿ hkêt xwÿnhjê kot amnhĩ nhĩpêx pyrãk kêt. ⁶ Na htem mē pahkĩnhã akupÿn wÿr kukamã hamaxpêr kêt nê. Te htÿx ri mē õt rãhã ho hikwÿ pyrãk. Nom mē papajaja na pu htem akupÿn wÿr kamã pajamak o papa pê kãm tanhmã amnhĩ nhĩpêx mex to rãhã ho ri papa. ⁷ Te kot ja pyrãk. Na htem kamãt kãm gõr nê mēmoj mã hamaxpêr kêt nê htÿx hikwÿ. Nê mē hk-wÿ-jaja kamãt kãm axpã nê htÿx ri tanhmã amnhĩ tomnuj to ho pa. Jao hamaxpêr mex kêt nê. Tã mē kêt Jejus kwÿ hkêt xwÿnhjaja hte mē uràk nê htÿx ri tanhmã amnhĩ tomnuj to ho pa nê akupÿn Jejus wÿr mã hamaxpêr kêt nê. ⁸ No kêt mē papajaja. Mē pahte hkõt amnhĩ xunhwÿr xwÿnhjaja. Kêr pu mē ho mē uràk kêt nê. Satanasti kãm mē pahte amnhĩ tomnuj prãm tã mē pahte kãm hprãm xà hkõt amnhĩ nhĩpêx pymaj kêr pu mē mēmoj punuj pê amnhĩ to htÿx rãhã ho ri papa. Nê amnhĩ kaxyw Jejus kõt pajamaxpêr tÿx rãhã nê.

Ně mẽ pamã mẽ piitã mẽ hkĩnh pê mẽ kutã pano-jarêt rãhã ho ri papa.

Ně nhỹrmã Tĩrtũm mẽ hkra Jejus wa kuri pahtĩr tũm ně papa ho papa hkukamã mãn pajamaxpěr rãhã o ri papa.

Kot puj mẽ ã amnhĩ nhĩpêx aně hãmri nhũm Satanasti tee ri mẽ pahte amnhĩ tomnuj prãm xà mẽ pahkrãm pajamaxpěr punuj jagjênh kaprỹ.

⁹ Xà na pre Tĩrtũm mẽ pakamã gryk kãm mẽ kot amnhĩ xà htỹx kamã hamak tũm xà hwỹr mẽ pajanor kaxyw mẽ parê? Nà na pre ja kaxyw mẽ parênh kêt ně. Ām Pahihti Jejus Kris kukwak ri kot amnhĩ katut kôt mẽ pahte amnhĩ tomnuj rênh par ně mẽ pahto hkra kaxyw na pre mẽ parê.

¹⁰ Tã mẽmo kaxyw na pre Krisja mẽ panê ty? Nà nhỹrmã Tĩrtũm mẽ wa kuri mẽ pamex kumrêx ně pahtĩr tũm ně papa ho papa hprãm xà na pre mẽ panê ty. Jakamã koja nhỹrmã akupỹm amnhĩ kôt ma mẽ pahto àpir kaxyw akupỹn mẽ pahwỹr wrỹ pu mẽ amnhĩ kaxyw hkôt pajamaxpěr xwỹnh piitã ma hkôt kaxkwa hwỹr api hãmri ně Tĩrtũm wa kuri pamex ně pahtĩr tũm ně papa ho papa. Kormã mẽ pahtĩr ri mẽ papa xwỹnhjaja ně ra mẽ htyk ně hikwỹ xwỹnhjaja nhũm akupỹm mẽ ho hĩr. Hãmri ně mẽ pahto hpimrààtã amnhĩ kôt mẽ pahto àpir pa. Mě pahte hkôt amnhĩ xunhwỹr xwỹnh piitã koja Jejus nhỹrmã akupỹn wrỹ ně ã mẽ panhĩpêx mex aně.

¹¹ Tã ã kot anhỹr jakamã kwa kêr ka mẽ jam ajamaxpěr o apa pê axpên jamaxpěr o hihtỹx o ri axpên kôt apa. Ně Jejus kôt axpên jamaxpěr o hihtỹx o ri axpên kôt apa. Ra ã mẽ ate axpên nhĩpêx anhỹr tã kêr ka mẽ arĩ ho anhỹr rãhã ho ri apa ně aa hkaga hkêt ně.

Tĩrtũm kapěr o mẽ pajahkre xwỹnhjê jarênh

Karatas 6.6; Wam Ximotre 5.17-19

¹² Ně kwa Kris kôt ixkwỹjaja. Na hte mẽ kot Tĩrtũm kapěr o mẽ ajahkre xwỹnhjaja mẽ ajahkre mex pê Tĩrtũm mã mẽ ajamãr mex o pa. Na htem ã mẽ anhĩpêx mex anhỹr rãhã ho ri mẽ akôt pa. Tã kwa kêr ka mẽ amnhĩ tã mẽ omu ně mẽ kapěr mar tỹx ně. ¹³ Ně mẽ hã apijaàm pê tanhmã mẽ ho mex to ho apa.

Ně kwa kêr ka mẽ tãm axpên nhĩpêx ně axàmnhĩx ri ajamakêtkati ně axpên kôt ri apa ho apa.

Mě pahte tanhmã Kris kôt mẽ pahkwỹjê nhĩpêx to hã mẽ pamã karõ

Epes 4.1-6

¹⁴ Ně koja Kris kôt mẽ anhĩõ kãm kaga ně pa ka mẽ ja hã omu ně kãm aně kê ã amnhĩ nhĩpêx anhỹr kêt ně. Kê hpãnhã amnhĩ xàpkur xà kaxyw àpênh o pa.

Ně mẽ kãm ma ho mẽ pa xwỹnhjaja ka mẽ kãm mẽ hamaxpěr o axihtỹx o ri mẽ hkôt apa.

Ně kormã amnhĩ kaxyw Jejus kôt mẽ hamaxpěr tohtuj anhỹr xwỹnhjaja ka mẽ tanhmã Jejus kôt mẽ ho mẽ axihtỹx to kê mẽ hkôt amnhĩ nhĩpêx mex o pa.

E kêr ka mẽ ã mẽ axpên nhĩpêx anhỹr o ri apa ně axpên kamã agryk tokyx anhỹr kêt ně.

¹⁵ Ně koja mẽhõ tanhmã atomnuj to ka mẽ ãm omu ně amnhĩ tã tanhmã ho hkêt ně. Ām ho mex o ri apa. Ně mẽ piitã tanhmã mẽ ho mex to hpix kukamã ajamaxpěr rãhã ně.

¹⁶ Ā mẽ pahte amnhĩ nhĩpêx anhỹr o papaja na Tĩrtũm kãm hprãm.

Mě pahpê hkra hã pahkĩnh rãhã papaja na kãm hprãm.

¹⁷ Ně mẽ pahte Tĩrtũm mã amnhĩ jarênh rãhã ho papaja na mããnên kãm hprãm.

¹⁸ Ně tanhmã mẽ pakute htã arĩ Tĩrtũm mã mex o mex ã harênh o papaja na mããnên kãm hprãm. Mě pahkĩnh ně papa kamã kãm mex o mex ã harê. Rỹ mẽ pahpunuj ně papa htã arĩ kãm mex o mex ã harê. Rỹ nhũm mẽhõ tanhmã mẽ panhĩpêx to htã pu mẽ arĩ kãm mex o mex ã harê.

Ā mẽ pahte amnhĩ nhĩpêx anhỹr o papaja na Tĩrtũm kãm hprãm.

Mě pahte tanhmã Tĩrtũm Karõ nhĩpêx to hã mẽ pamã karõ

¹⁹ Ně koja Tĩrtũm Karõ mẽ amã mẽmoj tã tanhmã kapěr o amnhĩrit to ka mẽ ama ně hkôt amnhĩ nhĩpêx kurê kumrêx. Rỹ mẽhõ mã tanhmã akapěr to kurê kumrêx. No kêr ka mẽ ama ně ãm ama ně atỹx ri hã apa hkêt ně. ²⁰ Rỹ nhũm mẽhõ Tĩrtũm Karõ nhỹ hã tanhmã mẽ amã kapěr to ka mẽ ama ně agryk ně tanhmã ho akapěr punuj to hkêt ně. ²¹ Koja Tĩrtũm kapěr kôt tanhmã mẽ amã mẽmoj jarênh to ně ãm hãmri Tĩrtũm Karõ nhỹ hã harênh ã amnhĩ jarê. Ka mẽ ama ně hkôt amnhĩ nhĩpêx. ²² No koja Tĩrtũm kapěr kwỹm ri tanhmã mẽmoj jarênh to hãmri ně Tĩrtũm Karõ nhỹ hã ja jarênh kêt ně. Ām amnhĩ krã hkôt harê. Ka mẽ tee ri ama ně amnhĩ krã kamã kapěr xir tỹx kêt ně. Jao hkôt amnhĩ nhĩpêx kêt ně.

Tanhmã Pawre kot mẽ ho Tĩrtũm wỹr to hã harênh

Wam Tesarõn 3.3, 16

²³ Ně na pa hte mẽ ato Tĩrtũm wỹr o ri ixpa ně kãm:

—Pa Tĩrtũm. Nà ate mẽ inhmã mẽ ijamakêtkati xà nhõr jakamã na pa htem anhỹ hã ixàmnhĩx ijamakêtkati ně ri ixpa. Jakamã kwa kêr ka tanhmã Tesarõn kamã akwỹjê ho kê mẽ amnhĩ to mex rãhã ri pa. Jao tãm amnhĩ nhĩpêx ně tãm ri hamaxpěr rãhã nhũm Pahihti Jejus Kris akupỹn mẽ ixwỹr wrỹ.

Anhỹr o mẽ ato kuwỹ. ²⁴ Tã koja ã mẽ anhĩpêx aně. Ra kot amnhĩ jarênh xà hkôt. Ā mẽ anhĩpêx anhỹr kaxyw na pre amnhĩm mẽ arê.

Kagà jatur xà

²⁵ E Kris kôt ixkwỹjaja. Kwa kêr ka mẽ amnhĩ xwar ixto Tĩrtũm wỹr o apa.

²⁶ Ně kêr ka mẽ atar Kris kôt mẽ pahkwỹjê piitã mẽ kãm mẽ ijarê.

²⁷ Ně kê Pahihti Jejus Kris mẽ akutã nojarêt rãhã ho pa. Ixte Pahihti nhỹ hã ã mẽ amã ixkapěr ně hã kagà

anhÿr jakamã kêr ka mẽ atar Kris kwÿjê piitã mẽ kãm
kamã harê kê mẽ piitã ixkapër ma.

Tã ãm ja pix na hapêx. Ixpê Pawre na pa ã mẽ amã
kagà nhÿpêx nê mẽ awÿr mênh anê.

Sikūn Tesarōn

Pawre na pre kagàja nhìpêx nê ma Tesarōn kamã Jejus kôt hkwyjê hwyr kumê. Na pre hte Tesarōn kamã mẽ kãm Jejus ã mẽ hkurê xwýnhjaja Jejus ã tanhmã mẽ homnuj to nhũm mẽ amnhĩ xà htỳx kamã hamak o pa. Hãmri nhũm Pawre mẽ harênh ma nê kagàja nhìpêx nê mẽ hwyr kumê. Nê kamã mẽ kãm mẽ hamaxpêr o hihtỳx. Nê mẽ kot arĩ Tirtũm kôt amnhĩ nhìpêx mex o pa nê hamaxpêr kôt hamaxpêr o pa hã mẽ kãm karõ. Nê nhỹrmã Jejus akupỳn kaxkwa rũm mẽ pahpê hkrajê hwyr wrỳk nê pika ho hapêx par ã mẽ kãm harê. Æ na pre Pawre mẽ kãm kagàja kamã mẽ kãm ujarênh anê. Nê mẽ kãm:

1 Pa Tesarōn nhõ xwýnh kot Tirtũm kapêr mar kaxyw axpên wyr mẽ apikuprõnh xwýnhjaja? Xà mẽ amex na ka mẽ apa? Ixpê Pawre na pa axte mẽ awyr kagà nhìpêx nê kumê. Siras mẽ Ximotre mẽ pa mẽ awyr kumê. Nà mẽ pahpê Měpanhìpêxà maati Tirtũm mẽ Kra Jejus Kris kwỳ na pu mẽ. ²Jakamã na pa htem mẽ ato wa hwyr rãhã ho ri ixpa. Wa kot mẽ akutã nojarêr rãhã ka mẽ ajamakêtkati nê apa kaxyw. Nê mẽ-moj to mẽ akutã wa nojarêr rãhã ho pa kaxyw.

Tirtũm kot nhỹrmã hkrajê nhìpêx kati xwýnhjê homnuj tỳx ã harênh
Wam Pêtre 4.12-19

³Nê na ka htem amnhĩ kaxyw Tirtũm mã ajamaxpêr tỳx mex o ri apa. Nê axpên kutã anojarêr rãhã nê. Na pa htem ã mẽ ate amnhĩ nhìpêx anhỹrja mã ijamaxpêr nê mẽ anhỹ hã ixkĩnh nê Tirtũm mã mẽ anhỹ hã ixkĩnh ã amnhĩ jarê. ⁴Nê nhỹhỹm ixpa nê nhỹri krĩm agjê nê kamã Tirtũm kôt mẽ pahkwỳjê mã mẽ ato amỹra nê mẽ kãm:

—E pa mẽ amã Tesarōn kamã Kris kwỳjê jarê ka mẽ inhma. Nà mẽ õ krĩ kamã mẽ hkwyjaja na htem Kris ã mẽ hipêx kati ho pa nhũm htem amnhĩ xà htỳx kamã hamak pê mex kêt nê pa. Tã nom tee ri amnhĩ kukamã hamaxpêr o Jejus kaga hkêt nê. Na htem arĩ hkôt amnhĩ nhìpêx mex rãhã ho pa. Anê.

⁵ ã mẽ ate mẽ kutã amnhĩ nhìpêx anhỹr o apaja na hte Tirtũm hã mẽ apumu nê hkĩnh nê pa. Nê mẽ akukamã hamaxpêr o:

—Mê kot Ixkra Jejus ã tanhmã mẽ hipêx to ho pa htã ãm hãmri na htem mẽ kutã amnhĩ to htỳx o pa nê mẽ umaj wa ixkaga hkêt nê. Na htem ã amnhĩ nhìpêx anê nê mẽ kêp ixkra hã amnhĩ to amnhĩrit mex nê. Nà koja mẽ nhỹrmã wa ixri mex kumrêx nê htĩr tũm nê pa ho pa.

Anhỹr o hamaxpêr. ⁶Nê mẽ kot Kris ã mẽ anhìpêx punuj xwýnhjaja koja Tirtũm nhỹrmã mẽ atã mẽ homnuj tỳx nê nhũm mẽ amnhĩ xà htỳx kamã hamak rãhã ho pa. Æm hãmri koja ã mẽ atã mẽ hipêx anê. ⁷Koja Pahihti Jejusja nhỹrmã man akupỳn pika hwyr hirã htỳx kãm wrỳ nhũm Tirtũm kapêr o mẽ wrỳk xwýnh xihtỳx xwýnhjaja man hkôt wrỳ. Koja mẽ wrỳ hãmri nê mẽ kot amnhĩ tomnuj xwýnhjê homnuj tỳx kumrêx. Jao

ma mẽ kot amnhĩ xà htỳx kamã hamak tũm xàta wyr mẽ rênh pa nhũm mẽ kamã htĩr tũm nê amnhĩ xà htỳx kamã hamak rãhã ho pa ho pa. Koja ã Pahihtija amnhĩ nê mẽ kot hkôt amnhĩ xunhwyr kêt xwýnhjê rênh anê nhũm mẽ pahkĩnhã Tirtũm mẽ Krata wa kuri mex nê pa hkêt nê. Nê mẽ pahkĩnh ã wa mex o wa mex nê wa hihtỳx o wa hihtỳx ã wa omunh kêt nê. Koja Pahihti Jejus nhỹrmã akupỳn wrỳ nê ã mẽ panê mẽ hipêx anê. Koja wrỳ pu mẽ amnhĩ kaxyw hkôt pajamaxpêr xwýnhjaja amnhĩ wyr omu nê pahkĩnh nê. Hãmri nê amnhĩ nhĩ nyw ã amnhĩ pumu nê kãm:

—Hêxta waa nê. Amex o amex Pahihti. Na ka pre mẽ inhnê ty hãmri nê mẽ inhmã mẽ inhĩ nyw gõ. Kot paj mẽ Tirtũm mẽ war ari inhmex kumrêx nê ixtĩr tũm nê ixpa ho ixpa. Æm hãmri na ka ã mẽ ixto mex anê. Nà amex kumrêx o amex kumrêx Pahihti. Anê.

Æ kot puj mẽ pahpê hkwyjaja amnhĩ tã kãm mex o mex ã harênh anê. Ra mẽ ate mẽ ixkapêr mar nê hkôt amnhĩ xunhwyr jakamã kot kaj mẽ ixpyrà nê ã kãm mex o mex ã harênh anê.

Pawre kot Tesarōn nhõ xwýnhjê ho Tirtũm wyr ã harênh

¹¹ Nê na pa htem mẽ ato Tirtũm wyr rãhã ho ixpa nê kãm:

—Pa Tirtũm? E Tesarōn kãm akrajaja na pa mẽ ho awỳ. Na ka hte Akra Pahihti Jejus Kris mẽ wa mẽ ho mex rax o apa. Jao amnhĩm mẽ arê nhũm mẽ ra kãm amnhĩ to mex prãm nê. Na htem amnhĩ kaxyw Jejus mã hamaxpêr rãhã pê mẽmoj to axpên kutã nojarêr o pa. Jakamã kwa tanhmã mẽ hkrã hto kê mẽ akôt ã amnhĩ nhìpêx anhỹr rãhã ho pa. Kêr ka mẽ kot akôt amnhĩ nhìpêx o pa hã mẽ omu nê akĩnh nê mẽ kãm mẽ mex ã mẽ harê. Nhũm mẽ ate tanhmã mẽ ho mex to hã amnhĩ tã apumu hãmri nê mẽ amnhĩ pyrà nê amã amex o amex ã ajarênh rãhã ho pa. Anê.

Kot amnhĩ tomnuj tỳx kumrêx xwýnh maati jarênh
Matêwre 24.23-25; Makre 13.14-23; Rukre 21.20-24; Wam Juãw 2.18-19; Apokarip 13.1-18

2 Nê koja nhỹrmã mẽ panhõ Pahihti Jejus Kris akupỳn wrỳ pu mẽ ma kutã api nê kakrã kamã hkaxpa. Jakamã kwa Jejus kôt ixkwỳjaja. ²Koja mẽhõ

mê awÿr mô nê mê amã Jejus ra akupÿn wrÿk ã harênh jarêp. Rÿ tanhmã mê amã Jejus hpôx xà hã arÿgro jarênh o hêx to nê mê amã:

—Kwa na ra Jejus akupÿn nojarê. Koja tokyx akupÿn mê pahwÿr wrÿ. Semãn ja kamã rÿ ko. Apu hõ hã koja apu wrÿ rÿ ko.

Anhÿr o harê. Nê Tirtûm Karõ nhÿ hã ã kot mê amã harênh anhÿr ã amnhÿ jarê rÿ nhãm mēhõ kot ã kãm harênh anhÿr ã harê. Rÿ pa ixte harênh nê hã kagã hã ijarê. Nom kwa kêr ka mê kapêr ma nê ãm ama nê hkôt ajamaxpêr kêt nê. Rÿ ama nê tee ri amnhÿ kukamã ajamaxpêr kêt nê. Koja mēhõ ã mê amã Jejus tokyx wrÿk ã harênh anê nê ãm amnhÿ krã hkôt ã harênh anhÿr o hêx. Nom Tirtûm Karõ nhÿ hã rÿ pa inhÿ hã rÿ nhãm Kris kôt mê panhÿõ nhÿ hã ã harênh anhÿr kêt nê. ³ Jakamã kêr ka mê ãm mê kot harênh o hêxja ma nê hkôt ajamaxpêr kêt nê. Kormã Pahihti Jejusja akupÿn nojarê kêt. E kot paj ixprÿ hã mê amã ja jarê ka mê inhma. Nà kormã Pahihti akupÿn nojarê kêt ri koja mê ohtõ rax kumrêx nê Tirtûm kutã amnhÿ xunhwÿ nê kãm hkurê ho pa. Nê amnhÿ tomnuj tÿx o pa. Hãmri nhÿm ra kot amnhÿ tomnuj tÿx kumrêx xwÿnh maatija amnhÿ to amnhÿrÿt. Nom na pre ra Tirtûm tanhmã kot hipêx to hkukamã hã amnhÿ jarê. Koja xep gaa nê ma mê kot amnhÿ xà htÿx kamã hamak tûm xàta wÿr kumê nhÿm kamã amnhÿ xà htÿx kamã hamak o pa rãhã nê pa ho pa.

Tã nom kormã Pahihtija akupÿn wrÿk nê ma hwÿr mēnh kêt ri koja mê piitã omu nê kêp Mēhpãm maati pixi hã harênh kaxyw mê kêp mê õ sãnti piitã hkrakrak pa. Nê mê kot mēmo karõ ho amnhÿ pãm ã harênh xwÿnhja nhÿm piitã hkrakrak pa. Hãmri nê axtem nê Tirtûm mã amnhÿ jarênh xà hã ixkre jatur xà kamã hitom wÿr axà nê kamã nhÿ nê hêx rom mê piitã mê kãm kêp Tirtûm ã amnhÿ to hêx nê mê kãm:

—E mê amnê ixpumu. Ixpê mê anhõ Tirtûm na pa. Pa kot kaj mê inhmã inhmex o inhmex ã ijarê. No kêr ka mê anhõ sãnti ho apãm o apa hkêt nê. Kwarÿ ho kwarÿ. ãm paxipix ixpê Mēapãm maati nê paxipix ixpê mê anhõ Tirtûm.

Anhÿr o amnhÿ to hêx. ⁵ Na pa pre arÿ mê akôt ixpa ri ã mê amã harênh anê. Mãn arÿ mê ate ja hã anohtÿx rÿ ko. ⁶ Nom kormã ã kot amnhÿ nhÿpêx anhÿr xà hã arÿgrota kormã kator kêt. Mēhõ kormã kot kêp àmnàr jakamã nhÿm kormã kator kêt nê. Ra mê ate kêp àmnàr xwÿnhja jarênh mar. Tã koja hpôx xà hã arÿgro kato nhÿm kêp àmnàr xwÿnhja kãm pry kaprã nhÿm rÿ kormã mô. ⁷ Nom na hte ra hpimxur pê Tirtûm nê mê piitã mê hkurê ho pa. Mê kot Tirtûm kôt amnhÿ xunhwÿr pymaj tanhmã nê mê ho ho pa. Nom kormã kêp àmnàr xwÿnhja kêp àmnàr jakamã nhÿm hte mê noo mã tanhmã mê ho hkêt nê. Tã koja Tirtûm nhÿrmã kêp àmnàr xwÿnhja mã anê nhÿm kuma nê kãm ure nhÿm rÿ kormã amnhÿ to amnhÿrÿt nê mê piitã mê noo mã mô nê Tirtûm nê tanhmã mê kãm hêx to ho pa. ⁸ Koja kato nê Satanasti mê wa mê piitã tanhmã mê nokupÿr to ho ri mê hkôt pa. Nê hêx rom mê kãm aa mê kot mēmoj pumunh kêt kwÿ ho anhÿr o ri pa. Koja wa hêx

rom te Tirtûm kot amnhÿ nhÿpêx pyrãk o ã amnhÿ nhÿpêx anê. Hãmri nhÿm mê kot Jejus kôt amnhÿ xunhwÿr kêt xwÿnhja ja hã wa omu nê wa hkôt hamaxpêr kurê kumrêx. Nê ãm hãmri wa kapêr ã wa hkamnhÿ. Kop apu ra mê kot Tirtûm kapêr mar nê hkôt amnhÿ xunhwÿr ronhÿx ra Tirtûm amnhÿ tã mê omu nê mê ho hkra. Nom koja mê kãm kapêr mar prãm kêt nê. ãm wa kot amnhÿ to hêx o wa pa xwÿnhja kôt pix mã koja mê kãm amnhÿ nhÿpêx prãm.

Ja mÿrapê koja Tirtûm tee ri ja hã mê omu hãmri nê mê nê wa kot amnhÿ tomnuj tÿx xwÿnhja wa omunh kêt nhÿm wa tanhmã mê kãm amnhÿ nhÿpêx to nhÿm mê wa omu nê wa hkôt hamaxpêr kurê kumrêx. Hãmri nê wa gryk ã Tirtûm kaga jakamã nhÿm nhÿrmã mê kot amnhÿ xà htÿx kamã hamak tûm xàja wÿr mê rēnh pa.

Koja Satanasti mê kot amnhÿ tomnuj tÿx kumrêx xwÿnh maatita ã hêx rom tanhmã mê no kupÿr to anhÿr o pa rãhã nhÿm Pahihti Jejusja hirã rax kãm akupÿn mê pahwÿr wrÿ. Hãmri nê kot amnhÿ tomnuj tÿx kumrêx xwÿnh maatita ã amÿnê nhÿm mê kãm hpÿr kurê kumrêx nhÿm hapêx. Koja ã amnhÿ nhÿpêx anê.

Tirtûm kot tanhmã mê pahto mex to hã harênh

Römãn 8.28-30; Wam Tesarôn 2.13, 5.23-24

¹³ Nê amnepêm kormã mēmoj kêt ri na pre Tirtûm amnhÿm mê arê. Mê ate kapêr mar nê hkôt amnhÿ xunhwÿr nhÿm kot mê ato hkra kaxyw mê arê. Kãm mê ajapêê. Na pre mê awÿr amnhÿ Karõ rē nhÿm mê akarõ mã agjê nê tanhmã mê ajamaxpêr to ka mê ÿ hã tãm amnhÿ nhÿpêx rãhã ho ri apa. Na pa htem ja hã mê amã ijamaxpêr nê mê anhÿ hã ixkÿnh kãm Tirtûm mã mê ajarênh o ri ixpa. ¹⁴ Na pre mê awÿr mê ixrê. Mê ixte mê awÿr ixpa nê mê amã tanhmã Jejus kot mê panê amnhÿ nhÿpêx to hã harênh o ixpa kaxyw. Mê ate mê inhmar nê Jejus kôt amnhÿ xunhwÿr nhÿm Tirtûm kot Pahihti Jejus Kris o mex pyrã nê tanhmã mê ato mex to kaxyw. ¹⁵ Jakamã kwa kêr ka mê ra mê ixte wam mê awÿr kagã mēnhja kamã harê nê mar tÿx nê. Nê mê akôt mê ixpa ri tanhmã mê ixte mê ajahkre htoja mã ajamaxpêr mex nê hã ano htÿx nê hkôt amnhÿ nhÿpêx rãhã ho ri apa. Jao Jejus kôt amnhÿ nhÿpêx mex o ri apa Kris kôt ixkwÿjaja.

¹⁶ Mēpanhÿpêêxà maati mê Pahihti Jejus Kris wa kãm mê pajapê htÿx kumrêx. Na hte wa tanhmã mê pajamaxpêr o hihtÿx to ho pa pu mê wa ÿ hã tãm pajamaxpêr o ri papa. Nê wa ÿ hã nhÿrmã wa kuri pamex nê pahÿr tûm nê papa hkukamã pajamaxpêr kaprÿ ho papa hkêt nê. ¹⁷ Na pa htem mê ato wa hwÿr o ixpa nê wa kãm:

—Pa Tirtûm mê Jejus wa? Kwa kêr ka wa tanhmã Tesarôn kamã akrajê mã mê hamaxpêr o hihtÿx to kê mê war anhÿ hã tãm amnhÿ nhÿpêx nê tãm hamaxpêr. Jao kapêr mex rãhã nê pa ho pa. Anê.

Tanhmã mẽ pahte axpën to Tirtûm wÿr to hã kot mẽ pamã karõ
Korosë 4.2-4

3 Nẽ kwa Kris kôt mẽ ixtõ nõ ixtõxjaja. Kêr ka mẽ amnhĩ xwar mẽ ixto Tirtûm wÿr rãhã ho ri apa. Mẽ ixte krĩ piitã hkôt mẽ kãm Jejus jarënh o ri mẽ hkôt ixpa nhũm mẽ kot mẽ inhmar nõ amnhĩ kaxyw Jejus kôt hamaxpër kaxyw. Jao mẽ apyrã nõ hkôt amnhĩ nhĩpêx mex o pa kaxyw. ² Nom koja mẽ piitã ã amnhĩ nhĩpêx anhÿr kêt nõ. Mẽ hkwyjaja kãm Jejus jarënh mar prãm kêt jakamã kwa mẽ ixto Tirtûm wÿr kêt mẽ inhnê mẽ omunh mex nõ nhũm mẽ Jejus ã tanhmã mẽ ixto hkêt nõ.

³ Nẽ koja Pahihti tanhmã mẽ akrã hto ka mẽ ajamaxpër mex nõ ÿ hã hkôt amnhĩ xunhwÿr tÿx o ri apa. Jakamã nhũm Satanasti mẽ ate amnhĩ tomnuj hprãm xaj tee ri tanhmã mẽ anhĩpêx to kaprÿ nhũm Pahihti mẽ anê omunh mex nõ. Ra kot mẽ atã amnhĩ jarënh xà hkôt. ⁴ Koja ã mẽ anê hipêx anê ka mẽ ÿ hã tanhmã mẽ ixte mẽmoj tã mẽ amã karõ xà hkôt amnhĩ nhĩpêx mex o ri apa. ⁵ Tã kê Pahihti tanhmã mẽ akrã hto ka mẽ Tirtûm pyrã nõ mẽ piitã mẽ kamã axukaprĩ ho ri apa. Nẽ Pahihti Kris pyrã nõ mẽmoj punuj kutã amnhĩ to htÿx nõ. Jao hkôt amnhĩ nhĩpêx mex rãhã ho ri apa.

Mẽ kãm kaga xwÿnhjê jarënh

Wam Korĩt 4.12; Epes 4.28; Wam Tesarôn 4.9-12

⁶ E kot paj hpãnhã Kris kôt mẽ pahkwÿ kãm kaga xwÿnhjê jarë ka mẽ inhma. Pahihti Jejus nhÿ hã kot paj mẽ amã tanhmã mẽ harënh to. Nà koja mẽ akwÿjaja kãm kaga nõ amnhĩm mẽmoj tã àpênh kêt japêr. Nẽ mẽ ixte mẽ axàpênh mex o apa hã mẽ amã karõja kuhpa hã amnhĩm mẽmoj tã àpênh kêt japêr. Koja mẽ ã amnhĩ nhĩpêx anê ka mẽ ja hã mẽ omu hãmri nõ mẽ hkôt ri apa hkêt nõ. ⁷ Xà mẽ pajaja na pa prem ma mẽ awÿr mõ nõ mẽ akôt inhmã kaga nõ mẽmoj tã ixàpênh kêt nõ ri ixpa? Nà na pa prem mẽ apa kukwak ri ixàpkur pymaj ixàpênh rÿnh nõ amnhĩ pa pix kukwak ri ixàpkur o ri ixpa. Na ka prem mẽ inhmã mẽmo mẽ apkur xà ho mra pa prem amarĩ amnhĩm hamÿnh nõ hkur kêt nõ. Na pa prem hpãnhã mẽ amã amnhĩre nõ kormã kuku. Tã kêr ka mẽ ã amnhĩ nhĩpêx anhÿr o ri axpën kôt apa nõ amnhĩ pa pix kukwak ri apku. Nẽ mẽ amã kaga hã nhãm akwÿjê hpa kukwak ri axàpkur o ri

apa kêt nõ. ⁹ Na pa prem amnhĩ pa pix kukwak ri ixàpkur o ri mẽ akôt ixpa. Mẽ ate ja hã mẽ ixpumunh nõ mẽ ixpyrà nõ ã amnhĩ nhĩpêx anhÿr kaxyw. Nom mẽ ixte Jejus mã tanhmã mẽ ajahkre hto nhũm mẽ ate mẽ inhmar nõ hpãnhã mẽ inhmã mẽ ixàpkur xà nhõrja Jejus mã tanhmã kute hkêt tã pa prem ã amnhĩ nhĩpêx anhÿr kêt nõ. Mẽ ate ja hã mẽ ixpumunh nõ mẽ ixpyrà nõ ã amnhĩ nhĩpêx anhÿr kaxyw na pa prem amnhĩ pa pix kukwak ri ixàpkur o ri mẽ akôt ixpa. ¹⁰ Na pa prem mẽ amã ja hã karõ ho:

—Koja mẽhõ kãm kaga nõ àpênh kêt nõ ka mẽ ja hã omu nõ kãm õ hkêt nõ. Kwãr mãmrĩ apkur kêt nõ kãm prãm nõ ri pa nõ amnhĩ pumu. Anê.

¹¹ Tã xep ra mẽ akwÿjaja ã amnhĩ nhĩpêx anê nõ kãm kaga nõ àpênh kêt nõ amarĩ ri pa. Nẽ xep htÿx ri axpën jakwa kamã nhãm mẽ hixi ho rêr o ri pa. ¹² Kwa mẽ inhma Jejus kôt ixkwÿjaja. Kot paj Pahihti Jejus nhÿ hã mẽ amã mẽ kot ã amnhĩ nhĩpêx xwÿnhjê jarë ka mẽ inhma nõ mẽ inhmar tÿx nõ. Kêr ka mẽ kãm kaga xwÿnhjê mã anê kê mẽ jam ure nõ hpãnhã àpênh mex o pa. Jao mẽ apyrã nõ amnhĩ pa kukwak ri apkur o pa. Kêr ka mẽ ã mẽ kãm ixkapër jarënh anê.

¹³ Nẽ kwa kêr ka mẽ axpën to mex o apata kaga hkêt nõ.

¹⁴ E na pa mẽ ã Tirtûm nhÿ hã mẽmoj tã mẽ amã karõ nõ hã kagã anê. Tã koja mẽhõ kamã harë nõ kuma nõ ãm kuma nõ hkôt amnhĩ nhĩpêx kêt ka mẽ ja hã omu nõ hkôt ri apa hkêt nõ. Tokyx kot ja hã amnhĩ pumunh nõ amnhĩ tã hpjiaàm kaxyw. ¹⁵ Nom arĩ Kris kôt kêp mẽ akwÿ jakamã kêr ka mẽ arĩ kêp mẽ atõ rÿ atõx ã tãm hipêx nõ kãm akapër mex o ri apa. Nom te ho kêp mẽ akwÿ hkêt pyrãk o kãm akapër kêt nõ.

Tanhmã Pawre kot mẽ ho Jejus wÿr to hã harënh

¹⁶ Nẽ na pa hte mẽ ato Pahihti Jejus wÿr rãhã ho ixpa. Kot mẽ pamã mẽ pajamakêtkati xà nhõr jakamã na pa htem mẽ ato kuwÿ nõ kãm:

—Pa Pahihti? Kwa kêr ka Tesarôn kamã akwÿjê pumu nõ mẽmoj to mẽ kutã anojarêt rãhã ho ri mẽ hkôt apa. Kê mẽ hamakêtkati nõ àmnhix pa ho pa. Anê.

Tã ãm ja pix. Ixpê Pawre na pa kagã jatur xà kamã inhĩkra ho amnhĩ nhĩxi nhĩpêx. Na hte kagã nhĩpêx xwÿnh inhmã ixkapër ã kagã. Nẽ hã kagã hpa pa hpãnhã hatur xà kamã pam inhĩxi nhĩpêx. Tã na hapêx.

Wam Ximotre

Pawre na pre kagàja nhípêx. Kêp Jejus nhỹ hã hkrajê jahkre ho pa xwýnhjê hõ na pre. Nê Ximotre kêp Pawre ho ajuta ho hkõt pa xwýnh na pre. Tã hpãnhã krí pê Epes kamã arík nê Tirtüm kapêr o Jejus kôt hkwyjê jahkre ho pa. Hãmri nhũm Pawre krí hõ kamã pa nê kagàja nhípêx nê hwýr kumê. Nê kamã kãm mëmoj tã karõ. Na pre ra Epes kamã më hkwyjaja Tirtüm kapêr o hêx o më ahkre ho pa nhũm Pawre më harênh ma nê kagàja kamã Ximotre mã tanhmã më harênh to. Nê kot Tirtüm kapêr o Jejus kwýjê jahkre mex xwýnhjê xunhwýr kaxyw kãm karõ. Nê Tirtüm kãm hprãm xà hkõt pix mã më ahkre ho pa hã kãm karõ nê hwýr kagà nê kumê. Nê kãm:

1 Pa Ximotre? Xà amex? Ixpê Pawre na pa awýr kagà nhípêx nê kumê. Ixte Jejus Kris nhỹ hã më ahkre ho ixpa kaxyw na pre Mëpapytãr xwýnh Tirtüm më Jejus Kris wa ixta nê ixãm. Jejus kamã na pu htem pajamak rãhã ho ri papa.

² Nà ra ate ixkapêr mar xà hkõt Jejus kôt amnhĩ xãm jakamã te apê ixkra pyrãk Ximotre. Jakamã na pa hte ato Mëpanhípêxã maati Tirtüm më panhõ Pahihti Jejus Kris wa hwýr o ixpa nê ato wa hwýr o:

—Pa Tirtüm më Pahihti wa. E Ximotre ho na pa war awýr kaxyw. Kwa kêr ka wa kamã axukaprí nê kutã war anojarêt rãhã ho wa ri apa. Kot kaj wa ã ho mex anê nhũm war anhỹ hã hamakêtkati nê amnhĩx pa ho pa.

Anhỹr o na pa hte war ato kuwý

Tirtüm kapêr o më ahkre xwýnhjê jarênh

Rõmãn 16.17; Wam Ximotre 6.3; Sikün Ximotre 2.23; Xitre 1.5-16

³ Nê na pu pre wa Epes kamã papa tã pika pê Masetõn wýr panojarêt nê tee ri Epes kamã Tirtüm kapêr ho hêx o më ahkre xwýnhjê kapêr ma. Jakamã na pa pre amã:

—E Ximotre kêr ka Masetõn wýr ixkõt amõr kêt nê. Æm jar Epes kamã arík nê ixwakre kamã Tirtüm kapêr o më hêx xwýnhjê mã akapêr nê ã më hêx anhỹrja nê më hkurê ho ri më hkõt apa.

Anhỹr o amã harê hãmri nê Epes kamã are nê ma Masetõn wýr ahte mõ. ⁴ Më hêx xwýnhjaja amnepêm panhígêjtaja kot tanhmã amnhĩ nhípêx to nê tanhmã ujarênh toja nhũm htem më kãm harênh pix o pa. Nê më hixi piitã harênh o pa. Na htem ã amnhĩ krã hkõt hkwyjê mã ujarênh anhỹr o pa. Jao axpên kwým ri më ahkre nê më hã axpên mã àkjêr o pa. Æ më kot amnhĩ nhípêx anhỹr jao Tirtüm nhỹ hã kãm hprãm xà hkõt më ahkre hkêt nê. Kojã mëhõ Tirtüm nhỹ hã kapêr o më ahkre hãmri nê amnhĩ kaxyw kãm hamaxpêr týt pê tanhmã më ahkre hto. Nom ixte amã më harênh xwýnhjaja Tirtüm nhỹ hã më ahkre hkêt jakamã na pa pre inhnojarêt nê ã amã më harênh anê nê më kuri Epes kamã are.

⁵ Tã kêr ka arí më ahkre ho ri më hkõt apa Ximotre. Nê Kris kôt më pahkwýjê mã anê kê më amnhĩ kaxyw Jejus kôt hamaxpêr týt pê hamaxpêr mex o pa. Jao tanhmã hamaxpêr punuj to hkõt amnhĩ nhípêx kêt nê.

Nê më kãm anê kê më te kãm amnhĩ tã ma pyrãk o nhãm kãm më hã ma ho pa. ⁶ Ixte amã më hêx xwýnh jarênh xwýnhjaja na htem ã më ahkre anhỹr kêt nê. Na htem htýt ri amnhĩ krã hkõt tanhmã më ahkre hto.

⁷ Tirtüm kot finat Mojes mã mëmoj tã karõja më kot mar týt ã amnhĩ kamnhĩx nê ho më ahkre hprãm tã no ãm hprí hã mar kêt nê htýt ri ho më ahkre ho pa.

⁸ Tirtüm kot Mojes mã mëmoj tã karõja mex. Më kot mar nê hkõt amnhĩ nhípêx o pa kaxyw na pre. ⁹ No na pre më kot tãm amnhĩ nhípêx xwýnhjê mã ã hã karõ anhỹr kêt nê. Æm më kot amnhĩ tomnuj xwýnhjê mã na pre hã karõ.

Më kot më õ pahi kapêr mar kêt xwýnhjê mã.

Nê më kot Tirtüm kapêr nhĩrõp kuhê ho më pa xwýnhjê mã.

Nê Tirtüm ã më hpijaãm kêt xwýnhjê mã.

Nê më kot më hipêxã nê më katorxã hpar xwýnhjê mã.

¹⁰ Nê më hprõ kuhpa hã nhãm mënijê ho amnhĩkati xwýnhjê mã.

Nê më mjên kuhpa hã nhãm mëmyjê ho amnhĩkati xwýnhjê mã.

Nê mëmyjaja kot mënijê kuhpa hã kãm amnhĩ kwý myjê hkĩnh nê më ho amnhĩkati xwýnhjê mã.

Nê mënijaja kot mëmyjê kuhpa hã kãm amnhĩ kwý nijê hkĩnh nê më ho amnhĩkati xwýnhjê mã.

Nê më kot mëmoj to àhkĩnh nê nhãm më kãm ho wênê o më pa xwýnhjê mã.

Nê ri më hêx o më pa xwýnhjê mã.

Æ më kot Tirtüm kapêr kwým ri amnhĩ nhípêx anhỹr o më pa xwýnh piitã më kaxyw na pre Mojes mã mëmojta ã karõ. Më kãm Jejus prãm kêt xwýnhjê mã. Më kot mar nê tãm amnhĩ nhípêx kaxyw. ¹¹ Tã pa na pa hte Pahihti kot tanhmã më panê amnhĩ nhípêx to hã harênh o ri më hkõt ixpa. Ja kaxyw na pre Tirtüm ixãm. Tirtümja mex o mex. Tãm na pre ja kaxyw ixãm.

Tanhmã Pahihti Jejus Kris kot Pawre ho mex to hã harênh

Atre 26.9-18

¹² Nê Pahihti Jejus Kris na hte ixto mex rãhã ho pa. Na hte tanhmã ixto pa ý hã më piitã më kãm tanhmã kot më panê amnhĩ nhípêx to hã harênh o ri më hkõt

ixpa. Na pre ixte ã amnhĩ nhĩpêx anhÿrja kukamã inhmã ixàpênh ã karõ në inhmã:

—E ate amnhĩ kaxyw ixkõt ajamaxpêr mex jakamã kêr ka ma mẽ piitã mẽ hkõt ri mẽ kãm ixkapêr jarênh o ri apa. Anê.

¹³ Nom amnepêm na pa pre hkõt ijamaxpêr kêr në. Æm axtem në haprÿ rÿnh në ho ixkapêr punuj o ri ixpa. Nê hkwyjê ho ixkrihkrit në mẽ haprÿ në mẽ htak. Nom kormã amnhĩ kaxyw Kris kõt ijamaxpêr kêr jakamã ix-tÿx ã mẽ hipêx anhÿr o ixpa nhÿm Pahihti ja hã ix-pumu në ixkamã ukaprĩ në mẽ hã tanhmã ixto hkêt në. ¹⁴ Nê kãm ijapê xaj mẽmoj to ixkutã nojarêt rãhã ho pa në tanhmã ixkrã hto pa ra amnhĩ kaxyw hkõt ijamaxpêr në hkõt amnhĩ xãm. Hãmri në kukwak ri ra inhmã hkwyjê hkĩnh në hpãnhã mẽ ho mex o ri mẽ hkõt ixpa.

¹⁵ Nê Jesus Kris ra wrÿk në mẽ pahte amnhĩ tomnuj piitã hpãnhã amnhĩrer kaxyw mẽ panê htyk ã harênhja na pa hte harênh o ri ixpa. Æ kot amnhĩ nhĩpêx anhÿrja na mex o mex. Kê mẽ piitã kuma në hã nohtÿx rãhã ho pa.

Kormã ixte hkõt amnhĩ xãm kêr ri na pa pre amnhĩ tomnuj tÿx kumrêx o mẽ piitã mẽ hakrenh ¹⁶ nhÿm Tirtÿm ixpumu në ixkamã ukaprĩ në. Hãmri në amnhĩ kaxyw ixãm. Mẽ piitã mẽ kot ja hã ixpumunh në axpên mã ã ijarênh anhÿr kaxyw. Nê ijarênh o:

—Kwa Pawre na pre amnhĩ tomnuj tÿx kumrêx o pa nhÿm Jesus Kris ja hã omu në kamã gryk tokyx anhÿr kêr në. Na pre tanhmã hkrã hto nhÿm ra tãm amnhĩ nhĩpêx o pa. Kwa pu mẽ uràk në amnhĩ kaxyw Jesus kõt pajamaxpêr në hkõt amnhĩ xunhwÿ. Kêr pu mẽ Pawre pyrã në nhÿrmã Tirtÿm mẽ Kraja wa kuri pamex në pahtrÿ tÿm në papa ho papa.

Anhÿr o axpên mã ijarênh në ixpyrã në Jesus kõt amnhĩ xunhwÿr kaxyw na pre Tirtÿm ã ixto mex anê. ¹⁷ Jakamã na pa hte kãm amnhĩ jarênh kaxyw në kãm: —Pa Tirtÿm? Nã kapxipix apê Pahi Maati. Nê arãhã ho arãhã në amex o amex. Mẽ ixte inhno ho aa apumunh kêr tã kapxipix apê Mëinhĩpêxã maati. Tã koja nhÿrmã mẽ piitã ã amã amex o amex ã ajarênh anhÿr o pa. Anê.

Ximotre kot tanhmã Epes nhõ xwÿnhjê jahkre hto hã kãm karõ

Wam Korĩt 5.1-5

¹⁸ Nê te apê ixkra pyrãk Ximotre. Tã kot paj mẽmoj tã amã karõ ka inhma në inhma tÿx në. Nã Pahihti Jesus mã ate tanhmã amnhĩ nhĩpêx to ho apa kaxyw na pa prem axãm nhÿm Tirtÿm nhÿ hã kapêr o mẽ pa xwÿnhjaja axàpênh kukamã amã kapêr në amã:

—E ate ma mẽ kãm Pahihti Jesus jarênh o apa kaxyw Tirtÿm kot axãm jakamã kêr ka ã amnhĩ nhĩpêx anhÿr o ri mẽ hkõt apa. Anê.

Tã kot paj ixaxwÿja kagaja kamã amã ixkapêr në mẽmoj tã amã karõ. Ka mar tÿx në hkõt amnhĩ nhĩpêx mex pê Tirtÿm mã amnhĩ nhĩpêx mex o ri apa. Jao aprĩ hã mẽ kãm tanhmã Jesus jarênh to ho ri mẽ hkõt apa.

¹⁹ Nê amnhĩ kaxyw Jesus mã ajamaxpêr mex në. Nê

mẽmoj punuj pumu në amã ho anhÿr prãm tã Jesus nhÿ hã në amnhĩ to htÿx në ho anhÿr kêr në. Jao tãm amnhĩ nhĩpêx ã amnhĩ pumunh mex o ri apa. Nom kot kaj ja në amnhĩ to htÿx kêr në tanhmã amnhĩ tomnuj to hãmri në te ate Pahihti Jesus kaga pyrãk. Na pre pahkwÿjaja ã amnhĩ nhĩpêx anhÿr o hkaga në axte kãm hamaxpêr kêr në. ²⁰ Imënew mẽ Aresãnja na pre wa ã amnhĩ nhĩpêx anê në tanhmã Tirtÿm o kapêr punuj to. Mÿrapê na pa pre Satanasti nhĩhkram wa haxã. Kot tanhmã wa ho nhÿm wa kot tee ri amnhĩ tomnujta ã amnhĩ pumunh në tokyx tãm amnhĩ nhĩpêx në axte ã amnhĩ nhĩpêx anhÿr kêr kaxyw.

Tanhmã mẽ pahte Tirtÿm mã amnhĩ jarênh to hã mẽ pamã karõ

Rukre 11.2-4; Atre 10.34-35; Epes 6.18

2 E kot paj hpãnhã tanhmã mẽ pahte Tirtÿm mã amnhĩ jarênh to hã amã karõ Ximotre. Ka inhma në ixõ ri ho mẽ pahkwÿjê jahkre ho ri mẽ hkõt apa. E ja kumrêx kot paj mẽ kaxyw amã hã karõ. Kêr ka mẽ piitã mẽ ho Tirtÿm wÿr ho ri pa. Nê kãm mẽ harê në mẽ kaxyw mẽmoj tã axãhwÿr o ri apa. Kêr kê ama në tanhmã mẽ ho mex to. Kê mẽ amnhĩ tã omu në ã kãm kapêr anê në kãm:

—Pa Tirtÿm? Nã ãm hãmri na ka ã mẽ ixto mex anê. Amex o amex. Anê.

² Nê mẽ kãm anê kê mẽ õ pahi në mẽ ho amnhĩptar xwÿnh piitã mẽ ho ahwÿr o pa ho:

—Pa Tirtÿm? Kwa kêr ka mẽ inhõ pahi mẽ mẽ kot mẽ ixto amnhĩptar xwÿnh piitã tanhmã mẽ ho kê mẽ ixto mex o pa. Kêr pa mẽ ijamakêtkati në ixãmnhix ixpa pê amã tanhmã amnhĩ nhĩpêx to ho ri ixpa. Nê ixãmnhix mẽ hkõt tãm amnhĩ nhĩpêx. Anê.

³ Kot puj mẽ ã mẽ ho mẽ papytar xwÿnh Tirtÿmja wÿr o papa anê nhÿm mẽ pama nhÿm ja kãm mex në. E kêr ka ã mẽ kãm ja hã karõ anê Ximotre.

Tirtÿm kãm mẽmoj prãm ã harênh

Sikÿn Pêtre 3.9

⁴ Nê mẽ piitã mẽ kot kapêr mar në amnhĩ kaxyw Jesus kõt hamaxpêr në hkõt amnhĩ xunhwÿrja na Tirtÿm kãm hprãm.

⁵ Ja kaxyw na pre mẽ pahwÿr Kra Jesus mẽ nhÿm man mẽ pahwÿr wrÿ. Tirtÿmja tapxipix na kêp Mëpahpãm. Nê Kra Jesusja tapxipix na kot Tirtÿm mã tãm mẽ pax-unhwÿr mã xwÿnh. Ja kaxyw na pre amnhĩ grõnh kõt wrÿ mẽ pahpyrã në ĩ ho ĩ mẽ kato.

⁶ Hãmri në gaa në aptar hãmri në mẽ pahpiitã mẽ panê ty. Jao Tirtÿm mã mẽ pahte amnhĩ tomnuj piitã hpãnhã amnhĩrer pa. Tã mẽ pahpiitã mẽ pahte kot ã amnhĩ nhĩpêx anhÿr ã harênh mar në tokyx hkõt amnhĩ xunhwÿrja na Tirtÿm kãm hprãm.

⁷ Ja kaxyw na pre ixãm. Ixte Ijaew kêr xwÿnhjê mã Tirtÿm kapêr jarênh o ri mẽ hkõt ixpa kaxyw. Nê Jesus nhÿ hã tanhmã mẽ kãm ixkapêr to ho ri ixpa kaxyw. Nê tanhmã kot mẽ panê amnhĩ nhĩpêx to hã harênh kaxyw. Æm hãmri na pa ã amnhĩ jarênh anê. Ixêx kêr.

Na pa hte Ijaew kêt xwýnhjê hkôt ixpa nê ã mẽ kãm ixkapêr anê nê mẽ kãm:

—E mẽ ate Tirtũm Kra Jejus kôt amnhĩ xunhwýrja na Tirtũm kãm hprãm. Jakamã kwa mẽ tokyx amnhĩ kaxyw hkôt ajamxpêr nê hkôt amnhĩ xunhwý. Anê.

Ikrêsti kamã tanhmã mẽ pahte amnhĩ nhĩpêx to hã mẽ pamã karõ

⁸ Nê kot kaj mẽ tõiã Tirtũm kapêr mar kaxyw xepn wýr akuprõ. Hãmri nê Tirtũm mã amnhĩ jarẽ nom kêr ka mẽ mẽmoj tã xepn kamã agryk kamã kãm amnhĩ jarẽnh kêt nê. Rý mẽmoj tã xepn mã axakjêr kamã kãm amnhĩ jarẽnh kêt nê. ãm tãm mẽ ajamxpêr pix o kãm amnhĩ jarẽ. Nê tãm amnhĩ nhĩpêx kamã kãm amnhĩ jarẽ. Ja na inhmã hprãm. Tã kêr ka ã Epes nhõ xwýnhjê mã ja hã akarõ anê Ximotre.

Mënijaja kot tanhmã amnhĩ nhĩpêx to kaxyw mẽ hã kãm karõ

Wam Korĩt 14.34; Epes 5.22; Xitre 2.3; Wam Pêtre 3.1-7

⁹ Nê kot paj hpãnhã Kris kôt mẽ pahtõxjaja tanhmã kot amnhĩ nhĩpêx to hã mẽ kaxyw amã karõ ka inhma. Nà mẽmyjaja kot mẽ omunh nê kãm mẽ hkĩnh prãm xaj kê mẽ htýx ri mẽ noo mã tanhmã amnhĩ nhĩpêx to hkêt nê. Nê ja prãm xaj tanhmã ê jagjênh to hkêt nê rý tanhmã ri rmar to hkêt nê. Rý mẽ kãm mẽ hkĩnh prãm xaj õkrexê mex jagjênh rý mẽ ãhkra kamã kax mex jagjênh nê ri hã mẽ hkôt pa kêt nê. Rý ja kaxyw tanhmã ri amnhĩ kí jaxwýr to nê ri hã mẽ hkôt pa kêt nê. Rý mẽ ê mex jagjê nê mẽ noo mã htýx ri hpĩaam kêt o pa hkêt nê. Kê mẽmyjaja kãm mẽ hkĩnh prãm xaj ã htýx ri amnhĩ nhĩpêx anhýr o pa hkêt nê. ¹⁰ Mẽ kãm anê kê mẽ kãm Tirtũm mãnh kĩnh xaj mẽ piitã mẽ kutã mẽmoj to nojarêt o pa.

¹¹ Nê mẽ kãm anê kê mẽ Tirtũm kapêr mar kaxyw mẽ pikuprõnh xà hwýr agjê nê akryk Tirtũm kapêr mar o hkrĩ nê htýx ri xepn mã kapêr o hkrĩ kêt nê.

¹² Nê kê mẽ ikrêsti kamã Tirtũm kapêr o mẽmyjê jahkre hkêt nê. Rý kamã mẽmoj tã tanhmã mẽ kãm karõ hto hkêt nê. ãm akryk Tirtũm kapêr mar o hkrĩ. ¹³ Mẽmo myrapê koja mẽ ã amnhĩ nhĩpêx anê? Nà na pre Tirtũm my kot wa finat Atãwja kumrêx nhĩpêx nê kormã hprõ Ewa o hapu nê hipêx. ¹⁴ Nê Atãwja na pre kagã kapêr mar nê hkôt amnhĩ nhĩpêx kêt nê. Prõ na pre mar xà hkôt Tirtũm kapêr nhĩrõp xa nê tanhmã amnhĩ tomnuj to. ¹⁵ Myrapê na htem mẽnijaja hpĩjagri ho hikwý nhũm mẽ hkrajaja à htýx kãm hapõj. Tã nom koja mẽ Jejus kôt amnhĩ xunhwý nê ã ixte mẽ kaxyw amã mẽmoj tã karõ xà hkôt amnhĩ nhĩpêx hãmri nê nhýrmã mex kumrêx nê htĩr tũm nê pa ho pa. E kêr ka ã mẽnijê mã mẽmoj tã karõ anê Ximotre.

Pastõ kot tanhmã amnhĩ nhĩpêx to kaxyw mẽ hã kãm karõ

Xitre 1.5-9

3 E kot paj hpãnhã tanhmã pastõ jarẽnh to. Koja mẽhõ kãm kêp Kris kwýjê nhõ pastõ nê Tirtũm

kapêr o mẽ ahkre hprãm nê ãm hãmri ã hamaxpêr anê. Ja mex. ² Jakamã koja mẽhõ kãm kêp pastõ hprãm hãmri nê ã amnhĩ nhĩpêx anhýr o apa.

Koja mẽ piitã mẽ noo mã tãm ri amnhĩ nhĩpêx.

Nê hprõ pix tãnopxar o pa.

Nê mẽmoj punuj kutã amnhĩ to htýx nê.

Nê tãm hamaxpêr.

Nê ãmnhĩx amnhĩ wýr mẽ piitã mẽ kuwý.

Nê Tirtũm kapêr o mẽ ahkre mex nê.

³ No kê mẽ kagõxyhti japrõr nê ho pipãnh o pa hkêt nê.

Nê ãhkurê ho pa hkêt nê.

Nê mẽ piitã mẽ kamã ukapri ho ri mẽ hkôt pa. Jao

mẽ kutã nojarêt rãhã ho pa.

Nê amnhĩm kaxpore rax o pikuprõnh prãm xaj tanhmã amnhĩ nhĩpêx to hkêt nê.

⁴ Nê hkrajê jahkre mex o pa nhũm mẽ kapêr ma nê hkôt amnhĩ nhĩpêx. Nê hã hpĩaam kãm tãm amnhĩ nhĩpêx.

Koja mẽ hkrajê jahkre mex kêt nê hãmri nê

mããnhn Kris kwýjê jahkre mex kêt nê. Jakamã nhũm hkrajê mẽ Kris kwýjaja tãm amnhĩ nhĩpêx kêt nê.

⁶ Nê kê mẽ kot Jejus kôt amnhĩ xunhwýr kêt xwýnhjê noo mã tãm amnhĩ nhĩpêx rãhã ho pa.

Mẽ kot ja hã mẽ omunh nê mẽ hã hpĩaam o pa

kaxyw. Nom koja mẽ tanhmã amnhĩ tomnuj to

nhũm mẽ tee ri ja hã mẽ omu nê mẽ ho kapêr

punuj nê. Satanasti kãm hprãm xà hkôt.

Nê kê mẽ kot Kris kôt amnhĩ xunhwýr nyw xwýnhjaja kêp pastõ hkêt nê.

Koja mẽ kêp pastõ hãmri nê mẽmo arĩgro hã tanhmã hamaxpêr to nê amnhĩ to rax prãm xaj tanhmã amnhĩ to jarkrar to ho pa. Hãmri nhũm Tirtũm tee ri ja hã omu nê te kot Satanasti nhĩpêx pyrak o hipêx nê tanhmã homnuj to. Ja pymaj kê mẽ kot Kris kôt amnhĩ xunhwýr nyw xwýnhjaja kêp pastõ hkêt nê.

E pastõ na hte ã amnhĩ nhĩpêx anhýr o pa kamã Jejus kwýjê jahkre nê tanhmã mẽ ho ajuta hto ho mẽ hkôt pa Ximotre.

Mẽ kot Kris kôt hkwyjê ho ajuta xwýnhjê kaxyw mẽ hã kãm karõ

Atre 6.1

⁸ Nê kot paj hpãnhã amã mẽ kot Kris kôt hkwyjê ho ajuta xwýnhjê jarẽ ka inhma Ximotre. Nà koja mẽhõ kãm Kris kôt hkwyjê ho ajuta hprãm hã koja ã amnhĩ nhĩpêx anhýr o pa.

Koja mẽ htýx ri mẽmoj tã mẽ kãm hpêr o pikênh o pa hkêt nê.

Nê tanhmã mẽmoj to hêx to ho pa hkêt nê.

Nê kagõxyhti japrõr nê ho pipãnh o pa hkêt nê.

Nê amnhĩm kaxpore ho pikuprõnh nê ho rax prãm

xaj tanhmã amnhĩ nhĩpêx to hkêt nê.

⁹ Nê kê Tirtũm kapêr piitã hkôt hamaxpêr o pa. Ra Tirtũm kot mẽ pamã kapêr piitã ho amnhĩrĩt jakamã koja Kris kôt hkwyjê ho ajuta xwýnhjaja kapêr piitã

hkôt hamaxpër pê hkôt amnhî nhîpêx mex rãhã ho pa.

¹⁰ Nê kê mê amnhî prô pix tânopxar o pa.

Nê pastô pyrã nê mê hkrajê jahkre mex nhũm mê hkôt ri amnhî nhîpêx mex o pa.

Nê kê mê hprôjaja mjên pyrã nê mê piitã mê noo mã tãm ri amnhî nhîpêx.

Nê hkwyjê ho kapër rý mê axpën jakwa kamã ri axpën mã mê hixi ho rêr o pa hkêt nê.

Nê mjên pyrã nê mëmoj punuj kutã amnhî to htýx o ri pa. Nê amnhî to mex rãhã nê.

E koja mëhõ kãm Kris kwýjê ho ajuta ho pa hprãm hã koja ã amnhî nhîpêx anhýr o pa. Nom kêr ka mê kot mê ho ajuta kaxyw mê unhwýr tokyx anhýr kêt nê Ximotre. Taxy mê kamã ama nê aprí hã mê kot ri tanhmã amnhî nhîpêx to hã mê omu mãn. Hãmri nhũm mê piitã mê mex ã mê harê ka mê hã mê ama nê rí kormã mê kot mê ho ajuta ho pa kaxyw mê unhwý. Hãmri nhũm mê amnhî tã omu nê axpën mã mex ã harê. Nê amnhî kaxyw Jejus Kris mã hamaxpër mex o pa hã mê omu nê mê hã hpijaam o pa.

Pawre kot Ximotre mã amnhî jarênh

¹⁴ Nê inhmã awýr inhmõr nê apumunh prãm Ximotre. Nom kot pa amnhî kukamã ã mëmoj tã amã karõ nê hã kagã anê. ¹⁵ Kêr pa tokyx awýr inhmõr kêt japêr ka ixte amã mëmoj ã kagãta kamã harê nê ixkutêp ho mê ahkre ho ri apa. Mê kot mar nê hprí hã mê õ pastô nê mê kot mê ho ajuta ho mê pa xwýnhjaja kot tanhmã amnhî nhîpêx to hã mê harênh mar kaxyw.

Mê pahpê Kris kwýjaja mê pahpê Tirtüm kra jakamã na pu htem kapër kôt ri amnhî nhîpêx nê pakatãt kôt mê piitã mê kãm pakapër o papa. Jao tanhmã mê kãm Jejus Kris jarênh to ho ri papa.

Pawre kot Jejus mex o mex ã mê grer jarênh

¹⁶ Nê Jejusja mex o mex. Amnepêm kormã mê pahte harênh mar kêt tã pu prem harênh ma hãmri nê mex o mex ã pagrer o papa. Nê pagrer o:

Kris kêp Mëpahpãm tã na pre mê pahwýr wrý nê mê pahpyrà nê í ho í nê kato.

Nhũm pre Tirtüm Karõja mex o mex ã harê.

Nhũm Tirtüm kapër o mê wrýk xwýnhjaja omunh o pa.

Nhũm ahpýnhã pika piitã hwýr tanhmã kot mê panê amnhî nhîpêx to hã harênhja anhrã.

Nhũm hte mê hkwyjaja harênh ma nê amnhî kaxyw hkôt hamaxpër nê hkôt amnhî xunhwý.

Tã nhũm pika kamã àpênh jatur xãm kumê nhũm Tirtüm akupým amnhî wýr ho api.

Na pu htem ã Jejus mex o mex ã pagrer anê.

Mê kot Tirtüm kapër kwým ri tanhmã Kris kwýjê jahkre hto xwýnhjê jarênh

Matêwre 24.4-13; Korosê 2.16-19; Sikün Ximotre 3.1-9; Sikün Pêtre 2.1-3; Jutre 3-16

⁴ Nê nhýrmã Jejus akupým mê pahwýr wrýk kaxyw koja pika nhõ xwýnh kwýjaja ma hkwyjê mã tanhmã Tirtüm kapër o hêx to ho pa. Na pre Tirtüm Karõ hprí hã mê hkukamã tanhmã mê harênh to. Kojaxep Satanasti hkwyjaja Jejus kwýjê hwýr mra nê hêx rom tanhmã mê kãm kapër to. Satanasti nhý hã mê kãm hêx o pa nhũm mê hkwyjaja mê kuma nê mê hkôt hamaxpër nê Jejus kaga. ã koja mê Jejus akupým mê pahwýr wrýk kukamã amnhî nhîpêx anê.

² Nê Satanasti nhý hã mê kãm mëmoj to hêx xwýnhjaja ãm Satanasti pix mar o pa jakamã koja mê hamaxpër mex kêt nê. Kojaxep mëmoj punuj pumu nê htýx mex ã hkamnhix. ³ Tã koja mê Tirtüm kapër kwým ri ã Jejus kwýjê mã hêx ho pa anê nê mê kãm:

—Kwa kêr ka mê axpën mã ri mê rer o apa hkêt nê. Tirtüm kãm ja prãm kêt. ãm ahte ri mê papaja na kãm hprãm. Anê.

Nê mê kot mëmoj mex kur ã mê omu nê nê mê kãm kapër nê mê kãm:

—Kwa na htem ata hkur kêt nê. Tirtüm pê omnuj kênã kot ka kêt ri aku.

Anhýr o koja mê kãm kapër o pa. ⁴ Nom Tirtüm na pre mê pamã mê apkur xã piitã ho kato. Mê paxãmnhix mê pahte piitã hkur o papa kaxyw. Jakamã mê pahpê hkrajaja na pu htem mëmoj kaga hkêt nê. Na pu htem mëmoj kur kaxyw nê Tirtüm mã harê hãmri nê paxãmnhix kuku. ⁵ Tirtüm kot mê paxãpkur xã piitã mex ã harênh jakamã na pu htem kãm harênh pê paxãmnhix piitã hkur o papa.

Pawre kot mëmoj tã Ximotre mã karõ

Sikün Ximotre 1.6-14; Xitre 2.1-8

⁶ E Ximotre. Ixte mëmoj tã amã karõta kêr ka ho Kris kôt pahkwýjê jahkre mex o ri mê hkôt apa. Kot kaj ã mê ahkre anhýr jao ra Jejus Kris mã axàpênh mex nê. Na ka pre harênh ma nê hkôt amnhî xãm hãmri nê hkôt amnhî nhîpêx mex rãhã kê mê piitã ja hã apumu.

⁷ Nê mê ujarênhja kot paj tanhmã amã hã karõ hto. Mê panhígêtxujarênh kamã mo Tirtüm jarênh? Amrakati kumrêx. Jakamã kêr ka mê hkôt ajamaxpër o ri apa hkêt nê. ãm Tirtüm kapër kôt pix mã ajamaxpër týtã rãhã ho ri apa. Tirtüm kapërja ãm hãmri na.

⁸ Nê na htem amnhî karo hprãm xàj tanhmã amnhî karo hto ho pa. Ja mex. Tanhmã kute hkêt. Na htem tanhmã amnhî karo hto nê gaa nê ra hkarore nê pa. No kêt mê kot Tirtüm kapër kôt ri amnhî nhîpêx o paja na mex o mê hkarota jakre. Na htem Tirtüm kapër kôt ri amnhî nhîpêx hãmri nê mex nê hkính nê pa ho pa. Hãmri nê nhýrmã kaxkwa kamã Tirtüm mê Kra Jejus wa kuri mex nê htír tùm nê pa ho pa. Ja na mex o mex. ⁹ ãm hãmri ixte amã ja jarênh jakamã kwa kêr ka ja hã anohtýx nê ri ho apa Ximotre.

¹⁰ Nê Tirtümja rãhã ho rãhã. Tã na pu pre amnhĩ kaxyw Kra Jejus kôt pajamxpër nê hkôt amnhĩ xãm nhũm Tirtüm pahto hkra. Kãm mē piitã mē ho hkra hprãm jakamã na htem pahpyrà nê amnhĩ kaxyw Kra hkôt hamaxpër nê hkôt amnhĩ xunhwý nhũm amnhĩ tã mē omunh xà hkôt mē ho hkra. Ja kaxyw na pu htem mē piitã mē kãm Jejus kot tanhmã mē panê amnhĩ nhĩpêx to hã harênh rãhã o ri mē hkôt papa. Jao Tirtüm mã paxápênh mex nê.

¹¹ E kêr ka ã ja ho pahkwýjê jahkre anhýr ho ri mē hkôt apa. Mē kot amar nê akapër kôt amnhĩ nhĩpêx mex ho pa kaxyw.

¹² Nê kormã anyw tã kêr ka mē piitã mē noo mã tãm ri akapër nê tãm amnhĩ nhĩpêx o apa. Mē kot Jejus ã tanhmã ato htã arĩ amnhĩ kaxyw kãm ajamxpër týx nê. Nê mē piitã mē kutã anojarêt nê ajamxpër mex pix o ri apa. Kot kaj kormã anyw tã ã mē noo mã amnhĩ nhĩpêx anê nhũm mē hã apumu nê kãm akapër mar prãm nê. Anyw ã apumunh tã kãm akapër mar prãm nê.

¹³ Nê kêr ka mē ate Tirtüm kapër mar kaxyw axpên wýr akuprõ ka arĩ ixkutêp mē kãm Tirtüm kapër tũm ã kagã kamã akapër rãhã ho apa. Nê aprĩ hã tanhmã ho mē ahkre hto nê ho mē ahkre mex nê Ximotre.

¹⁴ E kêr ka ã amnhĩ nhĩpêx anhýr o ri mē hkôt apa nê amã ho anhýr kaga hkêt nê. Mē piitã mē kot ate Jejus mã amnhĩ nhĩpêx mex o amõr ã apumunh kaxyw. Kormã ate mē kãm Jejus jarênh o apa hkêt ri na pre pastõ nhỹ hã mē kapër xwýnhjaja ate Jejus mã tanhmã amnhĩ nhĩpêx to ho apa kaxyw axãm. Hãmri nê anhĩmõk ã mē thkra jaxwý nê axápênh kukamã tanhmã ajarênh to nê ato Tirtüm wý. Hãmri nhũm ate mē kãm kapër jarênh o ri apa kaxyw amã ajamxpër o hihtýx. Tã kêr ka ý hã ã kãm amnhĩ nhĩpêx anhýr rãhã ho ri apa.

¹⁶ Nê kwa kêr ka amnhĩ pumunh mex nê Ximotre. Jao tãm ri amnhĩ nhĩpêx nê akatãt kôt Tirtüm kapër o mē ahkre ho ri mē hkôt apa. Kot kaj ã amnhĩ nhĩpêx anê hãmri nhũm mē ama nê apyrã nê Jejus kôt amnhĩ xunhwý. Hãmri nê pahpyrà nê nhýrmã Tirtüm wa kuri htĩr tũm nê pa ho pa.

Tanhmã mē pahte Kris kôt mē pahkwýjê nhĩpêx to kaxyw mē pamã karõ

Sikũn Ximotre 2.24-25

5 E kot paj hpãnhã Kris kôt pahkwýjê hõ kot tanhmã amnhĩ tomnuj to nhũm ate tanhmã ja nê kãm akapër to hã amã karõ.

Nà koja mēhõ tanhmã ri amnhĩ tomnuj to ka harênh ma hãmri nê ma hwýr tẽ nê ja nê tanhmã kãm akapër to. Nom kêr ka kãm akapër mã agêt kêt nê.

Koja mēwejjê õ tanhmã amnhĩ tomnuj to ka te kêp anhĩpêxã rý akatorxã pyrãk o kãm akapër. Jao hã apijaãm o tanhmã kãm akapër to.

Rý koja apyrã nê mē nywjê hõ tanhmã amnhĩ tomnuj to ka te kêp atõ pyrãk o kãm akapër.

Rý mēnijê nyw õ amnhĩ tomnuj japêr ka te kêp atõx pyrãk o kãm akapër. Jao hã apijaãm o kot amnhĩ tomnujja nê tanhmã kãm akapër to.

E kêr ka mē kot amnhĩ tomnuj nê ã mē pahkwýjê mã akapër anhýr o apa Ximotre.

Mē kêp mē mjên htyk xwýnhjê jarênh

Xiakre 1.27

³ Nê kot paj hpãnhã Kris kôt pahkwý pê mē mjên htyk xwýnhjê jarê. Nà koja mēhõ nija hkra hkêt nê htãmnhwý hkêt nê pa nhũm mjên kêp ty ka mē apê Kris kôt hkwyjaja ja hã omu nê mēmoj to kutã anojarêt rãhã ho ri apa. ⁴ Nom koja ra hkra rý ra htãmnhwý japêr kê mē tãmjaja tanhmã ho ajuta hto ho pa. Kãm õ nê kãm mēmoj nhõr o pa. Kormã mēhprĩre ri na pre mē õ wõwõ nê mē katorxã nê mē hipêxã mē hamãr mex pê mē kãm õ ho pa. Tã ra mē aptãr jakamã kê mē amnhĩ pyrã nê mē hamãr mex pê mēmoj to mē kutã nojarêt rãhã ho pa. Ja na Tirtüm kãm hprãm. ã mē kot hkwyjê kamã ukaprí ho pa jakamã te mē kot Tirtüm mã àpênh pyrãk.

⁵ No koja mēhõ ni ra wejre nê ahte ri pa. Nê hkra nê htãmnhwý hkêt nê ri pa. Tã kê ja hã amnhĩ pumu nê Tirtüm kamnãr rom amnhĩ to hwýr o pa. Nê mē piitã mē ho hwýr o pa. Jao tãm hamaxpër. Ka mē apê Kris kôt hkwyjaja ja hã omu hãmri nê mē kam nê tanhmã kutã anojarêt to ho ri apa. ⁶ No koja mē ã amnhĩ nhĩpêx anhýr kêt nê. Nê htýx ri mē grer wýr mra nê hpijaãm kêt o ri mra ka mē ja hã mē omu nê mē ho ajuta hkêt nê. Na htem ã amnhĩ nhĩpêx anhýr o pa nê arĩ htĩr tã te ra htyk nê hikwý pyrãk.

⁷ E kêr ka ã ja hã Kris kôt pahkwýjê mã karõ anê. Kê mē ama nê ã mē mjên htyk xwýnhjê nhĩpêx anhýr o pa. ⁸ Nom koja mēhõ amnhĩ kwýjê ho mex kêt japêr. Nê õrkwý kamã hprõ nê hkrajaja nê hipêxã nê katorxã nhũm mē kãm mē apkur xã nhõr kêt japêr. Koja mē ã amnhĩ nhĩpêx anhýr jao Jejus kaga nê te mē kot hkôt amnhĩ xunhwýr kêt xwýnhjaja kot amnhĩ nhĩpêx pyrãk o amnhĩ nhĩpêx nom amnhĩ tomnuj týx o mē hakre.

⁹ Nê mē mjên htyk nê mē hkra nê mē htãmnhwý hkêt xwýnhjaja kêr ka mē tanhmã mē ho ajuta hto kaxyw hãmri nê mē hixi piitã hã kagã. Nom kwa kêr ka aprĩ hã tanhmã mē amnhĩ nhĩpêx to hã mē omu nê rĩ kormã mē hixi hã kagã.

Koja mēhõ kormã mjên htĩr ri tãm hipêx nê nhãm mēmyjê ho amnhĩkati hkêt nê.

Nê ra hã amgrã pê 60 rý ra hã 60 jakre.

¹⁰ Nê tãm mē piitã mē hipêx o pa.

Nê hkrajaja kormã htĩr ri nhũm mē hamãr mex nê mē ahkre mex o pa.

Nê nhãm krĩ hõ nhõ xwýnhjaja õ krĩ hwýr pøj nhũm mē omu nê amnhĩ nhõrkwý hwýr mē kuwý.

Nê mē kêp amrakati xwýnhjê ho mex o pa.

Koja mē ã amnhĩ nhĩpêx anê ka ja hã mē omu nê rĩ kormã mē ho ajuta kaxyw mē hixi hã kagã. Nom mē hixi hã kagã kaxyw nê mēmoj tã mē hkukja nê mē kãm:

—E kot kaj ã amnhĩ nhĩpêx anhýr o apa hã inhãm amnhĩ jarê pa ama nê rĩ kormã anhixi hã kagã.

Kot kaj axte amjên kêt nê.

Nê tanhmã Kris kôt akwýjê ho mex to ho ri apa.

Nhũm mēhõ mēmo mýrapê hkaprĩ nē pa ka ja hã omu nē tanhmã ho ajuta hto. E kot kaj ã amnhĩ nhĩpêx anhỹr o apa hã amnhĩ jarē pa ama nē anhĩxi hã kagà. Hãmri nhũm Kris kôt akwýjaja amã axàpkur xà nhõr o pa. Anē.

À mē kãm akapēr anē nhũm mē ama nē amã:

—Ý. Ma kot paj ã amnhĩ nhĩpêx anē.

Anhỹr ã amnhĩ jarē ka mē ama nē mē hixi hã kagà. No kormã mē hã amgrà pē 60 kêt xwýnhjaja kēr ka kormã mē hixi hã kagà hkêt nē. Koja mē tanhmã mē kot amnhĩ nhĩpêx to ho pa hã mē kãm karõja ma nē wam tajē pyrã nē amã:

—Ý. Ma kot paj ã amnhĩ nhĩpêx anē. Na pa Jejus Kris noo mã ã amnhĩ jarēnh anē.

Anhỹr ã amnhĩ jarēnh tã gaa nē ra hkurē hapôj nē ra kot amnhĩ jarēnh ta kwým ri tanhmã amnhĩ nhĩpêx to nē axte mjên. ¹² Ra amnhĩ jarēnh o:

—Ma kot paj ãm Jejus mã pix mã tanhmã amnhĩ nhĩpêx to ho ri ixpa nē axte inhmjên kêt nē.

Anhỹr tã tanhmã hamaxpēr to nē kot amnhĩ jarēnh kwým ri axte mjên. Jao te Jejus mã amnhĩ to hêx pyrãk nhũm Tirtũm pē jamnuj. Ja pymaj kēr ka mē kormã mē hã amgrà pē 60 kêt xwýnhjê nhĩxi hã kagà hkêt nē. Kormã mē hã amgrà pē 60 kêt xwýnhjaja arĩ mē hkĩnh tyx ¹³ jakamã kot kaj mē kãm mē apkur xà nhõr o apa nhũm mē ja hã amnhĩ tã mē apumu nē axte amnhĩm àpênh kêt nē. ãm kãm kaga nē htýx ri nhãm mē hwýr mra nē nhãm mē hwýr mra. Nē amnhĩ pumunh mex kêt nē htýx ri axpên jakwa kamã ri mē hixi ho rēr o pa. Nē nhỹri mēmoj pumu rý tanhmã mēmoj jarēnh mar to hãmri nē ma htýx ri hkwyjê mã harēnh o mra. Koja mē ã amnhĩ nhĩpêx anhỹr o pa hãmri nhũm mē kêp Kris kwý hkêt xwýnhjaja ja hã mē omu nē mē hkôt mē pahpê Kris kôt pahkwýjê ho kapēr punuj nē. ¹⁴ ã mē kot amnhĩ nhĩpêx anhỹr o pa pymaj kēr ka kormã mē nyw xwýnhjê mã anē kē mē mãmrĩ axte mjên nē o pa. Hãmri nē hkra nē hkrajê jamãr o pa. Ja na inhmã hprãm. Koja mē ã amnhĩ nhĩpêx anē hãmri nhũm mē kêp Kris kôt pahkwý hkêt xwýnhjaja mē hkôt tanhmã mē pahto kapēr punuj to hkêt nē. ¹⁵ Mãn ka ra Kris kôt pahkwýjê nyw pē mē mjên htyk xwýnh kwýjaja tanhmã amnhĩ tomnuj to hã mē harēnh ma. Na prem Jejus kaga nē Satanasti hkôt amnhĩ nhĩpêx o pa.

¹⁶ E kēr ka mē ã Kris kwý pē mjên htyk xwýnhjê nhĩpêx o apa anē Ximotre. Nom koja mē akwý kamã mēhõ nhõ wôwô mjên rý katorxà mjên kêp ty kē tãm kãm õ ho pa. Kēr kē Kris kôt pahkwýjaja ãm mē kêp mē mjên htyk xwýnh pē mē hkra nē mē htãmnhwý hkêt nē ahte ri mē pa xwýnh pixjaja tanhmã mē ho ajuta hto ho pa.

Mē pahpê Kris kôt pahkwýjê hkrãhtũm kaxyw mē pahtã kãm karõ

Atre 14.23; Wam Korĩt 9.7-14; Karatas 6.6; Wam Tesarõn 5.12; Wam Pêtre 5.1-4

¹⁷ Nē kot paj hpãnhã amã Kris kôt mē pahkrãhtũmjê jarē. Tirtũm kapēr ã kagà htũm kot mē harēnh kot:

Kēr ka Tirtũm kapēr o mē ajahkre xwýnhjaja mē ahkre pãnhã mē kãm amnhĩre. Anē.

Nē mããnhēn mē harēnh ã kuxi nē mē harēnh o:

Koja akrit amã àpênh o pa ka ho mex nē kãm õ mex o apa. Anē.

À ja jarēnh kot anhỹr jakamã koja Kris kôt mē akrãhtũmja Kris mã tanhmã mē ato mex to ho pa ka mē amnhĩ tã kãm amnhĩrer mex o ri apa. Kot Tirtũm kapēr o mē ajahkre mex jakamã ka mē amnhĩ tã kãm amnhĩrer mex nē.

¹⁹ Nē koja mēhõ pixi nē mē awýr tē nē amã Kris kôt mē akrãhtũm kot tanhmã amnhĩ tomnuj to hã harēnh to ka ama nē ãm ama. Nom koja wa hamēxkrut rý mē axkrunēpxi nē mē awýr mra nē axpên kôt tanhmã harēnh to ka mē ama nē ãm hãmri mē kot tanhmã kot amnhĩ tomnuj tota kôt ajamexpēr. ²⁰ Hãmri nē Kris kwýjê piitã mē noo mã kot amnhĩ tomnuj xwýnh ta mã tanhmã kot amnhĩ tomnuj to nē kãm akapēr kē axte ã amnhĩ nhĩpêx anhỹr kêt nē. Mē piitã mē kot hã amar nē nhỹrmã tanhmã amnhĩ tomnuj to nhũm ate uràk nē hã tanhmã mē kãm axàkjêr to pymaj tanhmã amnhĩ tomnuj to hkêt nē.

²¹ E Tirtũm noo mã na pa ã amã mē kaxyw mēmoj tã karõ anē Ximotre. Nē Jejus Kris mē Tirtũm kapēr o mē wrýk xwýnhjê noo mã pa ã amã karõ anē. Jakamã kēr ka inhmar tyx nē hkôt amnhĩ nhĩpêx o ri apa. Jao mē piitã mē hipêx o axpên pyrãk. Nom kēr ka akrãmnhwý kot tanhmã amnhĩ tomnuj to hã omu nē axtem nē ãm omu nē ajamexpēr o:

—Nà kêp ixkrãmnhwý kēnã kot paj kêt ja nē tanhmã kãm ixkapēr to. Pa ho anhỹr kêt nē.

Anhỹr o ajamexpēr kêt nē. Mē piitã mē hipêx o axpên pyrãk.

²² Nē kēr ka anojarêt kãm mē kot Tirtũm mã tanhmã amnhĩ nhĩpêx to ho mē pa kaxyw mē unhwýr kêt nē. Aprĩ hã tanhmã mē kot amnhĩ nhĩpêx ã hã mē omu nē mē hkapi nē rĩ kormã mē unhwýr rý tee ri mēmoj tã mē omu nē mē hkaga.

Nē koja mēhõ tanhmã amnhĩ tomnuj to ka ja hã omu rý harēnh ma hãmri nē uràk nē ã amnhĩ nhĩpêx anhỹr kêt nē. Arĩ Tirtũm kôt amnhĩ nhĩpêx pē tãm ri amnhĩ nhĩpêx pix o apa. ²³ Na htem tõhã tanhmã amnhĩ tomnuj to nhũm mēhõ ja hã mē omu nē mē harēnh kurê kumrêx. Kris kôt mē hkrãhtũm kormã kot tanhmã hã kãm nē hkêt ri nhũm mē ja hã mē omu nē tanhmã mē harēnh to. Nom na htem tõhã hpimxur pē tanhmã amnhĩ tomnuj to nhũm Tirtũm pix ja hã mē omu. Tã koja nhỹrmã mē piitã mē kãm ja ho amnhĩrĩt nhũm mē piitã harēnh ma nē hkôt omu.

Nē mē kot amnhĩ to mex xwýnhjaja haxwýja. Na htem tõhã mē noo mã tanhmã mēhõ ho mex to nhũm hkwyjaja ja hã omu nē axpên mã mex ã mē harē. Nē tõhã hpimxur pē tanhmã mēhõ ho mex to nhũm mēhõ ja hã omunh kêt nē. ãm Tirtũm pix ã kot amnhĩ nhĩpêx anhỹr ã omu. Tã koja nhỹrmã mē piitã mē kãm ja ho amnhĩrĩt nhũm mē piitã harēnh ma nē hkôt omu.

Ně kwa Ximotre. Axà ně anhõhymnuj ně ri apa jakamã kwa kêr ka gõ pix o akõm o apa hkêt ně. Määñēn wĩhti hkwȳ ho ixkõ kêr ka anhõhy mex japēr.

Mě kãm mě àpēnh xw̄ynh̄jē kaxyw mě hã kãm karõ
Epes 6.5-9; Korosē 3.22-4.1; Xitre 2.9-10; Wam Pētre 2.18-25

6 E kot paj mě akw̄yjaja mě kãm mě àpēnh o mě pa xw̄ynh̄jē kaxyw měmoj tã amã karõ. Mě kãm aně kê mě õ patrãw ã hpijaãm o ri pa. Jao mě kapēr ma ně hkõt kãm àpēnh mex ně. Koja mě ã amnhĩ nhĩpēx aně nhũm amnhĩ tã mě omu ně hamaxpēr o:

—Kwa pēr Tirtũm kapēr na mex kumrēx. Inhmã àpēnh xw̄ynh̄ja na hte hkõt amnhĩ nhĩpēx pē amnhĩ to mex o pa. Pēr ãm hãmri na hte Pawre ho mě ahkre ho pa.

Anh̄yr o hamaxpēr. ² Ně koja mě õ patrãw ra Kris kõt amnhĩ xãm japēr ka kãm mě àpēnh xw̄ynh̄jē mã aně kê Kris kõt mě kēp mě htõ hã mě kãm àpēnh mex o ri pa. Nom kê mě urak ně kēp Kris kõt hkwȳ hã mě omu ně hamaxpēr o:

—Nà Kris kõt ixtõ kēnã kot paj kêt ri kapēr kõt amnhĩ nhĩpēx ně kãm ixapēnh mex o ri ixpa.

Anh̄yr o hamaxpēr kêt ně. Kê kēp Kris kõt htõ hã kãm ho mex prãm xaj kãm àpēnh mex o pa.

E kêr ka mě kãm mě àpēnh o mě pa xw̄ynh̄jē mã ã tanhmã mě àpēnh to ho pa hã karõ aně Ximotre.

Tirtũm kapēr kw̄ym ri mě ahkre xw̄ynh̄jē jarēnh

Rukre 12.13-21; Xiakre 5.1-6

³ Ně na hte Kris kw̄y hkêt xw̄ynh̄ kw̄yjaja Kris kw̄yjē mã Tirtũm kapēr o hēx o pa. Ně ht̄yx ri Jejus kapēr kw̄ym ri tanhmã harēnh to ho pa. ãm hãmri na Tirtũm mě Pahihti Jejus Kris wa kapēr tã nhũm htem ht̄yx ri tanhmã ho hēx to ho ri mě hkõt pa. ⁴ Mě kot amnhĩ to rũnh xw̄ynh̄ ã amnhĩ to jarkrar tã mě àhpumunh t̄yx kêt. Na htem tanhmã Tirtũm kapēr kute hã axpēn mã akir ně měmoj tã axpēn kãm gryk o pa. Ně axpēn mã kapēr punuj ně měmoj tã axpēn kamnhĩx o pa. ⁵ Ně hamaxpēr mex kêt jakamã měmoj tã axpēn mã àkjēr pix o pa. Na htem ã amnhĩ nhĩpēx anh̄yr o Tirtũm kapēr mar t̄yx kêt ně. Hãmri ně ht̄yx ri hamaxpēr ně hamaxpēr o:

—Kot paj Tirtũm kapēr o mě ahkre ho ixpa nhũm mě inhma ně inhmã amnhĩrer mex ně pa ixkãxpore rax ně ri ixpa. Nà kot paj ã amnhĩ nhĩpēx anh̄yr o ri ixpa. Ja inhmã mex.

Anh̄yrja o kãm hikãxpore rũnh prãm o amnhĩ to amnhĩrĩt o pa.

Kãxpore jarēnh

⁶ E kot paj hpãnhã amã tanhmã kãxpore jarēnh to ka inhma Ximotre. Xà na pu htem pakatorxà nhõhy rũm pajapõj ně amnhĩ kõt kãxpore hkwȳ jamȳ ně ho pajapõj? Nà na pu htem pahkēnh ně panh̄y kamã pajapõj. Tã kot puj mě ja pyrã ně nh̄yrmã ty ně mã ho aně ně panh̄y kamã ma papa. Jakamã kêr pu mě kor-mã pika ja kamã pahťir ně papa ri paxãpkur xà ně mě

paxē pix tãnopxar pē pahkĩnh ně ri papa. Pakãxpore rũnh kêt tã na pu htem Tirtũm kamnãr rom pahkĩnh ně pajamakētkati ně papa. Jao pajamaxpēr o:

—Nà ixkãxpore rax kêt ně ixkukrēx rax kêt tã na hte Jejus ixkõt pa ho pa ně měmoj to ixkutã nojarēt rãhã ho pa. Jakamã ixkãxpore rax kêt tã ixkĩnh ně ija-makētkati ně ixãmnhĩx ixpa.

Anh̄yr o pajamaxpēr o papa.

⁹ Mě kot amnhĩm kãxpore o pikuprõnh rũnh xw̄ynh̄jaja na htem kãxpore pix kukamã hamaxpēr o pa ně gaa ně kãxpore rũnh gryk ã amnhĩ tomnuj o pa. Na pre mě pahkw̄yjaja kãxpore rũnh prãm xaj Jejus kaga. Tã ra mě hikãxpore rũnh tã hkĩnh ně hamakētkati ně pa hkêt ně. Na htem omnuj ně hkaprĩ ně pa. ã na htem mě hikãxpore rũnh xw̄ynh̄ kw̄yjaja amnhĩ nhĩpēx anh̄yr o pa. Jao kãxpore pix kukamã hamaxpēr ně gaa ně ra gryk ã mě kot amnhĩ to mex xà kaga hpa ně ht̄yx ri tanhmã amnhĩ tomnuj to ho pa. Ně tanhmã hkwȳjē nhĩpēx punuj to. Te tutre kot harõj xãnh ã ht̄yx rapuuti hw̄yr gjēx ně tee ri kãm kator prãm kapr̄y pyrãk. ã mě kot amnhĩ nhĩpēx anh̄yr o pa jakamã koja nh̄yrmã Tirtũm ma mě kot amnhĩ xà ht̄yx kamã hamak tũm xà hw̄yr mě kurē.

Pawre kot Ximotre mã měmoj tã karõ

Korosē 4.17; Wam Ximotre 4.14; Sikũn Ximotre 2.1-7

¹¹ Ně kwa Ximotre kêr ka mě urak ně kãxpore rax prãm xaj amnhĩ tomnuj o apa hkêt ně. Ate Tirtũm mã tanhmã amnhĩ nhĩpēx to ho apa xw̄ynh̄ jakamã kêr ka kãm hprãm xà hkõt pix mã amnhĩ nhĩpēx o ri apa. Jao Tirtũm pyrã ně ate amnhĩ jarēnh xà hkõt amnhĩ nhĩpēx o ri apa. Ně amã Kris kõt akw̄yjē hkĩnh pē měmoj to mě kutã anojarēt o ri apa. Ně Kris kõt mě hkwȳ hkêt xw̄ynh̄jaja kot Kris ã tanhmã ato htã ka arĩ hkõt amnhĩ nhĩpēx mex ně mě piitã mě ho mex o ri mě hkõt pa.

¹² Na ka pre Kris kõt mě pahkw̄yjē noo mã tanhmã amnhĩ jarēnh to. Tirtũm kot amnhĩ w̄yr aw̄yr nhũm ate Jejus kõt amnhĩ xãm ně amã kãm tanhmã amnhĩ nhĩpēx to ho apa hprãm ã amnhĩ jarē nhũm ikrēsti kamã mě piitã ja hã ama. Jakamã kwa kêr ka arĩ Jejus kõt amnhĩ nhĩpēx mex rãhã ho ri apa. Hãmri ně nh̄yrmã Tirtũm mě Kra wa kuri amex kumrēx ně at̄ir tũm ně apa ho apa.

¹³ E na pa měmoj tã amã karõ rax ka piitã kamã harē ně mar pa. Tã kêr ka inhmã ja hã tanhmã amnhĩ jarēnh to. Měmoj piitã ho ht̄ir xw̄ynh̄ Tirtũm mě Jejus Kris wa noo mã tanhmã ja hã inhmã amnhĩ jarēnh to. Jejus htyk kaxyw ně àmnhĩx kot Pahi Põn Pirat mã amnhĩ jarēnh xw̄ynhta noo mã amnhĩ jarē ně inhmã amnhĩ jarēnh o:

—Nà kot paj ate měmoj tã inhmã karõ piitã hkõt amnhĩ nhĩpēx rãhã nhũm Pahihti Jejus Kris akup̄yn mě pahw̄yr wr̄y. ãm hãmri na pa ã amã amnhĩ jarēnh aně Pawre.

Anh̄yr o inhmã amnhĩ jarē.

Tirtüm mex o mex ä mẽ grer

¹⁵ Nẽ koja Tirtüm akupÿn mẽ pahwÿr Jejus mẽnh xà hã arĩgro jarẽ hãmri nhũm kot harẽnh xàta wÿr pøj nhũm akupÿn mẽ pahwÿr kumẽ. Tirtümja mex o mex. Tapxipix kęp mẽmoj piitã ho amnhĩptàr xwÿnh maati. Nẽ kęp jar mẽ ho amnhĩptàr xwÿnh piitã mẽ õ Pahi Maati.

¹⁶ Nẽ tapxipix na rãhã ho rãhã nẽ mex o mex jakamã puhã hirã rax kumrẽx. Tã hkĩnhã mẽ pahte amnhĩ tomnuj xwÿnh jakamã kot puj mẽ puhã hirã raxja kutã hkêt nẽ. Jao hwÿr mẽ pamrar kêt nẽ.

Nẽ aa mẽhõ kot no ho Tirtüm pumunh kêt tã kwa kër pu mẽ pahpiitã kãm mex o mex nẽ hihtÿx o hihtÿx ä harẽnh rãhã ho papa.

Axe mẽ hikàxpore rũnh xwÿnhjẽ jarẽnh

Rukre 16.9

¹⁷ Nẽ kër ka Kris kwÿjẽ kamã mẽ hikàxpore rũnh xwÿnhjẽ mã anẽ kẽ mẽ kot amnhĩ to rũnh kõt amnhĩ to àmra ho pa hkêt nẽ. Nẽ amnhĩ kaxyw mẽ hikàxpore rũnh kõt hamaxpër o pa hkêt nẽ. Kàxpore na hte hapêx tokyx anẽ. Mẽ kãm anẽ kẽ mẽ hpãnhã amnhĩ kaxyw Tirtüm kõt mãnh hamaxpër tÿx rãhã ho pa. Na hte àmnhĩx tanhmã mẽ pahto mex to ho pa nẽ mẽ pahpê õxÿ hkêt nẽ. Jao mẽ pahwÿr na rẽ nhũm mẽ pahpur go mex nẽ pu mẽ kamã panhõ rũnh o papa. Nẽ mẽ pamã myyti ho hirã pu mẽ kukwak ri parĩt mex

pẽ mẽmoj tã paxàpênh o papa. Ä Tirtüm kot mẽ pahto mex kot anhÿr pu mẽ kukwak ri pahkĩnh nẽ paja-makêtkati nẽ ri papa. Tã kër ka mẽ hikàxpore rũnh xwÿnhjẽ mã anẽ kẽ mẽ amnhĩ kaxyw kumã pix mã mãnh hamaxpër rãhã ho pa. ¹⁸ Nẽ mẽ kãm anẽ kẽ mẽ hikàxpore ho hkwyjẽ pẽ õxÿ hkêt nẽ ho tanhmã mẽ ho mex to ho pa. Nẽ àmnhĩx ho tanhmã mẽ kęp amrakati xwÿnhjẽ ho ajuta hto ho pa. ¹⁹ Koja mẽ ä amnhĩ nhĩpêx anẽ nhũm Tirtüm ja hã mẽ omu nẽ hkĩnh nẽ õ krĩ kamã mẽ kutêp mẽ kãm mẽmoj mex o akuprõ. Jakamã nhũm mẽ kormã jar htĩr nẽ pa ri mex nẽ pa nẽ mããnhẽnh nhÿrmã kaxkwa kamã mex kumrẽx o jar pika ja kamã mex nẽ pata jakre. E kër ka ä mẽ hikàxpore rũnh xwÿnhjẽ mã ja hã karõ anẽ Ximotre.

Pawre kot Ximotre mã mẽmoj tã karõ jatur xà

Korosẽ 4.17; Wam Ximotre 6.14; Sikũn Ximotre 1.13, 4.5

²⁰ Nẽ ra Tirtüm kot ate kapër o mẽ ahkre ho apa kaxyw axãm jakamã kër ka tãm amnhĩ nhĩpêx pẽ mẽ ahkre mex rãhã ho ri apa. Jao Tirtüm kapër o hẽx o ri mẽ ahkre xwÿnhjẽ hkõt apa hkêt nẽ. Na htem mẽ kuma nẽ mẽ kapër mex ä mẽ hkamnhĩx nom mẽ kapër mex kêt. Jakamã kwa kër ka mẽ kot tanhmã mẽ ahkre hto hã mẽ ama nẽ ãm mẽ ama. ²¹ Na pre ra mẽ pahkwÿjjaja mẽ kuma nẽ mẽ kapër gryk ä Jejus kaga.

E ãm ja pix. Kẽ Tirtüm mẽ apiitã mẽ akutã nojarêt rãhã ho pa. Ixpê Pawre na pa ä amã ixkapër ä kagà anẽ.

Sikūn Ximotre

Pawre na pre kagàja nhípêx. Na pre Jejus kwỳ hkêt xwỳnhjaja Jejus ã unê nê krí pê Rõm kamã haxà nhũm arí hkrí ho hkrí. Tã ra mẽ kot hpír kaxyw nhũm Ximotre mã kagàja nhípêx nê hwỳr kumẽ. Na pre Ximotre Pawre hkôt pa ho pa hã mytwrỳ xohtô nê. Tã hpãnhã krí pê Epes kamã arík nê Tirtũm kapêr o Jejus kôt hkwyjê jahkre ho ri mẽ hkôt pa. Jakamã nhũm Pawre kagàja nhípêx nê kamã kãm mẽmoj tã karõ nê hwỳr kumẽ. Nê nhỹrmã mẽ kot Pawre pyrã nê Jejus ã hpír mã htã tee ri amnhĩ kukamã hamaxpêr kêt ã kãm karõ. Nê mẽ hkwyjaja kêp Tirtũm kra hã amnhĩ jarênh tã nhũm Pawre Tirtũm kãm hprãm xà kuhpa hã mẽ kot tanhmã amnhĩ nhípêx to ho pa hã Ximotre mã mẽ harẽ. Kot mẽ harênh mar nê Jejus kwỳjê nê mẽ omunh mex o pa kaxyw. Nê Ximotre kot Tirtũm kãm hprãm xà kot pix mã amnhĩ nhípêx o pa hã kãm karõ. ã na pre Pawreja Ximotre mã mẽmoj tã karõ kamã hihtỳx nê hã kagà nê hwỳr mẽnh anê. Nê kãm:

1 Pa Ximotre? Xà amex? Ixpê Pawre na pa amã ixkapêr nê hã kagà nê awỳr kumẽ. Ixpê Jejus nhỹ hã hkwyjê jahkre ho ixpa xwỳnh na pa. Tirtũm na pre ja kaxyw ixãm. Tirtũm Kra Jejus Krisja kot puj mẽ pahpê hkwyjaja nhỹrmã kukwak ri pamex kumrêx nê pahĩr tũm nê ri papa ho papa.

Pawre kot Ximotre ho Tirtũm mẽ Jejus wa hwỳr ã harênh
Atre 16.1-2

² Te apê ixkra pyrãk Ximotre. Jakamã na pa hte ato Mẽpanhípêxã maati Tirtũm mẽ Pahihti Jejus Kris wa hwỳr rãhã ho ri ixpa. Na pa hte mẽ pakukamã mẽ panhĩgêr pyrã nê tãm ijamaxpêr o ixpa pê Tirtũm mã tanhmã amnhĩ nhípêx to ho ri ixpa. Jakamã na pa hte ato Kra Jejus mẽ wa hwỳr rãhã ho ri ixpa. Arĩgro hã nê kamãt kãm amã ijamaxpêr nê ato wa kuwỳ nê wa kãm:

—Pa Tirtũm mẽ Pahihti wa. E ixte ixkra puro Ximotre ho war awỳr kaxyw war amã ijamaxpêr. Na ka hte wa ho mex nhũm war akôt amnhĩ nhípêx mex o pa. Te õ wôwô mẽ katorxã wa kot amnhĩ nhípêx pyrãk. Na pa hte kot amnhĩ nhípêx o paja mã ijamaxpêr nê ý hã ixkĩnh nê. War ate kamã axukaprĩ ho ri apa kaxyw na pa ho war awỳ. War ate kutã war anojarêr rãhã ho ri war apa nhũm hamakêtkati nê àmnhĩx ri pa ho pa kaxyw. Anê.

Pawre kot Ximotre nhỹ hã hkĩnh ã harênh

⁴ Nê na ka pre hte ixkôt ixto ajuta ho ri ixkôt apa htã pa pre nhỹhỹm inhnojarêr nê axtem axàpênh õ hã amã karõ hãmri nê Epes kamã are nê ma mõ. Ka amã ijapê xaj tee ri ma inhmõr ã ixpumu nê amỳr rax nê. Na pa hte arĩ ja hã inhnohtỳx nê ri ho ixpa Ximotre. Jao ra ato ama nê. Tã kot puj nhỹrmã axte axpên pumu nê pahkĩnh tỳx nê.

⁵ Nê na pa hte akatorxã Enĩtre mẽ anhõ wôwôre Rojti wa kãm ijamaxpêr rãhã ho ri ixpa. Na pre wa kumrêx amnhĩ kaxyw Jejus kôt hamaxpêr nê hkôt amnhĩ xãm. Tã ka wa hkanrêhã wa urak nê ã amnhĩ nhípêx anê.

Ixte ja hã apumunh mex. ⁶ Na pa pre ate tanhmã Jejus mã amnhĩ nhípêx to ho ri apa kaxyw axãm kaxyw anhĩmõk ã inhĩhkra xi nê ato Tirtũm wỳ. Kot tanhmã akrã hto nhũm ate Karõ nhỹ hã tanhmã amnhĩ nhípêx to ho apa kaxyw. Tã kêt ka arĩ ã kãm amnhĩ nhípêx anhỹr rãhã ho ri apa. ⁷ Na pu htem Tirtũm Karõ nhỹ hã pamã ma ho papa hkêt nê. Na pu htem ý hã pamã mẽ piitã mẽ hkĩnh pê paxãmnhĩx tanhmã mẽ ho ajuta hto ho papa. Nê ý hã kapêr o mẽ ahkre htỳx o ri mẽ hkôt pa. Nê mẽmoj punuj kutã amnhĩ to htỳx rãhã nê. Jao amnhĩ to mex pix nê.

⁸ Jakamã kwa kêt ka amã mẽ kãm Jejus jarênh o apa pymaj tee ri amnhĩ kukamã ajamaxpêr kêt nê. Nê mẽ kot Jejus ã ijaxar nhũm arĩ ixkrĩ hã ijarênh ma nê mẽ kot ixkuxwar ajaxar pymaj mẽ kãm Tirtũm kapêr o mẽ ahkre hkukamã tee ri ajamaxpêr kêt nê. Mẽ kot ã anhĩpêx anhỹr mã tã kêt ka amnhĩ kamã akahak kêt nê. ãm Tirtũm nhỹ hã hihtỳx xà ho amnhĩ to htỳx nê ixpyrã nê ma mẽ kãm Jejus kot mẽ panê tanhmã amnhĩ nhípêx to hã harênh to rãhã ho ri mẽ hkôt apa. Mẽ kot tanhmã hã anhĩpêx to htãã. ⁹ Na pu htem Jejus kôt amnhĩ xunhwỳ nhũm Tirtũm ja hã mẽ pahpumu nê Jejus kukwak ri amnhĩ katut kôt mẽ pahte amnhĩ tomnuj piitã rênh pa nê mẽ pahto hkra. Hãmri nê mẽ pahte hkôt pix mã amnhĩ nhípêx o papa kaxyw mẽ paxunhwỳ. ãm Jejus pix kukwak ri na hte mẽ pahto hkra nê ã mẽmoj to mẽ pakutã nojarêr rãhã ho pa anê. No na hte mẽ pahte amnhĩ to mex ã mẽ pahpumunh kôt mẽ pahto hkra hkêt nê. Amnepêm kormã mẽmoj piitã hkêt ri na pre mẽ pakukamã hamaxpêr o:

—Koja mẽ nhỹrmã Ixkra Jejus Kris kôt amnhĩ xunhwỳ pa ja hã mẽ omu nê Ixkra kukwak ri mẽ ho mex nê. Anê.

¹⁰ Tã kormã mẽ pahte amnhĩ tã ã kot mẽ pajarênh anhỹrja mar kêt jakamã na pre Jejus mẽ pahwỳr wrỳ nê tanhmã mẽ pahto mex to. Na pre ty nhũm Tirtũm akupỹm ho htĩr. Jakamã na pu htem ra amnhĩ kaxyw hkôt pajamaxpêr nê hkôt amnhĩ xunhwỳ hãmri nê nhỹrmã mẽ pahtyk tã nhũm Tirtũm kot Kra Jejus nhípêx pyrã nê akupỹm mẽ pahto mẽ pahĩr pu mẽ Je-

jus kukwak ri wa kuri pamex në pahťir tũm në papa ho papa. Jakamã na pu htem mẽ pamã pahtyk pyma ho papa hkêt në.

¹¹ Amnepêm na pre Tirtũm ixãm në tanhmã inhmã ixãpênh ã karõ hto në inhmã:

—E Pawre kêr ka Jejus nhỹ hã ma hkwỹjê jahkre ho ri mẽ hkôt apa. Nê ixkapêr o mẽ ahkre mex në. Kêr ka ã amnhĩ nhĩpêx anhỹr rãhã ho ri mẽ hkôt apa. Anê.

¹² Tã ã kot inhmã kapêr anhỹr nhũm ixte kapêr kôt amnhĩ nhĩpêx o ixpaja mýrapê na htem Jejus ã tanhmã inhĩpêx kati hto ho pa. Pa hte ixpunuj nê amnhĩ xà htỹx kamã ijamak o ri Jejus mã tanhmã amnhĩ nhĩpêx to ho ri mẽ hkôt ixpa. Tã nom tee ri ja hã amnhĩ pumu nê amnhĩ kamã ixpijaãm nê ixkaprĩ hkêt në. Ixte amnhĩ kaxyw hkôt ijamaxpêr xwỹnhja na ixte tanhmã kot amnhĩ nhĩpêx to hã omunh mex jakamã kot paj ty nhũm mẽ arĩ inhmýr pê Tirtũm kapêr mar o pa. Mẽ kot ja hã ixpĩr tã koja mẽ apê Kris kôt ixkwỹjaja inhmýr pê arĩ mẽ kãm harênh o apa. Koja mẽ ã xapênh mýr pê amnhĩ nhĩpêx anhỹr o pa rãhã nhũm Pahihti Jejus akupỹn mẽ pahwýr wrỹ.

¹³ Kwa Ximotre. Ra ixte amã mẽmoj tã karõ rax jakamã kêr ka mar tỹx nê hkôt amnhĩ nhĩpêx rãhã o ri apa. Jao Jejus Kris nhỹ hã mẽ piitã mẽ noo mã amnhĩ kaxyw kãm ajamaxpêr tỹx rãhã nê. Nê mẽ piitã mẽ ho mex o ri apa. ¹⁴ Ate mẽ kãm tanhmã Jejus jarênh to ho ri apaja ãm hãmri na. Tã koja mẽhõ htỹx ri tanhmã ho kapêr punuj to rý axtem nê tanhmã harênh to ka ja hã ama nê nê kãm akapêr kãm axihtỹx nê. Tirtũm Karõ ra kot akarõ hwýr àr jakamã kêr ka ý hã ã Jejus jarênhja jamãr mex o ri apa anê.

Pawre kot tanhmã amnhĩ jarênh to

Sikûn Ximotre 4.16-18

¹⁵ Nê mãn ka pre ra pika pê As kamã Kris kwý kot ixkaga hã mẽ harênh ma. Na pre Pijerti mẽ Emosti mẽ mẽ ohtõ nê tanhmã hamaxpêr to nê ixto ajuta hkêt nê. ¹⁶ ãm Onësipti pix na pre mẽ kurom ijarênh ma nê man ixwýr Rõm wýr mõ nê ijapêr o ri mẽ hkôt mra nê ixwýr kato. Hãmri nê xatã ixwýr mra nê tanhmã ixto mex to. Jao akupỹm ijamaxpêr o hihtỹx. Ixpê prês nê ixkrĩ htã kêp ixkrãmnhwý hã amnhĩ jarênh ã hpijaãm kêt nê. Nê amnepêm kormã krĩ pê Epes kamã ixpa ri na pre mããnen tanhmã ixto mex to ho pa. Tã ã kot inhĩpêx mex anhỹr o pa jakamã na pa hte ho Pahihti Jejus wý nê kãm:

—Pa Pahihti? Onësipti o na pa awý. Kot ixto mex rãhã ho pa jakamã kwa kêr ka ixtã omu nê kutã anojarêt rãhã ho apa. Nê õrkwý kamã hkwỹjaja mããnen tanhmã mẽ ho mex to. Hãmri nê nhỹrmã akupỹn mẽ ixwýr wrỹ nê ixtã kamã axukapĩrĩ hã tanhmã ho mex to. Anê.

Mẽ pahte Jejus kôt amnhĩ nhĩpêx pix prãm ã mẽ pamã karõ

Wam Ximotre 6.11-16

2 E Ximotre. Jejus Kris kot mẽmoj to mẽ pakutã nojarêt rãhã jakamã kwa kêr ka ý hã amnhĩ to htỹx

nê kãm tanhmã amnhĩ nhĩpêx to ho apa hã amnhĩ kamã akahak o ri apa hkêt nê. ² Ra ate pa tanhmã Tirtũm kapêr o mẽ ahkre htoja mar jakamã kêr ka amnhĩ xô ri ã Jejus kôt mẽ pahkwỹjê jahkre ho apa anê. Mẽ kot amar nê pahpyràn axpên xô ri ho axpên jahkre ho pa kaxyw.

³ Sõrdat na htem mẽ hkrãhtũm kãm prãm xà hkôt tanhmã amnhĩ nhĩpêx to. Jao tanhmã kute htã kapêr ma nê hkôt amnhĩ nhĩpêx. Tanhmã ã rý kãm prãm rý tanhmã omnuj to htã kutã amnhĩ to htỹx nê mẽ hkrãhtũm kôt amnhĩ nhĩpêx. Na htem amnhĩ xãpênh kukamã tee ri hamaxpêr o pa hkêt nê. ãm mẽ hkrãhtũm kapêr kôt pix mã amnhĩ nhĩpêx o pa hprãm. Tã kêr ka mẽ uràk nê Pahihti Jejus kôt amnhĩ nhĩpêx rãhã ho ri apa hprãm. Mẽ kot hã tanhmã atomnuj to htãã.

⁵ Nê mẽ hprõt tỹx xwỹnhjaja na htem hkwỹjê pê amnhĩ to wa hprãm xàj ãm ja pix kukamã hamaxpêr. Hãmri nê hprõt tỹx prãm xàj mẽmoj kot mẽ ho hirerek kêt nê amnhĩ jagri htỹx nê. Hãmri nê hprõt tỹx o hkwỹjê jakre nê amnhĩ to wa nê pøj nê kot amnhĩ to wa hã mẽmoj to kãnja. Tã kêr ka mẽ uràk nê amã Pahihti Jejus kot amnhĩ nhĩpêx kôt pix mã amã amnhĩ nhĩpêx prãm.

⁶ Nê pur kãm mẽ àpênh xwỹnhjaja na htem mẽ hpur kãm àpênh pix tãnopxar o pa nê àpênh rũnh nê. Kãm kaga hkêt kãm àpênh o pa. Tã àpênh rũnhja kukwak ri ihpur kãm õ rũnh nê ho apkur mex o pa. Nom koja mẽ kãm kaga nê àpênh mex kêt nê hãmri nê õ grire nê apkur mex kêt nê. Tã kêr ka pur kãm mẽ àpênh rũnh xwỹnhjê pyrà nê Pahihti Jejus mã amnhĩ nhĩpêx mex o apa. Nê mẽ uràk nê amã kaga hkêt kãm axãpênh pix tãnopxar o ri apa.

⁷ E na pa ã ajahkre anê Ximotre. Tã kêr ka ixte ajahkreja ma nê kãm ajamaxpêr rãhã nê. Koja Pahihti tanhmã akrã hto ka aprĩ hã mar tỹx nê.

⁸ Nê kêr ka Pahihti Jejus Kris mã ajamaxpêr rãhã ho ri apa. Na pre katorxã hkôt kêp Pahi finat Tawi kanrêhã htãmnhwý hã mẽ pahpyrà nê ĩ ho ĩ nê kato nê panhõ pika kamã pa ho pa. Tã nhũm prem kupĩ nhũm amnhĩ xà htỹx kamã hamak kãm ty. Hãmri nhũm Tirtũm akupỹm ho htĩr nhũm akupỹm htĩr o htĩr. ã na pre hte harênh anhỹr rãhã ho ri mẽ hkôt ixpa. ⁹ Mýrapê na prem ijaxà pa arĩ jar ixkrĩ ho ixkrĩ. Na htem ixte amnhĩ tomnuj xwỹnh pyràk o inhĩpêx nê axte ixte Jejus kapêr jarênh o ixpa pymaj ijaxà. Tã ã mẽ kot inhĩpêx anhỹr tã na hte Kris kôt pahtõjaja arĩ ixpãnhã mẽ kãm harênh o ri pa. Koja mẽ tee ri kãm Jejus jarênh o hapêx prãm kaprý. ¹⁰ Jakamã kwãr mẽ mãmrĩ ã inhĩpêx anê. Koja mẽ arĩ Jejus kot tanhmã mẽ panê amnhĩ nhĩpêx toja mar o pa nhũm mẽ hkwỹjaja hkôt amnhĩ xunhwý nê nhỹrmã pahpyrà nê kêp Jejus Kris kwý hã Tirtũm mẽ wa kuri mex nê htĩr tũm nê pa ho pa.

Kris kwý kot tanhmã amnhĩ tã grer to hã mẽ harênh

¹¹ Na pu htem mẽ pahpê Kris kwý hã ã amnhĩ tã pagrer anê:

Mê kot Kris ã mê panhîmex tâ kot puj mê akupým pahťir nê kuri pamex nê pahťir tûm nê papa ho papa.

¹² Mê kot tanhmã Kris ã mê pahťomnuj to htã kot puj mê arí hkôt amnhî nhîpêx o papa rãhã ty nê nhÿrmã îhkô hã mê ho amnhîptâr o papa.

Nom kot puj mê amnhî kamã pakahak pê mê pahpê Jejus kwÿ hkêt ã amnhî jarê hã koja Jejus amnhî xwar mê pahpê hkwÿ hkêt ã mê pajarê.

¹³ Nê mê pahte amnhî kaxyw Jejus kôt pajamexpêr kêê tâ tanhmã amnhî jarênh to xà hkôt tanhmã amnhî nhîpêx to.

Aa kot mëmoj tâ amnhî jarênh kuhpa hã ri tanhmã amnhî nhîpêx to hkêt. Anê.

Mê kot Tirtûm kapêr o mê ahkre mex xwÿnhjê jarênh

Wam Pêtre 3.15-16

¹⁴ E Ximotre. Ixte ã mëmoj tâ amã karô anhÿrja kêr ka ho mê ahkre rãhã ho ri mê hkôt apa. Kê mê ama nê kãm hamaxpêr rãhã nê.

Nê mê kãm anê kê mê Tirtûm kapêr o mê ahkre mex o ri pa nê kapêr ã tanhmã axpên mã àkjêr to hkêt nê. Koja mê hã axpên mã akir hãmri nê amnhî to mex kêt nê. Hãmri nhÿm mê kot mê kapêr mar xwÿnhjaja ja hã mê omu nê tee ri Tirtûm kapêr kukamã hamaxpêr nê hkôt amnhî nhîpêx mex kêt nê.

¹⁵ Nê na htem mê kãm mê àpênh mex xwÿnhjaja mê ô patrãw kapêr ma nê hkôt mëmoj tâ àpênh mex nê. Nhÿm ô patrãwja hwÿr mra nê àpênh ã omu. Hãmri nhÿm amnhî wÿr omu nê àmnhîx noo mã apê. Kãm àpênh mex jakamã amnhî kamã kãm uma hkêt nê. Ja pyrã nê kêr ka Tirtûm noo mã kãm amnhî nhîpêx mex rãhã nê aprí hã kapêr o mê ahkre mex o ri mê hkôt apa. Kê ã ate amnhî nhîpêx anhÿr ã apumu nê anhÿ hã hkînh nê. Ka àpênh xwÿnhhta pyrã nê amnhî kamã amã uma hkêt nê noo mã kãm amnhî nhîpêx mex o ri apa.

¹⁶ No mê kot Tirtûm kapêr o hêx o mê pa xwÿnhjaja kêr ka mê hkôt ri apa hkêt nê. Nê mê kapêr mar nê ri mê hkôt axãm hkêt nê. Na htem mê kapêr ma nê mê hkôt amnhî nhîpêx o pa nê kãm Tirtûm kapêr mar prãm kêt nê. Nê gaa nê te kêp mar pumaj amnhî jamak pro pyrãk o amnhî nhîpêx. ¹⁷ Týx ri tanhmã mê ahkre hto xàja te kot mê hkànhy aa mex kêt nê ra omnuj týx o mörja pyrãk. Jao mê kot mê kapêr mar o mê pa xwÿnhjaja mê mar pê ra mê hkôt amnhî tomnuj týx o mō. Na hte ra Imênew mê Pijertija wa ã htÿx ri amnhî krã hkôt mê ahkre anhÿr o pa. ¹⁸ Nê Tirtûm o hêx o mê hkôt pa nê nhÿrmã akupým mê pahťo mê pahťir kêt ã harênh o pa. Hãmri nhÿm mê amnhî tâ wa kuma nê tee ri amnhî kukamã hamaxpêr pê Jejus kaga nê axte amnhî kaxyw hkôt hamaxpêr kêt nê. Nom wa kapêrja kot anhÿr kêt. ¹⁹ Kêt Tirtûm kapêrja ãm hãmri na. Kot mëmoj to hêx kêt jakamã na pu htem amnhî kaxyw hkôt pajamexpêr kaprÿ hkêt nê. Kapêr ã kaga htûm kot tanhmã mê pahpê hkrajê jarênh to nê harênh kot:

Tirtûm na kot hkrajê piitã omunh mex rãhã ho pa xwÿnh.

Anhÿr o mê pajarênh. Nê mê pamã mëmoj tâ karô kot:

Kê mê kot Jejus kôt amnhî xunhwÿr xwÿnhjaja amnhî tomnuj o pa hkêt nê. Anê.

Tirtûm krajaja te kêp prat mex pyrãk ã mê harênh

²⁰ Nê mê hikàxpore rÿnh xwÿnhjaja mê ô xijere nê mê ô prat xohtô. Prat kwÿ muxre nê hkwÿ omnajre. Prat pynajre na htem mãmri kamã apku no prat muxreja ãm mëmoj mex pix kaxyw na htem mësti hã haxwÿ nê kamã apku. Kasamêt ã rÿ mê hkra krã hkênh ã mê hkînh nhÿm htem mësti hã haxwÿ nê kamã apku. ²¹ Tã mê kot Tirtûm kapêr o hêx o mê pa xwÿnhjê hkôt hamaxpêr kêt nê mê hkôt amnhî tomnuj kêt xwÿnhjaja te mê kot prat muxre pyrãk. Na htem tãm amnhî nhîpêx nê tanhmã hamaxpêr punuj to ho pa hkêt nê. Hãmri nhÿm Tirtûm ja hã mê omu nê mê ý hã hkînh nê. Hãmri nê te mê kot prat muxre jaxwÿr nê kamã apkur pyrã nê mê kot kãm tanhmã amnhî nhîpêx to ho pa kaxyw mê unhwÿ.

Mê pahte tãm amnhî nhîpêx ã mê pamã karô

²² Nê mê àptâr nyw jamaxpêr punujja kêr ka te ate hamÿnh nê amnhî katut kôt rênh par pyrãk o hipêx Ximotre. Jao axte ho ajamaxpêr o ri apa hkêt nê. Nom mê hamaxpêr mexja kêr ka hamÿ nê amnhî krã him hagjê nê ho ajamaxpêr rãhã ho ri apa. Jao tãm amnhî nhîpêx nê amnhî kaxyw Tirtûm kôt ajamaxpêr rãhã nê. Nê amã mê kêp Kris kôt akwÿjê hkînh pê tanhmã mê ho ajuta hto ho ri mê hkôt apa. Jao mëmoj to mê kutã anojarêt rãhã nê. Na hte ã Pahiiti Jejus kôt amnhî nhîpêx xwÿnhjaja amnhî nhîpêx anhÿr o pa.

²³ Nê kêr ka mê kot htÿx ri amnhî krã hkôt mê ahkre ho mê pa xwÿnhjê hkôt apa hkêt nê. Te ate mê kêp awry hã ri apa pyrã nê mê kapêr ma nê ãm ama. Na htem mê kapêr mar o pa nê ra hã axpên mã tanhmã àkjêr to ho pa. Jakamã kwarí mê hkôt ri apa hkêt nê.

²⁴ Mê pahte Tirtûm mã amnhî nhîpêx o papa xwÿnhjaja na pu htem mê kurom mëmoj tâ axpên mã paxàkjêr o ri papa hkêt nê. Na pu htem ãm mê piitã mê kamã paxukaprí pê mê ho mex nê mê kamã pagryk tokyx anhÿr kêt nê. Nê Tirtûm kapêr o mê ahkre mex nê. Na hte ã mê pahte Tirtûm mã tanhmã amnhî nhîpêx to xwÿnhjaja amnhî nhîpêx o papa anê.

²⁵ Jakamã koja mëhō ate Tirtûm kapêr o mê ahkreja ma nê tanhmã ho amã kapêr to ka ama nê amnhî tâ tanhmã kãm akapêr punuj to hkêt nê. ãm kamã axukaprí ho tanhmã hã kãm akapêr mex to. Na hte Satanasti te kot amnhîm mê unênh pyrãk o mê hipêx nê tanhmã mê kãm Tirtûm kapêr o hêx to nhÿm mê kuma nê hkôt hamaxpêr nê kapêr kôt amnhî nhîpêx. Tã kot kaj mê kamã axukaprí ho mê kãm akapêr mex nê nhÿm Tirtûm tanhmã mê hkrã hto nhÿm mê ama nê hkôt amnhî xunhwÿr japêr. Te Tirtûm kot Satanasti pê amnhîm mê utâr pyrãk. Jakamã nhÿm mê hpãnhã Tirtûm kapêr mex ã harê nê harênh o:

—Nà pêr ãm hãmri na Tirtûm kapêrja. ãm mex o mex. Anê.

**Jejus akupÿn wrÿk kukamã mē kot amnhĩ tomnuj
xwÿnhjē jarēnh**

Matēwre 24.4-13; Korosē 2.16-19; Wam Ximotre 4.1-5; Sikûn Pētre
2.1-3; Jutre 3-16

3 Nē Jejus akupÿn mē pahwÿr wrÿk xwÿj ri mē kot tanhmã amnhĩ nhĩpēx toja kot paj hpãnhã ixprĩ hã amã harē ka inhmar tÿx nē Ximotre. Koja Jejus akupÿn mē pahwÿr nojarēt pu mē pahpē hkwÿjaja pahpunuj nē papa. ² Nē Kris kwÿ hkēt xwÿnhjaja koja mē amnhĩ pix kukamã hamaxpēr o pa.

Jao hikãxpore rax o pikuprõnh pix kukamã hamaxpēr pē hkwÿjē pē õxÿ htÿx o pa.

Nē mēmoj tã amnhĩ to jarkrar o pa.

Nē tanhmã hkwÿjē japry hto ho pa.

Nē mē hipēēxã nē mē katorxã hã hpijaàm kēt o pa.

Nē Tirtûm ã hpijaàm kēt o pa.

Nhũm mēhõ tanhmã mē ho mex to nhũm mē amnhĩ tã mē omu nē ãm mē omu nē amnhĩ tã tanhmã mē kãm nē hkēt nē. Rÿ mē kãm: "Nã ãm hãmri na ka ã ixto mex anē. Nã ja mex." Anhÿr o mē kãm kapēr kēt nē.

³ Mē ukapřĩ hkēt jakamã koja mēhõ tanhmã mē homnuj to nhũm amnhĩ tã mē omu nē kamã gryk kurē kumrēx nē aa gryk o hapēx kēt nē.

Nē amnhĩ tã tanhmã hkwÿjē ho hēx to ho pa.

Nē htÿx ri kãm hprãm xã hkõt tanhmã amnhĩ tomnuj to.

Nē oprē ho pijapu pix kukamã hamaxpēr.

Nē axtem nē kãm mēmoj mex pumunh prãm rÿ mēmoj mex mar prãm kēt nē.

⁴ Nē mēhõ ho hkrãmnhwÿ htã axtem nē mē kãm mē hkurē xwÿnhjē nhĩhkram haxã.

Nē hamaxpēr mex kēt o tanhmã amnhĩ tomnuj to rãhã ho ri pa.

Nē amnhĩ to rũnh o mē piitã mē hakrenh par ã amnhĩ to jarkrar o ri pa.

Nē amnhĩ krã hkõt kãm amnhĩ nhĩpēx prãm xã hkõt amnhĩ nhĩpēx o pa nē kãm Tirtûm kãm prãm xã hkõt amnhĩ nhĩpēx prãm kēt nē.

⁵ Hãmri nē mē kēp hkra hã amnhĩ jarēnh o pa htã aa hkõt amnhĩ nhĩpēx kēt. ã Tirtûm kra hkēt xwÿnhjaja amnhĩ nhĩpēx kot anhÿr jakamã kwa kēp ka ã mē hkõt apa hkēt nē Ximotre.

⁶ Na htem hēx rom hkwÿjē nhõrkwÿ hwÿr agjē nē kamã tanhmã mēnijē mã hēx to. Mē kot mē mar nē tanhmã amnhĩ tomnuj to hãmri nē ja hã amnhĩ pumu nē tee ri amnhĩ kukamã hamaxpēr kaxyw. Nē mē kãm mē kapēr nyw mar prãm tã nhãm mē kapēr ma nē nhãm mē kapēr mar nē aa Tirtûm kapēr mar nē amnhĩ kaxyw hkõt hamaxpēr kēt nē. Jakamã nhũm mē kot amnhĩ tomnuj xwÿnhjaja hēx rom mē hwÿr mra nē mē õrkwÿ hwÿr agjē nē tanhmã mē kãm mēmoj to hēx to.

⁸ Te kot amnepēm finat Jãnre mē finat Jãmtija wa kot amnhĩ nhĩpēxta pyrãk. Na pre finat Mojestija Tirtûm nhÿ hã tanhmã mē ahkre hto ho pa nhũm Jãnre mē Jãmti wa kãm mar prãm kēt nē. Nē tanhmã ja nē hkwÿjē mã kapēr to ho pa. Tã ã mē kot amnhĩ tomnuj an-

hÿr o mē pa xwÿnhjaja na htem wa urãk nē kãm Tirtûm kapēr mar prãm kēt nē kapēr nē tanhmã hkwÿjē mã kapēr to ho pa. Nhũm mē hamaxpēr mex kēt jakamã ãm mēmoj punuj pix kukamã hamaxpēr nē mē kuma nē amnhĩ kaxyw Jejus kõt hamaxpēr kēt nē. ⁹ Tã nom koja mē hkwÿjaja tokyx hprĩ hã mē kot mēmoj to hēx ã mē omu hãmri nē axte mē hkõt hamaxpēr kēt nē nhũm mē rĩ amnhĩ pumu. Te amnepēm mē kot hprĩ hã Jãnre mē Jãmti wa kot tanhmã amnhĩ tomnuj to hã wa omunhta pyrãk.

**Mē pahte Jejus ã pahpunuj tã hkaga hkēt ã mē pamã
karõ**

Atre 13.50-14.7, 14.19-22

¹⁰ E Ximotre. Ate ixkõt apa rÿy jakamã ra ate tanhmã ixte amnhĩ nhĩpēx ho ixpa hã ixpumunh mex.

Ixte tanhmã Tirtûm kapēr o mē ahkre hto ho ixpaja.

Nē inhã mēmoj to anhÿr prãm xwÿnhja.

Nē ixte amnhĩ kaxyw Kris kõt ijamaxpērja.

Nē inhgryk tokyx anhÿr kētja.

Nē ixte tanhmã Kris kõt ixkwÿjē ho mex to ho ri ixpaja.

Nē ixpunuj nē ixpa htã arĩ Kris kõt amnhĩ nhĩpēx mex o ixpaja.

ã ixte amnhĩ nhĩpēx anhÿr o ixpaja ate ixpumunh mex.

¹¹ Na pa pre krĩ pē ãxiok nē Ikõn nē Ristija kamã mē kãm Jejus jarēnh o ixpa nhũm mē hkwÿjaja Jejus ã tanhmã inhĩpēx to pa amnhĩ xã htÿx kamã ijamak o ri mē hkõt ixpa. Tã nhũm Pahihti Kris xatã mē kēp ixpytã pa ixtĩr pē mē ãhkra rũm ijaxõx o ixpa. ¹² Na hte Kris kwÿ hkēt xwÿnhjaja mē pahte Kris kõt amnhĩ nhĩpēx o papa hã mē pahtomnuj o pa.

¹³ Nē mē kot Tirtûm kapēr o hēx o mē pa xwÿnhjaja koja arĩ mē kēp Kris kwÿ hã amnhĩ to hēx pē mē nokupyr. Nē mē kãm Tirtûm kapēr o hēx o pa. Jao ra mē tãmjaja amnhĩ nokupyr o pa nē amnhĩ tomnuj tÿx kumrēx.

Pawre kot tanhmã Tirtûm kapēr ã kagã jarēnh to

Rõmãn 15.4; Sikûn Pētre 1.19-21

¹⁴ No ka Ximotre. Amnepēm aprĩre rũm na pa pre mē ixohtõ nē Tirtûm kapēr o ajahkre ho ixpa. Akatorxã nē anhõ wõwõre nē pa nē Kris kwÿjaja pa prem ho ajahkre rãhã ho akõt ixpa ka mē inhmar tÿx nē amnhĩ kaxyw Jejus kõt ajamaxpēr. Jakamã kwa kēp ka arĩ hkõt ajamaxpēr mex rãhã ho ri apa. Tirtûm kapērja na htem mar pē amnhĩ kaxyw Jejus Kris kõt hamaxpēr nē hkõt amnhĩ xunhwÿ nhũm Tirtûm ja hã mē omunh xã hkõt mē ho hkra. ¹⁶ Tirtûm kapēr ã kagãja Tirtûm kapēr na. Na htem ho mē ahkre ho pa. Koja mēhõ hkwÿm ri tanhmã amnhĩ tomnuj to nē kapēr ma nē tee ri amnhĩ tomnujja kukamã hamaxpēr o ra hkapřĩ nē. Rÿ tanhmã amnhĩ tomnuj to htã kapēr ã kagã kamã kapēr nē Tirtûm kot ã kot amnhĩ tomnuj anhÿrja nē mē pamã kapēr ã harēnh ma nē amnhĩ tomnujta kaga kurē kumrēx. Rÿ kamã kapēr nē Tirtûm kot tanhmã mē pahte amnhĩ to mex to hã mē pamã karõ kamã harē nē kuma. Hãmri nē ÿ hã hkõt amnhĩ nhĩpēx mex rãhã

nē. Ā na hte Tirtūm kapēr kagàja mē kot mar nē hkòt amnhī nhīpēx xwýnhjē ho mex anē. ¹⁷ Na hte mē kot Tirtūm mā amnhī nhīpēx o mē pa xwýnhjaja kamā harē nē hkòt amnhī nhīpēx mex pē mē piitā mē ho mex nē ho mē ahkre mex rāhā ho pa.

Pawre kot mēmoj tā Ximotre mā karō

Korosē 4.5-6

4 Nē koja nhýrmā Jejus Krisja akupýn mē pahwýr wrý hāmri nē mē pahpiitā tanhmā mē pajarēnh to. Ra mē htyk xwýnhjaja nē arī mē pahťir xwýnhjaja nhūm tanhmā mē pahte amnhī nhīpēx to ho papa hā mē pahpumunh kòt tanhmā mē pajarēnh to. Jao Tirtūm mē wa kuri mē pahťir tūm nē papa ho papa hā mē pajarē rý wa kuri pahťir tūm nē papa hkēt ā mē pajarē. Jakamā kwa Ximotre kot paj Tirtūm mē Jejus Krisja wa noo mā mēmoj tā amā karō ka inhmar týx nē.

² Koja nhýrmā mē kēp Tirtūm kra hkēt xwýnhjaja axte kām Tirtūm kapēr mar prām kēt nē nhām mē kapēr pix mar prām o ri pa. Jao amnhī kukamā hamaxpēr o: —Nā inhmā Tirtūm kapēr mar prām kēt. Kot mēmoj piitā nē mē hkurē kēnā. Kot paj hpānhā mēhō kot mēmoj nē mē hkurē hkēt xwýnhjē kapēr pix mar o ri ixpa. Nā kot paj anē. Ja na inhmā hprām. Nom kot paj axte Tirtūm kapēr mar kēt nē.

Anhýr jao kapēr kaga nē hpānhā htýx ri nhām mē ujarēnh pix ma nē hkòt hamaxpēr. Koja mē ā amnhī nhīpēx anhýr o pa. Jakamā kwa kēr ka arī mē kām Jejus kot tanhmā mē panē amnhī nhīpēx to hā harēnh rāhā ho ri mē hkòt apa Ximotre. Mē kām mar prām kēt tā māmri ri mē kām harē. Nē nhýri mēhō pumu nē kām harē. Mē kām mar prām xwýnhjē mā harē nē mē kām mar prām kēt xwýnhjaja ka määnēn mē kām harē. Nhūm mēhō tanhmā amnhī tomnuj to ka hā omu nē tanhmā nē kām akapēr to kē hkaga tokyx anē nē akupým tām amnhī nhīpēx. Rý nhūm mēhō tām amnhī nhīpēx o pa ka ja hā omu nē hā kām akapēr nē kām:

—Ām hāmri na ka hte Tirtūm kòt amnhī nhīpēx mex nē. Anē.

Hāmri nē anojarēt kēt kām mē kām Tirtūm kapēr o mē ahkre rāhā ho ri apa. ⁵ Nē tām ri amnhī nhīpēx rāhā nē. Mē kot Jejus ā tanhmā anhīpēx to htā kēr ka ý hā amnhī to htýx nē arī mē kām kapēr jarēnh o ri mē hkòt apa. Jao Tirtūm mā amnhī nhīpēx mex rāhā nē. Kēr ka ā mē hkòt amnhī nhīpēx anhýr o ri apa Ximotre.

Pawre kot ra htyk kaxyw ā amnhī jarēnh

Atre 20.17-35

⁶ Nē mē kot ixpír xā hā arīgroja ra hwýr ahtēp o mō. Kot paj pēr tokyx ty. Amnepēm na prem Tirtūm mā mēmoj nhōr kaxyw nē mē hkōm xā kamā mēmo kagōja py nē mē kot Tirtūm mā mēmoj nhōr xā hā mēstija ā hkapír pa nhūm hapēx. Tā te ixpē mē hkōm xā kamā mēmo kagō pikapírta pyrāk. Kot paj tokyx ty nē jar ijapēx. ⁷ Na pa ra Pahihti Jejus mā amnhī nhīpēx mex o ri ixpa. Mē kot tanhmā hā ixtomnuj to htā pa hkaga hkēt nē arī hkòt amnhī nhīpēx mex rāhā ra ixyk kaxyw. ⁸ Ixte Pahihti kām hprām xā hkòt amnhī nhīpēx

mex o ri ixpa jakamā koja amnhī tā tanhmā ixto mex to. Nom papxipix ixto mex kēt nē. Na hte ām hāmri tām mē pahpiitā mē panhīpēx. Jakamā nhýrmā kot mē piitā tanhmā mē harēnh to xā hā arīgrota ā koja mē pahkính pē mē pahte amnhī wýr kamā pajamak o pa pa xwýnh piitā mē pamā mā mēmoj mex gō.

Pawre kot amnhī wýr Ximotre hwýr

⁹ Kwa na pa ra ato ijamak týx nē Ximotre. Kwa kēr ka amnhīm anojarēt nē tokyx tanhmā amnhī to hpa nē man ixwýr mō.

¹⁰ Na pre ra Kresēx ma Karatas wýr mō nhūm Xitre ma pika pē Tawmas wýr mō. Nhūm Tēmti ra tanhmā hamaxpēr to nē àpēnh gryk ā ixkaga nē ma akupým Tesarōn wýr mō. ¹¹ Ām Rukre pix na arī ixkòt pa jakamā kēr ka anojarēt hāmri nē ahte amōr kēt nē. Makre mā anē kē man akòt ixwýr mō nē tanhmā ixto ajuta hto ho pa.

¹² Nē Xikitre na pa pre ra Epes wýr kumē.

¹³ Nē Toròt kām Kapti nhōrkwy kamā ixte kry pē inhō kamis pa hkà ryti rer jakamā kēr ka anojarēt nē inhmā apy nē man inhmā o mō. Nē inhō kagàta ka määnēn inhmā amý nē o mō. Nē mēmo mry kà hā ixte mēmoj tā kagàta ka määnēn apy nē mām inhmā o mō. E kēr ka anojarēt nē ixkukrēxja jamý nē ixwýr ho mō.

Tanhmā Aresānti kot Pawre nhīpēx to hā harēnh

¹⁴ Nē na pre kàx o mēmoj nhīpēx xwýnh Aresāntija ixtomnuj nē. Pa pre mē kām Tirtūm kapēr o mē ahkre ho ri mē hkòt ixpa nhūm tee ri inhma nē kām mar prām kēt nē. Hāmri nē ixkutā amnhī xām nē inhīpēx kati nē. Nom koja Pahihti Jejus ixtā tanhmā ho. Kwa kēr ka amnhī nē omunh mex nē Ximotre.

Pahihti Jejus kot Pawre mā hamaxpēr o hihtýx ā harēnh

¹⁶ Nē pahi kot mē mar xā hā ixkre kamā wam ixte mē kām amnhī jarēnh to ā na pre mēhō ixyr pē mē kām tanhmā ijarēnh to hkēt nē. Na prem piitā mē umaj ixkaga hpa. Nom kwār mē māmri ā amnhī nhīpēx anē. Tirtūm kot ixtā tanhmā mē hoja na inhmā hprām kēt. ¹⁷ Ām Pahihti Jejusja pix na pre mē kurom ixkaga hkēt nē. Na pre ixto ixihtýx nē pa ý hā mē kām tanhmā mē panē kot amnhī nhīpēx to hā harēnh pa. Nhūm Ijaew kēt xwýnh kot inhmar o hkrí xwýnhjaja ixujarēnh mar o hkrí nhūm Tirtūm inhnē tanhmā mē ho nhūm mē ixpír kēt nē. ¹⁸ Koja Pahihti mē kutā ixto ixihtýx rāhā nē mēmo arīgro hā amnhī wýr ixto api. Pa Tirtūm mē wa kuri inhmex kumrēx nē ixtír tūm nē ixpa ho ixpa. Pahihti mex o mex jakamā kēr pu mē kām mex o mex ā harēnh rāhā ho papa nē aa jam panhūrer kēt nē.

Pawre kot tanhmā hkrāmnhwýjē jarēnh to

¹⁹ Nē kēr ka Prisire mē mjēn Akir wa kām ijarē. Nē Onēsipti hprō nē hkrajaja ka määnēn mē kām ijarē. ²⁰ No Eras kormā Korít kām pa. Nē Toropti na pre à nē pa Mírēt kām kure nhūm ixkòt mōr kēt nē.

²¹ Kwa kê ka amnhĩm anojarêt nê amgrà pê man tokyx ixwỳr mǒ Ximotre.

Nê ota Epti mẽ Prutěhti mẽ Rĩnre mẽ Krawreja awỳr hpěr mẽ. Nê jar Kris kôt pahkwỳjê piitã awỳr hpěr mẽ.

²² E kê Pahihti Jejus ato mex rãhã nê mẽ apiitã mẽ akutã nojarêt rãhã ho pa.

Tã ãm ja pix. Ixpê Pawre na pa awỳr kagàja nhĩpêx nê kumě.

Xitre

Pawre na pre kagàja nhípêx. Kêp Jejus nhỹ hã hkrajê jahkre ho pa xwýnhjê hõ na pre. Nhũm pre Xitre Pawre hkôt pa hã mytwrý sohtô nê. Tã kêp Jejus kôt hkwyjê nhõ pastô kaxyw gô hipòk pè Kret ã arík nê Tirtùm kapër o mẽ ahkre ho mẽ hkôt pa. Jakamã nhũm Pawre kãm kagàja nhípêx nê kamã kãm mẽmoj tã karõ. Tirtùm kapër o mẽ hêx xwýnhjaja tanhmã kot ja nê mẽ hkurê to hã kãm karõ. Nê mẽ kot Tirtùm kapër o mẽ ahkre mex pix xwýnhjaja Jejus kwýjê kaxyw kot mẽ rênh ã kãm karõ. Nê Jejus kwýjaja kot axpên to mex o pa hã kot mẽ kãm karõ kaxyw kagàja kamã mẽ kaxyw kãm hã kagà. Æ na pre Pawre Xitre mã mẽmoj tã karõ nê hã kagà nê hwýr mẽnh anê. Nê kãm:

1 Pa Xitre? Xà amex? Ixpê Pawre na pa awýr kagà nhípêx nê kumê. Na pa hte Tirtùm mã tanhmã amnhĩ nhípêx to ho ixpa. Nê ixpê Jejus Kris nhỹ hã hkrajê jahkre o ixpa xwýnh jakamã na pa hte mẽ kot amnhĩ kaxyw hkôt hamaxpêr tỳx kaxyw tanhmã mẽ kãm ixkapêr to ho ri ixpa. Nê mẽ kot hprĩ hã mar kaxyw Tirtùm kapër o mẽ ahkre mex nê. ² Mẽ kot inhmar nê nhỹrmã htyk nê ma Tirtùm mẽ Jejus wa hwýr àpir nê wa kuri htír tùm nê pa ho pa hã amnhĩ kukamã hamaxpêr kaxyw. Amnepêm na pre Tirtùm ã mẽ pahpê hkrajê hkukamã mẽ pajarênh anê. Nê ãm hãmri ã mẽ pajarênh anê. Na hte mẽmoj tã amnhĩ to hêx kêt nê. ³ Tã ra mẽ pakukamã mẽ pamã mẽmoj to amnhĩrit nê inhmã kapêr o:

—E Pawre kêr ka ma mẽ hpiitã mẽ hkôt ri apa nê mẽ kãm ixkapêr jarê nê mẽ kãm: “Kot kaj mẽ amnhĩ kaxyw Tirtùm Kra hkôt ajamaxpêr nê hkôt amnhĩ xunhwý nhũm Tirtùm ja hã mẽ apumu nê mẽ ato hkra. Ka mẽ nhỹrmã atyk tã nhũm amnhĩ wýr mẽ ato api ka mẽ wa kuri amex kumrêx nê atír tùm nê apa ho apa.” Anhýr o mẽ kãm ixkapêr jarênh o ri mẽ hkôt apa Pawre.

⁴ Anhýr o inhmã kapêr tã pa ã amã ixkapêr nê hã kagà anê Xitre. Pajamê pahte amnhĩ kaxyw Jejus kôt pajamaxpêr nê hkôt amnhĩ xãm jakamã te apê ixkra pyræk. Jakamã na pa hte ato Mëpanhípêxà maati Tirtùm mẽ mẽ papytâr xwýnh Jejus Krisja wa hwýr rãhã ho ri ixpa nê wa kãm:

—Pa Tirtùm mẽ Pahihti wa. Nà Xitre ho na pa wa awý. Kwa kêr ka wa kutã anojarêt rãhã ho ri apa. Kê wa akukwak ri hamakêtkati nê àmnhix pa ho pa. Anê.

Kris kwý hkrãhtùmjaja kot tanhmã amnhĩ nhípêx to kaxyw mẽ hã kãm karõ

Wam Ximotre 3.1-13

⁵ Nê na pa pre Kret rùm inhnojarêt hãmri nê amã axàpênh ã karõ nê Kret kãm are nê man mō. Na pa pre amã:

—E kêr ka jar arík nê mẽ kãm ixkapêr jarênh jatur xàm mẽnh o mẽ hkôt apa. Nê Kris kôt pahkwýjê mã mẽ hkrãhtùmjê xunhwý. Kret kãm krĩ piitã hkôt. Na pa pre ixprĩ hã tanhmã amã mẽ harênh to. Tã kêr ka ate inhmar xà hkôt mẽ hkwyjê kapi nê mẽ unhwý. Koja mẽ

ã amnhĩ nhípêx anhýr o pa ka ja hã mẽ omu nê mẽ unhwý.

⁶ Koja mẽ tãm amnhĩ nhípêx o pa nhũm mẽ piitã axpên mã mẽ mex ã mẽ harê.

Nê mẽ hprõ pix tãnopxar o pa nê kuhpa hã nhãm mênijê ho amnhĩkati hkêt nê.

Nê kê mẽ hkrajaja hipêxà pyrã nê amnhĩ kaxyw Jejus kôt hamaxpêr o pa. Jao hipêxà nê katorxà wa kapêr ma nê wa hkôt amnhĩ nhípêx. No ri htỳx ri amnhĩ tomnuj o pa hkêt nê.

Anhýr o na pa pre mẽ hã amã karõ. ⁷ Jejus kôt pahkwýjê hkrãhtùmjaja kot Tirtùm nhỹ hã hkrajê mã kapêr mex o pa jakamã na htem tãm amnhĩ nhípêx o pa.

Nê amnhĩ pix kukamã hamaxpêr o pa hkêt nê.

Nê gryk tokyx anhýr kêt nê.

Nê kagòxýhti japrôr nê ho pipãnh o pa hkêt nê.

Nê oprê ho pa hkêt nê.

Nê kàxpore rũnh prãm xàj hêx rom tanhmã amnhĩ nhípêx to hkêt nê.

Na htem ã amnhĩ nhípêx anhýr hkêt nê.

⁸ Æm àmnhix amnhĩ nhõrkwý hwýr mẽ hwýr o pa.

Nê mẽ piitã mẽ kutã nojarêt rãhã nê.

Nê tãm hamaxpêr nê tãm mẽ piitã mẽ hipêx o pa.

Nê amnhĩ tomnuj pymaj amnhĩ to htỳx pè Tirtùm kôt amnhĩ nhípêx mex rãhã ho pa.

⁹ Nê mẽ kot Tirtùm kapêr mar tỳx jakamã kê mẽ arĩ hã nohtỳx nê mar tỳx xà hkôt amnhĩ xõ ri ho hkwyjê jahkre mex o pa.

Nê ho mẽ piitã mẽ hamaxpêr o hihtỳx o pa.

Nhũm mēhõ Tirtùm kapêr kwým ri tanhmã ujarênh to nhũm hã kuma nê hprĩ hã kãm tanhmã harênh to kê mar mex nê.

E Xitre. Na hte ã Jejus kwýjê hkrãhtùmjaja amnhĩ nhípêx anhýr o pa. Jakamã kêr ka aprĩ hã Kret kãm Jejus kôt pahkwýjê kapi nê mẽ kot tanhmã amnhĩ nhípêx to ho pa hã mẽ omu. Nhũm mēhõ ã amnhĩ nhípêx anê ka ja hã omu hãmri nê kêp Jejus kwýjê hkrãhtùm kaxyw ãm.

**Kret nhõ xwýnhjaja kot tanhmã amnhĩ tomnuj to hã
mẽ harẽnh**
Xitre 3.9-11

¹⁰ Nẽ atar Kret kãm na hte mẽ ohtô nẽ kãm mẽ õ pahi kapër mar prãm kêt nẽ htỳx ri tanhmã Kris kwỳjê mã kapër to ho pa. Na hte Ijaew kwỳjaja ã amnhĩ nhĩpêx anhỹr o pa. Jao Ijaew kêt xwýnh kot Jejus kôt amnhĩ xunhwỳr xwýnhjê mã kãm:

—Kwa mẽ ixpyrà nẽ mẽ ixpê Ijaewjê kot amnhĩ nhĩpêx kôt mãn amnhĩ nhĩpêx kêt wehe.

¹¹ Anhỹr o mẽ kãm kapër jakamã kwa kêr ka ã mẽ kapër anhỹrja nẽ mẽ kãm akapër kãm axihtỳx nẽ. Na htem hpjaàm kêt o hikàxpore hprãm xàj ã mẽ kãm kapër anhỹr o pa. Jao mẽ hamaxpër o ahkà nhũm mẽ kuma nẽ tee ri hamaxpër. ¹² Na pre ra mẽ hkwỳjê hõ tanhmã mẽ harẽnh to. Mẽ ahkre xwýnhjê hõja mẽ harẽnh o:

—Kret nhõ xwýnhjaja na htem hêx pix o pa. Nẽ oprẽ nẽ kãm kaga nẽ apkur xà pix kukamã hamaxpër o pa. Anẽ.

¹³ ãm hãmri ã mẽ harẽnh kot anhỹr. ã mẽ kot amnhĩ nhĩpêx anhỹr jakamã kwa mẽ kot amnhĩ nhĩpêxja nẽ mẽ kãm akapër kãm axihtỳx o ri mẽ hkôt apa Xitre. Kê mẽ ã amnhĩ nhĩpêx anhỹr kêt nẽ. Nẽ mẽ kãm anẽ kê mẽ amnhĩ kaxyw Tirtũm kôt mãn hamaxpër tỳx nẽ.

¹⁴ Nẽ kê mẽ axte Ijaewjê xujarẽnh nẽ mẽ kot amnhĩ nhĩpêx kôt amnhĩ nhĩpêx kêt nẽ. ã mẽ kot amnhĩ nhĩpêx o pa hã mẽ kãm karõ xwýnhjaja na prem Tirtũm kapër kaga hpa. ¹⁵ Mẽ kot Jejus kôt amnhĩ xunhwỳr xwýnhjaja tãm mẽ hamaxpër o pa jakamã na htem Tirtũm kot mẽmoj piitã ho kator xwýnh pumu nẽ piitã mex ã harẽ. No mẽ kêp Jejus kwỳ hkêt xwýnhjaja na htem hamaxpër punuj pix o pa. Nẽ mẽmoj mex pumu nẽ mex kêt ã harẽ. Mex tã nhũm mex kêt ã harẽnh o pa. ¹⁶ Nẽ mẽ kêp Tirtũm kra hã amnhĩ jarẽnh tã amnhĩ tomnuj pix o pa. Jao kêp hkra hã amnhĩ jarẽnh o hêx nẽ kapër kwỳm ri amnhĩ nhĩpêx pix o pa. Nhũm Tirtũm tee ri ja hã mẽ omu nẽ kãm mẽ hkĩnh kêt nẽ. Tirtũm mã mẽ kot amnhĩ to mex kwỳ mẽ hã jêt kêt kumrêx.

2 E Xitre kot paj tanhmã ate mẽ ahkre hto hã amã karõ ka inhma nẽ amnhĩ xô ri mẽ kãm hã karõ ho ri apa.

**Mẽmy wejjaja kot tanhmã amnhĩ nhĩpêx to kaxyw mẽ
hã kãm karõ**

² Nẽ kêr ka mẽmy wejjê mã anẽ kê mẽ amnhĩ to àp-tàr mex nẽ pa.

Nẽ pipãnh nẽ ri pa hkêt nẽ.

Nẽ mẽ gryk kaxyw htỳx ri hkwỳjê hã hpër o pikẽnh kêt nẽ.

Kê mẽ tãm hamaxpër nẽ tãm amnhĩ nhĩpêx o pa.

Nẽ amnhĩ kaxyw Jejus kôt hamaxpër tỳx rãhã nẽ.

Nhũm mẽ hkwỳjaja kot mẽmoj tã tanhmã mẽ homnuj to htã kê mẽ arĩ tãm amnhĩ nhĩpêx o pa nẽ amnhĩ tã tanhmã mẽ ho hkêt nẽ.

E kêr ka ã mẽmy wejjê mã ja hã akarõ anẽ.

**Mẽni wejjaja kot tanhmã amnhĩ nhĩpêx to kaxyw mẽ
hã kãm karõ**

Wam Korĩt 14.34-35; Wam Ximotre 2.9-15, 3.11; Wam Pêtre 3.1-6

³ Nẽ mẽni wejjê mã anẽ kê mẽ kãm Jejus kĩnh xàj tãm ri amnhĩ nhĩpêx o pa.

Jao axpẽn jakwa kamã nhãm mẽ hixi ho rêr o pa hkêt nẽ.

Nẽ kagôxỳhti ho pipãnh o pa hkêt nẽ.

Nẽ mẽ kãm anẽ kê mẽni xàptàr nywjê jahkre mex o pa. Mẽ kot mẽ mar nẽ mẽ uràk nẽ tãm amnhĩ nhĩpêx kaxyw. Jao mẽ kãm mẽ mjên nẽ mẽ hkrajê japê hã mẽ kãm mẽmoj to anhỹr o mẽ kutã nojarêt rãhã ho pa.

Kêr ka ã mẽni wejjê mã akapër anẽ.

**Mẽni xàptàr nywjaja kot tanhmã amnhĩ nhĩpêx to
kaxyw mẽ hã kãm karõ**

⁵ Nẽ mẽni xàptàr nywjê mã anẽ kê mẽ tãm hamaxpër pẽ tãm amnhĩ nhĩpêx o pa.

Nẽ mẽ òrkwỳ kamã àpẽn mex o pa.

Nẽ mẽ mjên kapër ma nẽ hkôt amnhĩ nhĩpêx.

E. ã mẽni xàptàr nywjê mã karõ anẽ. Kojã mẽ ã amnhĩ nhĩpêx anhỹr o pa hãmri nhũm mẽ piitã mẽ kot amnhĩ nhĩpêx ã mẽ omu nẽ mẽ harẽnh o:

—Tirtũm kapërja mex kumrêx. Mẽ kot hkôt amnhĩ nhĩpêx o mẽ pa xwýnhjaja na htem tãm amnhĩ nhĩpêx mex o pa. Anẽ.

**Mẽmy xàptàr nywjaja kot tanhmã amnhĩ nhĩpêx to
kaxyw mẽ hã kãm karõ**

Wam Ximotre 4.12; Sikũn Ximotre 2.22; Wam Pêtre 5.5

⁶ Nẽ kêr ka mẽmy xàptàr nywjê mã anẽ kê mẽ mẽmoj punuj pẽ amnhĩ to htỳx o pa. Mẽ hamaxpër punuj nẽ mẽ kot tanhmã amnhĩ tomnuj to pẽ amnhĩ to htỳx o pa.

⁷ Nẽ kêr ka ajaxwỳja tãm amnhĩ nhĩpêx rãhã ho ri mẽ hkôt apa Xitre. Mẽ kot ja hã apumunh nẽ akôt amnhĩ nhĩpêx o pa kaxyw. Nom kêr ka tanhmã mẽ ahkre hto hkwỳm ri tanhmã amnhĩ nhĩpêx to hkêt nẽ. ãm Tirtũm ã apijaàm o akatàt kôt mẽ kãm kapër o mẽ ahkre pẽ tãm amnhĩ nhĩpêx o ri apa.

⁸ Nẽ kêr ka tãm akapër rãhã ho ri apa. Kêr kê mẽ kãm mẽ pahkurê xwýnhjaja ja hã ama nẽ amnhĩ kamã hpjaàm hãmri nẽ apê Kris kwỳ hã tanhmã ato kapër punuj to hkêt japêr.

**Mẽ kãm mẽ àpẽn xwýnhjaja kot tanhmã amnhĩ
nhĩpêx to kaxyw mẽ hã kãm karõ**

Epes 6.5-8; Korosê 3.22-25; Wam Ximotre 6.1-2; Wam Pêtre 2.18-25

⁹ Nẽ kêr ka mẽ kãm mẽ àpẽn o mẽ pa xwýnhjê mã anẽ kê mẽ õ patrãw kãm hprãm xà hkôt amnhĩ nhĩpêx o pa.

Jao mẽ kapër ma nẽ hkôt amnhĩ nhĩpêx mex nẽ.

Nẽ amnhĩ tã tanhmã mẽ kãm kapër punuj to hkêt nẽ.

¹⁰ Nẽ kê mẽ kêp mẽmoj to àhkĩnh kêt nẽ.

Ně tām mẽ hipêx rāhã ně.

Ně kām hkukrêx jamār mex o pa.

Koja mẽ ã amnhĩ nhĩpêx anhÿr o pa nhũm mẽ õ pa-trāw amnhĩ tã mẽ omu ně mẽ ŷ hã hkĩnh ně pa. Hāmri ně hamaxpêr o:

—Hêxta waa ně. Inhmã àpênh xwÿnhhta na hte inhmã àpênh mex o pa. Na hte ixkukrêx ně ixkrit jamār mex ně ixpê mẽmoj to àhkĩnh kêt ně. Nà mẽ kot Tĩrtũm kapêr kôt amnhĩ nhĩpêx o mẽ pa xwÿnhjaja na htem tām amnhĩ nhĩpêx o pa. Pêr Tĩrtũm kapêr ãm hāmri na. ãm mex o mex. Anê.

E Xitre kêr ka mẽ kām mẽ àpênh xwÿnhjê mã ã mẽ kot amnhĩ nhĩpêx anhÿr ã karõ.

Tanhmã Jejus kām mẽ pajapê xaj amnhĩ nhĩpêx to hã harênh

Epes 2.8-10; Wam Tesarõn 1.9-10

¹¹ Ně Tĩrtũm kot mẽmoj to mẽ pakutã nojarêr rāhã ho pa jakamã na hte mẽ pahte Kra hkôt amnhĩ xunhwÿr xwÿnhjê ho hkra pu mẽ nhÿrmã wa kuri pahťĩr tũm ně papa ho papa. ¹² Na hte ã mẽ pamã kapêr o amnhĩrit anê ně mẽ pamã:

—E kêr ka mẽ apê ixkra hã tām amnhĩ nhĩpêx rāhã ho ri apa ně axte tanhmã amnhĩ tomnuj to ně tanhmã ajamaxpêr punuj to hkêt ně. Mě ate amnhĩ tomnuj pê amnhĩ to htÿx ně ixkapêr kôt pix mã ri amnhĩ nhĩpêx rāhã ně. Anê.

¹³ Na pu htem ã amnhĩ nhĩpêx anhÿr o papa jao pahkĩnh ně mẽ papytār xwÿnh Jejus Kris jamār o papa. Koja nhÿrmã mẽ panhõ Tĩrtũm xihťÿx xwÿnhja akupÿn mẽ pahwÿr kumê pu mẽ mex o mex ã omu.

¹⁴ Na pre Jejus amnhĩ grõnh kôt mẽ pahwÿr wrÿ ně mẽ pahpiitã mẽ pahte amnhĩ tomnuj pānhã amnhĩrer kaxyw htyk o Tĩrtũm mã amnhĩrer pa. Měmo kaxyw na pre ã mẽ panê amnhĩ nhĩpêx anê? Nà mẽ pahpê hkwyja na kām hprām. Ně mẽ pahte tām ri Tĩrtũm kapêr kôt amnhĩ nhĩpêx o papaja na kām hprām. Ně mẽ pahte urāk ně mẽ piitã mẽ kutã panojarêr rāhã ho papaja na kām hprām. Jakamã na pre ã mẽ panê amnhĩ nhĩpêx anê.

¹⁵ E Xitre. Ixte mẽmoj tã amã karõja kêr ka ho Kris kwÿjê jahkre mex o apa kê mẽ ama ně kapêr kôt amnhĩ nhĩpêx o pa. Nhũm mẽhõ tanhmã amnhĩ tomnuj to ka hã omu ně Tĩrtũm nhÿ hã tanhmã nê kām akapêr to kê axte hkêt ně. Tã mǎn ka inhma. Kêr ka ã Kris kwÿjê jahkre mex o apa anê.

Tanhmã Kris kwÿ kot amnhĩ nhĩpêx to hã mẽ kām karõ

Rõmǎn 13.1-10; Epes 2.1-10

3 Ně kêr ka Kris kôt akwÿjê mã anê kê mẽ ho amnhĩptār xwÿnhjê kapêr ma ně mẽ hkôt amnhĩ nhĩpêx o pa. Ně mẽmoj to mẽ kutã nojarêr rāhã ho pa.

² Ně mẽ kām anê kê mẽ tanhmã hkwyjê mã kapêr punuj to ho pa hkêt ně. Rÿ mẽmoj tã mẽ kām àkjêr kêt ně. Kê mẽ tām mẽ hipêx ně mẽ kamã ukapřĩ pê mẽ ho mex rāhã ho pa. Na hte ã Kris kwÿjaja axpênh nhĩpêx o pa anê. ³ Kormã mẽ pahte hkôt amnhĩ xunhwÿr kêt ri na pu prem ã amnhĩ nhĩpêx anhÿr kêt ně. Na pu prem

Tĩrtũm mã pajamaxpêr kêt ně kapêr kôt ri amnhĩ nhĩpêx hkêt ně. Ně amnhĩ tomnuj pix kukamã pajamaxpêr o ri papa. Ně amnhĩ pix kukamã pajamaxpêr. Jao mẽ pamã pam amnhĩ nhĩpêx prām xà kôt pix mã tanhmã amnhĩ nhĩpêx to ho ri papa. Ně axpênh tomnuj ně. Ně axpênh kām pagryk rāhã ho papa. ã mẽ pahte amnhĩ nhĩpêx anhÿr ho papa jakamã nhũm pre mẽ piitã kām mẽ pahkĩnh kêt ně. Pu mẽ pajaxwÿja pamã mẽ hkĩnh kêt ně.

Tanhmã Tĩrtũm kot mẽ pahto mex to hã harênh

Rõmǎn 5.6-8; Epes 2.4-10

⁴ Tã pu prem Tĩrtũm kêp mẽ papytār xwÿnh ã harênh ma. Kot tanhmã mẽ panê amnhĩ nhĩpêx to hã harênh ma ně mex o mex ně mẽ pakamã ukapřĩ hã harênh ma. ⁵ Hāmri ně amnhĩ kaxyw hkôt pajamaxpêr ně hkôt amnhĩ xunhwÿr nhũm amnhĩ tã mẽ pahpumu ně mẽ pahto hkra. Nom mẽ pahte tanhmã amnhĩ to mex to hã mẽ pahpumunh kôt mẽ pahto hkra hkêt ně. Mě pahte tanhmã amnhĩ to mex tore hã. Na pre mẽ pakamã ukapřĩ ně ã mẽ papytār anê. Tã tanhmã na pre mẽ papytār to wehe? Nà na pre Jejus Kris kukwak ri te kot mẽ pane mẽ pahte amnhĩ tomnuj piitã kuhõnh par pyrāk o mẽ panhĩpêx. Hāmri ně mẽ pahwÿr amnhĩ Karõ rē nhũm mẽ pahwÿr agjê ně mẽ pamã mẽ pahte amnhĩ nhĩpêx nyw gõ. ã na pre Tĩrtũm Jejus Kris kot mẽ panê htyk kukwak ri mẽ pahto mex rax anê hāmri ně mẽ pahwÿr amnhĩ Karõ rēnh anê. ⁷ Tã mẽmo kaxyw na pre ã mẽ pahto mex anê? Nà kām mẽ pajapê jakamã na pre ã mẽ panhĩpêx anê. Mě pahte amnhĩ tomnuj xwÿnh tã kām mẽ pajapê htÿx ně kām tanhmã mẽ pahto hprām kêt ně. Ně mẽ pahwÿr Kra Jejus mẽ nhũm wrÿ ně mẽ pahte amnhĩ tomnuj pānhã mẽ panê ty. Jakamã mẽ pahte amnhĩ kaxyw hkôt pajamaxpêr ně hkôt amnhĩ xunhwÿr xwÿnhjaja Jejus kukwak ri mẽ pahpê Tĩrtũm kraa. ã na pre Jejus mẽ pahto mex anê. Jakamã kot puj mẽ nhÿrmã Tĩrtũm mẽ wa kuri pahťĩr tũm ně pamej ně papa ho papa. Koja wa nhÿrmã ã mẽ pahto mex anê.

⁸ ãm hāmri na pa amã ã ja jarênh anê Xitre. Jakamã kwa kêr ka inhma ně inhmar tÿx ně. Ně ho amnhĩ kaxyw Tĩrtũm kôt mẽ hamaxpêr xwÿnhjê jahkre mex o ri apa. Kê mẽ amar xà hkôt tām ri amnhĩ nhĩpêx o pa.

⁹ Ně mẽ kot htÿx ri mẽmoj tã axpênh mã àkjêr o mẽ pa xwÿnhjaja kêr ka mẽ hkôt apa hkêt ně. Ně mẽ hkukamã mẽ higêt kôt apa hkêt ně. Rÿ finat Mojes kot Tĩrtũm nhÿ hã kapêr ã axpênh mã mẽ àkjêr xwÿnhjê hkôt apa hkêt ně. Na htem ã ri axpênh mã àkjêr anhÿr o pa ně tām amnhĩ nhĩpêx kêt ně.

¹⁰ Ně koja mẽ akwÿjê hõ amnhĩ krã hkôt tanhmã hkwyjê mã kapêr to nhũm mẽ kuma ně hã axpênh mã akir ně axpênh pê pikjêr kaxyw. Ka ja hã omu ně ã kapêr anhÿrja nê kām akapêr kê axte hkêt ně. Hāmri nhũm ama ně ãm ama ně arĩ ã mẽ kām kapêr anhÿr japêr ka axte nê kām akapêr. Tã ra ate nê kām akapêr o axkrut tã nhũm arĩ ã kapêr anhÿr o axkruněpxi japêr ka ja hã omu hāmri ně mẽ amnhĩ nê hano kê axte mẽ apê Kris kwÿjê hkôt ri pa hkêt ně. ¹¹ ã mẽ kot amnhĩ nhĩpêx an-

hÿr o mẽ pa xwÿnhjaja na mẽ ra Jejus wÿr pry kaga nẽ htÿx ri tanhmã amnhĩ tomnuj to ho pa. Nẽ ã amnhĩ nhĩpêx anhÿr o pa jao kêp Kris kwÿ hkêt ã amnhĩ to amnhĩrĩt.

Pawre kot kagà jatur xà kamã tanhmã Xitre mã kapẽr to

¹² Nẽ kot paj tokyx ma Nĩkop wÿr mỗ. Kêr pa tokyx hwÿr pøj nẽ amgrà pẽ krĩ nhõ xwÿnhjê hkôt ixpa. Jakamã kot paj tokyx ma awÿr Atẽmti rÿ Xikitre mẽ. Kê mỗ nẽ awÿr pøj ka tokyx tanhmã amnhĩ to hpa nẽ man ixwÿr mỗ pu mẽ Nĩkop kamã axpẽn pumu.

¹³ Nẽ ota mẽ akuri Apor mẽ axiwôkat Jẽntija. Koja wa mẽmo arĩgro hã ma krĩ hõ hwÿr nojarêt ka wa kãm mẽ apkur xà hkwy gõ kê wa ma ÿ kamã mỗr kêt nẽ.

¹⁴ Nẽ kêr ka Kris kwÿjê mã anẽ kê mẽ arĩ òrkwÿ pix kãm hkrĩ ho hkrĩ hkêt nẽ. Kê mẽ tanhmã axpẽn to mex to ho axpẽn kôt pa. Nhũm mẽhõ kêp amrakati kê mẽ tanhmã ho ajuta hto. Mẽ kãm anẽ kê mẽ ã axpẽn nhĩpêx anhÿr o pa.

¹⁵ Nẽ ota jar Kris kôt pahkwÿjê piitã awÿr hpẽr mẽ Xitre. Nẽ kêr ka atar Kris kôt mẽ pahkràmnhwÿjê mã mẽ ijarẽ.

E ãm ja pix. Kê Pahihti Jejus mẽ akutã nojarêt rãhã ho pa. Ixpê Pawre na pa amã ã ixkapẽr nẽ hã kagà nẽ awÿr mẽnh anẽ.

Piremõ

Pawre na pre kagàja nhípêx nê hkràmnhwý Piremõ hwýr kumê. Na pre Piremõja amnhím kãm àpênh xwýnh Onesti japrô. Kàxpore ho haprô nhùm amarí kãm àpênh o pa. Tã tanhmã hamaxpêr to nê hkaga nê ma umaj krí hõ hwýr hprôt nê tèn amũxu nê kamã pa ho pa. Hãmri nê Pawre pumu nê kãm amnhí jarê. Pawre arí kêp prês nê hkrí ho hkrí nhùm Onesti omu nê kãm amnhí jarê. Hãmri nhùm Pawre kãm Jejus jarê nhùm kuma nê hkôt amnhí xãm kurê kumrêx. Hãmri nhùm Pawre ja hã omu nê hkràmnhwý Piremõ mã kagà nhípêx nê kamã Onesti xyr pê kãm kapêr. Hãmri nê hipêx pa nê Onesti mã kugõ nê ma akupým õ patrãw Piremõ wýr kumê nhùm ma mõ. Nhùm Pawre kagàja kamã kãm kapêr nê kãm:

1 Pa ixkràmnhwý Piremõ? Xà amex? Ixpê Pawre na pa awýr kagà nhípêx nê kumê. Apê Kris kôt ixtõ hã inhmã akính. Na ka hte ixpyrà nê Kris mã tanhmã amnhí nhípêx to ho apa. Ta ot pa awýr kagàja kamã ixpêr mẽ. ² Amã nê anhõrkwý kamã Tirtùm kapêr mar kaxyw mẽ kêp Jejus kwý hã mẽ pikuprõnh xwýnhjê hwýr. Nê Kris kôt pahtõx Apti mẽ Akip wa hwýr kumê. Akipja na hte mẽ pahpyrà nê Pahihti Jejus mã tanhmã amnhí nhípêx to ho pa.

³ Na pa hte mẽ ato Mëpanhípêêxà maati Tirtùm mẽ Pahihti Jejus Kris wa hwýr rãhã ho ri ixpa. Kot mẽmoj to mẽ akutã nojarêt rãhã nhùm wa ý hã mẽ aja-makêtkati nê axàmnhix apa ho apa kaxyw.

Pawre kot Piremõ nhý hã hkính ã harênh

⁴ Na pa pre ajarênh ma Piremõ. Na htem xatã tanhmã inhmã ajarênh to nê ajarênh o:

—Hêxta waa nê. Piremõ na hte amnhí kaxyw Pahihti Jejus Kris kôt hamaxpêr tỳx nê kãm mẽ ixpê Kris kôt hkwyjê piitã hkính pê tanhmã mẽ ixto mex to ho ri mẽ ixkôt pa.

Anhýr o inhmã ajarê pa mẽ kuma nê anhý hã ixkính nê ato Tirtùm wýr rãhã ho ixpa nê ato hwýr o:

—Pa Tirtùm. Na xep hte Piremõ kãm akính tỳx nê akwyjê ho mex rãhã ho pa. ãm hãmri na hte ã mẽ hipêx anhýr o pa. ⁶ Na xep mẽ piitã mẽ kãm tanhmã Jejus kot mẽ inhnê amnhí nhípêx to hã harênh o ri mẽ hkôt pa. Jakamã kêr ka tanhmã mẽ kot mar xwýnhjê hkrã hto kê mēhprí hã mar tỳx nê Kris kot tanhmã mẽ ho mex to hã amnhí tã omu.

Anhýr o ato kuwý. ⁷ Ate Kris kwýjê ho mex o apa jakamã te ate pa ixto mex pyrãk Piremõ. Na htem anhý hã hkính nê pa. Pa ijaxwýja ajarênh ma nê anhý hã ixkính tỳx nê jar mẽ hagjênh xà kamã ixkrí.

Piremõ kot Onesti kamã ukaprí hã Pawre kot kãm karõ
Römãn 15.7; Epes 4.31

⁸ Nã ixte amã mẽmoj jarênhja tanhmã kute hkêt. Kot paj ãm amã mẽmoj jarê nê hã awý. Nom kot paj Kris nhý hã amã tanhmã hã karõ hto hkêt nê. ⁹ Kot paj ãm pahte xepên to pahkràmnhwý hã hã awý. Ra ixwej tỳx

nê Kris ã arí mẽ hagjênh xà kamã ixkrí htã mẽmoj tã awý ka inhma nê inhmã ho anhýr japêr ko.

¹⁰ E amã àpênh xwýnh Onestija na ixte amã harênh kaxyw. Na pre man ixwýr mõ. Ixpê prês nê ixkrí nhùm ixwýr mõ. Pa omu nê kãm Jejus jarê nhùm inhma nê pahpyrà nê amnhí kaxyw hkôt hamaxpêr nê hkôt amnhí xãm. Jakamã te kêp ixkra pyrãk. Hãmri nê ixto ajuta mex o pa. ¹¹ Xep kormã Jejus kôt amnhí xãm kêt ri na pre amã àpênh mex kêt nê. Nê kãm kaga nê htỳx ri tanhmã àpênh to ho pa. Tã ra Jejus kôt amnhí xãm hãmri nê katãt kôt inhmã àpênh mex o pa. Nê ixto ajuta mex nê. Koja akupým amã apê hãmri nê amã àpênh mex nê.

¹² Jakamã ot pa akupým awýr kumê ixkràmnhwý. Nom inhmã hapê jakamã koja ma akupým mõ pa ho ama nê. Tã kot paj akupým awýr kumê. ¹³ Kot jar ixri arík nê apãnhã tanhmã ixto ajuta hto ho paja na inhmã hprãm. ¹⁴ Jakamã kot kaj amã akupýn ixwýr mēnh prãm nê mãmrí ixwýr amê. Nom ixte ja pumunh kêt. Kam nê amã hprãm xà hkôt tanhmã kãm akapêr to. Kãm anê kê akuri arík nê amã àpênh o pa rý akupýn ixwýr amê. ¹⁵ Nom konên. Mãn akupým awýr mör nê kêp Kris kôt akwý hã amã àpênh mex kaxyw na pre Tirtùm ixwýr kumê nhùm ixwýr mõ nê ixri Jejus kôt amnhí xãm nê ixri pa hã mytwrý hkwy hapêx pa akupým awýr kumê. ¹⁶ Nom ra kêp amã àpênh xwýnh pix kêt mãänên kêp Kris kôt atõõ. Jakamã kot kaj wa atar xepên kôt Pahihti Jejus kôt tãm amnhí nhípêx o ri apa. Nom mãänên kêp ixkràmnhwý mex ã inhmã hapêê. ¹⁷ Jakamã kot kaj ixpê Kris kôt akràmnhwý hã ijarê hã kot kaj mãänên inhmã ho mex o apa.

¹⁸ Nê wam amã àpênh o pata ã mãn pre apê mẽmoj to ahkí rý akàxpore hkwy ho ahkính japêr. Tã pa kot paj hpãnhã amã amnhíre. Ka inhmã tanhmã kàxpore jarênh to pa amã amnhíre. ¹⁹ Ixpê Pawre kot paj tanhmã kot ato tewên toja pãnhã amã amnhíre. E pa amnhí nhíhkra ho ã amã amnhí jarênh ã kagà anê. Nom ajaxwýja na ka tanhmã ixto tewên to Piremõ. Na pa pre amã Jejus kot mẽ panê htyk ã harê ka pre inhmar xà hkôt hkôt amnhí xãm. Jao ixpyrà nê atír tùm nê apa ho apa mã xwýnhhta pãnhã te ate ixto tewên pyrãk.

²⁰ E kwa ixkràmnhwỳ. Ixpyrà nê apê Kris kwỳ jakamã kêr ka ixkamã axukaprĩ hã inhmã Onesti ho mex nê. Kêr pa ja hã ajarênh ma nê ixkĩnh nê tãm ijamaxpêr.
²¹ Nà ra ixte apumunh mex kênã. Kot kaj ixte hã awýrta kôt hipêx. Ja kaxyw na pa amã kagàja nhĩpêx nê awýr kumê. Nom kot kaj ãm ja pix ho anhýr kêt nê. Kot kaj ixte hã awýrja kôt amnhĩ krã hkôt tanhmã ho mex to. Nà kot kaj ho anê.

Pawre kãm Piremõ hwýr mör nê omunh prãm ã harênh

²² Nê Tirtũm kot mẽ awýr inhmênh kaxyw mẽ ate ix-to hwýr o apa jakamã koja apu tokyx ma mẽ awýr

inhmê. Jakamã kwa kêr ka ixkutêp tanhmã mẽmoj to mex to. Kêr pa mẽmo arĩgro hã mõi awýr pøj ka ra ixkutêp tanhmã amnhĩ to hpa nê ãm ixpix kãm ajamak o apa.

²³ Nê ota Epasja awýr hpêr mẽ. Na hte ixpyrà nê Jejus Kris ã mẽ hagdênh xà kamã kêp prês nê hkrĩ ho hkrĩ.

²⁴ Nê Makre nê Aristak nê Têmti nê Rukre mẽ awýr hpêr mẽ. Na htem ixpyrà nê Kris mã tanhmã amnhĩ nhĩpêx to ho pa nom ixrom mẽ kêp prês kêt.

²⁵ E kê Pahihti Jejus Krisja akutã nojarêt rãhã ho pa. Ta ãm ja pix. Ixpê Pawre na pa amã kagà nê awýr kumê.

Eprêw

Kagà ja na pre Ijaew ò amnhĩ kwỳjê mã hipêx nom mẽ pahte hipêx xwỳnh nhĩxi mar kêt. Na pre tanhmã hamaxpêr to nê amnhĩ nhĩxi hã kagà hkêt nê. Apu Pawre rỳ apu axtem mēhōja na pre hipêx. Ijaew kwỳjaja uràk nê Jejus kôt amnhĩ xunhwỳr xwỳnhjê mã na pre hipêx nê mẽ hwỳr kumê. Ijaewjaja mẽ hixi hō pē Eprêw. Jakamã nhũm kagà nhĩpêx xwỳnhja mẽ hwỳr hipêx nê kumê. Nê kamã mẽ kãm mẽmoj jarēnh rax nê tanhmã Jejus jarēnh to.

Nê mẽ hkwỳjaja hkwỳjê hkĩnhã kãm Jejus prãm kêt jakamã na prem hkaga nê mẽ kot amnhĩ nhĩpêx tũm o ujanār prãm xàj tanhmã mẽ homnuj to ho pa. Jakamã nhũm kagà nhĩpêx xwỳnhja tanhmã ja hã mẽ kãm kapêr to.

Nê na pre tanhmã Tĩrtũm nhõrkwỳ kaàkre hã kagà hto. Nê kaxkwa kamã òrkwỳ mexja nhũm tanhmã hã kagà hto nê mex o òrkwỳ kaàkre jakrenh ã harê.

Nê mẽ kot Jejus ã amnhĩ xà htỳx kamã hamak o pa htã mẽ kot tee ri ja hã amnhĩ pumunh nê Jejus kaga nê mẽ hkurê kamã hihtỳx nê. ã mēhōja mẽ kãm kapêr anê nê hã kagà nê mẽ hwỳr kumê. Nê mẽ kãm kapêr o:

1 Pa Kris kôt ixkwỳjaja? Xà mẽ amex? E ot pa mẽ amã kagà nhĩpêx nê mẽ awỳr kumê. Amnepêm Tĩrtũm na pre mẽ panhĩgêtjê hwỳr ý hã kapêr jarēnh o ri mẽ pa xwỳnhjê rē nhũm mẽ xatã mẽ kãm kapêr jarēnh o ri mẽ hkôt pa. Ahpỳnhã tanhmã mẽ kãm kapêr to ho amnhĩrít o mẽ hkôt pa. Nhũm Tĩrtũm xatã mẽ hkanrēhã mẽ hkra nê mẽ htàmnhwỳjê hwỳr mẽ hkwỳjê rē nhũm mẽ kãm kapêr jarēnh o ri mẽ hkôt pa. Nom mẽ kãm kapêr piitã harēnh kurê kumrēx kêt nê. Na prem ãm hkwy pix jarē. Tã nhũm hpãnhã mẽ hkwyjaja wamtajê mỳr pē mẽ hwỳr mra nê axte mẽ kãm hkwy jarēnh o ri pa. Jao ra mẽ kãm harēnh jatur xàm mēnh o mō. ² Tã nhũm Tĩrtũm Kraja mẽ pahwỳr wrỳ nê mẽ pamã kapêr jarēnh jatur xàm kumê. Kêp Tĩrtũm Kra jakamã te kot amnhĩ nhĩpêx pyrã nê pa. Uràk nê mex o mex. Nê wa hihtỳx xàja tipxi. Nê wa àhpumunh tỳxja mãanēn tipxi. Jakamã mẽ pahte pano ho Tĩrtũm pumunh kêt tã Jejus pumunh pē te mẽ pahte Tĩrtũm pumunh pyrãk. Uràk nê kot amnhĩ to rax o mẽ pahpiitã mẽ pajakrenh par. Amnepêm kormã mẽmoj kêt ri nhũm Jejus Tĩrtũm kukwak ri mẽmoj piitã ho kator pa. Tã koja Tĩrtũm nhỹrmã kãm mẽmoj piitã òr pa. Kaxkwa kamã mẽmoj piitã nê jar pika piitã hkôt nhũm kãm piitã òr pa.

Nê Jejus xàhpumunh xà pix kukwak ri na mẽmoja arĩ rãhãã. Na pre mẽ panê mẽ pahte amnhĩ tomnuj piitã hpãnhã amnhĩrer par kaxyw mẽ panê ty. Hãmri akupỳm htĩr hãmri nê ma akupỳm kaxkwa hwỳr api. Tĩrtũm xihtỳx o hihtỳx xwỳnhja wỳr akupỳm api. Nê ò krĩ kamã upòk rũm pahi maati hkrĩ xà hã kuri hkrĩ ho hkrĩ. Nê ìhkô hã mẽ pahto amnhĩptàr rãhã ho hkrĩ.

Jejus mẽ Tĩrtũm kapêr o mẽ wrỳk xwỳnhjê jarēnh

⁴ Nê Jejus kot amnhĩ to rax o Tĩrtũm kapêr o mẽ wrỳk xwỳnhjê jakrenh jakamã na pre ã Tĩrtũm kãm kapêr anê nê kãm:

Na ka amnhĩ to rax o mẽ kot ixkapêr o mẽ wrỳk xwỳnhjê jakre.

Mẽ kot inhmã tanhmã amnhĩ nhĩpêx to ho mẽ pa xwỳnh na mẽ.

No mẽ kurom apê Ixkra kumrēx jakamã amex o ate mẽmoj piitã hakrenh par.

Nê apê pika nhõ xwỳnhjê hwỳr ixte amēnh mã xwỳnh na ka. Nà apê Ixkra kumrēx.

Kot paj jarãhã ixpê anhĩpêxã hã mẽ piitã mẽ kãm amnhĩ to amnhĩrít. Pa na ixpê anhĩpêxã.

Anhỹr o Kra Jejus mã kapêr. Na pre kapêr o mẽ wrỳk xwỳnhjê mã ã kapêr anhỹr kêt nê. Jejus mã pix mã ã kapêr anê.

⁶ Nê koja nhỹrmã akupỳn mẽ pahwỳr Kra mēnh kaxyw hãmri nê kapêr o mẽ wrỳk xwỳnhjê mã kãm:

E ota Ixkrata. Ixkra kumrēx na. Kot amnhĩ to rax o mẽ piitã mẽ hakrenh par.

Jakamã kêr ka mẽ apiitã kutã aròròk nê kãm mex o mex ã harê.

Anhỹr o mẽ kãm kapêr. ⁷ Nê kapêr o mẽ wrỳk xwỳnhjê na pre axtem tanhmã mẽ harēnh to nê mẽ harēnh o:

Ixkapêr o mẽ wrỳk xwỳnhjaja na pa hte nhỹhỹm mẽ kurê nhũm htem inhmar xà hkôt ma nhỹhỹm mra nê inhmã tanhmã amnhĩ nhĩpêx to.

Te ixte ma nhỹhỹm kòk nê kuwyja mēnh nhũm ixkapêr kôt nhỹhỹm mōrja pyrãk.

Anhỹr o mẽ harê. ⁸ No ã Krata jarēnh anhỹr kêt nê. Na pre tanhmã kãm kapêr to nê amnhĩ pyrã nê kêp Tĩrtũm ã harê nê kãm:

Pa Tĩrtũm? E ka kot kaj mẽ ho amnhĩptàr rãhã ho akrĩ. Nê akatãt kôt mẽ ho amnhĩptã.

⁹ Koja mẽ tãm amnhĩ nhĩpêx ka ja hã mẽ omu nhũm ja amã mex nê.

No koja mẽ tanhmã amnhĩ tomnuj to ka ja hã mẽ omu nhũm ja apê omnuj nê. Mẽ kot tanhmã amnhĩ tomnuj to ho paja na omnuj tỳx.

Tã ate inhmã hprãm xà hkôt amnhĩ nhĩpêx jakamã na pa mẽ kaxyw axãm ka akĩnh kãm mẽ ho amnhĩptã.

Ixpê anhõ Tirtũm na pa ã amã ixkapêr anê. Anê.

¹⁰ Hãmri nê kãm:

Pa Pahihti. Nã amnepêm kormã mẽmoj kêt ri na ka pre ixkukwak ri pika nê kaxkwa ho akato. ãm hãmri na ka pre ã amnhĩ nhĩpêx anê.

¹¹ Tã nom koja nhỹrmã hamẽ wa hapêx pa. ãm kaxip-ix kot kaj kurom arĩ arãhãã nê aa ajapêx kêt nê.

Kaxkwa nê pika koja wa nhỹrmã te ixkre hã pô htũm kot amnhĩ nhĩpêx pyrãk.

¹² Kot kaj wa hipêx o te mẽ kot ixkre nê pô htũm mã hikranh par nê hpãnhã hã nyw janhõr pyrãk.

Jao pika nê kaxkwa htũm o ajapêx pa nê hpãnhã nyw nhĩpêx. Kaxkwa nyw nhĩpêx nê pika nyw nhĩpêx.

Nom kot kaj pika nê kaxkwa tũmta pyrã nê aa awej nê axirerek kêt nê.

Kot kaj arĩ anyw nê axihtyx rãhã apa ho apa nê aa ajapêx kêt nê. Arãhã atĩr tũm nê apa ho apa xwỹnh na ka.

¹³ E jar inhĩhkõ hã nhỹ nê inhmã mẽ ho amnhĩptãr o akrĩ.

Kot paj mẽ kãm akurê xwỹnhjê pynênh pa nê man awyr mẽ o mra nê anhĩhkram mẽ haxàr pa. Anê.

ã na pre Tirtũmja Kra Jesus mã kapêr anê. No kapêr o mẽ wryk xwỹnhjê mã ã kapêr anhỹr kêt nê.

¹⁴ E kot paj hpãnhã ixprĩ hã mẽ amã Tirtũm kapêr o mẽ wryk xwỹnhjê jarê ka mẽ inhma. Tirtũm mã na htem tanhmã amnhĩ nhĩpêx to ho pa. Na hte nhỹrmã kuri mẽ htĩr tũm nê mẽ pa mã xwỹnhjê hwyr mẽ kurẽ nhũm mẽ ma mẽ hwyr wry nê tanhmã mẽ ho ajuta hto ho pa. Na htem ã amnhĩ nhĩpêx anhỹr o pa.

Mẽ pahte Jesus kaga hkêt ã mẽ pamã karõ

2 Tã ã Tirtũmja Kra kot amnhĩ to rax o kapêr o mẽ wryk xwỹnhjê jakrenh ã harênh kot anhỹr jakamã kwa kêr pu mẽ kapêr mar tỳx rãhã nê hkôt pix mã amnhĩ nhĩpêx o papa. Kot pu mẽ ho anhỹr kêt hãmri nê gaa nê hkaga. ² Na pre Tirtũm kapêr o mẽ wryk xwỹnhjaja amnepê mã mẽ panhĩgêjtjê hwyr wry nê Tirtũm nhỹ hã mẽ kot tanhmã amnhĩ nhĩpêx to ho pa hã mẽ kãm karõ nê ma akupỹm api. Nê katãt kôt ri mẽ kãm Tirtũm kapêr jarênh o pa. Hãmri nhũm mẽ kot hkôt amnhĩ nhĩpêx nê mar mex xwỹnhjaja nhũm mẽmoj mẽ kãm mex nê. No nhũm mẽ kot mar nê ãm mar xwỹnhjaja koja mẽmoj mẽ kêp omnuj nê. ³ Koja nhỹrmã mẽmoj mẽ kêp omnuj tỳx kumrêx nhũm mẽ tee ri amnhĩ tã omu nê tee ri kêp amnhĩptãr prãm kaprỹ nê mex kêt nê pa. Nom mẽ kot Tirtũm kapêr mar tỳx xwỹnhjaja koja mẽmoj mẽ kãm mex o mex. Koja Tirtũm amnhĩ katut kôt mẽ kot amnhĩ tomnuj rênh pa nê axte kãm hamaxpêr kêt nhũm mẽ kuri htĩr tũm nê mex rãhã nê pa ho pa. Na pre Pahihti Jesus mẽ kot kapêr mar o kuhê xwỹnhjê kumrêx mã ã ja jarênh anê nê mẽ kãm:

—Nã kot kaj mẽ amnhĩ kaxyw inhmã ajamaxpêr nhũm Tirtũm ixtã mẽ apumu nê mẽ anê mẽ ate amnhĩ

tomnuj piitã ho hapêx pa nê axte kãm hamaxpêr kêt nê. Anê.

Hãmri nhũm mẽ kot kapêr mar nê hkôt mẽ pa ho mẽ pa nê xwỹnhjaja mar tỳx nê amnhĩ xõ ri mẽ pamã harênh o ri pa. Nê mẽ pamã:

—Nã ãm hãmri. Nã ã ja jarênh kot anhỹr. Anê.

⁴ Hãmri nê mẽ pamã aa mẽ pahte mẽmoj pumunh kêt kwỹ ho anhỹr o ri mẽ pahkôt pa. Tirtũm Karõ kot ja kaxyw mẽ ho mẽ ãhpumunh tỳx jakamã nhũm mẽ ý hã ahpỹnhã tanhmã mẽ pamã amnhĩ nhĩpêx to ho pa. Mẽ pahte ja hã mẽ omunh nê kamã pano puma kaxyw. Nê ã mẽ pajamaxpêr anê nê pajamaxpêr o:

—Nã ãm hãmri na mẽ pamã ã Jejus jarênh anê nê ý hã ã amnhĩ nhĩpêx anhỹr o pa.

Anhỹr o pajamaxpêr kaxyw na prem ã mẽ pahkôt amnhĩ nhĩpêx anhỹr o pa.

Mẽ pahpê Jejus tõ nê htõx ã mẽ pajarênh

Juãw 1.14; Rõmãn 8.3-4; Piripos 2.5-11; Korosê 2.9; Wam Juãw 4.2

⁵ Nê na pre Tirtũm amnhĩ kukamã tanhmã amnhĩ jarênh to nê nhỹrmã kot akupỹm mẽmoj piitã ho nyw nê tãm mẽmoj piitã ho amnhĩptãr o pa hã amnhĩ jarê. No na pre kapêr o mẽ wryk xwỹnhjê mã ã mẽ kot amnhĩ nhĩpêx anhỹr ã mẽ kãm karõ hkêt nê. Koja jajaja mẽ pahto amnhĩptãr o pa hkêt nê. ⁶ Tirtũm kapêr ã kaga htũm kot ja jarênh kot:

Kwa Tirtũm. Nã ãm hãmri na ka hte pika ja kamã ri mẽ ixpa xwỹnhjê jamãr mex rãhã ho apa.

Akĩnhã amarĩ ri mẽ ixpa xwỹnh tã amã mẽ ijapêê. Nê mẽ ixkutã anojarêr rãhã ho apa.

⁷ Na ka hte tanhmã mẽ inhĩpêx to pa mẽ te mẽ ixpê akapêr o mẽ wryk xwỹnhjê pyrãk.

Jao mẽ urãk nê akukwak ri mẽ inhmex nê ixpa ho ixpa.

Mẽ uràn mẽ ixãhpumunh nê ixihtyx kêt tã mẽ inhmex nê ixpa.

⁸ Na ka pre ra ate mẽmoj to akator xwỹnh piitã mẽ inhĩhkram haxà.

Nã ãm hãmri na ka pre ã mẽ inhĩpêx anê Tirtũm. Amex o amex. Anê.

Na pre ra mẽmoj piitãã mẽ panhĩhkram haxà. Pika nê kaxkwa nê kapêr o mẽ wryk xwỹnhjaja nê mẽkarõm-nuti nê kot mẽmoj piitãã hipêxja nhũm mẽ panhĩhkram haxàr pa. Mẽ pahte ãhkõ hã ho amnhĩptãr o papa kaxyw. No na pu mẽ kormã piitã ho amnhĩptãr kêt nê. ⁹ No kêt Jejusja na Tirtũm mẽ pakurom ãhkram mẽmoj piitã haxàr par kumrêx. Kormã pika ja kamã ri pare ri na pre tanhmã amnhĩ nhĩpêx to nê Tirtũm kapêr o mẽ wryk xwỹnhjê hkĩnhã te amnhĩ to grire pyrã nê amnhĩ xà htỳx kamã hamak kãm ty. Tirtũm kãm mẽ pahto mex prãm xà ã mẽ pahpiitã mẽ panê htyk anê. Tã nhũm Tirtũm akupỹm ho htĩr nê akupỹm amnhĩ wyr ho api nê kêp Pahi Maati mex o mex ã harê. Na pre ã Jejusja mẽ panê amnhĩ nhĩpêx anê nhũm Tirtũm ja hã omu nê kukwak ri mẽ pahto mex nê.

¹⁰ Nê Tirtũm kot mẽmoj piitã ho kator jakamã mẽmoj piitã õ na. Na pre mẽ pakukamã hamaxpêr o:

—Inhmã ixkra xohtô hprãm. Kot paj nhÿrmã man amnhÿ wÿr mẽ ho api kê mẽ ixri mex rãhã nẽ pa ho pa. Nà kot paj ã mẽ hipêx anẽ. Nẽ Ixkra Jejus koja kêp mẽ õ Pahihti. Koja mẽ urak nẽ mẽmoj punuj pumunh o pa hãmri nẽ à htÿx kamã hamak o kêp mẽ õ Pahihti mã tãm. Anẽ.

¹¹ Na hte Jejus mẽ panê mẽ pahte amnhÿ tomnuj rê nẽ hpãnhã mẽ pamã mẽ pahte amnhÿ nhÿpêx nyw jagjê nhÿm Tirtÿm ja hã mẽ pahpumunh kôt mẽ pahto hkra. Kêp Jejus Nhÿpêêxà nẽ kêp Mẽpanhÿpêêxà maati jakamã nhÿm Jejusja mẽ pahpê htô nẽ mẽ pahpê htôx ã mẽ pajarẽ nẽ mẽ panhÿ hã hkÿnh nẽ.

¹² Tirtÿm kapêr ã kagà htÿm ã mẽ pajarênh kot anhÿr. Kamã Jejusja Mẽpanhÿpêêxà maati mã mẽ pajarênh kot:

Koja ixtô nẽ ixtôxjaja akapêr mar kaxyw axpên wÿr akuprô pa ma mẽ hkôt mra nẽ mẽ kãm akapêr jarẽ nẽ mẽ ðhkô hã amex ã gre. Anẽ.

¹³ Hãmri nẽ kãm:

Kot paj amnhÿ kaxyw akôt pix mã ijamaxpêr mex o ri ixpa. Anẽ.

Hãmri nẽ hpãnhã kãm:

Ot pa akrajê hkôt ri ixpa ho ixpa.

Ka na ka pre mẽ kêp ixtô nẽ ixtôx kaxyw inhmã mẽ agô.

Koja mẽ ixpyrà nẽ amnhÿ kaxyw amã hamaxpêr rãhã ho pa Tirtÿm. Anẽ.

¹⁴ Nẽ mẽ pahpê pika nhõ xwÿnhjaja na pu htem ãm ri panhÿ pix ã papa. Nẽ panhÿ kamã pahkamrô hã ri papa. Jakamã na pre Jejus kot mẽ panê htyk kaxyw mẽ pahwÿr wÿr nẽ mẽ pahpyrà nẽ ð ho mẽ pakamã kato. Tã mẽmo kaxyw na pre ð ho ð nẽ mẽ pahkôt pa? Nà ð ho htyk o Satanasti pẽ hihtÿx xà ho hapêx par kaxyw na pre ã amnhÿ nhÿpêx anẽ. Satanasti kêp mẽ kot amnhÿ tomnuj xwÿnhjê hpãm nẽ kêp mẽ htyk xwÿnhjê hpãm.

¹⁵ Jakamã na hte kot mẽ pahtã ðhkra pikamÿr pyràk o mẽ panhÿpêx pu mẽ ÿ hã pamã pahtyk pyma nẽ ri papa. Tã ra Jejus kot mẽ pahwÿr wÿr nẽ te kêp mẽ papytãr pyràk o mẽ panhÿpêx jakamã pu mẽ tee ri pahtyk kukamã pajamaxpêr o ri pamã ma ho papa hkêt nẽ.

¹⁶ Nẽ Tirtÿm kapêr o mẽ wÿr kxwÿnhjê ho mex kaxyw na pre Jejus pika hwÿr wÿr kêt nẽ. Mẽ panhÿgêt finat Apraãw pyrà nẽ mẽ panhÿ ho panhÿ xwÿnhjê ho mex kaxyw na pre wÿr. ¹⁷ Ijaew nhõ patrejaja na pre htem mẽ kot amnhÿ tomnuj mÿrapê mẽ hpãnhã Tirtÿm mã mry hkwy pa nẽ hkamrô kapÿ nẽ mẽ ho Tirtÿm wÿ. Kot hã mẽ omunh nẽ mẽ mex ã mẽ harênh kaxyw. Tã nhÿm Jejus wÿr nẽ mẽmo mryta pyrà nẽ ã mẽ panê hkamrô pikapÿr anẽ. Kaxyw na pre mẽ pahtô maati ja mẽ pahwÿr ð ho ð nẽ wÿr nẽ mẽ pahpyrà nẽ ni nhõhy rÿm kato. Jao kêp mẽ pahto Tirtÿm wÿr xwÿnh maati. Na pre Tirtÿm kãm hprãm xà hkôt mẽ panê mẽ pahte amnhÿ tomnuj pãnhã amnhÿrer pa. Tã kot mẽ pahpyrà nẽ mẽmoj punuj pumunh nẽ amnhÿ xà htÿx kamã hamak o pa jakamã kêp mẽ pakamã ukapÿr xwÿnh ã pixi mex na. ¹⁸ Kormã htyk kêt ri na pre mẽ pahpyrà nẽ omnuj nẽ ri pa. Nhÿm mẽkarômnuti nhõ pahi kot tanhmã amnhÿ tomnuj to hprãm xàj tee ri hkôt kãm

ahkrox o pa hkaprÿ nhÿm hkôt amnhÿ nhÿpêx kêt nẽ amnhÿ nẽ ho axtem nẽ. Jakamã koja Satanastija urak nẽ tanhmã mẽ panhÿpêx to nhÿm Jejus mẽ pahtã omu nẽ amnhÿ pyrà nẽ tanhmã kêp mẽ panhÿpêx to pu mẽ ÿ hã kutã amnhÿ to htÿx nẽ papa.

Jejus kot amnhÿ to rax o Mojes jakrenh ã harênh

Juãw 1.17-18

3 E ixkrãmnhwÿjaja. Ra Tirtÿm kot mẽ pahte kapêr mar nẽ tãm amnhÿ nhÿpêx o ri papa kaxyw mẽ pahto hkra jakamã kwa kêr ka mẽ Jejus kot tanhmã mẽ pamã amnhÿ nhÿpêx toja mã ajamaxpêr rãhã ho ri apa. Na pre Tirtÿm mẽ pahwÿr kumẽ nhÿm mẽ pahwÿr wÿr nẽ Tirtÿm kapêr o mẽ pajahkre ho ri mẽ pahkôt pa. Nẽ te kêp mẽ panhõ patre pyrà nẽ mẽ pah-to Tirtÿm wÿr o pa. ² Na pre Tirtÿm finat Mojes kwÿ kaxyw Mojesja xãm nhÿm kãm hprãm xà hkôt tanhmã mẽ hipêx to ho pa. Tã nhÿm hpãnhã mẽ pakaxyw Kra Jejusja xãm nhÿm Mojes pyrà nẽ Tirtÿm kãm hprãm xà hkôt pix mã tanhmã mẽ panhÿpêx to ho pa. Hamẽ na pre wa Tirtÿm jamaxpêr xà hkôt tanhmã kãm mẽ panhÿpêx to ho pa.

³ Koja mẽhõ amnhÿm ixkre mex nhÿpêx nẽ hipêx pa nhÿm hkwyjaja hwÿr mra nẽ omu nẽ mex kumrêx ã harẽ. Nom kot hipêx xwÿnhhta ãhpumunh xà hkôt hipêx jakamã tãm na mex o kot ixkreta jakrenh. Ja pyrà nẽ finat Mojes kot amnhÿ to rax tã nhÿm Jejus kot amnhÿ to rax o kot hakrenh. Mojes te kêp ixkre nhÿpêx-ta pyràk no Jejus te kêp ixkre nhÿpêx xwÿnhhta pyràk jakamã kot amnhÿ to rax o kot Mojes jakrenh.

⁴ Nẽ mẽ kot ahpÿnhã amnhÿ krã hkôt tanhmã ixkre nhÿpêx to jakamã kot hipêx xwÿnhhta na mex o ixkreja jakrenh. Tã ja pyrà nẽ Tirtÿm kot mẽmoj piitã ho kator jakamã kot amnhÿ to rax o kot mẽmoj piitã ho kator xwÿnh jakrenh par.

⁵ Nẽ finat Mojes na pre hte Tirtÿm kãm hprãm xà hkôt tanhmã amnhÿ nhÿpêx to ho pa. Nẽ ma kãm hkwyjê piitã hkôt mẽ kãm kapêr jarênh o ri pa. Tirtÿm tanhmã kot mẽ kãm kapêr tota kukamã nhÿm mẽ kãm harênh o mẽ hkôt pa. No ãm Tirtÿm mã tanhmã amnhÿ nhÿpêx to ho hpa xwÿnh pix na pre.

⁶ Nẽ Kris haxwÿja na pre hte Tirtÿm kãm hprãm xà hkôt tanhmã amnhÿ nhÿpêx to ho pa. Nom Mojes rom kêp Tirtÿm Kra kumrêx jakamã kurom kêp mẽ panhõ Pahihti kumrêx. Tã kwa kêr pu mẽ kãm hprãm xà hkôt pix mã tanhmã kãm amnhÿ nhÿpêx to ho ri papa. Mẽ kot hã tanhmã mẽ panhÿpêx to htã pu mẽ ÿ hã mẽ kutã amnhÿ to htÿx nẽ papa nẽ pajamaxpêr o:

—Nà ixpunuj nẽ ixpa htã kot paj ixpunuj rãhã ixpa ho ixpa hkêt nẽ. Koja nhÿrmã Tirtÿm ixto mex kumrêx pa axte tanhmã ixpunuj to nẽ ixpa hkêt nẽ. Hêxta waa nẽ. Nà ja inhmã hprãm tÿx kumrêx.

Anhÿr o amnhÿ kukamã pajamaxpêr o papa.

Mẽ pahte Tirtÿm kaga hkêt ã mẽ pamã karõ

Wam Korÿt 10.1-11; Jutre 5

⁷ Amnepêem na pre mẽhõja tanhmã Tirtÿm Karõ nhÿ hã kapêr to nẽ kapêr o:

E kêr ka mē Tirtūm kapēr mar t̄yx o apa.
 No ama nē ām ama nē ri hā apa hkêt nē. R̄y kapēr pē akrā hiht̄yx o apa hkêt nē.
 Mē akukamā mē anhḡēt̄jaja na prem ā amnhī nh̄ip̄ex anē nē Tirtūm kapēr pē hkrā hiht̄yx o pa. Kapôt ā Mojes kôt mē pata ā na prem kām Tirtūm kapēr mar prām kêt nē. Nē tee ri amnhī kukamā hamaxpēr nē akup̄ym Ejit w̄yr hkrā nē axp̄en mā: “Kwa na pu mē ra pahpunuj t̄yx nē papa nh̄um Tirtūm ām ja hā mē pahpumu nē tanhmā mē pahto mex to hkêt nē. Mān ra mē pahkaga nà? E kwa pu mē awjanā nē ma akup̄ym Ejit w̄yr mān papa.” Anē.
⁹ Na prem ā axp̄en mā kapēr anh̄yr o ri pa hā amgrā pē 40.
 Tirtūm xatā kot tanhmā mē ho mex to nh̄um mē kot amnhī tā omunh tā ām omu nē ht̄yx ri amnhī hkrā hkôt pa.
 Nh̄um tee ri amnhī tā mē omu nē mē kamā gryk nē.
 Hāmri nē hamaxpēr o: “Nà pēr mē hamaxpēr kot mē hā hk̄w̄y jēt kêt kumr̄ex. Te mē hamak kre hkêt pyrā nē ixkapēr mar kêt nē.” Anh̄yr o hamaxpēr.
¹¹ Hāmri nē mē kām: “E mē inh̄ma. Ā mē ate amnhī nh̄ip̄ex anh̄yrja m̄yrapē kot kaj mē ma ixte mē amā pika mex nh̄or mā xw̄ynhta w̄yr apa hkêt nē.” Anh̄yr o mē kām kapēr. Anē.
 Ā mēhōja Tirtūm Karō nh̄y hā te Tirtūm tām kot mē kām kapēr pyrāk o mē harēnh anē. ¹² Jakamā kwa mē okora ixkrāmnhw̄yjaja. Kêr ka mē amnhī to mex o apa. Tirtūm kēp Mēpahpām ā pixi mex tā kot kaj mē tanhmā ajamaxpēr punuj to r̄y amnhī kaxyw hkôt ajamaxpēr kêt hāmri nē te ate amnhī katut kôt ām pyrāk o hip̄ex nē hkaga. Kwa mē ā amnhī nh̄ip̄ex anh̄yr kêt nē. ¹³ Kêt mē Kris kôt axp̄en to axiht̄yx o ri apa. Nē apkati mē ā axp̄en nh̄ip̄ex anh̄yr rāhā nē. Kot kaj mē anh̄yr kêt hāmri nē mē amā Tirtūm kapēr mar prām kêt ā amnhī to amnhīrīt. Jao tanhmā amnhī tomnuj to ho ri apa nē at̄yx ajamaxpēr o: —Nà ixte ā amnhī tomnuj anh̄yr tā nh̄um Tirtūm ja hā ixpumu nē ām hā ixpumu.
 Anh̄yr o ajamaxpēr japēr. R̄y mē ajamaxpēr o:
 —Nà na pa hte ā amnhī tomnuj anē nh̄um Tirtūm ja hā ixpumu nh̄um ja kām mex nē.
 Anh̄yr o ajamaxpēr japēr. ¹⁴ Kwa mē ri ā ajamaxpēr anh̄yr kêt nē. Amnepē mā mē pahte Kris kôt amnhī xunhw̄yr nh̄um kot mē pahto hkrata ā na pu prem amnhī kaxyw hkôt pajamaxpēr o papa. Tā kêr pu mē arī ā amnhī nh̄ip̄ex anh̄yr t̄yx o papa rāhā ty. ¹⁵ Tirtūm kapēr ā kagā ht̄um kot ja jarēnh kot:
 E kêr ka mē Tirtūm kapēr ma nē mar t̄yx nē.
 No ama nē ām mar nē ri hā apa hkêt nē.
 R̄y mē kot hkaga xw̄ynh̄jē pyrā nē kēp akrā hiht̄yx kêt nē. Anē.
¹⁶ Mē panhḡēt̄jaja na prem Mojes kôt pika pē Ejit rūm kato nē hk̄inh nē ma kapôt ā kormā pika mex w̄yr pa. Nom Tirtūm kapēr mar nē hkôt amnhī nh̄ip̄ex rāhā hkêt nē. Na prem kuma nē hkôt amnhī nh̄ip̄ex o hā apkati grēre htā ra mēmoj nh̄y hā omnuj nē pa hā amnhī pumu nē tee ri amnhī kukamā hamaxpēr. ¹⁷ Jao xatā kapēr nh̄irōp kuhē nē amnhī hkrā hkôt pix mā amnhī

nh̄ip̄ex o pa ho ra hā amgrā pē 40. Hāmri nh̄um tee ri amnhī tā mē omu nh̄um ja kēp omnuj nē. Jakamā nh̄um mē piitā kapôt ā ri pa nē gaa nē pikaprār pa.
¹⁸ Mē kot kapēr mar kêt jakamā nh̄um mē kām:
 —Nà ā mē ate amnhī nh̄ip̄ex anh̄yr o ri apaja m̄yrapē kot kaj mē ixte mē amā mē amex nh̄or mā xw̄ynhta w̄yr apa hkêt nē. Anē.
¹⁹ Tā mē kot amnhī kaxyw Tirtūm kôt hamaxpēr o pa hkêt jakamā na prem pika mexta w̄yr hpōx kêt rāhā pikaprār pa. Nh̄um mē hkra nē mē htāmnhw̄yjē pixjaja na prem mē m̄yr pē hw̄yr pōj nē kamā pa.

Mē pahte Tirtūm kukwak ri pajamakêtkati nē ri papa hā mē pajarēnh

4 Mē pahte Tirtūm kukwak ri pajamakêtkati nē ri papa ho papaja Tirtūm kām hprām jakamā kwa kêr pu mē amnhī pumunh mex o papa. Nē wam mē panhḡēt̄ rom Tirtūm kapēr mar t̄yx nē hkôt mān kêt ri amnhī nh̄ip̄ex mex rāhā nē. Kêr pu mē kurom mē pajamak kām amnhī krit xā hā pika mexta w̄yr pōj. ² Mē kot mē pahpyrā nē Tirtūm kapēr mar mex tā na htem amnhī kaxyw hkôt hamaxpēr kêt nē. Te mē kot mar kêt pyrāk. ³ ām mē kot amnhī kaxyw Kris mā hamaxpēr xw̄ynh pixjaja na htem kukwak ri hamakêtkati nē ri pa ho pa. Amnepē mā mēmoj piitā hkêt ri na pre Tirtūm mēmoj piitā ho kator pa hāmri nh̄um apkati nh̄um axte mēmoj tā àpēnh kêt nē. Ām õ krī kamā arī hamakêtkati nē hkôkôt o hkrī. Tā mē pahte urāk nē pajamakêtkati nē papa ho papaja na kām hprām. No wam ri mē pa xw̄ynhjaja mē kot amnhī tomnuj m̄yrapē na pre Tirtūm mē kot urā nē hamakêtkati nē paja nē mē hkurē. Kapēr ā kagā ht̄um kot harēnh kot:
 Na pre Tirtūm tee ri amnhī tā mē kot hip̄ex ā mē omu nh̄um ja kēp omnuj nē. Hāmri nh̄um mē kām: “Nà kot kaj mē ixkukwak ri axāmnh̄ix ajamakêtkati nē apa hkêt nē.” Anē.
⁴ Nē kot harēnh kot:
 Na pre Tirtūm àpēnh ā arīgro kēp 6 hāmri nh̄um arīgro pē 7ta ā nh̄um axte mēmoj tā àpēnh kêt nē. Na pre arī hkôkôt o nh̄y.
 Arīgro pē 7 ā arī hamakêtkati nē hkôkôt o nh̄y. Anē.
⁵ Nē mē kot kapēr mar nē ām mar xw̄ynh̄jē jarēnh kot:
 Kot kaj mē aa ixkukwak ri axāmnh̄ix nē ajamakêtkati nē apa hkêt nē. Anē.
⁶ Mē panhḡēt̄jaja kot amnhī kaxyw Tirtūm kôt hamaxpēr kêt jakamā na prem hamakêtkati nē ri pa hkêt nē. Tā mē papajaja na Tirtūm arī kām mē paxāmnh̄ix nē pajamakêtkati nē papa hprām. ⁷ Amnepēm Ijaew Tirtūm kôt hamaxpēr kêt jakamā na prem kapôt ā pikaprār pa. Hāmri nh̄um amgrā xohtō nē hap̄ex nh̄um Tirtūm mē hkanrēhā mē htāmnhw̄yjē hō pē finat Tawija mā kapēr nh̄um kuma nē mē pamā tanhmā kapēr tota ā kagā nē hā kagā kot:
 Kwa kêr ka ixkapēr ma nē mar t̄yx nē.
 No mē anhḡēt̄jē pyrā nē akrā hiht̄yx ho inh̄ma nē ām inhmar kêt nē. Anē.
 Na pa pre ra mē amā ā ja jarēnh anē. ⁸ Na pre finat Jojeja finat Mojes m̄yr pē ma pika pē Kanaā hw̄yr mē

hkanrêhã më hkrajê o pa nê hwÿr më o pôj. Tã nhÿm prem Jojue kukwak ri hamakêtkati nê pa ho pa hkê t nê. Kêp ãm kukwak ri ã amnhî nhîpêx anhÿr ronhÿx Tîrtÿm axte më kãm më hamakêtkati nê më hamak kãm amnhî krit nê më pata hkukamã harênh kêt nê. ⁹ Nom më pahte kukwak ri pajamakêtkati nê pajamak kãm amnhî krit nê ri papa ho papaja na Tîrtÿm arí kãm hprãm. ¹⁰ Na pre arîgro pê 6ja ã mëmoj piitã ho kator pa nhÿm apkati nhÿm hamakêtkati nê hkôkôt o nhÿ. Tã kot puj më pahpê hkrajaja amnhî to kuwÿ nhÿm tanhmã më pahkrã hto pu më kukwak ri uràk nê paxãmnhîx nê pajamakêtkati nê papa ho papa. Te Tîrtÿm ãpênh pa nhÿm apkati nhÿm hamakêtkati nê hkôkôt o ÿrta pyrãk. ¹¹ Jakamã kwa kêr pu më amnhî to kuwÿ kê ã më panhîpêx anê pu më uràk nê ã amnhî nhîpêx anhÿr rãhã ho papa. Nom kot pu më pahkwÿ Ijaewjê pyrã nê kapêr kwÿm amnhî nhîpêx o papa hãmri nê më urã nê paxãmnhîx pajamakêtkati nê pa-pa hkê t nê.

Tîrtÿm kapêr te kot wapo xwa gix pyrãk ã harênh

¹² Nê Tîrtÿm kapêrja te í ho tanhmã kot mëmoj to kaxyw hihtÿx pyrãk. Nê te wapo xwa gix pyrãk. Koja mëhõ õ wapo xwa mex nê ho mëmoj jakãr mex nê. Ho mry hi jakãr mex pê kaxwÿnh kãm hi kanhîn o amnhîrît. Ja pyrã nê na hte Tîrtÿm kapêr më pajamaxpêr o amnhîrît nê mex ã harê rÿ omnuj ã harê.

¹³ Nê na htem Tîrtÿm pê mëmoj to pimxur kêt nê. Na hte hprî hã mëmoj piitã omunh pa. Nê më pajamaxpêr kôt më pahpumunh pa. Na pu htem ã kot mëmoj piitã omunh par anhÿr xwÿnhja noo mã tanhmã amnhî nhîpêx to rãhã ho papa.

Jejus kêp më panhõ patre maati hã harênh

Eprêw 10.19-25; Wam Juãw 2.1-2

¹⁴ Nê Ijaew nhõ patrejaja na pre htem Tîrtÿm mã amnhî jarênh xà hã ixkre hwÿr agjê nê kamã më ho Tîrtÿm wÿr o pa. Ja pyrã nê na pre ra Jesus Tîrtÿm nhõ krî hwÿr api nê kamã më pahto hwÿr o hkrî. Kêp Kra kumrêx jakamã kêp më pahto Tîrtÿm wÿr xwÿnh maati. Jakamã kwa kêr pu më amnhî kaxyw hkôt pajamaxpêr tÿx rãhã ho papa. ¹⁵ Satanasti na pre te kot më panhîpêx pyrãk o Jesus nhîpêx. Nê tee ri kot tanhmã kãm kapêr to nhÿm kot mar nê tanhmã amnhî tomnuj to hprãm xà ãm ri kãm ahkrox kaprÿ nhÿm kutã amnhî to htÿx nê hkôt amnhî nhîpêx kêt nê. Tã kot Satanasti kot amnhî nhîpêx ã omunh mex jakamã na hte kêp më pahtãnopxar mex o pa. Kot më paxirerek kôt më pahpumunh mex. ¹⁶ Jakamã kwa kêr pu më amnhî tã kamã pahpijaam kêt kãm paxãmnhîx ri amnhî to hwÿr o papa. Kêp më pakutã nojarê t xwÿnh nê kêp më pakamã ukaprî xwÿnh jakamã kêr pu më tee ri mëmoj tã amnhî pumu nê amnhî to hwÿr kurê kumrêx. Hãmri nê ÿ hã paxãmnhîx nê pajamakêtkati nê ri papa.

⁵ Nê më panhõ patre maati Jesusja Tîrtÿm na pre më pakaxyw ãm. Kêp më pahkwÿ hã më pakaxyw ãm nhÿm hte më pahto Tîrtÿm wÿr o pa. Nê kãm më pahkînh xà nhõr o pa. Kot ja hã më pahpumunh nê më

pahte kapêr kwÿm tanhmã amnhî nhîpêx to ho papa hã më pakamã gryk o hapêx tokyx anhÿr kaxyw.

² Më panhîgê t jaja na pre htem më õ patre maati hwÿr mra nê kãm tanhmã amnhî tomnuj to hã amnhî jarê nhÿm më kuma nê më kamã ukaprî nê. Më urã nê kormã kot Tîrtÿm kôt amnhî nhîpêx totuj anhÿr jakamã na pre më kot tanhmã amnhî jarênh toja ma nê më kamã ukaprî nê. ³ Hãmri nê më hpãnhã Tîrtÿm mã mëmoj gõ nê mãänê n amnhî pãnhã kãm mëmoj gõ. Më uràk nê kot amnhî tomnuj o paja mÿrapê amnhî pãnhã kãm mëmoj gõ. ⁴ No na pre hte patrejaja amnhî krã hkôt kêp patre maati kaxyw amnhî xunhwÿr kêt nê. Tîrtÿm kot më kaxyw më unhwÿr jakamã na pre më kaxyw finat Arãwja xãm nhÿm kêp më õ patre maati hã më ho Tîrtÿm wÿr o pa.

⁵ Nê Kris haxwÿja kêp më panhõ pahi maati hã tãm kot amnhî xãm kêt. Tîrtÿm na pre më pakaxyw ãm nê tanhmã kãm kapêr to nê kãm:

Nà apê Ixkra na ka.

Kot paj jarãhã ixpê Anhîpêêxã hã më kãm amnhî jarê. Anê.

⁶ Nê hpãnhã kãm:

Kot kaj Mekijetek pyrã nê apê patre maati hã më ho ixwÿr rãhã ho ri apa. Anê.

⁷ Jesus kormã pika ja kamã pa ri na pre amnhî to Tîrtÿm wÿr rãhã ho pa. Tõhã hkaprî nê tee ri mëmoj tã amnhî pumu nê amnhî to kuwÿ. Nê tee ri më kot hpîrta kukamã hamaxpêr nê mÿr kãm amnhî to kuwÿ. Kop apu Tîrtÿm kãm më kot kêp hpîr prãm kêt ronhÿx pre tanhmã nê më kãm hkurê xwÿnhjê ho nhÿm më hpîr kêt nê. Jakamã nhÿm pre ã amnhî to hwÿr anê. No ãm Tîrtÿm kãm prãm xà hkôt kãm amnhî nhîpêx prãm jakamã nhÿm kuma no ãm tanhmã nê më ho hkê t nhÿm prem kupî. ⁸ Kêp Tîrtÿm Kra kumrêx tã amnhî xà htÿx kãm hamak kãm ty. Jao Tîrtÿm kãm hprãm xà hkôt amnhî nhîpêx ã amnhî pumunh mex nê. ⁹ Na pre amnhî xà htÿx kãm hamak o amnhî mex o amnhî mex ã më kãm amnhî to amnhîrît. Jakamã na hte më kot kapêr kôt ri amnhî nhîpêx o më pa xwÿnhjê mã më kot amnhî nhîpêx nyw jagjê nê nhÿrmã Tîrtÿm më wa kuri më htîr tÿm nê më pa mã xwÿnhjê hã më harê.

¹⁰ Jakamã na pre Tîrtÿm Mekijetek pyrã nê kêp patre maati kaxyw ãm.

Më pahte Kris kaga nê më pahkurê

Wam Korî t 3.1-2, 13.11, 14.20; Epes 4.11-16

¹¹ Nê Jesus kêp më pahto Tîrtÿm wÿr xwÿnh maati hã harênhja inhã ixprî hã më amã harênh par prãm tã ka më kormã inhmar tÿx kêt nê. Pa tee ri ixprî hã më amã harênh kaprÿ. Te më amã mar prãm kêt o amõr pyrãk. ¹² Amnepê mã më ate Kris kôt amnhî xunhwÿr nê kapêr mar tÿx tã kormã nhãm amnhî xõ ri ho amnhî kwÿjê jahkre ho ri apa hkê t nê. Te më ate hã ano hkê t pyrãk jakamã na pa hte arí më amã kapêr kot amnhîrît mex xwÿnh kwÿ ho më ajahkre ho pa. No kot amnhîrît mex kêt xwÿnh o më ajahkre hkê t nê. Te më hkaràre kot amnhî nhîpêx pyrãk o na ka htem amnhî nhîpêx o apa. Na hte më hkaràre mëõ mex kur kêt nê.

Ăm kormă katorxà hkà pix kaô. Ja pyrà nê ăm Tirtûm kapêr kot amnhîrît mex xwÿnhhta pix na ka mē mar tÿx o apa nom kapêr kot amnhîrît mex kêt xwÿnhja ka mē mar mex kêt nê.

¹³ Nê mē hkarêre kormă Tirtûm kapêr mar kêt jakamă na htem kormă mēmoj mex nê mēmoj punuj pumunh kêt nê. Tă te mē ate mē kot amnhî nhîpêx pyrâk.

¹⁴ Mē kot Tirtûm kapêr mar mex xwÿnhjaja na htem hprî hă kapêr piită mar tÿx nê. Kot amnhîrît mex xwÿnhhta mar tÿx nê määnên kot amnhîrît mex kêt xwÿnhja nhûm mēhprî hă piită mar tÿx nê. Te ho mē aptâr kot mēô mex kur o pata pyrâk. Jao ra mē aptâr jamaxpêr o hamaxpêr o ri pa nê hamaxpêr o:

—Kot paj tām amnhî nhîpêx o ri i xpa nhûm ja inhmă mex nê. Nom kot paj axtem tanhmă amnhî tomnuj to nhûm ja ixpê omnuj nê. Jakamă kot paj tām amnhî nhîpêx pix o ri i xpa nhûm Tirtûm mă ja mex nê. Anê.

6 Na pu prem ra Tirtûm kapêr kot amnhîrît mex xwÿnhhta kwÿ ma. Tām na ja:

Kris kot mē panê tanhmă amnhî nhîpêx to hă harênhja.

Nê mē pahte amnhî tomnuj kaga hă kot mē pamă karôja.

Nê amnhî kaxyw Tirtûm kôt mē pajamaxpêr ă mē pamă karôja.

Nê mē pahpê Tirtûm kra hă amnhî to amnhîrît kaxyw mē kot mē pahkră kumrăr ă pamă karôja.

Nê mē pahte Tirtûm mă tanhmă amnhî nhîpêx to ho papa hkukamă mē kot mē pahkră hă îhkra jaxwÿr nê mē pahto Tirtûm wÿr ă mē pamă karôja.

Nê mē pahtyk nê akupÿm mē pahțîr ă mē pajarênhja.

Nê Tirtûm kot nhÿrmă mē kot amnhî xà htÿx kăm hamak tûm xà hwÿr mē kêp hkra hkêt xwÿnhjê janorja.

Mēmojja piită pu mē ra harênh mar tÿx nê. Prî hă kot amnhîrît mex. Tă kwa kêr pu mē hpănă hijuk ri kot amnhîrît mex kêt xwÿnh kwÿ ma. Jao mē pahpê Tirtûm kra xaptâr mex nê ri papa. ³ Jakamă kwa kêr pu mē kot amnhîrît mex xwÿnh kumrêx kwÿ ma nê hpănă hijuk ri kot amnhîrît mex kêt xwÿnh kwÿ ma. Nê axpên mă harênh răhă ho ri papa. Nà koja Tirtûm kăm ja prām pu mē ă amnhî nhîpêx anhÿr răhă o ri papa.

⁴ Na pre ra mē pahkwÿjaja Kris kaga nê htÿx ri amnhî nhîpêx o pa. Mē kot kapêr mar tÿx tă axtem nê hkaga jakamă koja mē axte kapêr mar kêt nê. Ra mē kăm mar prām kêt. Kot puj mē tee ri axte mē kăm harênh o papa kaprÿ. Na prem hprî hă kuma. Tirtûm kăm mē ho hkra hprām ă harênhja nhûm prem hprî hă kuma nê kăm mar prām nê hkôt amnhî xunhwÿ. Hămri nhûm Tirtûm Karô te mē panhîpêx pyră nê mē hkarô mă agjê nê mē kot amnhî to mex o pa kaxyw tanhmă mē hkră hto nhûm prem ŷ hă tanhmă kăm amnhî nhîpêx to ho pa. Nê kăm Tirtûm kapêr mar prām nê. Nê axpên mă mex o mex ă harênh o pa. Nê aa mē kot mēmoj pumunh kêt kwÿ pumu nê axpên mă harênh o:

—Nà Krisja ăm hămri àhpumunh tÿx o àhpumunh tÿx. Kojă nhÿrmă akupÿn mē pahwÿr wÿr nê axte mē pamă àhpumunh tÿx o amnhîrît pu mē omu.

Anhÿr o kapêr tă tanhmă hamaxpêr to nê hkaga. Jakamă te mē kot axte Tirtûm pê Krata pî hă nhôr nê hprî pyrâk. Nê te mē piită mē noo mă tanhmă haprÿ hto nê tanhmă kăm kapêr punuj to pyrâk. Jakamă kot pu mē tee ri akupÿm tām mē unhwÿr prām kaprÿ.

⁷ Na hte Tirtûm mē pahto mex răhă ho pa. Jao mē pamă mē pahpur ă na rē pu mē kamă panhō rûnh nê. Jakamă mē kot amnhî kaxyw Kris kôt hamaxpêr nê hkôt amnhî xunhwÿr prām xwÿnhjaja te mē hpur mex nê kamă mēmoj ô rûnh pyrâk. Nê urâk nê amnhî to mex o pa. ⁸ Nom koja mē hpur kăm mēmoj nhîgrôt mex kêt japêr. Kamă mrônhi nê kahpare nê mēmoj punuj pix hapôj nhûm mē tee ri omu nê hkaga kurê kumrêx. Tă mē kot Kris kaga xwÿnhjaja te pur punuj kot amnhî nhîpêxta pyrâk nhûm Tirtûm te kêp pur nhô dôn pyrâk. Jao tee ri amnhî tă mē kot amnhî nhîpêx ă mē omu nê mē hkaga kurê kumrêx nê ma mē kot amnhî xà htÿx kăm hamak tûm xà pê kuwÿta wÿr mē rênh pa.

⁹ E ixkrâmnhwÿjaja. Inhă mē akînh jakamă na pa ă mē amă mē kot Kris kaga xwÿnhjê jarênh anê. Nom te mē ate mē urâk kêt. Kris kôt mē ate amnhî xunhwÿr xwÿnh mex na ka mē. Ra mē ate hkôt amnhî xunhwÿr tÿx jakamă te mē apê pur mexta pyrâk. ¹⁰ Na ka htem Kris kôt mē akwÿjê ho mex o ri apa. Te mē amă amnhî tă ma pyrâk o axpên nhîpêx o ri apa nhûm Tirtûm ja hă mē apumu. Tă koja tanhmă ja hă mē ato mex to. Kot tām mē panhîpêx o pa jakamă koja tanhmă mē ate axpên nhîpêx mex tota ă tanhmă mē ato mex to.

¹¹ Tă kêr ka mē arî ă axpên nhîpêx anhÿr o ri apa răhă ty kê nhÿrmă ja hă mē ato mex nê. Ă mē ate amnhî nhîpêx anhÿr o apaja na inhă hprām tÿx kumrêx.

¹² Kot kaj mē ă amnhî nhîpêx anê hămri nê amă kaga nê apa hkêt nê. Nê amnhî nhîpêx o te Tirtûm kra hkwy htyk xwÿnhjaja kormă htîr ri kot amnhî nhîpêxta pyrâk. Na prem amnhî kaxyw Tirtûm mă hamaxpêr tÿx răhă ho pa. Kot mē ho mex ă mē hă amnhî jarênhja nhûm prem amnhî tă kamă hamak răhă ho pa. Tă amnhî tă kamă hamak o pa ry rax răhă ty nhûm Tirtûm ra kot mē hă amnhî jarênh xà hkôt mē ho mex nê. Tă kêr ka mē urâk nê ă amnhî nhîpêx anhÿr o ri apa răhă ty. ¹³ ă na pre finat Apraăwja amnhî nhîpêx anê. Kormă hkra hkêt tă nhûm Tirtûm kăm hkra nê kanrêhă htâmnhwÿjê hkukamă tanhmă mē harênh to nê kăm:

—Pa Apraăw. E inhma. Kot paj aprô mē war ato mex nê. Kot kaj war akra hămri nê gaa nhûm akanrêhă war atâmnhwÿjaja ohtô rax kumrêx. Ăm hămri na pa ă mē hkukamă amă mē harênh anê. Kot paj amă amnhî jarênh xà hkôt ă anhîpêx anê. Ixpê mē anhîpêx xwÿnh na pa ă amă amnhî jarênh anê. Anê.

Tă ă kăm wa hkra jarênh anhÿr tă nhûm wa tokyx hkra hkêt nê. Nom tee ri ja hă amnhî pumu nê Tirtûm kot wa kăm hêx ă hkamnhîx kêt nê. Ăm hkamnâr rom ă hamaxpêr anê nê hamaxpêr o:

—Nà kot paj wa nhÿrmã ixkra. Tirtùm tãm kot wa inhmã wa ixkra jarënh kënã. Anë.

Tã nhÿm amgrã xohtô rax kumrëx në hapêx nhÿm wa hkra. Nhÿm axte amgrã hkwÿ hapêx nhÿm wa hkanrêhã htãmnhwÿ hkwÿ. Ra Tirtùm kot më hkukamã Apraãw mã më harënh xà hkôt. Tirtùmja hihtÿx o hihtÿx në àhpumunh o àhpumunh jakamã na pre amnhÿ jarënh xà hkôt ã wa kãm wa hkra në wa htãmnhwÿjê nhõr anë. Kot ra wa kãm hã amnhÿ jarënh xà hkôt. No ri nhãm mëhõ nhÿxi jarënh kôt wa kãm wa hkra jarënh kêt në. Mëhõ kot we hihtÿx o hihtÿx o Tirtùm jakre nhÿm we ri hixi jarënh kôt ã wa kãm më harënh anë? Amrakati kumrëx. Jakamã na pre wa kãm amnhÿ jarënh o:

—Nà ixàhpumunh xà hkôt na pa ã war amã war akra jarënh anë. Anë.

¹⁶ No pika ja kamã na htem ã amnhÿ jarënh anhÿr kêt në. Na htem mëhõ mã tanhmã mëmoj tã amnhÿ jarënh to kaxyw në mëhõ hihtÿx o kot hakrenh xwÿnh nhÿxi jarënh kôt amnhÿ jarë. Në amnhÿ jarënh o:

—Nà ixte jahti noo mã ã amã amnhÿ jarënh anhÿr jakamã ãm hãmri na pa ã amnhÿ jarënh anë. Anë.

Kot hã amnhÿ to hêx nhÿm hihtÿx o kot hakrenh xwÿnh ta kot hã harënh mar në hã tanhmã homnuj to pymaj na htem ã më hixi jarënh kôt mëmoj tã amnhÿ jarënh anë. Hãmri në kot tanhmã hã ho pymaj ra kot amnhÿ jarënh xà hkôt tanhmã mëmoj nhÿpêx to.

¹⁷ Nom Tirtùm na hte uràk në nhãm mëhõ nhÿxi jarënh kôt ri mëmoj tã amnhÿ jarënh kêt në. Na hte tãm amnhÿ jarënh xà hkôt mëmoj to anë në aa hã amnhÿ to hêx kêt në. Na pre më pahpê hkrajê mã kãm:

—Kot paj nhÿrmã më ato mex rax në. ãm hãmri na pa më amã amnhÿ jarë. Ixte amnhÿ pumunh xà hkôt na pa ã më amã amnhÿ jarënh anë. Anë.

Më pahte ãm hãmri kot amnhÿ jarënhja mar në amnhÿ to hêx kêt ã omunh kurê kumrëx kaxyw. Koja Tirtùm mëmoj tã ã amnhÿ jarënh anë hãmri në hijuk ri axtem hpãnhã tanhmã amnhÿ jarënh to hkêt në. ¹⁸ Jakamã koja nhÿrmã ma amnhÿ wÿr më pahto àpir ã amnhÿ jarë hãmri në ãm hãmri amnhÿ jarë në amnhÿ jarënh o:

—Nà ãm hãmri ixte amnhÿ pumunh xà hkôt na pa më amã ja hã amnhÿ jarë. Anë.

Koja ã amnhÿ jarënh anë hãmri në hijuk ri axte hpãnhã tanhmã mëmoj jarënh to hkêt në. Ra kot ã amnhÿ jarënh anhÿrja koja arÿ rãhã në. Jakamã e kwa kêr ka më tee ri amnhÿ kukamã ajamxpêr o ri apa hkêt në. Ra më pamex në ri papa kaxyw Tirtùm kôt amnhÿ xunhwÿr jakamã kêr pu më arÿ kot më pahto mex rax xà hã arÿgrota jamãr rãhã ho ri papa.

¹⁹ Na hte kanôre ho htÿx xàja kanôre ho htÿx nhÿm ma gô hkôt pa hkêt në. Ja pyrã në kot puj më Tirtùm kot më pahto mex xà kamã pajamak o papa hãmri në hkaga hkêt në.

Amnepê mã na pre hte më panhõ patre maatija Tirtùm mã amnhÿ jarënh xà hã ixkre hwÿr agjê në hkôt ã kupêxê ho hitom maati hwÿr agjê në kamã më ho Tirtùm wÿr o kuhê. Tã nhÿm Jesus akupÿm kaxkwa hwÿr api në Tirtùm ri hkrÿ hãmri në patre maatita pãn-

hã tãm më pahto hwÿr o hkrÿ. ²⁰ Na pre ra më pakukamã kaxkwa hwÿr api në kamã pa ho pa në finat Mekijetekja pyrã në kêp më panhõ patre maati. Tã koja më pahto Tirtùm wÿr rãhã në pa ho pa.

Patre Mekijetek jarënh

7 E kot paj ixprÿ hã më amã tanhmã finat Mekijetekja jarënh to ka më inhma. Krÿ pê Sarë kamã na pre kêp më õ pahi në mãänën kêp mëõ patre. Sarëja më pakapêr kãm kêp: “Më hamakêtkati në ri më pa xwÿnhjê nhõ krÿ.” Jakamã Mekijetekja më pakapêr kãm kêp: “Më hamakêtkati në ri më pa xwÿnhjê nhõ pahi.” Në mãänën kêp: “Pahi kot tãm amnhÿ nhÿpêx o pa xwÿnh.” Në Mekijetek nhÿpêxã në katorxã në higêt nhÿxija më pahte harënh mar kêt. Në kator ã arÿgro në htyk ã arÿgroja mãänën më pahte harënh mar kêt. Tirtùm kapêr ã kagà htÿm kot tanhmã ja jarënh to hkêt. ãm Jesus pyrã në kêp patre hã më ho Tirtùm wÿr rãhã ho pa xwÿnh pix ã kot harënh. ãm ja pix na më pahte harënh mar. Në kot amnhÿ to rax xwÿnh jakamã na pre Apraãw nhÿri omu në hã hpiaaam kaxyw kãm hikukrêx kwÿ gõ. Na pre hkwÿjê më ra më urojê kutã amnhÿ xunhwÿ në pijapu në më kêp më õ pahi ho 4 në më himex. Në më kêp më hikukrêx kwÿptã në hamÿ në ma õ krÿ hwÿr o mõ. Në kormã pry hã mõr ri Mekijetek kaxpa nhÿm amnhÿ wÿr omu në kãm:

—Pa Apraãw? E kê Tirtùm ato mex në ka amex në apa. Anë.

Nhÿm amnhÿ tã kuma në hkÿnh në. Hãmri në kãm më hikukrêx kwÿptãr xwÿnh ta hkwÿ gõ nhÿm hamÿ në ma amnhÿm o mõ. ⁴ Na pre Apraãw kot amnhÿ to rax ã omu në kãm mëmojta kwÿ gõ. Kêp më pahpê Ijaew pãr krax jakamã mãänën kot amnhÿ to rax tã Mekijetekja uràk në kot amnhÿ to rax ã omu në kãm mëmojta kwÿ gõ. ⁵ Finat Mojes kot Ijaew mã Tirtùm kapêr jarënh xà hkôt kãm kugõ. Na pre më kãm:

—Më akwÿ pê finat Rewi hkanrêhã htãmnhwÿjaja kêp më anhõ patre jakamã kêr ka më kãm më akukrêx kwÿ nhõr o ri apa. Kot kaj më akrit kêp 10 në kãm ho pixi në agõ. Në më akàxpore kêp 10 në kãm hõ gõ. Kêr ka më ã më kãm më akukrêx në më akrit kwÿ nhõr o apa anë. Në kêr ka më kãm mëmoj mex pix gõ. Më kêp më akwÿ na më. Më apiitã më apê Apraãw kanrêhã htãmnhwÿ jakamã kêr ka më ã më hipêx anhÿr o apa. Anë.

⁶ Tã Mekijetekja kêp Rewi hkwÿ hkêt tã nhÿm Apraãw amarÿ ã hipêx anë në kãm pahi htyk xwÿnhjê kukrêxta kwÿ gõ. Jao hikukrêxta kamã mëmoj kêp 10 nhÿm omu në kamã kãm ho hpÿnh në kugõ. Na pre ã kãm mëmoj nhõr anë. Hãmri nhÿm amnhÿm hamÿ në kãm:

—Nà ãm hãmri koja Tirtùm ato mex rax në. Anë.

Ra Tirtùm kot Apraãw kanrêhã kãm htãmnhwÿ ho ohtô në më hkukamã më harënh jakamã nhÿm Mekijetekja ã kãm Tirtùm kot ho mex ã harënh anë. ⁷ Më kot amnhÿ to rÿnh o më hakrenh xwÿnh pixjaja Tirtùm kot më ho mex kaxyw më ho àhwÿr o pa jakamã na pre Apraãw o Tirtùm wÿ. Jao kot amnhÿ to rax o kot hakrenh ã amnhÿ to amnhÿrÿt. ⁸ Hãmri në Rewi hkan-

rêhã htàmnhwý kot amnhí nhípêx pyrã në Apraãw o Tirtúm wý në kêp mëmoja jamý. Më urãk në mëmoj kamã kêp 10ja rúm ho hpýnh në amnhím hamý. Nom kot amnhí to rax o Rewi hkanrêhã htàmnhwýjê jakrenh. Tirtúm kapêr ã kagã htúm kot Rewi hkanrêhã htàmnhwýjê htyk par ã më harênh tá tanhmã Mekijetek htyk ã harênh to hkêt jakamã kot amnhí to rax o kot Rewi hkwýjê jakrenh.

⁹ Nê kot pry kamã Apraãw kaxparta ã kormã Rewi kator kêt tá kêp Apraãw kanrêhã htàmnhwý mã xwýnh. Jakamã nhúm Apraãwja Mekijetek mã më hikukrêxta kwý nhõr jao te Rewi mã õr pyrãk. Tá nhúm amgrã xohô në hapêx nhúm Rewi hkanrêhã htàmnhwýjaja hapõj në kêp më õ patre në ri pa. Jao Mekijetek pyrã në më kêp më hikukrêx kwý jamýnh o ri pa.

¹¹ Nê finat Mojes na pre Ijaewjê mã tanhmã Rewi hkanrêhã htàmnhwýjê jarênh to. Kormã më hapõx kêt ri nhúm hkwýjê mã tanhmã më harênh to. Më kêp patre hã më harê. Tá nhúm më hapõj në hprêk në më ho Tirtúm wýr o ri më hkôt pa. Nom më kot tám amnhí nhípêx o pa kaxyw na prem tanhmã më hkrã hto hkêt në. Tanhmã kot më amnhí to në ã më hipêx anê? Jakamã nhúm Tirtúm më hpãnhã më pahwýr kýj rúm mëhõja më nhúm më pahwýr wrý. Nom kêp Rewi hkanrêhã htàmnhwý hkêt. Nê mãänên kêp Rewi hpãm Arãw kanrêhã htàmnhwý hkêt. Axtem te Mekijetek kot amnhí nhípêx pyrãk xwýnh na pre. Jejus Krisja. Tãm na pre më pahwýr wrý hãmri në tanhmã më pahkrã hto pu më ý hã tám amnhí nhípêx o papa. ¹² No Mojes kapêr kot Rewi hkanrêhã htàmnhwý pixjaja kêp më ho Tirtúm wýr xwýnh ã më harênh. Tá nhúm Krisja më pahwýr wrý në më hpãnhã kêp më pahto àhwýr o pa xwýnh. Jakamã na pu htem axte Mojes kapêr kôt amnhí nhípêx kêt në. Pãnhã Jejus kapêr kôt pix mã amnhí nhípêx o papa.

¹³ Nê Jejus kêp Rewi hkanrêhã htàmnhwý hkêt. Katorxã hkôt kêp Apraãw támnhwý Juta hkanrêhã htàmnhwý na pre. Ra më pahte ja mar mex. Aa Juta hkanrêhã htàmnhwýjaja kêp patre hkêt. Na pre Tirtúm jajê mã më kot mëmoj nhõr xã hã mësti kunĩhtita ã kãm mëmoj nhõr në hkwýjê ho hwýr ã më kãm karõ hkêt në. Æm Apraãw támnhwý Rewi hkanrêhã htàmnhwýjê mã pix mã na pre ã më kãm ja hã karõ anê. Tá nhúm Jejus wrý në më hpãnhã më pahto hwýr o pa. Më urãk në kêp Rewi hkanrêhã htàmnhwý hkêt axtem kêp Juta hkanrêhã htàmnhwý htã Rewi hkwýjê hpãnhã më pahto Tirtúm wýr o pa.

Mekijetek pyrã në më pahto Tirtúm wýr xwýnh jarênh

¹⁵ Nê Ijaewja na prem Mojes kapêr mar týx në hkôt amnhí nhípêx tá aa amnhí to mex kêt nhúm Tirtúm tee ri ja hã më omu në hamaxpêr o:

—Nã Rewi hkanrêhã htàmnhwýjaja kêp më õ patre në më ho ixwýr o pa htã nhúm më arĩ htýx ri amnhí tomnuj pix o pa. Jakamã koja më axte ri më ho ixwýr o pa hkêt në. Anê.

Hãmri në më pakaxyw më pahto àhwýr xwýnhja ta në ãm. Kra Jejusja nhúm kuta në ãm. Tãm na hte Rewi

hkwýjê rom tanhmã më pahkrã hto pu më kukwak ri tám amnhí nhípêx në Tirtúm kôt amnhí nhípêx mex në. Jao nhýrmã ma më pahte Tirtúm nhõ krĩ hwýr paxãpirja jamãr o papa.

Jejus na hte Mekijetek pyrã në kêp më panhõ patre maati në më pahto Tirtúm wýr rãhã ho pa. Kêp Rewi hkanrêhã htàmnhwý hkêt tá Tirtúm pyrã në kêp htír tùm në pa ho pa xwýnh jakamã na pre Tirtúmja më pakaxyw kuta në më pahwýr kumê. Kapêr ã kagã htúm kot harênh kot:

Kot kaj Mekijetek pyrã në më ho ixwýr rãhã ho ri apa. Anê.

²⁰ No Rewi hkwýjê mã na pre ã kapêr anhýr kêt në. Æm Jejus pix mã ã kapêr anê në kãm:

E kot kaj apê më ho ixwýr rãhã o apa xwýnh. Kot paj nhýrmã apãnhã axtem mëhõ xãm kêt në. Æm kapxipix kot kaj më ho ixwýr o apa rãhã ho rãhã. Æm hãmri na pa amã ã ixkapêr anê. Ixpê Pahi Maati hã ã ajarênh anê.

²² Anhýr jao Jejus kot amnhí to rax o Rewi hkwýjê jakrenh par ã ho amnhírit. Më kot Ijaew mã Tirtúm kapêr jarênh nhúm më kot mar nom hkôt amnhí nhípêx kêt jakamã nhúm Tirtúm më hpãnhã Jejus xãm. Tapxipix na hte tanhmã më pahkrã hto pu më tám amnhí nhípêx mex o ri papa. ²³ Rewi hkwýjaja na prem axpên mýr pê kêp mëõ patre në ri pa htã htyk pa në hapêx. ²⁴ Nom Jejusja htír tùm në pa ho pa xwýnh jakamã koja më urãk në aa hapêx kêt. Koja më pahto Tirtúm wýr rãhã ho pa në aa jam urer kêt në. ²⁵ Æ Jejus kot amnhí nhípêx anhýr jakamã te kêp Tirtúm wýr më panhõ pry pyrãk. Na pu htem hkôt amnhí xunhwý nhúm më panê më pahte amnhí tomnuj piitã rênh pa në më pahpê Tirtúm kra hã më pajarê.

²⁶ Nê ãm hãmri kêp më pahto Tirtúm wýr xwýnh maati mex na. Më pakurom tám kot amnhí nhípêx mex o pa në aa kot tanhmã amnhí tomnuj to hkêt. Tá ra Tirtúm kot amnhí wýr ho àpir jakamã nhúm ra kuri më pahto hwýr rãhã ho pa. ²⁷ Nê kot amnhí to rax o wam mëõ patre maatijê jakrenh. Wamtaja na prem hkwýjê pyrã në amnhí tomnuj o pa. Jakamã na prem apkati më amnhí tomnuj pãnhã Tirtúm mã mëmoj gõ në kãm amnhí jarê në amnhí to kuwý. Hãmri në rĩ kormã kot nhãm më hwýr më mrar xwýnhjê mã më ho anê në më hpãnhã Tirtúm mã mëmoj nhõr pê më ho kuwý. No kêt Jejusja wam patre maati rom aa kot amnhí tomnuj kêt jakamã na pre hte më urãk në amnhí tomnuj pãnhã Tirtúm mã mëmoj nhõr o pa hkêt në. Æm më papajaja na pre më pahte amnhí tomnuj pãnhã htyk o kãm amnhíre. Æm htyk tipxi htã më pahpiitã më pahpãnhã amnhírer pa. Jakamã koja axte ã amnhí nhípêx anhýr kêt në. Mo kaxyw kot kêt axte më panê ty?

²⁸ Mojes kapêr kôt na pre Ijaew amnhím Rewi hkwýjê xunhwý nhúm më kêp më õ patre në ri pa. Tá no nhúm më urãk në arĩ amnhí tomnuj o pa nhúm Tirtúm tee ri më omu në më hpãnhã më pakaxyw Krata xãm në kãm:

—Nà kapxipix më kurom ate tãm amnhĩ nhĩpêx o apa jakamã kapxipix kot kaj më hpãnhã më ho ixwÿr o apa rãhã ho rãhã. Anê.

Jejus kêp më pahto Tirtûm wÿr xwÿnh maati hã harênh
Rukre 22.20; Sikûn Korîit 3.6-11

8 E kot paj axtem tanhmã më amã më pahto Tirtûm wÿr xwÿnh maati jarênh to ka më inhma. Na hte kaxkwa kamã Tirtûm nhĩhkô hã hkrĩ. İhkô hã kêp Pahi Maati hã hkrĩ xã hã upôk rûm hkrĩ ho hkrĩ.
² Wam patre maatijaja na prem Tirtûm nhõrkwÿ kaàkre wÿr mra nê kamã hitom maati kamã më ho Tirtûm wÿr o pa. Nom nhũm Jesus na hte më kurom kaxkwa kamã Tirtûm nhõrkwÿ mex kãm më pahto àhwÿr o hkrĩ. Örk-wÿ kaàkreja na prem İhkra ho hipêx nom kaxkwa kamã örkwÿ mexja na pre mëhõ İhkra ho hipêx kêt nê. Tirtûm na pre tanhmã hipêx to nhũm kamã Jesusja më pahto hwÿr o hkrĩ.

³ Nê më pahpê Ijaew nhõ patre maatijaja na prem më ho hwÿr kaxyw nê më kot amnhĩ tomnuj pãnhã Tirtûm mã mëmoj nhõr kôt më ho kuwÿ. No Kris na hte ã amnhĩ nhĩpêx anhÿr kêt nê. Ra htyk o kot kãm amnhĩ nhĩ nhõr jakamã na hte wam patre maati pyrã nê xatã kãm mëmoj nhõr kêt nê.

⁴ Tã na hte arĩ Ijaew Mojes kapêr kôt amnhĩm Rewi hkwÿ kêp më õ patre kaxyw më unhwÿ nhũm më ho Tirtûm wÿr o pa. No Jesus kêp Rewi hkanrêhã htãmnhwÿ jakamã kop apu arĩ jar pika ja kamã htĩr nê pa ronhÿx Ijaew nhõ patre pyrã nê kêp më ho Tirtûm wÿr o pa xwÿnh kêt. Am Rewi hkanrêhã htãmnhwÿ pixjaja na htem më kaxyw kãm mëmoj gõ nê hkôt më ho kuwÿ.

⁵ Jar na htem arĩ ã amnhĩ nhĩpêx anhÿr o pa nom kaxkwa kamã na htem ã amnhĩ nhĩpêx anhÿr hkêt nê.

Nê jar Tirtûm nhõrkwÿ kaàkreja te kot kaxkwa kamã örkwÿ mexta pyrãk. Na pre Mojes örkwÿ kaàkre nhĩpêx kaxyw nhũm Tirtûm tanhmã kãm hã karõ hto nê kãm:
—E jãã hixêt prêk nhĩmök ã axãmta ã na pa pre amã ixkreta kukamã ixpĩrĩ hã tanhmã më ate hipêx to hã amã karõ. Tã kêr ka ã hipêx anê. Anê.

Hãmri nhũm kuma nê kot kãm hã karõ xã hkôt hipêx. Hãmri nhũm më õ patre maati ixkreja kamã më ho Tirtûm wÿr o pa. Na prem ã amnhĩ nhĩpêx anhÿr o pa.

⁶ Tã nhũm ra Tirtûm axtem më hpãnhã më pakaxyw Kris xãm nhũm hte më pahto hwÿr mex o wamtajê jakre. Na hte kaxkwa kamã më pahpiitã më pahpupunh mex rãhã ho hkrĩ nê wamtajê rom tanhmã më pahkrã hto pu më tãm amnhĩ nhĩpêx o ri papa. Tirtûm kot finat Mojes mã kapêrja mex nê nom axtem na pre. Tã kapêr nyw na mex o kot wam kapêr jakrenh. Kapêr nyw kôt kot puj më pahtyk tã akupÿm pahĩr nê nhÿrmã Tirtûm më Jesus wa kuri pamex nê pahĩr tũm nê papa ho papa nê axte pahtyk kêt nê. ⁷ Kêp apu Tirtûm kot Mojes mã kapêr kôt më kot tãm amnhĩ nhĩpêx o pa ronhÿx pre Tirtûm axte kapêr nyw ã kagã hkêt nê. ⁸ Nom wam kapêr tũmta na pre më mar tÿx

htã arĩ amnhĩ tomnuj rãhã ho pa nhũm tee ri ja hã më omu nê më kãm:

Nà kot paj axte nhÿrmã më apê Ijaew mã axtem tanhmã ixkapêr to.

⁹ Amnepê m më anhgêtjê mã na pa pre ixkapêr.

Na pa pre Ejit pê më kator nê më kot tanhmã amnhĩ nhĩpêx to ho pa kaxyw tanhmã hã më kãm karõ hto.

Nom na prem ixkapêr ma nê ãm kuma nê ixkôt amnhĩ nhĩpêx kêt nê. Pa tee ri ja hã më omu hãmri nê më hkaga.

¹⁰ Tã kot paj më apê më hkanrêhã më htãmnhwÿ nywÿjê mã axtem ixkapêr ka më ixkapêr nywja ma.

Kot paj nhÿrmã tanhmã më akrã hto ka më ixkapêr nyw mar tÿx nê hã ano htÿx nê ho apa.

Nê akĩnh nê apa.

Nê ixkôt ri amnhĩ nhĩpêx mex o apa.

Nê axpên mã ijarênh o: “Nà ãm hãmri Tirtûm kêp më panhõ Tirtûm na.” Anhÿr o ri axpên mã ijarênh o apa.

Pa amnhĩ tã më ama nê më apumu nê amnhĩ xwar më apê ixkra hã amnhĩm më ajarê.

¹¹ Kot kaj më apiitã ixte amnhĩ nhĩpêx kôt ixpupunh mex o ri apa. Më akãxpore rũnh xwÿnhjaja nê më akãxpore hkryre xwÿnhjaja më apiitã ixpupunh mex jakamã kot kaj më ri axte ixtã tanhmã axpên kukjêr to ho ri apa hkêt nê.

¹² Nê kot paj më ato mex rax o ixpa.

Nê axte tanhmã më ate amnhĩ tomnu hto ho apaja mã ijamaxpêr kêt nê. Anê.

¹³ Nê koja mëmoj ra htũm hãmri nê hapêx tokyx anê. Ja pyrã nê na pre Tirtûm më pamã kapêr tũmta jarênh o:

—E kêr ka më axte ixkapêr tũm mar kêt nê. Pãnhã ixkapêr nyw pix mãn mar o apa nê ãm kôt pix mã mãn amnhĩ nhĩpêx rãhã ho ri apa. Anê.

Tirtûm nhõrkwÿ kaàkre jarênh

9 Nê amnepê m na pre finat Mojesja më panhgêt nê më pahpãmjê mã tanhmã Tirtûm nhõrkwÿ kaàkre jarênh to. Tanhmã më kot hipêx to nê kamã tanhmã amnhĩ nhĩpêx to hã më kãm karõ. Nê kamã tanhmã më kot amnhĩ to Tirtûm wÿr to hã më kãm karõ. Nê tanhmã më hkwÿjê ho hwÿr toja nhũm pre mããnen më kãm hã karõ. No Tirtûm nhõrkwÿ kaàkreja kêp örkwÿ kumrêx kêt. Am më kot omunh nê kaxkwa kamã örkwÿ kumrêx mã hamaxpêr kaxyw na pre.
² Jakamã nhũm prem Mojes kapêr ma nê hipêx. Kamã hitom hamêxkrut. Wam hitom kamã na pre kanê hprêeti xãm nê kutã mēsti xãm. Nê mēsti nhĩmök ã Tirtûm mã õ pãwti jaxwÿ. Më panhõ patre na pre htem Tirtûm mã kugõ nê mēsti ã kãm haxwÿ hãmri nê hk-wÿjê ho kuwÿ. Tã hitom ja na prem kêp Tirtûm nhõ hitom mex ã harê.

³ Nê hitom wa hkaêx kãm na pre kupêxê ho hakwakre kahê xaja ajêt. Haturxã kamã hitomja na prem Tirtûm nhõ hitom maati hã harê. Tirtûm na pre te hirã htÿx kãm hwÿr wrÿ nê te kamã hkrĩ pyrãk. Nê kamã na pre Tirtûm mã mëhkuxwa xã ho xêt xã hã mēs kunĩhti-ja kuhê. Na prem ör o hipêx nê kamã ãm nhũm kuhê.

Nhũm pre hte mẽõ patre hwỳr agjê nê kutã kuhê nê mẽ ho Tĩrtũm wỳ. Nê mês kunĩhti haxwỳja hitom maati kamã kuhê. Na prem pĩ ho hipêx nê ôr o hpro nê kamã ãm. Mêstija kaxwỳnh kãm na pre htem mẽmoj jagjê.

Tĩrtũm kot Ijaew mã tanhmã mẽ kot amnhĩ nhĩpêx to ho pa hã karõ nê kên po hã mẽ kãm hã kagàja nhũm prem kamã kuxà nhũm hikwỳ.

Nê mãânên ôr o xijereja xà nhũm hikwỳ. Nê xijere kamã amnepê mã Tĩrtũm kot kaxkwa rũm mẽ hwỳr mẽõ rênh kwỳ hikwỳ. Mẽõja mẽ kot kãm: “Manã” anhỳr xwỳnhja na prem hkwy hkwàrà nê xijere kamã kugjê hãmri nê mẽsti kamã kuxà.

Nê finat Arãw nhõ kô kot ho amnhĩ kaxpar xà htũm-ta nhũm prem kamã kuxà. Tĩrtũm kot tanhmã ho nhũm kurũm pixõrà muxre hapõx xwỳnhhta nhũm prem mãânên mês kunĩhti kamã kuxà nhũm hikwỳ.

⁵ Nê himõk ã Tĩrtũm kapêr o wrỳk xwỳnh wa hkarõ nhĩpêxja wa hamêxkrut nê axpên kutã wa hkõn krã ho hkrĩ. Axpên wỳr hara koror nê wa hkrĩ. Patre maati kot omunh nê Tĩrtũm kot mẽ hkõt pa ho paja mã hamaxpêr kaxyw. Nê wa hkaêx kãm ahkaprỳja Tĩrtũm kot mẽ nê mẽ kot amnhĩ tomnuj rênh mã hamaxpêr xà na pre.

Ã Tĩrtũm nhõrkwỳ kaàkre kot anhỳr. No kot paj ixprĩ hã mẽ amã piitã harênh par kêt nê. ⁶ Na pre hte mẽõ patre apkati mẽ wam hitom wỳr agjê nê kamã Ijaew ho Tĩrtũm wỳr o pa. ⁷ No hitom maatija ãm mẽ õ patre maati pix na pre hwỳr agjê. Nom apkati mẽ hwỳr pa nê gjêx kêt ãm amgrà pỳnh kãm hwỳr gjêx pỳnh nê. Nê hwỳr gjêx kaxyw nê mẽmo mry pa nê hkamrô ru nê o pa nê hitom maati hwỳr ho agjê. Hãmri nê ho mês kunĩhti nhĩmõk kamĩ nê Tĩrtũm mã kãm:

—Pa Tĩrtũm. E ota mry kamrôta. Mẽ ixpê akwỳjaja mẽ ixte amnhĩ tomnuj jakamã na pa mẽ amnhĩ pãnhã mẽmo mry nhõkre jakà nê kupĩ nê hkamrô ru nê man awỳr o mra. Te kot mẽ ixte amnhĩ tomnuj mỳrapê htyk pyrãk. Jakamã kwa ã mẽ ixte amnhĩ nhĩpêx anhỳrja ã mẽ ixpumunh hkõt mẽ inhnê mẽ ixte amnhĩ tomnuj rê.

Anhỳr o mẽ amnhĩ to kuwỳ. ⁸ Nê patre maati pix na pre hitom maatija wỳr agjê nê mẽ ho Tĩrtũm wỳ. Ijaew na prem ixkre kapem hamãr o kuhê nê hwỳr gjêx kêt nê. Tĩrtũm Karõ kot hã mẽ kãm karõ xà hkõt. Te Tĩrtũm pê amỳm kuhê pyrãk. Tã na htem jarãhã arĩ Ijaew kanrêhã mẽ hkra nê mẽ htãmnhwỳjaja ã amnhĩ nhĩpêx anhỳr o pa. Jao mẽ higêtjê pyrã nê Tĩrtũm pê amỳm kuhê.

⁹ Mẽ kot arĩ Tĩrtũm mã mry hpar nê hkamrô ho mẽmoj kamĩr nê amnhĩ to hwỳr o pa htã na htem arĩ hamaxpêr punuj pix o pa.

¹⁰ Tĩrtũm kapêr tũm kot tanhmã mẽmoj tã mẽ kãm karõ hto.

Na pre tanhmã mẽ apkur xà hã mẽ kãm karõ hto nhũm htem pix kur o pa.

Nê tanhmã mẽ hkõm xà hã mẽ kãm karõ hto nhũm htem pix o hkõm o pa.

Nê tanhmã amnhĩmnuj to hã tanhmã mẽ kot amnhĩ kuhõnh to hã karõja nhũm htem hkõt pix mã tanhmã amnhĩ kuhõnh to ho pa.

Nê tanhmã mẽ kot ri mẽ hikukrêx kuhõnh to hã mẽ kãm karõja nhũm htem kõt pix mã tanhmã kuhõnh to ho pa.

Ã na pre Tĩrtũm Kris kukamã mẽ kãm mẽmoj tã karõ rax anê. Kris kutêp pix mã ã mẽ kot amnhĩ nhĩpêx anhỳr kaxyw. No mẽ pahte arĩ ã amnhĩ nhĩpêx anhỳr kaxyw kêt. Na pre ra Kris mẽ pahwỳr wrỳ nê Tĩrtũm kapêr tũm o hapêx nê hpãnhã mẽ pamã kapêr nyw jarê pu mẽ hpãnhã nywta kõt pix mã amnhĩ nhĩpêx o papa. Kapêr nywja mex o mex. Nê mex o wamta jakrenh.

Kris htyk o mẽ pahte amnhĩ tomnuj pãnhã amnhĩrer ã harênh

¹¹ Tã na pre Krisja tãm mẽ pahwỳr wrỳ nê kêp mẽ pahto Tĩrtũm wỳr xwỳnh maati nê patre hpãnhã mẽ pahto hwỳr o pa. Nom jar pika ja kamã mẽ kot mẽ ãhkra ho Tĩrtũm nhõrkwỳ kaàkre nhĩpêxta wỳr àr nê kamã mẽ pahto hwỳr kaxyw na pre wrỳk kêt nê. Na pre ra akupỳm kaxkwa hwỳr api nê kamã õrkwỳ mex wỳr axà nê kamã tanhmã mẽ pahto mex to nê tanhmã mẽ pahto Tĩrtũm wỳr to rãhã ho hkrĩ. ¹² ã kaxkwa kamã Tĩrtũm nhõ hitom maatija wỳr àr tipxi htã mẽ pahpiitã mẽ pahte amnhĩ tomnuj pãnhã amnhĩrer pa. Nom mẽmo mry kamrô ho mẽ pahpãnhã amnhĩrer kêt nê. Mõx kamrô rỳ motre kamrô ho mẽ pahpãnhã amnhĩrer kêt nê. Amnhĩ kamrô ho na pre mẽ pahpãnhã amnhĩre. Tyk nê hkamrô pikapĩrta o mẽ pahpiitã mẽ pahpãnhã amnhĩrer pa.

¹³ Nê amnepêm Ijaew kot Tĩrtũm kapêr tũm kõt amnhĩ nhĩpêx mex o pa hkêt jakamã nhũm tee ri mẽ omu nê mẽ kot amnhĩ tomnuj o mẽ pa xwỳnh ã mẽ harê. Jakamã na pre mẽõ patre xatã mry kamrô ho mẽ hkamĩ. Mõx kamrô nê motre kamrô ho mẽ hkamĩ. Na pre mõx krare hkwy hpa nê ho hxêt nê hprã ho hkwyjê kamĩ. Æ na prem xatã mẽ hipêx anhỳr o pa. Tĩrtũm kot ja hã mẽ omunh nê mẽ mex ã mẽ harênh kaxyw. Nom te mẽ krãhkà pix mex pyrã nê mẽ hkrã kaxwỳnh kãm arĩ hamaxpêr punuj o pa. ¹⁴ ã na prem amnhĩ nhĩpêx anhỳr o pa. Nom Krisja mẽ kurom aa tanhmã amnhĩ tomnuj to hkêt jakamã na pre mẽ pahte amnhĩ tomnuj xwỳnhjê nê ty. Te mẽ kot amnhĩ nê mõx rỳ motre hpar nê hkamrô runhta pyrãk o amnhĩ nhĩpêx nê mẽ panê Tĩrtũm mã amnhĩ gõ nhũm pre mẽ kãm hkurê xwỳnhjaja kupĩ. Na pre Tĩrtũm Karõja ã kot mẽ panê htyk anhỳr kaxyw tanhmã ho hihtỳx to. Karõja aa hapêx kêt kumrêx rãhã nê pa ho pa xwỳnh jakamã na pre Kris tykja kukamã tanhmã ho hihtỳx to nhũm mẽ panê ty. Tapxipix na mẽ pahte tãm amnhĩ nhĩpêx o papa kaxyw kêp tanhmã mẽ pahkrã hto xwỳnh. Jakamã na pu htem ra pajamaxpêr nyw o pajamaxpêr o papa nê pajamaxpêr o:

—Na pa pre tee ri inhmã amnhĩ krã hkõt tãm amnhĩ nhĩpêx o ixpa hprãm kaprỳ nê ãm amnhĩ tomnuj pix o ri ixpa. Tã Kris kot inhnê htyk o hkamrô pikapĩr ã

harênh ma nê amnhî kaxyw hkôt ijamaxpêr tÿx nê nhûm amnhî tã ixpumu nê ixte tãm amnhî nhîpêx o ixpa kaxyw ixãm. Jakamã kot paj ãm Tirtûm pix mã kãm tanhmã amnhî nhîpêx to ho ri ixpa. Tîr rãhã nê pa ho pa xwÿnh jakamã kot paj nhÿrmã kuri urak nê ixtîr tûm nê ixpa ho ixpa. Anê.

¹⁵ Nê amnepê mã na prem piitã Tirtûm kapêr tûm kôt amnhî nhîpêx mex o pa hkêt nê. Mê kot xatã hkôt amnhî nhîpêx o pa hã amnhî jarênh tã hkôt amnhî nhîpêx kêt nê. Jakamã na pre Kris wrÿ nê mê pahte hkôt amnhî xunhwÿr mã xwÿnhjê mã Tirtûm kapêr nyw jarê nê mê pamã:

—Kot paj mê anê ty nhûm Tirtûm ã ixte amnhî nhîpêx anhÿrja kukwak ri mê ato mex rãhã ho pa. Anê.

Hãmri nê amnhî jarênh xà hkôt mê pahte amnhî tomnuj piitã hpãnhã amnhîrer kaxyw mê panê ty. ¹⁶ Te jar pika ja kamã mēhō htyk kukamã hkrajê mã tanhmã amnhî jarênh to pyrãk. Na htem htyk kaxyw nê hkrajê mã:

—Nà kot paj mēmo arÿgro hã ty ka mê inhmÿr pê ixpê ixkukrêx kwÿ o arÿk.

Anhÿr o na htem amnhî jarê. Hãmri nê ty nhûm hkrajaja amnhîm õ mēmoj to arÿk pa. Mē hipêêxà kukwak ri mê hikukrêx mex nê mÿr pê o pa. No kormã htîr ri nhûm mê kormã kēp hamÿnh kêt nê. Ja pyrã nê na pre Tirtûmja Jesus htyk kukwak ri tanhmã mê pahto mex to pu mê kukwak ri mê pamex nê pahkînh nê ri papa.

¹⁸ Nê Tirtûm kapêr tûm kôt na pre hte mê õ patre mry pa nê ãm hkamrô runh kôt pix mã mê ho Tirtûm wÿr o pa nhûm amnhî tã mê omunh xà hkôt mê kuma nê tanhmã mê ho mex to.

¹⁹ Na pre finat Mojesja Ijaew mã Tirtûm kapêr tûm piitã harê nê harênh pa hãmri nê mōx õxpî nê kaxyw motre hōxpî. Hãmri nê xijere kamã hamê wa hkamrô runh pa nê kamã gō hwÿ ru. Hãmri nê kaxyw mēmo pî hpa hkryre pê "isop" jarênhja kwÿ kukê. Nê kaxyw ôwêhti hkî kamrêkre hkwy hpy nê isop mê ho pihkàr pa nê mry kamrô o go. Hãmri nê ho hkwyjê kamî. Nê ho Tirtûm kapêr ã kagà tûmta kamî. ²⁰ Hãmri nê ho anhÿr pa nê mê kãm:

—Nà na Tirtûmja ixte mry kamrô ho mê akamîr pumunh kôt mê pamã kapêr o: "E kot kaj mê ixkapêr kôt amnhî nhîpêx o ri apa hã kot paj tanhmã mê ato mex to rãhã ho ri ixpa ka mê amex nê akînh nê ajamakêtkati nê ri apa. Jakamã kêr ka mê mry kamrô ho mēmoj piitã hkamîr pa. Nê ho amnhî kamî. Kêr pa ja hã mê apumu hãmri nê axte tanhmã mê ate amnhî tomnuj tota mã ijamaxpêr kêt nê." Anê. ã na Tirtûm mê pamã kapêr anê. Anê.

Hãmri nê hpãnhã mry kamrôta o òrkwy kaàkre kamî. Nê hkre kamã mēmoj kuhê xwÿnh piitã nhûm ho hkamîr pa. ã na pre mê õ patre mê mex kaxyw mê hipêx anhÿr o pa. Mê kot tōhã mēmoj to hpÿnhre nê ho hkamîr kêt jakamã kironhÿx pre mēmoj piitã ã hipêx anhÿr o pa. Kop apu mê kot mry hpar nê hkamrô runh kêt ronhÿx pre Tirtûm arÿ mê kot amnhî tomnuj mã hamaxpêr rãhã ho pa.

²³ Na prem ã Tirtûm nhòrkwy kaàkre kamã mēmoj kuhê xwÿnh piitã mex kaxyw hipêx anê. Te Tirtûm kot mê pahto mex nhûm mê pahte nhÿrmã ma kaxkwa hwÿr õ krî hwÿr paxàpirta pyrã nê. Nom mê kot mry hpar nê hkamrô runhta kukwak ri mê pamex nê papa hkêt. ãm mēhō kamrô kukwak ri mê pamex xwÿnh ta pix kukwak ri na mê pahpê pahÿr tûm nê papa mã xwÿnh. Ja na mex o mry kamrô piitã hakrenh pa. ²⁴ Jesus Krisja pix kukwak ri. Tãm na pre patre pyrã nê mê pahto Tirtûm wÿr kaxyw mê ïhkra ho Tirtûm nhòrkwy kaàkre nhîpêx ta wÿr gjêx kêt nê. ãm ixkre kaàkre pix na pre. Na pre kaxkwa kamã Tirtûm nhò krî hwÿr axã. Tã arÿ kamã Tirtûm nhîhkô hã mê pahto hwÿr rãhã ho hkrî.

²⁵ Nê Ijaew nhò patre maati na hte amgrã mê òrkwy kaàkre kamã hitom maati hwÿr gjêx tipxi. Nê amnhî kôt mry kamrô ru nê ho agjê. Tirtûm kot hã omunh nê axte mê kot amnhî tomnuj mã hamaxpêr hkêt kaxyw. Nom Kris na pre mê urak nê mēmo mry pa nê Tirtûm mã hkamrô kapîr kêt nê. Kamrô na pre mê panê axkapî. Nom patre pyrã nê amgrã mê ã amnhî nhîpêx anhÿr kêt nê. Na pre htyk o Tirtûm mã amnhî nhòr tipxi. ²⁶ Kêp apu patre pyrã nê amgrã mê mê panê htyk o pa ronhÿx ra mê panê htyk xohtô rax kumrêx. Nhÿx pre amnepê mã Tirtûm kot mēmoj piitã ho katorta rûm amgrã mê mê panê htyk o pa ho hkra. Jao xatã htyk o amgrã xohtô rax kumrêx. Nom ja kot anhÿr kêt. Na pre mê pahwÿr wrÿ nê mê panê htyk tipxi htã htykja o mê pahte amnhî tomnuj piitã hpãnhã amnhîrer par kumrêx. Jakamã mo kaxyw koja axte ty?

²⁷ ãm pahtyk tipxi htã koja Tirtûm nhÿrmã akupÿm mê pahpiitã mê pahto pahÿr nê ahpÿnhã tanhmã mê pajarênh to nê ahpÿnhã tanhmã mê panhîpêx to. Kormã mê pahÿr ri mê pahte amnhî nhîpêx ã mê pahpumunh xà hkôt tanhmã mê panhîpêx to. ²⁸ Ja pyrã nê na pre Krisja ãm mê panê htyk tipxi htã mê pahto ohtô nê mê panê mê pahte amnhî tomnuj piitã rênh pa. Hãmri nhûm Tirtûm akupÿm ho htîr nê akupÿm amnhî wÿr ho api. Tã koja nhÿrmã akupÿn mê pahwÿr wrÿ. Nom axte mê pahte amnhî tomnuj pãnhã amnhî rer kaxyw mê panê htyk kaxyw wrÿk kêt nê. Ra kot mê pahte amnhî tomnuj pãnhã amnhîrer kênã. Kojã akupÿn wrÿ nê mê pahte amnhî wÿr kamã pajamak o papa xwÿnhjaja ma akupÿm amnhî kôt kaxkwa hwÿr mê pahto àpir pa. Ra mê pahtyk tã nhûm akupÿm mê pahto mê pahÿr nê ma amnhî kôt mê pahto àpir pa pu mê kuri pamex nê pahÿr tûm nê papa ho papa.

Kris kot mê panê htyk tipxi hã harênh

10 Nê arÿ mê kot Tirtûm kapêr tûm kôt amnhî nhîpêx o mê pa xwÿnhjaja kormã hprî hã Tirtûm kot tanhmã mê pahto mex to hã harênh mar tÿx kêt. Na prem kormã hkwy pix ma. Na hte mê õ patreja amgrã mê kãnhmã kaxkwa hwÿr mry kamrôta pê nê mê amnhî to Tirtûm wÿ. Kot ja hã mê omunh nê axte mê kot amnhî tomnuj mã hamaxpêr hkêt kaxyw. Tã ã mê kot amnhî nhîpêx anhÿr tã arÿ Tirtûm kapêr kwÿm amnhî nhîpêx rãhã ² jakamã na prem xatã kãm mēmo

mry kamrô runh o pa. Kêp apu tãm amnhî nhîpêx nê tãm ri hamaxpêr ronhÿx arî ã amnhî nhîpêx anhÿr o pa hkêt nê. Nê xatã amnhî pãnhã mry hpar nê hkamrô ho Tirtûm nhôrkwÿ kaàkre kamã mëmoj kamîr kêt nê.

³ Nom na prem tãm amnhî nhîpêx o pa hkêt nê. Më kot amgrã më Tirtûm kot më nê më kot amnhî tomnuj rênh kaxyw më kot kãm mëmo mry hpar o pa htã no ãm hkôt amnhî nhîpêx xwÿnh ã amnhî jarênh kêt nê. Arî më kot amnhî tomnuj o pa jakamã na prem mry hparta ã amnhî pumu nê tee ri amnhî kukamã hamaxpêr o hkaprî nê pa. ⁴ Nom na hte môx kamrô rÿ motre kamrôja më panê më pahte amnhî tomnuj rênh kêt nê. ⁵ Jakamã na pre Krisja më pahwÿr nojarêt nê Tirtûm mã amnhî jarênh o:

Pa Tirtûm? E kot paj ma më hwÿr wrÿ.

Më kot amnhî pãnhã amã mry hparta apê hprãm nõkati nê amã hkînh kêt.

Ate më nê më kot amnhî tomnuj rênh kaxyw më kot amã mëmo mry hparta amã hprãm kêt. ãm ixkukamã na ka pre ã më kot amnhî nhîpêx anhÿr kaxyw më kãm ja hã karô.

Më kot mry nhîpêx o te pa ixte më nê ixtyk nê ixkamrô pikapîr pyrãk o na prem ixkukamã ã amnhî nhîpêx anê.

Jakamã na ka ra më kaxyw inhmã inhî gô pa më urãk nê inhî ho inhî.

Tã kot paj ma më hwÿr wrÿ. Ixte amã hprãm xà hkôt pix mã ixte tanhmã amã mnhî nhîpêx to ho ixpa kaxyw. Akapêr ã kagà htûm kot tanhmã ixkukamã ijarênh to xà hkôt kot wrÿ nê ã amã amnhî nhîpêx anê. Anê.

Hãmri nê man më pahwÿr wrÿ. ⁹ Kot Tirtûm kapêr tûm o hapêx par nê hpãnhã tãm më panê htyk kaxyw wrÿ. Jakamã na pre nojarêt nê Tirtûm mã amnhî jarênh o:

—E ixte amã hprãm xà hkôt amnhî nhîpêx kaxyw kot paj ma më hwÿr wrÿ.

¹⁰ Anhÿr jakamã wrÿ nê Tirtûm kãm hprãm xà hkôt më panê ty. Na pre nhãm mëhõ më kãm hkurê xwÿnhjê mã ôr nhûm më kot hpîr nhûm amarî htyk kêt nê. Na pre amnhî grônh kôt më kãm amnhî gô nhûm prem kupî. Hãmri nhûm htyk o më pahte hkôt amnhî xunhwÿr xwÿnhjê o Tirtûm kra. Më kot xatã mry hparta rom htyk tipxi tã më pahpiitã më pahte amnhî tomnuj pãnhã amnhîrer pa.

¹¹ Nê më ô patrejaja na htem apkati më Tirtûm nhôrkwÿ kaàkre kamã kãm tanhmã amnhî nhîpêx to. Nê apkati më hkwyjê hpãnhã mry hkwy hpa nê hkamrô ru nê më ho Tirtûm wÿ. Tã nom ja hã më omunh xà hkôt më nê më kot amnhî tomnuj rênh kêt nê. ¹² No kêt Kris na pre më kot xatã mry hpar xwÿnhhta rom ãm htyk tipxi htã më pahte amnhî tomnuj piitã hpãnhã amnhîre. Hãmri nê ma akupÿm kaxkwa hwÿr api nê Tirtûm nhîhkô hã Pahi Maati hkrî xà kamã upôk rûm hkrî ho hkrî. ¹³ Koja kuri hkrî rãhã nhûm Tirtûmja îhkram më kot kutã amnhî xunhwÿr xwÿnhjê jaxàr pa. Ja kaxyw na kormã kuri hamãr o hkrî. ¹⁴ ãm htyk tipxi htã htykja o më pahte hkôt amnhî xunhwÿr xwÿnhjê ho Tirtûm kra pu më ra hpãnhã tãm amnhî nhîpêx

rãhã ho papa. Nê pajamxpêr mex o ri papa. Tirtûm kãm hprãm xà hkôt.

¹⁵ Amnepêm më kot Tirtûm nhÿ hã kapêr jarênh o më pa xwÿnhjaja na prem më panhîgêjtê mã kapêr o pa. Tirtûm Karô nhÿ hã më kãm kapêr nê më kãm:

¹⁶ —E na Tirtûm më pamã amnhî jarê nê amnhî jarênh o:

Kot paj nhÿrmã axtem ixkapêr nyw o më amã ixkapêr.

Nê më akrãm hagjê ka më mar tÿx pè hã ano htÿx nê ho apa.

Ixkapêr tûm na pa pre më amã kên pota ã hã kagà.

Nom ixkapêr nyw kot paj axtem më akrãm hagjê.

¹⁷ Nê kot paj axte më ate amnhî tomnuj mã ijamaxpêr kêt nê.

Anhÿr o më pamã amnhî jarênh. Anê.

¹⁸ Tã ra axte më pahte amnhî tomnuj mã hamaxpêr kêt ã kot amnhî jarênh jakamã mo kaxyw kot pu më arî amnhî pãnhã kãm mëmo mry hpar nê hkamrô runh o papa? Tã më pahkwÿjaja na hte arî kãm ja ho anhÿr prãm o pa. E kwa më axte ã amnhî nhîpêx anhÿr kêt nê ixkwÿjaja.

Akupÿm më pahte amnhî nhîpêx tûm o paxujanãr kêt ã më pamã karô

Matêwre 27.51; Rukre 23.45; Rômãn 5.1-2; Epes 3.12; Eprêw 4.14-16

¹⁹ E ixkrãmnhwÿjaja. Ra Jejus kot më panê htyk o hkamrô pikapîr jakamã na pu htem arî tee ri amnhî kukamã pajamxpêr hkêt nê. Tirtûm axte kot më pahte amnhî tomnuj mã hamaxpêr kêt jakamã na pu htem paxãmnhîx amnhî to hwÿr o papa. Te paxãmnhîx ôrkwy kaàkre kamã hitom maati hwÿr pagjêx nê kamã amnhî to hwÿrta pyrãk. Jao ra më papamjaja amnhî to hwÿr o papa nhûm patre axte më pahto hwÿr kêt nê. Jejus na pre htyk o më pamã hitom maati wÿr hakwakre kahêxã hã kupêxêja kôt ã ho axkjê. Jao më paxãmnhîx hwÿr më pagjêx kaxyw më pamã kahê xà më. ²¹ Tã ra kêp Tirtûm nhô krî kamã më pahto hwÿr xwÿnh maati na. Nê mex kumrêx o jar pika ja kamã patre kot më ho hwÿr o pa xwÿnhhta jakrenh. ²² Jakamã e kwa kêr pu më mãmrî paxãmnhîx amnhî to Tirtûm wÿr o papa. Ra Jejus kot më panê htyk nhûm më pahte amnhî kaxyw hkôt pajamxpêr rãhã ho papa jakamã kêr pu më axte më pahpê amnhî tomnuj xwÿnh ã amnhî jarênh kêt nê. Kêr pu më nhÿrmã tanhmã pajamaxpêr punuj to rÿ tanhmã amnhî tomnuj to hãmri nê tee ri ja hã amnhî pumu nê pahkaprî kamã amnhî to Tirtûm wÿr kurê kumrêx. Jejus ra kot më pahte amnhî tomnuj pãnhã amnhîrer par jakamã kot puj më Tirtûm mã tanhmã më pahte amnhî tomnuj to hã amnhî jarê nhûm më pama nê axte kãm hamaxpêr kêt nê. Pu më te paxwÿr nê pahte amnhî nê pagrã htyk kuhõnh par nê akupÿm pamex pyrãk. Nê axte paxãmnhîx amnhî to Tirtûm wÿr o papa.

²³ Nê më kot Kris ã tanhmã më pahto htã kwa kêr pu më tee ri amnhî kukamã pajamxpêr kêt nê. Rÿ pajamaxpêr o:

—Konën. Koja më tanhmã hamaxpër to nê Kris ã ixpî rÿ ko. Pa apu më kot ixpîr pymaj akupÿm ixte amnhî nhîpêx tûm o awjanã nê akupÿm hkôt amnhî nhîpêx japër rÿ ko. Anê.

Kwa pu më tee ri ã pajamaxpër anhÿr hkêt nê. Pu kêt më pajamaxpër o:

—Nà më kot Kris ã tanhmã ixto htã kot paj aa hkaga hkêt nê. Më kot hã ixpîr mã tã kot paj hkaga hkêt kumrêx.

Anhÿr ã amnhî jarë. ²⁴ Nê kêr ka më akwÿjê mã anê kê më mëmoj to axpên kutã nojarêt rãhã ho ri axpên kôt pa. Jao tanhmã axpên to mex to o ri axpên kôt pa.

²⁵ Na pre ra më pahkwÿjaja tanhmã hamaxpër to nê axte më pahkôt pikuprôn nê Tirtûm kapër mar o hkrî hkêt nê. No kêr pu më ho më urãk kêt nê. Kêr pu më arî xatã axpên wÿr akuprô nê më pahte tee ri amnhî kukamã pajamaxpër nê axpên mã pakapër o papa. Kêt më panhõ Pahihtija ra akupÿn më pahwÿr wrÿk kaxyw jakamã kwa kêr pu më kutêp arî axpên mã pajamaxpër mex nhõr pê tãm axpên nhîpêx mex rãhã ho i papa.

²⁶ Më pahkwÿjaja kot Tirtûm kapër mar mex tã na htem kuma nê ãm kuma. Kwa kêr ka më ho më urãk kêt nê. Kris kot më panê htyk ã harênhja më kot mar mex tã na htem kuma nê ãm kuma nê hkaga kumrêx. Jakamã mëhõ koja Kris pyrã nê htyk o më kot amnhî tomnuj pãnhã amnhîre? Nà amrakati kumrêx. ãm Jejus pix na pre Tirtûm ja kaxyw ãm. Tapxipix na pre ã më panê amnhî nhîpêx anê. Tã nhÿm më kot hkagaja mÿrapê koja më nhÿrmã më tãmjaja më kot amnhî tomnuj pãnhã amnhîre. ²⁷ Më kot Tirtûm kutã amnhî xunhwÿr xwÿnh na më. Amnepêm na pre Tirtûm më kot kutã amnhî xunhwÿr xwÿnhjê kaxyw më kot amnhî xã htyx kamã hamak tûm xatã nhîpêx. Tã ra më kot Jejus kaga jakamã koja nhÿrmã ma hwÿr më rênh pa nhÿm më tee ri kãm hwÿr pa hprãm kêt kaprÿ. ²⁸ Amnepêm finat Mojesja kormã htîr ri na pre hte mëhõ pixi nê kapër kaga nê akupÿm kot amnhî nhîpêx tûm o awjanã nê tanhmã amnhî tomnuj to nhÿm hkwÿjaja ja hã omu. Tanhmã axkrut rÿ axkrunêpxi nê ja hã omu. Hãmri nê ma Mojes wÿr mra nê axpên kôt kãm tanhmã kot amnhî tomnuj to hã harê. Hãmri nhÿm harênh ma nê më kãm hã amÿnê nhÿm tee ri kãm htîr prãm kaprÿ. Më kot akupÿm amnhî nhîpêx tûm o ujanãr nê amnhî tomnuj o paja mÿrapê na prem më kupa. ã na pre htem më hipêx anhÿr o pa.

²⁹ Nê koja mëhõ tanhmã Tirtûm Kra Jejus o kapër punuj to. Tirtûm kapër ã kagã htûm kot ra më kot kêp Tirtûm Kra hã harênh mar mex tã axtem nê tanhmã ho kapër punuj to ho pa. Kot më panê htyk nê hkamrô pikapîr kôt kot më pahte amnhî tomnuj pãnhã amnhîre ã harênh mar tã kuma nê ãm kuma nê harênh o:

—Nà më pahpyrã nê kot amnhî tomnuj xwÿnh nhÿm më kot hã hpîr kênã. Na pre më panê htyk kêt nê.

Anhÿr ã harê. Nê Tirtûm Karõja nhÿm mãänên tanhmã ho kapër punuj to. Kêp më pakutã nojarêt xwÿnh tã nhÿm axtem nê tanhmã ho kapër punuj to. Mÿrapê koja nhÿrmã Tirtûm tanhmã homnuj tÿx to.

Homnuj tÿx o më kot Mojes kapër kaga nhÿm mÿrapê kot më hparta jakre. Jakamã kwa kêr ka më ã amnhî nhîpêx anhÿr hkêt nê. ³⁰ Tirtûm kapër ã kagã htûm kot ja jarênh kot:

Ixpê Tirtûm kot paj më kot amnhî tomnuj xwÿnhjê homnuj tÿx nê. Anê.

Nê më kot tãm amnhî nhîpêx xwÿnhjê jarênh kot:

Më kot amnhî to mex o më pa xwÿnhjaja kot paj nhÿr mã më ho mex rax nê. No më kot amnhî tomnuj o më pa xwÿnhjaja kot paj nhÿrmã më homnuj tÿx nê. Anê. Ra më pahte ã kapër anhÿr xwÿnhja kot amnhî nhîpêx ã omunh mex. ³¹ Jakamã kwa më okora. Kêr ka më amnhî to mex rãhã ho ri apa. Tirtûm rãhã ho rãhã nê hihtÿx o hihtÿx jakamã koja mëmoj tã akamã gryk ka amex kêt o amex kêt.

³² Nê amnepêm më ate Jejus kôt amnhî xunhwÿr krax kãm na prem Jejus ã më atomnuj tÿx tã ka prem më umaj hkaga hkêt nê. Tã kêr ka më arî ã amnhî nhîpêx anhÿrja kukamã mãn ajamaxpër nê hã anohtÿx rãhã ho apa. Jao arî ã amnhî nhîpêx anê nê më umaj Jejus kaga hkêt nê. ³³ Na prem më piitã më noo mã tanhmã më amã kapër punuj to nê tanhmã më anhîpêx to. Nê tõhã tanhmã më akwÿjê homnuj tÿx to ka më tee ri ja hã më omu nê më kamã axukaprí nê. Nê më hkôt axkamê nhÿm prem mã më ato anê nê. ³⁴ Na prem më akwÿjê jagjê ka prem ja hã më omu nê ma më hagjênh xã hã ixkre hwÿr më hwÿr mra nê tanhmã më ho mex to. Nhÿm prem më apê më akukrêx kwÿp-tã nê ma amnhîm o pa ka më ãm amnhî tã më omu nê ajamaxpër o:

—Kwãr më mãmrî ma amnhîm hamÿn o pa. Koa nhÿrmã Tirtûm inhmã ixkukrêx mex o kot ja jakrenhta kwÿ nhõr rax nê pa amnhîm hamÿ nhÿm aa ixpê hapêx kêt nê. Hãmri nhÿm axte mëhõ aa ixpê utàr kêt nê. Jar më ixkukrêxta mexti hã. Anê.

Jao më kot më apê utàr tã ka më akaprí nã apa hkêt nê. ã amnhî kukamã ajamaxpër anhÿr pê akînh nê apa. ãm hãmri na ka prem ã amnhî kukamã ajamaxpër anê. ³⁵ Na ka prem më kutã amnhî to htyx kãm ã apa anê. Tã kwa kêr ka më arî ã amnhî nhîpêx anhÿr o ri apa. Kêr kê nhÿrmã Tirtûm ja hã më ato mex rax nê.

³⁶ Nê kêr ka më arî amnhî kaxyw Tirtûm mã ajamaxpër rãhã ho ri apa. Më kot Jejus ã tanhmã më ato htã ka më hkaga hkêt nê. Kot kaj më ã amnhî nhîpêx anhÿr o apa nhÿm Tirtûm ja hã më apumu nhÿm ja kãm mex nê. Hãmri nhÿm ra kot amnhî jarênh xã hkôt nhÿrmã amã mëmoj mex nhõr rax nê. Jakamã kwa më kot tanhmã më anhîpêx to hã amnhî pumu nê tee ri amnhî kukamã ajamaxpër o ri akaprí hkêt nê. Kot kaj më Kris ã apunuj rãhã apa hkêt nê. ³⁷ Tirtûm kapër ã kagã htûm kot Jejus jarênh kot:

Koja më pahwÿr wrÿk mã xwÿnhhta tokyx wrÿ. Na ra wrÿk kaxyw nojarêt. Anê.

³⁸ Nê harênh kot:

Ixkôt më kot amnhî nhîpêx mex o më pa xwÿnhjaja koja më amnhî kaxyw ixkôt hamaxpër tÿx rãhã nê. Jao nhÿrmã ixri htîr tûm nê mex rãhã nê pa ho pa.

Ně koja mēhō ixkaga pa tee ri kām ixkīnh kēt ā omu. Aně.

³⁹ No mē papajaja te mē pahte mē kot Jejus kaga nhūm kot amnhī tā mē homnuj mā xwŷnhjē pyrāk kēt. Arī mē pahte amnhī kaxyw hkōt pajamaxpēr rāhā jakamā koja nhŷrmā amnhī wŷr mē pahto api.

Amnhī kaxyw Tirtūm kōt mē hamaxpēr mex xwŷnhjē jarēnh

Sikūn Pētre 3.5-7

11 Ně na htem Kris ā mē panhīpēx kati ho pa pu mē pahpunuj rāhā ně ri papa. Te Kris kot mē pahto mex kēt pyrāk pu htem mēmoj punuj pix kām ri papa ně kormā Tirtūm kot mē pahto mex ā amnhī tā omunh kēt ně. Tā ā mē pahte anhŷr tā kwa kēr pu mē arī kapēr kōt amnhī nhīpēx rāhā ho papa. Mē pahte pano ho Tirtūm pumunh kēt tā kot mē pahkōt pa ho pa hā amnhī kaxyw kām pajamaxpēr tŷx rāhā ho papa. Jakamā na pu htem ām kapēr kōt pix mā amnhī nhīpēx o papa. ² Amnepē mā mē pakukamā mē panhīgētjaja na prem no ho Tirtūm pumunh kēt tā amnhī kaxyw kām hamaxpēr ně kapēr kōt amnhī nhīpēx o pa nhūm amnhī tā mē omu nhūm ja kām mex ně.

³ Ně mē papajaja na pu htem pajaxwŷja mē pano ho omunh kēt tā amnhīm harēnh o:

—Nā amnepēm kormā mēmoj piitā amrakati ri nhūm Tirtūm ām kapēr pix o mēmoj piitā ho kato. Ixte inhno ho ja hā omunh kēt tā kot ā amnhī nhīpēx anhŷr ā amnhī jarēnhja jakamā kot paj hkōt ijamaxpēr tŷx rāhā ho ri ixpa. Aně.

⁴ Na pre finat Atāw nhīpēx ně kaxyw hprō Ewa nhīpēx. Hāmri nhūm wa hkra Apewja htō Kaī rom amnhī kaxyw Tirtūm kōt hamaxpēr tŷx o pa. Jakamā nhūm wa Tirtūm mā mēmoj gō. Nhūm Apew kot Kaī rom Tirtūm kām hprām xā hkōt kām mēmoj nhōr jakamā nhūm amnhī tā omu ně kot amnhī to mex xwŷnh ā harē ně kot kām ōr xwŷnhhta nhūm mex ā harē. Tā Apew amnepēm htyk tā pu htem arī harēnh mar rāhā ho papa ně kām pajamaxpēr o:

—Apew na pre hte amnhī kaxyw Tirtūm kōt hamaxpēr tŷx rāhā ho pa.

Anhŷr ā kām pajamaxpēr.

⁵ Ně Atāw kanrēhā htāmnhwŷ Enokja na pre haxwŷja amnhī kaxyw Tirtūm mā hamaxpēr tŷx o pa. Jao hkamnār rom kām hprām xā hkōt pix mā tanhmā kām amnhī nhīpēx to ho pa nhūm amnhī tā omu ně amnhīm mex ā harē. Jakamā na pre htyk kēt ně. Na pre Tirtūm htīr rāhā ma amnhī wŷr ho api nhūm hkwyjaja tee ri hapēr o pa. Jakamā na pu htem arī axpēn mā Enok kot amnhī kaxyw Tirtūm kōt hamaxpēr mex o pa hā harēnh o papa. ⁶ Mē kot amnhī kaxyw Tirtūm mā mē hamaxpēr kēt xwŷnhjaja na hte Tirtūm mē mex ā mē harēnh kēt ně. Tā mē papajaja kēr pu mē Enok pyrā ně amnhī kaxyw kām pajamaxpēr tŷx rāhā ho papa. Ně pajamaxpēr o:

—Tirtūmja htīr rāhā ho rāhā. Koja nhŷrmā mē ixte amnhī kaxyw hkōt ijamaxpēr xwŷnhjē ho mex rax ně. Nā koja mē ixto aně.

Anhŷr o mē pajamaxpēr nhūm Tirtūm amnhī tā mē pajamaxpēr ā mē pahpumu ně mē pahte amnhī to mex ā mē pajarē. No mē kot amnhī kaxyw kām hamaxpēr kēt xwŷnhjaja na hte ā mē harēnh anhŷr kēt ně.

⁷ Ně Enok kanrēhā htāmnhwŷ Noehtija na pre haxwŷja amnhī kaxyw Tirtūm mā hamaxpēr tŷx o pa. Jao hkamnār rom amnhīm pār raxja nhīpēx. Na pre ra Tirtūm na rax kukamā tanhmā kām ujarēnh to. Kormā aa na wrŷk nhūm Noehti kot omunh kēt tā Tirtūm kapēr ma ně mar xā hkōt amnhīm pār rax kumrēxta nhīpēx. Ōrkwŷ kamā hkwyjē mē mē amnhīm hipēx. No mē kot Tirtūm kapēr mar ně ām mar xwŷnhjaja na pre Tirtūm gō tām o mē hanhi ně mē himex pa. Nom Noehtija nhūm kot amnhī to mex xwŷnh ā harē. Kot amnhī kaxyw hkōt hamaxpēr rāhā ho pa jakamā nhūm pre ā mex ā harēnh aně.

⁸ Ně Noehti kanrēhā htāmnhwŷ Apraāwja na pre haxwŷja amnhī kaxyw Tirtūm mā hamaxpēr tŷx o pa. Na pre Tirtūm kot kām pika nhōr ā kām amnhī jarē ně ra kot ma hwŷr mēnh kaxyw. Hāmri nhūm Apraāw kuma ně hkamnār rom ō pika kaga ně ma pika hōja wŷr pa. Aa kot ma hwŷr mōr ně omunh kēt tā Tirtūm kapēr mar xā hkōt ō pika kaga ně ma hwŷr pa ho pa. ⁹ Hāmri ně hwŷr pōj ně omu nhūm Tirtūm kām:

—E pika ja kot paj nhŷrmā akanrēhā akra ně atāmnhwŷjē mā kugō. Aně.

Hāmri nhūm kuma ně pikaja kamā pa ho pa. Ra kamā axtem mē uro hkwyjaja ri pa nhūm Tirtūm kormā mē kator kēt ri nhūm mē ō pika hwŷr pōj ně mē kamā pa ho pa. Nom amnhīm ōrkwŷ mex nhīpēx kēt ně. Kormā kēp ō pika kumrēx kēt ā hkamnhīx jakamā ām mry kà o ixkre nhīpēx ně kamā pa ho pa. Ně nhŷhŷm pa kaxyw ně kugrà ně ma amnhī kōt o pa. Amnhī kaxyw Tirtūm mā hamaxpēr rāhā jakamā ā amnhī nhīpēx anhŷr o pa.

Ně Apraāw kra Ijak ně htāmnhwŷ Jakoja wa Apraāw pyrā ně mry kà ho ōrkwŷ ně ma amnhī kōt o pa. Nhūm Tirtūm kot Apraāw mā kapēr pyrā ně wa kām wa hkanrēhā wa hkra ně wa htāmnhwŷjē mā pika nhōr ā amnhī kukamā wa kām amnhī jarē. ¹⁰ Jakamā nhūm Apraāw kormā Tirtūm nhō krī hwŷr àpir xa hā amnhī tā hamār pē kot ho ō pika mā xwŷnhjē kamā pa ho pa. Kaxkwa hwŷr àpir mā xwŷnhhta mex kumrēx. Tirtūm kot hipēx jakamā koja mry kà ho ixkre nhīpēxta rom aa hapēx kēt ně. Jakamā nhūm Apraāw mē pahpyrā ně ma kot hwŷr àpir xa hā amnhī tā Tirtūm jamār rāhā ho pa. ¹¹ Tā ra hpigēt tŷx ně hkurē hkēt ně pa. Te ra ri htyk kaxyw pa pyrāk. Nhūm hprō Sara haxwŷja hpigēx tŷx ně. Kamrō hkēt ā amgrā xohtō rax kumrēx. Nhūm wa aa hkra hkēt ně pa htā nhūm Tirtūm nhŷrmā wa hkra hā wa kām awjarē nhūm wa kuma ně amnhī kaxyw hkōt hamaxpēr kurē kumrēx. Nom amnhī tā kuma ně tee ri amnhī kukamā hamaxpēr hkēt ně. Na pre wa kuma ně axpēn mā:

—Nā kot puj xep hāmri tā pahkra. Tirtūm kot hā ā pajarēnh anhŷr kēnā. Aně.

Tã ã wa kot hkra kaxyw Tirtûm mã hamaxpêr anhÿr jakamã na pre Apraãwja hprõ htu. Ra wa hamê hpigêt tÿx kumrêx tã nhûm htu. Nhûm wa hkra Ijakja gaa nê wa kãm kato. Jakamã nhûm wa gaa nê rí wa hkanrêhã wa htàmnhwÿ xohtô rax o ohtô rax. Ohtô ho kaxkwa kamã kanhêti xohtô jakre. Nê ohtô ho gô xujanãr mÿri pikahti grã hkryre jakre. Jakamã nhûm mê tee ri mê ho kôta hpar mã. Nhûm Apraãw kêp mê hpàr krax. ¹³ Tã nhûm Apraãw nê Ijak nê Jakoja mê ri pa tãmtã nê htyk pa nê hapêx. Tirtûm kormã kot mê kãm pika jarênhhta nhôr xwÿj ri ra htyk pa. Nom kormã mê htír ri tanhmã kãm hamaxpêr to nê hamaxpêr o:

—Nà kormã Tirtûm kot mê inhã pika jarênhja nhôr kêt tã koja nhÿrmã inhmÿr pê ixkanrêhã ixkra nê ix-tàmnhwÿjê mã kugô. Nà koja mê kãm kugô. Ra kot hã inhã amnhÿ jarênh kênã kot kêt mê kãm ôr kêt.

Anhÿr o kaxyw kãm hamaxpêr rãhã ho pa. Jao hkính nê hamaxpêr o:

—Nà inhô kríja axtem na. Na pa hte jar pika ja kamã ri mê hkôt ri ixpa. Te ixpê mê uro pyrã nê ri mê hkôt ixpa nom jar inhô krí hkêt. Inhô krí na kêt axte mã. Anê.

¹⁴ Na prem ã ô krí hõ hkukamã hamaxpêr anhÿr o pa. No ô krí htúmta mê kot hkaga nê pika hõ hwÿr mör xwÿnhhta na prem ã harênh anhÿr kêt nê. Kop apu mê kot amnhím tãm mãn jarênh ronhÿx prem awjanã nê ma akupÿm hwÿr pa. Na prem axtem krí hõ jarê nê kormã hwÿr mör kêt ã amnhÿ jarênh o pa. ¹⁶ Tã nhÿ krí na prem ã harênh anê? Nà kaxkwa kamã Tirtûm nhô kríja. Tãm na mex kumrêx jakamã nhûm prem kormã hwÿr ma àpir xa hã mê pahpyrà nê amnhÿ tã Tirtûm jamãr rãhã ho pa nhûm amnhÿ tã mê omu nê hkính nê. Nê mê kot tãm amnhÿ nhípêx ã mê omu nê mê kêp hkra hã mê harênh ã hpíjaãm kêt nê. Hãmri nê mê kutêp tanhmã ô krí ho mex to ho pa.

¹⁷ Na pre ra tanhmã Apraãw mã hkra Ijakja jarênh to nê kãm:

—Akra Ijak kanrêhã hkra nê htàmnhwÿjaja koja mê kêp ixkra. Anê.

Tã ra kot amnhÿ tã Apraãw kamã hamak kaxyw hkukamã hamaxpêr nê hamaxpêr o:

—Xà we Apraãw kãm ixkính tÿx kumrêx nê kãm ixkôt amnhÿ nhípêx rãhã ho pa hprãm nà? Xà we kãm ixkính tÿx o hkrata jakrenh? E pa kop we ja hã amnhÿ tã kamã ama nê omu mãn. Anê.

Hãmri nê kot hkra hpír nê kãm ôr ã kãm karô. Hãmri nhûm kuma nê ra kot kãm hpír kaxyw. Kot Tirtûm kot amnhÿ nhípêx ã omunh mex jakamã hkamnàr rom kot kãm hpír kaxyw. ¹⁹ Nê hamaxpêr o:

—Nà Tirtûm akupÿm kot mê ho htír xwÿnh kênã.

Anhÿr jakamã kãm hkra hpír puma hkêt nê ra kot kãm hpír mã tã nhûm Tirtûm amnhÿ tã omu nê nê kãm kapêr nhûm kuma nê hpír kêt nê wa ma akupÿm ôrk-wÿ hwÿr mō. Tã ã kot hkra nhípêx anhÿr jakamã Apraãw mã te Ijak htyk nê akupÿm htír pyrãk.

²⁰ Nê Ijakja na pre haxwÿja amnhÿ kaxyw Tirtûm mã hamaxpêr tÿx o pa. Jao hkamnàr rom amnhÿ kra wa kãm Tirtûm kot wa ho mex kukamã wa kãm harê. Kra Jako mê Ejauta wa kãm harê nê wa kãm:

—E koja nhÿrmã Tirtûm inhmÿr pê war ato mex rãhã ho pa. Anê.

²¹ Nê Jakoja na pre haxwÿja amnhÿ kaxyw Tirtûm mã hamaxpêr tÿx o pa. Jao hkamnàr rom hkra Juje mã Tirtûm kot mê ho mex kukamã harê. Na pre Jakoja hkra nê htàmnhwÿ mê hpimràatã hprãm xàj ma Ejit wÿr pa nê kamã pa ho pa. Tã nhûm Jako hpigêt tÿx nê ra htyk kaxyw. Hãmri nê hkra Juje mê hkra wa mê kãm kapêr nê mê kãm:

—E na pa tee amnhÿ kamã ama. Na pa ra ixtyk kaxyw. Nom koja Tirtûm nhÿrmã inhmÿr pê mê ato mex rax nê. Anê.

Hãmri nê amnhÿ kaxpar xà hã pí hã amnhÿ kaxpa nê kãnhmã xa nê Tirtûm mã mex o mex ã harê. Hãmri nê akupÿm nör xà kamã nön ty.

²² Nê Jujeja na pre haxwÿja amnhÿ kaxyw Tirtûm mã hamaxpêr tÿx o pa. Jao htyk kaxyw nê hkamnàr rom hkwyjê mã tanhmã amnhÿ jarênh to. Ra hpigêt nê htyk kaxyw nê hkwyjê mã tanhmã amnhÿ tã karô hto nê mê kãm:

—E na pa ra ixtyk kaxyw. Tã koja Tirtûm inhmÿr pê nhÿrmã Ejit rûm mê akator nê ma akupÿm mê panhõ pika hwÿr mê ato pa. Ra kot mê panhigêt Apraãw mã amnhÿ jarênh xà hkôt. Jakamã kwa mê inhã. Kêr ka mê akupÿm anojarêr nê ma amnhÿ kôt ixtã kasãwja mÿ nê amnhÿ kôt ixto mō. Hãmri nê mÿtar mê panhõ pika kamã mê anhõ krí htã ijaxà pa jawÿ mê akuri ixtã pyka. Anê.

²³ Nê Mojes katorxà mê hipêêxàja na pre wa haxwÿja jajê pyrã nê amnhÿ kaxyw Tirtûm mã hamaxpêr tÿx o pa. Juje hkanrêhã htàmnhwÿ na pre wa. Jakamã nhûm Ejit nhô pahija tee ri Ijaew xohtô rax kumrêx ã mê omu nhûm ja kêp omnuj nê. Hãmri nhûm mê hkra myjaja mê hapôx kôt mê hamÿnh xwÿnhjaja kot mê hpar ã mê kãm karô. Tã nhûm Mojes kato nhûm hipêêxà mê katorxàja wa omu nhûm muxre nhûm wa tee ri hkukamã hamaxpêr. Hãmri nê pahi Paraohti mã mê hkra jamÿnh xwÿnh kot wa kêp hpír pymaj ho pimxur o hã mytwÿr axkrunêpxi. Tirtûm kamnàr rom wa amnhÿ tã kãm uma hkêt nê ã kêp hkra ho hpimxur anê.

²⁴ Nê Mojes na pre haxwÿja amnhÿ kaxyw Tirtûm mã hamaxpêr tÿx o pa. Kormã karàre ri na pre Paraohti hkra nija omu nê amnhím kumÿ nê ho hkra nê amnhÿ kôt o pa. Rãhã nhûm àptàr nhûm Ejit nhô xwÿnhjaja kêp pahi Paraohti htàmnhwÿ hã axpên mã harê. Hãmri nhûm tee ri amnhÿ tã mê kuma nê amnhÿ tã mê kãm aprã nê mê kãm:

—Kwa mê ã ijarênh anhÿr kêt nê. Ixpê mê akwÿ hkêt. Anê.

²⁵ ãm kãm Tirtûm kwÿjê kôt pix mã ri pa ho pa hprãm. Nê kãm Ejit nhô pahi hkôt amnhÿ tomnuj prãm kêt nê. ãm mê kot amnhÿ tomnuj pix o paja na mê kãm hprãm nhûm ja hã mê omu nê tee ri mê hkukamã hamaxpêr nê hamaxpêr o:

—Nà kot paj mê hkôt ri ixpa hkêt kumrêx. Mê hkính nê pa htã koja mê gaa nê ty nhûm mê hkínhja mê kêp hapêx. Nà kot paj Tirtûm kwÿjê hkôt mãn ri ixpa ho ixpa. Mê kot Tirtûm ã mê inhípêx kati htã pa arí mê hkôt

ixpa ho ixpa. ²⁶ Inhmã Ejit nhõ xwýnhjê hkôt ixkukrêx rax në ri ixpa hprãm kêt. Kwär më mãmri Tirtüm ä tanhmã inhîpêx to. Koja më ä inhîpêx anê pa ixpunuj në ri ixpa htã koja Tirtüm nhÿrmã ixto mex rax në. Nà kot paj Ejit nhõ pahihtu hkôt ri ixpa hkêt në.

Anhÿr jao ra më pahpyrà në Kris gryk ä më hkaga. ²⁷ Tã akupÿm mëõ pika hwÿr Ijaewjê ho mör kaxyw nhÿm Ejit nhõ pahihtija tee ri ja hä omu në kamã gryk tÿx në. No nhÿm Mojesja amnhî kaxyw Tirtüm kôt hamaxpêr tÿx o hkamnär rom kãm më uma hkêt në. Nê më kêp hkwyjê kator pa në ma akupÿm mëõ pika hwÿr amnhî kôt më o pa. Tirtüm kamnär rom ä më kêp më ho kator anê. Aa kot no ho omunh kêt tã amnhî kaxyw kãm hamaxpêr tÿx në hkamnär rom më kator në hamakêtkati në më o pa. ²⁸ Nê hkamnär rom më hkính ä arıgro më kot kãm “Pas” anhÿr xwýnhta ho hkrax. Kormã Ejit rüm kator kêt ri. Nê kaxyw amnhî kwÿjê mã hä karõ në më kãm:

—E pa më amã Tirtüm kapêr jarê ka më inhma. Nà kot puj xep më jarãhã ôwêhti hkwy pa në hkamrô ru. Nê hkamrô ho panhörkwÿ jakwakre hä pî kukö. Hämri në ĩ kuxôt në kuku. Koja kamãt nhÿm më kot amnhî tomnuj xwýnhjê pê më hkra my kot wa piitã më hpar mã xwýnhja mõ. Hämri në më pamÿ ri mõ në ä më pahte më panhörkwÿ nhîpêx anhÿrja ä omu në tanhmã më pahkrajê ho hkêt në. Tirtümja ä më pahte amnhî nhîpêx anhÿr kaxyw ä inhmã karõ anê. Jakamã e pu më hkamnär rom ä amnhî nhîpêx anê kê më pahkrajaja më pahpê htyk kêt në. Anê.

Hämri në ä më kot Ejit rüm kator xà hä arıgrota ä më hkính o kator krax anê. Më hkínhja na htem kãm “Pas” anê.

²⁹ Nê Ijaewjaja na prem haxwÿja Ejit rüm kormã Mojes kôt më pa ri uräk në amnhî kaxyw Tirtüm mã hamaxpêr. Jakamã na prem ra gô xujanär pê “Gô Kamrêk” anhÿr xwýnhja mÿ ri kuhê nhÿm Tirtüm më kãm ho axkjê. Nê më kãm hkôt ä ho amgrã nhÿm më hä hkamnär rom mex në rêr pa. No nhÿm më hkôt më kot më himex kaxyw më mrrar xwýnhjaja. Ejit nhõ pôristijaja nhÿm gôja akupÿm më hä axkamur në më himex pa.

³⁰ Nê Ijaew kot Mojes mÿr pê Jojue hkôt pa ri më uräk në amnhî kaxyw Tirtüm kôt hamaxpêr o pa. Na prem ra Tirtüm kot më kãm pika nhör xwýnhta wÿr pøj nhÿm Tirtüm krí pê Jeriko hwÿr më kurê. Më kot kamã më pa xwýnh pê utär kaxyw më hwÿr më kurê. Mëõ krí pu hä kahêja kên tÿx pix o na pre. Nê hprêk rax kumrêx. Nê krí nhõ xwýnhjaja kãm Tirtüm kapêr mar prãm kêt. Hämri nhÿm Tirtüm më hä Ijaewjê mã amÿnê në më kãm:

—E mëõ kríja kot paj më amã kugö nom kêr ka më inhmar kumrêx. Kêr ka më apkati më më õ krí hwÿr mra në kupu hpÿnh o atã apkati kêp 7 në rí ma akupÿm mra. Anê.

Hämri nhÿm më kuma në mar xà hkôt ma Jeriko hwÿr mra. Hämri në hwÿr pøj në Tirtüm kamnär rom krí puhã kahêja kupu hpÿnh o hä apkati kêp 7. Hämri nhÿm apkati pê 7ta ä nhÿm kên tÿx o kahêja më kêp

amnhî krakrak në rôrök pa. Nhÿm më mra në hkôt krí hwÿr agjê në krí nhõ xwýnhjê nhímex pa. Nom krí kamã kupÿr pê Raapja Ijaew pyrà në amnhî kaxyw Tirtüm mã hamaxpêr o pa jakamã nhÿm më kormã më himex kaxyw më hwÿr mör kêt ri amnhî kukamã më hkwyjaja kot më hä ukapi ho pa kaxyw më hwÿr më kurê. Hämri nhÿm Raapja më kêp amnhî pyrà në Tirtüm kôt hamaxpêr ä më omu në hkwy kot më himex pymaj amnhî nhörkwÿ kamã më kêp më ho amÿxu nhÿm më hkã hkính pê ma akupÿm hkwyjê wÿr mõ. Jakamã nhÿm më kot më himex kaxyw më hwÿr mra hämri në amnhî pyrà në tanhmã Raap më õ fãmii ho hkêt nhÿm më arı htír në pa. Më uräk në amnhî kaxyw Tirtüm kôt hamaxpêr o pa hä omunh xà hkôt tanhmã më ho hkêt në.

³² ä na pre më kot amnhî kaxyw Tirtüm kôt më hamaxpêr xwýnhjaja Tirtüm kamnär rom amnhî nhîpêx anhÿr o pa. Nom jajê pixjaja na prem ä amnhî nhîpêx anhÿr hkêt në. Määnên Giteaw në Parak në Sãsö në Jepte në Tawi në Sãmuew në Tirtüm nhÿ hä më kapêr o pa xwýnhjaja. Jajê piitã na prem wamtajê pyrà në amnhî kaxyw Tirtüm kôt hamaxpêr tÿx rãhã ho pa. Nom kot paj ixprí hä tanhmã më kot hkamnär rom amnhî nhîpêx to hä më harênh kêt në. Kot pa anê në tokyx harênh par kêt në. Më ohtö rax kumrêx jakamã na pa äm hkwy pix jarê në hä kagã.

³³ Na prem hkwyjaja Tirtüm kamnär rom ma më kot amnhî tomnuj xwýnhjê nhõ krí hwÿr mra në më kêp më õ pika pytà. Nê më hkwyjaja Tirtüm kamnär rom më ho amnhîptär mex o pa. Nhÿm prem kãm Tirtüm kurê xwýnhjaja më hkwyjê pynê në ahkrehti kamã mry xoprê hkwy nhîpy më kurê. Nhÿm prem amnhî tã më omu në amnhî kaxyw Tirtüm mã hamaxpêr kurê kumrêx nhÿm amnhî tã më omu më nê te mry jakwa ho pikamÿr tÿx pyràk o më hipêx nhÿm äm më omunh o kuhê në tanhmã më ho hkêt në. Ä na prem Tirtüm kamnär rom amnhî nhîpêx anhÿr o pa.

³⁴ Nhÿm më kot kuwy rax kãm më hkwyjê rênh tã nhÿm më kot amnhî kaxyw Tirtüm mã hamaxpêr tÿx nhÿm amnhî tã më omu në më nê tanhmã kuwy ho nhÿm më hxêt kêt në. Nhÿm pre më hkwyjaja wapo ho më hkamnhwÿr o më hkwyjê hpar kaxyw nhÿm më amnhî kaxyw Tirtüm mã hamaxpêr nhÿm amnhî tã më omu në më nê tanhmã më ho nhÿm më amnhî rê në më umaj hpröt në ma mra. Më hihtÿx kêt tã Tirtüm kamnär rom ÿ hä hihtÿx në më kãm më hkurê xwýnhjê ho krihkrit pa nhÿm më ma akupÿm hapêx.

³⁵ Nê mëni hkwyjaja na prem haxwÿja amnhî kaxyw Tirtüm mã hamaxpêr tÿx o pa. Jao më hkrajaja më kêp htyk tã nhÿm prem Tirtüm kamnär rom më ho kuwy nhÿm më kuma në akupÿm më kãm më ho htír.

Ä na prem amnhî kaxyw Tirtüm mã hamaxpêr pê mex në pa anê. No na pre më hkwyjaja më uräk në amnhî kaxyw kãm hamaxpêr tÿx tã nhÿm Tirtüm tokyx më ho mex kêt në. Na pre më kãm më hkurê xwýnhjaja Tirtüm ä më par kaxyw. Nê më hkwyjaja Tirtüm ä më hipêx kati ho pa nhÿm më amnhî xà htÿx kãm hamak kãm ty. Nhÿm më himex kaxyw në më kãm:

—Kwa më Tirtûm kaga. Kot kaj më hkaga pa më amã inhûre nê më anhîmex kêt nê. Anê.

No nhûm më kuma nê am më kuma nê amnhî kaxyw kãm hamaxpêr tÿx pê më kãm:

—Nà më kam nê mãmri xipî. Inhmã ixyk pyma hkêt. Kot paj ty nhûm Tirtûm akupÿm ixto ixtîr pa kuri inhmex kumrêx nê ri ixtîr tûm nê ixpa ho ixpa.

Anhÿr o më kãm amnhî jarênh jakamã hãmri Tirtûm kaga hkêt rãhã nhûm më himex.

³⁶ Nê më kãm më hkurê xwÿnhjaja na prem Kris ã më hkwÿjê mã hpêr o pikênh pê më htak xà ho më htak rûnh o pa. Nê kàx o më hkwÿjê hpa hpre nê më hte hpre nhûm më kêp prês nê hkrî ho hkrî.

³⁷ Nhûm prem kên rûnh o më hkwÿjê htak o më kupa. Nê më hayr o më hkwÿjê pa. Nê më hkamnhwÿr o më hkwÿjê pa. Æ na prem Kris kôt më hamaxpêr ã më omunh xà hkôt më hipêx anhÿr o pa. Jakamã na pre më hkwÿjaja më umaj mëõ krî rûm hapôj nê ma hprôt nê mra. Nê te më õ krî hkêt pyrã nê kapôt ã kêp amrakati nê ri pa. Mê ê hkêt nê ôwêhti hkã ho ê nê ri hã pa. Nê motre kà ho amnhî pre nê ri hã pa. Nê kên prêk ã api nê kre kamã hpimxur o pa. Nê pika hkre kamã hpimxur o pa. Nhûm më kãm më hkurê xwÿnhjaja te më kêp ahpunu nê më kêp ahkro pyrãk o më hipêx nê xpen mã më harênh o:

—Nà më mexti hã. Kwa pu më piitã më himex paa ri.

Anhÿr o më harênh tã nhûm Tirtûm më urak nê ã më harênh anhÿr kêt nê. Na pre më mex kumrêx ã më harê. Nê nhÿrmã kuri më mex nê pa ho pa hkukamã më harê.

³⁹ Æ na prem Tirtûm kamnàrom më kãm më hkurê xwÿnhjê kutã amnhî to htÿx kãm htyk o pa anê. Nhûm Tirtûm ja hã më omu nê hkînh nê kãm më hapê htÿx nê. No nhûm më kormã htîr ri amnhîm Tirtûm kot më ho mex xà jamÿnh kêt rãhã ty. ⁴⁰ Tã mo na pre Tirtûm kormã më htîr ri hkwÿjê pyrã nê më ho mex kêt nê? Nà na pre kormã më hkukamã hamaxpêr o:

—Nà kot paj kormã më ho mex kêt nê. Kot pa më myr pê më kot ixkôt amnhî xunhwÿr mã xwÿnhjê jamãr grire mãn. Kêr pa inhõ krî kamã më ho ixpimràatã më ho mex rax kumrêx. Nà kot paj ã më ho mex anê. Ja na kêt inhmã mex o kormã më htîr ri ixte më ho mexta jakrenh. Anê.

Jao ra ã më papajaja më pakukamã hamaxpêr anê.

Mê pahte Jesus pyrã nê mëmoj kutã amnhî to htÿx ã më pamã karõ

Pirîpos 3.12-21

12 Na pre më pakukamã më panhîgêt kwÿjjaja amnhî kaxyw Tirtûm mã hamaxpêr pê ã amnhî xà htÿx kamã hamak o pa anê. Tã te ra më kot kÿj rûm kaxkwa rûm më pahpumunh nê tanhmã më pamã kapêr to pyrã nê më pamã kapêr o:

—E më inhma më ixkanrêhã më ixtãmnhwÿjjaja. Na pa prem ã Tirtûm kamnàrom amnhî nhîpêx o ixpa anê. Mê kot ja hã më inhîpêx kati htã pa prem Jesus kaga hkêt nê. Tã kêr ka më ixpyrà nê ã më kãm më akurê xwÿnhjê kutã amnhî to htÿx anê. Nê më ixpyrà nê

amnhî kaxyw Tirtûm kôt pix mã ajamaxpêr tÿx rãhã ho ri apa. Anê.

Jakamã kwa kêr pu më urak nê ã amnhî nhîpêx anhÿr rãhã ho mãn ri papa. Te më hprôt xwÿnhjaja kot amnhî nhîpêx pyrãk o amnhî nhîpêx. Na htem hprôt tÿx kaxyw mëmoj pytî jamÿnh nê ho hprôt hkêt nê. Na htem ÿ kamã hprôt o hprôt tÿx nê wam hkwÿjê mã wa nê mra. Ja pyrã nê kêr pu më pahte Tirtûm kapêr kôt amnhî nhîpêx mex o papa kaxyw tanhmã më pahte amnhî tomnuj to hã amnhî pumu nê hkaga kurê kumrêx. Mê pahte amnhî tomnuj o papa xàja te mex pyrãk no am mex kêt. Te ho më hprôt xwÿnh kot axtem nê mëmoj pytî mynh nê tee ri ho hprôt tÿxta pyrãk. Kot puj më tanhmã amnhî tomnuj to ho papa nê Tirtûm kapêr kôt amnhî nhîpêx mex kêt nê. Jakamã kwa kêr pu më Tirtûm kapêr gryk ã amnhî tomnuj nê amnhî to htÿx rãhã ho papa. Te ho më hprôt nê nhÿri më àhuk xà pix kukamã hamaxpêr rãhã hprôt tÿx xwÿnhhta pyrã nê am Jesus mã pajamaxpêr tÿx rãhã ho papa.

² E kot paj më amã Jesus kot tanhmã më panê amnhî nhîpêx toja jarê ka më inhma. Nà kot më panê më pahte amnhî tomnuj pãnhã amnhîrer kaxyw htyk nhûm më pahte hkôt amnhî xunhwÿr jakamã na hte më pamã pajamaxpêr nyw gô pu më amnhî kaxyw hkôt pajamaxpêr ho ri papa. Na pre më kãm hkurê xwÿnhjaja kot pî kahpa hã nhôr nê hpîr mã nhûm më kutã më kãm amnhî to htÿx nê arî më kãm xa nhûm prem kupî. Tã tee ri amnhî kukamã hamaxpêr o Tirtûm kaga hkêt nê. Na pre hamaxpêr o:

—Nà kwãr më mãmri xipî. Kot paj ty nhûm Inhîpêêxa akupÿm ixto ixtîr pa kuri inhmex kumrêx nê ixtîr tûm nê ixpa ho ixpa. Anê.

Tã na ra kaxkwa kamã Tirtûm xupôk rûm mex nê hkrî ho hkrî. ³ Jakamã kwa kêr pu më kot ã më panê amnhî nhîpêx anhÿrja mã pajamaxpêr rãhã ho ri papa. Mê kot hipêx kati htã nhûm më kutã amnhî to htÿx nê xa. Tã kêr pu më urak nê më kãm më pahkurê xwÿnhjê kutã amnhî to htÿx rãhã ri papa. Jao tee ri amnhî kukamã pajamaxpêr o më umaj Tirtûm kaga hkêt nê.

⁴ Na ka htem ma më kot amnhî tomnuj xwÿnhjê hwÿr mra nê më kot amnhî tomnuj kaga kaxyw tanhmã më kãm akapêr to nhûm më ja hã më ama nhûm ja më kêp omnuj nhûm më amnhî tã tanhmã më atomnuj to. Nom wam më kot më pahkwÿjê nhîpêxta pyrã nê kormã më atôxpîr kêt nê.

Tirtûm kot tanhmã hkrajê nhîpêx to hã harênh

Juãw 15.1-2; Eprêw 5.7-8; Xiakre 1.2-4

⁵ Nê mãn ka më arî Tirtûm kapêr ã kaga htûm kwÿ hã ano htÿx japêr. Mê pahpê Tirtûm krajê mã kapêr jarênh kot:

Koja Pahi Maati tanhmã më ate amnhî tomnuj to nê më amã kapêr ka më ama nê mar tÿx nê mëmojta kaga kurê kumrêx. No më ama nê tee ri kot nê akurê xwÿnhhta kukamã ajamaxpêr o ri akapri o axtem nê Tirtûm kaga hkêt nê. Ama nê kot amã mëmoj nê kapêr xwÿnhhta kaga kurê kumrêx.

⁶ Na hte Tirtûm kãm mẽ pajapê hã tanhmã mẽ pahte amnhĩ tomnuj to hã mẽ pahpumu nê hã tanhmã mẽ panhĩpêx to. Tãm mẽ pahte amnhĩ nhĩpêx o papa kaxyw. Kot mẽ pahpê hkra hã mẽ pajarênh jakamã na hte ã mẽ pahte tãm amnhĩ nhĩpêx o papa kaxyw mẽ panhĩpêx anê. Anê.

⁷ Jakamã kot kaj mẽ tanhmã amnhĩ tomnuj toja mýrapê tanhmã apunuj kute nê ri apa htã no ãm tee ri amnhĩ kukamã ajamaxpêr hkêr nê. Kêr mẽ ãm ajamaxpêr o:

—Nà ixte tãm amnhĩ nhĩpêx kaxyw na Tirtûm ã in-hĩpêx anê. Ixpê hkra hã ixte amnhĩ to mex o ixpa prãm xaj ã in-hĩpêx anê.

Anhýr o mãn kêr ajamaxpêr. Na hte mẽ hipêêxà mẽ hkra kot amnhĩ to mex kaxyw ã mẽ hipêx anê. Tã Tirtûm na hte mẽ urak nê ã mẽ panhĩpêx anê. ⁸ No koja mēhō hkra kot tanhmã amnhĩ tomnuj to hã omu nê ãm omu nê hã tanhmã ho hkêr nê. Hã koja hkraja te hipêêxà hkêr nê hã awrãre nê ri pa pyrãk. Tã mẽ pahpê Tirtûm krajaja kot puj mẽ tanhmã amnhĩ tomnuj to nhũm ja hã mẽ pahpumu nê hã tanhmã mẽ pahto. Nom mẽ kêp hkra hkêr xwýnhjaja nhũm hte ja hã mẽ omu nê ãm hã mẽ omu nê hã kormã tanhmã mẽ hipêx to hkêr nê.

⁹ Nê na hte mẽ panhĩpêêxà mẽmoj tã mẽ pamã karō pu htem kuma nê hkôt amnhĩ nhĩpêx. Ja mex. Nom kaxkwa kamã Mēpahpãm maatija mẽ pahte mar nê hkôt amnhĩ nhĩpêxja na kêr mex kumrêx. Kot puj mẽ ã amnhĩ nhĩpêx anê nê nhýrmã kuri pamex nê pahĩr tũm nê papa ho papa.

¹⁰ Nê mẽhprĩre na htem hamaakro nhũm mẽ hipêêxà tanhmã hã mẽ ho. Hã mẽ hkaprêprêk rý hã mẽ kãm akir. Amnhĩ krã hkôt tanhmã mẽ hipêx to. Mẽ kot ja hã amnhĩ pumunh nê axte hkêr kaxyw. Ja mex. Tã mẽ papajaja. Mẽ pahpê Tirtûm kra na pu htem tōhã tanhmã amnhĩ tomnuj to nhũm mẽ pahpumu nê tanhmã hã mẽ pahto. Mẽ pahte amnhĩ pumunh nê axte hkêr kaxyw. Urak nê amnhĩ to mex pix o papa kaxyw. ¹¹ Na hte mẽmoj tã tanhmã mẽ panhĩpêx to pu mẽ tee ri amnhĩ pumu nê pahkaprĩ nê pahkĩnh kêr nê ri papa. Nom kot puj mẽ tokyx tanhmã amnhĩ tomnuj tota kaga nê akupým Tirtûm kôt tãm amnhĩ nhĩpêx o papa nê akupým pahkĩnh nê pajamakêtkati nê ri papa.

Mẽ pahte Tirtûm kaga hkêr ã mẽ pamã karō

¹² Jakamã e kwa kêr ka mẽ amnhĩ to htýx nê apa. Mẽ kot Kris ã tanhmã mẽ anhĩpêx to htãã. ãm Tirtûm kôt pix mã amnhĩ nhĩpêx mex pê akĩnh nê apa. ¹³ Kêr kê Kris kôt atōjê hō tee ri mẽmoj tã amnhĩ pumunh kôt ra Tirtûm kaga kaxyw tã ã mẽ ate amnhĩ nhĩpêx anhýr ã mẽ apumu nê mẽ apyrã nê akupým hkôt amnhĩ xãm týx nê hkaga hkêr nê.

¹⁴ Nê kêr ka mẽ tãm ri axpên nhĩpêx o ri apa. Jao axpên kôt ajamakêtkati nê ri apa nê amnhĩ to mex pix kukamã ajamaxpêr. No kot kaj mẽ anhýr kêr nê nhýrmã mẽ panhō Pahi Maati hwýr axàpir nê kuri amex nê apa hkêr nê.

¹⁵ Na hte Tirtûm mẽ pahto mex nê mẽmoj to mẽ pakutã nojarêr rãhã o pa. Jakamã kwa kêr ka mẽ hkaga hkêr nê. Nê tanhmã ri ajamaxpêr punuj to ho ri apa hkêr nê. Kot ka mẽ ã amnhĩ nhĩpêx anê nhũm Kris kôt mẽ pahkwýjaja ja hã mẽ apumu nê mẽ apyrã nê tanhmã amnhĩ tomnuj.

¹⁶ Nê kêr ka mẽ axpên kãm apijaam kêr o ri apa hkêr nê. Nê te finat Ejau kot amnhĩ nhĩpêx pyrãk o ri apa hkêr nê. Na pre Tirtûm ã hpijaam kêr nê hkwyjê kamã hpijaam kêr o pa. Nê Tirtûm mã hamaxpêr kêr kumrêx. Kêp Ijak kra kot wa jakamã koja nhýrmã hipêêxà mýr pê kêp hikukrêx nê ò pika piitã ho ãrĩk pa. Hãmri nhũm hipêêxà kot ho Tirtûm wýr nhũm kot ho mex kaxyw mã tã nhũm axtem nê mẽmo arĩgro hã kãm prãm xaj kot kêp mẽmoj to ãrĩk mã xwýnhhta htō Jako mã hkaga hpa. Mankwýrtre gōj kãm ãm prãm xaj kãm hkaga hpa. Jakamã nhũm Jako hpãnhã te kêp Ijak kra kot wa pyrã nê mýr pê ò mẽmoj piitã ho ãrĩk mã.

¹⁷ Gaa nhũm Ejau tee ri ã amnhĩ nhĩpêx anhýrja mã hamaxpêr o hkaprĩ nê. Nê tee ri kãm Jako kot akupým kãm mẽmojta nhōr prãm kaprý. Nê mur nê hã hipêêxà wý no nhũm axte kãm mẽmoj nhōr kêr nê. Nhũm kot ho Tirtûm wýr kaxyw tee ri amnhĩ to kuwý no nhũm kuma nê ãm kuma nê kãm ho anhýr kêr nê.

¹⁸ Nê amnepê mã Tirtûm kot mẽ panhĩgêxjê mã kapêr kaxyw na prem hixêt prêk pê Sinai jarênhja wýr akuprō nê hparpê kuhê. Hãmri nhũm hixêt nhĩmōk ã kuwy hpōk rax kumrêx. Nê kuwy mýr ri kakrã htyk ajêt. Nê kōk àpêr týx nê. Nhũm Ijaewjaja hixêt krax ã omu nê kãm maa ho httert o kuhê. ¹⁹ Hãmri nhũm mẽhō pifti kakō nhũm Tirtûm hixêt nê mẽ kãm kapêr nê mẽ kãm:

—E mẽ inhma. Kêr ka mẽ hixêt ã axàpir kêr nê. Kot kaj mẽ atō hã api rý mẽ akrit ò hã api ka mẽ ja hã omu nê kaxyw kên rũnh kwý jamý nê ho htak o apĩ. Anê.

Hãmri nhũm mẽ piitã tee ri kuma nê kãm ma htýx kumrêx nê amnhĩ nê kãm:

—Kwa hãmri Tirtûm. Axte mẽ inhmã mẽmoj jarênh kêr nê. Mojes pix mã mãn mẽ ixkaxyw tanhmã kãm akapêr to. Anê.

Jakamã nhũm Mojes Tirtûm mã amnhĩ jarênh nê kapêr mar kaxyw hixêtja ã api. Kãm ma nê httert rãhã mō nê hã api. ²² Nom mẽ kãm ma ho Tirtûm mã amnhĩ jarênh tã mẽ papajaja na pu htem mẽ kurom paxàmnhĩx kãm amnhĩ jarênh o papa. Na pu htem kãm amnhĩ jarênh kaxyw nê hixêt prêk ã paxàpir kêr nê. Te ra mẽ pahte ma kaxkwa hwýr ò krĩ hwýr paxàpir nê pano ho omunh pê kãm amnhĩ jarênh pyrãk. Ò krĩja mex o mex. Kamã kapêr o mẽ wrýk xwýnhjaja ohtō o ohtō. Na htem kamã hkĩnh rãhã ho pa ho pa.

²³ Nê ò krĩ hwýr na hte hkra xàpir xwýnhjaja ri pa. Nê mẽ papajaja na pu htem kãm amnhĩ jarênh kaxyw nê te kaxkwa kamã kuri pakuhê nê kãm amnhĩ jarênh pyrãk o amnhĩ nhĩpêx. Te mẽ pahpê hkra kot wa pyrãk jakamã mẽ pamã uma hkêr. Nhũm pre Tirtûm ra ò kagã kamã mẽ pakutêp amnhĩm mẽ panhĩxi hã kagã hpa. Na hte mẽmoj piitã hamãr o hkrĩ. Nê krĩja kamã amnepêm kormã Kris kot mẽ pahwýr wrýk kêr ri nhũm

ra amnhî kaxyw Tirtûm kôt hamaxpêr mex xwÿnhjaja haxwÿja ra kamã ri pa. Ra Tirtûm kot mē ho hkra jakamã nhûm mē kuri ri pa ho pa. ²⁴ Nē Jejus haxwÿja kamã pa ho pa. Na pre mē panê htyk nē hkamrô pikapîrja o mē pahte amnhî tomnuj pãnhã amnhîre. Jakamã na pu htem hkôt amnhî xunhwÿ nhûm mē pahto hkra pu mē paxãmnhîx ri Tirtûm mã amnhî jarēnh nē amnhî to hwÿr o papa.

Amnepēm na pre Tirtûm tee ri Kaï kot htō Apew pîr nē hkamrô pikapîrja ã omu nē hamaxpêr o:

—Nà ã kot amnhî nhîpêx anhÿr jakamã kot paj hã homnuj tÿx nē. Anē.

Tã ra hpãnhã Jejus kot mē panê htyk nē hkamrô pikapîrja ã omu nē ra axtem hamaxpêr o:

—Nà ãm hãmri na Ixkraja mē nē ty. Jakamã mē kot hkôt amnhî xunhwÿr xwÿnhjaja kot pa Ixkra kukwak ri mē kot amnhî tomnuj mÿrapê tanhmã mē ho hkêt nē.

Anhÿr o mē pakukamã hamaxpêr. ã hamaxpêr anhÿrja mex o mex.

²⁵ Na pre Mojes Tirtûm nhÿ hã mē panhîgêxjê mã xatã mē kãm Tirtûm kapêr jarēnh o ri pa nhûm mē ku-ma nē hkôt amnhî nhîpêx o pa. Tã gaa nē ra hã nohkêt pa nē akupÿm mē kot amnhî nhîpêx tûm o awjanã nhûm Tirtûm tee ri ja hã mē omu nē mÿrapê tanhmã mē hipêx to. Tã nhûm Kraja kaxkwa rûm mē pahwÿr wrÿ nē mē pamã kapêr. Jakamã kwa mē okora kêr pu mē panhîgêjtê pyrà nē mē pahte amnhî nhîpêx tûm o paxujanãr kêt nē. Kot puj mē anē nhûm Tirtûm ja hã mē pahpumu nē mē urak nē ja hã tanhmã mē panhîpêx to.

²⁶ Amnepēm Tirtûm kot hixêt prêk pê Sinai kamã mē kãm kapêrja. Na pre kapêr tÿx o pika ho àk nhûm htertet tÿx nē. Tã koja nhÿrmã axte pika ho àk nē kaxkwa ho àk nhûm wa hamē htertet tÿx kumrêx. Koja axte ho anhÿr ho pixi nē axte ho anhÿr kêt nē. ²⁷ Tã nhÿrmã axte mēmoj to àk ã amnhî jarēnh jakamã koja mēmoj to kator xwÿnhhta piitã ho àk. Nē mē pahte panhîhkra ho mēmoj nhîpêx xwÿnhja nhûm ho àk nhûm htertet tÿx kãm hpigrãnh pa nē hapêx. Nhûm mēmoj htertet nē hpigrãnh kêt xwÿnh pixjaja arî rãhã ho rãhã. ²⁸ No Tirtûm nhô krî koja htertet nē hapêx kêt nē. Nē mē papajaja mē pahpê hkra jakamã te ra kuri ò krî kamã ri mē papa pyràk. Jakamã kot puj mē mē urak nē papajapêx kêt nē. Jakamã e kwa kêr pu mē amnhî tã Tirtûm mã mex o mex ã harēnh nē hã pahpijaàm rãhã ho papa. Nē tanhmã amnhî tomnuj to hã amnhî pumu nē Tirtûm pumaj mēmojta kaga kurê kumrêx. ã mē pahte amnhî nhîpêx anhÿr o papaja na Tirtûm kãm hprãm. ²⁹ Hihtÿx o hihtÿx jakamã koja mēmoj tã akamã gryk kot kaj amex kêt o amex kêt.

Mē pahte Tirtûm kãm hprãm xà hkôt amnhî nhîpêx ã mē pamã karō

Römãn 12.1-2; Epes 4.1-3; Korosê 1.10-11; Wam Tesarôn 4.1-12; Wam Pêtre 2.11-12; Wam Juãw 3.17-18

13 Nē e kwa Kris kôt ixtō nē ixtōxjaja. Kêr pu mē arî Kris kôt pahkwÿjê ho mex o mãn axpên kôt ri papa. Nē kêr pu mē tanhmã pahpunuj to hã amnhî

pumunh tã axpên to mex mã panhÿrer kêt nē. ã axpên nhîpêx anhÿr rãhã ho papa.

² Nē amnepê mã na pre mēmojaja nhÿhÿnh mra nē mē panhîgêjtê hō hwÿr pōj. Hãmri nhûm mē omu nē htÿx axtem krî hō nhô xwÿnh ã mē hkamnhîx tã no nhûm mē kêp Tirtûm kapêr o mē wrÿk xwÿnh kwÿ na prem. Hãmri nhûm amnhî nhôrkwÿ hwÿr mē kuwÿ nhûm mē ma hkôt mra nē kuri pōj nē kutã apku. Jakamã kwa koja nhÿhÿnh krî hō rûm mēmojaja ma mē awÿr mō ka mē omu nē axãmnhîx amnhî nhôrkwÿ hwÿr mē hwÿr kurê kumrêx kê mē ari pōj. ã mē hipêx anhÿr o apa hãmri nē nhÿrmã mē panhîgêjtja pyrà nē amnhî wÿr Tirtûm kapêr o mē wrÿk xwÿnhjê hō hwÿr japêr. Mē urak nē ja hã mē omunh kêt tã atÿx amnhî wÿr mē awÿ nhûm ja mē amã mex o mex.

³ Nē kêr ka mē ra mē kot Jejus ã mē akwÿjê pynēnh nē mē hagjēnh xwÿnhjê mã ajamaxpêr rãhã ho ri apa nē mē ho ajamakêtkati hkêt nē. Te mē kajaja mē ïhkô hã mē hagjēnh xà kamã apunuj nē akri pyràk o mē kãm ajamaxpêr o ri apa. Jao mē kamã axukapri ho mē hwÿr mra nē mē kãm mēmoj nhôr o ri apa.

⁴ Nē mē kot axpên to hprōja na mex. Nom kêr ka mē amyjaja ãm aprō pix tânopxar o ri apa. Nē mē anijaja mē ajaxwÿja amjên pix tânopxar o ri apa. No mē hkuprÿjê hwÿr mē mrar xwÿnhjaja nē nhãm mē kêp mē hprō ho amnhîkati xwÿnhjaja nē nhãm mē kêp mē mjên o amnhîkati xwÿnhjaja koja Tirtûm ja hã mē omu nē mē homnuj tÿx kumrêx.

⁵ Nē kêr ka mē akàxpore rûnh kêt ã amnhî pumu nē tee ri amnhî kukamã ajamaxpêr o akapri hkêt nē. Na pre Tirtûm mē pamã kapêr o:

Kot paj akôt ri ixpa rãhã ho ixpa nē aa arer rÿ akaga hkêt kumrêx.

Anhÿr jakamã kot kaj mē akàxpore grire htã akapri nē apa hkêt nē. Aa Tirtûm kot mē pahkaga hkêt ã amnhî jarēnh jakamã mēmoj kot pu wem omu nē pamã nhãm ri mē uma ho papa? Tirtûm kot mē pahkôt pa ho pa kênã. Jakamã na pu htem pajamaxpêr o:

Nà Pahi Maatija ra kot ixkôt pa ho pa xwÿnh jakamã mēmo kot pa hkêt ri inhãm uma ho ixpa?

Mēmo kot kêt ri tanhmã kêp ixto?

Anhÿr o pajamaxpêr o papa. ⁷ Nē mē kot Kris mã mē ajamãr o mē pa xwÿnh ra mē htyk xwÿnhjaja ka mē arî mē kot tanhmã amnhî nhîpêx to ho paja mã ajamaxpêr rãhã ho ri apa. Na prem Tirtûm kapêr o mē ajahkre mex nē. Nē tãm ri amnhî nhîpêx o ri mē akôt pa. Nē amnhî kaxyw Tirtûm kôt pix mã hamaxpêr rãhã ty. Tã kêr ka mē urak nē ã amnhî nhîpêx anhÿr o ri apa rãhã ty.

⁸ Nē Jejus Krisja arî rãhãã. Nē amnepê mã kot amnhî nhîpêxja mãänēn arî rãhãã. Aa kot amnhî nhîpêxja nhîjuk ri axtem tanhmã amnhî nhîpêx to hkêt.

⁹ Nē kwa kêr ka mē Tirtûm kôt amnhî nhîpêx rãhã ho ri apa. Na hte kapêr o hêx xwÿnhjaja mē awÿr mra nē mē amã:

—Amnepēm mē ate Tirtûm kot mē amex ã mē ajarēnh kaxyw mē ate kãm mēmo mry nhôr nē akupÿm hamÿnh nē hkur o apa htã ra ja ho anhÿr ka-

ga. Kwa mẽ ja ho awjanã në axte ã amnhĩ nhĩpêx anhÿr o ri apa. Kê Tĩrtũm ja hã mẽ apumunh kôt mẽ amex ã mẽ ajarẽ.

Anhÿr o mẽ amã kapêr. Nom xà na hte Tĩrtũm ã mẽ pahte amnhĩ nhĩpêx anhÿr ã mẽ pahpumunh kôt mẽ pamex ã mẽ pajarẽ? Xà na htem mẽmo mẽ apkur xà hkur pẽ amnhĩ kaxyw Jejus kôt hamaxpêr tÿx o pa? Nà na htem anhÿr kêt nẽ. Na pu htem mẽmoj kur kôt pamã Tĩrtũm kĩnh kêt nẽ. Kêt mẽ paxàpkur xàja mẽ panhĩ pix o hihtÿx kaxyw na. Na hte Jejus kôt mẽ pahto paxihtÿx kêt nẽ. ãm Tĩrtũm kot amarĩ kãm mẽ pajapê nẽ mẽmoj to mẽ pakutã nojarêt jakamã na pu htem ja hã amnhĩ pumu nẽ amnhĩ kaxyw hkôt pajamaxpêr tÿx o papa.

¹⁰ Tĩrtũmja Jejus kot mẽ panê htyk ã omunh xà hkôt ra kot mẽ pamex ã mẽ pajarẽnh jakamã mo kaxyw kot pu mẽ axte kot mẽ pamex ã mẽ pajarẽnh kaxyw kãm mẽmo mry gõ nẽ hkwy hku? Koja mẽhõ akupÿm Tĩrtũm kapêr tũm o ujanãr jao Jejus kot nẽ htyk nẽ hkamrõ pikapĩrja kaga. ¹¹ Amnepẽm na pre patre maatijaja tõhã mẽ kãm mẽmo mry hpar xwÿnh hkamrõ ru nẽ guhkrax kãm kuru nẽ hamÿ nẽ ma o mra nẽ Tĩrtũm nhõrkwy kaàkre hwÿr hitom maati hwÿr ho agjẽ. Tĩrtũm kot mẽ omunh nẽ axte mẽ kot amnhĩ tomnuj mã hamaxpêr kêt kaxyw. Hãmri nhũm hpãnhã ĩ mÿ nẽ krĩ pẽ ho kato nẽ ma o mra nẽ nhÿri amÿm hkwyjẽ hkà ã ho hxêt pa. Tĩrtũm kapêr tũm kôt na prem ã amnhĩ nhĩpêx anhÿr o pa. ¹² Tã ja pyrã nẽ na prem ma krĩ pẽ amÿm Jejus o tẽ nẽ kupĩ nhũm hkamrõ axkapĩ. Kot mẽ pahte amnhĩ tomnuj pãnhã amnhĩrer nẽ mẽ pahto mẽ pahpê Tĩrtũm kra kaxyw ã htyk nẽ hkamrõ pikapĩr anẽ. ¹³ Na prem Tĩrtũm kapêr tũm gryk ã Jejus kaga nẽ põristijẽ mã anẽ nhũm mẽ ma krĩ pẽ ho kato nẽ o tẽ nẽ kupĩ. Tã kêr pu mẽ jajê rom Jejus gryk ã mãn Tĩrtũm kapêr tũm kaga. Kwãr mẽ mãmĩr Jejus pyrã nẽ Tĩrtũm ã tanhmã mẽ pahto nẽ amnhĩ nẽ nhÿhÿm mẽ pajano. ¹⁴ Kêt jar mẽ papaxàja kêp mẽ papaxà kumrẽx kêt. Nẽ jar mẽ panhõ krĩja kêp mẽ panhõ krĩ kumrẽx kêt. Mẽ pamã te kot põ nhĩrõnh o ixkre pix pyrãk. No kêt mẽ panhõ krĩ kumrẽx koja jar mẽ panhõ krĩ rom aa hapêx kêt nẽ. Tã tãm na pu mẽ kormã ma hwÿr papa kaxyw arĩ amnhĩ tã Tĩrtũm jamãr o papa.

¹⁵ Nẽ na htem Ijaew arĩ ohtõ nẽ amnhĩ pãnhã Tĩrtũm mã mry hpar ho pa. Nom mẽ papajaja kot puj mẽ axte ã amnhĩ nhĩpêx anhÿr hkêt nẽ. Kot puj mẽ ãm Jejus kukwak ri Tĩrtũm mã mex o mex ã harẽnh rãhã ho mãn papa. Jao te mẽ pahte kãm hkĩnh xà nhõr pyrãk o amnhĩ nhĩpêx.

¹⁶ Nẽ kêr pu mẽ arĩ axpẽn to mex o ri axpẽn kôt pa-pa. Nẽ kê mẽhõ kêp amrakati japêr ka ja hã omu nẽ amnhĩ kutã kãm anhõ mẽmoj kwÿ. ã kot puj mẽ axpẽn nhĩpêx anhÿr rãhã ho ri axpẽn kôt papa. Kot puj mẽ anẽ nẽ te mẽ pahte Tĩrtũm mã hkĩnh xà nhõr pyrãk o amnhĩ nhĩpêx. ã mẽ pahte amnhĩ nhĩpêx anhÿrja na mex o mex.

¹⁷ Nẽ kêr ka mẽ Kris kôt mẽ akrãhtũmjê kapêr ma nẽ mẽ hkôt amnhĩ nhĩpêx mex nẽ. Na htem Tĩrtũm mã

mẽ ajamãr o ri mẽ akôt pa. Koja mẽ nhÿrmã mẽ kot tanhmã mẽ anhĩpêx to hã Tĩrtũm mã amnhĩ jarẽ. Jakamã mẽ kãm mẽ ato ajuta prãm. Tã kêr ka mẽ kapêr ma nẽ mẽ hkôt ri amnhĩ nhĩpêx mex o ri apa. Kêr kê mẽ amnhĩ tã mẽ apumu nẽ hkĩnh nẽ. No kot kaj mẽ ama nẽ ãm mẽ ama nhũm mẽ tee ri amnhĩ tã mẽ apumu nẽ hkaprĩ nẽ. Jao tee ri kot tanhmã mẽ ato ajuta mex to hkukamã hamaxpêr.

¹⁸ Nẽ kwa kêr ka mẽ ixto Tĩrtũm wÿr rãhã ho apa. Inhmã Tĩrtũm noo mã tanhmã amnhĩ tomnuj to hprãm kêt. ãm inhmã amnhĩ to mex pix o ri ixpa hprãm.

¹⁹ Nẽ kêr ka mẽ ixto awÿ kê tokyx akupÿm mẽ awÿr inhmẽ. Na pa ra inhmã mẽ apumunh prãm tÿx nẽ.

Kagã nhĩpêx xwÿnh kot tanhmã mẽ ho Tĩrtũm wÿr to hã harẽnh

Epes 3.14-19; Piripos 1.0-11; Wam Tesarõn 3.9-13, 5.23; Sikũn Tesarõn 1.11-12, 2.16-17

²⁰ Nẽ mẽ panhõ Pahihti Jejus Krisja na hte mẽ panhĩpêx o te õwêhti jamãr xwÿnh kot hkrit jamãr pyrãk o pa. Jakamã kêp mẽ pajamãr xwÿnh maati mex na. Na pre mẽ panê ty nhũm Tĩrtũm akupÿm mẽ pamã ho htĩr nẽ mẽ pamã harẽnh o:

—E ra Ixkra kot mẽ anê htyk jakamã kêr ka mẽ ãm ixkapêr nyw kôt pix mã ri amnhĩ nhĩpêx o ri apa. Kot kaj mẽ ã amnhĩ nhĩpêx anẽ hãmri nẽ nhÿrmã ty pa akupÿm mẽ ato mẽ atĩr ka mẽ ixri atĩr tũm nẽ apa ho apa. Anẽ.

Tĩrtũm kêp mẽ pahto mẽ pajamakêtkati nẽ ri mẽ pa-pa xwÿnh na. ²¹ Tã na pa hte tanhmã mẽ ato hwÿr to ho ixpa nẽ mẽ ato hwÿr o:

—Pa Tĩrtũm. E kwa tanhmã ixkwÿjê ho mex to kê mẽ kãm akapêr kôt pix mã amnhĩ nhĩpêx o pa hprãm. Nẽ mẽ kãm tãm amnhĩ nhĩpêx o pa hprãm. Nẽ kê Jejus haxwÿja tanhmã mẽ ho mex to kê mẽ war amã hprãm xà hkôt pix mã war amã tanhmã ri amnhĩ nhĩpêx to ho pa. Anẽ.

E kêr pu mẽ arĩ Jejus Kris mã mex o mex ã harẽnh rãhã ho papa.

Kagã jatur xà kamã mẽmoj jarẽnh

²² E Kris kôt ixkrãmnhwÿjaja. Nà na pa ã mẽ amã kagã nhĩpêx anẽ. Jejus kôt mẽ ato mẽ axihtÿx kaxyw. No na pa ho ry nẽ hipêx kêt nẽ. Ixte ho grire nẽ hipêx jakamã kwa kêr ka mẽ kamã harẽ nẽ mar tÿx nẽ hkôt amnhĩ nhĩpêx mex o ri apa.

²³ Nẽ mãn ka mẽ ra Ximotre jarẽnh mar japêr. Na pre Kris ã mẽ hagjẽnh xà kamã hkrĩ hã apkati xohtõ nẽ. Tã nhũm xep mẽ ra kator. Tã koja kormã mẽ awÿr inhmõr xwÿj ri man ixwÿr mõ nẽ hpõx japêr kot paj ma amnhĩ kôt mẽ awÿr o mõ ka mẽ omu.

²⁴ Nẽ kêr ka mẽ kot Kris mã mẽ ajamãr xwÿnhjê mã ijarẽ. Nẽ atar Tĩrtũm krajê piitã mẽ kãm ijarẽ.

Nẽ ota jar Tĩrtũm kra hkwyja piitã mẽ awÿr hpêr mẽ.

²⁵ E kê Tĩrtũm mẽ apiitã mẽ ato mex o pa. Tã ãm ja pix. Na pa ã mẽ amã hã kagã ho anẽ. Na hapêx.

Xiakre

Xiakre na pre kagàja nhípêx. Kêp Jejus tō nê kêp Jerujarê kamã mẽ kot Jejus kôt amnhĩ xunhwÿr xwÿnhjê nõh pastô na pre. Nê kêp Ijaew. Jakamã na pre hkwyjê mã kagàja nhípêx nê krĩ piitã hkôt urak nê Jejus kôt mẽ kot amnhĩ xunhwÿr xwÿnhjê hwÿr kurê. Jejus ã mẽ kãm mẽ hkurê xwÿnhjaja na prem mẽ hipêx kati nhũm mẽ amnhĩ xà htÿx kamã hamak o pa. Jakamã nhũm Xiakre kot mẽ hamaxpêr o mẽ hihtÿx kaxyw kagàja nhípêx nê mẽ hwÿr kurê nê mẽ kãm:

1 Pa ixkwÿjaja. Xà mẽ amex? E ixpê Xiakre na pa. Ixte Tirtũm mẽ Pahihti Jejus Kris wa kãm tanhmã amnhĩ nhípêx to xwÿnh na pa. Jakamã kot paj kagàja nhípêx nê pika piitã hkôt mẽ apiitã mẽ awÿr kurê. Mẽ apê Tirtũm krajê hwÿr.

Mẽ pahpunuj tã mẽ pahte amnhĩ kaxyw Tirtũm kôt pajamaxpêr

Rukre 6.20-23; Rõmãn 5.3-5; Korosê 1.11; Wam Pêtre 4.12-19

² E ixkwÿjaja. Kêr ka mẽ atõ tanhmã amnhĩ to rÿ tanhmã apunuj to. Rÿ mẽhõ tanhmã Jejus ã mẽ anhípêx to. Tã kêr ka mẽ ja hã amnhĩ pumu nê tee ri amnhĩ kukamã ajamaxpêr o ri akaprĩ hkêt nê. Arĩ akĩnh kãm amnhĩ kaxyw Tirtũm kôt ajamaxpêr tÿx rãhã ho ri apa. Kot kaj mẽ ã amnhĩ nhípêx anê nê gaa nê rĩ mẽmoj punuj pê Jejus kôt amnhĩ xunhwÿr tÿx nê. Jakamã kwa kêr ka mẽ tanhmã apunuj to hã amnhĩ pumu nê ã mẽ ate amnhĩ nhípêx anhÿrja kukamã ajamaxpêr pê akĩnh nê ri apa. ⁴ Nom kêr ka mẽ tee ri tanhmã apunuj to hã amnhĩ pumu nê akaprĩ xàj Tirtũm kaga hkêt nê. ãm amnhĩ kaxyw hkôt ajamaxpêr tÿx rãhã ho ri apa. Kot kaj mẽ ã amnhĩ nhípêx anê nê gaa nê Tirtũm noo mã tãm amnhĩ nhípêx mex o ri apa. Nê kãm hprãm xà hkôt pix mã amnhĩ nhípêx o apa.

Mẽ pahte tanhmã amnhĩ kute hã amnhĩ pumunh kôt amnhĩ to Tirtũm wÿr ã mẽ pamã karõ

Matêwre 21.18-22

⁵ Nê kêr ka mẽ mẽmoj mÿrapê tanhmã apunuj to hãmri nê tee ri ja hã amã Tirtũm mã ajamaxpêr tÿx prãm nhũm apê ja hihtÿx japêr. Rÿ mẽmoj tanhmã apê amnhĩ nhípêx to ka tee ri hkukamã ajamaxpêr japêr. Kêr ka mẽ ã ajamaxpêr anhÿr japêr hãmri nê amnhĩ to Tirtũm wÿr kurê kumrêx. Kot amã ajamaxpêr mex nhõr nhũm ate ÿ hã tãm ajamaxpêr kaxyw amnhĩ to awÿ. Kot kaj mẽ ã amnhĩ to hwÿr anê nhũm amnhĩ tã mẽ ama nê mẽmojta kutã tanhmã ato axihtÿx to kurê kumrêx ka ÿ hã hkôt ajamaxpêr tÿx mex o ri apa. Jao tanhmã akute htã akĩnh nê ajamakêtkati nê ri apa. Kojã Tirtũm tee ri amã mẽmoj kôt ajamaxpêr tÿx prãm kaprÿ hã apumu nê hã amã ãkjêr kêt nê. Kojã ate amnhĩ to hwÿrta ma nê tanhmã ato mex to. ⁶ Nom kêr ka mẽ amnhĩ to hwÿr kãm tee ri amnhĩ kukamã ajamaxpêr kati hkêt nê. Rÿ ajamaxpêr o:

—Koonên. Kojã apu Tirtũm inhmã ja ho anhÿr japêr. Anhÿr o tee ri amnhĩ kukamã ajamaxpêr kati hkêt nê. ãm akĩnh kãm tanhmã ate amnhĩ to hwÿr toja kukamã ajamaxpêr o:

—Nà kojã inhmã ho anê. Ixte amnhĩ kaxyw kãm ijamaxpêr nê amnhĩ to hwÿr xà hkôt kojã inhmã tanhmã amnhĩ nhípêx to.

Anhÿr o hkamnàr rom ã amnhĩ kukamã ajamaxpêr anê.

Nom kot kaj mẽ tanhmã amnhĩ to hwÿr to nê tee ri amnhĩ kukamã ajamaxpêr kati nê hkôt ajamaxpêr tÿx kêt nê. Nê te kôk nhãm àpêr nê nhãm àpêrta pyrã nê nhãm ri ajamaxpêr nê nhãm ri ajamaxpêrja o hkôt ajamaxpêr kêt nê. Kot kaj mẽ ã amnhĩ nhípêx anê nhũm Tirtũm tee ri ja hã mẽ apumu nhũm ja kãm mex kêt nê. ⁷ ã mẽ hamaxpêr anhÿr xwÿnhjaja na htem nhãm hamaxpêr nê nhãm hamaxpêr jao hamaxpêr mex kêt nê. Jakamã kot kaj mẽ ã ajamaxpêr anhÿr o amnhĩ to Tirtũm wÿ hãmri nê ãm amnhĩ to hwÿr kaprÿ. Kojã ama nê ãm ama. Nom kot kaj mẽ tanhmã akute hã amnhĩ kaxyw hkôt ajamaxpêr tÿx pê amnhĩ to awÿ. Nê tee ri amnhĩ kukamã ajamaxpêr kati hkêt kãm tanhmã amnhĩ to hwÿr to nhũm amnhĩ tã ama nê hkĩnh nê tanhmã amã mẽmoj nhípêx to. Mẽ ate hã axàhwÿr xà hkôt tanhmã mẽ amã mẽmoj nhípêx to.

Mẽ kêp amrakati xwÿnh mẽ mẽ kot amnhĩ to rÿnh xwÿnhjê jarênh

Eprêw 13.5-6; Wam Pêtre 1.24-25

⁹ Nê kwa mẽ akàxpore hkêt xwÿnhjaja. Jar mẽ apê amrakati htã mẽ apê Tirtũm kra na ka mẽ. Jakamã kêr ka mẽ akàxpore rÿnh kêt tã mẽ apê Tirtũm kra hã amnhĩ pumunh kôt ajamakêtkati nê nê akĩnh nê apa.

¹⁰ Nê mẽ akàxpore rÿnh xwÿnhjaja. Mẽ akàxpore rÿnh nê mẽ akukrêx rÿnh tã kot kaj mẽ nhÿrmã ty nê piitã rer pa nê mẽ kêp amrakati xwÿnhjê pyrã nê anhÿ kamã Tirtũm kuri akrĩ nhũm tanhmã mẽ ajarênh to. Te mẽ apê mẽmo pixôrà kot amnhĩ nhípêx pyrãk. Na hte kwÿhtã axpên pê axpôt nê muxre nê mex nê harir. Tã gaa nê rĩ hã myt xàhpanh mẽ nhũm ra nhôore. Nê gaa nê ra grã pa nê rôrôk nê hapêx. Tã kot kaj mẽ nhÿrmã urak nê ty nê akukrêx rer pa. Jakamã kwa kêr ka mẽ akàxpore rÿnh pumunh kôt akĩnh nê ri apa hkêt nê.

Kêt ãm mẽ apê Tirtũm kra hã mãn amnhĩ pumunh kôt akĩnh nê apa.

Mẽ pahpunuj kôt pagryk nê mẽ pahkurê

¹² Nê kot kaj mẽ atõ tanhmã apunuj to htã arĩ amnhĩ kaxyw Tirtũm mã ajamaxpêr tỳx rãhã ho ri apa. No tanhmã apunuj to hã amnhĩ pumu nê hkaga hkêt nê. Rỳ kot tanhmã ato xwỳnhhta kêr ka mẽ amnhĩ tã kamã agryk nê tanhmã ho hkêt nê. ãm Jejus kôt pix mã amnhĩ nhĩpêx rãhã ho ri apa. Kêr kê Tirtũm amã hkĩnh ã amnhĩ tã apumu nê amex ã ajarê. Ka nhỹrmã kuri amex kumrêx nê atĩr tũm nê apa ho apa. Ra kot mẽ pakukamã mẽ pahtã amnhĩ jarênh xà hkôt. Jakamã kêr ka mẽ tanhmã apunuj to htã ã amnhĩ kukamã ajamaxpêr anhỹr pê akĩnh nê apa.

¹³ Nê Tirtũm aa kãm tanhmã amnhĩ tomnuj to hprãm kêt. Nê mẽ papajaja mẽ pahte tanhmã amnhĩ tomnuj to kaxyw na hte mẽ pamã tanhmã àmnênh to rỳ mẽ pamã mẽ pajamaxpêr punuj jagjênh kêt nê. Jakamã kot ka mẽ atõ amã tanhmã amnhĩ tomnuj to hprãm tã kwa kêr ka Tirtũm tãm kot ja kaxyw mẽ akrãm mẽ ajamaxpêr punuj jagjênh to hã hkamnhĩx kêt nê. ¹⁴ Mẽ papamjaja na pu htem pajamaxpêr punuj xà hkôt tanhmã amnhĩ tomnuj to. No Tirtũm Karõ na hte mẽ pamã mẽ pajamaxpêr punuj jagjênh kêt nê. Mẽ papamjaja na pu htem pajamaxpêr punuj nê gaa nê ra hkôt tanhmã amnhĩ tomnuj to. Hãmri nê gaa nê ã amnhĩ nhĩpêx anhỹr rãhã ho ri papa. Mẽ kot amnhĩ tomnuj o mẽ pa xwỳnhjaja koja mẽ nhỹrmã ty hãmri nê Tirtũm mẽ Kra wa kuri htĩr tũm nê pa ho pa hkêt nê.

Tirtũm kot tanhmã mẽ pahto mex to hã harênh

Xiakre 3.17-18; Sikũn Pêtre 1.3-4

¹⁶ Nê e ixkwỳjaja. Tirtũm kot mẽ pahte amnhĩ tomnuj prãm xaj mẽ pamã mẽ pajamaxpêr punuj jagjênh kêt jakamã kwa kêr ka mẽ ã ajamaxpêr anhỹr kêt nê. ¹⁷ Na hte mẽ pahto mex pix o pa. Na pre myyti ho kato. Kapêr pix o ho kato. Nê mytwrỹre ho kato. Nê kanhêti ho kato. Ja piitã ho kato nhũm mẽ pamã hirã mex o harir. Na hte mytwrỹre tõhã hirã mex o pa. Nê gaa nê nyw kaxyw nê kamãt kô. Nê gaa nê nyw mẽ nhũm akupỹm hirã. ã na hte amnhĩ nhĩpêx anhỹr o pa. No Tirtũmja ã kot anhỹr kêt. Kot amnhĩ nhĩpêxja ãm rãhã ho rãhã. Na hte mẽ pahto mex pix o pa. No tõhã tanhmã mẽ pahto mex to nhũm jãã nhũm tanhmã mẽ pahtomnuj to hkêt nê. ¹⁸ Tã kapêr pix o kot ã mẽmoj to kator kot anhỹr. Nê mẽ pamã kapêr o amnhĩrĩt. Kãm mẽ pahto hkra hprãm xaj mẽ pamã Jejus kot tanhmã mẽ panê amnhĩ nhĩpêx toja nhũm pre mẽ pamã ho amnhĩrĩt. Na pu prem kuma nê hkôt amnhĩ xunhwỹ nhũm amnhĩ tã mẽ pahpumu nê mẽ pahto hkra. Mẽ pahpê Ijaew kumrêxjaja na pre mẽ pahto hkra.

Mẽ pagryk o papa nê mẽ pahkurê

Rõmãn 12.17-21; Epes 4.25-5.2

¹⁹ E ixkwỳjaja. Kwa mẽ ixkapêr ma nê hã anohtỳx nê ho apa. Koja mẽhõ Tirtũm kapêr o mẽ ajahkre kaxyw mẽ awỳr mõ nê mẽ amã kapêr jarê ka mẽ mar tỳx nê. Koja mẽ ate tanhmã amnhĩ tomnuj to nê mẽ amã kapêr ka mẽ amnhĩ tã ama nê kamã agryk kêt nê.

²⁰ Mẽ gryk o mẽ pa xwỳnhjaja na htem Tirtũm kapêr kôt ri amnhĩ nhĩpêx kêt nê. ²¹ Jakamã kwa kêr ka mẽ axte amnhĩ tomnuj rỳ ajamaxpêr punuj o ri apa hkêt nê. Na htem ohtõ nê ã amnhĩ nhĩpêx anhỹr o pa nom kêr ka mẽ kurom Tirtũm kapêr mãn amnhĩ krã him haxàr tỳx nê. Kapêr o mẽ ajahkre xwỳnhjaja na htem ho mẽ ajahkre mex o pa. Tã kêr ka mẽ ama nê amã hkôt amnhĩ nhĩpêx prãm rãhã ho ri apa. Na pu htem Tirtũm kapêr ma nê hkôt amnhĩ nhĩpêx o papa hãmri nê nhỹrmã Tirtũm mẽ Kra wa kuri pahtĩr tũm nê pa mex nê papa ho papa.

Mẽ pahte Tirtũm kapêr kôt amnhĩ nhĩpêx ã mẽ pamã karõ

Matêwre 7.24-27; Wam Juãw 2.3-6

²² Nê kwa mẽ okora. Kêr ka mẽ ãm Tirtũm kapêr ma nê ãm mar kêt nê. Mããnênh hkôt amnhĩ nhĩpêx rãhã ho ri apa. Kot kaj mẽ ama nê ãm ama nê hkôt amnhĩ nhĩpêx kêt nê hãmri nê apê Tirtũm kra hã amnhĩ jarênh kaprỹ. Jao nhỹrmã Tirtũm mẽ Kra wa kuri atĩr tũm nê apa hkêt nê. ²³ Te ho mẽhõ kot amnhĩ pumunh xà hpyr nê kamã amnhĩ pumunh nê amnhĩ krã hkĩ jaê rỳ amnhĩ kuk tyk pumunh pyrãk. Tã te kot ãm ja hã amnhĩ pumunh nê kot amnhĩ to mex kêt rãhã akupỹm amnhĩ pumunh xà xir nê ma htêm nê axte amnhĩ kuk tyk rỳ amnhĩ krã kĩ jaêrta mã hamaxpêr kêt pyrãk. Mẽ kot Tirtũm kapêr mar nê ãm mar nê hkôt amnhĩ nhĩpêx kêt xwỳnhjaja te kot ja jarênh pyrãk. ²⁵ Tã kêr ka mẽ ã amnhĩ nhĩpêx anhỹr kêt nê. Mẽ ate Tirtũm kapêr kôt amnhĩ nhĩpêx o apa kaxyw xatã kamã harê nê mar tỳx o apa. Jao hkôt amnhĩ nhĩpêx mex o apa. Tirtũm kot mẽ pahte tanhmã amnhĩ nhĩpêx to ho papa hã mẽ pamã karõ xaja ãm hãmri na. Na htem hkôt amnhĩ nhĩpêx nhũm Tirtũm ja hã mẽ omu nê mẽ ho mex nê nhũm mẽ àmnhĩx hamakêtkati nê hkôt amnhĩ nhĩpêx o pa. ²⁶ Nom koja mẽhõ kêp Tirtũm kra hã amnhĩ jarênh tã htỳx ri kapêr punuj o ri pa hãmri nê ãm kêp hkra hã amnhĩ jarênh kaprỹ. Mẽ pahpê Tirtũm krajaja na pu htem ã pakapêr anhỹr kêt nê. ²⁷ Axtem mẽ pahte amnhĩ nhĩpêx. Na pu htem mẽ hã awrã rỳ mẽ kêp mẽ mjên tyk xwỳnhjê ho mex nê mẽ hã pahpêr o pahpikênh o papa hkêt nê. Nê tanhmã mẽ kute hã mẽ omu nê mẽ ho ajuta ho papa. ã na pu htem pahpê Tirtũm krajaja amnhĩ nhĩpêx anhỹr o papa nhũm Mẽpanhĩpêxã Maati Tirtũm ja hã mẽ pahpumu nê hkĩnh nê. No na pu htem mẽ kot amnhĩ tomnuj o mẽ pa xwỳnhjê hkôt ri amnhĩ nhĩpêx kêt nê ãm Tirtũm kapêr xà kôt pix mã amnhĩ nhĩpêx nhũm amnhĩ tã mẽ pahpumu nê hkĩnh nê.

Mě pahte mě piitã mě hipêx o axpên pyrãk ã mě pamã karõ

Rõmãn 2.11; Korosë 3.25

2 E ixkwýjaja. Pahihti Jejus Krisja mex o mex. Tã ra mẽ ate hkõt amnhĩ xunhwýr jakamã kwa kêr ka mẽ apê hkwý hã mẽ piitã tãm mẽ hipêx o apa. Nẽ mẽ hipêx o axpên pyrãk. ²Jakamã kot kaj mẽ nhýrmã Tirtúm kapêr mar kaxyw axpên wýr akuprõ nhũm hikãxpore rax xwýnhta mẽ akõt axà. ê mex nẽ ôr o ãhkra kamã kàx hãmri nẽ mẽ akõt axà. Nhũm hkõt mēhõ pē amrakati xwýnhja tē nē axà. Nom wamta kĩnhã kēp amrakati nē ē omnajti nē pikaxõnhti. Hãmri nē hikãxpore rax xwýnhta hkõt mẽ awýr tēn axà. ³Tã tanhmã kot kaj wem ri wa hipêx to? Xà kot kaj mẽ wa hipêx o axpên pyrãk nã? Nã xà kot kaj mẽ ã wa hipêx anē nẽ wam àr xwýnhta ê mex ã omunh xà hkõt kãm kadêre hõ gõ nẽ kãm:

—E ota kadêre. Mãmri hã nhý. Anẽ.

Hãmri nẽ ê pynajti xwýnhta pumu nẽ axtem nẽ kãm:

—E atar pikap nhý.

Anhýr o ahpýnhã wa kãm akapêr? ⁴Kot kaj mẽ ahpýnhã ã wa hipêx anē nẽ amnhĩ tomnuj nẽ. Wam àr xwýnhta ka kãm akapêr mex nẽ tanhmã ho mex to. No hkõt hõta omnajti hã omunh xà hkõt te kamã anhõkre kahak pyrãk o hipêx. Kot kaj mẽ ã ahpýnhã wa hipêx anē nhũm Tirtúm tee ri ja hã mẽ apumu nhũm ja kēp omnuj nē. ⁵Kwa mẽ inhma ixkwýjaja. Mẽ kēp amrakati xwýnhjaja mẽ hikãxpore hkēt tã na hte mẽ hkwýjaja amnhĩ kaxyw Tirtúm kõt hamaxpêr nẽ hkõt amnhĩ xunhwý nhũm amnhĩ tã mẽ omu nẽ kot mẽ panhípêx pyrã nẽ mẽ ho hkra. Jakamã jar mẽ kēp amrakati htã na htem amnhĩ kaxyw Tirtúm kõt hamaxpêr tỳx rãhã ho pa. Jakamã koja mẽ nhýrmã kuri htĩr tũm nẽ mex kumrêx nẽ pa ho pa. Mẽ kãm Tirtúm kĩnh o mẽ pa xwýnh piitã koja mẽ nhýrmã ã mex nẽ ri pa anē. ⁶Nom kot kaj mẽ ahpýnhã mẽ hipêx nẽ amnhĩ tomnuj nẽ. E pa mẽmoj tã mẽ akukja. Mẽmojaja na htem tanhmã mẽ ato hêx to? Nẽ mẽmojaja na htem juisti mã tanhmã mẽ ato kapêr punuj to? Xà mẽ kēp amrakati xwýnhjaja? Nã mẽ tãm kêt. Mẽ hikãxpore rũnh xwýnhjaja na htem ã mẽ anhípêx anhýr o pa. ⁷Nẽ ra mẽ ate hkõt amnhĩ xunhwýr xwýnhja nhũm mẽ axtem nẽ tanhmã mẽ apê ho kapêr to ho pa. Tã ka htem mẽ kēp amrakati xwýnhjê rom mẽ kãm akapêr mex nẽ mẽ kãm kadêre mex gõ nhũm mẽ hã hkrĩ. ⁸Tirtúm kapêr ã kagã htũm kot ja jarênh kot:

Kêr ka mẽ piitã mẽ hipêx o te ka amã amnhĩ tã ma pyrãk. Anẽ.

Ã kot mẽ pamã karõ kot anhýr. Kapêrja mex kumrêx. Kot puj mẽ ã axpên nhípêx anhýr jao Tirtúm kãm hprãm xà hkõt amnhĩ nhípêx mex nẽ. ⁹Nom kot puj mẽ ã amnhĩ nhípêx anhýr kêt nẽ ahpýnhã tanhmã mẽ hikãxpore rũnh xwýnhjê ho mex to nẽ ahpýnhã tanhmã mẽ kēp amrakati xwýnhjê nhípêx to japêr. Hã kot puj mẽ Tirtúm kapêr htũmta nhĩrõp pakuhê nẽ amnhĩ tomnuj nẽ. ¹⁰Kot pu mẽ kapêr tũm piitã hkõt ri amnhĩ nhípêx mex o ri papa htã ãm pixire nẽ hirõp

pakuhê. Jao te pahte kapêr piitã hirõp pakuhê pyrãk. ¹¹Na pre Tirtúm mẽ pahte mẽ pahprõ pix tãnopxar o papa hã mẽ pamã karõ. Nẽ mẽ pamjên pix tãnopxar o papa hã mẽ pamã karõ. Nẽ mẽ pahte axpên par nẽ mẽ pahkurê. Jakamã kot puj mẽ pahprõ pix tãnopxar mex o ri papa japêr. Nẽ mẽ pamjên pix tãnopxar mex o ri papa japêr tã tanhmã pajamaxpêr to nẽ pahkwýjê hõxpĩ. Jao te Tirtúm kapêr tũm piitã hirõp pakuhê hpar pyrãk o amnhĩ nhípêx.

¹²Koja nhýrmã Tirtúm mẽ pahtĩr ri tanhmã axpên nhípêx to ho papa hã mẽ pahpumunh kõt tanhmã mẽ pajarênh to. Mẽ pamã axpên kĩnh ã axpên to mex o papa hã mẽ pahpumunh kõt mẽ pajarê rý mẽ pamã axpên kĩnh kêt ã axpên nhípêx o papa hã mẽ pahpumunh kõt mẽ pajarê. Jakamã mẽ kamã mẽ ukapri kêt xwýnhjaja koja nhýrmã ja hã mẽ omu nẽ mẽ urak nẽ mẽ kamã ukapri hkēt nẽ. Nom mẽ kamã mẽ ukapri ho mẽ pa xwýnhjaja koja ja hã mẽ omu nẽ mẽ urak nẽ mẽ kamã ukapri nẽ mẽ nẽ mẽ kot amnhĩ tomnuj piitã rênh pa. Jakamã kwa kêr ka mẽ amnhĩ to mex nẽ tãm axpên nhípêx o ri axpên kõt apa. Nẽ axpên mã akapêr mex nẽ axpên kamã axukapri pix kukamã ajamaxpêr o apa.

Amnhĩ kaxyw Tirtúm kõt mẽ hamaxpêr xwýnhjê jarênh

Rukre 3.8-14

¹⁴Nẽ kwa ixkwýjaja. Kojã mēhõ kot amnhĩ kaxyw Jejus kõt hamaxpêr nẽ hkõt amnhĩ xãm ã amnhĩ jarênh tã hkõt ri amnhĩ nhípêx kêt nẽ. Hã koja nhýrmã ty hãmri nẽ tanhmã kot we amnhĩ to nẽ Tirtúm mẽ Jejus wa kuri htĩr tũm nẽ pa ho pa? Nã koja anhýr kêt nẽ. Kêp hkra hã amnhĩ jarênh tã hkõt amnhĩ nhípêx kêt jakamã koja nhýrmã wa hwýr àpir kêt nẽ.

¹⁵Nẽ xà koja mēhõ kēp amrakati nē ri pa. Nẽ ê pynajre pix jagjê nẽ ri hã pa. Nẽ õ hkēt nẽ ri kãm prãm nẽ pa. ¹⁶Ka mẽ ja hã omu nẽ tanhmã kãm akapêr to nẽ kãm:

—Kwa ã amnhĩ nhípêx anhýr kêt nẽ. Anhõrkwý hwýr tēn axê mex japêr nē axà nē amnhĩm mẽmoj japêr nē aku. Kojã Tirtúm ato mex rax nẽ.

Anhýr o kãm akapêr tã kãm mẽmoj nhõr kêt nẽ. Tã xà koja we ama nẽ amar xà hkõt ê mex jagjê nẽ apkur mex o ri pa? Nã kot ka mẽ ã kãm akapêr anē nẽ ho ajuta hkēt nẽ nhũm arĩ kãm prãm nẽ ê hkēt nẽ omnuj nẽ ri pa. Na htem mẽ kapêr pix o mẽ ho mex kêt nẽ. Kot kaj mẽ ã kãm akapêr anē nẽ ãm kãm mẽmoj tã karõ kaprý. ¹⁷Ja pyrã nẽ koja mēhõ ra amnhĩ kaxyw Jejus kõt hamaxpêr nẽ hkõt amnhĩ xãm ã amnhĩ jarênh tã kapêr kõt ri amnhĩ nhípêx kêt japêr. Hã koja ãm kēp hkra hã amnhĩ jarênh kaprý.

¹⁸Nẽ kot kaj mẽ atõ ã ajamaxpêr anē nẽ ajamaxpêr o:

—Nã Jejus kwýjaja na htem ahpýnhã tanhmã amnhĩ nhípêx to ho pa. Na hte mẽ hkwýjaja amnhĩ kaxyw Jejus kõt hamaxpêr tỳx pix o ri pa. Nẽ mẽ hkwýjaja tanhmã hkwýjê ho mex to ho ri pa. ã na htem ahpýnhã tanhmã amnhĩ nhípêx anhýr to ho pa. Anẽ.

Kwa mẽ ri ã ajamaxpër anhÿr kêt nê. Mẽ hkwÿjê ho mex o mẽ pa xwÿnhjaja na htem Tirtÿm hkôt hamaxpër pẽ mãänën hkôt amnhÿ nhÿpêx nê hkwÿjê ho mex o pa. Koja mẽhõ amnhÿ kaxyw Jesus kôt hamaxpër hã koja mãänën hkôt amnhÿ nhÿpêx pẽ tanhmã hkwÿjê ho mex to ho pa. Na htem amnhÿ kaxyw hkôt hamaxpër pix o pa hkêt nê. Na htem mãänën hkôt mẽ piitã mẽ ho mex o ri pa.

¹⁹ Na ka hte mẽ akwÿjaja ã ajamaxpër anê nê ajamaxpër o:

—Nà Tirtÿmja pyxi mex o pyxi mex. Tã kot paj jam ijamaxpër rãhã ho ri ixpa nê ra ixpê hkra hã ri ixpa. Nom kot paj kapër kôt amnhÿ nhÿpêx o ri ixpa hkêt nê.

Anhÿr o ajamaxpër nê ã ajamaxpër anhÿr kaprÿ.

Nê ãm hãmri na ka htem Tirtÿm pyxi mex o pyxi mex ã harê. Nom na htem jam hamaxpër kôt pix mã kêp hkra hkêt nê. Mëkarõmnutijaja na htem haxwÿja Tirtÿm pyxi mex o pyxi mex kôt hamaxpër tã mẽ kêp hkra hkêt. Na htem ã hamaxpër anhÿr pẽ kãm uma ho pa. ²⁰ ã mẽ ajamaxpër anhÿrja mex kêt. Koja mẽhõ amnhÿ kaxyw Tirtÿm kôt hamaxpër ã amnhÿ jarênh tã hkôt amnhÿ nhÿpêx o pa hkêt japêr. Hãmri nê ãm amnhÿ kaxyw hkôt hamaxpër ã amnhÿ jarênh hkaprÿ. E kot paj ixprÿ hã mẽ amã ja jarê ka mẽ inhma. ²¹ Mẽ panhÿgêt finat Apraãw na pre amnhÿ kaxyw Tirtÿm mã hamaxpër nê hkôt ri amnhÿ nhÿpêx mex o pa. Tã nhÿm amnhÿ tã kamã hamak kaxyw hkra Ijak ã kuwÿ nhÿm kuma nê ra kot kãm hpÿr nê õr kaxyw nhÿm Tirtÿm amnhÿ tã omu nê amnhÿm mex ã harê. Hãmri nê kot hkra hpÿr nê kãm kapër. ²² Ra kot amnhÿ kaxyw hkôt hamaxpër nê hkôt amnhÿ xãm jakamã mãänën hkôt amnhÿ nhÿpêx nê ra kot kãm hkra nhõr kaxyw Tirtÿm amnhÿ tã omu nê amnhÿm mex ã harê. Na pre ã finat Apraãw Tirtÿm kapër kôt amnhÿ nhÿpêx mex anhÿr o pa. Jao amnhÿ kaxyw hkôt hamaxpër mex ã amnhÿ to amnhÿrit.

²³ Nê kormã Apraãw wa hkra hkêt ri nhÿm Tirtÿm wa kãm hkra jarê nhÿm kuma nê hkra hkukamã amnhÿ kaxyw Tirtÿm kôt hamaxpër tÿx o pa nhÿm amnhÿ tã omu nê mex ã harê. Nê kêp hkrãmnhwÿ hã harê. Kapër ã kagã htÿm kot ja jarênh kot:

Na pre Apraãw hkra hkukamã amnhÿ kaxyw Tirtÿm kôt hamaxpër tÿx nhÿm amnhÿ tã omu nê amnhÿm mex ã harê. Anê.

²⁴ ã na pre finat Apraãwja hkra kaxyw Tirtÿm kôt hamaxpër anhÿrja o ra hkôt amnhÿ nhÿpêx nê ra kot kãm hpÿr kaxyw. Nom kop apu amnhÿ kaxyw hkôt hamaxpër pix nê hkôt amnhÿ nhÿpêx kêt ronhÿx pre Tirtÿm tee ri amnhÿ tã omu nê amnhÿm mex ã harênh kêt nê. Na htem amnhÿ kaxyw Tirtÿm mã hamaxpër nê mãänën hkôt ri amnhÿ nhÿpêx mex o pa nhÿm amnhÿ tã mẽ omu nê amnhÿm mẽ mex ã mẽ harê. ²⁵ Mẽhõ ni kuprÿ finat Raapja na pre ã amnhÿ nhÿpêx anê nê amnhÿ kaxyw Tirtÿm kôt hamaxpër pẽ tanhmã hkôt amnhÿ nhÿpêx to ho pa. Na pre Ijaew myja wa hamëxkrut nê ma Raap nhõ krÿ hwÿr wa tẽ. Mẽ hã ukapi nê kot mẽ hkurê kaxàr kaxyw mẽ hwÿr wa tẽ. Hãmri nhÿm Raap Tirtÿm kot wa mẽnh ã wa omunh kurê kumrëx nê

põristi kot tanhmã wa ho pymaj amnhÿ nhõrkwÿ kamã mẽ kêp wa ho amÿxu nê wa nê mẽ kãm tanhmã hêx to. Nê hpãnhã nhãm pry hõ hkôt akupÿm wa kumê nhÿm wa hkã hkÿnh pẽ ma akupÿm mex nê tẽ. Hãmri nhÿm Tirtÿm wa hã Raap pumu nê amnhÿm mex ã harê.

²⁶ Tã kot kaj mẽ atõ amnhÿ kaxyw Tirtÿm kôt ajamaxpër ã amnhÿ jarênh tã hkôt amnhÿ nhÿpêx kêt japêr. Hãmri nê apê hkra hã amnhÿ jarênh kaprÿ. Te ra mẽhõ htÿk nê nõr tã nhÿm mẽ kot arÿ htÿr ã harênh kaprÿta pyrãk.

Mẽ kot Tirtÿm kapër o mẽ ahkre xwÿnhjê jarênh

3 Nê kwa Kris kôt ixkwÿjaja. Mẽ axohtõ nê mẽ amã Tirtÿm kapër o mẽ ahkre hprãm tã kormã ja kaxyw mẽ apitã mẽ amex kêt. Mẽ ixte Tirtÿm kapër o mẽ ajahkre xwÿnhjaja kot paj mẽ tanhmã amnhÿ tomnuj to japêr nhÿm Tirtÿm ja hã mẽ ixpumu nhÿm ja kêp omnuj nê. Mẽ ixte kapër o mẽ ajahkre ho mẽ ixpa kênã kot pa hkêt mẽ ri tanhmã amnhÿ tomnuj to ho ri ixpa. Jakamã kot kaj mẽ Tirtÿm kapër piitã hkôt ri amnhÿ nhÿpêx mex nê rÿ kormã ho akwÿjê jahkre ho ri apa.

² Nê mẽ pahpiitã na pu htem tõhã mẽ pajakwa ho tanhmã amnhÿ tomnuj to. Mẽmoj tã axpën kãm pagryk nê tanhmã mẽ kãm pakapër punuj to. Nom koja mẽhõ tanhmã kapër punuj toja nê amnhÿ to htÿx nê hãmri nê tãm amnhÿ nhÿpêx o pa.

Mẽ pajakwa jarênh

Epes 4.29

³ Na htem nhÿhÿm kawar o juk kaxyw hakwam kàx jagjê nê kãm nhÿhÿm o htêm prãm xà hkôt ma nhÿhÿm ho juk o tẽ. Kàxja hkryre nhÿm kawar rÿnh tã no nhÿm kãm ma nhÿhÿm ho mrar prãm xà hkôt ho juk o mra.

⁴ Nê gõ xujanãr kãm pàr rÿnhhta rÿnh tã na hte kôk àpêr tÿx nê ma nhÿhÿm o pa. Nê pÿ ho pàr o juk xàta hkryre htã ma nhÿhÿm ho juk o mõ. Nhÿhÿm pàr o mrar xwÿnh kãm o mõr prãm xà hkôt o mõ.

⁵ Ja pyrã nê mẽ pajakwaja hkryre htã na htem ho kapër o tanhmã mẽ hipêx to ho pa. Tõhã ho kapër mex nê nhÿm mẽ kuma nê hkÿnh nê. Nê tõhã ho kapër punuj nê nhÿm mẽ tee ri mẽ kapër ã mẽ kuma nê hkaprÿ nê rÿ kapër xwÿnhhta kamã gryk nê. Mẽ pajakwa hkryreja te kot kuwÿ jakrax kryre pyrãk. Kot ka kuwÿ jakrax grire ho tẽ nê nhÿri põtã kamã amê nhÿm kôk ho apê nhÿm hpòk rax tokyx anê. Hãmri nê ma pã ho hkaxàr par o mõ nê ho hkaxàr pa. ⁶ Mẽ pajakwaja mã kot anhÿr. Kot kaj atÿx ri tanhmã ho akapër punuj to nhÿm mẽ ama nê axpën mã anhÿxi ho krÿ nhÿpêx ka amex kêt nê apa. Rÿ ka atÿx ri ajakwa ho tanhmã akwÿjê ho akapër to nhÿm mẽ tee ri amnhÿ tã ama nê hkaprÿ nê rÿ akamã gryk nê. Satanasti nhÿ hã na htem ã mẽ hakwa ho kapër punuj anê.

⁷ Na htem tõhã mẽmo mry xoprê pynê nê tanhmã ho nê ra ho kãm ma hkêt. Kagã rÿ hagrõre rÿ àati rÿ gõx kãm mẽmo mryja nhÿm htem unê nê tanhmã ho

nhũm kãm ma hkêt nê mẽ hkôt pa ho pa. Nom na htem mry piitã ã hipêx anhÿr kêt nê. ⁸ Tã mẽ pajakwa te mẽ kot tee ri mẽmo mry ho kãm ma hkêt kaprÿ xwÿnhhta pyrãk. Na pu htem amnhÿ krã hkôt pajakwa ho pakapêr mex pix kêt nê. Tanhmã kot puj mẽ pakapêr punuj kêt kaxyw amnhÿ jakwa hto? Mẽ pakapêr punuj te kot kagã xoprê kot mẽ hkamnar nê õ wenên o mẽ hparta pyrãk. ⁹ Na pu htem tõhã pajakwa ho tãm pakapêr nê tõhã pakapêr punuj nê. Nê tõhã Pahi Maati Tirtũm mã mex o mex ã harênh tã ra axtem nê tanhmã mẽhõ japrÿ hto. Tirtũm kot mẽ pah-to amnhÿ pyrã nê mẽ panhÿpêx tã pu htem axtem nê tanhmã axpên japrÿ hto ho ri papa. Jao te pahte Tirtũm japrÿ pyrãk. Kwa ixkwÿjaja. Kêr pu mẽ pahpê Tirtũm krajaja ã pakapêr punuj anhÿr hkêt nê. ãm mẽ pajakwa ho mẽmoj mex pix jarênh o ri papa.

¹¹ Xà koja pã kamã hinore pyxi htã kamã gô xành nê mãânên kamã gô xenh nõkati? Nà koja anhÿr kêt nê. Na hte kamã gô mex pix nê rÿ kamã gô xenh nõkati pix nê.

Nê xà koja jàxô hpar ã rãrãj harir? Rÿ ahkrô xô hã mànkwrÿtre harir? Nà na hte ahpÿnhã hpar ã harir. Ja pyrã nê kêr pu mẽ pahpê Tirtũm krajaja pajakwa ho pakapêr punuj pê ho papikamÿr tÿx nê. Nê te hinore kamã gô mex pixta pyrã nê êmoj mex pix jarênh o ri papa. No mẽ pajakwa nhÿkê ho tãm pakapêr nê hikjê ho pakapêr punuj kêt nê. ãm pakapêr mex pix o pakapêr o ri papa. Kwa kêr pu mẽ ã amnhÿ nhÿpêx anhÿr rãhã ho papa.

Tirtũm kôt mẽ àhpumunh xwÿnhjê jarênh

Wam Korÿt 2.6-16

¹³ Nê kwa mẽ axàhpumunh tÿx xwÿnhjaja kêr ka mẽ amnhÿ to mex o ri apa. Nê mẽ piitã tãm mẽ hipêx mex nê mẽ amã axpên japê hã axpên to ajuta mex o ri apa. Tirtũm kapêr xà hkôt. Kot kaj mẽ ã amnhÿ nhÿpêx anê nê axàhpumunh mex ã amnhÿ to amnhÿrÿt. ¹⁴ Nom kot ka mẽ mẽmoj tã axpên kamã agryk o ri apa. Rÿ amnhÿ pix kukamã ajamaxpêr o ri apa hãmri nê ãm ate Tirtũm kapêr kôt amnhÿ nhÿpêx ã amnhÿ jarênh kaprÿ. ¹⁵ ã mẽ kot amnhÿ nhÿpêx anhÿr xwÿnhjaja na htem Tirtũm kôt amnhÿ nhÿpêx kêt nê. Mẽ kêp Tirtũm kra hkêt xwÿnh pixjaja na htem ã amnhÿ nhÿpêx anhÿr o pa. Jao mẽkarõmnuti kot amnhÿ nhÿpêx kôt pix mã amnhÿ nhÿpêx o pa. ¹⁶ Axpên kamã mẽ gryk o mẽ pa xwÿnhjaja na htem amnhÿ pix kukamã hamaxpêr jao tanhmã amnhÿ tomnuj to ho pa. Nê amnhÿ tã mẽ kamã mẽ gryk xwÿnhjê homnuj o pa. Tã ã mẽ pahte amnhÿ nhÿpêx anhÿr pumaj kwa kêr pu mẽ mẽmoj tã axpên kamã pagryk o ri papa hkêt nê. ¹⁷ Mẽ kot Tirtũm kôt amnhÿ nhÿpêx xwÿnhjaja na htem jajê rom tãm axpên nhÿpêx rãhã o pa.

Nê axpên kamã ukaprí pix o ri axpên kôt pa.

Nê tãm hamaxpêr o pa.

Nê mẽ piitã mẽ hipêx o axpên pyrãk.

Nê axpên tã hpijaàm o ri pa.

Nê tanhmã ri axpên no kupyri to hkêt nê.

Nê ri oprê ho pa hkêt nê.

Nê mẽ axpên kamã ôkre kahak kêt nê.

Nê mẽ piitã mẽ ho mex o axpên pyrãk.

Nê tãm mẽ piitã mẽ hipêx rãhã nê.

ã na htem Tirtũm kôt mẽ kot amnhÿ nhÿpêx xwÿnhjaja amnhÿ nhÿpêx anhÿr o pa. ¹⁸ Kot puj mẽ ã amnhÿ nhÿpêx anê nê pajamakêtkati nê paxàmnhÿx pahkÿnh nê ri papa. Nhũm nhÿri mẽhõ wa axpên kãm gryk pu mẽ wa omu rÿ wa harênh ma hãmri nê mẽ pah-tõ ma wa hwÿr tẽ nê wa kãm pakapêr nê tãm akupÿm wa ãm. Hãmri nhũm wa ra mẽ pahpyrã nê tãm amnhÿ nhÿpêx pê hamakêtkati nê wa ri pa. àmnhÿx ri hkÿnh nê wa ri pa.

Mẽ kot amnhÿ pix kukamã mẽ hamaxpêr xwÿnhjê jarênh

Matêwre 20.20-28; Juãw 16.24

⁴ Nê kwa mon ka hte mẽ akwÿjaja axpên mã akapêr mã agêt o axpên kãm agryk pix o apa? Na ka htem ã amnhÿ nhÿpêx anhÿr o amnhÿ pix kukamã ajamaxpêr. Nê mẽ amã amnhÿ jamaxpêr kôt pix mã ri amnhÿ nhÿpêx prãm. No Tirtũm kãm hprãm xà hkôt amnhÿ nhÿpêx prãm kêt nê. ² Na ka htem nhÿri mẽmoj pumu nê tee ri ho amã anhõ hprãm kaprÿ. Nê amã ho anhõ hprãm xàj õ xwÿnhhta pÿr nê kêp utãr mã.

Nê na ka htem tanhmã axpên kukrêx kute hã omu nê amã ho anhõ hprãm nê hã õ xwÿnhhta mẽ wa axpu. No mẽ amã hprãm xwÿnhhta mẽ ate hõ hã Tirtũm wÿr ronhÿx ra mẽ ama nê mẽ amã hõ gô. Tã mẽ ate hã axàhwÿr kêt jakamã nhũm mẽ amã õr kêt nê.

³ Rÿ ka mẽ tõhã mẽmoj tã awÿ nhũm kot mẽ amar tã mẽ amã õr kêt nê. Kot mẽ amã õr nhũm mẽ ate ho anhõxÿ ho apa pymaj na hte tõhã mẽ amã mẽ ate hã axàhwÿr xwÿnhhta nhõr kêt nê.

⁴ Kormã mẽ ate hkôt amnhÿ nhÿpêx mex kêt. Te mẽni hõ ra mjên tã nhãm kot mẽhõ my ho amnhÿkati pyrãk o na ka htem amnhÿ nhÿpêx o apa. Jao mẽ amã mẽ apê Tirtũm kra hprãm tã axtem nê mẽ kãm hprãm kêt xwÿnhjê hkôt amnhÿ nhÿpêx o ri apa nê mẽ urak nê tanhmã amnhÿ tomnuj to ho ri apa. Nê mẽ ate amnhÿ tomnuj gryk ã mẽ amã Tirtũm prãm kêt ã amnhÿ to amnhÿrÿt.

⁵ Tirtũm kapêr ã kagã htũm kot tanhmã Karõ jarênh to nê harênh kot:

Na pre Tirtũm mẽ pahwÿr amnhÿ Karõ rê nhũm mẽ pahwÿr wrÿ nê mẽ pakamã agjê nê mẽ pahkôt pa ho pa. Mẽ pahte hkôt pix mã amnhÿ nhÿpêx o papaja na kãm hprãm. Anê.

ãm hãmri ã harênh kot anhÿr jakamã kwa kêr ka mẽ harênh ma nê kãm ajamaxpêr tÿx rãhã ho ri apa.

⁶ Na hte Tirtũm mẽmoj to mẽ pakutã nojarêr rãhã pu mẽ ÿ hã tãm amnhÿ nhÿpêx o ri papa. Kapêr ã kagã kot ja jarênh kot:

Mẽ kãm Tirtũm kôt amnhÿ nhÿpêx prãm kêt xwÿnhjaja na hte Tirtũm amnhÿ tã mẽ omu nê mẽ kutã amnhÿ xunhwÿ.

No mẽ kãm hkôt ri amnhÿ nhÿpêx prãm xwÿnhjaja na hte amnhÿ tã mẽ omu nê mẽ ho mex o pa nhũm htem

hihtÿx xà nhÿ hã mẽ kãm hprãm kêt xwÿnhjê hkôt ri amnhĩ nhĩpêx kêt nê. Anê.

⁷Jakamã kwa kêr ka mẽ Tirtũm kapêr kôt pix mã mãn ri amnhĩ nhĩpêx o ri apa. Kêr kê Satanasti tanhmã mẽ ate amnhĩ tomnuj to hprãm xaj tanhmã mẽ ato ka mẽ Tirtũm Karô nhÿ hã ãm ama nê hkôt amnhĩ nhĩpêx kêt nê. Nhũm tee ri amã àhkrox kaprÿ nê akaga nê ma tẽ.

⁸Nê kot kaj mẽ Tirtũm kapêr kôt pix mã ri amnhĩ nhĩpêx o apa nhũm amnhĩ tã mẽ apumu nê te kot mẽ apa hã mẽ ajamÿnh nê mẽ ato pa pyrãk o mẽ anhĩpêx. Jao mẽ ato mex o ri mẽ akôt pa ho pa. Nê mẽ atãnopxar rãhã ka mẽ ajamakêtkati nê akĩnh nê ri apa.

Nê kêr ka mẽ tanhmã amnhĩ tomnuj to hãmri nê tee ri ja hã amnhĩ pumu nê hkaga kurê kumrêx nê axte ã amnhĩ nhĩpêx anhÿr kêt nê. Rÿ ka mẽ tanhmã ajamapêr punuj to hãmri nê ja hã amnhĩ pumu nê hkaga nê hpãnhã tãm ajamapêr pix o ri apa. Mẽ apê Tirtũm kra hã kêr ka mẽ ãm hkôt pix mã ri tãm amnhĩ nhĩpêx o ri apa.

Mẽ pahte amnhĩ tomnuj ã tanhmã amnhĩ nhĩpêx to hã mẽ pamã karô
Wam Juãw 1.5-10

⁹Nê kêr ka mẽ tee ri ate tanhmã amnhĩ tomnuj to hã amnhĩ pumu nê akaprí xaj mur nê akĩnh kêt nê. Nê akaprí xaj amÿr rax nê. ¹⁰Hãmri nê Tirtũm mã amnhĩ jarênh o:

—Pa Tirtũm. Na pa ã amnhĩ tomnuj anê. Nom kot paj axte hkêt nê. ãm inhã akapêr kôt pix mã ri amnhĩ nhĩpêx prãm.

Anhÿr o kãm akapêr kê mẽ ama nê mẽ ate amnhĩ tomnujta ã tanhmã mẽ ato hkêt nê. ãm mẽ ato mex nê ka mẽ akupÿm ajamakêtkati nê axãmnhix akĩnh nê ri apa.

Mẽ pahte axpên to pakapêr nê mẽ pahkurê
Matêwre 7.1-5; Rômãn 2.1-3, 14.10-13; Wam Korĩt 4.5

¹¹E ixkwÿjaja. Kwa kêr ka mẽ anhĩõ kot tanhmã amnhĩ tomnuj to hã omu nê tanhmã ho akapêr punuj to hkêt nê. Tirtũm kapêr ã kagã htũm kot ja nê mẽ pahkurê kamã hihtÿx jakamã kot ka mẽ ri ã amnhĩ nhĩpêx anê nê te ate Tirtũm kapêr tũm kwÿ omnuj ã harênh pyrãk. Rÿ te axãhpumunh tÿx o ate Tirtũm jakrenh ã amnhĩ to jarkrar pyrãk. Jao kapêr kôt amnhĩ nhĩpêx kêt nê. Na htem Tirtũm kapêr ã kagã htũm kwÿ mex ã harê nê hkwy omnuj ã harênh kêt nê. Piitã mex kênã.

¹²Nê Tirtũmja tapxipix na kêp mẽ pahto amnhĩptar xwÿnh maati. Nê tapxipix na hte mẽ pahte tanhmã amnhĩ nhĩpêx to hã mẽ pahpumunh hkôt tanhmã mẽ pajarênh to. Mẽ pahte amnhĩ to mex xwÿnh ã mẽ pajarê rÿ mẽ pahte amnhĩ tomnuj xwÿnh ã mẽ pajarê. ãm tapxipix kot ã mẽ pajarênh kot anhÿr xwÿnh. Tã ka mẽ axtem nê kapêr kwÿm ri tanhmã akwÿjê ho akapêr punuj to ho ri apa.

Mẽ pahte Tirtũm mã pajamapêr pê kãm amnhĩ jarênh ã mẽ pamã karô

Rukre 12.13-21

¹³E kwa mẽ inhma ixkwÿjaja. Na ka hte mẽ akwÿjaja tanhmã amnhĩ kukamã ajamapêr to nê akwÿjê mã amnhĩ jarênh o:

—Koja apkati pa ma krĩ hõ hwÿr mõ nê kamã mẽ kãm ixãpênh o ixpa hã ixtã amgrã pyxi nê hpãnhã kãxpore jamÿnh rax nê man akupÿn mõ.

Anhÿr o amnhĩ jarê. ¹⁴Kwa mẽ ã amnhĩ kukamã amnhĩ jarênh anhÿr kêt nê. Mẽ pahtõ mẽ pahte amnhĩ kukamã paxãhpumunh mex? Amrakati kênã. Kot ka mẽ ã amnhĩ kukamã amnhĩ jarênh anhÿr tã kormã ã amnhĩ nhĩpêx anhÿr kêt ri tanhmã amnhĩ to nê ty. Rÿ tanhmã amnhĩ to nê axã hãmri nê nhÿhÿm amõr kêt nê. Te mẽ pahpê namê pyrãk na pu htem ri papa nê tanhmã amnhĩ to nê ty nê pajapêx tokyx anê.

¹⁵Jakamã mẽ ã amnhĩ kukamã amnhĩ jarênh anhÿr kêt nê. Kêt amnhĩ jarênh o:

—Koja Tirtũm kãm ja prãm koja apkati pa ã amnhĩ nhĩpêx anê nê ã amnhĩ nhĩpêx anê.

Anhÿr o Tirtũm kamnãr o tanhmã amnhĩ kukamã amnhĩ jarênh to. ¹⁶No mẽ ate amnhĩ krã hkôt amnhĩ kukamã amnhĩ jarênh ta Tirtũm jamapêr xà hkôt kêt. ãm amnhĩ krã hkôt mẽ ate amnhĩ kukamã amnhĩ jarênh kênã. ã mẽ ate amnhĩ jarênh anhÿrja mex kêt.

¹⁷Nê mẽ kot tãm amnhĩ nhĩpêxja kot kaj mẽ ate mar mex tã hkôt amnhĩ nhĩpêx kêt japêr hãmri nê amnhĩ tomnuj o apa.

Mẽ hikãxpore rũnh xwÿnhjê jarênh

Rukre 12.13-21; Wam Ximotre 6.9-10; Apokarip 18.14

5 Nê kwa mẽ akãxpore rũnh xwÿnhjaja. Mẽ inhma nê inhmar tÿx nê. Nhÿrmã mẽ amex kêt jakamã kwa mẽ tee ri amnhĩ kukamã ajamapêr o ra akaprí nê amÿr o apa kurê kumrêx. ²Tirtũm noo mã mẽ akãxpore te ra mẽ apê hapêx par pyrãk. Te ra mẽ anhÿ kamã mẽ ate amnhĩ tomnuj xwÿnh ã kutã akrĩ pyrãk. ³Mẽ ate mẽ akukrêx nê mẽ akãxpore ho apikuprõnh rũnh tã ka htem mẽ akwÿjê pê ho anhõxÿ ho ri apa. Mÿrapê koja nhÿrmã tanhmã mẽ apê amnhĩ to nê omnu pa ka mẽ ho apikuprõnh rax kaprÿ. Hãmri nê mẽ ate amnhĩ tomnuj mÿrapê Tirtũm mẽ Kra wa kuri atĩr tũm nê apa ho apa hkêt nê. ãm kuwy kamã mẽ amnhĩ xà htÿx kamã ajamak rãhã ho ri apa. ⁴Na ka htem apur kãm mẽ ãpênh xwÿnhjê mã amnhĩrer kêt nê. Nhũm mẽ tee ri amnhĩ tã mẽ ajamã hãmri nê mẽ atã amnhĩ to Pahi Maati Tirtũm xihtÿx xwÿnh ta wÿr o pa nhũm mẽ atã mẽ kuma. ⁵Mẽ akĩnhã mẽ kêp amrakati htã ka htem ãm ja hã mẽ omu nê mẽ ãpênh pãnhã mẽ kãm amnhĩrer kêt nê amnhĩ pix kukamã ajamapêr. Nê amã prãm xà hpix kukamã amnhĩm mẽmoj japrõr pê akĩnh o ri apa. Jao te mẽ apê mõx htwÿm nhũm mẽ kot hpĩr nê hkrêr mã mex ã harênh xwÿnh ta pyrãk. Mÿrapê kot kaj mẽ mõxta pyrã nê nhÿrmã ty hãmri nê Tirtũm mẽ Kra wa kuri atĩr tũm nê apa ho apa hkêt nê. ⁶Nom ja pix kêt. Na ka htem mẽ anhõ krĩ kamã mẽ an-

hõ pahi mã tanhmã akwýjê ho axêx to ho ri apa. Mě kot tanhmã atomnuj to hkêt tâ ka mẽ kãm mẽ ho axêx rûnh nê. Tã koja nhÿrmã Tirtũm mẽ hã tanhmã mẽ ato rax kumrêx ka mẽ rí amnhĩ pumu.

Mě pahte Jejus kutêp amnhĩ kaxyw kãm pajamxpêr o papa hã mẽ pamã karõ

Sikũn Pêtre 3.1-13

⁷ E ixkwýjaja. Koja mēhõ tanhmã mẽ atomnuj to htã ka mẽ arĩ amnhĩ kaxyw Jejus mã ajamxpêr rãhã ho ri apa. Pê akupÿn hpõx xã hã arĩgro jamãr rãhã nê. Te pur nhõ dõn kot amnhĩ nhĩpêx pyrãk. Koja hpur kãm ahkre nê ahkre hpa hãmri nê arĩ hamãr o pa nê kãm nojarêk kêt nê hã na wrÿk jamãr o pa. Jao hamakêtkati nê ô jamãr rãhã ho pa. ⁸ Tã kêr ka mẽ urak nê arĩ Pahihti akupÿn hpõx xã hã arĩgro jamãr rãhã ho ri apa. Koja tokyx akupÿn mẽ pahwÿr wrÿ. Jakamã kêr ka mẽ kutêp mẽ kot mẽ atomnuj xwÿnhjê kutã amnhĩ to htÿx nê ri apa. Nom tee ri amnhĩ kukamã ajamxpêr o Jejus kaga hkêt nê. Arĩ hamãr pê akĩnh nê ajamakêtkati nê ri apa. Koja akupÿn mẽ pahwÿr wrÿ nê mẽ pahto mex rax kumrêx.

⁹ Nê kêr ka mẽ xepên to akapêr o ri apa hkêt nê. Kot ka mẽ ã amnhĩ nhĩpêx anê nhũm Tirtũm mẽ ama nê tanhmã mẽ ajarênh to. Kot mẽ pahpumunh xã hkôt tanhmã mẽ pajarênh to xwÿnh na. Tã ra tanhmã kot mẽ pahpiitã mẽ pajarênh to xã hã arĩgroja ra ahtêp o mō.

¹⁰ E ixkwýjaja. Kêr ka mẽ wam mẽ kot Tirtũm nhÿ hã kapêr jarênh xwÿnhjaja kot amnhĩ nhĩpêx mã ajamxpêr rãhã nê. Na prem Tirtũm nhÿ hã mẽ kãm kapêr o ri mẽ hkôt pa nhũm mẽ hkwyjaja ja hã tanhmã mẽ hipêx to nhũm mẽ amnhĩ xã htÿx kamã hamak rãhã ho pa. Tã tee ri amnhĩ kukamã hamaxpêr pê Tirtũm kaga hkêt nê. Na prem arĩ ÿ hã kapêr jarênh rãhã ho ri mẽ hkôt pa. Tã kêr ka mẽ kot amnhĩ nhĩpêx pyrãk o amnhĩ nhĩpêx nê Tirtũm kaga hkêt nê. ¹¹ Na prem amnhĩ xã htÿx kamã hamak o pa rãhã ty hãmri nê Tirtũm kuri mex nê hkĩnh nê pa ho pa. Ra mẽ ate finat Johti jarênh mar mex. Na pre omnuj tÿx nê pa htã amnhĩ tã Pahi Maati Tirtũm kamã gryk nê hkaga hkêt nê. Hãmri nhũm amnhĩ tã omu nê gaa nê ho mex rax nê nhũm akupÿm mex kumrêx nê pa. Pahi Maati ja ukapri ho ukapri nê mex o mex jakamã na pre ã Johti ho mex anê. Tã koja ho mexta pyrã nê ã mẽ pahto mex anê.

Mě pahte tanhmã amnhĩ nhĩpêx to hã mẽ pamã karõ

Matêwre 5.33-37, 18.15; Rõmãn 12.15; Karatas 6.1-2; Jutre 22-23

¹² E ixkwýjaja. Pa mẽ amã mẽmoj jarê ka mẽ inhma nê inhmar tÿx nê. Kêr ka mẽ mẽmoj tã amnhĩ jarênh kaxyw hãmri nê akatãt kôt amnhĩ jarênh kurê kumrêx. Nê amnhĩ jarênh o: "Nã kot paj ja ho anê." Anê. Rÿ amnhĩ jarênh o: "Nã kwarĩ pa ja ho anhÿr kêt nê." An-

hÿr o amnhĩ jarênh kurê kumrêx. Kê mẽ akwýjaja ãm hãmri mẽ ate amnhĩ jarênh ã mẽ apumunh kurê kumrêx nê axêx ã mẽ akamnhix kêt nê. Mě apê Tirtũm kra kênã kot ka kêt mẽ ri axtem nê amnhĩ jarênh o axêx.

¹³ Nê koja mẽ anhĩõ mẽmoj tã tanhmã amnhĩ to nê omnuj nê. Ka mẽ ja hã omu nê kãm anê kê amnhĩ kaxyw Tirtũm mã hamaxpêr pê amnhĩ to hwÿr rãhã ho pa. Rÿ koja hkĩnh nê ri pa ka mẽ ja hã omu nê kãm anê kê hkĩnh kãm mex o mex ã grer o pa. ¹⁴ Rÿ koja à nê nõ ka mẽ ja hã omu nê kãm anê kê amnhĩ wÿr pastõ nhÿ hã mẽ kapêr xwÿnh kwÿjê hã karõ. Kê mẽ hwÿr mra nê Jejus nhÿ hã mẽmo twÿm kwÿ ho hkukõ nê ho Tirtũm wÿ. ¹⁵ Kê mẽ ã mẽ à xwÿnhjê hwÿr mrar nê mẽ ho Tirtũm wÿr o pa anê. Koja mẽ ho kuwÿ nhũm mẽ kuma nê akupÿm mẽ ho mex. Nhũm mẽ tanhmã amnhĩ tomnuj to japêr kê mẽ ja hã amnhĩ jarê kê Tirtũm mẽ kuma nê ja hã tanhmã mẽ ho hkêt nê. ¹⁶ Jakamã kêr ka mẽ atõ tanhmã amnhĩ tomnuj to nê tee ri ja hã amnhĩ pumu hãmri nê tokyx akwýjê mã amnhĩ jarê kê mẽ tokyx ato Tirtũm wÿ. Kê atã mẽ kuma nê tanhmã akrã hto ka axte ã amnhĩ nhĩpêx anhÿr kêt nê. Nê ra amex nê apa.

Nê koja mēhõ Tirtũm kôt pix mã amnhĩ nhĩpêx mex rãhã ho pa. Hãmri nê mẽmoj tã kuwÿ nhũm kuma nê kãm tanhmã mẽmoj to. ¹⁷ Te finat Eris kot mẽmoj tã hwÿr nhũm kot mar nê kãm ho anhÿrta pyrãk. Erisja kêp mẽ panhĩõ na pre. Tã na pre hkwyjaja amnhĩ tomnuj pix o pa nhũm tee ri mẽ omu nê mẽ hã na wrÿk kêt kaxyw ho Tirtũm wÿr kãm hihtÿx nê. Hãmri nhũm kuma nê kãm ho anê nhũm na wrÿk kêt ry rax kumrêx. Hã amgrã axkrunêpxi nê hkôt mytwÿr kêp 6. Mě kot amnhĩ tomnuj tÿx o paja mÿrapê. ¹⁸ Tã nhũm Eris axte mẽ ho kuwÿ nhũm axte mẽ hwÿr na rē nhũm akupÿm katãt kôt wrÿk mex nê. Nhũm akupÿm mẽ hpur kãm mẽ õja mẽ kãm mex nê akupÿm mẽ kãm ô rûnh nê. Tã ã Tirtũm kot Eris mar nê kãm mẽmoj nhĩpêx anhÿrja pyrã nê koja mẽ pama nê mẽ pamã mẽmoj tanhmã ho.

¹⁹ Nê e mẽ inhma ixkwýjaja. Koja mēhõ Tirtũm kapêr mar tÿx nê te kêp hkra pyrãk o amnhĩ nhĩpêx. Tã tanhmã hamaxpêr to nê kapêr kaga nê htÿx ri amnhĩ tomnuj pix o pa. Ka mẽ ja hã omu nê hwÿr mra nê kot amnhĩ tomnuj nê kãm akapêr kãm axihtÿx kê tokyx hkaga nê akupÿm Tirtũm kôt amnhĩ xãm tÿx nê ãm hkôt pix mã amnhĩ nhĩpêx. ²⁰ Koja amnhĩ tã mẽ ama nê Tirtũm kôt amnhĩ xãm tÿx nhũm amnhĩ tã omu nê kot tanhmã amnhĩ tomnuj tota ho hamakêtkati nê amnhĩ katut kôt kurê nhũm nhÿrmã kuri htir tũm nê mex nê pa ho pa. Koja amnhĩ tomnuj tÿx o pa htã hkaga hpa nhũm Tirtũm ja hã omu nê hã tanhmã ho hkêt nê axte tanhmã kot amnhĩ tomnuj tota mã hamaxpêr kêt nê.

Tã ãm ja pix. Ixpê Xiakre na pa ã mẽ awÿr kaga nhĩpêx nê mēnh anê.

Wam Pêtre

Simaw Pêtre na pre kagàja nhîpêx. Kêp tep pynênh o pa xwÿnh tâ hpãnhã kêp Jejus nhÿ hã hkrajê jahkre ho pa xwÿnh. Nê krî pê Jerujarê kamã kêp Jejus krajê nhõ pastô. Na pre krî piitã hkôt Jejus ã mê kãm mê hkurê xwÿnhjaja tanhmã hã mê hipêx to nhÿm Pêtre mê harênh ma nê mê hamaxpêr o hihtÿx kaxyw mê kãm kagàja nhîpêx nê krî piitã hkôt mê hwÿr kurê. Mê kot kamã harênh nê mar nê amnhî kamã kahak kêt nê arî Tirtÿm kôt amnhî nhîpêx mex o pa kaxyw. Nê Jejus ã mê kot amnhî xà htÿx kamã hamak tâ nhÿrmã kaxkwa kamã mex nê pa ho pa hã mê kãm awjarê. Æ mê kãm mêmoj jarê nê hã kagà anê. Nê mê kãm:

1 Pa mê ate Jejus kôt amnhî xunhwÿr nhÿm Tirtÿm kot mê ato hkra xwÿnhjaja. Xà mê amex? Ot pa mê awÿr kagà nhîpêx nê kumê. Ixpê Simaw Pêtre na pa. Ixte Jejus nhÿ hã hkrajê jahkre ho mê ixpa xwÿnhjê hõ na pa mê awÿr kagà nê kumê.

Na xep pre Kris ã mê kãm mê pahkurê xwÿnhjaja tanhmã mê anhîpêx to ka mê panhõ pika rÿm mê umaj anhrà nê ma ahpÿnhã krî hkôt ri apa.

Jao mê akwÿjaja ma pika pê Põt kamã krî hkwÿ hkôt apa.

Nê mê akwÿjaja pika pê Karatas wÿr apa.

Nê mê akwÿjaja pika pê Kapatos wÿr apa.

Nê mê akwÿjaja pika pê As wÿr apa.

Nê mê akwÿjaja Pitin wÿr apa.

Æ ahpÿnhã pika hkôt mê apigranh par anê. Tã ot pa mê awÿr kagà nhîpêx nê mê apiitã mê awÿr kurê. Mê apÿnh nê mê ate kamã harênh nê ixkapêr mar kaxyw. ² Na pre Mëpahpãm Tirtÿmja amnhîm mê pahte amnhî kaxyw kãm pajamaxpêr xwÿnhjê rê nê mê pahtã amnhî jarênh o:

—Kot paj jajê ho ixkra. Na pre ra Ixkra Jejus Kris ixpê mê nê ty nê htyk o hkamrô axkapî nhÿm mê harênh ma nê hkôt amnhî xunhwÿ. Tã nhÿm Ixkarô mê hkarô mã agjê nhÿm mê ra inhmã hprãm xà kôt pix mã ri inhmã tanhmã amnhî nhîpêx to ho pa.

Anhÿr o mê pahtã amnhî jarênh. Tã kê mê akutã nojarêr rãhã ho ri mê akôt pa ka mê ÿ hã axãmnhîx ajamakêtkati nê akînh nê ri apa.

Mê pahte amnhî kukamã pajamaxpêr pê pahkînh o papa hã mê pamã karõ

Rukre 12.32-34; Römãn 8.18-25; Sikÿn Korîť 4.16-18

³ Nê na pre mê panhõ Pahihti Jejus Krisja ty nhÿm Hipêêxã Tirtÿm akupÿm ho htîr. Tã kot mê pakutã nojarêr rãhã ho pa jakamã na pre mê pahpê hkrajê mã mê pajamaxpêr nyw jagjê pu mê ÿ hã pahte amnhî nhîpêx nyw o amnhî nhîpêx o papa. Hãmri nê Jejus akupÿm htîrja mã pajamaxpêr nê amnhî kukamã pajamaxpêr o:

—Kot paj nhÿrmã ty nhÿm Tirtÿm kot Jejus nhîpêx pyrã nê akupÿm ixto ixtîr pa wa kuri ixtîr tÿm nê inhmex kumrêx rãhã ixpa ho ixpa. Nà koja ã inhîpêx anê.

Anhÿr o pajamaxpêr jakamã kwa kêr pu mê Tirtÿm mã mex o mex ã mãn harênh rãhã ho papa. ⁴ Na ra mê pakutêp õ krî kamã mêmoj piitã ho mex nê. Õ krî kamã mêmoj kot omnu nê hapêx kêt jakamã na pu htem amnhî tâ hamãr rãhã ho papa.

⁵ Nê mê kot Kris ã mê atomnuj mÿrapê na ka mê amnhî xà htÿx kamã ajamak o ri apa nom arî amnhî kaxyw Tirtÿm mã ajamaxpêr rãhã ho ri apa. Hihtÿx o hihtÿx jakamã koja mê pahkôt pa ho pa nê mê pamã pajamaxpêr o hihtÿx rãhã nhÿm nhÿrmã Jejus akupÿm mê pahwÿr wrÿ. Hãmri pu mê hkôt ri amnhî nhîpêx mex rãhã ho ri papa. Ra Tirtÿm kot mê pakukamã mê pajarênh xà hkôt. ⁶ Jar mê pahte arî amnhî xà htÿx kãm pajamak o papa htã na pu htem Tirtÿm nhÿrmã kot mê pahto mexta kukamã pajamaxpêr hãmri nê tee ri amnhî kukamã pajamaxpêr kêt nê. Mê pahpê mê pahpunuj tÿm nê ri papa ho papa mã xwÿnh kêt. ⁷ Na hte Tirtÿm mê panhîpêx o te mê kot ôr nhîpêx pyrãk. Na htem hprî hã tanhmã ôr kute hã omu. Kêp ôr kumrêx ã omu rÿ mêmoj mê ho pihkàr ã omunh kaxyw kuwy kamã kurê. Nhÿm piitã ôr nê pigãnh pa japêr nhÿm mê omu nê harênh o:

—Nà ãm hãmri. Kêp ôr kumrêx nê mêmoj mê ho pihkàr kêt. Anê.

Na hte Tirtÿm ã mê panhîpêx anê. Jakamã mê pahpê Jejus kôt amnhî nhîpêx o mê papa xwÿnhjaja mê pahte tõhã tanhmã pahpunuj to htã no nhÿm mê panê ja rênh kêt nê. Na hte amnhî tâ mê pahpumu nê hamaxpêr o:

—Kot paj kormã ja hã mê hamã nê tokyx akupÿm mê ho mex kêt nê. Koja mê omnuj nê pa htã tee ri amnhî kukamã hamaxpêr nê ixkaga hkêr nê arî amnhî kaxyw ixkôt hamaxpêr rãhã ho pa. Hãmri nhÿm mê hkwÿjaja ja hã mê omu nê mê kêp ixkra hã mê omunh kurê kumrêx. Te mê kot hprî hã ôr pumunh nê kêp ôr kumrêx ã omunhta pyrãk. Anê.

Jakamã kêr pu mê arî amnhî kaxyw hkôt pajamaxpêr rãhã ho papa. Mêmo mÿrapê mê pahpunuj nê ri papa htã arî hkôt pajamaxpêr rãhã nhÿm Jejus nhÿrmã akupÿn mê pahwÿr wrÿ. Hãmri nhÿm Tirtÿm mê pahpumu nê mê pamã:

—Nà ãm hãmri na ka prem amnhî kaxyw ixpîx mã ajamaxpêr rãhã ho ri apa. Mê kot ixtã tanhmã mê

atomnuj to nhũm mẽ ate amnhĩ xà htỳx kamā ajamak o apa htā aa ixkaga hkêt nẽ arĩ amnhĩ kaxyw inhmā ajamaxpēr rāhā ho ri apa. Nà ãm hāmri mẽ ate amnhĩ to mex kumrêx xwỳnh na ka mẽ. Kot paj mẽ piitā mẽ kām ja hā mẽ ajarẽ.

Anhỹr o mẽ pamā kapēr.

Nẽ ôr o mẽ hikukrêxja mex tã koja arĩ mex rāhā hkêt nẽ. Koja mēhõ kām tanhmā homnu hto hprām nẽ homnu hpa. No mẽ papajaja kot puj mẽ arĩ amnhĩ kaxyw Tirtũm mã pajamaxpēr rāhā ho papa hāmri nẽ ôrta pyrā nẽ pajapêx kêt nẽ. Kurom mẽ pamex tũm nẽ aa pajapêx kêt nẽ papa ho papa.

⁸ Nẽ Jeusja aa mẽ ate ano ho omunh kêt tã na ka htem kām mẽ ajapê htỳx nẽ kot mẽ panê tanhmā amnhĩ nhĩpêx to hā harênh ma nẽ mẽ amā hkĩnh nẽ. Nẽ amnhĩ kaxyw hkôt ajamaxpēr mex rāhā ho ri apa. Jakamā na pre Tirtũm ja hā mẽ apumu nẽ mẽ ato hkra nẽ mẽ apê õ krĩ kamā wa kuri amex nẽ apa mã xwỳnh ã mẽ ajarẽ. Ja kaxyw na pu prem amnhĩ kaxyw hkôt pajamaxpēr rāhā jao pahkĩnh nẽ ri papa. Nẽ tee ri tanhmā amnhĩ kĩnh tỳx ã amnhĩ jarênh to hkukamā pajamaxpēr. Kormā aa ã mẽ pahkĩnh anhỹr kêt tã mẽ pahkĩnh tỳx nẽ ri papa.

¹⁰ Nẽ Tirtũm kot mẽ pahto mex pẽ mẽ panê mẽ pahte amnhĩ tomnuj rênh par nhũm kuri mẽ pahĩr tũm nẽ mẽ papa hā mẽ pajarênhja. Amnepê mã Tirtũm nhỹ hā kapēr jarênh o ri mẽ pa xwỳnhjaja na pre mẽ pakukamā ã mẽ pajarênh anhỹrja ma nẽ tee ri hamaxpēr nẽ tee ri hā axpên kukjêr o ri axpên kôt pa. Nom hprĩ hā mar mex kêt nẽ. Tã arĩ ri mẽ pakukamā hkwyjê mã ja hā mẽ pajarênh o ri pa.

¹¹ Na pre Tirtũm Karõja Kris tyk kukamā mẽ kām ã mẽ pajarênh anhỹr o amnhĩrĩt. Kormā Kris kaxkwa kamā pa ri. Kormā wrỳk nẽ katorxà nhõxàhkre rũm kator kêt ri nhũm pre hkukamā mẽ kām tanhmā ho amnhĩrĩt to. Mẽ kot hprĩ nhũm kot amnhĩ xà htỳx kām hamak kām mẽ panê htykja ã hkukamā mẽ kām harênh o amnhĩrĩt. Nhũm Tirtũm kot akupỳm ho htĩr nẽ kām mex o mex ã harênhja nhũm hkukamā mẽ kām harênh o amnhĩrĩt. No ãm hprĩ hā mẽ kām mēhõ nhĩxi hkôt harênh kêt jakamā nhũm prem harênh ma nẽ tee ri hkukamā ri hamaxpēr nẽ tee ri hā axpên kukjêr o ri axpên kôt pa. Nẽ hā axpên kukjêr o:

—Kwa mēhõ koja we ã amnhĩ nhĩpêx anẽ? Xà koja tokyx ã amnhĩ nhĩpêx anẽ nà kormā?

Anhỹr o hā axpên kukjêr o ri pa. ¹² Hāmri nhũm Tirtũm axte mẽ kām Jeus jarênh kwỳ ho amnhĩrĩt nẽ mẽ kām:

—Nà mẽ anoo mã koja ã amnhĩ nhĩpêx anhỹr hkêt nẽ. Mẽ amỳr pẽ mẽ akanrêhā mẽ akra nẽ mẽ atàmhwỳjê noo mã koja kato nẽ mẽ hkôt ã amnhĩ nhĩpêx anhỹr o pa. Anẽ.

Mẽ papamjaja mẽ panoo mã kator nẽ ã kot amnhĩ nhĩpêx anhỹr o paja o ã mẽ kām ho amnhĩrĩt anẽ.

Amnepêm Tirtũm nhỹ hā kapēr o ri mẽ pa xwỳnhjaja nẽ jarāhā mẽ ixte Jeus nhỹ hā mẽ ahkre ho ri ixpa xwỳnhjaja mẽ ixkapēr ãm pixii. Na pa htem wamtajê pyrā nẽ Tirtũm Karõ nhỹ hā àhpumunh tỳx xà ho mẽ

amā tanhmā Jeus jarênh to ho ri mẽ akôt ixpa. Nhũm hte Tirtũm kapēr o mẽ wrỳk xwỳnhjaja mẽ ixkapēr ma nẽ tee ri hamaxpēr o mẽ pahpyrà nẽ kām hprĩ hā harênh mar par prām nẽ.

Mẽ pahte Tirtũm pyrā nẽ tãm amnhĩ nhĩpêx ã mẽ pamā karõ

Epes 4.1-3; Korosẽ 1.10-12; Sikũn Pêtre 3.10-13; Wam Juāw 3.1-6

¹³ E kwa Kris kôt ixtõ nẽ ixtõxjaja. Kêr ka mẽ Jeus kutêp mẽmoj punuj kutā amnhĩ to htỳx rāhā ho ri apa. Nẽ Tirtũm mã amnhĩ nhĩpêx mex rāhā nẽ. Pê tãm ajamaxpēr nẽ tãm amnhĩ nhĩpêx o apa. Nẽ mẽ ã ajamaxpēr anhỹr o:

—Nà koja nhỹrmā Jeus akupỳn mẽ ixwỳr wrỳ hāmri nhũm Tirtũm ixto mex rax nẽ. Nà koja ã inhĩpêx anẽ. Anẽ.

¹⁴ Nẽ kêr ka mẽ Tirtũm kapēr kôt pix mã mǎn ri amnhĩ nhĩpêx mex rāhā ho ri apa. Te mēhprĩre kot mẽ hipêêxà kapēr mar nẽ hkôt amnhĩ nhĩpêx pyrāk. Kormā mẽ ate Kris kôt amnhĩ xunhwỳr kêt ri na ka prem ate amnhĩ nhĩpêx tũm kôt ri tanhmā amnhĩ tomnuj to ho ri apa. ¹⁵ Tã kêr ka mẽ hpǎnhā amnhĩ to mex o mǎn ajamaxpēr o apa nẽ Tirtũm pyrā nẽ amnhĩ tomnuj o apa hkêt nẽ. Tirtũmja kot amnhĩ to mex pix o pa xwỳnh na. ¹⁶ Kapēr ã kagà htũm kot ja jarênh kot:

Kêr ka mẽ ixpyrà nẽ amnhĩ to mex pix o ri apa. Anẽ.

¹⁷ Tã koja nhỹrmā kêp Mēpahpām maati hā hprĩ hā mẽ pahte amnhĩ nhĩpêx ã mẽ pahpumunh hkôt tanhmā mẽ pajarênh to. Tãm mẽ pahte amnhĩ nhĩpêx kôt mẽ pajarê rỳ mẽ pahte amnhĩ tomnuj kôt mẽ pajarê. Hāmri nẽ ahpỳnhā mẽ panhĩpêx. Mẽ pahto mex nẽ rỳ mẽ pahptomnuj nẽ. Jakamā kwa pu mẽ nhỹrmā kot tanhmā mẽ pahptomnuj to pymaj hkôt pix mã amnhĩ nhĩpêx o ri papa rāhā nẽ.

¹⁸ Nẽ kormā mẽ pahte Jeus kôt amnhĩ xunhwỳr kêt ri na pu prem mẽ panhĩgêt pyrā nẽ pahĩtỳx ri amnhĩ tomnuj o ri papa. Tã nhũm Krisja te amnhĩm mẽ pajaprôr pyrāk o mẽ panhĩpêx. Mẽ pahte hpǎnhā kapēr kôt pix mã amnhĩ nhĩpêx o papa kaxyw. No mẽmoj to na pre mẽ pahpǎnhā amnhĩre? Nà ra mẽ pahte ja jarênh mar tỳx. Na pre kǎxpore ho mẽ pahpǎnhā amnhĩrer kêt nẽ. Rỳ ôr o mẽ hikukrêx ã ohtõ ho mẽ pahpǎnhā amnhĩrer kêt nẽ. Rỳ prat o mẽ hikukrêx ã ohtõ ho mẽ pahpǎnhā amnhĩrer kêt nẽ. Jajaja hapêx tokyx anhỹr mã xwỳnh na. ¹⁹ Na pre ã mẽ hpǎnhā amnhĩrer anẽ nẽ tãm mẽ panê ty nẽ htyk o amnhĩ nhĩ ho mẽ pahpǎnhā amnhĩrer pa. Nhũm hkamrô axkapĩ. Te amnepê mã mẽ panhĩgêt kot amnhĩ pǎnhā Tirtũm mã ôwêhti hkrare hpar nhũm hkamrô pikapĩrta pyrāk. ôwêhti krare mexre pix na prem kām kupa. Mex nẽ tanhmā kute hkêt xwỳnh pix. Tã Krisja aa tanhmā amnhĩ tomnuj to hkêt kumrêx nẽ mẽ panê ty nẽ htyk o Tirtũm mã mẽ pahte amnhĩ tomnuj piitā hpǎnhā amnhĩrer pa. ²⁰ Amnepê mã kormā mẽmoj kêt ri na pre Tirtũm kot ã mẽ pahpǎnhā amnhĩrer anhỹr kaxyw mẽ pakukamā kuta nẽ ãm. Tã nhũm amgrà ohtõ nẽ hapêx nhũm mẽ pahwỳr kumê nhũm man mẽ pahwỳr wrỳ. Kot ã mẽ pahpǎnhā amnhĩ nhĩpêx anhỹr kaxyw. ²¹ Tã nhũm prem kupĩ nhũm

Tirtûm akupým ho htîr nê mex o mex ã harê. Mê pahte ja hã harênh mar kôt amnhî kaxyw Tirtûm pix mã pajamaxpêr o ri papa kaxyw. Nê mê pahte amnhî wÿr Jejus jamâr rãhã ho ri papa kaxyw.

²² Tã pu prem ra kot ã mê panê amnhî nhîpêx anhÿr ã harênh ma nê mê pahte amnhî tomnuj kaga nê hkôt amnhî xunhwÿ. Jao amnhî to mex pix o ri papa. Nê mê pamã Kris kôt mê pahkwÿjê hkînh o papa. Tã kwa kêr pu mê arî pamã xepên kính tÿx rãhã ho papa.

Te mê pakatorxà rûm mê pajapôx pyrãk o axte mê pajapôx ã mê pajarênh

Juãw 3.1-21

²³ Nê na pu prem mê pakatorxà nhõxàhkre rûm mê pajapôx pyrã nê axte mê pajapôx pyrãk o amnhî nhîpêx. Jao ra mê pahpê Tirtûm kra nê ri papa. Na hte mê pakatorxà nê mê panhîpêxàja wa ri pa nê gaa nê mê pahpê ty. No kêt Mêpanhîpêxà maati Tirtûmja wa kurom rãhã ho rãhã. Tã ra mê pahte amnhî kaxyw kapêr kôt pajamaxpêr o pahpê hkra jakamã kot puj mê urãk nê nhÿrmã pahpê tûm nê papa rãhã ho papa.

Nê Tirtûm kapêrja Tirtûm pyrã nê rãhãã. Koja aa hapêx kêt nê. ²⁴ Kapêr ã kagà htûm kot ja jarênh kot: Pika piitã hkôt mê pa xwÿnhjaja te mê kot pöti grã pyrãk.

Nê mê kot amnhî to mex xàja te kot kapôt ã pixôrã pyrãk.

Na hte pöti tokyx grã nê hapêx.

Nê pixôrãja haxwÿja arîgro htÿx mê nhûm grã tokyx anê nê rarak pa nê hapêx.

²⁵ No Tirtûm kapêr koja pöti mê pixôrãta wa kurom aa hapêx kêt nê. Koja arî rãhã ho rãhã. Anê. Tã kapêrja tãm na htem mê pamã kamã harê pu mê pahpiitã mar o papa.

Mê pahte Tirtûm kot amnhî nhîpêx kôt amnhî nhîpêx ã mê pamã karõ

Römãn 12.2; Wam Korîť 3.16-17; Epes 2.19-22

2 Nê kwa kêr pu mê axte tanhmã amnhî tomnuj to ho ri papa hkêt nê.

Rÿ tanhmã xepên mã paxêx to hkêt nê.

Nê paxêx rom tanhmã ri xepên nokupyr to hkêt nê.

Nê mëmoj tã xepên kãm pagryk kêt nê.

Nê tanhmã xepên japyrÿ hto hkêt nê.

Kêr pu mê ã amnhî nhîpêx anhÿr o papa hkêt kumrêx.

² Mê hkarãre na htem ãm kãm pijaôr pix prãm. Nê gaa nê htÿxre nê ra hprêk o mō. Tã kêr ka mê pijaôr pix prãm xwÿnhjê pyrã nê amã Tirtûm kapêr mar nê hkôt pix mã amnhî nhîpêx o apa hprãm. Jao mar tÿx pê ra hkôt amnhî nhîpêx mex o mō nê gaa nê hkôt amnhî nhîpêx mex o apa. Te mê karãre pijaôr nê gaa nê ra hprêk o mōrta pyrãk. ³ Ra mê ate Jejus kot mê pahto mex ã omunh mex kênã.

⁴ Nê na htem kên o ixkre nhîpêx kaxyw hãmri nê hk-wÿ kawrà nê ri hkapi. Nhûm hō mex kêt nhûm mê tee ri omu nê nhãm kumê. Tã ja pyrã nê na pre mê pahkwÿjaja tee ri Kris pumu nê htÿx mex kêt ã hkamnhîx nê te mê kot kên mênhta pyrãk o hipêx nê hkaga. No

nhûm Tirtûmja amnhîm Kris mex o mex ã harê. Te ho mēhō kot kên mex kêt ã hkamnhîx nê mēnh nhûm mēhō kot mex ã omunh nê amnhîm mÿnhta pyrãk. Nom Krisja kên rom kêp htîr tûm nê pa xwÿnh jakamã nhûm pre Tirtûm mê pakaxyw ãm pu prem hkôt amnhî xunhwÿ.

⁵ Nê Tirtûm na hte nhÿrmã mê pahpê tûm nê wa kuri mê papa mã xwÿnh ã mê pajarê. Te mê pahpê kên nhûm Tirtûm te kot amnhî Karõ mã mê pahto ixkre nhîpêx pyrãk. Jakamã na hte Jejus Kris tanhmã mê pahkrã hto pu mê Tirtûm kôt amnhî nhîpêx mex rãhã ho ri papa. Nê tanhmã kãm amnhî nhîpêx mex to nhûm ja hã mê pahpumu nê hkînh nê.

⁶ Tirtûm kapêr ã kagà htûm kot tanhmã Kris jarênh to. Nê hã kuxi nê tanhmã harênh to. Te kêp kên pyrãk ã harê nê harênh kot:

Kot paj nhÿrmã Ijaew wÿr mēhō mê nhûm mê hkôt pa ho pa.

Koja te kêp kên o inhörkwÿ nhîpêx kaxyw kên maati mex kumrêxta pyrãk.

Koja amnhî kaxyw hkôt mê hamaxpêr xwÿnhjaja nhÿrmã ma inhō krî hwÿr api nê hkînh nê mex rãhã nê pa ho pa. Anê.

⁷ Tã ra amnhî kaxyw hkôt mê pajamaxpêr xwÿnhjaja.

Kên pyrãk xwÿnh pê Jejusja na mê pamã mex o mex. No mê kot hkaga xwÿnhjaja na htem hamaxpêr punuj xwÿnh ã hkamnhîx nê hkaga nê kãm hkînh kêt nê.

Tirtûm kapêr ã kagà htûm kot mê harênh kot:

Na prem kên o amnhîm örkwÿ nhîpêx kaxyw hkawrà ho pa nê kên maatija pumu nê htÿx omnuj ã hkamnhîx nê hkaga.

Mê kot hkaga htã nhûm Tirtûm mê kurom mex o kot kên piitã hakrenh par ã omunh kurê kumrêx. Anê.

⁸ Nê määnên harênh kot:

Koja mê kapêr mar kêt kumrêx.

Te pry kamã kên nör nhûm mê kot nhãm pry nê mēnh kaxyw hkamnar o amnhî par krã hi kukēnh pyrãk o koja mê amnhî nhîpêx. Anê.

Mê kot Kris kapêr mar tã hkôt amnhî xunhwÿr kêt jakamã te ho mê kot amnhî nê kên kamnar o amnhî par krã hi kukēnh pyrãk o koja mê amnhî nhîpêx.

Jakamã koja nhÿrmã Tirtûmja ja hã tanhmã mê ho htÿx kumrêx. Ra kot amnhî kukamã mê kãm amnhî jarênh xà hkôt. ⁹ No mê papajaja na pre Tirtûm jajê rom amnhî kôt mê paxunhwÿ. Nhÿrmã õ krî kamã mê

papa ho papa kaxyw. Nê mê pahte mex o mex ã harênh kaxyw. Na pu htem Ijaew nhõ patre pyrã nê Pahi Maati Tirtûm mã tanhmã amnhî nhîpêx to ho pa. Nom kormã mê pahte Kris kôt amnhî xunhwÿr kêt ri te mê pahpê kamãt kô kamã mê pahpêx ri mê papa xwÿnh pyrãk. Tã Jejus kôt amnhî xunhwÿ nê hpãnhã te mê pahpê hirã mex kãm ri mê papa xwÿnh pyrã nê tãm amnhî nhîpêx rãhã ho papa. Ra mê pahpê Tirtûm kra jakamã na pu htem amnhî to mex rãhã ho ri papa. Nê Mêpahpãm maati Tirtûm mã tanhmã amnhî nhîpêx to ho ri papa. Te mê kot mê ho àhwÿr xwÿnhjaja kot kãm amnhî nhîpêx o pata pyrãk. Æ na pre Tirtûm mê

pahte amnhî nhîpêx anhÿr o papa kaxyw mẽ panhîpêx.

¹⁰ Amnepêm kormã mẽ pahpê hkra hkêt ri na pre mẽhõ mẽ pakamã ukaprí hkêt kumrêx pu htem pahpunuj nê ri papa. Tã Jejus kôt amnhî xunhwÿ nhũm Tirtũm mẽ pahto hkra pu mẽ pahpê hkra hã ri papa nhũm mẽ pakamã ukaprí rãhã ho mẽ pahkôt pa.

Mẽ pahpê Tirtũm mã tanhmã amnhî nhîpêx to xwÿnh ã mẽ pajarênh
Rõmãn 13.1-7; Xitre 3.1

¹¹ E ixkràmnhwÿjaja. Ra mẽ pahpê Tirtũm kra jakamã mẽ pahpê õ krí nhõ xwÿnh. Te mẽ pahpê jar pika nhõ xwÿnh kêt pyrãk jakamã kwa kêr pu mẽ arí mẽ pahte amnhî nhîpêx tũm o amnhî nhîpêx kêt nê. Nê mẽ pajamaxpêr tũm o pajamaxpêr kêt nê. Ra axtem mẽ pajamaxpêr nyw nê axtem mẽ pahte amnhî nhîpêx nyw kênã. Mẽ pahte amnhî nhîpêx tũmja te kãm akupÿm mẽ pahte hkôt amnhî to paxujanãr prãm pyrãk. Mẽ pahte axte hkôt amnhî nhîpêx o ri papa kaxyw. Tã nom kêr pu mẽ anhÿr kêt nê. ¹² E kwa kêr ka mẽ anhõ krí kamã akwÿ kot Kris kôt amnhî xunhwÿr kêt xwÿnhjê noo mã tãm ri amnhî nhîpêx o ri apa. Mẽ kot Kris ã tanhmã mẽ anhîpêx to rÿ tanhmã hã mẽ ato kapêr punuj to htãã. Kot kaj mẽ ã mẽ hkôt amnhî nhîpêx anhÿr o ri apa hãmri nhũm mẽ tee ri mẽ apumu nê hamaxpêr o:

—Kwa mẽ ixte mẽ kot amnhî tomnuj xwÿnh ã mẽ harênh tã mẽ kot amnhî to mex pix xwÿnh na mẽ. Anê. Hãmri nê nhÿrmã mẽ pahpyrà nê Tirtũm kôt amnhî xunhwÿ nê kãm mex o mex ã harê nê kãm:

—Kwa Tirtũm. Na pre hte akrajaja anhÿ hã amnhî to mex rãhã nê pa ho pa ja hã mẽ omu. Nà xep amex o amex Tirtũm. Anê.

¹³ Nê mẽ apê Pahihti Jejus Kris kôt amnhî nhîpêx xwÿnh jakamã kêr ka mẽ anhõ krí kamã mẽ anhõ pahihti kapêr ma nê kapêr kôt mãn amnhî nhîpêx mex o ri apa. Nê mẽ anhõ pika kamã mẽ anhõ prêjitênja ka mẽ kapêr ma nê hkôt amnhî nhîpêx. Mẽ kot mẽ ato amnhîptàr xwÿnhjaja ka mẽ piitã mẽ kapêr ma nê mẽ kapêr kôt pix mã amnhî nhîpêx rãhã ho ri apa. ¹⁴ Nê mẽ anhõ pahi nhÿ hã mẽ kapêr o mẽ pa xwÿnhjaja na htem mẽ akaxyw mẽ unhwÿ. Mẽ kot amnhî tomnuj xwÿnhjaja nhũm tanhmã mẽ kot mẽ ho kaxyw. Nê tãm mẽ kot amnhî nhîpêx o ri mẽ pa xwÿnhjaja nhũm mẽ kot mẽ õ pahi mã mex ã mẽ harênh kaxyw. ¹⁵ Tã kêr ka mẽ kapêr ma nê mẽ hkôt tãm amnhî nhîpêx rãhã ho ri apa. Hãmri nhũm mẽ ato kapêr punuj xwÿnhjaja ja hã mẽ apumu nê axte tanhmã mẽ ato kapêr to hkêt nê. ã mẽ ate amnhî nhîpêx anhÿr o apaja na Tirtũm kãm hprãm.

¹⁶ Nê mẽ pahpê Tirtũm kra jakamã na pu htem paxàmnhîx kãm tanhmã amnhî nhîpêx to ho ri papa. Nom kêr pu mẽ pahpê hkra hã pahtÿx ri amnhî nhîpêx kêt nê.

¹⁷ Nê kêr ka mẽ piitã mẽ ho mex o ri apa.

Nê mẽ ato amnhîptàr xwÿnhjê ho mex nê mẽ hã apijaàm rãhã ho ri apa.

Nê mẽ apê Kris kôt mẽ ate xpên to mẽ atõ nê mẽ atõxjê hã amã xpên kÿnh pê xpên to mex nê. Nê Tirtũm ã apijaàm rãhã nê.

Mẽ kãm mẽ apênh xwÿnhjaja kot tanhmã amnhî nhîpêx to hã mẽ kãm karõ

Epes 6.5-8; Korosê 3.22-25; Wam Ximotre 6.1-2; Xitre 2.9-10

¹⁸ Nê mẽ apê mẽ kãm mẽ axàpênh xwÿnhjaja kêr ka mẽ anhõ patrãw kapêr ma nê hkôt ri amnhî nhîpêx. Kot mẽ ato mex o pa rÿ mẽ atomnuj o pa htã ka mẽ arí mẽ hã apijaàm pê hkôt ri amnhî nhîpêx. ¹⁹ Tanhmã kot mẽ anhîpêx punuj to htã ka mẽ arí kãm axàpênh mex rãhã nê. Kêr kê Tirtũm ja hã mẽ apumu nê mẽ ato mex nê ka mẽ ajamakêtkati nê axàmnhîx ri kãm axàpênh o apa. ²⁰ Nom kot kaj tanhmã amnhî tomnuj to nhũm anhõ patrãw ja hã apumu nê hã atak ka amnhî xà htÿx kamã ama nê rÿ amnhî pumu. No kot kaj akatãt kôt kãm axàpênh mex tã nhũm amarí atak japêr tã kêr ka amnhî tã kamã agryk kêt nê. Arí kãm amnhî to htÿx kamã kãm xa nê amnhî tã tanhmã ho hkêt nê. Hãmri nhũm Tirtũm ja hã apumu nê ato mex nê. ²¹ Amnepêm na pre mẽ pahte hkôt amnhî xunhwÿr xwÿnhjaja Kris pyrã nê mẽ paxà htÿx kamã pajamak o papa hkukamã ja hã mẽ pahpumunh mex. Na pre Kris mẽ pakaxyw amnhî xà htÿx kãm hamak tÿx tã amnhî to htÿx nê mẽ kãm xa. Tã kêr pu amnhî xà htÿx kamã pajamak tã ÿ urãk nê amnhî to htÿx nê papa. ²² Krisja aa tanhmã amnhî tomnuj to hkêt nê pa ho pa. Nê aa mẽmoj tã amnhî to hêx o pa hkêt. ²³ Mẽ kot kãm kapêr punuj tã nhũm amnhî tã tanhmã mẽ kãm nê hkêt nê. Nê mẽ kãm kapêr punuj kêt nê. Nhũm prem homnuj tÿx kumrêx nhũm amnhî xà htÿx kamã hamak tã amnhî tã mẽ kãm àkjêr nê tanhmã mẽ haprÿ hto hkêt nê. Na pre ãm hamaxpêr o: “Nà Tirtũm kot ixtã mẽ omunh mex kênã. Koja nhÿrmã mẽ piitã tanhmã mẽ kot amnhî nhîpêx to hã mẽ omunh xà hkôt tanhmã mẽ hipêx to. Tãm koja àhpumunh tÿx xà hkôt tanhmã ixtã mẽ harênh to. Mẽ kurom àhpumunh tÿx o àhpumunh tÿx xwÿnh kênã.” Anê.

²⁴ Kris na pre te kawã kamã mẽ pahte amnhî tomnuj piitã gjênh nê ho nÿt nê htur rãhã pÿ kahpa hã mẽ panê htyk pyrãk o amnhî nhîpêx. Mẽ pahte axte tanhmã amnhî tomnuj to hkêt prãm xàj. Pãnhã mẽ pahte amnhî to mex pix o ri papa kaxyw. Tã ã kot amnhî xà htÿx kãm hamak anhÿr o jêt jakamã kot puj mẽ pahte hkôt amnhî xunhwÿr xwÿnhjaja aa mẽ pahte amnhî tomnuj pãnhã amnhîrer kêt nê. Ra Jejus htyk o kot mẽ panê amnhîrer par kênã.

²⁵ Na pu pre te mẽ pahpê ôwêhti pikunor pyrã nê pahtÿx ri papa. Tanhmã amnhî tomnuj to rãhã ho ri papa. Tã nhũm Kris te kot ôwêhti jamãr xwÿnh kot ôwêhti pikunor mã katorta pyrãk o mẽ panhîpêx. Pu mẽ hkôt amnhî xunhwÿ nê hkôt amnhî nhîpêx mex o ri papa. Jao hkôt papa ho papa.

Mě mjên mě mě hprõ kot tanhmã axpën nhîpêx to hã mě kãm karõ

Wam Korît 7; Epes 5.22-25; Korosë 3.18-19; Wam Ximotre 2.9-15

3 Nê kêr ka mẽ anijaja mẽ amjên kapër ma nê hkõt amnhî nhîpêx. Akĩnhã kormã kot Tirtũm kõt amnhî nhîpêx kêt japêr tã arĩ kapër ma nê hkõt amnhî nhîpêx mex o ri apa. Kê mẽ ate amnhî nhîpêx ã mẽ apumu nê mẽ apyrã nê Kris kõt amnhî xunhwyr japêr. Mě kãm Tirtũm kapër mar prãm kêt tã koja mẽ ã mẽ ate amnhî nhîpêx anhÿr ã mẽ apumunh kõt mẽ apyrã nê amnhî kaxyw hkõt hamaxpêr japêr. ² Na htem mẽ ate Tirtũm kapër kõt tãm ri amnhî nhîpêx o apa hã mẽ apumunh o ri mẽ akõt pa.

³ Jakamã kêr ka mẽ anijaja amnhî mex pix kukamã ajamaxpêr o ri apa hkêt nê. Rÿ ajamaxpêr o:

—Ma kot paj mẽ hkuxwaxà ho amnhî krã hkĩ kuxwa mex nê inhõkrexê mex jagjê nê ri hã mra. Nê kupêxê mex kwÿ japrõ nê ho amnhîm ixê mex nhîpêx hãmri nê hagjê nê ri hã mra. Kot paj ã amnhî nhîpêx anê nhũm mẽ piitã ja hã ixpumu nê kãm ixkĩnh nê inhmex ã ijarê. Ma kot paj ã amnhî nhîpêx anê.

Anhÿr o ri amnhî kukamã ajamaxpêr kêt nê. ⁴ Tirtũm na hte ã mẽ pahte amnhî nhîpêx anhÿr ã mẽ pahpumu nê ãm hã mẽ pahpumu. Mě õkrexê nê mẽ ê mex na hte hapêx tokyx anê. No mẽ panhõpinhxà kaxwÿnh kãm tãm ri mẽ pajamaxpêr nê pakamã amnhíkrit nê papaja. Kot kaj mẽ ã amnhî nhîpêx anhÿr o ri apa hãmri nhũm Tirtũm ja hã mẽ apumu nhũm ja kãm mex nê. ⁵ Amnepê mã mẽ pakukamã mẽ panhõ wõwõ nê mẽ panãjaja. Mě hkwy kot Tirtũm kõt amnhî nhîpêx xwÿnhjaja na prem ã amnhî nhîpêx anhÿr o pa. Mě kot mjên kõt amnhî nhîpêx o pa jakamã na prem amnhî tã mẽ omu nê mẽ ho mex nê kãm mẽ hapê nê. ⁶ Mě panhõ wõwõ finat Saraja na pre ã amnhî nhîpêx anhÿr o pa. Jao mjên Apraãw kapër ma nê hkõt amnhî nhîpêx. Nê kêt õ pahi hã harê nê hkõt pix mã amnhî nhîpêx o ri pa. Tã kot kaj mẽ urak nê amnhî to htÿx nê ã amnhî nhîpêx anhÿr o apa. Hãmri nê amnhî tã amã amjên puma hkêt nê apa nê te apê Sara hkra pyrak.

⁷ Nê mẽ amyjaja kêr ka mẽ tãm mẽ aprõ nhîpêx o ri mẽ hkõt apa. Mě akĩnhã mẽ hihtÿx kêt jakamã mẽ kamã axukaprĩ rãhã ho ri mẽ hkõt apa. War ajamê war apê Jejus kukwak ri war atĩr tũm nê apa mã xwÿnh jakamã kêr ka mẽ ho mex rãhã ho ri mẽ hkõt apa. Tirtũm kãm war ajamê war ajapê jakamã kot kaj mẽ ã mẽ hipêx anhÿr o ri apa hãmri nê ra axamnhix mẽmoj tã amnhî to Tirtũm wÿ nhũm mẽ amar kurê kumrêx.

Tirtũm krajaja kot amnhî xà htÿx kamã hamak ã mẽ harênh

Rõmãn 12.9-21; Korosë 1.10; Wam Tesarõn 5.14-15

⁸ E Kris kõt ixkrãmnhwÿjaja. Nà ixkapêr jatur xà na ja. Kêr ka mẽ ri axpën kõt ajamaxpêr mex pê axpën to mex rãhã ho ri apa. Nê mẽ ate Kris kõt axpën to atõ nê atõx ã amã axpën kĩnh o ri apa. Jao axpën kamã axukaprĩ nê mẽmoj to axpën kutã anojarêt rãhã nê.

⁹ Na pu prem Jejus kõt amnhî xunhwÿ nhũm Tirtũm

mě pahto hkra nê mẽ pahto mex ã amnhî jarê. Tã koja mẽhõ tanhmã mẽ anhîpêx to rÿ tanhmã mẽ ato kapêr punuj to. Nom kêr ka mẽ ama nê amnhî tã tanhmã ho rÿ tanhmã ho akapêr punuj to hkêt nê. ãm te Tirtũm kot mẽ panhîpêx pyrak o mẽ hipêx nê mẽ ho mex pix o ri mẽ hkõt apa. Ja na Tirtũm kãm hprãm. ¹⁰ Kapêr ã kagã htũm kot ja jarênh kot:

Kot kaj mẽ amã amex nê akĩnh nê ri apa hprãm hã kot kaj mẽ ã amnhî nhîpêx anê:

Kot kaj mẽ ri akapêr punuj o ri apa hkêt nê.

Nê mẽmoj tã amnhî to axêx o ri apa hkêt nê.

¹¹ Nê te mẽ ate amnhî katut kõt ate amnhî tomnuj rênh o apa pyrã nê hpãnhã amnhî to mex pix o ri apa. Nê mẽ amã tãm axpën nhîpêx pix prãm o ri axpën kõt apa.

Nê mẽ amã ajamakêtkati nê axpën kõt apa hprãm rãhã ho ri apa.

¹² Na hte Tirtũmja ã mẽ kot amnhî nhîpêx anhÿr o pa xwÿnhjê jamãr mex rãhã ho pa.

Nhũm mẽ tanhmã amnhî to hwÿr to nhũm mẽ mar kurê kumrêx.

No mẽ kot amnhî tomnuj o mẽ pa xwÿnhjaja na hte mẽ kutã amnhî xãm nê ãm mẽ omu nê mẽ ho mex kêt nê. Anê.

Tirtũm kapêr ã kagã htũm kot ã mẽ harênh kot anhÿr.

¹³ Nê kot kaj mẽ amã amnhî to mex pix o apa hprãm nhũm mẽhõ ja hã tanhmã mẽ atomnuj to hkêt nê.

¹⁴ No kot kaj mẽ amnhî to mex pix o apa htã nhũm mẽhõ ja hã apumu nê tanhmã hamaxpêr to nê atomnuj ka amnhî xà htÿx kamã ajamak japêr. Tã koja Tirtũm nhÿrmã ja hã tanhmã mẽ ato mex to. Jakamã kwa kêr ka mẽ tee ri mẽhõ kot tanhmã mẽ atomnuj to hkukamã ajamaxpêr pê amã mẽ uma ho ri apa hkêt nê. Nê tee ri amnhî kukamã ajamaxpêr o akaprĩ nê ri apa hkêt nê. ¹⁵ ãm amnhî kaxyw Kris mã mãn ajamaxpêr tÿx rãhã nê mẽ panhõ Pahihti hã apijaãm rãhã ho ri apa. Nhũm mẽhõ ja hã mẽ apumu nê tanhmã hã mẽ akukjêr to nê mẽ amã:

—Kwa mẽmo kaxyw na ka pre Kris kõt amnhî xãm nê hkõt ri amnhî nhîpêx o apa? Anê.

Ka mẽ ama hãmri nê aprĩ hã kãm amnhî jarênh kurê kumrêx. ¹⁶ Nom kêr ka mẽ akapêr mã aprĩ kamã kãm amnhî jarê. Tirtũm kapêr kõt amnhî nhîpêx o apa hã mẽ kãm amnhî jarê. Koja mẽ Kris ã mẽ ato kapêr punuj rÿ hã mẽ atã hpêr o axkê nê pikunhar japêr ka mẽ ãm amnhî tã mẽ ama nê ãm mẽ ama. Kwãr mẽ mãmrĩ ã mẽ anhîpêx anê. Kêr ka mẽ amnhî tã mẽ omu nê arĩ amnhî to mex rãhã ho ri apa. Kêr kê mẽ tee ri amnhî tã mẽ apumu nê hpijaãm nê.

¹⁷ Nê koja mẽ akwÿjaja mẽ ate Tirtũm kapêr kõt amnhî nhîpêx mex o apa hã mẽ apumu nê hã tanhmã mẽ anhîpêx to htã kêr ka mẽ arĩ Tirtũm kõt amnhî nhîpêx o ri apa. Ja na kãm hprãm. Nom kot kaj mẽ tanhmã amnhî tomnuj to nhũm mẽ ja hã mẽ apumu nê pahihti mã mẽ ajarê nhũm kuma nê ja hã tanhmã mẽ amã ãkjêr to ka mẽ ra apijaãm nê.

¹⁸ Nê Krisja na pre mẽ panê ty. ãm htyk tipxi tã mẽ pahpiitã mẽ pahpãnhã amnhîre. Mě pakurom aa kot

tanhmã amnhĩ tomnuj to hkêt tâ mẽ pahte amnhĩ tomnuj piitã hpãnhã amnhĩrer pa. Mẽ pahte hkôt amnhĩ xunhwỳr nẽ nhỹrmã ma Tĩrtũm nhõ krĩ hwỳr paxàpir nẽ kamã pahťĩr tũm nẽ papa ho papa kaxyw. Mẽ kot hpĩr tâ nhũm Tĩrtũm akupỹm ho hťĩr nhũm hťĩr o hťĩr. ¹⁹ Nom kormã akupỹm hťĩr kêt ri na pre hkarõ pix o mẽ htyk xwỳnhjê hwỳr mō. Ahpunu kamã mẽ hkarõ kệp prês nẽ hkrĩ xwỳnhjê hwỳr mō nẽ mẽ kot Noehti kapêr mar nẽ hkôt amnhĩ nhĩpêx kêt nhũm gō htãm kot mẽ hanhir par xwỳnhjê mã kapêr. Tĩrtũm kot nhỹrmã mẽ kot amnhĩ tomnuj mỳrapê kuwy maati wỳr mẽ rênh ã mẽ hkukamã mẽ kãm awjarê. Amnepêm kormã Noehti kot pàr raxta nhĩpêx o kuhê ri na prem kãm Tĩrtũm kapêr mar prãm kêt nẽ. Nhũm amnhĩ tâ mẽ omu nẽ mẽ kamã gryk tokyx anhỹr kêt nẽ. Arĩ amnhĩ tâ mẽ hamãr o pa. Mẽ kot hkôt amnhĩ xunhwỳr nẽ hkôt amnhĩ nhĩpêx prãm xàj arĩ mẽ hamãr ry ho pa. No ãm tee ri mẽ hamãr kaprỹ nhũm mẽ amnhĩ kaxyw hkôt hamaxpêr kêt nẽ htỳx ri amnhĩ tomnuj o pa. Mẽ ãm grêre nẽ Noehti kapêr ma nẽ gō htãm pymaj hkôt pàr raxta wỳr agjê. ãm mẽ kệp 8 pix nẽ hwỳr agjê nhũm gō htãm mẽ hanhir kêt nẽ. Tĩrtũm na pre mẽ nẽ omunh mex nẽ. No mẽ kot amnhĩ tomnuj xwỳnhjaja nhũm gō htãmja mẽ hanhir o mẽ himex pa. Nhũm mẽ kệp 8ja pix arĩ hťĩr nẽ mex nẽ pàr raxta kamã gō krãhkã hã mex rãhã pa.

²¹ Gō tãmja kệp hprĩ hã mẽ pahte Jejus kôt amnhĩ xunhwỳr ã mẽ pahto amnhĩrĩt xà na. Mẽ pahte amnhĩ nhĩpêx tũm kaga nẽ hpãnhã amnhĩ nhĩpêx nyw o amnhĩ nhĩpêx o papa hã mẽ pahto amnhĩrĩt xà. Jakamã na htem mẽ pahkrã kumrã. Nom mẽ kot mẽ panê mẽ pagrã kugrãnh kaxyw kêt ra mẽ pahte Jejus kôt amnhĩ xunhwỳr ã amnhĩ to amnhĩrĩt kaxyw na htem mẽ pahkrã kumrã. Ra mẽ pahte Tĩrtũm kapêr kôt amnhĩ nhĩpêx o papa hã amnhĩ to amnhĩrĩt kaxyw. Pu mẽ ra mẽ pahte amnhĩ nhĩpêx nyw o amnhĩ nhĩpêx ã amnhĩ to amnhĩrĩt. Te mẽ pahte gōx kãm mẽ pahte amnhĩ tomnuj rer par pyrã nẽ hpãnhã amnhĩ nhĩpêx nyw o amnhĩ nhĩpêx o papa.

²² Nẽ na pre Jejus akupỹm hťĩr nẽ ma akupỹm Tĩrtũm nhõ krĩ hwỳr api nẽ Tĩrtũm nhĩhkô hã pahihiti hã mẽ hkrĩ xà kamã hkrĩ ho hkrĩ. Hãmri nẽ ra Tĩrtũm kapêr o mẽ wrỹk xwỳnh nẽ pahi piitã mẽ ho amnhĩptar o hkrĩ.

Mẽ pahte amnhĩ nhĩpêx nyw o amnhĩ nhĩpêx ã mẽ pamã karõ

Epes 4.17-24; Korosê 3.1-11

4 Nẽ na prem Kris pĩ nhũm amnhĩ xà htỳx kãm hamak kãm htyk kaxyw tâ arĩ mẽ kãm xa. Ra kot amnhĩ xà hkukamã amnhĩ tâ mẽ omunh tâ tee ri amnhĩ kukamã hamaxpêr o amnhĩ tâ tanhmã ri mẽ kot hpĩr mã xwỳnhjê homnuj to hkêt nẽ. Arĩ mẽ kãm xa nhũm prem kupĩ. Tã kêt pu mẽ uràk nẽ ã amnhĩ nhĩpêx anhỹr o ri papa. Mẽ kot hã tanhmã mẽ panhĩpêx to htã pu mẽ uràk nẽ amnhĩ xà htỳx kãm pajamak tâ tanhmã amnhĩ tâ mẽ ho hkêt nẽ. Na hte ra mẽ htyk nẽ mẽ hikwỹ xwỳnhjaja axte amnhĩ tomnuj kêt nẽ. Tã kêt pu mẽ uràk nẽ axte tanhmã amnhĩ tomnuj

to ho ri papa hkêt nẽ. ² Jakamã kêt pu mẽ axte mẽ pahte amnhĩ nhĩpêx tũm kôt amnhĩ nhĩpêx o papa hkêt nẽ. Nẽ mẽ pajamaxpêr tũm kôt axte pajamaxpêr o papa hkêt nẽ. ãm Tĩrtũm kãm hprãm xà hkôt pix mã tanhmã amnhĩ nhĩpêx to ho papa rãhã ty.

³ Amnepêm kormã mẽ pahte Jejus kôt amnhĩ xunhwỳr kêt ri na pu prem mẽ kệp Tĩrtũm kra hkêt xwỳnhjê hkôt amnhĩ nhĩpêx.

Jao nhãm mênijê pumu nẽ mẽ kamã pahpijaàm kêt hprãm.

Nẽ pahpipãnh o ri papa.

Nẽ mẽ pahpipãnh kaxyw axpên wỳr akuprõ nẽ mênijê kamã pahpijaàm kêt.

Nẽ sãnti hwỳr pahkõnkrã ho pahkrĩ nẽ kãm amnhĩ jagrer.

⁴ Tã Kris kôt amnhĩ xunhwỳr hãmri nẽ mẽ pahte amnhĩ nhĩpêx nyw o amnhĩ nhĩpêx o papa. Hãmri nhũm arĩ mẽ kot amnhĩ nhĩpêx tũm o amnhĩ nhĩpêx xwỳnhjaja tee ri ja hã mẽ pahpumu nẽ hêx rom amnhĩ kôt mẽ pamã tanhmã ri ãhkrox to ho pa. Pu mẽ axte mẽ hkôt amnhĩ nhĩpêx kêt nhũm mẽ tee ri ja hã mẽ pahpumu nẽ mẽ pakamã gryk kato nẽ tanhmã mẽ pahto kapêr punuj to. ⁵ Tã koja Tĩrtũm nhỹrmã amnhĩ wỳr mẽ hã karõ nhũm mẽ ma hwỳr mra nẽ kutã hkrĩ. Nẽ kormã mẽ hťĩr ri tanhmã mẽ kot amnhĩ nhĩpêx to ho pa hã kãm amnhĩ jarênh pa. Hãmri nhũm mẽ kot amnhĩ nhĩpêx ã tanhmã mẽ hipêx to. Koja mẽ pahpiitã tanhmã mẽ pajarênh to. Mẽ htyk xwỳnhjaja nẽ kormã mẽ pahťĩr nẽ mẽ papa xwỳnhjaja nhũm mẽ pahpiitã tanhmã mẽ pajarênh to.

⁶ Na pre Jejus ty hãmri nẽ kormã akupỹm hťĩr kêt rãhã hkarõ pix o ma amex wỳr tẽ nẽ kamã mẽ hťĩr ri amnhĩ kaxyw Tĩrtũm mã hamaxpêr xwỳnhjê mã awjarê. Na prem mẽ kot amnhĩ tomnuj mỳrapê ra wej nẽ ty nẽ arĩ amex kãm ri pa. Jakamã nhũm Jejusja hkarõ ho ma mẽ hwỳr tẽ nẽ mẽ kãm:

—E na pa ra mẽ ate amnhĩ tomnuj pãnhã amnhĩrer pa. Tã kormã mẽ atĩr ri mẽ ate amnhĩ kaxyw Tĩrtũm kôt ajamaxpêr jakamã kot kaj mẽ ma hwỳr api nẽ wa ixkuri wa ixpyrà nẽ atĩr tũm nẽ amex nẽ apa ho apa. Anẽ.

Mẽ pahpê Kris kwỳ hã tanhmã mẽ pahte axpên nhĩpêx to hã mẽ pamã karõ

Rõmãn 12.6-8; Wam Korĩt 12.1-11

⁷ Nẽ koja tokyx mẽ panhõ pikaja mẽ pahpê hapêx nẽ kamã mẽmoj piitã hapêx pa. Jakamã kwa kêt ka mẽ ate amnhĩ nhĩpêx ã amnhĩ pumunh mex o apa.

Nẽ mẽ atỳx ri ajamaxpêr ri apa hkêt nẽ.

Nẽ mẽmoj punuj nẽ amnhĩ to htỳx o ri apa ho ajamaxpêr nyw pix o amnhĩ to Tĩrtũm wỳr rãhã ho ri apa.

⁸ Nẽ kwa kêt ka mẽ amã axpên kĩnh o ri axpên kôt apa. Ja na mex o mex. Kot kaj mẽ ã axpên nhĩpêx anẽ nhũm Kris kôt atõ rỳ atõxjê hõ tanhmã atomnuj to japêr ka amnhĩ tâ omu nẽ ãm omu. Amã hkĩnh o ãm amnhĩ tâ omu. Jao axte kot tanhmã atoja mã ajamaxpêr kêt nẽ.

⁹ Nê kêr ka mê axàmnhîx ajamakêtkati nê amnhî nhôrkwî hwÿr axpên wÿ nê axpên to mex o ri apa. Nom kêr ka mê agryk kãm amnhî wÿr mê hwÿr kêt nê. ¹⁰ Na pre ra Tirtûm mê pahpê hkra hã ahpÿnhã tanhmã mê pamã mëmoj tã karõ hto nê ã mê pahte amnhî nhîpêx anhÿr o papa kaxyw mê pahto mê paxi-htÿx. Mê pahte ahpÿnhã tanhmã axpên to mex to ho ri axpên kôt papa kaxyw. Tã kêr ka mê ra kot mëmoj tã mê amã karõ hkôt axpên nhîpêx o ri axpên kôt apa. ¹¹ Koja ma mê ate akwÿjê mã kapêr jarênh o ri apa kaxyw mê amã karõ ka mê ama nê akatât kôt ÿ hã mê kãm harênh mex o ri mê hkôt apa. Rÿ tanhmã axpên to ajuta hto ho ri apa kaxyw mê axunhwÿr japêr ka mê amnhî tã omu nê hkamnâr rom mê ho ajuta mex rãhã ho ri apa. Mê apiitã Jejus nhÿ hã ã amnhî nhîpêx anhÿr o ri apa. Kêr kê Jejus kôt mê akwÿjaja amnhî tã mê apumu nê mê anhÿ hã Tirtûm mã mex o mex ã harê.

Jejus kwÿjaja kot amnhî xà htÿx kamã hamak o pa hã mê harênh

Rukre 6.20-23; Juãw 16.1-4; Sikûn Tesarõn 1.3-12; Sikûn Ximotre 3.13; Eprêw 12.3; Xiakre 1.2-4

¹² E Kris kôt ixkràmnhwÿjaja. Koja Kris kwÿ kêt xwÿnhjaja Kris ã tanhmã mê anhîpêx to nom kwa kêr ka mê tee ri amnhî kukamã ajamaxpêr o akaprí nê apa hkêt nê. Kêt mê akînh rãhã axpên kôt ri apa. Na htem ã mê pahpê Kris kwÿjê nhîpêx anhÿr o pa. Jakamã kwa mê amnhî tã mê omu nê tee ri amnhî kukamã ajamaxpêr kêt nê. ¹³ Mê arí akînh nê ri apa. Mê kot Kris pyrã nê mê panhîpêx punuj tãã. Kêr kê Jejus nhÿrmã akupÿn mê pahwÿr wÿ pu mê omu nê pahkînh tÿx o pahkînh tÿx. ¹⁴ Kwãr mê mãmrí mê pahpê Kris kwÿ hã tanhmã mê panhîpêx to. Na htem ã Tirtûm Karõ kot mê pahkarõ mã gjêx xwÿnhjê nhîpêx o pa anê.

¹⁵ Nê mê apê Kris kwÿ jakamã kwa kêr ka mê amnhî to mex rãhã o ri apa.

Jao mê hpar o ri apa hkêt nê.

Nê ri axàhkînh o ri apa hkêt nê.

Nê nhãm mê hkaêx mã agjêx o ri apa hkêt nê.

Nê tanhmã mê homnuj to ho ri apa hkêt nê.

Kot kaj mê ã amnhî nhîpêx anhÿr o ri apa nhÿm mê anhõ pahihti ja hã tanhmã mê ato ka mê amnhî kamã apijaàm tÿx nê. ¹⁶ Nom koja mê apê Kris kwÿ hã tanhmã mê anhîpêx to ka mê ja hã amnhî tã mê omu nê amnhî kamã apijaàm kêt nê. ãm Tirtûm pix mã amnhî jarê nê kãm:

—Pa Tirtûm. Ixpê akra Kris kwÿ hã na mê ã ixtomnuj anê. Nom ixpê akra jakamã kwãr mê mãmrí tanhmã inhîpêx to. Amex o amex o ate ixto akra jakamã kwãr mê mãmrí ã inhîpêx anhÿr o pa. Anê.

¹⁷ Nê koja Tirtûm tokyx mê pahpiitã tanhmã mê pahte amnhî nhîpêx to hã mê pahpumu nê tanhmã mê panhîpêx to. Mê pahpê hkrajaja koja tanhmã mê pahte amnhî nhîpêx to hã tanhmã mê pahto mex to. Hãmri nê hpãnhã mê kêp hkra hkêt xwÿnhjê ho hapu nê tanhmã mê hipêx to. Mê kot amnhî kaxyw hkôt hamaxpêr kêt jakamã nhÿm mê pahkînhã tanhmã mê

homnuj tÿx to. ¹⁸ Kapêr ã kagà htÿm kot ja hã mê pa-jarênh kot:

Mê kot Tirtûm kapêr kôt amnhî to mex xwÿnhjaja na htem àmnhîx amnhî xà htÿx kamã hamak o pa kamã ty nhÿm Tirtûm ma õ krí hwÿr amnhî wÿr mê ho àpir kurê kumrêx.

Nom mê kot amnhî tomnuj xwÿnhjaja koja mê hkînhã amnhî xà htÿx kamã hamak rãhã nê pa ho pa nê aa mex kêt nê. Anê.

¹⁹ Tã koja Tirtûm kãm ja prãm japêr kwãr mê mãmrí Kris ã tanhmã mê pahtomnuj to. Nom kêr pu mê Tirtûm kamnâr rom amnhî to mex pix o ri papa. Kêp mê panhîpêx xwÿnh maati jakamã ra kot amnhî jarênh xà hkôt koja tanhmã ri mê pamã amnhî nhîpêx to ho pa.

Tirtûm krajaja kot tanhmã amnhî nhîpêx to hã mê kãm karõ

Atre 20.28-31

5 E kot paj hpãnhã mê apê Kris kwÿ hkrãhtÿmjê mã ixkapêr ka mê inhma. Ijaxwÿja ixpê mê akrãhtÿmjê hõ na pa. Na pa pre mê akurom Kris htyk kãm omu. Nom kot puj mê nhÿrmã pahpimràatã mex o mex ã omu nê urak nê mê pamex nê ri papa ho papa. ² Jakamã e Kris kôt mê hkrãhtÿmjaja kêr ka mê atar Kris kôt pahkwÿjê jamãr mex nê. Ra Tirtûm kot mê ate kãm hkwÿjê jamãr kaxyw mê axunhwÿr jakamã kêr ka mê omunh mex rãhã ho mê hkôt ri apa. Te ho ôwêhti jamãr xwÿnh kot ôwêhti jamãr mexta pyrãk. Te mê kêp Tirtûm krit ôwêhti nhÿm mê ate kãm mê hamãr o apa xwÿnh pyrã nê kãm mê omunh mex rãhã ho ri mê hkôt apa. Nê akînh pê tanhmã ri mê ho ajuta hto ho ri mê hkôt apa. Ja na Tirtûm kãm hprãm. Nom kêr ka mê ano hkã karõ kãm mê ho ajuta hkêt nê. Rÿ kãxpore hprãm xaj mê kãm tanhmã amnhî nhîpêx to hkêt nê. ãm amarí tanhmã mê kutã anojarêt to pix kukamã ajamaxpêr o ri mê hkôt apa.

Nê kêr ka mê kãm mëmoj tã karõ kamã axihtÿx kêt nê. Mê akapêr mã aprí kamã mê kãm mëmoj jarê kê mê amnhî tã mê apumu nê mê apyrã nê ã axpên nhîpêx anhÿr o pa.

⁴ E kêr ka mê ã Kris kôt mê akwÿjê jamãr mex pê mê hipêx o apa anê. Hãmri nhÿm mê pajamãr xwÿnh maati ja hã mê apumu nê nhÿrmã akupÿn mê pahwÿr wÿr nê mê ato mex rax nê.

⁵ Nê e mê amy xàptâr nywjaja. Kêr ka mê Kris kôt mê akrãhtÿmjê kapêr ma nê mê hkôt ri amnhî nhîpêx mex o ri apa.

Nê kwa kêr ka mê apiitã axpên nhîpêx o te anhõ kot amnhî to rax o ajakrenh pyrãk. Tirtûm kapêr ã kagà htÿm kot ja jarênh kot:

Mê kot amnhî to jarkrar o ri mê pa xwÿnhjaja na hte Tirtûm mê kutã amnhî xunhwÿ.

No mê kot amnhî to hkryre nê axpên tã hpijaàm o mê pa xwÿnhjaja na hte mê ho mex o pa.

⁶ Anhÿr ã mê harênh jakamã kwa kêr ka mê Tirtûm ã apijaàm rãhã ho ri apa ixkwÿjaja. Nê axpên mã ri amnhî to jarkrar o ri apa hkêt nê. Kêr kê Tirtûm xihtÿx

xwÿnhja ja hã mẽ apumu hãmri nẽ nhÿrmã kot mẽ pahto mex xà hã arıgroja kato nhũm mẽ ate amnhĩ to mex xwÿnh ã mẽ ajarẽ nẽ mẽ ato mex rax nẽ.

⁷ Nẽ kër ka mẽ tee ri amnhĩ kukamã ajamxpër pẽ akaprĩ ho ri apa hkêt nẽ. Æm te mẽ ate Tirtũm mã akaprĩ nhõr pyræk o amnhĩ nhĩpêx nẽ axàmnhĩx akĩnh nẽ akaprĩ hkêt nẽ apa. Tirtũm kęp mẽ pajamãr xwÿnh maati kẽnã kot ka kêt mẽ ri akaprĩ nẽ ri apa.

⁸ Nẽ kwa mẽ okora. Kër ka mẽ amnhĩ nẽ kot mẽ pakutã amnhĩ xunhwÿr xwÿnh maati Satanastija pumunh mex rãhã ho ri apa. Na hte mẽ panhĩpêx o te ropkror kot akunĩ kamã mry ho krihkrit o ri mrar pyræk o mẽ panhĩpêx. Jao mẽ pahte Kris kaga hprãm xàj apkati mẽ tanhmã nẽ mẽ pahto ho ri mẽ pahkõt pa. ⁹ Na hte ã pika piitã hkõt Kris kõt mẽ pahtõ nẽ mẽ pahtõxjẽ nhĩpêx anhÿr o pa nhũm mẽ pahpyrà nẽ amnhĩ xà htÿx kamã hamak o pa pẽ omnuj nẽ pa. Jakamã kwa kër ka mẽ Kris kõt amnhĩ xunhwÿr tÿx nẽ kutã amnhĩ to htÿx rãhã ho ri apa. ¹⁰ Tirtũm kãm mẽ pajapê jakamã na hte mẽmoj to mẽ pakutã nojarêt rãhã ho ri pa. Na pre mẽ pamex nẽ nhÿrmã mẽ pahte kuri tãm amnhĩ nhĩpêx o papa mã xwÿnh ã mẽ pajarẽ. Kris kukwak ri ã mẽ pajarẽnh anhÿr jakamã mẽ ate jar Kris ã apunuj nẽ ri apa htã kot kaj mẽ kritpêm ã amnhĩ nhĩpêx anhÿr ry hkêt nẽ. Koja Tirtũm mẽ akrã kamã mẽ ajamxpër xihitÿx jagjê ka mẽ akupÿm amex nẽ axihitÿx pẽ ate amnhĩ nhĩpêx nyw o amnhĩ nhĩpêx rãhã ho ri apa.

¹¹ Tirtũmja hihtÿx o hihtÿx nẽ àhpumunh o àhpumunh. Nẽ hihtÿx xà nẽ àhpumunh xà koja aa kęp

hirerek nẽ hapêx kêt kumrêx. Æm hãmri na mẽ kot harẽnh kot anhÿrja.

Pêtre kapër jatür xà

¹² Nẽ ota Kris kõt mẽ pahtõ Sirastija na inhmã mẽ akaxyw kagàja nhĩpêx pa mẽ awÿr mẽnh kaxyw. Na pa hte kãm ixkapër nhũm inhma nẽ inhmã hã kagà. Na hte Kris kapër kõt amnhĩ nhĩpêx rãhã ho ri pa. Tã inhmã kagàja nhĩpêx. Mẽ ate kamã harẽnh nẽ mar nẽ tãm ajamxpër kaxyw. Nẽ Tirtũm kãm mẽ ajapê nẽ kot mẽmoj to mẽ akutã nojarêt ã mẽ ate kamã harẽnh kaxyw. Tã kër ka mẽ kãm mẽ ajapê hã amnhĩ tã harẽnh ma nẽ kapër kõt pix mã amnhĩ nhĩpêx mex rãhã ho ri apa. Mẽ akwÿjaja kot tanhmã hã mẽ ato htãã.

¹³ Nẽ ota jar Papirõn kamã Kris kõt mẽ pahtõ nẽ mẽ pahtõxjaja mẽ awÿr hpër mẽ. Tirtũm kot mẽ pahpyrà nẽ mẽ ho hkra jakamã mẽ kęp mẽ atõ nẽ mẽ atõx ã mẽ awÿr hpër mẽ. Nẽ Xiakre mãänën mẽ awÿr hpër mẽ. Te kęp ixkra pyræk.

¹⁴ Nẽ kër ka mẽ nhÿri apê Kris kwÿ hã axpën pumu nẽ mẽ axpën to atõ nẽ atõx ã axpën mã akapër mex kurê kumrêx.

E kê Tirtũm mẽ apê Kris kwÿ hã mẽ amã mẽ ajamakêtkati nẽ mẽ apa xà gõ ka mẽ axàmnhĩx ajamakêtkati nẽ amex nẽ ri apa ho apa.

Tã ãm ja pix. Ixpê Simãw Pêtre na pa ã mẽ awÿr kagà nẽ mẽnh anẽ.

Sikŭn Pêtre

Simăw Pêtre na pre kagàja nhîpêx. Jejus nhÿ hă hkrajê jahkre ho mẽ pa xwÿnhjê hõ na pre. Mẽ kêp Jejus kra hkêx xwÿnhjaja ra kot Jejus ã hprĩ kaxyw nhŭm pre kagàja nhîpêx nẽ krĩ piitã hkôt Jejus kwÿjê hwÿr kurê nẽ kamã hprĩ hă mẽ kãm mẽmoj tã karõ. Mẽ kot arĩ Tirtŭm kot amnhĩ nhîpêx kôt amnhĩ nhîpêx rãhã ho pa hă mẽ kãm karõ. Nẽ hamaxpêr o mẽ hamaxpêr rãhã ho pa hă mẽ kãm karõ. Nẽ mẽ hkwy kot Tirtŭm kôt amnhĩ nhîpêx ã amnhĩ jarênh tã hkôt amnhĩ nhîpêx kêt xwÿnhjaja nhŭm pre tanhmã mẽ harênh to. Æ na pre mẽ kãm mẽmoj jarênh nẽ hă kagà nẽ krĩ piitã hkôt mẽ hwÿr rênh anẽ. Nẽ mẽ kãm:

1 Pa Kris kôt ixtõ nẽ ixtõxjaja. Xà mẽ amex? Ot pa mẽ awÿr kagà nhîpêx nẽ krĩ piitã hkôt mẽ awÿr kurê. Ixpê Simăw Pêtre na pa wam ixte kagà nhîpêx nẽ mẽ awÿr mẽnh tã axte hõ nhîpêx. Ixte Jejus Kris nhÿ hă mẽ ajahkre ho ixpa xwÿnh ã mẽ amã hipêx nẽ kumẽ. Na pa hte Jejus mã amnhĩ nhîpêx mex o ri ixpa.

Nẽ mẽ papytâr xwÿnh Jejus Krisja Tirtŭm pyrã nẽ mex o mex. Nẽ wa kot amnhĩ nhîpêxja mex o mex. Jakamã na pre wa tanhmã mẽ pahkrã hto pu mẽ amnhĩ kaxyw wa hkôt pajamaxpêr tÿx rãhã ho ri papa. Na ka htem ixpyrà nẽ ã amnhĩ nhîpêx anẽ. Tã pa mẽ amã kagàja nhîpêx.

2 Nà Tirtŭm mẽ mẽ panhõ Pahihti Jejus wa kot amnhĩ nhîpêxja na ka mẽ ra harênh mar tÿx nẽ. Wa kot tanhmã amnhĩ nhîpêx to nẽ tanhmã wa hamaxpêr toja ka mẽ mar tÿx nẽ wa hkôt pix mã amnhĩ nhîpêx. Tã kêt ka mẽ arĩ ã amnhĩ nhîpêx anhÿr rãhã ho ri apa. Jao axamnhix ajamakêtkati nẽ akĩnh nẽ apa ho apa. Na pa hte ã mẽ ato Tirtŭm mẽ Pahihti Jejus Kris wa hwÿr o ri ixpa anẽ. Na hte Tirtŭm mẽ ato mex nẽ mẽ akutã no-jarêt rãhã ho pa.

Tirtŭm kot mẽ pahto mex o pa hă harênh

Epes 2.12-13; Wam Tesarõn 1.2-4; Sikŭn Pêtre 3.18

3 Nẽ Tirtŭmja àhpumunh tÿx o àhpumunh tÿx jakamã na pu htem hkôt amnhĩ xunhwÿ nhŭm amnhĩ tã mẽ pahpumu nẽ mẽ pamã àhpumunh tÿx xà hkwy gõ. Hãmri pu mẽ ra urak nẽ amnhĩ to mex nẽ tãm amnhĩ nhîpêx o ri papa. Tã kot puj mẽ nhÿrmã ma õ krĩ hwÿr api. **4** Na pre mẽ pakukamã amnhĩ jarênh o:

—Kot paj nhÿrmã ixkrajê mã ixte amnhĩ nhîpêx mex kwÿ gõ nhŭm mẽ inhÿ hă ho tãm ri amnhĩ nhîpêx mex o pa. Nẽ ixpyrà nẽ hamaxpêr mex o pa.

Anhÿr jao te ra mẽ pamã hkĩnh xà mex kwÿ nhõr pyrãk o mẽ panhîpêx. Nẽ te ra kot mẽ pahkrãm hamaxpêr mex jagjênh nẽ mẽ pamã kot amnhĩ nhîpêx mex jagjênh pyrãk. Mẽmo kaxyw na pre ã mẽ panhîpêx mex anẽ? Nà urak nẽ tãm mẽ pahte amnhĩ nhîpêx mex rãhã o ri papa kaxyw. Jao mẽ pahte mẽ kêp hkwy hkêx xwÿnhjê hkôt amnhĩ nhîpêx kêt nẽ. Nẽ mẽ hamaxpêr punuj o pajamaxpêr kêt nẽ. Nẽ hpãnhã mẽ pahte Tirtŭm kôt pix mã amnhĩ nhîpêx rãhã ho pa-

pa. Æ mẽ pahte amnhĩ nhîpêx anhÿrja na mex o mex.

5 Tã ã Tirtŭm kot mẽ panhîpêx mex anhÿr jakamã kwa kêt ka mẽ kapêr mar tÿx nẽ hkôt pix mã amnhĩ nhîpêx mex o ri apa. Jao amnhĩ kaxyw hkôt ajamaxpêr rãhã nẽ. Kot kaj mẽ ã amã amnhĩ nhîpêx anhÿr o apa hprãm hă kot kaj mẽ mããnhẽn amã tãm amnhĩ nhîpêx o apa hprãm. Nẽ mẽ amã Tirtŭm kapêr piitã mar prãm o ri apa. **6** Hãmri nẽ piitã mar pa nẽ mẽmoj punuj piitã nẽ amnhĩ to htÿx nẽ. Nhŭm mẽ kêp Kris kwÿ hkêx xwÿnhjaja Kris ã tanhmã mẽ anhîpêx to htã ka mẽ ãm amnhĩ tã mẽ omu nẽ mẽ umaj mẽ amã Kris kaga hprãm kêt nẽ.

Nẽ mẽ amã Tirtŭm mã amnhĩ jarênh rãhã ho apa hprãm.

Nẽ mẽ amã kapêr mar rãhã ho apa hprãm.

7 Nẽ mẽ amã Kris kôt mẽ atõ nẽ mẽ atõxjê ho mex pix o ri apa hprãm. Jao te mẽ amã amnhĩ tã ma pyrãk o mẽ piitã mẽ hipêx o ri mẽ hkôt apa.

8 E kêt ka mẽ ã amnhĩ nhîpêx anhÿr o ri apa. Kot ka mẽ ã amnhĩ nhîpêx anẽ nẽ mẽ panhõ Pahihti Jejus Kris kôt amnhĩ nhîpêx mex o mõ. Hãmri nhŭm mẽ akwÿjaja mẽ apumu nẽ mẽ apê Kris kwÿ hă mẽ ajarênh kurê kumrêx. **9** No kot ka mẽ atõ ixkapêr mar tã hkôt amnhĩ nhîpêx kêt nẽ hãmri te Tirtŭm kot anẽ ate amnhĩ tonuj rênh par mã ajamaxpêr kêt pyrãk. **10** No na ka htem ã amnhĩ nhîpêx anhÿr kêt nẽ. Ra mẽ ate Pahihti Jejus Kris kôt amnhĩ nhîpêx mex jakamã na htem ja hă mẽ apumu nẽ Tirtŭm kot mẽ ato hkra hă mẽ ajarênh kurê kumrêx. Kot kaj mẽ ã hkôt amnhĩ nhîpêx anhÿr o apa nẽ mẽmo arĩgro hă apunuj nẽ apa htã Jejus kaga hkêx nẽ. Hãmri nẽ nhÿrmã ma Tirtŭm nhõ krĩ hwÿr api nhŭm mẽ apumu nẽ mẽ ato mex rax nẽ. Hãmri ka mẽ õ krĩ kamã mẽ panhõ Pahihti Jejus Kris wa kuri atĩr tŭm nẽ amex nẽ apa ho apa.

12 Nẽ na ka mẽ ra Tirtŭm kot amnhĩ nhîpêx mar tÿx nẽ amnhĩ krã kamã kot amnhĩ nhîpêx mã ajamaxpêr tÿx o ri apa. Tã nom kot paj arĩ mẽ amã ja jarênh rãhã ho ri ixpa. **13** Kormã ixtĩr ri kot paj xatã mẽ amã harênh o amnhĩrit. Ja na kêt inhmã hprãm. Mẽ ate nhÿrmã tanhmã ri ajamaxpêr to nẽ hkaga pumaj. **14** Na pre mẽ panhõ Pahihti Jejus Krisja inhmã tokyx ixyk ã ijarê. Kot paj xep kritpêm ri ixtĩr nẽ ixpa hkêx nẽ. **15** Jakamã na pa

kormã ixtîr ri ã mẽ amã kagà nhîpêx anê. Mẽ ate inhmÿr pê arí omunh nê kamã harênh nê Tîrtûm kot amnhî nhîpêx mã ajamaxpêr tÿx rãhã ho ri apa kaxyw.

Pêtre kot no ho Jejus pumunh ã amnhî jarênh

Matêwre 17.1-5; Makre 9.1-8; Sikûn Ximotre 3.16-17

¹⁶ Nê na pa pre ra tanhmã mẽ amã mẽ panhõ Pahihti Jejus Krisja jarênh to. Hihtÿx o hihtÿx ã harê nê àh-pumunh tÿx o àhpumunh tÿx ã harê. Nê nhÿrmã akupÿn mẽ pahwÿr wrÿk ã harê. No na pa pre amnhî krã hkôt ã harênh anhÿr kêt nê. Na pa pre inhno ho Jejus hihtÿx o hihtÿx ã omunh o hkôt ixpa nê ixte omunh xà hkôt ã mẽ amã harênh anê. ¹⁷ Amnepê mã kormã ixkwÿjê mẽ mẽ ixte arí hkôt ixpa ri pa prem hkôt hixêr prêk nhîmök wÿr api. Pa nê kaxyw Xiakre nê Juãw mẽ pa mẽ hkôt ixpimràatã hixêr ã api nê himök ã ixkuhê. Hãmri nhÿm Tîrtûm tanhmã Jejus to nhÿm hirã htÿx kãm xa. Hãmri nhÿm Mẽpahpãm Tîrtûmja mẽ inhmã kapêr. Kaxkwa kamã hirã htÿx rax rÿm mẽ inhmã kapêr o:

—E ota Ixkrata xa. Inhmã hapê ho inhmã hapê. Anê.

Tã ra ixte mar xà hkôt pa amnhî xô ri mẽ amã harê nê hã kagã. ¹⁹ Na pa prem ã hixêr prêk nhîmök ã Jejus pumunh nê Tîrtûm kot tanhmã harênh to hã mar anê. Hãmri nê ijamaxpêr o:

—Nà ãm hãmri na pre amnepê Tîrtûm nhÿ hã kapêr jarênh o mẽ pa xwÿnhjaja Jejus kukamã ã harênh anhÿr o pa. Anê.

Mẽ kot tanhmã Jejus kukamã harênh toja te kot kamãt kô kamã kanê hpök nhîrã hkryre pyrãk. Tã koja nhÿrmã akupÿn wrÿ hãmri nê te myt kator nê hirã mex nhÿm mẽ pahte mẽmoj pumunh mex pyrãk. Jakamã kwa kêr pu mẽ kot tanhmã Jejus kukamã harênh toja mar tÿx rãhã nhÿm nhÿrmã te myt kator pyrã nê akupÿn mẽ pahwÿr wrÿ. ²⁰ Tîrtûm kapêr ã kagã htÿm kot tanhmã ÿ hã kapêr jarênh xwÿnhjê jarênh to. Mẽ kot mẽmoj kukamã ujarênh ã mẽ harê. Nê Jejus kukamã tanhmã ujarênh to hã mẽ harê. ã mẽ kot mẽmoj kukamã harênh kot anhÿr. Nom na pu htem amnhî krã hkôt ã mẽ ujarênh anhÿrja mar tÿx kêt nê. Koja Tîrtûm Karõ hprî hã mẽ pamã ho amnhîrît pu mẽ rî kormã pahprî hã mar tÿx nê. ²¹ Na pre ÿ hã kapêr jarênh o mẽ pa xwÿnhjaja amnhî krã hkôt hkwyjê mã ujarênh o pa hkêt nê. Tîrtûm Karõ na pre tanhmã mẽ hkrã hto nhÿm mẽ ÿ hã hkwyjê mã tanhmã harênh to ho pa nê ÿ hã mẽ pamã hã kagã.

Tîrtûm kapêr jarênh o hêx xwÿnhjê jarênh

Korosê 2.16-17; Wam Ximotre 4.1-5; Sikûn Ximotre 3.1-9; Jutre 3-16

2 Nê amnepê na pre Ijaew kwÿjaja te mẽ kêp Tîrtûm nhÿ hã kapêr jarênh xwÿnh pyrãk. Nom Tîrtûm kapêr kwÿm ri hkwyjê mã tanhmã ho hêx to ho pa. Tã koja nhÿrmã mẽmojaja mẽ urãk nê mẽ awÿr mra nê ã mẽ amã Tîrtûm kapêr o hêx o pa anê. Nê kapêr kwÿm ri tanhmã mẽ ajahkre hto ho mẽ amã hêx o mẽ akôt pa. Mẽ ate mẽ mar nê amnhî nhîpêx nyw kaga nê hpãnhã mẽ kot amnhî tomnuj kôt apa hprãm xaj nhÿm mẽ hêx rom tanhmã mẽ ajahkre hto ho pa.

Pahihti Jejus kot mẽ nê htyk tã nhÿm mẽ hkôt amnhî nhîpêx kêt nê axtem nê ri kapêr o hêx o pa. Mÿrapê koja Tîrtûm tokyx mẽ kot amnhî xà htÿx kamã hamak tÿm xà hwÿr mẽ rênh pa.

² Koja mẽ ohtô nê mẽ kapêr ma nê kãm mẽ mar prãm nê. Nê mẽ hkôt hamaxpêr nê mẽ hkôt amnhî nhîpêx o pa. Jao ra hpijaãm kêt nê mẽ hkôt htÿx ri tanhmã amnhî tomnuj to ho ri pa. Tã ã mẽ kot Tîrtûm kapêr o mẽ hêx xwÿnhjê mar nê mẽ hkôt amnhî nhîpêx anhÿr jakamã koja mẽ kãm Tîrtûm kapêr mar prãm xwÿnhjaja mẽ kot amnhî nhîpêx ã mẽ omu nê Tîrtûm kapêrja mex kêt ã harênh japêr. ³ Tîrtûm kapêr o mẽ hêx o mẽ pa xwÿnhjaja na htem kãxpore pix prãm xaj mẽ awÿr mra nê tanhmã mẽ amã kapêr jarênh o hêx to ho pa nhÿm Tîrtûm ja hã mẽ omunh rãhã ho hkrî. Na hte nhÿhÿm mra kêt nê rÿ htÿx ôr o hikwÿ hkêt nê. Na hte arí mẽ kot amnhî nhîpêx ã mẽ omunh rãhã ho hkrî. Tã koja nhÿrmã ma mẽ kot amnhî xà htÿx kamã hamak tÿm xata hwÿr mẽ kurê nhÿm mẽ ma hwÿr hapêx pa.

⁴ Nê amnepê mã kaxkwa kamã Tîrtûm kapêr o mẽ wrÿk xwÿnh kwÿjaja na prem axtem nê Tîrtûm kapêr nhîrôp kuhê nhÿm tee ri amnhî tã mẽ omu hãmri nê amnhî nê mẽ kator pa. Mẽ kamã ukaprí hkêt nê amnhî nê mẽ kator pa hãmri nê mẽ kot amnhî xà htÿx kamã hamak tÿm xata wÿr mẽ hano. Nhÿm prem ma hwÿr pa nê ahkre xupÿm kãm kamãt kô kamã arí hkrî ho hkrî. Tîrtûm kot mẽ piitã tanhmã mẽ harênh to xà hã arígroja jamãr o hkrî. Nê tee ri kãm hapôx prãm kaprÿ ho hkrî.

⁵ Nê amnepê pika kamã ri mẽ pa xwÿnhjaja na prem haxwÿja piitã amnhî tomnuj pix o ri pa. Jakamã nhÿm Tîrtûm ja hã mẽ omu nê mẽ kamã ukaprí hkêt nê. Nê mẽ hwÿr na rax mẽ. Mẽ kãm kapêr mar prãm kêt jakamã nhÿm mẽ hwÿr kumê nhÿm wrÿk rax kumrêx nê mẽ hanhir pa nê mẽ himex. ãm Noehti mẽ hkwy pê 7 pixjaja nhÿm mẽ kurom htîr nê hkã hkînh nê mex nê pa. Noehti kormã na xwÿj ri kot mẽ kãm Tîrtûm kapêr jarênh o ri mẽ hkôt pa htã nhÿm mẽ kuma nê ãm kuma. Mÿrapê na prem piitã pikaprãr pa.

⁶ Nê Sotõ mẽ Gomo wa kamã mẽ pa xwÿnhjaja haxwÿja na prem amnhî tomnuj tÿx kumrêx o pa nhÿm Tîrtûm wamtajê pyrã nê mẽ kamã ukaprí hkêt nê. Na pre kaxkwa rÿm mẽ hipy mẽmo hpök kwÿ rê nê ho mẽ ho hapêx pa. Tã mẽmo kaxyw na pre ã mẽ hipêx anê? Nà mẽ piitã mẽ kot mẽ harênh mar nê hamaxpêr o:

—Na hte ã Tîrtûm mẽ kot amnhî tomnuj xwÿnhjê nhîpêx anê.

Anhÿr o hamaxpêr kaxyw na pre ã mẽ hipêx anê. ⁷ Nom Rohtija na pre Tîrtûm Sotõ nê kator jakamã nhÿm htyk kêt nê. Na pre hkwyjê rom tãm amnhî nhîpêx tã mẽ kot amnhî tomnuj tÿx xwÿnhjê nhõ krî kamã ôrkwÿ nê ri pa. Nê apkati mẽ tee ri mẽ kot amnhî nhîpêx ã mẽ omu nê mẽ ÿ hã hkaprí nê tee ri mẽ hkukamã hamaxpêr o pa. No nhÿm mẽ amnhî tomnuj ã amnhî pumunh nê tokyx tãm amnhî nhîpêx kêt nê. Nê apkati mẽ tanhmã amnhî tomnuj to nê kapêr punuj

o pa nhûm Rohti tee ri mẽ omu nê hkaprî htýx nê pa.
⁹ Tã nhûm Tirtûm mẽ himex kaxyw nê mẽ nê kator nê mẽ himex pa. Na hte ã Tirtûm mẽmoj punuj pê mẽ kot amnhî kaxyw kãm hamaxpêr nê hkôt amnhî nhîpêx xwýnhjê pytâr anê. No mẽ kot amnhî tomnuj xwýnhjaja na hte axtem mẽ hipêx. Tã koja nhÿrmã mẽ pahpiitã tanhmã mẽ pajarênh to xà hã arîgro kato nhûm ma mẽ kot amnhî xà htýx kamã hamak tûm xà wÿr mẽ rênh pa. ãm tapxipix kot ã mẽ hipêx anhÿr kaxyw àh-pumunh tÿx. ¹⁰ Tã mẽ hpijaàm kêt kãm amnhî tomnuj o mẽ pa xwýnhjaja nê mẽ kot Tirtûm kapêr mar nê ãm mar xwýnhjaja koja nhÿrmã mẽ homnuj tÿx nê.

Nê Tirtûm kapêr o hêx o ri mẽ pa xwýnhjaja na htem amnhî to jarkrar pix o pa. Nê Tirtûm kapêr o mẽ wryk xwýnhjê hã hpijaàm kêt nê. Nê axtem nê mẽ ho kapêr punuj pê tanhmã mẽ haprÿ hto ho pa. ¹¹ Tã nhûm htem amnhî tã mẽ kuma nê ãm mẽ kuma. Mẽ kurom mẽ hihtÿx kumrêx tã no ãm amnhî tã Tirtûm mã tanhmã mẽ ho kapêr to hkêt nê.

¹² Nê mry xoprê na hte htÿx ri pa ho pa. Tã Tirtûm kapêr o mẽ hêx o mẽ pa xwýnhjaja htem mry xoprêta pyrã nê htÿx ri hamaxpêr mex kêt o pa. Jao hprî hã mẽmoj mar kêt tã htÿx ri hijuk ri tanhmã mẽmoj jarênh to.

Nê mry xoprêja htÿx pa nhûm mẽ kot hparja pyrã nê mẽ kot Tirtûm kapêr o hêx o mẽ pa xwýnhjaja koja Tirtûm nhÿrmã kuwy hwÿr mẽ ho hapêx nê kamã mẽ rênh pa.

¹³ Nê koja nhÿrmã Tirtûm mẽ kot tanhmã mẽ ama hêx to ho pa hã mẽ omunh xà hkôt mẽ homnuj tÿx nê. Na htem hpijaàm kêt nê mẽ piitã mẽ noo mã tanhmã amnhî tomnuj to ho pa. Kamàt kãm nê arîgro hã. Nê mẽ kãm tanhmã amnhî nhîpêx to hprãm xà hkôt pix mã amnhî tomnuj o pa.

Na htem te mẽ kêp Kris kôt mẽ atôjê pyrã nê mẽ akôt Tirtûm kapêr mar xà hã ixkre hwÿr agjê nê mẽ anhîhkô hã mẽ kot Jesus tyk mã hamaxpêr kaxyw pãwti hkwy hku. Nom htÿx hkur o hkrî nê htyk mã hamaxpêr kêt nê. Kãm Jesus kính kêt tã hêx rom hpijaàm kêt kãm mẽ anhîhkô hã htÿx ri hkur o hkrî.

¹⁴ Nê nhÿri krî hwÿr pôj nê mênijê pumu nê kãm mẽ hkính nê. Ra mẽ mjên ri pa htã nhûm mẽ kãm mẽ ho amnhîkati hprãm nê mẽ kamã hpijaàm kêt o ri pa.

Nê kormã mẽ kot Kris kôt amnhî xunhwÿr tohtuj anhÿr xwýnhjê hwÿr mra nê hêx rom tanhmã mẽ kãm kapêr to pê mẽ no kupyri o ri mẽ hkôt pa. Mẽ kot mẽ mar nê Kris kaga nê mẽ hkôt ri amnhî nhîpêx prãm xàj ã mẽ hipêx anhÿr o pa.

Na htem hikàxpore rûnh o pikuprônh pix kukamã hamaxpêr o ra ho ôxÿ nê.

ã na htem amnhî nhîpêx anhÿr o pa. Tã ra Tirtûm kot mẽ homnuj tÿx kaxyw mẽ hã amnhî jarê. ¹⁵ Te mẽ kot kamàt kô kamã pryjuk ã hpikunor nê htÿx ri pa pyrãk o na htem amnhî nhîpêx nê kãm Tirtûm kapêr mar prãm kêt nê amnhî tomnuj pix o pa.

Amnepêm Peo hkra Paraãwta kêp Tirtûm nhÿ hã kapêr jarênh o pa xwýnh tã axtem nê kàxpore rax prãm xàj tanhmã amnhî tomnuj to kaxyw. Nhûm

Tirtûm tee ri ja hã omu nê Paraãw krit jumênreja tanhmã hakwa hto nhûm kãm kapêr. Jumênre kapêr kêt tã nhûm Tirtûm tanhmã hakwa hto nhûm kãm kapêr nê tanhmã kot amnhî tomnuj to kaxywta ã kãm akir nhûm amnhî tã kuma hãmri nê ã amnhî nhîpêx anhÿr kêt nê. Tã mẽ kot Tirtûm kapêr o mẽ hêx ho mẽ pa xwýnhjaja na htem Paraãw pyrã nê kàxpore rax prãm xàj tanhmã amnhî tomnuj to pix prãm. ¹⁷ Te hino ra grã nhûm mẽ tee ri kamã gô japêr pyrãk o na htem amnhî nhîpêx. Rÿ te kakrã hapôx nhûm mẽ kot omunh nê na wryk ã hkamnhîx kaprÿ pyrãk. Tã ra Tirtûm mẽ kaxyw kamàt kô htÿx pê mẽ kot amnhî xà htÿx kamã hamak tûm xàta o mẽ nê. ¹⁸ Na htem htÿx ri amnhî tomnuj o pa hã mẽ amã amnhî to jarkrar o ri pa. Jakamã nhûm mêmhõ ra amnhî tomnuj kaga kaxyw nhûm mẽ tee ri ja hã omu nê kot ã amnhî nhîpêx anhÿr pymaj tanhmã nê kãm kapêr to nê mẽ kãm:

—Kwa ixte amnhî tomnuj o ixpa htã nhûm Tirtûm ja hã ixpumu nê ãm ixpumu nê arî inhmex ã ijarê. Na pa hte mẽ hkuprÿjê hwÿr mra nhûm ja hã ixpumu nê ãm ixpumu nê hã tanhmã ixto hkêt nê. Jakamã kwa mẽ ixpyrã nê arî ã amnhî nhîpêx anhÿr o ri apa. Koja Tirtûm tanhmã hã ato hkêt nê. Anê.

Hãmri nhûm mẽ tee ri kuma nê ra hamaxpêr kati nê. ¹⁹ Na htem mẽ kãm kapêr o:

—Kwa mẽ ixpyrã nê mãmri amã tanhmã amnhî tomnuj to hprãm xà hkôt amnhî nhîpêx o ri apa. Mêmhõ kot kêt ja nê tanhmã amã kapêr to? Anê.

Mẽ kot amnhî tomnuj xàja te kêp mẽ õ patrãw pyrãk jakamã na htem ãm kôt pix mã amnhî nhîpêx o pa. Jakamã kot pu mẽ tanhmã amnhî tomnuj to. Nê gaa nê axte. Nê gaa nê ra ho amnhî pyrãk. Hãmri nê tee ri pamã hkaga hprãm kaprÿ nhûm te kêp mẽ panhõ patrãw pyrãk o mẽ panhîpêx pu mẽ ãm kôt pix mã ri amnhî nhîpêx o ri papa.

²⁰ Nê koja mêmhõ ra Tirtûm kapêr ma. Nê mẽ panhõ Pahihti Jesus Kris jarênhja nhûm hprî hã kuma. Kêp mẽ pahte amnhî tomnuj pê mẽ papytâr xwýnh ã harênh ma. Tã nhûm mẽ kot Tirtûm kapêr o mẽ hêx xwýnhjaja hwÿr mra nê tanhmã kãm ho hêx to nhûm mẽ kuma nê kot amnhî nhîpêx tûm o awjanã. Jao amnhî tomnuj tÿx o kormã kot Tirtûm kapêr mar kêt ri kot amnhî tomnujta jakre. ²¹ Kêp ãm aa kot Tirtûm kapêr mar kêt rãhã htyk ronhÿx ja kãm mex nê. Nom ra kot mar mex tã ãm kuma nê hkaga jakamã koja mex kêt kumrêx. ²² Mẽ kot ã mẽ kot amnhî nhîpêx anhÿr ã mẽ harênh kot:

Rop na hte ôjaïr nê akupÿm ôjaïrta ku.

Nê hagrô na htem unê nê hkumrã nhûm muxre. Tã nhûm mẽ kãm ure nhûm akupÿm hprôt nê mra nê akupÿm gyw o amnhî tomnu pa. Anê. Tã mẽ kot Tirtûm kapêr o mẽ hêx xwýnhjê mar nê mẽ hkôt amnhî nhîpêx xwýnhjaja te mẽ kot rop mẽ hagrô wa kot amnhî nhîpêxta pyrã nê Tirtûm kapêr kaga nê akupÿm mẽ kot amnhî nhîpêx tûm o awjanã nê htÿx ri amnhî nhîpêx o pa.

Tirtûm kot pika ho hapêx kaxyw kormã amnhî tâ mẽ pajamãr ã harênh

Matêwre 24.29-31; Xiakre 5.7-11; Apokarip 19.11-16, 21.1-8

3 E Kris kôt ixkrãmnhwýjaja. Na pa pre ra wam kagàta nhípêx nê mẽ awýr kurê. Tã ra axte hkôt ja nhípêx. Hamê wa kamã na pa mẽ amã Tirtûm kot tanhmã amnhî nhípêx to hã harê. Nê Jesus Kris nhýrmã akupýn mẽ pahwýr wrýk ã harê. Mẽ ate mar nê tãm amnhî nhípêx nê tãm ajamaxpêr o kutêp mẽ apa kaxyw.

² Amnepê mã Tirtûm nhý hã kapêr jarênh o ri mẽ pa xwýnhjaja na prem Tirtûm kot nhýrmã mẽ pahwýr mêmõ mênh mã xwýnhhta jarênh o pa. Kot nhýrmã mẽ pahwýr wrýk nê mẽ pahto amnhiptar o pa hã harênh o pa. Tã kêr ka mẽ kapêr ma nê hã ano htýx nê hkôt ajamaxpêr týt rãhã ho ri apa. Nê Jesus kot mẽ awýr mẽ rênh xwýnhjaja ka mẽ kapêr ma. Mẽ kot mẽ amã mẽmoj jarênh o mẽ pa xwýnhjaja na htem tanhmã mẽ amã Pahihti Kris jarênh to ho ri mẽ akôt pa. Nê tanhmã kot mẽ panê amnhî nhípêx to hã harê. Tã kêr ka mẽ kapêr ma nê hã ano htýx nê kãm ajamaxpêr týt rãhã ho ri apa.

³ Nê kwa mẽ inhma. Nhýrmã Kris akupýn mẽ pahwýr wrýk xwýj ri koja mẽ kot amnhî tomnuj týt xwýnhjaja mẽ awýr mra. Mẽ hpijaam kêt o pa xwýnh jakamã koja mẽ tanhmã mẽ akamã amnhî tomnuj to ho pa. Nê mẽ apê Kris kwý hã mẽ apumu nê mẽ atã hpêr o pikênh o pa. ⁴ Nê htýx ri Kris ã mẽ akukja nê mẽ amã:

—Kwa no Krisja? Amnepêm akupýn wrýk nê mẽmoj piitã tanhmã hipêx to hã amnhî jarênh tâ arí Tirtûm kot mẽmoj to kator krax rûm mẽmoj amarí rãhãã. Ra mẽ panhígêjtaja pikaprãr par tâ nhùm kormã akupýn wrýk kêt nê. Kot mẽ pamã amnhî to hêx kênã. Mo kaxyw koja kêt akupýn mẽ pahwýr wrý? Kot mẽ pamã amnhî to hêx kênã. Anê.

⁵ Nom ã mẽ kot harênh anhýrja kot anhýr kêt. Tirtûm kot mẽmoj to kator krax rûm mẽmoj amarí rãhã hã mẽ kot harênhja kot anhýr kêt. Na pre Tirtûm kapêr pix o kaxkwa nê pika ho kato. Nhùm gô hkwýja kapêr mar xà hkôt pika hã amnhî jahkre. Nhùm hpãnhã panhî nhípêx. Tã no nhùm mẽ kapêr mar kêt kumrêx. Nê mẽ kot amnhî tomnuj týt mýrapê na pre Tirtûm gô ho mẽ himex pa. Jao mẽ hwýr na rax mẽ nhùm mẽ hanhir o mẽ ho hapêx. No nhùm mẽ kot Jesus wrýk ã hpêr o pikênh xwýnhhtaja kãm ã mẽ harênh anhýrja mar prãm kêt. Ra mẽ kot mar tâ kãm mar prãm kêt nê arí mẽmoj piitã rãhã hã ri harênh o pa. ⁷ Pika nê kaxkwaja arí rãhã htã koja Tirtûm nhýrmã mẽ pahpiitã mẽ pahte tanhmã amnhî nhípêx to hã mẽ pahpumunh kôt tanhmã mẽ pajarênh to. Nê mẽ kot amnhî xà htýx kamã hamak tùm xà hwýr mẽ kot amnhî tomnuj xwýnhjê rênh pa. Hãmri nhùm rí kormã kaxkwa nê pikaja wa pôr nhùm himök ã mẽmoj piitã hkaxàr pa nê hapêx.

⁸ Nê amgrà pê 1.000ja mẽ pamã amgrà xohtô rax kumrêx no Tirtûm mã te arígrô pixire pyrãk. ⁹ Tã ra kot mẽ pamã tokyx Jesus akupýn wrýk ã harênh tâ nhùm

kormã wrýk kêt jakamã nhùm htem tõhã tee ri hamãr o pa nê hamaxpêr o:

—Hêxta waa nê. Tirtûm kot tokyx akupýn mẽ pahwýr Jesus mênh ã amnhî jarênh tâ tokyx mênh kêt nê.

Anhýr o harênh tâ no ãm kot anhýr kêt. Na kormã amnhî tâ mẽ kot amnhî tomnuj xwýnhjê jamãr o pa. Mẽ kot amnhî tomnuj kaga nê hkôt amnhî xunhwýr prãm xàj kormã amnhî tâ mẽ hamã. Kãm mẽ kot amnhî xà htýx kamã hamak tùm xàta wýr mêmõ ho pixire nê mör prãm kêt jakamã na kormã amnhî tâ mẽ hamã. ¹⁰ Tã koja nhýrmã mẽ panhõ Pahihtija akupýn mẽ pahwýr wrý. Te mẽ àhkính xwýnh kot amnhî nhípêx pyrãk o mẽ pajaêr pê akupýn wrý. Pu mẽ pahtýt ri tanhmã paxapênh to ho ri papa nê akupýn wrýk ã hkamnhîx kêt rãhã nhùm mẽ pajaêr pê akupýn wrý. Hãmri nê ma akupým amnhî kôt mẽ pahte hkôt amnhî xunhwýr xwýnhjê ho àpir par kurê kumrêx. Hãmri nhùm rí kormã kaxkwa kaxàr o hkrihkrit týt kãm hapêx pa. Nê kanhêti mẽ myt nê mytwýrre kaxàr pa. Nê pikaja nê mãânên kamã mẽmoj piitã kaxàr pa. ¹¹ Koja nhýrmã ã mẽmoj hapêx par anê. Jakamã kwa kêr pu mẽ Jesus kutêp tãm ri amnhî nhípêx rãhã ho ri papa. Nê Tirtûm kapêr kôt pix mã amnhî nhípêx rãhã nê. Nê kãm hprãm xà hkôt tanhmã kãm amnhî nhípêx to ho ri papa. Kêr kê Jesus akupýn wrý nê ã mẽ pahte amnhî nhípêx anhýr ã mẽ pahpumu. Koja wrý nhùm rí kormã kaxkwa nê pikaja wa kaxàr pa. Nhùm kuwy mýri kaxkwa kamã mẽmoj harir xwýnhja xêr nê ôr pa nê hapêx. ¹³ Tã kwãr mãmrí mẽmoj ã amnhî nhípêx anê. Koja Tirtûm axte mẽmoj mex nhípêx. Na pre amnhî kukamã ja jarênh o:

Kot paj axte pika nê kaxkwa hõ nhípêx nhùm mex o mex. Nhùm mẽ kot amnhî kaxyw Jesus mã hamaxpêr nê hkôt amnhî xunhwýr nhùm ixte mẽ mex ã mẽ harênh xwýnh pixjaja koja mẽ pika nywja kamã mex nê pa ho pa. Anê.

¹⁴ Jakamã kwa ixkrãmnhwýjaja. Kêr ka mẽ Kris kutêp kapêr kôt amnhî nhípêx mex rãhã ho ri apa. Jao kutêp ajamakêtkati nê axãmnhîx axpên kôt apa. Kêr ka mẽ nhýrmã amnhî wýr omu nê tee ri amnhî kukamã ajamaxpêr kêt nê. Ate tãm amnhî nhípêx o apa hã amnhî pumu nê akính nê amnhî wýr omunh o akuhê.

¹⁵ Nom arí Jesus kãm mẽ pahkwýjê ho hkra hprãm jakamã na kormã amnhî tâ mẽ hamã nê tokyx akupýn wrýk kêt nê. Na pre Jesus kôt mẽ pahtõ Pawre Tirtûm nhý hã ã mẽ pamã ja hã kagà anê. Pawreja ixkrãmnhwý mex na. ¹⁶ Na hte mẽ pakaxyw kagà nhípêx nê kamã mẽ pahte Jesus kutêp tãm amnhî nhípêx o papa hã mẽ pamã karõ. Na hte tõhã mẽmoj tâ kagà pu mẽ kamã harê nê tee ri pahprí hã mar mã no ãm mar mex kêt nê. Hãmri nhùm Tirtûm kapêr o mẽ hêx o mẽ pa xwýnhhtaja haxwýja kuma hãmri nê amnhî krã hkôt hijuk ri tanhmã ho hêx to. Te mẽ kot hprí hã mar nê harênh pyrãk nom hprí hã mar kêt nê. Æ na htem Tirtûm kapêr ã kagà piitã ho hêx o pa anê. Mýrapê koja mẽ nhýrmã amnhî xà kamã hamak týt kumrêx.

¹⁷ Tã e Kris kôt ixkrãmnhwýjaja. Ra mẽ ate mẽ harênh mar jakamã kwa mẽ okora. Mẽ amnhî nê mẽ omunh

mex ně mě hkôt amnhĩ nhĩpêx kêt ně. Kot kaj mě aně ně Tirtũm kôt amnhĩ nhĩpêx mex kêt ně. ¹⁸ Na ka htem mě papytâr xwỳnh Pahihti Jejus Kris kôt ri amnhĩ nhĩpêx o apa. Tã kêr ka mě arĩ hkôt amnhĩ nhĩpêx mex rãhã ho ri apa. Ně hkôt amnhĩ xunhwỳr tỳx ně. Kêr kê

amnhĩ tã mě apumu ně mẽmoj to mẽ akutã nojarêt ně. Krisja mex o mex ně hihtỳx o hihtỳx. Tã kêr pu mẽ kãm mex o mex ã mãn harěnh rãhã ho ri papa. Tã ãm ja pix. Ixpê Simãw Pêtre na pa ã mẽ amã ja hã kagà ně mẽ awỳr mẽnh aně.

Wam Juãw

Juãw na pre kagàja nhípêx. Na pre kagà hwý nhípêx rax nê. Na pre mãänên Juãw kot tanhmã Jesus kot amnhí nhípêx to ho pa ã kagà nê Apokarip nê Sikün Juãw nê Hapuhã Juãw nhüm pre ja piitã Tirtüm nhý hã hã kagà. Juãwja Jesus nhý hã hkrajê jahkre ho mẽ pa xwýnhjê hõ na pre. Nê kêp Xiakre htõ na pre. Tã ra hpigêt týx nê kagàja nhípêx. Uràk nê mẽ kot Tirtüm kôt amnhí xunhwýr xwýnhjê mã hipêx. Mẽ kot kamã harênh nê mar nê kãm axpên kính o pa kaxyw. Nê mẽ kot amnhí tomnuj ã amnhí pumunh kôt tanhmã amnhí nhípêx to hã mẽ kãm karõ nê hã kagà. ã na pre Juãw mẽ kãm mẽmoj jarênh nê hã kagà anê nê mẽ hwýr kumê. Nê mẽ kãm:

Jejus kêp Tirtüm kapêr o amnhírít xwýnh ã harênh

Juãw 1.1-4; Eprêw 1.1-4

1 Pa ixpyrà nê mẽ ate Jejus kôt amnhí xunhwýr xwýnhjaja? Xà mẽ amex? E ot pa mẽ amã kagàja nhípêx nê mẽ awýr kumê. Ixte mẽ amã Tirtüm kapêr o amnhírít xwýnh jarênh kaxyw. Amnepê mã kormã mẽmoj amrakati ri nhüm pre ra rãhã ri pa ho pa. ãm kukwak ri pix mã na pu htem Tirtüm mẽ wa kuri pahtír tùm nê papa ho papa mã xwýnh. Tã ý hã mẽ ixte kapêr o mẽ ajahkre ho ri mẽ ixpa xwýnhjaja na pa prem ixpiitã kormã akupým kaxkwa hwýr àpir kêt ri inhno ho omunh o ri hkôt ixpa. Nê mẽ ijamak o kapêr mar o ri hkôt ixpa. Nê mẽ inhíhkra ho hkupênh o ri hkôt ixpa. ² Na pre kaxkwa kamã Hipêêxà hkôt ri pa ho pa htã amnê pika hwýr mẽ pahwýr wrý. Hãmri nê jar mẽ pakamã kato pa pre mẽ ixkwýjaja omu. Tã mẽ ixte omunh xà hkôt na pa htem amnhí xõ ri tanhmã mẽ amã harênh to. Kojã nhýrmã akupým mẽ pahto mẽ pahtír pu mẽ kuri pahtír tùm nê pamex nê papa ho papa. ³ Na pa prem tanhmã kapêr to hã mar o ri hkôt ixpa. Nê kot tanhmã mẽ kãm amnhí nhípêx to hã omunh o ri hkôt ixpa. Ta kagàja kamã amnhí xõ ri ixprí hã mẽ amã harê nê hã kagà. Mẽ ate ixpyrà nê aprí hã kot tanhmã amnhí nhípêx to ho pa hã harênh mar kaxyw. Jao mẽ pahpiitã te ixkre tipxi kamã mẽ papa pyrãk o amnhí nhípêx o papa nê axpên kôt pajamaxpêr o ri papa. Jao Měpanhípêêxà Maati mẽ Kra Jejus Kris wa hkôt amnhí nhípêx mex o ri papa. ⁴ Tã pa mẽ amã kagàja nhípêx nê mẽ awýr kumê. Mẽ ate kamã harênh nê mar hãmri nê mẽ ixpyrà nê ajamakêtkati nê akính nê ri apa kaxyw.

Tirtüm mex o mex ã harênh

Juãw 8.12; Epes 5.3-21; Wam Tesarõn 5.5; Eprêw 4.14-16, 9.11-14

⁵ Nê Jejus kot tanhmã mẽ inhmã Tirtüm jarênh toja kot paj amnhí xõ ri mẽ amã hã kagà. Nà Tirtüm kot amnhí nhípêxja mex o mex. Aa kot tanhmã amnhí tomnuj to hkêt. Mex o mex jakamã na hte tanhmã mẽ kot amnhí tomnuj to mã amnhí jagjênh kêt. ãm kot amnhí to mex o kot amnhí to mex rãhã nê pa ho pa xwýnh na. ⁶ Kot mẽ pahte amnhí tomnuj kêt ã mẽ pamã karõ jakamã kot puj mẽ pahpê hkra hã amnhí

jarênh tã amnhí tomnuj pix o ri papa nê ãm pahpê hkra hã amnhí jarênh kaprý nê amnhí to paxêx. Tirtüm krajaja na htem amnhí tomnuj o pa hkêt nê. ⁷ Nom kot puj mẽ hkôt amnhí nhípêx nê uràk nê tãm ri amnhí nhípêx o papa. Nê kapêr kôt ri amnhí nhípêx. Hãmri nê te ixkre tipxi kamã ri Tirtüm mẽ Kra Jejus Kris wa hkôt axpên to papa pyrãk o amnhí nhípêx. Na pre Jejus mẽ panê ty nê hkamrõ axkapí. Jao mẽ pahte hkôt amnhí xunhwýr xwýnhjaja mẽ panê mẽ pahte amnhí tomnuj piitã hpãnhã amnhírer pa. Jakamã ãm kukwak ri pix mã na pu htem tãm amnhí nhípêx o ri papa.

Mẽ pahpiitã mẽ pahte amnhí tomnuj xwýnh ã mẽ pa-jarênh

⁸ Nê mẽ pahte tõiã tanhmã amnhí tomnuj to jakamã kot puj mẽ aa pahte amnhí tomnuj kêt ã amnhí jarê hãmri nê ã amnhí jarênh anhýr o paxêx. Tirtüm kot mẽ pahpiitã mẽ pahte amnhí tomnuj ã mẽ pahpumunh xwýnh kênã.

Mẽ pahte amnhí tomnuj nê tanhmã amnhí nhípêx to hã mẽ pamã karõ

Xiakre 4.9-10

⁹ Nê mẽ pahpê Tirtüm krajaja na pu htem tanhmã amnhí tomnuj to hãmri nê tee ri ja hã amnhí pumu nê pahkaprí nê. Nê tokyx amnhí to Tirtüm wý. Hãmri nhüm mẽ pama nê Jejus kukwak ri tanhmã hã mẽ pah-to hkêt nê. ãm amnhí katut kôt tanhmã mẽ pahte amnhí tomnuj tota rê nê axte kãm hamaxpêr kêt nê. Ra kot mẽ pahtã amnhí jarênh xà hkôt. Na hte Tirtüm amnhí jarênh xà hkôt tanhmã amnhí nhípêx to. Tã ra kot mẽ pahpê hkrajaja mẽ pahte amnhí tomnuj piitã amnhí katut kôt rênh par ã amnhí jarênh jakamã na pre ã mẽ panhípêx anê. Na hte mẽmoj tã tanhmã amnhí jarênh to hãmri nhüm apkati nhüm ihkjê ho kumê nê axtem tanhmã mẽmoj jarênh to hkêt nê. ¹⁰ Ra kot mẽ pahpiitã mẽ pahte amnhí tomnuj xwýnh ã mẽ pajarênh jakamã kot puj mẽ pahtõ ã mẽ pajarênh anhýrja ma nê hkôt pajamaxpêr kêt japêr. Rý kuma nê ãm kuma nê pajamaxpêr o:

—Nà ixte tanhmã amnhí tomnuj tore hã.

Anh̄yr o amnh̄i jarē. Hāmri nē te ate Tirtūm hēx xw̄ynh ā harēnh pyrāk. Jao amā kapēr mar prām kēt ā amnh̄i to amnh̄irīt.

Jejus kēp mē paxyr pē Tirtūm mā kapēr xw̄ynh ā harēnh

Wam Ximotre 2.5; Eprēw 9.11-14

2 E mē ate amnh̄i tomnuj o apa hkēt kaxyw na pa ā mē amā ixkapēr nē hā kagā anē. Mē ate kamā harēnh nē mar hāmri nē tanhmā amnh̄i tomnuj to hkēt kaxyw. Jejus Kris na pre mē pahpiitā mē pahte amnh̄i tomnuj pānhā amnh̄irer kaxyw mē panē ty. Jakamā kot puj mē pahpē hkrajaja tanhmā amnh̄i tomnuj to nhūm ja hā mē pahpumu nē te kēp mē paxyr pē Tirtūm mā kapēr xw̄ynh pyrāk o amnh̄i nh̄ipēx. Mē pakurom aa kot amnh̄i tomnuj kēt jakamā na hte mē paxyr pē Tirtūm mā kapēr nhūm kuma. Hāmri nē kukwak ri pix mā mē pahte tanhmā amnh̄i tomnuj to piitā amnh̄i katut kōt rēnh pa nē axte kām hamaxpēr kēt nē.

Tirtūm krajaja kot Tirtūm kōt amnh̄i nh̄ipēx ā mē kām karō

3 Nē na pu htem Tirtūm kōt ri amnh̄i nh̄ipēx o papa hā amnh̄i pumunh kōt pahpē hkra hā amnh̄i pumunh mex nē. **4** Nom koja mēhō kēp hkra hā amnh̄i jarēnh tā hkōt amnh̄i nh̄ipēx kēt nē ām kēp hkra hā amnh̄i to hēx. **5** Na htem Tirtūm kapēr kōt amnh̄i nh̄ipēx o pa pē kām hkīnh t̄yx ā amnh̄i to amnh̄irīt. Nē kēp hkra hā amnh̄i to amnh̄irīt mex o pa. **6** Jakamā kēr ka mē apē Jejus Kris kw̄y hā amnh̄i jarēnh xw̄ynhjaja hkōt pix mā amnh̄i nh̄ipēx mex o ri apa.

Mē pamā xpēn kīnh ā mē pamā karō

Juāw 13.34-35; Wam Juāw 3.14-18

7 E Kris kōt ixkrānhw̄yjaja. Inhmā mē akīnh jakamā na pa ā mē amā mēmoj jarēnh nē hā kagā anē. Kot paj mē amā mēmoj nyw jarēnh kēt nē. Ra mē ate mēmoj mar xw̄ynhta kot paj axte mē amā harē. Mē pamā x-pēn kīnh nē tām x-pēn nh̄ipēx o papa hā Tirtūm kot mē pamā karōta. Ra mē ate mar tā kot paj axte mē amā harē nē hā kagā. **8** Wam Tirtūm kot mē pamā x-pēn kīnh ā mē pamā karōja kormā Jejus kot mē panē htyk hkēt ri kot mē pamā hā karōta na. Tā ra Jejus kām mē pajapē x̄aj mē panē htyk jakamā na pa axte ā mē ate x-pēn nh̄ipēx anh̄yr o apa hā mē amā karō nē hā kagā. Mē ate Kris pyrā nē amā x-pēn kīnh x̄aj tanhmā x-pēn kutā anojarēt to ho ri apa kaxyw. Nom kormā mē pahte Jejus kōt amnh̄i xunhw̄yr kēt ri na pu prem ā x-pēn nh̄ipēx anh̄yr kēt nē. Tā hkōt amnh̄i xunhw̄y hāmri nē ā x-pēn to mex o papa anē. **9** Tā koja mēhō kot Jejus kōt amnh̄i nh̄ipēx ā amnh̄i jarēnh tā kām hk-w̄yjē hkīnh kām àmnh̄ix ri mē kutā nojarēt o pa hkēt nē. Hāmri nē kot Jejus kōt amnh̄i nh̄ipēx ā amnh̄i jarēnh ā amnh̄i to hēx. Jao te ht̄yx ri kamāt kō kamā pa pyrāk. No koja mēhō kām hk-w̄yjē hkīnh kām mē kutā nojarēt o pa nē määnen Jejus kōt amnh̄i nh̄ipēx mex o

pa. Jao te hirā kamā ri pa pyrāk. Jakamā tanhmā hk-w̄yjē homnuj to ho pa hkēt nē mē piitā mē ho mex o xpēn pyrāk o pa.

Juāw kot mē piitā ahp̄ynhā tanhmā mē kām kapēr to

12 E kot pa ahp̄ynhā tanhmā mē amā ixkapēr to nē hā kagā. Mē apiitā te mē apē ixkra pyrāk. Na ka prem Jejus kōt amnh̄i xunhw̄y nhūm Tirtūm ja hā mē apumu nē Kra kukwak ri mē ate amnh̄i tomnuj piitā amnh̄i katut kōt rēnh pa nē axte kām hamaxpēr kēt nē. Jakamā ra mē ate Tirtūm kēp Mēpanh̄ipēxā Maati hā omunh mex.

Nē mē ate Jejus kōt amnh̄i xunhw̄yr ā amgrā xohtō xw̄ynhjaja. Amnepēm amrakati ri Jejus ra rāhā ri pa ho pa xw̄ynhja kōt mē ate amnh̄i xunhw̄yr xw̄ynhjaja kot paj mē amā tanhmā ixkapēr to nē hā kagā.

Nē mē akw̄yjaja ham Jejus kōt mē ate amnh̄i xunhw̄yr xw̄ynhjaja ra mē ate Tirtūm kapēr mā ajamaxpēr rāhā ho ri apa. Jakamā na hte Satanasti mē ate amnh̄i tomnuj prām x̄aj tee ri tanhmā mē akrā hto ka mē Jejus nh̄y hā kutā amnh̄i to ht̄yx pē hkōt amnh̄i nh̄ipēx kēt nē.

Mē kot amnh̄i tomnuj xw̄ynhjaja tanhmā kot amnh̄i nh̄ipēx to

Matēwre 6.24; Eprēw 11.24-26; Xiakre 4.4

15 Nē kēr ka mē amā Tirtūm kōt amnh̄i nh̄ipēx prām x̄aj mē kot amnh̄i tomnuj xw̄ynhjē hkōt amnh̄i nh̄ipēx kēt nē. Nē mē hamaxpēr punuj xw̄ynhjē hkōt ri amnh̄i nh̄ipēx kēt nē. Kot kaj mē hkōt amnh̄i nh̄ipēx hāmri nē amā Tirtūm kīnh kēt ā amnh̄i to amnh̄irīt. **16** Mē kot amnh̄i tomnuj xw̄ynhjaja na htem mēmoj punuj mā hamaxpēr nē hkōt tanhmā amnh̄i tomnuj to. Nē mēmoj pumu nē ra kām ho ō hprām nom Tirtūm pē ja omnuj ā hkamnh̄ix kēt nē. R̄y tanhmā mēhō kot amnh̄i tomnuj to hā omu nē hkōt kām amnh̄i nh̄ipēx prām. Nē tanhmā amnh̄i to jarkrar to ho ri pa. Ā na hte mē kot amnh̄i tomnuj xw̄ynhjaja amnh̄i nh̄ipēx anh̄yr o pa. Mē kot amnh̄i nh̄ipēxja Mēpanh̄ipēxā Tirtūm kām hprām kēt. **17** Koja nh̄yrmā mē kot tanhmā amnh̄i tomnuj toja piitā hapēx pa. Nē mē hamaxpēr punujja määnen nh̄yrmā hapēx pa. Nē mē kot amnh̄i tomnuj o mē pa xw̄ynhjaja koja mē amnh̄i x̄a ht̄yx kamā hamak rāhā ho pa ho pa. No Tirtūm kōt mē kot amnh̄i nh̄ipēx o mē pa xw̄ynhjaja koja mē kurom kuri ht̄ir tūm nē mex nē hkīnh nē pa ho pa.

Kām Kris kurē xw̄ynh maati jarēnh

Wam Juāw 4.1-6; Sikūn Juāw 7-11

18 E Kris kōt ixkw̄yjaja. Kris akup̄yn mē pahw̄yr wr̄yk kukamā koja mēmoj tanhmā amnh̄i nh̄ipēx to. Na pre ra Kris kōt mē panh̄ōja mē pamā ā harēnh anē nē harēnh o:

—Koja mē panhō Pahihti Kris akup̄yn mē pahw̄yr wr̄yk kaxyw hāmri nhūm kēp Kris ā amnh̄i to hēx xw̄ynh maati kumrēx nh̄yh̄ynh kato. Hāmri nē hēx rom te Kris pyrā nē tanhmā mē kām kapēr to nē tanhmā

mě hipêx to ho pa nhũm rĩ kormã Kris akupÿn mẽ pah-wÿr wrÿ. Aně.

Na pre hkukamã ã harěnh aně ka mẽ harěnh ma. Tã ra mẽ kěp Kris ã amnhĩ to hěx xwÿnhjaja ohtõ ně mra ně kãm hkurě xwÿnh maatita kukamã tanhmã amnhĩ nhĩpêx to pě mẽ kãm amnhĩ to hěx o pa. Jakamã na pa ixprĩ hã mẽ amã tanhmã mẽ harěnh to. Koja tokyx kěp Kris ã amnhĩ to hěx xwÿnh maatita nhÿhÿnh mẽ pah-wÿr kato. ¹⁹ Na pre hkwÿjaja mẽ pahpě Kris kwÿjě hkôt ri pa htã mẽ pahkĩnhã kěp Kris kwÿ hkět. Kěp hkwÿ ronhÿx arĩ mẽ pahkôt Kris kôt amnhĩ nhĩpêx o pa. Nom axtem ně ãhpumunh tÿx pyrã ně mẽ pahkaga ně htÿx tanhmã amnhĩ tomnuj to ho pa. Jao kěp Jejus kwÿ hkět ã amnhĩ to amnhĩrĩt.

²⁰ No kět mẽ pahpě Tĩrtũm krajaja na pre Jejus mẽ pahwÿr Karõ rě nhũm mẽ pahkarõ mã agjě ně mẽ pahkrãm kapěr mex jagjě. Jakamã na pu mẽ mẽ kěp Kris kwÿ hkět xwÿnhjě rom Tĩrtũm kapěr mar mex ně.

²¹ Xã mẽ ate Tĩrtũm kapěr ã kagã pumunh kět kôt na pa ã mẽ amã ixkapěr ně hã kagã aně? Nã ra mẽ ate omunh ně mar mex kěnhã. Tã mẽ ate mẽ kot tanhmã Jejus o hěx to xwÿnhjě pumunh mex ně mẽ harěnh mar mex kaxyw na pa ã mẽ awÿr kagã nhĩpêx ně měnh aně. Kěr kě mẽ mẽmo arĩgro hã mẽ awÿr agjě ně tanhmã mẽ amã Jejus o hěx to ka mẽ aprĩ hã mẽ omunh mex kurě kumrěx. ²² Tanhmã na htem Jejus o hěx to? E kot paj ixprĩ hã mẽ amã tanhmã mẽ harěnh to ka mẽ inhma. Nã koja mẽhõ mẽ amã tanhmã harěnh to ně harěnh o:

—Nã Jejus kěp Tĩrtũm Kra hkět. Tĩrtũm kot mẽ pah-wÿr měnh kět tã ka htem atÿx kapěr kôt ri amnhĩ nhĩpêx o ri apa. Kwa kět mẽ ixkapěr kôt mãn ri amnhĩ nhĩpêx o ri apa.

Anhÿr o mẽ amã kapěr ka mẽ ama ně kãm Kris mẽ Tĩrtũm wa hkĩnh kět xwÿnh ã omunh kurě kumrěx.

²³ Koja mẽhõ Tĩrtũm Kra Jejus kaga ně mãññen Hipêêxã kaga. No koja mẽhõ Tĩrtũm Kra hkôt amnhĩ xãm ně mãññen Hipêêxã hkôt amnhĩ xãm.

Mě pahte Kris kaga pymaj tanhmã amnhĩ nhĩpêx to hã mẽ pamã karõ

²⁴ Amnepêm mẽ ate Jejus kôt amnhĩ xunhwÿrta ã na ka prem kěp Tĩrtũm Kra hã Tĩrtũm kot mẽ pahwÿr měnh xwÿnh ã harěnh ma. Tã kěr ka mẽ arĩ amnhĩ kaxyw hkôt ajamxpěr ně hkôt pix mã amnhĩ nhĩpêx o ri apa. Kot kaj mẽ aně ně Měpanhĩpêêxã Maati mẽ Kra wa hkôt amnhĩ nhĩpêx mex o apa rãhã ty. ²⁵ Hãmri ně wa kuri atĩr tũm ně amex kumrěx ně apa ho apa. Ra Jejus kot ja jarěnh xã hkôt.

²⁶ Na pa ã mẽ amã ixkapěr ně hã kagã aně. Mě aprĩ hã mẽ amã Jejus o hěx xwÿnhjě kapěr mar ně mẽ kot mẽ amã hěx kôt mẽ omunh mex kaxyw. ²⁷ Tĩrtũm Karõ na pre mẽ akarõ mã gjěx pa ně mẽ amã Tĩrtũm kapěr piitã o amnhĩrĩt mex o mẽ akôt pa. Jakamã mẽmo kaxyw kot kaj mẽ Tĩrtũm kapěr o hěx xwÿnhjaja kot tanhmã harěnh toja ma? Ra Tĩrtũm Karõ kot mẽ amã ho amnhĩrĩt o mẽ ajahkre mex o pa kěnhã kot ka kět mẽ nhãm mẽ kapěr ma. Na hte Tĩrtũm Karõja mẽ urã ně

Tĩrtũm kapěr ho hěx kět ně. ãm katàt kôt kot ho amnhĩrĩt mex jakamã kwa kěr ka mẽ mar tÿx ně hkôt ri amnhĩ nhĩpêx mex rãhã ho ri apa.

Mě pahte tãm ri amnhĩ nhĩpêx ã mẽ pamã karõ

Juãw 14.25-26, 15.1-8

²⁸ E Jejus kôt ixkrajaja. Kěr ka mẽ arĩ Kris kôt amnhĩ nhĩpêx mex rãhã ho ri apa. Kě nhÿrmã akupÿn mẽ pahwÿr wrÿk o tě ka mẽ amnhĩ wÿr omu ně akĩnh ně. Ně akĩnh kãm axãmnhĩx kutã mra ně hkaxpa ně amnhĩ kamã amã uma hkět ně. Rÿ mẽmoj tã amnhĩ tã api-jaàm kět ně. ãm axãmnhĩx akĩnh ně ma kutã mra.

²⁹ Krisja mex o mex jakamã na pu htem uràk ně amnhĩ to mex o ri papa. Mě pahte amnhĩ to mex o papa xwÿnhjaja uràk ně mẽ pahpě Tĩrtũm kra na pu mẽ.

Tĩrtũm krajě hkukamã tanhmã mẽ harěnh to

Rõmãn 8.18; Sikũn Korĩt 3.18; Sikũn Pětre 3.11-14

3 Ně Měpanhĩpêêxã Maati kãm mẽ pajapě htÿx kumrěx jakamã na pre mẽ pahte hkôt amnhĩ xunhwÿr ã mẽ pahpumunh kôt mẽ pahpě hkra hã mẽ pajarě pu mẽ pahpě hkra ně ri papa. Ja na mẽ pamã mex o mex. Nom mẽ kot hkôt amnhĩ xunhwÿr kět xwÿnhjaja kot hprĩ hã ja hã mẽ pahpumunh kět jakamã na htem mẽ pahte tãm amnhĩ nhĩpêx ã mẽ pahpumu ně tee ri hamaxpěr.

² E Kris kôt ixkwÿjaja. Ra mẽ pahpě Tĩrtũm kra htã kormã mẽ pahte amnhĩ kukamã mẽ pahprĩ hã ja hã amnhĩ pumunh mex kět. Koja nhÿrmã Jejus akupÿn mẽ pahwÿr wrÿ pu mẽ pano ho tanhmã kute hã omunh mex ně. Hãmri ně tã te kot amnhĩ nhĩpêx pyrãk o amnhĩ nhĩpêx mex o papa. Ra mẽ pahte ja mar mex. ³ ã mẽ pahte amnhĩ kukamã pajamxpěr anhÿr o papa xwÿnhjaja na pu htem kormã amnhĩ wÿr Jejus kamã pajamak o papa. Pě uràk ně mẽmoj punuj mã pajamxpěr kět o papa. Ně uràk ně tanhmã amnhĩ tomnuj to hkět ně.

Tĩrtũm krajaja kot amnhĩ tomnuj o pa hkět ã mẽ kãm karõ

⁴ Ně mẽ kot amnhĩ tomnuj o mẽ pa xwÿnhjaja na htem Tĩrtũm kapěr kwÿm ri amnhĩ nhĩpêx o pa. Tã kot puj mẽ tanhmã amnhĩ tomnuj to hãmri ně mẽ uràk ně kapěr kwÿm ri amnhĩ nhĩpêx. ⁵ No Jejus na pre mẽ pahte amnhĩ tomnuj pãnhã amnhĩrer kaxyw mẽ pahwÿr wrÿ. Aa kot amnhĩ tomnuj kět jakamã tapxipix kot mẽ pahpãnhã amnhĩrer mã tãm. Ra mẽ pahte ja jarěnh mar mex. ⁶ Jakamã mẽ pahpě hkwÿjaja na pu htem ri pahtÿx tanhmã amnhĩ tomnuj to ho papa hkět ně. ã mẽ kot amnhĩ nhĩpêx anhÿr xwÿnhjaja kěp hkwÿr hkět. ⁷ Nom koja mẽhõ Kris pyrã ně tãm amnhĩ nhĩpêx o pa hãmri ně kěp Tĩrtũm kraa. Jakamã kwa koja mẽhõ Tĩrtũm kapěr kwÿm ri tanhmã mẽ amã kapěr to ka mẽ ama ně ãm ama. ⁸ Mě kot amnhĩ tomnuj o mẽ pa xwÿnhjaja na htem Satanasti hkôt ã amnhĩ nhĩpêx anhÿr o pa. Satanastija Tĩrtũm kot mẽmoj to kator krax rũm nhũm ã kot amnhĩ tomnuj anhÿr o pa xwÿnh na.

Tã ã kot amnhĩ nhĩpêx anhÿr o paja o hapêx par kaxyw na pre Tĩrtũm Kra Jejusja amnê pika hwÿr wrÿ.

⁹ Nom mē papajaja mē pahpê Tĩrtũm kra na pu mē. Na pre mē pahwÿr amnhĩ Karõ rē nhũm mē pahkarõ mã gjêx pa nē mē pahkõt pa ho pa. Jakamã tanhmã kot puj wem amnhĩ to nē Satanasti pyrã nē pahtÿx ri amnhĩ tomnuj o papa? Nã kot puj mē ã amnhĩ nhĩpêx anhÿr kêt nē. ¹⁰ Koja mēhõ tãm amnhĩ nhĩpêx kêt nē hãmri nē mãänēn hkwÿjê kamã ukapřĩ hkêt nē. Hãmri nē ã amnhĩ nhĩpêx anhÿr o kêp Tĩrtũm kra hkêt ã amnhĩ to amnhĩřĩt. ãm kêp Satanasti hkra hã amnhĩ to amnhĩřĩt kurê kumrêx.

Mē pamã axpēn kĩnh o te Jejus kãm mē pahkĩnh pyrãk ã mē pamã karõ

Matêwre 22.39; Rukre 10.25-37; Juãw 13.31-35

¹¹ Nē kêt ka mē arĩ amã axpēn kĩnh pē tãm axpēn nhĩpêx o ri apa rãhã nē. Te amnepê mã mē ate Jejus kõt amnhĩ xunhwÿr ã arĩgrota ã mē kot mē amã ja hã karõ pyrã nē. ¹² No mē ri finat Kaĩ kot amnhĩ nhĩpêx pyrãk o amnhĩ nhĩpêx kêt nē. Kêp Satanasti hkra jakamã na pre htõja pĩ. Kurom kot tãm amnhĩ nhĩpêx ã omu nē kamã gryk nē kupĩ. ¹³ Tã koja mē kêp Tĩrtũm kra hkêt xwÿnhjaja Kaĩ pyrã nē kêp mē aprãm nõkati nom kêt ka mē amnhĩ tã mē omu nē tee ri amnhĩ kukamã ajamaxpēr kêt nē. ¹⁴ Kormã mē pahte Jejus kõt amnhĩ xunhwÿr kêt ri na pu prem mē urãk nē amnhĩ tomnuj o papa. Jao mē pahpê kuwy hwÿr papa mã xwÿnh. Tã mē pahte Jejus kõt amnhĩ xunhwÿr jakamã ra pahpê Tĩrtũm mē Kra wa kuri pahťĩr tũm nē papa mã xwÿnh. Jakamã na pu htem mē kêp hkra hkêt xwÿnhjê kurom pamã mē piitã mē hkĩnh o tanhmã mē ho mex to ho papa. Mē kãm amnhĩ kwÿjê hkĩnh kêt xwÿnhjaja arĩ mē kêp kuwy hwÿr mē pa mã xwÿnh na mē. Ra mē pahte ja jarēnh mar mex. ¹⁵ Mē kãm mē hpar prãm o mē pa xwÿnhjaja koja nhÿrmã Tĩrtũm mē Kra wa kuri hťĩr tũm nē pa ho pa hkêt nē. Ra mē pahte mãänēn ja mar mex. Jakamã kwa mē amã akwÿjê hprãm nõkati ho ri mē apa xwÿnhjaja. Tĩrtũm noo mã te ra mē ate mē hpar pyrãk jakamã kot kaj mē arĩ ã amnhĩ nhĩpêx anhÿr o ri apa hãmri nē nhÿrmã Tĩrtũm nhõ krĩ hwÿr axapĩr kêt nē.

¹⁶ E ixkwÿjaja. Kwa kêt pu mē pajakwa pix o pamã axpēn kĩnh ã amnhĩ jarēnh kêt nē. Mãänēn axpēn kutã panojarêt o ri papa. Nē tanhmã axpēn to mex to. Tanhmã na pre Jejus kãm mē pajapê hã amnhĩ nhĩpêx to? Nã na pre kãm mē pamex prãm xaj mē panê ty. Kãm amnhĩ tã ma hkêt kãm mē pakamã ukapřĩ xaj mē panê ty. Tã kêt pu mē urãk nē pahkwÿjê kamã paxukapřĩ ho mē kutã panojarêt rãhã ho papa. Jao mē paxapkur xã hã panhõ pumu nē nhÿri pahkwÿjê hõ pumu nhũm kêp amrakati. Pu mē tee ri ja hã omu hãmri nē kãm mē panhõta kwÿ gõ. Kot pu mē ã amnhĩ nhĩpêx anhÿr kêt nē hãmri nē pamã Tĩrtũm kĩnh ã amnhĩ jarēnh kapřÿ. ¹⁹ Nē kot puj mē ã axpēn to mex o papa anē nē ra pahte Tĩrtũm kõt amnhĩ nhĩpêx mex ã amnhĩ to amnhĩřĩt. Hãmri nē ra paxãmnhĩx kãm tanhmã amnhĩ jarēnh to ho papa. Amnhĩ kamã pamã

uma hkêt nē paxãmnhĩx pajamakêtkati nē kãm tanhmã amnhĩ jarēnh to.

Mē paxãmnhĩx amnhĩ to Tĩrtũm wÿr ã mē pamã karõ

²⁰ Nē kot puj mē mēmo arĩgro hã tanhmã amnhĩ tomnuj to hãmri nē tee ri ja hã amnhĩ pumu nē amnhĩ kamã pagryk nē. Na hte Tĩrtũm tanhmã mē pahte amnhĩ tomnuj to hã mē pahpumu nom arĩ kãm mē pajapê. Mē parom ãhpumunh o ãhpumunh jakamã kot mē pahte amnhĩ tomnuj prãm kêt ã mē pahpumunh mex. ²¹ Jakamã puj mē ã kãm pajamaxpēr anē nē amnhĩ kamã pamã uma hkêt kãm paxãmnhĩx tanhmã ri amnhĩ to hwÿr to ho ri papa. ²² Kot puj mē hkõt amnhĩ nhĩpêx o papa rãhã nē mēmoj tã kuwÿ. Nē kãm hprãm xã hkõt amnhĩ nhĩpêx o papa hã amnhĩ pumunh kõt mēmoj tã kuwÿ. Hãmri nhũm mē pama nē tanhmã mē pamã mēmoj to rÿ mē pamã mēmoj gõ.

Te ixkre pixi kamã mē pahtipxi pyrãk ã mē pamã karõ

²³ Nē tanhmã mē pahte amnhĩ nhĩpêx to ho papa hã na hte Tĩrtũm mē pamã karõ? Nã mē pahte amnhĩ kaxyw Kra Jejus Kris kõt pajamaxpēr nē hkõt amnhĩ nhĩpêx o papa hã na hte mē pamã karõ. Nē kapēr xã hkõt pamã axpēn kĩnh o mēmoj to axpēn kutã panojarêt o papa hã na hte mē pamã karõ. Na hte ã mē pahte amnhĩ nhĩpêx anhÿr ã mē pamã karõ anē. ²⁴ Jakamã kot puj mē kapēr xã hkõt axpēn nhĩpêx o papa nē te ixkre tipxi kamã mē pahte axpēn kõt Tĩrtũm kõt ri papa pyrãk. Ra kot mē pahwÿr Karõ rēnh nhũm kot mē pahkarõ mã gjêx jakamã na hte mē pahkõt pa ho pa hã amnhĩ to amnhĩřĩt.

Mē kot Kris kapēr jarēnh ã amnhĩ to hêx xwÿnhjê jarēnh

Wam Korĩt 12.1-3; Wam Juãw 2.18-26; Sikũn Juãw 7-11

4 Nē koja mēhõ Tĩrtũm kapēr o mē ajahkre kaxyw mē amã tanhmã Jejus Kris jarēnh to nē ãm hãmri harē nē harēnh o:

—Na pre Tĩrtũm Kra Jejus mē pahwÿr wrÿ nē ĩ ho ĩ ho mē pakamã kato. Tĩrtũm tãm na pre mē pahwÿr kumē nhũm wrÿ.

Anhÿr o mē amã harē ka mē ama nē kapēr kõt ajamaxpēr kurê kumrêx. ãm hãmri na hte Tĩrtũm Karõ nhÿ ã harēnh anē. No koja Jejus kêp Tĩrtũm Kra hkêt ã harē ka mē ama nē ãm ama nē hkõt ajamaxpēr kêt nē. Kãm Kris kurê xwÿnh maati nhÿ hã kapēr xwÿnhjaja na hte ã harēnh anhÿr o pa. Na ka prem ra kãm Kris kurê xwÿnh maatiya tokyx hpõx ã harēnh ma. Tã na ra ĩ hã kapēr xwÿnhjaja ohtõ nē pika piitã hkõt mē hkõt pa nē te Tĩrtũm Karõ nhÿ hã mē kãm kapēr pyrãk o amnhĩ nhĩpêx o pa. Nom ãm amnhĩ to hêx o pa. Jakamã e kwa ixkwÿjaja. Koja mēhõ mē awÿr mra nē tanhmã mē amã Tĩrtũm kapēr jarēnh to ka mē aprĩ hã ama nē rĩ kormã kêp Tĩrtũm nhÿ hã kapēr jarēnh xwÿnh ã harē rÿ kot amnhĩ to hêx xwÿnh ã harē.

⁴ Kêt mē papajaja jajê rom mē pahpê Tĩrtũm kra na pu mē. Nē Tĩrtũm Karõ kot ra mē pahkarõ mã gjêx

xwýnhhta hihtýx o jajê piitã mě hakrenh. Jakamã na pu htem ý hã mě kutã amnhĩ to htýx o papa nhũm mě tee ri tanhmã mě pamã Jejus o hêx to kaprý. Pu mě kuma ně ãm mě kuma. ⁵ Mě kêp Tirtũm kra hkêť jakamã na htem hkôť amnhĩ nhĩpêx kêt ně. Mě kot amnhĩ nhĩpêx-ja axtem na. Jakamã na htem Tirtũm kapêť kwým ri tanhmã hkra hkêť xwýnhjê mã kapêť to ho pa nhũm mě kuma ně kãm mě mar prãm ně. ⁶ Nom mě ixte Tirtũm kapêť o mě ajahkre xwýnhjaja na pa htem mě kurom Tirtũm nhỹ hã ixkatãť kôť ãm hãmri mě amã kapêť jarênh o ri ixpa. Jakamã ka mě apê hkra hã mě amã mě inhmar prãm ně. No mě kêp hkra hkêť xwýnhjaja kãm mě inhmar prãm kêt.

Na pu htem pahprĩ hã mě kapêť ã mě kuma ně rĩ kormã tanhmã mě harênh to. Tirtũm nhỹ hã kapêť ã mě harê rỹ kãm hkurê xwýnh maati nhỹ hã kapêť ã mě harê.

Tirtũm kãm mě pajapê hã tanhmã amnhĩ nhĩpêx to hã harênh

Juāw 3.16-21; Rõmãn 5.5-9, 8.35-37

⁷ E ixkwýjaja. Na hte Tirtũm tanhmã mě pahpê hkrajê ho pu mě pamã axpên kĩnh ně. Jakamã kêť pu mě ã axpên nhĩpêx anhỹr jao axpên to mex pix ně. ã Tirtũm kot mě panhĩpêx anhỹr jakamã kêť pu mě pahpê hkrajaja ý hã ã axpên nhĩpêx anhỹr o ri papa.

⁸ Koja mêhõ Tirtũm kĩnhã kãm mě hkwýjê hkĩnh kêt hãmri ně mě kamã ukaprĩ hkêť o pa. Hãmri ně kêp Tirtũm kra hkêť ã amnhĩ to amnhĩrĩť mex ně.

⁹ Tirtũm kãm mě pajapê htýx kumrêx. Kormã mě pamã hkĩnh kêt ri nhũm kumrêx amnhĩ rom kãm mě pajapê ho pa. Ně kãm mě pajapê xaj mě pahwýr Kra pyxita mě. Mě pahte amnhĩ tomnuj pãnhã kot mě panê htyk kaxyw. Mě pahte kukwak ri amnhĩ nhĩpêx nyw o amnhĩ nhĩpêx ně nhỹrmã wa kuri pahťir tũm ně pamex ně papa ho papa kaxyw. ã na pre Tirtũm mě pahwýr Kra mênh anhỹr o kãm mě pajapê hã amnhĩ to amnhĩrĩť.

¹¹ E ixkwýjaja. Tirtũm kãm mě pajapê htýx jakamã kwa kêť pu mě urãk ně pamã axpên kĩnh o papa. Ně axpên kamã paxukaprĩ ně. ¹² Aa mě pahťõ pahte pano ho Tirtũm pumunh kêt tã na hte mě pakamã pa ho pa. Pu mě kãm mě pajapêta pyrã ně ý hã pamã axpên kĩnh o papa. ¹³ Na pre mě pahwýr Karõ rê nhũm mě pahkarõ mã agjê pu mě ý hã kot amnhĩ nhĩpêx o amnhĩ nhĩpêx o papa.

¹⁴ Ně mě ixpê Jejus nhỹ hã mě ajahkre xwýnhjaja. Mě ixte kot amnhĩ nhĩpêx ně kot mêmoj tanhmã ho hã omunh o ri hkôť ixpa jakamã na pa htem ma mě piitã mě kãm harênh o ri mě hkôť ixpa. Ně mě kãm harênh o:

—Tirtũm na pre mě pahwýr Kraja mě. Kot mě pahpiitã mě panê htyk kaxyw mě pahwýr kumê. Anê.

¹⁵ Mě kot Jejus kêp Tirtũm Kra hã harênh o pa xwýnhjaja na hte Tirtũm mě kamã pa ho pa nhũm htem ý hã ã Kra jarênh anhỹr o pa.

¹⁶ Na pu mě ra pahprĩ hã Tirtũm kãm mě pajapê hã amnhĩ tã omu. Kãm mě pajapê htýx kumrêx ã amnhĩ

tã omu. Jakamã kot puj mě urãk ně ý hã pamã mě piitã mě hkĩnh o papa. Tirtũm mě mě pahťipxi ně ri papa kênã.

Mě kãm axpên kĩnh xwýnhjaja kãm Tirtũm puma hkêť ã mě harênh

¹⁷ Ně kot puj mě pamã axpên kĩnh o papa ně mããnên Kris kôť amnhĩ nhĩpêx ho papa. Hãmri nhũm nhỹrmã Tirtũm kot Kra mě wa kuri mě hťir tũm ně mě pa ho mě pa mã xwýnhjê nhĩxi jarênh kaxyw pu mě tee ri amnhĩ kukamã pajamaxpêť kêt ně. Ra amnhĩ nhĩxi jarênh ma ně pahkĩnh ně.

¹⁸ Ně koja mêhõ kãm hkwýjê hkĩnh kêt ně tanhmã hõ homnuj to. Hãmri ně kot amnhĩ tã tanhmã ho pymaj kãm uma ho hwýr mrar kêt ně. No koja kãm hkwýjê hkĩnh ně tanhmã mě ho mex to ho pa ně kãm mě uma hkêť ně. ¹⁹ Tirtũm kumrêx na pre kãm mě pajapê ně mě pakukamã tanhmã mě pahťõ mex to. Tã pu mě ra amnhĩ pyrã ně pamã hkĩnh o papa. Ně pamã mě piitã mě hkĩnh o papa.

²⁰ Ně koja mêhõ kãm Tirtũm kĩnh ã amnhĩ jarênh tã kãm hkwýjê hõ hprãm nõkati hãmri ně ra kãm Tirtũm prãm kêt ã amnhĩ to amnhĩrĩť. Kot kaj mě ano ho akwýjê pumunh o apa xwýnhhta amã hkĩnh kêê tã tanhmã kot ka we amnhĩ to ně ate ano ho Tirtũm pumunh kêêta amã hkĩnh ã amnhĩ jarêť? Nã ka ã amnhĩ jarênh anhỹr o amnhĩ to axêx. ²¹ Na pre Tirtũm mě pamã kapêť o amnhĩrĩť o:

Kot kaj mě amã ixkĩnh hã kot kaj mě mããnên amã akwýjê hkĩnh o mě ho mex o ri apa. Anê.

Tirtũm nhỹ hã mě pamã axpên kĩnh ã mě pamã karõ

5 Ně Tirtũm kot mě pahwýr Jejus mênh ã harênhja. Koja mêhõ kuma ně amnhĩ kaxyw hkôť hamaxpêť ně Jejus kôť amnhĩ xãm hã koja Tirtũm ja hã omu ně ho hkra.

Ně koja mêhõ kãm Tirtũm kĩnh hã koja mããnên kãm hkwýjê hkĩnh o pa. ² Ja pyrã ně kot puj mě pamã Tirtũm kĩnh ně kapêť kôť amnhĩ nhĩpêx. Hãmri ně mããnên pamã krajê piitã mě hkĩnh ho papa.

³ Ně kot puj mě pamã Tirtũm kĩnh ně nhũm kapêťja mě pahpê hihtýx kêt ně. Pu mě pamã Tirtũm kĩnh ã kapêť kôť amnhĩ nhĩpêx mex o ri papa.

⁴ Na pu prem amnhĩ kaxyw Tirtũm Kra Jejus kôť pajamaxpêť ně hkôť amnhĩ xunhwý nhũm Tirtũm ja hã mě pahpumu ně mě pahťõ hkra pu mě ý hã amnhĩ nhĩpêx nyw o amnhĩ nhĩpêx o papa. No ri tanhmã amnhĩ tomnuj to ho ri papa hkêť ně.

Mêmoj axkrunêpxi ně kot Jejus kêp Tirtũm Kra hã ho amnhĩrĩť

Juāw 1.32-34, 3.36, 5.31, 15.26

⁶ Ně Jejus pix na pre Tirtũm mě pakaxyw ãm nhũm kêp Kra hã mě pahwýr wrý. Hãmri nhũm Juāw Paxisja pyhti kamã hkrã kumrã. Kêp Tirtũm Kra hã hkrã kumrã. Tã nhũm Tirtũm kapêť kôť ma tanhmã amnhĩ nhĩpêx to ho pa. Ně ri hkwýjê mã kapêť jarênh o ri mě

hkôt pa. Tã nhũm mẽ kupĩ nhũm kệp Tĩrtũm Kra hã pĩ kahpa hã ajêt nê ty nê hkamrô axkapĩ. Ǻ mẽ panê amnhĩ nhĩpêx anê nhũm Tĩrtũm Karôja kệp Kra hã mẽ pamã ho amnhĩrĩt. Ǻm hãmri na hte Ǻ tanhmã mẽmoj to amnhĩrĩt to anê. Mẽmoj to hêx kêt jakamã na pre Jejus kệp Tĩrtũm Kra hã mẽ pamã ho amnhĩrĩt.

⁷ Nê kệp Tĩrtũm Kra hã mẽ pamã mẽmoj to axkrunêpxi nê ho amnhĩrĩt. ⁸ Tĩrtũm Karô na pre kệp Kra hã mẽ pamã ho amnhĩrĩt pu prem kệp Kra hã omu. Nê Juāw Paxis kot hkrã kumrãrta Ǻ pu mẽ mǺănên kệp Tĩrtũm Kra hã kot ho amnhĩrĩtja Ǻ omu. Nê mǺănên kệp Tĩrtũm Kra hã pĩ kahpa hã jêt nê htyk nê hkamrô pikapĩrta Ǻ mẽ pamã ho amnhĩrĩt pu mẽ kệp Kra hã omu. E mẽ pamã mẽmoj to axkrunêpxi nê Jejus kệp Tĩrtũm Kra hã kot ho amnhĩrĩt xwýnh na jajaja.

⁹ Nê na pu htem jar pahkwýjaja kot axpên mar xà hã ixkre kamã mẽ kapêr ma nê mẽ hkôt pajamaxpêr. Tã koja Tĩrtũm tanhmã mẽ pamã mẽmoj to amnhĩrĩt to pu mẽ hkôt pajamaxpêr kurê kumrêx. Kệp Tĩrtũm kênã kot pu kêt mẽ kapêr prã nê hkôt pajamaxpêr kêt. Tãm na pre mẽ pamã Jejus kệp Kra hã Ǻ ho amnhĩrĩt anê.

¹⁰ Jakamã mẽ pahte Tĩrtũm Kra hkôt amnhĩ xunhwýr xwýnhjaja na pu prem Jejus kệp Kra hã harênh ma nê hkôt pajamaxpêr kurê kumrêx. No mẽ kệp hkra hkêt xwýnhjaja na htem Tĩrtũm kot kệp Kra hã harênh ma nê Ǻm kuma nê amnhĩ kaxyw hkôt hamaxpêr kêt nê. Jao te Tĩrtũm kệp Hipêêxà hã amnhĩ to hêx pyrãk Ǻ harê.

¹¹ E kot paj ixprĩ hã mẽ amã tanhmã ja jarênh to ka mẽ inhma. Nà na pre Tĩrtũm Krata mẽ pahpiitã panê ty. Jakamã kot puj mẽ pahte hkôt amnhĩ xunhwýr xwýnhjaja nhýrmã ty nhũm Tĩrtũm akupým mẽ pahto mẽ pahťir. Pu mẽ wa kuri pamex nê pahťir tũm nê papa ho papa. ¹² Mẽ pahpê Jejus kwýjaja kot puj mẽ Ǻ pahťir tũm nê papa anê. No mẽ kệp hkwy hkêt xwýnhjaja koja mẽ nhýrmã ty nê mẽ pahpyrà nê wa hwýr àpir kêt nê.

¹³ Na ka prem ixpyrà nê amnhĩ kaxyw Tĩrtũm Kra hkôt ajamaxpêr nê hkôt amnhĩ xunhwý. Tã pa Ǻ mẽ amã kagàja nhĩpêx anê. Mẽ ate kamã harênh nê mẽ pahte nhýrmã Tĩrtũm mẽ Kra wa hwýr mẽ paxàpir Ǻ mẽ pajarênhja mar nê amnhĩ kaxyw hkôt ajamaxpêr o ri apa kaxyw nê kapêr prãr o ri apa hkêt nê.

Mẽ pahte paxàmnhĩx mẽmoj tã Tĩrtũm wýr Ǻ mẽ pajarênh

Juāw 14.13-14

¹⁴ Nê mẽ pahpê Tĩrtũm krajaja na pu htem paxàmnhĩx pajamakêtkati nê mẽmoj tã tanhmã hwýr to ho pa-

pa. Kot puj mẽ kãm hprãm xà hkôt mẽmoj tã kuwý nhũm mẽ pama. ¹⁵ Na pu htem mẽmoj tã kuwý nhũm mẽ pamar mex nê mẽ pahte mẽmoj tã hwýr xà hkôt tanhmã mẽ pamã mẽmoj nhôr to rý tanhmã mẽmoj to. Ra mẽ pahte ja mar mex.

Tĩrtũm kot tanhmã hkra hkêt xwýnhjê nhĩpêx to hã harênh

Rukre 22.31-32

¹⁶ Nê koja Kris kôt mẽ anhĩô tanhmã amnhĩ tomnuj to ka mẽ atô tee ri ja hã omu nê ho Tĩrtũm wý. Ho awý kê nê tanhmã kot amnhĩ tomnuj tota o hapêx nê ja nê ho htýx kê axte Ǻ amnhĩ nhĩpêx anhýr kêt nê. Kot puj mẽ pahťo tanhmã amnhĩ tomnuj to nhũm Tĩrtũm tee ri ja hã mẽ pahpumu nhũm ja kệp omnuj nê. Tã kot puj mẽ amnhĩ tomnujta kaga nhũm ja hã mẽ pahpumunh kôt tanhmã hã mẽ pahťo hkêt nê. Ǻm mẽ kot amnhĩ nhĩpêx pixi koja ho hamakêtkati hkêt nê. Kojã mēhō Tĩrtũm kaga ho hkaga nê aa hkôt amnhĩ xãm kêt nê. Hãmri nhũm tee ri amnhĩ tã omu nhũm ja kệp omnuj týx kumrêx. Jakamã koja aa ho hkra hkêt nê. Nê aa kot hkaga ho hamakêtkati hkêt nê pa ho pa. Jakamã koja hkaga xwýnhta nhýrmã ty nê kuri htĩr tũm nê pa ho pa hkêt nê.

¹⁸ Nê mẽ pahpê Tĩrtũm krajaja na pu htem amnhĩ tomnuj o papa hkêt nê. Tĩrtũm Kra Jejus kot ja pymaj mẽ panê Satanasti pumunh mex jakamã nhũm tee ri mẽ pahte tanhmã amnhĩ tomnuj to hprãm xàj mẽ pano kupyri kaprý ho ri pa. Ra mẽ pahte ja mar mex. ¹⁹ Mẽ pahpê Tĩrtũm kra na pu mẽ. No mẽ kệp hkra hkêt xwýnhjaja Satanasti kot amnhĩ tã mẽ ho htýx pyrãk o mẽ hipêx jakamã nhũm htem tanhmã amnhĩ tomnuj to ho pa. Mẽ pahte ja mar mex.

²⁰ Nê mǺănên ja mẽ pahte mar mex. Na pre Tĩrtũm Kra mẽ pahwýr wrý nê mẽ pamã tanhmã Tĩrtũm o amnhĩrĩt to ho pa. Tapxipix kệp Měpahpãm Ǻ mẽ pamã ho amnhĩrĩt. Tã Jejus kukwak ri mẽ pahpê Tĩrtũm kra jakamã kot puj mẽ nhýrmã wa kuri pahťir tũm nê pa mex nê papa ho papa.

²¹ E Kris kôt ixkwýjaja. Kêr ka mẽ Tĩrtũm kapêr kôt pix mã mǺn ri amnhĩ nhĩpêx o ri apa rãhã nê. No nhãm mẽ kot Tĩrtũm kapêr kwým ri mẽ amã kapêr o hêx xwýnhjê kapêr ma nê Ǻm mẽ ama nê mẽ hkôt amnhĩ nhĩpêx hkêt nê.

Tã Ǻm ja pix. Ixpê Juāw na pa krĩ piitã hkôt mẽ amã kagà nhĩpêx nê kurê.

Sikũn Juãw

Juãw na pre kagàja nhĩpêx. Jejus nhĩ hã hkrajê jahkre ho ri pa xwýnhjê hõ na pre. Jakamã na pre hkrĩ hõ kamã Kris kôt htõx mẽ õ fãmii mã kagàja nhĩpêx nẽ mẽ hwýr kumẽ. Na pre hte Tĩrtũm kapêr o mẽ hêx o pa xwýnhjê hõ mẽ õ krĩ hwýr mra nhũm Juãw kràmnhwý nita omu nẽ htýx kot mẽ ahkre mex ã hkamnhĩx. Hãmri nẽ kot Tĩrtũm kapêr o hkwyjê jahkre kaxyw amnhĩ nhõrkwy hwýr kuwý. Hãmri nhũm Juãw tee ri harênh ma nẽ kãm kagàja nhĩpêx nẽ kamã kot amnhĩ wýr hwýr nẽ kãm kapêr nẽ hprĩ hã kãm tanhmã mẽ kot Tĩrtũm o hêx to ho pa hã tanhmã mẽ harênh to. Kot kamã harênh nẽ mẽ harênh mar hãmri nẽ mẽ axkãm hamak rom nẽ ri pa kaxyw. ã na pre Juãwja hkràmnhwý ni mẽ hkwyjê mã mẽmoj jarênh nẽ hã kagà nẽ mẽ hwýr mẽnh anẽ. Nẽ mẽ kãm:

1 Pa Jejus kôt ixtõx. Xà mẽ amex? E ot pa mẽ amã kagà nhĩpêx nẽ mẽ awýr kumẽ. Akrajaja nẽ apê mẽ hkatorxà mẽ mẽ ato ixpimràatã mẽ awýr kumẽ. Ixpê Juãw pigêtre na pa. Inhmã mẽ akĩnh nom papxipix inhmã mẽ akĩnh kêt. Mẽ pahpyrà nẽ mẽ kot Tĩrtũm kôt amnhĩ xunhwýr xwýnhjaja haxwýja kãm mẽ akĩnh.

² Mẽ pahte Tĩrtũm kapêr kôt ri amnhĩ nhĩpêx rãhã ho ri papa jakamã na pu htem pamã axpên kính o ri papa.

³ Na pa hte mẽ pahto Měpanhĩpêxà maati Tĩrtũm wýr o ixpa nẽ kãm:

—Pa Tĩrtũm. Ot pa mẽ amnhĩ to awý. Akra Jejus Kris mẽ mẽ amnhĩ to war awý. Kêr ka wa mẽ ixkamã axukaprĩ nẽ mẽ ixkutã war anojarêt rãhã ho ri apa. Nẽ tanhmã mẽ ixkrã hto pa mẽ ixàmnhĩx ijamakêtkati nẽ ixkĩnh nẽ mẽ inhmã axpên kính nẽ axpên to mex o ri axpên kôt ixpa. Nẽ tãm ri amnhĩ nhĩpêx. Anẽ.

Mẽ pamã axpên kính kãm axpên to mex ã mẽ pamã karõ

Juãw 13.34-35; Wam Juãw 2.7-9, 3.14-18

⁴ Nẽ na pa pre akra hkwyjê pumu nhũm mẽ inhmã amnhĩ jarê pa mẽ kuma nẽ mẽ ý hã ixkĩnh nẽ. Na xep prem Tĩrtũm kôt amnhĩ xunhwý nẽ hkôt ri amnhĩ nhĩpêx mex o pa. Mẽ kot Měpanhĩpêxà Maati Tĩrtũm kapêr ã kagà hkôt amnhĩ nhĩpêx ã inhmã amnhĩ jarê pa mẽ kuma nẽ ixkĩnh nẽ. ⁵ Jakamã na pa ã amã ixkapêr nẽ hã kagà anẽ. E kwa Kris kôt ixtõx. Kêr pu mẽ pamã axpên kính o ri papa hã mẽmoj to axpên kutã panojarêt rãhã ho ri papa. ã ixujarênh anhýrja nyw kêt. Amnepê mã mẽ ate Jejus kôt amnhĩ xunhwýr ã arĩgrota ã na prem ã mẽ amã karõ anẽ. Tã kêr pu mẽ arĩ pamã axpên kính pẽ Tĩrtũm kapêr piitã hkôt amnhĩ nhĩpêx mex o ri papa. Kapêr ã kagà kot ã mẽ pahte amnhĩ nhĩpêx anhýr ã mẽ pamã karõ.

Tĩrtũm kapêr o mẽ hêx xwýnhjê jarênh

Rõmãn 16.17-18; Wam Ximotre 5.22; Wam Juãw 2.18-26, 4.1

⁷ Nẽ mẽ kot Tĩrtũm kapêr o hêx o ri mẽ pa xwýnhjaja na mẽ ra ma krĩ piitã hkôt mẽ kãm tanhmã ho hêx to ho pa nẽ mẽ kãm:

—Jesús kêt Tĩrtũm Kra hkêt ãm mẽ panhĩõ na pre. Na pre Tĩrtũm mẽ pahwýr mẽnh kêt nẽ. ãm mẽ panhĩõ rĩm na pre kato.

Anhýr o mẽ kãm ho hêx o pa. Kãm Kris kurê xwýnh maatija nhĩ hã na htem ã ri ho hêx o pa anẽ. ⁸ Jakamã kwa mẽ amnhĩ nẽ mẽ omunh mex nẽ mẽ ama nẽ ãm mẽ ama. Kot kaj mẽ kapêr ma nẽ mẽ hkôt ajamaxpêr hãmri nẽ mẽ ixte Tĩrtũm kapêr o mẽ ajahkreta kaga. Kwa mẽ arĩ mẽ ate amnhĩ nhĩpêx nyw pix o mãn amnhĩ nhĩpêx rãhã o ri apa. Nẽ arĩ mẽ amã axpên kính kãm tanhmã axpên to ajuta hto rãhã ho ri apa. Kêr kê Tĩrtũm ja hã mẽ apumu nẽ nhýrmã mẽ ato mex nẽ.

⁹ Nom kot kaj mẽ nhãm mẽ kapêr punujja kôt amnhĩ nhĩpêx nẽ Kris kôt amnhĩ nhĩpêx kêt nẽ nhũm Tĩrtũm mẽ akôt pa hkêt nẽ. Nom kot ka mẽ arĩ Kris kôt amnhĩ nhĩpêx mex nẽ hãmri nhũm Tĩrtũm mẽ Kra Jejusja wa mẽ akôt ri pa ho pa rãhã nẽ. ¹⁰ Jakamã koja ã Tĩrtũm kapêr ã kagà kuhpa hã Jejus o hêx xwýnhjaja mẽmo arĩgro hã mẽ anhõ krĩ hwýr pøj ka mẽ omu nẽ amnhĩ nhõrkwy hwýr mẽ hwýr kêt nẽ. Nẽ tanhmã mẽ kãm akapêr to hkêt nẽ. ãm ri mẽ hkàx ã ri mra. ¹¹ No kot kaj mẽ ã mẽ hipêx anhýr kêt nẽ mẽ hwýr mra nẽ mẽ mar o akuhê hãmri nẽ te mẽ ate mẽ hkôt amnhĩ nhĩpêx o amnhĩ nhĩpêx pyrãk. Ja pumaj kêr ka mẽ nhýri mẽ omu nẽ mẽ htêp kêt kumrêx.

Kagà jatur xà

Hapuhã Juãw 13-15

¹² E Kris kôt ixtõx. Ixkapêr jatur xà na ja. Ixkapêr ã kagàja ãm hakotre nom inhmã mẽ amã ixkapêr ry hprãm. Jakamã kot paj mẽmo arĩgro hã ma mẽ awýr mõ pu mẽ axpên pumu nẽ pahkĩnh nẽ. Pa rĩ kormã mẽ amã ixkapêr jatur xãm kumẽ ka mẽ aprĩ hã inhma.

¹³ Nẽ ota jar Kris kôt atõx krajaja awýr hpêr mẽ.

E ixpê Juãw pigêtre na pa ã awýr kagàja nhĩpêx nẽ mẽnh anẽ.

Hapuhã Juãw

Juãw na pre mãänën kagàja nhípêx. Jejus nhỹ hã hkrajê jahkre ho mẽ pa xwýnhjê hõ na pre. Tã hkràmnhwý Gajore mã kagàja nhípêx nẽ hwýr kumẽ. Na pre Jejus kwýjaja ma krí piitã hkõt mẽ kãm Jejus kapêr jarênh o ri mẽ hkõt pa. Jao Gajore nhõ krí hwýr pøj nhũm Gajore mẽ hpôx ã mẽ harênh ma nẽ amnhĩ nhõrkwý hwýr mẽ kuwý. Jakamã nhũm pre htem ma õ krí hwýr pa hãmri nẽ kuri pøj. Nhũm Juãw ã Gajore kot amnhĩ nhípêx anhýr ã harênh ma nẽ hkĩnh nẽ hwýr kagàja nhípêx nẽ kumẽ. Nẽ kamã kãm mēhõ pẽ Xotre kot tanhmã amnhĩ tomnuj to ho pa hã harẽ. ã na pre Juãwja Gajore mã mẽmoj jarênh nẽ hã kagà nẽ hwýr mẽnh anẽ. Nẽ kãm:

1 Pa ixkràmnhwý Gajore? Xà amex? E ot pa awýr kagàja nhípêx nẽ kumẽ. Apê ixkràmnhwý mex na ka. Inhmã akĩnh.

² Na pre ra Kris kõt pahtõ hkwýjaja ixwýr pøj nẽ tanhmã inhmã ajarênh to. Na ka xep hte Tirtũm kõt amnhĩ nhípêx mex rãhã ho ri apa. Pa ajarênh ma nẽ anhý hã ixkĩnh nẽ. Nẽ ato Tirtũm wýr o ixpa. Kot ato mex nhũm amex nẽ ajamakêtkati nẽ apa ho apa kaxyw. Nẽ axà hkêt nẽ amex nẽ ri apa kaxyw.

⁴ Ixte Tirtũm kapêr o mẽ ajahkre o ri ixpa jakamã te mẽ apê ixkra pyrãk. Tã pa tanhmã ate mẽ pahkwýjê nhípêx to ho apa hã ajarênh ma nẽ ixkĩnh nẽ.

Gajore kot tanhmã Jejus kõt hkwýjê ho mex to hã harênh

Wam Korít 16.10-11

⁵ E ixkràmnhwý. Na ka xep hte Jejus kõt pahtõjê ho mex o ri apa. Aa ate mẽ omunh kêt tã nhũm htem ma anhõ krí hwýr pa ka mẽ omu nẽ apê Jejus kõt mẽ htõ hã mẽ ho mex nẽ. ãm hãmri na ka hte ã mẽ hipêx anhýr o ri apa Gajore. ⁶ Na pre ra mẽ hkwýjaja akupýn ixwýr pøj nẽ mẽ ixpê Kris kwýjê mã amnhĩ tã ajarẽ. Amã mẽ hkĩnh nẽ ate tanhmã mẽ ho mex to hã ajarẽ. Nhũm prem nojarêt ka xep pre mẽ kãm pry hã mẽ apkur xà hã mẽmoj gõ nhũm mẽ inhmã ajarẽ. Nã ãm hãmri na ka hte ã mẽ ho mex o apa anẽ. ã ate mẽ hipêx anhýr o apata ã na hte Tirtũm apumu nẽ hkĩnh nẽ. ⁷ Na htem krí piitã hkõt mẽ kãm Kris kot tanhmã mẽ panê amnhĩ nhípêx to hã harênh kaxyw ma mẽ hwýr pa. Nom mẽ apkur xà hprãm xàj mẽ kot Kris kõt amnhĩ xunhwýr kêt xwýnhjê hwýr pa hkêt nẽ. ⁸ Jakamã kwa kêr pu mẽ papajaja mẽ pahpê Jejus kõt mẽ htõ hã mẽ kãm mẽõ hkwý nhõr o papa. Kot puj mẽ ã mẽ ho ajuta anẽ nẽ te mẽ pajaxwýja mẽ ihkõ hã ri mẽ kãm Kris jarênh o ri papa pyrãk.

Xotre kãm Juãw kapêr mar prãm kêt ã harênh

Matêwre 20.25-28, 23.1-12

⁹ Nẽ ra ixte anhõ krí kamã mẽ apê Kris kwýjê mã kagà nẽ mẽnh nhũm mẽ ate kamã harênhhta. Na xep pre Xotreja kuma nẽ ãm kuma. Kêp mẽ akrãhtũm prãm xàj kãm ixkapêr mar prãm kêt nẽ. ¹⁰ Na xep hte tanhmã ixto hẽx to ho pa. Nom papxipix ixto hẽx kêt

nẽ. Mãänën Kris kõt mẽ pahtõjaja nhỹhýnh krí hõ rũm mẽ awýr pan pøj nhũm xep tanhmã mẽ amã mẽ ho hẽx to. Nẽ mẽ hpôx ã mẽ omu nom amnhĩ nhõrkwý hwýr mẽ hwýr kêt nẽ. Tã ka mẽ kurom amnhĩ nhõrkwý hwýr mẽ awýr nhũm xep tee ri ja hã mẽ apumu nẽ mẽ akamã gryk nẽ mẽ hã mẽ amã akir nẽ Tirtũm mã amnhĩ jarênh xà hã ixkre nẽ mẽ ajano. Na xep hte ã amnhĩ nhípêx anhýr o pa. Jakamã kot paj nhýrmã ma mẽ awýr mõ hãmri nẽ mẽ apiitã mẽ anoo mã hã kãm akir. Tanhmã kot mẽ ixto hẽx to nẽ tanhmã kot amnhĩ tomnuj to hã kãm akir ka mẽ apiitã hã inhma.

Mẽ pahte mẽ kot amnhĩ tomnuj xwýnhjê hkõt amnhĩ nhípêx kêt ã mẽ pamã karõ

Rukre 6.45; Rõmãn 12.9

¹¹ E kwa ixkràmnhwý. Kêr ka ã Xotre kot amnhĩ tomnuj o pa anhýrja kõt amnhĩ nhípêx kêt nẽ. Mẽ kot amnhĩ tomnuj o mẽ pa xwýnhjaja na htem Tirtũm kõt amnhĩ nhípêx kêt nẽ. No kêt mẽ kot amnhĩ to mex o ri mẽ pa xwýnhjaja na mẽ kêp Tirtũm kra jakamã kêr ka mẽ ã mẽ kot amnhĩ nhípêx anhýr xwýnhjê kõt pix mã amnhĩ nhípêx.

Temêtre jarênh

¹² Nẽ Temêtre na hte tãm ri amnhĩ nhípêx nẽ ãm hãmri Tirtũm kapêr o mẽ ahkre mex nẽ nhũm mẽ piitã axpên mã mex ã harẽ. Pa hte ijaxwýja mẽ kãm mex ã harênh o ri mẽ hkõt ixpa ka htem inhma. ãm hãmri na pa hte tanhmã harênh to ho ri ixpa.

Kagà jatur xà

Sikũn Juãw 12-13

¹³ E kagàja kamã na pa ãm ja pix jarẽ nẽ hã kagà nẽ awýr kumẽ Gajore. Na pa kormã harênh jatur xà mẽnh kêt nẽ. ¹⁴ Nom kot paj tokyx ma awýr mõ hãmri nẽ rĩ kormã amã hatur xãm kumẽ.

E kê Tirtũm akutã nojarêt rãhã ho pa.

Nẽ ota jar Kris kõt akràmnhwýjaja awýr hpêr mẽ. Nẽ kêr ka atar Kris kõt ixkràmnhwýjê mã ijarẽ.

Tã ãm ja pix. Ixpê Juãw pigêtre na pa ã awýr kagà nhípêx nẽ mẽnh anẽ.

Jutre

Jutre na pre kagàja nhípêx. Xiakre pyrà nê kêp Jejus tō na pre. Tã kagàja nhípêx nê krí piitã hkôt Jejus kôt hkwyjê hwÿr kurê. Na pre mẽ hkwyjaja kêp Jejus kwÿ hã amnhĩ jarênh tã axtem nê tanhmã amnhĩ tomnuj to ho pa. Jakamã nhũm Jutre kagàja kamã Jejus kwÿjê mã hprĩ hã tanhmã mẽ harênh to nê mẽ kot mẽ hkôt amnhĩ nhípêx nê mẽ kãm kapêr kãm hihtÿx nê. Nê mẽ kãm:

1 Pa Jejus kôt ixtō nê ixtōxjaja. Xà mẽ amex? E ot pa mẽ amã kagà nhípêx nê mẽ awÿr kurê. Tirtũm kot ixpyrà nê amnhĩ kaxyw mẽ axunhwÿr xwÿnhjê hwÿr. Měpanhípêêxà Maati Tirtũm kãm mẽ pahpiitã mẽ pajapê jakamã na hte Kra Jejus Kris mẽ wa mẽ pahtãnopxar mex rãhã ho pa.

Ixpê Jutre na pa hte Jejus Kris mã tanhmã amnhĩ nhípêx to ho ri ixpa. Nê ixpê Xiakre htō na pa.

² Na pa hte mẽ ato Tirtũm wÿr ho ixpa nê kãm:

—Pa Tirtũm. Kwa mẽ kot Akra Jejus kôt amnhĩ xunhwÿr xwÿnhjê pumu nê amã mẽ hapê hã mẽ kamã axukaprí rãhã ho apa. Kê mẽ kamã amnhĩ krit nê àmnhĩx hamakêtkati nê ri tanhmã amnhĩ nhípêx to ho pa. Nê mẽ kãm axpên kĩnh o ri axpên kôt pa. Anê.

Mě kot Tirtũm kapêr o hêx xwÿnhjê jarênh

Wam Ximotre 1.18-20, 6.12

³ E ixkràmnhwÿjaja. Nà inhmã mẽ akĩnh. Na pa pre jãã mẽ amã kagà hkwy nhípêx kaxyw. Mě pahte Jejus Kris kukwak ri amnhĩ nhípêx nyw ã tanhmã mẽ pajarênh to nê hã kagà kaxyw tã kormã harênh kêt nê. Kot paj axtem mẽmoj jarê. Na pre Tirtũm mẽ pamã kot amnhĩ nhípêx o amnhĩrit pa. Nê kapêr o amnhĩrit pa. Mě pahte mar nê hkôt amnhĩ nhípêx kaxyw. Jakamã kêr pu mẽ kapêr mar tÿx nê amnhĩ krã hi kamã haxàr tÿx nê hã papa. Nom koja mēhō kapêr kuhpa hã tanhmã mẽ amã kapêr o hêx to ka mẽ ama nê ãm ama.

⁴ Na xep ra kapêr o mẽ hêx xwÿnhjaja mẽ akôt pa nê mẽ apyrà nê Jejus kôt amnhĩ xunhwÿr ã amnhĩ jarê nom amnhĩ to hêx. Ka xep mẽ aprĩ hã mẽ hêx ã mẽ omunh kêt nê mẽ kêp Jejus kôt mẽ atō hã mẽ hkamnhĩx nê atÿx amnhĩ nhōrkwÿ hwÿr mẽ awÿ. Nom mẽ kot Tirtũm kapêr o hêx pix kaxyw na htem mẽ akôt pa nê mẽ amã kapêr o:

—Tirtũm kãm mẽ pajapê htÿx kumrêx nê mẽ pakutã nojarêt ho pa jakamã kwa kêr pu mẽ mãmri nhãm mēnijê ho amnhĩkati ho papa. Koja ja hã mẽ pahpumu nê tanhmã hã mẽ pahto hkêt nê. Kãm mẽ pajapê kēnã kot kêt hã tanhmã mẽ pahto. No kêt Jejus Krisja mẽ ate kêp mẽ panhō Pahihti hã harê nom kêp mẽ panhō patrãw rÿ kêp mẽ panhō Pahihti hkêt. Anê.

Ā Tirtũm kapêr kuhpa hã mẽ amã harênh anhÿr o pa. Tirtũm kapêr ã kagà htũm kot amnepem mẽ hkukamã tanhmã mẽ harênh to nê mẽ harênh kot:

Ā mẽ kapêr anhÿr o paja mÿrapê koja mẽ mex kêt nê pa. Koja Tirtũm mẽ homnuj tÿx kumrêx.

Anhÿr o kot mẽ harênh. Tã pa mẽ amã ixprĩ hã mẽ harê nê hã kagà. Mě ate inhmar nê amnhĩ nê mẽ omunh mex kaxyw.

Tirtũm kot tanhmã mẽ kot amnhĩ tomnuj xwÿnhjê nhípêx to hã harênh

Sikũn Pêtre 2.1-17; Sikũn Ximotre 3.1-9

⁵ Nê amnepê mã mẽ panhīgêjtjaja kormã Ejit kamã mẽ pa ri nhũm Tirtũm Ejit nhō xwÿnhjê rũm mẽ kator pa. Hãmri nhũm mẽ hkwyjaja tanhmã hamaxpêr to nê axtem nê amnhĩ kaxyw hkôt hamaxpêr kêt nê. Nhũm tee ri amnhĩ tã mẽ omu nê ã mẽ kot amnhĩ nhípêx anhÿr xwÿnhjê nhĩmex pa. Ra mẽ ate mẽ harênh mar mex tã pa axte mẽ amã mẽ harê.

⁶ Nê Tirtũm kapêr o mẽ wrÿk xwÿnh kwÿjaja. Na prem Tirtũm nhÿ hã kapêr o pa htã tanhmã hamaxpêr punuj to nê ra kãm ja ho anhÿr prãm nōkati nê Tirtũm kaga. Jakamã nhũm mẽ hã amÿnê nhũm mẽ unê nê kãx o mẽ hkaxpre pa. Nê nhÿri pika kaxwÿnh kãm kamàt kō htyk kãm mẽ kurê nhũm mẽ arĩ kamã hkrĩ ho hkrĩ. Nom koja nhÿrmã Tirtũm kot tanhmã mẽ pahpiitã mẽ pajarênh to xà hã arĩgro kato nhũm mẽ rĩ kormã hapôx pa. Hãmri nê kot amnhĩ tomnuj mÿrapê ma mẽ kot amnhĩ xà htÿx kamã hamak tũm xàta wÿr ma hapêx.

⁷ Nê krí pê Sotō nê Komo nhō xwÿnhjaja na prem haxwÿja kãm Tirtũm kapêr kôt amnhĩ nhípêx prãm kêt nê. Nê krĩja wa hpuhã krĩ hkwy kamã ri mẽ pa xwÿnhjaja haxwÿja mẽ urak nê nê kãm kapêr mar prãm kêt nê. Na prem amnhĩ tomnuj tÿx rãhã ho pa. Nê axtem nê axpên pê ri mẽ hprō ho amnhĩkati ho pa. Nê mẽmy hkwyjaja ri axtem nê axpên to amnhĩkati ho pa. Hãmri nhũm Tirtũm tee ri mẽ kot amnhĩ nhípêxja ã omu nê mẽ hipy kuwy hpōk kwÿ rē nhũm mẽ amnhĩ wÿr omu nê kãm ma xàj tee ri hprōt kaprÿ. Nê hprōt kaxyw ōrkwÿ rũm hapōj nê hxêt pa nê hapêx. Na hte ã Tirtũm mẽ kot amnhĩ tomnuj o mẽ pa xwÿnhjê nhípêx anê. Jakamã koja nhÿrmã kuwy hpōk rãhã xwÿnhhta wÿr mẽ piitã mẽ rēnh pa nhũm mẽ kamã amnhĩ xà htÿx kamã hamak rãhã ho pa ho pa nê aa à hapêx kêt nê. Nê à htÿx rãhã papa ho pa. Tã mẽ pahte Sotō mẽ Komo nhō xwÿnhjê jarênh mar nê mẽ pahte amnhĩ tomnuj kaga

kurê kumrêx kaxyw na pre Tirtûm ã më pamã më harênh o amnhîrît anê.

Më hpijaàm kêt xwÿnhjê jarênh

Sikûn Pêtre 2.10

⁸ Nê më kot Tirtûm kapêr o pihkâr xwÿnhjaja na htem ã më kot amnhî nhîpêx anhÿr xwÿnhjê pyrã nê amnhî tomnuj tÿx pix o ri pa. Jakamã na htem tanhmã hpimtir punuj to hãmri nê hkrã hapôj nê hpimtir xà hkôt tanhmã amnhî tomnuj to. Jao hkwyjê kamã hpijaàm kêt o pa. Rÿ mënijê hõ rÿ mëmyjê hõ nhùm më axpên kãm hpijaàm kêt o pa. Rÿ Tirtûm kapêr o më wrÿk xwÿnhjê ho kapêr punuj nê. Kapêr mã gêt o tanhmã më ho kapêr punuj to. ã na htem hpimtir punuj xà hkôt amnhî tomnuj o pa anê. ⁹ Tirtûm kapêr o më wrÿk xwÿnh krãhtûm Mikewja. Kêp më hkrãhtûm tã aa më kãm kapêr mã gêt kêt nê. Na pre Mojes ty nhùm Mikew ra ma hwÿr tèn wrÿ. Nê kuri Satanasti pumu hãmri nê Mojes nhî nê tanhmã kãm kapêr to. Nom kapêr mã gêt o kãm kapêr kêt nê. ãm kapêr mã hprî ho kãm kapêr nê kãm:

—Kwa ãm omu kê nõ. Kot kaj tanhmã ho nhùm Tirtûm apumu nê hã tanhmã hã ato. Anê.

¹⁰ Nom ixte më amã më hpimtir punuj jarênh xwÿnhjaja. Më kot Tirtûm kapêr o pihkâr xwÿnhjaja kot hprî hã Tirtûm kot amnhî nhîpêx ã harênh mar kêt jakamã na htem htÿx ri ho kapêr o haprÿ ho pa. Te ho mry xoprêja hamaxpêr kêt nê htÿx ri amnhî nhîpêx o pa pyrãk. Nom koja nhÿrmã Tirtûm më homnuj tÿx nê.

Te më kot finat Kaï kot amnhî tã hprî xwÿnh kot amnhî nhîpêxta pyrãk. Nê te më kot finat Paraãw kot amnhî nhîpêx pyrã nê kãxpore rûnh prãm xàj Tirtûm kapêr kuhpa hã tanhmã amnhî nhîpêx to ho pa. Nê te më kot finat Kore kot amnhî nhîpêx pyrã nê Tirtûm kot më kaxyw më õ pahi xãm xwÿnhhta kutã amnhî xunhwÿ. Mÿrapê koja më jajê pyrã nê kuwy hpôk rãhã xwÿnhhta wrÿ ma hapêx pa.

¹² Na ka htem apê Jejus kwÿ hã axpên wrÿ akuprõ. Nê tõhã më apê hkwy hã amã axpên kính ã axàpkur kaxyw axpên wrÿ akuprõ. Nhùm ixte më amã më harênh xwÿnhjaja më akôt agjê nê më akutã apku. Jakamã kwa më o kora më amnhî nê më omunh mex nê. Më hipêx o te më ate më axàpkur xà hã më anhõ kamã kênre pumunh nê hanhir nê rênih pyrã nê amnhî nhîhkô hã më pumu nê amnhî nê hanor kurê kumrêx. Na htem hpijaàm kêt kãm amnhî pix kukamã hamaxpêr pê apkur rûnh o pa.

Te na wrÿk kaxyw htyk rax nê mör nhùm më kot omunh nê wrÿk ã hkamnhîx tã nhùm kôk kot nhãm mënh nhùm wrÿk kêeta pyrãk o na htem amnhî nhîpêx. Jao te më kot ãm hãmri më amã Tirtûm kapêr jarênh mex pyrãk tã më amã ho hêx.

Nê te më kêp mëmo pí hpàr ra ô mã tãm tã ãm htÿx rã nê aa ô hkêt nhùm më kot krãhyr nê mënh nhùm grã parta pyrãk.

¹³ Nê te më kêp gô xujanãr kot amnhî nhîpêx pyrãk. Na hte gô xujanãrja hakàx wrÿ kapê nê mra nhùm hamrô kÿxpê amgrã kamã arík nhùm gô awjanã nê ma

akupÿm hipôk wrÿ mra. Ja pyrãk na htem ma nhÿhÿm mra nê më kãm mëmojarê nê nhãm mra nê më kãm mëmojarê nê ma akupÿm më kurûm mra. Nhùm më mar xà hkôt amnhî tomnuj rãhã ho pa.

Nê te më kot kaxkwa hã kanhêre nhÿhÿm htêm nhùm më kot nhÿhÿm htêm xà hkôt omunh kêeta pyrãk. Jakamã koja Tirtûm nhÿrmã kamàt kô kamã më rênih pa nhùm më aa hapôx kêt nê.

Më kot amnhî tomnuj xwÿnhjê hkukamã më harênh

Apokarip 20.11-15

¹⁴ Nê na pre finat Enokja amnepê mã ã më kot amnhî tomnuj anhÿr xwÿnhjê hkukamã tanhmã më harênh to. Më kot Tirtûm kapêr o pihkâr o ri më pa xwÿnhjaja nhùm më hkukamã më harê. Enokja finat Atãw kanrêhã htãmnhwÿ na pre. Tã ã më kot amnhî tomnuj anhÿr xwÿnhjê hkukamã më harênh o:

Koja nhÿrmã Pahihtija man pika hwÿr akupÿn wrÿ. Kapêr o më wrÿk xwÿnh xohtô rax më më hpimràatã akupÿn wrÿ.

¹⁵ Hãmri nê më pahpiitã kormã më pahtîr ri më pahte tanhmã amnhî nhîpêx to ho papa hã më pahpumunh xà hkôt tanhmã më pajarênh to. Hãmri nê më kot Tirtûm kapêr o hêx o pa xwÿnhjê pumu nê tanhmã më harênh to nê më harênh o: "Jajaja na pre më kãm Inhîpêxã Tirtûm prãm kêt nê ri kapêr kwÿm pix mã amnhî nhîpêx o pa. Nê kapêr punuj o pa. ã na prem amnhî nhîpêx anhÿr rãhã ho pa." Anhÿr o më harê nê amnhî nê kuwy hwÿr më kurê nhùm më amnhî xà htÿx kãm hamak o pa rãhã nê pa ho pa. Anê.

ã na pre finat Enokja më hkukamã më harênh anê. ¹⁶ ãm hãmri na më harê. Tã na hte arí më hkwyjaja ã amnhî nhîpêx anê. Nê hamaxpêr mex kêt nê. Na htem nhãm tanhmã më ho kapêr punuj to pix kukamã hamaxpêr. Nê amnhî krã hkôt htÿx ri tanhmã amnhî tomnuj to ho pa. Nê amnhî to jarkrar rãhã nê. Nê hêx rom më kêp mëmojarê jamÿnh kaxyw tanhmã më kãm hêx to.

¹⁷ E Kris kôt ixkrãmnhwÿjaja. Kojã më ã më amã Tirtûm kapêr o hêx anhÿr o më akôt pa ka më ama nê ãm më ama nê më kapêr mar kêt nê. ãm më panhõ Pahihti Jejus Kris nhÿ hã më ajahkre o më pa xwÿnhjaja kot tanhmã më amã më harênh toja mã mãn kêt ajamaxpêr tÿx rãhã o ri apa. ¹⁸ Na prem më amã më harênh o:

—Jesús akupÿn wrÿk xwÿj ri koja mëmojarã më awÿr mran pôj. Nom më kot Jejus kapêr kwÿm amnhî krã hkôt tanhmã amnhî nhîpêx to xwÿnhjaja koja më. Hãmri nê më apê Jejus kwÿ hã më apumu nê më atã akunha nê më atã hpêr o axkê nê Tirtûm ã hpêr o axkê nê kapêr ã kagã hã hpêr o axkê. Anê.

¹⁹ ã më kot amnhî nhîpêx anhÿr xwÿnhjaja më pahpê Jejus kwÿjaja më pahte axpên kutã amnhî xunhwÿrja na më kãm hprãm. Më kamã Tirtûm Karõ gjêx kêt jakamã më kãm amnhî krã hkôt pix mã tanhmã amnhî tomnuj to ho pa hprãm.

**Mě pahte Kris akupŷn wrŷk jamār pē tanhmā amnhī
nhīpēx to hā mẽ pamā karō**

Matêwre 24.45-51; Rukre 12.25-40; Karatas 6.1-2; Xiakre 5.19-20;
Sikŷn Pêtre 3.12-15

²⁰ Kwa mẽ apê Jejus kôt ixtō mẽ ixtōxjaja kêr ka mẽ ã mẽ kot amnhī nhīpēx anhŷr o mẽ pa xwŷnhjê rom apkati mẽ amnhī kaxyw Jejus pix mǎ mǎn ajamaxpêr rǎhǎ ho ri apa. Te mẽ kot mẽ hakre hǎ ra àptàr mẽ amnhī krām mẽ hakre xà jagjênh tŷxta pyrǎk.

Jao Tirtŷm kapêr mar tŷx mẽ hkôt amnhī nhīpēx mex o ri apa.

Nê Karō nhŷ hǎ amnhī to hwŷr rǎhǎ nê.

²¹ Nê Tirtŷm kām mẽ pajapê hǎ kām ajamaxpêr rǎhǎ ho ri apa.

Nê Pahihti Jejus Kris kām mẽ pajapê hǎ kām ajamaxpêr tŷx rǎhǎ ho apa.

Koja nhŷrmǎ kām mẽ pajapê hǎ akupŷn mẽ pahwŷr wrŷ nê tanhmā mẽ pahto mex to pu mẽ kuri pahŷtŷr tŷm mẽ pahkŷnh mẽ papa ho papa. Tǎ kêr pu mẽ arŷ akupŷn mẽ pahwŷr wrŷk xà hǎ arŷgro jamār rǎhǎ ho papa.

²² Nê mẽ pahkwŷjaja kormǎ mẽ kot Jejus kôt amnhī xunhwŷr tŷx kêr xwŷnhjaja kêr ka mẽ kamǎ axukaprŷ nê aprŷ hǎ mẽ kām Tirtŷm kapêr jarênh o ri mẽ hkôt apa. ²³ Na pre ra mẽ hkwŷjaja mẽ kot Tirtŷm kapêr o pihkàr xwŷnhjê kapêr ma mẽ mẽ hkôt amnhī nhīpēx. Jakamǎ kêr ka mẽ ja hǎ mẽ omu mẽ te mẽ ate kuwy hpôk rŷnh nê mẽ hpa hǎ mẽ hamŷnh mẽ nhām mẽ rênh pyrǎk o mẽ hipêx. Jao mẽ kot nhŷrmǎ Tirtŷm kapêr o pihkàr xwŷnhjê hkôt kuwy hpôk rŷnhhta wŷr pa pymaj mẽ nê mẽ kām akapêr kām axihtŷx o ri mẽ hkôt apa. Kê mẽ ama mẽ mẽ hkaga mẽ mẽ hkôt ri amnhī nhīpēx kêr nê.

Nê htŷx ri mẽ kot amnhī tomnuj o mẽ pa xwŷnhjaja kêr ka mẽ kamǎ axukaprŷ ho ri apa mẽ mẽ kamǎ agryk tokyx anhŷr kêr nê. Xatǎ mẽ kām Tirtŷm kapêr jarênh rǎhǎ ho ri mẽ hkôt apa. Nom kwa mẽ okora kêr ka mẽ kot amnhī nhīpēx o amnhī nhīpēx o ri apa hkêt nê. Kwarŷ ho kwarŷ.

Jutre kot Tirtŷm mǎ mex o mex ã harênh

Wam Pêtre 1.5-7

²⁴ Nê kêr pu mẽ Tirtŷm mǎ amnhī jarênh kaxyw mẽ ã kām amnhī jarênh anê mẽ kām:

—Pa Tirtŷm. Nà ãm hāmri na ka hte amnhī kôt mẽ ixunhwŷr tŷx mẽ pa mẽ akaga hkêt nê akôt amnhī nhīpēx rǎhǎ ho ri ixpa. Kot kaj nhŷrmǎ amnhī wŷr mẽ ixto api pa mẽ Akra mẽ war akuri axte tanhmā amnhī tomnuj to hkêt nê. Nê amnhī to mex pē anhŷrǎ htŷx rax kām ixpa. Jao ixkŷnh tŷx mẽ ixpa ho ixpa.

²⁵ —Apê mẽ inhō Tirtŷm ã apyxi mex kumrêx na ka. Na ka pre Pahihti Jejus Kris kukwak ri mẽ ixpiitǎ mẽ ixte amnhī tomnuj pē mẽ ixpytǎ. Nê na ka hte anhŷrǎ htŷx rax rǎhǎ ri apa. Nê amex o amex mẽ axihtŷx o axihtŷx mẽ axàhpumunh o axàhpumunh. Nê apê mẽ inhō Pahi Maati hǎ apyxi mex na ka. Amnepê mǎ kormǎ mẽmoj kêr ri ka pre ã amnhī nhīpēx anhŷr o apa rǎhǎ nê. Tǎ arŷ ã ate amnhī nhīpēx anhŷr ho apa ho rǎhǎã. Nê kot kaj apkati mẽ ã ate amnhī nhīpēx anhŷr ho rǎhǎã. ã ate amnhī nhīpēx anhŷr o apa ho rǎhǎ ho rǎhǎ. Tǎ ãm ja pix na hapêx. Anê.

E kêr pu mẽ ã Tirtŷm mǎ mex o mex ã harênh anhŷr o papa.

Ãm ja pix. Ixpê Jutre na pa mẽ awŷr kagàja nhīpēx mẽ kumê.

Apokarip

Juãw na pre mě pamã kagàja nhípêx. Juãw Paxis kêt axtem Jejus nhý hã hkrajê jahkre ho mě pa xwýnhjê hõ pê Juãw na pre hipêx. Na pre Jejus ã mě kãm hkurê xwýnhjaja unê nê ma gô hipôk pê Patos wýr kumê nhùm kêp prês nê gô hipôk kãm pa ho pa nê aa kurüm kator kêt rãhã ty. Jakamã kormã htír ri nhùm Tirtüm kapêr o wrýk xwýnhjê hõ gô hipôkja wýr wrý nê kãm měmoj kukamã awjarê nhùm kuma nê hkôt měmoj pumu. Te hpimtir kãm měmoj pumunh pyrãk. Hãmri nê omu nê kuma nê amnhí xõ ri mě pamã hã kagà. Na pre měmoj to axkrunêpxi nê hã kagà. Mě kot Jejus kutã amnhí xunhwýr xwýnhjaja kot Jejus ã tanhmã kêp hkwyjê to ho pa nhùm mě hkwyjaja pikaprãr ã kagà. Nê Jejus kêp Pahi Maati hã kot nhýrmã mě kot Tirtüm kutã amnhí xunhwýr xwýnh piitã ma mě kot amnhí xà htýx kamã hamak tùm xà hwýr mě rênh par ã kagà. Nê Tirtüm kot nhýrmã hkrajê ho mex kumrêx ã nhùm mãänêh hã kagà. Hãmri nê mě pamã hã kagà o:

1 E kot paj mě amã awjarê nê hã kagà. Ixpê Juãw ixte Tirtüm mã tanhmã amnhí anhípêx to ho ixpa xwýnh kot paj měmoj jarê nê hã kagà. Na pre Tirtümja Jejus mã měmoj kukamã tanhmã ujarêh to ho ra kãm ho amnhírít pa. Kot amnhí xõ ri mě pahte hkôt amnhí xunhwýr xwýnhjê mã harêh kaxyw. Hãmri nhùm kuma nê kot amnhí xõ ri inhmã ujarêh kaxyw man ixwýr kapêr o wrýk xwýnh mě nhùm man ixwýr wrý nê ô ri inhmã měmoj to amnhírít pa. ãm hãmri ã inhmã měmoj to amnhírít anê. Tã kot paj amnhí xwar mě apê Jejus kôt ri mě apa xwýnhjê mã harê nê hã kagà. Mě ate mar nê axkãm ajamak rom nê ri apa kaxyw. Nà ixte hã kagà mã xwýnhja koja tanhmã amnhí to nê tokyx mě pahwýr wrý. ³Jakamã kwa kêr ka mě aprí hã kagàja kamã harê nê ama nê hkôt pix mã amnhí nhípêx nê mě piitã mě kãm kamã harêh o ri mě hkôt apa. Kot kaj mě ã amnhí nhípêx anê nhùm Tirtüm ja hã mě ato mex ka mě akính nê apa ho apa. Nê mě kot mě axu-jarêh mar nê hkôt amnhí nhípêx xwýnhjaja koja Tirtüm ja hã mě omu nê mě ho mex nê nhùm mě apyrã nê hkính nê pa ho pa.

Juãw kot krí pê 7 kôt Jejus kwýjê hwýr kagà rênh

⁴E ixpê Juãw kot paj atar pika pê As kamã krí pê 7 pi-itã hkôt mě apê Jejus kwý hã axpên wýr mě apikuprõnh xwýnhjê hwýr kagà nê kurê ka mě kamã harê nê ama.

Na pa hte mě ato Tirtüm wýr rãhã ho ri ixpa. Nê mě ato hwýr o:

—Pa Tirtüm. Kwa kêr ka pika pê As kamã akrajê ho mex nê měmoj to mě kutã anojarêh rãhã ho apa. Kê mě hamakêtkati nê àmnhíx ri pa ho pa. Ja na inhmã hprãm. Anê.

Tirtümja rãhã ho rãhã. Amnepêm kormã měmoj kêt ri nhùm pre ra rãhã ho rãhã. Nê koja nhýrmã měmoj akupým hapêx par tã nhùm Tirtüm aa hapêx kêt kumrêx. Koja arí rãhã ho rãhã. Na hte kaxkwa kamã kot mě

pahto amnhíptàr ã hkrí xà kamã mě papytãr rãhã ho hkrí.

Nê Tirtüm Karõ te kot Tirtüm kot mě pahto amnhíptàr xà hã hkrí xà kapem kanê maati pixi kamã kwrýt pê 7 xãm xwýnhhta pyrãk. Na hte Tirtüm nhíhkõ hã hkrí ho hkrí. Tã kê mě ato mex rãhã ho pa.

⁵Nê Jejusja na pre hte Tirtüm kapêr o mě ahkre mex o pa nê aa hkaga hkêt nê. Tã nhùm prem axtem nê kupí. Hãmri nhùm Tirtüm akupým ho htír. Jejus kumrêx ho htír nhùm htír o htír. Nê kêp pika piitã hkôt pahi piitã nhõ Pahihti. Kãm mě pajapê htýx jakamã na pre mě panê ty nê hkamrõja te mě panê hpikapír pyrãk o amnhí nhípêx. Nê htyk o mě pahte amnhí tomnuj pãnhã amnhíre. Jao te mě pahte amnhí tomnuj pê mě papytãr par pyrãk o mě panhípêx. ⁶Nê na pre mě pahpê patre nê mě piitã mě ho Hipêêxà Tirtüm wýr o papa kaxyw mě paxunhwý. Nê kêp mě panhõ Pahi Maati hã kãm hprãm xà hkôt mě pahte kãm tanhmã amnhí nhípêx to ho papa kaxyw mě paxunhwý. Jakamã kwa kêr pu mě kãm mex o mex nê hihtýx o hihtýx ã mãh harêh rãhã ho papa.

⁷Nê koja tokyx akupým mě pahwýr kakrã kamã wrý pu mě pahpiitã wrýk kãm omu. Nhùm mě kot hpír xwýnhjaja tee ri amnhí wýr omu. Nê pika piitã hkôt ri mě pa xwýnhjaja omu nê mě kot amnhí tomnuj jakamã tee ri amnhí kukamã hamaxpêr o kãm ma htýx kumrêx. Hãmri nê kãm ma xaj mur nê httert o kuhê. Koja nhýrmã Jejus akupým wrý nhùm mě amnhí wýr omu nê ã amnhí nhípêx anê.

⁸Nê Tirtüm na hihtýx o hihtýx nê àhpumunh o àhpumunh. Nê aa kot mēhõ ni rúm kator kêt. Na hte amnhí jarêh o:

—Ixrãhã ixpa xwýnh na pa. Amnepê mã kormã měmoj piitã hkôt ri pa pre ra ixrãhã ri ixpa ho ixpa. Nê koja nhýrmã měmoj akupým hapêx tã pa arí ixrãhãã. Anê.

Juãw kot Jejus akupÿm htÿr ã omunh

⁹ Nê ixpê Jejus kôt mẽ atõ Juãw na pa hte mẽ apyrà nê Jejus kôt amnhĩ nhĩpêx nhũm hte mẽ kãm Jejus kurê xwÿnhjaja mẽ apyrà nê hã inhĩpêx kati ho pa. Mẽ pahte hkôt ri amnhĩ nhĩpêx o papa jakamã na htem hã mẽ pahtomnuj tÿx rãhã ho pa. Tã pu htem ÿ hã mẽ kutã amnhĩ to htÿx nê arĩ hkôt amnhĩ nhĩpêx. Jakamã na pa pre Tirtũm kapêr o mẽ ajahkre rãhã ho ri mẽ akôt ixpa. Nê Jejus kêp mẽ panhõ Pahihti hã mẽ amã harê. Mÿrapê na prem hã ixpynê nê man amnê ixto tẽ nê jar gô hipôk pê Patos kãm inhmẽ pa kamã ixpê prês nê ixpa ho ixpa.

¹⁰ Tã nhũm tãmik pa Tirtũm mã amnhĩ jarênh o nhÿ. Hãmri nhũm Karõ tanhmã ixkrã hto pa te ixpimtir kãm mẽmoj pumunh pyrã nê amnhĩ katut kôt mēhõ kapêr ma. Te kot pifti kakôr tÿx pyrãk pa kuma. ¹¹ Hãmri nhũm inhmã kapêr nê inhmã:

—Pa Juãw? E kot paj amã mẽmoj to amnhĩrit ka omu nê akwÿjê mã hã kagã. Nê hã kagã hpa hãmri nê ah-pÿnhã krĩ hkwy hkôt mẽ kêp ixkwÿ hã axpên wÿr mẽ pikuprõnh xwÿnhjê hwÿr arê. Mẽ kot kamã harênh nê mar nê axkãm hamak rom nê ri pa kaxyw. Epes wÿr nê Emĩnã hwÿr nê Pekamõ hwÿr nê Xijaxir wÿr nê Satre hwÿr nê Pirate hwÿr nê Raxisej wÿr. Krĩ pê 7ja piitã hwÿr ixkapêr ã kagã nê mẽ hwÿr arê kê mẽ apyrà nê mẽmoj jarênhja ma. Anê.

¹² Hãmri pa ixte mēhõja pumunh kaxyw ho ijakêx nê kanê hkwy pumu. Kanê kêp 7 nê piitã ôr o.

¹³ Nê kanê nhĩpôk ri mēhõja te panhĩ pyrã nê pahi hã ê mex kãm xa. êja hpar kôn kôt hitep nhũm xa. Nê pahi hã mẽ hinô hpre xà ho amnhĩ nhĩnô hpre nê xa. Hinô pre xàja ôr pix o. ¹⁴ Nê hkrã hkĩ te kaxat nhĩ jaka pyrã nê hakaajre. Nê no te kuwy hpôk pyrã nê hkarÿr tÿx nê. ¹⁵ Nê hpar te mẽmo kax karÿr tÿx pyrãk. Nê kapêr te gô hprôt tÿx koko pyrãk. ¹⁶ Na pre upôk rũm kanhêti ho 7 nê hamÿ nê o xa. Nê hakwa rũm wapo pôm kato nê akutã wa gixre nê ajêt. Nê hkuk kamã hirã htÿx kumrêx. Te myt kot mẽ pano hã harir nhũm gêk tÿx pyrãk. ã mēhõja kot anhÿr.

¹⁷ Pa tee ri tanhmã kute hã omu nê inhmã ma htÿx kumrêx nê umaj tēm nê hpar pê te ixtyk pyrã nê nõ. Hãmri nhũm ixtã upôk rũm ïhkraja xi nê inhmã kapêr nê inhmã:

—Kwa amã ixpuma hkêt nê. Pa na pa. Amnepê mã kormã mẽmoj kator kêt ri pa pre raa. Nê ixrãhãã. Koja nhÿrmã mẽmoj akupÿm hapêx pa arĩ ixrãhã ixpa ho ixpa.

¹⁸ —Na pa pre ty tã akupÿm ixtÿr. Nê ixtÿr o ixtÿr. Kam ixpumu. Kot paj axte ixtyk kêt nê. Ixpê mẽhtykjê hpãm jakamã papxipix na pa hte mẽ htyk ã arĩgro jarê nhũm mẽ hã ty nê ma mẽhtykjê papxã hwÿr ma pa.

¹⁹ —E kêt ka ate mẽmoj pumunh xwÿnhta pumunh tÿx nê akwÿjê mã hã kagã. Nê mẽmoj kormã kot amnhĩ nhĩpêx kêt nhũm ate omunh mã xwÿnhta ka inhÿ hã mẽ kãm hã kagã. Mẽ kot kamã harênh nê mar tÿx kaxyw.

²⁰ —Nê kot paj axte ixprĩ hã ate mẽmoj pumunh xwÿnhta jarê ka inhma. Nã kanê pê 7ta te mẽ kot krĩ hkwy pê 7 kamã mẽ kêp ixkwÿ hã axpên wÿr mẽ pikuprõnh xwÿnhjê pyrãk. Nê inhĩkra kamã kanhêti pê 7ta te kêp inhmã mẽ kot mẽ hamãr xwÿnhjê pyrãk. Anê.

Epes kamã Jejus kwÿjê hwÿr kagã

2 Nhũm Jejus arĩ inhmã kapêr nê inhmã: —E kêt ka krĩ pê Epes kamã ixkwÿjê jamãr xwÿnh wÿr kagã nê amê. Nê kagãja kamã mẽ kãm ixkapêr jarê nê mẽ kãm:

Pa Epes kamã ixkapêr mar kaxyw axpên wÿr apikuprõnh xwÿnhjaja. Ot pa mẽ awÿr ixpêr mẽ. Ixpê ixupôk o kanhêti ho 7 nê hamÿnh nê ho ixãm xwÿnhta na pa. Nê ixpê ôr o kanê pê 7 nhĩpôk ri ixpa xwÿnhta na pa ã mẽ awÿr ixpêr mēnh anê.

² Na pa hte tanhmã mẽ ate amnhĩ nhĩpêx to ho apa hã mẽ apumunh mex o ixpa. Na ka htem inhmã amnhĩ nhĩpêx mex nê pa ja hã mẽ apumu. Mẽ kot ixtã mẽ anhĩpêx kati htã ka mẽ kutã amnhĩ to htÿx nê ixkaga hkêt nê. Nê mẽ kot amnhĩ tomnuj xwÿnhjê hkôt amnhĩ nhĩpêx o ri apa hkêt nê. Nhũm ixte mẽ awÿr mẽ rēnh ã amnhĩ to hêx xwÿnhjaja mẽ awÿr pan pôj ka mẽ aprĩ hã mẽ kot amnhĩ to hêx ã mẽ omu. Hãmri nê tee ri mẽ kot amnhĩ nhĩpêx ã mẽ omu nê amnhĩ nê mẽ hanor kurê kumrêx. ãm hãmri na ka htem ã mẽ hipêx anê.

³ Nê mẽ kãm ixkurê xwÿnhjaja kot tanhmã ixtã mẽ atomnuj tÿx to htã ka mẽ kutã amnhĩ to htÿx nê aa ixkaga hkêt nê. Nê ixkôt amnhĩ nhĩpêx mex rãhã ho ri apa. ãm hãmri na ka htem ã amnhĩ nhĩpêx anhÿr o ri apa.

⁴ ãm mẽmoj pixi na ixpê omnuj. Amnepê mã kormã mẽ ate ixkôt amnhĩ xunhwÿr nyw ri na ka prem amã axpên kĩnh nê axpên to mex o ri apa. Nê mẽ amã axpên tã ma ho te mẽ amã amnhĩ tã ma pyrãk o axpên nhĩpêx. Tã tanhmã ajamaxpêr to nê axte ã axpên nhĩpêx anhÿr kêt nê. Jao te mẽ amã ixkĩnh kêt pyrãk o amnhĩ nhĩpêx. Pa tee ri ja hã mẽ apumu nhũm ja inhmã mex kêt nê.

⁵ Kwa mẽ tokyx ja hã amnhĩ pumu nê akupÿm mẽ ate ixkôt amnhĩ xunhwÿr nyw ri mẽ ate axpên nhĩpêx-ta o akupÿm axpên nhĩpêx o apa. Kot kaj mẽ anhÿr kêt kot paj te mẽ apê mẽ anhõ kanê hpÿr nê kapôt ã mēnh pyrãk o mẽ anhĩpêx ka mẽ ri apa nê gaa nê apikaprãr pa. Tã mēhõ koja mẽ amÿr pê mẽ anhõ krĩ kamã mẽ kãm ijarênh o pa?

⁶ Nê mẽ kêp Nikoraw nhõ xwÿnhjaja na ka htem mẽ kot tanhmã amnhĩ tomnuj to hã mẽ omu nê ixpyrã nê apê ja hprãm nõkati nê mẽ hkôt ri amnhĩ nhĩpêx kêt nê. Pa ja hã mẽ apumu nê ixkĩnh nê.

⁷ Tã ixte mẽ amã ixkapêr jatur xà na ja. Kot kaj mẽ amã ixkapêr mar prãm hã kot kaj mẽ ã Tirtũm mẽ wa Ixkarõ nhÿ hã ixte mẽ amã ixkapêr anhÿrja ma nê kãm ajamaxpêr tÿx rãhã ho ri apa.

Tirtũm nhõ krĩ kamã mẽmo pĩ hpàr kuhê xwÿnh. Mẽ kot ô hkur nê axte htyk kêt nê pa ho pa mã xwÿnhta. Kot kaj mẽ ate amnhĩ tomnuj nê amnhĩ to htÿx nê arĩ

inhmã hprãm xà hkôt amnhĩ nhĩpêx rãhã ty pa akupÿm mẽ ato mẽ atĩr nẽ ma pĩ hpãrta wÿr mẽ arẽ. Ka mẽ ma hwÿr mra nẽ ô hõ hta nẽ akrẽ nẽ axte atyk kêt kumrêx nẽ apa ho apa.

E ãm ja pix na hapêx. Anẽ.

—E Juãw. Kêr ka Epes kamã ixkwÿjê jamãr o pa xwÿnh-ta wÿr ã ixkapêr ã kagà anẽ nẽ mẽ hwÿr amẽ. Anẽ.

Hãmri pa kuma nẽ ô ri mẽ kãm hã kagà hpa.

Emĩnã kamã Jejus kwÿjê hwÿr kagà

⁸ Hãmri nhũm hpãnhã Emĩnã nhõ xwÿnhjê kaxyw inhmã kapêr nẽ inhmã:

—Nẽ hpãnhã Emĩnã kamã ixkwÿjê jamãr xwÿnh wÿr kagà nẽ mẽ hwÿr amẽ. Nẽ mẽ kãm ixkapêr jarẽ nẽ nẽ mẽ kãm:

Pa Emĩnã kamã ixkapêr mar kaxyw axpên wÿr mẽ apikuprõnh xwÿnhjaja. Ot pa mẽ awÿr ixpêr mẽ. Ixrãhã ho ixrãhã ixpa xwÿnh-ta na pa. Amnepêm kor-mã mẽmoj piitã hkêt ri na pa pre ixrãhã nẽ ri ixpa. Koja nhÿrmã mẽmoj akupÿm hapêx pa arĩ ixrãhã ho ixrãhã nẽ ri ixpa. Na pa pre ty no ãm akupÿm ixtĩr o ixtĩr. Tã pa ã mẽ awÿr ixpêr mẽnh anẽ.

⁹ Nà na pa hte mẽ ate tanhmã amnhĩ nhĩpêx to ho apa hã mẽ apumunh rãhã ho ixpa. Na hte mẽ kãm ixkurê xwÿnhjaja ixtã mẽ atomnuj to ka mẽ apê am-rakati nẽ ri apa. Nom mẽ ate tãm amnhĩ nhĩpêx jakamã te mẽ apê mẽ hikukrêx rũnh kumrêx xwÿnhjê kot amnhĩ nhĩpêx pyrã nẽ ixkukwak ri akĩnh rãhã ri apa. Na hte mẽ kêp Ijaew ã amnhĩ to hêx xwÿnhjaja mẽ ato kapêr punuj rũnh o pa. Mẽ kot Tĩrtũm kôt amnhĩ nhĩpêx ã amnhĩ jarênh tã no ãm hkôt amnhĩ nhĩpêx kêt nẽ. ãm Satanasti kôt pix mã na htem amnhĩ nhĩpêx o pa.

¹⁰ Tã mẽ kãm ixkurê xwÿnhjaja kot ixtã mẽ atomnuj tÿx o pa htã kêr ka mẽ amnhĩ tã mẽ omu nẽ tee ri amnhĩ kukamã ajamaxpêr kêt nẽ. Nẽ arĩ mẽ kutã amnhĩ to htÿx nẽ. Koja Satanasti mẽ akwÿjê pynê nẽ mẽ ajagjê. Hãmri nẽ mẽ ate ixkaga hprãm xàj tanhmã mẽ anhĩpêx kati hto ka mẽ hãgjênh xà kamã amnhĩ xà htÿx kamã ajamak o atã arĩgro pê 10. Nom kêr ka mẽ kutã amnhĩ to htÿx nẽ ixkaga hkêt nẽ. Mẽ kot mẽ apar mã tã ka mẽ kutã amnhĩ to htÿx nẽ. Kot kaj mẽ aa ixkaga hkêt nẽ ixkôt ri amnhĩ nhĩpêx rãhã ty pa akupÿm mẽ ato mẽ atĩr nẽ ma amnhĩ wÿr mẽ ato api. Hãmri ka mẽ Tĩrtũm mẽ wa ixri amex nẽ atĩr tũm nẽ apa ho apa nẽ axte atyk kêt nẽ apa.

¹¹ E ixkrajaja. Kot kaj mẽ amã ixkapêr mar prãm hã kot kaj mẽ ã Tĩrtũm mẽ wa Ixkarõ nhÿ hã ixte mẽ amã ixkapêrja anhÿr ma nẽ kãm ajamaxpêr tÿx rãhã ho ri apa. Kot kaj mẽ ate amnhĩ tomnuj nẽ amnhĩ to htÿx nẽ inhmã hprãm xà hkôt pix mã amnhĩ nhĩpêx rãhã ty. Hã kot paj akupÿm mẽ ato mẽ atĩr ka mẽ ma kuwyta wÿr apa hkêt nẽ.

E. ãm ja pix. Na hapêx. Anẽ.

—E Juãw. Kêr ka Emĩnã kamã ã ixkrajê mã ixkapêr ã kagà anẽ. Anẽ.

Hãmri pa kuma nẽ ô ri mẽ kãm hã kagà.

Pekamõ kamã Jejus kwÿjê hwÿr kagà

Sikũn Korĩt 6.14–7.1

¹² Nhũm Jejus arĩ inhmã kapêr nẽ hpãnhã inhmã:

—E hpãnhã Pekamõ kamã ixkrajê jamãr o pa xwÿnh-ta wÿr kagà nẽ mẽ hwÿr amẽ. Nẽ mẽ kãm ixkapêr jarẽ nẽ mẽ kãm:

Pa Pekamõ kamã ixkapêr mar kaxyw axpên wÿr mẽ apikuprõnh xwÿnhjaja. Ot pa mẽ awÿr ixpêr mẽ. Ixpê ijakwa rũm pôm wapo akutã wa gix nẽ kator nẽ ãm xwÿnh-ta na pa mẽ awÿr ixpêr mẽ.

¹³ Na pa hte mẽ anhõ krĩ nhõ xwÿnhjaja kot tanhmã amnhĩ tomnuj to ho pa hã mẽ omunh mex nẽ. Mẽ kot Satanasti kôt pix mã ri amnhĩ nhĩpêx o pa jakamã mẽ anhõ krĩ te kêp Satanasti nhõ krĩ pyrãk. Æxipas kot mẽ hkôt mẽ kãm ixkapêr o mẽ ahkre ho pa nẽ aa hkaga hkêt tã nhũm prem axtem nẽ ixtã kupĩ. Ka mẽ ja hã mẽ omunh tã mẽ umaj ixkaga hkêt nẽ arĩ ixkôt amnhĩ nhĩpêx rãhã ho ri apa. Æm hãmri na ka htem ã amnhĩ nhĩpêx anẽ.

¹⁴ Mẽmoj pixi na ixpê omnuj. Na hte mẽ akwÿjaja ax-tem nẽ Paraãw kapêr kôt amnhĩ nhĩpêx o pa. Na pre Paraãwja Parak mã tanhmã kapêr to nhũm kuma nẽ amnhĩ xõ ri tanhmã mẽ anhĩgêt mã kapêr to ho pa. Nom ixkapêr kôt kêt ixkapêr kuhpa hã tanhmã mẽ kãm kapêr to nẽ mẽ kãm: “Mẽ mãmrĩ ma sãnti hã mẽ hkĩnh mã xwÿnhjê hkôt mra nẽ sãnti hã apku nẽ hã akĩnh. Nẽ mẽ urak nẽ axpên pê axpên prõ ho amn-hĩkati nẽ axpên pê ri axpên mjên o amnhĩkati nẽ mẽ ã ri amnhĩ nhĩpêx anhÿr o ri apa. Ja mex kênã.” Anhÿr o mẽ anhĩgêt mã kapêr o pa nhũm mẽ kuma nẽ mẽ hkôt amnhĩ nhĩpêx. Tã ka mẽ akwÿjaja mẽ urak nẽ ã amnhĩ nhĩpêx anhÿr o pa. Kwa ja mex kêt.

¹⁵ Na hte mẽ akwÿjaja Nikorawjê kapêr kôt ixkapêr kuhpa hã tanhmã amnhĩ nhĩpêx to ho pa. Ja mããnên mex kêt. ¹⁶ Tã ra mẽ akwÿjaja ã amnhĩ tomnuj anhÿr o pa ka mẽ ja hã mẽ omu nẽ ãm mẽ omu nẽ nẽ tanhmã mẽ kãm akapêr to hkêt nẽ. Kwa mẽ ate ã amnhĩ nhĩpêx anhÿr xwÿnhjaja. Kêr ka mẽ tokyx ja kaga nẽ akupÿm ixkôt ri amnhĩ nhĩpêx mex nẽ. Kot kaj mẽ an-hÿr kêt kot paj tokyx mẽ awÿr wrÿ nẽ te ijakwa rũm pôm wapo kator xwÿnh-ta o mẽ hkanhwÿr pyrãk o mẽ anhĩpêx. Nom ixkapêr xih-tÿx pix o tanhmã mẽ anhĩpêx to.

¹⁷ E kot kaj mẽ amã ixkapêr mar prãm hã kot kaj mẽ ã Tĩrtũm mẽ wa Ixkarõ nhÿ hã ixte mẽ amã ixkapêr an-hÿrja ma nẽ kãm ajamaxpêr tÿx rãhã ho ri apa.

Nẽ kot kaj mẽ ate amnhĩ tomnuj nẽ amnhĩ to htÿx nẽ inhmã hprãm xà hkôt amnhĩ nhĩpêx rãhã ty. Hã kot paj akupÿm mẽ ato mẽ atĩr hãmri nẽ ra pam mẽ amã mẽ anhõ ka mẽ hkur o apa. Te amnepêm Ijaew kapôt ã pa nhũm ixte mẽ hwÿr “manã” anhÿr xwÿnh-ta rênh nhũm mẽ kot hkur o pata pyrãk. Nom ixte mẽ amã mẽ anhõja na hpimxur. Æm papxipix na pa hte mẽ kãm õr o ixpa.

Nẽ kot paj mẽ atã mẽ anhĩxi nyw rẽ. Jao kên jakare hkwÿ hã ahpÿnhã mẽ anhĩxi nyw jaxwÿ nẽ mẽ amã

kugō. Ka mẽ hamỳ nē kapxipix amnhĩ nhĩxi nyw pumunh o apa.

E ãm ja pix. Na hapêx. Anē.

—E Juãw. Kêr ka Pekamō kamã ixkrajê hwỳr ã ixkapêr anhỳr ã kagà nē mẽ hwỳr amē. Anē.

Hãmri pa kuma nē ô ri mẽ kãm hã kagà.

Xijaxir kamã Jejus kwỳjê hwỳr kagà

Jutre 3-23

¹⁸ Nhũm Jejus arĩ inhmã kapêr nē inhmã:

—E hpãnhã Xijaxir kamã ixkwỳjê jamãr xwỳnh wỳr kagà nē amē nē mẽ kãm ixkapêr jarē nē mẽ kãm:

Pa Xijaxir kamã ixkapêr mar kaxyw mẽ apikuprõnh xwỳnhjaja. E ot pa mẽ awỳr ixpêr mẽ. Ixpê Tirtũm Kra na pa. Ixpê inhno te kot kuwy hpõk karỳr tỳx pyrãk xwỳnhhta na pa. Nē ixpê ixpar te kot kãx karỳr tỳx pyrãk xwỳnhhta na pa mẽ awỳr ixpêr mẽ.

¹⁹ Na pa hte mẽ ate amnhĩ nhĩpêx kõt mẽ apumunh mex o ri ixpa. Na ka htem amnhĩ kaxyw inhmã ajamaxpêr pē inhmã amnhĩ to mex o ri apa. Mẽ akwỳ kot ixtã tanhmã mẽ anhĩpêx to htã ka mẽ umaj aa ixkaga hkêt nē. Nē arĩ amã ixkĩnh tỳx kãm tanhmã amnhĩ nhĩpêx to ho ri apa. Nē xpên to mex nē ixkõt pix mã amnhĩ nhĩpêx o ri apa. Jao ra ixkõt amnhĩ nhĩpêx mex o wam mẽ ate ixkõt amnhĩ nhĩpêxta jakre. Nà ja inhmã mex kumrêx.

²⁰ ãm mẽmoj pixi na ixpê omnuj. Mẽ akõt niti ri pa xwỳnh Jejapewtita. Kêp Tirtũm nhỹ hã kapêr jarēnh o pa xwỳnh ã amnhĩ to hêx xwỳnhhtita. Na hte ixkapêr kupa hã tanhmã mẽ ajahkre hto ka htem ama nē nē tanhmã kãm nē hkêt nē. Na hte mẽ amã: “Xê mẽ mãmri ri mẽ hkuprỳjê hwỳr mra nē mẽ ho amnhĩkati. Nē xpên pē mẽ aprõ nē mẽ amjên o amnhĩkati. Nē mẽ kot sãnti hã mẽ hkĩnh nē hã apkur xwỳnhjê hkõt mra nē mẽ hkõt amnhĩ nhĩpêx. Tirtũm kãm ja mex kênã.” Anhỳr o mẽ amã kapêr o pa. Nē inhmã ja mex ã ijarē nom inhmã ja mex kêt. Tã ra mẽ akwỳjaja kapêr ma nē hkõt amnhĩ nhĩpêx ka mẽ ja hã mẽ omunh tã amnhĩ nē nitita janor kêt nē nhũm arĩ ri mẽ amã hêx o ri mẽ akõt pa. ²¹ Ra kot ã amnhĩ nhĩpêx anhỳr o mẽ akõt pa ry rax kumrêx tã pa kormã ja hã tanhmã ho hkêt nē kormã amnhĩ tã hamã. Kot ã amnhĩ nhĩpêx anhỳr kaga kaxyw na pa kormã hamãr o ri ixpa. No nhũm aa hkaga hkêt nē.

²² Mỳrapê kot paj tokyx tanhmã ho nhũm amnhĩ xà htỳx kamã hamak o hikwỳ. Tã mẽ kot kapêr mar nē hkõt amnhĩ nhĩpêx xwỳnhjaja kot amnhĩ tomnuj ã amnhĩ pumu nē hkaga hkêt hã kot paj mã mẽ ho anē nē. Mããnhēn tanhmã mẽ homnuj to nhũm mẽ nitita pyrã nē amnhĩ xà htỳx kamã hamak o hikwỳ.

²³ Nē nitita kot paj kêp hkrajê nhĩmex pa. Ka mẽ apê ixkrajaja ja hã ixpumu nē ixte mẽ apiitã ahpỳnhã tanhmã mẽ ajamaxpêr to hkõt mẽ apumunh ã ixpumu. Nē ixte ahpỳnhã mẽ apiitã tanhmã mẽ ate amnhĩ nhĩpêx to ho apa hã mẽ apumunh xà hkõt tanhmã mẽ anhĩpêx to hã ixpumu.

²⁴ Na hte mẽ akwỳjaja akwỳjê rom nita kapêr ma nē ãm kuma nē hkõt amnhĩ nhĩpêx kêt nē. Nē mẽ kapêrja

mẽ kot kãm: “Satanasti kapêr pimxur” anhỳr xwỳnhhta kõt nhũm mẽ amnhĩ nhĩpêx kêt nē. Na htem ixkõt pix mã amnhĩ nhĩpêx mex o ri pa. Tã ã mẽ ate ixkõt amnhĩ nhĩpêx anhỳr o apa xwỳnhjaja kot paj mẽ amã ja pix ã karõ ka mẽ inhma. ²⁵ Kêr ka mẽ arĩ ixkõt pix mã amnhĩ nhĩpêx o ri apa rãhã pa akupỳn mẽ awỳr wrỳ. ãm ja pix ã kot paj mẽ amã karõ.

²⁶ Nē kot kaj mẽ ate amnhĩ tomnuj nē amnhĩ to htỳx nē arĩ inhmã hprãm xà hkõt amnhĩ nhĩpêx rãhã ty. Hãmri pa ja hã mẽ apumu nē nhỹrmã mẽ ate krĩ hkwỳ hkõt mẽ pa xwỳnhjê ho amnhĩptãr o apa kaxyw mẽ ax-unhwỳ. Ka mẽ apê mẽ ô pahihti nē inhmã mẽ ho amnhĩptãr o ri apa.

²⁷ Na pre Inhĩpêxã ixte pika piitã hkõt ri mẽ pa xwỳnhjê ho amnhĩptãr kaxyw ixãm.

Tã kot paj nhỹrmã amnhĩ pyrã nē mẽ kaxyw mẽ ax-unhwỳ ka mẽ inhmã mẽ hamãr o apa.

Nhũm mẽhõ ixkapêr kwỳm ri tanhmã amnhĩ nhĩpêx to ka mẽ ja omu nē hã tanhmã ho. Te mẽ kot poti punuj mỳnh nē mẽnh nē hkrakrak pyrãk.

²⁸ Kot paj ã mẽ ate mẽ hipêx anhỳr o apa kaxyw mẽ axunhwỳ. No ãm ja pix kêt. Kot paj te ixte mẽ amã kanhêti hõ nhõr pyrãk o mẽ anhĩpêx. Arĩgro hkõt kanhêti no hpõk rax japõx xwỳnhhta kot paj te ixte mẽ amã õr pyrãk ka mẽ ixri atĩr tũm nē apa ho apa.

²⁹ E ixkrajaja. Kot kaj mẽ amã ixkapêr mar prãm hã kot kaj mẽ ã Tirtũm mẽ wa Ixkarõ nhỹ hã ixte mẽ amã ixkapêr anhỳrja ma nē kãm ajamaxpêr tỳx rãhã ho ri apa. Anē.

—E Juãw. Kêr ka ã Xijaxir kamã ixkrajê kaxyw ixkapêr ã kagà nē mẽ hwỳr mẽnh anē. Anē.

Hãmri pa kuma nē ô ri mẽ kãm hipêx nē mẽ hwỳr kumê.

Satre kamã Jejus kwỳjê hwỳr kagà

Rukre 12.35-40

3 Nhũm Jejus arĩ inhmã kapêr nē inhmã:

—E hpãnhã Satre kamã ixkwỳjê jamãr xwỳnh wỳr kagà nē mẽ kãm ixkapêr jarē nē mẽ kãm:

Pa Satre kamã ixkrajaja. E ot pa mẽ awỳr ixpêr mẽ. Ixpê inhĩhkra ho kanhêti pē 7 jamỳnh nē xãm xwỳnhhta na pa. Nē ixpê inhĩhkra ho Tirtũm Karõ ãm pyxi htã te kamã kêp 7 jamỳnh nē ho ixãm xwỳnhhta na pa mẽ amã ixkapêr.

Na pa hte mẽ ate tanhmã ri amnhĩ nhĩpêx to hã mẽ apumunh rãhã ho ixpa. Mẽ piitã kot xpên mã mẽ ate ixkõt amnhĩ nhĩpêx ã mẽ ajarēnh tã ã mẽ ate amnhĩ nhĩpêx anhỳr kêt. Na ka htem ixkuhpa hã pix mã amnhĩ nhĩpêx o apa. Jakamã te inhmã ra mẽ atyk nē mẽ anhĩkwỳ pyrãk.

² Na ka htem ãm akrãnh mã ixkõt ri amnhĩ nhĩpêx nom Tirtũm mẽ wa ixkõt amnhĩ nhĩpêx mex kêt nē. Ra Tirtũm mẽ wa ixte ja hã mẽ apumunh mex. Mẽ ate kormã wa inhnoo mã tãm ri amnhĩ nhĩpêx kêt jakamã kwa mẽ tokyx ja hã amnhĩ pumu nē ate amnhĩ tomnuj mã anhũre nē wa ixkõt amnhĩ xunhwỳr tỳx nē.

³ Kêr ka mẽ amnepê mã kormã mẽ ate ixkõt amnhĩ nhĩpêx nyw ri mẽ kot ixkapêr o tanhmã mẽ ajahkre

htoja mã ajamxpër në amnhĩ tomnuj mã anhũre. Nê ixkapër kôt pix mã mãn amnhĩ nhĩpêx o ri apa. Kot kaj mẽ anhỹr kêt kot paj nhỹrmã mẽ ajaêr pê akupỹn mẽ awỹr wrỹ nê ja hã tanhmã mẽ ato.

⁴ ãm mẽ agrêre nê amã ixkôt amnhĩ nhĩpêx prãm. Jao tãm ri amnhĩ nhĩpêx nê mẽ kot amnhĩ tomnuj xwỹnhjê hkôt amnhĩ nhĩpêx kêt nê. Te mẽ axê jakare kamã apa nê tanhmã amnhĩ pê htyk to hkêt pyrãk. Tã kot kaj mẽ nhỹrmã ixri mẽ axê jakare kamã apa ho apa. Ra mẽ ate ja ho anhỹr mã tãm kênã. Ja na Tĩrtũm kãm hprãm.

⁵ Nê krĩ piitã hkôt mẽ ate amnhĩ tomnuj nê amnhĩ to htyx nê inhmã hprãm xà hkôt amnhĩ nhĩpêx rãhã atyk xwỹnh piitã kot ka mẽ nhỹrmã Tĩrtũm mẽ wa ixri amex mẽ atĩr tũm nê apa ho apa. Ra mẽ hixija Mẽpahpãm Maati nhõ kagàja kamã na. Kamã mẽ atĩr o mẽ atĩr mã xwỹnhjê nhĩxi piitã hã kagà. Kot paj kagàta kamã aa mẽ anhĩxi grãnh kêt nê. Hãmri nê Inhĩpêêxã mẽ kapër o mẽ wrỹk xwỹnhjê mã mẽ ajarênh o: “E mẽ jajê pumu. Ixkwỹ na mẽ.” Anhỹr o mẽ kãm mẽ ajarê.

⁶ E ixkwỹjaja. Kot kaj mẽ amã ixkapër mar prãm hã kot kaj mẽ ã Tĩrtũm mẽ wa Ixkarõ nhỹ hã ixte mẽ amã ixkapër anhỹrja ma nê kãm ajamxpër tỹx rãhã ho ri apa.

Tã ãm ja pix. Na hapêx. Anê.
—E Juãw. Kêr ka ã Satrejê mã ixkapër ã kagà nê mẽ hwỹr mẽnh anê. Anê.

Hãmri pa kuma nê ô ri mẽ kãm hã kagà.

Pirate kamã Jejus kwỹjê hwỹr kagà

Wam Tesarõn 2.13-16

⁷ Nhũm Jejus arĩ inhmã kapër nê inhmã:

—E hpãnhã Pirate kamã ixkwỹjê jamãr xwỹnh hwỹr kagà nhĩpêx nê amê nê mẽ kãm ixkapër jarê nê mẽ kãm kãm:

Pa Pirate kamã mẽ ate ixkapër mar kaxyw mẽ apikuprõnh xwỹnhjaja. E ot pa mẽ awỹr ixpër mẽ. Inhmex o inhmex xwỹnh na pa. Aa ixêx kêt nê ixpa xwỹnh. Amnepê mã na pre mẽhõja pahi Tawi mã òrk-wỹ mex ã saf jamãr o pa. Tã pa hte urãk nê Inhĩpêêxã Tĩrtũm nhõ krĩ hwỹr mẽ gjêx xà hã saf jamỹ nê ho ixpa. ãm papxipix inhõ saf jakamã papxipix na pa hte mẽ ate ixkôt amnhĩ xunhwỹr xwỹnhjaja mẽ agjêx kaxyw mẽ amã kahê xà rê nê ixkra hkêt xwỹnhjê pê kahê. Kot paj mẽ apê ixkrajê mã kahê xà rê ka mẽ hwỹr agjê. Hãmri pa mẽ atã kahê nhũm ixkra hkêt xwỹnhjaja tee ri kãm mẽ akôt gjêx prãm kaprỹ.

⁸ Na pa hte tanhmã mẽ ate amnhĩ nhĩpêx to ho apa hã mẽ apumunh mex o ri ixpa. Mẽ agrêre htã na ka htem ixkapër kôt amnhĩ nhĩpêx mex nê aa ixkaga hkêt nê. Jakamã kot paj te ixte mẽ amã Tĩrtũm nhõ hak-wakre kahê xà mẽnh pyrãk o mẽ anhĩpêx ka mẽ axãmnhĩx ajamakêtkati nê ma mẽ kãm Tĩrtũm kapër o mẽ ahkre ho ri mẽ hkôt apa. Nhũm mẽ hkwỹjaja tee ri ã mẽ ate amnhĩ nhĩpêx anhỹrja nê mẽ amã kapër kaprỹ ka mẽ arĩ ho mẽ ahkre ho ri mẽ hkôt apa.

⁹ Nê mẽ anhõ krĩ kamã mẽ akwỹjaja na prem ra Satanasti hkôt amnhĩ xunhwỹr nê hêx rom mẽ amã amnhĩ

to hêx nê mẽ amã: “E mẽ ixpê Ijaew mex jakamã kwa mẽ ixkapër ma nê mẽ ixkôt amnhĩ nhĩpêx.” Anhỹr o mẽ amã karõ htã no ãm mẽ kot Satanasti hkôt amnhĩ nhĩpêx xwỹnh na mẽ. Tã kot paj nhỹrmã tanhmã mẽ homnuj to nhũm mẽ tee ri amnhĩ pumu nê akupỹm mẽ awỹr mra nê mẽ akutã hkõnkrã ho rôrõk nê hkrĩ nê mẽ amã: “Nã mẽ kajaja na ka pêr mẽ ixrom Jejus kôt amnhĩ nhĩpêx. Mã kãm mẽ ajapêê.” Anê.

¹⁰ Mẽ kot ixtã mẽ atomnuj tỹx nhũm mẽ ate amnhĩ xà htyx kamã ajamak tã aa mẽ umaj ixkaga hkêt nê. Nê arĩ ixte mẽ amã mẽmoj tã karõ xà hkôt mẽ kutã amnhĩ to htyx rãhã arĩ ixkôt ri amnhĩ nhĩpêx o apa. Jakamã mẽ kot nhỹrmã mẽ kãm ixkurê xwỹnhjaja pika piitã hkôt tanhmã mẽ homnuj tỹx to nhũm mẽ amnhĩ xà htyx kamã ama. Tã kot paj mẽ anê mẽ omunh mex nê nhũm mẽ tanhmã mẽ ato hkêt nê ka mẽ amex nê ri apa ho apa.

¹¹ E kot paj tokyx akupỹn mẽ awỹr wrỹ nê mẽ ate ixkôt pix mã amnhĩ nhĩpêx ã mẽ ato mex rax kumrêx. Jakamã kwa mẽ mãmrĩ ã amnhĩ nhĩpêx anhỹr o inhmã hprãm xà hkôt pix mã amnhĩ nhĩpêx rãhã ty. Kot ka mẽ anhỹr kêt kot pa mẽ amã mẽmoj mex nhõr kêt nê.

¹² Nê kot kaj mẽ kot amnhĩ tomnuj xwỹnhjê kutã amnhĩ to htyx nê inhmã hprãm xà hkôt pix mã amnhĩ nhĩpêx rãhã ty. Hã kot paj amnhĩ kôt mẽ ato mẽ axi-htyx nê ka mẽ aa ixkaga hkêt nê. Nê kot paj nhỹhỹnh mẽ atã mẽ inhĩxi ho axkrunêpxi nê haxwỹ. Inhĩpêêxã nhĩxi nê inhĩxi nyw nê Inhĩpêêxã nhõ krĩ nhĩxija kot paj nhỹhỹnh mẽ atã haxwỹ. Tĩrtũm nhõ krĩ mẽ kot kãm: “Jerujarê nyw” anhỹr xwỹnhhta koja nhỹrmã tanhmã amnhĩ to nê ra kaxkwa rũm pika wỹr wrỹ.

¹³ E ixkwỹjaja. Kot kaj mẽ amã ixkapër mar prãm hã kot kaj mẽ ã Tĩrtũm mẽ wa Ixkarõ nhỹ hã ixte mẽ amã ixkapër anhỹrja ma nê kãm ajamxpër tỹx rãhã ho ri apa.

Tã ãm ja pix. Na ra hapêx. Anê.
—E Juãw. Kêr ka ã Pirate kamã ixkrajê mã ixkapër ã kagà anê. Anê.

Hãmri pa kuma nê ô ri mẽ kãm hã kagà.

Raxisej kamã Jejus kwỹjê hwỹr kagà

¹⁴ Nhũm pre Jejus arĩ inhmã kapër nê inhmã:

—E hpãnhã krĩ pê Raxisej kamã ixkrajê jamãr xwỹnh wỹr kagà nhĩpêx nê amê. Nê mẽ kãm ixkapër jarênh o:

Pa Raxisej kamã ixkrajaja. Ot pa mẽ awỹr ixpër mẽ. ãm hãmri ixkapër o ixpa nê aa ixêx kêt xwỹnhhta na pa. Jakamã ãm hãmri na pa hte Tĩrtũm kapër o mẽ ajahkre o ixpa nê aa ja kaga hkêt nê. Pa na ixpê mẽmoj piitã hpãr krax.

¹⁵ Na pa hte mẽ ate tanhmã amnhĩ nhĩpêx to ho apa hã mẽ apumunh rãhã ho ixpa. Kop apu mẽ ate ixkôt amnhĩ nhĩpêx mex ronhỹx pa ja hã mẽ apumu nê ixkĩnh nê. Nom mẽ ate ã amnhĩ nhĩpêx anhỹr kêt. No mããnên aa ixkaga hkêt nê. Na ka htem ri atỹx amnhĩ krã hkôt pix mã tanhmã amnhĩ nhĩpêx to ho apa nhũm ja ixpê omnuj nê. Kot kaj mẽ arĩ ã amnhĩ nhĩpêx anhỹr o apa pa hpãnhã amnhĩ nê mẽ akurê. Te mẽ kot gô

xenh nõkati janhir në tee hkakinھ në akupým hkapír pyràk.

¹⁷ Mě ate inhmã hprãm xà hkõt amnhĩ nhĩpêx ã amnhĩ jarênh tã ã amnhĩ nhĩpêx anhÿr kêt në. Nê ixkapêr mar tÿx në amnhĩ kaxyw inhmã ajamaxpêr mex kêt në.

¹⁸ Kwa mẽ tokyx ja hã amnhĩ pumu në akupým ixkõt amnhĩ xunhwÿr tÿx në. Kêr pa ja hã mẽ apumu në amnhĩ katut kõt mẽ ate amnhĩ tomnuj rê në tanhmã mẽ akrã hto ka mẽ inhnoo mã tãm amnhĩ nhĩpêx mex o ri apa. Hãmri pa mẽ amã tanhmã amnhĩ to amnhĩrît to ka mẽ aprĩ hã ixte amnhĩ nhĩpêx ã ixpumunh mex në ixkõt amnhĩ nhĩpêx mex rãhã o ri apa.

¹⁹ Xà inhmã mẽ ajapê hkêt ã na pa ã mẽ amã ixkapêr anê? Nà inhmã mẽ apiitã mẽ ajapê htÿx kênã. Nom inhmã mẽ ajapê htã ka htem ixkõt amnhĩ nhĩpêx kêt në. Na pa tee ri amnhĩ tã mẽ apumu në ja hã tanhmã mẽ atomnuj tÿx to. Tokyx mẽ ate amnhĩ tomnuj mã anhÿrer në hpãnhã tãm amnhĩ nhĩpêx kaxyw. Jakamã kwa mẽ tokyx ate amnhĩ tomnuj kaga në akupým amnhĩ kaxyw inhmã ajamaxpêr ho ri apa.

²⁰ Na htem hkwyjê nhõrkwy hwÿr gjêx kaxyw hakwa krem kãm àkjêr o kuhê nhũm mẽ kuma në mẽ kãm anê nhũm mẽ hwÿr agjê. Nê mẽ ixkre hkre kamã axpên mã kapêr o hkrĩ rÿ axpên mã kapêr pê mẽmoj to hkõm o hkrĩ. Ja pyrà në ot pa mẽ ajamãr o ixpa. Mě ate inhmã anhÿr nhũm ixte mẽ akõt ixpa ho ixpa nhũm mẽ pahte axpên to mex o papa kaxyw.

²¹ Kormã mẽ kot ixpír kêt ri na pa pre mẽ kot amnhĩ tomnuj xwÿnhjê kutã amnhĩ to htÿx o ixpa. Amnhĩ to htÿx në ri ixpa kamã ixtyk jakamã nhũm Inhĩpêxã akupým ixto ixtyr në akupým amnhĩ wÿr ixto api. Hãmri në amnhĩ nhĩhkõ hã mẽ ho amnhĩptàr ã hkrĩ xà kamã inhÿr pa ixkrĩ ho ixkrĩ në ïhkõ hã mẽ piitã mẽ ho amnhĩptàr o ixkrĩ. Tã kot kaj mẽ atõ ixpyrà në ate amnhĩ tomnuj nê amnhĩ to htÿx në. Nê inhmã hprãm xà hkõt pix mã amnhĩ nhĩpêx rãhã ty. Hã kot paj amnhĩ pyrà në wa ixte mẽ ato amnhĩptàr ã ixkrĩ xàja kamã amnhĩ nhĩhkõ hã mẽ akrĩ ka mẽ wa inhĩhkõ hã wa inhmã mẽ ho amnhĩptàr o akrĩ.

²² E ixkwÿjaja. Kot kaj mẽ amã ixkapêr mar prãm hã kot kaj mẽ ã Tirtũm mẽ wa Ixkarõ nhÿ hã ixte mẽ amã ixkapêr anhÿrja ma në kãm ajamaxpêr tÿx rãhã ho ri apa.

Tã ãm ja pix. Na hapêx. Anê.
—E Juãw. Kêr ka Raxisej kamã ixkrajê mã ixkapêr ã kagà në mẽ hwÿr amê. Nê kagàja piitã krĩ hkwy kamã ahpÿnhã ixkwÿjê hwÿr arê kê mẽ kamã harê në ixkapêr ma. Anê.

Nhũm pre ã Jesus inhmã kapêr anê. Pa kuma në ô ri mẽ piitã mẽ kãm hã kagà hpa.

Tirtũm kot mẽ ho amnhĩptàr ã hkrĩ xà jarênh

4 Tã pa axte mẽmoj pumu nhũm kaxkwa hwÿr mẽ gjêx xà hã hakwakreja amnhĩ kahê xà mẽ pa omu. Hãmri nhũm axte mēhõ kapêr tÿx xwÿnhta. Te kot pifti kakõr tÿx pyràk xwÿnhta axte inhmã kapêr në inhmã:

—E amnê ixwÿr api pa mẽmoj nhÿrmã kot tanhmã amnhĩ nhĩpêx to hkukamã amã ho amnhĩrît ka omu. Anê.

² Hãmri nhũm Tirtũm Karõ tanhmã ixto në ixto api pa kaxkwa kamã mẽmoj pumunh o xa. Tirtũm kot mẽ ho amnhĩptàr ã hkrĩ xà maatita pa pre omu. Nhũm kamã mēhõja nhÿ. ³ Kuk kamã hirã htÿx kumrêx. Te mẽmo kên kamrêk karÿr jaxênh tÿx pyràk. Nê kot mẽ ho amnhĩptàr ã hkrĩ xà puhã mãxwÿxti grãgrãreja kãm hipõk në harir pa omunh o xa.

⁴ Nhũm hkrĩ xà maati puhã mẽ ho amnhĩptàr o hkrĩ xà kêt 24. Kamã mẽ àptàr tũmjaja hkrĩ. Mě piitã ôr o mẽ ahkã htu në ê jakare në hkrĩ.

⁵ Nê Tirtũm hkrĩ xà maati rũm na katõtõk në hkrakrak në haxênh japà në hikwÿ. Nê hkrĩ xà kapem kanê maati pixi kamã kwÿr pê 7ja põk rãhã ho kuhê. Kanêja te Tirtũm Karõ pyràk.

⁶ Nê hkrĩ xà kapem mẽmo te gõ rax pyràkja hkarÿr jaxênh tÿx kumrêx në nõ. Te ho kax karÿr jaxênh tÿx pyrà në hkarÿyÿre. Nê hkrĩ xà puhã mẽmoj tÿr në kuhê pê kwat kuhê. Nê õkwa në katut piitã hkõt no. ãm no xohtõ rax kumrêx. Na pre ã mẽmoj kêt kwatja no xohtõ anê pa omu.

⁷ Wamta te kot mry pê rêãwti pyràk. Nê hkõt ja te kot mõx myti pyràk. Nê hapu hã hkuk te panhĩ hkuk pyràk. No hapu hã ja te kot àanhãhti htor kaxyw hara koror pyràk.

⁸ Nê piitã hara kêt 6. Nê ï piitã kamã no. Nhũm prem Tirtũm mã mex o mex ã grer rãhã ho kuhê në aa pinhkrênh kêt në. Nê kãm grer o:

Amex o amex Tirtũm.

Nê axihtÿx o axihtÿx.

Nê aa ate amnhĩ tomnuj kêt kumrêx.

Amnepê mã kormã mẽmoj kêt ri ka ra arãhã ri apa. Tã arĩ arãhã ri apa xwÿnh na ka. Kot kaj aa ajapêx kêt në.

ãm hãmri na ka hte mẽ ixto mex rãhã ho apa.

Nê amex o amex Tirtũm. Anê.

⁹ Nhũm prem xatã mẽ ho amnhĩptàr hkrĩ xà kamã hkrĩ xwÿnhja mẽ kot kãm “Rãhã pa xwÿnh” anhÿr xwÿnhta mã ã grer anhÿr o kuhê. Kãm mex o mex ã grer pê tanhmã kot mẽ ho mex to hã harê. Hãmri nhũm mẽ àptàr tũm pê 24jaja mããnen kutã hkõn krã ho rôrõk në hipõ hpa në hkrĩ. Nê amnhĩ krã rũm ôr o mẽ ahkãja kwÿr në hpar pê haxwÿ. Kêt mẽ õ Pahi Maati hã hã hpiaaam kaxyw wamtajê pyrà në mex o mex ã harênh o hkrĩ në kãm:

¹¹ ãm hãmri na pa htem amex o amex ã ajarê Tirtũm Apê mẽ inhõ Pahi Maati na ka.

Nê apê mẽ inhõ Tirtũm na ka.

Na ka pre mẽmoj piitã ho akato. Axãhpumunh tÿx në ajamaxpêr tÿx o mẽmoj piitã amã hprãm xà hkõt ho akator pa.

Jakamã na pa htem ã amex o amex ã ajarênh anê. Mě ixrom axihtÿx mex kumrêx na ka hte apa Tirtũm. Anê.

Mě pahte amnhī tomnuj pānhā amnhīrer xwýnh jarēnh

Juāw 1.29; Piripos 2.5-11

5 Tā pa pre arī te kaxkwa kamā mẽmoj pumu. Mě ho amnhīptār ā hkrī xà maatita kamā hkrī xwýnh nhīhkra kamā kagà pa omunh o xa. Upôk rūm omu. No ām axtem kagà kaxkep na pre. Nē akutā hā kagà nē menh ē ho ho htýx xàja kēp 7.

² Hāmri nhūm Tirtūm kapēr o wrýk xwýnh xihtýx xwýnhja kapēr týx kām kapēr o:

—E mẽ atō na ate kagà mūj pyr nē ho htýx xà hpôt mā tām? Anē.

³ Hāmri nē tee ri mẽ piitā mẽ hkapi nom nhūm ja kaxyw mẽhō amrakati kumrēx. Kaxkwa kamā amrakati nē pika kamā mǎānēn amrakati nē pika hkrak ri amrakati. Nhýri mẽhō kot kagà kaxkepta pyr nē hpôt nē omunh mā tām xwýnhja amrakati ho amrakati.

⁴ Nhūm tee ri mẽhō japēr nom mẽhō pumunh kēt nē. Pa tee ri ja hā omu nē ixkaprī htýx nē inhmýr o xa.

⁵ Hāmri nhūm pahi hōja ixpumu nē inhmā:

—Kwa amýr kēt nē. E mẽhō mūj pumu. Juta kanrēhā htāmnhwý xihtýx xwýnhja. Pahi Tawi kanrēhā htāmnhwý te kēp mry pē rēāw xihtýx pyrāk o hihtýx xwýnh mūj pumu. Kot mẽ kām hkurē xwýnhjē kutā amnhī to htýx nē mẽmoj punuj piitā ho hapēx kaxyw mā xwýnh jakamā tapxipix na kot kagàta hpyr nē ho htýx xà hpôt par mā tām. E ka omu. Anē.

⁶ Hāmri pa kuma nē hwýr rīt nē Jejusja pumu. Kot mẽ pahte amnhī tomnuj pānhā amnhīrer xwýnhja mẽ ho amnhīptār o hkrī xà maati kapem xa. Měmoj htír pē kwat mẽ àptār tūm pē 24jē nhīpōk ri xa. Mě kām hkurē xwýnhjaja kot hpír nhūm ra akupým htír nē xa. Nom ra axtem nē xa. àhpumunh týxja te kot pahi xàhpumunh pyrāk. Nē hpār kēp 7. Nē no mǎānēn kēp 7. Noja te Tirtūm Karō pyr nē kēp pika piitā hkôt pa xwýnh. Ā Jejusja axtem nē ām anē pa omu.

⁷ Hāmri nhūm mẽ pahto amnhīptār o hkrī xwýnhja wýr tē nē ĩhkra kamā kēp kagà kaxkepta py.

⁸ Hāmri nhūm mẽ htír pē kwat mẽ mẽ àptār tūmjaja hpar pē hkōn krā ho rôrōk nē hkrī hpa nē hipō nē hkrī. Piitā wiorāwti jamý nē ôr o xijere kamā mẽhkuxwa xà jamý nē o hkrī. Nhūm Tirtūm krajaja Tirtūm mā tanhmā amnhī jarēnh to nhūm mẽ mar o hkrī. Te xijere kamā mẽhkuxwa xà hpār o hkrī pyrā nē mẽ kuma.

⁹ Jakamā nhūm mẽ hkōn krā ho hkrī xwýnhjaja mẽ pahte amnhī tomnuj pānhā amnhīrer xwýnhja kutā kām grer o hkrī. Mě grer nyw o kām gre nē kām:

Na prem apī ka atyk o mẽ piitā mẽ kot amnhī tomnuj pānhā amnhīrer pa.

Ahpýnhā pika piitā hkôt mẽ urojē piitā hpānhā amnhīrer pa.

Nē ahpýnhā ri mẽ kapēr xwýnh kwýjē piitā mẽ hpānhā amnhīrer pa. Atyk o mẽ kot amnhī tomnuj piitā hpānhā amnhīrer pa.

Jakamā nhūm mẽ kot akôt amnhī xunhwýr xwýnhjaja kēp Tirtūm kra nē ri pa.

Ka ra mẽ panhō Tirtūm mā mẽ kēp patre kaxyw mẽ unhwý nhūm htem pika piitā hkôt mẽ ho amnhīptār o pa.

Tā atyk o ate pika piitā hkôt mẽ hpānhā amnhīrer jakamā kapxipix na ate kagàta pyr nē ho htýx xà hpôt mā tām. Anē.

¹¹ Hāmri nhūm Tirtūm kapēr o mẽ wrýk xwýnhjaja nhýhýnh hapōj nē kuhē. Mě ohtō rax o ohtō rax. Ohtō rax o mẽ pajamaxpēr jakrenh. Hāmri nē Tirtūm kot mẽ ho amnhīptār ā hkrī xà maatija wýr mra nē kām hipōk pa. Nē mẽmoj tír nē kuhē xwýnhjē mẽ mẽ àptār tūmjē mā hipōk pa nē mẽ pahte amnhī tomnuj pānhā amnhīrer xwýnhja mẽ kapēr.

¹² Kax pē kām kapēr nē kām:

Ām hāmri na pa htem amex o amex ā inhgrer o ixkuhē.

Mě ixrom axihtýx o axihtýx.

Nē mẽmoj piitā anhōō.

Nē ate mẽmoj piitā hkukamā axàhpumunh par.

Nē amex o amex jakamā na pa htem amā amex pix ā inhgrer o ri ixpa. Anē.

¹³ Tā nhūm mẽmoj piitā Tirtūm mẽ Jejus wa kām wa mex o wa mex ā harē. Pika hkôt panhī nē mry nē àk nē mẽmoj piitāā. Nē pika hkrak ri nē gō hkrak ri mẽmoj piitāā. Nē mẽ htykjaja. Nhūm mẽ piitā wa kām wa mex o wa mex ā wa harē nē wa kām:

E ate mẽ ixto amnhīptār ā akrī xà kamā akrī xwýnh mẽ kot mẽ ixte amnhī tomnuj pānhā amnhīrer xwýnh mẽ war amex o wa amex.

Nē war axihtýx o war axihtýx.

Nē war axàhpumunh o war axàhpumunh.

Na pa htem ā war ajarēnh anhýr rāhā ixpa ho ixpa. Anē.

¹⁴ Hāmri nhūm mẽmoj tír pē kwatjaja mẽ kuma nē mẽ kām:

—Nā ām hāmri na ka mẽ ā wa harēnh anē.

Wa mex o wa mex kumrēx. Anē.

Hāmri nhūm mẽ àptār tūmjaja Tirtūm mẽ Jejus wa hpar pē hkōn krā ho rôrōk nē hkrī hpa nē haxwýja wa kām wa mex o wa mex ā wa harē.

Kagà ho htýx xà pē 7 jarēnh

Matēwre 24.3-14; Sikūn Tesarōn 2.3; Wam Juāw 2.18

6 Tā pa arī kaxkwa kamā mẽ pahte amnhī tomnuj pānhā amnhīrer xwýnh kot tanhmā amnhī nhīpēx to hā omunh o xa. Nhūm kagà kaxkepta py nē wam ho htýx xà pôt. Hāmri nhūm mẽmo tír pē kwatjē hōja kapēr týx kumrēx. Te na katōtōk týx pyrāk o mẽhōj mā kapēr nē kām:

—E amnē mẽ ixwýr tē. Anē.

² Hāmri nhūm kawar jakajre nhýhýnh hwýr hpōx o tē. Nhūm mẽhōja ō kuxē mý nē hā nhý nē tē. Hāmri nhūm nhām mẽhōja hwýr tē nē kām pahi hā mẽ ahkà htū. Hāmri nē kām tanhmā kapēr to nhūm kuma nē mẽ kot kām Tirtūm mẽ Jejus wa kurē xwýnhjē nhīmex par kaxyw hakēx nē ma pika hwýr tēn wrý.

³ Hāmri nhūm mẽ pahte amnhī tomnuj pānhā amnhīrer xwýnhja wam kagà ho htýx xàta kôt axte ja pôt.

Hämri nhũm mẽmoj tĩr pẽ kwatjẽ hõja axtem mẽhõj mã kapẽr nẽ kãm:

—E amnẽ mẽ ixwỳr tẽ. Anẽ.

⁴ Hämri nhũm kawar kamrẽk mẽ hwỳr hpõx o tẽ. Nhũm mẽhõ hã nhỹ nẽ tẽ. Nhũm nhãm mẽhõja kãm wapo gõ nẽ ma pika hwỳr htẽm nẽ wrỳk kaxyw hano. Kot hwỳr wrỳk nẽ pikap mẽ pa xwỳnhjẽ kurẽ huk kaxyw. Mẽ kot axpẽn par kaxyw ma mẽ hwỳr kumẽ. Hämri nhũm kuma nẽ wapota py nẽ hakẽx nẽ ma mẽ hwỳr tẽn wrỳ.

⁵ Hämri nhũm mẽ pahte amnhĩ tomnuj pãnhã amnhĩrer xwỳnhja kagà ho htỳx xà hõ põt. Na pre ra ho axkrut nẽ hpõt tã hpãnhã axte hkõt ja põt. Hämri nhũm mẽmoj tĩr pẽ 4jẽ hõta mẽhõj mã kapẽr nẽ kãm:

—E amnẽ mẽ ixwỳr tẽ. Anẽ

Hämri nhũm kawar tykre mẽ hwỳr hpõx o tẽ. Nhũm hã ỹr xwỳnhja mẽmoj to peja xà hã parãs mỳ nẽ o tẽ.

⁶ Hämri nhũm mẽ htĩr pẽ kwatjẽ rũm mẽhõja kãm kapẽr nẽ kãm:

—E kẽr ka ma pika hwỳr mẽ hwỳr tẽn wrỳ nẽ mẽ kãm myt pyxi kamã mẽ àpẽn pãnhã mẽ kãm mẽmoj to hkryre nẽ anhõ parãsta kamã ho peja nẽ mẽ kãm õr o apa. Nom mẽ apkur xà hã orti nẽ wĩhti ka mẽ kẽp tanhmã ho hkõt nẽ. Anẽ.

Hämri nhũm kuma nẽ hakẽx nẽ ma tẽn mẽ hwỳr wrỳ.

⁷ Tã nhũm mẽ pahte amnhĩ tomnuj pãnhã amnhĩrer xwỳnhja axte kagà ho htỳx xà hõ hpõt. Na pre ra ho axkrunẽpxi nẽ hpõt tã hpãnhã axte hkõt ja põt. Hämri nhũm mẽmoj tĩr pẽ kwat kot hitep xwỳnhja mẽhõj mã kãm:

—E amnẽ mẽ ixwỳr tẽ. Anẽ.

⁸ Hämri nhũm kawar ràràare mẽ hwỳr hpõx o tẽ. Nhũm mẽhõ hã nhỹ nẽ tẽ. Hã ỹr xwỳnh nhĩxi na pre kẽp “Mẽhtyk” anẽ. Hämri nhũm mẽhõja kãm kapẽr nẽ kãm:

—E ma pika hwỳr wrỳ nẽ tanhmã mẽ ho kẽ mẽ ohtõ nẽ tanhmã amnhĩ to nẽ axkaprã. Kẽ mẽ hkwyjaja pijapu kamã axpẽn pa nẽ mẽ hkwyjaja prãm xà ty nẽ mẽ hkwyjaja tanhmã à htỳx kute kamã ty. Nẽ mẽmo mry xoprẽja mẽ hkwyjẽ pa. E ma mẽ hwỳr wrỳ nẽ tanhmã mẽ ho ho apa. Anẽ.

Hämri nhũm kuma nẽ hakẽx nẽ ma pika hwỳr tẽn wrỳ. Hämri nhũm mẽ htykjẽ papxàja tanhmã amnhĩ to nẽ te kot hã jêt nẽ ma hkõt mõr nẽ pika hwỳr wrỳk pyrãk pa pre arĩ omunh o xa.

⁹ Hämri nhũm mẽ pahte amnhĩ tomnuj pãnhã amnhĩrer xwỳnhja axte kagà ho htỳx xà hõ hpõt. Na pre ra ho kwat nẽ hpõt tã hpãnhã axte ja põt. Hämri nẽ hpõtja kõt pa ra mẽ kot Tĩrtũm mã mẽmoj nhõr xà hã mẽsti pumu. Nẽ hkrak ri mẽ hkarõjẽ pumu. Mẽ kot hkwyjẽ hkõt ri mẽ kãm Tĩrtũm kapẽr jarẽnh nẽ Jejus kẽp mẽ õ Pahihtĩ hã harẽnh o pa nhũm mẽ kot hã mẽ hpar xwỳnhjẽ karõja pa pre mẽ omu. Nhũm mẽ mẽsti hkrak ri amnhĩ to Tĩrtũm wỳr o hkrĩ. ¹⁰ Kỳx pẽ kãm kapẽr nẽ kãm:

—Ãm hãmri amex o amex Pahi Maati. Aa ate mẽmoj tã tanhmã amnhĩ to axẽx to hkõt kumrẽx. Kwa xà kot

kaj tokyx pika hkõt mẽ kot mẽ inhĩmex xwỳnhjaja tanhmã mẽ ixtã mẽ ho nà? Anẽ.

¹¹ Hämri nhũm mẽhõja mẽ hwỳr tẽn nẽ mẽ kãm mẽ ẽ jakajre gõ nhũm mẽ hagjẽ. Hämri nhũm mẽ kãm:

—E mẽ mamrĩ atar akõkõt o akrĩ. Kojã Tĩrtũm kormã tanhmã mẽ kot mẽ atomnuj xwỳnhjẽ ho hkõt nẽ. Kẽ mẽ axte mẽ apyrã nẽ mẽ akwỳjẽ nhĩmex mãn. Kojã mẽ Tĩrtũm jamaxpẽr xà hkõt axte mẽ akwỳjẽ pa nhũm rĩ kormã mẽ ato hpimràatã tanhmã mẽ atã mẽ hipẽx to. Jakamã e mẽ atar kutẽp mãmrĩ akõkõt o akrĩ. Anẽ.

¹² Hämri nhũm mẽ pahte amnhĩ tomnuj pãnhã amnhĩrer xwỳnhja axte kagà ho htỳx xà hõ hpõt pa omu. Na pre ra ho 5 nẽ hpõt tã hpãnhã hkõt axte ja põt. Hämri nhũm pika httertet tỳx kumrẽx. Nẽ myyti ahtyk nẽ mytwrỳre te kẽp mẽ hkamrõ kamrẽk tỳx pyrã nẽ ajêt.

¹³ Nẽ kanhẽti tanhmã amnhĩ to nẽ axrẽ nẽ pikap rõrõk pa. Te kõk xapẽr tỳx nẽ kot pàrerekre kormã ràx tã kot kãm hikranh par pyrã nẽ piitã rẽn h pa nhũm rõrõk.

¹⁴ Hämri nhũm kaxkwaja te kagà kaxkep pyrã nẽ amnhĩ to kaxkep o tẽ. Nẽ pika piitã hkõt kẽn prẽk nẽ hixêt prẽk maati piitã te hkrĩ xà rũm hapõx nẽ mrar nẽ nhãm hkrĩ pyrãk. Nhũm gõ hipõk piitã haxwỳja te hikwỹ xà rũm hapõx nẽ mrar nẽ nhãm hikwỹ pyrãk. Pika httertet tỳx nhỹ hã ã mẽmoj amnhĩ nhĩpẽx anẽ. ¹⁵ Hämri nhũm pika hkõt mẽ piitã tee ri mẽmoj ã amnhĩ nhĩpẽx anhỹr ã omu nẽ kãm ma nẽ httertet tỳx kumrẽx. Mẽ ho amnhĩptar xwỳnhjaja nẽ põristi krãhtũmjaja nẽ mẽ kot amnhĩ to rũnh xwỳnhjaja nẽ mẽ hihtỳx xwỳnhjaja nẽ mẽ kãm mẽ àpẽn xwỳnhjaja nẽ amnhĩ mã mẽ àpẽn xwỳnhjaja. Ãm piitã mẽmoj ã kot amnhĩ nhĩpẽx anhỹr ã omu nẽ tee ri amnhĩ kukamã hamaxpẽr nẽ kãm ma ho kãm ma. Hämri nẽ hpimxur kaxyw ma kẽn prẽk kre japẽr o hprõt nẽ mra. ¹⁶ Hämri nẽ amnhĩ to kẽn prẽk wỳ nẽ kãm:

—Kwa na ra mẽ ixto amnhĩptar ã hkrĩ xà maati kamã hkrĩ xwỳnh mẽ kot mẽ ixte amnhĩ tomnuj pãnhã amnhĩrer xwỳnhja wa mẽ ixkamã gryk tỳx kumrẽx. Ra wa kot tanhmã mẽ ixtomnuj to xà hã arĩgrota kato. Kojã wa mẽ ixtomnuj tỳx nẽ pa mẽ kutã hkõt nẽ. Kwa tokyx mẽ inhĩpy arõrõk nẽ wa kẽp mẽ ixto amũxu. Anẽ.

Mẽ kot Tĩrtũm mã hkrajẽ kagà

Apokarip 9.4

7 Tã pa arĩ kaxkwa kamã mẽmoj pumu. Nhũm Tĩrtũm kapẽr o mẽ wrỳk xwỳnh pẽ kwatja piitã ahpỹnhã pika nhĩtep xà hkõt kõk jatur xà hã hamỳ nẽ ho kuhẽ. Pika piitã hkõt kõk hpinhkrẽnh par nẽ àpẽr kêt nẽ gõ xujanãr kõt àpẽr kêt kaxyw hatur xà hã hamỳ nẽ ho kuhẽ. Nẽ pà piitã hkõt àpẽr nẽ tanhmã pĩ hkwy ho pymaj nhũm mẽ ã amnhĩ nhĩpẽx anẽ nẽ nẽ hatur xà hã hamỳ nẽ ho kuhẽ. ² Na pre ra Tĩrtũm ja hã mẽ kãm karõ nẽ mẽ kãm:

—E kẽr ka mẽ ma pika hwỳr wrỳ nẽ pika nẽ gõ xujanãrja tanhmã wa homnu hto. Anẽ.

Hämri nhũm mẽ kuma nẽ hwỳr wrỳ nẽ kormã nẽ kõk ho htỳx. Hämri nhũm Tĩrtũm kapẽr o wrỳk xwỳnhjẽ hõ-

ja myt japôx xà rûm mẽ hwÿr hpôx o tẽ. Nẽ ìhkra kamã mẽ kot Tirtûm kra hã mẽ hixi jarênh xà hã kagàta py nẽ o tẽ. Hãmri nẽ kàx pẽ mẽ kot pika mẽ gô xujanãr homnu mã xwÿnhjẽ mã kapêr nẽ mẽ kãm:

³—Kwa taxy pa Tirtûm krajẽ nhõkrã kagà hpa mãn. Kêr ka mẽ omu nẽ mẽ tapxipixjaja tanhmã mẽ ho hkêr nẽ. Anẽ.

⁴Hãmri nẽ mẽ hkagà pa. Ahpÿnhã Ijaew pigrãnh xwÿnhjaja mẽ ho ohtô rax kumrêx nẽ tanhmã mẽ hkagà hto. Pa tanhmã mẽ kute hã mẽ harênh ma nhũm xep mẽ ohtô rax kumrêx.

Juta kamã mẽ kêp 12.000.

Nẽ Rupẽ kamã mẽ kêp 12.000.

Nẽ Gax kamã mẽ kêp 12.000.

Nẽ As kamã mẽ kêp 12.000.

Nẽ Natari kamã mẽ kêp 12.000.

Nẽ Manase kamã mẽ kêp 12.000.

Nẽ Simeãw kamã mẽ kêp 12.000.

Nẽ Rewi kamã mẽ kêp 12.000.

Nẽ Isaka kamã mẽ kêp 12.000.

Nẽ Jepurõ kamã mẽ kêp 12.000.

Nẽ Juje kamã mẽ kêp 12.000.

Nẽ Pẽjamĩ kamã mẽ kêp 12.000.

Ã mẽ ohtô rax kot anhÿr. Hãmri nẽ mẽ piitã mẽ pikamÿr par kãm mẽ kêp 144.000. Piitã kêp Apraãw kanrêhã htãmnhwÿ na pre mẽ. Tã ã axpẽn kaxyw mẽ ohtô rax kumrêx kot anhÿr tã nhũm mẽ hkagà pa.

Tirtûm kra hkwyjẽ jarênh

Apokarip 14.1-5

⁹Tã pa axtem mẽmoj pumu. Nhũm mẽ ohtô rax nẽ Tirtûm nhõ krĩ kamã kuhê. Ahpÿnhã ri pika piitã hkôt mẽ urojaja. Nẽ ahpÿnhã ri mẽ kapêr xwÿnhjaja nhũm prem pika piitã kurũm kot mẽ ho amnhĩptãr ã hkrĩ xà maatija kamã hkrĩ xwÿnh pẽ Tirtûm mẽ mẽ pahte amnhĩ tomnuj pãnhã amnhĩrer xwÿnhja wa kutã kuhê. Mẽ ohtô rax kumrêx jakamã pa tee ri mẽ piitã mẽ ho kôta hpar prãm kaprÿ. Nẽ piitã ê jakare kamã kuhê. Nẽ hkĩnh nẽ hkĩnh xaj põ hkwy jamÿ nẽ ho àpêr o kuhê.

¹⁰Hãmri nẽ kÿx pêẽ Tirtûm mẽ Jesus wa kãm kapêr nẽ wa kãm:

Hêxta waa nẽ. War amex o war amex Pahi Maati.

Na ka pre Akra Jesus kukwak ri mẽ ixte amnhĩ tomnuj ã tanhmã mẽ ixto hkêr nẽ.

War ajamẽ mẽ ixkamã axukaprĩ rãhã ho apa xwÿnh na ka wa.

Jakamã pa mẽ inhmex nẽ war awÿr api nẽ war akuri inhmex nẽ ijamakêtkati nẽ ixpa ho ixpa.

Ãm hãmri na ka hte wa mẽ ixto mex rax kumrêx o apa. War amex o war amex. Anẽ.

¹¹Hãmri nhũm Tirtûm kapêr o mẽ wryk xwÿnhjaja Tirtûm krĩ xà mã hipôk nẽ hkõn krã ho rôrôk nẽ hkrĩ hpa. Nẽ mẽ àptãr tũmjê mẽ mẽ htĩr nẽ kuhê xwÿnhjaja mẽ ìhkô hã kãm hipôk nẽ wam tajê pyrãk nẽ hkõn krã ho rôrôk nẽ hkrĩ. Hãmri nẽ mẽ ohtô kot Tirtûm mẽ Jesus wa kãm kapêr ã mẽ kuma hãmri nẽ Tirtûm ã hpijaãm kaxyw hpar pẽ htu mÿr pẽ hikwÿ hpa nẽ kãm mex o mex ã harẽ nẽ kãm:

¹²“Ãm hãmri na mẽ ã ajarênh anẽ Tirtûm. Amex o amex.

Na ka hte mẽ ixto mex o apa.

Mẽ ixrom axãhpumunh o axãhpumunh.

Nẽ mẽ ixrom axihtÿx o axihtÿx.

Jakamã na ka hte mẽ ixpiitã mẽ ixto mex kumrêx rãhã ho apa.

Ã ate anhÿr rãhã o rãhã jakamã na pa htem amã

amex o amex ã ajarênh rãhã ho ixpa.” Anẽ.

¹³Hãmri pa mẽ omunh o ixãm rôm nhũm mẽ àptãr tũmjê hõja ixwÿr tẽ nẽ mẽ ê jaka kamã mẽ hkĩnh xaj põ jamÿnh nẽ ho kuhê xwÿnhjẽ hã ixkukja nẽ inhmã:

—E mãn ate mẽ ê jakare kamã mẽ kuhê xwÿnh mũjjẽ pumunh nã? Tanhmã na prem amnhĩ nhĩpêx to nẽ amnẽ api? Xà ate mẽ omunh? Anẽ.

¹⁴Hãmri pa kuma nẽ kãm:

—Nà ixte mẽ omunh kêt. Kêt ka na ixrom ate mẽ omunh. Anẽ.

Hãmri nhũm inhmã mẽ harênh o:

—Nà na pre mẽ hkwyjaja Jesus ã mẽ homnuj tÿx kumrêx nẽ mẽ kupa. Tã mẽ kêp Jesus kwÿ jakamã na pre mẽ nẽ mẽ kot amnhĩ tomnuj o hapêx nẽ te amnhĩ kamrô ho mẽ nẽ mẽ kot amnhĩ tomnuj piitã kuhõnh par pyrãk o mẽ hipêx. Jakamã nhũm mẽ ê jaka kamã mex nẽ hkĩnh tÿx nẽ pa.

¹⁵Nẽ Tirtûm kot mẽ pahto amnhĩptãr ã hkrĩ xà maati kutã kãm mex o mex ã harênh rãhã ho kuhê.

Na hte mẽ ho mex rãhã ho pa. Mẽ hkôt pa ho pa jakamã koja mẽmoj tanhmã kêp mẽ ho hkêr nẽ.

¹⁶Nẽ mẽ pahte amnhĩ tomnuj pãnhã amnhĩrer xwÿnh kot Tirtûm krĩ xà maati kamã ãm xwÿnhhta na hte mẽ hamãr mex rãhã ho mẽ hkôt pa.

Te mẽ kot mẽ hkrit jamãr mex pyrãk.

Nẽ te mẽ kot mẽ hkrit kôm o pa nhũm htĩr nẽ pa pyrãk.

Koja mẽ kuri htĩr tũm nẽ hkôt pa ho pa.

Nẽ axte kãm prãm kêt nẽ.

Nẽ axte kãm kôr kêt nẽ.

Nhũm arĩgro htÿxja axte mẽ hkã ho hxêr kêt nẽ.

Koja Tirtûm te mẽ kot mẽ hkra no kagô nhĩnhĩnh par pyrãk o mẽ hipêx nhũm mẽ axte hkaprĩ nẽ mÿr o pa hkêr nẽ.

Pãnhã hkĩnh nẽ mex rãhã kuri pa ho pa. Anẽ.

Kagà kaxkep o htÿx xà kot hitep jarênh

8 Tã pa arĩ kaxkwa kamã mẽmoj pumu nhũm mẽ pahte amnhĩ tomnuj pãnhã amnhĩrer xwÿnhja kagà kaxkep o htÿx xà kot hitepta pôt. Hãmri nhũm kaxkwa kamã mẽmoj piitã hpinhkrênh pa nhũm mẽhõ kapêr kêt kumrêx. Nẽ hpinhkrênh par o ra hã ahtũm ry mex nẽ.

²Hãmri nhũm Tirtûm kutã kapêr o wryk xwÿnh pẽ 7 nẽ mẽ kuhê xwÿnhjaja. Nhũm kapêr o wryk xwÿnhjẽ hõja mẽ hwÿr tẽ nẽ mẽ piitã mẽ kãm pifti gõ.

³Hãmri nhũm kapêr o wryk xwÿnhjẽ hõja ôr o xijere py nẽ Tirtûm mã mẽhkuxwa xà ho xêt xà hã mêt kunĩhti hwÿr o tẽ. Mẽ ho amnhĩptãr ã hkrĩ xà maati kutã ôr o mêtstija wÿr o tẽ nẽ kuri o xa. Hãmri nhũm

mě kām kamā mēhkuxwa xà hkwỳ runh rax nē nhūm mēsti hā ho xēt o xa. Rôm nhūm Tirtūm krajaja Tirtūm mā tanhmā amnhī jarēnh to. Jakamā nhūm mēhkuxwa xà xēt kūm mē mē kot Tirtūm mā amnhī jarēnh xāja mē nhūm ahkà nē Tirtūm kapēr o wrỳk xwỳnh nhīhkra kamā xijere rūm Tirtūm kutā kàx mā àpir o pa.

⁵ Hāmri nhūm kapēr o wrỳk xwỳnhja xijere kamā kuwy hpōk kwỳ ho nýt nē ahpar mā pika hwỳr kumē nhūm ma tē nē pikap tēm nhūm pika htet tēt tỳx nē kamā na katōtōk nē haxēnh nē hkrakrak.

Mě kot pifti kakōr ā mě harēnh

⁶ Hāmri nhūm Tirtūm kapēr o wrỳk xwỳnh pē 7 kot pifti jamỳnh xwỳnhjaja ra kot pafti kakōr mā.

⁷ Jakamā nhūm wamta ō pifti kakōr nhūm na mē te kot jēr krā jakot pyrāk xwỳnh mē kuwy te kot mēmo kamrō kamrēk pyrāk xwỳnhhta pikap rôrōk pa. Nē nhỹhỹnh pika hkwỳ ho rax nē ho kaxàr pa. Nē pōti nē akunī hkwỳ ho rax kumrēx nē ho kaxàr pa. ⁸ Hāmri nhūm wam ām xwỳnh nhījuk ri ām xwỳnhja ō pifti kakōr nhūm mēmoj te kēn krā hprēk pōk pyrā nē kaxkwa rūm ahpar mā tē nē gō xujanār nhīkjē kamā hpōk rāhā tēn mrō. Hāmri nhūm gō nhīkjē kamā gōja mēmo hkamrō hā amnhī jahkre hpa. ⁹ Jakamā nhūm gōx kām mēmoj htīr nē ri mrar xwỳnhjaja pikaprār pa. Nē gōx kām pàr gō krāhkà hā pa xwỳnhja haxwỳja gjēx pa. Nē pàr kām mē pa xwỳnhjaja haxwỳja hagjē nē pikaprār pa. No nhūm gō mex kām pàr kām mē pa xwỳnhjaja mē kurom arī htīr nē.

¹⁰ Tā nhūm wam ām xwỳnhhta wa hijuk ri ām xwỳnhja ō pifti kakōr. Hāmri nhūm kanhēti rax kumrēxja axta nē hpōk o ma ahpar mā tēn pikap tēm nē pyhti nē hino hkwỳ ho ohtō nē homnu hpa. ¹¹ Kanhēti nhīxi pē na pre “mēmoj xỳ xà” anhỹr jakamā nhūm tēm nē pyhti nē hino hkwỳ ho ohtō nē homnu pa. Nhūm prem hwỳr mra nē hkwỳ janhi nē ho ixkō nhūm y nē nhūm mē ohtō nē ho ixkō nē axkaprā.

¹² Hāmri nhūm hpānhā Tirtūm kapēr o wrỳk xwỳnhjē hōja ō pifti kakōr. Na pre ra ho axkrunēpxi nē hkakōr tā hpānhā ra axte hō ja kakōr. Hāmri nhūm mēhōja tē nē myyti kura nhūm hkwỳ ahtyk nē hirā hkēt nē. Nhūm mytwrỳre nē kanhēti mā ho anē nē myyti pyrā nē hkwỳ ahtyk nē hirā hkēt nē harir. Jakamā nhūm kamāt kām hirā mex kēt nē. Nē arīgro hā myytija haxwỳja hirā mex kēt nē.

¹³ Hāmri pa kaxkwa kamā àanhàhti pumu nhūm kỳx pē ri htor o pa pē tanhmā kapēr to nē kapēr o:

—Hēxta waa nē. Kormā kot pifti kakōr xwỳnhjaja axkrunēpxi nē kormā hkakōr kēt nē. Koja mē tokyx hkakōr nhūm pika hkōt ri mē pa xwỳnhjaja amnhī xà htỳx kamā hamak tỳx o pa. Na pa tee ri mē hkukamā ijampēr nē inhmā mē hkaprī htỳx nē. Hēxta waa nē. Koja mē omnuj tỳx kumrēx. Anē.

⁹ Tā pa axte mēmoj pumu. Nhūm Tirtūm kapēr o wrỳk xwỳnhjē hō ō pifti kakōr. Na pre ra ho kwat nē hkakōr tā hpānhā axte hōja ja kakōr. Hāmri nhūm kanhēti hō axta nē pikap tēm kurē kumrēx nhūm mēhōja omu nē hwỳr tē nē kām mēmoj tā saf gō. Sa-

tanasti jagjēnh xà hā ahkre xupỳm o htỳx xà hā safja nhūm kanhēti mā kugō.

² Hāmri nhūm kupy nē ahkrehtita wỳr o tē nē kahē xà mē nhūm kurūm kuwy hkūm hapōx rax nē. Nē ma kàx mā àpir o pa nē myyti hpro hpa nhūm kamāt kō rax kumrēx.

³ Nē kuwy hkūmja rūm mēmoj te krit pyrāk xwỳnh kwỳjaja pikap rôrōk nē kuhē. Te kot krit pyrāk tā mē hkuk te panhī hkuk pyrāk. Nē mē hkrā hkī te mēnijē hkrā hkī japjē pyrāk. Nē ôr o mē ahkà jagjē. Nē mē wa japjē htỳx kumrēx. Te rēāwti xwa japjē pyrāk. Nē kàx o mē hinō hkà. Nhūm mē htor o hara hkoko htỳx o mra. Te ho kawar xohtō pijapu kaxyw kot mē hkjēnh xà kamā mē htur nē mē hkjēnh o hprōt nhūm hkoko htỳx pyrāk. Nē mē hkamnhwỳr o pa kaxyw mē hanhyja te kot makre janhy pyrāk. Á kriitija kot anhỹr. Nē te nhỹhỹm oprē kaxyw nojarēt nē mē hkrít kawar hā hikukrēx mex rēnh pyrāk. Mēō pahija ahkre xupỳmta kamā kēp mē hkrāhtūm. Ijaew kapēr kām hixi pē “Ap-atō.” No Gres kapēr kām kēp “Aporiāw.” No mē pakapēr kām kēp “mē hpar o pa xwỳnh.” Hāmri nhūm Tirtūm kriiti mā kapēr nē mē kām:

—E kēr ka mē ma pika piitā hkōt te makre kot amnhī nhīpēx pyrā nē ri mē hkōt mē hkamnhwỳr o apa. Á amnhī nhīpēx anhỹr o mē atā mytwrỳ pē sīk. No ām kēr ka mē hpar kumrēx kēt nē. Ám mē kot amnhī xà htỳx kām hamak pix kaxyw tanhmā mē ho ho apa. Te makre kot mē hkamnhwỳr nhūm à htỳx kumrēxta pyrāk. No mē ate mē hkamnhwỳr nhūm mē hkamnhwỳr xāja koja à htỳx o makre kot mē hkamnhwỳr jakre. Nom ra mē kot Tirtūm kra hā mē hkagà xwỳnhjaja kēr ka mē omu nē ām mē omu nē tanhmā mē ho hkēt nē. Mē kēp ixkwỳ na mē. Nē pō nē prāt ka mē ām omu nē tanhmā ho hkēt nē. Ám mē kot panhī nhōkrā kagà hkēt xwỳnh pixjaja ka ā mē hipēx anhỹr o ri mē hkōt apa. Nom kēr ka mē hpar kēt nē. Kē mē tee ri amnhī xà hā maj kām tokyx htyk nē hapēx prām hkaprỳ ho pa. E ma mē hwỳr mra nē ā mē hipēx anhỹr o ri apa. Anē.

Hāmri nhūm mē kuma nē ma mē hwỳr mra.

¹² Na ra pika hkōt wam mē homnu xà pyxi nē hapēx. No ām arī hamēxkrut.

¹³ Jakamā nhūm Tirtūm kapēr o wrỳk xwỳnhjē hōja axte ō pifti kakōr. Na pre ra ho sīk nē hkakōr tā axte hkōt hōja hkakōr. Nhūm Tirtūm kutā ôr o mēsti rūm mēhōja tanhmā kapēr to. Mēsti janhà rūm kapēr.

¹⁴ Pifti kakōr xwỳnhhta mā kapēr nē kām:

—E na ra mē kot mē hkwỳjē nhīmex ā arīgrota kato. Jakamā kēr ka ma pyhti pē Erax wỳr wrỳ nē gō mỳ ri Satanasti mā mē àpēnh xwỳnh pē kwatja pumu. Na pre ra mē hpa hpre nhūm mē gō mỳr ri arī hkrī ho hkrī. Ka mē omu nē mē kām mē hpa hpre xà hpōt pa kē mē ma mē hkōt ri mē hpar o pa. Anē.

¹⁵ Na pre ra Tirtūm mē kot mē hkwỳjē nhīmex o pa kaxyw mē kurē nē gō mỳ ri mē unhwỳ nhūm mē kormā mē hpar xà hā arīgro jamār o hkrī. Jakamā nhūm ā pifti kakōr xwỳnhhta mā mē harēnh anē nhūm kuma nē ma tē nē mē hwỳr wrỳ nē mē kām mē hpa hpre xà

hpôt pa. Hämri nhüm mě ma pika piitã hkôt ri mě hpar o mě hkôt pa. Nē mě ho ohtô rax kumrëx nē mě himex. ¹⁶ Nē ma amnhĩ kôt pôristi ho ohtô rax nē o pa. Piitã kawar ã hkrĩ nē mě hkôt hprôt nē hkocho ho mra. Mē kēp 200.000.000 hã mě harē pa mě harēnh ma. Mē ohtô rax o mě ohtô rax.

¹⁷ Na pa pre arĩ te xipimtir kãm mě omunh pyrãk. Nhüm kawar ã mě hkrĩ xwýnhjaja. Mē hinô kãja axtem kãx o. Nē hkamrêkja te kuwy hpôk kamrêk pyrãk. Nē rãrãrja te mě hkurôt kane xã pē êsôf rãrãr pyrãk. Nē kakrã htyk. ã kãx o mě hinô hkã kot anhÿr. Nē mě hkrit kawarti hkrãja te rêãwti krã pyrãk. Nē mě hakwa rüm kuwy hpôk mě êsôfti mě kuwy hküm axpēn kôt hapôx o pa. ¹⁸ Nē kawarti jamy axtem te kēp kagã xoprē hkrã pyrãk nhüm mě hamy ho mě hkamnhar o mě kupa. Nē mě hakwa rüm kuwy hküm mě kuwy hpôk mě êsôfti hapôx xwýnhhta mã mě ho anē nē. Jakamã nhüm kawartijaja mě hkôt ri hamy mě hakwa ho mě hpar o pa nē mě ohtô rax kumrëx nē mě himex.

²⁰ Tã nom nhüm arĩ mě htĩr nē ri mě pa xwýnhjaja. Mē kot mě hkwyjē hpar kēt xwýnhjaja hãmri ja hã mě omunh tã arĩ amnhĩ tomnuj o pa nē kãm urer kēt nē. Arĩ tanhmã amnhĩ tomnuj to ho pa. Axpēn pē hprô nē mjēn o amnhĩkati nē axpēn pē ahkĩ. Nē axpēn par o ri pa nē tanhmã axpēn xy hto ho pa. ã htÿx ri amnhĩ nhĩpēx anhÿr o pa nē kãm urer kēt nē. ãm Satanasti hkôt pix mã ri amnhĩ nhĩpēx o pa. Nē amnhĩm sãnti hkwy nhĩpēx. Pĩ ho hipēx nē kãx o hipēx nē kēn o hipēx. Nē hipēx pa nē amnhĩ to hwÿr o pa. Nom mo kot mě mar kaxyw sãnti jamak kre? Nē kot mě omunh kaxyw mo no? Nē ri mrar nē mě ho utãr kaxyw mo hte? Na htem arĩ ã amnhĩ to hwÿr kaprÿ anhÿr o pa.

Kagã kaxkep grire jarēnh

10 Tã pa arĩ mēmoj pumu. Nhüm axte Tĩrtüm kapēr o wrÿk xwýnh xihtÿxjē hõja pika hwÿr wrÿk o tē. Nē êja kakrã ho na pre. Nē hkrã mÿ ri mãxwÿxti ajēt. Nē hkuk te myt no kamã hirã htÿx pyrãk. Nē akutã hte kamã te kuwy hpôk pyrãk. ² Nē ãhkra kamã kagã kaxkep grire ra pipôt nhüm ma o tē nē o wrÿ nē o xa. Nē gô xujanãr kãm upôk rüm hte xãm nē kÿx pē amgrã kamã apke rüm hte xãm nē o xa pa ixprĩ hã omu.

³ Hãmri nhüm kãx pēē amÿra. Te rêãw hkãr tÿx pyrãk. Nhüm hpãnhã kaxkwa kamã mēhõja kãm kapēr. Te na katôtök o 7 wēs pyrãk pa ixprĩ hã tanhmã kapēr to hã kuma. ⁴ Hãmri nē ra mě amã ã kagã kaxyw nhüm mě ja nē inhmã kapēr nē inhmã:

—Kwa nã kwarĩ ja kot kaj hã kagã hkēt nē. ãm ja pix kot kaj akwyjē mã hã kagã hkēt nē. ãm kapxipix mãn ama nē ri hã apa.

Anhÿr jakamã pa mě amã hã kagã hkēt nē. ãm papxipix kuma nē ri hã ixpa.

⁵ Tã nhüm Tĩrtüm kapēr o wrÿk xwýnh kot gô xujanãr kãm upôk rüm hte xãm nē apke amgrã kamã ãm xwýnhhta hãmri Tĩrtüm nhÿ hã kapēr kaxyw nē kãnhmã ãhkra pē. ⁶ Tĩrtüm pē kaxkwa nē pika nē gô xujanãr o kator nē kamã kot mēmoj piitã ho kator xwýnhja. Nē

htĩr rãhã nē pa ho pa xwýnhja. Nhüm ÿ hã kapēr nē kapēr o:

—E hãmri. Amnepē mã na pre Tĩrtüm ÿ hã mě kãm kapēr o ri mě pa xwýnhjē mã tanhmã amnhĩ kukamã amnhĩ jarēnh to. Tanhmã kot pika piitã hkôt mě pa xwýnhjē nhĩpēx to hã amnhĩ jarē. Nē mēmo arĩgro hã mě kot amnhĩ tomnuj mÿrapē tanhmã kot mě hipēx to hã mě hkukamã mě hã amnhĩ jarē. Tã ra ã mě hipēx anhÿr xã hã arĩgro kato. Jakamã koja kapēr o wrÿk xwýnh kot hitepta ô pifti kakô hãmri nhüm mēmojja ã amnhĩ nhĩpēx anhÿr kurē kumrëx. ãm hãmri na pa mě amã ja jarē. Anē.

⁸ Pa mar o ixãm rôm nhüm wam inhmã kapēr xwýnhhta axte inhmã kapēr nē inhmã:

—E ma pika hwÿr wrÿ nē gô xujanãr kãm upôk rüm hte xãm nē amgrã kamã apke rüm hte xãm xwýnhhta wrÿr tē nē kēp kagã kaxkep grire pipôt xwýnhhta py. Anē.

⁹ Hãmri pa kuma nē ma hwÿr wrÿ nē hã kuwÿ nhüm inhmã kugô nē inhmã:

—E mĩ. Apy nē akrē. ànhre. Te kot menh xãnh pyrãk. Nom kot kaj akrē nē anhõhy xã. Nom mãmrĩ apy nē akrē. E mĩ. Anē.

¹⁰ Hãmri pa kēp kupy nē hkaki nhüm ànhre. Pa hkrēr pa hãmri nē inhõhy xã kurē kumrëx.

¹¹ Hãmri nhüm kot inhmã ör xwýnhhta inhmã:

—Nã ãm hãmri na ka apy nē akrē. Jakamã kēr ka ano ho ate mēmoj piitã omunh xwýnhja nē ajamak o ate mēmoj mar xwýnhja nē ate tanhmã Tĩrtüm kapēr mar toja ka piitã hã kagã hpa. Hãmri nē ate omunh xã hkôt akwyjē mã piitã harēnh o apa. Mē kot nhÿrmã Tĩrtüm kot tanhmã mě piitã mě hipēx to hã harēnh mar kaxyw. Ahpÿnhã ri pika piitã hkôt mě urojē piitã koja nhÿrmã ã mě hipēx anē. Ahpÿnhã ri mě kapēr xwýnh piitã. Nē mě ô pahijaja. ãm mě piitã koja nhÿrmã ã mě hipēx anē. Anē.

Tĩrtüm nhÿ hã kapēr xwýnh pijakrut wa harēnh

11 Tã nhüm mēhõj inhmã mēmoj to mĩdi xã hã pĩ ryre gô nē inhmã:

—E ja py nē Jerujarē hwÿr wrÿ nē kamã Tĩrtüm mã amnhĩ jarēnh xã hã ixkreja o mĩdi. Nē ixkre kamã amnepēm mě kot amnhĩ tomnuj pãnhã Tĩrtüm mã ôwēhti nhõr xã hã mēstita mã ho anē nē ho mĩdi. Nē ixkre kamã mě kot Tĩrtüm mã amnhĩ jarēnh o mě hkrĩ xwýnhjaja ka aprĩ hã mě ho kôta.

² —No ixkre kapem pikaja ka ho mĩdi hkēt nē. Ra Tĩrtüm kot mě kot amnhĩ tomnuj xwýnhjē mã hkaga jakamã koja mě htÿx ri kãm hprãm xã hkôt tanhmã homnu hto ho pa. Nē Jerujarē piitã hkôt ri homnu ho paja ã hã amgrã axkrunēpxi nē hkôt mytwrÿ kēp 6.

³ —Koja Tĩrtüm ma ÿ hã kapēr xwýnh ho hamēxkrut nē mě hwÿr wa kumē nhüm wa ma mě hwÿr wrÿ nē mě kãm Tĩrtüm kapēr jarēnh o ri mě hkôt pa. Hãmri nē tee ri mě kot tanhmã amnhĩ tomnuj to hã mě omu nē hkaprĩ nē. Hãmri nē wa hkaprĩ xãj xak punure kaxô nē haxã nē mě kãm Tĩrtüm kapēr jarēnh o ri wa pa hã

amgrà axkrunëpxi në hkôt mytwrÿ kÛp 6. Jakamã e. Pÿ-ja py në ma mẽ hwÿr wrÿ në ixkreta o mÿdi. Anë.

⁴ Wa pijakrut wa kot Tÿrtÿm nhÿ hã kapër jarënh o wa pa xwÿnhhta wa. Na htem wa kot amnhÿ nhÿpëx ã wa harënh ma në mẽmo pÿ hpàr pë oriwëhti kot tanhmã amnhÿ nhÿpëx toja mã hamaxpër kurê kumrëx. Në amnepëm Tÿrtÿm nhÿ hã kapër o pa xwÿnh pë Jakaris kot kanê hpôk xãmta mã mãänën hamaxpër. Oriwëhti xô-ja htwÿm rax kumrëx nhÿm htem htwÿm opôj në ho kanê ho nÿt në hpôk në kÿx pë unhwÿ nhÿm mẽ piitã hirã kamã rÿt mex o ri mra. Në kanê hpôk mexja te kot Tÿrtÿm kapër pyrãk. Në kanê xãm xàja te kot Tÿrtÿm nhÿ hã kapër jarënh o wa pa xwÿnhhta wa uràk. Në oriwëhtija haxwÿja te kot wa uràk. Ra Tÿrtÿm Karô kot wa hkarô mã àr jakamã na hte wa hprÿ hã mẽ kãm Tÿrtÿm kapër jarënh o pa nhÿm mẽ kot mar xwÿnhhaja te kanê nhÿrã kamã ri rÿt mex në ri pa pyrã në hprÿ hã mar tÿx në.

⁵ Tã koja mẽhõ tanhmã wa hipëx to kaxyw wa hwÿr tẽ nhÿm wa hakwa rÿm kuwy hpôk kato në kot tanhmã wa ho mã xwÿnhhta o hxët o kupÿ.

⁶ Në koja wa Tÿrtÿm xàhpumunh tÿx hã ho tanhmã ri mẽ hã mẽmoj nhÿpëx to pë mẽ kãm kapër jarënh o ri mẽ hkôt pa. Jao tanhmã na hto nhÿm mẽ hã wrÿk kêt ry në. Rÿ tanhmã mẽ kÛp gô hto nhÿm mẽ hkamrô hã mẽ kÛp amnhÿ jahkre. Koja wa ã Tÿrtÿm nhÿ hã mẽ kÛp mẽmoj nhÿpëx anhÿr ho wa pa. Në xatã wa kãm hprãm xà hkôt tanhmã mẽmoj tomnu hto. ⁷ Në mẽ kãm kapër o pa pë ã mẽ hipëx anhÿr o wa hã amgrà axkrunëpxi në hkôt mytwrÿ kÛp 6 në rÿ kormã ho hapëx. Hãmri nhÿm ahkre xupÿm rÿm Satanasti nhõ kôwenatôja kato në ma wa hwÿr tẽ në nhÿri pry kahti ri wa unê në wa kupÿ nhÿm wa pry kamã ty në nõ. ⁸ Hãmri nhÿm mẽ wa haxàr kêt në nhÿm wa arÿ pry kamã nõ. Krÿ kapem na prem pÿ kahpa hã Jejus nhõ në kupÿ. Krÿ nhõ xwÿnhhaja mẽ kot amnhÿ tomnuj tÿx xwÿnh na mẽ. Te ho amnepëm krÿ pë Sotõ mẽ pika pë Ejit kamã mẽ kot amnhÿ tomnuj xwÿnhjê kot amnhÿ nhÿpëx pyrãk.

⁹ Jakamã nhÿm mẽ kot wa haxàr në axpën kurê nhÿm wa pry kamã arÿ ty në nõ nhÿm mẽ piitã wa hwÿr mra në wa omu. Në ahpÿnhã krÿ piitã hkôt mẽ pa xwÿnhhaja tanhmã amnhÿ to në ja hã wa omu. Ahpÿnhã ri pika piitã hkôt mẽ urojaja. Në ahpÿnhã ri mẽ kapër xwÿnh piitã. Hãmri arÿ ahpÿnhã mẽ õ krÿ kamã pa htã tanhmã amnhÿ to në wa htyk ã wa omunh ã hã apkati axkrunëpxi në hkôt hã myt apha. ¹⁰ Koja mẽ wa htyk ã wa omu hãmri në hkÿnh në. Në hkÿnh xàj axpën mã hkÿnh xà nhõr o pa. Wa kot kormã htÿr ri tanhmã mẽ homnuj to ho ri mẽ hkôt paja mã hamaxpër në wa htyk ã wa omu në hkÿnh tÿx në.

¹¹ Tã koja wa htyk ã apkati axkrunëpxi në hkôt hã myt apha hãmri nhÿm Tÿrtÿm wa kamã htyxà rë në akupÿm wa ho wa htÿr nhÿm wa kànhmã xa në ri mra. Hãmri nhÿm mẽ kot wa omunh xwÿnhhaja tee ri hã wa omu në kãm wa uma htÿx kumrëx. Æm kãm wa uma ho kãm wa uma.

¹² Hãmri nhÿm kaxkwa kamã mẽhõja wa kãm kapër në wa kãm:

—E war amnë mẽ ixwÿr war api. Anë.

Hãmri nhÿm wa kuma në ma kakrã kamã àpir o mō. Nhÿm mẽ kãm wa hkurê xwÿnhhaja tee ri wa àpir ã wa omu.

¹³ Hãmri nhÿm pika htetët tÿx në. Në krÿ kamã ixkre ohtô në grành pa në mẽ hkwy nhÿmex rax në nhÿm mẽ ohtô rax kumrëx në axkaprã. Mẽ kÛp 7.000 në pikaprãr pa. Hãmri nhÿm arÿ mẽ htÿr në ri mẽ pa xwÿnhhaja tee ri mẽ omu në kãm ma xàj htetët tÿx në axpën mã:

—Kwa Tÿrtÿm mãn ã mẽ panhÿpëx anë. Hihtÿx o hihtÿx jakamã kaxkwa rÿm ã mẽ panhÿpëx anë pu mẽ pahpiitã pano ho ixkre pigrành ã omu. Anë.

¹⁴ E na ra amnhÿ xà htÿx kamã hamak xàja hamëxkrut në hapëx. Tã no ãm arÿ mẽ kaxyw pyxi në arÿk.

Mẽ kot pifti kot hitep kakôr ã harënh

Apokarip 4.8, 5.9-14, 7.9-12, 14.2-5, 15.3-4, 19.1-2

¹⁵ Tã nhÿm Tÿrtÿm kapër o wrÿk xwÿnh kot hitepja õ pifti kakô nhÿm kaxkwa kamã mẽ pa xwÿnhhaja kàx pë kapër o:

E ãm hãmri. Na ra Mëpahpãm Maati mẽ Jejus Krisja wa kÛp krÿ piitã hkôt mẽ piitã mẽ õ Pahihti na wa.

Koja Mëpahpãm Maatija kÛp Pahi Maati rãhã në pa ho pa xwÿnh. Anë.

¹⁶ Hãmri nhÿm mẽ àptàr tÿm pë 24jaja. Tÿrtÿm kot mẽ pahto amnhÿptàr o hkrÿ xà mã hipôk në mẽ hkrÿ xwÿnhhaja. Hãmri ã mẽ kapër anhÿrja ma në Tÿrtÿm ã hpijaàm kaxyw hpar pë rôrôk pa në htu mÿr pë hikwÿ. Hãmri në kãm mex o mex ã harë në kãm:

¹⁷ Pa Pahi Maati Tÿrtÿm. Nã ãm hãmri mẽ ixrom axàhpumunh o axàhpumunh në axihtÿx o axihtÿx.

Amnepê mã kormã mẽmoj kêt ri na ka pre arãhã apa ho apa.

Tã arÿ arãhã apa ho apa.

Æm hãmri apë mẽ ixpiitã mẽ ixto amnhÿptàr xwÿnh.

Nã ãm hãmri amex o amex.

¹⁸ Kot kaj tokyx mẽ piitã tanhmã mẽ kot amnhÿ nhÿpëx to ho pa hã mẽ omunh xà hkôt tanhmã mẽ harënh to.

Në ra mẽ htyk xwÿnhhaja kot kaj mẽ piitã akupÿm mẽ ho mẽ htÿr pa nhÿm mẽ pika rÿm hapôx pa në ma mra në arÿ mẽ htÿr xwÿnhjê nhÿhkô hã akutã hkrÿ pa.

Ka mẽ piitã mẽ omu në tanhmã mẽ kot amnhÿ nhÿpëx to ho pa hã mẽ omunh hkôt tanhmã mẽ harënh to.

Mẽ kot amnhÿ tomnuj xwÿnhhaja kot kaj ma mẽ kot amnhÿ xà htÿx kamã hamak o pa htÿm xà hwÿr amnhÿ në mẽ arë nhÿm mẽ ma hwÿr hapëx. Hãmri në tee ri amnhÿ kukamã hamaxpër në gryk tÿx kumrëx.

Ka hpãnhã mẽ kot akôt amnhÿ xunhwÿr në akapër kôt amnhÿ nhÿpëx o mẽ pa xwÿnh piitã mẽ omu në tanhmã mẽ ho mex to.

Mẽ kot amnhÿ to rÿnh xwÿnhhaja në mẽ kot amnhÿ to hkryre xwÿnhhaja.

Në amnepëm mẽ kot anhÿ hã mẽ kapër o mẽ pa xwÿnhhaja.

Akrajê piitã kot atã hpijaàm xwÿnhhaja kot kaj kormã mẽ htÿr ri tanhmã amnhÿ to mex hã mẽ omunh xà hkôt tanhmã mẽ ho mex to.

Ä kot kaj tokyx mẽ piitã ahpÿnhã mẽ omunh xà hkôt mẽ hipêx anê. Anê.

¹⁹ Hãmri nhùm kaxkwa kamã Tirtüm nhörkwÿ hä hakwacre kahê xà amnhĩ mẽ pa kamã ôr o mës kunĩhtita pumu. Pu nhùm na hkatôtök nê haxênh nê hkrakrak nê na mẽ te kot jêr krã hakotre pyrãk xwÿnhja pikap rôrôk rax nê. Nê pika htetet tÿx o htetet tÿx pa arĩ omunh o xa.

Mêhõ ni mẽ kagãmnuti wa harênh

12 Tã pa axte mẽmoj pumu. Kaxkwa kamã aa mẽ pahte mẽmoj pumunh kêt xwÿnhja pa omu. Nhùm mẽhõ nija xê te myt no mã hirã htÿx pyrãk. Nê hpar nhökwa kamã mytwrÿre ajêt. Nê kanhêti ho 12 o mẽ ahkã tu nê o xa. ² Na ra htujarô nê hpijagri kaxyw ôhy xà nê amnhĩ kamnhêr o xa.

³ Tã pa axte mẽmoj pumu. Aa mẽ pahte mẽmoj ä kot anhÿr pumunh kêt xwÿnh ôja pa omu. Kagãmnuti nom äm axtem hkã kamrêk tÿx kumrêx. Nê rax kumrêx. Nê hkrã kêp 7. Nê hkrã piitã kamã ôr o pahi hä mẽ ahkã htu nê o nõ. Nê hkrã kamã pãr kêp 10.

⁴ Tã nhùm hamy ho apêr o kaxkwa kamã kanhêti ho ohtô nê pikap kurê. Hãmri nê ôhy xà nê amnhĩ kamnhêr o äm xwÿnhhta wÿr tẽ nê hkra kator nhùm kot kêp krêr kaxyw kutã hamãr o nõ.

⁵ Hãmri nhùm hkra kato nê myre. Hihtÿx o hihtÿx ä kot pika piitã hkôt mẽ piitã mẽ ho amnhĩptãr mã xwÿnh na pre. Nhùm kagãmnutija kot kêp utãr nê hkrêr mã tã nhùm Tirtüm kapêr o wrÿk xwÿnhjê hõja hwÿr wrÿ nê kêp kumÿ nê ma Tirtüm wÿr kaxkwa kamã kot mẽ pahto amnhĩptãr ä hkrĩ xà maatija wÿr ho api.

⁶ Hãmri nhùm kagãmnuti tee ri ma kot kêp o mör ä omu nê hpãnhã nita o apkjê nê kot tanhmã ho kaxyw nhùm amnhĩ tã omu nê umaj hprôt nê ma tẽ nê nhÿri kapôt ä amÿxu. Ra Tirtüm kot hkukamã kãm hpimxur xà nhĩpêx xà hwÿr hprôt nê ma tẽ nê kamã kêp amÿxu. Nhùm Tirtümja nê kagã pumunh mex nhùm kêp hpimxur mex ä amgrã axkrunêpxi nê hkôt hä mytwrÿ kêp 6.

Mê kot kaxkwa kamã mẽkarõmnuti kurê kaxàr ä mẽ harênh

⁷ Tã nhùm mẽ ra kaxkwa kamã kurê kaxàr kaxyw. Kagãmnuti mẽ hkwyjaja nhùm mẽ ra Tirtüm kurê kaxàr kaxyw kutã amnhĩ xunhwÿ. Jakamã nhùm Tirtüm kapêr o mẽ wrÿk xwÿnhjê hkrãhtüm Mikewja ma mẽ hwÿr amnhĩ kôt hkwyjê o mra nê mẽ pijapu ho kuhê.

⁸ Hãmri nhùm kagãmnuti tee mẽ kutã amnhĩ to htÿx kaprÿ nhùm Tirtüm kapêr o mẽ wrÿk xwÿnhjaja amnhĩ nê mẽ ho axtem nê kaxkwa rüm mẽ kator o mẽ kator.

⁹ Satanasti pê kagãmnutita kagã kot ni kator ewa mã hêx xwÿnh na pre. Nê hêx rom tanhmã hêx to ho pa xwÿnh. Jakamã nhùm Mikew mẽ hkwyjaja hkwyjê mẽ mẽ ho hpimràatã amnhĩ nê pikap mẽ rênh pa.

¹⁰ Hãmri nhùm kaxkwa kamã mẽhõja axte kãxpê kapêr nê kapêr o:

E äm hãmri. Na ra Tirtüm hihtÿx o hihtÿx o mẽ panê mẽmoj punuj piitã ho hapêx par kumrêx.

Na pre hte Satanasti pê mẽkarõmnutija xatã hwÿr mra nê kãm tanhmã Jejus kwÿjê ho kapêr punuj to ho pa.

Tã koja axte mẽ ho kapêr kêt kumrêx. Ra Tirtüm kot amnhĩ nê kator o kator nhùm ra ma mör o mör kênã.

Koja Tirtüm pika piitã hkôt mẽ ho amnhĩptãr xwÿnhjê japôx pa nê hpãnhã mẽ kaxyw Kra Krisja xãm nhùm piika piitã hkôt mẽ ho amnhĩptãr rãhã ho pa.

Nã äm hãmri. Ja mex o mex.

¹¹ Na pre Jejus kôt mẽ pahtô nê mẽ pahtõxjaja mẽkarõmnuti kutã amnhĩ to htÿx nê pa. No äm amnhĩ nhÿ hä ä kutã amnhĩ nhĩpêx anhÿr kêt.

Mê pahte amnhĩ tomnuj pãnhã amnhĩrer xwÿnhhta na pre ty nê hkamrô ho mẽ kuhõ nê mẽ nê mẽ kot amnhĩ tomnuj o hapêx.

Jakamã nhùm prem kukwak ri Satanasti kutã amnhĩ to htÿx rãhã pa.

Nhùm mẽ kot Jejus ä mẽ himex par kaxyw tã nhùm mẽ kãm htyk pyma hkêt nê. Äm Jejus kôt arĩ amnhĩ to htÿx nê mẽ hkôt pa rãhã nê.

Ja o arĩ mẽ kãm Jejus kot mẽ panê tanhmã amnhĩ nhĩpêx to hä harênh o ri mẽ hkôt pa.

¹² Tã Tirtüm ra kot mẽ panê mẽmoj punuj o hapêx par jakamã kwa kaxkwa kamã mẽ apa xwÿnhjaja kêr ka mẽ akĩnh nê apa.

Nom gô xujanãr kãm nê pika kamã mẽ pa xwÿnhjaja hêxta waa nê. Koja mẽ mex kêt nê.

Nê ra Mikew mẽ hkwyjaja kot amnhĩ nê kaxkwa rüm mẽkarõmnuti mẽ hkwyjê kator nê pikap mẽ rênh par jakamã nhùm Satanastija gryk tÿx kumrêx.

Tirtüm kot ma mẽ kot amnhĩ xà htÿx kamã hamak o pa tùm xàta wÿr mênh xà hä arĩgro hwÿr amgrã grêre nhùm tee ri amnhĩ kukamã hamaxpêr nê gryk tÿx o gryk tÿx. Anê.

¹³ Hãmri nhùm kagãmnutija mẽ kot amnhĩ nê kaxkwa rüm kator ä amnhĩ pumu nê gryk tÿx nê. Nê gryk xàj ma akupÿm ni kot hkra myre ho pijagri xwÿnhhta wÿr tẽ nê tanhmã ho kaxyw hkôt ho krihkrit.

¹⁴ Hãmri nhùm Tirtüm kapêr o mẽ wrÿk xwÿnhjê hõja omu nê nija mã àànHàhti jara gõ. Kot kagãmnuti pê ho htor nê ma nhÿri hpimxur xà wÿr htêm kaxyw. Nê kormã htor kaxyw nhùm kagãmnuti omu nê kot gô ho hanhir kaxyw hkôt hakwa rüm gô kapĩ nhùm hpikapĩr rax kumrêx. Te pyhti hprôt tÿx pyrãk. Hãmri nhùm Tirtüm omu nê nija nê tanhmã pika hto nhùm kãm axkjê nhùm gô hprôt nê kamã pikapĩr pa. Jakamã nhùm mex pê àànHàhti jara ho to nê ma kapôt ä pimxur xà hwÿr ma tẽ. Nê kamã pa hä amgrã axkrunêpxi nê hkôt mytwrÿ kêp 6 nhùm prem hamãr mex rãhã ho pa.

¹⁷ Hãmri nhùm kagãmnuti tee ri kãm hpĩr prãm kaprÿ nê gryk tÿx kumrêx. Hãmri nê ma ni hkwyjê hwÿr mō. Mẽ kot Tirtüm mẽ Jejus wa hkôt amnhĩ nhĩpêx o mẽ pa xwÿnhjê hwÿr tanhmã mẽ homnuj to kaxyw ma mẽ hwÿr mō. Hãmri nê tanhmã kot mẽ ho kaxyw gô xujanãr mÿ ri nõ.

Satanasti nõhõ kôwenatô wa kot gô xujanãr rûm kator
ã wa harënh
Sikûn Tesarôn 2.3-5

13 Tã pa axte mëmoj pumu. Nhûm gô xujanãr rûm Satanasti nõhõ kôwenatôjê hõja te mrymnuti pyrã nê àpir o mõ. Kagãmnuti pyrã nê hkrã kêp 7. Nê urak nê hpãr kêp 10. Nê hpãr piitã kamã pahi hã më ahkã. Nê ahkã piitã hã axtem tanhmã Tirtûm o kapër punuj to nê tanhmã haprÿ hto hã kagaja hikwÿ.

² Nê hkã te kêp ropkrorti kã pyrãk. Nê hakwa te kot rêãwti jakwa pyrãk. Nê ïhkra te kot pãati nhïhkra pyrãk. Jakamã na pre kagãmnuti nhÿ hã hihtÿx o kêp pahi hã pika nõhõ xwÿnhjê ho amnhïptãr o pa.

³ Nê hkrã hõ te më kot hayr o hpïr nhûm ra akupÿm htïr nê arï hayr xã wakre rã nyw pyrãk. Jakamã nhûm pika kamã më pa xwÿnhjaja amnhï jaêr pê omu nê kamã no puma nê. Hãmri nê hkôt amnhï nhïpêx o pa.

⁴ Hãmri nê kagãmnuti kot tanhmã mrymnuti ho nhûm ÿ hã më ho amnhïptãr jakamã nhûm më piitã hamê wa hã hpijaãm kaxyw wa kãm wa mex o wa mex ã wa harënh o pa. Nê mrymnuti hã axpën mã:

—Hêxta waa nê. Më pahtô na më pahte mrymnutita pyrã nê ã më pahte amnhï nhïpêx kot anhÿr? Më pahtô kot pu kutã xa nê paxihtÿx o hkurê kapa? Nã amrakati kumrêx. Anê.

⁵ Hãmri nhûm Satanasti tanhmã mrymnuti ho nhûm kapër o ri më hkôt pa nê më ho amnhïptãr o hã amgrã axkrunêpxi nê hkôt mytwrÿ kêp 6. No ãm axtem nê Tirtûm o kapër punuj o ri më hkôt pa. Nê ri tanhmã haprÿ hto nê õ krïja mex kêt ã harënh o ri më hkôt pa.

⁷ Hãmri nhûm Satanasti ra kot më hkurê kaxãr kaxyw kãm anê nhûm axtem nê Tirtûm pê hkrajê kutã amnhï xãm nê më hwÿr hprôt nê tanhmã hpïjapu hto ho pa nê më ho axtem nê më ho krihkrit pa nê ahpÿnhã ri pika piitã hkôt më uro hkwÿjê ho amnhïptãr o pa. Nê ahpÿnhã më kapër xwÿnh piitã më ho amnhïptã.

⁸ Jakamã nhûm më ohtô rax kumrêx nê mrymnuti hkôt amnhï nhïpêx. Nê kutã hkõn krã ho rôrök nê hkrï nê kãm mex o mex ã harê. No ãm më piitã hkêt. Kot më pahte amnhï tomnuj pãnhã amnhïrer xwÿnh kôt ra më kot amnhï xunhwÿr xwÿnhjaja tapxipixjaja na prem hkôt amnhï xunhwÿr kêt nê. Amnepê mã kormã amrakati ri Tirtûm më Jesus wa õ kagã kamã më htïr tûm nê më pa mã xwÿnh nhïxi xwÿnh pixjaja na prem mrymnuti pumu nê hkwÿjê rom hprï hã kot amnhï nhïpêx ã omunh kurê kumrêx nê hkôt amnhï nhïpêx kêt nê.

⁹ E ka më atõ axumar kaxyw ajamak kre hã kot kaj ixujarënh piitã ama nê kãm ajamaxpêr tÿx rãhã ho apa.

¹⁰ Jakamã kwa Tirtûm kôt ixkwÿjaja. Kwãr më mãmrï më apynê nê më ajagjê.

Nê kwãr më mãmrï wapo ho më ajayr o më apa. Nom kêr ka më umaj ixkaga hkêt nê. Ixkaga hkêt o ixkaga hkêt.

Më ãm ixkôt pix mã amnhï nhïpêx o ri apa rãhã ty.

Pika rûm mrymnuti hõ kator ã harënh
Makre 13.22

¹¹ Tã pa mrymnuti hõ pumu. Nom wamta pyrã nê gô xujanãr rûm kator kêt axtem pika rûm kato. Nê ôwêhti hkrare pyrã nê hpãr pijakrutre. Nê te ho kagãmnuti kapêr tÿx pyrã nê kapêr tÿx kumrêx o pa.

¹² Gô xujanãr rûm mrymnuti xàpir xwÿnhhta nhÿ hã pika nõhõ xwÿnhjê mã kapêr tÿx nê më kãm:

—E pika piitã hkôt më apa xwÿnhjaja më inhma. Kêr ka më kot hkrã hõ jayr o hpïr nhûm akupÿm htïr xwÿnhhta kôt pix mã amnhï nhïpêx rãhã ho ri apa. Nê kãm mex o mex ã harënh rãhã nê.

Anhÿr o më kãm kapêr. ¹³ Hãmri nê Satanasti nhÿ hã më kãm aa më kot mëmoj pumunh kêt kwÿ ho anhÿr o pa. Jao kaxkwa rûm tanhmã më kãm kuwy ho wrÿk to nhûm pikap rôrök nhûm më amnhï jaêr pê omu nê kamã no puma nê. ¹⁴ ã ri më noo mã më kãm amnhï nhïpêx anhÿr o ri më hkôt pa. Gô xujanãr rûm mrymnutija noo mã ã hêx rom amnhï nhïpêx anhÿr o më no kupyro pa nhûm më omu nê hkôt amnhï nhïpêx. Hãmri nhûm më kãm mëmoj tã karõ nê më kãm:

—E wam mrymnutita. Më kot hkrã hõ jayr o hpïr nhûm akupÿm htïr xwÿnhhta kêr ka më kãm hkarõ nhïpêx nê ho më anhõ sãnti. Kê më piitã hwÿr mra nê kutã hkõn krã ho rôrök nê hkrï nê amnhï to kuwy nê kãm mex o mex ã harê.

Anhÿr o më kãm hã karõ. ¹⁵ Hãmri nhûm më kuma nê mar xã hkôt hipêx nê ãm nhûm xa. Hãmri nhûm mrymnuti kot hitepta omu nê hwÿr tẽ nê tanhmã ho nhûm ra kapêr nê më kãm:

—E kêr ka më kot inhmx ã ijarënh kêt xwÿnhjê pynê nê më himex pa. Anê.

¹⁶ Hãmri nhûm pika rûm mrymnuti kator xwÿnhhta haxwÿja më kãm kapêr nê më kãm:

—E koja ixkwÿjaja inhÿ hã më apiitã më apê ixkwÿ hã më akagã. Më ate amnhï to rûnh xwÿnhjaja nê më ate amnhï to hkryre xwÿnhjaja. Nê amarï më kãm më axapênh xwÿnhjaja nê amnhï mã më axapênh xwÿnhjaja. Nê më akãxpore rûnh xwÿnhjaja nê më apê amrakati xwÿnhjaja. Kojã më apiitã më akagã hpa. Më akwÿ nhõkrã kagã nê më akwÿ xupök rûm më anhïhkra katut kagã.

¹⁷ —Gô xujanãr rûm mrymnutita nhïxi kot paj më atã hipêx. Rÿ hixi hã nûm nhïpêx. Hãmri ka më axãpkur xã japrôr kaxyw nhÿhÿm mra nhûm më atã hixita pumu nê rï kormã më amã mëmoj kwÿ ho wênê ka më amnhïm haprô nê ho axãpkur o ri apa. Nê më ate mëmoj to wênê xwÿnhjaja koja më apê mëmoj japrôr kaxyw më awÿr mra ka më tee ri nhÿhÿnh më hã hixi japêr hãmri nê më kãm mëmoj to wênê hkêt nê. ãm nhÿhÿnh më atã hixi hã kagãta pumunh pix kukwak ri kot kaj më awjaprô rÿ mëmoj to wênê. Anê.

¹⁸ E kwa kêr ka më ixte mëmoj pumunh nê më amã hã kagãta pumu nê ama nê kãm ajamaxpêr tÿx o apa. Mrymnutita nhïxi na kêp nûm. Nûmja kêp 666. E kaj më akrã hi mex xwÿnhjaja kot kaj më aprï hã ja mar tÿx kurê kumrêx.

Tirtüm mex ã mẽ grer

Apokarip 7.1-8

14 Tã pa axte mẽmoj pumu. Nhũm mẽ pahte amnhĩ tomnuj pãnhã amnhĩrer xwýnhja hixêt pê Siãwja nhĩmõk ã xa. Nẽ puhã mẽ ohtô rax kumrêx nõ kuhê. Mẽ ohtô ho mẽ ohtô. Piitã kamã mẽ kêp 144.000. Nẽ piitã õkrã hã mẽ pahte amnhĩ tomnuj pãnhã amnhĩrer xwýnh mẽ Hipêêxã wa hixi jaxwýr pa mẽ omu.

² Nhũm mẽ kaxkwa kamã grer o kuhê. Mẽ grerja mex o mex. Te kot gô hprõt tỳx hkoko htỳx pyrãk. Nẽ te na katõtõk tỳx pyrãk. Nẽ te wiorãw môr xwýnhjaja kot hkakrênh mex pyrãk pa mẽ mar o xa.

³ Nẽ mẽ grer xwýnhjaja. Jejus puhã mẽ ohtô rax kumrêx nõ mẽ kuhê xwýnhjaja na prem Tirtüm kot mẽ ho amnhĩptar ã hkrĩ xãta kuri grer o kuhê. Nẽ mẽmoj tĩr pê kwat xwýnhjê mẽ mẽ ãptar tũm pê 24jê kuri grer o kuhê. Mẽ grer nyw o gre. ãm mẽ tapxipixjaja mẽ kot mẽ grer nywja mar. Ra mẽ kêp Tirtüm kra hã mẽ kot mẽ õkrã hã Tirtüm mẽ Kra Jejus wa hixi ã kagã nhũm Tirtüm kot ra mrymnuti mẽ hõta wa kêp mẽ utar nõ amnhĩ wýr mẽ ho àpir xwýnh na pre mẽ. ãm mẽ tapxipixjaja mẽ grer nywja ma nõ wa kãm ho grer o kuhê.

⁴ Na prem tãm amnhĩ nhĩpêx nõ Tirtüm kõt amnhĩ nhĩpêx rãhã ho pa. Te mẽ kot amnhĩ prõ pix tãnopxar rãhã ho pata pyrãk. Nẽ ri tanhmã hêx to rý tanhmã ri amnhĩ tomnuj to ho pa hkêt nõ. ãm tãm ri amnhĩ nhĩpêx mex o pa. Mẽ kêp Tirtüm mẽ mẽ pahte amnhĩ tomnuj pãnhã amnhĩrer xwýnh kwý jakamã na prem mẽ pahte amnhĩ tomnuj pãnhã amnhĩrer xwýnhhta kõt pix mã amnhĩ nhĩpêx o pa. Jakamã na prem mrymnuti kutã rõrõk nõ kãm mex o mex ã harênh kêt nõ. Tã mẽ kumrêxjaja Tirtüm mẽ Kra wa kuri wa kãm grer o kuhê.

Tirtüm kapêr o wrýk xwýnh pijakrunêpxi jarênh

⁶ Tã pa axte Tirtüm kapêr o wrýk xwýnhjê hõ pumu nhũm kỳx pê ri htor o pa. Ahpýnhã ri pika piitã hkõt mẽ uro hkwyjê hkõt. Na ahpýnhã ri mẽ kapêr xwýnhjê piitã mẽ hkõt mẽ kãm Tirtüm kot tanhmã mẽ hipêx to hã harênh kaxyw. Ahpýnhã mẽ kapêr xwýnh piitã mẽ mẽ kãm harênh o pa. Nẽ htor o pa pê kỳx pê mẽ mẽ kãm kapêr nõ mẽ mẽ kãm:

⁷ "E na ra Tirtüm mẽ ate amnhĩ tomnuj mýrapê tanhmã mẽ ato kaxyw. Jakamã kwa mẽ tokyx hã apijaãm kaxyw akõn krã ho arõrõk nõ akrĩ nõ kãm mex o mex ã harê. Kêp mẽmoj piitã ho kator xwýnh na. Na pre kaxkwa ho kato nõ pika ho kato nõ gô xujanãr o kato nõ hino ho kato nõ mẽmoj piitã ho kator pa. Jakamã kwa kêr ka mẽ tapxipix ã mãn apijaãm nõ kãm mex o mex hã harênh rãhã ho apa."

Anhýr o mẽ kãm kapêr. ⁸ Hãmri nhũm hõja wamta kõt tẽ nõ urak nõ kỳx pê mẽ mẽ kãm kapêr o:

—Koja Tirtüm tokyx Papirõn grãnh pa. Na hte krĩ nhõ xwýnhjaja amnhĩ tomnuj pix rãhã ho pa. Mẽ kot amnhĩ nhĩpêx te mẽ kot kagõxyhti ho hkõm nõ amnhĩ mẽ mẽ piitã mẽ mẽ kãm õr nõ ho mẽ ho pipãnh pyrãk. Na htem

mênijê piitã ho amnhĩkati o pa. Nẽ amnhĩ kwýjê pê mẽ hprõ ho amnhĩkati. Nẽ amnhĩ mẽ pika piitã hkõt mẽ pa xwýnhjê mã anhýr o pa. Mẽ kot mẽ urak nõ ã amnhĩ nhĩpêx anhýr o pa kaxyw mẽ kãm anhýr o pa. Ja mýrapê na ra Tirtüm kot tanhmã mẽ ho kaxyw mẽ hã amnhĩ jarê. Anê.

⁹ Tã nhũm wa hkõt hõja tẽ nõ wa urak nõ kax pê pika nhõ xwýnhjê mã kapêr nõ mẽ mẽ kãm:

—E mẽ ate mrymnuti kutã akõn krã ho arõrõk nõ akrĩ nõ kãm mex ã harênh xwýnhjaja. Nẽ mẽ ate karõ nhĩpêx nõ kutã akõn krã ho akrĩ nõ kãm mex ã harênh xwýnhjaja. Nẽ mẽ anhõkrã nõ mẽ anhĩkra hã hixi hã kagã xwýnhjaja.

¹⁰ —Tirtüm na tee ja hã mẽ apumu nõ mẽ akamã gryk tỳx kumrêx. Mẽ ate kapêr kuhpa hã mrymnuti hkõt amnhĩ xunhwýr jakamã nhũm mẽ akamã gryk tỳx o mẽ akamã gryk tỳx. Jakamã koja kuwy hpõk rãhã ho rãhã xwýnhhta kamã mẽ arênh pa ka mẽ amnhĩ xã htỳx kamã ajamak rãhã apa ho apa. Kojã kuwy hpõkja aa hapêx kêt nõ kurũm kax mã hkũm àpir o pa rãhã nõ. Kojã ã mẽ ate amnhĩ tomnuj o mẽ apa xwýnhjê nhĩpêx anê ka mẽ mẽ kamã apa ho apa nõ aa kurũm ajapõx kêt nõ mẽ kamã amnhĩ xã htỳx kãm ajamak rãhã apa ho apa. Arĩgro hãn kamãt kãm arĩ ã amnhĩ nhĩpêx anhýr rãhã apa ho apa. Mẽ ate gõj rũm mrymnuti mẽ hkarõ ho sãnti wa kutã akõn krã ho arõrõk nõ akrĩ nõ wa kãm wa mex ã wa harênhja mýrapê kot kaj mẽ ã amnhĩ nhĩpêx anê. Kot mẽ pahte amnhĩ tomnuj pãnhã amnhĩrer xwýnh mẽ Tirtüm kapêr o mẽ wrýk xwýnhjê noo mã kot kaj mẽ ã amnhĩ nhĩpêx anhýr o apa.

¹² Anhýr o mẽ mẽ kãm kapêr jakamã kwa kêr pu mẽ pahte Tirtüm kõt amnhĩ xunhwýr xwýnhjaja mẽ hkukamã mẽ harênhja ma nõ Tirtüm kapêr kõt pix mã amnhĩ nhĩpêx rãhã ho ri papa. Mẽ kot tanhmã hã mẽ pahto htã pu mẽ hkaga hkêt nõ amnhĩ kaxyw Jejus kõt pajamaxpêr tỳx rãhã nõ. Hãmri nõ nhýrmã mẽ kurom ma õ krĩ hwýr api nõ mẽ kãm pamek kumrêx nõ papa ho papa.

Mẽ kêp Jejus kwý hã mẽ htyk xwýnhjê jarênh

Wam Tesarõn 4.16

¹³ Tã nhũm kaxkwa kamã mẽhõja axte inhãmã kapêr nõ inhãmã:

E Juãw. Kêr ka ã akwyjê mã mẽmoj tã kagã anê nõ mẽ mẽ kãm hã kagã ho: "E mẽ ate Tirtüm kõt ri amnhĩ nhĩpêx xwýnhjaja. Mẽ kot Tirtüm ã mẽ apar nhũm mẽ atyk tã koja amnhĩ tã mẽ ato mex rax kumrêx." Anhýr o mẽ mẽ kãm hã kagã.

Anhýr o inhãmã kapêr. Hãmri nhũm Tirtüm Karõja kuma nõ mẽ kãm:

—Nã ãm hãmri na ka ã mẽ harênh anê. Ra Tirtüm kot amnhĩ tã mẽ omunh rãhã ho pa. Mẽ kot kõt pix mã amnhĩ nhĩpêx o pa pê mẽ mẽ kãm mẽ hkurê xwýnhjê kutã amnhĩ to htỳx rãhã htykja nhũm Tirtüm kot amnhĩ tã mẽ omunh mex. Kojã mẽ ho mex kumrêx. Mẽ kot Jejus ã mẽ hpar tã koja mẽ ho mex rax nõ nhũm mẽ kuri mex rãhã nõ pa ho pa nhũm mẽhõ axte tanhmã mẽ ho hkêt nõ. Anê.

Tirtüm kot tanhmã mě kãm hkĩnh xwýnhjê nhĩpêx to

¹⁴ Tã pa axte mẽmoj pumu. Kaxkwa kamã kakrã jaka-
jre pumu. Nê kamã mẽhõj te panhĩ pyrã nê nhỹ. Nhũm
ôr o pahi hã mẽ ahkã htu nê kuteere xwagixre py nê o
nhỹ.

¹⁵ Hãmri nhũm kaxkwa kamã Tirtüm kapêr o mẽ
wryk xwýnhjê hõja Tirtüm mã amnhĩ jarênh xà hã ixkre
rũm kato nê kakrã jaka kamã ýr xwýnhta mã kapêr.
Kàx pê kãm kapêr nê kãm:

—E pika nhõ xwýnhjaja te mẽ hpur kãm mẽmo hy ra
hkamrêk nê hikênh mã mex pyrãk. Jakamã anhõ ku-
teere ata py nê ma mẽ hkôt tanhmã ri mẽ ho ho ri mẽ
hkôt apa. Te mẽ kot mẽmo hy nhĩkênh o ri pa pyrãk o
mẽ hipêx nê ma ho mẽ himex o ri apa. Anê.

¹⁶ Hãmri nhũm kuma nê pika piitã mýri õ kuteere ho
apê nê te mẽmo hy jakãr pyrãk o mẽ hipêx.

¹⁷ Hãmri nhũm axte Tirtüm mã amnhĩ jarênh xà hã
ixkre rũm kapêr o mẽ wrykjê hõja kato. ĩhkra kamã ku-
teere xwa gixre py nê o xa. ¹⁸ Hãmri nhũm axte hõja
ixkre rũm kê hkôt kato nê hkukamã kator xwýnhta mã
kapêr. Kàx pê kãm kapêr nê kãm:

—E na ra Tirtüm tanhmã mẽ kot amnhĩ tomnuj to hã
tanhmã mẽ hipêx to kaxyw. Te mẽ kêp mẽ hpur kãm
mẽmo xô pê uwa ra hkamrêk nê rênh mã tãm pyrãk.
Jakamã ma pika hwýr mẽ hwýr wry nê mẽ hkôt ri anhõ
kuteere ho mẽ himex o ri apa. Anê.

¹⁹ Hãmri nhũm kuma nê ma pika hwýr wry nê mẽ
hipêx o te mẽ kot uwa xô rênh nê přes kãm hkapĩr nê
kagõ janênh pyrã nê mẽ hkôt ri kuteere ho mẽ hpar o
pa. Tirtüm ra mẽ kamã gryk tỳx o mẽ kamã gryk tỳx
jakamã nhũm ã mẽ hkôt mẽ hipêx anhỹr o ri pa.

²⁰ Jakamã nhũm mẽ hkamrõ hpikapĩr rax kumrêx o
uwa kagõ jakre. Te ho pyhti hprõt o nõr pyrãk. Jao up-
ým o 2 met nê hkôt ho mẽj met. Nom hprõt xà hkôt ry
rax o ry rax. Ho 300 kirõm. Nhũm ã mẽ kamrõ hprõt
rax anê.

Tirtüm mex ã mẽ gre

15 Tã pa axte kaxkwa kamã mẽmoj pumu. Hãmri
nê amnhĩ jaêr pê omu nê tee ri hkukamã ijamax-
pêr. Aa mẽ pahte mẽmoj ã kot anhỹr pumunh kêt
xwýnh pa pre omu. Nhũm Tirtüm kapêr o mẽ wryk
xwýnh pê 7jaja ahpýnhã pika hkôt mẽ kot amnhĩ tom-
nuj xwýnhjê homnuj kaxyw akuprõ nê kuhê. Ām jajê
pixjaja koja Tirtüm nhỹ hã axte tanhmã mẽ homnuj to
nê ho anhỹr pa hãmri nhũm ra ja hapêx o hapêx.

² Jakamã pa axte Tirtüm kapem gõ rax pumu. Te kot
kàx karýr jaxênh mẽ kuwy hpõk o pihkãr pyrãk xwýnh-
ja hprõt o nõ. Nhũm Tirtüm kra hkwyjaja gõ mý ri ohtõ
rax kumrêx nê kuhê. Na pre ra mrymnutija tee ri am-
nhĩ kôt mẽ rênh mã nê tee ri mẽ hã amnhĩ nhĩxi hã kagã
hprãm kaprý nom nhũm mẽ hkaga nê Jejus kôt amnhĩ
nhĩpêx rãhã ho pa. Nê mrymnuti karõ ho sãnti mã mex
ã harênh kêt rãhã ty nê kaxkwa hwýr api. Jakamã
nhũm Tirtüm amnhĩ tã mẽ omu nê mẽ kãm wiorãwti
hkwy gõ nhũm mẽ piitã hamý nê gõ rax mý ri ho kuhê.

³ Hãmri nê Tirtüm mã tanhmã amnhĩ to ho pa xwýnh
pê Mojes mẽ mẽ pahte amnhĩ tomnuj pãnhã amnhĩrer
xwýnhta wa kot Tirtüm mã greta nhũm mẽ Tirtüm mã
ho gre o kuhê nê gre o:

E Pahi Maati Tirtüm. Na pa mẽ ra inhmex pê awýr
ixãpir pa.

Ām hãmri na ka hte tanhmã amnhĩ nhĩpêx to ho ri
apa.

Aa tanhmã axêx to hkêt.

Nê mẽ ixrom axihtỳx o axihtỳx.

Nê mẽ ixrom axãhpumunh o axãhpumunh.

Jakamã na ka hte mẽ inhmã aa mẽ ixte mẽmoj
pumunh kêt kwý ho anhỹr o apa.

Pika piitã hkôt ahpýnhã mẽ ho amnhĩptãr xwýnhjê
nhõ Pahi Maati na ka.

Nê ate tãm amnhĩ nhĩpêx xwýnh na ka.

⁴ Jakamã na htem piitã atã hpijaãm o pa.

Nê amã mẽ kapêr xãptãr pix o amã kapêr.

Nê amã amex o amex ã ajarênh rãhã nê. Ām hãmri
mẽ ixrom kapxipix amex o amex.

Jakamã koja ahpýnhã pika piitã hkôt akrajê piitã ate
tãm amnhĩ nhĩpêx nê tãm mẽ piitã tanhmã mẽ harênh
to hã ajarênh ma nê awýr mra nê akutã hkõn krã ho
rõrõk nê hkrĩ nê amã amex o amex ã ajarê. Anê.

Mẽ homnu xà hã xijere jamýnh xwýnh jarênh

⁵ Tã na pa axte mẽmoj pumu. Kaxkwa kamã Tirtüm
nhõrkwy hã hitom xà piitã amnhĩ kahê xà rê nê kuhê
pa omu. Nê ixkre kamã õ hitom mex maati haxwýja
amnhĩ kahê xà mẽ nê xa.

⁶ Hãmri nhũm ixkreja rũm Tirtüm kapêr o mẽ wryk
xwýnh pê 7jaja hapõj nê kuhê. Mẽ ê hakajre nê hirã
htỳx kumrêx. Nê mẽ hinõ pre xãja ôr pix o. Nê piitã
Tirtüm mã tanhmã kot mẽ homnuj to xà hã xijere pê
7ta jamýnh kaxyw kuhê.

⁷ Hãmri nhũm mẽmoj tĩr pê kwatjê õja mẽ kãm xijere
hkwy jamý nê mẽ hwýr o tẽ. Xijere kêp 7 nê piitã ôr o.
Nhũm hamý nê Tirtüm kapêr o mẽ wryk xwýnhajê
hwýr o tẽ nê ho mẽ hipêx nhũm mẽ ahpýnhã hamý. Xi-
jere kamã Tirtüm gryk xà jamý nê o kuhê.

⁸ Pu nhũm Tirtüm rũm kuwy hkũm hapõj. Tirtüm
mex nê hihtỳx xwýnhta rũm hapõx rax o ixkreta kunor
pa nhũm mẽ tee ri hwýr gjêx prãm kaprý.

Xijere kamã mẽ homnu xà pê 7 jarênh

16 Tã pa arĩ mẽmoj pumu nhũm Tirtüm nhõrkwy
kamã mẽhõja kapêr o wryk xwýnh pê 7jê mã kãx
pê kapêr nê mẽ kãm:

—E na pa ra mẽ kot ixkapêr kwým ri amnhĩ nhĩpêx
xwýnhjê pumu nhũm ixpê ja omnuj tỳx o ixpê omnuj
tỳx. Jakamã e mẽ anhõ xijereta jamý nê ma pika hwýr
mẽ hwýr wry nê axpên pãnhã mẽ hã xijere kamã mẽ
homnu xà kapĩ. E mẽ tokyx ma mẽ hwýr wry. Anê.

² Hãmri nhũm mẽ kuma nê axpên pãnhã mẽ hwýr
wry. Nhũm wamta kumrêx pika piitã hkôt mẽ homnu
xãta kapĩ. Pu nhũm mẽ kot mrymnuti mẽ õ sãnti wa

kām mex ã harēnh nē amnhī tā wa hixi jaxwýr xwýnh piitā hkànhy hpa nē à htýx kumrēx nē ri pa.

³ Hāmri nhūm wamta kôt hōja õ xijere py nē gō xujanār kām hkapīr pa nhūm gō te mē htykjē kamrō pyrā nē kamā mēmo mry htyyxā rēnh xwýnh piitā pikaprār pa.

⁴ Tā ra xijere kapīr xwýnh o axkrut nē õ xijere kapī hāmri nhūm hkôt hōta õ xijere py nē hpānhā gō hkryre piitā hkôt hkapīr pa. Pyhti nē ri hino piitā hkôt hkapīr pa nhūm piitā gō xujanār pyrā nē mē hkamrō hā amnhī jahkre hpa.

⁵ Hāmri nhūm axtem Tirtūm kapēr o mē wrýk xwýnhjē hō kot kām gō piitā hamār xwýnh ta ja hā omu nē Tirtūm mā kām:

Pa amex rāhā apa ho apa xwýnh. Nē arāhā apa ho apa xwýnh.

Nā ãm hāmri na ka ã mē kēp gōta nhīpēx anē.

⁶ Na prem mē kot akôt amnhī nhīpēx xwýnhjē mē mē kām ri akapēr jarēnh xwýnhjē hpar o pa nhūm mē hkamrō hpikapīr rax nē.

Tā ka ra mē hā mē kēp mē hkōm xà homnu hpa nhūm mē kēp mē hkamrō ã amnhī jahkre nhūm mē tee ri ho hkōm mā. Nā ãm hāmri na ka ã mē kēp gō nhīpēx anē Tirtūm. Anē.

⁷ Hāmri nhūm mē kot Tirtūm mā mēmoj nhōr xà hā mēsti hpar pē hkrī xwýnhjē hōja kuma nē kām:

Nā ãm hāmri na ã ajarēnh anē Tirtūm.

Ām hāmri na ka ã akrajē hā mē hipēx anē.

Ra ate mē hā amnhī jarēnh xà hkôt na ka hte tanhmā mē hipēx to.

Nā apē mē inhō Tirtūm Maati na ka. Mē ixrom axihtýx o axihtýx nē axàhpumunh o axàhpumunh. Anē.

⁸ Tā ra axkrunēpxi nē õ xijere kapī. Jakamā nhūm mē hpānhā hōja õ xijere o tē nē myyti hā hkapīr pa nhūm hkagro htýx nē pika hkôt mē pa xwýnhjē hkà ho hxēt o pa.

⁹ Kagro htýx o hkagro htýx jakamā mē hkà ho hxēt nhūm mē kamā hkà kajē hpa. Hāmri nē tee ri amnhī pumu nē hamaxpēr o:

—Nā Tirtūmtija na ã mē pahomnuj týx anē. Anē.

Hāmri nē kamā gryk týx nē haprý nē tanhmā ho kapēr punuj to ho pa. Nom mē kot amnhī tomnuj kaga nē kām mex o mex ã harēnh kēt nē arī tanhmā amnhī tomnuj to ho pa.

¹⁰ Nhūm ra kēp kwat nē õ xijere kamā mēmojja kapī. Jakamā nhūm ra hpānhā hōja õ xijere o tē nē gōj rūm mrymnuti kot mē ho amnhīptār xà hā hkrī xà hā hkapīr pa. Jakamā nhūm ra kot mē ho amnhīptār xà hā pikaja kamā kamàt kō htyk par kumrēx. Hāmri nhūm mrymnuti mē hkôt mē kot amnhī nhīpēx xwýnhjē hā kamàt kō hpa nhūm mē amnhī xà htýx ã maj amnhī nham o axpēn kamnhar týx kumrēx. ¹¹ Nē ã Tirtūm kot mē hipēx anhýr ã amnhī tā omu nē kamā gryk týx nē tanhmā ho kapēr punuj to ho pa. No ãm kot amnhī tomnuj xwýnh ã amnhī pumunh nē kot amnhī tomnuj kaga hkēt nē.

¹² Nhūm prem ra kēp sīk nē õ xijere kamā mēmoj kapī. Jakamā nhūm hpānhā hōja õ xijere kamā mēmoj-

ta o tē nē pyhti pē Erax kamā hkapīr pa nhūm gōja grā pa nē te kēp pry pyrā nē nō. Jakamā nhūm myt japōx xà rūm mē ho amnhīptār xwýnhjaja nē pōristijaja hāmri pijapu kaxyw Jerujarē hwýr nojarēt nē hā hwýr pa.

¹³ Tā nhūm kagāmnuti mē ý hā mē kām hēx o pa xwýnh mē mrymnutita wa mē hakwa rūm mēmoj te priti pyrā nē hapōx o pa. No ãm priti hkēt mē kēp Satanasti mā mē àpēnh xwýnh kwýy.

¹⁴ Jakamā na prem pika piitā hkôt mē kot aa mēmoj pumunh kēt kwý ho anhýr o hēx rom mē no kupy o mē hkôt pa. Tā pika piitā hkôt mē ho amnhīptār xwýnhjē mē ho pikuprōnh kaxyw mē hapēr o pa. Mē kot Tirtūm xihtýx o hihtýx kurē kaxār kaxyw mē pijapu xà hā arīgro kukamā mē ho pikuprōnh o pa.

Jeus kot amnhī kwýjē mā kapēr ã harēnh

¹⁵ Tā nhūm Jeus pika hkôt hkrajaja arī mē htīr nē pa xwýnhjē mā kapēr nē mē kām:

E mē inhma ixkwýjaja. Akupým ixte mē awýr ixwrýk xà hā arīgroja ã kot paj te mē àhkīnh xwýnh kot amnhī nhīpēx pyrā nē mē ajaēr pē mē awýr wrý. Jakamā kēr ka mē amnhī wýr ijamār rāhā ho apa. Kēr pa akupým wrý ka mē amnhī wýr ixpumu nē akīnh nē amnhī kamā amā ixpuma hkēt nē. Anē.

Mē kot axpēn kurē kaxār kaxyw mē pikuprōnh ã mē harēnh

¹⁶ Tā nhūm Satanasti hkwyjaja pika piitā hkôt mē ho amnhīptār xwýnhjē ho pikuprōnh pa nē mē hkurē kaxār kaxyw ma Ijaew kot kām “Amaketō” jarēnhja wýr mra.

¹⁷ Hāmri nhūm Tirtūm kapēr o mē wrýk xwýnh pē 7 kot hitepta õ xijere py nē kàx mā kamā mēmoj kapīr pa. Jakamā nhūm Tirtūm nhōrkwý kamā mē ho amnhīptār ã hkrī xà rūm Tirtūm kàx pē kapēr o:

—E hāmri. Na pa ra mē kot amnhī tomnuj mýrapē tanhmā mē ho jatur xàm mēnh kaxyw. Anē.

¹⁸ Pu nhūm na hkatōtōk nē hkrakrak nē haxēnh nhūm pika htertēt týx nē. Aa mē kot pika htertēt týx kot anhýr ã omunh kēt kumrēx.

¹⁹ Jakamā nhūm Papirōnja kajē axkrunēpxi. Papirōnh nhō xwýnhjaja kot amnhī tomnuj týx o paja mýrapē nhūm Tirtūm ã mē hipēx anē. Nē pika htertēt o pika piitā hkôt krī grānh pa. ²⁰ Nhūm gō hipōk piitā gōja hā axkamur nhūm hapēx pa. Nē kēn prēk nē hkrā hixēt rôrōk nē hpigrānh pa. Pika htertēt týx kumrēx jakamā ã mēmoj amnhī nhīpēx anē. ²¹ Nē na mē pē jēr krā jakootija mē piitā mē hipy rôrōk. No ãm hkrā hkryre hkēt hkrā rūnh kumrēx. Ām hpýnh nē kamā kēp 40 kir nē mē hā rôrōk nhūm mē tee ri amnhī tā ã omu nē Tirtūm kamā gryk týx nē haprý nē ho kapēr punuj nē.

Tirtūm kra hkēt xwýnhjē jarēnh

17 Tā pa pre kē axte mēmoj pumu. Nhūm kot xijere jamýnh xwýnhjē hōja ixwýr tē nē inh mā: —E ma ixkôt tē nē mēmoj pumu. Anē.

Hämri pa kuma ně ma hkôt tě nhům inhmä:

—Nä ahpýnhä gô rax mýri krí nhõ xwýnhjaja te ho ni hkuprý gô mý ri ýr ně kām mēmyjē piitā hkīnh o ýr xwýnhja pyrāk. Na htem urāk ně Tirtüm kapēr kôt ri amnhī nhīpēx kēt ně. Ām htýx ri tanhmā amnhī tomnuj to ho pa. Jakamā koja Tirtüm tanhmā mē homnuj týt to ně mē ho hapēx. ² Krí piitā hkôt mē ho amnhīptār xwýnhjaja na hte ma mē õ krí hwýr mra ně te mē kot mē hkuprýjē ho amnhīkati pyrāk o amnhī nhīpēx. Ně te pipānh ně htýx ri amnhī nhīpēx pyrāk o amnhī nhīpēx o pa. Nhům krí nhõ xwýnhjaja mē urāk ně amnhī krā hkôt pix mā tanhmā amnhī tomnuj to ho ri pa. E ma ixkôt tě ně ja hā mē omu. Anē.

³ Hämri nhům Tirtüm Karõ tanhmā ixto nhům kapēr o wrýk xwýnhja ma kapôt wýr ixto mō pa kapôt ā mrymnuti hkrā kēp 7 ně kamā hpār kēp 10 xwýnhja pumu nhům hkamrēti ně xa. Ně ĩ piitā hā tanhmā Tirtüm o kapēr punuj to hā kagà. Nhům katut ā mēhõ ni kuprýta nhý. Mē ho amnhīptār xwýnh ā mē ê kakrā htyk ně hkamrēk o hkukār jaxà ně hā nhý. Ně ôr o õkrexē. Ně ôr o hinwýyxē ně ĩhkra kamā kàx. Ām ôr pix o hikukrēx. Ně kēn mex karýr pix o amnhī jamrēx. Ně ôr o kopti hõ py ně hā nhý. Kopti kamā ni kuprý kot amnhī tomnuj xà. Ām kot mē kēp mē mjēn o amnhīkati ho pa xà pix nhům kupy ně o nhý.

⁵ Ně õkrā hā amnhī nhīxi hā kagà kot:

Inhīxi pimxur pē *PAPIRŌN RAXTI*.

Ně ixpē mē kēp mē mjēnjē ho amnhīkati ho mē pa xwýnhjē nā na pa.

Ně ixpē mē kot axpēn prõ ho amnhīkati o mē pa xwýnhjē nā na pa.

Ně ixpē mē kot Tirtüm nē mē kām hēx o ri mē pa xwýnhjē nā na pa.

Ně ixpē mē kot Tirtüm kapēr kôt amnhī nhīpēx o pa hkēt xwýnhjē nā na pa.

Anhýr o õkrā hā amnhī nhīxi hā kagà kot anhýr.

⁶ Nhům axpā ně nhý pa omu. No ām kagõxyhti ho hpiānh kēt. Mē kot Jesus kôt amnhī xunhwýr ně ri mē kām Jesus kēp mē õ pahihtī hā harēnh xwýnhjē kamnhwýr o mē hpar nhům mē hkamrõ pikapīr xwýnhjē kamrõ ho na pre axpā ně nhý. Pa ā kot amnhī nhīpēx anhýr ā omu ně tee ri ijamaxpēr.

⁷ Hämri nhům Tirtüm kapēr o wrýk xwýnhja inhmä:

—Kwa mon ka ri ja pumu ně tee ri ajamaxpēr? E kot paj ixprī hā amā harē ka inhma. Niti mē hā ýr xwýnh pē mrymnutita. Krā pē 7 ně kamā hpār pē 10 xwýnhja kot paj ixprī hā amā hamē wa harē ka wa harēnh ma.

⁸ —Nä mrymnutija na pre htír ně ri pa tā ty ně ahkre xupýmti kamā hikwý. Nom koja akupým htír ně kurým kato nhům mē piitā omu ně ahpýnhā tanhmā hamaxpēr to. Amnepēm kormā amrakati ri Tirtüm kot õ kagà kamā mē htír tūm ně mē pa mā xwýnhjē nhīxi jaxwýr xwýnhjaja koja kator ā omu ně ām omu ně tanhmā hamaxpēr to hkēt ně. No mē kot Jesus kôt amnhī xunhwýr kēt xwýnhjaja koja mē amnhī jaēr pē akupým kator ā omu ně tee ri hkukamā hamaxpēr. Hämri ně axpēn mā: “Kwa amnepēm htyk tā ra tanhmā amnhī to ně akupým htír ně api ně mō.” Anhýr o axpēn mā harē.

Hämri nhům kato ně ma tě nhům Tirtüm tā ho hapēx kumrēx nhům hapēx o hapēx.

⁹ —Kwa inhma ně jam ajamaxpēr týt ně. Mrymnuti krā pē 7ta te kēp hixēt prēk pē 7 pyrā ně hā ýr xwýnh ni kuprýta te hixēt prēk pē 7ta ā ýr pyrāk.

¹⁰ —Ně mrymnuti hkrā pē 7ja te kēp mē ho amnhīptār xwýnh pē 7 pyrāk. Nhům mē ho amnhīptār xwýnhjaja te mē kēp 5 ně ra htyk pyrāk nhům hkôt hõja arī mē ho amnhīptār o pa. No kot hitepta kormā. Nom koja mē ho amnhīptār ry hkēt ně.

¹¹ —Mrymnuti htír ně pa htā htyk ně ra akupým htír ně àpir xwýnhja koja hkrā hitepta pānhā mē ho amnhīptār o pa. Jakamā te mē ho amnhīptār xwýnh pē 7jē hõ pyrāk. Koja hkrā pē 7ja mē ho amnhīptā ně gaa ně htyk mē nhům hpānhā mrymnutita hpānhā mē ho amnhīptā. Hämri nhům rī kormā Tirtüm tā mē ho hapēx par kumrēx.

¹² —Ně ate mrymnuti hkrā kamā pār pē 10 pumunh xwýnhja te mē kēp mē ho amnhīptār xwýnh pē 10 pyrāk. No ām jaja na kormā mē ho amnhīptār kēt ně. Koja mē nhýrmā anhīpē mrymnuti nhý hā ahpýnhā ri mē ho amnhīptār o pa nom mē ho amnhīptār japjē hkēt ně. ¹³ Koja mē tanhmā ja hā axpēn mar to hāmri ně mrymnuti mā anē nhům mē hpānhā mē piitā mē ho amnhīptā.

¹⁴ —Ně mē ho amnhīptār xwýnh pē 10jaja koja mē pahte amnhī tomnuj pānhā amnhīrer xwýnh kurē kaxār kaxyw hwýr mra ně kutā pijapu ho kuhē. No ām tee ri kām tanhmā ho hprām hkapyrý nhům mē ho axtem ně amnhī tā mē himex pa. Hihtýt o hihtýt o kot mē ho hpimràatā mē hakrenh par. Ně kēp pika piitā hkôt mē ho amnhīptār xwýnhjē nhõ Pahihtī. Tām na pre amnhī wýr mē kot hkôt amnhī nhīpēx o mē pa xwýnhjē wý nhům htem amnhī kaxyw hkôt hamaxpēr mex rāhā ho pa. ¹⁵ —Ně krí pē Papirõn kapem gõ xohtõ mý ri ni kuprý hkrí xwýnhja. Gõ xohtõja te kēp ahpýnhā ri pika piitā hkôt mē uro hkwy pyrāk. Ně te ahpýnhā ri mē kapēr xwýnh kwý pyrāk.

¹⁶ —Ně mrymnuti hpār pē 10ta kēp mē ho amnhīptār xwýnh pē 10 pyrāk. Jakamā koja mē kām ni kuprýta prām nõkati ně kamā gryk týt kumrēx. Hämri ně hwýr mra ně kēp hikukrēx piitā utà ně kēp ê hkwrýnh pa nhům hkēnh mex ně xa. Hämri nhům mē kupī ně ĩ hkrēr pa ně kuwy kamā hi rē nhům kaxār pa ně hapēx.

¹⁷ —Na pre pahi pē 10jaja mrymnuti hkôt amnhī xunhwý nhům Tirtüm ām ja hā mē omu ně tanhmā nē mē kām ně hkēt ně. Jakamā koja mē ām hkôt pix mā amnhī nhīpēx o pa rāhā nhům Tirtüm mē ho hapēx. Ně mē õ krí mē mē ho hpimràatā mē ho hapēx pa. Hämri ně mē ho hapēx o mē ho hapēx.

¹⁸ —Ně ate mēhõ ni kuprý pumunh xwýnhja te kēp krí rax pē Papirõn nhõ xwýnhjē pyrāk. Ně mē ho amnhīptār xwýnhja pika piitā hkôt mē ho amnhīptār xwýnhjē hkrāhtüm na. Anē.

Ā Tirtüm kapēr o mē wrýk xwýnhja inhmā mē harēnh anē. Pa kuma ně ô ri mē amā hā kagà. Mē ate kamā harēnh ně aprī hā mar týt kaxyw.

Tirtüm kot Papirõn grành par ã harënh

18 Tã pa kê axte mëmoj pumu. Nhũm axte Tirtüm kapër o mẽ wryk xwýnhjê hõja kaxkwa rùm ah-par mã wryk o tẽ. Tirtüm nhỹ hã hihtýx nẽ kamã hirã rax kumrëx o pika piitã hkõt mẽ kãm hirã pa. ² Nẽ ah-par mã tẽn wry nẽ kàx pẽ kapër o:

E koja Papirõnja pigrành pa nẽ hpãnhã kęp Satanasti mã mẽ àpênh xwýnhjê papxà nẽ kęp nhõnhti papxà. Hãmri nẽ aa kamã mëmoj mex kêt kumrëx.

³ Krí nhõ xwýnhjaja na htem Tirtüm kapër kõt amnhĩ nhĩpêx kêt nẽ amnhĩ krã hkõt kãm prãm xà hkõt pix mã tanhmã amnhĩ tomnuj to ho pa. Te mẽhõ pipãnh nẽ htýx ri amnhĩ nhĩpêx o pa pyrãk.

Nhũm krĩ piitã hkõt mẽ ho amnhĩptàr xwýnhjaja mẽ hwýr mra nẽ mënijê ho amnhĩkati ho pa.

Nẽ krĩ nhõ xwýnhjaja mëmoj pumu nẽ kãm hkĩnh nẽ haprõr kurê kumrëx o pa nẽ aa ujaarõr o hapêx kêt nẽ.

Jakamã na hte krĩ hkwy nhõ xwýnhjaja mẽ hwýr mẽ-moj to pa nẽ xatã mẽ kãm ho wẽnê nẽ mẽ kukwak ri mẽ hikàxpore rũnh nẽ pa.

Anhýr o kapër. ⁴ Hãmri nhũm Tirtüm Papirõn kamã hkrajê mã kapër nẽ mẽ kãm:

E mẽ tokyx mẽ kot ri htýx amnhĩ nhĩpêx xwýnhjê nhõ krĩa rùm ajapõj ixkrajaja.

Kot kaj mẽ anhýr kêt nẽ ra mẽ hkõt amnhĩ nhĩpêx pa mẽ ato apimràatã mẽ ate amnhĩ tomnuj ã mẽ atomnuj týx nẽ.

⁵ Krĩ nhõ xwýnhjaja na htem amnhĩ tomnuj rũnh o pa.

Mẽ kot amnhĩ tomnuj xà te mẽ kot kẽn katutxõ nhũm hprêk rax o kot kaxkwa kanhwýr kaxyw pyrãk.

Na pa hte ã mẽ kot amnhĩ nhĩpêx anhýr ã mẽ omunh rãhã ho ri ixpa. Jakamã kwa ixkrajaja mẽ tokyx mẽ kurũm ajapõj.

Anhýr o hkrajê mã kapër. Hãmri nẽ kapër o mẽ wryk xwýnhjê mã kãm:

⁶ E kwa mẽ ma mẽ hwýr wry nẽ tanhmã ixkrajê hã mẽ ho.

No ãm kêr ka mẽ tanhmã mẽ ho htýx o mẽ kot ra tanhmã ixpê ixkrajê nhĩpêx tota jakre.

Kê mẽ tanhmã ixpê mẽ ho grille htã ka mẽ hã tanhmã mẽ ho htýx kumrëx o mẽ kot mẽ hipêxta jakre.

⁷ Krĩ nhõ xwýnhjaja na prem mex nẽ pa.

Nẽ mẽ hikukrêx rũnh nẽ hkĩnh nẽ pa.

Nẽ tanhmã amnhĩ to jarkrar to ho ri pa nẽ amnhĩ jarënh o:

“Ot pa mẽ te pahi ni kot amnhĩ nhĩpêxta pyrã nẽ ixkrĩ xà mex pix kãm ixkrĩ pyrãk.

Nẽ te Tirtüm kot amnhĩ nhĩpêx pyrãk o na pa htem amnhĩ nhĩpêx o ri ixpa.

Nẽ mẽ ixkĩnh nẽ mẽ inhmex rãhã ri ixpa.

“ ã mẽ ixte amnhĩ nhĩpêx anhýr xwýnh na pa mẽ.”

Anhýr ã amnhĩ to jarkrar o pa.

Tã kêr ka mẽ tanhmã mẽ homnuj to kê mẽ mexta pãnhã omnuj týx nẽ pa.

Nẽ kê mẽ hkaprĩ nẽ amnhĩ xà htýx kãm hamak rãhã nẽ pa ho pa.

⁸ E kê mẽ ã amnhĩ nhĩpêx anhýr o pa.

Jakamã koja mẽ arĩgro hpýnh kãm mẽ hkwyjaja hpikaprar rũnh nẽ nhũm arĩ mẽ htĩr xwýnhjaja omnuj nẽ pa.

Nẽ tee ri amnhĩ pumu nẽ hkaprĩ xàj mýr o pa.

Nẽ amnhĩ xà htýx kãm hamak o pa.

Nẽ tee ri amnhĩ nhĩpêx o pa.

Nẽ kãm prãm nẽ pa rãhã ty nhũm kuwy mẽ ho hkaxàr pa.

Ixpê Pahi Maati Tirtüm kot paj ixihtýx kãm ã mẽ hipêx anẽ. Anẽ.

⁹ Hãmri nhũm krĩ piitã kurũm mẽ ho amnhĩptàr xwýnhjaja. Mẽ kot mẽ hwýr mrar nẽ mẽ hkuprýjê ho amnhĩkati nẽ mẽ urak nẽ mẽmoj pumunh nẽ haprõr rãhã ho pa xwýnhjaja tee ri krĩ kaxàr nẽ kàx mã kuwy hkũm àpir o paja pumu nẽ hkaprĩ nẽ mýr o kuhê.

¹⁰ Nẽ Tirtüm kot mẽ ho hapêx par ã mẽ omu nẽ kãm ma htýx kumrëx. Amým mẽ omunh o kuhê nẽ tee ri amnhĩ kukamã hamaxpër nẽ htertët týx nẽ. Nẽ mýr kãm kapër o:

Hêxta waa nẽ Papirõn nhõ xwýnhjaja.

Mẽ amex nẽ axihtýx mex nẽ apa htã nhũm Tirtüm mẽ anhĩmex pa. Hêxta waa nẽ. Anẽ.

¹¹ Nẽ mẽ hwýr mrar nẽ mẽ kãm mẽmoj to wẽnê ho mẽ pa xwýnhjaja haxwýja krĩ pumu nẽ tee ri amnhĩ kukamã hamaxpër nẽ hkaprĩ nẽ mýr o kuhê. Nhýri koja mẽ tokyx axte mẽmoj to wẽnê? Mẽ kęp mẽmoj jaarõr rũnh xwýnhjaja hkaxàr par kumrëx kênã.

¹² Na prem mẽmoj piitã ho pa nẽ mẽ kãm ho wẽnê.

Mẽmoj mex piitã. ôr o mẽ hkukrêx nẽ prat o mẽ hkukrêx nẽ kẽn jaxênh ã kàxpore xohtõ. Nẽ kupêxê mex. Kakrã htyk nẽ hkamrêk nẽ hkroore nẽ hã hapjê. Nẽ mẽmo pĩ kuxware nẽ pĩ htýx nẽ kẽn jakàr nẽ kàx o ri mẽmo nhĩpêxja nhũm prem mẽ kãm ho wẽnê ho pa.

¹³ Nẽ mẽmo htwym nẽ mẽ hkuxwa xà. Nẽ mẽ õ ho ành xà nẽ mẽ õ kuxwa xà nẽ xwýgrà nẽ harõj. Nẽ môx nẽ ôwêhti nẽ kawar nẽ kaxyw kawarti hkjênh xà hã karrotre. Nẽ nhỹhýnh krĩ hõ kamã panhĩ hkwy pynê nẽ mẽ hwýr mẽ o pa nẽ mẽ kãm mẽ ho wẽnê nhũm mẽ amarĩ mẽ hkõt ri àpênh rũnh o pa. Na prem ã mẽ kãm mẽmoj to wẽnê anhýr o pa. Tã ra mẽ kot mẽ haprõr xwýnh mẽ mẽ pimràatã hapêx pa.

¹⁴ Jakamã nhũm mẽ tee ri mẽ hkukamã hamaxpër nẽ te kot mẽ kãm kapër pyrã nẽ mẽ kãm:

Hêxta waa nẽ. Mẽ amã mẽmoj prãm nẽ amnhĩm haprõr xwýnhhta na mẽ apê hapêx par kumrëx.

Nẽ mẽ akàxpore rũnh nẽ mẽ akukrêx rũnhhta mẽ mẽ apimràatã ajapêx pa. Kot kaj mẽ axte tanhmã amnhĩ nhĩpêx to ho apa hkêt nẽ. Anẽ.

¹⁵ Hãmri nẽ amým ri Tirtüm kot tanhmã mẽ hipêx to hã mẽ omu nẽ kãm ma xàj mur nẽ htertët o kuhê.

¹⁶ Nẽ mýr kãm kapër o:

Hêxta waa nẽ. Na pre htem ê mex pix jagjê nẽ ri hã mra. Kakrã htykre nẽ hkamrêkre.

Nẽ mẽ hikukrêx mex o amnhĩ jamrêx nẽ ri hã mra.

Nẽ ôr nẽ kẽn mex ã ohtõ xwýnh o amnhĩ jamrêx nẽ ri hã mra.

¹⁷ Tã ra hapêx par kumrëx. Anẽ.

Hāmri nhūm gô xujanār kām pâr nhô dôn nê mẽ kot mẽ kām pâr o ri mrar xwýnhjaja nê mẽ kot kamã tep pynênh xà ho tep pynênh o ri mẽ pa xwýnhjaja nê pâr kām amarí mẽ pa xwýnhjaja hāmri mẽ hwýr mra nê wamtajê pyrã nê tee ri amým ri mẽ õ krí pumu nê mýr o kuhê. ¹⁸ Nê kurūm kuwy hkūm xàpir o pa hã omu nê tee ri mẽ hkukamã hamaxpêr nê axpên mã:

Hêxta waa nê. Krí mŭj na pre mex o mex. Mex o krí piitã hakrenh par htã hapêx pa. Anê.

¹⁹ Hāmri nê mur nê hkaprí xàj pika hkwy jamý nê ho amnhí kamí nê mýr kām kapêr o:

Hêxta waa nê. Krí mŭj na pre rax o rax.

Nhūm pre nhýhýnh pâr kām mẽmoj to wênê ho pa xwýnhjaja mẽ hwýr mẽmoj to pa nê mẽ kām ho wênê nê mẽ hkukwak ri hikàxpore rŭnh nê ri pa.

Tã hāmri mẽ hapêx pa. Anê.

²⁰ Hāmri nhūm Tirtŭmja krajê piitã mẽ kām kapêr nê mẽ kām:

E ixpê Tirtŭm na pa ã mẽ hipêx anê.

Mẽ kot mẽ apê ixkrajaja tanhmã mẽ atomnuj to ho paja mýrapê na pa mẽ atã ã mẽ hipêx anê.

Jakamã e kaxkwa kamã mẽ apê ixri mẽ apa xwýnhjaja.

Nê mẽ ate inhý hã ri mẽ kām ixkapêr jarênh o mẽ apa xwýnhjaja.

Nê Jejus nhý hã mẽ akapêr o ri mẽ apa xwýnhjaja. Mẽ apiitã mẽ apê ixkra na ka mẽ.

E mẽ amnhí tã ja pumu nê akính nê axpên mã apikunhar o akuhê. Pa na pa mẽ atã ã mẽ ho ijpêx anê. Anê.

²¹ Tã nhūm kapêr o mẽ wrýk xwýnhjê hõja hihtýx o kên rax kumrêxja mý nê o tẽ nê gô xujanār kamã kām gêt nê kumê nhūm mrõ nê akunok. Hāmri nhūm kapêr o:

E kríta koja Tirtŭm te ho ixte gôx kām kên mênh nhūm mrõr nê hpikunor pyrãk o hipêx nhūm hapêx par kumrêx.

²² Na pre hte kríja kamã mẽ kot ri mẽ kām mẽmoj to wênê xwýnhjaja amnhí to rŭnh o krí piitã hkôt mẽ hakrenh pa.

Nê krí nhô xwýnhjaja na prem pika piitã hkôt hêx rom tanhmã mẽ no kupyr to ho ri pa. Jakamã ra mẽmoj to wênê xwýnhjê pyrã nê mẽ hikukrêx rŭnh gryk ã Tirtŭm kaga.

No ãm ja pix kêt. Tirtŭm krajê mẽ Tirtŭm nhý hã kapêr o mẽ pa xwýnhjaja na prem mẽ himex rax nê. Hāmri nhūm krí piitã kamã mẽ pa xwýnhjaja mẽ kot mẽ hipêx ã mẽ omu nê mẽ uràk nê ã mẽ hipêx anhýr o pa.

Tã Papirõn nhô xwýnhjaja kot mẽ hipêx anhýrja mýrapê koja Tirtŭm mẽ himex par kumrêx.

Jakamã koja mẽ axte hkính nê hkính xàj ri grer kêt nê.

Nê axte hkính nê grer kām hakwa kôr o ri pa kêt nê.

Nê axte ri wiorãw kakrênh hkêt nê.

Nê axte ri amnhĩm kawà hyr o hkrí hkêt nê.

Nê axte harôj kahuk o kuhê hkêt nê.

Nê axte mẽ õrkwý kamã kanê hpôk kêt nê.

Nê axte axpên mã ri hkrajê rer o ri pa hkêt nê. Koja ã mẽmoj kot anhýr piitã hapêx pa. Anê.

Mẽ kot Tirtŭm mex ã mẽ harênh

19 Tã pa kê axte mẽmoj pumu. Nê kaxkwa kamã mẽ kapêr ma nhūm mẽ ohtô rax kumrêx nê tanhmã axpên mã kapêr to. Nê anhípê kàx pê kapêr týx nê kapêr o:

E pu mẽ pahpiitã Tirtŭm mã mex o mex ã harê.

Tapxipix na hihtýx o hihtýx.

Nê tapxipix na àhpumunh o àhpumunh.

Nê tapxipix na mex o mex.

Tapxipix na mex o kot mẽmoj piitã hakrenh par.

Ra kot mẽmoj punuj pê mẽ papytãr par jakamã kêp mẽ papytãr xwýnh ã pixi mex na.

² Na hte amnhí jarênh xà hkôt tanhmã mẽmoj to ho pa.

Nê amnhí to hêx kêt nê.

Tã ãm hāmri na ã Papirõn nhô xwýnhjê nhípêx anê.

Na prem mẽ kām Tirtŭm kapêr jarênh o mẽ pa xwýnhjê nhímex rax kumrêx.

Nê krí piitã hkôt ri pa nê amnhí kôt mẽ kurê nhūm mẽ kuma nê mẽ hkôt amnhí tomnuj o pa.

Nhūm Tirtŭm tee ri hã mẽ omu nê ã hkrajê hã mẽ hipêx kati anê. ãm hāmri na ã mẽ hipêx anê.

Anhýr o axpên mã harê. ³ Hāmri nê xatã axpên mã:

Nà ãm hāmri na ã mẽ panhõ Tirtŭmja mẽ hipêx anê nhūm mẽ kurūm kuwy hkūm kàx mã àpir o pa.

Koja krí nhô xwýnhjaja amnhí xà htýx kamã hamak rãhã ho pa nê aa à htýx hapêx kêt.

E pu mẽ hã Tirtŭm mã mex o mex ã harê. Anê.

⁴ Hāmri nhūm mẽ àptãr tŭm pê 24 mẽ mẽmoj tŭr pê kwatjaja hāmri Tirtŭm kot mẽ ho amnhiptãr ã hkrí xà maati kutã rôrôk nê kām hipô hpa. Hāmri nê ã mẽ kapêr anhýr xwýnhjê mã kapêr nê kām:

Nà ãm hāmri na ka mẽ ã Tirtŭm mex ã harênh anê. E pu mẽ pahpiitã kām mex o mex ã harê. Anê.

⁵ Hāmri nhūm mēhõja Tirtŭm krí xà maati kamã kapêr o:

E mẽ axte Tirtŭm mã mex o mex ã harê.

Mẽ ate Mēpahpãm kôt amnhí nhípêx o mẽ apa xwýnhjaja.

Nê mẽ apê mẽ ho amnhiptãr xwýnhjaja nê amarí ri mẽ apa xwýnhjaja nê mẽ apiitã mẽ ate Tirtŭm ã api-jaam o mẽ apa xwýnhjaja kām mex o mex ã harê. Anê.

Kot mẽ pahpãnhã amnhĩrer xwýnh mẽ hkwyjê jarênh

⁶ Tã pa tanhmã mẽ kapêr to hã mẽ kuma nhūm mẽ kàx pê kapêr týx nê. Te mẽ ohtô rax kumrêx kapêr pyrãk. Nê te gô koko htýx rý na katõtök týx pyrãk.

Hāmri nê mẽ kapêr o:

E na ra Tirtŭm kêp mẽmoj piitã ho amnhiptãr xwýnh.

Nê kêp mẽ panhõ Pahi Maati.

Nê hihtýx o hihtýx nê àhpumunh o àhpumunh.

E pu mẽ kām mex o mex ã măn harê.

⁷ Nê hã pahkính nê.

Nê kām hihtýx o hihtýx ã harê.

Te mẽ kot axpên mã mẽ rer xwýnh kot amnhí nhípêx pyrãk.

Jao mẽ pahte amnhĩ tomnuj pãnhã amnhĩrer xwỳnhhta te kệp myja pyràk.

Ně mẽ kot hkôt amnhĩ nhĩpêx xwỳnh piitã te mẽ kệp nija pyràk.

Ně te mẽ kot axpên mã wa rer nhũm wa kot axpên kôt pa ho pa pyràk o koja mẽ amnhĩ nhĩpêx.

Ně te mẽ kot mjên mã xwỳnh mã ê mex jakare nhõr nhũm kot hagjênh pyràk. Ně ê mexja te mẽ kot tãm amnhĩ nhĩpêx xà pyràk. Aně.

⁹ Hãmri nhũm Tĩrtũm kapêr o wrỳk xwỳnhja inhmã:

—E Juãw. Pa amã mẽmoj jarê ka mar tỳx nẽ akwỳjê mã hã kagà. Tĩrtũm kapêr kwỳ kot paj amã harê. Kệp Tĩrtũm kapêr jakamã ãm hãmri na. Na hte mẽmoj jarênh o hêx kêt nẽ. E kapêr ã kagà ho:

Na htem axpên mã mẽ rer kaxyw nẽ amnhĩ wỳr hk-wỳjê wỳ nhũm mẽ hwỳr mra nẽ wa hã hkĩnh nẽ apkur mex nẽ.

Ja pyrã nẽ Tĩrtũm kot amnhĩ wỳr mẽ hwỳr xwỳnhjaja koja mẽ nhỹrmã mẽ pahte amnhĩ tomnuj pãnhã amnhĩrer xwỳnhhta wỳr api nẽ ã amnhĩ nhĩpêx anẽ nẽ hkĩnh nẽ apkur mex nẽ.

Hãmri nhũm Tĩrtũm mẽ ho mex rax kumrêx. Aně.

—E kêt ka ã akwỳjê mã ja hã kagà anẽ Juãw. Aně.

Hãmri pa kuma nẽ kagà ja kamã mẽ amã hã kagà.

¹⁰ Hãmri nẽ hã kagà hpa nẽ ra ixte kãm mex o mex ã harênh kaxyw kutã ixkôn krã ho tẽm nẽ nhỹ nhũm tee ri amnhĩ tã ixpumu nẽ inhmã:

—Kwa ã ri inhiêpêx anhỹr kêt nẽ. Apyrà nẽ ixte Jejus mã tanhmã amnhĩ nhĩpêx to xwỳnh kênã. Jejusja apyrã nẽ kệp inhõ pahihti na. Jejus kapêr na prem hkukamã mẽ kot Tĩrtũm nhỹ hã kapêr o mẽ pa xwỳnhjaja hã kagà nẽ mẽ kãm harênh o pa. Jakamã kwa pu mẽ Tĩrtũm pix kutã mãn pahkôn krã ho parôrôk nẽ pahkrĩ nẽ kãm mex o mex ã harê. Aně.

Kawar jaka hã ỹr xwỳnh jarênh

¹¹ Tã pa kê axte mẽmoj pumu. Nhũm kaxkwa axkjê nhũm kamã kawar jakajre xa nhũm mẽhõja hã nhỹ. Hixi na pre kệp “Aa kot Tĩrtũm kaga hkêt xwỳnh.” Aně nẽ hixi hõ na pre kệp: “Tĩrtũm kôt pix mã amnhĩ nhĩpêx o pa xwỳnh.” Aně. ã hixi kot anhỹr jakamã na hte katãt kôt ahpỹnhã mẽ kot amnhĩ nhĩpêx ã mẽ omunh xà hkôt tanhmã mẽ harênh to. Mẽ kot amnhĩ to mex ã mẽ omunh xà hkôt tanhmã mẽ hkwỳjê jarênh to nẽ mẽ kot amnhĩ tomnuj ã mẽ omunh xà hkôt ah-pỹnhã tanhmã hkwỳjê jarênh to. Na pre mẽ kot tanhmã hkwỳjê nhĩpêx to ho pa xwỳnhjê kutã amnhĩ xunhwỳ nẽ mẽ hã tanhmã mẽ ho. ã na pre kawar ã ỹr xwỳnhja amnhĩ nhĩpêx anhỹr o pa.

Ně no te kot kuwy hpôk pyrãk jakamã hprĩ hã mẽmoj piitã omu nhũm mẽmoj kệp hpimxur kêt nẽ. Nẽ kệp pahi hã mẽ ahkà ho ohtô nẽ kutu. Nẽ nhỹhỹnh ĩ hã hixi hõ hã kagà nom ãm tapxipix kot amnhĩ tã amnhĩ nhĩxi-ja pumunh. Na pre ra amnhĩ kamrô ho ê xy hpa nẽ xa. Nẽ hixi hõ pê:

TĨRTŪM KAPĚR O AMNHĨRĪT XWỠNH

Ně ê ryti hã hixi hõ hã kagà. Nẽ ihkjê hã ãm tãm. Hã kagà jarênh kot:

Ixpê mẽ ho amnhĩptãr xwỳnh piitã mẽ õ Pahi Maati na pa.

Ně hakwa rũm wapo xwa gixre pôm katon ajêt. Kot ho tanhmã mẽ kot Tĩrtũm mẽ wa kutã amnhĩ xunhwỳr xwỳnhjê nhĩpêx to kaxyw. Jakamã ra mẽ piitã mẽ ho pikuprõnh pa nẽ mẽ hipêx o te mẽ kot prês kãm uwa xô kagô janênh pyrãk nhũm mẽ hkamrô hpikapĩr rax kumrêx. Tĩrtũm xihtỳx xwỳnh kot mẽ kamã gryk tỳx jakamã nhũm ã kãm mẽ hipêx anẽ. Mẽ kot amnhĩ tomnuj o paja mỳrapê.

Nhũm õ pōristi piitã uràk nẽ kawar jakare hã hkrĩ nẽ hkôt ri pa. Mẽ ê jaka muxre jagjê nẽ hã ma hkôt ri pa.

¹⁷ Tã pa axte Tĩrtũm kapêr o mẽ wrỳk xwỳnh òja pumu nhũm myyti kutã xa nẽ kàx pê nhõnhti mã kapêr nẽ mẽ kãm:

—E mẽ amnẽ mẽ ixwỳr wrỳ nẽ Tĩrtũm ã akĩnh nẽ mẽ htyk nẽ mẽ hikwỳ xwỳnhjê hã atu nẽ aku. Mẽ ho amnhĩptãr xwỳnhjaja nẽ pōristijaja nẽ mẽ hkrãhtũm nẽ kawar nẽ kawar ã mẽ hkrĩ nẽ ri mrar xwỳnhjaja nẽ mẽ kot amnhĩ to rũnh xwỳnhjaja nẽ mẽ kot amnhĩ to hkryre xwỳnhjaja. Nẽ mẽ kãm mẽ ãpênh xwỳnhjaja nẽ amnhĩ mã ri mẽ ãpênh xwỳnhjaja. ãm mẽ htyk nẽ mẽ hikwỳ xwỳnh mũj piitã mãmri mẽ hwỳr wrỳ nẽ mẽ hã atu nẽ mẽ aku. E mẽ tokyx nhõnhti. Aně.

¹⁹ Tã nhũm mrymnuti nẽ krĩ piitã hkôt mẽ õ pahi nẽ mẽ õ pōristijaja piitã axpên wỳr akuprõ. Wam kawar jakare hã ỹr nẽ htẽm xwỳnh mẽ õ pōristijê hwỳr hprõt nẽ mẽ hkurê kaxàr kaxyw axpên mar kaxyw akuprõ.

²⁰ Hãmri nẽ mẽ hwỳr mra nẽ mẽ hkurê kapa. No ãm tee ri amnhĩ nhĩpêx nẽ tee ri kãm tanhmã mẽ ho hprãm hkapyrỹ nhũm wam kawar jakare hã ỹr nẽ htẽm xwỳnhhta hakwa rũm wapo xwagixre kator o mẽ himex pa. Hãmri nhũm mẽ hkwỳjê pyràn htyk pa nẽ hikwỳ. Nhũm nhõnhti mẽ omu nẽ mẽ hwỳr wrỳk o mra nẽ mẽ kuku hãmri nẽ kãm mẽ hkur kaga nẽ mẽ hkaga. No nhũm mrymnuti nẽ ỹ hã mẽ kãm hêx o pa xwỳnhhta wa nhũm mẽ axtem nẽ htĩr rãhã wa unê nẽ ma wa o tẽ nẽ êsôf o kuwy maati kamã wa kumẽ. Hãmri nhũm wa kamã htĩr tũm nẽ hxêt rãhã nẽ pa ho pa nẽ aa htyk kêt nẽ.

Mẽ kot Satanasti hpa hpre hã mẽ harênh

Wam Korĩt 15.20-28

²⁰ Tã pa kê axte mẽmoj pumu. Nhũm Tĩrtũm kapêr o mẽ wrỳk xwỳnhjê hõja kaxkwa rũm wrỳ nẽ ahkre xupỳmti hpro xà ho htỳx xà hã safja py nẽ kàx pytĩhti ho mẽ hpre xàja õ py. ² Hãmri nẽ kagãmnuti pê hêx xwỳnh maati Satanastija pynê. Amnepêm Atãw mẽ Ewa wa kãm hêx xwỳnhhta pynê nẽ kàx pytĩ o hpa hpre nẽ hte hpre hãmri nẽ ahkre xupỳmti nhĩtom xà mẽ nẽ kamã kumẽ. Hãmri nẽ akupỳm hpro xà ho hpro nẽ saf o hã ho htỳx. Kot pika piitã hkôt mẽ kãm hêx o pa pymaj ã hipêx anẽ. Koja tokyx kator kêt ry rax kumrêx. Koja kamã arĩ hkrĩ hã amgrã xohtô nẽ. Hã amgrã pê 1.000 nhũm rĩ kormã Tĩrtũm akupỳm kator nhũm kato nẽ ri pa. Nom pa hkrãre.

⁴ Tã pa mẽ htyk nẽ akupỳm mẽ htĩr xwỳnh kwỳjê pumu. Kormã mẽ htĩr ri na prem Tĩrtũm kapêr kôt pix

mã amnhĩ nhĩpêx o pa. Nê Jejus kêp mē ò pahihiti hã harênh rãhã ho pa. Aa mē kot mrymnuti kutã hkônkrã ho rôrok nê kãm mex ã harênh kêt. Nhũm prem tee mē ôkrã hã nê mē ïhkra katut ã mrymnuti nhĩxi nhĩpêx kaxyw nom nhũm prem hkaga kamã hihtýx nhũm prem kãm mē hkurê xwýnhjaja tee ri ja hã mē omu nê mē mut jakàr o mē kupa. Hãmri nhũm Tirtúm akupým mē ho mē htír nê mē kot mē ho amnhĩptàr ã hkrí xà kamã mē hkrí. Jejus nhĩhkô hã mē hkrí hã amgrà pē 1.000 kaxyw. ⁵ Mē kumrêx na pre Tirtúm akupým mē ho mē htír nhũm mē hkwyjaja mē hkĩnh ã arí ty nê hikwý hã amgrà pē 1.000 jakre nhũm rĩ kormã akupým mē ho mē htír.

⁶ Wam akupým mē htír xwýnhjaja kêp Tirtúm kra jakamã koja mē Tirtúm kra hkêt xwýnhjê kurom hkĩnh nê pa ho pa. Nê mē kurom mē kot amnhĩ xà htýx kamã hamak o pa htúm xà wýr pa hkêt nê. Nê mē kurom Tirtúm mē Kra Jejus Kris wa kuri mex kumrêx nê wa kãm tanhmã ri amnhĩ nhĩpêx to ho pa. Nê Jejus nhĩhkô hã mē ho amnhĩptàr o pa hã amgrà pē 1.000.

Tirtúm kot kuwy hwýr Satanasti mēnh ã harênh

⁷ Tã koja amgrà pē 1.000 hapêx nhũm rĩ kormã Tirtúm kapêr o wrýk xwýnhja akupým ahkre xupým wýr tē nê Satanasti mã kahê xà mē nhũm kato. ⁸ Hãmri nê kê axte pika piitã hkôt tanhmã mē kãm hêx to ho ri pa. Gorti nhõ xwýnhjê mã nê Makok nhõ xwýnhjê mã nê krí piitã hkôt Tirtúm nê tanhmã mē kãm hêx to ho mē hkôt pa. Hãmri nê mē kot Tirtúm krajê kutã amnhĩ xunhwýr nê mē hkurê kaxàr kaxyw amnhĩ kwýjê ho akuprõ nhũm mē ohtô rax kumrêx nê axpēn wýr akuprõ. Te pikahti grà xohtô pyrãk.

⁹ Hãmri nê ma Tirtúm krajê nhĩmex par kaxyw mē hwýr mra nê mē ò krí mã hipòk pa nê kuhê. Mē ò kríja Tirtúm mã mex tã nhũm mē kot kêp grành par kaxyw ma hwýr mra. Hãmri nhũm kaxkwa rúm kuwy hpòkja mē haêr pē mē hã rôrok nê mē ho hxêt pa.

¹⁰ No mē kãm hêx xwýnh maati Satanastita nhũm Tirtúm kapêr o wrýk xwýnhja axte unê nê ma êsôf o kuwy maatita wýr o tē nê kamã kumê. Ra mē kot kamã mrymnuti wa kot Tirtúm nê mē nokupyr o pa xwýnh wa mēnh tã wa hkôt Satanasti mã ho anê nê kamã kumê nhũm kamã pa ho pa. Koja mē aa kator kêt kumrêx. Nê arí kamã amnhĩ xà htýx kamã hamak rãhã nê pa ho pa.

Tirtúm kot ahpýnhã tanhmã mē piitã mē harênh to kaxyw

Matêwre 25.31-46; Juãw 5.25-29

¹¹ Tã pa axte mēmoj pumu nhũm kaxkwa mē pikaja wa ra hapêx pa. Pa Tirtúm kot tanhmã mē piitã mē harênh to hã hkrí xà raxja pumu. Nhũm hakajre nhũm Tirtúm kamã nhý.

¹² Hãmri nhũm ra mē htyk nê mē hikwý xwýnh piitã akupým hapòx pa nê Tirtúm kot tanhmã mē harênh to hã hkrí xàta kutã hkrí pa. Mē piitãã. Mē kot amnhĩ to rũnh xwýnhjaja nê mē kot amnhĩ to hkryre xwýnhjaja nê mē ho amnhĩptàr xwýnhjaja nê gô xujanãr kãm mē

mrõr nê mē htyk xwýnhjaja. Ra mē htyk nhũm mē kot mē hagjênh xwýnhjaja piitã mē htykjê papxà rúm hapòx pa nê Tirtúm kutã ohtô ho ohtô nê hkrí. Hãmri nhũm Tirtúm ò kagà py nê kamã mē piitã mē hixi japêr. Kagà kamã ra mē hkukamã mē htír tùm nê mē pa ho mē pa mã xwýnhjê nhĩxi japêr. Nê kagà hõ kamã mē htír ri tanhmã mē kot amnhĩ nhĩpêx to ho pa hã mē piitã mē hã kagàja. Nhũm kupy nê kamã tanhmã mē harênh to nê hkôt hprí hã mē piitã mē omunh pa nê rĩ kormã ahpýnhã tanhmã mē harênh to.

¹⁴ Hãmri nê mē htír tùm nê mē pa mã xwýnhjê nhĩxi hã kagàja kamã tee ri mē hkwyjê nhĩxi japêr nhũm kamã amrakati. Jakamã nhũm mē ma kuwy maatita wýr mē o mra nê kamã mē rênh pa. Te axte mē htyk nhũm mē kot kuwy kamã mē hagjênh pyrãk nhũm mē kamã rôrok nê tee ri amnhĩ xà htýx kamã hamak rãhã nê pa ho pa nê aa kator kêt kumrêx.

Pika mē kaxkwa wa nyw jarênh

Sikün Pêtre 3.8-13

21 Tã pa axte mēmoj pumu. Nhũm Tirtúm ra pika mē kaxkwa nyw wa ho kato. Ra pika nê kaxkwa nê gô xujanãr tùmja hapêx pa nhũm kaxkwa mē pika nyw wa ho kato. Nom axte gô xujanãr o kator kêt nê.

² Hãmri nhũm Tirtúm nhõ krí mex pē Jerujarê nywja tanhmã amnhĩ to nê pika nyw wýr wrýk o mō. Kríja mex kumrêx. Mex o mex. Te mjên mã xwýnh ê mex jaxàr nê amnhĩ to muxre nê mjên wýr htêm pyrã nê pika nyw wýr mex kumrêx nê wrýk o mō.

³ Hãmri nhũm Tirtúm kot mē ho amnhĩptàr ã hkrí xà maatija kamã mēhõja kapêr o:

—Nà ãm hãmri. Na ra Tirtúm hkrajê hkôt pa ho pa. Pika nyw kamã mē hkôt pa ho pa nhũm mē tã no ho omu nê hkôt pa ho pa rãhã nê. Nà ãm hãmri. Ja mex o mex.

⁴ —Koja hkrajaja hkôt pa ho pa nê axte htyk kêt kumrêx. Nhũm Tirtúm mē nê mē no kagô nhĩnhĩnh pa nhũm mē axte hkaprĩ nê mýr kêt nê. Nê ri axte amnhĩ xà kamã hamak kêt nê. Nê axte ri tanhmã omnu hto hkêt nê. Ra mē hkaprĩ nê à nê mýr o pata hapêx par kumrêx nhũm hpãnhã mēmoj nyw pix. Anê.

⁵ Hãmri nhũm Tirtúm tãm tanhmã inhmã kapêr to. Krí xà maati kamã ýr xwýnhhta tãm inhmã kapêr o:

—E na pa ra akupým mēmoj piitã ho nyw pa. Jakamã e Juãw. ãm hãmri na pa ã amnhĩ kukamã amã mēmoj jarênh anê. Ixêx kêt. Jakamã kêr ka akwýjê mã piitã hã kagà hpa. Kê mē kamã harê nê tokyx kuma nê hkôt hamaxpêr rãhã ho pa.

⁶ —Ra ixte amnhĩ kukamã mēmoj mã ijamaxpêr xwýnhja na pa ra ho anhýr pa. Ixpê mēmoj piitã ho anhýr o hkrax xwýnh nê mãñnên ixpê mēmoj piitã ho ijapêx par xwýnh. Nê ixrãhã ixpa xwýnh. Amnepêm kormã mēmoj kator kêt ri na pa pre ixrãhã ixpa. Nê ot pa arí ixrãhã ixpa. Tã mē kãm kôr nê kãm gô hkwy ho hkõm hprãm xwýnhjê pyrã nê mē kãm ixpix prãm xwýnhjaja kot paj te mē kãm inhõ hino rúm gô hkwy nhõr nhũm mē kot ho hkõm pyrãk o mē hipêx. Hãmri

nhũm mẽ htír tũm nê ixri pa ho pa nê axte htyk kêt nê. Kot paj ã mẽ hipêx mex anê.

⁷—Mê ate tanhmã amnhĩ tomnuj to nê amnhĩ to htỳx nê ixkôt pix mã amnhĩ nhĩpêx o mẽ apa rãhã mẽ atyk xwỳnhjaja kot paj ã mẽ anhiĩpêx mex anê. Ka mẽ apê ixkra hã amex nê ixkôt ri apa rãhã ho apa. Pa ixpê mẽ anhõ Tirtũm ã tanhmã mẽ ato mex to rãhã ho ixpa.

⁸—No mẽ kot amnhĩ kaxyw ixkôt hamaxpêr kêt xwỳnhjaja. Nê mẽ kot amnhĩ tomnuj xwỳnhjaja nê mẽ kot ri mẽ hpar prãm xwỳnhjaja. Nê mẽ kot nhãm ri mênijê ho amnhĩkati xwỳnhjaja. Nê wajagajaja. Nê mẽ kot amnhĩ to sãnti hwỳr o pa xwỳnhjaja. Nê ri mẽ hêx nhi xwỳnhjaja. Æ mẽ kot amnhĩ nhĩpêx anhỳr xwỳnh piitã koja mẽ apê ixkrajê hkĩnhã ma kuwy maati wỳr hapêx par kumrêx. Te axte mẽ htyk pyrãk nom koja mẽ axte htyk kêt nê. Anê.

Jerujarê nyw jarênh

Sikũn Korĩt 6.16; Karatas 4.26; Eprêw 12.22-24

⁹Tã nhũm mẽ kot xijere pê 7 kamã Tirtũm gryk xà jamỳnh xwỳnhjê hõja hãmri ixwỳr tẽ nê inhmã:

—E ma ixkôt tẽ nê mẽmoj pumu. Na ra krĩ nywja pika nyw wỳr wrỳk o mỗ. Te mjên mã xwỳnh ê mex jaxàr nê amnhĩ to muxre nê mjên wỳr htêm pyrã nê mex kumrêx nê kaxkwa rũm pika nyw wỳr wrỳk o mỗ. Nê kot ho mjên mã xwỳnhhta te mẽ pahte amnhĩ tomnuj pãnhã amnhĩrer xwỳnhhta pyrãk. E tokyx tẽ nê omu. Anê.

¹⁰Hãmri nhũm Tirtũm Karõ tanhmã ixto pa ma kot inhmã kapêr xwỳnhhta kôt tẽ nhũm ma ixto mỗ nê kên krã hprêeti hwỳr ixto api nê himõk ã ixãm. Pa Tirtũm nhõ krĩ mex pê Jerujarê nywja pumunh o xa. Nhũm mex o mex. Æm hãmri te mjên mã xwỳnh kot ê mex jaxàr nê amnhĩ to muxre nê mjên wỳr htêm pyrã nê ahpar mã wrỳk o mỗ pa ixprĩ hã omu.

¹¹Na pre rax o rax nê mex o mex. Tirtũm kamã pa ho pa jakamã nhũm kamã hirã htỳx kumrêx. Te kên mex ã kàxpore xohtõ jaxênh mex tỳx pyrãk.

¹²Nê krĩ puhã kahêja hprêk rax nê. Nê hwỳr mẽ gjêx xà kêp 12. Na pre myt japõx xà rũm axkrunêpxi. Nê myt gjêx xà rũm haxwỳja axkrunêpxi. Nê akutã kahpa hkôt haxwỳja axkrunêpxi. Nê ahpỳnhã hakwakre hã Tirtũm kapêr o wrỳk xwỳnhjaja hamãr o kuhê. Nê hakwa kre piitã hã Ijaew pê ahpỳnhã mẽ pikjêr kãm mẽ kêp 12jaja mẽ hixi hã kagà.

¹⁴Nê kahê xunhwỳr xà hkukamã kên pytyrja ahpỳnhã kêp 12. Kên pytyrta ã na mẽ kot Jesus nhỹ hã mẽ ahkre o mẽ pa xwỳnh maati pê 12jê nhĩxi hikwỳ.

¹⁵Tã nhũm kot ixto mỗr nê inhmã mẽmoj jahkre xwỳnhhta ôr o mẽmo pĩ py nê kot ho krĩ ho mĩdi kaxyw xa. Nê ho kahê piitã ho mĩdi kaxyw. Nê mẽ gjêx xàja ho mĩdi kaxyw.

¹⁶Hãmri nê ho mĩdi hpa. Krĩja ry nê kahpa piitã axpên pyrãk. Nê hprêk piitã mãănên axpên pyrãk. Kamã mẽmoj piitã ahpỳnhã kêp 2.200 kirõm. No puhã kahêja hprêk o 64 met pix nê.

¹⁸Nê kahêja kên jaxênh pix o kot amnhĩ nhĩpêx jakamã mex o mex. Nê hkarỳr tỳx kumrêx. Nê kahê

hkre kamã krĩ kamã ahpỳnhã ri ixkreja ôr pix o kot amnhĩ nhĩpêx. Nê piitã hkarỳr tỳx.

¹⁹Nê kahê xunhwỳr xà hkukamã kên pytyrta ahpỳnhã ri kên mex pix o kot amnhĩ nhĩpêx. Piitã mex kumrêx nê hkarỳrti.

Wamta kawax pê grãgrãre.

Nê hkôt ja kawax pê grãgrã kakrã htyk.

Nê hkôt ja kakrã htyk.

Nê hkôt hõja grãgrã karyr.

Nê hkôt ja hkamrêk pihkãrti.

Nê hkôt ja grãgrã kakrã htyk.

Nê hkôt ja hkamrêk tỳx kumrêx.

Nê hkôt ja rãrààre.

Nê hkôt ja grãgrã mẽ pihkãr.

Nê hkôt ja rãràr mẽ pihkãr.

Nê hkôt ja grãgrã karyrê.

Nê hkôt ja kakrã htyk pihkãr.

Æ kên pytyr mex kot anhỳr.

²¹Nê mẽ gjêx xà hã hakwakre kahê xà pê 12ja mẽmo kên jakooti rũnh kumrêx pix o. Nê krĩ kahti hkôt pry nhĩkwỳ xwỳnhja ãm ôr pix o. Nê hkarỳrê.

²²Pa pre tee ri krĩ kamã Tirtũm mã amnhĩ jarênh xà hã ixkre japêr nhũm amrakati. Mo kaxyw koja mẽ axte ixkreja hwỳr mra? Ra Pahi Maati Tirtũm xihtỳx xwỳnh mẽ mẽ pahte amnhĩ tomnuj pãnhã amnhĩrer xwỳnhhta ra hkrajê kamã pa ho pa kênã kot kêt mẽ axte ri ixkre-ta o presija. Koja mẽ kãm wa mex ã wa kãm harênh prãm nê nhỹri tãm wa hwỳr mra nê ã wa kãm kapêr anê. Te mẽ pahte pahi hwỳr pamrar nê kãm pakapêrta pyrã nê wa hwỳr mra nê wa kãm kapêr.

²³Nê koja krĩja kamã myyti nê mytwrỳreja hkêt. Mo kaxyw kot kêt myyti nê mytwrỳreja arĩ ri hirã ho pa? Krĩ kamã Tirtũm pa ho pa jakamã kamã hirã mex kumrêx. Nê mẽ pahte amnhĩ tomnuj pãnhã amnhĩrer xwỳnhhta haxwỳja kamã pa ho pa. Te kêp kanê hpõk rax kumrêx pyrã nê hirã mex o pa. Kot hirã mex o kot myyti jakrenh. Æ Tirtũm mẽ Kra wa krĩja kamã pa ho pa jakamã nhũm mẽ axte myyti ho presija hkêt nê.

²⁴Koja krĩ nhõ xwỳnhjaja hirã mex pix kãm ri pa ho pa nê tãm ri amnhĩ nhĩpêx o ri pa. Tã koja mẽ ho amnhĩptàr xwỳnhjaja Tirtũm wỳr mra nê amnhĩ rom kãm mex o mex ã harê nê kãm:

—Na pre mẽ ixkwỳjaja mẽ ixpê mẽ ho amnhĩptàr xwỳnh ã axpên mã mẽ inhmex nê mẽ ixãhpumunh ã ri axpên mã mẽ ijarê. Nom mẽ ixrom amex o amex nê axãhpumunh o axãhpumunh. Jakamã ãm hãmri na htem amã amex o amex ã ajarê Tirtũm. Anê.

²⁵Nê krĩ hwỳr hakwakre koja amnhĩ kahê xà rênh rãhã kuhê nê aa amnhĩ kahê hkêt nê. Jar mẽ panhõ pika kamã na hte kamàt kaxyw nhũm htem amnhĩ tã hakwakre kahê hpa. No mo kaxyw koja mẽ axte pika nywja kamã ã amnhĩ nhĩpêx anê? Koja kamàt kêt nê hirã rãhã ho rãhã jakamã nhũm mẽ amnhĩ tã kahê hkêt rãhã nê pa ho pa.

²⁶Nê koja mẽ piitã Tirtũm wỳr mra nê kãm mex o mex ã harê nê kãm:

—Pa Tirtũm. Hêxta waa nê. Anhõ krĩja mex kumrêx. Mex o mex. Nê mẽ ixrom amex o amex nê axihtỳx o

axihtÿx. Nê më ixrom axàhpumunh o axàhpumunh. Ām hāmri na ka ra më ixpê akrajê kamā apa ho apa Tirtūm. Anê.

²⁷ Nê koja mëmoj punuj krīja wÿr gjêx kêt kumrêx. Më hpijaam kêt xwÿnhjaja nê ri më hêx xwÿnhjaja hwÿr gjêx kêt nê. Ām më pahte amnhî tomnuj pānhā amnhîrer xwÿnhhta nhō kagā kamā Tirtūm ri më htîr tūm nê më pa mā xwÿnhjê nhîxi nhîpêx xwÿnh pixjaja koja më hwÿr agjê nê kamā pa ho pa.

22 Tā pa pre axte mëmoj pumu. Nhūm Tirtūm kapêr o wrÿk xwÿnhja axte inhmā mëmoj jahkre. Nhūm Tirtūm më kot më pahpānhā amnhîrer xwÿnhja wa kot më ho amnhîptār ā hkrī xā maati rūm pyhti hprôt. Krī kahti hkôt pry pohti nōr xwÿnhhta kahti hkôt hprôt o nō. Pyhti kamā gōja na htem ho ixkō nê htîr tūm nê pa ho pa. Gō karyÿre. Nhūm mëmo pī hpār muxre xwÿnhja akutā hijê nê xa. Pī xōja na htem kuwō nê htîr tūm nê pa ho pa. Na hte apkati më ô rāhā nê kuhê. Nê axtem hōja më piitā më mex nê à hkêt kaxyw na hōja.

³ Amnepê m na pre Tirtūm Atāw mā kapêr nê kām: —Ate amnhî tomnuj mÿrapê kot paj tanhmā pika homnu hto nhūm apê mex kêt nê. Ka kamā apur nê kamā axàpênh rūnh o apa rāhā nê rī kormā kamā axàpkur o ri apa. Apê jamnuj tā kot kaj më ā amnhî nhîpêx anhÿr o apa rāhā ty. Anê.

Tā ra Tirtūm nhō krī nyw kamā më omnuj xāja amrakati kumrêx. Nê Tirtūm më kot më pahpānhā amnhîrer xwÿnhhta wa ô krī kamā pa ho pa jakamā më pahte kamā më papa xwÿnhjaja kot puj më wa kām tanhmā amnhî nhîpêx to ho ri papa.

⁴ Kot puj më tā pano ho Tirtūm pumunh o papa. Hāmri nhūm te më pahpiitā më panhōkrā hā amnhî nhîxi nhîpêx pyrāk o më panhîpêx.

⁵ Nê kot puj më Pahi Maati Tirtūm nhîrā kamā ri papa nê axte myyti nhîrā ho presija hkêt nê. Koja kamāt hapêx pa pu më axte kanê ho presija hkêt nê. Nê Jesus nhîhkō hā hirā kamā mëmoj to amnhîptār rāhā ho pa pa.

Jejus tokyx akupÿn wrÿk ā harênh

Apokarip 1.1-3

⁶ Tā nhūm Tirtūm kapêr o më wrÿk xwÿnh kot ixto mōr xwÿnhhta axte inhmā kapêr nê inhmā:

—E nā ām hāmri na ixte amā mëmoj piitā harênh xwÿnhja. Ām hāmri na. Jakamā kwa kêt ka arī hā ano htÿx rāhā ho apa. Amnepê m Tirtūmja ŷ hā më kapêr o pa xwÿnhjê mā tanhmā kapêr o amnhîrīt to. Kot tanhmā amnhî nhîpêx to hkukamā më kām ho amnhîrīt nhūm prem kuma nê ô ri ma hkwyjê mā harênh o ri më hkôt pa. Tā ra më hpānhā pa më awÿr inhmê. Më ate Tirtūm mā tanhmā amnhî to ho apa xwÿnhjê mā ixte ja jarênh kaxyw Pahihti Tirtūmja më awÿr inhmê pa wrÿ. Nā koja mëmoj tokyx ā amnhî nhîpêx anê. ⁷ Na pre Jesus më amā amnhî jarênh o: “Kot paj tokyx akupÿm më awÿr wrÿ. Tā më ate ijarênh ā kagā kamā harênh nê mar nê amnhî kaxyw hkôt ajamaxpêr nê

hkôt amnhî nhîpêx xwÿnhjaja kot kaj më akînh nê ri apa.” Anhÿr o amnhî jarê. Anê.

⁸ Nā ixpê Juāw na pa pre ā inhno ho mëmoj pumunh anê. Hāmri nê omunh pa nê Tirtūm kapêr o wrÿk xwÿnh kot inhmā harênh xwÿnhhta kutā ixkōn krā ho ix-têm nê inhÿr kaxyw. Nom nhūm amnhî nê inhmā kapêr kām hihtÿx nê inhmā:

⁹ —Kwa nā ri ā inhîpêx anhÿr kêt nê. Ām Tirtūm pix kutā na pu htem ā amnhî nhîpêx anê. Apyrā nê ixpê Jesus kwÿ kênā. Na pa hte apyrā nê ŷ hā tanhmā amnhî nhîpêx to ho ixpa. Nê më apyrā nê kapêr ā kagā hkôt pix mā amnhî nhîpêx. Na pu htem axpên kutā pahkōn krā ho parōrōk kêt nê. Ām Tirtūm pix kutā na pu htem ā amnhî nhîpêx anê.

¹⁰ —E ā ate mëmoj pumunh nê mar anhÿr xwÿnhja koja tokyx ā amnhî nhîpêx anê. Jakamā kwa kêt ka akwyjê pē ho apimxur kêt nê. Piitā hā kagā hpa kê më kamā harê nê kuma nê mëmoj kot ā amnhî nhîpêx anhÿr mā xwÿnhhta piitā hkukamā harênh ma. Koja tokyx mëmoj ā amnhî nhîpêx anê.

¹¹ —Jakamā kwār më māmri piitā tanhmā kām amnhî nhîpêx to ho pa hprām xā hkôt amnhî nhîpêx o pa. Kwār më më kot amnhî tomnuj xwÿnhjaja ā amnhî anhîpêx anhÿr o pa. Nê kwār më kot tanhmā kapêr punuj to xwÿnhjaja māmri ā amnhî nhîpêx anhÿr o pa. Nê kwār më kot tām amnhî nhîpêx o ri më pa xwÿnhjaja māmri Tirtūm kôt pix mā ri tām amnhî nhîpêx o pa. Anê.

Nhūm pre ā kaxkwa hwÿr ixto àpir xwÿnhhta inhmā kapêr anê.

¹² Hāmri nhūm hpānhā Jesus tām inhmā kapêr nê inhmā:

—E kot paj tokyx akupÿm më awÿr wrÿ. Nê akupÿm pōj hāmri nê më kot amnhî tomnuj o më pa xwÿnhjaja pa ja mÿrapê ma më kot amnhî xā htÿx kamā hamak tūm xāta wÿr më rēnh pa. No më kot ixkôt amnhî nhîpêx xwÿnhjaja kot paj akupÿn inhō krī hwÿr amnhî kôt më ho api.

¹³ —Nê ixrāhā xwÿnh na pa. Amnepê mā kormā mëmoj kêt ri na pa pre ra ixrāhā. Nê koja nhÿrmā mëmoj piitā akupÿm hapêx pa arī ixrāhā nê ixpa ho ixpa.

¹⁴ —Nê Tirtūm kot më anê më ate amnhî tomnuj kuhōnh par xwÿnhjaja kot kaj më amex kumrêx nê apa ho apa. Nê akînh nê ajamakêtkati nê ri atÿx apa ho apa. Te ho më kot amnhî xê kahōnh nê mex jagjênh nê ri hā pata pyrāk. Koja Tirtūm më amā anê ka më ajamakêtkati nê ô krī hwÿr agjê nê kamā ri amex kumrêx nê ri apa ho apa. Nê kamā mëmo pī xō më kot kur nê htîr tūm nê pa mā xwÿnhhta wÿr mra nê amnhîm ô rē nê hkur o ri apa. Ra më ate Jesus kôt amnhî xunhwÿr jakamā kot kaj më axamnhîx hwÿr mra nê amnhîm hkwyjê rē nê hkur o ri apa. Kot kaj më ā amnhî nhîpêx anê.

¹⁵ —Nom më kot amnhî tomnuj o më pa xwÿnhjaja koja më akînhā inhō krī hwÿr gjêx kêt nê. Më kot ri më y ho më pa xwÿnhjaja. Nê më kot nhām ri mēnijê ho amnhîkati ho më pa xwÿnhjaja. Nê më kot ri më hpar o më pa xwÿnhjaja. Nê më kot ri sānti nhîpêx o te Tirtūm nhîpêx pyrāk o më pa xwÿnhjaja. Nê më kām ri

hêx prãm o ri mẽ pa xwÿnhjaja. Kojja mẽ akĩnhã inhõ krĩ hwÿr pa hkêt nê.

¹⁶ —E Juãw. Nà ixpê Jejus na pa awÿr ixkapêr o mẽ wrÿk xwÿnhhta mẽ. Kot ixkwÿjê kaxyw amã ixkapêr jarênh kaxyw. Ixpê Tawi pàr krax na pa. Te ixpê arĩgro hkôt kanhêti hpôk rax kot arĩgro ho mör ã ho amnhĩrĩt xwÿnhhta pyrãk. Anê.

Nhũm pre ã Jejus inhmã kapêr anê. ¹⁷ Tĩrtũm Karõ mẽ Jejus kwÿjaja na htem ã Jejus kot amnhĩ jarênh anhÿrja ma nê hkĩnh nê. Nê kãm kapêr o:

—Hêxta waa nê. Kwa amnhĩm anojarêr nê tokyx akupÿn mẽ ixwÿr wrÿ Pahihti. Pa mẽ tokyx ã amnhĩ nhĩpêx anhÿr o ri war akôt ixpa. Anê.

Nê mẽ ate ja mar xwÿnhjaja kêr ka mẽ urãk nê ã kãm akapêr anê.

Nê te mẽ amã kôr nê ri mẽ apa pyrãk xwÿnhjaja kêr ka mẽ te Jejus wÿr amrar nê õ gô ho akõm pyrã nê hkôt amnhĩ xunhwÿ. Te Jejus amarĩ mẽ pamã õ gô nhõr pyrãk o mẽ panhĩpêx pu mẽ hkôt amnhĩ xunhwÿ nê ra pahpê pahĩr tũm nê papa mã xwÿnh. Hãmri nê amnhĩ pãnhã tanhmã kãm amnhĩrer to hkêt nê.

Nhÿrmã mẽmoj nyw par ã harênh jatur xà

¹⁸ E ixpê Juãw na pa Jejus nhÿ hã mẽ amã mẽmoj tanhmã kot amnhĩ nhĩpêx to hkukamã ã mẽ amã hã kagà anê. Tã kwa mẽ o kora. Kêr ka mẽ atõ amnhĩ krã hkôt ri ajamaxpêr o te ho ja pyrã nê hijuk ri axte mẽmoj nhĩpêx kêt nê. ãm kwarĩ ho kwarĩ. Kot ka mẽ atõ anê nhũm Tĩrtũm ja hã apumu nê kagàja kamã

tanhmã mẽ hipêx kati hto xàta o tanhmã anhĩpêx to ka arĩ amnhĩ pumu.

¹⁹ Rÿ ka mẽ atõ kagà kamã harê nê ama nê tanhmã ajamaxpêr to nê ajamaxpêr o:

—Nà ja kot anhÿr kêt. Na mẽ ãm harênh o hêx. Kot paj kuma nê ãm kuma.

Anhÿr o ajamaxpêr japêr. Hãmri nhũm Tĩrtũm amnhĩ tã ama nê kagà mexta kamã kot tanhmã mẽ ho mex toja o ato mex kêt nê. Ka õ krĩ hwÿr axàpir nê mẽmo pĩ xõ mẽ kot hkur nê htĩr tũm nê pa kaxyw mã xwÿnhhta ka amnhĩm hõ hyr nê hkrêr kêt nê. Jakamã e kwa mẽ o kora. Kêr ka mẽ kagàta kamã ã mẽmoj kot amnhĩ nhĩpêx anhÿr mã xwÿnhhta jarênh ma nê aprĩ hã piitã hkôt ajamaxpêr tÿx rãhã ho ri apa.

²⁰ E Jejus kot inhmã mẽmoj kukamã tanhmã ujarênh to xwÿnhhta na pre inhmã amnhĩ jarênh o: “Kot paj tokyx akupÿn mẽ awÿr wrÿ.” Anê. ãm hãmri na pre ã amnhĩ jarênh anê. Kojja tokyx akupÿn mẽ pahwÿr wrÿ hãmri nhũm mẽmoj piitã mex o mex.

Jakamã kwa kêr ka amnhĩm anojarêr nê tokyx akupÿn mẽ ixwÿr wrÿ Pahihti Jejus.

²¹ Nê ixpyrà nê mẽ apê Tĩrtũm krajaja na pa hte mẽ ato Pahihti Jejus wÿr rãhã ho ri ixpa nê kãm:

—Kwa akwÿjê pumu nê mẽ kutã anojarêr rãhã ho ri apa Pahihti. Anê.

E mẽ ujarênhja na hapêx. Ixpê Juãw na pa Jejus kot inhmã tanhmã ujarênh toja pa amnhĩ xõ ri mẽ amã hã kagà hpa. E na hapêx.